

Dioso Pejumeliwaisibaxuto

Perujuliwaisibaxutoyajuwënëliwaisianë,

Daxita Pejanaliwiaibaxuto-ata

**Porciones del Antiguo Testamento y El Nuevo Testamento
en el idioma guahibo (jiwi) de los Llanos de Colombia y
Venezuela**

Dioso Pejumeliwaisibaxuto

Perujuliwaisibaxutoyajuwënëliwaisianë, Daxita Pejanaliwiaibaxuto-ata

Porciones del Antiguo Testamento y El Nuevo Testamento
en el idioma guahibo (jiwi) de los Llanos de Colombia y Venezuela
[guh]

Nuevo Testamento © 1982, Wycliffe Bible Translators
Antiguo Testamento © 1986, Wycliffe Bible Translators, Inc.

Primera edición, © 2020 Iglesia Cristiana Nuevos Horizontes, Bogotá, D.C.
del Nuevo Testamento con porciones seleccionadas del Antiguo Testamento

Colaboradores Técnicos:

Luís Enrique Ramírez (Comunidad de Puerto Paloma - CAWASI -etnia guahibo)

Arcesio Rodriguez Fonseca (Comunidad de Raya -TRIPLOVIA - etnia guahibo)

Virgilio Perez Fonseca (Comunidad de Raya - TRIPLOVIA - etnia guahibo)

Editado y distribuido por: Iglesia Cristiana Nuevos Horizontes, Bogotá, D.C.

Dirección Sede de Nuevos Horizontes: Cra. 81D N° 24D-84

TEL. (57) 12957623,

Fax (57) 15470820

Código Postal N° 110931, Bogotá DC. Colombia

Dirección web: www.nuevoshorizontesweb.org

© 2025, Wycliffe Bible Translators, Inc.
www.Wycliffe.org

Visita www.ScriptureEarth.org/guh
para más recursos biblicos en guahibo.



Este obra está bajo una licencia Creative Commons
Reconocimiento-NoComercial-SinObraDerivada 4.0.
<http://creativecommons.org/licenses/by-nc-nd/4.0>

ÍNDICE

Antiguo Testamento

Génesis	(Gén).....1	Jeremías	(Jer) 382
Éxodo.....	(Éxo)130	Ezequiel.....	(Eze) 389
Levítico.....	(Lev)216	Daniel.....	(Dan).....391
Números	(Núm)231	Oseas	(Os) 445
Deuteronomio.....	(Deut)272	Joel.....	(Joel).....447
Josué.....	(Jos)281	Amós.....	(Amós) 450
Jueces	(Jue)..... 292	Jonás.....	(Jon).....451
Salmos	(Sal)301	Miqueas	(Miq)..... 456
Proverbios.....	(Prov).....341	Habacuc.....	(Hab).....457
Eclesiastés	(Ecl) 366	Zacarías	(Zac)..... 460
Isaías.....	(Isa)367	Malaquías	(Mal)..... 462

Nuevo Testamento

Mateo.....	(Mt).....472	1 Timoteo	(1Ti).....1192
Marcos	(Mc) 589	2 Timoteo	(2Ti).....1205
Lucas.....	(Lc) 654	Tito	(Tit).....1214
Juan.....	(Jn)..... 771	Filemón.....	(Flm).....1220
Hechos	(Hch).....851	Hebreos.....	(Heb).....1223
Romanos.....	(Rom)..... 958	Santiago.....	(Sant)1262
1 Corintios.....	(1Co)1026	1 Pedro	(1Pd)1274
2 Corintios.....	(2Co)1081	2 Pedro	(2Pd)1291
Gálatas.....	(Gál).....1114	1 Juan.....	(1Jn)1303
Efesios.....	(Efe)1138	2 Juan.....	(2Jn)1314
Filipenses.....	(Flp)1158	3 Juan.....	(3Jn)1316
Colosenses	(Col)1168	Judas	(Jud)1318
1 Tesalonicenses	(1Ts)1178	Apocalipsis	(Apoc)1323
2 Tesalonicenses	(2Ts)1187		

Glosario	1385
Mapas	1418

Petaxuxuabiliwaisi

Prefacio

Paliwaisianë rubena mapabaxutota, najuta Dioso Pejumeliwaisi Perujuliwaisibaxuto-jawawerena (Antiguo Testamento). Apoyarubenaë daxita Dioso Pejumeliwaisi Perujuliwaisibaxutopijiliwaisianë. Peyajawarubenaë-yajuwënëliwaisianë saya. Mapaliwaisianë pajutajë wowaijumejawawerena, Antiguo Testamentobaxutojawawerena, jiwijumejawaberena, jamatejema jiwijume pecuaicuaijaiwi penatoxainaenexa pijajumeta penatoyorobinexa, penacujarubinexanua, bajarapacuenia peyapëtaenexa orijibia paliwaisianë Dioso tonajumecopata daxita mapanacuapijiwinexa, payapëtaenexanua Dioso pecuene. Paversículoxi sajina patsitajëtajë mapacueniaje: v 1-9 [...]. Capítuloxi pijinia C1–C3 [...]

Mapaliwaisibaxutonexa panacuenebajë mapamatabëxëyoje: Paxanë paIglesia Cristiana Nuevos Horizontes-pijiwinë, bajarapacuenianua CAWASIpiji-wiyajuwënëjiwi, TRIPLOVIApijiwiwiyajuwënëwi, TRIPLOVIA BAJOpijiwiwiyajuwënëwi, bajarapacuenia itsamonae jiwi Venezuela nacuata pejinawanapaewi.

Las porciones del Antiguo Testamento contenido en este libro, no son todo el texto, sino porciones selectas. Las hemos traducido con el propósito de proveer estas porciones para las personas de habla guahiba/jiwi en su propio idioma, para su lectura y estudio, con el propósito de que ellos conozcan cómo es Dios y más del mensaje que Él ha dejado para toda la humanidad. Los versículos faltantes se marcaron así: 1-9 [...] y los capítulos así: C1–C3 [...].

Las siguientes personas ayudaron en la elaboración de esta obra: La Iglesia Cristiana Nuevos Horizontes, algunas personas del Resguardo CAWASI, otras del Resguardo TRIPLOVIA, otras del Resguardo TRIPLOVIA BAJO, cómo así unas personas guahibas/jiwi de Venezuela.

Itsiata, pacuenejawanë yabara pacatoya-
quinatsi, paxamë panejumexaniataenexa
Jesús raja Cristo, Dioso pexënato. Pacatoya-
quinatsinua, panesiwanajamatabëcueneco-
pabinexa bajaraPonëjawabelia, panexainae-
nexa matabi apopewerewerecaejawa.

Juan 20:31

Antiguo Testamento

Génesis

Daxitacuene petaxuxuabiliwaisi

Pacuenia Dioso exana daxitacuene mapanacuataje,
athëbëpjiicuene yajawa, yabara peliwaisi

1 ¹DIOSO petaxuxuabimatacabi pexanaejawa mapanacuaje, exana^a itaboxo, ira yajawa. ²Bajarajota, iracuene abaxë aponayapëtae xaniawaetsia. Abaxë saya ëmera daxitajawa. Aitaquirinua daxita nacua meramatatsënëwereco. Itsiata bailsi jane, Espiritu Santo^b nacueneweretsiaya ponapon mera matatsënëwereco.

³Nexata, DIOSO jumaitsi:^c

—¡Naexanare pitayotsicotia! —jai. Nexata, naexana pejumeta pitayotsicotia.

⁴Itsa DIOSO tane pitayotsicotia, tsitaxanepanatsi. Nexata, xuacujinae DIOSO tsata pecotia pitaquirijawawecua. ⁵Penaitayotsicotia wënëruba matacabi. Pitaquirijawa pijinia wënëruba merawi. Bajaraxua exanaewereta penamataxainaematacabita.

⁶Icatsia, xuacujinae DIOSO jumaitsi:

—Mera natsatsi. Itsamerayajuwënëjawa junaetsia athëbëabetsia, athëbëyo perubenaenexa. Nexata, nacopatsi petusato bajarapanatsatsimerajawabeje-tuatuajëalia —jai. Nexata, bajarapacuenia natsatabeje.

⁷DIOSO bajarapacuenia tsata petusatotuatuajëalia, perubenaenexa mera athëbëabetsia. Itsajawa nacopata petusato bëxëpanayo, irawetsia pe-enaameranënexa. ⁸Bajarapatusato wënëruba itaboxo. Bajaraxua exanaewereta cotocaewimatacabita.

⁹Icatsia, bajaraxuacujinae DIOSO jumaitsi:

—¡Itaboxobëxëpana pebocaemera panacaetuare caejawabelia! Bajarapameratuatuajëatsina pitsapaetsina petsewijawa —jai. Bajarapacuenia pejumatsijawata naexana.

¹⁰Bajaraxua pepitsapaejawatsina petsewijawa DIOSO wënëruba ira. Pamera pijinia nacaetuata caejawabelia, bajaraxua wënëruba manuamene. Bajarapacuenia itsa DIOSO nacobecowëtane, tsitaxanepanatsi.

a 1:1 *exana*: Mapajumeyoje pitsapa «creó», wowaijumeta. Bajarapajume nacato-itajëta pacuenia Dioso exana daxitacuene piajibijawata itsacuenejawa pecanacuenebinexa. **b 1:2** *Espiritu Santo*: Dioso pejumeliwaisi, pejanaliwaisibaxutota, Dioso peEspiritu wënërubabiaba Espiritu Santocuenia. Dioso peEspiritu itsa wënërubatsi, bajarapajume nacayapëtaeya-exana pacuenia pepoDioso yabara cuaicuajiai. Bailsi apopenatoxainaeyajuwënëjawa, apobecobecowënë-ata. PepoDioso cajena espiritucuenia penaitajëtsinë. Taema «Dioso peEspiritu», glosariojawata. **c 1:3** *Dioso jumaitsi*: Taema Jn 1:3, Sal. 33:6; 95:3-5.

¹¹ Icatsia, xuacujinae DIOSO jumaitsi:

—iPajuware daxitawiria irajumawereca pejuwijawanë, pexu pecapitsapaejawanë-ata, pecuai pecapitsapaejawanë-ata, bajarapacuenia daxitawirianaejawanë, daxitawiriabotonë, daxitawiria pona, pe-ubijawanënexa-ata!^d Nexata, caewiria canacujitsia nacuaitsijitsia pijawiriacuenia saicaya —jai. Nexata, bajarapacuenia naexana.

¹² Ira nexata capitsapa daxitawiria naejawanë daxitawiria pexu pecapitsapaejawanë, banacale-ata, bajarapacuenia daxitawiria pona, bajarapijinia pacuenia, daxitawiria naejawanë, pecuai pecapitsapaenaejawanë pijawiria canacujitsia. Dioso itsa nacobecowëtane, tsitaxanepanatsi. ¹³ Bajaraxua exanaewereta acueyabi matababita.

¹⁴⁻¹⁵ Icatsia, DIOSO jumaitsi:

—Naexanae pitayotsijawanë, penaitayotsinexa athëbëwetsica irajumabereca, xaniawaetsia penawecuanatsatsinexa matababibeje, merawibeje, bajarapacuenianua penamata-ëjësixinepanaenexa wainë, penamata-ëjëtsinexa juametonë, matababianë-ata, bajarapacuenia pecanaëjëtsinexa DIOSO pitapetsimatababianë-ata —jai. Nexata, bajarapacuenia naexana baja pitayotsijawanë.

¹⁶ DIOSO exana anijapitayotsijuameto beje. Pinijicotia pitayotsijuameto tocopata pitayotsinexa matababita, tsiquiripitayotsijuameto pijinia pitayotsinexa merawi. Yajawa-exana tulupucune. ¹⁷ DIOSO exanaruba bajarapa-itayotsijawanë athëbëtatsia pitayotsinexa irajumawereca. ¹⁸ Bajarapijinia pacuenia, matababipijiuameto exana matababita pitayotsinexa. Merawipijiuameto exana merawi pitayotsinexa. Bajarapacuenia exana xaniawaetsia pewecuatsatsinexa matababipijicuene, merawipijicuenewecua-ata. DIOSO itsa nacobecowëtane, tsitaxanepanatsi. ¹⁹ Bajaraxua exanaewereta cuatro matababita.

²⁰ Bajaraxuacujinae, DIOSO jumaitsi:

—iNawitsia panaexanare daxitawiria menejawata^e panejinawanapaewinexa, bajarapacuenia itaboxojawa pepunaewinexa-ata irajumawereca!^f —jai.

²¹ Bajarapacuenia DIOSO exana daxitacuenewiria menepijiwineja, ayainëxanetonë-ata. Bajarapacuenia daxitawiria pepunaewi-ata exana DIOSO. Tocopata caewiriawi canacujitsia penacoxiwiatsinexa saicaya pijawiriacuenia. Nexata, bajarapacuenia DIOSO itsa nacobecowëtane, tsitaxanepanatsi.

²² DIOSO pexaniacuenia cuenecaëjëpaeya-exana^g bajarapamonae penacoxiwiatsinexa. Nexata jumaitsi:

d 1:11 *daxitawiria pona, pe-ubijawanënexa-ata*: Pahebreojume pitsapa, «hierba», wowaijume, bajarapahebreojume nacato-itajëta anijawiriajuwicuebeje yabara. Itsajawa saya pijacueneta pejuwijawa pacuenia canapiri, itsajawa pijinia pe-ubijawanë, pacuenia cilantro, jetsa, arroz-botoxi. Daxita bajaraxuanë yabara jumaitsi hebreojumeta hierba yabara, tsipaji bajaraxuanë apo-ajamatabësaë bajayajebineja. e 1:20 *menejawata*: Cajuna dujuai, maxë-neje, panabë, baitsi daxita meneta pejinawanapaewi waja-itaxutota wajataecapanapaewi. f 1:20 *pepunaewinexa-ata irajumawereca*: Bajarapamonae Dioso exana atsatomita. Taema Gén. 2:19-20. g 1:22 *pexaniacuenia cuenecaëjëpaeya-exana*: Bajarapajumebeje bendecir-jume wowaijumeta. Dioso yabara bajarapajume nacayapëtaeya-exana Dioso pexaniacuenia peyawenonae-jawa yabara, pecuenecaëjëpaeya-exanaejawanua yabara daxitacuenejawalia. Taema «bendecir», glosariojawata.

—Panacoxiwiatsianame ayaijawa paneyacaējēpaenexa daxitajawa, mene-pijiwi pewēnēcaenexa daxitamenianējawa, bajarapacuenia pepunaewi-ata daxitanacuanējawa peyacaējēpaenexa —jai DIOSO, pexaniacuenia pecuenecaējēpaeya-exanaejawata.

²³ Bajaraxua exanaewereta cinco matababita.

²⁴⁻²⁵ Icatisia, bajaraxuacujinae DIOSO jumaitsi:

—jPanaexanare irajumawereca^h daxitawiriawi panejinawanapaewinexa, caewiria canacujitsia daxitawiria dajubi, bajarapacuenia daxitawiria unupijiwi, pamona-ata pecotobēxēta penarobobocaewi irajumawereca! —jai. Bajarapacuenia naexana baja pijawiria canacujitsia. DIOSO daxita bajarapamona-ata exana. Nexata, itsa nacobecowētane, tsitaxanepanatsi.

²⁶ Nexata, bajaraxuacujinae DIOSOⁱ najumaitsi: «Ajenaconoxae exanaenatsi jiwi.^j Pacuenia waxaitsi jamatabēcuen-itsitsi, bajarapacuenia nacuenecataeya exanaenatsi,^k bajarapajamatabēcuen pexainaenexa. Nexata, bajarapamona-ata daxita pejamatabēcuenematatoxenetsiwi tsane dujuai, pepunaewi, dajubi, daxita pamona-ata unupijiwi, pamona-ata pecotobēxēta penarobobocaewi», najai.

²⁷ Pacujinaeta DIOSO exana pebi, petiriwa yajawa exanatsibeje najamatabēcuenējēpaeya.

²⁸ DIOSO pexaniacuenia cuenecaējēpaeya-exanabeje pexi pexainaponae-nexabeje. Bajaraxuata, jumaitsi:

—jPaxainarebeje panexibeje, panemomoxibeje-ata ayaibitsaēto penae-xanaponaenexa, peyacaējēpaenexa daxitanacuajawa! Paxamēbeje, bajarapacuenia panemomoxi-ata, pewajēnaeyabelia pa-ewetsianame, pajamatabēcuenematatoxenetsianamenua daxitawiria dujuai, pepunaewi-ata, daxitawiria pamona-ata irajumawereca pejinawanapaewi-ata —jai pexaniacuenia pecuenecaējēpaeya-exanaejawatatsibeje.

²⁹ Bajaraxuacujinae, DIOSO jumaitsi:

—jPanejumetaemabeje! Daxita pacatocopatsianatsibeje panexaenexabeje, bajarapacuenia panemomoxijawabelia-atabeje, pexu pecapitsapaebotonē, ponaenē-ata pijinia xaina pecuai. Daxita bajaraxua pacatoxanepanaena panexaewanapaenexa. ³⁰ Pamona-ata pijinia ta-exanaewi pejinawanapaenexa irajumawereca, unupijiwi, pepunaewi-ata, daxita bajarapamona-ata rajutsianajē daxita irajumawereca xua pejuwijawanē, pacuenia pona, pemacanē pexaenexa —jai. Bajarapacuenia DIOSO exana daxita pexanaecuenē.

³¹ Bajaraxua pexanaeweretsicujinae, DIOSO itsa nacobecowētane, tsitaxanepanatsi bitso ayaicuenia. Daxita bajaraxua exanaewereta seis matababita.

2 ¹ Nexata, daxitaxua xaina athēbēyo itaboxojawatatsia, xua-ata xaina mapanacuataje irawetsia, bajaraxua baja exanaewereta. Itsacuenējawa-ata aposajinae pexanaenexa. Daxitacuenē baja wereta. ² Siete matababita, DIOSO peweretsixae daxita pexanaejawa, bajarapamatababita

h 1:24-25 *irajumawereca ... pejinawanapaewinexa*: Bajarapamona-ata Dioso exana atsatomita. Taema Gén. 2:19-20. **i 1:26** DIOSO: Taema «DIOSO», glosariojawata. **j 1:26** *jiwi*: Itsa «pebi», jai hebreojumeta najumetane jiwi yabara. Baitsi pebi, petiriwabeje. Pijawiria yabara jumaitsi. Jiwi, pamona-ata unupijiwi, apodajubinua. Jiwinexa saya. Xaniawaetsia neyapētaenexa daxita pacuenia Dioso exana jiwi, taema Gén. 2:4-7, 18-25. **k 1:26** *nacuenecataeya exanaenatsi*: Taema «nacuenecataeya exanaenatsi», glosariojawata.

wemaxēnacuera-eweta. ³Nexata, DIOSO pexaniacuenia itapeta siete matacabita daxitamatacabianēwecua jiwi peyaiyataematacabinexa. Najumecopatanua daxita bajarapamatacabita peyaiyataenexa, tsipaji bajarapamatacabita wemaxēnacuera-eweta daxita pe-exanaejawa mapanacuataje petaxuxuabijawawerenacujinae. ⁴Mapaliwaisije nacayapētaeya-exana pacuenia exana petaxuxuabijawawerenacujinae, athēbē-itaboxopijicuene, mapanacuataje irapijicuene pijinia.

Pacuenia Dioso exana jiwi

(Gén 1:26-27; 2:18-25)

Pacujinae Jehová¹ DIOSO exana athēbēpijicuene, irapijicuene-ata, ⁵abaxē bajarapamatacabita ajibi pabita pe-ubijawanē,^m bajarapacuenia itsawiria tsiquiricuenejawaxi pe-ubijawanē-ata, tsipaji ajibi abaxē itsajiwiyoy-ata pabicuenia penacuenebinexa bajarapa-irata, Jehová DIOSO apopecopatsixaenua athēbēwetsica perunaenexa ema irajumawerereca. ⁶Itsiaa baitsi jane, ema aporunae-ata, bajarapamatacabita Jehová DIOSO copata irabēxēpanawetsina mera pepitsapaenexatsina bepetsēxēbocuenia, pesucuetsinexa daxita irajawa. ⁷Nexata, Jehová DIOSO, itsamatacabita jiwitonēnexa, atsatonēⁿ xaniawaetsia nacuenebabuata. Bajaraxuacujinae, pumu-uxune. Bajarapacuenia atsatonēmi najumalipita. Nexata, asaē tsaponaponae.

Dioso nacuenebabuata pabixaneto

⁸Xuacujinae, Jehová DIOSO nacuenebabuata pinijipabi Edén nacujawata pemutojawawetsina. Jehová DIOSO bajarapapabijawata, jiwitonē nuta peponaponae, ponē exana atsatomijawata. ⁹Bajarapapabijawata, Jehová DIOSO daxitawiria naejawanē juwia-exana irawetsina pexaniawirianaenē, ponae-ata xanepana pecuaixaeenexa. Itsiaa, bajarapapabituatujēta nuta anijanaebeje. Caenae itsa cuaixaejitsipa, daxitamatacabijawabelia wēna-asaētsaponaponae tsipae. Itsanae pijinia itsa cuaixaejitsipa, natoyapētaejitsipa xua pexaniacuenē, xua-ata pibisiacuenē.

¹⁰Edén nacuata xaina caemene. Bajarapamene najetaruca pabituatujējawa piracainejebia-exanaenexa. Bajarapapabicujinae bajarapamene natsanapona cuatro pamenebeje. ¹¹Copiayapijimenemaxērana pewēnē Pisón. Bajarapamene najetaruca Havila nacujawa, panacuata nawita oro-ibo. ¹²Bajarapa-orocuene bitso pexaniawiria-orojawanē. Xainanua bajarajota pexaniawiriatuxujuwijawa, bedeliowēnē naenani. Xainanua pexaniawiria ōnice-ibowēnējawanē. ¹³Itsamenemaxērana pijinia pewēnē Gihón. Bajarapamene najetaruca Cus nacua-irajawa. ¹⁴Itsamenemaxērana pijinia acueyabi mene pewēnē Tigris. Bajarapamene najetaruca Asiria nacuyabereca. Itsamenemaxērana pijinia cuatro mene pewēnē Éufrates.

1 2:4 *Jehová*: Bajarapawēnē itsawēnē Diosonexa. Taema «Jehová», glosariojawata. m 2:5 *ajibi pabita pe-ubijawanē*: Bajarajota, nacayapētaeya-exana daxita pe-ubijawanē yabara, xuanē jiwi ba-uba pecuaixaeenexa, pexuxaenexa-ata. Bajaraxuanē Dioso exana picani acueyabi matacabita, itsiaa pabita apojuwī, tsipaji ajibi pabicuenē abaxē. Matapania Dioso to-uba Adán-beje Edén nacuata peboacapabi, bajarajota taxuxuaba pe-ubicuenē. n 2:7 *atsatonē*: Dioso apo-exanae ējiwitonē atsatota. Taema Gén. 2:19.

¹⁵ Jehová DIOSO nuta pebi pabijawata, Edén nacuapijipabi, bajaraponë penacuenebaponaponaenexa, pe-ewetsinexa-ata. ¹⁶ Nexata, Jehová DIOSO yajawanajumecopatanuta mapacueniaje:

—Xanepana nexaenexa daxitawirianaecuai peyajawanubenaenaejawanë bajarapapabijawata. ¹⁷ Itsiata bailsi jane, pëtsa xaneme ponaecuaito! Itsa xaejitsipame natoyapëtaejitsipame xua pexaniacuene, xua-ata pibisiacuene, tsipaji pamatacabi itsa xaejitsipame bajaraponaecuaito, nexata pepacuene tēpaejitsipame —jai Jehová DIOSO pebijawabelia.

Dioso pexanaejawa petiriwa, yabara peliwaissi

(Gén 1:26-27; 2:4-7)

¹⁸ Nexata, xuacujinae Jehová DIOSO siwajamatabējumaitsi Adán yabara: «Apoxanepanae caenë pebi peponaponaejawa. Nexata, to-exanaenajë pejamatabēcueneliwaisijēpaewatsi peyanabiwanexatsi», siwajamatabējai bajaraponë. ¹⁹⁻²⁰ Bajarapacuenia petiriwa pexanaewajēnaeya, Jehová DIOSO daxita pamona exana baja atsatomita matatsēnēpijiwinexa, pepunaewinexa-ata, bajarapamona tocapona pebijawabelia petsitajētsinexa, pewēnērubinexa pijawiria canacujitsia. Nexata jane baja, Adán wēnēruba. Bajarapawēnēnēcuenia canacopata pacuenia wēnēruba. Itsiata bailsi jane, caenēyo-ata bajarapamonaeyajuwēnēnē Adán apojamatabēcueneliwaisijēpaetsi xania-waetsia. Apojamatabēcueneyawenonaetsinua peyanabijiwiycueniatsi.

²¹ Bajaraxuata, Jehová DIOSO tocopata pemajitsinexa pebi ayaicuenia. Pemajitsijawata, nexata yajuwēnēyenesijutatsi. Peyenesijutsicujinae, bajaraponë icatsia xuacujinae, yenewajēnē-acata. ²² Jehová DIOSO peyenejutsisito pebijawawerena, bajarapayenesito exana petiriwa. Bajaraxuacujinae, tsitajēta pebijawabelia. ²³ Itsa bajaraponë tane bajarapowa, jumaitsi:

—Pepacuene mapowaje tayajunusitowa, tayajunuwitowa-ata. Nexata, wēnērubianajë petiriwa,^o tsipaji DIOSO exana pebijawawerena —jai Adán.

²⁴ Bajaraxuata, pebi wecuapitsapaena paxa, pena-ata, pepitsinexa pijawa, pebarēponaponaenexa saicaya pijabota, bajarapacuenia anijajiwi-atabeje penaexanaenexa becajiwi,^p becaeperabēto-ata.

²⁵ Abaxë bajarapajiwi beje jumasa ponaponabeje. Itsiata, aponaitaxutua aurabeje bajarapamatacabita.

Adán, Evabeje, apojumecowēnētsibeje Dioso

3 ¹ Jehová DIOSO daxita pexanaewi matatoxenetsia mapanacuataje unu-pijiwiwecuaje, bitso jomo pejamatabēcuenecaējēpaenētsi peyamaxē-itojorobijawa. Itsamatacabi bajarapajomo jumaitsi petiriwajawabelia:

—¿Cowë DIOSO pacajumaitsibeje panecuaixaeyaniwabeje ponaenë nubena pabita? —jai jomo.

² Nexata, petiriwa jumecanawiata:

—Caējēpa pataxaejawabeje daxitawirianaecuaitonë. ³ Jane bailsi, cae-nae apopanetocopsibeje patacuaixanexabeje; pona pabituatujēta nuca.

o 2:23 *petiriwa*: Hebreojumeta petiriwa pejaijume, «pebiwa», pejaijume, itsa jume, «petiriwa-pebi», pejaijume. Itsaliwaissi bajaraxua yabara, taema «petiriwa», glosariojawata. p 2:24 *becaejiwi*: Taema «becaejiwi», glosariojawata.

DIOSO panejumaitsibeje: «Itsa paxaejitsipamebeje, itsa pajayatsipamebeje-nua, nexata patêpaejitsipamebeje», panejaiibeje DIOSO —jai petiriwa.

⁴Nexata, jomo jumaiti petiriwajawabelia:

—Jemajai raja. Apopatêpaemêbeje tsipae. ⁵DIOSO raja yapêtane xania-waetsia pamatacabi bajaraponaecuaio ita paxaejitsipamebeje, nexata pajamatabêcuenejêpaejitsipamebeje DIOSO paneypêtaejawatabeje xua pexania-cuene, xua pibisiacuene-ata —jai jomo.

⁶Nexata, petiriwa ita tane bajaraponaecuaio, tsitapexaniacuaitotsi. Bitso tsitaxanepanatsi baja pexaenexa. Jitsipania pejamatabêcuenejêpae-nexa DIOSO, peypêtaewa penaexanaenexa. Nexata, bajarapowa bajaraponaecuaio ucuta baja pexaenexa. Xane baja. Bajaraxuacujinae, narajuta pamona^q penaxaenexa. Bajaraponê-ata nexata naxane baja. ⁷Nexata, bajarapapatota bajarapajiwiibeje matapania nayapêtanebeje pejumasajawabeje. Aurabeje. Nexata, bajarapajiwiibeje natsijumajorocabeje higeranaebaxumi penaperabêcaranatsinexabeje.

⁸Nexata, caniwiyojawabelia, ajena juameto tabujuniya, paepatota jowibo tsabiabanucae, bajarapaepatota jumetanebeje Jehová DIOSO peponaponaejawa pabijawata. Nexata, bajarapajiwiibeje cujinaetabijirawabeje, penamatayabinexabeje naejawanêbêxêpanata, ponaenê nubena pabita. ⁹Nexata, Jehová DIOSO junata pebi. Jumaiti:

—Adán, ¿detsa jota nucame? —jai.

¹⁰Nexata, pebi jumecanawiata:

—Cajumetanetsi rabaja picani neponaponaejawa pabijawata. Xanê raja cacujunawatsi, tsipaji jumananê. Bajaraxuata, namatayabajê —jai.

¹¹Nexata, DIOSO yanijoba pebijawabelia:

—¿Jipatsa cayapêtaeya-exana jumasa neponaponaejawa? ¿Tsipaji tsaja xamê xaneme ponaecuaio ca-itawetatsi nexaeyaniwa? —jai DIOSO.

¹²Nexata, pebi jumecanawiata:

—Papetiriwa nerajutame taneyanabiwanexa, bajarapowa raja nerajuta bajarapacuaio. Nexata, xaniji —jai Adán.

¹³Nexata, Jehová DIOSO icatsia yanijoba petiriwajawabelia:

—¿Dexuajitsia bajaraxua exaname? —jai.

Nexata, bajarapowa jumecanawiata:

—Jomo raja neyamaxê-itojoroba. Bajaraxuata, xaniji bajaraponaecuaio —jai petiriwa.

¹⁴Nexata, Jehová DIOSO jumaiti jomojawabelia:

—Bajaraxua nexanaexae, cananeconitsia-exanaenatsi mapacueniaje: Daxitawiriawi matatoxenetsia mapanacuataje xamê bitso nenabejiobitsinê tsane. Ajena pamatacabijawaweliacujinae, necotobêxêta' nenarobobocaenê tsane. Nexata, atsapêrê pecatsicuaibojonenê tsane daxitamatacabijawabelia paepatowajêto asaêmê tsaponapona. ¹⁵Nexata, pacacopatsianatsibeje

q 3:6 *narajuta pamona*: Najumetane hebreojumeta Adán penanucaejawa tsaena bajarajota pijawa pemuxuneneta, pacujinae ucuta pecuaio pexaenexa. r 3:14-15 Mapaversículobejejawata, Dioso naneconitsia-exana anijanêbeje. Dioso tocopata jomo penaneconitsia-exanaecuenê pejumaitisijawata, ita jumaiti «necotobêxêta nenarobobocaenê tsane». Bajaraxuacujinae, versículo 15-jawata Dioso yapêtaeya-exana Satanás, ponê pepodowathinê, pacuene tocopiapatsijitsiatsi itsamatacabijawabelia pacujinae jumaiti «camatatsapanataxuabiana».

panena-itoyacuenia paneponaponaenexabeje petiriwabeje, bajarapijinia pacuenia, panemomoxibejewabelia-ata. Petiriwajawawerena pijinia pepitsapaen^s itsamatacabi camatatsapanataxubiana. Bajarapijinia pacuenia, xamë-ata itsamatacabi bajaraponë taxusalibësinianame —jai Jehová DIOSO jomojawabelia.

¹⁶Nexata, icatsia Jehová DIOSO jumaiti petiriwajawabelia:

—Xamë catocopatsianatsi ayaiwixae nenawixaetaewanexa pamatacabi xainaename nexi. Nenawixaetaecuenia exanaename nexinacueti. Itsiata baitsi jane, nejitsipaejamatabëcuene cajamatabëcuenecaponaena amonajawabelia. Bajaraponë nua canamatacaitorobaponaponaena. Amona nejamatabëcuene-ewetsiwanua tsane, pacuenia amona ca-itoroba nejumecowënëtabinexa —jai Jehová DIOSO petiriwajawabelia penaneconitsixae.

¹⁷Icatsia, xuacujinae jumaiti pebijawabelia:

—Nijawa nejumecowënëtsixae, nexaexaenua ponaecuito picani apocotocopatsi nexaenexa, nexata bajarapajamatabëcuene ira ajenaconoxaeta bitso pibisiacuenia nacopatsiana. Nexata, ayaicuenia nenacuenebinë tsane irajumawereca, nexainaenexa nexaejawa daxita neponaponaematacabibeje mapanacuataje. ¹⁸Irajawata pitsapaena daxita pejuwicuene piabejewanë, pe-ejuwinaenë nua. Nexata, xamë nexaenë nua tsane daxitawiria unupijinaecuaijawanë. ¹⁹Nexata, nenacuenebinë tsane ayaicuenia. Nenajanexuabinëcuenianua nexaenë tsane nexaejawa. Icatsia, nenawiatsinë tsane netëpaejawata irabelia. Pacuenia ca-exanatsi atsatomita, bajarapacuenia icatsia nawiatsianame atsatonexa, caewëalia atsato nenaexanaenexa —jai DIOSO pebijawabelia penaneconitsixae.

²⁰Adán wënëruba pijawa Eva, tsipaji bajarapowa daxitajiwi penanexa tsaponapona. ²¹Jehová DIOSO to-exana penaxatatsijawanexabeje dajubibocotomita. Nexata, bajarapajiwiabeje Jehová DIOSO jumaxatatatsibeje dajubibocotomi.

²²Xuacujinae, Jehová DIOSO najumaiti: «Jiwi ajenaconoxaeta baja canaëjëta pacuenia waxaiti canaëjëtatsi. Yapëtane baja xua pexaniacuene, xua-ata pibisiacuene. ¡Pëtsa saya pona pe-ucutsinexa, pexaenexanua, ponaecuito wëna-asaë tsaponaponaëjitsia daxitamatacabijawabelianexa, tsipaji ajenaconoxaeta caëjëpatsi bajaraponaecuito pexaenexa pewëna-asaëtsaponaponaenexa! Apoxanepanae bajarapacuenia pexanaejawa», najai Jehová DIOSO.

²³Bajaraxuata, Jehová DIOSO capitsapa pebi, pijawa yajawa, Edén nacuapijipabiwecua, bajaraponë penacuenebia-exanaenexatsi pe-ubijawanë irajumawereca, pa-irayajuwënëjawata exanatsi bajaraponë. ²⁴Pecapitsapaecujinaetsi bajarapajiwiabeje, pemutowetsina^t pabijawata Jehová DIOSO nuba ángelewí querubinewí.^u Bajarapijinia pacuenia, ruta espada, bitso pitatsajawijawa, peyacaranatsicuenia pabi matatoyorotsia penajetarucanexa, pexaeyaniwabeje ponaecuito picani wëna-asaëtsaponaponaëjitsiabeje daxitamatacabijawabelianexa.

Caín, Abel-beje, yabara peliwaissi

4 ¹Nexata, Adán pijawa pimoxoyobicujinae, Eva nacoxita. Nexata, bajarapowa exana pebinëyo. Bajaraponëyo yabara Eva jumaiti:

s 3:15 *Petiriwajawawerena...pepitsapaenë*: Taema Mt 1:21-23; Lc 1:27-31. t 3:24 *pemutowetsina*: Itsa jume, tamowetsina. u 3:24 *querubinewi*: Bajarapamona Dioso pija-ánglewiyajuwënëwi. Taema «querubinewi», glosariojawata.

«Ajenaconoxae baja xanë xainajë pebinëyo. Jehovah pejitsipaecuenia nerajuta bajaraponëyo», jai. Bajaraxuata, bajaraponëyo wënëruba Caín.^v ² Bajaraxuacujinae, bajarapowa icatsia nacoxita Abel-nexa, pejuyapijinë Caín. Nexata, penaweretsicujinaebeje, Abel naexana pewetsinë oveja. Caín pijinia naexana penacuenebinë pe-ubicuene irajawata.

³ Bajaraxuacujinae, itsamatacabijawabelia Caín capata petajuitsinexa Jehovah pewënëta pe-ubiyajuwënëjawa. ⁴ Bajarapijinia pacuenia, Abel toca-pata petajuitsinexa copiyapijicoxinëyo oveja pebito, bitso pexanianasitsinë, itsadajubinë penasitsito yajawa. Nexata, Jehovah siwajamatabëcuenebarëyatsi^w Abel. Totanetsi pexaniacuenianua xua capata rajutsiaya petajuitsinexa.

⁵ Itsiata, Caín aposiwabarëyatsi. Xaniawaetsia apototaetsinua xua capata petajuitsinexa rajutsiaya. Nexata, bajarajota Caín bitso anaepana. Pibisiajamatabëcuene najamatabë-itajëta Jehovahjawabelia pitabara-anaepanaejawata.

⁶ Nexata, Jehovah jumaitsi Caín-jawabelia:

—¿Detsa xuajitsia bitso anaepaname? ¿Detsa xuajitsia pibisiajamatabëcuene najamatabëcuene-itajëtame? ⁷ Pexaniacuenia itsa exanaejitsipame casiwabarëyatsi tsipae. Nexata, cacuenecaëjëpaejitsipa nenaitabarayotsi-jawa, tacasiwajamatabëcuenebarëyaxae nijapibisiajamatabëcuenewecua. Itsiata, itsa apo-exanaemë tsane, nexata pibisiacuenia bitso xamë cawajënae-eweta pecajamatabëcuene-amoneyabijawanexa. Xamë picani itsiata, cacuenecaëjëpa bajarapajamatabëcuene nejamatabëcuene-amoneyabijawa, bitso pibisiacuenia nexanaeyaniwa —jai Jehovah Caín-jawabelia.

⁸ Nexata, itsamatacabi Caín junata pejuyapijinë Abel, peponaenexabeje petusatojawabelia. Nexata, bajarapajiwiubeje itsa najetaruca petusatojawa, Caín jane baja, waetaba pejuyapijinë Abel pebeyaxuabinexa. Nexata baja, beyaxuaba.

⁹ Nexata, Jehovah xuacujinae yanijoba Caín-jawabelia:

—¿Jica nexata nejuyapijinë Abel? —jai Jehovah.

Caín jumecanawiata:

—Itsabo. Xanë apoyapëtaenë. ¿Xanë tsaja nexata bajaraponë ewetabia-bajë? —jai.

¹⁰ Nexata, Jehovah jumaitsi:

—¿Detsa xuajitsia bajarapitsicuene exaname? Apoxanepanae cajena.

Pajana janacayajatame nejuyapijinë irajumawereca, bajarapajana tataejawata picani najamatabëxainajë tayamatamotsijamatabëcuene. ¹¹ Ajenaconoxaeta, nexata xamë naneconitsiaya ponaponaname. Nexata, pitsapae-name mapa-irawecuae, pa-irajawata nejuyapijinë janacayajatame, ponë beyaxuabame. ¹² Nacuenebi-atamë tsane irajawata, apocatonaxaniabi tsane ne-ubijawanë pexaniacuenia. Apocatonacuaitsinua tsane. Xamë ponaponaname saya daxitanacuajawa nacuera-ewetsinejewamë —jai Jehovah.

¹³ Nexata, Caín jumecanawiata Jehovahjawabelia:

—Xanë bitso bajarapaneconiwajëto aponecuenecaëjëpae tajamatabëcuenesaenexa tawajënaeyabelia, paneconiwajëto netocopatame. ¹⁴ Ajena baja

v 4:1 Caín: Hebreojumeta Caín itsa jai, najumejëpabeje «pitajë», itsa jume, «xainajë», pejai-jawabeje. Eva pacujinae exana pebinëyo Caín-nexa, bajarapowa, «pitajë Diosojawata», jai.

w 4:4 Siwajamatabëcuenebarëyatsi: Taema Heb. 11:4-6.

necapitsapame mapa-irawecuaje. Nexata, xanë ponaponaenajë daxitana-cuajawa xamëwecua nacuera-ewetsinejewanë. Nexata, pajiwi necaxitajara-biana, bajarapajiwi nebeyaxuabiana —jai Caín.

¹⁵ Jehová jumecanawiata Caín-jawabelia:

—Pajiwiyo cabeyaxuabijitsipa, nexata bajarapajiwi pepacuene naneconitsipa siete xuabeje pematatsënëa. Bajarapacuenia naneconitsia-exanaenajë pecabeyaxuabijiwi —jai.

Nexata, Jehová tsirutatsi itsacuenejawa Caín penayapëtaenexa, pajiwi caxitajarabatsi pebeyaxuabiyaniwatsi. ¹⁶ Caín nexata bajarapacuenia wecuapona itsajota Jehová barëcuaijai. Nexata, bajaraponë ponapona Nod nacujawata, Edén ira pemutuabereca.

Caín pemomoxi, yabara peliwaishi

¹⁷ Caín pijawa* pimoxoyobicujinae, nexata bajarapowa naxoxita. Exana pexënatonëyo. Bajaraponëyo wënëruba Enoc. Xuacujinae, Caín bajarajota exaneta tomarayo. Bajarapatomarayo wënëruba Enoc pexënato pewënëcuenia. ¹⁸ Nexata, Enoc pexënato xaina, pewënë Irad. Irad pijinia pexënato xaina, pewënë Mehujael. Mehujael-ata pexënato xaina, Metusael. Metusael pijinia pexënato xaina, pewënë Lamec. ¹⁹ Lamec xaina anijawabeje pijawabeje. Caewa pewënë Ada. Itsawa pijinia pewënë Zila. ²⁰ Adajawabelia pijinia xaina pexënato, pewënë Jabal. Ponëjawawerena pitsapa pamonaepewaraparutsiwi carboxita, pewetsiwi vaca, oveja, chivo-ata. ²¹ Jabal xaina pejuyapijinë, pewënë Jubal. Bajaraponëjawawerena pitsapa bitso peyapëtaewi peracatsijawa arpa, piobijawanua pijinia flauta. ²² Pijinia Zila, itsawa Lamec pijawa, to-itajëta pexënato Tubal-caín. Bajaraponëjawawerena pitsapa pecanacueniwi brancenanonë, hierronanitonë-ata. Tubal-caín xaina pejuyapijiwa, pewënë Naama.

²³ Nexata, itsamatacabi Lamec jumaiti pijawabejewawabelia, Ada, Zilabejewawabelia:

—¡Panejumetaemabeje xua pacatsipaebijitsiatsibeje! Ajena raja beyaxuabajë pewëjëato; ponë nebijiapaita tanebejawata. ²⁴ Nexata, itsa Caín yabara jumaiti: «Pajiwi beyaxuabatsi naneconitsiaya yamatamotsianatsi siete xuabeje pematatsënëa», itsa yabara jai, xanë pijinia itsa nebeyaxuabiana, nexata bajarapajiwi naneconitsiaya neyamamatamotsiana setenta y siete xuabeje pematatsënëa —jai pijawabejewawabelia.

Adán, Evabeje, itsanë pexënato pexinaejawa, yabara peliwaishi

²⁵ Adán xuacujinae, icatsia pijawa imoxoyoba. Nexata, bajarapowa icatsia, bajaraxuacujinae, naxoxita. Toxaina pexënato. Bajaraponëyo yabara Eva jumaiti: «DOSO nerajuta itsanacueti Abel pejamatabëcuene, ponëmi beyaxuaba Caín», jai. Bajaraxuata, bajaraponëyo wënëruba Set.⁷

²⁶ Itsamatacabi bexëajawabelia Set-ata xaina pexënato, pewënë Enós. Bajarapamatacabianëjawa jiwi taxuxuaba pewajëcaejawa Jehová pewënëta peyawenonaenexatsi, pejumecowënëtsijawanexanua petonajumecopatsiliwaitsi.

x 4:17 *Caín pijawa*: Taema «Caín pijawa», glosariojawata. y 4:25 *Set*: Mapawënë pejumaitsiwënëje: «Tanerajutsinëyo», pejaiwënë.

Itsamonae Adán pemomoxi Caín pemomoxiwecua

(1Cró 1:1-4)

5 ¹Marapamonaeye Adán-jawawerena penaexanaponaewi. Itsa DIOSO exana jiwi, exana nacuenecataeya. ²DIOSO exana pebi, petiriwa-ata. Nexata, pexaniacuenia cuenecaējēpaeya-exanatsibeje, penayawiataponaenexabeje pewājēnaeyabelia. Bajarapajiwibeje DIOSO wēnēruba jiwi.^z

³Adán ita xaina ciento treinta pawai-beje, bajarapawaita naexana pexēnato Set. Ponē naexana, pijamonaewiwibeje daxitacuenejawalia pejamatabēcueneliwaisijēpaenē. ⁴Bjaraxuacujinae, Adán ponapona ochocientos pawai-beje pematatsēnēa. Xainaponanua itsamonae pexi, pebijijiwi, petiriawi-ata, bajarapawainējawalia. ⁵Nexata, Adán ita xaina novecientos treinta pawai-beje, bajaraxuacujinae, bajaraponē tēpa bajarapawaijawalia.

⁶Set pijinia ita xaina ciento cinco pawai-beje, bajarapawaita naexana pexēnato Enós. ⁷Bjaraxuacujinae, bajaraponē Set ponapona ochocientos siete pawai-beje pematatsēnēa. Bajarapawainējawalia xainapona pexi^a pebijijiwi, petiriawi-ata. ⁸Nexata, bajaraponē, daxitata, asaē tsaponaponae novecientos doce pawai-beje. Bjaraxuacujinae, tēpa.

⁹Enós ita xaina noventa pawai-beje, bajarapawaita naexana pexēnato Cainán. ¹⁰Bjaraxuacujinae, Enós ponapona ochocientos quince pawai-beje pematatsēnēa. Itsamonae bajarapawainējawalia xainapona pexi, pebijijiwi, petiriawi-ata. ¹¹Nexata, Enós ponapona novecientos cinco pawai-beje. Bajarapawaijawalia bajaraponē tēpa.

¹²Cainán ita xaina setenta pawai-beje, bajarapawaita naexana pexēnato Mahalaleel. ¹³Bjaraxuacujinae, Mahalaleel penaexanaecujinae, Cainán ponapona ochocientos cuarenta pawai-beje pematatsēnēa. Bajarapawainējawalia xaina itsamonae pexi, pebijijiwi, petiriawi-ata. ¹⁴Nexata, Cainán novecientos diez pawai-beje asaē tsaponaponae. Bajarapawaita bajaraponē tēpa.

¹⁵Mahalaleel ita xaina sesenta y cinco pawai-beje, pexēnato naexana Jared. ¹⁶Bjaraxuacujinae, bajaraponē Mahalaleel ponapona ochocientos treinta pawai-beje pematatsēnēa. Bajarapawainējawalia xaina itsamonae pexi, pebijijiwi, petiriawi-ata. ¹⁷Nexata, bajaraponē, Mahalaleel, ponapona ochocientos noventa y cinco pawai-beje. Bajarapawaita bajaraponē tēpa.

¹⁸Jared ita xaina ciento sesenta y dos pawai-beje, bajarapawaita naexana pexēnato Enoc. ¹⁹Bjaraxuacujinae, Jared ponapona ochocientos pawai-beje pematatsēnēa. Bajarapawainējawalia xaina itsamonae pexi, pebijijiwi, petiriawi-ata. ²⁰Nexata, Jared asaē tsaponaponae novecientos sesenta y dos pawai-beje. Bajarapawaita bajaraponē tēpa.

²¹Enoc ita xaina sesenta y cinco pawai-beje, bajarapawaita pexēnato naexana Matusalén. ²²Enoc raja ponapona DIOSO pejisipaecuenia. Nexata, Matusalén penaexanaecujinae, Enoc ponapona DIOSO pejisipaecuenia trescientos pawai-beje pematatsēnēa. Bajarapawainējawalia xaina itsamonae pexi, pebijijiwi, petiriawi-ata. ²³Nexata, bajaraponē asaē tsaponaponae

^z 5:2 *wēnēruba jiwi*: Majotaje wowaijumeta canacueneba Adán-wēnē jiwine. Taema «Adán», glosariojawata. ^a 5:7 *xainapona pexi*: Apoyapētaetsi pepacuenē papexibitsaētowajēto xaina bajarapabajayanacuapijiwimi. Taema «Adán pemomoxi», glosariojawata.

trescientos sesenta y cinco pawai-beje. ²⁴Enoc peponaponaexae DIOSO pejit-sipaecuenia, nexata itsamatacabi bajaraponë ajibi tsarucae, tsipaji DIOSO baja caponatsi.

²⁵Musalén itsa xaina ciento ochenta y siete pawai-beje, bajarapacujinaeta naexana pexénato Lamec. ²⁶Bajaraxuacujinae, Musalén ponapona setecientos ochenta y dos pawai-beje pematatsënë, penaexanaecujinae pexénato Lamec. Xainapona orijibia itsamonae pexi, pebijwi, petiriawi-ata bajarapawainëjawalia. ²⁷Nexata, Musalén asaë tsaponapona novcientos sesenta y nueve pawai-beje. Bajarapawaita bajaraponë tëpa.

²⁸Lamec itsa xaina ciento ochenta y dos pawai-beje, bajarapawaita naexana pexénato. ²⁹Bajaraponëyo yabara jumaiti: «Jehová bajayata naneco-nitsiaya pibisiacuenia copata ira, bajaraxuata waxaiti namatawenonatsi ayaicuenia wajanacuenebijawa waja-ubijawanë. Itsiata baitsi jane, mapanacuetonëyo nacanacuera-ewetsia-exanaena», jai. Bajaraxuata, bajaraponëyo wënëruba Noé. ³⁰Noé penaexanaecujinae, Lamec ponapona quinientos noventa y cinco pawai-beje pematatsënë. Orijibia, itsamonae xainapona pexi, pebijwi, petiriawi-ata. ³¹Nexata, ponapona setecientos setenta y siete pawai-beje. Bajarapawaita bajaraponë tëpa.

³²Noé itsa xaina quinientos pawai-beje, bajarapawainëjawalia xainapona pexi acueyabi ponëbeje: Sem, Cam, Jafet. Bajaraponëbeje raja Noé pexi.

Mapanacuapijiwije acuenebeje tsaponae Dioso pitabarata

6 ¹Pamatacabijawa jiwi yacaëjëpapona daxita mapanacua-jawa, xainapona bajarapamonae pexénatowaxi pexaniawaxi.

²Bajarapamatacabijawa-ata jinawanapa pijinia DIOSO pexi. ^cNexata, bajarapamonae DIOSO pexi itaxutuajinapona bajarapapetiriawi, tsipaji bajarapapetiriawi pexaniawaxi. Nexata, bajarapapetiriawijawabelia nacojiobapona; powaxijawabelia tsitaxanepanatsi. ³Itsiata baitsi jane, Jehová bajarapamatacabijawa jiwi yabara jumaiti: «Aponajamatabëcuenecataitsinë tsane tananeconitsia-exanaejawa jiwi. Nexata, apocopatsinë tsane mapamonaeje piasaëtsawanapaenexa dexitamatacabijawabelia, tsipaji saya bajarapamonae peperabëto pexainawanapaewi. ^dNexata saya, tocopatsianajë piasaëtsawanapaenexa ciento veinte ^epawai-bejajawalia», jai.

⁴Bajarapamatacabinua DIOSO pexi nacojiobapona itsamonae pexénatowaxijawabelia, DIOSO apopexijawabelia. Nexata, bajarapamonae pexi naexana piapiawi. Naexananua ayaijamatabëcuenewi, pecuene-aitsaawinua. Bajarapamonae nexata bitso pewënëliwaisipitsapaewi be-ayaijamatabëcuenewicuenia bajarapaperujumatacabijawa.

b 5:29 Noé: Mapawënë hebreojumeta pejumaitisijumeje: «Wajanacanacuera-ewetsia-exanaenënexa», pejaijume. **c 6:2** Dioso pexi: Bajarapamonae Set-pijinë pemomoxi tsaena. Taema Gén. 4:25. Taemanua «Dioso pexi Noé ponaponaematacabita», glosariojawata.

d 6:3 Peperabëto pexainawanapaewi: Bajarajota, Dioso nacayapëtaeya-exana pacuenia bajarapamonae ëpenatojitsipaecue pexanawanapaewi. Taema Mt 24:38,39. Nacatsijëtanua pacuenia jiwi saya cae-epatoyonexa pijamatabëcuenesaëwi; apodaxitamatacabinexa. Taema 1Pd 1:24.

e 6:3 ciento veinte pawai-beje: Dioso tocaëjëta 120 pawai-beje pamonae pejinawanapaewi bajarapamatacabi, penajamatabëcuenepënëyorotsinexa Diosojawabelia pibisiacue pexanaejawawecua. Bajaraxuacujinae, werebiabijitsia merata daxita pibisiacue pexanawanapaewi. Nexata, bajarapawainëjawaw Noé nacuenebaponapona barcomio.

⁵Nexata, Jehová tane mapanacuataje bitso pinijineconi pewajënaeyabelia jiwi pibisiacuene pexanaejamatabëcuene. Jiwinua baja cajena pewajënaeyabelia pejamatabë-ëthëtota najamatabëxainabiaba ëpibisiacuene pexanawanapaenexa. ⁶Nexata, bajarapamatacabita Jehová bitso tsi-atanetsi jiwi pija-neconi yabara. Nexata, najamatabëxaina ayaicuenia. ⁷Nexata, bajaraPonë petsi-atanexaetsi, bajarapamonae yabara jumaitsi: «Xanë werebiabianajë daxita mapanacuapijiwi, pamona xanë exanajë. Yajawawerebiabiana-jënuu daxita pamona-ata matatsënëwereca pejinawanapaewi, unupijiwi, dajubi, pamona-ata pecotobëxëta penarobobocaewi, pepunaewi-ata. Bajarapamonae daxita xanë werebiabianajë. Picani aponetsixanepanae jiwi ta-exanaejawami. Jiwi itsa apo-exanaenë tsipae, neconi aponatsi-exanae tsi-pae xanëjawaberena», jai Jehová siwajamatabëcuenebëjaiya.

⁸Itsia, bajarapamatacabijawa Jehová siwajamatabëcuenebarëya Noé.

Noé nacueneba barcoxaneto

⁹Mara paliwaisi Noépijinë yabara pijaliwaisije. Bajayata itsa ponapona mapanacuataje, bajaraponë DIOSO pitabarata pexaniajamatabëcuenenë, jumecowënëtsiaya-ata ponapona. Daxita mapanacuata pejinawanapaewije matatoxenetsia bajaraponë, caenë, exanaponapona DIOSO pejitsipaecuenia.

¹⁰Noé xaina acueyabi ponëbeje pexi; mapamonaeje: Sem, Cam, Jafet.

¹¹Mapanacuapijiwi bitso pibisiacuene exanawanapa DIOSO pitabarata. Belia, yacajëpa daxitanacuajawa bitso piabejecuene pexanawanapaewi itsamonaejawabelia bejiobiataenejewa. Bajaraxuata, DIOSO tsitapiabeje-nacuatsi daxitanacua, tsipaji mapanacuapijiwi bitso ajamatabëcuenebeje tsawanapae pewajënaeyabelia. ¹²DIOSO tane mapanacuapijiwi bitso pibisiacuene pexanawanapaewi; bitso piabejecuene pejaitaponaewi pexanawanapaenexa pewajënaeyabelia. ¹³Bajaraxuata, DIOSO itsa tane, nexata itsamatacabi jumaitsi Noéjawabelia:

—Najamatabëcueneweretajë raja tawerebiabijawa daxita mapanacuata pejinawanapaewi, jiwi pijaneconi yabara, tsipaji bitso wënëca pibisiacuene pexanaejawa mapanacuataje. Nexata, yajawawerebiabijitsianë daxitanacua.

¹⁴Nexata, nacuenebianame pinijimoxaneto barco.^f Canacuenebianame peja-nejaitablapanë, piatajatablapanë-ata. Exanaename peya-ënë-ucubimo. Catsanaenamenua pecatsanaenanitonëta pepënëwelia, pe-ënëwerena-ata, mera pejoneyaniwa. ¹⁵Bajarapamo nacuenebianame mapacueniaje: Piapijawa xainaena ciento treinta y cinco pametrobeje. Epatajërëtsialia xainaena pijinia veinte y dos pametrobeje epatua. Athëbëabetsia xainaena pijinia piapia-jawatsia trece pametrobeje epatua. ¹⁶Bajarapamoyenepanajawata, caenenia xainaeyaxanaename baupa. ¡Nexata, exanare acueyabi pa-irabejecuenia bajarapamo-ënëjawata athëbëabetsia! Caeventanabaupa pijinia rutsianame bajarapamopijiboyenepanajawata athëbëyo. Nexata, bajarapaventanabaupa xainaena epatuametro.^g ¹⁷Bajarapitsimo barcoxaneto exanaename, tsipaji

f 6:14 Barco: Bajarapamo exana tablapajawanëta. Picani bejera. Itsia, bitso ayaicuenia pinijimoxaneto. **g 6:16 epatuametro:** Itsamonae canajëta bajarapaventanawojoto perucaejawa epatua metrocuenia bajarapamo pemata-acatsijawa pebëxëpanayo caeyenepananenia. Itsamonae pijinia canajëta saya epatua metro penamatajëpaejawa.

raja merata bubutsia-exanaenajë mapanacuae daxitanacua, tawerebiabinexa daxitacuenewiriawi, matatsënëta pejinawanapaewi. Nexata, daxita tēpaena. ¹⁸Jane baitsi itsiata, xanë xamëjawabelia canaliwaisicajonejitsiatsi tacabarëcapanepaenexa, daxita nexi yajawa, nijawa-ata, necopenawaxi yajawa. Nexata, paxamë pajonename bajarapabarcoxanetojawabelia, bajarapacuenia panepanepaenexa. ¹⁹Bajarapijinia pacuenia, cajonename bajarapabarcoxanetojawabelia caewiria canacujitsia matatsënëwereca pejinawanapaewi, bajarapamonae neyajawapanepaenexa xamë. Caewiria canacujitsia tsaponae cajonename anijanëbeje, caenë pebito, caenë pesorowato yajawa. ²⁰Nexata, xamë yajawajonename pepunaewi-ata caewiria canacujitsia, bajarapacuenianua pecotobëxëta penarobobocaewi irajumawereca caewiria canacujitsia. Nexata, cajonename anijanëbeje tsaponae, caenë pebito, caenë pesorowato yajawa, jamatejema bajarapamonae pepanepaenexa, bajarapacuenia penacopabinexa mapanacuataje pebubutsicujinae. ²¹Caetuataponarenua^h daxitawiria pexaejawa, nexaniawaetsinexa bajarapamo-ënëta, jamatejema panexainaenexa panexaejawa, paxamë-ata, bajarapacuenia pamonae-ata matatsënëwereca pejinawanapaewi! —jai DIOSO Noëjawabelia.

²²Nexata, Noë exana daxita pacuenia DIOSO tonajumecopatatsi pe-exanaenexa.

Pacuenia Dioso bubutsia-exana mapanacuae, yabara peliwaishi

7 ¹Bajaraxuacujinae, barcoxaneto pweretsicujinae, icatsia Jehovah jumaitsi Noëjawabelia:

—Jonema jane baja, barcojawabelia daxitanijamonae yajawa, tsipaji daxita pejinawanapaewiwecua mapamatacabijawa, xamë caenëmë nejumecowënëtsiaya ponaponame tajitsipaecuenia. ²Cajonename catorce ponëbeje tsaponae pamonae ta-itapetsiwi itsadajubiwiwecua, caewiria canacujitsia siete ponëbeje pebitonë, siete pijinia papesorowato beje. Itsiata baitsi jane, pamonae apota-itapetsiwi, cajonename saya anijanëbeje; caenë pebito, caenë pesorowato yajawa caewiria canacujitsia. ³Nexata, yajawapitsianame pepunaewi ta-itapetsiwi, caewiria canacujitsia siete ponëbeje pebitonë, siete pijinia ponëbeje pesorowabi, bajarapamonae jamatejema pepanepaenexa, penacoxiwiatsinexa mapanacua tawerebiabicujinae, ⁴tsipaji siete pamatacabibecujinae copatsianajë mapanacuataje perunaewi emaxaneto cuarenta pamatacabibeje, cuarenta pamerawibeje yajawa, bajarapacuenia tawerebiabinexa baja daxitacuenewiria tacobecowëwi, pamonae jinawanapa mapa-irataje —jai Jehovah.

⁵Noë baja exana daxita pacuenia Jehovah tonajumecopatatsi.

⁶Pacujinaeta mapanacua bubutaje, Noë xaina seiscientos pawai beje. ⁷Nexata, Noë barëjunua pexi, pijawa-ata, pecopenaxi acueyabi powa beje yajawa, pewecuapanepaenexa bajarapa-ayaiwajubuaxaneto. ⁸Yajawacajunua daxitacuenewiriawi matatsënëwereca pejinawanapaewi, pepunaewi-ata, DIOSO pitapetsiwi itsamonaewecua, bajarapijinia pacuenia,

^h 6:21 *daxitawiria pexaejawa*: Neyapëtaenexa xua caetuata daxitawiriawi pexaenexa, taema Gén. 1:29-30.

daxitacuenewiriawi DIOSO apopitapetsiwi-ata, pamonaenua pecotobëxëta penarobobocaewi. ⁹Bajarapamonae yajawajunua Noé barcoxanetojawabelia, anijanëbeje tsaponae caewiria canacujitsia, caenë pebito, caenë pijinia pesorowato tsaponae, pacuenia DIOSO itorobatsi.

¹⁰DIOSO petsipaebicujinae barcojawabelia peyajawajonenexa, siete matacabita copiapata jane baja, emaxaneto perunaejawa irajumawereca piawaju-buajawanexa. ¹¹Pawaita Noé xaina seiscientos pawai-beje, cotocaewipijijua-metota¹ dieciete matocabijawata, bajarapamatacabita jane baja, taxuxuaba piniji-emaxaneto perunaejawa. Bajarapijinia pacuenia, irabëxëpanawetsina meraxanetonë pitsaparubena menejawa. ¹²Cuarenta pamatacabibeje, cuarenta pamerawibeje yajawa emaxaneto tsanucac daxitanacuajawa.

Noé pamona yajawajunua barcoxanetojawabelia

¹³Nexata, bajarapamatacabita Noé yajawajunua barcoxanetojawabelia acueyabi ponëbeje pexi, Sem, Cam, Jafet, acueyabi pijinia powabeje pecopenaxi, Noé pijawa-ata yajawa. ¹⁴Bajarapamonae yajawajunua daxitawiriawi pamona DIOSO pexanaewi, daxita unupijiwi, dajubi-ata caewiria canacujitsia, daxita pamona pecotobëxëta penarobobocaewi, bajarapacuenia pepunaewi-ata. ¹⁵Nexata, daxita bajarapamonae Noé yajawajunua barcojawabelia anijanëbeje tsaponae, caewiria canacujitsia DIOSO pexanaewi. ¹⁶Daxita pamona pata, jonepona caenë pebito, caenë pesorowato yajawa tsaponae caewiriawi canacujitsia, pacuenia DIOSO itorobatsi. Nexata, bajaraxuacujinae jane baja, Jehová barëyabaupaxatatatsi bajarapabarcoxaneto-ënëalia.

¹⁷Nexata, emaxaneto tsanucac cuarenta pamatacabibeje. Bajarapacuenia jane baja, itsa bubutanajetarua, nexata barcoxaneto cotananajetarua irajumawereca. ¹⁸Caematacabi canacujitsia bepjiayo mera awajubua tsanajetarua, nexata bajarapacuenia pinijibarco yacotanapona pewajënaeyabelia. ¹⁹Bajarapacuenia itsa awajubua tsanajetarua, daxita petsutonëmi pebubutsijawata matapëcaewapona. ²⁰Daxita piapiatsutonëmi bitso itsatsutonëwecua pematapëcaewicujinae, orijibia pematatsënëa awajubua siete pametrobeje athëbëabetsia. ²¹Nexata, bajarapacuenia baja, tëpa daxitajiwi, pamona jinawanapa mapanacuataje, daxita pepunaewi, daxita pamona matatsënëwereca pejinawanapaewi, pacuenia unupijiwi, dajubi-ata, pamona-ata pecotobëxëta penarobobocaewi irajumawereca. ²²Daxita pamona penajumalinotsiwicuenia piasaëtsawanapaewi, mapanacuata irajumawereca pejinawanapaewije, bajarapamonaemi tëpa. ²³Bajarapacuenia DIOSO werebiaba daxita mapanacuajawata pejinawanapaewije, jiwi, unupijiwi, dajubi, pecotobëxëta penarobobocaewi, pepunaewi-ata. Itsiata baitsi jane, caenë Noé pijamonae barëpanepa, pamona yajawajunua barcojawabelia. Daxita pebarëjonewi, bajarapamonae barë-asae. ²⁴Daxita apopejonewi barcojawajawabelia bubuna merata, tsipaji bejamatabëcuene ciento cincuenta pamatacabibeje mera awajubua tsanucac daxitanacuajawa.

i 7:11 *cotocaewipijijua-metota*: Bajayatami jiwi wënërubabiaba saya penamata-ëjëtsicuenia juametonë. Bajaraxuata, apoyapëtaetsi pajuametoneta waja-almanaquejawata Noé barëjunua barcoxanetojawabelia. Itsiata, Noé barëjunua barcoxanetojawabelia, anijajuametonobe pepuxaina Noé pijacumpleaños, 600 pawai-beje pexainaecujinae.

Icatsia mera petsewijawa pebubutsijawami, yabara peliwaissi

8 ¹Nexata, DIOSO najamatabēnapita^l Noéjawabelia penajumeliwaisica-jonejawami,^k daxita pamona-e-ata yajawajunua DIOSO pecobecowēwi barcoxanetojawabelia. Bajarapamatacabi, nexataDIOSO copata jowibo pebubujainexa meramatatsēñewereca, iramatatsēñewereca-ata. Bajarapacuenia mera nexata taxuxuaba petsewanajetarucaejawa. ²DIOSO nacobecowē-acabanua pepitsaparubenaeya-exanaemeranē irabēxēpanawetsina. Bajarapacuenia athēbēwetsica perunae-emaxaneto ajibia-exana. Nexata baja, copata ema perunaejawa. ³Nexata, mera taxuxuaba petsewanajetarucaejawa be-axayocuenia. Ciento cincuenta pamatacabibeje petaxuxuabicujinae ema perunaejawa, ⁴siete pajuametobejejawata, dieciete matacabita, barcoxaneto bocajopa Ararat-tsutojumatsia, cinco pajuametobeje Noé pejonecujinae barcomojawabelia. ⁵Pewajēnaeyabelia orijibia mera tsewanajetaruca. Diez pajuametobeje itsa xaina Noé pejonecujinae, copiyapijimatacabijawata matapania naitajēta pematatsewanubenaejawa pinijitsutojumanē.

⁶Bajaraxuacujinae, cuarenta pamatacabibeje pinijitsutojumanē pematatsewanubenaecujinae, Noé baupata ventanabaupa, peyapētaenexa ira petsewijawa. ⁷Bajarapaventanabaupajawalia Noé copata cuervowēñēñ^l pepunaenē, xaniawaetsia peyapētaenexa picani ira petsewijawa. Itsiata, bajaraponēyo aponawiatsi. Saya punaponapona athēbēyo. Ira petsewijawa ewetaponapona. ⁸Cuervowēñēñ pecopatsicujinae, Noé icatsia copata^m ucucuto, peyapētaenexa itsa pepacuenie tsewanajetaruca. ⁹Nexata, ucucuto nawiata, tsipaji bajaraponē apoxainae itsajota yanonsijitsia, itsajotania nacuera-ewetsijitsia. Nexata, bajarapacuenia Noé yapētane abaxē piawajubuajawa daxitanacua; ira apopejumapitsapaejawa. Ucucuto itsa nawiatanajetaruca, Noé nacobeyolia peyapitsinexa, pecajonenexarena barco-ēñäberena.

¹⁰Noé nexata abaxē, eweta siete pamatacabibeje pematatsēñē. Icatsia, xuacujinae copataba bajarapa-ucucutoyo. ¹¹Itsa baja caniwiyo tsanajetarucacae, ucucuto nawiatanajetaruca. Canajetaruca olivonaemaxēranayo pepumuxotota. Bajarapacuenia Noé yapētane petsewanajetarucaejawa mera.

¹²Nexata, icatsia eweta itsasiete pamatacabibeje pematatsēñē. Icatsia, xuacujinae copataba bajarapa-ucucuto. Nexata baja, ucucuto caewēarena aponawiatsi.

¹³Pacujinae Noé xaina seiscientos uno pawaiubeje, bajarapawaita baja tsewa pebubutsijawa. Bajarapawai copiyapijiuametojawata, penamataxainaematacabita, bajarapamatacabita Noé bajarapamopijibomatatuyenepana sarana nacua petaenexa. Tane ira pejumapitsapaejawa pebubutsicujinae.

¹⁴Anijajuametobejecujinae, Noé seiscientos uno pawaiubeje pexainaecujinae, veinte y siete matacabita bajaraponē tane ira xaniawaetsia petsewijawa.

¹⁵⁻¹⁶Nexata, DIOSO jumaitsi Noéjawabelia:

j 8:1 Dioso najamatabēnapita Noé: Taema «Dioso najamatabēnapita», glosariojawata.

k 8:1 penajumeliwaisicajonejawami: Taema Gén. 6:18. l 8:7 cuervowēñēñ: Taema «cuervo», glosario. m 8:8 Noé icatsia copata: Hebreojumeta najumetane Noé pe-ewetsijawa siete pamatacabibeje pecopatsinexa ucucuto cuervo pecopatsicujinae.

—Papitsapaename baja bajarapamowecua, nijawa, nexi acueyabi ponë-beje yajawa, necopenawaxi-ata yajawa. ¹⁷Capitsapaenamenua daxita pamonaeyajawajonewi, matatsënëwewereca pejinawanapaewi, unupijiwi, dajubi, pepunaewi-ata, bajarapacuenia pecotobëxëta penarobobocaewi irajumawewereca, jamatejema peponaenexa daxita-irajawa. Paxainaponaename panexi, panemomoxi-ata, ayaibitsaëto panepitsapaponaenexa, paneyacaëjëpaenexa daxitanacuajawa, bajarapijinia pacuenia pamonaeyajawajonewi barcoxanetojawabelia, penacoxiwiataponaenexa —jai DIOSO najumecopatsiaya barcoxanetowecua pepitsapaewijawabelia.

¹⁸Nexata jane baja, Noé, pijawabeje, pexi acueyabi ponëbeje, pecopenaxi-ata barëpitsapa bajarapabarco-ënëwecua. ¹⁹Yajawapitsapanua daxita peyajawajonewi Noé, pacuenia unupijiwi, dajubi, pecotobëxëta penarobobocaewi, pepunaewi-ata. Caewiria canacujitsia matatsënëwewereca pejinawanapaewi Noé barëpitsapa bajarapamowecua. ²⁰Nexata, xuacujinae Noé exananuta altar-jawaⁿ Jehová pewënëta. Bajaraxuacujinae, taicapona dajubi, pepunaewi-ata, pamonaeyajawajonewi itapeta Jehová jiwi petajuitabiabinexa altar-jumata. Taicapona caewirianëyo canacujitsia. Nexata, bajarapamonae daxitanëanë tajuita baja Jehová pewënëta, pesiwajamatabëcuenebarëyaxae. ²¹Bajarapacuenia itsa Jehovájawabetsia petajuitsidajubi tuxusipatsia tsitapexaniatuxusitsi.

Nexata, Jehová jumaitsi:

—Pematatsënëa baja ira apobijianaenë tsane jiwi pijaneconijamatabëcuene, pibisiacuene exanabiabi-ata tsane, tsipaji jiwi ëpibisiacuene najamatabëxainabiaba pexanabiabinexa pewëjëatojawawerenacujinae. Bajarapijinia pacuenia baja, pematatsënëa apowerebiabinë tsane daxita pamonaeyajawajonewi tabubutsia-exanaeyajawata daxita mapanacuaje, pacuenia baja exanajë maxuataje.

²²Nexata, paepatowajëto abaxë mapanacuaje tsitecanucaena, xainaena pijamatabacianë pe-ubijawanë, penotsijawanë-ata. Bajarapijinia pacuenia, tsitecaena piatajucueni, pecainejebicuene, emarapaepijicuene, waicuene, matababipijicuene, merawipijicuene-ata tsane —jai Jehová najumecapanepaeya Noéjawabelia, daxita pebarëpitsapaewijawabelia-ata.

Dioso najumeliwaisicajunua Noéjawabelia

9 ¹Nexata, DIOSO pexaniacuena cuenecaëjëpaeya-exana Noéjawabelia, penacoxiwiataponaenexa, acueyabi ponëbeje pexijawabelia-ata. Jumaitsi:

—Pacayawenonaponaenatsi, panexainaponaenexa panemomoxi, paneyacaëjëpaenexa daxitanacuajawa. ²Daxitacuenewirianëxi ta-exanaewi mapanacuataje, bajarapamonae paxamë papecacujunawiwi tsane. Nexata, daxita pamonaeyajawajonewi, daxita pamonaeyajawajonewi-ata irajumawewereca pejinawanapaewi, pamonaeyajawajonewi-ata menejawata pejinawanapaewi, daxita bajarapamonae paneyajamatabëcuenematatoxenetawanapaewi tsane. Nexata, pacatocopatatsi pane-ewetsinexa bajarapamonae. ³Pacatocopatatsinua panexaewinexa

daxitacuenewiriawi ta-exanaewi. Bajayata picanì pacarajutatsi pejuwija-wanë panexaenexa. Itsiata, maparucaeje pematatsënëa pacarajutatsi daxitacuenewiriawi panexaewinexa. ⁴Itsiata baitsi jane, ponë pabeyaxuabame panexaenexa, pacajani-itawetatsi panexaeyaniwa penajatotonaewi, peja-ata. Bajaraxua apobepaxaemë, tsipaji daxitacuenewiriawi asaë tsawanapae pejana pejamatabëcueneta.

⁵»Paca-itawetatsi panewënjawitonë panebeyaxuabiyaniwa. Nexata, daxita jiwibewi naneconitsiana xanëjawaberena. Nexata, ponë beyaxuabiana pewënjawitonë, juya bajarapajiwi pabeyaxuabianame. Bajarapacuenia pa-exanaenamenua unupijiwi piyaiwijawabelia, dajubijawabelia-ata, tsipaji bajarapamonae-ata netonaneconitsiana xanëjawaberena, jiwitonë pebeyaxuabixae tsane. ⁶Nexata, pajiwiyo beyaxuabiana pewënjawitonë, juya bajarapajiwi beyaxuabianatsi pewënjawitonë, tsipaji xanë DIOSOñë exanajë jiwitonë nacuenecataeya.

⁷»Itsiata, paxamë pacatocopatatsi ayaibitsaëtonë panexainaponaenexa panexi, panemomoxi-ata, mapanacuaeje pewëñëcaenexa panemomoxita, paneyacaëjëpaejawabelia daxitanacuajawa —jai DIOSO.

⁸DIOSO icatsia jumaitsi Noëjawabelia, pexi acueyabi ponëbejawabelia-ata:

⁹—¡Panejumetaema mapacueneye! Xanë pacanaliwaisicajunuatsi paxamëjawabelia, daxita panexijawabelia, panemomoxijawabelianexa-ata tsaponae, ¹⁰bajarapacuenia daxita pamonae payajawapitsapame barcojawawerena, pepunaewi, pamonae irajumawereca pejinawanapaewi, unupijiwi, dajubijawabelia-ata. ¹¹Xanë najumecapanepaeya patacanaliwaisicajonejawa paxamëjawabelia aponajumecowëxanetsinë tsane. Pematatsënëa apowerebiabinë tsane daxita mapanacuapijiwi merata, apowerebiabinë tsanenua pebubutsicuenia daxitanacua —jai DIOSO Noëjawabelia, peyajawapitsapaewijawabelia-ata.

¹²Icattia, DIOSO jumaitsi:

—Daxitamatacabijawabelianexa paneyapëtaeponaenexa pexaniajai-cuene patacanaliwaisicajonejawa, peneta paxamë pacatsitarutsianatsi, daxita pamonae paneyajawa-asaëtsawanapaewi mapanacuataje. ¹³Pacatsitarutsianatsi peneta taja-arawalibo itaboxojawata. Nexata, pacujinae pataneme, panajamatabënapitsianame pacuenia najumecapanepaeya patacanaliwaisicajunuatsi icattia merata tawerebiabiyaniwa mapanacuaje. ¹⁴Nexata, paepatota xanë copatsianajë pajubo penacaeuatsijawa emanexa, bajarapaepatota, naitajëtsiana taja-arawalibo pajubotuatuajëta. ¹⁵Nexata, bajarapaepatota xanë-ata najamatabënapitsianajë patacanaliwaisicajonejawami ajena pamatacabi paxamëjawabelia, daxitacuenewiriawi ta-exanaewijawabelia-ata, pematatsënëa apotawerebiabijawanexa daxita mapanacuapijiwije icattia tabubutsia-exanaecuenia merata. ¹⁶Paepatota taja-arawalibo naitajëtarucaena pajubotuatuajëta, bajarajota xanë itsa taeyabiabianajë, nexata najamatabënapitabiabianajë daxitamatacabijawabelianexa patacanaliwaisicajonejawa paxamëjawabelia, bajarapacuenia daxitacuenewiriawi irajumawereca pejinawanapaewijawabelia-ata. ¹⁷Bajaraxuata raja, pacatsitarutabiabianatsi peneta, panenajamatabënapitabiabianexa patacanaliwaisicajonejawa paxamëjawabelia, daxitajiwijawabelia-ata

mapanacuata pejinawanapaewinexa —jai DIOSO penajumeliwaisicajonejawata Noéjawabelia, daxita peyajawajonewi pewecupitsapaecujinae barcoxaneto-ënëwecua.

Pacujinae Noé naitajibiaxuaba, yabara peliwaishi

¹⁸Noé pexi barëpitsapa barcojawawerena mapamonaaje: Sem, Cam, Jafet. Cam-jawawerena pepitsapaewi Canaán nacuapijiwinexa; Canaán-wënëñë pexënato pemomoxi. ¹⁹Bajarapamona Noé pexi acueyabi ponëbeje, xainapona pexi, pemomoxi-ata. Nexata, bajarapamonaejawawerena pitsapa daxitajiwi mapanacuapijiwinexa.

²⁰Nexata, Noé taxuxuaba irajawata penacuenebijawa pe-ubicuene. Xaina uvapabi. ²¹Nexata, itsamatacabi bajaraponë uvayajuwënëcuaira nato-exana piatanevinora. ²²Nexata, bajaraponë piapaejawata bajarapavinora, naitajibiaxuaba. Jumasane boca irata pitajibinë pijacarpabo-ënëtuatujëta. ²³Nexata, Cam pejonejawata carpabo-ënëalia, tane paxa jumasane pebocaejawa. Nexata, pitsatabijirawa, pijamonaenëbejajawabelia petsipaebinxaxa, wayafo-talia penucaenëbeje. (Cam raja Canaán paxa). ²⁴Nexata, pijamonaenëbeje, Sem, Jafet-beje, pita pepana pewëtarajawawerera peperabëcaranatsine-xabeje, jumasa bitso jiwi petaeyabuatsiyaniwatsi. Nexata, bajarapajiwibeje joneya pematäxëpanenia, paxa jumasane peperabëtaeyaniwabeje.

²⁵Noé baja itsa naëcota piatajibijawawecua, jumetane xua pexënato juyapijinë exanatsi. ²⁶Nexata, Noé cuenetsitajëta pibisiacuene petocopiapatsijawanexatsi Cam pemomoxijawabelia. Jumaitsi:

—Canaán, xamë pibisiacuena pecatocopiapatsinë tsane. Daxitajiwiwecua bitso beweliamatabëcuenenë nenaeponaponaenë tsane, tsipaji raja nijamonaenëbejenexa amoneya netonacuenebaponaponaenë tsane. Bajarapijinia pacuenia, panemomoxijawabelia-ata bajarapacuene tsitecaeya canacopataponaena —jai Noé, Cam pemomoxi yabara. ²⁷Icatsia, pexaniacuene tsitajëtatsibeje petocopiapatsinexatsi pexënatobeje matapijinëbejajawabelia, DIOSO pewënëta. Jumaitsi:

—Xamë pijinia Sem, catojitsipatsi pexaniacuena tajaDIOSO Jehová pecayawenonaenënexa tsane Canaán-wecua. Canaán juya amoneya pecatonacuenebaponaponaenë tsane. Bajarapijinia pacuenia, panemomoxijawabelia-ata bajarapacuene tsitecaeya canacopataponaena.

²⁸»Xamë, Jafet, catsitajëtatsi pexaniacuena DIOSO pecayawenonaenexa ayaibitsaëto nemomoxi nexainaponaenexa, pinijinacua bajarapamona peyacaëjëpaenexa. Itsamatacabijawabelianua nemomoxi jinawanapaena Sem pijataxunaejawata. Bajarapijinia pacuenia, Canaán amoneya pecatonacuenebaponaponaenë tsane. Bajarapijinia pacuenia, panemomoxijawabelia-ata bajarapacuene tsitecaeya canacopataponaena —jai Noé pexaniacuene petocopiapatsinexatsibeje pexënatobeje, pemomoxijawabelia-ata.

²⁹Mapanacua pebubutsicujinaeje, Noé ponapona trescientos cincuenta pawai-beje pematatsënë. ³⁰Bajaraxuacujinae, bajaraponë tēpa itsa xaina novecientos cincuenta pawai-beje.

Pamonae Noé pemomoxi, yabara peliwaissi

(1Cró 1:5-23)

10 ¹Marapamonae penaexanaponaewije Noé pexi acueyabi ponëbe-
jejawawerena; Sem, Cam, Jafet-banajawawerena. Bajarapamo-
nae pexi xainapona pebubutsicujinae mapanacuaaje, barcojawawerena
pepitsapaecujinae.

²Jafet pijinia pexi mapamonaeje: Gomer, Magog, Madai, Javán, Tubal,
Mesec, pepojuyapijinë pewënë Tiras. ³Gomer pijinia xaina pexi mapamo-
naeje: Askenaz, Rifat, Togarma. ⁴Javán pijinia xaina pexi mapamonaeje:
Elisa, Tarsis, Quitim, Dodanim. ⁵Marapamonaeje naexanapona Jafet-
jawawerena. Bajarapamonae jinawanapa pebobenae-iranë manuamene-
itapajawa. Nexata, caenë canacujitsia, naexanapona saicaya caenacuapi-
jiwinexa, caewiriawi canacujitsianua. Jinawanapa pijanacuaya saicaya
pijawiriamaëtocuenia nawecuanatsanaeya. Bajarapijinia pacuenia, xaina-
pona saicaya pijajume.

⁶Cam pexi tsaponae mapamonaeje: Cus, Mizraim, Fut, Canaán-ata. ⁷Cus
pijinia xaina pexi mapamonaeje: Seba, Havila, Sabta, Raama, Sabteca.
Raama pijinia xaina pexi mapamonaeje: Seba, Dedán-beje. ⁸Itsanë Cus
pexénato pewënë Nimrod. Ponë bajayatami piacuenesaëtsaponaponaenë
mapanacuataje. ⁹Nimrod raja Jehová pitabarata bitso pepopenarujauit-
sijitsipaenë. Bajaraxuata, mapajumeyo jiwi capitsapa penarujauitsijitsi-
paewi yabaraje: «Pacuenia Nimrod bitso penarujauitsijitsipaenë Jehová
pitabarata,^p bajarapacuenia cuenejëpa bajaraponë», pejaijumeyo. ¹⁰Nim-
rod raja nacua-ewetsinë tsaponapona. Mapatomaranë ewetaponapona
penamatamotsitomaranëje: Babel, Erec, Acad, Calne-ata, Sinar nacuata
pe-enaetomaranë. ¹¹Bajaraxuacujinae, itsamatacabijawabelia warapa Asiria
nacuajawabelia. Bajaraponë pijinia nacuenebeta bajarajota mapatomarawë-
nëxije: Nínive, Rehobot, Cala-ata. ¹²Itsatomara pijinia bitso pinijitomara,
pecuenenamatamotsitomara, nacuenebeta Nínive, Cala tomarabejetuatu-
jéalia. Bajarapapinijitomara pewënë Resén.

¹³Cam pexénato, Mizraim, pemomoxi raja: Ludim-monae, Anamim-
monae, Lehabim-monae, Naftuhím-monae, ¹⁴Patrusim-monae, Casluhím-
monae, Caftorim-monae-ata. Casluhím-monaejawawerena pitsapapona
filisteomonae.^q

¹⁵Cam pexénato, Canaán, xaina copiyapijinë pexénato, pewënë Sidón.
Itsanë pewënë Het. ¹⁶Canaán-jawawerena pitsapa pijinia jebuseomonae,
amorreomonae, gergeseomonae, ¹⁷heveomonae, araceomonae, sineomo-
nae, ¹⁸arvadeomonae, zemareomonae, hamateomonae-ata. Bajarapamo-
nae jinawanapa pijawiriamaëtowicuenia natsanaeya Canaán nacujawa.

¹⁹Canaán pemomoxi pejinawanapaenacua bitso ayai-iraxaneto. Pijanacua

p 10:9 *Jehová pitabarata*: Bajarapajumebeje anijajamatabëcuenebeje xaina. Copiyajamatabë-
cuene: Najumetane Nimrod bitso pecujaninësi pejinacuene daxitajiwicua. Cotocaewijamata-
bëcuene: Najumetane Nimrod piäjumesaënë jiwi pejunatsinexa pejamatabëcueneyanabinexatsi
apojumecowënësinexa Dios. Nimrod-wënë, «apojumecowënësi tsanetsi wajanaca-
itorobicuenia», pejaiwënë. Bajaraxuata tsaena, jiwi junatabiaba apojumecowënësinexa Dios.

q 10:14 *filisteomonae*: Taema «filisteomonae», glosariojawata.

taxuxuaba Sidón nacuamatatujawata matatsënënenia,^r pepatsinexa Gaza tomarajawabereca ununenia, Gerar nacuata pe-ecaetomara. Epatajërëtsialia pijinia taxuxuaba Gaza tomarajawata, Lasa tomarajawabelia. Lasa tomara eca Sodoma, Gomorra tomarabejecujinaereca, Adma tomara, Zeboim tomarabejecujinaereca-ata. Bajarapatomarayojawata, copiaruca pija-ira pemutonenia.^s ²⁰Daxita bajarapamonae raja pitsapapona Cam-jawawerena Noé pexënato. Mapamonaeye caenë canacujitsia naexanapona caenacuapijiwinexa saicaya. Caewiriawibitsaëto canacujitsia xainapona saicaya pejinawanapaenacuanaexa. Saicaya pijinia xaina pijajume.

²¹Sem-pijinë matapijinë Jafet-wecua. Sem-ata xaina pexi. Daxita pamonaeye Heber pemomoxi tsaponaerena, bajarapamonae raja Sem-pijinë pijawiriawi. ²²Sem pexi pewënëanë mapamonaeye: Matapijinë Elam. Bajaraxuacujinae, naexanapona itsamonaeye pacuenia, Asur, Arfaxad, Lud, Aram-ata. ²³Aram pijinia pexi mapamonaeye: Uz, Hul, Geter, Mas-ata. ²⁴Arfaxad pexënato pewënë Sala. Sala pijinia pexënato xaina pewënë Heber. ²⁵Heber pijinia xaina anijanëbeje pexënato. Caenë pewënë Peleg, tsipaji peponaponaematacabita mapanacuapijiwiye nawecuanatsana saicaya penawecuajinawana-paenexa. Itsanë pijinia juyapijinë pewënë Joctán. ²⁶⁻²⁹Joctán xaina pexi mapamonaeye: Almodad, Selef, Hazar-mavet, Jera, Adoram, Uzal, Dicla, Obal, Abimael, Seba, Ofir, Havila, Jobab-ata. Daxita mapamonaeye pexi Joctán. ³⁰⁻³¹Daxita bajarapamonae Sem-pijinë pemomoxi tsaponaerena, penaitajëbiwi pijawiriamaëtojawarena. Bajarapamonae pejinawanapaenacuami taxuxuaba Mesa nacujawata, pepatsinexa Sefar nacujawabelia, panacuata nawita petsutonë pemutuabereca. Caenë canacujitsia naexanapona caenacuapijiwinexa saicaya. Nexata, natsanaeya cae-iratupayo canacujitsia jinawanapa. Bajarapacuenia xaina saicaya pecuaicuajijumenë.

³²Daxita bajarapamonae itsiata caenë Noépijinë pemomoxi tsaponaerena, bajarapacuenia pejinawanapaenacuanaë-ata, bajarapacuenia pijawiriamaëtonë-ata. Mapanacua pebubutsicujinae, bajarapamonae natsana daxitanacuajawa pejinawanapaenexa, bajarapacuenia-ata pexanaenexa pijatomaranë pejinawanapaenacuata.

Dioso jume-itothiana pijajumewecua mapanacuapijiwiye

11 ¹Bajayatami, daxita mapanacuapijiwiye caejumewi tsawanapae abaxë. Nexata, cuaicuajiai caewirijume. ²Bajarapamatacabijawa bajarapamonae wecuapitsapa pemutowetsina. Nexata, caxitajaraba pexaniamatajëpaetusatoyo, Sinar nacujawata pebocaetusato. Bajarajota, bajarapamonae nacopaba pejinawanapaenexa. ³Nexata, itsamatacabi bajarapamonae najumaitsi: «Nacuenebianatsi waja-exanaenexa adobejawanë, pesebitonë isotota piatajanexa», najai. Nexata, bajarapamonae bajarapa-adobejawanë canacueneba ibocuenia, pijatomara pexanetsinexa. Bajarapijinia pacuenia, canacueneba asfaltowënëjawa pecatsanaponaenexa bajarapasebi-adobetonë, pecanacuenebiyaniwa pematajërëbipecatsanaejawa. ⁴Bajaraxuacujinae, bajarapamonae najumaitsi: «nacuenebanutsianatsi wajatomarayo,

r 10:19 *matatsënënenia...ununenia*: Matatsënënenia wowajumeta norte, ununenia pijinia sur. Taema «brújula», glosariojawata. **s 10:19** *pemutonenia*: Itsa jume, tamoyabereca.

bajarapacuenia piapiaboxaneto-ata, athëbëabetsia pepatsibonexa itaboxoja-wabetsia. Bajarapacuenia waxaitsi nacawënëliwaisitaena ayaijamatabëcuene wajaxainawanapaejawa mapanacuataje. Nexata, aponamatawenonaetsi tsane wajanawecuanatsanaejawa daxitanacuajawa», najai bajarapamonae.

⁵ Itsiata baitsi jane, bajarapamatacabita Jehová runaica petäenexa bajarapatomara, piapiaboxaneto yajawa catsanaeya pefaratabuataponaejawa.

⁶ Nexata, Jehová jamatabë-itsi: «Marapamonaeje caebitsaëto, caewirijume pecuaicuaijaiwinua. Bajaraxuata, bajarapamonae taxuxuaba bajarapapiapiaboxaneto penacuenebijawa. Nexata, bajarapamonae aeconoxae apotsisajinaetsi itsacuenejawa xua yabara copabijitsia bajarapabo penacuenebijawa.

⁷ Nexata, juya xanepana wajarunaejawareca wajajume-itothianaenexa pija-jume, jamatejema penajumeyapëtaeyaniwa», jamatabëjai Jehová. Pesiwajamatabëjumaitsicowëya exana baja.

⁸ Bajarapacuenia Jehová bajarapamonae nawecuanatsanaeya-exana caya-jatsiaya daxitanacuajawa. Bajarapamonae nexata copaba baja penacuenebijawa bajarapatomara.

⁹ Bajaraxuata, bajarapataxunae wënëruba Babel,^t tsipaji bajarajota Jehová jume-itothiana caejume pecuaicuaijaiwimi daxita bajarapamonae. Bajarapajume-itothianaewata, Jehová tocopata bajarapamonae natsanaeya penawecujainawanapaenexa daxitanacuajawa.

Noé pexénato Sem pemomoxi, yabara peliwaishi

(1Cró 1:24-27)

¹⁰ Mapamonaeje Sem-jawawerena penaexanaponaewi. Anijawaibeje itsa xaina petsewijawa mapanacua pebubutsicujinaeje, Sem xaina bajarapamatacabita cien pawai-beje. Bajarapamatacabijawa pijinia pexénato xaina pewënë Arfaxad ¹¹ Bajaraxuacujinae, Sem ponapona quinientos pawai-beje pematatsënëa. Icatsia, orijibia xaina itsamonae pexi, pebiijiwi, petiriawi-ata bajarapawainëjawalia.

¹² Arfaxad pijinia itsa xaina treinta y cinco pawai-beje, bajarapamatacabijawa xaina pexénato pewënë Sala ¹³ Bajaraxuacujinae, bajaraponë Arfaxad ponapona cuatrocientos tres pawai-beje pematatsënëa. Icatsia, orijibia xaina itsamonae pexi, pebiijiwi, petiriawi-ata bajarapawainëjawalia.

¹⁴ Sala-ata pijinia itsa xaina treinta pawai-beje, bajarapamatacabijawa xaina pexénato pewënë Heber. ¹⁵ Bajaraxuacujinae, bajaraponë Sala ponapona cuatrocientos tres pawai-beje pematatsënëa. Icatsia, orijibia xaina itsamonae pexi, pebiijiwi, petiriawi-ata bajarapawainëjawalia.

¹⁶ Heber-ata itsa xaina treinta y cuatro pawai-beje, bajarapamatacabijawa pexénato xaina pewënë Peleg. ¹⁷ Bajaraxuacujinae, bajaraponë Heber ponapona cuatrocientos treinta pawai-beje pematatsënëa. Icatsia, orijibia xaina itsamonae pexi, pebiijiwi, petiriawi-ata bajarapawainëjawalia.

¹⁸ Peleg itsa xaina treinta pawai-beje, bajarapamatacabijawa naexana pexénato Reu. ¹⁹ Bajaraxuacujinae, bajaraponë Peleg ponapona doscientos nueve pawai-beje pematatsënëa. Icatsia, orijibia xaina itsamonae pexi, pebiijiwi, petiriawi-ata bajarapawainëjawabelia.

t 11:9 Babel: Marapawënë pejumaitsiwënëje: «Jiwi apopenajumetaejawa», pejaiwënëtaxunae.

²⁰Reu itsa xaina treinta y dos pawaibeje, bajarapamatacabijawa xaina pexénato pewënë Serug. ²¹Bajaraxuacujinae, Reu ponapona doscientos siete pawaibeje pematatsënëa. Icatsia, orijibia xaina itsamonae pexi, pebiijiwi, petiriawi-ata bajarapawainëjawalia.

²²Serug itsa xaina treinta pawaibeje, bajarapamatacabijawa xaina pexénato pewënë Nacor. ²³Bajaraxuacujinae, bajaraponë Serug ponapona doscientos pawaibeje pematatsënëa. Icatsia, orijibia xaina itsamonae pexi, pebiijiwi, petiriawi-ata, bajarapawainëjawalia.

²⁴Nacor pijinia itsa xaina veinte y nueve pawaibeje, bajarapamatacabijawa xaina pexénato Taré. ²⁵Bajaraxuacujinae, ponapona Nacor ciento diecinueve pawaibeje pematatsënëa. Icatsia, orijibia xaina itsamonae pexi, pebiijiwi, petiriawi-ata bajarapawainëjawalia.

²⁶Taré pijinia itsa xaina setenta pawaibeje, bajarapawainëjawalia xaina-pona pexi acueyabi ponëbeje: Abram, Nacor, Harán.

Tarépijinëmijawawerena pepitsaponaewi

²⁷Mapamonaeje pepitsaponaewi Tarépijinëmijawawerena. Bajaraponëmi xaina acueyabi ponëbeje pexi, Abram,^u Nacor, Harán. Harán xaina pexénato pewënë Lot. ²⁸Harán-pijinë tëpa Ur tomarajawata,^v Caldea nacuata pe-ecaetomara, paxa Taré pewajënaeya. Bajaraponëmi tëpa panacuata naexana.

²⁹Abram nacojioba. Pita Sarai^w pijawanexa. Nacor-ata pijinia nacojioba. Pita Milca. Bajarapowa Harán-pijinë pexénatoyo, Isca pejuyapijiwa. ³⁰Sarai apoxainae pexi, tsipaji bajarapowa mawecowa.

³¹Taré pitsapa Ur tomarawecua pepatsinexa Canaán nacuyabelia. Barëpona pexénato Abram, pecopena Sarai yajawa. Pemomo Lot-ata barëpona. Itsiata bailsi jane, itsa pata Harán tomarata,^x abaxë bajarajota jinawanapa bajayajebi. ³²Nexata baja, belia Taré tëpa Harán nacuata, pepuaxainae doscientos cinco pawaibeje, patsinejewa Canaán nacuyabelia.

Dioso icatsia junatatsi Abram

12 ¹Itsamatacabi Jehová jumaitsi Abram-jawabelia:
—¡Wecuaponare nija-ira, nijamonae-ata, axa pijabo-ata, nepatsinexa pa-irabelia catsitajëtsijitsiatsi! ²Bajarajotalia, ayaibitsaëto nemomoxi naexanaponaena. Bajarapamonaeta xanë Jehovánë^y ayainacua capitsapae-najë. Ayaicuenia pexaniacuenia cayawenonaenatsi. Catocopatsianatsinua jiwi yayataeya pecawënëliwaisicacuaicuaijainënexa. Bajarapacuenia juya itsamonae pexaniacuenie natoyapëtaena xamë nejamatabëcuenie. ³Pamonae pijinia pexaniacuenia cato-exanaena, xanë bajarapamonae tocopatsianajë tayawenonaejawanexa pexaniacuenia. Pamonae pijinia pibisiacuenia cato-exanaena, bajarapamonae pijinia xanë tocopatsianajë pibisiacuenie petaenexa. Nexata, xamë nejamatabëcueneta, daxitanacuanëpijiwi^z

u 11:27 Abram: Bexëajawabelia Dioso wënëxanetatsi Abraham. Taema Gén. 17:5. **v 11:28 Ur tomarajawata:** Taema «Ur tomara», glosariojawata. **w 11:29 Sarai:** Bexëajawabelia Dioso wënëxanetatsi, Sara. Pamonabeje najuawënëxanetatsi. Taema Gén. 17:15. **x 11:31 Harán tomarata:** Taema «Harán tomara», glosariojawata. **y 12:2 Jehovánë:** Taema «Jehová», glosariojawata. **z 12:3 daxitanacuanëpijiwi:** Taema Rom. 4:11, Gál. 3:8,16,28; Apoc. 7:9.

natoyapëtaena pexaniacuene tayawenonaejawanexa —jai Jehová Abram-jawabelia.

⁴Bajaraxuacujinae, Abram pitsapa Harán tomarawecua, pacuenia Jehová jumaitsitsi pexanaenexa. Pejionë Lot-ata napona bajaraponë pepëta. Itsa Abram pitsapa Harán tomarawecua, xaina bajarapacujinaeta setenta y cinco pawaijeje. Bajaraponë pona pa-irabelia Jehová tsipaebatsi, pepatsinexa Canaán nacujawabelia. ⁵Bajaraponë barëpona pijawa Sarai. Pejionë Lot-ata yajawapona. Pecobecowëjawanë-ata daxita capona. Barëpona pamonaenatocomuata Harán tomarata bedajubicuenia, amoneya petonacuenebiwinexatsi. Bajarapamonae-ata yajawapona Abram Canaán nacuyabelia. ⁶Itsa pata baja Canaán-jawata, Abram najetaruca itsanacuaxijawa pepatsinexa Siquem tomarabelia. Patajopa itsajota xaina pinijinaejawa pexania-itacaënae, Morepijinë peponaponaetusatojowata. Bajarapamatacabi abaxë jinawanapa Canaán-pijinë pemomoxi ayaibitsaëto bajarapanacuata. ⁷Bajara-jota nexata, Jehová tsitanitajëta Abram:

—Mapa-ira yabara cajumaitsitsije tacarajutsinexa, nijamonaenexanua tsaponae newënamuto —jai Jehová.

Nexata, Abram bajarajota altar-jawa^a tonacuenebanuta Jehová, penajamatabëcuene-itajëtsinexa asiwaya peyaiyataejawa, tsipaji bajarajota tsitanitajëtatsi Jehová.

⁸Bajaraxuacujinae, pona petsutonëmuxuneneyojawabelia, patsutoyene-panata eca Betel tomara imoxoyojawatareca. Bajarajota, icatsia nacuenebanuta caxatabiaya pijacarpabo,^b tsipaji cae-epatoyo ponaponaejitsia Betel, Hai tomarabejetuatuajëjawata. Bajarajota-ata nacuenebanuta itsa-altar Jehová pewënëta. Pewateretsicujinae, wajëca Jehovájawabelia. ⁹Xuacujinae, icatsia naropota itsajawabelia. Pona be-axayocuenia tsaponae pepatsinexa Neguev-wënëtusatojawabelia.

Abram pona Egipto nacujawabelia

¹⁰Pacujinaeta Abram ponapona Neguev nacuata, nexata tocopiapatatsi pinijijanibocuene. Ajibi pexaejawa daxita bajarapanacuanëjawa. Bajaraponë nexata barëpona pijamonae Egipto nacuyabelia, penaponaponaenexa bajarapanacuatalia, tsipaji itsajota ponapona bajaraponë, bitso ajibi pexaejawa. ¹¹Itsa bajaraponë imoxoyota najetaruca Egipto nacua, Abram nexata jumaiti pijawa Saraijawabelia:

—Xanë raja yapëtaniji xamë pexaniawacuenemë. ¹²Itsa cataena Egipto nacupijiwi, cajumaiti tsane: «Mapapetiriwaje maponë pijawaje», caji tsane. Nexata, bajarajota nesiwanajamatabëxainaena tanebeyaxuabinexa. Xamë cacopatsiana, bajarapamonaeyajuwënënë juya pecapitsinexa. ¹³Bajarapitsicuene tanetocopiapatsiyaniwa xanëjawaberena, tanebeyaxuabiyaniwa xamë nejamatabëcuene, nexata jumaitsimë tsane mapacueniaje: «Bajaraponë raja pejuyapijiwanë», jamë tsane —jai Abram pijawajawabelia.

¹⁴Itsa baja pata Abram Egipto nacuyabelia, Egipto nacupijiwi Sarai yabara jumaitsitsi: «Pexaniawa bitso», siwajamatabëjaitsi. ¹⁵Tanetsinua

^a 12:7 altar-jawa: Taema «altar», glosariojawata. ^b 12:8 pijacarpabo: Taema «carpabo», glosariojawata.

faraón^c pijajiwi, pamonaē barē-eweta Egipto nacua. Nexata, bajarapamonaē pona Egipto nacua pewetsinējawabelia, petsipaebinexa Sarai pexaniawacuenē. Nexata, bajaraxuacujinaē Sarai caponatsi faraón peponaponaēbojawabelia.

¹⁶Nexata, Sarai pejamatabēcueneta, faraón tane xaniawaetsia Abram. Abram rajutatsi amoneyacuenia dajubimonae: oveja, vaca, burro, camello-ata yajawa. Rajutatsinua pebinēxi, petiriwaxi bedajubicuenia amoneya petonacuenēbiwinexatsi. ¹⁷Itsia baitsi jane, Jehová naneconitsiaya tocopata witanecuenē faraón pijajiwi yajawa, bajaraponē pecapatsixae Sarai pijabojawaberena pijawacuenia, Abram pijawami. ¹⁸Nexata, bajaraxua itsa tane Egipto nacua pewetsinē petocopiapatsijawatsi, junata Abram pejumaitsinexa:

—¿Detsa xuajitsia xaniawaetsia aponetsipaebimē? Maxuanē tanecatocopiapatsije. ¿Dexuajitsia aponejumaitsimē xaniawaetsia? «Mara powa taja-waje», aponejamē. ¹⁹Tsipaji xamē nejumaitsimē: «Mara tajuyapijiwaje», nejamē. «Tajawa raja», nejamē tsipae cajena —jai.

²⁰Nexata, pijajiwi itoroba faraón pejutsinexatsi Abram Egipto nacua-wecua, pebarēponaenexa pijawa, pijamonae yajawa, xua-ata xaina daxita pecaponaenexa.

Abram, Lot-beje, nawecuanatsatabeje

13 ¹Pacujinaeta Abram pitsapa Egipto nacua-wecua, pijawa yajawa pona, pecobecowē yajawa, penawiatsinexa icatsia Neguev-tusatojawabelia. Pejionē Lot yajawanawiarena. Daxitaxua xainabeje canajetarucabeje. ²Abram bajarapamatacabi bitso xaina pecobecowē. Xaina oro, palatanua, dajubi-ata ayaibitsaēto. ³⁻⁴Nexata, penawiatsicujinaē Neguev nacua-wecua, be-axayocuenia pona pepatsinexa icatsia Betel tomarayojawabelia. Bajaraxuacujinaē, pona icatsia itsajota bajayata copiyami ponapona Betel, Hai tomarabejetuatuajējawata, itsajota bajayata nacuenēbanuta altar-jawa. Bajarajota, icatsia wajēca Jehovájawabelia.

⁵Bajarapijinia pacuenia, Lot-ata bitso pexainaenē pecobecowē. Xaina ayaijawa oveja, vaca, ayaibitsaētonua jiwi amoneya petonacuenēbawana-paewitsi. Paxuanē Abram cuenejēpa pexinaecuenē. ⁶Panacuata bajaraponēbeje ponaponabeje, bitso baja apotoyacaējēpaetsibeje pexaejawa pijadajubinexa. Tsipaji bitso ayaibitsaēto xainaponabeje pijadajubi, nexata bepijiayo pona werenebiaba. Nexata, apocuenēcaējēpaetsibeje caejawata penajuaponaenexabeje paxuanēbeje. ⁷Belia, pamonaē Abram to-ewetatsi pijadajubi, pamonaē-ata Lot to-ewetatsi pijadajubi, bajarapamonaē itsajawata tonabeyabiabatsibeje, peto-ajibixaetsi dajubi pexaejawa, bitso penajuajinawanapaexae caejawata. (Bajarapamatacabita, bajarapaCanaán nacuaata abaxē jinawanapa Canaán-pijinē pemomoxi, ferezeowi-ata.) ⁸Nexata, itsamatacabi Abram jumaitsi pejionē Lot-jawabelia:

—Waxaitsibeje raja napijamonaenētsibeje. Apoxanepanaē liwaisi wajanatsixainaejawabeje wajajiwiibeje pejamatabēcuenē, tsipaji pamonaē cato-eweta nijadajubi, xanē-ata pamonaē neto-eweta tajadajubi,

nacatonabeyabiababeje pona yabara. Nexata, bajarapacuenia aponacatoxa-nepanaebeje wajanajuaponaenexabeje. ⁹Bajaraxuata najamatabëxai-naename, tsipaji ayainacua tsarucae mapanacuaje. Nawecuanatsatsianatsibeje baja. Pitsianame payenepanabelia catsixanepana neponaponaenexa. Xamë itsa ponaejitsipame wajacujuanenia, xanë juya ponaejitsipajë wajatsawenonenia. Itsa jume, xamë itsa ponaejitsipame mapayenepanabeliaje, xanë pijinia ponaejitsipajë beliaje. Nexata, bajarapacuenia nawecuaponaenatsibeje —jai Abram Lot-jawabelia.

¹⁰Nexata, Lot matatsënënaëcota daxitanacuayo, Jordán menematatu-jawawerecacujinae daxita Zoar tomarajawabereca. Bajarapatusato tane pexinaejawa pexaniameranë, pacuenia Jehová^d pijapabimi Edén nacuata, pacuenianua Egipto nacua. Nexata, tsitajëpatsi bepexania-ubipabixaneto penaxaniabijawa, pacuenia bajarapanacuabeje. (Jehová abaxë itsa apoweriapaë Sodoma, Gomorra tomarabeje, nexata pexaniaponaenaejawa tsanucacae bajarapanacuami.) ¹¹Nexata, bajaraponë Lot pita bajarapatusato, Jordán mene imoxoyojawata pebocaetusato peponaponaenacuanexa. Bajaraponë pona pemutuabereca. ^eNexata, bajarapacuenia Lot wecuanatsata paxuanë Abram, pewecuaponaenexa saicaya. ¹²Abram itsiata nacopata Canaán nacuata. Lot juya pona Jordán mene-itapayabereca pebocaetusato, Sodoma tomara imoxoyo pe-ecaejawabereca. Bajaraponë nacueneba pijataxunaeyo bajarapapexaniatusatopijitomaraxi canacujitsijawata. ¹³Bajarapamonaemi Sodoma tomarapijiwimi bitso piacujirubejewi Jehová pitabarata, tsipaji bitso Jehová apopejitsipaecueni pexanawanapaewi.

¹⁴⁻¹⁵Itsa baja Lot wecuapona paxuanë, bajarapamatacabijawa Jehová jumaitsi Abram-jawabelia:

—jDaxita mapanacuaje matatoyorotsia taema, maberecaje, mabetsiaje, belia-ataje! Daxita panacua taneme xua catsitajëtatsi, xamë rabaja nija-ira tsane. Nemomoxi-ata pijanacua tsaponae tsane dexitamatacabijawabelia pejinawanapaenexa. ¹⁶Bitso ayaibitsaëtoxaneto naexanaponaena nijamonaenemomoxi xanë tamatabëcueneta. Pacuenia caejiwiyo-ata atsapërë aponamata-ëjëtsicapaneapae, bajarapijinia pacuenia itsamatacabi itsi tsane nemomoxi. Itsajiwi-ata aponamata-ëjëtsicapaneapae tsane. ¹⁷jNexata, ponare daxita bajarapanacuajawa matatoyorotsia, berecaje, beliaje, betsiaje, neyapëtaenexa panacuaxaneto carajutsijitsiatsi! —jai Jehová.

¹⁸Bajarapacuenia nexata, Abram pijacarpabomi matajona, peponaenexa pamatawonotojawata ponapona Mamrewënë, bajarajota peponaponaenexa. Bajaraponë ponapona imoxoyo Hebrón tomarajawata. Pepatsicujinaelia, bajarajota icsatia Abram nacuenebanuta altar-jawa Jehová pewënëta.

Abram pejionë Lot capanepa pijawajabitsaëwecua

14 ¹Pamatacabi Abram ponapona Hebrón tomara imoxoyojawata, bajarapamatacabi Amrafel-wënë Sinar nacua pewetsinë. Arioc-wënë pijinia Elasar nacua pewetsinë. Quedor-laómer-wënë^f

d 13:10 *Jehová pijapabimi*: Bajarapawënë itsawënë Edén nacuata pebocaepabinexa, itsajota ponaponaabeje Adán, Evabeje. e 13:11 *pemutuabereca*: Itsa jume, pijinia tamoyabereca. f 14:1 *Quedor-laómer-wënë*: Taema «Quedor-laómer», glosariojawata.

pijinia Elam pepopeyanacua-ewetsinē, Tidal-wēnēnē-ata pijinia Goim pepopeyanacua-ewetsinē. Bajarapamatacabijawa, Quedor-laómer natsicue-yajunata bajarapamonae pebarēnawajabitsaētanajetarucaenexa itsanacua-nējawa. ² Bajarapamonae nawajabitsaēta pona itsanacuanē pewetsiwi jawabelia. Mapamonae jawabeliaje: Berawēnēnē, Sodoma pepopeyanacua-ewetsinē, Birsawēnēnē, Gomorra pepopeyanacua-ewetsinē, Sinab-wēnēnē-ata, Adma pepopeyanacua-ewetsinē, Semeber-wēnēnē, Zeboim pepopeyanacua-ewetsinē, Bela-ata pepopeyanacua-ewetsinē. (Itsawēnē Bela tomarayo, Zoar pijinia). Bajarapatomaranē pewetsiwi jawabelia nawajabitsaēta Quedor-laómer-bana. ³ Bajarapacincō ponēbeje peyanacua-ewetsiwi juya barēna-caetuata pijajiwi wajabitsaēwi caejawata, Sidim-wēnētusatojawata, Mar Muertowēnē pucaxanoto imoxoyojawata. ⁴ Bajaraponē Quedor-laómer picani namatacaitorobaponapona doce pawai bejecuenia bajarapacincō-nacuanēpijiwi, pecuene-amoneyabicujinae bajawata. Itsiata baitsi jane, trece pawai bejewawata bajarapamonae, cinco ponēbeje pewetsiwi, icatsia najamatabēxaina pewecuapitsapaejawa Quedor-laómer penamatacaitorobijawatsiweucia. ⁵ Nexata, catorce waita, Quedor-laómer pebarēnajamatabējēpaewi barēnaropota, pepatsinexa bajarapacincō ponēbeje pewetsinacuaxijawabetsia, bajarapamonae penawajabitsaētanajetarubenaenexa. Copiata pata Astarot Karnaim tomarabelia, itsajota jinawanapa refaítawi. ⁶ Bajarapatomarapijiwimi cuene-amoneyaba penabejawata. Bajaraxuacujinae, icatsia pona Ham tomarabelia pecuene-amoneyabinexa zuzitawi. ⁷ Pecuene-amoneyabicujinae zuzitawi, icatsia naropoba Save-quiriataim tomarabelia, itsajota jinawanapa emitawi. ⁸ Xuacujinae, icatsia nawajabitsaēta horeowijawabelia. ⁹ Bajarapamonae Seir nacuapijitsutonējawa pejinawanapaewi. Bajarapamonae-ata cuene-amoneyaba. Rēcēpeca bajarapamonae. Nexata, tajējawabelia barapona petusatonacuajawabelia. Pēcōpata pebaraponaewajawa El-Parán-wēnē ferabojawabelia. ¹⁰ Nexata, itsa barēnawiata petusatonacuawerena, peyajawaponaewi barēpata En-mispat nacuajawata. Itsawēnē pijinia Cades, panacuata jinawanapa amalecitawiriawi. Nexata, bajarapanacuapijiwimi tobijiana daxita pijabonēmi, pexaejawacuene-ata. Patomaranē namataēxēnapona namutua penajetarubenaewajawata bijiananajetarubena. Bajarapacuenia exana amorreowijawabelia-ata, pamonae jinawanapa Hazezon-tamar nacuajawata. Bajarapacuenia Quedor-laómer barēnabenajetaruca, pepatsinexa Sidim nacuayabelia.

⁸⁻⁹ Nexata jane baja, Sodoma pepopeyanacua-ewetsinē, Gomorra pepopeyanacua-ewetsinē, Adma pepopeyanacua-ewetsinē, Zeboim pepopeyanacua-ewetsinē-ata, itsanē pijinia Bela pepopeyanacua-ewetsinē pona Sidim-tusatojawabelia, bajarajotalia pebarēnawajabitsaētsinexa. Nexata, barēnabia bajarajotalia Quedor-laómer-jawabelia, pebarēnajamatabējēpaewijawabelia yajawa. Maponēxije barēnajamatabējēpa Quedor-laómer, Elam pepopeyanacua-ewetsinē: Tidal, Goim

g 14:5 *refaítawi*: Hebreojumeta raja refaíta itsa jai: «Piapiawi», pejaijume. Astarot Karnaim tomarayota jinawanapa piapiawi, nexata wēnērubatsi refaítawi. h 14:5 *zuzitawi*: Hebreojumeta mapejumaitsiijumeje: «Caecowēta apopejinawanapaewi», pejaijume. i 14:5 *emitawi*: Hebreojumeta mapejumaitsiijumeje: «Piayaiwi, piapiawinua», pejaijume. j 14:6 *horeowi*: Hebreojumeta mapejumaitsiijumeje: «Ibowajuanējawa pejinawanapaewi», pejaijume.

pepopeyanacua-ewetsinē, Amrafel, Sinar pepopeyanacua-ewetsinē, Arioc, Elasar pepopeyanacua-ewetsinē-ata. Bajarapamonaē xaina caejamatabē-cuene Quedor-laómer-jawabelia, nexata napata Sidim-tusatota. ¹⁰ Bajarapamatacabita, Sidim-tusatojawata penabenacuajawata, nawita pijinia mēthēanē. Bajarapamēthēanē wēnēca bemawitsapatojawanē, pijacuata peyanacuanaexanaemēthēanē. Nexata, penabematacabi Sodoma, Gomorra tomara pewetsinēbeje, joparecabeje pepanepaenexabeje bajarapamēthēanējawareca, pewecuanamatayabinexabeje pijawajabitsaē. Bajarapacuenia nexata, wecuapanepabeje. Itsanēanē pewetsiwi pijinia rēcēpa petsutonēja-wabelia pepanepaenexa.

¹¹ Pamonae pecuene-amoneyabiwi, daxita pexaejawacuene wecuacaponatsi, pecobecowējawanē-ata. Xuanē xaina penamatamotsijawanē wecuannotatsi, Sodoma tomarapijiwi, Gomorra tomarapijiwi-ata pijajawanēmi. Xuacujinae baja, pona. ¹² Bajarapamatacabita, Lot naponapona Sodoma tomarajawata, Abram pejonē. Bajaraponē-ata nexata nacaponatsi bajarapanabejawata. Daxita pecobecowējawanē yajawacaponatsi. ¹³ Itsiata baitsi jane, itsanē pepanepaenē bajarapanabejawawecua pona Abram-jawabelia, hebreonējawabelia,^k petsipaebinxaxa pejonē peliwaishi. Bajaraponē ponapona pexaniamomoto-itacaēnaejawata, Mamre pijatusatojawata, amorreowiyajuwēnēnē. Nexata, Mamre, pijamonaenēbeje yajawa, Escol, Aner-beje, jamatabēcueneyawenonatsi Abram.

¹⁴ Itsa bajarapacuenia Abram jumetane pejonē yabara peliwaishi pecaponaejawatsi, daxita pecobecowē yajawa, pijajiwi-ata yajawa, nexata Abram caetuata pamonae amoneya petonacuenebawanapaewitsi, pijabota penae-xanaponaewi, pepēbaraponaenexa, pebarēnawajabitsaētsinexa Quedor-laómer-banajawabelia. Bajarapabitsaēto trescientos dieciocho ponēbeje daxitata. Nexata jane baja, barēpitsapa bajarapamonaē, pebarajinaenexa pecaponaewitsi Lot. Nexata, pēcaxina Dan nacuaajawatalia, tsipaji bajarapamonaē bajarajotalia pata penacuera-ewetsinexa. ¹⁵ Nexata, merawi Abram bajarapamonaē barēnabia pepēbarajinaewijawabelia, itsajota bajarapamonaē jamatejema tsarēcēpae. Barapona Hoba nacuaajawabelia, Damasco tomara imoxoyojawata pe-ecaetomarayojawabelia. ¹⁶ Nexata, daxitaxuanē wecuannotatsi bajarapamonaē picani, juya nexata, Abram barēwecuapita daxita bajaraxuanēmi. Nexata, bajarapacuenia capanepa Abram pejonē Lot. Nexata, icatsia daxita xua pejonē pijajawami towecuapita. Capanepanua daxita petiriawi, itsamonaē bajarapatomaranēmi peyajawataicawimitsi.

**Melquisedec pexaniacuene yapētaeya-exana
Abram, xua taejitsia Dioso pewēnēta.**

¹⁷ Pacujinae Abram barēnawiatanajetarua pebarēnawajabitsaētsicujinae Quedor-laómer-bana, pecuene-amoneyabicujinae-ata peyajawapona-ponaewi, nexata Sodoma pepopeyanacua-ewetsinē lia pecaxitajarabinexa Abram, pecopiapitsinexa Savewēnētusatoyojawabelia.^l Bajarapatusatoyo

k 14:13 *hebreonē*: Heber-pijinē pemomoyajuwēnēnē, Gén. 11:14. Taema «hebreonē», glosariojawata. **l 14:17** *Savewēnētusato*: Bajarapatusato eca imoxoyo Jerusalén tomarayojawata Canaán nacuata.

pepopeyanacua-ewetsinē pijatusatoyo. ¹⁸ Bajarajotanuua, caxitajarabatsi Melquisedec,^m Salem pepopeyanacua-ewetsinē. Bajaraponē petonacuenebinē pepoDioso ayaijamatabēcuenenējawabelia sacerdotenēcuenia.ⁿ Penamataëxënaecujinaetsi, bajaraponē pijadorowecua jutsina pan-bëanē, vinora yajawa perajutsinexatsi Abram-bana. ¹⁹ Nexata, pexaniacue ne yapëtaeya-exanatsi Abram, xua taejitsia Dioso pewënëta. Jumaitsi mapacueniaje:

—Xamē Abram, Dioso bitso pexaniacuenia cayawenonae, ponē pepoDiosonē daxitawecua, ponē-ata athëbëpijicuene pexanaenē, irapijicuene-ata —jai.

²⁰ Icatsia, jumaitsi Dioso wënëxaniatsiya:

«Xanepana rabaja daxitajiwi pejumaitssabiabinexa

Diosojawabelia: ‘Diosomē, xamē pepoDiosomē daxitawecua, ayaijamatabēcuenenēmē,’ pejaitsabiabinexa, tsipaji bajaraponē cayawenona necuene-amoneyabinexa daxitapamonae ajenaconoxaeta barëcuene-amoneyabame», jai Melquisedec Abram-jawabelia pewënëbarëyataejawatatsi.

Nexata, bajarapaepatota Abram rajuta Melquisedec-jawabelia pewecuanotsiyajuwënëjawanëmi, pecuene-amoneyabiwimi pijajawanëmi. Rajutapona caejawayo diez xuayomibejajawayajuwënëjawami.^o

²¹ Bajaraxuacujinae, Sodoma tomara pewetsinē jumaitsi Abram-jawabelia:

—¡Abram, nerajure ëtajanacuapijiwi! Catonacopsiana daxitaxua pawecuanotame pataxinaejawanëmi —jai bajaraponē.

²² Itsiata baitsi jane, Abram jumaitsi:

—Xanē rabaja naliwaicajunuajë pewajënaeya Jehová pepoDiosojawabelia, nexainaeyajuwënëjawanëmi tanapitsiyaniwa. Bajaraponē Dioso ayaijamatabëcuene pexainaenē. Pexanaenëna athëbëpijicuene, irapijicuene-ata.

²³ Nexata, xuata xanē aponapitsinē tsane xamē xuanē nexainaeyajuwënëjawanë. Caejilumaëtoyo-ata, caecorreayo-ata, tanataxuxatatsi-sandalia pijamaëtoyonexa-ata aponapitsinē tsane cajena, mapacueniaje tanebarajamatabë-itsiyaniwamē itsamatacabijawabeliaje: «Xanē tamamatabëcuene bajaraponē pexainaenē naexana», tanebarajamatabëjamëyaniwa.

²⁴ Xanē apojitsipaenē caejawayo-ata tapitsijawa nijajawayajuwënëjawami. Itsiata baitsi jane, tanetonacuenebiwi amoneya pita pexaejawayajuwënëjawanē pexaenexa. Pamonae-ata pijinia neyanaba, Aner, Escol, Mamrebana, bajara-ëpamonae taneyanabixae nanota itsajawanē, xuanē pawecuanotajë papewecuanotsijawanëmi panecueyawi —jai Abram Sodoma tomara pewetsinëjawabelia.

Dioso najumeliwaicajunua Abram-jawabelia

15 ¹ Abram pejonē Lot pecapanepaecujinae, icatsia xuacujinae, Jehová jumaitsi Abram-jawabelia bemajitsinaebocuenia:

—¡Pëtsa junawame nijawajabitsaëwijawabelia, tsipaji xanē caya-caranatsiaponaponatsi peca-itsacueniabiyananiwa! Daxitaxua

m 14:18 *Melquisedec*: Hebreojumeta pejumaitsi jumeje: «TajaDioso pianecunijibitsaponapo-naenē», pejaijume. Icatsia, caxitajarabatsi Melquisedec yabara peliwaitsi Heb. 7:2-jawata

n 14:18 *sacerdotenēcuenia*: Taema «sacerdotewi», glosariojawata. **o 14:20** *caejawayo diez xuayomibejajawayajuwënëjawami*: Bajaraxua pewënë diezmo wowaijumeta. Itsawënë pijinia décima parte. Taema «diezmo», glosariojawata.

carajutsianatsi, pewajënaeyabelia cato-ayaijawa tsaponae tsane —jai Jehovah Abram-jawabelia.

²⁻³ Itsiata baitsi jane, Abram jumecanawiata mapacueniaje:

—Tajatuxanenë^p Jehovah, ¿detsa pitsijawa yabara netoxanepanaejitsipa ayaijawa taxainaponaenexa? Xamë baja yapëtaneme apotaxinaejawa taxi, tsipaji xamë abaxë aponerajutsimë caejiwi-ata taxënatonexa, xua xainaponajë tawajënaeyabelia pecanacopatsijiwinexa. Bajaraxua meta canacopatsipa ponë xanë witsatajë tanetonacuenebabiabinënexa amoneya, Eliezer, Damasco tomarapijinë —jai Abram Jehovahjawabelia.

⁴ Itsiata, Jehovah jumaitsi Abram-jawabelia:

—¡Jume raja! Xamë raja xainaename itsamatacabi peponexënato. Bajaronë raja canacopatsiana. Itsanë raja peponexënatowecua apocanacopatsi tsane —jai icatsia Jehovah.

⁵ Jehovah nexata junata pebarëpitsapaenexa wayafuabelia. Jumaitsi:

—¡Abram, taema athëbëabetsia! ¡Namata-ëjère tulupu, itsa cacuenecäëjëpa nenamata-ëjëtsijawa! Pacuenia tulupu aponamata-ëjëtsicapanepaemë, bajarapacuenia itsi tsane itsamatacabi nemomoxi —jai Jehovah.

⁶ Bajarapaepatota nexata, Abram jumexaniatane Jehovah najumecapanepaeya pejumaitsijawatsi. Bajaraxuata, Jehovah xaniawaetsia bajaraponë ane-conijibia tanetsi. ⁷Nexata, Jehovah jumaitsi:

—Xanë rabaja Jehovahänë, Ur tomara, Caldeomonae pijanacuata pe-ecaetomarawecua tacacapitsapaenë, mapa-iraje tacarajutsinexaje, newënamuto nemomoxi pecanacopataponaenexa —jai Jehovah.

⁸ Abram icatsia jumaitsi:

—Tajatuxanenë Jehovah, ¿denexata pacuenia yapëtaenajë xanë tanerajutsi-iramë tacanacopatsinexa, tamomoxi-ata pecanacopataponaenexa tawënamuto? —jai Abram Jehovahjawabelia.

⁹ Jehovah jumecanawiata. Jumaitsi:

—¡Netocapare dajubixi, becerro pesorowato, cabra pesorowato, oveja-ata pebito, acueyabi pawaijebe pexainaenëanë! Capatsianamenua anija-ucucutowirianëbeje yajawa. Caenëyo tsiquiriwiranëyo. Itsanëyo pijinia pepo-ucucutoyo pejananëyo —jai Jehovah.

¹⁰ Bajarapacuenia nexata, Abram pejumaitsicueniatsi tocapata daxita Jehovahjawabelia. Caenëyo canacujitsia pebeyaxuabicujinae, tupatiti-biabapona, namata-enetsia caetupayo canacujitsia pebuataponaenexa corobotsiaya^q anijabërëtohejecuenia. Itsiata, bajarapacuenia apo-exanae ucucutowirianëyobejewawabelia. Saya daxitanëyobeje buatetabeje. ¹¹ Bajara-pajebitupanë nexata tsimaxëpatsipatsica quequeremonae picani pexaenexa. Itsiata baitsi jane, Abram yajiwiyorotapona. ¹² Itsa baja merawiyo tsaponae, Abram bajarapaepatota bitso ayaicuenia majitabeca. Pemajitabecaejawata

p 15:2-3 *Tajatuxanenë*: Bajarapajunatsicuenie hebreojume pecuaicuaijaiwi raja, «adonai», jai. Bajarapajumecuenia Dioso yabara itsa jumaitsi, najamatabëcuene-itajëta «Daxitacuenie Pijatuxanenë», pejaiwënyo. Taema «Tajatuxanenë Dioso yabara», glosariojawata. q 15:10 *pebuataponaenexa corobotsiaya*: Bajarapacuenia exana penajamatabëcuene-itajëtsinexa pepacuenie pexanaejawanexa xua namata-enetsia najumaitsi-beje najumecapanepaeya pexanaenëxabeje. Xaniawaetsia neyapëtaenexa bajaraxua yabara taema «penaliwaisicajonecuene bajayanacuapiji-wimi», glosariojawata.

nexata, Abram matatoyorotsia najetarucatsi pequirijaimerauwo. Nexata, bajaraponē bitso junawa.

¹³Nexata, Jehová jumaitis Abram-jawabelia:

—Beyapētaneme mapacueneje: Nemomoxi itsamatacabi jinawana-paena itsanacuayabelia mapanacuawecuaje. Bajarapanacuatalia amoneya tonacuenebawanapaena^r bajarapanacuapijiwi. Bitso ayaicuenia bejiobia-exanabiabianatsi^s cuatrocientos pawaijebecuenia. ¹⁴Itsia baitsi jane, xanē naneconitsia-exanaenajē^t patomarapijiwi bajarapacuenia exanatsi amoneya petonacuenebabiabixae. Itsia, bajaraxuacujinae nemomoxi pitsapaena bajarapacuenemiwecua ayaijawa pecobecowē yajawa.^u ¹⁵Xamēnexa pijinia cajumaitisitsi: «Xamē rabaja tēpaename itsacuenenejewamē, nepuaperu-junēyo tsane. Bajarapacuenia nexata, cabuatsiana nijamonaemi yajawa», cajiatsi pecatocopiapatsiucene yabara. ¹⁶Nemomoxi pijinia jinawanapaena bajarapanacuata penaexanaponaewi cuatro papemomoxibitsaētobejewawabelia,^v baitsi cuatrocientos pawaijebewawabelia. Nexata, bajarapamatacabi-jawabelia matapania xanē icatsia nawiabia-exanaenajē nemomoxi mapanacuayaberenaje. Bajarapaepatota jane baja, amorreomona bitso pibisiacuenia exanawanapaena taitabarata. Itsia, abaxē ajenaconoxae apotocopiapatsitsi paneconita naneconitsia-exanaejitsianē^w —jai Jehová najumecapanepaeya.

¹⁷Itsa baja merawijitsia, ajena^a aitatatu, bajarajota naitajēta pexaniatsē-xēboyo, waxiyojawawetsina pepitsapaejawa. Yajawanaitajētana^a pitayot-sicunu tajuitsiaya pecaponaejawa. Bajaraxuayobeje najetarucabeje pija-cuata bajarapadajubitupaxi pejebituatuajējawa. ¹⁸Bajarapaepatota, Jehová najamatabēcuene-itajēta penajumeliwaisicajonejawa Abram-jawabelia ira perajutsijawanexa. Nexata jumaitis:

—Mapa-iraje rajutsianajē nemomoxijawabelia, Nilo menejawaweliacujinae pepatsinexa Éufrates menejawabelia. Bajarapa-iratusato rajutsianajē pijanacuanexa. ¹⁹⁻²¹Marapamona^eje pejinawanapaenacuanē yabara jumait-sinē tarajutsinexa nemomoxijawabelia: pijanacuanēmi ceneowi, cenezeowi, cadmoneowi, heteowi, ferezeowi, refaitawi, amorreowi, cananeowi, gerge-seowi, jebuseowi. Daxita bajarapamona^e pijanacuanēmi rajutsianajē nemomoxijawabelia pejinawanapaenacuanexa —jai Jehová Abram-jawabelia.

Agar pexēnato Ismael, yabara peliwaisi

16 ¹Sarai apotoxinae pexi Abram-jawabelia. Itsia baitsi jane, bajarapamatacabi xaina amoneya petonacuenewiatsi, Egipto nacuapijiwa. Bajarapowa pewēnē Agar. ²Nexata, Sarai jumaitis Abram-jawabelia:

—iNejumeta^aen^a, itsaliwaisiyo cajumaitisijitsiatsi! Xanē raja aponetocopatsi Jehová taxi taxainaenexa xamējawabelia. Itsia baitsi jane, catocopatsianatsi Agar nebarēponaponaenexa benijawacuenia, amoneyacuenia

r 15:13 amoneya tonacuenebawanapaena: Taema Éxo. 1:11. **s 15:13** bejiobia-exanabiabianatsi: Taema Éxo. 1:14-16; 2:23-24; 5:6-19. **t 15:14** naneconitsia-exanaenajē: Taema Éxodo capítulo 7 capítulo 12-jawabelia **u 15:14** ayaijawa pecobecowē yajawa: Taema Éxo. 12:35-36.

v 15:16 cuatro papemomoxibitsaētobejewawabelia: Wowaijumeta baitsi cuatro pageneracionebecujinae. Mapacuenia itsije: Bajarapamona^e pewartapacujinae Egipto nacujawabelia, nexata pewartapawimi cuatronēta pemomoxijawabelia matapania nawiabijitsia icatsia Canaán nacua-yabereña. **w 15:16** paneconita naneconitsia-exanaejitsianē: Taema Deut. 9:5.

tanetonacuenebabiabiwa. Belia bajarapowajawabelia xainaejitsipajë betaxi-jiwiyonexa^x —jai Sarai pamona Abram-jawabelia.

Nexata, bajarapaepatota Abram jumejejai xua pijawa jumaitsitsi. ³Bajara-ponë bepjawacuenia^y baja pita Agar, Egipto nacuapijiwa. Sarai rajuta Abram pepitsinexa Agar pacujinae xaina bajaraponë diez pawaibeje Canaán nacuata peponaponaecujinae. ⁴Abram nexata imoxoyoba bajarapowa. Agar nexata nacoxita. Itsa baja bajarapowa nayapëtane penacoxitsijawa, nexata be-ayaijamatabëcuenewa natane pijatuxanewawecua. Bajaraxuata, bijiaya naëcota pijatuxanewa.

⁵Nexata, Sarai jumaitsi Abram-jawabelia:

—Xamë raja nejamatabëcuene Agar nitoyanaëcota. Xanë baitsi picani tajacuata carajutatsi bajarapowa nijawanexa. Itsiata baitsi jane, bajarapowa xanëwecua penacoxitsixae be-ayaijamatabëcuenewa natane. Bajaraxuata, jitsipajë Jehová wajanacajumaitsijawabeje itsa meta xanë tajamatabëcuene, itsa jume, xamë meta nejamatabëcuene —jai Sarai Abram-jawabelia.

⁶Nexata, Abram jumecanawiata:

—¡Abaxë jane nejumetaema! Xamë jane amoneya pecatonacuenebabiabiwa bajarapowa. Pacuenia catsitaxanepana nexanaenexa bajarapowajawabelia, bajarapacuenia exanaename —jai.

Nexata, Sarai jejai. Itsiata baitsi jane, Sarai itoyanaëcota Agar. Nexata, conitabiaba. Nexata, belia Agar anaeya wecuapona itsajawabelia. ⁷Bajara-apaepatota, pewecuaponaejawata, petusatonacuatalia caxitajarabatsi Jehová pija-ángelnë.^z Itsajota irawetsina mera pepitsapaemëthë eca, bajarapamëthëjawatalia bajarapowa caxitajarabanutatsi tajëjawatalia. Bajarapamera pepitsaparucaemëthë eca Shur tomarajawabelia peponaenamutomuxunenetalia ⁸Nexata yanijobatsi:

—Agar, amoneya netonacuenebiwa Sarai, ¿Detsa werena poname? ¿Detsa belia poname? —jai ángelnë. Nexata, bajarapowa jumaitsi:

—Wecuaponajë raja tajatuxanewa Sarai —jai Agar.

⁹Nexata, Jehová pija-ángelnë jumaitsi bajarapowajawabelia:

—¡Icatsia, nawiaremelia neponaponaenexa nijatuxanewajawatalia! ¡Daxi-taxuanë ca-itoroba, jumecowënëtsianame! —jai Jehová pija-ángelnë.

¹⁰Icatsia, Jehová pija-ángelnë jumaitsi tsanucacae Agar-jawabelia:

—Xanë raja tajamatabëcueneta nemomoxi ayaibitsaëto pitsapaponaena. Itsajiwi-ata aponamata-ëjëtsicapanepae tsane. ¹¹Yacotamë rabaja nexënatonëyo. Bajaraponëyo wënërubianame Ismael,^a tsipaji raja Jehovánë cajumetanetsi newajëtsijawa, pecabëjiobia-exanaejawata.

¹²»Bajaraponë itsa naweretsiana, apojitsipae tsane itsajiwi-ata pimo-xoyotsinexatsi. Pacuenia caballo pejunawinë jamatabëcuene-itsi, bajarajamatabëcuene-itsi tsane. Barënenabatsi itsamonae. Bajaraponë pijinia juya barënenabena itsamonaejawabelia. Nexata, bajarapacuenia pewajënaeyabelia pemomoxi-ata cuenecatsitecaenatsi, pijamonaejawaberena

x 16:2 *betaxijiwiyonexa*: Taema «betaxijiwiyonexa», glosariojawata. Maparucacae itsacuenesucristo nacatocopata. Taema 1Ti 3:2,12. y 16:3 *bepjawacuenia*: Taema «concupina», glosariojawata. Maparucacae itsacuenesucristo nacatocopata. Taema Mt 19:3-8, 1Ti 3:2,12; Tit. 1:6. z 16:7 *Jehová pija-ángelnë*: Taema «Jehová pija-ángelnë», glosariojawata. a 16:11 *Ismael*: Ismael mapejumaitsiwënëje: «Dioso raja nejumetane», pejaiwënë.

pebarēnabenexa. Bajarapacuenia siwanajamatabēxainae-atatsi tsane pijamonae, bajaraponē itsiata, acuenesā tsabiabi tsane pecuene-amoneyabiyaniwatsi —jai āngelnē Agar-jawabelia.

¹³Bajarapacuenia pebarēcuaicuiaiixaetsi Jehovā pija-āngelnē, Agar bajaraponē wēnērubiaya jumaitsi:

—Xamē cajena Diosomē tanetaenēmē —jai bajarapowa. Icatsia, bajarapowa jamatabējumaitsi, «Dioso tae-atanē, abaxē itsiata, asaēnē tsaponaponaē», jamatabēcuenenabenajacaeya jai Agar. ¹⁴Bajaraxuata, pameramēthē pitsaparuca itsajota bajarapowa taenutatsi, wēnēruba pijinia, «Piasaētsaponaponaenē, ponē wajanacataenē, pijameramēthē», ^b pejaicuenia wēnēruba, tsipaji bajarajota tsitanaitajētatsi Agar. Bajarapamera pepitsapaemēthē eca Cades, Bered tomarabejetuatuajējawata.

¹⁵Penawiatsicujinae pijatuxanewajawabelia, nexata jane baja, Agar toxaina Abram pexēnato. Bajaraponēyo Abram wēnēruba Ismael. ¹⁶Pacujinae Abram xaina ochenta y seis pawaibeje, Ismael baja naexana.

Dioso itoroba Abram penabo-upiperabēcaucubia-exanaenexa

17 ¹Pacujinaeta Abram xaina noventa y nueve pawaibeje, bajarapaepa-tota Jehovā icatsia tsitanaitajētatsi. Jumaitsitsi mapacueniaje:

—Xanē raja Diosonē daxitawecua tacuenesaēnē. ¡Xamē ponaponare ane-conijibia taitabarata! ²Bajarapacuenia itsa exanaename, xanē najumeliwaisicajonenajē xamējawabelia tacayawenonaenexa, nexainaponaenexa ayai-bitsaēto nemomoxi newajēnaeyabelia —jai Jehovā Abram-jawabelia.

³Nexata, bajarapaepatota Abram irataeya bocajunua yayataeya DIOSO. Bajarapacuenia exana paepatota abaxē DIOSO barēcuaicuiai jai tsanucaetsi mapacueniaje:

⁴—Maraxuaje najumecapanepaeya najumeliwaisicajonejitsianē xamējawabelia: Xamējawawerena pitsapaena nemomoxi itsanacuanēpijiwi penaexanaponaenexa. Apocaenacuapijiwinexa, itsanacuanēpijiwinexa-ata pitsapaena xamējawawerena. ⁵Nexata baja, aponewēnē tsane Abram. Maweliacujinaeje newēnē tsane Abraham, ^c tsipaji xanē tajamatabēcuenē nemomoxi ayai-bitsaēto xaneto xainaename itsanacuanēpijiwinexa. ⁶Capitsapaponaenajē nemomoxi pewajēnaeyabelia ayai-bitsaēto penaexanaponaenexa, peyacaējē-paponaenexa daxitanacuanējawa. Itsamonae nemomoxiyajuwēnēwi nacua-ewetsiwi naexanaena. ⁷Paliwaisi xanē najumeliwaisicajunuajē ajena xamējawabelia, bajarapacuenia exanaenajē daxita nemomoxijawabelia-ata. Xanē raja nijaDIOSonē tsane daxitamatabijawabelianexa, icatsia newēnamuto nemomoxi-ata pijaDIOSonē tsane. ⁸Xamē carajutsianatsi daxita Canaán nacua, panacuata ponaponame. Nexata, nemomoxi-ata rajutsianajē bajarapanacua pijanacuanexa, xamē nexi, nemomoxi-ata pexi bajarapanacua pecanacopataponaenexa newēnamuto daxitamatabijawabelianexa. Bajarapamonae xanē pijaDIOSonē tsaponaponaē tsane —jai DIOSO.

b 16:14 *Piasaētsaponaponaenē, ponē wajanacataenē, pijameramēthē*: Hebreojumeta wēnēruba «Beer-lajairoi», pejaiwēnē. Bajarapacuenia Agar wēnēruba tsipaji Dioso barēcuaicuiai jatsi.

c 17:5 *Abraham*: Hebreojumeta Abraham itsa jumaitsi, mapitsijamatabēcuenē xainaje: «Nacua-nēpijiwi pijasalinainēnexa», pejaijamatabēcuenē.

⁹Nexata, icatsia DIOSO jumaitsi Abraham-jawabelia:

—Xamē nejumecowēnētsianame paliwaiši naliwaisicajonejitsianē xamēja-wabelia, nexanaenexa xamē, daxita nijamonae, nemomoxi-ata yajawa.

¹⁰»Maraxuaje paxamējawabelia pacanajumeliwaisicajonejitsiatsi, bajaraxua padaxitamēnexa. Bajaraxuata, toxanepanatsi daxita pebi-jiwi, paxamējawata pejinawanapaewi, panenabo-upiperabēcaucubia-exanaenexa. Nexata, daxita nijamonae, nemomoxi-ata, bejumecowēnēta bajarapaliwaiši. ¹¹Itsa nexata panabo-upiperabēcaucubia-exanaenexa padaxitamē, panajamatabēcuene-itajētsianame panewitota caejamatabēcuene panexainaejawa paliwaiši pacanajumeliwaisicajunuatsi ajena. Bajaraxua raja nacato-itajētsiana wajanajumeliwaisicajonejawa, pacuenia xanē patacato-exanaejawanexa, bajarapijinia pacuenia, paxamē-ata pataneto-exanaejawanexamē. ¹²Nexata, bajaraxuata mapamatacabijawaweliacujinaeje, daxita pebinēxi pabo-upiperabēcaucutaponaenexa, itsa xainaena penaexanaecujinae ocho pamatacabibeje. Bajarapijinia pacuenia, pa-exanaenexa pamonaē pejewaxinēxi naexanaponaena amoneya pecatonacuenebiwajawabelia, pamonaē-ata panatocomuacae-name itsanacuanējawa bedajubicuenia, amoneya papecatonacuenebiwinexa. Bajarapamonaējawabelia-ata bajarapacuenia exanaenexa, apopanijamonaeyajuwēnēnē-ata. ¹³Daxita bajarapamonaē panebo-upiperabēcaucutaponaenexa peyasajinaeyaniwa itsajiwi-ata panijabonēja-wata pejinawanapaewi daxitamatacabijawabelianexa. Nexata, bajarapacuenia payapētaenexa itsa panabo-upiperabēcaucubia-exanaenexa, pepacuene xanējawaberena patanenaliwaisicajonejawamē, xanē-ata patacanaliwaisicajonejawa daxitamatacabijawabelianexa, waja-exanabiabinexa namata-enetsia xua najumecapanepaeya najumaitsi. ¹⁴Ponē baitsi jane aponabo-upiperabēcaucutsia-exanaē tsane, nexata panawecuacapsapaenexa, bajarapijinia pacuenia apotajajiwiwajuwēnēnēcuenia^d panetaenexa. Bajarapacuenia pa-exanaenexa, apotanejumeyaiyataexa xua paca-itorobatsi pane-exanaenexa —jai DIOSO.

¹⁵Icatsia, DIOSO jumaitsi Abraham-jawabelia:

—Nijawa raja ajenaconoxaeta baja apoSarai tsane. Mapamatacabijawaweliacujinaeje bajarapowa pewēnē tsane Sara.^e ¹⁶Bajarapowa pexaniacuenia yawenonaenaya cuenecaējēpaeya-exanaenajē. Nexata, nacoxitsiana. Carajutsianatsi nexēnatojiwiyo bajarapowajawabelia. ¡Xaniajanē cajena! Nexata, bajarapowajawawerena pitsapaponaena pemomoxi itsanacuanēpijiwinexa. Bajarapowajawata, pitsapaena tomaranē pewetsiwinexa —jai najumecapanepaeya DIOSO Abraham-jawabelia pijawa Sara yabara.

¹⁷Nexata, Abraham irataeya bocajunua yayiataeya. Jējējajai bēpēnēa DIOSO pejumaitsiawatatsi. Saya penajamatabēxainaejawata, bajaraponē jamatabējumaitsi mapacueniaje: «¿Baja tsaeta cien pawaiubeje pexainanē

d 17:14 *apotajajiwiwajuwēnēnēcuenia*: Bajarapacuenia itsa jumaitsi, judiowi yapētane pacuenia betane Dioso apopejumecowēnētsijiwiyo bepetēpaenēcuenia, penajua-exanaeyaniwa itsacuene-jawayo. Dioso-ata bepetēpaenēcuenia taejitsiatsi peyawenonaeyaniwatsi. Taema «Penawecuacapsapaenjawa», glosariojawata. **e 17:15** *Sara*: Hebreojumeta Sara itsa jumaitsi, mapitsijamatabēcuene xainaje: «Nacua-ewetsinē pexēnatoyo», pejaijamatabēcuene. Nacua-ewetsiwi pexi bitso peyaiyataewitsi tsabiabi itsamonaē pexiwecua.

caējēpatsi pexi pexinaejawa?», jamatabējai. Icatsia, jamatabējumaitsi: «¿Baja tsaeta Sara perujuwayo, noventa pawaibeje pexinaeawayo-ata, caējē-patsi pexi pexinaejawa?», jamatabējai Abraham jamatabēcuenējējājajaiya.

¹⁸ Abraham nexata jumaitsi DIOSO jawabelia:

—Nexata, meta Ismael canacopatsiana tanenaliwaisicajonejawamē taneyawenonaeyapaebijawanexamē, itsa catsixanepana —jai Abraham.

¹⁹ Itsiata, DIOSO jumecanawiata:

—¡Jume raja! Xanē xua yabara cajumaitsi, Sarajawata ponēyo xainae-jitsiamē yabara jumaitsinē. Nexata, bajaraponēyo wēnērubianame Isaac.

Bajaraponē rajane baja canacopatsiana tacanaliwaisicajonejawa. Tsitecaeya canacopatsiana pewajēnaeyabelia pemomoxijawabelia-ata daxitamatacabi-jawabelianexa —jai DIOSO.

²⁰ »Pacuenia nejumaitsimē Ismael yabara, cajumetanetsi. Bajaraponē-ata pexaniacuenia cuenecaējēpaeya-exanaenajē pexainaponaenexa pexi ayai-bitsaēto, orijibia pemomoxi-ata ayai-bitsaēto. Nexata, bajarapamonae naexa-naponaena pecunuanacuapijiwinexa. Bajaraponējawawerena pitsapaenanua doce ponēbeje pexi¹ pebijijiwi. Bajarapamonae penamatacaitorobiwi tsane, pijamonae peyanacua-ewetsiwinexa. ²¹ Xua itsiata canaliwaisicajunuatsi tacarajutsinexa, canacopatsiana Isaac, ponēyo xainaename Sarajawabelia caewaicujinae —jai DIOSO.

²² Itsa baja DIOSO najumewereta pebarēcuaicuajijawatsi, Abraham wecuaponatsi. ²³ Nexata, bajarapamatacabi Abraham pexēnato Ismael bo-upiperabēcaucuta. Bajarapamatacabi pijinia, daxita pebijijiwi bo-upiperabēcaucuba pijabota pejinawanapaewi-ata. Daxita penawe-rtsiwi, pewējēawi petonacuenebiwitsi, pamonae natocomuaca beda-jubicuenia amoneya petonacuenebiwinexatsi, bajarapamonae pexi-ata, bo-upiperabēcaucubia-exana. Daxita bajarapacuenia exana, pacuenia DIOSO itorobatsi pexanaenexa. ²⁴⁻²⁶ Abraham bajarapacujinae xaina noventa y nueve pawaibeje. Pexēnato Ismael pijinia xaina trece pawaibeje. Bajara-pacujinaeta, nabo-upiperabēcaucutsia-exanabeje caematacabita. ²⁷ Bajara-pamatacabitanua, pebijijiwi pejinawanapaewi pijabota, penatocomuatsiwi, pexi-ata, daxita bo-upiperabēcaucubia-exana.

Abraham siwaxainatsi ángelewi

18 ¹ Bajaraxuacujinae, icatsia itsamatacabi Abraham tsitanaitajētatsi Jehová. Bajarapamatacabi, ponapona pematawonotoyo pitacā-naebēxēpanata. Mamre canacujitsita itsajota ponapona copiaya. Nexata, bejamatabēcuenē matoneje-epatota, Abraham eca baupamuxuneneta pijacarpabo-itapajawata. ² Nexata, Abraham nawēyota naēcotsiaya namutuabelia. Tane acueyabi ponēbeje penajetarubenaejawa pijaboyaberena. Itsa tane, nexata bajaraponē nonotapuna naxatsiayo pecopiapitsinexa. Bajara-paepatota, irataeya bocajunua yaiyataeya. ³ Yaiyataeya jumaitsi:

—Tajatuxanenē, pexaniacuenē cawajētatsi taneto-exanaenexamē. ¡Cae-cuenia pētsa abaxē paponame! ⁴ Itsa paxamē pacatsitaxanepana, itorobianajē mera papecatocapatsinexa panenataxuquiatsinexa. Xuacujinae,

cae-epatoyo pa-enaename mapanaejawabëxëpanataje panenacuera-ewetsinexa. ⁵Nexata, panepatsixae xanëjawata, itsajota ponaponajë bewelianenë, xanë bepanijajiwitonëcuenia paca-ewetsianatsi. Carenanënua tsane panexaejawanexa, jamatejema panesaëpatsinexa. Belia pajamatabëcuene-faefaenaejitsipame namuto paneponaejawa. Panexaecujinae, panacuera-ewetsianame. Bajaraxuacujinae, icatsia paponae name itsabelia panajetaru-bename —jai Abraham. Nexata, bajarapamonaë jejai.

—Xanepana bitso —jai bajarapamonaë.

⁶Abraham kujinaelia pijabojawabelia. Joneya itsajota Sara nuca. Jumaitsi bajarapowajawabelia:

—¡Naxatsiayo! ¡Maxua pire veinte pakilobeje trigobenoje, nexanaenexa pan-bëanë! To-exanaename pan bajarapamonaë pexaenexa —jai.

⁷Bajaraxuacujinae, Abraham kujinaelia itsajota xainanuba pijabacabitsaëto. Bajaraponë nexata itapetsiaya waetaba pexaniabecerro pejananë. Bajaraponëyo rajuta pijajiwitonëjawabelia, petobeyaxuabinexatsi, petojayabinexatsinua bepijiayo pexaejawa. ⁸Bajaraxuacujinae, daxita pesetsicujinae, to-eta pesiwaxainaewitsi bajarapasetsiwi, itsawiriapexaejawanë yajawa. Rajuta lecheramita pexanaematabë,⁹ lechera yajawa piapaenexa. Nexata, Abraham, petsananucaenë, jamatabëcuenebarëyaya ewetanuca, petsanaponaenexa pexaejawa pexaeyenaejawata naejawabëxëpanata.

⁹Itsa baja najaniwerene, pesiwaxainaewitsi Abraham yanjibatsi:

—¿Detsa jota eca nijawa? —jaitsi. Bajaraponë nexata jumaitsi:

—Xuayolia nuca carpabo-ënëalia —jai Abraham.

¹⁰Nexata, bajarapamonaeyajuwënënë, itsanë jumaitsi:

—Ajenaconoxae pawai icatsia patsianajë patacasiwaxainaenexabeje. Bajarapacujinaeta Sara pexënato xainaena —jai itsanë.

Bajarapaepatota pijinia, Sara nuca pijacarpabo baupajawata Abraham pepënëwerena. Namuxuna-ewetanuca xua bajarapamonaë naliwaisita.

¹¹⁻¹²Bajaraxua itsa jumetane bajarapowa, bëpënëa jamatabëcuenejëajajai. Baitsi bajarapacujinaeta Abraham, Sarabeje bitso baja perujujiwiyo-beje. Nexata baja, Sara najanacopata. Nexata, jamatabëjumaitsi bajarapowa: «¿Denexata pacuenia xanë nacoixitsipajë tanacoxibarëyataenexa, itsa baja bitso paperujujiwiyonëbeje?», jamatabëjai tsanucacae bajarapowa, tsipaji baja natanebeje perujujiwiyobejecuene. ¹³Itsia, Jehovah jumaitsi Abraham-jawabelia:

—¿Detsa xuajitsia Sara jëajëajai bajaraxua yabara? ¿Nejume-aeba tsaja bajarapowa pexinaejawanexa pexënatojiwiyo, perujuwa-ata? ¹⁴Xamë yapëtaneme ajibi itsacuenejawa Jehovah petsita-ayapëbejajawatsi pexanaejawanexa —nayabarajai pijacuata. Icatsia, mataropotsia jumaitsi:

—Xaniajanë cajena pacuenia cajumaitsitsi. Pamatacabijawa pacatocaëjëtatsi, icatsia patsianajë. Nexata, bajarapacujinae baja, Sara xainaena pexënatonëyo —jai Jehovah Abraham-jawabelia.

¹⁵Bajaraxua Sara pejumetaejawata, bitso junawa. Jamatabënayawajunua-xaina picani. Bajaraxuata, Sara jumaitsi:

—Xanë apojëajëajanë tsanucacae —jai.

Itsiata pijinia, Jehovah jumecanawiatatsi. Jumaitsi:
—Xamê cajena cayapêtanetsi nejëajëajaijawa —jai.

Abraham towajëca Diosojawabelia Sodoma tomara nacuapijiwi

¹⁶Bajaraxuacujinae baja, Abraham pesiwaxainaewitsi nonobapuna, peponaenexa icatsia Sodoma tomarabelia. Abraham napênalia yanabiaya bajarapamonae, penapëjibinexatsi. ¹⁷Nexata, Jehovah jamatabëjumaitisi Abraham yabara: «Apoخانepanae baja tawecuamatayatsijawa Abraham xua exanaejitsianë. ¹⁸Aponetsixanepanae bajaraxuayolia, tsipaji tajumaitsico-wëya bajaraponëjawawerena pitsapaponaena ayaibitsaëto pemomoxi, piniji-nacuapijiwinexa. Najumecapanepaeya pexaniacuena yawenonaeyapaebajë daxitanacuanëpijiwi^h bajaraponë pejamatabëcuene. ¹⁹Bajaraponë itapeta-jëna pexi, pijamonae-ata, juya pecujarubinxexa, tanejumecowënëtsinexa paliwaisi xanë tonajumecopatajë, pexanabiabinexa xua ëpexaniacuene. Itsa nejumecowënëtabiabiana tanajumecopatsiliwaisi, to-exanabiabianajë pexijawabelia, pemomoxijawabelia-ata daxita tajumaitsicowëya najumecapanepaeya bajaraponëjawabelia», jamatabëjai Jehovah Abraham yabara. ²⁰Bajarapacuenia Jehovah pesiwanajamatabëxainaexae, nexata jumaitsi Abraham-jawabelia:

—Pamonae Sodoma tomarapijiwi, Gomorra tomarapijiwibeje bajayajebi wënëliwaisitaniji piacuenebejecuene. Papibisiacueneⁱ bitso exanawanapa, abeje. ²¹Nexata, ajenaconoxaeta ponaenajë bajarabereca, tayapëtaenexa itsa xaniajai pibisiacuene exanawanapa, pacuenia itsamonae jumaitsi tsa-ponae. Nexata, bajarapacuenia yapëtaenajë xaniawaetsia —jai Jehovah Abraham-jawabelia.

²²Nexata, bajarajota anijanëbeje bajarapamonae penajuaponaewi wecuaponatsi Sodoma tomara nacuayabereca. Itsiata, Abraham epatua yajawana-copatanuca Jehovah. ²³Nexata, Abraham imoxoyota bajaraPonë. Yanijobijitsia Jehovahjawabelia:

—¿Yajawawerebiabianame tsaja planeconijibiwi, penajuajinawanapaexae pibisiacuene pexanaewi? ²⁴Itsiata raeta, jinawanapaejitsipa cincuenta ponë-beje pexaniacuene pexanaewi bajarapatomarajawata, çdetsa itsimë tsane

h 18:18 *daxitanacuanëpijiwi*: Majotaje icatsia Dioso nacanajamatabënapitsia-exana ponë yabara itorobiapabatsi Adán, Evabeje pecapanepaenënexatsi. (Baitsi Jesús) Taema Rom. 4:11; Gál. 3:8,16,28; Apoc. 7:9. **i 18:20** *Papibisiacuene*: Majotaje picani aponacayapëtaeya-exanae papibisiacuene yabara, Dioso tsita-acuenebejetsi bitso. Itsiata, Gén. 19:5-jawata, Jud. versículo 7-ata, itsa yorobatsi, yapëtanetsi pacuenia Sodoma nacuapijiwi pebiuji jitsipabiaba ëpebibeje penaperabëquenetsiataenexa. Itsiata, itsamonae, profetawi, peyaquinaebaxutonë itsa lebatsi, bajarapamonae nacayapëtaeya-exana itsacueneliwaisixi-ata xua yabara Dioso tsita-acuenebejetsi, Sodoma tomarapijiwi, Gomorra tomarapijiwibeje pexanaecuenemi. Isa. 1:10-17, Isa. 3:9 Nacayapëtaeya-exana pacuenia Sodoma nacuapijiwi pexanawanapaewi Dioso pejitsipaeuene itajara, pacuenianua be-ayaijamatabëcuenewi penataewi tsawanapae. Jer. 23:14 Nacayapëtaeya-exana pacuenia Sodoma nacuapijiwi pebiuji wecuanaawiababiaba pi-jawaxi, najumetsënëtabiaba, najamatabëcuene-asaëya-exananua itsamonae pibisiacuene pexanawanapaenexa pewajënaeyabelia. Eze. 16:49 Nacayapëtaeya-exananua pacuenia Sodoma nacuapijiwi be-ayaijamatabëcuenewi nataeyabiaba, ayaijawa pecobecowë pexainabiabixae, pacuenianua ayaijawa pecobecowë xainae-ata, bajarapamonae apoyawenonabiabi pajiwi Dioso tsitabejejiobiwitsi. Nexata, bajaraxuata daxita bajarapapiabejecuene penamatabëcueneta Dioso naneconitsia-exanaejitsia isotota Sodoma tomarapijiwi, Gomorra tomarapijiwibeje, imoxoyo pe-naetomaranëpijiwi-ata.

bajarapamonaejawabelia? ¿Nexata, itsiata yajawawerebiabianame? ¿Apo-itaxutotsoniataemē tsane daxita bajarapatomarapijiwi bajarapacincuenta ponē-beje pejamatabēcuenē? ²⁵ Apocatoxanepanae tsipae neyajawabenexa pexaniacuenē pexanaewi pibisiajamatabēcuenewi pejamatabēcueneta, bepibisiacuenē penajua-exanaejawa. ¡Pětsa exaname bajarapacuenē! ¡Cato-acuenēbi! Xamē baja daxita mapanacuapijiwi netoyapětaenē pijaneconije, nenaneconitsia-exanaenexa pijaneconi pexainaewi. ¿Pexaniacuenē tsaja apoto-exanaemē itsiata tsipae, pexaniacuenē yapijiwinexanabiabiněxae? —jai Abraham Jehovájawabelia.

²⁶ Nexata, Jehová jumecanawiata:

—Itsa namataěxēnaenajē cincuenta ponēbeje pexaniacuenē pexanawana-paewi Sodomajawata, itsiata nexata, itaxutotsoniataenajē daxita bajarapatomarapijiwi. Apowerebiabinē tsane bajarapacincuenta pajiwi-beje pejamatabēcuenē —jai Jehová.

²⁷ Icatsia, Abraham jumaitsi Jehovájawabelia:

—Xanē picani ajume-uranē bajarapacuenia tacayanijobaponaenexa, tsi-paji xamē Tajatuxanenēmē, Diosonēmē. Xanē saya jiwitonēnē. Xamēwecua bitso beweliajamatabēcuenenēnē, tsipaji atsatonēnē. Itsiata, pexaniacuenē neto-exanaename, tacayanijobinexa. ²⁸ Belia meta, sajinaejitsipa cinco paji-wiyobeje pianeconijibiwi, cincuenta pajiwi-beje pecaxitajarabinexa. Bajara-pacincito ponēbeje pesajinaexae tsane, ¿tsitecaeya werebiabianame daxita tomarapijiwi? —jai Abraham.

Itsiata, Jehová jumecanawiata:

—Itsa namataěxēnaenajē cuarenta y cinco pajiwi-beje pexaniacuenē pexanawana-paewi, apowerebiabinē tsipae —jai Jehová.

²⁹ —¿Jica meta itsa namataěxēnaejitsipame cuarenta pajiwi-beje saya pexaniacuenē pexanawanapaewi? —jai icatsia Abraham.

—Bajarapacuaarenta pajiwi-beje pejamatabēcueneta itsiata apowerebiabinē tsipae —jai Jehová.

³⁰ Icatsia, Abraham orijibia jumaitsi tsaponae:

—Cajamatabē-itonotatsi. ¡Pětsa anaepaname xanējawaberena, tacayani-jobaponaexae bitso caejawalia! ¿Jica, itsa namataěxēnaejitsipame treinta pajiwi-beje? —jai Abraham.

Icatsia, Jehová jumaitsi:

—Bajarapatreinta pajiwi-beje pejamatabēcueneta itaxutotsoniataenajē bajarapatomarapijiwi —jai Jehová.

³¹ Abraham orijibia jumaitsi tsaponae Jehovájawabelia:

—Tajatuxanenē, itsiata icatsia, cabarēcuaicuaijajitsiatsi mapacueniaje: ¿De-itsimē tsipae itsa xamē namataěxēnaejitsipame saya veinte pajiwi-beje pexaniacuenē pexanawanapaewi? —jai Abraham.

Itsiata, icatsia jumaitsi Jehová:

—Bajarapaveinte pajiwi-beje pejamatabēcueneta apowerebiabinē tsipae bajarapatomarapijiwi —jaitsi.

³² Icatsia, orijibia Abraham jumaitsi:

—Pexaniacuenē neto-exanaename, xamē Tajatuxanenēmē. ¡Pětsa anaepaname xanējawaberena, tacajumaitsitsaponaexae! Mapajumeyocujinaeje bajaraxuacujinae, apocajumaitsi tsanetsi baja. ¿De-itsimē tsipae itsa namataěxēnaejitsipame diez pajiwi-beje? —jai Abraham.

Jehová jumaitsi:

—Bajarapadiez pajiwiubeje pejamatabëcueneta apowerebiabinë tsipae daxita bajarapatomarapijiwi —jai Jehová.

³³ Itsa baja Jehová najumewereta bajaraxua pecuaicuaijijawabeje Abraham-beje, wecuaponatsi baja. Abraham pijinia nawiata pijacarpabojawabetsia.

Dioso werebiaba Sodoma, Gomorra tomarapijiwiubeje

19 ¹Nexata baja, ajena merawi tsaponaejitsia, anija-ángel-nëbeje pata Sodomajawata, itsajota Lot ponapona. Bajarapatomarami xaina matatoyorotsia penayacaranatenaajawa.¹ Nexata, xaina caebaupa pejoneya-biabinexa tomarajawabelia, pepatsinexa pijabonëjawa. Nexata, bajarapae-patota Lot eca bajarapabaupa-itapata. Nexata, Lot itsa tane bajaraponëbeje penajetarucaajawa, nototapuna pecopiapitsinexa. Bajaraponë irataeya pematabacabëta nucajunua bajaraponëbeje pitabarata penacopiapitsicuenia.

² Jumaitsi Lot:

—Pexaniacuene paneto-exanaenamebeje. Ajena pamerawi papatsia-namebeje tajabojawabelia. Bajarajotalia, panataxuquiatsianamebeje, jamatejema icatsia merawia bajayacunua paneponaenexabeje —jai Lot bajaraponëbejajawabelia.

Bajaraponëbeje jumaitssiti picani:

—¡Jume! Xanepana bitso. Itsiata, callejawa payananianaenajëbeje —jai ángel-nëbeje.

³ Itsiata baitsi jane, Lot orijibia napëna jumaitsi tsaponae bajaraponëbejajawabelia. Xuacujinae baja, belia jumejejaitsi peponaenexabeje Lot pija-boyabelia, bajarajota penamajitsinexabeje. Itsa palia Lot pijabojawabelia, tonacueneba bitso pexaniapexaejawa, caniwiopijipexaejawa, levadurata apopematajërëabipan yajawa. Nexata, bajarapamonae naxane.

⁴ Lot, pijabopijiwi yajawa, itsa abaxë naëcotawanapa majitsinejewa, bajarapae-patota Sodomapijipebijiwi, daxita pewëjëawi, perujujiwi-ata, matatoyorotsia jinawanapa Lot pijabo pënëwerena. ⁵ Bajarapamonae wawajaiya jumaitsi tsawanapae Lot-jawabelia:

—¿Detsa jota ecabeje, ponëbeje xamë nijaboyabelia capatame? ¡Paneto-jure, tsipaji pajitsipajë pibisiacuene pata-exanaenexa patawitota bajaraponëbejajawabelia! —jai bajarapamonae pewawajaitsawanapaejawata.

⁶ Lot nexata pitsapalia pebarëcuaicuaijainexa bajarapamonae, baupaxatatsiaya pepënëyabelia xaniawaetsia. ⁷ Jumaitsi nexata:

—Pexaniacuene tajamonae paneto-exanaename. ¡Pëtsa bitso bajarapapibisiacuene panajamatabëxainame pane-exanaenexa! ⁸ Itsa pajitsipame pibisiacuene pane-exanaejawa panewitota, xanë xainajë anijawabeje taxë-natoyobeje, abaxë itsapebi-ata apopeperabëyapëtaewabeje. Pacatojutsianatsi bajarapowabeje. Nexata, xua jamatabëpa-exaname, pa-exanaename bajarapowabejajawabelia. Jane caejawa apopacatojitsipaetsi pibisiacuene pane-exanaejawa panewitota maponëbejajawabeliaje, tsipaji xanë junatajë maponëbeje tajaboyaberena pepatsinexa. Bajaraxuata, xanë ewetajë bajaraponëbeje pane-itsacueniabiyanäwa —jai.

⁹Itsiata, bajarapamonae jumaitsi mapacueniaje:

—¡Natixire! ¡Belia nucareje! Xamë saya nenapatsinë itsanacuawerena. ¿Detsa pacuenia xamë naexaname patanenamatacaitorobinëexamë, bajarapacuenia patanenaneconitsia-exanaenexamë? Nexata, ajenaconoxaeta xamë paca-itsacueniabianatsi, bitso picani papibisiacuene jamatabëpa-exanajë bajaraponëbejebawabelia matatoxenetsia —jai bajarapamonae Lot-jawabelia.

Nexata, bitso bajarapaepatota, Lot torobajarabatsi ayaicuenia. Jamatabëtorenabatsi picani baupajawata, jamatejema baupa pesarabiauxuabinexa, bajarapamonae pejonenexa bo-ënëabelia. ¹⁰Itsiata baitsi jane, pesiwa-xainaenëbeje namaxëyoliabeje perobotsinexalia Lot bo-ënëabelia. Bajaraxuacujinae baja, baupa xatata xaniawaetsia. ¹¹Daxita pamonaen nubena baupapënëwerena wayafota, nexata itaxutotsëcënaeya-exanatsi, daxita pewëjëawi, penaweretsiwi-ata. Bajarapacuenia exanae-atatsi, bajarapamonae itsiata apocopatsi pebaupajaitsijawa. Belia baja, cuerana baupa pejaitsi-jawa. ¹²⁻¹³Nexata, pesiwxainaenëtsibeje Lot jumaitsitsi:

—¿Xainame tsaja itsamonae nijamonae mapabota pejinawanapaewiwe-cuaje? Nexata, itsa xainame niopaxajiwi, nexënatonëxi, nexënatowaxi, xua daxita xainame mapatomarata, jutsianame baja daxita, nebarëponaenexa tajë majotawecuaje, tsipaji paxanëbeje bajarapatomara pawerebiabijitsianëbeje. Bajayajebi bitso Jehová wënëliwaisitaeyabiaba pibisiacuene pexanabiabijawa bajarapamonae. Bajaraxuata, Jehová pane-itorobabeje, patawerebiabinexabeje bajarapatomarapijiwi —jaibeje.

¹⁴Nexata, picani Lot siwalia piopaxabeje, ponëbeje picani coxipitsijitsiat-sibeje. Bajaraponë jumaitsi:

—¡Naxatsia! ¡Panonotapunarebeje! ¡Panaponarebeje baja mapatomarawecuaje, tsipaji raja Jehová werebiabiapaeba mapatomaraje! —jai. Itsiata, bajaraponëbeje apojumexaniataebeje Lot, penapënaponaejawane-xabeje. ¹⁵Itsa baja matacabiwëpa tsanajetarucacae, ángel-nëbeje jumaitsi Lot-jawabelia:

—¡Naxatsia! Pa-enaejitsipame. ¡Paponare baja bepíjia, itsa apopajitsipaemë mapanacuapijiwije yajawa patacanaxuabia-exanaejawabeje! ¡Nexata, comacapire nijawa, nexënatoyobeje yajawa mapatomarawecuaje paneponaenexa! —jai ángel-nëbeje.

¹⁶Lot picani abaxë najamatabëjematapona. Nexata, ángel-nëbeje cobepitatsibeje pebarëponaenexa bajaraponë, tsipaji Jehová bitso itaxutotsoniatane Lot. Comacapitatsi pijawa, pexënatoyobeje yajawa. Capitsapatsi nexata bajarapatomarawecua, pepanepaenexa piayaicuenewecua. ¹⁷Itsa baja wecuannubena tajëyo bajarapatomarawecua, itsanë ángelnë jumaitsi:

—¡Naxatsiayo! ¡Pabitsojinare petsutonëjawabelia panewecuapane-paenexa! ¡Pëtsa panecowëyabelia panapijiwinaëcotame! ¡Pëtsa panacopatame mapatusatojawataje, tsipaji raja daxita mapatusatojawata pe-enaetomaranëje, payajawawerebiabijitsianëbeje! Itsa pajitsipame panepanepaejawa bajarapapiayaicuenewecua, panewajënaeyabelia panajetaru-benaenename petsutonëjawabelia —jai ángelnë Lot-jawabelia.

¹⁸Itsiata baitsi jane, Lot jumaitsi:

—¡Jume raja! Tajamonaenëbeje, orijibia itsa pexaniacuene panetoxanaenename. ¹⁹Paxamëbeje pexaniacuene bitso paneto-exanename.

Panepitsapaeya-exanamebeje, patanecapanepaenexamē pexaniacuenia. Itsiata, aponecuenecaējēpae tsane petsutonējawabelia taponae nexa, tsipaji belia bajarapaweriajawijawa netajuejitsipa, itsa nepēcaxina epatua. Nexata tēpaejitsipajē. ²⁰ Itsiata, mapatomarawecua je imoxoyo eca itsatsiquiritomaro. Bajarajane belia ponaenajē. ¡Bajarabelia netocopare taponae nexa, tapanepaenexa bajarapapiayaicuenewecua! —jai Lot.

²¹ Nexata, itsa-ánglejajuwēnēnē jumaitsi:

—Je, cajumetanetsi rabaja tacajumebejiobiataenexa. Pacuenia panewajētamebeje, pacato-exanaenatsi. Nexata, bajarapatomarayo apopawerebiabinēbeje tsane. ²² ¡Nexata, ponare bepijiayo bajarabelia panepanepaenexa, tsipaji paepatota abaxē, itsa apopapatsimē tsane bajarapatomarajawabelia, aponecuenecaējēpae tsane abaxē itsacuenejawa ta-exanaejawa! Matapania, itsa patsiaremelia tsiquiritomarajawabelia werebiabianajē daxita tomaranē, mapatusatojawata pe-enaetomaranēje. —jai ángelnē.

Tsiquiritomarayo pejaixae Lot, nexata itsamonaē wēnēruba Zoar,^k perujuwēnē pijinia Bela tomarayo. ²³⁻²⁴ Itsa baja bajayacunua ayaimatacabi tsina, Lot-ata baja pepuapatsi Zoar-jawata, nexata Jehová be-emaenacia runaeya-exana ayaicotiajawanē, azufrewēnējawa' yajawa Sodoma tomarajawatsica, Gomorra tomarajawatsica-ata, daxita imoxoyo pe-enaetomaraxijawa-ata.

²⁵ Jehová nexata werebiaba daxita bajarapatomarapijiwi. Daxitaxua bajarajota pejuwijawanē yajawa werebiaba. ²⁶ Lot pijinia pijawami, cotocaewi penajetaruaejawata, namuto-epatua napijiwitaejopa pecowēyabelia. Nexata, naexanajopa yajo-iboto bajarapowami.

²⁷ Itsamatacabijawabelia, bajayacunua, pebarēcuaicuajiaicujinaē Jehová, Abraham pona itsajotareca barēcuaicuajiaitsi tsanuaē Jehová Sodoma, Gomorra tomarabeje peliwaitsi yabara. ²⁸ Naēcoreca Sodoma, Gomorra tomarabeje jawabereca daxitanacuatusato naēcotsiaya. Nexata, tane daxita bajarapatomaranēmi petsēxēxanetonētsenaejawa. Bitso acotiaiay tsenae. Pacuenia waita batajua, bajara-itsi. ²⁹ Nexata, bajarapacuenia DIOSO werebiaba bajarapatomaranēmi itsajota picani Lot naponapona. Itsiata, Abraham penajamatabēnapitsixaetsi^m Jehová, Lot jutatsi bajarapatomarawecua pewerebiabiawajēnaeya.

Itsawerena pitsapa moabitawi, amonitawi-ata, yabara peliwaitsi

³⁰ Bajaraxuacujinaē nexata, Lot bitso junawa penacopatsijawa Zoar tomarajawata, bajarapapiayaicuenē petaecujinaē. Nexata, barēpona pexēnatoyobeje petsutonacuayabelia. Barēponapona pexēnatoyobeje petsutoyenepana ibowajujawata. ³¹ Nexata, itsamatacabi pexēnatoyo matapijiwa jumaitsi pejuyapijiwajawabelia:

—Waxabeje rabaja perujunēyo tsaponae. Apoxainaetsibeje itsajota nana-cojiobijitsiatsibeje itsanējawabelia, pacuenia wajamonaemi ba-itsi tsaponae. ³² Nexata, exanaenatsibeje mapacueniaje. Itajibiaxubianatsibeje waxa wajabarēmajitsinexabeje, bajarapacuenia waxaxi waxajainaenexabeje. Nexata, wajawiriamaēto apocopiaruae tsane —jai matapijiwa.

k 19:22 Zoar: Hebreojumeta Zoar pejumaitsi jamatabēcuenē: «tsiquiritajawayo», pejaijamatabēcuenē xaina. **1 19:23-24** azufrewēnējawa: Azufrebena canacuenēbabiaba foforoboxi maparuaeje. **m 19:29** penajamatabēnapitsixaetsi: Taema «Dioso najamatabēnapita», glosariojawata.

³³ Nexata, bajarapamerawi bajarapowabeje rajutabeje paxa piatanevinora^a pitajibiaxuabinexa. Matapijiwa nexata nabarëmajitsia-exana paxa. Itsiata baitsi jane, paxa apoyapëtae paepatota bajarapowa naquenetsiataeya-exana, paepatota-ata pijinia wecuanonotapunatsi. ³⁴ Itsamatacabijawabelia matapijiwa tsipaeba pejuyapijiwajawabelia. Jumaitsi:

—Xanë raja ajena pamerawi yajawamajitajë waxa. Bajara-icatsia pacuenia ajena pamerawi itsi tsanetsibeje. Itajibiaxuabianatsibeje. Nexata juya, bajarapacuenia xamë na-naquenetsiataeya-exanaename. Bajarapacuenia xainaenatsibeje wajaxibeje, wajawiriawi pecopiarucaeyaniwa —jai pejuyapijiwajawabelia.

³⁵ Icatsia nexata, bajarapamerawi rajutabeje paxa piatanevinora pitajibiaxuabinexa. Juyapijiwa paxa nabarëmajitsia-exana. Bajarapacuenia Lot apoyapëtae pacuenia naquenetsiataeya-exana, pacuenia-ata wecuanonotapuna. ³⁶ Nexata, bajarapacuenia bajarapowabeje nacoxitabeje paxa pejamatabëcuene. ³⁷ Matapijiwa xaina pexë nato. Bajarapowa wënëruba pexë natonëyo Moab.^o Bajaraponëjawawerena nexata pitsapa moabitawiriawi. ³⁸ Bajarapacuenia juyapijiwa-ata xaina pexë natonëyo. Bajarapowa wënëruba pexë natonëyo Ben-ammi.^p Bajaraponëjawawerena pijinia pitsapa amonitawiriawi.

Abraham, Abimelec-beje, yabara peliwaisi

20 ¹ Abraham pewarapaenëcuenia wecuapitsapa copiyami penaponaponaenacuawecua, peponaenexa Neguev nacuyabelia, bajarajotalia cae-epatoyo peponaponaenexa Gerar tomarajawata. Bajara-patomara eca Cades, Shur tomarabejetuatajëjawata. ² Bajarajota peponaponejawata, itsamatacabi Abraham nayapijiwijumaitsi pijawa yabara bajarapanacupijiwijawabelia:

—Sara raja tajuyapijiwa —jai.

Bajarapacuenia Abimelec^q itsa jumetane, pewetsinë Gerar nacua, itoroba pijajiwi petobarëpatsinexatsi Sara bajaraponëjawaberena, pijawacuenia pexainaenexa picani. ³ Jane baitsi, bajarapamerawi Abimelec amajitsinae tsanucæ. DIOSO jumaitsi majitsinaebota bajaraponëjawabelia:

—Tëpaename raja, tsipaji powa xamë pitame penacojiobiwa —jaitsi.

⁴ Itsiata baitsi jane, bajaraponë abaxë apo-imoxoyotsi.^r Nexata jumecanawiata:

—Tajatuxanenë, çitsiata tsaja pibisiacueni apopexanaenë-ata cacaëjëpa nebeyaxuabijawa?, jai Abimelec—. ⁵ Abraham pijacuata nejumaitsi: «Bajarapowa raja tajuyapijiwa», nejai. Bajarapowa-ata pijacuata nejumaitsi: «Tamatapijinë raja Abraham», nejai. Nexata, xanë bajarapacuenia exanajë

n 19:33 *piatanevinora*: Taema «vinora», glosariojawata. **o 19:37** *Moab*: Pewënë Moab hebreojumeta pejumaitsi jume: «Paxa pewënëta pijawiriamaëto pecanacopsitijiwi», pejajume. Taema «Moab-moabitawi», glosariojawata. **p 19:38** *Ben-ammi*: Pewënë Ben-ammi hebreojumeta pejumaitsi jume: «Nacaemonaewi pexë nato», pejajume. Taema «Ben-ammi/amonitawi», glosariojawata. **q 20:2** *Abimelec*: Bajarapawënë apopepowënë. Saya, «nacua-ewetsinë», pejajume raja. Pewënëcuenia saya nawënëruba filisteo nacua pewetsinë, pacuenia bajumaitsi: «Presidente», bajaitsi. **r 20:4** *apo-imoxoyotsi*: Mapajumeje «imoxoyota», pejajume, pequenetsiataejawa yabara bajumaitsi judifomona, urataecuenia.

apopibisiajamatabëcuenecuenia. Itsiata, abaxë itsacuene apo-exanaenë baja rapowajawabelia. Bajaraxuata, aneconijibinë —jai Abimelec DIOSOjawabelia piamajitsinaejawata.

⁶Nexata, DIOSO jumecanawiatatsi majitsinaebota:

—Xaniajamë. Yapëtaniji xaniawaetsia bajaraxua ne-exanaejawa pexaniajamatabëcueneta. Bajaraxuata raja, apocatocopatsitsi bajarapowa nimo-xoyotsinexa, pibisiacuene bitso nexanaeyaniwa xanëjawaberena. ⁷¡Nexata, ajenaconoxaeta tocanawiare pijawa bajaraponëjawabelia! Bajaraponë tanejumeliwaisipaeaponaponaenëxae, catowajëcaena xanëjawaberena, netëpaejawaminexa newecuapanepaenexa. Itsiata baitsi jane, itsa apotocanawiatximë tsane, xamë, nijamonae-ata yajawa tēpaename pepacuene —jai DIOSO majitsinaebota Abimelec-jawabelia.

⁸Nexata, itsamatacabi, bajayacunua, itsa baja Abimelec namatacota, junata daxita pijajiwi petsipaebinxua xua bajaraponë amajitsinae tsanuca. Nexata, bajarapamonae itsa jumetane bajarapacuenia petsipaebijawatatsi, bitso junawa ayaicuenia. ⁹Bajaraxuacujinae nexata, Abimelec junata Abraham peyanijobinxua. Nexata jumaitsi:

—¡Nejumetaema! Xuanë panetocopiapata, bajaraxuanë xamë nejamatabëcuene, taneyamaxë-itojorobixaemë nijawa yabara. ¿Detsa nexata pitsijamatabëcuene cato-exanatsi tacajamatabëcuenebijianaenexa, mapapinjineconije tanecatocopiapatsi xanëjawaberena, tajajiwijawabelia-ata? Pacuene picani jiwi penayaiyataewi apobe-exanae, bajaraxua xamë neto-exaname —jai Abimelec Abraham-jawabelia. ¹⁰Icatsia, jumaitsi:

—¿Detsa pitsijamatabëcuene nesiwanajamatabëxainame tacaneto-exanaemë bajarapacuene? —jai Abimelec pecuaicuaijajawata Abraham-jawabelia.

¹¹Abraham juya jumecanawiata:

—Xanë jamatabë-itsinë mapacueniaje: «Mapanacuataje apojinawanapae DIOSO peyaiyataewi. Nexata, nebeyaxuabiana tajawa pejamatabëcuene», jamatabëjanë. ¹²Itsiata baitsi jane, pepacuene xaniajanë. Xanë tajuyapijiwa, tsipaji taxa pexënatoyo. Itsiata baitsi jane, apopanacae-enapijiwinëbeje. Bajarapowa pijinia itsa-enapijiwa. Bajaraxuata, pitajë bajarapowa tajawanexa.

¹³Pacujinaeta DIOSO netocopata tapitsapaenexa taxa pijabowecua, jumaitsinë bajarapowajawabelia: «Panacuata ajena patabiabianatsibeje, ‘tamatapijinë raja,’ jamë tsabiabi tsane», janë —jai Abraham Abimelec-jawabelia.

¹⁴Nexata, Abimelec tocanawiata Abraham pijawa Sara. Bajarapamatacabi rajutatsinua najamatabëcuenematomtsiaya pijaneconimi, ovejamonae, vacamonae, jiwi amoneya petonacuenebiwinexatsi-ata, pebinëxi, petiriwaxi yajawa. ¹⁵Bajarapaepatota, jumaitsi Abimelec Abraham-jawabelia:

—Mapa-ira, xanë ta-ewetsinacuaje, nawitsia xaina pexaniatusatoxi. Nexata, itapetsiname, nepitsinexa panacuayo catsitaxanepana neponaponaenexa —jai Abimelec Abraham-jawabelia.

¹⁶Sarajawabelia icatsia jumaitsi:

—Xanë rajutajë nematapijinë mil ponëbeje palatanëanë, bajaraxua pejamatabëcuene xaniawaetsia aneconijibia pecataenexa nebarëponaponaewi, itsamonae-ata, daxita mapanacuapijiwi-ata, pecabaracuaicuaijaiyaniwa itsajiwi-ata, xanëjawawelia nepitsapaecujinae —jai bajarapowajawabelia.

¹⁷⁻¹⁸ Pacuenia DIOSO jumaitsi^s Abimelec-jawabelia majitsinaebota, baja rapacuenia Abraham towajëta Diosojawabelia Abimelec yabara, pijawa yabara, amoneya petonacuenebiwaxitsi-ata yabara, bajarapapetiriawi icatsia pexi pexainaenexa. Abimelec picani pepitsixae Sara, Jehová acoxibia-exana daxita bajarapamonae pexi pexinaeyaniwa, daxita pejinawanapae-petiriawi Abimelec pijabota. Abraham petowajëtsicujinae, nexata DIOSO to-exana pexaniajamatabëcuene Abimelec-jawabelia, pijawajawabelia-ata. Tocopata pijawa pexi pexainaenexa icatsia. Bajarapijinia pacuenia, amoneya petonacuenebiwaxitsi tocopata pexi pexainaenexa.

Isaac-nëyo penaexanaejawa, yabara peliwaissi

21 ¹ Pacuenia najumecapanepaeya jumaitsi Jehová peyawenonaenexa Sara, bajarapacuenia jane baja tocopiapatatsi. ² Bajarapajumeco-wëya Sara baja nacoxita. Toxaina Abraham pexënatonëyo pawaita DIOSO tocaëjëta penaexanaenexa. Bajarapacujinaeta baja, Abraham bitso perujunëyo. ³ Ponëyo wecuanaexanatsi Sara, Abraham wënëruba Isaac. ⁴ Bajaronëyo baja, itsa xaina ocho pamatacabibeje penaexanaecujinae, nexata Abraham bo-upiperabëcaucuteta, pacuenia DIOSO itorobatsi pexanaenexa. ⁵ Abraham baja itsa xaina cien pawai-beje, naexana Isaac-nëyo.

⁶ Nexata, Sara jamatabëjumaitsi: «DIOSO bitso nebarëyaya-exana. Daxita pamonaenewënëtaeponaena xanë taxainaejawa taxënatonëyo, bajarapamonae nesiwajamatabëcuenebarëya tsane xanëjawaberena. ⁷ Itsamonae picani aponesiwajamatabëjumaitsi-ata taxainaejawanexa taxënatonëyo, itsiata baja, toxainajë Abraham pexënatonëyo pepuaperujunë bajaraponë», nasiwajamatabëjai Sara barëyaya.

Agar, Ismael-beje, capitsapatsi Abraham pijabowecua

⁸ Itsa abaxë Isaac pejewaxinëyo, Sara baja namicopata. Abraham nexata pexë nato to-exana fiestaxaneto pacujinae namicopatatsi pena. ⁹ Itsiata baitsi jane, bajarapaepatota Sara tane Agar pexë nato, Egipto nacupijijiwa, ponë xaina Abraham-jawabelia, petocapocaponaejawatsi Isaac-nëyo. ¹⁰ Nexata, Sara jumaitsi Abraham-jawabelia:

—Ponae baja mapowaje, pexë nato yajawa. Acuenebi itsamatacabi Isaac-beje penatsicobetsanaejawabeje necobecowëyajuwënëjawanë newënamuto bajarapowa pexë nato jawabelia —jai Sara.

¹¹ Nexata, Abraham bitso najamatabëxaina ayaicuenia, tsipaji bajaraponë-ata Abraham pexë nato. ¹² Itsiata, DIOSO jumaitsi:

—jPëtsa siwajamatabëcuenebëjamë nexë nato Ismael, nijawa amoneya pecatonacuenebiwa-ata yabara! jExanare pacuenia Sara cajumaitsi, tsipaji

s 20:17-18 Dioso jumaitsi: Taema Gén. 20:7b. Yapëtanetsi pacuenia Abraham apotowajëtsi Abimelec-jawabelia palata perajutsixaetsi, tsipaji Dioso caejamatabëcuene pexainaenë, cae-cuenia petocaëjëtsinexa pijajiwi pexanaenexa. Taema Hch. 8:18-22 itsajota nacatsitajëta Dioso pitoyajawa palata wajapitsiyaniwa Dioso wajanacayawenonaecueniejawa yabara. Taemanua Giezi peliwaissi 2Re 5. **t 21:3 Isaac:** Isaac-wënë xaina mapejumaitsi jamatabëcueneje, «pejëa-jëajajawa», pejaijamatabëcuene. Bajarapacuenia wënërubatsi, tsipaji pacujinae Dioso tsipaeba Abraham pexinaejawanexa pexë nato pepuaperujunë, bajaraponë jamatabëcuenejëajëjai Gén. 17:17, bajarapacuenia Sara-ata Gén. 18:12, bajarapijinia pacuenia, barëyabeje penaexanaematacabita Isaac. Gén. 21:6

raja pamonae nemomoxinexa najumecapanepaeya catsipaebatsi tacara-jutsinexa, bajarapamonae pitsapaponaena Isaac-nëyo pejamatabëcuene!

¹³ Bajarapijinia pacuenia, exanaenajë ponë xainame amoneya pecatonacue-nebiwajawabelia. Bajaraponë-ata yawenonaenajë ayaibitsaëto penaexanaponaenexa pemomoxi, nexënatoxae —jai DIOSO.

¹⁴ Itsamatacabijawabelia bajayacunua Abraham rajuta Agar-jawabelia pan-bëanë, meradoro yajawa. “Bajaraxuanë tsiwëtacararuta. Tocopatanua pebarëponaenexa pexënato Ismael.” Nexata napëjiobatsi. Bajaraxuacujinae, bajarapowa baja wecuaponatsi, apoyapëtaenejewua itsabelia patsijitsia. Najetarua Beersebawënëtusatojawa, petsewinacuajawa bitso. ¹⁵ Belia baja, towerewerecatsibeje namuto-epatua pijameradoro. Nexata, bajarapowa pueneteta pexënatonëyo naejawayobëxëpanata. ¹⁶ Bajarapowa ecajopa bajaraponëwecua tajëyo, tsipaji jamatabëjumaitsi: «Apojitsipaeenë petëpaejawa taitabarata», jamatabëjai. Itsa bajarapowa tajëyotareca ecajopa, nexata bajaraponë pewëjëato taxuxuaba ayaicuenia penuejawa.

¹⁷ DIOSO jumetane pewëjëato bitso penuejawa. Nexata, athëbëjawawetsica Jehová pija-ángelnë junataxuaba Agar-jawabelia. Jumaitsi:

—¿De-itsimë Agar? ¡Pëtsa junawame, tsipaji DIOSO jumetane bitso penuejawa nexënatonë pewëjëato itsajotalia puenetetame! ¹⁸ ¡Naxatsia! ¡Pire nexënatonë! ¡Jamatabëcuenebarëyaya-exanare, tsipaji xanë yawenonaenajë bitso ayaibitsaëto pepitsapaponaenexa bajaraponëjawawerena pemomoxi! —jai Jehová pija-ángelnë.

¹⁹ Nexata, bajarajota DIOSO taeya-exanatsi Agar mera pepitsaparucaejawa tajëyotalia mëthëjawawerena. Bajarapowa nexata pona bajarapameramëthëabelia, icatsia pewënëtsinexa pijadoro. Apaeya-exananua pexënato Ismael. ²⁰⁻²¹ Bajaraxuacujinae, pona Parán nacuyabelia bajarajota peponaponaenexa. DIOSO yawenona ayaicuenia Ismael. Belia baja, penaweretsinë tsapona Parán-tusatonacuata. Nexata, bajarajota naexana pexaniabixabajarabinëyo bitsabi. Bajaraxuacujinae, pena tojaitatsi pijawanexa Ismael, Egipto nacuapijiwa pepitsinexa.

Abraham, Abimelec-beje, penajumeliwaisicajonejawabeje

²² Bajarapamatacabijawa Abimelec pona Abraham-jawabelia, pebarëcuai-cuajainexa itsajotalia bajaraponë ponapona. Bajarapacujinae, yanabatsi Ficol-wënë, penamatacitorobinë Abimelec pijawajabitsaëwi. Abimelec nexata jumaitsi Abraham-jawabelia:

—Paxanë pataeyabiabajë xamë DIOSO pecayawenonaejawa daxita nexanaejawalia. ²³ ¡Bajaraxuata, najumecapanepaeya nejumaitsimëre DIOSO pewënëta majotaje! ¡Nejumaitsimëre apotaneto-exanaejawanexamë pibisiacuene xanëjawaberena, taxijawabelia-ata, tamomoxijawabelia-ata, pata-netaeyabiabinexamë pexaniajamatabëcuena! Pacuenia xanë casiwajamatabëcuenexanapanatsi, bajarapacuenia nesiwajamatabëxanepanaenexa, itsamona-ata tayanacua-ewetsiwi —jai Abimelec.

u 21:14 meradoro yajawa: Bajayatami judíowi natojorocabiaba dajubibocotomi dorocuenia, bajarajota pecoraponaenexa mera. Taema «dajubibocodoro», glosariojawata. v 21:14 pexënato Ismael: Bajarapacujinaeta, Ismael xaina bejamatabëcuene 16 pawai-beje. Gén. 16:16; 21:5,8

²⁴Nexata, Abraham jumecanawiata:

—Xaniajanë, cato-exanaenatsi pacuenia jitsipame —jai Abraham Abimelec-jawabelia najumeliwaisicajoneya.

²⁵Bajarapaepatota, Abraham yanijoba Abimelec-jawabelia pijameramëthë yabara, tsipaji Abimelec pijajiwi naxainaeyaba Abraham pijameramëthëmi.

²⁶Nexata, bajaraxua yabara Abimelec jumaitsi:

—Aeconoxaeta matapania yapëtaniji bajaraxua yabara. Xamë-ata apo-nejumaitsimë pewajënaeya. Nexata, apoyapëtaenë pajiwi bajaraxua exana —jai Abimelec.

²⁷Nexata, Abraham pita ovejanëanë, vaca-ata perajutsinexa Abimelec-jawabelia. Bajaraxuacujinae, pijacujirucuenia naliwaisicajunuabeje penasiwajamatabëcuenexanepanaenexabeje. ²⁸Bajaraxuacujinae, Abraham tsata siete ponëbeje oveja pesorowatoxi pija-ovejayajuwënwëwecua, saicaya penubinxexa.

²⁹Petaexae bajarapacuenia, Abimelec yanijoba:

—¿Detsa xua yabara tsatame siete pa-ovejabeje? —jai.

³⁰Abraham jumecanawiata:

—Bajarapasiete ponëbeje oveja xanë carajutatsi nepitsinexa, jamatejema nenayapëtaenexa, nijamonae yajawa, xanë tacueyetsimëthëcuene —jai Abraham. Abimelec jejai. Nexata baja, pita.

³¹Bajaraxuata, bajarapataxunaemi wënëruba Beerseba,^w tsi-paji bajarajota, bajarapajiwiabeje naliwaisicajunuabeje xaniawaetsia penasiwajamatabëcuenexanepanaenexabeje.

³²Penaliwaisicajonecujinaeabeje Beersebajawata, Abimelec barënawiata Ficol pijamonae filisteowi pijanacuayabelia. ³³Beersebajawata, Abraham ubanuta naejawa, tamariscowënnënae, pemaxëranawitsiwiriana. Bajara-jotana, wajëcabiaba Abraham Jehovájawabelia, ponë peyamatacabiatseite-caenë. ³⁴Nexata, bitso bajayajebi ponapona Abraham Beersebajawata, filisteomonae nacuata pe-ecaetaxunae.

Dioso itoroba Abraham petajuitsinexa Isaac altar-jumata

22 ¹Bajaraxuacujinae, Abraham itsamatacabi DIOSO jamatabëcuene-ëjëtatsi, pejamatabëcueneyapëtaenexatsi pepacuene pejumexania-taejawa Dioso najumecapanepaeya pejumaitsiyawamitsi pexënato yabara. Junataxuabatsi pewënëta:

—Abraham —jai.

Bajaraponë nexata jumecanawiata:

—Majotaje nucajëje —jai.

²DIOSO jumaitsi:

—¡Pire Isaac, ponë nexënato caenëyo, bitso ni-asiwanë!^x ¡Barëponare Moriah irabelia! Patsutojawata catsitajëtsianatsi, bajarapatsutojumatalia nerajutsiaya daxitanë netotajuitsianame, pacuenia exanabiabame dajubinë-xijawabelia —jaitsi DIOSO.

w 21:31 Beerseba: Hebreojumeta pejumaitsijamatabëcuene: «pameramëthëjawata naliwaisicajunuabeje penajumecowënnëtsinexabeje», pejaijume. Itsa jume, «pameramëthëjawata rajuta siate ponëbeje», pejaijume. Bexëajawabelia, Isaac bajarapameramëthë imoxoyojawata ponapona.

x 22:2 Ni-asiwanë: Bajarapacuenia Dioso-ata yabaracuaicuajai pexënato Jesús ayaibexëajawabelia. Mt 3:17.

³Nexata, itsamatacabijawabelia, pepobajayacunua, Abraham namata-cota. Tsiyumacēba silla pijaburroyo peponaenexa. Ucubaba iso petsewinaexi pecaponaenexa. Pexēnato barēpona anijanēbeje pijajiwitonēbeje yajawa. Pona itsabelia DIOSO itorobatsi peponaenexa, penacoxitajuitsinexa daxitanē DIOSOjawabelia. ⁴Acueyabimatacabita Abraham tajēweliacujinae taeyelia bajarapatsuto itsabelia tocaējētatsi pepatsinexa. ⁵Nexata, jumaitsi pijajiwitonēbejajawabelia:

—¡Bajarajota, payajawanacoparebeje burro! Paxanēbeje, pewējēatobeje paponanajēbeje orijibia webeliayo, patanamatabē-itajētšinexabeje pata-siwajawabeje, yaiyataeya-ata patato-exanaenexabeje pejitsipaecuenia DIOSO jawabelia. Bajaraxuacujinae, panawiatsiarenajēbeje —jai.

⁶Abraham pita pa-isocunu capona penacoxitajuitsinexa. Nexata, tsiwēta-carabuata pexēnato Isaac. Xuacujinae, pita cusiupa. Caponanua waxiyota iso-ita-ire! Nexata jane baja, najuaponabeje. ⁷Bajaraxuacujinae, peponaeja-watabeje Isaac jumaitsi paxajawabelia:

—Axa —jai.

Nexata, Abraham jumaitsi:

—¿Dexua jitsipame, taxēnato? —jai.

—Xainatsibeje isocunu, pita-ire yajawa. ¿Detsa nexata jota nuca ovejajo wajatajuitsinexabeje daxitanēyo DIOSOjawabelia wajaneconibeje yabara?

—jai Isaac.

⁸Nexata, Abraham jumecanawiata:

—Ūjūāē, DIOSO raja nacarajutsianabeje bajaraponēyo wajatajuitsinexa-beje —jai.

Pewajāneyabelia icatsia ponabeje. ⁹Itsa baja patabeje bajarajota, itsajota DIOSO tocaējētatsibeje, Abraham nacuenabanuta altar-jawa. Iso tsijumajeba bajarapa-altar-jumawereca. Bajaraxuacujinae nexata, pexēnato cobecēta, taxucēta yajawa, pebuatsinexa Isaac isojumawereca altar-jawata. ¹⁰⁻¹¹Pae-patota nacoxiwēsicaxiunaējitsia cusiupata, nexata Jehová pija-āngelnē itacarajeta junataxuabatsi athēbēwetsica:

—Abraham, Abraham —jai.

Bajaraponē jumaitsi:

—Nucajē majotaje —jai jumecanawiatsiaya Abraham.

¹²Āngelnē nexata jumaitsi bajaraponējawabelia:

—¡Pētsa itsacuenexaname bajaraponē! Yapētāniji xanē, DIOSOnē, tane-yaiyataejawamē, tsipaji aponewecua-asiwamē tanerajutsinexamē nexēnato, caenēyo-ata —jai Jehová pija-āngelnē.^y

¹³Abraham naēcolia. Nexata, taenuta pepēnēwerena penucaejawa oveja, pemata-e-arēbanucaeñētsi pemaxērananawitsinaeyojawabelia. Nexata, lia pepitsinexa. Bajaraxuacujinae, daxitanēyo tajuita Diosojawabelia pexēnato pejamatabēcueneta penacoxitajuitsijawaminexa. ¹⁴Bajaraxuacujinae, itsajota Abraham DIOSO yawenonatsi wēnēruba «Jehová wajanacarajutsinē wajanamatawenonaecuenē», pejaiwēnē. Bajaraxuata, abaxē bajarapatsuto

y 22:12 *Jehová pija-āngelnē*: Āngelnē pacujinae jumaitsi Abraham-jawabelia: «Aponewecua-asiwamē nexēnato», itsa jai, bajarajota Abraham yapētane pebarēcuaicuaijajawatsi pijacujaya Dioso. Taema «Jehová pija-āngelnē», glosariojawata.

wënëruba: «Jehová pijatsutojawata, bajaraPonë nacarajutsiana xua namata-wenonatsi», jai wënërubiaya. ¹⁵ Bajaraxuacujinae, Jehová pija-ángelnë athë-bëwetsica icatsia junataxuabatsi Abraham cotocaewijawa. ¹⁶ Jumaitsi:

—Jehová ra jumaitsi. Xamë taneto-exanaexaemë pacuenia cajumaitsitsi, aponewecua-asiwamë nexënato, nexata xanë xaniajaiya najumecapane-paeya cajumaitsitsi tacayawenonaenexa. ¹⁷ Pepacuenie ajenaconoaxaeta pexaniacuenia cayapëtaeya-exanatsi tacayawenonaejawanexa bitso ayaicuenia, orijibia nemomoxi ayaibitsaëto penaexanaponaenexa. Pacuenia athëbë-pijitulupu nawita, bajara-itsi tsane. Pacuenia tajetamaxë-atsapërë nawita manuamene-itapaya, bajara-itsi tsane. Bajarapacuenia orijibia yawenonaenajë itsamatacabi pecuene-amoneyababiabinexa pijawajabitsaë. ¹⁸ Daxitanacuanëpijiwi nemomoxiyajuwënënë pejamatabëcueneta^z yawenonaenajë pexaniacuenie penatoyapëtaenexa, tanejumecowënëtsixaemë —jai Jehová pija-ángelnë Abraham-jawabelia.

¹⁹ Bajaraxuacujinae, icatsia Abraham nawiata pijajiwiwonëbejajawabelia. Bajaraxuacujinae, daxita najuanawiaba Beersebjawabelia, itsajota Abraham ponapona.

Nacor pexi, yabara peliwaissi

²⁰ Bajarapamatacijawa matapania Abraham wënëliwaissitane Milcata penaxainaejawa pexi pejuyapijinë Nacor-jawabelia. ²¹ Copiyapijinëyo pewënë Uz. Cotocaewipijinë pewënë Buz. Itsanëyo pijinia Kemuel pewënë. Kemuel pexënato xaina Aram. ²² Kemuel-cujinae naexana Quesed, Hazo, Pildas, Jidlaf, Betuel-ata. ²³ Betuel xaina pexënatoyo pewënë Rebeca. Nexata, bajarapa-ocho ponëbeje Milca toxaina Nacor-jawabelia, Abraham pejuyapijinë.

²⁴ Bajaraxuacujinae, Nacor xaina itsajiwiyojeje Reúmajawabelia, powa cotocaewi pepitsiwa. Xaina pebijiwi pewënë Teba, Gaham, Tahas, itsawa pijinia pewënë Maaca. Bajarapajiwiyojeje xaina Reúmajawabelia.

Sara petëpaejawa, yabara peliwaissi

23 ¹⁻² Sara itsa xaina ciento veinte y siete pawaijeje, bajarapowa baja tēpa Quiriat-arba tomarata. Itsawënë pijinia xaina bajarapatomara. Pewënë Hebrón, Canaán nacuada pe-ecaetomara. Abraham bitso najamatabë-xainaeya wënuwa pijacuenecuenia pijawa, pewecuatëpaexaetsi. ³ Cae-epatoyo pewënuecujinae, wecuapona itsajota boca Sarapijiwami petëpaeawa. Pona imoxoyo pejinawanapaewijawabelia, heteomonaejawabelia,⁴ ira yabara pebarëcuaicuaijainexa, pexainaenexa itsajota mëthëtsijitsia pijawami.

⁴ Jumaitsi:

—Itsanacuapijinë-atanë paxamëtuatuajëta tsaponaponae, panerajut-sianame patacacomuatsinexa ibowajumëthë, taxuabinexa tajawami —jai Abraham.

z 22:18 *nemomoxiyajuwënënë pejamatabëcueneta*: Taema Gén. 12:2-3; Hch. 3:25; Gál. 3:8.

a 23:3 *heteomona*: Bajarapamonaemi Het-pijinë pemomoxi. Het raja Noëpijinë pemomoxiyajuwënënë; Canaán pexënato, Cam-pijinë pexënato. Itsawënë pijinia hititamona. Nexata, hititamona, heteomona-ata caewiria yabara cuaicuaijai. Taema Gén. 10:1,6,15.

⁵Itsiata baitsi jane, heteomonae jumecanawiatatsi:

⁶—Abaxë raja, patajatuxanenë. ¡Panenamuxuna-ewere! Xamë raja cajena paxanëtuatuajëta peca-itapetsinë Dioso. Paxanë raja paxainajë ibowajumëthëanë patamëthëcaenexa pamonae panewecuatëpaponä. Nexata, pa-ibomëthëwajujawata catsitaxanepana nemëthëtsinexa, mëthëtsianame nijawami. Acuenebi paxanëyajuwënëwi-ata pecawecua-asiwajawa —jai heteomonae Abraham-jawabelia.

⁷Abraham nexata nonotapuna. Xuacujinae, nawëbuatabareca yaiyataeya pecuaicuaijawiawënaeya heteomonaejawabelia.

⁸⁻⁹Jumaitsi:

—Pepacuene itsa pacatsitaxanepana tamëthëtsijawa tajawami mapanacuataje, nexata pexaniacuene paneto-exanaename. Panetowajëtsianame panijamonaenë Efrón-jawabelia, Zohar pexënatota, tanerajutsinexa petsutoyenepanata pa-ibowaju boca bajaraponë pija-iramuxunenetalia, Macpelawënë ibowaju. Xanë bajarapawajumatamo rajutsianajë pacuenia namatamota. Nexata, bajarapacuenia tajamëthëwaju tsanucäe tsane mapanacuataje —jai Abraham.

¹⁰Bajarapaepatota, Efrón heteomonaeyajuwënëne na-eca bajarapatuatuajëta, tomara peyacaranatanutsijawapijibaupa canacujitsita. Nexata, jumecanawiata Abraham-jawabelia, jamatejema itsamonae-ata pejumetaenexatsi, pamonae penajua-enaewi, pamonae-ata pelialiawi bajarapatomara mata-toyorotsia peyacaranatanutsijawapijibaupajawalia.

¹¹Efrón nexata jumaitsi daxita pijamonae pitabëta:

—¡Jume raja, patajatuxanenë! ¡Abaxë nenamuxuna-ewere! Xanë raja carajutsianatsi amoneya bajarapa-irayo, pa-ibowaju-ata boca bajarajota. Daxita mapamonaeye nejumetaeyena amoneya tacarajutsijawanexa bajarapa-irayo. Mëthëtsianame baja nexata nijawami —jai Efrón.

¹²Abraham icatsia nawëbuatabareca yaiyataeya bajarapatomarapijiwajawabelia. ¹³Xuacujinae, jumecanawiata Efrón-jawabelia daxita bajarapamonae pitabarata:

—¡Abaxë nenamuxuna-ewere! Xamë raja cajumaitsi orijibia tanewecua-pitsinexamë bajarapa-iramatamo. Bajarajane xuacujinae, tajawami mëthëtsianajë —jai Abraham.

¹⁴Efrón nexata jumecanawiata Abraham:

¹⁵—¡Nejumetaema tajatuxanenë! Bajarapa-irajawayo raja namatamota cuatrociontes ponëbeje palatanëanë. Bajaraxua yabara acuenebi wajacuaicuaijait-saponaejawabeje. Nexata, jamatejema mëthëtsianame nijawami —jai Efrón.

¹⁶Nexata, Abraham bajaraxua jumejejai pematamotsinexa bajarapamatamowajëto Efrón-jawabelia, pacuenia bajaraponë wajëtatsi daxita jiwi-tuatuajëta. Matamota daxita pematamocaëjëpaeacuenia bajarapamonae pitabëta. ¹⁷Bajarapacuenia Abraham comuata Efrón-jawabelia Macpelawënë ibowaju. Yajawacomuata itsa pa-irayojawata boca bajarapa-ibowaju, daxita penubenaenaejawaxi-ata. Macpela petsutoyenepanata pa-ibowaju boca Mamremacabo imoxoyojawatareca. ¹⁸Perajutsixaetsi bajarapa-irayo, Abraham baja pepopija-irayo exana. Bajarapacuenia natoxainabeje pejumetaewitsibeje ira penawijatsijawa heteomonae pejumetaeyenaewitsi, daxita pamonae-ata lialia tomara peyacaranatsipijibaupajawalia.

¹⁹Bajaraxuacujinae, pematamotsicujinae baja, Abraham pijawa mëthëta bajarapa-ibowajumëthëjawata. Macpelawënëmëthë ibowaju boca Mam-remacabo imoxoyojawatareca, Canaán nacuata pe-ecaetomara. Itsawënë pijinia Hebrón. ²⁰Bajarapacuenia nexata Abraham canacopata^b bajarapa-ibowaju, patsutota bajarapa-ibowaju ruca, patusatota-ata eca bajarapatsuto, heteomona pecanajetsixaetsi pemëthëtsinexa pijawami.

Abraham itoroba pijajiuitonë petojaitsinexa pexënato pijawanexa

24 ¹⁻² Abraham baja bitso perujunëyo. Jehová yawenonabiabatsi pexa-niacuenia daxitacuenejawalia. Nexata, itsamatacabijawabelia Abraham junata pijajiuitonë^c pewitsatsinë, perujuponaponaenë daxita amoneya petonacuenebiwiitsiwecua. Bajaraponë petonamatacatorobaponaponaenë daxita Abraham pijajiuijawabelia, peto-ewetaponaponaenëna daxitaxua Abraham xaina. Nexata, Abraham jumaitsi bajaraponëjawabelia:

—Nacobebuatsianame tathaëbëxëpanayota^d tayapëtaenexa itsa jeja-mëjitsia pacuenia ca-itorobijitsiatsi. ³Nexata, najumecapanepaeya neju-maitsimëre Jehová pewënëta, Ponë pewetaponaponaenë athëbëpijicuene, irapijicuene-ata, tanetocopatsiyaniwamë itsamatacabi taxënato Isaac penacojobiyaníwa Canaán nacuapijipetiriwajawabelia, panacuata xanë ponaponajë. ⁴Saya ponaename tajanacuamijawabelia. Nexata, bajarajotalia neto-itapetsianame taxënato pijawanexa, tajamonaeyajuwënëwa —jai Abraham.

⁵Nexata, pijajiuitonë jumecanawiatatsi:

—Itsa bajarapapetiriwa apojitsipae tsane peponaenexa xanë tapëta, ¿denexata itsinë tsane? ¿Nexata meta, caponaenajë nexënato bajarabelia, panacujawawerena wecuapitsapame? —jai Abraham pijajiuitonë.

⁶⁻⁷Abraham nexata jumaitsi:

—¡Jume! ¡Pëtsa netocaponame taxënato bajarabelia! Apoxanepanae, tsipaji Jehová DIOSO, athëbëtsatsia pe-ecaenë, nejuta taxapijinëmi pijamonaewecua, pa-irata-ata bajarapamonae jinawanapa. BajaraPonë najumecapanepaeya nerajutsiapaeba mapaCanaán nacuaje, tamomoxi tawënamuto pejinawanapaenacuanexa. Nexata xuata, bajaraPonë cato-itorobiana pija-ángelnë peca-ewetsinexa itsacueneyaniwamë, jamatejema tanetocapat-sinexamë maberenaje petiriwa taxënato pijawanexa. ⁸Itsa bajarapowa apojitsipae tsane peponaenexa xamë nepëta, apo-itsacuene. Nexata, xamë apo-exanae-atamë nejumlahitsicowëya, itsiata, aponajumecowëneaneconitsimë tsane. Itsiata baitsi jane, apojitsipaenë necaponaejawa taxënato bajarabelia —jai Abraham.

⁹Nexata, Abraham pijajiuitonë nacobebuata bajaraponë pethaëbëxëpanayowetsina. Najumecapanepaeya naliwaicajoneya jumaitsi:

—Xua nejumlahitsimë, cato-exanaenatsi —jai Abraham pijajiuitonë.

¹⁰Bajaraxuacujinae, caetuata itapetsiaya bitso pexaniawirijawanë, xua

b 23:20 Canacopata: Pija-iraxae, Abraham-pijinë pexi, pemomoxi-ata pewënamuto juya canacopatapona bajarapa-ira pemëthëtsinexa pewecuatëpaewitsi. Taema Abraham yabara Gén. 25:9, Isaac yabara Gén. 35:29, Lea, Jacob-ata yabara Gén. 49:31; 50:13. **c 24:1-2 pijajiuitonë:** Bajara-ponë pewënë Eliezer. Taema Gén. 15:2. **d 24:1-2 tathaëbëxëpanayota:** Bajaraxua banato-exana ëpenayapëtaewijawabelia pacujinae naliwaicajunuabeje. Xaniawaetsia orijibia neyapëtaenexa bajaraxua yabara, taema «nacobebuata pethaëbëxëpanawitowata», glosariojawata.

pijatuxanenë pexainaeyajuwënëjawanë, petocaponaenexa bajarapowa, pijamonaenexa-ata. Nexata, pita diez ponëbeje camello pecaponaenexa. Bajaraxuacujinae, barënaropota Nacor pe-ecaetomarajawabelia, patomara eca Mesopotamia nacuata.^e ¹¹Itsa baja Abraham pijajiwitonë barëpata bajarapatomara pënëwelia, caniwiyi baja tsanajetaruae. Bajarapatomarapijipe-tiriawi caniwiyi puanabiaba mera, pecueyetsimeramëthëjawabelia. Nexata, Abraham pijajiwitonë bajarapaepatota nacuera-ewetsia-exana pijacamellomonae, bajarapameramëthë imoxoyojawata. ¹²Bajaraxuacujinae, taxuxuaba pewajëcaejawa DIOSOjawabelia, peyapëtaenexa powa xanepana Isaac pijawanexa. Jumaitsi mapacueniaje:

—¡Jehová DIOSomë, tajatuxanenë Abraham pijaDIOSomë, tajumaitsicowëya tanetopitsapaenexa xaniawaetsia, pexaniajamatabëcuene to-exanare tajatuxanenë Abraham-jawabelia! ¹³Majotaje nacopatanuajë mapamëthëmuxunenëjawataje, pepatsiwajënaeya pejanawaxi mera pepuanaenexa mapanacuapijiwaxije. ¹⁴Nexata, pexaniacuene neto-exanaenaxa. Netsi-tajëtsianame powa to-itapetame tajatuxanenë pexënato Isaac pijawanexa. Xaniawaetsia tayapëtaenexa, peneta nerajutsiana mera tawajëtsijawata ta-apaenexa. Apo-itorobi-atanënu, peneta pijacuata camello mera netomit-sapuaena. Nexata, bajarapacuenia xanë yapëtaenajë xamë bajarapowa neto-itapetsijawa nijajiwitonë Isaac pijawanexa. Bajarapacuenianua yapëtaenajë pepacuene pexaniajamatabëcuenia neyawenonaejawa tajatuxanenë Abraham —jai Abraham pijajiwitonë pewajëtsijawata DIOSOjawabelia.

¹⁵Bajaraponë itsa abaxë apoweretsi pewajëcaejawa DIOSOjawabelia, tane penajetaruaejawa pejanawa, pijacanalito wëtacara. Bajarapowa tsaena Rebeca, Betuel pexënatoyo. Betuel, Nacor pexënato, Milcawënëwabeje. Abraham pejuyapijinë Nacor, Betuel paxa. ¹⁶Bajarapowayo Rebeca bitso pexaniawayo. Pejanawayo itsapebi-ata abaxë apopeperabëyapëtaewa. Nexata, Rebeca runareca bajarapameramëthëabereca pijacanalito pewënëtsinexa mera. Itsa baja pitsapaina pepuatsicujinae mera, nawiataba najetarucalia baja boyabelia. ¹⁷Nexata, bajaraponë pëbaralia pepëcaxinaenexa. Itsa baja pëcaxina, jumaitsi bajarapowajawabelia:

—¡Pexaniacuene neto-exanare! ¡Mera nerajure ta-apaenexa, nijacanalito-pijimera! —jai.

¹⁸Nexata, bajarapowa jumaitsi:

—¡Ājā, apaema tajatuxanenë! —jaitsi bajarapowa. Bajaraxuacujinae, etsica bajarapameracanalito. Bajarapowa cobenanucaya abata bajaraponë piapaenexa. ¹⁹Itsa bajaraponë apaewereta piapaejawa, Rebeca icatsia jumaitsi:

—Xanë catopuanaenatsinua mera nijacamellonexa, bajarapamonae piapaenexa pacuenia jitsipa —jai.

²⁰Bajarapowa nexata naxatsiayo epanaxuaba pijacanalitowecua dajubi piapaeyabiabimoyojawabelia. Nexata, bajarapowa topuanapona mera, daxita camello piapaenexa. ²¹Nexata, bajaraponë ajumejibia abaxë taenuca jamatabëcuenenabenajacaeya, jumaitsinejewa abaxë itsaliwaisi. Bajaraponë

^e 24:10 *Mesopotamia*: Mesopotamia nacua raja Padan-aram-yajuwënënacuyayo. Mesopotamia nacua eca Éufrates, Tigris menebejetuatujëlia pebocaetusatojawata.

jamatabějumaitsi: «¿Xaniajai meta mapowayo tsaneje? ¿Xaniajai meta Jehovah neyawenona tajanamuto tanetoxanepanaenexa?», jamatabėjai tsanucae. ²² Bajaraxuacujinae baja, daxita camello piapaeweretsicujinae, nexata bajaraponē jutsina oro anillo perajutsinexa bajarapowa. Bajaraxua arewe tsecae bejamatabē seis pagramobejecuenia. Nexata, tsipumuruta. Yajawarajutanua bajarapowa anijapenamaxēxatatsijawabeje, orojawata pexanaejawa. Bajaraxuabeje arewe bejamatabē cien pagramobejecuenia. ²³ Nexata, jumaitsi bajarapowajawabelia:

—¡Nejumaitsimēre! ¿Jipatsa xamē pexēnatoyomē? ¿Paxainame tsaja axa pijabota taxunaenē patanapatsinexa, itsajota-ata patanamajitsinexa? —jai.

²⁴ Bajarapowa jumecanawiata:

—Xanē raja Betuel pexēnatoyonē, Milca pexēnato, Nacor pijawa. ²⁵ Patajabojawatalia raja, paxainajē itsajota papatsijitsiamē, panenamajitsinexa-ata. Paxainejebajēnua pexaniabacamēsi nijacamello bajarapajumata pebobenae-nexa, bajarapacuenia pexaniapona patanotsijawami pexaenexa-ata —jai Rebeca Abraham pijajiuitonējawabelia.

²⁶ Bajarapaepatota nexata, Abraham pijajiuitonē pematabacabēta nuca, pexaniajamatabēcuenē perajutsinexa Jehovahajawabelia. ²⁷ Jumaitsi:

—Bitso pexaniajamatabēcuenenēmē, tajatuxanenē Abraham PijaDIOSomē. Caejamatabēcuenē nexainaenē, tsipaji pexaniajamatabēcuenē to-exaname tajatuxanenē Abraham-jawabelia. Nexata, yapētaniji tanematacaponaejawamē tapatsinexa bajaraponē pijamonaejawabelia —jai Abraham pijajiuitonē pexaniajamatabēcuenē perajutsijawata wēnēcacuaicuijaiya Jehovahajawabelia.

²⁸ Rebeca nexata cujinaeponalia pena pijaboyabelia, petsipaebinexa daxitaxua jumaitsitsi bajaraponē. ²⁹ Bajarapowa xaina pematapijinē pewēnē Labán. Bajaraponē pejumetaecujinae pejuyapijiwa, nexata cujinaelia bajarapameramēthējawabelia penamataēxēnaenexalia bajaraponē. ³⁰ Ponalia, tsipaji pumutane oro anillo. Maxētanenua penamaxēxatatsijawa orojawabeje pejuyapijiwa. Xua tsipaebanuca penajawabelia, jumetane bajaraponē pejumajitsijawatsi. Nexata, Labán itsa lia bajaraponējawabelia, caxitajaraba Abraham pijajiuitonē. Bajarajotalia, bajaraponē yajawanuca pijacamello meramēthē imoxoyojawata. ³¹ Jumaitsi Labán:

—¡Naxatsia! Xamē Jehovah pexaniacuenia pecayawenonaenē. Xamē acue-nebi nenacopatsijawa majotarenaje wayafota. Pacatoxainatsi paxanē botalia itsajota neyajawaponaewi papatsijitsiamē, panijacamello-ata itsajota pacapatsijitsiamē —jai Labán.

³² Nexata, bajarapacuenia Abraham pijajiuitonē napēnalia Labán pijaboyabelia. Bopanabojawata, Labán towejuma-isica daxita pijacamello xua capona. Rajutanua camello pexaejawa. Bajaraxuacujinae, carena mera bajaraponē petaxuquiatsinexa, peyajawaponaewi-ata petotaxuquiatsinexa.

³³ Itsa baja totsantasi pexaejawa pexaenexa, nexata Abraham pijajiuitonē jumaitsi bajarapamonaejawabelia:

—Xanē abaxē apoxaenē tsane pacatsipaebinejewatsi xua yabara najetarucajē —jai.

Nexata, Labán jumaitsi:

—¡Cuaicuijamēre pacuenia jitsipame! —jai Labán.

³⁴ Bajaraponë jumaitsi:

—Xanë raja tanewitsatsinë Abraham. ³⁵ Bajaraponë yawenonatsi bitso pexaniacuenia Jehová. Nexata, pexainaenë naexana. Xaina ovejamona, vacamona, oronua, palatanëanë-ata. Ayaibitsaëto amoneya petonacuene-biwitsi xaina pebinëxi, petiriwaxi-ata. Camellomonaenua orijibia yajawa-xaina, burromona yajawa. Nexata, xaina ayaijawa, Dioso perajutsixaetsi. ³⁶ Itsa baja Sara bitso perujuwa, bajarapaepatota, Abraham pexijiwiyo toxaina. Nexata, bajaraponë canacopata daxita paxa pecobecowë. ³⁷ Taja-tuxanenë nitoroba najumecapanepaeya tajumaitsinexa pexaniajaicuenia bajaraponëjawabelia mapacueniaje. Nexata nejumaitsi: «¡Pëtsa netocopatame taxë nato penacojobinexa mapanacua, Canaán nacuapijipetiriwajawabelia, panacuata xanë ponaponajë! ³⁸ Biji rajane, xamë ponaename taxapijinëmi pijamonaejawabelia. Bajarapamonaeyajuwënëpijipetiriwaweto-itapetsianame taxë nato pijawanexa, tajawiriawa», nejai. ³⁹ Xanë nexata jumaitsinë: «Tajatuxanenë, ¿de-itsinë tsane bajarapowa itsa apojitsipae peponaejawa xanë tapëta?», janë. ⁴⁰ Bajaraponë nexata nejumecanawia: «Xanë raja Jehová pejitsipaecuenia tajumecowënëtaponaponaenë. Bajaraponë raja cato-itorobiana pija-ángelnë, xaniawaetsia nijanamuto neponaenexa, nenacueratsiyaniwa-ata, netocaxitajarabinexa powa taxë nato pijawanexa tajamonaeyajuwënëwa. Baitsi, taxa Tarépijinëmi pijamonaeyajuwënëwa. ⁴¹ Jane baitsi, itsa apocatocopatsijitsipae tsane pejanawa pijamona, matapania xamë nexanaenexa cato-acuenebi tsane xua najumecapanepaeya nejumaitsimë taneto-exanaenexamë picani. Nexata, apoxanae-atamë, aneconijibimë baja xanëjawaberena», nejai tajatuxanenë Abraham.

⁴²⁻⁴³ »Itsa baja patajë meramëthëjawaberena, nexata wajëtajë Jehovájawabelia. Jumaitsinë: «Jehová, ponëmë tajatuxanenë Abraham pijaDiosomë, itsa neyawenonaename xaniawaetsia tajanamuto xua yabara najetarucajë, netocopatsianame tanetoxanepanaenexa wecae nucaenajë meramëthë imoxoyojawata. Powa patsiarena mera pepuatsinexa, itsa bajarapowajawabelia jumaitsinë tsane mapacueniaje: «¡Pexaniacuene nexanare! ¡Mera nerajure tana-apaenexa!», itsa janë tsane bajarapowajawabelia, ⁴⁴ bajarapowa peneta taneto-itapetsiwamë tsane tajatuxanenë Abraham pexë nato Isaac pijawanexa, jitsipaenajë tanejumecanawiaatsijawa mapacueniaje: «¡Apaema xamë! Jucaenajënua mera tacatorajutsinexa nijacammelö, nejai tsane peneta», janë tawajëtsijawata tajatuxanenë pijaDiosojawabelia. ⁴⁵ Itsa abaxë paepatota apoweretsinë tawajëtsijawa Jehovájawabelia, nexata taniji penajetarucaejawa Rebecca. Pijacanalito wëtcaranucapona. Bajarapowa runareca meramëthëareca, pepuatsinexa mera. Penawiatsiwatsina xanë nexata jumaitsinë: «¡Nenarajure mera!», janë. ⁴⁶ Nexata, bajarapowa bepijiayo nawewëtcara-pitsica tanerajutsinexa. Nejumaitsi: «¡Nijacueneta apaema!», nejai. Orijiibia, nejumaitsinua: «Rajutsianajënua mera nijacammelomona», nejai. Bajarapowa nerajuta mera. Tajacammelomonaenua netorajuta mera. ⁴⁷ Bajaraxuacujinae, yanijobajë: «¿Jipatsa xamë pexë natoyomë?», janë. Bajarapowa nejumecanawia: «Xanë raja Betuel pexë natoyonë, Nacor pexë nato, Milcabeje», nejai. Nexata, bajarapaepatota anillo tsipumurutajë. Tsimaxërutajënua anijapenamaxëxatatsijawabeje oronanito penacuenebijawanë. ⁴⁸ Nexata,

xanë tamatabacabëta nucajë asiwaya pexaniajamatabëcuene tarajutsinexa barëyaya, wënëxaniatsiaya Jehovájawabelia, ponë tajatuxanenë Abraham pijaDiosojawabelia. Bajarapacuenia wajëtajë tanecapatsixae xaniawaetsia maberenaaje, itsaberena tajatuxanenë Abraham papijamonaemë pajinawanapame, tatocaxitajarabinexa pexënato pijawanexa —jai Abraham pijajiwitonë.

⁴⁹Icatsia, bajaraponë jumaitsi:

—¡Ajenaconoxaeta nexata, panejumaitsimëre itsa pexaniajamatabëcuene paxainame tajatuxanenëjawabelia panerajutsinexa pexënato pijawanexa! ¡Itsa jume, itsa apopajitsipaemë bajarapajamatabëcuene, panejumaitsimëre tayapëtaenexa xua exanaeajitsianë! —jai Abraham pijajiwitonë Rebeca pijamonaejawabelia.

⁵⁰Nexata, Labán, Betuel-beje, jumecanawiata:

—Bajaraxua raëta pitsapa Jehovájawawerena. Nexata, paxanëbeje acue-nebi patacajumaitsinexabeje, «jājā», itsa jume, «jume», patacajainexabeje.

⁵¹¡Taema! Nuca rabaja maje Rebeca. Nexata, tobarëponaenename bajarapowa, jamatejema nijatuxanenë pexënato pijawanexa, pacuenia Jehová tocajë-tatsi bajarapowajawabelia pe-exanaenexa —jai-beje.

⁵²Itsa bajarapacuenia jumetane Abraham pijajiwitonë pejumaitsiyawatsi, nexata bajaraponë pematabacabëta nuca yaityataeya Jehová pitabarata, irabereca matabocopsiaya. ⁵³Bajaraxuacujinae, bajaraponë jutsina xuanë capona perajutsinexa Rebecajawabelia, orojawata pexanaejawanë, palatanëanënuua, nawanë yajawa. Itsajawanë pijinia Rebeca pijamonaejawabelia rajuta, xuanë jamatabënacapona perajutsinexa. ⁵⁴Xuacujinae, bajaraponë, peyajawaponaewinua, naxane pexaejawa. Namajitanua bajarajota. Itsa baja bajayacunua, bajarapamonae itsa namatacoba, nexata Abraham pijajiwitonë jumaitsi Rebeca pijamonaejawabelia:

—¡Panecopare baja taponaenexa tajatuxanenë Abraham pijabojawabelia! —jai.

⁵⁵Jane baitsi itsiata, Rebeca pematapijinë, pena-ata jumaitsi:

—Abaxë bajarapowayo nacopatsiana paxanëjawata diez pamatacabibejucuenia. Bajaraxuacujinae jane baja, barëponaenename —jaitsi.

⁵⁶Bajaraponë jumecanawiata:

—¡Pëtsa baja panecuenenajematsia-exaname, tsipaji Jehová neyawenona xaniawaetsia tanetopitsapaenexa tajanamuto maberenaaje! ¡Nexata baja, panecopare tanawiatsinexa tajatuxanenë Abraham pijaboyabelia! —jai bajaraponë.

⁵⁷Nexata, bajarapamonae jumecanawiatatsi:

—Junatsianatsi nexata bajarapowa, wajayapëtaenexa pacuenia najamatabëxaina —jaitsi.

⁵⁸Nexata, junatatsi Rebeca peyanijobinexatsi:

—¿Naponaejitsipame tsaja maponë pepëtaje? —jai.

Bajarapowayo jumecanawiata:

—Jājā. Naponaeajë —jai.

⁵⁹Nexata baja, copatatsi Rebeca penaponaenexa. Yajawapona powa ewetabiabatsi tsiquiriwayojawaweliacujinae, amoneya petonacuenebiwatsi. Nexata baja, barëpitsapa Abraham pijajiwitonë, pebarëpatsiwi yajawa.

⁶⁰Penapējibijawatatsi, Rebeca pijamonae yapētaeya-exanatsi Dioso pewēnēta itsamatacabi pexaniacuene petaenexa. Jumaitsi mapacueniaje:

—Patajuyapijiwamē, pacatojitsipatsi xamējawawerena bitso pepitsapoponaejawa nemomoxibitsaētoخانeto. Patojitsipajēnua bajarapamonae pecuene-amoneyababiabinexa tomanējawabelia pijawajabitsaē —jai pijamonae.

⁶¹Nexata, bajaraxuacujinae Rebeca ecaya camellojumatsia. Itsawaxi pijinia pona itsacamellonēta pepēnaponaewitsi. Pēnanajetarubena Abraham pijajiwiwonē. Bajarapacuenia nexata, Abraham pijajiwiwonē itsa caxitajaraba Isaac pijawanexa, wecuabarēpona Rebeca bajarapatomarawecua.

⁶²⁻⁶³Abraham pijajiwiwonē pecowēta, Isaac pijinia ponapona Neguev-tusatojawabelia itsajota meramēthē eca, pamēthē wēnēruba «Dioso piasaēt-saponaponaenē wajanacataenē»,^f pejaiwēnē, bajarajota peponaponaenexa cae-epatoyo. Penawiatsicujinae bajarawerena, pata icatsia paxa pijataxunaejawata. Itsamatacabi caniwiyo bowecua pitsapa wayafotusatuabelia peponaponaenexa. Bajarajotalia, asiwaya najamatabēxainaeya ponapona Diosojawabelia. Bajarapaepatota, tane camello pimoxoyobijawatsirena bajaraponējawaberena. ⁶⁴Rebeca-ata pijinia tane bajarapaepatota Isaac. Nexata, bajarapowa runaica camellojumawetsica. ⁶⁵Yanijoba Abraham pijajiwiwonējawabelia:

—¿Demaponē najetarucaje waxaitsijawaberena? —jai bajarapowa.

Bajaraponē jumaitsi:

—Tajatuxanenē raja Isaac —jai bajaraponē.

Nexata, bajarapowa pita penaitabaracaranatsipananexa.

Naitabara-acataxuaba.

⁶⁶⁻⁶⁷Pijatuxanenē pijataxunaebowawabelia pepatsicujinae, nexata Abraham pijajiwiwonē tsipaeba Isaac-jawabelia daxitaxua exana. Bajaraxuacujinae nexata, Isaac barēpona Rebeca penapijiwami pijacarpabowawabelia. Bajarapacuenia baja Isaac pita Rebeca. Isaac nexata bitso asiwa Rebeca. Nexata, Isaac pewēnajamatabēxainabiawami pena Sarapijiwa, Isaac baja copata.

Abraham xaina pemomoxi itsamonae Ceturawēnējawawabelia

(1Cró 1:32-33)

25 ¹Abraham xaina itsawa pijawa. Bajarapowa pewēnē Cetura. ²Bajarapowawawabelia xaina pexi, mapamonaeje: Zimram, Jocsán, Medán, Madián, Isbac, pecotocaewinē pijinia pewēnē Súa. ³Jocsán pexēnato xaina anijanēbeje pewēnē Seba, Dedán-beje. Dedán-jawawerena pitsapa Asurim-monae, Letusim-monae, Leumim-monae. ⁴Abraham pexēnato Madián-ata pexi xaina mapamonaeje: Efa, Efer, Hanoc, Abida, Elda. Daxita bajarapamonae pijapemomoxi tsaponae Cetura,^g Abraham pijawa. ⁵Isaac canacopata daxitaxua paxa Abraham pecobecowē pexinaejawanē. ⁶Itsamonae pijinia pamonae xaina itsapetiriawijawabelia saya rajutapona

^f 24:62-63 Dioso piasaēt-saponaponaenē wajanacataenē: Hebreojumeta wēnēruba «Beer-lajairoi», pejaiwēnē. Bajarapameramēthē wēnēruba bajarapacuenia Agar. Taema Gén. 16:14. ^g 25:4 *pija-pemomoxi tsaponae Cetura*: Taema «Cetura pemomoxi», glosariojawata, xaniawaetsia neyapētaenexa bajarapamonae yabara.

pijajawaxinexa caejiwi canacujitsia. Abaxë Abraham itsa asaë tsaponaponaë, pamonaë xaina pexi itsapetiriawijawabelia itoroba pemutuabereca pejinawanapaenexa Isaac-wecua.

Petëpaejawa Abraham, yabara peliwaishi

⁷Abraham asaë tsaponaponaë ciento setenta y cinco pawaije. Bajaruacujinaë, tēpa. ⁸Bajaraponë tēpa pijaperujunëwixaeta, pepuaperujunëyo bitso. Nexata, bajarapacuenia itsa tēpa, mëthëtatsi pacuenia pijamonaemi petëpawimi mëthëcabiaba.^h ⁹Pexënatobeje Isaac, Ismael-beje, xuabatsi Macpela petsutoyenepanata pebocae-ibomëthëjawata, pamëthë boca Mamremacabo imoxoyojawata, Efrón pija-iramiyajuwënëjawata, Zohar pexënatoheteowirianë. ¹⁰Bajarapa-ira cajena Abraham comuatabuata heteomonaëjawabelia. Nexata, bajaraponëmi-ata buatatsi pa-ibowajumëthëjawata Sarapijiwami copiaya buatatsi. ¹¹Abraham petëpaecujinaë, DIOSO pexaniacuenia yawenonaponatsi Isaac. Abraham petëpaecujinaë, Isaac ponapona imoxoyojawata pameramëthë eca Neguev-tusatojawata pewënë, «DIOSO piasaëtsaponaponaenë wajanacataenë», pejaiwënë.

Ismael pemomoxi, yabara peliwaishi

(1Cró 1:28-31)

¹²Mapamonaëje Ismael pexi, Abraham-pijinë pexënatu Agar-jawabelia. Ponë xaina Egipto nacuapijiwata, Sarapijiwami pijajiwitowami. ¹³Ismael-jawawerena mapamonaë naexanabuataponaje: Nebaiot, Cedar, Adbeel, Mibsam, ¹⁴Misma, Duma, Massa, ¹⁵Hadar, Tema, Jetur, Nafis. Pecotocawinë pewënë Cedema. ¹⁶Pamonaëje Ismael pexi pewënëanë doce ponëbeje. Bajarapadoceponëbeje naexana caenë canacujitsia peyanacua-ewetsinënexa pijamonaë pijanacuata. Bajarapamonaë pewënëanëcuenia wënërubapona pejinawanapaetusatonëmijawa.

¹⁷Ismael itsa xaina ciento treinta y siete pawaije, bajaraponë tēpa. Nexata, mëthëtatsi pacuenia pijamonaemi petëpawimi mëthëcabiaba. ¹⁸Daxita bajaraponë pemomoxi jinawanapa Havila nacua, Shur nacuabejetuatuajëajawa, Egipto nacua imoxoyojawabetsia. Panamuto najetaruca Egiptojawawerena Asiria nacuajawabelia, bajarapanamuto pemuxuneneta jinawanapa. Ismael pemomoxi itoya nanaëcota Cetura pexita penaëxanaewijawabelia, bajarapacuenia Isaac pemomoxijawabelia-ata. Daxita bajarapamonaë caenë Abraham-pijinëjawawerena picani pepitsapaponaewi. Bajarapacuenia itoya nanaëcotsi-ata, itsiata, Ismael pemomoxi jinawanapa bajarapanamutojawa Cetura pemomoxituatuajëajawa, Isaac pemomoxituatuajëajawa-ata.

Penaëxanaëjawabeje Jacob, Esaúbeje, yabara peliwaishi

¹⁹Marapaliwaishi Isaac-pijinë pexi yabara tsaponaëje, Abraham-pijinë pexënatu. ²⁰Isaac baja itsa xaina cuarenta pawaije, nacojioba

h 25:8 *petëpawimi mëthëcabiaba*: Bajarapaliwaishi nacato-itajëta petëpaenë piasiwajawa yaiya-tacuenia pejumaitsiyawa petëpaenë yabara. Taema «petëpawimi pijamonaemi pecowëyapona», glosariojawata.

Rebecajawabelia Betuel pexënatoyo, Labán pejuyapijiwa. Bajarapamonae arameowi pejinawanapaewi Padan-aram nacuata. ²¹ Rebeca apotoxainae pexënatojiwiyo Isaac-jawabelia bajayajebi. Bajaraxuata, Isaac wajëca Jehovájawabelia, bajarapowa pexi petoxainaenexatsi itsamatacabijawabelia. Jehová jumetanetsi Isaac petowajëcaejawa pijawa Rebeca. Bajaraxuacujinae, jemata baja tonacoxitatsi. ²² Yacotajina anijanacuetobeje. Bajarapowa peyacotaponaponae-epato, tsicotonabeyabiabatsibeje bitso. Nexata, bajarapowa najamatabëxaina: «Bajarapacuenia itsa tsitecaponaena, aponetoxanepanae ta-ajamatabësaëjawa», jamatabëjai. Nexata, lia bowecua pewajëcabiabitaxunaejawabelia, yanijobijitsia Diosojawabelia bajaraxua yabara.

²³ Jehová jumecanawiatatsi:

—Yacotamë raja anijanëbeje nexijiwiyo bejenexa. Nexata, bajaraponëta-beje pitsapaena anijawiriabitsaëtobejenexa, anijanacuabejenexanua. Bajaraxuata raja, catsicotonabeyabiababeje penaexanaewajënaeyabeje. Caenë piacuenesaënë tsane itsanëwecua. Matapijinë jamatabëcuene-ewetsiana pejuyapijinë —jai Jehová.

²⁴ Itsa baja tocopiapatatsi pexanaejawa, Rebeca exana anijanëyo beje.

²⁵ Copiaya penaexanaenëyo penatsobianëyo. Bitso najuweca. Nexata, bajaraponëyo wënërubatsi Esaú.ⁱ ²⁶ Bajaraxuacujinae, naexana itsanëyo, taxusalibëwaetabarucaeya pematapijinë. Bajaraponëyo wënërubatsi Jacob.^j Isaac bajarapacujinaeta xaina sesenta pawai beje pacujinae wecuanaitajëtatsi Rebeca pexënatonëyo beje.

Esaú canajetaxuaba pejuyapijinëjawabelia matapijinëjamatabëcuenemi

²⁷ Itsa bajaraponëbeje naweretaponabeje baja, Esaú nexata bitso pejitsipañenë penarujuaitsijawa unuabelia. Peyopianë bitso. Jacob apopejitsipañenë penarujuaitsijawa. Aposiwajamatabëcuenebëjainua itsajawabelia peponabiabinexa. ²⁸ Nexata, Isaac asiwaya tane bitso Esaú, tsipaji bajaraponë xae-yabiaba pecapatabiabi-unupijinëxi. Rebeca pijinia asiwa Jacob. ²⁹ Nexata, itsamatacabijawabelia Jacob seteta pexaejawacuene. Nexata, bajarpaepatota Esaú, bitso piäjaniñë, cueranaeya patanajetaruca unuwerena penarujuaitsinë.

³⁰ Nexata, Esaú jumaitsi:

—¡Pexaniacuene ne-exanare! ¡Nerajure bajarapatsobiatsapajawa xua setetame pexaniapexaejawa, tsipaji bitso tajani tsanajetaruca! Cueranajënu —jai Esaú. (Bajaraxuata, Esaú itsawënë xaina. Pewënë Edóm.)^k

³¹ Jacob jumecanawiata. Jumaitsi:

i 25:25 *Esaú*: Hebreojumeta Esaú, «penajuwinë», pejaijume. Esaú pejaijawa najumejëpabeje Seir pejaijawa hebreojumeta. Bajaraxuata, itsajawata Esaú pemomoxi wënëruba Seir nacuapijiwi pejaiwënëcuenia. Gén. 36:8. j 25:26 *Jacob*: Hebreojumeta Jacob pejumaitsi jume: «Jitsipajë Dioso pewetsijawa maponëje», pejaiwënë picani. Itsiata, pejumaitsi jawata najumejëpa «petaxusalibë», pejaijawa hebreojumeta. Hebreowi bayabaracuaicuajai itsanë pijataxunae penaxainae-yabinë, petaxusalibëwaetabinëtsi yabara. Bajaraxuata, Esaú bajarapacuenia wënëcacaicuajai Jacob yabara paxajawabelia Gén. 27:36-jawata k 25:30 *Edóm*: Edóm pejumaitsi jawata najumejëpa, «petsobiajawa», pejaijume hebreojumeta. Bajarapacuenia Esaú wënërubatsi, tsipaji tocopata pejuyapijinë pewecuanaxainayabinexatsi pecanacopatsijawaminexa matapijinëjamatabëcuene, petsobialentejaxutsapatomatamocuenia.

—Copiaya nerajutsianame matapijinējamatabēcuenemē,¹ xua canacopatsi-jitsiamē waxabeje pewēnamuto matapijinēxaemē —jai Jacob Esaújawabelia.

³² Nexata, Esaú jumaitsi:

—Xanē raja bitso tēpaejitsianē. Tajani. Asaējibinē baja. Nexata, itsa tēpaejitsipajē, apocabarēyanē tsipae xua canacopatsijitsianē picani waxa pecobecowē matapijinēxaenē. Bajaraxua cajena aponetoxanepanae itsacuenejawayonexa-ata —jai Esaú.

³³ Jacob jumaitsi:

—¡Nejumaitsimēre aeconoxaeta nexaniajaicuenia! —jai Jacob.

Bajaraxuacujinae, pexaniajaicuenia jumaitsi Esaú:

—Jājā, carajutsianatsi baja —jai.

Bajarapacuenia nexata Esaú tocopata, pecanacopatsinexa pejuyapijinē xua picani matapijinēxae canacopatsijitsia paxa pecobecowē.³⁴ Nexata, Jacob, pematapijinē pexaejawa rajuta, pan yajawa, lentejaxutsapato yajawa. Itsa baja Esaú werene pexaejawa, piapaera matawējēa-apanua. Bajaraxuacujinae, nonotapuna. Bajaraponē pona itsacuenejawayo aponajamatabēxainaenejewa. Aposiwajamatabēbjainejewanua xua canajetaxuaba pejuyapijinējawabelia.

Isaac pona Gerar nacuyabelia

26 ¹ Panacuata Isaac ponapona, bajarapamatacabijawa janiboxaneto tocopiatatatsi. Pacuenia paxa Abraham-pijinē pitsijanibo tocopiatatatsi, bajarapitsijaniboxaneto Isaac-ata tocopiatatatsi. Nexata, Isaac pona patusatojawabelia Gerar tomara eca, patomarata ponapona Abimelec, peyanacua-ewetsinē filisteomonae. ² Bajarajotalia itsa bajaraponē pata Gerar-jawata, nexata Jehová tsitanaitajētatsi. Jumaitsi:

—¡Pētsa poname Egipto nacuyabelia! ¡Ponaponare abaxē itsajota caju-maitsitsi! ³ Itsiata bailsi jane, xanē jitsipajē neponaponaejawa abaxē cae-epatoyo mapanacuataje. Xanē cayajawa tsanetsi. Cayapētaeya-exanatsi pexaniacuenia tacayawenonaejawanexa. Xamē, nemomoxi-ata pacarajut-sianatsi daxita mapa-iranēje. Nexata, xanē pacato-exanaenatsi pacuenia jumaitsinē najumecapanepaeya axa Abraham-pijinējawabelia. ⁴ Cayaweno-naenatsinua nemomoxi ayaibitsaēto pepitsapaponaenexa. Pacuenia nawitsia taneme athēbēyo perubenaejawa tulupu, bajarapacuenia bajarapamonae itsi tsane. Itsamatacabi bajarapamonae rajutsianajē daxita mapa-iranēje. Nemo-moxiyajuwēnēnē pejamatabēcueneta daxitanacuanēpijiwi^m yawenonaenajē penatoyapētaenexa pexaniacuenē. ⁵ Bajarapacuenia cato-exanaenatsi, tsipaji axa Abraham-pijinējawabelia xua tonajumecopatajē tanejumeyaiyataenē. Xuanē-ata itawetajē, xua itorobajē tacujarubiliwaisianē, daxita bajaraxua nejumecowēnētanajetarucaenexa —jai Jehová Isaac-jawabelia.

⁶ Nexata, bajarapamatacabijawa Isaac nacopata Gerar tomarajawata pepo-naponaenexa. ⁷ Bajarapanacuata pejinawanapaewi yanijobatsi Isaac pijawa yabara. Nexata, Isaac jumaitsi:

1 25:31 *matapijinējamatabēcuenemē*: Xuabeje Esaú canajetaxuaba neyapētaenexa, taema «matapi-jinējamatabēcuenē paxa pewēnamuto», glosariojawata. **m 26:4** *daxitanacuanēpijiwi*: Pacuenia Dioso jumaitsi Abraham-jawabelia Gén. 12:3-jawata, bajarapacuenia icatsia najumecapanepaeya jumaitsi Isaac-jawabelia.

—Tajuyapijiwa raja —jai. Bajaraponë nayawajunuaxaina tajawa raja pejaijawa, tsipaji Isaac bitso junawa bajarapamonaejawabelia. Bajaraxuata, pijawa yabara nayawajunuaxaina pebeyaxuabiyaniwatsi. Rebeca bitso pexaniawaxae, nexata bajaraponë jamatabëjumaitsi: «Belia mapowa tajawa yabaraje nebeyaxuabijitsipa», jamatabëjai. Nexata, bajarapaepatota bajaraponë nayawajunuaxaina pijawa yabara. ⁸Isaac bajayajebi pepuaponaponae bajarapatomarata, nexata itsamatacabi ventanawojotojawalia tanetsi Abimelec, pewetsinë filisteomonae, Isaac-beje, pijawa Rebecabeje, penawëtaicaecuenia penabarëyataeponaponaejawabeje. ⁹Nexata, Abimelec junata Isaac. Jumaitsitsi:

—Mapowa tsaena pepacuenen nijawaje. ¿Denexata xuajitsia xamë neju-maitsimë: «Tajuyapijiwa ra», nejamë? —jai.

Nexata, Isaac jumaitsi:

—Xanë jamatabë-itsinë: «Belia nebeyaxuabijitsipa mapowa pejamatabë-cueneje», jamatabëjanë —jai Isaac.

¹⁰Icatsia, Abimelec jumaitsi:

—¿Dexuajitsia nexata bajaraxua xamë paneto-exaname? Imoxoyo ra nexata mapanacuapijiwije nijawa pecatobarëmajitsi yapëtaenejewa nijawacuene. Xamë itsa bajarapacuenia paneto-exaname, nexata pibisiacuene imoxoyo pata-exanae Diosojawabelia, pataneyamaxë-itojorobixaemë —jai.

¹¹Nexata, Abimelec pijajiwi caetuata daxita petsipaebinxaxa mapacueniaje:

—Pajiwiyo jamatabë-itonotsiana, itsacueniabiana-ata Isaac pijawa, bajaraponë-ata, bajarapajiwiyo naneconitsia-exanatsi petëpaejawabelia —jai Abimelec.

¹²Bajarapawaita Isaac itsa nacueneba pe-ubijawanë, bajarajota bitso ayaijawa topitsapatsi, tsipaji Jehová yawenonatsi pexaniacuena. ¹³Bajarajota nexata baja, Isaac bitso pexinaenë naexana. Pexinaejawa pewajënaeyabelia bitso to-ayaijawatsi tsaponae. Ayaijamatabëcuenenë naexanapona pecobecowë yabara. ¹⁴Bajarapacuenia pexinaenëxaxa, xainanua dajubi, pacuenia ovejabitsaëtonë, vacabitsaëtonëna. Xainanua ayaibitsaëto pamona amoneya petonacuenebiwitsi. Bajarapamatacabi nexata filisteomonae cuenecaëbatsi pecobecowë yabara. ¹⁵⁻¹⁶Nexata, Abimelec jumaitsi Isaac-jawabelia:

—¡Ponare baja mapatomarawecuaje! Panewecuanatsatsianame baja, tsipaji bitso xamë panetsuxainaponame paxanëwecua. Ayaijamatabëcuenesaëna xainaponame paxanëtuatuajëta —jai Abimelec.

Nexata, Isaac jejai. Wecuapona baja Gerar tomarawecua, saicaya peponaponaenexa.

Itsa abaxë pamatacabijawa ponapona Abraham-pijinë, pijajiwi pecueyejebimeramëthëanëmi Gerar-tusatojawata, nexata bajarapameramëthëanëmi filisteomonae acabejeba atsataⁿ Abraham-pijinë pewënamuto. Nexata, acue-nebi mera pepuanaejawa.

¹⁷Nexata, Isaac pona pepatsinexa Gerar-tusatojawabelia, petsutobejetuatuajëta pebocaenamatajëpaetusato, Abimelec pecapitsapaexaetsi

ⁿ 26:15-16 *bajarapameramëthëanëmi filisteomonae acabejeba atsata*: Najumeliwaaisicajone-ata ëpexaniacuena petaeayabiabinexatsi daxita pemomoxijawabelia, itsiata, bajarapacuenia exana filisteomonae. Taema Gén. 21:25-31.

Gerar tomarawecua. Bajarajotalia nacuenebanuta pijacarpaboxi pepona-ponaenexa. Nexata, bajarajota ponapona. ¹⁸Itsa baja jinawanapa Gerar-tusatonamatajēpaejawata, nexata pijajiwi cua meramēthēanē, pamera-mēthēanēmi paxa Abraham-pijinē cueyejeba. Pamēthēanēmi acabejeba filisteomonaē Abraham-pijinē petēpaecujinae, bajarapamēthēanēmi icatsia mataropotsia yacuepona Isaac pijajiwi. Nexata, pacuenia paxapijinēmi wēnēruba bajarapameramēthēanēmi, bajarapawēnēcuenia icatsia wēnēruba Isaac-ata. ¹⁹Nexata, itsamatacabi Isaac pijajiwi cuewanapa pejanameramēthēnexa Gerar-tusatojawata. Nexata, bajarajota caxitajaraba pecuejawata pexaniamera, bēpēnēa pepitsaparucaemera. ²⁰Nexata, Gerar-tusatojawata oveja pewetawanapaewi, filisteomonaē, Isaac pijinia pijajiwi oveja pewetawanapaewi yanijobatsi anaeya bepīameramēthēcuenia. Nexata, Isaac pīajiwi barēnabia meramēthē yabara. Bajaraxuata, Isaac bajarapameramēthē wēnēruba Esek, «Peyabaranabemeramēthē», pejaiwēnē. ²¹Nexata, xuacujinae Isaac pijajiwi itsameramēthē taxuxuaba pecuejawa, pejanameramēthēnexa. Icatsia, bajarapameramēthē-ata yabara nabia filisteomonaē Isaac pijajiwi jawabelia. Isaac nexata bajarapameramēthē wēnēruba Sitna, «peyabaranaitoyameramēthē», pejaiwēnē.

²²Nexata, xuacujinae icatsia Isaac pijajiwi barēpona saicaya itsatusatojawabelia. Bajarajotalia, icatsia taxuxuaba pecuejawa itsameramēthē. Bajarapameramēthē apoyabarabetsi baja filisteomonaē. Isaac nexata bajarapameramēthē wēnēruba Rehobot, «Ayaitusatonacua wajajinawanapae-nexa», pejaijume. Isaac nexata bajarajotalia jumaitsi: «Bajarajane matapania Jehová nacato-itajēta pinijitusatoxaneto, aliwaisijibiaya wajajinawana-paenexa. Matsaena jotaje jamatabēcuenexanepanaeya jinawanapaenatsi, ayaijawa wajacapitsapaenexa waja-ubijawanē bajarapa-irata, bajarapijina pacuenia wajanacatonawitsinexa wajamonae, wajadajubi-ata», jai.

²³Bajarajotacujinae, Isaac barēpona Beerseba nacuyabetsia. ²⁴Itsa baja barēpata Isaac Beersebajawabetsia, bajarapamerawi Jehová tsitanaitajētatsi. Jumaitsi:

—Xanē raja pīaDIOSONē tsaponaponaē axa Abraham. iPētsa junawame, tsipaji xanē cayajawaponaponatsi! Pejamatabēcueneta tajajiwitonē Abraham asiwaya tanejumecowēnētsixae, cayawenonaenatsi pexaniacuenia. Ayaibitsaē-toxaneto cato-naexanaponaenanua nemomoxi —jai Jehová Isaac-jawabelia.

²⁵Nexata, Isaac to-exananuta altar-jawa. Bajarajota, yayiataeya wajēta Jehová jawabelia. Nexata, bajarajota Isaac nacuenebanuba pijacarpaboxi peponaponaenexa cae-epatoyo. Bajarajotania, icatsia pijajiwi amoneya petonacuenebiwiitsi tocueyetatsi itsameramēthē.

Isaac, Abimelec-beje, najumeliwaisicajunuabeje

²⁶Itsamatacabi Abimelec pona Gerar nacujawawerena, pepatsinexa Beersebajawaberena itsajotarena ponapona Isaac, pebarēcuaicuajaine-xatsi. Bajaraponē Abimelec yajawapona peyapētaenētsibeje, Ahuzat, Ficol-beje.° Itsanē pijinia Ahuzat-wēnēnē pemuxujobinē Abimelec, Ficol-wēnēnē

o 26:26 *Abimelec...Ficol-beje*: Bajaraponēbeje apoponaponaēbeje pacujinaeta Abraham-pijinē ponapona, nawēnējēpae-atabeje. Taema «Abimelec, Ficol-ata», glosariojawata.

pijinia penamatacaitorobinē wajabitsaēwi. ²⁷Nexata, Isaac jumaitsi bajarapamonaewajabelia:

—Itsa paxamē pane-ataejitsibimē, icatsianua baja panecapitsapame panija-irawecua, ¿dexuajitsia nexata paxamē panetae-othoparemena? —jai.

²⁸—Paxanē payapētaniji pecayajawajawa Jehová. Nexata, paxanē panajamatabēxainajē wajanaliiwaicajonejawa, caeliwaisi wajana juaxainaenexa. Wajanaliiwaicajoneliwaisibeje meta maxua tsaneje: ²⁹¡Najumecapane-paeya panejumaitsimēre itsa xamē apopaneto-exanaejitsiamē pibisiacuene paxanējawaberena, tsipaji paxanē-ata apopacato-exanaetsi pibisiacuene! Apopacajamatabē-itonotsitsi. Biji rajane, paxanē pexaniacuene pacato-exanabiabatsi. Pexaniacuena pacacopatatsinua patanewecuaponaenexamē. Jehová pecayajawaxae, xamē pexaniacuena cayawenonabiaba —jaitsi Abimelec.

³⁰Nexata, Isaac bajarapacujinae pinijifiesta barē-exana. Barēxane. Barē-apanua pematawējēa-apaejawanē. ³¹Itsamatacabi, bajayacunua, bajarapamonaē penamatacobicujinae, nexata jane baja, namata-enetsia najumeliwaisicajunuabeje. Pacuenia copiaya jinawanapa penaitoyacuena, bajarapacuenia penasiwajamatabēsitecaeyaniwa, pemomoxibejewabelia-ata penaitoyatsopanaeyaniwa. Nexata, xuacujinae itsa baja naliwaisiwereta, Isaac napējioba bajarapamonaē pexaniacuena. Bajarapamonaē-ata pijinia napējiobatsi pexaniacuena. ³²Bajarapamatacabita, Isaac amoneya petonacuenebiwitsi wajunucaparenatsi mera pecaxitajarabijawa pecuejawata, pamonaē cewanapa meramēthē itsajawayota. Nexata jumaitsi:

—Mera pacaxitajarabajā patacuejawata —jai.

³³Bajaraxuata, Isaac bajarapameramēthē wēnēruba Seba.^p Bajaraxuata-nua, patomara eca imoxoyojawata, wēnēruba Beerseba. Mapamatacabijawa-ata abaxē wēnēsiteca bajarapatomara.

³⁴Itsa baja Esaú xaina cuarenta pawaiabeje nacojioba. Pita pijawanexa Judit-wēnēwa, pexēnatoyo Beerí heteowirianē. Itsawa xuacujinae pita. Pewēnē Basemat, Elón pexēnatoyo. Bajaraponē-ata heteowirianē. ³⁵Nexata, bajarapapetiriwabeje Isaac, Rebecabeje, bitso siwajamatabēcuenebējaibeje itsawiriawaxaēbeje.

Isaac pexēnatobeje yapētaeya-exana Dioso pexaniacuena peyawenonaenexatsibeje

27 ¹Pamatacabijawa Isaac itsa baja perujunē, bitso baja itaxutotsē-cēna, apotae-ata baja. Nexata, itsamatacabi junata pexēnato mata-pijinē Esaú. Jumaitsi:

—Taxēnato —jai.

—¡Axa, nejumaitsimēre xua namatawenoname! —jai Esaú.

²—Yapētaneme rabaja perujunējawanē bitso. Imoxoyo tawajēnae tatē-paejawanexa. Apoyapētaenē pacujinae tēpaejitsianē. ³Nexata, tatēpawajē-naeya jitsipajā neponaejawa unuabelia, tanetojaitsinexamē itsacuenenēyo unupijidujuainē taxaenexa. ¡Nexata, pire nijabitsabi, nijaxuata yajawa,

p 26:33 Seba: Seba pejumaitsiyume hebreojumeta: «Penajumeliwaisicajonejawa». Taema «Beerseba», glosariojawata.

neponaenexa! ⁴Itsa capatsianame itsacuenenē unupijidujuainēyo, netosetsianame pexaniapexaejawa taxaenexa, pacuenia bitso xanē janijitsipabiabajē. Nesetsicujinae, netocapatsianame maberenaje taxaenexa. Bajaraxuacujinae, cayapētaeya-exanaenatsi^q tatēpaewajēnaeya pexaniacuenia Dioso pecayawenonaejawanexa —jai Isaac.

⁵Nexata, bajarapaepatota Rebeca jumetaenuca xua jumaitsi Isaac pexēnato Esaújawabelia. Itsa baja nexata, Esaú pona petonarujuaitsinē paxa unuabelia, ⁶nexata Rebeca jumaitsi, Esaú pecowēta, pexēnato Jacob juyapijinējawabelia:

—¡Njumetaema xaniawaetsia! Xanē raja jumetaniji axa pebarēcuaicuajawa nematapijinē Esaújawabelia pejumaitsiyawa: ⁷«¡Unuabelia netojaire itsacuenenēyo unupijidujuainē, taneto-exanaenexamē pexaniapexaejawa jamatejema taxaenexa! Bajaraxuacujinae, cayapētaeya-exanaenatsi tatēpaewajēnaeya Jehová pexaniacuenia pecayawenonaejawanexa», jai raja axa —jai Rebeca Jacob-jawabelia—. ⁸¡Nexata, aeconoxaeta nejumecowēnēre xua ca-itorobianatsi! ⁹¡Ponare baja wecae, itsajotalia wajadajubibitsaēto nubena! ¡Anijanēyobeje netocarenamēre pejana cabranēyobeje, penasitsinēyobeje! Cato-exanaenatsi pexaniacuenia pesetsijawa, pacuenia axa janijitsipabiaba. ¹⁰Nexata, xamē tocaliamē tsane pexaenexa axa, pecayapētaeya-exanaenexa pexaniacuenia petēpaewajēnaeya Dioso pecayawenonaejawa —jai Rebeca Jacob-jawabelia.

¹¹Nexata, Jacob penajawabelia jumaitsi:

—Tamatapijinē baitsi jane peperabēnajuwinē. Xanē apoperabēnajuwinē.

¹²Paepatota taxa nejayatsiparena neyapētaejitsipa. Bajaraponē netaejitsipa apotayaiyataejawa. Nexata, xanē xua jitsipajē taneyapētaeya-exanaenexa, pexaniacuenie tacanacopatsinexa, caranata neyapētaeya-exanaejitsipa pibisiacuenia tanetocopiapatsijawanexa —jai Jacob.

¹³Itsia, Rebeca jumecanawiata pexēnato Jacob mapacueniaje:

—Taxēnatonēyo, bajarapapibisiacuenie xua cayapētaeya-exanaejitsipa pecatocopiapatsinexa, xanē netsijumajopaena. ¡Xua cajumaitsi, nejumecowēnēre! ¡Netopiremelia bajaraponēyobeje! —jai.

¹⁴Nexata, Jacob lia, petopitsinexa anijacabranēyobeje, petocarenanexa pena. Nexata, pena tosetatsi pexaniapexaejawa, pacuenia paxa Isaac bitso janijitsipabiaba. ¹⁵Bajaraxuacujinae, Rebeca tojuta Jacob-nexa pexēnato Esaú penaxatatsiyajuwēnējawa, pexaniawirianaxatatsi, xua toxaniawaeta-buata pijabota. Nexata, Rebeca xatata pexēnato Jacob, Esaú pejuyapijinē.

¹⁶Bajaraxuacujinae, maxēxatatatsi cabrabocotomi. Wēsixatatatsinua itsaxuayo aponajui. ¹⁷Nexata, Rebeca tsicoberuta petosetsijawa. Rajutanua pan peto-exanaejawa, Jacob petocaponanexa paxa.

¹⁸Nexata jane baja, Jacob calia. Cajoneya itsaxuayolia paxa Isaac boca, jumaitsi:

—¿Jica, axa? —jai Jacob.

Nexata, Isaac jumecanawiata:

—Marajota bocajēje. ¿Detsa ponēmē xamē taxēnatomē? —jai Isaac.

q 27:4 *cayapētaeya-exanaenatsi*: Taema «matapijiwi pecuene-itajētsijawatsi paxajiwi», glosariojawata.

¹⁹—Xanë raja Esaúnë, nexënato matapijinënë. Cato-exanatsi rabaja pacuenia nejumaitsimë. ¡Pexaniacuenene ne-exanare! ¡Namatacore jane baja! ¡Ecare majotaje nexaenexa tacatobeyaxuabinëwito, bajaraxuacujinae taneyapëtaeya-exanaenexamë pexaniacuenia Dioso taneyawenonaejawanexa! —jai Jacob.

²⁰Nexata, icatsia jumaitsi Isaac pexënatojawabelia:

—Taxënato, ¿depacuenia caxitajarabatabame bepijiayorë? —jai.

Jacob pejumecanawiatsijawata jumaitsi:

—Jehová nijaDIOSO raja nerajuta, bepijiayo tacaxitajarabatabinexa —jai.

²¹Nexata, Isaac jumaitsi Jacob-jawabelia:

—¡Weberenayo natixire tacajayatsinexa, itsa pepacuenene taxënato Esaúmë, itsa jume, itsa apotaxënato Esaúmë tacayapëtaenexa! —jai Isaac.

²²Nexata, Jacob jejai. Cujilia paxa pejayatsinexatsi.

Nexata, Isaac jumaitsi:

—Itsiata baitsi jane, jumejëpame Jacob, juya baitsi jane nemaxë camaxëEsaúba —jai. ²³Bजारapacuenia nexata Isaac apoyapëtae Jacob peyamaxë-itojorobijawatsi, tsipaji bitso maxënjajuwa pacuenia maxënatsicujai Esaú.

Isaac jane baja itsa yapëtaeya-exanaejitsia pexaniacuenia Dioso peyawenonaejawanexatsi, ²⁴icatsia yanjibaja Jacob-jawabelia:

—¿Pepacuenene taxënato Esaúmë? —jai.

—Jājā, xanë rabaja Esaúnë —jai Jacob.

²⁵Nexata, jumaitsi Isaac:

—¡Natixiremena weberenayo! ¡Bजारajane netocajure taxaenexa ponëwito netocapatame nebeyaxuabinë! Nexata, xuacujinae cayapëtaeya-exanaenatsi pexaniacuenia Dioso pecayawenonaejawanexa —jai Isaac.

Jacob kujilia paxa perajutsinexa pexaejawa. Pematawëjëa-apaeranua toya-eta. Isaac baja itsa xane, itsa baja apanua pematawëjëa-apaera, ²⁶bajaraxuacujinae jumaitsi:

—¡Nimoxoyoremena, taxënato! ¡Nitabaratsutsunere! —jai.

²⁷Nexata, Jacob kujilia pitabaratsutsuninexa. Isaac bajarapaepatota jumasetuxune pitabaratsutsunijawata Jacob. Nexata, Isaac yapëtaeya-exana pexënato pacuenia DIOSO yawenonaejitsiatsi pexaniacuenia. Jumaitsi mapacueniaje:

—Mara taxënato tuxu-itsije pacuenia tuxu-itsi wayafopijicuene, Jehová pejamatabëcueneta penaxaniabiwayafo pexaniacuenia. ²⁸Catojitsipatsi DIOSO pecarajutsijawa pexania-emanë, daxita ne-ubijawanë pecatonaxaniababiabinexa mapa-irataje. Bजारapacuenia xainaename bitso ayaijawa trigo nexaejawanexa. Ayaijawanënu xainaename nematawëjëa-apaejawanë uvabarëmeneranë.

²⁹»Cayapëtaeya-exanatsinua itsanacuanëpijiwi yayiyataeya pecatonacuenebawanapaenexa amoneyacuenia. Yayiyataeya pematabacabëta catonubenabiabiana. Bजारapacuenia yanacua-ewetsianamenua nejuyapijiwi, ena pexi. Bजारapamonae nitabarata yayiyataeya catonubenabiabiana. Pamonae pijinia pibisiacuenia cato-exanaena, bajarapamonae pijinia pibisiacuenia natoyapëtaena DIOSO pejamatabëcuene. Pamonae pijinia pexaniacuenia cato-exanaena, bajarapamonae pijinia natoyapëtaena pexaniacuenia DIOSO pejamatabëcueneta —jai Isaac peyapëtaeya-exanaejawata xua Jacob canacopatsijitsia, matapijinëcuenia petaexaetsi.

³⁰ Itsa baja Isaac najumewereta peyapëtaeya-exanaejawa Jacob pexaniacuenia DIOSO peyawenonabiabijawanexatsi, ajena Jacob pitsatabalia paxawecua, bajarapaepatota pijinia baja Esaú patanajetaruca penarujuaitsinë unuwerena.

³¹ Bajaraponë-ata Esaú nexata to-exana pexaniapexaejawa, ponëyo tocapata paxanexa. Bajaraxuacujinae, tocalia paxajawabelia. Jumaitsi:

—¡Namatacore, taxa! Xaename baja ponëwito catocaponatsi, bajaraxuacujinae, tanetsitajëtsinexamë xua papexaniacuenia DIOSO taneyawenonabiabijawanexa —jai.

³² Nexata, Isaac yanijoba:

—¿Detsa ponëmë xamë? —jai Isaac.

Esaú jumecanawiata:

—Xanë ra Esaúnë, nexë nato matapijinënë —jai.

³³ Isaac nexata jamatabëcuenenajunawiacaeya jumaitsi jumeneconeconaeya:

—¿Denexata bajaya ponë pijaponae penarujuaitsinë, ponë tanecatocapatabi baja taxaenexa? Xaniji rabaja tanetocapatsiwitajawa nepatsiwajënaeya. Rajutsiaya baja cuene-itajëtajë papexaniacuenia DIOSO peyawenonaejawanexatsi. Bajaraponë rabaja nexata canacopata aeconoxae —jai.

³⁴ Itsa bajaraxua Esaú jumetane paxa pejumaitsijawa, bajaraponë bitso pinijijumeta aëjai ayaicuenia. Jumaitsi:

—¡Axa, xanë-ata taneyawenonaejawanexa netsitajëre tanecopiapatsijawanexa pexaniacuenia! —jai mapacueniaje.

³⁵ Icatsia, Isaac jumaitsi:

—Nejuyapijinë rabaja parena. Bajaraponë neyamaxë-itojoroba. Nexata, bajaraponë bajarapexaniacuenia DIOSO peyawenonabiabinexatsi rajutajë baja, xua picani carajutsiapaebatsi xamë —jaitsi.

³⁶ —Bajaraxuata tsaena, bajaraponë wënërubatsi Jacob-wënë —jai Esaú. Bajarama-anijatobeje bajarapacuenia newecuanaxainaeyaba taxainaejawaminexa. Copiaya newecuapita matapijinëjamatabëcuene. Icatsia baja, maxua aeconoxae picani netoxainame tanerajutsinexamëje, xua canacopatsijitsianë newënamuto pexaniacuenia DIOSO taneyawenonaejawaminexa, bajaraxua icatsia newecuapita. ¿Xanënexa tsabaja ajibi pematatsënëa tanetsitajëtsinexamë pexaniacuenia tanetocopiapatabiabiabijawanexa? ¿Apoxania-waetsimë cajena xanënexa? —jai.

³⁷ Nexata, bajarajota Isaac jumecanawiata:

—¡Nejumetaema xaniawaetsia! Yapëtaeya-exanajë rabaja nejuyapijinë Jacob pecanamatacaitorobinënexa. Tonajumecopatajënua petonacuenibinënexatsi pijawiriawi, bajarapacuenia bitso pexainaenexa ayajawa trigo pexaejawanexa, bajarapacuenia piapaejawanë uvabarëmeneranë-ata. ¿Denexata xanë xua taxënatomë yabara cayapëtaeya-exanaejitsipatsi pexaniacuenia pecatocopiapatsijawanexa ajenaconoxaeta? —jai Isaac.

³⁸ Nexata, Esaú icatsia jumaitsi:

—¿Ajibi tsabaja pematatsënëa itsajawa? ¡Xanë-ata neyapëtaeya-exanare itsajawa pexaniacuenia! —jai. Nexata, bajarajota icatsia, Esaú bitso aëaëjai ayaijumeta.

³⁹Nexata, Isaac cuene-itajëtsiaya jumaitsi Esaújawabelia:

—Xamë ponaponaename tajë mapapexania-irawecuaje. Itsajota ema aporunabiabi. Itsajota pe-ubijawanë aponaxaniababiabi-ata. Bajarapitsinacuata ponaponaename. ⁴⁰Xamë nexata saya nenawajabitsaëtsicuenia neponaponaenë tsane. Xamë raja netonacuenebaponaponaenë tsane nejuyapijinë. Itsiata baitsi jane, xamë itsa ajamatabëcuenesaëmë tsane, bajarapajamatabëcuene cayawenonaena newecuapitsapaenexa nejuyapijinë pecanamatacai-torobijawa —jai Isaac pexaniacuenia pecuene-itajëtsijawata.

Jacob wecuanajetabijirawa Esaú

⁴¹Nexata, bajarapamatacabi Esaú itoya tsaponapona pejuyapijinë Jacob, xua cuene-itajëtatsi paxa pexaniacuenia DIOSO peyawenonaejawanexatsi. Nexata, bajaraponë najamatabëxaina bajaraxua yabara mapacueniaje: «Itsa baja pataxabeje panewecuatëpaena, mapamatacabijawa nexata xanë tajuyapijinë beyaxuabianajë», jamatabëjai.

⁴²Nexata, itsa Rebeca jamatabëcueneypëtane xua najamatabëxaina Esaú pexanaenexa Jacob-jawabelia, bajarapaepatota itoroba petojunatsinexatsi Jacob. Rebeca jumaitsi:

—Nejumecowënëtsianame xua cajumaitsitsi. Nematapijinë Esaú raja najamatabëcuenebarëyaya-exanapona pecabeyaxuabinexa. ⁴³¡Nejume-taema taxë nato! ¡Ponare Harán nacuyabelia,^s itsajotalia tamatapijinë Labán ponapona! Bajaraponë pijabota ponaponaename Harán nacuatania. ⁴⁴⁻⁴⁵Bajarajotalia, bajayajebi ponaponaename axuyo Labán pijabota, nematapijinë pejamatabëcaewijawabelia pianapanaejawa, daxitaxua xamë exaname pejamatabëwerewerecaejawabelia, tsipaji xanë apojitsipaenë caematacabita panenajuatëpaejawabeje. Nexata, xuacujinae catonajumexuabianatsi nenawiatsinexarena icatsia —jai.

⁴⁶Nexata, xuacujinae jumaitsi Rebeca Jacob-jawabelia:

—Bitso rabaja xanë jamatabëcueranajë Esaú pijawabejejawabelia heteowiriawabeje. Itsa Jacob nacojiobjitsipanua heteopijipetiriwajawabelia, nexata xanë aponetoxanepanae taponaponaenexa bajayajebi. Netoxanepanaejitsipa bepjiyao juya tatëpaenexa —jai pamonajawabelia.

28 ¹Isaac icatsia junata Jacob pexaniacuenia pecuene-itajëtsinexa DIOSO peyawenonaejawanexatsi, namuto pexanaewajënaeya. Junatatsinua pemuxujiobinexatsi pepitsiyaniwa Canaán nacupijipetiriawiyajuwënëwa. Nexata, jumaitsi mapacueniaje:

—¡Pëtsa pitame mapanacuapijipetiriwa! ²¡Ponare Padan-aram nacuyabelia itsajotalia amo Betuel ponapona! Bajaraponë pijabota ponaponaename. Napitsianame bajarajotalia axuyo Labán pexënatoyoyajuwënëwa, ena pematapijinë. ³Dioso daxitawecua piacuenesaënë pexaniacuenia cayawenonaena. Nexata, xainaename bitso ayaibitsaëto nemomoxi, peyacaëjëpaenexa itsanacuanëjawa nawitsia xamëjawawerena pepitsapaewi. ⁴Bajarapacuenia pacanacopatsianame xamë, nemomoxi-ata xua DIOSO amo Abraham-pijinë

s 27:43 *Harán nacua*: Bajarapanacua nawitsiaya pewënëanë xaina. Itsajawata wënërubabiaba tomarawënë, bajaraxuata «Harán nacua», jai. Itsajawata nacuwënëcuenia: «Padan-aram», itsa jume, «Mesopotamia», jai tsabiabi.

najumecapanepaeya pexaniacuenia yawenonaeyapaebatsi, pa-ira-ata rajut-siapaebatsi itsajota ajenaconoxaeta jinawanapatsi wajanapatsiwicuenia —jai.

⁵Nexata, bajarapacuenia Isaac itoroba pexénato peponaenexa Padan-aram nacujawabelia, itsajota ponapona pena Rebeca pematapijiné Labán, Betuel pexénato, arameowiriané.

Esaú nacojioba paxuané Ismael pexénatoyojawabelia

⁶⁻⁸Esaú tane pacuenia Isaac pecuene-itajétsijawata pexaniacuenia DIOSO peyawenonaejawanexatsi Jacob. Tanenua pitorobijawatsi Padan-aram nacuyabelia, penacojiobinexa bajarajotalia. Jumetanenua pitawet-sijawa penacojiobiyaníwa Canaán nacupijipetiríawijawabelia. Tanenua Jacob peponaejawa Padan-aram nacuyabelia, pacuenia paxa jumaitsitsi, penabeje. Bajaraxua petaejawata, Esaú jamatabécueneyapétane apopeto-itaxanepanaejawatsi pijawabeje Canaán nacupijiwabeje. ⁹Esaú nexata pona petanenexa paxuané Ismael, Abraham pexénato. Bajarajota-ata, icatsia pita itsawa pijawanexa, Mahalat Ismael pexénatoyo, pejuyapijiwa Nebaiot. Copiaya papetiriawi nota Canaán nacupijiwabeje-ata yajawaponapona.

Dioso tsitanaitajétatsi Jacob Betel-jawata

¹⁰Jacob baja itsa pitsapa Beerseba nacuwecua, nexata pona panamuto ruca Harán nacuyabelia. ¹¹Bajaraponé itsa patajopa itsanacuayojawata, nexata bajarajota majitajopa, tsipaji baja bitso caniwiyo tsanajetaru-cae. Nexata, bajaraponé iboto pita, bajarajota pebobenaeyajuwéné-iboto, pemajitanucaené penamatabëxëyaëtanucaenexa. ¹²Bajarajota, bajaraponé amajitsinae tsanucacae. Tane majitsinaebota escaleraxaneto, piupipatsijawa irabetsica, athëbëabetsia-ata. Tanenua bajarapa-escalerajawatsica DIOSO pija-ángelëwí perunaejawatsica, icatsia pejunaejawatsia-ata. ¹³Bajarapa-escaleramatatujawatatsia, tane DIOSO penucacaejawa. Bajarawetsica jumetane pejumaitsijawatsi DIOSO:

—Xané raja Jehováné. Amo Abraham, axa Isaac-ata, PijaDio-soné tsaponapona. Pa-irajawata majitanucame, carajutsianatsi xamé, nemomoxijawabelia-ata. ¹⁴Bajarapamonae bitso ayaibitsaëto tsane, pacuenia itsi atsapërë. Nacayajatsiaya jinawanapaena matatoyorotsia, pa-irané bobena pemutuabereca, waëyabetsia, nortenenia, sur-nenia-ata. ¹⁵Nexata, xamé, nemomoxiyajuwénéné-ata pejamatabëcuene" natoyapëtaena pexaniacuenia tayawenonaejawa daxitanacuapijiwi. ¹⁵Xané raja cayajawa tsanetsi. Ca-ewetsianatsi pexaniacuenia itsabelia ponaponaename. Icat-sianua, cacanawiatnianatsi mapanacuayaberenaje. Apocacopatsi tsanetsi cato-exanaenejewatsi pacuenia xané cajumaitsitsi najumecapanepaeya —jai Jehová Jacob-jawabelia majitsinaebota.

¹⁶Itsa Jacob nexata bajarapaepatota naëcotaxuaba, jumaitsi: «¡Cuaé! Matsaena jotaje pepacuene Tajatuxanené peponaponaetusato. Xané

t 28:14 *nortenenia...sur-nenia*: Nortenenia Vichadapijiwinexa, matatsënenenia, sur-nenia pijinia ununenia, yabara jumaitsi. u 28:14 *nemomoxiyajuwénéné-ata pejamatabëcuene*: Bajaraxua apojumaitsi daxita Jacob pemomoxibitsaëtonexa yabara. Saya wénëjona caenë yabara bajarapapemomoxiyajuwénénë. Cristo yabara jumaitsi. Taema Gál. 3:16, Gén. 12:7.

apoyapëtaenë», jai. ¹⁷Nexata, bajaraponë bitso junawa. Bajarapaepatota, jamatabë-itsi: «Matsaena jotaje saicaya DIOSO pijabo itsajawawecua, athëbëa-betsia pepatsibaupanexa DIOSO pijanacuayabetsia», jamatabëjai bajaraponë.

¹⁸Itsa baja matabi, bitso pepobajayacunua, Jacob namatacota. Nexata, pita pa-iboto namatabëxëyaëtanuca. Bajarapa-iboto matabotanuta penajamatabënapitabiabinexa DIOSO pebarëcuaicuaijaitaxunaetsi. Xuacujinae, bajarapa-iboto tsimata-epanaxuaba aceiterata Dioso pewënëta. ^v ¹⁹Nexata, bajarapataxunae wënëruba Betel. Copiayami picani pe-ecaetomarayomi bajarajota pewënë Luz. Jacob xuacujinae wënëruba Betel. ^w

²⁰⁻²¹Nexata, bajarajota Jacob najumecapanepaeya jumaiti DIOSojawabelia mapacueniaje:

—Itsa pepacueni xamë DIOSomë neyajawamë tsane, itsa ne-ewetsianamenua mapanamuto tanajetarucaejawataje, itsa nerajutsianamenua taxaejawa taxaeenexa, tanaxatatsijawa tanaxatatsinexa, itsa-nua nawiatsianajë xaniawaetsia taxa pijaboyabelia, nexata Jehovämë tajaDIOSomë tsane. ²²Nexata, mapa-ibotoje matabotanutajë. Bajarapa-iboto itajëtanucaena DIOSomë nijabocuene, tanajamatabënapitabiabinexa wajanajumeliwaisicajonejawabeje ajena. Daxitaxuanë nerajutame, xamënexa pijinia catotsatanajetarucaenatsi caejawayo diez xuayomibejeyajuwënëjawami^x tacarajutsinexa —jai Jacob.

Jacob patajopa Harán nacuata

29 ¹Jacob nexata najetaruca panamuto ruca pemutuabereca. ²Bajaraponë bajaraxuayoreca itsa najetaruca, tane meramëthë pe-ecaejawa Harán tomara imoxoyojawata. Bajarapameramëthëjawata, ibotoxaneto wëpa-acatabuata. Bajarapameramëthë imoxoyojawata, tane acueyabi pada-jubibitsaëtobeje oveja pewetawanapaewi pebobobenaejawa. Oveja pewetsiwi nacuera-eweta pija-oveja yajawa bajarapameramëthëjawata, piabatsinexa pepuapatsi itsamonae oveja pewetsiwi pija-ovejabitsaëtowi yajawa. ³Paepatota matapania itsa nacaetuata daxita pamonaë oveja pewetsiwi pija-ovejabitsaëtonë yajawa mera perajutsinexa, matapania bajarapamonae iboto nacobenawëpatixitabiaba bajarapameramëthë. Perajutsicujinae mera pija-oveja, xuacujinae, icatsia mëthë-acatabiaba. ⁴Jacob nexata yanijoba oveja pewetsiwi jawabelia. Jumaiti:

—¿Detsa werena paxamë paneponaewi, tajamonae? —jai.

Nexata, bajarapamonae jumaiti:

—Paxanë raja Harán-jawawerena pataponaewi —jai.

⁵Icatsia, Jacob yanijoba:

—¿Payapëtaneme Labán, pemomo Nacor? —jai bajaraponë.

—Jājā, payapëtaniji —jai bajarapamonae.

⁶—¿Jamatejema ponapona? —jai icatsia Jacob.

—Jājā, jamatejema ponapona —jai. Nexata, bajarapamonae oveja pewetsiwi jumaiti:

^v 28:18 *tsimata-epanaxuaba aceiterata Dioso pewënëta*: Taema «iboto tsimata-epanaxuaba aceiterata», glosariojawata. ^w 28:19 *Betel*: Hebreojumeta Betel mapejumaitisijumeje: «Dioso pijabo», pejajume. ^x 28:22 *diez xuayomibejeyajuwënëjawami*: Taema «diezmo», glosariojawata.

—Taema! Marawerena najetarucaje Raquel, pija-oveja yajawa, Labán pexénatoyo —jai bajarapamonae.

⁷Jacob nexata jumaitsi:

—Abaxë bitso ayaimatacabi. Tajë juameto ruca paneyabaupaxatatsinexa panija-oveja. ¿Dexuajitsia nexata bepijiayo apoparajutsimë mera panija-oveja, icatsia abaxë panecaponaenexa petusatojawabelia, pona pexaenexa panija-oveja? —jai.

⁸Nexata, bajarapamonae jumecanawiatatsi:

—Apoxanepanae pata-exanaejawa bajarapacuenia. Panamatawenonajë itsamonae pata-ewetsijawa, daxita oveja patanajua-ewetsiwi patanacaetuatsinexa, jamatejema patawecuatixitsinexa meramëthë pewëpa-acatsi-iboto. Bajaraxuacujinae, pataja-oveja mera parajutabiabajë piapaenexa —jai oveja pewetsiwi.

⁹Paepatota abaxë Jacob barëcuaicuijai tsanucacae bajarapamonae, Raquel bajarapaepatota capatanajetaruca paxa pija-oveja peto-ewetsiwi. ¹⁰Nexata, Jacob itsa tane Raquel oveja pecapatanajetarucaejawa, paxuyo Labán pijawi, bajaraponë iboto wewëpatixitaxuaba meramëthë. Torajutanua mera Raquel pija-oveja. ¹¹Bajaraxuacujinae, bajaraponë bajacoba itabaratsutsuniaya. Jacob bajarajota ayaijumeta itaxutuanua Raquel. ¹²Jacob nexata nawajunupaeba Raquel-jawabelia pexénatocuene Rebeca. Labán piopaxacuene naitajëta. Bajaraxua itsa jumetane, Raquel nexata cujinaelia petsipae-binexa paxa.

¹³Labán bajaraxua itsa jumetane Jacob yabara, pejuyapijiwa pexénatocuene, bajaraponë cujinaelia pecopiapitsinexa. Itsa baja Labán palia Jacob-jawabelia, wëtaicarucapona. Bajacoba itabaratsutsuniaya. Bajaraxuacujinae, carena pijabojawaberena. Nexata, Jacob itsa pata paxuyo pijabota, nawajunupaeba pijamonae yabara, pacuenia bajaraponë exana, pacuenianua tocopiapatatsi namuto-epatua.

¹⁴Nexata, Labán jumaitsi:

—Pepacuene tsaena cajena xamë tajamonaenëmë —jai.

Jacob nexata nacopata paxuyo Labán pijabojawata.

Jacob tonacueneba paxuyo Labán pepitsinexa

Raquel, Leabeje, pijawabejenexa

¹⁵Paxuyo pijabota caejumeto peponaponaecujinae, Labán jumaitsi Jacob-jawabelia:

—Xanë apojitsipañë tanetonacuenebijawamë amoneya, saya tajamonaenëxaemë yabara. ¡Nejumaitsimëre pacuenia jitsipame tacamatamotsijawa! —jai.

¹⁶Bajarapamatacabijawa Labán xaina anijawabeje pexénatoyobeje. Mata-pijiwa pewënë Lea. Juyapijiwa pijinia pewënë Raquel. ¹⁷Nexata, Lea bitso pexania-itaxutoyobeje xaina. Raquel pijinia bitso daxisawa pexaniawa.

¹⁸Bajarapacujinaeta, Jacob jitsipaponapona Raquel. Nexata, Jacob jumaitsi:

—Raquel yabara, nexénatoyo juyapijiwa, catonacuenebianatsi^y siete pawaiubeje xamënexa —jai.

y 29:18 *catonacuenebianatsi*: Taema «pexénatoyo tonacueneba pepitsinexa», glosariojawata.

¹⁹Nexata, Labán jumecanawiata:

—Xanepana tacarajutsijawa xamě, tarajutsijawaminexa itsaně apotaya-pëtaeně. Nexata, xanějawata nacopatsianame neponaponaenexa —jai Labán.

²⁰Nexata, Jacob nacueneba siete pawai-beje Raquel yabara. Bajaraponě tsitacae-epatoyotsi saya bajarapawairenabeje, tsipaji bitso asiwa Raquel.

²¹Nexata, itsa baja panepanajetaruca siete pawai-beje petonacuenebijawa Labán, Jacob nexata jumaitsi itsamatacabi paxuyo Labán-jawabelia:

—iNerajure baja tapitsinexa Raquel tajawanexa, tsipaji baja weretajě xua catocaējētatsi tacatonacuenebinexa bajarapowamatamo! —jai Jacob.

²²Nexata, xuacujinae Labán junata daxita penajua-enaewi penacojiobi-fieta peto-exanaenexa bajarapajiwibeje. ²³Itsia baitsi jane, pamerawi napitsijitsiabeje picani, bajarapamerawi Labán juya comacapita matapijiwa Lea perajutsinexa Jacob. Nexata, Jacob yajawamajita bajarapowa. ²⁴Bajarapacujinae, Labán rajuta pexēnatoyo amoneya petonacuenebiwanexatsi Zilpawēnēwa, peto-ewetabiabiwanexatsi pijabo. ²⁵Itsamatacabijawabelia, bajayacunua, Jacob yapētane peyajawamajitsijawa Lea.^z Nexata, xuacujinae bajaraponě yanijoba paxuyo Labán-jawabelia. Jumaitsi:

—Axu, ¿Detsa xuajitsia maxua neto-exanameje? Xaně raja catonacuenebatsi Raquel yabara. ¿Detsa xuajitsia neyamaxě-itojorobame? —jai.

²⁶Labán nexata jumecanawiata:

—Paxaně raja apopatajacuene majotaje copiaya penacojiobijawa juyapijiwa. Copiaya raja banacojioba matapijiwa, xuacujinae juyapijiwa —jai.

Nexata, icatsia jumaitsi Labán:

²⁷—iAbaxě wepawererebeje panijafiestabeje^a mapasemanaje! Nexata, xuacujinae carajutsianatsi Raquel nijawanexa,^b itsa baitsi jane netonacuenebianame itsasiete pawai-beje orijibia —jai Labán.

²⁸Jacob bajaraxua jejai. Itsa baja weretabeje caesemana pexanaejawa pijafiesta Leabeje, Labán baja icatsia rajuta Jacob pijawanexa Raquel.

²⁹Labán rajuta pexēnatoyo Raquel amoneya petonacuenebiwanexatsi Bilhawēnēwa, bajarapowa peto-ewetabiabiwanexatsi pijabo. ³⁰Jacob nexata bajarapowa barēmajita Raquel. Tonacuenebanua Labán-nexa siete pawai-beje icatsia pematatsēnēa. Bajarapowa bitso asiwa Lea matatoxenetsia.

Jacob pexi pexinaejawa, yabara peliwaishi

³¹Itsa Jehová tane Jacob bewelia penaēcotsijawa Lea, nexata tocopata pexinaenexa pexi. Jane baitsi Raquel apotocopatsitsi Dioso pexi pexinaenexa. Mawecowacuenia ponapona. ³²Lea nexata baja, nacoxitaponapona. Bajaraxuacujinae, itajěta pebiněyo. Bajaraponěyo wēnēruba Rubén, tsipaji bajaraponěyo yabara jumaitsi: «Jehová netane najamatabēxainaeya taponaponaejawa, nexata nerajuta maponěyoje. Nexata, ajenaconoxaeta tamona bitso niasiwa tsane taxēnato pejamatabēcueneta», jai.

^z 29:25 *peyajawamajitsijawa Lea*: Taema «penacojiobiwanexa pijacuene», glosariojawata.

^a 29:27 *panijafiestabeje*: Taema «penacasabifieta», glosariojawata. ^b 29:27 *nijawanexa*:

Bajayatamipijiwi itsajawata caecuenia rajuta anijawabeje pexēnatoyobeje piopaxajawabelia pijawabejenexa. Itsia, bexējajawabelia Dioso rowialia itaweta bajaraxua pexanaeyaniwa. Taema Lev. 18:18.

³³ Bajaraxuacujinae, icatsia Lea itsanëyo xaina. Bajaraponëyo wënëruba Simeón, tsipaji bajaraponëyo yabara jumaitsi: «Jehová newënètane bijiaya tanenaëcotsijawa, bajaraxuata nerajuta itsanëyo pematatsënëa», jai.

³⁴ Icatsia, xuacujinae itsanacuetonëyo xaina. Bajaraponëyo wënëruba Leví, tsipaji bajaraponëyo yabara jumaitsi: «Nexata, ajenaconoxae pama-tacabi, tamona bitso neyajawaponaponaena,^e tsipaji baja rajutajë acueyabi panacuetobeje», jai.

³⁵ Nexata, Lea icatsia itsajiwiyo xaina. Bajaraponëyo wënëruba Judá, tsipaji bajaraponëyo yabara jumaitsi: «Maponëyo pejamatabëcuenetaje pexaniajatabëcuenia wënëxaniatsianajë Jehová», jai. Bajaraxuacujinae baja, apoxainae pexi.

30 ¹ Itsa Raquel nayapëtane apopexainaejawa pexi Jacob-jawabelia, nexata jamatabëcueneca-ëbiaya tane pematapijiwa Lea. Nexata, Raquel jumaitsi pamonajawabelia:

—¡Xanë-ata nerajure taxijiwiyo, tsipaji itsa xanë aponabarëxainae me tsane taxijiwiyo, xanë tēpaenajë ta-aurajamatabëcuenecobexae! —jai.

² Nexata, Jacob anaeya jumaitsi:

—¿Xanë tsaja nexata DIOSONÉ? DIOSO raja pejamatabëcuene apoxai-naemë nexi —jai.

³ Nexata, xuacujinae icatsia Raquel jumaitsi:

—!Nejumetaema xaniawaetsia! Mapacuenia belia xainaejitsipajëje taxi xamë-jawabelia. Mapowaje, Bilha, pitsianame amoneya tanetonacuenebabiabiwa. Bajarapowa pitaponaponaename. Nexata, bajarapowa itsa catoxainaena nexijiwiyo, nexata betaxijiwiycuenia^d xanë xainaenajë. Belia, bajarapacuenia taxi xainaejitsipajë —jai Raquel bepexijiwiycuenia petaenexa. Nexata, Jacob jejai.

⁴ Nexata, Raquel rajuta Bilha, amoneya petonacuenebabiabiwatsi, Jacob petaenexa bepijawacuenia.^e Jacob nexata yajawamajita bajarapowa.

⁵ Nexata, Bilha nacoxita. Pebinëyo wecuanaexanatsi.

⁶ Nexata, bajaraponëyo yabara Raquel jumaitsi: «Maponëyoje wënërubianatsi Dan, tsipaji DIOSO nejumetane tawajëtsijawa. Nexata, pexaniacuenia neto-exana tanerajutsijawata taxënato», jai.

⁷ Bilha icatsia nacoxita itsajiwiyo. Itsapebinëyo wecuanaexanatsi.

⁸ Nexata, bajaraponëyo yabara Raquel jumaitsi: «Bajayajebi tamatapjiwa-beje panacuenë-ëjëbajëbeje. Matapania maponëyota baja jamatabëcuene-amoneyabajë, bajaraxuata maponëyoje wënërubianatsi Neftalí», jai.

⁹ Nexata, Lea itsa baja nayapëtane apopexainaejawanexa pexi Jacob-jawabelia, nexata comacapitaba amoneya petonacuenebiwatsi Zilpa. Rajuta Jacob pijawacuenia pexainaenexa. ¹⁰ Itsa baja Jacob yajawaponapona, Zilpa nexata toxaina pexijiwiyo.

¹¹ Nexata, Lea bajaraponëyo yabara jumaitsi: «Yacueniaxanepanatsibeje. Nexata, bajarapanacuetonëyo wënërubianatsibeje Gad», jai.

c 29:34 neyajawaponaponaena: Majotaje nacayapëtaeya-exana anijacuenëbeje. Lea bitso pimo-xoyobijawanexatsi pamona. Raquel pijinia piasiwajamatabëcuenetsi bewelia petaenexa Jacob, juya bitso piasiwanaexa Lea pexi pexainaewa pejamatabëcuene. d 30:3 betaxijiwiycuenia: Taema «betaxijiwiycuenia», glosariojawata. Maparucaje itsacuenë Jesucristo nacatocopata. Taema 1Ti 3:2,12. e 30:4 bepijawacuenia: Bajarapajume concubina wowaijumeta. Taema «bepi-jawacuenia caponapona», «concubinana», glosariojawata.

¹² Xuacujinae, icatsia Zilpa toxaina Jacob itsanëyo. ¹³ Nexata, Lea icatsia bajaraponëyo yabara jumaitsi: «Bitso barëyanë, tsipaji tawënapetiriawi nesi-wajamatabëjumaitsi tsane: 'Dioso pexaniacuenia peyawenonaewatsi,' nesi-wajamatabëjai tsane. Bajaraxuata, bajaraponëyo wënërubianatsi Aser», jai.

¹⁴ Nexata, itsamatacabi trigo penotsimatacabijawa, Lea pexënato Rubén pabiabelia peponaenë caxitajaraba mandrágoracuai. Nexata, pena tocaparena. Raquel itsa cobetane bajarapacuai petocapatsijawatsi pexënato, bajarapowa jumaitsi pematapijiwajawabelia:

—¡Pexaniacuenia ne-exanare! ¡Nenarajure mandrágorayajuwënëcuai, pacuai catocaparena nexënato Rubén! —jai Raquel.

¹⁵ Nexata, Lea jumaitsi:

—Xamë imoxoyo taneyacajërëtsimë tamona. ¿Baja maje icatsia jitsipame taneyacajërëtsijawamë taxënato tanetocapatsicuairena? —jai Lea Raquel-jawabelia.

Nexata, Raquel jumaitsi:

—Bajarapacuaio pejamatabëcuene ajena pamerawi Jacob cayajawamajitsiana —jai Raquel.

¹⁶ Itsa baja merawiyo Jacob patanajetaruca wayafowerena penacuenebinë. Nexata, Lea mata-enenalia pejumaitsinexa:

—Ajena raja xanë neyajawamajitsianame, tsipaji rabaja Raquel-jawabelia matamotajë cacomuatsiaya mandrágoracuaaitota cae-epatoyocuenia xamë tanenacowaetsia-exanaenexa —jai Lea.

Nexata, bajarapamerawi Jacob yajawamajita pijawa Lea. ¹⁷ Bajarapameraw rawi DIOSO to-exana Lea pewajëcabiabicuenia. Nexata, tonacoxita cinco-nacueti. ¹⁸ Pewecuanaxanaecujinaetsi, Lea bajaraponëyo yabara, jumaitsi: «Dioso pexaniacuenia nerajuta taxainaenexa taxijiwiyo, icatsia amoneya tanetonacuenebiwa tarajutsixae tamonajawabelia. Bajaraxuata, mapanacuetonëyo wënërubianatsi Isacar», jai.

¹⁹ Bajaraxuacujinae, Lea icatsia toxaina itsajiwiyo, seis-jiwiyo. ²⁰ Bajaraponëyo yabara, bajarapowa jumaitsi: «Dioso nerajuta amoneyanacuetoyo. Nexata, ajenaconoxaeta tamona bitso asiwaya netaena, tsipaji baja toxainajë seis pajiwiyoobeje. Bajaraxuata, bajaraponëyo wënërubianatsi Zabulón», jai. ²¹ Bajaraxuacujinae baja, pecopiarucaejijiwiyo toxaina petiriwayo. Bajarapowayo wënëruba Dina.

²² Nexata, bajarapamatacabijawa DIOSO najamatabëcuenewereta peto-exanaenexa Raquel xua wajëcabiaba. Nexata, tocopata pexainaenexa pexijiwiyo. ²³ Bajarapowa pexanaecujinae copiyapijinacuetoyo, bajaraponëyo yabara jumaitsi: «Dioso baja newecua-ajibia-exana ta-auratsabiabijamatabëcuenemi taxi apotaxainaejawa. ²⁴ Orijibia, icatsia bitso jitsipajë tanetocopatsijawa itsajiwiyo taxainaenexa», jai. Bajaraxuata, bajaraponëyo wënëruba José.^f

Jacob, paxuyo Labán-beje, nayamaxë-itojorobabeje

²⁵ Itsa baja Raquel pewecuanaitajëtsicujinaetsi Josénexa, bajaraxuacujinae, itsamatacabijawabelia Jacob jumaitsi paxuyo Labán-jawabelia:

^f 30:24 José: Hebreojumeta mapawënë pejumaitsiyumeje: «Jehová nerajutsianame itsanëyo», pejaijume.

—Necopatsianame rabaja tanawiataponaenexalia tajamonae pija-irajawabelia. ²⁶ Neyajawacopatsianame taxibitsaëtoyo, tajawabeje yajawa. Bajarapowabeje yabara, bajayajebi xanë catonacuenebaponaponatsi. Nexata baja, necopatsianame taponae nexa. Xamë yapëtaneme pacuenia xamënexa catonacuenebaponaponatsi —jai Jacob.

²⁷ Itsiata baitsi jane, Labán jumaitsi:

—Xanë cawajëtsianatsi pexaniacuene. Abaxë nacopatsianame patacaya-jawajinawanapaenexa. Xanë raja yapëtaniji Jehová Dioso taneyawenonaponaejawa pexaniacuena xamë nejamatabëcueneta. ²⁸ ¡Nexata, nejumait-simëre nenacuenebijamatabëcuene pacuenia jitsipame tacamatamotsinexa! Nexata, bajarapacuenia camatamotsianatsi —jai.

²⁹ Nexata, Jacob jumaitsi:

—Xamë rabaja yapëtaneme tacatonacuenebijawa xamënexa pexaniacuenia, tacato-ewetsijawanua pexaniacuena nijadajubi. ³⁰ Abaxë tapat-siwajënaerena patsiquiribitsaëtoyawajëto xainame matatoxenetsia baja ajenaconoxae cato-ayaibitsaëto xaneto tsanajetarucæ, Jehová pexaniacuenia pecayawenonaexæ xanë tajamatabëcuene. Nexata, ¿depacujinae taja-taxuxuabi tsane tajuata taxainæjawa taja-ovejaxi? Xanë-ata raja pijinia namatawenonajë taxainaenexa taja-ovejabitsaëtoyo tajuata tanacoxi-ewetsinexa —jai.

³¹ Nexata, Labán jumaitsi:

—¿Depacuenia jitsipame tacamatamotsijawa? —jai.

Jacob icatsia jumecanawiata:

—¡Pëtsa nematamotame! Xanë saya abaxë icatsia ajena pamatacabija-waweliacujinae cato-ewetaponaenatsi nijadajubi, jane baitsi pijinia pacuenia xanë cajumait-sijitsiatsi itsa nejumejæjamë tsane. ³² Nexata, ajena necopatsianame taponae nexa nijadajubibitsaëtutuajëjawa, tatsatsinexa ponëxi petsæbianëxi, bajarapacuenia penayaquibinëxi, bajarapacuenia ayai-itanetonë-ata pexainaenëanë. Bajarapitsi-itanenëxi tsatsianajë tapitsi-nexa ovejabitsaëtojawata, cabrabitsaëtojawata-ata^s tacatonacuenebijamatabëcuene. ³³ Nexata, bajarapacuenia xamë yapëtaenæ apotacayamaxë-itojorobijawa. Pacujinae taenajetarucæname tajadajubijawa, nexata itsa nanucaena apopenayaquibinëyo, peniojainëyo-ata, piaitanëjibinëyo-ata tajadajubibitsaëtutuajëta, nexata xamë yapëtaenæ tacatonacobetoxotabiabijawa —jai Jacob.

³⁴ —Xanepana pacuenia xamë nejumaitsimë —jai Labán.

³⁵ Nexata, bajarapamatacabi Labán itapetsiaya natotsatapona pija-ovejabitsaëtowecua, pijacabrabitsaëtowecua-ata daxita pamonaæ penayaquibinëxi, ayai-itanetonë pexainaenëanë. Bajarapacuenia pitanenioponaenëxi najëpaeya tsata, petsæbianëxi-ata. Nexata, bajarapatsatsidajubi wecuacapisapa, Jacob pecanacopatsinexa caewiria color pexainaenëxi, petonacoxiwiwatsiyaniwatsi penayaquibiwi Jacob peto-ewetsiwiawata. Nexata, petsatsiwi Labán pexi rajuta pecaponaenexa tajë Jacob-wecua. ³⁶ Nexata, xuacujinae bajarapamonæ pona acueyabi pamatacabibejucuenia Jacob peponaponaejawawecua, bajarabelia peto-ewetawanapaenexa paxa pijadajubi.

Bajarapacowëta Jacob nacopata peto-ewetaponaponaenexa paxuyo Labán pijadajubi. ³⁷Paxuyo pecowëta Jacob apocaecueneyo exanapona pacuenia topitsapaejitsiatsi pecunuabitsaëto penayaquibiwi. Nexata, maxërana ucubaba álamonae, almendranae, castañoaemaxëranaxi-ata, piasiamaxëranajawanë. Pemaxërana-ucubabecujinae, xuacujinae bajaraponaenë yërëbocotobita peyërëyaquijaicuenia pecopatsinexa. ³⁸⁻³⁹Nexata, bajaraponaenë, peyërëbocotobitsinaenë, itsajota oveja mera apaeyabiaba, bajarajota bajaraponaenë rubabiaba merata. Nexata, paepatota dajubi naimoxoyoba mene-itapata, bajarapanaimoxoyobiwi itsa tane bajarapayërëyaquijainaenë pecowëcuenia pexi petopitsapaponaenexatsi. ⁴⁰Jacob nexata wecuatsatapona daxita pamonae naexanapona pitanebiwitsi pijadajubinexa. Jacob nexata bajarapacuenia taxuxuaba pexinaejawa pijawicuenia saicaya Labán peto-ewetsidajubiwecua. ⁴¹Nexata, paepatota dajubi bitso pexaniawi, penasitsiwi, naimoxoyobabiaba penaquenetsiatenexa, bajarapaepatota Jacob naejawanë peyërëbocotobitsinaenë tsitarubabiaba merata. Bajarapanaejawaxi rubabiaba mera piapaejawata, dajubi petanenexa, bajarapacuenia pecowëcuenia penayaquibinëxi petopitsapaponaenexatsi. Nexata, bajarapacuenia ëpexanianëxi topitsapaponatsi pijadajubinexa. ⁴²Itsia, pacujinae dajubi pibisianëanë, pejiopaenëxi imoxoyobijitsia penaquenetsiatenexa, bajarapacuenia apo-exanae. Nexata, Labán pijawinexa tonacopataponatsi ëpibisianëxi, pejiopaenëxi, itsanëxi bewelianëxi Labán pijanëxinexa. Jacob juya canacopatabiaba ëpexaniawi^h pijawinexa. ⁴³Bajarapacuenia Jacob naexana bitso pexainaenë. Xaina ayaibitsaëto oveja. Xainanua ayaibitsaëto jiwi amoneya petonacuenebiwitsi, petiriawi, pebijiwi-ata. Bajarapacuenia camello-ata ayaibitsaëto xaina. Burromonae-ata xaina ayaibitsaëto.

Jacob najamatabëxaina pewecuanajetabijirawinexa paxuyo Labán

31 ¹Jacob belia nayajumetane Labán pexi pebaracuaicuajijawatsi: «Jacob raja nacobetoxotanajetaruca waxa pijadajubiyajuwënëxi. Bajaraxuata, bajaraponë pexainaenë naexanapona», pejajawatsi. ²Belianua, Jacob tane. Yapëtane Labán pitoyanaëcotsijawatsi, tsipaji pexaniacuenia apotaetsi pacuenia copiaya. ³Nexata, bajarapamatocabijawa Jehová jumaitsi Jacob-jawabelia:

—iNawiare nija-irajawabelia, itsajotalia axa peponaponaenacua, itsajotalia nijamonae jinawanapa! Xanë raja cayajawa tsanetsi —jai Jehová.

⁴Jacob nexata itoroba petojunatsinexatsi pijawabeje, Raquel, Leabeje pepatsinexarenabeje itsajotarena Jacob ewetaponapona pijadajubi. ⁵Itsa baja parenabeje pijawabeje, nexata Jacob jumaitsi:

—Xanë yapëtaniji pacuenia pane-axabeje nesiwanajamatabëxaina, tsipaji baja xanë aponetae pacuenia copiaya netaeyabiaba. Itsia, taxa pijaDIOSONeyajawa tsaponapona. ⁶Paxamëbeje payapëtanemebeje xaniawaetsia

^h 30:42 *canacopatabiaba ëpexaniawi*: Jacob canaëjëba pijacujirucuenia petopitsapaponaenexatsi pexanianëanë, peyaquijainëxi. Itsia, belia yapëtane Dioso peyawenonaejawatsi. Dioso peyawenonaexaetsi, ayaijawa peyaquijainëxi topitsapaponatsi dajubi. Taema Gén. 31:7-12. Nexata, pacuenia Jacob jumaitsi Gén. 31:7-12-jawata xaniajai. Xua bajaraponë canacueneba naeboxita apoyawenonaetsi pitane pexainaenëxi petopitsapaponaenexatsi. Dioso peyawenonaexaetsi pita-xutotsoniatæjawatatsi, bajaraxuata bajarapitsinëxi tonaexanaponatsi.

pacuenia pane-axabeje tonacuenebaponaponajë, pacuenia necueneçaë-jëpa pexaniacuenia tatonacuenebinexa. ⁷Itsia baitsi jane, bajaraponë neyamaxë-itojorobabiaba. Bajarapacuenia neyamaxë-itojorobabiabi-ata, newecua-itothianaponae-ata diez xuabeje tanacuenebijamatabëcuene tane-matamotsiyaniwa, itsiata, DIOO apotocopatsitsi tane-itsacueniabinexa bajarapaepatota. ⁸Pane-axabeje tanejumaitsicujinae: «Carajutsianatsi dajubi tanetonacuenebijamatabëcuene, ponëxi penayaquibinëxi», tanejaicujinae, pesorowabi ëpenayaquibinëxi nacoxitabiaba. Icatsia, bajarapacuenie petaexae, itsamatacabi bajarapacuenia nejumaitsi-ata picani, icatsia nejumaitsi: «Carajutsianatsi saya tanetonacuenebijamatabëcuene dajubi pitanelialianëxi», nejai. Bajaratanejumaitsicujinae, icatsia bajarapitsinëxi nacoxitabiaba. ⁹Bajarapacuenia pane-axabeje newecua-itothianapona tana-cuenebijamatabëcuene. Bajaraxuata jane, DIOO bajarapadajubi wecuapitaponatsi picani, juya tanerajutsinexa. ¹⁰Pamatacabijawa dajubi banaboxonaba, bajarapamatacabi xanë amajitsinaenë. Taniji pebito pimoxoyobijawa pesorowabijawaberena pitanelialianëxi, penayaquibinëxi jawaberena-ata, ayai-itanetonë petsaebia-itanetonë pexainaenëxi jawaberena-ata. ¹¹Nexata, bajarapamatacabi majitsinaebota, Jehovah pija-àngelnë nejunataxuaba tawë-nëta. Xanë nexata jumecanawiatajë: «Majotaje nucajë», janë. ¹²Nexata, bajaraponë nejumaitsi: «¡Nejumetaema xaniawaetsia mapacuenije! Xanë catotanetsi xua axuyo Labán cato-exanaponapona. Bajaraxuata, daxita dajubi pebitonë ponëanë imoxoyobabiaba pesorowabi, bajarapamonae raja pitanelialiawi, penayaquibiwi, ayai-itanetonë petsaebiawi-ata. Bajarapacuenia exanapona, tatocopatsicuenia penaexanaponaenexa. ¹³Xanë ra nijaDiosonë, tacatsitanaitajësinë Betel-jawata, itsajota xamë iboto tsimata-epanaxuabanutame aceiterata. Itsajotanua najumecapanepaeya nenaliwaisicajunuame. ¡Nexata, namatacore! ¡Ponare baja! ¡Wecuapitsapare mapanacuaje, neponaenexa pa-iratalia naexaname!», nejai Jehovah pija-àngelnë tamajitsinaejawata —jai Jacob pijawabejewawabelia.

¹⁴Nexata, Raquel, Leabeje, jumecanawiata mapacueniaje:

—Paxanëbeje itsacueniejawa apopaxainaenëbeje xua yabara panacopat-sijitsianëbeje pecobecowëyajuwënëjawa pataxabejewawata. ¹⁵Biji caranata, paxanëbeje saya panenaëcotabeje pataxa be-itsanacuapijipetiriwabeje. Yapëtaneme xamëjawabelia patanecanajetaxuabijawabeje. Nexata, xua xamë panematamonacuenebamebeje, bajaraxua pataxabeje naxainaeyaba¹ daxita paxanëbejewecua. ¹⁶Daxitaxua-ataDIOO wecuapitaponatsi pataxabeje xamë juya pecarajutsinexa, bajaraxua cajena waxaitsi wajajawaminexa baja picani, bajarapacuenia wajaxijiwiwi pijawaminexa. ¡Nexata, pacuenia DIOO cajumaitsi, bajarapacuenia baja exanare! —jai Jacob pijawabeje.

Jacob barënamueta paxuyowecua

¹⁷⁻¹⁸ Jacob nexata baja barëanaxaniawaeta pebarëponaenexa Canaán nacuyaberena itsajotarena paxa ponapona Isaac. Nexata, bajaraponë barëanaxaniawaeta daxita pexi, pijawajiwi-ata. Caetuanua pijadajubi, xuanë-ata xaina. Penacueneweretsicujinae, camellojumabetsia pexi baja

i 31:15 *naxainaeyaba*: Taema «paxuyo tonacueneba pexënatoyo pepitsinexa», glosariojawata.

junaeya-exana. Bajarapacuenia pijawajiwi-ata junaeya-exana peponaenexa. Nexata, bajarapacujinae bajaraponë daxita pijadajubi capitsapa, pamonaenacuenibijamatabëcuene pematamobiwitsi Padan-aram nacuata. ¹⁹ Bajarapamatacabijawa, Labán pijinia ponapona itsawayafotusatojawabelia, pija-oveja pejumanaxunaenexa, penanotsinexa. Raquel peponaewajënaeya, paxa pecowëta, tonacobetoxota pijadisonëanë^j jumapecataeya pexanaenëxi pecobeta. Nexata, bajarapowa capona paxa pecowëta. ²⁰ Nexata, Jacob bajarapacuenia Labán yamaxë-itojorobicuenia barëpitsapa napëjiobinejewa peponaejawata. ²¹ Bajaraponë capitsapa daxitaxua xaina pecobecowë. Nexata, bajaraponë itsa baja patanajetaruca Éufrates menejawata, barënicabaponapona. Bajaraxuacujinae, penicabicujinae, bajaraponë barëpona orijibia webeliayo Galaad-tsutonëjawabelia.

Labán barajina Jacob

²² Acueyabi pamatacabibecujinae, Labán yapëtane Jacob pebarënamuet-sijawa. ²³ Nexata, Labán natsicueyajunata pijamona, pepëbarajinaenexa Jacob. Bajaraxuacujinae, barëpitsapa. Siete pamatacabibecujinae Labán pëcaxina Jacob Galaad-tsutonëjawata. ²⁴ Patsinejewalia abaxë, majitsinaebota Labán tsitanaitajëtatsi DIOSO merawi. (Bajaraponë Labán, arameonë.)^k DIOSO jumaitsitsi: «iPëtsa bitso Jacob pibisiacuenia jumaitsimë apopejitsipaecuenia!», jaitsi.

²⁵ Itsa Labán pëcaxina Jacob Galaad-tsutonëjawata, itsajota barëponapona abaxë, nexata bajarajota Labán-ata barëpatajopa pijajiwi.

²⁶ Nexata, Labán yanijoba Jacob-jawabelia:

—¿Dexuajitsia mapitsicuene exaname? ¿Dexuajitsia neyamaxë-itojorobame? ¿Dexuajitsia taxënatoyobeje carenamë, saya bepenawajabitsaëtsimatacabi pecaponaewatsibecucuenia? ²⁷ ¿Dexuajitsia nexata bajarapacuenia-ata neyamaxë-itojorobiaya barëponame saya muetsiacuenia nenapëjiobinejewamë? Apoxanepanae bajarapacuenia neponaejawata. Nexata, xanë itsa yapëtaejitsipajë neponaejawanexa, nexata pacanapëjiobijitsipatsi pexaniacuenia, barëyaya arpamúsicajawata, bajarapacuenia panderetamúsicajawata.^l Nexata, fiestacuenia nato-exanaejitsipatsi paneponaewajënaeya. ²⁸ Itsiata, aponetocopatsimë taxënatoyobeje tanenapëjiobinexa itabaratsut-suniaya, bajarapacuenia tanenapëjiobinexa tamomoxi-ata. Saya xamë netoexaname apobetaneyaiyataenëmëcuenia, apobeneyapëtaenëcuenia-ata. ²⁹ Xanë picani necuenecaëjëpa majotaje itsacuene-ata pataca-exanaenexa. Jane baitsi itsiata, ajena pamerawi axa pijaDIOSO nejumaitsi: «iPëtsa bitso pibisiacuenia bajaraponë jumaitsimë apopejitsipaecuenia!», nejai. ³⁰ Itsa baja xamë jitsipame nenawiatsijawa axa pijabojawabelia nitaxanaexae, itsa bajaraxua yabara poname, ¿dexuajitsia nexata netonacobetoxotame tajadisonëanë? —jai Labán.

³¹ Nexata, Jacob jumecanawiata:

j 31:19 *pijadisonëanë*: Bajaraxuaxi jumapecataeya pexanaenëxi pecobeta, pewënë terafim. Taema «terafim», glosariojawata. k 31:24 *arameonë*: Labán Aram nacuapijinë. l 31:27 *arpamúsicajawata...panderetamúsicajawata*: Taema «arpa», glosariojawata. Taemanua «pandereta», glosariojawata.

—Xanë rajane cacujunawatsi. Bajaraxuata, muetsiacuenia pitsapajë. Xanë jamatabë-itsinë: «Belia, tajawabeje newecuapitsipa pejamatabëcuenesaëta», jamatabëjanë. ³² Xanë raja aponacobetoxotsinë nijadisonëanë. Itsa majotaje paxanëyajuwënëjiwi xaina nijadisonëanë, nexata bajarapajiwi tēpaena. Mabaja pamonaëje wajayajawawibeje nacajumetanebeje. ¡Nexata, bajara-pamonaë pitabëta netsitajëre itsacuenëjawa nexainaeyajuwënëjawa, paxanë xua pacatonacobetoxotatsi! ¡Nexata, itsa caxitajarabame, pire baja! Cana-wiatsianame —jai Jacob.

Bajarapamatacabi Jacob apoyapētae Raquel petonacobetoxotsijawa paxa pijadisonëanë, jumapecataeya pexanaenëxi pecobeta.

³³ Nexata, Labán junua Jacob pemajitsicarpabo-ënëjawabelia pejaitsinexa pijadisonëanë. Xuacujinae, icatsia junua Lea pijacarpabojawabelia. Bajara-pacuenia junua anijawabeje, amoneya petonacuenëbiwatsibeje, pijacarpabojawabelia pejaitsinexa. Itsiata baitsi jane, apocaxitajarabi jumapecataeya pexanaenëanë pecobeta. Itsa baja pitsapa Lea pijacarpabo-ënëwecua, icatsia junua Raquel pijabojawabelia. ³⁴ Nexata, paxa pejonewajënaeya itsa pabota eca, bajarapowa pita bajarapadisonëanë. Camello pijasillajawata^m jia, pematayatsinexa. Bajaraxuacujinae, bajarapajumawereca bajarapowa eca. Nexata, Labán jaita bajarapabo-ënëta. Itsiata baitsi jane, apocaxitajarabi.

³⁵ Nexata, Raquel bajarapaepatota jumaiti paxajawabelia:

—¡Axa, pētsa anaepaname itsa apononotapunaenëⁿ xamë nitabarata, tsi-paji xanë naboxonabaponaponajë! —jai Raquel.

Bajarapacuenia Labán jaitsi-ata picani ayaicuenia pijadisonëanë, itsiata, apocaxitajarabi. ³⁶ Nexata, Jacob anaepana. Jumaiti Labán-jawabelia mapacueniaje:

—¿Detsa nexata xua exanajë? ¿Depitsineconi natsi-exanajë nexata tane-cabarajinaemë jamatabëcuenebëjaiya? ³⁷ Daxita tajajawaxi tanetoyobicujinaemë, ¿Depitsijawa jane caxitajarabame nijabo pijajawami majotaje? ¡Xua caxitajarabame, jebare majotaje xanë tajajiwi pitabarata, neyajawawinua pitabarata! Nexata, bajarapamonaë pejamatabëcuenejumaitsinexa: «Maponë xaniajai xua exanaponapona», wajanacasiwajamatabëjainexabeje. Bajarapamonaë majotaje tojumenamatamotsianatsibeje waxaitsibeje.

³⁸ Xanë daxitata paveinte pawaiabeje nacuenëbaponaponajë xamëjawata, itsadajubi-ata apocatonacoxipenetsi. Caenë-ata pejananë-ata apocatoyajuwënëxaetsi nija-ovejabitsaëtoyajuwënëñë. ³⁹ Apocatocapatanucaponaetsinua petëpaenë, unupijiwi pebeyaxuababuatsinë. Biji caranata, pamonaë penapenetaponaewijamatabëcuene xanë camatamotanajetarucatsi. Ponëxi-ata penacobetoxotsiwi nacobetoxota matababita, merawita-ata, bajaraponëxi-jamatabëcuene biji xamë nematamoyanijobabiabame. ⁴⁰ Itsajawata xanë matababijebi cato-ewetabiabatsi, icotia netsajawi-ata. Bajarapacuenia cato-ewetabiabatsi merawijebi, pecainejebijawa netsipëcaewi-ata. Itsajawata ta-itamajitsipanaejawami newecua-ajibi tsabiabi bajarapacuenia. ⁴¹ Veinte pawaiabeje bajarapacuenia catonacuenëbaponaponatsi nijabojawata. Bajarapacuenia xanë ponaponaë-atanë, itsiata, xanë apojamatabëcuenebëjanë.

m 31:34 *Camello pijasilla*: Taema «camello pijasilla», glosariojawata. **n 31:35** *apononotapunaenë*: Taema «nontapuna paxa pitabarata», glosariojawata.

Nexënatoyobeje yabara catonacuenebatsi catorce pawai-beje. Nenacuenebi-jawanë cayawenonatsi. Icatsia, nijadajubijawabelia catonacuenebatsi seis pawai-beje daxitamatacabi. Itsiata, xamë bajarapacuenia catonacuenebi-atatsi, newecua-itothianaponame, neyamaxë-itojorobanajetarucamenua diez xuabeje, tanacuenebijamatabëcuene tanematamotsiyaniwamë. ⁴² Nexata, itsa DIOSO aponeyajawa tsipae, Abraham pijaDIOSO, paDIOSota taxa yai-yataecuenia nawajëcabiaba, nexata meta cajena tacobesanë xamë neco-patsipame taponae nexa, itsacuenejawayo caponaenejewanë. DIOSO itsiata, netane tanajamatabëxainaejawanë. Neyapëtanenua pacuenia pexaniacuenia catonacuenebaponaponatsi. Bajaraxuata, ajena pamerawi DIOSO catsitanai-tajëta, bajarapacuenia pecajumaitsinexa tane-itsacueniabiyaniwamë —jai Jacob.

Jacob, Labán-beje, najumeliwaaisicajunuabeje

⁴³ Nexata, Labán jumecanawiata Jacob-jawabelia. Jumaitsi:

—Taxënatoyobeje xanë baja cajena taxënatoyobeje. Tamomoxi xanë baja cajena tamomoxi. Mapa-ovejabitsaëtoje xanë baja cajena taja-oveja picani. Daxitaxua majotaje tanemeje, bajaraxua daxita xanë tajajawa picani. Itsiata baitsi jane, neto-acuenebi ta-itsacueniabinexa taxënatoyobeje-ata, tamomoxi-ata. ⁴⁴ Bajaraxuata nexata, aeconoxae xamë, xanë, naliwaaisicajonenatsibeje pacuenia itsamatacabi wajanalawaaisicajonecujinae-beje bajarapaliwaaisi wajanaacayacaranatsinexabeje wajana-itsacueniabiyaniwabeje itsamatacabijawabelia —jai.

⁴⁵ Jacob jejai. Pita iboto. Matacotanutsiaya nuta pitajëtsinexa penali-waisicajonetaxunaabeje. ⁴⁶ Bajaraxuacujinae, jumaitsi pijajiwijawabelia peyajawaponaewi:

—Ibo panajumajebare bajarapa-iboto tanutsumuxuneneta! —jai Jacob.

Jejai. Nexata, daxita bajarapamonae ibo najumacaetuateta caeja-wata. Bajarajota, matatoyorotsia bajarapamonae najuaxane bajarapa-ibocaetuatsumuxuneneta. ⁴⁷ Nexata, Labán bajarapa-ibocaetuatetsijawa wënëruba pijajumeta Jegar Sahaduta. Jacob pijinia pijajumeta wënëruba Galaad. ⁴⁸ Nexata, Labán jumaitsi:

—Ma-ajenaje pa-ibotsuto wajacaetuatetsijawa bewajanacataenëbeje tsanucacae tsane waxaitsibeje pacuenia naliwaaisicajunuatsibeje —jai. Bajaraxuata, bajarapataxunae wënëruba Galaad. ⁴⁹ Bajarapacuenianua wënëruba Mizpa,^p tsipaji Labán najumecapanepaeya jumaitsi:

—Jehová nacacuenenaitaxutoca-ewetsianabeje ajena pamatacabijawaweliacujinae. Ajena wajanalawaaisicajonecujinae-beje DIOSO nacanaitaxutoca-ewetsiana paepatowajëto aponataeponaponaetsibeje. ⁵⁰ Nexata, itsa pijinia

o 31:47 Jegar Sahaduta...Galaad: Labán, arameonëxae, cuaicuajai arameojume. Jacob pijinia Eber-pijinë pemomoxiyajuwënëñëxae, hebreojume pecuaicuajainë. Itsiata, bajarapawënëbeje caejamatabëcuene xainabeje. Pejumaitsiwënëbeje: «Mara panajumajebi-ibotsuto wajanalawaaisicajonetaxunaabeje», pejaiwënëbeje. p 31:49 Mizpa: Pejumaitsiwënëbeje: «Piapiabo, penayajiwitaeyabiabibonexa pijawajabitsaëwiwecua bajarapabojumawereca», pejaiwënë. Bajarapacuenia wënëruba, tsipaji natocajëta Dioso bepenaitaxutocaewetsinë tsanucacae penaliwaaisicajonenëbejajawabelia, itsacueni penaeaxanaeyaniwabeje penatsimaxëponacueniabeje. Nexata, paepatota taeyabiabijitsia bajarapa-ibonajuma-etsijawa, penajamatabënapitabiabinexa Dioso penaitaxutocaewetsijawabeje.

xamē bijiaya netonaēcotsipame taxēnatoyobeje, bajarapacuenia itsa piji-
nia, notaponaetsipame orijibia itsapetiriawi nijawajiwinexa, apoxainae-
atatsibeje tsane jiwiyajuwēnēnē bewajanacacuenetaejiwibejenexa waxaitsi-
bejetuatuajēta, itsiata, DIOSO bajarapaepatota wajanacataeponaponaenēbeje
tsane. Nexata, itsa xanē aponaliwaisijumecowēnētsinē tsane, naneconitsia-
najē DIOSojawabelia. Bajarapacuenia xamē-ata tsane —jai najumecapanepa-
eaya Labán.

⁵¹ Labán orijibia jumaitsi tsaponae Jacob-jawabelia:

—¡Taema! Marabaja ecaje ibocaetuatsijawa wajanajumajebijawa.

Pa-ibotonua xamē matacotanutame waxaitsibejetuatuajēta. Nexata, bajara-
xuabeje bewajanacajumetaenucaenēbeje tsane, itsamatacabijawabelia-ata
pacuenia exanaejitsiatsibeje. ⁵² Bajaraxuabeje apoxenetsitsibeje tsane pibi-
siacuene wajanaexanaenexabeje, tsipaji bajaraxuabeje bewajanacacuenecar-
anatsinēbeje tsane. ⁵³ Nexata, DIOSO, xamē amo Abram pijaDIOSO, baja-
rapacuenia xanē tamo Nacor pijaDIOSO, bajaraPonē nacacuenetaenabeje.
Nexata, ponē apo-exanae wajanaliwaisicajonecowēyabeje, penaneconitsia-
exanaenexatsi —jai.

Nexata, Jacob bajarajota najumecapanepaeya paxuyo pejumaitsicowēya
jumaitsi naliwaisicajoneya, pewēnēta paDIOSojawabelia Isaac yayataeya-
cuenia wajēcabiaba. ⁵⁴ Nexata, xuacujinae Jacob rajuta dajubi Diosojawabelia
petajuitsicuenia petsutojumatatsia. Bajaraxuacujinae, junata daxita pijamo-
nae, Labán-ata pijamonae yajawa penajuaxaenexa. Nexata, daxita bajarajota
najuaxane. Bajarajota pexaecujinae, majitanubena bajarapatsutojumatatsia.

⁵⁵ Bajayacunua itsamatacabijawabelia Labán namatacota. Bajarajota, asi-
waya napējioba pexēnatoyobeje, daxita pemomoxi-ata. Cuenetsitajētana
pexaniacuene petaeayabinexa pewajēnaeyabelia. Bajaraxuacujinae, baja-
raponē nawiata pijanacuayaberena.

**Jacob tsiwajēnaenacuenexaniawaeta
penacaxitajarabinexa pematapijinē Esaú**

32 ¹ Jacob itsa abaxē najetaruca namuto-epatua Canaán-jawabelia
penawiatsinē, DIOSO pija-ánglewi mata-enenanajetarubenatsi.

² Nexata, Jacob itsa tane bajarapamonae, jumaitsi:

—DIOSO raja pijawajabitsaēwi pijataxunaebō —jai. Bajaraxuata, bajara-
ponē wēnēruba bajarapataxunae Mahanaim. ⁴

³ Nexata, Jacob itoroba pewajunupaebiwinexatsi Seir irajawabelia, Edóm
nacuayajuwēnē-irayo, petsipaebinexa Jacob pepatsijawa yabara Esaújawa-
belia. ⁴ Nexata, yajawanajume-itoroba mapaliwaisije:

—Pajumaitsimē tsane tamatapijinē Esaú: «Nejuyapijinē Jacob raja xamē
nitabarata beweliamatabēcuenenē tsaponaponae, cajumaitsisirena mapa-
cueniaje: ‘Labán-jawatalia bajayajebi ponaponajē. ⁵ Xainajē vaca, burro,
oveja. Jiwi-ata xainajē amoneya tanetonacuenebiwi pebiijiwi, petiriawi-ata,’
cajairena. Bajarapacuenia catonajume-itoroba, pexaniacuena panenacopia-
pitsinexabeje», pajamē tsane —jai Jacob.

q 32:2 *Mahanaim*: Hebreojumeta mapejumaitsijumeje: «Anijawiriabitsaētobeje pijataxunae»,
pejaijume.

⁶Nexata, itsa bajarapajiwibeje nawiarenabeje baja, pejumeliwaisicapo-naenëtsibeje, nexata Jacob-jawaberena itsa baja parenabeje, jumaitsibeje:

—Paxanëbeje palianëbeje patataenexabeje nematapijinë Esaú. Bajaraponë rabaja renajitsia pijacujaya, pecacopiapitsinexa pijajiwi yajawa cuatrocien-tos ponëbeje —jaitsibeje.

⁷⁻⁸Jacob itsa jumetane bajarapacuenia, bitso junawa ayaicuenia. Jamatabëcuenebëjainua. Nexata, pijajiwi tsata anijabitsaëtobejecuenia. Bajarapacuenia pijadajubi-ata caewiria canacujitsia tsata anijabitsaëtobejecuenia jiwi yajawa, tsipaji bajaraponë jamatabëjumaiti: «Itsa Esaú patsiarena tanebarënewajabitsaëtsinexa, nexata itsabitsaëto itsa cuene-amoneyabatsi, itsabit-saëto caëjëpa pewecuapanepaejawa», jamatabëjai.

⁹Nexata, bajarapaepatota Jacob wajëta DIOSOjawabelia. Jumaiti mapacueniaje:

—Jehová, tamopijinë Abraham, taxa Isaac-ata pijaDIOSOmë, xamë nejumaitsimë: «Nawiaremena nijamonaejawaberena, axa pija-irajawaberena. Cayawenonaenatsi pexaniacuenia», nejamë. ¹⁰Bajarapacuenia tane-itaxutotsoniataexaemë, neyawenoname baja, apoxinae-atanë picani xua yabara pexaniacuenia taneyawenonaenexamë. Apocatoxanepanae-ata picani xua yabara nesiwajamatabëcuenebarëyajitsiamë, itsiata baja, neyawenoname, tsipaji xanë pamatacabi tajabowecua pitsapajë, itsa nicabajë mapameneje, Jordán mene, itsacuenejawayo apocapitsapaenë. Caejawa saya tajanaeboyoy. Bajayata, caenëyo-atanë, itsiata, ajenaconoxaeta xainajë ayaibitsaëto tajajiwi dajubi, tajamona-ata. Nexata, yacaëjëpa anijataxunaebobejenexa pamona ta-ewetsiwinexa. ¹¹TajaDIOSOmë, pepacuenie bitso xanë junawajë. ¡Panecapanepare tamatapijinë Esaú pecobewecua, tane-beyaxuabiyaniwa, tajawabeje-ata pebeyaxuabiyaniwatsi, bajarapacuenia taxibitsaëto-ata! ¹²Bajarapacuenia panecapanepaenename, tsipaji xamë nejumaitsimë najumecapanepaeya taneyawenonaenexamë pexaniacuenia, taxainaponaenexa tamomoxi ayaibitsaëto, pacuenia manumeneppi-atsapërë aponamata-ëjëtsicapanepeatsi, bajarapacuenia bajarapamona pepitsapae-nexa itsamatacabi —jai Jacob pewajëtsijawata, Dioso peyawenonaenexatsi.

¹³Jacob bajarapamerawi barëmajita abaxë bajarajota. Bajarapamerawinua totsana xua rajutsijitsia pematapijinë Esaú amoneyacuenia. ¹⁴Totsata doscientos ponëbeje pesorowabi chivo, veinte ponëbeje pijinia pebitonë. Totsatanua doscientos ponëbeje pesorowabi oveja, veinte ponëbeje pijinia pebitonë. ¹⁵Bajarapacuenia totsata treinta ponëbeje camello pexi yajawa. Totsatanua cuarenta ponëbeje vaca pesorowabi. Bajarapacuenia totsata diez ponëbeje pijinia vaca pejanatorowi. Totsata veinte ponëbeje burro pesorowabi, diez ponëbeje pijinia pebitonë. ¹⁶Bajaraxuacujinae, Jacob rajutapona dajubi pijajiwi jawabelia caewiriawi canacujitsia, bajarapamona caebitsaëto canacujitsia saicayacuenia penawecuaponaenexa. Yajawanajumecopatanua mapacueniaje:

—Panajetarubenaenename natsatsiaya pepobitsaëtoxicuenia saicayayo napëtajayotsiaya —jai.

¹⁷Nexata, Jacob copiyapijibitsaëto pewetsinëjawabelia itoroba mapacueniaje. Jumaiti:

—Itsa pacacaxitajarabiana Esaú, itsa pacayanijobiananua, itsa pacajumaiti tsane: «¿Detsa belia paponame? ¿Detsa ponë papijajiwiwim? ¿Detsa

maponē pijadajubije patocanajetarubename?», ita pacajai, ¹⁸ nexata paxamē pajumaitsimē tsane: «Patajatuxanenē Jacob raja, xamē nitabarata beweliajamatabēcuenenē tsaponaponae pijanēxi, pecato-itorobiwi raja amoneyacuenia. Bajaraponē raja cotocaewa najetaruca», pajamē tsane —jai Jacob. ¹⁹⁻²⁰ Bajarapacuenia Jacob jumaitsi tsaponae cotocaewi pitorobiwijawabelia, bajarapacuenia acueyabibitsaētojawabelia-ata. Daxita pamonaē itorobapona, bajarapacuenia yajawanajumecopatapona. Bajarapacuenia Jacob exana, tsipaji bajaraponē jamatabē-itsi: «Bajarapacuenia xanē ita cato-itorobaponaenatsi, nexata tamatapijinē jamatabēcuenexanepanaeya-exanaenajē ētacaxitajarabijawabelia. Nexata, bajarapacuenia belia necopiapitsiana pexaniacuenia Esaú», jamatabējai Jacob. ²¹ Nexata, Jacob natsiwajēnae-itoroba penicabinexa Jaboc-najato pecaponaewi, perajutsiwinexa Esaú. Jacob bajarapamerawi nacopatanuca pijataxunaejawata, abaxē pemajitsinexa.

Jacob barēnatoroba āngelnē Peniel-jawata

²² Bajarapamerawi Jacob namatacota pitorobinexa pijawajiwi. Nexata, ya-itawaba pijawabeje, amoneya petonacuenebiwatsibeje yajawa, pexi once ponēbeje-ata penicabia-exanaenexa Jaboc-najato itsapanabelia. ²³ Bajaraponē baja ita nicabia-exana bajarapanajato itsapanabelia, yajawanicabia-exana daxita pecobecowē. Nexata, bepijiayo nawiarena pijataxunaejawaberena. ²⁴ Bajarajota, nacopatanuca caenē pija-epato. Bajarapaepatota, bajaraponē barēnataica athēbēwetsica peponaenē peyananianaejawabelia. ²⁵ Itsa bajaraponē athēbēwetsica peponaenē pebarēnataicaejawata, tane apopucuenecaējēpaejawatsi pecuene-amoneyabijawa. Nexata, bajaraponē pemaparawi pejayatajarabijawatatsi Jacob topadenedenecajunua. Bajaraxuata, Jacob jayujayuna. ²⁶ Nexata, Jacob petsimaxēpatsinētsi jumaitsi:
—¡Necopare baja taponaeenexa, tsipaji raja bitso matacabi tsaponae! —jaitsi. Itsiata baitsi jane, Jacob jumejai. Nexata jumaitsi:
—Apocacopatsi tsanetsi ita aponecuene-itajētsimē tsane Dioso pexaniacuenia taneyawenonabiabijawanexa —jai Jacob.

Nexata, bajaraponē pebarēnatorobinētsi jumaitsi:

²⁷ —¿Detsa pawēnēmē? —jaitsi.

Nexata, Jacob jumecanawiata:

—Xanē raja Jacob tawēnē —jai.

²⁸ Nexata, pebarēnatorobinētsi jumaitsi:

—Ajenaconoxae rabaja bajarapawēnē apowēnētsitecaemē tsane. Cawēnē-rubianatsi rabaja Israel, tsipaji niacuenesaēnē DIOSOjawabelia. Jiwiawabelia necuene-amoneyabinēnua —jaitsi. Nexata baja, bajarapaepatota Jacob wēnērubatsi Israel.^r

²⁹ Nexata, bajaraxuacujinae Jacob yanijoba:

—¿Detsa xamē pawēnēmē? —jai.

—¿Detsa xuajitsia newēnē yanijobame? —jaitsi. Itsiata, aponawēnētsipae-bitsi. Nexata, bajarajota cuenetsitajētatsi Dioso peyawenonaejawanexatsi pexaniacuenia.

^r 32:28 *Israel*: Israel-wēnē mapejumaitsiwēnēje: «Dioso raja piacuenesaēnē», pejaiwēnē.

³⁰Nexata, bajarapataxunaeta, itsajota natorobabeje, Jacob wënë-ruba Peniel,^s tsipaji bajarajota bajaraponë jumaitsi: «DIOSO pepacuene taja-itaxutocujaya taniji, xanë, abaxë itsiata, asaënë tsaponaponae», jai Jacob.

³¹Nexata baja, Jacob wecuapona Peniel-wënë taxunaebo itsa juameto pitsapaina. Jayujayunaeya najetaruca pamarapawito petotsapanataxuabi-xaetsi. ³²Bajarapamatacabicujinae, Israel-pijinë pemomoxi bajarapawijawa apoxae dajubinëwitojawa, tsipaji bajarapawito petotsapanataxuabijawatatsi natakununajunua.

Jacob, Esaúbeje, nasiwajamatabëcuenexanepanabeje

33 ¹Jacob itsa tane tajëjawawerena abaxë Esaú penajetarucaejawa pijajiwi yajawa cuatrocientos ponëbeje, nexata pewajënaeyota pexi totsana caewa canacujitsia. ²Bajarapacuenia amoneya petonacuenebiwatsibejewabelia-ata pexi pexainaewi totsata. Bajarapowabeje copiaya namataxainaeya barënucaeya-exanabeje pexi. Bajaraxuacujinae, Lea pexi yajawa saicaya cotocaewi barënuca. Bajaraxuacujinae, Raquel, Josébeje nucabeje pecopiarucaebitsaëtojawata. ³Bajaraxuacujinae, Jacob mata-enenalia pematapijinë. Itsa baja, imoxoyo najetaruca, nexata Jacob irataeya bocabiabajunua penajetarucaenë siete xuabeje. Bajarapacuenia Jacob exana pepatsijawaberena penajetarucaenë Esaú. ⁴Nexata, Esaú itsa tane bajarapacuenia, cujinaerena pejuyapijinëjawaberena. Bajarapaepatota, wëtaicarucapona. Naitabaratsutsuniaya nacopiapitabeje. Bajarajota, daxitanëbeje naitaxutuanuabeje ayaicuenia. ⁵Bajaraxuacujinae, Esaú taenuba petiriawi, pexi yajawa penubenaejawa. Nexata, yanijoba:

—¿Detsa mapamonaeye neyajawaponaewi tsaja? —jai.

Nexata, Jacob jumecanawiata:

—Bajarapamonaeraja taxi, DIOSO tanerajutsiwi —jai.

⁶Nexata, amoneya petonacuenebaponaponaewatsibeje, pijawacuenia pexainaewabeje, cujirenabeje. Bajarapaepatota, bocajunuabeje irataeya Esaú pitabarata. ⁷Bajaraxuacujinae, icatsia Lea pexi yajawa barërena. Bajarapacuenia itsi. Bajarapacuenia Raquel-ata pexënato yajawa José irataeya bocajunua bajaraponë pitabarata. ⁸Nexata, xuacujinae Esaú yanijoba. Jumaitsi:

—¿Dexua najamatabëxainame nexanaenexa dajubicaponaewijawabelia, pabitsaëtonë caxibajarabaponarenajë tarenanë? —jai Esaú.

Nexata, Jacob jumecanawiata:

—Bajaraxua cato-itorobatsi tacarajutsicuenia, pexaniajamatabëcuenia tanetaenexamë —jai Jacob.

⁹Nexata, Esaú jumecanawiata:

—¡Jume raja! Xanë raja pijinia xainajë ayaijawa. ¡Canacopare saya necobecowë dajubi! —jai Esaú.

¹⁰Itsiata, Jacob jumaitsi:

—jJume! jPexaniacuenē ne-exanare! jItsiata, xua carajutatsi, pire, tsipaji baja xamē itsa ca-itabaratanetsi beta-itabarataeuenē¹¹ DIOSO! jItsipajē pepacuenē nepitsijawa xua xanē amoneya carajutatsi. Bajaraxuanua catocanajetarucatsi, tsipaji DIOSO bajaraxua pexaniacuenia neyawenona taxainae-nexa. Itsacuenējawa-ata aponetsisajinae —jai. Jacob icatsia orijibia napēna jumaitsi tsaponae. Belia nexata baja, Esaú muxunajejaitsi. Nexata baja, wecuapitatsi amoneyacuenia dajubi perajutsijawa Jacob.

¹² Nexata, Esaú icatsia jumaitsi:

—Nexata baja, ponaenatsi majotawecujae. Nexata, xanē pacatsiwajēnae-namataxainae-natsi paxamēwecua, tacowēwelia paneponaenexa —jai Esaú.

¹³ Nexata, Jacob jumecanawiata:

—Tamatapijinē, xamē yapētaneme pejewaxi tayajawanajetarucaejawa. Bitso bajarapamonae apocajēpaetsi bajarapacuenia tabarēponaejawa abaxē. Nexata, xanēnua benajamatabēxainajē tajadajubi yabara, tsipaji tajadajubi itsamonae xaina pexi. Nexata, xanē itsa barēponaejitsipajē cae-cuenia, bajarapamonae belia pecacueranae yatēpaejitsipa namuto-epatua.

¹⁴ Nexata, xamē ponaename namataxainae. Xuacujinae, xanē beaxayo cotocaewa najetarucanajē tajadajubi yajawa. Nexata, xuacujinae waxaitsi-beje nacaxitajarabianatsibeje Seir nacujawata —jai Jacob.

¹⁵ Nexata, Esaú jumaitsi:

—Je, xanepana. Nexata, catocopatsianatsi itsamonae pamonaē yajawapona-ponajē —jai Esaú.

Itsiata, Jacob jumaitsi:

—jJume, apoxanepanae! jDetsa xuajitsia xanē cajamatabē-itonotsipatsi? —jai Jacob.

¹⁶ Nexata, Esaú bajarapamatacabi barēnawiata daxita pijajiwi Seir nacujawabelia. ¹⁷ Esaú baja penawiatsicujinae, Jacob pijinia naropota peponaenexa Sucot tomarajawabelia, bajarajota pijabo penacuenēbanutsinexa, pijadajubi-ata pijabobērētoxi petonacuenēbinexa. Bajaraxuata, bajarajota wēnēruba Sucot.¹⁸

¹⁸ Itsa Jacob nawiatanajetaruca Padan-aram nacuawerena, bajaraponē patajopa pexaniacuenia Canaán nacuata. Bajaraponē ponapona Siquem tomara¹⁹ imoxoyojawata. ¹⁹ Jacob-nua comuata irayo cien ponēbejeta palata-nēanē Siquemta, baitsi Hamor pemomoxiyajuwēnēnējawabelia. Bajarajota nexata, pijaboxi nacuenēba. ²⁰ Bajarajotanua, altar-jawa-ata nacuenēbanuta. Bajarapa-altar wēnēruba El-elohe-israel.²⁰

t 33:10 *beta-itabarataeuenē Dioso*: Apoyapētaetsi xaniawaetsia pajamatabēcuene yabara Jacob jumaitsi bajarapacuenia. Itsiata, ayaibitsaēto Dioso peliwaitsi penacujarubiwi bajaraxua yabara jumaitsi: «Pacuenia penaneconitsinē bacujunawa Dioso pitabarataejawa, bajarapacuenia itabaracujunawa pematapijinē», jai. Itsamonae pijinia jumaitsi bajaraxua yabara: «Pamerawi Dioso tsitanaitajētatsi Peniel-jawata, pexaniacuenia wecuapona beyaxuabinejewatsi pitaxutotsonia-taexaetsi, bepena-itabarataenēbeje-ata picani. Bajarapacuenia canajēta Jacob pexanaecuenia pewecuaponaejawa pematapijinē Esaú, beyaxuabinejewatsi, pitaxutotsonia-taexaetsi pematapijinē», jai. Saya nayapētanetsi pacuenia Jacob najamatabēcuene-itajēta penataejawa penaneconitsinēcuenia pematapijinē pitabarata. u 33:17 *Sucot*: Hebreojumeta pejumajitsijume: «Bobērēto», pejajijume. v 33:18 *Siquem tomara*: Siquem tomara canacopata pexanaenē pewēnēcuenia. Bajarajota ponapona Abraham-pijinē bajayata, Morepijinē pijataxunae imoxoyojawata. Gén. 12:6 w 33:20 *El-elohe-israel*: Bajarapawēnēyo nacayapētaeyā-exana mapacueniaje: Dioso, «Israel pija-Dioso», pejajiwēnē.

Jacob pexēnatoyo Dina, yabara peliwaishi

34 ¹ Jacob, Leabeje, pexēnatoyo Dina itsamatacabi pitsapa pesiwaxai-naenexa pewēnapejanawaxi bajarapanacuata pejinawanapaewi.

² Itsiata baitsi jane, paepatota tane Siquem, Hamor pexēnato, heveowirianē, bajarapatomarajawata penamatacatorobaponaponaenē. Nexata, Siquem saya quenetsiataeyaxuaba bajarapowayo, jumejejainejewatsi. ³ Itsiata baitsi jane, bajaraxuacujinae Siquem bajarapowayo bitso ayaicuenia jitsipa. Nexata, bajaraponē jaitapona pacuenia bajarapowayo jamatabēcueneliwai-sijēpaejitsiatsi pejitsipaenexatsi. ⁴ Nexata, penajamatabēcueneweretsicujinae, Siquem jumaitsi paxa Hamor-jawabelia:

—¡Ponare, tanetojumaitsinexamē mapowaje pijamonaejawabelia taneto-wajēcaenexamē, tsipaji bitso xanē jitsipajē bajarapowa tapitsinexa! —jai.

⁵ Jacob baja picani pexēnatoyo Dina wēnētane Siquem pequenetsiataeyaxuabijawatsi. Bajarapacujinaeta-ata pijinia Jacob pexi pebijiwi cajanawanapa pijadajubi wayafuabelia. Nexata, bajaraponē jumetae-ata bajaraxua, itsiata abaxē moya. Itsaliwaishi apojumaitsi bajarapamonae patsinejewa.

⁶ Itsiata, bajarapaepatota Siquem-beje, paxa Hamor-beje pona Jacob-jawabelia pebarēcuaicuaijainexabeje.

⁷ Bajarapaepatota pijinia, Jacob pexi nawiabanajetarubena wayafowerena. Bajarapamonae nexata jumetane xua Siquem exana pejuyapijiwa Dinajawabelia. Nexata, tsi-atanetsi bitso bajarapaliwaishi bajarapamonae. Bitso anaepanana ayaicuenia bajarapaliwaishi itsa jumetane, tsipaji bajarapamonae bitso topibisialiwaishitsi. Itsa jumetane Siquem Dina pequenetsiataeyaxuabijawatsi, bajarapamonae jamatabēcuenē-itsi: «Bajaraponē picani itsa nacayaityatane, caeto-ata bajarapitsicuenē apobe-exanae», jamatabējai.

⁸ Icatsia, Hamor barēcuaicuaijai Jacob, pexijawabelia-ata. Jumaitsi:

—Taxēnato Siquem bitso bajarapowayo jitsipa. Nexata, xamē nexēnatowayo, paxamē-ata papematapijiwimē, pexaniacuena pacawajētatsi panetocopatsinexa bajaraponē pepitsinexa. ⁹ Nexata, bajarapacuenia waxaitsi naexanaenatsi napenerimajiwitsi. Bajarapacuenia nexata paxamē pijinia panexi pebijiwi panecoxinotaponaena pataxēnatowaxi. Paxanē-ata pijinia bajarapacuenia pataxi nacojobaponaena paxamē panexēnatowaxijawabelia —jai bajaraponē. ¹⁰ Icatsia, xuacujinae jumaitsi:

—Bajarapacuenia panacopabianame paxanējawata wajanajuajinawanapaenexa, tsipaji raja panacuata pajinawanapajē ayainacuaxaneto itsajota paxamē-ata pacacuenecaējēpa panejinawanapaejawa. Jamatejema pajinawanapaename bajarapa-iranēta. Bajarapacuenia naexanaenatsi wajanawijatsiwi namataneatsia. ¡Mapanacuapiji-irayajuwēnējawa panawijarenua panenatocomuatsinexa panija-iranexa, panejinawanapaenexa! —jai Hamor bajarapamonaejawabelia.

¹¹ Bajarapaepatota pijinia, Siquem jumaitsi Jacob-jawabelia, daxita Dina pematapijiwijawabelia-ata:

—Pexaniacuene pacawajētatsi patanejumejexamēnexa. Pacarajutsianatsi xua panewajētame. ¹² Apo-itsacuene ayaijawa panewajētsi-atamē tsane tapitsijamatabēcuenē panejuyapijiwa tanajamatabēcuenematamotsinexa, nexata amoneya pacarajutsianatsi itsacujirujawanē pematatsēnyō. ¡Itsiata baitsi jane, panetocopare panejuyapijiwa tapitsinexa! —jai Siquem.

¹³ Jacob nexata pexi jejai itajara yamaxë-itojorobiaya Siquem, Hamor-bejajawabelia, petoquenetsiataeyaxuabixaetsi pejuyapijiwa Dina. ¹⁴ Bajaraxuata, bajarapamonae jumaitsi:

—Paxanë apopenecuenecaējēpae patarajutsinexa patajuyapijiwa ponë apopenabo-upiperabëcaucutsia-exanaenëjawabelia, tsipaji paxanënexa bajaraxua panetopibisiacuenë. ¹⁵ Itsiata baitsi jane, paxanë pacajumejejai tsipaetsi mapaliwaisijawaliaje. Pacuenia paxanë pa-exanabiabajë, bajarapacuenia itsa pa-exanaejitsipame; baitsi caepebi canacujitsia paxamë-tuatuajëta pejinawanapaewi benabo-upiperabëcaucubia-exana. ¹⁶ Nexata, bajarapacuenia pacarajutaponaejitsipatsi pataxënatowaxi panepitaponaenexa. Bajarapacuenia paxanë-ata papitaponaenajë panexënatowaxi. Nexata, bajarapacuenia paxanë pajinawanapaenajë paxamëtuatuajëta. Nexata, najuajinawanapaenatsi caebitsaëto wajanaexanaenexa. ¹⁷ Itsiata baitsi jane, itsa apopanejumecowënëtsimë tsane xua pacajumaitsitsi, panenabo-upiperabëcaucubinexa, nexata paxanë patajuyapijiwa apopacatocopatsitsi tsane. Rabiji papitsianajë, patacawecuacaponaeenexa.^x Nexata, bajarapacuenia-ata pacawecuapitsapaenatsi paxamë —jai bajarapamonae.

¹⁸ Hamor, pexënato Siquem-beje, bajarapajiwi-beje jejaibeje, tsipaji bajarapaliwaisi tsitaxanepanatsibeje pacuenia jumaitsitsibeje. ¹⁹ Itsamatacabianë panepaponaenëjewa, nexata Siquem jane baja nabo-upiperabëcaucutsia-exana, tsipaji bitso bajaraponë Jacob pexënatoyo jitsipa. Bajaraponë pijinia Siquem pijamonaetuatuajëta peyaiyataenëtsi tsaponaponaë daxitawecua. ²⁰ Nexata, bajaraponë, paxabeje, ponabeje tomara peyacaranatsijawapijibau-pajawabelia, itsajota jiwi nacaetuatabiaba daxitacueneliwaisianë pecuai-cuaijitsabiabinexa. Bajarapamonaejawabelia jumaitsibeje:

²¹ —Marapamonae Jacob barëpexije, bajarapamonae wajanacayapëtaewi. Bajarapamonae jinawanapaejitsia waxaitsijawata. Bajarapamonaenua najamatabëxaina penawijatsinexa waja-irayajuwënëjawa, pejinawanapaenexa mapanacuajawataje. Waxaitsijawata, bitso xainatsi piniji-iranë bajarapamonae pejinawanapaenexa. Nexata, bajarapacuenia cuenecaējēpa wajanacojio-baponaëjawa bajarapamonae pexënatowaxijawabelia, bajarapijinia pacuenia, bajarapamonae-ata penacojio-baponaenexa wajaxënatowaxijawaberena. ²² Itsiata baitsi jane, bajarapamonae caebitsaëto wajanaexanaenexa, waja-tuatuajëta pejinawanapaenexa, matapania jejai tsipae mapajamatabëcueneliwaisijawaliaje, waxaitsi daxitatsi pebijiwitsi itsa nabo-upiperabëcaucubia-exanaenatsi, pacuenia bajarapamonae exanabiaba. ²³ Daxitaxuanë xaina, pijadajubi-ata, nexata bajaraxuanë waxaitsi wajajawa tsane. Saya caejawa waxaitsi jumejejaisi tsane wajanabo-upiperabëcaucubia-exanaenexa nali-waisicajoneya. Nexata, bajarapamonae bajarapacuenia nacopabiana waxaitsijawata wajajawajinawanapaenexa —jaibeje.

²⁴ Daxita bajarapatomarapijiwi pebijijiwi, pamonae pecuenecaējēpaewitsi penawajabitsaëtsijawa, pewëjēawi penaweretsiwijawabelia, jejai pacuenia Hamor, pexënato Siquem-beje xua jumaitsi,

x 34:17 *patacawecuacaponaeenexa*: Pequenetsiataeyaxuabicujinae Dina, Siquem tsaena apocopatsi penawiatsijawa pijabojawabelia, itsa jume, bajarapowa jejai tsipae, ajumesaëya penapëna-junatsixae. Caponapona tsaena pijawacuenia. Taema Gén. 34:26.

penabo-upiperabëcaucubia-exanaenexa. Nexata, bajarapamonae nabo-upiperabëcaucubia-exana baja. ²⁵ Itsiata, acueyabimatacabita, paepatota abaxë bajarapamonae to-atanetsi penabo-upiperabëcaucubia-exanaejawami, bajarapaepatota Simeón, Levíbeje, Jacob pexënatobeje, Dina pematapijinë-beje, pita pija-espadabeje caenë canacujitsia. Tsimaxëponabeje bajarapatomarapijiwijawabelia. Nexata, bajaraponëbeje daxita pebiijiwi benajetarucabeje pija-espadanëta bajarapamonae xaniawaetsia nayamatamotsinejewa, tsipaji bajarapamonae apocuenecanaëjëtsi bajaraxua petocopiapatsinexatsi. ²⁶ Bajarapacuenia yajawabeyaxuababeje espadata Hamor, pexënato Siquem-beje. Bajaraxuacujinae, Dina jutatsi Siquem pijabowecua. Barëponatsibeje pijanacuayaberena. ²⁷ Bajaraxuacujinae, Jacob itsamonae pexi cotocaewi pata itsaxuayo bobena petëpaewi. Bajarapamonae jane baja, bajarapatomarapijiwimi pijajawanëmi wecuanotanjatarubena, penajamatabëcuenematamotsinexa petoquenetsiataeyaxuabixaetsi pejuyapijiwa. ²⁸ Nexata, bajarapamonae nota pijadajubianëmi. Nota ovejamonae, vacamonae, burromonae, daxitaxuanë xaina bajarapatomarata, bajarapacuenia wayafuanëjawa. ²⁹ Daxita pexaniacuenejawanë pecobecowëjawanëmi capona. Bajarapacuenia yajawacapona pamonae petaicaewi pejewaxi, petiriawi-ata. Nexata, bajarapamonae nacobetoxota daxitaxuanë xaina bonëjawa. ³⁰ Bajaraponëbeje itsa patabeje boyaberena, Jacob jumaitsi pexënatobejajawabelia:

—Paxamëbeje bitso pinijiliwaisi panetsi-exanamebeje. Nexata, ajenacono-xaeta mapanacuapijiwije naca-itoyanaëcotsiana, pacuenia cananeomonae, ferezeomonae-ata. Nexata, bajarapamonae itsa nacaetuatsiana wajana-catsimaxëpatsinexa, wajanacabarë nawajabitsaëtsinexa, xanë taxainaxae caejiwibeje pebiijiwi patacabarëcuenecanawiatsinexa neto-ayapëbeje tsane. Nexata, nacacue-ne-amoneyabiana. Xanë nebeyaxuabiana. Paxamë-ata pacabena, daxita wajamonae yajawa —jai Jacob.

³¹ Itsiata baitsi jane, bajaraponëbeje jumecanawiata mapacueniaje:

—¿Aponacatsicarucacae wajayamatamotsijawa Dina pequenetsiataeyaxuabijawami? Xamë tsaena jitsipame nexënatoyo petaenexatsi penaperabëcanajetabiabiwacuenia pewitota pibisiacuene pexanabiabinexa —jaibeje.

Jacob Dioso yawenonaeyapaebatsi Betel-jawata

35 ¹ Dioso jumaitsi Jacob-jawabelia:

—Mabaja jotaje wecuapitsapaename neponaponaenexa Betel-jawabelia, neponaponaenexa bajarajotalia. Bajarajotalia, netonacuenebianame altar-jawa tawënëta nijaDiosonë, itsajota catsitanaitajëtatsi pamatacabi wecuanajetabijirawame nematapijinë Esaú —jai Dioso.

² Nexata, Jacob jumaitsi pijamonaejawabelia, pamonae-ata yajawanajetaruca:

—Pacatuatsianame daxitawiriawi jumapecataeya pexanaenëanë panexainaewi paxamë. Panawecuapenetsianame bajaraponëanë. Nexata, panawaename baja, panenaxatabinexa panija-ese panequiatsijawanë. ³ Bepijia-wajëto ponaeniatsi Betel-jawabetsia itsajota nawita petsutonë. Bajarajotatsia raja, tonacuenebanutsijitsianë altar-jawa Dioso pewënëta. Bajaraponë raja neyawenonabiaba pacujinae xanë bitso najamatabëxainajë. Bajaraponë neyajawa tsabiabi itsabelia xanë ponaponajë —jai Jacob.

⁴Nexata, bajarapamonae Jacob tocapatatsi bepíjádiosonēcuenia petaewi pecobeta pexanaenēxi, daxitaxuanē-ata penamuxuxatabijawanē.⁷ Jacob nexata capona pemēthētetsinexa Siquem imoxoyojawabelia. Pinijinaebēxē-panajawata mēthēteta. ⁵Pamatacabijawa Jacob barēpitsapa, nexata DIOO cujunawia-exana bajarapanacuata pejinawanapaewi, pamona-ata namutua ena. Bajaraxuata, apopēbarajinaetsi Jacob, tsipaji DIOO junawia-exana.

⁶Jacob daxita peyajawaponaewi barēpata baja Luz tomaroyojawata. Bajarapatomarayo itsawēnē pijinia Betel, pe-ecaetomarayo Canaán nacuata. ⁷Nexata, bajarajota exananuta altar-jawa DIOO pewēnēta. Bajarapataxunae wēnēruba El-betel, tsipaji bajarajota Jacob tsitanaitajētatsi DIOO pacujinae najetabijirawa pematapijinēwecua. ⁸Bajarapanacuajawata tēpa Debora, Rebeca pe-ewetabiabiwamitsi. Bajarajota, mēthētatsi Betel-imoxoyojawata pinijinaejawabēxēpana. Itsajota mēthēta Debora, Jacob wēnēruba «penamatanueyabinaebēxēpana»,^z pejaiwēnē.

⁹Pamatacabi Jacob nawiata Padan-aram nacuajawawerena, bajarapamatacabi DIOO tsitanaitajētatsi icatsia Betel-jawata. Nexata, bajarajota DIOO najumecapanepaeya cuene-itajēta Jacob-jawabelia peyawenonaenexa, xua-ata jumaititsi Peniel-jawata penajamatabēnapitsia-exanaenexa. Jumaitsi mapacueniaje:

¹⁰—Xamē picani newēnē Jacob. Ajenaconoxae baja Jacob-wēnē apowē-nētsitecaemē tsane. Ajenaconoxae pamatacabijawaweliacujinae newēnē baja tsane Israel —jai.

Nexata, xuacujinae DIOO pewēnē-itothianaecujinae, icatsia jumaitsi:

¹¹—Xanē raja Diosonē, daxitawecua tacuenesaenē. Xainaename nexi ayaibitsaētoxaneto, bajarapacuenia nemomoxi-ata tsane daxitanacuajawa peyacaējēpaenexa. Itsamonae naexanaponaena nacua pe-ewetsiwi bajara-payajuwēnēwi. Apocawerianacuapijiwi nemomoxi tsane. Baitsi, xamēwecua pitsapaena itsabitsaēto nemomoxi caenacuapijiwinexa, itsabitsaētonē pijinia itsanacuanēpijiwinexa. ¹²Pa-ira rajutajē Abraham-pijinē, axa Isaac-ata, xamē-ata icatsia carajutsianatsi. Bajarapacuenia canacopatsiana nemomoxi pewajēnaeyabelia —jai DIOO Jacob-jawabelia.

¹³⁻¹⁴DIOO peponaecujinae itsajota barēcuaicuajiai tsanucac Jacob, nexata Jacob pita iboto. Mēthētanuta iboto matacotanutsiaya nuta. Bajaruacujinae, bajaraponē vinorata, aceiterata-ata tsimata-epananuta bajarapa-iboto DIOO pewēnēta. ¹⁵Itsajota DIOO barēcuaicuajiaitsi Jacob, bajarapataxunae wēnēruba Betel.

Raquel wecuatēpa Jacob

¹⁶Bajaraxuacujinae, bajarapamonae wecuapona icatsia Betel nacuayo. Itsa baja to-imoxoyotsi pepatsinexa bajarapamonae Efrata tomara, bajarapamatacabi Raquel bitso wixaenotaponatsi. Bepijia apowecuanaxanaetsi. Nexata, bajarapowa namuto-epatota wecuanaexanatsi. ¹⁷Raquel paepatota

y 35:4 *penamuxuxatabijawanē*: Bajarapa-aretejawaxi bajarapamonae namuxurubabiaba pe-itsacueniabiyaniwatsi. Canacuenebabiaba pacuenia waxaitsi canacuenebatsi sebo. Bajaraxuata, nawecuatorota bajaraxuanē Dioso pimoxoyotsiwajēnaeya, tsipaji Dioso itoya bajaraxuanē. Deut. 18:9-22 **z** 35:8 *Penamatanueyabinaebēxēpana*: Hebreojumeta penamatanueyabinaebēxēpana itsa jai: «Alón-bacut», bajai hebreojumeta.

tsi-ayapēbejetsi bitso pewecuaanaxanaenexatsi, nexata pewetsiwa jumaitsi Raquel-jawabelia:

—¡Pētsa junawame ne-exanaenexa! ¡Ajamatabēcuenesaēmēre! Cawecua-naexanaejitsia raja itsapebinēyo —jai. ¹⁸Itsa baja imoxoyo petēpaejawa, Raquel wēnēruba bajaraponēyo Benoni^a pejumecopiarucaejumeyo. Bajara-powa bajarapanacuetonēyo wēmarētēpa. Bajaraponēyo juya Israel nacoxi-wēnēruba Benjamín.^b

¹⁹Bajarapacuenia Raquel tēpa. Itsajota tēpa bajarapowa, bajarajota mēt-hētatsi namutomuxuneneta, panamuto ruca Efrata tomarajawabelia pepatsi-nexa. Itsawēnē pijinia maparucaeje bajarapatomara, Belén. ²⁰Israel mēthē-tanuta iboto Raquel pewēnēta pemēthējawata. Bajarapa-iboto ajenaconoxae pamatacabijawa-ata abaxē nuca^c penayapētaenexa Raquel pemēthēcuenē.

²¹Nexata, Israel najetaruca abaxē pepatsinexa Migdal-edar tomarajawabelia. Bajarajota pepatsicujinae, exananuba pijacarpaboxi peponaponaenexa cae-epatoyo. ²²Pamatacabijawa bajarapamonae jinawanapa bajarajota, Rubén matapijinē yajawamajita Bilha, paxa pijawacuenia petaewa, powa amoneya petonacuenēbaponaponaewa Raquel-pijiwami. Nexata, Israel itsa yapētane pexēnato peyajawamajitsijawa bajarapowa, bajarapaliwaisi bitso amuxujitsibi.^d

Jacob (Israel) pexi

Israel pexi xaina doce ponēbeje, mapamonaeje. ²³Ponēbeje xaina Leajawabelia: pexēnato pepomatapijinē Rubén, xuacujinae Simeón, Leví, Judá, Isacar, Zabulón. ²⁴Ponēbeje xaina Raquel-jawabelia: José, Benjamín-beje.

²⁵Ponēbeje xaina Bilhajawabelia, Raquel pijajiwirowata: Dan, Neftalíbeje.

²⁶Ponēbeje xaina Zilpajawabelia, Lea pijajiwirowata: Gad, Aser-beje. Mapamonaeje Jacob-jawawerena pepitsapaponaewi, penaexanaewi bajarapamonae Padan-aram nacujawawatalia.

Isaac baja wecuatēpa pijamonae

²⁷Jacob bajaraxuacujinae pona, petaenexa paxa Isaac, Mamre tomara-jawabelia. Bajarapatomara pijinia itsawēnēbeje Arbawēnē, Hebrón-wēnē. Bajarajota, Abraham-pijinēmi copiaya ponapona, bajaraxuacujinae Isaac-ata. ²⁸Isaac baja itsa xaina ciento ochenta pawai-beje bajaraponē tēpa.

²⁹Tēpa pepuaperujunēyo bitso. Nexata, Esaú, Jacob-beje, paxapijinēmi mēt-hētabeje. Pacuenia pijamonaemi petēpaewimi mēthēcabiaba,^e bajarapacuenia bajaraponēbeje paxapijinēmi mēthētabeje.

a 35:18 Benoni: Mapejumaitsiwēnēje: «Taxēnato tanenajamatabēxainaeya-exanaenēyo», pejai-wēnē. **b 35:18 Benjamín:** Mapejumaitsiwēnēje: «Taxēnato, ta-itapetsinēyo taxi daxitawecua», pejaiwēnē. **c 35:20 ajenaconoxae pamatacabijawa-ata abaxē nuca:** Pamatacabijawa Moisés yaquinaruta mapaliwaisije, bejamatabē 600 pawai-bejecujinae, abaxē nuca bajarapa-iboto pemēthētanutsijawa. Maparucaeje, bejamatabēcuenē 3900 pawai-bejecujinae, aponayapētae itsa abaxē nuca tsitecaeya. **d 35:22 bajarapaliwaisi bitso amuxujitsibi:** Bexējawabelia Gén. 49:3-4-jawata Jacob pexēnato matapijinē Rubén cuene-itajētatsi pibisiacuenē petaenexa, tsipaji barēmajita pijawa Bilha. Pibisiacuenē pecuene-itajētsijawata, wecuapitatsi pepomatapijinēcuenēmi, bajarapacuenē juya pecanacopatsinexa Judá. **e 35:29 pijamonaemi petēpaewimi mēthēcabiaba:** Bajarapaliwaisi nacato-itajēta petēpaenē piasiwajawa yaityatacuenia pejumaitsiyawata petēpaenē yabara. Taema «petēpaewimi pijamonaemi pecowēyapona», glosariojawata.

Esaúpijinē pemomoxi, yabara peliwaishi

(1Cró 1:34-54)

36 ¹Mapamonaēje penaexanaewi Esaúpijinējawawerena. Bajaraponē pijinia itsawēnē Edom. ²Esaú^f pita acueyabi powabeje pijawajiwinea, Canaán nacuapijipetiriawi; mapamonaēje: Ada, pexēnatoyo Elón, heteowirianē, itsawa pijinia Aholibama, pexēnatoyo Aná, Zibeón pexēnato. Bajaraponē heveowirianē. ³Pitanua Basemat, paxuanē Ismael pexēnatoyo. Ismael pexēnatoyo Nebaiot, pejuyapijiwa.^g ⁴Esaú barēxaina Adajawabelia pexēnato, ponē wēnēruba Elifaz. Basemat-jawabelia pijinia barēxaina pexēnato, ponē wēnēruba Reuel. ⁵Aholibamajawabelia pijinia barēxaina acueyabi ponēbeje, Jeús, Jaalam, Coré-ata. Daxita bajarapamonae naexana pamatacabijawa Esaú abaxē ponapona Canaán nacujawata.

⁶⁻⁷Esaú, pejuyapijinē Jacob-beje, xainabeje bitso ayaibitsaētozaneto pijadajubi, bajarapacuenia-ata pijajiwi peyajawaponaponaewibeje. Orijiibia pijadajubibitsaētonēbeje apotoyacaējēpaetsibeje bajarapanacuapijipona. Bajaraxuata, itsamatacabi Esaú wecuawarapa pejuyapijinē Jacob. Nexata barēpona pijawaxi, pexi yajawa, pebijiwi, petiriwaxi-ata, daxita pamo-naenua yajawaponapona pijataxunaebowata. Bajarapacuenia caponanua pijadajubibitsaētonē, daxita xua bajaraponē xaina Canaán nacuata. Nexata bajaraponē pona itsanacuajawabelia, pewecuanatsatsinexa pejuyapijinē Jacob. ⁸Bajarapacuenia Esaú (ponē itsawēnē Edom) ponapona petsutonēnacujawa, Seir-nacuata.

⁹Mapamonaēje pepitsapaponaewinua Esaújawawerena, ponē Edom nacuapijiwi pijasalinainē, pejinawanapaewi petsutonēnacujawa, Seir-nacuata. ¹⁰Mapamonaēje Esaú pexi pebijiwi. Penaexanaewi pijawa Adajawata, Elifaz. Pijawa Basemat-jawata pijinia naexana Reuel. ¹¹Pamonae pijinia pebijiwi penaexanaponaewi pexēnato Elifaz-jawawerena: Temán, Omar, Zefo, Gatam, Cenaz-ata. ¹²Elifaz pijawa, cotocaewi pepitsiwa, pewēnē Timna.^h Bajarapowa toxaina pexēnato pewēnē Amalec. Daxita bajarapamonae Esaú pijawa Adajawawerena pepitsapaponaewi. ¹³Pexēnato Reuel-jawawerena pijinia pepitsapaponaewi mapamonaēje: Nahat, Zera, Sama, Miza-ata. Daxita bajarapamonae Esaú pijawa Basemat-jawawerena pepitsapaponaewi. ¹⁴Acueyabiwa pijinia Esaú pijawa, Aholibama, bajarapowajawawerena penaexanaewi mapamonaēje: Jeús, Jaalam, Coré-ata. Aná pexēnatoyo Aholibama, Zibeón pemomoyo. Daxita bajarapamonae Esaújawawerena pepitsapaponaewi.

¹⁵⁻¹⁶Mapamonaēje namatacatorobawanapa Esaú pemomoxituatujēta: Esaú pexēnato pepomatapijinē, Elifaz, pexi Temán, Omar, Zefo, Cenaz, Coré, Gatam, Amalec-ata. Bajarapamonae penamatacatorobiwi pijamonae-tuatujēta, Edom nacuata. Bajarapamonae raja Ada pemomoxi tsaponae-rena. ¹⁷Esaú pexēnato Reuel-jawawerena pamonae namatacatorobawanapa

f 36:2 Esaú: Bajaraponē pexēnato Isaac, Jacob/Israel pematapijinē. Taema Gén. 25:25-26
g 36:3 Ismael pexēnatoyo: Taema Gén. 25:13 **h 36:12 cotocaewi pepitsiwa Timna:** Elifaz apopepijawa bajarapowa, saya petonacuenebaponaponaewatsi. Itsiata, barēxaina pexi bajarapowajawabelia pepopijawacuenia. Wowaijumeta «concubina». Jiwi jumeta «petonacuenebaponaponaewatsi».

pemomoxituatujëta, Edom nacuata, mapamonaeye: Nahat, Zera, Sama, Miza-ata. Bajarapamonaeye raja Esaú pijawa Basemat-wënëwa, pemomoxi tsa-ponaerena. ¹⁸ Pamonae pijinia penamatacaitorobiwi pijamonaetuatuajëta, penaexanaponaewi Esaú pijawata Aholibama, Aná pexënatoyo, mapamonaeye: Jeús, Jaalam, Coré-ata. ¹⁹ Daxita bajarapamonaeye Esaúⁱ pemomoxi, penamatacaitorobiwi tsawanapae pemomoxibitsaëtotuatuajëta,^j Edom nacuata.

Seir, horeowirianë, pemomoxi, yabara Peliwais

²⁰ Seir,^k horeowirianë, barëponapona pijamonaeye Edom nacuata, Esaú pepatsiwajënaeya. Bjaraponë pexi pebijijiwi mapamonaeye: Lotán, Sobal, Zibeón, Aná, ²¹ Disón, Ezer, Disán-ata. Bjarapamonaeye penamatacaitorobiwi tsawanapae pijamonaewiriawituatuajëta, Seir-jawawerena pepitsapaponaewi, Edom nacuata pejinawanapaewi. ²² Mapamonaeye Lotán pexi: Hori, Hemam-beje. Pematapijiwa Lotán pewënë Timna ²³ Mapamonaeye pijinia Sobal pexi: Alván, Manahat, Ebal, Sefo, Onam-ata. ²⁴ Zibeón xaina anijanë-beje pexënatobeje: Aja, Aná. Aná caxitajaraba meramëthë pepitsaparucaejawa, pacujinae paxa pijaburroxi to-ewetapona pona petsewitusatonacuata. ²⁵ Seir pexënató, Aná, xaina anijajiwibeje pexijiwibeje; pebi pewënë Disón, petiriwa pijinia pewënë Aholibama. ²⁶ Seir pexënató, Disón-wënëñë pexi mapamonaeye: Hemdán, Esbán, Itrán, Querán-ata. ²⁷ Seir pexënató, Ezer-wënëñë pexi mapamonaeye: Bilhán, Zaaván, Acán-ata. ²⁸ Seir pexënató, Disán, pexi mapamonaeye: Uz, Arán-beje.

²⁹⁻³⁰ Bjarapamonaeye penamatacaitorobiwi Seir nacuata, horeowiriawituatuajëta, mapamatabëxëyoje: Lotán, Sobal, Zibeón, Aná, Disón, Ezer, Disán-ata; caewiriamaëto canacujitsia, penamatacaitorobiwi.

Edom nacuata pamonaeye pepopeyanacua-ewetsiwi tsawanapae

³¹ Pamonae pepopeyanacua-ewetsiwi tsawanapae Edom nacuata, Israel-pijinë pemomoxi xainaenejewa abaxë pepopeyanacua-ewetsiwitsi. ³² Mapamonaeye: Bela, pexënató Beor, yanacua-eweta Edom-jawata, Dinaba tomarata. ³³ Petëpaecujinae Bela, pecowëta yanacua-eweta Jobab, pexënató Zera, Bosra tomarapijinë. ³⁴ Petëpaecujinae Jobab, pecowëta icatsia yanacua-eweta Husam, Temán nacuapijinë. ³⁵ Petëpaecujinae Husam, pecowëta yanacua-eweta Hadad, pexënató Bedad. Bedad cuene-amoneyaba Madián pemomoxi, Moab nacuata pejinawanapaewi. Pato-marata Hadad yanacuacua-eweta, pewënë Avit. ³⁶ Petëpaecujinae Hadad, pecowëta yanacua-eweta juya Samla, Masreca tomarapijinë. ³⁷ Petëpaecujinae Samla, pecowëta yanacua-eweta Saúl, Rehobot tomarapijinë. Rehobot tomara eca Éufrates-mene imoxoyojawata. ³⁸ Petëpaecujinae Saúl, pecowëta juya yanacua-eweta Baal-hanán, pexënató Acbor. ³⁹ Petëpaecujinae Baal-hanán, juya pecowëta yanacua-eweta Hadar. Patomarata

i 36:19 Esaú: Itsawënë pijinia Edom. Bjaraxuata, Esaú pemomoxi pejinawanapaenacua Seir nacua, itsajawata wënërua Edom nacua. j 36:19 pemomoxibitsaëtotuatuajëta: Taema «tribucan» glosariojawata. k 36:20 Seir: Bjarapanacuata Seir ponapona picani Esaú pepatsiwajënaeya, bjaraxuata copiaya wënërua Seir nacua. Itsiata, Esaú pepatsicujinae, juya wënërua Edom nacua.

yanacua-ewetaponapona pewënë Pau. Bajaraponë pijawa pewënë Meheta-bel, pexënatoyo Matred, pemomoyo Mezaab.

⁴⁰Mapamonaaje Esaúpijinë pemomoxi, caepemomoxibitsaëto canacujitsia, penamatacitorobiwi pewënëanë pecanacopabiwi, pejinawanapaenacuanëjawa-ata: Timna, Alva, Jetet, ⁴¹Aholibama, Ela, Pinón, ⁴²Cenaz, Temán, Mibsar, ⁴³Magdiel, Iram-ata. Bajarapamonaë raja penamatacitorobiwi tsanawanapae pijamonaetuatuajëta, Edom nacuata pejinawanapaewi. Bajarapamonaë pijasalinainë Esaú. Bajaraxuata, bajarapanacua canacopata pewënëcuenia Edom.

José piamajitsinaejawabeje, yabara peliwaisi

37 ¹Bajayata pamatacabijawa Jacob barëponapona pexi Canaan nacuata, barëponapona itsajota paxapijinëmi barëponaponatsi copiyami. ²Marapaliwaisi Jacob pijamonaë pijaliwaisi tsaponaerenaje. (Jacob pijinia itsawënë Israel.)

Itsamatacabi Israel pexënato José, itsa abaxë pewëjëato, itsa xaina dieci-siete pawaiabeje, bajaraponë ewetabiaba oveja pematapijiwi yajawa. Barë-ewetaponapona oveja Bilha, Zilpabeje pexi, paxa cotocaewi pepitsiwabeje. Nexata, José wënëliwaisicaponabiaba paxajawabelia pacuenia pematapijiwi pibisiacuene exanawanapa.

³Bajarapamatacabi Israel bitso asiwaya naëcota José pematapijiwiwecua, tsipaji bajaraponëyo naexana paepatota Israel baja bitso perujunë tsanajetarucæ. Bajaraxuata, Israel tonacueneba pexaniacuenia pitabëtsijawa penaxatatsijawanexa. Apocaewiria-itanebijawatsi. ⁴Nexata, bajaraxua itsa yapëtane pematapijiwi bitso piasiwajawatsi paxa bajarapamonaewecua, nexata bajarapamonaë cueneca-ëbiaya naëcota. Apobajacobabiabi-ata pejuyapijinë.

⁵⁻⁶Nexata, itsamatacabi José piamajitsinaejawa tsipaeba pematapijiw jawabelia pacuenia amajitsinae. Orijibia, bajarapamonaë itsa bajaraxua jumetanetsi penawajunupaebijawa, pematapijiwi bitsoyo itoyanaëcotatsi, tsipaji José jumaitsi bajarapamonaëjawabelia:

—¡Panëjumetaema, patacatsipaebinexa xua amajitsinaenë! ⁷Amajitsinaenë ajena. Jumapia tsaena waxaitsi jinawanapatsi wayafuabelia wajanotsiwi trigo. Caetuataponatsi tsaena trigocunuanë waja-epacëbinexa. Jemata tsaena ta-epacëtsicunumi nawëyota. Rowia tsaena nuca. Juya tsaena paxamë panecëbicunuanë tacëtsicunujawaberena matatoyorotsia nubena nawëpasucaeya —jai José.

⁸Nexata, José pematapijiwi jumecanawiatatsi mapacueniaje:

—¿Bajarapamajitsinae tsaja jamatabëcuene-itajëta patanëjamatabëcuene-matatoxenetsinëexamë, patanëyanacua-ewetaponaponaenëexamë paxanëtuatuajëta? —jai.

Nexata, José pematapijiwi itoyanaëcotatsi bitsoyo orijibia penawajunu-paebixæ piamajitsinaejawa. Amuxujitsibitsinua pacuenia namajitsinaewajunupaeba bajarapamonaëjawabelia.

⁹Bajaraxuacujinae, icatsia itsamatacabi José amajitsinae. Icatsia nexata, tsipaeba pematapijiwijawabelia. Jumaitsi:

—Icatsia amajitsinaenë. Jumapia tsaena matacabipijiuameto, bajarapacuenia merawipijiuameto, once patuluputobeje-ata najamatabëcuene-itajëta yayiatacuenia xanëjawaberena —jai José icatsia petsipaebijawata.

¹⁰ Nexata, itsa José nawajunupaeba paxajawabelia, pematapijiwijawabelia-ata, nexata paxa jume-itawetatsi bajaraxua pepae-biyaniwa. Nexata, Israel jumaitsi pexénato Joséjawabelia:

—¿Depitsijamatabëcuene xaina nexata xua amajitsinaemë? ¿Tsipaji tsaja xanë, ena-ata, nematapijiwi-ata, yaiyataeyacuenia patacataenexa patamata-bacabëta patacatonubenaenexa xamë nitabarata? Acuenebi paxanë pataca-xanaenexa, pecayiyataenënexa xua yabara amajitsinaemë —jai Israel.

¹¹ Nexata, bajaraxuacujinae pematapijiwi bitsoyo itoyanaëcotaponatsi, pecueneca-ëbixaetsi. Itsiata baitsi jane, Israel canaëjëtsiaya bitso, najamata-bëxainaeyanua ponapona José pemajitsinae yabara.

Pacuenia José canajetaxuabatsi pematapijiwi, yabara peliwaissi

¹² Itsa matakabi José pematapijiwi paxa pija-ovejabitsaëtoxi pewet-siwi capona Siquem nacujawabelia, pejaitabuataponaenexa pona pija-ovejaneja. ¹³ Nexata, itsamatakabi Israel jumaitsi Joséjawabelia:

—¡Taejoparemelia nematapijiwi Siquem nacujawabelia, itsajotalia ewe-tawanapa oveja! Jitsipajë netaejawalia bajarapamonae —jai Israel.

Nexata, José jumaitsi:

—Je, xanepana. Nexata, ponaenajë bajarabelia —jai José.

¹⁴ Israel icatsia jumaitsi pexénatojawabelia:

—¡Ponare! ¡Taema xaniawaetsia pacuenia nematapijiwi jinawanapa! ¡Bajarapacuenia taema oveja-ata, itsa jamatejemaya jinawanapa! Bajaraxuacujinae, nawiatsiaremena. Newajunucapatsiaremena pacuenia bajarapamonae jinawanapa —jai.

Nexata, Israel itoroba José Hebrón nacua, petsutobejetuatujëta pebocae-tusatojawawelia, peponaenexa Siquem nacujawabelia. Itsa baja José pata Siquem nacujawabelia, ¹⁵ bajarapamonae baja apocaxitarabi. Nexata, naxuabiaya ponapona pejaitaponaponaejawata. Bajarapaepatota, itsanë caxitarabatsi, jiwitonë.

Nexata yanijobatsi:

—¿Detsa xua jaitaponaponame? —jaitsi.

¹⁶ —Jaitaponaponajë raja tamatapijiwi —jai José.

Nexata, José jumaitsi:

—¡Nejumaitsimëre xamë itsa yapëtaneme bajarapamonae itsabelia ewetanapana oveja! —jai.

¹⁷ José nexata bajaraponë tsipaebatsi:

—Marabaja jotawecuaje pitsapa. Jumetaniji raja peponaejawa Dotán nacujawabelia —jaitsi.

José nexata jejai. Nexata, pona bajarabelia. Pëjaitaponalia pematapijiwi. Bajaraponë caxitarabata Dotán nacujawatalia.

¹⁸ Itsa pematapijiwi tanetsi tajëwelia José penajetarucaejawa, pepatsi-wajënaelia nexata bajarapamonae najumejaita pebeyaxuabinexatsi picani.

¹⁹ Bajarapamonae najumaitsi penajumejaitsijawata mapacueniaje:

—¡Pataema! Najetaruca raja piamajitsinaetsabiabinë. ²⁰ ¡Naxatsia! Bajaraponë beyaxuabianatsi. Bajaraxuacujinae, waxaitsi mapamëthëjawareca xuabiarecatsi. Nexata, waxajawabelia jumaitsi tsanetsi: «José raja cowë piayainë unupijinë xanetsi», jai tsanetsi. ¿Depacuenia nexata naexanaena

bajarapa-amajitsinaetsabiabinë wajanacajamatabëcuenematatoxenetsinë-nexa wajabeyaxuabicujinae? —najai.

²¹ Nexata, Rubén itsa jumetane bajaraxua pejumlahitsijawa, bajara-ponë picani pejamatabëcueneta pecapanepaenexa pejuyapijinë. Jumlahitsi pejuyapijiwajawabelia:

—¡Pëtsa beyaxuabatsi! ²² Apoxanepanae wajabeyaxuabijawa waja-juyapijinë. Saya xuabiarecatsi mapamëthëjawabereca petusatonacuata pe-ecaemëthëjawarecaje. ¡Pëtsa jane itsiata, itsacueniabatsi wajabeyaxuabiciuena wajacobeta! —jai Rubén.

Nexata, Rubén bajaraxua jumlahitsi, tsipaji bajaraponë picani najamatabëxaina pecapanepaejawa José bajarapamonae pepëya, bajaraxuacujinae picani, paxajawabelia pecanawiatsinexa. ²³ Itsiata baitsi jane baja, itsa pata José itsajotalia jinawanapa pijamonae, nexata bajarapamonae waetabatsi. Wejumlahjonotaxuabatsi pejumlahonaponaejawa naniawelia penaxatatsijawa, paxa perajutsijawamitsi bitso pexaniajawa, apocaewiria-itanejawa. ²⁴ Bajarapamonae nexata pewaetabicujinaetsi, meramëthëjawareca yasaëya xuarecatsi. Bajarapameramëthë itsiata tseweca. Pesamëthë tsecae.

²⁵ Bajaraxuacujinae, bajarapamonae paepatota xaeyena pexaejawa, Rubén pijabibitsarucaejawata, bajarapaepatota tane penajetarubenaejawa Ismael-pijinë pemomoxi, penawijatsiwi najetarubena Galaad nacujawawerena, peponaewi Egipto nacujawabelia. Bajarapamonae canajetarubena pecana-jetsinexa Egipto nacupijiwiwajawabelia petuxujuw jawanë, bálamojawanë, mirrajawanë-ata. Camellojumata canajetarubena bajaraxuanë. ²⁶ Nexata, Judá jumlahitsi nacaemonaejawabelia:

—¡Panejumetaema xaniawaetsia! ¿Dexua pitsipatsi wajabeyaxuabijawata wajajuyapijinë, bajaraxuacujinae wajanayawajunuaxainanexa? ²⁷ Juya meta xanepana wajacanajetaxuabinexa mapamonae Ismael-pijinë pemomoxijawabeliaje, wajabeyaxuabiyaniwa bajaraponë, tsipaji waxaitsi, itsiata baja cajena, wajajuyapijinëyo —jai Judá.

Nexata, daxita jejai pijamonae bajarapacuenia pecanajetaxuabinexa.

²⁸ Nexata, paepatota penawijatsiwi, Madián nacupijiwi, Ismael-pijinë pemomoxiyajuwëñëwi, parena, bajarapaepatota nexata José pematapijiwi jutatsi mëthëwecua. Canajetaxuabatsi Ismael-pijinë pemomoxijawabelia. Matamopitatsi veinte ponëbeje palatanëanë. Nexata, bajarapacuenia caponatsi José Egipto nacujawabelia.

²⁹ Pepatajopaecujinae, Rubén taejopalia icatsia mëthëjawabelia. Apocaxitajarabi baja José mëthëjawata. Nexata, bajaraponë Rubén penaxatatsijawa naniawelia namipatitinaxuaba penajamatabë-itajëtsinexa penajamatabëxainaejawa. ³⁰ Bajaraxuacujinae, bajaraponë nawiataponalia itsajotalia pejuyapijiwi nubena. Nexata jumlahitsi:

—Pewëjëato José baja apobocae mëthëjawata. ¿Denexata ajenaconoxae xanë itsinë tsane? —jai Rubén bitso jamatabëcuenebëjaiya.

³¹ Nexata, bajarapamonae chivo pejananëyo wësinepecaucutaxuaba pebeyaxuabinexa. Bajaraxuacujinae, José penaxatatsijawami cajapiba bajarapajana. ³² Bajaraxuacujinae, bajarapanaxatatsijawa, José perajutsijawamitsi paxa, to-itoroba pecajayabijawa pejanata paxajawabelia. Yajawanaliwai-itoroba mapacueniaje: «Pacaxitajarababuatajê raja

maxuaje. ¡Taema xaniawaetsia! ¡Yorobare neyapëtaenexa itsa meta penaxatatsijawami nexënato, itsa jume, itsa apobajaraxua!», jai petonajumerutsijawata pejumeliwaisicaponænëtsijawabelia bajarapaliwaisi.

³³ Nexata, Israel bajarapaepatota yapëtane pexënato penaxatatsijawacuene. Nexata jumaitsi:

—Jājā, maraje taxënato penaxatatsijawamije. Itsacuenenë meta piayainë unupijinë xanetsi. Pebeyaxuabijawatatsi meta, tupatitacxuabatsi pexaenexatsi —jai. ³⁴ Nexata, bajarajota Israel bitso penajamatabëxainaexae, penaxatatsijawa namipatitinaxuaba. Pijacuenecuenia naxatata pecatsequecaesetotsi, pewënuexae pexënato. Nexata, bajaraponë najamatabëxainaeya ponapona bajayajebi, pexënato pewënamatabëxainaexae. ³⁵ Nexata, daxita pexi pebijwi, petiriawi-ata, picani jamatabëcuenebarëyaya-exanabiabatsi penajamatabëxainaewawecua. Itsiata, bajaraponë apojitsipae bajarapacuenia pebarëyaya-exanaejawatsi. Orijibia, caranata pewajënaeyabelia bitso jitsipa pewënueyabiabijawa pexënato. Jumaitsi tsabiabi: «Tobejena cajena xanë najamatabëxainaeya ponaponaenajë étatëpaejawabelianexa», jai tsabiabi. Bajarapacuenia nexata ponaponabiaba najamatabëxainaeya.

³⁶ Israel pewënamatabëxainaewawata pexënato, bajarapaepatota pijinia Egipto nacujawatalia Madián nacupijijiwi, Ismael-pijinë pemomoxi, José canajetaxuabatsi Potifar-jawabelia. Bajaraponë pewetaponaponaenë, penamatacaitorobinënuwa wajabitsaë peya-ewetsiwiitsi Faraón, Egipto nacua pewetsinë.

Judá pecopena Tamar-beje, yabara peliwaissi

38 ¹ Pamatacabijawa José canajetatsi Egipto nacupijijiwijawabelia, bajarapamatacabijawa pijinia Judá wecuansata daxita pematapijiwi peponaponaenexa Hirawënënëjawabelia, Adulam tomarajawata peponaponaenë. ²⁻³ Bajarajota peponaponaewawata, bajaraponë tane cananeowirianë, Súa, pexënatoyo. Nexata, bajaraponë coxipita. Nexata, bajaraponë itsa pijawa imoxoyoba, bajarapowa baja nacoxita. Itsa wecuanaexanatsi baja pexënatonëyo, wënëruba Er. ⁴ Bajaraxuacujinae, icatsia bajarapowa nacoxita. Itsa wecuanaexanatsi baja, bajaraponëyo wënëruba Onán. ⁵ Icatsia, xuacujinae nacoxita. Itsa wecuanaexanatsi baja, bajaraponëyo wënëruba Sela. Bajaraponëyo naexana pacujinaeta Judá barëponapona Quezib-tomarajawata.

⁶ Bajarapanacuata ponapona Tamar-wënëwayo. Judá pexënato matapijinë Er nacojibia-exana Tamar-jawabelia. ⁷ Itsiata bailsi jane, Jehová apotsitaxanepaetsi Er, bitso piacujirubejenëxae. Nexata, bajaraponë tocopatatsi petëpaenexa. ⁸ Nexata, bajaraxuacujinae Judá jumaitsi pexënato Onán-jawabelia:

—Pitsianame nematapijinëmi pijawa cowëwa, wajacujirucuenia nexi nexainaenexa bajarapowajawabelia nematapijinëmi pewënëta, daxitajiwi petäenexa nematapijinëmi pepopexicuenia, bajarapacuenia pijawiriamaëto penaxuabiyaniwa —jai.

⁹ Itsiata bailsi jane, Onán yapëtane barëxainae-ata tsipae bajarapowajawabelia pexënato, bajaraponë apopetotaejawanexatsi pexënatocuenia. Bajaraxuata, bajaraponë paepatota pijawa itaxutuajinabiaba, bajaraponë

najamatabëxainabiaba apo pejitsipaejawa pijawa pecoxitsijawa. Bajaraxuata, wecuaxuababiaba irabelia pijapebicujiru, bajarapacuenia pematapijinëmi pijawiriamaëto penacopatsiyaniwa bajaraponë pejamatabëcuene. ¹⁰ Itsiata baitsi jane, Jehovah bitso apotsitaxanepanaetsi xua Onán exanaponapona pijawajawabelia. Nexata, bajaraponë-ata tocopatatsi petëpaenexa. ¹¹ Bajaruacuinae, Judá jumaitsi pecopena Tamar-jawabelia:

—Ponaponaename abaxë axa pijabota amona pecawecuatëpaewacuenia, taxë nato abaxë Sela penaweretsinëjawabelia —jai. Bajarapacuenia Judá jumaitsi, tsipaji bajaraponë jamatabë-itsi Sela yabara: «Belia, tēpaejitsipa bajaraponë-ata, pacuenia pematapijinëmibeje tēpa», jamatabëjai. Nexata, bajarapacuenia Tamar pona paxa pijabota peponaponaenexa.

¹² Bajaraxuacuinae, ayaibexëacuinae, Judá pijawa tēpa, Súa pexënatoyo. Bajaraponë baja itsa copata pijawami pewë najamatabëxainaeya peponaponaejawa, nexata bajaraxuacuinae, pona Timnat nacujawabelia, itsajota pijajiwi jinawanapa oveja penaxunaewi. Bajaraponë yajawapona Hira peyanabinënexatsi, peyapëtaenëtsi Adulam tomarapijinë. ¹³ Itsa Tamar wënëliwaisitane paxuyo peponaejawanexa Timnat-jawabelia penaxunaenexa pija-oveja, ¹⁴ nexata bajarapowa najonota pejumaponaponaenawa, panawa jamatabëcuene-itajëta pamona pewecuatëpaewacuenetsi. Bajaraxuacuinae, pepana pita penaitabaracaranatsinexa, itsajiwi-ata peyapëtaeyaniwatsi. Nexata, bajarapowa wecuapona paxa pijabo, pe-ecajopaenexa Enaim tomarayo peyacaranatsijawapijibaupamuxuneneta. Enaim tomarayo eca Timnat-jawabelia peponaenamutomuxuneneta. Bajarapowa bajarapacuenia exana, tsipaji yapëtane Sela baja penaweretsinëjawa tsaponapona. Itsiata, abaxë pijamonae apocopatsijawatsi penapitsinexabeje paxuyo Judá pejumaitsi-cowëya. Bajarapowa eweteca bajarajota, paxuyo penajetarucaenexa Timnat-jawabelia peponaenë.

¹⁵ Paepatota Judá najetaruca, itsa tane bajarapowa, nexata bajaraponë jamatabë-itsi: «penaperabëcanajetabiabiwa¹ meta pibisiacue ne pewitota pexanabiabinexa», siwajamatabëjai, tsipaji bajarapowa naitabaracaranata.

¹⁶ Nexata, bajaraponë namutowecua toquetajopa, bajarapowajawabelia peponaenexa. Bajaraponë yapëtaenëjewa xaniawaetsia pecopenacue ne, natsimaxëjunata pequenetsiataenexa. Jumaitsi:

—¿Ajena cae-epatoyonexa netonacopatsipame wajana-imoxoyobinexabeje? —jai Judá.

—¿Detsa xua jane nerajutsianame itsa cajumejejaitsi tane-imoxoyobijamatabëcuenemë? —jai bajarapowa.

¹⁷ —Cato-itorobianatsi tajachivobitsaëtoyajuwënënyö pejananëyo —jai Judá.

—Je, xanepana —jai bajarapowa.

Icatsia, xuacuinae jumaitsi:

—Itsiata baitsi jane, netopuenetsianame nexaniajainexa itsacuenëjawa taneto-itorobiwajënaeyamë —jai.

¹⁸ Nexata, Judá jumaitsi:

—¿Detsa xua jitsipame tacatopuenetsijawa taxaniajainexa? —jai.

—Necobenanucaejawanë. ¡Nerajure nenawësicëtsisellojawa pemaëto yajawa, nijanaebonua! —jai bajarapowa.

Judá nexata bajaraxuanë rajuta. Bajaraxuacujinae, bajaraponë bajarapowa quenetsiatane. Nexata, bajarapamatacabi bajarapowa nacoxita baja bajaraponë pejamatabëcuene. ¹⁹ Judá pewecuaponaecujinae, Tamar pijinia pona paxa pijabojawabelia. Bajaraxuacujinae, naitabara-isina penaitabaracaranatsipanami. Bajaraxuacujinae, bajarapowa icatsia naxatata panawa jumaponaponabiaba penajamatabëcuene-itajëtsinexa pamona pewecuatëpaewacuenetsi.

²⁰ Bajaraxuacujinae, itsamatacabijawabelia peyapëtaenëtsijawabelia Judá ca-itoroba chivo pejananëyo, Adulam tomarapijinë, bajarapapetiriwa petowecuacanawiatsinexatsi picani xua topueta pexaniajainexa. Itsiata baitsi jane, ponë ca-itoroba apocaxitajarabi bajarapapetiriwa. ²¹ Nexata, bajaraponë bajarajotalia yanijoba pebijiwita pamona bajarajota pejinawanapaewijawabelia:

—¿Jica majotaje powa Enaim tomarapijiwa ecabiaba namutomuxuneneta, penaperabëcanajetabiabiwa pibisiacuene pewitota pexanabiabinexa? —jai bajaraponë bajarapamonaejawabelia.

Nexata, bajarapamonae jumecanawiatatsi:

—Majotaje cajena caewa-ata apoponaponae penaperabëcanajetabiabiwa pibisiacuene pewitota pexanaenexa —jai bajarapamonae.

²² Nexata, bajaraponë baja nawiataponarena itsajotarena ponapona Judá. Bajaraxuacujinae, jumaitsi Judájawabelia:

—Apocaxitajarabinë baja bajarapapetiriwa. Icatsianua, bajarajotalia pamona pebijijiwi jinawanapa nejumaitsi: «Majotaje cajena caewa-ata apoponaponae powa penaperabëcanajetabiabiwa pibisiacuene pewitota pexanabiabinexa», nejai bajarapamonae —jai Judájawabelia.

²³ Nexata, Judá jumecanawiaata:

—Jema baja xua topuetajë canacopatsi, bajarapacuenia itsamonae waj anacawënëcapoponaeyaniwabeje waxaitsibeje bajarapowa wajajaitarutsijamatabëcuene. Itsiata baitsi jane, yapëtaena xanë picani tacaca-itorobijawa chivo pejananë. Itsiata, xamë apocaxitajarabimë bajarapowa —jai.

²⁴ Xuacujinae, bejamatabë acueyabi pajuametobejecujinae, itsamonae pata Judájawaberena, pejumaitsinexatsi:

—Tamar raja xamë necopena, bajarapowa itsamonae tsaena pebijijiwi barëmajitabiabatsi. Nexata, bajarapacuenia pexanabiabixae, bajarapowa baja ajenaconoxae nacoxita —jai.

Nexata, bajaraponë asaëya jumaitsi:

—¡Pajure pijabowecua! ¡Patajuire! —jai.

²⁵ Nexata, bajarapowa itsa jutatsi pijabowecua, bajarajota tonajume-itoroba paxuyojawabelia mapejumaitsiyumeje: «Maxuanë ponë pijajawanëje, bajaraponë raja pejamatabëcueneta nacoxitajë. Xamë taename xaniawaetsia maxuanëje neyapëtaenexa pajiwi pijajawanë. ¿Jipatsa meta jane pijasello penawësicëtsimaëto yajawa, bajarapacuenia pijanaebo-ata?», jai bajarapowa petonajume-itorobijawata. ²⁶ Itsa nexata Judá yapëtane bajaraponë pijajawacuene, jumaitsi:

—Bajarapowa xua jumaitsi xaniajai. Bajarapowa pexaniacuene exana xanëwecua, tsipaji taxënato Sela aporajutsinë pamonanexa

tajumaitsicowëya —jai. Bajaraxuacujinae, bajaraponë baja pematatsënëa bajarapowa apoquenetsiatæ.

²⁷Pamatacabi Tamar itajëtsijitsia pexinacuetobeje, nexata bajarapowa tsaena yacotaponapona anijajiwibeje Judá pexinacuetobeje. ²⁸Paepatota bajarapasapalanëbeje naitajëtsijitsiabeje, ponëyo copiaya maxëpitsapaica, pewetabiabiwa penacoxitsiwi cobetabucëta petsobiajilomaëtota. Jumaitsi: «Bajaraponëyo copiaya pitsapaica», jai. ²⁹Itsia baitsi jane, bajaraponëyo icatsia namaxëcajúniya. Nexata juya, icatsia naexana juyapijinëminexa picaní. Bajarajota, bajarapowa jumaitsi: «¿Detsa pacuenia catocopata xamë copiaya nenaexanaenexa?», jai. Bajaraxuata, bajaraponëyo wënëruba Fares. Bajaraponë nacopata nexata pepomatapijinë. ³⁰Bajaraxuacujinae, naexana matapijinëminexa, ponë cobetabucëtatsi petsobiajilomaëtota. Bajaraponëyo wënëruba Zara.

José pacuenia ponapona Potifar pijabota

39 ¹Pacujinae José caponatsi Egipto nacujawabelia, Egipto nacua-pijinë Potifar comuatatsi Ismael-pijinë pemomoxijawabelia, ponë pecaponaenëtsijawaberena. Bajaraponë Potifar pewetaponaponaenë, penamatacitorobinënuu wajabitsaë peya-ewetsiwitsi Egipto nacua pewetsinë. ²José, baitsi jane itsia, Jehová yajawatsi. Bajaraxuata, daxita bajaraponë toxanepanaponatsi peponapona-e-pato pijatuxanenë Potifar pijabojawata. ³José pijatuxanenë yapëtanetsi Jehová peyajawajawatsi. Yapëtanetsinua pacuenia Jehová peyajawaxaetsi, José xaniawaetsia topitsapaponatsi daxitaxua bajaraponë ewetsia-exanatsi. ⁴Nexata, bajaraponë petsitaxanepanaponaexaetsi, bajaraxuata asiwaya naëcotatsi. Nexata, belia itsamatacabi, pijatuxanenë peyawenonaenëcuenia itapetatsi, peto-ewetaponaponaenënexa pijabojawata penacuenebiwi, daxitaxua-ata xaina pecobecowë. ⁵Pamatacabi jawa Potifar tsicopata José peto-ewetsinexatsi pijabojawata daxitaxua yajawaxaina, nexata Jehová pexaniacuenia yawenonaponatsi Potifar José pejamatabëcuene. Bajarapacuenia daxitaxua xaina pijabojawata, xua-ata xaina wayafota pe-ubijawanë, dajubi-ata Jehová rajutaponatsi ayaijawa. ⁶Nexata, José xua to-ewetaponapona, bajaraxuanë aposiwajamatabëcuenebëjai itsacuenejawayo-ata. Jamatejema saya ponapona.

José raja bitso pexanianë, peyaxaniawaetsinënuu. ⁷Nexata, itsamatacabi Potifar pijawa jitsipatsi José. Nexata, itsamatacabijawabelia jumaitsitsi: —¡Naxatsia! ¡Nabocare xanëjawata! —jaitsi.

⁸Itsia baitsi jane, José apojejai. Jumecanawiata mapacueniaje: —¡Nejumetaema xamë xaniawaetsia! Tajatuxanenë raja pijawamë. Xanë majotaje tanetocopatsinë tane-ewetsia-exanaenexa daxitaxua xaina. Bajaraponë itsacuenejawa-ata aposiwajamatabëcuenebëjai tato-ewetaponaponaecujinaerena. ⁹Ajibi itsanë mapabopijiwi tanejamatabëcuenematatoxenetsinë, tajatuxanenë saya caenë. Bajaraponë ne-ewetsia-exana daxitaxua xaina. Netsicopata daxita tato-ewetsinexa. Xamë pijawaxamë, tajatuxanenë itsia, aponetsicaruae taca-ewetsinexa caeto-ata. ¿Detsa nexata xuajitsia xanë bajarapitsipibisiacuene exanaejitsipajë, neconi tanatsi-exanaenexa DIOSojawabelia? —jai José. Wecuapona baja bajarapaepatota bajarapowa.

¹⁰ Itsiata, bajarapowa bajarapacuenia ajamatabëcuenesaë tsanajetaruaec
caematacabi canacujitsia Joséjawabelia pejunatabibijawa pebarëbocaene-
xatsi picani. Itsiata, bajaraponë apojejai tsabiabi. ¹¹ Itsamatacabijawa José
pona pijatuxanenë pijabojawabelia, itsacuenejawaxi penacuenebinexa. Baja-
rapaepatota pijinia, itsajiwi-ata bajarapabojawata apoponaponaë. ¹² Nexata,
Potifar pijawa natsimaxëwaetabatsi José.

Jumaitsi:

—¡Naxatsia! ¡Nebarëbocare majotaje! —jaitsi.

Bajaraponë apojejai. Pewaetabanucaejawatatsi naniawelia penaxatat-
sijawa, bajaraponë pepitsatabijirawijawata bajarapowa wejumajonota-
xuabatsi. Nexata, Potifar pijawa cobenanuca José penaxatatsijawami.

¹³⁻¹⁴ Nexata, bajarapowa itsa tane José pepitsatabijirawijawa, penaxatatsi-
jawa pecobenanucaejawanua, nexata bajarajota, junataxuaba ayaijumeta
amoneya pijabota petonacuenebawanapaewitsi.

Jumaitsi:

—¡Panejumetaema xaniawaetsia! Tamona maberenaje nacatsicapata
mapitsihebreonë, bajaraponë nacaquenetsiataeya wajanacataenexa. Baja-
raponë raja junua tanetaenexa bojawalia itsa caewanë, tanebarëbocaenexa
picani. Jane baitsi, xanë wawajanë tsaxuabi bitso asaëya. ¹⁵ Nexata, baja-
raponë itsa nejumetane tawawajaijawa daxitasaëta, bajaraponë pitsatabi-
jirawa. Nexata, xuabatabijirawa penaxatatsiyajuwënëjawami —jai bajara-
powa amoneya petonacuenebiwiitsijawabelia.

¹⁶ Bajaraxuacujinae, bajarapowa xaniawaeta bajarapanaxatatsiyaju-
wënëjawa José pijajawa, ëpëpatsijawabelia pamona pijabojawaberena.

¹⁷ Nexata, bajarapowa icsatsia tsipaeba bajarapacuenia pamonajawabelia.
Jumaitsi:

—Mapahebreonëje, amoneya wajanacatonacuenebaponaponaenë, ponë
capatame maberenaje, bajaraponë junua wabajaberena tanequenetsia-
taenexa. ¹⁸ Itsiata baitsi jane, xanë wawajanë tsaxuabi daxitasaëta. Nexata,
bajaraponë cujinaetabijirawiya pitsatabijirawa. Penaxatatsiyajuwënëja-
wami xuabatabijirawa. Bajarapacuenia raja ne-exana nijajiwitonë —jai
pamonajawabelia.

¹⁹ Itsa bajarapacuenia jumetane Potifar pijawa petsipaebijawatsi, nexata
bajarapaepatota, José pijatuxanenë bitso anaepana. ²⁰ Nexata, bajarapacue-
nia waetabatsi José. Itorobatsi pe-etsinexatsi Egipto nacua pewetsinë pena-
neconitsiwi pejebabiabibojawabelia. ²¹ Itsiata baitsi jane, penaneconitsiwi
pejebabiabibojawabelia ecae-ata José, Jehová itaxutotsoniatanetsi. Yaja-
watsaponaetsi. Bajaraxuata, penaneconitsiwi pewetsinë tsitaxanepanatsi
José pecuenejawalia. ²² Nexata, José tocopatatsi peto-ewetsinënexa daxita
penaneconitsiwi pejebabiabibota. Bajarapacuenia nexata, José bajarajota
penamatacitorobaponaponaenë daxita penaneconitsiwi, xua-ata pena-
neconitsiwi nacuenebabiaba. ²³ Daxita pacuene José to-ewetaponapona
pijatuxanenë, aponamatawenonae bajaraponë petaeyabiabinexa.

Aposiwajamatabëbjai-ata. Saya jamatejema. José xua tocopatatsi peto-
exanabiabinexa pexaniacuenia topitsapabiabatsi, tsipaji José yawenona-
ponatsi Jehová. Bajarapacuenia nexata pewajënaeyabelia xua nacueneba
xaniawaetsia topitsapaponatsi Jehová pejamatabëcuene.

José yapētaeya-exana anijanēbeje xua yabara amajitsinaebeje

40 ¹ Bajaraxuacujinae, itsamatacabijawabelia Egipto nacua pewet-sinē anaepana petonacuenebaponaponaenētsibejajawabelia. Itsanē pijabota vinora pemit-sacaponabiabinētsi. Itsanē pijinia pan pemit-sa-exanabiabinētsi. Bajaraponēbeje apopejitsipaecuene to-exana pijatu-xanenē. ² Nexata, faraón anaepana petonacuenebinētsibejajawabelia, ponē vinora pemit-sacaponabiabiwi-tsi pewetsinējawabelia, ponē-ata pan pemit-sa-exanabiabiwi-tsi pewetsinējawabelia. ³ Nexata, bajaraponēbeje itorobatsi wajabitsaēwi penamatacaitorobabiabinējawabelia, bajaraponē pe-etsinexatsibeje penaneconitsiwi pejebabiabibota, pabota José ponapona. Wajabitsaēwi penamatacaitorobabiabinē pijabojawata xaina penaneconitsiwi pejebabiabibonexa. ⁴ Nexata, wajabitsaēwi penamatacaitorobabiabinē José tocopatatsi pewetapona-ponaenexa penaneconitsinēbeje. Petocopat-sicujinae, bajaraponēbeje bajayajebi ponaponabeje bajarapananeconitsiwi pejebabiabibota.

⁵ Itsamerawi penaneconitsinēbeje najua-amajitsinaebeje. Vinora pemit-sacaponabiabiwi pewetsinē amajitsinae. Bajarapijinia pacuenia, pan pemit-sa-exanaewi-ata pewetsinē amajitsinae. Nexata, caenē canacujitsia, xaina saicaya piamajitsinaecuene. Bajarapacuenia caemajitsinae canacujitsia xaina xua yabara amajitsinaebeje petocopiapatsijawanexatsibeje.

⁶ Nexata, bajayacunua José ita taejopalia penaneconitsinēbeje, caxitajara-betabeje bitso najamatabēxainaeya pe-ecaejawabeje. ⁷ Nexata, José yanijoba mapacueniaje:

—¿Detsa xuajitsia bitso paxamēbeje ajena pa-itabaranayapētanemebeje panenajamatabēxainecaejawabeje? —jai.

⁸ Nexata, bajaraponēbeje jumecanawiatabeje:

—Ajena pamerawi panajua-amajitsinaenēbeje, itsiata, ajibi itsanē patanetsipaebinēnexabeje xua yabara pa-amajitsinaenēbeje —jaitsibeje bajaraponēbeje.

Nexata, José jumaitsi:

—DIOSO cuenecaējēpatsi bajarapajamatabēcuene wajanacatsipaebinexa xua pa-amajitsinaemēbeje. ¡Xanē saya jamatejema panetsipaebarebeje xua pa-amajitsinaemēbeje, DIOSO papecayapētaeya-exanaenexabeje! —jai.

⁹⁻¹⁰ Nexata, vinora pemit-sacaponabiabiwi pewetsinē tsipaeba piamajitsinaejawa Joséjawabelia mapacueniaje:

—Ta-amajitsinaejawata taniji uvamacanae pexainaejawa acueyabi pama-xēranabeje. Bajarapa-uvamacanae juwapona pejanabaxu. Pitsapapona pejananamatonotsijawa-ata. Bajarapamatonomi naexana petsobia-uvaruanē.

¹¹ Bajarapaepatota tsaena, cobenanucajē faraón pijavaso tamitsacaponabibijawata vinora. Xanē tsaena ucutajē uvacuiruyajuwēnējawa, tamitsayuju-caenexa uvabarēmenera bajarapavasojawabelia. Bajaraxuacujinae, icatsia xanē tsaena faraón-jawabelia tsicoberutajē bajarapavaso, vinora piapaenexa —jai.

¹² Nexata, José jumaitsi:

—Xua xamē amajitsinaemē xaina mapajamatabēcueneje. Xua taneme acueyabi pamaxēranabeje, bajaraxua raja catsitajēta acueyabi

pamatacabibebenexa. ¹³Nexata, acueyabi pamatacabibecujinae, faraón icatsia catotaena xamē yabara nenacuenebaponaponaejawa. Icatsia, faraón orijibia catocopatsiana newajēnaeyabelia xamē nemitsacaponabiabinexa vinora pijavasota, pacuenia copiyami exanabiabame. ¹⁴Pamatacabi xamē maxua catocopiapatsiana, xanē nenajamatabēnapitsianame, pexaniacuene tacato-exanaejawa. Xanē pexaniacuene neto-exanaename. Neyapijiwicuai-cuaijamē tsane faraón-jawabelia, tanejutsinexa mapabowecuaje. ¹⁵Xanē raja nenacobetoxota tajanacuawecua, hebreomonaē pejinawanapaenacuawecua. Apojitsipaenē matawējēa mapabota penaneconitsiwi pejebabiabibojawa taponaponaejawa, tsipaji itsacuene pibisiacuene apo-exanaenē picani tanenaneconitsia-exanaenexa —jai José.

Nexata, bajaraponē picani jejai.

¹⁶Bajarapaepatota, jumetane pan pemitisa-exanabiabiwi pewetsinē José xaniawaetsia petsipaebijawata pacuenia amajitsinae vinora petocaponabiabinē faraón-jawabelia. Nexata, bajaraponē jumaitsi:

—Xanē pijinia amajitsinaenē mapacueniaje. Amajitsinaenē tamatabocotota tsaena matanajetarucājē acueyabi xuabeje, bemapirejawanē-ēnēta pejejawa penioponaepan pexanaejawanē. ¹⁷Copiya pe-ecamapirejawa bajarapa-ēnēta canajetarucājē daxitawiria pexaniapexanaejawanē galletacuenia faraón-nexa. Bajarapaepatota, tsaena athēbēwetsica pepunaewi tsimaxērūnaica pexaenexa bajarapagalletajawanēmi, pexaenexa tamataponaejawami. Nexata tsaena, newemataxane —jai pan pemitisa-exanabiabiwi pewetsinē Joséjawabelia.

¹⁸Nexata, José jumecanawiata:

—Xua xamē amajitsinaemē xaina mapajamatabēcuenije. ¡Xua taneme acueyabi bepamapirebeje nemataponaejawa pan peya-ēnēaponaejawanē, bajaraxua raja acueyabi pamatacabibebenexa catsitajēta! ¹⁹Nexata, acueyabi pamatacabibecujinae, faraón icatsia nijacuenemi catotaena xamē yabara nenacuenebaponaponaejawami. Nexata, bajaraponē itorobiana pijajiwi pecabeyaxuabinexa. Cawēsicaucutsiana bumacata naejawata athēbēwetsica. Nexata, bajarapacuenia pepunaewi cawixaena pecabeyaxuabarutsijawata —jai José.

²⁰Bajaraxuacujinae, acueyabi matacabita faraón fiesta exana, pijacumpleañonexa. Bajaraponē pinijipexaejawaxaneto exana daxitanexa pamonae petonacuenebiwitsi pecobena-ewetsicueniatsi Egipto nacua, pamonaeta pejunatsiwi fiesta penataenexa, bajarapamonae penajuaxaenexa.

Nexata, daxitajiwi pitabarata, faraón itoroba pijajiwi pejutsinexa ponēbeje penaneconitsinēbeje, peto-ewetsinē vinora pemitiscaponabiabiwi, bajarapacuenia peto-ewetsinē pan pemitisa-exanabiabiwi. ²¹Bajarajota nexata, vinora pemitiscaponabiabinēmi bajaraponē icatsia orijibia tocopata bajarapanacuenebijawa petonacuenebaponaponaenexatsi, pacuenia copiyami ba-exanapona. ²²Itsia baitsi jane, pan pemitisa-exanaewi pewetsinē tsi-itorobatsi pebeyaxuabinexatsi pewēsicētarutsicueniatsi bumacata naejawajawatsica, pacuenia baja José jumaitsi piamajitsinaejawa yabara.

²³Itsia baitsi jane, ponē vinora pemitiscaponabiabinē, xua José jumaitsi peyapijiwicuai-cuaijainexatsi faraón-jawabelia, apojumenajamatabēnapitsitsi. Nacofēnēta saya.

José yapëtaeya-exana faraón xua yabara amajitsinae

41 ¹Anijawaibeje itsa panepa vinora pemitacaponabiabiwi pewetsinē pepitsapaecujinae penaneconitsiwi pejebabiabibowecua, faraón amajitsinae. Bajaraponē amajitsinae mapacueniaje. Natane penuecawaja Nilo mene-itapata. ²Bajarapamenewetsina tane pepitsapaecujawatsina siete ponēbeje vaca, bitso pexanianasitsiwi, pexaewanapaejawa mene-itapata pejuwipona. ³Bajaraxuacujinae, pepitsapaecujinaetsina bitso pexanianasitsiwi, icatsia itsasiete ponēbeje pitsapaina, bitso pibisiapijopaewi. Bajarapamonae-ata nanubena bajarapamene-itapajawata itsajota nubena bitso pexanianasitsiwi pemuxuneneta. ⁴Nexata, xuacujinae bajarapavaca bitso pibisiapijopaewi xane pewēnavaca siete ponēmibeje pexanianasitsiwi. Bajarapacuenia piamajitsinaejawata, faraón nexata naēcotaxuaba.

⁵Icatsia, xuacujinae faraón majita. Icatsia, amajitsinae cotocaewijawa. Tane icatsia siete parubeje trigo, bitso pexaniaruanē, pexaniana-xaniabijawa, pepitsapaewaja caetrigobotota. ⁶Bajaraxuacujinae, icatsia pitsapa siete parubeje trigo, bitso pibisiapetsaquenaeruanē tsarubena, petsewiruanē. ⁷Bajarapasiete parubeje bitso petsaquenaeruanē xane pewēnatrigo pexaniaruanēmi. Bajarapacuenia piamajitsinaecujinae coto-caewijawa, faraón nexata naēcotaxuaba. Bajarapaepatota, yapētane piamajitsinaejawacuene.

⁸Itsamatacabijawabelia bajayacunua faraón bitso najamatabëxaina. Jamatabëcuenebëjainua. Nexata, bajaraponē itoroba petojunatsinexatsi, pepatsinexa Egipto nacuapijiwi peyapëtaewi pexanaecuenewawanëta, pamonaenua pecanaëjëbabiabiwi jiwi petocopiapatsijawanexatsi. Bajarapamonae junata peyapëtaeya-exanaenexatsi picani xua yabara amajitsinae. Nexata, faraón tsipaeba bajarapamonae piamajitsinaejawa. Itsiata baitsi jane, bajarapamonae, caejiwi-ata, apocaëjëpaetsi petsipaebinexa xua yabara bajaraponē amajitsinae. ⁹Nexata, faraón pijajiwitonē pemitacaponababinëtsi vinora najamatabënapiteca José xua jumaitsitsi. Nexata, jumaitsi pijatuxanenëjawabelia:

—Ajenaconoxae najamatabënapitecajë tajaneconi taxainaejawa tanacofënëtsijamatabëcuene xua itsanē netsipaeba^m penaneconitsiwi pejebabiabibota, juya tacatsipaebinexa xamë faraón. ¹⁰Pamatacabi xamë tajatuxanenē panebara-anaepanamebeje paxanëbeje, pan pecamitsa-exanabiabiwi pewetsinëjawabelia, nexata bajarapamatacabi pane-itorobamebeje penaneconitsiwi pewetsinëjawabereca, patananeconitaponaponaeenaxabeje penaneconitsiwi pejebabiabibojawatalia. ¹¹Bajarapabota itsamerawī paxanëbeje panajua-amajitsinaenëbeje. Bajarapijiniā pacuenia, pan pecamitsa-exanaenëmi-ata amajitsinae saicayacuenia. Nexata, pacaewinëbeje canacujitsia pata-amajitsinaejawabeje xaina pijaliwaisicuene saicaya. ¹²Bajarajotalia raja, bajarapacujinae paneyajawaponaponabeje pewëjëato, hebreonë. Bajaraponē wajabitsaë penamatacaitorobinë amoneya petonacuenebaponaponaeenë. Nexata, bajaraponē patsipaebajëbeje pata-amajitsinaejawabeje. Bajaraponē panetsipaebabeje xua yabara

pa-amajitsinaenëbeje. Paneyapëtaeya-exanabeje. Nexata, bajaraponë daxita pacuenia panejumaitsibeje, bajarapacuenia panetocopiapatabeje. ¹³Xania-jai. Xanë icatsia netocopatame tacatonacuenebaponaponaenexa. Itsanë pijinia pan pecamitsa-exanaenëmi, xamë beyaxuabia-exaname pewësicëta-rutsicueniatsi. Pacuenia panejumaitsibeje, panetocopiapatabeje baja —jai vinora pemitacaponabiabiwi pewetsinë.

¹⁴Bajarapacuenia ita jumetane faraón, itoroba pejunatsinexa José. Nexata, bajaraponë jutatsi bepijiayo penaneconitsiwi pejebabiabibowecua. José nexata namataxunaeya-exana. Nabëxëpinašibanua. Bajaraxuacujinae, xatatatsi itsapenaxatsijawa. Nexata, caponatsi itsajotalia faraón eca. Pita-barata nutatsi.

¹⁵Nexata, faraón jumaitsi:

—Xanë amajitsinaenë, itsiata, ajibi itsanë tanetsipaebinënexa bajarapamajitsinae pejamatabëcuene. Xamë itsiata, cawënëtanetsi pecacuenecaëjë-paejawa netsipaebinexa xua yabara itsamonaë amajitsinae. Itsa pina pajiwi canawajunupaeba xua amajitsinae, yapëtaeya-exanabiabame —jai Egipto nacua pewetsinë.

¹⁶Nexata, José jumaitsi:

—Xanë raja bajaraxua aponetsicaruae. Itsiata, DIOSO caëjëpatsi pecayapëtaeya-exanaenexa bajarapamajitsinaejamatabëcuene. Nexata, bajaraponë cayapëtaeya-exanaena xua catocopiapatsijitsia, jamatejema neyapë-taenexa pacuenia exanaejitsiamë —jai.

¹⁷Faraón nexata jumaitsi Joséjawabelia:

—Xanë taniji majitsinaebota mapacueniaje: Jumapia tsaena xanë nucajë Nilo mene-itapajawata. ¹⁸Bajarapamenejawawetsina pitsapaina siete ponëbeje vaca, bitso pexanianasitsiwi. Bajarapavaca xaweanapa pejuwipona bajarapamene-itapata. ¹⁹Bajaraxuacujinae, icatsia pitsapaina itsasiete ponëbeje vaca, bitso pibisiajiopaewi. Xanë cajena caeto-ata bajarapitsijio-paewi abaxë apotaenë Egipto nacujawata taponaponaenë. ²⁰Cotocaewi pavaca pitsapaina pejiopaewi, xane pewënavacami copiaya pasiete pava-cabeje pitsapaina, pamonaë pexanianasitsiwimi. ²¹Itsiata, bajarapacuenia penaxaecujinae, itsajiwi-ata apocueneyapëtaë pacuenia bajarapamonae naxane, tsipaji tsitecaeya nacopata pejiopaewicuenia. Bajarapacuenia ta-amajitsinaecujinae, nexata xanë naëcotaxuabajë.

²²«Icatsia, xuacujinae orijibia taniji itsamajitsinaebo. Icatsia, taniji siete parubeje trigo pexaniatrigoüanë, bitso pexanianaxaniabiruanë, caebotota pepitsapaejawa. ²³Bajaraxuacujinae, icatsia taniji itsasiete parubeje petsa-quenaëruanë, petsewiruanë jowibota piatajumatacabita. ²⁴Nexata, bajarapatsewiruanë xane pewënatrigoüanëmi pexanianaxaniabiruanëmi. Nexata, xanë bajayacunua tsipaebajë picani mapamonae pecanaëjëbiwiije, tanetsipaebinexa xua yabara amajitsinaenë. Itsiata baitsi jane, bajarapamonae apocaëjëpaetsi tanejumaitsijawa pajamatabëcuene yabara amajitsinaenë. Apoyapëtaë caenë-ata —jai faraón.

²⁵Nexata, José jumezanawiaata mapacueniaje:

—Xua amajitsinaemë anijatobeje, bajaraxua saya caemajitsinae. Caëjamatabëcuene xainabeje. DIOSO raja cayapëtaeya-exana xua exanaejitsia mapamatacabijawaje. ²⁶Xua taneme siete ponëbeje vaca pexaniawi,

bajarapacuenia xua-ata taneme siete parubeje trigo pexaniaruanë, bajaraxua jamatabëcuene-itajëta siete pawaiubeje pexaniawainë yabara penawitsijawanexa pexaejawa. Bajasaya xua xaina caejamatabëcuene. ²⁷Xua taneme siete ponëbeje vaca bitso pibisajiopaewi pepitsapaejawa cotocaewi, bajarapacuenia xua-ata taneme siete parubeje trigoruanë petsaquenae-ruanë, petsewiruanë piatajujowibota, bajaraxua raja itajëta siete pawaiubeje janibonexa. ²⁸Nexata, xanë pacuenia cajumaitsitsi, DIOSO raja bajaraxua cayapëtaeya-exana; xua copiapatsijitsia, xua exanaejitsia mapanacuataje. ²⁹Nacatocopiapatsiana siete pawaiubeje bitso penawitsia-exanaenexa, ayai-cuenia pecapitsapaenexa pe-ubijawanë daxita Egipto nacujawata. ³⁰Bajaruacujinae, itsasiete pawaiubeje pijinia nacatocopiapatsiana pinijijaniiboxanetonexa. Nexata, bajarapajanibo pejamatabëcuene, belia jiwi nacofënëtsiana copiyapijisiete pawaiubejemi penawitsicuenemi pexaejawa Egipto nacuata, tsipaji bajarapajanibocuene bitso nabejiobitsia-exanaena daxitanacuapijiwi. Daxita Egipto nacupijiwi nabejiobitsiaya jinawanapaena. ³¹Nexata, itsa janiboxaneto copiapatsiana, itsajiwi-ata apocuenenajamatabënapiitsi tsane itsacuenejawayo-ata penawitsimatacabimi pexaejawa. ³²Tajatuxanenë, xua amajitsinaemë anijatobeje, bajaraxua raja saya caemajitsinae. DIOSO raja najamatabëcuenewereta pecayapëtaeya-exanaenexa pepacuenie xua exanaejitsia. Tsipaji baja imoxoyo pewajënae pecopiapatsinexa, bajaraxuata DIOSO cayapëtaeya-exana anijatobeje niamajitsinaejawata —jai José.

³³José icatsia jumaitsi muxujiobiaya Egipto nacua pewetsinëjawabelia: —Tajatuxanenë, xanepana meta mapamatacabijawa nexanaejawa mapacueniaje. Itapetsianame pecaëjëpaenëtsi, petsiyapëtaenë pijinia pecayawenonaeya-ewetsijawa mapanacuaje, pecayawenonaenënexa neyanacua-ewetsiwi daxita Egipto nacuata. ³⁴Nexata, bajaraxuacujinae itapetsianame itsamonae pewetsiwinexa, pamona peponaewinexa-ata newënëta daxita Egipto nacujawata penotsiwinexa pe-ubiyajunujawanë Egipto nacuata. Bajarapamonae caetuatsiana penotsijawanë pexaniawaetsinexa pejebibonëjawata. Caetuatsiana caejawayo tsaponae cinco xuabejeyajuwënëjawanëmi, siete pawaiubejecuenia penawitsi-epato pe-ubijawanë. ³⁵Nexata, bajarapamonae caetuataponaena nitoroboxae, pejebaponaenexa pejebibonëjawata. Bajarapamonae becaetuatapona caetomara canacujitsia wecaenawitsi bitso trigo. Nexata, pamatacabimi janibo bajaraxuanë xaejitsia Egipto nacupijiwi. ³⁶Bajarapacuenia itsa paxaniawaetaponaename pane-caetuataponaejawa, nexata pamatacabimi janibo copiapatsiana siete pawai-bejenexa apopayatëpaemë tsane panijanijawa. Janibomatacabimi bajaraxua pacanacopatsianame panexaeponaenexa Egipto nacuata, paneyatëpaeya-niwa panijani —jai José.

Faraón tocopata José juya peyanacua-ewetsinënexa Egipto nacua

³⁷Nexata, pacuenia José jumaitsi, bajarapacuenia tsitaxanepanatsi Egipto nacua pewetsinë, bajarapacuenia peyajawanacuenebiwi-ata bajarapana-cuata. ³⁸Nexata, faraón jumaitsi peyajawanacuenebiwi jawabelia:

—Bajaraponë tsaena xanepana bajaraxuanexa, tsipaji ajibi itsanë pacuenia José cuene-itsi, pacuenia bajaraponë DIOSO pejamatabëcuene peyapëtaeya-exanaenëtsi —jai faraón. Bajarapamonae jejai.

³⁹Nexata, faraón jumaitsi Joséjawabelia:

—Dioso pecayapëtaeya-exanaexae daxita bajaraxuanë, ajibi mapanacuataje bitso peyapëtaenë, pecanaëjëtsinë-ata pacuenia xamë itsimë.

⁴⁰Bajaraxuata, xanë cacopatsianatsi xamë nenamatacaitorobinënexa daxita pamonaë jinawanapa tajabojawata, bajarapacuenia daxita Egipto nacuapijiwi. Cajumecowënëtanapaena xua itorobame. Xanë raja caenënë tacawecuanamatacaitorobaponaponaenë tsane, tsipaji xanë daxita mapanacua ta-ewetsinëje. ⁴¹¡Nejumetaema mapacuenije! Xanë cawënërubianatsi gbernadornënexamë, daxita Egipto nacuapijiwi pewetsiwi nejamatabëcuenemataxoenetsinënexa —jai faraón.

⁴²Bajaraxua pejumaitsijawata, faraón nacobejonotaxuaba pija-anillo, pa-anillo xaina besellocuenia pecanacuenebijawa pejumenamatamotsinexa peyaquinaeliwaianë. Nexata, cobesixatatatsi José. Bajaraxuacujinae, naxatatsia-exanatsi bitso pexaniawirianaxatatsijawa. Bajaraxua pexanialinowiriapanata" penacuenebijawa, bitso penamatamotsijawa. Tsicuaibosirutatsinua penacuaibosicëtsipananexa oronanitota pexanaejawa. ⁴³Bajaraxuacujinae, junaeya-exanayatsi pijacarrozawënëmojawatsia, caballo perobobocaemo, baitsi pacarroza beweliamo faraón yaponabiaba pacujinae apocuenecaëjëpaetsi peyaponaejawa pepopijamo. Tocopatanua José bajaramo peyaponaejawata, itsamonae pewajënaeya pewajunupaebanajetarubenaenexatsi wawajaiya: «¡Yaiyataeya panatixire namutowecua pesajinaenexa! Yaiyataeya panematabacabëta patonubenaename wajatuxanenë», jai tsabuataponaë pewajunupaebanajetarubenaewitsi. Nexata, bajarapacuenia José nacopata Egipto nacua pewetsinëcuenia.

⁴⁴Xuacujinae, faraón jumaitsi Joséjawabelia:

—Xanë faraón-atanë tsane, xamë nacua newetsinëxae tawënëta, caejiwiyo-ata Egipto nacuapijiwi aponacuenebi tsane itsacuenejawayo-ata apotonajumecopatsinejewamë, bajarapacuenia tsitatsiquiricuenejawayo-atatsi. Matapania nitorobicuenia nejumecowëya exanabiabiana —jai faraón.

⁴⁵Bajaraxuacujinae, faraón wënëruba José Egipto nacuwënëcuenia, Zafnat-paneawënëñ.° Pitsia-exananua bajarapanacuapijipetiriwajawabelia. Bajarapowa pewënë Asenat, pexënatoyo Potifera. Potifera raja peyapijiwina-cuenebinëtsi, peyapijiwicuaicuaijainëtsinua Egipto nacuapijiwi pijadiosonë, On-wënë tomarata. Bajarapacuenia faraón peto-exanaecujinae, José nacopata Egipto nacua pewetsinëcuenia. ⁴⁶José pepuaxainae treinta pawaijeje, bajarapacujinaeta taxuxuaba petonacuenebijawa Egipto nacua pewetsinë.

José nexata napëjioba faraón, pewecuaponaenexa baja. Bajaraponë jane baja nanajetaruca daxita Egipto nacujawa, bajarapanacuajawata pe-enaetomaranëjawa. ⁴⁷Daxita Egipto nacujawa itsaxuayo nacueneba pe-ubijawanë, bajaraxuayo-ata capitsapa ayaijawanaxanetonë pe-ubijawanë siete pawaijēcuenia. ⁴⁸José nexata caetuatsia-exananajetaruca daxita trigojawanë, xuanë capitsapapona Egipto nacuada bajarapasiete pawaijejewa. Bajaraponë xaniawaetanajetaruca trigoxu daxita tomaraxijawa itsaxuayo xainejeba bajarapatrigopabianë. ⁴⁹Nexata, bajarapamatacabijawa

n 41:42 *pexanialinowiriapanata*: Taema «linopana», glosariojawata. o 41:45 *Zafnat-panea*: Mapejumaitsiwënëje: «Dioso raja peponaponaenë, wajanacabarëcuaiicuaijinënua», pejaiwënë.

José caetuata daxita bajarapatrigoxu. Bitso ayaijawa tsanajetaruca trigu. Pacuenia meta becaetatejebatsi tajetabo atsapërë manuamene-itapapijijawa, bajarapacuenia nawita pejebijawanë. Nexata, bajaraponë belia apocajëpaetsi penamata-ëjëtsicapanepaponaejawa.

⁵⁰ Janibocuene copiapatsinejewa abaxë, José xaina anijajiwiyo beje pexë-natonëyo beje pijawa Asenat-jawabelia. ⁵¹ Matapijinëyo wënëruba Manasés,^p tsipaji bajaraponë yabara jumaitsi: «DIOSO nenacofënëtsia-exana daxita nabejiobitsicuenia taponaponaejawami. Nejamatabëcuenecaewia-exananua ta-itaxanaejawa tajamonae maponëyo pejamatabëcuenetaje», jai. ⁵² Icat-sia, xuacujinae juyapijinëyo wënëruba Efraín,^q tsipaji bajaraponë yabara jumaitsi: «DIOSO pexaniacuenia neyawenona, tsipaji netocopata taxainae-nexa taxi panacuata nabejiobitsicuenia ponaponajë tajamonae itaxanaeya», jai.

⁵³ Nexata jane baja, werewerecanajetaruca siete pawai beje penawitsijawami Egipto nacujawata. ⁵⁴ Bajaraxuacujinae jane baja, taxuxuaba itsasiete pawai-beje janibocuene, pacuenia José bajaraxua pewajënaeya jumaitsi. Nexata jane baja, bajarapajanibocuene tocopiapatatsi daxita nacuanëjawa. Caejawa Egipto nacuata xaina pexaejawa daxita nacuanëwecua. ⁵⁵ Bajarapamatacabita, daxita Egipto nacuata pejinawanapaewi itsa bitso janibocuena natane pejinawanapaejawa, nexata bajarapamonae pona faraón-jawabelia pewajëcaenexa trigu. Itsiata baitsi jane, faraón jumaitsi bajarapamonaejawabelia:

—¡Paponare Joséjawabelia, panejumaitsinexa! Bajaraponë pacuenia paca-jumaitsi tsane, bajaraxua pa-exanaename —jai.

⁵⁶ Paepatota bitso pewajënaeyabelia janibo tsaponae daxita Egipto nacujawa, nexata José jane baja, tocopata pecanajetsinexa pecaetatejebitrigoxumi Egipto nacuapijiwijawabelia. Pabonëta xaniawaetejeba trigoxu, bajarapabonë baupana pecanajetsinexa, tsipaji caematacabi canacujitsia pewajënaeyabelia bitso janibocuene tsaponae. ⁵⁷ Bajarapamatacabijawanua itsanacuanëpijiwi-ata patapona Egipto nacujawaberena pecomuacaenexa trigu Joséjawabelia, tsipaji daxita nacuanëjawa ajibi pexaejawa.

José pematapijiwi siwapona trigu Egipto nacujawabelia

42 ¹ Pamatacabi Jacob jumetane trigu pexainaejawa Egipto nacujawata, jumaitsi pexijawabelia mapacueniaje:

—¿Dexua pa-exaname majotaje, itsa saya ëpaxamë panataeyename?

² Nejumaitsi raja itsamonae Egipto nacujawatalia pexainaejawa trigu.

¡Bajarabelia paponare, panecomuatsinexa trigu wajani wajatëpaeyaniwa, waja-asaëtsawanapaenexa! —jai.

³ Nexata, diez ponëbeje José pematapijiwi pona Egipto nacujawabelia pecomuacaenexa trigu. ⁴ Itsiata baitsi jane, Jacob apocopatsi peyajawaponaenexatsi pematapijiwi Benjamín, José pejuyapijinë, tsipaji Jacob najamatabëxaina mapacueniaje: «Belia, itsacuenie tocopiapatsipatsi piabejecuene namuto-epatualia», jamatabëjai. ⁵ Nexata jane baja, Israel' pexi pona Egipto

p 41:51 *Manasés*: Mapejumaitsiwënëje: «Nacofënëtaxuaba», pejaiwënë. q 41:52 *Efraín*: Mapejumaitsiwënëje: «Penacoxiwiatsinexa ayaijawa», pejaiwënë. r 42:5 *Israel*: Israel-wënë, Jacob-wënëbeje yabara cuacuajiai caenë yabara. Taema Gén. 32:28.

nacuajawabelia pecomuacaenexa trigo. Bajarapamonae yajawapona itsa-monaē Canaán nacuapijiwi trigo penacomuacaenexa, tsipaji daxita Canaán nacujawa janibo tsanucaē.

⁶ José nexata, bajarapacujinaeta gobernadornē tsaponaponae bajarapana-cuata, Egipto nacujawata. Bajaraponē canajetabiaba trigoxu jiwijawabelia, pamonae patabiaba daxita nacuanējawawerena. José pematapijiwi itsa jane baja pata Egipto nacujawaberena, nubenajunua José pitabarata irataeya pematatababēta. Nubenajunua pijacuenecuenia peyaiyataenexatsi nacua pewetsinēxae. ⁷ Pijamonae apoyapētae-atatsi pejuyapijinēcuene, José itsiata, itsa tane, yapētane pijamonaecuenie. Itsiata baitsi jane, bajaraponē exana apobepeyapētaenēcueniatsi. Nexata, bajaraponē yanjibapona liwaisixi apo-bepejitsipaenēcuenia itajara pecuene-ējēbinexa pematapijiwi. Jumaitsi:

—¿Detsa werena paxamē paneponaewi? —jai.

Bajarapamonae jumaitsi:

—Paxanē raja paponajē Canaán nacujawawerena patacomuacaenexa tri-goxu —jai.

⁸ Itsiata, José yapētae-ata pematapijiwicuenie, bajarapamonae juya apoya-pētaetsi Josécuenie. ⁹ Nexata, José bajarapaepatota najamatabēnapita piama-jitsinaejawami bajarapamonae yabara. Nexata jumaitsi:

—Paxamē tsaena pataneya-enebiwimē. Paxamē saya maberenaje papa-tame paneyapētaenexa xua mapanacuata patajinawanapaewije apopanecue-necaējēpae pata-exanaejawa, itsamatacabi panenawajabitsaētsinexa paxanē-jawaberena —jai.

¹⁰ Nexata jumecanawiatatsi:

—¡Jume raja, patajatuxanenē! Paxanē cajena patayaiyataewi. Papatajē saya maberenaje patacomuacaenexa trigo. ¹¹ Paxanē raja caenē papexinē. Paxanē raja apopata-ajamatabēcueniebejewi. Patayaiyataewi. Caeto-ata paxanē apopataya-enebiwi itsamonae —jai.

¹² Icatsia, José jumaitsi:

—¡Jume! Apopaxaniajamē. Paxamē papatame maberenaje paneyapētae-nexa xua mapanacuapijiwi tsisajinatsije —jai José.

¹³ Icatsia, bajarapamonae jumecanawiata:

—Patajatuxanenē, paxanē raja doce paponēnēbeje caenē papexinē, pataji-nawanapaewi Canaán nacuata. Paxanē caenē patayajuwēnē, pepojuyapijinē, yajawanacopata pataxa. Itsanē pijinia baja cajena apopayajawajinawana-paenē. Tēpa tsaena —jai.

¹⁴ Nexata, bajarapaepatota José icatsia napēna jumaitsi:

—Xaniajanē baja pacuenia pacajumaitsitsi. Paxamē tsaena pataneya-enebiwimē —jai.

¹⁵ Icatsia, jumaitsi:

—Mapacueniaje pacajumexaniataenatsi panexaniajaicuene pepacuene. Faraón pewēnēta pacajumaitsitsi majotawecuaje apopapitsapaemē baja tsane, itsa abaxē maberena apopacatsimērena tsane panejuyapijinē.

¹⁶ Nexata, pa-itorobianame itsanē paxamējajuwēnēnē pesiwaponaenexa panejuyapijinē. Paxamē panenacopabiwi panacopatsianame penaneconit-siwi pejebabiabibota, pepatsimatacabijawabelianexa panejuyapijinē. Nexata, bajarapacuenia pacajumexaniataenatsi panijaliwaisi, itsa paxaniajamē. Itsa

pijinia apopatsi tsane panejuyapijinë, nexata pepacuene faraón pewënëta xaniajanë cajena. Pepacujiru paxamë saya pataneya-enebiwimë tsawanapae —jai José.

¹⁷Bajarapacuenia pejumaitsicujinae José, xaniajai baja. Jeba daxitajiwiyo-beje penaneconitsiwi pejebibota acueyabi pamatacabibecuenia. ¹⁸Itsiaata baja, acueyabimatacabita José jumaitsi:

—Xanë raja tayaiyataenë DIOSO. Mapacuenia pa-exanaenameje panetë-paeyaniwa. ¹⁹Itsa pepacujiru paneyaiyataewi, nexata caenë nacopatsiana majotaje penaneconitsiwi pejebabiabibojawata. Pacacopatsianatsi panepo-naenexa, panecaponaenexa pexaejawa panijabopijiwiwawabelia. ²⁰Itsiaata baitsi jane, panetocapatsiaremena panejuyapijinë, tayapëtaenexa panexaniajaicuene xua panejumaitsimë. Itsa jume, nexata patëpaename —jai José.

Nexata, bajarapamonae jejai, bajarapacuenia pexanaenexa. ²¹Bajarapae-patota, najumaitsi tsaponae bajarapamonae José yabara:

—Pepacuene waxaitsi bitso pibisiacuene exanatsi wajajuyapijinëmijawabelia wajabejiobia-exanaejawata. Yapëtae-atatsi bitso napëna wajana-cajumaitsijawa pejamatabëcuenebëjajawata, itsiata, namuxujematatsi wajamonaenë. Bajarapacuenia tae-atatsi bitso pejunawijawa, waxaitsi bejiobia-exanatsi. Bajaraxuata, ajenaconoxaeta juya nacanajamatabëcuenematamota wajajamatabëcuenebëjainexa, wajajuyapijinëmi wajabejiobia-exanaejamatabëcuene —najai bajarapamonae.

²²Matapijinë Rubén nexata jumecanawiata mapacueniaje:

—Xanë baja cajena picani paca-itawetatsi pane-itsacueniabiyaniwa bajaraponëyo, wajaneconi wajanacatsijumajopaeyaniwa. Itsiata, apopanejumecowënëtsimë. Nexata xuata, wajaneconi bajaraponëyo wajabeyaxuabijamatabëcuene yamatamotsiaya juya nacatsijumajopa ajena —jai Rubén pejuyapijiwawabelia.

²³Nexata, bajarapamonae jamatabëjumaitsi: «Apopanejumetae meta», jamatabëjai, tsipaji José barëcuaicuajai pijamonae Egipto nacuapijiwi pija-jumeta. Nexata, itsanë, peyajawanucaenë jumewajunupaebaponatsi José xua jumaitsi pematapijiwawabelia. ²⁴José jumetaenuca picani. Bajaraxua José itsa jumetane bajarapamonae penajumaitsitsaponaejawa, itsabo-ënëjawabelia wecuanatsata, pija-epato penuenexa. Paepatota baja nowereta, bajaraponë icatsia rena bajarapamonaejawaberena itsajotarena nubena. Icatsia, bajaraponë barëcuaicuajai. Nexata, bajaraxuacujinae tsata Simeón pijamonaewecua. Bajarapamonae pitabarata itoroba pijajiwi pecëtsinexatsi. ²⁵Xuacujinae, José itoroba pijajiwi petowënëbinexa trigoxu pijadoruanëjawabelia. Itorobanua papalata matamota trigoxu petocanawabinexa, caedoro canacujitsia petotsicuaibojebaponaenexa. Nexata, José pijajiwitonë muetsia jia bajarapapalata. Orijibia, itoroba perajutsinexa pexaejawa namuto-epatualia pexaejawanexa. Bajarapacuenia exana José pijajiwitonë. ²⁶Nexata, xuacujinae bajarapamonae jane baja caponalia pijatrigodoruanë petsijumacëbinexa pijaburronëxijawabelia. Bajarapamonae baja naropoba bajarajotawecua.

²⁷Itsa bajarapamonae pata itsajota majitsijitsia, nexata itsanë pijatrigodoro yawë-isica perajutsinexa pexaejawa pijaburro. Bajarajota, caxitajaraba pijapalata petotsicuaibobocaejawatsi pijadorowëwereca. ²⁸Nexata, pijamonaejawabelia jumaitsi:

—¡Maxuaje pataema! Xanë netotsiwëbuata tajatrigodorowëwereca tamamotsipalatami trigo —jai.

Nexata, bajarapamonae jamatabëcuenenajunawiaca. Ayaicuenia bitso junawa. Nexata, bajarapamonae najumaitsi:

—¿Detsa xua DIOSO manacato-exanaje? —najai.

²⁹ Nexata, itsa baja pata Canaán nacuata, tsipaeba paxa Jacob-jawabelia daxita pacuenia tocopiapatatsi. Jumaitsi:

³⁰ —Ponë pewetsinë bajarapanacua apopataneyaiyataewicuenia panejumaitsi: «¿Paxamë tsaja paneya-enebiwi paxanëjawaberena?», panejai pataponaexae bajarabelia. ³¹ Paxanë mapacuenia pajumecanawiatajëje: «Paxanë raja pepacuene jiwi patayaiyataewi. Paxanë cajena caeto-ata apopataya-enebiwi patanawajabitsaëtsiwajënaeya. ³² Paxanë raja doce papajiwinëbeje panacaemonaenë. Caenë papexinë. Itsanë raja paxanëjawata apoponaponae. Pepojuyapijinë raja yajawanacopata pataxa Canaán nacujawatalia», pajanë baja. ³³ Nexata, bajaraponë panejumaitsi: «Itsa pepacuene paxaniajamë jiwi paneyaiyataewi, nexata pepacuene pacopatsianame caenë xanëjawata penacopatsinënexa. Itsamonae baja paponaname panecaponaenexa trigo panijamonaenexa. ³⁴ Jane baitsi, panetocaponaeremena panejuyapijinë. Nexata, pepacuene bajarapacuenia paxaniajamë tsane paxamë, itsa pepacuene paneyaiyataewi jiwi, itsanua apopatane-enebiwimë. Bajarapacuenia matapania pacatocopatsianatsi panijamonaenë peponaenexa. Icatsianua pacacopatsianatsi, jamatejema panepatabiabine-panecomuacaewi trigo», panejai Egipto nacua pewetsinë —jai paxajawabelia.

³⁵ Nexata, bajarapacuenia petsipaebicujinae paxajawabelia, caenë canacujitsia, wecua-othoca pijatrigodoruanë. Bajarapaepatota, tane pijapalatadoroxi, caenë canacujitsia, papalatata picani matamoba trigomatamo Egipto nacuata. Bajarapacuenia petaxae palatadoroxi, nexata daxita najunawiaca bajarapaepatota. Junawa bitso paxa Jacob yajawa, Egipto nacua pewetsinë petayaniwatsi penacobetoxotsiwicuenia. ³⁶ Jacob yabara bëjainua pexënató Benjamín, nexata jumaitsi pexijawabelia mapacueniaje:

—Paxamë baja panewecua-ajibia-exanapona taxí. Bajarapitsinë José apoyajawajinawanapaetsi. Icatsia baja maje, Simeón-ata ajenaconoxae neto-ajibi. Panecopataponame baja taxinejewa. Aeconoxae baja icatsia pajit-sipame patanewecuacapsitapaejawamë Benjamín. Nexata, paxamë bajarapacuenia patane-exanaejamatabëcuenemë, xanë bajaraxua najamatabëxainabiabajë —jai pexijawabelia.

³⁷ Nexata, Rubén jumaitsi paxajawabelia:

—¡Jume! Xanë netocopatsianame tacato-ewetsinexa Benjamín pitsacue-neyaniwa. Nexata, Benjamín itsa naponae, xanë bajaraxua netsicaru-caena ta-ewetsinexa. Itsa apocatocanawiatsi tsanetsi, nexata juya catocopat-sianatsi nebeyaxuabinexa taxënatonëyobeje yamatamotsiya —jai Rubén.

³⁸ Itsiata, Jacob jumecanawiata mapacueniaje:

—Taxënató panejuyapijinë apocopatsinë tsane panecaponaenexa, tsipaji bajarapitsinë panejuyapijinë José tēpa, Benjamín pematapijinë. Aeconoxae Benjamín caenëyo netonacopata caewa pexënatobeje. Itsa naponae-jitsipa, belia itsacuene tsipae namuto-epatualia. ¿Jica itsa itsacuene tsipae? ¿Dexua pa-exanaejitsipame? Paxamë baja payapëtaneme xanë baja

perujunëyonëjawanë. Nexata, paxamë pacatsijumarucaejitsipa tanajamata-bëxainaecobexae ita yatëpaejitsipajë —jai Jacob.

Benjamín caponatsi pematapijiwi Egipto nacujawabelia

43 ¹Itsa bitso Canaán nacuaata janibo tsaponae pewajënaeyalia, ²nexata ita baja werenepona Jacob pexi pecomuatsijawami trigo Egipto nacujawabelia, Jacob jumaitsi pexijawabelia:

—¡Paponare icatsia panecomuacaenexa itsajawa trigo wajaxaejawanexa waxaitsi! —jai.

³Nexata, Judá jumecanawiata:

—Bajarajotalia ponë, pewetsinë, pepacuene pexaniajaicuenia pane-jumaitsi: «¡Itsa apopacapatsimërena tsane panejuyapijinë maberenaje, nexata, pëtsa paponaremena patanetaenexamë!», panejai. ⁴Nexata, ita paneyajawacopatsianame patajuyapijinë, matapania bajarapacuenia paxanë paponaeñajë patacatocomuatsinexa trigo. ⁵Itsa baitsi jane, ita apopaneya-jawacopatsimë tsane, nexata apopaponaenë tsane, tsipaji bajaraponë pane-jumaitsi: «¡Itsa apopaponaemërena tsane panejuyapijinë, nexata, pëtsa paponaremena maberenaje patanetaenexamë!», panejai —jai Judá.

⁶Nexata, bajarapaepatota bajarapamonae paxa jumaitsi:

—¿Dexuajitsia bajarapitsicuene, bitso pibisiacuene, paneto-exaname? ¿Dexuajitsia payapëtaeya-exaname panexainaejawa itsanë panejuyapijinë bajaraponëjawabelia? —jai Israel pexijawabelia.

⁷Nexata, pexi jumecanawiatatsi:

—Bajaraponë bitso paneyanijobapona paxanë yabara, patajamonaemë-ata yabara. Panejumaitsi: «¿Abaxë ponapona pane-axanëyo? ¿Paxainamenua itsamonae panejuyapijiwi?», panejai. Nexata, paxanë xaniawaetsia paju-maitsinë tsaponae pataneyanijobicowëya, tsipaji ajibi baja patajumaitsit-saponaejawa. ¿Depacuenia paxanë payapëtaejitsipajë patanejumaitsinexa: «Pacaponaremena panejuyapijinë», patanejainexa? —jaitsi pexi.

⁸Nexata, Judá jumaitsi paxa Israel-jawabelia:

—Tajuyapijinë netocopatsianame xanë tayajawaponaenexa, ta-ewetsinexa-ata. Bajarapacuenia matapania paponaeñajë. ¡Nexata, ita jitsipame waja-asaëtsawanapaejawa, panetocopare patayajawaponaenexa, wajatëpaeyaniwa wajani, xamë-ata, paxanë-ata, bajarapacuenia wajaxi-ata! ⁹Nexata, xanë natsiju-maxuabianajë tajuyapijinë yabara. Xua tocopiapatsianatsi netsijumajopaena. Itsa apocotocanawiatsi tsanetsi caewëarena, nexata xanë naneconitsianajë xamëj-wabelia daxitamatacabijawabelianexa. ¹⁰Itsa cajena apopanewecua-asiwamë tsaponae tsipae patajuyapijinë patabarëponaeyaniwa, panecuenecaëjëpaejitsipa baja picani anijatobeje patacapatsijawa pexaejawa bajarawerena —jai Judá.

¹¹Nexata, Israel jumecanawiata pexi mapacueniaje:

—Je. Itsa baja pepacuene ajibi itsacuenejawalia waja-exanaejawa, nexata maxua pa-exanareje. ¡Pacaponaremelia panijadoruanëta wajarajutsijawanexa bajaraponë xuanë xainatsi mapanacuataje pexaniajawanë, bálamojawa, jabë-rajawanë, petuxujuwijawanë, mirrajawanë, daxitawiria pexutunaxu pexae-jawanë,^a bajaraxuanë panerajutsinexa bajaraponëjawabelia nacua pewetsinë!

^a s 43:11 *pexutunaxu pexaejawanë*: Taema «pexutunaxu pexaejawanë», glosariojawata.

¹² ¡Patocaponarenua orijibia palata webeliayo! ¡Patsimatabuare anijatobeje pematatsenëyo! Caejawa bajaraponë panetocanawiatsinexa papalata pacapata-othoparemena, tsipaji raëta belia bajarapamonae nacobe-itaxanaejitsipa, itsa-jawa pijinia panecomuatsinexa trigo. ¹³ ¡Nexata baja, paponare panejuyapijinë yajawa, panetaenexa bajaraponë! ¹⁴ Dioso daxitawecua piacuenesaenë' tsaponaponae. Nexata, bajaraPonëjawabelia pacatowajëcabiabianatsi papecayawenonaenexa, bajarapanacua pewetsinë papeca-itaxutotsoniataenexa. Nexata, papeca-itaxutotsoniataexae, bajaraponë papecatocopsinexarena Simeón, bajarapacuenia paneyajawapatsinexarena-ata panejuyapijinë Benjamín. Xanë picani apojitsipaenë tanacopsitsijawa taxinejewa. Belia baja, neto-ajibi tsaponae. Itsa Dioso bajarapacuenia netocopiapatsia-exanaena, apo-itsacune tsane, tsipaji baja ajibi itsacunejawayo ta-exanaenexa taxënatobeje yabara —jai Israel siwajamatabëcuenebëjaiya.

¹⁵ Nexata jane baja, bajarapamonae nota xuanë caponaejitsia perajutsi-jawanënexa amoneya. Notanua palata orijibia ayaijawa pecomuatsinexa trigo, pematamotsinexanua copiyapijitrigojamatabëcuene. Nexata, bajarapacuenia Benjamín barëponatsi Egiptojawabelia. Itsa baja pata Egiptojawata, nexata naitajëbalia Joséjawabelia. ¹⁶ Nexata, José tane Benjamín peyajawanajetarubenaejawa bajarapamonae. Nexata, jumaitsi pijabojawata petonacuenebaponaponaenëtsijawabelia:

—¡Mapamonaeje caponare tajaboyabelia! ¡Beyaxuabare caenë vaca nexa-naenexa pexaejawa, tsipaji bajarapamonae xanë yajawaxaejitsianë matone-pijipexaejawata! —jai José.

¹⁷ Nexata, José pijajiwitonë jejai, pebarëponaenexa bajarapamonae José pijabojawabelia. ¹⁸ Itsiata, bajarapamonae jamatabëcuenenabenajaca. Junawana bajarapaepatota, tsipaji apoyapëtae xua yabara bajaraponë caponatsi José pijabojawabelia. Nexata, najumaitsi bajarapamonae:

—Maraëta imata papalataje nacatotsiwëjeba wajatrigodoruanëwëwewereca, jamatabëcuenenacacaponae nacaxaniabiaya maberenaaje, wajanacayanijobinexa bewajanacobetoxotsijawacuenia paepatowajëto cajanawanapatsi. Nexata, waxaitsi wajananeconitsiwicuenia wajanacataexae, nacataicaejitsia wajanacaxainenexa, wajanacanacuenebia-exanaenexa amoneya majotaje wajadajubi yajawa —najai tsabuataponae peponaejawata José pijabojawabelia.

¹⁹ Nexata, itsa baja pata baupajawata, José petonacuenebinëtsi cujibalia peyanijobinexa. ²⁰ Nexata jumaitsi:

—¡Abaxë raja, patajatuxanenë! Imata xua papatajë patacomuacae-nexa trigo copiyapijinamuto, bajarapacujinae apopapatsinë cajena pata-ajamatabëcuenebejewicuenia. Papatajë saya patacomuacae-nexa trigo. ²¹ Bajarapacujinae, itsa panawiabaponaliajë, itsa papatajë itsajota pamajitsijitsianë, bajarajota nexata caenë canacujitsia pawë-isciajë patajatrigodoruanë. Bajarajota, pacaxibajarabajë patajatrigodoruanëwëjawawereca patamatamobipalatami trigojamatabëcuene. Aeconoxae nexata, pacatocaponatsi patacatocanawiatsinexa bajarapapalatami. ²² Orijibianua,

pacanajetarubenajē pematatsēnēa itsapalata patacomuacaenexa trigo. Itsiata, apopayapētaenē bajarapacujinaeta pajiwiyo panetotsiwējia patajapalatajawanēmi patajadoruanēwējawawereca —jai bajarapamonae José petonacuenebinētsijawabelia.

²³Nexata, bajarapaepatota jumecanawiatatsi:

—¡Pajamatejemamēre saya! ¡Pētsa pajunawame! Itsiata raja, apopaca-itsacueniabi tsanetsi. Paniija DIOSO, panijamonae-ata pijaDIOSO pacatot-sicuaibojeba bajarapapalata panijatrigodoruanēwējawawereca. Xanē raja bajarapapalata picani pitajē xuanē picani pamatamobame trigojamatabē-cuenemi —jai.

Nexata, bajarapaepatota José petonacuenebabiabinē juta baja Simeón penaneconitsiwi pejebabiabibowecua. Caponatsi itsajotalia pijamonae nubena José pijabo baupajawabelia. ²⁴Xuacujinae, joneya-exanatsi José pijabojawabelia. Bajarajotalia, mera rajutatsi penataxuquiatsinexa. Torajutatsinua pijaburro pexaejawa. ²⁵Nexata, bajarapamonae matapania yapētane, bajarajota penaxaejawanexa, José pijabota. Nexata, bajarajota jane baja, xua tocapona perajutsijawanexa amoneya Joséjawabelia, bajarapamonae wecuajuca bajaraxuanē pijadoruanēwecua pexaniawaetsinexa, José pepatsiwañeaeja matonejepijipexaejawanexa.

²⁶Itsa baja José pata pijabojawata, nexata jane baja, rajuta bajarapamonae xuanē tocapona Josénexa. Nexata, bajarapamonae irataeya pitabarata bobenajunua yaiyataeyacuenia. ²⁷Nexata, José yanijoba bajarapamonaejawabelia pejinawanapaecueene yabara. Jumaitsi:

—¿Jica, depa-itsimē? ¿Depacuenia pajinawanapame? ¿Depacuenia pane-axanēyo ponapona, imata paperujunēyo yabara panewajunupaebame? ¿Abaxē bajaraponēyo ponapona? —jai.

²⁸Nexata, bajarapamonae jumecanawiata:

—Pataxanēyo, pecayaiyataenēyo, abaxē itsiata, jamatejema. Abaxē itsiata, ecaponapona —jai. Pejumaitsicujinae, icatsia irataeya bobenajunua yaiyataeya.

²⁹José nexata itsa naēcolia matatoyorotsia, taeyeta Benjamín, caenēta, caewata penaitajētsinēbeje. Nexata jumaitsi:

—¿Matsaja ponē yabara panejuyapijinē imata panejumaitsimēje? —jai.

Bajarapaepatota, José jumaitsi Benjamín-jawabelia:

—Catojitsipatsi DIOSO pecayawenonabiabijawa —jai.

³⁰Nexata, bajarapejumaitsijawata, José itsa tane pejuyapijinē, jamatabēcuenebarēya petaejawata. Bajarapaepatota, bajaraponē bitso jamatabē-itaxutua-aējai pecajamatabēcuenebarēya. Nexata, bepijiayo junua pija-cuartojawabelia. Nexata, bajarajotalia bajaraponē aēāējai. ³¹Nexata baja, itsa naitaxutonuewereta, paepatota icatsia cuenecaējēpatsi pecuaicuaijai-jawa, nexata bajaraponē naitabaraquiata merata. Bajaraxuacujinae, pita-xutonuetayaniwatsi najamatabēcuenecataitsiya pitsaparena. Jumaitsi petonacuenebiwitsijawabelia:

—¡Patsanare baja pexaejawa pataxaenexa! —jai. Bajarapamonae jejai.

³²Bajaraxuacujinae, José nexata to-etatsi pexaejawa pijamesajumata, itsamesa pijinia Egipto nacuapijiwinexa saicaya. Itsamesajumata pijinia tojeba pexaejawa Jacob pexinexa, saicaya José pijamonaenexa. Nexata,

bajarapacuenia bajarapamonae saicaya nawecuaxane José pijamonae, tsi-paji Egipto nacuapijiwi apojitsipae penajuaxaejawa hebreomonaejawabelia. Bajarapamonaenexa topibisiacuenetsi.^u ³³Nexata, José pijamonae enaeyaxana itsajota to-itajëtaþona. Bajarapamonae ena matapijinëjawaweliacujinae pijawainë canacujitsia juyapijinëjawabelia. Nexata, bajarapamonae bitso jamatabëcuenenajunawiaca itsa bajarapacuenia exanatsi. Èpamonae nanaëcoba. «¿Depacuenia meta patajanetoyapëtae patajawai caejiwi canacujitsia?», jamatabëjai tsenae jamatabëcuenenabenajacaeya. ³⁴José bitso asiwaya tane pejuyapijinë Benjamín pematapijiwiwecua. Nexata, José pijamesajumata pexaejawayajuwënëjawa perajutaponaejawata pijamonaejawabelia, Benjamín rajutatsi ayaijawa daxita pematapijiwiwecua. Nexata, José barëxane pijamonae, yajawa-apanua pematawëjëa-apaeranë. Najuabarëyanua bitso, penaxaejawata.

José waetabia-exana Benjamín penaneconitsinëcuenia

44 ¹Bajarapamonae penaxaecujinae, José icatsia tonajumecopata petonacuenebinëtsijawabelia. Jumaitsi:

—Tojema baja trigoxu mapamonae pijadoruanëtaje. ¡Towënëbare xania-waetsia daxitadoruanë, pacuenia cuenecaëjëpatsi pecaponanexa! ¡Caenë canacujitsia pijadorocuaiþojawawereca pijapalata toyajawajebaponare!

²Bajarapacuenia tojema juyapijinë Benjamín pijadorocuaiþojawawereca tajacopa, palatananitota pexanaejawa. Bajarapacuenia palata tojema pematamotsijawa trigojamatabëcuenemi —jai José pijajiwitonëjawabelia.

Nexata, bajarapacuenia exana petonacuenebabiabinëtsi José peju-maitsicowëya. ³Äjena baja juameto pitsapaina, pepabajayacunua, José ponaeya-exana bajarapamonae. Nexata, bajarapamonae pijabur-roxi nota peponanexa. ⁴Bajarapamonae peponaecujinae, abaxë bitso tajë apowecuaponae bajarapatomara, nexata xuacujinae, José jumaitsi petonacuenebinëtsijawabelia:

—¡Pëbaraponare bajarapamonae! Itsa pëcaxiname bajarapamonae, jumaitsimë tsane: «¿Dexuajitsia pibisiacuene panejamatabëcuenecanawiatame, pexaniacuene pacato-exanae-atatsi? ¿Detsa xuajitsia patonacobetoxotame pijacopa tajatuxanenë palatananitota pexanaejawa? ⁵¿Apopayapëtaemë tsaja tajatuxanenë bajaraxuata peca-apaeyabiþijawa, pecanacuenebabiþijawanua pecanaëjëbicuenia? Nexata, paxamë bitso pa-exaname pibisiacuene», jamë tsane bajarapamonaejawabelia —jai José.

⁶Nexata, bajaraponë pëbarajina bajarapamonae. Itsa baja pëcaxina, nexata bajaraponë jumaitsi tsanajetaruca pacuenia itorobatsi José.

⁷Nexata, bajarapamonae jumecanawiata:

—¿Dexuajitsia bajarapacuenia panejumaitsimë? Paxanë cajena caeto-ata bajarapitsicuene apopatana jamatabëxainaewi pata-exanaenexa. ⁸Paxanë imata papalata pacaxitajarabajë patajadorocuaiþojawata pacatocaponarenatsi Canaán nacujawawerena patacatocanawiatsinexa. Itsa peneta patanacobetoxotsiwi tsipae, bajarapacuenia apopatocanawiatsitsi tsipae. ¿Depacuenia nexata paxanë panacobetoxotsipajë nijatuxanenë pijabo

^u 43:32 *topibisiacuenetsi*: Taema «Egipto nacuapijiwi pena-ewetsicuene», glosariojawata.

pijajawa palatananitota pexanaejawa, orojawanëta pexanaejawa? ⁹Nexata, pabeyaxuabianame paxanëyajuwënë, ponë pijadorota patocaxitajarabianame bajarapacopa. Paxanë juya apopataxainae wi bajarapacopa, panacopatsianajë patacatonacuenebiwinexa, patayajawananeconitsiwiucuenia nija-tuxanenëjawabelia —jai.

¹⁰Nexata, ponë José petonacuenebabiabinëtsi jumaitsi:

—Nexata, paxamë pacuenia panejumaitsimë, bajarapacuenia exanaenatsi. Ponë matapania pijadorota nacaxitajarabiana bajarapacopa, bajaraponë amoneya patanetonacuenebaponaponaenë tsane. Itsiata, paxamë panacopatsianame aneconijibia —jai.

¹¹Nexata, caeiwi canacujitsia, irabetsica jebica bepijiayocuenia pijadoruanë. Xuacujinae, pijadoruanë wë-isica, jamatejema piënëjaitsinexa.

¹²Nexata, José petonacuenebabiabinë tojaita caeiwi canacujitsia pijadoro. Taxuxuaba matapijinëjawawerenacujinae pejaitsijawa, juyapijinëjawabelia. Belia, caxitajaraba bajarapacopa Benjamín pijadorocuaijowata.

¹³Nexata, bajarapamonae pijacueneucuenia pijacamisanëmi mipatitica, penajamatabëcuene-itajëtsinexa peyabarabëjaijawa pejuyapijinë. Bajaruacujinae, bajarapamonae caenë canacujitsia pijaburroxijawabelia icatsia tsijumacëba pijadoruanë. Nexata, icatsia nawiabalia tomarabelia. ¹⁴Itsa baja Judá palia pijamonae yajawa José pijabojawabelia, nexata José abaxë caxitajaraba pijabojawata. Nexata, bajarapamonae pijacueneucuenia bobenajunua irataeya peyaiyataecuenia. ¹⁵Nexata, José jumaitsi:

—¿Detsa pitsicuene nexata pa-exaname? ¿Apopayapëtaemë tsaja cajena paxamë pacuenia xanë cuene-itsinë, tayapëtaenëcuene tacanaëjëbabiabijawata? —jai.

¹⁶Nexata, Judá jumecanawiata:

—Tajatuxanenë, ¿Depacuene paxanë pacajumecanawiat sipatsi? ¿Depacuene paxanë pepacuene paxaniajanë tsipae patananeconitsijawa, aneconijibia patanetaenexamë? Ajibi. DIOSO raja paneyapëtaeya-exana patajaneconit pataxainae wicuene. Majotaje panexainame paxanë panijajiwiucuenianë amoneya patacatonacuenebiwinexa. Ponëjawata-ata pacaxitajarabame nija-copa bajaraponë yajawa pacatonacuenebawanapaenatsi —jai Judá.

¹⁷Nexata, José jumecanawiatatsi:

—¡Jume raja! Saya caenë, ponë tajacopa netopita, bajaraponë caenë taji-jiwitonë amoneya tanetonacuenebinë tsane. ¡Nexata, paxamë panawiabaremelia jamatejema pane-axa pijaboyabelia! Itsajiwiyo-ata apopacajamatabë-itonotaponae tsane —jai José.

Judá yapijiwicuaicuaijai Joséjawabelia, Benjamín pitaxutotsoniataenexatsi

¹⁸Judá jumaitsi pecujitsijawatalia Joséjawabelia:

—Xanë orijibia cajumaitsitsi. ¡Netocopare abaxë tacajumaitsinexa itsajawayo muetsiacuenia! ¡Pëtsa jane itsiata, niamuxujitsibimë tacajumaitsijawa, tsipaji baja xamë cacuene caëjëpa patanenaneconitsia-exanaenexamë pacuenia cuene caëjëpatsi faraón! ¹⁹Xamë imata paneyanijobame pataxainaejawa yabara patajuyapijinë, bajarapacuenia itsa paxainajë pataxa-ata. ²⁰Nexata, paxanë pacajumaitsitsi pataxainaejawa pataxa perujunëyo, bajarapacuenia patajuyapijinë yabara, penaexanaenëyo pataxa itsa baja bitso penaweretsinë

tsaponae. Pacatsipaebatsinua bitso piasiwajawa pataxa bajaraponëyo. Nexata, bajaraponënuua bitso caenëyo pena cotocaewi pexanaenëyotsi, tsi-paji itsanë penaexanaenë copiaya bajarapowata tēpa baja. ²¹Nexata, xamë panecajunatame patacapatsinexa bajaraponë xamëjawaberena. ²²Paxanë-nua pacajumaititsi bajaraponëyo yabara: «Pataxa apojitsipae pewecuapitsa-paejawatsi, tsipaji itsa wecuaponaejitsipa itsajawabelia, nexata belia penajamatabëxainaecuenia pexënato wëtēpaejitsipa», pacajaiti. ²³Bajarapacuenia patacatsipaebicujinae, xamë itsiata, panejumaitsimë mapacueniaje: «Bajara-ponë itsa apopayajawapatsimërena tsane, apojitsipaeenë panepatsijawarena panatetaenexamë», panejamë —jai Judá.

²⁴Itsajawanua jumaiti Josëjawabelia:

—Pamatacabi panawiabaponaliajē pataxajawabelia, bajaraxua patsipae-bajē daxitaxua panejumaitsimë. Nexata, itsamatacabijawabelia pataxa pane-itoroba mapacueniaje: ²⁵«¡Paponare, icatsia panecomuacaenexa orijibia trigo waxaitsinexa!», panejai. ²⁶Nexata, paxanë pajumaitsinë mapacueniaje: «Apopanetoxanepanae tsane pataponaejawa ēpaxanë patajuyapijinënejewa, tsipaji itsa bajaraponë apopaneyajawacopatsimë tsane, nexata apopane-toxanepanae pataponaenexalia bajaraponë patataenexa. Apopanecopia-pitsi tsane», pajanë pataxajawabelia. ²⁷Nexata, bajaraponë panejumaiti: «Paxamë payapëtaneme tajawa tanerajutsijawa anijanëyobeje saya taxijiwi-beje. ²⁸Itsanë tanewecuaponaecujinae, aponetopatajopae baja. Aeconoxaeta apotaenë. Nexata, xaniajanë pepacuene patacajumaitisijawami: ‘Belia meta xaejitsipatsi itsacuenenë unupijinë bajaraponëyomi.’ ²⁹Nexata, icatsia ajena-conoxae itsa panewecuacaponae name maponëyoje, itsa itsacuenetocopia-patsipatsi, nexata paxamë tatēpaejawa pacatsijumarucaejitsipa, tsipaji baja xanë perujunë wēcuatēpaejitsipajē tanajamatabëxainaecuenia», panejai.

³⁰⁻³¹»Pataxa bitso bajaraponë yabara siwajamatabëcuenebëjai tsabiabi.

Nexata, itsa maponëje apopayajawanawiabinëlia tsane, pataxa tēpaena itsa yapëtane apopatayajawapatsijawa. Nexata, bajarapacuenia paxanë panetsi-jumarucaena pataxa bitso itsa tēpaena penajamatabëxainaecobexae. ³²Xanë raja netsijumajopa taxajawabelia bajaraponë ta-ewetsinexa itsacueneyaniwa, tsipaji jumaitsinë taxajawabelia: «Itsa apocatocanawiatsitsi tsane, nexata xanë netsijumajopaena daxitamatacabijawabelianexa bajarapaneconi», janë. ³³Bajaraxuata, xanë cajumaititsi orijibia bajaraponë penacopatsiyaniwa majotaje amoneya pecatonacuenebinënexaje. Xanë juya naco-patsianajë, bajaraponë pejamatabëcuene. Nexata, copatsianame bajaraponë peponaenexa pematapijiwi yajawa. ³⁴¿Detsa nexata xuajitsia xanë lianë tsi-pae taxajawabelia, itsa maponë apoyajawalianëje? Xanë apojitsipaeenë tsane taxa bitso pewënajamatabëxainaejawa pexënato —jai Judá Josëjawabelia.

José nayapëtaeya-exana pijamonaejawabelia pejuyapijinëcuene

45 ¹Pejumetaejawata José xua Judá tsipaebatsi, nexata apojamatabëcuene caejëpaetsi penajamatabëcuene cataitsijawa daxita pamonae petonacuenebiwiitsi pitabarata. Nexata, bajaraponë asaëya ayaijumeta jumaiti:

—¡Papitsapare daxita majotawecuaje! —jai petonacuenebiwi-tsijawabelia. Nexata, daxita pitsapeca. Caejiwi-ata aponacopatsi

bajarapamonaeyajuwënë Joséjawata, paepatota nayapëtaeya-exanaejitsia pijamonaejawabelia. ²Bajarapamonaepija-epato penubenaejawata, José aëäjai bitso ayaijumeta. Belia, Egipto nacuapijiwi wayafuabelia penubenaewi jumetanetsi. Bajarapacuenia faraón pe-ecabiabibojawabelia jume-pata. ³José nexata jumaitsi pematapijiwijawabelia pijamonaepelumeta:

—Xanë raja Josénë. ¿Abaxë ponapona waxa? —jai.

Nexata, bajarapamonaepija-epato pematapijiwi, bitso jamatabëcuenenabena-jacaeya nubena bajaraponë pitabarata. Apocaëjëpaetsinua pejumecanawiat-sijawa. ⁴Nexata, José jumaitsi:

—¡Pëtsa panecujunawame! ¡Pexaniacuene paneto-exanare! ¡Panecujibaremena orijibia! —jai.

Bajarapamonaepija-epato icaesia jumaitsi bajarapamonaejawabelia:

—Xanë raja panejuyapijinë Josénë, ponë pacanajetaxuabame Egipto nacuapijiwijawabelia. ⁵Itsia, pexaniacuene paneto-exanare! ¡Pëtsa panasiwajamatabëbëjamë bajaraxua yabara! ¡Pëtsanua panabara-anaepaname ëpaxamë patanecanajetaxuabixamë DIOSO raja nitoroba panewajënaeya maberenaepatacacapanepaenexa, panijani panetëpaeyaniwa! ⁶Bajaramaje anijawaibeje najetarucaje janibocuene mapanacuataje. Abaxë raja saica cinco pawaiibeje janibocuene. Jiwi ubi-ata tsane, itsia, apotopitsapae tsanetsi pe-ubijawanë. ⁷Xanë itsia, DIOSO nitoroba maberenaepanewajënaeya, jamatejema papecacapanepaenexa pinijicuenia xanë tajamatabëcuene, pane-asaëtsawanapaenexa janibomatacabi, penacopatsinexa orijibia panemomoxi pewajënaeyabelia mapanacuataje. ⁸Bajarapacuenia DIOSO xanë nitoroba maberenaepataponaponaenexa. Paxamë apopanejamatabëcuene. Bajaraponëna netocopata betamuxujobinëcuenia faraón taponaponaenexa. Tato-ewetaponaponaenëna daxita pexinaejawa pijabojawata, bajarapacuenia tanamatacatorobaponaponaenë daxita Egipto nacujawata. ⁹¡Paponare bepijiayo itsajotalia ponapona waxa! Patsipaebianame mapacueniaje: «Cajumaitsi sirenaja nexë nato José: 'DIOSO raja majotaje netocopata daxita Egipto nacuapijiwi xanë tayanacua-ewetsinexa. Rena tsane bepijiama maberenaepataenexa. ¡Pëtsa bitso cuenenajemata! ¹⁰Ponaponaena raja Gosén nacujawata, imoxoyo peponaponaenexa xanëwecua. Bajaramaje, barëponaponaena daxita pexi, pemomoxi-ata yajawa, bajarapacuenia daxita pijadajubi-ata yajawa; daxitaxua xaina pecobecowë. ¹¹Bajaramaje, rajutsianajë pexaejawanexa, daxita pijajiwi yajawa, daxita pamonaepajawaponapona, petosajinaeyaniwatsi itsacuenejawayo-ata, tsipaji abaxë sajina janibocuene cinco pawaiibeje pematatsënë, caji rena raja José», pajamë tsane —jai.

¹²Itsajawanua jumaitsi José:

—Paxamë, tajuyapijinë Benjamín-ata panejumetaenubename baja pacuenia xanë tajacuaiibocujaya patacajumaitsi sijawa pepowajajumeta. ¹³¡Nexata, xaniawaetsia patsipaebare bajarapacuenia waxa daxita tanetocopiapat-sicuene; pacuenia xanë ewetaponaponaepa Egipto nacujawata! Daxitanua xua paxamë pataneme majotaje, bajarapacuenia patsipaebianame. ¡Nexata, bepijiayo paponaremelia panecaponaenexarena waxa! —jai José pematapijiwijawabelia.

¹⁴ José nexata pejumaitsicujinae, pejuyapijinē Benjamín wēwaetabalia. Bajarapacuenia pewēwaetabijawata aēaējai. Bajarapacuenia Benjamín-ata pewēwaetabijawata pematapijinē bitso aēaējai. ¹⁵ Bajaraxuacujinae, José pijamonaenēcuenia daxita pematapijiwi itabaratsutsunepona pebajacobicuenia. Nexata, bajaraponē wēya-aēaējai pijamonaē. Bajaraxuacujinae, matapania pematapijiwi ajamatabēcuenesaēya barēcuaicuajjai.

¹⁶ Nexata, bajarapaepatota itsamonae wēnēpaebatsi faraón pe-ecabiabibojawabelia pepatsijawa José pijamonaē. Nexata, faraón bitso jamatabēcuenenarēya, daxita pamonaē-ata peyajawanacuenebiwi. ¹⁷ Nexata, xuacujinae jumaitsi faraón Joséjawabelia:

—Nematapijiwi jumaitsimērē: «Nexata, ponae baja penawiabinexa Canaán-jawabelia, pijaburromonaē tsijumacēbitrigodoruanē, pecaponaenexa. ¹⁸ Ponae pecapatsinexarena pane-axa, daxita pijamonaē yajawa. Xanē raja rajutsianajē pexania-ira Egipto nacuyajuwēnē-ira; bitso pexania-ira daxitawecua. Rajutsianajēnua pexaewanapaejawanexa bitso pexaniapexajawa daxita Egipto nacujawa pecapitsapaeyajuwēnējawanē. ¹⁹ ¡Nexata, itorobare pecaponaenexa Egipto nacuata pejotsimonē, bueyu perobobocaemonē, pecaponaenexarena pijawaxi, pejewaxi yajawa, pane-axa-ata! ¡Nexata, junare peponaenexarena bepíjia! ²⁰ ¡Pētsa siwajamatabēcuenebējai pecobecowē xua xaina, tsipaji daxitaxua Egipto nacuata xaina pexanepanaejawanē bajarapamonae pijajawa tsane!», jamē tsane —jai faraón Joséjawabelia, petsipaebinxaxi pijamonaē.

²¹ Nexata, Israel pexi bajarapacuenia exana. José nexata rajuta dajubi perobobocaemonē pacuenia faraón tonajumecopatatsi. Bajarapacuenia rajutatsi pamarue namuto-epatua pexaejawanexa. ²² Bajarapacuenianua rajutatsi penaxatabijawanē caejiwi canacujitsia. Benjamín pijinia rajutatsi trescientos papalatanēbeje. Bajarapacuenia penaxatabijawa rajutatsi cinco panaxatatsijawabeje. ²³ Pijinia paxanexa to-itoroba maxuabeje: diez ponēbeje burromonaē pejumaponaewi daxitaxuanē pexaniacuene pexaniaejawanē Egipto nacuata, itsadiez pijinia ponēbeje pecaponaewi trigo, bajarapacuenia pan-cuene, itsacuenepexaejawaxi pexaenajetaruaejawarenanexa namuto-epatua. ²⁴ Nexata, paepatota José napējioba pematapijiwi, jumaitsi:

—¡Pētsa namuto-epatualia panabijataenajetarubename! —jai.

Nexata baja, pona bajarapamonae. ²⁵ Pitsapa Egipto nacuwecua, pepatsinexa Canaán-jawabelia itsajota ponapona paxa Jacob. ²⁶ Pepatsicujinae Canaán nacuyabelia, taxuxuaba paxa petsipaebijawa José peponaponaejawa abaxē, pacuenianua bajaraponē pe-ewetaponaponaenē bajarapanacuata. Nexata, Jacob ajamatabēcuenecowēbi pacuenia exanaejitsia, pacuenianua jumaitsijsia. Apocaējēpaetsinua pejumexaniataejawa xua tsipaebatsi. ²⁷ Bajarapamonae tsipaeba daxitajumexi pacuenia jumaitsi José pebarēcuaicuajjaijawatatsi. Icatsianua, itsa tane xua peto-itorobijawatsi, bueyu perobobocaemonē peyacaponaemonēnexatsi, nexata matapania bajaraponē jamatabēcuenenarēya bitso. ²⁸ Nexata jumaitsi:

—¡Pexaniacuene cajena! Netoxanepana abaxē tataejawa taxēnato José piasaētsaponaponaejawa. Nexata, taeliajē tatēpaewajēnaeya —jai jamatabēcuenenarēya.

Jacob barëwarapa pijamonae yajawa Egipto nacujawabelia

46 ¹Israel pitsapa daxita pecobecowë yajawa. Nexata, najetaruca pepatsinexa Beersebajawata, namuto-epatua Egipto nacujawabelia peponaenë.^v Daxita pijajiwi yajawanajetaruca, pecobecowë-ata. Bajara-ponë itsa pata Beersebajawata, nexata dajubi tajuita altar-jumata paxa Isaac pijaDIOsojawabelia. ²Bajarapamerawi DIOso tsitanaitajëtatsi majitsinaebo-cuenia. Junatatsi pewënëta:

—Jacob —jai.

Nexata, bajaraponë jumecanawiata:

—Marajota nucajêje —jai.

³Nexata, DIOso jumaitsi:

—Xanë ra Diosonë, axa pijaDIOsonë tsaponaponae. ¡Pëtsa junawame neponaejawa Egiptojawabelia! Bajarajota raja, xanë ayaibitsaëtoxaneto capitsapaponaenajë nemomoxi. ⁴Xanë cayajawa tsanetsi Egipto nacujawabelia neponaenë. Bajarapacuenia icatsia xanë jutsianajë nemomoxi bajarapanacuawerena, penawiatsinexa mapacanaán nacujawaberena. Nexata, xamë bajarabelia nepatsicujinae, itsamatacabijawabelia itsa tēpaename José nucaena nemuxuneneta pecataenexa netēpaejawa —jai DIOso majitsinaebo-cuenia Jacob-jawabelia.

⁵Nexata, bajaraxuacujinae Jacob barënaropota Beersebawecua.

Jacob pexi junaeya-exanatsi bueyu perobobocaemonëjawatsia, faraón peto-itorobimonëtsi peyacaponaemonënexatsi. Bajarapacuenia pexi-ata junaeya-exana, pijawaxi-ata. ⁶Jacob nexata daxita peyajawaponaponaewi najetarubena Egiptojawabelia. Caponanua pijadajubibitsaëtonë, daxita-xua xainapona pecobecowë Canaán nacujawata. Bajarapacuenia yajawanajetaruca peyajawaponae. ⁷Nexata, daxita pexi pebijiwí, petiriawinua, pemomoxi-ata yajawanajetaruca Egiptojawabelia.

⁸Marapamonaeye Israel-pijinëjawawerena pepitsapaewi pewënëanë, pamonaë pebarëwarapaewitsi Egipto nacujawabelia. Israel-pijinë itsawënë Jacob. Nexata, Jacob yajawapata Egipto nacujawabelia mapamonaeye:

Jacob pexënato matapijinë Rubén. ⁹Rubén pexi mapamonaeye: Hanoc, Falú, Hezrón, Carmi-ata.

¹⁰Jacob pexënato Simeón. Bajaraponë pexi mapamonaeye: Jemuel, Jamín, Ohad, Jaquín, Zohar, Saúl-ata. Simeón xaina Saúl Canaán nacupijipetiriwata.

¹¹Jacob pexënato Leví. Bajaraponë pexi mapamonaeye: Gersón, Coat, Merari-ata.

¹²Jacob pexënato Judá. Bajaraponë pexi mapamonaeye: Er, Onán, Sela, Fares, Zara-ata. Itsiata baitsi jane, Er, Onánbeje tēpabeje Canaán nacuata, Judá pebarëwarapaewajënaeya Egipto nacujawabelia. Fares pexijiwiweje pijinia: Hezrón, Hamul-beje.

¹³Jacob pexënato Isacar. Bajaraponë pexi mapamonaeye: Tola, Fúa, Job, Simrón-ata.

v 46:1 *Egipto nacujawabelia peponaenë*: Pacuenia Dioso jumaitsi bajayatami pamo Abraham-jawabelia, bajarapacuenia Jacob barëwarapa daxita pijamonae Egipto nacujawabelia. Taema Gén. 15:13.

¹⁴ Jacob pexénato Zabulón. Bajaraponë pexi mapamonaaje: Sered, Elón, Jahleel-ata.

¹⁵ Daxita bajarapamonae Leajawawerena pepitsapaewi. Powa toxaina Jacob Padán-aram nacuata itsa jinawanapa. Pexénatoyo pijinia toxaina, pewënë Dina. Nexata, Jacob, Leabejewawerena, pitsapa daxitata treinta y tres pajiwi-beje pexi, pemomoxi yajawa, pebijiwi, petiriawa-ata.

¹⁶ Jacob pexénato Gad. Bajaraponë pexi mapamonaaje: Zifión, Hagui, Ezbón, Suni, Eri, Arodi, Areli-ata.

¹⁷ Jacob pexénato Aser. Bajaraponë pexi mapamonaaje: Imna, Isúa, Isúi, Bería, Serawënëwa-ata. Bajarapowa petiriwa bajarapamonae pejuyapijiwa. Bería pijinia pexijiwi-beje: Heber, Malquiel-beje.

¹⁸ Daxita bajarapamonae Zilpajawawerena pepitsapaewi, powa Lea pija-jiwitowa, amoneyacuenia perajutsiawatsi paxa Labán. Bajarapowa toxaina pexi Jacob-jawabelia, daxitata diez y seis pajiwi-beje, pemomoxi yajawa.

¹⁹ Jacob xaina anijanëbeje Raquel-jawabelia: José, Benjamín-beje. ²⁰ José pijinia xaina pexijiwi-beje Egipto nacujawatalia: Manasés, Efraín-beje. Bajarapajiwi-beje tonaitajëtatsi Asenat-wënëwata, Potifera pexénatoyo. Potifera tonacue-nabaponapona On-wënë, jumapecataenë sacerdotenëcuenia Egipto nacuata.

²¹ Jacob pexénato Benjamín. Bajaraponë pexi mapamonaaje: Bela, Bequer, Asbel, Gera, Naamán, Ehi, Ros, Mupim, Hupim, Ard-ata.

²² Daxita bajarapamonae Jacob Raquel-bejewawerena pepitsapaponaewi. Daxitata catorce pajiwi-beje, pexi, pemomoxi yajawa.

²³ Jacob pexénato Dan. Bajaraponë pexénato pewënë Husim.

²⁴ Jacob pexénato Neftalí. Bajaraponë pexi mapamonaaje: Jahzeel, Guni, Jezer, Silem-ata.

²⁵ Daxita bajarapamonae pepitsapaponaewi Bilhajawawerena, powa Labán amoneyacuenia rajuta pexénatoyo Raquel-jawabelia, petonacuenebaponaponaewanexatsi. Nexata, Jacob, Bilhabejewawerena, pitsapa siete pajiwi-beje daxitata, pexi, pemomoxi yajawa.

²⁶⁻²⁷ Pamona israelitawi Jacob pepopijamonae yajawapata Egipto nacuata namata-ëjëta setenta pajiwiyo-beje, Jacob pexi, pemomoxi yajawa, namata-ëjëtsinejewa pecopenawaxi. Jacob barënajetaruca sesenta y seis pajiwiyo-beje pexi, pemomoxi yajawa. Bajarapamatacabijawa pijinia José pewajënaeya ponapona Egipto nacuata pexénato anijanëbeje yajawa, ponë-beje naexana Egipto nacuata. Nexata, bajarapacuenia daxita penamata-ëjëtsijawata, Jacob, peyajawapatsiwi, José, pexénatobeje yajawa namata-ëjëta setenta pajiwiyo-beje israelitawi pepatsijawa Egipto nacuata.

²⁸ Jacob itoroba copiya Judá petsipaebine-xalia José, jamatejema pecopiapitsinexatsirena Gosén nacujawaberena. Bajarapamonae itsa baja pata Gosén nacuata, ²⁹ José nexata itoroba petonacuenebiwiitsi petoxaniawaetsinexatsi carrozawënëmo, perobobocaemo caballo, peponaenexa paxajawabelia pecopiapitsinexa. Nexata, bajaraponë paepatota tsitanaitajëta paxa, nexata bajaraponë wëwaetaba. Wëyanuenuca bajayajebi paxa. ³⁰ Nexata, bajaraxuacujinae Israel jumaitsi Joséjawabelia:

w 46:26-27 *pecopenawaxi*: Bajarapasenta y seis pajiwiyo-bejewata, aponamata-ëjëtsitsi pecopenawaxi, tsipaji Jacob apopijamonaeyajuwënëwi. Saya namata-ëjëta baitsi pexi, pemomoxi-ata.

—Ajena tacataecujinae xanë tajacujaya, tacacaxitajarabijawa abaxë nia-saëtsaponaponaenë, nexata xanë baja tēpae-atanë apo-itsacune tacataecujinae —jai jamatabëcuenebarëyaya pexënatojawabelia.

³¹ José nexata jumaitsi pematapijiwijawabelia, daxita paxa peyajawapatsi wijawabelia-ata:

—Nexata, ponaenajë tatsipaebinea faraón, tayapëtaeya-exanaenexa panepatsijawa, tajumaitsinexa: «taxa, pexi, pemomoxi-ata yajawapata pejinawanapaewimi Canaán nacujawatalia. Pata maberenaje xanë imoxoyojawata pejinawanapaenexa. ³² Bajarapamonae capata piija-ovejabitsaëtonë, pijavacabitsaëtonë-ata, daxitaxuanë xaina pecobecowë bajarapamonae, tsipaji penacuenebicuene pewetsijawa dajubimonae, oveja, vacanua», tajainexa bajaraponëjawabelia. ³³ Nexata, itsa faraón pacajunatsiana pape-cayanijobinexa panacuenebicuene pata-ewetsijawa oveja, ³⁴ nexata pajumaitsimë tsane: «Paxanë patajanacuenebicuene pata-ewetsijawa oveja. Bajarapacuenianua patajamonae bajayata nacuenewanapa. Bajarapacuenia paxanë-ata panacuenebaponajë», pajamë tsane. Nexata, bajarapacuenia itsa pajumaitsimë tsane, faraón pacatocopatsiana panejinawanapaenexa mapagosén nacujawataje, Egipto nacujajuwënë-ira, saicaya panejinawanapaenexa Egipto nacupajijiwecua. Bajarapamonae Egipto nacupajijiwi apojitsipabiabi peyajawajinawanapaewajawa oveja pewetsiwi, tsipaji bajarapamonae nexa tsitapiacuenebejewawatsi bitso oveja pewetawanapaewajawa —jai José.

José tocopata bitso pexanianacua pijamonaejawabelia

47 ¹⁻² José yajawapona cinco ponëbeje pematapijiwiyajuwënëwi pet-sipaebinea faraón-jawabelia pijamonae pepatsijawa yabara. Jumaitsi:

—Taxa, daxita tajamonae yajawaparena Canaán nacujawawerena. Yajawapata daxita pijadajubi, daxita pecobecowë-ata. Pata-othopa raja Gosén nacujawata —jai. Bajaraxuacujinae, bajaraponë tsitajëta pematapijiwi faraón-jawabelia.

³ Faraón yanijobiaya jumaitsi pematapijiwijawabelia:

—¿Depitsicuene paxamë panacuenebawanapaewi? —jai.

Bajarapamonae jumecanawiata faraón-jawabelia:

—Paxanë raja ovejamonae pata-ewetawanapaewi. Pacuenia patajasalinai ewetawanapa, bajarapacuenia juya paxanë bajarapa-itsinë tsawanapae. ⁴ Paxanë panajetarubenajë mapae Egipto nacujaberena je patajinawanapaenexa, tsipaji patajinawanapaenacuami bitso janibo. Paneto-ajibinua pona patajadajubinexa. Bajaraxuata, pexaniacuena pacawajëtatsi patanecopatsinexamë nijanacuajajuwënëjawata patajinawanapaenexa, Gosén nacujata —jai bajarapamonae faraón-jawabelia.

⁵ Faraón nexata jumaitsi Joséjawabelia:

—Axa rabaja maje catopatajopa, daxita nijamonae yajawa xamëjawaberenen. ⁶ ¡Taema! Xamë rabaja yapëtaneme daxita Egipto nacua. ¡Nexata, axa, daxita nijamonae yajawa rajure pejinawanapaenexa Gosén nacua, pa-ira daxitawecua bitso pexanianacua! Itsa yapëtaneme bajarapamonae yajuwënëwi pecuenecejëpaejawatsi dajubi pewetsicuene, nexata netotsicopatsi-name tajadajubi taneto-ewetawanapaenexa —jai.

⁷Bajaraxuacujinae, José capata paxa Jacob penucaenexa faraón pitabara. Bajarajota, Jacob yaiyataeya pexaniacuenia faraón wënëxaniatsiya bajacoba.

⁸Faraón yanijobatsi:

—¿Detsa pawaijebe xainame neponaponaeucujinae? —jai.

⁹Jacob jumecanawiata:

—Caewaixi saya. Pacuenia tajasalinaiwimi bajayajebi jinawanapa mapanacuataje, apo-itsinë xanë. Xanë baja saya xainaponaponajë ciento treinta pawaijebe tajinarutsijawa. Daxita tajinarutsi-epato neto-ayapëbeje picani tsabiabi —jai faraón-jawabelia.

¹⁰Jacob yaiyataeya penapëjiobicujinae faraón, wecuapona baja. ¹¹José nexata tocopata pijamonaejawabelia Egipto nacuyajuwënë-ira, bajarapana-cuata pejinawanapaenexa, pacuenia baja faraón tonajumecopatatsi. Tocopata bitso pexanianacua daxita irawecua Egipto nacuada. Nexata, bajarapamonae naxainaeyaba Gosén nacujawata, Ramesés tomara imoxoyojawata pebocae-ira. ¹²José nexata paxa rajutabiaba pexaejawa, bajarapacuenia pematapijiwi-ata. Caebopijiwi canacujitsia rajutabiaba penamatawenonae-cuenia pexaejawa.

Egipto nacupijiwi canajeta pija-iraximi faraón-jawabelia, pexaejawanexa

¹³Nexata, bajarapanacuata bitso pewajënaeyabelia, caematacabi canacujitsia, janibo tsaponae; bajarapacuenia Egiptojawata, bajarapacuenia-ata pijinia Canaán-jawata. Nexata, jiwi bitso pijani. Itsamonae yatëpapon.

¹⁴José nexata belia, caetuatapona daxita palatanëmi Egipto nacupijiwi, Canaán nacupijiwibeje, pecomuacaponae trigo Joséjawabelia. Nexata, bajaraponë xaniawaetanajetaruca bajarapapalata faraón pijabota. ¹⁵Pamatacabianëjawa baja to-ajibitsi tsaponae palatacuene Egipto nacupijiwi, bajarapacuenia Canaán nacupijiwi-ata. Nexata, bajarapaepatota Egipto nacupijiwi pona Joséjawabelia pejumaitsinexa:

—¡Panerajure pataxaejawanexa! Apoxanepanae cajena paxanë patanetëpaeya-exanaenexamë patajani, apopataxainaejamatabëcuene palata patacomuatsinexa trigo —jai.

¹⁶Nexata, José jumecanawiata mapacueniaje:

—¡Itsa baja apopaxainaemë palata, nexata, pacapare panijadajubi patanerajutsinexamë, juya patacarajutsinexa trigo panijadajubimatamo! —jai José.

¹⁷Bajarapamonae jejai. Nexata, capata pijavaca, pijacaballo, pija-oveja, pijaburro-ata Joséjawabelia, bajarapadajubi pejamatabëcuene perajutsinexatsi pexaejawa daxita wai-epato. ¹⁸⁻¹⁹Itsiata baitsi jane baja, itsa panepa bajarapawai, icatsia cotocaewiwaita pona bajarapamonae Joséjawabelia pejumaitsinexa:

—Paxanë raja apopanecaëjëpae baja pepacuene patacayamaxë-itojorobinexa. Apopaxainaenë baja pepacuene palata, bajarapacuenia dajubi-ata, tsipaji baja daxitajawaxi pacarajutaponatsi. Apopaxainaenë baja itsacuenejawa pematatsënëa patacarajutsinexa trigomatamo. Saya caeja-wabeje paxainajë: ira, paxanë pajiwi-atanë patanacanajetsinexa-ata faraón-jawabelia patatonacuenebiwinexa amoneya. Nexata, panecomuacaename pataja-irami, bajarapacuenia pajiwinë-ata, juya patanerajutsinexamë trigo.

Nexata, xamē panerajutaponae name pexu pata-ubijawanexa janibocujinae, jamatejema pataja-iranēta patatonacuenebinexa faraón, iranē penapeneta-nubenaeyaniwa. Acuenebi xamē patanetēpaeyabia-exanaejawamē pataja-janijawata, bajarapijina pacuenia, pataja-iranē-ata penapenetanubenaeyaniwa —jai Joséjawabelia.

²⁰Nexata, José jejai. Tocomuaca faraón daxita iranē Egipto nacuapiji-wijawabelia, pamonaē canajetapona pexaejawanexa. Egipto nacuapijiwi canajeta pija-iraxi pijaanicobexae, tsipaji bitso namatawenona pexaejawa. Nexata, bajarapacuenia belia daxita iraxi naxainaeyabapona faraón Egipto nacuata. ²¹Nexata, pamonaē nacanajeta pijacujaya amoneya petonacuenebiwinea, bajarapamonaē baja yacaejēpa daxita Egipto nacujawata. ²²Itsia, José caejawa apocomuatsi pamonaē jumapecataeya pexanaenēanē pijisacerdotewi* pija-iranē, tsipaji bajarapamonaē faraón rajutanajetaruca pexaejawa trigojawanē. Nexata, bajarapacuenia bajarapamonaē apomatawenonaē pecanajetsijawa pija-iranē.

²³José xuacujinae, jumaitsi daxitajiwijawabelia:

—Nexata, ajenaconoxaeta paxamē pajiwiwimē, bajarapacuenia panija-iranēmi patacacomuatsiwi faraón-nexa. Faraón baja papijajawamē, panija-iranēnua-ata, tsipaji xanē tocomuataponajē bajaraponēnexa. Bajaramaje pacarajutatsi pane-ubixunexa bajarapa-irata. ²⁴Jane baitsi, faraón parajutaponae name caejawayo cinco xuabejeyajuwēnējawami caenacuaitsi canacujitsia papecatonacuaitsi jawanē. Itsacuatro xuabeje pijinia pacatonacopatsiana paxamē pane-ubineja, panexaenexa-ata panexi yajawa, daxita panyajawajinawanapaewi paxamējawata —jai.

²⁵Nexata, bajarapamonaē jumecanawiata:

—Bitso cajena xamē pexaniacuenia panesiwanajamatabēxainame. Panejamatabēcueneyawenoname patawecuapanepaenexa patajani patayatēpae-wiminexa. Nexata, ajenaconoxaeta amoneya paxanē patatonacuenebiwi tsane faraón —jai bajarapamonaē.

²⁶Nexata, José tocaējēta daxita Egipto nacuapijiwi perajutabiabinexa faraón-jawabelia caejawayo cinco xuabejeyajuwēnējawami caenacuaitsi canacujitsia. Bajarapacuenia exanawanapa abaxē maparucae-ataje tsitecaeya. Itsia baitsi jane, pamonaē jumapecataeya pexanaenēanē pijisacerdotemonaē, bajarapamonaē apotsicarucaetsi perajutsinexa, tsipaji bajarapamonaē pija-ira, caeto-ata, apoxinae faraón pesaēta, tsipaji apocanajetsi bajaraponējawabelia.

Israel tonaliwaisicopata José pemēthētsiyaniwatsi Egipto nacuata.

²⁷Nexata, Israel pijamonaē nacopata Egipto nacujawata pejinawanapaenexa. Bajarapamonaē naxainaeyaba Gosén nacuapiji-ira. Bajarajota nexata, bajarapamonaē bitso ayaibitsaēto tsaponaē. ²⁸Jacob ponapona diecisiete pawaijeje Egipto nacujawata. Bajarajota baja, xaina ciento cuarenta y siete pawaijeje.

²⁹Pamatacabijawa Israel nayapētane baja imoxoyo pewajēnae petēpaejawa, nexata itoroba petojunatsinexatsi José pejumaitsinexa:

x 47:22 *jumapecataeya pexanaenēanē pijisacerdotewi*: Taema «jumapecataeya pexanaenēanē pijisacerdotemonaē», glosariojawata.

—¡Itsa pepacuene xamë pexaniacuene jitsipame taneto-exanaejawamë, nexata, nacobeuare tathaëbëxëpanayota tanenaliwaisicajonenexamë! ¡Nejumaitsimëre pepacuene najumecapanepaeya xua xanë cajumaitsijitsiatsi taneto-exanaenexamë! ¡Pëtsa majotaje nemëthëtame Egipto nacujawataje!
³⁰Itsa xanë tëpaenajë, nexata nejutsianame Egipto nacuwecua, tanemët-hëtsinexamë tajamonaemi pijamëthëwajujawata —jai Israel.

Nexata, José nacobeuata paxa pethaëbëxëpanayota. Bajaraxuacujinae, jumaitsi:

—Bajarapacuenia cato-exanaenatsi —jai.

³¹Icatsia, jumaitsi Israel:

—¡Xaniajaiya nejumaitsimëre itsa xaniajamëjitsia! —jai.

Nexata, José najumecapanepaeya jumaitsi pexaniajaicuenia. Bajaraxuacujinae, Israel nexata nawëbuatanajereca pijacamajawabetsia pexaniajamatabëcuene perajutsinexa DIOSojawabelia.

Jacob pexaniacuene cuenewajunupaeba Efraín, Manasés-bejajawabelia

48 ¹Bajaraxuacujinae itsamatacabianëjawabelia, itsajiwiyo yapëtaeya-exanatsi José paxa peto-awitanejawatsi. Jumaitsitsi:

—Taema. Axa rabaja bitso cato-awitane —jaitsi.

Nexata, José pona paxa petaenexa. Yajawapona pexënatobeje, Manasés, Efraín-beje. ²José pepatsicujinae, Jacob tsipaebatsi pexënato pepatsijawa petaenexatsi. Nexata, nasaëta ayaicuenia, pe-ecaenexa pijacamajumata, pecopiapitsinexa, tsipaji asaëjibi tsanucæ. ³José pejonecujinaelia itsajota paxa boca, Jacob jumaitsi pexënatojawabelia:

—Dioso ayaijamatabëcuenenë netsitanaitajëta bajayatami Luz tomarata, Canaán nacuata pe-ecaetomarayo. Bajarajota, pexaniacuene necuenewajunuitajëta tanetocopiapatsinexa. ⁴Mapacuenia nejumaitsije: «Xanë raja carajutsianatsi ayaibitsaëto nexi, nemomoxi-ata, nexainaponaenexa, pejinawana-paenexa caenacuapijiwicuenia. Orijibia, nemomoxi rajutsianajë mapa-iraje, panacuata catsitanaitajëtatsi ajena, pijanacuanexa daxitamatacabijawabelia», nejai Dioso. ⁵Nexata, aeconoxæ cayapëtaeya-exanaenatsi nexënatobeje Efraín, Manasés yabara, ponëbeje naexana mapaEgipto nacujawataje, patsinejewanërena abaxë. Bajaraponëbeje taniiji bepepotaxënatobejecuenia, pacuenia taniiji Rubén, Simeón-beje. ⁶Itsiata, bajaraponëbejecujinae, pamona nexi xainaponaename, bajarapamonaecatönacopatsiana peponexicuenia. Itsiata bailsi jane, bajarapamona-ata napitsiana pa-irayajuwënëjawa Dioso rajutsiana Efraín, Manasés-beje pemomoxijawabelia-ata. ⁷Pamatacabijawa barënawiatanajetarucajë Padan-aram nacujawawerena, namuto-epatua ena Raquel-pijiwami newecuatëpa, Canaán nacuata patapua-imoxoyotanajetarubena patapatsinexa Efrata tomarajawabelia. Bajarajota, bitso nenajamatabëxainaeya-exana. Nexata, bajarapowami mëthëtajë namutomuxuneneta, imoxoyo Efrata tomara-wecua, itsawënë pijinia Belén —jai Jacob.

⁸Nexata, paepatota Jacob tane José pexënatobeje, yanijoba:

—¿Jipatsa maponëbeje? —jai.

⁹José jumecanawiata paxajawabelia:

—Bajaraponëbeje Dioso tanerajutsinëbeje, mapanacuataje taponaponaepato —jai.

Bajaraxuacujinae, Jacob jumaitsi:

—Pexaniacuene netocarenamëre bajaraponëbeje weberenayo, tsipaji xanë pexaniacuena Dioso pewënëta cuenewajunupaebijitsianë —jai.

¹⁰ Jacob baja bitso perujunëxae, itaxutotsëcëna. Nexata baja, apocuene-caëjëpaetsi xaniawaetsia petaejawa. Nexata, paepatota José imoxoyotsia-exana pexënatobeje, bajarapaepatota, Jacob wëwaetaba pemomobeje. Itabatsutsunebejenua. ¹¹ Bajarajota, Jacob jumaitsi pexënato Joséjawabelia:

—Xanë aponajamatabëxainanë picani pematatsënëa taca-itabarataejawa. Itsiata, Dioso netocopata tacataenexa, bajarapacuenia nexi-ata —jai Jacob.

¹² Bajaraxuacujinae, José, pexënatobeje wecuarunaeya-exanabeje paxa pethaëtowecua,^y penucaenexabeje pamo pitabarata. José pijinia irataeya nabëxëtsutsiaya nuca paxa pitabarata. ¹³ José pejewaxinëbeje itsa nutabeje paxa pitabarata, Efraín nutatsi José pecujuanenia, Manasés pijinia petsawenonenia. Itsiata bailsi jane, pamo Jacob pitabarata Efraín juya nuca petsawenowanenia, Manasés, matapijinëxae, pijinia nuca pamo pecujuanenia, jamatejema Jacob petsimatanacobeuatsinexa pecujuacobe Manasés-jawabelia, pexaniacuene Dioso pewënëta pecuenewajunupaebijawata. ¹⁴ Itsiata, Israel penamaxëyotsijawatalia namaxë-epatsiaxuabiaya pecujuanenia tsimatanacobeuata juyapijinë Efraín-jawabelia. Bajaraxuacujinae, icatsia petsawenomaxë namaxëyolia. Tsimatanacobeuata matapijinë Manasés-jawabelia. Namaxë-epatsia tsimatanacobeuatatsibeje. ¹⁵ Israel nexata pexaniacuene cuenewajunupaeba, José, pemomobejewawabelia-ata yajawa. Jumaitsi:

—PaDioso jumecowënëtsiaya ponaponabeje tamo Abraham-pijinë, taxa Isaac-pijinëbeje, bajarapaDioso tsitecaeya ajena pamatacabijawaberena abaxë ne-ewetaponapona tanaexanaematacabijawawerenacujinae. ¹⁶ BajarapOnë neto-itoroba pija-àngelnë, tanecapanepaenexa xuanë netsi-ayaijitsia picani. Tojitsipajë bajaraPonë pexaniacuena peyawenonaenexatsibeje mapapewëjëatobeje. Jitsipajënua pewajënaeyabelia jiwi tanenajamatabënapitabiabinexa, tamo Abraham-pijinë, taxa Isaac-pijinëmi-ata, Dioso pexaniacuena peyawenonabibijawatatsibeje. Tojitsipajënua ayaibitsaëtoxaneto pemomoxi pepitsapaponaenexa bajaraponëbejewawata, daxita iranëjawa peyacaëjëpaenexa —jai Jacob pecuenewajunupaebijawata José, pemomobejewawabelia-ata yajawa.

¹⁷ Jacob pexaniacuene pecuenewajunupaebijawatanexabeje pemomobejewawabelia, José itsa cuenetane petsimatanacobeuatsijawa pecujuanenia Efraín-jawabelia, nexata apotsitaxanepanaetsi. Nexata, maxëpita paxa, pecujuacobe pebuatsinexa Manasés pematobocotojawabelia. ¹⁸ Bajarapacuenia pexanaejawata, José jumaitsi paxajawabelia:

—Axa, apobajarapacuenia raja —jai—. Mara ponëje matapijinëje. Ponë jane tsinamatanacobeuare necujuacobe —jai paxajawabelia.

¹⁹ Itsiata bailsi jane, paxa apojitsipae bajarapacuenia pexanaejawa. Nexata jumaitsi:

y 48:12 *pethaëtowecua*: Jacob ecaeya-exana pemomobeje pethaëtota, penajamatabëcuene-itajëtsinexa petaejawatsibeje pepopexënatobejecuenia. Bajarapacuenia exana judfowi bajaya-tami, pitajëtsinexa pexënatocuenia, apopepopexënato-ata. Taema Gén. 30:3

—Yapētāniji rabaja, taxēnato. Yapētāniji rabaja, matapijinē Manasés-jawata-ata pepitsapaenexa ayaibitsaētoxaeneto. Itsiata baitsi jane, juyapijinē, Efraín, ayaijamatabēcuenenē tsane matapijinēwecua. Bajaraponējawawerena matatoxenetsia ayaibitsaēto pitsapaponaena, nawitsia itsanacuanēpijiwinexa. ²⁰ Nexata, pexaniacuene Dioso pewēnēta, pecuengewajunupaebijawata pemomobejewawabelia, Jacob jumaitsi mapacueniaje: «Dioso bitso pexaniacuenia papecayawenonabiabixaebeje tsane, nexata, xanē, Israelnē, daxita tamomoxi pexaniacuenia itsajiwijawabelia pecuengewajunupaebijawata, canacuenebabiabiana panewēnēbeje. Nexata, jumaitsi tsabiabi tsane mapacueniaje: 'Pacatojitsipatsi pexaniacuenia Dioso pecayawenonaejawa pacuenia to-exana Efraín, Manasés-bejewawabelia,' jai tsabiabi tsane, pexaniacuenia pecuengewajunupaebijawata», —jai Jacob. Namataxainaeya wēnē-jona Efraín, Manasés-wecua, pecuene-itajētsinexa Efraín pemomoxi pecuennenamatamotsiwinexa, Manasés pemomoxiwecua.

²¹ Bajaraxuacujinae, Israel icatsia jumaitsi pexēnato Josējawabelia:

—Taema. Xanē baja bitso netosajina caematacabibeje tatēpaejawanexa. Itsiata baitsi jane, Dioso pacayajawa tsane. Nexata, icatsia pacanawiabia-exanaena paxamē patamomoximē panacuajawata ponaponabeje panijasalinaenēbeje. ²² Xamē itsiata, canacopatsianame ayai-ira pematatsēnēa nematapijiwiwecua, pa-ira wecuapitajē amorreomonaē, tacuene-amoneyabijawata tabarēnawajabitsaētsimatacabi. Carajutatsi baja necanacopatsinexa Siquem nacua —jai Israel.

Jacob peyajawanajumecopatsiliwaisianē pexijawabelia petēpaewajēnaeya

49 ¹⁻² Jacob itsamatacabi junata pexi doce ponēbeje, tajēwelīa pecuene-itajētsinexa caenē canacujitsia DIOSO pewēnēta, pitsicuene pemomoxi tocopiapataponaejitsiatsi itsamatacabijawabelia.

Nexata jumaitsi:

—Xanē, Jacobnē, pataximē pane-imoxoyoremena cujibaremena nacaetuatsiaya, patanejumetaenexamē. ¡Panenamuxuna-ewere xaniawaetsia pane-axanē, Israelnē, pacuenia pacajumaitsiijitsiatsi! —jai.

³ Nexata, jumaitsi pexēnato Rubén-jawabelia:

«Rubén, xamē taxēnato matapijinēmē. Tajapewējēatojamatabēcuen ejawawerenacujinae copiaya tacaxainaenē. Necanacopatsinēnexa picani, pecayaiyataejamatabēcuenē, nenamatacitorobisāē nexainaejamatabēcuenē-ata, itsamonae taxiwecua. ⁴ Itsiata baitsi jane, bajarapajamatabēcuenemi baja apocanacopatsimē* tsane, tsipaji raja pacuenia mera penawotsijawata jiwi apocuenecaējēpaetsi pecaranatsijawa, bajarapacuenia xamē-ata apocacuenecaējēpae

z 49:4 *apocanacopatsimē*: Rubén matapijinēxae, naexanaejitsia picani pewetsinēnexa daxita pejuyapijiwi. Bajarapacuenia-ata pemomoxiyajuwēnēnē picani canacopatsijitsia pewetsinēnexa daxita Israel-pijinē pemomoxi. Itsiata, paxa apokeyaiyataexae, bajarapajamatabēcuenemi wecua-ajibia-exanatsi. Taema Deut. 33:6; Jueces 5:15-16.

najamatabēcuenecataitsijawa pibisiacuene nexanaeyaniwa.
 Bajarapajamatabēcuenē nexainaexae, xamē piuracuene neto-
 exaname, pibisiacuene ne-exanaejawata newitota tajawa, cotocaewi
 tapitsiwajawabelia»,^a jai Jacob tajēwelia pecuene-itajētsijawata
 Rubén-jawabelia.

⁵ Icatsia, Jacob jumaitsi Simeón, Levíbejajawabelia:

«Paxamēbeje, Simeón, Levíbeje, caejamatabēcuenē
 panexainaenēbeje, bitso piabejecuene pane-exanaenexabeje.^b

⁶ Caeto-ata xanē apojitsipaenē patacayajawanajumejai
 tsijawatabeje xua pa-exanaejitsiamēbeje, tsipaji pane-
 anaepanaejawatabeje, jiwi ayaibitsaēto pabeyaxuabamebeje,
 ayaibitsaēto dajubi-ata be-itacanicuena pabejiobia-exanamebeje,
 panetaxunepecaucubijawatabeje. ⁷ Bitso pane-anaejamatabēcuenēbeje
 yabara, pacacuene-itajētatsibeje pibisiacuene panenatotaenexabeje.
 Bitso pibisiacuena panebejiobia-exanaexaabeje yabara,
 pacacuene-itajētatsibeje pibisiacuene papecatocopiapatsinexabeje.
 Bajarapajamatabēcuenē panexainaexaabeje, nexata panemomoxibeje
 nacayajatsiya^c jinawanapaena, daxita panacuanējawa
 jinawanapa tamomoxi», jai Jacob tajēwelia pecuene-itajētsijawata
 bajaraponēbejajawabelia.

⁸ Nexata, jumaitsi pexēnato Judájawabelia:

«Xamē Judá, pecawēnēbarēyataebiabinē tsane nijamonae. Necuene-
 amoneyabiabinē tsane nijawajabitsaē. Daxita nijamonae
 nematapijiwi, nejuyapijiwi-ata, yaiyataeya pematabacabēta
 nitabarata catonubenabiabiana.

⁹ »Xamē newēthē pejananē^d necuenejēpaenē tsane necuenesaē
 yabara. Pacuena newēthē pebeyaxuabinē baxaeyaxuaba,
 bajarapacuenia xamē nijawajabitsaē cuene-amoneyabianame.
 Pacuena jiwi apojamatabē-itonotsi newēthē, perujunē,
 bajarapacuenia xamē apocajamatabē-itonotsi tsane,
 nijawajabitsaē necuene-amoneyabicujinae. Pacuena jiwi
 cujanawijitsipa pejamatabē-itonotsijawa, newēthē penacuera-
 ewetanucaenē, pejananē-ata, bajarapacuenia jiwi cacujunawiana
 pecajamatabē-itonotsijawa. ¹⁰ Itsajiwi-ata apowecuapitsitsi tsane
 nemomoxi penamatacaitorobisaē, peyanacua-ewetsicuene-ata.
 Bajarapamonae canacopatsiana bajarapanamatacaitorobisaēcū
 ene, pepatsimatacabijawabelia ponē pepopeyanacua-ewetsinēnexa

a 49:4 *cotocaewi tapitsiwajawabelia*: Bajarapowa pewēnē Bilha. Taema Gén.

35:22 b 49:5 *piabejecuene pane-exanaenexabeje*: Taema Gén. capítulo

34:25 c 49:7 *nacayajatsiya*: Pacujinae Josué bexējajawabelia ira barēnatsicobetsana

caepemomoxibitsaēto canacujitsia, rajuta cae-iratupayo Judá pemomoxi, Simeón pemomoxibejajawabelia-ata penajuaxainaenexa. Leví pemomoxi pijinia aporajutsitsi pija-
 iratupayonexa. Biji rajane, caebitsaēto canacujitsia, najinawanapa nacayajatsiya daxita Israel
 nacujawa. **d 49:9** *newēthē pejananē*: Taema Apoc. 5:5; Núm. 24:9 Bajarapanewēthē raja
 petsaunaenē, pinijiwirianē.

daxitamatacabijawabelia. Nexata, pepopeyanacua-ewetsinē
pepatsicujinae, daxitanacuanēpijiwi jumecowēnētabiabianatsi.

¹¹»Nemomoxi pija-uvabacabonē petocuainawitsixaetsi tsane,
bējainejewa cēbanubiana pijaburroxi pija-uvabacabonējawata,
tsipaji pijaburroxi tocuaxae-atatsi tsipae, tsiteca nacopatsiana
ayaijawa. Uvacuabarēmenera petonawitsixaetsi tsane,
aposiwajamatabēcuenebējai tsane itaxutejema pecanacuenebinea.
Bemeracuenia canacuenebiana. Bajaraporata pija-ese quiatsi-
ata tsipae, tsiteca nacopatsiana ayaijawa uvabarēmeneranē.

¹²Bajarapamonae itaxutotsaujai tsabiabi tsane, bitso vinoranē
piapaeyabiabixae. Lecheranē piapaeyabiabixae, wononiojai tsane.
Bajarapacuenia vinoranē, lecheranē-ata, petonawitsixaetsi tsane,
ayaijawa apaeyabiabiana», jai Jacob tajēwelia pecuene-itajētsijawata
Judājawabelia.

¹³Nexata, jumaitsi pexēnato Zabulón-jawabelia:

«Zabulón, nemomoxi jinawanapaena imoxoyo manuamene-itapajawa.
Nexata, bajarapawēpanējawa, barcomoxanetonē patabiabiana
daxitanacuanējawawerena. Nemomoxi pejinawanapaenacua
tocopiarucaenatsi Sidón nacujawabelia», jai Jacob tajēwelia
pecuene-itajētsijawata Zabulón-jawabelia.

¹⁴Jumaitsi pexēnato Isacar-jawabelia:

«Isacar, nemomoxi cuenejēpaena burro, petsijumacēbinētsi
piarewedorobeje. Nexata, apoeyotsixae, jumaboboca
petsijumacēsidorotsibeje. ¹⁵Itsiaata tsitapexaniataxunaexaetsi,
pexaniapona pexaeyabiabixaenua, jamatejema nacaewetabiaba
pexinaenētsijawabelia, petojotabibinexa. Bajarapijinia pacuenia
nemomoxi nacaewetsiana itsamonaejawabelia, piarewecuenejawanē
petonacuenebabibinexa, tsitapexanianacuaxaetsi
pejinawanapaenexa», jai Jacob tajēwelia pecuene-itajētsijawata
Isacar-jawabelia.

¹⁶Nexata, jumaitsi Dan-jawabelia:

«Dan, nemomoxi tsiquiribitsaētoyo-ata tsane, bajarapamonae pijacuata
nayanacua-ewetsiana. ¹⁷Pacuenia jomo namutomuxuneneta
pe-ecaenē, tsiquiriyo-ata, caballo, petaxusalibēsiniyawata,
pejumaoponaenē wejumaquababiabica irabetsica, bajarapacuenia
nemomoxi tsiquiribitsaētoyo-ata tsane, cuene-amoneyabiana
pijawajabitsaē, pija-ira pewecuapitsinexa», jai Jacob tajēwelia
pecuene-itajētsijawata Dan-jawabelia.

¹⁸Nexata, Jacob jumaitsi Jehovájawabelia: «Jehováme, tsiteca tawajēnae-
jawabelia cajamatabēcuenē-ewetaponatsi, tanecapanepaejawamēnexa taja-
wajabitsaēwecua», jai Jehovájawabelia.

¹⁹Bajaraxuacujinae, jumaitsi pexēnato Gad-jawabelia:

«Gad, nemomoxi itsanacuawerena tsimaxëpatabiabianatsi penacobetoxotawanapaewi. Itsiata bailsi jane, nemomoxi pëbarajinaena, pebarënewajabitsaëtsinexa bajarapamonaejawabelia», jai Jacob tajëwelia pecuene-itajëtsijawata Gad-jawabelia.

²⁰ Icatsia, jumaitsi pexënato Aser-jawabelia:

«Aser, nemomoxi pejinawanapaenacua capitsapabiabiana nawitsia pexaejawanë, bitso pexaniapexaejawanë, xuanë pepopeyanacua-ewetsiwi baxane», jai Jacob tajëwelia pecuene-itajëtsijawata Aser-jawabelia.

²¹ Nexata, jumaitsi pexënato Neftalíjawabelia:

«Neftalí, nemomoxi cuenejëpaena owebi pesorowato wayafopijinë, nexata jamatejemajinawanapaena. Capitsapabiabanua pexanianacuebi, pacuenia owebi pexi, pejananëxi», jai Jacob tajëwelia pecuene-itajëtsijawata Neftalíjawabelia.

²² Nexata, jumaitsi pexënato Joséjawabelia:

«José, nemomoxi cuenejëpaena banacali, mene-itapata penucaenae, ponae nawitsia pecuai capitsapabiaba. Bajarapacuenia nemomoxi ayaibitsaëto pexi xainaponaena. Pacuenia banacali pexaniananaxaniabimaxërananë, peyacaranatsijawawecua yasipitsapabiaba itsapanabelia, bajarapacuenia nemomoxi, pinijibitsaëtoxae tsane, pijanacuawecua itsanacuanëjawa jinawanapaena. ²³ Bajarapamonae pijawajabitsaë pitoyajamatabëcuenetsi bejiobia-exanaenatsi. Tsimaxëpatabiabianatsinua, xuatabonëta pebixabajarabinexatsi. ²⁴ Itsiata bailsi jane, nemomoxi maxëcueranaenejewä, pebixabajarabiwi cuene-amoneyababiabiana pijawajabitsaë, tsipaji Jacobnë tajaDIOSO, piacuenesaënë, yawenonabiabianatsi. BajarapaDioso pewetsinë pijajiwi playaicuenewecua. Peyacaranatsinënua be-iboto.

²⁵ »Xanë, axanë, catojitsipatsi tajaDIOSO pexaniacuenia papecayawenonabiabinexa, xamë, nemomoxijawabelia-ata. Catojitsipatsi Dioso ayaijamatabëcuenenë daxitawecua, papecayawenonabiabinexa athëbëwetsica emajawanë papecatocopiapatabiabinexa, irabëxëpanawetsinanua mera papecatonawitsinexa, paxamë ayaibitsaëto panexi panexainaponaenexa, panijadajubimona-ata. Tojitsipajënua Dioso peyawenonaenexatsi petiriawi pexi pexainaewi, dajubi pesorowabi-ata pemitsewiyaniwa.

²⁶ »Xanë, axanë, xuanë ajena cacuenewajunupaebatsi DIOSO pecayawenonaenexa, bitso pexaniacuenejawanë tajamonaemi tanecuenewajunupaebijawanëmi matatoxenetsia. Pacuenia petsutonë apowerewerecae pe-enaecujinae, bajarapacuenia catojitsipatsi bajarapapexaniacuenejawanë necanacopataponaenexa daxitamatacabijawabelia. Bajaraxuata, cacuenewajunupaebatsi

pexaniacuenia, taca-itapetsixae daxita nijamonaewecua pecayaiyataenēnexa», jai Jacob tajēwelia pecuene-itajētsijawata Josėjawabelia.

²⁷Icatsia, jumaitsi pexēnato Benjamín-jawabelia:

«Benjamín, nemomoxi cuenejēpaena lobomona^e pianaešanaewi.

Pacuenia lobobitsaēto bajayacunua bepjiayo beyaxuaba

pexaenēnexa, bajarapacuenia nemomoxi bepjiayo

werexuababiabiana pijawajabitsaē. Pacuenianua caniwiyo lobomona^e

najuaxane pebeyaxuabinēmi penacopatsijawa, bajarapacuenia

nemomoxi natsicobetsanabiabiana pewecuanotsijawanē

pijawajabitsaēwi», jai Jacob tajēwelia pecuene-itajētsijawata

Benjamín-jawabelia.

Jacob wecuatēpa pijamona^e

²⁸Bexējawabelia Israel^f pexi doce ponēbeje pemomoxi nacopata doce papemomoxibitsaēto bejecuenia; baitsi doce papemomoxibitsaēto beje^g naco-pata pijasalina iwi pewēnēcuenia. Bajarapacuenia Israel cuene-itajētapona pexaniacuenia caenē pexēnato canacujitsia pewēnēta Dioso, peyawenonaenexatsi. Caenē canacujitsia saicayacuenia tsitajētapona pacuenia taeponaen-jitsia bajaraponē pecuenejamatabēcuenē. ²⁹Bajarapacuenia pecuenetsitajēt-sicujinae, Jacob yajawanajumecopata pexi mapacueniaje:

—Netosajina rabaja caematacabibeje tatēpaenēxa. Nexata, panemēthēt-sianame tajamonaemi yajawa pa-ibowajumēthējawata bajarapamonaemi namēthēcaponā, pa-ibowaju boca petsutoyenepanata Efrón-pijinēmi, heteo-wirianē, pijanacuamita pecomuatsi-ira. ³⁰Pamēthē boca pemutowetsina Mac-pelawēnē irajawata, Mamrepijinēmi pija-irami imoxoyojawata, pa-ira baitsi Canaán nacuata Abraham comuata Efrón-jawabelia penatsixaniawaetabuat-simēthēnexa petēpaewi caewiriabitsaēto. ³¹Bajarajota raja, mēthētatsi tamo Abraham-pijinēmi, bajarapacuenia pijawami Sara-ata, bajaraxuacujinae, taxa Isaac-pijinēmi-ata, pijawami Rebeca-ata. Nexata, bajarajota xanē-ata mēthē-tajē tajawami Lea. ³²Nexata, bajarapamēthē comuatabuata daxitanēxa heteo-monaejawabelia bajarapawayafotusato yajawa —jai Jacob pexijawabelia.

³³Itsa baja Jacob najumewereta bajarapacuenia pejumaitsiyawa pexijawabelia, icatsia bajaraponē bocanajetsia pijacamajawabetsia. Bajarapacuenia bajaraponē baja tēpa.

50 ¹Bajaraxuacujinae, José paxa petēpaenē wēwaetabiaya aēāējai, ya-itsaxutonueya itabaratsutsunēna. ²Bajaraxuacujinae, itoroba petonacuenēbiwitsijawabelia pamona^e perabē-exababiaba petējiwi pija-cujirucuenia petuxujuwijawanēta, bepjiayo petsabanaeyaniwa. Nexata bajarapacuenia, bajarapamona^e toperabē-exaba paxapijinē. ³Cuenenajē-matawanapa cuarenta pamatacabibeje, tsipaji bajarapamatacabibewajēto namatawenonabiaba xaniawaetsia peperabē-exabinēxa.

e 49:27 *lobomona^e*: Taema «lobo», glosariojawata. **f** 49:28 *Israel*: Taema Gén. 32:28, neyapētaenēxa xua yabara anijawēnēbeje xaina. **g** 49:28 *doce pabitsaēto beje*: Taema «tribu», glosariojawata.

Egipto nacuapijiwi pijinia, José paxapijinē petēpaecujinae, pijacujirucuenia wēnajanatabēxainaeya jinawanapa setenta pamatacabibejecuenia.

⁴Itsa baja tocopiarucatsi pamatacabianē najamatabēxainaeya ponapona paxapijinē pewēnamuto, bajaraxuacujinae José barēcuaicuajiai faraón peyawanacuenebiwijawabelia. Jumaitsi:

—Itsa paxamē pacatsitaxanepanaponaponatsi patacayajawanacuenebi-jawa, nexata pexaniacuene pane-exanare, patanetojumaitsinexamē^h faraón-jawabelia xua yabara cae-epatoyo ajibinē tsarucae tsane. ⁵Xanē taxapijinē nitoroba najumecapanepaeya tato-exanaenexa mapacueniaje, itsa baja imoxoyo pewajēnae petēpaejawa. Nejumaitsi: «Xanē rabaja tēpaejitsianē. Nexata, itsa tēpaenajē, panemēthētsianame pamēthējawabelia natsiwajēnae-weretabuatajē petsutoyenepanata Canaán nacujawatalia», nejai. Nexata, xanē najumecapanepaeya jumaitsinē bajarapacuenia tato-exanaenexa. Bajaraxuata, pexaniacuene pacawajētatsi, patanecopatsinexamē taxapijinē tamēthētsinexa tanejumaitsicuenia. Bajaraxuacujinae, icatsia xanē bepjiia-cuenia nawiataponaerenajē maberenaje —jai José bajarapamonaejawabelia.

⁶Bajarapamonae petsipaebicujinaetsi, faraón juya jumecanawiatsiaya jumaitsi:

—Pacuenia axapijinē cawajēta, to-exanare. Nexata, ponare nemēthētsinexa pecawajētsicuenia —jai faraón pejumecanawiatsicuenia.

⁷Nexata José pona, paxapijinē pemēthētsinexa. José yanabatsi daxita pamonaē faraón peyawanacuenebiwi, pamonaē penamatacaitorobiwi, itsamonaē-ata pewetsiwi Egipto nacuata. ⁸Bajarapacuenia José yanabatsi daxita pijamonaē, pematapijiwi, pejuyapijinē, itsamonaē pijamonaē-ata. José pijamonaē pueneba Gosén nacujawata caemonaē petiriawi, pejewaxi yajawa, pijadajubibitsaētonē-ata. ⁹Itsamonaē Egipto nacupijijawabitsaē napona caballo peyarobobocaacarrozamonēta. Itsamonaē pijinia yapona caballonēta. Nexata daxita bajarapamonae najuapona, bitso pinijibitsaēto-xaneto. ¹⁰Itsa baja bajarapamonae pata-othopa Atad-taxunaeta, ⁱitsajota trigo tanabataxuababiaba, Jordán-mene itsapanawetsina, bajarajota icatsia bajarapamonae wēnua Jacob-pijinē siete pamatacabibejecuenia.

¹¹Nexata cananeomonaē petaejawata, bitso najamatabēxainaeya pejinawanapaejawa Atad-jawata, bajarapamonae najumaitsi: «Egipto nacuapijiwi bajarajota bitso najamatabēxainaeya jinawanapa, petēpaenē pemēthētsinexa», najai. Bajaraxuata, Atad-wēnēmi wēnēruba Abel-mizraim-wēnē.^j

¹²Nexata Jacob-pijinē pexi exana pacuenia baja tonajumecopatatsi.

¹³Nexata pexi caponatsi Canaán nacujawabelia, bajarajotalia pemēthētsinexatsi petsutoyenepanata pa-ibowajumēthē boca Macpela nacujawata; pamēthē Abraham comuata Efróna heteowirianējawabelia, jamatejema penamēthēcaponaeenexa bajarapabitsaēto. Bajarapamēthē boca pemutua-bereca Mamrepijinē pija-iranacuajawata. ¹⁴José pemēthētsicujinae paxa,

h 50:4 *patanetojumaitsinexamē*: José apocuenecaējēpaetsi petsipaebinexa pijacuata, tsipaji abaxē wēnajanatabēxainaeya ponapona paxapijinē. Nexata, bajarapitsinajanatabēxainaējawata, apot-sixanepanaetsi jiwi penucaenexa faraón pitabarata. Bajaraxuata, wajēca peyawanacuenebiwitsijawabelia petotsipaebinexatsi, xua caējēta peponaejawanexa. **i 50:10** *Atad*: Itsawēnē pijinia bajarapataxunae pewēnē Goren-ha-atad. **j 50:11** *Abel-mizraim-wēnē*: «Egipto nacuapijiwi penajamatabēxainaetaxunae», pejaiwēnē.

nawiarena baja Egiptojawaberena daxita pematapijiwi yajawa, pamonanua yanabatsi bajarabelia pemëthëtsijawata.

**José jamatejemaya-exana pematapijiwi,
pecujunawixaetsi pijaneconimijamatabëcuene**

¹⁵ Jacob baja itsa tëpa, nexata José pematapijiwi siwanajamatabëxainatsi mapacueniaje: «José meta waxaitsi naca-itoyanaëcotsiana, pibisiacueni wajasijamatabëxainaejamatabëcuene bajayata», jamatabëjai tsawana-pae pematapijiwi. ¹⁶ Nexata, bajarapamonae tonajumexuaba mapacueniaje: «Petëpaewajënae raja waxa paneyajawanajumecopata patacatsipaebinea. ¹⁷ Pajumaitsimë tsane José mapacueniaje tawënëta: 'Pexaniacueni cawajë-tatsi neto-exanaenexa nematapijiwijawabelia. Jitsipajë nesiwajamatabëcu-necaewijawa pajamatabëcuenemi casiwanajamatabëxaina bajarapamonae, paneconi natsi-exana xamëjawabelia bajayatami, xua-ata pibisiacuenia catane,' jai bajarapacuenia xamë yabara. Bajaraxuata, paxanë pacaju-maitsitsi patanesiwajamatabëcuene caewinexamë patajapibisiagamatabëcuene. Paxanë raja waxa pijaDIOSO patatonacuenebawanapaewi», jai petonajumexuabijawata.

Nexata, paepatowajëto cuaicuaijai liwaisicaponawewi, José bajarapaepa-tota aëaëjai, tsipaji pematapijiwi abaxë jamatabëtsiteca peto-exanaejawatsi bajayata. ¹⁸ Nexata, xuacujinae icatsia José pematapijiwi parena pebarëcuai-cuaijainexa. Nexata, bajarapamonae pijacuenecuenia yaityataeya irataeya bobenajunua José pitabarata. Bajarapamonae nexata jumaitsi:

—Xamë baja majotaje paxanë panexainameje nexata amoneya patacatonacuenebiwi tsane —jai.

¹⁹ Itsiata baitsi jane, José jumecanawiata mapacueniaje:

—¡Pëtsa pajunawame! ¿Xanë tsaja DIOSOnë patacananeconitsia-exanaenexa? Caenë DIOSO tsicarucatsi bajaraxua pexanaenexa. ²⁰ Paxamë picani panajamatabëxainame pibisiacuenia patane-exanaenexamë. Itsiata baitsi jane, DIOSO bajaraxua pënëyorota bajarapapibisiacuenemi pexaniacueni jawabelia, wajanacato-exanaenexa xua ajena taewanapatsi, wajanacapanepaenexanua wajani wajatëpaejawaminexa, bajarapacuenia itsamonae-ata ayaibitsaëtonë piasaëtsawanapaenexa. ²¹ ¡Pëtsa bitso pane-cujunawame! Xanë raja pacarajutaponaenatsi panexaejawanexa paxamë, panexi-ata —jai.

Nexata, bajarapacuenia José jamatabëcuene caewia-exana bajarapamonae, tsipaji bitso cuaicuaijai piasiwacuenia.

José petëpaejawa, yabara peliwaisi

²² José, pijamonae yajawa barëponapona Egiptojawata. José ponapona ciento diez pawai beje. ²³ José abaxë coxitane pexënato Efraín pemomoxi, bajarapapemomoxi pexijawabelia. ^k Bajarapacuenia-ata coxitane Manasés pexënato, Maquir-wënë. Bajarapamonae pexi José coxi-isapitapona pe-etaponaenexa pethaëtota pijacujirucuenia, penajamatabë-itajëtsinexa

k 50:23 *bajarapapemomoxi pexijawabelia*: Bajaraxua nacayapëtaeya-exana pacuenia José coxitane Efraín pemomoxi pexi tsaponae. Bajaraxua wowaijumeta wënëruba, «tercera generación».

petaejawa pepopemomoxicuenia, bajarapamonae juya pecanacopataponae-nexa paxapijinēmi pijacuenemi.

²⁴Nexata, itsamatacabi José jumaitsi pijamonaejawabelia:

—Caematacabibeje rabaja netosajina tatēpaenexa. Itsiata baitsi jane, DIOSO paxamē pacayajawa tsane. Pacajutsiananua mapanacuawecuaje papecacaponaenexa pa-irajawabelia bajayata najumecapanepaeya jumaitsi papecarajutsinexa wajasalinaiwi Abraham, Isaac, Jacob-jawabelia-ata —jai José. ²⁵Nexata, bajaraponē itoroba Israel-pijinē pemomoxijawabelia najumecapanepaeya pejumaitsinexatsi, pemēthētsiyaniwatsi Egipto nacuata. Jumaitsi:

—¡Xaniajanē cajena! DIOSO pacayajawa tsane papecayawenonaenexa. Pacujinae pacajutsiana mapanacuawecuaje, panesicaponaename cajonita patanesimēthētsinexamē bajarapanacuayabelia —jai José. Jejai bajarapamonae peto-exanaenexatsi.

²⁶José nexata tēpa Egiptojawata itsa xaina ciento diez pawai-beje. Bajaraponē perabē-exabauatatsi bālsamonanitsapatojawata peperabētsabanaeyaniwa. Nexata, bajaraponē uatatsi petēpaewi pejebabiabicajonita.

Éxodo

Israel-pijinë pemomoxi pepitsapaejawa Egipto nacuawecua

Egipto nacuapijiwi bejiobia-exanaponapona Israel-pijinë pemomoxi

1 ¹Mapamonaaje Jacob-pijinë pexi pewënëanë, peyajawajonewi baja-
raponë Egipto nacujawabelia. Jacob itsawënë pijinia Israel. Caenë
canacujitsia bajarapamona pexi yajawa najetarubena pejinawanapae-
nexa Egipto nacujawatalia. ²Jacob-pijinë^a pexi mapamonaaje: Rubén,
Simeón, Leví, Judá, ³Isacar, Zabulón, Benjamín, ⁴Dan, Neftalí, Gad, Aser.
⁵Bajarapamona Jacob-pijinë pexi tsaponaerena. Daxita pamona Jacob-
pijinëjawawerena pepitsaponaewi, Egipto nacuyabelia pepatsiwi,
namata-ëjêta setenta ponêbeje pemomoxi yajawa, tsipaji bajarapacujinaeta
pexênato, José, pexi yajawa baja cajena, ponapona Egipto nacuatatalia paxa
patsinejewalia.

⁶Bexëajawabelia José têpa. Bajarapacuenia pijamona-ata, daxita pamo-
nae Jacob-pijinë peyajawapatsiwi Egipto nacujawabelia, bajarapamonaemi
têpa bajarapanacuatalia. ⁷Itsiaata baitsi jane, bajarapamonaemi pemomoxi
ayaibitsaêto nacopata. Nexata, bajarapamona pexi xainapona. Orijiibia,
ayaibitsaêto naexanapona pewajënaeyabelia. Nexata, belia bajarapamo-
nae Israel-pijinë pemomoxi naexana pinijibitsaêtoxaneto. Wënëcanua bitso
bajarapanacua. Pinijibitsaêtoxae pewajënaeyabelia, bitso pinijicuenesaë
xainabuatapona.

⁸Bexëajawabelia Josépijinëmi petêpaecujinae, pijamonaemi-ata
pecowêta, icatsia itsapejanayanacua-ewetsinë naexana Egipto nacua-
jawata. Bajaraponë-ata apoyapêtae Josépijinëmi. Nexata, Egipto
pepopeyanacua-ewetsinë Israel-pijinë pemomoxi yabara jumaitsi
peyajawanacuenebiwiawabelia:

⁹—¡Panejumetaema! Israel-pijinë pemomoxi waxaitsiwecua bitso ayai-
bitsaêto naexanapona pewajënaeyabelia. Bajarapacuenianua bitso piniji-
cuenesaë xainapona. ¹⁰Nexata, waxaitsi bajarapamona yabara yapêtaeya
besiwacanaëjêtatsi, wajacuenecaranatsinexa ayaibitsaêtoyaniwa. Belia,
cuenecaëjêpaejitsipatsi wajanacabarë nawajabitsaëtsinexa, itsa naliwai-
sicajunua itsamonaejawabelia wajanacabarë nabenexa, bajarapacuenia

a 1:2 Jacob: Itsawënë Jacob raja Israel-wënë. Taema Gén. 32:28.

wajanacawecuapitsapaenexa mapanacuawecuaaje —jai Egipto nacua pewet-sinē peyajawanacuenebiwi jawabelia.

¹¹ Bajarapacuenia pejumaitsicujinae, Egipto nacuapijiwi itapeta itsamonaē pijawiriayajuwēnēwi penamatacaitorobiwinexa penacuenebijawata. Nexata, bajarapapenamatacaitorobiwi Israel-pijinē pemomoxi nacuenebia-exanabiaba ayaicuenia. Bejiobia-exanabiabanua penacuenebijawata. Bajarapamonae nacuenebia-exanatsi anijatomaraxanetobeje, itsajota faraón^b caetuatsijitsia daxitacuenē pecobecowē. Bajarapatomarabeje pewēnē Pitón, Ramesés tomarabeje. ¹² Itsiata baitsi jane, bajarapamonae bitso pibisiacuenia bejiobia-exanaponae-atatsi tsiquiribitsaētoyo penacopataponae nexa picani, caranata, orijibia ayaibitsaēto pewajēnaeyabelia tsanajetarubenaē. Nexata, Egipto nacuapijiwi bitso cujunawapona Israel-pijinē pemomoxi.

¹³ Nexata, bajarapacuenia petaexae, amoneya bitso nacuenebia-exana pibisiacuenia Israel-pijinē pemomoxi. Asaēya itorobabiaba penacuenebinexa. ¹⁴ Nexata, bajarapamonae bitso jamatabēcuenebējaiya-exanatsi penacuenebia-exanaejawatsi. Bajarapamonae nacuenebia-exanabiabatsi atsata pebacamēsi^c pematajērēabijawanē pexanaenexa adobejanwē. Nacuenebia-exanabiabatsinua wayafuabelia, panacuenebicuenē xaina. Nexata, bajarapacuenia Israel-pijinē pemomoxi itsa nacuenebia-exanabiabatsi, bitso nacueratsiaya nacuenebabiaba.

¹⁵ Bajarapamatocabijawa anijawabeje, Sifra, Fúabeje, ya-ewetabiababeje penacoxitsiwi pexanaematacabinexa Israel-pijinē pemomoxipijipetiriawi. Nexata, Egipto nacua pewetsinē itoroba bajarapowabeje pecoxibeyaxuabaponae nexabeje Israel-pijinē pemomoxi pebinēxi penaexanaecujinae. Bajarapapetiriwabejajawabelia faraón jumaitsi:

¹⁶ —Pamatocabi paxamēbeje pa-ewetabiabianamebeje pexanaejawa hebreopijipetiriawi,^d nexata panaitaxutoca-ewetabiabianamebeje penaexanaejawa pejewaxi. Nexata, itsa petiriwayo naexana, pacopatabiabianamebeje piasaēnexa. Itsa pijinia pebinēyo naexana, nexata pabeyaxuababiabianamebeje —jai Egipto nacua pewetsinē.

¹⁷ Itsiata baitsi jane, bajarapowabeje asiwaya yayatanebeje DIOSO. Nexata, pacuenia itorobatsibeje Egipto nacua pewetsinē, itsiata bajarapowabeje apo-exanaeabeje. Nexata, apobeyaxuabaponaebeje pebinēxi. Copataponabeje piasaēnexa. ¹⁸ Nexata, xuacujinae Egipto nacua pewetsinē junatsia-exanatsibeje peyanijobinexatsibeje pecuene yabara. Jumaitsiatsibeje:

—¿Detsa xuajitsia bajarapacuenia pa-exanaponaponamebeje? ¿Dexuajitsia paxamēbeje pacopataponamebeje pebinēxi piasaēnexa? —jai faraón.

¹⁹ Bajarapowabeje jumaitsi:

—Apopanecuenecaējēpaebeje, tsipaji hebreopijipetiriawi apobe-Egipto nacuapijipetiriawi. Bajarapapetiriawi bitso asaē. Nexata, bepijiayo exanabiaba penacueto papatsinejewanēbeje patataenexabeje —jaibeje.

²⁰⁻²¹ Nexata, bajaraxuata bajarapowabeje DIOSO pexaniacuenia tanetsibeje,

b 1:11 *faraón*: Taema «faraón», glosariojawata. **c 1:14** *pebacamēsi*: Bajayatami trigo, cebadadata penotsinexa bajarapamonae yabacamēsiaya caucubabiaba. Nexata, petanabataxuabicujinae, penacopabibacamēsijawanē canacuenebabiaba pijadajubi petsiwajēnaejebabiabinexa, itsa jume, pematajērēatsinexa atsajawabelia piya-adobetonē petotsēnēnēbiyaniwatsi. **d 1:16** *hebreopijipetiriawi*: Taema «hebreowi», glosariojawata.

bajaraPonë asiwaya peyaiyataexaebeje. Nexata, tocopatatsibeje pexainae-nexabeje pexi, pemomoxi-ata ayaibitsaëto. Bajarapacuenianua Israel-pijinë pemomoxi orijibia pewajënaeyabelia bitso ayaibitsaëto tsaponae. Bitso pini-jisaë xainabuataponanua, bepenawajabitsaëtsiwi penaexanaenexa.

²²Nexata, bajaraxuacujinae faraón icatsia itoroba daxita Egipto nacuata pejinawanapaewijawabelia. Jumaitsi:

—¡Meniareca papenetsiaremeca ëpebinëxi, pamona naexanapona Israel-pijinë pemomoxituatujëta. Petiriwaxi juya pacopabianame piasaëtsaponae-nexa! —jai faraón pijanacuapijiwawabelia.

Moisés penaexanaeliwaisi

2 ¹Itsanë Leví pemomoxiyajuwënënë nacojioba pijawiriabitsaëtopijipe-tiriwayajuwënëwajawabelia. ²Nexata, itsamatacabi bajarapowa naco-xita pebinëyo. Penaexanaematacabi ita nacoxitane tsitapexanianëyotsi. ³Nexata, pexënatonëyo muetsia bota nacoxiwiwsataponapona acueyabi pajua-metobejecuenia. ⁴Itsia baitsi jane, bajaraxuacujinae acuenebi matawëjëa muetsia pewitsataponaponaajawa bota. Nexata, itsamatacabi pexënatonëyo menejawata peyarutsinexa, pita beyoxobocuenia pecuejawaxaneto. Bajara-xua xaniawaetsia catsana pijawiriamawijawata, mera pejoneyaniwa. Bajaraxuacujinae, bajarapowa tsiquirinëyo buateta beyoxobo-ënëtuatujëta. Nexata, bajarapowa yaruta Nilo mene-itapata, bethamanacuenejawanëtua-tujëta. ⁵Nexata, xuacujinae bajarapowa jumaitsi pexënatoyo matapijiwajawabelia tsiquirinëyo petonaitaxutuaca-ewetaponaponaenexatsi muetsiacuenia, peyapëtaenexa xua tocopiapatsijitsiatsi bajarapanacuetonëyo.

⁶Peyarutsicujinae, bexëa faraón pexënatoyo nucionareca Nilo mene-itapayabereca penawaenexa. Nexata, paepatota pijinia faraón pexënatoyo pewetsiwxitsi bajarapamene-itapaya nubenaponaya, bajarapaepatota faraón pexënatoyo taeruta meneta beyoxobocuenia pecuejawaxaneto thamanatuatujëjawata. Nexata, faraón pexënatoyo itoroba bajarapamonaeyajuwënëwa petocarenanexatsi. ⁷Nexata, petocarenacujinaetsi, yamata-pata. Tanenua peboquecaejawa tsiquirinëyo, penuenuquecaejawa-ata beyoxobojawa-ënëta. Nexata, faraón pexënatoyo tsitabejiobitsi bajarapanacuetonëyo. Jumaitsi:

—Marapanacuetonëyoje hebreowi pexënatonëyo. Bitso bejiobi tsanuquecae —jai.

⁸Nexata, bajarapaepatota tsiquirinëyo pematapijiwa jumetaenuca faraón pexënatoyo pebejiobiataejawa. Nexata, kujirena pejumaitsinexa faraón pexënatoyojawabelia:

—¿Apocatsitanepanae tsaja tacatojunatsinexa hebreowiriawa pecatowitsatsiwanexa, jamatejema bajarapowa pecatonamirajutsinexa bajarapanacuetonëyo? —jai.

⁹Faraón pexënatoyo pejumecanawatsijawata jumaitsi:

—Je. ¡Siwaponare bajarapowa! —jai pejanawajawabelia.

e 2:2 *tsitapexanianëyotsi*: Hebreojumeta mapajume jamatabëcuene-itajëta Moisés pena peyapë-taejawa Dioso pitapetsijawatsi tsaena itsacuenejawanexa. Baitsi, daxita penajiwi batsitapexania-jiwitsi pexijiwi picani.

Nexata, pejanawa siwapon a tsiquirinëyo penajawabelia pejumaitsi-nexa. ⁹Nexata, itsa barëpata baja, jumaitsi faraón pexënatoyo tsiquirinëyo penajawabelia:

—¡Mapanacuetonëyo pire! Netowitsatsianame. Xanë raja camatamotsianatsi taneto-ewetsijamatabëcuenemë —jai faraón pexënatoyo.

Nexata, bajarapacuenia tsiquirinëyo pena caponatsi petowitsatsinexa. ¹⁰Itsa baja pejewaxinëyo witsabanajetaruca, itsa ayainëyo baja, nexata tocanawiata faraón pexënatoyojawabelia. Bajarapowa juya pita pexënatocuenia penacoxiyabinexa. Natowënëruba Moisés,^f tsipaji bajaraponëyo yabara jumaitsi:

—Xanë raja jutajë menewecua —jai.

Moisés najetabijirawa Egipto nacua pewetsinëwecua

¹¹Itsa baja Moisés penaweretsinë^g tsaponaponae, nexata itsamatacabi pitsapa pesiwaxainaenexa pijamonaewiriawi. Nexata, bajaraponë tane bajarapacujinaeta pijamonaewiriawi penacuenebia-exanabiabijawatsi ayaicuenia. Bajarapaepatota-ata, tane Egipto nacuapijinë pebeponaponaejawatsi hebreonë, Moisés pijamonaewirianë. ¹²Nexata, bajaraponë Moisés xaniawaetsia nayajiwinaëcoba daxitayenepanajawa. Nexata, itsa bajaraponë apotae itsajiwio-ata bajarajota, nexata pijamonaenë yamatamotsiaya beyaxuaba Egipto nacuapijinëmi. Bajaraxuacujinae, mëthëta xuababuata tajetamaxë-bëxëpana. ¹³Icatsia xuacujinae, merawiapitsijawata Moisés pitsapa pesiwa-xainaenexa pijamonaewiriawi. Nexata, bajarajota tane pijamonaenëbeje, nacaewirianëbeje, penabeponaponaejawabeje. Nexata, Moisés yanijoba penamaxëwanitsinë:

—¿Dexuajitsia xamë beponaponame nijawirianë? —jai Moisés.

¹⁴Nexata, ponë beponapona jumecanawiatatsi:

—¿Jipatsa xamë cacopata majotaje nenamatacaitorobinënexa, patanenaneconitsia-exanaenexamë paxanëtuatuajëta? ¿Tsipaji tsaja icatsia najamatabëxainame tanebeyaxuabinexamë pacuenia beyaxuabame Egipto nacuapijinëmi? —jai bajaraponë Moisés-jawabelia.

Bajarapacuenia Moisés itsa jumetane, bitso junawa, tsipaji bajaraponë yapëtane baja pewënëtaejawatsi pebeyaxuabijawa Egipto nacuapijinëmi. ¹⁵Nexata, Moisés pebeyaxuabijawa Egipto nacuapijinëmi belia wënëtanetsi faraón. Nexata, faraón itoroba pejaitsinexatsi Moisés, pebeyaxuabinexatsi juya. Itsiata, Moisés pewajënaeya najetabijirawa baja. Nexata, bajaraponë pona Madián nacujawabelia. Nexata, bajaraponë itsa patanajetaruca baja Madián-jawata, ecajopa meramëthë imoxoyojawata.

Moisés napata Madián nacuatatia peponaponaenexa

¹⁶Bajarapamatacabi pijinia Reuel^h ponapona Madián nacuata. Bajaraponë sacerdotenë. Xainaponaponanua siete powabeje pexi. Nexata, Moisés

f 2:10 Moisés: Egiptojumeta pejumaitsiwënë: «Pejutsinëtsi», pejaiwënë. **g 2:11 penaweretsinë:** Bajarapamatacabijawa Moisés cuarenta pawaiabeje pexainaenë tsaponaponae. Taema Hch. 7:23. **h 2:16 Reuel:** Itsawënë pijinia xaina, Jetrowënë. Taema Éxo. 3:1. Itsawënë-ata xaina bajaraponë, Hobab-wënë; taema Jueces. 4:11.

pepatsimatacabi, bajarapowaxi pona meramëthëjawabelia petowënëbinexa ovejabitsaëto mera piapaemonëjawata, paxa pija-ovejabitsaëto petorajut-sinexa. ¹⁷Itsiaa bajarapijinia paepatota, bajarajotalia itsamonae oveja pewetawanapaewi bajarapowaxi wecuayorota, mera piabatsiyaniwa pija-ovejabitsaëto. Nexata itsiaa, bajarapaepatota Moisés itsa tayeca, bajaraponë nonotabapuna, bajarapamonae pecuenecaranatsinexa. Bajaraxuacujinae, mera torajuta bajarapowaxi pija-ovejabitsaëto. ¹⁸Bajaraxuacujinae, bajara-powaxi itsa baja nawiabaponalia paxajawabelia, nexata baja itsa palia, paxa yanijobatsi:

—¿Detsa xuajitsia ajena bitso bepijiayo paparemena? —jai.

¹⁹Nexata, bajarapowaxi jumecanawiata paxajawabelia:

—Paxanë raja Egipto nacuapijinë paneyawenonaeya cueneyacaranata pamonae oveja pewetsiwi panetoyorota picani. Bajaraponë icatsia paneto-juca mera, patanetorajutsinexa pataja-oveja piapaenexa —jai bajarapowaxi.

²⁰Nexata, Reuel jumaitsi pexënatowaxijawabelia:

¿Detsa jota nexata bajaraponë nuca? ¿Dexuajitsia nexata pacopatanure-melia pija-epato? ¡Naxatsia! ¡Pajunaremelia bajaraponë penaxaenexarena waxaitsita! —jai. Nexata, bajarapowaxi siwaponalia.

²¹Bajarapacuenia Moisés bajarajota nacopatajopa, peponaponaenexa Reuel pijabojawata. Bajaraxuacujinae, Reuel rajuta pexënatoyo Séfora pepitsinexa pijawanexa. ²²Nexata, bajarapowa nacoxtita. Xaina pexënatonëyo. Moisés bajaraponëyo wënëruba Gersón, tsipaji bajaraponëyo yabara jumaitsi: «Xanë raja taponanë itsanacuajawawerena, tawarapaenëcuenia taponaponaenënexa apotayapëtaenacuata», jai.

²³Moisés baja pepuaponaponaë bajayajebi Madián nacuata, bajarapamatacabianëjawa pijinia Egipto pepopeyanacua-ewetsinë baja tëpa. Itsiaa, Israel-pijinë pemomoxi tsiteca amoneya tonacuenebawanapa ayaicuenia Egipto nacuapijiwi. Bajayajebi bajarapacuenë petaeyabiabixae, bajarapamatacabijawa bajarapamonae wajëcabiaba DIOSOjawabelia penasiwajamatabëcuenëbëjajawa, pejamatabëcuenenuejawa-ata pecapanepaenexatsi bajarapapibisiacuenewecua. Nexata, DIOSO jumetane bajaraxua, bitso najamatabëxainaeya pewajëcabiabijawa. ²⁴Nexata jane baja, bajaraPonë najamatabëcuenewereta peto-exanaenexa xua naliwaisicajunua Abraham, Isaac, Jacob-jawabelia. ²⁵Bejiobiatane Israel-pijinë pemomoxi pebejiobia-exanaejawatsi Egipto nacuapijiwi.

Dioso itoroba Moisés pematacaponaenexa Israel-pijinë pemomoxi Canaán nacujawabelia

3 ¹Pamatacabijawa Israel-pijinë pemomoxi bejiobia-exanawanapatsi Egipto nacuapijiwi, Moisés bajarapamatacabijawa paxuyo Jetroⁱ to-ewetaponapona pija-ovejabitsaëto. Bajaraponë Jetro sacerdotenë tsaponaponaë Madián nacujawata. Nexata, itsamatacabi Moisés oveja pewetaponaponaenë najetaruca petusatonacuajawa. Belia baja, patajopa DIOSO pijatsutojawabelia. Bajarapatsuto pewënë Horeb.^j ²Nexata, bajarajota

i 3:1 Jetro: Itsawënë pijinia Reuel. Taema Éxo. 2:17. j 3:1 Horeb: Horeb-wënëtsuto xaina anijawënëbeje, Horeb-wënë, Sinafwënë pijinia. Nexata, bajarapawënëbeje caetsuto yabara saya.

tsitanaitajētatsi Jehová pija-ángelnē bepetajueyecaenaemēyotuatuaējə-wata. Moisés xaniawaetsia tane bajarapanaemēyo petajueyecaējəwə. Itsiata, tajuenucaē-ata, apoweriajawi bajarapanaemēyo. ³Nexata, Moisés jamatabē-itsi: «¿Detsa xuajitsia meta naemēyo apoweriajawi tajueyecaē-ata? Wetaejopaliajē nexata, xaniawaetsia tayapētaenexa», jamatabējai.

⁴Itsa nexata Jehová tane Moisés pecujitanajetarucaējəwə petaenexa, junataxuabatsi Moisés pewēnēta, petajueyecaenaemēyotuatuaējəwawerena: —¡Moisés, Moisés! —jai tsaxuabi.

Nexata, Moisés jumecanawiata:

—Marajota nucajēje —jai.

⁵Nexata, DIOSO jumaitsi:

—¡Pētsa matatoxenetsia nimoxoyoremena! ¡Nataxujonore nenataxuxatat-sijawa taneyaiyataenexamē, tsipaji pa-irata nucame, xanē imoxoyojawata nucame! —jaitsi Moisés. Nexata baja, Moisés jejai.

⁶Icatsia xuacujinae, DIOSO jumaitsi:

—Xanē raja DIOSONē, pijaDIOSONē nijasalinaiwi. PijaDIOSONē tsaponaponaē Abraham, Isaac, Jacob-ata —jai Moisés-jawabelia.

Bajaraxua pejumetaējəwata, Moisés na-itabaracaranataxuaba petae-yaniwa DIOSO, tsipaji bitso cujunawa. ⁷Bajaraxuacujinae, icatsia orijibia Jehová jumaitsi:

—Xanē raja xaniawaetsia taniji pacuenia bitso bejiobia-exanaponatsi tajajiwi Egipto nacuata pejinawanapaewi. Jumetanijinua tanewajēcaponaejawata tanejumaitsijawa pacuenia penamatacaitorobiwitsi bejiobia-exanaponatsi penacuenebia-exanaejawatatsi. Xanē xaniawaetsia yapētaniji penabejiobitsicuenia pejinawanapaejawa. Nexata, xanē jumecowēnētsianajē tanewajēcəjəwə. ⁸Bajaraxuata, xanē runaicajē bajarapamonae tacapane-paenexa Egipto nacuapijiwi pecobewecua. Bajarapamonae raja jutsianajē Egipto nacuawecua tacaponaenexa itsa-irajawabelia. Bajarapa-ira piniji-iraxaneto. Pexania-ira itsajota daxitacuene naxaniababiaba pexaniacuenia, daxita pexaejawacuene-ata penawitsinacua. Rajutsianajē pejinawanapae-nacuanexa itsajota jinawanapa maparucaje: cananeomonae, heteomonae, amorreomonae, ferezeomonae, heveomonae, jebuseomonae-ata. ⁹¡Xamē taema mapacueneje! Xanē raja jumetaniji napēna tanewajēcaponaejawa Israel-pijinē pemomoxi. Tanijinua pacuenia Egipto nacuapijiwi bejiobia-exanabiaba ayaicuenia. ¹⁰¡Naxatsia baja! ¡Xamē bepijiayo ponare bajarabelia! Xanē ca-itorobatsi neponaenexa Egipto nacua pewetsinējəwabelia, nejut-sinexa Egipto nacuawecua tajajiwi, Israel-pijinē pemomoxi —jai Jehová.

¹¹Nexata, Moisés jumaitsi DIOSojawabelia:

—¿Detsa nexata xanē ponēnē taneca-itorobimē taponaeenexa faraón-jawabelia, tawecuajutsinexa Israel-pijinē pemomoxi? —jai Moisés.

¹²Itsiata, DIOSO jumecanawiata mapacueniaje:

—Xanē raja cayajawa tsanetsi. Pamatacabi netojutsianame Israel-pijinē pemomoxi Egipto nacuawecua, xamē matacarenamē tsane bajarapamonae mapatsutojawaberena. Nexata, mapatsutojawataje padaxitamē asiwaya panewajēcəname xanē DIOSONē tawēnēta yaiyataecuenia. Bajarapacuenia yapētaename pexaniajaijawa taca-itorobijawa, tacayajawajawanua —jaiDIOSO.

¹³ Itsiata baitsi jane, Moisés jumecanawiata. Jumaitsi:

—Itsa baitsi jane, xanë ponaajitsipajë, itsa jumaitsinë tsipae Israel-pijinë pemomoxijawabelia: «Jehová, panijasalinaiwi pijaDIOSO, nitoroba paxamë-jawaberena», itsa janë tsipae, nexata bajarapamonaë itsa neyanijobijitsipa: «¿Detsa pawënë bajaraponë?», itsa nejai tsipae, nexata xanë, ¿depacuenia jumaitsinë tsipae bajarapamonaëjawabelia? —jai Moisés.

¹⁴ Nexata, DIOSO jumecanawiata:

—Xanë rabaja daxita matacabi tayamatacabitsitecaponaponaenë caju-maitsitsi. Nexata, jumaitsimë tsane bajarapamonaëjawabelia: «Ponë pewënë, ‘Xanë rabaja tsaponaponaë,’ pejaiwënë, bajaraponë raja xanë nitoroba paxamëjawaberena», jamë tsane —jai DIOSO.

¹⁵ Nexata, bajaraxuacujinae, icatsia DIOSO jumaitsi Moisés-jawabelia:

—Xanë raja tawënë Jehová. Nexata, bajarapawënëta jiwi nejunatsiana daxitamatacabijawabelianexa. Nexata, jumaitsimë tsane Israel-pijinë pemomoxijawabelia: «Jehová DIOSO, panijasalinaiwimi Abraham, Isaac, Jacob pijaDIOSONë tsaponaponaë, nitoroba paxamëjawaberena», jamë tsane.

¹⁶ Nexata, ponare baja Egiptojawabelia necaetuatsinexa daxita pamonaë ancianowi, Israel-pijinë pemomoxi pewetsiwi! Jumaitsimë tsane: «Jehová DIOSO raja, wajasalinaiwimi Abraham, Isaac, Jacob pijaDIOSO, netsitanaitajëta. BajaraPonë yapëtane baja pacuenia Egipto nacuapijiwi pacabejiobia-exanawanapa. Nexata, pepacuenie pacayawenonaena. ¹⁷Paxamë papecabejiobia-exanaëjawami Egipto nacuapijiwi bajaraPonë pacawecua-jutsiana, papecacaponaenexa bitso pexanianacuajawabelia itsajota daxita-cuene naxaniababiaba, pexaëjawacuenenua penawitsinacua. Pacarajutsiana pijanacuami cananeomonaë, heteomonaë, amorreomonaë, ferezeomonaë, heveomonaë, jebuseomonaë-ata», jamë tsane —jai DIOSO Moisés-jawabelia Israel-pijinë pemomoxi yabara.

¹⁸ Bajaraxuacujinae, DIOSO jumaitsi:

—Bajarapacuenia netsipaebicujinae, nexata Israel-pijinë pemomoxi pija-ancianowi cajumecowënëtsiana. Nexata, bajarapamonaë cayajawaponaena panetaenexalia Egipto nacua pewetsinë, panejumaitsinexa bajaraponëjawabelia: «Jehová DIOSO raja, paxanë pahebreowinë patajaDIOSO, panetsitanaitajëta. Bajaraxuata, pajitsipajë patanecopatsinexamë pataponaenexa petusato nacuyabelia acueyabi pamatacabibecuenia, bajarajotalia dajubi tajuitsiaya patarajutsinexa Jehová patajaDiosojawabelia», pajamë tsane faraón-jawabelia. ¹⁹Xanë itsiata yapëtaniji bajaraponë xaniawaetsia jamatäbëcuenexanepanaëya apopapecacopatsijawanexa, Egipto nacuwecua panepitsapaeyaniwa. Saya matapania xanë tacuenesaëta pacajutsianatsi. ²⁰Itsiata baitsi jane, xanë nacuenie-itajëtsianajë pinijisaë taxainaeñëcuene bajarapamonaëjawabelia pinijicuenejawanë tatsita-exanaëjawata. Nexata, tocopatsianajë Egipto nacuapijiwi petëpaenexa bajaraxuanëta. Bajaraxuacujinae, matapania pacacopatsiana panepitsapaenexa. ²¹Itsiata baitsi jane, tajajiwi apocapitsapænë tsane bepejiobiwicuenia. Xanë tocopatsianajë Israel-pijinë pemomoxi-jawabelia asiwayacuenia petaenexatsi, jamatejema perajutsinexatsi pexainae-yajuwënëjawanë, pepitsapaeyaniwa cobesa^k Egipto nacuwecua. ²²Nexata,

caewa canacujitsia wajëcaena xuanë exana palatananitota, xuanë-ata exana oronanitota, penaxatabijawanë-ata, bajaraxuanë pejumaxatabaponaenexa pexi. Bajaraxuanë wajëcaena pewënapetiriawijawabelia Egipto nacuapijiwi, pamonaë pijabomuxuneneta pejinawanapaewi, peyajawajinawanapaewinua caebota. Bajarapacuenia jamatejema Israel-pijinë pemomoxi wecuanotsiana pexinaejawanë Egipto nacuapijiwi, bepecuene-amoneyabiwicuenia¹ penawajabitsaëtsijawata —jai DIOSO Moisés-jawabelia.

4 ¹Nexata, Moisés jumecanawiata:

—Bajarapamonaë raja aponejumexaniataë tsane. Aponemuxuna-ewetsinua tsane xua jumaitsinë. Biji saya caranata, nejumaitsi tsane: «Jehová raëta apocatsitanaitajëtsi», nejai tsane —jai Moisés.

²Nexata, xuacujinaë Jehová yanijoba:

—¿Detsa xua canucame necobeta? —jai.

Nexata, Moisés jumecanawiata:

—Tajanaebo raja —jai.

³Nexata, xuacujinaë Jehová itoroba:

—¡Nijanaebo xuare irabelia! —jai.

Nexata, Moisés pijanaebo xuaba irabelia. Bajarapaepatota, bajaraponaemi naexanajunua jomo. Moisés pecowëyabelia najetabijirawa jomowecua pecu-junawijawata. ⁴Itsiaata baitsi jane, icatsia Jehová jumaitsi:

—¡Nacobeyoremelia jomo nebosowaetabinexa! —jai.

Nexata, Moisés jejai. Nacobeyolia pebosowaetabinexa. Pebosowaetabijawata jomo, bajarapaepatota icatsia naebo naexanajunua pecowëcuenia.

⁵Nexata, Jehová jumaitsi:

—Bajarapacuenia itsa tsita-exanaename nijamonaë pija-ancianowijawabelia, cajumexaniataena tacatsitanaitajëtsijawa Jehovánë, nijasalinaiwimi Abraham, Isaac, Jacob-ata pijaDIOSOnë —jai. ⁶Bajaraxuacujinaë, icatsia Jehová jumaitsi:

—¡Aeconoxae, nacobexataremelia nemipabëjawalia nijacamisa bëxëpana! —jai.

Moisés bajarapacuenia nacobexatalia pemipabëjawalia. Itsa baja nacobejurena, bajaraponë nacobetane bitso pecobetsabanaejawa. Nexata, bajaraponë pecobetsabanaeleprawënëjawa cobeniopona bitso.

⁷Nexata, icatsia Jehová jumaitsi:

—¡Icatsia nacobexataremelia nemipabëjawalia! —jai.

Nexata, Moisés icatsia nacobejeya. Itsa baja nacobejurena pemipabëjawawecua, cobexanepana baja icatsia pecowëcuenia. Pacuenia daxitaperabëto perabëxanepana, bajara-icatsia itsi.

⁸Xuacujinaë, icatsia Jehová jumaitsi:

—Itsa copiyapijicuene netsita-exanaejawata apocajumexaniataë tsane pacuenia jumaitsimë, nexata cotocaewipijicuene netsita-exanaejawata caju-mexaniataena. ⁹Itsiaata baitsi jane, itsa tsitecaeya apocajumexaniataë tsane bajaraxuabeje netsita-exanaejawata, nexata bajaraxuacujinaë mera puat-sianame menejawawetsina. Bajarapamera epatajarabaxuabianame irabelia. Nexata, meranëmi naexanajonena pejanara —jai Jehová.

¹⁰Nexata, Moisés jumecanawiata:

—Yee, Tajatuxanenë, ¿depacuenia xanë exanaenajë, itsa aponetoyapëxa-nepanabiabi pexaniacuenia tacuaicuaijajawa? Bajaraxua aponetocopiapatsi matapania caniwí, ajena-ata. Saya cajena bajayajawawerena bajaraxua itsinë tsaponaponae pejewaxinënëjawawerenacujinae. Nexata, paepatota cuaicuaijanë jiwijawabelia, xanë nejume-arëbabiaba —jai Moisés.

¹¹Itsiaa baitsi jane, Jehová jumecanawiatatsi mapacueniaje:

—¿Jipatsa nexata jiwicuaibowojo exana? ¿Apoxanë tsaja? Xanë raja necuenecaëjëpa tacopatsinexa itsamonae apopenatsipaebiwinexa, bajarapacuenia itsamonae-ata apopejumetaewinexa, bajarapacuenia pitaxutotsëcënaewinexa-ata, bajarapacuenia itsamonae-ata petaewinexa. ¿Denexata pacuenia xamë netaneme? ¿Ponë apopecuenecaëjëpaenëtsicuenia? Xanë raja Jehovánë tanecuenecaëjëpaenë. ¹²¡Nexata, ponare baja! Xanë raja cayajawa tsanetsi. Nexata, paepatota cuaicuaijamëjitsia, cacujarubianatsi xua jumaitsimëjitsia —jai Jehová.

¹³Orijibia icatsia Moisés jumaitsi:

—Yee, Tajatuxanenë, xanë baitsi jane cajena taponaejawa apojitsipaenë. Pexaniacuenie neto-exanaename. ¡Itsajiwíyo itorobare peponaenexa! —jai.

¹⁴Nexata, xuacujinae Jehová anaepana Moisés-jawabelia. Jumaitsi:

—Xanë raja yapëtaniji nematapijinë Aarón, Leví pemomoxiyajuwënë, xaniawaetsia pecuaicuaijainë. Bajaraponë cato-itapetatsi pecatocuaicuaijainë. Bajaraponë raja najetaruca xamëjawaberena pecacaxitajarabinexa. Nexata, bajaraponë itsa cacaxitajarabiana, pecataxae bitso jamatabëcuene-barëya tsane. ¹⁵Nexata, bajaraponëjawabelia tsipaebianame paliwaisi jumait-sijitsia jiwijawabelia. Nexata, xanë pacayajawa tsanetsibeje paepatota pacuai-cuaijamëjitsiabeje. Pacatsitajëtsianatsibenjua pacuenia pa-exanaejitsiamëbeje.

¹⁶Nexata, xamë jumaitsimë tsane Aarón-jawabelia bexanë tacuaicuaijaicuenia pejumetaenexa. Nexata, xamë nejumaitsicowëya, Aarón cuaicuaijai tsane bajarapamonaejawabelia, pacuenia xamë tsipaebame. ¹⁷Nexata, caponaename mapanaeboje, panaebota tsita-exananajetarucaejitsiamë pinijicuene-jawanë, jiwi caeto-ata apopetaejawanë, pejamatabëcuenenabenajacaeya-exanaejawanëxexa —jai Jehová. Matapania Moisés jejai.

Moisés nawiata baja Egipto nacuyaberena

¹⁸Moisés nexata nawiata paxuyo Jetro pijabojawabelia. Bajarajotalia bajaraponë jumaitsi:

—Maraeta baja nawiatsianajë Egipto nacujawabeliaje itsajota jinawana-pa tajamonaewiriawi. Jitsipajë raja tataejawa bajarapamonae itsa abaxë jinawanapa —jai.

Nexata, Jetro jumecanawiata:

—Ponaename baitsi baja pexaniacuenia —jai.

¹⁹Nexata, itsa abaxë Moisés ponapona Madián nacuatalia, Jehová jumaitsitsi:

—¡Nawiare Egipto nacujawabelia, tsipaji rabaja, tëpa pamona picani cabeyaxuabijitsia! —jai.

²⁰Nexata, Moisés barëpona pijawa, pexi-ata. Tsijumajebaya burrojumabetsia. Bajaraxuacujinae baja, barëpitsapa pebarënawiatsinexa Egipto

nacuajawaberena. Bajaraponë cobenanajetaruca DIOSO pijanaebo. ²¹ Bajaraxuacujinae, Jehová jumaitsi Moisés-jawabelia:

—Itsa patsianame Egipto nacujawata, nexata nucaename faraón pitabarata netsita-exanaenexa daxita papinijicuene cayajawacopatatsi, tacacuenecaëjēpaeya-exanaejawanē tacuenesaēta. Xanē raja juya bajaraponē ajamatabēcuenetajaya-exanaenajē. Nexata, bajaraponē apocopatsi tsane pepitsapaenexa nijamonaewiriawi, Israel-pijinē pemomoxi. ²² Nexata, jumaitsimē tsane faraón-jawabelia: «Cajumaitsi raja Jehová: 'Israel raja pemomoxi betaxēnato matapijinēcuenia taeyabiabajē, asiwaya tayawenonaenexa. ²³ Cajumaitsi baja necopatsinexa pepitsapaejawa betaxēnatomatapijinēcuenia tataewi, jamatejema penajamatabē-itajētsinexa taneasiwajawa xanējawaberena, yaiyataeya-ata taneto-exanawanapaenexa tajitsipaecuenia. Itsa aponetocopatsimē tsane pepitsapaenexa, nexata xanē catobeyaxuabianatsi nexēnato matapijinē,' caji raja», jamē tsane faraón-jawabelia —jai Jehová Moisés-jawabelia.

²⁴ Bajarapamonae penajetarubenaecujinae namutua, Moisés itsajota barēnacopatajopa pebarēmajitsinexa, bajarajota picani Jehová patajopa pebeyaxuabinexa Moisés, pexēnato matapijinē apopebo-upiperabēcaucutsixae.

²⁵ Nexata, Moisés pijawa Séfora bajarapaepatota pexiujai-iboto pexanaecusiupa pita. Nexata, pexēnato bo-upiperabēcaucuta. Bajaraxuacujinae, bajarapowa bajarapabo-upiperabētoyo tsitaxuxuaba pamona Moisés petaxujawabelia. Nexata, bajarapowa jumaitsi:

—Xamē cajena tamonamē pepacujiru pejana bitso netaejitsipañē —jai pexēnato pebo-upiperabēto petsitaxuxuabijawata.

²⁶ Itsiata, Jehová apobeyaxuabi Moisés. Copatatsi itsiata peponaenexa Egipto nacujawabelia. Pacujinae Séfora jumaitsi pamona yabara: «tamona bitso pejana petaejitsipañē», jai pexēnato pebo-upiperabēcaucutsijamatabēcuenē.

²⁷ Moisés itsa aponaropotsi abaxē Egipto nacujawabelia pepatsinexa, bajarapamatacabijawa Jehová jumaitsi Aarón-jawabelia:

—Ponaename petusato nacujawabelia necaxitajarabinexa Moisés —jai.

Aarón nexata pona bajarabelia pecaxitajarabinexa Moisés. CaxitajarabaDIOSO pijatsutojawatalia, Horeb-tsutojawata. Bajaraponē bajarajota bajacoba itabaratsutsuniaya. ²⁸ Nexata, Moisés tsipaeba Aarón-jawabelia daxitaxua jumaitsi Jehová, pacuenianua tonajumecopatatsi pejumaitsinexa. Bajarapacuenianua tsipaeba daxita papinijicuene itorobatsi pexanaenexa Egipto nacuatatia. ²⁹ Xuacujinae, bajaraponēbeje nawiatabeje Egipto nacujawaberena. Bajarajota, caetuata daxita pamonaē ancianowi, Israel-pijinē pemomoxi pewetsiwi, Jehová pitorobicueniatsibeje petsipaebinexa. ³⁰ Aarón tsipaeba bajarapamonaejawabelia daxitaxua Jehová jumaitsi Moisés-jawabelia. Bajaraxuacujinae, tsita-exana daxita papinijicuene tocopatatsi pexanaenexa bajarapamonae pitabarata. Nexata, daxitajiwi pepocuene tane pija-itaxutocujaya.

³¹ Nexata, bajarapamonae jumexaniatane Jehová pitorobijawatsibeje. Itsa jumetane Jehová petayabiabijawatsi pacuenia Egipto nacupijiwi bejiobia-exanawanapatsi, itsa jumetanenua pacuenia Jehová najamatabēcuenewereta peyawenonaenexatsi, nexata bajarapamonae yaiyataecuenia nubena

nabëxëtsutsiaya pexaniajamatabëcuene perajutsinexa pewajëtsijawata Jehovahjawabelia.

Moisés, Aarón-beje tsipaebabeje faraón Dioso petonajumecopatsiliwaisi

5 ¹Petsipaebicujinaebeje Israel-pijinë pemomoxipiji-ancianowijawabelia, bajaraxuacujinae jane baja, Moisés, Aarón-beje ponabeje Egipto nacua pewetsinëjawabelia, pejumaitsinexa DIOSO petonajumecopatsiliwaisitsi. Jumaitsibeje:

—Jehová raja cajumaitsi mapacueniaje, Israel-pijinë pemomoxi PijaDIOSO: «Copatsiana baja tajajiwi peponaenexa petusatonacuajawabelia, bajarajotalia pexanaenexa fiesta nenajamatabënapitsiaya tawënëta», caji raja Jehovah —jaibeje faraón-jawabelia.

²Itsiaa baitsi jane, Egipto nacua pewetsinë jumecanawiata mapacueniaje: —¿Detsa ponë pija Jehovah tájumecowënëtsinexa, tatocopatsinexanua Israel-pijinë pemomoxi peponaenexa petusato nacuaajawabelia? Xanë cajena bajaraponë Jehovah apoyapëtaenë. Itsiata, apocopatsinë tsane Israel-pijinë pemomoxi peponaenexa petusato nacuaajawabelia —jai faraón.

³Nexata, bajaraponëbeje jumaitsi:

—Paxanë paHebreomonaenë patajaDIOSO panetsitanaitajëtabeje. Pane-itorobanua pataponaenexa petusatonacuajawabelia, tajuitsiaya patarajutsinexa dajubi patajaDIOSO Jehovahjawabelia. Nexata, bajaraxuata paponaejitsianë petusatonacuajawabelia, pataponaenexa bejamatabëcujiru acueyabi pamatacabibejecuenia. Bajarajotalia, pa-exanaejitsianë patajaDIOSO patane-itorobicuenia. Itsa nexata apopato-exanaenë tsipae bajarapacuenia, nexata bajaraPonë caëjëpatsi patanewerebiabijawa wixaeta, itsa jume, wajabit-saëwi panetsi-itorobjitsipa patanewerebiabinexa —jaibeje.

⁴Itsiaa baitsi jane, Egipto nacua pewetsinë, faraón, jumaitsitsibeje:

—¿Dexuajitsia paxamëbeje maberenaje papatamebeje, mapamonae panecopabia-exanaenexabeje penacuenebijawa? Panawiatsianamebeje icatsia pane-itorobinexabeje bajarapamonae icatsia penacuenebawanapaenexa.

⁵Maparucaeje bitso baja ayaibitsaëtoxaeneto panijamonae Israel-pijinë pemomoxi amoneya panetonacuenebawanapa picani, itsiata paxamëbeje pacuene-yacaranataponamebeje rowia patanetonacuenebawanapaeyaniwa —jai faraón.

Faraón orijibia bejiobia-exana Israel-pijinë pemomoxi

⁶Nexata, bajarapamatacabi faraón itoroba pijajiwi peliwaishinamatacaito-robiwi amoneya penacuenebawanapaewijawata, bajarapacuenia pamonaenata Israel-pijinë pemomoxiyajuwënëwi penamataca-asaëwi pitorobabiabinexa penacuenebibitsaëtonë penacuenebijawata. Nexata jumaitsi:

⁷—¡Mapamatacabijawaweliacujinaeje pëtsa bajarapamonae patocapatapona name pebacamësi peyajawamatajërëabinexa tsorobo, pexanaenexa adobe, pacuenia pato-exananajetarubename picani copiaya! Bajarapamonae saya pijacujaya pebacamësi natojaitsiana. ⁸Itsiaa baitsi jane, pa-itorobianame pejutaponaenexa pa-adobewajëto jutabiaba caematacabita copiyami. Apoxanepanae tsane pesajinaejawa cae-adobe-ata. Bajarapamonae tsaena afaetabi, bajaraxuata nejumaitsi tsaponae ajumesaëya mapacueniaje:

«Ajenaconoxae paponaeajë petusatonacuajawabelia, bajarajotalia tajuit-siaya patarajutsinexa dajubi patajaDIOSojawabelia», nejai tsaponae.

⁹ ¡Nexata, bajarapamonae bitso asaëyata panacuenebia-exanare, pecuenesajinawanapaeyaniwa, penamuxuna-ewetsiyaniwa, Moisés penajumetsënëtsiliwaisi! —jai faraón pijajiwijawabelia.

¹⁰ Jejai bajarapamonae. Nexata, bajarapacujinae pona faraón pijajiwi, peliwaisinamatacaitorobiwi amoneya penacuenebawanapaewi, bajarapacuenia penamataca-asaëwi penacuenebiwibitsaëtonëjawata, pejumaitsinexa Israel-pijinë pemomoxijawabelia:

—Faraón raja panetonajumecopata patacatsipaebinexa patacarajutsiyaniwa pebacamësi. ¹¹ Nexata, ajenaconoxaeta paxamë panijacujaya pebacamësi panatosiwaponabiabianame panejaitsinexa. Itsiata baitsi jane, pebacumësi apopacatocapatabiabi-atatsi tsane, apopacatotixitsisirena tsane, tsitecaeya pajucaponaename pa-adobewajëtonë pajutabiabame copiyami, —jai pijajiwi.

¹² Nexata, bajarapamonae Israel-pijinë pemomoxi natsaneca daxita Egipto nacujawa pejaitsiwi ëponamatabacaxi, penacopabijawaxi pejuetsicujinae, pecanacuenebijawami pebacamësi. ¹³⁻¹⁴ Nexata, caematacabi canacujitsia faraón pijajiwi penamatacaitorobiwi asaëya itorobapona penamataca-asaëwi penacuenebibitsaëtonëjawabelia. Jumaitsi tsaponae:

—¡Paweretabiabare patacatocaëjëtsicuenia panenacuenebijawa, xuawajëto pacatocaëjëtatsi adobe panejutsinexa! Pacuenia picani copiyami paju-taponame, pacujinaeta abaxë pebacamësi pacarajutabiabatsi —jai tsaponae faraón pijajiwi. Nexata, itsa Israel-pijinë pemomoxi apojutaponae adobe petocaëjëtsicueniatsi, nexata faraón pijajiwi jumaconibabeponatsi Israel-pijinë pemomoxi pitapetsiwiitsi penamataca-asaëwinexa penacuenebibitsaëtonëjawata. Jumaitsinua tsaponae:

—¿Detsa xuajitsia apopaweretsimë pacuenia pacatocaëjëtatsi panenacuenebinexa? Caniwi, ajena-ata apopajutsimë pacuenia copiyami pajutabiabame —jai tsaponae faraón pijajiwi.

¹⁵ Nexata, penamataca-asaëwi penacuenebibitsaëtonëjawata Israel-pijinë pemomoxi pona faraón-jawabelia, penajamatabëcuene-itajëtsinexa xua yabara bajarapamonae apotsitaxanepanaetsi bajarapacuenia penacuenebia-exanaejawatatsi. Peyanijobijawata jumaitsi:

—¿Dexuajitsia nexata bitso bajarapacuenia panenacuenebia-exaname, tsipaji picani paxanë panijajiwinë tsawanapae acuenebi bajarapacuenia patane-exanaejawamë? ¹⁶ Nijajiwi apopanerajutsi pebacamësi. Itsiata, patsijaitsi-atanë, orijibia panejumaitsi tsaponae patajucaenexa pa-adobewajëto pajutabiabajë pacujinaeta pebacumësi panetocapatabiaba. Nexata, itsa apopatojutsinë xuawajëto picani bepajutajë, nijajiwi paneconitabiaba apopatajutsijamatabëcuene. Paxanë bajaraxua apopatajamatabëcuene. Bajarapamonae nijajiwi pejamatabëcuene —jai Israel-pijinë pemomoxi, pamonaë penamataca-asaëwi penacuenebibitsaëtonëjawata faraón-jawabelia.

¹⁷ Nexata, faraón jumecanawiatatsi:

—Paxamë raja saya pane-afaetabiwi, bajaraxuata panajumait-simë tsaponae: «Ponaenatsi wajarajutsinexa dajubi wajatajuitsijawata

Jehovájawabelia», panajamë tsaponae. ¹⁸ ¡Paponare baja panenacuenebabia-bijawabelia! Apopacarajutsi-ata tsane pebacamësi. Nexata, itsiata pajutaponaename pa-adobebeje caematacabita pacatocaëjëtapona papeca-itorobiwi panejutsinexa —jai faraón.

¹⁹ Nexata, pamonae penamataca-asaëwi penacuenebibitsaëtonëjawata Israel-pijinë pemomoxi, bitso jamatabëcuenebëjai paepatota jumetane pejumaitsijawatsi: «Apopacatocopatsitsi bewelia pa-adobebeje-ata panejutsinexa», pejajawatsi, tsipaji natocanaëjëta peto-ayapëbejajawatsi. ²⁰ Nexata, itsa baja pitsapalia bajarapamonae faraón-jawawelia pebarëcuaicuajiaicujinae, nexata caxitajaraba Moisés, Aarón-beje, tsipaji faraón pijabo pënëwelia ewetanucabeje pejumetaenexa pacuenia faraón jumecanawiatsijitsiatsi bajarapamonae. ²¹ Nexata jumaitsitsibeje:

—Paxamëbeje neconi panetsi-exanamebeje, tsipaji bitso pibisiacuenia paneto-exanamebeje. Panejamatabëcuenetabeje faraón, pijajiwi yajawa, pibisiacuenia panenaëcota. Patane-itoyajamatabëcuene, bitso patanenacuenebia-exanaejawata jamatabëpanebeyajebapona. Bajaraxuata, paxanë pajitsipajë Jehová papecananeconitsia-exanaejawabeje panijaneconijamatabëcuenebeje —jai Moisés-bejajawabelia Israel-pijinë pemomoxi penamataca-asaëwi penacuenebibitsaëtonëjawata.

Moisés wajëca Diosojawabelia penaneconitsixae pijamonaejawabelia

²² Nexata, Moisés wajëca Jehovájawabelia. Jumaitsi:

—Tajatuxanenë, ¿Dexuajitsia tocopatame petaenexa bitso pebejiobia-exanaecuenetsi mapamonaeje? ¿Dexuajitsia nexata tajanitorobimë mapamonaejawaberenaje? ²³ Tane-itorobicujinaemë newënëta tabarëcuaicuajainexa faraón, bitso bajaraponë ayacuena bejiobia-exanapona nijajiwi, Israel-pijinë pemomoxi. Bitso pewajënaeyabelia pibisiacuenia taeponatsi bajara-pamonae. Nexata, abaxë xamë apocapanepaemë nijajiwi. Caranata, bitso nacueratsiaya jinawanapa —jai Moisés pewajëtsijawata.

6 ¹ Nexata, Jehová jumecanawiata Moisés-jawabelia:

—Mapamatacabijawa taename pacuenia exanaejitsianë faraón-jawabelia tananeconitsia-exanaenexa, tsipaji petaecujinae tacuenesaë matapania bajaraponë copatsiana pepitsapaenexa Israel-pijinë pemomoxi pijanacuawecua. Baitsi, tacuenesaë petaecujinae nayajiwi-itorobiana peca-pitsapaenexa —jai Jehová.

Icatsia Dioso itoroba Moisés petojutsinexa Israel-pijinë pemomoxi Egipto nacuawecua

² Icatsia xuacujinae, DIOSO Moisés-jawabelia jumaitsi:

—Xanë raja Jehovánë. ³ Xanë raja tatsitanaitajëtsinë Abraham, Isaac, Jacob-jawabelia-ata. Bajarapamonaejawabelia naitajëtajë daxitawecua tacuenesaë taxainaeDiosonëcuenia. Itsiata baitsi jane, aponaitajëtsinë bajarapamonaejawabelia pepotawënë, Jehováwënëta. ⁴ Xanë baja cajena najumeliwaisicajunuajë bajarapamonaejawabelia tarajutsinexa Canaán nacua pijanacuanexa, itsajotalia bajarapamonae copiyami jinawanapa abaxë bepejanapatsiwicuenia itsanacuajawawerena. ⁵ Aeconoxaeta yapëtaniji Israel-pijinë pemomoxi nabejibitsiaya pejinawanapaejawa, pacuenianua

bitso nacuenebia-exanabiabatsi asaëyata Egipto nacuapijiwi. Nexata, xanë ajenaconoxae apotanacofënëtsixae tanajumeliwaisicajonejawami pijasalinaiwimijawabelia, siwanajamatabëcueneweretajë bajarapacuenia tato-exanaenexa. ⁶Bajaraxuata, jumaitsimë tsane Israel-pijinë pemomoxijawabelia: «Marapacuenia pacajumaitsi Diosoje: 'Xanë raja Jehovánë. Xanë raja pacajutsianatsi, daxita patacacapanepaenexa pinijicuenia amoneya panenacuenebijawamiwecua. Pacacapanepaenatsinua nabejibitsiaya panejinawanapaejawamiwecua. Pacacapanepaenatsi xanë tacuenesaëta, bajarapacuenia pinijicuenia tananeconitsia-exanaecujinae Egipto nacuapijiwi. ⁷Nexata, xanë pacaxainaanatsi Israel papemomoximë patajajiwiwëcuenia panejinawanapaenexa. Xanë pijinia panijaDIOSonë tsane. Nexata, bajarapacuenia patacacapanepaecujinae Egipto nacuapijiwi papecanacuenebia-exanaejawamiwecua, payapëtaenaxe xanë Jehovánë panijaDIOSonë, patacacapanepaenëcuene-ata. ⁸Bajaraxuacujinae, pacacaponaanatsi pana-cuayabelia xanë najumecapanepaeya rajutsiapaebajë Abraham, Isaac, Jacob-jawabelia-ata, papemomoximë panecanacopatsinexa. Nexata, xanë pacarajutsianatsi bajarapa-ira panija-iracuenia panexainaanexa. Xanë raja Jehovánë pacajumaitsi, 'pacajai DIOSO», jamë tsane Israel-pijinë pemomoxijawabelia —jai DIOSO Moisés-jawabelia.

⁹Nexata, Moisés tsipaeba bajarapacuenia pejumaitsicowëyatsi Israel-pijinë pemomoxijawabelia. Itsiata baitsi jane, bajarapamonae apojumexaniataetsi, tsipaji bajarapamonae bitso jamatabëcuenecueranawanapa asaëya, amoneyacuenia petonacuenebijawa Egipto nacuapijiwi.

¹⁰Nexata, Jehová jumaitsi Moisés-jawabelia:

¹¹—¡Ponare Egipto nacua pewetsinëjawabelia, nejumaitsinexa Israel-pijinë pemomoxi pecopatsinexa, Egipto nacuaawecua pepitsapaenexa! —jai.

¹²Itsiata baitsi jane, Moisés jumecanawiata Jehovájawabelia mapacueniaje:

—Itsa Israel-pijinë pemomoxi aponejumexaniatae pacuenia jumaitsinë, ¿Denexata pacuenia xanë nejumexaniataejitsipa faraón, bijiata tacuaicuaijainë? —jai.

¹³Nexata, Jehová itoroba Moisés, Aarón-bejejawabelia pejumaitsinexa-beje paliwaisi yajawanajumecopatatsibeje Israel-pijinë pemomoxi yabara, bajarapacuenia faraón-ata, peyapëtaeya-exanaenexa Israel-pijinë pemomoxi pecapitsapaenexa Egipto nacuaawecua. ¹⁴⁻³⁰ [...]

Dioso tocopata Aarón petocuaicuaijainënexa Moisés

7 ¹Nexata, Jehová jumaitsi Moisés-jawabelia:

—¡Nejumetaema xaniawaetsia! Xanë raja tajamatabëcuene cacopatsianatsi tajajiwitonëcueniamë faraón-jawabelia. Nematapijinë Aarón pijinia xamë pecajumewajunupaebinë tsane. ²Xamë raja jumaitsimë tsane Aarón-jawabelia daxitaxua xanë ca-itorobatsi ne-exanaenexa. Nexata, Aarón cuaicuaijai tsane faraón-jawabelia, pecopatsinexa pepitsapaejawa Israel-pijinë pemomoxi Egipto nacuaawecua. ³Itsiata baitsi jane, xanë copatsianajë faraón piäjamatabëcuenetajanëcuenia papecajumecowënëtsiyaniwabeje. Nexata, xanë tsita-exanaenajë bitso pinijicuenejawanë Egipto nacuapijiwi pejamatabëcuenenabenajacababinexa. ⁴Bajarapacuenia tsita-exanae-atanë

tsane, faraón apopacajumecowënëtsibeje tsane. Itsiata bailsi jane, xanë najamatabëcuenecapitsapaenajë tacuenesaëjawa tanacuenen-itajëtsijawata Egipto nacuapijiw jawabelia. Nexata, capitsapaenajë wajabitsaëwicuenia taxainaewi tajajiwi, Israel-pijinë pemomoxi, pinijicuenia tananeconitsia-exanaecujinae faraón pijajiwi jawabelia. ⁵ Bajarapacuenia matapania Egipto nacuapijiwi necueneyapëtaena xanë Jehováncuene, pacujinae jutajë Israel-pijinë pemomoxi tacuenesaëta bajarapamonaewecua —jai Jehová Moisés-jawabelia.

⁶ Moisés, Aarón-beje exanabeje pacuenia baja Jehová tonajumecopatatsi pexanaenexa. ⁷ Moisés bajarapacujinaeta xaina ochenta y tres pawaiibeje, pacujinaeta barëcuaiicuijaibeje Faraón.

Pacuenia Aarón pijanaebomi jomo naexana, yabara peliwaissi

⁸ Xuacujinae, Jehová jumaitsi Moisés, Aarón-beje jawabelia:

⁹ —Itsa faraón papecajumecanawitsijawata pacajumaitsiibeje tsane: «¡Panetsita-exanarebeje pinijicuenenajawa», itsa pacajaiibeje, nexata jumaitsimë tsane Aarón-jawabelia: «Panaebo cobenanucame, tsitaxuare irabelia faraón pitabarata, bajarapacuenia nijanaebomi jomo penaexanaenexa», jamë tsane! —jai Jehová Moisés-jawabelia.^m

¹⁰ Bajaraxuacujinae, Moisés, Aarón-beje, ponabeje baja faraón-jawabelia. Exanabeje pacuenia Jehová itorobatsibeje. Nexata, Aarón pijanaebo faraón tsitabaraxuaba irabelia, bajarapacuenia peyawanacuenebiwi-ata pitabarata. Nexata, bajaraponaemi jomo naexanaxunua. ¹¹ Faraón pijinia junata pijajiwi peyapëtaewi, petsiyapëtaewinuaⁿ pexanaecuenen pinijicuenenajawanë dowathi pejamatabëcueneta. Nexata, bajarapaEgipto nacuapijiwi caejiwi canacujitsia exanapona bajarapacuenia pematawajibicuenia. ¹² Nexata, caenë canacujitsia pijanaebo irabelia buatajarabapona. Bajaraponaebonëmi jomo naexanaxuababiaba. Itsiata bailsi jane, Aarón pijanaebo toquijoba daxita bajarapamona pijanaebonëmi. ¹³ Bajarapacuenia faraón cuenetae-ata petsita-exanaejawatsi, abaxë ajamatabëcuenetaja. Apojumecowënëtsitsibeje, Moisés, Aarón-beje, pejumaitsicowëya Jehová bajaraponë yabara.

Dioso tsi-itoroba Egipto nacuapijimenianë pejana penaexanaenexa

¹⁴ Bajaraxuacujinae, Jehová jumaitsi Moisés-jawabelia:

—Faraón raja ajamatabëcuenetaja tsecae. Nexata, bajaraxuata apocopatsi Israel-pijinë pemomoxi pepitsapaenexa Egipto nacuwecua. ¹⁵ Itsiata bailsi jane, merawia bajayacunua ponaename faraón-jawabelia paepatota bajaraponë pona

m 7:9 *Dioso tsi-itoroba diez papiayaicuenenajawanë daxitata:* 1) Dioso tsi-itoroba Egipto nacuapijimenianë pejana penaexanaenexa. Éxo. 7:14-23, 2) Dioso tsi-itoroba cuaimona pepitsapaenexa menewetsina. Éxo. 7:25-8:15, 3) Dioso tsi-itoroba irajumapërëmi penaexanaejawa wacape. Éxo. 8:16-19, 4) Dioso tsi-itoroba mapara bitso penawitsinexa. Éxo. 8:20-30, 5) Dioso tsi-itoroba dajubi pijadomae petotëpaenexatsi. Éxo. 9:1-7, 6) Dioso tsi-itoroba petsabanaebo pecapunaenexatsi. Éxo. 9:1-12, 7) Dioso tsi-itoroba athëbëwetsica pithopaenexa bitso pecainajebitonë. Éxo. 9:13-35, 8) Dioso tsi-itoroba bosese pewatereninexa daxitawiria naejawanë. Éxo. 10:20, 9) Dioso tsi-itoroba Egipto nacuapijiwi peto-aitaquiria-exanaenexa pijanacua. Éxo. 10:21-29, 10) Dioso tsi-itoroba piña-àngelnë petobeyaxuabaponaenexa pepomatapijinë Egipto nacuapijiwi pexi. Éxo. 11. **n 7:11** *petsiyapëtaewinua:* Itsanëbeje bajarapamonaeyajuwënëwi pewënë Janes, Jambres-beje. Taema 2Ti 3:8.

pepamene-itapayabereca. Bajarajotareca, xamë ewetanucaename. Nexata, xamë caponaename nijanaebo, panaebo netsi-itabaraxuabijawata jomo naexanajunua. ¹⁶Bajarapaepatota, jumaitsimë tsane bajaraponëjawabelia: «Jehová raja hebreowi pijaDioso nitoroba xamëjawaberena tacajumaitsinexa: 'Copatsiana baja tajajiwi peponaenexa, bajarapamonae penajamatabë-itajëtsinexa tane-asiwajawa xanëjawaberena,' yaiyataeya taneto-exanawanapaejawata tajitsipaecuenia petu-satonacuajawatalia,' nitoroba tacajainexa. Itsiata baitsi jane, catsipaebi-atatsi, abaxë mapamatacabijawaweliaje apojumecowënëtsimë bajaraPonë. ¹⁷Mara-pacueniaje nexata, orijibia cajumaitsi Jehová: 'Maraeta xuataje xanë tacatsita-exanaejawatanexa, matapania necueneyapëtaename Jehovánëcuene,' cajai raja Dioso. Bajaraxuata, ajenaconoxae xanë itameneconitaxuabianajë ponaebo cobenanuacajë mapaNilo menejawabeliaje. Nexata, bajarapamene naexanaena pejana. ¹⁸Nexata, daxita dujuai tëpaena bajarapameneta pejinawanapaewi. Bajarapacuenianua amenebeje tsane. Egipto nacuata pejinawanapaewi janijunawiana bajarapamera piapaenexa», jamë tsane faraón-jawabelia —jai Jehová Moisés-jawabelia.

¹⁹Bajaraxuacujinae, icatsia Jehová jumaitsi Moisés-jawabelia: —jJumaitsimëre Aarón-jawabelia, pepitsinexa pijanaebo, pecobenana-maxëyotsinexa menematatsënëalia, bajarapacuenia daxita Egipto nacuapijimenianë, penajatonë, pucanë, pecaetuatejebimeranë-ata penaexanaenexa pejana, bajarapacuenia canalitonëta peyajebimeranë-ata, bajaraxuanëjawa daxita Egipto nacuata pejana penaexanaenexa! —jai Jehová.

²⁰Nexata, Moisés, Aarón-beje, bajarapacuenia exanabeje. Nexata, Aarón naebota itameneconitaxuaba menejawabelia faraón pitabëta, pijajiwi-ata peyajawanacuenebiwi. Nexata, bajarapaepatota daxita meranë bijiana. Naexananua baja pejana. ²¹Nexata, daxita dujuai bajarapameneta pejinawanapaewimi tëpa. Nexata, bajarapaepatota mera baja bitso abeje. Apoxanepanae piapaenexa Egipto nacuata pejinawanapaewi. Daxita Egipto nacujawa pameranë xaina, pejana naexana.

²²Itsiata baitsi jane, Egipto nacuata pejinawanapaewi petsiyapëtaewi pexanaenexa pinijicuenejawanë dowathi pejamatabëcueneta, nexata bajarapamonae-ata exana wajita pematawajibicuenia Moisés, Araón-beje pexanaecowëya. Baitsi, itsamera bijiana pejana penaexanaenexa. Nexata, faraón bajarapacuenie itsa tane, bajaraponë tsitecaeya ajamatabëcuenetaja. Apojumecowënëtsi Moisés, Aarón-beje, pacuenia Jehová jumaitsi picani bajaraponë yabara. ²³Nexata, faraón nawiataponaya pijabojawabetsia. Bajaraponë cuenetae-ata bajarapacuenia, apotsitanamatamotsitsi. ²⁴Nexata, daxita Egipto nacuapijiwi cuepona mera-mëthëanë mene-itapajawa pecaxibajarabinexa pexaniameranë piapaeranënexa, tsipaji bajarapamenepijimera apocajëpae piapaajawa.

Dioso tsi-itoroba cuaimonae pepitsapaenexa menewetsina

²⁵Siete pamatacabibeje baja itsa xaina Jehová mera pejana pexanaecujinae, bajaraxuacujinae Jehová jumaitsi Moisés-jawabelia:

8 ¹—Ponaename icatsia netaenexa faraón. Jumaitsimë tsane: «Cajumaitsi raja Jehová mapacueniaje: 'Copatsi baja tajajiwi peponaenexa,

bajarapamonae penajamatabë-itajëtsinexa tane-asiwajawa xanëjawaberena, yaiyataeya-ata taneto-exanawanapaenexa tajitsipaecuenia. ²Itsa xamë apocopsimë tsane peponaenexa, nexata xanë tacananeconitsia-exanaecuenia catocopatsianatsi cuaimonae daxita ne-ewetsinacujawa penawitsinexa. ³Nexata, Nilo mene nawitsiaya capitsapaena bajarapacuaiimonae ayai-bitsaëttoxaneto. Nexata, catsimaxëpitsapaena menewetsina, peponaenexa ne-ecaebowabetsia, pabota-ata majitabiabanucame, nijacamajawa-ata pejunaenexa itsajota majitabiabanucame. Bajarapacuenia neyajawana-cuenebiwi pijabonëjawata-ata penawitsinexa. Bajarapacuenia pamonae neyanacua-ewetsiwi tsawanapae, bajarapamonaejawata-ata nawitsiana. Itsa-jotania panamitsasebabiabame pan-jawanë,^p pawaxianëta cajayababiabame pan ne-exanaenexa, bajaraxuayo bajarapamonae enaena. ⁴Nexata, bajarapacuaiimonae xamë catsijunaena, bajarapacuenia neyajawanacuenebiwi, bajarapacuenia neyanacua-ewetsiwi jawabelia-ata, 'cajai', jamë tsane —jai Jehová Moisés-jawabelia.

⁵Xuacujinae, icatsia Jehová jumaitsi Moisés-jawabelia:

—¡Itorobare Aarón-jawabelia pijanaebo pecobenanamaxëyotsinexa menematatsënëalia, daxita pamenianë bobena Egipto nacuata, bajarapacuenia penajatonë-ata, bajarapacuenia pepitsapaenexa cuaimonae pewënëcaenexa daxita Egipto nacujawa! —jai Jehová.

⁶Jejai. Nexata, Aarón pijanaebo cobenanamaxëyota menematatsënëalia cuaimonae pepitsapaenexa menewetsina, daxita Egipto nacua pewënëcaenexa. ⁷Itsiata baitsi jane, petsiyapëtaewi dowathi pejamatabëcueneta pini-jicuene pexanaewi, bajarapitsicuene exana. Bajarapamonae nexata capata wajita bajarapitsicuaiimonae Egipto nacuata. Nexata, wënëca Egipto nacua bajarapamonae pecapatsiwi. ⁸Bajaraxuacujinae, faraón junata Moisés, Aarón-beje. Jumaitsi:

—¡Panetowajërebeje Jehovájawabelia, patanewecua-ajibia-exanaenexa mapacuaimonaeje, bajarapacuenia xanë yabara, tajajiwi yabara-ata! Nexata, xanë copatsianajë panijamonae penaponaenexa, tajuitsiaya perajutsinexa dajubi Jehovájawabelia —jai faraón.

⁹Moisés nexata jumecanawiata faraón:

—¡Nejumaitsimëre pacujinae jitsipame tacatowajëtsijawa xamë yabara, neyajawanacuenebiwi, neyanacua-ewetsiwi-ata papecawecua-ajibia-exanaenexa bajarapacuaiimonae, penacopatsinexa ëmenejawata! —jai Moisés.

¹⁰Nexata, faraón jumaitsi:

—Merawia tsane —jai.

Nexata, Moisés jumecanawiata icatsia:

—Nexata, bajarapacuenia exanaenajë, pacuenia nejumaitsimë necueneyapëtaenexa Jehová pecawecua-ajibia-exanaejawa, tsipaji ajibi itsanë pecueneceajëpaenëtsi pacuenia cuene-itsi patajaDIOO Jehová. ¹¹Nexata, cuaimonae pacawecuaponaena xamë faraón, bajarapacuenia neyajawanacuenebiwi, daxita neyanacua-ewetsiwi-ata, bajarapacuenia daxita panijabonë-atawecua. Bajarapacuenia pematatsënëa baja apopacajamatabë-itonotsi

tsane paxamë. Bajarapacuaimonae jinawanapaena ëNilo menejawatareca —jai Moisés.

¹² Moisés, Aarón-beje baja, pitsapa faraón pe-ecabiabibowecua. Nexata, Moisés xuacujinae towajëta Jehovájawabelia pewecua-ajibia-exanaenexa bajarapacuaimonae, pamona tsi-itoroba picani faraón-jawabelia. ¹³ Nexata, Jehová to-exana pacuenia wajëtatsi Moisés. Nexata, cuaimonae tëpa, pamona ena bonëjawa, panabojawa, wayafojawa-ata. ¹⁴ Bajarapanacuapijiwi caetuata bajarapacuaimonae petëpaewi penajumajebaponaenexa. Daxita Egipto nacua bitso ya-iratuxutsaeba bajarapamatacabijawa. ¹⁵ Itsiata baitsi jane, itsa faraón tane pewecuaponaejawatsi cuaimonae, abaxë ajamatabëcuene-taja. Apojumecowënëtsi Moisés, Aarón-beje, pacuenia jumaitsitsibeje picani Jehová bajaraponë yabara.

Dioso tsi-itoroba mapara bitso penawitsinexa

¹⁶ Nexata, Jehová icatsia jumaitsi Moisés-jawabelia:

—¡Jumaitsimëre Aarón pijanaebota irajuma peconitaxuabinexa, bajarapatsa irajumapërëmi penaexanaenexa wacape^q daxita Egipto nacujawa! —jai.

¹⁷ Bajaraponëbeje bajarapacuenia exanabeje. Aarón namaxëyotsiaya pijanaeboyota conitaxuaba irabelia. Nexata, bajarapa-ira-atsapërëmi naexanajunua wacape daxita Egipto nacujawa. Nexata, bajarapawacape bitso xanetsi Egipto nacuapijiwimi, bajarapacuenia pijadajubijawabelia-ata. ¹⁸ Egipto nacuapijiwi dowathi pejamatabëcueneta pinijicuene pexanaewi cuene-ëjëta picani bajaraxua-ata pexanaenexa, pecapitsapaenexa wacapemona ira-atsajumapërëjawami. Itsiata baitsi jane, apocuenecaëjëpaetsi pexanaenexa. Bajarapapatota, bajarapawacapemona bitso werene jiwimi, bajarapacuenia dajubijawabelia-ata. ¹⁹ Nexata, xuacujinae bajarapamona dowathi pejamatabëcueneta pinijicuene pexanaewi jumaitsi faraón-jawabelia:

—¡Marabaja jane jota yapëtanetsije Dioso pexanaecueni! —jai.

Itsiata baitsi jane, faraón bajarapacuenia tae-ata, ajamatabëcuenetaja abaxë. Itsiata, apojumecowënëtsi Moisés, Aarón-beje, pacuenia Jehová jumaitsi bajaraponë yabara.

²⁰ Xuacujinae, Jehová jumaitsi Moisés-jawabelia:

—Merawia raja namatacotsianame pepobajayacunua. Nexata, ponaename faraón pewajënaeya pepamenejawabereca, bajarajota necaxitajarabinexa mene-itapayabereca peponaenë. Nexata, jumaitsimë tsane: «Jehová raja icatsia cajumaitsi: ‘Copatsianame baja tajajiwi peponaenexa, bajarapamona penajamatabë-itajëtsinexa tane-asiwajawa xanëjawabereca, yaiyataeya-ata taneto-exanawanapaenexa tajitsipaecuenia. ²¹ Itsa raja apocopatsimë tsane

q 8:16 Wacape: Apoyapëtaetsi xaniawaetsia itsa pepacueni wacapemona, Egipto nacuada pamona tsimaxëpatatsi Dioso pejamatabëcueneta. Wowajumeta itsa, «mosquito», jai, saya cajunua atsinëxi yabara, pacuenia tsiquiridainatoxi, fiafiatoxi, petinenëxi, wacapetoxi-ata yabara, jai. Bajaraxuata, apoyapëtaetsi xaniawaetsia pawiriacuene. Bajarapijinia pacuenia hebreojume. Reina-Valerapijibibliabaxutojucaewi juya itajëta tarë yabara, tsipaji apocaxitajarabi pejume pawirianë yabaracuaicuaijai bajarapahebreojume meta. Saya canaëjëta tarë yabara. Tsipaji apocaxitajarabi pawirianë yabaracuaicuaijai, bajaraxuata bajarapacuenia yaquinaruta. Juya, Dios Habla Hoypijibibliabaxutojucaewi itajëta bajarapajume mosquitocuenia. Taema «mosquito», glosariojawata.

tajajiwi peponaenexa, nexata xanë catsi-itorobianatsi xamë, faraón, maparamonae pecaxaenexa, bajarapacuenia neyajawanacuenebiwi, neyanacuaewetsiwijawabelia-ata, daxitajiwi pijabonëjawa-ata pepatsinexa. Bajarapacuenia wënëcaena maparamonae daxita Egipto nacuapijiwi pijabonëjawa. Yacaëjëpaena daxita iranëjawa-ata.

²² »Pamatacabi pacatocapatsianatsi maparamonae, itsiata baitsi jane, xanë tajajiwi apotocopiapatsia-exanaenë tsane Gosén nacuaajawatalia pejinawanapaewi. Gosén nacua Egiptoyajuwënë-ira-ata picaní, bajarajota caenë-ata maparato aponaitajëtsi tsane, tajajiwi pejinawanapaenacuaxae. Nexata, bajarapacuenia paneyapëtaenaxanë, Jehovánë, taponaponaenëcuene mapanacuataje. ²³ Nexata, saicaya pacatsatsianatsi paEgiptonacuapijiwimë saicayacuenia pataca-ewetsinexa. Najëpaeya apopacatae tsanetsi tajajiwi pejinawanapaewi. Merawia bajaraxua pacatocopiapatsia-exanaenatsi, ëpaxamë, 'cajai», jamë tsane faraón-jawabelia —jai Jehová Moisés-jawabelia. Moisés jejai baja. Bajarapacuenia lia petsipaebinexa.

²⁴ Nexata, merawia pitsijawata bajarapacuenia Jehová exana. Nexata jane baja, pata daxitawiria mapara pejamatabë-itonotsinexatsi. Pepunanajetarubenaewata, bepajubocuenia najetarubena bitso penawitsixae. Nexata, bajarapamaparamonae itsa pata, wënëca faraón peponaponaewajawata, pamonae peyajawanacuenebiwi pijabonëjawa-ata. Daxita Egipto nacuaajawa wënëca. Nexata, bitso pepobijianae^r pexanianacuajawami.

²⁵ Nexata, bajaraxuacujinae faraón junatsia-exana Moisés, Aarón-beje. Nexata, jumaitsi bajaraponëbejewabelia:

—¡Paponare baja dajubi panetotajuitsinexa panijaDIOSO paneyaiyataecuenia, jane baitsi papitsapaenewamë Egipto nacuaewecua. Pëtsa baitsi jane, paponame petusatonacuajawabelia! —jai.

²⁶ Nexata, Moisés jumecanawiata:

—Apoxanepanae bajarapacuenia pata-exanaenexa, tsipaji padajubi paxanë tajuitsiaya parajutsijitsianë Jehová patajaDIOSOjawabelia, bajarapadajubi raja Egipto nacuapijiwi itajunawabiaba. Nexata, paxanë itsa Egipto nacuapijiwi panecuenetaejitsipa bajarapacuenia pata-exanaewata, DIOSOjawabelia patatajuitsijawata bajarapitsidajubi, nexata bajarapamonae panetseconaejitsipa piniji-ibotonëta patanebeyebibinexa. ²⁷ Nexata, bajaraxuata beponajë Egipto nacuaewecua petusatonacuayabelia acueyabi pamatacabibecuenia, bajarajotalia patanetoxanepanaenexa tajuitsiaya patarajutsijawa dajubi Jehová patajaDIOSOjawabelia, pacuenia bajaraPonë pane-itoroba —jai Moisés.

²⁸ Nexata, xuacujinae faraón jumaitsi:

—Je. Pacatocopatsianatsi paneponaenexa petusatonacuayabelia, bajarajotalia panetotajuitsinexa dajubi Jehová pewënëta panijaDIOSO. ¡Jane baitsi, itsiata pëtsa bitso paponame tajëjawabelia! Bajarajotalia, xanë-ata yabara panetowajëtsianame —jai faraón.

²⁹ Nexata, bajarajota Moisés jumecanawiata:

^r 8:24 *pepobijianae*: Bajarapacuenia jumaitsi, tsipaji bajarapawiriamaparamonae itsajota xanetsi jiwi, dajubi-ata yajinabiaba. Itsajotanua natobëjeba naebaxujawabelia, bajarapanaejawanë tsaquenapona. Baitsi, jiwi, dajubi, naejawanëna bijiana bajarapawiriamaparamonae.

—Majotaje itsa pitsapaenajë, xanë wajëtsianajë Jehovahawabelia xamë yabara, merawia pecawecua-ajibia-exanaenexa bajarapamaparamonae, bajarapacuenia neyajawanacuenebiwi, neyanacua-ewetsiwi-ata. ¡Itsiata baitsi jane, pëtsa paneyamaxë-itojorobapona pacuenia exanapona, orijibia neyacaranatsinexa Israel-pijinë pemomoxi peponaeyaniwa, tajuit-siaya perajutsinexa dajubi Jehovahawabelia! —jai.

³⁰Nexata, Moisés itsa baja pitsapa faraón pe-ecaebowecua, wajëta Jehovahawabelia. ³¹Nexata, Jehovah to-exanatsi pacuenia Moisés wajëta. Nexata, daxita maparamonae wecuaponatsi baja faraón, bajarapacuenia peyajawanacuenebiwi, peyanacua-ewetsiwi-ata. Nexata, caenë-ata maparato aponacopatsi. ³²Faraón bajarapacuenia tae-ata, icatsia orijibia abaxë ajamatabëcuenetaja. Apocopatsi pepitsapaejawa Israel-pijinë pemomoxi peponaenexa.

Dioso tsi-itoroba dajubi pijadomae petotëpaenexatsi

9 ¹Bajaraxuacujinae, Jehovah jumaitsi icatsia Moisés-jawabelia:

—Ponaename icatsia netaenexa faraón. Jumaitsimë tsane: «Jehová raja, hebreomonae pijaDIO, icatsia cajumaitsi: ‘Copatsianame baja peponaenexa tajajiwi, bajarapamonae penajamatabë-itajëtsinexa tane-asiwajawa xanëjawaberena, yaiyataeya-ata taneto-exanawanapaenexa tajitsipaecuenia. ²Itsa apocopatsimë tsane peponaejawa, itsa tsitecaya tajajiwi newecua-asiwamë tsane, ³nexata Jehovahänë tacuenesaëcuene catsitajëtsianatsi. Nexata, tsi-itorobianajë pijadomae Egipto nacuapijiwi pijadajubijawabelia, wayafuabelia pejinawanapaedajubi. Nexata, tēpaena daxita caballomonae, burromonae, camellomonae, vacamonae, ovejamonae-ata. ⁴Itsiata baitsi jane, Jehovahänë itsacuenia Israel-pijinë pemomoxi pijadajubi to-ewetsianajë Egipto nacuapijiwi pijadajubiwecua. Nexata, Israel-pijinë pemomoxi caenë-ata apotoyajuwënëtēpae tsanetsi, cajai», jamë tsane —jai Jehovah Moisés-jawabelia.

⁵Jehová yapëtaeya-exana Moisés pamatacabi tocaëjëta petsi-itorobinexa pinijidomae dajubijawabelia. Jumaitsi:

—Merawia xanë Jehovahänë, bajaraxua exanaenajë —jai.

⁶Nexata, itsamatacabi bajayacunua Jehovah bajarapacuenia baja exana. Nexata, daxita Egipto nacuapijidajubimi^s tēpa. Itsiata baitsi jane, Israel-pijinë pemomoxi pijadajubi, caenë-ata apotoyajuwënëtēpaetsi. ⁷Faraón nexata itoroba pijajiwi petaenexa Israel-pijinë pemomoxi pijadajubi. Nexata, bajarapamonae petaeui jumaitsi:

—Israel-pijinë pemomoxi pijadajubi caenë-ata apotoyajuwënëtēpaetsi —jai.

Bajarapacuenia tae-ata, itsiata bajaraponë ajamatabëcuenetaja. Apotocopatsi Israel-pijinë pemomoxi peponaenexa.

Dioso tsi-itoroba petsabanaebo pecapunaenexatsi

⁸Jehová xuacujinae jumaitsi Moisés, Aarón-bejejawabelia:

—Papitsianamebeje panecobetabeje ipumana hornopijijawa. Nexata, xamë Moisés cayajabixuabianame athëbëabelia faraón pitabarata.

^s 9:6 Egipto nacuapijidajubimi: Èpamonae wayafuabelia penubenaewi tsaena tēpa. Taema Éxo. 9:3.

⁹Nexata, bajarapa-ipumanajawami naexanajonena petsëxë, bajarapacuenia bajarapatsëxë peponaenexa daxita nacujawa. Nexata, bajarapatsëxëmi petsabanaebo capitsapaena daxitajiwijawabelia, bajarapacuenia dajubijawabelia-ata Egipto nacuata pejinawanapaewi —jai Jehová, Moisés, Aarón-bejefawabelia.

¹⁰Moisés, Aarón-beje nexata pitabeje ipumana hornopijijawa. Nexata, bajarapajiwiubeje capona faraón-jawabelia. Nexata, Moisés athëbëabelia cayajabiauxaba faraón pitabarata. Nexata, bajarajota jiwi capunatsi baja petsabanaebo, bajarapacuenia dajubijawabelia-ata. ¹¹Pamonae dowathi pejamatabëcueneta pinijicuene pexanaewi apocuenecaëjëpaetsi pepatsinexa faraón pitabarata pecuencaranatsinexa Moisés, tsipaji bajarapamonae-ata capunatsi bajarapatsabanaebo, bajarapacuenia daxita Egipto nacupijiwi-ata. ¹²Itsiaa baitsi jane, Jehová copata faraón piagamatabëcuenetajanexa, pecopatsiyaniwa, pejumecowënëtsiyaniwanua, pacuenia Jehová jumaitsi Moisés-jawabelia bajaraponë yabara.

Dioso tsi-itoroba athëbëwetsica piothopaenexa bitso pecainajebitonë

¹³Xuacujinae, Jehová jumaitsi Moisés-jawabelia:

—Merawia bajayacunua namatacotsianame, neponaenexa, nejumaitsinexa faraón-jawabelia. Jumaitsimë tsane: «Jehová raja hebreomonae pijaDioso icatsia cajumaitsi: ‘Copatsianame baja peponaenexa tajajiwi, bajarapamonae penajamatabë-itajëtsinexa tane-asiwajawa xanëjawaberena, yaiyataeya-ata taneto-exanawanapaenexa tajitsipaecuenia. ¹⁴Tsipaji ajena itsa aponejumecowënëtsimë tsane, nexata xanë catsi-itorobianatsi daxita papiayaicuene xainajë pecatsijopaenexa xamë, faraónmë, bajarapacuenia neyawanacuenebiwijawabelia, neyanacua-ewetsiwiwijawabelia-ata, neyapëtaenexa ajibi itsanë mapanacuataje tanejamatabëcuenejëpaenë. ¹⁵Xanë picani necuenecaëjëpa patacatsitajëtsinexa tacuenesaëta patacawerebiabijawa piayaicuenejawanëta. Bajarapacuenia itsa pacatsi-itorobijitsipatsi, nexata pacawerebiabijitsipatsi baja mapanacuawecuaje. ¹⁶Itsiaa, bajarapacuenia apopacawerebiabitsi, tsipaji picani pacatojitsipatsi paxamë patanecuenetaenexamë tacuenesaëta tanecuenecaëjëpaenëcuene. Bajarapacuenia pacatsitajëtaPONATSi daxita nacupijiwi tanewënëyapëtaenexa tanecuenecaëjëpaenëcuene paxamë patacananeconitsia-exanaejawata piayaicuenejawanëta. ¹⁷Itsiaa, bajarapitsicuene necuenetae-atamë, xamë newecua-asiwamë tsaponae tajajiwi pepitsapaeyaniwa mapanacuawecuaje. ¹⁸Bajaraxuata baja, merawia mapaepatotaje pacatsi-itorobianatsi itsajawa piayaicuenejawa. Copatsianajë piothopaenexa athëbëwetsica bitso piarewecainejebitonë. Pacuenia caeto-ata Egipto nacuata apotae abaxë petaxuxuabicujinaerena pejinawanapaewi ajena pamatacabijawaberena, bajaraxua xanë copatsianajë. ¹⁹Nexata, pa-itorobare papecatocaetuatsinexa bonëjawa panijadajubi, daxitaxuanë paxainame wayafuanëjawa, bajarapacuenia panecapanepaenexa bajarapapiayaicuene newecua! Daxita pamonae wayafota jinawanapa jiwi, dajubi-ata, itsa boyaberena apopacatsimë tsane, nexata itsa athëbëwetsica othopaenica bajarapa-arewecainejebitonë, bajarapamonaei beyaxuabianatsi. Nexata, bajarapaepatota pamonae jinawanapaena wayafowawabelia, bajarapamonae apocaëjëpae tsane penacapanepaejawa.

Ëpetëpaenexa saya, 'cajai», jamë tsane faraón-jawabelia —jai Jehovah Moisés-jawabelia.

²⁰ Itsamonae pijinia faraón peyajawanacuenebiyajuwënëwi itsa bajara-xua jumetane Jehovah pejumaitsiyawatsi, bitso junawa. Nexata, pona pijajiwi amoneya bedajubiwicuenia petonacuenebiwitsi penacaetuatsinexa, bajarapacuenia pijadajubi-ata pecaetuatsinexa bonëjawaberena petotëpaeyani-watsi. ²¹ Itsiata baitsi jane, itsamonae apojumexaniatae xua jumaitsi Jehovah. Nexata, bajarapamonae xaina pijajiwi, pijadajubi-ata wayafojawa.

²² Nexata, icatsia Jehovah jumaitsi Moisés-jawabelia:

—¡Namaxëyore athëbëabelia daxita Egipto nacujawa piothopaenexa piarewecainejebijawanë jiwijawabelia, dajubijawabelia-ata, bajarapacuenia daxitaxuanë ajena pejuwijawanë pijapabianëjawa pebijianaenexa Egipto nacuata! —jai Jehovah.

²³ Moisés nexata cobenanamaxëyota pijanaebo athëbëabetsia. Nexata, bajarapaepatota Jehovah itoroba yamaxëmonaenë pejurujurujainexa. Ayai-cuenia binepajunujunua. Itsajawa pijinia yamaxë othopa. Othopaeya-exanaica jane baja bitso piarewecainejebitonë irabetsica daxita Egipto nacujawa. ²⁴ Nexata, othopa piarewecainejebijawanë ayaicuenia Egipto nacuata. Bajarapacuenia yamaxëmonaenë bitso binepajunujunua. Caeto-ata Egipto nacujawata bajarapitsicuene apocopiapatsi. Apotae-ata abaxë pamonae jinawanapa bajarapanacuata petaxuxuabicujinaerena. ²⁵ Nexata, bajarapiarewecainejebitonë daxita Egipto nacujawa pe-othopaejawata tsapabajaraba, pebijianaenexa daxitaxuanë xaina wayafua. Nexata, jiwi tëpa, bajarapacuenia dajubi-ata. Bajarapacuenia daxita naejawanë pemaxëranaxi tsicabajaraba piothopaejawata athëbëwetsica. Bajarapacuenia daxita peju-wijawanë pijapabianëta tobijianatsi. ²⁶ Itsiata, Gosën nacuata itsajota jinawanapa israelitawi, bajarapanacuata apojopae caepiarewecainejebijawa-ata.

²⁷ Nexata, bajaraxua faraón petaejawata, itoroba pejunatsinexa Moisés, Aarón-beje. Nexata jumaitsi:

—Xanë ajena natoyapëtaniji pibisiacuene ta-exanaejawa. Jehovah raja ane-conijibia peponaponaenë. Paxanë juya pibisiacuene pata-exanaewi, bajaraxuata bajarapapibisiacuene panetsijumajopa. ²⁸ ¡Nexata, paneyajiwiwajëre Jehovah patanewecua-ajibia-exanaenexa bajaraPonë patanetsicopatsidiridiri-jaijawa ayaicuenia, bajarapacuenia piarewecainejebitonë-ata! Nexata baja, xanë apowecua-asiwanë tsane Israel-pijinë pemomoxi. Copatsianajë bajarapamonae peponaenexa —jai faraón.

²⁹ Nexata, Moisés jumecanawiata:

—Je, itsa nexata ajenaconoxae pitsapaenajë mapatomaraweliaje, nexata icatsia xanë daxitamaxëbeje namaxëyotsianajë athëbëabelia Jehovahajawabelia tawajëtsinexa. Nexata, bajaraponë pacawecua-ajibia-exanaena piothopaejawa piarewecainejebitonë, pediridirijaijawanua. Bajarapacuenia Jehovah pacato-exanaena, paneyapëtaenexa daxita mapanacua bajaraPonë pijanacuacueneje. ³⁰ Itsiata baitsi jane, xanë pacacueneyapëtanetsi. Xamë, neyajawanacuenebiwi, neyanacua-ewetsiwi-ata Jehovah DIOO cujunawiaya, yaiyataecuenia-ata abaxë apopacataetsi panejinawanapaejawa —jai Moisés.

³¹⁻³³ Itsa nexata Moisés pitsapa baja bajarapatomarawecua, faraón-beje pecuaicuaijaicujinaebeje, nexata bajaraponë athëbëabelia namaxëyota

daxitamaxëbeje pewajëtsinexa Jehovahawabelia. Nexata, bajarapaepatota copata baja piothopaejawa piarewecainejebijawanë. Bajarapacuenianua copata perunaejawa ema. Ajibinua baja yamaxë pejurujurujaajawa.

Bajarapamatacabi bajarapamonae pe-ubijawa linojawanë, bajarapacuenia cebadabotonë-ata tobijianatsi paepatota piarewecainejebijawanë othopa, tsi-paji baja cebadabotonë matonopitsapa. Bajarapijinia pacuenia, linojawa-ata namatonota. Itsiata baitsi jane, trigobotonë, centenobotonëbeje apotobijianaetsi bajarapapiarewecainejebijawa, tsipaji abaxë bajaraxuanë apojuiwi, cotocaewi pe-ubixae.

³⁴Nexata, faraón baja itsa tane pecaewijawa ema, bajarapijinia pacuenia piothopaejawa piarewecainejebijawa, pijajibijawanua baja yamaxë, nexata bajaraponë icatsia, orijibia pibisiacue ne yajawa-exana daxita peyajawanacuenebiwi. Nexata, tsitecaeya ajamatabëcuenetaja bajarapamonae.

³⁵Nexata, faraón pijamatabëcuenetajaxae, apocopatsi israelitawi peponaenexa, pacuenia Jehovahá jumaitsi Moisés-jawabelia bajaraponë yabara.

Dioso tsi-itoroba bosesse pewereninexa daxitawiria naejawanë

10 ¹Bajaraxuacujinae, Jehovahá jumaitsi Moisés-jawabelia:

—¡Ponare netaenexa faraón! Xanë raja picaní bajaraponë, daxita pijajiwinua peyajawanacuenebiwi tocopatajë pijamatabëcuenetajanexa, bajarapacuenia tatsitajëtsinexa daxita papinijicue ne xanë tsita-exananajetarucajë ta-exanaejawanëta. ²Bajarapacuenia tocopatajë paxamë juya panetsipaebinexa panexijawabelia, panemomoxijawabelia-ata daxita xua tajitsipaecuenia exanaponajë Egipto nacuapijiwijawabelia capocaponaeya, xuanë-ata daxita papinijicue ne jawanë tsita-exanajë bajarapamonae tuatujëta. Nexata, bajarapacuenia payapëtaenaxa xanë patacatsita-exanaejawata Jehovahánëcuenë —jai Jehovahá.

³Nexata, Moisés, Aarón-beje, ponabeje Egipto nacua pewetsinë jawabelia petsipaebinexa pacuenia Jehovahá tonajumecopatatsi. Bajaraponëbeje jumaitsi:

—Jehová hebreomonaë pijaDISO cajumaitsi: «¿Detsa paepatota baja copatsianame be-ayaijamatabëcuenenë nenataejawa, bewelianëcuenia netaenexa xanë taitabarata? Nexata, copatsianame baja peponaenexa tajajiwi, bajarapamonae penajamatabë-itajëtsinexa tane-asijawawa xanë jawaberena, yayataeya-ata taneto-exanawanapaenexa tajitsipaecuenia. ⁴Itsa tobejena xamë apocopataponaemë tsane peponaenexa, nexata merawia xanë catsicapatsianatsi bosesemonaenë pepatsinexa daxita Egipto nacujawa. ⁵Bajarapamonae yacajëpaena daxita Egipto iranacujawa piapaxayonexa. Itsa patsiana jiwi apocajëpa tsane irajuma petaejawa, irajuma pewënëcaexae. Nexata, bajarapamonae tsimaxëpatsiana pexaenexa daxitaxuaxi asaë tsanubenae abaxë piothopaecujinae pecainejebitonë. Nexata, wereniana daxitaxuanë pane-ubijawanë abaxë asaë tsanubenae. Bajarapacuenianua naejawanë-ata baxuwereniana. ⁶Panejinawanapaebota yacajëpaena, bajarapacuenia neyajawanacuenebabiabiwi pijabonëjawa-ata. Nexata, daxita Egipto nacuapijiwi pijabonë-ata yacajëpaena bajarapabosesse. Bajarapabosesse pa-itaxutuanabenajacaenaxa panetaejawata, tsipaji pane-axajiwi, pane-amojiwimi-ata pejinawanapaematacabianë bajarapatsicue ne apotae

bajaya matabijawawerenacujinae ajena pamatacabijawaberena-ata», caji Dioso —jai Moisés faraón-jawabelia Jehová pitorobicueniatsi.

Nexata baja, bajaraponē itsa najumewereta pecuaicuajijawa, Moisés nexata napēñeyorotsiaya pitsapalia faraón peponaponaebowecua.

⁷Nexata, faraón peyajawanacuenebiwi jumaitsi mapacueniaje pecanaējētsia-exanaenexatsi:

—¿Detsa pamatacabijawabelia maponēje copatajopaena wajanacajamatabē-itonotsijawa? ¡Taema pacuenia bitso nacatobijiana-pona wajaEgiptonacua! ¡Patajatuxanenē, xamē baja rowialia tocopare bajarapamonae peponaenexa, jamatejema bajarapamonae yaiyataecuenia peto-exanaenexa Jehová pijaDIOSO pejitsipaecuenia! —jaitsi faraón peyajawanacuenebiwi.

⁸Nexata, faraón itoroba pejunatsinexa icatsia Moisés, Aarón-beje. Jumaitsi bajaraponēbejajawabelia:

—Je. Paponaname baja, Jehová panijaDIOSO paneto-exanawanapaenexa pejitsipaecuenia. ¡Jane baitsi, paneponaewajēnaeya, panejumaitsimēre pamonae paponaejitsiamē! —jai faraón.

⁹Nexata, Moisés jumecanawiata:

—Cajena panamatawenonajē patacaponaenexa daxita pataxi, pebinēxi, petiriwaxi, penaweretsiwaxi, bajarapacuenia patajadajubi, oveja, vaca-ata patacaponaenexa, tsipaji paxanēnexa panetopinijinajamatabēnapitsifiesta-xaneto Jehovánexa —jai Moisés.

¹⁰Icatsia, faraón jumaitsitsibeje:

—Xaniawaetsia paxanē payapētaniji pibisiajamatabēcuenecuenia patanewecuapitsapaewanaxamē. Nexata, paxamē pacatsita tsabiabi-ata Jehová papecayajawajawa papecayawenonaenexa, itsiata xanē apopacayajawacopatsi tsanetsi paneyajawaponaenexa pejewaxi. ¹¹Bajarapacuenia apoxanepanae pane-exanaenexa. Apopaponaemē tsane daxita panexi yajawa. ¡Paxamē saya ēpanenaweretsiwi pabebijiwiwimē paponare, jamatejema paneto-exanaenexa Jehová pejitsipaecuenia, tsipaji paxamē bajaraxua pane-wajēcaponame pane-exanaenexa! —jai faraón.

Nexata, faraón itoroba pijajiwi pecapitsapaenexatsibeje bajaraponēwecua.

¹²Nexata, Jehová jumaitsi Moisés-jawabelia:

—¡Nexata, nijanaebo cobenanamaxēyore daxita Egipto ira matatsēñewereca, pepatsinexa bosesemonae, piapaxayonexa, daxita Egipto nacujawapewereninexa daxitaxuaxi nacopaba piarewecainejebitonē daxita pebijianacujinae, bajaraxuanēmī pewereninexa! —jai.

¹³Moisés nexata pijanaebo cobenanamaxēyota Egipto nacuatatsēñewereca. Nexata, Jehová jowibo copatsina pemutowetsina^a pebubujainexa bajarapanacuayabetsina. Daxitamatacabijebi, daxitamerawijebi-ata bitso bubujaitsina. Nexata, bajayacunua itsamatacabijawabelia pemutowetsina capona jane baja bosesemonae jowibota. ¹⁴Pata jane baja daxitanacujawa, peyacaējēpaenexa Egipto nacua. Nexata, bosesemonae wēñēca daxita Egipto nacua. Bajarapamatacabiwajēnaeya bajarapitsibosesecuene piapaxayojawa apotae abaxē caeto-ata. Bajarapamatacabicujinae, icatsia apotae

t 10:13 pemutowetsina: Itsajumeyo pijinia tamowetsina.

tsane pematatsënä. ¹⁵ Bajarapabosese ira bitso wënëca daxitanacuajawa. Piapaxayoxae ira apocaējēpae jiwi petaejawa. Ya-iratsaejai. Nexata, bajara-pamonae jane baja xaenajetarubena daxita naebaxucue, daxita naecuai, daxita pe-ubijawanë-ata xua nacopaba pamatacabi piarewecainejebijawa piothopaecujinae. Nexata, ajibia-exanapona daxita pejuwijawanë Egipto nacujawata.

¹⁶ Nexata, faraón bepjiayo itoroba bajarapaepatota Moisés, Aarón-bejējawabelia pejunatsinexatsibeje. Nexata, faraón jumaitsi:

—Xanë cajena pibisiacue exanajë Jehová pitabarata panijaDIOSO, bajarapacuenia paxamëbejējawabelia-ata. ¹⁷ Itsiata baitsi jane, xanë pacajumaitsiibeje tsane baja caeto patanesiwajamatabëcuenecaewine-xamë bajarapapibisiacue ta-exanaejawa. ¡Nexata, panetowajëre Jehová panijaDIOSOjwabelia, patanewecua-ajibia-exanaenexa bajarapapia-yaicuene! Itsa bajarapapiayacuene apopanewecua-ajibia-exanae tsane panijaDIOSO, nexata panetëpaeya-exanaena —jai.

¹⁸ Nexata, Moisés itsa pitsapalia faraón pe-ecaebowecua, wajëta baja Jehovájwabelia. ¹⁹ Nexata, Jehová icatsia pinijijowibo pebubujaijawa copatsica wäwetsica, pemutuabereca juya pebubujainexa. Nexata, bajarapabosesemonaemi caponatsi icatsia baja pemutuabereca Mar Rojo manuamenejawabereca. Bubunaeya-exana daxita bajarapabosesemonaemi. Nexata, aponacopatsi caenë-ata boseseto bajarapaEgipto nacuada. ²⁰ Itsiata baitsi jane, Jehová abaxë ajamatabëcuenetajaya-exana faraón. Nexata, apocopatsi peponaenexa Israel-pijinë pemomoxi.

Dioso tsi-itoroba Egipto nacupijiwi peto-aitaquiria-exanaenexa pijanacua

²¹ Icatsia xuacujinae, Jehová jumaitsi Moisés-jawabelia:

—¡Nijanaebo yore athëbëabelia, bajarapacuenia daxita Egipto nacua bitso ayaicuenia piaitaquirinexa!^u Itajara bepecuenecaējēpaecuenetsi tsane pejayatsinexa —jai.

²² Moisés nexata itsa pijanaebo cobenanamaxëyota athëbëabelia. Nexata, bajarapaepatota bitso piniji-aitaquirijawa tocopiapatsi daxita Egipto nacuada acueyabi pamatacabibejecuenia. ²³ Apocaējēpae petaejawa penajuajinawanapaewi. Bajarapacuenia apopitsapae itsajawabelia peponaenexa acueyabi pamatacabibejecuenia. Itsiata baitsi jane, Israel-pijinë pemomoxi pejinawanapaebonëjawa tonapebetatsi. Apoto-aitaquiritsi.

²⁴ Nexata, faraón itoroba pejunatsinexa Moisés. Jumaitsi:

—¡Paponare baja paneto-exanawanapaenexa Jehová pejetsipaecuenia! ¡Nexata, pacaponare daxita panexi, itsiata baitsi jane, pacopabanubianame panija-ovejamonae, panijavaca-ata! —jai faraón.

²⁵ Nexata, Moisés jumecanawiata:

—¡Jume raja! Panetocopatsianame patajadajubi patacaponaponaenexa, patatajuitsinexa pewënëta Jehová patajaDIOSO. ²⁶ Tsitecaeya cajena paxanë pacaponaenajë patajadajubixi. Caenë-ata mapanacuataje apotaxucowëna-copatsi tsane pataxainenëxi, tsipaji panamatawenonajë pata-itapetsijawa bajarajotalia, patatajuitsinexa bajarapadajubi yaiyataecuenia Jehová

^u 10:21 *piaitaquirinexa*: Bajarapa-aitaquiricuene pepobitso piaitaquirijawa merawiwecua.

patajaDIOSOjawabelia, asiwaya patajumecowënëtsixae. Itsa abaxë apopat-sinëlia tsane bajarabelia, apopayapëtaenë ponëxi panamatawenonaejitsianë Jehovahjawabelia patarajutsinëxinexa —jai Moisés faraón-jawabelia.

²⁷Itsiata baitsi jane, icatsia Jehovah ájamatabëcuenetajaya-exana faraón. Nexata, apocopatsi peponaejawa Israel-pijinë pemomoxi. ²⁸Faraón icatsia jumaitsi Moisés-jawabelia:

—¡Baja newecuapitsaparemelia majotawecuae! ¡Pëtsa baja patame pema-tatsënëa icatsia maberena tanetaenexamë, tsipaji pamatacabi icatsia patsia-name maberena je xanëjawaberena, nexata xanë cabeyaxuabia-exanaenatsi! —jai faraón.

²⁹Nexata, Moisés jumecanawiata:

—Je, xanepana. Xaniajamë pacuenia jumaitsimë. Pematatsënëa baja apo-cataetsirena tsane —jai Moisés.

Dioso beyaxuabaponaejitsia pepomatapijinë Egipto nacuapijiwi pexi

11 ¹Bajarapacuenia jumecanawiata, tsipaji peponaewajënaeya Egipto nacua pewetsinëjawabelia, Jehovah jumaitsi mapacuenia je Moisés-jawabelia:

—Orijiibia, icatsia tsi-itorobianajë faraón itsapiayaicuenejawa, bajara-pacuenia daxita Egipto nacuapijiwinexa. Bajaraxuacujinae, faraón paca-copatsiana paxamë panepitsapaenexa. Baitsi, bajaraponë pesaëta yajawa pacacapitsapaeya-exanaena majotawecuae. ²¡Nexata, ajenaconoxaeta jumaitsimëre Israel-pijinë pemomoxijawabelia, daxita pebijijiwi, petiriawi-ata, pewajëcaenexa pexaniajawanë penajuajinawanapaewijawabelia! Pebijijiwi pijinia wajëcaena pewënapebijawabelia, petiriawi pijinia pewajë-caenexa pewënapetiriawijawabelia peyajawajinawanapaewi Egipto nacupi-jiwi. Nexata, wajëcaena pexanaejawanë oronanitonëta, pexanaejawanë-ata palatananitonëta —jai Jehovah.

³Pejumaitsicowëya Jehovah jamatabëcuenexanepanaeya-exana Egipto nacuapijiwi Israel-pijinë pemomoxijawabelia. Nexata, apowecua-asiwa xua wajëta. Bajarapijinia pacuenia, daxita Egipto nacuapijiwi yayiataecuenia tane Moisés, bajarapacuenia faraón peyajawanacuenebiwi, daxita Egipto nacuata pejinawanapaewi-ata.

⁴Pepitsapaewajënaeya faraón-wecua, Moisés jumaitsi bajaraponëjawabelia:

—Jehová raja mapacuenia cajumaitsije: «Merawituatuajëta najetarucae-najë daxita Egipto nacujawa. ⁵Nexata, tēpaponae caebo canacujitsia pamona pebijijiwi pepomatapijiwi, daxita Egipto nacujawata. Bajarapacue-nia coxitēpaena pamona ayaijamatabëcuenewi, pacuenia faraón pe-ecaenë tronojawata pexënato matapijinë. Bajarapijinia pacuenia beweliamata-bëcuenewijawabelia coxitēpaena pacuenia amoneya petonacuenebawa-napaewi, powaxi molinota caquiatabiaba. Bajarapacuenia-ata pijadajubi copiyapijicoxi pebitonë tēpaena. ⁶Nexata, daxita Egipto nacujawa bitso wënuena penajamatabëxainacobexae. Bajarapitsinajamatabëxainacuenecae-to-ata apotocopiapatsitsi abaxë Egipto nacuata pejinawanapaecui-nae. Icatsianua, bajarapitsicuenecae apotae tsane matawëjëa. ⁷Itsiata baitsi jane, Israel-pijinë pemomoxi apowënue tsane. Bajarapacuenia awiriyo-ata

apo-aėjai tsane. Daxita saya jamatejema tsane. Bajarapacuenia exanaenajė patacayapėtaeya-exanaenexa pacuenia xanė, Jehovánė, saicayacuenia ewet-sianajė Israel-pijinė pemomoxi Egipto nacuapijiwiwecua», caji raja Jehová.

⁸»Bajarapa-ayaicuenene panetaecujinae, daxita mapamonae neyajawana-cuenebiwi Egipto nacuata patsiana xanė Moisés-nėjawaberena. Pemataba-cabėta nubenaena taitabarata tabarėpitsapaewajėnaeya tanejumaitsinexa: «¡Paponare baja pexaniacuenia, daxita pamonae neyajawa-ewetsiwi!», nejai tsane bajarapamonae. Nexata, bajarapacuenia tane-exanaecujinae, matapana xanė barėpitsapaenajė —jai Moisés faraón-jawabelia.

Nexata, bajaraxuacujinae bajaraponė bitso anaeyacuenia pitsapalia faraón pijabowecua. ⁹ Jehová picani bajarapacuenia yapėtaeya-exana Moisés-jawabelia, peponaewajėnaeya Egipto nacujawabelia: «Faraón cajena xamė apocajumecowėnėtsi tsane, tsipaji cajena piayaicuenejawanė nawitsia xainajė tatsita-exanaponaenexa daxita Egipto nacuapijiwijawabelia», jaitsi Jehová.

¹⁰ Moisés, Aarón-beje, tsita-exanabeje daxita bajarapa-ayaicuenejawanė faraón pitabarata. Bajarapacuenia tsita-exanae-atatsi faraón, Jehová pecopatsixae piamatabėcuenetajanexa, nexata bajaraponė apocopatabiabi pepitsapaejawa Israel-pijinė pemomoxi Egipto nacuwecua.

Pacuenia exanaejitsia israelitawi pecoxitėpaeyaniwa

12 ¹ Nexata, Jehová cuaicuaijai Egipto nacujawata Moisés, Aarón-bejėjawabelia. Jumaitsi mapacueniaje:

² —Marapajuametoje paxamėnexa tsane bitso papecatonamatamotsi-juameto itsajuametonėwecua. Caewai canacujitsia pacatocanacopatsiana penamataxainaejuametonexa.» ³ ¡Nexata, pajumaitsimėre daxitabitsaėto Israel-pijinė pemomoxijawabelia mapacueniaje: «Mapajuametotaje, diez matababita, caebopijiwi canacujitsia natotaicaena oveja pebito pejananė! Nexata, cae-ovejayo caebopijiwi natoxainaena. ⁴ Itsa caebopijiwi bitso caejijiwyobeje pexaenexa bajarapadajubinėyo, nexata boxainaenė junatsiana imoxoyo penajuajinawanapaewi, penajuaxaenexa bajarapadajubinėyo, xaniawaetsia pewerenijawa pecuenecaėjėpaenexatsi. ⁵ Bajarapadajubinėyo bexaina caewai. Daxitanė peperabėxanepanaenėyo. Natotaicaena oveja pebitoyo, itsa jume, chivoyo-ata. ⁶ Nexata, bajaraponėxi xaniawae-tanubiana pebenexa catorce matababijawabelia mapajuametotaje. Nexata, itsa baja ajena juametotabujuniya catorce matababita, daxita Israel-pijinė pemomoxi caecuenia wėsinepecaucubiana tatocaėjėtsicuenia. ⁷ Pewė-sinepecaucubicujinae, waxiyota pejana notsiana. Pabojawata xaejitsia, bajarapabopijibaupamatatsėnėyo tsautarubiana pejanata. Bajarapijinia pacuenia, baupamuxunenenaewababeje tsautarubiana bajarapadajubiyomi pejanata. ⁸ Bajarapamerawi xaena pewisebijawa. Caxaena lewadura» apomematajėrėabipan-jawanė, bajarapacuenianua piatsaxabaxujawanė. ⁹ ¡Pėtsa xane caejawa-ata piasiwijawa, merata pesetsiwijawa-ata! Xaena saya daxita dajubinėjawa epesebicuenia. ¹⁰ Apoxanepanae tsane

v 12:2 penamataxainaejuametonexa: Taema «Abib-juameto», glosariojawata. w 12:8 Levadura: Pesanaeya-exanaejawanexa pan-matabė. Taema «levadura», glosariojawata.

bajarapawijawa peyajuwënëcopabejebijawa itsamatacabijawabelia pexaenexa. Itsaxuanë yajuwënënacopaba itsabajayacunuajawabelia, nexata bajaraxuanë tajuitsiana isotota. ¹¹ Mapacueniaje pa-exanaename panexae-wajënaeya dajubi, paneponaewajënaeya. Panaxatabianame panija-esetoxi. Panataxuxatabianamenua panijazapatonë. Bajarapacuenia panijanaebonë pacobenaxaenubenaename bepjiacuenua bajarapadajubinë. Panaxaename cuenebitsojinaeya, tsipaji jemata papitsapaename. Bajarapacuenia pa-exanaename, tsipaji raja bajarapadajubi panexaejawata panenajamatabënapiabiabianame xanë Jehovânë rowia patacaxenetsijawa. ¹² Bajarapamerawi xanë najetarucaenajë daxita Egipto nacujawa. Nexata, xanë coxi-benajetarucaenajë caebopijiwi canacujitsia copiaya penaexanaewi Egipto nacupijiwi pexi pebijiwi, bajarapacuenia pijadajubijawabelia-ata ponëanë copiyapijicoxi pebitonë tonaexanatsi. !Bajarapacuenia orijibia bijianaenajë daxita pitsinëanëjawabelia Egipto nacupijiwi nawajëcabiaba diosowicuenia, tsipaji raja xanë Jehovânë pepoDiosonë* bajarapamonaewecua», jamëre! —jai Jehová Moisés-jawabelia.

¹³ Mapaliwaisije Jehová tonajumecopata Moisés-jawabelia Israel-pijinë pemomoxi yabara. Jumaitsi:

—Nexata, dajubijana pacatoxanepana panebaupatsautarubinexa, paxamë pane-itajëtsinexa itsa pabota pajinawanapame. Bajarapacuenia rowia patacaxenetsianatsi, itsa xanë coxi-benajetarucaenajë Egipto nacupijiwi. Bajarpajana itsa taerutsianajë bopijibaupajawata, rowia xenetsianajë. Caejiwi-ata nexata paxamëyajuwënëjiwi apopacacoxibeyaxuabi tsanetsi. ¹⁴ Nexata, mapamatacabijawaweliacujinaeje, caewai canacujitsia daxitamatacabijawabelianexa paxamë, bajarapijinia pacuenia, panexi, panemomoxi-ata tsaponae panajamatabënapiabiabianame patacacapanepaecuene panetë-paejawamiwecua. Bajarapanajamatabënapsicuene pane-exanabiabijawata tawënëta, xanë Jehovânë tajaPascuawënëfiesta raja —jai Jehová Moisés-jawabelia Israel-pijinë pemomoxi bajarapacuenia pecatsitecawanapaenexa.

Israelitawi exanabiabijitsia levadurata apopematajërëabipan-pijifiesta Pascuafiestacujinae

¹⁵ Jehová jumaitsi:

—Bajarapafiesta pane-exanaejawata, nexata paxaename levadurata apopematajërëabipan-jawanë siete pamatacabibejecuenia. Nexata, bajarapafiesta copiyapijimatacabita siete pamatacabibejewawabelia apobepaxinaemë caejawa-ata levadurajawa panijabonëjawa. Nexata, bajarapafiestamatacabianëjawa pajiwi xaena levadura pematajërëabia-exanaejawa, nexata bajarapajiwi baja panawecuapitsapaename Israel-pijinë papemomoximëwecua, saicaya peponaponaenexa, bajarapijinia pacuenia, apotajajiwiwajuwënëncuenia panetaenexa. ¹⁶ Bajarapafiesta copiyapijimatacabita saicaya patsatsianame patanetocaetuatsinexamë tawënëta, bajarapijinia pacuenia,

x 12:12 *pepoDiosonë*: Bajaraxua nacayapëtaeya-exana pacuenia Jehová ayaijamatabëcuenë Egipto nacupijiwi pijadiosowiwecua. Taema Núm. 33:4, Isa. 19:1. y 12:15 *levadurata apopematajërëabipan-jawanë*: Taema «levadurata apopematajërëabipan-pijifiesta», glosariojawata.

caesemanacujinae siete matacabita-ata icatsia patanetonacaetuatsinexamē tawēnēta. Bajarapamatacabibeje apobepanacuenebimē itsacuenejawanē. Itsiata, xua panamatawenoname panexaejawanexa, panamitsa-exanaename caejiwiyo canacujitsia xuawajēto panacuenecaējētame panexaenexa. ¹⁷Bajarapacuenia levadurata apopematajērēabipan-pijifiesta pa-exanabiabianame daxitamatacabijawabelianexa, tsipaji bajarapamatacabita xanē pacajutatsi Egipto nacuawecua. Nexata, bajarapafiesta pataeyabiabianame caewai canacujitsia. Nexata, panexi, panemomoxi tsaponae catsitecawanapaena pijacuenecuenia daxitamatacabijawabelia. ¹⁸Nexata, copiyapijijuumetota^z paxaeyabiabianame levadurata apopematajērēabipan-jawanē siete pamacabibejenexa. Nexata, pataxuxuabianame catorce matacabita bitso caniwiojawabelia levadura panenatsi-atsobijawa, panecopiarutsinexa icatsia veintiuno matacabita bitso caniwiojawabelia pecowēcuenia. ¹⁹Bajarapamatacabianējawa apobepaxainaemē levadurajawayo panijabonējawa siete pamatacabibejecuenia, tsipaji pajiwi xaena itsacuenejawawa pematajērēabijawanē levadurata, nexata bajarapajiwi paxamējajuwēnēwi panawecua-capitsapaename paxamēwecua, saicaya peponaponaenexa, bajarapijinia pacuenia, apotajajiwiwajuwēnēnēcuenia panetaenexa. Bajarapacuenia pa-exanaename paxamējajuwēnēwi, pamona-ata panijanacuata penapatsiwi. ²⁰¡Nexata, pētsa paxaneme itsacuenejawawayo-ata pexainaējawa levadura! Itsajota paxamē pajinawanapame, bajarajota saya paxaewanapae-name levadurata apopematajērēabipan-jawanē saya bajarapafiestamatocabianējawa —jai Jehová Moisés-jawabelia, petsipaebinexa Israel-pijinē pemoxijawabelia bajarapafiesta yabara.

²¹Moisés nexata itoroba pejunatsinexa daxita israelitawi pija-ancianowi^a pepatsinexa, xua Jehová itorobatsi petsipaebinexa, bajarapamonae petsipaebinexa juya pijamonae. Jumaitsi mapacueniaje:

—Paponaename panetaicaenexa caenē canacujitsia panija-oveja pejananē pebito, itsa jume, chivonēyo panijabopijiwinexa panebenexa Pascuamatacabita. ^b ²²Nexata, bajarapadajubi panewēsinepecaucutaxuabicuenia pabeyaxuabianame. Pejananua pacaewetsianame waxiyota. Nexata, bajaraxuacujinae hisopowirianaemēximaxērana pexanaecunuxita bajarapanata pabaupatsautsianame panijabonē. Patsautsianame panijabo baupamatatsēnēyo, bajarapacuenia pemuxunenenaebeje-ata namata-enetsia. ¡Bajaraxuacujinae, pētsa caejiwi-ata pitsapa abaxē bajarapabowecua, peyananiaejawabelia, ²³tsipaji Jehová coxibenajetarucaena Egipto nacupijiwi pexi pepomatapijinēanē! Nexata, itsa taena panetsautsijawa baupamatatsēnēyo, pemuxunenena-atabeje, nexata Jehová rowia xenetsiana bajarapabo, apocoxibeyaxuabinejewa. Nexata, Jehová apocopatsi tsane pejonenexalia pecoxibenajetarucacae-ángelnē, papecacoxibenexa panijabonējawalia. ²⁴Panenajamatabēnapitabiabinexa bajarapaPascuamatacabita, pa-exanawanapaename caewai canacujitsia Jehová pijaPascuafiesta papeca-itorobicuenia. Papecatonajumecopatsixae, bajarapacuenia

z 12:18 *copiyapijijuumetota*: Taema «Abib-juameto», glosariojawata. a 12:21 *ancianowi*: Taema «ancianowi», glosariojawata. b 12:21 *Pascuamatacabita*: Pascua pejumaitsiyume, «rowia pexenetsijawatsi», pejajume. Taema «Pascuafiesta», glosariojawata.

payapëtaeya-exanaename panemomoxijawabelia, bajarapacuenie pecanacopatsinexa daxitamatacabijawabelia. ²⁵Nexata, tsitecaeya Pascuafiesta pa-exanawanapaename pamatacabi pajonename panejinawanapaenexa Jehová najumecapanepaeya papecarajutsiapaebi-irajawata. ²⁶Pamatacabi panexi pacayanijobiana: «¿demapitsijamatabëcuene xua pa-exaname?», itsa pacajai tsane, ²⁷nexata paxamë pajumecanawiatibiabianame mapacueniaje: «Marapadajubinëyoje beyaxuabajë Jehová najamatabënapitsiayarowia wajanacaxenetsijawa, tsipaji pacujinaemi Jehová Egipto nacupijijiwoxiwerebiabanajetaruca, bajarapamatacabita israelitawi caejiwi-ata apocoxibeyaxuabitsi. Bajaraxuata, waxaitsi nacacapanepa bajarapatëpaecuenemiwecua», pajamë tsane pewajënaeyabelia panexijawabelia —jai Moisés israelitawi pija-ancianowijawabelia.

Nexata, bajarapacuenia israelitamonae pejumetaecujinae bajarapaliwaisi, yaiyataecuenia irataeya bobena, Jehovájawabelia penajamatabëcuene-itajëtsinexa peyaiyataejawa. ²⁸Bajaraxuacujinae, pona Israel-pijinë pemo-moxi. Exana baja pacuenia Jehová tonajumecopatatsi pexanaenexa Moisés, Aarón-bejejawabelia.

Jehová coxibenajetaruca pepomatapijiwi Egipto nacupijijiwi pexi pebijijiwi

²⁹Pamerawi Jehová tocaëjëta, bajarapamerawituatujëta baja Jehová coxibenajetaruca pepomatapijinë daxita Egipto nacupijijiwi pexi. Bajarapacuenia nacua-ewetsinë, ponë pe-ecaenë tronojawata, bajaraponë-ata pexë-nato matapijinëmi tobeyaxuabatsi. Bajarapijinia pacuenia, pamona-ata naneconitsiaya jinawanapa penaneconitsiwi pejebabiabibojawata, pexë-nato matapijinëmi tobeyaxuabatsi. Bajarapacuenia pijadajubi-ata copiyapijicoxi pebitonë tobeyaxuabatsi. Apopanepae caejiwiyo-ata copiyapijicoxi Egipto nacupijijiwi yawuwënëwi. ³⁰Nexata, faraón, daxita peyajawanacuenebiwi, daxita Egipto nacujawata pejinawanapaewi namatacoba merawituatujëta bajarapamerawi. Bajarapamonae bitso tocopiapatatsi pinijinajamatabëxainaecuenie. Nexata, daxita Egipto nacupijijiwi nawë-aëaëjai ayaicuenia, tsipaji caebopijijiwi-ata apowecuapanepae pecoxitëpaejawa bajarapanacuata. ³¹Nexata, bajarapamerawi, faraón itoroba pejunatsinexa Moisés, Aarón-beje. Nexata jumaitsitsibeje:

—¡Xanë, tajajiwi yajawa, panewecuanatsare! ¡Paponare baja paxamëbeje daxita Israel-pijinë pemomoxi yajawa, jamatejema asiwaya yaiyataeya-ata paneto-exanawanapaenexa Jehová pejitsipaecuenia, pacuenia panejumaitsimë tsaponae! ³²¡Pacaponarenua panija-ovejamonae, panijavaca-ata! ¡Pacuenia pajitsipame, paponare baja! Nexata, panetowajëtsianame Jehová-jawabelia xanë yabara, bajaraponë juya taneyawenonaenexa pexaniacuenia —jai faraón.

³³Nexata, Egipto nacupijijiwi pecajunawi, bitso ajamatabëcuenesaëya itoroba israelitawi bepijiayo pewecuapitsapaenexatsi, tsipaji bajarapanacupijijiwi jamatabëjumaitsi: «Belia, daxita paxanëmi patëpaenajë, itsa bajarapamonae apopanewecuaponae tsipae», jamatabëjai. ³⁴Nexata, israelitawi naxatsiayo nota peyajebimatabëanë abaxë lewadurata apopematajërëabi-jawa. Nexata, bajarapamonae yanota peyajebi-itapabocoxita bajarapamatabëanë, peyamatacëbinexa penajuma-acabipanaxita, bajarapacuenia daxita

pecobecowë yajawa. Bजारपacuénia nexata wëtarapona pepitsapaeja-wata. ³⁵ Pacuénia Moisés itorobatsi pexanaenexa, bजारपamonaë peju-maitsicowëya exana baja. Wajëcanajetarubena Egipto nacuapijiw jawabelia palatananitonëta pexanaejawanë, oronanitonëta-ata pexanaejawanë, bजारपacuénia penaxatabijawanënu. ³⁶ Jehová tocopatatsi Egipto nacuapijiwi pexaniajamatabëcuene pexainaenexa israelitawijawabelia. Nexata, xuanë israelitawi wajëcanajetarubena, Egipto nacuapijiwi pexaniajamatabëcuenecuenia rajutapona xuanë wajëcaponatsi. Nexata, bजारपacuénia Israel-pijinë pemomoxi wecuanota pexainaejawanë Egipto nacuapijiwi bepecuene-amoneyabiwicuenia penawajabitsaëtsijawata.

Israel-pijinë pemomoxi wecuapitsapa Egipto nacua

³⁷ Nexata jane baja, israelitawi pitsapa Ramesés tomarawecua peponaenexa Sucot tomarajawabelia. Bजारपamatacabita, bजारपamonaë pitsapa bejamatabëcujiru seiscientos mil ponëbeje pijamatabësaëwi penawajabitsaëtsinexa, namata-ëjëtsinejewa petiriawi, pejewaxi, itsamonaë pebijiwi penaweretsiwi yajawa. ³⁸ Bजारपamonaë yajawapitsapa bitso jiwi ayaibitsaëtoxaneto itsawiriawi-ata. Bजारपacuénia yajawapitsapa ayaibitsaëto pija-oveja, pijavaca-ata. ³⁹ Pamatacabi pitsapa bजारपamonaë apocuene-caëjëpaetsi penacuenebaponaenexa pexaejawa pamaruënexa, tsipaji Egipto nacuapijiwi bepijiayo pitsapaeya-exanatsi. Nexata, pamatabëanë yacapona levadurata matajërëabinejewa, namuto-epatua namitsaseba levadura matajërëabinejewa pexanaepan pexaenexa.

⁴⁰ Pamatacabita israelitawi baja xaina cuatrocientos treinta pawaibeje^c pejinawanapaecujinaë Egipto nacua Jacob pijamonaë yajawa pepatsicujinaë, ⁴¹ bजारपamatacabijawa baja tocopiapatatsi. Bजारपawaita pitsapa israelitawi, Jehová pijajiwi, bewajabitsaëwi pexanaecuenia Egipto nacua-wecua. ⁴² Nexata, bजारaxuata bजारपamerawi tocopatatsi Israel-pijinë pemomoxi penajamatabënapitabiabinexa bजारपamatacabita caewai canacujitsia. Pamerawi Jehová jutatsi Egipto nacua-wecua, nexata bजार-pamerawi Jehová bepijamerawi tsaponaponaë. Nexata, bexëajawabelia pamonaë naexanapona pemomoxi, bजारपamerawi najamatabënapitsijitsia daxitamatacabijawabelianexa.

Pacuénia israelitawi exanaejitsia Pascuapijifiesta caewai canacujitsia

⁴³ Jehová xuacujinaë icatsia jumaitsi Moisés, Aarón-bejējawabelia:

—Mara pecaëjëtsiliwaisije Pascuawënëfiestanexa tsane. Nexata, itsa-apopaxamëwirianë aponaxaë tsane bजारapaPascuafiestamatacabi pexaeyajuwënëjawa. ⁴⁴ Itsiata baitsi jane, ponë pecomuatsinëtsi amoneya paxamëyajuwënëne petonacuenebaponaenënexa, itsanacuapijinë-ata, bजारapone caëjëpa penaxaejawa, itsa baja pewajënaeya nabo-upiperabëcaucutsia-exana. ⁴⁵ Ponë itsanacuapijinë penanajetarucaenë itsajawabelia paxamëtua-tuajëta, ponë-ata peponaponaenë panijabota papecatonacuenebinëcuenia, nexata bजारapitsiwi apocaëjëpae penaxaejawa bजारapaxaeyajuwënëjawa.

c 12:40 *cuatrocientos treinta pawaibeje*: Pacuénia Jehová jumaitsi Abraham-jawabelia Gén. 15:13-16-jawata, bजारapajumecowëya baja exana.

⁴⁶Nexata, padajubinē seba caebopijiwi canacujitsia, benajuaxane caeboja-wata. Apobecapitsapae bajarapayajuwēnēwijawa wayafuabelia pexaenexa. Bajarapijinina pacuenia, apobesiyajuwēnētsicabiabi. ⁴⁷Nexata, daxitabitsaēto pamonaē israelitawi bajarapacuenia exanaena Pascuafiesta petaeyabiabi-jawata. ⁴⁸Itsiata baitsi jane, itsa apopaxamēwirianē naponapona paxamē-tuatuajēta, itsa jitsipa bajarapaPascuafiesta penataejawa Jehová pewēnēta, nexata copiaya penataewajēnaeya benabo-upiperabēcaucutsia-exana daxita nacaebopijiwi. Bajarapacuenia nexata toyapēxanepanaenatsi penatae-jawa. Nexata, bajarapajiwi pataename bepenaexanaejiwi bajarapanacuata israelitawiyajuwēnēwicuenia. Itsiata baitsi jane, caenē ponē apopenabo-upiperabēcaucutsia-exanaenē aponaxae tsane bajarapapascuafiestamata-cabi pexaeyajuwēnējawa. ⁴⁹Nexata, paliwaisi pacatocaējētatsi, xanē xai-najē caeliwaisi padaxitamēnexa, pamonaē pepacuene pa-israelitawiriamē, pamonaē-ata apopaxamēwiriawi. Nexata, caeliwaisi panajuajumeco-wēnētsianame Pascuafiesta panetaenexa —jai Jehová Moisés, Aarón-bejējawabelia, Pascuapijifiesta yabara.

⁵⁰Nexata, israelitawi exana pacuenia Jehová tonajumecopatatsi Moisés, Aarón-bejējawabelia. ⁵¹Nexata, bajarapamatacabi Jehová juta israelitawi bewajabitsaēwi pexanaecuenia Egipto nacuawecua.

Jehová itapeta copiaya penaexanaewi pebijiwi, dajubi-ata pijajawacuenia

13 ¹Bajaraxuacujinae, icatsia Jehová jumaitsi Moisés-jawabelia: ²—Nexata, neto-itapetsianame copiaya penaexanaenēxi pebi-jiwi daxita israelitawi pexi, tajacuene tanetonacuenebiwixina, bajarapijinina pacuenia, copiyapijicoxi dajubi-ata pebitonē. Xanē raja daxita copiaya penaexanaewi taniji tajanēxicuenia —jai Jehová.

³Moisés nexata tsipaeba bajarapaliwaisi pijamonaejawabelia: —¡Panajamatabēnapire pamatacabi pinijisaēta Jehová pacacapanepa Egipto nacuapijiwiwecua, papecajutsijawata itsajotalia picani paxamē pajinawanapame amoneya panetonacuenebiwicuenia! Nexata, pamata-cabi panajamatabēnapitabiabianame Jehová papecajutsijawa, apobepa-xaemē levadurata pematajērēabipexaejawanē. ⁴Paxamē baja ajena papit-sapame Abib-wēnē juametota. ⁵Bajaraxuata, mapajuametotaje paxamē pa-exanabiabianame itsafiesta, levadurata apopematajērēabipan-wēnēfiesta, panenajamatabēnapitabiabinexa caewai canacujitsia. Bajayatami, Jehová najumecapanepaeya rajutsiapaeba panijasalinaiwimijawabelia panacuata jinawanapa cananeomonaē, hititamonaē, amorreomonaē, heveomonaē, jebuseomonaē-ata pijanacuanēmi. Bajarapamonaē pijanacua bitso pexania-nacua itsajota nawita bitso pexaejawacuene. Nexata, Jehová papecarajut-sicujinae pejumaitsicowēya bajarapanacua panejinawanapaenexa, nexata bajarajotalia tobejena pataeyabiabianame bajarapafiesta mapajuametotaje —jai Moisés israelitawijawabelia.

⁶Icatsia, Moisés jumaitsi:

—Bajarapalevadurata apopematajērēabipan-pijifiesta pa-exanawanapaename siete pamatacabibecucuenia Jehová pewēnēta. Nexata, bajarapafiesta panetaematacabianējawa paxaename levaduramata-jērēabinejewa pexanaepan. Itsiata, siete matacabita patonacaetuatsianame

paneto-exanaenexa fiesta Jehová pewënëta. ⁷Bajarapasiete pamatacabibeje paxaewanapaename levaduramatajërëabinejewa pexanaepan. Nexata, itsacuenejawayo-ata levadura pexainaejawa apobepaxainaemë paxamëtua-tuajëta, panijabonëjawa, bajarapacuenia panijanacuanëjawa-ata. ⁸Nexata, bajarapamatacabipatsipaebianame panexijawabelia: «Mapacueniaje xae-wanapatsi, tsipaji bajarapamatacabita Jehová paneyawenona baja, patapit-sapaenexa Egipto nacuwecua», pajamë tsane panexijawabelia. ⁹Bajarapafiesta pacanajamatabënapitsia-exanaena Jehová papecajutsijawa pinijisaëta Egipto nacujawawerena. Pacuenia meta paxamë pitaneto parutsipame panemaxëta, pane-itapata-ata, papecatsirutsixae panenajamatabënapitabiabinexa, bajarapijini pacuenia, bajarapafiesta panetaeyabiabijawata pacanajamatabënapitabiabiaya-exanaena, panetsipaebabiabinexa Jehová papecatonajumecopatsiliwaisi. ¹⁰Bajaraxuajitsia, bajarapafiesta bepataeyabiabame, panenajamatabënapitabiabinexa caewai canacujitsia pamatacabipacatocopijajopa —jai Moisés.

¹¹Icatsia, itsaliwaisi jumaitsi Moisés israelitamonaewawabelia:

—Bajayata, panijamonaemijawabelia panacua yabara tajëwelia najumecapanepaeya jumaitsi papecarajutsinexa, itsa Jehová pacacapatsiana bajarapanacuajawabelia, cananeomonae pijanacuamijawabelia panejinawana-paenexa, ¹²nexata bajarapanacuata paxamë copiaya penaexanaepebinëxi pato-itapetsianame saicaya Jehovánexa, bajarapacuenia-ata copiaya penaexanaepebitoyo panijadajubijawata. Nexata, bajarapacuenia bajarapanacuata pa-exanawanapaename daxita copiaya penaexanaewijawabelia. ¹³Itsa burro copiaya xaina pexënato pebitoyo, nexata matamotsiaya pacapanepaename bajarapaburroyo panematamotajuitsijawata oveja pebitoyo. Bajarapacuenia nexata, burroyo asaë tsaponaponae tsane. Itsiata, itsa apopatotajuitsimë tsipae bajaraponëyo pejamatabëcuene, nexata bajarapaburroyo cuaibositatanaëcaejitsipa. Bajarapijini pacuenia, panexi copiaya penaexanaepebi-jiwi matamotsiaya pejamatabëcuene patobeyaxuabianame oveja pebitoyo, paneyapijiwitajuitsinexa Jehovájawabelia. ¹⁴Pamatacabipacayanijobiana panexi: «¿Demapitsijamatabëcuene yabara pabeyaxuabame ovejajo?», itsa pacajai tsane panexijiwi, nexata pajumaitsimë tsane: «Bajayatami, Egipto nacuada pajinawanapajë amoneya patatonacuenebiwicuenia. Bajarapamatacabimi Jehová pinijisaëta panejuta Egiptowecua. ¹⁵Nexata, pacujinae Egipto nacua pewetsinë ajamatabëcuenetaja tsecae patanecopatsiyaniwa patapitsapaenexa Egipto nacuwecua, bajarapamatacabijawa Jehová daxita copiaya penaexanaepebiijiwi coxibepona, caebo canacujitsia Egipto nacupapijiwi pexi. Bajarapacuenia tobeponatsinua copiyapijicoxi pijadajubiwiimi pebitonë. Nexata xuata, tajuitaponatsi Jehovájawabelia^d daxita copiaya penaexanaedajubi pebitoxi. Bajarapijini pacuenia, xamë taxënato matapijinëmë matamotsiaya cayapijiwitajuitatsi oveja pebitonëyo Jehovájawabelia», pajamë tsane panexijawabelia. ¹⁶Pamatacabipayapijiwitajuitame ovejajo nexënato

d 13:15 *tajuitaponatsi Jehovájawabelia*: Bajarajota apojumaitsi, «totajuitaponatsi Jehovájawabelia», apojai, tsipaji bajarapacuenia itsa jumaitsitsi tsipae, nexata Jehová bewajato-exanae tsipae, piasaëtsaponaponaeenexa. Bijirajane, bajarapacuenia yapijiwiitajuita dajubi Jehovájawabelia, petëpaeyaniwa jiwitonë, dajubi-ata, copiaya penaexanaewi.

pejamatábëcuene, nexata pacuenia meta itsa panaitanerutsipame pane-maxëta, itsa jume, pane-itapata panenacofënëtsiyaniwa. Bajarapacuenia pa-itajëtaponaename pacujinae Jehová pacajuta pinijisaëta Egipto nacuawecua —jai Moisés israelitamonaejawabelia.

Jehová matabapona Israel-pijinë pemomoxi piapiapajubocuenia

¹⁷Pamatacabi faraón copata pepitsapaenexa Israel-pijinë pemomoxi, DIOSO apomatacaponaetsi israelitawi panamuto najetaruca filisteomonae pijanacuaya. Bajarapanamuto perowianamuto picani Canaán nacujawabelia pepatsinexa, itsiata bailsi jane, DIOSO siwajamatabë-itsi israelitawi: «Filisteomonae itsa tsimaxëpatsipa pebarënewajabitsaëtsinexa israelitamonae, nexata pecajunawi caewëarena nawiabecaëjitsipa icatsia Egipto nacujawaberena», siwajamatabëjai. ¹⁸Bajaraxuata, bajarapamonae matabaponaetsi itsanamutojawa, pematawaquetsinexa filisteo nacua, panamuto najetaruca petusatonacuajawa Mar Rojo manuamenemuxunenialia.

Nexata, israelitawi itsa pitsapa Egipto nacuawecua, bajarapamonae najetarubena bewajabitsaëwi pexanaecuenia. ¹⁹Moisés barëcapona pepitsapaejawata Josépijinëmi pesijawanë cajonita. Bajarapacuenia exana, tsipaji Josépijinëmi petëpaewajënaeya, wajëta Israel-pijinë pemomoxijawabelia bajarapacuenia peto-exanaenexatsi. Bajaraponëmi jumaitsi mapacueniaje: «Xaniajanë cajena. DIOSO pacayajawa tsane. Pacayawenonaena papecajutsinexa mapanacuawecujaje. Pacujinae pacajutsiana mapanacuawecujaje, panesicaponaename, patanesimëthëtsinexamë^e bajarapanacuajawabelia», jai José petëpaewajënaeya. Nexata, pijamonae najumeliwaisicajunua Joséjawabelia bajarapacuenia peto-exanaenexa.

²⁰Nexata, israelitawi itsa pitsapa Sucot tomarawecua, pata-othopa Etam nacujawata, itsajota taxuxuaba bitso petsewinacua. ²¹Bajarapamonae itsa najetarubena matababita, Jehová tsiwajënaenamataxainabia-banajetaruca piapiapajubocuenia benaesituruto pematabaponaenexatsi. Merawi pijinia itsa najetarubena, bajarapapajubojawami naitayotabiaba benaesituruto petajuenajetarucajawa petsiwajënae-itayotsinexatsi, daxitamerawi peponaenexa. Nexata, bajarapacuenia najetarubena merawijebi, matababijebi-ata, Jehová petocaëjëtsicuenia. ²²Bajarapapajubojawa tsitecaeya bajarapamonae pewajënaeya najetarucabiaba matababita. Merawi pijinia penaitayotsipajubo bepetajuenajetarucaenaesituruto najetarucabiaba pewajënaeya.

Israel-pijinë pemomoxi nicaba Mar Rojo manuamene itsapanabelia

14 ¹Jehová nexata xuacujinae, barëcuaicuajai Moisés-jawabelia pejumaitsinexa:

²—;Jumaitsimëre Israel-pijinë pemomoxi penawiabinexarena caewëarena, pijataxunaebonë penacuenebanubinexa patusato boca Migdol-jawata,^f Mar Rojo manuamenebejetuatuajëjawata, bajarajota cae-epatoyo

e 13:19 *patanesimëthëtsinexamë*: Taema Gén. 50:25, Jos. 24:32. f 14:2 *Migdol-jawa*: Aponayapëtae itsa Migdol tomarawënë, itsa jume, petusatowënë. Itsiata bailsi jane, «Migdol», pejajjume raja: «Athëbëabetsia piapiabo peyajiwinacëotsibonexa wajabitsaë, pecueyawi», pejajjume.

pejinawanapaenexa manuamene imoxoyojawata, Pi-hahiro-t-jawa, Baal-Zefón nacuayobeje imoxoyojawata! ³Nexata, Egipto nacua pewetsinē pacasiwajamatabē-itsi tsane paxamē yabara: «Apoyapētae tsaena itsabelia ponaejitsia. Nexata, bajarapamonae naxuabawanapa petusatonacuata. Pijataxunaebō nacuenebanuta itsajota to-ayapēbejetsi patanewecuapanepae-cuene peyacaranatsixaetsi», pacasiwajamatabējai tsane. ⁴Xanē Jehovánē itsiata faraón jamatabēcūene-atajaya-exanaenajē, bajaraponē papecapēbarajinaenexa. Nexata, bajaraponējawabelia najamatabēcūene-itajētsianajē tacuensaēnēcūene, bajarapacuenia pijajiwi wajabitsaēwijawabelia-ata, patacacapanepaejawata. Nexata, bajarapacuenia ta-exanaejamatabēcūene daxitajiwi newēnēliwaisicacuaicuajai tsane. Daxita Egipto nacuapijiwi-ata yapētaena xanē Jehovánēcūene —jai Jehová Moisés-jawabelia, petsipaebi-nexa israelitawijawabelia.

Nexata, israelitamonaē bajarapacuenia baja exana. Pijataxunaebonē exana Mar Rojo manuamene imoxoyojawata. ⁵Bajarapamatacabijawa, Egipto nacua pewetsinē itsa wēnētane israelitamonaē pewecuarēcēpecae-jawatsi, nexata faraón, pijajiwi peyajawanacuenebiwi-ata, pesiwajamatabēxanepanaejawami israelitawi najamatabēcūenepēnēyorota. Nexata, najumaitsi: «¿Detsa xuajitsia waxaitsi copatsipatsi bajarapamonae wajanacawecuaponaenexa amoneya wajanacatonacuenebijawami?», najai.

⁶Nexata, bajarapaepatota faraón najamatabēxaina pepēbarajinaenexa israelitamonaē, petaicaenexa, amoneya petonacuenebawanapaenexatsi icatsia. Nexata, itoroba petoxaniawaetsinexatsi pijacarrozawēnēmōnē, pamōnē penawajabitsaētsimatacabi caponabiaba. Caballuanē peyarobotanajetarubenaēmōnē. Nexata, natsicueyajunata pijanacuapijiwajabitsaēwi pepēbaraponaenexa. ⁷Itapetsiaya capona seiscientos pacarrozamobeje pexaniamōnē pecanawajabitsaētsinexa, bajarapacuenia itsacarrozamōnē Egipto nacua pexainaēmōnē. Nexata, caemo canacujitsia tocopata pecaponaenexa wajabitsaēwi penamatacatorobinē caebitsaēto canacujitsia. ⁸Faraón yapētae-ata Jehová pinijisaēta pewecuajutsijawatsi israelitawi, itsiata Jehová tocopata faraón pijamatabēcūenetajanexa, pepēbarajinaenexa israelitamonaē.

⁹Nexata, pitsapa Egipto nacuapijiwajabitsaēwi. Capona daxita pecanawajabitsaētsimōnē, pecanawajabitsaētsicaballuanē-ata. Nexata, bajarapamonae pēbarajina israelitamonaē pecowēwelia. Bajarapamonae pēcaxinatsi israelitamonaē pejinawanapaejawata Mar Rojo manuamene imoxoyojawata, Pi-hahiro-t-beje, Baal-zefón nacuayobeje canacujitsia. ¹⁰Itsa baja faraón barē-imoxoyotanajetaruca, bajarapaepatota wajēnaetane israelitamonaē pepēbarajinaejawatsi. Nexata, bajarapaepatota ayaicuenia bitso junawa. Nexata, bajarapamonae ayaijumeta wajēca Jehovájawabelia peyawenonaenexatsi. ¹¹Nexata, xuacujinae bajarapamonae jumaitsi Moisés-jawabelia:

—¿Dexuajitsia patajanejutsimē Egipto nacuawecua? ¿Dexuajitsia nexata bajaraxua patajaneto-exanaemē? ¿Tsipaji tsaja ajibi mēthēanē Egipto nacujawatalia patanemēthēcaenexamē, patanecajutsimē patatē-paenexa petusatonacuata? ¹²Bajarapitsijamatabēcūene patataeyaniwa, Egipto nacujawatalia itsa abaxē jinawanapatsi pacajumaitsi: «¡Pancopare majotaje, patatonacuenebawanapaenexa Egipto nacuapijiwi. Baitsi, matatoxenetsia xanepana amoneya patatonacuenebawanapaejawa

patatëpaejawawecua petusatonacuajawabelia!», pacajaitsi picani —jai israelitamonae Moisés-jawabelia.

¹³ Moisés itsiata bajarapamonaejawabelia jumecanawiata:

—¡Pëtsa pajunawame. Pajamatabëcuenesaëmëre. Pëtsa parëcëpecame panejunawicobexae. Aeconoxae raja pataename Jehová wajanacacapanepaejawa bajarapamonaewecua. Daxita pamonaе ajena pataneme Jehová werebiabiana. Pematatsënëa bajarapamonae apotae tsanetsi icatsia. ¹⁴ Pëtsa paxamë pajamatabëcuenebëjamë, tsipaji Jehová pacayapijiwinawajabitsaëtsiana panijawajabitsaëwijawabelia, pecuene-amoneyabijawabelia! —jai Moisés israelitamonaejawabelia.

¹⁵ Nexata, Jehová jumaitsi Moisés-jawabelia:

—¡Pëtsa abaxë cuenenajematame tanewajëcaenexamë tacayawenonaewajaw! ¡Itorobare israelitamonae pewajënaeyabelia peponaenexa! ¹⁶ Xamë nijanaebo cobenanamaxëyotsianame menematatsënëalia, bajarapacuenia netsatsinexa anijajawabeje bajarapamanuamene, israelitamonae penicabinexa petaxuta petsewituatuajëjawalia. ¹⁷ Xanë itsiata Egipto nacuapijiwi ajamatabëcuenetajaya-exanaenajë, papecapëbarajinaenexa panecowëwelia bajarapatsewijawalia. Bajarajota nexata, najamatabëcuene-itajëtsianajë tanecuenecaëjëpaenëcuene faraón-jawabelia, bajarapacuenia pijajiwi wajabitsaëwijawabelia-ata, pijacarrozamonëta peponaewijawabelia, bajarapacuenia pamonaе caballojumanëta peponaewijawabelia-ata. ¹⁸ Nexata, Egipto nacuapijiwi yapëtaena Jehovánëcuene, tacuene-amoneyabijawata faraón, bajarapacuenia pijajiwi wajabitsaëwijawabelia, pamonaе caballuanë peyarobotanajetarucaecarrozamonëta peponaewi, pamonaе-ata caballojumanëta peponaewi —jai Jehová.

¹⁹ Nexata, bajarapaepatota Jehová pija-ángelnë, ponë pematacanajetarucaenë israelitawi apiaya piayapësaëpajubocuenia, natixita pijataxunawecua, juya perucaenexabeje pecowëwetsina. ²⁰ Nexata, bajarapapiapiapajubojawa benaesituruto rucajopa tuatuajëta peyacaranatsicuenia Egipto nacuapijiwi. Nexata, Israel-pijinë pemomoxi yajiwicaranatarucatsi, Egipto nacuapijiwi pepë-imoxoyotsiyaniwatsi. Nexata, Egipto nacuapijiwi apotae itsajota nubena israelitamonae, tsipaji to-aitaquiritsi bitso bajarapapajubo pejamatabëcuene. Itsiata baitsi jane, israelitawi penubenaewawata pë-itayotatsi, xaniawaetsia petaenexa pewajënaeyabelia. Nexata, merawijebi jaitarutsi-ata Egipto nacuapijiwi pepëcaxinaenexa, itsiata apopëcaxinaetsi israelitawi.

²¹ Nexata, pacuenia itorobatsi Jehová, Moisés namaxëyota baja Mar Rojo manuamenematatsënëalia.^g Nexata, Jehová copatsina pinijjowiboxaneto pemutowetsina daxita merawijebi. Nexata, bajarapacuenia mene natsata anijajawabeje. Nexata, bajarapacuenia Jehová tsewia-exana tuatuajëalia Mar Rojo manuamene. ²² Nexata, bajarapatsewijawalia israelitamonae petaxuta nicabicapanepa itsapanabelia bajarapanatsatsimenejawabejetuatuajëalia. Bajarapanatsatsimenejawabeje nuca namata-enetsia anijayenepanacueniabeje. Caejawa nuca petsawenonenia, itsajawa pijinia nuca pecujuanenia.

g 14:21 *Mar Rojo manuamene*: Bajarapamonae Israel-pijinë pemomoxi aponicabi tsaena pepomanuamenetuatuajëjawa. Nicaba saya pemaxëranamatatujawa.

²³Nexata, faraón, pijajiwi wajabitsaëwi yajawa, pamonaë caballuanë peyarobotanajetarucaecarrozamonëta peponaewi, pamonaë-ata caballojumanëta peponaewi, pëbarapona pecowëwelia israelitawi bajarapatsewija-walia manuamenetuatujäalia. ²⁴Itsa baja naniananajetaruca bajayacunua, nexata Jehová bajarapapiapiapajubojawawetsica, bepetajuenajetarucaenae-siturutowetsica, anaeya naëcotsica Egipto nacuapijiwajabitsaëjawabereca. Bajarajota, Jehová jamatabëcuenena-epatajërërëcaeya-exanatsi, pepëcaxi-naeyaniwa Israel-pijinë pemomoxi. ²⁵Bajarapamonae pijacarrozawënëmonë totaxullantajuepajunjunuatsi. Nexata, bajarapamonae bitso nacuene-epatajërërëca. Nexata, bajarapitsicuene petaejawata, Egipto nacuapijiwi najumaitsi:

—iNaxatsia! Caewëabelia rëcëpecatsi baja Israel-pijinë pemomoxiwecua, tsipaji raja Jehová yapijiwinawajabitsaëta bajarapamonae waxaitsijawabere-na, wajanacawerebiabinexa —najai, penawiabinexa caewëaberena pepa-nepaenexa picani.

²⁶Bajarapaepatota, Jehová jumaitsi Moisés-jawabelia:

—iNijanaebo cobenanamaxëyore, icatsia caewëalia mene-itaboxojawabelia, penatsatsijawami mera piawajubuanexa icatsia pecowë-cuenia! Nexata, Egipto nacuapijiwajabitsaë bubunaejitsia, bajarapacuenia carrozawënëmonëta peponaewi, caballojumanëta peponaewi-ata —jai Jehová Moisés-jawabelia.

²⁷Nexata, bajarapacuenia Moisés pecowëyabelia mera matatsënëalia pijanaebo cobenanamaxëyota. Bitso pepobajayacunua. Mera icatsia asaëya nacaxinajunua pecowëcuenia. Nexata baja, awajubua. Egipto nacuapijiwajabitsaëmi perëcëpecaewimi picani ya-awajubua tsajone epatua. Nexata, bajarapamonaei pëcaewa merata. Nexata, bajarapacuenia Jehová bubunaeya-exana Egipto nacuapijiwimi pewerebiabinexa. ²⁸Nexata, mera baja awajubua, pecowëcuenia penacopatsinexa. Nexata, daxita faraón pijajiwi wajabitsaëwimi, pijacarrozamonëmi, pijacaballonëmi-ata pëcaewa bajarapameneta. Faraón pijajiwiwajuwënë apo-asaë caenë-ata. ²⁹Itsia baitsi jane, israelitawi xaniawaetsia nicabalia menetuatujäalia petaxuta petsewijawalia, anijapenatsatsimerajawabejetuatujäawalia. Bajarapanatsatsimerajawa-beje caeyenepana nuca petsawenonenia, itsajawa pijinia nuca pecujanenia.

³⁰Bajarapacuenia Jehová capanepa baja israelitawi Egipto nacuapijiwi penamatacaitorobijawamitsiwecua. Nexata, israelitawi tane petëpaewi pebobenaejawa Mar Rojo manuamene-itapayaberena. ³¹Bajarapacuenia israelitawi itsa cuenetane Jehová pijapinjisaë petsita-exanaejawa, pewerebiabijawata Egipto nacuapijiwajabitsaëmi, nexata bajarapamonae yayiatane, itaxutuajamatejema tsawanapaenua Jehová, bajarapacuenia pijajiwitonë Moisés-jawabelia-ata.

**Moisés Israel-pijinë pemomoxi yajawa
wënëcanaxëana Dioso pewënëxaniatsinexa**

15 ¹⁷Nexata, Moisés, israelitamonaë yajawa Jehová wënëcanaxëana pewënëxaniatsinexa mapacueniaje:

—Xanë tonaxëanaenajë Jehová pewënëta, tsipaji pecujirucaëjëpae-nëtsi pecuene-amoneyabinexa ayaijamatatabëcuenenëcuenia Egipto

nacuapijiwajabitsaëwimi, pebubunaeya-exanaejawata pijacaballuanë yajawa.

²»Tajamatabëcuenebarëyajawata, wënëcanaxëanajë Jehová, ponë tane-nasaërajutsinë, tanecapanepaenënu. Bajarapitsinë raja tajaDioso. Bajaruata, wënëxaniatabiagianajë pexaniajamatabëcuene tarajutaponaejawata. Bajaraponë raja taxa-ata pijaDioso. Nexata xuata, ayaijamatabëcuenenëxae, wënëca-uranejewanë wënëliwaisipaebabiagianajë.

³»Jehová raja pexanianawajabitsaëtsinë! Bajaraponë raja pewënë Jehová.

⁴»Bubunaeya-exana manuamenejawata faraón pijawajabitsaëwi, pija-carrozamonë yajawa, bajarapacuenianua wajabitsaë penamatacaitorobiwi. Pamona bitso petsiyapëtaewi penawajabitsaëtsinexa bubunaeya-exana.

⁵»Bajarapamonae pebubunaejawata pëcaewajoneca menebëxëpanaya-bereca pacuenia iboto. Nexata, bajarapamonae mata-acatatsi bëpënëa merata.

⁶»Jehová DIOSomë, necujuasaëta^h cuene-amoneyababiabame nebarëna-wajabitsaëtsijawata nijawajabitsaëwi.

⁷»Nexata, pamona pecabarënaewajabitsaëtsiwimi, bajarapamonae nejamatabëcuene-amoneyabinë nejamatabëcuenesaëta. Paepatota baranaepaname necueyaw, tsitajëtame nebara-anaepanaejamatabëcuene newerebiabijawata. Pacuenia isoto baweriajawa petsewinaebaxumi, bajarapacuenia xamë werebiabame.

⁸»Bene-uxunijumalita pinijijowibo copatame mera penatsatsinexa, peyeneapanacueniabeje namata-enetsia penucaenexa. Bajarapamanuamenetua-tuajëalia copatame piatajanexa ira petsewijawa.

⁹»Bajarapawajabitsaëwimi panesiwajamatabëcuene-itsi-ata picani: 'Papë-barajinaenajë patapëcaxinaejawabelia. Nexata, pecobecowëmi panatsicobetsanaenajë. Pajamatabëcuenebarëyanë tsane, patawecuanotsixae. Xuacujinae, pataja-espadanëta pabeyejebianajë,' panesiwajamatabëjai picani,

¹⁰»Xamë itsiata bene-uxunijumalicienia pinijijowibo copatame pebubujainexa, bajarapamonae merata nemata-acabixuabinexa. Bajarapamonae nexata bubunareca pacuenia plomonanito pinijimalatacaxanetotuatujëjawareca.

¹¹»Bajaraxuata, xamëwecua cajena,

»Aji itsadisonë pecacuenjëpaenë Jehovámë!

»Aji itsanë petsita-exanaenë pinijicuenëjawanë pacuenia xamë! Xamë baja cajena ëpexaniacuenë ne-exanaponaponaenë! Bajaraxuata, netoxanepana tacawënëcanaxëanabiabijawa ayaijamatabëcuenenëmë yabara.

¹²»Necujanenia nenamaxëyotsisaëta, bajarapamonaemi ira quijonetsi baja.

¹³»Nitaxutotsoniataejamatabëcueneta matacaponame nijajiwi xua najumecapanepaeya jumaitsimë necapanepaexae Egiptonacuapijiwiwecua. Necuenesaëtanua matacaponame neponaponaetaxunaejawabelia.ⁱ

h 15:6 *Necujuasaëta*: Bajaraxua nacato-itajëta Dioso pesaënëcuene daxita matatoxenetsia pacuinäe capanepaejitsia pijajiwi pitaxutotsoniataejawata. **i 15:13** *neponaponaetaxunaejawabelia*: Apoyapëtaetsi xaniwaetsia pataxunae yabara cuacuajai. Itsiata, itsamonae canaëjëta Sinaitsuto yabara, itsa jume, Ziön-tsuto yabara, itsajota eca Dioso pijatemplobo, Salomón pexanaetsibo. Itsamonae canaëjëta pijinia Canaán nacuyabelia pejonejawanexa.

¹⁴»Ne-exanaejawanë pecawënëtaejawata, itsanacuanëpijiwi jamatabë-cueneneconecojai tsane. Filisteomonae pijinia yajamatabëcuenebëjai tsane bitso, pecajunawi.

¹⁵»Edom nacuapijiwi penamatacaitorobiwi pecajunawi yajamatabëcuenebëjai tsane. Moab nacuapijiwi penamatacaitorobiwi pecajunawi neconecojai tsane. Canaán nacuapijiwi apo-acuene-itatsaca tsane, pacuenia copiyami acuene-itatsaca tsabiabi.

¹⁶»Xamë, Jehovámë, bajarapanacuanëpijiwi tocopatsianame pejunawijamatabëcuene xamëjawabelia pexainaenexa. Nexata, pecacuenetaejawata niacuenesaënëcuene, bajarapamonae cacujunawiana. Pacuenia iboto caecowëta boca, nacujirutsinejewa, bajarapacuenia pijinia bajarapamonae pejunawicobexae, caecowëta nubenaena, nija-jiwi pexenetsijawabelia bajarapamonae pejinawanapaenacuanë. Bajarapacuenia xamë, Jehovámë, nesaëta capanepaejitsiamë, panijajiwinë patane-itapetsiwimë.

¹⁷»Bitso pajitsipajë patanematacaponaejawamë, xamë, Jehovámë, nenato-itapetsitsutojawabelia, imoxoyojawata patajinawanapaenexa, patsutota jiwi nawajëcabiabijitsia xamëjawabelia.

¹⁸»Jhovámë, daxitamatacabijawabelianexa neyanacua-ewetsinë tsaponaponae tsane.

¹⁹»Pacujinae faraón-pijinëmi barëjunua pijamonae caballuanë peyarobotanajetarucaerrozamonëta peyajawaponaewimi, itsamonae pijinia pijacaballonëmita pejumaponaewi manuamene petsew jawalia, bajarajota Jehová caewëarena mene tsimata-acabiauxuabatsi bajarapamonaemijawaberena pebubunaeya-exanaenexatsi. Itsiata, waxaitsi israelitawitsi jamatejema tsupanepatsi bajarapamenetsew jawalia itsapanabelia —jai israelitawi Jehová pexaniacuenia pewënëcanaxëanaejawata.

²⁰Bajarapacuenianua DIOSojumepaebiwa María, Aarón pematapijiwa, pecueneypëtaexae Jehová pecuene-amoneyabijawa faraón, pita pijapandereta pecanaxëanaenexa. Natsicueyajunatanua pewënepetiriawi penajuatonaxëananajetarubenaenexa Jehová. Nexata, bajarapapetiriawi-ata nota pijapanderetanë, canaxëanaeya, yawajibiaya-ata pewënëxaniatsinexa Jehová pexanaecueene ²¹Penaxëanaejawata jumaitsi:

—iPatonaxëanare Jehová pewënëta, tsipaji najamatabëcuene-itajëta ayajamatabëcuenenëcuene, pebubunaeya-exanaejawata faraón, pijacaballuanëmi, pamonaemi-ata caballojumata peyaponaewimi! —jai petiriawi penaxëanaejawata.

Piatsaxamera matathaibë pecaxitajarabijawa

Maratusatojawata, yabara peliwaishi

²²Moisés barëpona israelitamonae Mar Rojo manuamenewecua. Nexata, bajaraponë barëpona Shur-tusatojawa, bitso petsewinacuajawa. Najetaru-bena acueyabi pamatacabibecuencia mera caxitajarabinejewa. ²³Acueyabi pamatacabibecujinae, bajarapamonae pata-othopa Maratusatojawata. Bajarajota picani, caxitajaraba meramatathaibë, itsiata apocajëpaetsi

piapaejawa, tsipaji bajarapamera atsaxa. Bajaraxuata, bajarapanacuayo wënëruba Mara.¹

²⁴Nexata, bajarapaepatota Israel-pijinë pemomoxi Moisés-jawabelia siwajamatabëcuene-anaepanaeya pibisiacuenia najuabaracuaicuaijai tsaponae. Nexata, xuacujinae cuenebijataeya jumaitsi:

—¿Denexata pitsimera pataja-apae tsane? —jai tsaponae. ²⁵Nexata, Moisés bajarapaepatota wajëta Jehovájawabelia peyawenonaenexatsi. Bajarapaepatota, Jehová tsitajëtatsi naejawayo. Nexata, Moisés bajaraponae-jawa tsitaxuaba merajawabelia. Bajarapamera baja ajibi piatsaxajawami. Nexata, pexanepanaera naexana jiwi piapaenexa. Nexata, bajarajota Jehová cuene-ëjëta Israel-pijinë pemomoxi. Tonajumecopatatsinua pacuenia exanawanapaejitsia, pacuenianua jumecowënëtanapanaejitsia. ²⁶Nexata, Jehová jumaitsi:

—Paxamë itsa daxita panejumecowënëtsianame, xaniawaetsia itsa panenamuxuna-ewetabiabianamenua xua xanë Jehovánë panijaDIOSonënë pacajumaitsi, itsa pa-exanawanapaename xua netsita pexania-cuene, itsanua panejumecowënëtanapaname pataca-itorobiliwaisi pane-exanawanapaenexa, nexata apopacatsi-itorobi tsanetsi pitsipia-yaicue tsi-itorobajë Egipto nacupijiwi, tsipaji raja xanë Jehovánë patacjamatejemaya-exanaenë tsaponaponae —jai Jehová.

²⁷Nexata, xuacujinae Moisés barënaropota israelitawi pepatsinexa Elim nacuata. Bajarajota, xaina doce pameramëthëbeje pepitsaparubenaemeranë irajawawetsina. Itsajotanua xaina setenta pabotobeje dátíl-botonë. Nexata, bajarajota pepatsicujinae, icatsia exananuba pijacarpabonë pejinawanapaenexa bajarapameranë imoxoyojawata.

Jehová rajuta maná Israel-pijinë pemomoxi pexaewanapaenexa

16 ¹Icatsia baja, Israel-pijinë pemomoxi naropoba Elim-wecua, pepatsinexa bajarapamonae Sin petsewinacuatusatojawata. Bajarapatusato boca Elim-beje, Sinaitsutobejetuatuajëta. Bajarapamonae pata bajarabelia quince matacabita, cotocaewipijijuametojawata, pepitsapaecujinae Egipto nacuawecua. ²Nexata, daxita Israel-pijinë pemomoxi bajarapatsewinacuajawata, icatsia taxuxuaba anaeya penajuacuenebaracuaicuaijaijawa Moisés, Aarón-beje, yabara, pexaejawa petobeweliaxaetsi. ³Nexata, jumaitsi tsaponae bajaraponëbejewabelia:

—Cajena tsaena Jehová patanebeyejebijawami Egipto nacujawatalia, paepatota paxanë pamuxunenia-enabiabajë pesetsiwi waxianë pataxae-nexa patapenejawabelia. Xamë baitsi jane, itsiata mapanacuayaberenaje panecapona patayatëpaenexa patajajani —jai bajarapamonae Moisés, Aarón-bejewabelia.

⁴Nexata, Jehová jumaitsi Moisés-jawabelia:

—Xanë copatsianajë perunaejawa athëbëpijipexaejawanë piothopaenexatsica. Nexata, jiwi caematacabi canacujitsia pitsapaena penotabiabinexa saya caematacabicuenia pexaejawanënexa. Nexata, xanë bajarapacuenia

yapëtaenajë pamonae nejumecowënëtsiaya jinawanapa ta-itorobicuenia. Pamonae pijinia apojinawanapae tanejumecowënëtsicuenia, tacueneyapë-taenexa. ⁵Seis matakabita, itsiata penotsijawanë matatoxenetsia notabiana ayaijawanë, anijamatacabibejucuenianexa, penatoxaniawaetsinexa pijabojawata —jai Jehová.

⁶Nexata, Moisés, Aarón-beje, jumaitsibeje daxita Israel-pijinë pemomoxijawabelia:

—Caniwiyojawa paxamë pacueneyapëtaename Jehová wajanacajutsi-nëcuene Egipto nacuawecua. ⁷Bajarapijinia pacuenia, bajayacunua patae-namenua Jehová pinijicuenejawanë pexanaenëcuene ayaijamatabëcuene-nëxae. Pasiwajamatabënabenajacaename cajena papecatsita-exanaecueneyabara. Bajarapacuenia pacatsita-exanaena, tsipaji raja bajaraPonë pacajumetane paxamë pibisiacuenia panenajuacuenebaranatsipaebijawa jamatabëcuene-anaeya. Paxanëbeje saya pajiwitonënëbeje. Acuenebi patanebara-anaepanaejawamëbeje. Xua siwajamatabëcuene-anaepanaeya pibisiacuenia panebaracuaicuaijamëbeje paxanëbejelijawaberena, bajaraxua Jehová natotane bepancecuenebaranatsipaebijawa —jaibeje.

⁸Icacia xuacujinae, Moisés jumaitsi:

—Caniwiyojawabelia rabaja ajena Jehová pacarajutsiana pewi panexaenexa. Bajarapijinia pacuenia, merawia bajayacunua pacarajutsiana pan-cuene, ayaijawanë panexaenexa panepenejawabelia, tsipaji raja pacajumetane Jehová panebaracuaicuaijajawa siwajamatabëcuene-anaepanaeya. Paxanëbeje tsipaji patajamatabëcuene apopacacaponatsibeje maberenaje. Paxanëbeje Jehovájamatabëcuene apopaxinaenëbeje patacarajutsinexa panexaejawa. Bajaraxuata, xua panenajuacuenebaranatsipaebamebeje anaeyacuenia, bajaraxua raja apopaneto-exanaemë ëpaxanëbejelijawaberena. Bajaraxua bepanejumaitsijawa Jehovájawabelia —jai Moisés Israel-pijinë pemomoxijawabelia.

⁹Bajaraxuacujinae, Moisés jumaitsi Aarón-jawabelia:

—¡Itorobare israelitamonae penacaetuatsinexa daxita Jehová pitabara wajanacaetuatabiabitaxunaebowata, tsipaji rabaja Jehová jumetane bajarapamonae penajuacuenebaranatsipaebijawa anaeyacuenia! —jai Aarón-jawabelia.

¹⁰Nexata, paepatota Aarón abaxë itorobanuca bajarapamonae penacaetuatsinexa, bajarapaepatota bajarapamonae itsa naëcolia petusatonacujawabelia, tane jane baja Jehová pijapeniweniwenacotia^k piapiapajubowata. Nexata, bajarapapiapiapajubo benaesituruto itayotaruca ayaicuenia. ¹¹Nexata, bajarapa-itarërëbojawawerena Jehová barëcuaicuaijai Moisés-jawabelia mapacueniaje:

¹²—Xanë rabaja jumetaniji Israel-pijinë pemomoxi tanenajuacuenebaranatsipaebijawa anaeyacuenia. ¡Nexata, jumaitsimëre bajarapamonaejawabelia mapacueniaje: «Ajena caniwiyojawabelia paxamë paxaename pewi. Bajayacunua pijinia paxaename pan panepenejawabelia. Bajarapacuenia paneyapëtaename xanë Jehovánë panijaDIOSonëcuene», jamëre! —jai Jehová Moisés-jawabelia israelitawi yabara.

k 16:10 *Jehová pijapeniweniwenacotia*: Taema «gloria», glosariojawata. Taemanua Éxo. 16:7, 24:16-17.

¹³Nexata baja, itsa caniwiyoy, pata jane baja tsacanimonae ayaibitsaëto-xaneto. Yacaëjêpa daxita pijataxunaebowawa. Merawia pijinia, bajayacunua pitsijawata, othopa dono daxita pijataxunaebow matatoyorotsia. ¹⁴Bajaraxuacujinae, dono baja petsewicuinae, nexata jane baja, irajumawereca naco-paba bitso pitafacaepanaxi betsiquiridujauitsebocotoxi. ¹⁵Israelitamonae apopeyapêtaexae bajaraxua, nexata itsa tane bajarapamonae najumaitsi: «¿Detsa mapitsijawa meta pijabobenaeje?», najai tsaponae. Nexata, Moisés bajaraxuacujinae jumaitsi bajarapamonaejawabelia:

—Maraxuaje jane baja, Jehová nacarajuta wajaxaejawanexa pan-cuenia.

¹⁶Bajaramajane naca-itoroba Jehová waja-exanaenexa mapacueniaje: ¡Panore baja, pacaebopijiwimê canacujitsia, bajaraxuanê papecacaëjêpae-cuenia panexaenexa! Pacaetuatsianame pacaebopijiwimê caëjêtsiaya pabit-saëtowajêto payajawajinawanapame panijacarpabonêjawa. Nexata, caeji-wiyo canacujitsia bepitaona bejamatabêcujiru anijalitrobejecuenia¹ —jai Moisés.

¹⁷Nexata, israelitamonae pitorobicueniatsi exana. Bajarapamonae cae-tuata bajaraxuanê. Itsamonae nota ayaijawanê. Itsamonae pijinia nota beweliacuenia, nacaëjêtsiaya caematacabicuenia pexaejawanexa. ¹⁸Nexata, caëjêtaona anijalitrobejecuenia penotsijawanê pijabopijiwi pecaëjêtsicue-nia. Nexata, pamonae notapona ayaijawa, apotoyajuwênênacopabi-atatsi. Pamonae pijinia bewelia notapona, apotosajinae-atatsi. Nexata, bajarapa-monae notapona pacuenia natonamatawenona pexaenexa.

¹⁹Bajaraxuacujinae, Moisés jumaitsi bajarapamonaejawabelia:

—Caejiwi-ata apobeyajuwênêjebi bajaraxuanê itsamatacabijawabelianexa —jai.

²⁰Itsiaata baitsi jane, itsamonae pijinia apojumecowênêtsi pacuenia Moisés jumaitsi. Nexata, itsamonae pexaeyajuwênêjawanê jebabiaba, itsamatacabi-jawabelia pexaenexa picani. Itsiaata, merawia pitsijawata to-orobenatsi. Totu-xutsaebenatsinua. Nexata, Moisés bara-anaepana bajarapamonaejawabelia.

²¹Nexata, caebajayacunua canacujitsia notabiaba bajarapamonae cae-jiwi canacujitsia pexaejawanexa, tsipaji paepatota ataju tsanajetarucæ, nexata bajaraxuanê irata pebobenaejawa pepora naexanabiaba. ²²Itsiaata baitsi jane, seis-matacabita nota pematatsênêyo. Notapona bejamatabêcu-jiru cuatro palitrobejecuenia caejiwi canacujitsia. Nexata, itsa cobetane Israel-pijinë pemomoxi pewetsiwi bajarapacuenia pecaetuatsijawa, nexata Moisés-jawabelia pona petsipaebinexa penotaponaejawa bitso ayaijawanê.

²³Nexata, Moisés jumaitsi bajarapapewetsiwiawabelia:

—Bajarapacuenia racajena Jehová nacatonajumecopata, tsipaji merawia penacuera-ewetsimatacabi, pamatacabi Jehová nato-itapeta pijamatacabi-nexa. Nexata, ajena baja jiwi besetejeba xuanê xaina pesetsinexa. Bajara-pijinia pacuenia, besebejeba xuanê xaina pesebinexa. Nexata, daxitaxuanê pacatoyajununacopabiana, bajaraxuanê payajebianame, merawia pitsija-wata panexaenexa. Bajarapacuenia pa-exanaename panejayabiyaniwa pane-xaejawa penacuera-ewetsimatacabi —jai Moisés.

1 16:16 *anijalitrobejecuenia*: Xua Israel-pijinë pemomoxi canacuenebabiaba pecaëjêbicanalitoxi, bajaraxuaxi anijalitrobejewajêto. Bajarapacanalitoxi pewênê «gomer», pijajumeta.

²⁴ Nexata, pacuenia Moisés itoroba pexaniawaetsinexa xuanë peyajuwënënacopabijawanë, itsamatacabijawabelia pexaejawanexa, bajarapacuenia exana. Nexata, bajaraxuanë jebi-ata, apoto-orobenaetsi. Apototuxutsaebena-atatsi. ²⁵ Nexata, Moisés jumaitsi penacuera-ewetsimatacabita:

—¡Ajena baja paxaema caniwi panesetsijawanëmi, tsipaji raja ajena sábadó penacuera-ewetsimatacabí! Ajena raja pamatacabí pajaitsi-atamë tsane wayafuabelia, apopacaxitajarabimë tsane mapapexaejauwacuenia manáwënëjawa.^m ²⁶ Pacacuenecaëjëpa picani caematacabí canacujitsia panecaetuatabijawaseis pamatacabibecucuenia. Itsiata baitsi jane, siete matacabita, penacuera-ewetsimatacabí, pajaitsi-atamë tsane, itsacuenejawayo apopacaxitajarabimë tsane —jai picani Moisés israelitawijawabelia.

²⁷ Itsiata, bajarapamonaeyajuwënëwi itsamona siete matacabita picani pitsapa pejaitsiwi, pecaetuatsinexa. Itsiata baitsi jane, itsacuenejawayo apocaxitajarabi. ²⁸ Bajaraxuacujinae, Jehová jumaitsi Moisés-jawabelia:

—¿Depaepatojawabelia abaxë patajanejumecowënëtsimë tsane patacatorobiliwaisi, pacuenia pacatonajumecopatatsi pane-exanabiabinexa?

²⁹ Nexata, maxuaje pacanaëjëtsianame. Xanë Jehováne pacatocopatatsi siete matacabí panenacuera-ewetsimatacabinexa. Bajaraxuata, seis matacabita pacatocopatatsi panecaetuatsinexa pematatsënëa, anijamatacabibecucuenia panexaejawanexa. Bajaraxuata, siete matacabita caejiwi canacujitsia bepónapona pijabojawata. Apobepitsapae itsajawabelia peponaponaenexa —jai Jehová.

³⁰ Nexata, bajarapacujinaeta bajarapamona nacuera-eweta siete matacabita.

³¹ Israel-pijinë pemomoxi bajaraxua wënëruba maná, xuanë caetuatabiaba pexaenexa. Bajaraxua raja penioponaejawaxi, becilantroxutoxiwajëto. Bajaraxua tuxujëpa pacuenia jabërata bepitafacearëcarënaepan peyajawaxaejawa. Bajaratuxu-itsi maná.

³² Bajaraxuacujinae, Moisés jumaitsi:

—Marapacuenia Jehová nacatonajumecopataje: Pawënëtsianame maná-jawa caecanalitoyoⁿ gomer-wënëjawa, anijalitrobeje pecaëjëpaecanalito. ¡Nexata, bajarapamanáwënëtsicanalitoyo paxaniawaere panemomoxi petaenexa, peyapëtaenexa papexaecuene pacarajutatsi, pamatacabí pajinawana-pame petusatonacuajawata, patacujitsicujinae Egipto nacujawawerena! —jai Moisés petsipaebijawata.

³³ Moisés xuacujinae jumaitsi Aarón-jawabelia:

—¡Pire mapacanalitoje, nejenexa anijalitrobejucuenia manájawa! Bajaraxuacujinae, bajarapacanalito etsianame Jehová pitabarata, bajaraxua wajaxaniawaetsinexa, wajamomoxi juya petaeponaenexa —jai Moisés.

m 16:25 *maná*: Maná ita jai hebreojumeta, «¿Detsa xua meta, no?», pejajume. Bajarapacuenia penayanijobaponaexae copiaya petaejawata, bajarapawënëcuenia canacopata, «maná», pejainexa. Taema Éxo. 16:15. **n 16:32** *caecanalitoyo*: Pacanalito pita bajarapamona manájawa pejexa, atsata apopexanaejawa; oronanitota pexanaejawa. Bajaraxua nacayapëtaeya-exana Heb. 9:4.

³⁴Nexata, pacuenia Jehová itorobatsi Moisés, bajarapacuenia Aarón xaniawaeta maná pejecanalitoyo Jehová pijajawanê pexaniawaetsibaulajawata,^o bajarajota pexaniawaetsinexa.

³⁵Nexata, Israel-pijinë pemomoxi xaewanapa manájava cuarenta pawai-bejecuenia, pepatsijawabelia itsamonae pejinawanapaenacuajawabelia, Canaán-wënë nacua,^p bajarajotalia pejinawanapaenexa.

³⁶Caegomer raja diez xuabejeyajuwënëjawa cae-efajawami. Caegomer pijinia junua anijalitrobejecuenia.

Dioso pitsapaeya-exana mera ibotojawawerena

17 ¹Daxita israelitamonae pitsapa pijataxunaewecua Sin petsewinacuata, peponaenexa Sinaítsutojawabelia. Be-axayocuenia najeta-rubena bajarapanacuajawa, caematacabi canacujitsia pacuenia itorobatsi Jehová. Penajetarubenaajawata, pata-othopa Refidim-tusatojawata. Itsiata baitsi jane, bajarapanacuajawata ajibi mera bajarapamonae piapaenexa.

²Nexata, bajarapamonae jamatabëcuene-anaeya jumaitsi Moisés-jawabelia: —¡Mera panerajure pata-apaenexa! —jai tsaponae.

Nexata, Moisés jumaitsi bajarapamonaejawabelia:

—¿Detsa xuajitsia paxamê pajamatabëcuene-anaepaname xanëjawaberená? ¡Pëtsa pajamatabëcuene-ëjëbaponame Jehová panejumaitsitsaponae-jawata bajarapacuenia! —jai jumecanawiatsiaya.

³Nexata, bajarajota bajarapamonae bitso mera jitsipa, bajaraxuata jamatabë-anaepana Moisés-jawabelia. Nexata, bajaraponëjawabelia cuene-carapuabatsi mapacueniaje:

—¿Detsa xuajitsia nexata patajanejutsimê Egipto nacuaewecua, patane-caponaenexamê mapatsewinacuajawaberenaje? ¿Patanebenexamê tsaja, pataxi yajawa, bajarapacuenia patajadajubi yajawa-ata mera patajitsipae-cuenia? —jai Moisés-jawabelia.

⁴Nexata, Moisés wajëca Jehovájawabelia:

—¿Detsa xua xanê exanaenajê mapamonaejawabeliaje? Imoxoyo raja bajara-pamonae tanebeyaxuabi tanetseconaecuenia ibotonëta —jai pewajëtsijawata.

⁵Nexata, Jehová jumecanawiata Moisés-jawabelia:

—Xamê pewajënaeta nucaename bajarapamonae pitabarata. ¡Natsicue-yajunarenuia itsamonae pija-ancianowi pewetsiwiayajuwënëwi Israel-pijinë pemomoxi, ëneyajawaponaenexa ibotojawabelia! Caponaename panaebota mene-itaconitaxuabame^q Nilo mene. ⁶Xanê raja cawajënae-ewetsianatsi bajarajotalia, Horeb-tsutojawatalia^r ibotojawata. Nexata, itsa jumaconita-xuabianame bajarapa-iboto, bajarawerena pitsapaena mera, piapaenexa daxita bajarapamonae —jai Jehová.

Moisés nexata jejai. Bajarapacuenia exana daxita pamona pija-ancianowi^s Israel-pijinë pemomoxi pitabarata. Mera baja nawotsiaya

o 16:34 *Jehová pijajawanê pexaniawaetsibaulajawata:* Taema Heb. 9:4. **p 16:35** *Canaán-wënë nacua:* Taema Jos. 5:1-12. **q 17:5** *mene-itaconitaxuabame:* Taema Éxo. 7:20. **r 17:6** *Horeb-tsuto:* Mapatsutotaje Dioso tsitanaitajëta Moisés bajayata naemëyo bepewerijawijawa isotota. Taema Éxo. 3:1. Mapatsuto anijawënëbeje xaina picani; caewënë Horeb, itsawënë pijinia Sinaí. **s 17:6** *pija-ancianowi:* Israel-pijinë pemomoxi pewetsiwiayajuwënëwi. Taema «ancianowi», glosariojawata.

pitsaparena ibotojawawerena. ⁷Bajarapataxunaeyo Moisés wënëruba Masah, itsawënë Meriba^a pejaiwënë, tsipaji bajarajota Israel-pijinë pemomoxi jumaitsi tsaponae Moisés-jawabelia jamatabëcuene-anaepanaeya, Jehovánua jamatabëcuene-ëjëbiaya jumaitsi tsaponae mapacueniaje: «¿Waxaitsi tsaja nacayajawa picani Jehová, itsa jume meta, aponacaya-jawa?», najai tsaponae. Bajaraxuata, wënëruba bajarapawënëbejecuenia.

Amalecitawi barënawajabitsaëta Israel-pijinë pemomoxijawabelia

⁸Pacujinae Israel-pijinë pemomoxi xaina pijataxunae Refidim-nacuajawata, nexata amalecitawi tsimaxëpata pebarënabenexa Israel-pijinë pemomoxijawabelia. ⁹Moisés nexata jumaitsi Josuéjawabelia:

—Itapere itsamonae pebijwi, merawia nebarëponaenexa panebarënabenexa amalecitawijawabelia! Merawia raja pijinia bajayacunua xanë ponae-najë petsutojumabelia. Bajarajotalia, cobenanucaenajë DIOSO pijanaebo, baitsi ponaebota DIOSO nitoroba ta-exanabiabinexa pinijicuenejawanë —jai Moisés.

¹⁰Nexata, Josué bajarapacuenia exana, pacuenia Moisés jumaitsi. Nexata, Josué barënnabia amalecitawijawabelia. Moisés pijinia Aarón, Hur-bana pona petsutojumabetsia. ¹¹Nexata, paepatota Israel-pijinë pemomoxi barënnabia amalecitawijawabelia, bajarapaepatota Moisés itsa pijanaebo cobenanamaxëyotabiabanuca athëbëabetsia, bajarapaepatota, Israel-pijinë pemomoxi acuenie-itatsaca tsabiabi amalecitawijawabelia. Paepatota pijinia Moisés namaxëbuatabiabica, bajarapaepatota pijinia, amalecitawi acuenie-itatsaca tsabiabi. ¹²Moisés belia bitso maxëcuerana penamaxëyotabiabanucaejawa, tsipaji bajayajebi nawajabitsaëtawanapa bajarapamonae. Bajaraxuacujinae nexata, Aarón, Hur-beje, pitabeje iboto. Nexata, tsiwajënaebuatatsi Moisés pe-ecaenexa. Bajaraponë nexata bajarapa-ibotojumata eca. Aarón pijinia Hur-beje caecuenia najuamaxëyotanucabeje athëbëabetsia. Caenë canacujitsia caemaxënenia maxëyotanuca. Nexata, bajarapacuenia bajaraponë bajayajebi ajamatabësaë penamaxëyotecaenexa. Bajarapacuenia exana caniwiyojawabelia, juameto pepëcaewijawabetsia. ¹³Josué nexata cuene-amoneyaba daxita amalecitawimi pijawajabitsaëwi, pebecuenia espadata.

¹⁴Nexata, Jehová jumaitsi Moisés-jawabelia:

—Mapaliwaisije yaquinarutsianame cuyalatobaxutojawabelia, Israel-pijinë pemomoxi penacofënëtsiyaniwa patacayawenonaejawa ajena panecuenie-amoneyabinexa bajarapamonae. ¡Bajarapacuenianua, jumaitsimëre Josuéjawabelia, bajaraponë peyapëtaenexa, tsipaji xanë itsamatacabi amalecitawi werebiabianajë daxitamatacabijawabelianexa! Nexata, tawerebiabicujinae itsamonae apocuenenajamatabënapitsi tsane bajarapa-amalecitawimi —jai Jehová Moisés-jawabelia.

t 17:7 *Masah-wënë, Meribawënë*: Masah itsa jai hebreojumeta: «Pejamatabëcuene-ëjëtsicuene», pejaijume. Bajarapijinia pacuenia, hebreojumeta Meriba: «jamatabëcuene-anaepana», pejaijume. Icatsia, nacayapëtaeya-exana mapa-iboto yabara bajarapataxunaetabeje. Núm. 20:10-13, 1Co 10:1-5.

¹⁵ Moisés nexata bajarajota nacuenebanuta altar-jawa Jehová pewë-nëta. Bajarapa-altar-jawa wënëruba Jehová-nisi, " tsipaji bajaraPonë matacapona Israel-pijinë pemomoxi pacuenia bandera. ¹⁶ Bajaraxuacujinae, jumaitsi:

—Amalecitawi pecuenenamataxainaexae pebarënewajabitsaëtsinexa Jehová pijajiwijawabelia, nexata Jehová najumecapanepaeya jumaitsi juya pecueneanawiatsinexa amalecitawi pebarënenexa, pijajiji petsimaxë-patsixae. Bajarapacuenia, tsitecaeya bajaraponë barënenabeponaena pemomoxijawabelia tsaponae —jai Moisés.

Moisés paxuyo, Jetro, siwaxainatsi

18 ¹ Moisés paxuyo, Jetro, " sacerdotenëcuenia nacuenebaponapona Madián nacupijiwituatujëta. Bajaraponë wënëtane Moisés daxita pacuenia DIOSO to-exanatsi, Israel-pijinë pemomoxi-ata. Wënëtanenua pacuenia Jehová Egipto nacuawecua juta Israel-pijinë pemomoxi. ² Moisés peponaewajënaeya Egipto nacujawabelia, caewëarena itoroba" pijawa Séfora, penawiatsinexa paxa Jetro pijabojawaberena. Bajaraxuata, bajarapowa ponapona paxa pijabota, pexënatobeje yajawa. ³ Caenë pewënë Gersón. Bajarapacuenia Moisés wënëruta, tsipaji jumaitsi: «Xanë raja taponanë itsanacujawawerena, tawarapenëcuenia taponaponaenënexa apotayapëtaenacuata», pejaiwënëcuenia. ⁴ Itsanë pijinia Moisés wënëruba Eliezer, tsipaji jumaitsi: «Taxa piJaDIOSO neyawenona. Necapanepanua faraón pecobewecua», pejaiwënëcuenia.

⁵ Pamatacabi Moisés, Israel-pijinë pemomoxi-ata, exana pijataxunaebo papenamatajëpae-ira boca DIOSO pijatsuto" imoxoyojawata, bajarapamatacabi Jetro, Moisés paxuyo, tobarëpatajopatsi Moisés pijawa, pexënatobeje-ata yajawa. ⁶ Nexata pepatsiwajënaeya, Jetro tonajume-itoroba Moisés-jawabelia mapacueniaje: «Xanë raja, Jetronë, axuyonë, patajopajë tacataenexa. Bajarapacuenia yajawapatajë nijawa, nexënatobeje yajawa», pejailiwaishi.

⁷ Nexata Moisés itsa jumetane bajarapaliwaishi, pitsapa pecopiapitsinexa paxuyo. Bajaraponë yayataeya pitabarata nabëxëtsutsiaya nuca. Bajaraxuacujinae, bajacoba itabaratsutsuniaya. Nayanijobabeje pepona-naecuenebeje yabara. Bajarapacuenia penabajacobicujinaebeje, joneyabeje Moisés pijacarpabojawabelia. ⁸ Moisés nexata tsipaeba paxuyojawabelia daxita pacuenejawanë Jehová exana faraón-jawabelia, Egipto nacupijiwijawabelia-ata, pexaniacuenia peyawenonaejawatatsi israelitawi.

u 17:15 *Jehová-nisi*: Bajarapawënë pejumaitsiyume, «Jehová raja bewajabandera», pejaiwënë. Bajarapacuenia wënëruba, tsipaji pacuenia conferencia peponaewi, itsanë namataxainabiaba bandera peyotsinë, bajarapacuenia Dioso matacaponatsi Israel-pijinë pemomoxi penabarënewajabitsaëtsinexa amalecitawi. **v 18:1** *Jetro*: Itsawënë pijinia Reuel. Taema Éxo. 2:18 Reuel: «Dioso peyapëtaenëtsi», pejaiwënë, pijasacerdotecue yabara. Jetro pijinia: «petuxanenë», pejaiwënë, nacua pewetsinë yabara. **w 18:2** *itoroba*: Taema Éxo. 4:24-26 Dioso Pejumeliwaisibaxutota xaniawaetsia aponacatsipaebi. Itsiata, penacujarubiwi Dioso peliwaishi canaëjëta pacuenia Séfora pexënat Gersón pebo-upiperabëcaucutsicujinae, Moisés itoroba pijawa penawiatsinexa paxa Jetro pijabojawabelia, pewetsinexa Moisés pepatsijawabelia icatsia caewëarena Sinaïtsutota. **x 18:5** *Dioso pijatsuto*: Bajarapatsuto pewënë Sinaï. Itsawënë pijinia Horeb. Taema Éxo. 3:1

Tsipaebanua pacuenia Jehová yawenonaponatsi, paepatota to-ayapëbejetsi namutua penajetarubenaewawata.

⁹ Jetro nexata bitso siwajamatabëcuenebarëya Jehová, pexaniacuenia peyawenonaponaexae israelitawijawabelia, pecapanepaexaenua Egipto nacuapijiwi pesaëwecua. ¹⁰ Nexata Jetro bajarapaepatota, jumaitsi:

—¡Bitso ayaijamatabëcuenenë Jehová! BajaraPonë pacacapanepa Egipto nacuapijiwi pesaëwecua, bajarapacuenia faraón pecobewecua-ata. ¹¹ Aecnoxae matapania yapëtaniji Jehová bitso ayaijamatabëcuenenëcuene daxita diosowiweucua, tsipaji capanepa pijajiwi Egipto nacuapijiwi pesaëwecua, paepatota ayaijamatabëcuene nataeya bejiobia-exanaponatsi —jai Jetro Moisés-jawabelia cuenewënëxaniatsiaya Jehová yabara.

¹² Bajaraxuacujinae, Jetro, Moisés paxuyo, capata dajubi petajuitsia-exanaenexa altar-jumata, DIOSO pewënëta. Itsadajubi pijinia pewiyajuwë-nëjawa tajuitsia-exana, penajamatabëcuene-itajëtsinexa asiwaya peyaiyataejawa DIOSO. Nexata Aarón, daxita pamonaen penamatacitorobiwi-ata israelitawituatujëta, pona Jetrojawabelia, penacopabiwi penajuaxaenexa Dioso pitabarata, penajamatabëcuene-itajëtsinexa caejamatabëcuene penajuaxainaejawa Diosojawabelia.

Jetro muxujioba piopaxa Moisés

¹³ Itsamatacabijawabelia, Moisés eca liwaisi petocanaëjëtsitaxunaewawata. Nexata, Israel-pijinë pemomoxi, liwaisi penatsixainaewi, patapona petsipaebinxatsi paliwaisi natsixaina. Bajarapamonae nubena Moisés pitabarata, bajayacunuajawawerenacujinae caniwijojawabelia. ¹⁴ Nexata, paxuyo, pecueneataewatatsi bajarapacuenia, caenë pexanaejawa, yanijobatsi:

—¿Detsa xuajitsia xamë nijanatsicarucaeya exanae daxita mapacuenene? ¿Detsa xuajitsia xamë nija-ecae caenëmë jiwi liwaisi netoxanebinexa, itsajiwi cayawenonaenejewaw? Bajarapacuenia nexanaexae, jiwi ayaiBITSaëto nacueratanubena xamë nitabarata daitamatacabijebi —jai Jetro.

¹⁵ Nexata Moisés jumecanawiata paxuyo:

—Bajarapacuenia exanajë, tsipaji bajarapamonae pata xanëjawaberena, tayapëtaeya-exanaenexa DIOSO pewënëta pijaliwaisi yabara. ¹⁶ Pacujinae namata-enetsia liwaisi natsixaina anijajiwiweje, patabiababeje xanëjawaberena. Nexata xanë tsipaebabiabajë DIOSO pitorobiliwaisianë, pemuxujibiliwaisianë-ata, bajarapaliwaisi pejumecowënëtsinexa —jai.

¹⁷ Nexata Jetro muxujiobiaya Moisés-jawabelia jumaitsi:

—Apoxanepanae cajena, bajarapacuenia nexanaejawa. ¹⁸ Bajarapacuenia nexanaejawata cueranaeneme. Pamonaen-ita xamëjawata nacaetuabiabiana, cuerananubenaena. Bajarapaliwaisicanaëjëbicuene bitso cajena piayapëbejeliwaisi, ayaiBITSaëto liwaisi penatsixainaewi nexanebinexa. Nexata, xamë caenëmë apocacuenecaëjëpae bajarapacuenia ne-exanaejawa.

¹⁹ Ajenaconoxae, jitsipajë tanenamuxuna-ewetsijawamë tacamuxujiobi-jawa. DIOSO raja cayajawa tsane xamë, pecayawenonaenexa. Catoxanepana picani caenëmë, xamë, nenucaejawa DIOSO pitabarata, netocuaicuaijainexa israelitawi. Nexata, DIOSOjawabelia tsitajëtsianame bajarapamonae penatsixainaeliwaisianë. ²⁰ Xuacujinae, DIOSO pecatonajumecopatsiliwaisi, juya cujarubianame bajarapamonae pacuenia jinawanapaejitsia, pacuenianua

exanawanapaejitsia bajaraPonē pejitsipaecuenia. ²¹ Itsiata bailsi jane, oriibia natsicueya-itapetsianame itsamonae pecacueneyawenonaewinexa, jiwi pijaliwasianē petoxanebiwinexa. Mapitsicue pexainaewi nato-itapere: Pamonaē pecuenecaējēpaewitsi liwaisi pexanebijawa. Pexaniajamatabēcuenewi. Caeliwasi pexainaewi. Peyaiyataewi DIOSO. Pexaniajaiwi. Pamonaē-ata apopejitsipaewi ayaijawa pecobecowē penotsinexa, yamaxē-itojorobiaya liwaisi pexanebijawata. Nexata, bajarapamonaē tsicopatsianame peliwasixanebiwinexa caebitsaēto canacujitsia. Itsamonae ewetsiana mil pajiwiubeje, itsamonae cien pajiwiubeje, itsamonae cincuenta pajiwiubeje, itsamonae-ata diez pajiwiubeje. ²² Nexata, bajarapamonaē toxanebabiabiana paepatota itsamonae liwaisi natsixaina bajarapabitsaētonētuaatujēta. Matapania, bitso pinijipiayapēbejeliwaisi itsa natsixaina, nexata xamējawaberena liwaisi capatabiabiana netoxanebinexa. Itsiata, xuanē bewelialiwasijawanē, pamonaē nitapetsiwi toxanebabiabiana. Nexata, xamē bajarapacuenia bewelia catsicarucaena nexanaejawa. Apocato-ayaicue tane, bajarapamonaē neyawanacuenebabiabixae. ²³ Bajarapacuenia xamē itsa exanaename, DIOSO itsa ca-itorobanua tacamuxujibicuenia nexanaenexa, nexata xamē bitso apocatsicaruae tane ayaicuenia nexanaejawa. Bepijaiyo-ata apoyabaracueranaemē tane. Nexata, daxita liwaisi pecapatsiwimi nawiababiabiana jamatabēcuenekarēyaya pijacarpabonējawabelia —jai Jetro.

²⁴ Moisés exana paxuyo pemuxujibicueniatsi. ²⁵ Itapeta israelitawituaatujēta pamonaē pecuenecaējēpaewitsi bajarapitsicue pexanaenexa itsamonaewecua. Xuacujinae, bajaraponē tsicopata pewetsinexa bajarapamonaē caebitsaēto canacujitsia; itsamonae pewetsinexa mil pajiwiubeje, itsamonae cien pajiwiubeje, itsamonae cincuenta pajiwiubeje, bajarapacuenia itsamonaē-ata diez pajiwiubeje. ²⁶ Nexata, bajarapamonaē canacopata liwaisi petocanaējēbiwinexa caematacabi canacujitsia, petoxanebinexa jiwi paliwaisi natsixaina, pexaniajailiwasicuenia. Paliwaisianē beweliapiayapēbejeliwaisianē, toxanebabia pijacujaya. Moisés pijinia canacopata piayapēbejeliwaisianē, pepopenamatamotsiliwaisianē-ata, petoxanebabibinexa.

²⁷ Bajaraxuacujinae, Moisés baja paxuyo Jetro napējiobatsi. Nexata nawiata baja, pijanacuayaberena.

Moisés, Diosobeje nacaxitajarababeje icatsia Sinaītsutota

19 ¹ Pacujinae Israel-pijinē pemomoxi xaina acueyabi pajuameto-beje pepitsapaecujinae Egipto nacuwecua, bajarapamatacabita pata-othopa baja Sinaĩtusatojawata, patusatota nuca Sinaĩsuto. ² Nexata, bajarapamonaē pepitsapaecujinae Refidim-tusatojawawecua, xuacujinae pata-othopa Sinaĩsutojawata. Bajarajota, bajarapamonaē exananuba baja pijacarpabonē, pijataxunaēto pexanaenexa. Nexata, jinawanapa Sinaĩsuto-tabu imoxoyojawata. ³ Nexata, Moisés junaya petsutojumabetsia pecaxitajabinexa Dioso, tsipaji Jehová bajarapatsutojumawetsica junatsiajumaiatsi: —jJumaiatsimēre mapacueniaje israelitawijawabelia, Jacob-pijinē pemomoxi: ⁴ «Paxamē raja pataneme daxitaxua Jehovānē exanajē Egipto nacupapijiwijawabelia patacujitsinexa. Patanemenua pacuenia paca-ewetsiaya paca-caponatsi paxamē maberenaē itsajota pacayajawaponaponatsi maparucaje. Pexaniacuenia pacacaponatsi maberenaē, jamatejema panepanepaenexa

tajatsutojawaberena, pacuenia pinijiwiria pepunaenë becotsala⁷ pexi ewetsiaya pecorofetojumawetsica capuna pematapenajawabetsia. ⁵Daxita bajaraxua ta-exanaecueene pataneme, nexata paxamë daxitaxua panejume-taneme itsa panejumecowënëtsianame, itsa pa-exanawanapaenamenua patacanajumeliwaisicajonecowëya, nexata patajiwimë tsane. Nexata, bitso pataca-asiwawi tsane daxitajiwi mapanacuata pejinawanapaewiwecuaje. Picani daxita mapanacuapijiwi tajajiwiye, ⁶itsiata baitsi jane, paxamë ita-petsiaya pacatsatsianatsi itsawiriawiwecua saicayacuenia panejinawanapae-nexa. Paca-itapetatsinua tajasacerdotewicuenia tajacuene patanetonacuene-biwinexamë», jamëre israelitawijawabelia! —jai Jehová Moisés-jawabelia.

⁷Nexata, Moisés runaica Sinaítsutojumawetsica. Icatsia xuacujinae, junata daxita ancianowi, pamonaewewetsiwi. Nexata, daxitaliwaishi tsipaeba pacuenia Jehová itorobatsi. ⁸Nexata, daxita bajarapamonae bajarapali-waishi pejumetaecujinaetsi, najuajumecanawiatatsi daxita caejumecuenia. Jumaitsi:

—Je, xanepana rabaja. Pa-exanaenajë rabaja daxita pacuenia Jehová pane-itoroba —jai.

Nexata, bajaraxuacujinae icatsia Moisés caewëa jumeliwaisicajunaya Jehovájawabetsia pejumaitsijume pewetsiwi israelitawi peyapëtaeya-exanaenexa Jehová.

Dioso itaweta Israel-pijinë pemomoxi pimoxoyotsiyaniwa Sinaítsuto

⁹Nexata, petsutojumabetsia pepatsicujinae, Jehová jumaitsi Moisés-jawabelia:

—Nexata, xanë cabarëcuaijai tsanetsi pitayaëpajubotuatujëjawata jiwi pitabëta, bajarapamonae tanejumetaenexa tacabarëcuaijaijawaxamëjawabelia. Nexata, bajarapacuenia bajarapamonae cajumexania-taena nexaniajaitsabiabijawa daxitamatacabijawabelianexa pacujinae nejumewajunupaebabiabianame tacanajumecopatsiliwaishi —jai Jehová Moisés-jawabelia.

Nexata, bajaraxuacujinae Moisés jumewajunupaeba Jehovájawabelia jiwi pejumaitsijume. ¹⁰Nexata, jumaitsi Jehová:

—¡Runareme baja, bajarapamonae nejumaitsinexa ajena, merawia-ata, penacuenexaniawaetsinexa pibisiacueene pexanaejawawecua, tsipaji acue-yabi matabita bajarapamonae netonacaetuatsiana yayataeya xanë tawë-nëta! Nexata, bajarapamonae penaxatabijawanë quiatsiana. ¹¹Bajarapamonae najamatabëcuenexaniawaetsiana pexaniajamatabëcuenepexinaenexa xanëjawaberena, tsipaji raja acueyabi matabita Jehovánë patsiarecajë bajarapamonae pitabëta Sinaítsutojumabereca. ¹²Nexata, bajarapamonae petsuto pimoxoyotsiyaniwa, pejayatsiyaniwanua, parutsianame peyacaranatsijawa petsutotabujawa matatoyorotsia. Jumaitsimë tsane mapatsuto paneyacaranatsicujinae: «¡Pëtsa itsajiwi-ata junua paneyacaranatsi-ënëaberena! ¡Pëtsa pona mapatsutoyenepanajawa-ata! Nexata, pajiwiyo mapatsutoyenepanajawa ponaena, bajarapajiwiyo pepacueene tēpaena», jamë tsane. ¹³Nexata, pajiwiyo jonena bajarapayacaranatsi-ënëabelia,

bajarapajiwiyo pabeyaxuabianame pajayatsinejewamē, panetseconaejawata ibotonēta, itsa jume, panetseconaejawata cuererebonēta. Bajarapacuenia pa-exanaename jiwitonējawabelia, dajubijawabelia-ata. Nexata, apobepacopatsimē piasaētsaponaponaenexa bajaraxua pexanaejiwi. Nexata, itsa paju-metaneme pe-obijume apiaya ayaijumeta ovejamata-eto,^z bajarapaepatota matapania cuenecaējēpa pimoxoyotsinexarena jiwi petsutotabujawaberena, itsiata xenetsinejewa peyacaranatsijawa —jai Jehovah.

¹⁴⁻¹⁵ Nexata, Moisés baja runaica Sinaītsutowecua, jiwi petsi-paebinexa pacuenia Jehovah tonajumecopatatsi. Nexata, jumaitsi bajarapamonaejawabelia:

—¡Panaxaniawaetsianame. Panajamatabēcuenexaniawaetsianamenua pamerawiajawabelianexa, tsipaji Jehovah nacatsitanaitajētsianica. Nexata baja, paquiare panija-ese. Pijinia papebijiwiwimē pētsa pa-imoxoyotame abaxē panijawajiwi, mapaepatojawaweliacujinaeje Jehovah wajanacatsitanaitajētsi-jawabelia! —jai Moisés.

¹⁶ Nexata baja, acueyabi matabita bajayacunua, bajarapaepatota piatayaēpajuboxaneto runaica Sinaītsutojumabetsica, pejuma-acatsinexa. Bajarapaepatota, bitso yamaxē apaxayo. Niwepajunujunua ayaicuenia. Bajarapacuenia ayaicuenia najumetajunujunua. Nexata jane baja, najumeta pinijumecuenia ovejamata-eto pe-obijawa. Nexata, daxitajiwi pijacarpabonējawa pejinawanapaewi, bajarajota bitso neconecojai pecajunawi pejumetaejawata bajaraxua. ¹⁷ Nexata, Moisés matabapona bajarapamonae pijacarpabonēwecua pecopiapitsinexa DIOSO, petonacaetuatsinexa pitabarata Sinaītsutoyenepanajawaberena. Itsiata, nubena-othopa peyacaranatsijawa pēñewelia. ¹⁸ Nexata, bajarapatsutojumata pitsapa petsēxēxaneto, tsipaji Jehovah runaica pecotia yajawa bajarapatsutojumabetsica. Nexata, petsēxē junaponaya bepetajuitsitsēxēxaneto. Bajarapaepatota, bajarapatsuto najēaba bitso ayaicuenia. ¹⁹ Nexata, ovejamata-eto pe-obijawa caenajumetsi canacujitsia bitso ayaijume tsaponae pewajēnaeyabelia. Nexata, Moisés jane baja itsa barēcuaicuaijai DIOSojawabelia, nexata DIOSO jumecanawiataponatsi pejumediridirinaecuenia.

²⁰ Nexata, Jehovah perunaecujinae pepoSinaītsutojumabetsica, bajarapatsutojumawetsica junatatsi Moisés petsianexa petsutojumabetsia, pebarēcuaicuaijainexatsi. Moisés nexata junaya bajarapatsutojumabetsia. Bajarajotatsia pepatsicujinae, ²¹ Jehovah jumaitsitsi:

—¡Runaremeca baja icatsia, nemuxujiobinexa bajarapamonaejawabelia pejoneyaniwa mapatsuto matatoyorotsia peyacaranatsi-ēñēaberena, pejit-sipaexae tanetaenexa, tsipaji raja bajarapacuenia tēpaejitsipa ayaibitsaēto!

²² Bajarapacuenia sacerdotewi-ata apocuenecaējēpaetsi pimoxoyotsinexa mapatsutoje. Tanetonacuenebawanapaewi-ata tajacuene, acuenebi tsipae tane-imoxoyotsijawa pewajēnaeya nacuenexaniawaetsinejewa. Nexata, bajarapamonae itsa yaneconiaya nimoxoyotsipa, belia tananeconitsia-exanaejawata tēpaeya-exanaejitsipajē bajarapamonae pijaneconijamatabēcuenē —jai Jehovah.

²³ Nexata, Moisés jumecanawiata Jehovahajawabelia:

—Nexata, bajarapamonae apocuenecaējēpaetsi pejunaejawa mapatsutoju-majawabetsinaje, tsipaji xamē pane-itorobame patacaranatarutsinexa mata-toyorotsia mapatsutoje, bajarapacuenianua patanawecuatssatsinexa mapatsuto patacayaiyataexae —jai Moisés.

²⁴ Itsiata baitsi jane, Jehová jumaitsi Moisés-jawabelia:

—¡Jumel! ¡Runaremeca baja! Icatsia xuacujinae, junaenimina Aarón yajawa. Nexata, pamonaē sacerdotewi, bajarapacuenia daxitajiwi apobeponaē bajarapayacaranatsijawawecua, pejunaenexatsina itsajotatsina xanē Jehovánē ponaponajē. Belia, bajarapamonae xanēta pijacuata nawerebiabi-jitsipa —jai Jehová.

²⁵ Moisés nexata runaica bajarapatsutowetsica. Nexata, tsipaeba xua Jehová jumaitsi bajarapamonae yabara.

**Diez paliwaisibeje Dioso tonajumecopata Israel-pijinē pemomoxijawabelia
pejumecowēnētawanapaenexa**

(Deut 5:1-21)

20 ¹ Icatsia DIOSO pecuaicuaijajawata, mapaliwaisianēje Sinaītsutoju-mawetsica, jumaitsi daxita bajarapamonaejawabelia:

² —Xanē raja Jehovánē panijaDIOSOnē. Patacajtšinē Egipto nacuwecua, itsajotalia picani amoneya patonacuenebawanapame.

³ »¡Pětsa panatoxainame itsadiosomonae saicaya xanēwecua, panesiwana-jamatabēcuenecopatsinexa bajarapamonaejawabelia! ¡Biji rajane, ěxanēja-waberena pane-itaxutuajamatejemamēre patacayawenonaenexa!

⁴ »¡Pětsa pa-exaname itsawiria jumapecataenēanē, asiwaya panesiwanajamatabēcuenecopababiaba bajaraponēanējawabelia panenamatawenonaejawata xanēwecua panijadiosowicuenia! ¡Daxitaxua xaina athēbēpijicuenejawanē, bajarapacuenia mapanacuata irapijijawanē, xuanē-ata xaina menepijicuenejawanē, daxita bajaraxuanē pětsa jumapecataeyacuenia pa-exaname!

⁵ ¡Pětsa yaiyatacuenia panematabacabēta patonubenabiabame, asiwaya panenawajēcāenexa bajaraxuanējawabelia, panejumecowēnētabiabixae, tsipaji raja ěxanē Jehovánē panijaDIOSOnē! Xanē raja tacuenesaenē daxitawecua. Tacueneca-ēbinē^a pamonaē asiwaya siwanajamatabēcuenecopababiaba jumapecataeya pexanaenēanējawabelia xanēwecua. Tacuene-asiwanēnua jiwi pibisiacue pexanaeyaniwa, tsipaji tananeconitsia-exanaenē pibisiacue pexanaewi pesiwanajamatabēcuenecopatsijawata itsacuenējawabelia xanēwecua, penawajēcabiabinexa bajaraxuajawabelia. Pajiwi naneconitsia-exanabiabajē tanewecuasiwanajamatabēcuenecopatsixae, bajarapajiwi pijaneconimi tsijumajopaeya-exanabiabianajē pexijawabelia tananeconitsia-exanaenexa, bajarapijinia pacuenia pemomoxijawabelia, penaexanaponaewi cuatro papemomoxibitsaētojawabelia, tsipaji bajarapacuenia pexanaejawata nesiwanajamatabēcue-ita-jētabiaba tane-itoyajawa. ⁶ Itsiata baitsi jane, pamonaē netane asiwayacuenia, nejumecowēnētawanapanua ta-itorobiliwaisi,

a 20:5 Tacueneca-ēbinē: Dioso yapētaeya-exana pecueneca-ēbijawata mxuanē yabaraje: Pacuenia pijawa pexainaenē cueneca-ēbijitsipa pijawa pewajēcāexae itsacuenējawa peto-exanaenexatsi itsapebijawabelia, bajarapacuenia Dioso cueneca-ēba itsamonae pesiwanajamatabēcopatabiabixae itsanējawabelia, itsacuenējawabelia-ata bajaraPonēwecua.

nexata bajarapamonaewawabelia pijinia itaxutotsoniataeyabiabianajë, pewajënaeyabelia tayawenonabiabinexa, bajarapacuenia pexijawabelia, pemomoxijawabelia-ata, orijibia pemomoxi pexijawabelia-ata tsaponae, pepo-bexëajawabelia ayaibitsaëttoxaneto pemomoxi penaitajëtaponaewijawabelia, tsipaji nesiwanajamatabëcuene-itajëtabiaba tane-asiwajawa.

⁷»Xanë raja Jehovánë panijaDIOSONë. ¡Nexata, pëtsa jemacuenia pane-wënëcacaucuaijamë itsajiwi papecayaiyataenexa! Bajarapacuenia-ata apoxanepanae quenetsiataeyacuenia patanewënëcacaucuaijajawamë, tsipaji xanë apocopatsinë tsane naneconitsia-exanaenejewanë pajiwiyo pibisiacuenia newënëcacaucuaijaji.

⁸Panajamatabënapitabiabianame xanë DIOSONë ta-itapetsimatacabi, siete matacabi penacuera-ewetsimatacabinexa,^b bajarapamatacabi tsatsiaya panexai-naenexa itsamatacabianëwecua. ⁹Panacuenebabiabianame seis pamatacabibeje daxitaxuanë pajitsipame pane-exanaejawa. ¹⁰Itsiaa baitsi jane, siete matabita, xanë Jehovánë panijaDIOSONë tjamatacabi, panacuera-ewetabiabianame asiwaya pataneyaiaataexaemë. ¡Pëtsa bajarapamatacabita caejiwi-ata nacue-nebabiaba paxamëyajuwënëjiwi, panexijiwi-ata, panexënatowaxi-ata, bajarapacuenia amoneya papecatonacuenebiwi-ata, bajarapacuenia panijadajubi-ata, bajarapijinia pacuenia pamonaë jinawanapa paxamëjawata papecatonacuenebawanapaewi, itsanacujawawerena penapatsiwi, ¹¹tsipaji raja xanë Jehovánë seis matabita daxitacuenë weretajë ta-exanaejawa mapanacuaje! Daxita athë-bëpijicuene, irapijicuene, manuanenepijicuene-ata, daxita bajaraxuanë exanaeweretajë seis matabita. Xuacujinaë, wemaxënacuera-ewetajë siete matabita. Bajaraxuata, xanë Jehovánë nato-itapetajë bajarapamatacabi, saicaya daxitamatacabianëwecua, yaiyataeya panenacuera-ewetsimatacabinexa —jai Dioso.

¹²Icisia, Dioso jumaitsi:

—¡Yaiyataema axa, ena-ata, jamatejema bajayajebi niasaëtsaponaponaenexa panacuata xanë Jehovánë panija DIOSONë carajutatsi nijamonae yajawa panejinawanapaenexa!

¹³»¡Pëtsa beyaxuabame jiwitonë!

¹⁴»¡Pëtsa jaitame pibisiacuenë ne-exanaenexa newitota itsajiwiyojawabelia panenapitsijiwibejewecua!

¹⁵»¡Pëtsa nacobetoxotame!

¹⁶»¡Pëtsa itsajiwi-ata baracuaicuaijamë najumetsënëtsiaya apocuenetaenejewamë!

¹⁷»¡Pëtsa to-itaxutuajiname itsanë pijabopijijawa, bajarapacuenia pijawata, bajarapacuenia amoneya petonacuenebiwiitsi, pebijiwi, petiriawi-ata, bajarapacuenia pijabueyu, pijaburro-ata; daxitacuenë xua xaina baja bajaraponë! —jai DIOSO Sinaïtsutojawawetsica Israel-pijinë pemomoxijawabelia.

Israel-pijinë pemomoxi bitso cujunawa Dioso

¹⁸Bajarapaliwaisi DIOSO pebarëcuaicuaijajawatatsi, daxita israelitawi jumetaenubena. Taenubenana yamaxëcuenia pejurujurujaitsaponaejawa,

b 20:8 siete matabi penacuera-ewetsimatacabinexa: Bajarapamatacabi sábadomatacabi. Baitsi, domingo penamataxainaematacabi semanana, sábadu pijinia siete matabi pecopiarucaematacabi, caesmana canacujitsia.

peniwepajonejonejawanua. Jumetanenua penajumetaponaejawa piobijawata ovejamata-eto. Bajarapacuenia-ata tane pematatsëxëpitsapaejawa petsutojumatatsia. Bajarapacuenia itsa tane bajarapamonae, nexata bitso junawa. Pecajunawi tajë wecuanubena. ¹⁹Nexata, xuacujinae bajarapamonae penatixibicujinae, itsajota nubena bajarawerena jumaiti tsanubena Moisés-jawabelia:

—Paliwaisianë DIOSO jitsipa patanejumaitisijawa patajumecowënëtsinexa, xamëjawabelia cajumaiti tsabiabi tsane, xamë juya patanetsipaebabiabine-xamë DIOSO wajanacatonajumecopatsiliwaisi. Nexata, xua panetsipaebabianame, pacajumecowënëtsianatsi. ¡Pëtsa jane paxanë panebarëcuaicuajiai DIOSO, tsipaji raja icatsia itsa pajumetaejitsipajë belia patëpaejitsipajë! —jai bajarapamonae.

²⁰Nexata, Moisés jumecanawiata bajarapamonaejawabelia:

—¡Pëtsa pajunawame! DIOSO raja patsica papecajamatabëcueneyapëtaenexa, daxitamatacabijawabelia cujunawiaya panejinawanapaenexa bajaraponë paneyaiyataexae, pibisiacuenene pane-exanaeyaniwa —jai Moisés.

²¹Nexata, itsa abaxë bajarapamonae tajëwecua nubena bajarapatsuto, Moisés juya icatsia junaya pequiriiaipajubojawatsia pimoxoyotsinexa itsajotatsia DIOSO ponapona.

Dioso tonajumecopata altar-jawa pexanaejawanexa

²²Bajaraxuacujinae, Jehová jumaiti Moisés-jawabelia:

—¡Jumaitsimëre mapacueniaje israelitawijawabelia: «Jehová pacajumaiti: Paxamë panejumetaneme athëbëwetsica patacabarëcuaicuajiajawa paxamëjawabelia! ²³Pëtsa pa-exaname oronanitojawanëta itsacuenene jumapecataeya pexanaenëanë, bajarapacuenia palatananitojawanëta, bajaraponëanëjawabelia asiwaya panewajëcabiabinexa xanëwecua panenamatawenonaejawata ²⁴Nexata, panetonacuenebianame atsa-altar-jawa, bajaraxuajumata panetajuitabiabinexa tawënëta oveja, bajarapacuenia vaca-ata. Bajarapa-altar-jawata, patajuitsianame dajubi daxitanë panijaneconijamatabëcuenene. Itsanë pijinia patajuitsianame, caejamatabëcuenene wajanajuaxainaexae namata-enetsia patacasiwajamatabëcuenecawixae panijaneconimi. Nexata, panacuata pajinawanapaejitsiamë, bajarapacuenia pa-exanabibianame tawënëta, tajitsipaecuenia patanenajamatabënapitabiabinexamë. Nexata, xanë bajarapaepatota pacajamatabëcuenenimoxoyotsianatsi pexaniacuenia patacayawenonaenexa. ²⁵Itsa jamatabëpa-exaname ibo-altar-jawa, pëtsa paneto-exaname pa-ibotonë penamatajëpaeya-exanaejawa panexanebicuenia Saya panacuenebianame bajarapacuenia iboto paxanebinejewamë, tsipaji itsa paxamë paxanebi-jitsipame bajarapa-ibotonë panecanacuenebijawanëta, nexata aponetoxanepanae tsipae bajarapa-ibo-altar-jawa. Baitsi, panexanebi-ibotonë itsa pacanacuenebame ibo-altar-nexa, xua panetotajuitsipame bajarapa-altar-jumata aposiwajamatabëcuenenabarëyanë tsipae. ²⁶Itsa panacuenebianame altar-jawa, pëtsa panato-exaname panejunaejawanexa altar-jumata panetajuitanucaenexa dajubi, tsipaji raja itsa pajunaejitsipame belia itsamonae pacatabuwitaejitsipa panetabuwisajinaejawa panenaxatatsijawabëxëpana», jamëre! —jai Jehová Moisés-jawabelia.

Pacuenia be-eweta amoneya petonacuenebawanapaewitsi

(Deut 15:12-18)

21 ¹ Jehovah mapaliwaisianēje tonajumecopata Israel-pijinē pemomoxi pejumecowēnētawanapaenexa. Jumaitsi Moisés-jawabelia:

²—Pacuenia pacomuatabiabame dajubinē, bajarapacuenia itsa panatocomuatsianame panijawiriawiyajuwēnēnē panijabota amoneya papecatonacuenebabiabinēnē, bajaraponē panacuenebia-exanabiabianame saya seis pawaije. Nexata, siete waita baja pacopatsianame pepitsapaenexa amoneya papecatonacuenebabiabijawamiwecua.

³⁻⁴»Pajiwi panenatocomuatsiwi itsa pimisiarucaejijiwo pacapatajopame, nexata imisia wecuapitsapaena pijatuxanenē petonacuenebaponaponaewamiwecua. Baitsi, ponē panenatocomuatsinē, powa-ata panenatocomuatsiwa amoneya panijabota papecatonacuenebaponaponaewiyonexa, itsa napitsia-exanabeje, nexata pamatacabi pebi pitsapaena, apobepayajawacopatsimē pijawa pebarēponaenexa, bajarapijinia pacuenia pexi-ata. Bajarapacuenia apotsicaruaetsi penatocomuatsinē pexanaenexa.

⁵»Bajaraponē itsa pacajumaitsi tsane papijatuxanenēmējawaberena: ‘Asiwanē powa nepitsia-exaname tajawanexa, taxi-ata. Bajarapacuenianua tajatuxanenēmē ca-asiwatsi. ¡Nexata, apojitsipaenē tacawecuapitsapajawa,’ itsa pacajai tsane, pētsa pacapitsapame! ⁶Nexata, pijajiwitonē pexainaenē caponaena petonajumecopatsiliwaisi pewetsiwiawabelia. Bajarapamonae pitabarata muxuwojorutsiana, peyapētaenexa daxitajiwi pacuenia pemuxujoronaenētsi nacopatsijitsia daxitamatacabijawabelia petonacuenebaponaponaenēnē. Bajarapacuenia itsa pa-exanaename, daxitamatacabijawabelianexa panijabota amoneya pacatonacuenebaponaponaena.

⁷»¡Itsa panijamonaenē pacacanajetsiana pexēnatoyo, amoneya papecatonacuenebaponaponaewanexa, pētsa pa-exaname bajarapowajawabelia pacuenia pa-exanabiabame panenatocomuatsipebijiwiawabelia! Baitsi, bajarapowa apopacopatsimē tsane siete waita papecawecuapitsapaenexa camatamotsinejewa abaxē. Matapania matamotsiana penacapanepaematamo pexainaenētsijawabelia wecuapitsapaena petonacuenebijawami seis pawaije peweretsicujinae. ⁸¡Ponē comuatsiana petiriwa pijajiwi-towanexa, pijabota amoneya petonacuenebaponaponaewanexatsi, itsa penatocomuatsicujinae apotsitaxanepanaetsi, pitsijitsia-ata pijawacuenia picani, pētsa itsiata pexainaenē canajeta bajarapowa saicaya nacuapijinē-jawabelia, pewecuaponaeyaniwa israelitawiwecua! Biji rajane, becopata bajarapowa pijamonaeyajuwēnēnē petomatamotsinexatsi pewecuapitsapaematamonexa, jamatejema bajarapowa pewecuapitsapaenexa. ⁹Ponē pijinia pexēnato pitsia-exanaena, pijabota amoneya petonacuenebaponaponaewatsi, taena baja pecopenacuenia. ¹⁰⁻¹¹Boxainaenē, itsa jume, pexēnato, bajarapowa pitsiaya pecaponaponaecujinae cotocaewi pepitsiwacuenia,^c acuenebi penawecua-itawetsijawa. Itsamatacabijawabelia boxainaenē, itsa jume, pexēnato itsa jaita itsapetiriwa pepopijawanexa, acuenebi

c 21:10-11 *cotocaewi pepitsiwacuenia*: Bjarapitsiwaxi wēnēnē concubinawa wowaijumeta. Taema «concubina», glosariojawata.

penawecua-itawetsijawa copiaya pebarëponaponaewa. Bajarapowa apotae-ata pijawacuenia, itsiata apobewecua-asiwa xua namatawenona. Bajaraxuata, itsa aporajutapona xuanë namatawenona, nexata apotomatamotsi-atatsi, itsiata bepitsapa pijacujaya, bajarapacuenia pecopatsinexa amoneya petonacuenebaponaponaewacuenemi —jai Jehová Moisés-jawabelia.

**Pacuenia be-exana jiwitonë pebeyaxuabinëtsi,
pebijiapaitsinëtsijawabelia-ata**

¹² Icatsia, Jehová jumaitsi:

—Ponë pacayajuwënëbeyaxuabiana, juya pabeyaxuabianame. ¹³⁻¹⁴ Itsa bajaraponë jiwitonë anaeya beyaxuabiana itsacuenejawayo petonaneco-nitsixaetsi, juya paxamë pabeyaxuabianame. Taja-altar waetabanucae-ata panebeyaxuabiyaniwa, pacaponaename itsiata taja-altar-jawawecua pane-beyaxuabinexa. Itsa aponajamatabëxainae-ata jiwitonë pebeyaxuabinexa, saya jemata beyaxuabiana, nexata bajaraponë wecuanajetabijirawiana patomaraxijawabelia pacatsitajëtsianatsi itsamatacabijawabelia, itsa-jota jinawanapaejitsia peneconitsiwitsi pewecupanepaponaponaenexa peyamatomotsiwiwecua.^d

¹⁵ »Ponë paxa bena, pena-ata bena, bajaraponë-ata pabeyaxuabianame.

¹⁶⁻¹⁷ Ponë-ata paxa pibisiacuenia bijataena, pena-ata pibisiacuenia bijataena, pabeyaxuabianame. Pajiwi pacayajuwënënacobetoxotsiana penaxainaeyabinexa, bajarapacuenia pecanajetsinexa-ata, bajarapajiwi pabeyaxuabianame.

¹⁸ »Itsanëbeje itsa penabeponaponaejawata, pewënajiwitonë itsa bijiapaita pecobethaitota, itsa jume, ibotota, itsiata bajaraponë itsa apoyabitso, ¹⁹ itsa apoyatëpae, nexata ponë bijiapaita aponaneconitsi tsane jiwi pebeyaxuabijawabelianexatsi. Baitsi, pebijiapaitsinë itsa penacacatsubinaeta nuponapona wayafuabelia, nexata ponë bijiapaita matamotsiana saya pebijiapaitsinëjawabelia penaxuabijamatabëcujiru penacuenebimatacabianë, pewaëbijamatabëcuenetsinua pejamatejemajawabelia.

²⁰ »Ponë peconitaxuabijawata naeboyota yatëpa petonacuenebaponaponaewajiwio, pebi, petiriwa-ata, bajaraponë naneconita. Juya, pabeyaxuabianame. ²¹ Itsiata, itsa peconitaxuabijiwio namatacota icatsia najuamatacabipecujinae, pëtsa naneconitsia-exaname, tsipaji pijajiwitonë!

²² »Bajarapacuenia penabejawata, itsa bijiapaita peyacotajinaewa penacueto, bajarapowa itsa wecuajopatsi bajarapanacuetoyo, nexata pebijiapaitsinë matamotsiana pejopaejamatabëcujiru pejewaxijiwio. Bematomota pacuenia pijawa pexainaenë tocaëjëtatsi, peyanacua-ewetsiwi-ata. ²³⁻²⁵ Itsiata, bitso itsa bijiapaita ayaicuenia, nexata mapacuenia matamotsianaje: Itsa bajarapowa tëpa, juya bajaraponë pabeyaxuabianame. Itsa itaxutobijianatsi, juya pa-itaxutobijianaename. Itsa wonobijianatsi, juya pawonobijianaename. Itsa cobebijianatsi, juya pacobebijianaename. Itsa taxubijianatsi, juya pataxubijianaename. Itsa bijiapaita isotota, juya patajuitsianame. Itsa wajënë-exanatsi, juya pawajënë-exanaename. Pacuenia bijiapaitatsi, juya bajarapacuenia pabijiapaitsianame.

d 21:13-14 peyamatomotsiwiwecua: Mapatomaranë yabara xaniawaetsia neyapëtaenexa, yorobare Núm. 35:9-28, Deut. 19:1-13.

²⁶»Panijajiwitonē pane-itorobijawata itsa apopacajumecowēnētsi, baja-rapajamatabēcuene itsa paconitsianame, nexata paneconitsijawata itsa pa-itaxutobijianaejitsipame, pane-itaxutobijianaejamatabēcuene pacopatsianame baja papecawecuapitsapaenexa. ²⁷Itsa pijinia paneconitsijawata itsa pawonobijianaejitsipame, panewonobijianaejamatabēcuene pacopatsianame baja papecawecuapitsapaenexa, amoneya papecatonacuenebaponaponae-jawa —jai Jehová Moisés-jawabelia.

Dajubi pianaešanaewi pewetsicuene yabara

²⁸Icatsia, Jehová jumaitsi:

—Bueyu pemata-etota itsa cacuatatsi pebi, petiriwa-ata, nexata pecacuat-sijiwitsi itsa yatēpaena, bajarapabueyu patseconaename piniji-ibotonēta panebeyaxuabinexa. ¡Pētsa bajarapabueyu pewijawa paxaneme! ¡Pētsa pananeconitsia-exaname bueyu pexainaenē! ²⁹Itsia bailsi jane, pexainaenē yapētae-ata bajaraponē pianaešanaejawa, itsa apoyacaranatanutsi, nexata itsajiwio itsa beyaxuabatsi, pexainaenē bajarapabueyu payajawabeyaxuabianame panetseconaecuenia piniji-ibotonēta, tsipaji yapētae-ata pijabueyu pianaešanaejawa, apoyacaranatanutsi. ³⁰Itsia, itsa petēpaenē pijamonae wajē-caejitsipa petēpaenēmatamo bueyu pexainaenējawabelia, nexata bematamota petēpaenē pijamonaejawabelia petocaējētsicueniatsi pewecupanepaenexa pebeyaxuabijawaminexatsi. ³¹Bajarapacuenia jiwi exanaena dajubinējawabelia, pexainaenējawabelia-ata pacujinae bueyu coxibeyaxuabatsi, pexēnato, pexēnatoyo-ata. ³²Bajarapadajubinē itsa tobeyaxuabatsi itsanē amoneya petonacuenebijiwitsi, petiriwa, itsa jume, pebi-ata, nexata bajarapabueyu pexainaenē bematamota treinta ponēbeje palata, amoneya petonacuenebinētsi pexainaenējawabelia. Bueyu-ata bebeyaxuaba, ibotonēta petseconaecuenia.

³³»Pajiwī mēthēxaneto pecueyabuatsicujinae, itsa apowē-acatabuatsi tsane bajarapamēthēxaneto, nexata itsajiwī pijanē bueyu, burro-ata itsa tojopaerecatsi bajarapamēthēareca, ³⁴pemēthēcueyabuatsijiwi matamotsiana dajubi pexainaenējawabelia. Nexata, juya rajutsiana pijanē bueyu piasaenē, pijadajubi petotēpaenētsijawabelia. Nexata, mēthēxaneto pecueyabuatsinē pitsiana bueyu petēpaenē.

³⁵»Pajiwī pijabueyu tonamaxēwanitatsi, tocacuata itsanē pijanē bueyuja-wabelia, bajaraponē itsa yatēpa pecacuatsijawatsi, nexata pija bueyu petonamaxēwanitsinētsi canajetsiana, bajarapamatamo najēpaeya penatsicobetsatsinexabeje bueyu petotēpaenētsijawabelia. Ponē pijinia pijabueyu totēpatsi, bajaraponē-ata pewi namatajēpaeya natsicobetsatsianabeje. ³⁶Itsia, bueyu pexainaenē yapētae-ata pijanē pianaešanaenēcuenē, apopecaranatanutsixae, itsa tobeyaxuaba pecacuatsijawata itsanē pijadajubijawabelia matamotsiana. Juya, pijanēmi piasaenē rajutsiana petotēpaenētsijawabelia. Pajiwī pijanē tonamaxēwanitatsi juya pitsiana petēpaenē —jai Jehová Moisés-jawabelia.

**Pacuenia matamotsijitsia pexainaenējawabelia
petonacobetoxotsijamatabēcuene, petobijianaejamatabēcuene-ata**

22

^{1,4}Icatsia, Jehová jumaitsi:

—Ponē itsanē pijavaca tonacobetoxotsiana, itsa baja beyaxuabiana, itsa jume, itsa baja canajetsiana, nexata pexainaenējawabelia juya

matamotsiana mapacueniaje: Caenë vaca petonacobetoxotsimatamo, juya rajutsiana cinco ponëbeje pijavacayajuwëñëwimi. Ponë pijinia itsanë pija-oveja tonacobetoxotsiana, itsa baja beyaxuabiana, itsa jume, itsa baja canajetsiana, nexata pexainaenë juya matamotsiana mapacueniaje: Caenë oveja petonacobetoxotsimatamo, juya rajutsiana cuatro ponëbeje pija-ovejajajuwëñëwimi. Itsa abaxë nucaena pijabota ponë tonacobetoxota, nexata pexainaenëjawabelia tocanawiatsiana. Itsiata, petonacobetoxotsimatamo caenë juya pijanëmi yajawarajutsiana. ^{2-3,5} [...]

⁶»Ponë pecobe-isotota toyamatatajuenatsi itsanë pe-ubijawa, itsa jume, penotajebijawanë, nexata pexainaenëjawabelia petotajuitsijamatabëcuene pematamocuenia najëpaeya matamotsiana.

⁷»Itsajiwi itsa palata xaniawaetsia-exana boxainaenëjawabelia, itsa jume, bitso penamatamotsijawa-ata, bajarapacuenia dajubinë-ata, nexata petsipuenetsinëtsi itsa wecuancobetoxotatsi, itsiata itsa penacobetoxotsinë caxitajaraba, nexata bajarapapenacobetoxotsinë bematamota anijawabeje pematamocuenia penacobetoxotsijamatabëcuene pijajawa pexainaenëjawabelia. ⁸Itsa pijinia jaitsi-ata, apocaxitajarabi penacobetoxotsinë, nexata boxainaenë caponaenatsi pijaneconi petocanaëjëtsinexatsi nacua pewetsiwi-jawabelia, peypëtaenexa itsa xaniajai nacobetoxota bajaraponë xua tsipuenetatsi. Itsa xaniajai naneconita, bajaraponë bematamota pijajawa pexainaenëjawabelia. ⁹ [...] ¹⁰»Bajarapacuenia itsajiwi itsa tsipueneta pijadajubinë burro, bueyu, oveja-ata itsanëjawabelia, petsipuenetsicujinae itsa tëpa pija-cuata, itsa jume, itsajiwiyo taenëjewa itsacuenia itsa nabijiapaita, itsa jume, tonacobetoxotatsi, ¹¹nexata peto-ewetsinë nucaena Jehová pitabarata^e xaniajaiya pejumaitsinexa pepacuene apopecacajërëtsijawa bajarapadajubi. Pexainaenë nexata jamatabëcueneceawiana pijanë petonaxuabinëtsi yabara. Peto-ewetsinë apotsicarucaetsi tsane pematamotsinexa pexainaenëjawabelia. ¹²Itsiata, itsa peto-ewetsinë tonacobetoxota, bajaraponë bematamota pexainaenëjawabelia. ¹³Itsa pijinia unupijinë toxanetsi peto-ewetsidajubinë, nexata bajarapadajubinë peyajunuxaejawa becapata petsitajëtsinexa. Nexata, peto-ewetsinë apotsicarucaetsi tsane pematamotsinexa.

¹⁴»Itsajiwiyo itsa nacowaeta dajubinë pecanacuenëbinexa, nexata bajarapadajubinë itsa nabijiapaita, itsa jume, itsa tëpa pecowëta pexainaenë, nexata ponë pecowaetsinë bematamota pexainaenëjawabelia. ¹⁵Itsiata baitsi jane, itsa itsacuenë bajarapadajubinë pexainaenë peponaponaewawata, apobematamotsi. Matamotsiana saya pamatamo tocaëjëtatsi penacowaetsi-jamatabëcuene —jai Jehová Moisés-jawabelia.

Jiwi pena-ewetsiliwaisianë

¹⁶Icatsia, Jehová jumaitsi:

—Ponë yamaxë-itojorobiaya natsimaxëjunata pejanawa apopenacojio-biwa, itsa quenetsiataeyaxuaba bajarapapejanawa, beyapita. Bajarapacuenianua caecuenia bematamota pijamonaewawabelia pepitsijamatabëcuene. ¹⁷Itsiata, pejanawa paxa itsa apojsipae pecopatsinexa pexënatoyo

^e 22:11 *Jehová pitabarata*: Baitsi, nucaejsitsia Dioso pijatemplobo pewajënaeya bajarapacuenia pejumaitsinexa sacerdotenë pitabarata.

peyapitsijawatsi, nexata caecuenia bematamota pejanawa paxajawabelia imisia pejinawanapaewaxi pijamatamocuenia, xuawajëto piopaxajiwi bamatamota paxuyojawabelia pexënatoyo pepitsijamatabëcuene.

¹⁸»¡Papetiriwa jiwi piawitanenexa, petëpaenexa-ata caxueyatabiaba, bajayajebi pëtsa pacopatame peponaponaenexa! Ajena pawënëtaneme, pabeyaxuabianame.

¹⁹»Pajiwi dajubinëjawabelia pewitota pibisiacuene exana, bajarapajiwi penaneconitsixae Diosojawabelia pabeyaxuabianame.

²⁰»Ëxanë Jehovánëjawaberena panematabacabëta pawajëcabiabianame. Paxamëyajuwënëjiwi dajubi itsa beyabiabiana, bajarapawijawa tajuitsiya perajutabiabinexa jumapecataeya pexanaenëanëjawabelia, bajarapajiwi pabeyaxuabianame.

²¹»Itsanacuapijiwi-ata itsa patsiana panijanacuata, xaniawaetsia pataeya-biabianame. ¡Pëtsa itsanacuapijiwi-ata payamaxë-itojorobabiabame! ¡Pëtsa-nua pabejiobia-exanabiabame, tsipaji raja paxamë-ata pamatacabi pajinawanapame Egipto nacuata, pasaicayanacuapijiwimëcuenia pajinawanapame! Nexata, paxamë bepayapëtaneme xaniawaetsia pane-itaxutotsoniataenexa bajarapamonae.

²²»¡Pëtsa pabejiobia-exanabiabame pamona pewecuatëpaewanëtsi, bajara-pacuenia tsonijiwi-ata! ²³Bajarapamonae panebejiobia-exanaejawa yabara itsa newajëcaena tayawenonaenexa, xanë jumetaenajë tato-exanaenexa tane-wajëtsicowëya. ²⁴Xanë juya pacabara-anaepanaenatsi. Nexata, yamatamot-siya pacabeyaxuabia-exanaenatsi, panijawajiwi penacopatsinexa pamona pewecuatëpaewatsicuenia, panexi-ata penacopatsinexa tsonijiwicuenia.

²⁵»¡Paxamëyajuwënëjiwi bepejiobiwi itsa pacacowaetsiana palata, itsa patsicopatsianame, pëtsa pamatamoyanijobame panetsicopatsipalata pema-tatsënëa papecatocanawiatsinexa! Pacuenia patsicopatsianame, bajarasaya pacuenia patatocanawiatsiana. ²⁶⁻²⁷ [...]

²⁸»¡Pëtsa pibisiacuena panebaracuaicuajamë^f xanëDIOSonë! ¡Bajarapa-cuenianua, pëtsa pibisiacuena pabaracuaicuajamë pamonae pacayanacua-ewetawanapa! ²⁹⁻³⁰ [...]

³¹»Paxamë raja pataca-itapetsiwi saicayacuena daxitanacuanëpijiwiwe-cua panejinawanapaenexa. ¡Nexata, padajubinë jemata pijacuata tëpaena, bajarapacuenia unupijinë ponë beyaxuababuatsiana, bajaraponëwito pëtsa paxaneme! ¡Ponë-ata penacuaibocatarërëtsicuenia tëpa, bajaraponë-ata pëtsa pewito paxaneme! Bajarapawi saya parajutabiabianame awiri pexae-yabiabinexa —jai Jehová.

23 ¹Icatsia, Jehová jumaitsi Moisés-jawabelia:
—¡Pëtsa najumetsënëtsiya pabaracuaicuajamë itsamonae pacuenetaenejewamë! ¡Pëtsa paxamë caejamatabëcuene paxainame pija-neconi pexaenëjawabelia paneyapijiwinajumetsënëtsinexa, itsamonae petaenexatsi planeconijibinëcuenia!

f 22:28 *pibisiacuena panebaracuaicuajamë*: Bajarapajume hebreojumeta cajunua mapitsijama-tabëcueneliwaisije: Naca-itaweta waja-itoyacuena wajanaëcotsiyaniwa Dioso, bajarapacuenia bewelianëcuenia wajataeyaniwa wajanacayawenonaenexa, bepenatsiquejemanëcuenia wajataeyaniwa wajajumecowënëtsiyaniwa, cuenecarapuabiaya wajabaracuaicuajaiyaniwanua Dioso.

²»¡Pětsa panajamataběcuenejěpame pamonae pibisiacuene pexana-wanapaewi, ayaibitsaětoně jiwi bajarapapibisiacuene pexanabiabixae! ¡Bajarapacuenia daxitajiwi pibisiajamataběcueneucuenia neconitabiabi-ata planeconijibině, pětsa panajamatabějěpame, tsipaji pabijianaajtšipame pexaniajaicuenia panecanaějětsijawami peneconitsiliwaisi, itsa pajamata-běyanatame papecatsu-ayaibitsaětoxae pibisiacuene pexanaewi!

³»¡Pětsa bepejiobině itsa natsixaina pijaneconi panayapijiwicuaicuaijämě, nebejiobiataxae bepejiobinějamataběcuene yabara! ⁴⁻⁵ [...]

⁶»Pacuenia payaiyataeyabiabame bitso pexainaewi, bajarapijinia pacuenia payaiyataeyabiabianame bitso bepejiobiwi-ata, najěpaeya pexa-niajaicuenia panetocanaějětsinexa peneconitsiliwaisitsi. Daxitajiwi najě-paeya pataeyabiabianame panebijianaeyaniwa pexaniajailiwaisi pane-canaějětsicuenemi. ⁷¡Panayajiwitaema panenaneconitsia-exanaeyaniwa najumetsěnětsiaya! ¡Panayajiwitaemanua panejumeliwaisita panebexuabia-exanaeyaniwa planeconijibijiwiyo, tsipaji xaně apo-taeně tsane aneconijibia pejumeliwaisita pebexuabia-exanaejwi!

⁸¡Pětsa patocopatame pijaneconi pexainaeně penayajiwimatamotsi-nexa penaneconitsia-exanaeyaniwatsi, tsipaji itsa naneconimatamota liwaisi bijianaajtšipa pecanaějěbiwi, bajarapacuenia juya planeconiji-biněmi petsijumajopaenexatsi penaneconitsině pijaneconimi! ⁹¡Pětsa pabejiobia-exaname itsanacujawawerena pepatsiwi penaponaponae-xae paxamětuatuajěta, tsipaji paxamě panatoyapětaneme paneyabějai-cuenemi bitso, pacujinae Egipto nacupajiwi pacabejiobia-exanabiaba bajayatami, itsajota pajinawanapame panepatsiwicuenia! ¡Nexata, pětsa pacuenejěpame bajarapamonae papecabebiobia-exanaewimi! —jai Jehová Moisés-jawabelia.

Penacuera-ewetsicuene, yabara peliwaisi

¹⁰Icatsia, Jehová jumaitsi:

—!Paxamě panijapabianě panexainabiabiwi pa-ubabiabianame, panota-biabianame pane-ubijawaněmi seis pawaibejecuenia. ¹¹Itsiaata baitsi jane, siete waita pětsa baja pacanacuenebame. Baitsi, bajarapawaijawata paco-patsianame panacuenebinejewamě panijapabianě, pa-ubinejewamě-ata, pecuai panotsinejewaměna. Bajarapacuenia pacopabianame panenacuene-bijawa caewaicuenia pane-ubicuene, bajarapijinia pacuenia, panenotsijawa panija-uvapabianě, panija-olivobacaboně-ata, bajarapawai-epato nacuaitsi-ata. Bajarapacuenia pacopatabuatsianame bajarapa-ira caewaicuenia pacanacuenebinejewamě. Bajarapasietewaita pijacuata nacuaitsi-ata tsane panecopatabuatsicujinae, pětsa panotame. Patocopare saya penotsinexa bepejiobiwi, bajarapacuenianua pexaenexa unupijiwi xua bepejiobiwi copa-bapona penotsicujinae. Itsiata, bajarapasietewai pecopiarucaejawata, icatsia bepanacuenebame panijapabianě.

¹²»Panacuenebabianame seis pamatacabibeje caesemana cana-cujitsia. Itsiata, siete matacabita itsacuenejawa-ata pětsa panacuene-bame, bajarapacuenia daxita papecatonacuenebawanapaewi, jamatejema penacuera-ewetsinexa penacuenebijawawecua. Nacuera-ewetsijitsia daxita panijajiwi amoneya papecatonacuenebawanapaewi, itsanacuawerena

pepatsiwi-ata, pane-itorobiyaníwa papecatonacuenebinexa panemata-motsixaejitsia. Bajarapijiniá pacuenia, panijadajubi panecanacuenebiwi panacuera-ewetsia-exanaename.

¹³»Xaniawaetsia pajumecowēñētawanapaename daxita patacatonajumecopatsiliwaisianē. Pētsa asiwaya pawajēcame xanēwecua itsacuenejawabelia diosowicuenia, jumapecataeya pexanaenējawabelia-ata. Pētsanua pawē-nēcacuaicuajamē bajarapamonae! —jai Jehová Moisés-jawabelia.

Itsafiestajawanē pexanabiabinexa israelitawi Jehová pewēñēta

(Éxo 34:18-26; Deut 16:1-17)

¹⁴Icatsia, Jehová jumaitsi:

—Pacatocaējētatsi caewaita acueyabi xuayobeje panepatabiabinexa xanējawata,^g pane-exanabiabinexa acueyabi pafiestabeje tawēñēta necuenenajamatabēnapitsiaya. ¹⁵Nexata, caewai canacujitsia Abib-juametota papatabiabiname pane-exanabiabinexa copiaya levadurata apopematajērēabipan-pijifiesta^h siete pamatacabibecuenia. Daxita patacatocaējētsicueniaⁱ bajarapafiesta pa-exanabiabiname. Nexata, daxita bajarapafiestapijimatacabianējawa paxaeyabiabiname panijapan levaduramatajērēabinejewa pexanaepan-jawanē. Bajarapafiesta pa-exanabiabiname Abib-juametota, tsipaji bajarapajuametota papitsapame Egipto nacuaewecua. Itsiata, caenē-ata cobesa apobepatsi dajubinejewa, penatajuitsinēnexa nerajutsiaya xanējawaberena. ¹⁶Bajarapijiniá pacuenia, caewai canacujitsia pa-exanabiabiname itsacotocaewipijifiesta tawēñēta, copiyapijina-cuaitsi penotsijawapijifiesta. Bajarapafiesta pa-exanabiabiname panenotsicujinae copiaya papecatonacuaitsiawanē pane-ubijawanēmi. Orijibia, pa-exanabiabiname itsa-acueyabipijifiesta, pecotocaewijawa, daxita pane-ubijawanē panenotsicujinae penaweretsicuajawanē wai pewateretsijawatalia,^j bobērētoxi panenatsi-exanaejawapijifiesta. ¹⁷Nexata, acueyabi xuayobeje caewai canacujitsia panacaetuatabiabiname padaxitamē papebijiwimē xanē Jehová Diosonē tajataxunaejawaberena —jai Jehová Moisés-jawabelia. ¹⁸⁻¹⁹[...]

Jehová pija-ángelnē israelitawi matacaponaejitsia Canaán nacujawabelia

²⁰Icatsia, Jehová jumaitsi Moisés-jawabelia:

—Xanē raja Jehovánē pacato-itorobianicatsi taja-ángelnē, bajaronē papeca-ewetsinexa, papecamatacaponaenexa Canaán nacuyabelia, panacuajawabelia tajēwelía baja cajena najumecapanepaeya pacajumaitsi patacarajutsinexa. ²¹Nexata, taja-ángelnē xaniawaetsia panamuxuna-ewetsianame, panejumecowēñētabiabinexa papeca-itorobicuenia. ¡Pētsa nexata, pane-ajamatabēcuenetajajawata itsacuenia

g 23:14 xanējawata: Baitsi, pepatsinexa patomarata eca Dioso pijacarpabo, itsa jume, Dioso pija-templobo. **h 23:15** levadurata apopematajērēabipan-pijifiesta: Caematacabi bajarapafiesta pexanaewajēnaeya bajarapamonae exanaejitsia Pascua fiesta, pafiesta najamatabēnapitabiaba Dioso rowia pexenetsijawatsi beyaxuabinejewa pijamonaeyajuwēñēnē pebenajetarucaejawata daxita jiwi pepomatapijinēanē Egipto nacua. Taema Éxo. 13:3-10; Deut. 16:5-8. **i 23:15** patacatocaējētsicuenia: Taema Éxo. 12:15-20. **j 23:16** wai pewateretsijawabelia: Bajarapanacuapijiwinexa bajayatami pijawai towerewerecabiabatsi bejamatabē octubrejawa.

pa-exaname papeca-itorobicuenewecua, tsipaji itsa paxamë apopajume-cowënëtsimë tsipae, bajaraponë apopacasiwajamatabëcuenecaewi tsane panijaneconi, tsipaji bajaraponë papecanamatacaitorobinë xanë tajamatabëcuenel! ²²Itsa xaniawaetsia panamuxuna-ewetsianame bajaraponë, panejumecowënëtabiabinexa daxita pataca-itorobiliwaisi bajaraponëta, xanë juya pacayawenonaenatsi. Nexata, pamonaë panijawajabitsaëwi tsawanapae, naexanaena tajawajabitsaëwi pijinia. Panijawajabit-saëwi itsa bajarapacuenia jamatabëpacayacaranata panepitsiyaniwa patacarajutsiapaebi-irami, xanë juya pacayapijiwicueneyacaranatsianatsi bajarapamonaemi jamatejema bajarapa-ira panepitsinexa. ²³Nexata, taja-ángelnë pacamatacaponaena bajarapanacuajawabelia itsajota pane-wajënaetalia aeconoxae jinawanapa amorreowi, heteowi, ferezeowi, cananeowi, heveowi, jebuseowi-ata. Daxita bajarapamonaemi pacawe-cuawerebiabianatsi. ²⁴¡Canaán nacuayabelia panepatsicujinae, pëtsa panajamatabëcuenëjëpame bajarapanacuapijiwi asiwaya panenawajë-caenexa pijadiosowi, jumapecataeya pexanaenëanëjawabelia, ponëa-nëjawabelia bajarapamonaë pematabacabëta yayiataeya wajëcabiaba, pesiwanajamatabëcuenecopabixae bajaraponëanëjawabelia! Pabijianae-name daxita pajumapecataenëanëjawabelia bajarapamonaë nawajëcabiaba. Bajarapacuenia xuanë-ata nubena jumapecataenëanë pewënëta, patosarababename. ²⁵Paxamë panematabacabëta ëxanëjawaberena asiwaya, yayiataeya-ata panewajëcabiabianame daxita panenamatawe-nonaecuene yabara. Nexata, xanë pexaniacuenia pacayawenonaenatsi, papecatonawitsinexa panexaejawacuene, meranë-ata. Bajarapacuenia pacawecuatiixitsianatsinua daxitawiriawitanecuene, jamatejema pane-asaëtsawanapaenexa —jai Jehová Moisés-jawabelia.

²⁶⁻³³ [...]

Israel-pijinë pemomoxi jejai Jehovájawabelia peto-exanawanapaenexa penajamatabëliwaisicajonecuenia

24 ¹Jehová jumaitsi Moisés-jawabelia:
—Junaemina mapatsutojumabetsina, itsajotatsina xanë pona-ponajë. Yajawatsinamëre Aarón, Nadab, Abiú, setenta pijinia ponëbeje, penamatacaitorobiwi israelitawituatujëta, tajëyo xanëwecua bajarapamonaë neyayataeya pematabacabëta irataeya penubenaenexa. ²Itsiata, xamë, caenëmë Moisés, newajënaeyabelia nimoxoyotsianimina. Pëtsa nimoxoyota pamonaë neyajawaponaewi. Pëtsanua itsamonaë israelitawi junaina mapatsutojumabetsina —jai Jehová.

³Daxita bajarapacuenia Jehová pejumaitsicujinae, Moisés nexata wajunupaeba Israel-pijinë pemomoxijawabelia daxita Jehová petonajumecopatsiliwaisi, pitorobiliwaisianë, petocaëjëbiliwaisianënu. Daxita bajarapaliwaisi pejumetaecujinae, bajarapamonaë jumecanawiata mapacueniaje: «Daxita pacuenia Jehová nacatonajumecopata, bajarapacuenia daxita pa-exanaenajë», jai bajarapamonaë. ⁴Nexata xuacujinae, Moisés yaquina pebaxutojawabelia daxita Jehová petonajumecopatsiliwaisianë, pitorobiliwaisianë-ata. Itsamatacabijawabelia, pepobajayacunua, Moisés namatacota pexananutsinexa altar-jawa petsutomuxuneneta. Nubanua doce

pa-ibotobeje,^k pewënëta caenë pemomoxibitsaëtonë canacujitsia, Israel-pijinë pexi, doce ponëbeje, pemomoxibitsaëtonë.

⁵⁻¹¹ [...]

Moisés siwajunaya ibopanabeje Dioso peyaquinaejawa

¹² Bajaraxuacujinae, Jehová jumaitsi Moisés-jawabelia:

—Junaimina mapatsutojumabetsinae, itsajotatsina xanë ponaponajë. Bajarajota, ne-ewetsianame, tsipaji raja carajutsijitsiatsi tayaquinae-ibopanajawabeje, pa-ibopanajawatabeje yaquinarubajë tatocaëjëbiliwaisianë, ta-itorobiliwaisianë, juya xamë neyapëtaeya-exanaenexa israelitamonaejawabelia —jai Jehová.

¹³ Nexata, Moisés junaya, Dioso pijatsutojumabetsia, peyawenonaenëtsi Josué yajawa. ¹⁴ Moisés petsiawajënaeya petsutojumabetsia jumaitsi ancianowijawabelia:

—Bajarajota, paxamë pane-ewetawanapaenema icatsia patanawiatsijawabelianexatsicabeje. Tacowëta raja pacayajawanacopsatsianabeje Aarón, Hur-beje. Pajiwi xaina itsacueneliwaisianë, nexata pajumaitsimë tsane bajaraponëbejewawabelia —jai Moisés.

¹⁵ Bajarapacuenia Moisés pejumaitsicujinae, nexata baja, junaya Sinaítsutojumabetsia, patsuto jumawënëqueca pitayaëpajubo.

¹⁶⁻¹⁷ Nexata, Jehová pijapenivenivenaecotia runaica Sinaíjumabetsica, peponaponaenexa. Nexata, seis pamatacabibejecuenia bajarapatsuto bitso jumawënëqueca pitayaëpajubocuene.

Nexata, israelitamonaenexa itsa tane Jehová pijapeniweniwenaeotia, bepetsitatajuenajetarucaetsi pitatsajawicotia bajarapatsutojumajawatatsia. Nexata, siete matacabita jane baja, bajarapapajubotuatuajëwetsica Jehová junatatsi Moisés.

¹⁸ Nexata, Moisés pija-epato junaya bajarapapitayaëpajubotuatuajëjawatsia pepatsinexa bajarapatsutojumabetsia. Nexata, bajarajotatsia bajaraponë ponapona cuarenta pamatacabibeje, cuarenta pamerawibeje yajawa.

Pa-ofrendajawanë caetuatsijitsia Dioso pijatabernáculobonexa

(Éxo 35:4-9)

25 ¹ Jehová pebarëcuaicuaijajawata Sinaítsutojumata, Moisés-jawabelia jumaitsi mapacueniaje:

² —Jumaitsimëre israelitamonaejawabelia pecaetuatsinexa ofrendajawanë tawënëta, daxita pamonaenëpejitsipaewi perajutsijawa itsajiwiyo itorobinejewatsi pecapatsinexa. Capatsiana pamonaenëpejamatabë-ëthëtowetsina pexaniajamatabëcuenia perajutsijitsipaewi. ³ Mapawiria-ofrendajawanëje capatsiana perajutsinexa: oronanijawanë, palatananijawanë, bronzenanijawanë, ⁴ perajejaipananë, pesaëjaipananë, ¹ petsobiapananë, bajarapacuenia linowiriapananë, cabranami pexanaepananë-ata. ⁵ Bajarapacuenianua

k 24:4 doce pa-ibotobeje: Daxita bajarapamonaenëpejamaweliwaisicajonexae Diosojawabelia, pejumecowënëtawanapaenexa daxita pacuenia itorobatsi, bajaraxuata Moisés nuba bajarapabotonë, caepemomoxibitsaëto canacujitsia pewënëta. Nexata petaejawata, bajarapamonaenëpejamatabënapitsinexa penajumecajonejawami Diosojawabelia. **1 25:4 pesaëjaipananë:** Wowaijume meta púrpura. Bajarapacolor bepetsobiawirianojawa.

oveja pebitobocotonë, petsobiarata pejabucaebocotonë, itsawiriawi, pexaniawiriawi pebocotonë-ata, bajarapijinia pacuenia, acacianae pexanaetablapanë-ata. ⁶Capatsiananua olivacuaipiji-aceiteranë pitayotsi-ranexa lámpara, bajarapacuenia itsapetuxujuwíjawanë pematajërëabinexa itsa aceiterata pexaniatuxudere pexainaeranexa, porata tsimata-epacaejitsia ta-itapetsiwíjawabelia. Rajutsiananua petuxujuwípërëtoxi inciensowë-nëjawa petajuitsinexa. ⁷Bajarapacuenia-ata capatsiana ofrendacuenia pitabëtsi-ibotoxi, pacuenia cornalina-ibotoxi, pexaniawiria-ibotonë-ata, ónice-ibotoxi, pa-ibotoxi cataicarubijitsia penajumaxuabicorobëjawata, ^mbajarapacuenia penatsimpabërutabiabipanajawata pepopenamatacaito-robisacerdotenë penaxatatsijawanëtanexa. ⁸Nexata, panecaetuatsicujinae bajarapa-ofrenda, paneto-exanaename tajacarpabo" saicaya ëxanënexa, pabojawata ponaponaejitsianë paxamëtuatuajëta. ⁹Nexata, bajarapacarpa-boxaneto paneto-exanaename cuenejëpaeya tacatsitajëtsicowëya. Bajaruacuujinae, xainaena daxitaxuanë-ata bajarapabojawata pa-exanaename cuenejëpaeya tacatsitajëtsijawa! —jai Jehová Moisés-jawabelia.

Pacuenia exanaejitsia Dioso pijabaula

(Éxo 37:1-9)

¹⁰Bajaruacuujinae, Jehová yapëtaeya-exana Moisés pacuenia to-exanaejitsiatsi penajumeliwaisixaniawaetsibaula. ^oNexata jumaitsi:

—Paneto-exanaename tajabaula acacianaepijitablapanëta. Xainaena piapijawa caemetro pematatsënëa diez pacentímetrobeje. Pijinia epatajërëatsialia xainaena sesenta y cinco pacentímetrobeje. Pemuxubërëapijawa pijinia athëbëabetsina xainaena sesenta y cinco pacentímetrobeje.

¹¹Paneweretsicujinae bajarapabaula, pa-ënëxatatsianame oronanitota, bajarapacuenia naniawelia-ata. Bajarapacuenia daxita matatoyorotsia bajarapamuxubërë pacataitsia-exanaename ë-oro pexanae-itabëtsipanata.

¹²Panacuenebianamenua cuatro patoyororocaewojotobeje bajaraxuayo pecapitsatsinexa naebo. Nexata, bajarapacuatro xuabeje orojawanëta pexanaejawanë caeyenepananenia parutaponaename anijajawabeje.

Caeyenepana-upijawata, caejawa parutaponaename namata-enetsia. Bajarapacuenia itsayenepananenia anijajawabeje parutsianame namata-enetsia.

¹³Bajarapijinia pacuenia, panacuenebianame acacianaepijinaebobeje. Bajaraponaebobeje pajumaxatatsianame orojawata. ¹⁴Bajaraponaebobeje pacapitsatsianame bajarapatoyororocaewojotonëjawa paneyawëtaraponaenexa bajarapabaula. ¹⁵¡Bajaraponaebobeje panecapitsatsicujinae bajarapawojotobejajawa, xuacuujinae pëtsa baja pawecuajonotame! ¹⁶Daxita bajarapacuenia paneweretsicujinae, tajabaula-ënëta pajename, panexaniawaetsinexa, tayaquinae-ibopanabeje itsa carajutsianatsi. Bajarapacuenia bajarapabaula nacopatsijitsia pexaniawaetsibaulanexa patacanajumeliwaisicajonejawa pitajëtsi-ibopanabeje.

m 25:7 *penajumaxuabicorobëjawata*: Taema «efod-nawa pepopenamatacaitorobisacerdotenë», glosariojawata. **n 25:8** *tajacarpabo*: Mapaboje wënëruba wowajumeta, «tabernáculo». Taema «tabernáculobo», glosariojawata. **o 25:10** *penajumeliwaisixaniawaetsibaula*: Taema «Dioso pijabaula», glosariojawata.

¹⁷»Tajabaula pematapanexa, pa-exanaename ë-orojawata naniawereca baula panemata-acatsinexa. Bajaraxua pa-exanaename piapijawa caemetro pematatsënëa diez pacentímetrobeje pexainaejawa, bajarapacuenia epata-jërëtsialia sesenta y cinco pacentímetrobeje pexainaejawa. ¹⁸Bajarapabaula pematapajumawereca pa-exananutsianame oronanitota pecorofe pexainae-ángel-nëbeje jumapecataeya querubinenëbeje. Bajarapajumapecataenëbeje namata-enetsia nataenucaeya pa-exananutsianame. Bajarapa-ángel-nëbeje pacanacuenebianame oronanito pe-ucubaponaecuenia martillota. Nexata, bajaraponëbeje namata-enetsia baulamatapa-upijawata panutsianamebeje. ¹⁹⁻²⁰Nexata, bajarapamatapajumajawawereca pa-exananutsianame bajara-paquerubínejumapecataenëbeje cae-oronanitomijawata, patsatsinejewamë. Nexata, bajaraponëbeje panutsianame daxita-upineniabeje naitabaratae-nucaeya, bajarapacuenia pejumataenucaenexabeje bajarapabaulamatapa-jawabereca, jiwi pijaneconimi tasiwajamatabëcuenecaewitaxunaejawanexa. Pecorofetobeje pijinia nacorofe-upicaxinaeya pa-exananutsianame bajarapajumawereca pejumacaranatanucaenexabeje. ²¹Nexata, penajumeliwaisixaniawaetsibaula paneweretsicujinae, bajarapabaula-ënëta paxaniawaetsianame pa-ibopanatabeje pacatoyaquinaenatsi daxita paliwaisianë pacanajumeliwaisicajonenatsi. Nexata, bajaraxuacujinae pamata-acatsianame bajarapabaula pematapata, jiwi pijaneconimi tasiwajamatabëcuenecaewitaxunaejawa.^p ²²Nexata, xanë naitajëtabiabianajë bajarapamatapajumata penucaequerubinenëbejetuatuajëjawata, bajarawerena xamë tacayapëtaeya-exanabiabinexa daxita paliwaisianë catonajumecopatabiabijitsiatsi, Israel-pijinë pemomoxijawabelia netsipaebabiabinexa —jai Jehová Moisés-jawabelia.

Pacuenia exanaejitsia mesayo pan pejumajebabiabinexa carpabo-ënëta

(Éxo 37:10-16; Lev 24:5-8)

²³Icatsia, Jehová jumaitsi Moisés-jawabelia, peyapëtaeya-exanaenexa pacuenia exanaejitsia pan pejebabiabimesayo:

—Paneto-exanaenamenua mesayo^q acaciaepijitablapanëta. Bajarapamesa piapijawa pa-exanaename noventa pacentímetrobeje, pijinia epatajërëtsialia cuarenta y cinco pacentímetrobeje. Piapijawa athëbëabetsia xainaena sesenta y cinco pacentímetrobeje. ²⁴Nexata, daxita bajarapamesayo pajumaxatatsianame pepopexania-oronanitota. Bajarapacuenia muxubërë-itabëtsiaya itane-exanaena orojawata. ²⁵Bajarapamesajumawereca pemuxubërëcaranatsijawa matatoyorotsia panutsianame, siete pacentímetrobeje pexainaejawatsina. Bajarapamuxubërëcaranatsijawajumawereca pa-exanaename itabëtsiaya matatoyorotsia oronanitowata. ²⁶Panacuenebianamenua cuatro patoyororocaewojotobeje, bajaraxuayo pecapitsatsinexa naebo. Nexata, bajarapacuatro xuabeje, orojawanëta pexanaejawanë, caeyenepananenia parutaponaename anijajawabeje. Caeyenepana-upijawata, caejawa parutaponaename namata-enetsia. Bajarapacuenia itsayenepananenia anijajawabeje parutsianame namata-enetsia, bajarapamesasito

^p 25:21 jiwi pijaneconimi tasiwajamatabëcuenecaewitaxunaejawa: Taema «Dioso pijabaula pematapa», glosariojawata. ^q 25:23 Taema «Mesa pan pejumajebabiabinexa», glosariojawata.

yenepana-upijawata panerutsinexa bajarapatoyororocaejawanë, ²⁷bajara-pamuxubërëcaranatsijawa penacopatsinexa pebëxëpanayo, bajarapatoyororocaejawalia panecapitsatsinexa naebobeje, jamatejema panecaponaenexa bajarapamesa itsabelia pawarapame. ²⁸Panecaponaenaebojenexa, panacuenebianame acacia-naepijinaebobeje. Bajaraponaebobeje pajumaxatatsianame orojawata. ²⁹Yajawa panacuenebianame bajarapamesa pecanacuenebijawanënexa oronanijawata pexanaejawanë. Nexata, panacuenebianame pijawaxianë, pecajucaejawanë, pecapuanaejawanë, peyajebijawanënexanua peporanë ofrendajawanë. Daxita xuanë panamatawenonaajetsiamë panecanacuenebinexa bajarapamesajawata. ³⁰Bajarapamesajumata panetojebabianame pacopatsinejewamë pan-jawanë taitabarata, pataneto-itapetsipan-jawanë^r xanënexa saicaya —jai Jehová.

**Pacuenia exanaejitsia pitayotsinaebo candelabrowënëjawa carpabo-ënëta
pitayotsinexa
(Éxo 37:17-24)**

³¹Icatsia, Jehová jumaitsi Moisés-jawabelia:

—Paneto-exanaenamenua candelabrojawa^s cae-oronanitomita, pitayota-nucaenexa tajacarpabo-ënëjawata. Bajaraxua, martillota pane-ucubicuenia, pa-exanaename petabutoyoro, peyërëjawanë yajawa, seis pamaxëranabejenua. Bajarapacuenia pemaxërananë-upijawata, patsifera-exanaename lámparabëxi panejebitaxunaenënexa, almendranæ pematonoto pejë-paejawanë, pematonobaxujëpaejawanënua, pejanapitsapaetuwitsimatonojawanë-ata. Daxita baitsi, cae-oronanitojawawerena pane-ucubicuenia pepitsapaenexa. ³²Bajarapamaxëranajawanë pitsapaena tuatuajëatsina penucaenajawata. Xainaena namata-enetsia acueyabi pamaxëranabeje tsaponæ caenenia, itsanenia pijinia itsa-acueyabi pamaxëranabeje. ³³Bajarapacuenia caemaxërana canacujitsia xainaponaena acueyabi pamatontobeje, almendranæ pematonojëpacuenia, pematonobaxutocuenia-ata, pejanapitsapaetuwitsimatonocueniajawanë-ata. ³⁴Tuatuajëatsina penucaenæ xainaena sasawia cuatro pamatontobeje almendranæ pematontocuenia pexanaejawanë, pematonobaxutocuenianua, pejanapit sapaetuwitsimatonocueniajawanë-ata. ³⁵Ponæ tuatuajëatsina nuca pexainaematonojawanëtuatuajëta, pamaxëranarubaponaename peyërësajinaejawa, payërëtojawata pitsapa pemaxëranabeje namata-enetsia daxitaneniabeje. Nexata, itsamatonoto beruca pebëxëpanata, bajarapamaxëranabejecujinae. ³⁶Nexata, bajarapacandelabrojawa pa-exanaename cae-oronanitomita peyërëtojawatacujinae, daxita bajarapamaxërananë, daxita pejanapitsapaetuwitsimatonojawanë yajawa, penaexanaenexa caejawa pane-ucubicuenia martillota. ¡Pëtsa baitsi pacatsanarubame pemaxërananë, pematonotonë-ata peyërëtojawabelia! Pepopexania-oronanitota pacanacuenebianame bajarapa-itayotsicandelabrojawa. ³⁷Bajarapacuenia pa-exanaename siete pa-itayotsilámparabëyobeje, pane-etaponaenexa panetsiwajënaefera-exanaejawanë pemaxërananë-upijawata, tuatuajëatsina

^r 25:30 *pataneto-itapetsipan-jawanë*: Xaniawaetsia neyapëtaenexa bajaraxua yabara, taema Lev. 24:5-8. ^s 25:31 *candelabrojawa*: Taema «candelabrojawa», glosariojawata.

penucaenae-upijawata-ata, jamatejema pitayotsinexa^t tajacarpabo-ënëta.

³⁸ Pa-exanaenamenua lámpara pijamechajawanë panecawaetabijawanënexa, bajarapacuenia waxianë itsajota pemaë pejebabiabinexa. Daxita bajaraxuanë pa-exanaename oronanitota. ³⁹ Bajarapacandelabro pane-exanaenexa, daxita pecanacuenebijawanënexa yajawa, xainaena oronanito treinta y tres pakilobeje. ⁴⁰ Xaniwaetsia tacatsitajëtsicuenia mapatsutojumataje, panetonacuenbianame daxita pacuenia catsitajëtatsi —jai Jehová Moisés-jawabelia.

Pacuenia exanaejitsia Dioso pijacarpabo-ënë peyatu-ucutsipana
(Éxo 36:8-38)

26 ¹⁻³⁰ [...] ³¹ Icatsia, Jehová jumaitsi Moisés-jawabelia:

—Nexata, tajacarpabo anija-ënëyatu-ucutsijawabeje pexaenaenexa, paneto-exanaename peyatu-ucutsipananexa. Bajarapapananexa pacanacuenebianame perajejaimaëtonëta, pesaëjaimaëtonëta, petsobia-maëtonëta, bajarapacuenia pexaniacuenia pequibilinowiriamätoxi-ata. Bajarapapanaxanetoyenepanajawata, pecucuenia cuenecataeya panutsianame querubinenëbeje, pecorofexainae-ángel-nëbeje. ³² Bajaraxuacujinae, bajarapayatu-ucutsipana pacapitsatarutsianame cuatro pa-acaciaesitu rutobejelijawabelia, ponaenë tsinuba bo-ënëtuatujëta. Oronanitota pejumaxatabinaenë. Caenaesituruto canacujitsia petsi-exanae-oroganchoxita pacapitsabarubianame athëbëyo-upijawata. Caenaesituru canacujitsia patabuxatabanubianame palatananitojawanëta panetsiwajënaefera-exanaejawanë. ³³ Nexata, bajarapa-itacaranatsipana panerutsicujinae, bajarapacuatro paganchobejelijawata tajacarpabo xanaejitsia anija-ënëbeje. Penamataxainae-ënëtuatujëjawa pewënë tsane Lugar Santo.^u Cotocaewi payatu-ucutsi-ënëtuatujëjawa pewënë tsane Lugar Santísimo.^v Bajarapa-Lugar Santísimojowata, pabuatsianame tanajumeliwaisixaniaawaetsibaula. ³⁴ Bajaraxuacujinae jane baja, tajabaula panebuatsicujinae Lugar Santísimojowata, pematapata pamata-acatsianame, jiwi pijaneconimi tasiwajamatabë-cuenecaewimatapa. ³⁵ Nexata pijinia, bajarapa-itacaranatsipana pënëwereca Lugar Santojowata, panutsianame pan pejebabiabimesayo bo-ënë pecujuanenia. Bajarapijinia pacuenia pitayotsicandelabro panutsianame bo-ënë pet-sawenonenia,^w mesa canacujitsialia penucaenexa —jai Jehová. ³⁶⁻³⁷ [...]

Pacuenia exanaejitsia piniji-altar broncenanitota pexanaejawa
(Éxo 38:1-7)

27 ¹ Icatsia, Jehová jumaitsi:

—iPaneto-exanaename penamatajëpae-altar-jawa acaciaenepijitablajawanëta. Piapiajawa xainaena anijametrobeje pematatsënëa

t 25:37 *pitayotsinexa*: Bexëjawabelia Dioso Pejanaliwaisibaxutota, Juan nacayapëtaeya-exana pacuenia bajarapa-itayotsicandelabro nacatocuenecatane Cristo. Taema Jn 8:12. **u 26:33** *Lugar Santo*: Bajarapajumebeje pejumaitsiyumebeje: «Peyaiyataetaxunae Diosonexa», pejaijumebeje. **v 26:33** *Lugar Santísimo*: Bajarapajumebeje pejumaitsiyumebeje: «Pepopeyaiyataetaxunaenexa Dioso daxitataxunaenëwecua», pejaijumebeje. **w 26:35** *pecujuanenia...petsawenonenia*: Mapaversiculojowataje «pecujuaneniajume» wowaijumeta, yabaracuaicuaijai nortenenia, waëpijiwi pijajumeta pijinia matatsënënenia. Petsawenoneniajume pijinia wowaijumeta yabaracuaicuaijai sur-nenia, waëpijiwi pijajumeta pijinia ununenia.

veinticinco pacentímetrobeje, bajarapacuenia epatajërëtsialia-ata. Pijinia pemuxubërë-apiajawatsina athëbëabetsina xainaena caemetro pematatsënëa veinticinco pacentímetrobeje. ²Nexata, bajarapa-altar-jawata, cuatro pa-upibejewawata, panacuenebianame cuatro xuabeje pemata-etocuenia. Cae-upita canacujitsia pamata-erubianame. Bajarapamata-ejawa pa-exanaename caejawacuenia penaexanaenexa bajarapa-altar-jawata. Bajarapa-altar-jawa pane-exanaeweretsicujinae pajumaxatatsianame daxitajawa broncenanitojawanëta. ³Daxitaxuanë panamatawenonaejitsiamë panecanacuenebinexa bajarapa-altar-jawata, bajaraxuanë pa-exanaename broncenanitojawanëta; pacuenia ipumana pecapenetsijawanexa, pecajucaepalayonexa-ata, pacuenianua waxijawanë, pewi-ata pecayotsijawanë, pacuenia-ata pitajuruajawi-ita-ire pexaniawaetsiwxinexa! ⁴Bajarpacuenia pa-exanaename broncenanitota pesasawijawa betonebërëcuenia penamatajèpaejawa bajarapa-altar-ënëta panebuatsinexa. Nexata, bajarapasawijawa cae-upi canacujitsia parutsianame petoyororocewojotojawanë jamatejema pewaetabijawanexa peyotsijawata! —jai Jehová Moisés-jawabelia. ⁵⁻⁸ [...]

Dioso itoroba pijacarpabo matatoyorotsia pecaranatsipana

(Éxo 38:9-20)

⁹Icatsia, Jehová jumaitsi:

—Tajacarpabo matatoyorotsia panetonacuenebianame pijapanabonexa. Bajarapacarpabo pijapanabonexa parutsianame caranatsiaya pexaniali-nowiriapapaëbërëpananë. Nexata, bajarapacaranatsijawa matonotsiareca xainaena ununenia payenepana^x cuarenta y cinco pametrobeje piapijajawa. ¹⁰Xaniawaetsia panerubinexa bajarapapananë, patsi-exanaename veinte panaesiturutobeje broncenanito pexanaejawanë. Bajarapacuenia panenubijawanënexa bajaraponaenë, patsiwajënaefera-exanaename broncenanitojawanëta panetabuxatabanubinexa. Caebrocenaesituruto canacujitsia piupijawata, athëbëyo pa-upixatatsianame palatananitota pexanaejawanë. Bajarapamataxatatsipalatananito petabutoyoronaejawata patsi-exanaename petsijeyonaejawa, pecapitsatsinexa bajarapalinopananë bajarapanaesiturutonëta. ¹¹Bajarapijinia pacuenia, matatsënënenia payenepana bajarapacaranatsipananë matonotsiareca xainaena cuarenta y cinco pametrobeje piapijajawa. Xainaenanua itsaveinte panaesiturutobeje. Bajarapacuenia bajaraponaenë pato-exanaename petabuxatabanubijawanënexa broncenanitojawanëta panetsiwajënaefera-exanaejawanë. Bajarapacuenia-ata pijinia piupita palatananitota panetsi-exanaetoyoronaejawanë petsijeyonaejawa yajawa parubianame, jamatejema panerubabiabinexa naesiturutota bajarapalinopananë. ¹²Waënenia pijinia bajarapapanabo epatajërëtsialia xainaena veintidos pametrobeje epatuajawa yajawa. Bajarapalinopapaëbërëpananë parubabiabianame diez panaesiturubejewawata broncenanitota pexanaejawanë. Bajarapanaesituruto patabuxatabanubianame broncenanitojawanëta panetsiwajënaefera-exanaejawanëta. ¹³Pemutonenia pijinia bajarapapanabo epatajërëtsialia xainaena veintidos pametrobeje epatuajawa yajawa.

Bajarapalinopapaëbërëpananë parubabiabianame diez panaesiturubejajawata broncenanitota pexanaejawanë. Bajarapanaesituru patabuxatabanubianame broncenanitojawanëta panetsiwajënaefera-exanaejawanëta. ¹⁴⁻¹⁶ Itsiata, bajarapapanabo peyacaranatsipananëjawata, baupa pacopatsiainame waënenia ocho pametrobeje pexainaejawa. Nexata, baupa pecujua-nenia xainaena siete pametrobeje linowiriapapaëbërëpananë perubenaejawa acueyabi pabroncenaesiturujawata. Petsawenonenia pijinia itsasiete pametrobeje linopapaëbërëpananë perubenaejawa itsa-acueyabi pabroncenaesiturujawata. Itsiata, baupa pitacaranatsipananexa pa-exanaenename nueve pametrobeje pexainaenexa piapiajawa. Bajarapapananexa pacanacuenebianame pesaëjaimaëtonëta, perajejaimaëtonë-ata, bajarapacuenia petsobiamätonë-ata, linopapaëbërëpanata. Pa-itanerubianame daxitamu-xubërä matatoyorotsia bajarapapana panecuejawata. Patsi-exanaenename cuatro pabroncenaesiturotoheje, bajarapacuenianua bajaraponaenë petabuxatabanubijawanënexa broncenanitojawanëta panetsiwajënaefera-exanaejawanëta, jamatejema panerubabiabinexa bajarapabaupapana. ¹⁷ Nexata, daxita bajarapabroncenaesiturujawanë xainaena petabuxatabanubijawanexa broncenanitojawanëta panetsiwajënaefera-exanaejawanë. Xainaenanua athëbëyo piupita caebërëtoyo palatananitota pane-exanarubijawa, bajarapacuenianua petsijeyonaejawa linopana pecapitsatsijawanexa. ¹⁸ Nexata, bajarapapanabo daxitata xainaena cuarenta y cinco pametrobeje piapiajawa, bajarapacuenia veintidos pametrobeje epatuajawa yajawa epatajërëtsialia. Peyacaranatsipananexa pacanacuenebianame pexanialinopapaëbërëpana. Xainaena piapiajawatsina athëbëabetsina anijametrobeje treinta pacentímetrobeje yajawa pematatsënë. Bajarapacuenia caenaesituroto canacujitsia xainaëjitsia broncenanitojawanëta panetsiwajënaefera-exanaejawanë panetabuxatabanubijawanexa. ¹⁹ Daxitaxua canacuenebijitsia tajacarpabopanabojawata, pa-exanaenename broncenanitonëta. Bajarapacuenia broncenaebonë piupisotsijawanë pamatabiabaponaenename irabereca, pemaëtonë panecëbabiabinexa bo pemata-acatsipana piababanexa, bajarapacuenia panabo peyacaranatsipananë penutsinaesituru pejopaeyaniwanua, piababanexa —jai Jehovah. ²⁰⁻²¹ [...]

Pacuenia sacerdotewi naxatabijitsia saicayacuenia, yabara peliwaissi

(Éxo 39:1-31)

28 ¹ Icitsia, Jehovahá jumaitsi Moisés-jawabelia Sinaítsutojumata: —Neto-itapetsianame nematapijinë Aarón, pexi yajawa, Israel-pijinë pemomoxituatujëta tanetotsatsinexamë, saicaya tajasacerdotewinexa tajacuene tanetonacuenebiwinexa. Itapetsianame mapamatabëxëyoje: Aarón, yajawapexibitsaëto pebiwi Nadab, Abiú, Eleazar, Itamar. ² Nexata, saicayacuenia patsijumajorocaenename penaxatabijawanënexa nematapijinë Aarón, penacuene-itajëtsinexa peyaiyataenëtsicuenia, naitabëtsiayanua peponaponaenexa. ³ Nexata, xamë barëcuaicuaijamë tsane pamonae petsiyapëtaewi pitabëtsicuene pexanaewi penaxatabijawanënexa; xanë pamonae jamatabëcuenecaëjëpaeya-exanajë peyapëtaewinexa bajarapitsicuene. Bajaraxua peyabaracujaniwitsijawabelia yapëtaeya-exanaenename Aarón penaxatatsinawa peto-exanaenexatsi, bajarapanaxatsijawa

penaxatatsijawata daxitajiwi peyapëtaenexa ta-itapetsinëcuene bajaraponë tajasacerdotenëcuenia tanetonacuenebinënexa. ⁴Nexata, mapawirianaxa-tatsijawanëje pato-exanaeya-exanaename: penatsimipabërutsipana, nania-welia penajumaxuabinawayonexa, pe-epa-ucutsicorobë-ata, efod-wënëjawa. Bajarapacuenia to-exanaeya-exanaename itsanawa, mantowënë nawa. Bajarapamantonawa pemuxubërëa, pecuejawanë xainaena itabëtsiaya pexaniacuenia linowiriailomaëtota. Orijibia, to-exanaeya-exanaename itsanawa bëpënëa penaxatatsinawanexa, túnicanawa.⁵ To-exanaeya-exanaenamenua penamataxatatsijawa linowiriapanata, bajarapacuenia pena-epacëtsijawa pexanaejawa linojawata. Bajarapacuenia to-exanaeya-exanaename saicaya nematapijinë Aarón penaxatatsijawanënexa, bajarapacuenia pexinexanua saicaya penaxatabijawanënexa pamona tanetonacuenebiwonexa tajasacerdotewicuenia. ⁵Daxita bajarapanaxatatsijawanë pexanaenexa, canacuenebiana pejutsimaëtoyo pexanaejawata oronanitojawawerena, perajejaipananë, pesaëjaipananë, petsobiapananë, pefirabilinowiriamaëtotoxi-ata —jai Jehová. ⁶⁻³⁰ [...]

³¹Orijibia Jehová jumaitsi:

—Aarón pijamantonawa to-exanaeya-exanaename pesaëjaipapaë-bërëpanata pesaëjaitsautsaucaenawa, penajumaxuabicorobëyo efod-wënëjawacujinae penaxatatsijawanexa. ³²Bajarapanajumaxuabinawayo towëwojorutsiana, jamatejema penamatabocoxatatabiabineaxatsica. Bajarpawëwojorutsimuxubërë towëfunaeya-exanaename xaniawaetsia piatajanexa, pewëtittiticaeyaniwa. ³³Nexata, bajarapanawa tomuxubërërubiana itabëtsiaya pesaëjaitsautsaucaebëxicuenia pecuejawa, granadacuaito⁴ jumapecatacuenia pexanaebëxi. Bajarapabëxinexa canacuenebiana pesaëjaitsautsaucaemaëtota, perajejaimaëtota, petsobiamaëtota-ata. Yajawa muxubërërubiana oronanitota pexanaecampanaxi-ata. ³⁴Nexata, torubia-exanaename jërëatsiacuenia bajarapasaëjaitsautsaucaenawatabujawa. Copiaya rutsia-exanaename tsiquiricampanayo, bajaraxuacujinae icatsia pesaëjaitsautsaucaebëyo granadacuaito pecuenecataebëyo, bajaraxuacujinae itsacampanayo, bajarapacuenia daxitamuxubërë peyacaëjëpaenexa. ³⁵Nexata, Aarón naxatatabiabiana bajarapamantonawa pacujinae netonacuenebijitsia sacerdotenëxae tajacarpabo-ënëta. Bajarapanawa penaxatatsixae tajacarpabo-ënëaberena pejonewajënaeya, nexata bajaraponë xanë Jehovánë taitabarata penacuenebanucaejawa, pepitsapaejawalia-ata naya-pëtaena penajumetsijawata bajarapacampanaxi. Nexata, bajarapacuenia penaxatatsixae tsane, bajaraponë apotëpae tsane.

³⁶»Bajarapacuenia to-exanaeya-exanaenamenua tsiquiripanayo pepopexania-oronanitota pexanae-itafacaepanayo. Bajarapa-oropanayo pejumata itanerubia-exanaename pematabicuenia mapaliwaisiyoje: «Jehová pitapetsinëtsi», pejai-itanetoxi. ³⁷Bajarapapanayo nexata xaniawaetsia cëtarutsianame Aarón penamataxatatsijawata pesaëjaimaëtota petojopaeyaniwatsi. Tocëtarutsianame penamataxatatsijawa pitajawawenia —jai Jehová

y 28:4 *túnicanawa*: Taema «túnica», glosariojawata. Túnicanawa banaxatatabiaba sacerdotewi, pepopenamatacaitorobinënua sacerdotewi. Éxo. 28:40. z 28:33 *granadacuaito*: Bajarapacuai bebëñëmacuculucuaio, itsiata bajarapacuaionë rubena peponaejawata.

Moisés-jawabelia Aarón yabara sacerdotewi pepopenamatacaitorobinē.
38-39 [...]

⁴⁰ Orijibia, Jehová jumaitsi Aarón pexi pebiwi, sacerdotewi yabara:

—Nexata, Aarón pexinexa to-exanaeya-exanaename pijinia pijatúni-cajawanē penaxatatsijawanexa itsamonaewecua saicayacuenia, bajarapacuenia pena-epacētsijawa, bajarapacuenia penamataxatatsijawanēnua. Bajaraxuanē to-exanaeya-exanaename peyaiyataenexatsi, naitabētsiaya pejinawanapaenexanua. ⁴¹ Pamatacabi taxuxuabijitsia sacerdotewicue, ^a bajarajota nexata xamē xatabianame Aarón, pexi yajawa, daxita bajarapanawanēta. Nexata, xuacujinae bajarapamonae tsimata-epacaename aceiterata, ne-itajētsinexa pecanacopatsijawa sacerdotewicue, bajarapacuenianua penaitajētsinexa tatsatsijawa penacuenebawanapaenexa tajasacerdotewicuenia. ⁴² Bajarapacuenia-ata to-exanaeya-exanaename pētsiwajēnaerutsijawa bēpēnē petoya-ecaematabacajawa linowiripapanajawata, bajarapatsiwajēnaerutsijawa bēpēnē penajumamatacaranatsinexa, penathaēbēxēpanacaranatsinexanua. ⁴³ Nexata, Aarón, pexi yajawa, bajaraxuanē jumaponabiabijitsia taneyaiyataenexa paepatota bajarapamonae junua tajacarpabojawalia, paepatotanua incienso petajuitabiabi-altar-jawata nacuenebijitsia Lugar Santojawata penucaejawa. Ita apo-exanae tsipae ta-itorobicuenia, pibisiacue exanaejitsipa. Bajarapacuenia tēpaejitsipa. Mapaliwaisije tonajumecopatajē Aarón-nexa piasaētsaponaponae-epato, bajarapacuenia daxitamatacabijawabelia peca-asaētsawanapaenexa bajaraponē pemomoxi, pamonae sacerdotewicuenia nacuenebawanapaena —jai Jehová Moisés-jawabelia Sinaītsutojumata.

Pacuenia exanaejitsia inciensopērētoxi petajuitabiabi-altar-nexa

(Éxo 37:25-28)

30 ¹ Xuacujinae, icatsia Jehová jumaitsi Moisés-jawabelia:
—Bajarapacuenia exanaeya-exanaename acaciaepijitablapanēta tsiquiri-altar-jawayo, sacerdotewi petajuitabiabinexa bajarapajumata inciensopērētoxi. ² Bajaraxuayo exanaena cuarenta y cinco pacentímetro-beje piapiajawa, bajarapacuenia-ata epatajērētsialia, najēpaeya penacopatsinexa. Pijinia peyenepana-apiajawa athēbēabetsina xainaena noventa pacentímetrobeje. Bajarapa-altar-jawayo pexanaejawata, cae-upi canacujitsia mata-erubiana, caejawacuenia penaexanaenexa. ³ Nexata, bajaraxua jumaxatatsia-exanaename pepopexania-oronanitota, bajarapacuenia cuatro pamata-etobeje pexanaejawanē-ata. Daxita matatoyorotsia penacuenebiwi muxubērē-itane-exanaename itabētsiaya orojawata —jai Jehová. ⁴⁻¹⁰ [...]

Pacuenia caepebi canacujitsia matamotsijitsia penacapanepaematamonexa

¹¹ Icatsia, Jehová barēcuaiuaijai Moisés-jawabelia. Jumaitsi mapacueniaje:

¹² —Pacujinae namata-ējētsianame Israel-pijinē pemomoxi, nexata daxita nenamata-ējētsicapanepaecujinae caepebi canacujitsia nerajutsiana xanē

a 28:41 *pamatacabi taxuxuabijitsia sacerdotewicue*: Xaniawaetsia neyapētaenexa capanepaeya pexanaecue taema Éxo. 40:12-19, Lev. 8.

Jehovánějawaberena pijacujaya penacomuatsimatamo, pewecuapane-paenexa petěpaejawa pinijidomaeta. Bajarapamatamo pejamataběcuene, nexata bajarapamonaėjawabelia apotocopiajopae tsanetsi petěpaecuenenenamata-ějětsijamataběcuene. ¹³Pamonaе baja namata-ějětaponame caeně canacujitsia nerajutsiana cinco pagramobeje palatananitoně xaně Jehovánějawaberena, penacapanepaematamonexa. Nexata, nerajutsiana saya caesiclo epatua, pasiclo-arewejawa pacatocaějětatsi panecanacuenebinexa tajacarpabojawata palatananitota. ¹⁴Daxita papebijiwi nenamata-ějětsiwi veinte pawaiubeje pexainaewi pewajěnaeyabelia, bajarapamonaе nerajutsiana bajarapapenacomuatsimatamo xaně Jehovánějawaberena. ¹⁵Bajarapamatamo tanerajutsijawata xanějawaberena, najěpaeya nerajutaponaena, bitso pexainaewi-ata, bepejiobiwi-ata. Nexata, itsaně-ata apotoxanepanaetsi pecunuajawa, tsiquirijawayo-ata tanerajutsinexa. Najěpaeya cinco pagramobeje nerajutaponaena. ¹⁶Nexata, bajarapacuenia caetuatsianame bajarapapalatananitoně israelitamonaе pecarajutsijawa penacapanepaematamocuenia. Nexata, bajaraxuaně canacuenebianame tajacarpabojawata. Nexata, bajarapamatamo pejamataběcuene, xaně Jehováně najamataběnapitabiabianajě^b Israel-pijině pemomoxi taitaxutotsoniataenexa, tanerajutsixae bajarapapenacapanepaematamo —jai Jehová Moisés-jawabelia.

Pacuenia exanaejitsia mera pe-epacanutsipalanganajawa

¹⁷Icatsia, Jehová jumaitsi Moisés-jawabelia mapacueniaje:

¹⁸—Bajarapacuenianua nacuenebanutsia-exanaename penacobequiatsiwa-xixaneto, palanganawěnjawa, sacerdotewi penacobequiatabibijawanexa. Exananutsiana broncenanitota. Nexata, bajaraxua nutsia-exanaename tajacarpabopanabojawata. Nexata, bajaraxua nucaena tuatuajěta piniji-altar-jawabeje, tajacarpabobejetuatuajějawata. Nexata, bajarapapalanganajawata epacanutsiana mera, ¹⁹bajarapamerata Aarón, pexi-ata penacobequiatabiabinxata, bajarapacuenia penataxuquiatabiabinxata-ata. ²⁰Nexata, bajarapamonaе nacobequiatabiabiana, nataxuquiatabiabiananua pejonewajěnaeya tajacarpabo-ěněabelia tanetonacuenebabiabinexa tajacuene, bajarapacuenia-ata paepatota altar-jawata pijinia tajuatabiabijitsia dajubi xaně Jehovánějawaberena. Bajarapacuenia itsa exanaena, apotěpae tsane. ²¹Nexata, bajarapacuenia nacobequiatabiabiana, nataxuquiatabiabiananua petěpaeyaniwa. Nexata, mapaliwaisije tonajumacotapajě daxitamatacabijawabelianexa Aarón, pemomoxijawabelianexa-ata tsaponae, pejumecowěnětabiabinxata —jai Jehová. ²²⁻³³ [...]

Pacuenia exanaejitsia inciensopěřetoxi

³⁴⁻³⁵ Jehová icatsia xuacujinae jumaitsi Moisés-jawabelia:

—Nexata, notsia-exanaename pexaniawiriatiuxujuwinanijawaně najěpaeyacuenia. Notsia-exanaename mapawiriatiuxujuwijawaněje:

b 30:16 najamataběnapitabiabianajě: Taema «Dioso najamataběnapita», glosariojawata. Bajarapaliwaisi yapětaeya-exanatsi copiyapijicenso (jiwibitsaěto penamata-ějětsijawa) pexanaewajěnaeya. Taema Núm. 1. Mapacenso caeto saya exana. Taema 2Sa 24:1-16. Majotaje nacatsitajěta pacuenia bijiaya canaějěta censo yabara.

pexaniawirianaenanijawanë, gálbanonanjawanë, manuamenepijitsele pejumabococaquiatsibenoxi, pepo-inciensopërètuxujuwijawanë-ata. Daxita bajarapatuxujuwijawanë najëpaeya notsia-exanaename, penacuenebiwi pematajërëabinexa pexaniawiria-inciensotuxujuwijawa pexanaenexa, ëxanënexa saicaya. Nexata, bajaraxua barë-exanaena taja-inciensojawanënexa. Itsa exanaena bajarapa-inciensojawa xaniawaetsia nacuenebiana. Pacuenia pecujaniwitsi pexaniatuxujuwiranë ba-exana, bajarapacuenia nacuenebia-exanaename. ³⁶Nexata, bajarapa-inciensoyajuwënëjawa caquiatsiana, pepobenoben pejutsinexa. Nexata, bajarapabenojawa sacerdotewi buatabiabiana pijataxunaeta tajacarpabo-ënëta peyatu-ucutsipana pënëwetsina, penajumeliwaisixaniawaetsibaula pitabarata. Itsajota baitsi pacacaxitajarabababijitsiatsi Lugar Santisimojawata. Nexata, bajarapa-inciensojawa bitso ëxanënexa tsane. Bajaraxuata, panetoyaiyataename. ³⁷⁻³⁸ ¡Nexata, bajaraxuanë pëtsa panato-exaname cuenejëpaeyacuenia paxamë itaxutejema panecanacuenebiyaniwa! Nexata, pajiwi nato-exanaena natsiquejemaya pijacujaya penatotajuitsinexa bajarapapexaniatuxu petuxuninexa, nexata bajarapajiwiyopanawecuacapsapaeya-exanaename panejinawanapaetaxunaewecua saicaya, apotajajiwiyajuwënëncuenia panetaeyabiabinexa, tsipaji bajarapa-inciensojawa itapetajë ëxanënexa saicaya —jai Jehová.

Dioso itapeta anijanëbeje penamatacaitorobinëbejenexa penacuenebijawa

Dioso Pijacarpabo

(Éxo 35:30–36:1)

31 ¹ Jehová xuacujinae icatsia jumaitsi Moisés-jawabelia:
² —¡Nejumetaema xaniawaetsia! Xanë itapetajë Bezaleel, Judá-pijinë pemomoxijawawerena pepitsapaenë. Bajaraponë Uri pexë nato, Hur pemomo. ³ Bajaraponë xanë DIOSONë tajacuata jamatabëcuenecaëjëpaeya-exanajë Espíritu Santota^c peyabaracujaninexatsi, xaniawaetsia petsita-exanaenexa, xaniawaetsianua pebarënacuenebinënexa, pejamatabëcuenecaëjëpaenexatsi penacuenebijawata pexanaejawa daxitacuene pexaniawiriajawanë. ⁴ Nexata, bajaraponë pecujaninëtsi tsaponaponae pexanaenexa daxitacuenejawanë. Nexata, cuenecaëjëpatsi pecanacuenebijawa oronanitonëta, palatananitonëta, broncenanitonëtanua. ⁵ Nexata, bajaraponë petsiyapëtaenënu pexaniacuenia piojobinexa butujaiya pejucaenexanua pexania-itabëtsi-ibotoxi. ⁶ Bajarapacuenia petsiyapëtaenënu oronanitota pecatsanaejawa bajaraxuanë petsiwajënaefera-exanaejawata. Pecujaninëtsinua pexaniacuenia pecanacuenebijawa tablapanëta. Xaniawaetsia pecujaninëtsi pexanaejawa daxitawiria penacuenebijawa. ⁶ Nexata, bajaraponë peyawenonaenënexatsi to-itapetajë Aholiab, pexë nato Ahisamac. Bajaraponë pijinia Dan-pijinë pemomoxijawawerena pepitsapaenë. Bajarapacuenianua pamona peyawenonaewitsinexabeje jamatabëcuenecaëjëpaeya-exanajë, taneto-exanaenexa peyapëtaewicuenia daxitaxua ca-itorobatsi taneto-exanaenexamë. ⁷ Nexata, bajarapamonae

c 31:3 *Espíritu Santota*: Bajarajota nacayapëtaeya-exana pacuenia Dioso pijacuata Espíritu Santojawalia pejamatabëcuenecaëjëpaeya-exanaejawanexatsi. Taema «Dioso peEspíritu», glosariojawata. **d 31:5** *pexaniawiria-itabëtsi-ibotoxi*: Taema «joyas», glosariojawata.

neto-exanaena: Tajacarpaboxaneto itsajota panacaetuatabibijitsiamē, baja-rapacuenia tanajumeliwaisixaniawaetsibaulanexa patacanajumeliwaisica-jonejawa pitajētsi-ibopanabeje, bajarapacuenia pematapanua, xuanē-ata namatawenonaejitsia sacerdotewi pecanacuenebijawanēnexa tajacarpaboja-wata, ⁸ bajarapacuenia pan pejebabiabimesanexa, xuanē-ata bajarapamesa-jawata pecanacuenebijawanēnexa, bajarapacuenia pepopexania-oronanitota pexanae-itayotsicandelabrojawa, bajarapacuenia-ata pecanacuenebi-jawanēnexa bajarapacandelabrojawata, bajarapacuenia inciensojawa petajuitabiabi-altar-jawanexanua, ⁹ bajarapacuenia-ata pa-altar-jawata dajubi tajuitabiabijitsia tawēnēta daxita pecanacuenebijawanē yajawa, bajarapacuenia penacobequiatsiwaxixaneto palanganawēnējawa-ata, petsi-etsitabujawa yajawa. ¹⁰ Exanaenanua sacerdotewi penaxatatsijawanēnexa, Aarón pijajawanē saicaya, bajarapijinia pacuenia pexinexa-ata, bajarapamonae penaxatabinexa paepatota nacuenebawanapa tajacarpabota sacerdotewicuenia. ¹¹ Neto-exanaenanua pa-aceiterata tsimata-epanabiabijitsiamē paepatota jamatabēcuenē-itajētsijitsiamē ta-itapetsinēcuenē, bajarapijinia pacuenia pexaniatuxujuwi-inciensojawanē xuanē sacerdotewi tajuitabiabijitsia taitabarata tajacarpabo-ēnējawata. Nexata, bajarapamonae bajaraxuanē exanaena daxita pacuenia xanē ca-itorobatsi ajena —jai Jehová. 12-17 [...]

¹⁸ Nexata, Jehová pebarēcuaicuaijaicujinae Moisés Sinaftsutojawata, bajarajota nexata, rajutatsi anijapeyaquinae-ibopanabeje, DIOSO pijacobe-cujaya, papanabejewawata yaquinaruta penajumecajoneliwaisi^f israelitawijawabelia pejumecowēnētawanapaenexatsi.

Israel-pijinē pemomoxi nato-exananuta oronanitota pexanaebecerro

32 ¹ Itsa baja israelitamonaē tane Moisés abaxē pijabibitsarucaejawa bajayajebi petsutojawabetsia runaenejewatsica, nexata bajarapamonae nacaetuata matatoyorotsia Aarón-jawabelia pejumaitsinexa:

—Paneto-exananutsianame itsadisonē wajanacamatacaponaenēnexa, tsipaji Moisés, wajanacajutsinē Egipto nacuwecua, apoyapētaetsi xua tocopapatatsi. Ajibi tsipae pematatsēnē wajanacamatacaponaenēnexa —jai bajarapamonae.

² Nexata, Aarón jumaitsi bajarapamonaejawabelia:

—Je xanepana. Nexata, pawecuanotsianame panijawajiwi, panexēnatonēxi, panexēnatowaxi-ata penatsimuxurubi-arete orojawanē. Nexata, panetocapatsianame xanējawaberena —jai Aarón.

³ Nexata, daxita bajarapamonae jejai. Penatsimuxurubi-arete orojawanē nawemuxujona, pecaetuatsinexa. Nexata, bajaraxuanē tocapata Aarón-jawaberena. ⁴ Bajaraponē nexata pita. Bajaraxuacujinae, bajaraparojawanē seta isotota, pepora pexanaenexa. Bajarapasetsi-orojawa epana becerrojumapecataeya petsiwajēnae-exanaejawabelia. Bajaraxuacujinae, pecainaecujinae, bajaraponē canacueneba martillota beformón-jawata, xaniawaetsia becerro jumapecataeya pebitocuenia pejëpaeyabinexa

e 31:18 Taemana Deuteronomio 9:6-29. f 31:18 penajumecajoneliwaisi: Mapaliwaisije Dioso petoyaquinaeliwaisitsi ibopanabejewawata ruca Éxo. 20:2-17-jawata.

pe-ucubaponaejawata. Nexata, Israel-pijinē pemomoxi bajaraponēyo petae-jawata najumaitsi:

—Tajamonaē, waxaitsi Israel-pijinē pemomoxitsi, maraponē wajadioso-nēje, ponē wajanacajutsinē Egipto nacujawawerena —najai tsaponaē.

⁵ Aarón itsa jumetane bajarapamonaē pejumaitsi tsaponaējawa, Aarón nexata tonacuenebanuta altar-jawa bajarapajumapecataebecerro pitabara-ta. Bajaraxuacujinaē, peweretsicujinaē, bajaraponē ayaijumeta jumaitsi jiwijawabelia:

—Tajamonaē, merawia to-exanaenatsi pijafiesta pewënēta jehová^s —jai.

⁶ Itsamatacabi pepobajayacunua, bajarapamonaē capata dajubimonaē petotajuitsinexa altar-jumata daxitanē, pejamatabēcuenecaewia-exanaenexa pijaneconi. Itsadajubi pijinia totajuita caejamatabēcuene penajuaxainaexae bajarapajumapecataenējawabelia. Petotajuitsicujinaē, taxuxuaba bajarapajumapecataenē pemuxuneneta pexaejawa, pematawējēa-apaejawanua plataneranē. Bajaraxuacujinaē jane baja, nonobapuna. Naitacanitsiaya namuxusita pebarēyanexa, bajarapacuenia taxuxuaba orijibia pibisiacuenē pexanaponaenexa. ⁷ Bajaraxuata, Jehová jumaitsi Moisés-jawabelia, Sinaít-sutojumawecua perunaenexatsica:

—¡Naxatsia! ¡Runaremeca baja nijamonaējawabereca, tsipaji raja pamonaē jutame Egipto nacuwecua najamatabēcuenebijiana xanēwecua, pibisiacuenē pexanaenexa! ⁸ Bepijiayo saya bajarapamonaē wecuanatsata xanē paliwai si tonajumecopatajē. Nexata, bajarapamonaē nato-exana pesetsi-oronanonē becerrojumapecataenē pijadisonēnexa, pematabacabēta yayia-tacuenia penawajēcaenexa Diosowecua. Bajarapacuenia totajuitanua dajubimonaē. Nexata, pexaniacuenia pewënēxaniatsijawata najumaitsi tsaponaē bajarapajumapecataenē yabara: «Tajamonaē, waxaitsi Israel-pijinē pemomoxitsi, mara ponēje wajadisonē, ponē wajanacajutsinē Egipto nacujawawerena», najai tsaponaē —jai Jehová Moisés-jawabelia.

⁹ Jehová orijibia jumaitsi Moisés-jawabelia:

—Xanē yapētaniji bajarapamonaē pitsiwicuene. Saya piamatabēcueneta-jawi tanejumecowënētabiabinexa tacanajumecopatsiliwai si. ¹⁰ Bajaraxuata, aeconoxae necuenecopatsianame tawerebiabinexa, tanacuene-itajētsinexa xanē ta-anaepanaejawa ayaicuenia bajarapamonaējawabelia. ¡Pētsa necuene-itawetame! Necopatsianame xanē tajitsipaecuenia ta-exanaenexa bajarapamonaējawabelia. Itsiata baitsi jane, xamējawawerena nemomoxi capitsapaenajē ayainacuaxanetopijiwinexa, bajarapamonaē tajajiwinexa —jai Jehová.

¹¹ Moisés itsiata yapijiwicuaicuaijai ajumesaēya Jehovájawabelia perunaē-wajēnaetsica. Jumaitsi:

—Jehová, ¿dexuajitsia xamē nacuene-itajētsijitsiamē bitso nebara-anaepanaejawa nijajiwijawabelia? Xamē raja bajarapamonaē jutame Egipto nacujawawerena pinijinecuenesaēta nitajētsicuenia

g 32:5 jehová: Marajota Aarón wënēru ba bajarapabecerrojumapecataenē pepoDioso pewënē, Jehová. Baitsi, bajarapafiesta exanaejitsia becerrojumapecataeya pexanaenē pewënēta, apopepoDioso pewënēta. Bajarapacuenia Aarón wënēru ba bajarapabecerrojumapecataenē, tsipaji jiwijawajumaitsi tsaponaē: «mara ponēje wajadisonē, ponē wajanacajutsinē Egipto nacujawawerena», najai tsaponaē.

pecacuenecaējēpaenēcūene. ¹² Apoxanepanae newerebiabijawa nijajiwi, tsi-paji Egipto nacuapijiwi xamē yabara jumaitsi tsipae: «¿Yeera? Jehová juta Israel-pijinē pemomoxi mapanacuawecua je pewerebiabinexa petsutonacua-jawatalia, pewecuawerebiabinexa mapanacuaje», jai tsipae xamē yabara. Apoxanepanae ne-exanaejawa bajarapacuenia. ¡Jamatabēcuenecaeware baja nebara-anaepanaejawa, pibisiacuenia nesiwanajamatabēxainaejawa! ¹³ ¡Najamatabēnapire xua bajayatami nijajiwimējawabelia najumecapanepaeya jumaitsimē, Abraham, Isaac, Israel-banajawabelia! Bajarapamonae-jawabelia najumecapanepaeya jumaitsimē mapacueniaje: «Cayawenonae-natsi nemomoxi penaexanaponaenexa bitso ayaibitsaētoxaneto. Pacuenia athēbētatsia perubenaejawa tulupu jiwi aponamata-ējētsicapanepae, bajarapacuenia pitsinexa. ¡Daxita mapa-iraje pacarajutsianatsi paxamēnexa, panemomoxi pecanacopataponaenexa panewēnamuto pejinawanapaenexa daxitamatacabijawabelianexa», nejaijawa najamatabēnapire bajarapamonae mijawabelia! Nexata, nejumaitsicowēya xanepana ne-exanaejawa —jai Moisés peyapijiwicuaicuaijajawata bajarapamonae.

¹⁴ Nexata, xuacujinae Jehová najamatabēcuenecataita papibisiacuenie picani siwanajamatabēxaina peto-exanaenexa pijajiwijawabelia. ¹⁵⁻¹⁶ Nexata jane baja, Moisés runaica bajarapatsutojumawetsica. Bajaraponē catsica anija-ibopanayobeje, DIOSO pijacobecujaya peyaquinae-ibopanayobeje daxitayenepananeniabeje, daxita petonajumecopatsiliwaisianētsi.

¹⁷ Moisés baja patajopa itsajota Josué ewetsiaponapona^h pajubobēxēpanajawawetsia. Nexata, bajaraxuacujinae najuarunaicabeje. Itsa imoxoyotajetaruacabeje pijataxunaebowawabetsica pepatsinexabeje, Josué jumetane pewawajaijawa bajarapamonae. Nexata, jumaitsi Moisés-jawabelia:

—¡Najumetaema pewawajaijawa wajataxunaebowawatareca! Saya jumejēpa bepenawajabitsaētawanapaejawa —jai Josué

¹⁸ Nexata, Moisés jumecanawiata:

—¡Jume raja! Apobepenabejamatabēcueniejumenē raja.

Aponetsitajumejēpae-ata pebarējajamatabēcueniejumenē pecuene-amoneyabixae pijawajabitsaēwi penabejawata. Bajarapacuenia apoju-mejēpaenua penamatanueyabijamatabēcūene pecuene-amoneyabixaetsi pijawajabitsaēwi petsimaxēpatsiwitsi. Xanē saya netsita jumejēpa peyawajibi wajianē —jai Moisés Josuéjawabelia.

¹⁹ Nexata baja, itsa patanajetaruacabeje bajarapamonae pijataxunaebonējawata, Moisés jane baja taenuta becerrojumapecataeya pexananutsinē oronanitota. Tanenua bajarapamonae petoyawajibanubenaejawa. Bajarapae-patota, bitso Moisés anaepana ayaicuenia. Nexata, payaquinae-ibopanabeje cobenarunaica Sinaītsutojumawetsica, irabelia bixanaxuaba. Bajarapa-ibopanamibeje toxotoxocajunuabeje. Bajaraxua toxobiaxuaba Sinaītsutotabujawata. ²⁰ Bajaraxuacujinae, Moisés wecupita itsajota nuca bajarapabecerrojumapecataeya pexananutsinē. Bajaraxua nexata, isotojawabelia seta

h 32:17 Josué ewetsiaponapona: Bajarajota, yapētanetsi Moisés, Josuébeje, penajuajunaejawatsiabeje Sinaītsutojumabetsia. Itsiata baitsi jane, itajēta Josué penacopatapaejawa pajubobēxēpanawetsia. Taema Éxo. 24:13. Mapacapítulojawataje, nacayapētaeya-exana pacuenia petsiacujinae beje, icatsia pewajunupaebijawa Éxo. 32:17 penajuanawiatsijawabeje.

pepora pexanaenexa. Pesetsicujinae, penanito penaexanaejawami caquiata pepabeno pexanaenexa. Bajarapabeno pexanaecujinae, merajawabelia tsi-tawenowenota. Bajarapamera apaeya-exana israelitamona. Nexata, bajarapamona bajarapa-orobenota pematajëräatsimera apa. ²¹ Moisés nexata jumaitsi Aarón-jawabelia:

—¿Detsa xua pijacato-exanae mapamonaeye, xamë juya pinijineconi neto-exanaenexa? —jai Moisés.

²² Nexata, Aarón jumecanawiata Moisés:

—¡Tajatuxanenë, pëtsa anaepaname xanëjawaberena! Xamë yapëtaneme xaniawaetsia pacuenia bajarapamona caematacabi canacujitsia najamatabëxainabiaba pibisiacuene pexanaenexa. ²³ Tsipaji bajarapamona nejumaitsi mapacueniaje: «¡Paneto-exanare diosonë, ponë wajanacamatacaponaenënexa, tsipaji apoyapëtaetsi xua tocopiapatatsi Moisés, ponë picani nacajuta Egipto nacujawawerena!», nejai tsaponae. ²⁴ Nexata, xanë jumaitsinë bajarapamonaejawabelia: «Pamona xaina orojawanë pawecuanotsianame, panecapatsinexa xanëjawaberena», janë bajarapamonaejawabelia. Nexata, bajarapamona bajaraxuanë nerajuta. Bajaraxuacujinae, xanë setajë bajarapa-orojawa isotota. Nexata, bajarapacuenia naexana becerrojumapecataenëcuene pijacujaya —jai Aarón najumetsënëtsiya.

²⁵ Nexata, Moisés cuenetane israelitamona pibisiacuene pexanawanapaejawa, tsipaji Aarón cuenecopata bajarapacuenia pexanaenexa. Nexata, Moisés wënëca-ura pewënëliwaicaponaeanyiwatsi pijawajabitsaëwi. ²⁶ Nexata, bajaraxuacujinae Moisés pona penucaenexa panamuto cuaibopata bajarapamona pijataxunaebowaberena. Bajarajota nexata, jumaitsi tsanuae:

—Pamona Jehovah pejitsipaewi pejumecowënëtsinexa, bajarapamona xanëjawaberena nanubena —jai.

Nexata, daxita Levípijinë pemomoxi jejai. Nanubena Moisés pemuxuneneta.

²⁷ Nexata, Moisés jumaitsi Levípijinë pemomoxijawabelia:

—Jumaitsi raja mapacuenia Jehovah, waxaitsi Israel-pijinë pemomoxitsi wajaDIOSO: «Paxamë, caenë canacujitsia, pana-epacëbianame panija-espadanë. Nexata, xuacujinae paponaname panijataxunaebonëjawabelia, paneponaenexa caecarpabojawa canacujitsia, bajarajota panebeyaxuabaponaenexa pebijiwi panijamonaewi, paneyapëtaewi, panemuxuneneta pejinawanapaewi-ata. Itaxutejema pabeyaxuabaponaenameⁱ daxita panijataxunaebonëjawa», jai Jehovah —jai Moisés Levípijinë pemomoxijawabelia.

²⁸ Nexata, Levípijinë pemomoxi exana pacuenia Moisés itorobatsi Jehovah. Bajarapamatacabita, beyaxuaba bejamatabëcujiru tres mil ponëbeje.

²⁹ Nexata, xuacujinae Moisés jumaitsi bajarapamonaejawabelia:

—Ajena paxamë Levípijinë papemomoximë panajamatabëcuene-itajëta Jehovah papeca-itapetsiwi papijasacerdotewinexamë, panejumecowënëtsixae panebeyaxuabaponaejawata panijamonaewi, panexijiwi-ata, pabejiobiataenejewamë. Nexata, ajena Jehovah pexaniacuenia pacayapëtaeya-exana papecayawenonaeyapaebijawa daxitacuenewaliala —jai Moisés.

i 32:27 *Itaxutejema pabeyaxuabaponaename*: Bajaraxua apojumaitsi pecajematsijawa yabara daxitajwi. Saya itajëta itaxutobejiobiataenejewa pebeyaxuabaponaenexa pijamonaewi-ata. Pajwi ajamatabëcuenetaja tsitecaeya Diosowecua, bajarapajwi pebeyaxuabaponaenexa.

³⁰ Itsamatacabijawabelia, icatsia Moisés jumaitsi daxita Israel-pijinë pemomoxijawabelia:

—Paxamë cajena bitso pinijineconi panatsi-exaname Jehovahjawabelia. Itsiata baitsi jane, xanë junaeniajê Sinaïtsutojumabetsia ajenaconoxae itsajotatsia ponapona Jehovah, bajarajotatsia patacatowajêcaenexa, papecabarajamatabêcuenecaewinexa panijaneconi —jai Moisés.

³¹ Nexata, Moisés icatsia pona Sinaïtsutojumabetsia, Jehovahjawabelia pejumaitsinexa:

—Pepacuene cajena mapamonae Israel-pijinë pemomoxi exana pibisiacuene. Nexata, natsi-exana pinijineconi xamêjawabelia, pexanaexae oronanitota pexanaediosonê. ³² Xanê itsiata pexaniacuene cawajêtatsi bajarapamonae ne-itaxutobejiobiataenexa, nesiwajamatabêcuenecaewinexa pijaneconi. Itsa aposiwajamatabêcuenecawijitsiamê, nexata xanê-ata newênê-iquinaename nijabaxutowecua, pabaxutota wênêyaquinarubababame nijajiwi —jai Moisés petowajêtsijawata israelitamonae yabara.

³³ Itsiata, Jehovah jumecanawiata Moisés-jawabelia mapacueniaje:

—Pajiwi pibisiacuene exana xanê wênê-iquinaenajê tajabaxutowecua.

³⁴ Barêponaename tobejena panacuajawabelia imata catsipaebatsi nebarêponaenexa. Xanê raja taja-ângelnê itorobianajê pecamatacaponaenexa. Itsiata, pamatacabi tocopiapatsianatsi tananeconitsia-exanaenexa pijaneconijamatabêcuene, bajarapamatacabita xanê naneconitsia-exanaenajê pibisiacuene pexanaexae —jai Jehovah

³⁵ Nexata, Jehovah tocopatsia-exana pinijidomae petêpaenexa Israel-pijinë pemomoxi, penawajêcaexae becerrojumapecataeya pexanaenêjawabelia, Aarón ponê peto-exananutsinê.

Israel-pijinë pemomoxituajêta Dioso apoheyajawanexatsi

33 ¹ Bajaraxuacujinae, Jehovah jumaitsi Moisés-jawabelia:

—Majotawecuae barêpitsapaename israelitawi, pamonaе jutame Egipto nacujawawerena, nebarêponaenexa pa-irajawabelia najumecapaneпаеуа jumaitsinê tarajutsinexa Abraham, Isaac, Jacob-pijinëjawabelia-ata, pejinawanapaenexa pemomoxi bajarapanacuata. ² Itsiata baitsi jane, pacatsiwajênaenamataxainaeya-exanaenatsi xanê taja-ângelnê, bajara-ponê papecawecuatorotsinexa bajarapanacuata pejinawanapaewi, cana-neomonaе, amorreomonaе, heteomonaе, ferezeomonaе, heveomonaе, jebuseomonaе-ata. Bajarapamonae jutsia-exanaenajê bajarapanacuawecua, bajarapamonaeми pijanacuamita juya panejinawanapaenexa tajumaitsicowêya panijasalinaiwimijawabelia. ³ ¡Paponare pa-irabelia nawita pexacuene! Itsiata baitsi jane, xanê apopacayajawa tsanetsi paxamêtuatuajêta, tsipaji belia namuto-epatualia pacawerebiabijitsipatsi, tsipaji bitso paxamê pane-ajamatabêcuenetajawi patanejumecowênêtabiabiyaniwamê —jai Jehovah.

⁴ Nexata, bajarapamonae itsa jumetane bajarapaliwaisi Moisés petsipaebijawatatsi, apotsixanepanaetsi. Bitso najamatabêxainaeya jinawanapa. Nexata, caejwiyo-ata apoponaponae naitabêtsiaya, picani panaitabêtsijawanêta naitabêtabiaba. ⁵ Bajarapacuenia najamatabêxainaeya jinawanapa, tsipaji Jehovah pejumaitsiyawa Moisés-jawabelia: «¡Jumaitsimêre mapacueniaje

israelitamonaejawabelia: 'Bitso cajena paxamë pepacuene pane-
ajamatabëcuenetajawi tsawanapae! Nexata, itsa xanë pacayajawa tsipaetsi
cae-epatoyo-ata, pacawerebiabijitsipatsi padaxitamë. Aeconoxaeta, panawe-
cuajebianame xuanë naitabëtsiaya pacajinawanapabiabame. Bajarapacuenia
pajinawanapaename panaitabëtsinejewamë, tanajamatabëweretsijawabelia
xua jamatabë-exanajë paxamëjawabelia,' jamëre!», pejaijawa Jehová.

⁶ Bajarapaliwaisi pejumetaecujinae Horeb-tsutojawata,⁷ israelitawi nexata
baja copabawanapa penaitabëtsijawami.

**Moisés tixita israelitawi pijataxunaebonëwecua
pacarpaboyota wajëcabiaba Diosojawabelia**

⁷ Nexata, Moisés wecutixita Israel-pijinë pemomoxi pijataxunaebonë-
wecua penawajëcabiabarpaboyo,^k icatsia penacuenebanutsinexa bajara-
pamona saicaya pijataxunaebonëwecua. Bajarapacarpaboyo itsajota nuca
wënëruba «petonacaetuatabibiboyo penawajëcabiabinexa Jehovájawabe-
lia», pejaiwënë. Nexata, pacujinae pajiwiyo jitsipa Jehovájawabelia liwaisi
peyanijobijawa, nexata ponabiaba bajarapacarpaboyojawabelia. ⁸ Nexata,
itsa Moisés ponabiaba bajarapacarpaboyojawabelia, daxitajiwi nubenabiaba
wayafuabelia pijabonë baupamuxuneneta, caejiwi canacujitsia. Bajarapamo-
nae pëtaeyabiabanubena Moisés pejonejawa bajarapaboyojawabelia. ⁹ Moi-
sés pejoneyabiabicujinae bajarapacarpaboyojawabelia, nexata piapiapajubo
benaesituruto runabiabica bajarapacarpaboyo jumabetsica. Bajaraxuacu-
jinae, bajarapaboyopijibaupamatatsënëta imoxoyojawata rucabiabajopa.
Nexata, bajarapaepatota Jehová barëcuaicuajiai tsabiabi Moisés. ¹⁰ Paepa-
tota pijinia, bajarapamona taeyabiaba bajarapapiapiapajubojawa imoxoyo
perucajopaejawa bajarapacarpaboyo baupamatatsënëta, nexata pijabonë
baupamuxuneneta pematabacabëta nubenabiaba yaiyataecuenia, penajama-
tabëcuenerajutsinexa Jehovájawabelia.

¹¹ Bajarapacarpaboyojawata, Jehová, Moisés-beje, nabarëcuaicuajiaibeje
tsabiabi pijacujaya bepenayapëtaenëbejecuenia. Pebarëcuaicuajiaicujinae
bajaraponë nawiatabiaba pijataxunaebowawaberena. Itsiata baitsi jane, peya-
wenonabiabinëtsi Josué, Nun pexënato, bajaraponë bajarapabo-ënëwecua
apopitsapabiabi.

**Dioso icatsia najumecapanepaeya jumaitsi
peyajawanexa Israel-pijinë pemomoxi**

¹² Moisés nexata jumaitsi Jehovájawabelia:

—Tajatuxanenë, xamë nejumaitsimë picani mapamona tamatacapona-
nexa Egipto nacuawerena nerajutsiapaebi-iranexajawabelia. Jane baitsi
itsiata, xamë aponejumaitsimë ponë icatsia neyajawa-itorobijitsiamë tane-
barëmatacaponaenënexa. Asiwaya netaeyabiabame. Benijamonaenënëcue-
nia netaeyabiabame. Neyapëtaeya-exanamenua tanesiwajamatabëcuene-
itaxutuajamatejemajawamë xua cato-exanaponaponatsi. ¹³ Itsa pepacuene

j 33:6 Horeb-tsutojawata: Itsawënë Horeb-tsutonexa Sinaítsuto pijinia. k 33:7 penawajëcabiabi-
carpaboyo: Israel-pijinë pemomoxi pijataxunaebotuatujëtä xainabiaba tsaena penawajëcaecar-
paboyo Diosojawabelia, abaxë exanaenejewa pepoDioso pijacarpabo.

xaniajamē tanesiwa-itaxutuajamatejemajawamē, nexata neyapētaeya-exanare nesiwanajamatabēxainaeliwaissi bajarapamonae yabara, jamatejema pijinia xanē tacanamata-ējētsinexa pataneyawenonaejawamēnexa! ¡Bajarapacuenianua, xaniawaetsia netsitajēre tacato-exanaenexa nejtsipaecuenia, aponejtsipaecuenia ta-exanaeyaniwa! ¡Nexata, mapamonae bejio-biataema, tsipaji raja xamē nijajiwi! —jai Moisés.

¹⁴ Nexata, xuacujinae Jehová jumecanawiatatsi:

—¡Jamatejemamēre! Xanē raja tajacuata cayajawa tsanetsi. Bajarapacuenia pacayawenonaenatsi panecuenene-amoneyabinexa panijawajabitsaēwi, jamatejema panejinawanapaenexa bajarapanacuatalia —jai Moisés-jawabelia.

¹⁵ Itsiata baitsi jane, Moisés mapacuenia jumecanawiataje:

—¡Itsa baitsi jane, xamē apopaneyajawajitsiamē nijacujaya, pētsa nexata panecapitsapame majotawecuae! ¹⁶ Tsipaji itsa xamē apopaneyajawajitsiamē nijacujaya, ¿denexata pacuenia payapētaenajē itsamonaewecua pata-nesiwajamatabēcuenenabarēyajawamē? Matapania itsa paneyajawamē, bajarapacuenia nacuenene-itajētsianame daxitajiwijawabelia patane-itapetsijawamē daxitajiwiwecua panijajiwinexanē, saicaya mapanacuata pejinawanapaewiwecuae —jai Moisés.

¹⁷ —Je, xanepana. Xua xamē daxita nejumaitsimē, nexata xanē exanaenajē, tsipaji xanē xamējawabelia asiwaya catanetsi, betajamonaenēmēcuenia tacataeyabiabinexa. Casiwajamatabēcuenenabarēyatsinua —jai Jehová Moisés-jawabelia.

¹⁸ Moisés icatsia orijibia jumaitsi:

—¡Netocopare tataenexa nijanivenivenaecotia! —jai.

¹⁹⁻²⁰ Itsiata baitsi jane, Jehová jumecanawiatatsi mapacueniaje:

—¡Jume raja! Xaniajanē pacuenia cajumaitsijitsiatsi. Itsajiwi-ata cajena apocuenecaējēpaetsi tane-itabarataenexa,¹ tsipaji itsa netaejitsipa tēpaejitsipa. Itsiata, xamē catocopatsianatsi netaenexa daxita taca-itaxutotsoniataejawa. Bajarapacuenianua nejumetaenename Jehovánē, tacanawēnēpaebijawa. Xanē baitsi pajiwi jitsipajē taitaxutotsoniataenexa, bajarapajiwi itaxutotsoniataenajē. Pajiwi-ata jitsipajē asiwaya tayawenonaejawa, asiwaya yawenonaenajē —jai Jehová Moisés-jawabelia.

²¹ Icatsia, Jehová jumaitsi:

—¡Taema! Tamuxuneneta itsajota xanē nucajē. Bajarajota, nuca iboyenepanawajujawa. ¡Nucare bajarapa-ibotojumata! ²² Nexata, paepatota tacotia ca-imoxoyotanajetaruca, xanē canutsianatsi bajarapa-ibowajujawata. Nexata, tacobeta cayapijiwi-acatsianatsi ta-itabaraniweniwenaeotia pecaxenetsijawabelia. ²³ Bajaraxuacujinae, nacobetixitsianajē xamēwecua paepatota caxenatatsi. Nexata jane baja, nejumapēnētaenename. Itsiata baitsi jane, aponitabaracotiataemē tsane —jai Jehová.

Dioso itoroba Moisés pexanaenexa itsa-ibopanabeje

(Deut 10:1-5)

34 ¹ Bajaraxuacujinae, Jehová jumaitsi Moisés-jawabelia:
—Nacuenebianame anija-ibopanayobeje, copiaya pitsi-ibopanamibeje carajutatsi. Bajarajota, icatsia yaquinarutsijitsianē

paliwaisianēmi picani yaquinarubajē copiyapiji-ibopanamita, pa-ibopanabeje toxobiaxuabame. ²Nexata, merawia bajayacunua naxaniaawaetsianame nejunaenexa Sinaītsutojumabetsina tane-caxitajarabinexamē. ³¡Itsajijiwiyo-ata pētsa xamē yajawajunaimina! ¡Bajarapatsutoyenepanajawabelia-ata pētsa pona! Apotaējitsipaeñē caejijiwiyo-ata. ¡Bajarapacuenia pētsa pona panijadajubi pexaewanapaenexa pona bajarapatsutoyenepanabelia! —jai Jehová.

⁴Nexata, Moisés nacueneba anija-ibopanayobeje pacuenia baja copiyapiji-ibopanamibejecuenia. Nexata, itsamatacabijawabelia, pepobajayacunua, bajaraponē pita bajarapa-ibopanayobeje. Cobenajunaya jane baja Sinaītsutojumabetsia, pacuenia Jehová tonajumecopatatsi. ⁵Nexata, Jehová jane baja, runaica itarērēbota Sinaītsutojumabetsica. Nexata, bajarajotatsia Jehovábeje najuaponaponabeje Moisés-beje. Bajarajotatsia, nawēñetsipae-batsi Moisés. ⁶Nexata, pewajēnaewerena itsajota Moisés nuca, pexenetsijawata pinijijumeta pecuene nayabarajumaitsi mapacueniaje:

—¡Jehovánē! ¡Jehovánē!^m DIOSonē pinijisāē taxainanē. Jiwi taitaxutotsoniataenē. Xanē raja asiwaya pexaniacuenia tayawenonaenē, asiwaya tataeyabiabinē. Jiwijawabelia bepíjia apota-anaepanaenē nejamatabē-itonotabiabi-ata. Bajarapacuenia taxaniajainē-ata daxitacuenejawalia. ⁷Ta-asiwajamatabēcuene apotanetowerewerecaenē. Nexata, xanē caejamatabēcuene xainajē tabejiobiataenexa pepobajayajebi jiwijawabelia, milnēta penaexanaponaewi pemomoxibitsaētojawabelia, bajarapacuenia tasiwajamatabēcuene caewabiabinē pamonaē pijaneconi pexanaewi, pamonaē apotanejumecowēñetabiabiwi, pibisiacuenē pexanaewi-ata. Itsiata baitsi jane, bajarata-itsisaponaponaenē-ata, apotaenē tsane aneconijibia pijaneconi pexainaejiwiyo naneconitsiaya-exanaenējawanē, bepianeconijibinēcuenia tataenexa. Biji rajane, naneconitsia-exanaenajē pajiwi pijaneconi pexainaejiwi, bajarapajiwi pijaneconi tsijumajopaenatsi pexijawabelia, pemomoxijawabelia, pemomoxi pexi, pemomoxijawabelia-ata tsaponae, penaexanaponaewi cuatro papemomoxibitsaētojejawabelia. Daxita bajarapamonae pemomoxi pexijawabelia naneconitsia-exanaenajē pijamonae pijaneconijamatabēcuene yabara —nacueneyabarajai Jehová.

⁸Moisés nexata bepíjiayo irataeya pitabarata bocajunua, pitapapatsijawa irabereca. Nexata, Jehovájawabelia najamatabēcuene-itajētsiaya yaiyataeya bocajunua. ⁹Moisés jumaitsi:

—¡Tajatuxanenē! ¡Tajatuxanenē! ¡Itsa pepacuenē xamē nitaxutuabareyamē, nexata paneyajawamēre! Pacuenia jumaitsimē xaniajamē. Pepacuenē cajena mapamonaēje ajamatabēcuenetaja pecajumecowēñetsiyaniwa. ¡Itsiata baitsi jane, panesiwajamatabēcuene caeware patajaneconi pata-exanaejawa, pibisiacuenē pata-exanaeconimi! ¡Panetaemanua bepanijijiwinēcuenia! —jai Moisés pewajētsijawata. Jehová jejai. ¹⁰⁻²⁶ [...]

m 34:6 *Jehovánē*: Mapaversiculoxijawa, 6-7-beje, rubena Dioso pawēñēanē penawēñērubicuenia. Baitsi, mapawēñēanē nawēñērubaje: 1) Jehová, 2) Dioso pinijicuenesaē pexainanē, 3) Jiwi pitaxutotsoniataenē, 4) Jiwi asiwaya peyawenonaenē, 5) Jiwi asiwaya petaeyabiabinē, 6) Jiwijawabelia penajamatabēcuene catatsinē pianaepanaeyaniwa jamatabē-itonotabiabi-ata, 7) Pexaniajainē, pejumaitsicowēya pexanabiabinēnexa. Mapasiete pawēñēbejecueniaje nawēñē-ruba pecuene yabara.

²⁷ Icatsia penajumeliwaisicajonecujinae, Israel-pijinë pemomoxijawabelia, xuacujinae Jehová jumaitsi Moisés-jawabelia:

—¡Yaquinare jane baja mapaliwaisianëje, tsipaji raja bajarapaliwaisianëta najamatabëcuene-itajëtajë pexaniajailiwaissicuenia tacanaliwaisicajonejawa xamëjawabelia, israelitawijawabelia-ata, pacuenia bajarapaliwaisita panejumecowënëtanapaejitsiamë! —jai.

²⁸ Nexata, Moisés bajarajotatsia yajawaponapona Jehová cuarenta pama-tacabibeje, cuarenta pamerawibeje yajawa. Bajarajotatsia, ponapona xaenejewu, apaenejewu-ata itsacuenemerayo. Yaquinarubanua bajarapa-ibopanatabeje jumawelia penaliwaisicajonejawa israelitawijawabelia, diez paliwaisibeje pitorobiliwaisianë, petonajumeliwaisicopatsijawa. ²⁹ Peyaqui-naeweretsicujinae, bajaraponë runaica Sinaftsutojumawetsica israelitawi pijataxunaebonëjawabetsica. Cobenarunaicanua pa-ibopanatabeje rubena Jehová petonajumecopatsiliwaisianëtsi. Pebarëcuaiacuajicujinae Jehová, Moisés itabarabinejai. Itsiata, Moisés itsa baja runaica apona-itabarayapëtae pitabaraniweniwenaejawa. ³⁰ Aarón, bajarapacuenia daxita Israel-pijinë pemomoxi, itsa tane Moisés pitabaraniweniwenaejaijawa, cujunawa pimo-xoyotsijawa. ³¹ Moisés nexata junata Aarón, daxita pamonaen penamata-caitorobiwi pijamonaetuatujëta, pimoxoyotsinexatsi bajaraponë itsajota nuca. Moisés nexata barëcuaiacuajai bajarapamonaenjawabelia. ³² Bajaraxuacujinae, cae-epatoyocujinae, daxita Israel-pijinë pemomoxi-ata cujibarena pimoxoyotsinexatsi. Moisés nexata tsipaeba paliwaisianë tonajumecopatatsi Jehová petsutojumatsia. ³³ Moisés baja itsa najumewereta pecuacuajaijawa bajarapamonaenjawabelia, nexata xuacujinae na-itabara-acataxuaba pepanata.

³⁴ Nexata, pamatacabi Moisés joneyabiaba Jehová pijacarpabojawabelia pebarëcuaiacuajaitsabiabinexa Jehovájawabelia, bajaraponë na-itabara-isinabiaba bajarapapana pepitsapaejawabelia. Pebarëcuaiacuajicujinaetsi Jehová, bajaraxuacujinae, bajaraponë tsipaebabiaba icatsia daxita Israel-pijinë pemomoxijawabelia pacuenia Jehová yajawanajumecopatatsi.

³⁵ Moisés pewecuapitsapaeacujinae Jehová pijacarpabowecua, daxita bajarapamonaen itsa taeyabiabatsi Moisés pitabaraniwejaijawa, nexata Moisés pitabaraniwejaijawa yabara na-itabara-acatabiaba pepanata. Bajarapacuenia bajaraponë exanabiaba paepatowajëtoponapona abaxë bajarapamonaetuatujëta. Icatsia bajaraxuacujinae, itsa pona pebarëcuaiacuajainexa Jehová, bajaraponë na-itabara-isinabiaba bajarapapana.

Dioso itapeta Sábdomatacabi peyaiyataematacabinexa

35 ¹⁻³ [...] ⁴ Marapacueniaje Moisés pebarëcuaiacuajaijawata israelita-bitsaëtojawabelia jumaitsi:

—Marapacuenia Jehová naca-itoroba waja-exanaenexaje. ⁵ Pacae-tuatsianame panecobecowëyajuwënëjawanë ofrendacuenia panerajut-sinexa Jehovájawabelia. Daxita pamonaen jitsipa perajutsinexa ofrendacuenia Jehová, parajutaponaenname caenë canacujitsia xua pajitsipame panejamatabë-ëthëtojawawetsina. Nexata, pacapatsianame orojawanë, palatajawanë, broncejawanë-ata. ⁶ Bajarapacuenia-ata pacapatsianame daxitawirimaëtoxi, perajejaimaëtonë, pesaëjaimaëtonë,

petsobiamaëtonë-ata, bajarapacuenia pexaniawirialinojilomaëtonë, bajarapacuenia cabra pewejumaxunaenami-ata. ⁷Bajarapacuenia pacapatsianame oveja pebitonë pebocotonëmi, petsobiarata pejabucaebocotonë, bajarapacuenia itsapexaniawiriabocojawanë-ata. Pacapatsianamenua acacianaepijitablajawanë-ata, ⁸bajarapacuenianua olivacuaiji-aceiteranë lámpanexa. Pacapatsianame pexaniatuxujuwijawanë, pematajërëabinexa itsa-olivacuaiji-aceiterata, petsimata-epacaera pexanaenexa Jehová pitapetsiwitsi, bajarapacuenia itsawirijawanë pexaniatuxujuwipërëtoxi inciensojawanë, Jehovájawabelia petotajuitabiabijawanënexa. ⁹Bajarapacuenia pacapatsianame mapitsiwiria-ibotoxi: ónice-ibotoxi, itsa-ibotoxi penamatamotsijawanë-ata, pitabëtsi-ibotoxinexa sacerdotewi pepopenamatacitorobinë naniawelia penajumaxuabicorobë, efod-wënëjawa, petsicofiarubinexa, bajarapacuenia penatsimpabërutsipanjawata perubinxanua — jai Moisés. ¹⁰⁻¹⁹ [...]

Israelitawi capata jamatabëcuenebarëyaya pija-ofrendajawanë

²⁰ Moisés bajarapacuenia pejumaitsicujinae, nexata daxita israelitawi nawiaba pijacarpabonëjawabelia Moisés-wecua, pejaitsinexa xuanë rajutsijitsia. ²¹ Nexata, pamonaë pejamatabë-ëthëtowetsina pepacuene jitsipa perajutsinexa, bajarapamonae capata daxitaxua namatawenona pecanacuenibinexa Jehová pijacarpabonexa. Bajarapacuenia daxitaxua canacuenebijitsia bajarapabo-ënëjawata. Bajarapijinia pacuenia daxitaxuanë namatawenonaëjitsia pecanacuenebinexa sacerdotemonae penaxatabijawanënexa-ata. ²² Nexata jane baja, capata pebijwi, petiriawi-ata jamatabëcuenebarëyaya ofrendacuenia perajutsinexa. Nexata, capata daxitacuenewiria oronanitota pexanaejawanë: penacuaibosicëbijawanë, penacobesixatabijawanë, penatsimuxurubi-aretejawanë, penamaxëcëbijawanë-ata. Daxita bajaraxuanë oronanitota pexanaejawanë bajarapamonae ofrendacuenia capata Jehovánexa. ²³ Pamonaë-ata pexainaewi capata perajejaimaëtonë, pesaëjaimaëtonë, petsobiamaëtonë, pexaniawirialinojilomaëtonë-ata. Pamonaë pijinia xaina chivona pejumaxunaenami, ovejaboco petsobiarata pejabucaebocotonë, itsapexaniawiriabocotonë-ata, daxita bajaraxuanë capata ofrendacuenia ²⁴ Itsamonae pijinia capata palatananitojawanë, broncenanitojawanë-ata perajutsinexa ofrendacuenia. Bajarapacuenia itsamonae capata acacianaepijitablajawanë pexanaenexa daxitaxua canacuenebijitsia bajarapabo pexanaejawata. ²⁵ Papetiriawi pijinia yapëtane pefirabijawa jilomaëtoxicuenia pejucaenexa, bajarapamonae pejitsipaewi firaba perajejaimaë, pesaëjaimaë, petsobiamäë-ata. Powaxi pijinia yapëtane pecuejawa pepananë pejucaenexa, bajarapowaxi bitso pexaniawiria linowiriapapaëbërëpananë juca, pecapatsinexa. ²⁶ Bajarapijinia pacuenia itsapetiriawi, pamonaë xaniawaetsia firababiaba chivo pejumaxunaenami, bajarapamonae-ata capata pefirabijawanë, pejitsipaecuenia pejamatabë-ëthëtowetsina perajutsinexa. ²⁷ Bajarapijinia pacuenia pamonaë penamatacitorobiwi capata ónice-ibotoxi, itsapexaniawiria-ibojawanë-ata, bitso penamatamotsijawanë, petsicofiarubinexa sacerdotewi pepopenamatacitorobinë naniawelia penajumaxuabicorobë, efod-wënëjawa, bajarapacuenia-ata penatsimpabërutsipanjawata perubinexa. ²⁸ Bajarapamonae-ata

capata petuxujuwijawanë, bajarapacuenia olivacuaipiji-aceiteranë pitayot-sinexa, bajarapacuenia itsa-aceiteranë, petsimata-epacaeranënexa pamonaë Jehovah pijacuene petonacuenebiwinexa, penajamatabë-itajëtsinexa Jehovah pitapetsijawatsi. Bajarapacuenia capatanua pexaniatuxujuwijawanë inciensojawanë, xuanë tajuitabiabijitsia Jehovah pewënëta, bajaraPonë pijacarpabo-ënëta.

²⁹ Daxita Israel-pijinë pemomoxi jamatabëcuenebarëyaya ayaijawa capata wecua-asiwanejewa, perajutsinexa ofrendacuenia Jehovah pewënëta. Nexata, pebijiwi, petiriawi-ata, jamatabëcuenebarëyaya capata, pacuenia Jehovah tonajumecopatatsi Moisés-jawabelia bajarapamonae pexanaenexa. Nexata, bajarapamonae tocapata ofrendacuenia pacuenia bajarapamonae najamatabëcuenecaëjëta Jehovahjawabelia perajutsinexa.

Dioso itapeta Bezaleel, Aholiab-beje penamatacanacuenebinëbejenexa

(Éxo 31:1-11)

³⁰ Moisés xuacujinae jumaitsi daxita israelitawijawabelia:

—¡Pacanaëjere mapacueneje! Jehovah itapeta Bezaleel, Uri pexënato, Hur pemomo, Judápijinë pemomoxibitsaëtoyajuwënënë. ³¹ Bajaraponë DISO Espíritu Santota jamatabëcuenecaëjëpaeya-exanatsi, peyapëtaeya-exanaenexatsi daxitacuene, pecanaëjëtsinexa pacuenia exanaejitsia, daxitacuenenua petsiyapëtaenënexa. ³² Nexata, bajaraponë yapëtaejitsia oronaniawanëta pecanacuenebinexa pexaniacuena, palatananiawanëta, broncenaniawanëta-ata, ³³ bajarapijinia pacuenia pecanacuenebinexa pexaniawirinanamatamotsi-ibotoxi pexaniacuena pitabëtsia-exanaenexa, pecataicarubinexanua bajarapa-ibotoxi orojawanëta, bajarapacuenia naejawanëta penacuenebinexa itsacuenejawanë-ata. Daxita bajaraxua DISO Espíritu Santota jamatabëcuenecaëjëpaeya-exanatsi pexanaenexa. ³⁴ Bajarapijinia pacuenia, DISO Espíritu Santota caëjëpaeya-exanatsi Aholiab, Ahisamac pexënato, Dan-pijinë pemomoxibitsaëtoyajuwënënë. Bajaraponëbeje DISO Espíritu Santota jamatabëcuenecaëjëpaeya-exanatsibeje itsamonae-ata pecujarubinexa, peyapëtaeya-exanaenexa daxita pexanaecuenë. ³⁵ Bajaraponëbeje cuenecaëjëpaeya-exanatsi pexaniacuena penacuenebinexabeje itsacuenejawanë, xaniawaetsia pecapitsapaenexa pejamatabë-ëthëtota pecanaëjëbicuenia. Nexata, bajaraponëbeje yapëtaejitsia pexaniacuena pecapitsapaenexa pejorocaejawata, pitanecuejawa perajejaipananë pexanaejawata, bajarapacuenia pesaëjaitsautsaucapananë pexanaejawata, petsobiapananë, linowiriapapaëbërëpananë pexanaejawata-ata. Bajarapacuenianua caëjëpaeya-exanatsibeje pejucaenexa pexaniapitanejawanë bajarapapaëbërëpananëta pecuejawata.

36 ¹ »Bajaraxuanë panecapatsicujinae, nexata Bezaleel, Aholiab-beje, pamonaë-ata Jehovah pecuenecaëjëpaeya-exanaewitsi peyabarcujaniwinexatsi pexaniacuena penacuenebinexa, tonacuenebiana Jehovah pijacarpabo, pacuenia netonajumecopata pexanaenexa, daxitaxuanë-ata canacuenebijitsia bajarapacarpabo-ënëta peto-exanaenexa —jai Moisés Israel-pijinë pemomoxijawabelia, Jehovah petonajumecopatsicueniatsi. Israelitawi bitso capatapona ayaijawa penamatawenonaejawawecua Dioso pijabonexa.

²Bajaraxuacujinae, Moisés junata Bezaleel, Aholiab-beje, daxita pamona-ata Jehová pecuenecaëjëpaeya-exanaewitsi peyabaracujaniwine-xatsi pexaniacuenia penacuenebiwinexa, pamona-ata pejitsipaewi peto-nacuenebinexa. Daxita bajarapamona-ata penacuenebinexa Jehová pijacarpabo. ³Nexata jane baja, bajarapamona-ata nota Moisés-jawata daxitaxua Israel-pijinë pemomoxi ofrendacuenia pecapatsijawanëmi, petaxuxuabinexa penacuenebijawa Jehová pijacarpabo. Itsiata, orijibia Israel-pijinë pemomoxi tsitecaeya caebajayacunua canacujitsia capatapon-itsacuenejawanë perajutsinexa ofrendacuenia. Saya cuenejitsipaeya capatabiaba itorobine-jewatsi. ⁴Ayaijawa matatoxenetsia pecapatsixae, nexata daxita penacuenebiwi bajarapacarpabo copaba penacuenebijawa, peponaenexa Moisés-jawabelia. ⁵Nexata, jumaitsi bajaraponëjawabelia:

—Mapamona-ata bitso ayaijawa capatapon-itsacuenejawanë perajutsinexa Jehová pijacarpabonexa, bitso patanamatawenonaejawawecua matatoxenetsia bajarapabonexa —jai Moisés-jawabelia bajarapamona-ata.

⁶Nexata, Moisés itoroba itsamona-ata Israel-pijinë pemomoxi pijataxunaebonëjawa, petsipaebinxaxa daxitajiwijawabelia orijibia apopenamatawenonaejawapematatsënë Jehová pijacarpabonexa. Bajarapamona-ata nexata jumaitsi tsanajetarubena-ata bajarapamona-ata pijataxunaebonëjawa:

—|Orijibia, pëtsa itsajiwiyon-ata baja rajuta pematatsënë ofrendacuenia Jehová pijacarpabonexa, pebijiwi, petiriawi-ata! —jai tsanajetarubena-ata.

Bajarapacuenia nexata cuene-itaweta Israel-pijinë pemomoxi pecapatsijawa orijibia, ofrendacuenia perajutaponaejawaxa, ⁷tsipaji baja xaina bitso ayaijawa penamatawenonaejawawecua Jehová pijacarpabo pexanaenexa. Baitsi, peweretsicujinae bajarapabo, nacopatsijitsia bajaraxuayajuwënëjawanë. ⁸⁻³⁸ [...]

Penacuenebiwi tsiwajënaeweretejeba daxita Dioso pijacarpabonexa

39 ¹⁻³¹ [...] ³²Daxitaxua nacuenebawanapa Jehová pijacarpabonexa, penacuenebiwi weretejeba baja. Daxita pacuenia Jehová tonajumecopatatsi Moisés-jawabelia, bajarapacuenia israelitawi exana. ³³Nexata, bajarapamona-ata capata daxita peweretsijawanë Moisés-jawabelia. ³⁴⁻⁴² [...] ⁴³Moisés nexata xaniawaetsia yoroba daxita peyapëtaenexa itsa exana Jehová petonajumecopatsicuenia. Nexata, itsa tane xaniawaetsia Jehová pitorobicuenia pexanaejawa bajarapamona-ata, nexata Moisés pexaniacuenia cuenewajunupaeba bajarapamona-ata Jehová pewënëta.

Moisés jane baja caxatabiaya nacuenebanuta Dioso pijacarpabo

40 ¹⁻¹⁵ [...] ¹⁶⁻¹⁷Nexata, israelitawi itsa baja xaina anijawaipeje pepit-sapaecujinae Egipto nacuawecua, pejanawai petaxuxuabijuame-tota copiyamatacabijawata, Moisés jane baja, matapania xatabiaya tona-cuenebanuta Jehová pijacarpabonexa. Daxita pitorobicueniatsi to-exana. ¹⁸Nexata, Moisés jane baja, tobarënacuebanuta Jehová pijabonexa. Tsiwajënaejebanajetaruca itsajota tabunubijitsia tablapanë. Bajaraxuacujinae, patablapanë nubapona bajarapatsiawajënaejebitabunëjawawerëca, botabuyenepana pexanaenexa. Bajaraxuacujinae nexata, pe-epatajërëtsinaebonë ruba bajarapanubitablapanëyenepanata petsiwajënaerubiwojotualia,

bajarapayenepananë piababanexa. Bajaraxuacujinae, naesiturutonë jane baja nuba bajarapacarpabo epatajërëtsialia yatu-ucutsiaya itsajota rutsijitsia peya-itacaranatsipanabeje. ¹⁹Nexata, bajaraxuacujinae bajaraponë daxita carpabo juma-acata bëpënëa pexaniawiriapananëta. Bajarapacuenianua jane baja, daxita carpabo pejumawereca juma-acata dajubibocotonëmi pejo-rocaeapananë. Daxita pacuenia Jehová itorobatsi, bajarapacuenia Moisés exana.

²⁰Bajaraxuacujinae, Moisés pita jane baja bajarapa-ibopanayobeje itsajota yaquinaruta Jehová petonajumecopatsiliwaisitsi penajumeliwaisicajonecuenia israelitawijawabelia. Nexata, bajaraponë buata bajaraxuabeje Jehová penajumeliwaisixaniawaetsibaula-ënëta pexaniawaetsinexa. Bajaraxuacujinae, bajaraponë epatajërëtsialia ruliabeje peyawëtaraponaenae-bobejenexa petsiwajënerubiwojotualia bajarapabaulamuxunenialiabeje. Bajaraxuacujinae pijinia, pematatsënëwewereca buata pematapa, Jehová jiwi pijaneconimi pesiwajamatabëcuenecaewimatapanexa. ²¹Nexata, xuacujinae jane baja, caponaya Jehová pijabaula carpaboxaneto-ënëabetsia, pebuatsinexa cotocaewi peyatu-ucutsi-ënëjawabetsia. Bajaraxuacujinae, bajaraponë caranataruta pitacaranatsipanexa petsiwajënaenubinaesiturutonëjawata. Bajaraxuacujinae, Jehová penajumeliwaisixaniawaetsibaula buata bajarapayatu-ucutsipana pënëwetsica. Nexata, pacuenia Jehová itoroba, bajarapacuenia Moisés exana.

²²Bajaraxuacujinae, pan pejebabiabimesanexa nuta pecujuaneniaⁿ peya-itacaranatsipanajawa pënëwewereca. ²³Mesajumawereca jane baja, jeba pan Jehová pitabarata. Pacuenia baja Jehová itoroba, bajarapacuenia Moisés exana.

²⁴Bajarapacuenia nuta jane baja pitayotsicandelabrojawa bajarapabo-ënëyenepana ununenia, pan pejebabiabimesa rowialia.

²⁵Bajaraxuacujinae jane baja, candelabrojawa itayotanuta Jehová pitabarata, pacuenia Moisés itorobatsi bajaraxua pexanaenexa.

²⁶Oronanitota pexanae-altar-jawa nuta baja bajarapabo-ënëjawalia, peya-itacaranatsipana pënëwetsica. ²⁷Nexata, bajarapa-altar-jumata tajuita pexaniawiriatusujuwijawa inciensopërëjawanë pacuenia Jehová tonajumecopatatsi.

²⁸Bajaraxuacujinae, Moisés ruta bajarapacarpabo pijabaupajawata pitacaranatsipapaëbërëpana. ²⁹Bajaraxuacujinae nexata, icatsia nuta jane baja dajubi petajuitabiabi-altar-nexa bajarapacarpabo matatoyorotsia peyacaranatsibaupajawata. Bajarapa-altar-jumata Jehová pewënëta dajubi tajuita pijaneconijamatabëcuene. Itsanë pijinia tajuita Jehová pesiwajamatabëcuenecaewixaetsi pijaneconimi. Bajarapacuenia tajuita trigobeno-ata, ofrendacuenia perajutsinexa Jehovájawabelia, pacuenia baja itorobatsi Moisés.

³⁰Bajaraxuacujinae pijinia, eta jane baja penacobequiatsiwaxixaneto palanganawënëjawa bajarapacarpabopijipanabojawata, altar-beje, carpabobejetuatujëta. Nexata jane baja, mera wënëtanuta, bajarapamerata penacobequiatabiabinexa.

ⁿ 40:22 *pecujuanenia*: Mapaversiculotaje pecujuaneniajume wowaijumeta yabaracuaicuaijai nortenenia.

³¹ Bajarapapalanganawecua mera puatabiabiana Moisés, Aarón, baja-rapacuenia Aarón pexi-ata, bajarapamonae penacobequiatabiabinxexa, penataxuquiatabiabinxexa-ata. ³² Bajarapamonae paepatota jonejitsia Jehová pijacarpabojawabelia copiaya nataxuquiatsijitsia. Nacobequiatsijitsianua. Bajarapacuenia exanabiabiananua paepatota piniji-altar-jawata dajubi tajui-tabiabijitsia. Pacuenia Jehová tonajumecopatatsi Moisés, bajarapacuenia bajarapamonae exana.

³³ Xuacujinae, pecopiarucaejawa jane baja, Moisés ruta peyacaranatsi-linowiriapana daxita carpabo matatoyorotsia altar yajawa peyacaranat-sipananexa, xaniawaetsia bajarapabopanabo penayapētaenexa peyacaranatsijawa. Nexata, itsaxuayolia joneyabiabijitsia, bajaraxuayolia pijinia itsawiriapanayo ruta baupanexa. Nexata, daxita yamatacaranata. Bajarapacuenia nexata, Moisés wereta daxita bajarapabo penacuenebijawa Jehová pijacarpabonexa.

Dioso piapiapajubota rucabiabica carpabomatatsēnēta

(Núm 9:15-23)

³⁴ Itsa baja, Moisés carpabo wereta, nexata jane baja, Jehová pijapia-piapajubo mata-acata bajarapabo. Bajarapacueneta-ata ēnēwēnēcānua Jehová pijapenivenivenaecotia. ³⁵ Moisés nexata apocaējēpaetsi pejone-jawa bajarapabo-ēnējawabelia bajarapapajubo pejamatabēcūene, tsipajinua bajarapabo-ēnē wēnēca bitso Jehová pijapenivenivenaecotia. Nexata, apocaējēpaetsi bajaraponē pejonejawalia. ³⁶ Nexata, bajarapamatacabijawaweliacujinae, bajarapapajubojawa itsa nayotabiaba bajarapabowecua, nexata bajarapamonae pejinawanapaecarpaboxi saracabiaba pexaniawaetsinexa, pecaponaenexa itsajawabelia. Nexata, bajarapapajubo pēnapona-biaba. ³⁷ Paepatota abaxē bajarapapiapiapajubojawa aponayotabiabi, nexata bajarapamonae abaxē jinawanapabiaba bajarajota. Abaxē jamatabēcūene-ewetabiaba bajarapapajubo penayotsijawa icatsia peponaenexa. ³⁸ Nexata, bajarapamonae daxita pijanamuto Canaán nacujawabelia bajarapacuenia exananajetarubena. Bajarapamonae-ata bajarapacuenia taenajetarubena Jehová peyajawajawatsi pajubota. Nexata, pacujinae pijinia rucajopa, nexata Jehová pajubota rucabiabajopa pijacarpabo matatsēnēwetsica daxi-tamatacabijebi, bajarapacuenia merawi-ata bepetajueyabiabaruaenaesituroto bajarapapajubo. Bajarapacuenia yapētane bajarapamonae Jehová peyajawacuenetsi.

Levítico

Dioso petonajumecopatsiliwaisianë pijasacerdotewinexa

Pacuenia exanaejitsia itsa totajuita dajubi
Jehovájawabelia yabara peliwaisi

1 ¹ Jehová pijacarpabo-ënëwerena junataxuabatsi Moisés. Nexata, jumaitsi mapacueniaje:
² —¡Netsipaebijawata israelitamonaewawabelia, jumaitsimëre mapacueniaje: «Pajiwiyo paxamëyajuwënëjiwiyo capatsijitsia dajubi rajutsiaya petajuitsinexa xanë Jehovánëjawaberena, nexata capatsiana vaca, itsa jume, oveja-ata —jamëre!
³ »Nexata, itsa capata dajubi sacerdotenë daxitanë petotajuitsinexa altar-jumata pijaneconijamatabëcuene, capatsiana vaca pebito, daxitanë peperabëxanepanaenëyo.⁴ Padajubi totajuitsijitsia tawënëta xaniawaetsia tasiwabarëyanexa, bajarapajiwiyo becapata bajaraponë tajacarpabo peyacaranatsijawa pejonebaupa imoxoyojawata. ⁴ Bajarajota, pecapatsinë tsiमतानाकबेबुत्सिआने पेटताजुत्सिनेनेखा पिजानेकनिमि पेटसिजुमाखुबिनेखा. Nexata, bajarapacuenia itsa exanaena, dajubi petajuitsijawata siwajamatabëbarëyanë tsane. Siwajamatabëcuenecaewianajënua pijaneconimi. ⁵ Bajarapadajubi pecapatsinë wësinepecaucutsiana pebeyaxuabinexa xanë taitabarata. Bajaraxuacujinae, Aarón pexi, sacerdotewi, waxiyota pejana caewetsiana. Bajarapajanata pa-altar-jawa nuca tajacarpabo panabota jumatsicabiana pecobeta daxitayenepanabeje matatoyorotsia. ⁶ Nexata, ponë capatajoparena dajubinë, daxitanë petotajuitsinexatsi, copiaya boconotsiana petajuitsiwajënäeya. Bajaraxuacujinae, xaniawaetsia icatsia thabiana. ⁷ Sacerdotenë pijinia itajurutsiana isotoxaneto altar-bëxëpanawetsina. Bajarapacuenia iso xaniawaetsia tsitaxatabiana. ⁸ Bajaraxuacujinae, Aarón pexi, sacerdotewi, najumajebiana xaniawaetsia pethabijawanë bajarapa-isotota petajuitsinexa. Mapacueniaje pajebaponaename: copiaya pematabocoto. Bajaraxuacujinae, daxita panasitsijawanë najetarubena piënëjawata. ⁹ Nexata, dajubicapatsinë bequiata xaniawaetsia piënëjawanë, bajarapacuenia petopabeje, pemaxëbeje yajawa. Bajaraxuacujinae, sacerdotenë totajuitsiana bajarapadajubiyo

a 1:3 *peperabëxanepanaenëyo*: Bajarapacuenia itsa jumaitsi Dioso pejumeliwaisibaxutota, yapëtanetsi bajarapamonae pecapatsinexa apopedomaebinëyotsi, piawajënëjibinë, bajarapacuenia pexanianë-ata.

altar-jumawereca. Bajarapacuenia jiwi be-exana pacujinae capata vaca pebito petotajuitsinexatsi daxitanë pijaneconi yabara. Nexata, bajarapacuenia jiwi itsa exana petotajuitsijawata, pexaniatuxusi netonaexanaejitsia, tasiwabarëyanexa tanerajutsinë», —jai Jehová Moisés-jawabelia, petsipaebinexa israelitawijawabelia, vaca pebito petajuitsijawa yabara.

¹⁰Icatsia, Jehová jumaitsi Moisés-jawabelia:

—Itsa pijinia capatsipa ovejajo, itsa jume, chivoyo sacerdotenë petotajuitsinexatsi, nexata bajarapajiwiyo capatsiana dajubi pebitoyo, daxitanë peperabëxanepanaenëyo. ¹¹Nexata, bajarapadajubinëyo wësiñepecaucutsiana, pebeyaxuabinexa altar-muxuneneta pecujanenia,^b xanë, Jehovänë, taitabarata. Nexata, Aarón, pexi sacerdotewi, bajarapadajubijanata jumat-sicabiana pecobeta daxita bajarapa-altar-jawa matatoyorotsia. ¹²Nexata, xuacujinae dajubicapatsinë bajarapadajubinë thabiana pexaniacuenia. Nexata, sacerdotenë jebiana pethabijawanë altar-jumawereca, bajarapawi petajuitsinexa pa-iso tsibëxëpanaxataba. Bajarapacuenia copiaya buatsiana pematabocoto, xuacujinae piñënasitsijawanë yajawa. ¹³Xuacujinae, dajubicapatsinë bequiata merata xaniawaetsia piñëñawanë, petopabeje, pema-xëbeje yajawa. Nexata, xuacujinae sacerdotenë bajarapacuenia totajuitsiana daxitanë altar-jumawereca. Bajarapacuenia jiwi be-exana pacujinae capatsijitsia oveja, chivo-ata pebito, petotajuitsinexatsi pijaneconi yabara. Nexata, bajarapacuenia jiwi itsa exana petotajuitsijawata, pexaniatuxusi netonaexanaejitsia, tasiwabarëyanexa tanerajutsinë —jai Jehová Moisés-jawabelia, petsipaebinexa israelitawijawabelia, oveja, chivo-ata, petajuitsijawa yabara.

¹⁴Icatsia, Jehová jumaitsi:

—Itsa pijinia capatsipa pepunaenë petotajuitsinexatsi Jehovájawabelia pijaneconi yabara, nexata becapata anijawiria-ucucutobeje, tsiquiriwiria-ucucutoyo,^c pecunuawiria-ucucuto pejananë. ¹⁵Nexata, bajarapa-ucucutoyo petajuitsinexa altar-jumata, sacerdotenë wësitanaanaena. Bajaraxuacujinae, janayujucaena, petsicabinexa altar-yenepanajawata caeyenepanajawabelia. Xuacujinae jane baja, totajuitsiana altar-jumata. ¹⁶Petajuitsiwajënaeya bajarapa-ucucutoyo, daxita xua xaina pecuaibonaxaebëjawata jutsiana. Bajaraxua xuabiana altar-yenepana tabujawabereca, payenepananenia penetabiaba pejutsi-ipumana altar-jawawecua. ¹⁷Xuacujinae, namata-enetsiabb eje pecobetabeje corafewaetabiaya tupatitinaponaereca, tupa tsat-sinejewa daxitanëyo. Bajaraxuacujinae, matapania jane baja, sacerdotenë totajuitsiana daxitanë patajueyecae-iso altar-jumata. Bajarapatajuitsijawa pexaniatuxusi netonaexanaejitsia, tasiwabarëyanexa tanerajutsinë —jai Jehová Moisés-jawabelia.

Moisés itapeta Aarón, pexi yajawa sacerdotewinexa

8 ¹ Jehová jumaitsi Moisés-jawabelia:

² —¡Junare Aarón, pexi pebijijiwi-ata, neyajawapatsinexa taja-carpabo peyacaranatsipana baupa imoxoyojawata! ¡Bajarapacuenia

b 1:11 *pecujanenia*: Mapaversículota pecujanenia itsa jai, wowaijumeta yabarajumaitsi norteenia, waëpijiwi pijajumeta pijinia matatsënënenia. **c 1:14** *tsiquiriwiria-ucucutoyobeje*: Bajara-pawiria pewënë «törtola» wowaijumeta. Jëpa saya pebërëpiji-ucucutoxi.

caparenua sacerdotewi penaxatabijawanë, aceitera petsimata-epanaeranexa ta-itapetsicuene pitajëtsijawanexa, bajarapacuenianua pabecerro tajuit-sijitsiamë bajarapamonae pijaneconi yabara, anijanëbeje oveja pebito, bajarapacuenia-ata peya-etsi-aba levadurata matajërëabinejewa pexanaepan-jawanë! ³Netocaetuatsianamenua daxita Israel-pijinë pemo-moxi tajacarpabo peyacaranatsipanapijibaupa imoxoyojawata —jai Jehová.

⁴Moisés nexata exana pacuenia Jehová itorobatsi. Bajaraponë nacaetuatsia-exana daxita Israel-pijinë pemomoxi Jehová pijacarpabopana bo peyacaranatsijawapijibaupa imoxoyojawata.

⁵Daxita penacaetuatsicujinae, Moisés jumaitsi bajarapamonaejawabelia: —Marapacuenia naca-itoroba Jehová waja-exanaenexaje —jai. ⁶Nexata, junata Aarón, pexi yajawa, penubenaenexa daxitajiwi pitabarata. Bajaruacuujinae, bajaraponë nawaeya-exana bajarapamonae merata. ⁷Bajaruacuujinae, jumaxatata pematapijinë Aarón, sacerdotewi pepopenamatacaitorobinë penaxatatsijawa. Copiaya jumaxatata túnicanawa. Xuacuujinae, epacëta pecuepana becorreacuenia, bitso pexaniacuenia pecuejawa. Jumaxatatanua mantonawa, bajarapacuenia naniawelia pijinia penajumaxuabicatorbë, efod-wënëjawa. Bajarapanajumaxuabicatorbë xaniawaetsia ya-epacëta petsiwajënerutsimaëtoxita. ⁸Xuacuujinae, penajumaxuabicatorbë naniawelia nawëcapata penatsimipabërutsipana. Bajarapapanata jia Urim, Tumim-beje petsi-exanaedoroyota. ⁹Bajaraxuacuujinae jane baja, Moisés mataxatata Aarón, sacerdotewi pepopenamatacaitorobinë, penamataxatatsijawa. Xuacuujinae, tsi-itaparuta oronanitota pexanaepanayo, itsajota yaquinaruta, «Jehová pitapetsinëtsi», pejai-itaneto. Daxita pacuenia Jehová tonajumecopatatsi pejumaxatatsinexa pematapijinë, bajarapacuenia Moisés exana.

¹⁰Bajarapacuenia pexanaecuujinae jane baja, Moisés Jehová pijacarpabo ënëtsicaba petuxujuwi-aceiterata, pa-aceitera tsiwajënae-exana petsimata-epacaenexa Jehová pitapetsiwi. Tsicabanua Jehová pijajawanënexa daxitaxua nubena bajarapacarpabo-ënëta. ¹¹Xaniawaetsia pitajëtsinexa saicaya Jehová pijajawanexa, tsicabanua siete xuabeje dajubi petajuitabiabi-altar-nexa, daxita pecanacuenibijawanënexa bajarapa-altar-jawata, bajarapacuenianua penacobequiatsiwaxixaneto palanganawënëjawa petsiwajënae-exanetsitabu yajawa. ¹²Bajarapacuenia tsimata-epananua Aarón, pitajëtsinexa Jehová pitapetsinëtsicuene. ¹³Bajaraxuacuujinae baja, Moisés junata Aarón pexi pecujibinexatsirena. Nexata, bajaraponë xataba bajarapamonae-ata sacerdotewi penaxatabijawanë. Jumaxataba sacerdotewi pijatunicanawanë. Bajarapacuenia becorreacuenia epacëbanua pecuepanaxi. Mataxatabanua sacerdotewi penamataxatatsijawanë. Daxita pacuenia Jehová tonajumecopatatsi, bajarapacuenia exana.

¹⁴Bajaraxuacuujinae, Moisés capatsia-exana becerro pebito, ponë totajuit-sijitsia sacerdotewi pijaneconi yabara. Nexata, Aarón, pexi yajawa, becerro pebito matabocotojumawereca nacobebuatanubena. ¹⁵Nexata, sacerdotewi pijaneconi Jehová pesiwajamatabëcuenecaewinexatsi, Moisés tobeyaxuaba becerro pebito cuaibosicaucutsiaya. Bajarapabecerro pejanayajuwënëjawa pita pecobesitota petsautsinexa pemata-etocuenia pexananutsijawa altar-upijawata, petsicabinexanua matatoyorotsia altar-juma. Bajarapacuenia

exana pewecua-ajibia-exanaenexa bepenaxuirabijawami^d Jehová pitabarata, pitajëtsinexanua petotsatsijawa ëJehová pijajawanexa. ¹⁶Nexata, xuacujinae totajuita altar-jumata Jehovájawabelia becerro-ënënasitsijawanë, epatuajapato, pemara-ëthëtobeje yajawa. ¹⁷Bajaraxuacujinae, daxitawimi, peboco, petasi-ata tajuita pijataxunaebo pënëyabelia. Daxita pacuenia Jehová tona-jumecopatatsi, bajarapacuenia exana.

¹⁸Bajaraxuacujinae, icatsia Moisés capatsia-exana pa-oveja pebito totajuitsijitsia daxitanë altar-jumata. Aarón, pexi yajawa, ovejamatabocotoju-mawereca nacobebuatanubena.^e ¹⁹Nexata, tobeyaxuaba oveja pewësinë-pecaucutsicuenia. Bajaraponë pejanata tsicaba altar-juma matatoyorotsia. ²⁰Xuacujinae, xaniawaetsia thaba bajaraponë. Nexata, daxita penasitsi, pemataboco yajawa, totajuita altar-jumata. ²¹Itsiata, daxita piënëjawanë, petopabeje yajawa xaniawaetsia quiata merata. Xuacujinae, matapania daxita bajaraxuanë-ata totajuita altar-jumata. Bajarapacuenia daxitanë totajuita bajarapamonae pacuenia Jehová tonajumecopatatsi. Bajarapa-ovejayo rajutsiaya petotajuitsijawa Jehovájawabelia tsitapexaniatuxusijawatsi. Nexata, siwajamatabëcuenebarëya bajarapamonaejawabelia.

²²Bajaraxuacujinae, icatsia Moisés capatsia-exana itsanë oveja pebito, ponë tobeyaxuabijitsia pecuene-itajëtsinexa Jehová pitapetsijawa bajarapamonae saicaya petonacuenebiwinexa. Bajarapadajubinë Aarón, pexi yajawa, tsmatanacobebuatanubena petobeyaxuabijawatanexa. ²³Nexata, paepatota Moisés wësinëpecaucutsiaya beyaxuaba. Bajaraponëjanata Aarón pecujuanenia Moisés pematapijinë muxu-upitsauta. Tsautanua pecobematajaranae, petaxumatajaranae-ata. ²⁴Moisés xuacujinae junata Aarón pexi pecujibinexatsirena. Nexata, bajarapamonaejawabelia-ata bajarapadajubijana petcujuanenia muxu-upitsauta, bajarapacuenianua pecobematajaranae, petaxumatajaranae-ata. Nexata, pajana nacopata, bajarapajanata Moisés jumatsicaba dajubi petajuitabiabi-altar-jawa. Matatoyorotsianua yenepanatsicaba. ²⁵Moisés cotocaewi pa-oveja beyaxuaba, bajaraponë pemara-ëthëtobeje pita, epatuajapato penasitsijawa yajawa, daxita panasitsitonë rubena piënëjawata. Pitanua caetopa, pecujuaneniajawawa. ²⁶Moisés pitapona caebëyo caewiria canacujitsia Jehová pewënëta peya-etsi-abawecua, acueyabi pawiriatabeje pexanaepan, daxita levadurata matajërëabinejewa. Baitsi, pitapona caepanbë itsacujiru matajërëabinejewa pexanaepan, itsapan-bënu aceitera pematajërëabijawa pexanaepan, bajarapacuenia itsawiriapan-jawa, pitafacaecarëcarënaejawa. Daxita bajarapitsipan-jawanë Moisés tsijumabuata penasitsijawanë, pecujuanenia patopajawabeje. ²⁷Xuacujinae, daxita bajaraxuanë rajuta Aarón pecobejawabelia, pexi sacerdotewijawabelia-ata. Bajaraxuanë bajarapamonae yobajarabiaya athëbëabetsia rajuta Jehovájawabelia ofrendacuenia. ²⁸Bajarapacuenia pexanaecujinae, Moisés wecuanota bajaraxuanë bajarapamonae, peyajawatajuitsinexa altar-jumata copiaya

d 8:15 *bepenaxuirabijawami*: Wajanacujarubijawata Números capítulo 6 yapëtanetsi pacuenia Dioso canaëjëta jiwi bepenaxuirabiwicuenia petaenexa. Taemanua «bepenaxuirabinëcuenia tanetsi», glosariojawata. **e 8:18** *nacobebuatanubena*: Sacerdotewi penacobebuatanubenaejawata dajubinëjawabelia daxitanë petajuitsinexa (holocaustonexa), bajarajota najamatabëcuene-itajëta ëDioso petonacuenebaponaponaenexa. Pacuenia dajubinë tajuita daxitanë, bajarapacuenia daxitanë Dioso petonacuenebaponaponaenexa.

petajuitsi-oveja. Bajarapacotocaewi petajuitsijawa najamatabëcuene-itajëta Jehová sacerdotewi pitapetsijawatsi. Bajarapatuxusi Jehová tsitaxanepanatsi, nexata siwajamatabëcuenecaewa pijaneconimi bajarapamonae. ²⁹ Bajaraxuacujinae, pa-ovejajamatabëсібëрэ tsicarucatsi pepitsinexa petotajuitsinëjamatabëcuene, bajaraxua Moisés pita. Nexata, bajarapajamatabëсібëрэ yobajara-biaya athëbëabetsia rajuta Jehová jawabelia ofrendacuenia, pacuenia Jehová tonajumecopatatsi pexanaenexa. Bajarapacuenia pexanaecujinae, Moisés canacopata bajaraxua pijajawanexa.

³⁰ Bajaraxuacujinae, icatsia Moisés pita petsimata-epacae-aceitera, bajarapacuenia altar-jumata peya-etsipejanara-ata. Bajaraxuanëta tsicaba Aarón, pexijawabelia-ata, penaxatatsijawanë jawabelia-ata. Bajarapacuenia exana penajamatabëcuene-itajëtsinexa Jehová itapetsiaya pecuenetsatsijawatsi saicaya petonacuenebawanapaewinexatsi Israel-pijinë pemomoxituatua-jëta, bajarapijinia pacuenia penaxatatsijawanë nua. Bajarapacuenia nexata matapania nacopata bajarapamonae Jehová saicaya petonacuenebiwinexa sacerdotewicuenia.

³¹ Nexata, Moisés jumaitsi Aarón, pexijawabelia-ata:

—Pasetnianame pawijawanë nacopabanubena cotocaewi

patacatobeyaxuabi-ovejajajuwënëwi Jehová pijacarpabopijibaupa canacujit-sita. Xuacujinae, panajuaxaenane bajarapatsiwi levadurata matajërëabi-nejewa pexanaepan-jawanë-ata, papan pacapatame abata panetajuitsinexa panenajamatabëcuene-itajëtsijawata Jehová papeca-itapetsiwi cuene. Pacuenia bajara Ponë nacatonajumecopata pane-exanaenexa panexaejawata bajarapacopabiyajuwënëwi, bajarapacuenia xaniawaetsia pa-exanaenane.

³² Itsiata, panexaeweretsicujinae, penacopabiwi, penacopabipan-jawanua, patajuitsianame daxita altar-jumata. ³³ Bajaraxuacujinae, panacopabianame Jehová pijacarpabopanabota siete pamatacabibecuenia. Pepanepaecujinae siete pamatacabibeje, matapania pacatoxanepanaena panewecuanatixitsijawa Jehová pijacarpabo, tsipaji Jehová pacatocajëta bajarapasiete pamatacabibeje xaniawaetsia panenajamatabëcuene-itajëtsinexa bajara-Ponë papeca-itapetsiwi cuene panetonacuenebiwinexa sacerdotewicuenia.

³⁴ Daxitaxua pacato-exanatsi ajena, bajaraxua Jehová nitoroba patacatonexanaenexa panijaneconimi matamotsiaya papecasiwajamatabëcuenecawinexa. ³⁵ Nexata, panacopabianame Jehová pijacarpabopanabota, siete pamatacabibecuenia panejinawanapaenexa, siete pamerawibeje yajawa. Bajarajota, patonacuenebianame daxita Jehová papecatonajumecopatsicuenia panetëpaeyaniwa. Daxita bajara Ponë wajanacatonajumecopatsicuenia pa-exanawanapaenane —jai Moisés sacerdotemonae jawabelia.

³⁶ Jelai bajarapamonae. Daxita pacuenia tonajumecopatatsi Jehová Moisés, bajarapacuenia exana.

**Aarón, pexi yajawa, matapania taxuxuaba
sacerdotewicuenia penacuenebawanapaenexa**

9 ¹ Ocho pamatacabibecujinae, Aarón, pexi yajawa, sacerdotewi penaxanaecujinae, Moisés junata Aarón, pexi yajawa, ancianomonae, Israel-pijinë pemomoxiyajuwënëwi pewetsiwi-ata, penubenaenexa bajaraponë pitabarata. ² Nexata, Moisés jumaitsi Aarón-jawabelia:

—¡Pire becerro pebito, daxitanë peperabëxanepanaenë, nebeyaxuabinexa xamë nijaneconí yabara! Bajarapijinia pacuenia pitsianame pejananë oveja pebito, daxitanë peperabëxanepanaenë, netajuitsinexa Jehová-jawabelia. Nexata, bajaraponëbeje daxitanëbeje tajuitsianame altar-jumata Jehová pitabarata. ³Bajaraxua nexanaecujinae, nexata israelitamonaejawabelia itorobianame bajarapamonae pijinia pecapatsinexa chivo pebito, pexanianë, netotajuitsinexa pejamatabëcuenecaewia-exanaenexa Jehová bajarapamonae pijaneconimi. Bajarapacuenia capatsiananua becerro pebito, bajarapacuenia oveja pejananë pebito, caewai pexainaenëbeje, daxita peperabëxanepanaenëbeje, bajaraponëbeje netotajuitsinexa daxitanë altar-jumata. ⁴Bajarapacuenia itorobianame pecapatsinexa itsanë vaca pebito, oveja pebito yajawa, bajaraponëbeje netotajuitsinexa Jehová-jawabelia, penajamatabëcuenie-itajëtsinexa caejamatabëcuenie penajuaxainaexae namata-enetsia, pesiwajamatabëcuenecaewixaetsi pijaneconimi. Capatsiananua trigobeno pematajërëabijawa aceiterata, bajaraxua netotajuitsinexanua ofrendacuenia altar-jumata. Bajarapacuenia pa-exanaename, tsipaji raja Jehová nacatsitanaitajëtsiana ajena —jai Moisés, Aarón-jawabelia.

⁵Jejai nexata israelitamona. Nexata, capona Jehová pijacarpabojawabelia, daxita bajarapacuenia Moisés, Aarón-beje, pexanaenexa. Nexata, daxita bajarapamonae israelitawi pata Jehová pijacarpabo imoxoyojawata, bajarajotalia penubenaenexa Jehová pitabarata. ⁶Nexata, Moisés jumaitsi bajarapamonaejawabelia:

—Jehová raja naca-itoroba waja-exanaenexa maxuaje. ¡Nexata, wajanacatorobicuenia pa-exanare! Bajarapacuenia itsa pa-exanaename, nexata Jehová pacatsitanaitajëtsiana paxamë pijapeniweniwenacotia yajawa —jai Moisés.

⁷Bajaraxuacujinae, Moisés jumaitsi Aarón-jawabelia:

—Cujiremena baja altar-jawaberena. Bajarajane tajuitsianame Jehová pewënëta pabecerro pebito capatame nijaneconí yabara. Bajaraxuacujinae, tajuitsianame pachivo capatame daxitanë netajuitsinexa Jehová-jawabelia. Bajaraxuacujinae jane baja, totajuitsianame padajubi israelitamona capata pijaneconí yabara, padajubinua capata petajuitsinexa daxitanë. Daxita bajarapacuenia exanaename Jehová wajanacatonajumecopatsicuenia —jai Moisés.

⁸Nexata, Aarón jejai. Cujilia altar-jawabelia pebeyaxuabinexa dajubi. Nexata, becerro pebito wësinpecaucutsiaya natobeyaxuaba pijaneconí yabara. ⁹Bajarapaepatota pijinia, Aarón pexi capona paxajawabelia bajarapabecerro pejana. Nexata, Aarón pecobesitota tsauta bajarapajanata daxita altar-jawa pemata-etobejecuenia pexanaejawanë. Xuacujinae, penacopatsijana waxiyota, bajaraponë daxita epabajaraba bajarapa-altar-jawa petabujawata. ¹⁰Bajaraxuacujinae, ponë beyaxuaba petajuitsinënexa pijaneconí yabara, bajaraponëjawanë tajuita altar-jumawereca penasitsijawanë, bajarapacuenia pemara-ëthëtobeje penasitsijawanë yajawa, bajarapacuenia epatuajapato penasitsijawanë yajawa. Pacuenia baja Jehová itoroba Moisés pexanaenexa becerrojawabelia, bajarapacuenia exana. ¹¹Itsiata baitsi jane, pewi, pebocoto-ata tajuita israelitawi pijataxunaebowecua wayafuabelia tajëtojawabelia.

¹² Bajaraxuacujinae, Aarón wēsinepecaucutsiaya beyaxuaba pa-ovejajo capata petajuitsinexa daxitanēyo altar-jumawereca. Aarón pijinia pexi tocaponatsi pejana, bajarapajanata altar-jumawereca petsicabinexa, bajarapacuenia daxitayenepanabeje yajawa. ¹³ Bajaraxuacujinae, bajarapathabiwimi tocapataponatsi caejawa canacujitsia pematabocoto yajawa. Nexata, xua-cujinae tajuita bajarapadajubiwijawami Jehovájawabelia altar-jumawereca Jehová pitorobicowēyatsi. ¹⁴ Bajaraxuacujinae, piñējawanē, petopajawa-beje, pemaxēbeje-ata pequiatsicujinae, nexata bajaraxuanē-ata tajuita altar-jumata, pacuenia tajuitabiaba daxitanē.

Aarón totajuita padajubi israelitawi capata petotajuitsinexatsi

¹⁵ Bajaraxuacujinae, Aarón totajuita chivo pebito Jehovájawabelia, pejamatabēcuenecaewia-exanaenexa daxita israelitawi pijaneconimi. Bajarapacuenia pexanaenexa, bajaraponē pita pachivo capata israelitawi pijaneconi yabara, bajarapamonae petotajuitsinexatsi. Nexata, bajaraponē wēsinepecaucutsiaya beyaxuaba. Bajaraxuacujinae, totajuita israelitawi pijaneconimi pejamatabēcuenecaewia-exanaenexa Jehová. Pacuenia nato-exana copiyapijidajubinējawabelia, bajarapacuenia-ata exana. ¹⁶ Bajaraxuacujinae, totajuita daxitanēbeje^f altar-jumawereca, pabecerro, pa-oveja-ata israelitawi capata bajaraxuanexa. Jehová petonajumecopatsicuenia, bajarapacuenia exana. ¹⁷ Bajaraxuacujinae, Aarón pita trigobeno aceitera pematajērēabijawa, ofrendacuenia petotajuitsinexa altar-jawata. Pita bajarapatrigoyajuwēñjawa caecobepapatocuenia peyajawatajuitsinexa dajubi.^g Bajaraponēbeje tajuita pematatsēñē pa-ovejabeje batajuitabiaba daxitanē-beje caebajayacunua canacujitsia, caecaniwiyo canacujitsianua.

¹⁸ Nexata, Aarón wēsinepecaucutsiaya beyaxuaba vaca pebito, bajarapacuenia oveja pebito, ponēbeje israelitamonae capata petotajuitsinexatsi Jehovájawabelia, caejamatabēcuenē penajuaxainaexae namata-enetsia, pesiwajamatabēcuenecaewixaetsi pijaneconimi. Nexata, Aarón pexi tocaliatsi bajarapadajubijana altar-jumawereca, daxitayenepanabeje petsicabinexa bajarapajanata. ¹⁹ Bajarapacuenia-ata tocaliatsi toronasitsijawanē, ovejanasitsijawanē-ata; panasitsijawanē xaina pebosotojawata, bajarapacuenia piñēpijijawa, pemara-ēthētobeje yajawa, bajarapacuenia epatuajapato penasitsijawa yajawa. ²⁰⁻²¹ Nexata, bajarapanasitsijawanē yajawajeba ovejabeje, vacabeje pemipabēbejemumata. Bajaraxuacujinae, Aarón totajuita bajarapanasitsijawanē altar-jumata. Itsiata, pemipabējawabeje apotajuitsi. Bajaraxua pecujuatopabeje-ata, yobajarabiaya athēbēabetsia rajuta Jehovájawabelia, pacuenia Jehová baja tonajumecopatatsi^h pexanaenexa Moisés. ²² Nexata, Aarón namaxēyotabeje athēbēabetsia, israelitamonae pematatsēñēwajētsinexa, pexaniacuenia pecuene-itajētsinexa Jehová pewēñēta petowajētsi-jawata. Bajaraxua exana petotajuitsicujinae chivo Israel-pijinē pemomoxi

f 9:16 totajuita daxitanēbeje: Taema Lev. 9:3. **g 9:17 peyajawatajuitsinexa dajubi:** Caematacabi canacujitsia sacerdotewi tajuitabiaba Diosonexa anijakilobejecuenia trigobeno. Bajaraxua mata-jērēatabiaba olivocuaiji-aceitera, incienstonanipērē yajawa. Nexata, caebajayacunua canacujitsia epatua tajuitabiaba, caecaniwiyo canacujitsia pijinia itsa-epatuajawa. Taema Lev. 2:1-2, 6:19-23. **h 9:20-21 tonajumecopatatsi:** ¡Nepapētaenexa pacuenia Dioso tonajumecopatatsi, natoyorobare Lev. 7:28-35!

Jehová pejamatabëcuenecaewia-exanaenexa pijaneconimi, bajarapacuenia padajubibeje totajuita daxitanëbeje, bajarapacuenia padajubibeje totajuita penasitsijawanë caejamatabëcuene penajuaxainaexae namata-enetsia pesi-wajamatabëcuenecaewixaetsi pijaneconimi. Daxita bajaraxua pexanaecujinae, Aarón namaxëyotsiaya matatsënëwajëta Israel-pijinë pemomoxi Jehová pexaniacuenia peyawenonaenexatsi. Xuacujinae baja, altar-jawa wecuanatixita. ²³ Bajaraxuacujinae, Moisés, Aarón-beje junuabeje Jehová pijacarpabonëabelia. Nexata, bajaraponëbeje pepitsapaecujinaerena bajarapabowecua, Aarón-beje tsiwajënaecuenewajunupaeba Jehová pexaniacuenia peyawenonaejawanexatsi israelitawi. Nexata, bajarapaepatota Jehová jane baja naitajëta pijapeniweniwenacotia yajawa daxita bajarapamonae pitabarata. ²⁴ Nexata, Jehová pijaniweniwenacotiajawawetsica, copatsica isoto pejopaenexatsica altar-jumabetsica. Nexata, padajubiwi, penasitsijawanë yajawa, abaxë bobena altar-jumata tajuitsinejewa, daxita bajaraxuanëmi weriajawa bajarapa-isotota. Nexata, bajarapacuenie itsa tane israelitawi, ayaijumeta cuenewënëxaniata Jehová pinijicuene pexanaenëcuene yabara, pebarëyajamatabëcuenejawata. Bajarapamonae irataeya bobenajunua yayiataeya Jehová pitabarata.

Dioso tajuitatsibeje Nadab, Abiúbeje

10 ¹ Itsamatacabi Aarón pexënatobeje, Nadab, Abiúbeje, pibisiacuene exanabeje Jehová pitabarata. ¡Bajaraponëbeje caenë canacujitsia pita pijajawa incienso petajuitabiabiwaxiyonexa, iso-ita-ire yajawa, petajuitsinexa inciensopërë Jehová pitabarata! Nexata, bajarapa-ita-irejumawereca përeca inciensopërë, petotajuitsinexa Jehová pitabarata. Itsiata, bajaraponëbeje apo-exanaebeje Jehová petonajumecopatsicueniatsi sacerdotewi. Piaithiacuenia¹ saya exanabeje. ² Nexata, Jehová pecotiajawawetsica pitsapaica isoto bajaraponëbej jawabereca. Pa-isoto baja tajuatsibeje. Nexata, bajaraponëbeje tēpabeje Jehová pitabarata petajuecueniatsibeje jonenejewa abaxë Jehová pijacarpabojawabelia. ³ Bajaraxuacujinae, Moisés jumaitsi Aarón-jawabelia: —Bajaraxuayaniwa cajena nacatsipaeba Jehová pacujinae nacajumaitsi mapacueniaje:

‘Pasacerdotenë necujitsiana xanëjawaberena, bajaraponëjawabelia nexata xanë tsitajëtsianajë daxita piabejecuene tanawecua-itoyanë, tsipaji aneconijibia taponaponaenë daitawecua.

‘Nexata, daxita israelitawi pitabarata, tsitanaitajëtsianajë tajapinijicotia yajawa,¹ daxita xaniawaetsia taneyaiyataenexa,’ nacajai Jehová —jai Moisés.

Bajarapacuenia pejumaitsiyawata, Aarón moya nuca, pejamatabëcuene-anepanaejawami Jehovájawabelia penajamatabëcueneacataitsixae.

⁴ Bajaraxuacujinae, Moisés junata Misael, Elzafán-beje, pexënatobeje Uziel, Aarón paxuanë. Jumaitsi bajaraponëbej jawabelia:

—¡Naxatsia, paxamëbeje pajutsianamebeje maponëbeje, panijamonaenë-mibeje, Jehová pijacarpabopanabowecua! Pacaponaenamebeje wajataxunaebonëpënëjawabelia —jai Moisés.

i 10:1 *Piaithiacuenia*: Taema «Nadab, Abiúbeje», glosariojawata. j 10:3 *tajapinijicotia yajawa*: Taema «Dioso pecotia», glosariojawata.

⁵Nexata, bajaraponëbeje jejai. Siwaponabeje Jehovah pijacarpabopanabo-jawabelia, pejutsinexa petëpaenëmibeje. Bajarapapetëpaenëbeje pejumaxa-tatsinawa cobewaetabiaya caponatsibeje pijataxunaebonëwecua tajëwecua, pemëthëtsinexatsi pacuenia baja Moisés itorobatsibeje. ⁶⁻²⁰ [...]

Pacuenia sacerdotewi pepopenamatacitorobinë joneyabiabijitsia

Lugar Santísimojawabelia caeto caewai canacujitsia

16 ¹Aarón pexënatobeje petëpaecujinae, ponëbeje tēpa itaxutejema bitso Jehovah pijataxunae pimoxoyotsixaebeye, bajaraxuacujinae Jehovah barëcuaicuajiai Moisés-jawabelia. ²Nexata, Jehovah jumaitsi:

—¡Jumaitsimëre nematapijinë Aarón-jawabelia, bajaraponë bitso itaxutejema pejoneyabiabiyaniwa carpabo-ënë peyatu-ucutsipana pënëyabetsia Lugar Santísimojawata, bajarajota penucaeyaniwa tajabaula pematapawajënaeya, jiwi pijaneconimi tasiwajamatabëcuenecaewitaxunae, bajaraponë petëpaeyaniwa! Bajarapacuenia apobe-exanae, tsipaji raja xanë naitajëta-biabajë bajarapabaulamatapa matatsënëta itarërëbojawata. ³Aarón pejone-wajënaeya tajacarpabo-ënëjawabelia, becapata anijadajubibeje petajuitsinexa pijaneconijamatabëcuene. Nexata, becerro pejananë pebito tajuitsiana pijaneconi yabara tasiwajamatabëcuenecaewinexa. Bajarapijinia pacuenia oveja pejananë pebito tajuitsiana daxitanë pijaneconimatamotsiaya. Mata-pania bajarapacuenia penato-exanaecujinae, jonena Lugar Santísimojawata.

⁴Itsiata, pejonewajënaeya Aarón benawanenua merata. Bajaraxuacujinae, naxatatsiana sacerdotenë penaxatatsilinowirianawa, xua ësacerdotewi penaxatatsijawa. Bajarapacuenia naxatatsiana bēpënëa petsiwajënaerutsijawa linowiriapanata pexanaejawa. Na-epacëtsiananua linopanata pexanaejawa. Bajarapacuenia namataxatatsiana linopanata pexanaejawa. Daxita bajaraxuanë saicaya taitapetsijawa sacerdotewi penaxatabijawanexa. Daxita bajaraxua pexanaecujinae, xanepana baja pejonejawa. ⁵⁻¹⁰ [...]

¹¹»Xuacujinae, Aarón capatsia-exanaena itsajiwi pabecerro pebito pewajënaeya nato-itapeta penatotajuitsinexa pijaneconi yabara. Nexata, bajarapabecerro wësinepecaucutsiaya beyaxuabiana. Xuacujinae, altar-jumata tajuitsiana tasiwajamatabëcuenecaewinexa pijaneconimi, bajarapacuenia pijabopijiwi pijaneconimi yabara-ata. ¹²¡Bajaraxuacujinae, pitsiana incienso petajuitabiawaxiyo, pejenexa pitajuruajawi-iso-ita-ire pepitsijawa pepo-altar-wecua panabo penucaejawa! Pitsiananua anijacobejapatobejecuenia pexaniacuenia pecaquiatsi-inciensoanipërëjawanë pexaniatuxujuwijawa peya-etabiawixiowecua incienso petajuitabiabi-altar-nexa pejumata, pecaponaenexa peyacaranatsipana pënëyabetsia, Lugar Santísimojawabetsia. ¹³Nexata, jiwi pijaneconimi tasiwajamatabëcuenecaewitaxunae pewajënaeya, penucaenë përecaena inciensojawa iso-ita-irejumawereca, petajuenexa. Nexata, bajarapapexaniatuxujuwi-ëtsëxë junaenina, pemata-acatsinexa bajarapatsëxëta tajabaula pematapajawabetsia. Nexata, bajarapacuenia Aarón itsa exanaena, Lugar Santísimo jone-ata, apotëpae tsane.

¹⁴Bajaraxuacujinae, pitsiana becerro pejanayajuwënëjawa, ponë beyaxuaba pijaneconimi tasiwajamatabëcuenecaewinexa. Nexata, pecobesitota tsi-cabiana tajabaulamatapa pewajënaewetsina. Pijinia muxübërëtsicabiana pecobesitota siete xuabeje bajarapamatapajawa. ¹⁵Bajaraxuacujinae,

tajacarpabo panabuabelia icatsia wēsinepecaucutsiaya beyaxuabiana chivo, ponēyo beyaxuabijitsia daxita israelitawi pijaneconimi tasiwajamatabēcuenecaewinexa. Nexata, bajarapachivojana caponaena tajacarpabo-ēnēyatu-ucutsijawabetsia, Lugar Santísimojawabetsia. Bajarajotatsia, tsicabiana tajabaula jiwi pijaneconimi tasiwajamatabēcuenecaewimatapata, pacuenia exana imata becerrojanata. Baitsi, jumatsicabiana jiwi taitaxutsoniatætaxunæjawata, bajarapacuenia bajarapamatapamuxubērējawa. ¹⁶ Nexata, bajarapacuenia pexanaejawata, wecua-ajibia-exanaena daxita bepenaxuirabicuenemi xaina baja Lugar Santísimo, petsijumajopaexae Israel-pijinē pemomoxi pibisiacuene pexanaeneconijamatabēcuenē, bajarapijinia pacuenia bajarapamonæ pijaneconi apotanejumecowēnētabiabijawami, daxita papibisiacuene pexanabiabijawamiwecua. Bajarapacuenianua tsicabiana copiya peyatu-ucutsitaxunæ tajacarpabopijijawa, Lugar Santojawa, pewecua-ajibia-exanaenexa paneconi xaina jiwi pijaneconimi, tajataxunæ bajarapamonaetuatuajēta pe-ecaexae —jai Jehová Moisés-jawabelia.

¹⁷Icatsia, Jehová jumaitsi:

—Pacujinae Aarón junua tajacarpabo-ēnēta Lugar Santísimojawa-betsia pejumatsicabinexa tajabaulamatapa becerro, chivobeje pejanata tanejamatabēcuenecaewia-exanaenexa israelitawi pijaneconimi yabara, bajarapaepatota itsajijiwo-ata apobejone tajacarpabo-ēnēabelia Lugar Santojawata pepitsapaewabelia bajaraponē. Aarón petsicabicujinae tanejamatabēcuenecaewia-exanaenexa bajaraponē pijaneconimi, daxita israelitawi pijaneconimi yabara-ata, ¹⁸bajaraxuacujinae, pitsapaena tajarapabopanabuabelia itsajota nuca altar-jawa. Bajarapa-altar-jawata pexanaejawa pemata-etocuenia tsautsiana bajarapadajubibeje pejanata. Bajarapacuenia daxita matatoyorotsia altar-jawa tsicabiana. ¹⁹Bajaraxuacujinae, pecobesitota jumatsicabiana pejanata daxitanenia siete xuabeje tsaponæ. Bajarapacuenia nexata wecua-ajibia-exanaena bajarapa-altar-jawa bepenaxuirabicuene pexinaejawa, penucaexae Israel-pijinē pemomoxituatuajēta, bajarapamonæ pibisiacuene pexanawanapaewixae —jai Jehová Moisés-jawabelia. ²⁰⁻³⁴ [...]

**Pacuenia jiwi na-urataejitsia nacaemonæ,
penaquettsiataeyaniwa, penapitsiyaniwanua**

(Lev 20:10-21)

18 ¹ Jehová itsaliwaisianē juya tonajumecopata Moisés petsipaebinxæ Israel-pijinē pemomoxijawabelia. Nexata jumaitsi:

²—Mapacueniaje jumaitsi Israel papemomoximējawabelia: «Xanē raja Jehová panijaDIOSonē. ³ ¡PanijaDIOSoxaenē pētsa nexata pacuenejēpame Egipto nacuapijiwi pexanaecuenejawanēmi panejinawanapaenacuamijawata! ¡Bajarapijinia pacuenia pētsa pacuenejēpame Canaán nacuapijiwi, panacuajawabelia pacamatapatonatsi panejinawanapaenacuatænæ! ¡Pētsa bajarapamonæ pexanaecuene pacuenejēpame! ¡Pētsa pajumecowēnētamenua bajarapamonæ pitorobiliwaisianējawalia, bajarapacuenia panæna-ewetsinexa patacatonajumecopatsiliwaisianēwecua! ⁴ ¡Biji rajane, xaniawaetsia panejumecowēnere patacatonajumecopatsiliwaisinē!

Pa-exanawanapaenamenua patacatocaëjësicuenia. Bajarapacuenia bepa-exanawanapame, tsipaji xanë raja Jehová panijaDIONONë. ⁵ ¡Nexata, pajumecowënëre patacatonajumecopatsiliwaisianë, patacatocaëjësicuenia pane-exanawanapaenexa, tsipaji pajiwi jumecowënëtaponaponaena bajaraxuanë asaë tsaponaponaë tsane! Xanë raja Jehovánë.

⁶ ¡»Bajaraxuata, pëtsa paxamëyajuwënënë quenetsiatane bitso imoxoyo pijamonaewa! Xanë Jehovánë paca-itawetatsi. ⁷ ¡Pëtsanua itsajijiwi-ata nacuene-itajëta paxa apopeyaiyataejawa,^k pena pequenetsiatæjawata! Penaxae, apobe-exanae bajarapacuenia. ⁸ ¡Bajarapacuenianua pëtsa quenetsiatane penawa! Paxa pijawaxae apobetoquenetsiatæ, bajarapacuenia apo-peyaiyataejawatsi penacuene-itajëtsiyaniwa.

⁹ ¡»Pëtsa paxamëyajuwënënë quenetsiatane pematapijiwa, peyuyapijiwa-ata, tsipaji bajarapowa pepopijamonaewa! ¡Bajarapacuenia pëtsa exana caepaxa apo-exanae-ata, caepena apo-exanae-atabeje, tsipaji tsiteca pepopijamonaewa! Bajarapacuenia pebi pexi pexainaenë itsa pita petiriwa pijinia pexi pexainaewa, nexata apobequenetsiatæ penawa pexënatoyo, naexanae-ata tsipae saicayajawabelia bajaraponë peponaponaenacuawecua.

¹⁰ ¡»Pëtsa paxamëyajuwënënë quenetsiatane pemomoyo, pexënatota powa penaitajëtsiwa, powa-ata naitajëta pexënatoyota! Bajarapacuenia itsa exanaejitsipa, bitso acue-ura tsipae daxitajiwi pitabarata, pepopiauracuene pexanaexae pemomoyojawabelia.

¹¹ ¡»Pëtsa paxamëyajuwënënë quenetsiatane paxa pexënatoyo, powayo xaina penawajawabelia, tsipaji bajaraponënexa bajarapowayo pematapijiwa, itsa jume, peyuyapijiwa!

¹² ¡»Pëtsanua paxamëyajuwënënë quenetsiatane pame, powa paxa pematapijiwa, peyuyapijiwa-ata, tsipaji bajarapowa paxa pijamonaewa imoxoyo!

¹³ ¡Bajarapacuenianua pëtsa quenetsiatane penawa, powa pena pematapijiwa, peyuyapijiwa-ata, tsipaji pena pijamonaewa imoxoyo! ¹⁴ ¡Bajarapacuenia pëtsa quenetsiatane paxuanë pijawa, paxa pijamonaenë pijawa, tsipaji bajarapowa penawa!

¹⁵ ¡»Pëtsa paxamëyajuwënënë quenetsiatane pecopenayo, tsipaji raja bajarapowa pexënatoyota pijawa!

¹⁶ ¡»Pëtsanua quenetsiatane pematapijinë pijawa, bajarapacuenia peyuyapijinë pijawa-ata! Pijamonaenë pijawaxae apobetoquenetsiatæ bajarapacuenia pe-urabinexa.

¹⁷ ¡»Paxamëyajuwënënë pepitsiwa pëtsa coxiquenetsiatane, pepitsiwa pemomoyo-ata! ¡Bajarapacuenia pëtsa pita pexënatota penaitajëtsiwa, itsa jume, pexënatoyota-ata penaitajëtsiwa! Bajarapowa pepitsixae, nexata bajarapowa pexi, pemomoxi-ata bitso imoxoyo pijamonaë bajaraponë. Itsa apojanapanabi tsipae bitso piabejecuene exanaejitsipa bajaraponë.

¹⁸ ¡»Itsa pitame petiriwa nijawanexa, pëtsa yajawapitame bajarapowa peyuyapijiwa, pematapijiwa-ata! Matapania itsa cawecuatëpaejitsipa nijawa, catoxanepanaejitsipa nepitsinexa nijawami pijamonaewa.

k 18:7 *apopeyaiyataejawa*: Rowialia jiwitonë apobepitsi pena, penawa-ata pijawanexa, paxa xuabi-ata picani. Taema 1Co 5:1. Orijibia, apobe-urabitsi waxa, waenabeje, pia-uracuene yabara pacuenia Cam to-exana paxa Noëjawabelia. Taema Gén. 9:21-22.

¹⁹»Pebi apobequenetsiatae papetiriwa naboxonabaponapona, pamataca-bibeje abaxë janabaponaponatsi, tsipaji bajarapowa bepenaxuirabiwacuenia ponapona taitabarata.

²⁰¡Pëtsa quenetsiataneme itsanë pijawa! Bajarapacuenia itsa exanaejitsi-pame benenaxuirabinëcuenia¹ taitabarata nacopatsipame.

²¹»¡Pëtsa paxamëyajuwënëñë coxitajuita jumapecataeya pexanaenë Moloc-wënëñëjawabelia, peyawenonaenexatsi pewajëtsicuenia! Bajarapacuenia pexanaejawata, najamatabëcuene-itajëta tanewënëñëquenetsiataejawa panijaDiosonëñë jiwi pitabarata. Xanë raja Jehovánë.

²²»¡Pëtsa pebiijiwi pewënapebijawabelia pewitota pibisiacuene exana! Bajarapitsicuene bitso pepota-itoyacuene. ²³¡Bajarapacuenia pëtsa pebi-jiwi, petiriawi-ata pewitota pibisiacuene exana dajubinëjawabelia, unupijinëjawabelia-ata! Bajarapacuenia itsa exana, Jehovánë taitabarata acuenebeje bitso.

²⁴»¡Pëtsa bajarapitsipibisiacuenejawanë pa-exaname bepanenaxuirabiwi-cuenia panenacopatsiyaniwa taitabarata! Bajarapitsipibisiacuene pexana-wanapaexae pamonae jinawanapa maparucaeje patacarajutsinacuatanaexa, bajarapitsicuene tacuene-itoyaxae, bepenaxuirabiwicuenia jinawanapa taitabarata, pijanacua-ata bepiaxuiranacua naexana. Bajaraxuata, jutsianajë bajarapamonae bajarapanacuawecua, pijanacuami juya patacarajutsinexa. ²⁵⁻²⁶ [...] ²⁷Daxita bajarapitsicuenejawanë exanawanapa Canaán nacuapi-jiwi, pamonae pacatsiwajënaejinawanapa bajarapanacuata. Nexata, bajarapanacua netsita piaxuiranacua. ²⁸ [...] ²⁹Paxamëyajuwënëñë bajarapitsicuene itsa exana, bajaraponë panawecuacapsapaeya-exanaename Israel papemomoximëwecua, saicayajawabelia apotajajiwiyajuwënëñëcuenia-ata panetaenexa», jamë tsane —jai Jehová Moisés-jawabelia israelitawi yabara. ³⁰ [...]

**Pacuenia jiwi naneconitanajetarubena
piaurawijawabelia pibisiacuene pexanaexae**

(Lev 18:6-24; Deut 18:9-13)

20 ¹Icatsia, Jehová jumaitsi Moisés-jawabelia:
²—¡Marapacuenia jumaitsimëre israelitawijawabelia, bajarapamonae tanejumecowënëtabiabinexa: «Paxamë pa-israelitawiyajuwënëñëjiwiomë itsa nacoxitajuitsiana jumapecataeya pexanaenë Moloc-wënëñëjawabelia, bajarapajiwiyo pepacuene pabeyaxuabianame, panetseconaecuenia ibotonëta. Bajarapijinia pacuenia pa-exanaenamenua saicayanacuapijinëjawabelia, pajiwiyo paxamëtuatuajëta naponapona itsanacuawerena pepatsinë-ata. ³Pajiwiyo nacoxitajuitsipa Moloc-jawabelia, bajarapajiwiyo pexanaecuene taniji betanetonaxuirabia-exanaejawa tajacarpabo. Bitso pibisiacuena tane-wënëñëquenetsiataecuenenua itajëta. Bajaraxuata, bajarapajiwiyojawabelia bara-anaepanaenajë tananeconitsia-exanaenexa, tawecuatsatsinexa

1 18:20 benenaxuirabinëcuenia: Pepacuene Dioso rowialia itoroba bajarapacuene pexanaewi pebeyaxuabinexa. Taema Lev. 20:10.

Israel-pijinē pemomoxiwecua, saicaya peponaponaenexa, apotajajiwicuenia-ata tataenexa. ⁴⁻⁵Orijibia, pajiwi yawajunuaxaina, apobepetaewicuenia penataenexa ponē penacoxitajuitsinē Moloc-jawabelia, bajarapamonaē yajawananeconitsia-exanaenajē penacoxitajuitsinē apopenaneconitsia-exanaexae petēpaecuenia. Nexata, bajarapamonaenua wecuatsatsianajē Israel-pijinē pemomoxiwecua apotajajiwicuenia tataenexa daxita pijamonae yajawa. Baitsi, apobeyaxuabixae bajarapamonaē najamatabēcuene-itajēta caejamatabēcuene pexainaejawa penacoxitajuitsinējawabelia, peyaiyataenexa Moloc xanēwecua», jamēre penacoxitajuitsiyaniwa israelitawi!

⁶»Orijibia jumaitsimēre apotajitsipaecuenē pexanaeyaniwa, pacuenia xanē Jehovánē bitso bara-anaepanaenajē pajiwi mapitsipibisiacuene exana: penatojaitsiwi itsanē peyanijobicuenia peyapētaeya-exanaenexatsi itsacuenajawa pijacujirucuenia pe-ējēbijawata,^m bajarapijinia pacuenia malicaijawabelia peyanijobiwi, jiwijumapianējawabelia peyanijobiwi-ata. Pamonaē natojaitsiana pesiwanajamatabēcuenecopatsixae bajarapitsiwijawabelia peyawenonaenexatsi, xanē acuenetaejitsibinē. Bajaraxuata, naneconitsiaya wecuatsatsianajē Israel-pijinē pemomoxiwecua, apotajajiwicuenia tataenexa. ⁷!Pētsa panacofēnētame patajajiwicuenemē, panena-exanaeyaniwa bajarapitsipibisiacuene! ¡Biji rajane, panacuenexaniawaere pibisiacuene pane-exanaeyaniwa, aneconijibia panejinawanapaenexa taitabarata, tsipaji raja xanē Jehovánē panijaDioso ta-aneconijibinē tsaponaponae! ⁸Nexata, xaniawaetsia bepanejumecowēnētawanapame patacatonajumecopatsiliwaisianē, tsipaji xanē Jehovánē patacawecuatsatsinē daxita pibisiacuene pane-exanaejawawecua, xaniawaetsia panejinawanapaenexa taitabarata», jamēre israelitawijawabelia! —jai Jehová.

⁹»Orijibia jumaitsimē tsane: «Pajiwiyo bitso pibisiacueneta petēpaejanitsicuenia bijatane paxa, pena-ata, bajarapacuenia-ata apo-itaxutobejiobiataē peyawenonaeyaniwa, bajarapajiwiyo pabeyaxuabianame. Bajarapacuenia pexanaexae paxajawabelia, penajawabelia-ata pijacuata naneconita petēpaenexa.

¹⁰»Bajarapacuenia ponē toquenetsiatane itsanē pijawa, bajaraponē pabeyaxuabianamebeje petiriwa-ata yajawa.

¹¹»Ponē tobarēmajita paxa pijawa, bajaraponē apoyaiyataē paxa. Nexata, bajaraponē pabeyaxuabianame pebarēmajitsiwa yajawa. Bajarapajiwiibeje bajarapacuenia pexanaexae pijacuata naneconita petēpaenexa.

¹²»Ponē quenetsiatane pecopenawayo, pexēnato pijawa, bajarapajiwiibeje panajuabeyaxuabianame. Bajarapacuenia bitso piacujirubejecuene bajarapajiwiibeje pexanaexae, nexata pijacuata naneconita petēpaenexa.

¹³»Ponē pewēnapebijiwiawabeliaⁿ pewitota pibisiacuene exanaena, bajaraponēbeje panajuabeyaxuabianame, tsipaji bitso Jehová pepopitoyacuene exanabeje. Bajarapacuenia pexanaexaebeje bajaraponēbeje, pijacuata naneconitabeje petēpaenexa.

m 20:6 *pijacujirucuenia pe-ējēbijawata:* Taema Deut. 18:8-13. **n 20:13** *pewēnapebijiwiawabelia:* Rom. 1:26-27-jawabelia, nacayapētaeya-exana pacuenia petiriawi-ata bajarapacuenia itsa exana, Dioso cuene-itoya bitso. Nexata, Mapaversículoje itajētsi-ata ēpebijiwi yabara, itsiata caecuene xaina petiriawi-ata.

¹⁴»Ponë pita petiriwa pijawanexa, itsa yajawapita penanua, bitso exana piabejecuene. Nexata, bajarapamonae isotota panetajuitsicuenia pawe-rebiabianame, bajarapacuene pane-ajibia-exanaenexa paxamëtuatuajëta bajarapitsipibisiacuene.

¹⁵⁻¹⁶»Papebi, papetiriwa-ata, pewitota pibisiacuene exanaejitsipa dajubinëjawabelia, unupijinëjawabelia-ata, daxita saya bajarapamonae panajua-beyaxuabianame. Bajarapamonae bajarapacuenia pexanaexae, pijacuata naneconita petëpaenexa.

¹⁷»Ponë pitsipa pijawanexa pejuyapijiwa, itsa jume, pematapijiwa-ata, powa paxa pexënatoyo, itsa jume, itsa pena pexënatoyo, bajarapajiwiubeje panawecuapitsapaeya-exanaename daxitajiwi pitabarata, saicayajawabelia peponaponaenexabeje Israel papemomoximëwecua, apotajajiwiubejecuenia panetaenexa. Bajarapacuenia pato-exanaenamebeje bitso pibisiacuene pexanaexabeje. Bajarapajiwiubeje nacaemonaejiwi-atabeje penaperabëquenetsiataexabeje, bitso pia-uracuene exanabeje.

¹⁸»Ponë quenetsiataena petiriwa penaboxonabaponaponaejawata, pamatacabibeje abaxë janabatsi, bajarapajiwiubeje panajuacapitsapaeya-exanaename saicayajawabelia peponaponaenexabeje Israel papemomoximëwecua, apotajajiwiubejecuenia panetaenexa.

¹⁹»Ponë quenetsiataejitsipa pame, paxa pematapijiwa, pejuyapijiwa-ata, bajarapacuenia penawa-ata, pena pematapijiwi-ata, pejuyapijiwa-ata, bajaraponë pewitota pibisiacuene exana imoxoyo pijamonaewajawabelia. Nexata, bajarapajiwiubeje pananeconitsia-exanaename imoxoyo napijamonaejijiwi-beje penaquenetsiataejamatabëcuenebeje.

²⁰»Ponë tobarëmajitsipa paxuanë pijawa, bajarapacuenia paxuyo pijawata, najamatabëcuene-itajëta apopeyaiyataejawa pijamonaenëbeje. Bajarapajiwiubeje pexanaeneconi nexata tsijumajopaenatsibeje. Jehová tocopatsiana bajarapajiwiubeje apopexainaenexabeje pexi, mawecojiwiubejecuenia penacopatsinexabeje petëpaejawabelia, pijawiriamaëto petocopiarucaenexatsibeje.

²¹»Ponë pitsipa pematapijinë pijawa, itsa jume, pejuyapijinë pijawa bajaraponë abaxë piasaëtsaponaponaejawata, bajaraponë bitso apopeyaiyataenë pijamonaenë. Bajarapajiwiubeje penapitsixabeje, bitso pibisiacuene exanabeje. Jehová tocopatsiana apopexainaenexabeje pexi, mawecojiwiubejecuenia peponaponaenexabeje. ²²⁻²⁶ [...]

²⁷»Papebi, papetiriwa-ata, pijacujirucuenia jiwijumapianëjawabelia, itsa jume, itsawirijumapianëjawabelia-ata, yanijobiaya ëjëba peyapëtaenexa xua copiapatsijitsia, bajarapamonae pabeyaxuabianame ibotonëta panet-seconaejawata. Bajarapitsicuene pexanaexae bajarapamonae pijacuata naneconita petëpaenexa», jamë tsane israelitawijawabelia —jai Jehová Moisés-jawabelia.

Pacuenia sacerdotewi to-ewetsijitsia lámparaxi Jehová pijacarpabo-ënëta

24 ¹ Jehová jumaitsi Moisés-jawabelia, bajaraponë petsipaebinexa israelitawijawabelia:

²—Iltorobare Israel-pijinë pemomoxi pecapatabiabinexa pecayujutsi-olivocuai-aceitera, pepopexania-itaranaera, bajaraporaxita sacerdotewi pitayotabiabinexa lámparabëxita tajacarpabo-ënëtuatuajëjawata,

penapebetsinexa copiaya payatu-ucutsijawa daxitamerauwijebi, matacabijebi-ata! ³Peyatu-ucutsipanapēnēwetsia, papana ruca tanajumeliwaisixaniawaet-sibaula pewajēnaeya, bajarajota Aarón ewetsiaya taeponaponaena bajara-palámparaxi pitaxupaeyaniwa daxitamerauwijebi. Bajarapacuenia itorobajē tatocaējētsicuenia sacerdotewituatujēta ponē pepopenamatacaitorobinē pecanacopataponaenexa pemomoxibitsaētonējawabelia, bajarapacuenē pexanawanapaenexa daxitamatacabijawabelia. ⁴Palámparaxi ena pitayotsi-candelabrobojawata, pepopexania-oronanitota pexanaejawa, xaniawaetsia ewetsiana pitaxupaeyaniwa caeto-ata daxitamatacabijawabelianexa —jai Jehová.

**Pacuenia sacerdotewi tojebijitsia pan caesemana
canacujitsia Jehová pijacarpabo-ēnēta**

⁵—Bajarapijinia pacuenia mesajumata pejebabihipan-nexa, bajarapamo-nae pitsiana pepopexaniawiria trigobenojawa, bajaraxuajawa pan pexanae-nexa, doce papetoyororocepan-bēbeje. ⁶Bajaraxuacujinae, sebiana. Bajarapapan pexanaenexa, pitsiana trigobeno ceapan-bēnexa cuatro pakilobeje epatuajawa. ⁶Xuacujinae, pepopexania-oronanitota pexanaemesajumata bajarapadoce papan-jawanē jebabiabiana nacorobotsiaya anijabērētobeje-cuenia, caecorobota penajumabuataponaenexa seis pabēbeje. ⁷⁻⁸Caecorobo canacujitsia pejumata paya-etsianame waxiyota pepopexania-inciensojawa. Bajarapapan sacerdotewi pepopenamatacaitorobinē jebaponaena Jehová pitabarata caesábado canacujitsia, penacuene-itajētsinexa tanajumecopat-siliwaisi Israel-pijinē pemomoxijawabelia daxitamatacabijawabelianexa. Bajarapacuenia jebaponaena Israel-pijinē pexi caenē canacujitsia pemomoxibitsaētonē pewēnēta daxitamatacabijawabelianexa. Nexata, pamatacabi jebijitsia icatsia doce papan-bēbeje mesajumata, bajaraponē tajuitsijitsia copiaya peya-etsi-inciensojawanēmi bajarapapan-jamatabēcuenemi dajubi petajuitabiabi-altar-jumata, pitajētsinexa bajarapapan bepetajuitsipan. ⁹Itsia, bajarapapan, copiaya pejebijawanēmi, bajaraxuanē Aarón, pexi, pemoxoxi-ata, ēpamonae sacerdotewi, pexaeyabiabinexa taneyaiyataetaxu-naeta, baitsi, tajacarpabota, itsa jume, carpabo pijapanabota, tsipaji petajuitsijawaminexayajuwēnējawa altar-jumata. Bajarapacuenia sacerdotewi exanawanapaena daxitamatacabijawabelianexa —jai Jehová. ¹⁰⁻²³ [...]

Números

Israel-pijinë pemomoxi penamata-ëjëtsijawa, petsewinacuata pejinawanapaecuenenua

Nazareocuenejawabelia penacajonejawa yabara peliwaishi

6 ¹ Jehovahá jumaitsi Moisés-jawabelia:
² —¡Jumaitsimëre israelitamonaewawabelia mapacueniaje: «Paji-
wiyo jamatabënacajunua nazareocuenejawabelia, pebi, petiriwa-ata, nat-
satsiaya peponaponaenexa ëxanë Jehovahänë taitabarata, bajarapajiwiyo
exanaena mapacueniaje! ³ Apobi-apae vinora, bajarapacuenianua daxita
poranë capitsapa piatanejawa, bajarapacuenia piajatu-uvacuaira, vinagre-
wënëra,^a itsawiria piajatuvinagrera-ata. Bajarapacuenia apobexae uvacuai
peyabarëmeniajawa, bajarapacuenia icotiata petsewia-exanae-uvacuainë.^b
⁴ Paepatowajëto abaxë nazareocuena ponaponaena najumecapanepaeya
penaliwaisicajonecujinae, nexata bajarapajiwiyo apobexae caejawayo-ata
pecapitsapaejawa uvamacanaejawawerena. ⁵ Bajarapacuenia-ata abaxë
bajarapamatacabianëjawa apobenamatanäcaucubi. Paepatowajëto abaxë
apoweretsi nazareocuena penacajonejawa xanë Jehovahänëjawaberena, saya
becopata pematanaëwitsabaponaenexa peweretsijawabelia penatocaëjëtsi-
matabianënexa. Nexata, bajarapacuenia natsatsiaya beponapona Jehovahä-
nëjawaberena penaliwaisicajonecuenia. ⁶ Paepatowajëto abaxë ponapona
nazareocuena, bajarapajiwiyo apobi-imoxoyotsi petëpaejiwiyo, ⁷ totëpae-
atatsi pijamonaewiwiyo, paxa, pena, pematapijiwi, peyuyapijiwi-ata. Nexata,
apobi-imoxoyotsi, penacopatsiyaniwa bepenaxuirabinë taitabarata. Nexata,
bajarapajiwiyo tsicarucatsi penajamatabëcuenexaniawaetaponaponaenexa
xanë, Jehovahänë, taitabarata. Bajarapanatsatsicuenia peponaponaewawa Dio-
sojawabelia najamatabëcuene-itajëtabiaba pematanaëwitsabaponaewawata.
⁸ Nexata, bajarapajiwiyo daxita paepatowajëto abaxë ponapona nazareo-
cuenia najumecapanepaeya tanenaliwaisicajonecujinae Jehovahänëjawa-
berena, bajarapajiwiyo nexata nawecuatsatsiaya beponapona daxitaxua
bepenaxuirabia-exanaejawawecua, daxita pibisiacuene pexanaejawawecua-
ata, penajamatabëcuene-itajëtsinexa penacuenetsatsijawa xanëjawaberena
nazareocuenejawalia penacajonejamatabëcuene,» ¡jamëre! —jai Jehovahá.
⁹ Orijibia Jehovahá jumaitsi nazareocuena peponaponaewiwiyo yabara:

a 6:3 *vinagrera*: Taema «vinora», glosariojawata. **b 6:3** *petsewia-exanae-uvacuainë*: Bajara-
xuanë pewënë «uvas pasa» wowaijumeta.

—Pajiwiyo nazareocuenia peponaponaejawata taitabarata, itsa jemata itsajiwiyo tēpa pecanacujitsita, nexata bajarapajiwiyo baja nacopata bepenamatanaxuirabijiwi, pejamatabēcuenene-itajētsināmi natsatsiaya pepo-naponaejawa xanē Jehovānējawaberena taitabarata. Nexata, beponapona siete pamatacabibejucuenia bepenaxuirabinēcuenia petāenētsi, pacuenia picani pacatocaējētatsi papecatowerewerecaenexa bepanenaxuirabicuenemi. Bajaraxuacujinae, sietematacabita namatasibiana. ¹⁰ Bajaraxuacujinae pijinia, ocho matacabita tocaponaena tajacarpabo peyacaranatsipanapijibaupajawabelia anija-ucucutobeje tsiquiriwirianēyobeje, itsa jume, pini-jiwirianēbeje, perajutsinexa sacerdotenējawabelia. ¹¹ Nexata, sacerdotenē altar-jumata totajuitsiana caenēyo, pewecua-ajibia-exanaenexatsi bepenaxuirabijawami petēpaenē pejamatabēcuenene. Itsanēyo pijinia daxitanēyo totajuitsiana, tanejamatabēcuenecaewia-exanaenexa pijaneconimi. Nexata, bajarapacuenia bajarapajiwiyo petotajuitsicujinaetsi, itaxutuajamatabēcuenecaewianajē bajarapanaxuirabicuenemiwecua. Nexata, bajarapamatacabita pejanacuenia taxuxuabijitsia icatsia pijanazareocuenene. Icatsia taxuxuabiana penamatanaḡwitsabia-exanaenexa. ¹² Nexata, pamatacabibejewajēto picani copiya natocaējēta nazareocuenia peponaponaenexa, bajarapamatacabibejewajēto icatsia beponapona pejanacuenia. Baitsi, pamatacabianēwajēto ponapona nazareocuenia bepenaxuirabijiwiyo penaexanaewajēnaeya to-amatamobitsi baja. Nexata, petowerewerecaecujinaetsi cotocaewi pena-jumeliwaisticaējētsijawa pejanacuenia xanē Jehovānējawaberena, bajarapaepatota caponaena oveja pebito petajuitsinexa xanējawaberena tasiwajamatabēcuenecaewinexa pijaneconimiwecua. Bajaraponēyo abaxē caewai pexaināenēyo.

¹³ »Pajiwiyo towerewerecatsi nazareocuenene penacajonejawami, nexata exanaena mapaliwaisticueniaje. Itsa baja, towerewerecatsi penatocaējētsijawa nazareonēcuenia peponaponaejawa, nexata bajarapajiwiyo naitajētsiana pijadajubibeje yajawa tajacarpabopanabo peyacaranatsipanapijibau-pajawabelia. ¹⁴ Capatsiana caenē oveja, pejananē pebito caewai pexaināenē, daxitanē peperabēxanepanaenē, daxitanē petajuitsinexa altar-jumata ofrendacuenia. Capatsiananua caenē oveja pejananē pesorowato, daxitanē peperabēxanepanaenē, sacerdotenē petotajuitsinexatsi pijaneconi yabara. Bajarapacuenia capatsiananua caenē oveja pebito, penaweretsinē, daxitanē peperabēxanepanaenē, petajuitsinexa penasitsijawanē caejamatabēcuenene patanajuaxainaexae namata-enetsia, tasiwajamatabēcuenecaewixae pijaneconimi. ¹⁵ Bajarapacuenia capatsiana tanerajuitsinexa caemapipe pejejawan, pexanaejawanē bitso pexaniawiriatrigobenota lewadurajawa matajērēabinejewa, olivocuaipiji-aceitera peyajawamatajērēabimatabē pexanaepan. Bajarapacuenianua capatsiana pitafacaecarēcarēnaepan pexanaejawa lewadura matajērēabinejewa, petsimatatsicabijawa olivocuaipiji-aceiterata. Bajarapacuenia yajawacapatsiana pesebitrigoxu taneyajawarajuitsinexa ofrendacuenia. Bajarapacuenia capatsiana vinora-ata pe-epanaxuabiranexa taitabarata ofrendacuenia. ¹⁶ Nexata, sacerdotenē daxita bajaraxuanē nerajutsiana xanē Jehovānējawaberena. Tanerajutsijawata, totajuitsiana padajubi capata ofrendacuenia, bajarapacuenia padajubi capata petotajuitsinexa daxitanē pijaneconimijamatabēcuenene. ¹⁷ Bajaraxuacujinae,

sacerdotenē totajuitsiana penaweretsi-oveja pebito penasitsijawanē caeja-matabēcuene patanajuaxainaexae namata-enetsia tasiwajamatabēcuene-caewixae pijaneconimi. Bajarapanasitsijawanē yajawatotajuitsiana pama-pire pan-yajuwēñjawa capata, pexanaejawanē levaduranejewa. Nexata, ofrendacuenia tanerajutsinexa, vinora epanaxuabiana irajawabelia. Bajara-pacuenia pesebitrigoxu totajuitsiana. ¹⁸Nexata, nazareocuenia peponaponaenēmi, pamatanāta najamatabēcuene-itajētabiaba Jehovāñjawaberena natsatsiaya peponaponaejawa, bajarapamatanāmi namatabococasibiana tajacarpabo peyacaranatsipana pejonebaupa canacujitsita. Nexata, bajaraponē penamatasibināmi xuabiana isotojawabelia, pa-isotota tajuita dajubi penasitsijawanē, penajamatabēcuene-itajētsinexa tajamatabēcuenecaewi-jawa pijaneconimi. ¹⁹Bajaraxuacujinae, sacerdotenē pitsiana bajarapa-oveja pecofeferewijawa pesetsijawa. Bajarapacuenia pitsiananua caepan, levadura matajērēabinejewa pexanaepan, xua capata mapireta, bajarapacuenia caepan-ata, pitafacaecarēcarēnaejawa levaduranejewa pexanaejawa. Nexata, bajaraxuanē rajutsianatsi nazareocuenia peponaponaenēmijawabelia, penamatacasibicujinae. ²⁰Bajaraxuacujinae, sacerdotenē yobajarabiana pemipabēpana, petopa, xuanē-ata sacerdotewi pijajawanēnexa nerajutsiaya Jehovāñ. Nexata, xuanē yobajarabiaya nerajuta, bajaraxuanē canacopat-siana ēsacerdotenē pexaenexa. Bajaraxuayajuwēñjawa apobenaxae nazareocuenia peponaponaenēmi. Matapania, bajarapacuenia pexanaecujinae, toxanepanatsi nazareocuenia peponaponaenēmi icatsia vinora piapaenexa, bajarapacuenia daxitaxuanē uvamacanaeyajuwēñjawaata pexanaejawanē. ²¹»Daxita mapaliwaisianēje pacatonajumecopatatsi, pamonae nazareocuenia penacajonewi pexanaenexa bajarapacuenia itsa towerewerecatsi penato-caējētsimatacabianē. Nexata, pacuenia najumeliwaisicajunua pexanaenexa, ēbajarapacuenia toxanepanaenatsi pexanaenexa. Bajarapijinia pacuenia petowerewerecaematacabitsi nazareocuene becapata dajubimonae, patacatonajumecopatsiliwaisicuenia pexanaenexa. Pajiwi pijinia pematatsēñē jamatabēcapata tanerajutsinexa ofrendacuenia itsajawa patacatocaējētsijawawecua, itsa cuenecaējēpatsi, apo-itsacuene —jai Jehovā Moisés-jawabelia nazareocuenia penajumeliwaisicajonewi pexanaecuene yabara.

**Pacuenia sacerdotewi cuene-itajētsijitsia Dioso
pexaniacuenia peyawenonaenexa jiwi**

²² Jehovā icatsia bajaraxuacujinae jumaitsi Moisés-jawabelia mapacueniaje:

²³ —Tsipaebianame Aarón-jawabelia, pexi sacerdotewijawabelia-ata, bajarapamonae peyapētaenexa pacuenia exanaejitsia pacujinae yapētaeya-exanaejitsia israelitawi pexaniacuenia tayawenonaenexa. Jumaitsi tsane pexaniacuene peyapētaeya-exanaejawata tawēñeta:

²⁴ «Jhovā pacayawenonae. Paca-ewetsi pexaniacuenia. ²⁵ Bajaraponē pexaniacuenia pacanaēcotsi, papecasiwabarēyaxae. Pacatsitajētsi papeca-itaxutotsoniataejamatabēcuenenua. ²⁶ Bajarapacuenianua pacatae papeca-siwawicuenia, panejinawanapaenexa barēyaya itsacuene pataenejewamē», jai tsane pexaniacuene pepaebijawata.

²⁷»Nexata, bajarapacuenia bajarapamonae jumaitsi tsane xanē tawēñeta peyapētaeya-exanaejawata Israel-pijinē pemomoxi, pexaniacuene

pewajënaeyabelia petaewanapaenexa tajamatabëcuene. Bajarapajumeco-wëya itsa jumaitsi tawënëta, xanë juya pexaniacuenia yawenonaenajë peju-maitsicuenia —jai Jehová Moisés-jawabelia.

Jehová rajtsiapaeba Israel-pijinë pemomoxijawabelia pewi pexaenexa

11 ¹Itsamatacabi nexata, israelitamonae anaeya cuenecarapuaba Jehová, petaeponaexae pibisiacuenie petocopiapataponaejawatsi. Nexata, Jehová pejumetaejawata bajarapamonae pejumaitsijawa, bitso anaepana bajarapamonaejawabelia. Nexata, isoto tsi-itoroba petajuenexatsi matatoyorotsia pijataxunaebonëjawa. Itsamonae pijinia pijabonë yatajuatsi. ²Nexata, bajarapamonae wawajai Moisés-jawabelia, pewajëcaewi pejamatabëcueneyawenonaenexatsi. Moisés nexata towajëta Jehovájawabelia bajarapamonae yabara. Nexata, bajarapa-isotojawanë itacaëna baja. ³Bajaraxuata, bajarapataxunae wënëruba Tabera,^c tsipaji bajarajota Jehová pija-isoto tsi-itoroba anaeya pebaracuaicuajaiwitsijawabelia, penajamatabëcuene-itajëtsinexa pianaepanaejawa bajarapamonaejawabelia.

⁴Israelitmonaetuatuajëta penanajetarubenaewi itsawiriawi, apoIsrael-pijinë pemomoxiyajuwënëwi, nexata bajarapamonae saya najamatabëxainabiaba ëpexaeuene. Belia israelitamonae-ata bajarapamonae najamatabëcuenejëpaponae. Nexata, daxitabitsaëto siwajamatabëcuene-anaepanaeya ayaijumeta aëjaiya najuajumaitsi tsaponae:

—Jema xania apoxainaetsi ajenaconoxae pewi wajaxaenexa. ¿Jipatsa meta pewi wajanacarajutsi tsane? —najai tsaponae. ⁵Nexata, najamatabëxainaeaya najumaitsi tsaponae:

—¡Najamatabënapire papexaniapexaejawa xaewanapatsi Egipto nacuata! Bajarajota, xaeyabiabatsi dujuai amoneyacuenia, bajarapacuenia pepinobëanë, melón-bëanë,^d bajarapacuenia cebollabëanë, ajobëanë, wayafopiji-ajobëanë-ata. Daxita bajarapapexaniajawanë xaewanapatsi picani bajarapanacuata.

⁶Itsia, saya majotaje ajenaconoxae wajani bitso. Belia baja yatëpaejitsiatsi wajani. Itsacueniejawa pematatsënëa apoxaetsi. Ajanijitsibitsi baja picani belia ëmanáajawa —najuajai tsaponae daxita bajarapamonae ëmaná pïajanijitsibixae.

⁷Bajarapamanáajawa jëpa pacuenia cilantroxutoxiwajëto. Bajarapamanápërëtoxi tsëcënaeya wayajai tsenae. ⁸⁻⁹Merawi pijinia bajaraxuanë othopabiaba bajarapamonae pijacarpabonëmuxunenia, paepatota othopa donojuawanë. Nexata, bajayacunua bajarapamonae nacayajatsiaya notabiaba bajarapamanájawaxi pexaenexa. Penotsicujinae, caquiatabiaba pebeno pejucaenexa. Bajarapabeno itsamonae setabiaba petsapato pexanaenexa. Itsamonae pijinia pan-cuenia exanabiaba, pesebinexa. Bajarapabeno pexaejawata bitso xaica. Baitsi nayapëtane pacuenia itsa xane olivocuaiipiji-aceiterata pematajërëabijawa pexanaepan.

¹⁰Daxita Israel-pijinë pemomoxi pijacarpabonë baupajawata aëaëjai tsanubena, pïajanijitsibixae pexaejawa manáajawa. Bajaraxua yabara Jehová bitso anaepana ayaicuenia bajarapamonaejawabelia. Bajarapacuenia

c 11:3 *Tabera*: Mapajume pejumaitsijawa, «petajuenajetarucaejawa», pejaijume. **d 11:5** *Melón-bëanë*: Bajaraxua nacayapëtaeya-exana pemacajawata pepitsapaebëanë, xuanë pexainaejawa mera petunaxëjawata; pacuenia baitsi patillabëanë, itsawiriamelón-bëanë.

Moisés-ata apotsitaxanepanaetsi xua jumetane Israel-pijinë pemomoxi pejumaitsitsaponaejawa. ¹¹ Nexata, Moisés Jehovájawabelia jumaitsi pewajëcaejawata:

—Xanë raja nijajiwitonënë tsaponapona, nexata xanepana tane-itaxutotsoniatanexamë. Caranata tsaena, pibisiacuenia xanë nenaëcotame. ¿Detsa pitsijamatabëcuene xainame xanëjawaberena, tanecacopatsimë tacato-ewetsijawata bajarapa-ajamatabëbejewijawabelia? ¿Detsa xuajitsia nexata tajanitapetsimë bajarapamonae tamatacaponaenënexa? ¹² ¿Xanë tsaja nexata netaneme be-axanë, be-ena-atanë tanecaitorobimë tamatacaponaenexa bajarapamonae asiwaya bepejewaxijiwiycuenia panacuajawabelia najumecapanepaeya rajutsiapabame bajarapamonae pijasalinaiwimijawabelia? ¹³ ¿Detsa nexata xanë werena topitsianajë pewi bajarapamonae tarajutsinexa pexanexa? Tsipaji bajarapamonae aëaëjaiya nejumaitsi tsapona: «¡Panerajure pataxaenexa pewi!», nejai tsapona. ¹⁴ Xanë raja taja-epato aponecuenecaëjëpae tajamatabëcuenesaënexa bajarapamonae tanejamatabë-itonotsijawa. Nejamatabëcuenematatoxeneta cajena tacato-ewetsijawa bajarapamonae. ¹⁵ Nexata, itsa jitsipame orijibia bajarapacuenia tanetaejawamë, juya netoxanepana tanebeyaxuabijawamë caecuenia. Itsa pijinia pepacuenie nitaxutotsoniataneme tane-asiwaxaemë, nexata apobene-tocopatsimë mapitsijamatabëcuene tanetocopiapataponaenexa, tsipaji apo-ajamatabëcuenesaënë bajarapitsicuenejawalia —jai Moisés Jehovájawabelia pewajëtsijawata.

¹⁶ Nexata, Jehová jumecanawiatatsi mapacueniaje:

—¡Netocaetware setenta ponëbeje ancianowi, israelitawi penamatacaitorobiyajuwënëwi, pamonae xamë yapëtaneme penajamatabëcueneyapëtaewi jiwi pewetsicuenie! Nexata, bajarapamonae barëpatsianame tajacarpabo panaboyacaranatsipana baupajawaberena, panenubenaenexa. Bajara-jota, panewajënae-ewetsianame. ¹⁷ Nexata, xanë bajarajota runaerecajë, tacabarëcuai cuaijainexa xamëjawabelia bajarapamonae pitabëta. Nexata, xanë rajutsianajë bajarapamonaejawabelia tacajamatabëcuenecaëjëpaeya-exanaeyajuwënëjawa taja-Espíritu Santota. ^e Nexata, pacuenia xamë xaniawaetsia ewetaponaponame israelitawi, Espíritu Santo pecajamatabëcuenecaëjëpaeya-exanaexae, bajarapijinia pacuenia bajarapa-setenta ponëbeje xaniawaetsia barë-ewetsianame bajarapamonae Espíritu Santo pejamatabëcuenecaëjëpaeya-exanaexaetsi. Nexata, bajarapacuenia xamë caenëmë baja apo-ewetsimë tsane —jai Jehová Moisés-jawabelia peyawenonaewinexatsi yabara.

¹⁸ Bajaraxuacujinae, Jehová jumaitsi Moisés-jawabelia:

—Daxita bajarapamonae jumaitsimë tsane: «¡Pa-exanare Jehová wajanacatonajumecopatsicuenia bewajanacuenexuirabiwicuenia wajanacataeyaniwa! ^f ¡Panajamatabëcuenexaniawaerenua Jehovájawabelia pibisiacuenie pane-exanaeyaniwa, tsipaji merawia pitsijawata paca-abatsijitsia pewi! Panajamatabëcuenexaniawaetsianame bajaraPonëjawabelia, tsipaji

e 11:17 *taja-Espíritu Santota*: Pepacuenie Dioso peEspíritu picani. Taema «Dioso peEspíritu», glossariojawata. **f 11:18** *bewajanacuenexuirabiwicuenia wajanacataeyaniwa*: Xaniawaetsia neyapëtaenexa bajaraxua yabara taema Éxo. 19:1-15.

pacajumetane anaeya panejumaitsitsaponaejawa: ‘¿Jipatsa meta wajana-carajutsi tsane pewi wajaxaenexa? Bitso picani pexaniacuenecajena waja-jinawanapaecuenemi Egipto nacuatalla,’ panejaitsaponaejawa. Jehová nexata nawitsia pacarajutsiana pewi panexaenexa. ¹⁹ Apopacarajutsi tsane saya caematacabipijipexaejawanexa, apo-anijamatacabibejenexa, apo-ēcincopamatacabibejenexa, bajarapacuenia apo-ēdiez-pamatacabibejenexa, bajarapacuenia-ata apo-ēveintepamatacabibejenexa. ¡Jume! ²⁰ BajaraPonē pacarajutsiana pewi caejuametocuenia panexaewanapaenexa. Nawitsia panexaewanapaexae tsane, belia pacatsipumupitsapaena bajarapawi paneyacabijawata, pane-ajanijitsibicobexae. Belia, pa-ataejitsibimē tsane bajarapawi. Bajarapacuenia pa-itsimē tsane, tsipaji beweliamatabēcuenia pataeyabiabame Jehová, panetuatuajēta peponaponaenē. Papecajumetae-xaenua panecuenecarapuabijawa ya-itaxutuanueya bajaraponējawabelia: ‘¿Detsa xuajitsia patajanecapitsapaemē Egipto nacujawawerena?’ pane-jaitsaponaejawa», jamē tsane Israel-pijinē pemomoxijawabelia —jai Jehová Moisés-jawabelia.

²¹ Nexata, Moisés jumecanawiata Jehovájawabelia:

—Pamonaetuatuajēta najetarucajē, tabarēponaewi yajawanajetarucajē seiscientos mil ponēbeje ēpenawajabitsaētsiwi, namata-ējētsinejewanē peje-waxi, petiriawi-ata. Itsiata, xamē nejumaitsimē mapabitsaēto yabaraje: «Rajutsianajē bajarapamonae pewi pexaewanapaenexa caejuametocuenia», nejamē picani. ²² ¿Detsa jota nexata nawita oveja, vaca-ata tabarēbenexa, tanetoyacajēpaenexatsi daxita bajarapamonae? ¿Xamē meta mitsacatuatsianame daxita padujuai jinawanapa manuamenejawata, niabatsinexa bajarapamonae? Itsiata, apoyacajēpaetsi tsipae bajarapamonae, tsipaji bitso pinijibitsaēto xaneto ayaicuenia —jai Moisés.

²³ Itsiata bailsi jane, Jehová jumecanawiata mapacueniaje:

—¿Xamē netaneme bewelianēcuenia tacuenesaējawa? Nexata, aeconoxae taename pacuenia cajumaitsitsi xua copiapatsijitsia tacajumaitsicowēya —jai Jehová.

Espíritu Santo jamatabēcuenecaējēpaeya-exana itsamonae pewetsiwinexa

²⁴ Moisés nexata pitsaparena Dioso pijacarpabowecua. Bajaraxuacujinae, tsipaeba Israel-pijinē pemomoxijawabelia pitorobicueniatsi Jehová. Nexata, caetuata setenta ponēbeje ancianowi, israelitawi pewetsiyajuwēnēwi. Nexata, barēpata bajarapamonae Dioso pijacarpabo matatoyorotsia peyacaranatsijawapijibaupajawata penubenaenexa. ²⁵ Nexata, Jehová jane baja, bajarapaepatota runaica piapiapajubota benaesiturutocuenia. Nexata, barēcuaicuaijaitsi Moisés. Xuacujinae jane baja, Moisés wecuapitatsi pejamatabēcuenecaējēpaeya-exanaeyajuwēnējawatsi Jehová pija-Espíritu Santota. Nexata jane baja, rajuta bajarapajamatabēcuenecaējēpaeya-exanaeyajuwēnējawatsi bajarapasetenta ponēbeje ancianowijawabelia. Nexata, bajarapamonae taxuxuaba jane baja pecuaicuaijajawa Diosojumepaebiwcuenia Jehová pija-Espíritu Santo pecaējēpaeya-exanaexaetsi. Bajaraxuacujinae, pematatsēnēa apocuaicuaijai icatsia bajarapacuenia.

²⁶ Bajarapacuenia-ata pijinia exanabeje anijanēbeje, israelitawi pijataxu-naebotuatuajēta penacopatanucaenēbeje. Picani ponēbeje nawēnējutatsi

penaponaenexabeje Dioso pijacarpabojawabelia, itsiata aponaponaebeje. Bajaraponëbeje-ata Diosojumepaebiwicuenia cuaicuaijai Jehová pija-Espíritu Santo pecaëjëpaeya-exanaexaetsi aponaponaenatabeje. Caenë pewënë Eldad. Itsanë pijinia pewënë Medad. ²⁷Bajaraxua itsa cuenetane pewëjëato, cujinaetabijirawa petsipaebinexa Moisés-jawabelia. Jumaitsi:

—Eldad-beje raja, Medad-beje cuaicuaijaibeje Diosojumepaebiwicuenia pijabojawata —jai Moisés-jawabelia.

²⁸Nexata, Josué, pexënato Nun, Moisés peyawenonaponaponaenëtsi pewëjëatojawaweliacujinae, Eldad, Medad-beje pecuenecopatsiyaniwa bajaraponë jumaitsi Moisés-jawabelia:

—¡Tajatuxanenë Moisés, bajarapajiwiibeje jume-itawere bajarapacuenia pexanaeyaniwabeje! —jai.

²⁹Itsiata baitsi jane, Moisés jumecanawiata mapacueniaje:

—¿Xamë nexata bajaraxua netosiwabëjamë, xanë bewelia jiwi tane-taeyaniwa? Xanë biji tojitsipajë daxitajiwi Jehová pijajiwi pejumepaebiwi penaexanaenexa. Bajarapacuenia tojitsipajë daxitajiwi Jehová pejamatabëcuenecaëjëpaeya-exanaenexatsi Espíritu Santota —jai Josuéjawabelia.

³⁰Xuacujinae Moisés, ancianowi yajawa nawiata pijacarpaboxijawaberena israelitawi pijataxunaebojawabelia.

Dioso to-itorobatsi Israel-pijinë pemomoxi tsacanibitsaëtonë

³¹Bajaraxuacujinae, Jehová copata pebubujainexa manuamenejawawerena, pecapatsinexa tsacanimonae ayaibitsaëtoxanetonë. Bajarapamonae othopa Israel-pijinë pemomoxi daxita pijataxunaebonëjawa pijacarpabonë-itapaya. Bajarapamonae pijataxunaebonë matatoyorotsia imoxoyo ya-othopa. Yacopianuca bajarapatsacani namuto peponaejawa caematacabicuenia.

Itsa punanajetarubena, piaitayaëjawa bejamatabëcuijiru caemetrocuenia athëbëyo. ³²Nexata, bajarapamonae daxitamatacabijebi, daxitamerawijebi yajawa beyejebapona tsacanimonae anijamatacabibecuenia. Pajiwiyo bewelia nota, bajarapajiwiyo pitapona diez pacaetuatsibitsaëtobeje penajumajebijawanë tsacanimonae, bejamatabë cincuenta pamapirebejecuenia pejewanë. Nexata, bajarapamonae penotsiwi pijabonë pënëya ejebapona petsewinexa icotiata, penatoxaniawaetsinexa. ³³Nexata, bajarapamonae ajena itsa taxuxuaba pexaejawa bajarapawi, itsajota abaxë ucubaxaepona bajarapawi, bajarapaepatota Jehová bitso anaepana bajarapamonaejawabelia. Nexata, bajarapawi quijonenejewa, bajarapaepatota Jehová naneconitsia-exanaeya tocopatapona piawitanejawa petëpaenexa ayaibitsaëto. ³⁴Bajaraxuata, bajarapataxunaebo wënëruba Kibrot-hataavawënëyo, tsipaji bajarajota mëthëcatsi pamonae saya siwanajamatabëxaina ëpexaejawa.

³⁵Bajaraxuacujinae, israelitawi pitsapa Kibrot-hataavataxunaebowecua, pepatsinexa Hazerot nacujawabelia. Bajarajota, icatsia pata-othopa cae-epatoyo pejinawanapaenexa.

Moisés pematapijiwiibeje pibisiacuenia cuenecarapuabatsi

12 ¹Israel-pijinë pemomoxi pejinawanapaejawata Hazerot nacuata, Moisés pematapijiwiibeje, María, Aarón-beje, cuenecarapuabiaya

baracuaicuajiaitsibeje, pepitsixae pijawanexa cusitawiriawa.^g ²Nexata, jumaitisibeje: «¿Jehová tsaja cuaicuajiai tsabiabi caenē Moisés-jawabelia? ¿Jehová tsaja waxaitsi-atabeje aponacabarēcuaicuajiai tsabiabi?», jaiubeje Moisés cueneca-ēbiaya. Itsiata, jumetanetsibeje Jehová bajarapacuenia pejumaitisijawabeje.

³Moisés raja bitso beweliamatabēcuene penataenē daxitajiwiwecua. Apopecuenecanawiatsinē bepjiayo. ⁴Bajaraxuata, Jehová jumaitsi Moisés, Aarón, Maríajawabelia-ata:

—Paponae name paxamē acueyabi papajiwimēbeje tajacarpabojawabelia. —jai.

Nexata, bajarapa-acueyabi pajiwibeje pona bajarabelia. ⁵Pepatsicujinaelia bajarapamonae, Jehová runaica pepopitayaēpajubota, caranatsiaya perucapoenexa pijacarpabo baupajawata.^h Bajarapapajubojawawerena, junata, Aarón, Maríabeje, pimoxoyotsinexabeje. Nexata, bajarapajiwibeje cujilia-beje. ⁶Jehová nexata jumaitsi bajarapajiwibejejawabelia:

—Panajumetaemabeje, xua pacatsipaebijitsiatsibeje. Paxamētutaujēta itsa ponapona profetanē, xanē ta-itorobinē, bajaraponējawabelia bemaitsinaebocuenia tsitanaitajētabiabajē, tayapētaeya-exanaenexa paliwaisi tsipae-bijitsia itsamonaewawabelia tawēnēta. ⁷Itsiata baitsi jane, bajarapacuenia apo-exanaenē tajajiwitonē Moisés-jawabelia. Daxita tanetonacuenebiwi-tutaujēta, bajaraponē xaniawaetsia tanetonacuenebaponaponaenē itsamonaewecua. ⁸Nexata, bajaraponējawabelia xanē tajacuata naitabarataeya barēcuaicuajiajinē tsabiabi jumenapebetsiaya. Bajarapacuenia nitabarataeya itsa nebarēcuaicuajiai tsabiabi, ¿depacuenia nexata paxamēbeje pacatoxanepanabeje panecuenenabaracuaicuajiajinexabeje pibisiacuenia tajajiwitonē Moisés? Apoxanepanae cajena bajaraxua —jai Jehová.

⁹Nexata, Jehová bitso pebara-anaepanaexae bajarapajiwibejejawabelia, wecuapona pona baja, pajubo penayotsijawata. ¹⁰Bajarapapajubo pewecuanayotatsijawata DIOSO pijacarpabowecua, bajarapaepatota María lepratsabanaejawa perabēwēnēcarea. Daxita perabēniopanareca. Nexata, Aarón itsa napēnēyorota Maríajawabelia, tane pexinaejawa lepratsabanaejawa.

¹¹Nexata, Aarón jumaitsi pejuyapijinē Moisés-jawabelia:

—¡Tajatuxanenē, pane-itaxutotsoniataemabeje! Pētsa panenaneconitsia-exanamebeje bajarapitsineconita. Paxanēbeje saya itsajawata panacuenecanaējētsinejawanēbeje pibisiacuene panatsi-exanaejēbeje, apopatacayaiyataejamatabēcuenebeje. ¹²Pexaniacuene cawajētatsi, nematapijiwa necopatsiyaniwa peperabēniojaicuenia, pacuenia perabē-itsi petsabanaenacuetoyi, itsa naexana caematacabibeje petēpaecujinae pena pecototota —jai Aarón.

¹³Nexata, ayaicuenia Moisés towajēta pematapijiwa yabara Jehovájawabelia. Jumaitsi:

—Pexaniacuena cawajētatsi, DIOSOMē, tanetojamatejemaya-exanaenexamē ajenaconoxae tamatapijiwa —jai.

g 12:1 *cusitawiriawa*: Bajarapawiriawi petsaebiawi. h 12:5 *baupajawata*: Bajarapacuenia Dioso itsa rucapopa baupajawata, najamatabēcuene-itajēta bejuez-nēcuenia penucaejawa, jiwi pijaneconi petocanaējētsinexa, peyapētaeya-exanaenexa pacuenia naneconitsia-exanaejitsia.

¹⁴Nexata, Jehová jumecanawiata Moisés-jawabelia:

—Bajarapowa paxa pecuene-itoyaxaetsi, itsa itabarasuabijitsipatsi, Ɂapoura tsipae tsaja daxitajiwi pitabëta siete pamatacabibecuencia? Jājā, bajarapacuenia itsi tsipae. Pacuenia bajarapowa ca-uraba, abeje bitso. Nexata, bajarapowa pacapitsapaename panijataxunaebowecua, tsipaji raja bajarapowa naneconitsiaya-exanājē petsabanaejawata, peponaponaenexa bepe-naxuirabiwacuenia taitabarata siete pamatacabibeje. Bajaraxuacujinae, itsa caewiana petsabanaejawa, icatsia caewëarena patsiana paneyajawajinawana-paenexa —jai Jehová.

¹⁵Bajarapacuenia nexata, María capitsapatsi pijataxunaebowecua siete pamatacabibecuencia. Nexata, daxita israelitawi bajarajota tsitecaeya jinawanapa warapaenejewa, icatsia pepatsijawabelia María. ¹⁶Bajarapowa pepatsicujinae, bajarapamonae pitsapa Hazerot nacuaawecua. Icatsia pataothopa Parán nacuaajawabelia.

Moisés itoroba doce ponëbeje Canaán nacua peya-enebiwinexa

13 ¹Pacujinae Israel-pijinē pemomoxi jinawanapa Parán-wënë petsewi-tusatonacuata, bajarajota icatsia Jehová jumaitsi Moisés-jawabelia:

²—¡Itsamonaē itorobare peponaenexa, petaenexa Canaán nacua, pa-ira xanē rajutsiapaebajē israelitawijawabelia! Nexata, itapetsianame caenē caebitsaëto canacujitsia Israel-pijinē pexi, doce ponëbeje, pemomoxiyaju-wënëwi, nitorobinexa peya-enebanajetarubenaewinexa. Itsiata baitsi jane, itapetsianame pamonaē pewetsiwiayajuwënëwi pijamonaetuatuajëta —jai Jehová.

³Nexata, Moisés exana pacuenia Jehová tonajumecopatatsi. Itoroba Parán nacuatusatowawewelia peponaenexa Canaán nacuaajawabelia. Bajarapamonae pitapetsiwiitsi peponaewinexa, bajarapamonae daxita penaewetsiwiayajuwënëwi israelitawi. ⁴Marapamonaeje peponaewi pewënëanē: Itsanē Rubén-pijinēmi pemomoxibitsaëto pewetsiwiayajuwënëwē pewënë Samúa, pexënato Zacur. ⁵Itsanē pijinia Simeón-pijinēmi pemomoxibitsaëto pewetsiwiayajuwënëwē, pewënë Safat, pexënato Horí. ⁶Itsanē pijinia Judápijinēmi pemomoxibitsaëto pewetsiwiayajuwënëwē pewënë Caleb, pexënato Jefone. ⁷Itsanē pijinia Isacar-pijinēmi pemomoxibitsaëto pewetsiwiayajuwënëwē pewënë Igal, pexënato Josë. ⁸Itsanē pijinia Efraín-pijinēmi pemomoxibitsaëto pewetsiwiayajuwënëwē pewënë Oseas, ⁹pexënato Nun. ⁹Itsanē pijinia Benjamín-pijinēmi pemomoxibitsaëto pewetsiwiayajuwënëwē pewënë Palti, pexënato Rafú. ¹⁰Itsanē pijinia Zabulón-pijinēmi pemomoxibitsaëto pewetsiwiayajuwënëwē pewënë Gadiel, pexënato Sodi. ¹¹Itsanē pijinia Josépijinē pexënato, ¹²Manasés-pijinēmi pemomoxibitsaëto pewetsiwiayajuwënëwē pewënë Gadi, pexënato Susi. ¹²Itsanē pijinia Dan-pijinēmi

i 13:8 *pewënë Oseas*: Bajaraponē itsawënë pijinia Josué. Taema Núm. 13:16. Bajaraponē Moisés-beje penajua-ewetsinëbeje Israel-pijinē pemomoxi. j 13:11 *Josépijinē pexënato*: Manasés-pijinēmi, Efraín-pijinēmibeje Josépijinē pexënatobeje. Ajibi itsa pemomoxibitsaëto Josë pemomoxibitsaëto pewënëwi. Daxita Josépijinē pemomoxibitsaëto canacopata anijabitsaëtobeje-cuenia. Caepemomoxibitsaëto Efraín pemomoxibitsaëto, itsapemomoxibitsaëto pijinia Manasés pemomoxibitsaëto, Josë pexënatobeje pemomoxi. Anijabitsaëtobeje-ata, caenē Josë pemomoxibitsaëto picani.

pemomoxibitsaëto pewetsiwiyajuwënënë pewënë Amiel, pexënato Gemali.¹³ Itsanë pijinia Aser pemomoxibitsaëto pewetsiwiyajuwënënë pewënë Setur, pexënato Micael.¹⁴ Itsanë pijinia Neftalípijinëmi pemomoxibitsaëto pewetsiwiyajuwënënë pewënë Nahbi, pexënato Vapsi.¹⁵ Itsanë pijinia Gad-pijinëmi pemomoxibitsaëto pewetsiwiyajuwënënë pewënë Geuel, pexënato Maqui.

¹⁶ Daxita mapamonaëje pewënëanë, Moisés pamonaë itoroba peya-enebanajetarubenaewinexa Canaán iranacua. Bajarapaepatota peponaematacabinexa, Oseas-pijinë, pexënato Nun, Moisés wënë-itothiana peponaewa-jënaeya. Wëneruba Josué.

¹⁷ Itsa Moisés itoroba bajarapamonaë peya-enebinexa Canaán iranacua, yajawanajumecopata mapacueniaje:

—Paponaename maweliacujinaëje panepatsinexa Neguev nacujawabelia. Bajaraxuacujinaë, paponaename panepatsinexa petsutonënacujawabetsia.¹⁸ Xaniwaetsia bajarapanacua pana-itaxutocaewetanajetarubenaename, bajarapacuenia-ata pamonaë jinawanapa bajarapanacuatalia, itsa pecuene-aitatsacawi, itsa jume, itsa pecuene-aitejepaebiwi. Bajarapacuenia pataenamenua itsa jinawanapa caejiiwiyoheje, itsa jume pijinia, itsa bitso ayaibitsaëtoxaneto.¹⁹ Pataenamenua pijatomaranë, itsa bajarapamonaë jinawanapa saya carpabonëta; itsa xaina pijatomaranë peyana-itacaranatsijawanë pijawajabitsaëwiwecua. Bajarapacuenia pataename pitsinacuata jinawanapa bajarapamonaë; itsa pexania-iranë, itsa jume, pibisia-iranë,²⁰ itsa pijinia bitso pexanianaxaniabi-iranë, itsa jume pijinia, pe-ubijawanë apopenaxaniabi-iranë. Bajarapacuenia itsa pejinawanapaenacua xaina unuanë, itsa jume, itsa apoxainae. ¡Pëtsa pajunawame paneponaenexa! ¡Panajamatabëcuenesaëre! Pacapatsianae bajarapanacuapijinaëcuijawanë wajataenexa —jai Moisés.

Nexata, bajarapamonaë pona pamatacabijawa banota copiyapijinacuaitsi uvacuajawanë.^{k 21} Nexata, bajarapamonaë pona jane baja, peya-enebinexa bajarapanacua. Ya-enebanajetarubena daxitanacua Zin nacuatusatojawa-wetsiacujinaë, pepatsinexa Rehob nacujawabelia. Bajarapamonaë wecuanawiaba imoxoyo pepuapatsijitsia Hamat tomarajawabelia.²² Nexata, bajarapamonaë ya-enebanajetarubena Neguev nacujawawa, pepatsinexa Hebrón tomarajawabelia. Bajarapamatacabijawa bajarajota jinawanapa Ahimán-pijinë, Sesaipijinë, Talmaipijinë-ata; Anac-pijinë pemomoxi.^l Hebrón tomara bitso perujutomara Soan tomarawecua, Egipto nacua pe-ecatomara. Baitsi, Hebrón exaneta siete pawaiheje Soan tomara pexanaewajënaeya.²³ Nexata, bajarapamonaë pata Escol nacujawata. Bajarajota, bajarapamonaë yamaxërana ucua uvacuaimaxërana; xuanë peparuanë xaina. Bajaraparupini-jiruxaneto.^m Nexata, anijanëbeje namata-enetsia yawëtaraponaponabeje

k 13:20 *pamatacabijawa banota copiyapijinacuaitsi uvacuajawanë*: Baitsi, waja-almanaquencuenia bajarapamonaë pona julio juameto pecopiarucaejawata, quince matabicujinaelia. **l 13:22** *Anac-pijinë pemomoxi*: Anac paxa, Arbawënënë, exaneta Hebrón tomara, Quiriat-arba tomarami. (Josué 15:13) Anac-pijinë pemomoxi piapiawi. Baitsi, perujunacualiwaitsi nacatsipaeba pacuenia Sesaipijinë xaina anijametrobeje, setenta pacentímetrobeje yajawa piapijawa. **m 13:23** *pinijiruxaneto*: Maparucaëje cae-uvaru ba-arewe caekilocuenia. Itsajawa itsa pexanianaxaniabibëanë, arewe bejamatabëcujiru anijakilobeje. Paru ya-ucua peya-enebiwi bitso pepopiniiru. Baitsi, namatawenona anijanëbeje pecaponaëjawa.

naejawayota. Bajarajotanua, ucuba higocuai, granadacuai yajawa pecaponaenexa. ²⁴Nexata, bajarapamonae bajarajota wënëruba Escol,ⁿ piniji-uvaru pe-ucutsijamatabëcuene israelitamonaе.

²⁵Pepuaya-enebiweretsi bajarapa-ira, cuarenta pamatacabibecujinae, nawiabarena. ²⁶Pata-othopa icatsia Cades-jawaberena, Parán nacuatustojawaberena itsajotarena Moisés, Aarón-beje, daxita israelitawi yajawa ponaponabeje. Nexata, bajarapamonae tsipaeba pijamonaejawabelia xua taewanapa Canaán nacuatatia. Bajarapacuenia tsitajëta pacuaijawanë capata, bajarapanacuapijijawa. ²⁷Nexata, jumaitsi Moisés-jawabelia, daxita pijamonaejawabelia-ata:

—Paxanë paponajë pa-irajawabelia pane-itorobame patataenexa. Pepacuenie bajarajotalia nawitsia capitsapa daxitaxuanë pexaecuene. Bitso pexanianacua Jehová wajanacajumaitsicowëya picani. Marapacuaijawanë bajarapanacua-pijijawa. ²⁸Itsia baitsi jane, bajarapanacuata pejinawapaewi bitso piacujirusaëwi. Pijatamaranë-ata bitso ayaitomaranë. Icatsia, xainanua peyana-itacaranatsijawanë pijawajabitsaëwiwecua. Bajarapanacuata jinawanapa Anac-pijinë piapiänëmi pemomoxi. ²⁹Neguev nacujawata pijinia, jinawanapa amalecitawi. Petsutonëjawata pijinia, jinawanapa heteomonaе, jebuseomonaе, amorreomonaе-ata. Bajarapijini pacuenia manuameneyenepanajawa, Jordán-mene imoxoyojawata-ata jinawanapa cananeomonaе. Daxita bajarapamonae nacatsi-ayai tsane cajena —jai peya-enebiwiyajuwënëwi diez ponëbeje.

³⁰Bajaraxua pejumetaejawata, Caleb itoroba pemoyanexa daxita Israel-pijinë pemomoxi, pamonaе jamatabëcuenebëjaiya nabarëcuaiicaijai tsaponae, Moisés pitabarata penubenaewi. Pemoyacujinae, jumaitsi bajarapamonaejawabelia:

—Ponaenatsi itsiata baja bajarapamonaejawabelia, wajabarënwajabitsaët-sinexa bajarapa-ira yabara. Waxaitsi cajena nacacuenecaëjëpa wajawecuapitsinexa pija-irami, wajacanacopabinexa wajajinawanapaenacuanexa —jai Caleb.

³¹Itsia baitsi jane, penajuaya-enebiwi diez ponëbeje jumaitsi Caleb-jawabelia:

—¡Jume! Aponacacuenecaëjëpae cajena bajarapamonae wajabarënabe-nexa, tsipaji raja bajarapamonae bitso piacuenesaëwi waxaitsiwecua —jai bajarapamonae.

³²Nexata, bajarapadieз ponëbeje tsipaebanajetarubena israelitamonaе-jawa apoxanepanaenacuacuene peya-enebinacua. Jumaitsi:

—Bajarapanacua pibisianacua, itsajota jiwi piajani yatëpabiaba. Nacatsi-ayai tsane tsipaji bajarapanacuapijiwi bitso ayaiacuenia ayabitsaëttoxaneto. Bitso piapiawinua. ³³Patanijinua bajarajotalia pebijiji ayainëxanetonë, Anac-pijinë pemomoxiyajuwënëwi. Nexata, bajarapamonae pitabarata waxaitsi tsitatsi bebosesetoxitsi. Bajarapijini pacuenia nacatane bajarapamonae-ata, tsipaji bitso tsiquirijiwiitsi bajarapamonae pitabarata —jai bajarapamonae muxubijiapenetsiaya.

Israel-pijinë pemomoxi apojone Canaán nacujawabelia

14 ¹Bajarapaliwaisi pejumetaejawata, daxita israelitamonaе bitso jamatabëcuenebëjaiya taxuxuaba jane baja pe-aëaëjijawa

daxitamerauwijebi. ² Bajarapamonae daxita najuacuenenabaracuaicuaijai pibisiacuenia Moisés, Aarón-bejajawabelia. Najumaitsi tsaponae bajaraponēbeje yabara: «Nacatoxanepana picani waxaitsi wajatēpaejawa Egipto nacuatatia, itsa jume, wajanajetarubenaewawata petusatonacuajawa, bajarapamonae wajanacabeyejebijawawecua. ³ ¿Detsa xuajitsia Jehová wajanacacaponae mapanacuajawaberenaje? Nacacapon tsaena maberenaje wajatēpaenexa bajarapamonae wajanacabeyejebicuenia wajanacabarēnawajabitsaētsi-jawata. Nexata, bajarapacuenia taicaenatsi wajawaxi, wajaxijiwixi-ata, bajarapamonae penaxainaeyabinexatsi wajanacabeyejebicujinae, petonacuenebawanapaewinexa. Nacatoxanepana saya wajanawiabijawa Egipto nacujawabelia», najai tsaponae. ⁴ Bajarapacuenia penajumaitsitsaponaeaxae, belia bajarapamonae najumaitsi mapacueniaje: «Itsanē nexata juya nato-itapetsianatsi wajanacanamatatacitorobinēnexa, ponē wajanacabarēnawiat-sinēnexalia Egipto nacujawabelia», najai tsaponae.

⁵ Nexata, Moisés, Aarón-beje, bitso penajamatabēxinaejawata, yaiya-taecuena nabēxētsutsiaya irataeya nucabeje pewajēcaenexa Diosojawabelia daxitabitsaēto Israel-pijinē pemomoxi pitabarata. ⁶ Bajarapacuenianua Josué, Caleb-beje pebarēya-enebaponaponaenēmibeje Canaán nacua, bejamatabēcuenejioi tsanajetsirecabeje pejumetaejawata israelitawi pejumait-sitsaponaejawa. Nexata, najuma-esetitinaxuababeje, penajamatabēcuene-itajētsinexabeje bitso petsi-atanejawatsibeje bajarapamonae pecuene.

⁷ Nexata, jumaitsibeje israelitamonaejawabelia:

—Pa-ira pabarēya-enebaponaliajē bitso cajena pexania-ira. ⁸ Pepacuene nawitsia capitsapabiaba daxitaxuanē pexacuene. Itsa exanaenatsi pacuenia Jehová jitsipa wajanacasiwabarēyanexa, nexata nacayawenonaena bajarapa-ira wajanacarajutsinexa wajanawajabitsaētsijawata bajarapanacua-pijiwijawabelia. ⁹ ¡Pētsa baitsi jane, Jehovájawabelia pabara-anaepaname! ¡Pētsanua pacujunawame bajarapanacuapijiwi! Bajarapamonae saya waxaitsi jamatejema werebiabianatsi. Nacatoypēxanepanaena wajuacuen-amoneyabijawa bajarapamonae. Baitsi, nacatocuenejēpaena bewaxaejawa pan, tsipaji Jehová nacayajawa tsane. Bajarapamonae pijadidosowi, jumapecataeya pexanaenēanējawabelia, siwanajamatabēcueneocopatabiaba peyawenonaenexatsi. Jehová bajarapadidosowi pecuene-amoneyabinē tsaponaponae. Nexata, bajarapamonae apoxinae tsane peyacaranatsinēnexatsi. Biji rajane, waxaitsi tsuxainatsi wajanacayawenonaenēnexa, Jehová. ¡Pētsa pacujunawame! —jaibeje Israel-pijinē pemomoxijawabelia.

¹⁰ Bajarapacuenia pejumetaejawata, bajarapamonae orijibia jamatabē-beyaxuabatsibeje, petseconacueniatsi piniji-ibotonēta. Nexata, petsimaxē-patsijawatatsibeje, bajarapaepatota Jehová itacarajeta pijapeniweniwenae-cotia yajawa naitajēta pijacarpabojawata daxita israelitamonae pitabēta.

¹¹ Nexata, Jehová jumaitsi Moisés-jawabelia:

—¿Detsa xuajitsia bajarapamonae beweliamatabēcuenenēcuena tajanetaeyabiabi? ¿Detsa paepatota copatsiana tanecuene-aebabiabijawa, tsita-exanabiabi-atanē pinijicuenejawanē bajarapamonae pitabarata? ¹² Nexata, xanē tsi-itorobianajē pinijiwitanecuene bajarapamonae petēpaenexa, tarajutsiapaebi-iramijawabelia pejoneyaniwa. Itsiata baitsi jane, xamē-jawawerena capitsapaenajē itsabitsaēto tajajiwineja, bitso pinijibitsaēto

bajarapamonaewecua. Bajarapacuenianua pecuene-aitatsacawi tsane —jai Jehová Moisés-jawabelia.

¹³Itsia baitsi jane, Moisés jumecanawiata Jehovájawabelia mapacueniaje:

—Apoxanepanae bajaraxua ne-exanaejawa. Xamē tsipaji necuenesaēta bajarapamonaē jutame Egipto nacua jawawerena, bajarapanacuapijiwimi necuene-amoneyabicujinae. Nexata, pacujinae Egipto nacuaapijiwi cawē-nēliwaisitaena xua jamatabē-exaname mapamonaejawabelia, nexata juya cacuene-aebiana. ¹⁴Nexata, cacuenewajunupaebiana Canaán nacua-pijiwijawabelia apopecacuenecaējēpaenēcuenia. Bajarapamonaē picani itsacuenia cawēnēliwaisitane xamē yabara. Cawēnēliwaisitane pacuenia paneyajawamē tsaponaponaē, pacuenianua naitajētabiabame padaxitanē pata-itabēta piapiapajubowata, pacuenia matacabita pijinia panematacaponabiabame piapiapajubota benaesiturutocuenia, pacuenianua merawi penaitayotsicotiapajubo bepetajuenajetarucaenaesiturutocuenia panematacaponabiabame. Daxita bajaraxua cawēnēliwaisitane picani. ¹⁵Itsa nexata xamē beyaxuabianame caecuenia bajarapamonaē, nexata pamonaē peca-wēnēliwaisitaewi xamē yabara, cawēnēliwaisijumaitsi tsipae: ¹⁶«Yerajane, capatsinejewa najumecapanepaeya perajutsiapaebinacuajawabelia Jehová nayajiwibeyaxuaba bajarapamonaemi petusatonacuata. Bajaraponē apocuenecaējēpaetsi bajarapabitsaēto pecapatsinexa bajarapa-irajawabelia», bajarapamonaē cayabarajai tsipae.

¹⁷Nexata bajaraxuata, ayaicuenia cawajētatsi xamē Jehová, nitajētsinexa pepacuene niacuenesaēnēcueni, daxitanacuapijiwi pecawēnēliwaisixaniatsinexa. Najumeliwaisicowēnētsianame pacuenia bajayatami nejumaitsimē: ¹⁸«Xanē, Jehovánē, bepijiacuenia apota-anaepanaenē. Bitso ta-asiwanē jiwi. Tasiwajamatabēcuenecaewinē pajiwiyo pibisiacueni exana, pajiwiyonua aponejumecowēnētsi piamatabēcuenenebejexae. Itsia baitsi jane, xanē apocopatsinē tsane naneconitsia-exanaenejewanē pajiwiyo naneconita xanē-jawaberena. Bajarapajiwi aponaneconitsia-exanaenē tsane caejiwi. Itsa pexi pexinaenē, yajawananeconitsia-exanaenajē pexi, pemomoxijawabelia-ata. Baitsi, pexi pemomoxijawabelia, itsa jume, pemomoxi pexijawabelia matapania copatsianajē tananeconitsia-exanaejawa bajarapamonaē», nejamē picani. ¹⁹Nexata bajaraxuata, cawajētatsi nesiwajamatabēcuenecaewinexa bajarapamonaē pijaneconi pexanaejawa xamējawabelia, xamē tsipaji ayai-cuenia jiwi nitaxutotsoniataeyabiabinē. Pacuenia Egipto nacua jawawerena pepitsapaecujinae xamē siwajamatabēcaewabiabame, bajarapacuenia icatsia nesiwajamatabēcuenecaewinexa —jai Moisés Jehovájawabelia pewajētsijawata.

Dioso naneconitsia-exana Israel-pijinē pemomoxi

²⁰Nexata, Jehová jumecanawiata Moisés-jawabelia mapacueniaje:

—Je, xanepana. Nexata, xanē bajarapamonaē siwajamatabēcuenecaewina-jē pacuenia xamē newajētame. ²¹Itsia baitsi jane, catsipaebatsi maje: «Xanē raja ta-asaētsaponaponaenē, bajarapacuenianua ayaijamatabēcueni taxainaenēcueni tsitajētajē daxita-irajawa, jiwi tanewēnēliwaisitaenexa. Bajarata-itsinēxae, najumecapanepaeya catsipaebatsi: ²²⁻²³‘Caejiwi-ata

tanecuenae-aebiwi apojone tsane pa-irajawabelia picani najumecapanepaeya rajutsiapaebajē pijasalinaiwimijawabelia. ¡Jume cajena! Bajarapacuenia bajarapamonae apojone tsane, tsipaji xanē necueneyapētae-ata bajarata-itsinēcuene tatsita-exanaejawata bitso pinijicuenejawanē Egiptojawatalia, bajarapacuenia-ata petusatonacuata, bajaraxuanē tae-ata, aponejumeco-wēnētabiabi. Caranata, nejamatabēcuene-ējēbiaya najetarubena petusatonacuajawa. Diez xuabeje baja nejamatabēcuene-ējēba. Nexata, pamonae netane bewelianēcuenianē, bajarapamonae yajuwēnēwi apotae tsane Canaán nacua caenē-ata, siwajamatabēcuenecaeawi-atanē picani tanewa-jēcaecueniamē», cajaitsi —jai Jehová Moisés-jawabelia pecuene-aebiwitsi yabara.

²⁴ Icatsia, Jehová jumaitsi Moisés-jawabelia.

—Itsia, tajajiwitonē Caleb bajarapamonae wecua jonena bajarapanacua-jawabelia, baja tsipaji xaina itsajamatabēcuene tanecuenae-aebiwiwecua. Bajaraponē xaniajaiya najamatabēcuenewereta pejamatabē-ēthētowsina tanejumecowēnētaaponaponaenexa. Nexata, tanejumecowēnētsixae, bajaraponē xanē tocopatsianajē pejonenexa Canaán nacujawabelia pepitsinexa bajarapanacuayajuwēnē-ira, peya-enebinacuami. Nexata, pemomoxi canacopataponaena bajarapa-ira. ²⁵ Itsia, daxita israelitawi xamē Moisés caewēarena barēponaename icatsia petsewitusatonacuajawaberena, patusatonacua boca petsutonacua pewajēnaeya itsajota jinawanapa amalecitamonae, cananeomonae-ata. Nexata, merawia bajayacunua panaropobianame panepatsinexa patusato boca Mar Rojo manuamene imoxoyojawaberena, bajarapamonae papecabarēnawajabitsaētsiyaniwa —jai Jehová.

²⁶ Jehová xuacujinae icatsia jumaitsi Moisés, Aarón-bejejawabelia:

²⁷ —Acuenejitsibinē bajarapa-ajamatabēcuenebejewi tanejamatabēcuene-ējēbabiabijawa baja. Amuxujitsibinēnua tanecuenebaracuaicuajaijawa pibisiacuenia nesiwajamatabēcuene-anaepanaeya israelitawi. ¿Detsa paepatota copabiana bajarapacuenē? ²⁸ Nexata, pajumaitsimēbeje tsane bajarapamonae-jawabelia: «Jehová raja pacajumaitsi: ‘Xanē raja daxitamatacabi taya-matacabiatsitecaenē. Pacuenia pajumaitsimē panetēpaejawa yabara patane-baracuaicuajaijawatamē, nexata bajarapajumecowēya pacato-exanaenatsi. ²⁹ Nexata, patēpaename mapatsewitusatonacuataje. Baitsi, daxita pamonae pibisiacuenia tanenajuacuenebaracuaicuajaiwi, pexainaewi veinte pawai-beje pematatsēnēa pewēnējucaewitsi censojawata, bajarapamonae tēpaena. Bajarapamonae nacayajatsiaya namēthēcaponaena bajarapatusatonacuajawata. ³⁰ Caenē-ata paxamēyajuwēnēnē apojone tsane pa-irajawabelia najumecapanepaeya pacarajutsiapaebatsi picani panejinawanapaenexa. Itsia baitsi jane, tajajiwitonēbeje Caleb, Josuébeje jonena bajarapa-irajawabelia peponaponaenexabeje. ³¹ Itsia baitsi jane, paxamē panexi, pamonae pacacujunawame panijawajabitsaēwi papecatotaicaeyaniwatsi, bajarapamonae juya pacatsujonena panewēnamuto. Pa-ira paxamē beweliacuenia panaē-cotame panejoneyaniwa, bajarapa-ira panexi juya pacatsucabarēya tsane. ³² Paxamē juya panetēpaewi pacamēthēcaena bajarapatusatonacuata. ³³ Nexata, patanejume-aebixaemē ajena, panexi pacayajawajinawanapaena petsewitusatonacuata cuarenta pawai-beje panijaneconijamatabēcuene, matapania panetēpaejawabelia patanecuenae-aebiwiwē. Nexata, bajarapamonae

pacayajawawaraponaena oveja pewetsiwicuenia. Bajarapacuenia panexi bejiobicueneta jinawanapaena apopatanejumecowënëtsijamatabëcuenemë.
³⁴Paxamë pamatacabibeje pajinawanapame paneya-enebiwicuenia Canaán nacuatalla, bajarapacuarenta pamatacabibeje pejamatabëcuene pajinawanapame cuarenta pawai-beje petsewitusatonacuata panijaneconijamatabëcuene. Baitsi caematacabijamatabëcuene pacatocaewai tsane. Bajarapacuarenta pawairenabeje matapania payapëtaename patacananeconitsia-exanaejawa, 'pacajai Jehovah', pajamëbeje tsane tawënëta israelitawijawabelia. ³⁵Pacuenia xanë, Jehovahänë, najumecapanepaeya pacajumaititsibeje, bajarapajumecowëya to-exanaenajë bajarapa-ajamatabëcuenebejewijawabelia, tsipaji bajarapamonae xaina caejamatabëcuene tane-itoyanexa. Nexata, daxita bajarapamonae tēpaena petusatonacuata. Bajarajota, jinarutsiana pitsapaenejewaw petēpaejawabelia —jai Jehovah Moisés, Aarón-bejejawabelia.

³⁶⁻³⁷Moisés pamonaie itoroba pebarëya-enebiwinexa Canaán nacujawabelia, bajarapamonae Jehovah tocopata diez ponëbeje petēpaejawa caecuenia daxitajiwi pitabëta, tsipaji bajarapamonae nacua peya-enebicujinae, capata pibisiawënëliwaisi. Nexata, bajarapaliwaisita muxubijiapeneta Israel-pijinë pemomoxi, pejoneyaniwa Canaán nacujawabelia. Bajarapamonae peliwaisi pejamatabëcueneta, daxita israelitawi siwajamatabëcuenebara-anaepana Jehovah, nexata Jehovah tocopata bajarapadieze ponëbeje petēpaenexa.

³⁸Itsiata baitsi jane, Josué, pexënato Nun, Caleb-beje pexënato Jefone, bajaraponëbeje apoyajawatēpae bajarapamonae. Bajaraponëbeje jamatejema asaë tsaponaponaebeje peya-enebiwiyajuwënënebeje.

Itawetsi-atatsi picani, israelitawi tsimaxëpata itsiata Hormapijiwawabelia

³⁹Moisés baja itsa tsipaeba israelitamonaiejawabelia xua Dioso jumaititsi, nexata bajarapamonae daxita bitso najamatabëxainaeya jinawanapa.

⁴⁰Nexata, itsamatacabijawabelia, pepobajayacunua, bajarapamonae namatacoba peponaenexa petsutonënacujawabetsia, itsajota jinawanapa amalecitawi, cananeowi-ata, pebarënewajabitsaëtsinexa bajarapamonaejawabelia. Bajarapamonae pepitsapaewajënaeya najumaitsi:

—Bajaramajotaje nubenatsi Canaán nacua imoxoyojawata wajajonene-xalia. Xaniajai, bitso pibisiacuene exanatsi picani Jehovahjawabelia. Itsiata, aeconoxae ponanatsi panacuajawabelia bajaraPonë nacarajutsiapaeba, tsipaji baja copatatsi apowajajumecowënëtsicuenemi —najai.

⁴¹Itsiata Moisés jumaitsi bajarapamonaejawabelia:

—¡Itonopae! ¿Dexuajitsia orijibia apopajumecowënëtsimë Jehovah papeca-itawetsijawa? Maxua pa-exanae-atamë tsane, apopatopitsapae tsane pexaniacuena. Payacueniabejemë tsane. ⁴²¡Pëtsa paponame panewajënaeyabelia, tsipaji raja Jehovah apopacayajawa tsane! ¡Pëtsa paponame, panijawajabitsaëwi papecabeyejebinexa papecacuene-amoneyabijawata, ⁴³tsipaji raja panewajënaetalia pacawajënae-ewetanubena amalecitamonae, cananeomonae-ata papecabarënenexa paxamë! Itsa paponacermelia, papebayejebiana pija-espadanëta, tsipaji Jehovah apopacayajawa tsaponaponaie, imata apopanesiwanajamatabëcuenecopatsixae bajaraPonëjawabelia —jai Moisés bajarapamonaejawabelia, pebeyejebiyaniwatsi picani pijawajabitsaëwi.

⁴⁴ Itsiata baitsi jane, bajarapamonae ajamatabēcuenetaja orijibia. Itsiata, jumetae-ata, wecuaponaliatsi bajarapatsutonējumabelia itsajotalia wajēnae-ewetatsi bajarapanacuapijiwi. Bajarapamonae ponae-ata, itsiata Dioso pena-jumeliwaisixaniawaetsibaula nacopata Dioso pijacarpabota israelitawi pija-taxunaebotuatuajēta. Bajarapacuenia Moisés-ata nacopata. ⁴⁵ Nexata jane baja, amalecitamonae, cananeomonae, pejinawanapaewi bajarapanacuata, petsutonacuawetsica patsica pebarēnawajabitsaētsinexatsi israelitawi. Cuene-amoneyabatsi bitso ayaicuenia. Nexata, tēpa ayaibitsaēto. Nexata, israelitamonaemi pēbarajinatsi Horma tomarajawabelia.

**Corébana jamatabēnaexana pepopenamatacaitorobiwi
pacuenia Moisés, Aarón-beje**

16 ¹ Itsamatacabi, ° Levípijinē^p pexēnato Coat-pijinē pemomoxiyajuwē-nēnē, Coré, Izhar pexēnato pijamonae yajawa, tsimaxēpata anaeya peyanijobinexa Moisés, Aarón-bejējawabelia, pewetsicuenebeje yabara. Caejamatabēcuenē xainanua Datán, Abiram-beje, pexēnatobeje Eliab-pijinē, On-ata, Pelet pijinē pexēnao. Bajarapa-acueyabi ponēbeje Rubén-pijinē pemomoxiyajuwēnēwi. ² Orijiibia, bajarapacuatro ponēbeje natsicueyajunata itsamonae, doscientos cincuenta ponēbeje israelitawiyajuwēnēwi, pejamatabēcueneyanabinexatsi. Bajarapamonae pijamonaetuatuajēta penamatacaitorobiwi, pewēnēliwaisijonewanapaewi. ³ Bajarapamonae caejamatabēcuenē pexainaexae, tsimaxēnacaetuata cueneca-ēbiaya peyanijobinexa Moisés, Aarón-bejējawabelia. Nexata, Coré jumaitsi:

—Apoxanepanae baja pematatsēnēa paxamēbeje patanenamatacaitorobaponaponaejawamēbeje, be-ayaijamatabēcuenē panenataexaēbeje. Daxita israelitawitsi baja picani wajanaca-itapetsiwi Dioso. ¿Detsa xuajitsia nexata paxamēbeje panajamatabēxainamebeje paxanē patanenamatacaitorobinexamēbeje Jehová papijajiwinē? ¿Apopayapētaemebeje tsaja Jehová daxitatsi wajanacayajawajawa? —jai anaeya bajaraponēbejējawabelia.

⁴ Moisés bajarapacuenia pejumetaejawata pejumaitsijawatsi, yaiya-taeya pematabacata nuca itapapatsiaya irabelia, pewajēcaenexa Jehovájawabelia. ⁵ Pewajēcaeweretsicujinae, jumaitsi Corējawabelia, daxita peyajawapatsiwiawabelia-ata:

—Merawia raja bajayacunua, Jehová nacayapētaeya-exanaena pamonae israelitawituatuajēta itapeta petonacuenebawanapaewinexa Dioso

o 16:1 *Itsamatacabi:* Bajarapamatacabi raja, israelitawi Dioso itorobatsi icsatsi penaneconitsi-wicuenia penawiabinexa petsewitusatonacuajawaberena, pejinawanapaenexa itsatreinta y ocho pawaiabeje, petēpaejajawabelianexa pamonae cuene-aeba Dioso peyawenonaejawanexatsi. Bajaru-xuata, Corébana anaepana Moisés, Aarón-bejējawabelia. Taema Núm. Capítulo 14 p 16:1 *Levípijinē:* Taema Éxo. 6:14-27. Jacob-pijinē pexi pebiwiyajuwēnēnē Levípijinē. Bajaraponē xaina acueyabi ponēbeje pexi: Gersón-pijinē, Coat-pijinē, Meraripijinē-ata. Coat-jawata penaitajēbaponaewi, Aarón, Moisés, Coré-ata. Itsiata baitsi jane, Aarón yajawa-itapetatsi, pexi pebiujiwi, Nadab, Abiú, Eleazar, Itamar-ata sacerdotewinexa. Nexata, ēbajarapamonae pemomoxi pebiujiwi cuenecaējēpatsi penacuenebijawa tabernáculobo-ēnēta. Gersón-pijinē pemomoxi Dioso tocaē-jētatsi pecaponaenexa pewarapaejawata tabernáculobopijipananawanē. (Núm. 4:24-26; 7:7-8) Coat-pijinē pemomoxi pijinia tocaējētatsi pecaponaenexa Dioso pijabaula, daxita xuanē-ata pecanacuenebinexa tabernáculobojawata. (Núm. 4:4-12; 7:7-9) Meraripijinē pemomoxi pijinia tocaējētatsi pecaponaenexa, daxita tabernáculobopijitablananē, naejawanē, petsiwajēnaejebi-jawanēnua itsajota nubabiaba bajaraxuanē. (Núm. 3:36-37; 4:29-33)

pijarcapabota, israelitawi pecapatsidajubi petotajuitabiabiwinexa-ata altar-jumata. Jehová penato-itapetsiwi,⁹ ěbajarapamonae cuenecaĕjĕpae-natsi pepatsinexa pijataxunaejawabelia. ⁶Bajarapacuenia xaniawaetsia wajayapĕtaenexa, xamĕ, Coré, daxita nebarĕnajamatabĕcuenejĕpaewi yajawa, merawia pacapatsianame pawaxianĕta patajuitsijitsiamĕ incienso-pĕrĕ Jehovájawabelia. ⁷Nexata, bajarapawaxianĕta pajename iso-ita-ire. Bajarapa-iso-ita-irejumawereca pa-othocaename inciensopĕrĕ. Bajaraxuanĕ pacaponae name, panecobenanubenaenexa Jehová pitabarata, pijarcapabopijibaupa pewajĕnaeya. Bajarajota nexata, Jehová nacatsitajĕtsiana ponĕ itapeta Levípijinĕ pemomoxituatuajĕta, petonacuenebaponaponaeñenexa Dioso pijarcapabojawata. Paxamĕ rabiji be-ayaijamatabĕcuene panenataewi Jehová pitabarata —jai Moisés.

⁸Orijibia, Moisés jumaitsi Corĕbanajawabelia:

—Xaniawaetsia panejumetaema, paxamĕ Levípijinĕ papemomoximĕ.

⁹Israelitawituatuajĕta DIOSO paca-itapeta, panetonacuenebawanapae-winexa pijarcapabojawata, pane-imoxoyotabiabinexa, paneyapijiwinacuenebiwinexanua⁷ panijamonaetuatuajĕta Jehová pijataxunaejawata. ĵApopacatsitanamatamotsi tsaja bajaraxua paxamĕ? ¹⁰Coré, Jehová pecajitsipaexae, xamĕ ca-itapeta daxita itsamonae Levípijinĕ pemomoxi yajawa, pane-imoxoyotabiabinexa pijarcapabojawata. Itsiata, aeconoxae, ĵpematatsĕñĕta jitsipapona name tsaja sacerdotenĕcuenia nenacuenebaponaponaejawata? ¹¹Xamĕ, daxita nebarĕnajamatabĕcuenejĕpaewi yajawa apopaxainaemĕ picani xua yabara pibisiacuenia pabaracuaicuaijamĕjitsia Aarón, tsipaji bajaraponĕ pepobeweliajamatabĕcueneñĕ Jehováwecua. Nexata, xua pa-exaname Aarón-jawabelia panetsimaxĕnacaetuatsijawata, bajaraxua pepacuene pato-exaname Jehovájawabelia —jai Moisés Corĕbanajawabelia.

¹²Bajaraxuacujinae, Moisés itoroba petojunatsinexatsi Datán, Abiram-beje, Eliab pexĕnatobeje. Itsiata baitsi jane, bajaraponĕbeje jumecanawiat-siaya tonajume-itorobabeje mapacueniaje:

—Apopajitsipaenĕbeje bajarabelia pataponaejawabeje. ¹³Xamĕ panejutame Egipto nacuawecua, panacuata picani nawita daxitacuene pexaejawata. Nexata, panecaponame mapatsewitusatonacuayaberenaje patanetĕpaeya-exanaenexamĕ. Bajarapapibisiacunejawanĕ paneto-exanae-atamĕ, ĵabaxĕ icatsia jitsipapona name patacajumecowĕñĕtsinexa patanenamatacaitorobaponaecueniamĕ? ¹⁴Orijibia, abaxĕ apopanecaponaemĕ pa-irajawabelia daxita pexaejawacuene nawita. Apopanerajutsimĕnua abaxĕ pataja-uvabacabonĕnexa, iranĕ-ata patanacuenebinexa, patajapabianĕ pata-ubinexa. ĵJamatabĕpaneyamaxĕ-itojorobame tsaja patawajĕnaeyajawabelia, be-apopatanetsiwajĕnaetaewicuenia? ĵAjibi cajena! Paxa-nĕbeje apopaponaenĕbeje tsane xamĕjawabelia —jai Datán, Abiram-beje petonajume-itorobicuenia.

¹⁵Moisés nexata bitso itaxutejema anaepana. Nexata, jumaitsi Jehovájawabelia:

—¡Jehová, pëtsa tocopiapitame xua carajutsiana^s bajarapamonaē! Xanē rabaja caenē-ata pijaburro apowecuapitsinē^t bajarapamonaē. Bajarapacuenia caepibisiacuenejawa apoto-exanaenē tane-itoyanexa —jai Jehovájawabelia.

¹⁶ Bajaraxuacujinae, Moisés najamatabēcuenenapitsia-exanaeya jumaitsi Coréjawabelia, peyajawapatsiwijawabelia-ata:

—Merawia patsianame bajayacunua, daxita pamonaē-ata pecajamatabēcuenējəpaewi, panenaitajəbinexa Jehová pitabarata. Bajarajota-ata raja, napatsiana Aarón, penanucaenexa. ¹⁷ Caejiwi canacujitsia, paxamē pacapatsianame pawaxianēta patajuitsijitsiamē inciensopərə Jehová pita-barata; doscientos cincuenta paponēmēbeje daxitata. Bajarapawaxianēta pa-othocaename inciensopərə iso-ita-irejumawereca. Nexata, daxita paxamē, Aarón-ata, nacobenanucaena bajaraxuanē Jehová pitabarata —jai Moisés.

¹⁸ Bajarapacuenia exana baja. Nexata, bajayacunua, caenē canacujitsia, nota pija-incienso pecatajuitiabiwaxiyo. Bajarapawaxiyota, jia altar-piji-iso-ita-ire. ¹⁹ Xuacujinae, inciensopərə pərəca iso-ita-irejumawereca. Nexata jane baja, nacaetuata penajuacanubenaenexa Moisés, Aarón-beje yajawa, Dioso pijacarpabobaupa wayafowelia. ²⁰ Itsa baja Coré barēnacaetuata Dioso pijacarpabopijibaupa wayafowelia, daxita pejamatabēcueneyanabiwitsi yajawa, bajarapaepatota Jehová pijapeniweniwenaeotia tsitanaitajētatsi daxita israelitawi pitabarata. ²¹ Nexata, Jehová jumaitsi Moisés, Aarón-bejəjawabelia:

²¹ —Pawecuanatsarebeje bajarapamonaē penacaetuatsiwi, tsipaji raja cae-epatoyocujinae bajarapamonaē werebiabianajə —jai Jehová.

²² Itsiata baitsi jane, Moisés, Aarón-beje, bajarapaepatota irataeya boca-junuabeje, petowajətsinexabeje bajarapamonaē Jehovájawabelia. Jumaitsi tsanucaebeje:

—Diosomē xamē baja cajena daxitajiwi nenajumalirajutsinē, pejamatabēcuenē-ata neyapētaenē. Caenē picani pibisiacuene exana. ¿Detsa xuajitsia xamē bara-anaepanaeme daxita bajarapanacaetuatsibitsaətojawa-belia? Apoxanepanae bajaraxua —jaibeje.

²³ Nexata, Jehová jumecanawiatsiaya jumaitsi Moisés-jawabelia:

²⁴ —Itorobare daxita israelitamonaē pewecuanatsanaenexa pamonaē imoxoyo jinawanapa Coré, Datán, Abiram-ata, pijacarpabonəwecua —jai Jehová.

²⁵ Bajarapaepatota nexata, Moisés nonotapuna. Yajawapona itsamonaē israelitawi pewetsiwi, itsajotalia ponaponabeje Datán, Abiram-beje, pijacarpabobejəjawabelia. ²⁶ Nexata, Moisés jumaitsi israelitawijawabelia:

s 16:15 *carajutsiana*: Moisés apojitsipae Dioso pesiwabarəyajawa pa-inciensopərə tajuitsijitsia, itsa jume, padajubi rajutsiaya tajuitsijitsia. t 16:15 *apowecuapitsinē*: Bajayatami, petuxanewi wajəcabiaba itsacuenejawa pijajiwijawabelia pewetsimatamo yabara. Itsiata, bajarapacuenia Moisés apo-exanaē israelitawijawabelia. Bajarapa-ewetsimatamo maparucaje gobiernomonaē wənərubabiaba impuestomatamo. u 16:18 *altar-piji-iso-ita-ire*: Inciensopərə petajuitsinexa Diosojawabelia, perajutsiwi becanacueneba pa-iso-ita-ire xaina pijini-altar, itsajota dajubi tajuitabiaba. Taema Lev. 16:12. Aarón pexənəto-beje, Nadab, Abiúbeje saicaya-iso-ita-ire pecanacuenibexae, Dioso beyaxuabatsibeje. Taema Lev. 10:1-2

—¡Pawecuanatsanare baja mapamonaaje pijamatabëcuenebejewi, pijacarpabonëwecua imoxoyo panejinawanapaewi! Pëtsa papitame itsacuenejawayo-ata bajarapamonaë pecobecowëyajuwënëjawanëmi, Jehová papecayajawananeconitsia-exanaeyaniwa pijaneconijamatabëcuene —jai Moisés.

²⁷Nexata jane baja, daxita israelitawi wecuanatixibatsi Coré, Datán, Abiram-ata pijataxunaëbonëwecua. Bajarapaepatota Datán, Abiram-beje pijawabeje, pexi-ata, yajawanucabeje wayafowelia pijacarpabobaupa imoxoyojawata. ²⁸Nexata, orijibia jumaitsi Moisés israelitawijawabelia:

—Maxuaje papecatsita-exanaejawata Jehová, payapëtaename pepacuenë Dioso tane-itorobijawa daxitaxua^v exanabiabajë patacanamata-caitorobaponaponaejawata. Bajaraxuanë apo-exanaenë xanë tajacuata tanatujitsipaecuenia. ²⁹Nexata, bajarapamonaë itsa tēpaejitsipa saya jiwi petëpabiabicuenia, peneta Jehová xanë aponitorobi tsipae, bajarapacuenia ta-exanaenexa. ³⁰Jehová itsiata itsa exanaena jiwi apopetaecuenia abaxë, pewerebiabijawata bajarapamonaë, peneta xanë Jehová nitoroba. Bajaruata, bajaraPonë ira nawoconaeya-exanaena, ya-asaëya pequijoninexatsi bajarapamonaë, daxita pecobecowë yajawa. Bajarapacuenia payapëtaename bajarapamonaë bajaraPonëjawabelia penanecontsijawa, beweliacuenia petaxae —jai Moisés.

³¹Ajena najumewereta bajaraxua yabara Moisés pejumaitsiyawa, nexata jane baja, ira nawocona bajarapamonaë pebëxëpanatsina. ³²Nexata, bajarapacuenia ira quijonetsi Coré pijamonaë, daxita pamonaë-ata caejamatabëcuene xaina bajaraponëjawabelia, daxita pecobecowëjawanë yajawa. ³³Daxita bajarapamonaë othopareca ya-asaëya irabëxëpanayabereca, daxita pecobecowëjawanë yajawa. Bajaraxuacujinaë baja, ira icatsia pijacuenia na-acata. Nexata, irabelia pëcaewa. ³⁴Pejumetaejawata penatsi-aëaëjijawa ira pequijonijawatatsi, daxita imoxoyo penubenaewi rëcëpecaeya jumaitsi: «Pëtsa saya waxaitsi-ata ira nacayajawaquijone», jai tsecae. ³⁵Bajarapaepatota pijinia, Jehová caecuenia tsitoroba isoto athëbëwetsica, petajuënexatsi doscientos cincuenta ponëbeje, petajuitawanapaewi abaxë incienso Dioso pijacarpabopijibaupa wayafowelia. Nexata, bajarapamonaë tēpa isotota petajuëcueniatsi.

³⁶Bajaraxuacujinaë, Jehová jumaitsi Moisés-jawabelia:

³⁷—Itorobare sacerdotenë Eleazar, Aarón pexënato, pecaetuatsinexa bajarapamonaëmi pawaxixita tajuitanubena inciensojawanë. Bajaraxuanëmi raja tsiteca tanetotsatijawanë ëxanënexa. Itsiata, pa-iso-ita-ire abaxë itatsajawanubena bajarapawaxianë-ënëta, penetsia-exanare tajë panijataxunaëbonëwecua. ³⁸Bajaramonaëmi tēpae-ata pibisiacuenë pexanaëjamatabëcuene, pecanacuenëbiwaxianë nacopabiana tajajawanënexa, incienso pecatajuitsixae bajaraxuanëta taitabarata. Nexata, panecaetuatsicujinaë, bajarapawaxianëmi patsaquitsianame, pepanaxi pane-exanaenexa.

v 16:28 *daxitaxua*: Moisés yabaracuaicuaijai daxitaxua exana Dioso pewënëta israelitawituatua-jëta pewetsinëcuenia. Mapacuenëjawanëje: Pejutsijawa israelitawi Egipto nacuaawecua, pitapet-sijawa Levipijinë pemomoxi daxita israelitawituatua-jëta petonacuenëbawanapaewinexa Dioso pijacarpabota, pitapetsijawanua Aarón, pexi pebijiji yajawa, sacerdotewinexa. Daxita bajaraxuanë Moisés exana Dioso pitorobicueniatsi.

Xuacujinae, bajarapapanaxita pajumaxatatsianame piniji-altar-jumawelia. Bajarapapanaxi itsa taena israelitawi, najamatabēnapitabiabiana pexanae-yaniwa Corébana pexanaecuenemicowēya —jai Jehová.

³⁹Nexata, pamonaemi tajuatsi isotota, daxita incienso pecatajuitsiwa-xianē, bronceanito pexanaejawanē, Eleazar, sacerdotenē, caetuata. Xua-cujinae, itoroba pepanaxi pexanaenexa bajaraxuanēmita, piniji-altar-jawa pejumaxatatsinexa. ⁴⁰Bajarapapanaxi petaejawata penajamatabēnapita-biabinexa daxita israelitawi pacuenia caenē Aarón cuenecaējēpatsi, pecu-jitabiabinexa petajuitsijawata incienso Jehová pitabarata. Nexata, ponē apopemomoxiyajuwēnēnē Aarón, sacerdotewi pepopenamatacaitorobinē,^w apocuenecaējēpaetsi bajarapacuenia pexanaejawa. Najamatabēnapitsia-exanatsinua Jehová petocopiapatsia-exanaejawa xua tocopiapatatsi Coré-pijinēmi, pejamatabēcueneyanabiwitsi-ata, itsa apoyaiyatae bajaraPonē pijacuene. Daxita pacuenia baja jumaitsi Jehová Moisés-jawabelia Eleazar pexanaejawanexa, bajarapacuenia exana, israelitawi pecuenejēpaeyaniwa Corébana.

⁴¹Itsamatacabijawabelia, bajayacunua, daxita icsatia israelitawi taxu-xuaba Moisés, Aarón-bejejawabelia anaeya pebaracuaicuajaijawa mapacueniaje:

—Paxamēbeje raja pabeyaxuabamebeje Jehová pijajiwimi —jai tsaponae.

⁴²Bajarapamonae matatoyorotsia itsa tsimaxēpata Moisés, Aarón-bejejawabelia, bajaraponēbeje ponabeje Dioso pijacarpabojawabelia. Bajarapaepatota, bajarapamonae tane piapiapajubo pemata-acatsijawa daxita bajarapacarpabo. Bajarapapajubojawata, naitajēta Jehová pijapeniweniwe-naecotia yajawa. ⁴³Nexata, Moisés, Aarón-beje, imoxoyotabeje Jehová pijacarpabojawalia, pewajjēnaeya penucaenexabeje.

⁴⁴Nexata, Jehová, bara-anaepanaeya israelitawi, jumaitsi Moisés-jawabelia:

⁴⁵—¡Bajarapamonae pawecuanatsarebeje!, tsipaji raja, bajarapamonae cae-epatoyocujinae piawitanecuenia werebiabianajē —jai.

Nexata, Moisés, Aarón-beje, bajarapaepatota irataeya bocajunuabeje, petowajētsinexabeje israelitawi yabara Jehovájawabelia. ⁴⁶Petowajētsicujinae-beje, nexata Moisés jumaitsi Aarón-jawabelia:

—¡Pire pawaxiyota tajuitabiabame incienso! ¡Pirenu iso-ita-ire piniji-altar-wecua, nejenexa bajarapawaxijawabelia! Nexata, tsijumabuare incien-sopērē bajarapa-ita-irejumata. Bepijaiyo baja ponare itsajotalia tēpapon israelitawi. Netajuitsijawata inciensopērē, yajiwijajētsianame Jehovájawabelia, bajaraPonē pesiwajamatabēcuenecaewinexatsi pijaneconi, tsipaji pawitane tsi-itorobiapaebatsi pebara-anaepanaexaetsi, tocopiapataponatsitsi baja bajarapamonae —jai.

⁴⁷Aarón nexata exana pacuenia Moisés itorobatsi. Pita pawixiyota tajui-tabia incienso. Nexata, cujinaetabijirawalia itsajotalia tēpapon israelitawi, Jehová pawitanecuenie tsi-itoroba pewerebiabinexa. Nexata, Aarón

w 16:40 *sacerdotewi pepopenamatacaitorobinē*: Taema Éxo. 30:7-8 Itsiata, bexējajawabelia bajarapatajuitsicuene canacopata itsamonae sacerdotewi, apopepopenamatacaitorobinē-ata. Taema Lc 1:9

jane baja, bajarapaepatota yajiwitajuita inciensojawa. Yajiwijawjētanua Jehovájawabelia, pesiwajamatabēcuenecaewinexatsi pijaneconimi. ⁴⁸ Baja-raxuacujinae, bajaraponē tuatuajēta yacaranatsianuca pamonaē bobena petēpaewi, pamonaē-ata abaxē asaē tsanubenaē. Nexata, bajarapaepatota petēpaponaejawa copiaruca. ⁴⁹ Bajarapawitanejawata yatēpa catorce mil setecientos pajiwi-beje, namata-ējētsinejewa pamonaē copiaya tēpa pebara-anaepanaejamatabēcuenē Coré pejamatabēcueneyanatsiwitsi. ⁵⁰ Paepatota baja copiaruca jiwi petēpaponaejawa, bajaraxuacujinae Aarón nawialia Dioso pijacarpabojawabelia, itsajota Moisés nuca.

Aarón pijanaebo peliwaishi

17 ¹ Nexata, xuacujinae Jehová jumaitsi Moisés-jawabelia:
² —Itorobare israelitawijawabelia, caenē, pemomoxibitsaēto canacujitsia penamatacaitorobinē pecapatsinexa pijanaebo, baitsi pecapatsinexa daxitata doce ponaebobeje. Nexata, xamē caepenamatacaitorobinē canacujitsia wēnyequina-ponaenaē pijanaebota. ³ Levípijinē pijinia pemomoxibitsaēto pijanaebota wēnyequinaenaē Aarón. Bajarapacuenia caenē pemomoxibitsaēto canacujitsia xainaponaena pijanaebo, penamatacaitorobinē pewēnēta. ⁴ Bajaraxuacujinae, bajarapadoce ponaebobeje jebianaē tajacarpabo-ēnēta, patacanajumeliwaisixaniawaetsibaula pewajēnaeya, itsajota xanē pacacaxitajarababiabatsi. ⁵ Xanē raja peneta ponē ta-itapetsinē penamatacaitorobinēnexa tajajiwi, pijanaebo tobaxujuwia-exanaenajē. Nexata, bajarapacuenia israelitawi copabia-exanaenajē pematatsēnē pibisiacuenia papecabaracuaicuaijajawabeje xanē taitabarata —jai Jehová.

⁶ Moisés nexata tsipaeba bajarapaliwaishi daxita israelitawijawabelia. Nexata, caenē pemomoxibitsaēto canacujitsia penamatacaitorobinē, rajutapona pijanaebo Moisés-jawabelia. Bajarapacuenia caetuata daxitata doce ponaebobeje. Bajarapanaebonētutuajēta, Aarón pijanaebo naboca. ⁷ Bajaraxuacujinae jane baja, Moisés jeba bajarapanaebonē Dioso pijacarpabo-ēnēta, Jehová penajumeliwaisixaniawaetsibaula pewajēnaeya. ⁸ Itsamatacabi, bajayacunuajawabelia, Moisés icatsia pona carpabojawabelia. Itsa pata itsajota bajaraponaebonē bobena carpabo-ēnēta, tane Aarón pijanaebo pebaxujuwanucaeja, penamatonototanucaeja, penaweretsi-almendranea-cuaitonē perubenaējawa-ata. ⁹ Nexata, Moisés juta daxita bajarapanaebonē, Jehová pitabarata pejebijawanē, petsitajētsinexa daxita israelitawijawabelia. Nexata, bajarapamonaē petaecujinae, caenē canacujitsia penamatacaitorobinē pitapona pijanaebo.

¹⁰ Bajaraxuacujinae, Jehová jumaitsi Moisés-jawabelia:

—Icatsia buare Aarón pijanaebo patacanajumexaniawaetsibaula pewajēnaeya. Bajarajota xaniawaere bajaraponaebo, pecuene-itajētānucaenexa xanē taitapetsijawa bajaraponē, nexata bajarapamonaē copabiana pebara-cuaicuaijajawa pibisiacuenia xanē taitabarata. Bajarapacuenia bajarapamonaē apotēpae tsane —jai.

¹¹ Moisés nexata exana daxita pacuenia Jehová itorobatsi. ¹² Daxita bajaraxuanē petocopiapatsicujinaetsi, israelitawi jumaitsi Moisés-jawabelia:

—Paxanē saya padaxitanē patatēpaewinexa cajena. Ajibi patapane-paecuenenexa. ¹³ Daxita pamonaē kujita Dioso pijacarpabojawabelia,

bajarapamonae tēpabiaba. Bajaraxuata, paxanē padaxitanē patatēpaewi-
 hēxa saya —jai bajarapamonae.

**Ibotojawawerena cotocaewi mera pepitsapaeya-
 exanaejawa yabara peliwaissi**

20 ¹Penamataxainaejuameto waita,^x israelitamonae pata Zin
 nacuatusatojawata. Bajarajota, bajarapamonae pata-othopa cae-
 epatoyonexa Cades-tsutojawata. Bajarapanacuata tēpa María, Moisés pema-
 tapijiwa. Bajarajota, mēthētatsi bajarapowami.

²Bajarapanacuajawata, ajibi mera piapaenexa. Nexata, daxita israeli-
 tawi nacaetuata, siwajamatabēcuenē-anaepanaeya pejumaitsinexatsi Moi-
 sés, Aarón-bejējawabelia, apotsitaxanepanaetsi pewetsicuenēbejējawalia.

³Nexata, bajarapamonae bara-anaepanaeya jumaitsi Moisés-jawabelia:

—Panetoxanepana patayajawatēpaejawa picani patajamonaemi pacu-
 jinae Jehová tēpaeya-exana bajarapamonaemi. ⁴¿Detsa xuajitsia nexata
 panecaponame Jehová papijajiwinē mapatsewitusatonacuajawaberenaje?
 ¿Tsipaji tsaena pajitsipamebeje patacawecuatēpaejawa paxanē, patajadajubi
 yajawa? ⁵¿Detsa xuajitsia patajanejutsimē Egipto nacuwecua mapapiabeje-
 nacuajawaberenaje? Pibisianacua saya, tsipaji apoxanepanae waja-ubinexa.
 Ajibi pecuai pecapitsapaenaenē pacuenia higueraenē, uvabacabonē,
 granadanaenē-ata. Bajarapacuenianua ajibi mera waja-apaenexa —jai baja-
 rapamonae siwajamatabēcuenē-anaepanaeya bajaraponēbejējawabelia.

⁶Nexata, Moisés, Aarón-beje, wecuanatsata bajarapamonae. Bajarapo-
 nēbeje pona Dioso pijacarpabo baupa imoxoyojawabelia pewajēcaenexa
 Diosojawabelia. Bajarajota, bajaraponēbeje yayitacuenia nucabeje nabē-
 xētsutsiaya pitapapatsijawaberecabeje irabelia. Nexata, bajarapaepatota tsi-
 tanaitajētatsibeje Jehová pijapeniweniwenacotia. ⁷Nexata, Jehová jumaitsi
 Moisés-jawabelia:

⁸—¡Pire necanacuenēbabiabinaebo! Bajaraxuacujinae, paxamēbeje,
 nematapijinē Aarón-beje, pacaetuatsianamebeje daxita Israel-pijinē pemo-
 moxi, penubenaenexa ibotoxaneto canacujitsita. ¡Bajaraxuacujinae, baja-
 rapamonae pitabarata itorobare nijumeta bajarapa-ibotojawabelia mera
 pepitsaparucaenexa, bajarapamonae petāenexa ibotojawawerena mera
 pepitsapaejawa, bajarapacuenia piapaenexa bajarapa-ibotopijimera, pijada-
 jubi yajawa! —jai Jehová Moisés-jawabelia.

⁹Nexata, Moisés pita pecanacuenēbabiabinaebo, Jehová pitabarata pebo-
 caenaebo, pecaponaenexa Jehová pitorobicueniatsi. ¹⁰Bajaraxuacujinae,
 Moisés, Aarón-beje, nacaetuatsia-exana Israel-pijinē pemomoxi bajarapa-
 ibotoxaneto canacujitsita. Nexata, bajarapamonaeacuenē yabara Moisés
 jumaitsi: —¿Nexata tsaja, paxanēbeje pacatojutsianatsibeje mera mapa-
 ibotoxanetojawawerenaje patacarajutsinexabeje mera pane-apaenexa? —jai
 anaeya israelitawijawabelia.

¹¹Bajarapacuenia pejumaitsicujinae, Moisés nexata cobenanamaxēyo-
 taba pijanaebo. Conitaxubeta anijatobeje bajarapa-ibotoxanetojawabelia.

^x 20:1 Penamataxainaejuameto waita: Bajarapajuameto pewēnē Abib, itsa jume, Nisan hebreoju-
 meta. Taema «Abib-juameto», glosariojawata.

Nexata jane baja, ibotoxanetojawawerena meraxaneto pitsaparuca. Nexata, bajarapacuenia matapania mera apa bajarapamonae, pijada-jubi yajawa. ¹² Itsiata baitsi jane, Jehová muxujiobiaya jumaitsi Moisés, Aarón-bejajawabelia:

—Paxamēbeje apopatanejumecowēñetsixaemēbeje, panecuenaeabamebeje nijumeta mera nepitsapaeya-exanaenexa pataca-itorobicueniabeje. Nexata, apopatanesiwanajamatabēcuenecopat-sixaemēbeje xanējawaberena, panajamatabēcuenē-itajētamebeje apopataneyaiyataejawamēbeje bajarapamonae pitabarata. Panecuenaeabamebeje patacato-exanaenexabeje patacajumaitsicowēyabeje. Bajaraxuata, apopajonemēbeje tsane mapamonae yajawa Canaán nacua-jawabelia, pa-ira picani pacarajutsiapaebatsi —jai Jehová Moisés, Aarón-bejajawabelia.

¹³ Bajarapamera nepitsaparucaejawa wēñeruba Meriba,^y tsipaji bajarajota israelitamona cuenecarapuabiaya jumaitsi tsaponae Jehovájawa-belia. Bajaraxuata, bajaraPonē tsitanajamatabēcuenē-itajēta penawecua-itoyajamatabēcuenē^z daxita pibisiacuene pexanaejawa.

Edom nacuapijiwi apocopatsi pijanacuajawa Israel-pijinē pemomoxi penajetarubenaenexa

¹⁴ Cades nacua jawawelia, Moisés itoroba pejumeliwaicaponawinexatsi Edom nacua pepopeyanacua-ewetsinējawabelia, pejumaitsinexa mapacueniaje: «Paxanē Israel-pijinē papemomoxinē, paxamē rabaja patajamonaemē, tsipaji wajasalinainēmibeje^a nacaebananēbeje. Paxamē rabaja payapētaneme papiayapēbejucuenējawanē panetocopiapatapona patanajetarubenaejawata. ¹⁵ Payapētanemenua pacuenia patajasalinaiwimi pona Egipto nacua jawabelia. Bajarajotalia bajayajebi jinawanapa. Bajarapanacuapijiwi bitso ayaicuenia bejiobia-exanabiabatsi patajasalinaiwimi, bajarapacuenia paxanē-ata. ¹⁶ Patanebejiobia-exanaponaexae, paxanē belia pawajēcaponajē Jehovájawabelia, pataneyawenonaenexa. Nexata bajaraPonē panejumetane. Paneto-itoroba pija-ángelnē, patanejutsinexa Egipto nacuwecua. Nexata ajenaconoxae, pajinawanapajē Cades-jawata, panacuajawa panija-ira copia-rucanajetaruca. ¹⁷ Pexaniacuene pacawajētatsi pataneto-exanaenexamē, patanajetarubenaenexa panija-irajawa, bepijiayocuenia patapatsinexa panacuajawabelia Jehová panenamatacapona. Itsiata raja, patanajetarubenaejawata apopajoneponaenē tsane itsaxuayo pane-ubijawanē paxainame. Bajarapacuenia-ata apopa-apaeponaenē tsane panijamēthēanē pijimeranē. Saja panajetarubenaenajē rowia panamuto ruca, patoquebinejawanē, bajarapacuenia patanicabinexa itsabelia panajetarubenaajē', jai raja Moisés

y 20:13 Meriba: Meriba pejumaitsiyume maje: «peyabara-anaepanaemera», pejaiyume. Taema Éxo. 17:7, 1 Co. 10:1-5. z 20:13 penawecua-itoyajamatabēcuenē: Moisés, Aarón-beje nacuenējēpabeje Israel-pijinē pemomoxi apopesiwanajamatabēcuenecopatsijawata Diosojawabelia bajaraponē peyawenonaenexatsi. Taema Núm. 14:20-38. Najēpaeya nexata Dioso naneconitsia-exanatsibeje apopejonejawanexabeje Canaán nacua jawabelia Nexata, pecuene-amoneyabinexa Canaán nacuapijiwi, Dioso apocopatsi bajarapamonae pejonenexa. Caranata, tocajētatsi petēpaejawa petusatonacuajawata. Tēpabeje petusatonacuata. Taema Núm. 20:28, Deut. 34:5. a 20:14 wajasalinainēmibeje: Jacob-pijinē israelitawi pijasalinainē. Pematapijinē pijinia Esaú-pijinē, Edom nacuapijiwi pijasalinainē. Taema Gén. 25:22-26, 30; 36:1-17

pecatonajume-itorobiliwaisi», jai pejumeliwaisicaponaewi Edom nacua pepopeyanacua-ewetsinëjawabelia.

¹⁸ Itsiata baitsi jane, bajarapacuenia petsipaebicujinae, Edom nacua pepopeyanacua-ewetsinë jumaitsi:

—¡Jume! ¡Pëtsa paxamë pataja-irajawa panajetarubename! Itsa bajaruayo paponaname, xanë, tajajiwi wajabitsaë yajawa, pacatsimaxëpitsapaenatsi patacabarënatseconaenexa —jai bajaraponë.

¹⁹ Itsiata, israelitawi icatsia jumaitsi:

—Paxanë raja apopacajamatabë-itonotsi tsanetsi. Panajetaru-benaenajë saya peporowianamutojawa. Itsa paxanëyajuwënënë, patajadajubiyajuwënënë-ata pacato-apaejitsipa panijamëthë pijimeranë, nexata pacamatamotsianatsi patacato-apaejamatabëcuene. Saya caejawa pajitsipajë paxanë, patanetocopatsijawamë nija-irajawa patanajetarubenaenexa —jai.

²⁰ Itsiata baitsi jane, Edom nacua pepopeyanacua-ewetsinë jumaitsi:

—¡Jume cajena! Apojitsipañë paxamë bajararuayo paneponaejawa —jai.

Orijibia, bajaraponë barëpitspa pijajiwi wajabitsaë ayabitsaëtoxaneto Cades nacujawabelia, peyacaranatsinexa Israel-pijinë pemomoxi bajararuayo peponaeyaniwa. ²¹ Nexata itsa tane bajarapamonae apopotocopatsijawatsi peponaewanexa bajarapa-irajawa, nexata Israel-pijinë pemomoxi matawaquetsiaya pona panamuto ruca bajarapamonae pija-iranë pënënenia.

Aarón tēpa Hor-tsutojumata

²² Nexata, daxita israelitawi pitsapa Cades nacuwecua, peponaenexa Hor-tsutojawabelia, itsajota Edóm nacua ira copianajetaruca. ²³ Pepatsicujinae, Jehová bajarajota barëcuaijai Moisés, Aarón-bejajawabelia, Hor-tsutojumata. Jumaitsi:

²⁴ —Aarón raja tēpaena. Bajaraponë aponajone tsane panacujawabelia rajutsiapaebajë israelitamonae, tsipaji raja paxamëbeje apopanejumecowë-nëtsimëbeje, pacuenia paca-itorobatsi pane-exanaenexabeje mera pepitsa-parucaenexa ibotoxanetowawerena. ²⁵ Nexata, junatsianame Aarón, pexë-nato Eleazar yajawa, nebarëponaenexabeje Hor-tsutojumabetsia. ²⁶ Nexata, bajarajotatsia wejumajonotsianame Aarón penaxatatsinawa, panawa naxatatabiaba sacerdotewi pepopenamatacatorobinëxae. Nexata juya, jumaxatatsianame bajarapanaxatatsijawa Eleazar, tsipaji rabaja bajarajotatsia tēpaena Aarón —jai Jehová.

²⁷ Moisés nexata jejai. Exana pacuenia Dioso tonajumecopatatsi. Nexata, daxitajiwi pitabarata, israelitawi, bajarapamonae pona bajarapatsutojumabetsia. ²⁸ Bajaraxuacujinae, bajarajotatsia Moisés wejumajonota Aarón penaxatatsinawami sacerdotewi pepopenamatacatorobinëxae. Juya jumaxatata pexë-nato Eleazar, penajamatabëcuene-itajëtsinexa bajaraponë pecanacopatsijawa sacerdotewi pepopenamatacatorobinëcuene paxa pewënamuto. Nexata jane baja, Aarón tēpa bajarapatsutojumatatatsia. Bajaraxuacujinae, Moisés, Eleazar-beje, runaicabeje bajarapatsutojumawetsica.

²⁹ Nexata, itsa baja yapëtane israelitawi Aarón petëpaejawa bajarapatsutojumatatatsia, nexata wënuatsi caejumetocuenia.

**Israel-pijinē pemomoxi cuene-amoneyaba
Arad tomarata pejinawanapaewimi**

21 ¹Pamatacabijawa cananeomonaē pepopeyanacua-ewetsinē, Arad tomarapijinē, ponapona Neguev-tusatota, bajarajota bajaraponē wēnētane israelitamonae penajetarubenaējawa panamutoruca Atarim-jawa. Nexata, bajaraponē barēpitsapa pijajiwi pebarēnawajabitsaētšinexa israelitawi. Pebarēnabejawata taica itsamonae israelitawiyajuwēnēwi. ²Nexata, israelitawi najumecapanepaeya jumaitsi Jehovájawabelia: «Itsa xamē panejamatabēcujiruyawenonaename patacuene-amoneyabijawanexa mapamonaeje patajawajabitsaēwi, nexata pepocuene pawerebiabianajē daxita pijatōmaranē yajawa», jai naliwaisicajoneya israelitawi. ³Jehová jumetane xua najumecapanepaeya jumaitsi pēwajētsijawata israelitawi. Tocopata nexata pecuene-amoneyabinexa cananeomonaē. Nexata, israelitawi yajawawerebiaba bajarapamonae, daxita pijatōmaranē yajawa. Bajaraxuata, bajarapataxunaeyo wēnēruba Horma.

**Dioso tonajumecopata Moisés-jawabelia
jomojumapecataeya pexanaenexa bronsenanitota**

⁴Pecuene-amoneyabicujinae cananeowi, israelitawi nexata pitsapa Hortsutojawawerena peponaenexa Canaán nacujawabelia. Bajarapamonae najetarubena panamuto najetaruca Mar Rojo manuamenejawa, matawaquetsia peponaenexa^b Edóm nacua, peponaeyaniwa bajarapanacuapijiwi pijanacujawa. Bajarapaepatota bajarapamonae jamatabēcuenecueranaeya najetarubena. ⁵Nexata, taxuxuaba icatsia siwajamatabēcuenē-anaepanaeya pebaracuaicuajijawa Diosojawabelia, Moisés-jawabelia-ata. Anaeya jumaitsi tsaponae:

—¿Detsa xuajitsia paxamēbeje, Diosobeje patajanejutsimē Egipto nacua-wecua, mapatusatonacuanējawata patatēpaenexaje? Ajibi majotaje mera pata-apaejawabelia. Bajarapacuenia ajibinua pataxaejawa-ata. Belia baja bitso paxanē pajanijitsibinē mapapibisiamanājawaje orijibia pataxaeponae-jawa —jai tsaponae anaeya.

⁶Bajarapacuenia pejumaitsi tsaponaexae, nexata Jehová tsi-itoroba bajarapamonaejawabelia jomo, pesineponaenexatsi pijataxunaebonējawa. Nexata, itsa sineponatsi, bajarapacuenia israelitawiyajuwēnēwi tēpa ayaibitsaēto.

⁷Nexata, bajarapamonae itsa taepona bajarapacuenia, Moisés-jawabelia pona pejumaitsinexa:

—¡Paxanē panatotaniji pata-exanaejawa pibisiacuene patacuenecarapua-bijawata Jehovájawabelia, bajarapacuenia xamējawabelia-ata! ¡Jehovájawabelia paneyajiwiwajēre, patanewecuaponaenexa bajarapajomomonaenē! —jai bajarapamonae.

Moisés nexata towajēta Jehovájawabelia israelitawi pitaxutobejiobiatae-nexatsi. ⁸Nexata, Jehová jumaitsi:

b 21:4 matawaquetsia peponaenexa: Bajarapacuenia exana matatoxenetsia totajējitsia-atatsi Edóm nacua pewetsinē pitawetsixaetsi pijanacua pejoneyaniwa. Xaniawaetsia neyapētaenexa, taema Núm. 20:14-21.

—Exanaename jomojumapecataeya brancenanonē. Nexata, jomojumapecataeya nexanaenē rutsianame piapianaebo-upiyota. Bajaraxuacujinae, athëbëyo yayotanutsianame jiwi petanenexa. Nexata, pajiwiyo jomo sinianatsi, bajarapajumapecataenē itsa naëcotsiana petanenexa, nexata pesinijiwitsi jamatejema tsane. Bajarapajiwi asaë tsaponaponae tsane —jai Jehová.

⁹ Moisés nexata exana jomojumapecataeya brancenanitota. Bajaraxuacujinae, ruta athëbëyo naejawayota. Nexata, pajiwiyo jomo sinetsi, itsa taeyabiaba bajaraponëjawabetsia, bajarapajiwi nexata apoyatëpabiabi. Jamatejema baja tsabiabi. ¹⁰⁻³⁵ [...]

Balac, pepopeyanacua-ewetsinë Moab nacuapijiwi, junata Balaam pibisiacuene pecuengewajunupaebinexatsi Israel-pijinë pemomoxijawabelia

22 ¹ Israel-pijinë pemomoxi pecuene-amoneyabicujinae Basán nacuapijiwi, wecuapitsapa peponaenexa Moab nacujawabelia. Bajarajota, exananuba pijataxunaebo, Jericó tomara itsapanawetsica, Jordán-mene imoxoyojawata.

²⁻³ Moab nacua pepopeyanacua-ewetsinë, Balac, Zipor pexënato, itsa wënëtane xua israelitawi exana amorreowijawabelia, bajaraponë ayaicuenia junawa, pijajiwi yajawa, tsipaji tane israelitawi bitso ayaibitsaëtöjawa.

⁴ Nexata, Balac junata Madián nacuapijiwi pewetsiwi, penajumejaitsinexa pacuenia cuenecaranatsijitsia israelitawi. Bajaraponë jumaitsi: «Mapabitsaë-toxaneto daxitacuene werebiabanajetarubena wajajinawanapaenacuajawa. Pacuenia bueyu pona bawerenapona itsaxuayo xaenajetaruca wayafojawa, bajaracuene-itsi tsanajetarubenaë bajarapamonae», jai Madián nacuapijiwi pewetsiwijawabelia.

⁵ Nexata, Balac penajumejaitsicujinae Madián nacuapijiwi pewetsiwijawabelia, itoroba itsamonae petojunatsinexatsi Balaam, Beor pexënato, Petor tomarata peponaponaenē, Éufrates mene imoxoyojawata pe-ecaetomara. Balaam ponapona pijamonae pijanacuata. Balac itoroba pejumaitsinexa Balaam-jawabelia mapacueniaje: «Pexaniacuene cawajëtatsi taneyaweno-naenexamë. Egipto nacujawawerena pepitsapaewi yacajëpaponaxitana-cuanëjawa. Nexata, aeconoxae jinawanapa imoxoyo patajanacuata. ⁶ Bajarapamonae raja paxanëwecua panewecua-acuenesaë bitso. Naxatsia, bepijiayo paremena xanëjawaberena, necuengewajunupaebinexa bajarapamonae pibisiacuene petocopiapatsinexatsi. Bajarapacuenia itsa neyapijiwicuengewajunupaebijitsipame, nexata necueneacajëpaejitsipa tabarëwerebiabijawa bajarapamonami, tacapitsapaeya-exanaenexanua tajanacuawecua. Xanë yapëtaniji pacuenia necuengewajunupaebiwi tocopiapatabiatsi. Nexata, pamonaë cuengewajunupaebame pexaniacuene, bajarapamonae pexaniacuene taewana-pabiaba. Pamonaë pijinia pibisiacuenia cuengewajunupaebame, pibisiacuene taewanapabiaba. Bajaraxuata, cawajëtatsi bepijiayo nepatsinexa xanëjawaberena», jai Balac pejumeliwaicaponaewitsijawabelia.

⁷ Nexata, itsamonae Moab nacua pewetsiwi, itsamonae yajawa Madián nacua pewetsiwi, naropoba peponaenexa Balaam-jawabelia. Yajawacaponapalata, pematamotsinexa pibisiacuenia pecuengewajunupaebijamatabëcuene. Nexata, bajarapamonae itsa pata Balaam-jawata, tsipaeba paliwai si tonajumerutatsi Balac.

⁸Balaam nexata jumecanawiatsiaya jumaitsi bajarapamonaejawabelia:

—Ajena pamerawi panacuera-ewetsianame abaxë, tayanijobinexa Jehová xua exanaejitsianë. Nexata, merawia pacajumecanawiatsianatsi xua Jehová neyapëtaeya-exana —jai.

Bajarapamonaë jejai. Nexata, bajarapacuenia bajarapapewetsiwi naco-paba Balaam-jawata pemajitsinexa. ⁹Nexata, bajarapamerawi Balaam tsitanaitajëtsatsi DIOSO. Yanijobatsi:

—¿Detsa mapamonaëje, pamonaë yajawamajitanucame? —jaitsi.

¹⁰Nexata, Balaam jumecanawiata DIOSojawabelia:

—Balac raja, pexënato Zipor, Moab nacua pepopeyanacua-ewetsinë, itoroba bajarapamonaë tanejumaitsinexa: ¹¹«¡Taema! Pamonaë pitsapa Egipto nacuawecua, bajarapamonaë yacaëjëpapona daxitanacuanëjawa. ¡Naxatsia! Patsianame, bajarapamonaë pibisiacuenia necuengewajunupaëbinexa. Belia, bajarapacuenia itsa neto-exanaejitsipame, necuene-caëjëpaejitsipa tabarëwerebiabijawa bajarapamonaëmi, tacapitsapaëya-exanaenexanua tajanacuawecua», tanejainexa —jai Balaam DIOSojawabelia.

¹²Nexata, DIOSO jumaitsi Balaam-jawabelia:

—Pëtsa poname bajarapamonaë pepëta, pibisiacuenia necuengewajunupaëbinexa, tsipaji raja bajarapamonaë xanë ta-itapetsiwi, pexaniacuenia tayawenonabiabinexa —jai.

¹³Balaam nexata bajayacunua, namatacota. Jumaitsi Moab nacua, Madián nacuabeje pewetsiwiawabelia, pamonaë Balac pitorobiwi:

—Panawiabare baja paxamë panija-irajawabelia, tsipaji raja Jehová aponetocopatsi paxamë yajawa taponaenexa —jai Balaam.

¹⁴Nexata, bajarapamonaë nawiabaponalia baja, petsipaëbinexa Balac-jawabelia pacuenia Balaam jumaitsi. Bajarapamonaë jumaitsi:

—Balaam apojitsipae penarenajawa paxanë patapëta —jai.

¹⁵Icatsia Balac itoroba pecunuabitsaëto penamatacatorobiwi, copiaya pitorobibitsaëtowecua. Orijibia, bajarapamonaë matatoxenetsia ayaijamatabëcuenewi. ¹⁶Bajarapamonaë pona nexata Balaam-jawabelia. Jumaitsi:

—Marapacuenia catonajume-itoroba Balac, pexënato Zipor: «Pexaniacuenecawajëtsatsi. Apojejamë pëtsa nepatsinexarena xanëjawaberena.

¹⁷Pepacuene bitso cayaiyataenatsi. Carajutsianatsinua ayaijawa tacobecowëyajuwënëjawanë. Daxita pacuenia newajëtame, cato-exanaenatsi. Bepijaiyo paremena, tanewecuacuenewajunupaëbinexamë bajarapamonaë pibisiacuenecopetocopiapatsinexatsi», caji raja Balac —jai bajarapamonaë.

¹⁸Nexata, Balaam jumecanawiata Balac pijaijiwawabelia:

—Balac nerajutsijitsia-ata tsipae palatananijawanë, oronanijawanë-ata, pewënëtsibo, xanë aponecueneacaëjëpae Jehová, tajaDIOSO nejumaitsi-nejewa itsacuenecawayo-ata patacato-exanaenexa, tsiquiricuenejawayo, pinijicuenejawa-ata. ¹⁹Itsia, pacawajëtsatsi paxamë panenacopatsinexa ajena pamerawi xanëjawata. Nexata, belia Jehová itsacuenia nejumecanawiatsipa ta-exanaenexa, xua yabara panewajëtame patacato-exanaenexa —jai Balaam. Bajarapamonaë jejai. Nacopaba baja Balaam-jawata.

²⁰Nexata, icatsia bajarapamerawi DIOSO majitsinaebota tsitanaitajëta Balaam. Jumaitsi:

—Itsa bajarapamonae icatsia casiwapata pecajunatsinexa, naponaname pepêta. Itsiata baitsi jane, saya exanaename pacuenia xanê cajumaitsi tsane —jai DIOSO.

**Dioso tsi-itoroba ángelnê peyacaranatsinexa
burro, Balaam pejumaponanênêsi**

²¹ Balaam nexata pepobajayacunua namatacota. Pijaburro pesorowato jumaxaniawaeta peponaewajênaeya. Nexata, pamonaepapatsiwi, Moab nacua penamatacaitorobiwi, bajaraponê yajawapona. ²² Balaam nexata naje-taruca pijaburrojumata. Yajawapona pijajiuitonêbeje. Itsiata baitsi jane, DIOSO bitso ayaicuenia bara-anaepana bajaraponêjawabelia, penaponaeaxae^c Moab nacua pewetsiwi pepêta. Nexata, Jehová pija-ángelnê tonutatsi namutuatuajêta peyacaranatsinexatsi. ²³ Balaam apotae picani ángelnê. Itsiata, paburrota yanajetaruca tane Jehová pija-ángelnê penawemaraajutsi-espada pecobenanucaenê namututuatuajêta. Nexata, burro matawaquetsia natsatajopa namutowecua, pexenetsinexa ángelnê. Itsiata baitsi jane, Balaam pija-burro conita, icatsia caewêarena penawiatsinexa namutuaberena. ²⁴ Itsiata baitsi jane, Jehová pija-ángelnê xuacujinae, pewajênaeyabelia pona, icatsia yacaranatsiaya penucaenexa. Bajaraponê nuca namuto pepapetsojojocaejawata, tsipaji namuto najetaruca uvabacabonêtuatuajêjawa. Namutomuxubêrêabeje xaina peyacaranatsijawa, ibotonêta pexanaejawa, uvabacabobeje peyacaranatsijawanê. ²⁵ Nexata icatsia, bajarapaburro itsa tane Jehová pija-ángelnê, matawaqueta pexenetsinexa, iboyenepanajawa peyacaranatsijawa nacaliratsiaya penajetabarucaenexa. Bajarapacuenia pexenetsijawata, asaêyata Balaam taxucatobinatsi. Icatsia nexata, Balaam conita bajaraponê. ²⁶ Nexata, Jehová pija-ángelnê xuacujinae, icatsia natixitsiawebeysiyo, penucaenexa itsajota iboyenepanajawabeje bitso tsiquirinamutoyo. Bitso epatsojojoca bajarajota. Nexata, burro apocuenecaêjêpaetsi pematawaquetsijawa pecujuajawabelia, petsawenojawabelia-ata. ²⁷ Balaam pijaburro itsa tane Jehová pija-ángelnê, nexata irabereca bocanajereca. Bajarajota, pija-burro Balaam bara-anaepana. Icatsia, conita naebota. ²⁸ Nexata, bajarapae-patota Jehová bajarapaburro cuaicuaijaiya-exana. Nexata, burro jumaitsi Balaam-jawabelia:

—¿Detsa xua xanê cato-exanatsi tanecaconitsimê baja acueyabi xuabeje? —jai burro.

²⁹ —Bajarapacuenia caconitatsi, tsipaji aponecueneyaiyataemê, taneto-exanaenexamê taca-itorobicuenia. Itsa ajenaconoxae xanê canucaejiitsipajê taja-espada, nexata cabeyaxuabijitsipatsi baja —jai Balaam pijaburrojawabelia.

³⁰ Icatsia, burro jumaitsi Balaam-jawabelia yanijobiaya:

—¿Xanê tsaja aponijaburronê tsaponaponae? ¿Xamê tsaja aponexainaemê tanecomuatsijawaweliacujinaemê tacajumaponaponabiabinexa? ¿Itsjawata

^c 22:22 *penaponaeaxae*: Xua yabara Dioso bara-anaepana Balaam, aponayapêtae picani. Belia pejamatabêcueneyapêtae axetsi pejiitsipaejawa palata, Dioso pejumecowênêtsijawawecua. Wajayorobijawata 2Pd 2:15, Jud. 1:11, Apoc. 2:14 yapêtanetsi pacuenia Balaam pita palata peliwaisirajutsijamatabêcuene pacuenia bajarapamonae exanaejitsia Dioso, penaneconitsia-exanaenexa Israel-pijinê pemomoxi. Taema Núm. 31:16

tsaja bajarapacuenia xanë cato-exanabiabatsi tacajumaponaponabiabija-wata? —jai burro.

Nexata, Balaam jumecanawiata:

—¡Jume cajena! —jai

³¹Nexata, bajarapaepatota Jehová tocopata Balaam petanexa pija-ángelnë, pecobenanucaeja penawemarajutsi-espada namutotuata-jëta. Balaam nexata bajarapaepatota, yaiyataecuenia pematabacabëta nuca irataeya Jehová pitabarata. ³²Nexata, Jehová pija-ángelnë jumaitsi Balaam-jawabelia:

—¿Detsa xuajitsia nijaburro conitame acueyabi xuabeje? Xanë raja nuca-biabajë yacaranatsiaya, tsipaji xamë xua yabara poname, xanë netsita bitso pibisiacuenie. ³³Nexata, nijaburro itsa netane, nematawaquetabiaba namutowecua acueyabi xuabeje. Itsa aponekatawaquetabiabi tsipae, xanë baja xamë cabeyaxuabijitsipatsi. Nexata juya, copatsipajë nijaburro piasaënexa —jai ángelnë.

³⁴Nexata Balaam jumaitsi Jehová pija-ángel-nëjawabelia:

—Pibisiacuenie exanajë. Xanë apoyapëtaenë picani nenucabiabijawa tawajënaeya, namutotuatajëta. Nexata, ajenaconoxae itsa xamë catsita pibisiacuenie tayajawaponaejawa bajarapamonae, xanë baja icatsia nawiatsianajë tajanacuayabelia —jai.

³⁵Itsia baitsi jane, Jehová pija-ángelnë jumecanawiata Balaam-jawabelia mapacueniaje:

—Itsia, naponaname mapamonaeje pepëta. Jane baitsi, xanë pacuenia canajumeliwaisirajutatsi, bajara-ëpacuenia jumaitsimë tsane —jai.

Nexata, bajarapacuenia Balaam icatsia yajawapona pesiwapatsiwitsi, Balac pijajiwi.

Balac copiapita Balaam

³⁶Itsa Balac jumetane Balaam penajetarucaejawa, nexata bajaraponë pemata-enenaenexa pitsapa, pecopiapitsinexa patomarata eca Moab nacua-ira pecopiarucaejawata, patomara eca imoxoyo Arnón-menewecua.

³⁷Jumaitsi Balaam-jawabelia:

—¿Xanë tsaja apo-itorobinë pecajunatsia-exanaenexa, bepijiayo nepatsinexarena? ¿Detsa xuajitsia aporenamë bepijia xanëjawaberena? ¿Xamë tsaja netaneme apotanecuenecaëjëpaenëcuenia tacajamatabëcuenie-itajëtsinexa tacayaiyataejawa pinijimatamo tacarajutsijawata? —jai Balac.

³⁸Balaam nexata jumecanawiata Balac-jawabelia:

—Jume. Xanepana. Xanë baja belia patajopajë xamëjawaberena. Itsia baja, maje cayapëtaeya-exanatsi. Xanë ra saya necuenecaëjëpa tacuenewajunupaebineja DIOSO taneyapëtaeya-exanaecuenia —jai.

³⁹Bajaraxuacujinae, Balac, Balaam-beje, ponabeje moabitawi pijatomarajawabelia, Quiriat-huzot-wënë tomara. ⁴⁰Itsa baja patabeje bajarajota, Balac nexata beya-exana vacamonae, ovejamonae-ata, petajuitsia-exanaenexa altar-jumata, pijadioso^d pewënëta. Itsawiyayuwënëjawanë setsia-exana, Balaam, peyajawanajetarucaewi, Balac pijajiwi, penajuaxaenexa.

⁴¹ Itsamatacabijawabelia bajayacunua, Balac nexata yajawapona Balaam, Bamot-baal-tsutojumawetsia.⁶ Nexata, bajarapatsutojumawetsica, tanebeje israelitawi pijataxunaebonëyajuwënëjawa.

Balaam pexaniacuenia cuenewajunupaeba Israel-pijinë pemomoxi

23 ¹ Bamot-baal-tsutojumawerena petaenucaejawatabeje israelitawi pijataxunaebowabereca, Balaam nexata jumaitsi Balac-jawabelia: —Majotaje nacuenebia-exanare siete pa-altar-jawabeje. Bajarapacuenia capatsia-exanare siete ponëbeje becerro, siete ponëbeje oveja pebitonë, wajarajutsinexa Diosojawabelia —jai Balaam.

² Balac nexata exana pacuenia wajëtatsi pexanaenexa. Nexata, Balac, Balaam-beje, tajuitaponabeje bajarapadajubi altar-jawanëjumata, Dioso pewënëta. Cae-altar-jumata canacujitsia tajuitapona caenë becerro, caenë oveja pebito-ata.

³ Bajaraxuacujinae, Balaam jumaitsi Balac-jawabelia:

—Xamë nacopare majotaje, dajubi netajuitanajetarucac-altar-muxuneneta. Xanë abaxë cawecuaponaenatsi itsajawabelia. Jehová belia netsitanaitajëtsipa, tanetsipaebinexa pacuenia exanaejitsianë. Bajaraxuacujinae, xanë cayapëtaeya-exanaenatsi xua netsitajëta ta-exanaenexa —jai.

Nexata, Balaam pona petsutojumabetsia, caenë penucaenexa. ⁴ Bajarajota, Dioso tsitanaitajëta Balaam. Nexata, Balaam jumaitsi Diosojawabelia:

—Siete pa-altar-jawabeje nacuenebanutajë newënëta. Cae-altar canacujitsia pejumata catotajuitatsi caenë becerro, caenë oveja-ata —jai bajaraponë.

⁵ Jehová nexata yapëtaeya-exana bajaraponëjawabelia pajumenë jumait-sijitsia, pecuenewajunupaebijawata Israel-pijinë pemomoxijawabelia. Icatsia xuacujinae, jumaitsi:

—Nawiaremea Balac-jawabereca, netsipaebinexa daxita pacuenia caju-maitsitsi —jai Jehová.

⁶ Balaam nexata nawiareca Balac-jawabereca. Caxitajarabanuta penu-caenë altar-muxuneneta, Moab nacua penajua-ewetsiwi yajawa. ⁷ Nexata, Balaam taxuxuaba pexaniacuenia pecuenewajunupaebijawata Israel-pijinë pemomoxijawabelia, Balac pitabarata. Naxëanaeya jumaitsi:

«Balac, pepopeyanacua-ewetsinë Moab nacuapijiwi, pijumesaëta necapatsia-exana maberenaje, Aram nacujawawerena, taponaponaenë pemutowetsina patsutonë nubena.

Nejumaitsi: «¡Naxatsia! Paponaremena, pibisiacuene necuenewajunupaebinexa petocopiapatsinexatsi Jacob-pijinë pemomoxi, Dioso tanewecua-ajibia-exanaenexa bajarapamonae', nejai picani.

⁸ »Itsiata baitsi jane, ¿Depacuenia xanë cuenewajunupaebijitsipajë pibisiacuenia pamonaejawabelia Dioso apocuenewajunupaebi pibisiacuene petocopiapatsinexatsi? ¿Depacuenia xanë cuenewajunupaebijitsipajë piajibia-exanaenexatsi, pamonaejawabelia Jehová bajarapacuenia apotajitsipaetsi?

⁹»Aponecuenecaējēpae cajena, tsipaji ibotsutonējumawetsica apotaenē Dioso pebara-anaepanaejawa bajarapamonaejawabelia. Biji rajane, petsutonējumawetsica cuenetaniji Israel-pijinē pemomoxi, Dioso pitapetsiwiwsicue daxitanacuanēpijiwiwecua. Bajarapamona Dioso saicayacuenia taena itsanacuanēpijiwiwecua.

¹⁰»Ajibi baja cajena itsajiwi-ata pecuenecaējēpaewitsi penamata-ējētsijawa Jacob-pijinē pemomoxi. Jitsipae-ata penamata-ējētsijawa picani, apocuenecaējēpaetsi tsane caematabēxēyo-ata penamata-ējētsijawa. Bitso jitsipajē Dioso pexaniacuenia taneyawenonaejawa, pacuenia bajarapamona yawenonatsi, jitsipajēnua tatēpaejawa Dioso peyawenonaējiwiwotsicuenia», jai Balaam, cuenewajunupaebiaya penaxēanaejawata Israel-pijinē pemomoxi.

¹¹Balac nexata, bajarapacuenia itsa jumetane pejumaitsijawa, jumaitsi Balaam-jawabelia:

—¿Detsa pitsijawa xamē neto-exaname pija? Xanē raja cajunatatsi picani maberenaje tajawajabitsaēwi tanewecuacuenewajunupaebinxamē pibisia-cuenia. Itsiata, xamē caranata aithotiacuenia neto-exaname. Juya pexania-cuenia cuenewajunupaebame —jai Balac anaeya.

¹²Nexata, Balaam jumecanawiata:

—Pacatsipaebatsi picani pacuenia xanē saya netsicaruca tajumaitsitsa-biabinxata pacuenia Jehová nejumaitsi. ¿Aponajamatabēnapitsimē tsaja? —jai.

¹³Nexata, Balac jumaitsi:

—Je, xanepana. Pexaniacue cawajētatsi, icatsia neponaenexa xanē tapēta itsajawabelia, itsajotalia cacuenecaējēpaena netaejawa ayaibitsaēto-jawa bajarapamona. Daxitabitsaēto apotae-atamē, itsiata bajarapamonaeyajuwēnēwi cacuenecaējēpa netaejawa. Nexata, bajarawerena netaejawata, cuenewajunupaebianame pibisiacue petocopiapatsijawanexatsi —jai.

¹⁴Nexata, Balac barēpona Balaam Zofim-iranamatājēpaejawabetsia, Pisgatsutojumata. Bajarawetsica taenucabeje Israel-pijinē pemomoxi pijataxunaebō. Bajarapanamatājēpaetsutojumata, nacuenebanutabeje siete pa-altar-jawabeje. Capatsia-exananua siete ponēbeje becerro, siete ponēbeje oveja pebitonē. Cae-altar canacujitsia tajuitsia-exanapona,^f Jehová pewēnēta, anijadajubibeje tsaponae.

¹⁵Nexata, Balaam icatsia jumaitsi Balac-jawabelia:

—Bajarajota, xamē nacopare, netajuitanucae-altar-muxuneneta.

Abaxē pijinia xanē cae-epatoyo ponaenajē Jehová tanecaxitajarabinexa, taneyapētaeya-exanaenexa pacuenia jumaitsinējitsia —jai.

¹⁶Nexata, bajarapaepato Jehová tsitanaitajēta Balaam-jawabelia. Nexata, bajaraPonē rajutatsi pajumenē jumaitsiijitsia pecuenewajunupaebijawata Israel-pijinē pemomoxi. Jumaitsi:

—Icatsia nawiaremece itsajotareca nuca Balac, neyapētaeya-exanaenexa pacuenia cayapētaeya-exanatsi baja —jai Jehová Balaam-jawabelia.

^f 23:14 *tajuitsia-exanapona*: Balac, Balaam-beje, canaējēta tsaena napēna petajuitsijawa ayaibitsaēto dajubi Jehovájawabelia, belia Dioso epatua itsajamatabēcuenē pexainaenexa Israel-pijinē pemomoxijawabelia, pitoyanexa. Dioso itsiata caejamatabēcuenē pexainaenē.

¹⁷Balaam nexata nawiataponareca itsajota nucareca Balac altarmuxuneneta, Moab nacua penajua-ewetsiwi yajawa. Balac nexata yanijoba Balaam-jawabelia:

—¿Detsa cajumaitsi Jehová? —jai.

¹⁸Nexata, Balaam towajunupaeba mapacueniaje:

«Nejumetaema Balac. Xaniawaetsia nenamuxuna-ewere, Zipor pexēnatomē.

¹⁹»Dioso raja apobejiwitonē, penajumetsēnētšinexa. Dioso epatua apopenaliwaisixanetsinē, penajamatabēcuenepēñeyorotsinexa pes iwanajamatabēcueneweretsijawamiwecua. Xua Dioso jumaitsi, bajarapacuenia exanabiaba. Xua Dioso jumaitsi najumecapanepaeya, exanabiaba.

²⁰»Nejumetaema. Dioso nitoroba pexaniacuenia Israel-pijinē pemomoxi tacuenewajunupaebinxexa. Dioso baja tocaējēta pexaniacuenia peyawenonaenexa bajarapamonae. Nexata, acuenebi xanē tacuene-itothianaejawa pejitsipaecuenewecua.

²¹»Jehová apocuenetaetsi paneconi yabara naneconitsia-exanaejitsiatsi Israel-pijinē pemomoxi. Bajaraxuata, apocuenewajunupaebitsi pibisiacuenie petocopiapatsinexatsi. Orijibia, Jehová pija DIOSO yajawa tsabiabitsi. Bajarapamonae Jehová natotane pepopeyanacua-ewetabiabinētsi.

²²»Bajarapamonae Dioso jutatsi Egipto nacujawawerena, Ponē piacuenesaēnē bitso. Pacuenia vaca pebito pecueyanē nawecuatorotabiaba pemata-etota, bajarapacuenia Israel-pijinē pemomoxi Dioso wecuatorotabianatsi pijawajabitsaē.

²³»Bajaraxuata, Jacob-pijinē^a pemomoxijawabelia pibisiacuenia cuenewajunupaebi-atatsi, apotocopiapatsitsi itsacuenejawa^b bajarapamonaenexa. Bajaraxua yabara, aeconoxae jiwi toxanepanatsi pejumaitsiatsabiabinexa Israel-pijinē pemomoxi yabara: ‘Dioso bitso pexaniacuenia pinijicuenejawanē pacato-exanabiaba’ pejaitsabiabinexa.

²⁴»Pacuenia nēwēthē, pebocaenē, nonotapuna penayaibinēcuenia pecueyanē pitabarata, bajarapacuenia Israel-pijinē pemomoxi cuene-itsi tsane pijawajabitsaē pitabarata. Pacuenia newēthē pebeyaxuabinē xaeyaxuaba daxitanē, janaraebanucanua, bajarapacuenia Israel-pijinē pemomoxi werebiabiana pijawajabitsaē, jai Balaam, Jehová peyapētaeya-exanaecueniatsi, Balac-jawabelia.

²⁵Nexata, itsa jumetane bajarapacuenia Balaam pecuenewajunupaebijawa Israel-pijinē pemomoxijawabelia, Balac jamatabēcuenebējaiya jumaitsi:

—Itsa xamē apocacuenecaējēpae necuenewajunupaebijawa pibisiacuenia petocopiapatsinexatsi, nexata pētsa cuenewajunupaebame pexaniacueniata —jai Balac.

g 23:23 *Jacob-pijinē*: Itsawēnē pijinia Israel. h 23:23 *apotocopiapatsitsi itsacuenejawa*: Israel-pijinē pemomoxijawabelia, dowathi pejamatabēcueneta itsamonae pibisiacuenia siwanajamatabēcainae-ata tsipae, petocopiapatsia-exanaenexatsi bitso pibisiacuenejawanē, apojamatabēcuenesaē caējēpaetsi pitsacueniabinexatsi. Dioso ayaijamatabēcuenenē bajarapamonae. Xaniawaetsia eweta pijajiwi.

²⁶Bajaraxuacujinae, Balaam jumaitsi Balac-jawabelia:

—Pewajënaeya baja cajena catsipaebatsi bajaraxua yabara. Pacuenia xanë Jehová nejumaitsi, netsicaruca saya tajumaitsinexa tacuenewajunupaebija-wata —jai Balaam.

²⁷Itsiata baitsi jane, icatsia Balac jumaitsi:

—¡Naxatsia! Icatsia cacaponaenatsi itsajawabelia, itsajota belia Dioso apocawecua-asiwa tsipae¹ necuenewajunupaebijawa pibisiacuenen petocopia-patsijawa Israel-pijinë pemomoxijawabelia —jai Balaam-jawabelia.

²⁸Nexata, Balac capona Balaam Peor-tsutojumabetsia, petaeya-exanaenexa patusatonacuajawabelia Israel-pijinë pemomoxi xaina pijataxunaebonë.

²⁹Nexata, Balaam jumaitsi Balac-jawabelia:

—Bajarajota, icatsia nacuenebare siete pa-altar-jawabeje. Icatsia yajawa-capare siete pabecerrobeje, siete ponëbeje oveja pebitonë-ata —jai Balaam.

³⁰Balaam pejumaitsicowëya Balac exana. Nexata, icatsia cae-altar canacujitsia pejumata tajuitsia-exana caenë becerro, caenë oveja pebito-ata.

24 ¹Balaam baja, peyapëtaexae Jehová pesiwanajamatabëcueneweretsijawa ëpexaniacuenen peto-exanabiabinexa Israel-pijinë pemomoxi, nexata apo-exanae pe-ëjëbicuenia Jehová petsitanaitajëtsinexatsi, pacuenia exana copiyami anijatobeje. Saya petsutojumawetsica taenuca petusatonacuajawabelia. ²Nexata, itsa naëcolia, tane israelitawi penat-sanaecuenia pejinawanapaejawa pijataxunaebonëta, caenë pemomoxibitsaëto canacujitsia. Bajarajota, Balaam jamatabëcuenecaëjëpaeya-exanatsi Dioso pija-Ëspiritu Santo, pejumaitsinexa Jehová pejitsipaecuenia. ³Nexata, peyapëtaeya-exanaecueniatsi Balaam jumaitsi:

«Mapacueniaje pacatsipaebatsi xanë, Balaam, pexënatonë Beor, ponënë tatsiwajënaetaenë xaniawaetsia, tamatabacabëta tanucaenë-ata Dioso pitabarata.

⁴»Pacatsipaebatsi paliwaisi Dioso, ponë ayaijamatabëcuenenë daxitawecua, neyapëtaeya-exana. Dioso jumaitsi israelitawi yabara mapacueniaje: ⁵Jacob-pijinë papemomoximë, bitso pexaniacarpboxi paxainame. Paxamë pa-israelitawimë bitso peyaxaniawaetsitaxunaebonë paxainame.

⁶»Panijataxunaebowata, panijacarpabonë nacorobotsiaya paxainame, pacuenia itsi pe-ubijawanë mene-itapajawata penacuenepipabi. Pacuenia aloëbotonë, betsanabotonë, naxaniabiaba Jehová pejamatabëcueneta, pacuenianua cedro naejawanë pexaniacuenia naxaniabiaba, penubenaexae mera imoxoyojawata, bajarapacuenia Israel-pijinë pemomoxi ayaibitsaëto tsaponae Jehová pejamatabëcuenen.

⁷»Pacuenia jiwitonë merata petsimata-epacaecujinae pe-ubijawa petsewi-irata naxaniaba, bajarapacuenia Israel-pijinë pemomoxi

i 23:27 *apocawecua-asiwa tsipae*: Balaam yapëtaeya-exanae-ata vr 19-jawata pacuenia Dioso epatua itsajamatabëcuenen apoxainae, Balac itsiata jume-aeba tsaena bajaraxua. Bajaraxuata, icatsia junatatsi itsatsutojumata penucaenexa, bajarajotawetsica pecuenewajunupaebinexa pibisiacuenia Israel-pijinë pemomoxijawabelia.

ayaibitsaëto tsane, Dioso pexaniacuenia peyawenonabiabixaetsi. Bajarapamonae pepopeyanacua-ewetsinëtsi bitso ayaijamatabëcuenenë tsane Agag-wecua. Bajarapacuenia pijanacua-ata jiwi bitso peyaiyataenacua tsane.

⁸»Bajarapamonae Dioso jutatsi Egipto nacujawawerena, Ponë piacuenesaënë bitso, pacuenia vaca pebito pianae panaenë. Pacuenia vaca pebito pecueyanë nawecuatorotabiaba pemata-etota, bajarapacuenia Israel-pijinë pemomoxi Dioso wecuatorotsianatsi pijawajabitsaë.

Pacuenia unupijinë pianae panaenë pebeyaxuabinë basitsicabaxane, bajarapacuenia Israel-pijinë pemomoxi werebiaba pijawajabitsaë Dioso pejamatabëcueneta. Pebarë nawajabitsaëtsijawatanua yenejorobajarababiabiananua pijacuererebonëta.

⁹»Pacuenia newëthë pebeyaxuabicujinae pexaenë nexa wemaxë nacuera-ewetanua, bajarapacuenia Israel-pijinë pemomoxi pewerebiabicujinae pijawajabitsaë wemaxë nacuera-ewetsiana.

Pacuenia jiwitonë junawitsipa peya-itawabinexa newëthë pemajitanucanë, bajarapacuenia itsanacuapijiwi junawiana pejamatabë-itonotsijawa Israel-pijinë pemomoxi, penacuera-ewetsimatacabianë pewerebiabicujinae pijawajabitsaë.

Pamonae pexaniacuenie tojitsipabiaba Israel-pijinë pemomoxi petaewanapaenexa, bajarapamonae juya tojitsipajë Dioso pexaniacuenia peyawenonabiabijawatsi. Pamonae pijinia pibisiacuenie tojitsipa Israel-pijinë pemomoxi petocopiapatsinexatsi, bajarapamonae tojitsipajë juya Dioso petocopiapatsia-exanaenexatsi pibisiacuenie»,^j jai Balaam, pexaniacuenie pecuene wajunupaebijawata Israel-pijinë pemomoxijawabelia.

**Pecopiarutsijawa Balaam cuenewajunupaeba, Dioso
peyawenonaejawanexa Israel-pijinë pemomoxi**

¹⁰Nexata, Balac anaepana bitso Balaam-jawabelia, bajarapacuenia peju-metaejawata. Pianae panaexae, nacobepacababeya jumaitsi:

—Xanë picani cajunatsi pibisiacuenia tanewecuacuenewajunupaebinexamë tajawajabitsaëwi. Itsiata baitsi jane, xamë acueyabi xuabeje bitso pexaniacuenia cuenewajunupaebame bajarapamonae. ¹¹Aeconoxae baja, caecuenia ponare nijanacuayabelia. Xanë picani camatamotsiapaebatsi pexaniamatamo itsa newecuacuenewajunupaebijitsipame pibisiacuenia. Itsiata baitsi jane, Jehová bajarapajamatabëcuene cawecuanaxuabia-exana, tacato-exanaejawaminexa —jai Balac.

¹²Balaam nexata jumaitsi Balac-jawabelia:

—¿Aponajamatabënapitsimë meta pacuenia jumaitsinë tanesiwapo-naewijawabelia? Xanë baja cajena picani yapëtaeya-exanajë bajarapamonae mapacueniaje: ¹³«Balac nerajutsi-ata tsipae palatananijawanë, oronanijawanë nua pewënëtsibo, xanë itsiata aponecuenecaëjëpae Jehová

tanejumaitsijawawecua, saicayacuenia tajumaitsinexa pexaniacuenē, pibisiacuenē-ata. Pacuenia Jehová nejumaitsi, bajara-ēpacuenia xanē taju-maitsinexa tacuenewajunupaebijawata», janē baja cajena tanesiwaponaewijawabelia. ¹⁴ Xanē nexata baja ponaenajē ajenaconoxae tajanacuayabelia. Itsiata, taponawajēnaeya cayapētaeya-exanaenatsi xua bajarapamonae exanaejitsia itsamatacabijawabelia panijanacuapijiwijawabelia, Moab nacua—jai Balaam.

¹⁵ Nexata, cuenewajunupaebiaya Balaam jumaitsi:

«Mapacuenia pacatsipaebatsije. xanē, Balaam, Beor pexēnatonē, tatsiwajēnaetaenē xaniawaetsia.

¹⁶ Tamatabacabēta tanucaejawata, bemajitsinaebocuenia taniiji Dioso, ayaijatabābēcuenenē daxitawecua. Nexata, xanē xua pacatsipaebatsi, Jehová tanejumaitsijawanē, Dioso, ayaijatabābēcuenenē daxitawecua, taneyapētaeya-exanaejawa-ata.

¹⁷ »Xua tsiwajēnaetaniji pecopiapatsijawanexa, apo-ajenaconoxaetanexa. Bajaraxuanē ayaibexēa itsamatacabijawabelia copiapatsiana. Taniiji Ponē naitajētsijitsia Jacob-pijinē pemomoxituatuajēta pepopeyanacua-ewetsinēnexatsi, penamatacaponaenēnexanua pijajiwi pacuenia tulupu matacapona merawi namuto peponaewi. BajaraPonē werebiabiana Moab nacuapijiwi, Set-pijinē pemomoxi-ata, pejinawanapaewi petsewinacuajawa.

¹⁸ »BajaraPonē cuene-amoneyabiabiana Edom-pijinē^k pemomoxi. Wecuanaxainaeyababiabiananua pijanacua, Seir, Israel-pijinē pemomoxi pijawajabitsaēxae. BajaraPonē pejamatabēcuenē, Israel-pijinē pemomoxi juya pijawajabitsaēwecua xainaponaena bitso pinijicuenesaē.

¹⁹ »Jacob-pijinē pemomoxijawawerena pitsapaena ponē pecuene-amoneyabiabinēnexa daxita Israel-pijinē pemomoxi pijawajabitsaē. Nexata, bajaraponē werebiabanajetarucaena^l penacopabiwi bitso penamatamotsitomarata, Edom nacuata», jai Balaam Dioso peyapētaeya-exanaecuenetsi Balac-jawabelia.

²⁰ Bajarapacuenia pejumaitsicujinae, Balaam icatsia naēcolia Amalec nacuajawabelia. Nexata, cuenewajunupaeba pacuenia amalecitawi pijawajabitsaē cuene-amoneyabijitsiatsi itsamatacabijawabelia. Jumaitsi:

«Amalec nacuapijiwi pecuenenamataxainaewi-ata^m itsanacuanēpijiwiwecua, itsiata bailsi jane, pecopiarucaejawatalia bajarapamonae daxitami werebiabianatsi daxitamatacabijawabelianexa», jai Balaam.

k 24:18 *Edom-pijinē*: Itsawēnē pijinia Edom-nexa, Esaú, pematapijinē Jacob.

l 24:19 *werebiabanajetarucaena*: Balaam yabaracuaicuajai tsaena pepopeyanacua-ewetsinē David pecuene-amoneyabijawanexa bajarapanacuapijiwibeje. Taema 2Sa 8:2, 13-14.

m 24:20 *pecuenenamataxainaewi-ata*: Amalecitawi copiaya tsmaxēpatatsi Israel-pijinē pemomoxijawabelia itsanacuanēpijiwiwecua. Ajēna Israel-pijinē pemomoxi pitsapa Egipto nacuwecua, amalecitawi tsmaxēpatatsi. Taema Éxo. 17:8-16. Bexējawabelia pijinia Saúl werebiaba bajarapamonae daxitami bajarapaneconijamatabēcuenē. Taema 1Sa. 15:1-9

²¹ Xuacujinae, Balaam icatsia naëcolia ceneowi pejinawanapaenacuajawabelia. Jumaitsi Dioso peyapëtaeya-exanaecuenetsi:

«Paxamë, paceneowimë,ⁿ panejinawanapaewi-ata panenayaji winacuenebanutsitomaranëta, bitso piacuenesaëtomaranëta, panenacuenebiwi-ata panijatamaranë ibotsutonëjumata, itsajota ayapëbeje panijawajabitsaë papecatsimaxëpatsinexa, ²² itsiata baitsi jane, Asiria nacuapijiwi panijatamaranëmi pacatotajutsiana isotota, pamatacabita pacacaponae papecataicaewicuenia pijanacuajawabelia», jai Balaam ceneowi yabara.

²³ Bajaraxuacujinae, Balaam icatsia jumaitsi Dioso pexanaejawanexa yabara:

«Ayai baja tsane pamatacabi Dioso exanaena bajarapacuenia, tsipaji apopanepae tsane cajena caejiwi-ata.

²⁴ Bajarapamatacabita, Quitim^o nacuajawawerena wajabitsaë najetarubenaena barcoxanetonëta. Nexata, bajarapamonëta peyaponaewi cuene-amoneyabiana Asiria nacuapijiwimi, Heber-pijinë pemomoxi-ata.^p Daxita bajarapamonaemi Dioso werebiabianatsi», ^q jai.

²⁵ Nexata, Balaam bajarapacuenia pejumaitsicujinae, nonotapuna, peponaenexa^r pijanacuayabelia. Balac pijinia pona pijanamutuabelia penawecuanatsatsicueniabeje.

Israel-pijinë pemomoxiyajuwënëwi asiwaya barënewajëcabiaba Moab nacuapijiwi, Baal-peor jumapecataeya pexanaenëjawabelia

25 ¹ Israel-pijinë pemomoxi nacuenebanuba pijataxunaebo Sitim-tusatota, Moab nacuata pebocaetusato. Nexata belia, itsamonae pebijiwi israelitawiyajuwënëwi taxuxuaba Diosowecua

n 24:21 paceneowimë: Itsajawata bajarapamonae wënërubatsi quenitawi, itsa jume, Caïn pemomoxi. Bajarapamonae apopemomoxi Caïn, Adán, Evabeje pexënatomi, tsipaji Dioso werebiaba daxita bajarapamonae pamatacabita bubutsia-exana mapanacuae Noëpijinë matabita. Ceneowi, Noëpijinë pexënat Set-pijinë pemomoxiyajuwënëwi. Balaam peponaponaematacabi, ceneowi itsajawata wënërubatsi Caïn pemomoxicuenia, pecuenejëpaexae Caïn-pijinë, tomaranë penatonacuenebabiabijawata. Bajarapamonae bajayata jinawanapa patsewinacua boca sur-nenijawabelia, Moab nacuacujinae. **o 24:24 Quitim:** Itsawënë pijinia Chipretunaeto. Bajarapatunaeto eca Mediterráneo manuamenejawata. **p 24:24 Heber-pijinë pemomoxi:** Apoyabaracuaicuijai tsaena Abraham pemomoxi yabara, judfowi. Yabaracuaicuijai saya pamonaë Eber-pijinë pemomoxi xaina pexënatobeje Jotán, Peleg-bejējawabelia, penaitajëbaponaewi. Asiria nacuapijiwi cuene-amonaeyabatsi Grecia nacuapijiwi. Grecia nacuapijiwi cuene-amoneyabatsi pijinia Romano nacuapijiwi. Romano nacuapijiwi cuene-amoneyabatsi pijinia Islam peliwaitsi pejumecowënëtsiwi. Daxita bajarapanacuanëpijiwi cuene-amoneyabi-ata Israel nacuapijiwi-ata, bajarapamonae itsiata apowerebiabi judfowi pacuenia exana itsamonae Eber-pijinë pemomoxijawabelia. **q 24:24 Dioso werebiabianatsi:** Majotaje Balaam tajëwelía wajunupaeba tsaena pacuenia Jesús werewerecaeya-exanaena daxitanacuanëpijiwi peyanacua-ewetsicue, nacua pecopiarucaematacabita. Bajarapamatacabita, Jesús yanacua-ewetsiana daxitanacuapijiwi. **r 24:25 peponaenexa:** Balaam bitso asiwa tsaena papalata Balac rajutsiapaebatsi picani. Nexata, peponaewajënaeya muxujibatsi Balac pacuenia exanaejitsia, Dioso juya pitoyanexa israelitawi. Nexata, itsa exanaejitsipa Balaam pemuxubijapienetsicuenia, belia Dioso werebiabijitsia israelitawi Balac pejitsipaecuenia. Taema Núm. 25; 31:7-18; Apoc. 2:14; 1Pd 2:15; Judas 1:11, nepyëtaenexa pacuenia exana moabitawi Balaam pemuxupenetsicowëya.

penajamatabëcuenebijianaejawa^s Moab nacuapijipetiriawijawabelia. ²Bajarapowaxi junatabiaba israelitawi, pebijiwi, pebarëtajuitsinexa dajubi Baal-peor jumapecataenëjawabelia. Nexata bajarapapebijiwi penapatsicujinae, itsajota Moabitamonae dajubi tajuitsiaya rajutabiaba pijadiosowijawabelia, bajarapamonae najuaxaeyabiaba bajaraperajut-siyajuwënëwi. Pematabacabëtanua barë nawajëcabiabatsi bajarapajumapecataenëjawabelia. ³Bajarapacuenia pejamatabëcuenejëpaexae, belia nacajunua pejumecowënëtanapanapænexa Baal-peor pitorobiliwaisi. Nexata, siwanajamatabëcuene copatabiaba bajaraponëjawabelia, peya-wenonaenexatsi Jehovahewecua. Bajaraxuata, Jehovah bajarapacuenia itsa tane, bitso ayaicuenia bara-anaepana israelitawijawabelia. ⁴Nexata Jehovah jumaitsi Moisés-jawabelia:

—Taicaename Israel-pijinë pemomoxituajëta pamonae pewetsiwi, pebarënajamatabëcuenejëpaewi Baal-peor-jawabelia. Nexata naejawata athëbëyo wësicëbarubia-exanaename matababita, petëparubenaenexa xanë, Jehovahänë, taitabarata. Bajarapacuenia itsa exanaename, jamatabëcuene caewianajë bitso ayaicuenia tabara-anaepanaejamatabëcuenemi Israel-pijinë pemomoxijawabelia —jai Jehovah.

⁵Nexata, Moisés jumaitsi itsamonae Israel-pijinë pemomoxi pewetsiwi jawabelia:

—Pabeyaxuabaponaename panijamonaeyajuwënëjiwi, pebarënajamatabëcuenejëpaewi Baal-peor-jawabelia —jai Moisés. Nexata, bajarapamonae Moisés pitorobicueniatsi exana.

⁶Bajaraxuacujinae, Moisés barë nacaetuata tabernáculobobaupa canacujitsita, itsajota itsamonae yajawa ayaibitsaëto natsinueyena pijamonae pijaneconijamatabëcuene. Bajarapaepatota, bajarapamonaeyajuwënë nã itsanë tane tabernáculobo imoxoyo canacujitsialia pebarënajetarucaejawa madianitawa^t pijataxunaebojawaberena, pebarëpatsinexa. ⁷Nexata Finees, pexë-nato Eleazar, Aarón-pijinë pemomo, nonotabapuna penatsinueyenaewitua-tuajëta. Pitaba pijacuererebo. ⁸Bajaraponë pëbaralia ponë barënajetaruca madianitawa pijacarpabojawabelia. Penaimoxoyobijawatabeje, bajaraponë asaëyata najumacacuatabeje, daxitajiwibeje. Yasipitsatabatsibeje cuererebo. Finees, bajarapajiwibeje pebeyaxuabixae, Jehovah matapania jamatabëcuene caewa pebara-anaepanaejawa. Copata baja jiwi petëpaponaejawa Dioso pejamatabëcueneta. ⁹Pamonae tëpa bajarapawixaeta, namata-ëjëta veinticuatro mil pijiwibeje.

s 25:1 *penajamatabëcuenebijianaejawa*: Pacujinae jiwi siwanajamatabëcuene copatabiaba itsacue-nejawabelia Diosowecua, bajaraxua tsitatsi bepewecujajitsijawatsi itsajiwijawabelia pewetsine-xatsi. Cuenejëpa bailsi pebi pewecujajitsijawa itsawa pijawecua. Bajaraxuata, wowaijumeta juca adulterio, fornicación, prostitución-jumecuenia, pewecujajitsijawa yabara itsajijiwi, itsacueni-jawana Diosowecua, pesiwanajamatabëcuene copatabiabinexa bajaraxuanëjawabelia, peyaweno-naenexatsi. *Orijibia, pacujinae jiwi jamatabëcuenejëpa jumapecataeya pexanaenëanëjawabelia Baal-peor, Astarot-jawabelia-ata, najamatabëcuene-itajëta caejamatabëcuene pexainaejawa bajarapajumapecataenëjawabelia. Caejamatabëcuene pexainaexae bajarapajumapecataenëjawabelia, tsicarucatsi pexaenexa dajubi perajutsiyajuwënëwi, peperabëquenetsiataenexanua* powa tonacuenebaponaona bajarapajumapecataenë. **t 25:6** *madianitawa*: Madian-pijinë pemomoxi, Moab-pijinë pemomoxi-ata jinawanapa Moab nacuata. Madian raja Abraham-pijinë pemomo. (Gén. 25:1-2) Moab pijinia Lot-pijinë pemomo. (Gén. 19:32-37)

¹⁰ Nexata Jehová jumaitsi Moisés-jawabelia:

¹¹ —Finees, pexênato Eleazar, sacerdotenê Aarón-pijinë pemomo, bajaraponê pebeyaxuabijawata bajarapajiwibeje, nejamatabêcuenecaewia-exana tabara-anaepanaejamatabêcuenemi israelitawijawabelia. Bajarapacuenia exana tanejamatabêcuenepaexae pitoyajawa jiwi pesiwanajamatabêcuenecopabijawa jumapecataeya pexanaenêjawabelia xanêwecua. Bajaraxuata, apowerebiabinê daxita Israel-pijinë pemomoxi, bajaraponê pejamatabêcueneta. ¹²⁻¹³ Nexata yapêtaeya-exanaename Finees pacuenia xanê, Jehovahnê, najumeliwaisicajunuajê bajaraponêjawabelia, pemomoxijawabelia-ata, bajarapamonae pecanacopataponae nexa tajasacerdotewi daxitamatacabijawabelia —jai Jehovah.

¹⁴ Ponê Finees beyaxuaba pewênê Zimri, pexênato Salu. Bajaraponê pewetsinê Simeón-pijinë pemomoxi. ¹⁵ Pamadianitawa pijinia beyaxuaba, pewênê Cozbi, pexênatoyo Zur. Bajaraponê penamatacaitorobinê pijamonae madianitawituatuajêta.

¹⁶ Nexata icatsia Jehová jumaitsi Moisés-jawabelia:

¹⁷⁻¹⁸ —Tsimaxêponaename madianitawijawabelia, newerebiabinexa, tsi-paji bajarapamonae pacatsimaxêpata papecayamaxê-itorobiliwaisita, xanê juya patacawerebiabinexa panijaneconijamatabêcuene. Papecayamaxê-itorobixae Baal-peor peli waisita, Cozbi, madianitawi pewetsinê pexênatoyo, papecayamaxê-itorobixae aenua, pacawerebiabanajetarucatsi wixaeta panijaneconijamatabêcueneta. Bajaraxuata pawerebiabianame bajarapamonae —jai Jehovah.

Moisés itapeta Josué pecanacopatsinexa Israel-pijinë pemomoxi penamatacaitorobinê nexa

(Deut 31:1-8; 34:1-12)

27 ¹⁻¹¹ [...] ¹² Jehová jumaitsi Moisés-jawabelia:

—Junaimina Abarim-tsutojumabetsina. Bajarapatsutojumawet-sica taename pa-ira rajutajê Israel-pijinë pemomoxijawabelia. ¹³ Bajarapa-ira netaecujinae, xamê-ata têpaename jonenejewamê bajarapanacuajawabelia, pacuenia Aarón nematapijinêmi têpa, ¹⁴ tsipaji baja paxamêbeje apopanejumecowênêtsimêbeje, pacuenia paca-itorobatsibeje Zin nacuatatusatojawatalia. Paepatota Israel-pijinë pemomoxi nesiwajamatabêcuene-anaepanaeya newajêcapona mera, bajarajotalia paxamê-atabeje apopa-exanaemêbeje pataneyaiyataecueniamêbeje bajarapamonae pitabarata pane-exanaejawatabeje apopataca-itorobicueniabeje. Bajaraxuata, pacatonajumecopatatsibeje panetêpaenexabeje petusatonacuata, Canaán nacujawabelia pajonenejewamêbeje —jai Jehovah Moisés-jawabelia. (Bajaraxua yabarajumaitsi Dioso peca-pitsapaejawarena mera ibotoxanetojawawerena Meribataxunaejawatalia, Cades-tsutojawatalia, Zin nacujawata.)

¹⁵ Nexata, Moisés jumecanawiata Jehovájawabelia:

¹⁶⁻¹⁷ —Jehová tajaDIOSomê, xamê raja nenajumalirajutsinê daxitajiwijawabelia piasaêtsawanapaenexa. Cawajêtatsi nitapetsinexa itsanê tacowêta penamatacaitorobaponae nenê nexa mapamonae nijajiwi. Nexata, bajaraponê pematacaponaenê nexa nijajiwi israelitawi penawajabitsaêtsimatacabi

pijawajabitsaewijawabelia, bajarapacuenia pebarənawiatsinənexa pija-bonəjawaberena pecuene-amoneyabicujinae pijawajabitsaewi. Itsa apo-itapetsimē tsipae itsanē, nexata pacuenia ovejamonaē naxuabiaya bajina-wanapa pewetsinētsinejewa, bajarapacuenia nijajiwi bajara-itsi tsipae —jai Moisés.

¹⁸ Nexata, Jehová jumecanawiata Moisés-jawabelia:

—Je, xanepana. Josué, pexənato Nun, bajaraponē cajena taja-Espíritu Santo jamatabēcuenecaējəpaeya-exanatsi pejamatabēcueneyawenonaenexa. Nexata, junatsianame bajaraponē netsimatanacobeuatsinexa. ¹⁹ Baja-raxuacujinae, itajətsianame sacerdotenē Eleazar-jawabelia, daxitajiwi pitabarata-ata. Nexata, daxita bajarapamonae pitabarata tsicopatsianame Josuéjawabelia penamatacaitorobinənexa Israel-pijinē pemomoxi. ²⁰ Nexata, netsimatanacobeuatsijawata tsiwajənaecuenewajunupaebianame bajara-ponē pecanacopatsinexa nenamatacaitorobijamatabēcuenemi, jamatejema daxita israelitamonaē bajaraponē jumecowənətsiya pejinawanapaenexa. ²¹ Bajaraxuacujinae, Josué penamatacaitorobinē penaexanaecujinae, itsa itsacuenē pexanaewajənaeya, nexata bajaraponē ponabiabiana sacerdotenē Eleazar-jawabelia, peyanijobinexa pacuenia barē-exanaejitsia israelitawi. Nexata, Eleazar, tajacarpabota penucaenē, bajaraponē juya neyanijobiana Jehovānəjawaberena. Nexata, xanē yapətaeya-exanaenajē Eleazar-jawabelia xua barē-exanaejitsia Josué Urim pejamatabēcuenē. "Bajaraxuacujinae juya, Eleazar yapətaeya-exanaena Josuéjawabelia xua xanē tojitsipajē pexanae-jawanexa. Bajarapacuenia tsane Josué juya petsipaebinexa Israel-pijinē pemomoxi xua exanaejitsia. Nexata, Josué pitorobixae, bajarapamonae pitsapaena penawajabitsaətsinexa, bajarapijinia pacuenia penawiabinexa pijabonəjawaberena-ata penawajabitsaətsicujinae, daxitacuenē pejumecowənətsinexatsi —jai Jehová.

²² Daxita pacuenia Jehová tonajumecopatatsi pexanaenexa Josuéjawabelia, Moisés baja exana. Junata Josué petsitajətsinexa sacerdotenē Eleazar-jawabelia, bajarapacuenia daxitajiwi pitabarata. ²³ Nexata, bajarapamonae pitabarata bajaraponē tsimatanacobeuata, petsicopatsinexa Josué penamatacaitorobaponaponaenēcuenē Israel-pijinē pemomoxi, Jehová pitorobicueniatsi.

Israel-pijinē pemomoxi nawajabitsaəta Madianitawijawabelia

31 ¹ Jehová nexata jumaitsi Moisés-jawabelia mapacueniaje: ² —Xamē netəpaewajənaeya," itorobianame Israel-pijinē pemomoxi petsimaxəponaenexa madianitawi penayamatamotsinexa" peyamaxə-itojorobijamatabēcuenetsi. Bajarapamonae yamaxə-itojorobatsi* xanəwecua,

u 27:21 Urim pejamatabēcuenē: Taema Éxo. 28:30. Urim, Tumim-wənəjawabeje apoyapətaetsi-beje pawiriacuenəjawabeje. Itsiata, sacerdotewi penamatacaitorobinē pecanacuenəbijawa peyapətaenexa xua exanaejitsia Dioso pejamatabēcuenē. Nexata, bajaraponē canacuenəbabiaba pijacujirucuenia Urim, Tumim-beje, peyapətaenexa xua Dioso tojitsipa pexanaenexa. Taema «Urim», glosariojawata. v 31:2 netəpaewajənaeya: Taema Deut. cap. 34 w 31:2 penayamatamotsinexa: Taema Mt 18:16; Mc 9:42; Lu 17:1-2 Bajarapaversícuxi nacayapətaeya-exana pacuenia Dioso bitso cuene-itoya pamonaē peyamaxə-itorobiwi pijajiwi pesiwanajamatabēcuenəcopabinexa itsacuenəjawanəbelia bajaraPonəwecua, itsa jume, pewənajiwi jawabelia-ata. x 31:2 yamaxə-itojorobatsi: Taema Núm. cap. 25

asiwaya penawajēcabiabinexa jumapecataeya pexanaenējawabelia. Bajara-pacuenia nebarē-exanaecujinae, xamē jane baja tēpaename —jai Jehová.

³Nexata Moisés jumaitsi Israel-pijinē pemomoxijawabelia:

—Pa-itapetsianame itsamonae paxamēyajuwēnēwi, pebijwi, petsimaxē-ponaenexa madianitawijawabelia. Bajarapamonae benota, pecaponaenexa pecanawajabitsaētsijawanē, pewerebiabinexa madianitawi Jehová pewē-nēta. ⁴Itorobiana mil ponēbeje caenē pemomoxibitsaēto canacujitsia —jai Moisés.

⁵Nexata jane baja, caenē pemomoxibitsaēto⁷ canacujitsia itapetapona mil ponēbeje pijamonae wajabitsaētuatujēta. Nexata, daxitata namata-ējēta doce mil ponēbeje panawajabitsaētsiwinexa. ⁶Bajarapamonae Moisés itoroba pebarēnawajabitsaētsinexa madianitawijawabelia. Itoroba mil ponēbejatsaponae caenē pemomoxibitsaēto canacujitsia pitapetsiwi. Bajarapamonae yajawa, napona Finees, sacerdotenē Eleazar pexēnato. Bajaraponē capona xuanē sacerdotewi canacuenebabiaba Dioso pijacarpaboxanetota, caponanua trompetajawanē. Bajarapatrompeta objitsia, peyapētaeya-exanaenexa Israel-pijinē pemomoxi paepatota tsimaxēpatsijitsia madianitawijawabelia.

⁷Nexata jane baja, pepatsijawata barēnawajabitsaēta madianitawijawabelia, pacuenia Jehová tonajumecopata Moisés-jawabelia. Werebiaba daxita pebijwi. ⁸Beyaxuabanua cinco ponēmibeje Madian nacua peyanacua-ewetsiwi; Evi, Requem, Zur, Hur, Reba-ata. Orijibia yajawabeyaxuaba espadata Balaam, Beor pexēnato. ⁹Itsia, apowerebiabi petiriawi. Capona petaicaewicuenia, pexi yajawa. Notanua daxita pijadajubi, vaca, oveja, chivswi monae-ata. Notaponanua daxita madianitawi pecobecowē penamata-motsijawanē. ¹⁰Bajaraxuanē penotsicujinae, tajuita daxita bajarapamonae pijatomaranē, pijacarpabonē-ata. ¹¹Petajuitsicujinae, daxitaxuanē nota cae-tuata jane baja, jiwi-ata petaicaewi, dajubi-ata. ¹²Bajaraxuanē pecaetuat-sicujinae, capona jane baja Moisés, sacerdote Eleazar, daxita Israel-pijinē pemomoxijawabelia. Bajarapamonae bajarapamatacabita, xaina pijataxuna-bo, Jordán mene-itapata, pe-iranamatajēpaejawata Moab nacuata, Jericó tomara payenepanawelia eca.

¹³Imoxoyo baja pepuanajetarubena, Moisés, sacerdote Eleazar, daxita pamonae pewetsiwi Israel-pijinē pemomoxituatujēta, pitsapa pijataxunae-bowecua pemata-enenaenexa penawianajetarubenaewi panawajabitsaētsicujinae. ¹⁴Moisés bitso bara-anaepana wajabitsaē pewetsiwi jawabelia, penawianajetarubenaewi penawajabitsaētsicujinae. ¹⁵Nexata jumaitsi bajarapamonaewi jawabelia:

—¿Detsa xuajitsia apopabemē petiriawi? ¡Pacanajetarubename piasaēwi!

¹⁶Bajarapapetiriawi raja, Balaam pemuxubijiapenetsicuenia, pacajitsipaeya-exana panenawajēcabenexa Jehováwecua, Baal-peor jumapecataya

y 31:5 *caenē pemomoxibitsaēto*: Caebitsaēto canacujitsia xainapona doce ponēbeje, Israel-pijinē pexi pewēnēnē: Rubén, Simeón, Leví, Judá, Zabulón, Isacar, Dan, Gad, Aser, Neftalí, José, Benjamín-ata. Canaán nacuata, ira petsanaejawata José-pijinē pexēnatobeje Manasés, Efraín-beje, pemomoxibitsaēto beje canacopatabeje pija-iratupayobeje, itsamonae pewēnēta. Manasés-pijinē pemomoxi canacopata paxapijinē José pewēnēta. Efraín-pijinē pemomoxi pijinia canacopata Leví-pijinē pewēnēta.

pexanaenëjawabelia. Bajarapacuenia panenawajëcaexae bajarapajumape-cataenëjawabelia, Jehová pacatsi-itoroba paneyatëpaedomaenexa. ¹⁷Bajaraxuata, aeconoxae pabeyaxuabaponaename, daxita pebinëxi, daxita petiriawi-ata, powaxi baja pibisiacuene pewitota exana pebijiwijawabelia. ¹⁸Pacopatsianame saya piasaënexa powaxi, pepopejanawi, pebijawabelia abaxë apopenaperabëquenetsiataewaxi.

¹⁹»Paxamë pijinia pamonaë panebewi panenawajabitsaëtsijawata, pane-jayabiwinua petëpaewi, panacopatsianame wajataxunaebopënëyabelia sietepamatacabibeje. Penawecua-ajibiaya-exanaename bepenaxuirabicuenemi^z acueyabimatacabita, bajarapacuenia sietepamatacabita-ata. ²⁰Nexata, panenawecua-ajibia-exanaenexa panenaxuirabicuenemi, paquiatsianame daxita panenaxatabijawanë, xuanë-ata pexanaejawanë dajubibocotota, chivonãta, naejawanëtanua —jai Moisés bajarapamonaëjawabelia. ²¹⁻⁵⁴ [...]

z 31:19 *Penawecua-ajibiaya-exanaename bepenaxuriabicuenemi:*

Wowaijumeta pitsapa "Purificación." Baitsi bajayata xainabiaba saicaya mera petoquiatsinexa pajiwi petëpaewi jayaba.

Deuteronomio

Dioso itaweta jiwi penawajëcaeyaniwa
itsacuenejawabelia bajaraPonëwecua

4 ¹⁻¹⁴ [...] ¹⁵ Moisés jumaitsi israelitawijawabelia:
—Pamatacabi Jehová pacabarëcuaicuaijai paxamë Horeb-
tsutojawawetsica, bajarajota pacabarëcuaicuaijai pecotiajawawerena.
¡Apopataemë paxamë itsacuenejumape-ata bajarapaepatota! Nexata,
apopayapëtaemë Jehová pitsijumapecuene xaina. ¡Bajaraxuata, xania-
waetsia panajamatabëcuene-ewere mapacuenejawanëwecuaaje, ayaine-
coni panexainaeyaniwa! ¹⁶⁻¹⁸ ¡Pëtsa paxamë panajamatabëcuenebijianame
pane-exanaejawata itsawiriajumapecataenëanë, asiwaya panesiwana-
jamatabëcuenecopababiabinexa bajaraxuanëjawabelia, papecayaweno-
naenexa! ¡Pëtsa jumapecataeya pa-exanabiabame pebiijiwijumapecatae-
nëcuenia, petiriwajumapecataewacuenia-ata, bajarapacuenia pamonae
jinawanapa matatsënëwereca, pepunaewi, pecotobëxëta pejinawana-
paewi, menepijidujai-ata! ¹⁹ ¡Pamatacabi panaëcotame athëbëabet-
sia, itsa pataneme matabapijijumameto, merawipijijumameto, tulupu-ata,
daxitaxuanë itaboxotatsia perubenaejawanë,^a pëtsa bajaraxuanëta
panajamatabëcueneyamaxë-itojorobame, bajaraxuanëjawa belia panenawa-
jëcaenexa, panesiwanajamatabëcuenecopatsixae, tsipaji bajaraxuanë Jehová
DIOso pecobecowë! To-exananua bajaraxuanë daxitajiwi mapanacuataje
pejinawanapaewi peto-itayotsinexa ²⁰ Pacuenia hierronani pecanacuenebinë
bitso piatajuyaihornojawawerena bajuta piatajuhierronanijawa, jamatejema
pexanaenexa pejitsipaecuenia xua jamatabë-exana, bajarapijinia pacuenia,
paxamë Jehová pacajutanua Egipto nacuwecua, bajarapamonae bitso ayai-
cuenia papecabejibia-exanaecujinae, penatojitsipaecuenia pijajiwi papeca-
exanaenexa saicaya daxitawiriawiwecua.

²¹ »Itsiata, Jehová nebara-anaepana xanëjawaberena paxamë paneja-
matabëcuene. Nexata, najumecapanepaeya pepacuene aponetocopatsi
tanicabijawanexa Jordán-mene itsapanabelia. Aponetocopatsinua tajo-
nejawa papexanianacuajawabelia Jehová DIOso pacarajutsiapaeba,
panecanacopataponae-iranexa. ²² Bajaraxuata, xanë tēpaejitsianë map-
nacuataje Jordán-mene nicabinejewanë. ¡Paxamë itsiata panicabiaremelia
bajarapapexania-irajawabelia, panepitsinexa bajarapanacua panija-iranexa!
²³ ¡Nexata, xania baja tsane! ¡Bajaraxuata, pajamatabënajinawanapare!

a 4:19 *daxitaxuanë itaboxotatsia perubenaejawanë*: Taema «tulupu pecanaëjëbicuene»,
glosariojawata.

¡Pëtsa panacofënètame papecanajumeliwaisicajonejawa bajaraPonë, pane-exanaeyaniwa jumapecataenëanë! Jehová DIOSO bitso papecacuene-asiwanë, asiwaya panenawajëcaeyaniwa itsawiriadiosowijawabelia. ¡Pëtsa baitsi pa-exaname itsacuenewiriajumapecataenë asiwaya panenawajëcaenexa bajaraponëjawabelia, pacuenia Jehová DIOSO pacacuene-itaweta, ²⁴ tsipaji itsa pa-exanaejitsipame papeca-itawetsijawa, Jehová DIOSO pacawerebiabijitsipa! Pacuenia isotoxaneto baweriajawanajetaruca daxitaxua nubena pewajënaeya, bajarapacuenia Jehová DIOSO pecuene-itsinë. Wajanacacuene-asiwanënua daxita pibisiacuene waja-exanaeyaniwa —jai Moisés Israel-pijinë pemomoxijawabelia. ²⁵⁻³¹ [...]

Dioso raja ayaijamatabëcuenenë daxitawecua

³² Icatsia, Moisés jumaitsi Israel-pijinë pemomoxijawabelia:

—Xaniwaetsia paneyapëtaenexa itsa DIOSO bajarapitsipinijicuenejawanë to-exana itsamonaejawabelia pacuenia pacato-exana paxamë, payanijobianame daxitanacuanëjawa pejinawanapaewi. Payanijobianamenua bajayapijicue peyapëtaewi, DIOSO jiwi pexanaejawaweliacujinae. Payanijobiatamë tsane apopawënëtaemë tsane. ¿Jica, itsamonae paxamëwecua meta to-exanatsi bajarapitsipinijicuenejawanë? ¿Itsamonae meta wënëtane Dioso peto-exanaejawa bajarapacuenia itsamonaejawabelia paxamëwecua? ³³ ¿Jica, itsamonaejawabelia DIOSO meta barëcuaicuaijaitsi pecotiajawawerena bajarapamonae tēpaenejewa? ³⁴ Jica, ¿Bajayata meta DIOSO nato-itapeta itsawiriawi daxitajiwiwecua pijajiwinexa, pacuenia paxamë DIOSO paca-itapeta? ¿Bajayata meta itsawiriadiosonë tsitajëta bitso piacuenesaënëcuene, pacuenia Jehová panijaDIOSO tsitajëta Egipto nacupijijiwiawabelia papecacapanepaejawata? Pacanaëjère: bajaraPonë pacayapëtaeya-exana pinijicuenesaë pexainaenëcuene pacujinae tsita-exana pinijicuenejawanë, piayaicuenejawanë-ata. Pacajamatabëcuene-ëjëba papecajamatabëcueneyapëtaenexa, piacuenesaënëcuenia papecacayapijiwinawajabitsaëtsijawata, bajarapacuenia pepopecujunawijawanë-ata petsita-exanaejawata. Pacuenia Jehová DIOSO pacato-exana, ¿bajarapacuenia meta itsa diosonë exana? ¡Jume cajena! ³⁵ Daxita bajaraxuanë Jehová DIOSO pacatsita-exana paxamë panecueneyapëtaenexa Jehová pepoDIOSonëcuene papecajutsijawata Egipto nacupijijiwiwecua. Ajibi itsadiosonë pecuenejëpaenëtsi pepoDIOSOWecua. ³⁶ Nexata, bajaraPonë athëbëwetsica pacabarëcuaicuaijai, panejumetaenexa papecacuene xanebijawata. Bajarapacuenia irajawatatsica pijinia, pacatsitaitajëta pecunuacotiajawawerena papecabarëcuaicuaijaijawata. ³⁷ BajaraPonë bitso asiwa panijasalinaiwimi. Nexata bajaraxuata, paca-itapeta papijajiwinexamë. Pijacuata pacajutanua bajarapamonae papemomoxixaemë tsaponaerena, papecacapanepaenexa pinijicuenesaë petsitajëtsijawata Egipto nacupijijiwimi pecuene-amoneyabijawata. ³⁸ Canaán nacuata jinawana itsamonae ayaibitsaëto paxamëwecua. Bitso pecuene-aitatsacawinua. Itsiata baitsi jane, bajarapamonae Jehová DIOSO pacatsiwajënaecapitsapana-jetarucaena, panepitaponaenexa bajarapamonae pijanacuanëmi, panecanacopataponaenexa panija-iracuenia. Bajarapacuenia panemomoxi-ata juya canacopataponaena pewajënaeyabelia, pacuenia baja ajena canacopata itsamonae paxamëyajuwënëwi.^b

³⁹»¡Bajaraxuata, xaniawaetsia panejamatabë-ëthëtota pacanaëjëtawana-
napare panewajënaeyabelia paneyapëtaenexa Jehová DIOSONëcuene,
caenë pepoDIOSONë tsaponaponaecue-ne-ata! Ajibi itsaDIOSONë bajara-
Ponëwecua pacuenia bajaraponë cuene-itsi, tsipaji bajaraPonë itaboxo-
jawatatsia, irajawatatsica-ata DIOSO tsaponapona. ⁴⁰¡Nexata jane baja,
pa-exanawanapare daxitaxuanë papecatonajumecopatsiliwaisianë, baja-
rapacuenia papeca-itorobiliwaisianë-ata, xua xanë ajena pacayapëtaeya-
exanatsi panejumecowënëtawanapaenexa! Bajarapacuenia itsa pajumeco-
wënëtawanapaename, nexata xaniawaetsia pajinawanapaename bajayajebi
papecarajutsi-irajawata, panacuata Jehová panijaDIOSO pacarajutsijitsia
daxitamatacabijawabelianexa. Bajarapacuenia panemomoxi-ata jinawana-
paena bajayajebi bajarapanacuata —jai Moisés Israel-pijinë pemomoxijawa-
belia. ⁴¹⁻⁴⁹[...]

**Israel-pijinë pemomoxi Dioso peyawenonaexaetsi,
werebiabijitsia Canaán nacuapijiwimi**

9 ¹Moisés Israel pemomoxijawabelia jumaitsi:
—¡Paxamë pa-israelitamonamë, xaniawaetsia panejumetaema
maxuaje! Copiapata rabaja ajena panenicabinexa Jordán-mene itsapana-
belia, panejonenexa panacuajawabelia Jehová pacarajutsijitsia. Bajara-
panacuata jinawanapa bitso ayaibitsaëto pecuene-aitatsacawi paxamë-
wecua, bajarapacuenia ayaitomaranë-ata pexainaewi. Bajarapatomaranë
xainabiaba penaya-itacaranabijawanë, athëbëabetsia bitso piapijawanë.
Bajarapanacuapijiwimi pacuene-amoneyabianame, panepitaponaenexa pija-
nacuanëmi. ²Bajarapatomarapijiwi bitso ayainëxanetonë, piapiawinua dxi-
tajiwiwecua, tsipaji bajarapamonae Anac-pijinë pemomoxi. Bajarapamonae
Anac-pijinë pemomoxi yabara pawënëtaneme baja. Mapacuenia pejumait-
sijawaje: «Ajibi cajena itsamonae pecuene-amoneyabinexatsi Anac pemo-
moxi», peyabarajajawatsi pajumetaneme.

³¡Itsiata, ajenaconoxaeta bepapapëtaneme maxuaje: Jehová panijaDIOSO,
bajaraPonë raja panewajënaeya najetarucaena bajarapamonae papecawe-
cuawerebiabinexa panebarënwajabitsaëtanajetarubenaewawata. Pacuenia
nawaxaneto baweriajawanajetaruca, bajarapacuenia bajaraPonë were-
biabanajetarucaena daxita bajarapanacuapijiwi. Nexata, bajarapacuenia
paxamë bepijiayo pacuene-amoneyababiabianame bajarapanacuapijiwimi,
panewerebiabinexa, pija-iranëmi panepitsinexa Jehová papecayawenona-
cuenia. Pacuenia nacatsita bepijiayo tsatabi jiwitonë penaitaxutotsaque-
tajarabijawa, bajarapacatsita-itsi tsane panecuene-amoneyabijawa bajara-
panacuapijiwi. Bajarapacuenia Jehová najumecapanepaeya pacajumaitsi
papecayawenonaewawanexa. ⁴¡Pamatacabi jamatejema pajinawanapaename
bajarapanacuata, Jehová panijaDIOSO papecawecuacapsapaexae tsane
bajarapamonae pejinawanapaenacuanëmiwecua, pëtsa pajamatabëju-
maitsimë paxamë panenajamatabëxainaecuenia: 'Pexaniacuenia waja-
tojinawanapaexae Jehová, bajaraPonë juya nacarajuta bajarapamonae

b 4:38 *paxamëyajuwënëwi*: Bajaraxua yabarajumaitsi Rubén pemomoxi, Gad pemomoxi, Mana-
sés epatau pemomoxibitsaëto-ata. Taema Núm. 32:33; Deut. 2:26-3:22.

pijanacuanëmi, pjamatabëjamë pëtsa! Baitsi, Jehovah PanijaDIOso paca-wecuacapitsapaena bajarapanacuapijiwimi bitso piacujirubejewixae Dioso pitabarata. Nexata, pijaneconijamatabëcuene yabara, pacawecuacapitsapaena. ⁵ Jehovah panijaDIOso apopacarajutsi tsane bajarapamonaemi pijanacuami, aneconijibia panejinawanapaexae bajaraPonë pitabarata. Jume baja cajena! Paxamë pacarajutsiana bajarapamonaemi pijanacuanëmi, bitso pibisiacuene pexanawanapaexae bajaraPonë pitabarata. Nexata, Jehovah pacarajutsiana bajarapamonaemi pijanacuanëmi, penajumecowë-exanaenexa tajëwëlia xua najumecapanepaeya jumaitsi papecato-exanaenexa panijasalinaiwimi, ⁶ Abraham, Isaac, Jacob-banajawabelia. ⁶ Biji rajane, bepanatoya-pëtaewananapame maxuaje: Jehovah panijaDIOso apopacarajutsi tsane bajarapapexanianacua, aneconijibia panejinawanapaexae bajaraPonë pitabarata, tsipaji paxamë panatae-atamë aneconijibia panejinawanapaewaja, itsiata pa-ajamatabëcuenetajamë tsabiabi Diosojawabelia panejumecowënëtsiya-niwa —jai Moisés Israel-pijinë pemomoxijawabelia. ⁷⁻²⁹ [...]

Jehová raja ayaijamatabëcuenenë

11 ¹ Moisés jumaitsi Israel-pijinë pemomoxijawabelia: —Pa-asiwamëre tsawanapae Jehovah panijaDIOso. Caemata-cabi canacujitsia pajumecowënëtanapanapenama daxita pitorbiliwaisianë, paliwaisianë-ata pematatsënëa pacatonajumecopata. ² Panajamatabënapitabiabare Dioso papecayapëtaeya-exanaeliwaisi, bajarapaliwaisi panejumecowënëtanapanapenexa. Apojumaitsinë panexijawabelia, tsipaji abaxë bajarapamonaemi apoyapëtae Jehovah, wajaDIOso, pecuenexanetsijawatsi. Apotae-ata DIOso ayaijamatabëcuenenëcuene. Aponatoyapëtae Dioso pinijicuenesaëta pecapanepaejawatsi. ³ Bajarapamonaemi apotae papiyacuenejawanë DIOso tsitoroba daxita Egipto nacuapijiwijawabelia, peyanacuawetsinë faraón-jawabelia-ata. ⁴ Apotaenua Egipto nacuapijiwijabitsaë pijacaballuanë, pijacarrozamonë-ata pacuenia DIOso bubunaeya-exana Mar Rojo manuamenejawata pacujinae paxamë pacabarajina. Bajarapacuenia DIOso werebiaba daxita bajarapamonaemi. ⁵ Apotaenua DIOso daxita xua nacato-exana wajanaca-ewetsijawa, wajajinarutsijawata petsewinacuajawa. ⁶ Apotaenua pacuenia DIOso naneconitsia-exana Datán, Abiram-bejewawabelia, pexënatobeje Eliab, Rubén-pijinë pemomobeje. Nexata, apotae pacuenia DIOso israelitawi pijataxunaebotuatujëta ira woconaeaya-exana, pequijoninexa bajarapamonaemi, pijamonaemi-ata, daxita pijacar-pabonë, pijadajubi-ata yajawa. ⁷ Panexi apotae-ata bajaraxuanë, paxamë itsiata pataneme papinijicuenewajanë Jehovah pacatsita-exana. Bajaraxuata paxamë bepapapëtaneme Dioso ayaijamatabëcuenenëcuene, bepajumecowënëtanapanapenuea bajaraPonë —jai Moisés.

Moisés icatsia muxujioba Israel-pijinë pemomoxi

⁸ Icatsia Moisés jumaitsi Israel-pijinë pemomoxijawabelia:

c 9:5 panijasalinaiwimi: Dioso najumecapanepaeya ira rajutsiapaeba Abraham-pijinëjawabelia Gén. 13:14-17; 15:13-16; Isaac-pijinëjawabelia Gén. 26:2-5; Jacob-pijinëjawabelia Gén. 35:11-12; pijasalinaiwimijawabelia Éxo. 3:7-8.

—Bajarapacuenia pajumecowënētawanapaename daxita paliwaisianē xanē ajena pacatsipaebatsi, jamatejema pane-ajamatabēcuenesaēnexa panejonenexa pa-irajawabelia, panawajabitsaëtsijitsiamē panecuenē-amoneyabijawabelia. ⁹ Bajarapamonae panecuenē-amoneyabicujinae, tsitecaeya pajumecowënētawanapaename bajarapaliwaisianē, jamatejema bajayajebi panejinawanapaenexa panacuatalia Jehová najumeca-panepaeya rajutsiapaeba panijasalinaiwimijawabelia, bajarapacuenia paxamē papemomoximējawabelia-ata, bajarapacuenia panejinawanapae-nexa panacuata capitsapabiaba nawitsiaya daxitawiria pexaejawacuene. ¹⁰ Panacua raja payabaranawajabitsaëtsijitsiamē panepitsinexa, apojēpae Egipto nacuapiji-iranēmi. Panacuawerena papitsapame, Egipto nacua, bitso petsewi-iranacua. Nexata, bajarajotalia pe-ubiwi petonaxaniabinexatsi, yabacatsicababiaba pacuenia ba-exana jiwi bo-imoxoyojawata pe-ubijawaxi. ¹¹ Itsiata bailsi jane, panacuayabelia paponaejitsiamē panepitsinexa, bajarapacuenia apopa-exanaemē tsane. Bajarapanacua raja xaina petsutonē, pet-sutonētatuajēta pebobenae-iranē pexaniabēxēfoto-iranē-ata. Bajarapanacuata pijinia ema runabiaba daxitanacuajawa, piracainejebia-exanaenexa. ¹² Bajarapa-ira raja Jehová panijaDIOSO pewetsi-ira. Nexata, caematacabi canacujitsia bajarapa-ira naitaxutuacaewetabiaba daxitawaijebi. ¹³ »Nexata, paxamē itsa xaniawaetsia pajumecowënētawanapaename pali-waisi ajena pacatsipaebatsi, pane-asiwatsawanapaexae Jehová panijaDIOSO panejamatabē-ēthētowetsina, daxita panejamatabēcuenewetsina-ata, bajarapacuenia yaiyataeya-ata itsa pato-exanawanapaename pejitsipaecuenia, ¹⁴ nexata bajaraPonē pacatocopatabiabiana pijamatacabianējawata ema perunabiabinexa, copiyapiji-emanē, cotocaewipiji-emanē-ata, bajarapacuenia pijamatacabianēta paxamē panenotabiabinexa pane-ubijawanē trigo, bajarapacuenia uvacuai, panexainaponaenexa vinoranē, bajarapacuenia panenotsinexa olivocuai, aceiteranē-ata panexainaponaenexa. ¹⁵ Bajarapacuenia pacatonaxaniabia-exanaena wayafopijiponacuene, xaniawaetsia papecatowit-sabinexa panijadajubi, panexainaponaenexa ayaibitsaētonē. Nawitsia paxainaenamenua pexaejawacuene panexaewanapaenexa. ¹⁶ ¡Xania baja tsane! ¡Panajamatabēxaniawaere! ¡Pētsa panacopatame itsamonae papecayamaxē-itojorobijawa, itsajamatabēcuenē panexainaeyaniwa Jehováwecua! ¡Pētsa panajamatabēcuenetsatame Jehováwecua jumapecataenēanējawabelia, bajarapacuenia panenajamatabēcuenē-itajētsinexa pane-asiwajawa panemataba-cabēta panenawajēcabiabijawata! ¡Pētsanua yaiyataeya pato-exanawanapame pejitsipaecuenia, Jehová papecatonajumecopatsiliwaisiwecua, ¹⁷ tsipaji bajarapacuenia itsa pa-exanaejitsipame, Jehová pacabara-anaepanaejitsipa paxamējawabelia! Nexata, bajaraPonē apopacato-itorobi tsipae ema perunaenexa. Ema piajibixae bajarapapexania-irami apopacatocapitsapae tsipae pecuai pane-ubijawanē. Belia jemata paxamē-ata pawecuatēpaejitsipame bajarapapexania-iranacuami, Jehová papecarajutsi-irami —jai Moisés israelitawijawabelia, pejumecowënētawanapaenexa DIOSO.

**Pacuenia Israel-pijinē pemomoxi exanaejitsia
penacofēnētsiyaniwa Dioso petonajumecopatsiliwaisitsi**

¹⁸ Icatsia, Moisés israelitawijawabelia jumaitsi:

—Nexata, Jehová papecatonajumecopatsiliwaisianē panenacofēnētsiya-niwa, xaniawaetsia paxainawanapaename panejamatabē-ēthētota, pane-jamatabēcuenetanua, jamatejema panenajamatabēnapitaponaenexa. Bajarapaliwaisianē panatoyaquinarubianame tsiquiribaxutoxita, jamatejema bajaraxuanē panena-itapacēbabiabinexa,^d bajarapijinia pacuenia panenacobecēbabiabinexanua. Nexata, panetaejawata panajamatabēnapitabiabianame Jehová papecatonajumecopatsiliwaisianē. Nexata, daxitaxua panajamatabēxainame, xua-ata pa-exanabiabamenua, pato-exanabiabianame Jehová panejumecowēnētsicuenia.¹⁹ Bajarapaliwaisianē pacujarubabiabianame panexijawabelia, paepatota pajinawanapame panijabonējawata, paepatota namuto panenajetarubenaejawata, merawi panemajitsiwajēnaeya-ata, bajarapacuenia bajayacunua panenaēcobicujinae-ata.²⁰ ¡Nexata, bajarapaliwaisianē panenacofēnētsiyaniwa, panijabonē naesiturutonējawa payaquinarubare, bajarapacuenia baupajawa-ata!²¹ Bajarapaliwaisianē itsa panejamatabēcueneta paxainawanapaename, bajarapacuenia panenajamatabēnapitabiabixae, nexata paxamē, panexi-ata bajayajebi pajinawanapaename panacuajawata Jehová panijaDIOSO najumecapanepaeya rajutsiapaeba panijasalinaiwimijawabelia. Paepatowajēto abaxē daxita mapanacuaje tsitecanucaena, nexata bajarapamatacabiwajēto paxamē panemomoxi-ata tsaponae pajinawanapaename papecarajutsinacuata.

²²»Itsa pepacuene xaniajaiya pa-exanawanapaename papeca-itorobiliwaisianē ajena paliwaisianē pacatsipaebatsi panejumecowēnētsinexa, itsa pijinia pa-asiwamē tsane Jehová panijaDIOSO, itsa caejamatabēcuenenua paxainaename bajaraponē panepēnanajetarubenaenexa, xaniawaetsia papeca-itorobiciuenia paneto-exanawanapaenexa,²³ nexata Jehová pacawecuapitsapaena pejinawanapaewimi bajarapanacuata. Nexata, jamatejema papitsianame bajarapamonae pijanacuanēmi, bajarapamonae picani ayaibitsaēto-ata paxamēwecua, piacuenesaēwimi-ata.²⁴ Itsaxuayo paxamē panajetarubenaename, nexata panecowējawa bajaraxuayo panija-ira tsanajetarucae tsane. Bajarapairanacia taxuxuabiana piapiajawa Cades-barnea tomara pebocaetusatojawata, pepatsinexa Líbano nacujawabelia. Epatajērētsialia pijinia taxuxuabiana Éufrates menejawata, juameto pepitsapaejawawetsina pebocae-ira, pepatsinexa Mediterráneo manuamenejawabetsia.²⁵ Itsajiwiyo-ata apocuenecaējēpaetsi tsane papecacaranatsijawa pija-irami panewecuapitsiyaniwa. Jehová DIOSO pacatocopatsiana bajarapanacuanēpijiwi papecacujunawinexa paxamē. Nexata, panacuanējawa panajetarubenaename, bajarapanacuanēpijiwi pacacujunawiana papecajumaitsicowēya najumecapanepaeya.

²⁶»¡Panejumetaema! Anijacuenebeje pacatsipaebatsi panenato-itapetsinexa ajena panetaeyabiabijawanexa; caejawa pexaniacuenia Jehová papecayawenonabiabijawanexa, itsajawa pijinia pibisiacuene papecatocopiapatabiabijawanexa.²⁷ Pexaniacuene itsa jamatabēpataewanapame, pajumecowēnētawanapaename papeca-itorobiliwaisi xua ajena pacatsipaebatsi. Nexata juya, Jehová, panijaDIOSO, pexaniacuenia pacayawenonabiabiana.²⁸ Pibisiacuene itsa jamatabēpataewanapame, apopajumecowēnētawanapaemē tsane paliwaisianē ajena pacatsipaebatsi. Itsa pijinia

d 11:18 *panena-itapacēbabiabinexa*: Taema «filactérias», glosariojawata.

pawecuanatsanaename pepoDiosowecua, panepënaponaenexa itsawiria-diosonëanëjawabelia panenawajëcabiabinexa, nexata DIOSO pexaniacuenia apopacayawenonae tsane. Pacatocopatsiana pibisiacuene panetaewanapae-nexa panenaneconitsiwicuenia —jai Moisés Israel-pijinë pemomoxijawabe-lia. 29-32 [...]

Pitsicuenejawanë tsitatsi Dioso bitso pibisiacuene jiwi pexanaejawa

(Lev 20:6-8)

18 ¹⁻⁸ [...] ⁹ Moisés jumaitsi Israel-pijinë pemomoxijawabelia Canaán nacuyabelia pejonewajënaeya:

—¡Pamatacabi paxamë pajonename panacuayabelia Jehová DIOSO paca-rajutsiapaeba, pëtsa panacuenejëpame bajarapanacuapijiwi pitsipibisia-cuene exanawanapa, tsipaji DIOSO bajaraxua bitso tsitapibisiacuene! ¹⁰ ¡Pëtsa caejiwi-ata panexijiwi paxamëyajuwënëwi panicabia-exanaename isototuatujäalia! ¡Pëtsa panexijiwi patajuitame jumapecataenëjawabe-lia, papecayawenonaenexa panewajëtsicuenia! ¡Bajarapacuenia pëtsa caejiwi-ata nanaexana petsiyapëtaewi peyapëtaeya-exanaenënexa pija-cujirucuenia pe-ëjëbijawata xua copiapatabiabijsia! ¡Bajarapacuenia pëtsa nanaexana caejiwi-ata wajitaenënexa, jiwi pitoyanë pematacaetsi-nënexa, pecaxueyatsinënexa-ata! ^e ¡Pëtsa pajumexaniataneme bolecuene! ¹¹ ¡Bajarapacuenia pëtsa nanaexana caejiwi-ata pematawajibinënexa, penajorobinënexa-ata, bajarapacuenia peyathicarunaenënexa, itsa jume, itsawiriajumapianëjawabelia-ata peyanijobabiabinënexa! ¹² ¡Bajarapitsi-cuene pëtsa pana-exaname, tsipaji raja Jehová DIOSO bajaraxua bitso pepo-pitoyacuene! Pajiwi exanaena bajaraxua naneconitsiana Jehová DIOSOjawa-belia. Bajaraxuata, Jehová DIOSO capitsapaejitsia pamonae picani jinawanapa bajarapanacuata, papecarajutsinacuajawatanexa. Jehová DIOSO wecuapita bajarapa-irami, petsita-abejexaetsi bajarapamonae pecuene. ¹³ Paxamë juya bajarapitsicuene apopa-exanaemë tsane. Bepajinawanapame xaniawaetsia aneconijibia Jehová DIOSO pitabarata. ¹⁴ Pamonae jinawanapa maparucaeje panacua pacarajutsiapaeba Jehová DIOSO, bajarapamonae jumecowënëtabiaba pe-ëjëbiwi petsipaebiliwaisitsi petocopiapatsijawane-xatsi yabara. Tsitaxaniajaitsi tsabiabi bajarapaliwaisi. Itsiata baitsi jane, paxamë apobepajumecowënëtsimë bajarapaliwaisianë, tsipaji Jehová DIOSO paca-itaweta bajarapitsicuenejawa pane-exanaeyaniwa —jai Moisés.

Dioso itorobiapaeba itsaprofetanë, Moisés pecuenejëpaenë

¹⁵ Icatsia, Moisés jumaitsi Israel-pijinë pemomoxijawabelia:

—Itsamatacabijawabelia Jehová Dioso pacatonutsiana paxamëtuatuajëta Diosojumepaebinënexa paxamëyajuwënë. Pacuenia xanë cuene-itsinë, bajarapecuene-itsinë tsane. Nexata, paxamë bajaraponë pajumecowënëta-biabianame. ¹⁶ Xua paxamë pawajëcame imata Jehová panijaDIOSOjawa-belia papecarajutsinexa pamatacabi panacaetuatame Horeb-tsutojawatalia, pajumaitsimë mapacueniaje: «Apopajitsipaenë matawëjëa Jehová Dioso

^e 18:10 *pecaxueyatsinë*: Taema «pecaxueyatsinë», glosariojawata.

patajumetaejawa pecuaicuaijajawa. Apopajitsipaenēnua patataejawa matawējēa petajuecotia. Matawējēa, icatsia itsa pataejitsipajē bajaraxuanē, patē-paejitsipajē», pajamē Jehová Diosojawabelia. ¹⁷Nexata, bajarajotalia Jehová nejumaitsi: «Xanepana bajarapamonae xua nejumaitsi. ¹⁸Xanē nexata bajarapamonaejawabelia to-itorobianajē itsanē tanejumepaebinē, xamē pecacuenējēpaenē.^f Bajarapamonaejawawerena bajaraponē naitajētsiana. Bajaraponē-ata tanejumeliwaisipaebinēnexa pacuenia tonajumecopatajē petsipaebinēnexa tajajiwijawabelia. Daxitaxua tonajumecopatsianajē, tajumaitsicowēya pepaebinēnexa. ¹⁹Nexata, daxita pamonae apojumecowēnētsi tsane paliwaisi tsipaebaponaena tawēnēta. Nexata, bajarapajiwi xanē naneconitsia-exanaenajē. ²⁰Itsia baitsi, paDiosojumepaebinē paebapona-ponaena itsaliwaisi xanē tawēnēta, beta-itorobicuenia itajara, nexata xanē bajaraponē-ata naneconitsia-exanaenajē. Bajarapijinia pacuenia ponē petsipaebaponaenē pecopiapatsijawanexa itsadiosowi pewēnēta xanēwecua, bajaraponē-ata naneconitsia-exanaenajē. Bajarapamonae penaneconitsixae tsane xanējawaberena, pacatocopatsianatsi panebexayuabinexa. ²¹Itsia, paxamē belia pajamatabē-itsimē tsipae mapacueniaje: ‘¿Detsa pacuenia meta waxaitsi yapētaejitsipatsi paliwaisi pepitsapaeliwaisi Jehovájawawerena, wajajumecowēnētsinexa pexaniajailiwaisi?’ pajamatabējamē meta tsipae. Itsia baitsi jane, bepaxainawanapame panejamatabēcueneta mapacuenije. ²²Ponē paeba xanē Jehovánē tawēnēta, panayajiwicuenetaename pexaniajaicue. Nexata, xua wajunupaeba pecopiapatsijawanexa, itsa apocopiapatsi pejumaitsicowēya, nexata bajaraxua apotanajumecopatsiliwaisi Jehovánē bajaraponējawabelia. Nexata, bajarapaprotetanē saya cuaicuaijai tsaponaponae tsane pejamatabēcueneliwaisi, be-ayaijamatabēcuenenē penataexae. ¡Itsiata baitsi jane, pētsa pajunawame bajaraponē papecatsipaebiliwaisita pejamatabēcuenē!», nejai Jehová —jai Moisés Israel-pijinē pemomoxijawabelia.

Pacujinae Moisés tēpa Nebotsutojumata

(Núm 27:12-23)

34 ¹Pacujinae Israel-pijinē pemomoxi xaina pijataxunaebo Moab-tusatonacuata, bajarawerena Moisés pona pejuanaenexa Nebotsutojumabetsia, patsuto nuca Pisgatsutonē imoxoyojawatalia, Jericó tomara rowialia penucaetsuto. Nexata, bajarapatsutojumawetsica Jehová tsitajētatsi daxita panacuanē Israel-pijinē pemomoxi pijanacuanēnexa. Tsitajētatsi daxita Galaad nacua, Dan-pijinē pemomoxi pejinawanapaenacuajawanexa, ²bajarapijinia pacuenia daxita Neftalípijinē pemomoxi pejinawanapaenacuajawanexa, Efraín-pijinē pemomoxi pejinawanapaenacuajawanexa, Manasés-pijinē pemomoxi pejinawanapaenacuajawanexa, daxita panacua Judápijinē pemomoxi pejinawanapaenacuajawanexa Mediterráneo

f 18:18 xamē pecacuenējēpaenē: Moisés copiapapijiprofetanē Dioso pija-itaxutocujaya pebarē-cuaicuaijainētsi. Moisés-wecua itsaprofetawi apobarēcuaicuaijai Dioso pija-itaxutocujaya. Saya yapētaeyabiaba bemajitsinaebocuenia xua Dioso tsipaebatsi. Matapania Cristo pija-itaxutocujaya Dioso barēcuaicuaijai tsabiabi pacuenia Moisés. Bajaraxuata, Cristo pecuenējēpaenē Moisés.

manuamenejawabelia pebocae-ira. ³ Bajarapacuenia nacua tsitajētatsi Neguev-tusatojawawerena, daxita Jordán menemuxubërëa pebobenaë-iranë, pepatsinexa Jericó tomarajawabelia (itsajota nubena dátíl-botonë), Zoar tomarajawabelia-ata. ⁴ Bajarajota, Jehová jumaitsi Moisés-jawabelia:

—Marapanacuayabaraje najumecapanepaeya jumaitsinë Abraham, Isaac, Jacob-banajawabelia, tarajutsinexa pemomoxijawabelia. Mapatsutojuma-wereca catsitajētatsi xaniawaetsia netaenexa pamatacabijawaberena-ata. Itsa xaina ciento veinte pawaibeje, itaxutotsëcënaenejewa abaxë, piacuenë-itatsacanëjawata —jai Jehová. ⁵⁻⁷ [...]

⁸ Nexata, itsa abaxë israelitawi jinawanapa Moab petsewitusatona-cuata, bajarapamonae wënua Moisés petëpaejawa bejamatabëcujiru treinta pamatacabibeje, peweretsijawabelia pematantueyabimatacabianë pewënajamatabëxainaejawa pijacujirucuenia petëpaenë. ⁹ Bajaraxuacujinae, Moisés petëpaeucujinae, Josué, Nun pexënato, Dioso Espíritu Santota jamatabëcuenecaëjëpaeya-exanatsi peyapëtaenëcuenia, tsipaji Moisés bajaraponë tsmatanacobebuatatsi pecanacopatsinexa pewetsijamatabëcuene. Nexata, israelitawi jumecowënëtabiaba Josué Moisés petëpaeucujinae. Bajarapacuenia jumecowënëtanapanua Jehová petonajumecopatsiliwaisitsi Moisés-pijinëta.

¹⁰ Moisés-cujinaerena, itsanë Diosojumepaebinë baja apocaxitajarabi Israel-pijinë pemomoxituatuajëta, pacuenia Moisés jamatabëcuene-itsi tsaponaponae,⁸ pijacujaya pebarëcuaicuaijatsabiabinëna Jehovájawabelia. Bajarapitsijamatabëcuenenë apocaxitajarabi. ¹¹ Ajibinua itsanë pinijicuenejawanë petsita-exanaenë Jehová pejamatabëcuene, pacuenia bajaraponë tsita-exana Egipto nacua pewetsinëjawabelia, bajarapacuenia peyajawanacue-nebiwi, daxita Egipto nacuapijiwijawabelia-ata. ¹² Ajibi pecuenejëpaenëtsi pacuenia tsita-exana daxita Israel-pijinë pemomoxi bitso pinijicuenejawanë, bitso piayaicuenejawanë-ata, pacuenia exana Diosojumepaebinë Moisés-pijinë. Ajibi bajarapitsijamatabëcuene pexainaenë bajaraponëcujinaerena.

Josué

Israel-pijinë pemomoxi pita matapania Dioso perajutsiapaebi-ira

Jehová tocopata Josué penamatacatorobinënexa Israel-pijinë pemomoxi

1 ¹ Moisés petëpaecujinae, Jehová pijajiwitonëmi, nexata Jehová barë-cuaicuaijai Josuéjawabelia, pexënato Nun. Josué raja peyawenonabia-binë Moisés-pijinëmi. Jehová jumaitsi bajaraponëjawabelia mapacueniaje:

²—Tajajiwitonë Moisés rabaja tēpa. Nexata, ajenaconoxae xamë mapaJordân-mene barënicabianame daxita Israel-pijinë pemomoxi, paneponaenexa pa-irajawabelia pacarajutsijitsiatsi. ³ Pacuenia baja xanë tajëwelia najumecapanepaeya jumaitsinë Moisés-pijinëmijawabelia ira patacarajutsinexa, bajarapacuenia pacato-exanaenatsi. Nexata, daxita panacuaxijawa panajetarubenaename, xanë pacarajutsianatsi. ⁴ Mapitsi-nacuawajëto pacarajutsianatsi panijanacuanexa: Pa-ira najetaruca Neguev petsewitusatonacuajawawetsina, pecopiarucaenexa Lfbano nacua petsu-tonëjawabetsia. Bajarapacuenia pijinia Mediterráneo manuamenejawa-weliacujinae, daxita heteomonaë pejinawanapaenacua yajawa, Éufrates menejawabelia pepatsinexa. Daxita bajarapa-iraxaneto panijanacua tsane. ⁵ Xanë cayajawa tsanetsi, pacuenia tajajiwitonë Moisés yajawanë tsabiabi. Nexata, itsamonaë-ata apocuenecaëjēpaetsi tsane pecacueneyacaranatsi-jawa nebarënewajabitsaëtsiyaniwa. Xanë caeto-ata apocacopatsi tsanetsi nija-epato cayawenonaenewatsi. ⁶ ¡Acuenesaëmëre! ¡Jamatabëcuene-aitatsacamërenua, tsipaji raja xamë matacaponaename Israel-pijinë pemomoxi penawajabitsaëtsijawata bajarapanacuata pejinawanapaewijawabelia, netotsanaejawabelia Israel-pijinë pemomoxi irayajuwënëjawanë caenë pemomoxibitsaëto canacujitsia, pacuenia tajëwelia najumecapanepaeya jumaitsinë panijasalinaiwimijawabelia, paxamë papemomoximë panecanacopataponaenexa panija-iracuenia, panecuene-amoneyabicujinae pija-iranë pexainaewimi! ⁷ Xanë saya caejawa cawajëtatsi bajarapacuenia tacayawenonaenexa. Catojitsipatsi niajamatabëcuenesaëjawa, nejamatabëcuene-aitatsacajawa-ata nexanaenexa xua cajumaitsitsi. Bajarapacuenia xania-waetsia jumecowënëtabiabianame peca-itorobicuenia daxita paliwaisianë najumecopatajë tajajiwitonë Moisés-pijinëmijawabelia. Bajarapaliwaisianëwecua apobe-exanaemë itsacuenia patacatonajumecopatsiliwaisiwecua, jamatejema xaniawaetsia pecatopitsapabiabinexa daxitaxuanë exaname.

⁸Bajarapaliwaisianē napēnajumaitsimē tsabiabi tsane. Bajarapacuenia caematacabi canacujitsia, caemerawī canacujitsia-ata, canaējētsiaya pona-ponabiabianame nenajamatabēnapitabiabijawata. Nexata, exanaponaponaename daxitaxua catonajumecopatatsi bajarapaliwaisita. Bajarapacuenia itsa exanaponaponaename, nexata daxita ne-exanaecue ne pexaniacuenia catopitsapanajetarucaena. ⁹Xanē raja Jehovánē nijaDIOSOnē ca-itorobatsi niacuenesaējawa, nejamatabēcuenesaējawa-ata. ¡Nexata, pētsa junawame! ¡Pētsa jamatabēcuenefaeafenamenua, tsipaji raja xanē nijaDIO SO Jehovánē cayajawa tsanetsi daxita itsabelia ponaponame! —jai Jehová Josuéjawabelia pejonewajēnaeaya Canaán nacujawabelia.

**Josué barēnaxaniawaeta Israel-pijinē pemomoxi
penawajabitsaētsinexa Canaán nacupijiwijawabelia**

¹⁰Nexata, bajaraxuacujinae Josué itoroba daxita pewetsiwi Israel-pijinē pemomoxi. Jumaitsi:

¹¹—Paponae name daxita panijamonaejawa panetsipaebinexa penatoxaniawaetsinexa pamarue pijanamutonexa, tsipaji raja acueyabimatacabit nicabianatsi Jordán mene itsapanabelia, wajapitsinexa jane baja waja-iracuenia, pa-ira Jehová DIO SO nacarajutsiapaeba —jai pewetsiwijawabelia.

¹²Bajarapacuenia-ata Josué barēcuaicuaijai Rubén-pijinē pemomoxijawabelia, Gad-pijinē pemomoxijawabelia, bajarapacuenia itsabitsaēto Manasés-pijinē pemomoxiyajuwēñewijawabelia-ata mapacueniaje:

¹³—¡Panajamatabēnapire xua paca-itoroba Moisés, Jehová pijajiwitonēmi, pacujinae pacajumaitsi Jehová Dioso papecarajutsijawanexa paxamē mapa-irataje panejinawanapaenexa, matapania jane baja, panenacueraewetsinexa! ¹⁴Nexata, papecajumaitsicowēya, papuenebanubianame majotaje panijawajiwi, bajarapacuenia panexi-ata, panijadajubi-ata pa-irajawata Moisés-pijinē imata pacarajuta^a paxamē, panejinawanapaenexa Jordán-mene itsapanawelia. Itsiata baitsi jane, daxita pamonaē pebijijiwi, pamonaē cuenecaējēpatsi penawajabitsaētsinexa, daxita bajarapamonae notsiana pecanawajabitsaētabijawanē, namataxainae peponaenexa, pejamatabēcueneyawenonaenexa panijamonae pecuene-amoneyabinexa Canaán nacupijiwi. ¹⁵Bajarapacuenia pajamatabēcueneyawenonaponaename panijamonae, matapania Jehová perajutsijawabeliatsi bajarapamonae-ata pa-irajawata jinawanapaejitsia nacuera-ewetsiaya, pacuenia baja paxamē pacarajuta panecanacopataponaenexa. Pacujinae bajarapamonae-ata jama-tejema pita bajarapa-iranē, itsajota Jehová rajutsiapaebatsi pejinawana-paenexa, bajaraxuacujinae matapania paxamē panawiabaponaenimica mapa-itsapana-irajawabetsicaje, panejinawanapaenexa panija-irajawata, pa-iraboca daxita Jordán menemuxubērējawa itsawetsina juameto pitsabiaba, bajarapa-iranē panepitsinexa panija-iracuenia, Jehová pijajiwitonē Moisés-pijinē papecarajutsicuenia —jai Josué.

¹⁶Nexata, bajarapamonae jumecanawiata mapacueniaje:

^a 1:14 *Moisés pacarajuta*: Bajarapa-acueyabi papemomoxibitsaēto beje tsupita itsamonae israelitawi amorreomonae pi ja-iranēmi pi ja-iranexa. Taema Núm. Capítulo 32; Deut. 2:24-3:20.

—Pa-exanaenajë daxita pacuenejawanë panetonajumecopatame pata-exanabiabinexa. Paponaeenajë itsabelianua pane-itorobame. ¹⁷Pacuenia Moisés-pijinëmi pajumecowënëtabiabajë copiyami, bajarapacuenia xamë-ata pacajumecowënëtabiabianatsi. Caejawa rajane paxanë pacatojitsipatsi Jehová pecayajawajawa, pacuenia Moisés-pijinë yajawatsi copiya. ¹⁸Pamonae apojitsipae tsane pecajumecowënëtsijawa xua itorobame, nexata bajarapamonae apopecajumecowënëtsijamatabëcuene naneco-nitsiaya patocaëjëtajë petëpaejawa. Xamë pijinia pacatojitsipatsi niacue-nesaëjawa, niajamatabëcuenesaëjawanua —jai Rubén-pijinë pemomoxi, Gad-pijinë pemomoxibeje, bajarapacuenia itsabitsaëto Manasés-pijinë pemomoxiyajuwënëwi-ata Josuéjawabelia.

Dioso apoyawenonae israelitawi Acán pibisiacuene pexanaejamatabëcuene

7 ¹Israelitawi apojumecowënëtsi Jehová pitorobicueniatsi, pepitsiya-niwa picani Jericópijiwimi pecobecowëyajuwënëjawa pecuene-amoneyabicujinae. Jehová xuanë tsata pewerebiabinexa, itsiata Acán pita bajaraxuayajuwënëjawa. Bajaraponë pexënato Carmi, Zabdi pemomo, pexënato Zera, Judápijinë pemomoxibitsaëtoyajuwënë. Acán pepitsixae bajaraxua, Jehová bara-anaepana daxita Israel-pijinë pemomoxijawabelia.

²Bajarapamatacabijawa, Josué itoroba itsamonae pebijiwi, peya-enebinexa Hai tomarajawabelia. Bajarapatomara eca imoxoyowecua Bet-avén tomara, Betel tomarabejewecua pemutuabereca. Nexata, jumaitsi peya-enebiwinexajawabelia:

—Paponae name paneya-enebinexa ira, wajayapëtaenexa pajiwi bitsaëto-wajëto jinawanapa bajarapanacuajawa —jai Josué.

Nexata, bajarapamonae pona petaenexa pa-iranë bobena Hai tomara nacujawa. ³Bajarapamonae pepatsicujinae, peya-enebiwi jumaitsi Josuébanajawabelia:

—Apoxanepanae wajaponaejawa daxitatsi, tsipaji Hai tomarapijiwi tsiquiribitsaëtoyo. Pa-itorobianame saya peponaenexa dos mil, itsa jume, tres mil ponëbeje wajabitsaëwi, pebarë nabewinexa —jai.

⁴Nexata, bejamatabëcujiru tres mil ponëbeje pona, pebarë nabenexa picani bajarapatomarapijiwijawabelia. Itsiata baitsi jane, israelitawimi cuene-amoneyabatsi Hai tomarapijiwi. ⁵Bajarapamonae beyaxuaba treinta y seis ponëbeje israelitawimi. Pecajunawi israelitawi wecuarëcëpeca. Nexata, bajarapamonae pëbaraponatsi tomara baupajawaweliacujinae Sebarim-taxunaejawabelia. ⁶Bajarajota, Hai tomarapijiwi capanepaeya cuene-amoneyaba israelitawi fotojawata. Bajarapacuenia israelitawi itsa natane, nexata jamatabëcuenejunawa. Jamatabëcuenefaefaanua.

⁶Pebarë nawajabitsaëtsiwi pijataxunaejawabelia pepatsicujinae, tsi-paeba pacuenia tocopiatatsi. Nexata, Josué, daxita israelitawi pewetsiwi yajawa, pejumetaejawata, ayaicuenia pejamatabëcuenebëjaixae, penaxatatsijawanë mipatitica. Natsimata-othocaponanua atsabenojawanë. Nexata,

b 7:5 Sebarim: Maparucaeje aponayapëtae bajarapataxunae. Itsiata, itsamonae Dioso peli-waisi pejucaewi, canaëjëta pacuenia yabarajumaitsi pataxunaeta jiwi ibo jucabiaba, pijabonë pecanacuenebinexa.

pematabacabêta irataeya nubena Jehová penajumeliwaisixaniawaetsibaula pewajênaeya, caniwiyô-epatojawabelia.

⁷Pewajêtsijawata, Josué jamatabêcuenebêjaiya jumaitsi Jehovájawabelia:

—Tajatuxanenêmê, Jehová, ¿Detsa xuajitsia panenicabia-exaname Jordán mene itsapanaberena, amorreomona patanewerebiabinexa? Juya tsaena panecopatsipame patajinawanapaejawa bajarapaJordán mene itsapanawetsina. ⁸Tajatuxanenê, ¿Detsa xanê jumaitsinê tsipae xamê yabara, itsa ajenaconoxae nijajiwi, israelitawi, cuene-amoneyabatsi pijawajabitsaê? ⁹Bajaraxua yabara, daxita cananeomona, daxita itsamona-ata bajarapanacuata pejinawanapaewi, cawênêtaena apopecacuenecaêjêpaejawa nijajiwi neyawenonaenexa pecuene-amonaeyabiyaniwatsi pijawajabitsaê. Nexata, panetsimaxêpatsiana, matatoyorotsia pataneyacapsinexa patanewerebiabijawabelia. ¿Detsa nexata xamê xua exanaename, bajarapacuenia pecawênêbejiobitsiyan-wa? —jai Josué.

¹⁰Jehová nexata jumecanawiata Josuéjawabelia:

—iNamatacore! ¿Detsa xuajitsia paxamê bajarapacuenia irataeya saya panubename, pibisiacuene pane-exanaejawa yajawa patanewajêcaenexamê? ¹¹Israelitawi raja pibisiacuene exana, tsipaji xanê aponejumecowênêtsi tanajumeliwaisicajonejawa bajarapamonaejawabelia, xua picani itawetajê Jericópijiwimi pecobecowê yabara. Xuanê xanê tsatajê pebijianaenexa tawênêta, bajaraxuayajuwênêjawa bajarapamona nacobetoxota. Yapêtae-ata pibisiacuene pexanaejawa, itsiata yajawamatayaba pijajawanê. Orijiibia, yajawanajumetsênêtanua. ¹²Bajaraxuata, Israel-pijinê pemomoxi apocuenecaêjêpaetsi pecuencaranatsijawa pijawajabitsaê. Saya nexata, wecuarêcêpeca. Bajarapamona pibisiacuene pexanaexae, tocopatajê pijawajabitsaê pewerebiabinexatsi. Pacuenia xanê pacatocopatatsi panewerebiabinexa daxita Jericópijiwimi pecobecowêjawanêmi, bajarapacuenia pacatocaêjêtatsi panijawajabitsaê papecawerebiabinexa panenacobetoxotsijamatabêcuene xanê tatsatsijawanêmi panebijianaenexa. ¹³Nexata, ponare nitorobinexa israelitawi penacuenexaniawaetsinexa. Jumaitsimêre: «Jehová wajaDIOso raja pacajumaitsi mapacueniaje: ‘Panacuenexaniawaere, tsipaji baja merawia panubenaename xanê taitabarata, patacacuenecanaêjêtsinexa. Paxamêtuatujêta itsanê xaina xua paca-itorobatsi picani panewerebiabinexa. Nexata, itsa apopanawecuaxuabimê tsane daxita xua bajaraponê pita, apopacacuenecaêjêpae tsane panecueni-amoneyabinexa panijawajabitsaê,’ pacajai raja Jehová», jamê tsane, —jai Jehová.

Icatsia, Jehová jumaitsi Josuéjawabelia:

¹⁴—Merawia bajayacunua caenê pemomoxibitsaêto canacujitsia pijasalinainê pewênêta naitajêbaponaena taitabarata. Nexata, Jehovánê pacayapêtaeya-exanaenatsi papemomoxibitsaêtojawata ponapona penaneconitsinê. Bajarapamona natixibiana pewajênaeyabetsia penubenaenexa. Natsanaeya nubenaena pijasalinainê pexi pewênêta,

clan-cuenia.^c Nexata, xanë pacayapëtaeya-exanaenatsi paclan-jawata nuca penaneconitsinë. Bajarapaclan-pijiwi natixibiana pewajënae-yabetsia, natsanaeya penubenaenexa pijamonae canacujitsia, pexi, pemomoxi yajawa. Nexata, bajarapamonaetuatuajëta pacayapëtaeya-exanaenatsi pabopijiwi pepocuene naneconita taitabarata.¹⁵ Bajaraponëjawata, itsa pacaxitajarabame xua paca-itawetatsi panepitsiyaninwa, nexata bajaraponë, pijabopijiwi yajawa, patajuitsianame isotota, daxitaxua-ata xaina pecobecowë yajawa. Bajarapacuenia pabeyaxuabianame, tsipaji bajaraponë bitso pibisiacuenia paca-uraba paxamë pa-israelitawimë taitabarata. Apojumecowënëtsinua xua yabara pacanajumeliwaisicajunuatsi —jai Jehová Josuéjawabelia.

Acán naneconitsia-exanatsi israelitawi

¹⁶ Josué pepobajayacunua namatacota. Nexata, patsia-exanapona caenë pemomoxibitsaëto canacujitsia pijasalinainë pewënëta, penubenaenexa Dioso pitabarata. Bajarapaepatota, Dioso yapëtaeya-exana Judápijinë pemomoxibitsaëto penaneconitsijawa.¹⁷ Bajarapabitsaëtojawata, yapëtaeya-exana Zera pijaclan-jawata penaneconitsijawa. Bajarapaclan-jawata pijinia yapëtaeya-exana Zabdi pijamonae penaneconitsijawa.¹⁸ Bajaraxuacujinae, Zabdi nuca daxita pexi, pemomoxi yajawa. Nexata, caenë canacujitsia naitajëta pona Dioso pitabarata. Bajarapamonaetuatuajëta Dioso yapëtaeya-exana Acán penaneconitsinëcuene. Bajaraponë pexënato Carmi, pemomo Zabdi, Zerapijinë-ata.

¹⁹ Nexata, Josué jumaitsi Acán-jawabelia:

—Tajamonaenëmë, pexaniacuenia wënëxaniare Jehová, israelitawi pijaDioso, tanenawajunupaebijawatamë xua xamë exaname. Jumaitsimëre itsaliwaisi-ata nayawajunuxainaenejewamë —jai Josué.

²⁰ Nexata, Acán jumecanawiata Josuéjawabelia:

—Pepacuene cajena xanë pibisiacuene exanajë Jehová pitabarata, israelitawi pijaDioso. Xanë bajarapacuenia exanajë.²¹ Xanë taniji wajawecuanotsijawanëmijawata, pexaniajawa Babilonia nacuapijiwi penaxatatsimantonawa. Tanijinua doscientos ponëbeje palatanëanë, caelibra pijinia oronanijawa. Bitso itaxutuajinajë bajaraxuanë. Nexata, pitajë baja. Daxita bajaraxuanë matayatsia mëthëtajë tajacarpabojawata —jai Acán.

²² Nexata, Josué itoroba itsamonae, pejaitsinexa bajaraxuanë bajaraponë pijacarpabojawabelia. Bajarapamonae cujinaeyecalia, pejaitsinexa pijacarpabojawabelia. Pejaitsijawata, caxibajaraba jane baja Acán pejumaitsicuenia, pematayabajebijawanë xuanë methëcajeba. Bajaraxuanëbëxëpanajawata, bobena palatananijawanë, oronanijawanë-ata.²³ Nexata, bajarapamonae bajaraxuanë tocapona Josuéjawabelia, petsitajëtsinexa

c 7:14 clan-cuenia: Caenë pemomoxibitsaëto pijasalinainë pewënëta pitsapa wowaijumeta, «tribu». Jacob-pijinë/Israel-pijinë xaina doce ponëbeje pexi, pebijiwi. Nexata, bajarapadoce ponëbeje pemomoxibitsaëtonë canacopata doce patribubeje, Israel-pijinë pemomoxituatuajëta. Bajarapadoce ponëbeje, Jacob-pijinë pexi, xainaponanua itsamonae pexi, pebijiwi. Nexata, bajarapapebijiwi pewënëta pitsapapona itsapemomoxibitsaëtonë. Bajarapabitsaëtonë wowaijumeta pitsapa, «clan». Xaniawaetsia penayapëtaenexa pacuenia wënëruba tribu, clan-ata pewënëcuenianua taema Gén. 46:8-26-jawabelia.

daxita israelitawi pitabarata. Bajarapacuenia bajaraxuanë jeba irata Jehová pitabarata.

²⁴ Bajaraxuacujinae, Josué, daxita israelitawi yajawa, capona Acán, pemomo Zerapijinë, Acor-ira penamatajëpaejawabelia. Yajawacaponanua pepitsipalata, mantonawa, oronanijawa, pexi, pebijwi, petiriwaxi-ata, daxita pijabueyu, pijaburro, pija-ovejabitsaëtonë-ata, pijacarpabo, daxita xua-ata xaina bajaraponë.

²⁵ Bajarapatusatojawata pecapatsicujinae, Josué jumaitsi Acán-jawabelia: —¿Detsa xuajitsia bajarapapiabejecuene paneto-exaname? Nexata, xamë juya Jehová piabejecuene cato-exanaena —jai Josué. Nexata, bajarapae-patota daxita israelitawi ibotonëta tsecona bajarapamonaemi, pijadajubi yajawa. Pebeyajebicujinae, bajarapamonaë tajuita, daxita pecobecowë yajawa. ²⁶ Petajuitsicujinaetsi, israelitawi pejumawereca najumajeba ibotonë, pecunua-ibotsuto pexanaenexa. Bajarapa-ibotsuto nuca ajena pamatacabijawaberena. Bajarapacuenia pexanaexae, Jehová jamatabëcuenecaewia-exana bitso pebara-anaepanaejawa israelitawijawabelia. Bajaraxuata, bajarapataxunae wënëruba Acor,^d ajena pamatacabijawaberena.

Josué barëcuene-amoneyaba nacua-ewetsinë Jabín, Hazor tomarapijiwimi

11 ¹⁻⁹ [...] ¹⁰ Josué, Israel pemomoxi yajawa, pecuene-amoneyabicujinae cuatro patomarapijiwajabitsaëwibeje, bajaraxuacujinae nawiata Hazor tomarajawaberena, pebarënewajabitsaëtsinexa nacua-ewetsinë Jabín pijajiwi wajabitsaëwijawabelia. Bajaraponë Jabín pepopeyanacua-ewetsinë bajarapanacuapijiwimi Hazor tomarawerena, tsipaji bajarapatomara bitso penamatamotsitomara bajarapanacuapijiwiminexa. Nexata, Josué bajarapatomara pewetsinëmi beyaxuaba. ¹¹ Bajarapacuenia werebiaba daxita bajarapatomarapijiwimi. Daxitaxuanëminua xaina bajarapatomarapijiwimi tobi-jiana. Bajaraxuacujinae, tajuita Hazor tomarami. ¹² Bajarapacuenia Josué exanapona itsatomaranëpijiwijawabelia-ata, patomaranëpijiwimi naliwaisicajunua pepopeyanacua-ewetsinë Jabín-jawabelia. Nexata, tobepona bajarapatomaranë pewetsiwimi, bajarapacuenia pijinia pamonaë jinawanapa bajarapatomaranëta. Nexata, pacuenia tonajumecopatatsi Moisés-pijinë Jehová pijajiwitonë pexanaenexa, bajarapacuenia Josué exanapona. ¹³ Itsiata baitsi jane, israelitawi apoyatajuitsi daxita patomaranë petsutonëjumata ena. Caetomara saya petsutojumata pe-ecaetomara tajuita, Hazor tomara. ¹⁴ Daxita bajarapatomaranëpijiwimi beyejeba espadanëta. Apocopatsi caejiwiyo-ata piasaëtsaponaponaenexa. Nexata, daxita bajarapamonaemi pexainae-jawanëmi nota; pacuenia pijadajubi, daxitaxuanë-ata bajarajota xaina pecobecowëjawanëmi.

Josué barëcuene-amoneyabanajetaruca Canaán nacuapijiwimi

¹⁵ Pacuenia Jehová copiaya itoroba pexanaenexa Moisés-pijinëjawabelia, nexata bajarapacuenia juya Moisés itoroba Josuéjawabelia. Nexata, Josué

d 7:26 Acor: Bajarapawënë mapajamatabëcueneliwaisi xainaje: «Liwaisi penatsixainaejawa itsajiwi pejamatabëcuene, itsa jume, itsajiwi pe-urabijawa itsamonaë pijanacuapijiwi pitabarata», pejajamatabëcuene.

juya exanapona bajarapajumecowëya caeliwaisiyo-ata xenetsinejewa.

¹⁶Nexata, Josué barëcuene-amoneyaba daxita pamonaë jinawanapa bajarapanacuanëjawata, pija-iranëmi penotaponaenexa Israel-pijinë pemomoxi pijanacuanexa. Pita baja daxita petsutonacuanë, daxita Neguev nacuanë, daxita Gosén nacuanë,^e bajarapacuenia daxita penamatajëpaetusatonë, pebobenae-iranë Jordán menemuxubërëa itsapanawelia, itsapanawerena-ata. ¹⁷⁻¹⁸Bajarapacuenia pitanua pa-ira boca Halac-tsutojawaweliacujinae pepatsijawabelia Seir nacujawabelia, Baal-gad tomarajawabelia, patomara eca Hermón-tsutomuxuneneta, Líbano nacuata pe-ecaetsuto. Daxita bajarapanacuanë Josué barënotapona bajayajebi pebarënowajabitsaëtsicujinae bajarapanacuanëpijiwajawabelia, matapania pecuene-amoneyabijawabelia. Nexata, Josué taicapona daxita bajarapanacuanë pepopeyanacua-ewetsiwi. Beyaxua-baponanua. ¹⁹Daxita bajarapatomaranë yacajërëtapona pebarënowajabitsaëtsijawata bajarapatomarapijiwimijawabelia. Caetomarapijiwajawabelia-ata aponajumeliwaisicajone pitaxutotsoniataenexa. Caetomarapijiwi saya, Gabaón tomarapijiwi, heveowiriawi, itsiata israelitawi naliwaisicajunua^f pebarënowajabitsaëtsiyaniwa. Nexata, pijatomara apowecuapitsi. ²⁰Itsiata, itsatomarapijiwajawabelia aponajumeliwaisicajone pewerebiabiyaniwa, tsi-paji Jehová jamatabëcuene-atajaya-exana bajarapamonaë, pitoyanexa israelitawi pebarënowajabitsaëtsinexa. Nexata, israelitawi bajarapacuenia werebiabanajetarubena bajarapamonaëmi itaxutotsoniataenejewa, pacuenia baja Jehová tonajumecopatatsi Moisés-pijinëjawabelia.

²¹Bajarapamatocabitanua Josué cuene-amoneyaba anaquitamonae, Anac-pijinë pemomoxi, Hebrón-tsutonëjawa pejinawanapaewimi, bajarapacuenia Debir tomarapijiwimi, Anab tomarapijiwimi, bajarapacuenia daxita pejinawanapaewimi patsutonëjawa Judá pemomoxi xaina pijataxunaëbonë, bajarapacuenia patsutonëjawanua itsamonae Israel-pijinë pemomoxi xaina pijataxunaëbonë. Daxita bajarapamonaë anaquitawi pijatomaranëmi yajawawerebiaba. ²²Nexata, bajarapacuenia pebeyejebixae Anac-pijinë pemomoxi, aponacopatsi caejiwiyo-ata Israel-pijinë pemomoxi pejinawanapaenacuata. Itsiata bailsi jane, nacopata itsamonae Anac-pijinë pemomoxi Gaza tomarata, bajarapacuenia Gat tomarata, Asdod tomarata-ata. Bajarapamonaë piapiawí pacuenia Anac-pijinë piapianëmi.

²³Nexata, bajarapacuenia Josué cuene-amoneyabanajetaruca daxita bajarapa-iranëjawa pejinawanapaewimi, pacuenia baja Jehová tonajumecopatatsi Moisés-pijinëjawaberena pexanaenexa. Bajaraxuacujinae jane baja, Josué tsicobetsana Israel-pijinë pemomoxi, caenë pexi pemomoxibitsaëto canacujitsia penacopataponaenexa pija-iratupayo Canaán nacuata. Bajaraxuacujinae baja, bajarapamonaë aponawajabitsaëtsi bajarapanacuata. Nexata, jinawanapa jamatabëcuenexanepanaëya daxita bajarapanacuanëjawa.

e 11:16 *Gosén nacua*: MapaGosén nacuaje apoyabaracuaicuaijai panacuajawata Israel-pijinë pemomoxi jinawanapa Egipto nacuata. Itsanacua raja. MapaGosén nacuaje yabaracuaicuaijai panacua boca Israel nacua petabujawabereca, Neguev nacua canacujitsita. **f 11:19** *israelitawi naliwaisicajunua*: Gabaón tomarapijiwi yamaxë-itojoroba israelitawi, bajaraxuata naliwaisicajunua bajarapamonaëjawabelia. Xaniawaetsia neyapëtaenexa bajarapaliwaisi, taema Josué capítulo 9.

Josué muxujiobiaya napëjioba Israel-pijinë pemomoxi petëpaewajënaeya

24 ¹ Josué itoroba penacatuatsinexa Siquem tomarajawata daxita Israel-pijinë pemomoxi. Junata daxita Israel-pijinë pemomoxi pija-ancianowi, daxita penamatacaitorobiwi-ata, pamona-ata liwaisi pecanaëjê-biwi. Nexata, daxita bajarapatuxanewi naitajêba DIOSO pitabarata.^g ² Bajarajota, Josué jumaitsi daxita Israel-pijinë pemomoxijawabelia:

—Marapacuenia pacajumaitsi Jehová, Israel-pijinë papemomoximê panijaDIOSO: «Bajayatami panijasalinainëmi Taré pexënatobeje yajawa, Abraham, Nacor-beje, bajarapamonaemi jinawanapa picani Éufrates mene-itapajawa. Bajarapamona-asiwaya siwanajamatabëcuenecopaba-biaba picani itsawiriadiosowi, jumapecataeya pexanaenëanëjawabelia.

³ Itsiata, capitsapajê panijasalinainëmi Abraham-pijinë, Éufrates mene-itapajawa peponaponaenëmi, pepatsinexa Canaán nacujawaberena. Daxita bajarapanacuajawa^h matabaponajê bajaraponê. Bajarapacuenia pemomoxi tonawiatia-exanajê. Tocopatajënua pexainaenexa pexë nato Isaac. ⁴ Bajarapacuenia tocopatajê Isaac pexainaenexa anijanêbeje pexënatobeje, Jacob, Esaúbeje. Esaúpijinêjawabelia rajutajê petsutonënacua, Seir nacua, bajaraponê pemomoxi pecanacopatsinexa, bajarapanacuajawa pejinawanapaenexa. Jacob-pijinë juya, pijamona-eyajawa, pona Egipto nacujawabelia. ⁵ Bajarapanacuata pejinawanapaecujinae bajayajebi, belia to-itorobajê Moisés-pijinë, Aarón-pijinëbeje, Jacob-pijinë pemomoxi peca-pitsapaenexabeje Egipto nacuwecua. Egipto nacupijiwijawabelia tsi-itorobajê piayaicuenëjawanê, petëpaenexa ayaibitsaëto. Bajarapacuenia tatsita-exanaecujinae bajarapamonaetuatuajêta, panijasalinaiwimi, paxamê papeximê-ata, bajarapamatacabi pacajutatsi Egipto nacuwecua. ⁶ Panijasalinaiwimi pepitsapaecujinae Egipto nacuwecua, Egiptopijiwijabitsaë pëbarajinatsi Mar Rojo manuamenejawabelia pecanawajabitsaëtsimonêta, caballo peyarobobocaacarrozamonê, bajarapacuenia caballuanê pejumapo-naewinua icatsia papecataicaenexa. ⁷ Bajarajota, panijasalinaiwimi newajêca xanëjawaberena. Nexata, yacaranatsiaya rutajê bitso pequirijaijawa bajarapabitsaëtobejetuatuajêta Egipto nacupijiwijabitsaëwiwecua, bajarapamona- xaniawaetsia penatsiwajënaetaeyaniwa. Xuacujinae, manuamene petsatsimeneyenepanabeje icatsia matabcënëbia-exanajê, Egipto nacupijiwiwabitsaëwimi tawerebiabinexa. Daxitaxua exanajê Egipto nacupijiwijawabelia, paxamê panijacuata pataneme cajena. Nexata, bajaraxuacujinae paxamê bajarapamona-epapeximê, papemomoximê-ata, bajayajebi pajinawanapame petsewitusatonacuata. ⁸ Bexëajawabelia pacamatacaponatsi amorreowi pejinawanapaenacuamijawabelia Jordán mene itsapanawetsina, juameto pepitsapaenenia. Bajarajota xanê, Jehovánê, pacayawenonatsi panecuenë-amoneyabinexa bajarapanacuapijiwimi, bajarapamona-epijanacuanëmi panepitaponaenexa, panëjinawanapaenacuanaexa. Baitsi, yawenonaeya paca-tawerebiabaponatsi bajarapamona-epanëbarënewajabitsaëtanajetarubënaejawata. ⁹ Xuacujinae, moabitawi pepopeyanacua-ewetsinë, Balac, Zipor

g 24:1 *Dioso pitabarata*: Bajaraxua nacayapëtaeya-exana penubenaajawa Dioso pijacarpabowajënaeya itsajota boca Jehová penajumeliwaisicajonejawa pitajëtsi-ibopanabeje pexaniawaetsi-baula. h 24:3 *daxita bajarapanacuajawa*: Taema Gén. 13:14-18.

pexënato, pacatsimaxëpata picani papecabarënawajabitsaëtsinexa. Nexata, itoroba pijamonae petojunatsinexatsi Balaam,¹ Beor pexënato, papecacuene-itajëtsinexa picani pibisiacuene panetaewanapaenexa. ¹⁰ Itsiata, bajarapacuenia canaëjëtsi-ata Balaam papecacuene-itajëtsinexa Jehovánë tawënëta, xanë aponamuxuna-ewetsinë. Nexata, papecacuene-itajëtsijawaminexa pibisiacuena, pacatopitsapabiabia-exanatsi ëpexaniacuene panetaewanapaenexa. Bajarapacuenia xanë, Jehovánë, pacacapanepatsi Balac pesaëwecua. ¹¹ Belia, panicabame Jordán mene itsapanabetsina, mapanacuajawabetsina, matapania panepatsinexa Jericó tomarajawata. Nexata, bajarapatomarapijiwimi pacabarënawajabitsaëta. Bajarapacuenia itsamonae-ata amor-reowi, ferezeowi, cananeowi, heteowi, gergeseowi, heveowi, jebuseowi-ata, Canaan nacua pejinawanapaewimi, pacabarënawajabitsaëta. Daxita bajarapamonae itsiata pacatocopatatsi jamatejema panewerebiabinexa. Nexata, pacuene-amoneyabame baja. ¹² Itsiata, paxamë apopayorotsimë bajarapamonae paniija-espadanëta, panijabitsabianëtanua. ¡Jume! Biji rajane, xanë Jehovánë tajamatabëcuene, tsipaji pacuenia jiwi bawecuanajetabijirawa enemanë^j pecacuatsiyaniwatsi, bajarapacuenia exanajë bajarapamonae panepatsiwajënaeya papecawecuarëcëpecaenexa pecajunawi. ¹³ Bajarapacuenia pacato-exanatsi, patacarajutatsi itsamonae pecanacuenebi-iranëmi. Nexata, maparucaeje pabianë pa-ubinejewamë, paxamë paxaewana-pame itsamonae pe-ubijawanëmi uvacuai, olivocuaitoxi-ata. Bajarapijinia pacuenia itsamonae pexanaetomaranëmijawata jamatejema pajinawana-pame, bajarapabonë panacuenebinejewamë», pacajai Jehová, paniijaDioso papecanajamatabënapitsia-exanaenexa papecato-exanaecuenemi.

¹⁴»Nexata xuata, ajenaconoxaeta jane baja, pacatoxanepana paneyaiyataejawa Jehová, caejamatabëcuene panexainaenexa, panewajëcaponaenexa caenë Jehovájawabelia, yayataeya paneto-exanawanapaenexanua pejitsipaecuenia. ¡Panayajiwitsarenua baja jumapecataeya pexanaenëanëjawabelia panesiwanajamatabëcuenecopabiyaniwa, ponëanëjawabelia panijasalinaiwimi asiwaya wajëcabiaba, pacujinae jinawanapa Éufrates mene-itapajawa, bajarapacuenia-ata Egiptojawata! ¡Itsiata, paxamë ajenaconoxaeta patonacuenebawanapare Jehová ëpejitsipaecuenia! ¹⁵ ¡Itsa baja paxamë pacatsi-abeje asiwaya paneto-exanawanapaejawa Jehová pejitsipaecuenia, nexata panato-itapere ajena pawiriadiosowijawabelia asiwaya patonacuenebawanapaejitsiamë! ¡Panato-itapere itsa pajumecowënëtsijitsiamë padiosowi, jumapecataeya pexanaenëanëjawabelia, bajayatami panijamo-naemi asiwaya nawajëcabiaba itsa abaxë jinawanapa Jordán mene itsapanawerena, Éufrates mene-itapata, itsa jume, padiosowijawabelia amorreowi asiwaya nawajëcabiaba, pamonaemi jinawanapa mapanacuataje picani itsajota pajinawanapame! Itsiata baitsi jane, xanë, Josué^{në}, daxita tajamonae, taxi yajawa-ata, pajumecowënëtanawapaenajë Jehová, pejitsipaecuenia patato-exanawanapaenexa —jai Josué.

i 24:9 *petojunatsinexatsi Balaam*: Bajarapaliwaisi yabara natoyorobianame Números capítulo 22-24-jawabelia xaniawaetsia neyapëtaenexa. Taemanua Apoc. 2:14, 2Pd 2:25, Jud. 1:11.
j 24:12 *jiwi bawecuanajetabijirawa enemanë*: Bajarapacuenia Dioso tajëwelia najumecapanepaeya to-exanaeyapaebatsi. Taema Éxo. 23:28, Deut. 7:20.

¹⁶ Nexata, Israel-pijinē pemomoxi jumaitsi:

—Acuenebi caeto-ata bajarapitsicuene pata-exanaejawa Jehovahewecua. Paxanē apopajitsipaenē tsane Jehovahá patawecuanatsatsijawa, asiwaya pata-siwanajamatabēcuenecopababiabinexa itsadiosowijawabelia, jumapecataeya pexanaenēanējawabelia, yaiyataeyanua patajumecowēnētsinexa. ¹⁷ Paya-pētaniji rabaja bajaraPonē wajanacajutsijawa waxaitsi, wajamonaemi-ata pejutsijawatsi, Egipto nacujawawerena, itsajota picani jinawanapatsi amoneya wajatonacuenebiwi. Bajaraponē Jehovahá wajaDIOSO baja cajena nacatsita-exanabiaba bitso pinijicuenejawanē waja-itabēta. Bajarapacuenia naca-ewetabiaba. Nacayapijiwinawajabitsaētanua, pacujinae najetarubennatsi namutua Egipto nacujawawerena, imoxoyo xenebabuataponae-atatsi patomaranēpijiwi wajanaca-itoyawimi. ¹⁸ Bajarapacuenianua bajaraPonē cajena wajanajetarubenaejawata nacatsiwajēnaetorota mapanacuapijiwimi, amorreowi-ata, pamonaemi jinawanapa picani mapanacuataje. Nexata xuata, paxanē-ata ajenaconoxae patawajēnaeyabelia pajitsipajē patajumecowēnētawanapaejawa Jehovahá, pejitsipaecuenia pata-exanawanapaenexa, tsipaji bajaraponē wajaDIOSO —jai Israel-pijinē pemomoxi.

¹⁹ Itsiata baitsi jane, Josué jumaitsi bajarapamonaejawabelia:

—Paxamē pacato-acuenebi asiwaya panejumecowēnētawanapaejawa Jehovahá, jumapecataeya pexanaenēanē yajawa, tsipaji Jehovahá saicaya daxita pibisiacuene pexanaewi pewecuanatsatsinē. Icatsianua, wajanacacuene-asiwanē wajasivanajamatabēcuenecopatsiyaniwa itsanēanējawabelia bajaraPonēwecua. Nexata, bajaraPonē apo-ajamatabēcuenesaē tsane papecananeconitsia-exanaeyaniwa apopanejumecowēnētsixae, bajarapacuenia daxita papibisiacuene patsita-exanawanapame. ²⁰ Bajaraxuata, itsa paxamē pacopatsipame Jehovahá pane-itaxutuajamatejemajawa, juya pane-siwanajamatabēcopababiabinexa jumapecataeya pexanaenēanējawabelia, bajaraPonē juya pacatocopiapatsia-exanaejitsipa pibisiacuenejawanē. Nexata, pacawerebiabijitsipa, pexaniacuene papecatopua-exanae ayaicuenia picani —jai Josué Israel-pijinē pemomoxijawabelia.

²¹ Nexata, bajarapamonaē jumecanawiatatsi Josué:

—¡Jume! BajaraPonēwecua apopawajēcaenē tsane itsanējawabelia. ĖJehovahájawabelia pasiwanajamatabēcuenecopatsianajē, patatonacuenebawana-paenexa jumecowēnētsiaya —jai bajarapamonaē.

²² Icatsia, Josué jumaitsi:

—Paxamē rabaja panato-itapetame Jehovahá jumecowēnētsiaya panetona-cuenebawanapaenexa. Bajarapacuenia panejumaitsijawata namata-enetsia panajumetanemenua bajarapacuenia panenajuanajumeliwaisicajonejawa bajaraPonējawabelia panejumecowēnētabiabinexa —jai Josué.

Bajarapamonaē jumecanawiatatsi:

—Paxaniajanē cajena. Paxanē bajarapacuenia pa-exanaenajē, tsipaji panajuanajumetaniji xua pajumaitsinē patajumecowēnētawanapaenexa —jai bajarapamonaē.

²³ Icatsia, Josué jumaitsi bajarapamonaejawabelia:

—¡Nexata, panawecuapenere baja daxita padiosowi, jumapecataeya pexanaenēanē, paxamē paxainawanapame. Caewēarena panajamatabēcuenepē-nēyorore Jehovahájawaberena, bajarapacuenia daxita panejamatabēcuenesaēta

bajara-ëPonëjawabelia panesiwanajamatabëcuenecopatawanapaenexa, Ponë waxaitsi Israel-pijinë pemomoxitsi wajaDIOsojawabelia! —jai Josué.

²⁴Icatsia, bajarapamonae jumecanawiata:

—Paxanë raja Jehovájawabelia patonacuenebawanapaenajë. Bajaraponë wajaDIOsowajanacatonajumecopatsiliwaisianë pajumecowënëtabiabianajë —jai bajarapamonae.

²⁵Bajarapacuenia pejumaitsixae, bajarapamatacabita Josué barënjauana-liwaicajunua bajarapamonae DIOsojawabelia Siquem tomarajawata. Bajaraponë tocaëjëba daxita paliwaisianëcuenia jumecowënëtanapaejitsia, bajarapanajumecajoneliwaisi xaniawaetsia pejumecowënëtsinexa. ²⁶Daxita bajarapaliwaisianë yaquinaruba Moisés-pijinëjawabelia DIOso petonajumecopatsiliwaisianë peyaquinaebaxutomita. Bajaraxuacujinae, iboto pita penutsinexa encinanaejawayo pebëxëpanata, ponae nuca Jehová pijacar-pabo imoxoyojawata. ²⁷Nexata, jumaitsi daxita bajarapamonaejawabelia:

—Mapa-ibotoje nacatoxanepanaena bewajanacaliwaisitaenucaenë, bajarapacuenia bepejumetaenucaenënua Jehová wajanacajumaitsiliwaisianë. Nexata, bajarapa-iboto wajataeyabiabijawata, wajanajamatabënapitabiabinexa wajanajumeliwaisicajonejawa, bajarapacuenia waja-exanabiabinexa wajajumaitsicowëya. Bajarapacuenia pacanajamatabënapitsia-exanaena, pane-exanaenexa panejumaitsicowëya, panenajumetsënëtsiyaniwa panijaDIOsojawabelia —jai Josué.

²⁸Daxita bajarapacuenia pexanaecujinae, Josué napëjioba. Itorobanua penawiabinexa pijanacuanëjawabelia caenë pemomoxibitsaëto canacujitsia.

Josué baja tëpa

(Jue 2:6-10)

²⁹Bajarapacuenia penajuanajumeliwaisicajonecujinae, itsajumetonëcujinae Josué, Nun pexënato, baja tëpa itsa xaina ciento diez pawaibeje, ponë Jehová pijajiwitonëmi. ³⁰Bajaraponë mëthëtatsi pija-irata, Timnat-sera tomarata, patomara eca Gaas-tsutonë canacujitsita, Efraín nacuata penucaetsuto. ³¹Nexata, Israel-pijinë pemomoxi to-exanawanapa picani Jehová pejitsipaecuenia daxita Josué piasaëtsaponaponamatacabianëjawa, bajarapacuenia daxita piasaëtsawanapaematacabianë pa-ancianowi nacopaba Josué petëpaecujinae, daxita pamonaë petaewi pacuenia Jehová peto-exanaejawamitsi Israel-pijinë pemomoxi. Itsiata, pewënamuto bajarapamonae itsacuenia exana.

Israel-pijinë pemomoxi mëthëta Josépijinëmi pesi

Egipto nacuawerena pecaponaejawa

³²Josépijinëmi pesi xua capona Egipto nacuajawawerena, nexata bajarapamonae mëthëta Siquem-jawata, pa-irayojawata comuata Jacob-pijinëmi cien ponëtabeje palatanëanëta Hamor-pijinë pemomoxijawabelia, Siquem-wënëñë paxa. Bajarapa-irami canacopata pija-iracuenia Josépijinë pemomoxi.

Eleazar tëpa, ponë sacerdotewi pepopenamatacaitorobinë

³³Belia Eleazar-ata baja tëpa, Aarón pexënato. Nexata, bajaraponë mëthëtatsi pexënato Finees pija-irata, Gabaa tomarata, pa-irayo rajutatsi Efraín nacuata.

Jueces

Jehová pija-ángelnē tsitanaitajēta israelitawijawabelia Boquim-jawata

2 ¹ Jehová pija-ángelnē pona Gilgal-jawawetsina Boquim-tsutojumabetsia. Nexata jumaitsi israelitawijawabelia:

—Xanē raja jutajē panijasalinaiwimi Egipto nacuwecua, itsawerena caponajē mapanacuajawaberena, pa-ira yabara tajēwelia najumecapane-paeya jumaitsinē bajarapamonaemi pijasalinaiwimijawabelia tarajutsinexa. Pamatacabi rajutajē, jumaitsinē bajarapamonaemijawabelia cajena: «Xanē aponajumeliwaisinacofēnētsinē tsane patacanajumeliwaisicajonejawa paxamējawabelia, ² itsa baitsi jane paxamē apopanalwaisicajonemē tsane bajarapanacuata pejinawanapaewijawabelia, itsa pijinia paxamē patobijia-naponaename pija-altar-jawanē jumapecataeya pexanaenēanē», janē picani. Itsiata baitsi jane, bajarapamonaē papeximē apopanejumecowēnētsimē. ¡Pataema xua paxamē pa-exanawanapame! ³ Bajaraxuata xanē-ata pacajumaitsi: «Apopacawecuacapsapaetsi tsane bajarapanacuapijiwi paxamēwecua. Bajarapamonaē pijadiosowi, bajarapanacuapijiwi-ata, paxamēnexa papecayamaxē-itojorobjawanē tsane», pacajaitsi baja cajena —jai ángelnē.

⁴ Itsa baja Jehová pija-ángelnē najumewereta pecuaicuajaijawa, nexata daxita israelitawi natsinua ayaijumenēta. ⁵ Bajaraxuata, bajarapataxunaē wēnēruba Boquim.^a Bajarajotanua rajutsiya tajuita dajubimonaē Jehovájawabelia.

Josué petēpaejawa, yabara peliwaissi

(Jos 24:29-31)

⁶ Itsa baja Josué napējioba daxita Israel-pijinē pemomoxijawabelia penajuanajumeliwaisicajonecujinae, bajarapamonaē jane baja pona caenē pemomoxibitsaēto canacujitsia matapania jane baja penotsinexa perajutsi-iratupaxitsi, pa-iranējawata jinawanapaējitsia. ⁷ Itsa bajaraponē asaē tsaponaponaē, daxita abaxē bajarapamonaē xaniawaetsia jumecowēnētsiya tonacuenebawanapa Jehová pejitsipaecuenia, bajarapijinia pacuenia pa-epatowajēto abaxē asaē tsawanapae Israel-pijinē pemomoxi pija-ancianowi Josuépijinē petēpaecujinae, pamonaē tane daxita pinijicuenejawanē Jehová peyapijiwi-exanaejawanētsi israelitawi. ⁸ Itsiata, belia Josué tēpa, Jehová pijajiwitonē, itsa baja xaina ciento diez pawaijeje.

a 2:5 Boquim: Hebreojumeta mapajamatabēcuene xaina mapawēnē, «pamonaē penatsinuwēi», pejaiwēnē.

⁹ Bajaraponë mëthëtatsi pija-irajawata Timnat-serajawata, Efraín-pijinë pemomoxi pijanacujawata, Gaas-tsuto imoxoyojawata. ¹⁰ Bajarapacuenia pijinia bexëa tēpaponā daxita pamonaē penaweretsiwimi, pamonaemi asāē tsawanapae pamatacabianējawa Josué matacapona Israel-pijinë pemomoxi Canaán nacujawaberena. Daxita bajarapamonaemi petēpaecujinae, cotocaewi pamonaē naexanapona, bajarapamonaē aponatotae Jehová pijaDiosocuenia pejumecowënëtsinexa, tsipaji apotaenua papinijicuene-jawanē bajaraPonē peyapijiwi-exanaejawatsi pijasalinaiwimi Israel-pijinë pemomoxijawabelia.

**Israel-pijinë pemomoxi asiwaya nawajēcabiaba
Baal-wiria jumapecataenēanējawabelia**

¹¹ Bajaraxuacujinae, Josué, pijasalinaiwimi-ata petēpaponaeacujinae, Israel-pijinë pemomoxi exanawanapa daxitaxua Jehovánexa bitso tsitapi-bisiacuenetsi. Bajarapamonaē taxuxuaba asiwaya penawajēcabiabijawa, pesiwanajamatabēcuenecopatabiabijawanua, baal-wiria jumapecataeya pexanaenēanējawabelia. ¹² Copabanua baja Jehová pejumecowënētawanapaejawa, pijasalinaiwimi pijaDIO, Ponē jutatsi pijamonaemi Egipto nacujawawerena. Juya siwanajamatabēcuenecopatabiaba itsadiosowi, jumapecataeya pexanaenēanējawabelia, padiosowijawabelia asiwaya nawa-jēcabiaba pamonaē pejinawanapaewi pemuxunenina, Canaán nacuata. Bajarapacuenia pexanawanapaexae, anaeya-exanapona Jehová. ¹³ Bajarapamonaē baja copaba-othopa Jehová pejumecowënëtsijawa, juya asiwaya penawajēcabiabinexa Baal jumapecataenēanējawabelia, Astarot jumapecataenēanējawabelia-ata. ¹⁴ Bajaraxuata, Jehová bara-anaepana bajarapamonaejawabelia. Nexata, tocopatatsi itsanacuanēpijiwi, penacobetoxotsiwi, pewecuanotsinexatsi pecobecowējawanēmi. Bajarapacuenia pijawajabitsaē itsa tsimaxēpatatsi, Israel-pijinë pemomoxi acuenesaējibi tsabiabi pecuene-yacaranatsinexa. Nexata, cuene-amoneyababiabatsi. ¹⁵ Caepitsapabiabi canacujitsia Israel-pijinë pemomoxi pebarēnawajabitsaëtsinexa itsamonaejawabelia, bajarapaepatota Jehová jamatabēcueneyawenonabiaba israelitawi pijawajabitsaējawabelia, bajarapacuenia pibisiacuenia petopitsapabiabinexatsi Israel-pijinë pemomoxi. Pacuenia tonajumecopatatsi penajumecajoneliwaisijawata, pejumaitsicowēya petayabiabinexa itsa apojumecowënëtsi. Pejumaitsicowēya bajarapacuenia itsa nataeyabiaba pijawajabitsaēwi pecuene-amoneyabijawatsi, Israel-pijinë pemomoxi nexata nataepona pebejiobia-exanaponaejawatsi.

¹⁶ Itsiata, bajarapacuenia tocopiapatabiabi-exanae-atatsi pebejiobia-exanaenexatsi, bajaraxuacujinae Jehová to-itapetabiabatsi itsamonaē israelitawiyajuwënēnē pecapanepaewinexatsi bajarapapebejiobia-exanaejawanëtsiwe-cua, xuacujinae peyanacua-ewetsiwinexatsi Jehová pejamatabēcueneta juez-nēcuenia.^b ¹⁷ Itsiata baitsi jane, israelitawi apojumecowënëtabiabi bajarapajuez-monaē. Bajarapacuenia-ata xaniawaetsia Jehová apojumecowënëtawanapae. Saya caranata itsadiosowijawabelia nawajēcabiaba Jehováwe-cua. Bajayatami pacuenia pijamonaemi Jehová

b 2:16 juez-nēcuenia: Taema «juez-monaē», glosariojawata.

jumecowënëtsiaya jinawanapa petonajumecopatsiliwaisitsi, bajarapacuenia bajarapamonae pecuenecowëya apojinawanapae, caejamatabëcuene pexainaenexa Jehovájawabelia. ¹⁸ Paepatota Jehová to-itapetabiabatsi itsanë pijajuez-nënexa, bajarapaepatota pijinia Jehová yawenonabiaba bajarapajuez-monae pejamatabëcueneta pecuene-amoneyabinexa Israel-pijinë pemomoxi pijawajabitsaë pamatacabianë abaxë asaë tsaponaponae bajarapajueznë. Bajarapacuenia yawenonabiaba, tsipaji itaxutotsoniataeya-biaba Israel-pijinë pemomoxi pacujinae jumetanetsi pewajëcaejawatsi peyajājajawata,^c pebejiobia-exanaexaetsi pijawajabitsaë. ¹⁹ Itsiata baitsi jane, paepatota tēpabiaba bajarapajueznë, nexata bajarapamonae icatsia caewëalia bitso pijapibisiacuene exanabiaba, bitso pewajënaeyabelia pijamonaemi pecuene matatoxenetsia. Najamatabëcuenebijiana bitso Jehováwecua. Bajarapamonae nexata asiwaya pematabacabëta nawajëcabiaba jumapecataeya pexanaenëanëjawabelia. Bajarapajumapecataenë peliwaissi asiwaya pēnaponabiabanua, pejumecowënëtabiabinexa pitorobicueniatsi. Apojitsipae bajarapamonae pewecuanatsatsijawa bajarapapibisiacueneuwecua pexanawana-paejawa. Nexata, bajarapamonae ajamatabëcuenetaja tsawanapae Jehová pejumecowënëtsiyaniwa. ²⁰ Bajaraxuata, Jehová pebara-anaepanaejawata, israelitawijawabelia jumaitsi bajarapamonae yabara: «Mapamonae pali-waissi naliwaissicajunuajë pijasalinaiwimijawabelia, bajarapamonae apo-exanawanapae tanajumeliwaisicajonecowëya. Bajarapamonae apojitsipae tanejumecowënëtanawana-paejawa. ²¹ Bajaraxuata, xanë apowecuajutsinë tsane yawenonaeya pamonaë abaxë nacopata Canaán nacuata, patomaranëata nacopaba wecuajutsinejewa pejinawanapaenacuanë Josué petēpaewajënaeya. Nexata Israel-pijinë pemomoxi apoyawenonaenë tsane tawecuatorotsinexa pewajënaeya, bajarapamonae pija-iranëmi pepitsiyaniwa», jai Jehová. ²² Bajarapacuenia pejumaitsijawata Jehová cuene-ējëbijitsia israelitawi, peyapëtaenexa itsa najamatabëcuenejēpaejitsia pijasalinaiwimi pacujinae jumecowënëtsiaya jinawanapabiaba pejitsipacuenuia, itsa jume, itsa bajaraPonë pejitsipacuene apo-exanawanapaejitsia. ²³ Bajaraxuata, Jehová apowecuatorotsi pamonaë copiaya jinawanapa Canaán nacuata, pamonaë nacopata abaxë Josué cuene-amoneyabinejewa petēpaewajënaeya.

Pawiriawi nacopata Canaán nacuata Josué petēpaecujinae

3 ¹ Jehová itsamonae copata Canaán nacuata pejinawanapaenexa jutsinejewa, tsipaji bajarapamonaeta cuene-ējëbijitsiatsi israelitawi, pamonaë abaxë apopenaexanaewi pamatacabijawa pijamonaemi nawajabitsaëta-biaba Canaán nacuapijiwimijawabelia, pija-iranëmi pewecuapitaponaeenexa. ² Jehová nexata tocopata bajarapamonae, bajarapacuenia cotocaewi penae-xanaewi penacujarubabiabinexa pebarë nawajabitsaëtsicuene bajarapana-copabiwijawabelia. Bajarapacuenia copata, tsipaji pamonaë cotocaewi nae-xana apocueneyapëtae penawajabitsaëtsijawa abaxë. ³ Mapamonaeje Jehová copata pejinawanapaenexa Israel-pijinë pemomoxi perajutsinacujawa.

c 2:18 *peyajājajawata*: Pijawajabitsaë pebejiobia-exanabiabixaetsi bitso penacuenebia-exanaejawata. Nexata, Israel-pijinë pemomoxi bëjaiya wajëcabiaba Diosojawabelia penatsinuejawata, Dioso pecapanepaenexatsi.

Copata filisteomonaе cinco patomarabeje, pewetsiwi yajawa, cananeomonaе, Sidonio nacuapijiwi, heveomonaе-ata. Heveomonaе pijinia jinawanapa LÍbano nacula petsutonējawa, Baal-hermón-tsutojawawelia pepatsijawabelia Hamat tomarajawabelia. ⁴Bajarapamonaеjawabelia Jehová jamatabēcuenе-ējětsijitsia peyapětaenexa itsa Israel-pijině pemomoxi jumecowěnětawana-paejitsia, pacuenia pijamonaemi jumecowěnětawana petonajumecopat-siliwaisi Moisés-pijiněta. ⁵Nexata, bajarapacuenia israelitawi taxuxuaba peyajawajinawanapaejawa cananeomonaе, heteomonaе, amorreomonaе, ferezeomonaе, heveomonaе, jebuseomonaе-ata. ⁶Bajarapacuenia penajua-jinawanapaexae, israelitawi pexi pebijiwi, petiriawi-ata, nacojiobapona bajarapamonaе pexijawabelia. Bajarapacuenia namata-enetsia penacojioba-ponaexae, Jehová cuene-itawetsi-atatsi picani, nacuenejěpapona. Nexata, asiwaya jumecowěnětabiaba, nawajěcabiabanua pijadiosowijawabelia, jumapecataeya pexanaeněaně, Jehováwecua.

**Otoniel capanepa Israel-pijině pemomoxi
Mesopotamia nacula pewetsiněwecua**

⁷Nexata, Israel-pijině pemomoxi exanawanapa bitso pibisiacuenе Jehová pijaDISO pitabarata. Nacofěnětanua pijaDISO. Juya siwanajamatabēcuenecopatabiaba baal-jumapecataeya pexanaeněanějawabelia, Aserajumapecataeněanějawabelia-ata. ⁸Bajaraxuata, Jehová bitso ayai-cuenia bara-anaepana bajarapamonaеjawabelia. Nexata, tocopata Cusan-risataim pecobeyabelia, Siria pepopeyanacula-ewetsině Mesopotamia nacujawata. Bajaraxuata, Israel-pijině pemomoxi tonacuenebawanapa ocho pawaibejecuenia bajaraponě petocaějětsicueniatsi. ⁹Belia baja Israel-pijině pemomoxi wajěcapona Jehovájawabelia, peyawenonaenexatsi. Nexata, Jehová tonutatsi pecapanepaeněnexatsi, Otoniel, pexěnato Cenaz, Caleb pejuyapijině.

¹⁰Nexata, Jehová Espíritu Santota runaica Otoniel-jawabetsica, pejamatabēcuenecaějěpaeya-exanaenexatsi pewetsiněnexa juez-cuenia, pematacaponabiabinexanua Israel-pijině pemomoxi penawajabitsaětsimatacabi pijawajabitsaějawabelia. Penawajabitsaětsijawata, Jehová tocopata pecuene-amoneyabinexa Cusan-risataim, poně Siria nacula pepopeyanacula-ewetsině. ¹¹Bajaraxuacujinae, Israel-pijině pemomoxi jamatejema jinawanapa pijanacuata cuarenta pawaibejecuenia. Bajaraxuacujinae, Otoniel

ѐpa, pexěnato Cenaz. ¹²⁻³¹ [...]

Jehová to-itapeta Gedeón juez-něnexa Israel-pijině pemomoxituatujěta

6 ¹Barac peyanacula-ewetsicujinae juez-něcuenia cuarenta pawaibeje, icsia israelitawi bitso pibisiacuenе exanawanapa Jehová pitabarata. Nexata, Jehová tocopatatsi Madián nacuapijiwajabitsaě petsimaxěpatsinexatsi, pebarěnawajabitsaětsinexa Israel-pijině pemomoxijawabelia. Nexata pecuene-amoneyabixaetsi, Madián nacula pewetsině Israel-pijině pemomoxi yanacula-ewetatsi siete pawaibejecuenia. ²Madián nacuapijiwajabitsaě bitso bejiobia-exanawanapaena Israel-pijině pemomoxi. Belia nexata, Israel-pijině pemomoxi pecajunawi, penamatayababiabinexa natonacueneba petsutonējawa, ibowajuanějawa-ata penamatayabitaxunaeněnexa, itsaxuayonua

to-ayapëbejeitsiatsi pijawajabitsaë petsimaxëpatsinexatsi. ³ Madián nacuapijiwi, amalecitawibeje, itsatamaranëpijiwi yajawa pemutuabereca pejinawanapaewi-ata siwanajamatabëcueneyanabatsi petsimaxëpatabiabinexatsi pitoyaxae Israel-pijinë pemomoxi. Bajarapamonae itsa wënëtanetsi Israel-pijinë pemomoxi pe-ubijawanë pexainaejawa, nexata totsimaxëpatabiabatsi bijianaeya peto-ajibia-exanaenexatsi daxita pe-ubijawanëmi.

⁴ Bajarapamonae pijataxunaebonë exananubena Israel-pijinë pemomoxi pejinawanapaenacuajawa. Nexata, bajarapamonae pijadajubibitsaëtonë yajawa towerenetsi Israel-pijinë pemomoxi pexaejawanëminexa pe-ubipabianëmi. Yacajërëbatsinua daxita pija-oveja, vaca, burromonae-ata. Nexata, Israel-pijinë pemomoxi apotonacopatsitsi itsacuenejawa pexaejawanexa. Bajarapacuenia petobijianaponaejawatsi yacopiapata Gaza tomarajawabetsia. ⁵ Madiánitawi yajawapatabiaba daxita pijamonae, yajawa pijadajubibitsaëtonë, pijacamellomonae-ata pijataxunaebonë penacuenebinxaxa, bajarajota pejinawanapaenexa. Bitso ayaibitsaëtoxanetoxae, bajarapamonae apocuenecaëjëpabiabitsi penamata-ëjëtsijawa madiánitawi, bajarapijinia pacuenia pijacamellomonae-ata. Ayaicuenia bitso ayaibitsaëtoxae, cuenejëpa pinijibitsaëtobosesemonae pacuenia bepigia bawerenenajetarubena pe-ubijawanëmi. Belia bajarapacuenia bajarapamonae janibota israelitawi. ⁶ Nexata, Israel-pijinë pemomoxi bitso bepejiobiwi naexana Madiánitawi pejamatabëcuene. Belia bajarapamonae bëjaiya wajëcapona Jehovájawabelia peyawenonaenexatsi, pebejiobia-exanaexaetsi pijawajabitsaëwi.

⁷ Nexata Israel-pijinë pemomoxi wajëcabiaba Jehovájawabelia Madián nacuapijiwi pebejiobia-exanabiabijawatsi yabara. ⁸ Nexata, Jehová to-itorobatsi itsanë profetanë petsipaebinxatsi mapacueniaje:

—Mara pacuenia pacajumaitsi Jehová paxamë Israel papemomoximë panijaDIOSO: «Xanë Israel papemomoximë panijasalinaiwimi jutajë Egipto nacuwecua, panacuata bajarapamonae amoneya tonacuenebawanapa bajarapanacuapijiwi. ⁹ Pexaniacuenia icatsia capanepajë, pacuenia Egipto nacuapijiwi pecobewecua capanepajë baja. Bajarapacuenia pijinia bajarapamonaemi capanepajë daxita pamonaewecua pejinawanapaewimi mapanacuataje bejiobia-exanatsi. Baitsi, bajarapamonae pitsapaeya-exanajë pejinawanapaenacuanëmiwecua, juya pija-iranëmi panijasalinaiwimijawabelia tarajutsinexa. ¹⁰ Bajarapacuenia tato-exanaecujinae, panijasalinaiwimijawabelia cajena jumaitsinë: ‘Xanë raja caenënë Jehovánë panijaDIOSONë. ¡Pëtsa yaiyataeya panawajëcame panematabacabëta amorreowi pijadiosowijawabelia xanëwecua, pamonaë pijanacuamita pajinawanapame maparucaeje!’ janë picani. Itsiata baja, paxamë bajarapamonaemi papemomoximë apopanejumecowënëtsimë, bajarapacuenia paca-itawetsi-atatsi», pacajai Jehová —jai profetanë Israel-pijinë pemomoxijawabelia.

¹¹ Nexata itsamatabacijawabelia, Jehová pija-àngelnë pona Ofra tomarabelia. Bajarajota pepatsicujinae, eca encinanaebëxëpanata. Bajaraponaë pijanae Joás, Abiezer pijawiriamaëtoyajuwënënë. Joás pexënato Gedeón naeboyota conitapona trigoxu uvacuaibarëmene pejucabiabitaxunaeta, tajëwecua pepopijataxunae petanabataxuababiabijawa trigoxu, peyacajërëtsiyaniwatsi madiánitawi.

¹² Bajarajota, Jehová pija-àngelnë tsitanaitajëtatsi. Jumaitsi Gedeón-jawabelia:

—Gedeón, xamë rabaja Jehová pecayajawatsaponaponaenë pexaniacuenia nenawajabitsaëtsinënexa, niajamatabëcuene-itatsacanënexanua —jai. ¹³Gedeón jumecanawiata:

—Abaxë cae-epatoyo, tajatuxanenë. Itsa pepacuenie Jehová paneyajawa, ¿detsa xuajitsia nexata mapitsipibisiacuenejawanë patajataewanapaeje? ¿Detsa xuajitsia bajaraPonë bitso pinijicuenejawanë apopaneto-exanae pataneyawenonaenexa, pacuenia patajasalinaiwimijawabelia bajayata to-exana? Patajasalinaiwi panetsipaebabiaba mapacueniaje: «Jehová raja nacajuta Egipto nacuwecua», panejai tsabiabi. ¿Detsa xuajitsia bajarapacuenia apopaneto-exanae? Caranata, mapamatacabitaje Jehová panecopata pataja-epato. Madiánitawi pecobejawabelia panecopatanua patanebejiobia-exanabiabinexa pataneyanacua-ewetsixae —jai.

¹⁴ Jehová pija-ángelnë itabaranaëcotsiaya jumaitsi Gedeón-jawabelia:

—Nexainaecuenesaëta ponaename nijamonae yajawa panebarënawajabitsaëtsinexa Madián nacupijiwijawabelia. Xamë capanepaenename Israel-pijinë pemomoxi madiánitawi pecobewecua. ¡Taema, xanë raja ca-itorobatsi bajarapacuenia nexanaenexa! —jai ángelnë.

¹⁵ Gedeón jumecanawiatsiaya jumaitsi:

—Abaxë cae-epatoyo, tajatuxanenë. ¿Detsa pacuenia xanë capanepaejitsipajë Israel-pijinë pemomoxi madiánitawi pecobewecua? Tajamonae pijawiriamaëtobitsaëto^d bitso tsiqiribitsaëtoyo Manasés-pijinë pemomoxibitsaëto-tuatuajëta. Nexata, pa-acuenesaëjibinë bajaraxuanexa. Orijibia, xanë bitso beweliamatabëcuenenënë tajamonaetuatuajëta —jai.

¹⁶ Jehová pija-ángelnë jumecanawiatatsi:

—Paxamë jamatejema pacuene-amoneyabianame madiánitawi, tsipaji raja xanë pepacuenie pacayajawa tsanetsi. Baitsi pacuenia ayaibitsaëto caenë apocuenecaëjëpaetsi pecueneyacaranatsijawa pebarënawajabitsaëtsiwi, bajarapacuenia apocuenecaëjëpaetsi tsane papecacueneyacaranatsijawa, ayaibitsaëtoxaneto-ata —jai ángelnë.

¹⁷ Gedeón jumecanawiata:

—Itsa xaniajamë Jehová ca-itoroba tanebarëcuaicuaijainexamë, tanetsipaebinexamëna taneyawenonaejawanexa tanesiwajamatabëcuenebarëyaxae, nexata netsita-exanaenename itsacuenejawa xaniawaetsia tayapëtaenexa Jehová taneyajawajawa, xua netsipaebanucame. ¹⁸ Pexaniacuenie cawajë-tatsi. Abaxë ne-ewetsianame tapatsijawabelia majotaje. Abaxë raja siwaponaejitsianë ofrendacuenia xua carajutsijitsiatsi —jai.

—Je. Jota ca-ewetsianatatsi caewëarena nepatsijawabelia —jai Jehová pija-ángelnë.

¹⁹ Gedeón nexata pona pijabojawabelia, petosetsinexa chivo pejananëyo. Sebaxuabanua bepijiacuenia levadura matajërëabinejewa pexanaepanjawaxi. Bajarapapan-matabënexa canacueneba veinte palítrobeje trigo-beno. Daxita pewateretsicujinae, pewi jia abata, pëpëra pijinia waxiyota. Bajaraxua nexata capona itsajotalia ángelnë ewetanucatsi encinanaebë-xëpanata, perajutsinexa ángel-nëjawabelia. ²⁰ Nexata DIOSO pija-ángelnë itoroba peto-etsinexatsi pesetsiwijawa, levaduranejewa pexanaepan yajawa

piniji-ibotojumata. Xuacujinae, itoroba pewi, pan-atanua, petsimata-epacaenexa bajarapapëpërata pejumawereca. Nexata Gedeón jejai. Bajarapacuenia exana. ²¹Nexata Jehová pija-ángelnë pecobenanucaenaebo piupiyota cawayata pewijawa, pan-jawanënu. Bajarapa-ibotojumatsina pitsapaina isotocotia. Bajarapa-isoto weriajawa daxita pebobenaewi, pan-yajawa. Xuacujinae, Jehová pija-ángelnë bajarapaepatota Gedeón wecuaponatsi baja.

²²Bajaraxua petsita-exanaejawatatsi, Gedeón matapania yapëtane pebarë-cuaicuajijawatsi Jehová pija-ángelnë. Nexata ayaijumeta bëjaiya jumaitsi Jehovájawabelia pewajëcaejawata:

—¡Cuaë, xanëmi! Xanë baitsi taniyi taitaxutocujaya Jehováme nija-ángelnë tanebarëcuaicuajijawata, tatëpaenënexa-ata meta saya —jai Gedeón.

²³Jehová itsiata jumaitsitsi:

—¡Pëtsa bëjamë! ¡Pëtsa cujunawame! ¡Jamatejemamëre! Apotëpaemë tsane taja-ángelnë pitabarata netaejamatabëcuene —jaitsi.

²⁴Gedeón nexata jamatabëcueneceawa pebëjaijawami. Tona-cuenebanuta altar-jawa Jehová. Bajarapa-altar wënëruba: 'Jehová tanejamatabëcuenejamatejemaya-exanaenë^e tabëjaiyaniwa,' pejaiwënëcuenia. Bajarapa-altar abaxë nuca Abiezer-pijinë pemomoxibitsaëto pijawiria-maëtocuenia pejinawanapaetomarata, Ofrawënë tomarata.

²⁵Bajarapamatacabipijimerawijawalia icatsia Jehová jumaitsi Gedeón-jawabelia:

—Pitsianame axa pijavacayajuwënënë ayainë pebito, itsanë pijinia pecotocawinë, siete pawaipeje pexainanë. Caponaename bajarapatorobeje itsajotalia axa exananuta altar-jawa Baal jumapecataeya pexananutsinëjawabelia. Bajarapa-altar-jawa toxuababuatsianima. Bajarapacuenia-ata Asera jumapecataeya pexananutsinaesituruto bajarapa-altar-muxuneneta nicata-xuabianame. ²⁶Xuacujinae, bajarapa-altar-cowëta petsutojumata netonacuenebanutsianame itsa-altar-jawa xanë Jehovánë panijaDIOSonë tawënëta. Nexata bajarapa-altar-jumata cotocaewi toro netotajuitsianame. Isonexa pijinia wocobianame nenicataxuabinaesiturutomi Asera jumapecataeya pexananutsijawami —jai Jehová Gedeón-jawabelia.

²⁷Gedeón jejai. Nexata merawi barëpona diez ponëbeje pijajiwi amoneya bedajubiwicuenia petonacuenebawanapaewitsi, peyawenonaenexatsi Jehová pejumaitsicowëyatsi. Bajarapacuenia exana pijamonae, pijatomarapijiwi-ata petayaniwatsi. Muetsiacuenia exana pecajunawi pitsacueniabiyaniwatsi picani. Bajaraxuata, apo-exanae matababita.

²⁸Nexata merawia pitsijawata, bajayacunua itsa naëcota pijatomarapijiwi, bajarapamonae taeyabuata Baal pija-altar-jawa petoxuababuatsijawatsia. Tanenua Asera jumapecataeya pexananutsinaesituruto petonicataxuabijawatsi. Orijiibia, taeyabuata petajuenucaejawa pecotocaewitoro pejana-exananutsi-altar-jumata. ²⁹Nexata nayanijobapona: «¿Jipatsa meta bajara-xua pija-exanae?», najai tsaponae. Belia ayaicuenia peyanijobaponaecujinae,

e 6:24 *Jehová tanejamatabëcuenejamatejemaya-exanaenë*: Hebreojume pecuaicuajiaiwi marapacuenia wënëruba: «Jehová-salom», jai pewënëjonejawata.

xaniawaetsia yapètane Gedeón petoxuababuatsijawatsia paxa pexananutsi-altarmi. ³⁰ Nexata bajarapatomarapijiwi jumaitsi Joás-jawabelia:

—Panetøjuremena nexénato Gedeón, patabeyaxuabínexa. Naneconitsia petèpaenexa, tsipaji bajaraponè Baal pija-altar-jawa toxuababuatsia. Nica-taxuabanua Asera jumapecataeya pexananutsinaesituruto bajarapa-altar-muxuneneta —jai.

³¹ Itsiata baitsi jane, Gedeón paxa jumaitsi:

—Itsa peneta Baal diosonè tsaponaponae, nexata taxénato naneconitsia-exanaenatsi pija-altar-jawa petoxuababuatsijamatabècuenetsi. ¿Paxamè tsaja paneyapijiwi-ewetsiwi Baal diosonè? ¿Pijacuata apocuenecaèjèpaetsi penayamatamotsijawa? Peneta, itsa diosonè tsipae, nayamatamotsipa. Nexata, pajiwiyo paxamèyajuwènnè payamatamotsijisiamè Baal, pacatsi-wajènaewajunupaebatsi panetèpaenexa matababiwèpata —jai Gedeón paxa pijatomarapijiwijawabelia. Nexata baja, Gedeón pijatomarapijiwi apobeyaxuabitsi. ³² Bajarapamatababita, Gedeón wènrubatsi itsawènnè, Jerobaal-wènnè, «Jema baja Baal pijacuata nayamatamotsi», pejaiwènnè. Baal pija-altar petoxuababuatsixae, bajarapacuenia wènrubatsi.

³³ Nexata jane baja, daxita Madián nacuapijiwiibeje, amalecitawibeje, bajarapacuenia itsatomaranèpijiwi yajawa, pemutuabereca pejinawana-paewi, nacaetuata petsimaxèpatsinexa Israel-pijinè pemomoxijawabelia pebejejebinexatsi. Daxita bajarapamonae barènicaba pijataxunaebò pexanaenexa Jordán mene itsapanabetsia, Israel nacuajawabetsia, panamatajè-paetusatota boca petsutobejetuatuajèta, Jezreel-menemuxuneneta.

³⁴ Nexata Jehová Espñritu Santota runaica Gedeón-jawabetsica, pejamatabècuenecaèjèpaeya-exanaenexatsi. Bajarajota nexata, bajaraponè oba ovejamata-etota, pecaetuatsinexa daxitabitsaèto pijajiwi wajabitsaèwi. Nexata, muxunapata Abiezer pijawiriamaètowi, Manasés pemomoxiyajuwènnèwi. ³⁵ Bajaraxuacujinae, itoroba pejumeliwaisicaponaeuwitsi tajèyowawabelia Manasés-pijinè pemomoxi pejinawanapaenacuajawa, petojunatsinexatsi pebarènacaetuatsinexa, bajarapacuenia petojunatsinexatsi Aser, Zabulón, Neftalípijinèmi pemomoxi pejinawanapaenacuanèjawa-ata, bajarapamonae najuapebarènenexa. ³⁶⁻⁴⁰ [...]

Sansón jaita filisteowiriawa pijawanexa Timnat tomarajawabereca

14 ¹ Itsamatababi Sansón pona Timnat tomarajawabereca. Bajarapatomarata tane filisteowiriawa. ² Nexata, bajaraponè itsa nawiata pija-nacuayabetsina pijamonaejiwibejewawabelia tsipaeba. Jumaitsi:

—Xanè taniji Timnat tomarata filisteowiriawa. Pexaniacuene pacawajètatsibeje, patanetøjumaitsimènexabeje bajarapowa pijamonaejawabelia, tapitsinexa bajarapowa tajawacuenia —jai.

³ Pijamonaejiwibeje itsiata jumecanawiatatsi:

—¿Ajibi tsaja petiriwa nejitsipaewa wajawiriayajuwènnèwa? ¿Bajaraxuata, necajaitsi filisteowiriawa, apowajawiriawa-ata? —jai pijamonaejiwibeje. Sansón nexata jumecanawiata pijamonaejiwibeje:

—¿Itsiata, panetowajèrebeje bajarapowa tajawacuenia, tsipaji bitso jitsipajè! —jai.

⁴ Itsiata baitsi jane, pijamonaejiwibeje apoyapètaebeje Jehová pejamatabècueneta bajaraxua pexénato pexanaejawanexa, tsipaji Jehová

siwanajamatabëcuenewereta pacuenia tsimaxëpatsijitsia filisteomonaejawabelia Sansón pejamatabëcuene, tsipaji bajarapamatacabijawa filisteomonaeyanacua-ewetawanapa Israel-pijinë pemomoxi.

⁵Nexata, Sansón pijamonaewibeje yajawapona Timnat tomarajawabereca. Bajaraponë itsa patanajetaruca cotocaewi, bajarapatomarapijiwi pijauvacabonë canacujitsita, bajarapaepatota pinijiwiria petsaunaenewëthë pefiabinë cujitanajetarucatsi. ⁶Nexata, bajarajota Jehová Espíritu Santota runaica bajaraponëjawabetsica, penasaërajutsinexatsi. Piasaëbejewata, pecobeta maxëjona. Topa-ucubania bajarapanewëthëmi. Bajaraxua exana pecobesanë newëthëxanetojawabelia, pacuenia jiwi exanaejitsipa chivonacuetojawabelia. Itsiata, bajaraponë aponawajunupaebi pijamonaewibejewabelia, xua newëthë beyaxuabaponapona. ⁷Bajaraponë cotocaewi patajopareca pijajarawajawabereca, pebarëcuaicuaijainexa. Nexata bajaraponë pebarëcuaicuaijajucujinae, bajarapowa pijinia tsitaxanepanatsi Sansón.

⁸Itsamatacabianë pepanepaecujinae, itsanamuto exana pijajarawajawabereca, pepitsinexa jane baja. Bajarapanamuto pexanaejawata, namutowecua natsatajopa itsajota beyaxuababuata pinijiwiria petsaunaenewëthë, petaenexa. Bajarapanewëthë pejamatabëbojawata tane banapewarapaeto. Tayetanua jabëperianë. ⁹Bajarapajabëperianë pita. Nexata namutua xaenucapona. Icatsia, itsa pëcaxina pijamonaewibeje, narajuta baja bajarapajabëjawa penaxaenexabeje. Itsiata baitsi jane, apowajunupaebi pejutsijawa newëthë petëpaenë pejamatabëbojawata. ¹⁰⁻²⁰ [...]

Salmos

Israel-pijinë pemomoxi pecanaxëanaewajianë

Salmo 1

Pexaniacuene pexanaewi, pibisiacuene pexanaewi-ata peliwaishi

¹ Jamatabëcuenebarëya tsawanapae tsane pajiwi apojumecowë-nëtsi pibisiacuene pexanaewi pemuxubijiaxubijawatsi. Apojumecowë-nëtsi pibisiacuene pexanaewi pejunatsijawatsi, pibisiacuene pebarë-exanaenexatsi. Apobarënamatabëcuenejëpaenua pecaponaponaewi Dioso pijacuene. ² Biji rajane, bajarapajiwi caematacabi canacujitsia, caemerawi canacujitsia-ata, Jehová pejumeliwaishi canaëjëtsiaya asiwaya najamatabëxainabiaba.

³ Pacuenia mene-itapata waja-ubanutsinae, xaniawaetsia nacuai-tabiaba penacuaitsimatacabi, pebaxu-ata waita apotsaquenae, bajarajamatabëcuene-itsi tsabiabi bajarapajiwi. Daxita xua bajarapajiwi exana, toxanepanabiabatsi.

⁴ Juya piajamatabëcuenebejewi, bajara-apojamatabëcuene-itsi. Pacuenia arroz-xuboco caputatsi jowibota penaxuabinexa, bajarasaya itsi tsane piajamatabëcuenebiwi. ⁵ Bajarapamonae Dioso naneconitsia-exanaena, pamatacabi naneconitsia-exanaena pibisiacuene pexanaewi. Pibisiacuene pexanaewi aponanubenae tsane pexaniajamatabëcuenewi penacaetuatsijawata.

⁶ Jehová xaniawaetsia pejamatabëcueneyapëtaexae pexaniacuene pexanaewi, xaniawaetsia pijinia ewetabiaba. Juya, pamonae pibisiacuene pexanaewi, bajaraPonëwecua naxuabiana.

Salmo 2

Pacuenia Jehová petsimata-epanaenëtsi^a yanacua-ewetsiana mapanacuapijiwije

¹ Itsanacuanëpijiwi, pamonaë apojudfowi, bitso anaepanabiaba Jehová-jawabelia. Saya jema natocaëjëbabiaba picani pecuenecaranatsinexa Jehová, apocuenecaëjëpae-atatsi pexanaenexa.

² Pinijinacuanë, tomaranë-ata, pewetsiwi nacaetuatabiaba penajumejait-sinexa pacuenia wecua-ajibia-exanaejitsia Jehová pitorobicuene, ponë-ata petsimata-epanaenëtsi peyanacua-ewetsinexa. ³ Nexata, najumaitsi tsabiabi: «Nawajabitsaëtsianatsi Jehovájawabelia, petsimata-epanaenëtsijawabelia-ata, wajanawecua-ajibia-exanaenexa bajaraPonëbeje wajanacanamatacaito-robicuenemi. Nexata, pacuenia jitsipatsi wajacuata, exanabiabianatsi», najai tsabiabi bajarapamonaë.

⁴ Itsiata, Jehová, Ponë athëbëtatsia yanacua-eweta daxitacuene, cuenecapocaponaëna bajarapamonaë, tsipaji apocaëjëpaetsi Jehová pecuene-amoneyabinexatsi. ⁵ Biji rajane, Jehová bitso anaëya cuenexanetsiana bajarapamonaë. Nexata pecajunawi, bitso neconecojai tsane. Orijibia, anaëya jumaitsi tsane bajarapamonaëjawabelia: ⁶ «Xanë raja ta-itapetsinë peyanacua-ewetsinënexa, tocopatajë peyanacua-ewetsinexa mapanacuapijiwije Siôn-tsojumawetsica.^b Nexata, ecaëna Jerusalén tomarata, tajatsutojumata pe-ecaetomarata», jai tsane Dioso anaëya.

⁷ «Xanë tane-itapetsinë pacayapëtaëya-exanaenatsi xua Jehová nesi-wanajamatabëcuenewereta xanë, tayanacua-ewetsicuene yabara. Jehová raja jumaitsi: ‘Ajena raja, pamatacabi, canutatsi daxitajiwi pitabarata, pecayapëtaenexa xanë taxënatocuenemë!’ Xanë raja axanë tsaponaponaë. ⁸ jNexata, newajëre tacarujutsinexa neyanacua-ewetsijawa daxitanacuanëpijiwi! Catocopatsianatsi newetsinënexa daxitanacuanë, tajënacuanë-ata. ⁹ Pacuenia hierronaëbota jiwi batoboxiaxuaba atsananitomita pefaratsicanalito, Xanë neyanacua-ewetsisaëta ajibia-exanaenexa daxita itsamonae reyjiwi peyanacua-ewetsicuenemi’, neyabarajai Jehová», jai pitapetsinëtsi pewetsinënexa.

¹⁰ jNexata baja, pinijinacuanë, tomaranë-ata pane-ewetsiwi, xaniawaetsia panenamuxuna-ewere patacamuxujiobiliwaisi! jPajamatabëcuenecaëware Jehovájawabelia papecacuenexanetsinexa! ¹¹ jYaiyataëya, barëyayanua, patonacuenëbabiabare bajaraPonë! ¹² jPayaiyataëmanua Ponë pacayapëtaëya-exana

a 2:0 *petsimata-epanaenëtsi*: Daxita judfowiyajuwënënë pitapetsijawata pepopeyanacua-ewetsinënexa, tsimata-epanabiaba aceiterata. Nexata, mapasalmo nacayapëtaëya-exana pacuenia yanacua-ewetsijitsia Cristo, petsimata-epanaenëtsi Dioso, penacopatsinexa peyanacua-ewetsinënexa mapanacuapijiwije. b 2:6 *Siôn-tsojumawetsica*: Siôn-tso to eca Jerusalén tomarata. Dioso pijatemplobo-ata eca bajarapatomarata. Nexata, Dioso pitapetsinë itsa yanacua-ewetsiana mapanacuapijiwije Siôn-tsojumawetsica, yanacua-ewetsiana Jerusalén-jawata, itsajota eca Dioso pijatemplobo. c 2:7 *taxënatocuenemë*: Taëma 2Sa 7:14; Sal. 89:26-27; Mt 3:17; Mc 1:11; Lc 9:35; Hch. 13:33; Heb. 1:5; 5.5.

pexēnatocuene, papecabara-anaepanaeyaniwa, papecawerebiabiyanianua
paperujiwiwajēnaeyamē, tsipaji bepīia bara-anaepanabiaba pibisiacuene jiwi
pexanaejawa yabara! Itsiata, bitso jamatabēcuenēbarēya daxita pamonaē siwana-
jamatabēcuenecopata Jehovájawabelia, pewetsinexatsi daxita piayaicuenewecua.

Salmo 8

Jiwi bitso ayaijamatabēcuenewi Dioso pexanaejawa peliwaisi

Israel nacua peyanacua-ewetsinē, David-pijinē, peyaquinaesalmoyo.

¹ Jehová, patajaTuxanenēmē, daxitanacuanēpijiwi cawēnētane ayaijama-
tabēcuenē nexainaejawa. Athēbētatsia pejinawanapaewi-ata, cayapētane
ayaijamatabēcuenē nexainaejawa.

² Pejewaxi, mito-apaenacuetoxi-ata, naxēanaeya-exanaename. Nexata, pana-
cuetoxi penaxēanaejawata, ayaijamatabēcuenenēmē yabara cawēnēxaniata. Baja-
rapacuenia pecajumaitsixae tsane, nijawajabitsaē aura tsane. Moyanua tsane.

³ Itsa naēcotsiajē athēbēabetsia tataenexa nexanaejawanē, taniji juameto,
tulupu-ata. Nexata, jamatabēcuenējumaitsinē mapacueniaje: ⁴ «Diosomē,
jiwi matatoxēnetsia bitso ayaijamatabēcuenenē-atamē, ¿detsa xuaįtsia
itsiata jiwi siwanajamatabēxainame newetsinexa?», jamatabējanē.

⁵ »Jiwi exanae-atamē beweliamatabēcuenewi ángelewiwecua, Itsiata, ayaija-
matabēcuenewi tsawanapae. ⁶ Nexata, tocopatame jiwi ne-ewetsia-exanaenexa
daxita nexanaecuene. ⁷⁻⁸ Tocopatamēnua pacuenia jiwi najamatabēxaina pexa-
nabiabinexa ovejajawabelia, vacajawabelia-ata, unupijiwijawabelia-ata, daxita
pēpunaewijawabelia daxita menepijidujaijawabelia-ata, daxita manuamenejawa
pejinawanapaewijawabelia-ata.

⁹ »Jehová, patajaDiosomē, ayaijamatabēcuenē nexainaenē raja daxitawe-
cua! Bajarapaliwaisi yacaējēpa daxitanacuanējawa», jamatabējanē.

Salmo 16

David wēnēcānaxēana Jehová

¹⁻⁶ [...] ⁷David naxēanaeya jumaitsi:

—Xanē pexaniacuenia rajutsianajē pexaniajamatabēcuenē Jehová, tsipaji
bajaraPonē nemuxujiobabiaba pacuenia ponaponaējitsianē. Merawi tana-
jamatabēxainaejawata, nejamatabēcuenecujarubabiaba tanajamatabēcue-
nexanetsinexa. ⁸ Jehovájawabelia daxitamatacabi itaxutuajamatejemanē
tsabiabi^d daxitacuenējawalía. BajaraPonē tacujuanenia pēnucaxae tsane
tane-itsacueniabiyaníwa, nexata xanē aponatixitsinē tsane pijaliwaisiwecua.

d 16:8 itaxutuajamatejemanē tsabiabi: Apóstolnē Pedro nacayapētaeya-exana pacuenia daxita
Sal. 16:8-11 Jesucristo yabaracuaicuaįainua. Taema Hch. 2:25-28.

⁹ Bajaraxuata, xanë ayaicuenia jamatabëcuenebarëyanë. Bajarapacuenia daxita tjamatabë-ëthëtowetsina siwanajamatabëcopatsianajë Jehovaha-wabelia itaxutuajamatejemaya. ¹⁰ Xanë Jehovah tane-itapetsinë. BajaraPonë aponecopatsi tsane bajayajebi tanacopatsinexa mëthëjawata,^e tanemëthët-sicujinae. Aponecopatsinua tsane taperabëtsabanaejawabelia. ¹¹ Bajaraponë netsitajëtsiana namuto tapanepaenexa, itsajota aposajinae pebarëyacuene. Bajarajotalia, pecujanenia ponaponaenajë^f barëyaya daxitamatacabijawabelianexa —jai David Jehovah pewënëcanaxëanaejawata.

Salmo 19

Dioso bitso pexaniacuene pexanaejawa peliwaissi

Israel nacua peyanacua-ewetsinë, David-pijinë, peyaquinaesalmoyo.

¹ Dioso raja itaboxo exana. Nexata, itaboxo itsa tanetsi, nacayapëtaeya-exana Dioso bitso ayaijamatabëcuene pexinaejawa. Itaboxo nacayapëtaeya-exananua Dioso pexanaejawatsi.

² Caematacabi canacujitsia, caemerawi canacujitsia-ata, nacayapëtaeya-exanabiaba bajaraPonë bitso ayaijamatabëcuene pexinaejawa.

³ Itaboxo picanî apoxainae pijajume. Itaboxo apocuaicuaijai. Apojumetaetsi wajanacatsipaebijawa.

⁴ Itsiata, daxitanacuanëpijiwitsi itaboxo itsa tanetsi, yapëtanetsi itaboxo wajanacayapëtaeya-exanaejawa Dioso bitso ayaijamatabëcuene pexinaejawa. Nacuatabujawabelia pejinawanapaewi-ata, itaboxo yapëtaeya-exanatsi Dioso bitso ayaijamatabëcuene pexinaejawa.

Itaboxotatsia Dioso ruta juameto, matacabipijito. ⁵ Pacuenia pebitso-jinaenë pecujinaejinaejawa cujinaejina, pacuenia-ata pejananacojobinë barëyaya pijabowecua pitsapa peponaenexa itsajawabelia, bajarapijinî itsi matacabipijijuameto. ⁶ Pitsapaina itaboxo pecopiarucaejawawetsina. Tajë pijanamutua najetaruca, pepatsinexa itaboxo pecopiarucaejawabetsia. Matacabipijijuameto petajuwecua itsacuenejawayo-ata apowecuanamatayabitsi.

⁷ Jehovah penajumecopatsiliwaissi Moisés-pijinëta pepopexanialiwaissi, tsipaji bajarapaliwaissi jiwi najamatabëcuenepeñëyorotsia-exanatsi Jehovaha-wabelia. Jehovah wajanaca-itorobiliwaissi apobecuene-aebitsi, tsipaji baja cajena pexaniajailiwaissi. Bajarapaliwaissi pejamatabëcuene, bewelija-matabecuenenëmi, peyapëtaenë naexana. ⁸ Jehovah penajumecopatsiliwaissi caejamatabëcuene xaina. Nexata, pajiwi jumecowënëta bajarapaliwaissi, jamatabëcuenebarëyaya-exanatsi. Jehovah pitorobiliwaissianë jumenapebeta. Nexata, bajarapaliwaissi jiwi jamatabëcuene-itayotatsi pacuenia exanaponaenajitsia. ⁹ Jiwi peyaiyataejawa Jehovah bitso xanepana. Daxitamatacabijawabelia beyaiyatane. Jehovah pitorobiliwaissianë, pexaniajailiwaissi

e 16:10 mëthëjawata: Bajaraxua tajëwelia Jesucristo yabarajumaitsinua. Taema Hch. 2:27; 13:35.
f 16:11 pecujanenia ponaponaenajë: Bajaraxua tajëwelia Jesucristo yabarajumaitsinua. Taema Hch. 2:25-28.

baja cajena. Najëpaeya daxitajiwi cuene-itawetabiaba, pibisiacue pexanaeyaniwa. ¹⁰ Jehovah, toxanepanatsi jiwi pejitsipaejawa nitorobiliwaisianë oronanijawa matatoxenetsia; bitso penamatamotsijawanë pexaniawiria-orojawa matatoxenetsia. Bajarapaliwaisianë bitso pemuxujitsipaeliwaisi, jabëra pejitsipaejawa matatoxenetsia, banaperijawawerena pejucaera. ¹¹ Nitorobiliwaisianë toxanepanatsi pecuene-itawetsinexatsi nijajiwitonënë. Nexata, itsa jumecowënëta bajarapaliwaisi, bitso pexaniacuenia yawenonaenatsi.

¹² Jiwi pijacuata aponatoyapëtae pijaneconi nenajumecopatsiliwaisinejewa. Jehovah, newecua-iquinaename bëpënëa paneconi xainajë.

¹³ ¡Newecua-iquinare be-ayaijamatabëcuenenë tanataejawa! ¡Pëtsa copatame bajarapapibisiacue tanejamatabëcuene-amoneyabijawa! Nexata, xaniawaetsia ponaponaenajë xamë nitabarata. Pinijineconi aponato-exanaponaenë tsane xamë nitabarata.

¹⁴ Jitsipajë daxita tajumaitsijawanë pecajamatabëcuenebarëyaya-exanaejawa. Jitsipajënia daxita tanajamatabëxainaeuene tajamatabë-ëthëtota pecajamatabëcuenebarëyaya-exanaejawa. Jehovah, xamë raja ne-ewetabiabame, neyacaranatabiabamenua piyaicuenejawanëwecua. Necapanepamenua pibisiacue ta-exanaeneconiwecua.

Salmo 22

**Mapasalmo David yaquina pacujinae Israel nacua
pewetsinë Saúl bejiobia-exanabiabatsi**

Israel nacua peyanacua-ewetsinë, David-pijinë, peyaquinaesalmoyo.

¹ Petsi-ayaijawatatsi David jumaitsi pewajëcaejawata Diosojawabelia mapacueniaje:

—Taja DIOSO, TajaDIOSO, ¿Detsa xuajitsia taja-epato^g necopatame? ¿Detsa xuajitsia tajë newecuaponaponame tanecapanepaeyaniwamë? ¿Detsa xuajitsia nenamuxujematame tacawajëtsijawa? ² TajaDIOSO daxitamatacabijebi cawajëcabiabatsi, itsiata aponejumetaemë, taneyawenonaenexamë. Bajarpacuenia merawijebi-ata aponajumecopatsinë nacuera-ewetsinejewanë.

³ »Xanë itsiata yapëtaniji xamë nianeconijibinëcuene. Pexaniacue nexanaponaponaenëxae, daxita Israel-pijinë pemomoxi cawënëxaniatabiaba. ⁴ Xamëjawabelia patajasalinaiwimi^h casiwanajamatabëcuene-copaba neyawenonaenexa, pebejiobia-exanaejawatatsi. Nexata, xamë capanepame. ⁵ Bajarapamonaemi cawajëca neyawenonaenexa. Nexata, xamë capanepame. Casiwanajamatabëcuenecopatana xamëjawabelia neyawenonaenexa. Nexata, xaniajaiya yawenoname. Apocopatsimë yawenonaenejewamë.

g 22:1 taja-epato: Bajaraxua Jesucristo yabarajumaitsinua. Taema Mt 27:46, Mc 15:34.

h 22:4 patajasalinaiwi: Israel-pijinë pemomoxi pijasalinaiwi yabaracuaicuaijai.

⁶»Xanë itsiata beweliamatabëcuenenënë. Jiwi xaniawaetsia apone-tae jiwitonënëcuenia.¹ Caranata saya, netane be-orotonëcuenia, bijaiya tanenanaëcotabiabinexa. Bajaraxuata tsaena, aponesiwajamatabëcuene-bëjai taneyawenonaenexa. Xanë saya jiwi jëäjëajaiya necapocaponabiaba.⁷ Daxita tanetaewi pibisiacuenia nebaracuaicuajai tsabiabi. Nexata, tane-cuenebaracuaicuajaijawata, bajarapamonae namatabocowewetabiaba,¹ tanejamatabëcuene-itajëtsinexa tajemajainëcuene. Najumecapocaponaeya neyabarajumaitsi tsanubena: ⁸ «Maponëje pina siwajamatabë-itaxutuajamatejema Jehovájawabelia peyawenonaenexatsi. Nexata, Jehová yawenonae pecapanepaenexa. Jehová pina bitso bajaraponë jitsipa. Nexata, itsa xaniajai becapanepatsi^k pitaxutuajamatejemanë», neyabarajai tsanubena.

⁹»Xamë nenaexanaeya-exaname taena pecototowecua. Nexata, neyapëtaeya-exaname taca-itaxutuajamatejemacuene, taena tami-apaejawata. ¹⁰ Taena pecototowecua tanaexanaewajënaeya xamë baja cajena ne-ewetabiabame, tanaexanaejawaweliacujinae-ata xamë tajaDIOSomë tsaponaponae. ¹¹ Pëtsa tajë newecuaponaponame, tsipaji yajamatabë-cuenebëjanë tajawajabitsaë tane-imoxoyotsijawata! Ajibi itsajiji-ata taneyawenonaenexa.

¹²»Tajawajabitsaëwi nematatorotsia nubena tane-itsacueniabinexa betoro pianapanaewi, bitso piasaëwi-ata pacuenia Basán nacuata peji-nawanapaewi. Nexata, tapanepacuene neto-ajibi bajarapamonaewecua. ¹³ Pacuenia pinijiwirianewëthë, petsobianë, nacuaibowësatsiaya pefiabinë pewatabinexa tsijumajirewa pexaenënexa, bajarapacuenia tajawajabit-saëwi neconi netsijumaxuaba ayaijumeta tanebaracuaicuajaitsiabiabijawata tananeconitsicuenia tatëpaenexa.

¹⁴»Pacuenia mera ajibi tsaponae pe-epanaxuabicujinae, bajarapacuenia asaëjibinë tsaponae. Daxita tasitoxi sitixipajunujunujä. Pacuenia jabëmani-xuxuto yacueyacuca piatajujawata pepora penaexanaenexa, bajarapacue-nia jamatabëcuenefaefaenajë bitso. ¹⁵ Cuaibotsewajë bitso, pacuenia peto-xotoxocaemuxupayo pecotiata pebobocaejawa. Nexata, ta-ebarecutoxae, ne-ebarecanatsana tamataxaxanawijawabetsia. Xamë nejamatabëcuene, Jehová, imoxoyo raja tatëpaejawa, caewëarena atsapërë tanaexanaenexa.

¹⁶»Pacuenia awiri pianapanaewi matatorotsia banubena pecue-yawi, bajarapacuenia xanë-ata pibisiacuene penajamatabëxainaewi, tajawajabitsaëwi, nematatorotsia nubena daxitajawa. Bajarapamonae be-awiri netaxujorone. Necobejoronenua.¹ ¹⁷ Tanejumalibijawata necaë-jëpa tanayenesinamata-ëjëtsijawa. Tajawajabitsaëwi aponecopatabiabi

i 22:6 jiwitonënëcuenia: Bajaraxua Jesucristo yabarajumaitsinua. Taema Jn 19:5. j 22:7 nama-tabocowewetabiaba: Bajaraxua Jesucristo yabarajumaitsinua Taema Mt 27:39; Mc 15:29; Lc 23:35. k 22:8 becapanepatsi: Bajaraxua Jesucristo yabarajumaitsinua Taema Mt 27:43. l 22:16 netaxujorone. Necobejoronenua: Bajaraxua tajëwelia Jesucristo yabarajumaitsinua, pacu-jinae cobematabiatsi, taxumatabiatsinua cruzajawabelia. Taema Jn 19:34, 37.

tanenaitaxutocaewetsijawa. ¹⁸ Bajarapamonae natsicobetsana tanaxatatsijawami. ^m Canaējēbiaya natsibixabajaraba pecanaējēbijawaxita peyapētaenexa ponē canacopatsijitsia.

¹⁹ »İtsiata baitsi jane, Jehová, pētsa tajē newecuaponaponame! İNaxatsiayo patsiaremena taneyawenonaenexamē, tsipaji raja xanē najamatabēcueneyaētajē xamēta taneyawenonaenexamē! ²⁰ İTajawajabitsaēwecua necapanepare, bajarapamonae tanebeyaxuabiyaniwa, pamonae acujirubeje pacuenia awiri pianaepanaenē!

²¹ »İNecapanepare tajawajabitsaē pecuaibowecua, tsipaji bajarapamonae jamatabēnebeyaxuaba tanebaranatsipaebijawata, pacuenia pinijiwiriane-wēthē petsobianē nawonuattiticaejitsipa pexaenē! İNecapaneparenua tane-itsacueniabiyaniwa nematatoyorotsia penubenaewi, pacuenia toro pianaepanaewi, piatatsacawi-ata!

²² »Xanē juya cawajunupaebianatsi tajamonaejawabelia. Daxita pecajumecowēnetsiwi penacaetuatsijawata, xanē tananucaexae, cawajunupaebianatsi daxita papexaniacuene jiwi to-exanabiabame —jai David Jehovájawabelia. ²³⁻³¹ [...]

Salmo 23

Dioso raja tane-ewetsinē be-oveja pewetsinēcuenia

Israel nacua peyanacua-ewetsinē, David-pijinē, peyaquinaesalmoyo.

- ¹ Pacuenia oveja pewetsinē xaniawaetsia ewetabiaba pija-ovejabitsaēto itsacueneyaniwa, bajarapacuenia Jehová ne-ewetabiaba. Nexata, itsacuenejawa-ata aponetsisajinae tsane.
- ² Pacuenia oveja pewetsinē jinawanapaeya-exana pija-ovejabitsaēto itsajota nawita pejanajuwipona, xaniawaetsia penacuera-ewetsinexa, bajarapijina pacuenia Jehová neponaponaeya-exanabiaba pexaniataxunaeta, nacuera-ewetsiaya taponaponaenexa. Pacuenia pewetsinē matabaponabiaba pewainae-ecaemenethaibējawabelia, o pija-ovejabitsaēto jamatejema piapaenexa, bajarapacuenia Jehová nematabaponabiaba itsaxuayo nejamatabēcuenexanepanaeya-exanaejitsia, apotanetsi-ayaijawata.
- ³ Nejumalixanepanaeya-exana. Nejamatabēcuenexa-asaēya-exananua. Nematabaponabiaba pexaniacuene ta-exanabinexa, xaniawaetsia tapatsinexa itsabelia ponajē. Ne-ewetanua pibisiacuene

m 22:18 *natsicobetsana tanaxatatsijawami:* Bajaraxua tajēwelia Jesucristo yabarajumaitsinua Taema Mt 27:35; Mc 15:24; Lc 23:34; Jn 19:24. **n 23:2** *pejanajuwipona:* Bajarapitsipona pexaniajawa oveja pebocaenexa, petotowijawanua pexaenexa. **o 23:2** *pewainae-ecaemenethaibējawabelia:* Ovejamona itacujunawa mera piapajawa itsajota mera nawota.

ta-exanaeyaniwa. Bajarapacuenia xanējawaberena exanabiaba, daxitajiwi peypätaenexa Jehová pexaniajamatäbäcuene pexinaejawa.

⁴Neyamerawibi-ata tsane, itsajota bitso netsi-ayai tanebeyaxuabinexa, itsiata apojunawinē tsane, tsipaji Jehováme neyajawaponaponabiabame. Pacuenia oveja pewetsinē pijanaebobeje^e cobena-ewetabiaba, pe-upitoxorotsinaebo, peypapijiwiconitsinaebo-ata, pija-ovejaxi peto-itsacuenebiyaniwatsi, bajarapacuenia xamē ne-ewetabiabame. Nexata, casiwajamatäbäcuene xanepanaeyaponaponabiabatsi.

⁵Netsiwējumatame, taxaejawa tanaxaenexa xamējawata. Nexata xamējawata, taxaejawa tsunaxaniji tajawajabitsaē pitabarata.^q Tanecopiapitsinexamē xaniawaetsia, netsimata-epaname petuxujuwi-aceitera. Papeca-apaejawata^r nerajutame tamatawējäa-apaeranexa, netowēnētame pematapitsipaejawabelia. Nexata, bitso barēyanē.

⁶Pepacuenie tane-asiwajawamē, tanebejiobiataejawamē-ata cabarēyanē tsabiabi tsane, daxita ta-asaēmatacabianētsaponaponaejawata. Cayajawaponaponaenatsi nijatemplobota daxitamatacabijawabelianexa.

Salmo 27

Dioso jiwi pejamatabäcuene-itayotsijawa, daxita piyaicuenewecua pecapanepaejawa-ata peliwaissi

Israel nacua peyanacua-ewetsinē, David-pijinē, peyaquinaesalmoyo.

¹Jehová raja nejamatabäcuene-itayota. Necapanepanua daxita piyai-cuenewecua. ¿Detsa pajiwi nexata cujunawianajē? Jehová raja pesaēta ne-ewetabiaba. Nexata, itsajiwi-ata apocujunawinē tsane.

p 23:4 *pijanaebobeje*: Oveja pewetsinē caponabiaba anijanaebobeje. Caenaebo upitsoxorona. Bajaraponaebota pewetsinē canacuenebabiaba bastón-cuenia penucaponaejawata, ovejanē pewésicawaetabinexa pewaēbijawata, itsa jume, perobotsinexa itsa wecuaponaejitsipa pepobitsaētowecua, itsa jume, peyotsinexa itsa joparecaejijsipa tajē pitajanituareca. Itsanaebo petotoyaecaenaebo pijinia. Bajarapanaebota peypapijiwiconitsinexa unupijiwi pianapanaewi, itsa jume, penacobetoxotsiwi. **q 23:5** *tajawajabitsaē pitabarata*: Bajayatami, Israel-pijinē pemomoxituatujäta mapacuenie xaina. Pacujinae itsanē copiapitsipa pijabojawaberena pebarajinaejiwitsi pijawajabitsaēnē, nexata bo pexainaenē tsicarucatsi pewetsijawa pijawajabitsaēnēwecua. Nexata, pijawajabitsaēnē ewetabiabanucatsi bopijibaupajawata, pepitsapaejawabelia pewaetabinexa icatsia. Bajarajota, taenucae-ata pebarajinaenē jamatejema petsuxaejawa pexaniapexaejawa, petsu-apaejawanua pematawējäa-apaeranē, acuenebi petsimaxēpatsinexa bo-ēnēabelia. Bajarapijinia pacuenia, Jehová ewetabiaba pamonaē itaxutuajamatejematsi pewetsinexatsi. Itsa abaxē jiwi itaxutuajamatejema tsaponaponaē bajaranäpōnejawabelia, nexata apocuenecaējēpaetsi dowathi, ainawi, xuiranotsiwi, pematacaetsiwi-ata, pitsacueniabinexa. Bajarapawajabitsaēwi nacopatanubena saya bepetaewicuenia baupajawata. Itsiata, pitaxutuajamatejemawimi itsa wecuajitsipa pesiwanajamatäbäcuene copatsinexa itsanējawabelia, itsa jume, itsacuenejawabelia Diosowecua, pewetsinexatsi, nexata Jehová pewetsicuenemitsi tocopiarucaejitsipatsi, pacuenia tocopiapatsipatsi itsa pitsapaejijsipa pewetsinētsi pijabowecua. Taema Éxo. 20:1-5. **r 23:5** *Papeca-apaejawata*: Salmo peyaquinaenē canacuenie bajarapajume pecuene-itajätsinexa pacuenia Jehová ayaicuenia jamatabäcuene barēyaya-exanabiaba pijajiwi, yawenonabiabanua. Bajaraxua yabara Jehová pamonaē eweta pejamatabäcuene barējajawa bepematapitsapaejawabelia.

²Tajawajabitsaë, pibisiajamatabëcuenewi, itsa netsimaxëpata tanebeya-xuabinexa picani, nacueratabiaba.

³Ayaibitsaëto tajawajabitsaë nematatoyoronae-ata, apojunawinë tsane, tsipaji itaxutuajamatejemanë tsaponaponae Diosojawabelia. Nesiwapitsapae-ata tajawajabitsaë tanebeyaxuabinexa, itsiata jamatejemanë tsane, tsipaji itaxutuajamatejemanë tsaponaponae Diosojawabelia.

⁴Caejawa baja wajëtajë Jehovahjawabelia tanetocopatsinexa. Bajaraxua bitso jitsipajë daxitacuene mapanacuapijicuene matatoxenetsiaje. Nexata, wajëtajë Jehovahjawabelia tanetocopatsinexa pijatemplobota taponaponae-nexa tasaëtsaponaponae-epato mapanacuataje. Jehovah pijabota itsa ponaponajë, tacanaëjëtabiabinexa pijacuene, tawajëcabiabinexanua pijatemplobonëta xua bitso pexaniacuene.

⁵Pamatacabi piayaicuene netocopiapatsiana, bajaraPonë nematayatsiana pijatemplobota, tawecuapanepaenexa piayaicuene. Itsa jume, nenutsiana ibotoxanetojumatatsia, tawecuapanepaenexa piayaicuene.

⁶Tajawajabitsaë, pamonae nematatoyorotsia netsimaxëpatsiana tawecuapanepaenexa Jehovah neyawenonaena. Nexata, xanë bajaraPonë taneyawenonaejamatabëcuene, pijatemplobota dajubiwi juya ofrendacuenia rajutsianajë bajaraPonëjawabelia. Naxëanaeyanua, wajita pexaniacuenia wënëxaniatsianajë taneyawenonaejamatabëcuene.

⁷«¡Jehová, nejumetaema tacajunatsijawa! ¡Nitaxutotsoniataema! ¡Nejumecanawiare! ⁸Itsa nejumaitsimë: 'Nejamatabëcueneta saya nimoxoyotsianame,' itsa nejamë, nexata baja tajamatabë-ëthëto caju-mepota. Tajamatabë-ëthëto cajumaitsi: 'Jehová, ca-imoxoyotsianatsi,' cajai.

⁹»¡Pëtsa newecuanasaicayabame! ¡Pëtsa anaeya nenawecua-itawetamenua nijajiwitonënë! Xamë raja neyawenonabiabame daxitacuenejawabelia. Xamë raja DIOSOMë, necapanepamenua tajawajabitsaëwecua. ¡Pëtsa necopatame taja-epato! ¡Pëtsa nexuabame!

¹⁰Taxa, taenabeje, nexuabi-ata tsipae, itsiata xamë, Jehovahmë, ne-ewetsipame daxitacuene yabara. ¹¹¡Jehová, neyapëtaeya-exanare nejamatabëcuene! ¡Nematacaponare nijanamutua, tsipaji tajawajabitsaë nenaitaxutoca-eweta! ¹²¡Pëtsa tajawajabitsaë tocopatame tane-exanaeyaniwa pacuenia nesiwanajamatabëxaina, tsipaji tawajabitsaë nesiwanajamatabëcuenewereta penajumetsënëtsiliwai-sita taneneconitsinexa! Nesiwanajamatabëcueneweretanua bitso tanebejiobia-exanaenexa.

¹³»Xamë taneyawenonaejawanexamë yabara, jamatabë-itsinë tsabiabi: 'Mapanacuataje, Jehovah taneyawenonaecuene taenajë icatsia', jamatabëjanë tsabiabi», cajaitsi Jehovah. ¹⁴¡Jehovájawabelia siwanajamatabëcuenecopare pecayawenonaenexa! ¡Ajamatabëcuenesaëmëre! ¡Pëtsa jamatabëcuene-faefaename! ¡Jehovájawabelia pepacuene siwanajamatabëcuenecopare pecayawenonaenexa!

Salmo 32

Jiwi pibisiacuene pexanaeconimi Dioso itsa wecua-
ajibia-exana, jiwi pebarëyajawa peliwaishi

Israel nacua peyanacua-ewetsinë, David-pijinë, peyaquinaesalmoyo.

¹ Jamatabëcuenebarëya tsane pajiwi Dioso siwajamatabëcueneceawatsi pijaneconimi, altar-jumata petajuitsixae dajubi pijaneconijamatabëcuene. ² Jamatabëcuenebarëya tsane pajiwi Jehová aneconijibia tanetsi, penawajunupaebixae matayatsinejewa daxita pibisiacuene pexanaejawa.

³ Pa-epatowajëto aponawecuapaebinë tajaneconi Diosojawabelia, apera-bësaëjibinë tsaponapona. Najamatabënaxainabiabajë bitso. Nawixaetaeya aëaëjanë tsabiabi daxitamatacabi. ⁴ Merawijebi, matacabijebi-ata, aponecopatsimë nenaneconitsia-exanaenejewamë tajaneconi yabara. Nexata, jamatejema apoponaponabiabinë.

⁵ Belia jamatabë-itsinë: «Diosojawabelia tsipaebianajë pibisiacuene ta-exanaejawa», jamatabëjanë. Nexata, Jehová catsipaebatsi daxita pibisiacuene ta-exanaejawa, cawecuamatayatsinejewatsi itsaneconitata. Nexata baja, xamë newecua-ajibia-exaname daxita pibisiacuene ta-exanaeconimi.

⁶ Bajaraxuata, nijajiwi itsa nacueneyapëtaena, penaneconitsijawa xamëjawabelia, caecuenia benawecuapaeba xamëjawabelia, pae-patota abaxë aponaneconitsia-exanaemë. Nexata, wecuapanepaena nenaneconitsia-exanaejawanexa.

⁷ «Xamë raja caxainatsi tanecapanepaenënexamë. Xamë ne-ewetabiabame tajawajabitsaë tane-itsacueniabiyaníwa. Nexata, daxita necapanepaewi yajawa, barëya ayaijumeta pacawënëxaniatatsi patanecapanepaejawamë yabara», janë Diosojawabelia.

⁸ Dioso nejumaitsi:

«Canaitaxutoca-ewetabiabianatsi. Camuxujiobabiabianatsi pexaniacuenia. Cayapëtaeya-exanabiabianatsi xua xanepana nexanabiabinexa. ⁹ ¡Pacuenia jamatabëcuene-itsi caballo, mula-ata, pëtsa xamë bajarajamatabëcuene-itsimë, tsipaji bajarapamonae apocajumecowënëtsi saya nijumeta nitorobi-jawa! Matapania itsa tsicuaiboxatatame pijafreno, cajumecowënëta. ¡Xamë pëtsa bajara-itsimë xanëjawaberena! Caecuenia nejumecowënëre», jai Dioso.

¹⁰ Pijamatabëcuenebejewi tonawitsianatsi pejamatabëcuenebëjaiya-exanabiabijawanexatsi. Pajiwi siwanajamatabëcuene copata Jehová jawabelia, bajarapajiwi bitso asiwaya ewetsianatsi.

¹¹ ¡Paxamë papexaniajamatabëcuenewimë Jehová pitabarata, pasiwajamatabëcuenebarëyamëre papecayawenonabiabijawa yabara! ¡Bajara Ponëjawabelia jamatabëxanepanaeya ayaijumeta patonaxëanare!

Salmo 33

**Wēnēxaniatsianatsi Jehová ayaijamatabēcuenenē
wajanacayawenonabiabinē daxitawecua**

¹¡Paxamē pexaniacuene pane-exanawanapaewi jamatabēcuenebarēyaya patonaxēanare Jehová! Pexaniacuene pexanaewi itsa wēnēcanaaxēana Jehová bitso pexaniacuene.

²¡Pawēñjoneya-exanare Jehová panetoracatsijawata panija-arpa, bajara-pacuenia patocanaxēanaename Jehová lirawiria-arpayo!

³¡Jehová patocanaxēanare pejanawajianē!⁵ Pexaniacuenia barēyaya patoracatsianame panecanaxēanaejawanēta. ⁴Bajarapacuenia patonaxēanaename tsipaji Jehová pijumeliwaisi pexaniajailiwaisi. Daxitajawa Jehová pexanaejawanē pexaniacuenia topitsapabiabatsi. Epatua itsajamatabēcuenenē apopexainaenē pexaniacuene pexanaejawawecua. ⁵Jehová asiwaya tane daxita pamonaē pexaniacuene pexanaewi, pamonaē-ata pexaniajamatabēcuenewi. Jehová wajanaca-asiwajawa yacāējēpa daxitanacuajawa.

⁶Jehová' pejumeta exana itaboxo, daxita pitayotsitulupujawanē yajawa.

⁷BajaraPonē mene caetuata caecowēta, manuamene pexanetsinexa. Pecaetuatetsicujinaē awajubua tsecae.

⁸Bajaraxuata, daxita nacuapijiwi beyaiyatane Jehová. Cujunawiaya-ata bejinawanapa bajaraPonē pitabarata, ⁹tsipaji raja pejumaitsijawata naexa-naxuaba daxitacuene. Pitorobixae daxitacuene pejumaitsicowēya naexana. Tsitecaeyanua nacopata.

¹⁰Mapanacuataje penamatacaitorobiwi siwanajamatabēcueneweretaabiaba xua exanaejitsia picani, itsiata Jehová to-itothianabiaba pesiwanajamatabēcueneweretsijawami. Bajarapacuenianua tobijianabiaba daxitaxua jiwi najamatabēcuenewereta pexanaenexa Jehovánejewa.

¹¹Itsiata baitsi jane, xua Jehová najamatabēcuenewereta pexanaenexa, bajaraxua tsitecaena daxitamatacabijawabelianexa. Daxitacuene Jehová penajamatabēxainaecuene pexanaenexa tsitecaena. Apotocopiarucaetsinua tsane.

¹²Bitso jamatabēcuenebarēya tsane panacuapijiwi xaina Jehová pijaDIOSocuenia peyawenonaenēnexatsi. Bajarapacuenia bitso jamatabēcuenebarēya tsane pamonaē natoyapētane Jehová pitapetsijawatsi pijajiwicuenia.

¹³Jehová athēbēwetsica naēcotabiabica mapanacuajawabet-sica, nexata taeyabiaba daxita mapanacuata pejinawanapaewije.

¹⁴Pe-ecaetronojawawetsica nacanaitaxutuaca-eweta daxitatsi mapanacuata wajajinawanapaewije. ¹⁵Jehová daxitajiwi pejamatabēcuenenē-exanaenē, bajaraxuata xua najamatabēxaina jamatabēcueneyapētaeyabiaba. Cueneya-pētanenua daxitajiwi pexanaejawanē.

¹⁶Mapanacuataje itsa pepopeyanacua-ewetsinē barēnawajabitsaēta petsi-maxēpatsiwi jawabelia, itsamonae pewetsiwi najamatabēxainabiaba pewecuapanepaenexa pijawajabitsaēwiwecua pinijibitsaēto penatoxainaexae pija-jiwi peyacaranatsiwi. Itsiata baitsi jane, bajaraponē apocuenecaējēpaetsi penacapanepaenexa bajarapapinijibitsaēto natoxinae-ata pijajiwi. Bajarapacuenia pecuene-aitatsacanē apocuenecaējēpaetsi penacapanepaenexa pijacuata piasaēnēxae. ¹⁷Bajarapacuenia caballojumata ponaeta jiwitonē, apocuenecaējēpaetsi caballo pecapanepaenexatsi pijawajabitsaēwecua. Caballo bitso asaē-ata tsipae, apocuenecaējēpaetsi pecapanepaenexa jiwitonē.

¹⁸Bajarapacuenia apocuenecaējēpaetsi-ata bajarapamonae penacapanepaenexa, itsiata baitsi jane, Jehová naitaxutoca-eweta pewetsinexa pajiwi ponapona cujunawiaya peyaiyataexae, pamonaenua siwanajamatabēcuenecopata bajaraponējawabelia piasiwaxaetsi pitaxutotsoniataenexatsi.

¹⁹Bajarapajiwi Jehová ewetabiaba pecapanepaenexa petēpaejawawecua, janibomatacabita-ata peyatēpaeyaniwa pijaanijawa.

²⁰Jehová bajarapitsipewetsinēxae, waxaitsi nexata jamatabēcuenewetawanapatsi bajaraPonē wajanacayawenonaewanexa, tsipaji baja Jehová wajanacayawenonaenē tsaponapona, wajanacayacaranatsinēxanua xua nacatsi-ayaijitsia. ²¹Jehová bitso siwajamatabēcuenēbarēya tsanetsi wajajamatabē-ēthēto jawawetsina, tsipaji itaxutuajamatejemaya siwanajamatabēcuenecopatatsi wajanacayawenonaenexa bajaraPonējawabelia.

²²—Itaxutuajamatejemaya patacasiwajamatabēcōpatsixae xamē Jehovámējawabelia, pacawajētatsi asiwaya pataneyajawaponaponaenexamē pataca-itaxutuajamatejemamatabēcuenecowēya —jaitsi wajasiwanajamatabēcuenecopabiwi Jehovájawabelia.

Salmo 34

Dioso wajanaca-ewetsijawa peliwaissi

Israel nacua peyanacua-ewetsinē, David-pijinē, peyaquinaesalmoyo.

¹Caematacabi canacujitsia pexaniajamatabēcuenē rajutabiabianajē Jehovájawabelia. Tawajēnaeyabelia pexaniacuenia wēnēxaniatabiabiana bajaraPonē. ²Jiwi jawabelia barēyaya nawajunupaebabiabianajē Jehová taneyawenonabiabijawa yabara. Beweliamatabēcuenewi penataewi, nejumetaena. Bajarapamonae-ata barēya tsane.

³¡Naxatsia! Wēnēxaniatsianatsi Jehová bitso ayaijamatabēcuenenē yabara. Pecuenecaējēpaenētsi-ata pinijicuene pexanaenexa yabara.

⁴Tajunawijawata, wajētajē Jehovájawabelia, taneyawenonaenexa. BajaraPonē nejumecowēnēta tawajētsijawa. Nexata, newecua-ajibia-exana daxita tajunawijawami. ⁵Pamonae Jehovájawabelia siwanajamatabēcuenecopata peyawenonaenexatsi, nexata itsa yawenonatsi, jamatabēcuenēbarēya tsabiabi, tsipaji bajarapamonae aponajamatabēcuenecueratsi bajaraPonējawabelia.

⁶Xanë, betajibinë, wajëtajë Jehovájawabelia. BajaraPonë nejumecowë-nëta tawajëtsijawa. Nexata, daxita papibisiacuene netocopiapata, tayajamatabëcuenebëjajawami, newecua-ajibia-exana. ⁷Pamonaë Jehová yayatane, bajarapamonaë bajaraPonë pija-ángelnë matatoyorotsia ewetatsi itsacueneyaniwa.

⁸Jehová pajamatabëcuene-ëjëtsianame. Nexata, payapëtaename pexaniamatabëcuene pexainaejawa bajaraPonë. Pajiwi siwanajamatabëcuene-copata bajaraPonëjawabelia, bitso barëya tsaponaponae. ⁹¡Paxamë Jehová papijajiwimë, payaiyataema, tsipaji pamonaë yayiatane bajaraPonë, pexaniacuene to-exanabiaba bajarapamonaëjawabelia! Nexata, bajarapamonaë aponamatawenonabiabi itsacuenejawa-ata. ¹⁰Newëthë piatatsacanë-ata, itsajawata piajani tsabiabi. Jiwi apo-aitatsaca-ata, pamonaë siwanajamatabëcuene-copata Jehovájawabelia, bajarapamonaë apoto-ajibitsi tsane penamatawenonaecuene, tsipaji bajaraPonë rajutabiabatsi.

¹¹Paxamë papewëjëawimë, paxamë-ata papejanawimë, naxatsia. ¡Panejumu-metaema! Pacamuxujiobianatsi Jehová paneyaiyataenexa. ¹²¿Detsa pajiwi jitsipa jamatabëcuenebarëyaya xaniawaetsia peponaponaenexa? ¿Detsa pajiwi jitsipa bajayajebi piasaëtsaponaponaenexa?

¹³Paxamë bajaraxua itsa pajitsipame, panajamatabëcuene-cataitsianame pibisialiwaitsi panecuaicuaijaniwa. Panajamatabëcuene-cataitsianamenua penajumetsënëtsiliwaitsi panepaebiyaniwa. ¹⁴Pibisiacuene pane-exanabiabijawa, pacopabianame. Pexaniacuene pa-exanabiabianame. Daxitajiwijawabelia pabarajamatabëcuene-xanepanabiabianame. ¡Pëtsa pacopatame daxitajiwijawabelia panebarajamatabëcuene-xanepanaejawa!

¹⁵Jehová naitaxutoca-eweta pexaniacuene pexanaewi. Namuxuna-ewetanua pewajëtsijawatsi. ¹⁶Pibisiacuene pexanaewi, Jehová anaeya naëcota. Pibisiacuene pexanaewi, bajaraPonë ajibia-exanaena mapanacua-wecuaje. Nexata, bajarapamonaë matawëjëa itsajiwi-ata aponajamatabëna-pitsitsi tsane.

¹⁷Pexaniacuene pexanaewi, wajëta Jehovájawabelia. Nexata, bajaraPonë jumecowënë-tatsi pewajëtsijawa. Nexata, daxita papibisiacuene tocopiapatatsi, bajarapapibisiacuenewecua Jehová capanepatsi. ¹⁸Pamonaë bitso najamatabëxaina itsacuene itsa tocopiapatatsi, bajarapamonaë Jehová yajawaponapona. Pamonaë yajamatabëcuenebëjai pibisiacuene pexanaeneconi, bajarapamonaë Jehová wecua-ajibia-exana pejamatabëcuenebëjajawami.

¹⁹Pexaniacuene pexanaewi-ata, pibisiacuene tocopiapatsianatsi. Itsiata, daxita bajarapapibisiacuenewecua Jehová capanepaenatsi.

²⁰Tsitecaena daxita pesi. Jehová apocopatsi tsane caesito-ata pesi-epatsicabiabinexatsi. ²¹Pamonaë bitso pibisiacuene exana, bajarapamonaë pibisiacuene tocopiapatsianatsi pibisiacuene pexanaejawa pejamatabëcuene. Pamonaë itoya pexaniacuene pexanaewi, bajarapamonaë Dioso naneconitsia-exanaenatsi. ²²Pamonaë xaniawaetsia Jehová tojinawanapa, bajarapamonaë bajaraPonë capanepaenatsi pijawajabitsaëwecua. Pamonaë siwanajamatabëcuene-copaba Jehovájawabelia, bajaraPonë aponaneconitsia-exanaetsi tsane.

Salmo 37

¡Siwanajamatabëcuenecopare Diosojawabelia, pecayawenonaenexa!

Israel nacua peyanacua-ewetsinë, David-pijinë, peyaquinaesalmoyo.

¹¡Pëtsa jamatabëcuenebëjamë pibisiacuene pexanaewi yabara! ¡Pëtsa cueneca-ëbamenua bajarapamonae pibisiacuene pexanaejawa! ²Pacuenia ponatoxi bepijia tsaquena, nexata tëpa, bajara-itsamatacabi itsi tsane pibisiacuene pexanaewi pijaneconi yabara.

³¡Siwanajamatabëcuenecopare Jehovahjawabelia! ¡Pexaniacuene exana-biabare newajënaeyabelia! ¡Mapanacuataje neponaponae-epato, pëtsa copa-tame Dioso nejumecowënëtsijawa!

⁴¡Jehová asiwamëre daxitacuenewecua! Nexata, bajaraPonë carajutsiana xua bitso jitsipame nejamatabë-ëthëtojawawetsina.

⁵Njamatabëcuenenacaewetsianame Jehovahjawabelia pecajamatabëcuenematacaponaenexa daxitacuenejawalia. ¡Siwanajamatabëcuenecoparenua bajaraPonëjawabelia pecayawenonabiabinexa! Nexata, daxitacuene yabara cayawenonabiabiana. ⁶Najumetsënëtsiaya itsamonae cabaracuaicuaijai-ata tsane, itsiata Dioso daxitajiwi xaniawaetsia yapëtaeya-exanaena xamë pibisiacuene aponexanaejawa.

⁷Jamatabëcuenebëjamënejewa, bajayajebi-ata ewetsianame Jehovah pecayawenonaejawanexa. ¡Pibisiacuene pexanaewi, pexainaejawa pewajënaeyabelia bitso ayaijawa xainaponae-ata, itsiata Jehovah itsa aponeconitsia-exanaetsi, pëtsa siwajamatabëcuenebëjamë!

⁸¡Pëtsa anaepanabiabame! ¡Copare nianaepanabiabijawa, tsipaji itsa anaepaname, xamë-ata pibisiacuene exanaejitsipame! ⁹Pibisiacuene pexanaewi, Jehovah werebiabiana. Itsiata, pamonae siwanajamatabëcuenecopaba bajaraPonëjawabelia, bajarapamonae Dioso rajutsiana mapanacuaje.

¹⁰Pibisiacuene pexanaewi, cae-epatoyocujinae saya ajibi tsane. Jaitsi-atamë, apocaxitarabimë tsane. ¹¹Pamonae beweliamatabëcuenewi natane, Dioso rajutsiana mapanacuaje. Jamatabëcuenebarëyaya xaniawaetsia jinawanapaena. ¹²Pibisiacuene pexanaewi, pibisiacuene jamatabë-exana pexaniacuene pexanaewijawabelia. Pibisiacuene pexanaewi, itoya tsabiabi pexaniacuene pexanaewi. ¹³Petuxanenë Dioso saya capocapona pibisiacuene pexanaewi, tsipaji yapëtane imoxoyo baja pewajënae penaneconitsia-exanaejawanexa bajarapamonae.

¹⁴Pibisiacuene pexanaewi, nawemarajona pija-espadanë. Pijabitsabianë-ata tumaëbababa pebeyejebinexa bepejiobiwi, pexaniacuene pexanaewi. ¹⁵Itsiata, bajarapamonae beyejebinejewa, beyejebianatsi pija-espadanëta. Jamatabëjorobacacuatsianatsi. Pijabitsabianëmi totsicababenatsi.

¹⁶Pibisiacuene pexanaewi, ayaijawa pexainaejawa xinae-ata, amata-mobi Diosojawabelia. Pexaniacuene pexanaewi, bejiobi-ata, namatamota

Diosojawabelia, ¹⁷ tsipaji Jehová werebiabiana pibisiacuene pexanaewi. Pexaniacuene pexanaewi, juya yawenonaena.

¹⁸ Pianeconijibiwi, Jehová yawenonabiaba. Nexata, xua bajaraPonë rajutsiana, apowerewerecae tsane daxitamatacabijawabelianexa. ¹⁹ Pianeconijibiwi, janibomatacabita apopijani tsane. Xainaena pexaejawa.

²⁰ Bajarapacuenia Jehová apoyawenonae pibisiacuene pexanaewi. Pacuenia wayafota petsewipona isotota tajua, pacuenia ètsëxë-ata caewa bepíjia, bajarapíjia pacuenia pibisiacuene pexanaewi werewerecaena.

²¹ Pibisiacuene pexanaewi, xua namatawenona, cowaetabiaba itsamonaewajawabelia. Itsiata, xua cowaeta, apomatamotabiabi. Juya, pexaniacuene pexanaewi, itaxutotsoniataeyabiaba bepejiobiwi. Xua xaina, tsicobetsana-biaba bepejiobiwi peyawenonaenexa.

²² Pamonaehová yawenonabiaba, bajarapamonaerajutsiana mapanacuaje. Pamonaepíjia Jehová naneconitsia-exanaena pibisiacuene pexana-biabineconi pejamatabëcuene, bajarapamonaewerebiabiana.

²³ Pexaniacuene pexanaewi, Jehová yapëtaeya-exanabiaba pexaniacuene pexanabiabinexa. Muxujiobabiabanua pacuene bajaraPonë jitsipapeto-exanaenexatsi pesiwajamatabëcuenebarëyanexa. ²⁴ Pexaniacuene pexanaewi, jopae-ata tsane Diosopejumeliwaisiwecua, itsiata bajayajebi bajarapacuenia apotsitecae tsane, tsipaji bajarapamonaehová cobewaeta-baponapona bepíjia peyotsinexa.

²⁵ Perujunënë baja. Itsiata, pejewaxinëjawaweliacujinaenë caeto-ata apotaenë Diosopexuabijawa pexaniacuene pexanaewi. Bajarapamonaepëxënatojiwi-ata, apotaenë itsamonaewajawabelia palata amoneya pewajëcaejawa, penatocomuatsinexa pexaejawa. ²⁶ Pexaniacuene pexanaewi, itaxutotsoniataeyabiaba itsamonaehowa xaina, amoneya rajutabiaba. Itsajawata tsicopatabiaba. Pexaniacuene pexanaewi pexi-ata, bajarapacuenia itsamonaewitaxutotsoniataeyabiaba.

²⁷ Copare pibisiacuene nexanaejawa! Pexaniacuene exanabiabare! Nexata, panacuata ponaponame, xaniawaetsia ponaponaename daxitamatacabijawabelianexa. ²⁸ Jehová raja asiwa pexaniacuene pexanaewi. Pamonaewumecowëñëtanapapitorobicueniatsi, bajarapamonaehová apoxuabi tsane. Juya, pamonaepibisiacuene exana, bajarapamonaebajaraPonë werebiabiana. Pibisiacuene pexanaewi pexi, pemomoxi-ata, ajibi tsane.

²⁹ Pexaniacuene pexanaewi Jehová rajutsiana mapanacuaje, daxitamatacabijawabelianexapejinawanapaenexa.

³⁰ Pexaniacuene pexanaewi, xaniawaetsia muxujiobabiaba itsamonaehowa bajarapamonaewapëtane xua pexaniacuene pexanaenexa, xua-ata pibisiacuene pexanaeyaniwa. ³¹ Pejamatabë-ëthëtota bajarapamonaehowa xaina Diosopejumeliwaisi. Nexata, Diosopejumeliwaisiwecua apojopae tsane.

³² Pibisiacuene pexanaewi, naitaxutoca-ewetabiaba pexaniacuene pexanaewi pebeyejebinexatsi. ³³ Itsiata, Jehová apocopatsi tsane pibisiacuene pexanaewi pebeyejebiyaniwa bajarapamonae. Itsamonae najumetsënëtsiaya neconitsi-atatsi tsane juez-nëjawabelia, itsiata bajaraPonë apocopatsi tsane pexaniacuene pexanaewi penaneconitsia-exanaeyaniwatsi.

³⁴ ¡Najamatabëcuene-ewetsiaya siwanajamatabëcuenecopare Jehovájawaabelia pecayawenonaenexa! ¡BajaraPonë jumecowënëre! Nexata, pexaniacuene cato-exanaena. Carajutsiana mapanacuaje necanacopatsinexa nija-iracuenia. Nijacuata taename pacujinae werebiabiana pamonaemi pibisiacuene pexanaewi.

³⁵ Bajayata taniji pibisiacuene bitso pexanaenë. Bajaraponëmi bitso ayaijamatabëcuenenë nataeya ponaponabiaba. ³⁶ Itsiata, bajaraponëmi bajayajebi apoponaponae. Bepijia tëpa. Nexata, jaitsi-atanë, apocaxitajarabinë.

³⁷ ¡Canaëjère xaniawaetsia peponaponaejawa planeconijibijiwi, pibisiacuene apopexanaejiwi! Bajarapajiwi pewajënaeyabelia jamatabëcuenexanepanaeya xaniawaetsia ponaponaena.

³⁸ Pibisiacuene pexanaewi, Jehová werebiabiana.

³⁹ Pexaniacuene pexanaewi, Jehová yawenonabiaba. Nexata, piayaimatacabita caranatabiaba itsacueneyaniwa. ⁴⁰ Bajarapamonae Jehová yawenona pewecuapanepaenexa pibisiacuene pexanaewi. Capanepatsinua pesiwanajamatabëcuenecopatsixae bajaraPonëjawabelia pecapanepaenexatsi.

Salmo 40

**Dioso peyawenonaexaetsi, pexaniajamatabëcuene
perajutsijawa Diosojawabelia peliwaaisi**

Israel nacua peyanacua-ewetsinë, David-pijinë, peyaquinaesalmoyo.

¹ Bajayajebi ewetajë Jehová taneyawenonaenexa. BajaraPonë nenamuxuna-eweta tawajëtsijawa. ² Nexata, bitso piayaicuenewecua Jehová necapanepa. Nenuta baja itsajota apo-ayai. ³ Jehová nenaxëanaeya-exana pejanawaji. Nexata, tanaxëanaejawata, pexaniajamatabëcuene rajutajë wajaDIOSojawabelia. Jiwi itsa newënëliwaisitaena ayaicuenia Jehová taneyawenonaponaejawa, yaiyataena bajaraPonë. Nexata, bajarapamonaeajuwënëwi, ayaibitsaëtoxaneto, siwanajamatabëcuenecopabiana Jehovájawabelia.

⁴ Pamona ayaijamatabëcuenewi apopenataewi, pamona-ata asiwaya aponawajëcabiabi jumapecataenëanëjawabelia, bitso jamatabëcuenebarëya itsa siwanajamatabëcuenecopabiana Jehovájawabelia. ⁵ Tajatuxanenëmë, tajaDIOSomë, pinijicuene nexanaejawa paneto-exanabiabame. Panejamatabënajinabiabame. Itsajiwi-ata apocaëjëpaetsi bajarapitsipinijicuene pexanaenexa. Bitso nawita pinijicuene nexanaejawanë. Nexata, aponecaëjëpae daxita pinijicuene nexanaejawanë tanamata-ëjëtsinexa.

⁶Apojitsipaemē xuanē jiwi carajutabiaba ofrendacuenia. Apojitsipaemēnua dajubinē-ata pebeyaxuababibijawa pewi pecarajutsinexa ofrendacuenia. Neyapētaeya-exaname mapacueneye. Xuanē jiwi ofrendacuenia carajutabiaba, bajaraxuanē pejamatabēcueneta acuenebi jiwi newecua-ajibia-exanaejawa pibisiacuene pexanaeneconi. ⁷⁻⁸Bajarajane manucajēje. Pacuenia jitsipame, barēyaya tacato-exanaenexa. Nijumeliwaisi xainajē tajamatabē-ēthētota.

⁹Daxitajiwi baja tsipaebajē pexanialiwaissi. Tsipaebajēnua xamē newecua-ajibia-exanaejawa pibisiacuene pexanabiabineconimi. Xamē yapētaneme daxitajiwi tatsipaebijawa bajarapaliwaissi. ¹⁰Apoyawajunuaxainaenē baja-rapapexanialiwaissi. Daxita nijajiwi tsipaebaponajē, jiwi nitaxutotsoniataejawa. Tsipaebaponajēnua jiwi, necapanepaejawanexa-ata. Apoyawajunuaxainaenē jiwi bitso niasiwajawa. Tsipaebaponajēnua nexaniajainēcueneta-ata.

¹¹⁻¹²Tajatuxanenē, netocopiapata baja bitso apopexanepanaecuenejawanē. Orijibia, pibisiacuene ta-exanaeneconi, bitso yanajamatabēxainajē, tsipaji bitso ayaijawa tanamata-ējētsicapanepaejawawecua. Nexata, xamējawa-belía bitso auranē. Cacujunawatsinua. Neconecojanē tacajunawi. ¡Nexata, nitaxutotsoniataema! ¡Asiwaya netaeyabiabare! ¡Nelumeliwaisi, pexania-jailiwaissi, pejamatabēcueneta nenayajiwiyapētaeya-exanare pibisiacuene ta-exanaeyaniwa!

¹³¡Tajatuxanenē, pexaniacuene neto-exanare! ¡Necapanepare! ¡Naxat-siayo! ¡Renamēre taneyawenonaenexamē! ¹⁴⁻¹⁷[...]

Salmo 41

¡Jehová, nitaxutobejiobiataema!

Israel nacua peyanacua-ewetsinē, David-pijinē, peyaquinaesalmoyo.

¹⁻³[...] ⁴Bajarapitsiwi Jehová pebejiobiataenēxae, xanē jumaitsinē:

—¡Jehová, nitaxutobejiobiataema tanebarajamatabēcuenecaewinexamē tajaneconimi! ¡Nejamatabēcuenematejemaya-exanare, tsipaji pibisiacuene exanajē xamē nitabarata!

⁵»Tajawajabitsaēwi tanebaracuaicuajaitsabiabijawata nesiwajamatabē-itsi tsabiabi: «¿Detsa nexata pacujinae maponē tēpaena? ¿Detsa pacujinae bajaraponē pijawiriamaēto naxuabajopaena?», nesiwajamatabējai tsabiabi.

⁶Pamonae nesiwaxainabiaba betane-asiwawicuenia, itsiata bajarapamonae apopena-urabiwi. Penajumetsēnētsiwi saya. Nexata, itsa nesiwaxainabiaba, saya namuxuca-ewetabiaba pibisialiwaissianē xanē yabara tanebaracuaicuajainexa najumetsēnētsiaya tanewecuaponaecujinae.

⁷»Pamonae nitoyanaēcota, bajarapamonae nacaetuatabiaba tanebaracuai-cuijainexa. Bajarapamonae nesiwajamatabē-itsi tsabiabi taponaponaejawa nabejiobitsiaya betajaneconi yabara.

⁸»Bajaraxuata, neyabarajumaitsi tsabiabi: «Bajaraponē awitane tsaponaponae pijaneconijamatabēcueneta, nexata yawixaeya boca pijacamata.

Bajarapacamawecua aponamatacotsi tsane pejamatejemanë», nebarajai tsabiabi.

⁹»Bitso taneyapëtaenë xaniawaetsia, ponëjawabelia xanë itaxutuajama-tejemanë tsabiabi, ponë-ata yajawaxaeyabiabajë, bajaraponë tajawajabit-saënë“ naexana —janë xanë Jehovahjawabelia. ¹⁰⁻¹³ [...]

Salmo 46

Dioso wajanacayajawaponaponaewajawa peliwaishi

Mapasalmo obijitsia Corépijinë pemomoxi.

¹DIOSO raja wajanaca-ewetsinë daxita piyaicuenewecua. Wajana-canasaërajutsinëua. ²⁻³Bajaraxuata, apojunawitsi tsane, itsamatacabi mapanacuaje werewerecae-ata. Pinijitsutoxanetonë manuamenejawabelia othopae-ata tsane, manuamenepijimalataca ayaicuenia najumetsi-ata tsane, bajarapamalataca pinijitsutonë jëabi-ata, apojunawitsi tsane.

⁴DIOSO pijatamarata pejinawanapaewi bitso siwajamatabëcuenenëbarëya pamene bocapona bajarapatomaratuatujëa, DIOSO ayaijamatabëcuenenë daxitawecua peponaponaetomarata.

⁵DIOSO peponaponaexae bajarapatomarata, apowerewerecae tsane. Ajena matacabi tsina, petsi-ayaijawatatsi, DIOSO yawenonaena bajarapatomarapijiwi.

⁶DIOSO pejume ayaicuenia penajumetsijawata, Itsanacuanëpijiwi ajamatabëcuenecowëbi tsane. Peyanacua-ewetsinacuanëjawa jiwi neco-necojai tsane pecajunawi. DIOSO pijumetanua werebiabiana daxita mapanacuamije.

⁷Jehová, pijajiwiwajabitsaë penamatacaitorobinë, nacayajawa-ponapona. Wajasalinainë Jacob pijaDIOSO nacacaranata daxita piyaicuenewecua.

⁸¡Naxatsia! ¡Pataema papinijicuenejawanë itsamatacabi Jehovah exa-naena! ¡Pataemanua pacuenia werebiabiana mapanacuapijiwije! ⁹Bajara-Ponë copiarucaeya-exanaena daxitanacuanëjawa penawajabitsaëtsicuenemi. Daxita wajabitsaë pijabitsabianëmi to-epatsicababena. Cuererebonëmi-ata to-epatanababena. Daxita xuanë wajabitsaë canawajabitsaëta, tajuitsiana isotota.

¹⁰Jehová jumaitsi jiwijawabelia: «¡Moya panubenare! Panecuenecanaëjët-sianame, paneyapëtaenexa DIOSONëcuenenë. Daxitanacuanëpijiwi necue-neyapëtaena ayaijamatabëcuenenëcuenë. Daxitanacuanëjawa pijinia neyai-yataena», jai.

¹¹¡Jehová, pijajiwiwajabitsaë penamatacaitorobinë, nacayajawa-ponapona! ¡Wajasalinainë Jacob pijaDIOSO nacacaranata daxita piyaicuenewecua!

Salmo 50

Dioso raja jiwi pijaneconi pexaniajainëcuenia pecanaëjëtsinë

Mapasalmo yaquina Asaf-pijinë, penamatacaitorobinë penaxëanaewi templobota.

¹ Jehovah, ponë ayaijamatabëcueneDiosonë daxita itsadiosowiwecua, cuai-cuaijai baja mapanacuapijiwijawabeliaje. BajaraPonë junata daxita pamonae pejinawanapaewi waëyabetsia, pemutuabereca-ata pejinawanapaewi. ²⁻⁴ [...]

⁵ BajaraPonë jumaitsi daxita mapanacuapijiwijawabeliaje:

—Panetocaetuatsianame pamonaesiwaya taneyaiyataewi ajamatabësäë tsawanapae, pamonaesi nənajumeliwaisicajunua xanëjawaberena dajubi petajuitsijawata tawënëta —jai DIOSO.

⁶ DIOSO itsa cobecowëtanetsi itaboxo, nacayapëtaeya-exana DIOSOpexaniajainëcuenia pecanaëjëtsinë.^{*} Bajaraxuata, yapëtanetsi DIOSO xaniajaiya petocanaëjëtsinë pijaneconi pexainaewi, pijaneconi apopexainaewi-ata.

⁷ DIOSO jumaitsi Israel-pijinë pemomoxijawabelia:

—¡Panējumetaema tajajiwi Israel papemomoximë! Pacatsipae-bianatsi xua yabara pananeconitame xanëjawaberena. Xanë raja Diosonë, panijaDiosonënë tsaponaponaesi. ⁸ Xanë raja apopacacueni-itawetsitsi panecapatabibijawa dajubi panetajuitabiabinexa altar-jumata pacuenia pa-exanawanapame panijaneconijamatabëcuene, patacasijawamatabëcueneceawinexa.

⁹ »Xanë picani aponamatawenonaenë panecapatabibijawa panijabecerroyajuwënëwi, panijacabrayajuwënëwi-ata tana-abatsinexa. ¹⁰ Aponamatawenonaenë, tsipaji daxita unupijiwi xanë tajanëxi. Padajubiwi jinawanapa petsutonëjawa, bajaraponëxi-ata tajanëxi. ¹¹ Bajarapacuenia yapëtanijiji daxita pepunaewi tajanëxicuene, daxita pamonaenua petusatonacuajawa pejinawanapaewi.

¹² »Xanë tajani-ata tsipae, taxaenexa apopacanamitsawajëcae tsipaetsi patanerajutsinexamë, tsipaji daxita mapanacuataje xua ya-ënëaboca, bajaraxua daxita tajajawa. ¹³ ¡Pacanaëjëre! ¿Xanë tsaja vacawi taxaenë? ¿Xanë tsaja pebito cabrajana ta-apaenë? ¡Jume cajena! ¹⁴ Dajubi pata-nerajutabiabijawamëwecua altar-jumata matatoxenetsia jitsipajë pata-nerajutabiabijawamë pexaniajamatabëcuene, bajarapacuenia pataneto-exanaenexamëna pepopanijaDiosonënë xua najumecapanepaeya panejumaitsimë pane-exanaenexa. ¹⁵ Pacujinae payajamatabëcuenebë-jamë tsawanapae itsacuenejawa yabara, panewajëtsianame. Nexata, xanë pacayawenonaenatsi. Paxamë juya yaiyataeya panewënëjoneya-exanaename itsamonaejawabelia —jai DIOSO Israel-pijinë pemomoxijawabelia. ¹⁶⁻²³ [...]

Salmo 51

Dioso wajanaca-itaxutotsoniataejawa peliwaishi

(Mapasalmo pepopeyanacua-ewetsinē David yaquina profeta Natán

pemuxujobicujinaetsi, peyacajërëtsixae Uriapijinē pijawa, Bestabé). Taema 2Sa 11-12

¹¡DIOSomē, jiwi asiwaya netaenē, nitaxutotsoniataema! ¡Newecua-ajibia-exanare pibisiacuene ta-exanaeneconi! ²¡Nejamatabëcuenequiare pibisiacuene ta-exanaeneconi! ¡Newecua-ajibia-exanare pibisiacuene ta-exanaeneconi!

³Yapëtaniji xamëjawabelia tananeconitsijawa pibisiacuene ta-exanaexae. Daxitamatacabi, merawijebi-ata, najamatabënanotabiabajë pibisiacuene ta-exanaejawa. ⁴Pibisiacuene itsa exanajë, pacuene xamë nitawetame, naneconitajë xamëjawabelia. Pibisiacuene itsa exanajë, xamë netaneme. Nexata, xanepana pacuenia nenaneconitsia-exaname pibisiacuene ta-exanaexae.

⁵Taena tanenacoxitsijawaweliacujinae, pibisiacuene jamatabë-exanabiabajë. Taena pecototowecua tanaexanaecujinae, pibisiacuene exanabiabajë. ⁶Xamë jitsipame taxaniajainexa tajamatabë-ëthëtojawawetsina. ¡Necujarubare tajamatabë-ëthëtota tayapëtaenexa pexaniajailiwaishi!

⁷¡Nejamatabëcuenequiare pajanata nejamatabëcuene axuirajibia-exanaejitsiamë! Nexata, tajamatabëcuene-axuirajawa, ajibi tsane.

⁸Tanenaneconitsia-exanaecujinaemë, nejamatabëcuenebarëyaya-exanaename jamatabëcuenebarëyaya icatsia taponaponaenexa. ⁹¡Pëtsa baja najamatabënapitame pibisiacuene ta-exanaejawanë! ¡Newecua-ajibia-exanare pibisiacuene ta-exanaeneconi!

¹⁰¡DIOSomë, netocopare tajamatabëcueneexanepanaenexa! ¡Netocoparenua tasiwanajamatabëxainabiabinexa ëpexaniacuene! ¹¹¡Pëtsa nena-wecuaxuabame daxitamatacabijawabelianexa naxuabiaya tacawecuaponaponaeyaniwa! ¡Pëtsa newecuapitamenua nijaEspíritu Santo! ¹²¡Icalsia jamatabëcuenebarëyaya neponaponaeya-exanare, tajaneconi tanewecua-ajibia-exanaexaemë! ¡Nejitsipaeya-exanarenua, tacajumecowënëtabiabinexa pacuenia nitorobame!

¹³Nexata, pibisiacuene pexanabiabiwijawabelia, nejumeliwaishi tsi-paebabiabianajë. Nexata, pibisiacuene pexanabiabiwi-ata pibisiacuene pexanabiabijawawecua, najamatabëcuenepeñëyorotsiana xamëjawabelia. ¹⁴¡DIOSomë, pëtsa nebeyaxuabame tanenaneconitsia-exanaenexamë pibisiacuene ta-exanaeneconi pejamatabëcuene! Xamë raja caenëmë cacaëjëpa tanewecua-ajibia-exanaenexamë ta-exanaeneconi. Nexata, xanë wajita canaxëanaenajë pibisiacuene ta-exanaeneconimi tanewecua-ajibia-exanaejawamë.

¹⁵¡Necuaicuajaiya-exanare! Nexata, xamëjawabelia jumaitsinë tsane: «¡DIOSomë, xamë bitso ayaijamatabëcuenenëmë!», janë tsane.

¹⁶ Apojitsipaemē saya jema dajubiwi ofrendacuenia tacarajutsijawa. Itsa jitsipaejitsipame, carajutsipatsi. Xamē aposiwabarēyamē dajubinē ofrendacuenia tacatobeyaxuabijawa. Apojitsipaemē dajubiwi ofrendacuenia altariumata tacatotajuitsijawa. ¹⁷Xamē jitsipame pajiwi bitso yajamatabēcuenebėjai pibisiacuenē pexanaeneconi. Aponaitaxutojematsimē pajiwi bitso yajamatabēcuenebėjai pijapibisiacuenē pexanaeneconi.

¹⁸ ¡Israel-pijinē pemomoxi nitaxutotsoniataexae, pexaniacuenē to-exanare! ¡Yawenonare bajarapamonae icatsia pexanebinexa Jeruslén tomara matatoyorotsia peyacaranatsijawaxaneto! ¹⁹Nexata, nijajiwi pejamatabē-ēthētojawawetsina pecajumecowēnētawanapaewi, ofrendacuenia becerro ita catobeyaxuaba, bajarapawī altar-jumata ita catotajuita, siwabarēyamē tsane.

Salmo 53

Mapanacuapijiwi apopenatsiwajēnaecanaējētsiwi, pibisiacuenēnua pexanawanapaewi

(Sal 14:1-7)

Pemuxujibiliwaisi penaxēanaewi pepopenamatacitorobinēnexa.

Pecanaējētsia-exanaesalmonexa, David peyaquinaesalmo

¹ Pajiwi apopenatsiwajēnaecanaējētsiwi jamatabēcuenenawēxaniabiaya jamatabējumaitsi tsabiabi: «Ajibi cajena DIOSO», jamatabėjai.

Nexata, penajamatabēcuenēbijianaējiwi tsaponaponae.

Pepopiabejewanē bitso exanaponapona. Caejiwi-ata pexaniacuenē apo-exanaponaponae.

² DIOSO baja cajena athēbēwetsica penaitaxutoca-ewetsinē, pecuēnetaenexa mapanacuapijiwi pexanawanapaecuenēje, peyapētaenexa ita pepacujiru nacopata caejiwi penatsiwajēnaecanaējētsijiwi, pejaitsijiwinexa DIOSO.

³ Itsiata, caejiwi canacujitsia DIOSOWecua najamatabēcuenepēnēyorota. Nexata, daxitajiwi najamatabēcuenēbijianawanapa. Ajibi caejiwi-ata pexaniacuenē pexanaējiwi. ¡Ajibi cajena pepacuene caejiwi-ata!

4-6 [...]

Salmo 66

Pexaniacuenia cuenewēnēxaniare Dioso pexanaejawanē yabara

David-pijinē peyaquinaesalmo

1-15 [...]

¹⁶ «Naxatsia, daxita paxamē DIOSO paneyaiyataewi, patanejumetaenexamē. Pacatsipaebianatsi daxita xua bajaraPonē neto-exana taponaponaematacabianējawabelia.

- ¹⁷ »Ayaicuenia wajëcajë DIOSojawabelia, taneyawenonaenexa.
Pexaniacuenia wënëxaniataponajënua.
- ¹⁸ »Yapëtaniji tanacueratsijawanexa, DIOSojawabelia itsa
yajawawajëcaejitsipajë tajaneconi. Xanë asiwaya itsa taejitsipajë
pibisiacue ne ta-exanaejawa, nawecuapaebinejewanë DIOSojawabelia,
nexata bajaraPonë aponenamuxuna-ewetsi tsipae xua wajëtajë.
- ¹⁹ »Itsiata, xanë yapëtaniji tanejumetaejawa, tanenamuxuna-
ewetsijawanua tawajëtsijawa.
- ²⁰ »DISO cajena bitso pexaniajamatabëcuenenë. BajaraPonë
aponemuxunajematsi tawajëtsijawa. Biji rajane, xaniawaetsia
nenamuxuna-eweta, najamatabëcuene-itajëtanua
tane-asiwajamatabëcuene».

Salmo 68

Jehová pijawajabitsaë pecuene-amoneyabinë

Israel nacua peyanacua-ewetsinë, David-pijinë, peyaquinaesalmoyo.

¹⁻¹⁶ [...] ¹⁷DISO raja xaina bitso ayaijawa pecanawajabitsaëtsimonë
caballo perobobocaecarrozamonë apowajanamata-ëjësicapanepaecuenia.
Jehová Sinaitsutojumawetsica najetaruca bajarapamonëta peyaponae-
wituatujëta pijatemplobojawabetsica. ¹⁸DISO barëtsia athëbëabetsia
pejamatabëcuene-amoneyabiwi^w petaicaewicuenia. Nexata, wecuapitabiaba
jiwi perajutsijawatsi, bajarapacuenia piamatabëbejewi-ata. Bajarapacuenia
exana Jehová DISO peponaponaenexa bajarapamonaetuatujëta. ¹⁹⁻³⁵ [...]

Salmo 69

Bepejiobicuena peponaponaenëyo wajëca Diosojawabelia

Israel nacua peyanacua-ewetsinë, David-pijinë, peyaquinaesalmoyo.

¹Pewajëcaejawata David jumaitsi:

—¡TajaDIOSomë, necapanepare, tsipaji rabaja imoxoyo tatëpaejawa tsa-
najetaruca! Pacuenia mene piawajubujawata ba-itapajanitobubutapona,
bajarajamatabëcuene-itsinë tanejamatabëcuenematatoxenetaaponaejawa
bajarapaliwaisi. ²Pacuenia ferabojawa penucaponaenë itsa xataxataëca-
nua ba-apoxainae itsajota nayotsijitsia pexataxatanaexae, bajarapijinia
pacuenia apoxainaenë itsajota tanajamatabëcuenesaëtsinexa. Pacuenia
mene piawajubumatacabi cawota daxitacuene piamesesaëxae, bajara-
pacuenia nejamatabëmatatoxeneta tajaliwaisi. ³Belia baja, xanë cuera-
najë tacajunatsijawa. Acuaibojumebinë baja tacajunatabiabijawa. Xanë
belia itaxutocueranajë tacawajënaetaeponaejawa tajaDIOSomë picani
taneyawenonaenexamë.

⁴»Bitso baja ayaibitsaëto tsaponae pamonaе tane-ityoanaëcotsiwi, tamatana penamata-ëjëtsijawa matatoxenetsia, apoxainae-atanë xua yabara picanі nitoyajitsia.^x Pamonaе jamatabënebeyaxuaba, bajarapamonaе pewajënaeyabelia ayaibitsaëto tsanajetarubenaе. Bajarapamonaе neyanijobapona tatocanawiatsinexa xua aponacobetoxotsinë picanі —jai pewajëtsijawata pejamatabëbëjaijawa yabara.⁵⁻¹⁵ [...]

¹⁶Orijibia, jumaitsi:

—¡Jhová, tacawajëtsicowëya nejumejejamëre taneto-exanaenexamë, tsipaji baja xamë pexaniacuene nexanaenë, jiwi-ata niasiwajamatabëcuene nexainaenë! ¡Jiwi ayaicuenia niasiwajamatabëcueneta, nenaëcore tane-itaxutobejiobiataenexamë! ¹⁷¡Pëtsa nenawecuatsatame xanë nijajiwi-tonënë! Bepijayo nejumejejamë tsane, tsipaji raja netsi-ayai. ¹⁸¡Nimoxoyore tanecapanepaenexamë, tatëpaeyaniwa! ¡Bajarapacuenia necapanepare tawajabitsaëwiwecua!

¹⁹»Xamë netoyapëtaneme pacuenia apotajitsipaecuene taneto-exanaejawata auranë bitso jiwi pitabarata, bajarapacuenia aponeyaiya-taenua. Xamë yapëtaneme pamonaе tajawajabitsaëwi. ²⁰Bajaraxuanë taneto-exanaexae, belia cobexae jamatabëcuenenatsoninajë, ajamatabëcuenesaëjibinënuа. Jaitsi-atanë, ajibi tanejamatabëcueneyawenonaеjiwiyo tabarëyanexa. ²¹Bajarapamonaе nerajutanua taxaejawacuenia piatsaxara bepecolailaicaeracuenia. Mera tajitsipaejawata, nerajutanua piajatuvinagrera^y ta-apaenexa —jai Jhovájawabelia pewajëtsijawata.²²⁻³⁶ [...]

Salmo 73

Dioso bitso yawenonabiaba pijajiji

Mapasalmoyo yaquina Asaf-pijinë.

¹Pamonaе, Israel-pijinë pemomoxiyajuwënëwi, pibisiacuene apopexana-wanapaewi, DIOSO bitso yawenonabiaba. ²⁻³Xanë imoxoyo tajopae DIOSO tajumecowënëtsijawawecua, tacueneca-ëbixae pibisiacuene pexanabiabiwi, ayaijamatabëcuenewi penataewinua, tacuenetaejawata bitso pexaniacuenia petopitsapaponaеjawatatsi.

⁴Bajarapamonaе aponasiwabëjai petëpaejawa yabara. Biji rajane, jumalixanepanaeya jinawanapa. ⁵Caeto-ata apojinawanapae nabebiobitsiya, pepitsinexa penamatawenonaecuene. Piabejejawanë apotocopiapatabiabitsi, pacuenia tocopiapatabiaba itsamonaе. ⁶Bajaraxuata, bitso ayaijamatabëcuenewi natane. Jiwi beyejebabiaba. ⁷Pecobecowëjawanë^z ayaijawa pexainae-xae, siwanajamatabëxainabiaba ëpibisiacuene pexanaejawa. Nexata, jamatabëcuenewënëca bitso pibisiacuenejawanë pexanaenexa.

^x 69:4 nitoyajitsia: Bajaraxua tajëwelia Jesucristo yabarajumaitsinua. Taema Jn 15:25.

^y 69:21 nerajutanua piajatuvinagrera: Bajaraxua tajëwelia Jesucristo yabarajumaitsinua. Taema Mt 27:34, 48; Mc 15:23, 36; Lc 23:36; Jn 19:28-29. ^z 73:7 Pecobecowëjawanë: Itsacuenia pijinia pejucaenexa. Bitso penasitsijamatabëcuene, bajarapamonaе itaxutopitsapa. Nexata, itajitsipa daxitacuenе penaxainaeyabinexa ëponënexa.

⁸ Orijibia, bajarapamonae, pibisiacuenia, capocaponaeya baracuaicuajiai tsabiabi daxitajiwi. Bitso ayaijamatabēcuenewi penataexae, pibisiacuenia atiobabiaba itsamonaejawabelia, piabejecuenejawanē peto-exanaenexatsi. ⁹ Ayaijamatabēcuenewi penataexae, pibisiacuenia baracuaicuajiai tsabiabi Dioso. Daxitanacuanē pewetsiwi nataeya, itaxutojema cuaicuajiai tsabiabi.

¹⁰ Bajarapacuenia pecuaicuajiaixae, jiwi xaniawaetsia namuxuna-ewetabiabatsi, pejumexaniataenexatsi petsipaebiliwaisianētsi. Aponatocanaējētsi pibisiacuene pexanaejawa, xua exanawanapa bajarapapibisiacuene pexanawanapaewi. ¹¹ Bajarapapibisiacuene pexanawanapaewi jamatabēcue-nejumaitsi tsabiabi: «¿Detsa pacuenia yapētaejitsipa Dioso? Apocaējēpaetsi peyapētaejawa xua exanawanapanatsi», jamatabējai. ¹² ¡Pataema pacuenia exanabiaba bajarapamonae! Apojamatabēcuenebējainejewa pijaneconi yabara, bitso nacuenebinejewa-ata, itsiata pewajēnaeyabelia xainapona bitso pexinaejawa.

¹³ Xanē Tacueneca-ēbinē bajarapamonae tacuenetaejawata, jamatabē-itsinē picani: «¿Detsa xua yabara netoxanepana meta aneconiijibia taponaponaejawa Dioso pitabarata, pibisiacuene exanaenejewanē? Ajibi tsaena. ¹⁴ Aneconiijibia ponaponae-atanē, apotajitsipaecuenejawanē netocopiapatabiaba caematacabi canacujitsia. Nenaneconitsia-exanabiabame tajaneconi yabara», jamatabējanē.

¹⁵ Yapētaniiji pibisiacuene ta-exanaejawa nijajiwijawabelia, itsa xanē pibisiacuenia cuaicuajianē tsipae, pacuenia bajarapapibisiacuene pexanawana-paewi. Nijajiwi betajawajabitsaē taejitsipajē. ¹⁶ Bajayajebi canaējētsi-atanē pajamatabēcue yabara pibisiacuene pexanawanapaewi pewajēnaeyabelia pexinaejawa bitso xainapona, aponejitsipaecuena jinawanapae-ata, apocaxitajarabinē. Neto-ayapēbeje^a cajena tayapētaejawa bajaraxua. ¹⁷ Bajarapacuenia jamatabēcuenenawēxaniabiaya canaējētajē tapatsijawabelia neponaponaeбота. Itsa junuajē nijatemplobo-ēnēabelia, bajarajota tanucae-jawata, neyapētaeya-exaname pibisiacuene pexanabiabiwi newerebiabijawanexa pibisiacuene pexanabiabineconi pejamatabēcue, nenaneconitsia-exanaematacabita. ¹⁸ Pepacuene jemata werebiabianame. Apoxinae tsane pepanepacuene ¹⁹ Bepijia tocopiarucaenatsi pebarēyajawami. Pini-jicuenia junawiana. ²⁰ Xua jiwi majitsinaebota tane, penamatacotsijawata nacofēnētabiaba. Bajarapijinia itsi tsane pibisiacuene pexanaewi. Xamē, tajaTuxanenē Dioso, itsa nonotapuname newerewerebiabinexa, pēcaewia-exanaename bajarapamonae pecuenemi. Nexata, pematatsēnēa itsajiwi-ata apocuenenajamatabēnapitsi tsane. Nacofēnētsiana saya.

²¹ Bajarapacuenia taneyapētaeya-exanaecujinaemē, nexata xanē jamatabē-itsinē: «¿Detsa meta xuajitsia cueneca-ēbajē pibisiacuene

a 73:16 *Neto-ayapēbeje*: Neyapētaenexa xua yabara salmo peyaquinaenē cuene-aeba pexinaponaejawa yabara, taema Deut. 11:13-32. Bajarapaliwaisi nacayapētaeya-exana pacuenia Dioso pexaniacuenia yawenonaejitsia pamonae jumecowēnētawanapa pitorobiliwaisianē. Pacuenianua ayaicuenia bejibobia-exanaejitsia pamonae apojumecowēnētsi bajarapaliwaisianē.

pexanabiabiwi pewajënaeyabelia bitso pexainaponaejawa? Aeconoxae baja yapëtaniji pibisiacuene pexanaewi, Dioso penaneconitsia-exanaejawanexa», jamatabëjanë. Ta-urajamatabëcuene bitso nejamatabëbejibobita, ²² tsipaji natoyapëtaniji bitso ta-amatabocotajanëcuene Dioso pitabarata. Pacuenia dajubinë apoyapëtae liwaisi, bajara-itsinë. ²³ Aeconoxae yapëtaniji apotajitsipaecuenejawanë tanetocopiapatabiabijawata, xamë taneyajawajawamë tsaponapona. Necobewaetabame tacujuanenia taneyawenonaenexamë. ²⁴ Nemuxujiobabiabame tayapëtaenexa pacuenia jitsipame tacato-exanabiabinexa. Tatëpaecujinae nepitsianame. Necaponaename nija-peniweniwenacuayabetsia. ²⁵ Xamë baja cajena caenëmë caxainatsi athëbëtatsia tacayajawaponaponaenexa. Daxitacuenewecua, xamë, DIOSOMë, bitso cajitsipatsi. ²⁶ Aperabësaëjibi-atanë tsane, jamatabëcuenefaefaenatanënuu tsane, itsiata ëxamë, DIOSOMëjawabelia, najamatabëcueneyotsianajë. Nexata, nejamatabëcuene-asaëya-exanabiabianame. Xamë raja tajaDIOSOMë tsane daxitamatacabijawabelianexa.

²⁷ DIOSO, pamona cawecuanatsata, pejinawanapaenexa pejitsipaecuena, cawecuanaxuabiana daxitamatacabijawabelianexa. Daxita pamona siwanajamatabëcuenecopatabiaba itsacuenejawanëjawabelia pewetsinexatsi xamëwecua, bajarapamona werebiabianame. ²⁸ Itsiata, xanë bitso netsixanepana xamë taca-imoxoyotsijawa, tajaDIOSOMë. Bajaraxuata, ca-itaxutuajamatejematsi tsaponapona tane-ewetsinexamë tawajënaeyabelia. Nexata, daxita pacuenia neyawenonabiabame, tsipaebianajë itsamonaejawabelia.

Salmo 78

Bajayata Israel-pijinë pemomoxi Dioso peyawenonaejawa peliwaisi

¹ Tajamona, panenamuxuna-ewetsianame paliwaisi pacatsipaebijitsiatsi. ² Pacatsipaebianatsi perujuliwaisi. Pacuenia bajayata wajasalinaiwimi exana, pacatsipaebianatsi. ³ Paliwaisi-ata nacatsipaeba wajasalinaiwimi, pacatsipaebianatsi. ⁴ Bajarapaliwaisi apoyawajunuaxainaetsi tsane. Tsipaebiabianatsi wajaxi-ata pejumetaenexa. Bajarapaliwaisi wajaxi tsipaebiabianatsi peyapëtaenexa bajayata Jehová ayaicuene pexanabiabijawa, peyapëtaenexanua jiwijawabelia bajaraPonë peyapëtaeya-exanaejawa Jehová pecaëjëpaejawatsi daxitacuene pexanaejawa.

⁵ BajaraPonë pitorobiliwaisi rajuta Israel-pijinë pemomoxijawabelia. Tsipaeba pacuenia jinawanapaejitsia pibisiacuene pexanaeyaniwa. Orijiibia, itoroba wajasalinaiwimi juya bajarapaliwaisi petsipaebabiabinexa pexijawabelia. ⁶ Bajarapacuenia Jehová itoroba wajasalinaiwimi juya bajarapaliwaisi petsipaebabiabinexa pexijawabelia, pamona-ata bexëa naexanapona, bajarapaliwaisi peyapëtaenexa. ⁷ Bajarapacuenia daxitajiwi Dioso pejumeliwaisi pexijawabelia itsa tsipaebiabianana, daxitajiwi siwanajamatabëcuenecopabiana DIOSOjawabelia. Aponacofënëtsi tsane xua bajaraPonë to-exanabiaba bajarapamona pijasalinaiwimijawabelia. Pewajënaeyabelia

jumecowënëtaponaena Dioso pitorobiliwaisi. ⁸Nexata, bajarapamonae apo-exanae tsane pacuenia bajayata pijasalinaiwimi exana. Bajarapamonae pijasalinaiwimi apojejai Dioso pejumeliwaisi pejumecowënëtabiabiyanawa. Caejamatabëcuene apoxinae Dioso pejumecowënëtabiabiyanawa.

⁹Jacob pexënato, Efraín, pemomoxi pexaniabitsabianë, pexaniacue-rerebonënuu, xainae-ata, rëcëpeca pijawajabitsaëjawabelia penawajabitsaëtsijawata. ¹⁰Pacuenia DIOSO itorobatsi, apojumecowënëtsi. Apojejai pexanaponaeyaniwa pacuenia bajaraPonë itorobatsi. ¹¹Bajarapamonae nacofënëta xuanë DIOSO to-exanatsi. Nacofënëtanua petaejawa bajaraPonë ayaicuene pexanaejawanë. ¹²Bajarapamonae paxajiwimi tane bajaraPonë ayaicuene pexanaejawanë Zoán wayafota, Egipto nacuata, xuanë jiwi apocaëjëpaetsi pexanaenexa. ¹³Bajarapamonae paxajiwimi Dioso pematacaponaejawata, manuamene-epatualia benamutocuenia tsewia-exanaxualia, bajarapamonaemi petaxuta itsapanabelia pepanepaenexa. Manuamene-epatualia, itsaxuayolia Dioso tsewia-exanaxualia, namata-enetsiabeje mene nucaeya-exana. Pacuenia namata-enetsiabeje banuca bo petabufaratsijawa, bajarapacuenia namata-enetsiabeje mene nuca. ¹⁴Matacabita bajaraPonë itorobabiaba piapiapajubo bajarapamonae pematacaponabiabinexatsi. Merawi icatsia itorobabiaba pitarunutsicotia bajarapamonae pematacaponabiabinexatsi. ¹⁵Bajarapamonae petusato nacuata mera piapaenexa, ibotoxanetotuatuajëarena Dioso wocowococaeya-exana. Nexata, bajarapabibotoxanetotuatuajëarena ayai-iraxaneto, mera, pitsaparena. ¹⁶Ibotoxanetotuatuajëarena Dioso pitsapaeya-exana mera bepepamenecuenia.

¹⁷Itsiata, bajarapamonae tsiteca pibisiacuene exanapona. Dioso, athëbë-tatsia pe-eaenë, apojumecowënëtsi. Nexata, bajarapamonae ita jinawana-pa petusato nacuata, naneconita Diosojawabelia. ¹⁸⁻⁷² [...]

Salmo 91

Wajawajabitsaë wajanaca-itsacueniabiyanawa, Dioso wajanacacaranatsijawa peliwaisi

¹Pajiwi itaxutuajamatejemaya yajawaponapona Dioso, Ponë ayaijamatabëcuenenë daxitawecua, bajarapajiwi ewetabiabatsi daxita pibisiacuenewecua. ²Nexata, jumaitsi tsabiabi Jehovájawabelia: «Xamë raja tane-ewetsinëmë, tanewecuatorotsinëmënuu daxita pibisiacuenewecua. Xamë raja tajaDIOSomë, Ponëjawabelia siwanajamatabëcuenecopatabiabajë tane-ewetsinexamë», jai tsabiabi. ³Caenë DIOSO raja wajanacacapanepaenë wajawajabitsaëwecua, namuetsia nacawajënae-ewetsi-ata wajanacabeyaxuabinexa, wajanacacapanepaenënexanua jiwi peyatëpaedomae-atawecua. ⁴Pacuenia wacara pexi bacaranateca pecorofetota, bajarapijinia pacuenia, DIOSO nacacaranatsiana daxita pibisiacuenewecua. Pacuenia wajabit-saënë pija-escudopanata nacaranata pejorojoronaeyaniwatsi pijawajabitsaë, bajarapijinia pacuenia, DIOSO nacacaranatsiana daxita pibisiacuenewecua, wajanacajumaitsicuenia waja-itaxutuajamatejemaxae. ⁵Bajarapacuenia wajanacajumaitsixae, apocujunawitsi tsane matacabita, merawi-ata,

nacatsi-ayai-ata itsacuene. ⁶ Apocujunawitsinua tsane jiwi peyatëpaedomae-ata, daxitanacuanëjawa peyacaëjëpaedomae, nacatocopiapatsi-ata merawituatujëta, itsa jume, matoneje-epatota-ata tsane.

⁷ Yatëpae-ata tsane bajarapadomae imoxoyo wajamuxuneneta pe-enaewi, mil pajiwiibeje, diez mil pajiwiibeje-ata, itsiata aponacatocopiapatsi tsane waxaitsijawaberena. ⁸ Bajarapacuene saya taenatsi waja-itaxutota. Taenatsi DIOSO penaneconitsia-exanaejawa pibisiacuene pexanaewi.

⁹ Wajasiwanajamatabëcuenecopatsixae Jehová jawabelia wajanacacue-
wetsinexa, waxaxainaexae ayaijamatabëcuenenë Dioso wajanacacue-
necaranatsinënexa, ¹⁰ nexata aponacacuene-amoneyabi tsane itsacuene
piayaicuenejawanë-ata. Jiwi peyatëpaedomae-ata aponaca-imoxoyotsi tsane
wajajinawanapaebowata. ¹¹ Bajarapacuenia apotaetsi tsane, tsipaji Dioso
raja itorobiana pija-ánglewi, wajanaca-ewetsinexa. Nexata, bajarapamonae
naca-ewetabiabiana daxitajawa itsajota jinawanapatsi. ¹² Ánglewi pecobeta
nacayotsiana wajanacataxutsaquitisiyaniwa ibotonëjawabelia. ^b ¹³ Newëthë-
ata aponaca-itsacueniabi tsane. Pianaepanaenë jomo, nacasini-ata, aponaca-
itsacueniabi tsane.

¹⁴ Jehová nacajumaitsi: «Pajiwi xanë niasiwa, nesiwanajamatabëcueneco-
patanua Xanëjawaberena tayawenonaenexa, bajarapajiwi capanepaenajë.
Caranatsianajënua piayaicuenewecua, taneyapëtaejiwixae.

¹⁵ »Bajarapitsijiwi itsa nejunatsiana, jumepitsianajë. Paepatota jama-
tabëcuenebëjai itsacuene yabara, yajawanë tsane. Bajarapacuenewecua
yawenonaenajë pepanepaenexa. ¹⁶ Tocopatsianajënua jiwi peyaiyataenexatsi.
¹⁶ Bajarapitsijiwi tocopatsianajë mapanacuataje bajayajebi piasaëtsaponapo-
naenexa. Capanepaenajënua tajanacuayabetsia», jai Jehová.

Salmo 95

Jehová wajawënëxaniatsinexa barëyaya wajatonaxëanaejawa peliwaishi

¹ ¡Naxatsia! Barëyaya tonaxëanatsi Jehová. ¡Tonaxëanatsi wajanaca-
ewetsinë, wajanacacapanepaenënua!

² ¡Pijatemplobowabelia junuatsi pexaniajamatabëcuene wajarajutsinexa
bajaraPonëjawabelia wajanacayawenonabiabixae! ¡Wajianë tonaxëanatsi waja-
tuxanenë wajayaiyataenexa, ³ tsipaji Jehová pinijiDioso, bitso ayaijamatabë-
cuenenë daxita jumapecataediosowi matatoxenetsia! ⁴ Eweta daxitanacuanë.
Eweta iratuatujëabereca-ata. Eweta pinijitsutonëjawa-ata. ⁵ Jehová exana
manuamene. Exana ira-ata. Daxitacuene baja cajena bajaraPonë pijajawa.

⁶ ¡Naxatsia! Jehová pitabarata wajamatabacabëta nubenatsi. «¡Bitso
ayaijamatabëcuenenëmë!», jaitsi tsane, tsipaji bajaraponë naca-exana.

b 91:12 Mapaversículoje dowathi tsipaeba Jesús-jawabelia pejamatabëcuene-ëjëbijawata. Taema
Mt 4:6; Lc 4:11.

⁷Bajaraponë wajaDioso. Waxaitsi pijajiwitsi, bepija-ovejatsi. Naca-eweta. ¡Ajena panamuxuna-ewere pacuenia bajaraPonë pacajumaitsi!

⁸BajaraPonë pacajumaitsi mapacueniaje: «¡Pëtsa pajamatabëcuenetajamë pacuenia panijasalinaiwimi ajamatabëcuenetaja pamatacabi jinawanapa petusato nacuata, Meribajawata, itsawënë Masah-jawata! ⁹Bajarajota, panijasalinaiwimi taeyabiabi-ata pinijicuene ta-exanaejawanë, nejume-aeba tayawenonabiabijawanexa. ¹⁰Nexata, cuarenta pawaiubeje anaepanjë panijasalinaiwimijawabelia. Panijasalinaiwimi yabara jamatabë-itsinë mapacueniaje: ‘Mapamonaeje aponejamatabënajinae. Apojumecowënëtsinua tatonajumecopatsiliwaisi. ¹¹Nexata, bajarapamonae aponapatsi tsane tara-jutsinacuayabelia, panacuata picani xaniawaetsia jinawanapaejitsia,’ jamatabëjanë panijasalinaiwimi yabara», pacajai Jehová.

Salmo 96

Pejanawaji penaxëanaenexa Jehovájawabelia

(1Cró 16:23-33)

¹Panaxëanare pejanawaji Jehovájawabelia. Patonaxëanare padaxitanacuanëpijiwimë.

²Panaxëanare Jehovájawabelia. Pexaniacuenia pawënëcacuaicuajamëre, panenaxëanaejawata. Caematacabi canacujitsia panawajunupaebianame daxitanacuanëjawa papecacapanepaejawa papecatsi-ayaijawawecua.

³⁻⁴Pawajunupaebianame daxitanacuanëjawa Jehová ayaijamatabëcuenenëcuene. Pawajunupaebianamenua daxitajiwi pijatomaranëjawa papinijicuenejawanë-ata pacatsita-exanabiaba, tsipaji raja bajaraPonë bitso ayaijamatabëcuenenë daxitawecua. Daxitanacuanëpijiwi tsicarucatsi Jehová pexaniacuenia pewënëxaniatsinexa ayaijamatabëcuenenë yabara daxita itsawiriodiosowiweucua. ^c Bitso wajanacajamatabëcuenenabenajacaeya-exanaenënu, daxita itsadiosowiweucua.

⁵Padiosowijawabelia itsamonae siwanajamatabëcuenecopababiaba, bajarapadiosowi piamatamobiwi. Biji rajane, Jehová pepopiasaënë, tsipaji daxita athëbëpijicuene pexanaenë.

⁶Jehová peponaponaetaxunaeta^d wënëca daxita peyaiyataecuene, pexaniacuenianua pewënëxaniatsijawa bitso pitabëcuene. Bajarapacuenia najamatabëcuene-itajëtabiaba pepo-ayaijamatabëcuenenëcuene, pepopiacuenesaënëcuene-ata.

⁷Padaxitanacuanëpijiwimë Jehová pexaniacuenia pawënëcacuaicuajamëre ayaijamatabëcuene pexainaejawa, pepopiacuenesaënëcuene-ata

c 96:3-4 itsawiriodiosowiweucua: Bajarapajumejawabelia nacajunua daxitaxunëjawabelia jiwi siwanajamatabëcuenecopababiaba pena-ewetsinexa Diosowecua, pacuenia pesiwanajamatabëcuenecopatsijawa pematawajibicuenejawabelia, jumapecataeya pexanaenëanëjawabelia, itsacuenejawanëjawabelia-ata. **d 96:6 peponaponaetaxunaeta:** Najumetane anijataxunaebeje yabara. Caetaxunae Dioso pijanacuatatsia. Itsataxunae pijinia, templobo-ënëta Pepopeyaiyataetaxunae, tsipaji bajarapabo-ënëta Jehová rucabiaba pecotiajawata, Dioso penajumecajoneliwai-sixaniawaetsibaula pijatapamatatsënëta.

yabara. ⁸Pexaniacuenia pawënëcacuaicuaijamëre, tsipaji bajarapacuenia toxanepanatsi daxitajiwi pexanabiabinexa. Panepatsijawata Jehová pijatemplobopijipanabota, pacapatsianame xuanë parajutsijitsiamë ofrenda. ⁹Panubenaename panematabacabëta ayaijamatabëcuenenë Jehová pitabarata, panenajamatabëcuene-itajëtsinexa asiwaya paneyaiyataejawa. Bitso cajena toxanepanatsi daxitanacuanëpijiwi pematabacabëta penubenaejawa jamatabëcuenenabenajacaeya Jehová pitabarata.

¹⁰Pajumaitsimëre daxitanacuanëpijiwijawabelia: «Jehová raja pepopetuxanenë», pajamëre. BajaraPonë mapanacuaje copataruta pejitsipaetaxunaeta. Nexata, apowecuatixitsi tsane bajarapataxunaewecua. Pexaniajaicuenia tocanaëjëtsiana daxitajiwi pexainaeneconi. ¹¹Bajara-pitsijamatabëcuenenëxae, daxita athëbëpijiuene, irapijiuene-ata, bitso xanepana pejamatabëcuenebarëyajawa Jehovájawabelia. Bajarapijinia pacuenia, toxanepanatsi manuamene, daxitaxuanë-ata xaina, penajumbinexa, pejamatabëcuenebarëyaxae Jehovájawabelia. ¹²Bajarapacuenia wayafopijicuene, daxita pejuwijawanë-ata, bitso xanepana pejamatabëcuenebarëyajawa Jehovájawabelia. Toxanepanatsinua daxita-unuanëjawa penubenaenaewanë penajumbinexa, pejamatabëcuenebarëyaxae Jehovájawabelia.

¹³Bitso cajena xanepana daxitanacuanëpijiwi pexaniacuenia pewënëxaniatsijawa jamatabëcuenebarëyaya Jehová pitabarata, tsipaji raja patsiana peyanacua-ewetsinexa daxitanacuanëpijiwi. Patsiananua pexaniajaicuenia petocanaëjëtsinexa daxitanacuanëpijiwi pexainaeneconi.

Salmo 100

Diosojawabelia jiwi pejamatabëcuenebarëyajawa peliwaissi

Mapasalmota jiwi pexaniajamatabëcuene perajutsinexa Diosojawabelia.

¹¡Padaxitanacuapijiwimë, barëyaya patonaxëanare Jehová! ²¡Pijacuene barëyaya patonacuenebawanapare! BajaraPonë pijatemplobota itsa papatame, barëyaya patonaxëanaename.

³¡Pacanaëjëre Jehová pepoDIOOnëcuene! BajaraPonë raja naca-exana. Waxaitsi raja wajacuata apona-exanaetsi. BajaraPonë naca-eweta, pacuenia oveja pexainaenë xaniawaetsia eweta pija-oveja.

⁴¡Paponare Jehová pijatemplobobaupajawaberena, panejonenexa bajarapatemplobo-ënëabelia! ¡Panejonejawata, pexaniajamatabëcuene parajure bajarapawenonabiabixae, wajianë panenaxëanaejawata! ¡Pexaniacuenia pawënëxaniatsianame bajarapawenonabiabixae, wajianë panenaxëanaejawata! ⁵Bajarapacuenia tonaxëanabiabianame, tsipaji Jehová raja bitso pexaniajamatabëcuenenë. Jiwi pitaxutotsoniataenë daxitamatacabijawabelianexa. Jiwiwijawabelia caejamatabëcuene pexainaenëdua daxitamatacabijawabelianexa.

Salmo 103

Jiwijawabelia Dioso pexaniacuene peto-exanaexae,
Diosojawabelia jiwi pejamatabëcuenebarëyajawa peliwaissi

Israel nacua peyanacua-ewetsinë, David-pijinë, peyaquinaesalmoyo.

¹Tajamatabëcueneuwetsina wënëxaniatsianajë Jehová ayaijamatabëcuene-
nenë yabara. Daxita tajamatabëcueneta bajaraPonë pewënë yayiataeya-
exanaenajënuu. ²Tajamatabëcueneuwetsina wënëxaniatsianajë Jehová
taneyawenonaejawa yabara. Aponacofënëtsinë tsane daxita papexaniacuene
bajaraPonë neto-exanabiaba.

³Jehová baja newecua-ajibia-exana daxita pibisiacuene ta-exanaeeneconimi.
Nejamatejemaya-exananua baja daxita tawitanejawami. ⁴Necapanepa tatë-
paejawaminexawecua. Nitaxutotsoniataeyabiaba. Niasiwana tsabiabi.
⁵Jehová pexaniacuene nerajutabiaba. Nejamatabëcuene-asaëya-exanabiaba.
Pacuenia amaru perujunë-ata, apocorofecueranae, bajarata-itsinexa bajara-
Ponë nejamatabëcuene-asaëya-exanabiaba tajamatabëcueneecueranaejawami.

⁶Pajiwi itsamonae bejibia-exanatsi, bajarapajiwi Jehová yapijiiyawe-
nonabiaba, pexaniajamatabëcueneta. ⁷Bajayata xuanë ayaicuene Jehová
exanaejitsia, bajaraxuanë copiata tsipaeba Moisés-jawabelia. Bajaraxuacujia-
nae, ayaicuene bajaraPonë pexanaejawanë, tsitajëta Israel-pijinë pemomoxi.
⁸Jehová raja jiwi pitaxutotsoniataenë. Pexaniajamatabëcuenenënuu. Bepijia
bajaraPonë apo-anaepanae. Ayaicuenia naca-asiwa.

⁹«¿Detsa xuajitsia pibisiacuene exaname?», aponacajai napëna. BajaraPonë
apo-anaetsiteca bajayajebi. ¹⁰Ayaineconi raja picani xainatsi pibisiacuene waja-
exanaeeneconi. Itsiata, ayaicuenia Jehová aponacananeconitsia-exanae pacuenia
necatocaëjëta wajanacato-exanaenexa wajaneconijamatabëcuene. ¹¹Bajarapacue-
nia exana, tsipaji pacuenia ayaitusatoxaneto nacopataruca itaboxo, mapa-iraje
tuatuajëta bajarapitsipiniijicuenia bajaraPonë asiwa peyaiyataewitsi. ¹²Pacuenia
nacuatabubeje bitso nawecuatajêbeje, bajarapijinia pacuenia bitso tajë Jehová
nacawecuaxuaba pibisiacuene waja-exanaeeneconimi. ¹³Pacuenia pexi pexai-
naenë, itaxutotsoniatane pexi, bajarapijinia pacuenia Jehová itaxutotsoniatane
pamonae yayiatanetsi. ¹⁴Bajarapacuenia nacato-exana, tsipaji bajaraPonë yapë-
tane apowaja-aperabësaëjawa. Aponacofënëtsi atsatota wajanaca-exanaecuene.

¹⁵Pacuenia wayafopijimatonoto pijamatacabianë apotonawitsitsi bajaya-
jebi perucaenexa, bajarapijinia itsitsi jiwitsi-ata. ¹⁶Pematonoto saya aitaëbë
cae-epatoyonexa. Bajaraxuacujinae tsaquena. Jowibota caputatsi. Nexata
baja, pematonoto aponamatacotsi icatsia. Bajarapijinia itsi jiwi-ata. Cae-
epatoyo saya ponapona. ¹⁷Jehová cajena daxitamatacabijawabelianexa
pasiwanë pamonae yayiatanetsi. Nexata, tsiteca pewajënaeyabelia itaxu-
totsoniataeyabiabiana bajarapamonae, pemomoxijawabelia-ata. ¹⁸Pamonae
exana pacuenia Jehová itoroba, bajarapamonae itaxutotsoniataeyabiaba.
Pamonae aponacofënëtsi Dioso penajumecopatsiliwaissi Moisés-pijinëta,
pitorobicueniatsi pexanaenexa, bajarapamonae itaxutotsoniataeyabiaba.

¹⁹Jehová raja daxitacuene pepopewetsinë athëbëwetsica. Nexata,
pepopitorobinë tsaponaponae daxitanacuanëpijiwi. ²⁰Paxamë Jehová

papija-ánglewimë, ayaijamatabëcuene panexainaewi, pacuenia bajara-Ponë paca-itoroba, pa-exanabiabame. Nexata, pexaniacuenia pawënëxaniatabiabianame bitso ayaijamatabëcuenenë yabara. ²¹ Paxamë-ata Jehová papijajiubitsaëtoxanetomë, pajamatabëcuene-ewetabiabame. Pacuenia pacatojitsipa, pa-exanabiabame. Paxamë-ata pexaniacuenia pawënëxaniatabiabianame bitso ayaijamatabëcuenenë yabara. ²² Paxamë-ata Jehová papeca-exanaenëxi, bajaraPonë pexanaenacuata panejinawanapaenëxi, pexaniacuenia pawënëxaniatabiabianame bitso ayaijamatabëcuenenë yabara.

¡Xanë-ata tajamatabë-ëthëtowetsina pexaniacuenia wënëxaniatsianajë Jehová bitso ayaijamatabëcuenenë yabara!

Salmo 106

Dioso yawenonabiaba Israel-pijinë pemomoxi, pibisiacuene exanabiabi-ata

¹ Wënëxaniatsianatsi Jehová, tsipaji pexaniajamatabëcuenenë. Pitaxutotsoniataejamatabëcuene tsitecaena daxitamatacabijawabelia.

² ¡Caejiwi-ata apocuenecaëjêpaetsi xaniawaetsia pecuengewajunupaebinexa Jehová papinijisaëta xua exana! ¡Caejiwi-ata apocuenecaëjêpaetsi pexaniacuenia pewënëxaniatsinexa Jehová, pacuenia picani tsixanepanatsi peto-exanabiabinexatsi!

³ Pamonae catsitecawanapa pexanaejawa ëpexaniacuenejawanë, jamatabëcuenebarëya tsawanapae tsane.

⁴ Jehová, nenajamatabënapire paepatota pexaniacuene to-exanaejitsiamë nijajiwi. Nexata, necapanepaejawata nijajiwi, xanë-ata necapanepaenname.

⁵ Daxita xua neyawenonaecuene nijajiwi, nitapetsiwi, bitso jitsipajë patanajuacabarëyajawa. Nexata pacanajuawënëxaniatsianatsi pataneyawenonaejawamë yabara.

⁶ Pacuenia patajasalinaiwimi pibisiacuene exanawanapa, bajarapijinia pacuenia paxanë-ata pa-exanabiabajë. Pibisiacuene pa-exanabiabajëna, bitso pepopiabejecuenejawanë-ata.

⁷ Patajasalinaiwimi cacuenetae-ata pexaniacuenia neyawenonaejawa Egipto nacuata, itsiata apotsitanamatamotsitsi papexaniacuenejawanë to-exaname. Mar Rojo manuamene-itapata nacofënëta daxita asiwaya neyawenonaejawami. Caranata bajarajota cabara-anaepana. ⁸ Itsiata baitsi jane, Jehovahmë, capanepame bajarapamonaemi, nenajamatabëcuene-itajëtsinexa bitso pinijisaë nexainaenëcuene, xaniawaetsia jiwi pecawënëcacuaicuaijainexa bajaraxua yabara.

⁹ Nexata xamë itorobame petsewinexa peyacaransijawami Mar Rojo manuamene. Bajarapacuenia copatame nijajiwi pexaniatsewitusatojawalia penicabinexa bajarapamanuamenetuatajëalia. ¹⁰ Nexata bajarapacuenia, xamë capanepame pitoyawitsi pecobewecua, bajarapacuenia-ata pijawajabitsaëwecua. ¹¹ Daxita pijawajabitsaëwimi matacënëbia-exaname merata pebubunaenexa. Bajarapamonaemi caenë-ata apo-asäë tsaponapona. ¹² Bajarajota patajasalinaiwimi matapania cajumexaniantane

najumecapanepaeya nejumaitsijawami. Pecacuenetaecujinae, bajarapamona^e cawënëcanaxëana^e pexaniacuenia.

¹³ Itsiata, bajarapamona^e bepijia nacofënëta netsita-exanaejawanëmi. Apocajamatabëcuene-ewetsi neyapëtaeya-exanaeliwaisianënexa pacuenia exanawanapaejitsia.

¹⁴ Nexata petsewinacuata pejinawanapaejawata, Diosomë cajamatabëcuene-ëjëbabiaba, daxita pejamatabëcuenesaëta cawajë-cabiaba neto-exanaenexa penatojitsipaejawanë. ¹⁵ Nexata, Diosomë, to-exanabiabame picani xua ca-itoroba, itsiata yajawatsi-itorobame peyatë-pawitanenexa. ¹⁶⁻⁴² [...]

⁴³ Jehovahmë, patajasalinaiwi capanepabiabame bajayajebi. Bajarapacuenia to-exanae-atomë, bajarapamona^e ajamatabëcueneta-jaya wecuaponabiaba netojumecopatsiliwaisi. Bajarapapibisiacuene jamatabëcuene-amoneyabatsi, orijibia bitso pibisiacuene pexanawana-paenexa. ⁴⁴ Bajarapacuenia cato-exanae-ata, xamë itsiata bejiobiataneme pebejiobia-exanaejawatatsi. Nexata, xaniawaetsia jumetaneme bajarapamona^e nasiwayabëjaiya pecawajëcaejawata. ⁴⁵ Bajarajota, najamatabënapitame nenajumeliwaisicajonejawami bajarapamona^e jawabelia. Nexata, nebejiobia-taejawata bajarapamona^e wecuatixitame nenaneconitsia-exanaejawa, tsipaji xamë bitso jiwi nitaxutotsoniataenë. ⁴⁶ Orijibia, pamona^e israelitawiyaju-wënëwi petaicaewimitsi, bajarapamona^e tocopatame pijawajabitsaë pitaxutotsoniataenexatsi.

⁴⁷ ¡Panecapanepare, Jehovah DIOSO! ¡Panecaetuare patajanacuayaberena itsanacuanëjawa patanecayajatsicujinae, patacawënëxaniatawanapaenexa, patanabarëya-exanaenexa patacawënëxaniatsijawata!

⁴⁸ ¡Asiwaya pawënëxaniare Jehovah, Israel-pijinë pemomoxi pijaDIOSO, nacua pexanaewajënaeya daxitamatacabijawabelianexa-ata! «¡Bajara-itsi tsane», padaxitamë pajamëre! ¡Pawënëxaniare Jehovah!

Salmo 115

WajaDioso peponapona^ejawa athëbëtatsia peliwa^esi

¹ Jehovah, pepacueni apoxanepana^e cajena ëjiwi penawënëxaniatsi-jawa. Biji rajane, jiwi toxanepanatsi ëxamë pecawënëxaniatabijajawa, tsipaji xamë asiwaya yawenonabiabame. Paxanë panijajiwi paneto-exanabiabamenua daxita pacuenia najumecapanepaeya panejumaitsimë.

² Bajaraxuata, apotoxanepana^etsi pamona^e apopecayapëtaewi Jehovahmë, pejumaitsiabiabijawa paxanë yabara: «¿Detsa jota ponapona pijaDIOSO israelitawi?», pejaitsiabiabijawa cuene-aebiaya.

³ WajaDIOSO athëbëtatsia ponapona. Exanaponapona xua tsitaxanepanatsi pexanaejawa. ⁴ Itsiata, pamona^e apopecayapëtaewi, natonacuenebabiaba

pecobeta, jumapecataenëanë palatananitota, oronanitota-ata, pesiwanajamatabëcuenecopatabiabinexa bajarapajumapecataenëanëjawabelia bediosowicuenia. ⁵ Bajarapajumapecataenëanë xainae-ata picani pecuaibo, apocuaicuaijai. Xainae-ata picani pitaxutobeje, apotae. ⁶ Xainae-ata picani pemuxuwojotobeje, apojumetae. Xainae-ata picani pepumu, apotuxuni. ⁷ Xainae-ata picani pecobebeje, apowaetabi. Xainae-ata picani petaxubeje-ata, apoponapona. Pecuaibowojotojawawetsina apopitsapae itsajumeyo-ata. Nexata, apoxanepanae itsacuenejawayonexa-ata. ⁸ Pamona exana bajarapajumapecataenëanë, pamona-ata siwanajamatabëcuenecopatabiaba bajaraxuanëjawabelia, cuene-amatamobi tsane pepitsinexa xua namatawewona, pacuenia bajarapajumapecataenë acuenematamobi Jehovah pitabarata.

⁹ ¡Israel papemomoximë, pasiwanajamatabëcuenecopabare Jehovahájawabelia! Bajara-ëPonë baja cajena nacayawenonabiaba. Nacacaranatabiabanua itsacuenewecua.

¹⁰ ¡Paxamë, pasacerdotewimë, pasiwanajamatabëcuenecopabare Jehovahájawabelia! Bajara-ëPonë baja cajena nacayawenonabiaba. Nacacaranatabiabanua itsacuenewecua.

¹¹ ¡Paxamë Jehovah paneyaiyataewi, pasiwanajamatabëcuenecopabare bajaraPonëjawabelia! Bajara-ëPonë baja cajena nacayawenonabiaba. Nacacaranatabiabanua itsacuenewecua.

¹² Jehovah raja nacanajamatabënapitabiaba, wajanacato-exanaenexa najumecapanepaeya pejumaitsicowëya. Nexata, nacayawenonabiabiana. Israel-pijinë pemomoxitsi nacayawenonabiabiana. Sacerdotewi-ata yawenonabiabianatsi. ¹³ Pamona yaiaiyatane Jehovah, pexaniacuenia juya yawenonabiabianatsi, bepejiobiwi, petuxanewi-ata.

¹⁴ Pacatojitsipatsi Jehovah pexaniacuenia papecayawenonaejawa panexi ayaibitsaëtoxaenonë panexainaponaenexa, panewajënaeyabelia panemomoxi-ata ayaibitsaëtoxaenonë penaexanaponaenexa. ¹⁵ Pacatojitsipatsinua Jehovah, ponë pexanaenë ira, itaboxo yajawa, panewajënaeyabelia pexaniacuenia papecayawenonabiabinexa.

¹⁶ Itaboxo raja Jehovah pijajawa. Juya rajuta mapanacua je daxitajiwijawabelia. ¹⁷ Pajiwi baja tëpa, moya boca, tsipaji acuenebi pecuaicuaijajawa. Nexata, apocajëpaetsi pewënëxaniatsijawa Jehovahájawabelia. ¹⁸ Itsiata, waxaitsi pexaniacuenia wënëxaniatsianatsi Jehovah daxitamatacabijawabelianexa ayaijamatabëcuene pexinaejawa yabara.

Salmo 118

Pexaniajamatabëcuene rajutsianatsi
Diosojawabelia wajanacapanepaexae

¹⁻²⁰ [...] ²¹ Pexaniajamatabëcuene carajutatsi Jehovah, tsipaji nejumetaneme tacawajëtsijawa. Netonaexanamenua tanecapanepaenëmë.

²² Pa-iboto bo-exanaewi, petsita-abejexaetsi, naitaxutojematabuatabiaba picani, bajarapa-iboto itsiata tonaexanatsi pepopecanaropotsi-ibotonexa botabutotsotojawata, penaexanaenexa pepopeyaëtsi-ibotonexa^f itsa-ibo matatoxenetsia. ²³ Bajaraxua pepacuene Jehovájawawerena najetaruca. Bajaraxuata, nacajamatabëcuenenabenajacaeya-exana wajataejawata.

²⁴ Ajena rabaja pamatacabi, xamë, Jehovámë, pataneyawenonaemataca-bimë. Nexata, paxanë pajamatabëcuenenabarëyanë bitso bajarapamatacabijawata. ²⁵⁻²⁹ [...]

Salmo 119

Pamonaë jumecowënëta Dioso penajumecopatsiliwaisi Moisés-pijinëta, pejamatabëcuenenabarëyawajawa peliwaisi

¹ Bitso jamatabëcuenenabarëya, pamonaë jumecowënëtanawanapa Jehová penajumecopatsiliwaisi Moisés-pijinëta, aneconijibianua jinawanapa bajara-Ponë pitabarata.

² Bitso jamatabëcuenenabarëya pamonaë jumecowënëtanawanapa Jehová pitorobiliwaisianë, daxita pejamatabë-ëthëtojawawetsina pejaitsiwi caejamatabëcuene pexainaenexa Jehovájawabelia. ³ Bajarapitsijamatabëcuene pexainaewi apo-exanaë itsapibisiacuenejawata. Biji rajane, jumecowënëtanawanapa pacuenia Jehová itorobatsi.

⁴ Jehovámë, panetonajumecopatame nejumeliwaisi, xaniawaetsia pata-jumecowënëtanawanapaenexa. ⁵ ¡Ayaicuenia jitsipajë picani bajarapaliwaisi pexaniajaicuenia tajumecowënëtaponaponaenexa! ⁶ Bajarapacuenia itsa exanaponaenajitsipajë bajarapaliwaisi tane-itorobicuenia, apo-auranë tsi-pae daxita bajarapaliwaisi tanajamatabënapitsijawata.

⁷ Jehovámë, xaniawaetsia nejumeliwaisi taneyapëtaeya-exanaecujinaemë pexaniajaicuenia, tanecuenexanetsijawatanua, matapania jane baja, necuenecaëjëpaena tacawënëxaniatsinexa taxaniajaijamatabëcueneta.

⁸ ¡Jumecowënëtaponaponaenajë nitorobiliwaisianë! ¡Pëtsa nexuabame daxitamatacabijawabelianexa!

⁹ ¿Detsa pacuenia pewëjëato caëjëpaejitsipatsi aneconijibia peponaponaenexa? Bajaraponë itsa jumecowënëtsipa pacuenia nijumeliwaisi itorobatsi, aneconijibia ponaponaëjitsipa.

¹⁰ Jitsipajë taca-imoxoyotsijawa daxita tajamatabëcueneta. ¡Pëtsa necopatame nejumeliwaisita tane-itorobicueniamë saicayacuenia taponaponaeyaniwa! ¹¹ Jehová, tajamatabë-ëthëtota jamatabënaponaponaenajë nejumeliwaisi, pibisiacuene ta-exanaeyaniwa, tananeconitsiyaniwa xamëjawabelia. ¹² Pexaniajamatabëcuene carajutatsi nijumeliwaisi yabara. ¡Necujarubare tajumecowënëtabiabinexa daxita nenajumecopatsiliwaisianë! ¹³ Tacuaibowojotota tsipaebajë baja itsamonaëjawabelia, daxita pacuenia xamë itorobame jiwi

f 118:22 *pepopeyaëtsi-ibotonexa*: Mapaliwaisije nacayapëtaeya-exana Jesucristo yabara comparación-cuenia. Taema 1Pd 2:6-7; Mt 21:42; Mc 12:10; Lc 20:17; Hch. 4:11; Efe. 2:20.

pexanawanapaenexa. ¹⁴ Tajumecowënëtsijawa nenajumecopatsiliwaisianë Moisés-pijnëta bitso nejamatabëcuenebarëyaya-exana, taxainaejawa-wecua ayaijawa tacobecowë, palata-ata. ¹⁵ Tajamatabë-ëthëtota siwacanaëjëtaponanajë nitorobiliwaisianë yabara, namuxuna-ewetabiabianajë nenajumecopatsiliwaisi, bajarapacuenia ta-exanaponaponanexa. ¹⁶ Siwajamatabëcuenebarëyanë tsaponaponae tsane daxita nitorobiliwaisianë. Apocafënëtsinë tsane caeliwaisiyo-ata.

¹⁷ ¡Tajatuxanenë, neyawenonaponare, tanecaëjëpabiabinexa tacajumecowënëtsijawa! ¹⁸ ¡Neyapëtaeya-exanare, xaniawaetsia tayapëtanexa papinijijamatabëcuene xaina nejumeliwaisi! ¹⁹ Xanë saya cae-epatoyonexa ponaponajë mapanacuataje. ¡Pëtsa newecumatayatame nejumeliwaisi! ²⁰ Daxitamatacabi bitso nejamatabëcuene-enabiaba, xaniawaetsia tayapëtanexa nejumeliwaisi.

²¹ Xamë itawetame ayaijamatabëcuenewi penataewi pecopabinexa pibisiacuenexa pexanabiabijawa. Bajarapamonae naneconitsia-exanaename apopejumecowënëtsixae nejumeliwaisi. ²² ¡Pëtsa copatame bajarapamonae, tanecapocaponaenexa tacajumecowënëtsixae! ²³ Petuxanewi pibisiacuenia nebaracuaicuaijai-ata, itsiata jamatabënaponaponabiabianajë nejumeliwaisi. ²⁴ Xanë bitso siwabarëyanë nejumeliwaisi. Nemuxujiobabiaba nejumeliwaisi. ²⁵⁻⁹⁶ [...]

⁹⁷ ¡Xamë, Jehovámë, nenajumecopatsiliwaisi bitso cajena ayaicuenia xanë asiwanë! ¡Daxitamatacabi bajarapaliwaisita natocanaëjëtabiabajë!

⁹⁸ Nitorobiliwaisianë nejamatabëcueneyawenona, bitso pexaniacuenia tacanaëjëtsinënexa tajawajabitsaëwecua, tsipaji bajarapaliwaisianë caematacabi canacujitsia yajawaponaponajë.

⁹⁹ Bajarapaliwaisi pejamatabëcueneta, xaniawaetsia natoyapëtaniji tacanaëjëtsicuene daxita tanecujarubiwiwecua, tsipaji bëpënëa canaëjëtaponaponajë tanejamatabëcuenematacaponaenexa.

¹⁰⁰ Bajarapaliwaisi pejamatabëcueneta, naexanajë bitso tayapëtanënexa penaweretsiwiwecua, tsipaji jumecowënëtabiabajë pacuenia nitoroba.

¹⁰¹ Xaniawaetsia tajumecowënëtaponaponanexa nitorobiliwaisi, nacuenewetaponaponajë pibisiacuenia ta-exanaeyaniwa.

¹⁰² Xanë aponawecuatsatsinë nenajumecopatsiliwaisi, tsipaji raja xamë tanecujarubinëmë bajarapaliwaisi.

¹⁰³ Najumecapanepaeya nejumatsiliwaisi tajumetaejawata bitso netsita pexaicaeliwaisi, banara pexaicaejawa matatoxenetsia.

¹⁰⁴ Nitorobiliwaisianë pejamatabëcueneta, bitso tayapëtaenë naexanaponajë. Bajaraxuata, daxita penajumetsënëtsiliwaisianë nawecua-itoyanë, tatsipaebiyaniwa, tajumexaniataeyaniwanua.

¹⁰⁵ Nejumeliwaisi baja cajena netojëpa lámpara tanetsiwajënae-itayotsinexa, tanematacaponaenexanua itsaxuayo najetarucaejëtsianë. Nexata, neyapëtaeya-exana xaniawaetsia taponaponanexa Xamë nitabarata. ¹⁰⁶⁻¹⁷⁶ [...]

Salmo 121

Dioso wajanaca-ewetsijawa peliwaishi

¹Itsa naëcotsiajë ibotsutonëjawabetsia, jamatabë-itsinë: «¿Detsaeta werena patsiana taneyawenonaejawanexa? ²Taneyawenonaejawanexa raja patsiana Jehovájawawetsica. BajaraPonë pexanaenë itaboxo, ira yajawa», jamatabëjanë.

³Jehová apocacopatsi tsane nefirapanucaejava. Peca-ewetsinë, Jehová, apomajitabiabi. ⁴Xaniajanë. Israel-pijinë pemomoxi pewetsinë, apopitama-jitsipanaenë. Apopemajitsinë cajena.

⁵Jehová raja ca-ewetabiaba. Jehová raja pecayawenonaenexa, imoxoyo cawecuaponaponabiaba. ⁶Nexata, matababita, merawî-ata, bajaraPonë ca-ewetabiabiana.

⁷Jehová ca-ewetsiana daxita piayaicuenewecua. Ca-ewetsiana pecabeyaxuabiyaniwa-ata. ⁸Jehová ca-ewetsiana nenaro-potsijawata, nenawiatsijawata-ata. BajaraPonë ca-ewetsiana daxitamatabijawabelianexa.

Salmo 127

Daxitacue ne yabara Dioso wajanacayawenonaenexa, wajanamatawenonaejava peliwaishi

¹Itsajiwi itsa nacueneba itsacuenejawa, xanepana pewajëtsinexa Jehovájawabelia, bajaraPonë peyawenonaenexatsi. Nexata, bo pexanaewi xanepana pewajëtsinexa Jehovájawabelia, peyawenonaenexatsi, bo pexanaejawa pewartetsicujinae peto-itsacueneyaniwatsi. Patomarapijiwi apowajëtsi Jehovájawabelia, bajarapatomarapijiwi bajaraPonë apoyawenonae tsipae. Nexata, bajarapatomarapijiwi yajuwënëjiwi majitsinejewa, merawijebi pijawajabitsaë copia-ewetsi-ata tsipae pijatomaraberena picani petsimaxëjoneyaniwatsi, itsiata tsimaxëjonejitsipatsi. ²Itsamonae ëpexaejava pesiwanacuenebinexa, yananianabiaba. Nexata, itsa nacueneba, merawî-ata abaxë nacuenebabiaba. Aponacuera-ewetabiabi. Nexata penacuenebijawa, bitso cueranabiaba. Itsiata, Dioso piasiwawî, merawî yajawa aponacuenebi-ata, aponamatawenonae pexaejawanexa.

³Jehová wajanaca-asiwaxae, papejewaxi xainatsi, bajaraPonë nacarajuta. ⁴Pacuenia wajabitsaënë cuererebonë cobenanuca pijawajabitsaë pewajënae-ewetanucaejawata, bajara-itsi papejewaxi Jehová nacarajuta itsa abaxë pejanajiwiitsi, tsipaji bajarapamonae caëjëpatsi wajanacajamatabëcueneyawenonaenexa itsamonae itsa nacatsimaxëpata. ⁵Ponë pexi ayabitsaëto xaina, barëya, tsipaji apocuene-amoneyabitsi tsane pijawajabitsaë, neconitsi-atatsi juez-nëjawabelia!

Salmo 139

Dioso daxitajawa peponaponaejawa, daxitacuene-ata peyapëtaejawa peliwaissi

Peyanacua-ewetsinë David-pijinë peyaquinaesalmo.

¹ Jehová, xanë nejamatabëcuenetaneme. Nexata, xaniawaetsia nejamatabëcueneyapëtaneme.

² Neyapëtaneme daxita xua exanabiabajë. Nexata, yapëtaneme ta-ecae-epato, tanonotapuna-epato-ata. Tajë ponapona-atanë xamëwecua, tajëw-erena nejamatabëcueneyapëtaneme.

³ Netaneme tanajetarucaejawata namutua, tanacuera-ewetarucaejawata-ata. Daxita xua exanabiabajë, yapëtaneme.

⁴ Daxita tajumaitsiliwaisinexa, tajumaitsiwajënaeya, yapëtaneme.

⁵ Nematatoyorotsiaponapona. Tawajënaewerena, tacowëwerena-ata, nesaëta ne-ewetaponapona.

⁶ Xamë daxitacuene neyapëtaejawa. Ayaijamatabëcuenenëmë bitso. Nexata, aponecajëpae xaniawaetsia tacajamatabëcueneyapëtaenexa pacue-nia jamatabëcuene-itsimë daxitacuene yabara.

⁷ ¿Detsa belia ponaëjitsipajë tajë nijaEspíritu Santowecua, itsajota bajara-Ponë apoponapona? ¡Ajibi cajena! ¿Detsa belia cawecuanajetabijirawijitsipatsi? ¡Ajibi tacawecuanajetabijirawijawabelia!

⁸ Ita ponaëjitsipajë tajëbetsia, athëbëabetsia, bajarajotatsia ponapona. Ita ponaëjitsipajë tajëbereca, iratuatujëabereca, bajarajotareca-ata ponapona. ⁹⁻¹⁰ Ita pënaponaëjitsipajë matcabipijjuameto, tapatsinexa manuamenetabuyabereca, bajarajotareca-ata ponapona. Nexata, bajarajotareca-ata xaniawaetsia ne-ewetsipame ta-itsacueneyaniwa.

¹¹⁻¹² Ita jumaitsinë tsipae: «Merawi raeta, piaitaquirijawata, Dioso apone-tae tsane», ita janë tsipae, itsiata xamë netaëjitsipame, tsipaji merawi-ata apocatsitamerawi. Merawi piaitaquirijawata-ata, apocawecuanacaranatsitsi tsipae, tsipaji merawi-ata catsitanapebeta pacuenia matcabita. Merawi, matcabita-ata, catsitanajëpabeje.

¹³ Bajayata xanënexa taena ita nenacoxita, xamë ne-exaname taena pecototota. Xaniawaetsia ne-exaname daxita taperabëto, tajamatabëcuene yajawa.

¹⁴ Barëyanë bitso xamëjawabelia, tsipaji pexaniacuenia bitso ne-exaname. Bitso cajena pexaniacuenia daxita nexanaejawa. Bajarapacuenia tane-exanaexaemë pexaniacuenia carajutabiabatsi.

¹⁵ Taena pecototota, itsajota daxitajiwi aponetae tawitsabaponaejawa, xamë caenëmë netaneme.

¹⁶ Ita abaxë aponaexanaenë taena pecototowecua, xamë netaneme. Naexanaenejewanë abaxë, nijabaxutota yaquinarutame pamatacabibeje ponaponaëjitsianë.

¹⁷ Netsitaxanepana bitso nenajamatabëxainaecuene. Nawita bitso tanesiwanajamatabëxainaecuenëmë.

¹⁸ Ita namata-ëjëtsipajë tanesiwanajamatabëxainaecuenëmë, nawitsipa bitso tajetabo-atsatoxi matatoxenetsia. Ita naëcotajë tamajitsicujinae, tsi-teca cayajawatsi.

¹⁹ ¡Dioso, werebiabare pibisiacune pexanaewi! ¡Jiwibewi newecuatixire!
²⁰ Bajarapamonae cabaranatsipaeba pibisiacuenia. Pibisiacuenia cawënëjona nijawajabitsaë.

²¹ Jehovah, xanë itoyanë pamonaë ca-itoya. Itoyanë pamonaë catsimaxëna-jamatabëwereta, ²² tsipaji nijawajabitsaë xanë-ata tajawajabitsaë.

²³ ¡Dioso, nejamatabëcuenetaema tanejamatabëcueneyapëtaenexamë!
 ¡Nejamatabëcuene-ëjère neyapëtaenexa pacuenia jamatabëcuene-itsinë!

²⁴ Itsa taneme itsacune ta-exanaejawa, xua aponejitsipaecune, neyapëtaeya-exanaename. Neyapëtaeya-exanaename nejitsipaecune ta-exanaenexa.

Salmo 146

**Dioso itsa yawenona jiwi, bajaraPonëjawabelia jiwi
 pejamatabëcuenebarëyajawa peliwaishi**

¹ Itsamonaejawabelia payapëtaeya-exanaename Dioso ayaijamatabëcuene pexinaejawa. Daxita tasaëtsaponaponae-epatojebi mapanacuataje, tajamatabëcuenewetsina pexaniacuenia wënëxaniatabiagianjë Jehovah taneyawenonabiabijawa yabara. ² Daxita tasaëtsaponaponae-epatojebi mapanacuataje, pexaniacuenia wënëxaniatsianjë Jehovah bitso ayaijamatabëcuenenë yabara. Wajianë-ata tonaxëanabiagianjë Jehovah tajaDioso.

³ ¡Pëtsa pasiwanajamatabëcuenecopatame petuxanewijawabelia papecayawenonaenexa! ¡Pëtsa pasiwanajamatabëcuenecopatame itsajiwijawabelia-ata papecayawenonaenexa, tsipaji jiwi apocajëpaetsi papecacapanepaenexa, ⁴ tsipajinua saya jiwi bepijia tëpa! Atsabeno icatsia naexana. Itsa baja tëpa, tocopiarucatsi baja pacuenia picani exanaejitsia, penajamatabëxainaejawami.

⁵ Pajijiwi xaina Jacob pijaDioso peyawenonaenexatsi, bajarapajijiwi barëya. Pajijiwi siwanajamatabëcuenecopata Jehovah DIOSO jawabelia peyawenonaenexatsi, bajarapajijiwi barëya. ⁶ Jehovah raja exana itaboxo, ira-ata, manuamene-ata. Daxita xua-ata tanetsi itaboxota perubenaejawa, irata-ata, manuameneta-ata, bajaraPonë yajawa-exana. Pacuenia bajaraPonë najumecapanepaeya jumaitsi pexanaenexa, bajarapacuenia exanabiaba dexitamatacabijawabelianexa. ⁷ Jehovah raja pijajijiwi yawenonabiaba, itsamonaë ita tobejiobia-exanatsi. BajaraPonë rajutabiaba pejanipaewi pexaejawanexa.

Jehová pijajijiwi capanepabiaba, pijawajabitsaë pejamatabëcuene bejiobia-exanaejawatsiwecua. ⁸ Bitso pitatsëcënaewimi-ata, Jehovah itaxutoxaniawae-tabiaba. Pamonaë pejumecowënëtsijawa pejamatabëcuenecueranaewi-ata, Jehovah jamatabëcuene-asaëya-exanabiaba. Jehovah raja asiwa tsabiabi pamonaë pexaniacune exanabiaba. ⁹ Itsanacuawerena pepatsiwi-ata, Jehovah ewetabiaba itsamonaë pitsacueniabiyaniwatsi. Yawenonabiaba tsonijiwixi. Yawenonabiabanua pamonajijiwi pewecuatëpaewanëtsi-ata. Pibisiacune pexanaewi, itsa najamatabëcuenewereta itsacune

picaní pexanaenexa itsamonaejawabelia, bajarapamonae Jehová nacueratsia-exanabiaba.

¹⁰ Itsamatacabi Jehová daxitanacuanë ewetsiana daxitamatacabijawabelianexa. Israel papemomoximë, panijaDIOSO daxitanacuanë ewetsiana pewajënaeyabelia. Itsamonaejawabelia payapëtaeya-exanaename bajaraPonë ayaijamatabëcuene pexanaejawa yabara.

Salmo 147

**Jerusalén tomara Dioso pewetsixae, bajaraPonëjawabelia
jiwi pebarëyajawa peliwaissi**

¹ Pexaniacuenia pawënëxaniatsianae Jehová, tsipaji bitso nacatoxanepana wajianëta bajarapacuenia wajanaxëanabiabinexa wajaDIOSO.

² Jehová baja icatsia Jerusalén tomara matacotapona. Bajarapatomara-berena icatsia caetuataponaena Israel-pijinë pemomoxi, itsanacuanëjawa penacayajatsiajinawanapaewimi. ³ Nexata, pamonae bitso najamatabëxaina, Jehová jamatejemaya-exanabiaba bitso penajamatabëxinaejawamiwecua.

⁴ BajaraPonë namata-ëjëtacapanepa daxita perubenaetuluputonë, bitso ayaijawa exanae-ata. Caetuluputo canacujitsia wënëruba. ⁵ ¡WajaTuxanenë raja ayaijamatabëcuenenë! ¡Piasaënë bitso! ¡Daxitacuenë peyapëtaenë! ¡Apotocopiarucaetsi peyapëtaecuenë cajena! ⁶ Pamonae beweliajamatabëcuenewi natane, Jehová yawenonabiaba itsamona peyaiyataenexatsi. Juya, pamonae pibisiacuenë exanabiaba, bajarapamonae bajaraPonë ayaiacuenia urabiana jiwi pitabarata.

⁷ ¡Jehovájawabelia barëyaya panaxëanare, panewënëxaniatsinexa pape-cayawenonaexae! ¡Arpa racatsiaya wajianë panaxëanare wajaDIOSOjawa-belial! ⁸ BajaraPonë itaboxo itacaranatabiaba itarërëbonëta. Itorobabiaba ema ira piatsanaenexa. Petsutonëjawa juwia-exanabiaba pona. ⁹ Pexaejawa rajutabiaba unupijidujuai. Pepunaewi pexi-ata pexaejawa rajutabiaba, ita fiababiaba piajanijamatabëcuene.

¹⁰ Dioso aposiwabarëya tsabiabi caballo piasisaëjawa, jiwi pesaë-ata, penamatamotsicuenia petaenexa bajaraPonë pitabarata. ¹¹ Biji rajane, siwa-barëya tsabiabi pamonae yayiatanetsi, siwanajamatabëcuenecopatanua bajaraPonëjawabelia peyawenonaenexatsi, tsipaji yapëtane Dioso piasiwajawatsi. Bajaraxuabeje namatamota cajena Dioso pitabarata.

¹² Pajerusalén-tomarapijiwimë, pexaniacuenia pawënëxaniatsianame Jehová ayaijamatabëcuenenë yabara. ¡Pexaniacuenia pawënëcacuaicuai-jamëre panijaDIOSO, ¹³ tsipaji panijatomara matatoyorotsia peyacara-natsijawaxanetopijibaupanë bajaraPonë atajaya-exana, panijawajabitsaë papecatsimaxëjoneyaniwa! Bajarapatomaratuatujëta xaniawaetsia paca-ewetabiaba. ¹⁴ Panijanacuata wajabitsaëcuene ajibia-exana. Nexata, pexaniapexaejawanë aliwaisijibia paxaeyabiabame. ¹⁵ Najume-itorobabiaba pejume mapanacuayabetsicaje. Pijajiwi bitsojinaeya to-exanabiabatsi xua itoroba. ¹⁶ Athëbëwetsica bitso pecainejebijawaxi, othopaeya-exanabiaba.

Bajaraxuaxi bitso niojai. Bitso pecainejebidonotoxi-ata, cayajatabiaba daxi-tajawa perubenaenexa, be-ipumana. ¹⁷Itsajawata athëbëwetsica othopaeya-exana pecainejebimatarejetoxi, merami piatajajawa penaexanaematare-jetoxi. Bitso pecainejebixae, merami piatajajawanë naexana. ¹⁸Nexata, icotia itsa ataju, jowibo-ata itsa bubujai, bitso pecainejebijawaximi, bitso pecainejebidonotoximi-ata, bitso pecainejebimatarejetoximi-ata, DIOSO tsabanaeya-exana. Nexata, icatsia mera naexana.

¹⁹Israel-pijinë pemomoxijawabelia DIOSO tonajumecopata pejumeliwaisi. ²⁰Itsia, bajarapacuenia apotonajumecopatsi itsanacuanëpijiwijawabelia. Nexata, bajarapamonae apoyapëtae Dioso pejumeliwaisi.

¡DIOSO raja ayaijamatabëcuene pexainaenë!

Proverbios

Petsiyapëtaeliwaisianë jiwi pemuxujiobinexa

Israel-pijinë pemomoxi yapëtane pexaniajailiwasianë. Nexata bajarapaliwaisianë Israel-pijinë pemomoxi jitsipa namata-enetsia penatsipaebabiabinexa. Bajarapaya-juwënëliwaisianë Israel-pijinë pemomoxi yaquinaruba Proverbios-baxutota. Bajara-payajuwënëliwaisixi rubena mapabaxutotaje. Nacua-ewetsinë Salomón bitso yapëtane ayaijawa liwaisi. Nexata, Salomón peyaquinaeliwaisianë-ata, ayaijawa rubena Proverbios-baxutota. Bajarapayajuwënëliwaisixi-ata rubena mapabaxutotaje.

**Pajamatabëcuene yabara yaquina mapabaxuto bitso peyapëtaenë
Salomón-pijinë toyaecaeya pemuxujiobiliwaisixi**

1 ¹Mapabaxutotaje rubena toyaecaeya pemuxujiobiliwaisianë, Salomón peyaquinaejawa, David-pijinëmi pexënato, Israel nacua peyanacua-ewetsinëmi. ²Bajarapaliwaisixi nacacujarubiana wajatsi-wajënaecanaëjëtsijamatabëcuenenexa, wajayapëtaenexanua pacuenia jinawanapaejitsiatsi. Nacajamatabëcueneccujarubiananua wajanacuenexanebaponaenexa, wajayapëtaenexa xaniawaetsia pabëpënëaliwaisianë bitso peyapëtaewi nacatsipaebabiabiana wajanacamuxujiobijawata. ³Bajarapaliwaisianë pejamatabëcueneta, natoyapëtaenatsinua wajanacuenexanebabiabinexa, xaniawaetsia wajajinawanapaenexa. Natoyapëtanetsinua yapëtaeya waja-exanabiabinexa daxitacuene, xaniawaetsia wajacanaëjëtsicujinae. Natoyapëtanetsinua pexaniajaijamatabëcueneta waja-exanawanapaenexa daxitacuene. Bajarapaliwaisianë nacamuxujioba najëpaeya pexaniacuene waja-exanawanapaenexa daxitajiwijawabelia. ⁴Bajarapaliwaisianë nacanaexanaeya-exana wajayapëtaewinexa, xaniawaetsia wajacanaëjëtsinexa, apowajayapëtaewi-ata picani. Bajarapacuenia pewëjëawi, pejanawi-ata, naexanaena bitso peyapëtaewi, abaxë apojamatabëcuenenaweretsi-ata. Nexata, nato-itapetabiabiana pexania-cuene pexanabiabinexa.

⁵Bajarapijinia pacuenia, pajiwi penatsiwajënaecanaëjëtsijiwi itsa natojumetaena bajarapaliwaisianë, nexata matatoxenetsia peyapëtaejijiwi ne-exanaena. Pejumeyapëtaejijiwi pijinia pitaponaena pexaniamuxujiobiliwaisianë, pecanaëjëtsijamatabëcuene-ata. ⁶Nexata, bajaraxuanë pejamatabëcueneta, jumeyapëtaeyabiabiana bëpënëa pejumaitsijumenë, cuenecataeya itsacuenia pecanaëjëtsijumenë-ata, itsamonae peyapëtaewi pejumaitsijumenë-ata bëpënëacuenia, piyapëbejejumenë-ata.

⁷Pajiwi jamatabënaexana peyapëtaewi, copiaya ayaicuenia beyaiyatane Jehovah. Pamonaе pijinia apopenatsiwajënaecanaëjëtsiwi peneta namuxu-jematabiaba pemuxujiobijawatsi. Apojitsipabiabinua pecujarubijawatsi xua abaxë apoyapëtae.

Pemuxujiobiliwaisianë pewëjëawinexa, pejanajiwinexa-ata

⁸Xamë pewëjëatomë, tonacopare axa pecacuenexanebijawa. Namuxuna-ewerenua ena pecamuxujiobijawa. Pëtsa nacofënëtame axa, enabeje pecamuxujiobiliwaisi, ⁹tsipaji bajarapaliwaisianë nejumecowënëtsijawata, daxita casiwajamatabëcuenebarëya tsane. Pacuenia jiwi itaxutuabarëya tsipae nenamataxatatsijawata coronajawa, nenacuaibosicëtsijawatanua pexania-maëto, bajarapijinia pacuenia jiwi casiwajamatabëcuenebarëya tsane pecacuenetaejawata nejumecowënëtsijawa axa, enabeje pecamuxujiobiliwaisi. 10-33 [...]

**Papexaniacuenejawanë jiwi taewanapaena yapëtaeya
pecanaëjëtsicue ne pejamatabëcueneta**

2 ¹Xamë, pewëjëatomë, nenamuxuna-ewere xua cajumaitsitsi. Asiwaya najamatabënapitabiabianamenua daxita paliwaisianë catonajumecopata-tsi, neyapëtaenexa xaniawaetsia Jehovah neyaiyataecue.

²Namuxuna-ewetabiabianamenua peyapëtaewi pecanaëjëtsiliwaisianë pecatsipaebijawa. Caeliwaisi xainare bajarapaliwaisi, neyapëtaenexa pexaniacuenia nexanabiabinexa.

³Bitso nejitsipaecuenia wajëre liwaisi peyapëtaewijawabelia, pecayapëtaeya-exanaenexa. Nexata xainaename neyapëtaejamatabëcuene, nenatsiwajënaecanaëjëtsijamatabëcuenenua, neponaponaenexa yapëtaeya.

⁴Ayaicuenia natojaire bajarapajamatabëcuenebeje pacuenia jaitsi-pame palatabaxuto, pacuenia-ata jaitsipame pematayabijawami, bitso penamatamotsijawanë.

⁵⁻⁶Daxita bajarapacuenia itsa exanaponaponaename, nexata yapëtaenajetarucaename baja xamë ayaicuenia neyaiyaitaejawa Jehovah. Orijibia, pepacue ne cueneyapëtaename nijaDIOSO, tsipaji raja Jehovahjawawerena pitsapa wajacanaëjëtsijamatabëcuene, daxita wajayapëtaejamatabëcuene-ata.

⁷BajaraPonë rajutabiaba pexaniacanaëjëtsijamatabëcuene, yacaranatabiabanua itsacuenewecua, pamonaе pexaniacue ne pexanaewijawabelia. 8-22 [...]

**Siwanajamatabëcuenecopare Jehovahjawabelia
daxita nejamatabë-ëthëtojawawetsina!**

3 ¹Xamë, pewëjëatomë, pëtsa nacofënëtame tacayapëtaeya-exanaejawanë. Xuanë ca-itorobatsi nexanaenexa, natoxaniawaere nejamatabë-ëthëtota, newajënaeyabelia nejumecowënëtaponaponaenexa.

²Nexata bajarapacuenia itsa exanaponaponaename, bajayajebi asaëmë tsaponaponaе tsane mapanacuataje. Bitso jamatabëcuenebarëyamënuа tsaponaponaе tsane.

³Pëtsa copatame itsamonae niasiwatsabiabijawa. Pëtsa copatamenua nexaniajaitsiabibijawa. Bajaraxuabeje natoxaniawaere nejamatabë-ëthëtota,

pecajamatabëcuenematacaponaponaenexa pexaniacuenejawalia. ⁴ Oriji-bia, bajaraxuabeje pejamatabëcuene DIOSO casiwabarëya tsane, jiwi-ata cayaiyataena.

⁵ Pëtsa jumecowënètame pacuenia nejamatabëcuene ca-itoroba nexanaenexa. Biji rajane, daxita nejamatabëcuenesaëta siwanajamatabëcuenecopare Jehovahajawabelia, pecayapëtaeya-exanaenexa xua exanaejitsiamë. ⁶ Nexata, itsa najamatabëcuenecaewetsianame bajaraPonëjawabelia pecatojitsipacuenia nexanaenexa, catsitajëtsiana pacuenia ponaponaejitsiamë newajënaeyabelia. Jamatabënaponaponabiabianame, nexanabiabinexa pacuenia Jehovah ca-itoroba.

⁷ Pëtsa bitso beneyapëtaenë nataneme Jehovahewecua. Biji rajane, yaiyataema Jehovah, necopatsinexa pibisiacuene nexanabiabijawa. ⁸ Bajarapacuenia itsa exanaponaponaenexa, perabëjumalixanepanaeya ponaponaenexa.

⁹ Dioso yaiyataeya ofrendacuenia rajutabiabianame nexainaeyajuwënë-jawanë. Xuanë-ata ubabiabianame, xuanë copiata catonaweretabiabiana, bajaraxuanëyajuwënëjawanë-ata Dioso yaiyataeya rajutabiabianame.

¹⁰ Bajarapacuenia itsa exanabiabianame, Dioso cayawenonabiabiana. Ne-ubijawanë catonaxaniababiabiana. Nexata, nexaejawa ayaijawa xainabiabianame.

¹¹ ¡Pewëjëato, pëtsa anaepaname Dioso itsa cananeconitsia-exana pibisiacuene nexanaeneconí pejamatabëcuene! ¡Pëtsa anaepanamenua Dioso itsa ca-itaweta pibisiacuene nexanaejawa, ¹² tsipaji pajiwi Dioso asiwa, pibisiacuene itsa exana, bajarapajiwi Dioso naneconitsia-exanabiaba! Pacuenia pexi pexinaejijiwi, pexi piasiwaxae, itawetabiaba pibisiacuene itsa exana, bajarapajini pacuenia Dioso pijajiwi piasiwaxae, itawetabiaba pijajiwi pibisiacuene itsa exana. ¹³⁻²⁰ [...]

²¹ Xamë, pewëjëatomë, pëtsa wecuanajamatabëcuenetsatame daxita xua pexanianaëjëtsijamatabëcuene. Pëtsa bijiaya nacuene-ewetame pexaniacuene nexanaecuene yabara. ²² Bajarapaliwaisibeje cajamatabëcueneayawenonaena, xaniawaetsia neponaponaenexa. Nexata pecacuenetaejawata nexanaecuene, daxita jiwi casiwajamatabëcuenebarëya tsane, pacuenia petaejawata itaxutuabarëya tsipae pexanianenacuaibosicëtsimaëto pexaniajawa. ²³ Bajarapacuenia ne-exanaponaponaexae, jamatejema ponaponaename jiwi pitabarata, aliwaisijibia. Nexata, xamë apowecujopaemë tsane, ^a pexaniacuene nexanaponaponaejawa.

²⁴ Nemajitsijawata, apoxainaemë tsane xua yabara junawijitsiamë, nexanaecuene yabara. Biji rajane, jamatejema majitabiabianame, bëjamënejewa. ²⁵ Aponajunawimënu tsane jemata bitso piyaicuene pecatocopiapatsijawa yabara, pabejiobicuene-ata, pacuenia tocopiapatatsi pamonaë piamatabëcuenebejewi.

²⁶⁻²⁷ Jehovahajawabelia nitaxutuajamatejematsaponaponaexae, jamatejema ponaponaenexa. Nexata, bajaraPonë apocacuenecopatsi tsane pecajamatabëcuene-ëjëbijawata pecajopaeya-exanaeyaniwa. ²⁸⁻³⁵ [...]

Nayajiwitaema, nimoxoyobiyaníwa pewitota pibisiacúene pexanaewi

5 ¹ Xamë pewëjëatomë, nenamuxuna-ewere tacatsiwajënaecanaëjëtsili-waisita tacamuxujiobinexa. Nenamuxuna-ewere muxujitsipaeya tacamuxujiobiliwaisi. ² Bajarapacúenia nexanaejawata, xainaename necanaëjëtsijamatabëcuene. Necuacuaijaicuenejawatanua, canaëjëtsiaya cuaicuajjamë tsane.

³ Pamona pexainaewa^b itsa cajunata pexanialiweisita, nayajiwi-taema nejumecowënëtsiyaniwa. Bajarapowa pecajumaitsijumënë camuxujitsipaeya-exanaena, pacúenia banara nacajitsipaeya-exana wajaxaenexa. Pacúenia-ata aceitera nacaperabëyacueyacuëya-exana, bajarapacúenia bajarapowa pecajumaitsijumënë cajamatabëcúenetotowia-exanaena, nejumëjëjainexa pecajunatsijawata. ⁴ Bajarapowa peliwaisi, itsa jumecowënëtsipame, catonae-xanaejitsipa bepiatsaxamera nejamatabëcuenejawata, tsipaji bitso canajamatabëxainaeya-exanaejitsipa. Pacúenia itsa cacuatsipa pexuijai-espadata,^c anijabarëneniabeje pexinaejawa, bajarapacúenia-ata bitso catsi-ayai tsipae bajarapowa nejumecowënëtsixae pecajunatsijawata. ⁵ Bajarapowa raja camatacaponaejitsipa netëpaenamutuabelia. Bajarpitsiwa raja pejamatabëcúeneta, jiwi tëpaeya-exanabiaba. ⁶ Bajarapowa aponasiwabëjai tsabiabi peponaponacuene yabara. Caranata, saya siwabëjai tsabiabi pibisiacúene pexanabiabinexa. Nexata, aponatoyapë-tae penajetaruaejawa pibisianamutojawalia.

⁷ Nexata, xamë, pewëjëatomë, nenamuxuna-ewere xaniawaetsia. Nejumecowënëre. Pëtsa nenamuxunajematame paliwaisianë camuxujiobatsi. ⁸ Tajë wecuanatsare powa naperabërajutabiaba pibisiacúene pewitota pexanaenexa ponëjawabelia jamatabë-exana. Pëtsa bajarapitsipetiriwa pijabobaupa imoxoyojawa najetarucame.

⁹ Bajarapowa pijabota itsa patsipame nimoxoyobinexa, jiwi pecayaiyatae-cúenemi cawecua-ajibi tsipae. Orijiibia, daxitaxuanë xainame, bayajajebi nenacúenebijamatabëcuene, naxuabijitsipame. Bajaraxuanë canacopatsipa pibisiagamatabëcúenewi. ¹⁰ Daxita xuanë ayaicúenia nacuerotame nepitsinexa nenacúenebijawata, bajaraxuanë itsamonae aponeyapëtaewi cabarëya tsipae. Nexata, daxita necobecowëjawanëmi, cawecuanaxainaeyajitsipa pijabota.

¹¹ Bajarapitsicúene itsa exanaejitsipame, itsamatacabijawabelia belia natsiyapitsipame pawixae caperabëbijianaejitsipa. Nexata yabëjaimë tsipae nepuacúenepanepae. ¹² Yajamatabëcuenebëjiaia jumaitsimë tsipae: «¡Jaa! ¿Detsa xuajitsia tajacanawecua-itoya taxa tanecúene-itawetsijawami? ¿Detsa xuajitsia tajaca-amuxujitsibi xua necujaruba tanemuxujiobijiwi? ¹³ Xanë aponacopatsinë itsajiwi tanemuxujiobijawa, pacúenia xaniawaetsia ponaponaejitsianë. Aponacopatsinë xuanë netsipaeba tanecúenexanetsinexa

b 5:3 Pamona pexainaewa: Hebreojumeta, nayapëtane powa penaperabëcanajetsiwa apopenacojiobiwa, penacojiobiwa-ata. **c 5:4 pexuijai-espadata:** Espada raja bepiapiacusiupa, anijabarëneniabeje pexuijaijawa. Bajayatami wajabitsaë canawajabitsaëtabiaba bajaraxuanëta.

tanecujarubiwi. ¹⁴ Bajarapacuenia ta-exanaexae, ajenaconoxae baja bitso nabejiobitsicuenia ponaponajë. Bitso baja nebaracuaicuaijai tsabiabi daxita jiwi», jamë tsipae.

Penacojiobiwi pemuxujobiliwaisi

¹⁵ Pacuenia mera nejitsipaejawata nijacanalitopijimera apaeyabiabame jaitsinejewamë itsamonae pijacanalitopijimera, bajarapacuenia apobejaitsimë itsapetiriwa nijawawecua, nejitsipaejawata nimoxoyobinexa. Pacuenia jamatabëcuenebarëyamë mera niapaecujinae nejitsipañemi, bajarapacuenia jamatabëcuenebarëyamë tsane nijawa nimoxoyobicujinae. ¹⁶ Pacuenia nepuanaemera apo-epabajarabimë tsipae namutonëjawa, bajarapacuenia apobenacoxicayajatsimë itsapetiriwajawabelia nexi nebarëxainaponaexae. Bajarapacuenia itsa exanaejitsipame, nexata itsamonae saicaya pijabota cacoxiwitsatsipa. ¹⁷ Bajaraxuata, panacuenexaniawaerebeje panena-asiwacuenebeje, ëpaxamëbejenexa pena-imoxoyobinexabeje. Pëtsa panawecuajaitamebeje itsajiwijawabelia.

¹⁸ Xanepana cajena bitso nijawajawabelia nexi nexainaejawa. Nexata, siwajamatabëcuenebarëyamëre powa pitame pewëjëato-jawatamë. ¹⁹ Bajarapowa xamënexa caewa bitso pexaniawa, peca-asiwawanua. Bajaraxuata, tonacopare bajarapowa pecabarëyataejawa, pecawëtaicaejawa-ata. Tonacoparenua pecajamatabëcuenecajopaeya-exanaenexanua peca-asiwajawa.^d Nexata cajamatabëcuenecaranatsiana ëbajarapowa nejitsipañexa. ²⁰ Xamë pewëjëatomë, ¿detsa xuajitsia nacopatsipame itsanë pijawa netobarënajitsipañexa? ¿Detsa xuajitsia wëtaicame itsa petiriwa powa aponijawa? Apoxanepanae cajena bajarpacuenexanaejawa.

²¹ Jehová raja naitaxutoca-ewetabiaba xua exana caejiwiyo canacujitsia. Naitaxutoca-ewetabiabanua itsaxuayo ponapona.

²² Pajiwi pibisiacuene exana, bajarapa-exanaecuenejawata jamatabëcuene-amoneyabianatsi. Pacuenia dajubi, pemaëtota pecëtanutsinëtsi, apocopatsitsi peponaponaenexa, bajarajamatabëcuene-itsi pajiwi apocopatsi pibisiacuene pexanaejawa. ²³ Nexata, bajarapamonae apopenacuene-ewetsixae pibisiacuene pexanaejawa, tëpaena. Pejinawana-paexae najamatabëcuenecataitsinejewa pibisiacuene pexanaejawa, naxuabiana. *Bajarapacuenia, xamë-ata pewëjëatomë, catocopiapatsiana, itsa aponejumeowënëtsimë tacamuxujobiliwaisi.*

Penacowaetsia-exanaecuenexa pemuxujobiliwaisi

6 ¹⁻² Xamë, pewëjëatomë, itsa naliwaisicajonejitsipame neto-matamotsijawa itsanë neyapëtaenë piamoneyabijawa, itsa jume, aponeyapëtaenëjawabelia-ata, xua apocuenecaëjëpaetsi

d 5:19 peca-asiwajawa: Wowaijumeta pitsapa pemitto. Itsiata, bajarapajume, pemittojume, nacatocuenecatane wajawa wajanaca-asiwajawa. Itsiata, itsamonae casaë pecanacuenebinexa pemittojume. Bajaraxuata, juta mapacueniajæ: *Itaxutuajiname ënjawa pemitto pecabarëyaya-exanaenexa*, pejaicuenia. Itsiata, bajarapacuenexa nacyapëtaeya-exana pacuenia aponacato-xanepanae wajajaitisjawa itsajiwijawabelia waja-imoxoyobinexa wajanapitsijiwibewecua.

penatomatamotsinexa, xamë-ata pijinia itsa apocacuenecaë-jëpae tsipae nejumaitsicuenia, belia nexainaeyajuwënëjawanë cawecuapitsipa.

³Xaniawaetsia nenamuxuna-ewere xua catsipaebijitsiatsi. Pewë-jëatomë, mapacuenia exanaename newecuapanepaenexa bajarapali-waisi. Pëtsa na-urabame. Beweliajamatabëcuenenëcuenia naitajëre ponëjawabelia nacajunuame netomatamotsinexa. Bajaraponëjawa-belia jumaitsimëre pecawënë-iquinaenexa pabaxutota cawënëya-quinaruta picani ne-exanaejawaminexa. ⁴Pëtsa cuenenajematame cae-epatoyo-ata nexanebinexa bajarapaliwaisi. Caecuenia saya exanaename. Pëtsa ewetame itsamatacabijawabelia nexanaenexa. ⁵Pacuenia owebi bepijiayo wecuanamatayabijitsipa penarujauit-sinë, pacuenia-ata baratsuito wecuapanepaejitsipa pewaetabi-nënexatsi, bajarapijinia pacuenia bepijiayo wecuapitsapaenama bajarapanajumecajoneliwaisiwecua.

Piafaetabiwi pemuxujobiliwaisi

⁶¡Xamë, niafaetabinë, cuenetaema penacuenebijawa pëbëthai! ¡Cue-necanaëjëre, necuenejëpaenexa bajarapamonae pacuenia exanabiaba! ⁷Pëbëthai apoxinae penamatacaitorobiwitsi penacuenebinexa, itsiata nacuenebabiaba. ⁸Nexata, caewai canacujitsia natoxaniawaetabiaba pexaejawanexa.

⁹⁻¹⁰Xamë, niafaetabinë, buta rurucabiabame. Saya jema ponapo-nabiabame. Aponacuenebabiabimë nexaejawanexa. ¹¹Jemata itsa-matacabi catocopiapatsiana bitso nebejibijawanexa. Pacuenia penacobetoxotsinë yacajërëtsipa daxita pecobecowë, pewecuaca-ponaenexa, bajarapijinia pacuenia niafaetabicuene cawecua-ajibia-exanaejitsipa daxita nexainaejawaminexa. Nexata, bitso bejibicueneta ponaponaenama.

Pitsicuene xaina piajajamatabëcuenewi

¹²Mapitsicuenejawanë exanawanapa pamonae itsacuenejawayonexa apopexanepanaewi, piajamatabëcuenebejewinua. Najumetsë-nëtsiaya jinawanapabiaba. ¹³Bepexaniajaili-waisi itajara pecuaicuai-jawata, nacuene-exanabiaba^e pijacujirucuenia pitaxutota, petaxuta, pecobesitota-ata, peyapëtaeya-exanaenexa peyanabinëtsijawabelia apopexaniajaicuene. ¹⁴Bajarapitsiwi najamatabëcueneweretabiaba pibi-siacuene pexanabiabinexa. Jaitabiaba pacuenia anaeya-exanaejitsia itsamonaejawabelia.

¹⁵Bajarapacuenia pexanabiabiwi, jemata piabejecuene tocopiapatsianatsi, pejamatabëcuene-amoneyabinexatsi. Apoxinae tsane pepanepaejawanexa bajarapapiabejecuenewecua.

e 6:13 nacuene-exanabiaba: «Najumetsënëtajë picani», pejainexa penacuene-itajëtsijawata, judfowi canacuenebabiaba mapitsicuenejawanë: Caenenia naitaxutotsaquetabiaba, itsa jume, nataxuna ira conita, itsa jume, nacobesijëaba. Baitsi pecuaicuaijinëjawabelia apotsita-exanae bajaraxuanë. Saya tsita-exana itsanë pejamatabëcueneyanabinëtsijawabelia, bajaraponë peyapë-taenexa apopexaniajaicuene

Papibisiacuenejawanē jiwi exana Jehová cuene-itoya itsapexanaejawanēwecua

¹⁶Mapaseis xuabeje jiwi pexanaecuenejawanē Jehová bitso pecuene-itoyajawanē. Daxitata siete xuabeje Jehová pepopiataejitsibijawanē, itsacue-nejawanēwecua jiwi pexanaecuene. Maxuanēje:^f

¹⁷Ayaijamatabēcucene jiwi penataejawa itsamonaewecua, jiwi penajumetsēñsīcuene, jiwi planeconijibiwi pebeyaxuabicuene, ¹⁸jiwi pesiwanajamatabēweretsīcuene pibisiacuene pexanaejawanexa, jiwi pejaitaponaecuene jamatabēcucene-aitatsacaeya pibisiacuene pexanaenexa, ¹⁹pajiwi cuenetaenejewa najumetsēñsīaya itsajiwiyo peneconitsīcuene, itsamonaē juya petāenexatsi penaneconitsījiwicuenia, pajiwi-ata liwaisi tsi-exanabiaba pebaracuaicuaijajawata, namata-enetsia pena-itoyanexa nacaemonae-ata.

Pemuxujiobiliwaisi pijawa pexainaenē, itsawa pewecuaajaitsiyaniwa

²⁰Xamē, pewējēatomē, xua axa, enabeje, ca-itorobabiaba, jumecowēñētabiabiab-name. ¡Pētsa nacofēñētamenua pecamuxujiobiliwaisianē! ²¹Pecamuxujiobiliwaisianē, nacofēñētsinejewamē jamatabēnaponaponabiabianame. ¡Bajarapaliwaisi asiwaya taema, pacuenia penamatamotsimaēto nawēsīcētsipame! ²²Nexata, matababijebi, merawijebi-ata, cājamatabēcuenematacaponaena itsajiwi-ata pecayamaxē-itojorobiyanīwa, pibisiacuene peca-exanaeya-exanaeyaniwa.

²³Peca-itorobiliwaisianē bepecotia, pecayapētaeya-exanaenexa xua catsī-ayai peca-itsacueniabīnēxā. Pecamuxujiobiliwaisianē-ata cājamatabēcucene-itayotsiana xaniawaetsia neyapētaenexa, neponaponaecuene.

²⁴Bajarapaliwaisianēta nenacuene-ewetaponaponaejawata, apo-imoxoyotsimē tsane pibisiacuene pexanabiabiwa, powa pīcani cabarēcuaicuaijajitsia pexania-jumenēta, pibisiacuene newitota nexanaenexa bajarapowajawabelia.

²⁵¡Pētsa nejamatabē-ēthētojawawetsina itaxutuajiname pexaniawacuene yabara! ¡Pētsa nacopatame pecayamaxē-itojorobīnēxā pecabarēnajume-itacanitsijawata!

²⁶Powa, penaperabēcanajetsiwa, jaita saya cae-epatoyonexa, penamatamopitsijawata penatopitsīnēxā penamatawenonaecuene. Itsiata, itsanē pijawa itsa jaitame, pibisiacuene newitota nexanaenexa bajarapowajawabelia, pamona cabeyaxuabijitsipa. Nexata, bajaraxuabeje najēpaeya catsī-ayai.

²⁷Pacuenia pena-itajurutsi-isopanē itsa isapitsipame, camipabētajuejitsipa. ²⁸Pacuenia-ata iso-ita-irejumawereca itsa nonotsipame, cataxutajuejitsipa. ²⁹Bajarapacuenia ponē itsanē pijawajawabelia pewitota pibisiacuene

f 6:16-18 Maxuanēje: Hebreojumeta copiya cinco pacuenebeje wēñērubapona jiwiperabētoyajuwēñējawawerena, itsajota banaitajēta bajarapacuenē: copiya pitaxutobeje, pe-ebārēto, pecobebeje, pejamatabē-ēthēto, petaxubeje-ata. Nexata, jiwi ayaijamatabēcucene penataejawa yabara canacueneba, «*nawēyotsiaya jiwi petāenē*». Jiwi penajumetsēñsīcuene yabara canacue-neba «*penajumetsēñsī-ebārēto, itsa jume, penajumetsēñsīcuaiabo*». Jiwi planeconijibiwi pebeyaxuabijawa yabara canacueneba «*bepijīayo pebeyaxuabicobebeje itsajiwi neconi aponatsi-exanae-ata*». Jiwi pesiwanajamatabēcūnacuene pibisiacuene pexanabiabijawa yabara, canacueneba «*pecapitsapabiabijamatabē-ēthēto pibisiacuene pexanaenexa*». Jiwi pejaitaponaejawa pibisiacuene pexanaenexa canacueneba «*pecujinaejinaetaxubeje itsajawabelia pibisiacuene itsa exanaejitsia*».

exanaejitsipa, tocopiapatsipatsi piabejecuenejawa. Bajaraponë penaneconit-sixae, ayaicuenia naneconitsia-exanaejitsipatsi.

³⁰Pajiwi bitso pïajanixae, itsajiwi pebuatsijawa tonajanitoxota, bajarapa-jiwi itsamonae beweliacuenia apotaetsi. ³¹Itsia, pexinaejiwi itsa yabaracaxitarabatsi penacobetoxotsijawata, bematamota siete xuabeje pematatsënëa penacobetoxotsijawawecua. Penacobetoxotsijamatabëcuene itsa apoxinae xuata matamotsijitsia, berajuta daxita xua xaina^a pecobecowëjawanë.

³²Ponë pewitota pibisiacuene exana itsanë pijawajawabelia, bajaraponë saya liwaisi apopecanaëjëtšinë. Pijacuata naneconita. ³³Bajarapacuenia pexanaexae, bajarapowa pamona pitoyaxaetsi, benatsi. Nexata, bitso aura tsabiabi tsane. ³⁴Itsia, acuenebi tsane penawecua-ajibia-exanaenexa pïaurajawa, tsipaji bajarapowa pamona, pe-ëbijamatabëcuene, bitso ayaicuenia anaepanaena. Nexata, pamatacabi tsimaxëpatsiana peyamamatotsinexa pijawa pijaneconijamatabëcuene, apo-itaxutotsoniataetsi tsane.

³⁵Aposiwajamatabëcuene caewinua tsane nayajiwimatamotsi-atatsi. Bitso penamatamotsijawanë nayajiwimatamotsiyapaebi-ata, tsiteca apo-anaecaewi tsane.

**Bitso pexaniacuene jiwi petsiwajënaecanaëjëtšij
amatabëcuene yapëtaeya pexanaenexa**

8 ¹Bëpënëa Dioso pecanaëjëtšijamatabëcuene ayaijumeta pacajunata padaxitanacuapijiwimë, papecajamatabëcuene cujarubinexa. Peyapëtaejamatabëcuenenua jamatabëcueneyanatsiaya pacawawajai, xaniawaetsia paneyapëtaenexa pejinawanapaecuenia.

²Bajarapacuenia paxamë xaniawaetsia panecanaëjëtšijamatabëcuene panexainaenexa, bepeceawawajai tsanuca^b petsutojumawetsica,ⁱ

g 6:31 *daxita xua xaina*: Itsajawata, matamotabiaba dajubi, xua xaina pijabota, pijapabi-ata. Itsajawata, rajutsipa pexi amoneya petonacuenebiwinexa piamoneyabinëjawabelia.
h 8:2 *bepapeceawawajai tsanuca*: Mapaversiculoxita Salomón cuenecataeya canacueneba jiwi peyapëtaejamatabëcuenenexa bejiwitowacuenia pemuxujiobiwa. Baitsi, Salomón canaëjëta jiwi apopenamatawenonaejawa penacopatsinexa pewajënaeyabelia apo peyapëtaewicuenia. Jiwi itsa xaniawaetsia nacujarubijitsipa, cuenecaëjëpatsi matatoxenetsia peyapëtaeponaenexa pejinawanapaecuenenexa, natsiwajënaecanaëjëtšipianua pexanaewajënaeya, tsipaji jiwi peyapëtaejamatabëcuenenexa aponawecuamatayatsi. Biji rajane, bepemuxuneneta wawajai tsanuca bepemuxujiobiwacuenia, jiwi pecanacuenebinexa bajarapayapëtaejamatabëcuene. Salomón canaëjëta bepejamatabëcuene-ewetsijawa jiwi peyapëtaejamatabëcuene, pecabarëyanexa. Itsia, pewëjëawi, pejanawi-ata, apopesiwabëjaixae pexainaenexa bajaraxua, cuene-itajëtšiya yabaracuaicuaijai bejiwitowa pejunatsijawa pïajamatabëcuenetajawijawabelia. **i 8:2** *petsutojumawetsica* Salomón canacueneba acueyabi pataxunaabeje itsajota jiwi namatawenonabiaba peyapëtaejamatabëcuene pecanacuenebinexa: **Petsuto** nacatocuenecatane itsajota jamatabëcuene-amoneyabatsi, itsajotanua pexaniacuene nacatopitsapa itsacuenejawa. **Anijanamutobeje pena-epacaxinaejawatabeje** nacatocuenecatane wajasowanajamatabëcueneretsijawa waja-exanaejawanexa, pacujinae nacatsicarua wajanato-itapetsinexa anijawabejetuatujëta. **Tomarajawabelia pejonebaupajawata** nacatocuenecatane wajanawijatsijawata, wanasiwacanaëjëtšijamatabëcuene-ata wajanasiwacanaëjëtšijawa xua pexaniacuene waja-exanaenexa, xua-ata pibisiacuene waja-exanaeyaniwa, itsajiwi pijaneconi yabara-ata, wajanatojutsinexanua papenamamatotsiliwaisianëta na-ewetsijitsiatsi waja-asaëtsaponaponamaetacabianë mapanacuataje.

itsajota-ata anijanamutobeje na-epacaxinabeje. ³ Bajarapacuenia-ata toma-rajawabelia pejonebaupajawata bepapecawawajai tsanuca mapacueniaje:

⁴ «Paxamë padaxitanacuapijiwimë pacajunatatsi patacajumaitsinexa mapajumenë. ⁵ Pacajunatatsi apopaneyapëtaewi pane-exanaecuenenexa, pejewaxijamatabëcuene-ata panexainaewi. Pacajunatatsi patacayapëtaeya-exanaenexa, nacuenezanaëjëtsiaya panejinawanapanaexa.

⁶ »Panejumetaema, tsipaji xua pacajumaitsijitsiatsi bitso penamata-motsijumenë, pepoperowialiwaيسانë-ata. ⁷ Xua pacajumaitsijitsiatsi pexaniajailiwaيسي cajena, tsipaji xanë nawecua-ataejitsibinë tsabiabi tacuaicuajainexa penajumetsënëtsiliwaيسانë. ⁸ Daxita paliwaيسانë paca-jumaitsitsi, bitso cajena pexaniajailiwaيسانë. Caejawa-ata apoxaina peyamaxë-itojorobicuene.

⁹ »Pamona bitso bepjiayo peyapëtaewi, pejumeyapëtaewi-ata, tajumaitsijumenë tsitajumenapebetatsi. Tsitaxaniajaitsinua.

¹⁰ »Bjaraxuata, matatoxetsia asiwaya pataema patacamuxujobiluwaيسانë, patacacujarubiliwaيسانënu, panejitsipaejawawecua palatananijawanë, oronanijawanë, bitso pexaniawirijawanë-ata.

¹¹ »Bitso toxanepanatsi cajena jiwi pexainaewi xaniawaetsia pecanaë-jëtsijamatabëcuene pexainaewawecua pexaniawirianamatamotsi-ibotoxi. Ajibi itsacuenewi xua yabara siwajamatabëcuenebëjajitsia bajarapajamatabëcueneewi jiwi pexainaewawanexa, tsipaji bajarapajamatabëcueneliwaيسي bitso namatamota itsacuenewi jiwi pejitsipaejawawecua», bepapecawai tsabiabi Dioso pecanaëjëtsijamatabëcuene papecajunatsijawata. ¹²⁻³⁶ [...]

Pibisiacuene pexanaewiwibe pexaniacuene pexanaewiwibe peliwaيسي

10 ¹ Mapaliwaيسانë Salomón capitsapa pemuxujobiluwaيسانë:

Papexijiwi penaliwaيسانëjëtsiwi, pijamonaewiwibe bitso siwajamatabëcuenebarëyatsi. Itsiata pijinia, papexijiwi pecuenejemabijiwiitsi, pijamonaewiwibe bitso bayapijiwi-auratsi.

² Papalata jiwi pita piabejecuene penacuenebijawata, ayaijawa topitsapae-atatsi, apocueneyawenonaetsi peyaiyataenexatsi. Itsiata, jiwi pexaniajaitsabiabixae, pexaniacuenia pexanabiabixae-ata, peyaiyataecuene xaina. Bajarapayaiyataecuene capanepaenatsi petëpaejawawecua, tsipaji bajarapacuene bitso namatamota palatawecua.

³ Jehová apocopatsi tsane pexaejawanejewa, pexaniacuene pexanabiabi-jiwi. Itsiata, pamona pibisiacuene pexanabiabiwi Jehová wecuacaranatsiana xuanë picani itaxutuajitsipa pexainaewawanexa.

⁴ Pajiwi aponacuenebabiabi, bajarapajiwi pexainaewi apoxaina-biabi pecobecowëjawanë. Pajiwi pijinia nacuenebabiaba, xainabiaba pecobecowëjawanë.

⁵ Pajiwi caetuatabiaba pe-ubijawanëmi penaweretsimatabita, nacuene-itajëta bitso peyapëtaewiwicuene. Itsiata, pajiwi buta saya rurucabiaba pe-ubijawanë pecaetuatsimatatabita, nacuene-itajëta apopia-urajiwicuene.

⁶ Pajiwi pexaniacuene exanabiaba, Dioso pexaniacuenia yawenonaenatsi. Pajiwi ajamatabēcuenenebeje pecuaicuaijawata nacuenematayata bitso papibisiacuenejawa exanaejitsia.

⁷ Pexaniacuene pexanaejiji, pewēnamuto itsamonae pexaniacuenia wēnēli-waisicuaicuaijaitsi tsabiabi tsane penajamatabēnapitabiabijawatatsi. Itsiata, piajamatabēcuenenebejewi pewēnamuto bepjiayo jiwi nacofēnētsianatsi.

⁸ Pajiwi xaniawaetsia canaējētabiaba, namuxuna-ewetabiaba pemuxujio-biliwaisitsi. Pajiwi pijinia, jema cuaicuaijai tsabiabi canaējētsinejawa, pepopiabejecuene natotaena.

⁹ Pajiwi xaniajai tsabiabi, pexaniacuenia exanabiabanua, bajarapajiwiyo aliwaisijibia jamatejema ponaponaena. Pajiwi pijinia pibisiacuene jiwi pepēya exanabiaba, bajarapajiwi itsamatacabijawabelia pibisiacuene pexanaejawami wēnētaenatsi. ¹⁰⁻¹¹ [...]

¹² Jiwi itsa jamatabēcuenewēnēca pitoyajamatabēcuenē, bepjiayo najumē-anaenotabiaba. Juya, itsa jamatabēcuenewēnēca piasiwajamatabēcuenē, siwajamatabēcuenēcaewabiaba itsamonaejawabelia daxita apocejitsipaecuene peto-exanaejawanētsi, liwaisicayajatsinejewa itsamonaejawabelia. ¹³⁻¹⁷ [...]

¹⁸ Pajiwi najamatabēcuenematayata pitoyajawa itsajiwi, bajarapajiwi penajumetsēnētsijiwi. Pajiwi pijinia pibisiacuenia baracuaicuaijai tsabiabi itsajiwi, bajarapajiwi apopenatsiwajēnaecanaējētsijiwi.

¹⁹ Pajiwi itaxutojema ayaicuenia cuaicuaijai tsabiabi, belia pibisialiwasianē yajawacuaicuaijai. Pajiwi pijinia yapētaeya cuaicuaijaitsiabiabi, liwaisi penatsiwajēnaecanaējētsijiwi.

²⁰ Pacuenia pepopexaniapalatananitojawa bitso namatamota, bajarapacuenia liwaisinamatamota pexaniajamatabēcuenējiwi pecuaicuaijailiwasi. Itsiata, piajamatabēcuenenebejejiwiyo paliwaisi capitsapabiaba pecuaicuaijajawata, aliwaisimatamobi cajena.

²¹ Pajiwi pexaniajamatabēcuenējiwi, muxujobiabiaba pexanialiwasita. Bajarapaliwaisi jamatabēcueneyawenonabiaba ayaibitsaēto. Itsiata, pajiwi liwaisi apopenatsiwajēnaecanaējētsijiwi yajawatēpaena apopecanējētsijamatabēcuenē. ²²⁻²⁷ [...]

²⁸ Pamonaē pexaniajamatabēcuenēwi copia-ewetawanapa pebarēyajamatabēcuenē. Pamonaē pijinia pibisijamatabēcuenēwi, jamatabēcuenēnaxuabiana pexaniacuene pecopia-ewetsijawa.

²⁹ Jehová ewetabiaba pexaniacuene pexanawanapaewi. Itsiata, tocaējēta pewerebabiabijawa pamonaē pibisiacuene pexanawanapaewi.

³⁰ Pajiwi pexaniacuene exanaponapona, apoliwaisibijianaetsi tsane. Itsiata, pajiwi pibisiacuene exanaponapona, bajayajebi apoponaponaē tsane mapanacuataje.

³¹ Pajiwi pexaniacuene exanaponapona, pexaniacanaëjëtsicuenia cuai-cuaijai tsabiabi pemuxujobijawata. Itsiata, pajiwi cuaicuaijai tsabiabi penajumetsënëtsiliwaisianë, peyamaxë-itojorobiliwaisianë-ata, jume-itawetsianatsi pemoyanexa bepe-ebarëtojutsinëtsicuenia.

³² Pajiwi pexaniajamatabëcuenejiwi, cuaicuaijai tsabiabi itsamonaenexa pexanepanaeliwaisianë. Itsiata, pajiwi pibisiajamatabëcuene xaina, cuai-cuaijai tsabiabi itsamonaenexa piamuxujitsibiliwaisianë.

11 ¹⁻¹¹ [...] ¹² Pajiwi jumejemabatsi, pibisiacuena baracuaicuaijai tsabiabi caetomarata penajuajinawanapaewi. Pajiwi pijinia liwaisi nat-siwajënaecanaëjëtabiaba, najamatabëcueneccataitabiaba. ¹³⁻²¹ [...]

²² Pacuenia nacatsita abeje marranojawabelia wajatsipumurutsijawa' bitso penamatamotsi-anillo, oronanitota pexanaejawa, bajarapijinia pacuenia acue-nebeje bitso pexaniawa, peponaponaejawa apopenacuene-ewetsiwacuena, nacenecanaëjëtsinejewa pibisiacuene pexanaeyaniwa. ²³ [...]

²⁴ Itsamonaë pexainaeyajuwënëjawanë rajutabiaba itsamonaejawabelia, wecua-asiwanejewa. Itsiata, xainabiaba matatoxenetsia perajutsijawawecua. Itsamonaë pijinia pexainaeyajuwënëjawanë wecua-asiwa tsabiabi, piamoneyabijawami-ata apomatamotabiabi, pexainaewi penaexanaenexa picanì. Itsiata baitsi jane, xua xaina towerewerecabiabatsi. Nexata, bepejio-biwi nacopatabiaba. ²⁵⁻³¹ [...]

**Pamonaë pexaniacuene pexanawanapaewi, pibisiacuene
pexanawanapaewibeje nawecua-acuenetothibeje**

12 ¹ Pajiwi nato-asiwa pecuenexanetsijawatsi, najamatabëcuene-itajëta piasiwajawa peypätaejamatabëcuene. Pajiwi pijinia apojitsipae pecuenexanetsijawatsi, bajarapajiwi piamatabëcueneccowëbijiwi.

² Pajiwi pexaniacuene exanabiaba Jehová siwajamatabëcuenebarëya tsa-biabitsi. Itsiata, pajiwi pibisiacuene pexanaejawa najamatabëxainabiaba, Jehová tocaëjëtatsi penaneconitsia-exanaejawanexa.

³ Pibisiacuene pexanaejawata, jiwi aponaexanaë peyaiyataejamatabë-cuenetsi bajayajebineja. Itsiata baitsi jane, pexaniajamatabëcuene pexai-naewi, apowecua-ajibia-exanaecapanepaetsi bajarapajamatabëcuene. Pacuenia naejawa petabunepe bëpënëa-irabereca pexainaexae, apotixit-sitsi, bajaratsijamatabëcuene-itsitsi bajarapamonaë piayapëbejeliwaisi tocopiapatsi-atatsi.

⁴ Powa xaniawaetsia ponapona pamonajawabelia, siwajamatabëcuenebarëyatsi. Powa pijinia bijiata penacuene-ewetsiwa pamonajawabelia,

j 11:22 wajatsipumurutsijawa: Itsacuena pejumaitsinexa: «Pacuenia bitso penamatamotsijawa, oronanitota pexanaë-anillo, apoxanepanaë wajatsipumurutsijawa marranojawabelia, bajarapijinia pacuenia apotoxanepanaetsi bitso pexaniawa nacenecanaëjëtsinejewa pibisiacuene pexanaenexa, jiwi pebaracuaicuaijayaniwatsi, beweliacuena-ata petayaniwatsi», pejainexa.

aposiwajamatabëcuenebarëyatsi. Yapijiwi-auratsi tsabiabi saya. Bajarapitsi-petiriwa pamona bitso jamatabëcuenecueranaeya-exanabiaba.

⁵Pajiwi pexaniacuene exanabiaba, bajarapajiwi siwanajamatabëxaina-biaba ëpexaniacuene. Pajiwi pijinia pibisiacuene exanabiaba, bajarapajiwi najamatabëxainabiaba peyamaxë-itojorobabiabinexa itsamona. ⁶⁻¹⁴ [...]

¹⁵Pajiwi liwaisi aponatsiwajënaecanaëjëtsi daxita pexanaecuene tsitape-xaniacuenetsi, pibisiacuene exanae-ata. Pajiwi liwaisi natsiwajënaecanaë-jëta, namuxuna-ewetabiaba itsajiwi pemuxujiobijawatsi.

¹⁶Pajiwi aponatsiwajënaecanaëjëtsi, caecuenia najamatabëcuene-itajëtabiaba pianaepanaejawa najamatabëcuenecataitsinejewa. Juya pajiwi natsiwajënaecanaëjëtabiaba, bajarapajiwi namuxujematabiaba xua itsamona-pibisiacuenia jumaititsi.

¹⁷Pajiwi xaniajai tsabiabi, pecuetaecuenia cuenewajunupaebabiaba itsanë pijaneconi pexinaejawa yabara. Juya pajiwi najumetsënëtabiaba, bepexaniajaicuenia cuenewajunupaebabiaba najumetsënëtsi-ata itsanë pija-neconi pexinaejawa yabara.

¹⁸Pajiwi itaxutejema, canaëjëtsinejewa, cuaicuaijai tsabiabi, cuenecaë-jëpatsi peliwaitsita wajanacajamatabëcuenebijianaejawa. Bajarapaliwaisi becusiupata wajanacajamatabëcuenecacuatsijawa. Juya pajiwi liwaisi natsi-wajënaecanaëjëtabiaba, pecuaicuaijailiwaitsita bewajanacajamatabëcuene-waëbi, wajanacajamatabëcuenexanepanaeya-exanaenexa.

¹⁹Pajiwi^t pexaniajaicuenia cuaicuaijai tsabiabi, bajarapajiwi asaë tsaponaponae tsane bajayajebi. Pajiwi pijinia penajumetsënëtsicuenia cuaicuaijai tsabiabi, bajarapajiwi caematacabibeje asaë tsaponaponae tsane.

²⁰Pajiwi siwanajamatabëxaina pibisiacuene pexanaenexa, bajarapajiwi jamatabëcuenewënëca peyamaxë-itojorobijamatabëcuene. Juya pajiwi siwanajamatabëcuenewereta pexaniacuenia peponaponaenexa, bajarapajiwi jamatabëcuenewënëca pebarëyajamatabëcuene.

²¹Ponë pexaniacuene exanaponapona, bajaraponë apotocopiapatabiabitsi tsane itsapibisiacuenejawa-ata. Juya ponë pibisiacuene exanaponapona, pibisialiwaitsianë bitso tocopatabiabanatsi.

²²Jehová raja itoya pamona penajumetsënëtsiwi. Itsiata juya, siwajamatabëcuenebarëya tsabiabi pamona pexaniajaiwi.¹

k 12:19 Pajiwi: Itsamona canaëjëta mapacuenia pejutsinexa mapaversiculoyoje: «Pexaniajaili-waisi ba-ayapësaë daxitamatacabijawabelianexa. Juya penajumetsënëtsiliwaisi bepjiyayo nayapëtae-yabiaba penajumetsënëtsicuen», pejutsinexa. 1 12:22 pamona pexaniajaiwi: Itsa jume, jutsipa mapacueniaje: «pamona pejumaitsicuenia pexanawanapaewi.»

²³ Ponë peyapëtaenë, pijacuata aponawënëliwaisipaebi, yapëtae-ata daxitacuene. Juya apopenatsiwajënaecanaëjëtsinë, pijacuata naliwaisipaeba-biaba, bepeyapëtaenëcuenia, natsiquejemacuene exanae-ata.

²⁴ Ponë peyabarajitsipaenë penacuenebijawa, naexanaena penamatacaito-robinë. Juya ponë piafaetabinë, amoneya tonacuenebabiabiana.

²⁵ Pajiwi bitso siwajamatabëbëjai itsacuenejawa yabara, belia siwajamatabëcuenecuerana. Juya itsa pexanialiweisita muxujobatsi, jamatabëcuenebarëyaya-exanatsi.

²⁶ Ponë pexaniacuene exanaponapona, xaniawaetsia matacapona pijamonaejiwiyo pexanianamutojawalia. Juya ponë pibisiacuene exanaponapona, pijamonaejiwiyo matacapona penaxuabinamutojawalia. 27-28 [...]

13 ¹⁻³ [...] ⁴ Pajiwi afaetabi, itajitsipae-ata daxitacuene, itsiata apoxai-nae tsane itsacuenejawayo-ata. Pajiwi pijinia xaniawaetsia nacuenebabiaba, xainabiaba xua namatawenona. ⁵⁻¹⁷ [...]

¹⁸ Pajiwi amuxujitsibi pecuenexanetsijawatsi pexanaecuene yabara, ponaponaena bepejiobicuena, apoheyayataejiwitsicuenia-ata. Pajiwi pijinia namuxuna-ewetsiana pecuenexanetsijawatsi, wënëxaniatsianatsi pexaniacuene pexanaejawa yabara.

¹⁹ Pajiwi pejitsipaejawami caxitajaraba, jamatabëcuenebarëya tsabiabi. Itsiata, pajiwi pijamatabëcuenebewi aponawecua-ataejitsibi pecopatsijawa pibisiacuene pexanaejawa.

²⁰ Pajiwi yajawaponapona xaniawaetsia pecanaëjëtsiwi, bajarapajiwi-ata naexanaena xaniawaetsia pecanaëjëtsijiwi. Itsiata, pajiwi yajawaponapona pijamatabëcuenebewi, nabejiobitsiaya ponaponaena.

²¹ Pajiwi pibisiacuene exanabiaba, pibisialiwaisi yapënapatabiabianatsi. Itsiata, pajiwi pexaniajamatabëcuenewi, bajarapajiwi tocopiapatabiabianatsi pexaniacuenejawawa pematamotsicueniatsi.

²² Pexaniajamatabëcuenenë, xua xaina pecobecowëjawanë, yacaëjëpaena pewënamoto penatsicobetsanaenexa pexijawabelia, pemomoxijawabelia-ata. Papecobecowëjawanë pijamatabëcuenebewi natoxaniawaetapona, bajaraxuanë Dioso juya rajutsiana pexaniajamatabëcuenewijawabelia, pecanacopatsinexa.

²³ Bepejiobiwi cuenecaëjëpatsi ayaijawa pexaejawa pecapitsapaenexa, pexaniacuena itsa nacuenebawanapa pijapabianë. Itsiata, itsa jinawanapa pijamatabëcuenebewi bajarapanacuata, cuenecaëjëpatsi bajaraxuanë pewecua-ajibia-exanaenexatsi.

²⁴ Pajiwi pexijiwi apoconitsi pecuenexanetsinexa, bajarapajiwi aponacoxi-asiwa. Pajiwi pijinia nacoxi-asiwa, pewajënaeya cuenexaneta, pibisiacue pexanaeyaniwa.

²⁵ Pajiwi pexaniajamatabëcuenewi, xaniawaetsia xaeyabiaba pexaejawa, pepenejawabelia. Itsiata, pajiwi piamatabëcuenebewi, tsiteca piamanijiwi nacopatabiaba.

14 ¹ Powa pexaniacuenia pecanaëjëtsiwa, pijabopijiwiliwaisi asaëya-exanabiaba, najamatabëcuenejëpaeya penajuajinawanapaenexa. Powa pijinia apopecanaëjëtsiwa, pijabopijiwiliwaisi bijianabiaba, nexata bijiaya jinawanapabiaba. ²⁻¹³ [...]

¹⁴ Pajiwi bijiaya pecanaëjëtsiwi nasiwajamatabëcuenebarëya tsabiabi daxita pexanaponaponacue yabara, Dioso apojejitsipaecue exanae-ata. Pajiwi pijinia pexaniacue pexanabiabiwi, pexaniacue natocopia-patsiana, pexanabiabijamatabëcuene pexaniacue.

¹⁵ Pajiwi bijiaya penaliwaisi-ewetsiwi, canaëjëtsinejewa jumexaniataeya-biaba daxita paliwaisi tsipaebatsi. Pajiwi pijinia xaniawaetsia penaliwaisi-ewetsiwi, copiya canaëjëta pexanaewajënaeya, peyapëtaenexa itsa pexaniacue, itsa jume, apopexanepanaecue. ¹⁶⁻²⁰ [...]

²¹ Pajiwi bijiaya tane itsamonae, naneconita Diosojawabelia. Itsiata, jamatabëcuenebarëya tsaponaponae tsane pajiwi itaxutotsoniatane bepejiobiwi. ²² [...]

²³ Pajiwi nacueneba, xainabiaba pexainaejawa, pexaejawa-ata. Itsiata, pajiwi saya ëpejumeta cuaicuaijai tsabiabi penacuenebijawanexa yabara, apoxainabiabi pexainaejawa, pexaejawa-ata. ²⁴⁻²⁵ [...]

²⁶ Pajiwi yaiyatane Jehová, itaxutuajamatejema peyawenonabiabi-nexatsi, pewetsinexatsinua playaicuenewecua. Nexata, bajarapajiwi pexi-ata pijinia jamatabëcuene-ewetawanapaena Jehová bajarapacuenia peto-exanaenexatsi.

²⁷ Pajiwi yaiyatane Jehová, bajayajebi asaë tsaponaponae tsane bajara-payaiyataejamatabëcueneta, tsipaji bajarapajiwi baja wecuapanepa xuanë picani pejamatabëcueneta tëpaejitsia penaneconitsixae. ²⁸⁻²⁹ [...]

³⁰ Pajiwi pexanepanaejamatabëcuene xaina, perabëjumali xanepana-biaba. Itsiata, pajiwi jamatabëcuene-enabiabatsi ëpecuenece-ëbijawa, bitso ya-awitane tsabiabi bajarapajamatabëcuene.

³¹ Pajiwi nacueratsia-exana bepejiobiwi, bajarapajiwi apoyaiyatae Dioso, pexanaenëtsi. Itsiata, pajiwi yaiyatane Dioso, itaxutotsoniataeyabiaba penamatawenonaëjiwi.

³² Ponë piabejecue peto-exanabiabinë itsamonaejawabelia, juya pijapi-bisiacuejamatabëcuene matacënënaenatsi. Itsiata, pexaniajamatabëcuene

pexainaejiwi, tocopiapatsi-atatsi petēpaejawanexa itaxutuajamatejema Dioso peyawenonaenēnexatsi.

³³ Pajiwi xaniawaetsia penaliwaisi-ewetsijiwi, tsijamatabērucatsi xania-waetsia pecanaējētsijamatabēcuene. Itsiata, pajiwi bijiaya penaliwaisi-ewetsijiwi, apotsijamatabērucaetsi pecanaējētsijamatabēcuene. ³⁴⁻³⁵ [...]

15 ¹ Pajiwi jumecanawiata asiwaya pebara-anaepanaejiwitsijawabelia, anaecaewia-exanaena pianaepanaejawami. Itsiata, anaeya itsa jumecanawiatsipa pebara-anaepanaejiwitsijawabelia, pewajēnaeyabelia bitso anaepanaeya-exanaejitsipa.

² Pajiwi liwaisi penatsiwajēnaecanaējētsijiwi, pecuaicuaijajawata pexaniajumenē capitsapabiaba pexaniacanaējētsiliwaisianē. Pajiwi pijinia liwaisi apopenatsiwajēnaecanaējētsijiwi, pecuaicuaijajawata jemajumenē capitsapabiaba natsiquejemaliwaisianē.

³ Jehová raja daxitajawa peponaponaenē. Nexata, taeponapona pamonaē pexaniacuene pexanaewi, pamonaē-ata pibisiacuene pexanaewi.

⁴ Pajiwi cuaicuaijai asiwayacuenia bepejamatabējiobiwijawabelia, bajara-pajiwi jamatabēcueneyawenona piamatabēcuenesaēnexa pejumetaewitsi. Juya pajiwi pibisiacuenia baracuaicuaijai tsabiabi jiwi, jamatabēcuenebijianabiaba itsamonaē.

⁵ Pajiwi liwaisi apopenatsiwajēnaecanaējētsijiwi amuxujitsibi tsabiabi xua pijamonaējiwibeje muxujibatsi, pecuēnexanetsinexatsi. Pajiwi pijinia liwaisi penatsiwajēnaecanaējētsijiwi namuxuna-ewetabiaba pemuxujibiliwaisitsi pijamonaējiwibeje.

⁶ Ponē pexaniacuene exanaponapona pijabota, ayaijawa bitso xainabiaba. Ponē pijinia pibisiacuene exanaponapona, ayaijawa xinae-ata, bajaraxuanē liwaisi tsi-exanabiabatsi.

⁷ Pamonaē liwaisi penatsiwajēnaecanaējētsiwi, peyapētaejamatabēcueneliwaisi capitsapabiaba pecuaicuaijajawata itsamonaējawabelia. Pamonaē pijinia liwaisi apopenatsiwajēnaecanaējētsiwi, caeto-ata aponajamatabēxainae peyapētaejamatabēcuenē pexinaenexa.

⁸ Jehová bitso cuene-ataejitsibi pamonaē pibisijamatabēcueneyajawa, tajuita dajubinē altar-jumata najamatabēcuenepēnēyorotsinejewa pijapibisijamatabēcuenewecua. Itsiata, juya pamonaē pexaniajamatabēcuenewi, Jehová siwajamatabēcuenēbarēya xua wajētatsi.

⁹ Jehová bitso cuene-itoya pejamatabēcuenematacaponaewitsi pibisiacuene pexanabiabinexa. Itsiata, asiwaya naēcotabiaba pejamatabēcuenematacaponaewitsi pexaniacuene pexanabiabinexa.

¹⁰⁻¹⁶ [...] ¹⁷Xanepana bitso wajanaxaejawa papexaejawa beweliacuene-jawa, pabojawata namata-enetsia jiwi na-asiwa tsawanapae, wajanaxaejawawecua papexaejawa bitso pexaniapexaejawa, pabojawata jiwi namata-enetsia na-itoya tsawanapae.

¹⁸Pajiwi jamatabëcuene-anaepanaponapona, bajarapajiwi matapitabiaba jiwi pebarënajume-anaenotsijawa. Pajiwi pijinia pejamatabëcuenexanepanajijiwi, jamatabëcuene-anaecaewia-exanabiaba penajume-anaenotsiwi.

¹⁹Pacuenia to-ayapëbejetsi taxusa penucaponaenë itsajota nawita pe-ejuwijawanë, bajarapacuenia piafaetabiwi tonawitatsi penayacaranatsiliwaisianë penacuenebiyaniwa. Itsiata, pacuenia jiwi xaniawaetsia pona pexanepanaenamutojawa, bajarapijinia itsi pexaniajamatabëcuene pexainaewi. Tsiyapëxanepanabiabatsi pexanaenexa pexaniacuene.

²⁰Papexi natsiwajënaecanëjëtsiaya jinawanapa, jamatabëcuenebarëyaya-exanabiaba paxajiwi. Itsiata, papexi bijiaya naliwaisi-eweta, apotaeyabiabi piasiwacuenia pena.

²¹Pajiwi bijiaya naliwaisi-eweta nasiwajamatabëcuenebarëya tsabiabi nacuenecanëjëtsinejewa pexanaecuene yabara. Pajiwi pijinia xaniwaetsia natsiwajënaecanëjëta, nacuenexanetapona Dioso pejitsipaecuenia peponaponaenexa.

²²Pajiwi exanaejitsia itsacuenejawa, copiata itsa yanijobiana pexanaewajënaeya peyapëtaewijawabelia, xaniawaetsia topitsapaenatsi pexanaejawa, tsipaji yapëtaenejewa itsa exanaejitsipa, bijiaya topitsapaejitsipatsi. ²³⁻²⁷ [...]

²⁸Pajiwi pexaniacuene exanabiaba, copiata canaëjëtabiaba pacuenia jumecanawiatsijitsia itsajiwijawabelia. Itsiata baitsi jane, pajiwi piamatabëcuenebejewi, itaxutejema pibisiacuenia cuaicuajai tsabiabi itsajiwijawabelia.

²⁹Jehová tajë wecuanatsatsiaponapona pamona pibisiacuene pexanawanapaewi. Juya, namuxuna-ewetabiaba pewajëtsijawatsi pamona pexaniacuene pexanawanapaewi.

³⁰Itsamonae itsa naca-itaxutuabarëya wajanacataejawata, nexata nacajamatabëcuenebarëyaya-exana. Pexanaliwaisi wajawënëtaejawata pijinia, nacajamatabëcuene-asaëya-exana.

³¹Pajiwi namuxuna-ewetabiaba xua itsamonae muxujiobatsi pecuenexanetsinexatsi, bajarapajiwi naexanaena xaniawaetsia pecanaëjëtsijiwi.

³²Pajiwi pijinia amuxujitsibi pemuxujiobijawatsi pecuenexanetsine-xatsi, bajarapajiwi pepacuene apona-asiwa. Itsiata, pajiwi xaniawaetsia namuxuna-ewetabiaba pecuenexanetsijawatatsi, pewajënaeyabelia naexanaponaena peyapëtaejijiwi.

³³Wajayaiyataejawa Jehovah nacajamatabëcuenecujaruba, wajanaexanaenexa xaniawaetsia wajacanaëjëtsiwi. Itsamonaë wajanacayaiyataenexa, beji-nawanapatsi copiya beweliajamatabëcuene nataeya.

16 ¹Jiwi picani pijacuata natocanaëjëtabiaba xua exanaejitsia. Itsiata baitsi jane, Jehovah bajaraxua xaniawaetsia capitsipabiaba pejitsipaecuenia.

²Caejiwi canacujitsia natocanaëjëtabiaba pexanaecuene yabara petsitaxa-nepanaecueniatsi. Itsiata baitsi jane, Jehovah xaniawaetsia jiwi pejamatabëcuenecanaëjëtsinëxae yapëtane pacuenia jamatabëcuene-itsi.

³¡Tocopare Jehovahajawabelia daxita nexanaejawanë pecayawenonaenexa! Nexata, xua siwanajamatabëcueneweretame nexanaenexa, xaniawaetsia catopitsapaena.

⁴Jehová nato-exana daxitacuene, pecanacuenebinexa pejitsipaecuenia. Bajarapijini pacuenia, Jehovah tocaëjëta penaneconitsia-exanaenexa piajamatabëcuenebejejiwi pamatacabi naneconitsia-exanaena daxita pijaneconi pexainaewi.

⁵Jehová ataejitsibi pamonaë natane ayaijamatabëcuenewi^m itsamonaewecua. Nexata, bajarapitsiwi pepacuene naneconitsia-exanaena bepijiayocuenia, itsa jume, bexëajawabelia-ata. ⁶[...]

⁷Jehová itsa siwajamatabëcuenebarëya jiwi pexanawanapaecuene yabara, nexata pitoyawimitsi aliwaisijibia barëponaponaenanua.

⁸Matatoxënetsia namatamota jiwi pexinaejawa bewelia pecobecowë pexaniacuenia penacuenebijawata, ayaijawa pexinaejawawecua, xuanë pitabiaba pibisiacuene pexanaejawata.

⁹Jiwi canaëjëtsi-ata pejamatabë-ëthëtota pacuenia exanaponaejitsia, itsiata Jehovah matakaponatsi petocaëjëtsicueniatsi pexanaponaenexa. ¹⁰⁻²⁸[...]

²⁹Pajiwi pibisijamatabëcuene xaina, yamaxë-itojorobabiaba peyapë-taewitsijawabelia. Matakaponabiabanua pibisiacuene pebarë-exanaenexa, pexaniacuene pexanaejawaminexawecua. ³⁰Paepatota naitatsaquetanuca, najamatabëxainabiaba pibisiacuene pexanaejawa. Upijëajëajai-ata itajara,

m 16:5 *natane ayaijamatabëcuenewi*: Jiwi xaina anijamatabëcuenebeje xua yabara Dioso bitso bara-anaepana. **1)** Jiwi pejume-aebijawa Dioso peliwaissi, pecuene-aebijawanua peyawenonaenexatsi. Pe-aebiwi apocopiapitsi tsane xua Dioso toxainatsi perajutsinexatsi. Jiwi itsa jume-aeba Dioso, exana xua itawetatsi pexanaeyaniwa. Apo-exanaenua pacuenia itorobatsi. **2)** **Jiwi ayaijamatabëcuene penataejawa**: Dioso cajena bitso bara-anaepana bajarapajamatabëcuene, tsipaji pamonaë ayaijamatabëcuenewi natane Diosowecua, apojumecowënëtabiabi pitorobicueniatsi. Orijiibia, pamonaë be-ayaijamatabëcuene penataewi itsamonaewecua, najamatabëcuene-itajëta pecuene-aebijawa caenë Dioso pexanaenëcuene daxitajiwi. Nexata, yapëtanetsi waja-aebijawa Dioso, be-ayaijamatabëcuene wajanataejawanua Diosowecua, najëpaeya nacajamatabëcuenenamatacaitoroba apowajajumecowënëtsinexa Dioso. Bajaraxuata, Dioso bitso nacabara-anaepanabiaba bajarapajamatabëcuenebeje yabara.

itsiata bēpēnēa siwanajamatabēxainabiaba peyapētaewitsijawabelia pibisia-cuene peto-exanaenexa.

³¹ Peruñunēcuene itsa nacatsipatajopa, matanāniojaitsi. Bajara-xua bewajanacamataxatatsi coronajawata, jiwi wajanacayaiyatae-nexa. Wajamatanāniojaijawa bewajacorona, pexaniacuene waja-exanabiabijamatabēcuene wajaponaponae-epato mapanacuataje.

³² Matatoxenetsia namatamota jiwi penacuenecataitsijawa, pitatsacajama-tabēcuene pexinaejawawecua. Matatoxenetsia namatamota jiwi pijacuata penajamatabēcuene-ewetsijawa, pecuene-amoneyabijawawecua itsatomara-pijiwi, pebarēnawajabitsaētsijawata.

³³ Jiwi canamuxusitabiabi-ata dadojawaxi,ⁿ peyapētaenexa pexanaecue-nejawanēnexa, itsiata baitsi jane, Jehová daxita bajarapacuene pejitsipae-cuenia capitsapabiaba.

17 ¹⁻² [...] ³ Pesetsijawata oronanijawanē, palatananijawanē-ata, jiwi cuenecaējēpatsi peyapētaenexa itsa yajawapona piabejejawa. Itsiata baitsi jane, caenē Jehová cuenecaējēpatsi jiwi pejamatabēcuene-ējētsijawa, peyapētaenexa itsa yajawapona pibisiajamatabecue. ⁴⁻⁸ [...]

⁹ Pajiwi siwajamatabēcuene caewa itsacueniabi-atatsi pewēnajiwi, baja-rapajiwi najamatabēcuene-itajēta pejitsipaejawa tsitecaeya piasiwajawa pitsacueniabinētsi. Pajiwi pijinia pitsacueniabiwiitsi aposiwajamatabēcuene-caewi, biji saya nawajunupaebabiaba bajarapaliwaisi yabara, bajarapajiwi pecueyajiwi nato-exana peyapētaejwiitsi. ¹⁰⁻¹¹ [...]

¹² Ponē liwaisi apopenatsiwajēnaecanaējētsinē bitso ayai. Matatoxenetsia nacatoxanepana wajacaxitajarabijawa unupijinē, bitso pianaepanaenē, waja-caxitajarabijawawecua ponē apopecanaējētsinē liwaisi, pejamatabēcuene-enaenētsi natsiquejemajawanē pexanaenexa.

¹³ Pajiwi cuenecanawiata pibisiacuenia, pexaniacuene pexanaejiwitsijawa-belia, pibisialiwaisi apoto-ajibitsi tsane pijabopijiwituatujēta. ¹⁴ [...]

¹⁵ Anijacuenebeje jiwi pexanaejawa Jehová bitso acuenetaejitsibi. Mapa-cuenebejeje: Jiwi peyapijiwicuauaijaijawa pijaneconi pexinaejwi, bepianeconijibiwi petanenexatsi, penaneconitsia-exanaeyaniwatsi. Jiwi

n 16:33 dadojawaxi: Bajarapadadoxi xaina anijamatabēcuenebeje. Bajayatami, Espíritu Santo petsijamatabēcuene-ecaewajēnaeya Jesús pijajiwi, sacerdotewi pepopenamatacaitoro-binē xainabiaba anija-ibotoyobeje. Bajarapa-ibotobeje pepopenamatacaitorobinē bixabajara, peyapētaenexa xua Dioso jitsipa jiwi pexanaenexa. Bajarapa-ibotoyobeje pewēnē Urim, Tumim-beje. (Éxo. 28:30) Itsajawata pijinia, jiwi nacuenebabiaba itsa-ibotoxi, dadowēnē ibotoxi. Bajaraxuanēta canamuxusitabiaba peyapētaenexa pajiwi pitsijitsia pejebijawanē, palata, pese, itsacuenejawa-ata.

peneconitsijawa planeconijibijiwi, bepianecononi pexainaejiwicuenia petae-nexatsi, penaneconitsia-exanaenexatsi. ¹⁶⁻²⁸ [...]

18 ⁸Pebaracuaicuajailiwaaisianē nacatsimuxuxanepana picani, pacue-nia wajajanijitsipaepexaejawa wajaxaenexa. Itsiata, bajarapaliwai-sianē wajamuxujitsipaecuijinae, ayaicuenia nacajamatabēcuenebijiana.

⁹Pajiwi ya-afaetabiaya nacuenebabiaba, penacuenebijawa cuenejēpa daxi-tacue ne pebijianabiabiwi. Nexata, penacuenebijawa jiwi apotosiwajamata-bēcuenebarēya tsabiabitsi. ¹⁰⁻¹² [...]

¹³Pajiwi namuxuna-ewetsinejewa xaniawaetsia natsiquejemacuenia jume-canawiata, bitso pia-uracue ne exana.

¹⁴⁻¹⁶ [...] ¹⁷Pajiwi copiya pijacuata nayapijiwicuaicuai xua yabara neconi-tatsi, wajajumetaejawata nacatsitaxaniajai. Itsiata, itsajiwi pecueneetaejiwitsi itsa wajunupaebatsi yapētanetsi penajumetsēnētsicue ne. ¹⁸⁻²¹ [...]

²²Ponē caxitajaraba petiriwa pijawanexa, bitso pexaniajawa caxitajaraba itsaja-wawecua. Orijibia, natoyapētane bitso pexaniacue ne Jehovah peto-exanaejawatsi.

²³Pajiwi bepejiobiijiwi napēnawajēcabiaba jiwijawabelia pebejiobiataene-xatsi. Itsiata, bitso pexainaejiwi jumecanawiatatsi pia-ura-exanaejumeta.

²⁴Itsamonae wajayapētaewi bepijiayo naca-itoya. Naca-exana pecue-yawitsi. Itsamonae wajayapētaewi pijinia, matatoxenetsia naca-asiwa pepowajamonaējiwiwecua.

19 ¹⁻³ [...] ⁴Pajiwi bitso pexainaejiwi, itaxutuapatabiabatsi ayaibitsaēto peyapētaewinexatsi. Pajiwi pijinia bepejiobiijiwi, peyapētaejiwitsi wecuaponabiabatsi. ⁵⁻¹⁰ [...]

¹¹Pajiwi xaniawaetsia naliwaisi-eweta, pejamatabē-itonotsijawatatsi najamatabēcuenecataitabiaba, bepijiayo pianaepanaeyaniwa. Bajarapajiwi yaityatanetsi, tsipaji nawecuajamatejema tsabiabi, itsajiwi to-exanae-atatsi apopejitsipaecue ne. ¹² [...]

¹³Papejewaxinē apojumecowēnētabiabi, paxa siwajamatabēcuenecue-ronabiabatsi. Powa pijinia pamona barēnabijataeyabiaba, bitso jamatabē-itonotabiaba. Cuenejēpa boyenepanata petopitopijaijawa ema matabi.

¹⁴Paxa, penabeje, pewēnamuto, pexi canacopatibiaba pijabomi, pecobecowēmi-ata. Itsiata, ponē xaina pijawa, xaniawaetsia penaliwaisi-ewetsiwa, bajarapowa xaina Jehovah perajutsixaetsi.

¹⁵Piafaetabiijiwi bitso ayaicuenia majitabiabaruruca. Nexata, pijani-ata, ponaponabiabiana xaenejewa.

¹⁶Pajiwi jumecowēnētsiaponapona Jehovah pitorobiliwaisianē, bajarapa-jiwi na-eweta petēpaewecua pijaneconijamatabēcue ne. Pajiwi pijinia bijiya-tane bajarapaliwaisi, nexata tēpaena bepijiayo.

¹⁷Pajiwi palata tsicopata bepejiobijiwijawabelia, bajaraxua Jehová tane bepetsicopatsijawatsi. Nexata, Jehová bajarapajiwi juya yawenonaenatsi, bepejiobijiwijawabelia pexaniacuene peto-exanaejamatabëcuene.

¹⁸Naneconitsia-exanaenaeme nexijiwi paepatota abaxë cacuene-caëjëpa necuenexanetsinexa. Itsiata, pëtsa anaeya nacoxiconitame nebeyaxuabijawabelia.

¹⁹Pajiwi jamatabëcuene-amoneyababiabatsi pianaejamatabëcuene, belia bajarapajiwi tsinawiatsianatsi bajarapajamatabëcuene. Bajarapitsiwi, asiwaya muxujiobi-atatsi, matatoxenetsia anaepanabiaba.

²⁰Namuxuna-ewetabiabianame pecamuxujiobijawa. Tonacopatsianame itsajiwi pecacuenexanetsijawa. Bajarapacuenia itsa exanaename, naexanaename canaëjëtisiaya neyapëtaenë nenaweretsinëjawabelia. ²¹⁻²² [...]

²³Pajiwi yaiyatane Jehová, bajayajebi jamatabëcuenexanepanaeya asaë tsaponaponae tsane. Pibisiacuenenua apotocopiapatsitsi tsane. ²⁴⁻²⁹ [...]

20 ¹Piatanera piapaecujinae, jiwi itaxutejema cuaicuaijai tsabiabi. Daxitawiria piataneranë piapaexae, yanamataxainabiaba. Apoxainaenua penajamatabëcuenecataitsijamatabëcuene. ² [...]

³Pajiwi aponacuenecanaëjëtsi pexanaewajënaeya, tomatapitabiaba pebarënajume-anaenotsijawa. Pajiwi najamatabëcuenecataitabiaba pebarënajume-anaenotsiyaniwa, beyaiyatanetsi, pexaniacuenianua bewënë-cacuaicuaijaiti. ⁴⁻¹⁴ [...]

¹⁵Nawitsi-ata tsipae penamatamotsi-orojawanë, pexaniawiria-ibotoxi-ata, bajaraxuanëwecua bitso namatamota paliwaisianë jiwi cuaicuaijai tsabiabi, xaniawaetsia pecanaëjëtisicujinae. ¹⁶⁻²¹ [...]

²²¡Itsajiwi itsacuene cato-exanae-ata, pëtsa nenayamatamotsiliwaisi cuai-cuaijamë! ¡Tocopare Jehová bajarapajiwi penaneconitsia-exanaenexatsi! ²³⁻²⁵ [...]

²⁶Ponë nacua-ewetsinë, liwaisi xaniawaetsia pecanaëjëtisinë, nawecuat-satabiaba pibisiacuene pexanawanapaewi. Ayaicuenianua naneconitsia-exanabiaba, pewerewerebiabinexa. ²⁷⁻²⁹ [...]

³⁰Pibisiacuene pexanaponaponaejiwi, naneconitsiaya itsa ayaicuenia jumaconitabiabatsi,^o copatabiaba pibisiacuene pexanabiabijawa. Pejumacónitsijawata, nacujaruba pitoyajawanexa papibisiacuene jamatabë-exanapona.

o 20:30 *jumaconitabiabatsi*: Mapaversículoje apoyabaracuaicuaijai pejewaxi pijamonaewiweje peconitsijawatsi yabara. Biji rajane, cuene-itajëta pacuenia bajayatami pibisiacuene pexanaponaponaejiwi penaweretsicujinae, naneconitsia-exanabiabatsi pecuenexanebinexatsi.

21 ¹ Jehovahä caëjêpatsi pepamene peponaeya-exanaenexa itsaxuayo jamatabêponaeya-exana. Bajarapijinia pacuenia, Jehovahä exanaeya-exana nacua-ewetsinjawabelia, pejitsipaecuenia. ²⁻⁷ [...]

⁸ Pajiwi pibisiajamatabêcuene xaina, najamatabêcuene-itajêtabiaba pibisiacueni pexanabiabijawata. Pajiwi pijinia pexaniajamatabêcuene xaina, najamatabêcuene-itajêtabiaba pexaniacueni pexanabiabijawata. ⁹⁻²⁴ [...]

²⁵ Piafaetabijiwi itajitsipae-ata daxitacuene pexainaejawa, itsiata pepope-bejiobiijiwi naexanaena, tsipaji apojitsipabiabi penacuenebijawa. ²⁶ Bajara-pajiwi daxitamatacabijebi bitso daxitacuene itajitsipaeya ponaponabiaba, pitsinejewa itsacuenejawa. Itsiata, pajiwi pexaniajamatabêcuenejiwi, xainabiaba perajutsijawanexa wecua-asiwanejewa itsamonaiejawabelia.

²⁷ Jehovahä bitso cuene-ataejitsibi pamona pibisiajamatabêcueneyajawa, capata ofrenda perajutsinexa bajaraPonêjawabelia. Matatoxenetsia itoya bajaraxuanê tsipaji itsa jamatabêcueneyajawa capata.

²⁸ Pajiwi wajunupaebabiaba jiwi pijaneconi yabara najumetsênêtsiaya, bajarapajiwi tocajêtatsi petêpaejawanexa. Pajiwi pijinia xaniajaiya wajunupaebabiaba jiwi pijaneconi yabara, tocopatabiabatsi pecuaicuaijaisabiabinexa.

²⁹ Pajiwi pibisiacuene exanaponapona, naitajêtabiaba jiwi pitabarata pibisiacuene apobepexanaejiwicuene. Pajiwi pijinia pexaniacuene exanaponapona, nacuenexaneta pibisiacuene pexanaejawami. Nexata, nacueneyapê-tane pexaniacuene pexanaejawa.

³⁰ Jiwi, xaniawaetsia pecanaëjêtsiwi-ata, bitso peyapêtaewi-ata, pexaniacuenia pemuxujiobiwi-atanua, apocuenecaëjêpaetsi Jehovahä pecuenecaratsijawa xua siwanajamatabêcuenewereta pexanaenexa. ³¹ Bajaraxuata, wajabitsaë canaweretsi-ata pijacaballuanê penawajabitsaëtsiwajênaeya, itsiata Jehovahä ëpejamatabêcueneyawenonaewi, yawenonabiaba. Nexata, cuene-amoneyababiaba.

22 ¹⁻⁶ [...] ⁷ Ponê pexainaenê, bepejiobiwi pijatuxanenê. Ponê pijinia palata cowaeta, palata pexainaenê pijajiwitonê naexana. ⁸⁻¹⁴ [...]

¹⁵ Pejewaxi exanabiaba piabejecuene apopenacuenecanaëjêtsixae pexanaewajênaeya. Itsiata, itsa conitatsi wajacuenexanetsinexa, copata bajara-xua pexanaejawa. ¹⁶⁻²⁹ [...]

23 ¹⁻⁸ [...] ⁹ Pajiwi aponaliwaisicanaëjêtabiabi, pëtsa muxujiobame, tsipaji nemuxujiobiliwaisi, cajumecapocaponaëjitsipa! ¹⁰⁻³⁵ [...]

24 ¹⁻⁸ [...] ⁹ Pajiwi aponatsiwajênaecanaëjêtsi, siwanajamatabê-xainabiaba ëpibisiacuene pexanaejawa. Nexata, yapêtae-ata

pitawetsiliwaisi pejumecowënëtsinexa, itsiata itsa exanabiaba pijacuata penatojitsipaecuene, bajarapajiwi daxitajiwi itoyatsabiabitsi. ¹⁰⁻²⁶ [...]

²⁷ ¡Copiata nacuenebare nepitsinexa xua namatawenoname, nepitsinexa-nua nexaejawa-ata! Bajaraxuacujinae, itsajota cuenesajiname, exanaename jane baja nijabo. ²⁸⁻²⁹ [...]

³⁰ Nucaponajë piafaetabinë, xaniawaetsia apopecanaëjëtsinë pijapabijawa. ³¹ Bajarapapabita taniyi pepopijabiobocuene, itsajota juwa pe-ejuwijawanë. Tanijinua peyacaranatsijawa dajubiwecua peto-abejejawatsi.

³² Nexata, bajaraxuanë tataejawata, nenajamatabëxainaeja-exana. Necu-jarubania mapaliwaisije: ³³ «Cae-epatoyo wajamajitanucaejamatabëcuene, wajanacuera-ewetabinexa, cae-epatoyo wajanacorabëwaetabanucaejamatabëcuenua wajamajitabinexa, jemata bewajiobicuene nacatocopiapatsiana, bewajanacatsimaxëpatsinëcuena. ³⁴ Pacuenia penacobetoxotsinënexa pijanae cobenapatsipa, wajacobecowë wajanacayacajërëtsinexa, bajarapacuenia bajarapabejiobicuene nacatsimaxëpatsiana, wajanacawecuapitsinexa waja-xainaejawami», jamatabëjanë tatotaejawata piafaetabinë pijapabi.

25 ¹¹ Pacuenia bitso pexaniajawa, oronanitota jumapecataeya pexanaenaecuaito, pexaniapitanerubijawa palatananitota, bajarapijinia pacuenia bitso pexaniajawa wajanacamuxujibijumeyo wajanamatawenonae-epatota.

¹² Pacuenia penatsimuxurubijawa, penawësicëtsijawanua pepopexania-oronanitota pexanaejawanë, bajarapijinia pacuenia penamuxuna-ewetsijiwiyo tsitatsi bitso pexanaliwaisi piasiwajawanexa papexaniacanaë-jëtsiliwaisi muxujibatsi pibisiacuene pexanaeyaniwa.

¹³ Pacuenia pecainaemera nacajamatabëcuenebarëyaya-exana waja-apaejawata piatajumatacabita, bajarapijinia pacuenia pajiwi pijatuxanenë xaniawaetsia jumewajunupaeba pejumaitsicuenia siwajamatabëcuenebarëyatsi.

¹⁴ Pacuenia bitso petsewimatacabita, itsa najetarucaejitsipa itarë-rëbo, jowibo yajawa, be-emaecuenejawa. Itsiata itsa apojopae tsipae ema, jiwi jamatabëcuenenacuerositsipa. Bajarapajamatabëcuene-itsi pajiwi rajutsiapaebi-ata itsacuenejawa itsajiwijawabelia, itsiata itsa aporajutsi. Nexata, jamatabëcuenenacuerositsia-exana. ¹⁵⁻¹⁷ [...]

¹⁸ Pacuenia pepacuene bijiaapaetsipatsi jiwi wajaconitaxuabijawata sipalita, wajacacuatsijawata espadata, waja-upaxuabijawatanua piupisojaicuere-rebota, bajarapijinia pacuenia jamatabëcuenewajënë-exanatsi pajiwiwawabelia baranajumetsënëtsiaya baracuaicuajaitsi.

¹⁹ Pacuenia nacato-atane waja-awonobejejawa waja-ucubaxaenexa, pacuenianua nacato-atane waja-asibejejawa wajanucaenexa, bajarapijinia itsitsi penajumetsënëtabijijiwi waja-itaxutuajamatejemajawata, bitso nacajamatabëcuenebëjaiya-exanabiaba.

²⁰Wajatonaxëanaejawa pemuxunabarëyawajianë pejamatabëjiobiwijawabelia, tsitatsi bajarapajiwi bewajajumajonotsijawa penaxatatsijawami pecainajebimatacabita, itsa jume, bewajawajënëquiatsijawa piajatuvinagrerata. 21-28 [...]

26 ¹⁻¹³ [...] ¹⁴Pacuenia baupa penabaupatsicujinae, caewëalia icatsia nabaupaxatatabiaba, bajarapijinia pacuenia piafaetabinë pijacama-jawata pebocaenë, na-enebabiaba.

¹⁵ Piafaetabinë xainae-ata pecanacuenebijawanë, piafaetabixae apocanacuenebi pena-ewetsinexa. Cuenejëpa penacobejenë platojawabelia, pejutsinexa pexaejawa. Itsiata baitsi jane, penatsicuaiboxatatsijawa pexaenexa, ayabarafaetabi tsabiabi.

¹⁶ Piafaetabinë nataeyabiaba bitso bepeyapëtaenë, siete ponëbeje pemuxujiobiliwaisi peyapëtaewi matatoxenetsia.

¹⁷ Pajiwi tane saicayajiwi beje penajume-anaenotsijawabeje, pëtsa nacajunua pecuene-itawetsijawa, belia itsacuene tsipae! Pacuenia awiribeje penasinijawatabeje, itsajiwi itsa muxuyorowaetabijitsipa, sinijitsipatsi, bajara-itsitsi tsipae. 18-19 [...]

²⁰ Isonaenë baja itsa weriajawa, isoto baja itacaëna. Bajarapijinia itsi jiwi-ata penabijataejawa. Jiwi pibisiacuena itsa aponabaracuaicuaijai, ajibi jiwi penayabarabijataejawa. 21-28 [...]

27 ¹ [...] ² Tocopare itsamonae pecawajunupaebinexa pexaniacuene nexanabiabijawa! Pëtsa nijacuata nawajunupaebame pexaniacuene nexanabiabijawa! ³⁻¹¹ [...]

¹² Pajiwi naliwaisicanaëjëta itsacuene pexanaewajënaeya, bajarapajiwi wecuapanepapona daxita xua pibisiacuene petocopiapatsijawaminexatsi. Pajiwi aponaliwaisicanaëjëtsi, bajarapajiwi daxita xua pibisiacuene, tocopiapatsianatsi, tsipaji liwaisi apocanaëjëtsi pacuenia wecuapanepaponaëjitsia daxitaxua pibisiacuene. 13-14 [...]

¹⁵ Pacuenia emajawata latobocotojawabelia petopitopijaijawa, belia amuxujitsibitsi, bajarapijinia itsitsi powa daxitacuene yabara nawajunutabiaba.

¹⁶ Pacuenia jowibo acuenebi wajacaranatsijawa wajacobeta, pacuenia aceitera-ata acuenebi wajawaetabijawa, bajarapijinia pacuenia acue-nebi wajamoya-exanaejawa powa daxitacuene yabara nawajunutabiaba. 17-27 [...]

28 ¹ Pamonaë pibisiacuene exanabiaba, itsajiwi-ata apotsimaxëponaë-atatsi, rëcëpecabiaba. Pamonaë pijinia pexaniacuene exanabiaba, jamatejema jinawanapa. Pacuenia newëthë itsacuenejawata-ata apocujunawi, bajarapajamatabëcuene-itsi tsawanapae. ²⁻⁸ [...]

⁹Pamonaē apojitsipae pejumecowēñsijawa Dioso pejumeliwaisi, bajara-pamonaē wajëcae-ata Diosojawabelia, itsiata aponamuxuna-ewetsitsi tsane, pewajëcaejawa peto-exanaenexatsi. ¹⁰⁻¹² [...]

¹³Pajiwi nayawajunuaxaina pibisiacuene pexanaejawa, penawecuapae-biyaniwa Diosojawabelia, bajarapajiwi apotoxanepanaetsi daxitacuene. Pajiwi pijinia Diosojawabelia nawecuapaebabiaba, copatanua daxita pibisiacuene pexanaejawa, bajarapajiwi Dioso itaxutotsoniatanetsi, siwajamatabëcuenecaewatsinua pijaneconimi. ¹⁴⁻¹⁸ [...]

¹⁹Ponë nacuenebabiaba pijapabi, xainabiaba ayaijawa pexaejawanexa. Ponë saya nasiwanajamatabëxainabiaba apopecuenecaëjëpaejawatsi pexai-naejawanexa, bajaraponë bepejiobicueneta ponaponae. ²⁰⁻²⁶ [...]

²⁷Pajiwi yawenonaena bitso bepejiobiwi, bajarapajiwi itsacuenejawa-ata apotosajinaetsi tsane. Pajiwi apoyawenonaē tsane bitso bepejiobiwi, bajara-pajiwi tocopiapatabiabianatsi xuanë apopexanepanaejawanë.

²⁸Pacujinae piacuenebejewi namatacaitorobiaya yanacua-eweta, daxitajiwi wecuamatayababiabatsi. Itsiata, pacujinae piacuenebejewi cuenecopiarucaena peyanacua-ewetsijawa, pexaniajamatabëcuenewi pewajënaeyabelia pexanaecuene toxanepanaponanatsi.

29 ¹ [...] ²Pexaniacuene pexanabiabiwi jiwi itsa yanacua-eweta, jiwi jamatabëcuenebarëyaya jinawanapabiaba. Itsiata, piamatabëcuenebejewi itsa yanacua-eweta, jiwi cuenebaracuaicuaijatsi tsabiabi, bitso bejiobicueneta pejinawanapaexae.

³Ponë naliwaisicanaëjëta itsacuene pexanaewajënaeya, bajaraponë paxa siwajamatabëcuenebarëyatsi. Ponë yajawaponaponabiaba penaperabëcana-jetsiwaxi, pijapalata weretabiaba. ⁴⁻⁶ [...]

⁷Pexaniajamatabëcuenenë, toyaiyataeyabiaba bepejiobiwi pijaliwaisi. Pijamatabëcuenebejenë pijinia, apotoyaiyataeyabiabi bepejiobiwi pijaliwaisi. ⁸⁻¹⁰ [...]

¹¹Pajiwi aponaliwaisicanaëjëtsi pexanaewajënaeya, itsa anaepana, anaeya ayaijumeta cuaicuaijai tsabiabi. Pajiwi pijinia naliwaisicanaëjëta pexanaewajënaeya, anaepanae-ata, najamatabëcuenecataitabiaba. ¹²⁻¹⁴ [...]

¹⁵Pexi pexinaejijiwi, pexijiwiyo pibisiacuene itsa exana, nacoximuxujioba. Nacoxiconitanua. Nexata, bajarapajiwiyo copata baja, pibisiacuene pexanabiabijawami. Itsiata, itsa aponacoximuxujiobi tsipae, pewajënaeyabelia pibisiacuene exanabiabijitsipa. Nexata, pena bitso yapijiwi-auratsi tsabiabi tsipae. ¹⁶ [...]

¹⁷¡Nacoxicuenexanetababare, pecopatsinexa pibisiacuene pexanaejawa! Nexata, jamatabëcuenebarëyaya barëponaponaname, jamatabëcuenebëjamënejewa.

¹⁸ Pacujinae jiwi aponajamatabëcuenecaewetsi Dioso penajumecopatsili-waisi pejamatabëcuenematacaponaenexatsi, itaxutejema jinawanapaena. Itsiata, jamatabëcuenenbarëya tsawanapae tsane pamonaе jumecowënëtawa-napa Dioso penajumecopatsiliwaisi Moisés-pijinëta. ¹⁹⁻²² [...]

²³ Ayaijamatabëcuenenë penataeyabiabinë, itsamatacabi jiwi beweliaja-matabëcuenenë taenatsi. Ponë beweliajamatabëcuene penataeyabiabinë, itsamatacabi jiwi yaiyataenatsi ayaijamatabëcuenenëcuenia petaxaetsi. ²⁴⁻²⁶ [...]

²⁷ Pamonaе pexaniajamatabëcuenewi, apojitsipabiabi pimoxoyotsijawa pibisiacuene pexanabiabiwi. Pamonaе pijinia piajamatabëcuenenëbejewi, apojitsipabiabi pimoxoyotsijawa pexaniacuene pexanabiabiwi.

30 ¹⁻⁶ [...] ⁷ Dioso, cawajëtatsi anijacuenebeje tanetocopatsinexamë tatëpaewajënae.

⁸ ¡Neyawenonare tanajumetsënëtabiabiyaníwa, itsacuenejawa yabara! ¡Neyawenonarenua taxainaejawa taxainaenexa!^p ¡Pëtsa netocopatame taxainaejawa bitso ayaijawa taxainaenexa, tanejamatabëcuenenëbijianaeyaniwa! ¡Pëtsa netocopatamenua bitso betajijobijawa! Netocopatsianame saya taxainaenexa pacuenia namatawenonajë, ⁹ tsipaji taxainaejawa ayaijawa bitso itsa xainaejitsipajë, bijiaya cataejitsipatsi. Nexata, xamë yabara najamatabë-xainaejitsipajë: «Aponamatawenonaeñë Dioso taneyawenonaeñexa», jama-tabëjanë tsipae. Itsa pijinia bitso bejiobinë tsipae, ca-urabia-exanaejitsipatsi tanacobetoxotsijamatabëcuene. ¹⁰⁻³³ [...]

Pacuenia peyanacua-ewetsinë Lemuel pena muxujibatsi

31 ¹⁻⁹ [...] ¹⁰ Powa xaniawaetsia na-ewetaponapona pibisiacuene-wecua, ayapëbeje wajacaxitarabinexa. Powa xaniawaetsia na-ewetaponapona pibisiacuenewecua, bitso namatamota pamonajawabelia. ¹¹⁻²⁹ [...]

³⁰ Xua petiriwa cuenetanetsi wajajitsipaenexa, bajaraxua saya wajanacayamaxë-itojorobijawa. Xua-ata petiriwa nacatsita pexaniawa, bajaraxua-ata saya wajanacayamaxë-itojorobijawa, tsipaji saya cae-epatoyonexa pexaniawa. Powa rajane yaiyatane Dioso, bajarajane powa daxitajiwi pexaniacuenia baracuaicuajaitai tsabiabi tsane.

³¹ [...]

Eclesiastés

4 ¹⁻⁸[...] ⁹Matatoxenetsia caejiwiwecua cuenenamatamota anijajiwibeje, tsipaji anijajiwibeje penajuanacuenebijawatabeje nacue-neyawenonabeje petopitsapaenexatsi pexaniacuenia xua nacuenebabeje. ¹⁰Bajarapacuenia anijajiwibeje namutua penajetarucaejawatabeje, caejiwiyo itsa firapecaejitsipa, juya itsajiwi cobepitsipa pejopaejiwi, icatsia penonotapunaeya-exanaenexa. Bitso ayaicuenia bejiobi pajiwiyo pija-epato najetaruca, tsipaji pefirapanucaejawata apoxinae peyotsijiwinexatsi. ¹¹Bajarapacuenia-ata anijajiwibeje itsa najuamajitanucaejitsipabeje caejawata, namata-enetsia natajutanucaejitsipabeje pecainaejawata. Itsiata, caenë itsa majitanucaejitsipa pija-epato, ¿detsa pacuenia natajuaya-exanaejitsipa? ¹²Bajarapacuenia caenë pija-epato penucaejawata, pijawajabitsaë bepijiayo cuene-amoneyabijitsipatsi. Juya, anijajiwibeje itsa nayanabanucaejitsipabeje, pijawajabitsaë cuene-caranatsipabeje pecuene-amoneyabiyaniwatsibeje. Pacuenia ayapëbeje bepijia waja-ucutsijawa acueyabi pamaëtobeje penajumaxuetsimaëtonë, bajarapijinia itsi acueyabi pajiwiibeje penajamatabëcueneliwaisiyana-biwi, ayapëbeje bepijiayo pijawajabitsaë pecuenetsatsinexatsi. ¹³⁻¹⁶[...]

Isaías

Paliwaisi Dioso tonajumecopata Isaías petsipaebinexa Acaz-jawabelia

7 ¹ Pamatacabijawa Uzías pemomo, Jotam pexénato Acaz, Judá nacua pewetsinē tsaponaponae Jotam petēpaecujinae, bajarapamatacabijawa pijinia Rezín Siria nacua pewetsinē tsaponaponae. Bajarapamatacabijawa-ata pijinia Peka, pexénato Remalías, Israel nacua pewetsinē tsaponaponae. Rezín, Pekabeje pijajiwiwajabitsaēwibeje najuatsimaxēpatabiababeje pebarēnawajabitsaētsinexa caebitsaētocuenia Jerusalén tomarapijiwajawabelia, Acaz peponaponae tomarata. Itsiata, bajaraponēbeje pijajiwiwibitsaētobeje apocuenecaējēpabiabitsi pecuene-amoneyabinexa bajarapatomarapijiwi peyacajērētsinexa.

² Bajaraponēbeje pijajiwiwajabitsaēwi pebarēpatsiwajēnaeya Jerusalén tomarapijiwajawaberena pebarēnawajabitsaētsinexa, itsamonae waju-nupaeba Judá nacua pepopeyanacua-ewetsinē Acaz-jawabelia pacuenia Siria nacuapijiwajabitsaēwi pata Israel nacuata. Bajarapamonae jama-tabēcueneyanatsijitsia Efraín-pijinē pemomoxi^a pijajiwi wajabitsaēwijawabelia pebarēnawajabitsaētsinexa Jerusalén tomarapijiwajabitsaējawaberena. Nexata, pejumetaejawata bajarapatomarapijiwi, bajarapacuenia pepopeyanacua-ewetsinē-ata, ayaicuenia pecajunawi bitso neconecojai. Baitsi, pacuenia naejawa banajēaba jowibota, bajarapacuenia bajarapamonaē pecajunawicobexae neconecojai bajarapaliwaisi pejumetaejawata.

³ Bajarapamonae pejunawixae, Jehová jumaitsi profeta Isaías-jawabelia: —Aeconoxae barēponaename nexénato Sear-jasub yajawa panemata-enenaenexabeje Acaz, Judá nacua pepopeyanacua-ewetsinē, panamuto ruca Ovejanapananē Pequiatsitaxunaejawabetsia. Baitsi, panamuto ruca tomara-wecua waēyabetsia, itsajota copiaruca mera petsi-exanaefoto penawotabiabi-jawa petsicuemēthēpucajawabetsia. ⁴ Necaxitajarabijawata jumaitsimē tsane Acaz-jawabelia: «¡Xania baja tsane! ¡Na-ewere xaniawaetsia nijacuata necajunawi nexanaeyaniwa itsacuenejawa Jehováwecua! ¡Pētsa junawame! ¡Pētsa cujunawamenua bajaraponēbeje yabara! ¡Ajamatabēsaēmēre, tsipaji bajaraponēbeje bitso cabara-anaepanaponaponabeje picani, itsiata imoxoyo pewajēnae pecopiarucaejawanexabeje! Baitsi, pacuenia petajuenubenaē-isotabuqueranē bepijiayo itaxupa pitatsajawicujinae, bajara-itsi tsane bajaraponēbeje.

a 7:2 Efraín-pijinē pemomoxi: Israel nacuata apojinawanapae ēEfraín-pijinē pemomoxibitsaēto. Jinawanapa picani 10 ponēbeje pemomoxibitsaēto. Itsiata, Efraín pemomoxi bitso ayaibitsaēto-xaneto daxitawecua. Bajaraxuata, itsa wēnējona Israel nacuapijiwi, Efraín pemomoxi yabarajai tsabiabi.

⁵»¡Xaniajai picani, pacuenia nayajumetaneme! Siria nacua pewetsinē, Remalías pexēnato-ata, Israel nacuaa pepopeyanacua-ewetsinē, najamatabēxainabeje papecatsimaxēpatsinexa. Bajarapamonae najumaitsi penajumejaitsijawata: ⁶‘Tsimaxēponaenatsi Judá nacuapijiwi wajajunawia-exanaenexa bajarapamonae. Nexata, barēnawajabitsaētsianatsi bajapanacuapijiwijawabelia, wajapatsinexa Jerusalén tomarajawabelia. Bajarapatomarapijiwi itsa cuene-amoneyabianatsi, nexata nutsianatsi Tabeel pexēnato, Judá nacua pepopeyanacua-ewetsinēnexa Acaz pecowēta,’ najai picani bajarapamonae. ⁷Itsiata, marapacuenia pepoPetuxanenē Jehová jumaitsi pajudānacuapijiwimējawabelia: ‘Xua bajarapamonae najamatabēxaina apotocopiapatsitsi tsane, pexanaenexa paxamējawabelia. Pepacuene pejitsipaecuenia apotopitsapaetsi tsane. ⁸⁻⁹Baitsi, bajarapamonae bitso apociacuenesaēwi pacuenia nataeyabiaba. Damasco tomarapijiwi, Siria nacuaa pe-ecaetomara, bajarapacuenia Samaria tomarapijiwi Israel nacuaa pe-ecaetomara, natae-ata ayaijamatabēcuenewicuenia pepopenamatacaitorobitomaraxaebeje, itsiata aposaēmatatoxenetsi itsatomaraxipijiwiwecua, pijanacuabejeyajuwēntomaranē. Daxita saya najēpaeya beweliasaē pexainaewi taitabarata. Bajarapacuenia Damasco tomarata pepopeyanacua-ewetsinē Rezín, bajarapacuenia Samaria tomarata Peka, Remalías pexēnato, pepopeyanacua-ewetsinē, bajaraponēbeje pepopeyanacua-ewetsinē-atabeje, itsiata bajaraponēbeje jiwitonēbeje saya Jehová pitabarata. Nexata, aposaēmatatoxenetsi pijanacuapijiwi. Daxita saya beweliasaē pexainaewi. Pepacuene pacatsipaebatsi Efraín-pijinē pemomoxi yabara. Bajarapamonae Israel nacuapijiwi pijanacuacuenemi tocopiarucaenatsi sesenta y cinco pawai-bejecujinae.’ Itsiata, paxamē pajudānacuapijiwimē yabara pacajumaitsi mapacueniaje: ‘Bajarapijinia pacuenia paxamē-ata bajayajebi apopajinawana-paemē tsane panijaJudānacuaa, itsa paxamē tsitecaeya panewajēnaeyabelia apopanesiwanajamatabēcuenecopabimē tsane ēxanējawaberena pataca-ewetsinexa,’ jai raja Jehová», jamē tsane Acaz-jawabelia —jai Jehová Isaías-jawabelia.

¹⁰Nexata, Jehová itsaliwaisi itoroba Isaías petsipaebinexa Acaz-jawabelia. Nexata, Isaías jumaitsi bajaraponējawabelia:

¹¹—Neyapētaenexa pexaniajaicuene xua Jehová pecatsipaebijawa bajarapanacua-ewetsinēbeje yabara, bajaraPonē ca-itoroba newajētsinexa bajaraponējawabelia pecatsita-exanaenexa pinijicuenejawa, bitso pecatsita-ayapēbejecuene-ata. Bajarapapinijicuenejawa catsi-exanaena bajarapacuenia athēbēyo itaboxojawatatsia, itsa jume, mapanacuataje irajawatatsica. Nejitsipaecuenia wajētsianame, bajarapacuenia bajarapapinijicuene pecatsitajētsijawata yapētaejitsiamē pepacuene necuene-amoneyabijawanexa bajarapanacua-ewetsinēbeje —jai Isaías abaxē Rezín, Pekabeje petsimaxēpatsiwajēnaeya Judá nacuapijiwijawaberena.

¹²Acaz nexata jumecanawiata:

—¡Jume! Jehovájawabelia acuenebi xanē tawajēcaejawa jamatabēcuenē-ējēbiaya tanetsita-exanaenexa tayapētaenexa pexaniajaicuene —jai Acaz.

¹³Nexata Isaías jumaitsi:

—¡Panejumetaema paxamē David-pijinē papemomoxiyajuwēnēwimē, nacua pane-ewetsiwi tsaponaaerena! Paxamē tsaena pacatsita jemacuene

panejamatabê-itonotabiabijawa jiwijawabelia pane-exanaejawata apope-jitsipaecuene. Nexata, xamê Acaz, orijibia ¿bajarapacuenia tsaja icatsia jamatabê-exaname tajaDrosojawabelia nejamatabê-itonotsinexa, apone-exanaejamatabêcuene xua cawajêta? ¹⁴Nexata, bajaraxuata Jehová pija-cuata cayapêtaeya-exanaena pexaniajainexa, pecatsita-exanaejawata mapapinijicuene. Pejanawa raja, imisia peponaponaewa, yacotaponaponaena pejewaxinacueti. Bajarapowa raja itajêtsiana pejewaxinêyo. Bajaraponêyo wênêrubiana Emanuel^b —jai Isafas Acaz-jawabelia. ¹⁵⁻²⁵ [...]

Jehová yapêtaeya-exanatsi Isafas pacuenia wênêrubijitsia pexênato

8 ¹Isafas jumaitsi Israel-pijinê pemomoxi, Judá nacuata pejinawanapaewijawabelia:

—Jehová nejumaitsi mapacueniaje: «¿Pire pinijitablaxaneto bajarapajumata neyaquinaenexa piniji-itanetota mapawênêje; Maher-salal-hasbaz^c pejaiwênê!», nejai Jehová.

²»Nexata, xanê jejanê baja. Bajarapacuenia yaquinarutajê bajarapawênê taxênato pewênênexa. Nexata, natsicueyajunatajê sacerdotenêbeje, Uriás, Zacarías-ata, Jeberequías pexênato, bajaraponêbeje tanetaenêbejexa pexaniajaicuene tayaquinarutsijawa taxênato penaexanaewajênaeya. Bajaraponêbeje pexaniajainêbeje tsabiabi, pacuenia pawênêtaneme baja bajaraponêbeje yabara. ³Itsamatacabijawa tajawa Diosojumepaebiwa imoxoyobajê. Nexata, bajarapowa naxoxita pebinêyo. Penaexanaematacabi bajarapapejewaxinêyo Jehová nejumaitsi: «¿Bajaraponêyo wênêrubare Maher-salal-hasbaz! ⁴Bajarapacuenia wênêrubianame nexênato tsipaji bajaraponêyo peyapêtaewajênaeya pejumaitsi: «'apa, ena,' pejaijawa, bajarapamatacabijawa Asiria nacua pewetsinê tsimaxêpatsiana Israel-pijinê pemomoxijawabelia, Damasco tomarapijiwi, Samaria tomarapijiwi beje, pebarênawajabitsaêtsinexatsi. Nexata, bajaraponê cuene-amoneyabiana bajarapanacuapijiwimi. Yacajêrêtsiananua bajarapatomarapijiwimi beje pecobecowêmi», nejai —jai Isafas Israel-pijinê pemomoxijawabelia.

⁵Isafas jumaitsi Israel-pijinê pemomoxijawabelia, Judá nacuata pejinawanapaewi:

—Icatisia, Jehová tanebarêcuaicuaijajawata nejumaitsi: ⁶«Xanê Jehovánê picani bajarapamonae asiwaya ewetsijitsianê jamatejema pejinawanapaenexa pijawajabitsaêwiwecua, itsiata baitsi jane, nenaixutuwajemata. Caranata, pecujunawixae pijawajabitsaêwi, natsata xanêwecua pejunatsinexa Rezín, Siria nacua pewetsinê, bajarapacuenia Peka, Samaria tomara pewetsinê, Remalfas pexênato, bajaraponêbeje peyawenonaenexatsi pebarênawajabitsaêtsijawata», nejai Jehová. Baitsi, pacuenia Siloé matathaibêpijimerawainae-ecabiaba, bajarapacuenia Jehová pacatocaêjêta picani jamatejema pejinawanapaenexa. Itsiata, aeconoxaeta itsacuenia pacatocopatsiana.

b 7:14 Emanuel: Mapawênê pejumaitsiwênêje: «Dioso nacayajawa», pejaiwênê. Isafas yabaracuai-cuaijai anijanacuetobeje yabara. Caenê Acaz peyapêtaewatsi pexênato. Bajarapijinia pacuenia Isafas yapêtaeya-exana Acaz pacuenia itsamatacabijawabelia itsawa pejanawa, pebi apoperabê-quenetsiataenejewa, naxoxitsijitsia penacuetonêyo. Taema Mt 1:23, Lc 1:27. **c 8:1 Maher-salal-hasbaz:** Mapawênê pejumaitsi jume maje: «Imoxoyo pewajênae pecopiapatsinexa papecawerebiabijawa, bajarapacuenia papecawecuanaxainaeyabijawa panecobecowêmi», pejaiwênê.

⁷»Panewecuanatsatsixae Jehová pacatocopatsiana papecatsimaxëpat-sinexa Éufrates menejawawerena peponaewi, baitsi Asiria nacuapijiwi. Nexata, pacuenia menianë piawajubumatacabí cawota daxitacuenecaponaenexa piajibijawabelia, bajarapacuenia Asiria nacuapijiwajabitsaë paca-exanaena pecuenesaëta papecawerebiabaponaenexa, xanëwecua panejunatsixae jiwitonëbeje papecayawenonaenënexabeje. ⁸Pacuenia mene piawajubuajawata belia matapëcaewa daxita-iranë, bajarapacuenia Asiria nacuapijiwajabitsaë yacajëpaena daxita nacuanëjawa bajarapacuenia pepatsinexa Jerusalén tomarajawabelia, itsanacuanë pecuene-amoneyabicujinae. Pacuenia jiwitonë ba-apobubunae itsa piawajubumamera pata saya pecuaibositojawa matapëcaewinejewa, bajarapacuenia pijawajabitsaëwi matatoyorotsia jinawanapae-atatsi tsane, itsiata Jerusalén tomarata pejinawanapaewi apocuene-amoneyabitsi tsane. Xamë Emanuel, daxita nijanacuajawa^d yacajëpaena Asiria nacuapijiwajabitsaë. Pacuenia pinijipe-punaenë cotsala bepijiayo patabiaba itsajawabelia, bajarapacuenia bepijiayo yacajëpaena nijanacuajawa Asiria nacuapijiwajabitsaë —jai Isaías Judá nacuapijiwajawabelia Asiria nacuapijiwi yabara.

⁹Icatsia, Isaías jumaitsi Judá nacuapijiwi pijawajabitsaëwijawabelia Asiria nacuapijiwajawabelia-ata:

—¡Nexata, panejumetaema padaxitanacuapijiwimë, tajë paxanëwecua panejinawanapaewi, panejamatabëcueneyanatsiwi Asiria nacua pewet-sinë panebarënawajabitsaëtsinexa mapanacuayaberanaje! Panacaetuatsi-atamë tsane patanebarënawajabitsaëtsinexamë, apopanecuenecamoneyabimë tsane, tsipaji Dioso pacawerebiabiana. Xaniawaetsia pasiwanacuenexaniawaetsi-atamë tsane, bajaraPonë pacawerebiabiana.

¹⁰Xaniawaetsia patsiwaënaenajamatabëcueneweretsi-atamë tsane pacuenia panecuenecamoneyabijitsiamë, pacuene-amatononobimë tsaothopae tsane. Daxitaxua panajamatabëxainaname pane-exanaenexa patanebarënawajabitsaëtsijawatamë, panenajamatabëxainacuenia apopacatopit-sapae tsane, tsipaji Dioso baja paneyajawa —Isaías yapijiwijai Judá nacua pijawajabitsaëwijawabelia.

Jehová muxujioba Isaías pesiwanajamatabëcuenecopatsiyaniwa pewënajiwitonëjawabelia

¹¹Icatsia, Isaías jumaitsi Judá nacuapijiwajawabelia:

—Jehová ajumesaëya nemuxujioba tanajamatabëcueneliwaisijëpaeyaniwa mapanacuapijiwije, tasiwanajamatabëcopatsiyaniwa tawënajiwitonëjawabelia bajaraponëwecua. Nexata nejumaitsi: ¹²«Mapanacuapijiwi jumaitsi tsabiabije: 'Itsamonaë pibisiacuenia nacasiwanajamatabëxainabiaba wajapëya,' jai tsabiabi. ¡Xamë pëtsa itsiata liwaisijëpame! ¡Pëtsa cujunawame! ¡Xua bajarapamonae yabaracujunawabiaba, pëtsa xamë bajaraxua cujunawame! ¹³Daxita bajaraxuanëwecua ëxanë Jehovánë necujunawiaya yaiyataeya-ata ponaponaename, tsipaji ta-acuenesaënë daxitawecua. Nexata, xanë benecujunawame taneyaiyataeyabiabinexamë, tsipaji xanë tananeconitsia-exanaenë pajijiwi naneconita xanëjawaberena. Nexata,

apobecujunawimē xanēwecua itsacuenewewa-ata», nejai Jehovah. ¹⁴Bajara-Ponē xaniawaetsia ewetsiana piayaicuenewecua daxitajiwi pesiwanajamatabēcuenecopatsiwiitsi. Aponacueratsi tsane. Itsiata bailsi jane, paxamē Israel papemomoximē, anijanacuatabeje panejinawanapaewi, Diosojawabelia apopanesiwanajamatabēcopabixae, bajaraPonē pacatonaexanaena be-iboto^e panefirapecaenexa. Bajarapijini pacuenia Jerusalén tomarapijiwinexa tonaexanaenatsi bepecataicaebu^f baratsui, bajarapacuenia yacaranatsijitsia bajarapamonae pewecuapanepaeyaniwa pijawajabitsaēwiwecua, apoheyai-yataexae pijaDioso. ¹⁵Nexata, be-iboto pijaDioso petonaexanaexaetsi, ayai-bitsaēto firapajonejonena bajaraPonē pejamatabēcueneta petēpaenexa. Bajarapijini pacuenia itsamonae bepetaicaebaratsuitsi tsane pecuemayajawata, bepe-arēbanubenaewitsi tsane petaicaenexatsi pijawajabitsaē, pecaponaenexatsi itsanacujawabelia —jai Isaías Jehovah^g pitorobicueniatsi. ¹⁶⁻²² [...]

**Itsamatacabijawabelia naexanaejitsia pexaniacuenia
pepoeyanacua-ewetsinēnexa**

9 ¹Orijibia Isaías jumaitsi:

—Dioso picani bejiobia-exana Galilea nacuapijiwi, Zabulón-pijinē pemomoxi, Neftalípijinē pemomoxi-ata, bajarapacuenia itsamonae apojudiowi-ata Jordán-menemuxubērēa pejinawanapaewi. Nexata, ayaicuenia pebejiobia-exanaexaetsi, bajarapanacuapijiwi aponatotae penacapanepaecuenenexa. Pacuenia jiwi bitso pitaquirijawata^h itsa jinawanapa apotae pepitsapaejawanexa pecotianejewā, bajarato-itsitsi. Itsiata, bajarapacuenia jinawanapae-ata apotsitecae tsane daxitamatacabijawabelianexa pebejiobia-exanaejawatsi. Itsamatacabijawabelia Dioso wecua-iquinaena bajarapamonae itsamonae beweliamatabēcuenewi petaejawamitsi. Belia, itsamonae topexaniacuenetsi tsane, bajarapacuenia-ata wēnēxaniatsianatsi Galilea nacujawata pejinawanapaewi, bajarapacuenia Jordán menepanawerena, Galilea pucapanawerena pejinawanapaewi-ata.

²»Pamonae jinawanapa bepitaquirinacuanējawa,^h xuacujinae belia jemata bajarapamonae taena bepinijicotiajawa. Pamonae jinawanapa bepinijipitaquirijawabēxēpana, bajarapitsiwiawata tonapebetsijitsiatsi pitayotsicotia. ³Bajarapamatacabi icatsia Israel nacuapijiwi be-ayaijamatabēcuenewi nataejitsia. Nexata, bajarapamonae bitso siwajamatabēcuenēbarēyajitsia, pacuenia jiwi babarēya pe-ubijawanē penotsicujinae pexaejawa petonawitsixaetsi. Bajarapacuenianua barēyajitsia pacuenia wajabitsaēwi babarēya pijawajabitsaēwi pecobecowēmi penatsicobetsanaejawata pecuene-amoneyabicujinae. ⁴Bajarapacuenia barēya tsane, tsipaji bajarapamatacabita Dioso capanepaena pijajiwi, pacuenia exana bajayatami pecapanepaejawata Gedeón-pijinē pejamatabēcueneta Madián nacuapijiwimi pewerebiabimatacabita. Nexata, pebejiobia-exanaecuenemitsi Israel-pijinē pemomoxi wecuapitsapaena, jamatejema icatsia pejinawanapaenexa. ⁵Bajarapamatacabi Dioso pijalibia-exanaexae penayabara-itoyacuenemi, nexata

e 8:14 *pacatonaexanaena be-iboto*: Taema Rom. 9:33; 1Pd 2:8. **f 8:14** *bepecataicaebu*: Taema «mallawiriatrampa», glosariojawata. **g 9:1** *jiwi bitso pitaquirijawata*: Taema Mt 4:15.

h 9:2 *bepitaquirinacuanējawa*: Taema Mt 4:16.

penataxutabijawanëmi, penaxatabijawanëmi-ata penawajabitsaëtsijawata, pejana penacajapibijawanëmi, tajuitsijitsia isotota pebijanaenexa.

⁶»Bajarapitsicuene taenatsi, tsipaji waxaitsi penacuetonëyo nacara-jutsijitsia pebinëyo.ⁱ Bajaraponëyo tocopatsijitsiatsi pewetsinënexa daxitajiwi.^j Bajaraponëyo wënërubianatsi pecuene yabara mapawënëanëje: ‘Bitso pexanialiwaaisicuena pemuxujibinë,’ ‘Diosonë bitso piacuenesaënë, apopejamatabëcuene-amoneyabinëtsi,’ ‘peyamatacabitsitecaenë jiwi pewetsinexa paxacuenia,’ ‘pewecua-ajibia-exanaenë^k jiwi penayabara-itoyacuenemi, jamatejemaya penajuajinawanapaenexa,’ pejaiwënëanë xainaena.

⁷»Bajaraponë xaniawaetsia yanacua-ewetsiana daxitanacuanë,^l jamatejema penajuajinawanapaenexa. Peyanacua-ewetsicuene apotocopiaruacetsi tsane. Bajarapacuenia jamatejema jiwi penajuajinawanapaecuene apowerewerecae tsane. Bajaraponë, David-pijinë pemomoxiyajuwënëñëxae, canacopatsiana daxitamatacabijawabelianexa peyanacua-ewetsitaxunaemita^m pe-ecaenexa. Bajaraponë yanacua-ewetsiana daxitajiwi xaniajaiya perowialiwaishi pecanaëjëtsicuena. Èpexaniacuena exanaena. Bajarapacuenianua najëpaeya taena daxitajiwi. Bajaraxuata, jiwi jamatejemaya najuajinawana-paena daxitamatacabijawabelianexa, nacua-ewetsinë penaexanaejawawerenacujinae. Daxita maxua nacato-exanaena Jehovah, Ponë daxitawecua bitso piacuenesaënë tsaponaponae. Bitso wajanaca-asiwajamatabëcuene pexainaenë —jai Isaías Judá nacuapijiwijawabelia. ⁸⁻²¹ [...]

Jehová tonajumecopata Isaías xua yabara naneconitsia-exanaejitsia Israel nacuapijiwi pewetsiwi

10 ¹⁻² Paliwaisi Jehovah tonajumecopatatsi, Isaías tsipaeba Efraín Pemomoxijawabelia. Jumaitsi mapacueniaje:

—Piayaicuenejawanë Jehovah pacatsi-itorobiana papecatocopiapatsinexa paxamë jiwi pijaliwaisianë panetocanaëjëtsiwi, tsipaji paxamë panejamatabëcueneliwaisita pa-itorobabiabame itsamonaë beweliamatabëcuenewi pecobecowëjawaxi yamaxë-itojorobiaya panewecuanotabiabinexa. Nexata, pawecuanotabiabame pecobecowëjawanëmi bepejiobiwi, pamonajiwi pewecuatëpawaxitsi-ata, tsonijiwixi-ata. Dioso pejumeliwaisi apopajumecowënëtsimë. ³ Nexata, pacayanijobatsi panecanaëjëtsinexa. ¿Detsa nexata xua pa-exanaename patacayanijobimatacabita pane-exanaecuenemi yabara, patacananeconitsia-exanaenexa? ¿Jipatsa nexata pacayawenonaëjitsipa bajaraxuawecua? ¿Detsa jota papuenetsianame daxita panecobecowëjawanë juya papecayacajërëtsiyaniwa? ⁴ Ajibi panewecupanepaenexa tsane Jehovah papecatsi-itorobimatacabiti Asiria nacua pewetsinë papecabarëna-wajabitsaëtsimatacabinexa paxamëjawaberena. Pacatsicopatsiana saya papecatacaejawa bajaraponë papecacuene-amoneyabixae, itsa jume, bajaraponë pacabeyejebaponaena. Bajarapacuenia Jehovah pacato-exanae-ata

i 9:6 pebinëyo: Taema Lc 2:11. j 9:6 pewetsinënexa daxitajiwi: Taema Mt 11:7; 28:18, Efe. 1:21-22; Apoc. 19:16. k 9:6 pewecua-ajibia-exanaenë: Taema Efe. 2:14. l 9:7 yanacua-ewetsiana daxitanacuanë: Taema Lc 1:32-33. m 9:7 David-pijinë pemomoxiyajuwënëñëxae ... peyanacua-ewetsitaxunaemi: Taema Lc 1:69.

tsane, apopacasiwajamatabêcuenecaewi tsane papecabara-anaepanaejawa panijaneconi yabara. Orijibia, pacatocaējētsiana papecananeconitsia-exanaejawanexa —jai Isaías Efraín pemomoxijawabelia, Jehovah pejumaitscueniatsi.

Dioso xaina itsaliwaisi Asiria nacua pewetsinēnexa

⁵ Isaías mapaliwaisije wajunupaeba Asiria nacua pepopeyanacua-ewetsinē yabara, Jehovah pejamatabêcueneta penaneconitsia-exanaejawanexa. Nexata, pecopiapatsiwajēnaeya jumaitsi Efraín pemomoxijawabelia:

—Jehová jumaitsi: «Asiria nacua pepopeyanacua-ewetsinē piayai-cuene penatotaenē tsane. Pacuenia pijajiwonē pexainaenē naneconitsiaya jumaconitabiaba apojejitsipaecuene pexanaexae, bajarapacuenia Xanē picani Asiria nacua pepopeyanacua-ewetsinē xainajē betajanaebu-cuenia tananeconitsia-exanaenexa tajajiwi pijaneconi pejamatabêcuene. ⁶ Bajaraxuata, bajaraponē picani itorobijitsianē pebarēnawajabitsaētsinexa tajajiwiawabelia, tsipaji nenacofēnētsiaya jinawanapa, apotanejumeowēnētsicuenia, tajajiwicuenia natae-ata picani. Xanē tocopatsianajē tabara-anaepanaexae, pecuene-amoneyabinexatsi bajarapamonae pecobecowējawanēmi, pebejiobiwicuenia penacopabinexa, bajarapacuenia benatsiquejemawicuenia petaenexatsi pecuene-amoneyabixaetsi. Pacuenia namuto peponaejawata natsiquejemacuenia ira taxunanonobabiaba bejiobiataenejewa, bajarapacuenia tocaējētsianajē natsiquejemacuenia petaenexatsi Isra-el-pijinē pemomoxi Asiria nacuapijiwi pebeponaejawatatsi.

⁷ Bajarapacuenia tocaējētsi-atanē tsane Asiria nacua pepopeyanacua-ewetsinē bajarapacuenia tananeconitsia-exanaenexa picani tajajiwi, itsiata bajaraponē apocanaējētsi-ata bajarapacuenia pexanabiabinexa. Saya jitsipaena pewerebiabinexa ayaibitsaēto nacuanēpijiwi pebeponaejawata, ayainacua pepopeyanacua-ewetsinē penaexanaenexa. ⁸ Nasiwajamatabêcuene-itsi tsabiabi tsane saya mapacueniaje: ‘Yeee ra jane daxita tajajiwi wajabitsaēwi penamatacaitorobiwi pepopeyanacua-ewetsijamatabêcuene pexainaewi jiwi peyayataenexatsi. ⁹ Xanēnexa daxita tomaranē acuenesaējibi tanecuenecaranatsijawa. Yeee ra jane cuene-amoneyabajē Carquemis tomarapijiwi necuenecaranatsinejewa, Calno tomarapijiwi-ata, Arfad tomarapijiwi-ata, Hamat tomarapijiwi-ata, Damasco tomarapijiwi-ata, bajarapacuenia Samaria tomarapijiwi-ata. ¹⁰⁻¹¹ Daxita najēpaeya jamatejema cuene-amoneyabajē ayaibitsaēto, jumapecataeya pexanaenēanē xainae-ata pijadiosowicuenia pewetsinexatsi, apojejitsipaecuene petocopiapatsiyaniwatsi. Pacuenia cuene-amoneyabajē baja Samaria tomarapijiwi, bajarapacuenia-ata cuene-amoneyabianajē Jerusalén tomarapijiwi, tsipaji padiosowi jumapecataeya pexanaenēanē natoxaina pewetsinexatsi picani, bajarapadiosowi beweliasaē pexainaewi, Samaria tomarapijiwi pijadiosowiwecua,’ jamatabêcuenejai tsane Asiria nacua pepopeyanacua-ewetsinē xanē Jehovahnē tatocaējētsicuenewecua.

¹² »Pamatacabijawa Jehovah weretsiana pecuenexanetsijawa pijajiwi Jerusalén tomarapijiwi, bajarapacuenia Sión-tsutota pewetsiwi, Asiria nacua pepopeyanacua-ewetsinē pejamatabêcueneta, bajarapamatacabijawa matapania jane baja Asiria nacua pepopeyanacua-ewetsinē juya Jehovah

naneconitsia-exanaena, tsipaji bitso be-ayaijamatabëcuenenëcuenia nataeya-biaba Jehováwecua. ¹³ Asiria nacia pepopeyanacua-ewetsinë jamatabëcuenen-itsi tsane: 'Xanë daxita bajaraxua exanajë tajacuata, tsipaji ayaibitsaëtoxaneto xainajë tajajiwi wajabitsaëwi. Bitso tayapëtaenënuu tanawajabitsaët-sinexa, nexata xaniawaetsia siwanajamatabëxainajë pacuenia cuene-amoneyabijitsianë daxitanacuanëpijiwi. Bajaraxuata, tajajiwi wajabitsaëwi cuenecaëjëpatsi pewerebiabaponaenexa bajarapanacuanëpijiwi tanaxainaeya-binexa pijanacuanëmi. Bajarapacuenia to-ajibia-exanajë pitsinacuamiwajëto itsaxuayo tocopianajetarucatsi pija-iranëmi, bajarapacuenia bajarapanacuanëmi penaexanaenexa caenacuaxaneto tayanacua-ewetsinacuanexa. Yacajërëtajënuu pecobecowëjawanëmi tajajawanexa. Cuene-amoneyabajë daxita itsamonae pepopeyanacua-ewetsijiwi pecuene-aitatsacapepopeyanacua-ewetsinëcuenia. Daxita bajaraxua tajacuata exanajë bajarata-itsinëxae.

¹⁴ Jamatejema notaponajë bajarapatomarapijiwi pecobecowëjawanëmi, bajarapacuenia pija-iranëmi itsajiwiyo neyacaranatsinejewa, bajarapacuenia itsajiwiyo-ata yapijiwicuaicuajainejewa bajarapamonae. Baitsi, pacuenia peyacabocaenë pecowëta pematapenajawata, jiwitonë notabiaba petobëtoxi, bajaraponëyo yacaranatsiaya anaeya nacorafefaubabenejewa, napumuxowë-satsiaya aëjainejewa-ata, bajara-itsinë xanë bajarapamonae pija-iranë tayacajërëtaaponaejawata,' jamatabëjai tsane Asiria nacia pepopeyanacua-ewetsinë.

¹⁵ Itsiata, Jehová jumaitsi yanijobiaya pecanaëjëtsinexa pexanaecueneyabara bajaraponë: «Canaëjërë! ¿Sipali meta be-ayaijamatabëcuenenë nataejitsipa pecanacuenenëbinëtsiwecua? ¿Bajarapacuenia serrucho be-ayaijamatabëcuenenëjewa nataejitsipa meta pecaucubinëtsiwecua? ¿Detsa xuajitsia nexata xamë, betajanaebocuenia tacacanacuenebaponaponanë, be-ayaijamatabëcuenenëmë nataneme xanë Jehovánëwecua? ¡Icatsia canaëjërë! Ponaëbo jiwitonë cobenanucaponaejitsipa, ¿bajaraponaebo tsaja cobepitsiaya cobecaponaejitsipatsi? Jume cajena, tsipaji saya naëbo. Baitsi, jiwitonë xuanë pecanacuenenëbijawanë daxita bajaraxuanë. Apojiwitonë. Bajarapacuenia xanë Jehovánë cacanacuenebaponaponatsi tajitsipaecuenia. Nexata, xamë nexanaecuenenëmi aponijacuata nexanaejawanë. Xanë saya ta-exanaejawanë xamëta.

¹⁶ »Ayaijamatabëcuenenë nenataexae xanëwecua, xanë Jehovánë, daxitawecua bitso ta-acuenesaënë tsaponaponae, cananeconitsia-exanaenatsi. Nexata, catsi-itorobianatsi pinijidomaecuenenë nijajiwi wajabitsaëwi pecuenobiwitsicuenia penacopabinexa. Daxita ayaicuenia bajarapamonae domae pejamatabëcuenenë amatataju tsane. Nexata, bajarapadomaeta cato-ajibia-exanaenatsi daxitaxua yabara be-ayaijamatabëcuenenëmë picani nataeyabiabame. Pacuenia pitatsajawi-isoto baweriajawa isonaëxi, bajarapacuenia cato-ajibia-exanaenatsi ayaijamatabëcuenenëcuenia nenataeyabiabijawami», jai Jehová Asiria nacia pepopeyanacua-ewetsinë yabara, Isaías petsipaëbinexa Israel nacuapijiwijawabelia. ¹⁷⁻³⁴ [...]

Pacuenia Mesías yanacua-ewetsijitsia mapanacuapijiwi

11

¹ Isaías jumaitsi israelitawijawabelia:

—Jehová papecatsicopatsicujinae Asiria nacuapijiwi papecacuene-amoneyabinexa, panenaneconitsixae bajaraPonëjawabelia,

itsamatacabijawabelia pamatabëxëyo abaxë jinawanapaena Israel nacuata, pacuenia naejawa penicataxubicujinae penacopatsimatabacajawata pitsapa itsanae, bajarapacuenia naitajëtsiana bajarapamonaejawata itsanë, Isaiⁿ pemomoxiyajuwënënë, peyanacua-ewetsinënexa mapanacuapijiwije.

²»Espíritu Santo, Jehová pe-Espíritu, jamatabëcuenecaëjëpaeya-exanaenatsi bajaraponë mapacuenejawanë pexainaenexa: Yapëtaeya pexanaecuenë, xaniawaetsia peyapëtaecuenë, pemuxujobicuene Dioso pejitsipaecuenia, piacuenesaëcuenë, Jehová pecueneypëtaecuenë, Jehová peyaiyataeya-exanaecuenë-ata.

³»Nexata, jiwi pijaneconi xaniajaiya tocanaëjëtsiana. Bajaraxuata, aponaneconitsia-exanae tsane, itsa jume, apocopatsinua tsane naneconitsia-exanaenejewa ëpecuenë yabara,^o itsa jume, pinaliwaitsa-ata, tsipaji bitso pejitsipaenë tsane pejumecowënëtabibijawa Jehová.

⁴»Bajaraxuata, xaniawaetsia tocanaëjëtsiana bepejiobiwi, bitso pexainaewibeje, paliwai si namata-enetsia natsixainabeje. Xaniawaetsia tocanaëjëtsiananua pijaliwai si piacuenesaëjibiwi xaina piacuenesaëwijawabelia. Pejumeta penamatacitorobijawata junawia-exanaena daxita nacuapijiwi ayaicuenia. Cae-uxunejawata werebiabiana daxita pijamatabëcuenëbejewi. ⁵Pacuenia jiwi cinturón na-epacëbabiaba xaniawaetsia penacuenebinexa, bajarapacuenia pecanacuenebixae ëpexaniacuene pexanaejawa, pexaniajaijumenë-ata daxitacuene pexanaejawata, xaniawaetsia topitsapae-natsi bajaraponë, pacuenia cinturón pena-epacëtsinë.

⁶»Bajaraponë peyanacua-ewetsimatacabijawa penayabara-itoyacuenemi ajibi tsane. Nexata, pinijiwiriano,^p lobowënënë, unupijinë pianaepanaenë, oveja pejananëbeje najuaponaponaenabeje xaniawaetsia na-itoyanejewabeje. Bajarapacuenia newëthëbeje, chivo pejananëbeje najuamajitanuena-beje. Bajarapijina pacuenia vaca pejananëanë, newëthë petsobiawi najuawitsabawanapaena caejawata. Nexata, pejewaxinëyo cuenecaëjëpaenatsi bajarapamonae pejamatabëcuenë-amoneyabicuenia pematacaponaenexa wayafuabelia pona pexaenexa. ⁷Bajarapijina pacuenia vaca pesorowabi, unupijipianaepanaenëanë osowiriawi^q pesorowabi jamatejema najuajinawanapaena caejawata. Pexi-ata najuabobobenabiabiana caejawata penacuera-ewetsinexa. Bajarapamatacabijawa newëthë petsobiawi pinijiwiriawi xaena pona pacuenia baxane bueyumona.^r ⁸Pejewaxinëyo pena pemiapaenacuetoyo cuenecaëjëpaenatsi penamuxusitsijawa be-atamiwiriajomo pianaepanaenë pijamëthëmuxuneneta. Bajarapijina pacuenia, pejananamicopatsijiwiyo cuenecaëjëpaenatsi penacobebëtsijawa bula pijamëthëjawareca. ⁹Nexata, caejiji-ata apobijanae tsane itsacuenejawayo-ata daxita Jerusalén-jawata, Sión-tsutojawata pe-ecaetomara, tsipaji pacuenia mera bayacaëjëpa daxitajawa manuamenejawata, bajarapacuenia jiwi jamatabëcuenewënëcaena Jehová peyapëtaeya-exanaejamatabëcuenetsi caejamatabëcuenë penajuaxainaenexa Jehovájawabelia.

n 11:1 Isai: Pepopeyanacua-ewetsinë David paxa. Taema Rut 4:17, 22; 1Sa 16:11-13. **o 11:3** ëpecuene yabara: Najëpaeya taena daxita jiwi, pamona bitso pexainaewi, bepejiobiwibeje, ayajamatabëcuenewi, beweliamatabëcuenewibeje, pecuensaëwi, pecuenobiwibeje-ata. **p 11:6** pinijiwiriano: Taema «lobo», glosariojawata. **q 11:7** osowiriawi: Taema «oso», glosariojawata. **r 11:7** bueyumona: Taema «bueyu», glosariojawata.

¹⁰»Nexata, bajarapamatacabita Isaípijinēmijawawerena pepitsapaenē daxita nacuapijiwi itaxutuanacaetuatsiana petaenexatsi. Bajaraxuata, cae-nacuapijiwi canacujitsia jaitsiana bajaraponē, penaponaponaenexa itsajota bajaraponē ponapona bitso pexanianacuata —jai Isaías Judá nacuapijiwija-wabelia. ¹¹⁻¹⁶ [...]

**Dioso yapētaeya-exana Israel-pijinē pemomoxi
penawiabinexa icatsia pijanacuamijawaberena**

14 ¹Isaías jumaitsi Israel-pijinē pemomoxijawabelia:
—Xaniajai, itsamatacabijawabelia Jehová paca-itaxutotsoniataena icatsia Jacob-pijinē papemomoximē, icatsia papeca-asiwanexa daxita nacuanēpijiwewecua. Nexata, pacacanawiabiana icatsia panijanacuamija-waberena, bajarajota panejinawanapaenexa. Bajarapamatacabita, itsana-cuawerena peponaewi pataponaena panijanacuata, bajarajota panenajuaji-nawanapaenexa nacaewiriawicuenia, Jacob-pijinēmi papemomoximēcuenia panenataenexa. ²Nexata, itsanacuanēpijiwi papecataicaewimi pexaniacue-nia pacayawenonaena Israel papemomoximē panenawiabinexa panijana-cuajawaberena. Nexata, pamonaē pacacuenē-amoneyaba picani, bajarapa-monaē juya pacuenē-amoneyabianame. Bajarapijinia pacuenia pamonaē patonacuenēbawanapame amoneya bedajubiwicuenia, juya bajarapamonaē pacatonacuenēbawanapaena amoneyacuenia. Pijatuxanewi panaexanae-name pamonaemi picani pacabejibia-exanabiaba —jai Isaías.

Dioso tajēwelia yapētaeya-exana Isaías Babilonia nacua pewetsinē yabara

³Isaías capōcaponaeya jumaitsi Israel-pijinē pemomoxijawabelia Babilo-nia nacua pepopeyanacua-ewetsinē yabara:

—Pamatacabi Jehová pacacanawiabia-exanaena paxamē Israel papemo-moximē, bajarapamatacabi ajibi tsane papecabejibia-exanabiabicuenemi Babilonia nacuapijiwi. Ajibinua tsane bajarapamonaē amoneya bedajubiwi-cuenia panetonacuenēbawanapaecuenemi. ⁴Paxamē saya Babilonia nacua pepopeyanacua-ewetsinē jumecaponaeya pawēñēcanaxēanaename mapaliwaisiyoje wajicuenia. Pajumaitsimē tsane: «¡Yera jane! ¡Taema pacuenia nacacopata baja wajanacabejibia-exanaenēmi! ¡Yera jane! ¡Taema pacuenia cuenecopatajopa bitso ayaijamatabēcuenē penataenēmi-ata!

⁵»Jehová baja wecua-ajibia-exanatsi piacuenesaējawami mapapiacujirubejenēmi nacua-ewetsinē-ata. Nexata, wajanacayanacua-ewetsijamatabēcuenemi ajibi baja.

⁶»Bajaraponē anaeya yanacua-ewetabiaba pewetsinacuanē, nexata anaeya peyanacua-ewetsiwi conitabiaba copatsinejewa caematacabi canacujitsia. Aponajamatabēcuenecataitabiabi caeto-ata pibisiacuenē pexanaeyaniwa peyanacua-ewetsiwi jawabelia. ⁷Nexata, maparucaeje daxita peyanacua-ewetsiwimi jamatejemaya jinawanapa. Barēyaya saya naxēanabiaba.

⁸»Bajarapacuenia Líbano nacuata penubenaenaewajanē, cedrowiria-naenē, bajarapacuenia pinowirianaenē-ata, barēya bajaraponē pecuene-amoneyabixaetsi, tsipaji ajibi baja pematatsēñēa penicatabiabiwiwitsi tsane.

⁹»Bajarapacuenia pamonaemi nebeyaxuabiwimi necuene-amoneyabijawata, nacuanē pewetsiwimi, bajarapamonaemi

cawajēnae-ewetawanapa pecacopiapitsinexa nepatsixaejitsia petēpaewimi pemēthējawabereca. ¹⁰ Bajarapamonae petēpaewimi pecacopiapitsijawata cajumaitsi tsane: ‘Yee ra jane! Marajotaje cato-ajibi niacuenesaēcuenemi, juya nenacopatsinexa niasaējibinē pacuenia paxanē. ¹¹ Catocopiarucajopa baja ayaijamatabēcuenenē nenataeyabiabijawami. Nexata, ajibi newēñeca-naxēanaeya pectoracatsiwi árpata. Nijapexaniacamami catonaexana saya ēpetsabanaecuene, bajarapijinia pacuenia sábanapanacuenia camata-acata oro jiwixaewi. ¹² Pacuenia Lucerowēñē⁸ bajayapijituluputo bitso pexanianē, bajarapijinia pacuenia xamē-ata pexaniacuenia pecayaiyataenē picani ayaijamatabēcuenenēxaemē. Itsiata, Dioso caxuabica⁴ mabetsicaje, xamē necuene-amoneyabinēmi itsanacuanēpijiwi.’ ¹³ Be-ayaijamatabēcuenenēcuenia nenataexae, jamatabējumaitsimē picani: «Junaeniajē Dioso pijataxunaejawabetsia, bajarajotatsia juya daxita Dioso pijatulupu ta-ewetsinexa athēbētatsia. ¹⁴ Baitsi, junaeniajē pajubopēñeyabetsia itaboxojawabetsia, bajarajotatsia tanaexanaenexa pepo-ayaijamatabēcuenenēñē pacuenia Dioso pepo-ayaijamatabēcuenenē», jamatabējamē picani. ¹⁵ ‘Itsiata baja, aeconoxae pepobeweliamatabēcuenenēmē pecaxuabixaereca mapamēthēareca, pepomēthējawabereca,’ cajai tsane mēthēta pecacopiapitsiwi», pajamē tsane wajita —jai Isafas Israel-pijinē pemomoxijawabelia Babilonia nacua pepopeyanacua-ewetsinē yabara. ¹⁶⁻²⁶ [...]

²⁷ »Jehová, ponē daxitacuene pecuenecaējēpaenētsi, siwanajamatabēcuenewereta baja pacuenia exanaejitsia Asiria nacuapijiwijawabelia. Nexata, ajibi cajena pecuenecanaranatsiwi, pexanaeyaniwa pesiwanajamatabēweretsicuenia. BajaraPonē namaxērowitanuca, pijajiwi peyawenonaenexa, pecapanepaenexa Asiria nacuapijiwi pesaēwecua. Nexata, ajibi cajena pemaxēcanaewiatsiwi, pijajiwi peyawenonaeyaniwa, pesiwanajamatabēcueneweretsicuenia. ²⁸⁻³² [...]

29 ¹⁻¹² [...] ¹³ Marapacuenia Pepopetuxanenē Dioso jumaitsi: «Tajajiwi saya pejumeta bitso niasiwa tsabiabi, itsiata aponejume-cowēnetabiabi. Pematabacabēta yayataeya nubenabiaba taitabarata, itsiata pepacuene aponeyaiyatae pejamatabē-ēthētojawawetsina. Daxita xua exana penajamatabēcuenē-itajētsinexa tane-asiwajawa, exana saya itsamonae pecujarubixaetsi. ¹⁴ Bajarapacuenia tajajiwi pexanabiabixae, pinijicuenejawanē tsita-exanaenajē tabenajacaeya-exanaenexa icatsia taneyaiyataenexa. Wecua-ajibia-exanaenajē daxita pemuxujiobiliwaisianē pamonae pecuene-caējēpaewitsi pemuxujiobijawa. Wecua-ajibia-exanaenajēñua daxita peyapē-taewi peyapētaecuene», jai Dioso Isafas-jawabelia israelitawi yabara.

¹⁵ Orijibia Isafas jumaitsi:

—¡Bejiobi tsane pamonae canaējēta pewecuanamatayabijawa Pepopetuxanenē, pesiwanajamatabēcanaējētsijawa pibisiacuene pexanaenexa,

s 14:12 *Lucerowēñē*: Bajayatami itsanacuanēpijiwi nawajēcabiaba Lucerowēñē tuluputojawabelia. Bajaraxuata, Babilonia nacua pewetsinē tsitatsi beLucerowēñē tuluputo be-ayaijamatabēcuenenēcuenia petaxaetsi. Orijibia, mapaversiculota Dioso nacayapētaeya-exana xua exana Satanás-jawabelia, Lucerowēñēñemi, pacujinae be-ayaijamatabēcuenenē natane Diosowecua. Taema Lc 10:18; 2Pd 2:4; Apoc. 12:7-10. t 14:12 *caxuabica*: Satanás yabara-jumaitsinua. Taema Apoc. 8:10; 9:1.

pamonaenua pibisiacuene exana pitaquirijawata Dioso petaeyaniwatsi! Bajarapamonaē nawēxaniabiaya jumaitsi tsabiabi: «Pepopetuxanenē Dioso apocuenecaējēpaetsi wajanacataejawa pitaquirijawata, nexata apoyapētae xua exanatsi», jai tsabiabi. ¹⁶ Bajarapitsiwi pepacuene piamatabēcuene-cowēbiwi. Canaējēre: Pepopetuxanenē Dioso jiwi pexanaenē, bajaraxuata wecua-ayaijatabēcuenenē pexanaewi, pacuenia pefaratsinē wecua-ayaijatabēcuenenē pefaratsiwaxi.

»¿Itsajawata pecobecowējawa jumaitsi tsipae pexanaenētsijawabelia: «Bajaraponē apone-exanae cajena» jai tsipae? Jume cajena.

»¿Itsajawata waxi jumaitsi tsipae pefaratsinētsi yabara: «Ponē nefarata cobecoxanatsi cajena pefaratsicuene, nexata bijiaya ne-exana», jai tsipae? Jume cajena.

»¿Detsa xuajitsia nexata, paxamē pibisiacuenia pabaracuaicuaijamē tsa-biabi Pepopetuxanenē panijaDioso? —jai Isafas. ¹⁷⁻²⁴ [...]

Pacuenia Dioso pijajiwitonē bejiobia-exanae-atatsi, tsiteca siwanajamatabēcuenecopatsijitsia Diosojawabelia

50 ¹⁻³ [...] ⁴ Jehová petsipaebicueniatsi, Isafas wajunupaeba Israel-pijinē pemomoxijawabelia ponē Jehová itorobijitsia pijajiwitonē-cuenia. Bajaraponē yabara jumaitsi mapacueniaje:

—Jehová yapētaeya-exanaena paliwaii tsipaebijitsia ponē itorobijitsia pijajiwitonēcuenia pejamatabēcuenecueranaewijawabelia, pejamatabēcuene-asaēya-exanaenexa. Nexata, Jehová caebajayacunua canacujitsia pijajiwitonē yatixobabiabiana, xaniawaetsia penamuxuna-ewetabiabinexatsi paliwaii jitsipa peyapētaeya-exanaejawa. Bajaraxuata muxunanaēcotabiabianatsi, ita yatixobabiabiana pejumetaenexatsi. ⁵ Wajatuxanenē Jehová pijaliwaii xaniawaetsia yapētaeya-exanaena, bajaraponē pejumeyapētaenexa. Nexata, bajarapaliwaii jumecowēnētabiabiana, bejiobia-exanae-atatsi bajarapaliwaii yabara. Apo-ajamatabēcuenetaja tsane pejumecowēnētsinexa. Bajaraponēwecua aponajamatabēcuenepēnēyorotsi tsane itsajawabelia. ⁶ Ponē Jehová itorobiana pijajiwitonēcuenia saya tonajumacaewetsiana" pamonaē pejumaconitabiabiwitsi. Bajarapijinia pacuenia tonabēxēcaewetsiana pebēxēpinajonewitsi. Apowecuanamuxufetsi tsane pibisiacuenia pejumaitsiyawatsi, bajarapijinia pacuenia pitabarasuababiabijawatsi. ⁷ Bajaraponē Wajatuxanenē Jehová peyawenonaexaetsi, pewajēnaeyabelia ajamatabēsāē tsane jiwi bejiobia-exanae-atatsi. Pacuenia piniji-ibotoxaneto ba-apotixitabuatsi, bajarapacuenia bajaraponē ajamatabēcuenetajaya jumecowēnētsiana Jehová. Bajaraxuata, aponayapijiwi-aura tsane —jai Isafas Jehová pijajiwitonē yabara. ⁸⁻¹¹ [...]

Pacuenia Jehová pijajiwitonēcuenia pitorobinē bejiobia-exanaejitsiatsi

52 ¹⁻¹² [...] ¹³ Icatsia, Isafas jumaitsi Israel-pijinē pemomoxijawabelia Jehová pijajiwitonē yabara:

—Jehová raja jumaitsi wajanacato-itorobinēnexa pijajiwitonēcuenia yabara: Maraponēje pexanaecuene pexaniacuenia topitsapabiabianatsi.

Nexata, bajaraponë bitso ayaijamatabëcuenenëcuenia^v petaenëtsi tsane daxitajiwiwecua. Jiwinua wënëxaniatsianatsi pexanaecue yabara. Nexata, bajaraponë nacua-ewetsinëcuenia yaiyataenatsi daxitanacua pewetsiwiwecua.

¹⁴»Bajaraponë jiwi ayaibitsaëtso bitso itaxutuanabenajacaenatsi^w pae-patota taenatsi, tsipaji jiwitonë-itabaracue aponayapëtae tsane ayaicue-nia pitabarabijianaexaetsi pebejiobia-exanaejawatatsi. ¹⁵Bajarapacuenia itsanacuanëpijiwi apojudfowi jamatabëcuenenajunawiacaena,^x nacua-ewetsiwi-ata, tsipaji bajaraponë apojamatabëcuenëjəpae tsane pacuenia jiwi jamatabëcuenë-itsi. Bajarapamonae apoyapëtae tsane pacuenia jumezana-wiatsijitsia bajaraponëjawabelia, nexata jamatabëcuenenabenajacaya moya nubenaena bajaraponë pitabarata, yaiyataeya beweliamatabëcuenewi penataexae. Bajarapamonae jamatabëcuenenajunawiacaena paepatota itsa cuenetanetsi, tsipaji bajaraponë yapëtaeya-exanaena xua apopejumetae-capanepabiabijawanëmi, xua pewajënaeya itsamonae apopeyapëtaeya-exanabiabijawanë —jai Isafas pewajunupaebijawata.

53 ¹Orijibia, icatsia Isafas jumaitsi Jehová pijajiwitonëcuenia pitoro-binë yabara:

—¿Jipatsa panejumecowënëtsiana^y patatsipaebiliwaisi Dioso Pijajiwitonë yabara? ¿Detsa pamonaenatoyapëtaena Dioso pecapanepaejawatsi pijajiwitonë pecuenesaëta? Caejiwiyoheje saya tsane, tsipaji ayaibitsaëtso jume-aebiana. ²Jehová siwajamatabëcuenëbarëya tsane bajaraponë. Pacuenia jiwitonë siwajamatabëcuenëbarëya tsipae pexanianaejawayo pejuwixae pibisiapetsewinacuata, bajarapacuenia Jehová siwajamatabëcuenëbarëya tsane bajaraponë. Itsiata, bajaraponë aponacatsitapexanianë tsane. Apoxinae tsane wajacuene-itajitsipaenexa. Aponacatsitaxainae-ata tsane xua yabara itaxutuabarëyajitsiatsi waja-asiwanexa. ³Caranata, daxitajiwi bajaraponë naitaxutojematabiagianatsi.^z Bajarapacuenia apojitsipae tsane peyajawajawatsi,^a pibisiacue pexanaenëcuenia petaexae. Jiwi bajarapacuenia petaexaetsi, bajaraponë bejamatabëcuenëjiobi tsabiabi^b tsane. Bajaraponë natoyapëtaena penajamatabëxainacue pebejiobia-exanabiabijawatsi. Bajaraponë taeyabiagianatsi bewelianëcuenia, nexata jiwi wecuanapënëyorotabiabiana. Pecueene-ataejitsibixae, apotae tsane asiwaya. ⁴Bajaraponë jiwi bewelianëcuenia tae-atatsi tsane, itsiata bajaraponë, caenë, tsijumajopaenatsi^c daxitajiwi pebejiobia-exanaejawaminexatsi,

v 52:13 *bitso ayaijamatabëcuenenëcuenia*: Bajarapaliwaisi tajëwelia Jesucristo yabarajumaitsi. Taema Mt 28:18; Jn 3:31; 5:22-23; Efe. 1:20-23; Flp. 2:9-11; Apoc. 5:6-13.

w 52:14 *bitso itaxutuanabenajacaena*: Bajarapaliwaisi tajëwelia Jesucristo yabarajumaitsi. Taema Mt 26:27; 27:26-30; Lc 22:63-65; Jn 19:1-5; 1Pd 1:10-12.

x 52:15 *jamatabëcuenenajunawiacaena*: Bajarapaliwaisi tajëwelia Jesucristo yabarajumaitsi. Taema Mt 7:28; 22:22; Mc 5:42; 6:51; 7:37; Lc 2:47; 4:36; 5:26.

y 53:1 *¿Jipatsa panejumecowënëtsiana?*: Taema Jn 12:37-38; Rom. 10:16.

z 53:3 *naitaxutojematabiagianatsi*: Bajaraxua tajëwelia Jesucristo yabarajumaitsi. Taema Jn 1:10-11; Hch. 3:13.

a 53:3 *apojitsipae tsane peyajawajawa*: Bajaraxua tajëwelia Jesucristo yabarajumaitsi. Taema Mt 27:39-44; Mc 9:12; Lc 9:22. **b 53:3** *bejamatabëcuenëjiobi tsabiabi*: Bajaraxua tajëwelia Jesucristo yabarajumaitsi. Taema Mt 26:37-38; Heb. 5:7-8. **c 53:4** *tsijumajopaenatsi*: Daxita bajaraxua nacayapëtaeya-exana pacuenia Jesucristo nacawecua-ajibia-exana wajaneconimi wajaxainaejawa Diosojawabelia. Taema Mt 8:17; Gál. 3:13; Heb. 9:28; 1Pd 2:24.

peyanajamatabëxainaecueneminexa-ata pijaneconi. Jiwi itsiata bajarapacuenia petaejawata jamatabëcuene-itsi tsane bajaraponë yabara: «Jehováj-wabelia tsaena bajaraponë ayaicuenia naneconita, bajaraxuata nabejiobit-siaya tocopatatsi penaneconitsia-exanaenexatsi. Bajaraxuatanua, tocopatatsi petëpaenexa pijaneconi yabara», siwajamatabëjai tsane bajaraponë yabara. ⁵Bajarapacuenia nawëxaniabiaya jiwi siwajamatabë-itsi-ata tsane, itsiata bajaraponë pepacuene bitso nawixaetaeya-exanaenatsi^d jiwi pijapibisiája-matabëcuene yabara. Pinijicuenia bejiobia-exanaenatsinua jiwi pijaneconijamatabëcuene pibisiacuene pexanawanapaexae. Bajaraponë daxita bajarapacuenia tocopiapatsianatsi, jiwi juya pexaniacuena pejinawanapaenexa^e aneconijibia Jehová pitabarata. Baitsi, daxita jiwi penaneconitsijawaminexa tsijumajopaenatsi bajaraponë, bajarapacuenia jiwi pejamatabëcuenexanepa-naenexa DIOsojawabelia.

⁶»Daxitajiwi naxuabiaya bajinawanapa Jehováwecua. Pacuenia ovejamonae^f bawecuapona pewetsinëtsi naxuabiaya pejinawanapaenexa, bajarapacuenia jiwi itsi tsabiabi Jehováwecua. Pacuenianua oveja caenë canacujitsia natsata pona pejaitsinexa^g itsabelia jitsipa, bajarapacuenia jiwi ponabiaba Diosowecua penatojitsipaecuene pexanaenexa. Itsiata baitsi jane, Jehová bajarapaepatota daxitajiwi pijaneconimi bajaraponëjawabelia tsijumaxuabiana, mapanacuapijiwi pewecua-ajibia-exanaenexa pijapibisiájamatabëcuene. ⁷Bajaraponë bejiobia-exanae-atatsi tsane, itsiata bajaraponë bewelia-jamatabëcuenenëcuenia moya nucaena^h pebejiobia-exanaewitsi pitabarata; caejumeyo-ata apojumepitsi tsane bajarapamonaejawabelia. Pacuenia oveja moya banuca penaxunaewitsi pitabarata aëjainejewaw, pacuenia-ata moya najetaruca pecaponaejawatatsi itsa pataxunaewata beyaxuabijit-siatsi, bajarapacuenia itsi tsane bajaraponë. Moya nucaena cuacuajai-nejewaw pamona pebeyaxuabiwitsinexa pitabarata. ⁸Bajaraponë anaeya pewaetabucujinaetsi pebejiobia-exanaenexatsi, bajaraxuacujinae jane baja, beyaxuabianatsi itsaneconi natsixainaenejewaw, pibisiacuena petocanaëjëtsicujinaetsi petuxanewi pijaneconi.ⁱ Nexata, pebeyaxuabixaetsi, bajaraponë ajibi baja tsane pemomoxinexa. Paepatota pijaneconi tocanaëjëbatsi, bajara-paepatota itsajiwi-ata apoyapijiwicuaicuajai tsane. Bajaraponë beyaxuabianatsi daxitajiwi pijaneconijamatabëcuene peyabaratëpaenexa. ⁹Bajaraponë picani mëthëtsijitsiatsi penaneconitsiwi pemëthëtabiabitaxunaeta, itsiata petëpaejawata mëthëtsianatsi bitso pexainaewi penatsixaniawaetsimëthëta,^j tsipaji pibisiacuene apopeto-exanaenë^k tsane itsajiwiwajawabelia-ata. Bajarapacuenia apocuaicuajai tsane pibisialiwaesianë. ¹⁰Itsiata, pijaneconi

d 53:5 *nawixaetaeya-exanaenatsi*: Bajaraxua tajëwelia Jesucristo yabarajumaitsi. Taema Rom. 3:24-26; 1Co 15:3; 1Pd 3:18. **e 53:5** *pexaniacuena pejinawanapaenexa*: Bajaraxua tajëwelia Jesucristo yabarajumaitsi. Taema Lc 1:79; Jn 16:33; Hch. 10:36; Rom. 5:1; Efe. 2:14; Col. 1:20; Heb. 7:2; 1Pd 2:24. **f 53:6** *ovejamonae*: Taema «ovejaw», glosariojawata. **g 53:6** *bawecuapona pewetsinë ... natsata pona pejaitsinexa*: Taema Mt 18:12-14; Rom. 3:10-19; 1Pd 2:24. **h 53:7** *moya nucaena*: Bajaraxua tajëwelia Jesucristo yabarajumaitsi. Taema Mt 26:26; 27:12-14; 1Pd 2:23. Pacuenia oveja moya banucabiaba: Taema Hch. 8:32-33. **i 53:8** *pibisiacuena petocanaëjëtsicujinaetsi ... pijaneconi*: Bajaraxua tajëwelia Jesucristo yabarajumaitsi. Taema Mt 26:65-66. **j 53:9** *pexainaewi penatsixaniawaetsimëthëta*: Bajaraxua tajëwelia Jesucristo yabarajumaitsi. Taema Mt 27:57-60. **k 53:9** *pibisiacuene apopeto-exanaenë*: Bajaraxua tajëwelia Jesucristo yabarajumaitsi. Taema Jn 19:6; 2Co 5:21; Heb. 4:15; 7:26; 1Pd 2:22; 1 Jn 3:5.

apoxainae-ata, Jehovahá tocaējētatsi daxitajiwi pijaneconi yabara pesiwatē-paenexa penawixaetaecuenia. Daxitajiwi pijaneconi pesiwatēpaecujinae pemomoxi xainaenejewa-ata, itsiata bajaraponē taena ayaibitsaēto pijajiwi.^l Bajarapacuenia asaē tsaponaponae tsane. Jehovahá tajēwelia penatocaējētsijawami^m xaniawaetsia topitsapaenatsi bajaraponē pejamatabēcuene.

¹¹ Nexata, Jehovahá petaecujinae daxita penawixaetaeya-exanaejawatsi, bajaraPonē jamatabēcuenecaewiana daxitajiwi pijaneconi penaneconitsia-exanaejawaminexa. Bajarapa-aneconijibinē pejamatabēcuene ayaibitsaēto jiwi aneconijibia jinawanapaena,ⁿ tsipaji bajaraponējawabelia tsijumaxua-bianatsi bajarapamonae pijaneconimi^o pexainaejawami Jehovahájawabelia.

¹² Bajaraponē penacaewetsixae tsane jiwi pesiwatēpaenexa, jiwi taenatsi peyajawanajēpaenēcuenia pibisiacuene pexanaewi.^p Bajaraxuata, Jehovahá tocopatsianatsi peyajawa-ecaenexa ayaijamatabēcuenewituatujēta, peyai-yataenexatsi pinijisaē pexainanēcuenē pecuene-amoneyabinēxae, tsipaji bajaraponē aponatoyabaratēpae tsane pijaneconi. Biji rajane, bajaraponē natsijumaxuabiana daxitajiwi pijaneconimi peyapijiwitēpaenexa pibisiacuene pexanaewi, peyapijiwicuaicuaijainexanua^q baja DIOSOjawabelia —jai Isaías Israel-pijinē pemomoxijawabelia Jehovahá pijajiwitonē yabara.

l 53:10 *ayaibitsaēto pijajiwi*: Bajaraxua tajēwelia Jesucristo yabarajumaitsi. Taema Jn 12:24; Heb. 2:13. **m 53:10** *penatocaējētsijawami*: Bajaraxua tajēwelia Jesucristo yabarajumaitsi. Taema Hch. 2:22-24; Rom. 6:9; Apoc. 1:18. **n 53:11** *aneconijibia jinawanapaena*: Bajaraxua tajēwelia Jesucristo yabarajumaitsi. Taema Rom. 3:22-24; 5:18-19; 1Co 6:11. **o 53:11** *tsijumaxuabianatsi bajarapamonae pijaneconi*: Bajaraxua tajēwelia Jesucristo yabarajumaitsi. Taema Mt 20:28; Heb. 9:28. **p 53:12** *peyajawanajēpaenēcuenia pibisiacuene pexanaewi*: Bajaraxua tajēwelia Jesucristo yabarajumaitsi. Taema Mc 15:28; Lc 22:37; 23:32-33. **q 53:12** *peyapijiwicuaicuaijainexanua*: Bajaraxua tajēwelia Jesucristo yabarajumaitsi. Taema Lc 23:24; Rom. 8:34; Heb. 7:25; 9:24; 1 Jn 2:1.

Jeremías

Pacuenia Jerusalén tomarapijiwi pijawajabitsaëwi matatoyorotsia nubenaëjitsia

6 ¹Xua Jehová jumaitsi, bajaraxua Jeremías juya jumewajunupaeba Judá nacuata pejinawanapaewijawabelia:

—Pitoyawitsi tsi-itorobianajë Jerusalén tomarapijiwijawabelia. Nexata, paxamë Benjamín papemomoximë, panejinawanapaewi Judá nacuata,^a xania baja tsane. ¡Pajaire pewajënae pacuenia papanepaejitsiamë tananeconitsia-exanaematacabitanexa Jerusalén tomarapijiwi! Nexata, pawecuarëcëpecaename bajarapatomara. Tecoa tomarata^b panejinawanapaewi panayapijiwi-obianame trompetajawa, Judá nacuapijiwi perëcëpecaenexa pijawajabitsaëwiwecua. Bajarapijinia pacuenia Bet-haquerem-jawata^c panejinawanapaewi petsëxëxaneto patsita-exanaename, jiwi peyapëtaenexa pijawajabitsaëwi petsimaxëpatsijawanexatsi, tsipaji pijawajabitsaëwi tsimaxënjatarubenatsi nortenia^d payenepanajawawerena, bitso pibisiacuenia pewerebiabinexatsi.

²»Bajarapacuenia pa-exanaename, tsipaji Jehová raja jumaitsi: «Jerusalén, Sión-tsutota pe-ecaetomara, werebiabijitsianë bitso bepexaniawa taxënatoyocuenia asiwaya tataeyabiabitomarami. Bajarapacuenia taeyabiabi-atanë bajarapatomara, itsiata pijawajabitsaëwi tatsicopatsixae werebiabia-exanajë. ³Nexata, pacuenia oveja pewetsinë exananutabiaba pijacarpabo petusatonacuatalia, jamatejema pija-ovejabitsaëto pona pexaewanapaenexa matatoyorotsia, bajarapacuenia Jerusalén-pijiwi pijawajabitsaëwi petuxanewi exananubiana pijacarpabonë Jerusalén matatoyorotsia. Pacuenia oveja jamatejema xaeponapona carpabo matatoyorotsia pewetsinëtsi petocopatsiponajawatsi, bajarapacuenia Jerusalén tomarapijiwi pematatoyorotsianubenaewitsi pijawajabitsaëwi wecuanotaponaenatsi daxitaxuanë xaina tomara matatoyorotsia, pacuenia wabajabitsaëwi penamatacaitorobiwi tocopatatsi pexanaenexa. ⁴Nexata, Jerusalén tomarapijiwi

a 6:1 *panejinawanapaewi Judá nacuata*: Benjamín pemomoxibitsaëto bitso tsiquiribitsaëtoyo itsaIsrael-pijinë pemomoxibitsaëtowecua. Nexata, Benjamín pemomoxi pita itsa-irayo Judá pemomoxi pija-iramatatuyabetsia matatsënënenia. Taema Josué 18:11. Nexata, xuata Benjamín pemomoxi, Judá pemomoxi yajawa becaenacuata jinawanapa. b 6:1 *Tecoa tomarata*: Tecoa tomara eca bejamatabë 20 pakilómetrobeje Jerusalén tomaracujinaereca. Bajarapatomarajawata naexana baja Diosojumepaëbinë Amós. Taema Amós 1:1. c 6:1 *Bet-haquerem-jawata*: Bajarapataxunae eca Jerusalén tomara, Tecoa tomarabejetuatuajëta. Nexata itsa tsita-exanaejitsia petsëxëxaneto bajarajota, nexata Tecoa tomarata pejinawanapaewi yapëtaejitsia petsimaxëpatsijawanexatsi pijawajabitsaëwi matatsënënenia payenepanajawawerena, Jerusalén tomarawerena. d 6:1 *nortenia*: Matasënënenia Vichadapijiwinexa.

pijawajabitsaēwi najumaitsi tsane pejamatabēcuenenabarēyanexa: 'Nacuenexaniaawaetsianatsi wajabarēnabenexa bajarapatomarapijiwajawabelia. ¡Naxatsia! Barēnabenatsi matonejewa-ata,' najai tsane.

»Bajarapaepatota, najumaitsi tsane: '¡Jaipe! Bitso baja nacayacaniwiyo-banajetaruca ajenaconoxae. ⁵ Itsiata baitsi jane, barēnabenatsi merawi-ata. Bajarapacuenia bijianaenatsinua bajarapamonae pijapiapiabonē, pabonējawata nayapijiwitaeyabiaba pijawajabitsaēwiwecua,' najai tsane», jai Jehová.

⁶»Nexata, Jehová daxitawecua piacuenesaēnē jamatabēcueneyaweno-naeya jumaitsi tsane Jerusalén-pijiwi pijawajabitsaēwijawabelia: «Xanē raja tocaējētājē Jerusalén tomarapijiwi tananeconitsia-exanaenexa, tsipaji raja bajarapatomarapijiwi bitso ayaicuenia namata-enetsia nabejiobia-exanapona. Bajaraxuata, panicatsianame naejawanē, bajaraxuanēta pane-natsinacuenebinexa benamutocuenia panejunaenexatsia, bajarapatomara peyacaranatanutsi-ibopanayenepanajawatsia panejunaenexa. Bajarapacuenia nexata pacatoyapēxanepanaena panejonenexalia pijatomara-ēnēabelia daxita bajarapamonae panewerebiabinexa penaneconitsixae xanējawabere-rena, ⁷ tsipaji bajarapaJerusalén tomarapijiwi bitso capitsapapona daxitacuenie pibisiacuenie pexanaejawanexa. Pacuenia meramēthē bacapitsapeca daxitamatacabi, bajarapacuenia bajarapatomarajawata ēpepopibisiacuenie pexanawanapaejawa wēnēliwaisipitsapabiaba, penacobetoxotsicuenie-ata. Bajarapamonaetuatuajētanua taeyabiabajā saya jiwi namata-enetsia penawājēnērubiabijawa penabejawata», jai tsane Jehová Jerusalén tomarapijiwi pijawajabitsaēwijawabelia.

⁸»Orijibia, Jehová pacajumaitsi juya paxamē paJerusalén-tomarapijiwimē: «¡Wecae apopacatocopiapatsi abaxē patacananeconitsia-exanaejawaminexa, panacuenexanere tajitsipaecuenie pataneto-exanawanapaenexamē! Bajarapacuenia itsa apopanacuenexanetsimē tsane, nexata pacawecuanatsatsianatsi patacayawenonaeyaniwa. Nexata, panijatomara pacatonacopatsiana jiwinejewa petusatonacuacuenia», pacajai Jehová paJerusalén-pijiwimē.

⁹»Orijibia, padaxitamē Judá nacuata panejinawanapaewi Jehová daxitawecua bitso piacuenesaēnē nejumaitsi paxamē yabara: «Paxamē pa-israelitawimē panijawajabitsaēwi pacataicaena padaxitamē. Pacuenia uvacuai penotsinē xaniawaetsia jaita daxita maxēranaxijawa penacopabiya-niwa caecuaito-ata, bajarapijinia pacuenia pacajaitsiana paxamē panenacopabiwi, papecataicaenexa panenacopatsiyaniwa caejiwiyo-ata mapanacuataje», nejai raja Jehová —jai Jeremías Judá nacuapijiwajawabelia.

¹⁰ Icatsia, Jeremías jumaitsi:

—Bajarapacuenia Jehová tanejumaitsixae, xanē Jeremíasnē jumecanawiatājē mapacueniaje: «¿Denexata pamonaejawabelia tsipaebijitsipajā bajarapaliwaisi? ¿Depamonae nenamuxuna-ewetsipa tamuxujiobiiliwaisi? Bajarapamonae aponamuxuna-ewetsi tsane, pejumetaenexa mapitsiliwaisi tatsipaebijawataje. Jehová, bajarapamonae pijapibisiacuenie pexanawanapaejawami muxuxatatatsi, nejumeliwaisi pejumetaeyaniwa. Nexata, bajarapamonae apocuenecaējēpaetsi pejumetaecapanepaejawa nejumeliwaisi. Amuxujitsibi tsabiabi, apopetsitaxanepanaexaetsi bajarapaliwaisi.

¹¹ Jehová, nebara-anaepanaecuenie xanē-ata netsijamatabēcuenewēnēca

mapapibisiacuene pexanawanapaewijawabeliaje. Aponecuenecaējēpae baja bajaraxua», janē xanē Jehovájawabelia. Nexata, xanē-ata Jehová nejumaitsi: «¡Bajarapabara-anaepanaejamatabēcuenene wajaxainaejawabeje to-itajēre nejumaitsijawata pejewaxijawabelia, callejawa penamuxusiti-siwi, pewējēawijawabelia caejamatabēcuenene pexainaewi, bajarapacuenia bitso perujujiwijawabelia-ata, bajarapacuenia peyapētaenexa petaicaejawanexatsi pijawajabitsaē! ¹² Nexata, bajarapacuenia bajarapamonae pija-bonēmi, pijapabianēmi-ata, pijawaximi-ata canacopatsiana itsamonae, pewecuanaxainaeyabinexatsi pijawajabitsaēwi. Bajarapacuenia pijawajabit-saēwi to-exanaenatsi bajarapamonae. Bajarapacueneta najamatabēcuenene-itajētsianajē bajarapamonaejawabelia tananeconitsia-exanaecuenene. Xanē Jehovánē bajaraxua xaniajanē tsane tato-exanaenexa.

¹³ »Bajarapacuenia to-exanaenajē, tsipaji daxita bajarapamonae, beweliamatabēcuenewijawaweliacujinae, ayaijamatabēcuenewijawabelia-ata, jitsipabiaba pepitaponaenexa itsamonae pecobecowē yamaxē-itojorobiaya. Bajarapijinia daxita profetawi, sacerdotewi-ata nanaexana peyamaxē-itojorobiwi. ¹⁴ ¡Pataema! Bajarapamonae, tajajiwi, itsamonae pijaneconi natsiquejemacuenia totaeyabiaba, ayaineconi natsixainae-ata. Nexata saya, natsiquejemacuenia muxujiobabiaba. Najumetsēnētsiaya jumaitsi tsabiabi: ‘Liwaitsi aponatsixainaetsi tsane. Daxitacuene saya xanepanaena. Jama-tejematsi tsane,’ jai tsabiabi, itsa caranata, paepatota pewajēnaeyabelia bitso ayai tsanajetarucae. ¹⁵ Picani bajarapamonae bajarapejumaitsijawa benayabara-aura tsabiabi. Itsiata baitsi jane, daxita bajarapamonae aponatotapētae piaurajamatabēcuenene, bitso apotajitsipaecuenene pexanaejamatabēcuenene. Bajaraxuata, xanē pamatacabi naneconitsia-exanaenajē bajarapamonae, yajawananeconitsia-exanaenajē itsamonae xanējawaberena penaneconitawanapaewi. Xanē Jehovánē maxua jumaitsinēje», nejai Jehová —jai Jeremías pewajunupaebijawata Judá nacuapijiwijawabelia. ¹⁶⁻³⁰ [...]

**Dioso yapētaeya-exana Jeremías-jawabelia jiwi
pijapibisiajamatabēcuenene yabara**

17 ¹⁻⁴ [...] ⁵ Icatsia, Jeremías jumaitsi Judá nacuapijiwijawabelia: —Jehová raja jumaitsi mapacueniaje: «Pajiwi xanē Diosonēwecua siwanajamatabēcuenecopata pewēnajiwiwijawabelia, jaitanua peyawenonaenexatsi penamatawenonaecuenene, tonajumecopatajē bitso pibisiacuene petaenexa. ⁶ Pacuenia tsaquenapona petsewinacuata pe-ecaenaemēyo, apopexainaepewawenonaecuenetsi, bajarapijinia pacuenia itsi tsane xanēwecua pajiwi siwanajamatabēcuenecopata pewēnajiwiwijawabelia. Apoxainae tsane tayawenonaecuenene. Nexata, bejiobicueneta ponaponaena.

⁷ »Itsiata baitsi jane, pajiwiyo nesiwanajamatabēcuenecopata xanē Jehovánējawaberena, bajarapajiwiyo pexaniacuene bitso taeyabiabiana, tanejamatabēcuenene-ewetaponaponaexae tayawenonaenexa. ⁸ Pacuenia mene-itapata penucaenae, ema aporunae-ata, baxunaxaniaba petsewimatacabita, bēpēnēayareca petabunepe pexainaexae, apocuaiwerewerecaenua. Bajarapijinia pacuenia tane-itaxutuajamatejemajiwi, aponasiwajamatabēcuenebējai tsane, pibisiacuene tocopiapatsi-atatsi, pejamatabē-ēthētojawawetsina tanesiwanajamatabēcuenecopabixae

Jehovánějawaberena. Nexata, capitsapabiabiana tajitsipaecuenejawanë, jiwi bejiobia-exanae-atatsi.

⁹»¡Maxuaje xaniawaetsia panayajiwitaema! Bitso jiwi pejamatabëcuene yamaxë-itojorobatsi,^e pibisiacuene pexanaenexa, itsa peyamaxë-itojorobijawanëwecua. Bajarapajamatabëcuene cajena bitso abeje. ¿Jipatsa nexata cuenecaējēpatsi xaniawaetsia jiwi pejamatabëcuene canaējētsinexa? ¹⁰Xanë raja, caenënë Jehovánë, jiwi tajamatabëcuenejaitsinë, tajamatabëcueneyapëtaenexa xua jiwi bēpēnëa najamatabëxaina. Nexata, pexanaecujinae penajamatabëxainaecuenia, xanë juya to-exanaenajë pexaniacuene, itsa jume, naneconitsia-exanaenajë pijaneconijamatabëcuene», jai raja Jehová —jai Jeremías Judá nacuapijiw jawabelia. ¹¹⁻²⁷ [...]

**Jeremías xuabareca atsawaxiyo irabereca
petoxotajarabinexa jiwi pitabarata**

19 ¹Icatsia, Jeremías jumaitsi Judá nacuapijiw jawabelia:

—Jehová raja nejumaitsi: «Ponaename waxi pefaratsinējawabelia necomuatsinexa atsatota pexanaecanalitoyo. Nexata, necomuatsicujinae junatsianame itsamonae pewetsiwi ancianowicuenia, bajarapacuenia itsamonae sacerdotewi, pewetsiwi ancianowicuenia, nebarēponaenexa.

²Nexata, bajarapamonae barēponaename Hinom pexēnato pija-irajawabelia, petsutobejetuatuajëta pa-iraboca ajena tomara pitsapareca, peyacaranatsi-ibopana baupajawawetsina.^f Bajarajota, wajunupaebianame tacatsipaebili-waisi nebarēponaewi pejumetaenexa.

³»Jumaitsimë tsane Judá nacua pepopeyanacua-ewetsiwi jawabelia, Jerusalén tomarapijiw jawabelia-ata mapacueniaje: 'Marapaliwaisi pacatonajumecopata Jehová, ponë daxitawecua piacuenesaenë tsaponaponae.' ¡Pajumetaema paxamë, Israel papemomoximë! PanijaDIOSO pacajumait-sije: «Tsi-itorobianajë mapatomarajawaberenaje bitso piayaicuenejawa, pinijicuenia pibisiacuene panetaenexa. Bajarapapiayaicuene yabara itsa wënëliwaisitaena, itsamonaenexa bitso tsimuxu-atanetsi tsane, bitso petsi-tapibisiali waisixaetsi. ⁴Bajarapacuenia exanaenajë, tsipaji mapa-israelitawi nenacofënëtsiaya newecujinawanapa. Mapa-iranua, tajanacuacuenia tatae-jawami, bajarapamonae neto-exana apobetaja-iracuenia, tsipaji tajuitabiaba incien sonanipërë apo peyapëtaediosowijawabelia xanëwecua. Bajarapamonae, Judá nacuapijiwi, apowënëtae picani bajarapadiosowi. Pepopeyanacua-ewetsiwi mitsi, pijasalinaiwimi-ata, apowënëtae bajarapajumapecataeya pexanaenëanë. Orijibia, bajarapamonae ayaibitsaëto pejewaxijiwixi bepona aneconi jibi-ata, petajuitsinexa saya altar-jawaba. Bajaraxuata, netsita bepe-wënëtsijawa pejana pija-ira bajarapapejewaxi pejanajamatabëcuene, ⁵tsipaji bajarapamonae natonacuenebanuba itsa-altar-jawanë, Baal-wënë jumapecataenë pewënëta. Nexata, bajaraxuanëjumata totajuitabiaba pexënatonëxi,

e 17:9 yamaxë-itojorobatsi: Wajajamatabëcuenejawata itsa siwacanaējētatsi xua exanaeji tsatsi, yapëtae-atatsi picani apowaja-exanaejawanexa, wajajamatabëcuene itsiata nacataeya-exana bepe xaniacuene. Nexata, exanatsi bējainejewatsi wajaneconi yabara. **f 19:2 peyacaranatsi-ibopana baupajawawetsina:** Itsajawata mapabaupaje wënëruba «Petoxotsi waxi pemuxupaxi pija-baupa». Bajarapacuenia wënëruba tsana, tsipaji bajarajota, imoxoyo jawata, waxi pefaratsijiwi penetabiaba petotoxotsi waxianë pijimuxupaxi.

pexēnatowaxi-ata Baal-jawabelia. Bajaraxua xanē rowialia itawetajē picani⁸ bajarapamonae pexanaeyaniwa. Baitsi, caeto-ata bajarapitsicuene apo-itorobinē. Pepacuene aponajamatabēxainaenēnua jiwi ta-exanaeya-exanaenexa bajarapacuenia. ⁶Bajarapitsicuene pexanawanapaexae mapa-irata pebocaefoto imoxoyo baja tawēnē-itothianaenexa. Nexata, jiwi apowē-nējone tsane Tofet-wēnē,^h itsa jume, Hinom pexēnato pija-irawēnē-ata. Saya wēnērubiana 'Jiwi Pebeyejebitaxunae', pejaiwēnē. Xanē Jehovānē xaniajanē bajarapacuenia tawēnē-itothianaenexa, bajarapamonae petajuitabiabixae pexi Baal-jawabelia.

⁷»Daxita xua najamatabēxaina Judá nacuapijiwi, Jerusalén tomarapijiwi-ata, xaniawaetsia pena-ewetsinexa pijawajabitsaēwiwecua, xanē liwaisi amatononobia-exanaenajē, tsipaji tocaējētajē pamonae ayaicuenia pitoyawitsi pebeyejebaponaenexatsi. Nexata, pebeyejebaponaewawatatsi nacayajatsiabobenaena petēpaewi, bajarapamonae petēpaewi pexaenexatsi unupijiwi, pepunaewi-ata.

⁸»Copsiansanjē mapatomarami jiwinejewa penacopsinsinexa. Bajaraxuayo jiwi itsa ponabiabiana, petaejawata ayaicuenia jamatabēcuenenabenajacabiabiana bajarapatomara pewerebiabijawatsi yabara. ⁹Tocopsiansanjē bajarapatomarapijiwi, pijapexaejawa petowerewerecaexaetsi, pexēnatonēxi, pexēnatowaxi-ata penacoxiaenexa, bajarapacuenia namata-enetsia itsamonae penaxaewanapaenexa janibomatacabi pijawajabitsaēwi pejamatabēcuenia, bajayajebi matatoyorotsia peyacajinawanapaexaetsi», pacajai Jehová panijaDIO, —jamē tsane bajarajotareca.

¹⁰Orijibia Jehová nejumlahtsi:

—Bajarapacuenia nejumlahtsicujinae, necomuatsicanalito tsitatotajarianame pecayajawaponaewi pitabarata. Bajarapacuenia nexanaecujinae, ¹¹jumaitsimē tsane: Mapacuenia pacajumaitsije Jehová, ponē daxitawecua piacuenesaenē tsaponaponae: «Ayaicuenia werebiabianajē mapatomaraje. Pacuenia petoxotoxocaecanalito acuenebi caewēarena pemuxupaxi wajacatsanaenexa daxita canalitocuenia penacopsinsinexa icatsia, bajarapacuenia exanaenajē Jerusalén tomarajawabelia, bajarapatomarapijiwijawabelia-ata. Ayaibitsaēto bajarapatomarapijiwimi pijawajabitsaēwi pebeyejebixaetsi, to-ajibi tsanetsi itsajota mēthēcaejijsiatsi petēpaewi. Belia, Tofet-jawata namēthēcaponae peyacaējēpaenexatsi daxita, tsipaji baja ajibi tsane pematatsēnē itsajota namēthēcaejijsia. ¹²Bajarapacuenia exanaenajē bajarapatomarajawabelia, bajarapatomarapijiwijawabelia-ata, pijatomarami penacopsinsinexa bejiwi pemēthēcaetaxunae jiwi petaenexa. Baitsi, pacuenia jiwi itajunawabiaba Tofet-wēnē fotojawa peponaeyaniwa petēpaewi pemēthēcaetaxunaexae, bepenaxuirabiwicuenia petaeyaniwatsi, bajarapacuenia jiwi itajunawiana bajarapaJerusalén tomara. Xanē Jehovānē xaniajanē bajarapacuenia ta-exanaejawanexa, pexi petajuitabiabixae Baal-jawabelia. ¹³Pacuenia jiwi itajunawabiaba Tofet-jawa peponaeyaniwa, bajarapijinia pacuenia itajunawiana pejoneyaniwa daxita Jerusalén-pijiwi pijabonēmijawa, bajarapacuenia pepopeyanacua-ewetsijiwi pijapexania-bonēmijawa. Pabonēmi-ata pematatunamatajēpaebomita bajarapamonae

tajuitabiaba inciensonanipērē tulupujawabelia picani, itsawetsica pexania-jamatabēcuenē rajutsiaya epanabiabanua vinoranē itsadiosowijawabelia xanēwecua, bajarapabonēmi-ata itajunawiana. Daxita saya bepenaxuirabia-exanaejawanēnexa taena pacuenia Tofet-wēnē foto», jai raja Jehová paxamē yabara —jai Jeremías Judá nacuapijiwijawabelia.

¹⁴Daxita bajarapacuenia pexanaecujinae pebarēponaewi pitabēta, nexata Jeremías nawiatsina Tofet-wetsina, pepatsinexatsina templobojawabetsia, itsajota Jehová itorobatsi pepaebinexa daxitajiwijawabelia petoxotsicanalito peliwaissi, pamonaē patapona templobopanabota.

¹⁵Jumaitsi:

—Marapacuenia Jehová jumaitsiye, ponē daxitawecua piacuenesaēnē tsaponaponaē, Israel-pijinē pemomoxi pijaDIOso, mapatomara yabara-
raje: «Tsi-itorobianajē daxita baja tatocaējētsicuenia tananeconitsia-exanaejawanēnexa bajarapatomarajawabelia, bajarapatomarapiji-wijawabelianua, tsipaji bajarapamonae bitso ajamatabēcuenetaja pejumecowēnētsiyaniwa tatonajumecopatsiliwaissi», jai raja Jehová paxamē yabara —jai Jeremías templobota penubenaewijawabelia.

Jeremías wajunupaeba Pasur-jawabelia xua taejitsia Dioso pejume-aebixae

20 ¹Pamatacabi ponapona Pasur, Imer pexēnato, bajaraponē sacerdotewi penamatacaitorobaponaponaenē templobojawata. Nexata, bajaraponē itsa jumetane Jeremías petsipaebiliwaissi Jehová pewēnēta, xua copiapatsijitsia Judá nacuapijiwijawabelia, ²nexata bajaraponē piamuxujitsibixae Jeremías pepaebiliwaissi, itoroba pijajiwi naneconitsia-exanaeya pejumaconitsinexa pejumaconitabiabimaētota. Itorobanua bajarapapejumaconitsicujinae pecobexatatsinexatsi, petaxuxatatatsinexatsinua penaitabarataeya-exanaetablapabeje tusatualia cepowēnējawata.⁴ Bajarapacepo boca imoxoyo templobojawata, tomara matatoyorotsia peyacaranatanutsijawata Benjamín-wēnē baupajawata. ³Nexata, caematacabicujinae bajaraponē icatsia itoroba pijajiwi pewecujonenexatsi Jeremías.

Nexata, Jeremías jumaitsi bajaraponējawabelia:

—Jehová raja cawēnē-ithothiana¹ Pasur-wēnēwecua, juya pecawēnērubinexa Magor-misabib, pejaiwēnē, ⁴tsipaji Jehová jumaitsi xamē yabara: «Xamē catocopatsianatsi bitso nenacujunawinexa nijacuata, bajarapacuenia nejunawiaya-exanaenēnexa daxita niasiwawi pecayapētaewi-ata. Nexata, daxita niasiwawi catotēpaena nitabarata, nijawajabitsaēwi pecatobecueniatsi. Bajarapacuenia tocopatsianajē daxita Judá nacuapijiwi Babilonia nacua pewetsinē pijawajabitsaēwi pecobeyabelia, bajarapamonae pecaponaenexatsi petaicaewitsicuenia Babilonia nacujawabelia, itsa jume pijinia, pebeyejebinexatsi pija-espadanēta. ⁵Bajarapacuenianua tocopatsianajē pewecuanotsinexatsi bajarapamonae daxitaxuanē Judá nacuapijiwi pexinaejawanēmi bajarapatomarajawata, daxitaxuanē penaxainaeyabijawanēmi,

i 20:2 *Cepowēnējawa*: Taema «cepo», glosariojawata. j 20:3 *cawēnē-ithothiana*: Hebreojumeta Pasur-wēnē mapejumaitsi jamatabēcuenēje xaina: «Pewecuacapanepaenē», itsa jume, «pewecua-isinaenē», pejaiwēnē. Bajarapacuenia Magor-misabib pejumaitsiwēnē: «Bitso pecujunawicuenē yacaejēpa daxitajawa», pejaiwēnē.

daxitaxuanë-ata penamataamotsijawanë pexainaejawanë, bajarapacuenia daxitaxuanëmi xaina Judá nacua pepopeyanacua-ewetsimonae penamataamotsijawanë. Daxita bajaraxuanë Babilonia pewetsinë pijawajabitsaëwi caponaena Babilonia nacujawabelia. ⁶ Bajarapacuenia xamë, Pasur, cacaponaena mapa-irawecuaje daxita nijamonae yajawa Babilonia nacujawabelia. Nexata, bajarajotalia xamë tēpaename. Camēthētsiananua. Bajarapacuenia daxita pamona-ata pecajumecowēnētsiwi netsipaebiliwaisi najumetsēnētsiaya pijaneconi penasiwabējaiyaniwa, bajarapijinia pacuenia bajarapamonae-ata tēpaena. Mēthēcaenatsinua Babilonia nacuata», jai Jehová xamë yabara —jai Jeremías Pasur-jawabelia. ⁷⁻¹⁸ [...]

Ezequiel

Jehová tonajumecopatatsi Tiro tomara pewetsinē
pewecua-ajibia-exanaenexatsi pewetsicuenemi

28 ¹⁻¹⁰ [...] ¹¹ Ezequiel jumaitsi:
—Jehová nitoroba tatsipaebaponaenexa mapaliwaisicueniaje
Tiro tomara pewetsinē yabara.

¹² Nejumaitsi: «Daxitajiwiwajuwēnēnēmē, najamatabēxainae-
naename Tiro tomara pepopeyanacua-ewetsinē petēpaewi petonaxēanae-
waji pemēthējawabelia pecaponaewi», nejai Jehová.

¡Orijiibia, jumaitsimēre bajaraponējawabelia: «Cajumaitsi raja Jehová:
‘Xamē bitso daxitawecua neyapētaenē daxitacuene. Bajarapacuenia bitso
pexanianēmēnua. ¹³ Xamē ponaponame tajapabita, Edén nacuata pebocae-
pabi. Nenaxatatabijawata, naitabētsiaya rubabiabame daxitawiria ibo-
toxi, bitso penamatamotsi-ibotonē; mapawiria-ibotoxije: rubí, crisólito, jade,
topacio, cornalina, jaspe, zafiro, granate, esmeralda-ata. Bajarapa-ibotonē
nerubinexa nenaxatatsijawanējawabelia, oropanayojawabelia catsanaru-
babiabame. Bajaraxuanē catsiwajēnaexaniawaetatsi tacarajutsinexa xanē
taca-exanaematacabi.

¹⁴ »Xamē picani taca-itapetsiquerubinenē newetsinēnexa. Nexata, xamē
neponaponaenēmi xanēDIOSonē tajatsutojumata. Neponaponaenēminua
tuluputuatuajēta.

¹⁵ »Taca-exanaematacabijawaweliacujinae aneonijibia xaniawaet-
sia picani ponaponabiabame. Itsiata, jemata epatua najamatabēxainame
itsacuenia pibisiacuene nexanaenexa. ¹⁶ Bitso nexainanē nenaexanae-
xae nenawijatsicuenia, nexata najamatabēcuenebijianame pibisiacuene
ne-exanaejawabelia. Nexata, xanēwecua canawecuacapitsapatsi. Nexata,
tajatsutojumawetsica canawecuaxuabicsi. Bajarapacuenia tuluputuatua-
jēta neponaponaejawami cawecuajutatsi. ¹⁷ Ca-exanatsi pexanianēmēcuenia,
ayaijamatabēcuenenēmēnua. Pexanianēxaemē najamatabēcuenebijianame.
Ayaijamatabēcuenenēmē taca-exanaejawami matatoxenetsia ayaijama-
tabēcuenenēmē bitso jamatabēnaexaname. Nexata, caxuabatsi irabereca
beweliamatabēcuenenēcuenia pecataenexa. Nexata, nacuanē pewet-
siwi cataena apotanejamatabēcuenematatoxenetsijawamē, ‘cajai Jehová»,
jamēre! —jai profeta Ezequiel Tiro tomara pewetsinē yabara. ¹⁸⁻²⁶ [...]

Xua tsicarucatsi peyajiwiwitaenucanē, pijajiwi pecapanepaenexa

33 ¹ Jehová nejumaitsi xanējawaberena mapacueniaje: ² «Eze-
quiel, xamē jiwiwajuwēnēnēmē, ponaename Xanē tawēnēta,

netsipaebinexa tacayapëtaeya-exanaeliwaisi nijamonaewijawabelia. Jumait-simë tsane: 'Jehová raja nejumatisi mapacueniaje': Pacujinae Xanë tocopatajê itsanacuapijiwi pijawajabitsaë petsimaxëponaenexatsi, itsawënëtane petsimaxëpatsijawanexatsi, bajarapanacuapijiwi nato-itapetabiaba peyaji-witaenucaenënexatsi. ³Nexata bajarapayajiwiwitaenucaenë itsa tane pijawajabitsaë imoxoyo petsimaxënajetarubenaewajatsi, pijatrompeta be-obaxuaba, peyapëtaeya-exanaenexa pijanacuapijiwi. ⁴Pajiwi jumetae-ata trompeta penajumetsijawa, itsiata itsa namuxujemata, nexata pijawajabitsaë itsa beyaxuabatsi espadata, pijacuata nacopata penabeyaxuabia-exanaenexa. ⁵Jumetane picani pe-obijawa trompeta, itsiata penamuxujematsixae, pijacuata nacopata penabeyaxuabia-exanaenexa. Itsiata, itsa jumecowënëtsipa, wecuapanepaejitsipa pebeyaxuabijawatsi. ⁶Itsiata bailsi jane, peyajiwi-taenucaenëtsi itsa apo-obi tsipae pijatrompeta, peyapëtaeya-exanaenexa pijanacuapijiwi, tae-ata pijawajabitsaë petsimaxënajetarubenaewajatsi, nexata pijanacuapijiwi pijawajabitsaë itsa beyejebatsi espadata, bajaraponë naneconitsipa pijanacuapijiwijawabelia, petëpaejawa yabara», jamë tsane nijamonaewawabelia.

⁷»Xamë, jiwiyajuwënënëmë, cayapëtaeya-exanatsi mapacueniaje: 'Xanë canutatsi israelitawi neyajiwiwitaenucaenënexa. Nexata, tacayapëtaeya-exanaecujinae paliwaisi jitsipajê nepaebijawa, caecuenia bepaebame bajarapamonaewawabelia, penacuenexanetsinexa, tananeconitsia-exanaewajënaeya tacayapëtaeya-exanaecuenia. ⁸Nexata, itsa ca-itorobatsi neyapëtaeya-exanaenexa pibisiacune pexanaewijawabelia, rowialia tsi-paebianame tatocaëjësijawa petëpaejawanexa pijaneconijamatabëcuene. Itsiata, itsa apoyapëtaeya-exanaemë tsipae bajarapajiwiwijawabelia, penajamatabëcuenepënëyorotsinexa pibisiacune pexanaewawawecua, pijaneconijamatabëcuene itsa yajawatëpaejitsipa, nexata xamë naneconitsipame xanëjawaberena, bajarapajiwi petëpaejamatabëcuene. ⁹Itsiata bailsi jane, yapëtaeya-exanae-atamë petëpaejawanexa, itsa aponacuenexanetsi tsipae pecanamuxujematsixae, nexata xanëjawaberena aponaneconitsimë tsipae, bajarapajiwi petëpaejamatabëcuene'», nejai Jehová. ¹⁰⁻³³ [...]

Daniel

Pacuenia Daniel-bana jinawanapa Babilonia tomarata

1 ¹Joacim itsa baja xainaponapona acueyabi pawai-beje peyanacua-ewetsicujinaerena Judá nacuata, bajarapawaita Nabucodonosor, Babilonia pepopeyanacua-ewetsinē, tsimaxēpatajopa pijajiwi wajabitsaēwi yajawa Jerusalén-jawaberena, patomarata ponapona Joacim. Nexata, Nabucodonosor pijajiwi wajabitsaē matatoyorotsia yacajinawanapa, bajarapato-marapijiwimi pecopatsijawabelia penayajiwinawajabitsaētaponaejawa, juya penacaewetsinexa pijawajabitsaē pecobeyabelia. ²Dioso Pepopetuxanenē daxitawecua tocopata Nabucodonosor pecobeyabelia, Joacim pebarēcuene amoneyabinexatsi, Judá nacuapijiwi pepopeyanacua-ewetsinēmi. Bajarapacuenia-ata tocopata penotsinexa Dioso pijatemplobota pexainae-yajuwēñejawanēmi, bitso penamatamotsijawanēmi. Nexata, Nabucodonosor pijajiwi wajabitsaē penawiabijawata, bajaraxuanēmi capona Babilonia^a nacujawabelia. Caponanua jiwi ayaibitsaēto petaiacawē. Nexata, xuanē capona, Dioso pijatemplobopijijawanēmi, pecapatsicujinae Babilonia tomarajawabelia, Nabucodonosor xaniawaetsia-exana pijadiosowi pewēñēta, pabo-ēñēta asiwaya nawajēcabiaba bajarapajumapecataenēanējawabelia, pataxunaeta xaniawaetabiaba penamatamotsijawanē. ³Bajaraxuacujinae, Nabucodonosor itoroba pijajiwitonē, Aspenaz, ponē pepopenamatacaitorobinē penacuenebiwi peyanacua-ewetsibojawata, peto-itapetsinexatsi pamonaē Judá nacuata petaiacawimiyajuwēñēwi itsamonae pewējēawē, peto-nacuenebiwinexatsi nacua pewetsiwicuenia. Itoroba peto-itapetsinexatsi mapitsicuene pexainae-wije: pamonaē pijamonaemi ayaijamatabēcuenewiya-juwēñēwi, itsamonae-ata Judá nacua pepopeyanacua-ewetsinēmi pijamonaeyajuwēñēwi. ⁴Nexata, Nabucodonosor jumaitsi Aspenaz-jawabelia: —Papewējēawē neto-itapetsianame, Judá nacuata wajataicawimiyajuwēñēwi, mapecuene-itsiwi tsaneje: caejawayo-ata apopenabejenaewi, peyaxaniawaetsiwi, peyapētaewinua pecujarubicuenetsi daxitacuene yabara, bajarapacuenia-ata pamonaē peyapētaejamatabēcuenē pecanaējētsicuenia pexanaewinexa. Itapetsianame pamonaē toyapēxanepanaejitsiatsi penacuenebawanapaewinexa nacua-ewetsinē peyanacua-ewetsibojawata. Bajarapamonaē nitapetsicujinae, nacujarubia-exanaename Babilonia nacuapijiwitsi wajacuaicuaijajume, panacujarubiliwaisianē-ata rubena

a 1:2 Babilonia: Babilonia nacua itsawēñē pijinia Sinar. Taema Gén. 11:2 Babilonia nacuata penamatamotsitomara itsatomaranēwecua, tsipaji pijacapital, bajarapawēñē naxaina Babilonia nacuwēñēcuenia, tomarawēñēcuenia-ata.

peyaquinaebaxutonëta, wajasalinailiwaishianë, wajanacuapijiliwaishianë, wajayapëtaecueneliwaishianë, wajana-ewetsiliwaishianë-ata yabara —jai.

⁵Nabucodonosor itorobanua pijajiwi bajarapapewëjëawı perajutabiabinexa apocawiriapexaejawa caematacabi canacujitsia, paxaeyajuwënjawanë bajaraponë xaeyabiaba, pawiriavinora-ata matawëjëa-apaeyabiaba. Orijibia, itoroba pecujarubawanapaenexanua bajarapamonae acueyabi pawaibejecuenia. Bajarapa-acueyabi pawaibejecujinae bajarapapewëjëawı caponaejitsiatsi, petonacuenebawanapaenexa pepopeyanacua-ewetsinë peyanacua-ewetabiabibota.

⁶Bajarapapitapetsipewëjëawıjawata, Judá nacuata petaicaewimiyajuwë-nëwi, itapetatsi mapamatabëxëyoje, Judápijinë pemomoxibitsaëtöyajuwë-nëwi: Daniel, Ananías, Misael, Azarías. ⁷Aspenaz, pepopenamatacaitorobabibinë penacuenebiwituatujëta, daxita bajarapamonae wënë-itothianatsi bajarapacuatro ponëbeje. Daniel wënërutatsi Beltsasar. Ananías wënërutatsi Sadrac. Misael wënërutatsi Mesac. Azarías pijinia wënërutatsi Abed-nego.

⁸Itsiaata baitsi jane, Daniel najamatabëcuenewereta apopenajamatabëcuenebijianaejawanexa bajarapaxaejawanëta, tsipaji Daniel yapëtane pacuenia Dioso jani-itawetatsi israelitawi pexaeyaniwa peyanacua-ewetsinë pexaeyajuwënjawanë, piapaevinoranë-ata. Bajaraxuata, pona Aspenaz-jawabelia, pexaniacuene pewajëtsinexa, bajaraxuanë pexaeya-exanaeyaniwatsi, bepenaxuirabinëcuenia penacopatsiyaniwa^b Jehová pitabarata. ⁹Dioso tocopata Aspenaz pitaxutotsoniataejamatabëcuene petoxainaenexa Daniel-jawabelia, pexaniajamatabëcuenia penaëcotabiabinexatsi.

¹⁰Itsiaata, Aspenaz, pecujunawixae pijatuxanenë, jumaitsi:

—Xanë tajatuxanenë pepopeyanacua-ewetsinë bitso yayiataeya kujunawajë. Bajaraponë pacatotsata picani xua jitsipa, xua-ata nitoroba patacarajutabiabinexa panexaejawanexa, panematawëjëa-apaeyabiabivinoranexa-ata. Nexata, bajarapacuenia itsa apo-exanaenë tsipae, belia bajaraponë itsa pacayapëtaejitsipa paxamë apopanexanepanaejawa itsamonaewecua, nexata bajaraponë nebara-anaepanaejitsipa. Itorobjitsipanua pijajiwi, wajabitsaë, tanebeyaxuabia-exanaenexa paxamë panejamatabëcueneta —jai.

¹¹Aspenaz apojejajaixae, bajaraxuacujinae Daniel pona pebarëcuai-cuajainexa Melsar-jawabelia, ponë Aspenaz tocopatatsi pewetabiabinënexa Daniel, Ananías, Misael, Azarías-bana. Bajaraponëjawabelia nexata Daniel jumaitsi:

¹²—Paxanë apopanetsixanepanae picani pepopeyanacua-ewetsinë pexaeyajuwënjawa patanerajutabiabijawamë. Nexata, paxanë, nitabarata beweli-jamatabëcuene pataxainaewı, pexaniacuene pacawajëtatsi xamëjawabelia patanecuenë-ëjëtsinexamë paxanëjawaberena diez pamatacabibejecuenia, saya patanerajutabiabinexamë ëpe-ubijawanë pataxaewanapaenexa, ëmera-ata patamatawëjëa-apaenexa. ¹³Itsa baja panepaena bajarapadiezw pamatacabibeje, nexata, xuacujinae paxanë paneperabëcanaëjëtsianame

b 1:8 *bepenaxuirabiwicuenia penacopatsiyaniwa*: Itsajawanë, pexaejawanë jumapecataeya pexanaenëanëjawabelia perajutsiyajuwënjawanëmi, itsajawanë maranowı meta, itsajawanë perajutsijawanëmi pepopeyanacua-ewetsinë wënëxaniatsiaya diosonëcuenia petaxaetsi. Bajaraxuata, itsa xaejitsipa bajaraxuanë, nacopatsipa bepenaxuirabinë Dioso pitabarata.

pamonaejawabelia xaweanapa pepopeyanacua-ewetsinē pexaeyajuwēñjawanē. Nexata, itsa pacatsitabeweliatsi, bajaraxuacujinae xamē exanaename pacuenia jitsipame paxanējawaberena pataxaejawa yabara. Itsiata, itsa panajēpaenajē bajarapamonaē yajawa, pexaniacuene cawajētatsi, patanetocapatsinexamē pataxaeyabiabinexa patacawajētsicowēya patawajēnaeyabelia —jai Daniel pewetsinētsijawabelia.

¹⁴Nexata, Melsar jejai. Tsitaxanepanatsi pacuenia Daniel jumaitsi. Nexata, bajaraponē cuene-ējēta diez pamatacabibejucuenia peypātaenexa. ¹⁵Itsa baja panepa diez pamatacabibeje, itsa tane bajarapamonaē, nexata caenē-ata apoyajuwēñjiopae. Caranata, matatoxenetsia wēna-perabējumalixanepana, acuenesaēnua, pamonaewecua abatawanapatsi pepopeyanacua-ewetsinē pexaeyabiabiyajuwēñjawa. ¹⁶Nexata, bajarapamatacabijawaweliacujinae, Melsar tocapatabiaba bajarapamatabēxēyo ēpe-ubijawanē pexaeyabiabinexa, ėmera-ata pematawējēa-apaeyabiabinexa, tocapatsinejewatsi pepopeyanacua-ewetsinē pexaeyabiabiyajuwēñjawa, pematawējēa-apaevinoranē-ata.

¹⁷Dioso jamatabēcuenecaējēpaeya-exana bajarapacuatro papewējēatobeje, xaniawaetsia peypātaenexa, pecanaējētsinexanua daxita pali-waisianē rubena Babiloniapijiwi peyaquinaebaxutonēta daxitacuene yabara, nacuapijiliwaisianē-ata. Daniel itsamonaewecua pematatsēñēa Dioso tocopatatsi peypātaeya-exanaenēnexa itsamonaejawabelia pajamatabēcuenē xaina xua tane bemajitsinaebota, piamajitsinaejawata-ata. ¹⁸Acueyabi pawai-beje baja itsa panepa penacujarubicuene, itsa baja copiapata pamatacabianējawa tocaējētatsi bajarapapewējēawī pet-sitanaitajētsinexa Babilonia nacua pepopewetsinē pitabarata, nexata jane baja, Aspenaz tocapona daxita bajarapamonaē petsitanaitajētsinexa Nabucodonosor pitabarata. ¹⁹⁻²⁰Nexata, pepopeyanacua-ewetsinē jamatabēcuenē-ējēbiaya barēcuaicuaijai daxita bajarapapewējēawī-jawabelia. Itsiata baitsi jane, daxita bajarapapewējēawituatujēta, naexana caemonaē Daniel, Ananías, Misael, Azarías-bana bitso peypātaewī, xaniawaetsia pecanaējēbiwinua, daxitacuene itsapewējēawiwecua. Caejiwiyo-ata apocuenejēpaetsi bajarapacuatro ponēbeje xuanē bitso peypātaejawanē. Bajaraxuata, pepopeyanacua-ewetsinē daxita xua jamatabēyanijoba bajarapacuatro ponēbejējawabelia, yanjobapona petoyapātaenexa pijapeypātaejamatabēcuenē, pijapecanaējētsijamatabēcuenēnua. Nexata, tocaxibajaraba bajarapamonaejawata diez xuabeje bitso pepoxaniawaetsia peypātaecuene daxitali-waisianē^c daxita pamonaē bitso peypātaewiwecua mapanacuapijicuene, pamonaē pejinawanapaewī peyanacua-ewetsinacuata. Nexata, diez xuabeje cuenematatoxenetsia yapētane pamonaē penajuanacujarubiwiwecua, pamonaenua peypātaewī pecopiapatsijawanēnexa pijacujirucuenia

c 1:19-20 *peypātaecuene daxitali-waisianē*: Wowaijumeta capitsapa «sabios, itsa jume, sabiduria». Bajarapajumebeje yabaracuaicuaijai pamonaē peypātaecuēnia pexanaewī, pemuxujiobiwi-ata. Bajaraxua nacacujaruba 1Co 2:5-7; 3:18-19 bajarapitsiyapātaecuene yabara. Itsiata, Babilonia nacuapijīwi itsacuenia canaējēta peypātaecuene yabara. Bajarapamonaē tsitatsi bitso peypātaewī pamonaē cujanetsi peypātaeya-exanaenexa itsamonaē pajamatabēcuenē xaina xua amajitsinae, pamonaenua peypātaewī pijacujirucuenia pe-ējēbicueneta.

pe-ëjēbijawata,⁴ pecanaëjēbijawata tulupucue, penajorobiwi-ata. Baitsi, bitso wecuayapētane daxita bajarapamonaē. Bajaraxuata, pepopeyanacua-ewetsinē tocopata bajarapamatabēxēyo petona-cuenebawanapaewinexatsi peyanacua-ewetsibojawata, itsamonaē pebarē-ewetsiwituatujēta.

²¹ Bajarapacuatro ponēbejeyajuwēnēwi, caenē Daniel tsitecaeya nacopata petonacuenebaponaponaenēcuenia pepopeyanacua-ewetsiwi peyanacua-ewetsibota pewetsinē Cirojawabelia,^e Persia nacuapijinē, bajaraponē caewai-cuenia pexainaejawabelia peyanacua-ewetsijawa Babilonia tomarata, pecuene-amoneyabicujinaē Babilonia nacuapijiwimi, Nabucodonosor petēpaecujinaē.

**Nabucodonosor tane majitsinaebota jiwitonē
jumapecataeya pexanaenēxaneto**

2 ¹ Nabucodonosor itsa baja xaina anijawaibeje peyanacua-ewetsijawa^f Babilonia nacua, bajaraponē nawitsia amajitsinaē. Nexata, baja-rapamajitsinaenē bitso jamatabēcuenebējaiya-exanatsi. Bajaraxua yabara, apocuenecaējēpaetsi pemajitsijawa, pejunawixae. ² Nexata, bajaraponē itoroba pijajiwi petojunatsinexatsi pamonae bitso peyapētaewi mapanacua-pijicuene. Baitsi, junatsia-exana pamonae peyapētaewi pe-ëjēbijawata, tulu-pucue pecanaëjēbijawata, penajorobiwi-ata. Daxita bajarapamonaē junata peyapētaeya-exanaenexatsi picani xua amajitsinaē, pajamatabēcuenē-ata xaina bajarapamajitsinaē. Nexata, bajarapamonaē itsa pata pepopeyanacua-ewetsinē pe-ecaebota, tsitanaitajēba. ³ Nexata, pepopeyanacua-ewetsinē jumaitsi bajarapamonaējawabelia:

—Xanē amajitsinaenē. Bitso jamatabēcuenebējanē bajarapamajitsi-naē yabara, tsipaji jamatabēyapētaniji xua yabara amajitsinaenē —jai bajaraponē.

d 1:19-20 *pe-ëjēbijawata*: Daxita bajarapamonaē saicayacue xainabiaba pe-ëjēbinexa, peyapētaenexa jiwi apopeyapētaejawanē. Bajarapamonaē wowaijumeta pewēnē «magos». Bajarapamonaetuatujēta itsamonaē jinawanapa petsita-exanaewi bepinijicuenejawanē itajara, asiwaya pewajēcaejawata jumapecataeya pexanaenējawabelia. Itsamonaē pijinia canaējēbiabiaba liwaisianē tulupu penaëcobijawata. Itsamonaenua yapētaeya-exanabiaba jiwijawabelia pajamatabēcueneliwaisi xaina piamajitsinaejawami, bemajitsinaebocuenia petaejawaminua. Daxita bajarapitsiwi Babilonia nacuapijiwi tsitatsi pecueneçaējēpaejawsiti peyapētaeya-exanaewinexa xua tocopiapatsijitsiatsi. Tsitatsinua bepinijicuenejawanē petsita-exanaewi. Juya pamonae peyapētaewi bepenajorobiwicuenia wowaijumeta wēnēruba «encantadores». Bajarapamonaē Babilonia nacuapijiwi tsitatsi pecueneçaējēpaejawsiti pinijicuene pexanaenexa daxitawiria dowathimonaē pejamatabēcueneta. Tsitatsinua pecueneçaējēpaejawsiti, pewecuatorotsiwinexa papibisiacue ca-amajitsinaē petocopiapatsiyaniwatsi. **e 1:21** *Ciro*: Baitsi, Daniel nacuenebaponapona nacua pewetsiwi pijabota, Nabucodonosor peyanacua-ewetsimatacabianējawa, Belsasar peyanacua-ewetsimatacabianējawa, matapania caewai Ciro peyanacua-ewetsijawabelia pecuene-amoneyabicujinaē Babilonia nacuapijiwimi. Taema Dan, cap. 5. **f 2:1** *anijawaibeje peyanacua-ewetsijawa*: Pepacuene aponayapētae pawaiibeje yabarajumaitsi, tsipaji capitulo unojawata nacayapētaeya-exana pacuenia Daniel-bana nacujarubawanapa Babilonia nacuapijiwi peyapētaecue acueyabi pawaiibejecuenia. Babilonia nacuapijiwi xaina itsacueneçuenia penamata-ëjētsinexa wainē, itsa namata-ëjētabiaba pewetsiwi pewsimsatocabianē. Baitsi, pamatacabita taxuxuaba peyanacua-ewetsijawa, aponamata-ëjētsi bajarapamatacabicujinaē-rena. Caranata, Año Nuevo matacabita petaxuxuabicujinaē, bajarapamatacabita matapania taxuxuaba penamata-ëjētsijawa. Nexata, pepacuene wajanamata-ëjētsicuena Nabucodonosor xaina tsaena acueyabi pawaiibeje peyanacua-ewetsijawa pamatacabijawa tane majitsinaebota jiwi jumapecataenēxaneto.

⁴Nexata, pamonae bitso peyapëtaewi mapanacuapijicuene, jumaitsi pepopeyanacua-ewetsinëjawabelia arameojumeta:

—Patajatuxanenëmë, pacatojitsipatsi pataneyanacua-ewetsinëmë nia-saëtsaponaponaejawa daxitamatacabijawabelianexa. ¡Nexata, panetsipaebare paxanë panijajiwinëjawaberena xua xamë amajitsinaemë, nexata paxanë pacatsipaebianatsi pajamatabëcuene xaina bajarapamajitsinae! —jai bajarapamonae.

⁵Itsia, pepopeyanacua-ewetsinë jumecanawiata:

—¡Jume! Xanë rabaja pacasiwanajamatabëcueneweretatsi apopatacat-sipaebijawanexa xua amajitsinaenë. Paxamë panetsipaebianame xua amajitsinaenë, pajamatabëcuene-ata xaina. Nexata, itsa apopanetsipaebimë tsane xua amajitsinaenë, pajamatabëcuene-ata xaina bajarapamajitsinae, xanë pepacuene pacananeconitsia-exanaenatsi mapacueniaje. Pacatsi-itorobianatsi panijaneconijamatabëcuene tajajiwi wajabitsaëwi papeca-beyejebinexa papecatupatitibabecuenia, bajarapacuenia panijabonë-ata papecatobijianaenexa. ⁶Itsia, itsa paneto-itajëtsianame xua yabara amajitsinaenë, pajamatabëcuene-ata yajawaxaina, nexata xanë juya pacara-jutsianatsi amoneya penamatamotsijawanë. Pacatocopatsianatsinua jiwi papecayaiyataenexa ayaijamatabëcuenewicuenia. ¡Nexata jane baja, pane-jumaitsimëre xua xanë amajitsinaenë, pajamatabëcuene-ata xaina! —jai pepopeyanacua-ewetsinë.

⁷Icatsia, cotocaewijawa pamonae bitso peyapëtaewi mapanacuapijicuene jumaitsi pepopeyanacua-ewetsinëjawabelia:

—Itsa xamë patajatuxanenëmë panetsipaebijitsipame xua amajitsinaemë picani, nexata paxanë juya pacatsipaebijitsipatsi pajamatabëcuene xaina bajarapamajitsinae —jai.

⁸Nexata, pepopeyanacua-ewetsinë jumecanawiata:

—Yapëtaniji xaniawaetsia mapacuenieje. Paxamë saya panajamatabëjemataponame, bepijiayo panetaeyaniwa patacananeconitsia-exanaejawanexa. ⁹Bajaraxuata, itsa paxamë apopanejumaitsimë tsane xua yabara amajitsinaenë, pepacuene najëpaeya pacananeconitsia-exanaenatsi padaxitamë xua pacatocaëjëtatsi. Paxamë tsaena caejamatabëcuene paxainame penajumet-sënëtsiliwaisianë patanetsipaebaponaenexamë, bepexaniajailiwaisi, juya patacajumexaniataenexa. Bajarapacuenia panajamatabëjemataponae-atamë, belia itsajamatabëcuene taxainaenexa, xanë abaxë pacajamatabëcuene-ewetaponatsi patanetsipaebinexamë. ¡Nexata, rowialia paneto-itajëre baja tamajitsinaejawa yabara! Matapania bajarapacuenia yapëtaenajë pexania-jacuene patanetsipaebijawatamë pajamatabëcuene-ata xaina bajarapamajitsinae —jai.

¹⁰Nexata, pamonae bitso peyapëtaewi mapanacuapijicuene, pejumecanawiatsijawata jumaitsi pepopeyanacua-ewetsinëjawabelia:

—Mapanacuataje ajibi cajena itsanë pecato-itajëtsinënexa nijacuene yabara petuxanenëmë, xua xamë panewajëtae patacayapëtaeya-exanaenexa. Mapanacuataje caenë-ata peyanacua-ewetsiwiwajuwënënë, bitso ayaijamatabëcuenenë natae-ata itsapewetsiwiwecua, apoyanijobi bajarapitsipiayapëbejajawa bitso mapanacuapijicuene peyapëtaewijawabelia, pamonae peyapëtaewi pe-ëjëbabiabijawata, tulupu pecanaëjëbijawata,

pamona-e-ata peyapëtaewi penajorobijawata. Xamë matapania paxanëjawaberena panewajëtame patacato-itajëtsinexa. ¹¹ Patajatuxanenëmë, xua pane-wajëtame, bitso ayapëbeje patacayapëtaeya-exanaenexa. Ajibi baja cajena, itsanë-ata pecayapëtaeya-exanaenexa nijacuene yabara. Ëdiosowi yapëtane bajarapacuene. Itsiata, waxaitsituatujëta bajarapadiosowi aponacayajawajinawanapae wajayanijobinexa jiwitonëcuenia. Bajaraxuata, ayapëbeje wajayapëtaenexa xua panewajëtame —jai bajarapamona-e.

¹² Bajarapacuenia itsa jumetane pejumecanawitsijawatsi, pepopeyanacua-ewetsinë bitso ayaicuenia anaepana. Bajaraxuata, itoroba pijajiwi wajabitsaë, peyanacua-ewetsibota pewetsiwi, pebeya-exanaenexa Babilonia tomarata pejinawanapaewi, daxita pamona-e bitso peyapëtaewi mapanacuapijicuene. ¹³ Bajaraxuata, pebeya-exanaewajënaeya wajunupaeba daxitanacuajawa xua yabara bajarapamona-e naneconita, pacuenianua tocopata pebeyejebia-exanaenexa daxita pamona-e bitso peyapëtaewi mapanacuapijicuene, pejinawanapaewi Babilonia nacua. Bajarapa-itorobicuene daxitanacuajawa peyapëtaeya-exanaecujinae, nexata wajabitsaë jaitsia-exanatsi Daniel, bajarapacuenia acueyabi ponëbeje penajuawi, bajarapamona-e peyajawabenexatsi itsamona-e bitso mapanacuapijicuene peyapëtaewi, Daniel-bana aponanubena-e-ata picani bajarapamona-ejawata, paepatota pepopeyanacua-ewetsinë yanijobatsi piamajitsinaejawa yabara.

Daniel yapëtaeya-exana Nabucodonosor xua tane majitsinaebota

¹⁴ Nexata, Daniel itsa wënëtane Arioc petocopatsijawatsi pebeponaejawanexa daxita pijacujirucuenia peyapëtaewi pecanaëjëbijawata, bajaraponë pona pebarëcuaicuajainexa Arioc-jawabelia, ponë pepopenamatacaitorobinë wajabitsaëwi pepopeyanacua-ewetsinë pijabota. Nexata, namatacaitoroba pamona-e pebeponaewinexa daxita pijacujirucuenia peyapëtaewi. Nexata, Daniel pecanaëjëtsinëcuenia, yapëtaeya barëcuaicuajai bajaraponëjawabelia. ¹⁵ Jumaitsi mapacueniaje:

—¿Detsa pitsijamatabëcuene yabara pepopeyanacua-ewetsinë panetsi-itoroba pijajiwiwajabitsaë, bepijiacuenia patanebeya-exanaenexa daxita paxanë bitso patayapëtaewi mapanacuapijicuene? —jai Daniel.

Nexata, Arioc yapëtaeya-exana daxita pajamatabëcuene yabara exana bajarapacuenia. ¹⁶ Bajaraxua pejumetaecujinae, Daniel bepijiayo pona pepopeyanacua-ewetsinë pe-ecabiabibojawabelia, pewajëtsinexa itsamatacabianë abaxë petocopatsinexatsi, jamatejema peyapëtaeya-exanaenexa piamajitsinaejawa yabara, pajamatabëcuene-ata xaina. Jumaitsi:

—Pexaniacueni cawajëtatsi abaxë tanetocopatsinexamë itsamatacabibeje tacayapëtaeya-exanaenexa niamajitsinaejawa, pajamatabëcuene-ata xaina —jai.

¹⁷ Bajaraxuacujinae, pepopeyanacua-ewetsinë pejejaicujinae, Daniel nawiata baja pijaboyabelia. Nexata, tsipaeba penajuawijawabelia, Ananías, Misael, Azarías-bana xua tocopiapatsijitsiatsi, itsa apoto-itajëtsi pepopeyanacua-ewetsinëjawabelia xua amajitsinae. ¹⁸ Nexata, Daniel wajëta penajuawijawabelia pewajëcaenexa Dioso athëbëtatsia pe-ecaenëjawabelia.^g Itoroba

^g 2:18 *Dioso athëbëtatsia pe-ecaenë*: Bajarapacuenia Daniel itsa wënëjona Dioso, najamatabëcuene-itajëta mapajamatabëcueneliwaisianë yabara: Dioso pexanaenë athëbëpijicuene, pewetsinë-ata daxita athëbëpijicuene, peponaponaejawa yabara-ata athëbëtatsia.

petowajëtsinexatsi Dioso pitaxutotsoniaenexatsi penajuawi yajawa, jamatejema peyapëtaeya-exanaenexatsinua xua tane piamajitsinaejawata pepopeyanacua-ewetsinë, xua-ata itsamonaë pijacujirucuenia peyapëtaewi apocuenecaëjëpaetsi peyapëtaeya-exanaejawa. Nexata, Dioso peyapëtaeya-exanaecujinaetsi, itsa yapëtaeya-exana pepopeyanacua-ewetsinëjawabelia, Daniel-bana penajuawe-cuapanepaenexa pebeyejëbijawaminexatsi, daxita pamonaë-ata bitso peyapëtaewi mapanacuapijicuene, Babilonia nacujawata pejinawanapaewi. ¹⁹Itsia baitsi jane, bajarapamerawi Dioso yapëtaeya-exanatsi Daniel majitsinaebota xua Nabucodonosor tane piamajitsinaejawata, xua-ata picani Babilonia nacuapijiwi, pijacujirucuenia peyapëtaewi, apocuenecaëjëpaetsi peto-itajëtsinexa. Orjibia, yapëtaeya-exanatsi pajamatabëcuene xaina bajarapamajitsinaë. Bajaraxuata, bajayacunua itsa namatacota, Daniel pexaniacuenia wënëxaniata Dioso athëbë-tatsia pe-ecaenëjawabelia. ²⁰Jumaitsi mapacueniaje:

—Daxitamatacabijawabelia xanepana pexaniacuenia pecawënëxaniatabiabiawata jiwi pecawënëcacuaicuaijajawata Diosomë, tsipaji xamë nexainaenë neyapëtaecuene, niacuenesaëcuene-ata daxitawecua.

²¹Xamë raja newetaponaponaenë matabianëpijicuene, nacuapijicuene-ata, nejitsipaecuenia nexanetababinexa. Nexata, nejitsipaecuenia xamë itsamonaë tocopatabiabame peyanacua-ewetsiwinexa, itsamonaë juya wecua-ajibia-exanabiabame peyanacua-ewetsijawami. Xamë itsamonaë rajutame neyapëtaejamata bëcuene yajuwënëjawa pexainaenexa, peyapëtaejamatabëcuene cuenia pexanabiabiwinexa. Itsamonaë pijinia jamatabëcuene caëjëpaeya-exaname bepigia pejumeyapëtaewinexa penacujarubicuene.

²²Yapëtaeya-exanabiabamenua bëpënëapijicuene jawanë, apopatayapëtaecuene mi-ata. Yapëtanemenua xua apotae itsajiwi-ata pitaquirijawata, tsipaji necotia nexainaenë.

²³Xamë, Diosomë, tajasalinaiwimi pija Diosomë, pexania jamatabëcuene carajutatsi. Bajarapacuenianua cawënëxaniatatsi, tsipaji xamë netocopatame tayapëtaenënexa, bajarapacuenia tacanaëjëtsinënexa, tasaëjamatabëcuene taxainaenexanua. Baitsi, ajenaconoxaenua netocopatame tayapëtaenexa xua pacawajëtatsi. Neyapëtaeya-exanamenua xua nacua-ewetsinë piamajitsinaejawa siwajamatabëcuene bëjai peyapëtaenexa —jai Daniel Diosojawabelia, pewënëxaniatsijawata.

²⁴Daniel pewajëtsicujinaë Diosojawabelia, pona jane baja petaenexa Arioc, ponë nacua-ewetsinë tocopatatsi pebenexa daxita pamonaë pijacujirucuenia peyapëtaewi pecanaëjëbijawata, Babilonia tomarata pejinawana-paewi. Bajaraponëjawabelia jumaitsi:

—¡Pëtsa abaxë panebiame daxita paxanë mapanacuapijicuene pataya-pëtaewi! ¡Biji rajane, xanë necaponare pepopeyanacua-ewetsinëjawabelia, tato-itajëtsinexa bajaraponëjawabelia xua tane piamajitsinaejawata! —jai Daniel.

²⁵Nexata bajarapaepatota, Arioc bepjiayocuenia caponatsi Daniel pepopeyanacua-ewetsinë Nabucodonosor-jawabelia. Nexata, bajaraponë jumaitsi pepopeyanacua-ewetsinëjawabelia:

—Tajatuxanenē, xanē raja caxitajarabajē wajaicaewimi Judá nacua-pijiwimi yajuwēnēnē, caenē, bajaraponē cuenecaējēpatsi pecayapētaeya-exanaenexa niamajitsinaejawa, pajamatabēcuenē-ata xaina bajarapamajitsinae —jai Arioc.

²⁶Nexata, Nabucodonosor jumaitsi Daniel-jawabelia, ponē wēnērubatsi Beltsasar:

—¿Xaniajai? ¿Xamē cacuenecaējēpa tanejumaitsi jawamē xua amajitsinaenē, pajamatabēcuenē-ata xaina bajarapamajitsinae? —jai.

²⁷Nexata, Daniel jumecanawiata:

—¡Jume! Aponecuenecaējēpae picani, tsipaji xua xamē panewajētame patacayapētaeya-exanaenexa, acuenebi caenē-ata pecato-exanaenexa. Bajaraxuata, pamona bitso peyapētaewi mapanacuapijicuene, caebitsaēto canacujitsia, pamona peyapētaewi pe-ējēbijawata, tulupucuenē pecanaējēbijawata, penajorobiwi-ata, apocuenecaējēpaetsi bajarapacuenia pecato-exanaenexa. ²⁸Itsia baitsi jane, caenē Dioso athēbētatsia peponaponenē, bajaraPonē cuenecaējēpatsi bajaraxua pecayapētaeya-exanaenexa, tsipaji bajaraPonē jiwi xuanē apopetaejawanē to-itajētabiaba. Bajaraponē nexata, xamē tajatuxanenēmē, niamajitsinaejawata cayapētaeya-exana baja xua copiapatsijitsia itsamatacabijawabelia mapanacuataje. Nexata, xua tajatuxanenēmē, nebocaenē, taneme niamajitsinaejawata, aeconoxae cayapētaeya-exanaenatsi pacuenia Dioso neyapētaeya-exana bajaraxua yabara, xua-ata taneme bemajitsinaebocuenia —jai Daniel.

²⁹Nexata, Daniel orijibia jumaitsi:

—Xamē, tajatuxanenēmē, nijacamajawata nenacuera-ewetsijawata, xamē bitso siwanajamatabēxainabiabame pitsicuene mapanacuataje copiapatsijitsia itsamatacabijawabelia. Nexata, Dioso, ponē daxitacuene peyapētaenē, jiwijawabelia peyapētaeya-exanaenēnua bēpēnēapijicuenejawanē, apopeyapētaejawanēmi, bajaraPonē cayapētaeya-exana bemajitsinaebocuenia xua copiapatsijitsia mapanacuataje itsamatacabijawabelia. ³⁰Pitsicuene Dioso cayapētaeya-exana majitsinaebota mapanacuataje pecopiapatsijawanexa, xua abaxē apoyapētaeya-exanae itsajiwiyojawabelia-ata, bajaraxua xanē Dioso neyapētaeya-exana tacatoyapētaeya-exanaenexa. Xanē picani apoyapētaenē bajaraxua bitso tayapētaenēxae daxitacuene daxitajiwewe-cua. Dioso saya neyapētaeya-exana bajaraxua, xanē juya tacayapētaeya-exanaenexa tajatuxanenēmējawabelia pajamatabēcuenē xaina niamajitsinaejawa, Dioso taneypapētaeya-exanaecowēya xua xamē taneme niamajitsinaejawata, xua-ata Dioso canajamatabēxainaeya-exana.

³¹»Xamē, ponē taenutame bemajitsinaebocuenia, nitabarata penucaenē, bajaraponē bitso ayainēxaneto jiwitonēcuenia jumapecataenē. Peniwe-jainē bitso. Jiwi petaejawata bitso pejunawia-exanaenē pibisianē yabara.

³²Bajaraponē pematabocoto exana ēpepopexania-orojawanēta. Pemipabē, pemaxēbeje yajawa, exana palatananijawanēta. Pecototojawawerecacujinae pijinia pethaētobejewabereca exana bronce nanijawanēta. ³³Pesito-beje pijinia exana hierronanijawanēta. Petaxubeje pijinia exana itsajawa hierronanijawa, itsajawa pematajērēatsi-atsa pesebijawami yajawa. Nexata, petaxubeje apocaenanitota pexanaejawabeje. ³⁴Paepatota xamē taenucame bemajitsinaebocuenia, bajarapaepatota ibotoxaneto pijacuata wecuanatsata

petsutoxanetowecua. Nexata, itsajiwi torotajarabinejewatsi, bajarapatsutojawawetsica natorenatabica bajarapajumapecataenëxanetojawabetsica. Nexata, hierronanitota, pematajërëabi-atsananitota-ata pexanaetaxumibeje petaxucënëbijawatatsi, pepobeno naexanajunuabeje. ³⁵ Paepatota bajara-ponë jopanucaya daxitanë, bajarapaepatota pepobeno naexanajunua daxita hierronanijawami, pematajërëabi-atsa pesebijawami, bronsenanijawami, palatananijawami, oronanijawami-ata. Nexata, bajarapabenomi jowibo caputatsi pacuenia atsapërë jowibo bacaputa waimatacabita. Nexata, caepërëtoyo-ata bajarapajumapecataenëmijawa aponacopatsi jowibo peca-putsicujinae. Itsiata baitsi jane, pa-ibotoxaneto petsutojawawetsica taxucënëbatsi bajarapajumapecataenëmi, bajarapa-ibotoxaneto juya naexana pini-jitsutoxaneto, peyacaëjëpaenexa daxitanacuanëjawa.^h ³⁶ Bajarapacuenia raja taneme majitsinaebota —jai Daniel Nabucodonosor-jawabelia.

ICatsia, jumaitsi pepopeyanacua-ewetsinë Nabucodonosor-jawabelia:

—Ajenaconoxae nexata cayapëtaeya-exanaenatsi pajamatabëcuene xaina niamajitsinaejawa. ³⁷ Xamë, tajatuxanenëmë, bitso ayaijamatabëcuenenëmë tsaponaponae daxita pamonaewewenamuto cotocaewi peyanacua-ewetaponaewinexa. Dioso, ponë athëbëtatsia pe-ecaenë, catocopata neyanacua-ewetsinacuata pepopenamatacaitorobisaë nexainaenë-nexa, pinijicuenesaë nexainaenexa, itsamonae-ata pecayaiyataenënexa. Bajaraxua yabara, daxita neyanacua-ewetsiwi cawënëliwaisiyaiyatane. ³⁸ Bajarapacuenia cacuenecaëjëpa neyanacua-ewetsijawa panacuanëjawa jinawanapa daxitajiwi, matatsënëwewereca pejinawanapaewi, pamonaewi-ata. Nexata, xua taneme bemajitsinaebota, jiwitonë jumapecataeya pexanaenëxaneto pematabocoto, oronanitota pexanaejawa, bajaraxua jamatabëcuene-itajëta neyanacua-ewetsinacua yabara. Pacuenia oronani bitso penamatamotsijawa itsananijawanëwecua, bajarapacuenia neyanacua-ewetsinacua bitso penamatamotsijawa itsamonae peyanacua-ewetsijawanexawecua. ³⁹ Orijibia, cayapëtaeya-exana newenamuto penaitajëtsijawanexa beweliacuenesaë pexainaejawanexa peyanacua-ewetsinacuanë ne-ewetsinacuawecua. Nexata, xua taneme palatananitota pexanaejawa, bajaraxua jamatabëcuene-itajëta bajarapanacua beweliacuenesaë pexainaejawanexa. Pacuenia palatanani beweliacuenia namatamota oronaniwecua, bajarapacuenia cotocaewinacua bewelia peyaiyataecuenetsi pexainaejawanexa copiaya neyanacua-ewetsinacuawecua. Bajarapanacua pewerewerecaecujinae, naitajëtsiana icatsia itsanacua, acueyabinacuacuenia, bitso beweliacuenesaë pexainaejawanexa, cotocaewi peyanacua-ewetsijawawecua. Bajarapajamatabëcuene catsitajëta xua bronsenanitota pexanaejawa. Pacuenia bronsenani beweliacuenia namatamota palatananiwecua, bajarapijinia pacuenia acueyabinacua bitso bewelia peyaiyataecuenetsi pexainaejawanexa pecotocaewinacuawecua. ⁴⁰ Bajarapa-acueyabinacua pewerewerecaecujinae tsane, icatsia itsanacua naitajëtsiana, cuatronacuacuenia. Bajarapacuatronacuapijiwajabitsaë bitso piacuenesaëwi tsane. Nexata, pacuenia hierronanitota pexanaejawanë

h 2:35 *peyacaëjëpaenexa daxitanacuanëjawa*: Bajaraxua apojumaitsi petsuto yabara. Saya nacayapëtaeya-exana Cristo peyanacua-ewetsinexa daxitanacuanëpijiwi. Taema Dan. 2:45.

cuenecaējēpa daxitacuene pebijianaenexa, pesaranabiabinexa-ata, bajarapacuenia cuene-itsi tsane bajarapawajabitsaē. Nexata, nacua pewetsiwi pitorobicuenia, pijajiwi wajabitsaē ajibia-exanaena daxita copiaya peyanacua-ewetsinacuanēmi. Wecua-ajibia-exanaenatsinua bajarapanacuanēpijiwi pena-ewetsiliwaisianēmi, bajarapamonae juya, pejumecowēnētabiabinexa pecuene-amoneyabiwitsi ēpitorobicueniatsi. Bajarapacuenia bijianaena daxitacuene. Nexata, pacuenia hierronani beweliacuenia namatamota broncenaniwecua, bajarapijinia pacuenia, cuatronacua peyanacua-ewetsijawa bewelia peyaiyataacuenetsi xainaena acueyabinacuawecua.

⁴¹»Xua taneme bemajitsinaebocuenia petaxubeje, petaxuwēsi yajawa, pexanaejawa hierronanitota, itsajawa pematajērēabi-atsa pesebijawa yajawa, bajarapamatajērēabicuenebeje jamatabēcuenē-itajēta caesaē apopenajuaxainaejawanexa bajarapacuatronacuata pewetsiwi, najuayanacua-ewetsi-ata tsane pijanacua becaenacuacuenia. Caejamatabēcuenē apopenaxainaexae, aponacuenesaējēpae tsane copiyapijicuenemi. ⁴²Petaxuwēsi exana hierronanijawata, itsajawa pijinia pematajērēabi-atsa pesebijawa, bajaraxua jamatabēcuenē-itajēta pacuenia bajarapanacua pewetsiwi xainaejitsia piacuenesaējējawanexa, piacuenesaējēbijawanexa-ata. ⁴³Pacuenia xamē taneme bemajitsinaebocuenia petaxubeje pexanaejawa itsajawa hierronanitota, pematajērēabi-atsa pesebijawa yajawa, bajaraxua jamatabēcuenē-itajēta pacuenia bajarapanacuanēpijiwi naliwaisicajone-ata tsane caenacuapijiwi penaexanaenexa, itsiata apocuenecaējēpaetsi tsane caebitsaētocuenia penaexanaenexa. Pacuenia hierronanito, pematajērēabi-atsajawabeje apocuenecaējēpae caejawa penaexanaenexabeje piatajanexa, bajarapacuenia cuene-itsi tsane peyanacua-ewetsiwi; caeto-ata caejamatabēcuenē aponajuaxainae tsane. ⁴⁴Paepatota bajarapamonae pecopiarucaewi yanacua-ewetawanapaena, bajarapaepatota pijinia Dioso tocopatsiana itsanē peyanacua-ewetsinēnexa daxita nacuanēpijiwi daxitamatacabijawabelianexa. Nexata, bajaraponē caeto-ata apocuene-amoneyabitsi tsane itsanē-ata, peyanacua-ewetsinexa juya pijanacuami bajaraponē pecowēta. Caranata, cuene-amoneyababiabiana daxitanacuanēpijiwi peyanacua-ewetsiwi cuenemi pewerebiabijawabelia. Nexata, bajaraponē ajamatabēcuenesaē tsane peyanacua-ewetsinexa daxitanacuanēpijiwi daxitamatacabijawabelianexa. ⁴⁵Bajaraponē yabara bajarapa-ibotoxaneto catocuene-itajēta, pa-ibotoxaneto taneme pijacuata pewecuanatsatsijawa petsutoxanetowecua, bajaraponē ajibia-exanaena daxitanacuanēpijiwi peyanacua-ewetsijawanēmi. Pacuenia bajarapa-ibotoxaneto ajibia-exana bajarapajumapecataenēxaneto penatorenatabijawatatsica petaxucēnēbinexatsi, itsajiwi torotajarabinejewatsi, bajarapijinia pacuenia exanaena bajaraponē. Pacuenia petaxucēnēbijawatatsi naexanajunua pepobeno, daxita hierronanijawami, broncenanijawami, bajarapacuenia pematajērēabi-atsa pesebijawami, palatananijawami, oronanijawami-ata, bajaraxua raja catsitajēta pacuenia daxita nacuanēpijiwi peyanacua-ewetsicuenemi itsamatacabi copiarucaejitsia. Pacuenianua bajarapa-ibotoxanetomi witsabapona ayaitsuto penaexanaenexa, peyacaējēpaejawabelia daxitanacuajawa, bajarapacuenia bajaraponē naexanaena daxitanacuanēpijiwi peyanacua-ewetsinēnexa daxitamatacabijawabelianexa. Daxita bajaraxua pewajēnaeya catsitajēta

Dioso, ponë bitso ayaijamatabëcuenenë, pecayapëtaeya-exanaenexa itsamatacabijawabelia xua copiapatsijitsia. Xua amajitsinaemë, bajaraxua xaniajai. Bajarapacuenia-ata pajamatabëcuene xaina xua cayapëtaeya-exanatsi, xaniajai —jai Daniel.

⁴⁶Nexata, Nabucodonosor pejumetaejawata xua Daniel tsipaebatsi, bajaranapeatota, yaiyataeya pematabacabëta nucajunua Daniel pitabarata, pitapapatsijawabelia irabereca. Bediosonëcuenia petaexaetsi, orijibia itoroba pijajiwi perajutsinexatsi pexaniacuenejawanë, petotajuitsinexa-ata incienso-përë Daniel pewënëta. ⁴⁷Bajaraxuacujinae, jumaitsi Daniel-jawabelia:

—Pepacuene cajena nijaDioso, ayaijamatabëcuenenë itsawiriadiosowi-wecua. PepoPetuxanenë daxita mapanacuataje peyanacua-ewetsiwiwecua. BajaraPonë wajanacayapëtaeya-exanaenë-ata xua apowajayapëtaecue-nejawanëmi. Matapania yapëtaniji bajaraxua nijaDioso yabara, tsipaji cajamatabëcuenecaëjëpaeya-exana neyapëtaenexa, juya xanë, taneyapëtaeya-exanaenexamë xua amajitsinaenë apotayapëtaejawaminexa —jai Nabucodonosor.

⁴⁸Bajarapacuenia pejumaitsicujinae, Nabucodonosor tocopata Daniel ayaijamatabëcuenenëcuenia pinijitaxunaejawata peyanacua-ewetaponaponaenexa. Orijiibia, tocopatatsi ayaijawa penamatamotsijawanë amoneya perajutsinexatsi. Copatatsinua bajaraponë gobernadornëcuenia Babilonia nacuata peyanacua-ewetsinexa. Pematatsënëa copatatsinua pepo-penamatacaitorobinënexa daxita bajarapanacuata mapanacuapijicue bitso peyapëtaewijawata.

⁴⁹Bajarapacuenia peto-exanaecujinaetsi, orijibia Daniel towajëca pepopeyanacua-ewetsinë Nabucodonosor-jawabelia petocopatsinexatsi Sadrac, Mesac, Abed-negobana peyajawanacuenebinexa penamatacaitorobiwicuenia Babilonia nacujawata. Jejai Nabucodonosor. Nexata, Daniel nacopata peponaponaenexa pabota pepopeyanacua-ewetsinë yanacua-ewetabiabaponapona.

Nabucodonosor nacuenibia-exana jiwitonë jumapecataenëxaneto

3 ¹Itsamatacabijawabelia pepopeyanacua-ewetsinë Nabucodonosor pijajiwi itoroba ayainëxaneto jiwitonë jumapecataenëcuenia petonacuenebanutsinexatsi oronanitota. Itorobanua bajarapajumapecataenë pexainaenexa treinta pametrobeje piapiajawa athëbëabetsia, acueyabi pijinia pametrobeje epatajërëtsialia. Bajarapajumapecataenëxaneto nacuenibia-exananuta Duratusatojawata, Babilonia nacuata pebocaetusato. ²Bajaraxuacujinae, najumeliwaisi-itoroba petopeabanjetarucaenexatsi daxita pewetsinacuajawa, penacaetuatsia-exanaenexa daxita pamonaë ayaijamatabëcuenewi bajarapajumapecataenë penutsijawata. Junatsia-exana pamonaë pewetsiwi pecuene-amoneyabinacuanëmijawa, pamonaë wajabitsaë penamatacaitorobiwi, pamonaë penajuanacuenebiwi, pacuenia gobernador-monae, pamonaë pepopeyanacua-ewetsinë pemuxujiobabiabiwi, pamonaë palata peto-ewetabiabiwi, pamonaë penaneconitsiwi peliwaixanëbabiabiwi, itsamonae pewetsiwi-ata. Daxita bajarapamonae pata pinijifiesta penataenexa bajarapajumapecataenë pewënëta. ³Nexata, daxita bajarapitsinamatacaitorobiwi nacaetuata Duratusatota, penataenexa

Nabucodonosor peto-exanaefiesta bajarapajumapecataenē pewēnēta. Papat-sicujinae, daxita nubena bajarapajumapecataenē pitabarata. ⁴Nexata, ponē pepopeyanacua-ewetsinē pejumepaebabiabinē ayaijumeta wawajaiya jumaitsi penacaetuatsiwijawabelia:

—iPanejumetaema xaniawaetsia, paxamē daxita panepatsiwi daxita nacuanējawawerena, pa-itsawiriawimē, itsawiriajumenē panecuaicuajaiwi-ata! ⁵Paepatota pajumetaename penajumetsijawa piobijawata trompeta, flauta, zampoña-ata, peracatsijawatanua arpa, cītarawiria-arpajawanē, salteriojawanē, itsawiria pecanaxēanaejawanē-ata, nexata bajarapaepa-tota, daxita paxamē yaiyataeya panematabacabēta irataeya panubenae-name bajarapajumapecataenē pitabarata, oronanitota pexananutsinē, panenajamatabēcuenē-itajētsinexa asiwaya paneyaiyataejawa bajaraponē ayaijamatabēcuenēcuenia. ⁶Pajiwi pematabacabēta apotonucae tsane yaiyataeya bajarapajumapecataenē pitabarata, nexata bajarapajiwi cae-cuenia tajajiwi wajabitsaēwi xuabianatsi pitatsajawi-isotoxanetojawabelia, itsajota setabiaba daxitawiria penanijawanē pepora penaexanaenexa —jai pejumepaebinē.

⁷Bajarapanacaetuatsibitsaēto itša jumetane bajarapacuenia penajumet-sijawa piobijawanē, peracatsijawanē, itsapecanaxēanaejawanēnua, nexata bajarapamonae nubena pematabacabēta yaiyataeya bajarapajumapecataenē pitabarata, oronanitota pexananutsinē.

Sadrac, Mesac, Abed-negobana peneliatsi pitatsajawi-isotoxanetojawabelia

⁸Nexata, bajarapaepatota, itsamonae, peyapētaewiyajuwēnēwi tulupu pecanaējēbicuenia, pibisiacuenia cuenabaracuaicuajai judiōwi yabara pepopeyanacua-ewetsinē Nabucodonosor-jawabelia. ⁹Jumaitsi:

—Patajatuxanenēmē, pacatojitsipatsi niasaētsaponaponaejawa daxitama-tacabijawabelianexa. ¹⁰Xamē, patajatuxanenēmē, panetocāējētame paepa-tota pajumetaeyabiabājē penajumetsijawa piobijawanē, peracatsijawanēnua, itsawiriapecanaxēanaejawanē yajawa, bajarapaepatota, yaiyataeya pada-xitanacuapijiwinē patamatabacabēta patatonubenabiabinexa oronanitota ne-exananutsia-exanaenē pitabarata. ¹¹Orijibia jumaitsimēnua: «Pajiwi aponucae tsane pematabacabēta yaiyataeya, nexata bajarapajiwi xuabia-exanaenājē pitatsajawi-isotoxanetojawabelia, pataxunaeta penanijawanē setabiaba», jamē picani. ¹²Bajarapacuenia jumaitsi-atamē, itsiata itsamonae judiōwi, pamonae wajataicaewimi Judā nacuata, amoneya wajanacatona-cuenebiwinexa, xamē nenato-itapetsiwi neyajawanacuenebiwinexa nebar-ewetsiwiutauajētē, bajarapamonae apopecayaiyataecuenia exana xamēja-wabelia. Caranata, apo-exanae pacuenia panetonajumecopatame Sadrac, Mesac, Abed-negobana. Nexata, oronanitota ne-exananutsia-exanaenē yai-yataeya apotonubenabiabi pematabacabēta. Orijibia, itsamonae nijadosowi-ata asiwaya apocatoyaiyataenua —jai bajarapamonae.

¹³Bajarapacuenia Nabucodonosor pejumetaejawata, bitso anaepana. Nexata, anaeya itoroba petocaponaenexatsirena bajaraponējawabe-rena Sadrac, Mesac, Abed-negobana. Nexata, caecuenia caponaliatsi pepopeyanacua-ewetsinējawabelia, pitabarata penubinexatsi. ¹⁴Anaeya peyanijobijawata jumaitsi:

—¿Xaniajai tsaja paxamë apopanaxajëcabiabimë patajadiosowijawabelia? ¿Xaniajai tsaja asiwaya yayiyataeyanua apopatonubenabiabimë panematabacabëta ponë exananutsia-exanaxë oronanitota, jiwitonë jumapecataenëjawabelia? —jai bajaraponë.

¹⁵Icatsia, jumaitsi:

—Aeconoxae icatsia pacacuene-ëjëtsianatsi tayapëtaenexa itsa panejumecowënëtsijitsiamë. Nexata, paepatota pajumetaename penajumetsijawa piobijumenë, peracatsijumenë, itsawiria pecanaxëanaejawanë yajawa, bajarapaepatota pananubenaename panematabacabëta yayiyataeya pitabarata bajarapajumapecataenëjawabelia. Patacatonajumecopatsicuenia itsa apopa-exanaemë tsane, caecuenia jane baja, tajajiwi wajabitsaë itorobianajë papecapenetsinexa pitatsajawi-isotoxanetojawabelia, penanijawanë pesetsitaxunaeta. ¡Jica! ¿Detsa nexata padioso pacacapanepaena paxamë bajarapacuenë pataca-exanaejawawecua? —jai pepopeyanacua-ewetsinë Nabucodonosor Sadrac, Mesac, Abed-negobanajawabelia.

¹⁶Nexata, bajarapamonae jumaitsi:

—Paxanë apopaxainaenë xua yabara pacajumecanawiatsijitsiatsi, patajatuxanenëmë, xua yabara panejumaitsimë. ¹⁷PatajaDioso, ponëjawabelia asiwaya yayiyataeyanua panawajëcabiabajë, bajaraPonë cuenecaëjëpatsi patanecapanepaejawa bajarapa-isotoxaneto pitatsajawicotiawecua. Papibisiacuenenua xamë, patajatuxanenëmë, jitsipame pataneto-exanaenexamë, caëjëpatsi bajaraPonë necobewecua patanecapanepaejawa. ¹⁸Itsiata baitsi jane, bajarapacuenia apopanecapanepae-ata tsipae, paxanë, patajatuxanenëmë, tsitecaeya apopanaxajëcaenë tsane panijadidosowijawabelia. Asiwaya, yayiyataeya, apopatonubenanenëna tsane patamatabacabëta bajaraparonanitota pexanaejumapecataenëjawabelia —jai bajarapa-acueyabi ponëbeje.

¹⁹Bajarapacuenia Nabucodonosor itsa jumetane pejumaitsiyaw, nexata itsa-itabaracuene xaina. Itabaratsobiatsatabi, ayaicuenia pianaepanaexae bajarapa-acueyabi ponëbejeyawabelia. Nexata, bajaraponë itoroba pijajiwi peto-itajurutsinexatsi ayai-isotoxaneto penanijawanë pesetsitaxunaeta. Itoroba bajarapamonae pitajurutsinexa, ayaicuenia piataju-exanaenexa siete xuabeje pematatsënëyo piatajutsabiabijawamiwecua. ²⁰Bajaraxuacujinae, itoroba pijajiwi wajabitsaëyajuwënëwi, bitso piasaëwi itsamonae wajabitsaëwiwecua, pecëbïnexatsi Sadrac, Mesac, Abed-negobana, pepenetsinexatsilia bajarapa-isotocotiaxanetojawabelia. ²¹Nexata, bajarapa-acueyabi ponëbeje, xuanë juma-enabiaba, taxuna-enabiaba, mata-enabiabanua, penajamatabëcuene-itajëtsinexa penacuenebijawata ayaijamatabëcuene-wicuenë, bajaraxuanë yajawacëbatsi. Nexata, bajarapamonae pecobecëbicujinaetsi, petaxucëbicujinaetsi-ata, peneliatsi bajarapa-isotocotiaxanetojawalia. ²²Pepopeyanacua-ewetsinë Nabucodonosor pitorobixae peto-itajurutsinexatsi bajarapa-isotoxaneto piataju-exanaenexa siete xuabeje pematatsënëa piatajujawamiwecua, nexata bajarapa-isotoxaneto bitso ataju. Bajaraxuata, pawajabitsaëwi caponalia bajarapa-acueyabi ponëbeje pepenetsinexalia isotoxanetojawabelia, bajarapawajabitsaëwimi tajuatsi bajarapa-isotoxanetocotiata. Nexata baja, tëpa. ²³Nexata, pepënatorobajarabijawata bajarapa-acueyabi ponëbeje pecëbiwitsi, othopalia bajarapa-isotoxaneto-itatsajawijawalia.

²⁴ Nexata, Nabucodonosor nonotabapuna bepijiayo. Jamatabëcuenenabenajacaeya peyajawanacuenebiwijawabelia jumaitsi:

—¿Apopenetsiliatsi tsaja acueyabi ponëbeje pecëbiwitsi isototuatujäëlia? —jai.

—Jājā, bajarapacuenia rabaja exana —jai bajarapamonae.

²⁵ Icatsia, Nabucodonosor jumaitsi:

—Itsiata baitsi jane, xanë cuatro ponëbeje taniji pejinawana-paewi apocëbinejewatsi bajarapa-isototuatujäëjawalia, bajarapamonae tajuenewewatsi. Itsiata, cuatronë xaina ángelewí pecuene —jai jamatabëcuenenabenajacaeya.

²⁶ Bajaraxua pejumaitsicujinae, Nabucodonosor nexata imoxoyolia pataxunaeta setabiaba penanijawanë, itsajota isotoxaneto tajuenajetaruca, pecuaiboyenepanajawa pepënëwelia tajëyo penucaenexa. Nexata, wawajai tsaxuabi:

—Sadrac, Mesac, Abed-nego, Dioso pepo-ayaijamatabëcuenenë daxitawecua papijajiwimë. ¡Pawecuapitsaparemena bajarapa-isotojawawerena! —jai bajaraponë.

Nexata, bajarapa-acueyabi ponëbeje wecuapitsaparena bajarapa-isotocotijawawerena. ²⁷ Nexata, itaxutuanacaetuata daxita pamonaenatacaitorobiwi bajarapanacuata, pamonaenata bajarajota nubena. Cujibarenatsi bajarapa-acueyabi ponëbejebawaberena, xaniawaetsia petanexatsi, tsipaji perabëxanepana daxita. Bajarapa-isotocotiaxaneto apoperabëtajueatatsi. Apomatanasiajawi-atatsi. Apojuma-esetajue-atatsi penaxatabijawanë. Apotuxutsëxë-enaenata.

²⁸ Daxita bajarapacuenia petaxae, nexata bajarapaepatota Nabucodonosor ayaijumeta jumaitsi:

—Sadrac, Mesac, Abed-negobana pijaDioso raja ayaijamatabëcuenenë bitso. Nexata, to-itoroba pija-ángelnë pecapanepaenexa pijajiwi, bajarapamonae caejamatabëcuene pexainaexae pitaxutujamatejemajawa pijaDiosojawabelia. Bajarapamonae apo-exanae pacuenia xanë itorobajë, pepotayanacua-ewetsinë, asiwaya, yayataeya pematatabacabëta penubenaenexa ta-exanaeya-exananutsinë pitabarata. Caranata, pijaDioso ayaicuenia peyayataexae, jitsipa petëpaejawa, pematatabacabëta penubenaeyaniwa yayataeya itsadidosowi pitabarata. ²⁹ Bajarapacuenia Dioso pecuene-itsinëxae, ajenaconoxae xanë pacatonajumecopatatsi padaxitanacuanëpijiwimëjawabelia mapacueniaje. Pajiwi pibisiacuenia baracuaicuaijai tsane bajarapa-acueyabi ponëbeje pijaDiosojawabelia, Ponëjawabelia bajarapamonae itaxutujamatejema peyawenonaenexatsi, nexata bajarapajiwi natupatitibiana cuatro xuabejecuenia pebeyaxuabinexatsi. Pijabo-ata tobijianaenatsi pepopiabejebawabelia. Bajarapacuenia to-exanaenatsi tocanaëjëtsinejewatsi itsacuenajawa xua yabara itaxutotsoniataejitsiatsi. Nexata, apotocanaëjëtsi tsanetsi pijatomara yabara, pijanacua yabara, pecuaicuaijajume yabara, waja-asiwanë-ata. Nexata, pamonaenaneconita bajaraxua yabara, apo-itaxutotsoniataetsi tsane, wajacopatsinexa naneconitsia-exanaenewewatsi. Daxitajiwi beyaiyatane bajarapamonae pijaDioso, tsipaji ajibi itsadioso bajarapitsicuene pecueneacëjëpaenëtsi pecapanepaenexa, pacuenia bajarapamonae yawenonatsi —jai Nabucodonosor.

³⁰ Bajaraxuacujinae, pepopeyanacua-ewetsinē bajarapa-acueyabi ponēbeje tocopatatsi itsapenamatomotsitaxunaenē, pewetawanapaenexa pewetsita-xunaenēmiwecua ayaijamatabēcuenewicuenia bajarapaBabilonia nacuata.

Nabucodonosor Dioso tocopatatsi jemata pematajemabinexatsi

4 ¹ Pepopeyanacua-ewetsinē Nabucodonosor tonajume-itoroba mapaliwaisije daxitanacuanēpijiw jawabelia, daxitawiriaw jawabelianua, daxitawirijawemijawabelia-ata mapanacuata pejinawanapaewije. Peyaquinaebaxutota jumaitsi: «Xanē, Nabucodonosornē patacayanacua-ewetsinē, bitso pacabajacobatsi pexaniacuenia. Pacatojitsipatsi panenajuajinawana-paenexa aliwaisijibia, panecobecowējawanē-ata papecatonawitsijawanexa. ² Xanē netoxanepana patacatsipaebijawa, paneyapētaenexa daxita papinijicuenejawanē, papexaniacuenejawanēnua Dioso pepo-ayaijamatabēcuenenē neto-exana xanējawaberena. ³ ¡Bitso bajaraponē wajanacatsita-exanaenē pinijicuenejawanē! ¡Bitso pinijisaē pexinaenēxae, pinijicuenejawanē nacato-exanabiaba! BajarapaDioso canacopatsiana peyanacua-ewetsinēcuenē daxitamatacabijawabelianexa. Penamatacaitorobisaē-ata xainaponaponaena daxitamatacabijawabelianexa, jiwi werewerecaponae-ata. ⁴ »Xanē, Nabucodonosornē, pacayapētaeya-exanaenatsi xua netocopiapata baja. Itsamatacabi nacuera-ewetaponaponajē tayanacua-ewetsibojawata. Bajarajota, xanē jamatejema ponaponajē bitso taxainaenēcuenia. ⁵ Itsiata baitsi jane, itsamerawi tamajitanucaejawata, xanē amajitsinaenē. Xua taeponajē bajarapamajitsinaejawata, bitso nejunawia-exana. Nexata, nebenajaca bitso. ⁶ Nexata, xanē tanejamatābēcuenē-enaexae bajarapamajitsinae, itorobajē tanetocapatsinexa xanējawaberena daxita pamonaē Babilonia tomarata pejinawanapaewi, mapanacuapijicuene bitso peyapētaewi, bajarapamonae taneyapētaeya-exanaenexa picani pajamatābēcuenē xaina bajarapamajitsinae. ⁷ Nexata, pata daxita pamonaē mapanacuapijicuene bitso peyapētaewi, peyapētaewi-ata tulupujawanē pecanaējēbicuenia, peyapētaewi-ata penajorobijawata. Daxita bajarapamonae pepatsicujinae, xanē nexata tsipaebajē bajarapamajitsinae. Itsiata baitsi jane, bajarapamonae apocuenecaējēpaetsi taneyapētaeya-exanaenexa pajamatābēcuenē xaina ta-amajitsinaejawa. ⁸ Bajaraxuacujinae, cotocaewi Daniel-ata patajopa, ponē wēnērubatsi Beltsasar, tajadisonē pewēnēta. Bajaraponē bitso peyapētaenēxae, nacatsita pejamatabēcuenecaējēpaeya-exanaenētsi wajanacuapijidiosowi. ⁹ Bajarapadosowi peyawenonabiabixaetsi bajaraponē naexana bitso peyapētaenē daxita jiwiwecua. Bajaraxuata, bajaraponējawabelia tsipaebajē tamajitsinaejawa mapacueniaje. ⁹ Jumaitsinē: ‘Beltsasar, nenamatacaitorobinē daxita pamonaē mapanacuapijicuene bitso peyapētaewi. Xanē yapētāniji pacuenia diosowi cajamatābēcuenematacapona necanaējētsijawata daxita jiwiwecua, bajarapacuenia neyapētaeya-exanabiabinēnexa daxitacuene jiwi apopeyapētaejawanēmi cawecumatayatsinejewa. ¡Nejumetaema! Pexaniacuene

i 4:8 wajanacuapijidiosowi: Babilonia nacia pewetsinē xainabiaba ayaibitsaēto diosowi, penawajēcabiabinexa bajaraponēanējawabelia. Bajaraxuata, tsitatsi Daniel bepxainaejawa nawitsia diosowi pejamatabēcuenē. Daniel itsiata itaxutuajamatejema tsabiabi caenē pepoDiojawabelia. Nexata, caenē Dioso yawenonabiabatsi.

cawajētatsi, taneto-itajētsinexamē pajamatabēcuene xaina xua xanē taniji ta-amajitsinaejawata. ¹⁰Maraxua xanē netsitajēta tataenexa bemajitsinae-bocuenia tajacamata tabocaejawata. Jemata netsitanaitajēta naejawaxaneto penucaejawa daxitajiwi pejinawanapaenacuanētatuajēta. Bajarapanae-jawaxaneto bitso piapianae. ¹¹Nexata, bajarapona bitso witsabapona. Ayainaexaneto naexanapona. Bajarapona matatupata athēbēabetsia, nexata jiwi cuenecaējēpatsi itsanacuanējawawerena-ata petaejawa, bitso tajē jinawanapae-ata bajaraponaewecua. ¹²Bitso bajarapona pexaniabaxu xaina. Ayaijawa-ata pecuai xaina. Nexata, cuenecaējēpatsi pecuaixanexa daxitanacuanēpijiwi. Bajarapona pebēxēpanata, pitacaēnaeta, bobobena-biaba daxitawiria matatsēnē-unupijiwi. Bajarapijina pacuenia, daxitawiria pepunaewi xaina pematapenanē pemaxērananējawa. Nexata, daxitacuenewiriawi na-eweta mapanacuataje, pewēna-asaētsawanapaenexa bajaraponaejawa pejamatabēcuene.

¹³»Bajarapamajitsinaejawata jemata icatsia taniji ángelnē perunaej-watsica athēbēwetsica, peyajiwitaeponaponaenē. ¹⁴Bajaraponē ayaijumeta peyanabiwitsijawabelia¹ jumaitsi: «¡Panicataxuabare bajaraponaejawa! ¡Pamaxērananē-ucubabema! ¡Pabaxusiribabema! ¡Pacuaicayajarenu! ¡Ori-jibia, daxita pamona matatsēnēwereca pejinawanapaewi payorore, pita-caēnaeta pebobenaewi bajaraponaebēxēpanata, pitaxutuanacaetuanawewi! ¡Payororenu pepunaewi-ata, pamona xaina pematapenanē pemaxēranajawa! ¹⁵«¡Itsiata baitsi jane, bajaraponaematabaca pētsa baja pacajutsimina irawetsina! ¡Pacopatanure bajarapamatabaca petabunepe yajawa! ¡Saya pamatabacacētanure anijacadenamaētotabeje, pexanaejawa hierronanitota, pexanaejawa bronceaninitota! Bajarapacuenia pacopatanutside name waya-fotusatota». Orijibia, ángelnē jumaitsi ponē yabara jamatabēcuene-itajēta bajaraponaejawa petocopiapatsijawanexatsi. Jumaitsi: »Pacuenia wayafota penucaenaematabaca donota sucuenabiaba, bajaraponē baja jema bajarapacuenia donota sucuenae. Naxaeponaponaenua pona dajubimonae yajawa, wayafota pejinawanapaewi. ¹⁶Nexata, bajaraponē jiwijamatabēcuene wecua-ajibitsi tsane, juya dajubijamatabēcuene pexainaenexa. Nexata, ponaponaena siete pawaiabeje dajubijamatabēcuene pexainaenēcuenia», jai ángelnē wajunupaebiaya penaneconitsia-exanaecuenia.

¹⁷Icatsia, ángelnē jumaitsi: «Marapaliwaisi petocaejētsijawatsi bajaraponē penaneconitsia-exanaenexa, Dioso pija-ángel-monae peyaji-witaewanapaewi, pitorobicueniatsi towajunupaeba. Bajarapaliwaisi-cuenia tonajumecopatatsi, daxitacuenewiriawi peyapētaenexa Dioso pepo-ayaijamatabēcuenenēcuene daxitawecua, pepoPetuxanenēnaxa-nua daxita peyanacua-ewetsiwijawabelia, bajarapamona peyanacua-ewetsinacuanēpijiwijawabelia-ata. Bajaraponē pepoPetuxanenēxae, tocopatabiaba daxitanacuanēpijiwi ponē tojitsipa peyanacua-ewetsinēnexa. Bajarapacuenia wecuapitabiabanua itsamonae peyanacua-ewetsicuenemi, juya petocopatsinexa itsanē beweliamatabēcuenenējawabelia. Dioso baja cajena peto-itapetabiabinē daxitanacuanēpijiwi pajiwi yanacua-ewetsia-exanabiabijitsiatsi», jai ángelnē tataejawata bajarapamajitsinaebota.

j 4:14 *peyanabiwitsijawabelia*: Bajarapa-ángelnē wawajai pewēna-ángelwewijawabelia tsaena.

¹⁸»Bajarapacuenia xanë amajitsinaenë. Ajenaconoxae nexata xamë, Beltsasar, nejumaitsimë tsane, taneto-itajëtsinexamë pajamatabëcuene xaina, tsipaji itsanë-ata, ta-ewetsinacuata pijacujirucuenia peyapëtaewi, apocuenecaëjpaetsi bajaraxua taneyapëtaeya-exanaenexa. Itsiata baitsi jane, xamë cacuenecaëjpa taneyapëtaeya-exanaejawamë bajarapajamatabëcuene yabara, tsipaji xamë xainame diosowi pejamatabëcuene jiwiwecua, janë Nabucodonosornë Daniel-jawabelia.

¹⁹»Itsiata baitsi jane, Daniel, ponë wënërubatsinua Beltsasar, moya eca bajaya-epatowajëto, ayaicuenia pejamatabëcuenenabenajacaexae. Xua naja-matabëxaineca tanejumeacanawiatsinexa, bitso jamatabëcuenenawiteca. Siwajamatabëcuenebëjai xua yabara Dioso yapëtaeya-exanaponatsi. Nexata, pecajunawi moya eca. Nexata, xanë, Nabucodonosornë, jumaitsinë: '¡Beltsasar, pëtsa jamatabëcuenebëjamë tamajitsinaejawa yabara! ¡Jume! ¡Pëtsa jumejunawame tanetsipaebijawamë pajamatabëcuene xaina!' janë.

Nexata, Daniel nejumeacanawiata: «Tajatuxanenëmë, pamajitsinae taneme pajamatabëcuene xaina bitso abeje. Bajaraxua picani, apojitsipaenë pecatocopiapatsijawa. Biji rajane, netsitaxanepana picani bajaraxua petsijumajopaejawatsi nijawajabitsaëwi, pamonae catojitsipabiaba piabejecuene. ²⁰Nexata, catsipaebianatsi jane baja. Ponaejawaxaneto xamë taneme niama-jitsinaejawata, bajaraxua xamë cacuenecatane neyanacua-ewetsijawa yabara. Pacuenia bajaraponae witsabapona, pinijinaexaneto penaexanaponaenexa, bitso piasaënaenexanua, bajarapacuenia xamë pinijicuenesaë xainaponame neyanacua-ewetsijawata. Pacuenia bajaraponae matatupata itaboxojawabetisia, jamatejema jiwi petaenexa, tajë nacujawa pejinawanapaewi-ata, bajarapijini pacuenia, tajë pe-enaetomaranë pejinawanapaewi-ata cawënëtane ayajamatabëcuenenëmë yabara. ²¹⁻²²Bajaraponae pexaniabaxu xaina, pexaniapitacaënae pexainaenexa. Nexata, pebëxëpanata daxitawiria-unupijiwi nacaetuatabiaba penacuera-ewetsinexa. Pemaxërananëjawa daxitawiria pepunaewi xaina pematapenanë. Bajaraponae cuainawitanua, daxitacuenewiriawi pewëna-asaëtsawanapaenexa pecuaxaejawata. Nexata, pacuenia daxitawiriawi na-eweta bajaraponae pejamatabëcueneta, bajarapijini pacuenia, xamë necuenesaëta na-ewetawanapa daxitanacuanëpijiwi. ²³Tajatuxanenëmë, niamajitsinaejawata taneme Dioso pija-ángelnë, peyajiwitaeponaponaenë, athëbëwetsica perunaejawatsica, pejumaitsijawanua peyanabiwitsijawabelia: '¡Panicataxuabare bajaraponaejawa! ¡Pa-epa-ucubarenua panebijianaenexa! ¡Pëtsa itsiata bajaraponaematabaca pacajutsimina! ¡Pacopatanure bajarapamatabaca petabunepe yajawa! ¡Saya pamatabacacëtanure anijacadenamaëtotabeje, pexanaejawa hierronanitota, pexanaejawa broncenanitota! Bajarapacuenia pacopatanutsianame wayafotusatojawata.' Orijibia, ángelnë jumaitsi ponë yabara bajaraponaejawa jamatabëcuene-itajëta petocopiapatsijawanexatsi mapacueniaje: 'Pacuenia wayafota penucaematabaca donota sucuenabiaba, bajaraponë bajarapacuenia sucuenabiabiana. Bajarapacuenia jema baja naxaeponapona pona dajubimona yajawa, wayafota pejinawanapaewi, siete pawaipeje pepanepaejawabelia,' jai ángelnë niamajitsinaejawata.

²⁴»Orijibia Daniel nejumaitsi: «Tajatuxanenë, bajarapacuenia ángelnë pecajumaitsijawa, jamatabëcuene-itajëta xua catocaëjëta xamë

pecananeconitsia-exanaenexa Dioso pepo-ayaijamatabëcuenenë. ²⁵ Nexata, xamë, tajatuxanenëmë, jiwi canawecuatsatsiana, saicaya neponaponaenexa dajubimonaetuatuajëta, nexaeponaponaenexa pona pacuenia vacamonae. Bajarapacuenia dono-ata catsijuma-othopabiabiana nejumasucuenenexa. Nexata, bajarapacuenia xamë, tajatuxanenëmë, dajubinëcuenia ponaponaename siete pawaibeje, nenatoyapëtaejawabelia Dioso pepo-ayaijamatabëcuenenëcuenë daxitanacuanë peyanacua-ewetsiwiwecua, nenatoyapëtaejawabelianua bajaraPonë pejitsipaecuenia peto-itapetabiabinë caenacuapijiwi canacujitsia ponë yanacua-ewetabiabijitsiatsi. ²⁶ Bajarapacuenia peca-itapetsixae Babilonia nacuapijiwi neyanacua-ewetsinënexa, nexata xua itoroba ángelnë pecopatanutsinexa bajaraponaematabaca petabunepe yajawa, bajaraxua cuene-itajëta pacuenia xamë, tajatuxanenëmë, icatsia Dioso pecatocopatsinexa caewëarena neyanacua-ewetsijawanexa Babilonia nacuapijiwi. Matapania nenatoyapëtaecujinae Dioso penamatacaitorobisaë pexainenëcuenë daxitawecua, pacuenia-ata yanacua-eweta neyanacua-ewetsinacua xamëwecua, bajarajane baja, icatsia catocopatsiana neyanacua-ewetsinexa Babilonia nacuapijiwi. ²⁷ Bajarapacuenia pecatocopiatsiyaniwa tajatuxanenëmë, cawajëtatsi tanenamuxuna-ewetsinexamë: ¡Pëtsa baja orijibia pibisiacuenë exanapona! ¡Juya, exanaponaaponare ëpexaniacuenë! ¡Nacuenecopare baja jiwi nebejiobia-exanaecuenë, pibisiacuenë neto-exanaponaaponaejawata! ¡Juya pexaniajamatabëcuenë xainare neyawenonabiabinexa jiwi bepejiobicuenëta pejinawanapaewi! Tajatuxanenëmë, bajarapacuenia itsa exanaponaaponaejitsipame, belia Dioso ca-itaxutotsoniataejitsipa, jamatejemaya neponaponaenexa barëyaya Dioso cananeconitsia-exanaenëjewa», nejai Daniel.

²⁸ 'Daxita bajaraxuanë netocopiapata jane baja, pepotayanacua-ewetsinë Nabucodonosor-nëjawaberena. Tanetowajunupaebijawami pexaniajaijawa. ²⁹ Bajarapacuenia nexata netocopiapata baja: Caewaicujinae itsa baja xainajë ta-amajitsinaejawa, itsamatacabi nucaponaaponajë tayanacua-ewetsibo athëbëyopiji-irajawatatsia Babilonia nacuata. Nexata, itsa matatsënënaë-corecajë, nasiwajamatabëcuenëbarëyaya jumaitsinë: ³⁰ «¡Pataema xanë daxita ta-exanaecuenëjawanë! Mapapexaniatomaraxaneto, Babilonia tomara, exanajë baja taponaponaetomaranexa, itsajota eca pabota yanacua-ewetaponaaponajë. Daxita bajaraxuanë exanajë pinijicuenesaë taxainae-xae, ayaijamatabëcuenenënëxaxae-ata. Nexata, jiwi newënëxaniatabiaba ta-exanaecuenëjawanë yabara, tsipaji xanë ayaijamatabëcuenenënë cajena daxitawecua», janë xanë tanucaponaejawata.

³¹ 'Paepatota abaxë cuaicuaijanë tsanucaponaë, jumetaniji Dioso athëbëwet-sica tanejumaitsijawa: «¡Xamë, peponeyanacua-ewetsinë Nabucodonosormë, juya nejumetaema xua xanë tacatocaëjëtsijawa pecatocopiatsijawanexa! Xamë rabaja neyanacua-ewetsijamatabëcuenëmi cawecuapitatsi baja. ³² Jiwi-jamatabëcuenë cawecuapitsianatsinua, dajubijamatabëcuenë juya tacatsijamatabërutsinexa. Nexata, xamë baja, jiwi canawecuapitsipaena, juya siete pawaibeje neponaponaenexa dajubimonaetuatuajëta, pona nenaxaeponaenexa. Bajarapacuenia ponaponaename matapania nijacuata nenatoyapëtaejawabelia pacuenia xanë caenënë Dioso pepo-ayaijamatabëcuenenënë, tanamatacaitorobisaë taxainenëcuenë daxita peyanacua-ewetsiwiwecua.

Nenatoyapëtaejawabelianua pacuenia Xanë tanatojitsipaecuenia nato-itapetababajë daxitanacuanëpijiwi, caenacua canacujitsia, pajiwi yanacua-ewetsia-exanaejitsianë. Bajaraxua nenatoyapëtaecujinae, copatsianame jane baja, dajubijamatabëcuene nexinaejawami», nejai Dioso athëbëwetsica.

³³Penajumeweretsicujinae tanejumaitsijawa, xainaenejewa bajaya-epato, nexata bajarapaepatota, netocopiapata jane baja, dajubijamatabëcuene taxinaejawa, tanetocaëjëtsicuenia. Nexata, xanë, Nabucodonosornë, nepitsapaeya-exana jiwi pejinawanapaetaxunaewecua, taxaeponaponae-nexa pona pacuenia vacamonae. Donojawanënua netsiperabë-othopabiaba athëbëwetsica. Nexata, belia xanë amatanapianë tsaponae pacuenia cotsalamianana itsi. Acopibocopianënua, pacuenia cotsala.

³⁴Itsa baja, copiaerewereca siete pawaipeje tanetocaëjëtsijawa tanenaneconitsia-exanaecuenejawami, nexata tanaëcotsijawata athëbëabetsia, xanë, Nabucodonosornë, jamatabëjumaitsinë: «Xaniajai, Xamë, Diosomë, caenëmë Peponayanacua-ewetsinë daxitawecua», jamatabëjanë. Bajarapaepatota, natoyapëtaniji tanejumaitsicowëya tanetocanawiatsijawa, icatsia jiwi-jamatabëcuene taxinaejawa. Nexata, xanë pexaniacuenia wënëxaniatsiaya Diosojawabelia pepo-ayaijamatabëcuenenë yabara, daxitamatacabijawabelia peponaponae-nëcuene yabara-ata, jumaitsinë: «Xamë, Diosomë, nenamatacitorobisaë apoecatowerewerecaenë pepoPetuxanenëxaemë. Nexata, neyanacua-ewetsicue apocatowerewerecae tsane daxitamatacabijawabelia-nexa. ³⁵Xamë nitabarata daxita mapanacuapijiwinë pa-amatamobinë. Xamë exanabiabame pacuenia jitsipame pamonaë athëbëbëtsia pejinawanapaewijawabelia, bajarapacuenia pamonaë irajawatatsica pejinawanapaewijawabeliata. Itsajiwi-ata apocuenecaëjëpaetsi pecacueneyacaranatsijawa nesaëta nexanaejawanë. Apocuenecaëjëpaetsinua pecajumaitsinexa: '¿Detsa xuajitsia bajarapacuenia exaname?' pecajainexa», janë tawënëxaniatsijawata.

³⁶Bajarapaepatota jane baja, xanë natoyapëtaniji Dioso tanetocanawiat-sijawa icatsia jiwijamatabëcuene taxinaenexa. Nexata, netocanawiata icatsia tayanacua-ewetsicuenemi, caewëalia tayanacua-ewetsinexa, icatsia jiwi yaiyataeya ayaijamatabëcuenenëncuenia tanetaenexa. Nexata bajarapaepatota, tayajawanacuenebiwiimi nesiwapata. Nexata bajarapacuenia icatsia baja, caewëalia yanacua-ewetaponaponajë. Orijibia, pematatsënëa netocopata taxinaenexa bitso pinijitanamatacitorobisaë copiyapijisaëwecua.

³⁷Bajaraxuata, ajenaconoxae xanë, Nabucodonosornë, wënëxaniatajë yaiyataeya Dioso, ponë athëbëbëtsia peyanacua-ewetsinë, tsipajixua daxita bajaraPonë siwanajamatabëxaina pexanaenexa, pexaniacuenia exanabiaba. BajaraPonë beweliamatabëcuenewi exanabiaba pamonaë be-ayaijamatabëcuenewi penataewi, pacuenia baja neto-exana xanëjawaberena, janë Nabucodonosornë —jai petoyaquinaebaxutota daxitanacuanëpijiwijawabelia.

Pacuenia jiwicobe liwaisi yaquinaruca Belsasar pijaboyenepanajawata

5 ¹Nabucodonosor petëpaecujinae, pexë nato Belsasar^k naexana pepopeyanacua-ewetsinënexa Babilonia nacuata. Nexata, itsamatacabi

k 5:1 Belsasar: Bajaraponë tsaena Nabucodonosor pemomo, Naboin pexë nato.

bexëajawabelia, bajaraponë exana pinijifiesta, pebarëxaenexa pijajiwi mil ponëbeje, peyajawanacuenebiwi bajarapanacuata. Bajarapafiesta-jawata barëxane pexaejawa ayaijawa, barëmatawëjëa-apanua ayaijawa piatanevinoranë pamonaë daxita pejunatsiwi. ²⁻³ Belsasar piatanevinora penatsi-apaexae, naitajibiaxuaba. Pebarëyajamatabëcuene itoroba pijajiwi, petocaponaenexatsirena xuanë pecanacuenebijawanëmi Dioso Pijatemplo-bojawata, copajawanë, tasajawanë-ata, pexanaejawanë oronanitonëta, palatananijawanëta-ata, pecapatsijawanëmi pijasalinainë Nabucodonosor Jerusalén tomarawerena Babilonia tomarajawaberena. Bajarapacuenia itoroba tsipaji bajaraxuanëta jamatabëca-apa vinoranë, daxita pijajiwi pejunatsiwi, pamonaë ayaijamatabëcuenewi, bajaraponë pijawajiwi, powaxi-ata cotocaewi penotsiwxai. Nexata, pijajiwi tocaparenatsi bajaraponëjawa-berena bajarapacopajawanë oronanitota pexanaejawanë, palatananitota pexanaejawanë-ata. Nexata, bajaraponë bajarapacopajawanëta piatanevinoranë ca-apaepona, daxita pamonaë-ata pejunatsiwi bajarapafiestanexa. ⁴ Nexata, bajarapamonae bajarapacopanë peca-apaewata vinoranë, yayotaponaeya wënëxaniatapona¹ pijadiosowi jumapecataeya pexanaenëanë oronanijawanëta, palatananijawanëta, brancenianijawanëta, hierronanijawanëta, naejawanëta, bajarapacuenia ibotonëta-ata.

⁵ Bajarapaepatota, jemata naitajëta jiwicobe peyaquinarucaejaewa boyenepanajawata, bitso pexanianapebetsicotiajawata, pabota ponapona pepopeyanacua-ewetsinë. Nexata, bajarapacuenia pepopeyanacua-ewetsinë taenuca peyaquinarucaejaewa jiwicobe. ⁶ Nexata pepopeyanacua-ewetsinë petaejawata bajarapacobe peyaquinarucaejaewa, najunawiaca. Bajaronë ayaicuenia jamatabë-enatsi, bitso pecajunawi wayanataba. Orijibia a-epasisaëjibi. Belia, bitso sineconecojai, nexata matabacanabiabeje pecajunawi. ⁷ Bajaraxuacujinae, bajaraponë ayaijumeta wawajai petojunatsinexatsi pamonaë mapanacuapijicuene bitso peyapëtaewi, pamonaë peyapëtaewi tulupu pecanaëjëbicuenia, pamonaenua peyapëtaewi penajorobijawata. Daxita bajarapamonae pepatsicujinae, Babilonia nacua pepopeyanacua-ewetsinë jumaitsi bajarapamonaejawabelia:

—Ponë cuenecaëjëpatsi peyorobinexa mapa-itanejawanë rubena boyenepanata, ponë-ata netsipaebiana pajamatabëcuene yabarajumaitsi, nexata bajaraponë xanë xatatsia-exanaenajë pesaëjainawa. Wësixatatsia-exanaenajënua oronanijawata pexanaepanajawa, bajaraxuajawatabeje daxitajiwi peyapëtaenexa bitso peyaiyataenënexatsi. Orijibia, tocopatsianajë yawenonaeya acueyabinëcuenia tanecobena-ewetsinënexa —jai pepopeyanacua-ewetsinë.

⁸ Nexata bajarapaepatota, daxitawiriawi pijacujirucuenia peyapëtaewi pe-ëjëbijawata cujibarena pepopeyanacua-ewetsinëjawaberena, peyapëtaeya-exanaenexa picani. Itsiata baitsi jane, bajarapamonae caejiwi-ata apocuenecaëjëpaetsi peyorobijawa bajarapayaquinarutsijawa,

1 5:4 *yayotaponaeya wënëxaniatapona*: Pijawasojawanë peyayotaponaejawata, bajarapamonae wënëxaniata pijadiosowi pejumaitsiyawata: «Ayaijamatabëcueneenë raja wajadioso» pejaijawata wënëcacuaicuaijaiya pajumapecataenë yabaracuaicuaijai. Itsa jume: «Bitso pexanacuenia nacayawenonabiaba wajadioso», pejaijawata wënëcacuaicuaijaiya pajumapecataenë yabaracuaicuaijai.

peyapëtaeya-exanaenexa pepopeyanacua-ewetsinë pajamatabëcuene xaina bajarapa-itanejawanë. ⁹Bajaraxua petaejawata, nexata bajaraponë bitso najunawiaca. Orijibia, ayaicuenia pecajunawi ya-itabarawayana. Daxita pamonaë peyajawanacuenebiwi apoyapëtaë xua exanaejitsia. Bitso jamatabëcuenebëjai bajarapayaquinarutsijawa yabara. ¹⁰Itsia baitsi jane, Belsasar pena itsa jumetanetsi pewawajaijawa peyajawanacuenebiwi-ata, nexata muxunapata pabo-ënëjawata pexë nato barëxane pijajiwi. Jumaitsi:

—Catojitsipatsi, tajatuxanenëmë, neyanacua-ewetaponaponaejawa daxitamatacabijawabelianexa. ¡Pëtsa jamatabëcuenebëjamë! ¡Pëtsa nenabenajacaexae itabaranajeronamenua! ¹¹Neyanacua-ewetsinacuata raja caenë ponapona, ponë bitso peyapëtaenëxæ, nacatsita pejamatabëcuene caëjëpaeya-exanaenëtsi wajanacuapijidiosowi. Bajarapa-diosowi peyawenonabiabixaetsi, bajaraponë naexana bitso peyapëtaenë daxita jiwiwecua. Axapijinë pamatacabijawa yanacua-ewetsiaponapona, itsa tocapatatsi bajaraponë petocanaëjëtsinexa piayapëbejeliwaisianë, xaniawaetsia yapëtaeya-exanabiaba juya pacuenia exanaejitsia itsamonaë pecanaëjëbiwiwecua. Peyapëtaenë bitso anijajamatabëcueneliwaisibeje pexainaejawata-ata, bajarapacuenia-ata pecanaëjëtsinë. Bajaronë bitso cajena peyapëtaenë pecanaëjëtsicuene, pacuenia itsi diosowi. Bajaraxuata tajatuxanenë, axapijinë pepopeyanacua-ewetsinëmi Nabucodonosor, bajaraponë tocopata pepopenamatacaitorobaponaenënexa daxita pamonaë peyapëtaewi mapanacuapijicuenetuatuajëta, pamonaë peyapëtaewi pe-ëjëbijawata, pamonaë peyapëtaewi tulupu pecanaëjëbi-jawata, pamonaë-ata peyapëtaewi penajorobicuenia. ¹²Bajaronë raja pewënë Daniel, ponë pepopeyanacua-ewetsinëmi wënëruba Beltsasar. Bajaronë rajane xainaponapona ayaicuenia daxitajiwiwecua peyapëtaejamatabëcuene, pecanaëjëtsijamatabëcuene-ata. Nexata, xaniawaetsia yapëtaeya-exanabiaba pajamatabëcuene xaina xua jiwi amajitsinaë, apowajayapëtaejamatabëcuenemi-ata. Bajarapacuenia bitso piayapëbejeliwaisianë xaniawaetsia canaëjëtabiaba, peyapëtaeya-exanaenexa xua exanaejitsia. ¡Bajaronë pajunare tajatuxanenë, pecayapëtaeya-exanaenexa pajamatabëcuene xaina jiwicobe xua yaquinaruta boyenepanajawata! —jai pepopeyanacua-ewetsinë pena. Jejai nexata Belsasar.

¹³Daniel nexata caparenatsi pepopeyanacua-ewetsinëjawaberena. Nexata, bajaraponë yanjibatsi:

—¿Xaniajai tsabaja Judá nacujawawerena xamë Danielmë pecayajawacapsinërena petaiacawitsituatuajëta taxapijinë, pepopeyanacua-ewetsinëmi Nabucodonosor? ¹⁴Itsamonaë raja nejumaitsi xamë yabara diosowi pejamatabëcuene nexainaejawa itsamonaewecua. Bajarapacuenia xamë cuenewënëjunuame bitso neyapëtaenëcuene, xaniawaetsia liwaisi necanaëjëtsinëcuene-ata yabara. ¹⁵Picani raja mapanacuataje pejinawanapaewi xanë capatsia-exanajë daxita pamonaë bitso peyapëtaewi mapanacuapijicuene daxitajiwiwecua, tanetoyorobinexa picani bajarapayaquinarubi-itanejumenë boyenepanajawata, taneyapëtaeya-exanaenexanua pajamatabëcuene xaina. Itsia, bajarapamonaë apocuene caëjëpaetsi peyorobinexa, taneyapëtaeya-exanaenexanua pajamatabëcuene xaina. ¹⁶Xanë itsia, jumetaniji xamë yabara pecacuenecaëjëpaenëcuene

neyapëtaeya-exanabiabijawa pajamatabëcuene xaina jiwi piamajitsinaejawanë. Bajarapacuenianua cawënëtanetsi pecacuenecaëjëpaenëcuene peto-ayapëbejeliwaisianëtsi neto-itajëtabiabijawa, netoxanebijawanua xaniawaetsia petopitsapaenexatsi jiwi penatsixainaeliwaisianëwecua. Nexata, itsa xamë aeconoxae yorobianame bajarapa-itane, tanetsipaebinexamë pajamatabëcuene xaina, nexata xanë itorobianajë tajajiwi pecaxatatsinexa pesäëjainawa, bajarapacuenia pecatsiwësirutsinexanua oronanijawata pexanaepanajawa. Bajarapacuenianua catocopatsianatsi yawenonaeya acueyabinëcuenia tanecobenayanacua-ewetsinënexamë —jai pepopeyanacua-ewetsinë.

¹⁷Nexata, Daniel jumecanawiata:

—¡Bajaraxuanë natoxaniawaere saya, tajatuxanenë, xua picani jitsipame tanerajutsinexamë jiwi taneyaiyataenexa! Itsa jume, tocopatsianame itsanë nerajutsinexa, pecabarëyanexa. Bajaraxuanë xanë aponamatawenonaenë. Itsiata bailsi jane, tajatuxanenë, xanë yorobianajë pajumenë yaquinaruta boyenepanajawata. Xuacujinae, cayapëtaeya-exanaenatsi pajamatabëcuene xaina bajarapajumenë.

¹⁸»Tajatuxanenë, Dioso, ponë pepo-ayaijamatabëcuenenë, bajayata axapijinë, Nabucodonosor, tocopatatsi peyanacua-ewetsinënexa pinijninacua-xaneto. Bajarapacuenia tocopatatsinua ayaijamatabëcuenenënexa, jiwi pewënëxaniatabiabinexatsinua pexanaecuenëjawanë yabara. ¹⁹Nexata, bajaraponë ayaijamatabëcuenesaë xaina, Dioso perajutsixaetsi. Nexata, tomaranëpijiwi, daxitanacuanëpijiwi, daxitawirijumewi-ata, yaiyataeyabiabatsi. Cujunawiaya taeyabiabatsi. Ayaijamatabëcuenesaë pexainaexae, exanabiaba pejitsipaecuenia jiwijawabelia. Bajarapacuenia pexanaejawata, itsamonae pijajiwi wajabitsaë itorobabiaba pebeya-exanaenexa, itsamonae pijinia tocopatabiaba abaxë pejinawanapaenexa. Itsamonae pijinia tocopatabiaba peyaiyataenexatsi, bitso ayaijamatabëcuenewicuenia, bajarapacuenia itsamonae petaeyabiabinexa beweliamatabëcuenewicuenia. Daxita bajaraxua pejitsipaecuenecowëya exana, cueneyacaranatsinejewatsi. ²⁰Itsiata bailsi jane, itsamatacabi bajaraponë ayaijamatabëcuenenëcuenia natane Diosowecua. Bajarapacuenianua ajamatabëcuenetaja tsajopae ëpenatojitsipaecuenia pexanaponaponanexa. Ayaijamatabëcuenenë nataeya jiwi bejiobiataenejewa exanaponaponanua daxitacuene. Nexata, Dioso bajara-paepatota wecua-ajibia-exanatsi peyanacua-ewetsijamatabëcuenesaëmi, jiwi pewënëxaniatsicuenemitsi-ata ayaijamatabëcuenenë yabara. ²¹Juya tocopatatsi pewecuanatsatsinexa jiwiwecua pejinawanapaejawa. Jiwicuenia penajamatabëxainaejawami to-ajibitsi. Naexana juya bedajubinëcuenia. Nexata, bajaraponë wayafuabelia bowecua ponapona beqjunawiwi burromonaecuenia. Naxaeponapona pona, pacuenia vacamonae. Bajarapacuenia athëbëwetsica dono tsijuma-othopabiabatsi. Bajarapacuenia ponapona axapijinë, penatoyapëtaejawabelia pacuenia caenë Dioso pepo-ayaijamatabëcuenenë daxitawecua, pesaë pexinaenëcuenenua daxita jiwi peyanacua-ewetsiwiwecua. Penatoyapëtaejawabelianua pacuenia baja-raPonë to-itapetabiaba caenacua canacujitsia daxitanacuanëpijiwi pajiwi yanacua-ewetsia-exanaejitsia.

²²»Ajenaconoxae, tajatuxanenëmë Belsasar, bajaraponë pexëna-tomë, xamë jamatabëcuenëjëpame bajaraponëmi, axapijinëmi. Nexata,

ayaijamatabëcuenenëmë nataneme Diosowecua. Picani yapëtae-atamë xua tocopiapatatsi axapijinëmi, xamë itsiata ajenaconoxae beweliamatabëcuenenëcuenia apoponaponaemë Dioso pitabarata. ²³ Caranata saya juya, itsacuenia exaname. Xamë, tajatuxanenëmë, be-ayaijamatabëcuenenë nataneme Dioso athëbëtatsia pe-ecaenëwecua. Dioso apoyaiyataemë. Caranata, cuenecapocaponame. Nexata, itorobame pecapatsinexa nijamesajawaberena pacopajawanë pecanacuenebijawanëmi Dioso pijatemplobota, bajarapacuenia necuenecapocaponaenexa Dioso. Nexata, bajaraxuanëta xamë, neyajawanacaetuatsiwi, ayaijamatabëcuenewi, nijawaxi, cotocaewi nenotsiwxinua, bajarapacopajawanë paca-apaewanapame piatanevinoranë. Nexata, paneyayotaponaejawata pane-apaeranë, pawënëxaniataponame panijadioskowi, pepoDiosowecua. Pawënëxaniataponame jumapecataeya pexanaenëanë oronanijawanëta, palatananijawanëta, brancenanijanawëta, hierronanijawanëta, naejawanëta, bajarapacuenia ibotonëta-ata. Bajarapadioskowi apopetaewi, nexata apopacatae paneyayotaponaejawa panewënëxaniatsicuenia pane-apaejawata. Bajarapadioskowi apopejumetaewinua, nexata apopacajumetae panewënëxaniatsijumenë. Apopeyapëtaewi-ata itsacuenëjawa, nexata apoyapëtaenua papecayawenonaenexa. Itsiata, pepoDioso cuenecaëjëpatsi daxita bajaraxua pexanaenexa. Nexata, cuenecaëjëpatsi pecatocaëjëtsinexa netëpaejawanexa, itsa jume, niasaëtsaponaponaejawanexa, tsipaji xaina pecobeta daxita ne-exanaecuenëjawanënexa. BajaraPonë itsiata caeto-ata apopawënëxaniatsimë, ayaijamatabëcuenenë-ata. ²⁴ Bajaruata ne-ecaejawata, bajaraPonëwecua ayaijamatabëcuenenëmë nenataexae, imoxoyojawata catsi-itoroba bajarapajiwicobe pecatoyaquinarubinexa mapajumenëje: ²⁵ «MENE, MENE, TEKEL, UPARSIN^m», pejajumenë. ²⁶ Bajarapajumenë mapajamatabëcuene xainaje: MENE pejajamatabëcuene xaina: «Cato- caëjëta», pejajume. Bajarapajumeta cayapëtaeya-exana, tajatuxanenëmë, Dioso catocaëjëta neyanacua-ewetsicuenë pecatocopiarucaematacabinexa. ²⁷ TEKEL pejajamatabëcuene xaina: «Cajamatabëcuenecanaëjëta», pejajume. Bajarapajumeta cayapëtaeya-exana, tajatuxanenëmë, Dioso raja cajamatabëcuenecanaëjëta, peyapëtaenexa nejamatabëcuenenamamotsijawa. Caranata, catocaxitajaraba nejamatabëcuenefanaejawa, bijiaya neyanacua-ewetsinëxae. ²⁸ UPARSIN pejajamatabëcuene xaina: «Cawecuatsata», pejajume. Bajarapajumeta cayapëtaeya-exana, tajatuxanenëmë, Dioso rabaja cawecuatsata neyanacua-ewetsinacuanëmi, anijanacuabeje penacopatsinexa. Bajarapacuenia pecawecuatsatsixae, tocopata juya Media nacuapijiwi pewetsinë, Persia nacuapijiwi pewetsinëbeje, neyanacua-ewetsinacuanëmi pewetsinexabeje anijanacuabejucuenia necowëta —jai Daniel.

²⁹ Bajarapaepatota nexata, Belsasar caecuenia itoroba pijajiwi Daniel pejumaxatatsinexatsi pesäëjainawa. Bajarapacuenia petsiwësirutsinexatsinua oronanitojawata pexanaepanajawa. Nexata jane baja, Daniel wënëpaebanajetarubenatsi pecanacopatsijawa yawenonaeya acueyabinëcuenia pecobenayanacua-ewetsinënexa bajarapanacuata.

³⁰ Itsiata baitsi jane, bajarapamerawi Belsasar baja beyaxuabatsi pijawajabitsä, Babilonia nacua pepopeyanacua-ewetsinëmi. ³¹ Xuacujinae,

Darío jane baja, Media nacua pepopeyanacua-ewetsinē, yajawacanacopata pepopeyanacua-ewetsinēnexa Babilonia nacuata Belsasar pecowēta. Bajara-pacujinaeta Darío xaina sesenta y dos pawai-beje.

Daniel xuarecatsi newēthēmonae penubenaemēthējawareca

6 ¹ Darío penaexanaecujinae pepopeyanacua-ewetsinē Babilonia nacuata, najamatabēcuenewereta pitapetsinexa ciento veinte ponēbeje peyawenonaeya-ewetsiwinexatsi. Nexata, bajaraponē tocopata bajarapamonaē, caenē canacujitsia, pewetsinacuanē pecobena-ewetawanapaenexatsi gobernador-wicuenia. ² Itapetanua itsa-acueyabi ponēbeje penamatacaitorobiwinexa bajarapagobadorwi. Bajarapa-acueyabi ponēbejeyajuwēnēnē Daniel. Darío tocopata bajarapapenamatacaitorobiwi pecuenaetaeyabibinexa gobernadorwi, petsipaebinexa pepopeyanacua-ewetsinējawabelia pacuenia yanacua-ewetawanapa bajarapaciento veinte ponēbeje, bajarapacuenia peyajiwiataewanapaenexa pepopeyanacua-ewetsinē pewēnēliwaisibijianaeyaniwatsi, itsa bijiaya tonacuenebawanapa. ³ Itsiata baitsi jane, bajarapapenamatacaitorobiwituatuajēta nacuene-itajēta Daniel pecuenaecājēpaenētsicueene daxita pewetsiwiwecua, penamatacaitorobiwiwecua-ata. Bajaraponē pexainaexae itsamonaewecua xaniawaetsia pewetsijamatabēcuenē, nexata pepopeyanacua-ewetsinē siwanajamatabēxainaponaponatsi Daniel petocopatsinexatsi daxita peyajawanacuenebiwi pepopenamatacaitorobinēnexa peyanacua-ewetsinacuata. ⁴ Itsiata baitsi jane, paciento veinte ponēbeje Darío itapeta yawenonaeya nacua pewetsiwinexa, ponēbeje-ata Daniel najuanamatacaitorobaponapona bajarapaciento veinte ponēbeje, itsa jumetane pacuenia siwanajamatabēxainapona pepopeyanacua-ewetsinē petocopatsinexatsi Daniel pinijitaxunae, bajarapamonaē bitso cuenecaēbatsi. Nexata, tojaitabiabatsi pacuenia bajaraponē cuenewajunupaebijitsiatsi bijiaya penacuenebaponaejawa penamatacaitorobicuenejawata. Itsiata baitsi jane, Daniel apocueneacxitajarabitsi caejawayo-ata xua yabara naneconitsia-exanaejitsiatsi, tsipaji bajaraponē pexaniajaicuenia tonacuenebaponapona daxitacuenejawalia. Bajaraxuata, ayaicuenia jaitabiabi-ata peneconitsinexatsi, bajarapamonaē itsiata apocueneacājēpaetsi pewajunupaebijawatsi bijiata petonacuenebaponaponaejawa. ⁵ Nexata, bajarapamonaē bajaraxua yabara najumaitsi: «Pepacuene baja apotocaxitajarabitsi tsane bijiaya penacuenebijawa, caejawa-ata xua yabara neconitsijitsiatsi Daniel pepopeyanacua-ewetsinē pitabarata. Juya saya, betojaitatsi pacuenia bajaraponē apocueneacājēpaetsi tsane pejumecowēnētsijawanexa pepopeyanacua-ewetsinē. Betojaitatsi xua pijaDioso itawetatsi pexanaeyaniwa. Nexata, pijaDioso pejumecowēnētabiabinēxae, apojumecowēnētsi tsane pacuenia itorobatsi pepopeyanacua-ewetsinē. Matapania meta, bajarapacuenia jopaeya-exanaejitsipatsi», najai bajarapamonaē pecuenaecābixae Daniel-jawabelia.

⁶ Nexata, bajarapamonaē, ciento veinte ponēbeje yawenonaeya pewetsiwi, penamatacaitorobinēbeje yajawa, najumejaita pitapetsinexa bajarapamonaetatuajēta pamatabēxēyo ponaejitsia Daríojawabelia, pebarēcuaicuaijainexa. Nexata, itsa baja bajarapamatabēxēyo pata Daríojawata, bajarapamonaē jumaitsi:

—Patajatuxanenēmē, Darío, bitso pacatojitsipatsi xamē daxitamata-cabijawabelia neyanacua-ewetaponaponaejawanexa. ⁷Daxita paxanē patacacobena-ewetsiwi mapanacuataje, pa-ayaijamatabēcuenewinē, pabeweliajamatabēcuenewinē-ata, patanacaetuatsicujinae caejamatabēcuenē paxainajē mapacueneyabaraje. Bediosonēcuenia ayaijamatabēcuenē nexainaenēxae, pacasiwacanaējētatsi daxitajiwi penajamatabēcuenē-itajētsinexa pecayaiyataejawa pexanaejawata mapacueniaje: Treinta pama-tacabibejecuenia cuene-itawetsianame daxitajiwi penawajēcayaniwa itsadisoswijawabelia, jiwitonējawabelia-ata. Examējawabelia jamatejema penawajēcabiabinexa. Nexata, pajiwi aponawajēcae tsane xamējawabelia, bajarapajiwi naxuabiareca newēthēmonae penubenaemēthējawareca. ⁸¡Nexata, ajenaconoxae pepacuene xaniajaiya bajarapaliwaisi najumecopare! Yaquinarutsia-exanaename peyaquinaebaxutojawabelia. Xuacujinae, yajawanawēñyaquinarutsianame bajarapabaxutota itsajiwi-ata pexanetsiyaniwa, tsipaji acuenebi pexanetsijawa caejijiwiyo-ata, pe-iquinaejawanua nenawēñyaquinarutsicujinae. Waxaitsi daxita Media nacuapijiwitsi, Persia nacuapijiwi-ata xainatsi caeliwaisi wajajumecowēñētabiabinexa wajanacatonajumecopatsiliwaisianē wajanacayanacua-ewetsinēbeje penawēñyaquina-rutsicujinae —jai bajarapamonae.

⁹Nexata, pepopeyanacua-ewetsinē Darío jejai, petsitaxanepanaexaetsi bajarapa-itorobiliwaisi. Nexata, Darío yaquinaeaya-exana peyaquinaebaxutota bajarapaliwaisi. Xuacujinae, pexaniajainexa nawēñyaquinaruta peyaquinaepanatabujawata. ¹⁰Nexata, paepatota Daniel yapētane bajarapaliwaisi pepopeyanacua-ewetsinē penajumecopatsijawa, bajarapaepatota pona pijaboyabelia, penawajēcaenexa Diosojawabelia. Pepatsicujinae, bajaraponē baupata pijaventanawojoto, pabo-ēñējawata majitabiaba, athēbēyo irajawatatsia. Bajarapaventanawojoto ruca payenepananenia Jerusalén tomara eca. ¹¹Nexata, pacuenia pematabacabēta wajēcabiaba, acueyabi xua-beje caematacabi canacujitsia ventawojoto canacujitsialia, bajarapacuenia nuca pewajētsinexa Diosojawabelia pexaniacuenia wēñēxaniatanucae. ¹²Pecueneyapētaexae Daniel bajarapacuenia pexanabiabinēcuenē, nexata bajarapamonae junua peya-enebinexa Daniel peponaponaebojawabelia. Bajarajota, caxitajarabatsi penawajēcenucaejawata, pewēñēxaniatanucae-jawatanua pijaDioso. ¹²Bajarapaepatota, nexata bajarapamonae bepijiayo nawiabeca pepopeyanacua-ewetsinējawabelia, petsipaebinexa apopejumecowēñētsijawa penajumecopatsiliwaisi yabara. Nexata, bajarapamonae jumaitsi bajaraponējawabelia:

—Xamē, patajatuxanenēmē, ¿aponajumecopatsimē tsaja jiwi pena-wajēcayaniwa treinta pamatacabibejecuenia itsadisosjawabelia, jiwitonējawabelia-ata, examējawabelia penawajēcabiabinexa? ¿Apotocā-ējētsimē tsaja nexuabia-exanaenexareca newēthēmonae penubenaemēthēxanetojawareca daxita pamonae apopecajumecowēñētsiwi nenajumecopatsiliwaisi? ¿Bajarapacuenia tsaja aponaliwaisicaējētsimē? —jai bajarapamonae.

n 6:10 *Jerusalén tomara eca*: Dioso pijatemplobomi eca picani Jerusalén tomarata, Judá nacuata, Nabucodonosor pijajiwi wajabitsaē pebijianaewajēnaeya. Bajaraxuata, Jehová penajamatabēna-pitsinexa, Daniel wajēcabiaba paventanawojoto ruca payenepananenia eca Jerusalén tomara.

Nexata, pepopeyanacua-ewetsinē jumaitsi:

—Jājā, bajarapacuenia rabaja najumecopatajē —jai. —Nexata, pacuenia itsi tsabiabi Media nacua, Persia nacuabeje pitorobiliwaisianē pepopeyanacua-ewetsinēbeje peyaquinarutsicujinae, acuenebi jiwi pexanet-sijawa, pe-iquinaejawanua —jai.

¹³Orijibia, bajarapamonae icatsia jumaitsi:

—Daniel, ponē Judā nacuapijiwi petaicaewitsiyajuwēnēnē, apopecayaiya-taenēcuenia apojumecowēnētsi nenajumecopatsiliwaisi, penawajēcæjawata itsadisonējawabelia xamēwecua. Paxanē pacaxitajarabajē bajaraponē tsi-teca penawajēcabiabijawa acueyabi xuabeje pijaDiosojawabelia, pacuenia exanabiaba caematacabi canacujitsia —jai bajarapamonae.

¹⁴Nexata, pepopeyanacua-ewetsinē itsa jumetane bajarapacuenia pejumaitsiyawatsi, bitso bejamatabējiobireca. Caecuenia siwanajamatabēcuenewereta picani pacuenia capanepaejitsia Daniel bajarapaliwaisiwecua. Nexata, daxitamatacabijebi caniwiyojawabelia jaitaponapona pacuenia capanepaejitsia. ¹⁵Itsa abaxē jaitaponapona, cuenenajemata penajumecowēnētsinexa. Icatsia, belia bajarapamonae pata pepopeyanacua-ewetsinējawabelia, orijibia penajamatabēnapitsia-exanaenexatsi pacuenia tsicarucatsi penajumecopatsiliwaisi penajumecowē-exanaenexa. Nexata, asaēyata jumaitsi:

—Patajatuxanenēmē, xaniawaetsia xamē yapētaneme pacuenia to-acuenebitsi jiwi peliwaixanetsinexa, pe-iquinaejawa-ata penajumecopatsiliwaisi Media nacua, Persia nacuabeje peyanacua-ewetsinēbeje penawēnyāquinarutsicujinae bajarapabaxutota. Catsicaruca nexata nenajumecowēnētsijawa —jai bajarapamonae.

¹⁶Nexata, pepopeyanacua-ewetsinē Darío matapania itoroba pijajiwi wajabitsaē Daniel pecapatsinexatsirena, pexuabinexatsireca newēthēmonae penubenaemēthējawareca. Itsiata baitsi jane, penaneconitsia-exanaewajēnae pacuenia bajarapaliwaisi tocaējētatsi pexanaenexa, nexata Darío ajamatabēcuenesaēya-exanaeya jumaitsi Daniel-jawabelia:

—Daniel, nijaDioso, Ponē to-exanaponaponame pejitsipacuenia, bajaraponē baja cacapanepae —jaitsi.

¹⁷Nexata, Daniel pexuabicujinaetsireca bajarapamēthēxanetojawareca, bajarapamonae capata piniji-ibotoxaneto, bajarapamēthēcuaibo peyabaupaxatatsinexa. Xuacujinae, peyabaupaxatatsi-ibotoxaneto pemuxubērējawata catsana atsananijawanēta. Bajarapa-atsananitota pepopeyanacua-ewetsinē, peyajawanacuenebiwinua pija-anillojawanēta cacuetsanapona pecowēru-caenexa, Daniel petocopiapatsinexatsi xaniajaiya pacuenia baja tocaējētatsi penaneconitsia-exanaenexatsi, apopecumecowēnētsixae panajumecopatsiliwaisi Darío juta pejanaliwaisicuenia. Bajarapacuenia cacuetsanaponanua itsamonae muetsiacuenia pecapanepaeyaniwatsi. ¹⁸Bajaraxuacujinae baja, Darío nawiata peponaponaeboxanetojawabelia. Nexata, bajaraponē pijacamata boca pexaejawa xaenewewa. Pitsicuenejawanē bato-exanabiabatsi picani pebarēyaya-exanaenexa, bajaraxuanē-ata apotocopatsi, tsipaji bitso bajaraponē najamatabēxaina bajaraxua yabara. Orijibia jamatabēcuenebėjai. Daxita merawijebi apojamatabēcuenemajitsi. ¹⁹Nexata, ajenā matacabitsina, pepobajayacunua, bajaraponē naēcota, peponaenexa bepijia

newëthëmonae penubenaemëthëjawabelia, jamatejema peyapëtaenexa xua tocopiapatatsi Daniel. ²⁰Nexata, Darío itsa patanajetaruca bajarapamëthë-xanetojawabelia, nexata najamatabëxainaeya junata. Jumaitsi:

—Daniel, Dioso piasaëtsaponaponaenë pijajiwitonëmë, ¿nijaDioso tsaja cacapanepa bajarapanewëthëmonaenë pecaxaeyaniwa, paDioso xamë topo- naponabiabame xaniawaetsia? —jai.

²¹Nexata, Daniel jumecanawiata:

—Tajatuxanenë, catojitsipatsi niasaëtsaponaponaejawa daxitamatacabija- wabelianexa. ²²TajaDioso raja neto-itoroba pija-ángelnë, bajarapanewëthë- monae taneyajiwicuabocataitsinexa, tane-itsacueniabiyaníwa, tsipaji Dioso yapëtane xanë apotaxainaejawa itsacujiruneconi bajaraPonëjawabelia, xamëjawabelia-ata. Itsapibisiacuene-ata apocato-exanaetsi, tajatuxanenëmë —jai Daniel.

²³Nexata, pepopeyanacua-ewetsinë Darío jamatabëcuenebarëya bitso. Nexata, itoroba pijajiwi pewecuajutsinexatsi Daniel pamëthëjawata nubena newëthëmonae. Nexata, itsa jutatsi baja bajarapamëthëwecua, apocaxitaja- rabitsi peperabëtojawata itsacuenewajënë-ata, tsipaji bajaraponë itaxutua- jamatejema pijaDiosojawabelia peyawenonaenexatsi. ²⁴Bajaraxuacujinae, pepopeyanacua-ewetsinë juya itoroba pecapatsinexatsi pamonaë Daniel cuenewajunupaebatsi penaneconitsinëcuene yabara, bajarapacuenia pijawa- jiwi yajawa, pexijiwixiyajawa-ata. Nexata, daxita bajarapamonae enerecatsi bajarapamëthëxanetojawareca, itsajota nubena newëthëmonaenë. Bajarapa- monaemi pepenetsijawatatsireca, patsinejewa irabereca bajarapanewëthë- monae siwajirewecatsi pexaenexatsi. Pexaejawatatsi yasitsicabaxanetsi.

²⁵Bajaraxuacujinae, Darío tonajumecopata pejanaliwaisi daxita peyanacua-ewetsinacuata pejinawanapaewi pejumecowënëtsinexa. Baja- rapaliwaisi daxita jiwi peyapëtaenexa, toyaquinarutsia-exana peyaquinae- baxutota, pitorobinexa daxita tomaranëjawabelia, daxita nacuanëjawabe- lia, daxitawiriajumenë pecuaicuaijajiwijawabelianua. Mapejumaitsicuenia toyaquinaeya-exanaje: «Pacatojitsipatsi jamatejema pexaniacuena panejina- wanapaajawa, panecobecowëjawanë-ata papecatonawitsinexa.

²⁶»Orijibia xanë paca-itorobatsi, pacatonajumecopatatsinua daxita panejinawanapaewi tayanacua-ewetsinacuajawa paneyaiyataeyabiabi- nexa, panewënëxaniatabiabinexanua Daniel pijaDiosojawabelia, tsipaji raja, bajarapaDioso piasaëtsaponaponaenë. Apopewerewerecaenë dxi- tamatacabijawabelianexa. Peyanacua-ewetsicuenie epatua apotowerewe- recaetsi tsane. Penamatacaitorobisaë-ata epatua apotowerewerecaetsi tsane. ²⁷Jiwi petsi-ayaicuenetsiwecua pecapanepaenë. Pijawajabitsaë pecobewecua pewecuajutsinënua. Petsita-exanaponaenë bitso pini- jicuenejawanë athëbëtatsia, irajawatatsica-ata. Bajarapecuene-itsinëxae, Daniel capanepatsi baja, xaenejewatsi newëthëmonae», jai Darío peyaquinaeya-exanaebaxutota.

²⁸Bajaraxuacujinae, Daniel tsitecaeya nacuenebaponapona peyanacua- ewetsiwituatujëta, petonacuenebinë tsaponaponaë Darío peyanacua- ewetsimatacabianë Babilonia nacuata. Bajarapacuenia orijibia tonacueneba- ponapona Ciro, Persia nacupijinë peyanacua-ewetsimatacabianë Babilonia nacuata, Darío pecowëta.

**Daniel tsitajëta xuanë taeyabiaba bemajitsinaebocuenia
Belsasar peponaponaematacabita**

Daniel tane bemajitsinaebocuenia cuatro ponëbeje pitothianëanë

7 ¹Itsa abaxë Belsasar-pijinë xaina caewai peyanacua-ewetsijawa Babilonia nacuata, bajarapawaijawalia itsamerawi xanë, Danielnë, amajitsinaenë. Bajarapacuenia taniji majitsinaebocuenia nawitsia itsacuenëjawanë, tabocaejawata tajacamata. Xanë tanaëcotsijawata, yaquinajë daxita xuanë penamatomotsijawanë, tataejawanë bemajitsinaebocuenia. Taxuxuabajë tayaquinaejawa bajaraxuanë yabara mapacueniaje:

²«Bemajitsinaebocuenia xanë taniji merawi jowibo namata-enetsia pebubujaijawa cuatro payenepanabejajawawerena manuamenematatsënëwereco. Nexata, bajarapajowibonëta bitso exana ayaicuenia malataca namata-enetsia manuamena. ³Jemata bajarapaepatota pitsapaina bajarapamanuamenejawawetsina cuatro ponëbeje pitothianëanë,^o piayainëxanetonë. Daxita bajaraponëanë nawecua-aitothia tsaponae saicayacuenia. ⁴Copiaya ponë pitsapaina, bajaraponë jëpa newëthë petsobianë^o pinijinë. Pexainaenë pejumata becotsalacorofetoxanetobeje. Xanë paepatota taenucajë, bajarapacorofetomibeje wejuma-ucutatsi. Xuacujinae, bajarapanewëthëxaneto petaxutabeje nucaeya-exanatsi jiwitonëcuenia. Bajaraponë tsijamatabërutatsi jiwijamatabëcuene pexainaenënexa, jiwicuenia penajamatabëxainaenënexa.

⁵»Bajaraxuacujinae, icatsia taniji itsanë piayainë. Cotocaewi ponë pitsapaina, bajaraponë pejëpaenë be-unupijinë pianaepanaenë oswirianëcuenia.^q Bajaraponë nayenepanayotsiya nuca caenenia. Wonuanucapona

o 7:3 cuatro ponëbeje pitothianëanë: Bajarapacuatro pitothianëanë nacatocuenecatane cuatro pa-imperioebeje; baitsi, cuatro payanacua-ewetsinacuanëbeje pinijnacuaxanetonë. Caenë canacujitsia pitothianë nacayapëtaeya-exana pitsicuene xainaejitsia caenacua canacujitsia pewetsinë peyanacua-ewetsijawata. Bajarapapithothianëanë, Daniel pamona tane, itsamona cuenëjëpae-ata newëthë, itsiata newëthëmomowi yabara apocuene-itajëtsi. Cuene-itajëta saya nuanë yabara. **p 7:4 newëthë petsobianë:** Bajaraponë nacatocuenecatane Babilonia peyanacua-ewetsinacuaxaneto (Imperio Babilónico). Nexata, Imperio Babilónicopijiwi canaëjëta petsobianewëthë, pinijiwiranë, bepeyanacua-ewetsinë daxita unupijiwi. Canaëjëtanua cotsala bepeyanacua-ewetsinë daxita pepunaewi. Bajarapacuenia pecanaëjëtsixae, Imperio Babilónico pewetsiwi natocanaëjëta pewetsijawa, daxita jiwi, unupijiwi, pepunaewi-ata, pejinawanapaewi peyanacua-ewetsinacujawa. Pacuenia cotsala bepjiayo pata itsabelia pona, bajarapacuenia Imperio Babilónicopijiwajabitsaewi bepjiayo cuene-amoneyabiaba panacuanëpijiwijawabelia tsimaxëpatabiaba. Jiwi jumapecataenëxaneto pematabocoto oronanito pexanaejawa Dan. 2:36-40, petsobianewëthë pinijiwiranë-ata Dan. 7:4, bajaraxuabeje nacatocuenecatane Imperio Babilónico yabara. **q 7:5 pianaepanaenë oswirianë:** Bajaraponë nacatocuenecatane Medo nacuapijiwi, Persa nacuapijiwibeje peyanacua-ewetsinacuaxaneto (Imperio Medo-Persa). Nexata, Persa nacua, ayainacuaxae Medo nacuawecua, bajaraxuata osonë caeyenepana boca. Baitsi, piapiyenepana cuenecatane Persa nacua, petoyaecaeyenepana pijinia Medo nacua. Pa-acueyabi payenesitobeje pewonuanucaponaejawa cuenecatane acueyabi panacuanëpijiwibeje pecuene-amoneyabijawa, pija-iranë penaxainaeyabicujinae, pijinacuaxaneto pexanaenexa; Babilonia nacuapijiwi, Lidia nacuapijiwi, Egipto nacuapijiwi-ata. Pacujinae ángelnë itoroba osonë pexaenexa ayaijawa pewi, bajaraxua nacatocuenecatane pacuenia Imperio Medo-Persa nacuapijiwi peyanacua-ewetsinë ayaicuenia bejiobia-exanaejitsia jiwi. Jiwi jumapecataenëxaneto pemipabë, pemaxëbeje yajawa, palatananitota pexanaejawanë Dan. 2:32, bajarapacuenia osonë Dan. 7:5, bajarapacuenia oveja pebito Dan. 8:3-4, 20, daxita bajaraxuanë nacatocuenecatane Imperio Medo-Persa yabara.

acueyabi payenesitobeje. Nexata, bajaraponē pitorobijawatsi, jumetaniji mapacueniaje: ‘¡Ponare! ¡Xaema daxita pawī cacuenecaējēpa nexaejawa!’, pejaijawa.

⁶»Bajaraxuacujinae, icatsia taniji acueyabinē pepitsapaejawa manuame-nejawawetsina. Bajaraponē pejëpaenē leopardowirianewēthē^r peyaquijainē, pebitsojinaenē. Bajaraponē pejumajawata xaina cuatro pacorofetobeje. Tanijinua bajaraponē pexainaejawa cuatro pamatabocotobeje. Nexata, bajaraponē rajutatsi pinijisaē, pejamatabēcuenecaējēpaenexatsi daxita peyanacua-ewetsijawa.

⁷»Bajaraxuacujinae, icatsia taniji bemajitsinaebocuenia cuatronē. Bajaraponē pepopiyainē^s. Waja-itaxutuanabenajacaenē. Bitso pepopibisianē. Bitso ayaicuenia pepopiasaēnēnua. Bajaraponē xaina pinijihierrowonotonē. Nexata, bajaraponē daxita epa-ucubaxaenajetaruca pexaeponaejawata. Xuanē wecuaibo-othopatsi, bajaraxuanē cuetsabataxuabapona. Bajaraponē xaina diez pamata-etobeje pematabocotota. Bajaraponē bitso wecua-aitothia daxita pamonaē copiya taniji bemajitsinaebota, acueyabi ponēbeje pitothianēanē.

⁸»Paepatota xanē taenucajē bajaraponē pemata-etonē, taniji pepitsapaejawa itsatsiquirimata-etoyo bajarapamata-etonētuauijēta. Pepitsapaejawata, wematabocojopaeya-exana acueyabi pamata-etomibeje, copiya picanī xuanē xaina. Bajarapamata-etoyo xaina bejiwitonē-itaxutobeje, pecuaibowojoto-ata. Nexata, cuaicuaijai tsabiabi, ayaijamatabēcuenenē nataeya.

Dioso jiwi penaneconitsia-exanaematacabinexa

⁹»Bajarapamata-etoyo itsa abaxē cuaicuaijai tsarucae, bajarapaepatota icatsia taeponajē bemajitsinaebota penubaponaejawa athēbētatsia trono-jawanē, itsaxuanēta enaejitsia pamonaē jiwi pijaneconi petocanaējēbiwinexa. Bajaraxuanē penubicujinae, caetronojawata eca ponē Pepoperujunē,

r 7:6 *leopardowirianewēthē*: Bajaraponē nacatocuenecatane Griego peyanacua-ewetsinacuaxaneto (Imperio Griego). Nexata, pacuenia leopardowirianewēthē pēbitsojinaenē, bajarapacuenia Imperio Griego peyanacua-ewetsinē, Alejandro Magno, bepijiayo cuene-amoneyaba daxitanacuanēpijiwi. Pacuatro pamatabocotobeje xaina bajarapanewēthē, nacatocuenecatane cuatro ponēbeje pepopenamatacaitorobiwi wajabitsaēwi (generales), pamonaē yanacua-ewetsijitsia Imperio Griego nacujawata, Alejandro Magno petēpaecujinae. Baitsi, bajarapanacuaxanetomi tsatsijitsia cuatro panacuabejenexa, caepenamatacaitorobinē canacujitsia peyanacua-ewetsinexa cae-iratupayo. Jiwi jumapecataenēxaneto pecototo, pethaēto-bejeyajawa, broncenanito pexanaejawanē Dan. 2:32, bajarapacuenia leopardowirianewēthē Dan. 7:6, bajarapacuenia chivo pēbito Dan. 8:5-14, 21-26, daxita bajaraxuanē nacatocuenecatane Imperio Griego yabara. **s 7:7** *pepopiyainē*: Bajaraponē nacatocuenecatane Roma peyanacua-ewetsinacuaxaneto (Imperio Romano). Itsa jume, itsamonae pijinia canaējēta bajarapapiayainēxaneto pecuencataejawa «Califato Islámico». Apoyapētae-atatsi pepacuene panacua yabara nacatocuenecatane, itsiata pacuenia bajarapapiayainē, bitso pibisianē daitawecua pitothianēanē, bajarapacuenia panacua nacatocuenecatane acue-ithiaijitsia peyanacua-ewetsijawata. Baitsi, pitaxutotsoniataejamatabēcuenē apoxainaejitsia. Itaxutejema werebiabanajetarucaejitsia pecuene-amoneyabijawata. Nexata, jiwi jumapecataenēxaneto petopabeje, petaxubeje yajawa, hierronanito pexanaejawanē Dan. 2:33, bajarapacuenia papiayainē Dan. 7:7, bajarapacuenia papiayainē apóstolnē Juan tane bemajitsinaebocuenia Apoc. 13:2-jawata, daxita bajaraxuanē nacatocuenecatane Imperio Romano yabara, itsa jume, Califato Islámico yabara meta tsipae. Taema «peyapētaeya-exanaeliwaisi mapabaxuto penamataxainaejawataje».

daxitacuene pewajënaeya peponaponaenë. Bajaraponë penaxatatsijawa bitso pepopeniojaijawa, pacuenia pebinejainioponaejawa. Bitso pematobocoto matananiojai, pacuenia papaëputo baniojai.⁶ Bajaraponë pe-ecaetronojawa xaina petaxutoyorotojawanë. Bajaraxuanë xaina be-isotocotia bitso pitatsa-jawijawanë.¹⁰ Bajaraponë pe-ecaetronojawawelia pitsapa nawotsiaya pitatsajawicotiaxaneto pacuenia pepamene. Bajaraponë xaina bitso ayaicuenia pepo-ayaibitsaëtoxaneto ángelewi petonacuenebiwitsi, jiwi apopenamata-ëjësicapaneacuena. Orijibia, jiwi ayaibitsaëtoxaneto nubena bajaraponë pitabarata, ángelewi matatoxenetsia. Bajaraxua tataejawata, netsita jiwi pijaneconi pexainaewi petocanaëjëbitaxunaenexa. Nexata jane baja, tro-nota pe-ecaenë, jiwi pijaneconi petocanaëjëbinë, taxuxuaba mapanacua-pijiwiije pijaneconi pexainaewi petocaëjëtsinexatsi, caejiwiyo canacujitsia, penaneconitsia-exanaenexa. Nexata, payaquinaebaxutonëta rubena jiwi pexanaecuenemi peyaquinarubijawa, pãteca jane baja, paneconiawjeto xaina baparapaneconicowëya penaneconitsia-exanaenexatsi.

¹¹»Bajarapaepatota pijinia, jumetaeponajë tsitecaeya tsiquirimata-etoyo nawënëxaniatsiaya penayabaracuaicuaijatsaponaewa be-ayaijamatabëcuenenë nataeya. Xua jumaitsi tsaponae nejamatabëcuenenajaca tajumetaenucaejawata. Bajarapaepatota pijinia, taniji pebexa-xuabijawatsi cuatronë, ponë pepopitothianë daxitawecua, bajarapamata-etoyo yajawa. Bajaraponëmi tupatitcatsi, pepotsiquirijawaxi pexanaenexa. Bajarapatsiquirijawaxi pexanaejawa jane baja, penelia isotojawalia, pa-isotocotia pitsapa nawotsiaya Pepoperujunë pe-ecaetaxunaejawawerena bepepamenecuenia.¹² Bajarapijinia pacuenia, acueyabi ponëbeje pitothiawi, copiaje pepitsapaewi, wecua-ajibia-exanatsi pecuenesaëjawami. Itsiata jane abaxë, tocopatatsi saya cae-epatoyo piasaëtsawanapanaenexa, petocopiapatsi-jawabeliatsi pewecua-ajibia-exanaematacabinexatsi.

¹³»Orijibia, bajarapamerawi taeponajë bemajitsinaebocuenia maxua-nëje. Xanë taniji jemata penaitajëtsijawa penajetarucaenë itarërëbotuatua-jëta, jiwitonë pejëpaenë.¹⁴ Bajaraponë najetaruca, pepatsinexa itsajota eca Pepoperujunë. Nexata, tocopatatsi pimoxoyotsinexa bajaraponë Pepope-rujunë pe-ecaejawabelia.¹⁴ Nexata, bajaraponë tocopatatsi piacuenesaë-jawa pexainaenexa, ayaijamatabëcuenenëcuenia petanexatsi, peyanacua-ewetsinexanua daxitanacuanëpijiwi. Nexata, bajaraponë pitorobicuenia daxitanacuanëpijiwi, daxitawiriajumewi-ata tonacuenebawanapaenatsi, penajamatabëcuene-itajëtsinexatsi asiwaya peyaiyataejawa. Papiacuenesaë xaina bajaraponë peyanacua-ewetsinexa, apotowerewerecae tsanetsi. Bajarapijinia pacuenia, peyanacua-ewetsicuenia itsajiwi-ata apocuene-amoneyabi tsanetsi pewecuapitsinexatsi.

t 7:9 *pacuenia papaëputo baniojai*: Hebreojume canacueneba picani mapajumexije: «bepequiatsilana peniojaijawa». Bajaraxua apopetaejawami jiwi picani. Nexata, wecuajume-aitothia papaëputonexa. Itsiata, naniojaijëpabeje. u 7:13 *jiwitonë pejëpaenë*: Bajaraponë raja Jesucristo. Mateo, Marcos, Lucas-baxutonëjawa bajarapajumecowëya wënërubatsi Jesús «Daxitajiwi Pematapijinë». Taema Mt 24:27, 37, 44; Mc 8:38; 14:62; Lc 17:30. Nexata, pa-iboto bijiana jiwi jumapecataenëxaneto Dan. 2:34-jawata, bajarapacuenia ponë jiwitonë pejëpaenë Dan. 7:13-jawata, bajaraxuabeje nacatocuencatane Jesucristo, pacujinae yanacua-ewetsiana 1000 pawaihejecuenia daxitanacuanëpijiwi nacua pecopiarucaewajënaeya.

Pajamatabëcueneliwaisi xaina xuanë Daniel tane bemajitsinaebocuenia

¹⁵»Daxita xuanë xanë Danielnë taniji bemajitsinaebocuenia, bajara-xuanë yabara natsijunawajë, tanejamatabëcuenematatoxenetsixae. Nexata, jamatabëcuenebëjanë daxita bajaraxuanë tataejawanë yabara. ¹⁶Nexata, xanë imoxoyotajë itsanë bajarapa-ängelewiyajuwënëñëjawabelia, pamonae tonacuenebawanapa Pepoperujunë, tronojawata pe-ecaenë. Wajëtajë xanë pexaniajaili waisi tanetsipaebinxaxa pitsicuene yabara amajitsinaenë, pajamatabëcuene-ata xaina taneto-itajëtsinexa. Nexata, bajaraponë neju-mejejai tanetsipaebinxaxa. Nejumaitsi: ¹⁷‘Xua taneme cuatro ponëbeje pitot-hiawi, bajaraxua raja jamatabëcuene-itajëta cuatro panacuaxanetobeje, jiwi peyanacua-ewetsijawanexa mapanacuataje. ¹⁸Itsia, bajarapacuatro panacuaxanetobeje pewetsiwi petocopiarubenaecujinaetsi tsane daxita nacuanëpijiwi peyanacua-ewetsijawa, bajarajane Dioso ayaijamatabëcuenenë tocopatsiana pijajiwi pitapetsiwi’ peyanacua-ewetsinexa daxita nacua-nëpijiwi. Nexata, bajarapamonae daxita nacuanëpijiwi yanacua-ewetsiana daxitamatacabijawabelianexa. Apotocopiarucaetsi tsane bajarapayanacua-ewetsicuene,’ nejai bajaraponë.

¹⁹»Nexata, xanë jumaitsinë bajaraponëjawabelia: ‘Xanë bitso jitsipajë picani pexaniajaicuenia tayapëtaejawa cuatronë yabara; ponë ayaicuenia pitothianë, bitso pepopiayainë dexitawecua, ponë xaina hierrowo-notonë, broncecopibocotonë-ata. Ponënuu jiwi pebeyaxuabaponaejawata epa-ucubaxaepona, cuetsabataxuabaponanua xuanë penacopabijawanëmi. ²⁰Bajarapacuenia-ata jamatabëyapëtaniji xua yabara diez pamata-etobeje xaina pematabocotota. Xua yabara-ata naitajëta tsiquirimata-etoyo, coto-caewi pepitsapaejawa. Xua yabara tsiquirimata-etoyo jopaeja-exana itsa-acueyabi pamata-etomibeje, copiaya penubenaejawanëmi. Xua yabara bajarapatsiquirimata-etoyo xaina pitaxutobeje, pecuaibowojoto-ata penayabaracuaicuajainexa bitso ayaijamatabëcuenenëcuenia nataeya. Bajarapitsicuene pexainaexae tsiquirimata-etoyo, xanë netsita bitso bepenamatamotsimata-eto itsamata-etonëwecua. ²¹Bajarapacuenia canaëjtajë, tsipaji itsa abaxë taeponajë tamajitsinaejawata bajarapacotocaewi penaitajëtsimata-etoyo pejamatabëcuene-itajëtsinë taxuxuaba pebarënewajabitsaëtaponaejawa Dioso pijajiwi pitapetsiwi jawabelia, pecuene-amonaeyabaponaejawanua bajarapamonaemi, pepatsijawabelia Pepoperujunë dexitawecua. ²²BajarapaPerujunë, ponë Dioso pepo-ayaijamatabëcuenenë, pexaniacuenia yawenonaena pijajiwi pitapetsiwi,

v 7:18 pijajiwi pitapetsiwi: Bajarapajume yabaracuaicuajai Israel-pijinë pemomoxi picani. (Deut. 7:6; 1Sa 10:1; Sal. 106:5) Nexata, Jesucristo penaexanaewajënaeya, pamatacabi yabara Dan. Capítulo 8, 11-beje nacatsipaeba, yapëtanetsi pacuenia itsamonae peyanacua-ewetsiwi ayaicuenia bejiobia-exana Dioso pijajiwi, israelitawi. Itsia, Dioso penaneconitsia-exanaematacabita mapanacuapijiwi siete pawabejucuenia, yapëtanetsi pacuenia Anticristonë bejiobia-exanaejitsia daxitajiwi Dioso pejumecowënëtsiwi, judfowi, apojudfowi-ata. Baitsi, apo-ëjudfowi yabarajumaitsi Apocalipsis-baxutota. Bajarapananeconitsia-exanaematacabi pecopiarucaecujinae, Cristo yanacua-ewetsiana daxita nacuanëpijiwi Israel-pijinë pemomoxi pejinawanapae-nacuajawawerena. Bajarapacuenia yabara, nexata yapëtanetsi pacuenia «Dioso pitapetsiwi» yabaracuaicuajai-ata israelitawi, itsajawata yajawacajunua itsamonae Dioso pejumecowënëtsiwi, apojudfowi-ata.

pecapanepaenexa tsiquirimata-etoyo pecuene-itajëtsinë pebejiobia-exanaponaejawamitsiwecua. Bajaraxuawecua pecapanepaecujinae, Dioso tocopatsiana pijajiwi peyanacua-ewetsinexa daxita nacuanëpijiwi,' janë ángel-nëjawabelia, taneyapëtaeya-exanaenexa pajamatabëcuene xaina xua yabara yanijobajë.

²³»Bajarapa-ángelnë tanejumecanawatsijawata nejumaitsi: 'Ponë taneme piayainë, cuatronë pepitsapaenë, bajaraponë cuene-itajëta mapanacuapiji-wije cuatronacuaxanetocuenia peyanacua-ewetsijawanexa. Bajarapacuatro-nacuaxaneto peyanacua-ewetsiwi wecua-acuene-itothia tsane peyanacua-ewetsijawata, copiaya pamonaemi yanacua-ewetawanapa acueyabi panacuamibeje. Nexata, bajarapacuatronacuaxaneto pewetsiwi exanaena mapacueniaje: Pijajiwi wajabitsaë anaeya werebiabaponaena itsanacuanë-pijiwi pecuene-amoneyabaponaejawata, pacuenia pianaeptanae-unupijinë werenepona pexaeptanaejawata pebeyaxuabinë. Nexata, pexaeweretsicujinae penacopabiwijawanë, cuetsabataxuabapona bëjainejewa penucaponaejawata, bajarapacuenia pijajiwi wajabitsaë pecuene-amoneyabiwimi itsaxutotsoniataenejewa bejiobia-exanaponaena. Pacuenianua bajarapa-unupijinë pexaenënexa tupatiticabiaba, bajarapacuenia bajarapawajabit-saë peyacajërëbi-iranëmi natsicobetsanaena penajua-ewetsinexa. ²⁴Padiez pamata-etobeje pijinia taneme, bajaraxua cuene-itajëta diez ponëbeje penajuanacobena-ewetsiwinexa bajarapacuatronacuaxanetojawata, caenë canacujitsia pewetsiwinexa saicaya pija-iratupayo. Bajarapadieze ponëbeje penajuanacobena-ewetaponaejawata, itsamatacabijawabelia itsanë icatsia naitajëtsiana bajarapamonaetuatuajëta. Bajaraponë, cotocaewi panaitajëtsinë, ponë cuene-itajëta tsiquirimata-etoyo, bajaraponë wecua-acuene-itothia tsane copiyapijiwi peyanacua-ewetsijawawecua bajarapanacuaxanetojawata. Nexata, bajaraponë tsmaxëpatsiana acueyabi ponëbeje penajua-ewetsiwiwijawabelia pecuene-amoneyabijawabelia. Bajaraponë pecuene-amoneyabicujinae bajarapamonaemi, nexata yanacua-ewetsiana peyanacua-ewetsi-iratupanëmi. ²⁵Nexata, bajaraponë bitso pibisiacuenia baracuaicuajai tsane Dioso pepo-ayaijamatabëcuenenë. Orijiibia, ayaicuenia jamatabë-itonotsiana Dioso pijajiwi pitapetsiwi, pecopabia-exanaenexa pejumecowënëtsijawami Dioso petonajumecopatsiliwaisitsi. Nexata, bajaraponë jaitsiana pacuenia xanetsijitsia Dioso Moisés-pijinëta petonajumecopatsiliwaisitsi, pemuxufetsinexa pexaniajailiawaisiwecua. Bajarapacuenia jaitsiananua petixitsinexa penacatuatsimatocabianëmiwecua Dioso pexanaecuenemi penajamatabënapitababinexa, itsamatacabijawabelia najamatabanapitsiaya penacatuatsinexa Dioso petonajumecopatsimatocabianëmiwecua. Nexata, bajarapacuatro peyanacua-ewetsinacuaxaneto pewetsinë peliwaissisaëbëxëpanayo Dioso pijajiwi jinawanapaena bejamatabëcuene acueyabi pawaiubeje epatuajawa.»

²⁶»Itsiata baitsi jane, belia Pepoperujunë daxitawecua, athëbëtsia pe-ecaenë tronojawata, jiwi pijaneconi yabara petocanaëjëtsinë, bajaraponë

w 7:25 *acueyabi pawaiubeje epatuajawa*: Wowaijumeta capitsapa mapajumecueniaje: «un tiempo, y tiempos, y medio tiempo». Itsiata, apóstolnë Juan nacayapëtaeya-exana pacuenia bajarapajumenë nacatocaëjëta acueyabi pawaiubeje epatua yajawa. Taema Apoc. 12:14; 13:5-6.

petoyapëtaexaetsi penaneconitsinëcuene, nexata wecua-ajibia-exanaenatsi piacuenesaëjawa bajarapayanacua-ewetsicuenewecua, ayaijamatabëcuenenë penataenëmi. Peyanacua-ewetsicueneminua tobijianaenatsi. Nexata, tocopiarucaenatsi baja. ²⁷Bajarapacuenia petocopiarucaecujinaetsi, Dioso pepo-ayaijamatabëcuenenë tocopatsiana pijajiwi pitapetsiwi peyanacua-ewetsinexa daxitanacuanë mapanacujawataje, bajarapacuenia pejamatabëcuenematatoxensinexa daxita pamona yanacua-ewetawanapa. Bajaraxuata, daxitanacuanëpijiwi jumecowënëtabiabiana Dioso pijajiwi, pitorobicuenia pexanawanapaenexa. Dioso pijajiwi peyanacua-ewetsicuenepowerewerecae tsanetsi. Canacopatsiana daxitamatacabijawabelia,» nejai bajaraponë, tataejawata bemajitsinaebota.

²⁸»Bajarajota, werewereca baja tataejawa bemajitsinaebocuenia.

Itsia, xanë, Danielnë, bajaraxua yabara jamatabëcuenebëjanë tsa-biabi. Tacanaëjëbaponaejawata xua taniji bemajitsinaebota, bitso xanë nejamatabëcuenebëjaiya-exana. Belia, itabaranajeronajë tacajunawi. Itsia baitsi jane, moyanë. Apotsipaebinë itsamonaejawabelia. Tajamatabëcueneta saya natoxainajë», jai Daniel peyaquinaejawata piamajitsinaejawa yabara.

Daniel tane bemajitsinaebocuenia anijawiriapebitobeje, oveja, chivo-ata

8 ¹Daniel icatsia jumaitsi peyaquinaejawata: «Itsamatacabijawabelia, Belsasar itsa baja xaina acueyabi pawai-beje peyanacua-ewetsijawa, xanë, Danielnë, icatsia taniji bemajitsinaebocuenia copiaya xuanë tataejawanëwecua. ²Bemajitsinaebota xanë nataniji tanucaejawa Susa tomarata, penatonacuenebanutsitomara pijawajabitsaëwecua penayajiwitaenexa, Elam nacua pe-ecaetomara Ulaimene-itapajawata. ³Nexata, xanë tanaë-cotsijawatalia, tajëwetsina taenutajë oveja pebito penucaejawa Ulaimene-itapajawata. Bajaraponë xaina anijamata-etobeje. Bajarapamata-etobeje piapiamata-etobeje, itsia caemata-eto netsita amata-epia cotocaewimata-etowecua. ⁴Taniji bajaraponë penamata-e-cawetsijawa petsimaxëponae-jawanexa waëyabetsia, norteyenepanajawabelia,^x bajarapacuenia sur-yenepanajawabelia-ata.^y Bajaraponë itsadajubinë-ata apocuenecaëjëpaetsi pecueneyacaranatsinexatsi, pecuenesaë-ata pewecuapanepaenexa. Nexata, bajaraponë pejitsipaecuenia exanapona. Bitso piacuenesaënë naexanapona, pecuene-amoneyabaponaejawata.

⁵»Itsa abaxë xanë canaëjëtsiaya taenucajë bajaraponë yabara, bajara-paepatota taniji chivo pebito penaitajëtsijawa, penajetarucaejawa waëwet-sica. Bajaraponë daxitajawa najetaruca pebitsojinaecuenia irajumawereca taxunanonotsinejawa. Bajaraponë saya xaina pitaxutobejetuatuajëta perucaejawa caemata-etoxaneto. ⁶Bajarapachivonë pecowëwetsica daxita-saëta anaeya tsimaxëcujinaeponaica, pebarënabenexa anijamata-etobeje pexinae-oveja pebitojawabelia, mene-itapata penucaenë. Nexata, chivo pebarënebajawata daxitasäta torotajarabaxuaba ovejami. ⁷Petorotajarabaxuabijawata mata-etsicatarabaxuaba anijamata-etomibeje. Bajarapa-oveja

x 8:4 *norteyenepanajawabelia*: Nortenenia Vichadapijiwi pejumaitsiyumecuenia «matatsënënenia», pejaijume. y 8:4 *sur-yenepanajawabelia-ata*: Sur-nenia Vichadapijiwi pejumaitsiyumecuenia «unuyenepananenia», jai.

pebito apoxinae pesaë penayamatamotsinexa chivo pebarënabejawatatsi. Nexata, ovejami xuabatsi irabelia. Tsapabataxuabatsinua irata. Bajarapae-patota, ajibi itsajiw-ata oveja pecapanepaenexatsi chivo pecuenaesäewecua.

⁸»Nexata, chivo pebito pecuene-amoneyabi-oveja pebitojawabelia, cae-matacabi canacujitsia ayaicuenesaë xainapona. Itsiata, paepatota baja-raphonë bitso pinijicuenesaë xaina, papinijimata-etomi xaina pitaxutobe-jetuatuajëta totanatanaëcatsi baja. Bajarapamata-etomi pecowëyarena, tojuwatsi itsacuatro pamata-etobeje, beweliawananë. Bajarapacuatromata-etobeje, caemata-eto canacujitsia, saicaya nawecua-itaropitarubena nacua-yenepananëjawabelia. ⁹Bajarapacuatro pamata-etobejeyajuwënëjawata juwarena tsiquirimata-etoyo. Bajarapatsiquirimata-etoyo cuenewitsa-banajetaruca pewajënaeyabelia. Nexata, cuenesaëyacaëjëpanajetaruca pemutuabereca payenepana pe-enaetomaranëjawabereca. Orijibia, peyacaëjëpaenexanua sur-yenepananenia pe-enaetomaranëjawabelia, bajarapacuenia pepatsinexa wajapexania-iranacuajawabelia, itsajota waxaitsi israelitawitsi jinawanapatsi. ¹⁰Orijibia, cuenesaëwitsabanajetarucanua, petsimaxëpatsinexatsia Dioso pijajiwi wajabitsaëjawabetsia, tulupumonaëjawabetsia.² Nexata, bajarapamonaeyajuwënëwi penetsica irabetsica. Bajaraxuacujinae, bajarapamonaë itaxutotsoniataenejewatsi bejiobia-exanaponatsi, pacuenia jiwi taxunanonobapona ira itaxutotsoniataene-jewa. ¹¹Belia, bajarapatsiquirimata-etoyo pejamatabëcuene-itajëtsinë, ayaijamatabëcuenenë nataeya tsimaxëpata jamatabë-itonotsiaya Dioso-jawabelia, Ponë pepopenamatacaitorobinë⁶ Dioso pijajiwi wajabitsaë. Nexata, cuene-itaweta jiwi dajubi petotajuitsiyaniwa altar-jumata cae-matacabi canacujitsia Diosojawabelia. Tobijiananua Dioso pijataxunaemi, pabojawata pijajiwi nawajëcabiaba, bepenaxuirabitaxunaecuenia penacopatsinexa bajaraPonë pitabarata. ¹²Bajarapacuenia bajarapatsiquirimata-etoyo bejiobia-exanapona Dioso pijajiwi, Dioso petocopsixae bajaraponë pecobejawabelia. Orijibia, bajaraponë pibisiajamatabëcuenenëcuenia cuene-itawetapona petajuitabiabiyaniwa dajubi caematacabi canacujitsia Diosojawabelia, pejumecowënëtabiabiyanianua Dioso Moisés-pijinëta petonajumecopatsiliwaisitsi, juya benatsiquejemaliwaisicuenia petaenexa. Orijibia, pataxunaeta picani jiwi dajubi totajuitabiaba Diosojawabelia, bajarapataxunaeta tocopata pijajiwi wajabitsaë pecuene-itorobinexa Dioso pijajiwijawabelia, pexanaenexa Dioso apopejitsipaecuenia. Bajarapataxunaeta, Dioso apopejitsipaecuenejawanë pexanabiabixae, tobijiana Dioso pijajiwi penawajëcabiabitaxunaemi. Bajaraxuata, nacopata

z 8:10 *Dioso pijajiwi wajabitsaëjawabetsia, tulupumonaëjawabetsia:* Pepacuene apoyapëtaetsi xaniajaiya xua yabarajumaitsi bajarapajumenë. Itsiata, wajanacujarubijawata Dioso pejumeliwaisibaxuto, tanetsi pacuenia bajarapajumenë yabarajumaitsi acueyabi pawiriabitsaëtobeje yabara. Itsajawata, «Dioso pijajiwi wajabitsaë tulupujawabetsia» nacatocuenecatane Dioso pij-ängelewi. Taema Apoc. 12:4; Job 38:7. Itsajawata, nacatocuenecatane Dioso pijajiwi israelitawi. Taema Jer. 33:22-24 Bajarapacuenia-ata tsitatsi israelitawi, Dioso pejumaitsixae Abraham-pijinëjawabelia pemomoxi petonawitsinexatsi pacuenia itsi tulupu. Taema Gén. 15:5, Rom. 4:18, Heb. 11:12 Itsajawata pijinia, «tulupu» nacatocuenecatane Dioso pijajiwi pejumecowënëtsiwi. Taema Dan. 12:3 Nawitsia bajarapajumenë nacatocuenecatane-ata itsamonae yabara, mapaversi-culojawataje nacatocuenecatane tsaena israelitawi, pamonaë casaë Dioso pejumecowënëtsinexa. **a 8:11** *pepopenamatacaitorobinë:* Bajaraponë raja pepoDioso. Taema Dan. 8:25.

bepenaxuirabitaxunae^b Dioso pitabarata. Pacuenia bajarapabijianaponaeñ jitsipa exanabiaba. Xua exanapona, pexaniacuenia topitsapaponatsi.

¹³»Bajarapacuenie tataenucaejawata, ángel-nëbeje jumetaniji penabarë-cuaicuaijajawabeje. Cae-ángelnë yanjíoba itsa-áñgel-nëjawabelia. Jumaitsi: '¿Detsa pamatacabijawabelia meta werewerecaena bajaraxuanë; pecuene-yacaranatsijawa dajubi petajuitsijawami caematacabi canacujitsia, pebijianaponaejawa Dioso pijajiwi penawajëcabiabitaxunae, bajarapijinia pacuenia, Dioso pijajiwi pebejibíobí-exanaponaejawatsi?' jai bajarapa-áñgelñ.

¹⁴Nexata, itsanë jumecanawiata mapacueniaje: 'Bajaraxua najematsiana dos mil trescientos pacaniwiyobeje, pabajayacunuabeje yajawa.' Bajaraxuacujinae, Dioso wecua-ajibíobí-exanaena pijataxunaewecua bajarapanaxuirabícuenemi, icatsia Dioso pijajiwi penawajëcabiabíobí aneconijibíobí pe-ecanexa,' jai.

¹⁵»Paepatota, abaxë xanë, Danielñ, bemajitsinaebocuenia tataejawa canaëjëtanucajë, bajarapajamatabëcuene tayapëtaenexa, bajarapaepatota icatsia jemata netsitanaitajëta áñgelñ, jiwi pecuenejëpaenë. ¹⁶Nexata, xanë jumetaniji pejumaitsijume jiwijumecuenia Ulaimenejawata. Asaëyata pejumaitsijawa: '¿Gabriel, tsipaebare maponëjawabeliaje pajamatabëcuene xaina, xua bajaraponë tane bemajitsinaebocuenia!,' pejaijawa.

**Gabriel yapëtaeya-exana Daniel-jawabelia
pajamatabëcuene xaina piamajitsinaejawa**

¹⁷»Nexata, áñgel Gabriel, itsa nimoxoyorena tanucaejawaberena, xanë bitso najunawiacajë. Nexata, xanë tamatabacabëta nucajunuajë itapatsiaya irabereca. Itsiata baitsi jane, bajaraponë nejumaitsi: 'Xamë, jiwitonëmë, xua taneme bemajitsinaebocuenia, bajaraxua raja catsi-tajëta pecopiapatsijawanënexa pamatacabijawabelia mapanacuapijiwi penayanacua-ewetsicueneje^d copiarucaejitsia,' nejai.

¹⁸»Paepatota, bajaraponë nebarëcuaicuaijai tsanucac, xanë tējapunuajë. Nexata, xanë irataeya bocajunuajë irabelia. Tanejayatsijawata bajaraponë nematacota. Nexata, bajaraponë icatsia nenucaeya-exana.

b 8:12 *nacopata bepenaxuirabitaxunae*: Bajarapabepenaxuirabícuenie yabaracuaicuaijai aniacuenebeje yabara. Copiaya Antíoco nuta Dioso pijatemplóbopijipananabota Zeus jumapeca-taenë, jiwi penawajëcabiabíobí bajaraponëjawabelia diosonëcuenia pepoDiosowecua. Icatsia, nacayapëtaeya-exana pacuenia anticristonë píbisíacuene pexanaenënexa Dioso pijatemplóbota, bepenaxuirabícuenia penacopatsínexa Dioso pitabarata. Taema 2Ts 2:4. **c 8:14** *dos mil trescientos pacaniwiyobeje, pabajayacunuabeje yajawa*: Itsamonae canaëjëtá pacuenia bajarapados mil trescientos pabajayacunuabeje, pacaniwiyobeje yajawa, betane 1.150 pamatacabíbeje daxitata, tsipaji caematacabi canacujitsia anijatobeje sacerdotewi dajubi tajuitabiaba; caenë bajayacuna bejamatabë las nuevejawa, caenë pijinia caníwiyo bejamatabë las 3-jawa. Nexata, itsa namata-ëjëtá 1.150 pabajayacunuabeje, 1.150 pacaniwiyobeje yajawa, pítsapa 2.300 daxitata apopetajuitsijawanexa dajubímonae bajarapataxunaeta. Bajarapacuenia canaëjëtá, tsipaji Dan. 7:25, 9:27 capítsapa acueyabi pawái-beje epatuajawa. Itsamonae pijinia canaëjëtá pepacuene 2.300 pamatacabíbeje daxitata. **d 8:17** *mapanacuapijiwi penayanacua-ewetsicueneje*: Pepacuene, wowaijumeta canacueneba «futuro, itsa jume, fin del mundo». Bajarapajume jiwijumeta «itsamatacabijawabelia», pejaijume. Itsiata, xua Daniel tane bemajitsinaebocuenia, bajaraxua cuene-itajëtá aníjamatacabícueníbeje pecopiapatsijawanexa. Caejawa cuene-itajëtá Antíoco Epífanes peponaponaeatacabi bejamatabë 400 pawái-beje pematatsënë Daniel-píjinë pewënamuto. Itsajawanua cuene-itajëtá anticristonë peponaponaeatacabíabíenënexa, xua apocopiapatsi abaxë.

¹⁹ Bajaraponë nejumlahtsi: 'Nacua pecopiarucaematacabianëjawabelia Dioso bara-anaepanaeya naneconitsia-exanaena mapanacuapijiwiye pibisia-cuene pexanawanapaejamatabëcuene. Nexata, xanë catsipaebianatsi xua copiapatsijitsia mapanacuapijiwijawabeliaje, pamatacabi copiarucaejitsia bajarapananeconitsia-exanaecuene mapanacuapijiwi.

²⁰ »'Itsiata, bajarapacopiarucaematacabiwajënaeya, copiapatsinejewa copiya cayapëtaeya-exanaenatsi. Xua taneme oveja pebito, pexinaenë anijamata-etobeje, bajaraxua raja itajëta anijanacuapijiwibeje peyanacua-ewetsicuene yabara, Media nacua, Persia nacuabeje. ²¹ Xuacujinae, pachivo pebito taneme, bajaraxua raja pijinia itajëta Grecia nacuapijiwi peyanacua-ewetsijawanexa daxitanacuanëpijiwi. Papinijimata-eto pijinia xua taneme pitaxutobejetuatuajëta, bajaraxua raja cuene-itajëta copiya pepopeyanacua-ewetsinënexa' bajarapanacuata. ²² Xua pijinia taneme peta-natanaëcaejawa pemata-etotabuyalia, pepitsapaejawa itsacuatro pamata-etobeje bajarapacowëyarena, bajaraxua cuene-itajëta caenacuaxanetomi-ata, natsanaena cuatro panacuabejecuencia. Nexata, bajarapanacuanëpijiwi yanacua-ewetsianatsi itsamonae. Bajarapanacuanëpijiwi pewetsiwi apocue-nesaëjëpae tsane pitsicuenesaë xaina copiyapijinacua peyanacua-ewetsinë.

²³ »'Bajarajane baja, paepatota bajarapanacuanëpijiwi pepo-ayaineconi natsi-xainaena, imoxoyo pewajënae peyanacua-ewetsicuenemi petocopiarucaenexatsi bajarapacuatro panacuanëbeje peyanacua-ewetsiwi, nexata bajarapaepatota naitajëtsiana itsanë pepopeyanacua-ewetsinënexa. Bitso ayaijamatabëcuene penataenë tsane, petsiyapëtaenëna peymaxë-itojorobicuencia peyanacua-ewetsijawa. ²⁴ Nexata, bajarapayanacua-ewetsinë pewajënaeyabelia pinijicue-nesaë xainaponaena. Itsiata, papinijicuenesaëta bajaraponë canacuenebiana, pijacuata apopenatoxainaesaëta. Bajarapayanacua-ewetsinë pijajiwi wajabitsaë ayaicuenia bijiananajetarubenaena patomaranë tsimaxëpata pebarënaawaja-bitsaëtsimatacabianëjawa. Daxita xua exanaena, pexaniacuencia topitsapa-biabianatsi. Nexata, bajaraponë werebiabiana itsanacuanëjawa peyanacua-ewetsiwimi, pamonaë piacuenesaëwimi-ata. Bajarapacuencia werebiabiananua ayaibitsaëto Dioso pijajiwi pitapetsiwiwajuwënëwi. ²⁵ Bajaraponë bitso petsiyapë-taenë tsane peymaxë-itojorobinexa, nexata yanacua-ewetsiana jiwi peymaxë-itorobiliwaisita. Bajaraxua yabara be-ayaijamatabëcuenenë nataeyabiabiana. Itsamatacabijawabelia pacujinae jiwi natocanaëjëta aliwaisijibia pejinawanapaejawa, bajarapamatacabita bajarapamonae yapëtaeya-exanaenejewatsi bajaraponë jemata werebiabiana ayaibitsaëto bajarapamonaeyajuwënëwi. Belia, bajaraponë tsimaxëpatsiana ponë daxita pepoPeyanacua-ewetsinë Diosojawabelia picani pebeyaxuabinexa. Itsiata baitsi jane, bajaraponë saya cuene-amoneyabianatsi pesaëta, jiwi yawenonaenejewatsi.

²⁶ »'Daxita pacuene taneme bemajitsinaebocuencia caniwiyopijicuenejawanë, bajayacunuapijicuenejawanë yabara-ata, xua catsitajëta bajaraxua pexaniajaijawa. Itsiata baitsi jane, xamë nejamatabëcueneta natoxainare muetsiacuencia, tsipaji abaxë sajina pecopiapatsinexa! Bajaraxuanë raja copiapatsiana itsamatacabi ayaibexëjawabelia,' nejai ángel Gabriel.

²⁷»Bajarapacuenia tataecujinae bemajitsinaebocuenia, xanë, Danielnë, natotaniji ta-asaëjibijawa. Nejamatabëcueneromaebaponapona itsa-matacabianë. Bajaraxuacujinae, namatacotajë baja. Icatsia nexata, nacuenebaponapajë xuanë netsicaruca tanacuenebaponaponaenexa, pepopeyanacua-ewetsinë pijacuenejawanë. Itsiata baitsi jane, xanë bitso jamatabëcuenebëjaiya ponaponabiabajë xua yabara taniji bemajitsinaebocuenia, tsipaji apoyapëtaenë pajamatabëcuene xaina», jai Daniel peyaquinaejawata.

Daniel towajëca pijamonae israelitawi Diosojawabelia

9 ¹Icatsia, Daniel yaquina peyaquinaebaxutota. Jumaitsi: «Darío, Media nacuapijinë, Asuero pexënato, pecuene-amoneyabicujinae Belsasar, Babilonia nacua peyanacua-ewetsinëmi, yanacua-ewetaponapona Babilonia nacuapijiwi.^f Darío itsa baja xaina caewaicuenia peyanacua-ewetsijawa caldeowi, ²copiaya waita, xanë, Danielnë,^g bajarapamatacabi nacujarabaponapajë profeta Jeremías-pijinë peyaquinaebaxutota,^h paliwaisi Jehová tajëwelia yapëtaeya-exanatsi Jerusalén tomara yabara. Bajarajota, taniji pacuenia Jehová tocaëjëta setenta pawaijebuena Jerusalén tomara piabejetsecaenexa pebijanetsicujinae. ³Nexata, xaniawaetsia tayapëtaenexa Jeremías-pijinë peyaquinaejawa yabara, wajëcajë Diosojawabelia taneyapëtaeya-exanaenexa. Orijiibia, wajunupaebajënu waxaitsi israelitawitsi pibisiacuene waja-exanaenconimi. Tanajamatabëcuene-itajëtsinexa ayaicuenia tasiwajamatabëbjaijawa waxaitsi israelitawitsi wajaneconijamatabëcuene yabara, najuma-acatajë pecatsequercaepanata, tawajëtsijawata. Orijiibia, ecajënu ipumanajumata. Apoxaenënu taxaejawa, jamatejema Tajatuxanenë Dioso taneyawenonaenexa tawajëtsicowëya. ⁴Tanawajunupaebijawata Jehová tajaDiosojawabelia israelitawitsi wajaneconi yabara, jumatsinë mapacueniaje: 'Tajatuxanenëmë, Diosomë, bitso ayaijamatabëcuenenëmë, ayaisaënu nexainaenë. Xua tajëwelia jumatsimë najumecapanepaeya nenajumeliwaisicajonejawa nijaijiwijawabelia, bajarapacuenia exanabiabame. Pamona peca-asijamatabëcuene cajumecowënëtanawapa nenajumecopatsiliwaisi, bajarapamonaejawabelia najamatabëcuene-itajëtame nitaxutotsoniatæjawa. ⁵Paxanë baja cajena nitabarata pibisiacuene bitso pata-exanawanapaewi. Nexata, pata-ajamatabëcuenebejewicuenia pa-exanawanapajë bitso piabejucuenejawanë, pepo-aponejitsipaecuenejawanë-ata. Apopacajumecowënëtabiabitsina. Pacopabawanapajënu patanetonajumecopatsiliwaisianëmi, patane-itorobiliwaisianëmi-ata, ëpatajitsipaecuenia pata-exanawanapaenexa. ⁶Orijibia, apopanamuxuna-ewetabiabinënu nijaijiwi profetawi pata-netsipaebiliwaisianë. Bajarapamonae picani newënëta paebabiaba pepopatanyanacua-ewetsiwimijawabelia, itsamonae-ata patanenamatacaitorobiwimijawabelia, patajasalinaiwimijawabelia-ata, daxita pamona pejinawanapaewimi Israel nacujawata. Itsiata, bajarapamonae petsipaebiliwaisianëtsi apojumecowënëtabiabi. Tsiteca bajarapacuenia paxanë-ata

f 9:1 *Babilonia nacuapijiwi*: Itsawënë pijinia Babilonia nacuapijiwi, «Caldeopijiwi».

g 9:2 *Danielnë*: Bajarapamatacabita, Daniel xaina bejamatabë 66 pawaije peponaponaecujinae Babilonia nacua. **h 9:2** *Jeremías-pijinë peyaquinaebaxutota*: Taema Jer. 25:11-12, 29:10.

pa-itsinē tsawanapae. ⁷Xamē baja cajena Tajatuxanenēmē, pexaniacuene nexanaponaponaenē. Itsiata, paxanē pa-israelitawinē apobajarapata-itsiwi. Nexata, padaxitanē bitso pa-auranē Xamē nitabarata, pamonaē israelitawi pejinawanapaewi Judá nacuata, Jerusalén tomarata, Judá nacuwecua imo-xoyojawa pejinawanapaewi, tajēnacuanējawa-ata patajinawanapaewi Judá nacuwecua, panacuanējawa panecayajatame patajinawanapaenexa. Bajarapacuenia panecayajatame apopatacujumecowēnētabibijamatabēcuenē pata-ajamatabēcuenetajaxae. ⁸Jehová, daxita pamonaē pepopataneyanacua-ewetsiwimi, pamonaē patanenamatacaitorobiwimi, patajasalinaiwimi-ata, daxita bajarapamonaē pibisiacuene exanawanapa xamē nitabarata. Paxanē-ata bajarapacuenē-itsinē tsawanapae. Bajaraxuata, paxanē panajuanatoyapē-taniji bitso pata-auracuene xamē nitabarata. ⁹Xamē itsiata, patajaTuxanenē Diosomē, jiwi nitaxutobejiobiataenē, nexata jiwi pijaneconi siwajamatabēcuenecaewabiabame. Bajaraxuata raja, pane-itaxutobejiobiataeyabiabame patajaneconimi patanesiwajamatabēcuenecaewinexamē, paxanē pata-ajamatabēcuenetajawi-ata patacujumecowēnētabibiyaniwa. ¹⁰Jehová patajaDiosomē, picani apopatacanamuxuna-ewetabiabiwi, apopatajumecowēnētabiabiwi-ata paliwaisianē panetonajumecopatame nijajiwi profetawita. ¹¹Padaxitanē Israel nacuata patajinawanapaewimi apopajumecowēnētawanapaenē patanetonajumecopatsiliwaisimē. Pawe-cuanatsatabiabajā patane-itorobiliwaisianē patajumecowēnētabibiyaniwa. Bajaraxuata, bajarapapibisiacuene panetsijumajopa paxanē, itsanacuanējawa patanecayajatsinexamē patajinawanapaenacuamiwecua, pacuenia baja xamē jumaitsimē najumecapanepaeya patanetocopiapatabiabinexa patajaneconijamatabēcuenē. ¹Bajarapaliwaisi baja najumecopatame nijajiwitonē Moisés-pijinējawabelia. Bajarapaliwaisicowēya baja panetsijumajopa, pibisiacuene pata-exanawanapaexae xamē nitabarata. ¹²Xamē, paneyapētaeya-exaname picani paxanējawaberena, pataneyanacua-ewetsiwijawabelia-ata, bajarapapibisiacuene patanetocopiapatsiyaniwa, patanenaneconitsia-exanaeyaniwamē patajaneconijamatabēcuenē. Itsiata, apopacajumecowēnētsitsi. Nexata, xamē baja cajena najumecowē-exaname patanetsi-itorobijawatamē bajarapitsipini-jipibisiacuenejawa. Itsiata, pacuenia xamē panenaneconitsia-exaname Jerusalén tomarata patajinawanapaewi ayaicuenia, caeto-ata abaxē apopataenē mapanacuata bajarapacuenia nenaneconitsia-exanaejawa itsanacuanēpijiwi. Baitsi, panacua rajutame picani patajasalinaiwimijawabelia pijanacuanexa, paxanē-ata papemomoxinē patawajēnaeyabelia patajinawanapaenacuaminexa, bajarapanacuawecua panecapitsapame, pacuenianua cajayatsiaya panejinawanapaeya-exaname itsanacuanējawa, bajarapitsinaneconitsia-exanaecuene apopataenē cajena caeto-ata. ¹³Daxita baja pacuenia paneyapētaeya-exaname Moisés-pijinēta netonajumecopatsiliwaisita, bajarapabiabecuenē panetocopiapata baja paxanējawaberena. Itsiata, tsiteca abaxē paxanē apopacajaitabiabitsi Jehová patajaDiosomē. Orijiibia, paxanē baja cajena apopawecuanajamatabēcuenepēnēyorotsinē, patacopabinexa pibisiacuene pata-exanawanapaewi. Bajarapacuenia nejumecowēya paneto-exanae-atamē, nejumeliwaisi pacatotanetsi benatsiquejemaliwaisi, asiwaya

patacajumecowënëtsiyaniwa. ¹⁴ Bajaraxuata Jehovámë, panetoxaniawaetame bajarapitsipibisiacuene patanetocopiapatsia-exanaenexamë, patajinawana-paenexa nacajayatsiaya itsanacuanëjawa Judá nacuwecua, panacuami picani xamë rajutame patajasalinaiwimijawabelia. Xamë Jehová patajaDiosomë, pexaniacuene nexanaponaponaenë daxita xua exaname. Bajarapacuenia necuene-itsinë tsabiabi-ata, paxanë itsiata apopajitsipaenë patacanamuxuna-ewetsijawa, patacajumecowënëtsinexa.

¹⁵ Bajaraxuata ajenaconoxae, pexaniacuene cawajëtatsi xamë Taja-tuxanenë patajaDiosomë, tsipaji xamë baja cajena itajëtame pinijisäë nexainaenëcuene, pacujinae jutame nijajiwi patajasalinaiwimi Egipto nacuwereña. ¹⁶ Bajarapacuenia nexanaejawata xamë nawënëcapitsa-pame pecacuenecaëjëpaenëcuene bajarapamatacabijawawerenacujinae ajena pamatacabijawaberena-ata. Itsiata baitsi jane, paxanë pibisiacuene pa-exanawanapajë, daxita piabejecuenejawanë-ata xamë nitabarata. ¹⁶ Taja-tuxanenëmë, pacacueneyapëtanetsi xamë bitso pexaniacuene nenajamatabëxainabinë. Bajaraxuata, ajena pexaniacuene cawajëtatsi necopatsinexa bitso nebara-anaepanaejamatabëcuenemi patajinawanapaewimi Jerusalén tomarata, icatsia nexanebia-exanaenexa bajarapatomara. Bajarapacuenia cawajëtatsi, tsipaji raja bajarapatomara xamë nijatomaracuenia nexainaetomara, patomarata eca picani nijatemplobo nijatsutojumata. Daxita panijajiwinë, patajasalinaiwimi-ata pibisiacuene pata-exanawanapaejamatabëcuene, daxita pamonae pejinawanapaewi patapëñëya capocaponae ya panebaracuauaijai tsabiabi Jerusalén tomarata patajinawanapaewimi yabara. ¹⁷ PatajaDiosomë, nenamuxuna-ewere nijajiwitonëñë xua cawajëcaponatsi newënëta, asiwayacuenia netaenexa nijatemplobomi nexanebia-exanaenexa, jiwi pecawënëyayataenexa! ¡Tajatuxanenëmë, xaniawaetsia taema pacuenia nijatemplobomi nacopata piabejetsecaejawa! ¹⁸ Nejumetaema tajaDiosomë xua cawajëtatsi! ¡Taema xaniawaetsia pacuenia paxanë pajinawanapajë nabejiobitsiaya! ¡Tae manua pacuenia nijatomarami nacopateca pepopebijanetsicueniatsi, patomarata jiwi nacaetuatabiaba picani, newënëta pecawajëcabiabinexa! Bajarapacuenia apocawajëcaetsi pataneto-exanaenexamë aneconjibia patajinawanapaexae nitabarata. Biji rajane, cawajëcatsi pataca-itaxutuajamatejemaxae jiwi nitaxutobejiobiataeyabinëxae. ¹⁹ Tajatuxanenëmë, nejumetaema! ¡Tajatuxanenëmë, panesiwajamatabëcuenecaeware patajaneconi! ¡Tajatuxanenëmë, nejume-itaxutotsoniataema, pataneto-exanaenexamë tacawajëtsicuenia! Xamë panijajiwinë pexaniacuena patacawënëcacuaicuaijainexa, pëtsa cuenenajematame pataneyawenonaenexamë! ¡Nijatomara xanebia-exanarenua, patomarata pacawajëcabiabatsi! ¡Pëtsa cuenenajematame bajaraxua nexanaenexa! janë tawajëtsijawata.

**Pacuenia Dioso pijajiwi, pitapetsiwi, pitsicuene taejitsia
itsamatocabijawabelia, yabara peliwaizi**

²⁰ »Orijibia, wajëcaponajë Jehová tajaDiosojawabelia. Nexata, paepatota xanë wajëcanucajë, nawajunupaebajë tajaneconi, tajamonae israelitawi

pijaneconi-ata yabara. Bajarapacuenia wajunupaebajë Diosojawabelia, baja-raPonë pitaxutotsoniataenexa pijatemplobomi, pabomi picani eca penato-itapetsitsutota. ²¹ Xanë abaxë itsa wajëcanucajë, bajarapaepatota, ángelnë, Gabriel, punanajetaruca bepijiayo xanëjawaberena, copiyami ponë net-sitanaitajëta bemajitsinaebota. Bajaraponë najetaruca caniwioy-epatota,^k paepatota dajubi totajuitabiaba Diosojawabelia. ²² Bajaraponë nejumaitsi: ‘Daniel, xanë matapania najetarucajë ajenaconoxae xamëjawaberena, xania-waetsia tacayapëtaeya-exanaenexa pajamatabëcuene xaina xua taneme bemajitsinaebocuenia. ²³ Xamë picani ajena taxuxuabame newajëtaaponae-jawa Diosojawabelia, bajarapaepatota Dioso cajumecanawiata. Nexata, Dioso bitso peca-asiwaxae ayaicuenia, xanë najetarucajë tane-itorobicuenia, xua wajëtame Diosojawabelia tacayapëtaeya-exanaenexa. ¡Xaniawaetsia nenamuxuna-ewere xua catsipaebijitsiatsi, jamatejema nejumeyapëtaenexa xua xamë taneme bemajitsinaebocuenia! Cajumaitsitsije:

²⁴»’Setenta pasemanabejecuenia (490 pawaibeje)^l Dioso tocajëta petanenexa nabejiobitsicueneta pejinawanapaejawa xamë nijawiriawijawabelia, Jerusalén tomara yajawa, bitso niasiwatomara, pewecua-ajibia-exanaejawabeliatsi nijawiriawi pijaneconimi, bitso pibisiacuene pexanawanapaejamatabëcuene. Bajarapasetenta pasemanabeje pepanepaecujinae, matapania Dioso nutsiana ponë yanacua-ewetsijitsia pexaniacuene daxitanacuanëpijiwi daxitamatacabi-jawabelianexa. Bajarapacuenia jane baja, matapania copiapatsiana pexaniajai-cuenia xua taneme bemajitsinaebota. ²⁵ ¡Daniel, jumeyapëtaema xaniawaetsia xua catsipaebijitsiatsi mapajamatabëcueneje! Pamatacabijawa Babilonia nacua pepopeyanacua-ewetsinë itorobiana icatsia israelitawi penawiabinexa Jerusalén tomarajawabelia, peyaxanebinexa, bajarapa-itorobimatacabijawaweliacujinae panepaena siete pasemanabeje^m peyaxanebiweretsijawabelia Jerusalén tomara pijacallejawanë, bajarapacuenia-ata tomara matatoyorotsia peyacaranatanut-sipanjawa. Bajaraxua peyaxanebiweretsicujinae, panepaena itsasesenta y dos pasemanabeje, pepatsimatacabijawabelia ponë petsimata-epanaenëtsiⁿ Dioso

k 9:21 caniwioy-epatota: Pacujinae Dioso pijatemplo abaxë eca Jerusalén tomarata bijianaenexa, bajarapamatacabianëjawa sacerdotewi tajuitabiaba dajubi anijatobeje, caematacabi canacujitsia, daxita israelitawi pijaneconi yabara. Caenë tajuita bajayacunua, bejamatabë las 9-jawa, itsanë pijinia caniwioy tajuitabiaba, bejamatabë las 3-jawa. Nexata, Gabriel tsaena najetaruca las 3-jawa. Daniel peyaquinaebaxuto pelebiwi najamatabënapitsia-exana pacuenia exanabiaba bajayatami, templo pebijianaewajënaeya, tsipaji pacujinae ponapona Babilonia nacua, israelitawi dajubi apotajuitsi Diosojawabelia, tsipajinua ëJerusalén tomarata Dioso tocajëta bajaraxua pexanabiabinexa. **l 9:24 Setenta pasemanabejecuenia:** Wowaijumeta itsa pitsapa 70 pasemanabejecuenia, yabaracuaicuajai-ata 490 pawaibejecuenia. Pepacuene arameojumeta pit-sapa siete pasetentabeje. Nexata, wajayapëtaexae pawainë panepa petocopiapatsiwajënaeyatsi xua Daniel tane bemajitsinaebocuenia, yapëtanetsi nexata pacuenia caesemana cuene-itajëta siete pawaibejenexa. Nexata, itsa tanetsi setenta pasemanabeje pepacuene cuene-itajëta 490 pawaibeje daxitata. Bajaraxua cuenjëpa xua Cristo jumaiti Pedrojawabelia pejamatabëcuene-caewijawanexa yabara. Taema Mt 18:21-22. **m 9:25 siete pasemanabeje:** Baitsi, pepacuene cuarenta y nueve pawaibeje, itsasesenta y dos pasemanabeje: Baitsi, cuatrocientos treinta y cuatro pawaibeje. **n 9:25 petsimata-epanaenëtsi:** Bajarapajume nacayapëtaeya-exana anijanëbeje yabara. Caenë tsaena pepopenamatacaitorobinë sacerdotewi, Onías III pewënë. Onías beyaxuabatsi 170 pawaibeje Jesucristo penaexanaewajënaeya mapanacuataje. Bajarapijinia pacuenia nacayapëtaeya-exana Jesús yabara, tsipaji bajaraponë beyaxuabatsi pepopeyanacua-ewetsinë naexanaenexa abaxë Israel-pijinë pemomoxituatujëta. Bajaraxuata, Reina-Valera Bibliabaxuto canacueneba Mesías-jume.

pitapetsinëxaetsi. Itsiata, bajarapasesenta y dos pasemanabejewalia Dioso pija-jiwi bitso jinawanapaena jamatabëcuenebëjaiya, nabejiobitsiaya pejinawanapae-xae. ²⁶Bajarapasesenta y dos pasemanabeje (434 *pawaibeje*) pepanepaecujinae, ponë aceiterata tsimata-epanatsi Dioso pitapetsinëxaetsi, abaxë pitsinejewa xua yabara pata, bajarajane baja beyaxuabianatsi.^o Orijibia, pebeyaxuabicujinaetsi, itsanacuapijiwajabitsaë² tobijianaenatsi pijatemplobomi, bajarapacuenia-ata pijatomarami, Jerusalén tomara. Bepijiacuenia bijianaena, pacuenia ayaicuenia penawotsimene babijiana daxita pebubutsijawata. Dioso tajëwelia pecaëjësicue-nia, jiwi barënabenajetarubenaena daxita bajarapasesenta y dos pasemanabeje peweretsijawabelia. ²⁷Bajaraxuacujinae, bajarapanacua peyanacua-ewetsinë naliwaicsajonena caesemanacuenia^q ayaibitsaëto Dioso pijajiwijawabelia, pejamatabëcuene yawenonaenexa picani. Itsiata, bajarapasemanamaxëto epa-tujawata, bajaraponë itawetsiana Dioso pijajiwi petajutabiabiyaníwa dajubi altar-jumata Diosojawabelia, bajarapacuenia itawetsiananua itsa-ofrendajawanë perajutabiabiyaníwa. Belia, bajaraponë bitso pibisiacuene exanaena dajubi petajuitsi-altar-muxuneneta, bajarajota pecopatanutsinexa pitsicuenejawa Dioso tane pepopitoyajawa. Nexata, bajarapa-itoyajawa nacopatanucaena bajara-jota, Dioso penaneconitsia-exanaejawabelia bajaraponë bajarapapibisiacuene pexanaexae, pamatacabijawabelia Dioso tajëwelia tocajëta penaneconitsia-exanaenexatsi,[’] nejai Gabriel taneyapëtaeya-exanaejawata xua yabara amajitsi-naenë, jai Daniel peyaquinaebaxutota.

Xua Daniel tane bemajitsinaebocuenia Tigris menemuxuneneta

10 ¹Ciro baja itsa xaina acueyabi pawai-beje peyanacua-ewetsijawa Per-sia nacujawata, bajarapamatacabijawa Daniel, ponë wëñërubatsi Beltsasar, Dioso yapëtaeya-exanatsi bemajitsinaebocuenia papexaniajaili-waisi itsamatacabijawabelia tocopiapatsijitsiatsi Israel-pijinë pemomoxija-wabelia. Itsiata baitsi jane, bajarapajamatabëcuene bitso to-ayapëbejetsi pejumeyapëtaenexa. Nexata, Daniel bajaraxua pejamatabëcuene yapëtae-nexa, bitso canaëjëbiaya ponapona. Belia, nexata yapëtaejopa pajamatabë-cuene xaina, peyapëtaeya-exanaejawatatsi icatsia bemajitsinaebocuenia.

²Nexata, peyaquinaejawata Daniel yapëtaeya-exana daxita bajarapama-jitsinaejawa yabara. Jumaitsi: «Bajarapamatacabianëjawa xanë, Danielnë, bitso najamatabëxinaeaya ponaponajë acueyabi pasemanabejecuenia xua yabara taniji bemajitsinaebocuenia. ³Apoxaenë pexaniapexaejawanë; saya xaniji piaxaebijawanë. Apoxaenë-ata pewi. Vinora-ata apo-apaenë. Aponatuxuwiatsinënu petuxujuwijawanëta. Èbajarapacuenia ponapo-najë bajarapa-acueyabi pasemanabeje pewerewerecaeajawabelia. ⁴Nexata bajarapacujinae, veinticuatro matababita, copiyapijiuametojawata, xanë nucajë pinijimene Tigris-itapajawata. ⁵Nexata, xaniawaetsia tanaëcotsija-wata, jemata taenutajë itsanë bejiwitonë. Bajaraponë naxatatanuca bitso pexanianaxatatsijawa, linowiriapanata pexanaejawa. Na-epacëtanucanua

o 9:26 *beyaxuabianatsi*: Yabaracuaicuajai Jesús pebeyaxuabijawanexatsi cruzata, naexanaene-jewa abaxë pepopeyanacua-ewetsinë daxitanacuanëpijiwinexa. **p 9:26** *itsanacuapijiwajabitsaë*: Yabaracuaicuajai tsaena Tito, Imperio Romano peyanacua-ewetsinë, petobijianaejawa Jerusalén tomara, Dioso pijatemplobomi 70 a.D. pacuenia Jesús jumaitsi Mt 24:1-2. **q 9:27** *caesemana-cuenia*: Baitsi, siete pawai-bejecuenia.

pepopexania-oronani jawanëta pexanaepanajawa. ⁶Bajara ponë perabë-naitayota pacuenia topaciowiria-iboto. Pitabarata pijinia itabaranaitayota pacuenia yamaxëcotia. Pitaxutobeje pijinia itaxuto-itatsajawa benaecnuyo petajuitsicotia. Pemaxëbeje, petaxubeje pijinia butujai pacuenia pe-objibroncenani jawanë. Bajara ponë pecuaicuajai jawata, jumejëpa be-ayai bitsaëtöxaneto pecuaicuajai jumenë.

⁷»Xanë picani bajara paepatota itsamona e yajawanu cajë. Itsiata, xanë caenënë taniji bajara ponë bemajitsinaebocuenia. Caejiwi-ata, tayajawanucaewi, apotae itsacuenajawa-ata. Itsiata, taenejewawa bitso pejunawijawa jamatabëcuene-amoneyabatsi. Nexata, rëcëpeca penamatayabinexa. ⁸Nexata, xanë caenënë bajarajota nacopatanu cajë, paepatota xanë taniji bemajitsinaebocuenia. Bajara pitsicuene tataejawata, bitso xanë daxitanënë najeronayajë, asaëjibinë nua tsanajetsireca. ⁹Paepatota jumetaniji bajara panaitayotsinë pecuaicuajai jawata, nexata xanë jopajë irataeya tatëpajonecuenia. Bajara jota, xanë irata nacopatanu cajë irataeya tabocaejawata, bitso betamajitsinëcuenia. ¹⁰Bajara paepatota, nayapëtaniji pecobeta tanejayatsijawa. Nexata, nematacota, tanucaenexa tamatabacabëta irawaetabanucaeya tabobeta. ¹¹Bajara panaitayotsinë nejumaitsi: 'Daniel, xamë bitso Dioso peca-asiwanë. jNamatatore, netaxuta nenucaenexa, wajuacuicuajai inexabeje! Xanë raja nitoroba xamë jawaberena, tacatsipaëbinexa xua canaëjët-siaya ponaponame. jNexata, nenamuxuna-ewere xaniawaetsia xuanë caju-maitsi jitsiatsi!' nejai.

»Bajara pacuenia tanejumaitsi sanucaejawata, xanë namatacotajë tanucaenexa. Nucaeya neconecojanë tsanuca. ¹²Nexata, bajara ponë nejumaitsi: 'jDaniel, pëtsa junawame, tsipaji raja Dioso cajumetane pamatacabitaxuxuabame newajëcaponaejawata, nenajamatabëcuene neweretsixae neyapëtaenexa pajamatabëcuene xaina papiayapëbejewanë taneme bemajitsinaebocuenia! Catotanenua beweliamatabëcuene nenajamatabëcuene itajëtsijawa bajara Ponë pitabarata, pacujinae apoxaemë nexaejawata, aponaitabëtsimë nua. Nexata, xanë Dioso nitoroba xamë jawaberena, tacayapëtaya-exanaenexa bajaraxua yabara. ¹³Pamatacabita taxuxuabame newajëcaejawa Diosojawabelia, bajara pamatacabita nitorobi-ata picani tapatsinexa xamë jawaberena. Itsiata, Persia nacia pewetsidowathinëtsi,^s necueneyacaranataponapona veintiun pamatacabibejecuenia, tapatsiyania xamë jawaberena. Itsiata baitsi jane, Dioso neto-itoroba itsa-ängelne taneyawenonaenexa. Bajara ponë, Miguel, pepopenamatacaitorobiwiya juwënë Dioso pija-ängelwituatujëta. Miguel patsinejewawa abaxë, xanë caenënë taja-epato nacopatanu cajë tabarë nawajabitsaëtsinexa bajara padowathinë jawabelia, Persia nacia pewetsinë jawabelia. ¹⁴Xanë raja matapania patajopajë tacayapëtaeya-exanaenexa xua tocopiapatsi jitsiatsi nijawiriawijawabelia, Israel-pijinë pemomoxi, mapanacia pecopiarucaematacabijawabelia, tsipaji xua xamë taneme bemajitsinaebocuenia, bajaraxua catsitajëta

r 10:11 *bajara panaitayotsinë*: Bajara ponë tsaena ángel Gabriel. Bajara ponë penamatamotsiliwaisi Dioso Pejumeliwaisicaponanë jiwijawabelia. Taema Dan. 8:16, Lc 1:19, 26. s 10:13 *pewetsidowathinëtsi*: Bajara ponë Satanás pija-ängelwiyajuwënë, demoniowi baitsi, itsa jume, dowat-hiwi. Satanás tsaena tonuta pijadowathiwiyajuwënë pecueneyacaranatsinexa Dioso peliwaisi pexaniajiliwaisi pepatsiyania Persia nacuapijiwawabelia.

bajarapamatacabijawatalianexa,' nejai bajarapanaitayotsi-ángelnë. ¹⁵ Paepatota bajarapanaitayotsinë nejumlahtsi tsanucaae bajaraxua, xanë moya nucajë irataeya itsajume-ata jumaitsinënejewa. ¹⁶ Nexata, bajarapaepatota icatsia itsa-ángelnë naitajëta, jiwitonë pejëpaenë. Bjaraponë necuaibo-jayata. Nexata, matapania necuenecaëjëpa tacuaicuaijainexa penaitayotsi-ángel-nëjawabelia, ponë taitabarata pecuaicuaijaitsanucaenë. Jumaitsinë mapacueniaje: 'Tajatuxanenë, majotaje daxitaxua taniji bemajitsinaebocuenia bitso xanë siwajamatabëcuenebëjanë tsabiabi. Nexata, xanë nacopatajë ta-asaëjibinëcuenia tasiwajamatabëcuenebëjaijawa yabara. ¹⁷ ¿Detsa pacuenia meta xanë nijajiwitonënë necuenecaëjëpaejitsipa tacabarëcuaicuaijainexa xamëjawabelia, itsa bitso xanë pepo-asaëjibinë, nejumecuenobanua nitabarata?' janë.

¹⁸ »Bjarapacuenia tajumaitsicujinae, nexata cotocaewi penaitajëtsi-ángelnë necujirena icatsia tanejayatsinexa. Bjarapacuenia nerajuta pesaë taxainaenexa. ¹⁹ Xuacujinae, bjaraponë tane-ajamatabëcuenesaëya-exanaenexa nejumlahtsi: '¡Xamë raja Dioso peca-asiwanë, nexata pëtsa junawame! ¡Pëtsa jamatabëcuenebëjamënu! ¡Ayaicuenia ajamatabëcuene-saëmëre!,' nejai. Paepatota nebarëcuaicuaijai tsanucaae, xanë nayapëtaniji orijibia tajamatabëcuenesaëtsaponaejawa. Nexata, jumaitsinë penaitayotsi-ángel-nëjawabelia: '¡Tajatuxanenë, nejumlahtsimëre, tsipaji rabaja icatsia tasaë xainajë!,' janë tanebarëcuaicuaijainëjawabelia. ²⁰⁻²¹ Nexata bjaraponë nejumlahtsi: '¿Xamë tsaja yapëtaneme xua yabara xanë patajë xamëjawabere-na tacataenexa? Patajë picaní tacayapëtaeya-exanaenexa paliwaisianë rubena pepopexaniajailiwaibaxutota.' Orijibia, xanë xainajë itsajawanë ta-exanaenexa, itsiata taponawajënaeya cayapëtaeya-exanaenatsi bjarapaliwaisianë. Bjaraxuacujinae, bepíjiayo caewëalia ponaenajë tabarënawajabitsaëtsinexa Persia nacua pewetsidowathinëtsijawabelia. Itsa baja, xanë cuene-amoneyabianajë bjaraponë tabarënawajabitsaëtsijawata, nexata bajarapaepatota, itsanë netsimaxëpatsiana Grecia nacua pewetsidowathinëtsi tanebarënawajabitsaëtsinexa. Xanë apoxainaenë itsanë taneyaweno-naenexa tabarënawajabitsaëtsijawata bajarapa-ewetsidowathinëbeje; caenë saya Miguel, pa-ángelnë ewetaponapona Dioso pewënëta Israel nacua,' nejai ángelnë.

11 ¹ »Icatsia, bajarapanaitayotsi-ángelnë" nejumlahtsi: 'Xanë abaxë bajayata copiaya Miguel jamatabëcuene-asaëya-exanajë, yawenonajënuu bjaraponë pebarënawajabitsaëtsijawata bajarapa-ewetsidowathinëbeje pacujinae Darío copiyapijiwaita'

t 10:20-21 *pepopexaniajailiwaibaxutota*: Pepacuene waxaitsi apoyapëtaetsi pabaxuto yabarajumaitsi ángelnë. Saya wajayorobijawata Dioso pejumeliwaibaxuto Sal. 139:16-jawata yapëtanetsi pacuenia Dioso yaquinaruta pijabaxutota wajajinawanapaematacabianë yabara. Orijibia, Apoc. 5:1-jawata yapëtanetsi pacuenia Dioso tsiwajënaeyaqinara penaneconitsia-exanaecuenie yabara mapanacuapijiwi. Bjaraxuata, itsamonae canaëjëta pacuenia Dioso tsiwajënaenaliwaibaxutota daxita nacuanëpijiwi pejinawanapaecuenie yabara. Baitsi, Dioso daxitacuene petsiwajënaeyapëtaenëxae, tsiwajënaeyapëtaenë pacuenia cuene-itsi tsane. Nexata, xua ruca bajarapabaxutota xaniajaiya copiapatsiana. Bjaraxuata, wënëruba pexaniajailiwaibaxuto. **u 11:1** *bajarapanaitayotsi-ángelnë*: Bjaraponë tsanea ángel Gabriel. Bjaraponë penamatamotsiliwaibaxutota Dioso Pejumeliwaibaxutotaenë jiwijawabelia. Taema Dan. 8:16, Lc 1:19, 26. **v 11:1** *Darío copiyapijiwaita*: ¡Natoyorobare! Dan. 6.

yanacua-ewetaponapona Media nacuata. ²Nexata, ajenaconoxae cayapêtaeya-exanaenatsi papexaniajailiwaيسانë rubena bajarapabaxutota, nejai.

Pacuenia penaitayotsi-ángelnë yapêtaeya-exana Daniel-jawabelia Egipto, Siria nacuabeje peyanacua-ewetsiwinexa, yabara peliwaisi

»Orijibia nejumlahtsi: 'Pepopeyanacua-ewetsinë Cirocujinae, abaxë itsamona acueyabi ponëbeje yanacua-ewetawanapaena Persia nacuata. Bajarapacueyabi ponëbejecujinae itsanë cuatronë» yanacua-ewetsiana bajarapanacuajawata. Bajarapacuatronë bitso pexainaenë tsane daxita matatoxenetsia copiaya pepopeyanacua-ewetsiwimiwecua Persia nacuata. Ayaijawa pexainaexae tsane, pinijicuenesä xainaponaena. Nexata, bitso penamatacaitorobisaëna pexainaexae tsane, tsimaxëponaena Grecia nacua pepopeyanacua-ewetsinëjawabelia. ³ Bajarapacuatronë petsimaxëpatsicujinae Grecia nacua pepopeyanacua-ewetsinëjawabelia, bexëajawabelia itsanë naitajëtsiana Grecia nacuata. Pepopiacuenesaënë tsane penawajabitsaëtsinexa. Nexata, bajaraponë belia cuene-amoneyabaponaena ayaibitsaëto itsanacuanëpijiwi,^y bajarapacuenia peyanacua-ewetsinexa Grecia nacua pepopinijnacuaxanetocuenia. Bajaraponë daxita xua jamatabë-exana, pejitsipacuenia exanaponaponaena. ⁴ Itsiata baitsi jane, bajaraponë pepuaxinae pinijipenamatacaitorobisaë daxitawecua, bajarajota pibisiacuene tocopiapatsianatsi. Nexata, papinijnacuaxaneto picani copiayanëmi yanacua-ewetaponapona, bajarapanacuami itsamona canatsanaena, cuatro panacuabeje penacopatsinexa. Bajarapacuenia bajaraponë peyanacua-ewetsicuenemi towerewerecaenatsi. Nexata, pemomoxi-ata apocanacopatsi tsane bajarapayanacua-ewetsicueni. Biji rajane caranata, cuatro ponëbeje, itsamona, cotocaewi naexanaena pepopeyanacua-ewetsiwinexa bajarapanacuami, pepuanatsicobetsanae tsane bajarapa-iranëmi. Itsiata, pitsicuenesaë xaina copiaya pepopeyanacua-ewetsinëmi, bajarapacuenia cotocaewi pamonae yanacua-eweta apocuenesaëjêpae tsane.

⁵»Bajaraxuacujinae, Grecia nacuaxaneto pepuapenatsicobetsanaecujinae cuatro pa-iratupabejecuenia, saicaya penayanacua-ewetsinexa cae-iratupa canacujitsia. Bajarapa-iratupaxiyajuwënëjawa cae-iratupayo boca sur-nenia^z Israel nacuwecua, pewënë Egipto nacua.^a Bëxëajawabelia Egipto nacua pepopeyanacua-ewetsinë, ayaicuenesaë xainaena. Itsiata belia, itsanë,

w 11:2 cuatronë: Pacuatro payanacua-ewetsinëbeje yabarajumaitsi pepacuene aponayapëtae, tsipaji 7 ponëbeje yanacua-eweta Persia nacua Cirocujinae. Itsiata, itsamona canaëjêta mapamonaë. Cambises II, Gautama, itsa jume, Sudo-Esmerdis, Darío I el Grande; ponë pepopiacuenesaënë daxitawecua, bitso pexainaenëna pecobecowë, Jerjes I, ponë wënëjona Asuero, Ester-wënëbaxutota. Saya nacayapêtaeya-exana cuatro ponëbeje yabara. **x 11:2 Grecia nacua pepopeyanacua-ewetsinë:** Bajaraponë pewënë raja Alejandro Magno. Bajaraponë-ata cuenecatanetsi pajumapecataenëxanetojawata broncananito pexanaecototo, xua Nabucodonosor tane bemajitsinaebocuenia. Taema Dan. 2:32 Bajarajota, cuenecatanetsi pijinia pinijimata-eto cabra pitaxutobejetuatuajêta Taema Dan. 8:7-8. **y 11:3 itsanacuanëpijiwi:** Bajarapanacuanë Persia nacuyajuwënëjawanë. **z 11:5 sur-nenia:** Vichadapijiwi pejumlahtsijumecuenia «ununenia». Nortenenia: Vichadapijiwi pejumlahtsijumecuenia «matatsënënia». **a 11:5 pewënë Egipto nacua:** Egipto nacua raja boca sur-yenepananenia Israel nacuwecua. Bajarapanacua peyanacua-ewetsinë bajarapamatacabijawa Ptolomeo I Soter. Bajaraponë yanacua-ewetaponapona Egipto nacua mapawainëjawaje (312-281 a.C.) Jesucristo penaexanaewajënaeya.

bajaraponë pijajiwi wajabitsaëtuatujëta pepopenamatacaitorobiwiyajuwënë,^b caenë bitso piacuenesaënë tsane pepopeyanacua-ewetsinëwecua. Nexata, bajarapapenamatacaitorobinë wecuanatsatsiana pepopeyanacua-ewetsinëwecua, juya peyanacua-ewetsinexa itsa-iratupayo Egipto nacuapiji-irayajuwënëjawami. Bajarapayacajërëtsi-irami boca nortenenia Israel nacuawecua, pewënë Siria nacua. Orijibia, pijajiwi wajabitsaë cuene-amoneyabaponaena ayainacuanëpijiwijawabelia, ayainacuaxaneto pecanacopataponaenexa. Bajarapacuenia nexata saicaya yanacua-ewetsiana itsanacua pinjinacuaxaneto Egipto nacua peyanacua-ewetsinëwecua. ⁶ Ayaicuenia wainë pepuapanepae tsane, nexata Egipto nacua^c pepopeyanacua-ewetsinë, bajarapijini pacuenia Siria nacua pepopeyanacua-ewetsinëbeje nali-waisicajonenabeje penatsimaxëpatsiyaniwabeje, caeliwaisi penajuaxai-naenexabeje picani. Bajaraxuata, Egipto nacua pepopeyanacua-ewetsinë nacoxirajutsiana^d Siria pepopeyanacua-ewetsinëjawabelia. Bajarapacuenia exanaenabeje pexaniajainexabeje penaliwaisicajonejawabeje picani. Itsiata, bajarapanaliwaisicajonecuenemi pexaniacuenia apotopitsapaetsibeje tsane, tsipaji itsamonae beyaxuabianatsi bajarapowami, pamonami, pexënatomi, bajarapacuenia-ata pamonaemi yajawapata amoneya petonacuenebawana-paewimitsi. ⁷ Nexata, bajarapowami pijamonaeyajuwënë naexanaena pepopeyanacua-ewetsinë Egipto nacuata. Bajaraponë tsimaxëpatsiana Siria nacua pepopeyanacua-ewetsinëjawabelia pebarënewajabitsaëtsinexa. Bajaraponë cuene-amoneyabiana bajarapamonaemi, yacajërëtsiananua paboxanetota Siria nacua pewetsinë natonacuenebanuta penayajiwitae-nexa pijawajabitsaëwecua. Nexata, juya ponaponaena bajarapaboxanetota. ⁸ Bajarapacuenia bajaraponë yacajërëtsiana jumapecataeya pexanaenëanë, Siria nacuapijiwi pijadiosowi, pecaponaenexa Egipto nacujawabelia. Nexata, capona padiosonëanë exana pe-epanaxuabicuenia psetsinani-jawanë petsiwajënae-exanaeferajawabelia, itsajawanënu bitso penamata-motsijawanë, oronanitota, palatananitota-ata pexanaejawanë. Bajaruacujinae, apojamatabë-itonotsi tsane, wainë panepae-ata, Siria nacua pepopeyanacua-ewetsinëjawabelia. ⁹ Ayaibexëacujinae itsiata, Siria nacua pepopeyanacua-ewetsinë icatsia cuene-ëjëbiaya tsimaxëpatsiana Egipto

b 11:5 *pepopenamatacaitorobiwiyajuwënë*: Bajaraponë raja Seleuco Nicator, ponë nacopata Siria nacua pepopeyanacua-ewetsinë. Nexata, Israel nacua boca Egipto nacua, Siria nacuabej-tuatuajëta. Baitsi, Egipto boca sur-nenia Israel nacuawecua, Siria nacua pijinia boca nortenenia Israel nacuawecua. Itsiata, Israel nacua nacopata picani Egipto nacua peyanacua-ewetsinacuayo, Ptolomeowi peyanacua-ewetabiabinexa. Bexëjawabelia, itsanë, Siria nacua pepopeyanacua-ewetsinë, wecuapita Israel nacua Egipto nacua pewetsinëwecua, penacopatsinexa Israel nacua pijanacuayajuwënë-iracuenia. **c 11:6** *Egipto nacua...Siria nacua*: Wowajume Bibliabaxu-tota Daniel capítulo 11-jawata canacuenebabiaba «sur-nenia pebocaenacua Israel nacuawecua» Egipto nacuanexa, nortenenia pebocaenacua Israel nacuawecua Siria nacuanexa pijinia. **d 11:6** *nacoxirajutsiana*: Bajarapayanacua-ewetsinëbeje pewënëbeje tsaena Ptolomeo Filadelfo, Egipto nacua pewetsinë, Antíoco Teo, pijinia Siria nacua pewetsinë. Filadelfo pexënatoyo pewënë Berenice, powa pita Siria nacua pewetsinë. Bajayatami pacujinae anijanëbeje anijana-cuabeje peyanacua-ewetsinëbeje najumeliwaisicajunua penabarajamatabëcuenexanepanaenexabeje, nexata itsapeyanacua-ewetsinë, pexënatoyo barajuta ponëjawabelia naliwaisicajunua. Nexata, penacoxirajutsinë ba-apotsimaxëpatsi itsanëjawabelia, tsipaji tobeyaxuabijitsipatsi pexënatoyo. Bajarapacuenia pepitsinë muetsia aposiwanajamatabëcueneweretsi tsipae petsimaxë-patsinexa paxuyojawabelia, tsipaji pijawa wajunupaebijitsipatsi xua najamatabëxainaponapona paxajawabelia.

nacua pepopeyanacua-ewetsinējawabelia pebarēnabenexa. Itsiata, apope-cuenecaējēpaexaetsi tsane pecuene-amoneyabijawa, nexata caewēarena nawiatsiana jamatabēcuenenacueratsiaya pija-irajawaberena.

¹⁰»'Itsiata baitsi jane, Siria nacua pepopeyanacua-ewetsinē pexi siwa-najamatabēcueneweretsiana petsimaxēponaenexa Egipto nacuapijiwija-wabelia, pebarēnawajabitsaētsinexa. Nexata, caetuatsiana wajabitsaēwi pinijibitsaētoخانeto, pebarēnacuenexaniawaetsinexa. Nexata, bajarapae-patota Siria nacua pepopeyanacua-ewetsinē pexiyajuwēnēnē,^e barētsi-maxēpatsiana pijajiwi wajabitsaēwi yajawa Egipto nacuapijiwijawabelia. Nexata, bajaraponē barēwerebiabanajetarucaena bepijiayocuenia. Pacuenia pepamene bepijiayo bijianapona daxita piawajubuatsanajetarucaejawata, bajarapacuenia werebiabanajetarucaena pepatsijawabelia Egipto nacuapijiwi penayajiwinacuenebanutsitomarajawabelia, bitso piacuenesaētomara. Itsiata, apojonecapanepae tsane bajarapatomarajawabelia. ¹¹Bajarapacuenia petsimaxēpatsixaetsi, nexata Egipto nacua pepopeyanacua-ewetsinē^f bitso ayaicuenia anaepanaena. Nexata, bajaraponē ya-anaeya tsimaxēpitsapaena, pebarēnawajabitsaētsinexa Siria nacua pepopeyanacua-ewetsinē pijajiwi wajabitsaējawabelia. Nexata, Siria nacuapijiwijabitsaē pinijibitsaēxanetomi-ata, daxitami cuene-amoneyabianatsi. ¹²Nexata, Egipto nacua pepopeyanacua-ewetsinē pecuene-amoneyabixae tsane, pinijibitsaētoخانeto pijawajabitsaēwimi pebeyejebixae-ata, be-ayaijamatabēcuenenē nataena. Itsiata baitsi jane, bajaraponē penamatacaitorobisaē bajayajebi apocanacopatsi tsane. ¹³Itsamatacabi bexējawabelia Siria pepopeyanacua-ewetsinē pijajiwi wajabitsaē icatsia caetuatsiana, pebarēnacuenexaniawaetsinexa, copiyamibitsaēto matatoxenetsia. Nexata, pijajiwi wajabitsaē xainaeya-exanaena bitso pexaniawiria pecanawajabitsaētsijawanē. Bajaraxuacujinae, wainē pepanepaecujinae tsane, icatsia bajaraponē barētsimaxēpatsiana pijajiwi wajabitsaē yajawa, pebarēnawajabitsaētsinexa Egipto nacua pepopeyanacua-ewetsinējawabelia.

¹⁴»'Bajarapamatacabijawa bajarapacuenia itsa taeponaena, nexata itsa-nacuanēpijiwi ayaibitsaēto jamatabēcuenē-anaepanaena Egipto nacua pepopeyanacua-ewetsinējawabelia. Bajaraxuata, tsimaxēpatsiana bajaraponējawabelia. Itsamonae israelitawiyajunēwi pijinia, pejitsipaewi pebarēnawajabitsaētsijawa, jamatabēcueneyanabiana bajarapamonae petsimaxēpatsijawata. Bajarapacuenia exanaena bajarapa-israelitawi, pijacuata jamatejema pecopiapatsia-exanaenexa bemajitsinaebocuenia petaejawa. Itsiata, bajarapamonae jamatabēcuenenaxuabiana, tsipaji penatocaējētsicuenia apotopitsapaetsi tsane. ¹⁵Bajaraxuacujinae, Siria nacua pepopeyanacua-ewetsinē tsimaxēpatsiana pamonaē jinawanapa Egipto nacuapijiwi penatonacuenebanutsitomara penayajiwitaenexa pijawajabitsaēwecua. Bajarapatomara

e 11:10 *pexiyajuwēnēnē*: Bajaraponē pewēnē Antíoco el Grande (Ayaijamatabēcuenenē). Bajaraponē cuenecatanetsi tsiquirimata-etoyo cotocaewi pemata-e-juwijawa pachivo Daniel tane bemajitsinaebocuenia. Taema Daniel 8:9. **f 11:11** *Egipto nacua pepopeyanacua-ewetsinē*: Egipto nacua eca Israel nacuaewecua sur-nenia Bajarapamatacabijawa yanacua-eweta tsaena Egipto nacuata Ptolomeo Filopátor. Siria nacua pepopeyanacua-ewetsinē: Siria nacua eca Israel nacuaewecua nortenenia. Bajarapamatacabijawa yanacua-eweta tsaena Antíoco el Grande Siria nacuata.

peyacaranatsijawa matatoyorotsia yacapatsiaya jinawanapaena. Nexata, natonacuenebaponaena irajawanë najumajebaponaeya pexananutsinexa petsutocuenia, bajarawetsica petsimaxëjonenexa tomarajawabelia. Belia, cuene-amoneyabiana bajarapatomarapijiwimi, bajarapacuenia peyaca-jërëtsinexa pijatomarami. Nexata, Egipto nacuapijiwajabitsaë apocuene-caëjëpaetsi tsane pecueneccaranatsijawa bajaraponë. Bajarapacuenianua pamonaë pexanianawajabitsaëtsiwi-ata, apocueneccajëpaetsi tsane pecueneccaranatsinexa, tsipaji acuenesaëjibi tsane. ¹⁶ Nexata, Siria nacuapijinë barëbenajetarucaena pijawajabitsaëwi pejitsipaecuenia, cuenecaranatsinejewatsi itsanacuanëpijiwijawa-ata. Belia, patajopaena bitso pexanianacua Israel nacujawabelia, bajarapanacuata penacopatsinexa. Nexata, xuacujinaë pecuene-amoneyabaponaëjawata, werebiabanajetarucaena xua caxitajarabanajetaruca. ¹⁷ Bajaraxuacujinaë, bajaraponë icatsia tsimaxë-nacuenexaniawaetaponaena, penaxainaeyabinexa daxita Egipto nacuapijiwi pejinawanapaenacuanëjawa. Nexata, petoyapëxanepanaenexatsi pecuene-amoneyabijawa Egipto nacuapijiwi, bajaraponë canaëjëtsiana yamaxë-itorobiaya penaliwaisicajonejawa Egipto nacua pepopeyanacua-ewetsinëjawabelia namata-enetsia penatsimaxëpatsiyaniwabeje. Nexata, rajutsiana pexënatoyo pijawanexa Egipto nacua pewetsinëjawabelia,^g bajarapacuenia picani pewerebiabiyanawa bajarapanacuapijiwi. Itsiata baitsi jane, xaniawaetsia apotopitsapaetsi tsane pecaëjëtsicuenia. ¹⁸ Bajaraxuacujinaë, tsimaxëpatsiana manuamene-itapaya pe-enaenacuanëpijiwi. Ayaibitsaëto bajarapanacuanëpijiwimi cuene-amoneyabiana, bajarapacuenia juya peyanacua-ewetsinexa. Itsiata baitsi jane, itsanë, apopijanacuapijinë, waja-bitsaë pepopenamatacaitorobinë, cuenecanawiatsiaya urabiana Siria nacua pepopeyanacua-ewetsinëjawabelia,^h be-ayaijamatabëcuenenë penataeyabibinëmi, pecuene-amoneyabijawatatsi. ¹⁹ Nexata, bajaraponë nawiataponaerena pijanacuajawaberena, bajarajota peponaponaenexa picani pijanacuata penatonacuenebanutsitomaranëta itsajota naewetsijitsia pijawajabitsaëwecua. Itsiata, patsinejewa abaxë pijatomarajawabelia, bajaraponë cuene-amoneyabianatsi. Beyaxuabianatsinua. Nexata, bajaraxuacujinaë caeto-ata pematatsënëa jiwi apoyapëtae tsane bajaraponë yabara.

²⁰ »Nexata, bajaraponë pecowëtimi juya itsanë naitajëtsiana peyanacua-ewetsinexa Siria nacua. Bajaraponë itorobiana itsanë impuestomatamo peyanijobiabinënexa, ayaijawa pecobecowëjawanë penotaponaenexa, bajarapacuenia bitso pexainaenë penaexanaenexa. Itsiata baitsi jane, caematacabibecujinaë, bajaraponë beyaxuabianatsi, apopenawajabitsaëtsimatacabi-ata.

²¹ »Orijibia ángelnë nejumaitsi tsaponaë: 'Bajaraponë pebeyaxuabicujinaetsi, icatsia itsanë yanacua-ewetsianaⁱ Siria nacua. Bajaraponë picani

g 11:17 *Egipto nacua pepopeyanacua-ewetsinëjawabelia*: Bajarapamatacabita, Ptolomeo Epifanes yanacua-ewetaponaena Egipto nacua. Antíoco, Siria nacua pewetsinë, rajuta pexënatoyo, Cleopatra, Egipto nacua pewetsinëjawabelia. **h 11:18** *wajabitsaë pepopenamatacaitorobinë*: Bajaraponë tsaena Roma nacuapijinë Lucio Cornelio Escipión. Bajarapacuenia exana 192 a.C. (Cristo pewajënaeya) pawabiye pewajënae. **i 11:21** *itsanë yanacua-ewetsiana*: Bajaraponë tsaena Antíoco Epifanes, bajayatami ponë ponapona. Itsiata, yajawa-itaropita tsaena anticristonëjawabelia, ponë yabara cuaicuajai Juan Apocalipsis-baxutota.

apopecuene-itajitsipaenëtsi tsane, apopetsicarucaenëtsinua picani pepopeyanacua-ewetsinë penaexanaenexa, tsipaji apopecyanacua-ewetsinë pijamonaeyajuwënënë tsane. Penacopatsinexa pepopeyanacua-ewetsinë bajarapanacuata, bajaraponë pibisiajamatabëcuenenë-ata najamatabëcuenematayatsiana, pepitsinexa bajarapataxunae peymaxë-itojorobicuenia. ²²Nexata, bajaraponë werebiabanajetarucaena daxita pamonaie picani pecuencyacaranatsiwiitsi. Orijibia, beyaxuabiananua Israel nacuata sacerdotewi pepopenamatacaitorobinëmi,^j ponë penamatacaitorobinë Dioso penajumeliwaisicajonewijawata.^k ²³Bajaraponë picani itajara naliwaisicajonena itsanacuanëpijiwiwawabelia, yaiyataeya penataenexa. Itsiata, belia tsimaxëpatsiana penaliwaisicajonewimijawabelia. Tsiquiribitsaëtoyo xainae-ata pijajiwi wajabitsaë, cuene-amoneyababiabiana pamonaiejawabelia barë nawajabitsaëtanajetarucaena. ²⁴Paepatota bajaratomaranëpijiwi jamatejema jinawanapaena aliwaisijibia, bitso pecobecowëjawanë pexainaewicuenia itsanacuanëpijiwiwecua, bajarapaepatota bajaraponë jemata tsimaxëpatsiana bajarapatomarapijiwiwawabelia. Nexata, bajaraponë cuene-amoneyabanajetarucaena pacuenia pijamonaemi apocuenecaëjèpaetsi pecuene-amoneyabinexa. Nexata, bajaraponë pijajiwi wajabitsaë barë-natsicobetsanabiabiana daxitaxuanë yacajërëbanajetarubena pebarë-nawajabitsaëtsimatacabianëjawa. Nexata, bajaraponë barënajumejaitabiabiana pacuenia icatsia barë nawajabitsaëtsijitsia pamonaiejawabelia jinawanapa penatonacuenenbanutsitomaranëta penayajiwitaenexa pijawajabitsaëwecua. Bajarapacuenia pexaniacuenia topitsaponaenatsi xua exanaponaena ëcae-epatoyonexa.

²⁵»Pexaniacuenia petopitsapaexaetsi picani pexanaecuenemi, nexata itsamatacabijawabelia bajaraponë pejamatabëcuenebarëyaxae, pecuensaëjamatabëcuene, pitatsacajamatabëcuenenua, tsimaxëpatsiana Egipto nacua pepopeyanacua-ewetsinëjawabelia.^l Bajarapaepatota pijinia, Egipto nacua pepopeyanacua-ewetsinë caetuatsiana ayaibitsaëto pijajiwi wajabitsaë, bitso piacuenesaëwi, pecuencaranatsinexa pijawajabitsaëwi pebarë nawajabitsaëtsijawata. Itsiata baitsi jane, Egipto nacua pepopeyanacua-ewetsinë penajuanawajabitsaëtsiwi yamaxë-itojorobianatsi. Nexata, Siria nacua pepopeyanacua-ewetsinë cuene-amoneyabiana bajaraponëmi. Bajaraxuata, apocuenecaëjèpaetsi tsane pecuencaranatsijawa petsimaxëpatsiwiitsi. ²⁶Pamonaie Egipto nacua pepopewetsinë itajara bepeyapëtaewitsi siwaxainabianatsi, bajarapamonaie najumejaitatsiana bajaraponë pepëya, pecuene-amoneyabinexatsi. Nexata, bajaraxuata, bajaraponë pijajiwi wajabitsaëmi tobeyejebianatsi ayaibitsaëto pewerebiabijawabeliatsi. ²⁷Nexata, Siria nacua, Egipto nacua pepopeyanacua-ewetsinëbeje, najua-ecaenabeje caemesajawata, penajumejaitatsinexabeje picani pacuenia

j 11:22 sacerdotewi pepopenamatacaitorobinëmi: Bajaraponë pewënë tsaena Onías III, ponë Antíoco beyaxuabia-exana 171 a.C. waita. k 11:22 Dioso penajumeliwaisicajonewi: Israelitawi yabarajumaitsi. l 11:25 Egipto nacua pepopeyanacua-ewetsinëjawabelia: Bajaraponë tsaena Ptolomeo Filométor.

nabaramatabëcuenexanepanaejiatsibeje icatsia. Najumejaitsi-atabeje tsane penasiwajamatabëcuenexanepanaenexabeje itajara, bēpē-nēa nasiwanajamatabëxainaenabeje, namata-enetsia ēpiabejecuene penato-exanaejawabeliabeje, penawerebiabinexabeje. Nexata, nasiwanajumetsēnētsianabeje xua najumaitsibeje namata-enetsia. Itsiata baitsi jane, apotopitsapaetsibeje tsane caenē canacujitsia penatocanaē-jētsicowēyabeje, tsipaji sajina abaxē Dioso petocaējētsimatacabitsibeje pecopiarucaejawanexabeje. ²⁸Nexata, Siria nacua pepopeyanacua-ewetsinē naropotsiana penawiatsinexa pijanacuayabelia. Ayaijawa pecobecowējawanē canajetarucaena, peyacajērēbijawanēmi penawajabitsaētsimatacabi Egipto nacua pepopeyanacua-ewetsinējawabelia. Nexata, penawiatanajetarucaenē, bajaraponē siwanajamatabëxainaena pibisiacuene pexanaenexa Israel nacua pejinawanapaewijawabelia, pamonaē jumecowēnētawanapa Dioso penajumeliwaisicajonejawami Moisés-pijinēta. Bajaraxuata pesiwanajamatabëcueneweretsicowēya, pibisiacuene exanaena pejitsipaecuenia bajarapamonaejawabelia. Bajaraxua pexanaecujinae, nawiatsiana pijanacuayabelia. ²⁹Pamatatabijawa tocajētatsi Dioso, bajaraponē icatsia tsimaxēpatsiana Egipto nacua pepopeyanacua-ewetsinējawabelia. Itsiata baitsi jane, cotocaewi patsimaxēpatsicuene apotopitsapaetsi tsane pacuenia copia-yami. ³⁰Bajarapacuenia apotopitsapaetsi tsane, tsipaji pamonaē waē-yabetsia^m manuamene-itapajawa pejinawanapaewi, pijajiwi wajabitsaē najetarubenaenica manuamenejawa barcomonēta. Nexata, bajarapamonaē cueneyacaranatsiaya tsimaxēpatsianica pebarēnawajabitsaēt-sinexatsi. Nexata, Siria nacua pewetsinē bajarapacuenia petaejawata, aitaajepaebiaya caewērena nawiatsiana pijanacuajawaberena. Itsiata, pejamatabëcuenenaxuabixae pesiwanajamatabëcueneweretsijawami, ya-anaeya penawiatanajetarucaexae, bejiobia-exanaena pamonaē Diosojawabelia penawajēcabiabiwi Israel nacua. Itsiata, pamonaē copabiana Diosojawabelia penawajēcabiabijawami, juya penawajēcabiabinexa bajaraponē pijadiosowijawabelia, bajara-ēpamonaē pexaniacuenia taeyabiabiana.

³¹»Bajaraponē pijajiwi wajabitsaē tocopatsiana pibisiacuenejawanē pexanaenexa Dioso pijatemplobo-ēnēta, itsajota jiwi nayajiwiwinawana-paenaⁿ pijawajabitsaēwecua. Papibisiacuene exanaena bajarajota, Dioso taena petobijianaejawatsi pijataxunaemi, bepenaxuirabibocuenia penacopatsinexa bajaraPonē pitabarata. Orijibia, cuene-itawetsiana bajarapatemplobojawata jiwi dajubi petajuitabiabiyanīwa caematacabi canacujitsia altar-jumata Diosojawabelia. Xuacujinae, pecowēta copatsia-exanaena jiwi pexanabiabinexa bajarapataxunaeta xuanē Dioso tane pepopitoyajawanē. ³²Nexata, bajaraponē najumetsēnētsiaya wēnēxaniatabiabiana, peyamaxē-itojorobinexa pamonaē pecopabiwi Diosojawabelia penawajēcabiabijawami, caejamatabëcuene pexainaenexa bajaraponējawabelia,

m 11:30 waēyabetsia: Bajarapamonaē tsaena Roma nacuapijiwi pijajiwi wajabitsaē.

n 11:31 nayajiwiwinawana-paena: Bajarapamatacabijawa itsamonaē tsaena namatayabiana templobo-ēnēta pijawajabitsaēwecua.

apopejumecowënëtsinexa Dioso penajumeliwaisicajonejawami. Belia, bajarapamonae xainaena caejamatabëcuene bajaraponëjawabelia, pibisiacuene pexanabiabinexa. Itsiata baitsi jane, pamonaepacucuenepiasiwawidioso, bajarapamonae ajamatabësäë tsane Dioso pejitsipaecueniapexanaenexa. Nexata, cuenecaranatsiayanawajabitsaëtsiana Siria nacua pewetsinëjawabelia.³³ Pamonaedioso piasiwawiyajuwënëwi, pewetsiwi pijamonaetuatuajëta, cujarubabiabiana jiwi ayaibitsaëto Dioso pijacuene beweliacuena peyapëtaewijawabelia. Itsamatacabijawabelia, bajarapacujarubiwiwiyajuwënëwi° itsamonae beyejebianatsi espadata, itsamonae tajuitsianatsi. Wecuanacobetoxotsianatsi dexitaxua-ata xaina. Itsamonae pijinia caponaenatsi petaicaewitsicuenia tajë nacuanëjawabelia, bajarapanacuanëpijiwi amoneyacuena petonacuenebiwinexa. Bajarapitsipibisiacuenejawanë Dioso pijajiwi taeyabiabiana caejuameto-bejecuenia.³⁴ Pacujinaedioso piasiwawitocopiapatsianatsipebejiobia-exanaejawatsi, pebeyebijawatsinua, bajarapamatacabita jiwi bewelia yawenonaenatsi. Itsamonae-ata nacajonena Dioso piasiwawijawabelia bepejumecowënëtsiwi itajara, itsiata apoyawenonaetane bajarapamonae pewecupanepaenexa bajarapabejiobia-exanaecuenetsi. Nacajonena saya pijacuata penasiwanajamatabëxainaexaepexaniacuene penatotaenexa.³⁵ Nexata, Siria nacua pewetsinë itsa beyejebia-exanaena Dioso piasiwawibajarapabejiobia-exanaecuenejawata Dioso capitsapaeya-exanaena pamonaesaya ëpenacajonewi, pijacuata penasiwanajamatabëxainaecueneyabara, jamatejema penacopabinexa ëpamonae pepacuenedioso piasiwawibajarapacuena Dioso tocopatsiana bajarapanacua pewetsinë pebejiobia-exanaenexa pijajiwi nacua pecopiarucaematacabijawabelia. Bajarapamatacabibaxë sajina pecopiapatsinexa, Dioso penatocaëjëtsimatacabi.

³⁶»'Bajarapamatacabianëjawa Siria nacua pepopeyanacuaewetsinë^p exanabiabiana penatojitsipaecuenecowëya. Belia, nexata bajaraponë ayaijamatabëcuenenë nataena dexitawiriadiosowiwe-cua. Nexata, bitso pibisiacuena baracuaicuaijai tsane pepoDioso yabara, jiwi caeto-ata apopejumaitsijumenë. Daxita bajaraponë pexanaecuenejawanë, xaniawaetsia topitsapabiabianatsipicani, Dioso bara-anaepanaeya penaneconitsia-exanaematacabi pecopiarucaejawabelia, daxita pibisiacuene pexanawanapaewi mapanacuataje. Bajarapaepatota nexata, Dioso tsitorobianatsipaneconita tocaëjëta penaneconitsia-exanaenexa, tsipaji xua Dioso jamatabë-exana, bajaraxua exanabiaba.³⁷ Bajarapayanacuaewetsinë apotoyaiyataetane

o 11:33 *bajarapacujarubiwiwiyajuwënëwi*: Bajarapamonaejawabelia cajunua itsamonae Dioso Pejumeliwaisi peyapëtaewi itsamonaewecua, bajarapijinia pacuenia pijinia pamonaejumecowënëta bajarapamonae pecujarubiliwaisi. Nacua peliwaisijawata bajarapamonae wënërubatsi Macabeowi. Nexata, bajarapaMacabeowi barënewajabitsaëta Siria nacua pewetsinë Antíoco Epífanesejawabelia. p 11:36 *Siria nacua pepopeyanacuaewetsinë*: Antíoco Epífanepijinë cuenëjëpae-ata xua Dioso tsitajëta Daniel-jawabelia bemajitsinaebocuenia bajarapanacua peyanacuaewetsinënexa pecuene yabara, itsiata versículo 36-jawaweliacujinae ángelnë yapëtaeya-exana Daniel pepo-anticristonënexa pexanaecuenenexa.

pijasalinaiwimi pijadiosowi,^q bajarapacuenia petiriawi-ata padiosowijawabelia' jumecowënëtsiaya nawajëcabiaba, itsawiradiosowijawabelia-ata, tsipaji bajaraponë bitso ayaijamatabëcuenenëcuenia nataeponaponaena daxita diosowiweucua. ³⁸ Bajarapacuenia be-ayaijamatabëcuenenë nataeponaponaena-ata tsane daxita pijanacuapijiwi pijadiosowiweucua, bajaraponë itsiata siwanajamatabëcuenecopatabiabiana itsatomaranëpijiwi jumapecataeya pexanaenëjawabelia,^s pijasalinaiwimi apopeyapëtaediosonëjawabelia. Nexata, siwanajamatabëcuenecopatabiabiana pajumapecataenë natoxainabiaba bediosonëcuenia pamonaie piacuenesaëtomaranëta pejinawanapaewi, pewetsinexatsi pijawajabitsaëwecua. Bajarapajumapecataenë bepjadiosonëcuenia petaexae tsane, asiwaya yayiataeya rajutabiabiananua oronanijawanë, palatananijawanë, pexanianaitabëtsiwiria-ibojawanë-ata, bajarapacuenia itsawiriapenamatomotsijawanë-ata. ³⁹ BajarapaSiria nacua pepopeyanacua-ewetsinë bajarapapitothiadiosonëjawabelia siwanajamatabëcuenecopatsiaya tsimaxëpatsiana piacuenesaëtomaranëta pejinawana-paewijawabelia. Nexata, pecuene-amoneyabicujinae, pamonaie yayiataeya taeyabiabiana bajaraponë,^t bajarapamonaie juya tocopsiansatsi pataxunaeta ayaijamatabëcuenewi ewetabiaba. Bajarapacuenia iranë tsicobetsanaenatsi pijamatamocuenia.

⁴⁰ »Paepatota jane baja, Dioso tocaëjëtatsi petocopiarucaenexatsibeje bajaraponëbeje peyanacua-ewetsijawamibeje, bajarapaepatota copiya Egipto nacua pepopeyanacua-ewetsinë tsimaxëpatsiana,

q 11:37 pijasalinaiwimi pijadiosowi: Itsacuenia pijinia itsamonaie juca wowaijumeta: «pijasalinaiwimi pijaDioso», tsipaji canaëjëta pepoDioso yabara. Pamonaie asiwaya nawajëcabiaba jumapecataeya pexanaenëjawabelia peyawenonaenexatsi, bediosowicuenia petaexae, bajarapamonaie nawitsia xaina bajaraxuanë, pacuenia waxaitsi jiwi nawitsia wajianë xainatsi wajanawetsinexa. Baitsi, pamonaie pe-ubiwi asiwaya nawajëcabiaba itsajumapecataenëjawabelia, pijapabianë petonaxaniabinexatsi. Petiriawi pijinia asiwaya nawajëcabiaba itsajumapecataenëjawabelia penacoxitsinexa, peyacotajinaenacueto petojopaeyaniwatsinua. Pamonaie penawijatsiwi asiwaya nawajëcabiaba itsajumapecataenëjawabelia penawijatsicue pexaniacuenia petopitsapaenexatsi. Pamonaie wajabitsaë asiwaya nawajëcabiaba itsajumapecataenëjawabelia pewetsinexatsi pebarënwajabitsaëtsijawata, jamatejema pecuene-amoneyabinexa pijawajabitsaë. Bajarapijiniacuenia, pamonaie jinawanapa penatonacuenebanatsitomaranëta penayajiwitaenexa pijawajabitsaëwecua, bajarapamonaie asiwaya nawajëcabiaba saicua jumapecataeya pexanaenëjawabelia pewetsinexatsi, pijawajabitsaë pejoneyaniwa pijatomarajawaberena. Itsiata, pamonaie siwa-itaxutuajamatejema pepoDiosojawabelia daxitacuene yabara, nawitsia diosowi aponamatawenonaie. Nawitsia wajianëna aponamatawenonaie. Namatawenona caenë Dioso saya. Abraham itaxutuajamatejemaya penawajëcabiabixae pepoDiosojawabelia, bajaraxuata itsamonaie canaëjëta anticristonë apopeyayataejawanexa pepoDioso. **r 11:37 petiriawi-ata padiosowijawabelia:** Itsacuenia nacacuenecaëjëpa pijinia wajajutsinexa mapajumenë yabara. Mapacueniaje: «Apo-yayiaetenua tsane ponë petiriawi jamatabëcuene-ewetawanapa pepatsijawanexa». Itsa jume, mapacueniaje juca itsamonaie: «Apo-yayiaetenua tsane ponë petiriawi jamatabëcuene-eweta pexanaenexa pexënatocuenia Mesías-nënexa». **s 11:38 jumapecataeya pexanaenëjawabelia:** Bajarapajumapecataenë pewënë tsarena Júpiter Capitolinus, Roma nacuapijiwi pijadiosow. Itsiata, Siria nacua pewetsinë bajarapajumapecataenë pecapatsicujinae pijanacuayaberena, itsacuenia wënëruba, Zeus Olímpico. Bajarapacuenia exana Antíoco Epífanës, itsiata itsa pepo-anticristonë pecuene yabara, aponayapëtaetsi pawiradiosonëjawabelia pewënëta bajarapapibisiacuenëjawanë exanaponaponaiejisitsa. Itsamonaie pecanaëjëtisixae anticristonë penaitajëtisijawanexa árabemonaetuatujäta, nexata bajaraponë yayiataejitsia Aláwënë diosonë, tsipaji Alá peliwaissi pejumecowënëtsiwi natocaëjëtabiaba pewerebiabinexa daxita pamonaie apopejumecowënëtsiwi Alá peliwaissi. **t 11:39 yayiataeya taeyabiabiana bajaraponë:** Aponayapëtae xaniawetsia ponë yabaracuaicuajai. Itsamonaie canaëjëta peyayataejawa pepopeyanacua-ewetsinë. Itsamonaie canaëjëta pijinia jumapecataeya pexanaenëjawabelia peyayataejawanexa.

pebarēnawajabitsaētsinexa Siria nacua pepopeyanacua-ewetsinējawabelia. Itsiata baitsi jane, Siria nacua pepopeyanacua-ewetsinē cuenecanawiatsiaya barētsimaxēpatsiana ayaibitsaēto pijajiwi wajabitsaēwi yajawa; itsamonae petaxuta peponaewi, itsamonae pecanawajabitsaētabiabicarrozamonēta peponaewi. Itsamonae pijinia ponana pecanawajabitsaētabiabicaromonēta. Nexata, barēnawajabitsaētsiana Egipto nacua pepopeyanacua-ewetsinējawabelia. Nexata, pebarēnawajabitsaētanajetarucaejawata, cuene-amoneyabaponaena itsanacuanēpijiwi, panacuanē ena bajaraponē-beje peyanacua-ewetsinacuabejetuatuajēta. Pacuenia bitso mene piawaju-buamatacabita iranē bepijiayo pēcaewa, bajarapacuenia cuene-itsi tsane Siria nacua pewetsinē pijajiwi wajabitsaē pecuene-amoneyabaponaejawata.⁴¹ Bajarapijinia pacuenia, barējonenajetarucaena Israel nacujawa. Nexata, bajarapanacuajawa beponaena bitso jiwi ayaibitsaētonē. Itsiata baitsi jane, wecuapanepaenatsi Edóm nacupijiwi, bajarapacuenia Moab nacupijiwi, ayaibitsaētonē Amón nacupijiwi-ata.⁴² Nexata, bajarapacuenia bajaraponē yanacua-ewetsiana itsanacuanē nawitsia. Belia, yanacua-ewetsiananua Egipto nacua, tsipaji bajarapanacuapijiwimi apocuenecaējēpaetsi tsane pewecuapanepaejawa.⁴³ Bajarapacuenia wecuaponaena daxitaxua penamatamotsijawanē, oronanijawanē, palatananijawanē, daxitaxuanē-ata bitso penamatamotsijawanē Egipto nacupijiwi pijajawanēmi. Bajaraxuacujinae, icatsia cuene-amoneyabiana Libia nacupijiwi, Etiopía nacupijiwi-ata.⁴⁴ Bajarapamatacabijawalia tojumepatsianatsi ayailiwaissi, pemutuabereca pejinawanapaewi peliwaissi, nortenenia pejinawanapaewi peliwaissi-ata. Bajarapaliwaissianē anaeya-exanaenatsi, jamatabēcuenebējaiya-exanaenatsinua. Bajaraxuata, anaeya caewēarena barēpitsapaena bajarapanacuabejajawabelia, pebarēnawajabitsaētsinexa. Picani bitso jamatabēwerebiabiana, jamatabēbeyejebaponaenanua jiwi ayaibitsaēto.⁴⁵ Nexata, exananubiana pexaniawiriacarpabonē pijataxunaeboxanetonexa pa-ira boca manuamenebeje, petsutobejetuatuajēta; patsuto baitsi Dioso itapeta pijatemplobomi pijataxunaenexa, Jerusalén tomarata. Itsiata baitsi jane, Dioso petocaējētsicueniatsi bajaraponē tocopiapatsianatsi petēpaejawanexa. Nexata, beyaxuabianatsi xainaenejewawa itsajiwi-ata peyawenonaejiwinexatsi, nejai ángelnē taneyapētaeya-exanaejawata xua copiapatsijitsia itsamatacabijawabelia», jai Daniel.

**Pacuenia itsi tsane imoxoyo nacua
pecopiarucaematacabijawabelia, yabara peliwaissi**

12 ¹Icatsia, Daniel peyaquinaejawata jumaitsi: «Orijiibia bajarapanaitayotsi-ángelnē» nejumaitsi: 'Pamatacabianē-jawa imoxoyo nacua copiarucaejitsia,^v naitajētsiana piacuenesaē-ángel Miguel,^w ponē yajiwitaeya ewetaponaponabiaba nijamonae israelitawi. Bajarapamatacabijawa-ata jiwi bitso nabejiobitsiaya jinawanapaena,^x

u 12:1 *bajarapanaitayotsi-ángelnē*: Bajaraponē tsaena ángel Gabriel. Bajaraponē penamatamotsiliwaissi Dioso Pejumeliwaissicaponaenē jiwijawabelia. Taema Dan. 8:16, Lc 1:19, 26.

v 12:1 *nacua copiarucaejitsia*: Taema Mt 24:21; Mc 13:19; Apoc. 7:14; 12:7. **w 12:1** *Miguel*: Taema Dan. 10:13, 21; Apoc. 12:7. **x 12:1** *nabejiobitsiaya jinawanapaena*: Taemanua Jer. 30:7, Joel 1:15-18, Zef. 1:14-18, Apoc. Cap. 6-cap. 18-jawabelia.

pitsinabejiobitsicueene caeto-ata jiwi abaxë apotae petaxuxuabijawawerena-cujinae pejinawanapaenacuanëjawa. Itsiata, pacujinae tocopiapatsianatsi mapanacuapijiwi bajarapanabejiobitsicueene, Dioso capanepaena nijamonae israelitawi, pamonaë wënërubenaena Dioso pewënëyaquinaebaxutota.^y

² Bajarapamatacabijawa ayaibitsaëto petëpaewimi icatsia namatacobiana petëpaejawamiwecua. Nexata, bajarapanamatacobiwiyajuwënëwi itsamonaë jinawanapaena bitso piauracuenia, penabejiobitsicuenianua. Itsamonae pijinia cabarëya tsawanapae tsane matababi apopewerewerecaejawa. ³ Bajarapabarëyawiyajuwënëwi, pamonaë Dioso pecuene penatoyapëtaewi,^z bajarapamonae naitayotsiana daxitamatacabijawabelianexa, pacuenia tulupu athëbëpijicuenejawanë. Bajarapacuenia naitayotsiana pematacaponaexae jiwi aneconijibia pejinawanapaenexa Dioso pitabarata, itsa cujarubawanapa Dioso peliwaisi.

⁴ »Bajarapacuenia tanetsipaebicujinae, nexata ángelnë nejumaitsi: 'Bajarapaliwaisi xua pacatsipaebatsi, itsiata ajenaconoxae canajumecopatatsi xamë mapacueniaje: ¡Danielmë, pëtsa abaxë paebame! ¡Muetsia natoxainare bajarapaliwaisi! ¡Bajarapaquionaebaxuto itsajota yaquinarubame bajarapaliwaisi, nequionaecujinae upicatsare sellocuenia,^a jiwi pelebiyaniwa^b pecopiarucaematacabi pecopiapatsijawabelia! Bajarapamatacabianë yabara bitso ayaibitsaëtonë jiwi daxitajawa jinarutsiana, pecaxinaenexa pexaniajai-liwaisi. Nexata, jiwi pewajënaeyabelia yapëtaeponaena bajaraxua yabara,' nejai ángelnë.

⁵ »Bajaraxuacujinae, icatsia xanë, Danielnë, taniji itsa-ángelenëbeje penucaenëbeje. Caenë nuca pepamene itsapanawelia, itsanë pijinia nuca itsapanawerena. ⁶ Bajaraponëbejeyajuwënënië yanijoba pa-ángelnë nuca menematatsënëta, pexaniawirialinopanata pexanaejawa penaxatatsinë. Jumaitsi mapacueniaje: '¿Detsa pamacatabiwajëto sajina pecopiarucaenexa bajarapapiayaicuenejawanë pexanaejawa?', jai bajaraponë. ⁷ Nexata, bajarapaepatota pexaniawirialinopanata penaxatatanucaë-ángelnë, penucaenë menematatsënëta, anijacobebeje nacobeyota athëbëabetsia pepopexaniajaicuena pejumaitsinexa. Nexata, najumecapanepaeya Dioso peyamatacabiatSITECAENë pewënëta jumaitsi: 'Daxita bajaraxua copiarucaena acueyabi pawabeje epatuacuenia. Pamatacabijawabelia tocopiarucaenatsi pecuenaesä^c ponë Dioso pijajiwi bejiobia-exanaponapona, bajarapacujinaeta rabaja daxita bajaraxua copiarucaena,' jai najumecapanepaeya ángelnë.

y 12:1 *Dioso pewënëyaquinaebaxutota*: Taemanua Éxo. 32:31-32, Sal. 69:28, Apoc. 3:5.

z 12:3 *penatoyapëtaewi*: Pamonaë bairtsi Dioso piásiwawi. Taema Dan. 11:33, 35. a 12:4 *upicatsare*: Taema Apoc. 22:10. b 12:4 *jiwi pelebiyaniwa*: Itsamonae canaëjëta pacuenia ángelnë apo-itorobi Daniel-pijinë pexaniawaetsinexa bajarapabaxuto jiwi pelebiyaniwa. Biji rajane, itorobatsi pexaniacuenia pexaniawaetsinexa jiwi pexinaenexa bajarapaliwaisi nacua pecopiarucaematacabijawatalia, tsipaji matapania bajarapamatacabijawa jiwi xaniawaetsia jumetaena pajamatabëcuenexaina. Taema Dan. 12:9. c 12:7 *tocopiarucaenatsi pecuenaesä*: Xaniawaetsia picani aponayapëtae pajiwi yabarajumaitsi bajarapajumebeje. Itsamonae canaëjëta israelitawi yabara pejumaitsiyawa, tsipaji bajarapamonae tsaena bepjawajabitsaëwicuenia Dioso jinawanapaena bajarapamatacabita apopejumecowënëtabibixae. Nexata, ayaibitsaëto Dioso pijajiwi israelitawiyajuwënëwi nawajabitsaëtsiana Dioso pijacuenejawabelia. Itsamonae canaëjëta pijinia anticristonë yabara pejumaitsiyawa, ponë bejiobia-exanaena Dioso pijajiwi pacuenia jumaitsi Apocalipsis-baxutota.

⁸»Xanë picani bajaraxua pejumaitsijawa jumetaniji, itsiata baitsi jane, apojumeyapëtaenë. Nexata, icatsia yanijobajë pepaebinëjawabelia: 'Tajatuxanenë, daxita maxuanëje pecopiapatsicujinae, ¿detsa pacuenia meta nacopatsiana mapanacuaje?' janë. ⁹Nexata bajaraponë nejumecanawiata: 'Pëtsa siwabëjamë bajaraxua yabara! Jamatejema saya ajamatabëcuenesaëya jumecowënëtaponaponaname Diosojawabelia bëjamënejewa, tsipaji paliwaisi neyanijobame Dioso muetsiacuenia xainaena pecopiarucaematacabi pecopiapatsijawabelia. ¹⁰Bitso ayaibitsaëtonë, piajamatabëcuenebejewi, Dioso pijajiwi-ata taena panabejiobitsimatacabianë yabara catsipaebatsi. Nexata, bajarapabejiobia-exanaecuenia yabara, ayaibitsaëto peyapëtaewi Dioso pecuene copatsiana pibisiacuenia pexanawanapaejawi, juya Dioso ëpejitsipaecuenia pejinawanapaenexa. Cueneyapëtaenanua xua cayapëtaëya-exanaponatsi. Biji rajane, pamonaë piajamatabëcuenebejewi, bajarapamonae tsitecaëya pibisiacuenia exanawanapaena. Xaniawaetsia aponatoyapëtaenua tsane xua yabara catsipaebatsi ajena.

¹¹Pitawetsicujinae dajubi petajuitabiabijawami altar-jumata, pexanaecujinaenua xuanë Dioso tane pepopitoyajawanë pijatemplobota, bajaraxuacujinae Dioso pijajiwi jinawanapaena mil doscientos noventa pamatacabibeje pebejiobia-exanaecueniatsi. ¹²Bitso jamatabëcuenebarëya tsane pajiwiyo Diosojawabelia itaxutuajamatejemaya copia-ewetaponapona peyawenonaponanexatsi bejiobia-exanae-atatsi pecopiarucaejawabelia bajarapamil trescientos treinta y cinco pamatacabibeje. ¹³Itsiata baitsi jane, xamë, Danielmë, jamatejema ajamatabëcuenesaëya bejumecowënëtaponaponaname Dioso netëpaematacabijawabelia. Nexata, nacua pecopiarucaematacabita icatsia namatacotsianame netëpaejawawecua, Dioso pecarajutsinexa xua catoxaina pecamatamotsinexa,' nejai ángelnë», jai Daniel, mapabaxutotaje peyaquinaejawataje.

Oseas

Dioso asiwa pijajiwi ajamatabēcuenetaja-ata pejumecowënëtsiyaniwa

11

¹Oseas jumaitsi Israel-pijinë pemomoxijawabelia:

—Jehová raja nejumaitsi paxamë yabara: «Pacujinaeta Israel-pijinë pemomoxi abaxë pejanabitsaëtoyo bepejewaxijiwiwocuenia, taniyi asiwaya taxënatocuenia. Nexata, junatajë taxënato Egipto nacujawawerena^a pepitsapaenexa.

²»Itsiata baitsi jane, paepatota xanë juya itsa junatabiabajë, bajarapae-patota bajarapamonae aponejumecowënëtabiabi. Caranata, xanëwecua natsatabiabanajetarubena. Bajarapamonae tajajiwi dajubi tajuitabiaba penajumetsënëtsidosowijawabelia. Totajuitabiabanua incienstonanijawanë jumapecataeya pexanaenëanëjawabelia.

³»Xanë daxitajawalia jamatabēcuenecujarubanajetarucajë Israel-pijinë pemomoxi, Efraín nacuapijiwi. Cujarubanajetarucajënua pacuenia jinawanapaejitsia. Pacuenia paxajiwi bacujaruba pexijiwi peponaponaenexa pecomacaponaejawata pejopaeyaniwa, bajarapacuenia picani cujarubajë Efraín nacuapijiwi. Itsiata baitsi jane, bajarapamonae aponatoyapëtae xanë tajamatabēcuenecujarubijawa, xanë-ata ta-ewetabiabijawa itsacueneyaniwa.

⁴Xanë bajarapamonae ewetabiabajë xaniawaetsia. Asiwayanua ewetabiabajë. Pacuenia dajubi pexainaenë bitso piasiwänë peyacueyacuecaemaëtota bayamaëroboboca bojawabelia, bajarapacuenia ta-asiwacuenia matabaponajë bajarapamonae xanëjawaberena. Bajarapamonae picani tonacuenebawanapa Egipto nacuapijiwi amoneya bedajubiwicuenia. Pacuenia bueyu yugonaejawabelia pecëbinëtsi tonacueneba amoneyacuenia pexainaenëtsi, bajarapacuenia picani itsi bajarapamonae. Itsiata, xanë wecuacapanepajë bajarapacuenemiwecua. Asiwaya abatajë pexaejawa. ⁵Bajarapacuenia ewetsi-atanë, bajarapamonae caewëarena ajamatabēcuenetajaya aponajamatabēcuenepëñëyorotsi xanëjawaberena. Nexata, aponawiatsi-ata Egipto nacujawabelia, bajarapamonae itsiata ponana Asiria nacujawabelia, bajarapanacua pewetsinë peyanacua-ewetsinexatsi, bajarapamonae icatsia amoneya petonacuenebawanapaenexa.

⁶»Nexata, Asiria nacuapijiwajabitsaëwi tsimaxëpatsianatsi, espadata pebeyejebaponaenexatsi. Bajarapacuenia werebiabianatsi Israel-pijinë pemomoxi penamuxubijiapenetaponaejamatabēcuenë. ⁷Baitsi, tajajiwi Israel-pijinë pemomoxi xanëwecua ajamatabēcuenetajaya jinawanapa apotanejumecowënëtsicuenia tanejumecowënëtsiyaniwa. Bajarapamonae

a 11:1 *Egipto nacujawawerena*: Taema Éxo. 4:22-23; Mt 2:15, 19-20.

newënëxaniatsiaya nejumlahsi-ata: ‘Ayaijamatabëcuenenëmë daxitawecua,’
nejai tsabiabi-ata, itsiata bajarapamonae newecuanajamatabëcuenepë-
nëyorota. Aponeyaiyataeyabiabi», nejai Jehová paxamë yabara —jai Oseas
Israel-pijinë pemomoxijawabelia, Efraín nacuata pejinawanapaewi. ⁸⁻¹² [...]

Joel

**Jehová junata Judá nacuapijiwi penajamatabécuen
epënëyorotsinexa bajaraponëjawaberenä**

2 ¹⁻¹¹ [...] ¹² Joel pewajunupaebijawata Jehová peyapëtaeya-
exanaejawamitsi penaneconitsia-exanaejawamitsinexa, jumaitsi Judá
nacuapijiwijawabelia:

—Jehová pacajumaitsi: «¡Bajarapitsicue ne panetaeyaniwa panejamatabë-
ëthëtojawawetsina panajamatabécuenepënëyorore xanë Jehovánëja-
waberenä! Panajamatabécue ne itajëtsianame panenasiwanajamata-
bëxainae cuenia pibisiacue ne pane-exanaejawami yabara, pexaejawa
panenatsi-atso bijawata, panenasiwajamatabë nuejawata, panenajamatabë-
xainae jawatanua», pacajai Jehová.

¹³» ¡Tajamonae, pëtsa saya naniawelia panenaxatabijawa panamipa-
bëtitinaxuabame papecatsi-atanejamatabécue ne panijaneconi yabara!
Biji rajane, pepacue ne panejamatabë-ëthëtowetsina bepacatsi-atane
panijaneconi panexainaejawa. ¡Bajarapapecatsi-atanejawata panajama-
tabécuenepënëyorore Jehová panija DIOSojawabelia, tsipaji bajaraponë
wajanaca-itaxutotsoniataenë, asiwaya wajanacataenënuä! Bajaraponë
bepijiayo apowajanacabara-anaepanaenë wajaneconi yabara. Nexata,
najamatabécuenecatitabiaba petsi-atanejawamitsi wajanacananeconitsia-
exanaeyaniwa, wajaneconi wajaxainawimi-ata picani. ¹⁴ Bajarapacuenia
nexata itsa pa-exanaename, belia bajaraponë jamatabécuenecaewijitsipa
papecananeconitsia-exanaejawaminexa, juya pexaniacue ne papecarajutsi-
nexa pane-ubijawanë papecatonaxaniabinexa, paxamë juya panerajutsinexa
ofrendacuenia Jehová jawabelia pexujawanë, uvacuai barëmeneranë-ata.

¹⁵» ¡Nexata, pa-obare trompeta Sión-tsutojumawetsica, pejumetaewi pena-
cuenexaniawaetsinexa! ¡Nexata, itorobare pexaejawa penatsi-atso binexa
pijaneconijamatabécue ne! Itorobarenua daxita penacaetuatsinexa Jehová
pewënëta. ¹⁶ ¡Pajunare daxita Dioso pejumecowënëtsiwi! Nexata, daxitajiwi
barëpatsiana perujujiwixi, pejewaxi, mitopiapaenacuebi-ata. Bajarapacue-
nia pejananacojiobiwi-ata namatacobiana penapatsinexa. Daxita bajara-
pamonae panacaetuatsia-exanaename Sión-jawata, penacuenexanetsinexa
Jehová petocaëjëtsicueniatsi. ¹⁷ Paxamë pijinia, pasacerdotewimë paneto-
nacuenebawanapaewi Jehová, panubenaename templo baupawajënaeya
piniji-altar-wënëjawa canacujitsita, bajarajota jiwi pijaneconi yabara natsi-
nueya panetowajëcaenexa mapacueniaje: «¡Siwajamatabécuenecaeware nija-
jiwi pijaneconimi yabara! Pexaniacuenia pacawajëtatsi netocopatsiyaniwa

itsamonae pewënëcaponaeyaniwatsi nijajiwi. Pacawajęcatsinua itsana-cuanëpijiwi nijajiwi peyanacua-ewetsiyaniwatsi, bajarapacuenia nesiwa-jamatabęcuenecaewixae nijajiwi pijaneconi yabara itsatomaranëpijiwi cawënëcaponaeya patanejumaitsiyaniwa: ‘¿Detsa jota pijaponaponaë panijaDIOSO?’ patanejaiyaniwa», pajamë tsane pasacerdotewimë panetowa-jętsijawata panijanacuapijiwi —jai Joel.

Xuanë Jehová to-exanaejitsia pijajiwi penajamatabęcuenepënëyorotsixae

¹⁸ Orijibia, icatsia jumaitsi:

—Bajarapacuenia itsa papijajiwimë pa-exanaename, nexata Jehová papijanacuapijiwimë asiwaya papecataeyabiabinęxae, pacasiwajamatabęcuenecaewiana panijaneconimi. ¹⁹ Marapacuenia nexata Jehová pacato-exanaeyapaeba juya papijajiwimë. Pacajumaitsi: «Pacarajutsianatsi nawitsia panexainaenexa trigo, uvacuaibarēmeneranë-ata, olivocuaipiji-aceiteranë-ata, daxita bajaraxuanë panexaeyabiabinexa panepenejawabelia. Nexata, bajarapacuenia beweliamatabęcuenewi apopacatae tsane. ²⁰ Bajarapacuenia apopacacapocaponae tsanenua, tsipaji xanë pacawecuatorotsianatsi pamonae papecatsimaxępatsiwi matatsęnęjawawerena.^a Itsamonae torotsianaję petsewinacuajawabelia. Nexata, penamataxainaewi bubunaeya-exanaenaję Mar Muerto pucaxanetowabereca. Cotocaewibitsaęto pijinia torotsianaję Mediterráneo manuamenejawabetsia, bajarajotatsia pebubunaenexa. Pamonae petępaewi tsabanaena. Nexata, pacato-atuxubeje tsane daxita panijana-cuajawa. Xanë Jehovánë, bajarapapiniјicuene patacatsita-exanaenë», pacajai Jehová —jai Joel sacerdotewijawabelia, Judá nacuapijiwijawabelianua.

²¹ Orijibia, icatsia Joel jumaitsi:

—¡Pajamatabęcuenebaręyamëre! ¡Pajunawame pętsa panija-iranę papecatobijianaewawami, tsipaji Jehová mapitsipiniјicuenejawanę pacato-exanaenaje! ²² ¡Paxamę pijinia pona panexaewanapaewi pajunawame pętsa, tsipaji petsewinacuamijawa icatsia pexaniapona capitsapaena! ¡Bajarapacuenia naewawanę xainaena pecuai, higeranaenę-ata, uvamacanaenę-ata! ²³ ¡Pajamatabęcujirubaręyamëre tsawanapae Sión-tsutomuxunenia^b panejinawanapaewi, tsipaji Jehová panijaDIOSO bitso pinijicuenia pexaniacuene papecato-exanaponaponaenęnexa! Panija-ira petsewinacuami-ata, pacatotsi-itorobabiabiana ema perunabiabinexa pijamatacabianęjawa, pacuenia baja itsi tsabiabi papecatobijianaewajęnaeya. ²⁴ Nexata, pane-ubijawanę pacato-capitsapabiabiana ayaijawa trigo, panewënëbınexa pabonęta paxaniawaeta-biabame panenotsixu. Bajarapacuenia nawitsia paxainaename uvacuaibarēmeneranę, olivocuai-aceiteranę-ata. Nexata, xua paxainame bajaraporanę panejenexa apopacatoyacaęjępae tsane penawitsixae.

²⁵»Nexata, itsa panajamatabęcuenepënëyorotsianame, Jehová orijibia pacajumaitsi papecato-exanaenexa: «Xanę pacatocanawiatsianatsi

a 2:20 matatsęnęjawawerena: Nortejawawerena. **b 2:23 Sión-tsuto:** Bajarapawënë itsawënë Jerusalén tomaranexa. Baitsi Sión-wënëtsuto pe-ecaexae Jerusalén tomarata, bajarapacuenianua Dioso pijatemplobo Sión-tsutojumata pe-ecaexae, itsajawata wënërubabiaba Jerusalén Sión-wënëcuenia.

xuanēwajēto pane-ubijawanēmi pacatobijiana bosesemonae panenotsijawa-nēmīnexa patacatotsi-itorobimatacabianējawa.^c ²⁶Nexata, paxamē paxae-wanapaename panepenejawabelia. Nexata, panewēnēxaniatawanapaename Jehovānē panijaDiosonē, tsipaji bitso pinijicuenia pexaniacuenejawanē pacato-exanabiabianatsi. Bajarapacuenia patacato-exanaexae pematatsēnēa itsamonae beweliamatabēcuenewi apopacatae tsane. ²⁷Nexata, matapania panatoyapētaename caenēnē Jehovānē panijaDiosonēnē taponaponae paxamētuaatujēta. Panatoyapētaenamenua pacuenia ajibi itsanē, itsajawa-ata panijaDiosonexa xanēwecua. Bajarapacuenia pematatsēnēa itsamonae beweliamatabēcuenewi apopacatae tsane paxamē patajajiwixaemē», paca-jai Jehová —jai Joel pewajunupaebijawata Judá nacuapijiwijawabelia.

Dioso najumecapanepaeya runaeya-exanaeyapaeba

Espíritu Santo pijajiwijawabetsica

²⁸Icatsia, Jehová pacajumaitsi:

«Daxita bajarapacuenia panija-ira patacatoxanetsicujinae, matapania runaeya-exanaenicajē Espiritu Santo daxitajiwijawabetsica. Nexata, bajarapacuenia paxamētuaatujēta daxita panexi newajunupaebiana, pebijijiwi, petiriawi-ata. Daxita panijamonae perujujiwi Espiritu Santojamatabēcuenē amajitsinae tsabiabi tsane. Pewējēawi pijinia taeyabiabiana bemajitsinaebocuenia. ²⁹Bajarapijini pacuenia, runaeya-exananicajē Espiritu Santo pamonaē amoneya jiwi petonacuenebawanapaewijawabetsica, pebijiwijawabelia, petiriawijawabelia-ata. ³⁰Bajarapamatacabi paneyapētaenexa xaniawaetsia pecopiapatsijawa, pacatsitajētsianatsi pinijicuenejawanē itaboxojawatatsia, mapanacuajawata-ata. Pacatsitajētsianatsi pejana pexainaecuenē, pitatsajawicotiacuenē, piapiatsēxēbocuenē-ata. ³¹Nexata, matacabipijijumeto quirijai tsarucae tsane. Merawipijijumeto pijinia itatsobia tsarucae tsane pejanacuenia. Daxita bajarapacuenia itsinē tsane Jehovānē tjamatacabita, pamatacabi natocaējētajē ayaicuenia tananeconitsia-exanaenexa mapanacuapijiwije», pacajai Jehová.

³²»Itsiata baitsi jane, tjamonaē, pamonaē wajēcaena Jehová pewēnēta pecapanepaenexatsi, bajarapamonaē capanepaenatsi, tsipaji Jehová najumecapanepaeya jumaitsi itsamonae pepanepaejawanexa Jerusalén tomarajawata pejinawanapaewiyajuwēnēwi, Sión-tsutota pejinawanapaewiyajuwēnēwi pijinia. Pamonaē panepaena bajarapapiayaicuenewecua, Jehová najumecapanepaeya pejumaitsixae, bajarapamonaetuaatujēta pijinia itsamonae nanubenaena, Jehová pejunatsiwitsi», jai Joel Judá nacuapijiwijawabelia Jehová petonajumecopatsicueniatsi.

Amós

3 ¹⁻² [...] ³ ¿Cuenecaējēpatsibeje meta anijajiwibeje xaniawaetsia
penajuaponaponaenexabeje, itsa caeliwaisi aponajuaxainaebeje? ¡Jume
cajena! ⁴⁻¹⁵ [...]

Jonás

**Jonás pona saicayajawabelia, Nínive tomarajawabelia
peponaeyaniwa, Jehová pejumecowënëtsiyaniwa**

1 ¹Itsamatacabi Jehová yapëtaeya-exana Jonás-jawabelia, Amitai pexë-nato, xuajitsipa peto-exanaenexatsi. Nexata, jumaitsitsi mapacueniaje:

²—¡Nonotapunare! ¡Ponare Nínive tomaraxanetojawabelia, netsipaebi-nexa bajarapatomarapijiwijawabelia pacuenia xanë naneconitsiaya tawerebiabijawanexa, tsipaji bajarapamonae pijaneconi xanë yapëtaniji! —jai Jehová Jonás-jawabelia.

³Itsiata baitsi jane, Jonás pejumecowënëtsiyaniwa Jehová, wecuanajetabijirawa saicayajawabelia. Nexata, bajaraponë pona Jope tomarawëpajawabelia. Bajarapawëpajawata caxitajaraba barco, peponaemonexa Tarsis tomarajawabelia. Nexata, bajaraponë junua bajarapamo-ënëta penatoma-tamotsinexa pijanamuto, bajarapamota peponaewi pepëta penaponaenexa Tarsis-jawabelia tajë Jehováwecua. ⁴Itsiata baitsi jane, bajarapamonae peponaecujinae, itsa baja tajë najetarubena, Jehová copata bitso ayaicuenia pinijijowiboxaneto. Nexata, bajarapamanuamene bitso pinijimalatacaxanetonë. Belia, bajarapamalatacaxanetota peponaebarmomota jamatabëyasarabiaxuabatsi. ⁵Nexata, bajarapabarcota penacuenebiwi bitso ayaicuenia junawa. Nexata, bajarapamonae caejiwi canacujitsia wajëcapona pijawiriodiosowijawabelia, bajarapadiosowi pecapanepaenexatsi. Belia, bajarapamonae penereca meniareca pecaponaejawanëmi, bajarapamo pefafanaenexa. Jonás jowibonejewa abaxë runareca bajarapamotuatuajë-ënëabereca. Bajarajotareca, majitanuca bitso ayaicuenia. ⁶Nexata, bajarapamo penamatacitorobinë daxitacuenejawalia siwarunareca itsajotareca Jonás majitanuca. Jumaitsi bajaraponëjawabelia:

—¿Dexamë bajarajota xua exananucame piaitamajitsiyainë? ¡Namatacore baja, nijaDIOSojawabelia pijinia nenawajëcaenexa! Belia, bajaraponë xamë cajumecowënëtsipa, wajanacabijiobiataexae wajanacacapanepaenexa malatacata wajatëpaeyaniwa —jai.

⁷Itsiata, malataca tsiteca bitso ayai. Nexata, bajarapamota penacuenebiwi najumaitsaponae ëpamonae: «Nexata, wajanatoya-ëjëbicuenia exanaenatsi, bajarapacuenia wajayapëtaenexa pajiwi pejamatabëcueneta bajarapapitsi-ayaicuenie nacatocopiapata», najai. Nexata jane baja, bajarapamonae pijacujirucuenia nato-ëjëbapona, peyapëtaenexa ponë penaneconitsinë. Bajara-paepatota, Jonás tsijopatsi penaneconitsinëcuenia. ⁸Nexata, bajarapamonae jumaitsitsi:

—¡Panetsipaebare! ¿Dexuajitsia mapitsipibisiacuene nacatocopiajo-paje? ¿Detsa pitsicuene xamë nenacuenebaponaponaenë? ¿Detsa werena nenajetarucaenë? ¿Detsa panacuapijinëmë? ¿Detsa pawirianëmë? —jai bajarapamonae.

⁹Nexata, Jonás jumecanawiata:

—Xanë raja hebreowiyajuwënënë. Xanë raja Jehová yaiyataeyacuenia tatonacuenebaponaponaenë. PaDIOSO exana daxita athëbëpijicuene, mapamanuamenepijicuene, bajarapacuenia irapijicuene-ata, bajarapaDIOSO tatonacuenebinë —jai.

¹⁰⁻¹¹Nexata, Jonás tsipaeba penajuanajetarubenaewijawabelia bajara-pamota pewecuanajetabijirawijawa Jehová. Nexata, bajarapamonae itsa bajarapacuenia jumatane pewecuanajetabijirawijawa Jehováwecua, bitso junawa ayaicuenia. Nexata, bajarapamonae itsa tane bitso ayaicuenia malataca tsaponaejawa, yanijoba bajaraponëjawabelia:

—¿Detsa xuajitsia nexata xamë bajarapitsicuene exaname? ¿Detsa xua nexata paxanë pa-exanaenajë xamëjawabelia mapamalatacaje pewainae-ecaenexa? —jai.

¹²Nexata, Jonás jumaitsi:

—¡Panexuaremea bajarapamanuamenejawareca! Nexata, bajarapamalataca ajibi tsane, tsipaji xanë tajaneconijamatabëcuene bajarapayaimalatacaxaneto nacatocopiapata —jai Jonás.

¹³Nexata, bajarapabarcota penacuenebiwi picaní yawenonaeya waeta pecowëyabelia ayaicuenia, pepatsinexa irajawabelia. Itsiata baitsi jane, bajarapamonae apocuenecaëjëpaetsi, tsipaji bitso bajarapamanuamene malatacaxaneto tsanajetarucaewajënaeyabelia. ¹⁴Nexata, bajarapamonae wajëca Jehovájawabelia. Jumaitsi:

—¡Jehovámë, pëtsa paxanë panetëpaeya-exaname maponë pejamatabëcuene! ¡Maponëje itsa paxuabiarecajë planeconijibinë, pëtsa panetaneme bepatananeconitsiwicuenia bajaraponë pejamatabëcuene! Xamë tsipaji Jehovámë exaname pacuenia jitsipame —jai pewajëcaejawata Jehovájawabelia.

¹⁵Bajarapacuenia pewajëcaecujinae, nexata jane baja Jonás xuabarecatsi meniareca. Nexata, bajarapaepatota malataca wainae-ecajunua. ¹⁶Bajarapabarcota penacuenebiwi bajarapacuenia petaejawata, bitso cujunawiaya tane Jehová. Nexata, pesiwanajamatabëcuene-itajëtsinexa peyaiyataejawa, bajarapamonae tajuita dajubiyo Jehová pewënëta. Bajarapaepatotunua, jumeccapanepaeya naliwaisicajunua bajaraponëjawabelia bajarapacuenia peto-exanawanapaenexa pewajënaeyabelia.

¹⁷Itsiata baitsi jane, bajarapaepatota Jehová tsiwajënaexaniawaeta pinijnëxaneto dujuainë, bajaraponë Jonás pequijoninexatsi. Nexata, Jonás bajarapadujainë ënëta boca acueyabi pamerawibeje, bajarapacuenia acueyabi pamatacabibeje.

Jonás dujuainë-ënëjawawerena wajëteca Jehovájawabelia

2 ¹Nexata, Jonás wajëteca Jehovájawabelia dujuainë-ënëjawawerena.

²Jumaitsi:

- «Cawajětatsi tajamatabēcuenebėjaijawata Jehovámėjawabelia, nexata xamě itsiata nejumetaneme. Bajarapacuenia xaně tatěpaejamatabēcuenetayapětaejawata, tacawajětsijawata xamėjawabelia nejumetaneme.
- ³»¡Nexuaremeca manuamenetuatuajėjawareca, bitso tajėjawareca! Nexata, manuamenesaėjawa malatacaxanetota nemataquiobaba, xamě tanetsi-itorobicueniamě tanetocopiapatsinexa. ⁴»Bajarapaepatota, nasiwajamatabě-itsině: ‘Jehováwecua xaně netsita tanenawecuaxuabiněmi tsaponaponae. ¿Icatsia, meta taenajě nijatemplobo?’ jamatabějaně.
- ⁵»Bajarapamanuamene nemataquiona daxitaněñ. Nexata, bajarapamanuamenetuatuajěareca necajoneca. Bajarapacuenia tanecawotsijawata, manuamenepijithamanajawaně nematacacěba.
- ⁶»Bubunanajetarucajě, tapatsijawabereca petsutonětabujawabereca meneběxěpana. Pacuenia hierronaeboněta yacaranatabiaba penaneconitsiwi pejebabiabibota pepitsapaeyaniwa, bajarapacuenia daxitamatacabijawabelia tatěpaejawanexa neyacaranata icatsia ta-asaětsaponaponaejawayaniwa. Itsiata bailsi jane, xamě Jehová DIOSOMě, necapanepame tatěpaejawaminexawecua.
- ⁷»Paepatota natoyapětaniiji tatěpaejawanexa, bajarapaepatota canajamataběnapitatsi Jehovámě. Nexata, ne-ecaeně nijatemplobojawata, tacawajětsijawata nejumetaneme nijatemplobojawawerena.
- ⁸»Pamonae jumapecataeya pexanaeněñejawabelia siwanajamatabēcuenecopatabiaba, bajarapamonae nayamaxě-itojorobabiaba natsiquejemajawaněta. Bajarapacuenia pexanabiabixae nacofěñěba xamėjawabelia piamamataběsaenexa. Aponatotaenua nitaxutotsoniataeyabiabijawa.
- ⁹»Itsiata bailsi jane, xaně pexaniajamatabēcuenetacarajutsijawata, carajutabiabianatsi dajubi tajuitsiaya xamėjawabelia. Najumeliwaisicowě-exanaenajě pacuenia baja xaně najumecapanepaeya cajumaitsitsi. Xamě Jehovámě, caeněmě, cacuenecaējěpa jiwi necapanepaejawa», jai Jonás pewajětsijawata.
- ¹⁰Nexata, Jehová dujuaině itoroba Jonás peyacabinexatsi irajawabelia.

Nínive tomarapijiwi najamatabēcuenepěñeyorota Diosojawabelia

3 ¹Bajaraxuacujinae, icatsia Jehová jumaitsi cotocaewijawa Jonás-jawabelia. Jumaitsitsi mapacueniaje:

²—¡Nonotapunare! ¡Ponare Nínive tomaraxanetojawabelia, netsipaebi-nexa paliwaiši xaně cajumaitsi tsanetsi! —jai Jehová.

³Nexata, Jonás jumecowěñěta. Pona baja Nínive tomarajawabelia, pacuenia Jehová itorobatsi pexanaenexa. Nínive tomara bitso pinijitomaraxaneto ayaicuenia. Cuenecaējěpa peponaejawa acueyabi pamatacabibeje bajarapatomara pe-epapitsapaenexa petaxuta. ⁴Jonás baja itsa junua bajarapatomarajawata, nexata junua caematacabicuenia petsipaebanajetarucaeně. Nexata, bajaraponě pewawajaicuenia jumaitsi tsanajetarucae ayajumeta: —¡Cuarenta pamatacabibejecujinae DIOSO werebiabiana Nínive tomarapijiwi penaneconitsixae! —jai tsanajetarucae DIOSO pewěñěta.

⁵Nexata, bajarapatomarapijiwi, ayaijamatabēcuenewi, beweliamatabēcuenewi-ata, jumexaniatane DIOSO. Nexata,

penajamatabëcuene-itajëtsinexa itsajamatabëcuene pexainaejawa pibisia-cuene pexanaejawamiwecua, bajarapamonae itoroba daxita penajanixaniawaetsinexa, pexaeyaniwa pexaejawa, bajarapacuenia penaxatabinexa pecatsequecaepananëtsi. ⁶Belia, Nínive tomara pewetsinë jumetane Jonás petsipaebanajetarucaeliwaisi. Nexata, bajaraponë-ata wecuanonotapuna pe-ecabiabironowecua, pe-ecaenexa ipumanajawata, penajamatabëcuene-itajëtsinexa itsajamatabëcuene pexainaejawa pexanaeiconimi yabara. Bajarapacuenianua najonotaxuaba naniawelia penaxatatecaejawanë penajuma-acatsinexa pecatsequecaepanatsi. ⁷Bajaraxuacujinae, bajaraponë pepopeyanacua-ewetsinë najua-itoroba peyajawanacuenebiwi-ata pepaebanajetarubenaenexa daxita Nínive tomarapijiwijawabelia pacuenia exanaejitsia. Nexata, itoroba mapacueniaje: «Caejiwi-ata apobexae pexaejawa. Apobe-apanua mera. Bajarapacuenia apoberajutsinua mera, pexaejawata pijadajubijawabelia. ⁸Daxitajiwi naxatabiana pecatsequecaepananëtsi. Bajarapacuenia pijadajubimonae-ata juma-acabiana bajaraxuanëta. Caejiwi canacujitsia Diosojawabelia wajëcaena daxitajamatabëcuenesaëta. Bajarapacuenia copabiananua papibisiacuene exanawanapa, pebejiobia-exanawanapaejawami itsamonae. ⁹Bajarapacuenia itsa exanaejitsipatsi, belia nexata Dioso najamatabëcuenecanawiatsipa wajanacananeconitsia-exanaejawaminexa. Nexata, bajarapacuenia meta Dioso jamatabëcuenecawiana wajanacabara-anaepanaejamatabëcuenemi, wajanacananeconitsia-exanaejawaminexa wajatëpaejawata», jai pitorobijawata. Jejai. Pona baja petsipaebanajetarucaenexa.

¹⁰Dioso itsa tane bajarapacuenia bajarapatomarapijiwi pexanaejawa, pecopabanajetarubenaejawa papibisiacuene exanawanapa, nexata bajaraponë najamatabëcuenecataita, apopenaneconitsia-exanaejawanexa pacuenia picani tonajumecopata Jonás-jawabelia.

Jonás anaepana Dioso apopenaneconitsia-exanaexae Nínive tomarapijiwi

4 ¹Jonás bitso apotsitaxanepanaetsi, itsa yapëtane Jehová pitaxutotsoniataejawa Nínive tomarapijiwijawabelia. Bajaraxuata, bara-anaepana bitso ayaicuenia. ²Nexata, wajëta Jehovájawabelia mapacueniaje:

—¡Nejumetaema mapacueniaje, Jehová! Xanë pacujinae tajanacuata abaxë ponaponajë, bajarapacuenia xanë cajumaitsitsi pacuenia xamë exanaejitsiamë. Bajaraxuata, xanë picani nayajiwinajetabijirawajë bepijia Tarsis nacuyabelia, tsipaji xanë yapëtaniji, DIOSOMë, cajena jiwi nitaxutotsoniataeyabiabinë, jiwi niasiwänënu. Bajarapacuenia xamë bepijanua aponianaepanaenë. Yapëtanijinua pacuenia xamë niasiwajamatabëcuene nexainaenëxae, naneconitsia-exanaeyapaebi-atamë penaneconitsiwi icatsia najamatabëcueneliwaisicataitsijitsiamë naneconitsia-exanaenejewamë.

³Bajaraxuajitsia Jehová, ajena cawajëtatsi tanebeyaxuabinexamë. Xanë jitsipajë tatëpaejawa taponaponaejawawecua —jai pewajëtsijawata.

⁴Itsiaata baitsi jane, Jehová jumecanawiatatsi:

—¿Catsitaxanepana tsaja xamë nianaepanaejawa mapacueniaje? Apoxanepanae cajena —jaitsi.

⁵Bajaraxuacujinae, Jonás pitsapa peponaponaenexa pemuutuabereca bajarapatomarawecua. Nexata, bajarajota Jonás nacuenebanuta

naemaxëranabobërëtoyo, bajarapa-itacaënaejawata pe-ecaenexa. Bajara-ponë ewetecabiaba peyapëtaenexa xua bajarapatomarapijiwi tocopiapatsi-jitsiatsi. ⁶ Jehovah DIOSO xuacujinae tojuwia-exana pijabobërëtomuxuneneta ricinonaeyo. Bajaraponaeyo xaina bitso pexania-itacaënae. Nexata, bajaraponë bajarapa-itacaënaebëxëpanata ecabiaba, pejamatabëcuenexanepanaponaenexa. Nexata, Jonás bitso siwajamatabëcuenebarëya bajarapa-itacaënaejawa. ⁷ Itsiata baitsi jane, itsamatacabijawabelia bajayacunua DIOSO icatsia tocopata tolenaito bajaraponaeyo pexaenexa. Nexata, bajaraponaeyo baja tsaquena. ⁸ Nexata, itsa juameto pitsapaina, DIOSO icatsia copatsina pemutuawetsina bitso piatajujowibo. Nexata, itsa Jonás bitso icotia matatsajawaponatsi, bajaraponë bitso icotia yajamatabëfaena. Jamatabëyatëpanua. Nexata, jumaitsi:

—Xanë netoxanepana tatëpaejawa ta-asaëtsaponaponaejawawecua —jai bajaraponë.

⁹ Nexata, DIOSO jumezanawiatatsi:

—¿Catsitaxanepana xamë nianaepanaejawa pecawecuatsaquenaexae ricinonaejawa? —jaitsi bajaraponë.

—Jājā, netsitaxanepana cajena bajarapacueni, tsipaji xanë jamatabëyatëpajë taca-anae —jai Jonás.

¹⁰ Nexata, icatsia Jehovah jumaitsi Jonás-jawabelia:

—Xamë picani apo-ubimë bajaraparicinonaejawayo. Bajarapacuenianua apowitsabia-exanaemë. Bajaraponaejawayo juwina merawi. Bajarapacuenia icatsia itsamerawijawabelia tsaquena. Bajaraponaeyo naxaniaba saya caematacabicuenia. Xamë itsiata bajaraponaeyo itaxutobejiobiataneme.

¹¹ Bajarapacueni matatoxenetsia netoxanepana xanë ta-itaxutotsoniataejawa Nínive tomarapijiwi, tsipaji bajarapamonae matatoxenetsia piamatabësaëwi. Orijibianua bitso pinijitomaraxaneto itsajota jinawanapa ciento veinte mil pajiwi beje bepejexijamatabëcuenewi, pamonae apopecanaëjët-siwi, bajarapacuenia dajubi-ata ayaibitsaëto —jai Jehovah Jonás-jawabelia.

Miqueas

Israel pepopeyanacua-ewetsinē naexanaejitsia Belén tomarata

5 Mapaliwaisije^a Jehová tsipaeba Miqueas-jawabelia, Moreset tomarapijinē, Samaria tomarapijiwi, Jerusalén tomarapijiwibeje yabara, pamatacabanējawa Jotam, Acaz, Ezequías-ata peyanacua-ewetsiwi tsawanapae Judá nacuapijiwi. Nexata, Miqueas jumaitsi Judá nacuapijiwijawabelia:

¹—Jehová pacajumaitsi: «PaJerusalén-tomarapijiwimē ajena panatocae-tuatsianame panijajiwi wajabitsaēwi, papecayapijiwitaenubenaewinexa, tsi-paji panijawajabitsaē pacamatatoyorotsianubena. Bajarapamonae raja naebota itabaraconibabena Israel-pijinē pemomoxi pijatuxanenē. ²Itsia baitsi jane, Efrata Belén tsiquiritomarayo-ata Judá nacuata pejinawanapaewi nacaewiriamaētowi daxita pijatōmaranēwecua, itsia bajarapatomarayoja-wata naexanaena ponē Israel nacua peyanacua-ewetsinēnexa, ponē pepona-ponaenē bitso pepobajayajawawerena», pacajai Jehová.

³»Itsia, maparucaeje Jehová copatsiana pijajiwi Judá nacuapijiwi pija-epato, matapania pewecua-naexanaejawabeliatsi powa ewetaponapona pitajētsinexa pexinacuetō. Nexata, bajaraponē icatsia caetuatsiana daxita nacaewiriawi Israel-pijinē pemomoxi pijanacua-jawaberena, tajē itsanacua-nējawabelia pejinawanapaewimi. ⁴Nexata, bajaraponē naitajētsiana pewet-sinēnexa pijanacuapijiwi Jehová pesaēta. Ayaijamatabēcuenenēnua tsane Jehová pijaDIOSO pejamatabēcuenē. Nexata, bajarapamonae matapania jinawanapaena itsacueneliwaisi natsixainaenejewa daxita nacuanējawabelia —jai Miqueas Judá nacuapijiwijawabelia. ⁵⁻¹⁵ [...]

Habacuc

Pacuenia Habacuc wajëca Diosojawabelia, yabara peliwaissi

3 ¹Profeta Habacuc wajëca Jehovájawabelia peyawenonaenexatsi. Jumaitsi naxëanaeya:

²«Cawënëliwaisitanetsi xamë, Jehovámë, daxita ne-exanaecuenemi bajayatami. Bajarapacuenia tacawënëliwaisitaexae, nejamatabëcuenenabenajacaeya-exaname. Bajaraxuata, ayaicuenia cayaiyatanetsi. Nexata, ajena cawajëtatsi icatsia papiniijicuenejawanëmi to-exaname patajasalinaiwimi, bajarapijinia pacuenia paxanë-ata pataneyawenonaenexamë bitso patanamatawenonaejawata. Bitso patane-anaepanae-atamë patajaneconijamatabëcuene, pëtsa itsiata nacofënètame patane-itaxutotsoniatæjawamë», jai Habacuc pewajëtsijawata Jehovájawabelia.

³Nexata Habacuc wajunupaeba Dioso petsitajëtsijawatsi bemajitsinaebo-cuenia, peyawenonaejawanexa israelitawi. Jumaitsi:

«Taniji Dioso penajetarucajawa Temán-tsutonë^a nacuajawawerena.

Ponë pepopianeconijibinë najetaruca Parán-tsutowerena»,^b (Selah)^c
Penajetarucaejawata peniweniwenaeotia yacaëjëpa daxita itaboxoya.
Daxitanacuanëjawa pejinanawapaewi ayaicuenia wënëxaniatapona Dioso.

⁴«Peniweniwenaeotia butujai yamaxëcuenia. Bajarapacotia xua xaina pecobeta, tsitajëta pesaë pexainaejawa, jiwi pecanaëjësijawawecua.

⁵«Dioso pepatsiwajënaeya, copiapatapona piayaidomaejawanë, jiwi petëpaenexa. Itsaxuayo najetarucua, petaxucowëya pitatsajawijawa nacopatapona.

⁶«Penucaejawata ira najëaba. Daxitanacuanëpijiwi neconecojai pecajunawi. Perujutsutonë othopaeya-exana. Beweliatsutonë-ata ajibia-exana. Itsiata, bajaraPonë tsiteca daxitamatacabijawabelia peponaponaenë.

⁷Taniji Cusán^d nacuapijiwi, Madián nacuapijiwi-ata, jamatabëcuenebëjaiya pejinawanapaejawa,

a 3:3 Temán-tsutonë: Edom nacua. Panacuata jinawanapa bajayata Esaúpijinë pemomoxi.

b 3:3 Parán-tsutowerena: Sinaitsuto baitsi. **c 3:3 Selah:** «Nenaxëanaejawata, najumeyatu-

ucubajarabaponare», pejaijume **d 3:7 Cusán:** Perujuwënë Cusán nacua. Pejanawënë Babilonia nacua.

- patanebejiobia-exanaewimi paxanë paIsrael-nacuapijiwinë. Nexata, bajarapanacuapijiwimibeje neconecojai pecajunawi.
- ⁸»Xamë, Jehovámë, bara-anaepaname tsaja menianëjawabelia? ¿Bara-anaepaname tsaja manuamenianëjawabelia? ¿Bajaraxuata tsaja, najetarucame nijacarrozamota, nebarë nawajabitsaëtsinexa? ¿Jume cajena! Bajarapacuenia najetarucame necapanepaenexa nijajiwi.
- ⁹Nexata, cobenanajetarucame nijabitsabi. Tsiwajënaexaniawetame nijaxuatabonë. (Selah.)
- »Menianë penawotsijawata, petsewi-ira ucubame, fotonë penaexanaenexa. ¹⁰Daxita petsutonë najëba pecataejawata. Itaboxojawawetsica emaxanetonë runa. Manuamenepijimalataca ayaicuenia najumetabiaba. Bajarapamalataca apia athëbëabetsia.^e
- ¹¹»Petaejawata necotia piapiacotiajawanë peniweniwepajonejawata, matabipijijuameto, merawipijijuametobeje, athëbëyo rucajopabeje.
- ¹²»Nebara-anaepanaejawata, najetarucame daxitanacuanëjawa, benecuetsabataxuabanajetarucae bajarapanacuanëpijiwi, penaneconitsixae xamëjawabelia.
- ¹³»Bajarapacuenia pitsapame necapanepaenexa nijajiwi, nitapetsinë-ata peyanacua-ewetsinënexa. Nexata, cuene-amoneyabame pijamatabëcuenebejewi pijatuxanenë,^f daxita pijajiwiwajabitsaë yajawa. (Selah.)
- ¹⁴»Bajarapamonae ayaijamatabëcuenewi nataeya panetsimaxëpata. Canaëjëta picani bejowibocuenia patanecayajatsinexa, patanewerebiabinexanua, apopatanecuenecaëjëpaexae. Itsiata, xamë, Jehovámë, bajarapamonae pijapecanawajabitsaëtsijawanëta pijatuxanenë tomatathinaxuabame.
- ¹⁵»Xamë jamatejema manuamenejumawerca najetarucame nijacarrozamota, malatacaxanetonëtuatujëjawa-ata.
- ¹⁶»Bajarapacuenia tacawënëliwaisijumetaejawata, anaeya nenaneconitsia-exanaejawanexa patanebejiobia-exanaewi, bitso jamatabëcuenenabenajacajë. Nexata, cotoyucuyucujanë, upiyucuyucujanë, nesicuenobanua tajamatabëcuenebenajacaexae. Daxitanënë asäjibinëreca. Itsiata baitsi jane, jamatejema ca-ewetaponaponaenatsi, pamatacabi xamë, Diosomë, ayaicuenia bejiobia-exanaename, pawajabitsaëwi panebejiobia-exanawanapa maparucaeje.
- ¹⁷⁻¹⁸»Bajaraxuata, ayaicuenia siwajamatabëcuenebarëyanë tsaponaponaeh Jehovah, tsipaji bajaraPonë raja tanecapanepaenë.

e 3:10 apia athëbëabetsia: Habacuc tane malacata piapiajawa xua cuene-itajëta bepenacobeyotsijawa pewënëxaniatsinexa Diosojawabelia. **f 3:13 pijatuxunenë:** Hebreojumeta, cuenecataeya canacueneba bo peliwaisicuenia, peyanacua-ewetsicue yabara. Nexata, bomatatu nacamotocue-itajëta peyanacua-ewetsinë. Botabu pijinia nacamotocue-itajëta pijajiwi yabara. Nexata, Dioso itsa bijiana daxita bo, pematatuwetsica, petabujawabereca, nacayapëtaeya-exana daxita bajarapanacuapijiwi, pewerebiabijawa.

Nexata, higonae aponamatonotsi-ata tsipae, uvabacabo, olivonaenë-ata, aponacuaitsi-ata tsipae, tajapabianë apocapitsapae-ata tsipae itsacuenejawata tanotsinexa, netowerewerecae-ata tsipae tajadajubi, oveja, vaca-ata, xanë tsiteca siwajamatabëcuenebarëyanë DIOSO.

- ¹⁹»Tsitecaeya siwajamatabëcuenebarëyanë tsaponaponae, tsipaji Jehová raja pesaë tanerajutsinë tajamatabëcuenesaënexa. Nerajuta tataxusaë taxainaenexa, tajopaeyaniwa tacujinaejinaejawata. Neyawenonanua bepijiayo tapatsinexa petsutojumajawabetsia, tawecuapanepaenexa tajawajabitsaë», jai Habacuc pecueneewënëxaniatsijawata Dioso bajarapacuenia-ata penaxëanaewi penaxëanaenexa.

Zacarías

Israel-pijinē pemomoxi pewetsiwi yanacua-
ewetabiaba natsiquejemacuenia

11 ¹⁻³ [...] ⁴ Zacarías jumaitsi Israel-pijinē pemomoxijawabelia:
—Marapacueniaje Jehová tajaDIOSO nejumaitsi: «Ewetsianame
oveja, ponēxi tsatatsi pewi yabara pebewinexatsi. ⁵ Pamonaē pecomua-
caewi oveja jamatejema beyejeba jamatabēcuenebējainejewā. Beyejebi-ata,
aneconijibia wemaxēnataeyabiaba. Bajarapacuenia pamonaē oveja pecana-
jetsiwi barēyaya saya jumaitsi tsabiabi: ‘Pexaniacuenia paneto-exaname,
Jehová. Bitso pataxainaewi panaexanajē,’ jai tsabiabi. Bajarapacuenianua
pamonaē pewetsiwi apo-itaxutotsoniataē pewetsi-ovejaximi pebeyejebi-
jawatatsi. ⁶ Nexata, xanē Jehovānē cayapētaeya-exanatsi pacuenia cue-
nejēpaejitsianē pamonaē oveja pecanajetsiwi, pebewi-ata. Mapanacuapi-
jiwi apo-itaxutotsoniataenē tsane. Nexata, tocopatsianajē bajarapamonaē
pecuene-amoneyabinexatsi itsanacuapijiwi imoxoyo pejinawanapaewi. Bja-
rapacuenia pewetsinē tocopatsianajē itsamonaē peyanacua-ewetsinexatsi.
Nexata, itsanacuapijiwi werebiabiana bajarapamonaemi bējainejewā, itsiata
xanē naitaxutuajematsianajē. Apocapanepaenē tsane», nejai Jehová —jai
Zacarías.

⁷Icatsia, Zacarías jumaitsi:

—Nexata, Jehová tane-itorobicowēya xanē taxuxuabajē ta-ewetsijawa
oveja, pamonaē tsata pebewinexa. Nexata, bajarapamonaē ta-ewetsinexa,
xanē natonacuenebajē anijanaebobeje taca-ewetsinaebobejenexa. Caenaēbo
wēnērubianajē «pitaxutotsoniataenaēbo»,^a itsanaēbo pijinia «nacaemonaē
pecuene-itajētsinaēbo». ^b ⁸ Caejuametojawalia capitsapaeya-exanajē acue-
yabi ponēbeje patanajua-ewetsiwimi oveja. Itsiata, bajarapa-ovejabitsaēto
necuene-itoya ta-ewetsijawa. Xanē-ata belia acuenetaejitsibinē bajarapa-
oveja, apotanejumecowēnētabiabixae ta-ewetsijawa.

⁹»Nexata, xanē jumaitsinē bajarapa-ovejabitsaētojawabelia: «Orijiibia,
apopaca-ewetsi tsanetsi. ¡Ponē paxamēyajuwēnēnē jamatabētēpa, jema
tēpae! ¡Ponē pijinia jamatabēnaxuaba, jema naxuabi! Itsaponē nacopat-
siana piasaēnē paxamēyajuwēnēwi, paxaename panewēna-oveja» janē
bajarapa-ovejabitsaētojawabelia.

a 11:7 *pitaxutotsoniataenaēbo*: Bajarapanaēboyota Zacarías canacueneba pejumatsautsinexa
petsobiarata pa-ovejaxi pitapetsiwi perajutsinexa Diosojawabelia. b 11:7 *nacaemonaē pecuene-
itajētsinaēbo*: Pacuenia daxita oveja taejitsia pebeyaxuabijawa, bajarapacuenia Israel nacuapi-
jiwi, Judānacuapijiwi-ata caeneconixaina. Bajarapacuenia caenaneconitsia-exanaecuene taejitsia
nacaemonaēxae.

¹⁰»Nexata, pitajë oveja taca-ewetsinaebo, panaebowënërubajë «pitaxutotsoniataenaebo». Bajaraponaemi epatsicanajë, tajamatabëcuene-itajëtsinexa apotanajumecowënëtsijawanexa tanajumeliwaisicajonejawami bajara-pamonaejawabelia ta-ewetsijawaminexa. ¹¹Nexata, taca-ewetsinaebomi ta-epatsicanaejawata, yapëtaeya-exanajë tawecua-ajibia-exanaejawa tana-jumeliwaisicajonejawami ta-ewetabiabijawanexa. Itsiata, tanecuenetae-nubenaewi xaniawaetsia yapëtane apotatsita-exanaejawa oveja yabara. Natocana-ëjëtanua pacuenia Jehová pewecua-ajibia-exanaejawatsi penajumeliwaisicajonejawami pewetabiabinexatsi. ¹²Nexata, xanë jumaitsinë oveja pecomuacaewimi pexainaewijawabelia: «Itsa pacatsixanepana panematamore patacatonacuenebaponaponaenamatabëcuene! Itsa jume, itsa apopacatsixanepanae, nexata apopanematamotsi-atamë apo-itsacuenë», janë. Nexata, bajarapamonaenematamota treinta ponëbeje palatanëanë.

¹³»Bajaraxuacujinae, Jehová nejumaitsi: «¡Bajarapapalatanëanë, xua bajarapamona tsitatsi pexaniapecamatamotsijawanëmi, pire bajarapanatsiquejemamatamo, necaponaenexa templobojawabelia! ¡Nexata, bajarapapalatanëanë pecamatamotsijamatabëcuenemi, buare ofrenda pijacajón-yajawata templobo-ënëjawata!», nejai Jehová.

»Nexata, xanë pitajë bajarapatreintaponëbeje palatanëanë tabuatsinexa Jehová pijatemplobojawata, ofrenda pijacajónyojawata. ¹⁴Bajaraxuacujinae, itsanaebo epatsicanajë tajanaebomi, «nacaemonaenaebo» tawënërubinaebomi, bajarapacuenia tajamatabëcuene-itajëtsinexa pecopiarucaejawa Israel nacuapijiwi, Judá nacuapijiwibeje nacaemonaecuenia penataejawa —jai Zacarías Israel-pijinë pemomoxijawabelia petsita-exanaejawata. ¹⁵⁻¹⁷[...]

Malaquías

1 ¹Mapaliwaisije Jehová tonajumecopata profeta Malaquías-jawabelia, petsipaebinexa Israel nacuapijiwi.

Jehová ayaicuenia asiwa pijajiwi israelitawi

²⁻³Nexata profeta Malaquías jumaitsi israelitawijawabelia:

—Jehová raja pacajumaitsi: «Xanë rabaja paca-asiwatsi», pacajai. Paxamë itsiata pajumaitsimë tsabiabi: «¿Depacuenia waxaitsi yapëtanetsi Jehová wajanaca-asiwajawa?», pajamë tsabiabi. Nexata, bajaraPonë pacajumecanawiata mapacueniaje: «¡Pacanaëjère! Esaú, Jacob-beje, nacaemonaenë-atabeje picani, itsiata «asiwanë juyapijinë Jacob, matapijinë Esaú matatoxetsia». Bajaraxuata, Jacob papemomoximë pacatanetsi patajajiwimëcuenia. Juya, Esaú pemomoxi pejinawanapaenacuanëmi petsutonëjawa tobijianajë. Bajarapanacuanëmi tocopatajë ënamomonaë pejinawanapaenexa jiwi peco-wëta», pacajai Jehová —jai Malaquías.

⁴Icatsia profeta Malaquías jumaitsi Esaúpijinë pemomoxi yabara:

—Edóm nacuapijiwi jumaitsi-ata tsipae: «Patajinawanapaetomaranë Jehová panetobijianaë-ata tsipae, apo-itsacuenë. Xaniawaetsia icatsia paya-nacuenebianajë», jai-ata tsipae, itsiata Jehová, pepopiacuenesaënë daxitawecua, pacajumecanawiatsipa mapacueniaje: «Payanacuenebanutsimë-ata tsipae, xanë icatsia pacatobijianaenatsi. Patacatobijianaecujinaë, itsanacuanëpijiwi wënërubiana panijanacua, ‘ëpibisiacuenë pexanawanapaenacua jiwi’, pejaiwënëcuenia. Bajarapanacuata panejinawanapaewi pijinia pacawënërubiana, ‘Jehová pebara-anaepanaë-bitsaëto pibisiacuenë pexanawanapaexae,’ pejaiwënëcuenia», jai tsipae Jehová Edóm nacuapijiwija-wabelia. ⁵Paxamë pa-israelitawimë panijacuata pataenama bajarapacuenia Jehová pexanaejawa Edom nacuapijiwijawabelia. Nexata payabaraju-maitsimë tsane: ¡Cuaë, Jehová bitso ayaijamatabëcuenenë saëyacaëjëpa itsanacuanëpijiwijawabelia-ata Israel nacuawecua!», pajamë tsane —jai Malaquías Esaúpijinë pemomoxi yabara.

Jehová cuenexanebiaya muxujioba sacerdotemonae

⁶Icatsia profeta Malaquías jumaitsi:

—Jehová pepopiacuenesaënë daxitawecua pacajumaitsi paxamë pasacerdotemonaëmëjawabelia: «Paxajiwi yaiyataeyabiabatsi pexijiwi. Petuxanewi yaiyataeyabiabatsi pijajiwi, amoneya petonacuenëbawanapaewitsi. Nexata, paxamë itsa panetaneme pane-axanëcuenia, ¿detsa xuajitsia nexata apopaneyaiyataemë? Itsa panetaneme panijatuxanenënëcuenia, ¿detsa xuajitsia

nexata apopanajamatabëcuene-itajëtsimë pataneyaiyataejawamë, patane-jumecowënëtabiabinxamë pataca-itorobicuenia? Bajarapacuenia bijiya paneto-exanawanapae-atamë, itsiata panejumaitsimë: '¿depacuenia bijiya patajacanaëcotabiabi?', panejamë. ⁷Paxamë saya panetocapatabiabame pibi-siapexaejawanë, altar-jumata xanëjawaberena. Bajarapacuenia pa-exanae-atamë, itsiata panejumaitsimë: '¿detsa xuajawalia paxanë pacato-exanatsi aponejitsipaejawanë?' panejamë. Xanë juya pacajumaitsi mapacueniaje: 'Itsa paxamë pasiwanajamatabëxainame taja-altar natsiquejemacuenia panetaejawanexa, bajarapajumata pibisiajawanë panetajuitsinexa, bajara-xuanë apotajitsipaecuene pataneto-exanaejawamë. ⁸Pacujinae pacapatame pibisiadajubinë panetajuitsinexa altar-jumata, pacuenia pitaxutotsëcënaenë, pejayujayunaenë, piawitanenë-ata, bajarajota bewelianëncuenia panetane-me. ¿Bajarapacuenia itsa pa-exaname, apopacatsitapiabecueene tsaja? ¡Jica jane, ëjëtsiaya patocaponare bajarapitsidajubinëyo, panerajuitsinexa papecyanacua-ewetsinëjawabelia! Bajarapacuenia itsa pa-exanaejitsipame, apopacasiwajamatabëcuenebarëya tsipae», pacajai Jehová, Ponë daxitawecua bitso piacuenesaënë tsaponaponae—.

⁹»Orijobia, xanë, Malaquíasnë, pacatsipaebatsi pasacerdotewimëjawabelia. Panatowajëcaename Diosojawabelia, pexaniacuenia papeca-itaxutobejiobiataenexa. Itsa baitsi jane, panewajëcaejawata bajaraPonëjawabelia, tsitecaeya itsa patajuitiabiabame altar-jumata bajarapibisiadajubinëanë, apobepajamatabëcuene-ewetsimë Dioso ayaijamatabëcueneenë papecasiwajamatabëcuenebarëyanexa.

¹⁰»Jehová pepopiacuensaënë pacajumaitsi: 'Xanepana picaní paxamëyajuwënënjë tajatemplo bebaupaxatatanutsijawa, bajarapacuenia pane-exanabiabiyaníwa. Baitsi, xuanë patajuitiabiabame taja-altar-jumata, pepacuene pacato-amatamobi. Apoxanepanae panenacuerotsijawa bajarapapiamatamobicuene pane-exanawanapaejawa. Baitsi, apopacasiwabarëyatsi. Pematatsënëa apopacatocopiapitsitsinua tsane patanerajutaponaejawanëmë tajuitsiaya altar-jumata,' pacajai Jehová.

¹¹»Orijobia, pacajumaitsi Jehová, Ponë daxitawecua bitso piacuenesaënë tsaponaponae: 'Daxitanacuanëjawa pejinawanapaewi itsamonae xania-waetsia neyaiyataeyabiaba paxamë matatoxenetsia. Inciensopërëjawanë-ata tajuitabiaba tawënëta. Pexaniacuenejawanënua tajuitabiaba tawënëta.

¹²Paxamë itsiata pa-acuene-itothiamë tsabiabi bajarapamonaewecua. Apotajitsipaecuene paneto-exanabiabame, tsipaji natsiquejemacuenia paneto-taeyabiabame taja-altar-jawa. Xua taeyabiabajë picaní pepotajamesacuenia, bajarapa-altar-jawa bijiya panetoyaiyataeyabiabame. Baitsi, itsa pibisiajawanë panetojebame tajamesajumata, natsiquejamecuenia panetotaneme bajaraxua. Nexata, pexaniajaicuenia apopanetoyaiyataemë tajamesa, xua-ata pejumata bobenabiaba. ¹³Paxamë pasacerdotewimë saya panajumaitsimë tsabiabi: «Xua Jehová nacatocaëjëta waja-exanabiabinexa, acuenëjitsibitsi saya», panajamë tsabiabi. Pepacuene paxamë saya pane-ataejitsibimë, itsiata panatocanaëjëtame patacasiwabarëyajawanexa pacapatsi-atamë panenacobetoxotsidajubinë, vaca pejayujayunaenë, piawitanedajubinë-ata, panetajuitsinexa taja-altar-jumata. ¹⁴¡Bitso pibisiacuene cuenewajunu-paebajë petocopiapatsinexatsi taneyamaxë-itojorobijiwi! Bajarapamonae

nerajutsiapaebi-ata pija-ovejabitsaëtoyajuwënë pexanianë, itsiata netocapatabiaba piabejenë, petajuitsinexa altar-jumata. Apoxanepanae pataneto-exanaejawamë bajarapacuenia, tsipaji paxamë bepanerajutame ëpexaniajawanë, Xanë Pepotayanacua-ewetsinëxae daxitawecua. Bajaraxua daxitanacuanëpijiwi ayaicuenia tanewënyaiyataenë paxamëwecua», pacajai Jehová, Ponë pepopiacuenesaënë daxitajawa —jai Malaquíás sacerdotewijawabelia.

2 ¹Orijibia, profeta Malaquíás jumaitsi sacerdotewijawabelia: —Ajena Jehová pacatonajumecopata pasacerdotowimëjawabelia mapacueniaje: ²«Paxamë itsa apopanejumecowënëtsimë tsane, patacatonajumecopatsicuenia pane-exanawanapaenexa, itsa apopane-wënëyaiyataemënu tsane panexamatabë-ëthëtojawawetsina, nexata pacananeconitsia-exanaenatsi. Papexaniacue pican pacatocaëjëtatsi patacayawenonabiabinexa patajasacerdotewixamë, bajaraxua pacatotothianaenatsi, pibisiacue panenatotaewanapaenexa. Bajarapapibisiacuejawa pacatocopiapatsi-exanatsi baja. ³Xanë Jehovánë, naneconitsia-exanaenajë panemomoxijawabelia. Pacatsitabara-othobajarabianatsi petasitonëta padajubianë pacapatame panebenexa. Bajaraxuacujinae, pacayajawa xuabianatsi bajarapadajubianë petasiyajawa. ⁴Bajarapacuenia papecatocopiapatsicujinae, matapania jane baja payapëtaename xaniawaetsia, Xanë tajacuata patacayapëtaeya-exanaejawa, tanajumecowënëtsinëcuene-ata, xua exanajë panijasalinaiwimijawabelia Levípijinë pemomoxijawabelia. Bajarapacuenia peypapëtaenexa tananeconitsia-exanaejawata bajarapamonaemi, tanajumecajoneliwaisi Levípinëjawabelia panecatsitecawanapaenexa, pebijianaeyaniwa-ata», pacajai raja Jehová Ponë pepopiacuenesaënë daxitawecua».

⁵»Bajarapacuenia najumeliwaisicajunuajë panijasalinaiwimi, Levípijinë pemomoxijawabelia, xaniawaetsia aliwaisijibia pejinawanapaenexa taitabarata. Bajarapacuenia tonajumecopatajë bajarapamonaë, xaniawaetsia taneyaiyataenexa. Bajarapacuenia panijasalinaiwimi, Levípijinë pemomoxi, pejamatabë-ëthëtojawawetsina xaniawaetsia pican neyaiyatane. ⁶Pexania-jailiwaiscuenia cujarubabiaba bajarapamonaemi. Caeto-ata pibisialiwaishi apopaebi. Xaniawaetsia jinawanapa xanëjawaberena aliwaisijibia. Bajarapacuenia pejinawanapaexae, pecujarubabiabixanua, bajarapamonaemi tsata ayaibitsaëto pibisiacue pexanaejawawecua, juya tajitsipaecuenia pexanawanapaenexa. ⁷Bajarapacuenia tsicarucatsi sacerdotewi pecujarubabibinexa tajacue, peypapëtaeya-exanaenexa jiwijawabelia, bajarapamonaë juya taneyapëtaenexa Diosonëcuene. Daxita jiwi beponabiaba bajarapamonaejawabelia peypapëtaenexa taliwaisi, tsipaji sacerdotewi tanejumeliwaisipaebiwi tsawanapae, xanë, Jehovánë, pepota-acuenesaënë daxitawecua. ⁸Itsiata, paxamë pasacerdotewimë, Levípijinë papemomoxi-atamë, patacatonajumecopatsiliwaisimiwecua, itsamonaë pawecujapaya-exaname panecujarubijawata. Bajarapacuenia panetobijianame tanajumecajoneliwaisimi Levípijinë pemomoxijawabelia. ⁹Paxamë apopa-exanawanapaemë pataca-itorobicuenia. Najëpaeya apopanananeconitsia-exanaemënu daxita pijaneconi pexainaewi. Bajaraxuata, xanë juya pacatocopatsianatsi daxita tajajiwi papeca-itoyanaëcotsinexa, natsiquejemacuenianua papecataenexa»,

pacajai Jehová, pasacerdotewimějawabelia, Poně pepopiacuenaesaēnē daxitawecua —jai Malaquías.

**Judá nacuapijiwi caejamataběcuene apoxinae
pejumecowēnētsinexa Jehová**

¹⁰Icatsia, profeta Malaquías jumaitsi Judá nacuapijiwijawabelia:

—¿Waxaitsi apoxinaetsi tsaja caenē Dioso waxanexa? ¿Apoxinaetsi tsaja caenē Dioso wajanaca-exanaenē? Xainae-atatsi caenē Dioso waxanexa, wajanaca-exanaenēnua, ¿detsa xuajitsia namata-enetsia nayamaxē-itojorobabiabatsi? Bajarapacuenia waja-exanaejawata, apojumecowēnētabibitsi pacuenia bajaraPonē najumecapanepaeya naliwaisicajunua wajasalinaiwimijawabelia. ¹¹Paxamē, paJudānacuapijiwimē, caejamataběcuene apopaxainaemē panejumecowēnētabiabinexa Dioso. Bajaraxuata, bitso piabejecuene pa-exanawanapame Jerusalén nacuata, Israel-nacuata-ata. Apopaneyaiyataexae Jehová pijataxunae, pijabo, bitso piasiwabo, papebijiwimē panacojiobaponame papetiriawijawabelia asiwaya nawajēcabiaba jumapecataenēanējawabelia pepoDiosowecua. ¹²Xanepana picani Jehová pejutsijawa wajanacuawecua, bajarapitsicuene pexanawanapaewi. Apopitsacuene itsa ayaijamataběcuenewi, itsa jume, bewelijamataběcuenewi-ata, ayaijawa pecapatabiabiwi-ata ofrendajawanē Dioso pepopiacuenaesaēnē-jawabelia perajutsinexa.

¹³»Orijibia, itsacuenejawa-ata pa-exanawanapame xua tsitapibisiacuenetsi Jehová. Copiaya panepitsawawecua, itsawa panotsi-atamē, apopasiwabějamē panijaneconi. Caranata, pasiwajamataběcuenebějamē Jehovájawabelia apopapecasiwajamataběcuenebarěyaxae, apopapecatocopiapitabiabixaenua dajubi, panecapatabiabiawanē altar-jumata panetajuitsijawa. Nexata, nawěxaniabiaya ayaicuenia panatsinueyabiabame apopapecasiwabarěyaxae, asiwaya apopapecatocopiapitsixaenua panerajutsijawanē altar-jumata, panasiwabějamēnejewa panijaneconi. ¹⁴Bajarapacuenia pa-exanawanapae-atamē, itsiata payanijobabiabame Jehovájawabelia mapacueniaje: ‘¿Detsa xuajitsia meta siwajamataběcuenebarěyaya apopanetocopiapitsi patatajuitsijawanē altar-jumata?’ pajamē tsabiabi. Jehová apopacatocopiapitabiabi bajaraxuanē, tsipaji apopaxanawanapaemē panejumaitsicowēya panepitsiwajawabelia. Panijacuata panejumaitsijawa Jehová pacajumetane itsa abaxē pewějēatomē nepitsimatacabi nijajawa, caejamataběcuene nebarěxainaponaponaenexa bajarapowajawabelia. Bajarapamatacabicujinae, bajarapowa picani peponijawa tsaponaponae. Paxamē itsiata pawecuajaitabiabame itsawa. ¹⁵Paxamēbeje panenapitsijawatabeje, Jehová paca-exanabeje becaeperaběto, becaejamataběcueneliwaisi-ata panexainaejiwinexabeje. Bajarapacuenia paca-exanabeje, tsipaji jitsipa panexibeje yajawa panejumecowēnētsinexa Dioso. Bajaraxuata, pebimē xaniawaetsia naliwaisi-ewere nijacuata nenajumecowēnētsinexa xua najumecapanepaeya jumaitsimē nijawajawabelia, nepitsiwa pewějēatojawatamē. ¹⁶Jehová, israelitawi pijaDOSO, Ponē ayaijamataběcuenenē pacajumaitsi: «¡Xaniawaetsia panajamataběcuene-ewetawanapare! Pětsa panijawawecua, itsawa pajaitame, tsipaji ra xanē ayaicuenia cuene-itoyanē daxita pamonae pijawajiwi pepeneta-ponaewi. Bajarapamonae najamataběcuenexuirabapona taitabarata, bajarapapibisiacuene pexanaexae», —pacajai Jehová.

¹⁷»Jehová raja bitso baja jamatabëcuenecuerana picaní panejumait-sitsaponaejawa yabara. Abaxë itsiata, paxamë tobejena payanijobapona: «¿Detsa xuajawalia Jehová paxanë pajamatabëcuenecueranaeya-exanaponajë, patajumait-sijawanë yabara?» panajamë. Bajarapacuenia apopacajumetae, tsipaji jamatabëcuenenawëxaniabiaya pajumaitsimë tsapona: ‘Jehová ra itsiata siwajamatabëcuenenabarëya tsabiabi, barëyaya taeyabiabatsinua pamonae pibisiacuene pexanaewi,’ pajamë tsabiabi. ¡Paxamë tsaena apopajumexaniataemë DIOSO pepopianeconijibinëcuene, Ponë ëpexaniacuene pexanaejawa pesiwabarëyanë! —jai Malaquíás Judá nacuapijiwajawabelia.

Judá nacuapijiwi bijiaya ofrendababiaba Diosojawabelia

3 ¹Orijibia, profeta Malaquíás jumaitsi Judá nacuapijiwajawabelia: —Jehová pepopiacuenesaënë daxitawecua pacajumaitsi: «¡Mara-pacuenia pataenameje! Xanë itorobianajë tanejumepaebinë^a tanetsiwajë-naexaniawaetsinexa jiwi pexanaecuene, jamatejema tapatsinexa. Nexata, papetuxanenë paxamë pawajënae-ewetawanapame pepatsijawanexa, jemata naitajëtsiana templobojawata. Ponë, ‘Pejumeliwaisicaponanë Dioso penali-waisicajonejawanexa’, bajaraponë raja patsiana», pacajai Jehová—.

²»¿Jipatsa cuenecaëjëpatsi penucaenexa pianeconijibinëcuenia nataeya bajaraPonë pitabarata pepatsimatocabijawata? ¿Jipatsa cuenecaëjëpatsi rowia penucaenexa, pematabacabëta irataeya nucaenejewawa, bitso bewelia-jamatabëcuenewi nataeya bajaraPonë pitabarata? Ajibi cajena, tsipaji raja bajaraPonë patsiana jiwi pijaneconi petocanaëjëtsinexa. Pacuenia isoto penani pesetsijawata jiwi bawecuatsata piabejewawa, ëpepopexaniananijawa penacopatsinexa, pacuenianua jabón ajibia-exana piaxuirajawami, bajara-pacuenia bajaraPonë patsiana, jiwi pijaneconi petocanaëjëtsijawata pibisiacuene pexanaewi pewecuatsatsinexa pijajiwiutuaujëta, penacopatsinexa ëpexaniacuena pexanawanapaewi. ³Orijibia, pacuenia penani pesetsiwi piabejewawa bawecuatsata, ëpexanianani penacobabinexa, palatananitota, oronanitota-ata, bajarapacuenia Jehová exanaena Levípjinë pemomoxi sacerdotewijawabelia. BajaraPonë wecuatsatsiana pamonae pajamatabë-cuenebejewi, penacopabinexa sacerdotewi ëpexaniajamatabëcuenewi bajaraPonë pitabarata. Bajaraxuacujinae, cuenecaëjëpaenatsi jane baja icatsia dajubimonae petajuitabinexa altar-jumata, pacuenia tsicarucatsi pexanaejawanexa. Nexata, DIOSO siwajamatabëcuenenabarëyanua tsane petajuitsijawanë. ⁴Bajaraxuacujinae jane baja, Jehová siwajamatabëcuenenabarëya tsane Judá nacuapijiwi, Jerusalén tomarapijiwi-ata petajutsijawanë dajubi,

a 3:1 *tanejumepaebinë*: Wajayorobijawata Isa. 40:3, Mal. 4:5 yapëtanetsi bajaraponë pewënë Elías. Juya Mt 11:3-14; Mc. 1:2; Lu 1:76; 7:27 Jesús nacayapëtaeya-exana pacuenia Juan jiwi-bautizabinë najetaruca Elías-cuenia. Itsiata, Apoc. 11:1-13 icatsia naitajëtsiana itsanëbeje Diosojumepaebinëbeje. Itsamonae canaëjëta bajaraponëbejeyajuwënë Elías-pjinë, itsanë pijinia Moisés-pjinë. Itsamonae pijinia canaëjëta bajaraponëbeje yabara pepocuene apoElías-pjinë, apoMoisés-pjinë-ata tsane. Saya canaëjëta itsanëbeje yabara, pexainaejawanexa pitsijamatabëcuenesaë xaina bajaraponëmibeje, pinijicuenejawanë pexanaponaponanexa, pacuenia bajaraponëmibeje exanaponaponabe bajayatami. Itsiata, bajarapacuenia yapëtanetsi pacuenia Malaquíás tajëwelia wajunupaeba beElíasnë penaitajëtsinexa imoxoyo pewajënae nacua pecopiarucaejawanexa.

pecapatabijawanënia ofrendacuenia, pacuenia bajayatami exanabiaba pijasalinaiwijawabelia.

⁵»Orijobia, Jehová pepopiacuenesaënë daxitawecua pacajumaitsi: «Jiwi tananeconitsia-exanaenënexa patsianajë, tacuenetaenëcuenia-ata cuenewajunupaebianajë jiwi pijaneconi. Nexata, bepijiayo itsajamatabëcuene xainaenejewanë cuenewajunupaebianajë pamonaë penajorobiwi, pijawajiwi pepenetsiwi, penajumetsënëtsicuenia najumecapanepaeya pejumaitsiwi, xaniawaetsia apopematamobiwi petonacuenebiwiitsi, pebejjobia-exanabiabiwi pamonajiwi pewecuatëpaewitsi, sutijiwixi, itsanacuanëwerena pepatsiwi-ata, pamonaenua xaniawaetsia xanë Jehovanë aponeyaiyataeyabiabi. Bajarapitsiwi pijaneconi caecuenia cuenewajunupaebianajë, tananeconitsia-exanaenexa», jai Jehová —jai Malaquías Judá nacuapijiwijawabelia.

Pacuenia Judá nacuapijiwi nacobetoxotabiaba Dioso pijajawanë

⁶ Icatsia, profeta Malaquías jumaitsi Judá nacuapijiwijawabelia: Jehová raja pacajumaitsi: «Xanë raja Jehovánë, apotanamatabëcujiruitothianaenë ta-exanaejawanexa najumecapanepaeya tajumaitsijumemiwecua. Bajaraxuata, paxamë Jacob-pijinë papemomoximë apopacatocopsitsi itsamonae papecawerebiabinexa, pibisiacuene pa-exanawanapae-atamë. ⁷Baja cajena panijasalinaiwijawawerenacujinae mapamatacabijawaberena-ataje, paxamë pawecuanatsatabiabame, apopajumecowënëtanapanamënia patacatonajumecopatsiliwaisianë. Bajaraxuata, xanë, Jehovánë, pepota-acuenesaëtsaponaponanë pacajumaitsitsi mapacueniaje: ‘¡Panajamatabëcuenepënëyorore pibisiacuene pane-exanawanapaejawawecua xanëjawaberena, icatsia patanejumecowënëtabiabinexamë! Nexata, xanë juya pacasiwajamatabëcuenecaewianatsi panijaneconimi, icatsia pexaniacuena patacayawenonabinexa. Bajarapacuenia pacajunatsi-atatsi, paxamë panejumaitsimë tsabiabi: ‘¿Detsa xua pacato-exanatsi xua yabara icatsia panajamatabëcuenepënëyorotsijitsianë xamëjawabelia?’ panejamë. ⁸Xanë itsiata pacayanijobatsi: ‘¿Pacatsita tsaja pexaniacuene jiwi penacobotoxotsijawa DIOSO pijajawanë? Paxamë cajena panetonacobetoxotabiabame,’ pacajaitsi. Itsiata baitsi jane, pajumaitsimë tsabiabi pataneyanijobijawatamë: ‘¿Detsa xuanë nexata paxanë patajacatonacobetoxotsi?’ pajamë tsabiabi. Paxamë pacatsicaruae-ata picani patanerajutaponanexamë, panewecua-asiwamë tsabiabi panija-ofrendajawanë, panijadiezuayomibejeyajuwënëjawa-ata. ⁹¡Xaniajanë! Padaxitamë Judá nacuata panejinawanapaewi panetonacobetoxotabiabame bajaraxuanë. Baraxuata, xanë pacatocaëjëtsianatsi pibisiacuene panenatotawanapaenexa.

¹⁰»Nexata, xanë, Jehovánë, pepota-acuenesaënë daxitawecua, pacajumaitsi bajaraxua yabara: ‘Pacapatabiabianame templobojawaberena patanerajutaponanexamë diez xuyomibejeyajuwënëjawa, caewiria caejawa canacujitsia, patacatocaëjëtsicuenia patanerajutabiabinexamë. Nexata nawitsia xainaena pexaejawa penacuenebiwi tajabojawata. Pëtsa panewecua-asiwamë bajaraxuanë. Panecuene-ëjère saya pexaniajamatabëcuene taxainaenëcuene, xaniawaetsia paneyapëtaenexa. Nexata, patanerajutabiabijawanëwecua, xanë juya nawitsia pacarujutsianatsi

daxitacuenejawanë. Bepatacatobaupatsicuenia itaboxotatsia, athëbëwet-sica pacato-othopaeya-exanaenicatsi, bitso ayaicuenia papecatonawitsinexa pexaniacuenia patacayawenonaejawanë. ¹¹ Orijibia, xanë apocuenecopat-sinë tsane pane-ubijawanë papecatobijianaewinexa. Tocopatsianajënuu panija-uvabacabonë ayaijawa papecatonacuaitsinexa. ¹² Bajarapacuenia patacayawenonaexae tsane, daxitanacuanëpijiwi papecabaracuaicuajawata pacawënëbaracuaicuajai tsane DIOSO pexaniacuenia papecayawenona-biabiwicuene. Nexata, panejinawanapaenacua jiwi bitso pitajitsipaenacua tsane pejinawanapaenacuanexa', pacajaitsi Jehovänë pepota-acuenesaënë daxitawecua —jai Malaquíás Judá nacuapijiwijawabelia.

¹³ Icatsia, profeta Malaquíás jumaitsi Judá nacuapijiwijawabelia:

—Jehová pacajumaitsi: «Paxamë bitso pibisiacuenia xanë panebara-cuaicuajiamë tsabiabi. Bajarapacuenia pa-exanae-atamë, tsiteca paneya-nijobabiabame: '¿Detsa pacuenia patajacabaracuaicuajai pibisiacuenia?', panejamë tsabiabi. ¹⁴ Nexata Jehová pacajumecanawiata: 'Orijibia, paxamë panajumaitsimë tsabiabi: «Wajatojinawanapaejawa DIOSO pejitsipaecue-nia aponacayawenonae itsacuenejawayo-ata. Apopitsitsi itsacuenejawa bajarapacuenia waja-exanaejawata. ¿Detsa xua nacatoxanepanaejitsipa jumecowënetsiaya waja-exanawanapaejawa xua Jehová naca-itoroba? ¿Detsa xua nacatoxanepanaejitsipa wajanaxatatsijawa piayo-eseto, wajanajamatabëcuene-itajëtsinexa wajanasiwanajamatabëxainaejawa pibisiacuenia waja-exanaeneconi Jehová pepopiacuenesaënë pitabarata? ¹⁵ ¡Amatamobi saya! Waxaitsi cuenetaeyabiabatsi pamonaе DIOSOWecua ayaijamatabëcuene penataewi, pebarëyacuenia pejinawanapaejawa. Cuenetansinua pamonaе pibisiacuenia pexanawanapaewi pexaniacuenia petopitsapabiabijawatsi xua nacuenebabiaba. Bajarapitsicuenia pexana-wapaewi jamatabëcuene-ëjëbabiaba DIOSojawabelia picani pibisiacuenia petocopiapatsia-exanaenexatsi, itsiata jane DIOSO aponaneconitsia-exanabiabitsi. Jamatejema saya jinawanapa. Yee, amatamobi DIOSO pejitsi-paecuenia wajajinawanapaejawa,' panajamë tsabiabi, pibisiacuenia patane-baracuaicuajaijawatamë», pacajai Jehová —jai Malaquíás.

¹⁶ Pamonaе asiwaya yayiatanë Jehová, bajarapamonaе nabarëcuaicuajai tsabiabi, namata-enetsia penajamatabëcuenesaëya-exanaenexa Jehová pejitsipaecuenia pejinawanapaenexa. Nexata bajarapamonaе Jehová bitso namuxuna-ewetabiabatsi xuanë najumaitsi. Orijibia, Jehová pitabarata itsanë wënëyaquinaruba, pabaxutojawata najamatabënapitabiabijitsia pamonaе Jehová yayiataeya jinawanapa, jumecowënëtanawanapanua.

¹⁷ Icatsia, profeta Malaquíás jumaitsi DIOSO pejumecowënëtsiijawabelia:

—Jehová pepopiacuenesaënë daxitawecua jumaitsi: «Pamatacabi natocaë-jëtajë tapatsinexa tacuenecanaëjëtsinexa tajajiwi pijaneconi, bajarapama-tacabi yayiataeya tanejumecowënëtsiwi pepotajajiwicuenia nacopatsiana, asiwaya tataenexa itsamonaewecua. Pacuenia paxajiwi asiwaya taeyabiaba pexënato pejumecowënëtsinëtsi, pexanaexae pitorobicuenia, bajarapijinia pacuenia xanë taenajë bajarapamonaе. ¹⁸ Bajarapapatota, matapania icat-sia paxamë payapëtaename pacuenia xanë, Jehovanë, saicayacuenia taeya-biabajë pamonaе pexaniacuenia pexanawanapaewi, pibisiacuenia pexanawa-napaewiwecua. Saicayacuenia taenajënuu pamonaе asiwaya, yayiataeyanua,

exanawanapa tajitsipaecuenia, bajarapacuenia apopexanaewiwecua», jai Jehová paxamē yabara —jai Malaquíás DIOSO pejumecowēñetsiwi jawabelia Judá nacuata pejinawanapaewi.

Xua Jehová exanaejitsia jiwi pijaneconi penaneconitsia-exanaematacabita

4 ¹Icalsia, profeta Malaquíás jumaitsi Judá nacuapijiw jawabelia: —Jehová pepopiacuenaesāñē pacayapētaeya-exana pacuenia exanaejitsia jiwi penaneconitsia-exanaematacabita. Jumaitsi: «Imoxoyo rabaja tsaponae pecopiapatsinexa pamatacabī xanē naneconitsiaya tajuitsia-exanaejitsianē pepopitatsajawi-isotocotiata pamonaē ayaijamatabēcuene penataewi xanēwecua, pamonaenua pibisiacuene pexanawanapaewi. Bajarapatajuenajetarucaejawata bajarapamonaē jēpaena pōna bepījiayo peweriajawnexatsi, nacopatsinejewa itsacuenejawa xua yabara jiwi cuene najamatabēnapitsijitsiatsi. ²Itsia, paxamē asiwaya, yayiataeya-ata, pata-nejumecowēñētawanapaewimē, bajarapitsinaneconitsia-exanaecuenē apopataemē tsane. Biji rajane, pacuenia matacabipijiuameto pecotiata^b daxita napebeta, bajarapacuenia yapētaeya-exanaenajē jiwijawabelia, paxamē pexaniacuena panejinawanapaewi taitabarata. Pacuenianua matacabipijiuameto pecotia pejamatabēcuene piawitanewi bajamatejema tsaponae, bajarapacuenia paca-ajamatabēcuenaesāyē-exanaenatsi, pexaniacuene patacato-exanabiabijawata. Nexata, pacuenia becerromonaē pecapitsapacujinaetsi corral-ēñewecua barēyaya jirejirewaruta, bajarapajamatabēcuene-itsimē tsane, patacacapanepaejawa yabara. ³Nexata, pamatacabijawa xanē naneconitsia-exanaenajē pibisiacuene pexanawanapaewi, paxamē, patane-yaiyataewimē, beweliamatabēcuenewi pataename bajarapamonaē. Nexata pacuenia atsapērē pataxunanonobijitsipame pasiwabējamējewa, bajarapacuenia pa-itsimē tsane bajarapamonaejawabelia tabarēnawajabitsaētsijawata. Nexata apopacacuenecaranatsi tsane, patacayawenonaexae», pacajai Jehová pepopiacuenaesāñē.

⁴Orijibia, pacajumaitsi bajaraPonē: «Panajamatabēnapire paliwaisianē tonajumecopatajē tajajiwitonē Moisés-pijinjējawabelia Horeb-wēñetsutojawata. Daxita patacacujarubiliwaisianē, pataca-itorobiliwaisianē-ata, pacatonajumecopatatsi padaxitamē pa-Israel-nacuapijimē pejumecowēñētawanapaenexa.

⁵Orijibia, icalsia panejumetaema pacuenia pacajumaitsijsiatsi: ‘Pamatacabī Jehovāñē tajamatacabī, jiwi ayaicuenia tananeconitsia-exanaematacabinexa, pecopiapatsiwajēnaeya xanē raja pacato-itorobianatsi tajumepaebinē, profeta Elías. ⁶Nexata Elías bajarapamatacabita, paxajiwī pexijawabelia penaitoyajawami nasiwajamatabēcuenexanepanaeya-exanaena. Bajarapijinia pacuenia, pexi-ata paxajiwijawabelia. Nexata

b 4:2 pecotiata: Bajarapacotia yabara jiwi canaējēta acueyabi pajamatabēcuenebeje yabara: 1) Mesías yabara. Baitsi, ita Cristo patsiana pexaniacuena yawenonaena pamonaē jumecowēñētawanapa Dioso, tsipaji Cristo ēpexaniacuene pexanaponaponaenē. Mal. 3:1 2) Dioso pecapanepaejawanexa pamonaē pejumecowēñētawanapaewitsi penaneconitsia-exanaejawawecua yajawa pibisiacuene pexanaewi. 3) Pacuenia matacabipijiuameto pecotiata daxitacuene napebetabiaba, bajarapacuenia Dioso yapētaeya-exanaena mapanacuapijiw jawabelia pamonaē Dioso pejumecowēñētawanapaewi papexaniacuene exanawanapa Dioso pitabarata.

bजारपकुनल, दखलत पखललल, पखलत यलखल नलखनलखलतलबुकुनल-
पुनुरुकुतलनल खनलखलबरलनल, तलखलतलपकुनल पलखनलनलपलनल.
Bजारपकुनल लतल लपो-खनल तलपल तलपतलतलतलकललवलखलनल, बलल
तलपतलखलतल वलरलललखलतलपलखल दखलतल पलखनलकुलपलखल, पलखलनल-
नलपलनलकुनल यलखल, पलकलखलतल», खल रलखल खलवुल —खल लललकुलस लुदल
नलकुलपलखलखलबलल.

Nuevo Testamento

Mateo

Pexanialiwaisi, Jesucristo peliwaisi, apóstolnē Mateo peyaquinaeliwaisi

Jesucristo pijasalinaiwimi, yabara peliwaisi

(Lc 3:23-38)

1 ¹Mapaliwaisije Jesucristo pijasalinaiwimi peliwaisi. Jesucristo rabaja nacua-ewetsinēmi David-pijinē pemomoxiyajuwēnēnē, ponē Israel nacua pewetsinēmi. Abraham-pijinē-ata pemomoxiyajuwēnēnē, ponējawawerena pitsapa daxita judíowi. ²Copiaya Abraham-pijinēmi xaina pexēnato, pewēnē Isaac. Isaac-pijinē pexēnato xaina, pewēnē Jacob. Jacob-pijinē pexi xaina ayaibitsaēto. Pexiyajuwēnēnē pewēnē Judá. Bajaraponēmi xaina pematapijinēbeje, pejuyapijiwi-ata. ³Judápijinē xaina pexēnatobeje; Fares, Zarabeje. Bajaraponēmibeje penapijiwa pewēnē Tamar. Fares-pijinē pexēnato xaina, pewēnē Esrom. Esrom-pijinē pexēnato xaina, pewēnē Aram. ⁴4 Aram-pijinē xaina pexēnato pewēnē Aminadab. Aminadab-pijinē xaina pexēnato pewēnē Naasón. Naasón-pijinē xaina pexēnato pewēnē Salmón. ⁵Salmón-pijinē xaina pexēnato pewēnē Booz. Booz-pijinē xaina pexēnato pewēnē Obed. Obed-pijinē xaina pexēnato pewēnē Isaí. ⁶Isaípijinē xaina pexēnato pewēnē David. Nexata bajarapajiwiibeje juya xainabeje pexēnato, pewēnē Salomón. ⁷Salomón-pijinē xaina pexēnato pewēnē Roboam. Roboam-pijinē xaina pexēnato pewēnē Abías. Abías-pijinē xaina pexēnato pewēnē Asa. ⁸Asapijinē xaina pexēnato pewēnē Josafat. Josafat-pijinē xaina pexēnato pewēnē Joram. Joram-pijinē xaina pexēnato pewēnē Uzías. ⁹Uzías-pijinē xaina pexēnato pewēnē Jotam. Jotam-pijinē xaina pexēnato pewēnē Acáz. Acáz-pijinē xaina pexēnato pewēnē Ezequías. ¹⁰Ezequías-pijinē xaina pexēnato pewēnē Manasés. Manasés-pijinē xaina pexēnato pewēnē Amón. Amón-pijinē xaina pexēnato pewēnē Josías. ¹¹Ezequías-pijinē xaina pexēnato pewēnē Manasés. Manasés-pijinē xaina pexēnato pewēnē Amón. Amón-pijinē xaina pexēnato pewēnē Josías. Pexiyajuwēnēnē pewēnē Jeconías. Jeconías xaina pematapijinē, itsamonaē pejuyapijiwi-ata. Pamatacabi Israel nacuapijiwi cobecēbiaya caponatsi Babilonia nacuyabelia, bajarapamatacabi naexana Jeconías-pijinē. ¹²Bajaraxuacujinae Jeconías-pijinē xaina pexēnato pewēnē Salatiel. Salatiel-pijinē xaina pexēnato pewēnē Zorobabel. ¹³Zorobabel-pijinē pexēnato xaina, pewēnē Abiud. Abiud-pijinē pexēnato xaina, pewēnē Eliaquim. Eliaquim-pijinē pexēnato xaina, pewēnē Azor. ¹⁴Azor-pijinē xaina pexēnato pewēnē Sadoc. Sadoc-pijinē xaina pexēnato

pewënë Aquim. Aquim-pijinë juya xaina pexênato pewënë Eliud.¹⁵ Eliud-pijinë xaina pexênato pewënë Eleazar. Eleazar-pijinë xaina pexênato pewënë Matán. Matán-pijinë xaina pexênato pewënë Jacob.¹⁶ Jacob-pijinë juya xaina, pexênato pewënë José. Bajaraponëmi María pamona. Bajarapowami Jesús pena, ponë yabara: «Mesías»,^a jaitsi.¹⁷ Nexata, Abraham-pijinëmita petaxuxuabicujinae judíowi penaexanaponaejawa, treceñeta naexana David-pijinë. Bajaraxuacujinae, icatsia David-pijinëmita petaxuxuabicujinae judíowi penaexanaponaejawa, treceñeta icatsia naexana Jeconías-pijinë. Pamatacabi Israel nacuapijiwi cobecëbiaya caponatsi Babilonia nacuayabelia, naexana Jeconías-pijinë. Bajaraxuacujinae, icatsia Jeconías-pijinëmita petaxuxuabicujinae judíowi penaexanaponaejawa, treceñet pijawajawata naexana jane baja Mesías.

Jesús penaexanaejawa, yabara peliwaais

(Lc 2:1-7)

¹⁸ Mapacuenia Jesucristo naexana mapanacuataje. Bajarapamatacabi, José, Maríabeje, najumejejaibeje^b pepacuenenapapitsinexabeje. Itsiata, abaxë penapitsiwajënaeyabeje, María nayapëtane penacoxitsijawa, Espíritu Santo pejamatabëcueneta.^c ¹⁹ María pamonanexa, José, bitso penajamatabëcuenerebiabinë. Bajaraxuata, apojitsipae daxitajiwi pitabarata pewajunupaebijawa María penacoxitsijawa. Nexata picaní, José bëpënëña jitsipa muetsia pecopatsijawa. ²⁰ Pamatacabi abaxë bajarapacuenia najamatabëxainaponapona, majitsinaebota tsitanaitajëtatsi Dioso pitorobinëtsica, ángelnë. Nexata, jumaitsi Joséjawabelia:

—José, xamë raja nacua-ewetsinëmi David-pijinë pemomomë. ¡Pëtsa junawame nepitsijawa María penacoxitsijamatabëcuenen, tsipaji raja panacuetoyacotaponapona, Espíritu Santo saya pejamatabëcueneta nacoxita.²¹ Bajarapowa panacuetonëyo exanaena. Xamë wënërubianame Jesús, tsipaji raja bajaraponëyo capanepaena daxita pijajiwi, pibisiacuene pexanaenecónimiwecua —jaitsi ángelnë majitsinaebota.

²² Daxita bajarapacuenia María tocopiapatatsi jane baja, profeta Isafás-pijinë, tajëwelia pewajunupaebicuenia. Bajaraxua yabara jumaitsi mapacueniaje:

a 1:16 *Mesías*: Griegojumeta, Mesías-wënë pitsapa Cristo. Mesías-wënë, Cristowënëbeje najëpabeje. Xaina caejamatabëcuenenebeje. Mapejumaitsijamatabëcuenenebeje jiwijumetaje: «Dioso pitapetsinëtsi», itsa jume, «Ponë aceiterata petsimata-epanaenëtsi, Dioso pitapetsixaetsi pejitsipaecuene peto-exanaenexatsi», pejaiwënëbeje. Judíowi itsa nabarëcuaiacujai ponë yabara Dioso to-itorobiapaeabatsi peyanacua-ewetsinexatsi, peyanacua-ewetsinë David-pijinëmi pewetsicuenia, bajarapamonae wënërubabiaba, «Mesías». Nexata, pewënajudíowi peyapëtaeya-exanaenexa Jesús Mesías-nëcuene, Mateo toyaquina bajarapamonae mapa-Evangelio Mateobaxutotaje.

b 1:18 *najumejejaibeje*: Judíowi penapitsinexabeje pexanaecuene mapacueniaje: Bajarapajiwi-beje pijajarijiwicuena ponaponabeje. Xuacujinae, bajarapajiwi-beje najumejaitabeje pepacuenenapapitsinexabeje. Petoxaniajainexatsi, pebi rajutabiaba penamatamotsijawanë petiriwa pijamonaejawabelia. (Pebi itsa bepejiobinë, nexata tonacuenebaponapona paxuyo, pexênatoyo pematamoweretsijawabelia. Gén. 29:16-21.) Bajarapacuenia daxita itsa exana, tanetsibeje bepenapitsijiwi-beje, apona-imoxoyobabiabi-beje-ata abaxë. Nexata, pebi wënërubatsi «novio», petiriwa pijinia «novia», peyapëtaeya-exanaenexa pepacuenenapapitsijawanexabeje. Copiaya pebi namatawenona pijabo penacuenebinexa, itsajota ponaponaejitsiabeje. Orijiibia, namatawenona palata pecatuatsijawa, penacobjibifiesta pexanaenexabeje. Bajarapacuenia pebi pexanaeweretsicujinae, matapania napitsianabeje, panepae-ata juametönë. **c 1:18** *Espíritu Santo pejamatabëcueneta*: Taema Lc 1:35.

²³ «Petiriwa, caeto-ata pebijawabelia apopenaperabëquenetsiataeya-exanaewa, nacoxitsiana. Exanaena penacuetonëyo. Wënërubiana bajaraponëyo, Emanuel. (Emanuel pejaiwënë: «Dioso nacayajawa», pejajume),»^d jai bajayata tajëwelia profeta Isaías-pijjinë.

²⁴ Itsa baja José naëcota piamajitsinaecujinae, jumecowënëta ángelnë pacuenia itorobatsi. Nexata baja, pijaboyaberena María barëpata pijawa-nexa. ²⁵ Itsiata, abaxë bajaraponë apo-imoxoyobi pijawa, penamataxainae-nacuetonëyo penaexanaejawabelia. José bajarapanacuetonëyo jane baja, wënëruba JESÚS.

Tulupu perubenaejawa pecanaëjëbiwi najetarubena petaenexa Jesús-nëyo

2 ¹ Jesús naexana Belén tomarata, Judea nacuada pe-ecaetomara, pama-tacabijawa nacua-ewetsinë, Herodes, Judea nacua ewetaponapona. Nexata penaexanaecujinae, bexëajawabelia pebijijiwi, tulupu pecanaëcobaponaejawata pecanaëjëbiwi, pata tajënacujawawetsina, Jerusalén tomarajawabetsina, patomarata Herodes yanacua-ewetaponapona. ² Bajarapamonae yanijobapona Jerusalén tomarapijiwijawabelia:

—¿Detsa jota barë-ecatsi panacuetonëyo naexana judíowi pepopeyanacua-ewetsinënexa? Payapëtaniji bajaraponëyo penaexanaejawa, tsipaji baja cajena, patajanacuatareca pataniji bajaraponëyo penaexanaejawata patuluputo^e naitajëta. Bajaraxuata, paponainajë mabetsinaje, patataenexa bajaraponëyo, pitabarata yaiyataeya patamatabacabëta patatonube-nanexa —jai tsaponae tulupu pecanaëjëbiwi jiwijawabelia.

³ Nexata, peyanacua-ewetsinë, Herodes, itsa wënëliwaisitane tulupu pecanaëjëbiwi bajarapacuenia pejumaititsaponaejawa, bitso jamatabëcuenebë-jai, daxita Jerusalén tomarata pejinawanapaewi-ata. ⁴ Bajaraxuata, itoroba pejunatsia-exanaenexa daxita sacerdotewi penamatacatorobiwi, judíowi pecujarubiwi yajawa. Penacaetuatsijawata pijabota, Herodes yanijoba pepatsiwijawabelia, peyapëtaeya-exanaenexatsi itsajota bajayata Diosojumepaebiwi, profetawi, tajëwelia wajunupaeba Mesías penaexanaejawanexa.

⁵ Nexata bajarapamonae jumaitsi Herodes-jawabelia:

—Belén tomarata raja naexanaeyapaeba, Judea nacuada pe-ecaetomara. Bajarapacuenia bajayata baja cajena profeta Miqueas-pijjinë, tajëwelia wajunupaeba peyaquinaeliwaisibaxutota. Jumaitsi mapacueniaje:

⁶ «Xamë, Belén, Judea nacuada ne-ecaetomarayo, bitso newënëjonetomara tsane. Tsiquiritomarayo-atamë, daxita itsatamaranëwecua

Judea nacuada, bajarapacuenia mapanacuapijiwi pematatsënëa beweliacuenia apocatae tsane, tsipaji xamëjawata naexanaena Ponë jiwi pepopewetsinënexa. BajaraPonë oveja pewetsinëcuenia, pexaniacuenia, ewetsiana Dioso pijajiwi, Israel nacuapijiwi»,^f jai baja cajena profeta Miqueas-pijjinë peyaquinaeliwaisibaxutota, Dioso pitorobinëtsica, Mesías penaexanaejawanexa Belén tomarata —jai penacaetuatsiwi Herodes-jawabelia.

⁷ Bajarapamonae peyapëtaeya-exanaecujinaetsi, nexata Herodes muetsia junata pamonaë tajënacuwetsina pepatsiwi, tulupu pecanaëjëbiwi,

peyanijobinexa pamatacabi copiaya naitajëta bajarapatuluputo. ⁸Nexata, peyapëtaeya-exanaecujinaetsi, Herodes itorobalia Belén tomarabelia. Jumaitsi bajarapamonaejawabelia:

—¡Paponaremelia Belén tomarabelia! Xaniawaetsia pajaitsianame bajara-papejewaxinëyo. Itsa baja pacaxitajarabianame, panewajunucaponaeremena patanetsipaebinxamë, tsipaji xanë-ata jitsipajë taliajawa, yaiyataeya tamatabacabëta bajaraponëyo pitabarata tatonucaenexa —jai Herodes.

⁹Bajarapamonae, bajarapacuenia pejumaitsicujinaetsi, ponalia Belén tomarabelia. Nexata namutualia penajetarubenaewata, jemata icatsia napebeta patuluputo tane pijanacuatareca. Nexata, bajarapatuluputo bajarapamonae matabanajetarucatsi. Bajarapamonae bajarapatuluputo matabanajetarucatsi. ¹⁰Itsa tane bajarapatuluputo perucaejawa, bitso jamatabëcunebarëya. ¹¹Nexata bajarapamonae boyalia itsa joneya, tane pejewaxinëyo, Jesús, pena yajawa. Bajarapaepatota, yaiyataeya pematabacabëta tonubenajunua pitabarata, penajamatabëcuene-itajëtsinexa bitso peyaiyataeja-matabëcuene bajaraponëyojawabelia. Bajaraxuacujinae, pecapatsicajonixi matapana, itsajota cajinawanapa penamatamotsijawanë. Nexata, pejewaxinëyojawabelia rajuta orojawa, anijawiriapetuxujuwijawabeje-ata; incienso-përëjawanë, mirrajawanë-ata. ¹²Bajaraxuacujinae, tulupu pecanaëjëbiwi, merawi majitsinaebota, Dioso itawetatsi penawiabiyanawa peyanacuaewetsinë Herodes-jawabelia. Nexata, bajarapamonae saicaya namutua baja nawiaba pijanacuayabereca.

José barënajetabijirawa Jesús-nëyo Egipto nacuayabelia

¹³Tulupu pecanaëjëbiwi penawiabicujinae, Dioso pija-ángelnë merawi José majitsinaebota tsitanaitajëtsi. Nexata jumaitsi Joséjawabelia:

—¡José, nonotapunare baja! ¡Barënajetabijiraware baja pejewaxinëyo, pena yajawa, Egipto nacuayabelia, tsipaji raja Judea nacua pewetsinë, Herodes, tsiquirinëyo tsimaxërenajitsiatsi pebeyaxuabinxatsi! Bajarajotalia, barëponaponaename, matapana tacayapëtaeya-exanaejawabelia paepatota icatsia barënawiatsijitsiamërena —jai ángelnë Joséjawabelia.

¹⁴Nexata, José nonotapuna. Piamajitsinaemerawi barënajetabijirawa baja pejewaxinëyo, pena yajawa, Egipto nacuayabelia. ¹⁵Bajarajotalia barëponapona bajayajebi, petëpaejawabelia Herodes nacuaewetsinëmi. Bajaraxuacujinae, José icatsia barënawiatsiarena Israel nacuayabereca. Nexata itsa barënawiarena Egipto nacuawerena, copiapata jane baja, profeta Oseas-pijinë, xua bajayata tajëwelia jumaitsi Mesías yabara: «‘Taxënato icatsia junatsiarenajë penawiatsinexa Egipto nacuawerena,’ jai raja Dioso»,^g pejajawa tajëwelia profeta Oseas-pijinë Mesías yabara.

Herodes, nacuaewetsinë, pijajiwi itoroba, pebinacuetoxi pebeponaenexa, Belén tomarata imoxoyo pe-enaetomaranëjawa-ata

¹⁶Nacuaewetsinë, Herodes, itsa yapëtane tulupu pecanaëjëbiwi peyamaxë-itorobijawatsi, caxitajarabi-ata pejewaxinëyo, Jesús, apopetsipaebixaetsirena, bajaraponë bitso anaepana. Nexata, pijajiwi tsi-itoroba. Jumaitsi:

—Pabeponaename daxita pebinacuetoxi, pejananaexanaenacuetoxi jawaweliacujinae, anijawaibeje pexainaenacuetonëxijawabelia, Belén tomarata pejinawanapaewi, tomarajumawelia pe-enaebonëjawa-ata —jai pianae-pa-naexae pijajiwijawabelia. Bajarapacuenia itoroba Jesús-nëyo picani peyajawabeyaxuabinexatsi, tsipaji tulupu pecanaëcobaponaewi, pecanaëjëbiwi, Herodes-jawabelia tsipaeba paepatota taxuxuaba petaejawa tuluputo.

¹⁷Copiapata jane baja, xua profeta Jeremías-pijinë, bajayata tajëwelia yaqui-nabuata, pebeponaejawanexa pebinacuetoxi Belén tomarata. Bajarapabaxu-tota baja cajena jumaitsi mapacueniaje:

¹⁸«Ramá tomarata,^h jumetaena ayaicuenia pemataneuyabijawa.

Raquel-pijiwa pemomoxi pexi mataneuyabiana. Itawetsi-atatsi tsane bitso penajamatabëxainaeyaniwa, itsiata apocopatsi tsane, tsipaji pexi totëpaenatsi», jai bajayata tajëwelia profeta Jeremías-pijinë peyaquinaeliwaisita.

¹⁹Nacua-ewetsinë, Herodes baja, itsa tëpa, Dioso pija-àngelnë merawi majitsinaebota tsitanaitajëta Josëjawabelia Egipto nacuata.

²⁰Jumaitsi:

—¡José, nonotapunare! Barëponaename baja pejewaxinëyo, pena yajawa, nebarënawiatsinexa icatsia Israel nacuayabelia. Tëpa rabaja ponë picani jamatabëbeyaxuabatsi pejewaxinëyo —jai ángelnë majitsinaebota Josëjawabelia.

²¹Nexata baja, José nonotapuna. Barëpona pejewaxinëyo, pena yajawa, icatsia pebarënawiatsinexa Israel nacuayabelia. ²²Peyanacua-ewetsinëmi, Herodes-pijinë pexënato, Arquelao, Judea nacua-eweta paxa pewënamuto. Nexata, José itsa wënëliwaisitane bajaraxua, cuju-nawa Jesús-nëyo pebarëponaejawa Judea nacuayabelia. Majitsinae-bota Dioso pitawetsixaetsi pebarëponaeyaniwa bajarapanacuayabelia, nexata José barëpona bajaraponëyo Galilea nacuayabelia. ²³Bajara-panacuayabelia pebarëpatsicujinae, barëpona Nazaret tomarata. Bajarapacuenia copiapata jane baja, xua bajayata profeta Isaías-pijinë tajëwelia jumaitsi Mesías yabara: «Ponë Dioso itorobijitsiatsica jiwi pecapanepaenënexa, bajaraponë yabara jiwi jumaitsi tsabiabi tsane: ‘Mara ponëje Nazaret tomarapijinëje,’ jai tsabiabi tsane»,ⁱ pejaijawa tajëwelia profeta Isaías-pijinë Mesías yabara.

**Juan, jiwibautizabinë, liwaisi tsipaebanajetaruca
jiwijawabelia petusatonacuata**

(Mc 1:1-8; Lc 3:1-9,15-17; Jn 1:19-28)

3 ¹Pamatacabijawa Jesús abaxë itsa ponapona Nazaret tomarata, Juan, jiwibautizabinë, najetaruca Judea nacuatusatojawa. ²Nexata, Dioso pitorobicueniatsi, jiwijawabelia paebanajetaruca mapaliwai-sicueniaje: «Imoxoyo rabaja pewajënae pecopiapatsijawanexa Dioso,

h 2:18 *Ramá tomarata:* Bajarapatomara eca Raquel-pijiwa, pexënato Benjamín-pijinë pemomoxibitsaëto pejinawanapaenacuata. Bajarapowa Jacob-pijinë pijawami, bitso piasiwawa. Nexata, Herodes itsa beya-exana pebinacuetoxi bajarapanacuata, Raquel-pijiwami bepemomoxi bepona. Orijibia, Raquel-pijiwami itsa tëpa Jacob-pijinë ayaicuenia mataneuyaba, pemëthëtsicujinae Ramá nacuata. Taema Gén. 35:16-20. **i 2:23** Taema Isa. 11:1.

athëbëtatsia pe-ecaenë, pijajiwi peyanacua-ewetsimatacabinexa¹ mapanacuataje. ¡Nexata baja, pacopabare pibisiacuene pane-exanabibijawa! ¡Panajamatabëcuenepëñëyorore Diosojawabelia!», jai tsanajetaruca Juan pepaebijawata.

³ Bajarapacuenia Juan jiwi itsa tsipaebanajetaruca, copiapata jane baja, pacuenia profeta Isafas-pijinë bajayata tajëwelia yaquina Juan yabara. Jumaiti mapacueniaje:

«Tanejumeliwaisipaebinë wawajaiya jumaiti tsane petusatonacuajawa mapacueniaje: ‘¡Pacuenia jiwi baxaneba panamutowerena najetarucaejitsia petuxanenë, batorowia-exananua namuto, bajarapijinia pacuenia paxamë-ata panajamatabëcuenexaniawaere pepoPetuxanenë pepatsiwajënaeyarena!’, jai tsane tanejumeliwaisipaebinë», jai profeta Isafas-pijinë peyaquinaeliwaisita.

⁴ Juan naxatata camellonata pexanaejawa. Na-epacëta cuerobocoto. Xae-yabiaba bosesë, jabëra yajawa. ⁵ Juan petsipaebiliwaisi pejumetaenexatsi, muxunapatabiabatsi Jerusalén tomarapijiwi, Judea nacuapijiwi, Jordán mene imoxoyopijiwi-ata. ⁶ Nexata, bajarapamonae pejumetaecujinae Juan pepaebiliwaisi, itsa natoyapëtane pibisiacuene pexanaejawa, rowialia Diosojawabelia nawecuapaebapona. Nexata, bajarapamonae Juan bautizabapona Jordán meneta.

⁷ Juan itsa tane ayaibitsaëto, fariseoyajuwënëwi,^k saduceoyajuwënëwi-ata,^l pepatsijawa pebautizabinexa picani, bajaraponë jumaiti bajarapamonaejawabelia:

j 3:2 *pijajiwi peyanacua-ewetsimatacabinexa*: Wowaijumeta pitsapa, «reino de los cielos». Bajarapajumenë nacayapëtaeya-exana pacuenia Cristo yanacua-ewetsijitsia mapanacuapijiwije, pacuenia ewetaponapona daxita pamonaë jinawanapa Dioso pijanacuatatsia. Wowaijumeta pitsapa, Milenio, «mil pawaibeje», pejaijume. Jesús baitsi, yanacua-ewetsiana daxita mapanacuapijiwije mil pawaibejenexa, pacuenia Diosojumepaebiwi, profetawi, tajëwelia wajunupaëba Mesías yabara. Mateo peyaquinaebaxutota pecuene-itajëtsixae Jesús, pijaMesías-cuene pewëñajudfowijawabelia, bajaraxua yabara tsaena jumaiti Juan, jiwibautizabinë, Dioso pijajiwi pewetsimatacabinexa. *Itsiaata, itsamonae canaëjëta* pacuenia Jesús athëbëwetsica jamatabëcuenewetsiana daxita pijajiwi, pacuenia ewetaponapona daxita pamonaë jinawanapa Dioso pijanacuatatsia. Baitsi, athëbëwetsica peyanacua-ewetsijawata, pijajiwi jamatabëcuenenamatacaitorobiana. **k 3:7** *fariseoyajuwënëwi*: Bajarapamonae judfowi picani. Itsiaata, itsamonae pebi-jiwi, nacajunua fariseocuenejawabelia, asaëyata pecatsitecaenexa picani Dioso penajumecopatsiliwaisi Moisés-pijinëta, itsamonawecua. Itsiaata, jumecowënëtabiaba saya paliwaisianë yabara pijanacuapijiwi ayaijamatabëcuenewicuenia taejitsiatsi. Bajarapaliwaisi jumecowënëtabiabi-ata, pepocune aponajamatabëcuenepëñëyorotsi Diosojawabelia, pibisiacuene pexanaejawawecua. Pamonaë, escribamonae (judfowi pecujarubiwi), nacajoneyabiaba fariseocuenejawabelia. Tsiquiribitsaëtoyo sacerdotewiyajuwënëwi nacajunua fariseocuenejawabelia. Fariseowi naneconita Diosojawabelia, tsipaji be-ayaijamatabëcuenewi natane pewëñajudfowiweua. Baitsi, natane beMoisés-jamatabëcuene pexainaewi, pitorobabiabinexa jiwi pacuenia be-exanawanapa, Dioso pesiwabarëyanexatsi. Bitso piyapëbejeliwaisianë Dioso penajumecopatsiliwaisiweua Moisés-pijinëta itorobabiaba peyajawajumecowënëtsinexa. Nexata, natocanaëjëtabiaba pepopiayapëbejucene Dioso bepejitsipaecuenia pejinawanapaejawa. Taema Mt 23:13, Mt 15:4-9. Itsiaata, bajarapapexanaejawata apocuenjëpae pacuenia itorobabiaba itsamonae pexanaenexa. Mt 6:2-16. **l 3:7** *saduceoyajuwënëwi*: Ayaibitsaëto sacerdotewi saduceocuenejawabelia penacajonewi, bajaraxuata, saduceomonae ayaijamatabëcuenewi itsamonae judfowi pewetsiwitua-tuajëta. Bajarapamonae naneconita Diosojawabelia, tsipaji cujaruba pewëñajudfowi pejinawanapaenexa apojudfowicuenia, Dioso itawetsi-ata bajarapacuenia pexanaeyaniwa. Baitsi, bitso jitsipa Roma nacuapijiwi asiwaya pætaenexatsi, aliwaisijibia pejinawanapaejawa. Nexata pema-tajërëatsixae mapanacuapijiliwaisi, Dioso peliawaisijawabelia, naneconita Diosojawabelia. Saduceowi jume-aebanua jiwi icatsia piasaëjawanexa petëpaecujinae. Jume-aebanua dowathimonae pepopiabejewicune.

—¡Panexamatabëcuenenawëxaniabiwi! Paxamë pajamatabëcuenejëpame saya jomo, bitso pianapanaewi. ¿Jipatsa pacacujaruba panewecuapanepaeja-wanexa Dioso papecananeconitsia-exanaejawanexa panenabautizabijawata? Pacuenia jomo barëcëpeca, itsa tane isoto petajunenajetarucaejawa pewecua-panepaenexa, bajarapijinia pacuenia paxamë-ata pa-exaname picani, itsa papatame xanëjawaberena patacabautizabinexa, panajamatabëcuenejëpënyo-rotsinejewamë Diosojawabelia, pibisiacuene pane-exanawanapaejawawecua. Bajarapacuenia pajamatabëjumaitsi-atomë, apopawecuapanepaemë tsane Dioso papecananeconitsia-exanaejawanexa panijaneconijamatabëcuene. Biji rajane, caranata paca-imoxoyotapona Dioso papecananeconitsia-exanaematacabinexa. ⁸ ¡Itsa pajitsipame Dioso papecacapanepaejawa, panajamatabëcuene-itajëre Dioso-jawabelia panenajamatabëcuenejëpënyorotsijawa panecopabijawata pibisiacuene pane-exanabijawata, juya Dioso pejitsipaecuenia pane-exanawanapanaexa! Nexata, daxitajiwi pacayapëtaena pepacuene panenajamatabëcuenejëpënyo-rotsijawa Diosojawabelia. ⁹ ¡Pëtsa pajamatabëjumaitsimë: «Waxaitsi raja Dioso aponacaneconitsia-exanae tsane, Abraham-pijinë pemomoxixaetsi»,^m pajamatabëjamë pëtsa! Dioso itsa siwajamatabëcuenejëjai tsipae Abraham-pijinë pemomoxi pexainaenexa, caëjëpatsi raja ayaibitsaëto pecapitsapaejawa mapai-ibotonëmijawawerenaje. Bajaraxuata, Abraham-pijinë papemomoxixaemë apopawecuapanepaemë tsane Dioso papecananeconitsia-exanaejawanexa panijaneconijamatabëcuene. ¹⁰ Biji rajane, tsiteca Dioso pacananeconitsia-exanaena. Pacuenia pe-ubinaenë pexainaenë, ponaenë apotonacuaitsitsi pexaniacuai, bajaraponaenë nicata sipalita. Yatabutopa cajucanua, petajuitsinexa isotota. Bajarapijinia pacuenia, paxamë-ata Dioso pacaxuabiana apopewerewerecae-isotojawabelia papecatajuenexa, apopanecapitsapaexae pexanaicuenejawanë pane-exanaejawata, bajaraPonë pejitsipaecueniejawanë.

¹¹ »Xanë raja saya jiwi bautizabaponajë merata,ⁿ penajamatabëcuenejëpënyorotsicujinae Diosojawabelia, pibisiacuene pexanabijawawecua, juya Dioso pejitsipaecuenia pejinawanapaenexa. Itsiata baitsi jane, Ponë tacowëwerena najetarucaena, ayaijamatabëcuenenë xanëwecua. BajaraPonë rajane baja pacatsijamatabëcuenejëneya-exanaena Espíritu Santo. Itsa-monaë pijinia naneconitsia-exanaenatsi isotota pijaneconijamatabëcuene. BajaraPonëwecua, xanë saya beweliamatabëcuenenënë. Wecua-auranënuu pijazapato-ata tatocaponaenexa, bepijajiwiwonëcuenianë. ¹² Nexata,

m 3:9 *Abraham-pijinë pemomoxixaetsi:* Jesús peponaponaematacabi mapanacuataje, ayaibitsaëto judiowi canaëjëta Dioso pitaxutotsoniatæjawatsi apojudfowiwecua. Baitsi, canaëjëta Dioso aneconijibia petæjawatsi Abraham-pijinë pejamatabëcuene. Canaëjëtanua Abraham pemomoxixae, pejonejawanexa Mesías peyanacua-ewetsicuenejawabelia pibisiacuene exanawanapae-ata. Canaëjëtanua Dioso pesiwabarëyajawanexatsi daxita petajuitsijawanë dajubi, aponajamatabëcuenejëpënyorotsi-ata pibisiacuene pexanaejawawecua, peto-exanabiabijawanexatsinua daxita pacuenia wajëca bajaraPonëjawabelia, pibisiacuene exanawanapae-ata. Bajarapamonae nacofënëta pacuenia Dioso jumaitsi, 1Sa 15:22; Sal. 51:16-17; 66:18; Isa. 1:11-17. **n 3:11** *bautizabaponajë merata:* Bautizar-jume pitsapa jiwijumeta, «jabuta merata», pejaijawa. Nexata, bajarapajume Juan canacueneba mapacueniaje: «Xanë jabut-siaya jiajë jiwi merata, tatsitajëtsinexa caejamatabëcuene pexinaejawa Diosojawabelia. Itsiata, Ponë tacowëwerena patsiana, bajaraPonë tsijamatabëjena Espíritu Santo petsitajëtsinexa pajiwi siwanajamatabëcueneocopata bajaraponëjawabelia», pejaicuena. (2Co 1:22; Efe. 1:13) Itsamonaë pijinia jena isotojawabelia, petsitajëtsinexa Dioso apopejitsipaecuenie pexanaewi. Bajaraxua yabara nacayapëtaeya-exana vr 12. Baitsi, xua abeje, bajaraxua baja batajuita.

bajaraPonë xaniawaetsia pacacuenecanaëjësiana. Pacuenia arroz-xainaenë baja itsa wereta pesiricaejawa, jëaba pepitsinexa ëpexu. Pejëa-bijawata saicaya tsatapona ëpexu pesiwecua. Nexata, ëpexu xaniawaeteta pe-etsibojawabelia. Pesi pijinia penetapona wayafuabelia, petajuitsinexa isotota. Bajarapijia pacuenia, paxamë-ata tacowëwerena penajetaruaenë pacacuenecanaëjëbiana. Nexata pamona Dioso pejisipaecuenia jinawana, capanepaenatsi pejinawanapaenexa Dioso pijanacuatatsia. Pamona pijinia Dioso apopejisipaecue exanawanapa, naneconitsia-exanaenatsi daxitamatacabijawabelianexa apopewerewerecae-isotojawabelia —jai Juan fariseowi, saduceomonaejawabelia-ata.

Pacuenia Juan bautizaba Jesús, yabara peliwaishi

(Mc 1:9-11; Lc 3:21-22)

¹³Pamatacabi Juan bautizabaponapona jiwi Jordán meneta, Jesús naro-pota Galilea nacujawawerena, peponaenexa Jordán menejawabelia. Nexata, itsa pata mene-itapata, imoxoyota Juan-jawabelia, pebautizabinexatsi. ¹⁴Juan picani apojitsipae pebautizabijawa Jesús. Bajaraxuata, jumaiti Jesús-jawabelia: —¿Detsa xuajitsia patame tacabautizabinexa? Biji rajane, xamë benebautizabame —jai Juan.

¹⁵Itsiata, Jesús jumaiti bajaraponëjawabelia:

—Aeconoxae itsiata, pacuenia baja cawajëtatsi, neto-exanaename. Xanepana waja-exanaenexa daxita Dioso wajanaca-itorobicuenia —jai.

Nexata baja, Juan jejai. ¹⁶Jesús pebautizabicujinaetsi, nototajuna menewet-sina. Bajarapaepatota, Jesús tane athëbëtatsia itaboxo penapatsijawa, Espíritu Santo perunaejawatsica be-ucucuto. Nexata tsmatarunaicatsi. ¹⁷Bajarapaepatota, Juan jumetane athëbëwetsica Dioso pejumaitisijawa: «Mara ponë taxënatota-asiwanëje. Siwajamatabëcuenebarëyanë bitso», pejaijawa.

Pacuenia Jesús jamatabëcuene-ëjëbatsi dowathi, yabara peliwaishi

(Mc 1:12-13; Lc 4:1-13)

4 ¹Jesús pebautizabicujinaetsi, Espíritu Santo ponaeja-exanatsi petusatonacuayabelia, bajarajotalia dowathi pejamatabëcuene-ëjëbinexatsi.

²Nexata petusatonacuata, Jesús ponapona cuarenta pamatacabibeje, cuarenta pamerawibeje yajawa, pexaejawa xaenejewa. Nexata, Jesús bitso pijani. ³Nexata dowathi, ponë jiwi pejamatabëcuene-ëjëbabiabinë, Jesús imoxoyotatsi pejamatabëcuene-ëjëbinexatsi, picani pibisiacuene pexanaeja-exanaenexatsi. Jumaiti Jesús-jawabelia:

—¡Itsa pepacue Dioso pexënatomë, itorobare mapa-ibotonëje penaexanaenexa panbëxi! —jai dowathi.

⁴Nexata, Jesús jumezanawiata mapacueniaje:

—¡Jume raja! Dioso raja pejumeliwaisibaxutota jumaiti mapacueniaje: «Jiwi raja ëpexaejawa apowëna-asaë tsawanapae. Biji rajane, namatawenona Dioso peliwaishi pejumexaniataejawa, pejumecowënëtsijawanua, piajamatabëcuenesaëtsawanapaenexa»,^o jai raja Dioso pejumeliwaisibaxutota —jai Jesús dowathijawabelia.

⁵ Bajaraxuacujinae, icatsia Jesús barëliatsi dowathi Jerusalén tomarabelia. Barëjunayatsi templobo matatuyabetsia. ⁶ Nexata, templobo matatutatsia, dowathi icatsia jumaitsi Jesús-jawabelia:

—Itsa pepacuene Dioso pexënatomë, jirewaremeca irabereca, tsipaji xamë nitsacueneyaniwa peca-ewetsinexa Dioso pejumeliwaisibaxutota jumaitsi mapacueniaje:

«Dioso itorobianica pija-ánglewi peca-ewetsinexa. Nexata, pecobeta cayotsiana pecataxutsaquitsiyaniwa ibotonëjawabelia»,^p jai raja Dioso pejumeliwaisibaxutota xamë peca-ewetsinexa ánglewi —jai dowathi.

⁷ Nexata, Jesús icatsia jumaitsi dowathijawabelia:

—¡Jume raja! Dioso raja icatsia pejumeliwaisibaxutota jumaitsi mapacueniaje: «¡Pëtsa jamatabëcuene-ëjëtame petuxanenë Dioso, neyapëtaenexa itsa xaniajai pecato-exanaenexa pejumaitsicuenia!»,^q jai Dioso pejumeliwaisibaxutota —jai Jesús.

⁸ Jesús icatsia barëliatsi dowathi pinijitsutoxanetowawabelia. Barëjunayatsi petsutojumabetsia. Nexata, bajarapatsutojumawetsica dowathi Jesús tsitajëtatsi daxitanacuanë, daxitacuene bajarapanacuanëta pexainaejawanë yajawa. ⁹ Nexata, icatsia jumaitsi Jesús-jawabelia:

—Ayaijamatabëcuenenë netaeya taitabarata nematabacabëta itsa netonucaename, nexata daxitacuene xua catsitajëtatsi, carajutsianatsi —jai dowathi.

¹⁰ Nexata Jesús jumecanawiata mapacueniaje:

—¡Dowathi, newecuanatixire! Dioso raja pejumeliwaisibaxutota jumaitsi mapacueniaje: «¡Daxitajiwi asiwaya, yayataeya, pematabacabëta nubena caenë, pepoPetuxanenë Dioso pitabarata! ¡Tonacuenebinua bajara-ëPonënexa!», jai raja Dioso pejumeliwaisibaxutota —jai Jesús dowathijawabelia.

¹¹ Nexata baja, dowathi wecuapona Jesús. Bajaraxuacujinae, ánglewi patsica Jesús peyawenonaenexatsi.

Jesús taxuxuaba Galilea nacuata penacuenebijawa Dioso pijacuene
(Mc 1:14-15; Lc 4:14-15)

¹² Jesús itsa wënëliwaisitane Juan, jiwi pebautizabinë, pe-etsijawatsi penaneconitsiwi pejebabiabibota,^r bajaraPonë caewëalia pona Galilea

p 4:6 Taema Sal. 91:11-12. Bajarapacuenia Dioso najumecapanepaeya jumaitsi peyawenonaenexa pajiwi siwanajamatabëcuenecopata bajaraPonëjawabelia. Baitsi, apoyawenonaeyapaebi pajiwi cuene-ëjëta Dioso, peyapëtaenexa pexaniajaicuene peyawenonaëjawanexa. q 4:7 Taema Deut. 6:16. Masah nacuata, israelitawi jamatabëcuene-ëjëta Dioso, pecuene-aebijawata bajaraPonë pewetsijawanexatsi, pebarënawajabitsaëtisjawata Canaán nacuapijiwajawabelia. Judíowi jamatabëcuene-ëjëtanua Dioso, pecuene-aebijawata Dioso penaneconitsia-exanaejawanexatsi daxita pibisiacuene pexanaeneconi, tsipaji canaëjëta Dioso apopenaneconitsia-exanaejawanexatsi Abraham pemomoxiax. Nexata, Jesús itsa jumecowënëtsipa dowathi, pejirewinexa bomatatuwetsica, anijajamatabëcuenebeje yabara jamatabëcuene-ëjëtsipa Dioso. Jamatabëcuene-ëjëtsipa pejumecowënëtsixae dowathi. Najamatabëcuene-itajëtsipana pecuene-aebijawa Dioso pewetsiapiabijawatsi. r 4:12 pe-etsijawatsi penaneconitsiwi pejebabiabibota: Bajarapacuenia exana Herodes Antipas, pewetsinë Galilea nacuata. Taema Lc 3:19-20.

nacuayabelia. ¹³ Pepatsicujinae Nazaret tomarata, aponacopatsi bajarajota peponaponaenexa. Icatsia pona Capernaúm tomarajawabelia peponaponaenexa. Bajarapatomara eca pucaxaneto-itapata, Zabulón-pijjiné, Neftalípijiné-beje pemomoxi, pejinawanapaenacuata. ¹⁴ Bajarapacuenia Jesús itsa patajopa Capernaúm tomarata, Dioso peliwaisi jiwi petsipaebinxexa, copiapata jane baja pacuenia bajayata profeta Isaías-pijjiné tajéwelia peyaquinaeliwaisita, Mesías pexanaejawanexa. Jumaitsi mapacueniaje:

¹⁵⁻¹⁶ «Zabulon, Neftalí nacuapijiwibeje, pucaxanetomuxuneneta pejinawanapaewi, pexaniajailiwaisi, Dioso peliwaisi, apopeyapëtaexae, bepitaquirinacuanëjawa jinawanapa. Bajarapijini pacuenia, Galilea nacuata, Jordán-mene itsapanawetsina pebocaenacua, apojudíowi pejinawanapaenacua, bajarapamonae-ata bepitaquirinacuanëjawa jinawanapa. Nexata pacuenia pinijicotiaxaneto itayotsipa, petanexa xaniwaetsia, bajarapijini pacuenia bajarapamonae jamatabëcuene-itayotsianatsi, itsa tsipaebianatsi Diosojawabelia pecapanepaeliwaixinexatsi»,⁵ jai tajéwelia profeta Isaías-pijjiné peyaquinaeliwaisita Mesías petsipaebijawanexa.

¹⁷ Nexata Capernaúm tomarata, Jesús copiaya jane baja taxuxuaba jiwi petsipaebijawa Dioso peliwaisi. Jumaitsi tsaponae mapacueniaje: «Imoxoyo rabaja pewajënae pecopiapatsijawanexa Dioso athëbëtatsia pe-ecanë papijijiwiwimë papecyanacua-ewetsimatacabinexa mapanacuataje. ¡Nexata baja, pacopabare pibisiacuene pane-exanabiabijawa! ¡Panajamatabëcuene-pënëyore Diosojawabelia!», jai tsaponae Jesús jijiwijawabelia.

Pacuenia Jesús junata cuatro ponëbeje dujuai peyamatajucabiabiwi, yabara peliwaisi

(Mc 1:16-20; Lc 5:1-11)

¹⁸ Itsamatacabi penajetarucaejawata Galilea pucaxaneto-itapaya, Jesús taenuta anijanëbeje nacaebananëbeje, Simón, Andrés-beje. Simón itsawënë Pedro. Bajaraponëbeje dujuai peyamatajucabiabinëbeje. Mallata yamatajucabiababeje dujuai, pecanajetabiabinexabeje. ¹⁹ Nexata Jesús jumaitsi bajaraponëbejajawabelia:

—¡Naxatsia! ¡Panepënaponarebeje! Pacacujarubianatsibeje jiwi panejucanexabeje. Pacuenia dujuai payamatajucabiabamebeje, bajarapacuenia jiwi panecujarubijawatabeje tajumeliwaisi, pajucaenamebeje mapanacuapijicunenewecuaje, Dioso pijajiwixexa —jai Jesús.

²⁰ Nexata, bajaraponëbeje dujuai peyamatajucabiabijawamibeje, bajarajota puenetabuatabeje. Nexata baja, naponabeje Jesús pepëta.

²¹ Bajaraxuacujinae, icatsia webeliayo pewajënaeyabelia Jesús barëpona. Icatsia taenuta anijanëbeje, nacaebananëbeje, Zebedeo pexënatobeje; Santiago, Juan-beje. Pijajera-ënëta paxa yajawa xanëbaponaponabeje dujuai peyamatajucaejawanënexabeje. Icatsia, bajaraponëbeje-ata Jesús junata.

²² Nexata bajarajota, paxa puenetanutabeje, jera yajawa. Naponabeje baja Jesús pepëta.

- ⁶ Jamatabëcuenebarëya tsawanapae tsane pamona mapanacuata bepijaniwi, mera bepejitsipaewi, daxitacuene matatoxenetsia pejitsipaewi pexanaenexa Dioso pitorobicueniatsi, tsipaji bajarapamona Dioso jamatabëcueneyawenonaenatsi nawitsia pexaniacuenejawanë pexanawanapaenexa.
- ⁷ Jamatabëcuenebarëya tsawanapae tsane pamona mapanacuata jiwi itaxutotsoniataeyabiaba, tsipaji bajarapamona Dioso juya itaxutotsoniataeyabiabianatsi.
- ⁸ Jamatabëcuenebarëya tsawanapae tsane pamona mapanacuataje ëpexaniacuene najamatabëxainabiaba pexanaenexa, tsipaji bajarapamona taena Dioso.
- ⁹ Jamatabëcuenebarëya tsawanapae tsane pamona mapanacuataje jamatabëcueneyawenonabiaba jiwi aliwaisijibia penajuajinawanapaenexa, tsipaji bajarapamona yabara, Dioso: «Taxi», jai tsane.
- ¹⁰ Jamatabëcuenebarëya tsawanapae tsane pamona mapanacuataje bejiobia-exanabiabatsi Dioso pejitsipaecuenia pexanawanapaexae, tsipaji bajarapamona tocopatsianatsi pejinawanapaenexa Dioso, athëbëtatsia pe-ecaenë, peyanacua-ewetsijawatatsia.
- ¹¹ »Pajamatabëcuenebarëyamë tsawanapae tsane pacujinae itsamona pibisiacuena pacabaracuaicuajiai, pacabejiobia-exanaena, najumetsënët-siayanua pacabaracuaicuajiai tsane, patajajiwxiaemë. ¹² Bajarapacuenia pacato-exanae-ata, pajamatabëcuenebarëyamë tsawanapae tsane, tsipaji athëbëtatsia pacatoxaina papecabebiobia-exanaejamatabëcuene itsamatacabi Dioso papecarajutsijawanexa bitso pexaniacuenejawa. Pacuenia paxamë-ata pacato-exana patajajiwxiaemë, bajayata panewajënaeyapijiwimi-ata, Diosojumepaebiwimi, profetawi-ata, bejiobia-exanabiabatsi Dioso pijajiwxiae —jai Jesús pijajiwiawabelia.

**Jesús yapëtaeya-exana pacuenia Dioso pijajiwi
bejinawanapa mapanacuataje**

(Mc 9:50; Lc 14:34-35)

- ¹³ Icatsia, Jesús pepaebijawata petsutoyenepanata jumaitsi:
—Paxamë raja bepajajomë tsawanapae^y mapanacuapijiwawataje. Baitsi, pacuenia jiwi yajobenota pewi exaba piabejeyaniwa, bajarapijina pacuenia paxamë bepajajomë tsawanapae Dioso peliwaissi panepaebijawata, pane-cuenecaranatsinexa mapanacuapijiwi bitso pibisiacuene pexanaeyaniwa.

y 5:13 *bepajajomë tsawanapae*: Yajo nacatocuenecatane acueyabi pajamatabëcueneliwaisibeje: 1) Yajobenota waja-exabicujinae yacaranatatsi pewi bepjiyao petsabanaeyaniwa. Bajarapijina pacuenia, pexaniacuene wajatsita-exanabiabijawata, pexanaliwaisita wajamuxujobabiabijawatanua, cueneyacaranatatsi wajanajuajinawanapaewi bepjiyao pibisiacuene pexanaeyaniwa. Itsiata, ita cuenëjapëjitsipatsi mapanacuapijiwi pexanaecuen, nexata jëpatsi beyajo pexaicaejawami piabijawata. 2) Yajobenota nacatoxaicaeya-exana wajaaxajawa, wajanacato-axaebiyaniwa. Nexata, wajajinawanapaecuen yabara, wajacuaicuajiaicuene yabara-ata cuene-itajëtatsi jiwi pejamatabëcuenebarëyajawa Dioso pejitsipaecuenia pexanawanapaewata. 3) Yajo-ata nacajitsipaeya-exana mera waja-apaenexa. Nacatocuenecatane pacuenia bejitsipaeya-exanatsi itsajiwi pesiwanajamatabëcuenecopatsinexa Jesucristojawabelia, waja-exanawanapaecuen pejamatabëcueneta, wajacuaicuajiaicuene pejamatabëcueneta-ata.

Itsiata, yajo itsa axaebi tsipae, ¿detsa nexata pacuenia pewi naxaicaeya-exanaejitsipa? Ajibi tsipae. Itsacuenejawayonexa-ata baja apoxanepanae tsipae. Saya xanepanaejitsipa, pexuabinexa wayafuabelia, jiwi petaxuna-nonobinexa. Bajarapijinia pacuenia, paxamë-ata pa-amatamobimë tsipae, itsa apopacuenejêpawanapaemë panetsipaebiliwaisi. Pacato-acuenebi tsipae panetsitajëtsinexa xua Dioso apo-pejitsipaecuene.

¹⁴ »Paxamë pijinia bepapecotiamë mapanacuapijiwinexa. Pacuenia pitayotsicotia itayota pitaquirijawata, xaniawaetsia jiwi penatsiwajënae-taenexa, bajarapijinia pacuenia paxamë-ata pajamatabëcuene-itayotame paneyapëtaeya-exanaejawata Dioso peliwaisi piamatabëcuene-itaquiriwimijawabelia, xaniawaetsia penayajiwiypëtaenexa Dioso apo-pejitsipaecuene. Nexata, pacuenia petsutojumata pe-ecaetomara acuenebi penacaranatecaejawa jiwi petaeyaniwa, bajarapijinia pacuenia daxita jiwi xaniawaetsia pacacuenetaena Dioso pejitsipaecuena panejinawanapaejawa. ¹⁵ Itsajiwi-ata pitanojotsicujinae lámparabë, apo-etsi cajonibëxëpanalia. Biji rajane, athëbëyo etsia, pitayotecaenexa daxitabo-ënë. ¹⁶ ¡Bajarapijinia pacuenia, paxamë-ata pa-itsimëre tsawanapae tsane! ¡Xaniawaetsia pat-sitajinawanapare daxitajiwi pitabarata, papecacueneataewi pexaniacuenia pewënëxaniatsinexa pane-axa Dioso, athëbëtatsia pe-ecaenë! —jai Jesús pijajiwiwijawabelia.

**Jesús pijajiwi muxujioba petaeyaniwa piamatamobicuenia
Dioso penajumecopatsiliwaisi Moisés-pijinëta,
profetawi, peyaquinaeliwaisianë-ata**

¹⁷ Icatsia, Jesús jumaitsi petsutoyenepanata pe-enaewijawabelia:

—¡Tapatajopaejawa yabara, pëtsa jamatabëcuenenawëxaniabiaya pane-siwajamatabëjumaitsimë ta-ajibia-exanaejawanexa Dioso penajumecopat-siliwaisi Moisés-pijinëta, paliwaisi-ata bajayata tsipaebapona! Biji rajane, patajopajë ta-exanaenexa jane baja daxita pacuenia tajëwelia newajunu-paeba bajarapaliwaisianëta. ¹⁸ Xaniajanë pacuenia pacatsipaebijitsiatsi. Paepatowajëto abaxë itaboxo, ira-ata tsitecaena,^z pewajënaeyabelia liwaisinatamotsiana Dioso penajumecopatsiliwaisi Moisés-pijinëta, pecopia-patsijawabelia daxita Dioso pajamatabëcuene yabara najumecopata. Epatua apo-aliwaisimatamobi tsane, cae-itanetoyo-ata. ¹⁹ Daxita Dioso penajumecopatsiliwaisi Moisés-pijinëta, tsiquiriliwaisiyo-ata, liwaisimatamota. Nexata, pajiwi apojumecowënëtsi bajarapayajuwënëliwaisi, itsa cujarubanua tsajiwijawabelia Itsoliwaisicuenia pejumecowënëtsiyaniwa, bajarapajiwi nane-conitsiana Diosojawabelia. Nexata, bajarapaneconi yabara, bajarapajiwi daxitajiwiwecua beweliamatabëcuenejiwi taenatsi Dioso, athëbëtatsia pe-ecaenë, peyanacua-ewetsimatocabita. Itsiata baitsi jane, pajiwi jumecowënëta daxita bajarapaliwaisi, itsa cujarubanua itsajiwijawabelia bajarapaliwaisi pejumecowënëtsinexa, nexata bajarapajiwi ayaijamatabëcuenejiwi taenatsi Dioso, athëbëtatsia pe-ecaenë, peyanacua-ewetsinacuata. ²⁰ Bajaruata, pacayapëtaeya-exanatsi mapacueniaje. Paxamë, patanejumetaewimë,

^z 5:18 *tsitecaena*: Petsitecaejawa yabara Dioso penajumecopatsiliwaisi Moisés-pijinëta. Taema Jer. 33:20-22. Pijajibijawanexa itaboxo, ira-ata. Taema 2Pd 3:12.

matatoxenetsia pexaniacuene itsa apopa-exanawanapaemë tsane fariseowi-wecua, itsamonaë papecacujarubiwi-ata, pexanaecuenewecua,^a nexata apo-pajonemë tsane Dioso, athëbëtatsia pe-ecaenë, peyanacua-ewetsijawatatsia, pacuenia bajarapamonae —jai Jesús pijajiwijawabelia.

Jesús muxujioba pijajiwi, pecopabinexa penabara-anaepanabiabijawa

(Lc 12:57-59)

²¹ Icatsia, Jesús jumaitsi petsutoyenepanata pe-enaewijawabelia:

—Paxamë rabaja pajumetaneme bajayata pacuenia Dioso najumecopata Moisés-pijinëjawabelia, panijasalinaiwimijawabelia pejumaitsinexa mapacueniaje: «¡Pëtsa pabeyaxuabame jiwitonë! Pajiwi beyaxuaba jiwitonë, bajarapajiwi pabeyaxuabianame penaneconitsixae»,^b pejajijawa. ²² Itsiata baitsi jane, xanë pacajumaitsi mapacueniaje: Pajiwi bara-anaepanaena pijamonaewijawabelia, bajarapajiwi Dioso naneconitsiaya-exanaenatsi. Pajiwi itsajiwi bijatane pibisiacuena, bajarapajiwi caponaenatsi, penutsi-nexatsi peneconicanaëjëbiwi pitabarata. Bajaraxuacujinae, penaneconitsia-exanaenexatsi. Pajiwi pijinia pijamonaewiwi anaeya jumaitsi tsane: ‘Xamë ra saya apopecajamatabëcuenewiwinë’, itsa jai tsane, bajarapajiwi bitso tsiyai tsanetsi. Bajarapaneconi yabara Dioso naneconitsiaya-exanaenatsi apopewerewerecae-isotojawabelia.

²³ »¡Bajaraxuata, panecapatsijawata dajubi altar-jawata panetajuitsinexa Diosojawabelia panijaneconijamatabëcuene, bajarapaepatota itsa panajamatabënapitsipame panijamonaewijawabelia itsacuene pane-exanaejawa, pëtsa abaxë sacerdotenë patajuitsia-exaname! ²⁴ ¡Panecapatsijawa papuenerë abaxë altar-jawa pitabarata! ¡Paponare caecuena pajiwiyojawabelia pananeconitame, panenabarajamatabëcuenexanepanaenexabeje icatsia! Bajaraxuacujinae, icatsia panawiatsiaremena altar-jawaberena, panecapatsidajubi jane baja panetajuitsia-exanaenexa Diosojawabelia panijaneconijamatabëcuene.

²⁵ »¡Bajarapijinia pacuenia, panijamonaewiwi beje itsa panatoxainamebeje liwaisi, nexata namutua panenajetarucaejawatabeje, panajumejairebeje panenatoxanetsinexabeje, juez-nëjawabelia panepatsiwajënaeyabeje panijaliwaisibeje papecatoxanebiwajënaeyabeje! ¡Bajarapacuenia pa-exanare, papecanutsiyaniwa jueznë pitabarata, tsipaji raja jueznë itorobijitsipa policíawí, nijaneconi yabara pecacaponanexa penaneconitsiwi pejebabia-biboyabelia, bajarajota pecananeconitsia-exanaenexa! ²⁶ Bajarapacuenia jueznë itsa pacananeconitsia-exanaejitsipa, pepacuene bepíjia apopawecua-pitsapaemë tsipae papecananeconitsia-exanaejawawecua, matapania panematamoweretsijawabelia daxita pacuenia cawajëta pananeconitsijamatabëcuene —jai Jesús pijajiwijawabelia.

Jesús pijajiwi muxujioba penacojobinë itsawa pejaitsiyaniwa pijawawecua

²⁷ Icatsia, Jesús jumaitsi pijajiwijawabelia, petsutoyenepanata:

a 5:20 *pexanaecuenewecua*: Daxita judíowi yayataeyabiaba fariseowi, judíowi pecujarubiwiitsia (escribamonaë), tsipaji tsitatsi xaniawaetsia Dioso pejumecowënëtsiwi daxitajiwíwecua. Nexata bajarapacuenia itsamonaë tae-atatsi, Jesús yapëtane xaniawaetsia apo-pejumecowënëtsi-jawa Dioso. **b 5:21** Taema Éxo. 20:13; Deut. 5:17.

—Paxamē rabaja pajumetaneme Dioso penajumecopatsili-waisi Moisés-pijinēta pejumaitisijawa mapacueniaje: «iPētsa jai-tame itsawa nijawawecua!»,^c pejaijawa. ²⁸Itsiaata baitsi jane, xanē pacayapētaeya-exanatsi mapacueniaje: Ponē petaejawata petiriwa, siwanajamatabēxaina pewitota pibisiacuene pexanaejawa, bajara-ponē naneconita Diosojawabelia, tsipaji Dioso pitabarata pepacuene bepexanaejawa pibisiacuene pijawawecua.

²⁹»iBajaraxuata, panecujua-itaxutota panetaejawata pibisiacuene itsa paca-exanaeya-exana, pana-itaxutocajure!^d iTajē baja paxuare, tsipaji baja xanepana bajarapacuenia panenawecuaxuabinexa, pada-xitaperabētojiwimē Dioso papecaxuabiyaniwa apopewerewerecae-isotojawabelia! ³⁰iPanecujuacobeta pibisiacuene itsa pa-exaname, panacobecacure! iTajē baja paxuare, tsipaji baja xanepana bajarapacuenia panenawecuaxuabinexa, padaxitaperabētojiwimē Dioso papecaxuabiyaniwa apopewerewerecae-isotojawabelia! —jai Jesús pijajiwijawabelia.

Jesús pijajiwi muxujioba, penacojiobinē pijawa pexuabiyaniwa

(Mt 19:9; Mc 10:11-12; Lc 16:18)

³¹Icatsia, Jesús jumaitsi pijajiwijawabelia:

—Paxamē rabaja pajumetaneme Dioso penajumecopatsiliwaisi Moisés-pijinēta pejumaitisijawa mapacueniaje: «Ponē pijawa jamatabē-wecuanawiata, toyaquinae pewecuanawiatsiliwaisi. Nexata, xuacujinae xuabi pijawa»,^e pejailiwaisi. ³²Itsiaata baitsi jane, xanē pacayapētaeya-exanatsi mapacueniaje: Ponē pijawa xuaba, bajarapowa pewitota pibisiacuene apowecua-exanae-ata pamonawecua itsanējawabelia, bajara-ponē naneconita Diosojawabelia. Petiriwa pamona pexuabicujinaetsi, itsa nacojiobijitsipa itsanējawabelia, nexata jane baja, bajarapowa pewitota pibisiacuene wecua-exanaejitsipa itsanējawabelia, tsipaji abaxē bajaraponē pijawacuenia Dioso totanetsi. Nexata, pijinia, ponē pitsipa itsanē pexuabicowēwami, bajaraponē-ata pibisiacuene exanae-jitsipa pewitota bajarapowajawabelia, tsipaji abaxē itsanē pijawacue-nia Dioso totanetsi —jai Jesús pijajiwijawabelia.

**Jesús pijajiwi muxujioba, pecacuaicuaijaiyaniwa
penamatamotsijumenē, jiwi pejumexaniataenexatsi**

³³Icatsia, Jesús jumaitsi pijajiwijawabelia:

—Paxamē rabaja pajumetaneme Dioso penajumecopatsili-waisi Moisés-pijinēta pejumaitisijawa panijasalinaiwimijawabelia

c 5:27 Taema Éxo. 20:14; Deut. 5:18. **d 5:29** *pana-itaxutocajure*: Bajarapacuenia itsa itoroba, Jesús apo-itorobi pepacuene penaitaxutocajutsinexa, penacobecacutsinexa-ata, bajaraxuacujinae, tajē pexuabinexabeje. Saya itoroba pepacuene pecopabijawanexa bajarapacuenia pematatsēnēa pexanaeyaniwa. Baitsi, pacuenia pitaxuto pecajutsicujinae, acuenebi pematatsēnēa petaejawanexa bajarapa-itaxutota. Pacuenianua penacobecacutsicujinae, acuenebi pematatsēnēa penacuenebijawa bajarapacobeta. Bajarapijinia pacuenia, becopata petiriwa pitaxutuajitsi-paejawa pewitota pibisiacuene pexanaejawa, pibisiacuene pexanaejawanua pecobebejajuwē-nējawata. Bajarapacuenia jumaitsi penasiwajamatabēcuenebējaiya-exanaenexa jiwi pibisiacuene pejitsipabiabiwi pexanaejawa. **e 5:31** Taema Deut. 24:1-4; Mt 19:7; Mc 10:4.

mapacueniaje: «¡Pëtsa epatua pacopabame najumecapanepaeya pane-exanaeyapaebijawa^f Diosojawabelia! ¡Biji rajane, panejumaitsicuenia pa-exanare!»,^g pejajawa. ³⁴Itsiaata baitsi jane, xanë pacajumaitsitsi mapacueniaje: «¡Pëtsa yamaxë-itojorobiaya najumecapanepaeya pajumaitsimë Diosojawabelia, jiwijawabelia-ata, pane-exanaejawanexa itsacuenejawa! ¡Pexaniajaicuenia saya pajuumaitsimë pane-exanaejawanexa yabara!», pacajaitsi. ¡Bajaraxuata, jiwi yamaxë-itojorobiaya papecajumexaniataenexa, pëtsa pawënëcacaicuajiamë athëbëpijicuene, tsipaji bajaraxua Dioso pijatronojawa, bajarawetsica pitorobinexa pijajiwi! Nexata, itsa apopa-exanaemë tsi-pae panejumaitsicuenia bajaraPonë pacananeconitsia-exanaejitsipa. ³⁵¡Pëtsa pawënëcacaicuajiamë irapijicuene-ata, tsipaji raja Dioso pijajawa! ¡Pëtsa pawënëcacaicuajiamë Jerusalén tomara-ata, tsi-paji Dioso, pepopeyanacua-ewetsinë, pijatomara! ³⁶¡Pëtsa pacacacuaicuajiamë panematabocoto-ata, tsipaji raja paxamë apopaca-caëjëpae caematanatoyo-ata panenamatananiojaiya-exanaenexa, panenamatanatsaejaiya-exanaenexa-ata! Caenë Dioso pacamatabocoweta. Nexata, daxita bajarapacuenia pawënëcacaicuajiamë-ata tsipae, itsa apopa-exanaemë panejumaitsicuenia, Dioso pacananeconitsia-exanaejitsipa. ³⁷¡Bajaraxuata, itsa pepacuene pa-exanaejitsiamë itsacuenejawa, «Jājā, exanaenajë», pajamë rowialia! ¡Itsa apopajamatabë-exanaemë, «Jume, apo-exanaenë tsane», pajamë rowialia! Pematatsënëa itsa pajumaitsimë tsipae itsajumeyo-ata jiwi papecajumexaniataenexa, belia dowathi pejamatabëcueneta pajuumaitsimë tsipae —jai Jesús pijajiwi jawabelia.

**Jesús pijajiwi muxujioba pecuenecanawiatsiyaniwa
itsajiwi itsacueniabi-atatsi**

(Lc 6:29-30)

³⁸Icatsia, Jesús jumaitsi pijajiwi jawabelia:

—Paxamë rabaja pajumetaneme Dioso penajumecopatsiliwaisi Moisés-pijinëta pejumaitsijawa mapacueniaje: «Pajiwi itsanë itaxutobijianatsi, juya bajarapajiwi namatamo-itaxutobijianae. Pajiwi-ata itsanë wonotanabiabatsi,

f 5:33 najumecapanepaeya pane-exanaeyapaebijawa: Pacujinae judiowi najumecapanepaeya exanaeyapaeba itsacuenejawa, wënëcacaicuajiai tsabiabi itsanë pewënëta, itsacuenejawa-ata pewënëta, (pacuenia Dioso, itaboxo, ira, peyanacua-ewetsinë, itsacuenejawa-ata pewënëta), bajarapacuenia jumaitsi jiwi pejumexaniataenexatsi. Orijiibia, natocaëjëtana ponë pewënëta cacuaicuajiai penaneconitsia-exanaejawanexatsi, itsa apo-exanae pejumaitsicuenia. Nexata, natocanaëjëta itsa wënëcacaicuajiai tsipae ira, itaboxo, tomara-ata (Jerusalén-wënë), bewelianeconi xainaejitsipa, pejumaitsicuenia apo-exanae-ata tsipae. Biji rajane, itsa wënëcacaicuajiai tsipae Diosowënë, peyanacua-ewetsinë pewënë, ayaineconi xainaejitsipa, itsa apo-exanae pejumaitsicuenia. Nexata, tsiyaijitsiatsi, tsipaji bajaraponëbeje cuenecaëjëpatsi penaneconitsia exanaenexatsi, penajumetsënëtsixae. Bajarapacuenia jiwi canaëjëta «juramentonajumecapanepaeya pexanaeyapaebijawa yabara». Itsiata, «je», itsa jume, «jume», wajajaijawa yabara, Diosonexa bewajajawajumaitsijawa, «Dioso pitabarata», bewajajaijawa. Nexata, najëpaeya Dioso naneconitsia-exanaena pajiwi apo-exanae pejumaitsicuenia, apowënëcacaicuajiai-ata Dioso pewënë. **g 5:33 Taema Lev. 19:12; Núm. 30:2; Deut. 23:22.**

juya bajarapajiwi namatamowonotanabiabi»,^h pejajawa pajumetaneme. Nexata, papecacujarubiwi paca-itorobabiaba bajarapacuenia pane-exanaenexa. ³⁹Itsiaa baitsi jane, xanë bajaraxua yabara pacayapëtaeya-exanatsi mapacueniaje: ¡Pëtsa pajaitame panenayamatamotsijawanexa pajiwi paca-itsacueniaba! ¡Nexata, itsajiwi itsa paca-itabarapacabiayuaba anaeya panecujuanenia, nexata itsanenia-ata patonaitabaracaewere papeca-itabarapacabiayuabinexa! ⁴⁰¡Itsajiwi itsa pacaneconita juez-nëjawabelia pane-amoneyabijamatabëcuene, papecawecuapitsinexa panijacamisa, patoyajawacoparenua panijacamisajumawelia panenaxatatsijawa! ⁴¹»¡Wajabitsaë itsa paca-itoroba panetocaponanexa pijajawa anijakilómetrobejecuenia, patocaponare pematatsënëa itsa-anijakilómetrobejecuenia! ⁴²¡Pajiwiyo, bitso penamatawenonaejiwiyo, itsa pacawajëta itsacuenejawayo, parajure! ¡Itsa jamatabëpacacowaeta, pëtsa pawecua-asiwamë! ¡Patsicopare saya! — jai Jesús pijajiwijawabelia.

Jesús pijajiwi muxujioba piasiwanea pitoyawi-atatsi

(Lc 6:27-28,32-36)

⁴³Icatsia, Jesús jumaitsi pijajiwijawabelia:

—Paxamë rabaja pajumetaneme Dioso penajumecopatsiliwaisi Moisés-pijinëta mapejumaitsiijumeje: «¡Pa-asiwamëre papecayapëtaenë bitso! ¡Pa-itoyamëre! papeca-itoyawi!», pejajawa. Nexata, papecacujarubiwi paca-itoroba bajara-pacuenia pane-exanaenexa. ⁴⁴Itsiaa baitsi jane, xanë bajaraxua yabara paca-itorobatsi mapacueniaje. ¡Pa-asiwamëre panijawajabitsaëwi! ¡Patowajëtabiabare Diosojawabelia, pamonaë papecabijataewi pibisiacuenia! ¡Pexaniacuenë pato-exanare pamonaë paca-ataejitsibi! ¡Patowajëre Diosojawabelia pexaniacuenia peyawenonaenexatsi pamonaë-ata papecaliwaissi-itoyawi!^k ⁴⁵Bajarapacuenia itsa paexanawanapaeneme, pane-axa, athëbëtatsia pe-ecaenë, papeximëcuenia

h 5:38 Taema Éxo. 21:24; Lev. 24:20; Deut. 19:21. Dioso mapaliwaisitaje apo-itorobi jiwi cuene-jëpaeya peyamatomotsinexa. Biji rajane, itaweta pematatsënëa penayamatamotaponaeyaniwa pebijapaitsinëtsi pijamonaëjawabelia. Bajayata, judiowi pecueyanë itsa itaxutobijianatsi, nexata peyamatomotsijawata pijamonaenë to-itaxutobijianabiaba daxita pecueyanë pijamonaëjawabelia. Nexata, bajarapacuenia judiowi pexanaeyaniwa, Dioso cuenecaranatsiaya tocopatatsi ëpacuenia to-exanatsi penayamatamotsijawa pijacuata. Orijibia, Dioso nacayapëtaeya-exana Deut. 32:35; Sal. 94:1; Rom. 12:19-jawata, pacuenia daxita peyamatomotsicuenë bajaraPonë tsicarucatsi pexanaenexa. Baitsi, jiwi pijacuata apobenayamatamotsi. Bajaraxuata, Jesús apotsitanexanepanaetsi jiwi peyamatomotsijawa. Saya itoroba jiwi penacawetsinexa pematatsënëa pebejobia-exanaenexatsi. **i 5:43** *papecayapëtaenë bitso*: Taema Lev. 19:18; Deut. 1:18-19. Wowajumeta canacuenëba «tu prójimo» «papecayapëtaenë bitso», pejajume. Prójimo itsa jai, nacayapëtaeya-exana, nacaenacuapijiwi yabara, nacaetomarapijiwi yabaranua. Itsiaa, Lc 10:31-37-jawata, Jesús nacayapëtaeya-exana pacuenia ponë prójimo, peyawenonaenë penamatawenonaejiwi beweliacuenia petanëtsi-ata. **j 5:43** *Pa-itoyamëre*: Mapaliwaisije fariseowi pijacuata mataropotsia cujaruba Dioso bepitorobiliwaisi. Baitsi, bajarapamonaë pijacuata canaë-jëta mapacueniaje: «Dioso itsa nitoroba ta-asiwanexa tayapëtaenë bitso, nexata tsaena caecuenia nitoroba ta-itoyanexa tane-itoyanë», jamatabëjai. Itsiaa, Dioso apo-itorobi pitoyanexa itsamonaë. Taema Rom. 12:14-21. **k 5:44** *pamonaë-ata papecaliwaissi-itoyawi*: Mapaversículo yabara nawitsia pamonaë Dioso peliwaissi pejucaewi najëpaeya apojucaë pacuenia ruca Reina Valera-baxutota. Itsamonaë saya juta anijaliwaisibeje, tsipaji saya bajarapaliwaisibeje nawitsia yabara jumaitsi. Bajaraxuata picani copiyami mapacuenia rucaje: ¡Pamonaë-ata pibisiacuenia pacabara-cuacuajai, bajarapamonaë paxamë xaniawaetsia pabaracuacuajiamëre! ¡Pamonaë-ata paca-itoya, bajarapamonaë pexaniacuenë pato-exanare! ¡Pamonaë-ata pibisiacuenia pacabijatanë, pibisiacuenë paca-exanaë-ata, patowajëre Diosojawabelia peyawenonaenexatsi!

patsitajinawanapaename. BajaraPonë, pane-axa, yawenonabiaba najëpaeya daxitajiwi, pexaniajamatabëcuenewi, pibisiajamatabëcuenewi-ata. Nexata, najëpaeya tocopata icotia, ema-ata, pijapabianë petonaxaniabinexatsi. ⁴⁶Itsa pasi-wamë tsipae ëpapeca-asiwawi, ¿denexata papexaniacuenejawa Dioso pacarajutsipa pijanacuatatsia, panexainanexa pane-asiwajamatabëcuene? Ajibi tsipae, tsipaji saya pacuenejëpaejitsipame pamonaë impuestojamatabëcuene papecamatamoyanijobabiabiwi. Paxamë pamonaë bitso pibisiacuene pacatsita exanawanapa, itsiata bajarapamonaë-ata asiwa tsabiabi piasiwawitsi. ⁴⁷Xaniawaetsia itsa pacopiapitsipame ëpaneyapëtaewi, nexata apopa-acuene-itothiamë tsipae Dioso apopeyapëtaewiwecua, tsipaji bajarapamonaë-ata xaniawaetsia copiapitabiaba peyapëtaewitsi. ⁴⁸Daxita bajarapacuenia paca-itorobatsi, pane-axa Dioso pane-cuenejëpaenexa.¹ ¡Baitsi, pacuenia pane-axa, athëbëtatsia pe-ecaenë, pejamatabëcuenexanepanaenë, bajarapaxamë-ata pajamatabëcuene-itsimëre! —jai Jesús petsutoyenepanata pe-enaewi, pijajiwijawabelia.

**Jesús muxujioba pijajiwi pacuenia exanaejitsia
peyawenonaejawata penamatawenonaewi**

6 ¹Icatsia, Jesús jumaitsi petsutoyenepanajawata pijajiwi ayaibitsaëtoxanetojawabelia:

—¡Nayajiwitaeya panacuene-ewere paneyawenonaejawa yabara! ¡Pëtsa pexaniacuene pa-exaname saya jiwi papecacueneetaenexa, itsamonae papecataeyaniwa bitso bepapexaniajamatabëcuenewimë pane-exanaejawa yabara! Bajarapacuenia itsa pa-exanaejitsipame, nexata pane-axa, athëbëtatsia pe-ecaenë, apopacarajutsi tsipae pematatsënëa itsacuenejawayo, panexainaejawanexa pijanacuatatsia, pexaniacuene pane-exanaejamatabëcuene. ²¡Bajaraxuata, itsa payawenoname penamatawenonaejiwiyo, pëtsa panacuenewajunupaebame daxitajiwijawabelia, pacuenia ba-exana Dioso bepijajiwi itajara penataewi! Bajarapamonaë jiwi pitabarata yawenonabiaba penamatawenonaejiwi, judfowi pijasinagogabonëjawa,^m callejawa-ata, pecueneetaewitsi pewënëcacaicuajijainexatsi bepexaniajamatabëcuenewi. Xaniajanë pacuenia pacatsipaebijitsiatsi. Pamonaë baja pewënajiwi wënëcacaicuajijaitsi, xaina baja Dioso perajutsijawaminexatsiwecua. Nexata, apoxainae tsane athëbëtatsia papexaniacuenejawa rajutsiapaebatsi, bepejiobiwi peyawenonaejamatabëcuene. ³¡Bajaraxuata, itsa payawenoname penamatawenonaejiwi, pëtsa patsita-exaname daxitajiwi pitabarata! ¡Biji rajane, muetsia payawenonare, itsamonae yapëtaenejewal! ⁴Nexata, muetsia paneyawenonaejawa yabara penamatawenonaewi, pane-axa, Dioso, papecacueneetaenë muetsia pane-exanaejawa, juya pexaniacuenejawa pacarajutsiana daxita jiwi pitabarata —jai Jesús pijajiwijawabelia.

**Jesús muxujioba pijajiwi pacuenia wajëcaejitsia Diosojawabelia
(Lc 11:2-4)**

⁵Icatsia, Jesús jumaitsi pijajiwijawabelia:

¹ 5:48 *Dioso panecuenejëpaenexa*: Baitsi, Dioso apo-asiwa ëpijajiwi; yajawa-asiwa pitoyawitsi-ata. Bajarapacuenia najëpaeya waja-asiwanexa itsamonae-ata. Pacuenia Jesús apocueneacanawitsi pebejiobia-exanaewitsi. Biji rajane, nacaeweta saya pebeyaxuabinexatsi, bajarapacuenia waxaitsi-ata waja-exanaenexa. **m 6:2** *pijasinagogabonëjawa*: Bajarapacuenia judfowi wënërubabiaba penacaetuatsibo, itsajota nacujarubabia Dioso peliwaesi caesábado canacujitsia.

—¡Itsa pawajëcame Diosojawabelia, pëtsa pa-exaname pacuenia pamonae, pacuenia Dioso bepijajiwi itajara penataewi, nawajëcabiaba! Bajara-pamonae jitsipabiaba daxita jiwi pecuenaenexatsi. Nexata, nubenaeya nawajëcabiaba Diosojawabelia judíowi pijasinagogabonëta, calle pena-epacaxinaejawata-ata, jiwi pewënëcuaicuaujainexatsi. Xaniajanë pacuenia pacatsipaebijitsiatsi. Pamonae baja wënëcuaicuaujaitsi pewënajiwi, xaina baja Dioso perajutsijawaminexatsiwecua. Nexata, apoxinae tsane pematatsënë athëbëtatsia papexaniacuenejawa rajutsiapaebatsi, Diosojawabelia pewajëcaejamatabëcuene. ⁶ ¡Nexata, itsa pawajëtsijitsiamë Diosojawabelia, pajonemeya panijaboyalia! ¡Pabaupaxatare! ¡Bajaraxuacujinae jane baja, pawajëcare pane-axajawabelia! Nexata, bajaraPonë, apowajataenë-ata, pacayajawa tsane bajarajota. Itsiata, muetsia pane-exanaejawa papeca-cuenaenëxae, juya pexaniacuenejawa pacarajutsiana daxitajiwi pitabëta pane-exanaematamo.

⁷ ¡Itsa pawajëcame Diosojawabelia, pëtsa napëna pajumaitsimë pane-wajëcaejawata! Payapëtaneme rabaja pacuenia Dioso apoepaypëtaewi napëna jumaitsi tsabiabi pewënajonabiabijawata. ‘Bajarapacuenia itsa ca-exanaenatsi, nejumetaena,’ jamatabëcuenejai tsabiabi nawëxaniabiaya. ⁸ ¡Pëtsa bajarapajamatabëcuene-itsimë pane-axa Dioso yabara, tsipaji bajaraponë panewajëtsiwajënaeya-ata, yapëtane xua panamataweno-name! ⁹ Bajaraxuata, itsa pawajëcame Diosojawabelia, pajumaitsimë tsane mapacueniaje:

«Diosomë, pataxamë, athëbëtatsia ne-ecaenë, pajitsipajë caenëmë daxitajiwi pecayaiyataejawa, daxitacuene matatoxenetsia.

¹⁰ »Pajitsipajë naxatsiayo pecopiapatsijawa daxita nijajiwi neyanacua-ewetsijawa mapanacuataje. Pajitsipajë daxitajiwi mapanacuataje nejitsipaecuenia pecato-exanabiabijawa, pacuenia baja athëbëtatsia nijajiwi nejitsipaecuenia cato-exanabiaba.

¹¹ »¡Ajena pamatacabi, pataxaejawanexa panerajure pacuenia panamatawenonajë!

¹² »¡Pacuenia paxanë pasiwajamatabëcuenecaewajë, pamonae pibisiacuene paneto-exana, bajarapijinia pacuenia paxanëjawaberena panesiwajamatabëcuenecaeware pata-exanaeneconi yabara!

¹³ »¡Pëtsa panecopatame patanejamatabëcuene-ëjëbijawa pibisiacuene patanejamatabëcuene-amoneyabinexa! ¡Biji rajane, panecapanepare dowathi patanejamatabëcuene-ëjëbisaëwecua, pibisiacuene pata-exanaeyaniwa! Bajarapacuenia pacawajëtatsi, tsipaji raja xamë nijajiwi neyanacua-ewetsinë tsaponaponae, daxitacuenesaë nexainaenënu daxitamatacabijawabelianexa. Bajaraxua yabara jiwi toxanepanatsi pecawënëxaniatabiabijawa daxitamatacabijawabelianexa. Bajara-itsi tsane», pajamë tsane mapacueniaje, itsa pawajëcame Diosojawabelia —jai Jesús pijajiwi jawabelia.

¹⁴ Icatsia, Jesús jumaitsi:

—¡Pasiwajamatabëcuenecaeware pamonae pibisiacuene papecato-exanaewi! ¡Pabarajamatabëcuene xanepanarenua! Nexata, pane-axa-ata, athëbëtatsia pe-ecaenë, pibisiacuene pane-exanaejawa

pacasiwajamatabëcueneceawiana. Pacabarajamatabëcueneceawiana-
nua. ¹⁵Itsiata, paxamë ita apopasiwajamatabëcueneceawimë tsipae itsamo-
nae pibisiacuene papecato-exanaejawa, ita apopabarajamatabëcueneceawiana-
panaemëna tsipae, nexata pane-axa-ata apopacasiwajamatabëcueneceawiana
tsane." Apopacabarajamatabëcueneceawiana tsane, pibisiacuene pane-
exanaejawa yabara —jai Jesús pijajiwijawabelia.

**Jesús pijajiwi yapëtaeya-exana pacuenia jinawanapaejitsia
Dioso pitabarata japasa pamatacabibejawa nato-itapeta**

¹⁶Icitsia, Jesús jumaitsi pijajiwijawabelia:

—¡Pamatacabibejawa panato-itapetame japasa° panejinawanapae-
nexa Dioso pitabarata, pëtsa pacuenejëpame Dioso bepíjajiwi itajara
penataewi! Bajarapamonae raja najamatabëxainaeja jinawanapabiaba,
na-itabaraquiatsinejewa, namatatiatsinejewanua, itsamonae peyapëtaene-
xatsi japasa pejinawanapaejawa. Jitsipabiaba pewënëcacuaicuaijainexatsi
penacueratsijawa Dioso pewënëta. Xaniajanë pacuenia pacatsipaejitsiatsi.
¡Pamonae pewënajiwi wënëcacuaicuaijaitsi, xaina baja Dioso perajutsija-
waminexatsiwecua! Nexata, apoxinae tsane athëbëtatsia papexaniacuene
rajutsiapaebatsi, japasa peponaponaejamatabëcuene Dioso pitabarata.
¹⁷¡Paxamë juya pamatacabibejawa japasa pajinawanapame Dioso pitarata,
pana-itabaraquiare! ¡Panamatatiarenu xaniawaetsia! ¹⁸¡Bajarapacuenia
pa-exanare, jiwi papecacuene yapëtaeyaniwa japasa panejinawanapaejawa!
Caenë, pane-axa, papecajawanë, yapëtaena. Nexata, bajaraPonë itsamata-
cabi pacarajutsiana pexaniacuenejawa panexainaejawanexa, japasa paneji-
nawanapaejamatabëcuene Dioso pitabarata —jai Jesús pijajiwijawabelia.

**Jesús yapëtaeya-exana pijajiwi xua be-exanawanapa,
itsamatacabi ayaijawa pexainaejawanexa athëbëtatsia**

*¡Pëtsa pasiwabëjamë, ayaijawa mapanacuapijawanë panenatocaetuatsinexa!
(Lc 12:33-34)*

¹⁹Icitsia, Jesús jumaitsi pijajiwijawabelia:

—¡Pëtsa pacaetuataponame ayaijawa panexainaejawanënexa mapan-
acuataje, tsipaji pacatobijianaejitsipa pe-ucubaxaewi! Pacatotasibijitsi-
patsinua. Pacatonacobetoxotsipanua penacobetoxotsiwi. ²⁰¡Biji rajane,

n 6:15 *apopacasiwajamatabëcueneceawiana tsane*: Taema Mt 18:21-35 **o 6:16** *japasa*: Jiwi canaë-
jëta cinco pajamatabëcuenebeje xua yabara jinawanapaejitsia pexaejawa xaenejewa, Dioso
pitabarata. **1)** Penajamatabëcuene-itajëtsinexa bitso beweliamatabëcuenewi penataejawa
Diosowecua. **2)** Penajamatabëcuene-itajëtsinexa penasiwabëjaijawa pibisiacuene pexanae-
jawa yabara; pijacuata pexanaejawa, ita jume, pijamonaewi pexanaejawa-ata yabara. **3)**
Penajamatabëcuene-itajëtsinexa pesiwabëjaijawa pijamonaewi petodomaebixaetsi, ita
jume, petocopiapatsixaetsi piyapëbejeliwaisi. **4)** Penajamatabëcuene-itajëtsinexa pesiwa-
najamatabëxainaejawa pewecuatëpaexaetsi penapitsijiwibeje, ita jume, pijamonaewi. **5)**
Pejamatabëcuene-enaexaetsi peyapëtaenexa Dioso yabara. Bajarapacuenianë yabara, jiwi japasa
jinawanapabiaba Dioso pitabarata. Itsajawata, ponapona saya pexaejawa xaenejewa. Itsajawata
pijinia, yajawawajëcabiaba Diosojawabelia. Nacujarubaponaponanua Dioso peliwaitsi, xania-
waetsia pesiwaanaëjëtsinexa xua exanaejitsia Dioso pejitsipacuene. Itsiata, itsamonae jama-
tabëcuenenawëxaniaba bajaraxua yabara. Canaëjëta pewajëcaecuenia Dioso perajutsinexatsi,
japasa ita wajëcabiaba bajaraPonëjawabelia.

panatoxaniawaetaponare pexaniacuenejawanë Dioso pijanacuatatsia, xaniawaetsia pejitsipaeacuenejawanë bajaraPonë paneto-exanawanapaexae! Bajarajotatsia, apopacatobijjanae tsane pe-ucubaxaewi. Apopacatotasibitsinua tsane. Penacobetoxotsiwi-ata apopacatonacobetoxotsi tsane. ²¹ Itsajota panatoxaniawaetame panexainaejawanexa, bajarajota pajamatabënajinawanapame panejamatabë-ëthëtota —jai Jesús pijajiwijawabelia.

*Waja-itaxuto raja belámparabë wajaperabëtonexa. Nexata,
wajajitsipaejawata siwabëjaitsi wajapitsinexa.
(Lc 11:34-36)*

²²⁻²³ Icatsia, Jesús jumaitsi pijajiwijawabelia:

—Lámparabë bo-ënëtuatuajëta itayoteca xaniawaetsia wajataenexa pitaquirijawata. Bajarapijinia itsi pane-itaxutobeje-ata paneperabëtonexa. Nexata, itsa pa-itaxutoxanepaname, xaniawaetsia panatsiwajënaetaneme. Itsa pa-itaxutobejemë tsipae, nexata xaniawaetsia apopatsiwajënaetaemë tsipae. Pacatsita-aitaquiri saya tsipae. Bajarapijinia itsi panejamatabëcuene-ata. Itsa Dioso pijacuene panajamatabëcuene-enaeyabame, nexata bepane-itaxutoxanepanaewi tsawanapae, tsipaji Dioso peliwaisita pacajamatabëcuene-itayota. Itsa pijinia ëmapanacuapijicuene panajamatabëcuene-enaeyabame, bepane-aitaxutobejewi tsawanapae, tsipaji mapanacuapijicuene pacajamatabëcuene-itaquiriaya-exana. Nexata, bitso bepanejamatabëcuene-aitaquiriwi tsawanapae —jai Jesús pijajiwijawabelia.

*Pacuenia jiwi to-acuenebitsi caecuenia anijatuxanenëbeje
petonacuenebijawa, yabara peliwaisi
(Lc 16:13)*

²⁴ Icatsia, Jesús jumaitsi pijajiwijawabelia:

— Jiwi acuenebi caecuenia anijatuxanenëbeje petonacuenebijawa. Caenëjawabelia, ponë jitsipa petonacuenebinexa, tonacuenebijitsipa. Ponëjawabelia apojitsipae petonacuenebijawa, apotonacuenebi tsipae. Bajarapijinia itsi pajiwi bitso jitsipa Dioso petonacuenebijawa. Acuenebi peyajawajitsipaejawala palatacuene. Nexata, apoxanepanae jiwi caecuenia anijajawabeje, penajua-asiwajawabeje, tsipaji xua matatoxenetsia bitso asiwa, bajaraxua yabara siwabëjai tsipae pexainaenexa —jai Jesús pijajiwijawabelia.

*Dioso xaniawaetsia eweta pijajiwi
(Lc 12:22-31)*

²⁵ Icatsia, Jesús jumaitsi pijajiwijawabelia:

—¡Nexata, panenajamatabëcuene-enaeyabiwixae Dioso pijacuene, pëtsa panasiwajamatabëcuenebëjamë panexaejawala, pane-apaejawala, panenaxatabijawanënexa-ata yabara, xaniawaetsia panejinawanapaenexa! Apojinawanapaetsi cajena bajara-ëxuanënexa. Biji rajane, jinawanapatsi Dioso pijacuene waja-exanawanapaenexa. ²⁶ ¡Pacanaëjère pacuenia Dioso eweta baratsuimonae, itaboxojawa pejinawanapaewi! Paxamë payapëtaneme bajarapamonae apo-ubi pexaejawanexa. Aponotsinua penaweretaponaewajawa, pe-etsinexa bota. Itsiata, Dioso, pane-axa, athëbëtatsia pe-ecaenë,

rajutabiaba pexaejawanexa. ¡Paxamē rabiji bitsoyo Dioso paca-asiwa baratsuimonae matatoxenetsia, papecarajutsinexa daxita xua panamatawenoname! ¡Bajaraxuata, pētsa bitso pasiwajamatabēcuenebējamē panenamatawenonaejawanē yabara! ²⁷ ¿Detsa jane ponē paxamēyajuwēnēnē cuenecaējēpatsi pijacujiruta caemetro-epatua matawējēa pena-apiaya-exanaenexa? Ajibi. Bitso jamatabēbējai-ata tsipae pena-apiaya-exanaenexa, itsiata apocuenecaējēpaetsi tsipae pijacujiruta.

²⁸ »Bajarapacuenia Dioso itsa eweta baratsuimonae, apopapecacuenecaējēpaejawa-ata panijacujiruta panena-apiaya-exanaejawa, ¿detsa xuajitsia bitso panasiwajamatabēcuenebējamē panenaxatabijawanē yabara? ¡Pacanaējēre pacuenia witsabapona wayafopijimatono! Bajarapamatono aponatsijumanacuenebi penaxatatsijawanexa. Aponatsijumajorocae-ata, itsiata bitso pexaniacuenia aitaē. ²⁹ Xaniajanē pacuenia pacatsi-paebijitsiatsi. Bajayata, peyanacua-ewetsinēmi, Salomón-pijinē, bitso naitabētsiaya naxatabiabi-ata pexaniawiriajanē, itsiata, bajarapone pena-itabētsijawawecua matatoxenetsia bitso mapamatonotoxi aitaē. ³⁰ Bajarapacuenia Dioso itsa itabēta wayafopijipona pematonojanēta, bepīia petsaquenaejawanēnexa-ata, xuanē xanepana isotonexa, ¿detsa xuajitsia panasiwajamatabēcuenebējamē panenaxatabijawanē yabara? BajaraPonē raja cuenecaējēpatsi matatoxenetsia pexaniacuenia papeca-ewetsijawa. Paxamē saya juwa beweliacuenia pa-itaxutuajamatejemamē Dioso papeca-ewetsijawanexa. ³¹ ¡Bajaraxuata, pētsa jamatabēbējaiya pajamatabējumaitsimē: «¿Detsaeta xua xaenatsi? ¿Detsaeta xua matawējēa apae-natsi? ¿Detsaeta xua naxatabianatsi?», pajamatabējamē pētsa! ³² Pamonaē, apojudiowi, Dioso apoheyapētaexae, bajarapacuenia bitso siwajamatabēcuenebējamē tsabiabi bajaraxuanē yabara. Itsiata baitsi jane, bajarapacuenia paxamē apobepa-exanaemē, tsipaji pane-axa, athēbētatsia pe-ecaenē, yapētane daxita bajaraxuanē panenamatawenonaejawa. Cuenecaējēpatsinua papecarajutsijawa. ³³ ¡Bajaraxuata, pajaire copiaya dexitacuenewecua Dioso pijacuene papecajamatabēcuenenamatacitorobijawa, pejitsipacuenia pa-exanawanapaenexa! Bajarapacuenia itsa pa-exanawanapaenename, nexata bajaraPonē pacarajutsiana daxita xua panamatawenoname. ³⁴ ¡Bajarapacuenia Dioso papecayawenonaexae, pētsa pasiwajamatabēcuenebējamē merawiapijicuene yabara! Caematacabi canacujitsia copiapatabiaba wajanacajamatabēcuenebējaiya-exanaejawanē. Nexata, aponamatawenonaetsi itsacuenejawa pematatsēnēa wajasiwajamatabēcuenebējaijawanexa. Bajaraxuata, ajena pitsijawata apobesiwajamatabēcuenebējaijatsi xua merawia pitsijawata nacatocopiapatsijitsia —jai Jesús pijajiwijawabelia, pe-enaewi petsutoyenepanata.

**Jesús pijajiwi muxujioba bepianeconijibiwi nataeya
pemuxujiobiyaniwa itsamonaejawabelia**

(Lc 6:37-38,41-42)

7 ¹ Icatsia, Jesús jumaitsi petsutoyenepanajawata pijajiwi
ayaibitsaētojanetowawabelia:

—¡Bepane-aneconijibiwi panenataexae, pētsa paneconitame itsa-
monae xaniawaetsia pacueneyapētaenejewamē, tsipaji paxamē-ata

bajarapitsineconi itsa paxainaejitsipame, Dioso juya pacananeconitsia-exanaejitsipa! ² Pacuenia itsamonae pijaneconi patocanaējētabiabame, bajarapijinia pacuenia paxamē-ata Dioso pacatocanaējētsiana panijaneconi. ³ ¡Pacanaējēre mapacueniaje! Pacuenia pacato-ayapēbeje panewē-itaxutojutsijawa tsiquirinaepērētoyo petsi-itaxutorucaejiwitsi, itsa paxamē pacatsi-itaxutoruca pinijinaepērēto, bajarapijinia pacuenia apopacato-xanepanae panetoxanebinexa itsajiwi pijaneconi, tsiquirineconiyo-ata, itsa caranata paxamē ayaineconi paxainame. ⁴ Paxamē ayaineconi pane-xainaewi apopacatoxanepanae panejumaitsijawa tsiquirineconi pexainaejiwiyojawabelia: «¡Papibisiacuene exaname, copare baja! Bajaraxua cajena abeje», panejaijawa. ⁵ ¡Biji rajane, copiaya pacopabare pibisiacuene pane-exanabiabijawa! Bajaraxuacujinae jane baja, pacatoxanepanaena paneacuene-itawetsijawa itsamonae pibisiacuene pexanaejawawecua —jai Jesús pijajiwijawabelia.

⁶ Icatsia, Jesús jumaitsi itsaliwaisi yabara pijajiwijawabelia:

—¡Pētsa patsipaebame bitso penamatamotsiliwaisi Dioso pijacuene yabara, pamona pexainaewi be-awirijamatabēcuene, bemarranojamatabē cuenewijawabelia- ata, Dioso pijacuene pitoyaxae! Paxamē baja cajena apoparajutsimē tsipae awirijawabelia xuanē Diosonexa patotsatsipame, panerajutsinexa asiwaya, yaityataeyanua. Bajarapijinia pacuenia apoparajutsimē tsipae marranojawabelia penamatamotsiperlabēxi, tsipaji apoyapētae bitso penamatamotsicuene. Caranata, saya taxunanonobijitsipa asiwaya apope-taexae. Pacuenia awiri, pija-epato pewitsabinē, pexaniapexaejawa rajutsi-atatsi tsipae, naca-itoya tsipae. Belia nacasinijitsipa. Bajarajamatabēcuene-itsi Dioso pijacuene pitoyawi. Bajaraxuata, patsipaebi-atamē tsipae bitso penamatamotsiliwaisi bajarapamonaejawabelia, belia pacabejiobia-exanaejitsipa —jai Jesús pijajiwijawabelia.

**Jesús cujaruba pijajiwi pacuenia itaxutuajamatejemaya
bewajētaƿona Diosojawabelia**

(Lc 11:9-13; 6:31)

⁷⁻⁸ Icatsia, Jesús jumaitsi pijajiwijawabelia:

—¡Pawajētaƿonare Diosojawabelia payabaracueranaenejewamē xua pajitsipame panecaxitajarabijawabelia! ¡Pacuenia pajaitsipame panecaxitajarabijawabelia papecatonaxuabijawa, pacuenia-ata baupa padocodocotsipame pacopabinejewamē papecatobaupatsijawabelia, bajarapijinia pacuenia asaēyata pawajētaƿonare Diosojawabelia, tsipaji pajiwi wajētabiaba, rajutababatsi! Pajiwi-ata jaitabiaba, caxitajarababiaba. Pajiwi-ata baupa docodocotabiaba, tobaupatabiabatsi.

⁹»¡Bajarapacuenia itaxutuajamatejemaya pawajēcaponare Diosojawabelia, tsipaji baja, pexicuenia pacatane! Paxamē papebijiwiwimē, panexi panexainaewi, panexēnatonēyo itsa pacawajēta panbē, apopanacoxirajutsimē tsipae iboto. ¹⁰ Itsa pacawajēta dujuainēyo, apopanacoxirajutsimē tsipae jomo.

¹¹ Paxamē pane-ajamatabēcuenebejewi-ata, payapētaneme panenacoxirajutsinexa pexaniajawa. Pane-axa, athēbētatsia pe-ecanē, bitso biji cajena pexaniajamatabēcuenenē paxamē matatoxenetsia. Nexata, bajaraPonē paca-rajutsiana pexaniacuene itsa pawajētame.

¹²»¡Xua pexaniacuene pajitsipame paxamë itsamonae papecato-exanaenexa, copiaya bajarapacuenae pato-exanare bajarapamonaejawabelia! Bajarapaliwaisiyo caejamatabëcuene xaina daxita paliwaisianë rubena Dioso penajumecopatsiliwaisi Moisés-pijinëta, Diosojumepaebiwimi, profetawi-ata, peyaquinaeliwaisianëta —jai Jesús pijajiwijawabelia.

Jesús tsipaeba pijajiwijawabelia anijanamutobeje, yabara peliwaisi

(Lc 13:24)

¹³⁻¹⁴Icatsia, Jesús jumaitsi pijajiwijawabelia:

—Jiwi pejonejawanexa Dioso peyanacua-ewetsijawabelia cuenejëpa pejonejawa tsiquiribaupayojawalia, peponaejawanua tsiquirinamutoyojawalia-ata. Biji rajane, papinijinamutoruca copiapatajopa pinijibaupajawalia, pepatsinexa apopewerewerecae-isotojawabelia. Jiwi ayaibitsaëtozanetonë bajaraxuayo jonepona, tsipaji jiwi pejitsipaecuenia exanawanapa. Pabaupa tsiquiribaupayo, tsiquirinamutoyonua, pata matakabi apopewerewere-caejawa pexainaewi pijanacuayabelia. Nexata, saya caejiwiyobeje bajaraxuayo jonepona, Dioso pejitsipaecuenia pejinawanapaewi —jai Jesús pijajiwijawabelia.

Jesús yapëtaeya-exana pijajiwijawabelia pecueneyapëtaenexa pamonaebepexanialiwaishi itajara pepaebiwi

(Lc 6:43-44)

¹⁵Icatsia, Jesús jumaitsi pijajiwijawabelia:

—¡Xania! ¡Panayajiwitaema, pamonaebepexaniajailiwaishi itajara pepae-biwi! Bajarapamonae saya yamaxë-itojorobiaya patsiana paxamëtuatuajëta beDiosojumepaebiwicuenia. Itsiata baitsi jane, bajarapamonae jamatabë-cuenejëpa pianaepanaelobomonae.^p Nexata, pacuenia lobomonae bajaramatabëwerebiaba ovejamonae, bajarajamatabëcuene-itsi bajarapamonae, panejumexaniataeliwaisimi Cristo peliwaisi papecacopabia-exanaenexa.¹⁶ Waxaitsi rabaja yapëtanetsi pamonaebepexaniajailiwaishi itajara pepae-biwi wajacuenetaejawata pexanaecuenae. Pacuenia pe-ejuwinaeta aponacuaitsi uvaru, jomowaënaeta-ata aponacuaitsi higocuai, bajarapijinina pacuenia bajarapamonae apocapitsapabiabi Dioso pejitsipaecuenae pexanaejawata. Biji rajane, exanabiaba pacuenia najamatabëxaina pejamatabë-ëthëtowetsina.¹⁷ Nexata, ponae pexaniawiriana, pexaniacuai capitsapabiaba. Ponae pijinia pibisiawiriana, ëpibisiacuai capitsapabiaba. Bajarapijinina pacuenia, cuene-itsi^q pamonaebepexanialiwaishi itajara pepaebiwi. Pibisiagamatabëcuene pexinaexae, penajumetsënëtsiliwaisianë capitsapabiaba.¹⁸ Pexaniawiriana aponacuaitsi pibisiacuai. Pibisiawiriana

p 7:15 *pianaepanaelobomonae*: Lobomonae jëpa benamo, itsiata pecunuanëanë, bitso pianae-panaenëanënuu. Bajarapamonae apocuenejëpae newëthëmonae, tsipaji jinawanapa pepobit-saëto pexaenënexa pejaitsijawata. Taema «lobo» glosariojawata. **q 7:17** *cuene-itsi*: Pacuenia pexaniawiriana capitsapabiaba pexaniacuai, wajaxaenexa, bajarapijinina pacuenia pexaniajailiwaishi pepaebiwi cuaicuajai tsabiabi pexanialiwaisianë wajanacajamatabëcueneexanepanaeya-exanaeliwaisianë. Pacuenia pibisiawiriana capitsapabiaba pibisiacuai, apowajaxaecuai, bajarapijinina pacuenia bepexaniajailiwaishi itajara pepaebiwi cuaicuajai tsabiabi pibisialiwaisianë wajanacajamatabëcuenebijianaeliwaisianënexa Diosowecua.

pijinia aponacuai pexaniacuai. ¹⁹Bajaraxuata, daxita ponaenë capitsapa pibisiacuai, bajaraponaenëmi nicatatsi. Nexata, tajuitatsi isotota. Bajara-pijinia pacuenia, Dioso exanaena bajarapamonaewawabelia, penajumet-sënëtsiliwaisianë pepaebabiabixae. ²⁰Nexata, pacuenia payapëtaneme naejawanë penacuai tsicuene, bajarapijinia pacuenia pacueneyapëtaename pamona bepexanaliwaisi itajara pepaebiwi, xua exanawanapa —jai Jesús pijajiwawabelia.

**Daxitajiwi apojone tsane Dioso, athëbëtsatia pe-ecaenë,
peyanacua-ewetsijawabetsia**

(Lc 13:25-27)

²¹Icatsia, Jesús jumaitsi pijajiwawabelia:

—Daxita pamona yayiataeya tanejumaitsiwi: «Tajatuxanenë, Tajatuxanenë», tanejaiwi-ata, itsiata daxita bajarapamona apojone tsane taxa Dioso, athëbëtsatia pe-ecaenë, peyanacua-ewetsijawabetsia. Jonena saya ëpamona exanawanapa taxa Dioso pejitsipacuene. ²²Pamatacabi copia-patsiana pijaneconi pexainaewi Dioso penaneconitsia-exanaematacabinexa, jiwi ayabitsaëtoxanetonë betaneyaiyataewicuenia nejumaitsi tsane: «Patajatuxanenë, Patajatuxanenë, xamë baja cajena newënëta pawajunupaebanajetarubenajë jiwawabelia Dioso pejumeliwaisi. Newënëtanua dowathi jiwawecua pacapitsapaponajë. Dioso pesaëta pinijicuenejawanë patsita-exanaponajënu», nejai tsane bajarapamona. ²³Itsiata baitsi jane, xanë jumaitsinë tsane bajarapamonaewawabelia: «¡Apopacayapëtaetsi cajena paxamë! ¡Panewecuaponare pibisiacuene pane-exanabiabiwi!», janë tsane bajarapamonaewawabelia —jai Jesús pijajiwawabelia.

**Jesús tsipaeba jiwawabelia pecuenecataeliwaisi, anijanëbeje,
bo penacuenebinëbeje, peliwaaisicuenia**

(Mc 1:22; Lc 6:47-49)

²⁴Icatsia, Jesús jumaitsi pijajiwawabelia:

—Pajiwi jumetane tatsipaebiliwaisi, exanaenanua tajumaitsicuenia, bajarapijiwi aponacueratsi tsane. Cuenejëpaena ponë xaniwaetsia pecanaëjëtsinë, pijabo ibojumata pe-exanetsinexa.^r ²⁵Nexata, pijabo apotoxuabitsi tsane ayai-emaxaneto jopae-ata, menianë awajubua tsaponae-ata, ira bubutsi-ata, ayaijowiboxaneto bubujai-ata. Tsiteca tonacopatanucaenatsi, pijabo pexanetsixae ibojumata. ²⁶Itsiata baitsi jane, pajiwi jumetae-ata tatsipaebiliwaisi, itsa apo-exanaenua tsane tajumaitsicuenia, bajarapijiwi nacueratsiana. Cuenejëpaena saya ponë bijiaata pecanaëjëtsinë, pijabo pexanetsinexa tajetabota. ²⁷Nexata, pijabo peweretetsicujinae, itsa jopa ayai-emaxaneto, menianë awajubua tsipae. Ira-ata bubutsipa. Ayaijowiboxaneto pijabojawaberena bubujai tsipaenua. Nexata, pijabomi toxuabijitsipayatsi. Pepacuene baja nexata, bo to-abejetsi tsipae. Bajaraxuata, panenacueratsiyaniwa bepa-exanawanapame patacajumaitsicuenia —jai Jesús mapacueniaje pijajiwawabelia.

^r 7:24 *ibojumata*: Jesús cuenecataeya cacuaicuaijai bo pexanaejawa ibojumata. (Mt 16:18; Rom. 9:33; 1Co 10:4; 1Pd 2:8). Bajarapacuenia itsa jumaitsi, apoyabarajumaitsi naesituruto pemëthët-sijawanexa ibojumata.

²⁸⁻²⁹ Itsa baja Jesús najumewereta petsutoyenepanajawata bajarapa-liwaisi petsipaebijawa, pejumetaewitsi bitso jamatabëcuenenabenajaca pecujarubicuenetsi yabara, tsipaji Jesús liwaisi tsipaeba pinijijamatabë-cuene pexainaenëcuenia. Apotsipaebi saya pacuenia judíowi pecujarubiwi exanabiaba.

Jesús jamatejemaya-exana bajayajebi bitso peperabëtsabanaenë

(Mc 1:40-45; Lc 5:12-16)

8 ¹ Itsa baja Jesús runaica petsutojumawetsica, jiwi ayaibitsaëtozaneto pënaponatsi. ² Nexata, jemata bajarapitsijawata, imoxoyotatsi leprado-mae⁴ pexainaenë. Jesús pitabarata yaiyataeya pematabacabëta nucajunua. Bajaraponë jumaitsi:

—Petuxanenë, yapëtaniji raja pecacuenecaëjëpaejawa tanejamatejemaya-exanaenexamë. ¿Apojitsipaemë meta tanejamatejemaya-exanaenexamë? — jai bitso peperabëtsabanaenë.

³ Nexata, Dioso penajumecopatsiliwaisi Moisés-pijinëta itawetsi-atatsi bajarapacuenia pexanaeyaniwa, itsiata Jesús nacobeyolia bitso peperabëtsabanaenë peperabëjayatsinexa. Jumaitsi bajaraponëjawabelia:

—Jajä, jitsipajë cajena. Jamatejemamë rabaja —jai Jesús.

Bajarapacuenia Jesús pejumaitsiyawata, peperabëtsabanaenëmi Caecue-nia baja daxitanë perabëxanepanareca.

⁴ Nexata, icatsia Jesús jumaitsi bajaraponëjawabelia:

—¡Naitajëtsiaremeliaa! ¡Pëtsa tsipaebame itsajiwijawabelia-ata tacajamatejemaya-exanaejawa! ¡Na-itajëtsiaremelia jane saya sacerdotenë, templobojawata penacuenebinëjawabelia, pecawajunupaebinxax⁴ nejamate-jemajawa yabara! Bajaraxuacujinae, capatsianame dajubiyo sacerdotenëja-wabelia pecatotajuitsinexa Diosojawabelia. Bajarapacuenia bajayata waja-salinainëmi Moisés-pijinë naca-itoroba waja-exanaenexa wajanaitajëtsinexa wajanacawecua-ajibia-exanaejawa wajaperabëtsabanaejawami. Nexata, jiwi yapëtaena pepacune baja pecawecua-ajibijawa⁴ neperabëtsabanaejawami —jai Jesús bajaraponëjawabelia.

Jesús pejumeta tojamatejemaya-exana wajabitsaë pijacapitännë pijabota petonacuenebaponaponaenëtsi

(Lc 7:1-10)

⁵ Itsa baja Jesús patajopa penawiatsinërena Capernaüm tomaraberena, bajarapatomarapijinë, Romano nacuapijiwajabitsaëwi pijacapitán, imoxoyo-renatsi pewajëtsinexatsi. ⁶ Nexata wajabitsaëwi pijacapitán bitso ayaicuenia wajëta Jesús-jawabelia. Jumaitsi:

s 8:2 leprado-mae pexainaenë: Dioso itaweta picani peperabëtsabanaenë pimoxoyotsijawa itsa-jiwi, peyajawanacopatsiyaniwa bepenaxuirabijiwi Dioso pitabarata. Taema Lev. 13:44-46; Núm. 5:2-3. Bajaraperabëtsabanaecuenia, bajayatami judíowi wënëruba «lepra». Itsiata, aponayapëtae pepacune pawitanecuenia yabara jumaitsi, tsipaji canacueneba bajarapajume peyabaracuaicuaijainexa, daxitawiria peperabëtsabanaecuenia, peserubicuenetsi, teque-recuene, pepalepracuene-ata. **t 8:4 pecawajunupaebinxax:** Taema Lev. 13:2-46; 14:2-32. **u 8:4 pecawecua-ajibijawa:** Daxita bajarapacuenia pexanaecujinae, matapania toxanepanatsi peperabëtsanaenëmi peponaponaejawa tomarata, pijatomarapijiwituatujëta-ata.

—Petuxanenë, tajajiwitonë raja tajabota camata boboca. Bitso cuenabatsi. Pinijicuenia nawixaetaeyabiaba —jai.

⁷Nexata Jesús jumaitsi bajarapacapitán-jawabelia:

—Xanë ponaenajë nijaboyabelia, tacatojamatejemaya-exanaenexa nijajiwitonë —jai Jesús.

⁸Nexata, capitán jumaitsi Jesús-jawabelia:

—Petuxanenë, xanë raja bitso beweliamatabëcuenenënë xamëwecua. Apoxanepanae tsipae nejonejawa tajaboyabelia. ¡Nexata, saya maweliaje ënijume itorobare, tajajiwitonë tanetojamatejemaya-exanaenexamë! ⁹Xanë-ata xainajë tane-itorobabiabiwi, tane-itorobicuenia tajumecowënëtabiabinexa. Xanë-ata juya xainajë tajajiwiji wajabitsaëwi, ta-itorobicuenia taneto-exanabiabinexa. Nexata, caenë peponaenexa itsa itorobajë, ponabiaba. Itsa junarenajë itsanë pepatsinexa xanëjawaberena, patabiabarena. Itsa itorobajë tajajiwitonë taneto-exanaenexa itsacuenejawayo, neto-exanabiaba. Bajarapijinia pacuenia, xamë-ata nexanaenexa cacaëjëpa. ¡Nexata, saya, maweliaje ënijume itorobare tajajiwitonë tanetojamatejemaya-exanaenexamë! —jai capitán Jesús-jawabelia.

¹⁰Jesús itsa jumetane bajarapacuenia capitán pejumaitsiyawatsi, jamatabëcuenenabenajaca. Nexata jumaitsi pepënaponaewitsijawabelia:

—Xaniajanë pacuenia pacatsipaebijitsiatsi. Israel nacuapijiwituatujëta, caeto-ata apocaxitarabaxuabinë xanëjawaberena tanesiwanajamatabëcuenecopatsinë pacuenia exana mapacapitán-nëje. ¹¹Nexata, pacatsipaebatsi paneyapëtaenexa. Apojudiowi-ata raja, ayaibitsaëtoxonetonë daxitanacuanëpijiwi, patsiana Dioso, athëbëtatsia pe-ecanë, peyanacua-ewetsijawata pamonaë xanëjawaberena tanesiwanajamatabëcuenecopabiwi pacuenia mapacapitán-nëje. Nexata, bajarapamonaë najonena pena-enaenexa panijasalinaiwimi Abraham-pijinë, Isaac-pijinë, Jacob-pijinë-ata, bepemomoxicuenia yajawa pexaenexa. ¹²Itsia bailsi jane, judiowi, pamonaë picani toxaniawaetatsi bajarapanacuata Dioso peyajawajinawanapaenexatsi, bajarapamonaë caranata aponajone tsane Dioso peyanacua-ewetsinacuajawata, xanëjawaberena apotanesiwanajamatabëcuenecopabixae. Biji rajane, xubianatsi Dioso pijanacuawecua, pepopitaquirinacuajawabelia. Bajarapanacuata jiwi nuena. Nawonosiniananua,^v bitso penawixaetaexae —jai Jesús mapacueniaje pepënaponaewitsijawabelia.

¹³Nexata, icatsia Jesús jumaitsi capitán-jawabelia:

—¡Ponare baja nijaboyabelia! Cato-exanatsi rabaja pacuenia nejumaitsimë xanëjawaberena tanesiwanajamatabëcuenecopatsixaemë —jai.

Nexata, bajarapaepatota capitán pijabotalia pijajiwitonë baja tojamatejematsi.

Jesús tojamatejemaya-exana Pedro pame

(Mc 1:29-31; Lc 4:38-39)

¹⁴Capitannë penawitsicujinae, Jesús jane baja pona Pedro pijaboyabelia, Capernaúm tomarabelia. Bajaraponë pepatsijawata Pedro pijabota, taeyabuata Pedro pijawa pena peromaebanucaejawatsi camata. ¹⁵Nexata, Jesús bajarapowa

pecobejayatsijawata peromaebanucaewatsi, domae baja wecua-ajibitsi. Nexata baja, jamatejema. Jesús-bana pexaejawa bajarapowa to-exanatsi.

Jesús jamatejemaya-exana ayaibitsaëto jiwi, piawitanewi

(Mc 1:32-34; Lc 4:40-41)

¹⁶Itsa baja ajena merawitsia, judíowi penacuera-ewetsimatacabi pecopiaru-caejawa,^w Jesús-jawaberena tocapatatsi Pedro pijabota, ayaibitsaëto dowathi peyajawajinawanapaewi. Jesús cae-itawetsita dowathi wecuacapitsapa bajarapamonae. Jamatejemaya-exananua daxita piawitanewi. ¹⁷Bajarapacuenia Jesús itsa exana, copiapata jane baja xua bajayata Diosojumepaebinē, profeta Isaías-pijinē, tajēwelía wajunupaeba Mesías yabara, mapacueniaje: «Bajara-Ponē nacawecua-ajibia-exanaena waja-awitanejawanēmi»,^x jai bajayata tajēwelía profeta Isaías-pijinē Mesías yabara.

Papiayapēbejecuene xainaena, pamonaē jamatabēpēnapona Jesús

(Lc 9:57-62)

¹⁸Nexata Jesús pecueranaexae, itsa tane jiwi ayaibitsaëto pematatoyonaejawatsi, junata pijajiwi pepēnaxuabinexatsi pucaxaneto^y itsapanabelia. ¹⁹Nexata, panabojawabelia penajetarucawata, judíowi pecujarubinē Jesús imoxoyorenatsi. Bajaraponē jumaitsi Jesús-jawabelia:

—Petuxanenē, itsabelia poname, capēnaponaenatsi cajena —jai.

²⁰Nexata Jesús jumaitsi bajaraponējawabelia:

—Itsa nepēnaponaejitsipame, aponapatabiabimē tsipae tajabota nenacuera-ewetabiabinexa, tsipaji tajabo apoxainaenē. Namo pijamēthēanē xaina pepatabiabinexa, itsajota majitabiabijitsia. Baratsui-ata xaina pematapenanē. Itsiata baitsi jane, xanē, Daxitajiwi Pematapijinēnē, itsajawabelia-ata apoxainaenē itsajota nacuera-ewetabiabijitsianē —jai Jesús judíowi pecujarubinējawabelia.

²¹Nexata, itsanē, Jesús pijajiwiyajuwēnēnē, jumaitsi Jesús-jawabelia:

—¡Tajatuxanenē, cae-epatoyo abaxē necopare taponaponaenexa taxajawata, itsa tēpa tamēthētsinexa! —jai.

²²Nexata, Jesús jumaitsi bajaraponējawabelia:

—¡Naxatsia! ¡Nepēnaponare! ¡Tocopare saya pamonaē pejamatabēcuene-tēpawanapaewi Dioso pitabarata,^z pemēthēcanexa petēpaewi! —jai Jesús pijajiwiwonējawabelia.

Jesús pejumeta itaweta piayaijowiboxanetomi, malataca yajawa

(Mc 4:35-41; Lc 8:22-25)

²³Jesús, pijajiwi yajawa, pebarēpatsicujinae jera panabojawata, barē-runareca jera-ēnēabereca. Nexata, yanajetarubena pucajawa. ²⁴Jemata

w 8:16 *pecopiarucawata*: Taema Mc 1:29-32. Judíowi itawetatsi penacuenebijawa itsacuenejawa penacuera-ewetsimatacabita, sábadomatacabi. Bajaraxuata, eweta bajarapamatacabi pecopiarucawata, pecapatsinexa piawitanewi Jesús-jawabelia. **x 8:17** Taema Isa. 53:4. **y 8:18** *pucaxaneto*: Bajarapapuca pewēnē Galilea puca. **z 8:22** *pejamatabēcuene-tēpawanapaewi Dioso pitabarata*: Pamonaē apopesiwanajamatabēcuene-copabiwi Jesucristojawabelia, bajarapamonae pejamatabēcuene-tēpawanapaewi Dioso pitabarata. Matapania itsa siwanajamatabēcuene-copaba Jesucristojawabelia, jamatabēcuene-aitawa Dioso pitabarata. Nexata, xainaena matacabi apopewerewerecaejawa. Jn 3:16-18; 1Co 15:22; Efe. 2:1; Col. 2:13.

pinijijowiboxaneto najetaruca. Ayai bitso malatacaxanetonë. Belia, bajarapamalataca jera-ënëaberena mera epabajarabapona. Itsiata, Jesús bitso pecueranaexae, jamatejema majitanuca. ²⁵Nexata, Jesús pijajiwi ya-itawabatsi pemajitanucaenë. Jumaitsi:

—¡Patajatuxanenë, panecapanepare! ¡Waxaitsimi rabaja ya-othopaenatsi! —jai Jesús pijajiwi.

²⁶Nexata, Jesús jumaitsi pijajiwi jawabelia:

—¿Detsa xuajitsia bitso pajunawame? ¿Pacuene-aebame tsaja Dioso papeca-ewetsijawa? —jai bajaraPonë.

Nexata Jesús namatacotapuna. Pinijijumeta itawetaxuaba jowibo, malataca yajawa. Daxita puca wainae-ecaxuaba. ²⁷Jesús pijajiwi itsa tane bajarapacuene, jamatabëcuenenabenajaca. Nexata, bajarapamonae najumaitsi: «¿Demeta tsipaji maponëje? ¡Pitawetsijawata jowibo, malataca yajawa, jumecowënëtätsi! ¡Nexata baja, ajibi tsaxuabi caecuenia piyaijowiboxanetomi, malataca yajawa!», najai Jesús pijajiwi.

Jesús wecuacapsipa dowathiwi peyajawaponaponaenëbeje,

Gadara tomarapijinëbeje

(Mc 5:1-20; Lc 8:26-39)

²⁸Jesús, pijajiwi yajawa, itsa barëpata pucaxaneto itsapanabelia, Gerasa nacuayabelia, Gadara tomarapijinëmibeje, dowathiwi peyajawaponaponaenëbeje, pitsaparenabeje petëpaewi pemëthëanëjawawerena. Bajaraponëbeje Jesús mata-enenarenatsibeje. Imoxoyorenatsibeje Jesús, dowathiwi peyajawaponaponaenëbeje. Bitso pianaepanaenëbeje. Nexata, itsajiwi-ata apoponabiabi bajaraxuayo perucaenamutojawa. ²⁹Nexata, dowathiwi peyajawaponaponaenëbeje wawajibeje:

—Jesús, Dioso pexënatomë, ¿detsa xua namatawenoname paxanëjawaberena? ¿Patame tsaja patanenaneconitsia-exanaenexamë, Dioso patanenaneconitsia-exanaematacabiwajënaeya? —jai Jesús-jawabelia, padowathiwi yajawaponaponaabeje.

³⁰Nexata, bajarajota imoxoyo petsutojawata, marranobitsaëtoxaneto xae-wanapa. ³¹Nexata, bajaraponëbeje peyajawaponaponaedowathiwi bitso wajëca Jesús-jawabelia. Jumaitsi:

—¡Itsa panecapitsapaejitsiamë maponëbejewecuaje, panetocopare patajonenexa mapamarranobitsaëtoxanetowawabelia! —jai dowathiwi.

³²Nexata, Jesús jumaitsi dowathiwi jawabelia:

—¡Paponare baja, panejonenexa bajarapamarranobitsaëtoxanetowawabelia! —jai.

Nexata, bajaraponëbeje dowathiwi wecuapitsapatsibeje, pejonenexa marranobitsaëtoxanetowawabelia. Pejonecujinae, nexata jane baja, daxita bajarapamarranobitsaëtoxanetomi kujinaeyeca. Pucaxaneto itapajanituareca othopareca. Daxita baja bubuna bajarapapucawata.

³³Bajarapamarranobitsaëtomí pewetawanapaewi, rëcëpeca. Itsa bajarapamonae Gadara tomarabelia pata, tsipaeba daxita pacuenia tane. Tsipaebanua pacuenia Jesús wecuacapsipa dowathiwi peyajawaponaponaenëbeje. ³⁴Nexata, daxita bajarapatomarapijiwi ponarena Jesús-jawaberena. Bajarapamonae itsa tane Jesús, ayaicuene wajëcatsi peponaenexa pijanacuawecua, pecujunawixaetsi.

Jesús jamatejemaya-exana petabusipacuenabinëtsi

(Mc 2:1-12; Lc 5:17-26)

9 ¹ Gadara tomarapijiwi pecapitsapaecujinaetsi, Jesús, pijajiwi yajawa, icatsia barërunareca jera-ënëabereca. Nicabilia puca itsapanabelia. Caewëarena pata icatsia pijatomaraberena. ^a ² Bajarajota, itsamonae Jesús tocapatatsi petabusipacuenabinëtsi, pacamayota bocabiaba, yawëtarapata-tatsi. Jesús jamatabëcueneyapëtane pacuenia siwanajamatabëcuenecopata-tatsi bajarapamonae, petojamatejemaya-exanaenexatsi. Bajaraxuata, petabusipacuenebinëtsijawabelia Jesús jumaitsi mapacueniaje:

—¡Tajabananë, jamatabëcuenebarëyamëre! Pibisiacuene rabaja nexanae-neconimi Diosojawabelia cawecua-ajibia-exanatsi —jai.

³ Nexata, itsamonae judíowi pecujarubiwi, bajarajota pena-enaewi, itsa jumetaeyena bajarapacuenia Jesús pejumaitsijawa, jamatabëcuene-itsi tsenae: «Maponëje Jesús, Dioso apopejitsipaecuenia cuaicuajiai, tsipaji beDiosonë natane, bajarapacuenia pejumaitsixae», jamatabëjai tsenae Jesús yabara.

⁴ Jesús jamatabëcueneyapëtane judíowi pecujarubiwi bajarapacuenia pesiwanajamatabëxainaejawatsi. Nexata, jumaitsi bajarapamonaejawabelia:

—¿Detsa xuajitsia panesiwanajamatabëxainame pibisiacuena? ⁵ Paxamënexa, ¿detsa xua pacatsitayapëxanepana jiwi pejumaitsinexa, xaniajaiya penacujumataenexa mapatabusipacuenabinëtsijawabelia: «Cawecua-ajibia-exanatsi rabaja pibisiacuene nexanae-neconimi», pejajawa. Itsa jume, «¡Nonotapunare! ¡Ponare baja!», pejajawa? ¡Jume cajena! Dioso apotocopat-sitsi bajarapacuenia pexanaejawanexa. ⁶ Itsiata baitsi jane, paxamë paneyapëtaenexa Dioso tanetocopatsijawa, Xanë, Daxitajiwi Pematapijinënë, mapanacuataje tawecua-ajibia-exanaenexa itsajiji pibisiacuene pexanae-neconimi, Dioso pesaëta jamatejemaya-exanaenajë mapapetabusipacuenabinëtsijawabeliaje —jai Jesús judíowi pecujarubiwiawabelia.

Nexata, Jesús jumaitsi petabusipacuenabinëtsijawabelia:

—¡Nonotapunare baja! ¡Nijacamayo pire! ¡Nijaboyabelia baja ponare! —jai Jesús.

⁷ Nexata, bajarapacuenia Jesús pejumaitsijawata, petabusipacuenabinë-mitsi nonotapuna. Pijaboyabelia baja pona. ⁸ Nexata, jiwi itsa tane bajara-pacuene, bitso cajena jamatabëcuenenabenajaca. Wënëxaniatsiaya jumaitsi Diosojawabelia: «Diosomë, bitso ayaijamatabëcuenenëmë, tsipaji jiwi caëjëpaeya-exaname pinijicuene pexanaenexa», jai bajarapamonae, Jesús pecuetaejawata.

Mateo yapëtaeya-exana pacuenia Jesús junatatsi pijajiwitonënexa

(Mc 2:13-17; Lc 5:27-32)

⁹ Jesús baja wecuapona itsajota jamatejemaya-exana petabusipacuenabinëtsi. Nexata penajetarucaejawata, taeyeta Mateo, ^b pe-ecaenë itsajota

a 9:1 *pijatomaraberena*: Bajarapatomara Capernaúm tomara. Taema Mc 2:1. **b 9:9** *taeyeta Mateo*: Beweliagamatabëcuene penataenëxae, Mateo, ponë yaquina mapaMateobaxutoje, nayabaracuajicuijai be-itsanë peyaquinaecuenia. Jiwi pejumaitsicuenia pitsapaejitsipa mapacueniaje: «Nexata penajetarucaejawata, Jesús netaeyeta xanë, Mateonë, ta-ecaenë itsajota yanijobabiabajë gobierno pejamatabëcueneta impuestomatamo», pejaicuenia.

matamoyanijobabiaba impuestojamatabëcuene. Nexata, Jesús jumaitsi Mateojawabelia:

—¡Mateo, nepënaponare! —jai.

Jejai Mateo. Nexata nonotapuna. Napona baja Jesús pepëta.

¹⁰ Bajarapacaniwiyo, Mateo junata Jesús, pijajiwi yajawa, pebarëxenexa pijabota. Nexata, pexaeyenaejawata Mateo, Jesús-bana, bajarapaepatota napata ayaibitsaëto jiwijawabelia impuestojamatabëcuene pematamoyanijobabiabiwi, itsamonae piawënëliwaisibejewi-ata. Nexata, pamesata Jesús, pijajiwi yajawa, eca, bajarapamonae na-ena. ¹¹ Nexata, fariseowi itsa tane bajarapacuenae, jamatabëcuenenawëxaniabiaya jumaitsi Jesús pijajiwiawabelia:

—Dioso pitabarata apoxanepanae cajena papecacujarubinë peyajawaxaeyecaejawa impuestojamatabëcuene pematamoyanijobabiabiwiawata, piawënëliwaisibejewijawatanua —jai fariseowi Jesús pijajiwiawabelia.

¹² Nexata, Jesús jumetaeyeca bajarapacuenia fariseowi pejumaitsijawa. Nexata jumaitsi bajarapamonaejawabelia:

—Pejamatejemawi raja aponamatawenonae pewaëbinë pewaëbinexatsi. Biji rajane, piawitanewi jaita pewaëbinënexatsi. Bjarapijinia pacuenia, xanë-ata itsinë. Siwapatajopajë tayawenonaenexa pamonae natoyapëtane pibisijamatabëcuene pexinaejawa, tacapanepaenexa Diosojawabelia.

¹³ Paneyapëtaenexa pexaniacuene ta-exanaejawa, paponare panelebinexa Dioso pejumeliwaisibaxuto, itsajota Dioso jumaitsi: «Bitso jitsipajë pane-itaxutotsoniatæjawa itsamonae, dajubi patanetotajuitsijawamëwecua altar-jumata»,^c Dioso pejajawa! Xaniawaetsia itsa pacanaëjëtsianame bajarapaliwaisi, nexata payapëtaenae pacuenia xanë aposiwapatajopænë tajunatsinexa pamonae pexaniacuene pexanawanapaewi. Biji rajane, siwapatajopajë tajunatsinexa pijaneconi pexinaewi, pecopabinexa pibisiacuene pexanaejawa, penajamatabëcuenepënëyorotsinexa Diosojawabelia —jai Jesús fariseowijawabelia.

Jesús yanijobatsi xua yabara pijajiwi japasa

apojinawanapae Dioso pitabarata

(Mc 2:18-22; Lc 5:33-39)

¹⁴ Itsamatacabi, Juan, jiwibautizabinë, pijajiwi imoxoyorena Jesús, peyanijobinexa mapacueniaje. Jumaitsi:

—Petuxanenë, paxanë, fariseowi-ata pataxaejawa apopaxaeyabiabinë pamatacabibeje pawajëtaPONAJë Diosojawabelia, patanajamatabëcuene-itajëtsinexa caejamatabëcuene pataxainaejawa Diosojawabelia. ¿Detsa xua-jitsia xamë nijajiwi bajarapacuenia apo-exanawanapae? —jai Juan pijajiwi Jesús-jawabelia.

¹⁵ Nexata, Jesús jumaitsi bajarapamonaejawabelia:

—Pamonae junatatsi penacojiobifiestajawabelia penaxaenexa, bajarapamonae japasa ba-apo-enaë bepenajamatabëxainaewi, itsa abaxë yajawa-ecatsi pejananacojiobinë, tsipaji barëyaya najuxaeyena. Bjarapijinia pacuenia itsi tajajiwi-ata. Tayajawaponaponae-epato abaxë acuenebi xaenejewa

pejinawanapaejawa, taneyajawabarëyaxae. Itsiata baitsi jane, pamatacabi xanë necaponaena bajarapamonaewecua, nexata jane baja, bajarapamatacabi bitso tanesiwanajamatabëxainaexae, japasa jinawanapaena.

¹⁶»Orijiibia, Juan pijajiwi perujujamatabëcuene baja penawecuaacopabinexa,^d juya pejumexaniataenexa ëpejanaliwaisi,^e Jesús tsipaeaba pecuene-cataeliwaisi mapacueniaje: Itsajiwi-ata raja apocatsatarutsi pejanapana perujunaxatatsi-esetojawabelia, tsipaji bajarapacuenia itsa exanaejitsipa, pejanapana yanarobotsipa peruju-esetojawawerena. Nexata biji, bitso pinijiwojoto titinaejitsipa. ¹⁷Itsajiwi-ata pijinia apo-epacae pejanavinoranë^f perujubocodorianëjawabelia, bajayajebi peyajebinexa, tsipaji pejanavinoranë pejumalitsëxë pexainaexae, yatititibia tsipae, piatanevinora penaexanaejawata. Nexata, pejanavinora pejumalitsëxë pexainaexae, perujubocodorianë yatititibia tsipae apopeyanayeretsixae. Yajawanaxuabijitsipa vinoranëmi, perujubocodoro-ata. Bajaraxuata, be-epaca pejanavinoranë pejanabocodorianëjawabelia, bajayajebi peya-ajamatabësaënexa. Bajarapijinia pacuenia, pejanaliwaisi, apobepayajawajumexaniataemë panijaperujujumecowënetsicuene. Bajarapacuenia itsa pa-exanaejitsipame, pacatobijianaena^g pejanaliwaisi panejumexaniataejawa, —jai Jesús Juan pijajiwi jawabelia.

**Jesús jamatejemaya-exana piawitanewi, pamonae
siwanajamatabëcuene copabatsi peyawenonaenexatsi**

(Mc 5:21-43; Lc 8:40-56)

¹⁸ Jesús liwaisi petsipaebanucaejawata Juan pijajiwi jawabelia, bajarapaepatota sinagogabo^h pewetsinë parenna Jesús-jawaberena. Nexata, bajaraponë Jesús pitabarata yayiataeya pematabacabëta nucajunua. Jumaitsi Jesús-jawabelia:

—Taxënatowayo rabaja aeconoxae netotëpa. Itsiata baitsi jane, itsa ponae-name tajaboyabelia, tanetoperabëjayatsinexamë necobeta, icatsia neto-asae tsane —jai bajaraponë.

¹⁹ Nexata, Jesús nonotapuna. Bajaraponë pepëta naponna, pijajiwi yajawa.

²⁰ Namutua penajetarucaejawata, pepënëwerena imoxoyotatsi petiriwa, piawitanewa. Bajarapowa janabaponaponatsi,ⁱ doce pawaijebecuenia

d 9:16 *perujujamatabëcuene baja penawecuaacopabinexa:* Judíowi canaëjëtabiaba caeja-matabëcuene pexainaejawa Diosojawabelia pexaejawa piatsobijawata. Canaëjëtanua penajamatabëcuene-itajëtsinexa itsamonaejawabelia matatoxenetsia Dioso pijacuene pexanawanapaewi, japasa pejinawanapaejawata itsamonaewecua. Juan pijajiwiwonëbeje canaëjëta becaeliwaisicuenia pecanacuenëbinexa pijaperujujamatabëcuene, Jesús peliwaibeje. Nexata Jesús yapëtaeya-exana bajaraponëbejejawabelia pacuenia Jesús petsipaebiliwaisi, pejanaliwaisixae, pijaperujujumexaniataecuenemi tobijiana pijaperujucanaëjëtsicuenëmibeje. **e 9:16** *ëpejanaliwaisi:* Jesús pepaebiliwaisi. **f 9:17** *pejanavinoranë:* Pejanavinora raja uvacuibarëmene, piatanera penaexanaewajënaeya. **g 9:17** *pacatobijianaena:* Anijaliwaisibeje bijiana picani. Pijasalinaliawaisi, itorobatsi pejumecowënëtawanapaenexa Dioso penajumecopatsiliwaisi Moisés-pijinëta, bajaraPonë aneconijibia petanexatsi. Itsa apojumecowënëtsi, nexata itorobatsi dajubi petajuitsinexa Diosojawabelia. Juya Jesús peliwaishi yapëtaeya-exanatsi pacuenia Dioso aneconijibia tanetsi Jesús petomatamotsijawatatsi pijaneconimi pesiwaetëpaejawatatsi cruzata. (Rom. 3:20-22). Nexata, nawecua liwaisi-aitothiabeje. Bajaraxuata, itsa matajërëta bajarapaliwaisibeje, najëpaeya apoxaniajaibeje. **h 9:18** *sinagogabo:* Bajarapacuenia judíowi wënërubiabiaba penacaetuatsibo, itsajota nacujarubabia Dioso peliwaishi caesábado canacujitsia. **i 9:20** *janabaponaponatsi:* Dioso penajumecopatsiliwaisi Moisés-pijinëta itaweta petiriawi, panaboxonabiwi, pimoxoyotsiyaniwa templobojawabelia penawajëcaenexa Diosojawabelia, tsipaji bepenaxuira-biwi tsawanapae Dioso pitabarata.

pecapunaecujinaetsi. Nexata, bajarapowa Jesús pepēñewelia ponataba, jiwibitsaētoخانetotuatujējawalia. Tojayataba Jesús penaxatatsicopijawa.

²¹ Bajarapacuenia exana, tsipaji bajarapowa siwanajamatabēcuenecopatsiaya jamatabējumaitsi mapacueniaje: «Itsa tojayatabianajē Jesús penaxatatsicopijawa, nexata tawitanėjawami newecua-ajibi tsane», jamatabējai bajarapowa.

²² Nexata, Jesús napēñeyorotaxuaba. Taenuta bajarapowa. Nexata, jumaitsi bajarapowajawabelia:

—¡Jamatabēcuenēbarēyamēre! Tanesiwanajamatabēcuenecopatsixaemē xanējawaberena, jamatejemamē baja —jai Jesús bajarapowajawabelia. Bajarapaepatota, bajarapowa jamatejema baja.

²³ Jesús pebarēpatsicujinae sinagogabo pewetsinē pijaboyabelia, pejonejawata, tane pewajēnae pepatsijawa pamonaē flauta pe-obanajetarubenaewinexa itsabelia caponaējitsia petēpaewayo pemēthētsinexa. Tanenua pamonaē bitso pinijicuenia pematānueyabawanapaewi petēpaewayo. ²⁴ Nexata, bajarapamonaējawabelia jumaitsi:

—¡Papitsapare mapabowecuaje! Pejanawayo raja apotēpae. Saya raja majita —jai Jesús.

Bajarapamonaē saya Jesús jumecapōcapōnatsi, bajarapacuenia pejumatsijawa. ²⁵ Jesús itsiata bajarapamonaē bowecua pitsapaeya-exana. Bajaraxuacujinae, joneya itsaxuayolia petēpaewayo boca. Cobepita petēpaewayomi. Nexata baja, namatacota. ²⁶ Daxita bajarapanacuapijiwi Jesús wēñēliwaisitanetsi piasaēya-exanaejawa petēpaewayomi.

Jesús itaxutoxaniawaeta bitso pitaxutotsēcēnaenēmibeje

²⁷ Itsa baja Jesús wecuapona sinagogabo pewetsinē pijabowecua, anijanēbeje bitso pitaxutotsēcēnaenēbeje Jesús pēnanajetarucatsibeje. Wawajaiya jumaitsi tsaponaēbeje Jesús-jawabelia:

—¡Jesús, nacula-ewetsinē David-pijinē pemomomē, pane-itaxutotsoniataemabeje! —jai tsaponaēbeje.

²⁸ Itsa baja Jesús joneya pabojawabelia pona, nexata bajaraponēbeje pēnajoneyatsibeje. Nexata Jesús bajarajota jumaitsi bajaraponēbejējawabelia:

—¿Xanējawaberena tsaja panesiwanajamatabēcuenecopatamebeje pataca-itaxutoxanepanaeya-exanaenexabeje? —jai.

Nexata, bajaraponēbeje jumaitsibeje Jesús-jawabelia:

—Jājā pacasiwanajamatabēcuenecopatatsibeje cajena —jaibeje.

²⁹ Nexata Jesús itaxutojayatsiaya jumaitsi bajaraponēbejējawabelia:

— Pacuenia baja panesiwanajamatabēcuenecopatamebeje xanējawaberena pataca-Itaxutoxaniawaetsinexabeje —jai Jesús.

³⁰ Bajarapaepatota, itaxutoxanepanabeje baja.

Bajaraxuacujinae, Jesús asaēya jume-itaweta bajaraponēbeje. Jumaitsi:

—¡Pētsa panawajunupaebamebeje itsamonaējawabelia pataca-itaxutoxaniawaetsijawabeje! —jai.

³¹ Itsiata saya, ajenā bajarapabowecua pitsapaliabeje, nawajunu-paebaponabeje daxita bajarapanacuapijiwijawabelia, pacuenia Jesús itaxutoxaniawaetatsibeje.

Jesús natsipaebia-exana apopecuaicuaijainēmi

³² Bajaraponēbeje peponaecujinae, nexata icatsia, itsamonae Jesús tocaparenatsi dowathi apopecuaicuaijaiya-exanaenētsi. ³³ Nexata Jesús dowathi itsa wecuacapitsapa, cuaicuaijai baja xaniawaetsia. Bajarajota, pecuenetaewitsi bitso jamatabēcuenenabenajaca. Najumaitsi ēbajarapamonae:

—¡Caeto-ata cajena Israel nacuata itsajiwi-ata apotae mapitsicueneje!
—najai.

³⁴ Itsiata baitsi jane, fariseowi jamatabēcuenenawēxaniabiaya jumaitsi Jesús yabara:

—Mara ponēje dowathi jiwiwecua capitsapabiaba dowathiwi pepopena-matacaitorobinē pesaēta —jai fariseowi, Jesús yabara.

Pacuenia Jesús itaxutotsoniatane jiwi, yabara peliwaissi

³⁵ Capernaúm tomara pewecuapitsapaecujinae, Jesús najetaruca daxita bajarapanacuata pe-enaetomaranējawa, pinijitomaranējawa, tsiquiritomaraxijawa-ata. Caetomaranē canacujitsia, judfowi pijasina-gogabonējawa, Jesús jiwi tsipaebanajetaruca pexanaliwaissi, Dioso pija-jiwi peyanacua-ewetsijawanexa yabara. Piawitanewi-ata jamatejemaya-exanapona, daxitawiriawitane pexainaewimi. ³⁶ Bajarapacuenia penajetarucawata, Jesús itsa tane ayaibitsaēto pepēnaponaewitsi, bitso itaxutobejiobiatane, tsipaji tsitatsi pewetsiwiitsi apobepexainaewi. Pacuenia ovejabitsaēto itsa apoxinae pewetsinētsi, nexata nabejiobitsiaya jinawanapa, jamatabēcuenenaxuabianua. Bajarapijinia pacuenia, jamatabēcue-itsi bajarapamonae Dioso pijacuene yabara. ³⁷ Bajaraxua yabara Jesús jumaitsi pijajiwijawabelia:

—Xaniajanē pacuenia pacatsipaebijitsiatsi. Pepacuene sajina abaxē ayaibitsaētoxaneto Dioso pejumeliwaissi pejumetaewinexa, pamonaesiwanajamatabēcuenecopabiwinexa Diosojawabelia. Pacuenia pinijipabita pe-ubijawa penaweretsicujinae, apocaējēpaetsi bepijiayo penotsiweretsijawa, caejiwiyoxaebeje penotsiwi. Bajarapijinia itsi Dioso pejumeliwaissi pepaebiwi. Caejiwiyoxaebeje, ayapēbeje bepijiayo pepaebijawa caecuenia daxitanacuajawa. ³⁸ ¡Bajaraxuata, Diosojawabelia pawajēcabiabare, icatsia itsamonae Dioso pijajiwi pitorobinexa papecayawenonaenexa! —jai Jesús pijajiwijawabelia.

Pacuenia Jesús pijajiwi ayaibitsaētoxanetoyajuwēnēwi itapeta saya doce ponēbeje apóstolewinexa, yabara peliwaissi

(Mc 3:13-19; Lc 6:12-16)

10 ¹ Itsamatacabi, Jesús pijajiwi caetuata. Bajarapamonaeyajuwēnēwi itapeta saya doce ponēbeje pija-apóstolewinexa. Nexata, Jesús pitorobiwajēnaeya bajarapamonae, pepaebanajetarubenaewajawa pexanaliwaissi Israel nacuapijiwiawabelia, jamatabēcuenecaējēpaeya-exana dowathi peyajawajinawanapaewi pewecuacapitsapaponaenexa, pejamatejemaya-exanaponaenexanua daxitawiriawitane pexainaewi. ² Bajarapadoce ponēbeje, apóstolewi, mapewēnēanēje: Simón, itsawēnē Pedro. Itsanē Andrés, Simón pejuyapijinē. Itsanēbeje pijinia nacaebananēbeje, Zebedeo

pexënatobeje, Santiago, Juan-beje. ³ Itsanë Felipe, Bartolomé, Tomás, Mateo-ata, ponë impuestojamatabëcuene pematamoyanijobinëmi jiwijawabelia. Itsanë Santiago, Alfeo pexënato. Itsanë Lebeo, ponë wënëbjiarubatsi Tadeo. ⁴ Itsanë Simón, celotenë.^j Itsanë Judas Iscariote, ponë bexëajawabelia canajetsijitsiatsi Jesús pijawajabitsaë pecobeyabelia, pebeyaxuabinexatsi.

**Jesús pija-apóstolewi itoroba, petsipaebanajetarubenaenexa
pexanaliwaisi jiwijawabelia**

(Mc 6:7-13; Lc 9:1-6)

⁵ Jesús pija-apóstolewi, doce ponëbeje, pitorobijawata, yajawanajumecopata mapacueniaje:

—¡Pëtsa paponame apojudíowi pejinawanapaenacuanëjawa, Samaria nacuata penaetomaranëjawa-ata! ⁶ ¡Paponare jane Israel nacuapijiwajawabelia, tsipaji pacuenia ovejabitsaëtoxaneto pewetsinëtsi wecuanaxuabawanapa, bajarapijinia itsi Israel nacuapijiwi Diosowecua naxuabiaya jinawanapa! ⁷ ¡Nexata, paponare baja, panetsipaebanajetarubenaenexa bajarapamonae imoxoyo baja pewajënae pecopiapatsijawanexa Dioso, athëbëtatsia pe-ecaenë, pijajiwi peyanacua-ewetsijawanexa! ⁸ Nexata jiwi papecajumexaniataenexa panetsipaebiliwaisi, pajamatejemaya-exanaponaename piawitanewi, leprawitane^k pexainaewi-ata. Pasaëya-exanaponaename petëpaewimi. Pawecuacapitsapaponaename dowathi peyajawajinawanapaewi-ata. ¡Pëtsa pamatamoyanijobame bajarapacuenia paneto-exanaejawa yabara, tsipaji raja, xanë amoneya pacacuenecaëjëpaeya-exanatsi!

⁹»¡Pëtsa pacaponamenua penamatamotsijawanë, palata-ata, panijana-mutonexa! ¹⁰ ¡Pëtsa pacaponame panijadoro-ata! Saya pajumaponaename caenaxatatsi. Caenataxuxatatsijawa-ata, pataxunaponaename. ¡Naeboyo-ata pëtsa pacaponame! Pamonaejawabelia liwaisi patsipaebianame, pacarajut-siana panexaejawa. Pajiwi baja cajena tonacuenebapona pija-tuxanenë pitorobicueniatsi,^l bajarapajiwi xaniawaetsia biabatatsi.

¹¹»Itsa papatabiabianame pinijitomarata, tsiquiritomarayojawata-ata, bajarajota pajaitabiabianame ponë peyaiyataenëtsi. Nexata bajaraponë pijabota pamajitabiabianame, panepitsapaejawabelia bajarapatomarawecua. ¹² Nexata, pabojawata papatame, ajëna pajonejitsiamëlia, panebajacobijawata pajumaitsimë tsabiabi tsane: «Dioso pewënëta, pacatojitsipatsi jamatabëcuenexanepanaeya panenajuajinawanapaejawa», pajamë tsabiabi

j 10:4 celotenë: «Pewecua-asiwanë», pejaijume. Jesús penaexanaecujinae, itsamonae judíowi taxuxuaba pebarënenexa Romano nacuapijiwajabitsaëjawabelia pitoyajamatabëcuene. Itsajawata, ayacuena najume-anaenotabiaba fariseowi, saduceowibejewabelia, caejamatabëcuene apopexainaexae pecujarubiliwaisijawabelia. Bajarapamonae pewecua-asiwaxae Israel nacua Romano nacuapijiwi peyanacua-ewetsijawa, nawënëruba, celotewi. Simón bajarapamonaejawabelia penajumeliwaisicajonenëmi Jesús pejunatsiwajënaeya. **k 10:8 leprawitane:** Bajayajebi bitso peperabëtsabanaewi. Belia daxita pecobesi, petaxusi, pepumuthaito-ata wecuajopatsi petsabanaejamatabëcuene. **l 10:10 tonacuenebapona pija-tuxanenë pitorobicueniatsi:** Mt 10:5-15-jawabelia Jesús nacuene-itajëta Mesías-nëcuene, pepopeyanacua-ewetsinënexa Israel nacuapijiwi. Bajaraxuata, itaweta apóstolewi peponaeyaniwa itsanacuanëpijiwajawabelia. Itawetatsinua pecaponaeyaniwa palata, doru, pexaejawa, pijanaebo-ata penayajiwëcaranatsinexa, tsipaji Israel nacuapijiwi tsicarucatsi pewetsinexa petsipaebinëtsi peyanacua-ewetsinëtsi pijaliwaisi.

tsane. ¹³Itsa bajarapabopijiwi xaniawaetsia pacacopiapitsiana, nexata panejumaitsicuenia Dioso yawenonaenatsi. Itsiata baitsi jane, xaniawaetsia itsa apopacacopiapitsi tsane, nexata panejumaitsicuenia Dioso apoya-wenonaetsi tsane. ¹⁴Nexata, pabopijiwi, patomarapijiwi-ata, xaniawaetsia apopacacopiapitsi tsane, apojitsipaenua tsane papecanamuxuna-ewetsinexa panetsipaebiliwaisi, bajarapamonae pawecuaponaename. Pitabarata panataxu-atsapërëwarëbianame, bajarapamonae peyapëtaenexa Dioso-jawabelia penaneconitsijawa, bajarapacuenia pexanaexae. ¹⁵Xaniajanë pacuenia pacatsipaebijitsiatsi. Pamonae apopacacopiapitsi tsane, Dioso ayaicuenia naneconitsia-exanaenatsi, Sodoma, Gomorra tomarapijiwiimi-beje, penaneconitsia-exanaejawa matatoxenetsia, pamatacabi naneconitsia-exanaena daxita pijaneconi pexainaewi —jai Jesús pijajiwijawabelia pitorobiwajënaeya.

Pacuenia Jesús pijajiwi bejiochia-exanaejitsiatsi, yabara peliwaisi

(Mc 13:9-13; Lc 21:12-19; Lc 12:2-7)

¹⁶Icatsia, Jesús jumaitsi pijajiwijawabelia:

—¡Xania, panayajiwitaename! Ajena paca-itorobatsi paneponaenexa bitso pibisiacuen pexanabiabijawabelia. Pacuenia ovejasi tsiayaitsi itsa jinawanapaejitsipa pianapanaelobomonaetuatuajëta,^m bajarapacuenia pacatsiayai tsane pianapanaewituatuajëta panejinawanapaexae. ¡Nexata, nayajiwitaeya pajinawanapare pacuenia jomo! ¡Itsiata baitsi jane, pajinawanapare beweliamatabëcuenewi nataeya panecuenecanawiatsiyaniwa, Apopanejitsipaecuen pataco-exanae-ata, pacuenia ucucu aponayamata-mocuanae itsacueniabi-atatsi! ¹⁷¡Xania baja tsane! Patajajiwixaemë, bajarapamonae pacaneconitsiana papecananeconitsia-exanaenexa. Nexata itsajota, nacaetuatabiaba tomara pewetsiwi, bajarabelia pacacaponae. Judfowi pijasinagogabonëjawa" pacajumatitibabeyabiabiana penaneconitsiwi pejumaconitabiabimacata. ¹⁸Orijibia, patajajiwixaemë pacanubiananua nacua-ewetsiwi pitabarata, gobernadorwi pitabarata-ata. Bajarapacuenia pacatoyapëxanepanaena xanë taliwaisi panetsipaebinxexa bajarapamonae-jawabelia, apojudfowi-ata pitabarata. ¹⁹¡Itsiata baitsi jane, bajarapacuenia pataco-exanae-ata, pëtsa panasiwajamatabëcuenebëjamë panenayajiwicuai-cuaijainexa bajarapamonaejawabelia! Bajarapaepatota, Dioso pejamatabëcueneta pacacuaicuaijaiya-exanaena. ²⁰Nexata, itsa panayajiwicuaicuaijamë tsane, paxamë panijacuata apopacuaicuaijaimë tsane. Espíritu Santo raja pacacuaicuaijaiya-exanaena.

²¹»Itsamatacabijawabelia tajajiwi itsamonae canajetsianatsi nacua-ewetsiwijawabelia, pebeyejebinxatsi. Nacaemonaejiwibeje nacanajetsiana-beje. Itsamonae pijinia pexijiwi canajetsiana. Itsamonae pijinia paxa, pena-ata, canajetsiana. ²²Daxita nacuapijiwi paca-itoya tsane, patajajiwixaemë. Pajiwi pebejiochia-exanaejawatatsi, itsa ajamatabëcuenesaë tsaponaponae

m 10:16 *pianapanaelobomonaetuatuajëta*: Lobomonae jëpa benamo. Itsiata pecunuanënë, pianapanaenë-ata. Bajarapamonae apocuenejëpae newëthëmonae, tsipaji jinawanapa pepo-bitsaëto, pexaenëxexa pejaitsijawata. Taema «lobo», glosariojawata. **n 10:17** *pijasinagogabonëjawa*: Bajarapacuenia judfowi wënërubiabiaba penacaetuatsibo, itsajota nacujarubabia Dioso peliwaisi caesábado canacujitsia.

tsane tane-itaxutuajamatejemajawa pebeyaxuabijawabeliatsi,^o bajarapajiwi capanepaenatsi Dioso pijanacuayabetsia.²³ Itsa patomarata pacabejiobia-exanaena, pawecuarēcēpecaename itsatomarabelia. Xaniajanē pacuenia pacatsipaebijitsiatsi. Daxita Israel nacuata pe-enaetomaranējawa abaxē pat-sipaebiweretsinejewamē pexanaliwaisi, Xanē, Daxitajiwi Pematapijinēnē, itacarajeta icatsia patsianicajē.

²⁴»Bajarapacuenia pacatsipaebatsi papecabebiobia-exanaejawanexa yabara, tsipaji itsajiwi-ata apojamatabēcuenematatoxenetsi pecujarubinētsi. Bajarapijinia itsi pijajiwitonē, apojamatabēcuenematatoxenetsi pijatuxanenē.²⁵ Xanē, patacacujarubinē, jiwi copiaya itsa nebejiobia-exanapona, bajarapacuenia paxamē-ata, patacacujarubiwi, pacabejiobia-exanaena. Bajarapijinia pacuenia, panijatuxanenēnē jiwi copiaya itsa nebejiobia-exanapona, bajarapacuenia patajajiwimē-ata, pacabejiobia-exanaena. ¡Pataema! Xanē panijatuxanenēnē tanejumaitsitsabiabijawa: «Beelzebú, daxita dowathiwi pijatuxanenē», tanejaitsabiabijawa. Nexata pijinia, patajajiwixaemē bitso pibisiawēnēta pacawēnējonabiabiana. Bajarapacuenia paca-tocopiapatabiabiana patajajiwixaemē, patanecuenējēpaenexamē.

²⁶»¡Nexata, pētsa pacujunawame bajarapamonae! Daxita xua jiwi muetsia pibisiacuene exana, bexējajawabelia cueneyapētaeponaenatsi daxitajiwi.²⁷ Pali-waisianē muetsia waja-epatojawata pacatsipaebaponatsi, bajarapaliwaisianē paxamē pinijijumeta patsipaebaponaname jiwi penacatuatabiabijawata.

²⁸¡Pētsa pacujunawame jiwibewi-ata! Bajarapamonae pacabeyaxuabi-ata tsi-pae, acuenebi matawējēa papeca-itsacueniabinexa pepopanejamatabēcuenējawa-belia. ¡Biji rajane, pacujunaware Dioso, Ponē caējēpatsi papecabeyaxuabicu-jinae papecaxuabinexa apowerewererecae-isotojawabelia!

²⁹»Anijanēbeje baratsuitobeje namatamota saya caepalatanēyo. Itsiata baitsi jane, caenē-ata baratsuito, jemata apojopaetsica petēpaenē, pane-axa, Dioso, yapētaenejewā.³⁰ BajaraPonē cajena bitso paca-asiwa baratsui mata-toxenetsia. Nexata, panematanatoxi-ata, caematanatoyo canacujitsia, Dioso namata-ējēta.³¹ ¡Bajaraxuata, pētsa pacujunawame itsacuenējawayo-ata, tsi-paji paxamē Dioso bitso paca-asiwa baratsuitoxi matatoxenetsia! —jai Jesús pijajiwijawabelia.

Jesús pijajiwi apobenayawajunuaxainae penawajunupaebijawa

Jesús pijajiwicuene

(Lc 12:8-9)

³² Icatsia, Jesús jumaitsi pijajiwijawabelia:

—Daxita pamonaē tajajijiwi, jiwi pitabarata itsa nawajunupaebiana taja-jiwicuene, xanē-ata wajunupaebianajē bajarapamonae tajajiwicuene taxa pitabarata, athēbētatsia pe-ecaenē.³³ Pamonaē pijinia moya nawajunuaxainawanapa jiwi pitabarata tajajiwicuene, xanē-ata pijinia moyanē tsane. Yawajunuaxainaenajē tajajiwicuene taxa pitabarata, athēbētatsia pe-ecaenē —jai Jesús.

o 10:22 *pebeyaxuabijawabeliatsi*: Wowaijumeta canacueneba, «hasta el fin», pejaijume. Bajarapajume xaina acueyabi pajamatabēcueneliwaisibeje: 1) Nacua pecopiarucaejawabelia, 2) Pebejiobia-exanaematacabitsi pecopiarucaejawabelia, 3) pebeyaxuabijawabeliatsi-ata.

**Jiwi apopenajuasiwanajamatabëcuenecopabixae Jesús-jawabelia,
nacaemonae-ata, caejamatabëcuene aponajuaxainae tsane**
(Lc 12:51-53; 14:26-27)

³⁴Icatsia, Jesús jumaitsi pijajiwijawabelia:

—|Pëtsa panesiwajamatabëjumaitsimë: «Jesús raeta patsica mapana-cuayabetsicaje daxitajiwi najamatabëcuenejëpaeya pejinawanapaeya-exanaenexa», panesiwajamatabëjamë pëtsa! Biji rajane, xanë tapatsixae-tsica mapanacuayabetsicaje, jiwi najamatabëcuenejëpaeya apojinawanapae tsane.^p Nexata, namata-enetsia nataena benapijawajabitsaëwi. ³⁵Bajaraxua yabara, pebi, paxabeje caejamatabëcuene apoxainaebeje tsane. Pexënatoyo, penabeje, pame, pecopenabeje-ata, caejamatabëcuene apoxainae tsane. ³⁶Nexata, xanëjawaberena apotenenajuasiwanajamatabëcuenecopabixae, caejiwi canacujitsia benapijawajabitsaë nataena, nacaebopijiwi-ata.

³⁷»Pajiwi, asiwaya yaiyatane paxa, pena-ata, xanë tane-asiwajawawecua, bajarapajiwi aponetoxanepanae tajajiwicuenia tataejawa. Bajarapijini pacuenia, pajiwi asiwaya yaiyatane pexënatoyo, pexënatoyo-ata, xanë tane-asiwajawawecua, bajarapajiwi aponetoxanepanae tajajiwicuenia tataejawa. ³⁸Pajiwi nayawajunuaxainaena tajajiwicuenie, pebeyaxuabiyaniwatsi, pebejiobia-exanaeyaniwatsinua, bajarapajiwi aponetoxanepanae tsane tajajiwicuenia tataejawa. ³⁹Pajiwi tajajiwicuenie nayawajunuaxaina, wecuapanepae-ata petëpaejawawecua, bajarapajiwi itsiata naxuabiana. Itsiata baitsi jane, pajiwi nacaewetsiana pebeyaxuabinexatsi tajajiwixae, bajarapajiwi daxitamatacabijawabelia Dioso yajawaponaponaenatsi —jai Jesús pijajiwijawabelia.

**Pacuenia Dioso matamotsijitsiatsi pamona xaniawaetsia
copiapita Jesús pijajiwi**

(Mc 9:41)

⁴⁰Icatsia, Jesús jumaitsi pijajiwijawabelia:

—Pajiwi pacacopiapitsiana patajajiwixaemë, bajaraxua xanë taenajë tanecopiapitsijawa, taxa, Dioso-ata, pecopiapitsijawatsi. ⁴¹Pajiwi copiapita profetanë pijaboyaberena, petocopatsixaenua pepaebinxaxa Dioso peli-waisi, bajarapajiwi Dioso matamotsianatsi pecopiapitsijamatabëcuene. Pajiwi copiapita pijaboyaberena Dioso pejitsipaecuenia peponaponaenë, bajarapajiwi Dioso matamotsiana, pacuenia bajaraponë matamotsianatsi Dioso pejitsipaecuenia peponaponaexae. ⁴²Pajiwi yawenonaena tajajiwi, beweliamatabëcuenejiwi-ata daxita tajajiwawecua, tsiquirimerayo-ata itsa rajutsiana piapaenexa, bajarapajiwi pepacuene Dioso matamotsianatsi —jai Jesús pijajiwijawabelia.

11 ¹Jesús baja itsa najumewereta pijajiwi, doce ponëbejexawabelia, bajarapacuenia pemuxujiobjiawawa, itoroba jane baja Israel nacuata pe-enaetomaranëjawa, liwaisi petsipaebinxaxa. BajaraPonë juya saicaya nat-sata, itsatomaranëjawabelia liwaisi petsipaebinxaxa.

p 10:34 najamatabëcuenejëpaeya apojinawanapae tsane: Najamatabëcuenejëpaeya apojinawanapae tsane, tsipaji daxitajiwi aposiwanajamatabëcuenecopabijitsia Cristojawabelia.

**Juan, jiwibautizabinë, itoroba pijajiwiyajuwënëwi Jesús-jawabelia,
peyanijobinexa Mesías pecuene yabara**
(Lc 7:18-35)

²Bajarapamatacabi, Juan, jiwibautizabinë naneconitsiaponapona penaneconitsiwi pejebabiabibota. Nexata itsa wënëliwaisitane Cristo pinijicuene pexanaponaejawa Dioso pesaëta, Juan itoroba pijajiwiyajuwënëwi Cristo-jawabelia peyanijobinexa. ³Nexata bajarapamonaë itsa pata Cristojawata, jumaitsi:

—¿Xamë tsabaja Mesíasmë? ¿Xamë tsabaja Dioso peca-itorobiapaebinë, ponë tajëwelia pacawajënaë-ewetawanapatsi nepatsijawanexatsica, daxitajiwi necapanepaenexa? Itsa apoxamë, ¿abaxë tsaja pacopia-ewetawanapaenajë itsanë pepatsijawanexatsica? —jai Juan pijajiwí Cristojawabelia.

⁴Nexata Jesús⁴ jumaitsi bajarapamonaejawabelia:

—¡Paponare baja, panetsipaebinexa Juan-jawabelia pacuenia baja pata-neme ta-exanaponaejawa, patanejumetaejawamënuu tatsipaebiliwaisi jiwijawabelia! ⁵Patsipaebianame tjamatejemaya- exanaponaejawa apo-pe-taewimi, petabusipacuenabiwimitsi tajinawanapaeya- exanaejawa, bajaya-jebi bitso peperabëtsabanaewimi tawecua-ajibia-exanaejawa, bitso pemu-xusipanaewimi tajumetaeya-exanaejawa, xaniawaetsia pejumetaenexa, petëpaewimi-ata icatsia ta-asaëya-exanaejawa-ata. Patsipaebianamenua bepejiobiwijawabelia tatsipaebaponaejawa pexanialiwaissi, pecapanepae-liwaisinexatsi pibisiacuene pexanaeiconimiwecua. Daxita bajaraxua ta-exanaponaejawa patanetaejawamë, patsipaebianame Juan-jawabelia.

⁶Orijibia, bajaraponëjawabelia pajumaitsimë tsane: «Jesús raja cajumaitsi-rena: ‘Jamatabëcuenebarëya tsaponaponaë tsane pajiwi apocuene-aebi xanë Dioso tane-itorobinëtsicacuene,’ cajairena», pajamë tsane —jai Jesús, Juan pijajiwijawabelia.

⁷Itsa baja Juan pijajiwí nawiabalia, Jesús taxuxuaba jiwijawabelia petsipaebijawa Juan peliwaissi. Jumaitsi mapacueniaje:

—Pamatacabi Juan ponapona petusatonacuatalia, itsa paponame, ¿detsa pitsicuene pajamatabënaponaremelia panetaenexa? ¿Paponaremelia tsaja, saya panetaenexa musuli penajëabijawa’ jowibota? ⁸Itsa jume, ¿paponame tsaja, panetaenexa meta naitabëtsiaya pexaniajawa penaxatatsinë, bitso penamatamotsijawa? Paxamë rabaja payapëtaneme mapacuenije. Pamonae

q 11:4 *Jesús*: Tajëwelia Diosojumepaebiwi, profetawimi, hebreojumeta wajunupaebabiaba Mesías pepatsijawanexatsica, peyanacua-ewetsinexa Israel nacupijijiwi. Xuacujinaë, griegojume pecuaicuaijiwi, yabara cuaicuaijai Mesías, Cristowënëcuenia. Itsiata, ángel, Gabriel-wënëné, María itorobatsi pexënato pewënërubinexa Jesús, «pijajiwí pecapanepaenënexa», pejaiwënë. Bajaraxuata, Jesús, acueyabi pawënëbeje xaina. Pepawënë raja Jesús. Itsiata, Mesías-wënë, Cristowënëbeje, caewënë-exana pecuene-itajëtsinexa pexanaecuene yabara. Daxita bajarapawë-nëanë, caenë yabara jumaitsi. r 11:7 *musuli penajëabijawa*: Pamonae caeliwaissi apopexainaewi jamatabëcuenejëpa bemusuli pejëabijawa jowibota. Baitsi, pacuenia musuli pejëabijawata cae-cowëta aponucae, bajarapijinia itsi pamonae nawitsia liwaisi pexainaewi. Ajena cujaruba caeli-waisicuenia jiwi pejinawanapaenexa, merawia icatsia itsaliwaisicuenia. Juan itsiata caeliwaissi pexainaenë. Itorobabiaba jiwi pibisiacuene pecopabinexa, penajamatabëcuenepeñëyorobinexa Diosojawabelia.

naitabëtsiaya pexaniajawa naxatababiaba, bajarapamonaē jinawanapa nacuanē pewetsiwi pijabonējawa. ⁹ ¿Detsa nexata xua pajamatabēnapona-remelia panetaenexa petusatonacuayabelia? ¿Paponaremelia tsaja panetaenexa Diosojumepaebinē, profetanē? Xaniajanē pacuenia pacatsipaebijitsiatsi bajaraponē yabara. Juan rabaja pepacuenē profetanē, Diosojumepaebinē. Bajaraponē baja cajena pejumenamatamotsinē itsa Diosojumepaebiwi, profetawiwecua. ¹⁰ Bajaraponē yabara jane baja, bajayata tajēwelīa Dioso pejumeliwaisibaxutota wajunupaeba mapacueniaje:

«Xanē itorobianajē newajēnaeyabelia ponē

xamē pecawajunupaebinēnexa. Nexata jiwi

jamatabēcuenexaniawaetaponaena, xaniawaetsia

pecacopiapitsinexa», jai bajayata Dioso pejumeliwaisibaxutota.

¹¹»Xaniajanē pacuenia pacatsipaebijitsiatsi. Daxita paDiosojumepaebiwi, paprofetawi-ata, pejinawanapaewimi Juan pewajēnaeya, bajarapamonaewecua Juan ayaijamatabēcuenenē. Itsiata baitsi jane, pajiwi bewelijamatabēcuenējiwi-ata, itsa ponapona Dioso, athēbētatsia pe-ecaenē, peyanacua-ewetsijawata, bajarapajiwi ayaijamatabēcuenējiwi Dioso taenatsi Juan matatoxenetsia.

¹²»Juan, jiwibautizabinē, taxuxuaba petsipaebanajetarucaejawa, imoxoyo pewajēnaē Dioso, athēbētatsia pe-ecaenē, peyananacua-ewetsijawanexa. Bajarapamatacabijawawerenacujinae, mapamatacabijawaberena-ataje, jiwi ayaiBITSaētoXaneto jitsipa bepijiayo pecopiapatsijawanexa. ⁵ Itsamonaē itsiata, pesaēta liwaisicaranabapona. Jamatabē-ajibia-exanaponanua bajarapaliwaisi. Nexata, bejiobia-exanapona pepaebiwi. ¹³ Juan penaexanaewajēnaeya, daxita Diosojumepaebiwi, profetawi, Moisés-pijinēta-ata, tajēwelīa wajunupaebapona itsamatacabi Dioso pijajiwi pewetsijawanexa mapanacuataje. Itsiata, Juan pepopocotocaewiprofetanē wajunupaeba pecopiapatsijawa Dioso pijajiwi pewetsijawanexa. ¹⁴ Patacatsipaebiliwaisi itsa pacatsitaxaniajai, itsa jume, itsa apopacatsitaxaniajai-ata, Juan yabara pacatsipaebatsi mapacueniaje: «PaElías pajamatabēcuenē-ewetawanapame,⁴ pepatsijawanexa pamatacabi Dioso taxuxuabijitsia peyanacua-ewetsijawa pijajiwi, Juan yabara jumaitsi». Pacuenia jamatabēcuenē-itsi profeta Elías,^u bajarajamatabēcuenē-itsi Juan-ata. ¹⁵ Patacatsipaebiliwaisi, pajiwi jamatabēnejumeyapētane, nenamuxuna-ewetsi xaniawaetsia —jai Jesús jiwijawabelia.

¹⁶Icatsia, Jesús jumaitsi jiwijawabelia:

—Xanē, Juan-beje, patacatsipaebiliwaisibeje, paxamē, patanejumetaewimē, bepejewaxijamatabēcuenē panexainaewi. Pejewaxi tomaratuatua-jēta penajuamuxusitsijawata, ayaijumeta bawabena, caejamatabēcuenē apopenajuaxainaexae penajuajinawanapaewijawabelia. ¹⁷Pewawajaijawa wata bajumaitsi: «Pacato-obecatsi picani flauta. Itsiata, apopayawajibimē.

s 11:12 *pecopiapatsijawanexa*: Taema Jn 6:14-15. t 11:14 *pajamatabēcuenē-ewetawanapame*: Taema Mal. 4:5. Juan picani apopepo-Elíasnē. Saya cuene-itajēta pexanaecuenējawata.

u 11:14 *Elías*: Bajaraponē bayatami ponapona Israel nacua. Baitsi, apo-asaē tsaponaponaē mapanacuataje, Jesús peponaponaematacabi. Itsiata, bajaraponē Dioso ya-asaēya caponatsi athēbēabetsia. (2Re 2:1-11). Bajaraxuata apopayaquinarubinē «Elías-pijinē». Daxita bajaraponē peliwaisi ruca 1Re 18-2Re 2-jawabelia.

Pacatonaxëanecatsi picani panemuxunanuewajinexa-ata. Itsiata, apopanuemë», bajai tsecae. Bajasaya pajamatabëcuene-itsimë paxamë patacatsipaebiliwaisibeje patanejumetaewimë, caejamatabëcuene apopanenuaxainaexae paxanëbeje yabara. ¹⁸ Juan, jiwibautizabinë, papecatsipaebanajetarucaejawata imoxoyo pewajënae pecopiapatsijawanexa Dioso pijajiwi pewetsijawa mapanacuataje, apoxaeyabiabi pexaniapexaejawanë. Apo-apae-ata vinoranë. Nexata, bajaraponë yabara pajumaitsimë tsabiabi: «¡Juan raja dowathi yajawaponapona!», pajamë tsabiabi jamatabëcuenenawëxaniabiaya. ¹⁹ Bajaraxuacujinae icatsia, Xanë, Daxitajiwi Pematapijinënë, najetarucajë, bajarapaliwaisi patacatsipaebinexa. Itaxutejema xaniji. Matawëjëa apaeyabiabjënua. Nexata xanë yabara icatsia pajumaitsimë tsabiabi: «¡Pataema maponëje! Ayaijawa xaeyabiaba. Ayaira vinoranë matawëjëa apaeyabiabanua, piaitajibinexa. Barënajamatabëcuenejëpanua impuestojamatabëcuene pematamoyanijobabiabiwi, pijamatabëcuenebejewi-ata», pajamë tsabiabi xanë yabara jamatabëcuenenawëxaniabiaya. Paxamë raja caeliwaisi apopanexainaewi Dioso peliwaisi pepaebiwi yabara. Itsiata baitsi jane, xuanë paxanëbeje, Juan-beje pa-exanaponajëbeje, payapëtaename pexaniajaicuene Dioso pejamatabëcueneta pata-exanaejawabeje, panecuenetaejawata jiwi penajamatabëcuenepëñëyorotsijawa Diosojawabelia —jai Jesús jiwijawabelia.

Dioso matatoxenetsia naneconitsia-exanaena pamonaë,

pejume-aebiwi Jesús peliwaisi

(Lc 10:13-15)

²⁰ Patomaranëjawa Dioso pesaëta Jesús pinijicuenejawanë nawitsia tsita-exanapona itsatomaranëwecua, bajarapatomaranëpijiwi Jesús cuenebijatane, apopecopabixae pibisiacuene pexanabiabijawa, penajamatabëcuenepëñëyorotsinexa picani Diosojawabelia. Nexata, Jesús ajumesaëya jumaitsi bajarapatomaranëpijiwijawabelia: ²¹ «¡Bitso bepajiohimë tsane Corazín tomarata panejinawanapaewi! ¡Bitso bepajiohimënua tsane Betsaida tomarata panejinawanapaewi! Bepajiohimë tsane, tsipaji pinijicuenejawanë Dioso pesaëta pacatsita-exanae-atatsi, apopanajamatabëcuenepëñëyorobimë pibisiacuene pane-exanaejawawecua, Diosojawabelia. Bajarapitsicuenejawanë itsa tsita-exanaejitsipajë Tiro, Sidón tomarapijiwimibeje, copabijitsipa pibisiacuene pexanaejawa. Najamatabëcuenepëñëyorobijitsipana Diosojawabelia. Penajamatabëcuene-itajëtsinexa peyamatabëcuenebëjaijawa pibisiacuene pexanabiabineconi, naxatabijitsipa piayopapaëbërëjawanë. Enaëjitsipa irata. Natsimata-othocaëjitsipana ipumanata. ²² Xaniajanë pacuenia pacatsipaebijitsiatsi. Pamatacabi Dioso naneconitsia-exanaena daxita pijaneconi pexainaewi, paxamë Corazín, Betsaida tomaratabeje panejinawanapaewi, Dioso matatoxenetsia pacananeconitsia-exanaena penaneconitsia-exanaejawawecua Tiro, Sidón tomarapijiwimibejewecua. ²³ Paxamë Capernaúm tomarata panejinawanapaewi, jamatabëcuenenawëxaniabiaya pajamatabëjumaitsimë tsabiabi: 'Waxaitsi cajena ayaijamatabëcuenewitsi. Nexata, Dioso nacacapanepaena athëbëabetsia', pajamatabëjamë tsabiabi. Itsiata baitsi jane, bajarapacuenia apopacato-exanae tsane. Biji rajane, Dioso pacaxuabiana apopewerewerecae-isotojawabelia, apopatanejumexaniataexaemë. Bajayata,

Sodoma tomarapijiwimijawata itsa exanaejitsipajë Dioso pesaëta pinijicuene ta-exanaejawa, pacuenia paxamëjawata pacatsita-exanaponatsi, bajarapa-tomarapijiwimi copabijitsipa pibisiacuene pexanaejawa. Najamatabëcuene-pënëyorobijitsipania Diosojawabelia. Nexata, Dioso apowerebiabi tsipaetsi pibisiacuene pexanaeneconi yabara. Mapamatacabijawaberena-ataje jiwi jina-wanapaëjitsipa bajarapatomarata. ²⁴ Xaniajanë pacuenia pacatsipaëbijitsiatsi. Diosojawabelia apopenenajamatabëcuene-pënëyorobixae pibisiacuene pane-exanaejawawecua, nexata pamatacabi bajaraPonë naneconitsia-exanaena pijaneconi pexainaewi, matatoxenetsia pacananeconitsia-exanaena Sodoma tomarapijiwawecua», jai Jesús bajarapamonaejawabelia.

**Jesús pijajiwi junata pejamatabëcuene-asaëya-exanaenexa
pejamatabëcuene-cueranaejawawecua**

(Lc 10:21-22)

²⁵ Bajarapacuenia pepaëbiweretsicujinae, Jesús wajëta paxa Diosojawabelia. Jumaitsi:

—Axa, newetsinë athëbëtatsia, mapanacuajawa-ataje, cawënëxania-tatsi ayaijamatabëcuenenëmë yabara, tsipaji pexanialiwaissi, xanë tali-waissi, wecuamatayatame bitso peyapëtaewiwecua, penacujarubiwiwecua-ata mapanacuapijicuene yabaraje. Caranata, bajarapaliwaissi yapëtaeya-exaname pamonaejawabelia bitso apopenacujarubiwi, beweliamatabëcuenewi-ata, peyapëtaenexa daxita nijajiwi newetsijawanexa mapanacuataje. ²⁶ Bajarapacuenia exaname, tsipaji baja catsitaxanepana bajarapacuenia —jai Jesús paxa Diosojawabelia pewajëtsijawata.

²⁷ Icatsia, Jesús jumaitsi pijajiwi jawabelia:

—Xanë baja cajena, taxa Dioso netocopata daxitacuene ta-ewetsinexa. Itsajiwi-ata, Dioso pexënatonë, apoyapëtae pajamatabëcueneliwaissi xainajë. Caenë, taxa Dioso, nejamatabëcueneyapëtane. Bajarapijinia pacuenia, itsajiwi-ata apoyapëtae pajamatabëcuene taxa Dioso xaina. Xanë, caenë pexënatonë, jamatabëcueneyapëtaniji. Nexata, pamona tojitsipajë tayapëtaeya-exanaenexa pacuenia taxa Dioso jamatabëcuene-itsi, bajarapamonae-ata yapëtaeya-exanaponanajë.

²⁸ »; Paxamë panejamatabëcuene-cueranaewi, panejamatabëcuenebëjaiwi-ata apopenajumecowënëtsicapanepaejawa yabara papeca-itorobiliwaissi, daxita papare xanëjawaberena, patacjamatabëcueneyawenonaenexa! Nexata xanë pacajamatabëcuenenacuera-ewetsia-exanaenatsi bajarapajamatabëcuenebejewecua. ²⁹ »; Paxamë papire» tanajamatabëcuene-catait-sijamatabëcuene, pabeweliamatabëcuene-ata xainajë, bajarapajamatabëcueneliwaissi bejewawata panenacuenecujarubawanapaenexa Dioso pejitsipaecuenejawanë! Nexata, xanëjawata bajarapacuenia pacaxitajarabianame panenacuera-ewetsijamatabëcuene. ³⁰ Nexata, xanë pataca-itorobiliwaissi pacatoyapëxanepanaeya-exanatsi pane-exanaenexa, tsipaji tajaliwaissi cuenejëpa bepefanaeyugonae —jai Jesús pijajiwi jawabelia.

v 11:29 *papire*: Pacuenia pejanabueyu yugonae petsiwësjumabuatsicujinaetsi, nacuenecujarubapona perujubueyu jawabelia perobobocajawa piracatafunucaemo, bajarapijinia pacuenia Cristo pijajiwi nacuenecujarubijitsia bajaraPonëta pexanawanapaenexa Dioso pejitsipaecuenejawanë.

**Jesús yapētaeya-exana fariseowijawabelia petuxanenēcuene
penacuera-ewetsimatacabita**

(Mc 2:23-28; Lc 6:1-5)

12 ¹Itsamatacabijawabelia, judiowi penacuera-ewetsimatacabita, Jesús, pijajiwi yajawa, najetaruca trigo pabianējawa. Jesús pijajiwi bitso pīajanixae, trigoxu siricanajetarubena. Xuxaeyabua-taponanua. ²Nexata, fariseowi itsa tane Jesús pijajiwi pesirica-najetarubenaejawa trigoxu penacuera-ewetsimatacabita, jumaitsi Jesús-jawabelia:

—¡Taema nijajiwi! Bajarapamonae siricanajetarubena trigoxu penacuera-ewetsimatacabita. Nexata, naneconita baja Diosojawabelia, apopejumeco-wēnētsixae pacuenia naca-itoroba Dioso penajumecopatsiliwaisi Moisés-pijinēta —jai fariseowi.

³Nexata Jesús jumaitsi fariseowijawabelia:

—Ajena, penacuera-ewetsimatacabi, tajajiwi bajarapacuenia exanae-ata, itsiata apopibisiacuene, tsipaji bitso pīajani bajarapamonae. Bajarapacuenia pajumaitsimē, xaniawaetsia apopanelebixae xua Dioso pejumeliwaisibaxuto nacayapētaeya-exana wajasalinainē David-pijinē, pebarēnajetarucaewi yajawa, xua exana pamatacabi bitso pīajani. ⁴David-pijinē joneya Dioso pijatemploboyalia. Bajarapabo-ēnēta, mesajumata ofrendacuenia Diosojawabelia petojebipan-bēanēmi^w nota, pebarēxanexa peyajawaponaponaewi. Bajarapapan-bēanē picani apotocopatsitsi David-pijinē, pijajiwi-ata, pexaenexa penaneconitsiyaniwa Diosojawabelia. Ēsacerdotewi picani tocopatatsi pexaenexa. David-pijinē aposacerdotenē-ata, pijajiwi barēxae-ata bajarapapan-bēanē, itsiata apowēnananeconitsi Diosojawabelia.

⁵¿Apopalebimē tsaja xua Dioso penajumecopatsiliwaisi Moisés-pijinēta nacayapētaeya-exana sacerdotewi yabara? Bajarapamonae templobota nacuenebawanapae-ata penacuera-ewetsimatacabita, aponaneconitsi Diosojawabelia. ⁶Itsiata baitsi jane, xanē bitso ayai-jamatabēcuenenēnē templobopijicuenejawanēwecua.^x ⁷Paxamē itsa pajumeyapētaejitsipame pajamatabēcuenē yabara jumaitsi Dioso pejumeliwaisibaxutota: «Jitsipajā pane-itaxutotsoniatējawa itsamona-e-ata, patanetotajuitsijawamēwecua dajubi altar-jumata», pejaijawa, nexata tajajiwi apopaneconitsimē tsipae, trigoxu pesiricaejawa yabara penacuera-ewetsimatacabita, aneconijibi-ata Dioso pitabarata. Bajara-xua exana pijanijamatabēcuenē. ⁸Nexata, Xanē, Daxitajiwi Pematapi-jinēnē, pijatuxanenēnē bajarapanacuera-ewetsimatacabi, bajaraxuata netoxanepana tato-itapitsinexa xua tajajiwi xanepana pexanaenexa bajarapamatacabita —jai Jesús mapacueniaje fariseowijawabelia trigo pabianējawata.

^w 12:4 *petojebipan-bēanēmi*: Taema Lev. 24:5-9; Éxo. 29:32-33; 1Sa 21:1-6. ^x 12:6 *templobopijicuenejawanēwecua*: Jesús Diosonēxae, ayaijamatabēcuenenēnē Moisés-pijinēwecua, fariseowi-atawecua. Diosonēxae, bajaraponē petaxuxuabinē jiwi penacuera-ewetsijawanexa penacuera-ewetsimatacabita, nexata matatoxenetsia yapētane fariseowiwecua, xua jiwi apobe-exanae bajarapamatacabita. Jesús baitsi pepoPetuxanenē daxitawecua.

Jesús jamatejemaya-exana pebi pecobetsaquenaenē

(Mc 3:1-6; Lc 6:6-11)

⁹Trigo pabianēwecua Jesús pona baja, pepatsinexa judíowi pijasi-nagogabojawabelia.^y ¹⁰Nexata, bajarajota Jesús taeyeta pebi, pecobet-saquenaenē. Itsamonae fariseowi bajarajota yanijoba Jesús-jawabelia. Na-itaxutocaewetatsi xua yabara neconitsijitsiatsi. Nexata, bajarapamonae Jesús jamatabēcuene-ējēbiaya yanijobatsi mapacueniaje:

—¿Wajanacuera-ewetsimatacabita tsaja xanepana piawitanewi wajajamatejemaya-exanaenexa? —jai fariseowi.

¹¹Nexata, Jesús jumaitsi fariseowijawabelia:

—Paxamēyajuwēnēwi pija-ovejayo itsa tojopaejitsiparecatsi meramēthēa-reca, penacuera-ewetsimatacabita-ata, zapoponae tsipae meta, pejutsine-xatsina? ¡Jājā cajena! ¹²Itsa bajarapacuenia nacatoxanepana pexaniacuene wajato-exanaejawa oveja bajarapamatacabita, bitso biji, matatoxenetsia nacatoxanepana pexaniacuene wajato-exanaejawa jiwi, tsipaji jiwi namata-mota ovejawecua —jai Jesús fariseowijawabelia.

¹³Nexata, Jesús jumaitsi pecobetsaquenaenējawabelia:

—¡Nacoberowire! —jai Jesús.

Itsa bajaraponē nacoberowita, cobexanepanareca baja. Pacuenia itsane-nia cobexanepana, bajaracobe-itsi baja. Pecobetsaquenaejawami baja ajibi.

¹⁴Nexata, fariseowi bajarapacuenia itsa cuenetane, bitso anaepana. Bajarapamonae pepitsapaecujinae judíowi pijasinagabowecua, nacaetuata, penajumejaitsinexa pacuenia picani Jesús beyaxuabijitsiatsi.

Jesús jamatejemaya-exanapona piawitanewi, petsitanacuene-itajētsinexa pecopiapatsijawa xuanē profeta Isaías-pijinē wajunupaeba Mesías yabara

¹⁵Jesús jamatabēcueneyapētane pacuenia fariseowi siwanajamatabēxai-natsi, pebeyaxuabinexatsi picani. Nexata bajarapamonaewecua, pona itsajawabelia. Jiwi ayaibitsaētoخانeto pēnaponatsi. Bajarapamonaetuatuajēta nana-jetarubena itsamonae piawitanewi. Nexata Jesús jamatejemaya-exana daxita bajarapapiawitanewi. ¹⁶Jume-itaweta pejamatejemaya-exanaewijawabelia pecuenepaebiyaniwatsi itsamonaejawabelia Jesús-cuene. ¹⁷Bajarapacuenia Jesús beweliamatabēcuenenēcuenia itsa jamatejemaya-exanapona piawitanewi, copiapata jane baja, pacuenia bajayata profeta Isaías-pijinē tajēweliam wajunupaeba Dioso pejumaitsiyawa Mesías yabara. Jumaitsi mapacueniaje:

¹⁸«Maponē ta-itapetsinē tajajiwitonēnexaje, ta-itorobicuenia tanetonacuenebaponaponaenexa. Bajaraponē ta-asiwanē. Siwajamatabēcuenebarēyanēnua. Espíritu Santo runaeya-exanaenicajē bajaraPonē pematatsēnēatsica. Nexata, nejumewajunupaebiana apojudíowijawabelia tananeconitsia-exanaejawanexa daxita pibisiacuene pexanaewi.

¹⁹BajaraPonē apojume-anaenotsi tsane itsajiwijawabelia.

Apowawajainua tsane. Nexata, callejawa liwaisi itsa

y 12:9 pijasinagabojawabelia: Bajarapacuenia judíowi wēnērubiabiaba penacaetuatsibo, itsajota nacujarubabia Dioso peliwaishi caesábado canacujitsia.

tsipaebanajetarucaena, pinijijumeta apowawajai tsanajetarucaena tsane.

- ²⁰ BajaraPonë jamatabëcueneyawenonaena pamonaen jamatabëcuenefaefaena,^z piajamatabëcuenesaëjibiwi-ata. Bajarapacuenia asiwaya jamatabëcueneyawenonaena bajarapitsijamatabëcuene pexainaewi, daxitajiwi peyapëtaejawabelia Dioso pexaniacuene pexanaponaponaenëcuene.
- ²¹ Nexata, daxita pamonaen apojudiowi, siwanajamatabëcuenecopabiana bajaraponëjawabelia pecapanepaenexatsi»,^a jai bajayata tajëwelia profeta Isaías-pijinë peyaquinaebaxutota, Dioso pejumaitisijawa Mesías yabara.

**Itsamonaen Jesús pibisiacuena cuenebaracuaicuajitsi,
dowathi pecapitsapaejawa yabara**
(Mc 3:20-30; Lc 11:14-23; 12:10)

²² Itsamatacabijawabelia, Jesús tocapatatsi bitso pitaxutotsëcë-naenë, apopenatsipaebinë-ata, dowathi peyajawaponaponaexaetsi. Jesús jamatejemaya-exana bajaraponë. Nexata baja, xaniawaetsia tane. Cuaicuajainua baja. ²³ Jiwi itsa tane Jesús bajaraponë pejamatejemaya-exanaejawa, jamatabëcuenenabenajaca. Nexata, jiwi najumaitsi Jesús yabara: «¿Matsaeta ponë David-pijinë pemomoje,^b Dioso pitorobinëtsicaje?», najai Jesús yabara.

²⁴ Nexata, fariseowi itsa jumetane bajarapacuenia jiwi penajumaitisijawa, jumaitsi bajarapamonaejawabelia:

—Mara ponëje Jesús, dowathi jiwiwecua capitsapabiaba Beelzebú^c pesaëta, ponë daxita dowathiwi pitorobinë —jai fariseowi jamatabëcuene-nawëxaniabiaya Jesús yabara.

²⁵ Jesús jamatabëcueneyapëtane pacuenia fariseowi siwanajamatabëxainatsi. Nexata jumaitsi bajarapamonaejawabelia:

—Nacaenacuapijiwi-ata itsa nawecuanatsanaejitsipa namata-enetsia penawajabitsaëtsinexa, nawerebiabijitsipa. Bajarapijinia itsi tsipae

z 12:20 jamatabëcuenefaefaena: Mateo canacueneba anijapecuenecateliwisibeje jiwi pejamatabëcuene yabara. Pejamatabëcuenefaefaenaewi yabara cuenecatane bepejumafurutsinaeboyoy. Nexata, Jesús pijajiwi nabëxëtsutsiaya bepejumanajetarubenaewi pitorobiliwaisianë pëtsita-arewexaetsi, Jesús orijibia apotsijumaxuabi itsapitorobiliwaisi pejumecowënëtsinexa. Biji rajane, jamatabëcueneyawenonatsi xaniawaetsia penucaponaenexa, icatsia pewecua-ajibia-exanaejawatatsi pejumanucaponaejawa pitorobiliwaisimitsi. Piajamatabëcuenesaëjibiwi yabara cuenecatane bepecotia-itacënanajenajebirecaejawa. Nexata pacujinae Jesús pijajiwi ajamatabëcuenesaëjibi tsaponaen pitaxutuajamatejemajawa Dioso, Jesús apoyabijatae pecopatsijawabelia bajarapa-itaxutuajamatejemacuene. Biji rajane, ajamatabëcuenesaëya-exanatsi, matatoxenetsia pitaxutuajamatejemanexa Dioso. **a 12:21** Taema Isa. 42:1-4. Taemanua Gén. 22:2; Sal. 2:7. **b 12:23 David-pijinë pemomoje:** Bajarapacuenia yabarajumaitsi Jesús, tsipaji tsitatsi Mesíasnë. Dioso pejumeliwaisi nacayapëtaeya-exana pacuenia Mesías naexanaejitsia pepopeyanacua-ewetsinëmi David-pijinë pemomoxituatujëta. **c 12:24 Beelzebú:** Bajarapacuenia judiowi wënëruba Satanás, ponë pepopenamatacaitorobinë daxita dowathiwinexa. Bajayatami Canaan nacuapijiwi pijadioso, jumapecataeya pexanaenë, pewënë Baal «petuxanenë» pejaijume. (Taema 2Re 1:2-3). Bajarapacuenia nexata fariseomonaen itsa jumaitsi Jesús pecapitsapaejawa dowathi, dainamonaen pijatuxanenë pesaëta jumecapocapona Jesús. Taemanua Lc 11:15 pijanota Beelzebú yabara.

nacaetomarapijiwi, nacaebopjiwi-ata, itsa nawecuanatsanaejitsipa namata-enetsia penasiwanawajabitsaëtsinexa, nawerebiabijitsipa. ²⁶ Bajarapijinia itsi tsipae Satanás-ata. Itsa capitsapaejitsipa pijajiwi, nexata bepijawajabitsaënë taejitsipatsi. Itsajamatabëcuene wecuaxainaejitsipatsi. Orijibia, penamata-caitorobisaë apoxainaponae tsipae. ²⁷ Paxamë xanë yabara panejumaitsimë tacapitsapaejawa dowathimonae Beelzebú pesaëta. Nexata, xanë pacayanijobatsi: «¿detsa nexata ponë pesaëta panijajiwi-ata dowathi jiwiwecua capitsapabiaba?» Itsa paxaniajamë tsipae pacuenia paxamë panesiwacanaëjëtame, nexata panijajiwi-ata Beelzebú pesaëta dowathi capitsapabiabijitsipa. Itsiata, panijajiwi pacayapëtaeya-exanaena panenawëxaniabicuene xanë yabara. ²⁸ Xanë, Espíritu Santo pesaëta nejamatabëcuene caejëpaeya-exana dowathi jiwiwecua tacapitsapabiabinexa. Bajarapacuenia tanejamatabëcuene caejëpaeya-exanaejawa, bepanyapëtaneme petaxuxuabijawa baja Dioso, athëbëtsia pe-ecaenë, pijajiwi peyanacua-ewetsijawa paxamëtuatuajëta —jai Jesús fariseowijawabelia.

²⁹ Jesús icatsia jumaitsi fariseowijawabelia, pecanaëjëtsinexa ayaijamatabëcuene pewecuaxainaejawa yabara:

—Itsajiwi-ata apocaëjëpaetsi pejonenexa bitso piasaënë pijaboyalia, peyacajërëtsinexa xua xaina pijabota, cëtabuatsinejewa. Matapania itsa cëtabuatsipa, toyapëxanepanejitsipatsi peyacajërëtsinexa daxita xua xaina pijabota. Bajarata-itsinë xanë Satanás-jawabelia.

³⁰ »Pajiwi xanëjawaberena caejamatabëcuene apoxainae,^d bajarapajiwi tajawajabitsaëjiwi. Pajiwi pijinia aponeyawenonaeyacaetuatsi jiwi Dioso-jawabelia, bajarapajiwi newecuanacayajatsia-exana jiwi, Diosojawabelia pesiwanajamatabëcuene copabiyaniwa.

³¹ »Bajaraxua yabara pacatsipaebatsi mapacueniaje: «Dioso cajena siwajamatabëcaewiana daxita papibisiacuenebeje jiwi exana, pibisiacuenia baracuaicuajai-ata Dioso. Itsiata baitsi jane, pajiwi pibisiacuenia baracuaicuajai Espíritu Santo, pacuenia paxamë pajumaitsimë,^e Dioso aposiwajamatabëcuene caewi tsane bajarapaneconi. ³² Bajarapijinia pacuenia, pajiwi pibisiacuenia nebaracuaicuajai, Xanë, Daxitajiwi Pematapijinënë, bajarapaneconi itsiata Dioso siwajamatabëcuene caewianatsi, itsa najamatabëcuene pëñëyorotsiana bajarapapibisiacuenewecua. Itsiata baitsi jane, pajiwi pibisiacuenia baracuaicuajai tsane Espíritu Santo, bajarapaneconi Dioso apowecua-ajibia-exanaetsi tsane daxitamatacabijawabelianexa», pacajaitsi —jai Jesús fariseowijawabelia.

Pe-ubinaenë nayapëtane pawirianaecuene, itsa nacuaita

(Lc 6:43-45)

³³ Icatsia, Jesús jumaitsi fariseowijawabelia:

—Pexaniawirianaenë itsa ubatsi, nacuaita pijinia pexaniacuai. Ponae pijinia pibisiawiriana, nacuaita pibisiacuai. Caewiriana canacujitsia

d 12:30 *caejamatabëcuene apoxainae*: Fariseowi apopejumexaniataexae Jesús, Espíritu Santo pesaëta dowathi jiwiwecua pecapitsapabiabijawa, naexana pijawajabitsaëwi. Nexata, caejamatabëcuene apoxainae Jesús-jawabelia. **e 12:31** *pajumaitsimë*: Fariseowi pibisiacuenia baracuaicuajai Espíritu Santo, tsipaji Jesús yabara jumaitsi tsabiabi: «jiwiwecua dowathi capitsapabiaba Beelzebú pesaëta», jai tsabiabi. Bajarapacuenia pejumaitsiax, bajarapamona bitso pexaniacuena wënëxaniatabiaba Satanás, Espíritu Santowecua.

yapëtanetsi pijawirianaecuaio. ³⁴ Xanë itsiata, pacacueneyapëtanetsi panejamatabëcuenejêpaejawa jomo, bitso pianaejanaewi. Nexata, xua pacujarubame jiwijawabelia, bitso piataneliwaishi, pacuenia jomo xaina pecuaibowojotota piatanejawa. Bajara-itsi panetsipaebiliwaishi. Pane-ajamatabëcuenebejewixae, apopacacaejêpae panecuaicuaijainexa pexaniacuene yabara. Pajamatabëcuene bêpênê panajamatabëxainame panejamatabë-êthëtota, panecuaicuaijaijajawata capitsapa panecuaibowojotuatsina. ³⁵ Ponê pijinia pexaniajamatabëcuenenê, pexaniacuene yabara cuaicuaijai, tsipaji pexaniajamatabëcuene xaina pejamatabë-êthëtota. Ponê pijinia pibisiajamatabëcuenenê pibisiacuene yabara cuaicuaijai tsa-biabi, tsipaji pibisiajamatabëcuene najamatabëxaina pejamatabë-êthëtota. ³⁶ Xaniajanê pacuenia pacatsipaebijitsiatsi. Pamatacabi Dioso naneconitsia-exanaena daxita pijaneconi pexainaewi, caejiwi canacujitsia, najumewajunupaebaponaena pibisiacuena pecuaicuaijajawa yabara. ³⁷ Itsa pijinia pibisiacuena pacuaicuaijamê pananeconitsianame. Pexanialiwaishi itsa pacuaicuaijamê tsabiabi tsane, nexata pa-aneconijibimê tsane Diosojawabelia —jai Jesús fariseowijawabelia.

**Jesús pejume-aebiwiitsi, itorobatsi picani Dioso pesaëta
pinijicuene petsita-exanaejawanexa**

(Mc 8:12; Lc 11:29-32)

³⁸ Bajarapacuenia pejumetaexaetsi, fariseowi, judiowi pecujarubiwi-ata, jumaitsi Jesús-jawabelia:

—Jesús, pajitsipajê patanetsitajëtsinexamê Dioso pesaëta pinijicuene, patacayapëtaenexa pepacuene Dioso athëbëwetsica peca-itorobinëcuenetsica —jai bajarapamona.

³⁹ Nexata Jesús jumecanawiata mapacueniaje:

—Paxamê bitso pibisiacuene pane-exanaewi. Dioso cajena apopanejamatabëcuene-ewetsiwixae, pane-itorobame picani Dioso pesaëta pinijicuene patacatsita-exanaenexa, pataneyapëtaenexamê Dioso pepacuene athëbëwetsica tane-itorobinëcuenetsica. Itsiata baitsi jane, patanewajëtsicueniamê apopacatsita-exanae tsanetsi. Biji rajane, pacuenia bajayata profeta Jonás-pijinë exanatsi, bajara-ëpitsicuene pacatsitanacuene-itajëtsianatsi. ⁴⁰ Jonás-pijinë bajayata boca pinijidujuainëxaneto pênêta acueyabi pamatacabibeje, acueyabi pamerawibeje yajawa, bajarapijinia pacuenia xanê-ata, Daxitajiwi Pematapijinênê, bocaenajê mëthêta acueyabi pamatacabibeje, acueyabi pamerawibeje yajawa. ⁴¹ Bajarapacuenia neto-exanaena, tsipaji copiapatsiana Dioso penaneconitsia-exanaematacabinexa daxita pijaneconi pexainaewi. Bajarapamatacabi, Nínive tomarapijiwimi nonobapunaena, Diosojawabelia papecaneconitsinexa, apopanenajamatabëcuenepênëyorobixae Diosojawabelia, pibisiacuene pane-exanaejawawecua. Bajayata, bajarapamonaemi itsa jumetane Jonás-pijinë petsipaebiliwaishi, copaba pibisiacuene pexanaejawa. Najamatabëcuenepênëyorobanua Diosojawabelia. Xanê majotaje ponaponajê, bitso ayaijamatabëcuenenênê Jonás-pijinëmi matatoxenetsia. Nexata, pacatsipaebi-atatsi Dioso pejume-liwaishi, itsiata apopanejumexaniataemê. Apopanejamatabëcuenepênëyorobimêna pibisiacuene pane-exanaejawawecua. Bajaraxuata, ayaineconi

paxainame Nínive tomarapijiwimiwecua Diosojawabelia. ⁴² Bajarapamata-cabita pijinia, bajayata peponaponaewami, Saba nacuapijiwi pewetsiwami, nonotapunaena Diosojawabelia papecaneconitsinexa, paxamë bewelia-cuenia patanetaexaemë. Bajarapowa pacaneconitsiana, tsipaji bajayata bajarapowami tajë nacuatabuwerena-ata muxunarena, pejumetaenexa Salomón-pijinë, bitso daxitaliwaishi peyapëtaenëmi, petsipaebiliwaishi. Xanë majotaje ponaponajë, bitso ayaijamatabëcuenenënë Salomón-pijinëmi matatoxenetsia. Nexata, pacatsipaebi-atatsi Dioso pejumeliwaishi, itsiata apopanejumexaniataemë. Apopanenamuxuna-ewetsimënuu. Bajaraxuata, Dioso pacananeconitsia-exanaena —jai Jesús tajëwelia fariseowijawabelia, judíowi pecujarubiwiwajawabelia-ata.

Pacuenia jiwitonë pewecuapitsapaecujinaetsi dowathi, icatsia caewëa nawiarena petsijamatabë-ecaenexatsi, yabara peliwaishi
(Lc 11:24-26)

⁴³ Icatsia, Jesús jumaitsi bajarapamonaewajawabelia:

—Dowathi itsa wejamatabëpitsapa jiwitonë, nexata petsewi-iranëjawa jinaruta, pejaitsinexa pataxunaeta patajopaejitsia, penacuera-ewetsinexa. Itsa apocaxitajarabi, nexata dowathi jamatabëjumaitsi: ⁴⁴ «Nawiatsiana-jë meta icatsia pabomiwerena pitsapajë», jamatabëjai dowathi. Nexata ponëjawawerena pitsapa icatsia caewëalia tsijamatabëjunua. Dowathi itsa nawiarena, caxitajaraba peyajawaponaponaenëmitsi pejamatabë-ëthëto, bepënësajinaebo, bepënëxaniawaetetsibo, bepiracajuetetsibo-ata. ⁴⁵ Nexata, dowathi icatsia siwaponas itsadowathiwi, itsa siete ponëbeje. Bitso piacujirubejewi copiya padowathinë matatoxenetsia. Daxita bajarapamona pebi tsijamatabëjunuatsi peyajawaponaponaenexa. Belia jane baja, pebi bitso bejiobia-exanatsi, copiyapijinëwecua matatoxenetsia. Bajarapijinia pacuenia, pacatocopiapatsiana paxamë pane-ajamatabëcuenenebejewi, patanejume-taewimë^f —jai Jesús fariseowijawabelia, judíowi pecujarubiwiwajawabelia-ata.

Jesús pejuyapijiwi, pena yajawa, nubena bojumapënëjawawelia, pebarëcuaicuajainexatsi
(Mc 3:31-35; Lc 8:19-21)

⁴⁶ Paepatota Jesús abaxë jiwi liwaishi tsipaeba bo-ënëtuatuajëalia, pata Jesús pejuyapijiwi, pena yajawa. Nexata, bojumapënëjawawelia nubena bajarapamona. Jamatabëbarëcuaicuajaitsi picani Jesús. ⁴⁷ Nexata itsajiwi Jesús jumaitsi:

—Patajatuxanenë, ena raja, nejuyapijiwi yajawa, nuca bojumapënëjawawerena. Jitsipa pina pecabarëcuaicuajaijawa —jai Jesús-jawabelia.

⁴⁸ Nexata Jesús jumaitsi petsipaebijiwitsijawabelia:

—¿Detsa powa nexata taena? ¿Detsa pamona nexata tajuyapijiwinua? —jai. ⁴⁹ Bajarapejumaitsiyawata pecobeta itaropita pijajiwiwajawabelia. Jumaitsi:

^f 12:45 *patanejumetaewimë*: Bajarapamona pejumetaexae Jesús petsipaebiliwaishi, nexata matatoxenetsia naneconita Diosojawabelia, apocejumexaniataexae bajarapaliwaishi. Baitsi, pacuenia jiwitonë peyajawaponaponaenë ocho ponëbeje dowathiwi ayaicuenia bepejiobicueneta ponapona, bajarapijinia pacuenia bajarapamona matatoxenetsia bepejiobicueneta jinawana-paena apopewerewerecae-isotojawata, apocejumexaniataexae Jesús peliwaishi.

—Mara jane pamonaē taenajiwije, tajuyapijiwinua. ⁵⁰ Baitsi, pajiwi exana taxa, athēbētatsia pe-ecaenē, pitorobicueniatsi, bajarapajiwi⁸ cajena tajuya-pijinē, tajuyapijiwa, taenanua —jai Jesús petsipaebijiwitsijawabelia.

**Jesús liwaisi petsipaebijawata, caecuenia
canacueneba siete pacuenecataeliwaisibeje**

**Jesús tsipaeba jiwijawabelia pecuenecataeliwaisi,
pabi pe-ubinē peliwaisicuenia**

(Mc 4:1-9; Lc 8:4-8)

13 ¹ Jesús baja itsa najumewereta jiwijawabelia liwaisi petsipaebijawa, pitsapa baja bajarapabowecua, peponaenexa Galilea pucaxanetojawabelia. Pepatsicujinae, ecojopa bajarapapucaxaneto-itapata. ² Bajarajota, jiwi ayaibitsaētozaneto itaxutuanacaetuanatsi. Nexata, Jesús runareca jera-ēnēabereca, pe-ecaenexa. Daxita jiwibitsaētozaneto nubena tajetabowelia. ³ Nexata Jesús daxitacueneliwaisianē tsipaeba pecuenecataeliwaisianēcuenia. Jesús pepaebijawa taxuxuaba pabi pe-ubinē peliwaisi mapacueniaje: —Pe-ubinē pona pabiabelia pe-ubinea. ⁴ Pabita pepatsicujinae, ubana-jetaruca pexucayajabajarabicuenia. Nexata, itsaxu othopa pabituatujā-jawa penajetarucaenamutojumata. Bajarapaxu tsiwēpata baratsui. Xane juwinejewa. ⁵ Itsaxu pijinia othopa ibopananējumata, itsajota bitso ira apo-aitayaē. Bepijia picani juwa. ⁶ Itsiata, itsa icotia bitso ataju, bajara-paxu juwi-ata, tsaquenapona, tsipaji irabereca bitso apo-atabunepepiareca. ⁷ Itsaxu pijinia othopa pa-irajawata xaina bēpēnē pe-ejuwijawanē pejuwinea. Nexata, pe-ubixu, pe-ejuwijawanē-ata, caecuenia peyajawajuwixae, bitso matakēnēnatsi pe-ubijawanēmi. ⁸ Itsaxu pijinia othopa pexania-irata. Bajarapaxu pejuwicujinae, xaniawaetsia nacuita. Itsabotonē capitsapa cien paxutoyobeje tsaponae, itsabotonē sesenta paxutoyobeje tsaponae, itsabotonē-ata treinta paxutoyobeje tsaponae. ⁹ Patacatsipaebiliwaisi, pajiwi jamatabēnejumeyapētane, nenamuxuna-ewetsi xaniawaetsia —jai Jesús petsipaebijiawabelia.

**Jesús xaniawaetsia tsipaeba pijajiwijawabelia xua yabara
canacueneba pecuenecataeliwaisianē**

(Mc 4:10-12; Lc 8:9-10)

¹⁰ Jesús pijajiwi imoxoyotatsi peyanijobinexatsi. Jumaitsi mapacueniaje: —Patajatuxanenē, jiwijawabelia liwaisi itsa tsipaebame, ¿detsa xuajitsia ēpecuenecataeliwaisianēcuenia tsipaebabiabame? —jai Jesús pijajiwi.

¹¹ Nexata, Jesús jumaitsi pijajiwijawabelia:

—Paxamē rabaja, Dioso papijajiwixaemē, pacatocopata paneya-pētaejawa muetsia pexainabuatsiliwaisimi, bajaraPonē, athē-bētatsia pe-ecaenē, papecyanacua-ewetsijawa yabara. Itsiata,

g 12:50 *bajarapajiwi*: Jesús beweliacuenia apotae picani pena, pejuyapijiwi-ata. Asiwa bitso. (Taema Jn 19:26.) Majotaje yapētaeya-exana pacuenia pajiwi exanaponapona Jesús paxa pejitsi-paecuenia, bajarapajiwi asiwajitsia pena, pejuyapijiwi-ata piasiwacuenia, benacaemonaecuenia penataexae.

itsamonaē apoyapētaēya-exanaetsi bajarapacuenē. ¹² Pajiwi xaniawaetsia nenamuxuna-eweta tatsipaebiliwaisi, bajarapajiwi jumeyapētaena. Nexata, Dioso tocopatsianatsi pematatsēnēa peyapētaeponaenexa. Itsiata, pajiwi aponenamuxuna-ewetsi tsane tatsipaebiliwaisi, bajarapajiwi xaniawaetsia apojumeyapētaē tsane. Nexata, Dioso tocopatsianatsi penacofēnētsinexa, xuayowajēto jumeyapētane picani. ¹³ Bajaraxuata, liwaisi itsa tsipaebajē bajarapamonaē, pecuenecataeliwaisianēcuenia paebajē, tsipaji namuxuna-ewetsi-ata tatsipaebiliwaisi, itsiata apojumeyapētaecapanepae pajamatabēcuenē xaina. Necuenetaē-atanua Dioso pesaēta pinijicuenē ta-exanaejawa, itsiata apoyapētaecapanepae pajamatabēcuenē yabara exanajē. ¹⁴ Bajara-pacuenia itsa exana, copiapata jane baja, bajayata tajēwelīa Dioso jumepaebiniē, profeta Isaiās-pijiniē paliwaisi yaquina bajarapamonaē yabara. Jumaitsi mapacueniajē:

«Bajarapamonaē picani jumetaena. Itsiata, apojumeyapētaē tsane xua yabara tsipaebianatsi. Bajarapamonaē taena picani. Itsiata, apoyapētaē tsane pajamatabēcuenē xaina petaejawata.

¹⁵ »Bepijaiyo apojumeyapētaē tsane, tsipaji ajamatabēcuenetaja tsane. Bepenamuxu-acabiwi tsane, pejumetaeyaniwa tatsipaebiliwaisi. Bepewecua na-itaxutotsaquebiwi tsane, petaejaniwa ta-exanaecuenējawanē. Bajarapejamatabēcuenē-itsitsawanapaexae, xua taena, apoyapētaē tsane pajamatabēcuenē xaina. Paliwaisi jumetaena, apojumeyapētaē tsane pejamatabē-ēthētojawawetsina. Nexata, xanējawaberena aponajamatabēcuenepēnēyorotsi tsane pijaperujumatabēcuenewecua. Xanējawaberena itsa najamatabēcuenepēnēyorotsipa, nexata jamatabēcuenexanepanaēya-exanaejitsipajē bajarapamonaē»,^h jai bajayata tajēwelīa Isaiās-pijiniē peyaquinaeliwaisita, bajarapamonaē apopejumetaejawanexa yabara.

¹⁶ »Itsiata baitsi jane, paxamē baja pajamatabēcuenēbarēyamē, tsipaji payapētaneme pajamatabēcuenē xaina xua pataneme. Pajumeyapētanemēnua pajamatabēcuenē xaina paliwaisi pajumetaneme. ¹⁷ Xaniajanē pacuenia pacatsipaebijitsiatsi. Bajayatami ayaibitsaēto Dioso jumepaebiwimi, profetawī, itsamonaē-ata Dioso pejitsipaecuenia pejinawanapaewi, necopia-ewetawanapa tanetaenexa picani tapatsijawatsica. Itsiata, aponetaenējewa daxita bajarapamonaemi tēpa baja. Jamatabējumetaeyabianua picani paliwaisianē baja aeconoxae paxamē pacatsipaebaponatsi. Itsiata, bajarapamonaemi apojumetaenējewa bajarapaliwaisianē, tēpa baja —jai Jesús pijajiwijawabelia.

Jesús yapētaēya-exana pijajiwi pajamatabēcuenē xaina pe-ubiniē peliwaisi
(Mc 4:13-20; Lc 8:11-15)

¹⁸ Icatsia, Jesús jumaitsi pijajiwijawabelia:

—[Xaniawaetsia panenamuxuna-ewere, panejumeyapētaenexa pajamatabēcuenē xaina paliwaisi pacatsipaebatsi, pabita pe-ubiniē peliwaisicuenia!

¹⁹ Pamonaē jumetaē-ata tatsipaebiliwaisi Dioso, athēbētatsia pe-ecaenē, pijajiwi peyanacua-ewetsijawa yabara, itsiata, itsa apojumeyapētaē, nexata

dowathi najetaruca pewecuapitsinexa pejumetaeliwaisimi, penacofënëtsia-exanaenexatsi. Bajarapamonae jamatabëcuenejêpa bepe-othopaexutonë namutojumata, piataja-irajawata. ²⁰Itsamonae pijinia jamatabëcuene-jêpa bepe-othopaexutonë ibopananëjumata, itsajota bitso ira apo-aitayaë. Nexata bepjiayo juwa. Bajaratsijamatabëcuene-itsitsi itsamonae tatsi-paebiliwaisi yabara. Pejumetaejawata, bepjiayo picani siwajamatabë-cuenebarëya. ²¹Itsia baitsi jane, paxu juwa itsajota ira apo-aitayaë, irabereca apo-atabunepepiareca, tsaquenapona bepjiayo piatajujawata, bajaratsijamatabëcuene-itsitsi bajarapamonae. Jamatabëcuenebarëyaya jumetae-ata, apo-ajamatabëcuenesaë tsawanapae piasiwajawa bajarapaliwaisi, tsipaji pepacuene apojumexaniatae pejamatabë-ëthëtowetsina. Nexata itsa tocopiapatatsi daxita piayapëbejecuene, itsa yaliwaisibat-sinua tatsipaebiliwaisi yabara, nexata bepjiayo copaba piasiwajawa bajarapaliwaisi.

²²»Paxu pijinia othopa pa-irajawata xaina bëpënëa pe-ejuwijawanë pejuwinexa. Pejuwicujinae, bitso matacënënatsi pe-ejuwijawanë. Bajaratsijamatabëcuene-itsitsi itsamonae tatsipaebiliwaisi yabara. Jume-tane picani bajarapaliwaisi. Itsia baitsi jane, bitso jamatabëcuene-cënënatsi mapanacuapijicuenejawanëje, pejitsipaexae-ata ayaijawa palata pexainaenexa. Nexata, tatsipaebiliwaisi juwi-ata pejamatabë-ëthëtota, apojamatabëcuenexanetsitsi pijaperujumatabëcuenewecua. Pacuenia pabita pe-ubibotonë acuaijibi pe-ejuwijawanë pematacënë-naexaetsi, bajaratsijamatabëcuene-itsitsi pamona, jamatabëcuenece-nënatsi mapanacuapijicuenejawanëje Dioso pijacuenejawanëwecua. ²³Pacuenia pijinia pexania-irajawata pejuwixu nawitsia nacuitabiaba, bajaratsijamatabëcuene-itsitsi pamona xaniawaetsia jumetane, jume-yapëtanenua tatsipaebiliwaisi. Nexata, pewajënaeyabelia jamatabëcuenexa-netaponatsi pijaperujumatabëcuenewecua, pexanawanapaenexa Dioso pejitsipaecuenia, pacuenia pexania-irata pejuwibotonë capitsapa cien paxu-toyobeje, sesenta paxutoyobeje, treinta paxutoyobeje-ata tsaponae —jai Jesús pijajiwajawabelia.

**Jesús tsipaeba jiwijawabelia pecuenecataeliwaisi, trigoxu
pe-ubituatujêjawa peto-ubijawatsi pibisiawirijawa peliwaicsicuenia**

²⁴Icatsia, Jesús itsa pecuenecataeliwaisi tsipaeba tajetabota penubenaewijawabelia. Jumaitsi mapacueniaje:

—Dioso, athëbëtsia pe-ecaenë, pijajiwi peyanacua-ewetsijawa yabara cuenejêpa pabi pexainaenë, pe-ubijawa pexaniawiriatrigoxu pijapabita. ²⁵Itsia baitsi jane, pamona penacuenebiwi pemajitsijawata, pabi pexainaenë pijawajabitsaenë tojunuatsi pijapabijawata. Nexata, trigotuatujêjawa to-ubatsi pibisiawirijawanë, pejëpaejawanë trigobotonë. Bajaraxuacujinae, wemaxëpona baja. ²⁶Nexata trigo juwa baja. Witsabanua. Itsa baja trigobotonë namatonota, nexata, matapania bajarajota nayapëtane pibisiawirijawanë peyajawanamatonotsijawa. ²⁷Nexata pabi pexainaenë pijajiwi pata petsipaebinexatsi. Bajarapamonae jumaitsi: «Nijapabita ubame ëpexaniawiriatrigoxu. ¿Detsaeta pacuenia pitsapa trigojawata, peyajawajuwinexa pibisiawirijawa?», jai bajaraponë pijajiwi. ²⁸Nexata,

pabixainaenē jumaitsi: «Tajawajabitsaēnē raeta bajaraxua uba», jai. Nexata, pijajiwi jumaitsitsi: «¿Jitsipame tsaja bajaraxua pataxunaejawa?», jai. ²⁹ Itsiata baitsi jane, pabixainaenē jumaitsi: «Jume, tsipaji panexunaejawata payajawaxunaejitsipame trigobotonē. ³⁰ Copatsianatsi abaxē penacuaitsinexa. Nexata penotsimatacabi itorobianajē tanetonotsiwi copiaya pecaetuatsinexa pibisiawiriajawanē. Pepacunuanē exanaena. Bajaraxuacujinae, bajaraxua tajuitsiana. Bajaraxuacujinae, ētrigoxu netonotsiana, ⁱ ta-etabiabibota taneto-etsinexa», jai pabixainaenē pijajiwi jawabelia —jai Jesús jiwi ayaibitsaēto xaneto jawabelia.

**Jesús tsipaeba jiwijawabelia pecuenecataeliwaisi,
bepijiayo pewitsabijawa mostazanaemēyo peli waisicuenia**
(Mc 4:30-32; Lc 13:18-19)

³¹ Icatsia, Jesús itsapecuenecataeliwaisi tsipaeba tajetabota penubenaewi jawabelia. Jumaitsi mapacueniaje:

—Pabita mostazaxuto pe-ubicujinae, bepijiayo witsaba, penaexanaenexa pepamēyo. Bajarapijina pacuenia, Dioso, athēbētatsia pe-ecaenē, peyanacua-ewetsijawa pijajiwi, bepijia witsabaponaena. ³² Mostazaxu raja bitso tsiquirixutoxi daxitawiria pane-ubixuwecua. Itsiata baitsi jane, pejuwicujinae, bepijia witsaba, penaexanaenexa pinijinaemē itsapeubijawanēwecua. Nexata, baratsui pata bajarapanaemēanē pemaxērananējawata, pematapenanē pexanaenexa. Bajarapijina pacuenia, Dioso pijajiwi, tsiquiribitsaētoyocuenia taxuxuabi-ata tsane, bepijiayo ayaibitsaēto naexanaena, Dioso peyanacua-ewetsimatacabita —jai Jesús jiwi ayaibitsaēto xaneto jawabelia.

**Jesús tsipaba jiwijawabelia pecuenecataeliwaisi, pan pexanaematabēnexa,
levadura pefufunaeya-exanaejawa peli waisicuenia**
(Lc 13:20-21)

³³ Icatsia, Jesús itsapecuenecataeliwaisi tsipaeba tajetabota penubenaewi jawabelia. Jumaitsi mapacueniaje:

—Dioso, athēbētatsia pe-ecaenē, pijajiwi peyanacua-ewetsijawa, cuenejēpa petiriwa pecanacuenebijawa levadura pexainaematabēyo, pematajerēatsijawa acueyabi patarrobejepijijawa trigobenonē pexanaematabē. Nexata, pacuenia levadura pexainaematabēyota, pematajerēatsijawata yacaejēpa daxita bajarapamatabējawabelia pefufunaeya-exanaenexa, bajarapijina pacuenia liwaisi yacaejēpaena daxita nacujawa, pijajiwi caejiwiyobeje pae banajetarubena-ata Dioso, athēbētatsia pe-ecaenē, pijajiwi peyanacua-ewetsijawanexa —jai Jesús jiwi ayaibitsaēto xaneto jawabelia.

i 13:30 *ētrigoxu netonotsiana*: Mapaliwaisije Jesús tsipaeba Dioso pijajiwi peyanacua-ewetsijawa yabara. (*Pibisiawiriajawanē nacatocueneccatane Dioso peli waisi pejume-aebiwi; trigoxu pijinia Dioso peli waisi pejumexaniataewi.*) Mapanacuata najuajinawanapa Dioso peli waisi pejumexaniataewi, pejume-aebiwi yajawa. Itsiata, pamatacabi Dioso taxuxuabiana peyanacua-ewetsijawa mapanacuataje, bajarapamatacabita caetuatsiana daxita pamona pejume-aebiwi pexuabinexa apopewerewerecae-isotopucujawabelia. Pamona pijinia pejumexaniataewi caetuatsiana pebarē-jonenexa Dioso peyanacua-ewetsinacujawabelia. Bajarajota, Cristo yanacua-ewetsiana bajarapamona mil pawai bejenexa.

Xua yabara Jesús tsipaebabiaba pecuenecataeliwaisianēcuenia

(Mc 4:33-34)

³⁴ Jesús itsa tsipaeba jiwijawabelia Dioso, athëbëtatsia pe-ecaenë, pijajiwi peyanacua-ewetsijawa yabara, tsipaebapona ëpecuenecataeliwaisianēcuenia. ³⁵ Bajarapacuenia itsa tsipaebapona, copiapata jane baja pacuenia Diosojumepaebinëmi, profetanë, bajayata tajëwelia yaquina Mesías yabara. Peyaquinaebaxutota, profetanë jumaitsi mapacueniaje:

«Jiwi itsa tsipaebajë, liwaisi tsipaebianajë pecuenecataeliwaisicuenia. Tsipaebianajë pitsicuene Dioso nacua pexanaejawaweliacujinae itsajiwi-ata abaxë apoyapëtae»,^j jai tajëwelia bajayata Diosojumepaebinëmi, profetanë, peyaquinaebaxutota.

**Jesús pijajiwi yapëtaeya-exana pajamatabëcuene xaina
trigobotonëtuatujëjawa pejuwijawa pibisiawiriajawa peliwaishi**

³⁶ Penapëjibicujinae tajetabota penubenaewi, Jesús boya joneya. Bajara-pabota Jesús pijajiwi imoxoyorenatsi, peyanijobinexatsi. Jumaitsi:

—¡Patajatuxanenë, panetsipaebare pajamatabëcuene xaina paliwaishi tsipaebame pibisiawiriajawa pejuwijawa trigobotonëtuatujëjawa! —jai Jesús-jawabelia.

³⁷ Nexata, Jesús jumaitsi pijajiwi jawabelia:

—«Ponë uba pexaniawiriatrigoxu», itsa janë, xanë rabaja, Daxitajiwi Pematapijinënë, nayabarajanë. ³⁸ «Pijapabi», itsa janë, mapanacua yabaraje, janë. «Pexaniawiriatrigoxu», itsa janë, Dioso, athëbëtatsia pe-ecaenë, pijajiwi peyanacua-ewetsijawa yabara, janë. «Pibisiawiriajawa pejuwijawa», itsa janë, dowathi pejitsipaecuenia pexanawanapaewi yabara, janë. ³⁹ «Pabixainaenë pijawajabitsaënë», itsa janë, dowathi yabara, janë. «Penotsimatacabi», itsa janë, mapanacua pewerewerecaematacabijawanexa yabara janë. «Tane-tonotsiwi», itsa janë, ángelewí yabara janë. ⁴⁰ Nexata, pacuenia pibisiawiria-jawanë caetuata pexuabinexa isotojawabelia, bajarapijinia pacuenia itorobianajë tajajiwi, ángelewí, pecaetuatsinexa dowathi pijajiwi, pexuabinexatsi apowerewerecae-isotojawabelia^k mapanacuaje pewerewerecaematacabi. ⁴¹ Bajarapamatacabi, Xanë, Daxitajiwi Pematapijinënë, itorobianajë taja-ánglewí peponaenexa daxita tayanacua-ewetsinacuajawa, pecaetuatsinexa daxita pamona pibisiacuene pexanabiabiwi, pamona-ata pejamatabëcunebijianaewi itsamonaejawabelia pibisiacuene pexanaeya-exanabiabinexa.

j 13:35 Taema Sal. 78:2; 2Cr6. 29:30. k 13:40 *apowerewerecae-isotojawabelia*: Mapajumeje nacayapëtaeya-exana pibisiacuene pexanawanapaewi, petëpaewimi, pejinawanapaenacua, itsajota nacueratsiajinawanapaëjitsia isoto pejamatabëcuene. Bajarapanacua pewënë «Hades» wowaijumeta. (Taema Lc 16:20-31.) BajarapaHades nacujawabelia pona daxita pamona tëpa Cristojawabelia siwanajamatabëcuenecopabinejewa. Bajarajota, nacueratsiaya jinawanapa pewetsinexa Dioso pecaëjëtsimatacabi penaneconitsia-exanaenexa pepo-isotopucaxanetota daxitamatacabijawabelia. Taema Apoc. 20:11-15.

⁴² Bajarapamonaē xuabianatsi¹ apowerewerecae-isotojawabelia. Bajarajota nuena. Nawonosiniana bitso penawixaetaexae. ⁴³ Itsiata baitsi jane, pamonaē Dioso pejisipaecuenia exanawanapa perabēnaitayotsiana pacuenia matacabipijijumeto cotia-itsi, bajaraperabē-itsi tsane taxa Dioso peyanacua-ewetsinacuata. Pajiwi jamatabēnejumeyapētane xua pacatsipae-batsi Dioso, athēbētatsia pe-ecaenē, pijajiwi peyanacua-ewetsijawa yabara, nenamuxuna-ewetsi xaniawaetsia —jai Jesús pijajiwijawabelia.

**Jesús tsipaeba jiwijawabelia pecuenecataeliwaisi,
jiwitonē pecaxitajarabijawa bitso penamatamotsijawanē,
pematayatabuatsijawami peliwaaisicuenia**

⁴⁴ Icatsia, Jesús itsapecuenecataeliwaisi tsipaeba pijajiwijawabelia:
—Dioso, athēbētatsia pe-ecaenē, pijajiwi peyanacua-ewetsinacuajawabelia pejonejawanexa cuenejēpa bitso penamatamotsijawanē, pebi irata pematayatetsijawa. Bajaraxuanē bobenaē-ata, jiwi apoyapētae. Nexata, juya itsanē bexējajawabelia bajaraxuanē caxitajarabeta irata. Abaxē bajaraponē caecuenia apojutsi bajaraxua. Saya mata-acateta bajarajota, itsanē pija-irajawata pecaxitajarabetsixae. Nexata, bitso penamatamotsijawanēxae, jamatabēcuenēbarēyaya pona pijaboyabelia. Xuacujinae, canajeta daxita pexainaejawaximi, peyacomuatsinexa bajarapa-ira, pecabarēyanexa bajarapapenamatamotsijawanē —jai Jesús pijajiwijawabelia.

**Jesús tsipaeba jiwijawabelia pecuenecataeliwaisi, bitso
penamatamotsiperlawēnjawa peliwaaisicuenia**

⁴⁵ Icatsia, Jesús itsapecuenecataeliwaisi tsipaeba pijajiwijawabelia:
—Pajiwi jaita pejonexa Dioso, athēbētatsia pe-ecaenē, pijajiwi peyanacua-ewetsinacuajawabelia, cuenejēpa ponē pejaitsinē, penatocomuatsinexa bitso pexaniawiriaperlajawanē. ⁴⁶ Nexata, itsa caxitajarabaxuaba pexaniawiriaperlajawa, bitso penamatamotsijawa itsajawanēwecua, pona pijaboyabelia pecanajetsinexa daxita pexainaejawami, penatocomuatsinexa bajarapaperlajawa —jai Jesús pijajiwijawabelia.

**Jesús tsipaeba jiwijawabelia pecuenecataeliwaisi,
dujuai peyamatajucaeja peliwaaisicuenia**

⁴⁷ Icatsia, Jesús itsapecuenecataeliwaisi tsipaeba pijajiwijawabelia:
—Dioso, athēbētatsia pe-ecaenē, pijajiwi peyanacua-ewetsinacuajawabelia, cuenejēpa dujuai bepeyamatajucaeja. Dujuai peyamatajucaeja itsa xuareca meniareca daxitawiria dujuai yamatajut-sina. ⁴⁸ Itsa wēnēca bajaraxua, nexata juta tajetabojawabelia. Bajarajota,

1 13:42 xuabianatsi: Mapajumeje nacayapētaeya-exana pepo-isotopucaxaneto yabara, itsajota Dioso naneconitsia-exanaena daxita pijaneconi pexainaewi, daxitamatacabijawabelia-nexa. Itsawēnē pijinia «cotocaewi patēpae». Maparucaeje apojinawanapae abaxē caejiwiyo-ata petēpaejiwimi pepo-isotopucaxanetota. Ajena pamatacabijawaberena tsiteca pamonaē apopesiwanajamatabēcuenecopabiwi Jesucristojawabelia, petēpaeucujinae ponabiaba Hades nacuata/isotojawabelia. Abaxē bajarapanacuata ewetawanapa Dioso pijaneconi pexainaewi penaneconitsia-exanaematacabijawabelianexa, Cristo peyanacua-ewetsicujinae mapanacuapiji-wije mil pawaije. Taema Apoc. 20:11-15.

itapetapona pawiriadujuai Dioso tocopatatsi pexaenexa. Bajarapadujuai jebapona bemapiřejawabelia. Pawiriadujuai pijinia Dioso jani-itawetatsi pexaeyaniwa xuabapona. ⁴⁹Bajarapijiniä itsi tsane nacua pewerewerecae-matacabi. Ángelewi ponaena, petsataponaenexa pibisiacuenä pexanaewi, Dioso pejitsipaecuenia pejinawanapaewiwecua. ⁵⁰Nexata, pibisiacuenä pexanaewi xuabianatsi apowerewerecae-isotojawabelia. Bajarajota nuena. Nawonosinianua, bitso penawixaetaexae —jai Jesús pijajiwijawabelia.

Jesús tsipaeba jiwijawabelia pecuenecataeliwaisi, bitso penamatamotsijawanë, pejanajawanë, perujujawanë-ata peliwaissicuenia

⁵¹Bajarapaliwaisianë petsipaebicujinae, Jesús yanijoba pijajiwijawabelia. —¿Panejumeyapëtaneme tsabaja daxita xua yabara pacatsipaebatsi? —jai Jesús.

Nexata Jesús pijajiwi jumaitsi:

—Jājā, pacajumeyapëtanetsi rabaja —jai.

⁵²Nexata Jesús jumaitsi pijajiwijawabelia:

—Ponë judíowi pecujarubinë-ata, Dioso penajumecopatsiliwaisi Moisés-pijinëta, itsa jumexaniataena tatsipaebiliwaisi, Dioso, athëbëtatsia pe-ecaenë, pijajiwi peyanacua-ewetsijawa yabara, bajaraponë-ata tajajiwi-tonë tsane. Nexata, pacuenia bo pexainaenë pijabowecua jutapona bitso penamatamotsijawanë, pejanajawanë, perujujawanë-ata, bajarapijiniä jamatabëcuene-itsi tsane pejumexaniataenë bajarapaliwaisibeje yabara. Bajaraponë capitsapaena peyapëtaeliwaisianëwecua, pejanaliwaisianë, xanë taliwaisianë, perujuliwaisianë-ata, Dioso penajumecopatsiliwaisi Moisés-pijinëta, pexaniajailiwaisi petsitajëtsinexa jiwijawabelia —jai Jesús pijajiwijawabelia.

Jesús penawiatsijawa yabara pijanacuayaberena, Nazaret tomaraberena

(Mc 6:1-6; Lc 4:16-30)

⁵³Jesús baja penajumeweretsicujinae jiwijawabelia petsipaebijawa pecuenecataeliwaisianë, pona baja icatsia itsajawabelia. ⁵⁴Nawiata baja pewit-sabinacuayaberena, Nazaret tomaraberena. Nexata, taxuxuaba liwaisi petsipaebijawa judíowi pijasinagogabota.^m Pejumetaewitsi siwajamatabë-cuenenabenajacatsi. Bajarapamonae Jesús yabara najumaitsi mapacueniaje:

—¿Detsaeta jota maponë nacujaruba peyapëtaenexa mapaliwaisije? ¿Detsaeta pacuenia caëjëpatsi mapacuenia Dioso pesaëta pinijicuene pexanaenexaje? ⁵⁵Maponëje carpinteronëmi, Mariabeje, pexë nato. Pejuyapijiwi pijinia, Santiago, José, Simón, Judas. ⁵⁶Daxita bajaraponë pejuyapijiwaxi wajatomarata jinawanapa. ¿Detsa werena nexata capitsapa paliwaisianë nacatsipaebapona maponëje? —najai bajarapamonae Jesús yabara, pecuene-aebixae ayaijamatabëcuenenëcuene.

⁵⁷Nexata, petaxaetsi caetomarata penajuajinawanapaejawa, Jesús petsipaebiliwaisi apomuxujitsipaetsi. Jume-aebatsinua.

Nexata, bajaraxua yabara Jesús jumaitsi bajarapamonaejawabelia:

m 13:54 pijasinagogabota: Bajarapacuenia judíowi wënërubabiaba penacaetuatsibo, itsajota nacujarubabia Dioso peliwaissi caesábado canacujitsia.

—Bajarapacuenia itsi tsabiabi. Daxita nacuanējawa Diosojumepaebiwiimi, profetawi, bayaiyatanetsi Dioso pitorobinētsicuenia. Itsiata, pijanacupapijiwi, pijamona-e-ata, apoyaiyataeyabiabitsi —jai Jesús pijatomarapijiwijawabelia.

⁵⁸ Jesús pijatomarapijiwi pecuene-aebixaetsi, Dioso pesaēta pinijicuene bitso apotsita-exanae.

Juan, jiwibautizabinēmi, pacuenia beyaxuabatsi

(Mc 6:14-29; Lc 9:7-9)

14 ¹ Bajarapamatacabijawa, Herodes, Galilea nacua pewetsinē, Jesús wēnēliwaisitanetsi Dioso pesaēta pinijicuene petsita-exanaponaejawa. ² Nexata Herodes pijajiwi jawabelia jamatabēcuenenawē-xaniabiaya jumaitsi Jesús yabara: «Juan raeta, jiwibautizabinēmi, icatsia asaē petēpaecujinae. Bajaraxuata, caējēpatsi Dioso pesaēta pinijicuene petsita-exanaenexa», jai Jesús yabara. ³ Bajarapacuenia Herodes jumaitsi, tsipaji abaxē Juan-pijinē itsa asaē, bajaraponē pijajiwi, wajabitsaēwi, itoroba Juan-pijinē pewaetabinexatsi, cobecētsiaya pecaponaenexatsi penaneconitsiwi pejebabiabiboyabelia. Bajarapacuenia Herodes pijajiwi itoroba, pijawa, Herodías-wa, peliwaysi-itorobicueniatsi. Bajarapowa picani copiaya pita Felipe, Herodes pejuyapijinē. Itsiata xuacujinae, pejuyapijinē pijawa yacajērēta. ⁴ Bajarapacuenia Herodes pexanaexae, Juan-pijinē abaxē itsa apowaetabitsi, muxujioba bajaraponē jawabelia mapacueniaje: «Acuenebi raja nejuyapijinē pijawa nepitsijawa, tsipaji Dioso penajumecopatsiliwaisi Moisés-pijinēta cuene-itaweta bajarapitsicuene pexanaejawa»,ⁿ jai Juan-pijinē Herodes-jawabelia.

⁵ Bajarapacuenia Juan-pijinē pemuxujiobixae Herodes-jawabelia, jamatabēbeyaxuabatsi. Itsiata bailsi jane, abaxē apobeyaxuabitsi, jiwi pecujunawixae, tsipaji daxitajiwi Juan-pijinē yapētanetsi Diosojumepaebinēcuene.

⁶ Nexata Herodes penaexanaematacabipijifiesta pexanaejawata, junata jiwi ayaibitsaēto. Bajarapafiestamatacabi, pejionēyo, pijawa pexēnatoyo, pijacujirucuenia caewayo yawajiba daxita pejunatsiwi pitabarata. Nexata, Herodes bitso barē-itajitsipa pejionēyo peyawajibijawa. ⁷ Najumecapanepaeya pexaniajaijumeta jumaitsi pejionēyo jawabelia: «Xua saya jitsipame, newajētsianame. Nexata, tanewajētsicueniamē carajutsianatsi», jai Herodes pejionēyo jawabelia. ⁸ Bajarapowayo pena, Herodías-wa, peyanijobicujinae, pitorobicueniatsi jumaitsi mapacueniaje Herodes-jawabelia: «¡Nerajure platota Juan, jiwibautizabinē, pematabocoto!», jai bajarapowayo.

⁹ Bajarapacuenia pejamatsijawatatsi pejionēyo, Herodes bejamatabējiobi tsanajetsireca. Itsiata, acuenebi: «Jume», pejaijawa, tsipaji baja najumecapanepaeya jumaitsi pejionēyo jawabelia pexaniajaijumeta daxita pejunatsiwi pitabarata. Nexata, Herodes jejai. ¹⁰ Nexata, pijajiwi, wajabitsaēwi, itoroba penaneconitsiwi pejebabiabiboyabelia pewēsi-ucutaxuabinexatsi Juan-pijinē. ¹¹ Bajaraxuacujinae, wajabitsaēwi Juan-pijinē pematabocoto tocaparenatsi platota, perajutsinexa Herodes pejionēyo jawabelia. Bajarapowa juya pena rajuta. Nexata baja, Herodías-wa yapētane pepacuene Juan-pijinē pebeyaxuabijawatsi. ¹² Bajaraxuacujinae, Juan-pijinē pijajiwi parena itsajota

boca petëpaenë. Nexata baja, pitatsi petëpaenë, pemëthëtsinexatsi. Baja-raxuacujinae, bajarapamonae pona Jesús-jawabelia petsipaebinexa Juan-pijinë pebeyaxuabiliwaisitsi.

Jesús pexaejawa rajuta cinco mil ponëbeje

(Mc 6:30-44; Lc 9:10-17; Jn 6:1-14)

¹³ Jesús itsa wënëliwaisitane Juan-pijinë pebeyaxuabijawatsi, ëpijajiwi jerata barëpona itsabelia ajibi jiwi. Itsiata bailsi jane, jiwi ayaibitsaëto-xaneto yapëtane itsabelia Jesús pona. Nexata, pijatomaranë wecuapona. Matatsënëa najetarubena pepëjaitsiwitsi Jesús. ¹⁴ Itsa Jesús nonotajuna jerawecua, tane jiwibitsaëto-xaneto, pepatsijawa pewajënaeya. Itaxutobe-jibiatane bajarapamonae. Nexata tojamatejemaya-exana pamona capata piawitanewi. ¹⁵ Itsa baja caniwio tsaponae, Jesús pijajiwi cujibarenatsi pejumaitsinexatsi:

—Caniwio rabaja bitso. Majotaje ajibi pexaejawa, tsipaji itsajiwi-ata pijabo apoxinae. ¡Itorobare baja jiwi peponaenexa tomaraxijawabelia, pecomuacaenexa pexaejawa! —jai Jesús pijajiwi.

¹⁶ Nexata, Jesús jumaitsi bajarapamonaejawabelia:

—Aponamatawenonae picani abaxë peponaejawanexa. ¡Paxamë parajure pexaejawa! —jai pijajiwijawabelia.

¹⁷ Nexata, Jesús pijajiwi jumaitsi:

—Paxainajë saya cinco papan-bëbeje, anijadujuainëyobeje yajawa —jai.

¹⁸ Nexata, Jesús jumaitsi pijajiwijawabelia:

—¡Panetocarenamëre bajarapapan-bëanë maberenaje, dujuainëyobeje yajawa! —jai Jesús.

¹⁹ Nexata, Jesús itoroba daxitajiwi pe-enaenexa ponajawata. Bajaraxuacujinae, pita cinco papan-bëbeje, anijadujuainëyobeje yajawa. Athëbëa benaë-cotsia. Jumaitsi Diosojawabelia: «Pexaniacuene paneto-exaname. Panerajutame pataxaejawa», jai Diosojawabelia. Bajaraxuacujinae, Jesús pan-bëanë epatsënëcapona, perajutaponaenexa pijajiwijawabelia. Nexata, juya Jesús pijajiwi tsicobetsana jiwijawabelia. ²⁰ Daxita xaniawaetsia xane. Bajaraxuacujinae, Jesús pijajiwi caetuata pan, dujuai yajawa, jiwi peyajuwënëcoba-bejebijawanë. Nexata, wënëba doce xuabeje pecuejawanë beyoxobocuenia. ²¹ Pamona pexaejawa xane, ayaibitsaëto-xaneto; cinco mil ponëbeje, ëpebi-jiwi, namata-ëjëtsinejewa petiriawi, pejewaxi-ata.

Jesús mene-itaboxoya najetaruca

(Mc 6:45-52; Jn 6:16-21)

²² Jesús jiwi ayaibitsaëto-xaneto pexaejawa perajutsicujinae, pijajiwi bepijia runaeya-exanareca jera-ënëabereca. Copiata itoroba penicabinexa puca itsapanabelia, Betsaida tomarabelia. Nexata bajaraPonë abaxë caenë nacopatanuca bajarajota, penapëjiobinexa bajarapajiwibitsaëto-xanetoja-wabelia. ²³ Itsa baja jiwi napëwereta penawiabijawa, Jesús junaya petsuto-jumabetsia, caenë pewajëtsinexa Diosojawabelia. Nexata, yamerawibatsi bajarapatsutojumatsia. ²⁴ Bajarapaepatota, Jesús pijajiwi jerata epatuaanabuatapona, pepatsinexa puca itsapanabelia. Nexata pewajënaewerena jowiboxaneto najetaruca. Malataca bitso ayai. Pemene-epabajarabaponaexae

jera-ënëaberena, mera wënëcapona. ²⁵ Bajaraxuacujinae, pepobajayacunua, ajena matcabitsina, Jesús pijajiwi pecowëwelia pë-imoxoyotanajetaruca, mene itaboxoya. ²⁶ Bajarapamonae itsa tanetsi mene-itaboxoya penajetaru-caejawa, nabenajaca. Wawajai pecajunawi.

—¡Petëpaenë raeta pejumape najetaruca! —najai Jesús pijajiwi.

²⁷ Nexata, Jesús jumaitsi pijajiwijawabelia:

—¡Xanë raja! ¡Pëtsa panecujunawame! ¡Pajamatejemamëre saya! —jai Jesús pijajiwijawabelia.

²⁸ Nexata, Pedro jumaitsi Jesús-jawabelia:

—Tajatuxanenë, itsa pepacuene xamë, nexata nejunaremelia, talianexa mene-itaboxoyalía xamëjawabelia —jai.

²⁹ Nexata, Jesús jumaitsi Pedrojawabelia:

—¡Renamëre baitsi baja! —jai.

Pedro nexata jerawecua runareca meniabereca. Lia baja mene itaboxoyalía, pepatsinexa Jesús-jawabelia. ³⁰ Itsiata baitsi jane, Pedro itsa tane jowibo piasaëjawa, bitso cujunawataba. Nexata, bubunanajereca. Pedro ajena bubunanajereca, wawajai tsaxuabi Jesús-jawabelia.

—¡Tajatuxanenë, newaetabare! —jai Pedro.

³¹ Bepijia Jesús cobepitajaraba. Jumaitsi Pedrojawabelia:

—Tsiquirijawayo saya xanëjawaberena nitaxutuajamatejemamë taca-ewetsijawa. ¿Detsa xuajitsia necuene-aebiataneme? —jai Jesús.

³² Nexata baja, Jesús, Pedrobeje, jera-ënëabelia itsa nonoliabeje, jowiboxanetomi baja ajibi tsaxuabi. ³³ Nexata, daxita jerata peponaewi pematocabëta tonubena Jesús pitabarata. Jumaitsi bajarapamonae:

—Xaniajai rabaja. Xamë Dioso pexënatomë —jai Jesús-jawabelia.

Jesús jamatejemaya-exana piawitanewi Genesaret nacuata

(Mc 6:53-56)

³⁴ Jesús, pijajiwi yajawa, pata puca itsapanabelia, Genesaret nacuata.

³⁵ Bajarapanacuapijiwi itsa yapëtanetsi Jesús-cuene, nexata daxita bajarapanacuajawa wajunupaebatsi. Nexata, tocapatatsi daxita piawitanewi Jesús-jawaberena. ³⁶ Piawitanewi pecapatsiwi napëna jumaitsi Jesús-jawabelia:

—¡Pexaniacuene bitso neto-exanare! Tocopatsianame maponëje pecato-jayatsinexa nenaxatatsicopijawa —jai tsabiabi.

Nexata, daxita pamonaë Jesús penaxatatsicopijawa tojayataponatsi, jamatejema tsaponae caecuenia piawitanewiawawecua.

Jesús yapëtaeya-exana xua jiwi bitso jamatabëcuenebijianatsi

(Mc 7:1-23)

15 ¹ Bajarapaepatota, itsamonae fariseowi, judíowi pecujarubiwi yajawa, Jerusalén tomarawerena pepatsiwi, Jesús imoxoyorenatsi. Nexata bajarapamonae jumaitsi Jesús-jawabelia:

² —Jesús, ¿detsa xuajitsia nijajiwi jumecowënëtsia-apojinawanapae wajasalinaíwi pijacujirucuenia? Bajarapamonae xane pexaejawa, anijatonë napëna nacobequiatsinejewa. Nexata, bepenaxuirabiwi tsawanapae Dioso pitabarata —jai.

³ Nexata, Jesús jumaitsi bajarapamonaejawabelia:

—¿Jica jane paxamē? ¿Detsa xuajitsia paxamē apopajumecowēñetsimē Dioso penajumecopatsiliwaisi Moisés-pijinēta, saicaya wajasalinaliwi pija-cuene panecatsitecaenexa? ⁴ Dioso penajumecopatsiliwaisi Moisés-pijinēta naca-itoroba mapacueniaje: «¡Axa, ena-ata yaiyataema! ¡Pajiwi apopeyaya-taexae paxa, pena-ata, pibisiacuenia bijatane, bajarapajiwi pabeyaxuare!», jai. ⁵ Bajarapacuenia Dioso pejumeliwaisi jumaitsi-ata, paxamē itsiata, jiwi pamuxubijipenetabiabame peyayataeyaniwa paxajiwi, penajiwi-ata. Paju-maitsimē tsabiabi mapacueniaje: «Axa, ena-ata, itsa cawajēta neyawenonae-nexa, nexata itsa apojitsipaemē neyawenonaejawawa, jumaitsimē tsane mapacueniaje: ‘Xua picani pajitsipamebeje patacayawenonaeenexabeje, daxita bajaraxua natocaējētajē baja tarajutsinexa Diosojawabelia. Nexata baja, acuenebi patacayawenonaeenexabeje,’ jamē tsane neyawenonaeayaniwa, axa, enabejējawabelia», pajamē tsabiabi. ⁶ Bajarapacuenia nenatocaējētsijawata nerajutsijawanexa Diosojawabelia, nexata apocatsicaruaē tsane axa, ena-beje, neyayataejawa neyawenonaejawata», pajamē tsabiabi jiwijawabelia. Itsiata baitsi jane, xanē pacatsipaebatsi bajarapacuenia panemuxubiapene-tsijawata pajume-amatamobia-exaname xua Dioso nacato-itoroba, «¡Axa, ena-ata, yaiyataema!», pejailiwaisi, juya panejumecowēñetsia-exanaenexa wajasalinaliwimi pena-ewetsiliwaisi. ⁷ ¡Paxamē ra saya beDioso panejume-cowēñetawanapaewi itajara! Bajaraxua yabara profeta Isaías-pijinē, baja cajena bajayata tajēwelía xaniawaetsia pacawajunupaeba. Peyaquinaeliwai-sita jumaitsi paxamē yabara mapacueniaje:

⁸ «Dioso jumaitsi: ‘Bajarapamonae neyayatatane saya pejumeta. Itsiata, newecuatajē tsane pepotanejitsipaejamatabēcuene.

⁹ ‘Nexata, xua newēñexaniatawanapa, penajamatabēcuene-itajētsinexa taneyayataejawa, bajaraxua daxita to-amatamobitsi, tsipaji jiwi pecanaējētsijamatabēcuenia exanawanapa, xanē betaitorobicuenia,’ jai Dioso», jai tajēwelía profeta Isaías-pijinē Dioso pejumewajunupaebijawata —jai Jesús fariseowijawabelia, judfowi pecujarubiwiwawabelia-ata.

¹⁰ Nexata, Jesús junata jiwi pimoxoyotsinexatsi. Jumaitsi bajarapamonaejawabelia:

—¡Panenamuxuna-ewere, xaniawaetsia patanejumeyapētaenexamē pata-catsipaebiliwaisi! ¹¹ Xua jiwi xane pecuaibowojotota, apojamatabēcuenebi-jianaetsi. Pexaewajēnaeya napēna anijatone aponacobequiatsi-ata, apowe-maxēnaneconitsi Diosojawabelia. Biji rajane, xua jiwi pejamatabē-ēñētota najamatabēxaina, capitsapa pecuaibotuatsina, pibisiacuenia pecuai-cuaijainexa, bajarajane xua jiwi bajamatabēcuenebijianatsi —jai Jesús bajarapamonaejawabelia.

¹² Nexata, Jesús pijajiwi imoxoyorenatsi, peyanijobinexatsi. Jumaitsi:

—Patajatuxanenē, ¿yapētaneme tsabaja fariseowi pecabara-anaepanaejawa, itsa cajumetane bajarapacuenia nejumaitsijawa? —jai Jesús pijajiwi.

¹³⁻¹⁴ Nexata fariseowi yabara Jesús jumaitsi pijajiwiwawabelia:

—¡Panamuxujemare saya, tsipaji raja apoyapētae bajarapamonae! Bepi-tatsēcēnaewi Dioso pijacuenejawalia. Bajaraxuata, bajarapamonae bepe-matacaponaewi itsapitatsēcēnaewi. Nexata, pacuenia pitsatsēcēnaenē

pematacaponaejawata itsapitatsēcēnaenē, najuajopaejitsiparecabeje mēthē-xanetojawareca, bajarajamatabēcūene-itsi bajarapamonae Dioso peliwa-sijawalia, pecujarubijawata itsamonaejawabelia. Pacuenia pabita piabeje-jawa itsa juwa, daxita yatabutopaya jonatsi, wajaweretsinexa, bajarapijinia pacuenia taxa, athēbētatsia pe-ecaenē, werebiabianatsi daxita bajarapamonae —jai Jesús pijajiwijawabelia fariseowi yabara.

¹⁵ Pedro nexata jumaitsi Jesús-jawabelia:

—¡Patajatuxanenē, paneyapētaeya-exanare pajamatabēcūene yabara jiwi-jawabelia jumaitsimē: «Xua jiwi xane pecuaibota, apojamatabēcūenebijianaetsi», jamē! —jai Jesús-jawabelia.

¹⁶ Nexata, Jesús jumaitsi:

—¿Paxamē-ata tsaja abaxē apopanejumeyapētaemē? ¹⁷ Daxita xua jiwi xane pecuaibowojotota, junua pecotsorotwareca. Bajaraxuacujinae, nawe-cuaxuaba. ¹⁸ Itsiata baitsi jane, xua jiwi pecuaibuatsina pitsapa pecuaicui-jainexa, bajaraxua jamatabēcūenebijianatsi, tsipaji cuaicuijai pacuenia najamatabēcūena pejamatabē-ēthētota. ¹⁹ Jiwi pejamatabē-ēthētojawawetsina capitsapabiaba pibisiajamatabēcūenejawanē pexanaenexa. Capitsapa jiwi pebeyaxuabijamatabēcūenenexa, pebi pijawa pewecuanamatayajitsijamatabēcūenenexa, pebi petiriawijawabelia penaperabēquenetsiataejamatabēcūenenexa, penacobetoxotsijamatabēcūenenexa, itsamonae pexanaejawa yabara penajumetsēnētsijamatabēcūenenexa, itsamonae yabara najumetsēnētsiaya pebaracuacuijaijamatabēcūenenexanua. Daxita bajarapajamatabēcūenianē pitsapa jiwi pejamatabē-ēthētojawawetsina, pibisiacūene pexanaenexa. ²⁰ Daxita bajarapajamatabēcūene jiwi jamatabēcūenebijianatsi. Jiwi raja pexaejawa xae-ata, anijatonē napēna nacobequiatsinejewa, bajaraxua raja apojamatabēcūenebijianaetsi —jai Jesús pijajiwijawabelia.

Jesús itsanacuapijiwa, apojudfowa, pexēnatoyo tojamatejemaya-exana

(Mc 7:24-30)

²¹ Jesús baja Genesaret nacua wecuapona itsanacuayabelia, itsabelia eca anijatomarabeje, Tiro, Sidón tomarabeje. Jesús baja pata bajarapanacuayabelia. ²² Nexata, bajarapanacuapijipetiriwa, cananeawiriawa, apojudfowa, pata Jesús-jawaberena. Pexaniacūene peto-exanaenexatsi, ajumesaēya napēnawajēca Jesús-jawabelia:

—¡Petuxanenē, David-pijinē pemomomē, nitaxutotsoniataema! Taxēnatowayo raja dowathi yajawaponaponatsi. Bitso bejiobiaya-exanabiabatsi —jai bajarapowa Jesús-jawabelia.

²³ Itsiata, Jesús apojumepitsi.

Nexata, Jesús pijajiwī imoxoyorenatsi, pejumaitsinexatsi:

—¡Patajatuxanenē, ponaeya-exanare baja mapowaje! Bitso raxua nacapē-wabanajetaruca —pejainexatsi bajarapamonae.

²⁴ Nexata, Jesús jumaitsi bajarapowajawabelia:

—Dioso baja cajena nitoroba tayawenonaenexa ējudfowi, Israel nacua-pijiwi, pamonae Dioso tane bepīja-oveja penaxuabawanapaewi —jai Jesús bajarapowajawabelia.

²⁵ Itsiata, bajarapowa imoxoyolia Jesús. Yaiyataeya pematabacabēta nuca-junua Jesús pitabarata. Jumaitsi:

—¡Petuxanenë neyawenonare! —jai.

²⁶ Nexata, Jesús jumaitsi bajarapowajawabelia:

—Abaxë copiaya weyawenonajë tajanacuapijiwi, judíowi, apoxanepanae copiaya xamë itsanacuapijiwamë tacayawenonaenexa. Bajarapacuenia itsa cayawenonaejitsipatsi, nexata pacuenia pejewaxi pexaejawaminexa wecuarajutsipajë awirixijawabelia, bajara-itsinë tsipae —jai Jesús.

²⁷ Itsiata baitsi jane, bajarapowa ajumesaëya wajëcapona. Jumaitsi tsapona Jesús-jawabelia:

—Xaniajamë rabaja picani. ¡Itsiata, neyawenonare, tsipaji awirixi-ata baxane pexainaenëtsi pexaeyecamesabëxëpanareca piothopaepërë! ¡Bajarapijinia pacuenia, itsiata itsanacuapijiwa-atanë, neyawenonare! —jai tsapona bajarapowa Jesús-jawabelia.

²⁸ Nexata, icatsia Jesús jumaitsi:

—Petiriwa, bitso nesiwanajamatabëcuenecopatsixae Diosojawabelia, pecayawenonaenexa, nexata pacuenia jumaitsimë, bajarapacuenia Dioso baja cajena cato-exanaena —jai Jesús bajarapowajawabelia.

Bajarapaepatota, bajarapowa pexënatowayo, Jesús pejamatabëcueneta tojamatejematsi baja pijabotalia.

**Jesús jamatejemaya-exana ayaibitsaëtoxaneto
piawitanewi Galilea pucaxaneto imoxoyojawata**

²⁹ Panacuajawata eca Tiro, Sidón tomarabeje, Jesús baja wecuapona. Nexata, najetaruca Galilea pucaxanetomuxubërëa. Itsa patajopa petsutojawata, junaya pe-ecajopaenexa. ³⁰ Pe-ecajopaecujinae, jiwi ayaibitsaëtoxaneto pata Jesús-jawaberena. Tocapatatsi apocawiriawixae pexainaewi, pacuenia pejayujayunaewi, bitso pitaxutotsëcënaewi, apopecuaicuaijaiwi, penabejenaewi, ayaibitsaëtoxaneto piawitanewinua, pitabarata petojebinexatsi. Nexata Jesús daxita bajarapamonae caecuenia jamatejemaya-exanapona. ³¹ Nexata, jiwi jamatabëcuenenabenajaca petaejawata pecuai-cuaijaijawa apopecuaicuaijaiwimi, pexanepanaejawa penabejenaewimi, pejayujayunaewimi-ata, pitaxutoxanepanaejawa bitso pitaxutotsëcënaewiminua. Nexata, jiwi itsa tane bajarapacueni, wënëxaniata Dioso mapacueniaje: «Diosomë, bitso ayaijamatabëcuenenëmë, Pa-Israel-nacuapijiwinë patajaDiosomë», jai bajarapamonae.

Jesús rajuta pexaejawa bejamatabëcuene cuatro mil pajiwiibeje

(Mc 8:1-10)

³² Bajarapatsutojumata Jesús junata pijajiwi pejumaitsinexa mapacueniaje:

—Netsitabejiobi baja cajena mapamonaeje, tsipaji baja ajena acueyabi pamatacabibeje xaina xanëjawata pejinawanapaecujinae. Pemarue baja towerewerecatsi. Pexaejawa xaenejewa, apojitsipañë ta-itorobijawa peponaenexa pijabonëjawabelia. Namuto-epatua meta cuenabijitsipatsi piajani —jai Jesús.

³³ Nexata, bajarapamonae jumaitsi Jesús-jawabelia:

—¿Detsa jane pacuenia pexaejawa tocaxitarabianatsi mapajiwi bitsaëtoxanetoje? Majotaje ajibi pexaejawa, tsipaji itsajiwi-ata pijabo apoxinae majotaje —jai Jesús pijajiwi.

³⁴Nexata Jesús yanijoba pijajiwijawabelia.

—¿Detsa papan-bêbeje paxainame? —jai.

Bajarapamonae jumaitsi:

—Paxainajë siete papan-bêbeje, dujuainëxi yajawa —jai.

³⁵Nexata Jesús itoroba daxitajiwi pe-enaenexa irata. ³⁶BajaraPonë pita siete papan-bêbeje, dujuainëxi yajawa. Nexata pexaniajamatabëcuene rajuta Diosojawabelia pexaejawa yabara. Bajaraxuacujinae, epatsënëcapona pan, dujuainëxi yajawa. Bajaraxuanë Jesús rajutapona pijajiwijawabelia, bajarapamonae juya petsicobetsanaenexa bajarapajiwibitsaëtoxanetojawabelia. ³⁷Daxita bajarapamonae xane xaniawaetsia. Nexata, peyajuwënëcöcabijawanë Jesús pijajiw caetuata. Wënëba siete xuabeje pecuenejawanë beyoxobocuenia. ³⁸Pamonae pexaejawa xane, ayaibitsaëtoxaneto. Cuatro mil ponëbeje namata-ëjëtatsi xaniawaetsia ëpebijijiwi, namata-ëjëtsinejewa petiriawi, pejewaxi-ata. ³⁹Bajaramonae pexaecujinae pexaejawa, Jesús baja nawiabiaya-exana. Nexata, Jesús, pijajiw yajawa, runareca jera-ënëabereca. Pona baja Magdala nacuyabelia.

**Fariseowi, saduceowibeje, Jesús picani itorobatsi Dioso
pesaëta pinijicuene petsita-exanaenexa**

(Mc 8:11-13; Lc 12:54-56)

16 ¹Jesús pepatsicujinae Magdala nacuata, fariseowi, saduceowiyajuwënëwi-ata, pata bajaraponëjawaberena, pejamatabëcuene-ëjëbinexatsi, peyapëtaenexatsi pepacuene itsa Dioso pitobinëtsi. Bajaraxuata, itorobatsi picani pinijicuene petsita-exanaejawanexa Dioso pesaëta. ²Nexata Jesús jumaitsi bajarapamonaejawabelia:

—Pamatacabi caniwiyo itaboxo tsobia, paxamë pajumaitsimë tsabiabi: «Merawia pexaniamatacabi tsane», pajamë tsabiabi. ³Pamatacabi pijinia bajayacunua itaboxo itacaënanuca, pajumaitsimë tsabiabi: «Ajena apocacuaxanepanaejitsia daxita matacabi», pajamë tsabiabi. Paxamë panataeyabiabame bepanyapëtaewi. Xaniawaetsia matacabipijicuenejawanë payapëtae-atamë, itsiata xua Dioso pacatsita-exanapona maparucaeje, pecopiapataponaejawanë, xanë tjamatabëcueneta, apopacanaëjëtisicanepaemë. ⁴Paxamë bitso pibisiacuene pane-exanaewi. Dioso cajena apopanejamatabëcuene-ewetsiwi. Bajarapanejamatabëcuene-itsiwiwixae, pane-itorobame picani Dioso pesaëta pinijicuene patacatsita-exanaejawanexa, paneyapëtaenexamë Dioso pepacuene athëbëwetsica tane-itorobinëcuenetsica. Itsiata baitsi jane, apopacatsita-exanaetsi tsane Dioso pesaëta pinijicuene ta-exanaejawa. Saya papinijicuenejawa Dioso pesaëta bajayata to-exanatsi profeta Jonás-pijinë, bajara-ëpitsicuene tane-exanaejawanexa, pacatsitajëtisiansatsi —jai Jesús petëpaecujinae icatsia Dioso piasaëya-exanaejawanexatsi yabara. Bajaraxuacujinae, Jesús baja wecuapona.

**Jesús pijajiw muxujioba fariseowi pecujarubiliwaisi
pejumexaniataeyaniwa**

(Mc 8:14-21)

⁵Jesús, pijajiw yajawa, nicabalia Galilea pucaxaneto itsapanabelia. Bajarapamonae, Jesús pijajiw, nacofënëta pamarue pan pecaponaejawanexa.

⁶Bajarapitsijawata, Jesús jumaitsi pijajiwijawabelia mapacueniaje:

—¡Panejumetaema! ¡Xania baja! ¡Panayajiwitaema fariseowi, saduceowi-ata, pijalevadura! —jai Jesús pijajiwijawabelia.

Bajarapacuenia Jesús jumaitsi fariseowi, saduceowi-ata pecujarubiliwaisi yabara, Jesús pijajiwi pejumexaniataeyaniwa. ⁷Itsiata, Jesús pijajiwi apojumeyapëtaetsi. Siwabëjai saya ëpemarue yabara. Bajaraxuata, jamatabëcuenenawëxaniabiaya ëpamonae najume-anaenota Jesús pejumaitsijume yabara:

—Bajarapacuenia Jesús nacajumaitsi tsaena, pan wajanacofënëtsixae — najai bajara-ëpamonae jamatabëcuenenawëxaniabiaya.

⁸ Jesús, pijajiwi jamatabëcueneyapëtane bajarapacuenia jamatabëcuenenawëxaniabiaya penajume-anaenotsijawa levadura yabara. Nexata jumaitsi pijajiwijawabelia:

—¿Detsa xuajitsia panajume-anaenotame: «Baja raeta pacuenia Jesús nacajumaitsi pan apowajacaponaexae», panajamë? ¿Apopayapëtaemë tsaja tanecuenecaëjëpaejawa ta-exanaenexa pan itsa namatawenonatsi? ⁹Paxamë abaxë apopanejumeyapëtaemë. ¿Apopanajamatabënapitsimë tsaja pacuenia exanajë pamatacabi pan namatawenonatsi? Tsicobetsanajë cinco papan-bëmibejewata cinco mil ponëbeje pexaenexa. ¿Detsa xuabeje pawënëbame peyajuwënëcopabijawanë pecuejawanë beyoxobocuenia? ¹⁰ ¿Apopanajamatabënapitsimënu tsaja pacuenia tsicobetsanajë siete papan-bëmibeje cuatro mil pajiwiabeje pexaenexa? ¿Detsa xuabeje bajarapamatacabi pawënëbame peyajuwënëcopabijawanë pecuejawanë beyoxobocuenia? ¹¹ Bajarapacuenia patanecuenetaexaemë, bepanejumeyapëtaneme picani apopatacajumaitsijawa pan yabara, itsa pacajumaitsitsi: «¡Xania baja! ¡Panayajiwitaema fariseowi, saduceowi-ata, pijalevadura!», itsa pacajaitsi, pan yabara apopacajumaitsitsi —jai Jesús pijajiwijawabelia.

¹² Nexata jane baja, Jesús pijajiwi xaniawaetsia jumeyapëtanetsi apopejani-itawetsijawa pexaeyaniwa fariseowi, saduceowi-ata, pijalevadura. Biji rajane, itawetatsi pejumexaniataeyaniwa bajarapamonae pecujarubiliwaisi.

Pedro cuenewajunupaeba Jesús Cristocuene yabara

(Mc 8:27-30; Lc 9:18-21)

¹³ Jesús, pijajiwi yajawa, itsa najetaruca Cesarea de Filipo tomaramuxunenia, pijajiwijawabelia jumaitsi mapacueniaje:

—¿Detsa jiwi jumaitsi tsabiabi xanë, Daxitajiwi Pematapijinënë yabara? ¿Detsaeta xanë ponënë? —jai Jesús pijajiwijawabelia.

¹⁴ Nexata bajarapamonae jumaitsi:

—Itsamonae xamë yabara jumaitsi tsabiabi: «Juan raeta, jiwibautizabinëmi, icatsia asaë», jai tsabiabi. Itsamonae pijinia: «Diosojumepaëbinëmi raeta, profeta Elías° raeta, ponëmi bajayata ponapona, icatsia asaë», jai tsabiabi. Itsamonae pijinia: «Profeta Jeremías-pijinë raeta, ponëmi bajayata

o 16:14 *Elías*: Bajaraponë bayatami ponapona Israel nacuata. Baitsi, apo-asaë tsaponaponae mapanacuataje, Jesús peponaponaematacabi. Itsiata, bajaraponë Dioso ya-asaëya caponatsi athëbëbetsia. (2Re 2:1-11.) Bajaraxuata apopayaquinarubinë «Elías-pijinë». Daxita bajaraponë peliwaysi ruca 1Re 18-2Re 2-jawabelia.

ponapona, icatsia asaë. Itsa jume, nexata meta bajayata Diosojumepaebi-wimi, profetawiyajuwëñëñë, icatsia raeta asaë», jai tsabiabi itsamonae xamë yabara —jai Jesús pijajiwi.

¹⁵Nexata Jesús jumaitsi pijajiwi jawabelia:

—¿Detsa pacuenia paxamë panesiwanajamatabëxainame xanë yabara? ¿Detsa xanë pacatsitaponëtsi? —jai Jesús pijajiwi jawabelia

¹⁶Simón Pedro jumaitsi Jesús jawabelia:

—Xamë cajena Mesíasmë,^p athëbëwetsica Dioso peca-itorobinëtsica, jiwi necapanepaenexa. Xamë, Dioso pexënatomë, Ponë peyamatacabiatsitecapo-naponanenë —jai Pedro Jesús-jawabelia.

¹⁷Nexata, Jesús jumaitsi Pedro jawabelia:

—Simón, Juan pexënatomë, xamë jamatabëcuenebarëyamë, tsipaji itsajiwi-ata apocayapëtaeya-exanae xanë taneyapëtaenexamë Mesías-nëñëcuene. Biji rajane, taxa Dioso, athëbëtatsia pe-ecanenë, cayapëtaeya-exana. ¹⁸Bajaraxuata, aeconoxae cawënërubianatsi Pedro.^q Nexata, ibopanaxanetojumata,^r xanë nubianajë tajajiwi, tawënëta penacaetuatsiwi.^s Nexata, bajarapamonae bajayajebi ajamatabësaë tsane pejumexaniataejawa Mesías-nëñëcuene. Petëpaejamatabëcuene^t apojamatabëcuene matatoxenetsitsi tsane, pewerebiabinexatsi, tsipaji pewajënaeyabelia jiwi jumexaniataeponaena bajarapaliwai. ¹⁹Pacuenia baupa-ewetsinë ewetsia-exanatsi llavianë, bajarapijina pacuenia caewetsia-exanae-natsi llave bene-ewetsinëcuenia^u Dioso, athëbëtatsia pe-ecanenë, pijajiwi

p 16:16 *Mesías*: Itsawënë pijinia, «Cristo» griegojumeta. **q 16:18** *Pedro*: «ibotoyo», pejiijamatabëcuene pexainaewënë. **r 16:18** *ibopanaxanetojumata*: Bajarapajume pejumaitsi jamatabëcuene yabara Dioso pejumeliwai si penacujarubiwi caejamatabëcueneliwai si apoxinae. **1)** Itsamonae canaëjëta pacuenia nacayapëtaeya-exana Pedro pejumexaniataejawa Jesús Cristocuene. Nexata, Jesús pijajiwi ajamatabëcuene saëjitsia, pejumexaniataexae Dioso peliwai si. **2)** Itsamonae pijinia canaëjëta Jesús pijacuata penayabarajumaitsi jawa ibotoxanetocuena. Nexata, jiwi pesiwanajamatabëcuene copatsixae bajara Ponë jawabelia naexanaena Jesús pijajiwi bitsaëtöyajuwënëwi. Bepijiyonua aponawecuati xitsijitsia pejumexaniataejawa Jesús peliwai si. **3)** Itsamonae pijinia canaëjëta pacuenia bajarapa-iboxanetojuma natatocuene catane Pedro, itsa-apóstolewi yajawa pecujarubiliwai si Jesús yabara. Nexata, pamonae Jesús pijajiwi bitsaëtöyajuwënëwi ajamatabëcuene saëjitsia pejumexaniataejawa bajarapamonae pecujarubiliwai si, bepjiayo apowecua-jopaejitsia bajarapaliwai si. Taema Efe. 4:11-16. **s 16:18** *tawënëta penacaetuatsiwi*: Pamonae jumexaniatane Jesús peliwai si, pesiwanajamatabëcuene copabinexa Jesucristo jawabelia. **t 16:18** *petëpaejamatabëcuene*: Bajarapajume griegojumeta, «Hades nacupijibaupa pesaë», pejai-jume. Hades-jume xaina mapejumaitsi jamatabëcueneje: «Petëpae wimi pejinawanapaenacua», pejai jamatabëcuene. Nexata, Dioso peliwai si pejucaewi caejamatabëcuene apoxinae pajamatabëcuene xaina, «Hades nacupijibaupa pesaë», xaniawaetsia pejucaenexa jiwi pejumetae cuenia. Itsamonae canaëjëta dowathi pesaë yabara pejumaitsi jawa. Itsiata, bajaraponë apowewetsinë Hades nacua. Itsamonae canaëjëta pijinia, pacuenia mapanacuapijiwi, piajamatabëcuene-bejewi, pebeyajebaponae jawanexa, Cristo peliwai si pejumexaniataewi, piajibia-exanaenexa picanı bajarapaliwai si. Bajaraxuata, paxanë pajucajë, «petëpaejamatabëcuene», tsipaji itsa dowathi tsipae, itsa jume, mapanacuapijiwi tsipae, bajarapamonae apocuencaëjëpaetsi tsane piajibia-exanaejawa Cristo peliwai si pejumexaniataebitsaëtö, beyajebaponae-ata. Biji rajane, pewajënaeyabelia tsiteca nacopsiansia bajarapajumexaniataebitsaëtö, nacua pecopiarucaematacabijawabelia. **u 16:19** *llave bene-ewetsinëcuenia*: Ponë baupa-ewetsinë copatabiaba itsamonae pejonejawa bajarapabaupajawalia. Itsamonae pijinia apocopatsi pejonejawa. Pedro copiya pet-sipaebinë Jesús peliwai si judöwiji jawabelia (Hch. 2). Nexata tobaupata judöwi pejonejawa Dioso peyanacua-ewetsijawalia. Bajaraponë-ata copiya tsipaeba Jesús peliwai si apojudöwiji jawabelia (Hch. 10). Nexata tobaupata apojudöwi pejonejawa Dioso peyanacua-ewetsijawalia. Pedro-ata copiya naneconitsia-exana pamonae bijiya tane Espíritu Santo. (Hch. 5:1-10). Bajarapacuenia pexanaexae, llave bepewetsinëcuenia tanetsi.

peyanacua-ewetsijawa peliwaishi. Nexata, xua itawetsianame mapanacua-taje, bajaraxua-ata Dioso athëbënacuatatsia itawetsiana. Xua tocopatsianame pexanaenexa mapanacuataje, bajaraxua-ata Dioso athëbënacuatatsia tocopatsiana pexanaenexa —jai Jesús Pedrojawabelia.

²⁰Nexata, pijajiwi jume-itaweta pewajunupaebiyaniwatsi itsamonaēja-wabelia Jesús, Mesías-nëcuene, Dioso athëbëwetsica pitorobinëtsica jiwi pecapanepaenënexa.

Jesús tajëwelia nawajunupaeba pebeyaxuabijawanexatsi

(Mc 8:31–9:1; Lc 9:22–27)

²¹Pedro pewajunupaebicujinae Jesús Mesías-nëcuene yabara, Jesús jane baja tajëwelia yapëtaeya-exana pijajiwi jawabelia pitoyawitsi pebeyaxuabijawanexatsi. Jumaitsi mapacueniaje:

—Xanë netsicaruca taponaejawa Jerusalén tomarabelia. Bajarajotalia ayaicuenia nebejiobia-exanaena judíowi pija-ancianowi, sacerdotewi penamatacaitorobiwi, judíowi pecujarubiwi-ata. Bajaraxuacujinae, nebeyaxuabiana. Itsiata baitsi jane, tatëpaecujinae, acueyabimatacabita, icatsia asaënë tsane —jai Jesús tajëwelia pijajiwi jawabelia.

²²Nexata, Pedro junata Jesús pebarëponatabinexa pesaicayojawabelia. Nexata jumaitsi Jesús-jawabelia:

—¡Tajatuxanenë! Dioso ca-itaxutotsoniataena bajarapamonae pexanaeyaniwa^v daxita pacuenia tajëwelia nawajunupaebame —jai Pedro.

²³Nexata Jesús napënëyorotaxuaba Pedrojawabelia, itabarataeya pejumaitsinexatsi:

—¡Satanás, newecuanatixire! Xamë saya jamatabënecuenecaranatame, ta-exanaeyaniwa Dioso tane-itorobicuenia. Saya jitsipame pacuenia jiwi jitsipa ta-exanaejawa —jai Jesús.

²⁴Nexata Jesús jumaitsi daxita pijajiwi jawabelia:

—¡Pajiwi jitsipa tanepënaponaejawa, nawecuacopatsi pejitsipacuenia penajamatabëxainabiabijawami, juya pexanaponaponanexa ta-itorobicuenia! ¡Najamatabëcueneweretsinua penatocopiapitsijawa pebejiobia-exanaejawanexatsi, pebeyaxuabijawanexatsinua, tanepënaponaejawata tajajiwitonëcuenia! ¡Matapania jane baja, nepënaponae! ²⁵Itsiata, pajiwi apo-exanaponaponae tsane bajarapacuenia, itsajiwi pebeyaxuabiyaniwatsi tajajiwitonëxae, apoxinae tsane matacabi apopewerewerecaejawa. Pajiwi pijinia nacopatsiana xanë yabara pebeyaxuabinexatsi tajajiwitonëxae, bajarapajiwi xainaena matacabi apopewerewerecaejawa. ²⁶¡Pacanaëjere mapacuenije! ¿Detsa xua yabara toxanepanatsi jiwi pexainaejawa daxita mapanacuapijijawanë, itsa Diosowecua naxuabijitsia, matacabi apopewerewerecaejawa xainaenejewa? ¿Detsa xua rajutsipa Diosojawabelia mapanacuapijijawuwënëjawa, pexainaenexa matacabi apopewerewerecaejawa, penaxuabiyaniwa Diosowecua? ¡Ajibi cajena! ²⁷Ayapëbeje tsane, tsipaji Xanë, Daxitajiwi Pematapijinënë, yajawapatsianicajë taxa

^v 16:22 *peca-exanaeyaniwa*: Pedro peyapëtaexae Jesús Mesías-nëcuene, nexata jitsipa petaxuabijawa jane baja peyanacua-ewetsijawa judíowi. Apocanaëjëtsi petëpaejawanexa. Baitsi, xaniawaetsia apoyapëtae paliwaishi ruca Mesías yabara Isa. 53-jawata.

Dioso pijapeniweniwenaecotia, taja-ánglewinua. Nexata tacuenecanaë-jëtsicujinae, matapania matamotaponaenajë caejiwi canacujitsia pexanawanapaecue ne mapanacuataje. ²⁸ Xaniajanë pacuenia pacatsipaebijitsiatsi. Paxamëyajuwënëwi, ajena panenubenaewi, patëpaenejewamë pataename Xanë, Daxitajiwi Pematapijinënë, tajiwi tayanacua-ewetsijawa —jai Jesús pijajiwijawabelia.

Pacuenia Jesús cae-epatoyo perabëniweniwenataba, yabara peliwaissi

(Mc 9:2-13; Lc 9:28-36)

17 ¹ Pepanepaecujinae seis pamatacabibeje penawajunupaebijawa, Jesús pijajiwijawuënëwi, natsicueyajunata acueyabi ponëbeje. Mapamonaaje: Pedro, Santiago, Juan-ata. Santiago raja pejuyapijinë Juan. Bajarapamatabëxëyo barëjunaya pinijitsutoxanetojumabetsia. ² Nexata bajarapatsutojumatsia, Jesús perabëniweniwenareca bajarapamonaepitabarata. Pacuenia matabibipijiuameto naitayota, bajarapacuenia Jesús itabaranaitayota. Penaxatatsijawareca, daxita niweniwenae niojai. ³ Nexata bajarajota, jemata naitajëta Moisés-pijinë, Elías-ata. ⁴ Jesús barëcuaicuaijatsi bajaraponëbeje. ⁴ Nexata Pedro jumatsi Jesús-jawabelia mapacueniaje:

—¡Patajatuxanenë, pijacuaxae panebarëponame! Itsa jitsipame, pacatoexanaenatsi acueyabi pabobërëtoheje; xamënexa tsane, Moisés-nexa tsane, Elías-nexa-ata tsane —jai Pedro Jesús-jawabelia.

⁵ Itsa abaxë Pedro cuaicuaijai tsanucue, penaitayotsi-itarërëbo mata-acataxubatsi daxita bajarapamona. Nexata bajarapamona Jumetanenua bajarapa-itarërëbojawawetsia Dioso pejumatsijawa: «Mara ponë taxënat, ta-asiwanëje. Bitso siwajamatabëcuenebarëyanë. ¡Pajumetaema bajara-Ponë!», pejaijawatsica. ⁶ Itsa jumetane bajarapacuenia Dioso pejumatsijawatsica, bajarapa-acueyabi ponëbeje irataeya bobenajunua, tsipaji bitso ayaicuenia junawa. ⁷ Nexata, Jesús imoxoyolia pijajiwi. Pocobeta jayalia. Jumatsi bajarapamonaewawabelia:

—¡Panonobapunare! ¡Pëtsa pajunawame! —jai Jesús pijajiwijawabelia.

⁸ Nexata, bajarapamona ita naëcobarëcëpalia Jesús-jawabelia, ajibi baja tsarucaebeje Moisés, Elías-beje. Caenë baja Jesús nuca.

⁹ Nexata, Jesús bajarapa-acueyabi ponëbeje ita barërunanucaponaica petsutojumawetsica, jume-itaweta pijajiwi. Jumatsi:

—¡Pëtsa patsipaebame itsajiwijawabelia-ata pacuene pataneme! Matapania Xanë, Daxitajiwi Pematapijinënë, icatsia asaënë tsane tatëpaecujinae, nexata jane baja, matapania patsipaebianame itsamonaewawabelia xua pataneme —jai Jesús pijajiwijawabelia.

¹⁰ Nexata bajarapa-acueyabi ponëbeje, yanijoba Jesús-jawabelia. Jumatsi:

—Patajatuxanenë, ¿detsa xuajitsia judiowi pecujarubiwi jumatsi tsa-biabi: «copiata raja naitajëtsiana mapanacuataje Elías,^x pepatsiwajënaeya

w 17:3 Moisés-pijinë, Elías-ata: Taema Deut. 18:15; Mal. 4:5-6. x 17:10 copiata...Elías: Bajarapacuenia yanijoba, tsipaji matapania tane Elías petsutojumatsia, pepuawajunupaebi Jesús Cristonëcuene.

Mesías,⁷ ponë, Dioso athëbëwetsica itorobijitsiatsica, wajanacayanacua-ewetsinënexa», jai tsabiabi? —jai Jesús pijajiwi.

¹¹Nexata, Jesús jumaitsi pijajiwi jawabelia:

—Xaniajai rabaja pacuenia jumaitsi tsabiabi judíowi pecujarubiwi: «Copiaya Elías patsiana,⁸ pejamatabëcuenexanetsinexa daxitajiwi», pejajawa. ¹²Xaniajanë pacuenia pacatsipaebijitsiatsi. Elías rabaja patajopa. Itsiata, jiwi apoyapëtae ponëcuene, peponaponaematacabita mapanacua-taje. Nexata, pejiitsipaecuenia bajaraponë bejiobia-exanatsi. Bajarapijinia pacuenia, Xanë-ata, Daxitajiwi Pematapijinënë, nebejiobia-exanaena bajaramonae —jai Jesús pijajiwi jawabelia.

¹³Nexata, bajarapa-acueyabi ponëbeje, Jesús pijajiwi, yapëtane Jesús pejumaitisijawa Juan, jiwibautizabinëmi yabara.

Jesús jamatejemaya-exana pejewaxinë, dowathi peyajawaponaponaenë
(Mc 9:14-29; Lc 9:37-43)

¹⁴Jesús pijajiwi, acueyabi ponëbeje, barënewiata petsutojumawetsica. Nexata bajarapatsutoxanetotabuta, wajënae-ewetatsi jiwi ayaibitsaëttoxaneto. Nexata pebi Jesús imoxoyorenatsi. Bajaraponë yayiataeya pematocabëta nucajunua Jesús pitabarata. Jumaitsi Jesús-jawabelia:

¹⁵—¡Petuxanenë, neto-itaxutotsoniataema taxënatonëyo! Dowathi raja netotëpajoneya-exanabiabatsi. Bitso ayaicuenia bejiobi tsabiabi, tsipaji anijatonë isotualia jopabiaba. Menialia-ata jopabiabanucalia. ¹⁶Nijajiwi jawaberena picani capatajë tanetojamatejemaya-exanaenexa. Itsiata baitsi jane, apocaejëpaetsi tanetojamatejemaya-exanaenexa —jai bajaraponë.

¹⁷Nexata Jesús jumaitsi pijajiwi jawabelia, bajarajota penubenaewijawabelia-ata:

—¡Paxamë baja cajena panecuene-aebiwi Dioso papecayawenonaenexa! ¡Pane-ajamatabëcuenebejewi baja cajena! ¿Detsa paepatojebi abaxë paxamë jawata pacayajawaponaponaenatsi, patanesiwanajamatabëcuenecopabinexamë xanë jawaberena? Belia rabaja, pacasiwajamatabëcuenecueranatsi. ¡Panetocarenamëre pejewaxinë! —jai Jesús.

¹⁸Nexata Jesús wecua-itaweta dowathi pejewaxinë pewecuapitsapaenexatsi. Dowathi baja wecuapitsapatsi. Pejewaxinë baja jamatejema.

¹⁹Bajaraxuacujinae, Jesús pijajiwi barëcuacuajaitsi pija-epatojawata. Jumaitsi:

—Patajatuxanenë, ¿detsa xuajitsia meta paxanë apopanecaëjëpae patawecuapitsapaenexa dowathi? —jai Jesús pijajiwi.

²⁰Nexata Jesús jumaitsi pijajiwi jawabelia:

—Apopacacaejëpae panecapitsapaejawa bajarapadowathi, tsipaji xaniawaetsia apopasiwanajamatabëcuenecopabimë Diosojawabelia papecayawenonaenexa. Xaniajanë pacuenia pacatsipaebijitsiatsi. Paxamë tsiquirijawayo-ata itsa pa-itaxutuajamatejemamë tsipae Diosojawabelia papecayawenonaejawanexa, nexata pacacaejëpaejitsipa Dioso pesaëta pinijicuene pane-exanaenexa. Nexata, itsa pajumaitsimë tsipae

y 17:10 Mesías: Bajarapacuenia yanijoba, tsipaji yapëtane baja Jesús Mesías-nëcuene. Itsiata, apotae abaxë Elías, piasaëtsaponaponaejawa mapanacuataje. z 17:11 Taema Mal. 4:5.

mapatsutoxanetowawabeliaje: «¡Wecuanatixire majotaje! Itsajawabelia ecaename», itsa pajamē tsipae, pacajumecowēnētsipa. Nexata, natixitsipa. Nexata, paxamē pane-exanaenexa itsacuenejawayo-ata, apopacatsita-ayapēbeje tsipae itsa bajarapacuenia pasiwanajamatabēcuenecopatsipame Diosojawabelia papecayawenonaejawanexa. ²¹ Bajarapawiriadowathi apopitsapae, itsa japasa apopawajēcaemē Diosojawabelia —jai Jesús pijajiwijawabelia.

Icatsia Jesús tajēwelia nawajunupaeba pebeyaxuabijawanexatsi
(Mc 9:30-32; Lc 9:43-45)

²² Jesús abaxē pijajiwi itsa barēponapona Galilea nacuata, nawajunupaeba pebeyaxuabijawanexatsi. Jumaitsi mapacueniaje:

—Xanē, Daxitajiwi Pematapijinēnē, necanajetsiana tajawajabitsaēwi pecobeyabelia. ²³ Bajarapamonae nebeyaxuabiana. Itsiata bailsi jane, acueyabi matababita, icatsia asaēnē tsane —jai tsaponae Jesús pijajiwijawabelia.

Bajarapamonae itsa jumetaeyabiaba bajarapacuenia Jesús pejumaitsijawa petēpaejawanexa yabara, bitso najamatabēxainabiaba.

Pacuenia Jesús matamota impuestojamatabēcuenē, yabara peliwaissi

²⁴ Pamatababijawa pata Jesús, pijajiwi yajawa, Capernaúm tomarata, bajarapatomarata impuestojamatabēcuenē pematamoyanijobabiabiwi templojamatabēcuenē, pona Pedrojawabelia. Nexata, bajarapamonae jumaitsi:

—Pedro, ¿panijatuxanenē tsabaja matamotabiaba impuesto templobojamatabēcuenē? —jaitsi.

²⁵ Pedro nexata jumaitsi:

—Jājā. Matamotabiaba cajena —jai.

Bajarapecujumaitsicujinae, Pedro joneya Jesús pe-ecaeboyalia pebarēcuaicuaijainexa.

Bajarajota, Jesús copiaya jumaitsi Pedrojawabelia:

—Pedro, ¿detsa xamē jamatabēcuenē-itsimē? ¿Nacua-ewetsiwi tsaja impuestojamatabēcuenē matamoyanijobabiaba pijanacuapijiwawabelia? Itsa jume, ¿tsaja, saicayanacuapijiwawabelia?^a —jai Jesús Pedrojawabelia.

²⁶ Pedro nexata jumaitsi:

—Nacua-ewetsiwi raja impuestojamatabēcuenē apomatomoyanijobabiabi pijanacuapijiwawabelia. Biji rajane, yanijobabiaba saicayanacuapijiwawabelia —jai Jesús-jawabelia.

Nexata, Jesús jumaitsi Pedrojawabelia:

—Pacuenia nacua-ewetsiwi pijanacuapijiwi apomatomotsitsi impuestojamatabēcuenē, bajarapijinia pacuenia Dioso pijajiwixae apotsicarucaetsi picani pematamotsinexa impuestojamatabēcuenē, Dioso pijajiwixae. ²⁷ Itsiata bailsi jane, xamē matamotsianame itsajiwi-ata wajanacabara-anaepanaeyaniwa. ¡Caliamēre nijaculupabo

a 17:25 saicayanacuapijiwawabelia: Bajayatami, pacujinae nacua-ewetsinē cuene-amoneyabiaba itsanacuapijiwi, nexata matamowajēcabiaba impuestojamatabēcuenē pecuene-amoneyabijamatabēcuenē. Bajarapacuenē-amoneyabimatamo apowajēcāe pijanacuapijiwawabelia. Nexata, judfōwi, Dioso pitapetsixaetsi pijajiwixae, apoxanepanae templobo pewetsiwi pewajēcāejawa impuestojamatabēcuenē. Bailsi, judfōwi aposaicayanacuapijiwi.

pucaxanetojawabelia! Ëjëbianame bajarajotalia. Padujuainëyo copiaya yaxunujutsianame. Cuaiboyeretsianame. Bajarajota caxitajarabianame palatanëyo. Bajarapapalatanëyo nacatocuenecaëjëpaenabeje, wajamatamotsinexabeje impuesto templojamatabëcuene pewetsiwijawabelia, xanënexa, xamënexa-ata. Nexata, caponaename, impuestomatamo nematamotsinexa —jai Jesús Pedrojawabelia.

Jesús pijajiwi yanijoba, peyapëtaenexa pajiwi ayaijamatabëcuenejiwi tsane Dioso peyanacua-ewetsinacuata

(Mc 9:33-37; Lc 9:46-48)

18 ¹Bajarapacuenia impuesto yabara Jesús pejumaitsicujinae Pedrojawabelia, daxita Jesús pijajiwi imoxoyorenatsi, peyanijobinexatsi. Jumaitsi:

—Patajatuxanenë, çdetsa ponë paxanëyajuwënënë bitso ayaijamatabëcuenenë tsane daxitawecua, Dioso, athëbëtatsia pe-ecaenë, pijajiwi peyanacua-ewetsinacuata? —jai.

²Nexata Jesús junata pejewaxinëyo, pimoxoyotsinexatsi. Pijajiwituatua-jëta nuteta bajaraponëyo. ³Nexata jumaitsi pijajiwijawabelia:

—Xaniajanë pacuenia pacatsipaëbijitsiatsi. Paxamë itsa apopanajamatabëcuenepënëyorotsimë tsane ayaijamatabëcuene panenataejawawecua, beweliamatabëcuene panexainaenexa, pacuenia mapapejewaxinëyo itsije, nexata apopajonemë tsane Dioso, athëbëtatsia pe-ecaenë, pijajiwi peyanacua-ewetsinacuata. ⁴Bajaraxuata, ponë beweliamatabëcuene natane pacuenia mapapejewaxinëyo jamatabëcuene-itsije,^b bajaraponë rajane ayaijamatabëcuenenë tsane daxitawecua, Dioso, athëbëtatsia pe-ecaenë, pijajiwi peyanacua-ewetsinacuata. ⁵Pajiwi tawënëta copiapita xanëjawaberena tanesiwanajamatabëcuenecopatsijiwiyo, beweliamatabëcuenejiwi, pacuenia mapitsijiwiyo jamatabëcuene-itsije, bajaraxua xanë taniji tanecopiapitsijawa —jai Jesús pijajiwijawabelia.

Jesús pijajiwi muxujioba itsajiwi-ata pibisiacuene pexanaeya-exanaeyaniwa

(Mc 9:42-48; Lc 17:1-2)

⁶Jesús jumaitsi pijajiwijawabelia:

—Pajiwi pibisiacuene exanaeya-exanaejitsipa, xanëjawaberena tanesiwanajamatabëcuenecopatsiyajuwënëjiwiyo, beweliamatabëcuenejiwi-ata pacuenia mapapejewaxinëyo, bajarapajiwi Dioso ayaicuenia naneconitsia-exanaejitsipatsi. Bajaraxuata, pajiwi najamatabëxaina pibisiacuene pexanaeya-exanaenexa xanëjawaberena tanesiwanajamatabëcuenecopatsijiwiyo, abaxë pibisiacuene exanaeya-exanaenewewa, bajarapajiwi pija-cuata benawësicëta ibotoxaneto, peyajawajopaenexareca pucaxanetotuatujëareca. ⁷Mapanacuataje nawita jiwi pejamatabëcuene-ëjëbijawanëtsi,

b 18:4 *mapapejewaxinëyo jamatabëcuene-itsije*: Pejewaxi ba-apo-itorobi paxa, penabeje, pewetsinexatsi. Biji rajane, itaxutuajamatejema tsabiabi saya perajutsinexatsi penamatawenonaecueni. Aposiwabëjai itsajota pijamonae topitsijitsiatsi penamatawenonaecueni. Apocanaëjëtsinua ayaijamatabëcuene pexainajewanexa itsamonaewecua.

pejitsipaeya-exanaenexatsi pibisiacuene. Bajaraxua jiwi apocajëpaetsi penawecua-ajibia-exanaejawa. Itsiata, pajiwi pejamatabëcueneta pibisiacuene exanaeya-exana xanëjawaberena tanesiwanajamatabëcuenecopatsijiwiyo, bajarapajiwi Dioso ayaicuenia naneconitsia-exanaenatsi.⁸ ¡Bajaraxuata, panecobeta, panetaxuta-ata, pibisiacuene itsa paca-exanaeya-exanaena, panawecuacacure! ¡Tajë panawecuaxuare! Bitso biji, pacatoxanepana panejonejawa cobemataxucaeaya, taxumataxucaeaya-ata, Dioso peyanacua-ewetsinacuajawabelia, Dioso papecaxuabiyaniwa anijacobeje, anijataxubeje-ata yajawa, apopewerewerecae-isotojawabelia.⁹ ¡Paneitaxutota panetaejawa, pibisiacuene itsa paca-exanaeya-exanaena, pana-itaxutocajure! Bitso biji, pacatoxanepana panejonejawa pacae-itaxutojiwimë Dioso peyanacua-ewetsinacuajawabelia, Dioso papecaxuabiyaniwa anija-itaxutobeje yajawa apopewerewerecae-isotojawabelia —jai Jesús pijajiwijawabelia.

**Jesús tsipaeba pijajiwijawabelia pecuenecataeliwaisi,
oveja penaxuabinë peliwaaiscuenia**

(Lc 15:3-7)

¹⁰ Jesús jumaitsi pijajiwijawabelia:

—¡Panayajiwitaema, beweliacuena panetaeyaniwa mapitsipejewaxijiwiyo,^c xanëjawaberena tanesiwanajamatabëcuenecopatsijiwiyo, tsipaji bajarapamonae ángelewi yajawajinawanapa peyawenonababinexatsi! Bajarapa-ángelewi taxa Dioso, athëbëtatsia pe-ecaenë, pitabarata jinawanapa.

¹¹ Xanë, Daxitajiwi Pematapijinënë, patajopajë tacapanepaenexa daxita Diosowecua naxuabiaya pejinawanapaewimi.

¹² »¡Pacanaëjère mapacueneje! Pebi xainaëjitsipa cien ponëbeje oveja. Nexata, itsa toyajuwënëxaxuabijitsipatsi caenë, oveja, pexainaenë puenetsipa abaxë noventa y nueve ponëbeje, pejaitsinexa petonaxuabinëtsi.

¹³ Xaniajanë pacuenia pacatsipaebijitsiatsi. Bajaraponë pija-oveja itsa caxitajarabijitsipa, bitso barëyataejitsipa. Nexata bitso siwajamatabëcuenecobarëya tsipae petonaxuabinëmitsi, noventa y nueve ponëbeje apopetonaxuabiwit-siwecua. ¹⁴ Bajarapijinia pacuenia, pane-axa-ata, athëbëtatsia pe-ecaenë, apojitsipae pewecuanaxuabinexatsi caejiwi-ata, mapitsipejewaxijiwixi-ataje, xanëjawaberena tanesiwanajamatabëcuenecopatsijiwi —jai Jesús pijajiwijawabelia.

**Diosojawabelia pesiwanajamatabëcuenecopatsijiwi
bebarajamatabëcuenexanepana pajiwi itsacueniabatsi**

(Lc 17:3)

¹⁵ Icatsia, Jesús jumaitsi pijajiwijawabelia:

c 18:10 *mapitsipejewaxijiwiyo*: Jesús pijajiw pitorobixae, pejamatabëcuenecopatsipaenexa pejewaxinëyo, Diosojawabelia pesiwanajamatabëcuenecopabiwi, nexata canacueneba pejewaxijiwiyo peliwaaiscuenia, daxita mapaliwaisijawalia, pejamatabëcuene-itajëtsinexa pijajiw, beweliajamatabëcuene penataewi. Itsiata, itsamonae canaëjëta Jesús peyabarajumaitsijawa pepopejewaxijiwixi, tsipaji yapëxanepana penaweretsiwi pejewaxi peyamaxë-itojorobinexatsi. «Bajaraxuata, Dioso ayaicuenia naneconitsia-exanaena pajiwi pibisiacuene exanaeya-exanaejitsipa pejewaxijiwiyo», jai.

—¡Itsanē nijamonaenē, Diosojawabelia pesiwanajamatabēcuenecopat-sinē, pibisiacuene itsa cato-exana, nexata ponare bajaraponējawabelia, xaniawaetsia nebarēcuaicuaijainexa, caenējawata, bajaraxua yabara! Nexata, itsa canamuxuna-ewetsiana, najamatabēcuenepēñeyorotsiana pecato-exanaejawawecua, icatsia panenabarajamatabēcuenexanepanae-nexabeje, bepanacaemonaejiwimēbejecuenia asiwaya panenataenexa-beje. ¹⁶ Itsiata, xaniawaetsia itsa apocanamuxuna-ewetsi tsane, nexata natsicueyajunatsianame caenē nebarēponaenexa, itsa jume, anijanēbeje, papecajumetaenēnexabeje panenabarēcuaicuaijajawatabeje, pibisia-cuene pecato-exanaenējawabelia. Bajarapacuenia pane-exanaejawatabeje, pajumenamatamotsianame panenatoxanebijawabeje. Pajumecowēñēt-sianamebejenua pacuenia paca-itoroba Dioso penajumecopatsiliwaisi Moisés-pijinēta. ^d ¹⁷ ¡Nexata, bajaraponē itsa tsiteca aponamuxuna-ewetsi tsane neyajawaponaenēbeje-ata pemuxujobiawatsi, nexata pabarēponare tawēñeta penacaetuatabiabiwijawabelia, ^e papecayawenonaeyamuxujio-binexa! Bajarapamona-ata itsa apojumecowēñētsi pemuxujobiliwaisitsi, nexata bajaraponē pataenexa Diosojawabelia apopesiwanajamatabēcue-necopatsinēcuenē. Nexata baja, panawecua-itawetsianame pepatsiyaniwa panenacaetuatsijawata.

¹⁸ »Xaniajanē pacuenia pacatsipaebijitsiatsi. Paxamē patajajiwiwē mapanacuataje pacuenia patocaējētame panenaneconitsia-exanaenexa pijaneconi pexinaejijiwiyo, Dioso, athēbētatsia pe-ecaenē, caejamatabēcuenē xainaena bajarapajamatabēcuenē yabara. Pajiwi pijinia patocaējētame planeconijibi-jawa, Dioso, athēbētatsia pe-ecaenē, caejamatabēcuenē xainaena bajarapajamatabēcuenē yabara.

¹⁹ »Orijibia, pacatsipaebianatsi: Mapanacuataje pa-anijanēmēbeje itsa panajamatabēcuenējēpamebeje xua yabara pawajētsijitsiamēbeje Dioso-jawabelia, nexata taxa, athēbētatsia pe-ecaenē, pacato-exanaenabeje xua pawajētamebeje, ²⁰ tsipaji itsajota anijajiwibeje, acueyabi pajiwiwibeje-ata, tajajijiwi, tawēñeta nacaetuata, bajarajota xanē yajawa-ecaenajē —jai Jesús pijajijawabelia.

²¹ Nexata Pedro imoxoyolia Jesús peyanijobinexa. Jumaitsi:

—Tajatuxanenē, itsajijiwi, Diosojawabelia patanajuasiwanajamatabēcuenē-copatsijiwibeje, apotajitsipaecuene, piabejejawa, itsa neto-exanabiabijitsipa, ¿detsa nexata xuabeje siwajamatabēcaewabiabianajē? Itsa jume, ¿siete tsaja xuabeje? —jai Pedro.

²² Nexata, Jesús jumaitsi bajaraponējawabelia:

—Siete xuabejenexa yabara apojumaitsinē. ¡Biji rajane, siete pasetenta xuabeje aponejitsipaecuene cato-exanae-ata, siwajamatabēcuenecaeware, barajamatabēcuenexanepanaeya netaenexa; *baitsi cuatrocientos noventa xuabeje!* —jai Jesús Pedrojawabelia.

d 18:16 Taema Deut. 19:15; 1Ti 5:19. **e 18:17** *tawēñeta penacaetuatabiabiwi*: Wowaijumeta canacueneba iglesia, bajarapajumenexa. Itsiata, pepo-iglesiacuene apopetaxuxuabixae abaxē, paxanē pajumaitsinē saya, «tawēñeta penacaetuatabiabiwi», pajanē. Baitsi, Jesús pijajijiwi nacayapētaeya-exana 12 ponēbeje Jesús pepēnaponaewitsi yabara Mateo, Marcos, Lucas, Juan peyaquinaeliwaisianēta. Juya, Hechos-baxutojawaweliacujinae nacayapētaeya-exana daxita Jesús pijajijiwi yabara; baitsi, pamonaē iglesiapijiwi yabara.

Jesús tsipaeba jiwijawabelia pecuenecataeliwaisi, Ponë apojitsipae peb arajamatabëcuenexanepanaejawa itsanëjawabelia peliwaaisicuenia

²³ Jesús tsipaeba itsa pecuenecataeliwaisicuenia pijajiwijawabelia.

Jumaitsi:

—Dioso, athëbëtatsia pe-ecaenë, pijajiwi peyanacua-ewetsijawa, cue-nejëpa pacuenia nacua-ewetsinë pijajiwi pejunatsijawa, peyapëtaeya-exanaenexatsi pecanacuenebijawa bajaraponë pijapalata. ²⁴ Bajarapacuenia peyapëtaeya-exanaponaejawatatsi, caxitajaraba itsanë bitso ayaijawa piamoneyabinëtsi, millones papesobejecuenia.^f ²⁵ Bajaraponë apoxinae pacuenia matamotsijitsia. Nexata, nacua-ewetsinë itoroba pijajiwi bajaraponë pecanajetaxuabinexatsi, daxita pexi, pijawa yajawa, pecobecowë-ata. Bajarapacuenia itsa canajetatsi, canaëjëta pepitsinexa pijamatamo piamoneyabinëtsi. ²⁶ Nexata, piamoneyabinëtsi, nacua-ewetsinë pitabarata pematabacabëta nucajunua. Pinijicuenia wajëta nacua-ewetsinëjawabelia. Jumaitsi: «¡Nebejiobiataema! ¡Nejamatabëcuene-ewere abaxë! ¡Camatamotsianatsi rabaja daxita xua ca-amoneyabatsi!», jai. ²⁷ Nexata, nacua-ewetsinë itaxutotsoniatane piamoneyabinëtsi. Nexata, jumaitsi piamoneyabinëtsijawabelia: «Daxita rabaja tane-amoneyabijawamë, iquinajë. Nexata baja, apone matamotsimë tsane», jai nacua-ewetsinë. Bajaraxuacujinae, copata baja penawiatsinexa.

²⁸ »Nexata, bajaraponë ajena pepitsapaejawatalia nacua-ewetsinë pjabowecua, caxitajarabaxuaba itsanë penajuanacuenebabiabinëbeje nacua-ewetsinë pijajawa. Bajarapanajuanacuenebabiabinëbeje itsanë amoneyabatsi saya cien ponëbeje palatanëanë.^g Nexata, asaëyata cuaibosicuejsacaya, jumaitsi bajaraponëjawabelia: «¡Nematamore tane-amoneyabijawamë!», jai. ²⁹ Nexata, piamoneyabinëtsi pitabarata pematabacabëta nucajunua. «¡Nebejiobiataema! ¡Nejamatabëcuene-ewere abaxë! ¡Camatamotsianatsi rabaja daxita xua camoneyabatsi!», jai. ³⁰ Itsiata baitsi jane, bajaraponë piamoneyabinëtsi apo-itaxutotsoniatane. Biji rajane, itoroba pe-etsinexa penaneconitsiwi pejebabiabibojawabelia, bajarapacuenia pematamotsinexatsi daxita piamoneyabijawatsi. ³¹ Nexata, nacua-ewetsinë pijajiwi itsa tane bajarapacuenia pexanaejawa penajuanacuenebabiabinëbejewawabelia, bajarapamonae bitso najamatabëxaina. Nexata ponalia, petsipaebinexa pijatuxanenëjawabelia. ³² Nacua-ewetsinë pijajiwi itsa tsipaebatsi bajarapacuenia, nexata itoroba icatsia petojunatsinexatsi bajaraponë. Itsa baja tocapatsi, nacua-ewetsinë jumaitsi bajaraponëjawabelia: «¡Nijamatabëcuenebejenë baja cajena! Cato-iquinatsi rabaja picani tane-amoneyabijawamë, tsipaji pinijicuenia newajëtame tacabejiobiataenexa. ³³ Pacuenia xanë ca-itaxutotsoniatanetsi, ¿Detsa xuajitsia bajarapacuenia xamë apo-itaxutotsoniatamë peca-amoneyabinë?» ³⁴ Nexata, nacua-ewetsinë bitso bara-anaepana millones papesobeje piamoneyabinëtsijawabelia.

f 18:24 *millones papesobejecuenia*: Wowaijumeta pitsapa «diez mil talentos», pejajiume. Bajarapadiezmilpatalentobeje cuenejëpa 60,000 pamatacabibeje penacuenebimatamo, baitsi 164 pawai-beje pematatsënëna penacuenebimatamo. **g 18:28** *cien ponëbeje palatanëanë*: Wowaijumeta pitsapa cien padenariobeje, baitsi 100 pamatacabibeje penacuenebimatamo.

Bajaraxuacujinae, itoroba pecaponaenexatsi penaneconitsiwi pejebabiabi-bojawabelia, bajarajotalia pebejiobia-exanaenexatsi epematamoweretsijawabelia daxita piamoneyabijawa. ³⁵ Bajarapijiniya pacuenia, paca-exanaena taxa Dioso, athëbëtatsia pe-ecaenë, paxamë-ata itsa apopabarajamatabëcuenecaewimë tsane panebarajamatabëcuenexanepanaenexa pamonae paca-itsacueniaba —jai Jesús pijajiwijawabelia.

Jesús jiwi liwaisi tsipaeba penacojibinë pijawa pexuabiyaniwa

(Mc 10:1-12; Lc 16:18)

19 ¹ Jesús baja pemuxujiobiweretsicujinae pebarajamatabëcuene-xanepanaenexa itsamonae itsacueniabi-atatsi, pona baja Galilea nacuwecua, peponaenexa Judea nacuyabelia. Nicaba Jordán-mene itsapanabelia. ² Jiwi ayaibitsaëtozaneto pënaponatsi. Bajarajotalia, Jesús jamatejemaya-exana daxita pamonae piawitanewi. ³ Nexata fariseowiya-juwënëwi Jesús imoxoyorenatsi. Jamatabëcuene-ëjëbiaya yanijobatsi mapacueniaje:

—¿Xanepana tsaja penacojibinë pijawa pexuabinexa itsacueneliwaisixi yabara-ata? —jai fariseowi

⁴ Nexata, Jesús jumaitsi:

—¿Apopalebimë tsaja cajena Dioso pejumeliwaisibaxuto, paneyapëtaenexa bajaraxua yabara pejumaitsijawa? Bajarapabaxutota yaquinaruta pejumaitsijawa, pamatacabi Dioso taxuxuaba nacua pexanaejawa, exana caenë pebi. To-exananua caewa petiriwa pijawanexa, penajuaponaponaenexabeje. ⁵ Bajaraxua yabara Dioso pejumeliwaisibaxutota jumaitsi mapacueniaje:

«Pebi itsa pita petiriwa pijawanexa, bawecuanatsata^h paxa, pena-ata, saicaya peparëponaponaenexa pijawa. Nexata, anijajiwimibeje naexana becaejiwi peperabëtocuenia», jai. ⁶ Nexata, pajiwiibeje napitabeje Dioso apotae be-anijajiwibeje. Biji rajane, tane becaejiwi. Bajaraxuata, apoxanepanae itsanë-ata pijawa pexuabijawa, tsipaji Dioso pejamatabëcueneta napitsia-exanatsibeje —jai Jesús fariseowijawabelia.

⁷ Nexata, icatsia fariseowi jumaitsi:

—¿Detsa xuajitsia bajayata Moisés-pijinë jumaitsi mapacueniaje: «¡Ponë pijawa jamatabëwecuanawiata, toyaquinae pewecuanawiatsiliwaisi, xucujinae pijawa pecapitsapaenexa pijabowecua!»,ⁱ pijajai bajaraponë? —jai fariseowi.

⁸ Nexata Jesús jumaitsi:

—Bajarapacuenia Moisés-pijinë pacatocopata pane-ajamatabëcuenetajaxae, panijawajiwi panexuabaponaenexa. Itsiata bailsi jane, Dioso pexanaejiwibejewaweliacujinae, apotocopatsi pebi pijawa pewecuanawiatsinexa. ⁹ Itsiata bailsi jane, xanë mapacuenia pacatsipaebatsije. Ponë pijawa xuaba, pibisiacuene apowecua-exanae-atatsi itsanëjawabelia, bajaraponë itsa nacojioba icatsia itsawajawabelia, pibisiacuene exana pewitota. Nexata, naneconita Diosojawabelia. Dioso cajena abaxë bajara-ponë pexuabiwa pijawacuene totanetsi. Ponë-ata itsanë pexuabicowëwa

h 19:5 bawecuanatsata: Taema Gén. 2:24; 1Co 6:16; Efe. 5:31. **i 19:7** pecapitsapaenexa pijabowecua: Taema Deut. 24:1-4; Mt 5:31; Mc 10:4.

pitsipa, bajaraponë-ata pibisiacuene exanaejitsipa pewitota, tsipaji bajara-powa abaxë Dioso tanetsi itsanë pijawacuene —jai Jesús fariseowijawabelia.

¹⁰Nexata, Jesús pijajiwi jumaitsitsi bajarapaliwaisi yabara:

—Itsa bajarapacuenia pebi apotocopatsitsi itaxutejema pijawa pexuabinexa, nexata meta bajarapajiwi beje/ najëpaeya apobenacojiobi —jai Jesús pijajiwi.

¹¹Nexata, Jesús jumaitsi pijajiwijawabelia:

—Daxitajiwi apocuenecaëjëpaetsi tsane pejumecowënëtsijawa xua yabara jumaitsinë. Pamonaë saya Dioso cuenecaëjëpaeya-exanatsi, jamatabëcuenecaëjëpaenatsi nacojobinejewa pejinawanapaejawa. ¹²Itsamonae yajawa naexana pena pecototojawawerenacujinae apopecuenecaëjëpaewitsi penacobiwijawa, pe-ëthëjibiwi penaexanaexae. Itsamonae pijinia apocaëjëpaetsi penacobiwijawa pewëna pebiwiwi pe-ëthëjucaexaetsi. Itsiata, itsamonae jinawanapa bepe-ëthëjucaewitsi, pejitsipaexae ëDioso pijacuene peto-exanawanapawinexa. Bajarapitsiwi jamatabëcuenecaëjëpatsi nacojobinejewa pejinawanapaejawa. Nexata, pajiwi jamatabëcuenecaëjëpatsi peponaponaëjawa patacatsipaebiliwaisicuenia, bajarapacuenia be-exanaponapona —jai Jesús pijajiwijawabelia.

Jesús pexaniacuenia cuenewajunupaeba pejewaxijiwi

(Mc 10:13-16; Lc 18:15-17)

¹³Itsamatacabijawa pexi pexainaewi capatapona tsiquirijiwi Jesús-jawaberena, pecobeta pejayataponaenexa, petowajëtaponaenexatsi Diosojawabelia. Itsiata baitsi jane, Jesús pijajiwi itaweta pexi pexainaewi pecapatsiyaniwa Jesús-jawaberena.

¹⁴Nexata, Jesús jumaitsi pijajiwijawabelia:

—¡Pëtsa pa-itawetame! ¡Pacopare pejewaxijiwi pepatsinexa xanëjawaberena! Mapitsipejewaxijiwixije jume-aebinejewa, xaniawaetsia bajumexaniatane paliwaisi tsipaebatsi. Nexata, pamonaë jitsipa pejonejawa Dioso, athëbëtatsia pe-ecaenë, pijajiwi peyanacua-ewetsijawata, bejumexaniatane, jume-aebinejewa pacuenia mapapejewaxijiwixije —jai Jesús pijajiwijawabelia.

¹⁵Nexata, Jesús tsimatanacobeuatapona caepejewaxijiwiyo canacujitsia. Cuenewajunupaebapona, Dioso pexaniacuenia peyawenonaenexatsi. Bajaruacujinae, Jesús baja pona, pijajiwi yajawa, bajarapanacuawecua.

Pewëjëato, bitso pexainaenë, barëcuaicuajai Jesús-jawabelia

(Mc 10:17-31; Lc 18:18-30)

¹⁶Jemata pewëjëato patajopa Jesús-jawaberena, peyanijobinexatsi. Jumaitsi:

—Petuxanenë, pexaniajamatabëcuenenëmë. ¿Detsa pitsipexaniacuene, exanaenajë taxainaenexa matabi apowerewerecaejawa? —jai pewëjëato.

j 19:10 *bajarapajiwi beje*: Jesús pijajiwi, canaëjëta saya pebiwiwi yabara. Itsiata, xua Jesús jumaitsi pebiwiwi yabara, pijawa yabara-ata, namata-enetsia naliwaisijëpabeje petiriawinexa pamonajiwi yabara.

¹⁷Nexata, Jesús jumaitsi pewējēatojawabelia:

—¿Detsa xuajitsia neyanijobame xua pexaniajamatabēcuenē yabara? Ajibi cajena itsajiwi-ata pexaniajamatabēcuenē pexainaejiwi. Caenē rabaja Dioso pexaniajamatabēcuenē pexaināenē. ¡Itsia, itsa jitsipame nexaināenēxā matabē apowerewerecaejawa, jumecowēnēre pacuenia ca-itoroba Dioso penajumecopatsiliwaisi Moisés-pijinēta! —jai Jesús.

¹⁸Nexata, pewējēato jumaitsi Jesús-jawabelia:

—¿Detsa paliwaisi nexata jumecowēnētsianajē? —jai.

Nexata, Jesús jumaitsi:

«Pētsa beyaxuabame jiwitonē! ¡Pētsa jaitame itsawa nijawawecua! ¡Pētsa nacobetoxotame! ¡Pētsa itsamonae pexanaejawa yabara najumetsēnētsiaya baracuaicuajamē! ¹⁹¡Axa, ena-ata, ya-yataema! ¡Asiwamēre itsajiwi-ata pacuenia xamē nijacuata nasiwamē!» —jai Jesús pewējēatojawabelia.

²⁰Pewējēato nexata jumaitsi:

—Daxita rabaja bajarapaliwaisianē jumecowēnētsiaponaponajē, pejewaxinēnējawawerenacujinae. ¿Detsa xua netosaica abaxē ta-exanaenēxā? —jai pewējēato.

²¹Nexata Jesús jumaitsi:

—¡Itsa jitsipame pepacuenē aneconijibia neponaponaejawa, nexata ponare necanajetsinēxā daxita xua xainame! Bajarapamatamomi tsicobetsanaenē bepejibiwijawabelia. Nexata, bajarapacuenia bitso xainaenēxā Dioso pijanacuatatsia. Bajaraxuacujinae jane baja, nepēnaponaenēxā —jai pewējēatojawabelia.

²²Nexata pewējēato itsa jumetane bajarapacuenia Jesús pejumaitsiyawatsi, najamatabēxainaēya baja wecuapona, tsipaji daxitacuenē bitso pexaināenē. Bajaraponē apojamatabējumecowēnētsi paliwaisi Jesús tsipaebatsi.

²³Nexata bajaraponē pecowēta Jesús jumaitsi pijajiwijawabelia:

—Xaniajanē pacuenia pacatsipaebijitsiatsi. Ponē bitso pexaināenē daxitacuenē, tsi-ayapēbejetsi tsane pejonejawanēxā Dioso, athēbētatsia pe-ecaenē, pijajiwi peyanacua-ewetsicuenējawabelia. ²⁴Icatsia, matawējēa pacajumaitsi. Pacuenia camello apocājēpaetsi pejonejawa paluta-eto-itaxutowojotualia, bajarapijinā pacuenia to-ayapēbejetsi tsane bitso pexaināenē pejonejawanēxā Dioso, athēbētatsia pe-ecaenē, pijajiwi peyanacua-ewetsicuenējawabelia, pejamatabēcuenecaranatsixaetsi pexaināejawa —jai Jesús.

²⁵Pijajiwi itsa jumetane bajarapacuenia Jesús pejumaitsiyawatsi, bitso jama-tabēcuenēnabenajaca. Nexata jumaitsi Jesús-jawabelia:

—¿Detsa nexata pitsiwi cuenecājēpaenatsi pepanēpaenēxā, itsa pexaināewi-ata apopanēpae tsane Diosojawabelia? —jai.

²⁶Nexata Jesús pijajiwi asaēya naēcota. Jumaitsi:

—Jiwi raja apocājēpaetsi pijacuata penacapanēpaenēxā Diosojawabelia. Itsia baitsi jane, xua jiwi to-ayapēbejetsi, caenē Dioso caējēpatsi pexanaenēxā —jai Jesús pijajiwijawabelia.

²⁷Nexata Pedro jumaitsi Jesús-jawabelia:

—Patajatuxanēnē, paxanē rabaja pacopabajē daxitacuenē pataxaināejawami, patacapēnājinawanāpaenēxā. ¿Detsa meta xua Dioso panerajutsiana bajaraxuanējamatabēcuenē? —jai Pedro.

²⁸ Nexata Jesús jumaitsi pijajiwijawabelia:

—Xaniajanë pacuetia pacatsipaebijitsiatsi. Pamatacabi Dioso icatsia daxitacuen pejanacuenia exanaena, Xanë, Daxitajiwi Pematapijinënë, ecaenajë tajapeniweniwenaeatronojawata, tayanacua-ewetsinexa daxitajiwi. Bajarapamatacabi paxamë-ata, Dioso pacatocopatsiana patacabarë-ewetsinexa Israel nacuapijiwi, doce ponëmibeje, pemomoxibitsaëto. Nexata patanepëñajina-wanapaewimë, doce paponëmëbeje, pacaenëmë canacujitsia, panijatronota pa-ecaponaename, wajanajua-ewetsinexa xua ewetsianajë, juez-nëcuenia bajarapamonae panetocanaëjëtaponaeñexa bajarapamonae pijaneconi.

²⁹ Daxita pamonaë tajamatabëcueneta pueneta pijabomi, pematapijiwi, pejuyapijiwi, paxa, pena, pijawa, pexi, pija-iranë-ata. Bajaraxuanëjamatabëcuen Dioso rajutaponaenatsi cien xuabeje, caejawayojamatabëcuen tsaponae. Xainaenanua matacabi apopewerewerecaejawa. ³⁰ Pamonaë aeconoxae mapamatacabitaje ayaijamatabëcuenewi tanetsi, palata pexinaewixae, itsamatacabi Dioso beweliamatabëcuenewi exanaenatsi. Pamonaë beweliamatabëcuenewi tanetsi bepejiobiwixae, itsamatacabi Dioso ayaijamatabëcuenewi exanaenatsi —jai Jesús pijajiwijawabelia.

**Jesús tsipaeba jiwijawabelia pecuenecataeliwaisi,
uvapabita penacuenebiwi peliwaaiscuenia**

20 ¹ Jesús tsipaeba itsa pecuenecataeliwaiscuenia pijajiwijawabelia. Jumaitsi:

—Dioso, athëbëtatsia pe-ecaenë, pijajiwi peyanacua-ewetsijawa, cuenejëpa ponë pexainaenë uvapabixaneto. Bajayacunua naropota, jiwi pejaitsinë petonacuenebiwineixatsi pijapabita. ² Nexata baja, itsa caxitajaraba jiwi petonacuenebiwineixatsi, yapëtaeya-exana pematamotsijawanexa caedenario caematacabi. Nexata, bajarapamonae bajarapamatamo tsitaxanepanatsi pematamotsineixatsi. Bajaraxuacujinae, pabi pexainaenë itoroba pijapabiabelia petonacuenebineixatsi. ³ Bajaraxuacujinae, icatsia naropota, bejamatabëcuen a las nuevejawa. Taenuba tomaratuatujëta pebijijiwi, itsajota jiwi nacaetuatabiaba itsacuenejawa apopecuene-enaewitsi. ⁴ Nexata, pabixainaenë jumaitsi bajarapamonaejawabelia: «¡Paxamë-ata paponaremelia tajapabiabelia, patanetonacuenebineixamë! Pacamatamotsianatsi raja xaniawaetsia», jai pabixainaenë. ⁵ Nexata, bajarapamonae-ata ponalia petonacuenebineixatsi. Pabixainaenë, matoneje-epatota, junata icatsia itsamonae. Xuacujinae, caniwiyo-epatota bejamatabëcuen a las tres-jawa, junata itsamonae. Bajarapamonae-ata ponalia petonacuenebineixatsi. ⁶ Bitso baja pepuacaniwiyo, bejamatabëcuen a las cincojawa, pabixainaenë icatsia pona tomaratuatujëareca. Caxitajarabaxuaba pebijijiwi, itsacuenejawa apopecuene-enaewitsi. Nexata, pabixainaenë jumaitsi bajarapamonaejawabelia: «¿Detsa xuajitsia saya daxitamatacabi jema pajinawanapame panacuenebinejewamë?» jai. ⁷ Nexata, bajarapamonae jumaitsi: «Tsipaji itsajiwi-ata apopanejunatsi patatonacuenebineixa», jai. Nexata, pabixainaenë jumaitsi: «¡Paxamë-ata paponaremelia tajapabiabelia patanetonacuenebineixamë! Pacamatamotsianatsi raja xaniawaetsia», jai pabixainaenë. Nexata, bajarapamonae jejai. Ponalia petonacuenebineixatsi.

⁸ Nexata baja, juameto itsa pëcaewaya, pabixainaenë jumaitsi pijajiwitonë penamatacaitorobinëjawabelia: «¡Junare baja tanetonacuenebiwi!

¡Matamobare baja! ¡Copiaya matamobare pamona cotocaewi juna-tajë! ¡Bajarapacuenia matamotaponare caebitsaëto canacujitsia tajunatsiwi tanetonacuenebiwinea! Nexata, juya cotocaewi matamobianame copiaya tajunatsiwi », jai pabixainaenë pijajiwitonëjawabelia. ⁹Nexata, pamona cotocaewi pata a las cincojawa penacuenebinexa, parena pematamobinexatsi. Caenë canacujitsia rajutaponatsi caedenario. ¹⁰Nexata, daxita pamona bajayacunua copiaya pata penacuenebinexa, cotocaewi juya parena pematamobinexatsi. Nexata, bajarapamona jamatabëju-maitsi: «Caedenario meta pematatsënëa waxaitsi nacamatamobiana, tsi-paji copiaya waxaitsi patatsi wajanacuenebinexa», jamatabëjai picani. Itsiata baitsi jane, bajarapamona-ata, caenë canacujitsia, rajutaponatsi caedenario. ¹¹Nexata, bajarapamona penacuenebimatamo itsa nota baja, bara-anaepana pabixainaenëjawabelia. ¹²Jumaitsi bajarapamona: «Mapamona cotocaewi pepatsiwi, nacueneba saya caehora. Paxanë baja cajena ayaicuenia icotia daxitamatacabi panetsajawa. Itsiata, mapamonaenë najëpaeya panenajumamatamobame», jai bajarapamona. ¹³Itsiata baitsi jane, pabixainaenë jumaitsi bajarapamonaeyajuwënëjawabelia: «Itsacuenejawayo-ata pibisiacuen apopacato-exanaetsi. Patacajunatsijawata patanetonacuenebinexamë, pacatsipaebatsi caematacabi patacamatamotsinexa caedenario. ¹⁴Pacarajutatsi baja panijamatamo. ¡Papire baja! ¡Paponare baja panijabonëjawabelia! Pamona cotocaewi pata tanetonacuenebinexa, bajarapamona-ata matamobajë pacuenia pacamatamobatsi paxamë, xanë tajitsipaecuenia. ¹⁵Xanë baja cajena tajapalataxae, netoxanepana pacuenia jitsipajë patacarajutsinexa. ¿Pacobeca-ëbame tsaja bajarapamona ayaijawa tamatamotsixae?», jai pabixainaenë. ¹⁶Bajarapijinia pacuenia, Dioso-ata exanaena pijajiwijawabelia. Caejiwiyo canacujitsia matamotaponaena pejitsipaecuenia. Nexata, Dioso najëpaeya matamobiana petonacuenebiwitsi, cotocaewi pepatsiwi, copiaya pepatsiwi-ata. ^kPamona ayaijamatabëcuenewi penataewi, itsamatacabi Dioso bewelia-jamatabëcuenewi exanaenatsi. Pamona pijinia beweliajamatabëcuenewi penataewi, itsamatacabi Dioso ayaijamatabëcuenewi exanaenatsi. Bajarapacuenia Dioso exanaena, tsipaji jiwi ayaibitsaëto xaneto junatsi-ata petonacuenebiwinea, caejiiwiyobeje saya jumecowënëta —jai Jesús pijajiwijawabelia.

Icatsia Jesús tajëwelia nawajunupaeba pebeyaxuabijawanexatsi

(Mc 10:32-34; Lc 18:31-34)

¹⁷Jesús, pijajiwi, jiwi ayaibitsaëto yajawa, penajuanajetarubenaewata Jerusalén tomarabelia, namutua Jesús junata pijajiwi, doce ponëbeje,

k 20:16 *cotocaewi pepatsiwi, copiaya pepatsiwi-ata*: Copiaya pepatsiwi raja judíowi, tsipaji Dioso copiaya junata Abraham-pijinë pesiwanajamatabëcuenecopatsinexatsi. Nexata, bajaraponëmi pemomoxi exanawanapa Dioso pejitsipaecuenewi. Bajaraxuata, bajarapamona copiaya pepatsiwi Dioso pijacuenewi petonacuenebiwinea. Bexëjawabelia, apóstolnë Pedro pejamatabëcueneta, Dioso junata apojudíowi pesiwanajamatabëcuenecopabinexa Jesucristojawabelia. Bajaraxuata, apojudíowi cotocaewi pepatsiwi Dioso pijacuenewi petonacuenebiwinea. Bajarapacuenia yapënetsi Dioso najëpaeya perajutsijawanexa pijanacuatsia apojudíowijawabelia, xua rajutsiapaeba judíowijawabelia. Taema Gál. 3:7-9.

pimoxoyotsinexatsi. Nexata, ëpijajiwi pebarënacaetuatsijawata saicaya bajarapamonaewecua, Jesús icatsia tajëwelia nawajunupaeba pebeyaxuabijawane-xatsi. Jumaitsi mapacueniaje:

¹⁸—¡Panejumetaema! Mara Jerusalén tomarabelia ponatsije. Bajarajotalia Xanë, Daxitajiwi Pematapijinënë, newaetabiana, tanecanajetsinexa sacerdotewi penamatacaitorobiwi pecobeyabelia, judfowi pecujarubiwi pecobeyabelia-ata. Nexata xanë, neneconitsiana tanebeyaxuabinexa. ¹⁹Bajaraxuacujinae, icatsia apojudfowi pecobeyabelia necopatsiana, bajarapamonae tanecapocaponaenexa, tanejumatitibabenexanua penaneconitsiwi pejumaconitabiabimacata. Bajaraxuacujinae, cruzajawabelia necobematabiabarutsiana tatëpaenexa. Itsiata baitsi jane, tatëpaecujinae, acueyabi matabacaba, icatsia asaënë tsane —jai Jesús pijajiwi jawabelia.

**Santiago, Juan-beje, pena towajëtatsibeje Jesús-jawabelia
penamamotsitaxunae perajutsinexatsibeje**

(Mc 10:35-45)

²⁰Santiago, Juan-beje, paxa pewënë Zebedeo. Nexata bajaraponëbeje pena barëliatsibeje Jesús-jawabelia. Bajarapowa pematabacabëta nucajunua Jesús pitabarata, pewajëtsinexa pexaniacuene peto-exanaenexatsi pexënatobeje yabara. ²¹Nexata Jesús jumaitsi bajarapowajawabelia:

—¿Detsa pitsicuene jitsipame tacato-exanaenexa? —jai Jesús.

Nexata bajarapowa jumaitsi Jesús-jawabelia:

—Pamatacabi daxitacuene ewetsianame, tocopatsianame taxënatobeje nemuxuneneta pena-ecaenexabeje panenajua-ewetsinexa. Caenë tocopatsianame necujuanenia pe-ecaenexa. Itsanë pijinia ecaeya-exanaename netsawenonenia¹ —jai bajarapowa.

²²Nexata, Jesús jumaitsi Santiago, Juan-beje jawabelia:

—Paxamëbeje apopayapëtaemëbeje xua pawajëcaeya-exanamebeje ena xanë jawaberena. ¿Pacacajëpabeje tsaja, panenacaewetsinexabeje ayaicuenia papecabebiobia-exanaenexabeje pacuenia xanë Dioso netocajëta jiwi tanebejiobia-exanaenexa? —jai Jesús bajaraponëbeje jawabelia.

Nexata, Santiago, Juan-beje jumaitsibeje:

—Jājā, panecajëpabeje cajena —jaibeje.

²³Nexata, icatsia Jesús jumaitsi bajaraponëbeje jawabelia:

—Paxaniajamëbeje cajena. Pacuenia xanë Dioso netocajëta jiwi tanebejiobia-exanaenexa, paxamëbeje-ata ayaicuenia pacabejiobia-exanaenabeje. Itsiata baitsi jane, xua panewajëtamebeje panenacaenexabeje, itsanë tacujuanenia, itsanë tatsawenonenia, bajara-xua Dioso aponetocopatsi patacatocopatsinexabeje, tsipaji raja taxa

¹ 20:21 *necujuanenia ... netsawenonenia*: Peyanacua-ewetsiwinexa bajarapataxunabeje, pecujuanenia, petsawenoneniabeje, bitso peyaiyataetaxunabeje itsataxunaenëwecua. Ponëbeje yajawa-eca pebarënacuenebinexabeje, caejamatabëcuene penajuaxainaewi penacuenebijawata pecuene caranatsiyaniwatsi. Petsawenonenia pamaxë cuene-itajëta penayacarantsijawa, tsipaji bajarapamaxëta escudopanata nacaranatabiaba peyotsijawata. Pecujuanenia pamaxë cuene-itajëta pijinia pecuene namataxainaejawa pexanaejawa, tsipaji bajarapamaxëta espadata canawajabitsaëtabiaba.

Dioso ëpitapetsiwinexa abaxë bajaraxua toxaniawaeta —jai Jesús bajaraponëbejewabelia.

²⁴Nexata, diez ponëbeje Jesús pijajiwi, itsa wënëliwaisitane pepëya bajaraxua Santiago, Juan-beje Jesús-jawabelia pewajë-caejawabeje, bajarapamonae jamatabëbara-anaepana bajaraponëbejewabelia. ²⁵Nexata, Jesús daxita pijajiwi junata. Jumaitsi bajarapamonaejawabelia:

—Payapëtaneme rabaja pacuenia nacua-ewetsiwi ba-exana mapana-cuataje. Ajumesaëya itorobabiaba pijanacuapijiwi itaxutotsoniataenejewa. Bajarapijinia pacuenia, exanabiaba pamonaе yajawanacueneba. Ayai-jamatabëcuenewi penataexae, ajumesaëya itorobabiaba xua jamatabë-itoroba pewetsinacuanëjawa pejinawanapaewi peto-exanaenexatsi.

²⁶¡Pëtsa paxamë bajarapacuenia pa-exaname, pane-ewetsijawata taja-jiwi! Biji rajane, ponë paxamëyajuwënëñë jitsipa ayaijamatabëcuenenë penaexanaejawa paxamëtuatuajëta, bajaraponë daxita paxamë bepani-jajiwitonëcuenia bepacyawenonabiaba. ²⁷Ponë paxamëyajuwënëñë jitsipa penaexanaejawa papecanamatacaitorobinënexa, bajaraponë daxita paxamë panijajiwitonë benaexana papecayawenonabiabinexa. ²⁸Bajarapacuenia itsa pa-exanabiabianame, nexata xanë-ata ta-ewetsicuene panecuenëjëpaename, tsipaji raja Xanë, Daxitajiwi Pematapijinë-atanë, apopatajopaenë jiwi taneyawenonaenexa. Biji rajane, xanë patajopajë daxitajiwi tayawenonaenexa, tasiwatëpaenexanua, ayaibitsaëtoxaneto pibisiacuene pexanaeconimi yabara tatomatamotsinexa —jai Jesús pijajiwi jawabelia.

Jesús itaxutoxanepanaeya-exana bitso pitaxutotsëcënaenëbeje

(Mc 10:46-52; Lc 18:35-43)

²⁹Jesús, pijajiwi yajawa, pepitsapaejawata Jericó tomarawecua, jiwi ayaibitsaëto pënaponatsi. ³⁰Panamutojawa Jesús najetaruca, namutomuxu-neneta ecabeje bitso pitaxutotsëcënaenëbeje. Nexata, bajaraponëbeje, itsa jumetanebeje bajarapanamutua imoxoyo Jesús penajetarucaejawa, wawajai-beje tsecae.

—¡Petuxanenë, David-pijinë pemomomë, pane-itaxutotsoniataemabeje! —jai tsecaebeje.

³¹Jiwi picani jume-itawetatsibeje, pemoyatsecaenexabeje. Caranata biji, saya bitsoyo wawajai tsecaebeje.

—¡Petuxanenë, David-pijinë pemomomë, pane-itaxutotsoniataemabeje! —jai tsecaebeje Jesús-jawabelia.

³²Nexata, Jesús muxunanucojopa. Junata pitaxutotsëcënaenëbeje. Jumaitsi bajaraponëbejewabelia:

—¿Detsa xua pajitsipamebeje patacato-exanaenexabeje? —jai.

³³Nexata, bajaraponëbeje jumaitsibeje:

—Petuxanenë, pajitsipajëbeje pata-itaxutoxanepanaejawabeje —jai tsecaebeje.

³⁴Nexata, Jesús pitaxutotsoniataejawatabeje, itaxutojayata bajaraponë-beje. Bajarajota, caecuenia itaxutoxanepanabeje baja. Nexata, bajaraponë-beje Jesús pepëta naponabeje baja.

Jesús pebeyaxuabijawatsi, icatsia petëpaejawawecua penamatacotsijawanexa, yabara peliwaishi

(Mt 21:1–28:20)

**Pacuenia Jesús nacua-ewetsinëcuenia copiapitatsi itsamonae Jerusalén
tomarapijiwi**

(Mc 11:1-11; Lc 19:28-40; Jn 12:12-19)

21 ¹Jesús baja pijajiwi itsa barë-imoxoyotanajetaruca Jerusalén tomara, barëpatajopa Betfagé tomara canacujitsita, Olivobacabotsu-tojumata pe-ecaetomarayo. Nexata Jesús jumaitsi pijajiwitonëbejajawabelia mapacueniaje:

²—¡Mapatomarajawabeliaje paponarebeje! Bajarajotalia, ajena itsa papatsiaremeliabeje, pataenutsianamebeje burro, pesorowato, pecëtanut-sinëtsi pexënatonëyo yajawa. Pa-isinaenamebeje bajarapaburrobeje. Paya-maëyacarenamëbeje tsane xanëjawaberena. ³«¿Detsa xuajitsia burrobeje pa-isinamebeje?», itsa pacajaibeje tsane itsajiwi, nexata pajumaitsimëbeje tsane: «Wajatuxanenë raja namatawenona. Aeconoxae raja icatsia canawiat-siarena», pajamëbeje tsane —jai Jesús pijajiwitonëbejajawabelia.

⁴Bajarapacuenia Jesús itsa jumaitsi, tocopiapatatsi jane baja pacuenia Diosojumepaebinë, profeta Zacarías-pijinë, bajayata tajëwelia yaquina Mesías pepatsijawanexa yabara Jerusalén tomarata. Peyaquinaeliwaisita jumaitsi mapacueniaje:

⁵«Pajumaitsimë tsane Jerusalén tomarapijiwijawabelia: '¡Pataema penajetarucajawa paxamëjawaberena papecyanacua-ewetsinënexa! Beweliajamatabëcuenenëcuenia najetaruca. Pejananaweretsinë burrota yapatanaajetaruca,' pajamë tsane Jerusalén tomarapijiwijawabelia»,^m jai bajayata tajëwelia profeta Zacarías-pijinë peyaquinaeliwaisita, Mesías yabara.

⁶Nexata, Jesús pijajiwitonëbeje liabeje. Jumecowënëtabeje pacuenia Jesús itorobatsibeje. ⁷Yamaëya carenabeje burro pesorowato, pexënatonëyo yajawa. Nexata, bajarapaburrobeje Jesús pijajiwi tsijumajeba pijacamisajumawelia penaxatabijawanë. Nexata, Jesús ecaya pejananaweretsinë burro pejumata. ⁸Jesús penajetarucaenamutuarena, jiwi ayaibitsaëtoخانeto, tsiwajënaeyerequejebaponatsi pijacamisajumawelia penaxatabijawanë. Itsamonae pijinia tsiwajënaejebaponatsi pe-ucubabebaxujawanë. Bajarapacuenia exana penajamatabëcuene-itajëtsinexa yayataeya pecopiapitsijawatsi. ⁹Jesús penajetarucajawata jiwi ayaibitsaëtoخانeto pewajënaeya namataxainaeya najetarubena. Itsabitsaëtoخانeto pecowëya cotocewanajetarubena. Daxita baja rapamonae wënëxaniatsiaya wawajai tsanajetarubena mapacueniaje:

«¡Xamë panecapanepare,ⁿ pepopeyanacua-ewetsinë David-pijinë pemomomë!»

m 21:5 Taema Zac. 9:9. **n 21:9** *panecapanepare*: Bajarapajume arameojumeta, «*hosana*», hebreojumeta pijinia «*hoshana*». Taema Sal. 118:25. Bajarapajume judiowi bawawajai Diosojawabelia, itsa jitsipa pecapanepaejawanexatsi. **o 21:9** *David-pijinë pemomomë*: Bajarapacuenia judiowi wënërubabiaba Mesías bajarapamatacabijawa.

¡Dioso pexaniacuena yawenonaetsi, maponėje, penajetarucaenē wajatuxanenē pewēnēta!

¡Dioso, athēbētatsia ne-ecaenē, maponē nitorobinėje pejamatabēcueneta panecapanepae!», jai tsanajetarubenae wawajaiya Jesús yabara.

¹⁰ Nexata Jesús itsa pata Jerusalén tomarata, daxita bajarapatomarapijiwi muxunanabenajacaruta pejumetaejawata pewawajaijawa. Nexata, nayanijo-biaya jumaitsi:

—¿Detsa meta maponē najetarucaje? —najai bajarapamonae.

¹¹ Nexata jiwi jumaitsi:

—Mara ponėje Jesús najetaruca, Diosojumepaebinē, Nazaret tomarapi-jinē, Galilea nacuata pe-ecaetomara —jai bajarapamonae.

**Jesús pitsapaeya-exana templobowecua pecanajetabiabiwi,
pecomuacabiabiwinua**

(Mc 11:15-19; Lc 19:45-48; Jn 2:13-22)

¹² Jesús itsa pata Jerusalén tomarata, joneya temploboyalía. Bajarajota, tane pecanajetsiwi, pecomuacaewinua. Nexata, daxita bajarapamonae Jesús pitsapaeya-exana templobowecua. Palata pecambiabiabiwi-ata pijamesa-nēmi, ucucu pecanajetabiabiwi-ata pe-enabiabijawanēminua, topēnēyoroba-jaraba. ¹³ Jesús jumaitsi bajarapamonaejawabelia:

—Dioso baja cajena pejumeliwaisibaxutota mapatemplobo yabara tajēwelía jumaitsi mapacueniaje: «Tajabo raja, bajarapabota jiwi xanējawaberena penawajēcabiabibonexa», jai. Itsiata baitsi jane, paxamē juya yamaxē-itojorobiaya panenacobetoxotsinexa panacaetuatabiabame mapabotaje —jai Jesús templobota pecanajetabiabiwijawabelia.

¹⁴ Bajarajota, templobota, Jesús imoxoyorenatsi pitaxutotsēcēnaewi, pejayujayunaewi-ata. Nexata Jesús bajarapamonae xanepanaeya-exana.

¹⁵ Itsiata, pacujinae templobota penubenaesacerdotewi, judíowi pecujarubiwinua, taenubena Jesús pinijicuenejawanē petsita-exanaejawa Dioso pesaēta, bajaraxua yabara bajarapamonae bara-anaepanatsi. Orijiabia, itsa jumetaenubenania pejewaxi templobota pewawajaijawata pejumaitsi-jawa Jesús yabara: «¡Dioso raja pexaniacuene nacato-exana, tsipaji pata-jopa maponē Dioso pewēnēta, pepopeyanacua-ewetsinēmi David-pijinē pemomo!», pejaijawa Jesús yabara, itsa jumetane, matatoxenetsia bitso bara-anaepanatsi. ¹⁶ Nexata bajarapamonae jumaitsi Jesús-jawabelia:

—¿Tsipaji tsaja xamē yabara pejumaitsitsaponaejawaje apojumetaemē mapapejewaxije? ¿Aponecajume-itawetsi? —jai.

Nexata Jesús jumaitsi bajarapamonaejawabelia:

—Jājā. Jumetaniji picani. Itsiata, apojume-itawetsinē. ¿Paxamē tsipaji Dioso pejumeliwaisibaxuto apopalebimē, paneyapētaenexa pacuenia tajēwelía jumaitsi xanē yabara bajarapapejewaxi pewawajaijawanexa? Jumaitsi mapacueniaje:

«Pejewaxi, mito-apaenacuetoxi-ata, naxēanaena pecawēnēxaniatsinexa ayaijamatabēcuenenēmē yabara»,^p jai Dioso pejumeliwaisibaxutota —jai Jesús sacerdotewijawabelia, judíowi pecujarubiwijawabelia-ata.

¹⁷Nexata baja, Jesús bajarapamonaewecua pona. Jerusalén tomarawecua pijajiwi yajawa pitsapa, pepatsinexa Betania tomarayojawabelia. Bajarajota majita bajarapamona.

Pacuenia Jesús bijataenuta higeranae piacuaijibixae, yabara peliwaisi

(Mc 11:12-14, 20-26)

¹⁸Jesús pijajiwi Betania tomarata pebarëmajitsicujinae, merawia pitsijawata, bajayacunua, barëlia icatsia Jerusalén tomarabelia. Nexata namutua penajetarucawata, bajaraPonë bitso piajani. ¹⁹Taenuta higeranae namutomuxuneneta penucaejawa. Nexata, imoxoyolia, pecuai itsa xaina, pexaenexa picani. Itsiata, pecuai apocaxitarabi. Èpebaxu saya tsanucacae. Bajaruata nexata, Jesús jumaitsi higeranaejawabelia:

—¡Xamë baja cajena aponacuaitsimë tsane! —jai Jesús.

Bajarapacuenia Jesús pejumaitsiyawata, bepigia higeranae tēpanajereca yatabutopaya.

²⁰Nexata, Jesús pijajiwi itsa tane bajaraxua, jamatabëcuenenabenajaca. Nayanijobiaya jumaitsi:

—¿Detsa pacuenia maponae bepigia tsaquenatabanucaje? —najai.

²¹Nexata Jesús jumaitsi pijajiwijawabelia:

—Xaniajanë pacuenia pacatsipaebijitsiatsi. Itsa pa-itaxutuajamatejemamë tsipae Diosojawabelia, papecato-exanaenexa panejumaitsicuenia, pacuene-aebinejewamë, nexata paxamë-ata pacacaejēpaejitsipa pane-exanaenexa pacuenia exanajë mapahigeranaejawabeliaje. Pematatsënëa itsacuenenawänëua pane-exanaenexa, pacacaejēpaejitsipa. Nexata, itsa pajumaitsimë tsipae mapatsutojawabelia-ataje: «¡Wecuanatixire majotaje! ¡Pucaxanetojawabelia jopare!», itsa pajamë tsipae, pacajumecowënëtsipa panejumaitsicuenia. ²²Nexata, daxitacuene xua itaxutuajamatejemaya pawajëtsianame Diosojawabelia, pacato-exanaena —jai Jesús pijajiwijawabelia.

**Jesús najamatabëcuene-itajëta pexainaejawa
penamatacaitorobijamatabëcuene**

(Mc 11:27-33; Lc 20:1-8)

²³Jerusalén tomarata pepatsicujinae, Jesús icatsia junua temploboyalia. Bajarajota, jiwi liwaisi tsipaeba. Pepaebijawata, Jesús imoxoyorenatsi sacerdotewi, judiowi pija-ancianowi yajawa. Yanijobatsi mapacueniaje:

—¿Jipatsa pejamatabëcueneta pecanajetabiabiwi, pecomuacawinua, capitsapame mapatemplobopanabowecuaeje? —jai bajarapamona.

²⁴Nexata, Jesús jumaitsi bajarapamonaejawabelia:

—Xanë copiaya caejumeyo pacayanijobianatsi. Itsa paxamë panejumecanawiatsianame, nexata xanë juya pacatsipaebianatsi ponë nitoroba ta-exanaenexa bajarapacueni. ²⁵¿Jipatsa jane pejamatabëcueneta Juan-pijinë jiwi bautizabaponapona? ¿Dioso tsaja pejamatabëcueneta? Itsa jume, ¿jiwi tsaja pejamatabëcueneta? —jai Jesús bajarapamonaejawabelia.

Nexata, epamonaenabarëcuaicuaijai. Najumaitsi:

—¿Demeta pacuenia jumecanawiatsianatsi? Waxaitsi itsa jumaitsi tsipae: «Dioso raja pejamatabëcueneta», itsa jaitsi tsipae, nexata Jesús nacajumaitsi tsipae: «¿Detsa nexata xuajitsia apopajumexaniataemë Juan-pijinë pepaebiliwaisi?»

nacajai tsipae. ²⁶ «Jiwi raja saya pejamatabēcueneta Juan-pijinē jiwi bautizabaponapona», itsa jaitsi tsipae, nexata jiwi belia nacabeyejebijitsipa, tsipaji tsitatsi pepacuene Diosojumepaebinēmi —najai sacerdotewi, judíowi pija-ancianowi yajawa. ²⁷ Nexata, saya bajarapamonae jumaitsi Jesús-jawabelia:

—Apopayapētaenē ponē Juan-pijinē itorobatsi jiwi pebautizabaponaenexa —jai.

Nexata, Jesús jumaitsi bajarapamonaejawabelia:

—Nexata, xanē-ata apopacatsipaebi tsanetsi ponē nitoroba ta-exanaenexa bajarapacuene —jai Jesús.

**Pecuenecataeliwaisicuenia Jesús tsipaeba jiwijawabelia
anijanēbeje pexēnatobeje pexainaenē peliwaishi**

²⁸ Icatsia, Jesús jumaitsi sacerdotewijawabelia, judíowi pija-ancianowijawabelia-ata:

—Panejumecanaējētsianame paliwaishi aeconoxae pacatsipaebijitsiatsi. Pebi xaina anijanēbeje pexēnatobeje. Nexata pexēnato matapijinējawabelia jumaitsi: «Taxēnato, ajena netonacuenebianame taja-uvabacabota», jai. ²⁹ Nexata bajara-ponē paxajawabelia jumaitsi: «¡Jume! Apojitsipaenē tanacuenebijawa», jai. Itsiata, xuacujinae bajaraponē icatsia itsajamatabēcuenē xaina. Nexata baja, pona pabiabelia penacuenebinexa. ³⁰ Bajaraxuacujinae, pexi pexainaenē juyapijinē itoroba penacuenebinexa. Bajaraponējawabelia jumaitsi: «Taxēnato, ajena netonacuenebianame taja-uvabacabota», jai. Nexata, jejai itajara pexēnato. Itsiata, apoponaenē. ³¹ ¿Detsa ponē bajaraponēbejeyajuwēnēnē paxa jumecowēnēta? —jai Jesús.

Nexata bajarapamonae jumaitsi Jesús-jawabelia:

—Copiata ponē paxa itorobatsi, apojejai-ata, itsiata tonacuenēba. Bajara-ponē paxa jumecowēnēta —jai.

Nexata Jesús jumaitsi bajarapamonaejawabelia:

—Xaniajanē pacuenia pacatsipaebijitsiatsi. Bajarapijinia itsi tsane pamonae bitso pibisiacuene pexanawanapaewi, pacuenia impuestojamatabēcuenē petomatamoyanijobabiabiwimi, penaperabēcanajetsipetiriawi-ata. Bajarapamonae itsa najamatabēcuenepēnēyorobiana Diosojawabelia pibisiacuene pexanabiabijawamiwecua, nexata jonena Dioso, athēbētatsia pe-ecaenē, pijajiwi peyanacua-ewetsinacuata. Itsiata, paxamē apopajonemē tsane, tsipaji Dioso pejitsipaeacuene panenajamatabēcuenecapaebiwi. ³² Juan, jiwibautizabinē, patajopae-ata, papecacujarubinexa Dioso pejitsipaeacuēnia panexanawanapaenexa, paxamē apopajumexaniataemē bajarapaliwaishi. Itsiata, bajarapaliwaishi jumexaniatane impuestojamatabēcuenē pematamoyanijobabiabiwi, papetiriawi-ata naperabēcanajetabiaba bajarapaliwaishi jumexaniatane. Paxamē pacuenetae-atamē bajarapamonae, itsiata baitsi jane, apopanajamatabēcuenepēnēyorobimē pibisiacuenewecua, panesiwanajamatabēcuenecopabinexa Diosojawabelia —jai Jesús bajarapamonaejawabelia.

**Pecuenecataeliwaisicuenia, Jesús tsipaeba jiwijawabelia pija-uvabacabo
pexainaenē bijiaya peto-ewetsijawatshi itsamonae**

(Mc 12:1-12; Lc 20:9-19)

³³ Icatsia, Jesús jumaitsi sacerdotewijawabelia, judíowi pija-ancianowijawabelia-ata:

—¡Xaniawaetsia panenamuxuna-ewere mapaliwaisije! Pija-ira pexainaenë ubabuata ayai-uvabacaboxaneto. Bajarapapabi matatoyorotsia yacaranata, ibopanaxanetonë pefaratsijawata, itsamonae peyacajërëbiwi petojoneyani-watsi. Bajaraxuacujinae, irata mëthë cueyeta itsajota uvacuai taxubataxua-bijitsia, pebarëmenejutsinexa. Bajaraxuacujinae, pija-uvabacabotuatuajëta exananuta piapiabo, penacuaitsimatacabi itsa tonaweretatsi, athëbëyo peyajiwiitaeyabiabecaenexa pija-uvabacabo. Nexata bajaraponë itsamonae ewetsia-exana pija-uvabacabo, petonacuenebinexatsi pecowëta. Nexata pexainaenë tajë nacuyabelia pona. ³⁴Itsa baja uvabacabo pexainaenë yapë-tane pecopiapatsijawa uvacuai penaweretsimatacabi penotsinexa, itoroba pijajiwi peto-ewetsiwiitsijawabelia, petsicobetsatsinexatsi. ³⁵Itsia, bajarapacuenia apo-exanaetsi. Biji rajane, uvabacabo pewetsiwi, totaica pexainaenë pijajiwi, pitorobiwi. Bajarapapitorobiwiyajuwënënë, caenë, toconibabiatsi. Itsanë pepacuene tobeyaxuabatsi. Itsanë ibotonëta totseconatsi. ³⁶Nexata uvabacabo pexainaenë icatsia itsabitsaëto pijajiwi itorobalia. Bajara-icatsia pacuenia to-exanatsi uvabacabo pewetsiwi. ³⁷Nexata, uvabacabo pexainaenë itoroba icatsia pepopexënato. Bajaraponë jamatabëjumaiti: «Taxënatoxae meta netoyaiyataenatsi», jamatabëjai. ³⁸Itsia baitsi jane, pexënato-ata apo-toyaiyataetsi. Biji rajane, itsa tane bajaraponë pexënatocuene, bajarapamonae najumaiti: «Mara ponëje paxa pewënamuto pija-uvabacabo pitsipaje. ¡Naxatsia! ¡Beyaxuabianatsi! Nexata raja, waxaitsi waja-uvabacabo tsane», najai bajarapamonae. ³⁹Nexata, icatsia uvabacabo pexainaenë pexënato-ata towaetabatsi. Caponaliatsi bajarapa-uvabacabo pënëyabelia. Nexata pexënato-ata tobeyaxuabatsi. ⁴⁰Bajarapacuenia peto-exanaexae uvabacabo pexainaenëjawabelia, itsa patsiarena, çdetsa xua exanaena uvabacabo peto-ewetsiwiitsijawabelia? —jai Jesús bajarapamonaejawabelia.

⁴¹Nexata, bajarapamonae jumaiti Jesús-jawabelia:

—Werebiabianatsi bajarapamonaemi pibisiacuene pexanaewi itaxutotsonia-taenejewa. Nexata, icatsia itsamonae ewetsia-exanaena bajarapa-uvabacabo. Uvacuai penaweretsimatacabi, bajarapamonae tsicobetsatsianatsi, pacuenia baja tocaëjëtatsi uvabacabo pexainaenë perajutsinexatsi —jai bajarapamonae.

⁴²Nexata Jesús jumaiti bajarapamonaejawabelia:

—Payapëtaneme rabaja pacuenia Dioso pejumeliwaisibaxutota tajëwelia jumaiti Mesfas yabara. Iboto peliwaissicuenia jumaiti mapacueniaje:

«Pa-iboto itsamonae bo-exanaewi, petsita-abejexaetsi

naitaxutojematabuata, bajarapa-iboto itsamonaenexa tsitaxanepanatsi, pecanacuenebinexa copiaya bebuatsi-ibotonexa boyenepanatotsotota.

Petuxanenë Dioso bajarapacuene caenë exana. Nexata bitso nacatsita pexaniacuene bajarapanamatamotsitaxunaeta bebuatsijawa

penaitaxutojematsi-ibotomi»,^q jai tajëwelia Dioso pejumeliwaisibaxutota.

q 21:42 *penaitaxutojematsi-ibotomi*: Taema Sal. 118:22-23. Bajayatami, pacujinae israelitawi nacuenebanuta Dioso pijatemplobo, pepopeyanacua-ewetsinë, Salomón-pijinë, peponaponaematacabi, Dioso tocopatatsi bajarapacuene pecopiapatsinexa templobo penacuenebiwi. Nexata pa-iboto naitaxutojemata petsita-abejexaetsi picani, itsamonae juya buata bajarapa-iboto pepopenamatamotsitaxunaeta boyenepanatotsotota. Bajarapacuenia Dioso bo penacuenebiwi tocopiapatsia-exanatsi pecuene-itajëtsinexa Cristo pepo-ayaijamatabëcuenenë penacopatsinexa jiwi naitaxutojematsi-atatsi.

⁴³ »Nexata paxamē, Dioso peliwaishi pane-ewetsiwi, apopajonemē tsane athebētatsia pe-ecaenē pijajiwi peyanacua-ewetsinacujawabelia, apopane-copiapitsixae, panenaitaxutojematsixaenua, Ponē Dioso pacato-itorobica. Biji rajane, itsamonae tocopatsiana pejonejawanexa, penacuenecapitsa-paewi nawitsia Dioso pejitsipaecuenejawanē. ⁴⁴ Pamonae apojumexaniatae Dioso pitorobinētsica pepaebiliwaishi, bitso bejamatabējiobi tsane. Pacuenia ibotojumata pefirapecaejiwi, itsa tsapatecatsi, pewixae bitso yanabejiobita, bajara-itsi tsane. Pamonae cuene-aeba Dioso pitorobinētsica, pepacuene naxuabiana daxitamatacabijawabelianexa. Pacuenia iboto pematacēnēbiji-witsi apo-asaē, bajara-itsi tsane —jai Jesús bajarapamonaejawabelia.

⁴⁵ Sacerdotewi penamatacaitorobiwi, fariseowi yajawa, itsa jumetane bajarapacuenia Jesús pejumaitsiyawa, bajarapamonae jamatabējumaitsi tse-nae: «Waxaitsi yabara raeta jumaitsi», jamatabējai tse-nae. ⁴⁶ Nexata bajara-paepatota picani, Jesús jamatabēwaetabatsi. Itsiata, jiwi ayaibitsaēto Jesús Diosojumepaebinēcuenia petaxaetsi, bajarapamonae cujunawa pitsacuenia-biyaniwatsi pewaetabijawata. Bajaraxuata, Jesús apowaetabatsi.

**Jesús tsipaeba jiwijawabelia pecuenecataeliwaishi, penacojiobifiesta
pexanaenē peliwaishicuenia**
(Lc 14:15-24)

22 ¹ Icatsia, Jesús liwaishi tsipaeba sacerdotewijawabelia, judiowi pija-ancianowijawabelia-ata, peypätaenexa pacuenia itsijitsia, pamata-cabi Dioso pijajiwi ewetsiana. Jumaitsi mapacueniaje:

² —Dioso, athēbētatsia pe-ecaenē, pijajiwi peyanacua-ewetsijawa cuene-jēpa pepopeyanacua-ewetsinē fiesta pexanaejawa pexēnato petonacojiobi-fiestanexatsi. ³ Nexata, bajarapafiesta petsiwajēnaexaniawaetsicujinae baja, peyanacua-ewetsinē itoroba pijajiwi peypätaeya-exanaenexa pejunatsiwi-mijawabelia pepatsijawanexa. Pijajiwi baja nexata, pona petsipaebinexa. Itsiata, pejunatsiwi apojitsipae pepatsijawa penataenexa bajarapafiesta. Nexata, bajarapamonae nawiabarena petsipaebinexa pijatuxanenējawabe-lia. ⁴ Nexata nacua-ewetsinē icatsia itsamonae pijajiwi itorobalia pesiwa-ponaenexalia. Jumaitsi pijajiwiawabelia: «Pajumaitsimē tsane tajunatsiwi-jawabelia: 'Daxita rabaja weretejeba panexaejawanexa. Beya-exana rabaja vaca penasitsiwi, becerro yajawa. ¡Naxatsia! Daxita pina paponaremelia panenataenexa pexēnato penacojiobifiesta,' pajamē tsane tajunatsiwi-jawabelia», jai nacua-ewetsinē pijajiwiawabelia. ⁵ Itsiata baitsi jane, bajarapamonae junatsi-atatsi, bajarapacuenia apojejai. Pejunatsiwiwajuwēnēnē itsanē pona pipapabianējawabelia. Itsanē pijinia pona penawijatsinexa.

⁶ Itsamonae nacua-ewetsinē pijajiwi taicatsi. Itsamonae bejiobia-exanatsi pibisiacuenia. Itsamonae pijinia beyejebatsi baja. ⁷ Bajaraxuata nexata, nacua-ewetsinē bitso bara-anaepana pejunatsiwiwimijawabelia. Nexata, itorobalia wajabitsaēwi pebenexa pamonae tobeyejebatsi pijajiwi. Itorobanua pijatomaranēmi-ata petotajuitsinexa. ⁸ Bajaraxuacujinae, nacua-ewetsinē icatsia pijajiwiawabelia jumaitsi: «Daxitacuene baja picani weretejebia-exanajē taxēnato penacojiobifiestanexa. Itsiata baitsi jane, tajunatsiwiimi aponetopatsirena. ⁹ ¡Paponaremelia pinijicallexanetonējawabelia! Nexata, daxita pamonae pacaxitajarabaponaename bajarapacallexanetonējawa,

pajunataponae name, taxénato penacojiobifiestajawaberena pepatsi-nexa», jai nacua-ewetsinē pijajiwijawabelia. ¹⁰ Nexata, bajaraponē pija-jiwi ponalia. Najetarubena callexanetonējawa, pejunataponae nexa daxita pamonae caxitajarabapona. Junatapona piamatabēcuenebewiji, pejamatabēcuenexanepanaewi-ata. Nexata, bajarapamonae barēpona fiesta pexanae bojawabelia. Pabota fiesta exana, wēñeca jiwi.

¹¹ »Nexata, nacua-ewetsinē jonena bajarapaboyarena petaenexa peto-patsiwi tsi. Daxita pamonae topatatsi, jumapata xua banaxataba penacojiobinē pijafiestajawabelia. Itsiata, bajarajota itsanē napata, saicayawiriajawa penaxatatsinē. Aponaxatatsi daxita xua tsunaxatabatsi. ¹² Nexata, nacua-ewetsinē jumaitsi bajaraponējawabelia: «¿Detsa xuajitsia najunume aponenaxatatsinē pacuenia daxita naxataba penacojiobifiestajawaberena pejonewi?» jai nacua-ewetsinē. Bajaraponē moya nuca. ¹³ Nexata nacua-ewetsinē jumaitsi mesa pewetsiwijawabelia: «¡Maponē pataxucēreje! ¡Payajawacobecēre! ¡Paxuaremelia bopēñeyabelia, pitaquirijawabelia! Bajarajotalia nuena. Nawonosiniana bitso penawixaetaexae», jai nacua-ewetsinē. ¹⁴ Pacuenia fiesta pexanaenē ayaibitsaētojaneto junatsi-ata, caejiwiyobeje saya topatatsi, bajarapijina itsi tsane Dioso pejunatsiwi-ata. Ayaibitsaētojaneto junatsi-ata pijajiwineja, caejiwiyobeje saya jumecowēñetatsi —jai Jesús sacerdotewijawabelia, judíowi pija-ancianowijawabelia-ata.

**Jesús jamatabēcuenē-ējēbiaya yanijobatsi impuestojamatabēcuenē
pematamotsijawa yabara
(Mc 12:13-17; Lc 20:20-26)**

¹⁵ Bajarapacuenia Jesús pejumaitsicujinae, fariseowi nacaetuata pena-jumejaitsinexa pacuenia yanijobijitsia jamatabēcuenē-ējēbiaya Jesús-jawabelia, bijiaya itsa jumecanawiatatsi, peneconitsinexatsi picani nacua-ewetsinējawabelia. ¹⁶ Nexata, fariseowi itoroba pijajiwi, Herodes pijajiwi yajawa, Jesús-jawabelia jamatacuene-ējēbiaya liwaisi peyanijobinexa. Nexata bajarapamonae jumaitsi:

—Necujarubinē, payapētaniji cajena nexaniajaicuene, xua yabara tsipae-babiabame liwaisianē. Pexaniajaicuene tsipae-babiabame pacuenia Dioso jitsipa jiwi petojinawanapaenexatsi. Xamē najēpaeya jiwi liwaisi canacue-nebabiabame, ayaijamatabēcuenewi, beweliamatabēcuenewi-ata. Apo-ajume-uramē tsabiabi bajarapacuenia nejumaitsiyawa, daxitajiwi najēpaeya netaexae. ¹⁷ ¡Panetsipaebare pacuenia najamatabēxainame mapacuene yabara-je! ¿Xanepana tsaja wajamatamotsinexa impuestojamatabēcuenē Romano nacua pepowetsinējawabelia? Itsa jume, ¿apoxanepanae tsaja wajamatamotsinexa? —jai bajarapamonae.

¹⁸ Itsiata baitsi jane, Jesús jamatabēcueneyapētane bajarapamonae jamatabēcuenē-ējēbiaya peyanijobijawatsi, peneconitsinexatsi picani. Nexata, jumaitsi bajarapamonaejawabelia:

—Paneyamaxē-itojorobiwi, ¿detsa xuajitsia jamatabēcuenē-ējēbiaya paneyanijobame? ¹⁹ ¡Panetsitajere pitsipalatanēyota pamatamotabiabame impuestojamatabēcuenē! —jai Jesús bajarapamonaejawabelia.

Nexata, bajarapamonae Jesús tocaponarenatsi palatanēyo. ²⁰ Jesús itsa tane bajarapapalatanēyo, jumaitsi bajarapamonaejawabelia:

—¿Jipatsa mapapitabarajumapeje, wënërucanua, mapapalatanëyojawa-taje? —jai Jesús.

²¹ Nexata, bajarapamonae jumaiti Jesús-jawabelia:

—Romano nacua raja pepopewetsinë pitabarata, pewënënua —jai.

Nexata, Jesús jumaiti bajarapamonaejawabelia:

—Nexata, parajutabiabianame Romano nacua pepopewetsinë pijajawa.

Parajutabiabianame pijinia saicaya Dioso pijajawa —jai Jesús.

²² Jesús xaniawaetsia ita jumecanawiata, bajarapamonae jamatabëcuene-nabenajaca. Nexata baja, copatatsi Jesús jamatabëcuene-ëjëbiaya peyanijo-bijawatsi. Nawiaba baja bajarapamonae.

**Jesús yapëtaeya-exana Saduceowijawabelia pacuenia jiwi
jinawanapaejitsia, petëpaecujinae**

(Mc 12:18-27; Lc 20:27-40)

²³ Saduceowi saicayacuenia jumexaniatane itsamonae judfowi pecu-jarubiwecua. Bajarapamonae jamatabëcuenenawëxaniabiaya cuene-aebabiaba jiwi icatsia piasaëjawanexa petëpaecujinae. Nexata, bajarapamonae imoxoyorenatsi Jesús liwaisi-ëjëbiaya peyanijobinexatsi. Jumaiti mapacueniaje:

²⁴ —Necujarubinë, Moisés-pijinë bajayata wajanacatoyaquinaeliwaisi, jumaiti mapacueniaje: «Ponë pepomatapijinë pepuapenacojiobinë baja, ita tëpa pexi xainaenejewa, nexata juyapijinë bepita pematapijinëmi pija-wacowëwami, juyapijinë pexainaenexa pexi bajarapowajawabelia pematapijinëmi pexicuenia petaenexa^r daxitajiwi», jai Moisés-pijinë bajayata wajanacatoyaquinaeliwaisi. ²⁵ Bajarapitsicue petocopiapatsiwitsi, jinawana-ë nacae monae siete ponëbeje paxanëjawata. Pepomatapijinë copiya nacojioba. Nexata bajaraponë pijawa wecuatëpa pexi xainaenejewa. Xuacujinae, pepënarucaenëtsi pita pematapijinëmi pijawacowëwami. ²⁶ Nexata, icatsia bajaraponë-ata tëpa pexi xainaenejewa bajarapowajawabelia. Icatsia, acueyabinë, pita bajarapowa. Bajaraponë-ata tëpa pexi xainaenejewa bajarapowajawabelia. Bajarapacuenia tëpa daxita siete ponëmibeje, nacaemonami, bajarapowa pepitaponaewi. Itsiata, itsanë-ata pexi apoxainae bajarapowajawabelia. ²⁷ Bajaraxuacujinae, bajarapowa-ata baja tëpa.

²⁸ Nexata, pamatacabi Dioso icatsia asaëya-exanaena petëpaewimi, ¿Detsa nexata ponë bajarapomonaeyajuwënënë pijawa tsane, daxita pamona siete ponëmibeje nacaemonae pitapona picani bajarapowami? —jai saduceowi Jesús-jawabelia.

²⁹ Nexata Jesús jumaiti bajarapamonaejawabelia:

—Paxamë saya panejamatabëcuenenawëxaniabiwi, tsipaji apopayapë-taemë xua jumaiti Dioso pejumeliwaisibaxutota petëpaewi yabara, Dioso daxitacuene pecuene caëjëpaenëtsicue-ata. ³⁰ Pamatacabi raja petëpaewimi Dioso icatsia asaëya-exanaenatsi, aponacojiobi baja tsane. Itsajiwi-ata pexënatoyo apocanajetsi tsane pebijawabelia, petonacojiobinexatsi.

r 22:24 pematapijinëmi pexicuenia petaenexa: Bajarapapexi canacopatsijitsia pematapijinëmi pewetsitaxunaeminexa pijajiwituatujëta, pecobecowëjawanë, pija-iranë-ata. Taema Deut. 25:5-10.

Bajarapamonae nacojobinejewa jinawanapaena athëbëtsia, pacuenia ángelewi jinawanapa. ³¹Itsa pepacuene paxamë xaniawaetsia paneyanijobame paneyapëtaenexa Dioso icatsia piasaëya-exanaejawanexatsi petëpae-wimi, nexata pacatsipaebianatsi. Bajaraxua yabara Dioso nacayapëtaeya-exana pejumeliwaisibaxutota. Pepuatëpae Abraham, Isaac, Jacob-ata, bajarapamonae yabara bajayata Dioso jumaitsi Moisés-pijinëjawabelia mapacueniaje: ³²«Xanë rabaja pijaDiosonë tsaponaponae Abraham, Isaac, Jacob-ata», jai baja cajena Dioso bajayata petëpae-wimi yabara. Bajarapacuenia Dioso pejumaitsixae, nayapëtane bajarapamonae tēpae-ata, Diosowecua apopenaxuabijawa. Nayapëtanenua aeconoxae-ata Dioso peyajawaponaejawawa athëbëtsia. Dioso baitsi, petëpae-wi^s apopiDioso. Dioso raja, piasaëwi pijaDioso —jai Jesús saduceowijawabelia.

³³ Jiwi ayaibitsaëtoxaneto itsa jumetane bajarapacuenia Jesús pejumait-sijawa saduceowijawabelia, jiwi bitso jamatabëcuenenabenajacaeya-exana petsipaebijawata.

Papenamatomotsiliwaisibeje bitso jiwi bejumecowënëta

(Mc 12:28-34)

³⁴ Xaniawaetsia Jesús pejumecanawiatsixae, nexata baja, moya saduceowi. Nexata, fariseowi nacaetuata penajumejaitsinexa pacuenia jamatabëcuene-ëjëbiaya yanijobijitsia Jesús-jawabelia. ³⁵ Nexata bajarapamonae yajuwënë, bitso peyapëtaenë Dioso penajumecopatsiliwaisi Moisés-pijnëta, Jesús-jawabelia jamatabëcuene-ëjëbiaya yanijoba mapacueniaje:

³⁶ —Necujarubinë, Dioso pitorobiliwaisianë yajuwënëjawawa, penajumecopatsiliwaisi Moisés-pijnëta, ¿detsa paliwaisi bitso jiwi bejumecowënëta itsa-liwaisianëwecua? —jai bajaraponë.

³⁷⁻³⁸ Nexata, Jesús jumaitsi bajaraponëjawabelia:

—Matatoxenetsia paliwaisi bitso jiwi bejumecowënëta daxita Dioso pitorobiliwaisianëwecua, mapejumaitsiliwaisije: «¡Asiwamëre petuxanenë nijaDioso daxita nejamatabë-ëthëtojawawetsina, daxita nejamatabëcuene-wetsina, daxita nenajamatabëxainaesaëta-ata!», jai. ³⁹ Bajaraxuacujinae, cotocaewiliwaisi, paliwaisi bitso jiwi bejumecowënëta, mapejumaitsiliwaisije: «¡Asiwamëre itsajiwi-ata pacuenia xamë nijacuata nasiwamë!», jai.

⁴⁰ Pajiwi jumecowënëta bajarapaliwaisibeje, Dioso baja tanetsi pejumecowënëtsijiwicuene daxita Dioso pitorobiliwaisianë; paliwaisianë Dioso najumecopata Moisés-pijnëta, paliwaisianë-ata profetawi, bajayata tsipaeba jiwi pejumecowënëtsinexa —jai Jesús judíowi pecujarubinëjawabelia.

¿Detsa pamonaejawawerena naitajëta Mesías?

(Mc 12:35-37; Lc 20:41-44)

⁴¹ Itsa abaxë fariseowi nacaetuatawanapa, Jesús nayabarajumaitsi bajarapamonaejawabelia:

s 22:32 *petëpae-wi*: Pamona apopesiwanajamatabëcuenecopabiwi Diosojawabelia, bajarapamonae betëpae-wi Diosonexa, tsipaji petëpaejamatabëcuene pexainawanapaewi. Pamona siwanajamatabëcuenecopaba Diosojawabelia, Espiritu Santo jamatabëcuene-aitawayaxanatsi. Nexata, Diosonexa piasaëtsawanapaewi.

⁴²—¿Detsa pacuenia pasiwacanaëjètame Mesías yabara? ¿Jipatsa pemomo bajaraPonë? —nayabarajai Jesús fariseowijawabelia.

Nexata, bajarapamonae jumaitsi:

—David-pijinë pemomo tsane —jai.

⁴³Nexata, Jesús jumaitsi fariseowijawabelia:

—Pajamatabëcuenenawëxaniabame raja. Espíritu Santo pejamatabëcueneta David-pijinë tajëwelia jumaitsi Mesías yabara: «Tajatuxanenë», jai. Bajarapacuenia David-pijinë pejumaitsiyawata, najamatabëcuene-itajëta apopepomocuenene. Icatsia, David-pijinë jumaitsi:

⁴⁴«Petuxanenë Dioso jumaitsi tajaTuxanenëjawabelia: ‘¡Ecare abaxë tacujuanenia, jiwi pecayaiyataetaxunaeta! Abaxë wecatsiwajënaecuenene-amoneyabianatsi copiaya daxita nijawajabitsaë, nitorobicuenia pecajumecowënëtanapanaxena’,^t jai Petuxanenë Dioso tajaTuxanenëjawabelia», jai bajayata tajëwelia David-pijinë Espíritu Santo pejamatabëcueneta.

⁴⁵»David-pijinë bajayata Mesías yabara pejumaitsixae: «Tajatu-xanenë», pejaixae, yapëtanetsi David-pijinë apopemomo. Saicaya baja cajena Dioso pexënato —nayabarajai Jesús pijacuata, fariseowi pecanaëjëtsia-exanaenexa.

⁴⁶Bajarapaepatota, fariseowiyajuwënë-ata Jesús apojumepitsi caejumeyo-ata. Bajaraxuacujinae, caejiwi-ata Jesús-jawabelia baja jamatabëcuene-ëjëbiaya liwaisi apoyanijobi, tsipaji cujunawa baja.

**Jesús tsipaeba jiwijawabelia fariseowi, judíowi pecujarubiwi-ata,
penaneconitsijawa Diosojawabelia
(Mc 12:38-40; Lc 11:37-54; 20:45-47)**

23 ¹Jesús jumaitsi jiwi ayaibitsaëtojawabelia, pijajiwijawabelia-ata: ²—Judíowi pecujarubiwi, fariseowi-ata, Dioso tocopatatsi jiwi xaniawaetsia peyapëtaeya-exanaponaenexa pajamatabëcueneliwaisi xaina Dioso penajumecopatsiliwaisi Moisés-pijinëmita. ³Nexata, pajumecowë-nëtsianame, pa-exanawanapamenenua daxita pacuenia bajarapamonae pacatsipaebapona bajarapaliwaisita. ¡Itsiata baitsi jane, pëtsa pacuenejë-pame pacuenia bajarapamonae exanawanapa, tsipaji xua bajarapamonae paca-itaweta pane-exanaeyaniwa, bajaraxua itsiata bajarapamonae exana-biaba! ⁴Bajarapamonae piyapëbejeliwaisianëta itorobabiaba jiwi pejumecowënëtabiabinexa. Itsiata baitsi jane, bajarapaliwaisianëyajuwënëjawa, caeliwaisiyo-ata, pijacuata apojumecowënëtsi. ⁵Daxita xua bajarapamonae exana, exanabiaba saya jiwi bepexaniajamatabëcuenewi petanexatsi. Nexata, bajarapamonae na-itapacëbabiaba, nacofiacëbabiabanua, becajo-nixicuenia pexanaejawaxi. Xuaxi xaina Diosojumeliwaisi peyaquinaeba-xutoxi.^u ⁶Naxatabiabanua pexaniapitabëjawanë. Mataropotabiabanua piapiafleco pijanawatabuyalia perutsinexa. ⁶Bajarapamonae itsa junatatsi

t 22:44 Taema Sal. 110:1. u 23:5 Diosojumeliwaisi peyaquinaebaxutoxi: Bajarapabaxutoxita yaquinaruba cuatro paversículobeje. Deut. 6:8, 11:18; Éxo. 3:9, 16. Bajarapacajonixi wënë-ruba filaterias. Bajaraxuanë nacëbabiaba, pitapata, pamaxëta-ata, paepatota Diosojawabelia wajëcaejijsia. Bajarapacuenia exana peto-exanaenexatsi pewajëtsicuenia, penajamatabëcuene-itajëtsinexanua xaniawaetsia pejinawanapajawa Dioso pejijsipacuenia.

fiestajawabelia penaxaenexa, jaitabiaba pe-enaenexa peyaiyataetaxunaejawa. Bajarapamonae itsa najoneyabiaba judfowi pijasinagogabota,^v jitsipabiaba pe-enaenexa peyaiyataewitsi petsinubijawanëta. ⁷Bitso jitsipabiaba jiwi pebajacobijawatsi yayiataeya callejawa: «Patanecujarubinë, patanecujarubinë», pejajawatsi.

⁸»iPëtsa paxamë pajitsipame jiwi papecajumaitsinexa: «Pecujarubinë», papecajainexa, tsipaji baja caenë, panexainame Mesíasnë, patacucujarubinëxaxa! Paxamë saya daxita bepanacaemonaemë, najëpaeya patacucujarubixae. ⁹iBajarapijinia pacuenia, itsanëjawabelia mapanacuapijinëje: «Axa», pajamë pëtsa, tsipaji caenë pane-axa paxainame, ponë eca athëbëtatsia! ¹⁰iPëtsa pajitsipame itsamonae papecajumaitsinexa: «Jiwi pewetsinë», papecajainexa, tsipaji xanë, caenë Mesíasnë, patacawetaponaenë! ¹¹Ponë, paxamëyajuwënnë, pacawecua-ayaijamatabëcuene, bepacyawenonabiaba padaxitamë, bepanijajiwitonëcuenia. ¹²Pajiwi daxitajiwewecua natane ayaijamatabëcuenejiwi, itsamatacabi Dioso beweliamatabëcuenejiwi exanaenatsi. Pajiwi pijinia daxitajiwewecua natane beweliamatabëcuenejiwi, itsamatacabi Dioso ayaijamatabëcuenejiwi exanaenatsi^w —jai Jesús jiwi ayaibitsaëttoxanetowawabelia, pijajiwijawabelia-ata.

¹³Icatsia, Jesús jumaitsi fariseowijawabelia, judfowi pecujarubiwi jawabelia-ata:

—iPaxamë saya jiwi paneyamaxë-itojorobiwi! Paxamë judfowi panecujarubiwi, pafariseowimëna, ayaineconi panatsixainame Diosojawabelia. Pacuenia bo babaupaxatata jiwi pejoneyaniwa, bajarapacuenia paxamë bepane-exanae. Itsamonae jitsipae-ata pejonenexa Dioso, athëbëtatsia pe-ecaenë, pijajiwi peyanacuawetsinacujawabelia, apopacopatsimë pejonenexa, saicayaliwaisi panecujarubixae. Paxamë-ata apopajitsipaemë panejonenexa bajarapanacuajawabelia.

¹⁴»iPaxamë saya jiwi paneyamaxë-itojorobiwi! iPaxamë, judfowi panecujarubiwi, pafariseowimëna, ayaineconi panatsixainame Diosojawabelia! Papetiriawi yabara Dioso paca-itoroba itaxutotsoniataeya pane-ewetsinexa,^x pamonajiwi pewecuatëpaewanëtsi, paxamë caranata yamaxë-itojorobiaya pawecuanotababame pecobecowëjawaximi. Bajarapijinia pacuenia, Dioso bepanijajiwimë itajara jiwi papecataenexa, daxitajiwipi tabarata pinijicuenia patsitanawajëcabiabame Diosojawabelia. Bajaraxuata, paxamë bitso ayaicuenia^y Dioso pacananeconitsia-exanaena, pamatacabi naneconitsia-exanaena pamonaepijaneconi pexainaewi.

v 23:6 *pijasinagogabota*, Bajarapacuenia judfowi wënrubabiaba penacatuatsibo, itsajota nacujarubabia Dioso peliwaitsi caesábado canacujitsia. w 23:12 Taema Job 22:29; Prov. 29:23.

x 23:14 *pane-ewetsinexa*: Dioso itoroba daxita Israel-pijinë pemomoxi xaniawaetsia pewetsinexa daxita pamonajiwi pewecuatëpaewaxitsi, tsonijiwixi-ata. (Isa. 1:16-17; Sant. 1:27.) Bajaraxuata, tsicarutsi xaniawaetsia pewetsijawa picani. Itsiata, yamaxë-itojorobiaya jumaitsi tsabiabi bajarapowaxijawabelia: «Amona pecawecuatëpaexae, xanë juya Dioso necopata be-amonanë, Dioso tatonacuenebinëxae. Naxata, benerajutame necobecowëyajuwënnëjawanë», jai tsabiabi. Itsa jume, jumaitsi tsabiabi: «Dioso tatonacuenebinëxae, itsa nerajutsianame necobecowëjawanë, Dioso juya carajutsiana ayajawa tanerajutsijawami matatoxenetsia», jai tsabiabi yamaxë-itojorobiaya. y 23:14 *bitso ayaicuenia*: Pamonae itajara bepexaniacueni pexanawanapaewi, bajarapamonae bitso naneconita Diosojawabelia, tsipaji yapëtae-ata pacuenia tsicarucatsi pexanaejawanexa Dioso pesiwabarëyanexatsi, bajarapacuenia apo-exanae. Caranata saya exana pexaniajawa nacenematayatsiaya pibisiacueniawa exanae-ata. Bajarapitsijamatabëcuene yabara, wowaijumueta wënruba, «hipocresia». Bajaraxuata, Dioso ayaicuenia naneconitsia-exanaena bajarapamonae itsamonawecua, pamatacabi naneconitsia-exanaena pamonaepijaneconi pexainaewi.

¹⁵»¡Paxamë, judfowi panecujarubiwi, pafariseowimënua, jiwi saya paneyamaxë-itojorobiwi! Ayaineconi cajena panatsixainame Diosojawabelia, tsipaji daxitanacuanëjawa pacujarubarutame panajumetsënëtsiliwaisi pacajinawanapame. Panecujarubiwi pejumexaniataexae panenajumetsënëtsiliwaisi, nexata paxamëwecua matatoxenetsia pibisiacuene exanawanapa. Bajaraxuata, Dioso matatoxenetsia naneconitsia-exanaena bajarapamonae, pamatacabi pacayajawaxuabiana apopewerewerecae-isotojawabelia.

¹⁶»Paxamë saya apopaneyapëtaexae Dioso pejumeliwaisi, bepane-itaxutotsëcënaewi panaexaname panecujarubijawata, tsipaji pacuenejëpame pitaxutotsëcënaenë pematacaponaejawa itsa pitaxutotsëcënaejiwi. Nexata, panecujarubijamatabëcueneta bajarapamonae payajawananeconitame Diosojawabelia. Paxamë jiwijawabelia pajumaitsimë tsabiabi: «Pajiwi itsanëjawabelia najumecapanepaeya jumaitsi pejumexaniataenexatsi: ‘Cato-exanaenatsi pepacuene. Cajumaitsiitsi cajena templobo pewënëta,’ jai-ata, apo-itsacuene. Bajarapajiwi pejumaitsicuenia apo-exanae-ata, itsiata aponaneconitsi Diosojawabelia», pajamë tsabiabi. «Pajiwi rajane itsanëjawabelia jumaitsi pejumexaniataenexatsi: ‘Cato-exanaenatsi pepacuene. Cajumaitsiitsi cajena templobopiji-orojawanë pewënëta,’ jai, bajarajane xua abeje. Nexata, bajarapajiwi exanae pejumaitsicuenia, penaneconitsiyaniwa Diosojawabelia», pajamë tsabiabi jiwijawabelia. ¹⁷Pajamatabëcuenenawëxaniabame raja saya bajarapacuenia itsa pajumaitsimë. Biji rajane, templobo beyaiyatanetsi bajarapatemplobopiji-orojawanë matatoxenetsia. Bajarapa-orojawanë-ata beyaiyatanetsi, tsipaji bajarapa-orojawanë yanamatamotsia-exana bajarapatemplobo. ¹⁸Bajarapijinia pacuenia, jamatabëcuenenawëxaniabiaya pajumaitsimë tsabiabinua: «Pajiwi itsanëjawabelia najumecapanepaeya jumaitsi pejumexaniataenexatsi: ‘Cato-exanaenatsi pepacuene. Cajumaitsiitsi altar-jawa pewënëta,’ jai-ata, apo-itsacuene. Bajarapajiwi pejumaitsicuenia apo-exanae-ata, itsiata aponaneconitsi Diosojawabelia», pajamë tsabiabi. «Pajiwi rajane pejumexaniataenexatsi itsanëjawabelia jumaitsi: ‘Cato-exanaenatsi pepacuene. Cajumaitsiitsi altar-jumata pebuatsi-ofrenda pewënëta,’ jai, bajarajane xua abeje. Nexata, bajarapajiwi pepacuene exanae pejumaitsicuenia, penaneconitsiyaniwa Diosojawabelia», pajamë tsabiabinua jiwijawabelia. ¹⁹Paxamë bepijiayo apopaneyapëtaewi, pane-amatabocotajaxae. Pajumetae-atamë, itsiata apopajumeyapëtaemë. Xaniawaetsia apopanetsi-wajënaecanaëjësixae, bepane-itatsëcënanawanapaewi Dioso peliwaisi yabara. Bajaraxuata, beyaiyatanetsi altar-jawa, bajarapajumata pebuatsi-ofrenda matatoxenetsia. Bajarapa-ofrenda-ata beyaiyatanetsi, tsipaji altar-jumata boca. ²⁰Nexata, pajiwi jumaitsi: «Cajumaitsiitsi altar-jawa pewënëta», jai, caecuenia yajawawënëjona bajarapa-altar-jumata pebocae-ofrenda. ²¹Pajiwi pijinia najumecapanepaeya jumaitsi pejumexaniataenexatsi: «Cajumaitsiitsi templobo pewënëta», jai, caecuenia yajawawënëjona bajarapatemplobota peponaponanë Dioso. ²²Pajiwi pijinia najumecapanepaeya jumaitsi pejumexaniataenexatsi: «Cajumaitsiitsi athëbëtatsia panacua pewënëta», jai, caecuenia yajawawënëjona Dioso pijatrono. Caecuenia yajawawënëjonanua Dioso, ponë ecabiaba bajarapatronota, pitorobabiabinexa pijajiwi.

²³»¡Paxamë, judfowi panecujarubiwi, pafariseowimënua, jiwi saya paneyamaxë-itojorobiwi! ¡Ayaineconi cajena panatsixainame

Diosojawabelia! Daxita xuanë pacatopitsapa pane-ubijawanë, pacuenia mentawiriabaxutoxi, anís-xutoxi, cominoxutoxi-ata, bajaraxuanë diez xuabeyajuwënëjawa, caejawayo, parajutabiabame ofrendacuenia Diosojawabelia. Bajarapacuenia pajumecowënëtame panerajutabiabinexa ofrendajawanë Diosojawabelia. Caranata, juya apopajumecowënëtsimë mapanamatamotsiliwaisianëje: Aneconijibia panejinawanapaejawanexa Dioso pitabarata, pane-itaxutotsoniaataeyabiabijawanexa itsamonae-ata, panesiwanajamatabëcuenecopabijawanexanua Diosojawabelia. Xaniajai, pacatoxanepana ofrendajawanë panerajutabiabijawa Diosojawabelia. Itsiata, apobepanacofënëtsimë panejumecowënëtabiabinexa bajarapapecatonajumecopatsiliwaisianë. ²⁴Paxamë saya apopanepapëtaexae Dioso pejumeliwaisi, bepanetitaxutotsëcënaewi panaexaname panecujarubijawata. Pacuenejëpame saya pitaxutotsëcënaenë pematacaponaejawa itsa pitaxutotsëcënaejiwi. Nexata, paliwaisianë Dioso najumecopata panejumecowënëtsinexa, bewelia penamamotsiliwaisixi, paca-asaëmë tsawanapae pane-exanabiabinexa. Juya, paliwaisianë picani Dioso bitso pacatojitsipa panejumecowënëtsijawa, panamuxujematabiabame, pane-exanaeyaniwa. Nexata, panecujarubiwi papecacuenejëpaexae, exanawanapa panecujarubicuenia. Bajaraxuata, bajarapamonae payajawananeconitame Diosojawabelia.

²⁵»¡Paxamë, judíowi panecujarubiwi, pafariseowimënua, jiwi saya paneyamaxë-itojorobiwi! ¡Ayaineconi cajena panatsixainame Diosojawabelia! Paxamë saya pasiwabëjamë tsabiabi naniapijicuene yabara, panasiwajamatabëcuenebëjamënejewa bëpënëapijicuene. Pacuenejëpame saya naniawelia pequiatsiwi taza, plato-ata. Itsiata, pexaniacuene patsita-exanabiabi-atamë jiwi pitabarata, biji caranata pajamatabëcuenewënëcame pibisiacuene. Nexata, pajitsipabiabame paneyacajërëbijawa itsajiwi pecobecowë. Panatojitsipabiabamenua ayaijawa panenaxainayabijawa panecobecowë, ëpaxamënexa. ²⁶Paxamë pafariseowimë, bepanejamatabëcuene-itaxutotsëcënaewi Dioso peliwaysi yabara. Pajiwi quiata pecaxaenë, taza, plato yajawa, piaxuirajibinexa, copiaya xaniawaetsia ënëquiata. Bajaraxuacujinae, xaniawaetsia quiata naniawelia. Bajarapijinia pacuenia, paxamë-ata copiaya Dioso pacajamatabëcuenequiatsi, pane-ajamatabëcuenexuirajibinexa. Nexata bajaraxuacujinae, paca-cuenecaëjëpaena panetsita-exanaenexa ëpexaniacuene, pacuenia Dioso paca-itoroba.

²⁷»¡Paxamë, judíowi panecujarubiwi, pafariseowimënua, jiwi saya paneyamaxë-itojorobiwi! ¡Ayaineconi cajena panatsixainame Diosojawabelia! Jiwimëthë itsamonae caiquinae-ata pejumawereca peniojairata, pitabëtsinexa, itsiata bëpënëareca abeje, petëpaewimi petsabanaejawa, pesi yajawa-ata. ²⁸Bajarapijinia paxamë-ata Dioso patsitajamatabëcueneitsimë. Itsamonae naniawelia pacatane, itajara patsitapexaniajamatabëcuenewimë. Itsiata baitsi jane, panejamatabë-ëthëtota bëpënëa pajamatabëcuenewënëcame paneyamaxë-itojorobjamatabëcuene, pibisiacuene pane-exanaejamatabëcuene-ata.

²⁹»¡Paxamë, judíowi panecujarubiwi, pafariseowimënua, jiwi saya paneyamaxë-itojorobiwi! ¡Ayaineconi cajena panatsixainame Diosojawabelia! Paxamë profetawi, pemëthëanëjumawereca bo pa-exanabiabame

itabëtsiaya. Pamonaemi-ata bajayata tēpa, aneconijibia pejinawanapae-wimi Dioso pitabarata, pemēthēanējumawereca itabëtsiaya parubabiabame itsacuenejawaxi. Bajarapacuenia pa-exaname itsamonaē papecataenexa bepane-asiwawi Dioso pijajiwi. ³⁰Nexata, jiwijawabelia pajumaitsimē tsa-biabi mapacueniaje: «Wajasalinaiwimi bajayata pibisiacuene exana, itsa beyeyebiaba profetawi-ata. Paxanē bajarapamatacabi pajinawanapae-atanē tsipae, apopayawenonaenē tsipae bajarapamonaemi pebeyabiabijawa Diosojumepaebiwiimi, profetawi», pajamē tsabiabi. ³¹Bajarapacuenia panejumaitsixae, panawajunupaebame papemomoxicuenemē bajayata pamonaemi beyababiaba profetawi. Bajarapamonaemi papemomoxixaemē, pajamata-bēcuenējēpame panijasalinaiwimi. ³² Bajarapanejamatabēcuenē-itsiwixae, paneweretsinexa^z xua panijasalinaiwimi taxuxuaba, xanē-ata, Dioso taju-mepaebinēxae, panebeyaxuare!

³³ Paxamē bitso pibisiacuene pane-exanaewi! Pacuenia jomo rēcēpeca itsa tane petajunenajetarucaejawa isoto, bajarapa-itsimē. Itsiata, apopapane-paemē tsane Dioso papecananeconitsia-exanaejawa apopewerewerecae-isotojawata, panijaneconi yabara. ³⁴ Paxamē picani pacato-itorobianatsi Diosojumepaebiwiimi, itsamonaē profetawi, itsamonaē bitso Dioso pijacuene peyapētaeya-exanaewitsi, itsamonaē-ata xanē taliwai si papecat-sipaebiwinexa. Itsiata baitsi jane, paxamē bajarapamonaeyajuwēnēwi pabeyaxuabaponaename. Itsamonaē cruzajawabelia pacobematabiabaponaename. Itsamonaē pajumatitibabeponaename penaneconitsiwi panejumaconitabiabimacata, judīowi pijasinagogabonējawa. Itsamonaē pabara-jinabiabianame itsa tomaranējawabelia-ata, panebejiobia-exanaenexa. ³⁵ Bajarapacuenia pane-exanaexae tsane planeconijibiwi jawabelia, ayaineconi pacatsijumajopaena panenaneconitsinexa Dioso jawabelia. Panijasalinaiwimi beyejebapona aneconijibia pejinawanapaewi Dioso pitabarata, Abel-pijinējawawerenacujinae Zacarías-pijinējawaberena, Berequías-pijinē pexēnatomi. Bajaraponē beyaxuabatsi templobopanabota, templobobeje, altar-jawabejetuatuajēta. Nexata, daxita pamonaē bajayata panijasalinaiwimi beyaxuabapona, bajarapaneconimi yajawa paxamē pacatsijumajopaena. ³⁶ Xaniajanē pacuenia pacatsipaebijitsiatsi. Bajarapaneconi pacatsijumajopaena paxamē, maparucaeje panejinawanapaewi, Dioso papecananeconitsia-exanaenexa —jai Jesús judīowi pecujarubiwi jawabelia, fariseowijawabelianua.

Jesús najamatabēxainaeya nua Jerusalén tomarapijiwi yabara

(Lc 13:34-35)

³⁷ Bajarapacuenia pejumaitsicujinae, Jesús najamatabēxainaeya penueja-wata Jerusalén tomarapijiwi yabara, jumaitsi mapacueniaje:

—Pajerusalén-tomarapijiwimē, pabeyabiabame Diosojumepaebiwiimi, profetawi. Ibotonēta patseconabiabamenua panebeyaxuababiabinexa Diosojumeliwai si pecaponaewi paxamē jawaberena. Pacuenia wacara

z 23:32 *paneweretsinexa*: Judīowi pijasalinaiwimi taxuxuaba pebenajetarubenaejawa Diosojumepaebiwi, profetawi. Jesús pepopecopiarucaeprofetanēxae, bajarapamonaē itsa beyaxuabijitsia Jesús, pabecuene pijasalinaiwimi taxuxuaba, peyaweretsinexa pebeyaxuabijawata Jesús.

banacoxicaetuata pecorofetobëxëpanaberena, bajarapijinia pacuenia xanë-ata picani bitso jitsipabiabajë patacacaetuatsinexa, patacacapane-paenexa panijaneconiweucia. ¡Itsiata baitsi jane, paxamë apopajitsipaemë!³⁸ ¡Panejumetaema! Dioso rabaja panijatamarawecua pacacopata papeca-ewetabiabijawami. Pijatemplobota-ata apoponaponae tsane.³⁹ Xaniajanë pacuenia pacatsipaebijitsiatsi. Paxamë rabaja apopanetaemë tsane matawëjëa, mapatemplobotaje. Matapania itsa panejumexaniataename Mesías-nëcuenenë, icatsia panetaename. Itsa panesiwajamatabëjumaitsimënuu tsane: «¡Dioso pejamatabëcueneta penajetarucaenë, ayaicuenia yawenonael!»,^a itsa panesiwajamatabëjamë tsane xanë yabara, nexata jane baja, icatsia panetaename tapatsimatacabita —jai Jesús najamatabëxainaeya penuejawata Jerusalén tomarapijiwi yabara.

**Jesús pijajiwi tajëwelia tsipaeba itsamatacabi itsanacuapijiwi
templobo pebijianaewawanexa**
(Mc 13:1-2; Lc 21:5-6)

24 ¹ Jesús itsa pitsaparena templobowecua, pijajiwi imoxoyorenatsi, pecanaëjësia-exanaenexatsi templobo pexaniabocuene yabara, pemuxuneneta pe-enaebonë-ata.

² Bajarapabonë petaejawata, Jesús tajëwelia wajunupaeba itsamatacabi bajarapaboxanetonëmi pepenetsijawanexatsica. Jumaitsi mapacueniaje:

—Xaniajanë pacuenia pacatsipaebijitsiatsi. Daxita raja paboxanetonë pataneme, bajarapaboxanetonëmi itsamatacabi itsanacuapijiwi penetsianica irabetsica. Nexata, pa-ibotonë catsanaruba mapaboxanetonëtaje, itsa-iboto-ata pejumawereca apobocae tsane —jai Jesús tajëwelia pijajiwi jawabelia.

**Pacuenia itsijitsia Jerusalén tomarata, daxitanacuanëjawa-ata,
mapanacua pecopiarucaewajënaeje, yabara peliwaishi**
(Mc 13:3-23; Lc 21:7-24; Lc 17:22-24)

³ Jesús eca Olivobacabotsutojumata, itsajota olivonaenë apaxayo. Bajara-jota, pijajiwi pija-epatojawata imoxoyorenatsi, peyanijobinexatsi. Jumaitsi Jesús-jawabelia:

—Patajatuxanenë, pajitsipajë patanetsipaebinexamë patayapëtaenexa, paepatota copiapatsijitsia xua wajunupaebame. ¿Detsa peneta pitsicuene pataenajë itsa icatsia patsijitsiamëtsica? ¿Detsa peneta pitsicuene pataenajë mapanacua-ata itsa werewerecaejitsiaje? —jai Jesús pijajiwi.

⁴ Nexata, Jesús jumaitsi pijajiwi jawabelia:

—¡Xania, panayajiwi taeneme! ¡Pëtsa panacopatame itsajiwi-ata papecayamaxë-itojorobijawa! ⁵ Ayaibitsaëto tawënëta patsiana. Bexanë itajara tsane. Najumetsënëtsiaya jumaitsi tsane: «Xanë raja Mesíasnë», jai tsane. Nexata, bajarapamonae jiwi ayaibitsaëto yamaxë-itojorobiana. ⁶ Paxamë pawënëliwaisitaeneme wajabitsaë pexanaejawa imoxoyo nacuanëjawa, tajë nacuanëjawa-ata. ¡Itsiata, pëtsa pajunawame! Bajarapacuenia peneta copiapataponae mapanacua pewerewerecaewajënaeya. Itsiata baitsi jane, abaxë bepjiia apowerewerecae tsane. ⁷ Mapanacuae

pewerewerecaewajënaeya peneta copiaya itsawiriawi nabena itsawiriawijawabelia. Itsanacuanëpijiwi pijinia nabena itsanacuanëpijiwijawabelia. Ayai-janiboxaneto, witane cuene-ata najetarucaena itsanacuanëjawa. Ira najëa-biana ayaicuenia itsanacuanëjawa. ⁸ Daxita bajarapacueni itsa pataename, abaxë saya petaxuxuabijawa tsane bajarapapiayaicueni jawanë —jai Jesús.

⁹ Icatsia, Jesús jumaitsi pijajiwi jawabelia:

—Bajarapamatacabi pijinia paxamë pacacaponae nacua-ewetsiwi jawabelia, papecabebiobia-exanaenexa, papecabeyejebinxata-ata. Daxitanacuanëpijiwi paca-itoya tsabiabi tsane patajajiwi xamë. ¹⁰ Bajaruata, jiwi ayaibitsaëtonë nawecuacopabiana tane jumexaniataejawami. Namata-enetsia naitoya tsane. Nacanajetsiananua nacua-ewetsiwi pecobeyabelia. ¹¹ Najetarubenaena ayaibitsaëtonë, itajara bepxaniajaili-waisi pepaebiwi, Dioso pewënëta. Bajarapamonae yamaxë-itojorobiana jiwi ayaibitsaëtonëtonë petsipaebiliwaisita. ¹² Jiwi ayaibitsaëtonëtonë tsaponae tsane pewajënaeyabelia pibisiacueni pexanawanapaejawa. Nexata baja, ayaibitsaëto namata-enetsia pena-asiwacueni werewerecaponaena. ¹³ Itsiata, pajiwi ajamatabëcuenesaë tsaponaponae tsane tane-itaxutuajamatejemajawa pebeyaxuabijawabeliatsi, bajarapajiwi capanepaenatsi Dioso pijanacuayabetsia. ¹⁴ Itsamonae daxita nacuanë-jawa tsipaebanajetarubenaena^b pexaniali waisi, jiwi peyapëtaenexa imoxoyo baja pewajënae Dioso, athëbëtatsia pe-ecaenë, pijajiwi peyanacuaewetsi jawanexa. Bajaraxuacujinae jane baja, mapanacua werewerecaenaje.

¹⁵⁻¹⁶ »Nexata, itsa pataename Dioso pijatemplobo-ënëjawata penucaejawa Dioso piataejitsibijawa, pacuenia profeta Daniel-pijinë, bajayata tajëweli wajunupaeba pecopiapatsi jawanexa, nexata parëcëpecaename. (Pajiwi lebiana mapaliwaisije, yapëtaena papiayaicueni^c wajunupaeba Daniel-baxutota wajunupaeba.) ¡Nexata, paxamë itsa pataename bajarapapiayaicueni, bajarapamatacabi Judea nacuata pejinawanapaewi pëtsa nubena! Naxatsiayo rëcëpecaena petsutonë jawabelia. ¹⁷ Pajiwi pijabojumata athëbéyo ecaya, itsa wënëliwaisitaena bajarapaliwaisi, bajarapajiwi bepjiia runaenica, penajetabijirawinexa. ¡Pëtsa joneya pijaboyalialia, pejutsinexa pecobecowë! ¹⁸ Pajiwi pijinia nacuenebaponapona pijapabita, itsa wënëliwaisitaena bajarapaliwaisi, bepjiia najetabijirawiana. ¡Pëtsa nawiata pijaboyabelia, pejutsinexa penaxatabijawa! ¹⁹ ¡Bitso bejiobi tsane bajarapamatacabi peyacotajinawanapaewaxi! ¡Papetiriawi-ata isajinawanapa mito-apaenacuetoxi, bitso nabejiobitsiaya jinawanapaena! ²⁰ ¡Bajaraxuata, tajëweli Diosojawabelia pawajëcare piayapëbejematacabita papecatocopiapatsiyaníwa bajarapapiayaicueni! Nexata, pamatacabi parëcëpecaename, Dioso pacatocopatsiana pexaniamatacabi, bitso nabejiobitsiaya paneponaeyaniwa. ¡Pawajëcarenuu penacuera-ewetsimatacabita bajarapapiayaicueni papecatocopiapatsiyaníwa, papecato-ayapëbejeyaniwa! ²¹ Bajarapacuenia pawajëcaename, tsipaji raja bajarapamatacabi bitso jiwi bejiobi tsane. Pabejiobicueni abaxë jiwi

b 24:14 *tsipaebanajetarubenaena*: Taema Apoc. 14:1-6. **c** 24:15-16 *papiayaicueni*: Bajarapajumejawabelia nacajunua anijajamatabëcueneliwaisibeje. **1)** Dioso piataejitsibijawa penucaenexa pijatemplobota, xua yabara bepenaxuirabibo nacopatsijitsia Dioso pitabarata. Nexata bajaraxua yabara, Dioso aponaitajëtsi tsane bajarapatemplobota. **2)** Nacayapëtaeya-exananua Jerusalén tomara pebijianetsinexa. Taema Dan. 9:27; 11:31; 12:11.

caeto-ata apotae Dioso nacua pexanaecujinae, mapamatacabijawaberena-ataje, bajarapanabejiobitsicuene taena. Bajaraxuacujinae, pematatsënëa itsajiji-ata apotae tsane caeto-ata bajarapitsibejiobia-exanaecuenetsi.

²² Dioso eputua itsa apoyatu-ucutsi tsipae bitso jiwi nabejiobitsiaya peji-nawanapaematacabianëminexa, caejiwi-ata apo-asaë tsipae. Itsiata baitsi jane, Dioso piasiwaxae pijajiji, pitapetsiwi, eputua yatu-ucutsiana bitso jiwi nabejiobitsiaya pejinawanapaeyaniwa —jai Jesús pijajijiawabelia.

²³ Icatsia, Jesús jumaitsi:

—Bajarapamatacabi, itsajiji yamaxë-itojorobiaya itsa pacajumaitsi tsane: «¡Pataema, mara Mesías nucaje!», ¡itsa pacajai tsane, pëtsa paju-mexaniataneme! ¡Itsa pacajumaitsinua tsane: «Bajarajota nuca Mesías», itsa pacajai tsane, pëtsa pajumexaniataneme! ²⁴ Itsamonae pijinia naitajëbiana beMesías-wicuenia, itsamonae pijinia beDiosojumepaebiwi, profetawicuenia-ata. Bajarapamonae tsita-exanaponaena pinijicuenejawanë, peyamaxë-itojorobinexa jiwi. Cuene-ëjëbiana Dioso pijajiji, pitapetsiwitsi, itsa cuenecaëjëpatsi peyamaxë-itojorobinexa. ²⁵ Tajëwelia rabaja maje pacat-sipaebatsije. ²⁶ ¡Bajaraxuata, itsamonae itsa pacajumaitsi tsane: «Cristo raja ponapona petusatonacuatalia ¡Naxatsia, panataename!», itsa pacajai tsane, pëtsa paponaremelia! ¡Itsa pacajumaitsinua tsane: «Cristo raja ponapona mapa-ënëyatu-ucutsibotaje! ¡Naxatsia, panataema!», itsa pacajai tsane, pëtsa pajumexaniataneme! ²⁷ Pacuenia yamaxë itsa niwejai tsajuni athëbë-wetsica, caecuenia jiwi bacotiatane daxitajawa. Bajarapijinia peneta pacue-nia, daxitanacuanëpijiwi caecuenia netaena pamatacabi patsianicajë Xanë, Daxitajiji Pematapijinënë. ²⁸ Pacuenia quequeremonae bepíjia bayapëtane itsajota petuxutsaebinë boca, bajarapijinia pacuenia daxitanacuanëpijiwi yapëtaena tapatsijawatsica —jai Jesús pijajijiawabelia tajëwelia penawaju-nupaebijawata icatsia pepatsijawanexatsica.

**Jesús tajëwelia nawajunupaeba icatsia
pepatsijawanexatsica mapanacuajawabetsicaje
(Mc 13:24-37; Lc 21:25-33; 17:26-30,34-36)**

²⁹ Jesús jumaitsi pijajijiawabelia mapacueniaje:

—Jiwi penabejiobitsicuene pepanepaecujinae, matacabipijijuameto aita-quiri tsane. Merawipijijuameto-ata aponaitayotsi tsane. Tulupu-ata othopae-nica irabetsica. Daxitacuene, xua rubena athëbëtatsia, najëabiana. Xania-waetsia aporubenae tsane. ³⁰ Bajaraxuacujinae jane baja, daxita jiwi taena itaboxotatsia papinijicuenejawa naitajëtsiana Xanë, Daxitajiji Pematapiji-nënë, tapatsijawanexatsica. Nexata itsa netaena athëbëwetsica itarërbota tanajetarucajawa, daxitawiriawi, mapanacuapijiwi, natsinuena pecajunawi pijaneconi yabara. Necujunawiana, tsipaji yajawapatsianicajë bitso tanama-tacaitorobisaë, tajapeniweniwenaeicotia-ata. ³¹ Bajaraxuacujinae, trompeta itsa najumetsiana ayaijumeta, itorobianajë taja-ángelëwi, daxitanacuanë-jawawerena xanëjawaberena tanetocaetuatsinexa tajajiji, pamonae Dioso pitapetsiwitsi —jai Jesús pijajijiawabelia.

³² Icatsia, Jesús jumaitsi:

—¡Xaniawaetsia paneyapëtaenexa tapatsimatacabinexa yabara, pacanaë-jëre pacuenia itsi higeranae! Bajaraponae itsa maxëranajuwanajetaruca,

pejanabaxu pepitsapaenexa, payapëtaneme baja wai imoxoyo pewajënae pecopiapatsinexa. ³³ Bajarapijinia pacuenia, peneta itsa pataeneme pecopiapataponaejawa xua tajëwelia wajunupaebajë, nexata payapëtaeneme imoxoyo baja tawajënae tapatsijawanexatsica. ³⁴ Xaniajanë pacuenia pacatsipaebijitsiatsi. Pamonae taena pecopiapataponaejawa tawajunupaebijawa, bajarapamonae apotëpae tsane daxita xuanë tajëwelia wajunupaebajë, copiarucaenejewa. ³⁵ Itaboxo, ira yajawa, werewerecaena. Itsiata baitsi jane, tajumeliwaisi apowerewerecae tsane.

³⁶ »Xua yabara pacatsipaebatsi, itsajiwi-ata apoyapëtae pamatacabita, paepatota-ata, copiapatsijitsia. Athëbëpiji-ängelewi-ata, apoyapëtae. Xanë, Dioso pexënato-atanë, apoyapëtanë. Caenë taxa Dioso yapëtane. ³⁷ Pacuenia bajayata Noëpijinë peponaponaematacabita, jiwi jamatejema pibisiacuenë exanawanapa, bajarapijinia pacuenia exanawanapaena pamatacabita Xanë, Daxitajiwi Pematapijinënë, patsianicajë. ³⁸ Noëpijinë peponaponaematacabita, ira pebubutsiwajënaeya, jiwi picani xaniawaetsia jamatejema pexaejawa xaewanapa. Apaewanapanua. Nacojiobapona itsamonae. Canajetaponanua pexënatowaxi pebijiwijawabelia, petonacojiobinexatsi. Bajarapacuenia jamatejema exanawanapa pamatacabijawa Noëpijinë, pijamonae yajawa, barëjunua pinijibarcotanetojawabelia. ³⁹ Nexata, itsajiwi-ata yapëtaenejewa pamatacabita copiapatsijitsia, jemata ayai-emaxaneto jopa, ira pebubutsinexa. Matapania bajarapacuenë petaejawata, yapëtane. Nexata, daxitajiwi bubuna. Bajarapijinia pacuenia, itsajiwi-ata yapëtaenejewa tapatsijawanexatsica, Xanë, Daxitajiwi Pematapijinënë, jemata patsianicajë. ⁴⁰ Nexata, bajarapamatacabita anijanëbeje, pebibije, penajuanacuenebanucaejawatabeje tsane pabita, itsanë ängelnë pitsianatsi.^d Itsanë copatanutsianatsi. ⁴¹ Bajarapijinia itsi tsane petiriwabeje-ata.

d 24:40 ängelnë pitsianatsi: Taemanua Mt 13:24-30, 39-43, 47-50. Pamonae Jesús yanijobatsi 24:3-jawata, bajarapamonae judfowi. Nexata judfowixae, apocanaëjëtsi Jesús pijajiwi (iglesiawi) yabara. (1Ts 4:15-16.) Canaëjëta saya ëjudfowi pijacuene yabara. Nexata Jesús jumecanawiata peyanijobiwitsi, judfowi pecanaëjëtsicuenia. Bajarapamonae yanijoba Jesús icatsia pepatsimatabinexatsica mapanacuajawabetsicaje yabara, Mesías-nëcuenia peyanacua-ewetsijawanexa daxitanacuanëpijiwi Jerusalén tomarawerena. Bajaraxuata, bajarapaversicüloxi nacayapëtaeya-exana xua copiapatsijitsia bajarapamatacabijawatalia. Apoyabarajumaitsi Jesús pepitsijawanexa pijajiwi (iglesiawi), tsipaji baja pepuapitsicujinaetsi, 7 pawaiabeje pepanepaecujinae, Cristo icatsia patsianica mapanacuataje peyanacua-ewetsinexa daxitajiwi 1.000 pawaiabejecuenia. Nexata bajarapamatacabita, ängelewi pajiwi pitsianatsi, pijaneconi pexainaewi, penaneconitsia-exanænenxatsi apowerewerecae-isotojawabelia. Pajiwi pijinia ängelewi copatanutsianatsi, Dioso aneconijibia petaxaetsi, bajarapamonae pejonewinexa Dioso pijajiwi peyanacua-ewetsinacuajawabelia mapanacuataje. Nexata, Cristo yanacua-ewetsiana daxitanacuanëpijiwi mil pawaiabejecuenia. Bajarapamil pawaiabejecujinae, patsiana jane baja Dioso peniojaitronota pe-ecaenë, daxitajiwi pijaneconi petocanaëjëtsinexa. (Apoc. 20:11-15.) Mt 13:30-jawatanua nacayapëtaeya-exana pacuenia pibisiawirijawanë copiya nota, petajuitsinexa isotota. Xuacujinae, penacopabijawanë, pexaniatrigoxu, nota pexaniawaetsinexa bota. Baitsi pibisiawirijawanë nacatocueneecatane pibisiacuenë pexanawanapaewi. Pexaniatrigoxu pijinia nacatocueneecatane Dioso pijajiwi. Itsiata, itsamonae aithothia canaëjëta bajarapamatacabita yabara. Canaëjëta saya Jesús pejunatsijawa pijajiwi (iglesiapijiwi) pajubowetsica. (1Ts 4:15-16.) Nexata, canaëjëta ängelewi pepitsijawanexa Jesús peliwaissi pejumexaniataejwi, pecaponaejawanexa Dioso pijanacuajawabetsia. Pecopatanutsijwi pijinia, canaëjëta pamonae pejume-aebijwi bajarapaliwaisi, penacopatsinexa mapanacuataje, Dioso penaneconitsia-exanænenexa 7 pawaiabejecuenia. (Bajarapaliwaisi yabara nacayapëtaeya-exana Apoc. cap. 5—cap. 19-jawabelia.) Bajarapacuenia itsamonae canaëjëta, xaniawaetsia apopetaexae xua yabara Mateo capítulo 24-jawata jumaitsi.

Caejawata penajuacaquiatanucaejawatabeje tsane, itsawa ángelnē pitsia-natsi. Itsawa copatanutsianatsi. ⁴² Nexata, nejamatabēcuene-ewetsiaya panecopia-ewetawanapaename, tsipaji raja apopanewajēnaeyapētaemē tsane paepatota xanē, panijatuxanenēnē, icatsia patsijitsianētsica. ⁴³ Paca-naējēre mapacuenēje! Bo pexainanē itsa yapētaejitsipa paepatota merawi patsijitsia pijaboyaberena petonacobetoxotsinēnexatsi, nexata naēcotsiaya wajēnae-ewetsipa. Apocopatsi tsipae pijaboyaberena pejonejawa. ⁴⁴ Bajara-pijinā pacuenia, paxamē-ata najamatabēcuenexaniawaetsiaya panecopia-ewetawanapaename, tsipaji Xanē, Daxitajiwi Pematapijinēnē, paepatota apopanejamatabēnājinaemē tapatsijawanexatsica, jemata icatsia patsiani-cajē —jai Jesús pijajiwijawabelia tajēwelīa penawajunupaebijawata itsama-tacabi icatsia pepatsijawanexatsica.

**Jesús tsipaeba pijajiwijawabelia pecuenecataeliwaisi petuxanenē,
pijajiwitonēbeje peliwaicsuenia**

(Lc 12:41-48)

⁴⁵ Pepatsijawanexatsica pijajiwi xaniawaetsia pecopia-ewetawanapaenexatsi, Jesús tsipaeba mapapecuenecataeliwaisije:

—Petuxanenē, ponē pijajiwitonē, xaniawaetsia pecowēta canaējēt-siaya nacuenebaponapona, bajaraponē itsajamatabēcuene xainaenejewa, copia-ewetaponaponaena pijatuxanenē pepatsijawabelianexa. Bajaraponē pacuenia pijatuxanenē itorobatsi, pijajiwi pecowēta to-ewetaponapona. Abataponaponanua pexaejawa caematacabi canacujitsia. ⁴⁶ Bajaraponē bitso barēya tsane pamatacabi pijatuxanenē patsiana, xaniawaetsia pi-ja-jiwi peto-ewetaponaponaexae pecowēta. ⁴⁷ Xaniajanē pacuenia pacatsi-paebijitsiatsi. Ponē xaniawaetsia tonacuenebiana pijatuxanenē pecowēta, bajaraponē ewetsia-exanaenatsi daxita xua xaina pijatuxanenē. ⁴⁸ Itsiata baitsi jane, ponē, pijajiwitonē piajamatabēcuenebejenē, nexata pijatuxa-nenē pecowēta itsa jamatabējumaitsi tsipae: «Tajatuxanenē ajibi tsarucae tsane bajayajebi», jamatabējai tsipae. ⁴⁹ Nexata, bajaraponē taxuxuabijitsipa petoconibabeyabiabijawa pijatuxanenē pijajiwi. Ayaijawa wecuaxaeyabiabi-jitsipa. Na-apaeyabiabijitsipana piaitajibiwita. ⁵⁰ Nexata, itsajota apojama-tabēnājināe tsipae pijatuxanenē pepatsijawanexa, jemata patsipa. ⁵¹ Nexata, bajaraponē ayaicuenia naneconitsia-exanaejitsipatsi pijatuxanenē. Bajara-pijinā pacuenia, Dioso ayaicuenia naneconitsia-exanaena jiwi peyamaxē-itojorobabiabiwi. Nexata, natsinuena. Nawonosiniananua, bitso penawixae-taexae —jai Jesús pijajiwijawabelia.

**Jesús tsipaeba pijajiwijawabelia pecuenecataeliwaisi, diez
papejanawabeje pijalámparabēxi pecaponaewaxi peliwaicsuenia**

25 ¹ Jesús pepatsijawanexatsica pijajiwi jamatabēcuene-aitawayaya pecopia-ewetawanapaenexatsi, jumaitsi pijajiwijawabelia mapacueniaje:

—Dioso, athēbētatsia pe-ecaenē, pijajiwi peyanacua-ewetsimatacabinexa, cuenējēpa diez papejanawayobeje pecopiapitsijawa pejananacojio-binē, pijawa yajawa. Nexata, daxita bajarapapejanawaxi, caewa cana-cujitsia, capona picani pijalámparabēxi, penatsiwajēnae-itayotsinexa

penamata-enenaejawata bajarapajiwiubeje penajetarucaejawata, pebi pija-boyaberena, itsajota barë-exanaejitsia penacojobifiesta. ² Bajarapowaxiya-juwëñewi, cinco powabeje, xaniawaetsia liwaisi pecanaëjëtsiwaxi. Itsacincopowabeje bijiaya pecanaëjëtsiwaxi. ³ Nexata, apopecanaëjëtsiwaxi, yapëtae-ata picani petsicaponaejawanexa aceiteranë pijalámparabëxinexa, itsiata, apotsicapona. Nexata, pijalámparabëxi aceitera itsa towerewerecatsi, apoxinae pe-epatsinexa icatsia pijalámparabëxijawabelia. ⁴ Cinco piji-nia powabeje, xaniawaetsia liwaisi pecanaëjëtsiwaxi, aceiteranë tsicapona pijalámparabëxinexa. ⁵ Nexata, bajarapadiez powabeje merawi itayotena pijalámparabëxita. Bajayajebi picani wajënae-ewetena pejananacojobinë pepatsijawa. Nexata, bajaraponë pecuenenajematsixae, belia pijalámparabë-xita pa-aceiteranë capona, towerewerecaponatsi baja. Nexata, daxita bajarapapetiriawi belia baja itamajitsipana. Nexata, majita. ⁶ Bajaraxuacujinae, ayaimerawituatujëta, jumetane pewawajaijawa. «¡Najetaruca rajane baja pejananacojobinë! ¡Papitsaparemena jane baja, panecopiapitsinexa!», pejai-jawa jumetane. ⁷ Nexata, daxita bajarapapetiriawi nonobapuna, pecopiapitsinexa jane baja. Papetiriawi aceiteranë tsicapona, epaca pijalámparabëxijawabelia. Xaneba petajue-upijawanë pequiobimaëjawa. Jutsinanua ayaicotia pexanaenexa. ⁸ Nexata, papetiriawi apotsicapona aceiteranë, jumaitsi aceiteranë pexainaewijawabelia: «¡Panenarajure tsiquiri-aceiteraxi, tsipaji patajalámparabëxi paneto-itacaënapon!», jai bajarapamonae. ⁹ Itsiata, aceiteranë pexainaewi jumaitsi: «Jume. Apocaëjëpae. Paxanë-ata meta apopanetocaëjëpae tsipae. ¡Paponaremelia, panenacomuacaenexa itsajotalia canajetabiaba aceiteranë!», jai. ¹⁰ Nexata, papetiriawi aceiteranë apotsicapona pijalámparabëxinexa, itacarajeta ponalia aceiteranë pecomuacaenexa. Pecowëta pejananacojobinë patanajetaruca. Nexata papetiriawi aceiteranë tsicapona pijalámparabëxinexa, napona baja penacojobifiesta pexanaebowawabelia. Pejonecujinaelia daxita jiwi baupaxatata bajarapabo. ¹¹ Bajaraxuacujinae, aceiteranë pijalámparabëxi petsicomuacawaxi pata. Jumaitsi pejananacojobinëjawabelia: «¡Panetobaupare! ¡Panetobaupare!» jai tsanubenae bojumapëñewelia. ¹² Nexata, pejananacojobinë bo-ënëwerena jumaitsi: «Xaniajanë pacuenia pacatsipaebijitsiatsi. Apopacayapëtaetsi cajena paxamë», jai bajarapapetiriawijawabelia. ¹³ Paxamë, patajajiwimë, jamatabëcuene-aitawaya panecopia-ewetawanapare, bajarapacuenia papecatocopiapatsiyaniwa, tsipaji caejijiwi-ata apoyapëtae tsane pamatacabita, paepatota-ata, Xanë, Daxitajwi Pematapijinënë, patsianicajë! —jai Jesús pijajiwijawabelia.

**Jesús tsipaeba pijajiwijawabelia pecuenecaetaeliwaisi,
pijapalata pewetsia-exanaenë peliwaaisicuenia**

(Lc 19:11-27)

¹⁴ Pijajiwí xaniawaetsia petonacuenebawanapaenexatsi xua tocopatatsi peto-ewetsinexatsi, Jesús jumaitsi pijajiwijawabelia mapacueniaje:

—Dioso, athëbëtatsia pe-ecaenë, pijajiwí peyanacua-ewetsijawa cuenejëpa petuxanenë pijajiwí petsicopatsijawa palata, bajarapamonae petocanacuenebinexatsi pecowëta. ¹⁵ Bajarapamonae ewetsia-exanapona petocanacuenebinexatsi pecowëta, pacuenia caenë canacujitsia cuenecaëjëpatsi.

Nexata, copiyapijinē ewetsia-exana cinco mil ponēbeje palatanēanē, bitso penamatamotsiwi. Xuacujinae itsanē ewetsia-exana dos mil ponēbeje. Xuacujinae itsanē pijinia ewetsia-exana mil ponēbeje. Bajaraxuacujinae, petuxanenē pona tajēnacuyabelia. ¹⁶Nexata jane baja, ponē ewetsia-exana cinco mil ponēbeje, canacueneba jane baja pecowēta bajarapapalata. Nexata, pematatsēnēa topitsapatsi icatsia itsacinco mil ponēbeje. Nexata baja, daxitata toxaina diez mil ponēbeje. ¹⁷Bajarapijinia pacuenia, itsanē canacueneba dos mil ponēbeje. Nexata, pematatsēnēa topitsapatsi icatsia itsados mil ponēbeje. ¹⁸Itsiaa baitsi jane, ponē to-eweta mil ponēbeje, pijatuxanenē pijapalata pona pematayatsinexa. Irata saya mēthēteta.

¹⁹»Ayaibexēcujinae, nawiatanajetaruca jane baja petuxanenē. Junata pijajiwi peyapētaenexa pacuenia to-ewetatsi pecowēta pijapalata. ²⁰Copiaya pata ponē cinco mil ponēbeje ewetsia-exanatsi. Jumaitsi bajaraponē pijatuxanenējawabelia: «Ne-ewetsia-exaname cinco mil ponēbeje tacato-ewetsinexa. Bajarapapalata tacanacuenebijawata tsmatapitajē itsacinco mil ponēbeje. Bajarama nijapalataje. Catocanawiatatsi diez mil ponēbeje», jai pijatuxanenējawabelia. ²¹Nexata petuxanenē jumaitsi: «Xanepana rabaja. Xaniawaetsia neto-ewetaponaponame, itsajamatabēcuenē xainaenejewamē. Xaniawaetsia taneto-ewetsixaemē, tsiquirijawayo-ata, nexata aeconoxae ca-ewetsia-exanaenatsi pematatsēnēa ayaijawa. ¡Naxatsia! Najuabarēyatsi tsane», jai pijajiwitonējawabelia.

²²»Bajaraxuacujinae, pata ponē dos mil ponēbeje ewetsia-exanatsi. Nexata, bajaraponē jumaitsi pijatuxanenējawabelia: «Ne-ewetsia-exaname dos mil ponēbeje tacato-ewetsinexa. Bajarapapalata tacanacuenebijawata tsmatapitajē itsados mil ponēbeje. Bajarama nijapalataje. Catocanawiatatsi cuatro mil ponēbeje», jai bajaraponē pijatuxanenējawabelia. ²³Nexata petuxanenē jumaitsi: «Xanepana rabaja. Xaniawaetsia neto-ewetaponaponame, itsajamatabēcuenē xainaenejewamē. Xaniawaetsia taneto-ewetsixaemē, tsiquirijawayo-ata, nexata aeconoxae ca-ewetsia-exanaenatsi pematatsēnēa ayaijawa. ¡Naxatsia! Najuabarēyatsi tsane», jai pijajiwitonējawabelia.

²⁴»Icatsia, pata ponē ewetsia-exana mil ponēbeje. Bajaraponē jumaitsi pijatuxanenējawabelia: «Cacueneyapētanetsi. Xamē nijajiwi apoitaxutobejiobiataeyabiabimē. Bajarapamonae ne-ubia-exanaejamatabēcuenē ayaijawa palata catopitsapabiaba. Bajarapijinia pacuenia, xanē-ata newe-cuapitsipame xua pematatsēnēa nacanabijitsipajē, tacanacuenebijamatabēcuenē nijapalata. ²⁵Bajaraxua yabara cacujunawatsi. Nexata, ponajē, tamēthētetsinexa irata nijapalata. Bajarama nijapalataje. Catocanawiatatsi, jai bajaraponē pijatuxanenējawabelia. ²⁶Nexata, petuxanenē jumaitsi: «Tajajiwitonē-atamē, itsiaa ajamatabēcuenēbejemē. Afaetabimēnua. Xamē baja cajena yapētaneme tajajiwi ta-ubia-exanabiabijawa, bajarapamonae pejamatabēcueneta ayaijawa palata tanetopitsapaenexa. ²⁷Bajaraxuata, xanepanaejitsipa picani itsa netocanacuenebia-exanaejitsipame tajapalata banco pewetsiwiawabelia. Nexata, aeconoxae banco pewetsiwi tajapalata pecowaetsijamatabēcuenē netocanawiatsipa pematatsēnēa», jai pijajiwitonējawabelia. ²⁸Nexata, petuxanenē jumaitsi bajarajota penubenaewijawabelia: «¡Pawecuapire bajarapamil ponēbeje, juya panerajutsinexa diez mil ponēbeje pexainaenējawabelia, tsipaji bajaraponē caējēpatsi taneto-ewetsinexa pematatsēnēa!», jai pijajiwitonējawabelia.

²⁹»Bajarapijini pacuenia, exanaena Dioso, athëbëtsatsia pe-ecaenë, pija-jiwi peyanacua-ewetsimatacabita. Pajiwi xaniawaetsia canacueneba xua Dioso ewetsia-exanatsi, pematatsënëa icatsia itsajawa rajutsianatsi. Nexata, xainaena ayaijawa. Itsiata, pajiwi bijiaja canacueneba xua Dioso ewetsia-exanatsi, patsiquirijawayomi picani xaina wecuapitsianatsi —jai Jesús pija-jiwijawabelia, xaniawaetsia pecanacuenebinexa xua Dioso ewetsia-exanatsi petonacuenebinexa.

³⁰»Icatsia, petuxanenë jumaitsi bajarajota penubenaewijawabelia: «¡Maponë tajajiwitonëje, itsacuenejawayonexa-ata aponetoxanepanae! ¡Nexata, paxuabaremelia pitaquirijawabelia! Bajarajota natsinuena. Nawo-nosinianua bitso penawixaetaexae», jai petuxanenë, xaniawaetsia apope-tonacuenebixae —jai Jesús pijajiwijawabelia, pemuxujobinexa xaniawaetsia pecanacuenebijawanexa xua Dioso rajutatsi.

Dioso naneconitsia-exanaena pijaneconi pexainaewi

³¹ Icatsia, Jesús jumaitsi pijajiwijawabelia mapacueniaje:

—Xanë, Daxitajiwi Pematapijinënë, icatsia itsa najetarucaenajë, tacotia-tuatujëta, taja-ánglewi yajawa. Nexata, ecaenajë tajapeniweniwenae-tonojawata, ta-ewetsinexa daxitanacua. ³²⁻³³ Nexata, daxitanacuanëpijiwi caetuatsianatsi taitabarata. Tsataponaenajë bajarapamonae. Pacuenia oveja pewetsinë ovejawecua saicaya tsatapona, bajarapacuenia-exanaenajë jiwijawabelia. Nexata, pamonae taniji betaja-oveja, Dioso pejitsipaecuenia pexanawanapaexae, nubianajë tacujuanenia. Pamonae pijinia taniji bechivocuenia, Dioso apopejumecowënëtsixae, nubianajë tatsawenonenia.

³⁴»Nexata xanë, tayanacua-ewetsinë, jumaitsinë tsane tacujuanenia penubenaewijawabelia, Dioso panejumecowënëtsiwi: «¡Naxatsia, paxamë taxa pexaniacuenia papecayawenonaewi, panecanacopatsiwinexa panacua taxa Dioso baja cajena tajëwelia pacatsiwajënaexaniawaeta, nacua pexanaejawaweliacujinae! ³⁵ Itsa tajani, paxamë taxaejawa panerajutame. Itsa mera jitsipajë, panerajutame ta-apaenexa. Itsanacuawerena itsa patajë, xaniawaetsia panecopiapitame. ³⁶ Itsa ajibi bitso tanaxatatsijawa, panerajutame tanaxatatsijawanexa. Itsa awitanenë, papatame patane-ewetsinexamë. Itsa ne-eta penaneconitsiwi pejebabiabibota, papatame patanetaenexamë», janë tsane tacujuanenia penubenaewijawabelia. ³⁷ Nexata, bajarapamonae nejumaitsi tsaponae tsane: «Tajatuxanenë, ¿detsa pacujinae nijanijawata patajacarajutsi nexaejawa? ¿Detsa pacujinae mera nejitsipaejawata patajacarajutsi? ³⁸ ¿Detsa pacujinae itsanacuawerena nepatsinë patajacacopiapitsi xaniawaetsia? ¿Detsa pacujinae piajibijawata bitso nenaxatatsijawa patajacarajutsi nenaxatatsijawanexa? ³⁹ ¿Detsa pacujinae niawitanejawata patajaponae pataca-ewetsinexa? ¿Detsa pacujinae peca-etsijawata penaneconitsiwi pejebabiabibota patajaponae patacataenexa?», nejai tsaponae tsane. ⁴⁰ Nexata, xanë jumaitsinë tsane bajarapamonaejawabelia: «Xaniajanë pacuenia pacatsipaebijitsiatsi. Daxita xua pato-exaname paneyawenonaenexa tajajiwiajuwënëjiwi, beweliamatabëcuenewi petaewitsijawabelia, bajaraxua xanë taniji bexanëjawaberena pataneto-exanaejawamë», janë tsane.

⁴¹»Nexata, tatsawenonenia penubenaewi, Dioso peliwaissi apopejumecowënëtsiwijawabelia, jumaitsinë tsane: «¡Panewecuanatsare panijaneconi

paneyajawajinawanapaewi! ¡Paponaremelia apopewerewerecae-isotojawabelia, pa-isoto Dioso picani tajëwelia toxaniawaeta ëdowathi-nexa, pija-ängelewi yajawa!^e ⁴² Xanë itsa tajani, paxamë apopanerajutsimë taxaejawa. Itsa mera jitsipajë, apopanerajutsimë ta-apaenexa. ⁴³ Itsanacuawerena itsa patajë, xaniawaetsia apopanecopiapitsimë. Itsa ajibi bitso tanaxatatsijawa, apopanerajutsimë tanaxatatsijawanexa. Itsa awitanenë, apopapatsimë patane-ewetsinexamë. Itsa ne-eta penaneconitsiwi pejeba-biabibota, apopapatsimë patanetaenexamë», janë tsane tatsawenonenia penubenaewijawabelia. ⁴⁴ Nexata, bajarapamonae pijaneconi peyajawajinawanapaewi nejumlahitsi tsaponae tsane: «Tajatuxanenë, ¿detsa pacujinae nijanianjawata apopacarajutsitsi nexaejawa? ¿Detsa pacujinae mera nejitsipaejawata, apopacarajutsitsi? ¿Detsa pacujinae itsanacuawerena nepatsinë, apopacacopiapitsitsi xaniawaetsia? ¿Detsa pacujinae bitso pecato-ajibijawata nenaxatatsijawa, apopacarajutsitsi nenaxatatsijawanexa? ¿Detsa pacujinae niawitanejawata, apopaponaenë pataca-ewetsinexa? ¿Detsa pacujinae penaneconitsiwi pejebabiabibota peca-etsijawata, apopaponaenë patacataenexa?», nejai tsaponae tsane. ⁴⁵ Nexata, xanë jumlahitsinë tsane bajarapamonaewajawabelia: «Xaniajanë pacuenia pacatsipaebijitsiatsi. Bajarpacuenia itsa apopato-exanaemë paneyawenonaenexa tajajiwijawuwënëji-wijawabelia, nexata bajaraxua xanë taniiji bexanëjwaberena apopataneto-exanaewajawamë», janë tsane pijaneconi peyajawajinawanapaewijawabelia. ⁴⁶ Nexata, bajarapamonae ponaena apopewerewerecae-isotojawabelia, naneconitsiaya pejinawanapaenexa daxitamatacabijawabelia. Pamonae pijinia, Dioso pejitsipaecuenia exanawanapa, bajarapamonae rajutsianatsi matacabi apopewerewerecaejawawa, pebarëjinawanapaenexatsi daxitamatacabijawabelia —jai Jesús pijajiwijawabelia.

Jesús pijawajabitsaë picani jamatabëwaetabatsi

(Mc 14:1-2; Lc 22:1-2; Jn 11:45-53)

26 ¹ Itsa baja Jesús najumewereta pijajiwijawabelia liwaisi petsipaebi-jawa, icatsia tajëwelia nawajunupaeba itsamonae cruzajawabelia pecobematabiabarutsijawanexatsi. Jumlahitsi pijajiwijawabelia mapacueniaje:

² —Payapëtaneme rabaja anijamatacabibeje pesajinaejawa pejonenexa baja Pascuafiesta. Nexata Xanë, Daxitajiwi Pematapijinënë, bajarapamatacabi necanajetsiana itsamonae pecobeyabelia, tanecobematabiabarutsinexa cruzajawabelia —jai Jesús.

³ Nexata bajarapaepatota, nacaetuata sacerdotewi penamatacaitorobiwi, judfowi pecujarubiwi, pija-ancianowi-ata, Caifás pijaboxanetojawa. Bajaraponë sacerdotewi pepopenamatacaitorobinë. ⁴ Bajarajota,

e 25:41 pija-ängelewi yajawa: Apoc. 12:4-jawata nacayapëtaeya-exana pacuenia dowathi/Satanás yamaxë-itororoba ayaibitsaëto Dioso pija-ängelewijawuwënëwi. Nexata peyamaxë-itorobicujinaetsi, bajarapamonae nacopata dowathi pija-ängelewinexa. Ängelewixae, apoxinae petëpaecueni. Apowajataecapanepaewi-ata waja-itaxutota. Pacujinae Dioso itoroba pija-ängelewi naitajëtsia-exana jiwijawabelia bejiwiperabëto pexainaewicuenia. Itsiata, pacujinae dowathi pija-ängelewi itoroba naitajëbabiaba pejumapewicuenia. Nexata itsawënëanë wowaijuma dowathi pija-ängelewi yabara, xaina mapacueniaje: «demonio, espíritu malo, diablo-ata», jiwijumeta pijinia, «dowathi, malicai, ainawi-ata». Daxita bajarapadowathimonae caejamatabëcueni xaina Satanás-jawabelia jiwi peyamaxë-itorobinexa Dioso pecuenewecua.

daxita bajarapamonae najumejaita, penajumetsënëtsiliwaisita Jesús picani pewaetabinexatsi, pebeyaxuabinexatsi-ata. ⁵Itsia, bajarapamonae najumaitsi: «Fiestajawata meta abaxë apobewaetabitsi tsane, jiwi wajanaca-itsacueniabiyanawa», najai daxita bajarapamonae.

Jesús petiriwa tsimata-epanatsi petuxujuwi-aceiterata

(Mc 14:3-9; Jn 12:1-8)

⁶ Jesús peponaponaejawata Betania tomarata, Simón pijabota, ponë bajayajebi bitso peperabëtsabanaenëmi, bajarajota patajopa petiriwa.

⁷ Cobena-imoxoyorenatsi bitso penamatamotsituxujuwi-aceitera, alabastro-botellabëta. Nexata Jesús mesata pexaeyecaejawata, bajarapowa tsimata-epanaicatsi bajarapa-aceitera. ⁸ Nexata Jesús pijajiwi itsa taeyena petsimata-epanaejawatsitsicabajarapa-aceitera, jamatabëcuene-anaepanareca. Nexata ëpamonae najumaitsi tsenae:

—¿Detsa xuajitsia saya xuaba bajarapacuenia maporaje? ⁹ Canajetsipa rajane. Nexata, matamopitsipa ayaimatamo. Bajarapapalata rajutsipa bepejiobiwawabelia, bajarapacuenia peyawenonaenexa —najai tsenae Jesús pijajiwi.

¹⁰ Jesús bajarapacuenia pejumetaexae pijajiwi pejumaitsiyawa, nexata jumaitsi pijajiwiwawabelia:

—¿Detsa xuajitsia bajarapacuenia pajumaitsimë bajarapowa pexanaejawa yabara? Mara powaje pexaniacuene neto-exanaje. ¹¹ Daxitamatacabi raja bepejiobiwi jinawanapa itsaxuayo pajinawanapame. Itsia baitsi jane, xanë daxitamatacabi apoponaponaenë tsane paxamëjawata. ¹² Bajarapacuenia bajarapowa itsa neto-exana, betaneperabëxaniawaetsijawa tanemëthëtsi-wajënaeya, pacuenia itsamonae petëpaejiwi perabë-exababiaba petuxujuwi-aceiterata pemëthëtsiwajënaeya. ¹³ Xaniajanë pacuenia pacatsipaebijitsiatsi. Daxitanacuanëjawa tajajiwi itsa paebanajetarubenaena pexanialiwaitsi, jiwi tacapanepaeliwaitsinexa, wajunupaebabiabiananua pacuenia exana xanëjawa-waberena mapapetiriwaje —jai Jesús pijajiwiwawabelia.

Jesús pepëya yajumejaitatsi Judas pecanejetsinexatsi

pijawajabitsaë pecobeyabelia

(Mc 14:10-11; Lc 22:3-6)

¹⁴ Bajarapamatacabita, Jesús pijajiwi, doce ponëbejeyajuwënënë, Judas Iscariote, pona sacerdotewi penamatacitorobiwawabelia. Bajaraponë jane baja, canajelia Jesús. ¹⁵ Nexata jumaitsi sacerdotewi penamatacitorobiwawabelia:

—¿Detsa pacuenia panerajutsipame, panecobeyabelia itsa pacacanajetsipatsi Jesús? —jai Judas.

Nexata, bajarapamonae matamotatsi treinta ponëbeje pepopalatanëanë, bitso penamatamotsinëanë. ¹⁶ Bajarapamatacabijawaweliacujinae, Judas naitaxutuacaewetsiaponapona, peyapëtaenexa paepatota toyapëxanepanae-jitsiatsi, perajutsinexa jane baja Jesús bajarapamonae pecobeyabelia.

Jesús pijajiwi barëxane pecopiarutsipexaejawata, pebeyaxuabiwajënaetsi

(Mc 14:12-25; Lc 22:7-23; Jn 13:21-30; 1Co 11:23-26)

¹⁷ Junua jane baja fiesta, pafiestajawa judíowi baxane levadurata matajërëabinejewa pexanaepan. Nexata Jesús pijajiwi imoxoyorenatsi. Yanijobatsi.

—¿Detsa belia paponaeñajë patacamitsa-exanaenexa, xua jiwi baxane Pascuafiestamatacabi? —jai Jesús pijajiwi.

¹⁸ Nexata Jesús jumaitsi pijajiwijawabelia:

—¡Paponare tomarabelia! Ponë pacaxitajarabianame,^f pacayapëtaeya-exanaena ponë pijabota papatsijitsiamë. Pajumaitsimë tsane bo pexainae-nëjawabelia mapacueniaje: «Wajanacacujarubinë raja jumaitsi: ‘Imoxoyo rabaja tawajënae tanebeyaxuabinexa. Netsicopatsiana pijabo tajajiwi tabarëxaenexa Pascuafiestapijipexaejawa’, jai raja wajanacacujarubinë», pajamë tsane bo pexainaeñajawabelia —jai Jesús pijajiwijawabelia.

¹⁹ Nexata baja, Jesús pijajiwi pona pacuenia itoroba. Nexata, xua jiwi baxane Pascuafiestamatacabi daxita Jesús pijajiwi pebarëxaenexa, exana jane baja.

²⁰ Nexata baja, ajenä merawiyotsia, Jesús pijajiwi, doce ponëbeje, barë-eca mesamuxuneneta. ²¹ Nexata, pexaeyenaejawata Jesús jumaitsi pijajiwijawabelia:

—Xaniajanë pacuenia pacatsipaebijitsiatsi. Caenë paxamëyajuwënëñë tajawajabitsaë pecobeyabelia necanajetsiana —jai Jesús pijajiwijawabelia.

²² Nexata, Jesús pijajiwi bejamatabëjiobireca. Caenë canacujitsia, yanijobapona.

—Tajatuxanenë, ¿xanë tsaja tsane? —jai tsaponae bajarapamonae.

²³ Nexata Jesús jumaitsi pijajiwijawabelia:

—Ponëbeje peneta caecuenia panajuacajabutsianajëbeje panbë platojawabelia, bajaraponë raja, tajawajabitsaë pecobeyabelia tanecanajetsinë tsane. ²⁴ ¡Xaniajanë baja cajena! Xanë, Daxitajiwi Pematapijinënë, tēpaenajë pacuenia baja Dioso pejumeliwaisibaxutota tajëwelia jumaitsi xanë yabara. Itsiata, ponë tajawajabitsaë pecobeyabelia necanajetsiana, bajaraponë bitso bejiobi tsane pinijicuenia. Itsa meta bajaraponë aponaxanae tsipae, bajarapacuenia aponecanajetsi tsipae. Nexata, aponaneconitsi tsipae Diosojawabelia —jai Jesús pijajiwijawabelia.

²⁵ Nexata, Judas, ponë jane baja Jesús pijawajabitsaë pecobeyabelia rajutsijitsia, jumaitsi:

—Petuxanenë, ¿xanë tsaja tsane? —jai.

Nexata, Jesús jumaitsi:

—Jājā, xamë rabaja tsane —jai.

²⁶ Pexaeyenaejawata, Jesús pita panbë. Pexaniajamatabëcuene perajutsicujinae Diosojawabelia, epatsënëquejeba bajarapapanbë. Rajuta jane baja pijajiwi. Bajarapamonaejawabelia jumaitsi:

—¡Paxaema! Maratawitoje^g —jai.

f 26:18 Ponë pacaxitajarabianame: Taema Mc 14:13; Lc 22:10-11. Jesús caecuenia apowënëñerubi ponë pijabota exanaejitsia Pascuafiesta, tsipaji apoijitsipae tsaena Judas Iscariote pewajënaeya peyapëtaejawa, Jesús pijawajabitsaë petsimaxëpatsiyaniwatsi bajarapafiesta pexanaejawata. **g 26:26** Maratawitoje: Panbë picani Jesús apopeperabëto. Vinora-ata picani Jesús apopejana. Bajaraxuaeje saya nacatocueneecatane xua Cristo nacato-exana wajanacasiwatëpaejawata. Pacuenia pan pexanaenexa, jiwi sebiabiaba piatajutaxunaeta, hornojawa, bajarapijinia pacuenia Jesús ayaicuenia bejiobia-exanatsi, wajanacacapanepaenexa Dioso wajanacananeconitsia-exanaejawaminexawecua, wajaneconijamatabëcuene. Pacuenia uvacuaibarëmene jucabiaba vinoranexa, bajarapijinia pacuenia Jesús pejanarunaejawata, nacatomatamota daxita wajaneconimi. Nexata, pacuenia jiwi wëna-asäë tsawanapae pan/peri pexaejawata, bajarapijinia pacuenia jiwi jamatabëcuene-aitawa tsawanapae Diosojawabelia, Jesucristo pejamatabëcueneta. Pacuanianua jiwi jamatabëcuenebarëya piapaejawata piatanevinora, bajarapijinia pacuenia Jesús pijajiwi jamatabëcuenebarëya tsane, penajamatabënapitsijawata Jesucristo petomatamot-sijawatsi daxita pijaneconimi.

²⁷ Bajaraxuacujinae, icatsia Jesús yapita copajawata piapaeranexa. Diosojawabelia pexaniajamatabëcuene perajutsicujinae, pijajiwi bajarapora rajuta. Jumaitsi bajarapamonaejawabelia:

—iPa-apaema daxita maporaje, ²⁸ tsipaji raja tajana runaena jiwi ayai-bitsaëtoxaneto pibisiacuene pexanaeneconi pewecua-ajibia-exanaenexatsi! Bajarapajanata xaniajaiya-exanaena Dioso pejanacuenia penajumeli-waisicajonejawa mapanacuapijiwijawabeliaje, pecapanepaenexatsi tasi-watëpaejawata. ²⁹ Xaniajanë pacuenia pacatsipaebijitsiatsi. Xanë rabaja mapanacuataje matawëjëa apo-apaenë tsane uvacuaira, matapania icatsia pacabarë-apaenatsi pejanavinora taxa Dioso, athëbëtatsia pe-ecaenë, pija-jiwi peyanacua-ewetsinacuata —jai Jesús pijajiwijawabelia.

Jesús yapëtaeya-exana Pedrojawabelia
penayawajunuaxainaejawanexa pijajiwitonëcuene yabara
(Mc 14:26-31; Lc 22:31-34; Jn 13:36-38)

³⁰ Jesús pijajiwi pebarëanaxëanaecujinae Diosojumewajianë, barëpona Olivobacabotsutojawabelia. ³¹ Nexata bajarapatsutojumata, Jesús jumaitsi pijajiwijawabelia:

—Daxita raja paxamë ajena, pamerawi, panexuabarëcëpecaename, pacuenia Dioso pejumeliwaisibaxutota tajëwelia jumaitsi mapacueniaje: «Beyaxuabianatsi raja oveja pewetsinë. Nexata, pija-ovejabitsaëto nacaya-jatsiarëcëpecaena»^h jai Dioso pejumeliwaisibaxutota, paxamë patanexuabarëcëpecaejawanexamë yabara. ³² Itsiata baitsi jane, tatëpaecujinae, icatsia asaënë tsane. Nexata, paxamë panewajënaeyabelia, copiata ponaenajë Gali-lea nacuayabelia —jai Jesús pijajiwijawabelia.

³³ Nexata Pedro jumaitsi Jesús-jawabelia:

—Daxita mapamonaeye caxuabarëcëpecae-ata tsane, xanë cajena apocaxuabatabijirawi tsanetsi —jai Pedro.

³⁴ Nexata Jesús jumaitsi Pedrojawabelia:

—Xaniajanë pacuenia catsipaebijitsiatsi. Ajena rabaja, pamerawi, nania-naewëpata, wacara pefiabiwajënaeya, nayawajunuaxainaename tajajiwi-tonëcuenemë. «Apoyapëtaenë cajena bajaraponë», jamë tsane xanë yabara acueyabi xuabeje —jai Jesús.

³⁵ Itsiata, Pedro jumaitsi Jesús-jawabelia:

—Nebeyaxuabijitsia-ata tsane xamë yajawa, itsiata cajena, aponayawajunuaxainaenë tsane nijajiwitonëcuenenë —jai Pedro.

Daxita Jesús pijajiwi bajarapacuenia-ata jumaitsi, pejunawiyaniwa picani.

Pacuenia Jesús wajëta Diosojawabelia Getsemaníwënë
pabijawata, yabara peliwaissi
(Mc 14:32-42; Lc 22:39-46)

³⁶ Jesús pijajiwi, pecunamerawita, yajawapata Getsemaníwënë pabijawata, Olivobacabotsutota pebocaepabi. Bajarajota, jumaitsi pijajiwijawabelia:

—iPane-ewetenare abaxë majotaje! Abaxë raja imoxoyo majotaliaje wajët-sijitsianë Diosojawabelia —jai Jesús pijajiwijawabelia.

³⁷Nexata, bajarajotawecua Jesús barëpona itsajawayojawabelia pijajiwi, acueyabi ponëbeje, Pedro, Santiago, Juan-bana. Santiago, Juan-beje, Zebedeo pexënatobeje. Bajarajotalia, Jesús bitso najamatabëxaina. Bejamatabë-jjobireca. ³⁸Nexata, jumaitsi pijajiwi acueyabi ponëbejajawabelia:

—Xanë bitso pinijicuenia najamatabëxainajë.ⁱ Bajarapajamatabëcuene jamatabëyatëpajë. ¡Paxamë abaxë majotaje panacopabare! ¡Panaëcotawanapare najamatabëcueneweretsiya xanë yajawa! ¡Pëtsa abaxë pamajitame! —jai Jesús bajarapa-acueyabi ponëbejajawabelia.

³⁹Nexata, Jesús, caenë, pewajënaeyabelia icatsia tsiquirijawayo natixilia. Bajarajota, irataeya bocajunua, pewajëtsinexa Paxa Diosojawabelia. Jumaitsi: «Axa, jitsipajë picani tanewecua-ajibia-exanaenexamë betajibi-cueneta tanebeyaxuabiyaniwa. ¡Pëtsa itsiata, neto-exaname xanë tajitsipacuenia! Pacuenia xamë jitsipame, netocopatsianame», jai pewajëtsijawata Diosojawabelia.

⁴⁰Xuacujinae, Jesús nawiarena acueyabi ponëbeje pijajiwijawaberena. Caxitajaraba pemajitanubenaewi. Nexata jumaitsi Pedrojawabelia:

—¿Apopacacajëpae tsabaja cae-epatoyo-ata panenaëcotenaenexa?

⁴¹¡Pëtsa pamajitame! ¡Panaëcobawanapare! ¡Pawajëre Diosojawabelia pape-cayawenonaenexa pibisiacuene pane-exanaeyaniwa, tsipaji raja dowathi pacajamatabëcuene-ëjëbiana! Paxamë picani panejamatabëcueneta pexaniacuene jamatabëpa-exanabiabame. Itsiata baitsi jane, apopajamatabëcuenaëmë pexaniacuene pane-exanaenexa —jai Jesús Pedrojawabelia.

⁴²Nexata, icatsia Jesús pona pecowëyabelia, pewajëtsinexa Diosojawabelia. Wajëta mapacueniaje: «Axa, itsa apojitsipaëmë tanewecuatsatsinexamë bajarapabejibicuene tanetocopiapatsiyaniwa, nexata pacuenia jitsipame, netocopatsianame», jai Jesús.

⁴³Bajaraxuacujinae, icatsia Jesús nawiarena pijajiwijawaberena. Caxitajaraba icatsia pijajiwi pemajitanubenaewi, tsipaji baja, bajarapamonae bitso itamajitsipana. ⁴⁴Nexata abaxë bajarapamonae pemajitanubenaewawata, icatsia pona pecowëyabelia pewajëtsinexa Diosojawabelia. Nexata, icatsia wajëta Diosojawabelia pacuenia copiaya wajëta. ⁴⁵Bajaraxuacujinae jane baja, Jesús nawiarena pijajiwijawaberena. Jumaitsi pijajiwijawabelia:

—¿Abaxë tsaja tsiteca pamajitanubename? Copiapata rabaja paepatota Xanë, Daxitajiwi Pematapijinënë, tanecopatsijawanexa pibisiacuene pexanaewi pecobeyabelia. ⁴⁶¡Panonobapunare baja! Ponaenatsi baja. Imoxoyo rabaja najetaruca tajawajabitsaë pecobeyabelia tanecanajetsinënëxexa —jai Jesús pijajiwijawabelia Judas yabara.

Jesús waetabatsi pijawajabitsaë

(Mc 14:43-50; Lc 22:47-53; Jn 18:2-11)

⁴⁷Itsa abaxë Jesús cuaicuaijai tsanucae pijawajabitsaë yabara, bajara-paepatota patanajetaruca Judas, pijajiwi doce ponëbejeyajuwënëni. Pënanajetarubenatsi jiwi ayaibitsaëtoxaneto. Bajarapamonaeyajuwënëni,

i 26:38 *pinijicuenia najamatabëxainajë*: Jesús najamatabëxaina mapajamatabëcuenejawanë yabara: 1) Paxa pewecuanatsatsijawanexatsi yabara. 2) Matapania yapëtaejitsia xua neconicuene (pecado). 3) Jiwitonëxae, bitso nasiwabëjai bepejibicuena petëpaejawanexa.

itsamonae canajetarubena espadanë. Itsamonae capona naebonë. Bajarapamonae itorobatsi sacerdotewi penamatacaitorobiwi, judfowi pija-ancianowi-ata. ⁴⁸ Bajarapamonae Judas pebarërenawajënae, copiaya baja cajena tsi-paeba pacuenia yapëtaeya-exanaejitsia Jesús-cuene. Jumaitsi: «Ponë raja peneta bajacobiaya itabaratsutsunexuabianajë, bajaraponë Jesús tsane. BajaraPonë pawaetabianame. Pacobecëtsianamenua xaniawaetsia», jai baja cajena Judas pebarërenawajënae. ⁴⁹ Nexata jane baja, Judas itsa patanajetaruca, exana pacuenia jumaitsi pematacanajetarucaewijawabelia. Bajara-ponë bajacoba itabaratsutsuniaya, pematacanajetarucaewi peyapëtaenexa Jesús-cuene.

⁵⁰ Nexata, Jesús jumaitsi Judas-jawabelia:

—Judas, ¿detsa xua yabara patame? —jai.

Nexata jane baja, Jesús petsimaxëponaewitsi, cujibarëcëpaliatsi. Wae-tabatsi. Cobecëtsi, xaniawaetsia pecaponaenexatsi. ⁵¹ Bajarajota, Jesús pijajiwiwajuwënënë pija-espada nawemarajonotaxuabina. Muxuyropaebia-xuaba sacerdotewi pepopenamatacaitorobinë pijajiwitonë. ⁵² Nexata, Jesús jumaitsi pijajiwitonëjawabelia:

—¡Nija-espada baja xataremeca pewënojojawareca, tsipaji pamonae namaxëwanita espadata, juya espadata babiatsi! ⁵³ Xanë itsa jitsipaejitsipajë tawecuapanepaejawa bajarapamonae, wajëtsipajë taxa Diosojawabelia taneto-itorobinexatsica taneyawenonaewinexa. Nexata, caecuenia neto-itorobijitsipaica ángelewibitsaëtoxaneto. ⁵⁴ Bajarapacuenia itsa wajëtsipajë taxa Diosojawabelia, aponetocopiapatsi tsipae pacuenia Dioso pejumeliwaisibaxutota tajëwelia newajunupaeba. ¡Cuenecopare bajarapamonae tanewaetabinexa, bajarapacuenia tanebeyaxuabinexa! —jai Jesús pijajiwitonëjawabelia.

⁵⁵ Nexata, Jesús bajarajota jumaitsi petsimaxëponaewitsijawabelia:

—¿Paxamë meta panetaneme betanacobetoxotsinë? Bajaraxuata, pacapona name espadanë, naebonë yajawa, patanewaetabinexamë pacuenia pawae-tababiabame penacobetoxotsinë. Xanë caematacabi canacujitsia Dioso pejumeliwaisi paxamëjawabelia pacatsipaebabiabatsi templobota. Itsiata, bajarapamatacabi apopanewaetabimë. ⁵⁶ Mara pacuenia panewaetabameje, tanetocopiapatsixae baja pacuenia Dioso pejumeliwaisibaxutota bajayata tajëwelia newajunupaeba —jai Jesús pewaetabiwitsijawabelia.

Nexata jane baja, Jesús pijawajabitsaë pewaetabijawatatsi, daxita pijajiwi xuabarëcëpecatsi pacuenia baja cajena Jesús yapëtaeya-exana pijajiwiwabelia pexanaejawanexa.

Jesús nutatsi judfowi penamatacaitorobiwi pitabarata

(Mc 14:53-65; Lc 22:54-55,63-71; Jn 18:12-14,19-24)

⁵⁷ Jesús pewaetabiwitsi caponaliatsi sacerdotewi pepopenamatacaitorobinë, Caifás, pijaboyabelia. Nexata bajaraponë pijabota nacaetuana judfowi pecujarubiwi, pija-ancianowi yajawa. ⁵⁸ Itsa baja Jesús caponaliatsi, Pedro bajarapamonae pecowëya tajëyo najetaruca. Sacerdotewi pepopenamatacaitorobinë pijabo matatoyorotsia peyacaranatsijawapijibaupajawalia, najoneya bopanabojawabelia, itsabelia Jesús cajunuatsi. Nexata bajarapabopanabota, Pedro na-eca templobopijipolicíawita,

petaenexa pacuenia Jesús pijawajabitsaë exanatsi. ⁵⁹Nexata bajarapabo-
 ënëtuatujëta, sacerdotewi penamatacaitorobiwi, judfowi pija-ancianowi,
 pecujarubiwi-ata, nabarëcuaicuajai. Najumejaita picani pacuenia pena-
 jumetsënëtsiliwaisita neconitsijitsia, xua yabara Jesús beyaxuabijitsiatsi.
⁶⁰Ayaibitsaëto patsi-ata penajumetsënëtsiliwaisi pepaebinexa Jesús yabara,
 itsiata caeliwaisicuenia najumejëpaeya apopaebi. Bajaraxuata, bajarapa-
 monae apocaxitajarabi paneconi yabara Jesús naneconitsia-exanaejitsiatsi,
 pebeyaxuabia-exanaenexatsi. Bajaraxuacujinae belia, anijanëbeje caeli-
 waisi najumejëpaeya neconitatsibeje. ⁶¹Jumaitsibeje bajaraponëbeje Jesús
 yabara:

—Maponë jumaitsije: «Xanë necaëjëpa taxuabinexatsica Dioso pijate-
 mplobo. Xuacujinae, acueyabimatacabita pejanacuenia icatsia weretetsia-
 najë bajarabomi», jai maponëje —jaibeje Jesús yabara.

⁶²Bajarapaepatota, sacerdotewi pepopenamatacaitorobinë nonotapuna.
 Jumaitsi Jesús-jawabelia:

—¿Apocacaëjëpae tsaja itsaliwaisiyo-ata nejumecanawiatsinexa? ¿Xania-
 jai tsabaja pacuenia maponëbeje xamë yabara caneconitanucabeje? —jai.

⁶³Jesús itsiata moya. Nexata bajaraponë icatsia jumaitsi Jesús-jawabelia:
 —Ca-itorobatsi Dioso pewënëta patanenawajunupaebinexamë. ¿Xamë
 tsaja xaniajai Mesíasmë? ¿Xamë tsaja pepacuene Dioso pexënatomë? —jai.

⁶⁴Nexata, Jesús jumaitsi:

—Jājā, xanë rabaja, pacuenia xamë jumaitsimë. Pematatsënëa icatsia
 pacajumaitsitsi. Paxamë panetaename Xanë, Daxitajiwi Pematapijinënë,
 ta-ecaëjawa pecujuanenia Dioso, daxitajamatabëcuene pecaëjëpaenëtsi.
 Panetaenamenua tanajetarucaëjawa athëbëwetsica itarërëbota —jai Jesús.

⁶⁵Bajarapacuenia itsa jumetane, sacerdotewi pepopenamatacaitorobinë
 penaxatatsijawa naniawelia anaeya titinaxuaba, Jesús pejumaitsijawa
 yabara. Nexata bajaraponë jumaitsi daxita penacaetuatsiwi jawabelia:

—¡Mara ponë Dioso apojejitsipaecuenia cuaicuajijai, tsipaji Dioso
 bepexë nato nataeya cuaicuajijai! ¡Pijacuata rabaja naneconita, bajarapa-
 cuenia pecuaicuajiaixae! Pematatsënëa baja aponamatawenonaetsi itsa-
 monae wajanacatsipaebinexa paneconi yabara maponëje naneconitsia-
 exanaejitsiatsi. Paxamë rabaja pajumetaneme panijamuxucujaya
 Dioso apojejitsipaecuenia pecuaicuajijajawa. ⁶⁶¿Detsa nexata paxamë
 pajamatabë-itsimë? —jai sacerdotewi pepopenamatacaitorobinë daxita
 penacaetuatsiwi jawabelia.

Nexata daxita penacaetuatsiwi jumaitsi:

—Naneconita rabaja Diosojawabelia. Nexata baja, beyaxuabianatsi —jai
 bajarapamonae Jesús yabara.

⁶⁷Nexata, bajarapamonae Jesús itabarasuabatsi. Papaëbërëpanata pita-
 xutocëtsicujinaetsi, itabaratsa quibabeponatsi pecobethaitonëta. Itsamo-
 nae itabarapacababeponatsi. ⁶⁸Nexata, bajarapamonae jumaitsi tsaponae
 Jesús-jawabelia:

—¡Xamë pepacuene itsa Mesíasmë, nexata wënëjonare ponë
 ca-itabarapacabi axuaba! —jai tsaponae bajarapamonae.

Pedro nayawajunuaxaina Jesús pijajiwitonëcuene

(Mc 14:66-72; Lc 22:56-62; Jn 18:15-18,25-27)

⁶⁹ Paepatojebi abaxë Jesús bo-ënëta yanijobaponatsi xua yabara naneconitsia-exanaejitsiatsi, Pedro naitaxutocaewetsiaya na-eca bajarapa-bopanabota. Nexata bajarapabota penacuenebiwa, Pedro cujirenatsi. Bajara-powa jumaitsitsi:

—Xamë-ata rabaja naponaponame Jesústa, Galilea nacuapijinëta —jai.

⁷⁰ Nexata Pedro itsiata nayawajunuaxaina Jesús pijajiwitonëcuene. Daxita bajarajota penubenaewi pitabarata, bajaraponë jumaitsi:

—Xanë cajena apoyapëtaenë pacuene yabara nejumaitsimë —jai.

⁷¹ Nexata natixilia bopanabo peyacaranatsijawapijibaupajawabelia, bajarapamuxuneneta penucaenexa. Bajarajota icatsia, itsawa, bajarapabota penacuenebiwa, Pedro taenutatsi. Bajarapowa-ata Pedro yabara icatsia jumaitsi bajarajota penubenaewijawabelia:

—Mara ponë-ata naponapona Jesústaje, Nazaret tomarapijinëta —jai bajarapowa.

⁷² Nexata, icatsia Pedro nayawajunuaxaina Jesús pijajiwitonëcuene. Jumaitsi:

—¡Xaniajanë! Dioso pitabarata cajumaitsitsi. ¡Apoyapëtaenë cajena bajaranonë! —jai.

⁷³ Bajaraxuacujinae icatsia, cae-epatoyocujinae, bajarajota penubenaewi cujibarëcëpaliatsi Pedro. Jumaitsi bajarapamonae:

—Xaniajai raeta baja cajena. Xamë Jesús pijajiwiyajuwënënëmë, tsipaji rabaja Galilea nacuapijiwi penatsipaebicuenia natsipaebame —jai bajarapamonae Pedrojawabelia.

⁷⁴ Nexata, Pedro jumaitsi:

—Itsa apoxaniajanë tsipae paxamëjawabelia, nexata Diosojawabelia naneconitsipajë. ¡Apoyapëtaenë cajena bajaranonë! —jai Pedro bajarapamonaejawabelia.

Itsa baja Pedro najumewereta bajarapacuenia pejumaitsijawa, wacara jane baja fiaba. ⁷⁵ Nexata, bajarapaepatota Pedro najamatabënapijaraba Jesús pejumaitsijawatsi: «Ajena rabaja pamerawi, wacara pefiabiwajënaeya, nayawajunuaxainaename acueyabi xuabeje tajajiwitonëcuenemë», pejaijawatsi. Nexata baja, Pedro pitsapalia bo matatoyorotsia peyacaranatsijawapëñëyabelia. Pinijicuenia natsinua.

Jesús jane baja caponaliatsi Pilotojawabelia

(Mc 15:1; Lc 23:1-2; Jn 18:28-32)

27 ¹ Itsa abaxë pepobajayacunua, sacerdotewi penamatacaitorobiwi, judíowi pija-ancianowi yajawa, siwanajamatabëcuenejëpa pacuenia exanaejitsia Jesús pebeyaxuabia-exanaenexatsi. ² Nexata, Jesús cobecëtsiaya caponaliatsi nacua-ewetsinë, Poncio Pilotojawabelia.

Judas Iscariote nabeyaxuaba

³ Judas, ponë canajetaxuabatsi Jesús pijawajabitsaë pecobeyabelia, itsa tane Jesús penaneconitsijawa pebeyaxuabinexatsi, nexata bitso bëjaiya

najamatabëxaina. Nexata, pona petocanawiatsinexa sacerdotewi penamatacaitorobiwijawabelia, judíowi pija-ancianowijawabelia-ata, perajutsipalatamitsi, treinta ponëbeje pepopalatanëanë, bitso penamatamotsinëanë.

⁴ Jumaitsi bajarapamonaejawabelia:

—Pibisiacueña baja cajena exanajë, tsipaji bajaraponë apoxinae-ata itsa-neconi, panecobeyabelia baja canajetaxuabajë, panebeyaxuabinexa pijaneconi pexainaenëcuenia —jai Judas.

Nexata bajarapamonae jumaitsi Judas-jawabelia:

—¿Paxanë tsaja patajamatabëcueneta naneconitsianame? ¡Xamë raja nija-cuata naneconitame! —jai bajarapamonae Judas-jawabelia.

⁵ Nexata Judas templobota othotajarabeta perajutsipalatanëanëmitsi. Bajaraxuacujinae, pona baja. Nexata pepuanawësicëtsi, athëbëwetsica jirewica. Bajarapacuenia pijacuata nabeyaxuaba, Judas Iscariotepijinë.

⁶ Nexata sacerdotewi penamatacaitorobiwi caetuata Judas piothotajara-betsipalatanëanë. Najumaitsi bajarapamonae:

—Acuenebi mapapalataje wajabuatsinexa ofrenda wajajebabiabicajónita, tsipaji bajarapapalata pejamatabëcueneta jiwitonë beyaxuabijitsiatsi —najai bajarapamonae.

⁷ Nexata bajarapamonae caeliwaisi xaina, pecomuatsinexa ira bajara-papalatanëanëta. Nexata, comuata canalitonë pefaratabiabinë pija-irami, bajarajota pemëthëtabiabinexa itsanacuawerena pepatsiwi, itsa tëpa Jerusalén tomarata. ⁸ Bajaraxuata, mapamatacabijawaberena-ataje wënë-ruba bajarapa-ira mapejumaitsiwënëje: «Papalata pejamatabëcueneta jiwitonë beyaxuabatsi, pecomuatsi-ira», pejaiwënë. ⁹ Bajarapacuenia itsa comuata bajarapa-ira, copiapata jane baja pacueniaprofeta Jeremías-pijinë, bajayata tajëwelia wajunupaeba bajarapapalata yabara. Jumaitsi mapacueniaje: «Israel nacua pewetsiwi matamocaëjëruta pamatamowa-jëtota jiwitonë beyaxuabijitsiatsi, treinta ponëbeje, platananitota pexa-naenëanë, bitso penamatamotsinëanë. ¹⁰ Nexata, bajarapapalatanëanëta comuatsiana canalitonë pefaratabiabinë pija-irami. Bajarapacuenia raja Dioso neyapëtaeya-exana», jai bajayata profeta Jeremías-pijinë, Jesús pematamopitsipalatanexatsi.

Jesús nutatsi Pilato pitabarata

(Mc 15:2-5; Lc 23:3-5; Jn 18:33-38)

¹¹ Jesús nutatsi nacua-ewetsinë Pilato pitabarata. Nexata jumaitsi Jesús-jawabelia:

—¿Xamë tsaja judíowi peponeyanacua-ewetsinë? —jai Pilato.

Nexata Jesús jumaitsi Pilatojawabelia:

—Jājā, xanë rabaja pacuenia nejumaitsimë —jai.

¹² Sacerdotewi penamatacaitorobiwi, judíowi pija-ancianowi yajawa, Jesús neconitaponae-atatsi, aponayapijiwumecanawiatsi.

¹³ Nexata Pilato jumaitsi Jesús-jawabelia:

—¿Apojumetaemë tsaja pacuenia mapamonae caneconitaponaje? —jai.

¹⁴ Jesús neconitsi-atatsi, itsiata aponayapijiwumecanawiatsi, caejumeyo-ata. Bajaraxuata, Pilato jamatabëcuenenabenajaca. Apoyapëtae pacuenia exanaejitsia Jesús-jawabelia.

Pilato tocopata jane baja Jesús pebeyaxuabinexatsi

(Mc 15:6-20; Lc 23:13-25; Jn 18:38-19:16)

¹⁵ Nacua-ewetsinē Pilato xaina pijacujirucue. Caewai canacujitsia, Pas-cuafiestamatacabi, capitsapabiaba caenē, penaneconitsinē, penaneconit-siwi pejebabiabibowecua. Pilato tocopatabiaba jiwi, pewajētsinexatsi ponē jitsipa petocapitsapaejawa. Nexata bajaraponē capitsapaeya-exanabiaba. Bajarapacuenia Pilato capitsapabiaba caenē, jiwi pesiwajamatabēcuenexa-nepanenexatsi. ¹⁶ Pamatacabi Jesús naneconitsia-exanatsi, bajarapama-tacabi penaneconitsiwi pejebabiabibota naneconitsiaponapona jiwibenē, Barrabás-wēnēnē. Bajaraponē bitso piacujirubejenēcue yapētanetsi dxi-tajiwi. ¹⁷ Nexata, daxita Jerusalén tomarapijiwi penacatuatsijawata, Pilato jumaitsi:

—¿Detsa ponē, penaneconitsinē, pajitsipame patacatocapitsapaenexa? ¿Barrabás tsaja? Itsa jume, ¿Jesús tsaja, ponē yabara jiwi, «Mesías?», jai tsabiabi —jai Pilato bajarapamonaejawabelia. ¹⁸ Bajarapacuenia jumaitsi, tsipaji yapētane sacerdotewi penamatacitorobiwi pecapatsijawa, Jesús pebeyaxuabijawanexatsi pecueneca-ēbixaetsi. ¹⁹ Pilato abaxē pe-ecaejawata, pataxunaeta penaneconitsiwi neconicanaējētabiaba, pijawa tonajume-itorobarenatsi. Bajarapowa Jesús yabara jumaitsirena mapacueniaje: «¡Copare bajaraponē, ponē itsacueneneconiyo-ata apopenaneconitsinē! Ajena raja, merawi, amajitsinaebejenē bajaraponē yabara», jaitsirena Pilato pijawa. Nexata, picani Pilato jamatabēcopata Jesús.

²⁰ Itsiata baitsi jane, bajarapaepatota sacerdotewi penamatacitorobiwi, judfowi pija-ancianowi-ata yajawa, jiwijawabelia muxubijiapenetsiajumaitsi tsaponae:

—Pawajētsianame Barrabás pecapitsapaenexatsi, Jesús juya pebeyaxuabi-nexatsi —jai tsaponae bajarapamonae.

²¹ Nexata, nacua-ewetsinē Pilato icatsia yanijoba jiwijawabelia:

—¿Detsa ponē nexata pajitsipame patacatocapitsapaenexa? —jai Pilato.

Nexata, bajarapamonae jumaitsi:

—¡Panetocapitsapare Barrabás! —jai.

²² Pilato nexata jumaitsi bajarapamonaejawabelia:

—¿Detsa nexata xua exanaenajē Jesús-jawabelia, ponē yabara: «Mesías», jaitsi? —jai Pilato.

Nexata, daxita bajarapamonae jumaitsi Pilatojawabelia:

—¡Cruzajawabelia cobematabiabarutsia-exanare! —jai bajarapamonae.

²³ Nexata, Pilato jumaitsi bajarapamonaejawabelia:

—¿Detsa pitsineconi yabara cobematabiabarutsia-exanaejitsipajē cruzaja-wabelia? —jai Pilato Jesús yabara.

Itsiata, bajarapamonae icatsia pinijijumeta wawajai:

—¡Cruzajawabelia cobematabiabarutsia-exanare! —jai tsaponae.

²⁴ Pilato apocuenecaējēpaetsi pecuencaranatsijawa, tsipaji bajarapa-monae ajumesaē tsaponae. Muxujiobi-ata, apojumecowēnētsitsi. Bitsoyo jamatabē-itsacueniabapona bajarapatomarata. Nexata, Pilato pijajiwi itoroba petocarenanexatsi mera, penacobequiatsinexa. Bajarapacue-nia itsa nacobequiata daxitajiwi pitabarata, yapētaeya-exana Jesús

apopenaneconitsia-exanaecuenē. Nexata penacobequiatsijawata, jumaitsi bajarapamonaejawabelia:

—Xanē raja tajaatabēcueneta apobeyaxuabia-exanaenē tsane maponēje, planeconijibinē. Paxamē panejamatabēcueneta pabeyaxuabia-exanaename —jai Pilato.

²⁵Nexata, daxita bajarapamonae jumaitsi:

—¡Bajaraponē ita aneconijibi Diosojawabelia, nexata patabeyaxuabineconi jema baja paxanē panetsijumajopae, pataxi yajawa! —jai bajarapamonae Pilatojawabelia.

²⁶Nexata baja, Pilato tocopata Barrabás pepitsapaenexa penaneconitsiwi pejebabiabibowecua. Itorobanua wajabitsaēwi ayaicuenia Jesús pejumatitibabenexatsi penaneconitsiwi peconitabiabimacata. Bajaraxuacujinae, tocopata wajabitsaēwi Jesús pecobematabiabarutsinexatsi cruzajawabelia.

²⁷Nexata baja, Pilato pijajiwi, wajabitsaēwi, Jesús caponaliatsi bajaraponē pijaboxanetojawabelia. Nexata Jesús daxita wajabitsaēwi matatoyorotsia nubenatsi. ²⁸Jesús penaxatatsijawa wajabitsaēwi wejumajonotatsi, saicaya-jawa pexatatsinexatsi. Nexata jane baja, Jesús ya-itacaniaya jumaxatatatsi petsobianawa, benacua-ewetsinēcuenia petaenexatsi. ²⁹Mataxatatatsi pe-ejuwitoyoroto becoronacuenia. Tsicoberutatsinua naebo pecujuane-nia, benacua-ewetsinēcuenia petaenexatsi. Nexata pematatabacabēta tonubenatsi bepeyaiyataecueniatsi Jesús pitabarata. Capocaponaeja jumaitsi tsaponaetsi:

—¡Bajaco, judíowi peponeyanacua-ewetsinē! —jai tsaponaetsi.

³⁰Suabaponatsi. Wecupitatsi panaebo cobenanuca. Bajarapanaebota mataconitajarabaponatsi. ³¹Bajarapacuenia pecapocaponaecujinaetsi, wejumajonotatsi baja pexatatsijawatsi. Jesús baja icatsia penaxatatsijawami jumaxatatatsi. Caponaliatsi jane baja pecobematabiabarutsinexatsi cruzajawabelia.

Jesús jane baja cruzajawabelia cobematabiabarutatsi

(Mc 15:21-32; Lc 23:26-43; Jn 19:17-27)

³²Tomarawecua wajabitsaēwi Jesús ita caponaliatsi, namuto-epatualia caxitajaraba Simón-wēnēnē, Cirene tomarapijinē. Nexata, wajabitsaēwi Simón itorobatsi, peyawenonaeyacaponaeenexa Jesús, pacruzajawabelia cobematabiabarutsijitsiatsi. ³³Jesús caponaliatsi Gólgotawēnētsutojawabelia, patsutojumata jane baja cobematabiabarutsijitsiatsi cruzajawabelia. «Gólgota», ita jai hebreojumeta, mapejumaitsijumeje: «Jiwimatasipatsuto», pejaijume. ³⁴Bajarajota picani, Jesús rajutatsi vinora, pematajērēatsira piatsaxajawa,^k bitso penawixaetaeyaniwa pecobematabiabarutsijawatatsi cruzajawabelia. Itsiata, pepajanicujinae, bajaraPonē apojitsipae piapaejawa bajarapora.

³⁵Nexata jane baja, wajabitsaēwi cobematabiabarutatsi Jesús cruzajawabelia. Bajaraxuacujinae, bajarajota canamuxusita be-ibotoxi, peyapētaenexa ponē pitaponaejitsia caejawa canacujitsia Jesús penaxatatsijawami, xua pejumaponaponaejawanēmi. Bajarapacuenia natsicobetsana Jesús

k 27:34 pematajērēatsira piatsaxajawa: Taema Sal. 69:21. Matajērēata mirrata, Mc 15:23.

penaxatatsijawami. Itsa bajarapacuenia natsicobetsana Jesús penaxatatsijawami, copiapata jane baja pacuenia Profetanëmi, David pijinë bajayata tajëwelia wajunupaeba Mesías penaxatatsijawa yabara. Jumaitsi mapacueniaje: «Natsicobetsanaena penaxatatsijawa. Canamuxusitsiana be-ibotoxi peypätaenexa ponë pitaponaejitsia»,¹ jai Diosojumepaebinë, David-pijinë. ³⁶ Baja-raxuacujinae, wajabitsaëwi bajarajota ya-ewetawanapatsi Jesús. ³⁷ Jesús pematabocoto matatsënëyo, cruzajawata tablapayo ruta, itsajota yaquinaruta mapejumaitsijumeje: «Maraponëje Jesús, judíowi pepopeyanacuaewetsinë», jai tsarutsi Jesús yabara, jiwi peypätaenexa xua yabara neconitatsi.

³⁸ Anijanëbeje, penacobetoxotsinëbeje, Jesús yajawacobematabiabarutatsi. Caenë canacujitsia pijacruzata rutaponatsi. Bajaraponëbeje Jesús pemuxuneneta rutatsibeje. Jesús pecujanenia itsanë rutatsi. Petsawononienia pijinia itsanë rutatsi. ³⁹ Jesús pecobematabiabarutsijawatatsi cruzajawabelia, bajaraxuayo penajetarubenaewi itaropitsiaya bijataeyabiabatsi. ⁴⁰ Jumaitsi tsabiabi bajarapamonae:

—Xanë raja imata jumaitsimë: «Xanë necaëjëpa^m taxuabinexatsica Dioso pijatemplobo, icatsia acueyabi matababita, taweretetsinexa bajarapabomi», jamë imatami. ¡Nacapanepare jane baja nijacuata! ¡Itsa xaniajai Dioso pexënatomë, nexata cruzajawawetsica runaimica! —jai tsabiabi Jesús-jawabelia bajaraxuayo penajetarubenaewi.

⁴¹ Bajarapijinia pacuenia, sacerdotewi penamatacaitorobiwi, judíowi pecujarubiwi, fariseowi, judíowi pija-ancianowi-ata, capocaponatsi Jesús. Ëbajarapamonae najumaitsi:

⁴² —Maponëje capanepa itsamonae peyawenonaecuenia. Caranata, pijacuata apocaëjëpaetsi penacapanepaenexa. ¡Itsa xaniajai Israel nacua-pijiwi pepowetsinë, nexata aeconoxae cruzajawawetsica runaenica wajataenexa! Nexata jane baja, jumexaniataenatsi Mesías-nëcuene.

⁴³ Bajaraponë pina itaxutuajamatejema tsabiabi Dioso peyawenonaenexatsi. «Xanë raja Dioso pexënatonë», jai tsabiabinua. Nexata, itsa xaniajai Dioso asiwatsi, capanepaetsi —najai bajarapamonae capocaponaeya Jesús yabara.

⁴⁴ Ponëbeje, penacobetoxotsinëbeje, Jesús yajawacobematabiabarutatsi, najuabijataerucatsibeje bajarapacuenia.

Jesús jane baja tēja

(Mc 15:33-41; Lc 23:44-49; Jn 19:28-30)

⁴⁵ Jesús baja itsa tēpaejitsia, ajena matonejejitsia daxita nacuanëjawa aitaquiri tsajuni. Matapania bejamatabëcuene a las tres-jawa, icatsia nacua napebeta. ⁴⁶ Nexata paepatota nacua napebeta, bajarapaepatota pinijicuenia Jesús aëjai. Jumaitsi:

—Elí, Elí, ¿lama sabactani? —jai Jesús. Bajarapacuenia Jesús itsa jumaitsi pijajumeta: «TajaDioso, tajaDioso, ¿detsa xuajitsia baja taja-epato necopata-me?»,ⁿ pejaijume.

⁴⁷Nexata bajarajota penubenaewi, itsamonae bijiaya jumetane bajarapacuenia Jesús pejumaitsijawa. Nexata, saya jamatabëcuenenawëxaniabiaya jumaitsi:

—Mara ponëje junata profeta Elías^o —jai bajarapamonae.

⁴⁸Bajarapamonaeyajuwënëñë bepìjia cujinaeponalia, pecarenanexa esponjawënëjawa. Nexata, bajaraxua jabutaba piajatuvinorayalia. Xuacujinae, naebo-upita cëtaruta. Toyotsia Jesús pebarëmenetsutsunia-exanaenexa pìcani bajaraxua.

⁴⁹Itsiaata, itsamonae jumaitsi:

—¡Copare abaxë! Taenatsi Elías ita najetaruca pecapanepaenexatsi —jai bajarapamonae capocaponaeya.

⁵⁰Icatsia, Jesús pinijicuenia aëjai. Bajaraxuacujinae jane baja, Jesús tēpanajereca. ⁵¹Paepatota Jesús tēpanajereca, bajarapaepatota templobonēñtuatuajēalia peyatu-ucutarutsipana, ayaipapaëbërēpanaxaneto-tuatuajēatsica, titititica, athëbëwetsicacujinae irabereca. Ira najēaba. Ibotoxanetonë-ata sarapajunujunua. ⁵²Petēpaewimi pemëthēanë-ata nawēpananubena. Nexata, pamonae Dioso pejitsipaecuenia pejinawanapaewimi, ayaibitsaëto namatacoba petēpaejawawecua. ⁵³Jesús petēpaejawawecua acueyabimatacabita pematacotsicujinae, bajarapamonae-ata cotocaewi namatacoba. Nexata bajarapanamatacobiwi, pona Jerusalén tomarabelia. Bajarajotalia naitajëbapona jiwi ayaibitsaëtojawabelia. ⁵⁴Jesús cruzata petēpaejawata, wajabitsaëwi pijacapitán, pijajiwi yajawa, nuca. Taenubena Jesús petēpaejawata, ira penajëbijawa. Tanenua itsajawanë-ata xua copiapatapona. Nexata, bajarapamonae bitso junawa. Jumaitsi: «Matsaena ponë tēpaje, pepacuene baja Dioso pexēnato», jai bajarapamonae.

⁵⁵Bajarajota, petiriawibitsaëtozaneto tajëyowerena taenubena Jesús petēpaejawa. Bajarapapetiriawi Jesús pepëta napona Galilea nacuaowerena, Jesús peyawenonaewimitsi. ⁵⁶Bajarapapetiriawibitsaëtozanetotatuajëta nanubena mapamatabëxëyoje. Caewa María, Magdala tomarapijiwa. Itsawa pijinia María,^p Santiago, Josébeje pena. Itsawa pijinia Salomé, Santiago Juan-beje pena. Zebedeo pijawa.

Jesús petēpaenë mëthëtatsi

(Mc 15:42-47; Lc 23:50-56; Jn 19:38-42)

⁵⁷Itsa baja caniwiyotsia, José, Arimatea tomarapijinë, pona nacuaewetsinë Pilatojawabelia. Bajaraponë pecobecowë bitso pexainaenë. Jesús peliwaishi pejumexaniataenë. ⁵⁸Bajaraponë ita pata nacuaewetsinë Pilatojawabelia, wajëta petocopatsinexatsi, pemëthëtšinexa petēpaenë Jesús. Nexata, Pilato itoroba pijajiwi petocopatsinexatsi. ⁵⁹Nexata, José cruzajawawsica pitsica petēpaenë Jesús. Mataquionaeya matakacëba daxitanëreca, pexaniawiria piapiasábanapanata, piaxuirajibipanata. ⁶⁰Xuacujinae jane, buata pejana-ibowajujawalia, pa-ibowaju José natsixaniawaeta

o 27:47 *Elías*: Bajaraponë bayatami ponapona Israel nacuaeta. Baitsi, apo-asaë tsaponaponae mapanacuataje, Jesús peponaponaematacabi. Itsiata, bajaraponë Dioso ya-asaëya caponatsi athëbëabetsia. (2Re 2:1-11.) Bajaraxuata apopayaquinarubinë «Elías-pijinë». Daxita bajaraponë peliwaishi ruca 1Re 18-2Re 2-jawabelia. p 27:56 *María*: Bajarapowa raja Cleofas pijawa. Taema Jn 19:25.

picaní pamatacabi tēpa pemēthētsinexatsi. Bajaraxuacujinae, José pinijipetoyororocae-ibopanaxanetota, yamēthēwajuwēpa-acatabuata. Nexata baja, nawiata pijaboyabelia. ⁶¹ Bajarajota, ibowaju-itapajawata e-ecabeje anijawabeje ēMaríawēnwabeje. Itsawa María, Magdala tomarapijiwa, *itsawa María, José, Santiagobeje, pena.*^q

Pacuenia wajabitsaēwi ewetawanapa Jesús pemēthē, yabara peliwaissi

⁶² Merawiapitsijawa, sábadomatacabi, judíowi penacuera-ewetsimatacabi, itsa caniwiyotsia, sacerdotewi penamatacaitorobiwi, fariseowi-ata, ponalia Pilatojawabelia. ⁶³ Jumaitsi bajaraponējawabelia Jesús yabara:

—Pamatacabi abaxē bajaraponē asaē tsaponaponae, bitso najumetsēnētabiaba. Jumaitsi tsabiabi: «Tatēpaecujinae, acueyabimatacabita, icatsia asaēnē tsane», jai tsabiabi. Bajarapejumaitsiijawa paxanē apopajumenacofēnētsinē. ⁶⁴ ¡Nexata, nijajiwi itorobare bajaraponē pemēthē acueyabi pamatacabibeje, xaniawaetsia ne-ewetsia-exanaenexa! Nexata, acuenebi tsane pijajiwi merawi pejutsinexatsi mēthēwecua. «Namatacota rabaja Jesús», pejaijawa-ata jiwijawabelia, acuenebi tsane. Itsa bajarapacuenia pijajiwi jumaitsi tsipae, nexata najumetsēnētsipa copiaya Jesús penajumetsēnētsijawa matatoxenetsia. Nexata, bajarapacuenia yamaxē-itorobijitsipa jiwi ayaibitsaētochaneto —jai bajarapamonae Pilatojawabelia.

⁶⁵ Pilato nexata jumaitsi bajarapamonaejawabelia:

—¡Mapamonae tajiwi, wajabitsaēwije, payajawaponare! ¡Nexata, pa-itorobare bajarapamonae Jesús pemēthē pewetsinexa xaniawaetsia! —jai.

⁶⁶ Nexata, bajarapamonae wajabitsaēwi barēponalia Jesús pemēthējawa-belia, ibopana peyamēthēwēpa-acatabuatsinexa. Naniajumawelia yaju-mapēnē, cacuetsanaruta pijasellota. Bajarapacuenia exana, peyapētaenexa petixitsijawa muetsia Jesús peyawajuwēpa-acatabuatsi-ibopantsi. Bajaraxuacujinae, wajabitsaēwi Jesús pemēthēwēpa ewetanubena.

Jesús paebanajetarubenaenexatsi, icatsia asaē

(Mc 16:1-8; Lc 24:1-12; Jn 20:1-10)

28 ¹ Judíowi baja penacuera-ewetsimatacabi itsa werewereca, merawia pitsijawata, bajayacunua copiyapijimatacabi semana petaxuxuabijawa, ajena matacabi tsarucaponae, María, Magdala tomarapijiwa, itsaMaría yajawa, taeyajopaliabeje Jesús pebuatsi-ibowajutsijawabelia. ² Jemata ira ayaicuenia najēaba, tsipaji Dioso pija-ángel runaica athēbēwetsica. Nexata bajaraponē pepatsicujinae Jesús pebuatsi-ibowajutsijawata, tixita peyawēpa-acatsi-ibopanaxanetomi. Bajaraxuacujinae, eca bajarapa-ibopanajumata. ³ Bajarapa-ángelnē, naitayota beyamaxēcotia. Penaxatatsijawa bitso niojai daxita peniojaijawa matatoxenetsia. ⁴ Pawajabitsaē ewetanubena Jesús pebuatsi-ibowajutsiwēpa, itsa tane ángelnē, pecajunawi neconecojai. Bobenajunua bepetēpaewi.

⁵ Nexata, ángelnē jumaitsi petiriwabejajawabelia:

—¡Pētsa pajunawamebeje! Yapētāniji xua yabara paponamebeje. Jesús pecobematabiabarutsinēmitsi cruzajawabelia, pajaitamebeje. ⁶ Ajibi raja

tsarucæ majotaje. Asaë rabaja icatsia pacuenia baja cajena tajëwelia jumaitsi. ¡Parenamërebeje panetaenexabeje itsajota picani buatatsi! ⁷¡Bajaraxuacujinae, bepíjia paliamërebeje pijajiwijawabelia! Patsipaebianamebeje mapaliwaisije: «Petëpaenëmi rabaja icatsia asaë. Jesús raja pewajënaeyabelia pona Galilea nacuayabelia. Bajarajotalia pacacaxitajarabiana», pajamëbeje tsane bajarapamonæjawabelia. Bajarapaliwaisiyo xainajë patacatsipæbinexabeje —jai ángelnë bajarapowabejewawabelia.

⁸Nexata, bajarapowabeje nawiatabajirawabeje Jesús pebuatsi-ibowajutsiwecua. Junawabeje picani. Itsiata, barëyabeje bitso. Cujinae-tabajirawabeje petsipaebinxabeje Jesús pijajiwijawabelia. ⁹Namutualia pecujinaejinaenajetarucæjawatabeje, Jesús jemata tsitanaitajëtatsibeje. Bajacobatsibeje. Nexata, bajarapowabeje cujitaliabeje bajaraponëjawabelia. Pematocabëta nucajunuabeje pitabarata. Yaiyataeya siwaetabaliabeje.

¹⁰Nexata, Jesús jumaitsi bajarapowabejewawabelia:

—¡Pëtsa pajunawamebeje! ¡Paponarebeje, panetsipaebinxabeje tajiawijawabelia, bajarapamonæ peponaenexalia Galilea nacuayabelia, bajarajotalia tanecaxitajarabinexa! —jai Jesús.

**Wajabitsaëwi pacuenia najumetsënëtsiaya
wajunupaeba, Jesús piasaëjawa yabara**

¹¹Paepatota ëMaríabeje nawiatabeje Jesús pebuatsi-ibowajutsijawawelia, bajarapaepatota pijinia wajabitsaëwijawuënëwi, Jesús pemëthë pewetsiwi, pona tomarabelia. Bajarapamonæ tsipaeba sacerdotewi penamatacaitorobiwijawabelia daxita pacuenia tane. ¹²Nexata sacerdotewi penamatacaitorobiwi pona judíowi pija-ancianowijawabelia, penabarëcuaicuajainexa, penajamatabëjëpaenexa pacuenia exanaejitsia. Nexata jane baja, bajarapamonæ najamatabëcuenejëpa, pematamotsinexa ayaijawa palata waja-bitsaëwijawabelia, pepaebiyaniwa xua pepacuene tane. ¹³Nexata, jumaitsi wajabitsaëwijawabelia:

—Jiwijawabelia pajumaitsimë tsane: «Merawi pata-itamajitsita, pata Jesús pijajiwi. Nexata, bajarapamonæ juta petëpaenë Jesús», pajamë tsane. ¹⁴¡Pëtsa pabëjamë bajaraxua yabara! Nacua-ewetsinë Pilato itsa jume-taena bajarapajume, paxanë itsiata, pacayawenonaenatsi itsacuene papeca-exanaeyaniwa —jai bajarapamonæ wajabitsaëwijawabelia.

¹⁵Nexata, wajabitsaëwi jejai. Nota bajarapapalata. Nexata jane baja, naropoba najumetsënëtsiaya jiwijawabelia pepaebanajetarubenaenexa pacuenia itorobatsi. Bajarapacuenia wajabitsaëwi pepaebixae, judíowi juya bajarapacuenia natsipaebapona. Bajaraxuata, mapamatocabijawaberenataje judíowi tsiteca jumaitsi tsabiabi: «Jesús pijajiwi petëpaenë jutatsi», jai tsabiabi.

**Jesús itoroba pijajiwi pejumeliwaisi paebanajetarubenaenexatsi,
daxitanacuanëjawa pejinawanapaewijawabelia
(Mc 16:14-18; Lc 24:36-49; Jn 20:19-23)**

¹⁶Jesús pijajiwi, once ponëbeje, pona Galilea nacuayabelia, pecaxitajarabinexatsi petsutojumabelia, itsabelia tocapaebatsi pewetsinexatsi. ¹⁷Nexata, bajarapamonæ itsa taenuta Jesús petsutojumata penucaejawa, yaiyataeya

pitabarata pematabacabëta tonubenajunua. Itsiata, bajarapamonaeyajuwë-nëwi aeba pepacuene Jesús-cuene. Nexata, jamatabëjumaitsi: «ApoJesús meta», jamatabëjai.

¹⁸Nexata, Jesús pijajiwi cujirena. Jumaitsi:

—Dioso baja cajena ne-ewetsia-exana daxitacuene athëbëtatsia, mapanacuata-ataje. ¹⁹Nexata, daxitacuene tane-ewetsia-exanaexae, paca-itorobatsi mapacueniaje. ¡Paponare daxitanacuanëpijiwijawa, tajumeliwaisi panetsipaebinexa! Bajarapamonae tajacuene pacuenecujarubianamenua, panecuenecujarubicuenia pexanawanapaenexa. Pabautizabaponaenamenua taxa pewënëta, xanë pexënatonë tawënëta, Espíritu Santo-ata pewënëta.

²⁰Pacujarubaponaenamenua pexanawanapaenexa daxita pacuenia paca-itorobatsi. ¡Pëtsa pajunawame paneponaejawa, tsipaji raja xanë pacayajawaponaponaenatsi daxitamatacabi, nacula pewerewerecaejawabelia! —jai Jesús pijajiwijawabelia.

Marcos

Pexanialiwaissi, Jesucristo peliwaissi, Marcos, peyaquinaeliwaissi

Juan, jiwibautizabinë, liwaissi tsipaeba jiwijawabelia petusatonacuata
(Mt 3:1-12; Lc 3:1-9,15-17; Jn 1:19-25)

1 ¹Mapacueniaje taxuxuaba pexanialiwaissi, Jesucristo peliwaissi, Dioso pexënato yabara. ²Bajayata, profeta Isafas-pijinë tajëwelia yaquina Dioso pejumaitsiyawa pexënatojawabelia. Dioso jumaitsi mapacueniaje: «Itorobianajë tanejumeliwaisipaebinënexa newajënaeyabelia, pecatsiwajënaexanebinexa namuto, nepatsiwajënaeya.

³»Nexata, bajaraponë petusatonacujawa wawajaiya jumaitsi tsanajetarucæ tsane: ‘¡Paxanebare namuto, petuxanenë panamutowerena najetarucæjitsia! ¡Parowia-exanarena bajarapanamuto! ¡Bajarapijinia pacuenia, panajamatabëcuenerowiya-exanarena, pepoPetuxanenë pepatsiwajënaeyarena paxamëjawaberena!’ jai tsane tanejumeliwaisipaebinë xamë yabara», jai Dioso pexënatojawabelia jai Dioso pexënatojawabelia, profeta Isafas-pijinë peyaquinaebaxutota.

⁴Bajarapacuenia exana Juan, profeta Isafas-pijinë pejumaitsicuenia, petusatonacuata jiwí petsipaebanajetarucænexa Dioso petsijamatabërutsi-liwaissitsi. Itorobanua jiwí penajamatabëcuenerowiya-exanaenexa, Jesús pewajënaeya. Bajaraponë tsipaebapona jiwijawabelia penajamatabëcuenepëñëyorobinexa Diosojawabelia, pecopabinexanua^a pibisiacuene pexanaejawa. Nexata, bajarapamonæ bautizabapona merata Dioso pesiwajamatabëcueneceawinexatsi panijaneconimi, jai tsanajetarucæ tsane Juan jiwijawabelia. ⁵Nexata, Juan-jawaberena patapona jiwí, ayabitsaëttoxaneto, Judea nacuapijiwí, Jerusalén tomarapijiwinua. Bajarapamonæ muxunapata, Juan petsipaebiliwaissi pejumetaenexa. Nexata, bajarapamonæ nawecua-paebapona pibisiacuene pexanaejawami, Diosojawabelia. Bajaraxuacujinae, Juan bautizabapona Jordán meneta.

⁶Juan naxatata camellonata pexanaejawa. Na-epacëta piji-nia cuerobocoto. Xaeyabiaba bosesë, jabëra yajawa. ⁷Juan

a 1:4 pecopabinexanua: Taema Mt 3:7-8; Lc 3:7-8.

petsipaebanajetarucaejawata Jesús peliwaissi jiwijawabelia, jumaitsi tsaponae mapacueniaje: «Xanë raja tacowëwerena itsanë najetarucaena. Bajaraponë ayaijamatabëcuenenë xanëwecua. Daxitacuene pexanae-nexa pecaëjëpaenëtsi tsane. Xanë saya beweliamatabëcuenenë. Nexata, wecua-auranë pijazapato tataxujonotsinexa. ⁸ Xanë raja saya pacabautizabaponatsi merata. Ponë rajane xanëcujinae najetarucaena, pacatsijamatabëjoneya-exanaponaena Espiritu Santo», jai tsaponae Juan jiwijawabelia Jesús penajetarucaejawa yabara.

Juan pebautizabijawa Jesús

(Mt 3:13-17; Lc 3:21-22)

⁹ Pamatacabi abaxë Juan paebaponapona petusatonacuata, Jesús naro-pota Nazaret tomarawelia, Galilea nacuata pe-ecaetomara, pepatsinexa Jordán menejawabelia, itsajota Juan bautizabaponapona jiwi. Bajarajota pepatsicujinae, Juan bautizaba Jesús bajarapameneta. ¹⁰ Jesús penonotajunaejawata menewetsina, pebautizabicujinaetsi, tane itaboxo penapatsijawa. Tanenua Espiritu Santo perunaejawatsica pematatsënëatsica be-ucucuto. ¹¹ Jumetanenua athëbëwetsica Dioso pejumaitsiyawatsi: «Xamë raja taxë-natomë, bitso taca-asiwanë. Tacasiwajamatabëcuenëbarëyanënu», pejajyawatsi Dioso.

Jesús pejamatabëcuene-ëjëbijawatsi dowathi

(Mt 4:1-11; Lc 4:1-15)

¹² Bajaraxuacujinae, Jesús jamatabëcuene-itorobatsi Espiritu Santo, bepi-jiayo peponaeya-exanaenexatsi petusatonacuayabelia. ¹³ Nexata, bajarajota Jesús ponapona, caenë, daxitata cuarenta pamatacabibeje. Bajarajotania, jinawanapa daxitacuenewiria unupijiwi, pianaepanaewi. Bajarapamatacabianëjawa, Satanás picani jamatabëcuene-ëjëba Jesús, pibisiacuene pexanaeya-exanaenexa. Itsiata baitsi jane, Dioso pija-ängelewi^b runaica, Jesús pewetsinexatsi.

Jesús taxuxuaba Galilea nacuata, Dioso pijacuene penacuenebijawa

(Mt 12:12-17; Lc 4:14-15)

¹⁴ Juan pewaetabicujinaetsi wajabitsaë, etatsi penaneconitsiwi pejeba-biabibota. Bajarapamatacabijawa, Jesús pona Galilea nacujawabelia, jiwi petsipaebaponaenexa pexanialiwaissi, Dioso pijajiwi peyanacua-ewetsijawanexa. ¹⁵ Pepaebaponaejawata, Jesús jumaitsi tsaponae jiwijawabelia mapacueniaje:

—Copiapata rabaja Dioso pecaëjëtsimatacabi, tsipaji baja imo-xoyonua pijajiwi peyanacua-ewetsimatacabinexa. ¡Bajaraxuata, pacopabare pibisiacuene pane-exanabiabijawa, panenajamatabëcuenepënyorobinexa Diosojawabelia! ¡Pajumexaniataemanua mapape-xanialiwaissi, papecacapanepaeliwaissinexa! —jai tsaponae Jesús jiwijawabelia.

b 1:13 *Dioso pija-ängelewi*: Mt 4:10-11, Lc 4:11-ata nacayapëtaeya-exana Dioso pija-ängelewi runaica peyawenonaenexa Jesús Satanás pejamatabëcuene-ëjëbiweretsicujinaetsi.

**Jesús nato-itapeta cuatro ponëbeje pijajiwinexa,
dujuai peyamatajucabiawimi
(Mt 4:18-22; Lc 5:1-11)**

¹⁶Itsamatacabi penajetarucaejawata Galilea pucaxaneto-itapaya, Jesús taenuta anijanëbeje, nacaebananëbeje, Simón, Andrés-beje. Bajaraponëbeje mallata dujuai peyamatajucabiabinëbeje. ¹⁷Nexata, Jesús jumaitsi bajaraponëbejajawabelia:

—¡Naxatsia! ¡Panepënaponarebeje! Xanë pacacujarubianatsibeje jiwi panejucaenexabeje. Pacuenia dujuai payamatajucabiabamebeje, bajarapijini pacuenia jiwi pajucaenamebeje Dioso pijajiwinexa —jai Jesús bajaraponëbejajawabelia.

¹⁸Bajaraponëbeje caeuenia bajarajota puenetabuatabeje peyamatajucabiabijawamibeje dujuai. Nexata baja, naponabeje Jesús pepëta.

¹⁹Nexata, icatsia webeliayo pewajënaeyabelia penajetarubenaejawata puca-itapayatsia, Jesús taenuta anijanëbeje Santiago, Juan-beje, Zebedeo pexënatobeje. Bajaraponëbeje pijajera-ënëta xanebanucabeje dujuai peyamatajucawabeje. ²⁰Nexata, icatsia Jesús junata bajaraponëbeje-ata. Bajaraponëbeje paxa, Zebedeo, puenetanutabeje jerata, pijajiwi, petonacuenebi-witsi yajawa. Nexata, Santiago, Juan-beje naponabeje Jesús pepëta.

**Jesús jamatejemaya-exana pebi, dowathi peyajawaponaponanë
(Lc 4:31-37)**

²¹Jesús, pijajiwi yajawa, itsa pata Capernaúm tomarata, judíowi penacuera-ewetsimatacabita,^c Jesús joneya judíowi pijasinagogaboyalia.^d Nexata, Jesús liwaisi tsipaeba jiwijawabelia bajarapabota. ²²Pamonae Jesús jumetanetsi, petsipaebiliwaisi yabara jamatabëcuenenabenajaca, tsipaji xaniawaetsia tsipaeba Dioso pitorobinëtsicuenia. Apotsipaebi pacuenia judíowi pecujarubiwi tsipaebabiaba. ²³Bajarajota, pebi, dowathi peyajawaponaponanë, na-eca. Bajaraponë wawajai tsaxuabi Jesús-jawabelia. Jumaitsi:

²⁴—¡Jesús, Nazaret tomarapijinëmë! ¿Detsa xua pane-exanaejitsiamë? ¿Najetarucame tsaja patanewerebiabinexamë? ¡Panewecuaponare baja! Xanë cajena cayapëtanetsi Dioso pexënatocuenemë, pepopexaniajamatabëcuenenëmë —jai dowathi peyajawaponaponanë Jesús-jawabelia.

²⁵Jesús pejume-itawetsijawata dowathi, jumaitsi:

—¡Moyamëre! ¡Wecuapitsapare baja maponëje! —jai.

²⁶Nexata, dowathi pebi pinijicuenia tëpajoneya-exanatsi. Wawajai pinijicuenia. Nexata baja, jiwitonëwecua pitsatabijirawa.

²⁷Bajarapacuenë itsa tane, daxitajiwi bitso jamatabëcuenenabenajaca. Najumaitsi:

—¿Depitsicuene exana maje? ¿Detsa mapitsipejanacujarubiliwai-sije? ¡Maponëje pecujarubijawata penamatacaitorobisaëxaina, beDioso

c 1:21 *penacuera-ewetsimatacabita*: Bajarapamatacabi raja sábadomatacabi. **d 1:21** *judíowi pijasinagogaboyalia*: Judíowi nacaetuatabiaba bajarapabota, sábadomatacabi, pejumetaenexa sacerdotewi pecujarubijawa Dioso peliwaisi. Pamonae pijinia, liwaisi penatsixainaewi, patabiaba pesajinaematacabianë bajarapabojawabelia, sacerdotewi petoxanebinexatsi pijaliwaisianë.

pitorobinëtsitsica! ¡Dowathi-ata jumecowënëtsi! Pitawetsijawata, pebi baja wecuapitsapatsi —najai bajarapamonae Jesús yabara. ²⁸Nexata, daxita Galilea nacuapijiwi bepijia Jesús wënëliwaisitanetsi Dioso pesaëta piniji-cuene pexanaponaejawa.

Jesús tojamatejemaya-exana Simón Pedro, pame

(Mt 8:14-15; Lc 4:38-39)

²⁹Jesús baja pitsapa judíowi pijasinagogabowecua. Nexata, Santiago, Juan-beje, Jesús yajawapona, Simón, Andrés-beje pijaboyabelia. ³⁰Nexata, Jesús-bana pewajënae Simón, pijawa pena romaebanucatsi camata. Pepatsi-cujinae, itsamonae bepijia Jesús tsipaebarecëpatsi bajarapowa peromaebanucæjawatsi yabara. ³¹Nexata, Jesús imoxoyotalia bajarapowa. Cobeyot-siaya matakota. Caecuenia baja, domae wecua-ajibi tsanajetsirecatsi. Nexata, bajarapowa Jesús-bana pexæjawa tonacuenebatsi.

Jesús ayaibitsaëto jiwi, piawitanewi, jamatejemaya-exana

(Mt 8:16-17; Lc 4:40-41)

³²Simón pijabojawata abaxë pejinawanapæjawata, ajenā baja mera-wijitsia, Jesús-jawaberena tocapatatsi daxita piawitanewi, pamonaenua dowathi peyajawajinawanapæwi. ³³Daxita bajarapatomarapijiwi nacaetuata Jesús pepatsibo imoxoyo baupajawaberena. ³⁴Nexata, Jesús jamatejemaya-exanapona ayaibitsaëto apocæwiriawitane pexainaewimi. Wecuacapsapaponanua dowathi peyajawajinawanapæwi. Jesús dowathi pecapitsapæjawata, apotocopatsi pecuaicuaijajawa,^e jiwiawabelia pewajunupaebiyaniwatsi, tsipaji dowathi xaniawaetsia yapëtane Jesús Dioso pexënatocuene.

Jesús paebanajetaruca Dioso peliwaisi, pexanialiwaissi, Galilea nacujawa

(Lc 4:42-44)

³⁵Pepobajayacunua, itsa abaxë aponapebetsi xaniawaetsia, Jesús naëcota. Pitsapalia bowecua. Pona pesaicayojawabelia, pewajëtsinexa Diosojawabelia. ³⁶Pepumatacabi, Simón-bana Jesús pëjaitaponalia. ³⁷Bajarapamonae itsa caxitajaraba, jumaitsi bajaraponëjawabelia:

—Daxitajiwi raja cajaitaruta, pecataenexa —jai.

³⁸Nexata, Jesús jumaitsi:

—Ponatsi baja imoxoyo pe-enaetomaraxijawabelia, tatsipaebinxexa Dioso peliwaisi, pexanialiwaissi, tsipaji bajaraxuanexa patajopajë mapanacuayabetsicaje —jai Jesús pijajiwiawabelia.

³⁹Nexata, daxita Galilea nacujawa Jesús jiwi tsipaebapona Dioso peliwaisi, pexanialiwaissi, judíowi pijasinagogabonëjawa. Jiwi wecuacapsapaponanua dowathi.

^e 1:34 *apotocopatsi pecuaicuaijajawa*: Jesús apojitsipae jiwi pejumexaniataejawa dowathi pejumaitsicuenia Dioso pexënatocuene. Dowathi xaniajai-ata Jesús Dioso pexënatocuene yabara, itsiata, dowathimonae ayajawa yajawapaeba penajumetsënëtsiliwaisianë. Bajarapanajumetsënëtsiliwaisianë jiwi peyajawajumexaniataeyaniwa, Jesús jitsipa jiwi, pijacuata pejumexaniataejawa Dioso pexënatocuene, pecuetaejawatatsi pinijicuenejawanë petsita-exanaejawata Dioso pesaëta.

Jesús jamatejemaya-exana bajayajebi bitso peperabětsabanaponaponaeně
(Mt 8:1-4; Lc 5:12-16)

⁴⁰Itsa matababi, Jesús imoxoyorenatsi bajayajebi bitso peperabětsabana-ponaponaeně. Bajaraponě pematatababěta nucajunua Jesús pitabarata. Aju-mesaěya wajěta Jesús-jawabelia. Jumaitsi:

—Yapětaniji cajena pecacuenecaějěpaejawa tanejamatejemaya-exanaenexamě. ¿Apojitsipaemě meta tanejamatejemaya-exanaenexamě? —jai.

⁴¹Nexata, Jesús bajaraponě jume-itaxutobejiobiatane. Pecobeta perabě-jayalia. Jumaitsi:

—Jājā, jitsipajě cajena. Jamatejemamě rabaja —jai peperabětsabanaenějawabelia.

⁴²Bajarapacuenia Jesús pejumaitsijawata, peperabětsabanaejawami baja wecua-ajibi tsanajetsirecatsi. Jamatejema baja. ⁴³Nexata baja, Jesús nawiatsia-exana bajaraponě. Penawiatsiwajěnaeya, pinijicuenia yajawanaju-mecopatanua mapejumaitsicueniaje:

⁴⁴—¡Nejumetaema! ¡Pětsa itsajiwijawabelia tsipaebame tacajamatejemaya-exanaejawa! ¡Naitajěremelia jane, sacerdotenějawabe-lia, templobota penacuenebabiabině, pecataenexa pecawecua-ajibijawa baja neperabětsabanaejawami! ¡Orijiibia, tocaponare sacerdotenějawabelia, xua Dioso najumecopata Moisés-pijiněta nerajutsinexa bajaraPonějawabelia, pecawecua-ajibia-exanaexae neperabětsabanaejawami! Nexata, jiwi yapě-taena pepacuene baja pecawecua-ajibijawa neperabětsabanaejawa —jai picani Jesús bajaraponějawabelia.

⁴⁵Nexata, bajaraponě lia sacerdotenějawabelia, petsitanaitajětsinexa. Jesús itawetsi-atatsi picani, taxuxuaba petsipaebanajetaruaejawa jiwijawa-belia Jesús pejamatejemaya-exanaejawatsi. Bajaraxuata, Jesús apojitsipae naitajětsiaya pejonejawa itsatomarabelia-ata, jiwi ayaibitsaětoxaneto pema-tatoyoronaeyaniwatsi. Ponapona saya tomaraně piajibijawa. Itsiata cajena, daxita nacuanějawawerena jiwi muxunapatabiabatsi Jesús.

Jesús jamatejemaya-exana petabusipacuenabinětsi
(Mt 9:1-8; Lc 5:17-26)

2 ¹Itsamatabianěcujinae, icatsia Jesús nawiarena Capernaúm toma-raberena. Jiwi bepjiyao wěnětanetsi pepatsijawa pabota patabiaba.

²Nexata, Jesús pepatsibota, jiwibitsaětoxaneto nacaetuata. Bobaup-a wěněca. Nexata, bajarapamonaejawabelia Jesús tsipaeba Dioso peliwaissi, pexanialiwaissi. ³Jesús pepaebanucaejawata abaxě, cuatro poněbeje, yawě-tacaraparena camayota petabusipacuenabinětsi. ⁴Bo-ěnětuatuajě bitso jiwi pewěněcaexae, acuenebi pecajonejawalia petabusipacuenabinětsi Jesús pitabarayabelia. Nexata, bajarapamonae bomatatu jawawetsica wojorut-sica, Jesús pecanacujitsiatsica. Bajarapawojotuatsica camayota yacopsatsica petabusipacuenabinětsi, Jesús pitabarayatsica. ⁵Jesús pejamataběcue-neyapětaexae pacuenia bajarapamonae siwanajamataběcuenecopatatsi, petojamatejemaya-exanaejawanexa petabusipacuenabinětsi, jumaitsi petabusipacuenabinětsijawabelia:

—Tajabananë, pibisiacuene rabaja nexanaeneconimi Diosojawabelia cawecua-ajibia-exanatsi —jai Jesús.

⁶ Bajarajota, judíowi pecujarubiwiyajuwënëwi na-ena. Itsa jumetaeyena bajarapacuenia Jesús pejumaitisijawa, jamatabëcuenenawëxaniabiaya bëpë-nëa jamatabëjumaitsi tsenae: ⁷ «Maponëje, Jesús, Dioso apopejitsipacuenia cuaicuaijai. Itsanë-ata cajena apocaëjëpaetsi itsajiji pibisiacuene pexanae-neconí pewecua-ajibia-exanaenexa. Caenë Dioso caëjëpatsi pewecua-ajibia-exanaenexa bajarapacuenë», jamatabëjai tsenae bajarapamonae.

⁸ Jesús jamatabëcueneyapëtane bajarapacuenia pesiwanajamatabëxainae-jawatsi. Nexata, jumaitsi bajarapamonaejawabelia:

—¡Pëtsa bajarapacuenia panesiwanajamatabëxainame, tsipaji cajena xanë necaëjëpa jiwi pibisiacuene pexanaeneconimi tawecua-ajibia-exanaenexa! ⁹ ¿Detsa xua yapëxanepana jiwi pejumaitsinexa, petabusipacuenabinëtsijawabelia? ¿«Nijaneconimi baja casiwajamatabëcuenecaewatsi»? Itsa jume, ¿Pejumaitsinexa: «¡Notapunare! ¡Nijacamayo pire! ¡Ponare baja!», pejai-jawa? ¡Jume baja cajena! Bajarapacuenia Dioso apotocopatsi jiwi pejumaitsinexa. ¹⁰ ¡Itsiata, paxamë paneyapëtaenexa, Dioso tanecopatsijawa Xanë, Daxitajiwi Pematapijinënë, tawecua-ajibia-exanaenexa jiwi pibisiacuene pexanaeneconí, pataema pacuenia jamatejemaya-exanaejitsianë maponëje! —jai Jesús bajarapamonaejawabelia.

Nexata, Jesús jumaitsi petabusipacuenabinëtsijawabelia:

¹¹ —Xamë cajumaitsi. ¡Notapunare! ¡Nebocabiabipana pire! ¡Nijayobabelia baja caponare! —jai Jesús.

¹² Nexata, bajarapacuenia Jesús pejumaitisijawata, petabusipacuenabinë-mitsi nonotapuna. Pebocaecamayo baja pita. Pitsapalia baja daxitajiwi pitabarata. Nexata, daxitajiwi itsa tane bajarapacuenë, jamatabëcuenenabenajaquena. Nexata, wënëxaniata Dioso ayaijamatabëcuenenë yabara. Jumaitsi tsenae mapacueniaje:

—Diosomë bitso ayaijamatabëcuenenëmë. Caeto-ata abaxë mapitsicuene pexanaejawa apopataenëje —jai tsenae Diosojawabelia.

Jesús junata Leví pijajiwitonënexa

(Mt 9:9-13; Lc 5:27-32)

¹³ Jesús pejamatejemaya-exanaecujinae petabusipacuenabinëtsi, pona icatsia pucaxaneto-itapajawabelia. Nexata, jiwi ayaibitsaëtoxaneto pënapatatsi bajarabelia. Bajarajota, Jesús tsipaeba Dioso pejumeliwaisi bajarapamonaejawabelia. ¹⁴ Bajaraxuacujinae, penajetarucaejawata Jesús taeyeta Leví,^f Alfeo pexë nato. Bajaraponë eca pabota gobierno pejamatabëcueneta jiwijawabelia impuestojamatabëcuene matamoyanijobabiaba. Nexata, Jesús jumaitsi bajaraponëjawabelia:

—¡Leví, naxatsia! ¡Nepënaponare! —jai.

Jejai Leví. Nonotapuna. Napona baja Jesús pepëta.

¹⁵ Jesús pejunatsicujinae Leví, itsamatacabijawabelia, juya bajaraponë junatatsi, pebarëxanexatsi pijabota. Nexata, Jesús naxane Leví pijabota. Bajarapabota ayaibitsaëto naxaeyena, jiwijawabelia impuestojamatabëcuene

pematamoyanijobabiabiwi, piajamatabëcuenebejewi-ata. Nexata, Jesús pijajiwi nabarë-eca bajarapamonaewawata. ¹⁶ Nexata, fariseowi, judfowi pecujarubiwinua, Jesús taeyetatsi daxita bajarapamonaewawata pijajiwi penabarëxaeyecaejawa. Bajaraxua yabara bajarapamonaë jamatabëcuene-nawëxaniabiaya jumaiti Jesús pijajiwijawabelia:

—¿Detsa xuajitsia papecacujarubinë Jesús naxaeyeca pexaejawa impuestojamatabëcuene pematamoyanijobabiabiwiwawata, piajamatabëcuenebejewijawatanua? —jai fariseowi, judfowi pecujarubiwi-ata, Jesús pijajiwijawabelia.

¹⁷ Bajarapamonaë pejumaitisijawa, itsa Jesús jumetane, jumaiti:

—Pewaëbinë raja apowaëbi pejamatejemawi. Biji rajane, waëbabiaba piawitanewi. Bajarapijinia xanë-ata itsinë. Aposiwapatajopaenë tajunatsinexa pamonaë Dioso pitabarata aneonijibi tsawanapae. Biji rajane, siwapatajopajë tajunatsinexa pijaneconë pexainaewi, pecopabinexa pibisiacuene pexanaejawa, penajamatabëcuenepeñëyorobinexanua Diosojawabelia —jai Jesús bajarapamonaewawabelia.

**Pacuenia Jesús yanijobatsi xua yabara pijajiwi japasa
apojinawanapae Dioso pitabarata**

(Mt 9:14-17; Lc 5:33-39)

¹⁸ Itsamatacabi, Juan pijajiwi, fariseowi pijajiwinua, japasa jinawanapa, pejitsipaexae caejamatabëcuene pexinaejawa, pamatacabibeje Diosojawabelia, wajëcawanapa. Nexata, itsamonae Jesús-jawaberena pata peyanijobinexatsi, japasa pejinawanapaejawa yabara. Jumaiti mapacueniaje:

—Juan pijajiwi, fariseowi pijajiwinua, japasa jinawanapa pamatacabibeje Diosojawabelia wajëcawanapa. ¿Detsa xuajitsia itsiata xamë nijajiwi bajara-pacuenia apojinawanapae? —jai peyanijobiwitsi.

¹⁹ Nexata, Jesús jumaiti bajarapamonaewawabelia:

—Pamonaë junatatsi penacojiobifiestajawabelia acuenebi japasa pejinawanapaejawa, paepatota abaxë yajawa-ecatsi pejananacojiobinë. ²⁰ Itsiata baitsi jane, pejananacojiobinë itsamatacabijawabelia pijawajabitsaë tsimaxëpatsipatsi, pecaponaenexatsi itsajawabelia. Bajarapamatacabi jane baja, bajarapamonaë apoxae tsipae pexaejawa, bitso penajamatabëxainaexae. Bajaraxua yabara, tajiwi abaxë apoxae pexaejawa, pamatacabibeje yajawapononajë —jai Jesús peyanijobiwitsijawabelia.

²¹ Orijibia, bajarapamonaë peca-asaëyaniwa perujumecowënëtsicuene, bajaraponë pëtsipaëbiliwaisi yajawa, pecuencataeliwaisicuenia jumaiti bajarapamonaewawabelia mapacueniaje:

—Itsajiwi-ata raja apocatsatarutsi pejanapana perujunaxatatsi-esetojawabelia, tsipaji pejanapana yanarobotsipa peruju-esetojawawerena. Nexata biji, pinijiwojoto bitsoyo titinaejitsipa. ²² Itsajiwi-ata pijinia apopacae pejanavinorane^g perujubocodoruanëjawabelia, bajayajebi peyajebinexa, piatanevinoranë pexanaenexa. Pejanavinoranë pejumalitsëxë pexainaexae, perujubocodoruanë yatititibia tsipae, apopeyanayeretsixae. Nexata, yajawanaxuabijitsipa vinoranë, perujubocodoruanë-ata. Bajaraxuata, jiwi

^g 2:22 *pejanavinorane*: Pejanavinora raja uvacuaibarëmene, pianera penaexanaewajënaeya.

be-epaca pejanavinora pejanabocodoruanējawabelia. Bajarapijinia pacuenia, pejanaliwaisi, apobepayajawajumexaniataemē panijaperujumecowē-nētsicue, papecatobijianaeyaniwa^h pejanaliwaisi panejumexaniataejawa —jai Jesús Juan pijajiwi jawabelia.

Jesús raja penacuera-ewetsimatacabi petuxanenē

(Mt 12:1-8; Lc 6:1-5)

²³ Itsamatacabi, judíowi penacuera-ewetsimatacabita, Jesús, pijajiwi yajawa, barēnajetaruca panamuto ruca trigo pabianētuatuajējawa. Nexata, Jesús pijajiwi pajanixae, taxuxuaba trigoxu pesiricanajetarubenaejawa. Xuxaeyabuatapona. ²⁴ Fariseowi pecuetaejawata bajaraxua, jumaitsi Jesús-jawabelia:

—¡Taema mapacueneye! Dioso penajumecopatsiliwaisi Moisés-pijinēta naca-itaweta picaní wajanacuenebiyaniwa penacuera-ewetsimatacabita. Itsiata, nijajiwi siricanajetarubena trigoxu, ajena, pamatacabi Dioso nacatocaējēta wajanacuera-ewetsinexa. ¿Detsa xuajitsia apocuene-itawetsimē pexanaeyaniwa? —jai Jesús-jawabelia.

²⁵ Nexata, Jesús jumaitsi fariseowijawabelia:

—¿Apopalebimē tsaja Dioso pejumeliwaisibaxutota, xua wajasalinainēmi, David-pijinē, pebarēponaponaewi yajawa, exana pamatacabi bitso pajani? ²⁶ Bajaraponē joneya Dioso pijatabernáculoboyalia pamatacabi Abiatar-pijinē, sacerdotewi pepopenamatacaitorobinē tsaponapona. Nexata, David-pijinē wajētaⁱ Abiatar-pijinē jawabelia perajutsinexatsi papan-bēanē bobena mesajumata, Diosojawabelia ofrendacuena petojebipan-bēanē. Bajarapapan-bēanē itsajiwi-ata sacerdotewiwecua apotocopatsitsi pexaenexa picaní, penaneconitsiyaniwa Diosojawabelia. Itsiata, David-pijinē aposacerdotenē-ata, barēxae-ata pijajiwi, bajarapamonae apowēnananeconitsi Dioso-jawabelia, tsipaji bitso pajanijawata xane. Bajaraxuata, ajena, penacuera-ewetsimatacabita, tajajiwi trigoxu siricanajetarubena-ata, pibisiacuene apo-exanae, tsipaji bitso pajani —jai Jesús fariseowijawabelia.

²⁷ Icatsia, Jesús jumaitsi bajarapamonaejawabelia:

—Dioso raja tocopata caematacabi jiwi penacuera-ewetsinexa, tsipaji bajaran Ponē yapētane jiwi bajarapamatacabi penamatawenonaejawanexa. Dioso apotocopatsi penacuera-ewetsimatacabi, jiwi nacueratsiaya pejinawanapenexa bajarapamatacabi yabara, pitawetsiliwaisianē pejutsixae. ²⁸ Xanē, Daxitajiwi Pematapijinēnē, penacuera-ewetsimatacabita petuxanenēnē. Bajaraxuata, netoxanepana tatocaējēt-sijawa pacuene xanepana jiwi pexanaenexa bajarapamatacabita —jai Jesús fariseowijawabelia.

^h 2:22 *papecatobijianaeyaniwa*: Pijasalinailiwaisi, itorobatsi pejumecowēntawanapaenexa Dioso penajumecopatsiliwaisi Moisés-pijinēta, Dioso aneconjibia petanexatsi. Juya Jesús peliwaisi yapētaeya-exanatsi pacuena Dioso aneconjibia tanetsi Jesús petomatamotsijawatatsi pijaneconimi pesiwatēpaejawatatsi cruzata. Nexata naliwaisi-itothiabeje. Bajaraxuata, itsa matajērēata bajarapaliwaisibeje, najēpaeya apoxaniajaibeje. ⁱ 2:26 *David-pijinē wajēta*: Taema 1Sa 21:6.

Jesús cobexanepanaeya-exana pecobetsaquenaenë

(Mt 12:9-14; Lc 6:6-11)

3 ¹ Jesús icatsia, itsamatacabijawabelia, penacuera-ewetsimatacabita, joneya judíowi pijasinagogaboyalia.^j Bajarajota, pebi, pecobetsaquenaenë, na-eca. ² Nexata, fariseowi naitaxutocaeweta Jesús, pecuenaenexatsi pecobexanepanaeya-exanaejawa pecobetsaquenaenë penacuera-ewetsimatacabita. Bajarapacuenia jaita, peneconitsinexatsi picani jiwijawabelia, tsipaji tsitapibisiacuenetsi penacuera-ewetsimatacabita jiwi pejamatejemaya-exanaejawa. ³ Nexata, Jesús jumaitsi pecobetsaquenaenëjawabelia:

—¡Nonotapunare! ¡Nucare mapamonae pitabarataje! —jai.

⁴ Xuacujinae, Jesús jumaitsi fariseowijawabelia:

—¡Pacanaëjère! Penacuera-ewetsimatacabita, ¿nacatoxanepana meta waja-exanaejawa pexaniacuene, itsa jume, piabejecuene? Bajarapacuenia meta, ¿nacatoxanepana jiwi wajayawenonaejawa piasaënexa, itsa jume, wajacopatsijawa yawenonaenejewatsi petëpaenexa? —jai Jesús fariseowijawabelia.

Bajarapamonae itsiata moya ena, jumecanawiatsinejewatsi caejume-ata.

⁵ Nexata, Jesús anaeya naëcota bajarapamonaejawabelia. Bitso bejamatabëjibirecanua, bajarapamonae piajamatabëcuenetajaxae, pecobetsaquenaenë peyawenonaeyaniwa penacuera-ewetsimatacabita. Nexata, Jesús jumaitsi pecobetsaquenaenëjawabelia:

—¡Nacoberowire! —jai.

Nexata, pecobetsaquenaenë penacoberowitsijawata, cobexanepananaje-reca baja. Pecobetsaquenaejawami baja ajibi.

⁶ Jesús bajarapacuenia pexanaexae,^k fariseowi jamatabëcuene-anaepana. Nexata, bajarapabowecua pepitsapaecujinae, pona nacua-ewetsinë Herodes pijajiwijawabelia, penabarëcuaijainexa. Bajarapamonae najumejaita Jesús pebeyaxuabinexatsi.

Jiwi ayaibitsaëtozaneto pënanajetarubena Jesús Galilea pucaxaneto-itapajawabelia, penamuxuna-ewetsinexa Jesús pepaebiliwaisi

⁷ Itsiata, Jesús bowecua pepitsapaecujinae, pijajiwi yajawa, juya pona Galilea pucaxaneto-itapayabelia. Bajarapanacuapijiwi pënaponaliatsi ayaibitsaëtozaneto. ⁸ Pënaponaliatsinua Judea nacuapijiwi, Jerusalén tomarapijiwi, Idumea nacuapijiwi, Jordán-mene itsapanawerenapijiwi, imoxoyo Tiro tomarawecua pejinawanapaewi, imoxoyo Sidón tomarawecua pejinawanapaewi-ata. Daxita bajarapamonae Jesús pënaponaliatsi, tsipaji wënëliwaisitanetsi Dioso pesaëta pinijicuene pexanaponaejawa.

j 3:1 *pijasinagogaboyalia*: Bajarapacuenia judíowi wënërubabiaba penacuaetsibo, itsajota nacujarubabia Dioso peliwaisi caesábado canacujitsia. k 3:6 *pexanaexae*: Pacujinae Jesús, daxita jiwi pitabarata, yanijoba fariseowijawabelia pitsicuene tozanepanaejitsipatsi pexanaenexa penacuera-ewetsimatacabita (vr 3), bajarapamonae yapëtane picani pejumecanawiatsinexatsi, «pexaniacuene catoxanepana nexanaejawa», pejaijawanexa. Itsiata, moya ena. Nexata, Jesús itsa jamatejemaya-exana pecobetsaquenaenë bajarapacuenia peyanijobicujinae fariseowijawabelia, uraba piajamatabëcuenetajaxae. Bajaraxuata, bajarapamonae bitso anaepana Jesús-jawabelia.

⁹⁻¹⁰ Ayaibitsaëto piawitanewi Jesús pejamatejemaya-exanaexae, itsamonae, piawitanewi, Jesús-jawabelia natorobaponabiaba, pejayatsinexatsi. Bajara-pajiwibitsaëto xaneto bitso pematacënënaponaexaetsi, Jesús pijajiwi itoroba jera petoxaniawaetarutsinexatsi menetareca, bajarapamo-ënëabereca perunaenexareca, jamatejema bajarapamo-ënëwerena pepeabinexa Dioso pejumeliwaisi bajarapajiwibitsaëto jawabelia. ¹¹ Jesús itsa taeyabiabatsi dowathi peyajawajinawanapaewi, irata othopabiaba Jesús pitabarata. Pe-aëjajawata jumaitsi tsabiabi:

—Xamë baja cajena Dioso pexënatomë —jai tsabiabi dowathi peyajawajinawanapaewi.

¹² Itsiata, Jesús jume-itawetabiaba bajarapamonae, bajarapacuenia pejumaitsiyaniwa, bajarajota penubenaewi peyapëtaeyaniwatsi Dioso pexënatocuene.

**Ayaibitsaëto xaneto pepënaponaewitsituatujëta,
Jesús saya nato-itapeta doce ponëbeje, pijajiwi, apóstolewinexa**
(Mt 10:1-4; Lc 6:12-16)

¹³ Pepebiweretsicujinae, Jesús junata itsamonae pepënaponaewitsituatujëta, pebarëponaenexa petsutojumabetsia. Pamonae pitapetsiwi nexata pënaponatsi petsutojawabetsia. ¹⁴ Bajarajotatsia penacaetuatsijawata, Jesús jane baja, matapania nato-itapeta doce ponëbeje pijajiwinexa, pepënajinawanapaewinexatsi. Jesús bajarapadoce ponëbeje itorobijitsia, petsipaebanajetarubenaenexa Dioso peliwaisi, pexanialiawaisi, daxitanacuanëjawa. ¹⁵ Bajarapamonae jamatabëcuenecaëjëpaeya-exana Dioso pesaëta pejamatejemaya-exanaponaenexa piawitanewi, pewecuacapsapaponaenexanu dowathi peyajawajinawanapaewi. ¹⁶ Jesús pamona nato-itapeta pija-apóstolewinexa, mapewënëanëje: Simón, ponë Jesús wënëruba Pedro. ¹⁷ Santiago, Juan-beje, bajaraponëbeje nacaebananëbeje, Zebedeo pexënatobeje. Bajaraponëbeje Jesús wënëruba pijinia Boanerges. «Boanerges», itsa jai, «Yamaxë pexënatobeje», pejaijume. ¹⁸ Itapetanua Andrés, Felipe, Bartolomé, Mateo, Tomás, Santiago, Alfeo pexënato, Tadeo, Simón, Celotecuenejawabelia penacajonenëmi. ¹⁹ Itapetanua Judas Iscariote, ponë bexëjawabelia Jesús canajetsijitsiatsi pijawajabitsaë pecobeyabelia, pebeyaxuabinexatsi.

**Itsamonae Jesús pibisiacuenia cuenebaracuaicuajitsi
dowathi, pecapitsapajawa yabara**
(Mt 12:22-32; Lc 11:14-23; 12:10)

²⁰ Pijajiwinexa penato-itapetsicujinae, caewëarena Jesús nawiarena Capernaúm tomaraberena. Nexata, pijajiwi yajawa boya pejonecujinaelia, jiwibitsaëto xaneto icatsia nacaetuata. Bajaraxuata, pijajiwi yajawa apocuenecaëjëpaetsi pebarëxaenexa. ²¹ Itsamonae, pecuetaejawata bajaraxua, Jesús yabara jumaitsi: «Bajaraponë saya matajemabatsi», jai. Jesús pijamonae itsa wënëliwaisitanetsi bajarapacuenia jiwi pejumaitsiyawa, ponarena Jesús-jawaberena pebarëponaenexatsilia picani.

²² Bajarapamatacabijawa, pamona pijinia judíowi pecujarubiwi, pepatiwi Jerusalén tomarawerena, Jesús yabara baracuaicuajai tsabiabi jiwijawabelia: «Mara ponë Jesúsje yajawaponapona Beelzebú, daxita dowathiwi

pewetsinē. Bajaraxuata, Beelzebú pesaēta dowathi jiwiwecua capitsapapona» jai tsabiabi bajarapamonae.

²³ Nexata, Jesús junata bajarapamonae, pecanaējētsia-exanaenexa bajarapajumaitsiyawa yabara. Pecuenecataeliwaisicuenia jumaitsi bajarapamonaejawabelia:

—Satanás, ponē pawēnērubame Beelzebú, bajaraponē raja jiwiwecua dowathiwi apocapitsapapona tsipae. Bajarapacuenia itsa exanaejitsipa, nexata beprijawajabitsaēnē taejitsipatsi pijajiwi. ²⁴ ¡Pacanaējēre mapacueneye! Nacaenacuapijiwi itsa nawecuanatsanaejitsipa, namata-enetsia penawajabitsaētsijawata nawerebiabijitsipa. ²⁵ Bajarapijinia pacuenia, nacaemonae-ata, itsa namata-enetsia najume-anaenotabiabijitsipa. Nexata, nawecuanatsanaejitsipa penajuajinawanapaecuenemi. ²⁶ Bajarapijinia pacuenia, itsi tsipae Satanás-ata. Bajaraponē jiwiwecua itsa capitsapaponaejitsipa pijajiwi dowathiwi, nexata beprijawajabitsaēnē taejitsipatsi pijajiwi. Nexata, pijacuata nacopiarucaeya-exanaejitsipa peyanacua-ewetsicuenemi —jai Jesús judíowi pecujarubiwi jawabelia.

²⁷ Orijibia, bajarapamonae pecanaējētsinexa Jesús bitso piasaēnēcuenē dowathi matatoxenetsia, pijacuata nayabarajumaitsi mapacueniaje:

—Itsajiwi-ata apocajēpaetsi pejonenexa bitso piasaēnē pijaboyalia, peyacajērētsinexa xua xaina pijabota. Itsiata, itsa patsipa bajaraponē matatoxenetsia bitso piasaēnē, nexata cobecētabuatsipatsi. Yajawataxucētabuatsipatsi. Matapania bajarapacuenia yacajērētsipatsi daxita xua xaina pijabota. Bajarapijinia pacuenia, xanē-ata bitso tasaēnē dowathi matatoxenetsia. Bajaraxuata, necaējēpa jiwiwecua tacapitsapaenexa dowathiwi.

²⁸ »Xaniajanē pacuenia pacatsipaebatsi. Dioso cajena caējēpatsi pewecua-ajibia-exanaenexa daxitajiwi pibisiacuenē pexanaeneconi. Jiwi pibisiacuenia wēnēbaracuaicuajai-ata Dioso, bajarapaneconi wecua-ajibia-exanaenatsi. ²⁹ Itsiata bailsi jane, pajiwi pibisiacuenia Espíritu Santo cuenebaracuaicuajai tsane, bajarapaneconi Dioso apowecua-ajibia-exanaetsi tsane. Biji rajane, bajarapajiwi naneconitsiaponaponaena daxitamatacabijawabelianexa —jai Jesús bajarapamonaejawabelia.

³⁰ Bajarapacuenia Jesús jumaitsi, tsipaji judíowi pecujarubiwi jumaitsi tsaponaes Jesús yabara: «Jesús raja Beelzebú yajawaponapona», jai tsaponaes. Bajarapamonae naneconita Espíritu Santo jawabelia, pibisiacuenia pebaracuaicuajiaxae.

Jesús pejuyapijiwi, pena yajawa, nubena bojumapēnēwelia

(Mt 12:46-50; Lc 8:19-21)

³¹ Paepatota Jesús cujarubaponapona Dioso peliwaisi, bajarapaepatota pejuyapijiwi, pena yajawa, pata-othopa pebarēcuaicuajainexatsi. Itsiata, bajarapamonae boyalia apojonelia, Jesús penucaejawalia. Bajarapamonae junatsia-exana pejumetaeyenaewitsijawabelia. ³² Nexata, pamonae petsipae-biliwaisi matatoyorotsia jumetaeyenatsi, jumaitsi Jesús-jawabelia:

—Ena raja, nejuyapijiwi yajawa, nubena patapēnēwerena. Cajaita raja xamē —jai.

³³ Nexata, Jesús jumaitsi bajarapamonaejawabelia:

—¿Detsa pitsijamatabēcuenewi taena, tajuyapijiwi-ata? —jai Jesús.

³⁴ Bajaraxuacujinae, matatoyorotsia pejumetaeyenaewitsijawabelia naë-cota. Jumaitsi:

—Majotaje, pamona, pe-enaewi xanëjawata, bajarapamona, jane tae-najiwi, tajuyapijiwinua. ³⁵ Pamona, baitsi exana pacuenia Dioso itoro-batsi, bajarapamona, jane baja, tajuyapijiwi, taenajiwinua —jai Jesús bajarapamonaejawabelia.

**Jesús tsipaeba jiwijawabelia pecuenecataeliwaisi,
pe-ubinë peliwaicsuenia**
(Mt 13:1-9; Lc 8:4-8)

4 ¹ Icatsia, itsamatacabi Jesús taxuxuaba liwaisi petsipaebijawa Galilea pucaxaneto-itapajawata. Nexata, bajarajota jiwi ayaiBITSaëtoxaneto penacatuatsixae, Jesús runareca jera-ënëabereca. Bajarapajera-ënëwerena tsipaebeca Dioso peliwaitsi tajetabota penubenaewijawabelia. ² Nexata, cuja-ruba pecuenecataeliwaicsuenia bajarapamonaejawabelia. Jumaitsi tsapona mapacueniaje:

³ —jPanenamuxuna-ewere xaniawaetsia mapaliwaitsije! Pe-ubinë pona pabiabelia, pe-ubinexa. ⁴ Nexata, pe-ubijawata pabita xucayabajarabana-jetaruca. Itsaxu othopa pabituatujëjawa penajetarucaenamutojumata. Nexata, bajarajota pata barsatsui. Xane bajarapaxumi, juwinejewa. ⁵ Itsaxu pijinia othopa ibopananëjumata, itsajota bitso ira apo-aitayaë. ⁶ Nexata, bajarapaxu juwi-ata, icotia bitso piatajuxae, tsaquenapona, tsipaji irabereca bitso apo-atabunepiarcia. ⁷ Itsaxu pijinia othopa pa-irajawata xaina bëpë-nëa pe-ewijawanë pejuwinexa. Nexata, pe-ubixu, pe-ewijawanë-ata, caecuenia penajuajuwixaebeje, bitso matacënënaenatsi pe-ubijawanëmi. Nexata, pe-ubijawa aponacuaitsi. ⁸ Itsaxu pijinia othopa pexania-irata. Bajarapaxu pejuwicujinae xaniawaetsia witsabapona. Xaniawaetsia nacuaita. Itsabotonë capitsapa treinta paxutobeje tsapona. Itsabotonë capitsapa sesenta paxutobeje tsapona. Itsabotonë capitsapa cien paxutobeje tsapona —jai Jesús bajarapaliwaisi petsipaebiwiawabelia.

⁹ Nexata, icatsia Jesús jumaitsi jiwibitsaëtoxanetojawabelia:

—Patacatsipaebiliwaisi, pajiwi jamatabënejumeyapëtane, nenamuxuna-ewetsi xaniawaetsia —jai Jesús.

**Jesús pajamatabëcuene yabara ëpecuenecataeliwaisianëcuenia
tsipaeba jiwijawabelia**
(Mt 13:10-17; Lc 8:9-10)

¹⁰ Jesús liwaisi petsipaebicujinae, jiwibitsaëtoxaneto baja wecuanawiabatsi. Nexata, pija-epato barënacopata doce ponëbeje pijajiwi, itsamona-ata yajawa. Bajarapamona, yanijobatsi pajamatabëcuene yabara pecuenecataeliwaicsuenia paebabiaba. ¹¹ Nexata, Jesús jumaitsi bajarapamonaejawabelia:

—Paxamë rabaja Dioso pacatocopata xaniawaetsia panejumeyapëtaenexa Dioso papijajiwiwaemë papecyanacua-ewetsijawanexa yabara. Pamona abaxë apotajajiwi, Dioso apotocopatsi pejumeyapëtaenexa. Bajaraxuata, tsipaebabiabajë ëpecuenecataeliwaisianëcuenia. ¹² Nexata, bajarapamona, tae-ata Dioso pesaëta pinijicuene ta-exanaejawa, apoyapëtae pajamatabëcuene

yabara exanajë. Nenamuxuna-ewetsi-ata, apojumeyapëtae pajamatabëcuene xaina tatsipaebiliwaisi. Bajarapacuenia tocopatatsi pejumeyapëtaejawanexa, penajamatabëcuenepeñëyorotsiyaniwa Diosojawabelia¹ pibisiacuene pexa-naeneconimi pesiwajamatabëcueneceawiyaniwatsi —jai Jesús.

**Jesús yapëtaeya-exana peyanijobiwitsi,
pajamatabëcuene xaina pe-ubinë peliwaishi**

(Mt 13:18-23; Lc 8:11-15)

¹³ Jesús icatsia jumaitsi pijajiwijawabelia:

—Itsa apopajumeyapëtaemë pajamatabëcuene xaina paliwaisi pacatsipae-batsi pe-ubinë peliwaishicuenia, ¿detsa nexata pacuenia pajumeyapëtaename daxita paliwaishianë pacatsipaebijitsiatsi pecuenecataeliwaishicuenia? Ayapë-beje cajena. ¹⁴ Itsiata, pacayapëtaeya-exanaenatsi, pajamatabëcuene xaina pe-ubinë peliwaishi:

»Pe-ubinë raja pexu, cuene-itajëta pepaebinë Dioso peliwaishi, pexania-liwaisi. ¹⁵ Paxu othopa pabituatujëjawa penajetarucaenamutojumata, baratsui xane. Bajarapaxu cuene-itajëta pamonaë tsijamatabëcuene-ubatsi Dioso peliwaishi, pexanialiwaishi, itsiata pejumetaecujinaë, bepjiia dowathi najetaruca bajarapamonaëjawaberena. Nexata, pejumetaeliwaishimi Pejume-taeliwaishimi tsijamatabëjonenejewatsi dowathi wecuapita penacofënëtsia-exanaenexatsi. ¹⁶ Paxu pijinia othopa ibopananëjumata, itsajota bitso ira apo-aitayaë, cuene-itajëta pamonaë Dioso peliwaishi, pexanialiwaishi, pejumetaejawata barëyaya picani natocopiapita. ¹⁷ Itsiata, apo-ajamatabëcuenesaë bajayajebinxë, itsa tocopiapatatsi pebejiobia-exanaejawatsi bajarapali-waisi yabara. Nexata, bepjiiayo nawecuacopaba pesiwajamatabëcueneba-rëyajawami bajarapaliwaisi, pepacuene apocejumexaniataexaë. ¹⁸ Paxu pijinia othopa pa-irajawata, xaina bëpënëa pe-ewujawanë pejuwinexa, cuene-itajëta pamonaë Dioso peliwaishi, pexanialiwaishi, pejumexaniatae-cujinaë, itsiata, bepjiiayo nacofënëta. ¹⁹ Nexata, Dioso peliwaishi apotsija-matabëcuenewitsabitsi, tsipaji bitso yajawajamatabëcuene-enatsi mapana-cuapijicuenejawanëje. Nexata, siwanajamatabëxainabiaba ayaijawa palata pexainaenexa. Itaxutujainabiabanua itsacuenejawanë pexainaenexa, petsi-sajinaejawanëtsi. Bajarapajamatabëcuenejawanë apocopatatsi Dioso peliwaishi petsijamatabëcuenewitsabinexatsi, tsipaji jamatabëcueneliwaishimatacënë-natsi pe-ewujawanëcuenia. ²⁰ Paxu pijinia othopa pexania-irata, cuene-itajëta pamonaë pepacuene jumexaniatane Dioso peliwaishi, pexanialiwaishi. Nexata, bajarapaliwaisi xaniawaetsia penato-itapetsixaë, tsijamatabëju-nuatsi. Nexata, nawitsia capitsapona Dioso pejitsipaecuenejawanë. Pacue-nia pe-ubijawa capitsapa itsabotonë treinta paxutobeje, itsabotonë sesenta paxutobeje, itsabotonë cien paxutobeje, bajaratsijamatabëcuene-itsitsi baja-rapamonaë Dioso pejitsipaecuenejawanë pexanaejawa, Dioso peliwaishi pet-sijamatabëcuenewitsabaponaexaetsi —jai Jesús pijajiwijawabelia.

1 4:12 penajamatabëcuenepeñëyorotsiyaniwa Diosojawabelia: Pamonaë bajayajebi ajamatabëcuene-tajaja pesiwanajamatabëcuenecopabiyanwa Jesucristojawabelia, belia Dioso apotocopatatsi tsane penajamatabëcuenepeñëyorotsinxë Diosojawabelia, pibisiacuene pexanaejawawecua. Taema Éxo. 7:3-14; 2Co 6:1-2; Heb. 4:7.

**Jesús tsipaeba pijajiwijawabelia pecuenecataeliwaisi,
lámparabê peliwaaisicuenia**
(Lc 8:16-18)

²¹ Icatsia, Jesús jumaitsi pijajiwi, doce ponêbejewawabelia, itsamonaewawabelia-ata:

—Itsajiwi-ata lámparabê pitanojotsicujinae apo-etsi cajoni-ênêalia, cama bêxëpanalia-ata. ¡Jume baja cajena! Biji rajane, athêbêyo etsia daxitabo-ênê pitayotecaenexa. ²² Bajarapijinia itsi paliwaisianê tsipaebaponajê pecuenecataeliwaaisicuenia, daxitajiwi picani jitsipajê bajarapacuenia pejumeyapê-taenexa. Najumematayatsia apotsipaebaponaenê. Itsamona nejumetae-ata, aeconoxae abaxê aponejumeyapêtae pajamatabêcuene xaina tatsipaebiliwaisianê. Itsiata, itsamatacabi, bexêajawabelia, daxitajiwi nejumeyapêtaena pajamatabêcuene xaina paliwaisianê pecuenecataeliwaaisicuenia tsipaebaponajê. ²³ ¡Pajiwi jamatabênejumeyapêtane patacatsipaebiliwaisi, xaniawaetsia nenamuxuna-ewetsi! —jai Jesús pijajiwijawabelia.

²⁴ Icatsia, Jesús jumaitsi bajarapamonaewawabelia:

—¡Panejumecanaējere patacatsipaebiliwaisi! Patanejumecanaējêtsicueniamê,^m bajaraxuawajêto pajumeyapêtaeponaenae. Pajiwi pijinia bewelia canaējêtsiana bajaraxuawajêto jumeyapêtaeponaena. Pajiwi pijinia ayai-cuenia canaējêtsiana, bajaraxuawajêto jumeyapêtaeponaena. Dioso picani xaina ayaijawa papecajumeyapêtaeya-exanaenexa. ²⁵ Pajiwi pijinia xania-waetsia nejumeyapêtane patacatsipaebiliwaisi, bajarapajiwi pematatsênêa itsaliwaisi Dioso jumeyapêtaeya-exanaenatsi. Itsiata, pajiwi xaniawaetsia aponejumecanaējêtsi patacatsipaebiliwaisi, bajarapajiwi paliwaaisyowajêto picani jumeyapêtane, nacofênêtsiana —jai Jesús.

**Jesús pijajiwi tsipaeba anijapecuenecataeliwaisibeje, pacuenia Dioso
pijajiwi bepijiayo ayaibitsaêto naexanaejitsia**
(Mt 13:31-35; Lc 13:18-19)

²⁶ Jesús icatsia jiwi liwaisi tsipaeba pecuenecataeliwaaisicuenia. Jumaitsi mapacueniaje:

—Paliwaisi tsipaebajê Dioso pijajiwi peyanacua-ewetsijawanexa, cue-nejêpa pe-ubinë pabita pexucayabajarabanajetaruaejawa. ²⁷ Pe-ubinë pe-ubicujinae, wemaxëmajitabiaba merawi canacujitsia. Naëcotabiaba matababita. Bajarapacuenia panepapona matababianê. Pe-ubijawa baja pabita juwa. Witsabaponanua. Itsiata baitsi jane, pe-ubinë apoyapêtae pacuenia pe-ubixu pijacuata juwa. ²⁸ Ira raja pejamatabêcueneta naxaniaba pe-ubijawa. Copiata pepaboto witsabaya. Xuacujinae, namatonota. Nacuaitanua. Bajaraxuacujinae jane baja, cuainawereta. ²⁹ Peyanio-naecujinae, penotsiwi caetuatapona, tsipaji baja penotsimatababinexa tocopiapatatsi. Bajarapijinia pacuenia, cuenejêpa tatsipaebiliwaisi.

m 4:24 *Patanejumecanaējêtsicueniamê:* Jn 1:1-2-jawata nacayapêtaeya-exana daxita Dioso pajumenê jumaitsi pejumeliwaisibaxutota, Jesús pejumewajunupaebijumenê. Nexata, pajiwi xania-waetsia apojumecanaējêtsi Dioso peliwaaisi, bajarapajiwi xaniawaetsia apojumeyapêtae tsane pajamatabêcuene xaina.

Aponayapētae abaxē pajiwi jumeyapētane bajarapaliwaisi. Matapana, penacuenecapitsapaejawata Dioso pejitsipaecuenejawanē, nayapētaena pajiwi tsijamatabēcuenewitsabatsi tatsipaebiliwaisi —jai Jesús jiwijawabelia.

³⁰⁻³¹ Jesús icatsia jumaitsi:

—¿Demeta xua peliwaisi jēpa Dioso pijajiwi bepigia ayaibitsaētoxaneto penaexanaejawanexa? Tsipaebianajē meta mostazaxutoxi peliwaisi. Mostazaxu raja bitso tsiquirixutoxi daxita pe-ubixuwecua. ³² Itsiata baitsi jane, mostazanae itsa juwa, bepigia witsaba. Caewaita pinijinae naexana, itsape-ubinaenē matatoxenetsia. Nexata, bajaraponae pemaxērananējawata, baratsui-ata pematapenanē exana. Bajarapijinia itsi tsane Dioso pijajiwi peyanacua-ewetsicue. Caejiwiyohejawanata taxuxuabi-ata tsane, bepigia ayaibitsaēto naexanaena, Dioso peyanacua-ewetsiwinexa —jai Jesús pijajiwiawabelia, itsamonaejawabelia-ata.

³³ Jesús petsipaebanajetarucaejawata Dioso peliwaisi, pexanialiawaisi, tsipaebanajetaruca ēpecuenecataeliwaisianēcuenia. Pacuenia baja jiwi caē-jēpatsi pejumeyapētaenexa, bajarapacuenia Jesús tsipaebabiaba. ³⁴ Jiwijawabelia ēpecuenecataeliwaisianēcuenia tsipaebabiabi-ata, itsiata, saicaya Jesús ēpijajiwiawabelia, xaniawaetsia jumeyapētaeya-exanabiaba pajamatabēcue xaina daxita bajarapaliwaisianē.

Jesús pitawetsijawa jowiboxaneto, malatacaxaneto yajawa, piayaijawami

(Mt 8:23-27; Lc 8:22-25)

³⁵ Jesús bajarapacuenia pepaebiweretsicujinae, caniwiyotsia baja. Nexata, jumaitsi pijajiwiawabelia:

—Nicabaliatsi mapapucaxaneto itsapanabeliaje —jai.

³⁶ Nexata baja, penapējiobicujinae bajarapajiwiibitsaētoxaneto, Jesús, pijajiwi yajawa, wecuapona. Pajerata Jesús ecareca, pijajiwi yajawa pona. Itsiata, itsamonaē pēnaponatsi itsajeranēta. ³⁷ Nexata, pinijijowiboxaneto jemata najetaruca, malataca yajawa. Jera-ēnēaberena mera epabajarabapona. Nexata, jera-ēnē mera wēnēcapon. ³⁸ Bajarapaepatota, Jesús jamatejema majitanuca namatabēxēyaētanucaeya jeratabufejawawetsina. Nexata, Jesús pijajiwi ya-itawabatsi. Jumaitsitsi:

—¡Patanecujarubinēmē, waxaitsimi rabaja ya-othopaenatsi! ¿Apojamatabēcue nebējamē tsaja? —jai Jesús pijajiwi.

³⁹ Nexata, Jesús pemajitanucaenēmi naēcotapuna. Pinijijumeta itaweta-xuaba jowibo. Jumaitsi pucajawabelia, jowibojawabelia-ata:

—¡Wainae-ecare baja! —jai.

Bajarapacuenia Jesús pejumaitsijawata, jowibo baja ajibi tsaxuabi. Daxitapuca baja wainae-ecaxuaba. ⁴⁰ Nexata, Jesús jumaitsi pijajiwiawabelia:

—¿Detsa xuajitsia bitso pajunawame? ¿Tsipaji tsaja Dioso apopaitaxutuajamatejemamē papeca-ewetsijawa? —jai Jesús.

⁴¹ Nexata, Jesús pijajiwi najunawiaca bajarapacue petaejawata. Ēpamonaē najumaitsi: «¿Demeta tsipaji maponēje? ¡Itaweta jowibo, malataca-ata! ¡Jumecowēnētatsi baja maponēje! ¡Nexata baja, jowibo, malataca yajawa, ajibi tsaxuabi!», najai Jesús pijajiwi.

Jesús wecuacapitsapa pebi, dowathiwi peyajawaponaponaenē,

Gerasa nacuata

(Mt 8:28-34; Lc 8:26-39)

5 ¹ Jesús pitawetsicujinae jowibo, malatacaxaneto yajawa, pijajiwi barēpata jane baja pucaxaneto itsapanabelia, Gerasa nacuayabelia. ² Nexata, Jesús jerajawawetsina itsa nonotajunaina, bajarapaepatota pebi, dowathiwi peyajawaponaponaenē, mata-enenarenatsi jiwimēthēanējawa-werena. ³ Bajaraponē baja cajena ponaponabiaba jiwimēthēanējawa. Apocaējēpaetsi cajena itsajiwi-ata, pecētsinexatsi cadenamaētota. ⁴ Apocaetoyo picani taxucēbabiabatsi, cobecēbabiabatsinua cadenamaētonēta. Itsiata cajena, bajarapamaētonē ucubabiaba pesaēta. Pecobeta epatanacabiabanua. Itsajiwi-ata cajena apocaējēpaetsi pecētsinexa, tsipaji bitso asaēbeje. ⁵ Bajaraponē ponaponabiaba petsutonējawa, petēpaewi pemēthēanējawa, matabi-jebi, merawijebi-ata. Wawajai tsabiabaponapona. Ibotonējawabelia natsa-quibajarababiabaponapona. ⁶ Bajaraponē itsa wajēnaetane tajēwerena Jesús penajetarucaejawa, nexata cujinaeponalia. Pematabacabēta nucajunua Jesús pitabarata. ⁷⁻⁸ Nexata, Jesús pitawetsijawata, dowathijawabelia jumaitsi:

—iDowathiwi, maponēje baja pawecuapitsapare! —jai.

Bajarapaepatota, dowathi aējai pinijijumeta. Jumaitsi Jesús-jawabelia:

—iJesús, Dioso, Pepo-ayaijamatabēcuenenē, pexēnatomē! ¿Detsa xua jaitame xanējawaberena? Pexaniacuene cawajētatsi Dioso pewēnēta, tanebejiobia-exanaeyaniwamē —jai dowathi.

⁹ Bajarapacuenia dowathi pejumaitsixae, nexata Jesús jumaitsi dowathijawabelia:

—¿Detsa pawēnēmē? —jai.

Nexata, dowathiwi nawēnēpaeba.

—Patawēnē raja Legión, tsipaji raja bitso pa-ayaibitsaēto-xanetonē —jai dowathi.

¹⁰ Nexata, dowathiwi pinijicuenia wajēca Jesús-jawabelia, itsa-irabelia pejutsiyaniwatsi bajarapa-irawecua. ¹¹ Bajarajota, imoxoyo petsutojawata, marranobitsaēto-xaneto xaewanapa. ¹² Nexata, dowathiwi bitso wajēca Jesús-jawabelia. Jumaitsi

—iPane-itorobare marranobitsaēto-xanetojawabelia, patajonenexa! —jai dowathiwi.

¹³ Jesús tocopata pacuenia dowathiwi wajēcatsi. Nexata, bajarapadowathiwi baja pebi wecuapitsapecatsi, marranobitsaēto-xanetojawabelia pejon-enexa. Bajarapamarranobitsaēto-xaneto, jinawanapa dos mil ponēbeje. Dowathiwi pejonecujinae bajarapamarranobitsaēto-xanetojawabelia, cuji-naeyeca daxitabitsaēto. Pucaxaneto-itapajanituareca othopareca. Daxita bajarapabitsaētomi meneta bubuna.

¹⁴ Pamona marranobitsaēto ewetawanapa rēcēpeca. Pona, pacuene tane petsipaebinexa tomarapijiwijawabelia, wayafotusatojawa pe-enaewijawabelia-ata. Nexata, jiwi ponarena petaenexa bajarapacueni. ¹⁵ Nexata, bajarapamona itsa pata Jesús peponaponaejawata, taeyeta pemuxuneneta dowathiwi peyajawaponaponaenēmi. Bajaraponē penaxatatsijawa baja naxatateca. Jamatejema baja. Xaniawaetsia eca.

Nexata, bajarapamonae cujunawa Jesús. ¹⁶ Pamonaе cuenetane Jesús pejamatejemaya-exanaejawa dowathiwi peyajawaponaponaenēmi, xua-ata exana marranobitsaētoخانetojawabelia, bajarapamonae paeба daxita pacuene tane pepatsiwi jawabelia. ¹⁷ Nexata, Gerasa nacuapijiwi, bitso peca-junawi, taxuxuaba pewajēcaejawa Jesús-jawabelia, pewecuaponaenexatsi itsanacuayabelia.

¹⁸ Jesús baja itsa runareca jera-ēnēabereca, ponē, dowathiwi peyajawaponaponaenēmi, bitso picani nawajēca Jesús pepēta penaponaenexa. ¹⁹ Itsiata, Jesús apojejai. Jumaitsi bajaraponējawabelia:

—¡Ponare nijaboyabelia! ¡Nijamonae tsipaebare papinijicuene Dioso cato-exana! Pacuenia-ata ca-itaxutotsoniatane —jai Jesús dowathiwi peyajawaponaponaenēmijawabelia.

²⁰ Nexata baja, bajaraponē pona pijatamarabelia. Taxuxuaba pena-wajunupaebijawa, Decápolis nacuajawa pejinawanapaewijawabelia, papinijicuene Jesús to-exanatsi. Decápolis nacuata eca diez patomara-beje. Daxitajiwi jamatabēcuenenabenajaca itsa jumetanetsi bajaraponē penawajunupaebaponaejawa.

**Jesús namuto-epatota jamatejemaya-exana piawitanewa, pacuenia-ata
Jairo pexēnatowayo, petēpaewayomi, to-asāyēa-exana**
(Mt 9:18-26; Lc 8:40-56)

²¹ Jesús icatsia pecowēyaberena jerata nawiarena, pucaxaneto itsapanawerena. Nexata, tajetabojawatarena jiwibitsaētoخانeto Jesús matatoyoronsi. ²² Bajarajota napatajopa Jairo, judíowi pijasinagogabo pewetsi-wiyajuwēnē. Itsa taetaba Jesús, pitabarata pematabacabēta yaiyataeya nucajunua. ²³ Jairo wajēta pinijicuenia Jesús-jawabelia. Jumaitsi:

—¡Taxēnatoyo raja netobitsi! Najumalipeneta rabaja petēpaenexa. ¡Pexaniacuene neto-exanare! ¡Naxatsia! Netoperabējayatsianame necobeta, petēpaeyaniwa —jai.

²⁴ Jejai Jesús. Nexata, napona Jairo pepēta. Jiwibitsaētoخانeto, Jesús pepēnaponaewitsi, matatoyorotsia cēnēnanajetarubenatsi. ²⁵ Bajarapajiwi-bitsaētoخانetotuatujēta, nanajetaruca petiriwa, doce baja pawai-beje pejanacuene pecapunaewatsi. ²⁶ Bajarapowa baja daxita pexainaejawami wereta pewaēbiwitsijawabelia. Itsiata, bajarapamonae apojamatejemaya-exanaetsi. Biji caranata, pewajēnaeyabelia bitso tsaponae. Nexata, bepejiobicuena ponapona, pewaēbiwitsi pejamatabēcueneta. ²⁷ Nexata, bajarapowa itsa jumetane itsamonae pecuaicuaijajawa Jesús piawitanewi pejamatejemaya-exanaponaejawa yabara, ponataba Jesús pepēnēwelia, jiwibitsaētoخانetotuatujēalia. Nexata, bajarapowa tojayataba Jesús penaxatatsijawa, ²⁸ tsipaji jamatabējumaitsi: «Itsa Jesús penaxatatsijawa tojayatabianajē, tawitanewi jawami baja newecua-ajibi tsane», jamatabējai. ²⁹ Nexata, itsa tojayataba Jesús penaxatatsijawa, caecuenia baja wecua-ajibitsi pejanatsabiabijawami. Nayapētane baja pejana pecaewijawareca. ³⁰ Jesús-ata nayapētane pejayatabijawatatsi pesaēta pejamatejemaya-exanaejawa pepēnēyabelia. Nexata, napēnēyorotaxuaba. Naēcobaruta. Yanijoba jiwijawabelia.

—¿Jipatsa tanaxatatsijawa netojayataba? —jai.

³¹ Nexata, Jesús pijajiwi jumaitsitsi:

—Taneme rabaja jiwibitsaëtoxañeto pecacënënanajetarubenaewawa.
¿Detsa xuajitsia: «¿Jipatsa tanaxatatsijawa netojayataba?», jamë? —jaitisi
Jesús pijajiwi.

³² Itsiata, Jesús naëcobaruta daxitajiwijawa, petanexa pajiwi tojayatabatsi penaxatatsijawa. ³³ Nexata, bajarapowa neconecojai tsanucae pecajunawi, penayapëtaexae Jesús pejamatejemaya-exanaewawatsi. Bajarapowa najetabalia. Jesús pitabarata, pematabacabëta nucajunua. Daxita pacuene exana, bajarapowa tsipaeba Jesús-jawabelia.

³⁴ Nexata, Jesús jumaitisi bajarapowajawabelia:

—Xamë, tanesiwanajamatabëcuenecopatsixaemë xanëjawaberena, jama-tejemamë baja. ¡Ponare baja jamatabëcuenexanepanaeya! Niawitanejawami rabaja ajibi —jai Jesús bajarapowajawabelia.

³⁵ Bajarapacuenia Jesús pejumaitisitsanucawata namuto-epatota, Jairo pijabowerena peponaewi mata-enenatsi. Bajarapamonae jumaitisi Jairojawabelia:

—Nexënatoyo rabaja tëpa. ¡Pëtsa baja matawëjëa jamatabë-itonotaponame Jesús! —jai Jairojawabelia.

³⁶ Jesús jumetae-ata bajarapajume, itsiata jumaitisi Jairojawabelia:

—¡Pëtsa najamatabëxainame! ¡Nesiwanajamatabëcuenecopare saya xanë-jawaberena, nexënatowayo pecato-asaënexa! —jai Jesús.

³⁷ Bajarapacuenia pejumaitisicujinae, Jesús, pajiwbibitsaëtoxañeto pënana-jetarubenatsi, pueneta bajarajota. Jairo pijaboyabelia yajawaponaliatsi saya mapamatabëxëyoje: Pedro, Juan, Santiagobana. Santiago pejuyapijinë Juan-beje. ³⁸ Itsa baja palia Jairo pijaboyabelia, tane jiwibitsaëto pinijijumeta pematnueyabijawa petëpaewayo. ³⁹ Jesús itsa joneya boyalia, jumaitisi bajarapamonaejawabelia:

—¡Pëtsa bitso pamatanueyabame! Pejanawa raja apotëpae. Saya raja majitanuca —jai Jesús, tsipaji yapëtane piasaëya-exanaejawanexa bajarapowayo.

⁴⁰ Bajarapacuenia Jesús pejumaitisijawa, bajarapamonae saya jumecapocaponatsi. Pamonae daxita pematnueyabiwi bowecua pitsapaeya-exana. Itsaxuayolia petëpaewayo boca, Jesús barëjoneya saya caejiwiyobeje: petëpaewayo paxa, pena, Jesús pijajiwi, acueyabi ponëbeje yajawa. ⁴¹ Nexata Jesús petëpaewayo cobepita. Bajarapowayomi pijajumeta^a jumaitisi:

—¡Talita cumi! —jai. (Mapejumaitisijumeje: «¡Pejanawa, nonotapunare!», pejajijume.)

⁴² Bajarapacuenia Jesús pejumaitisijawata, pejanawayo nonotabapuna. Ponapona baja. Bajarapowayo xaina doce pawai-beje. Nexata, Jesús peyaja-wajonewilia, itsa tane bajarapacuenia, pinijicuenia jamatabëcuenenabena-jaca. ⁴³ Itsiata, Jesús pinijicuenia jumaitisi:

—¡Pëtsa itsajiwi-ata patsipaebame mapacuenije! —jai Jesús. Bajaraxuacujinae, Jesús itoroba pejanawayo penajawabelia pexaejawa perajutsinexatsi.^o

n 5:41 *pijajumeta*: Jesús peponaponaematacabi, ayaibitsaëto judiowi cuaicuaijai arameojume. Itsamonae pijinia griegojume. Nexata, Jairo pijamonae cuaicuaijai tsaena arameojume.
o 5:43 *pexaejawa perajutsinexatsi*: Bajarapacuenia itoroba, tsipaji bajarapamatacabi judiowi canaëjëta pacuenia petëpawimi pejumape apocuenecaëjëpaetsi pexaejawa pexaenexa.

Jesús Nazaret tomarata pepatsicujinae, jume-aebatsi pepaebijawa yabara
(Mt 13:53-58; Lc 4:16-30)

6 ¹ Capernaúm tomarawecua, pitsapa Jesús, penawiatsinexa Nazaret tomarajawaberena, patomarata witsaba. Pijajiwi pënaponatsi baja-raberena. ² Pepatajopaecujinae, itsa copiajopa baja judíowi penacuera-ewetsimatacabi, Jesús taxuxuaba jiwi liwaisi petsipaebijawa judíowi pijasinagogabota.^p Ayaibitsaëtoxaneto pejumetaewitsi siwajamatabëcuenenabenajacatsi. Itsiata, itsamonae pijinia jamatabëcuene-aebatsi. Nexata, Jesús yabara najumaitsi mapacueniaje:

—¿Detsa pacuenia yapëtane maponëje mapajamatabëcueneliwaisije? ¿Detsa werena meta natocapitsapa peyapëtaenë penaexanaenexa? ¿Detsa ponë pesaëta exanaponapona mapitsipiniijucuenejawanëje? Bajaraxuanë caeto-ata apotaetsi. ³ Maponëje saya carpinteronë. María pexënato. Bajaronë raja pejuyapijiwi Santiago, José, Judas, Simón, itsamonae petiriawi-ata. Bajarapamonae wajatomarata jinawanapa —najai bajarapamonae Jesús yabara. Bajarapamonae nacaetomarapijiwixae, Jesús apojumexaniataetsi.

⁴ Nexata, Jesús jumaitsi bajarapamonaejawabelia:

—Bajarama-itsi tsabiabije. Profetawi, yaiyataeyabiabatsi yaiyataeyabiabatsi itsanacuapijiwi. Caranata, pijanacuapijiwi, pijawiriawi, pijamonae-ata, apoyaiyataeyabiabitsi —jai Jesús.

⁵ Nexata, Jesús bajarajota jiwi ayaibitsaëtojawabelia pinijicueene pexanae-jawa apotsita-exanae, pecuene-aebixaetsi Dioso pitorobinëtsicacuene. Saya caejiwiyobeje piawitanewi jamatejemaya-exana, pecobeta pejayatsijawata.

⁶ Nexata, Jesús bitso najamatabëxaina, tsipaji cuene-aebatsi. Bajaraxuacujinae, Jesús tsiquiritomaraxijawa Dioso peliwaisi, pexanialiwaisi, jiwi tsipaebanajetaruca.

Jesús itoroba pijajiwi, doce ponëbeje, petsipaebanajetarubenaenexa Dioso peliwaisi, pijajiwi peyanacua-ewetsijawanexa yabara
(Mt 10:5-15; Lc 9:1-6)

⁷ Jesús junata pijajiwi, doce ponëbeje, penacaetuatsinexa. Nexata, itoroba anijanëbeje tsaponae, Dioso peliwaisi petsipaebinexa tomaranëjawa. Pijajiwi jamatabëcuenecaëjëpaeya-exananua dowathi peyajawajinawanapaewi pewecuacapsapaponaenexa. ⁸ Nexata jane baja, pijajiwi penaropobiwajënae, Jesús jumaitsi bajarapamonaejawabelia:

—¡Pëtsa itsacuenejawa-ata pacapona name panijanamutonexa! ¡Pëtsa pacapona name panemarue, doro, palata-ata! ¡Ënaeboyoya saya pacapona re!

⁹ ¡Caejawa pataxunaponare panenataxuxatatsijawa! ¡Pëtsa pacapona name anijanaxatatsijawabeje! ¡Caejawa saya pajumaponare! ¹⁰ Pabota papatabiabianamebeje, bajarajota paponaponaenamebeje. ¡Pëtsa panatixitapona mebeje itsaboyabelia, panemajitsinexabeje! Matapania icatsia, itsajawabelia itsa paponaejitsiamëbeje, bajarapabowecua papitsapaenamebeje. ¹¹ Patomarata apopacacopiapitsibeje tsane, itsa apojitsipaenua

p 6:2 pijasinagogabota: Bajarapacuenia judíowi wënërubiabiaba penacaetuatsibo, itsajota nacujarubabia Dioso peliwaisi caesábada canacujitsia.

tsane papecanamuxuna-ewetsinexabeje panetsipaebiliwaisibeje, nexata paponae namebeje bajarapatomarawecua. Paneponaewajënaebeje bajarapatomarata panataxu-atsapërëwarëbianamebeje. Bajarapacuenia itsa pa-exanaenamebeje, bajarapatomarapijiwi yapëtaena Diosojawabelia pena-neconitsicuene, apopapecacopiapitsixaebeje papecanamuxuna-ewetsinexa panetsipaebiliwaisibeje. Xaniajanë pacuenia pacatsipaebijitsiatsi. Pamatacabi Dioso jiwi naneconitsia-exanaena, bajarapamatacabi Dioso bitso naneconitsia-exanaenatsi patomarapijiwi apopacacopiapitsibeje tsane. Patomarapijiwi apopacacopiapitsibeje tsane, Dioso ayaicuenia naneconitsia-exanaena. Paneconiwajëtota bajayata Dioso naneconitsia-exana Sodoma tomarapijiwi, Gomorra tomarapijiwimibeje, bajarapaneconiwajëto mata-toxenetsia Dioso naneconitsia-exanaena bajarapamonae —jai Jesús pijajiwi jawabelia.

¹² Nexata jane baja, Jesús pijajiwi, anijanëbeje tsaponae, naropoba petsipaebanajetarubenaenexa jiwi, penajamatabëcuenepënyërobinexa Diosojawabelia, pibisiacuene pexanaejawawecua, tsipaji imoxoyo pewajënae Dioso pijajiwi peyanacua-ewetsijawanexa. ¹³ Wecucapitsapona dowathi peyajawajinawanapaewi. Piawitanewi olivocuaiipiji-aceiterata mata-exabapona. Jamatejemaya-exanaponanua.

Pacuenia Juan, jiwibautizabinëmi, beyaxuabatsi

(Mt 14:1-12; Lc 9:7-9)

¹⁴ Herodes, Galilea nacua pewetsinë, jumetane itsamonae jamatabëcuenenawëxaniabiaya pejumaitisijawa Jesús yabara: «Raëta, jiwibautizabinëmi, icatsia asaë petëpaecujinae. Bajaraxuata, caëjëpatsi Dioso pesaëta pinijicuene pexanaenexa», pejaijawa itsamonae Jesús yabara.

¹⁵ Itsamonae pijinia jumaitsi tsaponae: «Bajayata raeta, ponë ponapona, profeta Elías,⁹ baja raeta ponë», jai tsaponae.

Itsamonae pijinia jumaitsi tsaponae Jesús yabara: «Maraeta Diosojume-paebinë, profetanë, tsipaji rabaja pacuenia bajayata profetawimi jinawana, bajara-icatsia maponë itsije», jai tsaponae itsamonae.

¹⁶ Bajarapacuenia Herodes pejumetaexae, jamatabëcuenenawëxaniabiaya jumaitsi Jesús yabara:

—Maraeta Juan-pijinëmije, ponëmi bajayata xanë tajajiwi wësi-ucutaxuabia-exanaxë. Raëta asaë petëpaecujinae —jai Jesús yabara.

¹⁷ Bajarapacuenia jumaitsi, tsipaji abaxë Juan-pijinë itsa asaë, Herodes pijajiwi, wajabitsaëwi, itoroba pewaetabinexatsi, cobecëtsiaya pecaponaenexatsi penaneconitsiwi pejebabiabiboyalia. Bajarapacuenia Herodes itoroba pijajiwi, pijawa, Herodías-wa, pejamatabëcueneta. Copiata picani pita bajarapowa Felipe, Herodes pejuyapijinë. Itsiata, Herodes, pejuyapijinë pijawa yacajërëta. ¹⁸ Bajarapacuenia Herodes pexanaexae, nexata Juan-pijinë muxujioba Herodes-jawabelia, abaxë itsa apowaetabitsi. Nexata,

q 6:15 *Elías*: Bajaraponë bayatami ponapona Israel nacuata. Baitsi, apo-asaë tsaponapona mapanacuataje, Jesús peponaponaematacabi. Itsiata, bajaraponë Dioso ya-asaëya caponatsi athëbëbetsia. (2Re 2:1-11.) Bajaraxuata apopayaquinarubinë «Elías-pijinë». Daxita bajaraponë peliwaia ruca 1Re 18-2Re 2-jawabelia.

jumaitsi: «Acuenebi raja nejuyapijinē pijawa nepitsijawa», jai Juan-pijinē Herodes-jawabelia.

¹⁹Nexata, bajarapacuenia Juan-pijinē pejumaitsixae, itoyatsi Herodías-wa. Nexata, abaxē Juan-pijinē itsa ponapona penaneconitsiwi pejebabiabibota, bajarapowa picani jamatabēbeyaxuabia-exanatsi. Itsiata, apocaējē-paetsi, ²⁰tsipaji bajarapowa pamona, Herodes, yaiyatane Juan-pijinē bitso pejamatabēxanepanaenēxae. Nexata, apotocopatsi pijawa pebeyaxuabia-exanaenexa Juan-pijinē. Orijibia, Juan-pijinē itsa barēcuacuajai tsabiabi Herodes-jawabelia pijaneconi yabara, bajaraponē jamatabēbējai tsabiabi. Jamatabēcuenebējai-ata, xaniawaetsia namuxuna-ewetabiaba. ²¹Itsiata, pamatacabi pinijifiesta exana Herodes penajamatabēnapitsinexa penaexanaematacabi, Herodías-wa toyapēxanepanatsi Juan-pijinē pebeyaxuabia-exanaenexa. Bajarapafiestajawa, Herodes junata pijaboyaberena jiwi ayai-bitsaētoxaneto penajuaxaenexa, peyajawanacuenebiwi, pija-ira pewetsijawa yabara, wajabitsaēwi pewetsiwi, petuxanewinua, Galilea nacuata pejinawanapaewi. ²²Herodíaswa toyapēxanepanatsi, tsipaji pexēnatoyo joneya Herodes pejunatsiwi pebarēxaeyecaejawalia, pijacujirucuenia caewayo peyawajibinexa. Nexata, Herodes pejunatsiwi bitso barē-itajitsipa pejionēyo peyawajibijawa. Nexata, Herodes pitaxutuabarēyajamatabēcuene, najumecapanepaeya jumaitsi pejionēyowawabelia:

—¡Jamatejema, newajēre xua jitsipame! Xanē juya carajutsianatsi. ²³Pacue-nejawa newajētsianame, carajutsianatsi. Epatua tane-ewetsia-exanaenacuata, carajutsianatsi —jai najumecapanepaeya pejionēyowawabelia.

²⁴Nexata, bajarapowayo pitsatabalia penajawabelia. Jumaitsi:

—¿Detsa meta xua wajētsianajē? —jai penajawabelia.

Nexata, Herodíaswa pexēnatoyowawabelia jumaitsi:

—¡Juan, jiwibautizabinē, pematabocoto wajēre! —jai.

²⁵Nexata, bepiglia bajarapowayo jopajoneya Herodes pe-ecaejawabelia. Jumaitsi Herodes-jawabelia:

—Jitsipajē cajena tanerajutsinexamē bepigiayo platota Juan, jiwibautizabinē, pematabocoto —jai bajarapowayo.

²⁶Herodes pejumetaejawata, pinijicuenia bejamatabējiobi tsanajetsireca. To-acuenebitsi: «Jume», pejaijawa, najumecapanepaeya pejumaitsixae pejionēyowawabelia, daxita pejunatsiwi pitabarata, perajutsijawanexa xua wajētatsi. ²⁷Nexata, Herodes bepiglia itoroba wajabitsaēnē, petocarenanexatsi Juan pematabocoto. ²⁸Wajabitsaēnē nexata pona penaneconitsiwi pejebabiabiboyabelia. Bajarajota wēsi-ucutaxuabatsi. Juan-pijinēmi pematabocoto carena platota. Nexata, pejanawa rajutatsi. Bajarapowayo juya pena rajuta. Nexata baja, Herodíaswa yapētane pepacuene baja Juan-pijinē pebeyaxuabijawatsi.

²⁹Nexata, Juan-pijinē pijajiwi, itsa wēnētanetsi pebeyaxuabijawatsi, ponarena Juan-pijinē pebocaejawaberena. Pitatsi petēpaenē, pijajiwi pemēthētsinexatsi.

Jesús pexaejawa rajuta cinco mil ponēbejajawabelia

(Mt 14:13-21; Lc 9:10-17; Jn 6:1-14)

³⁰Jesús, pijajiwi, apóstolewi, penawiabanajetarubenaewi Jesús-jawaberena, nawajunupaeba daxita pacuene exanawanapa,

pacuenia-ata jiwi liwaisi tsipaebawanapa. ³¹ Nexata, Jesús jumaitsi bajarapamonaejawabelia:

—¡Naxatsia! Ponatsi pesajinaejawabelia, wajanacuera-ewetsinexa cae-epatoyo —jai. Bajarapacuenia jumaitsi, tsipaji jiwibitsaëtoxañetonë topa-tabiabatsi. Itsamonae penawiabaponaecujinae, itsamonae juya patabiaba. Nexata, apocuenecaëjöpabiabitsi Jesús pijajiwi pebarëxaenexa.

³² Nexata, Jesús ëpijajiwi jerata yajawapona itsabelia jiwi ajibi picani.

³³ Itsiata, jiwi ayaibitsaëtoxañetonë pëtanetsi Jesús peponaejawa. Yapëtanenua itsabelia pona. Nexata, matatsënëa pënacujinaerubenatsi daxita tomaranë-pijiwi. Caranata, pewajënaeyabelia bajarapamonae pata. ³⁴ Itsa baja Jesús, pijajiwi yajawa, nonotajunaya jerawecua, petaejawata bajarapajiwibitsaëtoxañetonë, Jesús itaxutobejiobiatane. Tsitatsi be-ovejabitsaëtoxañetonë, apopexainaejawa pewetsinëtsi. Bajarapacuenia petaxae, Jesús apocaeliwaesicuenejawa tsipaeba bajarapamonaejawabelia. ³⁵ Itsa baja bitso caniwiyotsia, Jesús pijajiwi cujibarenatsi. Jumaitsitsi:

—Bitso rabaja caniwiyo. Majotaje ajibi pexaejawa, tsipaji itsajiwi-ata apoxainae pijabo. ³⁶ ¡Ilorobare baja, jiwi peponaenexa imoxoyo pena-enaetomaranëjawabelia, pecomuacaenexa pexaejawa! —jaitsi Jesús pijajiwi.

³⁷ Nexata, Jesús jumaitsi pijajiwijawabelia:

—¡Paxamë parajure pexaejawa! —jai.

Nexata, Jesús pijajiwi jumaitsi:

—¿Paponaeñajë tsaja tomarabelia patacomuatsinexa pan doscientos denariota,^r bajarapamonae pexaenexa? —jai Jesús pijajiwi.

³⁸ Icatsia, Jesús jumaitsi pijajiwijawabelia:

—¿Detsa papan-bëbeje paxainame paxamë? ¡Pataema copiata! —jai Jesús. Petaecujinae, bajarapamonae jumaitsi:

—Paxainajë saya cinco papan-bëbeje, anijanëyobeje dujuainëyobeje yajawa —jai Jesús pijajiwi.

³⁹ Nexata, Jesús itoroba daxitajiwi pe-enaenexa ponajawata. ⁴⁰ Nexata, bajarapamonae pepobitsaëtonë natsanaeya ena. Itsabitsaëtonëta enapona cien pajiwi-beje, itsabitsaëtonëta pijinia cincuenta pajiwi-beje tsaponae.

⁴¹ Nexata, Jesús pita cinco papan-bëbeje, anijaduainëyobeje yajawa. Athëbëa benaëcotsia, pexaniajamatabëcuene rajuta Diosojawabelia bajarapape-xaejawa yabara. Bajaraxuacujinae, epatsënëcapona pan, dujuainëbeje-ata. Nexata, bajarapa-epatsënëcaponaejawanë rajutapona pijajiwijawabelia, juya petsicobetsanaenexa pe-enaewijawabelia. ⁴² Daxita xaniawaetsia penia.

⁴³ Pexaeweretsicujinae, Jesús pijajiwi caetuata pan, dujuai yajawa, jiwi peyajuwënëcopabejebjawanë. Wënëba doce xuabeje beyoxobocuenia pecuejawanë. ⁴⁴ Pamonae pexaejawa xane, namata-ëjëta ëpebijijiwi cinco mil ponëbeje, namata-ëjëtsinejewa petiriawi, pejewaxi-ata.

Jesús najetaruca mene-itaboxoya

(Mt 14:22-27; Jn 6:16-21)

⁴⁵ Jesús jiwi ayaibitsaëtoxañetonë pexaejawa perajutsicujinae, pijajiwi bepijia runaeya-exanareca jera-ënëabereca. Copiata itoroba pijajiwi

penicabinexa puca itsapanabelia, Betsaida tomarabelia. Jesús abaxë caenë nacopatanuca bajarajota, jiwi penapëjibinexa. ⁴⁶ Penapëjibiwercicujinae, Jesús junaya petsutojumabetsia, pewajëtsinexa Diosojawabelia. ⁴⁷ Merawitatuajëta, pijajiwi pucaxanetotuatujëta yajajetarubena. Jesús abaxë caenë nacopatanucarena matatsënëtarena. ⁴⁸ Matatsënëwelia Jesús taenuca pijajiwi peto-ayapëbejewa watsi pewaetsijawa, tsipaji jowiboxaneto pewajënaewerena najetaruca. Bajayacunua, ajena matcabijitsia, Jesús pijajiwi pecowëwelia najetaruca mene-itaboxoya, penicabinexa pucaxaneto itsapanabelia. Pijajiwi canacujitsialia najetaruca, rowia picani pexenetsinexa. ⁴⁹ Pijajiwi itsa tanetsi mene-itaboxoya penajetarucaejawa, jamatabëjumaitsi: «¡Petëpaenëmi raeta pejumape najetaruca!», jamatabëjai. Nexata, bajarapamonae wawajai tsaxuabi ayajumeta. ⁵⁰ Daxita bajarapamonae petaxae bajarapacuenia penajetarucaejawa, jamatabëcuenenajunawiaca. Nexata Jesús bepjiayo jumaitsi pijajiwi jawabelia:

—¡Xanë raja! ¡Pëtsa panecujunawame! ¡Pajamatejemamëre saya! —jai Jesús pijajiwi jawabelia.

⁵¹ Nexata baja, Jesús nonolia bajarapajera-ënëabelia. Ajibi baja tsaxuabi jowibo. Nexata, Jesús pijajiwi pinijicuenia jamatabëcuenenajunawiaca, tsipaji tane jowibo, malataca yajawa, Jesús piajibia-exanaejawa. ⁵² Bajarapamonae picani tane Jesús perajutsijawa pan, tsiquirijawayomi-ata, jiwibitsaëtoxaneto jawabelia. Itsiata, apojamatabëcuene yapëtaecapanepae Jesús pecaëjëpaenëcuenetsi pinijicuene pexanaejawa, tsipaji abaxë ajamatabëcuenetaja.

Jesús jamatejemaya-exana piawitanewi Genesaret nacuata

(Mt 14:34-36)

⁵³ Jesús pijajiwi jerata yajawapata jane baja puca itsapanabelia, Genesaret nacuayabelia. Peyapatsijera cëtaruta puca-itapata. ⁵⁴ Paepatota Jesús, pija-jiwi yajawa, nonotajunaya jerawecua, bepjiia jiwi yapëtanetsi Jesús-cuene. ⁵⁵ Jesús pepatsijawa itsa wënëtanetsi, natsipaebaruta daxitajawa. Nexata, itsajota jiwi jumetane Jesús pepatsijawa, piawitanewi pijacamaxita yawë-tacaraponabiabatsi. ⁵⁶ Nexata, Jesús-jawaberena capatabiaba piawitanewi, itsaxuayo bajaraponë patanajetaruca, tsiquiritomaraxijawa, pinijitomaranë-jawa, tomarapënëya pe-enaebonëjawa-ata. Bajarapapiawitanewi callejawa tojebabiabatsi. Pamonae capata piawitanewi pinijicuenia jumaitsi tsabiabi Jesús-jawabelia:

—¡Pexaniacuene bitso neto-exanare! ¡Maponëje tocopare pecatojayatsinexa nenaxatatsicopijawa! —jai tsabiabi.

Nexata, daxita pamonae piawitanewi tojayataponatsi, jamatejema baja tsaponae.

Jesús tsipaeba xua jiwi jamatabëcuenebijianatsi

(Mt 15:1-20)

7 ¹ Itsamatacabi, pata Jesús-jawaberena, Jerusalén tomarawerena pepo-naewi, fariseowiyajuwënëwi, judíowi pecujarubiwi-ata, pamonae pecatsitecawanapaewi pijasalinaiwimi pijacuene matatoxenetsia. ² Bajarapamonae cuenetane, peya-enebijawata itsamonae, Jesús pijajiwi, pan

pexaejawata, pijasalinaicuena napëna apopenacobequiatsijawa, pexae-wajënaeya. Nexata, tsitatsi bepenaneconitsijawa Jesús pijajiwi. ³ Baitsi, bajarapamonae jamatabëcuenenawëxaniabiaya jamatabëjumaitsi tsabiabi: «Itsa catsitecäjë tajasalinaliwiwi pijacuene, nexata Dioso aneconijibia netaena», jamatabëjai tsabiabi. Bajaraxuata, bajarapamonae pexaejawa apoxae, napëna itsa aponacobequiatsi pijasalinaliwiwicuenia. ⁴ Bajarapijinia pacuenia, pataxunaeta pexaejawacuene canajetabiaba pecomuacaecujinae, itsa nawiaba pijaboyabelia, xaniawaetsia itsa aponapënanacobequiatsi, apoxaeyabiabi. Bajarapamonae catsitecawanapa pematatsënëa nawitsia itsacujirujawaxi-ata, pijasalinaliwiwi pijacujirucuenia. Nexata, pijatazaxi, mera peyajebinëanë, pecasetsinëanë, camanë-ata, xaniawaetsia quiatabiaba. ⁵ Bajarapamonae pecuenaetaecujinae Jesús pijajiwi, jumaitsi Jesús-jawabelia:

—¿Detsa xuajitsia nijajiwi apojumecowënëtawanapae wajasalinaliwiwi pijacuene? Caranata saya, xaewanapa pan, napënanacobequiatsinejewa wajasalinaliwiwi wajanaca-itorobicuenia —jai bajarapamonae Jesús-jawabelia.

⁶ Jesús nexata jumaitsi bajarapamonaejawabelia:

—¡Paxamë saya jiwi pitabarata panacuene-itajëtabiabame pexania-jamatabëcuene bepanexainaewi! Itsiata, panijacuata panayamaxë-itojorobabiabame. Bajayatami, baja cajena profeta Isaías-pijinë paxamë yabara xaniawaetsia pacawajunupaeba. Peyaquinaeliwaisita jumaitsi mapacueniaje:

«Bajarapamonae saya itajara neyayataena pejumeta. Itsiata, pepotanejitsipaejamatabëcuene newecuatajë tsane.

⁷ Bajarapacuenia taneyayataejawa yabara, apotoxanepanaetsi tsane caejawayonexa-ata, tsipaji bajarapamonae saya cujarubaponaena bepexaniajailiwaesicuenia jiwi pecapitsapaeliwaesianë, xanë, Diosonë, beta-itorobiliwaesicuenia»,^s jai tajëwelia Dioso pejumatsijawa paxamë yabara, profeta Isaías-pijinë peyaquinaeliwaisita —jai Jesús bajarapamonaejawabelia.

⁸ Jesús icatsia jumaitsi fariseowi, judfowi pecujarubiwijawabelia-ata:

—Isaías-pijinë xua jumaitsi, xaniajai baja cajena paxamë yabara. Paxamë Dioso papeca-itorobicuenia apopa-exanaemë. Caranata, ëwajasalinaliwi pijacuene pacatsitecame. ⁹ Dioso pitorobiliwaisi pajume-amatamobia-exaname, wajasalinaliwi pijacuene panecatsitecaejawata. ¹⁰ Dioso penajumecopatsiliwaisi Moisés-pijinë naca-itoroba picani mapacueniaje: «¡Axa yayiataema! ¡Ena-ata yayiataema!». Orijibia, nacajumaitsinua: «¡Pajiwi pibisiacuenia bija-tane paxa, pena-ata, bajarapajiwi pabeyaxuare!», jai. ¹¹⁻¹² Itsiata, paxamë pajume-amatamobia-exaname bajarapaliwaisibeje. Jiwi pamuxubijiapenetaabiabame^t peyayataeyaniwa paxajiwi, penajiwi-ata. Pajumaitsimë tsabiabi mapacueniaje: «Axa, ena-ata, itsa cawajëta neyawenonaenexa, nexata itsa apojitsipaemë neyawenonaejawa, jumaitsimë tsane mapacueniaje: ‘Daxita

s 7:7 Taema Isa. 29:13. t 7:11-12 *pamuxubijiapenetaabiabame*: Bajarapamuxubijiapenetsijume pewënë, «corbán», judfowi pijajumeta. Nexata, judfonë itsa wënërubijitsipa pecobecowëyajuwë-nëjawa, «corbán», daxita pijamonae yapëtane petsatsijawa ëDiosonexa.

xua pacarajutsijitsiatsibeje picani patacayawenonaejawanexabeje, daxita bajaraxua najumecapanepaeya rajutsiapaebajë Diosojawabelia. Nexata baja, acuenebi patacayawenonaenexabeje, jamë tsane neyawenonaeyaniwa», pajamë tsabiabi jiwijawabelia. ¹³ Bajarapacuenia panejumaitsitsabiabijawata, pacopabia-exanaponame jiwi pejumecowënëtsijawami Dioso pitorobiliwaisi, juya panejumecowënëtsia-exanaenexa saicaya wajasalinaiwimi pija-liwaisi. Itsaliwaisianë-ata pematatsënëa saicayacuenia patsipaebaponame Dioso pitorobiliwaisiwecua —jai Jesús judíowi pecujarubiwijawabelia, fariseowijawabelia-ata.

¹⁴ Bajarapacuenia pejumaitsicujinae judíowi pecujarubiwijawabelia, fariseowijawabelia-ata, Jesús junata daxita bajarajota penacae-tuatsiwi pimoxoyotsinexatsirena, pecujarubinxexa. Nexata, jumaitsi bajarapamonaejawabelia:

—¡Daxita paxamë panenamuxuna-ewere, xaniawaetsia patanejumeyapëtaenexamë! ¹⁵ Xua jiwi xane, apojamatabëcuenebijaenatsi, Dioso pitabarata. Biji rajane, xua jiwi capitsapa pibisialiwaishi pejamatabë-ëthëtojawawetsina, penajamatabëxainaejawa pexanaenexa, bajarajane xua jiwi jamatabëcuenebijaenatsi. Nexata, naneconita Diosojawabelia. ¹⁶ Pajiwi jamatabënejumeyapëtane patacatsipaebiliwaisi, nenamuxuna-ewetsi xaniawaetsia —jai Jesús.

¹⁷ Itsa baja Jesús jiwiiwecua natixita, boya joneya. Nexata, boyalia pijajiwi yanijobatsi bajarapaliwaisi. ¹⁸ Nexata, Jesús jumaitsi pijajiwiawabelia:

—¿Paxamë-ata baja cajena abaxë apopanejumeyapëtaemë? Daxitawiria pexaejawa xae-ata, jiwi apojamatabëcuenebijaenatsi, apowënananeconitsinua Diosojawabelia, ¹⁹ tsipaji raja, jiwi pexaejawa apotsijamatabë-ëthëjonetsi. Saya pënëareca joneca. Bajaraxuacujinae, icatsia wecuapitsapatsi —jai Jesús.

Bajarapacuenia Jesús jumaitsi, pijajiwi peyapëtaeya-exanaenexa pacuenia daxitacuene jiwi pexaejawa xae-ata, apopibisiacuene.

²⁰ Icatsia, Jesús jumaitsi:

—Baitsi jane, jiwi pejamatabë-ëthëtojawawetsina, pitsapa pibisiajamatatabëcuenejawanë, xua jiwi jamatabëcuenebijaenatsi. ²¹ Nexata, pitsapa mapitsipibisiajamatatabëcuenejawanëje: Jiwi nacojobinejewa pibisiacuene pewitota pexanaejamatatabëcuene, penacobetoxotsijamatatabëcuene, jiwitonë pebeyaxuabijamatatabëcuene, ²² penacojobiwi pewecuanamatayajitsijamatatabëcuene, itsamona pecobecowë penaxainaeyabijamatatabëcuene, piacujirubejejamatabëcuene, itsamonaejawabelia peyamaxë-itojorobijamatatabëcuene, itsamona pexainaecuene pecobeca-ëbijamatatabëcuene, itsajiwi pibisiacuenia pebaracuaicuajaijamatabëcuene, ayaijamatabëcuenejiwi penataejamatatabëcuene, saya jema peponaponaejamatatabëcuene-ata. ²³ Daxita bajarapajamatatabëcuenejawanë pitsapa jiwi pejamatabë-ëthëtojawawetsina, pejamatabëcuenebijianaenexatsi —jai Jesús pijajiwiawabelia.

**Pacuenia petiriwa, apojudíowa-ata, xaniawaetsia
siwanajamatatabëcuenecopata Jesús-jawabelia peyawenonaenexatsi,
yabara peliwaishi
(Mt 15:21-28)**

²⁴ Jesús baja naropota Genesaret nacuwecua, peponaenexa panacua-yabelia eca Tiro, Sidón tomarabeje. Bajarapanacuatalia, pabota patajopa,

muetsia picani jamatabēpata itsajiwi yapētaenejewatsi. Itsiata, bepijiayo wēnētanetsi pepatsijawa. ²⁵Nexata, bajarapanacuapijiwa bepijiayo pata Jesús-jawaberena. Yaiyataeya pematabacabēta nucajunua Jesús pitabarata. Bajarapowa pexēnatoyo dowathi toyajawaponaponatsi. ²⁶Bajarapowa sirofeniciawiriawa. Apojudiōwa-ata, jumaiti Jesús-jawabelia:

—¡Pexaniacue ne bitso neto-exanare! ¡Taxēnatowayo netowecuacapitsa-pare dowathi! —jai bajarapowa.

²⁷Nexata, Jesús jumaiti bajarapowajawabelia:

—Copiaya abaxē weyawenonajē tawēnajudiōwi, tsipaji apoxanepanae copiaya tacayawenonaenexa xamē, apojudiōwamē, nacueneweretsinejewanē tayawenonaejawa tawēnajudiōwi. Bajarapacuenia itsa cato-exanae jitsipatsi, betayacajērētsi tsipae pejewaxi pexaejawaminexa, tarajutsinexa awirixijawabelia —jai Jesús bajarapowajawabelia.

²⁸Itsiata baitsi jane, bajarapowa ajumesaē tsaponae. Icatsia, jumaiti Jesús-jawabelia:

—¡Xaniajamē rabaja picani! ¡Itsiata, neyawenonare, tsipaji raja awirixi-ata mesa bēxēpanata itsa nubena, pejewaxi pexaepan-pērē itsa othopareca mesa bēxēpanareca, bajarapapērē banaxane! ¡Bajarapijinia pacuenia itsiata, apojudiōwa-atanē, neyawenonare! —jai bajarapowa Jesús-jawabelia.

²⁹Nexata, icatsia Jesús jumaiti bajarapowajawabelia:

—Xaniawaetsia nejumecanawiatame. ¡Nawiare baja nijaboyabelia! Nexēnatowayo rabaja dowathi wecuapitsapatsi —jai Jesús.

³⁰Itsa baja pata bajarapowa pijaboyabelia, pexēnatowayo caxitajaraba-buata jamatejema baja pebocaejava camata. Nexata, yapētane baja, petowecuapitsapaejawatsi dowathi.

Jesús jamatejemaya-exana apocejumetaenē, apocecuaijaijainē-ata

³¹Jesús baja naropota Tiro nacuawecua. Najetaruca Sidón nacujawa, Decápolis nacujawa-ata, pepatsinexa Galilea pucaxanetowabelia. ³²Bajarajota, jiwi tocapatatsi apocejumetaenē, bitso apocecuaijaijainē-ata. Nexata, bajarapamona jumaiti Jesús-jawabelia:

—¡Jesús, pexaniacue ne paneto-exanare! ¡Panetoyajare maponēje pejumetaenexa, pecuacuaijainexanua! —jai bajarapamona.

³³Nexata, Jesús jiwiwecua bajaraponē barēpona pesaicayojawabelia. Bajarajotalia, pecobesitota namata-enetsia muxuwojobēta. Bajaraxuacujinae, nacobesisuaba. Nexata, ebarētojayata apocecuaijaijainē. ³⁴Nexata, Jesús athēbēa penaēcotsijawatatsia, wenajumalixuabica.^u Jesús nexata, bajaraponējawabelia pejumeta jumaiti:

—¡Efata! —jai.

«Efata», pejaijume mapejumaitisijumeje: «¡Muxuwojonapare!», pejaijume.

³⁵Bajarapacuenia Jesús pejumaitisijawata, caecuenia bajaraponē muxuwojorucalia baja. Jumetane jane baja. Pe-ebareto-ata jane baja xanepana. Cuaicuaijai baja xaniawaetsia. ³⁶Nexata, Jesús jumaiti bajaraponē petocapatsiwiwsijawabelia:

^u 7:34 *wenajumalixuabica*: Jiwi xua siwabējai, bajarapacuenia pexanaejawa. Baitsi, Jesús jamatabēcuenebējaija pejumaitisijawa: «¡Jaa!», pejaijawa.

—jPëtsa panecuenewajunupaebapona mataropotsia itsamonaewawabelia pacuene exanajë maponëjawabeliaje! —jai picani Jesús asaëyata.

Itsiata, bajarapamonae jume-itawetsi-atatsi, bitsoyo tsipaebapona jiwijawabelia. ³⁷Bajarapamonae jamatabëcuenenabenajacaeya jumaitsi tsaponae:

—Bajaraponë, Jesús, daxitacuenewitane pexainaewi-ata xaniawaetapona. Pamonae-ata apopecuaicuajaiwi, apocejumetaewimi-ata, cuenecaëjëpatsi pejamatejemaya-exanaejawa —jai bajarapamonae Jesús yabara.

Jesús rajuta pexaejawa bejamatabëcuene cuatro mil pajiwi bejewawabelia
(Mt 15:32-39)

8 ¹Itsamatacabi, Jesús jiwibitsaëtozaneto icatsia muxunanacaetuatsi. Bajarapamonae pexaejawa towerewerecatsi. Jesús junata pijajiwi. Jumaitsi mapacueniaje:

²—Mapamonaeje netsitabejiobi bitso, tsipaji baja ajena acueyabi pamacatabibeje xaina xanëjawata pejinawanapaecujinae. Nexata, pamarue baja towerewerecatsi. ³Itsamona, bajarapamonaeyajuwënëwi, pata tajëwerena. Itsa meta itorobijitsipajë pijabonëjawabelia peponaenexa pexaejawa xae-nejewa, apo-asaë meta tsipae namutua penajetarubenaewata —jai Jesús pijajiwi jawabelia.

⁴Nexata, Jesús pijajiwi jumaitsi:

—¿Detsa jane pacuenia pexaejawa berajutatsi? Majotaje ajibi pexaejawa, tsipaji itsajiwi-ata pijabo apoxinae —jai Jesús pijajiwi.

⁵Nexata, Jesús yanijobiaya jumaitsi pijajiwi jawabelia.

—¿Detsa papan-bëbeje paxainame? —jai.

Bajarapamonae jumaitsi:

—Siete papan-bëbeje paxainajë —jai.

⁶Nexata, Jesús itoroba daxitajiwi pe-enaenexa irata. Pita siete papan-bëbeje. Diosojawabelia pexaniajamatabëcuene rajuta bajarapapexaejawa yabara. Bajaraxuacujinae, epatsënëca pan. Xuacujinae, rajutapona pijajiwi jawabelia, juya petsicobetsanaenexa, daxitajiwi pexaenexa. ⁷Yajawaxaina dujuainëxi-ata. Icatsia, Jesús pexaniajamatabëcuene rajuta Diosojawabelia dujuainëxi yabara. Nexata icatsia, pijajiwi itoroba petsicobetsanaenexa bajarapadujuaijawaxi daxitajiwi jawabelia. ⁸Daxita jiwibitsaëtozaneto xania-waetsia xane pepenejawabelia. Nexata, peyajuwënënacopabijawanë Jesús pijajiwi caetuata. Siete xuabeje beyoxobocuenia pecuejawanë wënëba. ⁹Pamonae pexaejawa xane bejamatabëcuene cuatro mil pajiwi beje. Pexaejawa pexacujinae, Jesús jiwi nawiabia-exana pijabonëjawabelia. ¹⁰Bajaraxuacujinae, Jesús, pijajiwi yajawa, runareca jera-ënëabereca. Barëpona Dalmanuta nacuyabelia.

Fariseowi pejumexaniataenexa Jesús Dioso pitorobinëtsicacuene,
itoroba Dioso pesaëta pinijicuene petsita-exanaenexatsi
(Mt 16:1-4; Lc 12:54-56)

¹¹Fariseowi itsa wënëtane Jesús pepatsijawa, pata bajaraPonëjawaberena. Bajarapamonae jamatabëcuene-ëjëbiaya barënajumenotapona. Wajëtatsi picani Dioso pesaëta pinijicuene petsita-exanaenexatsi, pecue-neyapëtaenexatsi pepacuene Dioso athëbëwetsica pitorobinëtsicacuene.

¹² Bajarapacuenia pejumetaejawata, Jesús bitso jamatabëcuenebëjai. Nexata, athëbëwenajumalixuabica.^v Jumaitsi:

—¿Detsa xuajitsia panewajëcame pinijicuene patacatsita-exanaenexa, pataneyapëtaenexamë pepacuene Dioso athëbëwetsica tane-itorobinëtsicacuene? Xaniajanë pacuenia pacatsipaebijitsiatsi. Pematat-sënëa, ta-exanaecuenemiwecua apopacatsita-exanaetsi tsane pinijicuene ta-exanaejawa —jai Jesús.

¹³ Nexata baja, Jesús bajarapamonae wecuapona. Icatsia, runareca jera-ënëabereca, pucaxaneto itsapanabelia peponaenexa.

**Jesús pijajiwi muxujioba pejumecowënëtsiyaniwa
fariseowi petsipaebiliwaisi
(Mt 16:5-12)**

¹⁴ Penaropotsiwajënaeya Galilea pucaxaneto itsapanajawabelia, Jesús pijajiwi nacofënëta pamarue pecaponaejawa. Caepan-bëyo saya cajina-wanapa jerata. ¹⁵ Jesús pijajiwi pebarënajetarucaejawata jerata, jumaitsi mapacueniaje:

—¡Panajumetaema! ¡Xania! ¡Panayajiwiwitaema pecanacuenebilevadura fariseowi, Herodes, nacua-ewetsinë-ata! —jai Jesús pijajiwiwawabelia.

¹⁶ Itsiata, Jesús pijajiwi apopejumeyapëtaexae penayajiwiwitaenexa bajara-pamonae pijaliwaisi, nexata najumaitsi: «Bajarapacuenia nacajumaitsi pan wajanacofënëtsijawa yabara», najai.

¹⁷ Jesús pijajiwi jamatabëcueneypëtane, bajarapacuenia jamatabëcuenenawëxaniabiaya penajumaitsijawa levadura yabara. Nexata, jumaitsi pijajiwiwawabelia:

—¿Detsa xuajitsia panajumaitsimë: «Baja raeta pacuenia, Jesús naca-jumaitsi pan apowajacaponaexae», panajamë? Paxamë abaxë apopanejumeyapëtaemë xua yabara pacajumaitsitsi, bitso panejamatabëcuenetajaxae.

¹⁸ Patae-atamë pane-itaxutota, itsiata apopajumeyapëtaecapanepaemë pane-taejawa. Pamuxuwojorubena-atamënua, itsiata apopajumeyapëtaecapanepaemë panejumetaejawata. Pan itsa namatawenonaejitsipatsi, necaëjëpa ta-exanaenexa. ¿Apopanajamatabënapsimë pacuenia exanajë pamatacabi pan namatawenonatsi? ¹⁹ Pacujinae epatsënëcajë cinco papan-bëmibeje panetsicobetsanaenexa cinco mil ponëbejajawabelia, bajarapacujinae peyajuwënëcopabijawanë, ¿detsa xuabeje pawënëbame beyoxobocuenia pecuejawanë? —jai Jesús pijajiwiwawabelia.

Bajarapamonae jumaitsi:

—Doce xuabejeta pawënëbajë —jai.

²⁰ Icatsia, Jesús jumaitsi:

—Pacujinae epatsënëcajë siete papan-bëmibeje panetsicobetsanaenexa cuatro mil pajiwiwejajawabelia, bajarapacujinae peyajuwënëcopabijawanë, ¿detsa xuabeje pawënëbame beyoxobocuenia pecuejawanë? —jai Jesús pijajiwiwawabelia.

^v 8:12 *wenajumalixuabica*: Jiwi xua siwabëjai, bajarapacuenia pexanaejawa. Baitsi, Jesús jamatabëcuenebëjaiya pejumaitsijawa: «¡Jaa!», pejaijawa, fariseowi piamatabëcuenetajaxae pejuxanataeyaniwa Cristonëcuene.

Bajarapamonae jumaitsi:

—Siete xuabejeta pawēnēbajē —jai.

²¹ Nexata, Jesús jumaitsi pijajiwijawabelia:

—¿Detsa xuajitsia nexata pasiwabējamē pan yabara itsa xanē pacaju-maitsitsi: «¡Xania! ¡Panayajiwitaema pecanacuenebilevadura fariseowi, Herodes, nacula-ewetsinē-ata!», itsa pacajaitsi? Bajarapacuenia pacaju-maitsitsi panejumecowēnētsiyaniwa bajarapamonae petsipaebiliwaisi, tsi-paji pacatsipaebiana saicayacuenia Dioso pejumeliwaisiweucia —jai Jesús pijajiwijawabelia.

Jesús itaxutoxaniawaeta bitso pitaxutotsēcēnaenē

²² Jesús, pijajiwi yajawa, pepatajopaecujinae Betsaida tomarata, tocanajetarubenatsi bitso pitaxutotsēcēnaenē, apopetaenē. Pinijicuenia wajēcatsi Jesús pitaxutojayatsinexa, bajaraponē pitaxutoxanepanaenexa. ²³ Nexata, Jesús cobepita, pebarēponaenexa pesaicayojawabelia, tomarapēnēyabelia. Bajarajotalia, Jesús pionitota itaxuto-exaba. Bajaraxuacujinae, nacobebeuata bajaraponējawabelia. Nexata yanijoba.

—¿Cacaējēpa tsabaja netaejawa? —jai Jesús.

²⁴ Nexata, bajaraponē naēcota. Jumaitsi:

—Taniji pebijijiwi pejinawanapaejawa. Itsiata, saya benetsita naejawanē —jai bajaraponē.

²⁵ Nexata, icatsia Jesús itaxutojayata. Bajaraponē jane baja, xaniawaetsia naitaxutobabatsianaēcota. Itaxutoxanepana jane baja. Xaniawaetsia baja tane. ²⁶ Nexata, Jesús jumaitsi bajaraponējawabelia:

—¡Nawiare nijaboyabelia! ¡Pētsa abaxē poname tomarabelia! ¡Pētsa pae-bame itsajiwijawabelia-ata pacuene cato-exanatsi! —jai Jesús.

Pedro pewajunupaebijawa Jesús Cristonēcuene

(Mt 16:13-20; Lc 9:18-21)

²⁷ Jesús, pijajiwi yajawa, pitsapa Betsaida tomarawerena, peponanexa Cesarea Filipino tomarapēnēwerena pe-enaetomaraxijawabelia. Namutua abaxē penajetarubenaewata, Jesús jumaitsi pijajiwijawabelia:

—¿Detsa jiwi xanē yabara jumaitsi tsabiabi? ¿Detsaeta xanē ponēnē? —jai.

²⁸ Nexata, Jesús pijajiwi jumaitsi:

—Itsamonae xamē yabara jumaitsi tsabiabi: «Juan raeta, jiwibautizabinēmi, icatsia asaē», jai tsabiabi. Itsamonae pijinia jumaitsi tsabiabi: «Profeta Elías» raeta, ponēmi bajayata ponapona, icatsia asaē», jai tsabiabi. Itsamonae pijinia jumaitsi tsabiabi: «Bajayata raeta, profetawimiyajuwēnēnē, icatsia asaē», jai tsabiabi xamē yabara —jai Jesús pijajiwi.

²⁹ Nexata, icatsia Jesús jumaitsi pijajiwijawabelia.

—¿Detsa nexata paxamē pajamatabē-itsimē xanē yabara? ¿Detsa xanē pacatsitaponētsi? —jai Jesús pijajiwijawabelia.

w 8:28 Elías: Bajaraponē bayatami ponapona Israel nacuata. Baitsi, apo-asaē tsaponaponae mapanacuataje, Jesús peponaponaematacabi. Itsiata, bajaraponē Dioso ya-asaēya caponatsi athēbēabetsia. (2Re 2:1-11.) Bajaraxuata apopayaquinarubinē «Elías-pijinē». Daxita bajaraponē peliwaishi ruca 1Re 18-2Re 2-jawabelia.

Nexata, Pedro jumaitsi Jesús-jawabelia:

—Xamë cajena Cristomë, athëbëwetsica Dioso peca-itorobinëtsica jiwi necapanepaenexa —jai Pedro.

³⁰Nexata, Jesús pijajiwijawabelia jumaitsi:

—iPëtsa bajarapacuenia itsajiwijawabelia papaebame, Cristonëcuene yabara! —jai Jesús.

Jesús tajëwelia nawajunupaeba pebeyaxuabijawanexatsi yabara

(Mt 16:21-28; Lc 9:22-27)

³¹Jesús pebeyaxuabijawanexatsi, tajëwelia nawajunupaeba pijajiwijawabelia. Jumaitsi mapacueniaje:

—Xanë, Daxitajiwi Pematapijinënë, pinijicuenia bejiobinë tsane. Judíowi pija-ancianowi, sacerdotewi penamatacaitorobiwi, judíowi pecujarubiwinua, aponejumexaniatae tsane Cristonëcuene. Nexata, nebeyaxuabiana. Itsiata bailsi jane, tatëpaecujinae, acueyabimatacabita, icsiata asaënë tsane —jai Jesús. ³²Bajarapacuenia pijajiwijawabelia jumenapebetsiaya tsipaeba petëpaejawanexa yabara. Nexata, Pedro junata Jesús pebarëponatabinexa pesaicayojawabelia. Bajarajotalia, jume-itaweta Jesús bajarapacuenia pejumaitsiyaniwa. ³³Nexata, Jesús Pedrowecua napëñëyorotaxuaba. Tenuca pijajiwi pe-enaejawabelia. Nexata, napëñëyorotsia jumaitsi tsanucac Pedrojawabelia:

—iSatanás, newecuanatixire!* Xamë, apocanaëjëtisimë xanë Dioso tane-tojitsipaecuenia ta-exanaenexa. Saya canaëjëtame ëjiwi pacuenia jitsipa ta-exanaenexa —jai Jesús.

³⁴Nexata, Jesús junata pijajiwi, daxitajiwibitsaëto yajawa. Jumaitsi pepënaponaewinexatsi yabara bajarapamonaejawabelia:

—Ponë, cruza pewëtaranajetarucaenë, exanabiaba pitorobicueniatsi pamona bajarapacruzejawabelia cobematabiabarutsijitsiatsi. Bajarpijinia pacuenia, pajiwi jitsipa tanepënaponaejawa, becopata pijacuata penatojitsipaecuenia pexanaponaponaejawami, ëta-itorobicuenia pexanaponaponaenexa. Najamatabëcueneweretsinua bejiobia-exanaejitsia-atatsi, beyaxuabijitsia-atatsinua, taliwaisi yabara. Nexata jane baja, xuacujinae nepënaponaena. ³⁵Pajiwi nayawajunuaxainaena tajajiwitonëcuene, pebeyaxuabiyaniwatsi, apoxainae tsane matacabi apowerewererecaejawa. Pajiwi pijinia beyaxuabianatsi tajajiwitonëxae, pepaebaponaponaexaenua taliwaisi, jiwi pecapanepaeliwaixinexatsi, bajarapajiwi xainaena matacabi apowerewererecaejawa. ³⁶Jiwi daxitacuene xainae-ata mapanacuapiji-cuenejawanëje, bajaraxuanë apojamatabëcueneyawenonaetsi tsane, tsipaji apocapanepaetsinua tsane Dioso penaneconitsia-exanaejawanexatsiweuca. Caranata saya, Diosowecua naxuabiana. ³⁷Jiwi apotocuenecaëjëpaetsi tsane bajaraxuanëta pematamotsinexa, penaxuabiyaniwa Diosowecua.

³⁸»Pamona tanejume-aebiwi, pibisiacuene pexanawanapaewituatujëta-ata, tajajiwitonëcuene itsa

x 8:33 *Satanás, newecuanatixire*: Bajarapacuenia Jesús jumaitsi Pedrojawabelia, tsipaji yapëtane Satanás apopejitsipaejawa pexanaenexa Dioso pejitsipaecuenia. Bajarapacuenia penajamatabë-xainaewata Pedro, Satanás tocanacuenebatsi.

nawēñliwaisica-ura tsane, tajumeliwaisi yabara-ata, xanē juya pamacacabi icatsia patsianicajē, Daxitajiwi Pematapijinēñ taja-ánglewi yajawa, taxa Dioso pijapeniweniwenaeotia yajawa-ata, bajarapajiwi xanē-ata wēñliwaisica-uranē tsane tajajiwitonēcuene —jai Jesús pijajiwijawabelia.

9 ¹Icatsia, Jesús jumaitsi jiwijawabelia:

—Xaniajanē pacuenia pacatsipaebijitsiatsi. Daxita paxamē, majotaje panenubenaeyajuwēñwi, tēpaenejewa taena petaxuxuabijawa^y Dioso pesaēta pijajiwi peyanacua-ewetsijawa mapanacuataje —jai Jesús jiwijawabelia.

Pacuenia Jesús cae-epatoyo perabēniweniwenataba, yabara peliwaishi

(Mt 17:1-13; Lc 9:28-36)

²Bajarapacuenia pejumaitsicujinae, seis pamatacabibeje pepanepaecujinae, Jesús pijajiwi, acueyabi ponēbeje, barēpona pinijitsutoxanetojumabetsia, mapamatabēxēyoje: Pedro, Santiago, Juan-bana. Bajarapatsutojumatasia Jesús perabēniweniweni, bajarapamonae pitabarata. ³Penaxatatsijawa bitso niojaiya niweniweni. Mapanacuataje pexaniaquiatsiwa-ata apocā-jēpaetsi bajarapacuenia peniojaiya-exanaenexa. ⁴Jesús pijajiwi bajarajota tane jemata penaitajētsijawa Elías, Moisés-pijinēbeje.^z Jesús barēcuaicuaijaitsi bajaraponēbeje. ⁵Nexata, Pedro jumaitsi Jesús-jawabelia mapacueniaje:

—¡Patanecujarubinē, pijacuaxae panebarēponame! Itsa catoxanepana, pacato-exanaenatsi acueyabi pabobērēto beje. Itsabobērēto xamēnexa tsane, Moisés-nexa tsane, Elías-nexa-ata tsane —jai Pedro Jesús-jawabelia.

⁶Bajarapacuenia Pedro jumaitsi xaniawaetsia canaējētsinejewa, tsipaji bajarapamonae bitso najunawiaca. Nexata, apoyapētae pacuenia jumaitsi-jitsia. ⁷Nexata, daxita bajarapamonae pematatsēñewetsica itarērēbo mata-acataxuabatsi. Bajarapa-itarērēbojawawetsica bajarapamonae jumetane Dioso pejumaitsiyawa: «MaraPonēje, taxēnato, ta-asiwanē. ¡Panamuxunaewere bajaraponē!», pejaijawatsica. ⁸Bajarapacuenia pejumetaecujinae, bajarapamonae itsa naēcobarēcēpalia Jesús-jawabelia, ajibi baja tsarucabeje bajaraponēbeje. Caenē baja Jesús nucataba.

⁹Nexata, Jesús pijajiwi itsa barērunanucaponaica petsutojumawetsica, jume-itaweta pijajiwi. Jumaitsi:

—¡Pētsa patsipaebame itsajijiwi-ata pacuene pataneme! Matapania Xanē, Daxitajiwi Pematapijinēñ, tatēpaecujinae icatsia asaēñ tsane, matapania jane baja, bajarapacueni patsipaebianame —jai Jesús pijajiwijawabelia.

¹⁰Bajarapamonae, acueyabi ponēbeje, jumecowēñeta pejumaitsicueniatsi. Itsiata, epamonae nayanijobabiaba pajamatabēcueni xaina, Jesús pejumaitsiyawa: «tatēpaecujinae, icatsia itsa asaēñ tsane», pejaiyawa yabara.

¹¹Nexata, Jesús pijajiwi yanijobatsi. Jumaitsi:

y 9:1 *petaxuxuabijawa*: Dioso taxuxuaba pijajiwi peyanacua-ewetsijawa pacujinae itoroba Pedrobana pejumecowēñētsinexa Pexēnato Jesús. Mar. 9:7. z 9:4 *Elías, Moisés-pijinēbeje*: Taema Deut. 18:15; Mal. 4:5-6.

—Patanecujarubinē, ¿detsa xuajitsia judíowi pecujarubiwi nacacujarubiabiaba copiata pepatsijawanexa Elías,^a pepatsiwajēnaeya Cristo, ponē Dioso athēbēwetsica itorobiapaeba? —jai Jesús-jawabelia.

¹²Nexata, Jesús jumaitsi pijajiwi jawabelia:

—Xaniajai rabaja bajarapaliwaisi. Copiata baja cajena Elías patajopaena,^b pejamatabēcuenexanetsinexa daxitajiwi. Orijibia, xaniajainua xua jumaitsi tajēwelia Dioso pejumeliwaisibaxutota, Xanē, Daxitajiwi Pematapijinēnē, yabara.^c Bajarapaliwaisijawata nacayapētaeya-exana pacuenia xanē jiwi nebejiobia-exanaejitsia pinijicuenia. Nenaitaxutojematsijitsianua. ¹³Pepacujiru Elías baja patajopa, tsipaji pacuenia Elías cuene-itsi, bajaracuene-itsi Juan, jiwibautizabinēmi-ata. Nexata, pacuenia Elías pitoyawitsi pejitsipacuenia to-exanatsi, bajarapacuenia-ata Juan-pijinē jawabelia jiwi to-exanatsi —jai Jesús, Juan-pijinē yabara.

Jesús jamatejemaya-exana pejewaxinē, dowathi peyajawaponaponanē

(Mt 17:14-21; Lc 9:37-43)

¹⁴Jesús pijajiwi, acueyabi ponēbeje, petsutojumawetsica barērunaica, pepatsinexa itsajota itsamonae, Jesús pijajiwi, nacopabanubena. Bajara-jota, tane jiwibitsaētohaneto pewajēnae pematatoyoronaejawatsi. Tanenua judíowi pecujarubiwi anaeya pijajiwi pejumenotsijawatsi. ¹⁵Nexata, bajarapamonae itsa taerēcēpa Jesús, daxita jamatabēcuenenabarēyaya cujinaeyeca bajaraponē jawabelia, pebajacobinexatsi. ¹⁶Nexata, Jesús jumaitsi bajarapamonae jawabelia:

—¿Detsa xua yabara panajume-anaenotame pinijicuenia? —jai.

¹⁷Caenē bajarapajiwi bitsaētohanetoyajuwēnēnē jumaitsi Jesús-jawabelia:

—Jesús, mara picani taxēnatonēyoje, dowathi peyajawaponaponanēyo, catocanajetarucatsi. Maponēyoje dowathi aponetonatsipaebia-exanaetsi.

¹⁸Itsa raja dowathi waetababiabatsi, irata xuababiabatsi. Nexata, bajarajota pecuaibothamu tsabiabi. Nawonoquiarabaxaeyabiaba. Daxitanēyo aperabēbabatsabiabireca. Nijajiwi jawabelia raja picani jumaitsinē: «¡Panetowecucapitsapare dowathi!», janē picani. Itsiata, bajarapamonae apocaējēpaetsi tanetowecucapitsapaenexa —jai bajaraponē Jesús-jawabelia.

¹⁹Nexata, Jesús jumaitsi bajarajota penubenaewi jawabelia:

—¡Paxamē baja cajena panecuene-aebiwi^d Dioso, papecayawenonaejawanexa! ¿Detsa paepatojebi abaxē paxamē jawata pacayajawaponaponanatsi patanejumexaniataenexamē? ¿Detsa paepatojebi abaxē ajamatabēcuenesaenē tsaponaponae tsane, patanesiwanajamatabēcuenecopabinexamē xanē jawaberena? ¡Panetocarenamēre pejewaxinē! —jai Jesús jiwijawabelia.

²⁰Nexata, petocarenajawatatsi pejewaxinē, dowathi itsa tanetsi Jesús, icatsia tēpajoneya-exanatsi. Irata xuabatsi. Natorenabanua. Pecuaibothamu bitso.

²¹Nexata, Jesús yanijoba pejewaxinē paxajawabelia.

—¿Detsa pamatacabibeje xaina petaxuxuabicujinaetsi mapacueneye? —jai.

a 9:11 Elías: Bajarapacuenia yanijoba, tsipaji matapania tane Elías petsutojumataatsi, pepuawajunupaebi Jesús Cristonēcuenē. b 9:12 patajopaena: Taema Mal. 4:5. c 9:12 Daxitajiwi Pematapijinēnē, yabara: Taema Isa. capítulo 53. d 9:19 panecuene-aebiwi: Taema Heb. 11:6.

Pejewaxinē paxa jumaitsi:

—Penacuetojawaweliacujinae cajena taxuxuabatsi. ²²Bajayajebi dowathi netoxuababiabaliatsi isotojawalia, menialia-ata, bajarapacuenia picani pebeyaxuabinexatsi. ¡Xamē itsa cacaējēpa itsacuenia-ata taneyawenonae-nexamē, nitaxutotsoniataema! ¡Neyawenonare! —jai pejewaxinē paxa Jesús-jawabelia.

²³Nexata, Jesús jumaitsi bajaraponējawabelia:

—¿Dexuajitsia, «itsa cacuenecaējēpa», nejamē? Pajiwi cajena siwanajamatabēcuenecopata Diosojawabelia peyawenonaenexatsi, daxita bajarapacuenia to-exanaenatsi —jai Jesús.

²⁴Nexata, pejewaxinē paxa aėjai. Jumaitsi:

—¡Siwanajamatabēcuenecopatajē baja cajena Diosojawabelia! ¡Orijiibia, bitso neyawenonare ta-itaxutuajamatejemanexa, tacuene-aebiyaniwa! —jai bajaraponē Jesús-jawabelia.

²⁵Nexata, Jesús itsa tane jiwibitsaētoخانeto penacaetuataponaejawa bajaraponējawaberena, itaweta dowathi. Jumaitsi:

—Dowathi, xamē, pejewaxinē aponenatsipaebia-exanaenē, aponejumetaeya-exanaenēnua, xanē ca-itawetatsi. ¡Pitsapare mapapejewaxinēwecuaje! ¡Pētsa baja icatsia junuame matawējēa maponēyojawaberenaje! —jai Jesús dowathijawabelia.

²⁶Nexata, dowathi pejewaxinē icatsia aėjaiya-exanatsi. Tēpajoneya-exanatsi. Pewecuapitsapaejawatatsi jane baja, puenetabuatatsi bepetēpaenēyo. Bajarajota petaejawata itsamonae jumaitsi:

—Bajaraponēyo rabaja tēpa —jai bajarapamonae. ²⁷Nexata, Jesús pejewaxinē cobewaetabiaya yotsina. Pejewaxinē nuca pejamatejemanē.

²⁸Nexata xuacujinae, Jesús boya itsa joneya, pimisijawata pijajiwi jumaitsitsi:

—¿Detsa xuajitsia meta paxanē apopanecaējēpae patawecuacapsapae-nexa dowathi? —jai Jesús pijajiwi.

²⁹Nexata, Jesús jumaitsi pijajiwijawabelia:

—Mara pawiria dowathije apojitsipae pepitsapaejawaje. Itsiata, itsa apopasiwaxamē tsipae pexaejawa, asaēyata itsa pawajētsipame Diosojawabelia, matapania pitsapaejitsipa —jai Jesús pijajiwijawabelia.

Jesús icatsia cotocaewijawa nawajunupaeba pebeyaxuabijawanexatsi

(Mt 17:22-23; Lc 9:43-45)

³⁰Jesús pejewaxinē dowathi pewecuacapsapaeacujinae, barēnajeta-ruca pijajiwi Galilea nacujawa. Bajaraponē itsiata, apojitsipae itsajiwi-ata peypātaejawa bajaraxuayo pebarēnajetarucaejawa, ³¹tsipaji jamatabēcujaruba ēpijajiwi, itsamonae liwaisi caranabinejewatsi. Jumaitsi tsaponae pijajiwijawabelia:

—Xanē, Daxitajiwi Pematapijinēnē, necanajetsiana itsamonae pecobeyabelia. Bajarapamonae nebeyaxuabiana. Itsiata baitsi jane, tanebeyaxuabicujinae, acueyabimatacabita, icatsia asaēnē tsane —jai tsaponae.

³²Itsiata, pijajiwi apojumeyapētaetsi. Bajarapamonae siwa-ajume-ura, Jesús-jawabelia peyanijobinexa bajarapaliwaisi yabara.

Pacuenia Dioso tane ayaijamatabëcuenejiwi pijajiwituatujëta

(Mt 18:1-5; Lc 9:46-48)

³³ Jesús pijajiwi barëpata Capernaúm tomarata. Pebarëpatsicujinae, boyalia itsa barëjoneya, yanijoba pijajiwijawabelia.

—¿Detsa pitsicuene yabara namutua bitso panajumenotanajetarubename? —jai.

³⁴ Nexata, Jesús pijajiwi moya, tsipaji namutua penajetarubenaewawata, nayanijobapona pajiwi ayaijamatabëcuenejiwi bajarapamonaetuatuajëta.

³⁵ Nexata, Jesús eca. Junata pijajiwi, doce ponëbeje, pimoxoyotsinexatsirena. Jumaitsi:

—¡Pajiwi jitsipa Dioso ayaijamatabëcuenejiwi petaejawatsi paxamë tuatuajëta, beweliamatabëcuenejiwi natae! ¡Yawenonaenua daxitajiwi! —jai Jesús pijajiwijawabelia. ³⁶ Bajaraxuacujinae, Jesús cobepita pejewaxinëyo. Pijajiwi pitabarata nuteta. Nexata bajaraponëyo isapita. Jumaitsi pijajiwijawabelia:

³⁷ —Pajiwi copiapita tanesiwanajamatabëcuenecopatsijiwiyo, mapitsipejewaxinëyo-ataje, xanë taniji tanecopiapitsijawa. Pajiwi necopiapita, ëxanë aponecopiapitsi. Neyajawacopiapita tane-itorobinë —jai Jesús pijajiwijawabelia.

Jesús pijajiwi caxitajaraba itsanë, dowathi jiwiwecua

pecapitsapaejawa Jesús pewënëta

(Mt 10:42; Lc 9:49-50)

³⁸ Jesús pijajiwitonë, Juan, jumaitsi Jesús-jawabelia:

—Tanecujarubinë, pataniji itsanë, apopaxanëyajuwënënë, newënëta dowathi jiwiwecua pecapitsapaejawa. Nexata, pa-itawetajë bajaraponë bajarapacuenia pexanaeyaniwa —jai Juan.

³⁹ Itsiata, Jesús jumaitsi Juan-jawabelia:

—¡Pëtsa pa-itawetame bajaraponë, tsipaji raja, pajiwi pinijicuene pexanaejawa exana tawënëta, bajaraxuacujinae, acuenebi tanebaranatsipae-binexa pibisiacuenia! ⁴⁰ Baitsi, pajiwi pibisiacueni aponajamatabëxainae waxaitsijawaberena, nacajamatabëcueneyawenona. Bajarapajiwi bewajanacajamatabëcueneyanatsijiwi. ⁴¹ Xaniajanë pacuenia pacatsipaebijitsiatsi. Pajiwi pacarajutsiana tsiquirimerayo-ata pane-apaenexa patajajiwixaemë, bajarapajiwi pepacueni Dioso matamotsianatsi papecarajutsimatamo —jai Jesús Juan-jawabelia.

Jesús pijajiwi muxujioba itsajiwi-ata pibisiacueni

pexanaeya-exanaeyaniwa

(Mt 18:6-9; Lc 17:1-2)

⁴² Icatsia, Jesús jumaitsi pijajiwijawabelia:

—Pajiwi pibisiacueni exanaeya-exanaejitsipa xanëjawaberena tanesiwanajamatabëcuenecopatsijiwiyo, beweliamatabëcuenejiwi-ata pacuenia mapapejewaxinëyoje, bajarapajiwi Dioso ayaicuenia naneconitsia-exanaejitsipatsi. Bajaraxuata, pajiwi najamatabëxaina pibisiacueni pexanaeya-exanaenexa, xanëjawaberena

tanesiwanajamatabëcuenecopatsijiwiyo, abaxë pibisiacuene exanaeya-exanaenejewa, bewësicëtatsi ibotoxaneto, penayajawaxuabinexareca puca-xaneto tuatujäareca. ⁴³ ¡Itsa panecobe pibisiacuene paca-exanaeya-exana, panacobecaucure! Itsiata, xanepana cobemataxucaeaya panejonejawa Dioso peyanacua-ewetsinacuajawabelia, Dioso papecaxuabijawawecua anijacobebeje yajawa, apowerewerecae-isotojawabelia, itsajota apocotia-itaxupae tsane caeto-ata. ⁴⁴ Bajarajota, apotëpae tsane oro, jiwiwixaewi. Isotocotia-ata apo-itaxupae tsane, caeto-ata. ⁴⁵ ¡Itsa panetaxu paca-itoroba pibisiacuene pane-exanaenexa, panataxucaucure! Itsiata, xanepana taxumataxucaeaya panejonejawa Dioso peyanacua-ewetsinacuajawabelia, Dioso papecaxuabijawawecua anijataxubeje yajawa apowerewerecae-isotojawabelia. ⁴⁶ Bajarajota, apotëpae tsane oro, jiwiwixaewi. Isotocotia-ata apo-itaxupae tsane, caeto-ata. ⁴⁷ ¡Itsa pane-itaxutota panetaejawata paca-itoroba pibisiacuene pane-exanaenexa, panaitaxutocajure! Itsiata, xanepana pacae-itaxutojiwimë panejonejawa Dioso peyanacua-ewetsinacuajawabelia, Dioso papecaxuabijawawecua anija-itaxutobeje yajawa apowerewerecae-isotojawabelia. ⁴⁸ Bajarajota, apotëpae tsane oro, jiwiwixaewi. Isotocotia-ata apo-itaxupae tsane, caeto-ata.

⁴⁹ »Jiwi ba-exaba yajobenota dajubinë pëwi, petajuitsijawanexa Diosojawabelia. Bajarapijinia pacuenia, be-isotocuenia* daxita Dioso pijajiwi-ata jamatabëcuene-ëjëbianatsi piayapëbejecuenejawanëta mapanacuataje, pijibia-exanaenexa pibisiacuene pexanaejawa, pewajënaeyabelia pita-xutuajamatejemanexa Diosojawabelia. ⁵⁰ Yajo raja xanepana. Itsiata, yajo pexaicaejawami itsa ajibi tsipae, apoxanepanae tsipae itsacuenejawayonexa-ata. Bajarapijinia pacuenia, paxamë-ata pajamatabëcuene-itsimë tsipae Diosojawabelia, itsa apopawecuapanepaemë tsipae papecajamatabëcuene-ëjëtaaponaejawa. ¡Nexata, pajamatabëcuenesaëmëre panejamatabëcuenexanepanaenexa Diosojawabelia! ¡Pajinawanapare xaniaawaetsia itsamonaejawabelia-ata! —jai Jesús pijajiwiawabelia.

Jesús jiwi liwaisi tsipaeba penacojiobinë pijawa pexuabiyania

(Mt 19:1-12; Lc 16:18)

10 ¹ Jesús baja naropota Capernaúm tomarawecua, peponaenexa Judea nacuayabelia, penicabinexa Jordán mene itsapanabelia, pebocae-irajawabelia. Icatsia, bajarajotalia jiwibitsaëtöxaneto pata Jesús-jawaberena. Nexata, icatsia liwaisi tsipaeba bajarapamonaejawabelia pijacujirucuenia. ² Nexata, fariseowi Jesús cujibarenatsi petsipaebiliwaisi yabara jamatabëcuene-ëjëbiaya peyanijobinexatsi, bijiaya itsa jumecanawiata, jamatejema peneconitsinexatsi. Nexata, bajarapamona jumaitsi Jesús-jawabelia:

e 9:49 *be-isotocuenia:* Taema Lev. 2:13. Pacujinae jiwi tajuitsijitsia daxitanë dajubi Diosojawabelia yajo pe-exabicujinae, nacayapëtaeya-exana petsatsijawa ëDiosonexa. Nexata, Dioso piayapëbejewanë pecanacuenebijawata, tsata pijajiwi pibisiacuene pexanaejawawecua, ëDioso pejitsipaecuenia pejinawanapaenexa. (Lc 12:49-53; 1Pd 4:12.) Pacuenia yajo pe-exabicujinae pëwito, bajayajebi ajamatabësäë tsabanaenejewa, bajarapacuenia waja-itaxutuajamatejemanajawa Dioso, piayapëbejewanë nacatocopiapatsi-ata, naca-ajamatabëcuenesaëya-exana Dioso pejitsipaecuenie waja-exanawanapaenexa.

—¿Xanepana tsaja penacojiobinē pijawa pexuabinexa? —jai.

³ Jesús nexata jumaitsi fariseowijawabelia:

—¿Detsa pacuenia bajayata Moisés-pijinē paca-itoroba panijawajiwi pane-xuabijawa yabara? —jai.

⁴ Nexata, fariseowi jumaitsi Jesús-jawabelia:

—Moisés-pijinē tocopata, ponē pijawa itsa jamatabēxuaba, copiaya petoyaquinaenexa cuyalatobaxuto pexuabiliwaisi pijawajawabelia, bajaruacuujinae jane baja, pijawa pecapitsapaenexa pijabowecua^f —jai fariseowi.

⁵ Nexata, Jesús jumaitsi bajarapamonaejawabelia:

—Moisés-pijinē raja bajarapacuenia pacatocopata pane-ajamatabēcueneliwaisitajaxae. ⁶ Itsiata, pamatacabi Dioso taxuxuaba nacua pexanaejawa, exana caenē pebi. Exananua caewa petiriwa, pebi pijawanexa. ⁷ Bajaruaxuata, pebi itsa pita petiriwa pijawanexa, bawecuanatsata paxa, pena-ata, saicaya pebarēponaponaenexa pijawa. ⁸ Nexata, Dioso tane penapitsijiwibeje becajiwi^g anijajiwimibeje-ata. ⁹ Bajaruaxuata, itsanē-ata apobexuabi pijawa, tsipaji Dioso pejamatabēcueneta napitsia-exanatsibeje —jai Jesús fariseowijawabelia.

¹⁰ Bajaruacuujinae, Jesús pijajiwi pija-epato itsa barēnacopata bota, bajarapamonae yanijobatsi bajarapacueni yabara. ¹¹ Nexata, Jesús jumaitsi pijajiwijawabelia:

—Ponē pijawa pexuabicujinae, itsawa icatsia itsa pita, bajaraponē pibisiacuene exana pewitota. Nexata, naneconita Diosojawabelia, pejaitsixae itsawa pepopijawawecua. Dioso cajena abaxē pepopijawacuenia pexuabiwa totanetsi. ¹² Bajarapijinia itsi petiriwa-ata. Pamona pewecuanawiatsicujinae, itsanē icatsia itsa pitatsi, pibisiacuene exana pewitota. Nexata, naneconita Diosojawabelia, pejaitsixae itsanē pamonawecua. Dioso cajena abaxē pepo-pamonacuenia pexuabinē totanetsi —jai Jesús pijajiwijawabelia.

Jesús asiwaya tane pejewaxijiwixi

(Mt 19:13-15; Lc 18:15-17)

¹³ Itsamonae Jesús-jawaberena pejewaxijiwixi tocapataponatsi, pejaya-taponaenexa pecobeta. Itsiata, Jesús pijajiwi itaweta pexi pecapatsiwi.

¹⁴ Nexata, Jesús itsa tane bajarapacuenia pijajiwi pitawetsijawa, apotsitaxanepanaetsi. Anaeya jumaitsi pijajiwijawabelia:

—¡Pëtsa pa-itawetame! ¡Pacopare saya pejewaxijiwixi pepatsinexa xanējawaberena! Mapitsipejewaxijiwixije jume-aebinejewa, xaniawaetsia bajumexaniatane paliwaisi tsipaebatsi. Pamona jitsipa pejonejawa Dioso pijanacuayabetsia, nexata pejewaxicuenia, jume-aebinejewa xaniawaetsia bejumexaniatane Dioso pejumeliwaisi. ¹⁵ Xaniajanē pacuenia pacatsipaebijitsiatsi. Mapitsipejewaxijiwixije caecuenia bajumexaniatane paliwaisi tsipaebatsi. Bajarapijinia pacuenia, pamona jitsipa pejonejawa Dioso pijanacuayabetsia, bejumexaniatane Dioso pejumeliwaisi —jai Jesús pijajiwijawabelia.

¹⁶ Nexata, Jesús isapitapona caejiwiyo canacujitsia, pejewaxijiwixi. Pecobeta matajayatapona. Jesús pexaniacuenia cuenewajunupaebiaya jumaitsi tsaponae:

f 10:4 Taema Mt 19:7-pijinotayo. **g 10:8 becajiwi:** Becajiwii Dioso petaxae penapitsijiwibeje, nexata pebi itsa xuaba pijawa, Dioso tane bepenayajuwēnēwicaucutsijawa.

—Dioso xaniawaetsia ca-ewetsiana —jai tsaponae daxita bajarapapejewaxijawabelia.

Pewëjëato, bitso pexainaenë, cuaicuaijai Jesús-jawabelia

(Mt 19:16-30; Lc 18:18-30)

¹⁷Pabota Jesús pejewaxijiwi isapitapona, bajarapabowecua itsa naropot-sijitsia, pewëjëato cujinaerucarena Jesús-jawaberena. Pitabarata nucajunua pematabacabëta. Jumaitsi Jesús-jawabelia:

—Petuxanenë, pexaniajamatabëcuenenëmë. ¿Detsa pitsicuene be-exanaxë, taxainaenexa matacabi apopewerewerecaejawa? —jai.

¹⁸Nexata, Jesús jumaitsi pewëjëatojawabelia:

—¿Detsa xuajitsia: «Pexaniajamatabëcuenenëmë», nejamë? Ajibi raja itsapebi-ata pexaniajamatabëcuenenë. Caenë rabaja Dioso pexaniajamatabëcuenenë. ¹⁹Xamë baja yapëtaneme pacuenia Dioso pejumeliwaisita itoroba jiwi pejumecowënëtsinexa. Jumaitsi mapacueniaje: «¡Pëtsa jaitame itsawa nijawawecua! ¡Pëtsa beyaxuabame jiwitonë! ¡Pëtsa nacobetoxotame! ¡Pëtsa itsamonae pexanaejawa yabara najumetsënëtsiaya paebame! ¡Pëtsa yamaxë-itojorobiaya wecuapitame itsajiwi pexainaejawa! ¡Axa, ena-ata yai-yataema!», jai Dioso pejumeliwaisita —jai Jesús pewëjëatojawabelia.

²⁰Nexata, bajaraponë jumaitsi Jesús-jawabelia:

—Petuxanenë, daxita rabaja bajarapaliwaisianë jumecowënëtsiaponapona-jë pejewaxinënëjawaweliacujinae —jai pewëjëato.

²¹Nexata, Jesús asiwaya tane pewëjëato. Jumaitsi:

—Caejawa raja catosaica nexanaenexa. ¡Ponare necanajetsinexa daxita nexainaecuenem! Bajarapamatamomi tsicobetsanaename bepejiobiwi. Nexata, xainaename bitso nexainaecue Dioso pijanacuatatsia. ¡Nexata, najamatabëcuenewerere, cabejibia-exanae-ata, cabeyaxuabijitsia-atanua tajumeliwaisi yabara, niamatabëcuenesaëtsaponaponaenexa! Bajaraxuacujinae jane baja, nepënaponaename —jai Jesús pewëjëatojawabelia.

²²Nexata, pewëjëato itsa jumetane bajarapacuenia Jesús pejumajitsijawa, najamatabëxainaeya baja wecuapona, tsipaji daxitacuene bitso pexainaenë. Nexata, apojamatabëjumecowënëtsi paliwaisi Jesús tsipaebatsi.

²³Nexata, pewëjëato peponaecujinae, Jesús pijajiwi, matatoyorotsia penubenaewi, naëcotsiaya jumaitsi:

—Pamonae bitso daxitacuene pexainaewi, Tsiayapëbejetsi tsane pejonejawa Dioso pijajiwi peyanacua-ewetsijawata, pejamatabëcuene caranatsixaetsi pecobecowë^h —jai Jesús pijajiwiawabelia.

²⁴Nexata, Jesús pijajiwi jamatabëcuenenabenajaca, itsa jumetane bajarapacuenia Jesús pejumajitsijawa. Nexata, icatsia Jesús jumaitsi pijajiwiawabelia:

—Tajamonae, pamonae bitso ëpexainaewanexa itaxutuajamatejema, bitso tsi-ayapëbeje tsanetsi pejonenexa taxa Dioso

h 10:23 *pejamatabëcuene caranatsixaetsi Pecobecowë*: Pijacuata pena-ewetabiabixae pecobecowë-jawanëta, nexata tsi-ayapëbejetsi pejamatabëcuene-ewetaponaponaejawa Dioso perajutsinexatsi penamatawenonaejawanë. Apojitsipaenua pesiwanajamatabëcuenecopatabiabijawa Diosojawabelia peyawenonaejaxatsi. Waxaitsi xuajawabelia siwanajamatabëcuenecopatabiabatsi wajana-ewetsinexa, wajacopatsijawa banacato-ayapëbeje, waja-itaxutuajamatejemanexa Dioso.

pijanacuayabetsia. ²⁵ Pacuenia camello ayainëxae, acuenebi pejonejawa paluta-eto-itaxutowojotualia, bajarapijinia pacuenia bitso pexainaenë acuenebi tsane pejonejawa Dioso pijatomarabetsia —jai Jesús pijajiwijawabelia.

²⁶ Pijajiwi itsa jumetane bajarapacuenia pejumaitsijawa, bitso jamatabëcuenenabenajaca. Nexata, jumaitsi Jesús-jawabelia:

—Bitso pexainaewiⁱ itsa apopanepae tsane, ¿detsa nexata pitsiwi pane-paena Diosojawabelia? —jai.

²⁷ Nexata, Jesús asaëya naëcotsiaya jumaitsi pijajiwijawabelia:

—Jiwi raja apocajëpaetsi pijacuata penacapanepaenexa Diosojawabelia. Caenë, Dioso, cajëpatsi jiwi pecapanepaenexa, tsipaji daxitacuene pecuenecajëpaenëtsi —jai Jesús pijajiwijawabelia.

²⁸ Nexata, Pedro jumaitsi Jesús-jawabelia:

—Patajatuxanenë, paxanë rabaja pacopabajë daxitacuene pataxainaejawa, patacapëñajinawanapaenexa —jai Pedro.

²⁹ Nexata, Jesús jumaitsi:

—Xaniajanë pacuenia pacatsipaebijitsiatsi. Xanë tajamatabëcueneta, pajiwi pueneta pijabomi, pematapijiwi, pejuyapijiwi, paxa, pena, pijawa, pexi, pijapabianë-ata, taliwaisi pepaebanajetarucaenexa, jiwi pecapanepaeliwaixinexatsi, bajarapajiwi bitso ayaijawa Dioso rajutsianatsi pepuetsijawanëmi matatoxenetsia. ³⁰ Caejawayomijamatabëcuene tsaponae, rajutsianatsi mapanacuataje cien xuabeje pewajënaeyabelia. Bajarapajiwi icatsia xainaena bonë, pematapijiwi, pejuyapijiwi, pena, pexi, pabianë-ata. Itsiata, bajarapajiwi itoya tsanetsi mapanacuapijiwije. Bejiobia-exanabiabianatsinua. Itsiata baitsi jane, bexëajawabelia xainaena matacabi apowerewerecaejawa. ³¹ Pamonaë aeconoxaë mapamatacabitaje ayaijamatabëcuenewi tanetsi ayaijawa pecobecowë pexainaewi yabara, bajarapamonaë Dioso beweliamatabëcuenewi exanaenatsi. Pamonaë beweliamatabëcuenewi tanetsi, bepejiobiwixae, bajarapamonaë Dioso ayaijamatabëcuenewi exanaenatsi —jai Jesús pijajiwijawabelia.

Icatsia, Jesús nawajunupaeba pebeyaxuabijawanexatsi

(Mt 20:17-19; Lc 18:31-34)

³² Itsamatacabijawabelia, Jesús, pijajiwi yajawa, najetaruca namutua, peponaewi Jerusalén tomarabelia. Jesús namataxainanajetaruca pijajiwi pewajënaeya. Pijajiwi, pepënaponaewitsi, jamatabëcuenenabenajaca, tsipaji najetarubena patomarajawabelia jinawanapa pitoyawitsi. Bajaraxua yabara bajarapamonaë junawanajetarubena. Bajaraxuata, Jesús junata pijajiwi, doce ponëbeje, pesaicyojawabelia, penawajunupaebinexa tajëwelia pacuenia exanaejitsiatsi Jerusalén tomarata. ³³ Jumaitsi pijajiwijawabelia:

—¡Panejumetaema! Ponatsi ra maje Jerusalén tomarabelia. Bajarajotalia, Xanë, Daxitajiwi Pematapijinëne, necanajetsiana sacerdotewi penamatacatorobiwi, judfowi pecujarubiwi-ata pecobeyabelia, tanewaetabinexa.

i 10:26 *Bitso pexainaewi*: Bajarapacuenia jamatabëcuenenabenajaca, tsipaji judfowi canaëjëtabiaba Dioso asiwaya petaejawa bitso pexainaewi. Dioso pejumaitsixae Moisés-pijinëjawabelia; «Pajiwi xaniwaetsia jumecowëñetsiana tanajumecopatsiliwaisi, bajarapajiwi pexaniacuenia yawenonaenajë ayaijawa pexainaenexa pexi, pecobecowë, pijadajubi-ata», pejaixae, judfowi canaëjëta bajaraxua yabara jiwi ayaijawa pexainaewi penaexanaenexa.

Bajarapamonae juya neneconitsiana tanebeyaxuabijawabelianexa. Bajaruacuajinae, icatsia, necanajetsiana apojudíowi pecobeyabelia. ³⁴ Bajarapamonae necapocaponaena. Nesuabiana. Nejumatitibabena penaneconitsiwi pejumaconitabiabimacata. Bajaruacuajinae, nebeyaxuabiana jane baja. Itsiata baitsi jane, tanebeyaxuabicujinae, acueyabimatacabita, icatsia asaenë tsane —jai tajëwelia penawajunupaebijawata.

**Santiago, Juan-beje, wajëtabeje Jesús-jawabelia
pexaniacuene peto-exanaenexatsibeje
(Mt 20:20-28)**

³⁵ Zebedeo pexënatobeje, Santiago, Juan-beje, imoxoyoliabeje Jesús. Jumaitsibeje:

—Patajatuxanenë, pacuenia pacawajëtsijitsiatsibeje, bajarapacuenia pajitsipajëbeje pataneto-exanaenexamëbeje —jaibeje Jesús-jawabelia.

³⁶ Nexata, Jesús jumaitsi:

—¿Detsa pitsicuene pajitsipamebeje patacato-exanaenexabeje? —jai.

³⁷ Nexata, bajaraponëbeje jumaitsi:

—Pamatacabi daxitacuene ewetsianame, panetocopatsianamebeje patana-ecaenexabeje nemuxuneneta, wajanajua-ewetsinexa. Itsanë na-ecaena necujuanenia, itsanë pijinia netsawenonenia —jaibeje.

³⁸ Nexata, Jesús jumaitsi:

—Paxamëbeje apopayapëtaemëbeje xua panewajëramebeje. Pacuenia xanë nacaewetsianajë tanebejiobia-exanaenexa, tanebeyaxuabine-xanua, ¿paxamëbeje-ata tsaja pacacajëpabeje panenacaewetsinexabeje papecabebiobia-exanaenexabeje, papecabeyaxuabinexabeje-ata? —jai Jesús pijajiwitonëbejajawabelia.

³⁹ Nexata, bajaraponëbeje jumaitsi:

—Jājā, panecajëpabeje cajena —jaibeje.

Nexata, icatsia Jesús jumaitsi pijajiwitonëbejajawabelia:

—Xaniajanë pacuenia pacatsipaebijitsiatsibeje. Paxamëbeje pacabejiobia-exanaenabeje, pacabeyaxuabianabejenua pacuenia xanë neto-exanaena.

⁴⁰ Itsiata baitsi jane, xua panewajëramebeje panena-ecaenexabeje, caenë tacujuanenia, itsanë tatsawenonenia, bajaraxua Dioso aponetocopatsi patacatocopatsinexabeje. Taxa Dioso bajaraxua toxaniawaeta ëpamonae itapeta —jai Jesús Santiago, Juan-bejajawabelia.

⁴¹ Diez ponëbeje, Jesús pijajiwi, itsa wënëtane pepëya bajaraxua Santiago, Juan-beje, Jesús-jawabelia pewajëcaejawabeje, nexata jamatabëcuenebaranaepana bajaraponëbejajawabelia. ⁴² Nexata, Jesús daxita pijajiwi junata. Jumaitsi pijajiwijawabelia:

—Payapëtaneme rabaja pacuenia caenacua canacujitsia peyanacua-ewetsiwi exanawanapa, pewetsijawata pijajiwijawabelia. Bajarapamonae ayaijamatabëcuenewi nataeya, ajumesaëya itorobabiaba xua jamatabë-itoroba, pewetsinacuanëjawa pejinawanapaewi peto-exanaenexatsi.

⁴³ ¡Pëtsa paxamë bajarapamonae cuenëjëpaeya bajarapacuenia pa-exaname itsamonaejawabelia! Biji rajane, ponë, paxamëyajuwënënë, jitsipa ayaijamatabëcuenenë penaexanaenexa daxita paxamëwecua, bajaraponë daxita bepanijajiwitonëcuena bepacayawenonabiaba. ⁴⁴ Ponë, paxamëyajuwënënë,

jitsipa papecanamatacaitorobinēnexa, bajaraponē daxita paxamē bepanija-
jiwitonēcuenia bepacayawenonabiaba, ⁴⁵ tsipaji rabaja Xanē-ata, Daxitajiwi
Pematapijinē-atanē, apopatajopaenē jiwi taneyawenonaenexa. Biji rajane,
patajopajē tayawenonaenexa daxitajiwi, tasiwatēpaenexanua, jiwi ayaibit-
saētoxaneto pibisiacue ne pexanaeconimi taneconimatamotsinexa —jai
Jesús pijajiwijawabelia.

**Jesús itaxutoxanepanaeya-exana Bartimeo,
bajajajebi bitso pitaxutotsēcēnaenē**
(Mt 20:29-34; Lc 18:35-43)

⁴⁶ Jerusalén tomarajawabelia pebarēnajetaruaejawata, Jesús, pijajiwi
yajawa, pata Jericó tomarabelia. Bajarapatomarawecua icsatia Jesús, pijajiwi
yajawa, pitsapa itsamonaenua ayaibitsaētoxaneto yajawa. Nexata, Bartimeo,
Timeo pexēnato, eca namutomuxuneneta, jiwijawabelia amoneya palata
pewajēcabiabinexa. Bajaraponē, bitso pitaxutotsēcēnaenē, apopetaenē.

⁴⁷ Nexata, itsa jumetane Nazaret tomarapijinē, Jesús, imoxoyo penajetaru-
caejawa, wawajai tsecae:

—¡Jesús, David-pijinē pemomomē, nitaxutotsoniataema! —jai tsecae
Bartimeo.

⁴⁸ Nexata picani itsamonaē jume-itawetatsi pemoyanexa. Itsiata, bitsoyo
orijibia wawajai tsecae:

—¡David-pijinē pemomomē, nitaxutotsoniataema! —jai tsecae
Jesús-jawabelia.

⁴⁹ Nexata, Jesús muxunanucojopa. Jumaitsi jiwijawabelia:

—¡Pajunaremena bajaraponē! —jai.

Nexata bajarapamonaē junarena Bartimeo. Jumaitsi bajaraponējawabelia:

—¡Najamataběsaētaxuare! ¡Nonotapunare! Jesús raja cajunata —jai
bajarapamonaē.

⁵⁰ Nexata Bartimeo penajumaxuabipana xuabapuna. Bepijia najetabalia
Jesús-jawabelia.

⁵¹ Nexata, Jesús yanijoba bajaraponējawabelia.

—¿Detsa xua jitsipame tacato-exanaenexa? —jai.

Nexata, Bartimeo, bitso pitaxutotsēcēnaenē, jumaitsi Jesús-jawabelia:

—Tanecujarubinē, jitsipajē ta-itaxutoxanepanaejawa —jai.

⁵² Nexata, Jesús jumaitsi:

—¡Ponare baja! Tanesiwanajamatabēcuenecopatsixaemē xanējawaberena,
itaxutoxanepaname baja —jai Jesús.

Bajarapacuenia Jesús pejumaitsiyawata, Bartimeo baja xaniawaetsia natsi-
wajēnaetane. Bajaraponē baja, Jesús pepēta napona.

**Pacuenia Jesús, nacua-ewetsinēcuenia copiapitatsi
itsamonaē Jerusalén tomarapijiwi**
(Mt 21:1-11; Lc 19:28-40; Jn 12:12-19)

11 ¹ Jesús baja pijajiwi barē-imoxoyotanajetaruca Jerusalén tomara.
Itsa barēpatajopa Olivocabotsutojumata, Betfagē, Betania
tomarayobeje imoxoyojawata, Jesús itoroba anijanēbeje pijajiwitonēbeje.
² Jumaitsi bajaraponēbejajawabelia:

—¡Mapatomarayo ecaliaje, bajarapatomarayojawabelia paponarebeje! Ajena itsa papatsiaremeliabeje, pataenutsianamebeje pejananaweretsinē burro, pecētanutsinētsi. Bajarapaburro itsajiwi-ata abaxē apopejumaponaenē. Pa-isinaenamebeje. Payamaēcarenamēbeje tsane. ³ «¿Detsa xuajitsia pa-isinamebeje burro?», itsa pacajaibeje tsane itsajiwi, nexata pajumaitsimēbeje tsane: «Wajatuxanenē raja namatawenona. Aeconoxae raja icatsia canawiatsiarena», pajamēbeje tsane —jai Jesús pijajiwitonēbejējawabelia.

⁴ Nexata, Jesús pijajiwitonēbeje liabeje. Caxitajarabanutabeje burro bapamuxuneneta, pecētanutsinētsi. Bajaraponēbeje baja isinabeje. ⁵ Bajarajota pijinia, pejinawanapaewi yanijobatsibeje:

—¿Detsa xuajitsia pa-isinamebeje burro? —jaitsibeje.

⁶ Bajaraponēbeje jumaitsiibeje pacuenia Jesús yajawanajumecopatatsibeje. Nexata, tocopatatsibeje pecaponaenexabeje. ⁷ Bajaraxuacujinae jane baja, burro tocaponabeje Jesús-jawabelia. Pecapatsicujinae, Jesús pijajiwi pijacamisajumawelia penaxatabijawanē burro tsijumajeba. Bajarapajumata Jesús ecaya. ⁸ Jesús penajetarucaenamutojawarena jiwi ayaibitsaētozaneto pijacamisajumawelia penaxatabijawanē namutua tsiwajēnaeyerequejebaponatsi. Itsamonae tsiwajēnaejebaponatsi naemaxērananē, pebaxu yajawa, pe-ucubijawanē-ata. Bajaraxuanēta itabētsiaya tsiwajēnaejebaponatsi, yayataeya pecopiapitsinexatsi. ⁹ Jesús penajetarucaejawata, jiwi ayaibitsaētozaneto pewajēnaeya, namataxainaeya, najetarubena. Itsabitsaētozaneto pecowēya cotocaewanajetarubena. Daxita bajarapamonae wawajai tsanajetarubena. Jumaitsi tsabuataponae:

«¡Dioso panecapanepae^k maponēje pejamatabēcueneta! ¡Dioso pexaniacuenia yawenonaetsi maponē penajetarucaenēje, wajatuxanenē pewēnēta!

¹⁰ ¡Dioso pexaniacuenia yawenonaetsi maponē najetarucaje, xaniawaetsia pijajiwiitsi wajanaca-ewetsinexa, wajasalinainēmi, David-pijinē, peyanacua-ewetsicuenia!

¡Dioso athēbētatsia ne-ecaenē, maponēje pejamatabēcueneta, panecapanepae!», jai tsanajetarubena bajarapamonae.

¹¹ Jesús baja itsa patajopa Jerusalén tomarata, pona Templobojawabelia. Nexata, bajarajota naitaxutocaeweta, petaenexa pacuene jiwi exana templo-bota. Bajaraxua petaecujinae, pona baja Betania tomarabelia, pijajiwi, doce ponēbeje yajawa, tsipaji baja, caniwiyotsia.

Pacuenia Jesús bijataenuta higueranae piacuaijibixae, yabara peliwaissi
(Mt 21:18-19)

¹² Itsamatacabijawabelia, bajayacunua, Jesús icatsia pijajiwi barēlia Jerusalén tomarabelia. Nexata, Jesús namutua penajetarucaejawata, piajani. ¹³ Namutowecua tajēyotalia higueranae baxutaenulia. Nexata, taeyojopalia bajaraponae pecuai perubenaejawa. Itsiata, ēpebaxu saya

j 11:2 *Pejananaweretsinē*: Bajaraponē pejananaweretsinēxae, itsajiwi-ata abaxē apojumapona-ponaetsi. k 11:9 *panecapanepae*: Bajarapajume arameojumeta, «hosana», hebreojumeta pijinia «Hosha'na». Taema Sal. 118:25. Bajarapajumeta judíowi bawawajai Diosojawabelia, itsa jitsipa pecapanepaejawanaxatsi.

tsanucae, tsipaji abaxë apopenacuaitsimatacabi. ¹⁴Nexata, Jesús jumaitsi higueranaejawabelia:

—Itsajiwi-ata apocacuaixae tsane matawëjëa —jai.

Nexata, pijajiwi jumetanetsi bajarapacuenia pejumaitsijawa higueranaejawabelia.

**Jesús pitsapaeya-exana pecanajetabiawi,
pecomuacabiawinua, templobowecua**

(Mt 21:12-17; Lc 19:45-48; Jn 2:13-22)

¹⁵ Jesús, pijajiwi yajawa, itsa pata Jerusalén tomarata, joneya templo-boyalia. Bajarajota, taxuxuaba pecapitsapaejawa bajarapatemplobopijipanaowecua pamona canajetabiaba, pamona-ata comuacabiaba. Palata pecambiabiawinua pijamesanëmi, ucucu pecanajetabiawinua pe-enabiabijawanëminua topënyorobajaraba. ¹⁶ Apotocopatsinua itsajiwi-ata pecaponaenexa itsacuenajawa bajarapatemplobopijipana-bojawa. ¹⁷ Bajarapacuenia pexanaejawata, Jesús cujarubiaya jumaitsi bajarapamonaejawabelia:

—Dioso baja cajena pejumeliwaisibaxutota mapatemplobo yabaraje tajë-welia jumaitsi mapacueniaje: «Tajabo raja tsane daxitanacuanëpijiwi xanë-jawaberena penawajëcaebonexa»,¹ jai Dioso pejumeliwaisibaxutota. Itsiata baitsi jane, paxamë panacatuatabiabame yamaxë-itojorobiaya panewecua nacobetoxotsinexa^m panecanajetsijawata mapabotaje —jai Jesús templobota pecanajetabiawijawabelia.

¹⁸ Daxita pacuenia Jesús exana jiwijawabelia templobota, itsa jumetane sacerdotewi penamatacatorobiwi, judiowi pecujarubiwi-ata, najumejaita pacuenia Jesús beyaxuabijitsia. Cujunawanua Jesús pewecuapitsiyaniwatsi pijataxunae, tsipaji daxitajiwi jamatabëcuenenabenajaca Jesús petsipaebili-waisi yabara. ¹⁹ Ajena baja merawijitsia, Jesús yajawapona pijajiwi Jerusalén tomarawecua, peponaenexa Betania tomarajawabelia.

Pacuenia higueranae tëpanuca, yabara peliwaitsi

(Mt 21:20-22)

²⁰ Merawipitsijawata, bajayacunua, Jesús, pijajiwi yajawa, najetaruca pecowënamutojawa. Bajarapamona taenuta higueranae baja petëpanucaejawa daxita yatabutopaya. ²¹ Nexata, Pedro najamatabënapita Jesús higueranae pebijataenutsijawa. Nexata, jumaitsi Jesús-jawabelia:

—i Tajatuxanenë, jica jane taema, pahigueranae bijataenutame! Tsaquena-nuca baja. ¿Detsa meta pacuenia tëpa? —jai Pedro.

²² Nexata, Jesús jumaitsi pijajiwi jawabelia:

—i Paxamë pane-itaxutuajamatejemamatabëcuene paxainare Diosojawabelia, papecato-exanaenexa pacuenia pawajëtame! ²³ Xaniajanë pacuenia pacatsipaebijitsiatsi. Diosojawabelia itaxutuajamatejemaya

1 11:17 Taema Isa. 56:7. m 11:17 panewecua nacobetoxotsinexa: Bajarapacuenia jumaitsi, tsipaji palata pecambiabiawinua ayaimatamo wajëcabiaba templobopijimonedanënexa, pecanajetsiwinua ayaimatamo exanabiaba xuanë jiwi namatawenonabiaba, perajutsinexa Diosojawabelia altar-jumata.

pajumaitsimē tsipae mapatsutojawabeliaje: «¡Natixire majotawecuaaje! ¡Pucaxanetojawabelia jopare!», itsa pajamē tsipae, pacuene-aebinejewamē Dioso papecayawenonaejawanexa, nexata mapatsuto-ataje pane-itorobicuenia, pacajumecowēñetsipa. ²⁴ Bajaraxuata, pacajumaitsitsi. Daxita xua itaxutuajamatejemaya pawajētsianame Diosojawabelia, pacarajutsiana, panesiwanajamatabēcuenecopatsixae. ²⁵ ¡Diosojawabelia pane-wajētsijawata, itsa panajamatabēnapitame panebara-anaepanaejawa itsaji-wijawabelia, pabarajamatabēcuenexanepanare! Nexata pijinia, pane-axa, athēbētatsia pe-ecaenē, jamatabēcuenecaewiana paxamē-ata pitabarata pibisiacuene pane-exanaejawa. ²⁶ Paxamē itsa apopasiwajamatabēcuenecaewimē tsane, apopabarajamatabēcuenexanepanaemēnua tsane itsaji-wijawabelia, nexata pijinia pane-axa, athēbētatsia pe-ecaenē, apopacasiwajamatabēcuenecaewi tsane, apopacabarajamatabēcuenexanepanaenua tsane paxamē pitabarata pibisiacuene pane-exanaejawa —jai Jesús pijijiwijawabelia.

Jesús najamatabēcuenē-itajēta penamatacaitorobisaē pexainaejawa

(Mt 21:23-27; Lc 20:1-8)

²⁷ Jesús, pijajiwi yajawa, itsa pata Jerusalén tomarata, icatsia pona temploboyabelia. Bajarapabo-ēñeta peponaponaejawata, sacerdotewi penamatacaitorobiwi, judíowi pecujarubiwi, judíowi pija-ancianowi-ata, parena Jesús-jawaberena. ²⁸ Jumaitsi Jesús-jawabelia:

—¿Jipatsa catocopata nenamatacaitorobinēcuenia daxita bajarapacuenenexanaenexa, necapitsapaenexa pecanajetabiabiwi, pecomuacaewi, mapatemplobowecuaaje? —jai.

²⁹ Nexata, Jesús jumaitsi bajarapamonaejawabelia:

—Xanē copiaya caejumeyo pacayanijobianatsi. Itsa paxamē panejumecanawiatsianame, nexata xanē juya pacatsipaebianatsi ponē nitoroba tacapitsapaenexa bajarapamonaē. ³⁰ ¿Jipatsa jane pejamatabēcueneta Juan-pijinē jiwi bautizabaponapona? ¿Dioso tsaja pejamatabēcueneta? Itsa jume, ¿jiwi tsaja pejamatabēcueneta? ¡Panejumecanawiare baitsi jane baja! —jai Jesús bajarapamonaejawabelia.

³¹ Nexata, ĕpamonaē najumejaita pacuenia jumecanawiatsijitsia. Najumaitsi: «¿Demeta pacuenia jumecanawiatsianatsi? Waxaitsi itsa jumaitsi tsi-paetsi: ‘Dioso raja pejamatabēcueneta,’ itsa jai tsipaetsi, nexata bajaraponē nacajumaitsi tsipae: ‘¿Detsa nexata xuajitsia apopajumexaniataemē Juan-pijinē pepaebiliwaitsi?’, nacajai tsipae. ³² ‘Jiwi raja saya pejamatabēcueneta Juan-pijinē jiwi bautizabaponapona,’ acuenebi wajajaijawa, tsipaji mapatomarapijiwiye ayaibitsaētoxaneto Juan-pijinē yabara siwajamatabējumaitsi: ‘Juan-pijinē raja pepacuene Diosojumepaebinēmi,’ siwajamatabējai. Nexata, bajarapamonaē nacabeyejebijitsipa», najai Jesús peyanijobiwitsi. ³³ Nexata, saya bajarapamonaē jumaitsi Jesús-jawabelia:

—Apopayapētaenē Juan-pijinē ponē itorobatsi jiwi pebautizabaponanexa —jai.

Nexata Jesús jumaitsi bajarapamonaejawabelia:

—Nexata, xanē-ata apopacatsipaebi tsanetsi ponē nitoroba ta-exanaenexa bajarapacuenē —jai Jesús.

Jesús tsipaeba pecuenecataeliwaisi jiwijawabelia, piamatabäcuenebewewi, itsanë pija-uvabacabo bijiaya peto-ewetsijawa peliwaisicuenia

(Mt 21:33-46; Lc 20:9-19)

12 ¹Bajarapacuenia pejumecanawiatsicujinae penamatacaitorobi-saë yabara, Jesús mapaliwaisije tsipaeba sacerdotewi penamatacaitorobiwawabelia, judíowi pecujarubiawabelia, judíowi pija-ancianowijawabelia-ata. Jumaiti mapacueniaje:

—Pija-ira pexainaenë bajarapa-irata uba pini-uvabacaboxaneto. Bajaraxuacujinae, pijapabi matatoyorotsia ibopanaxanetonë pefaratsijawata yacaranata. Bajarapayacaranatsijawa athëbëabetsia apiatsia jiwitonë matatoxenetsia. Bajaraxuacujinae, irata mëthë cueyeta, itsajota uvacuaibarëmene taxubataxuababijitsia. Exananutanua pija-uvabacabotuatajêta piapiabo, athëbëyo peyajiwi-taeyabiabinexa, penacuaitsimatacabi itsa tonaweretatsi pija-uvabacabo. Daxita bajarapacuenia pexanaecujinae, bajaraponë itsamonae ewetsia-exana pija-uvabacabo. Tocaëjêta bajarapamonae pecuainaweretsimatacabi penatsicobetsanaenexa. Nexata, uvabacabo pexainaenë tajë nacuyabelia pona. ²Itsa baja copiapata pecuainaweretsimatacabi, uvabacabo pexainaenë itoroba pijajiwitonë peto-ewetsiawabelia, petsicobetsatsinexatsi. ³Itsia, apotsicobetsatsi. Biji rajane, bajarapa-uvabacabo pewetsia-exanaenëtsi pijajiwitonë towabetatsi. Toconibabiatsi. Petoconibabecujinaetsi, cobesa nawiatsia-exanalatsi. ⁴Itsia, uvabacabo pexainaenë icatsia itoroba itsanë, pijajiwitonë, petsicobetsatsinexatsi. Bajaraponë-ata icatsia tomatajorobiaxuabatsi. Pibisiacuenia tobijatanetsi. ⁵Itsia, icatsia uvabacabo pexainaenë itoroba itsanë, pijajiwitonë. Bajaraponë jane baja tobeyaxuabatsi. Bajaraxuacujinae, icatsia itoroba itsamonae. Bajarapamonaejajuwënëwë itsamonae tosaquibabiatsi. Itsamonae tobeyejebatsi. ⁶Abaxë uvabacabo pexainaenë icatsia pitorobinexa, caenë tonacopatatsi. Pexënato, bitso piasiwänë. Nexata jane baja, pexënato itoroba. Jamatabëjumaiti: «Taja-uvabacabo taneto-ewetsiwi tajajiw i aponetoyaiyatae-ata, itsia raeta, taxënato netoyaiyataenatsi», jamatabëjai. ⁷Itsia, uvabacabo peto-ewetsiwi pexënato-ata, apotoyaiyataetsi. Itsa wajënaetane pexënato penajetarucajawa, bajarapamonae najumaiti: «Mara ponëje paxa pewënamuto canacopatsipa mapa-uvabacaboje. ¡Naxatsia! Beyaxuabianatsi. Nexata, waxaitsi waja-uvabacabo tsane», najai bajarapamonae. ⁸Nexata, icatsia uvabacabo pexainaenë pexënato-ata towaetabatsi. Tobeyaxuabatsi. Petëpaenë xuabatsi bajarapa-uvabacabopënyabelia.

⁹»¿Demeta nexata xua exanaena uvabacabo pexainaenë pija-uvabacabo peto-ewetsiawabelia? Bajaraponë raja patsiarena. Werebiabiana daxita bajarapamonae. Nexata, icatsia itsamonae ewetsia-exanaena bajarapa-uvabacabo —jai Jesús bajarapamonaejawabelia.

¹⁰Icacia, Jesús nayabarajumaiti sacerdotewi penamatacaitorobiwawabelia, judíowi pecujarubiawabelia, judíowi pija-ancianowijawabelia-ata: —¿Apopalebimë tsaja pacuenia Dios pejumeliwaisibaxutota tajëwelia jumaiti Cristo yabara, iboto peliwaisicuenia? Jumaiti mapacueniaje:

«Bonacuenebiwi pa-iboto, naitaxutojematabuata, petsita-abejexaetsi. Itsia bajarapa-iboto naexana, penamatamotsi-iboto pebuatsinexa boyenepanatotsotota.

n 12:11 *penaitaxutojematsi-ibotomi*: Taema Sal. 118:22-23. Bajayatami, pacujinae israelitawi nacuenebanuta Dioso pijatemplobo, pepopeyanacua-ewetsinē Salomón-pijinē peponaponaacuenacabi, Dioso tocopata bajarapabo petocopiapatsinexatsi mapacuneje. Itsamonaē bo penacuenebiwi naitaxutojemata cae-iboto petsita-abejexaetsi. Itsiata, pa-iboto bo penacuenebiwi naitaxutojemata picani, itsamonaē juya buata bajarapa-iboto pepopenamata motsitaxunaeta boyenepanatotsotota. Bajarapacuenia Dioso bo penacuenebiwi tocopiapatsia-exana, pecuene-itajëtsinexa Cristo pepo-ayaijamatabëcuenenē penacopatsinexa jiwi naitaxutojematsi-atatsi.

Jesús bajarapacuenia pejumecanawitsijawata, bajarapamonae jamata-bēcuenenabenajaca. Nexata, jamatabējumaitsi: «¡Xaniawaetsia baja Jesús panejumecanawiata!», jamatabėjai.

**Jesús yapētaeya-exana jiwi petēpaecujinae,
pacuenia jinawanapaejitsia icatsia itsa asaē**

(Mt 22:23-33; Lc 20:27-40)

¹⁸ Saduceowiyajuwēnēwi^o pata Jesús-jawaberena, peyanijobinexa jiwi icatsia piasaējawanexa petēpaecujinae, tsipaji apojumexaniatae jiwi petēpaecujinae icatsia piasaējawanexa. Nexata, bajarapamonae imoxoyorenatsi Jesús liwaisi-ējēbiaya peyanijobinexatsi. Jumaitsi mapacueniaje:

¹⁹—Necujarubinē, Moisés-pijinē bajayata wajanacatoyaquinaeliwaisi, jumaitsi mapacueniaje: «Ponē pepomatapijinē pepuapenacojiobinē baja, itsa tēpa pexi xainaenejewa, nexata juyapijinē bepita pematapijinēmi pewēnamuto pijawacowēwami, juyapijinē pexainaenexa pexi bajarapowajawabelia pematapijinēmi pexicuenia petāenexa daxitajiwi»,^p jai Moisés-pijinē bajayata wajanacatoyaquinaeliwaisita. ²⁰Nexata, jinawanapa ēnacaemonae siete ponēbeje. Pepomatapijinē copiaya nacojioba. Bajaraponē pijawa wecuatēpa, pexi xainaenejewa. ²¹Nexata, pematapijinēmi pepēnarucaenē icatsia pita bajarapowa. Nexata, icatsia bajaraponē-ata tēpa, pexi xainaenejewa bajarapowajawabelia. Nexata, icatsia itsanē acueyabinē pita bajarapowa. Bajaraponē-ata icatsia tēpa, pexi xainaenejewa bajarapowajawabelia. ²²Bajarapacuenia daxitatēpa siete ponēmibeje, bajarapowa pepitaponaewi. Itsiata, itsanē-ata pexi apoxainae bajarapowajawabelia. Belia baja, bajarapowa-ata tēpa baja. ²³Pamatacabi Dioso icatsia asaēya-exanaena petēpaewimi, bajarapasieteponēmibejeyajuwēnēwijawata ģdetsa nexata ponē canacopatsiana bajarapowami, penacojiobaponaexae caewajawabelia? —jai saduceowi Jesús-jawabelia.

²⁴Nexata, Jesús jumaitsi bajarapamonaejawabelia:

—Paxamē xaniawaetsia apopayapētaemē pacuenia Dioso pejumeliwaisi-baxutota jumaitsi petēpaewi yabara. Bijiaya pacanaējētamenua Dioso daxitacuenē pecuenecaējēpaenētsicuenē. Bajaraxuata, jamatabēcuenenawēxaniabiaya paneyanijobame: «¿Detsa ponē pitsiana bajarapowa?», panejamē.

²⁵Pamatacabi raja petēpaewimi Dioso icatsia asaēya-exanaena, caejiwi-ata aponacojiobi baja tsane, pebi, petiriwa-ata. Nacojiobinejewa jinawanapaena athēbētatsia, pacuenia āngelewi. ²⁶Itsa pepacuenē paxamē paneyanijobame Dioso icatsia piasaēya-exanaejawanexa petēpaewimi, nexata pacatsipae-bianatsi. Paxamē xaniawaetsia apopayapētaemē pacuenia bajayata Moisés-pijinē peyaquinaebaxutota jumaitsi. Bajarapabaxutota, nacayapētaeya-exana pacuenia Moisés-pijinē Dioso barēcuaicuaijaitsi tsiquirinaemēyo petajueyecaecotiajawawerena. Nexata, pepuatēpae Abraham, Isaac, Jacob-ata, bajarapamonae yabara bajayata Dioso jumaitsi Moisés-pijinējawabelia

o 12:18 *Saduceowiyajuwēnēwi*: Daxita saduceowi apojumexaniatae jiwi petēpaecujinae icatsia piasaējawanexa. Fariseowi juya jumexaniatane jiwi petēpaecujinae icatsia piasaējawanexa.

p 12:19 *pematapijinēmi pexicuenia petāenexa*: Bajarapapexi canacopatsijitsia pematapijinēmi pewetsitaxunaeminexa pijajiwituatujēta, pecobecowējawanē, pija-iranē-ata. Taema Deut. 25:5-10.

mapacueniaje: «Xanë raja pija Diosonë tsaponaponae Abraham, Isaac, Jacob-ata»,^q jai Dioso Moisés-pijinëjawabelia bajayata bajarapamonaemi yabara. ²⁷Bajarapacuenia Dioso pejumaitsixae, nayapëtane bajarapamonaë bajayata tēpae-ata, Diosowecua apopenaxuabijawa. Aeconoxae-ata, bajarapamonaë Dioso yajawajinawanapa athëbëtatsia. Bajaraxuata, paxamë ita pajumaitsimë: «Petëpaewi rabaja petëpaecujinae, icatsia apo-asäë tsane», ita pajamë, pinijicuenia pajamatabëcuenenawëxaniabame —jai Jesús saduceowijawabelia.

**Paliwaisi bitso jiwi bejumecowënëta daxita Dioso
pitorobiliwaisianë matatoxenetsia
(Mt 22:34-40)**

²⁸ Xuacujinae, itsanë, judíowi pecujarubinë, pata Jesús-jawaberena jamatabëcuene-ëjëbiaya peyanijobinexa. Bajaraponë picani jumentane Jesús xaniawaetsia pejumecanawiataponaejawa saduceowijawabelia. Nexata, bajaraponë jumaitsi Jesús-jawabelia:

—Dioso pitorobiliwaisianëyajuwënëjawa, ¿detsa paliwaisi bitso jiwi bejumecowënëta itsaliwaisianëwecua? —jai.

²⁹ Jesús nexata jumecanawiata bajaraponëjawabelia. Jumaitsi:

—Matatoxenetsia paliwaisi bitso jiwi bejumecowënëta daxita Dioso pitorobiliwaisianëwecua, jumaitsi mapacueniaje: «¡Paxamë, Israel-pijinë papemomoximë, pajumetaema! Caenë rabaja Dioso Petuxanenë. Bajara-ponëwecua ajibi itsanë Dioso. ³⁰¡Nexata, bajaraPonë pa-asiwamëre daxita panejamatabë-ëthëtojawawetsina, daxita panejamatabëcueneta, daxita panenajamatabëxainaesaëta, daxita panesaëta-ata!»,^r pejailiwaisi, bitso jiwi bejumecowënëta daxita ita pitorobiliwaisianëwecua. ³¹Bajaraxuacujinae, pecotocaewiliwaisi, bitso jiwi bejumecowënëta, mapejumaitsiijumeje: «¡Pa-asiwamëre itsajiwi-ata, pacuenia paxamë panijacuata pana-asiwamë!»,^s pejailiwaisi. Ajibi rabaja itsaliwaisi, paliwaisi bitso jiwi jumecowënëtsijitsia —jai Jesús judíowi pecujarubinëjawabelia.

³² Nexata, icatsia judíowi pecujarubinë jumaitsi Jesús-jawabelia:

—Necujarubinë, xaniajamë rabaja pacuenia jumaitsimë. Caenë tsaena Dioso ponapona. Ajibi tsaena pematatsënëa itsanë Dioso. ³³Biasiwa tsawana-apaetsi Dioso, daxita wajajamatabë-ëthëtojawawetsina, daxita wajanajamatabëxainaesaëta, daxita wajasäeta-ata. Biasiwatsi itsajiwi-ata pacuenia waxaitsi wajuacuta nasiwatsi. Daxita bajaraxua ita jumecowënëtsi, bitso nacatonamatamota, dajubi wajatajuitabiabijawawecua Diosojawabelia —jai judíowi pecujarubinë.

³⁴ Jesús ita jumentane xaniawaetsia pejumecanawiatsijawatsi, jumaitsi bajaraponëjawabelia:

—Tsiquirijawayo catosajina Diosojawabelia nesiwanajamatabëcueneco-patsinexa, nejonejawanexa Dioso pijajiwi peyanacua-ewetsinacujawabetsia —jai Jesús judíowi pecujarubinëjawabelia.

Bajaraxuacujinae, itsajiwi-ata apojaitsitsi pematatsënëa liwaisi peyanijobijawata, pejamatabëcuene-ëjëbinexatsi.

Jesús yapëtaeya-exana pacuenia Mesías ayaijamatabëcuene xaina nacua-ewetsinë, David-pijinëwecua, naexanae-ata pemomoxiyajuwënëwata

(Mt 22:41-46; Lc 20:41-44)

³⁵ Jesús pecujarubaponaponaejawata templobota, pijacuata nayabaraju-maitsi mapacueniaje:

—Judíowi pecujarubiwi pacacujarubabiaba, Dioso athëbëwet-sica pitorobinëtsica yabara mapacueniaje: «Cristo raja itsa patsiana, David-pijinë pemomo tsane», pacajai tsabiabi. ¿Xaniajai meta bajara-paliwaisi? ³⁶ Bajarapaliwaisi yabara, Dioso pejumeliwaisita, Salmo-baxutota, nacayapëtaeya-exana xua David-pijinë bajayata tajëwelia jumaiti Cristo yabara, Espiritu Santo pejamatabëcueneta. Jumaiti mapacueniaje:

»Petuxanenë Dioso jumaiti tajaTuxanenëjawabelia:

‘¡Ecare abaxë tacujuanenia, wecatsiwajënaecuenene-amoneyabianatsi copiaya daxita nijawajabitsaë, nitorobicuenia pecajumecowënëtanapanexa!’,³⁷ jai Petuxanenë Dioso tajaTuxanenëjawabelia», jai bajayata tajëwelia David-pijinë mapacueniaje Cristo yabara.

³⁸ »Nexata, David-pijinë bajayata Cristo yabara pejumaitisixae: «Tajatuxanenë», pejaixae, yapëtanetsi David-pijinë apopemomo. Saicaya baja cajena Dioso pexënato —nayabarajai Jesús, judíowi pecujarubiwi pecanaëjëtsinexa Cristo Dioso pexënato cuene. Nexata, jiwibitsaëtoxaneto Jesús pejumetae-witsi jumebarëyatanetsi.

Jesús muxujioba pijajiwi pecuenejëpaeyaniwa judíowi pecujarubiwi, peyajawananeconitsiyaniwa Diosojawabelia

(Mt 23:1-36; Lc 11:37-54; 20:45-47)

³⁸ Jesús orijibia pecujarubaponaponaejawata, muxujioba jiwi ayaibitsaëto-xanetojawabelia, pijajiwi jawabelia-ata. Jumaiti mapacueniaje:

—¡Xania! ¡Panayajiwitaema, panecunejëpaeyaniwa judíowi pecujaru-biwi pexanaecuenene! Bajarapamonae jitsipabiaba piapijawanë pejumaji-nawanapaejawa tomaratuatuajëjawa, jiwi peyaiyataenexatsi. Jitsipabia-banua bitso yayiataeya pebajacobijawatsi callejawa. ³⁹ Itsa najoneyabiaba judíowi pijasinagogabonëjawa,⁴⁰ itsa napatabiaba fiestajawa-ata, jitsipabiaba pe-enaenexa pexaniawirijawanëta. Nexata, natsi-itapetabiaba pe-enaenexa peyaiyataewitsi petsinubijawanëta. ⁴⁰ Bajarapamonae yamaxë-itojorobiaya wecuanotabiabanua pamonajiwi pewecuatëpaewanëtsi pecobecowëjawaxi. Pinijicuenia itajara wajëcabiaba Diosojawabelia. Itsiata, pepopexaniajai-jamatabëcueneta apowajëcabiabi. Bajarapacuenia exanabiaba jiwi saya petaenexatsi Dioso bitso bepejumecowënëtsiwi. Nexata, bajarapamonae bitso pinijicuenia naneconitsia-exanaenatsi, pamatacabi daxita pijaneconi pexainaewi Dioso naneconitsia-exanaena —jai Jesús judíowi pecujarubiwi yabara.

t 12:36 Taema Sal. 110:1. u 12:39 pijasinagogabonëjawa: Bajarapacuenia judíowi wënërubabiaba penacaetuatsibo, itsajota nacujarubabia Dioso peliwaisi caesábado canacujitsia.

Pamona pewecuatëpaewatsi pa-ofrenda rajuta

Diosojawabelia, tonamatamotatsi

(Lc 21:1-4)

⁴¹ Itsamatacabi, Jesús pe-ecaejawata templobota, cobetaeyeca jiwi palata pejobaponaejawa ofrendapijicajonita. Ayaijawa palata pexainaewi, cae-jiwi canacujitsia, ayaijawa palata jepona. ⁴² Bajarajota, napata pamona pewecuatëpaewatsi, bepejiobiwa. Bajarapowa najia saya anijapalatanëyo-beje, piamatamobinëyobeje. ⁴³ Nexata, Jesús junata pijajiwi. Jumaitsi bajarapamonaejawabelia:

—Xaniajanë pacuenia pacatsipaebijitsiatsi. Mapowaje, pamona pewecuatëpaewatsi, bitso bejiobi. Itsiata, xuayo jia cajonita, perajutsinexa ofrenda Diosojawabelia, bajaraxuayo bitso Dioso siwajamatabëcuenebarëya daxita itsamonae pejobijawanë matatoxenetsia, ⁴⁴ tsipaji saya xua bajarapamona aponamatawenonae, ofrendacuenia rajuta Diosojawabelia. Itsiata, mapowaje, bepejiobiwa, daxitajawayomi pena-ewetsijawayotaminexa, rajuta ofrenda Diosojawabelia —jai Jesús pijajiwijawabelia.

Jesús tajëwelia wajunupaeba xuanë copiapatsijitsia, pamatacabi itsa baja

imoxoyo pewajënae nacua pecopiarucaejawanexa

(Mt 24:1-51; Lc 21:5-36; Lc 17:22-24)

13 ¹ Itsa baja Jesús, pijajiwi yajawa, pitsaparena templobowecua, pijajiwiyajuwënënë jumaitsi Jesús-jawabelia:

—¡Tajatuxanenë, jica, nataema mapaboxanetonëje, pa-ibotoxanetonëta catsananuba bajarapabonë! —jai.

² Nexata, Jesús tajëwelia jumaitsi pijajiwitonëjawabelia:

—Daxita raja mapaboxanetonë tanemeje, itsamatacabi, itsanacuapijiwi penetsianica irabetsica. Bajarapabonëmi pecatsanae-ibotoxanetonëmi, cae-iboto-ata apobocae tsane” itsa-ibotojumawereca —jai Jesús tajëwelia pijajiwitonëjawabelia.

³ Bajaraxuacujinae, Jesús, pijajiwi yajawa, pona Olivobacabotsutojawabelia. Nexata, petsutojumata pe-enaewata, taeyena templobo canacujitsijawalia. Nexata, Pedro, Santiago, Juan, Andrés-bana, pija-epatojawata yanijoba Jesús-jawabelia. Jumaitsi:

⁴ —Patajatuxanenë, pajitsipajë patanetsipaebijawamë patayapëtaenexa pae-patatota copiapatsijitsia xua wajunupaebame. ¿Detsa peneta pitsicuene pataenajë xua jumaitsimë pecopiapatsijawanexa templobo yabara? —jai bajarapamona.

⁵⁻⁶ Jesús nexata tajëwelia wajunupaeba pacuenia copiapatsijitsia mapanacuataje. Jumaitsi mapacueniaje:

v 13:2 *apobocae tsane*: Judíowi apopecopiapitsixae Jesús peyanacua-ewetsinexatsi Cristocuenia, nexata wai 70 d.C.-jawata, bejamatabë 47 pawai-beje Jesús pecobematabiabarutsicujinae cruzata, naneconitsia-exanaeya Dioso tocopatatsi judíowi pijawajabitsaë petsimaxëpatsinexatsi. Pecuene-amoneyabicujinaetsi, pijawajabitsaë pepacuene tobijianatsi Dioso pijatemplobomi. Irajawabereca penetsica daxita pecanacuenebi-ibotonëmi. Nexata, itaxutejema bobena bajarapataxunaeta. Tobijianatsinua Jerusalén tomara. Capitsapaeya-exananua judíowi nacayajatsiaya pejinawanapaenexa daxitanacuanëjawawa. Matapania 1948-waita, judíowi taxuxuaba icatsia pepataponanexa pijanacuamijawaberena, 1.878 pawai-beje pecapitsapaeya-exanaecujinaetsi.

—¡Xania baja! ¡Panayajiwitaema! ¡Pëtsa panacopatame itsajiwí-ata papecayamaxë-itojorobinexa, tsipaji raja peyamaxë-itojorobiwinexa ayai-bitsaëto pataponaena bexanë itajara tsane! Najumetsënëtsiaya jumaitsi tsane: «Xanë raja Cristonë, Dioso athëbëwetsica tane-itorobinëtsica, pija-jiwi tayanacua-ewetsinexa», jai tsane. Bajarapacuenia jiwi, ayaibitsaëto yamaxë-itojorobiana.

⁷»¡Pawëñliwaisitae-atamë tsane wajabitsaë pexanaejawa imoxoyonacua-nëjawa, tajënacuanëjawa-ata, itsiata, pëtsa pajunawame! Bajarapeneta itsi tsane mapanacua pewaterewerecaewajënaeje. Itsiata baitsi jane, mapanacuaje bepíjia abaxë apowerewerecajuni tsane. ⁸Mapanacuaje pewaterewerecaewa-jënae peneta copíaya itsawiriawi nabena itsawiriawijawabelia. Itsanacuanë-píjiwi píjina nabena itsanacuanëpíjiwijawabelia. Ira ayaicuenia najëbiana nacuanëjawa. Ayajaniiboxaneto najetarucaena nacuanëjawa. Daxita bajara-pacuenie itsa pataename, saya abaxë taxuxuabaponaena piayaicueniejawanë. Pacuenia petiriwa, ajenã itsa wixaenotatsi, apotaetsi penacueto, bajarapíjina itsi tsane panetaeponaejawata xuanë copiapataponaena. Abaxë itsiata, mapanacuaje apocopiaruca tsane.

⁹»¡Nexata, paxamë xania panayajiwitaename, tsipaji raja xanë patajaji-wixaemë, tomara pewetsiwijawabelia pacacaponabiabiana! Pacajumaconi-babeyabiabiana judíowi pijasinagogabonëjawa.» Pacanubiananua nacua-ewetsiwi, presidentewi-ata, pitabarata. Bajarapacuenia paca-exanae-ata tsane, pacacuenecaëjëpaena panetsipaebinexa xanë taliwaisi. ¹⁰Pecopia-patsiwajënaeya mapanacua pewaterewerecaejawa, pacatsicarubena taliwaisi panetsipaebanajetarubenaenexa daxitanacuanëpíjiwijawa, jiwi pecapane-paeliawaisinexatsi. ¹¹Bajarapacuenia pane-exanawanapaejawata, itsamo-nae pacataicaena papecaneconitsinexa nacua-ewetsiwijawabelia. ¡Pëtsa pajamatabëcuenebëjamë panenayajiwicuaicuaijainexa bajarapanacua-ewetsiwijawabelia! Bajarapaepatota Espíritu Santo pacacuaicuaijiaya-exanaena paliwaisi pajumaitsimëjitsia bajarapamonaejawabelia. Paxamë raja, panejamatabëcueneta apopacuaicuaijamë tsane. ¹²Bajarapamatacabi patajajiwixaemë, panacaemonae-atamë, itsajiwí panijamonaejiwí-ata paca-canajetsiana nacua-ewetsiwijawabelia papecabeyaxuabinexa. Pane-axa, pane-ena, panexi-ata, pacacanajetsiana nacua-ewetsiwijawabelia papeca-beyaxuabinexa. ¹³Daxitajiwí paca-itoya tsabiabi tsane, patajajiwixaemë. Pajiwí itsiata ajamatabëcuenesaë tsane Diosojawabelia pitaxutuajamatejema-jawa nacua pecopiarucaejawabelianexa, bajarapajiwí Dioso capanepae-natsi —jai Jesús pijajiwijawabelia.

¹⁴Icatsia, Jesús tajëwelia wajunupaeba papiayaicuenie itsamatacabi copia-patsijitsia Jerusalén tomarata. Jumaitsi mapacueniaje:

—Profeta Daniel-píjinë tajëwelia wajunupaeba papibisiacuenejawa^x nucaejiitsia templobota, panijatomara pewaterewerecaewajënaeya. Paxamë itsa pataename bajarapapibisiacuenejawa penucaejawa templobota, pata-xunaeta picani apobenucae, nexata caecuenia parëcëpecaename. (Pajiwí

w 13:9 *pijasinagogabonëjawa*: Bajarapacuenia judíowi wëñërubabiaba penacaetuatsibo, itsa-jota nacujarubabia Dioso peliwaissi caesábado canacujitsia. x 13:14 *papibisiacuenejawa*: Xuanë judíowi pepacuenie itajunawijitsia. Taema Dan. 9:27; 11:31; 12:11.

lebiana mapaliwaisije, yapêtaena papibisiacuenejawa wajunupaeba mapaliwaisitaje.) ¡Bajaraxuata, Judea nacuata pejinawanapaewi-ata, itsa wênê-liwaisitaena, pêtša nubena! Bepijiayo rêcêpecaena ibotsutonêjawabelia.

¹⁵ ¡Pajiwi pijabojumata athêbëyo ecaya, pêtša runaica pijabojawabelia, pejonenexa pecobecowê pejutsinexa! ¹⁶ ¡Pajiwi pijinia nacuenebaponapona pijapabita, pêtša nawiata pijaboyabelia, pejutsinexa penaxatatsi-jawa! ¹⁷ Bajarapamatacabi, bitso bejiobi tsane peyacotajinawanapaewaxi, papetiriawi-ata mito-apaenacuetoxi isajinawanapa, tsipaji to-ayapêbejetsi tsane bepijiayo penajetabijirawijawa. ¹⁸ ¡Bajaraxuata, tajêwelia Diosojawabelia pawajêcare emarapaematacabita papecatocopiapatsiyaniwa bajarapapiayaicuene, ¹⁹ tsipaji raja bajarapapiayaimatacabita bitso jiwi bejiobi tsane! Pabejiobicuene abaxê jiwi caeto-ata apotae Dioso nacua pexanaecujinae, mapamatacabijawaberena-ataje. Bajaraxuacujinae, pematatsênêa apotae tsane bajarapitsijunawicuene. ²⁰ Dioso epatua itsa apoyatu-ucutsi tsipae, bitso jiwi nabejiobitsiaya pejinawanapaematacabianêminexa, caejiwi-ata apo-asae tsipae. Itsiata baitsi jane, Dioso piasiwaxae pijajiwi, pitapetsiwi, epatua wecuayatu-ucutsiana bajarapamatacabi.

²¹ »Nexata, itsajiji yamaxê-itojorobiaya itsa pacajumaitsi tsane: «¡Pataema! Mara Cristo nucaje» itsa jume, «Bajarajota nuca Cristo», jitsa pacajai tsane, pêtša pajumexaniataneme! ²² Bajarapamatacabi, itsamonaenaitajêtsiana, apopexaniajaiwi, Cristo pewênêta, Diosojumepae-biwi pewênêta-ata. Itsiata, jemajai tsane. Bajarapamonae itajara tsitaexanaena pinijicuene pexanaejawanê, jiwi saya peymaxê-itojorobinexa. Belia, paxamê-ata Dioso papijajiwimê, papeca-itapetsiwiitsi, jaitsiapapecayamaxê-itojorobinexa. ²³ ¡Xania baja tsane! Xanê rabaja pacatsipaebatsi tajêwelia daxitacuene panenayajiwitaenexa —jai Jesûs pijajiwijawabelia tajêwelia pewajunupaebijawata pacuenia itsamatacabi mapanacuataje copiapatsijitsia.

Jesûs tajêwelia nawajunupaeba icatsia pepatsijawanexatsica

(Mt 24:29-35, 42, 44; Lc 21:25-36)

²⁴ Jesûs tajêwelia nawajunupaeba pijajiwijawabelia itsamatacabi icatsia pepatsijawanexatsica yabara. Jumaitsi mapacueniaje:

—Jiwi nabejiobitsiaya pejinawanapaematacabianê pepanepaecujinae, jiwi taena athêbêtatsia pecujunawicuene. Matacabipijijuameto, merawipijijuameto-ata aitaquiri tsane. ²⁵ Tulupu-ata othopaenica irabetsica. Daxitacuene, xua rubena athêbêtatsia, najêabiana. Xaniawaetsia aporubenaen tsane. ²⁶ Nexata bajarapaepatota, Xanê, Daxitajiwi Pematapijinênê, jiwi netaena athêbêwetsica itarêrêbota tanajetarucaejawa, daxitacuene ta-ewetsinexa. Taniweniwenacotia yajawapatsianicajê. ²⁷ Bajaraxuacujinae, ángelewi itorobianajê, tanetocaetuatsinexa daxitanacuanêpijiwi xanêjawa-berena, pamonae tajajiwi, Dioso pitapetsiwiitsi.

²⁸ »¡Pacanaêjêre pacuenia itsi higueranae! Pacujinae pemaxëranajawa pejanabaxu pitsapa, payapêtaneme wai baja imoxoyo pewajênae pejonejawanexa. ²⁹ Bajarapijinia pacuenia, peneta itsa pataenename pecopiapatsijawa, xua yabara pacatsipaebatsi, nexata payapêtaenename imoxoyo baja tawajênae tsane tapatsijawanexatsica. ³⁰ Xaniajanê pacuenia pacatsipaebijitsiatsi.

Pamonae taena pecopiapataponaejawa patacawajunupaebijawa, bajarapamonae apotēpae tsane copiarucaenejewa daxita xuanē tajēwelia wajunupaebajē pecopiapatsijawanexa. ³¹Itaboxo, ira yajawa, werewerecaena. Itsiata baitsi jane, tajumeliwaisi apowerewerecae tsane.

³²»Itsajiwi-ata apoyapētae pamatacabita, paepatota-ata, copiapatsijitsia daxita xua yabara tajēwelia pacatsipaebatsi. Athēbēpijiwi-ata, ánglewi, apoyapētae. Xanē, Dioso pexēnato-atanē, apoyapētaenē. Caenē taxa Dioso yapētane. ³³¡Nexata, xania baja tsane! Daxitamatacabita saya panecopia-ewetawanapaename, tsipaji raja apopayapētaemē tsane paepatota patsijitsianētsica. ³⁴Pacuenia bo pexainaenē, tajēnacuayabelia pepo-naewajēnaeya, pijabo ewetsia-exana pijajiwi, bajaraxanē-ata itsinē tsane. Bajaraponē pijajiwi, caejiwi canacujitsia, rajutapona petocanacuenebawanapaejawanexatsi pecowēta. Nexata, pijajiwi yajuwēnēnē itoroba baupa peto-ewetabiabinexatsi, pamatacabita pata petobaupatsinexatsi. ³⁵Nexata, paxamē-ata bajarapacuenia panecopia-ewetawanapaename matapania tapatsimatacabitsicajawabelianexa, tsipaji raja apopayapētaemē tsane pamatacabita patsijitsianētsica. Ajena meta merawijitsia, patsipajē. Itsa jume meta, patsipajē merawituatujēta. Belia meta, patsipajē matababiwēpata. Itsa jume meta, bajayacunua patsipajē. ³⁶¡Nexata baja, xania tsane! Daxitamatacabita saya panecopia-ewetawanapaename. Belia raja patsipajē paepatota apopanecopia-ewetsimē, jemata patacacaxitarabiyaniwa panejamatabēcuenemajitsijawata. ³⁷Paliwaisi pacatsipaebatsi paxamējawabelia, daxitajiwinexa jumaitsinē. ¡Daxitamatacabijebi jamatabēcuenē-aitawaya panecopia-ewetawanapare! —jai Jesús pijajiwi jawabelia.

Jesús pijawajabitsaē pacuenia picani jamatabēwaetabatsi

(Mt 26:1-5; Lc 22:1-2; Jn 11:45-53)

14 ¹Itsa abaxē sajina anijamatacabibeje pejonejawanexa Pascuafiesta, pafiestajawa-ata judíowi baxane levadurata matajērēabinejewa pexanaepan, bajarapafiestajawatabeje sacerdotewi penamatacaitorobiwi, judíowi pecujarubiwi-ata, najumejaita picani Jesús pewaetabinexatsi. Canaējēta picani pewaetabinexatsi penajumetsēnētsiliwaisita, pebeyaxuabinexatsi, bajarapafiestabeje^v petaxuxuabiwajēnaeya. ²Bajarapamonae najumaitsi:

—Fiestajawa meta abaxē apobewaetabitsi, jiwi wajanacaisacueniabiyaniwa —najai bajarapamonae.

Petiriwa tsimata-epana Jesús petuxujuwi-aceiterata

(Mt 26:6-13; Jn 12:1-8)

³Bajarapamatacabijawa, Jesús ponapona Betania tomarata, Simón pijabota, bajayajebi bitso peperabētsabanaenēmi. Nexata, Jesús

y 14:1 *bajarapafiestabeje*: Bajarapafiestabeje judíowi taewanapabiaba 8 pamatacabibeenexa daxitata. Penamataxainamatacabita taeyabiaba Pascuafiesta, merawituatujēta. Xuacujinae, orijibia itsa 7 pamatacabibeenexa, judíowi xaeyabiaba levaduramatajērēabinejewa pexanaepan-bēanē, caepexaejawa canacujitsia. Daxita bajarapa-ocho pamatacabianējawa, judíowi xaeyabiaba levaduramatajērēabinejewa pexanaepan-bēanē. Anijafiestabeje-ata picani, itsajawata becafiestacuenia wēnējoneyabiaba. Taema Lev. 23:4-8.

pexaeyecaejawata mesata, petiriwa cobena-imoxoyorenatsi petuxujuwi-aceitera, nardowënëra, alabastrobotellabëta peje-aceitera. Bitso penamata-motsira. Nexata, bajarapowa yawëtoxobiaxuaba bajarapatuxujuwi-aceitera. Jesús bajarapa-aceiterata tsimata-epanaicatsi. ⁴Bajarajota, itsamona pena-enaewi itsa taeyena Jesús petsimata-epanaejawatsi, jamatabë-anaepanareca. Ēpamonaenajumaitsi tsenae:

—¿Detsa xuajitsia saya xuaba bajarapacuenia maporaje? ⁵Canajetsipa rajane. Nexata, matamopitsipa trescientos padenariobeje matatoxenetsia. Bajarapapalata rajutsipa bepejiobiwi, peyawenonaenexa —najai tsenae, cuenabaracuaicuaijaiya bajarapowa yabara.

⁶Nexata, Jesús jumaitsi bajarapamonaejawabelia:

—¡Pacuenecopare saya! ¡Pëtsa matawëjëa pajamatabë-itonotame! Bajarpowa piabejecuene aponeto-exanae. Biji rajane, pexaniacuene neto-exana. ⁷Daxitamatacabi raja bepejiobiwi payajawajinawanapame. Nexata, pamatacabi pajitsipame, pexaniacuene pato-exanaename. Itsiata baitsi jane, xanë daxitamatacabi apoponaponaenë tsane paxamëjawata. ⁸Mara papetiriwaje pexaniacuene neto-exana pacuenia baja cuenecaëjëpatsi. Bajarapacuenia taneto-exanaejawata, pewajënaeya neperabëxaniawaeta, itsamona tane-mëthëtsiwajënaeya. Baitsi, pacuenia jiwi batsiperabë-epana petuxujuwi-aceitera petëpaejiwi, peperabëxaniawaetsinexa pemëthëtsiwajënae, bajarapacuenia neto-exana mapowaje. ⁹Xaniajanë pacuenia pacatsipaebijitsiatsi. Daxitanacuanëjawa tajajiwi itsa paebanajetarubenaena pexanaliwaisi, jiwi tacapanepaeliwaesinexa, wajunupaebabiabiananua pacuenia exana xanëjawa-berena mapapetiriwaje —jai Jesús pijajiwi jawabelia.

**Jesús pepëya yajumejaitatsi Judas pecanajetsinexatsi
pijawajabitsaë pecobeyabelia**

(Mt 26:14-16; Lc 22:3-6)

¹⁰Jesús pijajiwi doce ponëbejeyajuwënënë, Judas, Iscariote, pona sacerdotewi penamatacaitorobiwijawabelia. Jesús jane baja, canajeliatsi pebeyaxuabinexatsi sacerdotewi penamatacaitorobiwi pecobeyabelia.

¹¹Bajarapamonae itsa tane bajarapacueni, barëya, palata perajutsinexa Judas-jawabelia. Nexata jane baja xuacujinae, Judas naitaxutocaewetapona-pona, peyapëtaenexa paepatota toyapëxanepanatsi, perajutsinexa jane baja Jesús bajarapamonae pecobeyabelia.

Jesús barëxane pijajiwi pecopiarutsipexaejawa, pebeyaxuabiwajënaeyatsi

(Mt 26:17-29; Lc 22:7-23; Jn 13:21-30; 1Co 11:23-26)

¹²Anijamatacabibejecujinae, junua jane baja pafiestajawa judíowi baxane levadurata matajërëabinejewa pexanaepan. Bajarapamatacabi, ovejaji beyabiaba, pexaenexa Pascuafiestamatacabi. Nexata, Jesús yanijobatsi pijajiwi.

—¿Detsa belia jitsipame pataponaejawa, patacamitsa-exanaenexa pexaejawa, Pascuafiestamatacabi nexaenexa? —jai.

¹³Nexata, Jesús itoroba anijanëbeje pijajiwitonëbeje. Jumaitsi:

—¡Tomarabelia paponarebeje! Bajarajotalia, meracanalito pewëtacaranajetarucaenë pacaxitarabianamebeje. Bajaraponë papënanajetarucaenamebeje. ¹⁴Pabota joneyojopaena, bajarapabo pexainaenëjawabelia

pajumaitsimēbeje tsane: «Wajanacacujarubinē raja jumaitsi: ‘¿Detsa jota pēnyatu-ucutsibo eca, pabota tajajiwi barēxaejitsianē xua jiwi baxane Pascuafiestamatacabi?’, jai raja wajanacacujarubinē», pajamēbeje tsane bo pexainaenējawabelia. ¹⁵ Bjaraponē pacatsitajētsianabeje, athēbēabet-sia anija-irabeje pēnyatu-ucutsibojawa, ayai-ēnētuaatjē pexinaejawa. Bjarapabo-ēnēta daxitacuene xainaena. Nexata, wjaxaejawanexa bjarajotatsia pa-exanaenamebeje —jai Jesús pijajiwiwonēbejajawabelia.

¹⁶ Nexata jane baja, ponabeje. Patabeje baja tomarabelia. Caxitajarabeje daxita pacuenia Jesús jumaitsitsibeje. Nexata, xua jiwi baxane Pascuafiestamatacabi daxita Jesús pijajiwi pebarēxaenexa, bjaraponēbeje exana-beje jane baja. ¹⁷ Itsa baja merawijitsia, Jesús patajopa bjarajota pijajiwi, doce ponēbeje yajawa. ¹⁸ Daxita mesata pexaeyenaejawata, Jesús jumaitsi pijajiwiwajawabelia:

—Xaniajanē pacuenia pacatsipaebijitsiatsi. Caenē paxamēyajuwēnēnē, xanējawata pexaeyecaenē, necanajeta baja tajawajabitsaē pecobeyabelia —jai Jesús.

¹⁹ Nexata, Jesús pijajiwi bejamatabējiobireca. Caenē canacujitsia, Jesús-jawabelia yanjibapona.

—¿Xanē tsaja tsane? —jai tsaponae.

²⁰ Nexata, Jesús jumaitsi pijajiwiwajawabelia:

—Doce paponēmēbejeyajuwēnēnē raja. ¡Ponēbeje peneta caecuenia panajuacabajutsianajēbeje panbē platojawabelia, bjaraponē raja tsane! ²¹ Nexata, Xanē, Daxitajiwi Pematapijinēnē, tēpaenajē, pacuenia baja cajena xanē yabara Dioso pejumeliwaisibaxutota tajēwelia jumaitsi. Itsiata, ponē tajawajabitsaē pecobeyabelia necanajeta, bitso bejiobi tsane pinijicuenia. Bjaraponē meta itsa aponaexanae tsipae, bjarapacuenia aponecanajetsi tsipae. Nexata, bjaraponē aponaneconitsi tsipae Diosojawabelia —jai Jesús pijajiwiwajawabelia.

²² Nexata, pexaeyenaejawata Jesús pita panbē. Pexaniajamatabēcuene rajuta Diosojawabelia bjarapapan yabara. Xuacujinae, panbē epatsēnēquejeba. Rajuta pijajiwiwajawabelia. Jumaitsi:

—¡Paxaema! Mara tawitoje^z —jai.

²³ Bjaraxuacujinae, icatsia Jesús copajawata yapita pijajiwi pebarē-apaeranexa. Pexaniajamatabēcuene rajuta Diosojawabelia bjarapora yabara. Xuacujinae, pijajiwi bjarapora rajuta. Daxita bjarapora najua-apa.

²⁴ Jesús pijajiwiwajawabelia jumaitsi:

—Tanebeyaxuabijawata, tajana raja runaena, jiwi ayaibitsaētoxaneto pecapanepaenexatsi Diosojawabelia. Bjarapajana pejamatabēcueneta,

z 14:22 Mara tawitoje: Panbē apopeerabēto Jesús. Vinora-ata apojejana Jesús. Bjaraxua-beje saya nacatocuenecatane xua Cristo nacato-exana wajanacasiwatēpaejawata. Pacuenia pan pexanaenexa, jiwi sebiabiata piatajutaxunaeta, hornojawa, bjarapijinina pacuenia Jesús ayaicuenia bejiobia-exanatsi, wajanacapanepaenexa Dioso wajanacananeconitsia-exanaejawaminexawecua, wajanconijamatabēcuenē. Pacuenia uvacuaibarēmene jucabiaba vinoranexa, bjarapijinina pacuenia Jesús pejanarunaejawata, nacamotamatota daxita wajanecominimi. Nexata, pacuenia jiwi wēna-asaē tsawanapae pan/peri pexaejawata, bjarapijinina pacuenia jiwi jamatabēcuenē-aitawa Diosojawabelia, Jesucristo pejamatabēcueneta. Pacuenianua jiwi jamatabēcuenēbarēya piapaejawata piatanevinora, bjarapijinina pacuenia Jesús pijajiwi jamatabēcuenēbarēya, penajamatabēnapitsijawata Jesucristo petomatamotsijawatsi daxita pijaneconimi.

Dioso pejanacuenia najumecapanepaeya pacanajumeliwaisicajonena, pape-cacapanepaejawanexa. ²⁵Xaniajanë pacuenia pacatsipaebijtsiatsi. Xanë rabaja matawëjëa apo-apaenë tsane uvacuaira mapanacuataje. Matapania apaenajë Dioso peyanacua-ewetsinacuata, icatsia apaenajë pejanavinora — jai Jesús pijajiwijawabelia.

**Jesús yapëtaeya-exana Pedrojawabelia,
penayawajunuaxainaejawanexa pijajiwitonëcuene**
(Mt 26:30-35; Lc 22:31-34; Jn 13:36-38)

²⁶Jesús pijajiw barëna xëana Diosojumewajianë. Bajaraxuacujinae, Jesús pijajiw barëpona Olivobacabotsutojawabelia. ²⁷Nexata, bajarapatsutojumata Jesús jumaitsi pijajiwijawabelia:

—Daxita raja paxamë ajena, pamerawí, panexuabarëcëpecaename, tsipaji rabaja patanexuabarëcëpecaejawanexamë yabara, Dioso pejumeliwaisibaxutota tajëwelia jumaitsi mapacueniaje: «Beyaxuabianatsi raja oveja pewetsinë. Nexata, pija-ovejabitsaëto nacayajatsia rëcëpecaena», jai Dioso pejumeliwaisibaxutota paxamë yabara. Nexata, ajena pamerawí, tajawajabitsaë itsa newaetabiana tanebeyaxuabinexa, daxita paxamë panexuabarëcëpecaename. ²⁸Itsia baintsi jane, tatëpaecujinae icatsia asaënë tsane. Nexata, paxamë panewajënaeyabelia copiata ponaenajë Galilea nacuayabelia —jai Jesús pijajiwijawabelia.

²⁹Nexata, Pedro jumaitsi Jesús-jawabelia:

—Daxita mapamonaeje caxuabarëcëpecae-ata tsane, xanë cajena caejawa-ata apocaxuabatabajirawitsi tsane —jai.

³⁰Nexata, Jesús jumaitsi Pedrojawabelia:

—Xaniajanë pacuenia catsipaebijtsiatsi. Ajena rabaja, pamerawí, nania-naewëpata, anijajumebeje wacara pefiabiwajënaeya, nayawajunuaxainaname tajajiwitonëcuenemë. «Apoyapëtaenë cajena bajaraponë», jamë tsane xanë yabara acueyabi xuabeje —jai Jesús Pedrojawabelia.

³¹Itsia, Pedro ajumesaëya jumaitsi Jesús-jawabelia:

—Nebeyaxuabijtsia-ata tsane xamë yajawa, itsia cajena, aponayawajunuaxainanë tsane nijajiwitonëcuenenë —jai Pedro Jesús-jawabelia.

Daxita Jesús pijajiwí bajarapacuenia jumaitsi.

Pacuenia Jesús wajëta Diosojawabelia Getsemaníjawata, yabara peliwaissi
(Mt 26:36-46; Lc 22:39-46)

³²Jesús, pijajiwí yajawa, itsa pata Getsemaníjawata,^a jumaitsi pijajiwijawabelia:

—¡Pane-ewetenare abaxë majotaje tawajëtsi-epatoyo Diosojawabelia! —jai Jesús.

³³Nexata, Pedro, Santiago, Juan-bana, bajarapamatabëxëyo barëpona pesaicayojawabelia. Bajaraxuacujinae, Jesús bitso najamatabëxaina. Bejamatabëjiobireca. ³⁴Nexata jumaitsi pijajiwí, acueyabi ponëbejajawabelia:

—Xanë bitso pinijicuenia najamatabëxainajë. Tanajamatabëxainaejawa yatëpaëjitsianë. ¡Paxamë abaxë majotaje panacopabare!

a 14:32 *Getsemaníjawata*: Pa-olivobacabo eca bajarapatsutojumata, pewënë raja Getsemaní. Getsemaní itsa jai, «olivocuai pebarëmenecayajucaetaxunae», pejaijume.

Panaëcotawanapaename. ¡Pëtsa pamajitame! —jai Jesús pijajiwi acueyabi ponëbejajawabelia.

³⁵Nexata, Jesús, caenë, pewajënaeyabelia icatsia tsiquirijawayo pona-taba. Irataeya bocajunua pewajëtsinexa Diosojawabelia, petocopiapatsiya-niwatsi bitso ayaicuenia pebejibia-exanaejawatsi, paepatota pijawajabitsaë beyaxuabijitsiatsi. ³⁶Pewajëtsijawata Diosojawabelia, jumaitsi: «Axa, daxitacuene raja cacaëjëpa nexanaenexa. Bajaraxuata, cawajëtatsi picani tanewecua-ajibia-exanaenexamë tanebeyaxuabiyaniwa betajiobicieneta. ¡Pëtsa itsiata, neto-exaname xanë tajitsipaecuenia! Pacuenia xamë jitsipame, netocopatsianame», jai Jesús pewajëtsijawata.

³⁷Bajaraxuacujinae, Jesús nawiarena acueyabi ponëbeje pijajiwi-jawaberena. Caxitajaraba pemajitanubenaewi. Nexata, Jesús jumaitsi Pedrojawabelia:

—Simón, ¿pamajitanubename tsaja? ¿Apopacacaëjëpae tsabaja cae-epatoyo-ata pane-aitawatsenaenexa? ³⁸¡Pëtsa pamajitame! ¡Panaëcobare! ¡Pawajëre Diosojawabelia pibisiacuene pane-exanaeyaniwa, tsipaji raja dowathi pacajamatabëcuene-ëjëbiana! Paxamë picani panejamatabëcueneta pexaniacuene jamatabëpa-exanabiabame. Itsiata baitsi jane, apopajamatabëcuenesaëmë tsabiabi tsane pexaniacuene pane-exanabiabinexa —jai Pedrojawabelia.

³⁹Nexata, icatsia Jesús pona pecowëyabelia, pewajëtsinexa Diosojawabelia. Pacuenia copiata wajëta, bajarapacuenia icatsia wajëta Diosojawabelia.

⁴⁰Icatsia nawiarena pijajiwi-jawaberena. Caxitajaraba icatsia pemajitanubenaewi, tsipaji baja bitso itamajitsipana. Nexata, pijajiwi apoyapëtae pacuenia jumecanawiatsijitsiatsi.

⁴¹Icatsia, abaxë Jesús nawiata pecowëyabelia, pewajëtsinexa Diosojawabelia. Bajaraxuacujinae, acueyabi baja xuabeje pewajëtsicujinae, icatsia nawiarena pijajiwi-jawaberena. Jumaitsi pijajiwi-jawabelia:

—¿Abaxë tsaja tsiteca pamajitanubename? ¡Panaëcobare baja! Copiapata rabaja paepatota Xanë, Daxitajiwi Pematapijinënë, tanecopatsijawanexa pibisiacuene pexanaewi pecobeyabelia. ⁴²¡Panonobapunare baja! ¡Ponae-natsi baja! Imoxoyo rabaja najetaruca tajawajabitsaë pecobeyabelia tanecanajetsinënexa —jai Jesús pijajiwi-jawabelia Judas yabara.

Jesús jane baja waetabatsi pijawajabitsaë

(Mt 26:47-56; Lc 22:47-53; Jn 18:2-11)

⁴³Jesús pijawajabitsaë pewaetabiwajënaeyatsi, cuaicuajiai tsanucae pija-jiwi-jawabelia. Bajarapaepatota, patanajetaruca Judas, Jesús pijajiwi doce ponëbejeyajuwënënëmi. Jiwi pënanajetarubenatsi ayaibitsaëto-xaneto, Jesús pewaetabinexatsi. Bajarapamonaeyajuwënëwi itsamonae canajetarubena espadanë, naebonë-ata. Bajarapamonae itorobatsi sacerdotewi penamatacitorobiwi, judíowi pecujarubiwi, judíowi pija-ancianowi-ata.

⁴⁴Judas pebarërenawajënae bajarapamonae, copiaya baja cajena tsipaeba pacuenia yapëtaeya-exanaejitsia Jesús-cuene. Jumaitsi mapacueniaje: «Ponë raja peneta bajacobiaya itabaratsutsunexuabianajë, bajaraponë raja tsane Jesús. BajaraPonë pawaetabianame. Pacobecëtsianame xaniawaetsia. Nexata, panecobecëtsinë pacaponaeremena», jai baja cajena Judas

pematacanajetarucaewijawabelia pebarërenawajënaeya. ⁴⁵ Nexata jane baja, Judas itsa patanajetaruca, jumaitsi:

«Necujarubinë», jai. Jesús jane baja, itabaratsutsunetsi pebajacobijawata-tsi. Nexata baja, pematacanajetarucaewi yapëtane Jesús-cuene. ⁴⁶ Waeta-batsi jane baja. Cobecëtatsi xaniawaetsia.

⁴⁷ Bajarajota, Jesús pijajiwiyajuwënë^b pija-espada nawemarajonotaxuabina. Muxuyoropaebiaxuaba sacerdotewi pepopenamatacaitorobinë pijajiwi-tonë. ⁴⁸ Nexata, Jesús jumaitsi pewaetabiwitsijawabelia:

—¿Paxamë meta panetaneme betanacobetoxotsinë? Bajaraxuata, pacaponame espadanë, naebonë-ata, patanewaetabinexamë pacuenia pawaetababiabame penacobetoxotsinë. ⁴⁹ Xanë caematacabi canacujitsia Dioso pejumeliwaisi paxamëjawabelia pacatsipaebabiabatsi templobota. Itsiata, bajarapamatacabi apopanewaetabimë. Mara pacuenia panewaetabameje tanetocopiapatsixae baja pacuenia Dioso pejumeliwaisibaxutota bajayata tajëwelia jumaitsi xanë yabara —jai Jesús pewaetabiwitsijawabelia.

⁵⁰ Nexata jane baja, Jesús pijawajabitsaë pewaetabijawatatsi, daxita Jesús pijajiwi xuabarëcëpecatsi, pacuenia baja cajena Jesús jumaitsi tajëwelia pijajiwiyawabelia.

Pacuenia pewëjëato najetabijirawa, yabara peliwaissi

⁵¹ Pewëjëato^c pënanajetaruca Jesús pecaponaewitsi. Sábanata namata-quiona najetaruca. Nexata, bajarapamonae yasábanawaetabatsi. ⁵² Pewaeta-bijawatatsi, pewëjëato sábanana na-isinaxuaba. Najetabijirawa jumananë.

Jesús nutatsi judíowi penamatacaitorobiwi pitabarata, pijaneconi petocanaëjëtsinexatsi

(Mt 26:57-68; Lc 22:54-55,63-71; Jn 18:12-14,19-24)

⁵³ Jesús caponaliatsi sacerdotewi pepopenamatacaitorobinë pijaboyabelia. Nacaetuata bajarajota daxita sacerdotewi penamatacaitorobiwi, judíowi pija-ancianowi, judíowi pecujarubiwi-ata yajawa. ⁵⁴ Itsa baja Jesús caponaliatsi, nexata Pedro bajarapamonae pecowëya tajëyo najetaruca. Nexata, sacerdotewi pepopenamatacaitorobinë pijabo matatoyorotsia peyacaranatsijawa pijibaupajawalia, Pedro najoneya bopanabojawabelia, itsabelia Jesús cajunuatsi. Nexata, bajarapabopanabota, Pedro nanonopeca isotomuxuneneta templobopijipolicíawijawata. ⁵⁵ Nexata, bajarapabo-ënëtuatuajëta sacerdotewi penamatacaitorobiwi, judíowi pija-ancianowi, judíowi pecujarubiwi-ata yajawa, namata-enetsi nayanijoba. «¿Jipatsa yapëtane Jesús pibisiacuene pexanaejawa, paneconi yabara beyaxuabijitsiatsi?», najai tsaponae. Itsiata, Jesús pijaneconi apotocaxitajarabi, itsaneconi-ata. ⁵⁶ Itsamonae saya penajumetsënëtsiliwaisi paebe Jesús yabara. Itsiata, caeliwaisi najuapaebi-ata, najumejëpaeya apopaebi. ⁵⁷ Petaexae, pijaumematamobijawa copiaya pamonaë paebe, itsamonae juya nonobapuna, pepaebinxaxa

b 14:47 Jesús pijajiwiyajuwënë: Bajaraponë raja Pedro. Taema Jn 18:10. **c 14:51** Pewëjëato: Bibliabaxuto aponacayapëtaeya-exanaë ponë yabara jumaitsi. Itsiata, itsamonae peyakuinaewi Jesús penayabara jumaitsijawa yabara, nacayapëtaeya-exana Marcos, pijacuata penayabarajumaitsijawa.

penajumetsënëtsiliwaisi Jesús yabara. Bajarapamonaeyajuwënënë jumaitsi mapacueniaje:

⁵⁸—Paxanë raja, pamatabëxëyo panubenajë majotaje, pajumetaniji Jesús pejumaitsijawa mapacueniaje: «Xanë raja xuabianicajë^d mapatemploboje, jiwi pexanaebo. Acueyabimatacabita icatsia itsabo weretetsianajë. Jiwi apo-pexanaebo tsane», pejaijawa —jai penonobapunaewiyajuwënënë.

⁵⁹Itsia, daxita bajarapamona bajarpaliwaisi najumëjëpaeya apopaebi.

⁶⁰Nexata jane baja, sacerdotewi pepopenamatacaitorobinë nonotapuna bajarapamona pitabarata. Jumaitsi Jesús-jawabelia:

—¿Apoyapëtaemë tsaja itsaliwaisiyo-ata nejumecanawiatsinexa? ¿Xania-jai tsabaja pacuenia mapamona caneonitsiajumaitsi? —jai sacerdotewi pepopenamatacaitorobinë Jesús-jawabelia.

⁶¹Jesús itsia moya. Apojumepitsi cajena. Nexata, icatsia sacerdotewi pepopenamatacaitorobinë jumaitsi Jesús-jawabelia:

—¿Xamë tsabaja pepacuen Cristomë, athëbëwetsica Dioso peca-itorobinësica, jiwi necapanepaenexa? ¿Xamë tsaja, Dioso pexënatomë? —jai.

⁶²Nexata, Jesús jumaitsi bajaraponëjawabelia:

—Jājā, xanë rabaja. Paxamë raja panetaename, Daxitajiwi Pematapij-nënë, Dioso pecujuanenia ta-ecaejawa, daxitajamatabëcuene pecaëjëpae-nëtsi. Panetaenamenua tanajetarucaejawa athëbëwetsica itarërëbota —jai Jesús.

⁶³Bajarapacuenia Jesús pejumaitsijawa itsa jumetane, sacerdotewi pepopenamatacaitorobinë penaxatatsijawa anaeya titinaxuaba, xua Jesús jumaitsi bitso piamuxujitsibixae.^e Nexata, jumaitsi daxita penacaetuatsiwi jawabelia:

—Pijacuata rabaja pejumaitsijumeta naneconita. Pematatsënëa apotamatawenonaetsi itsamonae wajanacatsipaebinexa paneconi yabara naneconitsia-exanaejitsiatsi. ⁶⁴Paxamë rabaja pajumetaneme Dioso apo-pejitsipaecuenia pecuaicuajijaijawa, tsipaji Dioso bepexënato nataeya cuaicuajiai. ¿Detsa nexata paxamë pajamatabë-itsimë? —jai sacerdotewi pepopenamatacaitorobinë.

Nexata, daxita penacaetuatsiwi jumaitsi:

—Naneconita rabaja Dioso jawabelia. Nexata baja, beyaxuabianatsi —jai Jesús yabara.

⁶⁵Nexata, bajarapamonaeyajuwënëwi Jesús itabarasuabatsi. Bajaraxuacujinae, papaëbërëpanata pitaxutocëtsicujinaetsi, itabaratsaquibabeponatsi pecobethaitonëta. Bajarapamona jumaitsi tsaponae Jesús-jawabelia:

d 14:58 *Xanë raja xuabianicajë*: Bajarapamona najumetsënëta. Taema Jn 2:19. Jesús apocanaëjëtsi pexuabinexatsica templobo. Saya jumaitsi: «Itsa pabijianaename», jai. Bajarapacuenia jumaitsi, tsipaji yapëtanë bajarapamona pebeyaxuabijawanexatsi. Yapëtanenua penamatacotsi-jawanexa icatsia petëpaejawawecua acueyabi pamatacabibejecujinae. **e 14:63** *piamuxujitsibixae*: Bajarapamona cuene-aeba Jesús, Cristonëcuene, Dioso pexënatocuenë-ata. Nexata, Jesús jiwitonëcuenia petaxaetsi, canaëjëta Jesús bitso pibisiacuenia pejumaitsijawa, «Xanë raja Dioso pexënatonë», pejaijawata. Xua jiwi jumaitsi bewelianëcuenia petanexa Dioso, bajaraxua wowai-jumeta wënëruba, «blasfemar a Dios». Nexata, Jesús itsa jumaitsi, «Dioso pexënatonë», itsa jai, pijaneconi petocanaëjëtsiwi tsiatsi beweliacuenia Dioso yabara pejumaitsijawa. Bajaraxuata, tocaëjëtatsi petëpaejawa. Itsia, Jesús apopenajumetsënëtsixae, nexata to-ajibitsi neconi bajaraxua yabara. Taema Deut. 6:4. Dioso raja caenë.

—¡Wēñējonare ponē ca-itabara tsaquibabepona! —jai tsaponaetsi beya-itacania. Bajaraxuacujinae, templobopijipolicíawi itabarapacabeponatsi Jesús.

Pedro jane baja nayawajunuaxaina Jesús pijajiwitonēcuene

(Mt 26:69-75; Lc 22:56-62; Jn 18:15-18,25-29)

⁶⁶Itsa abaxē Jesús sacerdotewi pepopenamatacaitorobinē pijabo-ēñētuatuajēalia yanijobaponatsi xua yabara naneconitsia-exanaejitsiatsi, Pedro naitaxutocaewetsiaya na-eca bopanabota. Nexata, bajarajota taeyetatsi petiriwa, sacerdotewi pepopenamatacaitorobinē pijabota penacuene-biwa. ⁶⁷Bajarapowa Pedro taeyetatsi penanonopecaejawata. Nexata, bajarapowa naitaxutobabatsia asaēya petaenucaejawatatsi, jumaitsitsi:

—Xamē-ata rabaja naponaponame Jesús-jawata, Nazaret tomarapijinēta —jaitsi.

⁶⁸Pedro itsiata nayawajunuaxaina Jesús pijajiwitonēcuene. Jumaitsi bajarapowajawabelia:

—¡Jume raja! Apoyapētaenē cajena bajaraponē. Apoyapētaenē pacuene yabara nejumaitsimē —jai.

Bajaraxuacujinae, Pedro pabaupajawawerena junua, bajarabenatixilia. Bajarapaepatota, wacara fiaba. ⁶⁹Icatsia bajarapowa Pedro tanetsi. Nexata, pamonaе bajarajota nubena, bajarapamonaеjawabelia bajarapowa jumaitsi:

—Mara ponēje Jesús pijajiwiyajuwēñēñē —jaitsi Pedro yabara.

⁷⁰Icatsia nexata, Pedro jumaitsi:

—¡Jume raja! Apoyapētaenē cajena bajaraponē —jai Pedro.

Bajaraxuacujinae, icatsia cae-epatoyocujinae, bajarajota penubenaewi Pedro jumaitsitsi:

—¡Xaniajai raeta baja cajena! Xamē Jesús pijajiwiyajuwēñēñēmē, tsipaji rabaja Galilea nacuapijinēmē. Galilea nacuapijiwi pecuaicuaijaicuenia cuai-cuaijamē —jaitsi.

⁷¹Nexata, Pedro pejumexaniataenexatsi, ajumesaēya jumaitsi:

—Itsa apoxaniajanē tsipae paxamējawabelia, nexata Diosojawabelia naneconitsipajē. Apoyapētaenē cajena ponē yabara panejumaitsimē —jai Pedro.

⁷²Itsa baja Pedro najumewereta bajarapacuenia pejumaitsijawa, wacara icatsia fiaba. Nexata, bajarajota Pedro najamatabēnapitajara-pacuenia Jesús jumaitsitsi: «Anijajumebeje wacara pefiabiwajē-naeya, nayawajunuaxainaename tajajiwitonēcuenēmē. ‘Xanē cajena apoyapētaenē bajaraponē,’ jamē tsane xanē yabara acueyabi xuabeje», pejajiwatsi, Pedro najamatabēnapitajaraba. Nexata, bajarajota Pedro bitso najamatabēxaina Jesús pejumaitsijumetsi yabara. Nexata, nua bajaraponē.

Jesús pijawajabitsaē caponaliatsi Pilatojawabelia, peneconitsinexatsi

(Mt 27:1-2,11-14; Lc 23:1-5; Jn 18:28-38)

15 ¹Ajena baja matababi tsarucaponaе, sacerdotewi penamatacaitorobiwi, judíowi pija-ancianowi, judíowi pecujarubiwi, itsamonaе-ata

bajarapitsijamatabëcuenewi^f yajawa nacaetuata, penabarëcuaicuaijainexa pacuenia neconitsijitsia Jesús Pilato pitabarata. Bajaraxuacujinae, caponaliatsi Jesús cobecëtsiaya nacua-ewetsinë Pilatojawabelia.

²Nexata, Pilato yanijobatsi Jesús:

—¿Xamë tsaja judíowi peponeyanacua-ewetsinë? —jaitsi.

Nexata, Jesús jumaitsi Pilatojawabelia:

—Jājā, xanë rabaja pacuenia nejumaitsimë —jai Jesús.

³Sacerdotewi penamatacaitorobiwi jumaitsi Pilatojawabelia:

—Jesús raja bitso pibisiacuenene exanabiaba —jai.

⁴Nexata, icatsia Pilato yanijobatsi Jesús:

—¿Itsaliwaisiyo-ata tsaja apoyapëtaemë nejumecanawiatsinexa? ¿Apoju-metaemë mapacuenia pecaneconitsijawaje? —jaitsi.

⁵Itsia, Jesús matawëjëa apojumepitsi⁸ Pilatojawabelia. Bajaraxuata, Pilato apoyapëtae pacuenia exanaejitsia Jesús-jawabelia.

Pilato jane baja tocopata Jesús pecobematabiabarutsinexa cruzajawabelia

(Mt 27:15-31; Lc 23:13-25; Jn 18:38-19:16)

⁶Nacua-ewetsinë Pilato xaina pijacujirucuenene. Caewai canacujitsia, Pascua-fiestamatacabi, bajaraponë copatabiaba caenë, penaneconitsinë, pepitsapae-nexa penaneconitsiwi pejebabiabibowecua. Pajiwi yabara jiwi wajëcabiaba bajaraponëjawabelia, nexata copatabiaba Pascuafiestamatacabi, jiwi pesiwa-jamatabëcuenexanepanaenexatsi. ⁷Pamatacabi Jesús naneconitsia-exanatsi, bajarapamatacabi, Barrabás-wënënë, pijajiwi yajawa, barënaneconitsiaponapona penaneconitsiwi pejebabiabibota. Barrabás, pamona yajawa, barënabia picani gobierno pijajiwi jawabelia. Nexata, petaicacujinaetsi, naneconitsia-exanejebatsi penaneconitsiwi pejebabiabibota. ⁸Nexata, jiwi ayaibitsaëto pona pewajëcaenexa Pilatojawabelia, pecopatsinexatsi caenë pepitsapaenexa penaneconitsiwi pejebabiabibowecua, pacuenia exanabiaba Pascuafiestamatacabi. ⁹Nexata, Pilato jumaitsi bajarapamonaejawabelia:

—¿Pajitsipame tsaja patacatocopsijawa pepitsapaenexa Jesús, pajudíowimë papeca-ewetsinë? —jai.

¹⁰Bajarapacuenia Pilato jumaitsi, tsipaji yapëtane sacerdotewi penamatacaitorobiwi petocaponaejawatsirena Jesús, pecuene-itoyaxaetsi. ¹¹Itsia, sacerdotewi penamatacaitorobiwi pibisiacuenia pemuxubijijapenetsixaetsi Jesús yabara, bajarapamonae asaëya wajëca Barrabás pecapitsapaenexatsi.

¹²Nexata, icatsia Pilato yanijoba jiwijawabelia:

—¿Detsa nexata xua pajitsipame ta-exanaenexa maponëjawabeliaje, ponë pawënërubabiabame, «Judíowitsi wajanaca-ewetsinë?», —jai Pilato judíowijawabelia.

f 15:1 *bajarapitsijamatabëcuenewi*: Bajarapamonae pijabitsaëto wënëruba Sanedrin, itsa jume, Concilio Supremo. Bajarapabitsaëto namata-ëjëtabiaba 70 ponëbeje, liwaisi pecanaëjëbiwinexa. Bajarapabitsaëtojawabelia nacajoneyabiaba, sacerdotewi, fariseowi, saduceowi, judíowi pija-ancianowi, judíowi pecujarubiwi-ata. Nexata, sacerdotewi pepopenamatacaitorobinë bajarapabitsaëto pijatuxanenë. Pacujinae Sanedrin Jesús pijaneconi tocanaëjëtatsi, sacerdotewi pepopenamatacaitorobinë apojunatsi tsaena daxita bajarapasenteta ponëbeje. Junata saya pamonaecuenene-itoya Jesús. Bajaraxuata, cotocaewi matapania bajayacunua pata itsamonae Sanedrinpijiwi. **g 15:5** Taema Isa. 53:7.

¹³Nexata, bajarapamonae wawajai pinijijumeta:

—¡Cruzajawabelia cobematabiabarutsia-exanare! —jai tsaponae Pilatojawabelia.

¹⁴Nexata, Pilato jumaitsi bajarapamonaejawabelia:

—¿Detsa pitsineconi yabara nexata cobematabiabarutsia-exanaejitsipajē? —jai Pilato.

Itsiata, bajarapamonae icatsia pinijijumeta wawajai:

—¡Cruzajawabelia cobematabiabarutsia-exanare! —jai tsaponae.

¹⁵Nexata baja, Pilato tocopata Barrabás pepitsapaenexa penaneconitsiwi pejebabiabibowecua, jiwi pebarajamatabēcuene xanepanaenexatsi. Nexata, pijajiwi, wajabitsaē, itoroba copiaya Jesús ayaicuenia pejumatitibabenexatsi penaneconitsiwi pejumaconitabiabimacata. Pejumaconitsia-exanaecujinae, tocopata baja Jesús pecobematabiabarutsinexatsi cruzajawabelia.

¹⁶Nexata baja, wajabitsaēwi Jesús caponaliatsi nacua-ewetsinē Pilato pijaboxanetojawabelia. Bajarajota, nacaetuata daxita wajabitsaēwi.

¹⁷Bajaraxuacujinae, Jesús xatatatsi peraēnaetsautsaucaejawa, benacua-ewetsinēcuenia petaenexatsi. Coronacuenia pemataxatatsinexatsi, pe-ejuwitoyoroto tsimata-exanatsi. Bajaraxua Jesús mataxatatatsi. ¹⁸Bajara-xuacujinae, capocaponaeya bajacobaponatsi.

—¡Bajaco, judfowi neyanacua-ewetsinē! —jai tsaponae wajabitsaēnēanē.

¹⁹Bajarapamonae, caenē canacujitsia, mataconibiaxuabaponatsi nae-bota. Suabaponatsinua. Pematabacabēta tonubenajoneyabiabatsi beyaiya-taeya Jesús pitabarata. ²⁰Jesús pecapocaponaecujinaetsi, wejumajonotatsi peraēnaetsautsaucaejawa, xua picani xatatatsi. Jesús baja icatsia xatatatsi penaxatatsijawa. Caponaliatsi jane baja, pecobematabiabarutsinexatsi cruzajawabelia.

Jesús jane baja cruzajawabelia cobematabiabarutatsi

(Mt 27:32-44; Lc 23:26-43; Jn 19:17-27)

²¹Alejandro, Rufobeje, paxa, Simón, Cirene tomarapijinē. Bajaraponē naje-taruca wayafotusatojawawerena. Nexata, wajabitsaēwi junatatsi, pacruza-jawabelia Jesús cobematabiabarutsijitsiatsi, peyawenonaeyacaponanexa.

²²Caponaliatsi Jesús Gólgotatsutojawabelia. «Gólgota», itsa jai hebreojumeta, mapejumaitsiyumeje: «Jiwi matasipatsuto», pejaijume. ²³Bajarajota picani, Jesús rajutatsi vinora piapaenexa, pematajērēabira mirrananijawata, bitso penawixaetaeyaniwa pecobematabiabiawatatsi cruzajawabelia. Itsiata, Jesús apo-apae. ²⁴Nexata jane baja, Jesús wajabitsaēwi cobematabiabarutatsi cruzajawabelia. Bajaraxuacujinae, wajabitsaēwi bajarajota canamuxu-sita be-ibotoxita, peyapētaenexa ponē pitaponaejitsia, caejawa canacujitsia, Jesús penaxatatsijawanēmi. Nexata, bajarapacuenia wajabitsaēwi natsico-betsana Jesús penaxatatsijawami. ²⁵Bajayacunua-epatota, bejamatabēcuene la nueve, Jesús cobematabiabarutatsi cruzajawabelia. ²⁶Bajarajota, Jesús pematabocotomatatsēñeyo yaquinaruta tablapayota, itsamona-e-ata peya-pētaenexa pajamatabēcuene yabara Jesús cobematabiabarutatsi cruzajawabelia. Jumaitsi tsarutsi mapacueniaje: «Mara ponēje judfowi peyanacua-ewetsinē», jai tsarutsi Jesús yabara. ²⁷Anijanēbeje penacobetoxotsinēbeje, Jesús yajawacobematabiabarutatsi. Caenē canacujitsia pijacruzata rutatsi

Jesús pemuxuneneta. Jesús pecujuanenia itsanë rutatsi. Itsanë pijinia rutatsi petsawenonenia. ²⁸ Bajarapacuenia Jesús itsa yajawacobematabiabarutatsi penacobetoxotsinëbeje, Jesús tocopiapatatsi jane baja, pacuenia Dioso pejumeliwaisibaxutota tajëwelia pejumlahitsijawa Jesús yabara mapacueniaje: «Naneconitsia-exanaenatsi bepibisiacuene pexanaenëcuenia», ^h jai baja cajena tajëwelia Dioso pejumeliwaisibaxutota. ²⁹ Jesús pecobematabiabarutatsijawata-tatsi cruzajawabelia, bajaraxuayo penajetarubenaewi Jesús itaropitsiaya bija-taeyabiabatsi. Bajarapamonae jumlahsi tsabiabi:

—Yera jane ma-itsimëje. Xamë raja imata jumlahsimë: «Xuabianicajë templo. Acueyabimatacabita icatsia weretetsianajë itsabo», jamë itajara. ³⁰ ¡Nexata, nacapanepare jane baja nijacuata! ¡Cruzajawawetsica runaimica! —jai tsabiabi Jesús-jawabelia, bajaraxuayo penajetarubenaewi.

³¹ Bajarapijinia pacuenia, sacerdotewi penamatacaitorobiwi, judíowi pecujarubiwi-ata, capocaponatsi Jesús. Epamonae najumaitsi:

—Bajaraponë pina capanepa itsamonae. Caranata, pijacuata apocaë-jëpaetsi penacapanepaenexa. ³² Itsa xaniajai pepacuene Cristo, athëbë-wetsica Dioso pitorobinëtsica jiwi pecapanepaenexa, Israel nacuapijiwitsi pepowajanaca-ewetsinënexanua, aeconoxae runaenica cruzajawawetsica wajataenexa. Nexata jane baja, jumexaniataenatsi Cristonëcuenia —najai bajarapamonae capocaponaeya Jesús yabara.

Ponëbeje-ata Jesús yajawacobematabiabarutatsi, bijataerucatsibeje.

Pacuenia baja Jesús tēpa, yabara peliwaissi

(Mt 27:45-56; Lc 23:44-49; Jn 19:28-30)

³³ Ajenā matonejeitsia, Jesús baja itsa tēpaeitsia, daxita nacujawa aita-quiri tsajuni. Matapania caniwiyojawabelia, bejamatabëcuenia las tres-jawa, nacua napebeta icatsia. ³⁴ Nexata icatsia, paepatota nacua napebeta, bajara-paepatota, pinijicuenia Jesús aëjai. Jumlahtsi:

—Eloi, Eloi, ¿lama sabactani? —jai. Bajarapacuenia Jesús itsa jumlahsi pijajumeta, ⁱ mapejumlahitsijumeje: «TajaDioso, tajaDioso, ¿detsa xuajitsia baja taja-epato necopatame?», pejaijume. ³⁵ Nexata, itsamonae bajarajota penu-benaewi bijiaya jumetane bajarapacuenia Jesús pejumlahitsijawa. Nexata, saya jamatabëcuenenawëxaniabiaya jumlahsi bajarapamonae:

—¡Jica, pajumetaema! Mara ponëje junata profeta Elías! —jai bajarapamonae.

³⁶ Nexata, bajarapamonaeayajuwënëne piajatuvinorayalia bepijia jabu-taxuaba esponja-jawa. Bajaraxuacujinae, naebo-upita cëtaruta bajarapa-esponja, petoyotsinexatsia, Jesús picani petsutsuninexa bajarapora. Petoyot-sinëtsi, jumlahsi penajuanubenaewijawabelia:

—Bajarapacuenia abaxë copatarutatsi. Taenatsi profeta Elías itsa najeta-ruca cruzawecua Jesús penutsinexatsitsica —jai bajaraponë capocaponaeya.

h 15:28 Taema Isa. 53:12. **i 15:34** *pijajumeta*: Bajarapajumenë arameojumenë, pajume judíowi cuaicuajiai tsabiabi, penawiabicujinae Babilonia nacuaawerena. Baitsi, arameojume Babilonia nacuapijiwi pecuaicuajiaijume. **j 15:35** *Elías*: Bajaraponë bayatami ponapona Israel nacuata. Baitsi, apo-asäë tsaponapona mapanacuataje, Jesús peponaponaematacabi. Itsiata, bajaraponë Dioso ya-asäëya caponatsi athëbëabetsia. (2Re 2:1-11.) Bajaraxuata apopayaquinarubinë «Elías-pijinë». Daxita bajaraponë peliwaissi ruca 1Re 18-2Re 2-jawabelia.

³⁷ Jesús icatsia pinijicuenia aėjai. Bajaraxuacujinae jane baja, tēpanajereca.

³⁸ Paepatota Jesús tēpanajereca, bajarapaepatota, templobo-ēnētuaťuajēalia peyatu-ucutarutsipana, ayaipapaēbērēpanaxaneto, titititica tuatuaťeareca, athē-bēwetsicacujinae irabereca. ³⁹ Paepatota Jesús tēpanajereca, wajabitsaēwi pijacapitán Jesús pitabarata canacujitsialia nuca. Nexata, itsa taenuca Jesús petēpana-jetsijawareca, pinijicuenia pe-aējaicujinae, bajaraponē jumaitsi:

—Matsaena ponē tēpaje, pepacuene baja Dioso pexēnato —jai.

⁴⁰ Bajarajota, petirawibitsaētoťaneto tajēyowerena taenubena Jesús petē-paejawa. Bajarapapetiriawi tuatuaťeta nanubena María, Magdala tomarapijiwa, Salomé, itsawa pijinia María, Santiago, ponē bewelianē,^k Josébeje, pena. ⁴¹ Pamatacabi abaxē Jesús ponapona Galilea nacuata, bajarapapetiriawi Jesús pēnaji-nawanapatsi, peyawenonaenexatsi. Papetiriawibitsaētoťawata Mariabana nanu-bena, Jesús najuapēnaponarena Galilea nacuawerena Jerusalén tomaraberena.

Pacuenia Jesús petēpaenē mēthētatsi, yabara peliwaissi

(Mt 27:57-61; Lc 23:50-56; Jn 19:38-42)

⁴²⁻⁴³ José, Arimatea tomarapijinē, judíowi pewetsinē, peyayataenētsi. Bajara-ponē copia-ewetaponapona pecopiapatsijawa pamatacabi caenē Dioso ewetsijit-sia daxita pijajiwi mapanacuataje. Judíowi baja penacuera-ewetsimatacabinexa pewajēnaeya pamatacabi, caniwiyotsia baja. Bajarapaepatota, José acuene-ura-ata, najamatabēsaēta. Nexata, lia nacua-ewetsinē Pilatoťawabelia, pewajētsinexa petocopatsijawatsi petēpaenē Jesús, pemēthētsinexa. ⁴⁴ Nexata, Pilato jamatabē-jumaitsi: «Xaniajai meta baja Jesús tēpa», jamatabējai, tsipaji abaxē bajayajebi Jesús aporucac cruzajawabelia, pecobematabiabarutsicujinaetsi. Nexata, junata wajabitsaēwi pijacapitán, peyanijobinexa itsa Jesús pepacuene tēpa. ⁴⁵ Nexata, wajabitsaēwi pijacapitán tsipaeba Pilatoťawabelia:

—Jesús rabaja capanepaeya tēpa —jai.

Nexata jane baja, Pilato, tocopata José cruzajawawetsica pepitsinexa Jesús petēpaenē. ⁴⁶ Nexata, José comuata pexaniawiria sábara. Bajaraxua-cujinae jane baja, cruzajawawetsica pitsica Jesús petēpaenē. Daxitanēreca mataquionaeya matacacēba pexaniawiria piapiasábanapanata. Bajaraxua-cujinae, itsajota cajena José ibo-itapajanitoťawata piniji-ibowaju exanaeya-exanabuata, petēpaewi pebuataponanexa, bajarapa-ibowajualia buata Jesús petēpaenē. Bajaraxuacujinae, pinijipetoyororocae-ibopanaxaneto, tixirena peyawēpa-acatabuatsinexa. ⁴⁷ María, Magdala tomarapijiwa, itsawa pijinia María, José pena, tanebeje itsajota Jesús buatatsi, petēpaenē.

Petēpaecujinae, Jesús icatsia asaē

(Mt 28:1-10; Lc 24:1-12; Jn 20:1-10)

16 ¹ Judíowi baja penacuera-ewetsimatacabi itsa werewereca,¹ María, Magdala tomarapijiwa, Salomé, itsaMaría pijinia, Santiago

k 15:40 bewelianē: Bajarapacuenia itsajawata wēnērubatsi, Santiago, bewelianē. Itsiata, apoya-pētae itsa jumaitsi pijawainē yabara, itsa jume, pecuene yabara. **1 16:1 itsa werewereca:** Judíowi penacuera-ewetsimatacabi, sábadu matacabi, taxuxuababiaba viernes matacabi, pepo-caniwiyota, a las seis-jawa, icatsia pecowēcuenia, copiarucabiaba pijinia sábadu matacabi, a las seis-jawa. Nexata, bajarapowaxi petuxujiwira comuata sábadu matacabita, las seis-cujinae, domingo matacabita pepobajayacunua pecaponanexa Jesús pebuatsi-ibowajutsijawabelia.

pena, nacobenacomuata petuxujuwira, peperabë-exabinexa picani Jesús petëpaenë. ²Nexata, merawia pitsijawata, semana petaxuxuabimatacabita, pepobajayacunua, bajarapamonae ponalia Jesús pebuatsi-ibowajutsijawabelia. ³Namutualia najumaitsi tsanajetarubenaë:

—¿Jipatsa meta nacatotixitsiana Jesús peyawëpa-acatabuatsi-ibopanaxanetotsi? —najai tsanajetarubenaë bajarapapetiriawi.

⁴Nexata, bajarapamonae ita imoxoyotabuatapona, ita naëcobalia, ibowajujawabelia, taenuta petoyororocae-ibopanaxanetomi petixitanutsijawalia ibowajuwëpawecua, bitso piniji-ibopanaxaneto-ata. ⁵Nexata, petiriawi ita joneya Jesús pebuatsi-ibowajutsijawalia, taeyeta pecujuanenia pe-ecaejawa pewëjëato. Bajaraponë naxatateca piapiajawa penioponaejawa. Bajarapapetiriawi pataejawata, najunawiaca. ⁶Nexata, pewëjëato jumaitsi petiriawijawabelia:

—iPëtsa panajunawiacame! Paxamë picani pajaitame Jesús, Nazaret tomara-pijinë, ponë cobematabiabarutatsi cruzajawabelia. Bajaraponë rabaja icatsia asaë petëpaecujinaë. Ajibi rabaja tsarucae majotaje. iPataema jane itsajota picani buata-tsi! ⁷iPaponare baja, panetsipaebinexa pijajiwijawabelia, Pedrojawabelia-ata! Pajumaitsimë tsane bajarapamonaejawabelia: «Jesús raja panewajënaeyabelia pona Galilea nacuayabelia. Bajarajotalia pacaxitajarabianame pacuenia baja pacajumaitsi», pajamë tsane pijajiwijawabelia —jai pewëjëato petiriawijawabelia.

⁸Nexata saya, bajarapapetiriawi rëcëpeca Jesús pebuatsi-ibowajutsiwecua. Neconecojai pecajunawi. Namuto-epatualia-ata apotsi-paebi itsajiwijawabelia, tsipaji bitso junawa.

**Jesús ita asaë petëpaecujinaë, tsitanaitajëta María,
Magdala tomarapijiwajawabelia**

(Jn 20:11-18)

⁹Jesús ita asaë petëpaecujinaë, semana petaxuxuabimatacabita, bajayacunua tsitanaitajëta María, Magdala tomarapijiwajawabelia. Bajarapowa cajena copiaya Jesús wecuacapitsapa siete padowathibeje, ita abaxë Jesús apobeyaxuabitsi. ¹⁰Nexata, bajarapowa, Jesús petsitanaitajëtsicujinaetsi, pona Jesús pijajiwijawabelia. Itsa pata, caxitajaraba pewajënaë pijajiwi abaxë pewënuenaejawata Jesús. ¹¹Nexata, jumaitsi Jesús pijajiwijawabelia:

—Jesús rabaja icatsia asaë petëpaecujinaë. Taniji rabaja tajacuata —jai María. Itsiata, Jesús pijajiwi apojumexaniataetsi.

Jesús petëpaecujinaë ita asaë, tsitanaitajëta pijajiwitonëbejejawabelia

(Lc 24:13-35)

¹²Jesús pijajiwitonëbeje namutua penajetarucæjawatabeje, tsitanaitajëta be-itsanëcuenia. ¹³Nexata, bajaraponëbeje ita tanebeje Jesús, nawia-tecabeje, petsipaebinexabeje itsamonae Jesús pijajiwijawabelia. Itsiata, apojumexaniataetsibeje.

**Jesús pijajiwi itoroba, pexanialiwaishi pepaebanajetarubenaenexa
daxitanacuanëjawa pejinawanapaewijawabelia**

(Mt 28:16-20; Lc 24:36-49; Jn 20:19-23)

¹⁴Bexëajawabelia, icatsia Jesús tsitanaitajëta pijajiwi once ponëbejejawabelia, pexaeyenaejawata mesata. Nexata, pinijicuenia muxujioba pijajiwi

apopejumexaniataexae petsipaebiliwaisitsi piamatabëcuenetajaxae, icatsia piasaëjawa petëpaecujinae, itsamonae petaewitsi tsipaebi-atatsi.

¹⁵Nexata, Jesús jumaitsi pijajiwijawabelia:

—¡Paponare daxitanacuanëjawa, panetsipaebanajetarubenaenexa daxitajiwi pexanaliwaisi, pecapanepaeliwaisinexatsi, Diosojawabelia! ¹⁶Pajiwi jumexaniataena panetsipaebiliwaisi, pabautizabianame. Bajarapajiwi Dioso capanepaenatsi. Pajiwi pijinia jume-aebiana panetsipaebiliwaisi, bajarapajiwi Dioso naneconitsia-exanaena daxitamatacabijawabelianexa.

¹⁷Pamonae peneta jumexaniatane bajarapaliwaisi, mapacuenia exanawana-paenaje. Tawënëta jiwiwecua capitsapaponaena dowathi. Itsawirijumeta, apopenatsipaebijumemi-ata, jemata natsipaebiana. ¹⁸Jomo pecobeta pitsi-ata tsane, apo-itsacueniabitsi tsane. Apae-atanua tsane peyarujitsiratsi petë-paenexa, itsiata apotëpae tsane. Itsa nacobebuatsiana piawitanepijawabelia, jamatejema tsane piawitanepawawecua —jai Jesús pijajiwijawabelia.

Jesús jane baja pona athëbëabetsia

(Lc 24:50-53)

¹⁹Wajatuxanenë Jesús liwaisi petsipaebicujinae pijajiwijawabelia, Dioso baja pesaëta catsiatsi athëbëabetsia. Bajarajotatsia eca Dioso pecujua-nenia, penajua-ewetsinexabeje daxitacuene. ²⁰Nexata jane baja, Jesús pijajiwi daxitanacuanëjawa jiwi tsipaebanajetarubena bajarapapexanaliwaisi. Nexata, daxita pamonae, pejumetaeyabiabiwitsi, jumexaniataeya-biabatsi pexaniajailiwaisi petsipaebicuene, tsipaji Jesús pijajiwi jamatabëcueneyawenonabiaba, pinijicuene pexanaenexa jiwijawabelia, liwaisi petsipaebabiabijawata.

Lucas

Pexanialiwaishi, Jesucristo peliwaishi, Lucas^a peyaquinaeliwaishi

Lucas pajamatabëcuene yabara yaquina Jesucristo
peliwaishi mapabaxutotaje, Teófilojawabelia

1 ¹⁻²Pamatacabi Jesús ponapona mapanacuataje, jiwi ayaibitsaëtoxañeto cuenetanetsi pexanaponaponaejawa. Jumetanetsinua petaxuxuabijawaweliacujinae jiwi liwaishi petsipaebaponaejawa. Nexata, Jesús pitorobiwi, paebanajetarubena tomaranëjawa bajaraPonë peliwaishi, pexanialiwaishi. Nexata, bajarapaliwaishi pejumetaewi, ayaibitsaëto baja cajena tsaponae. Jesús pecuenetaewitsi, pejumetaewitsinua wajunupaebatsi. Nexata, pejumetaewi juya mataropotsia yaquina, petsipaebinexa itsamonaejawabelia. ³Nexata, xaniawaetsia tayapëtaenexa, yanijobajë Jesús pecuenetaewijawabelia, pejumetaewijawabelia-ata. Bajaraxuata, xanë-ata netsitaxanepana bajarapacuenia tacatoyaquinaenexa mapaliwaisije, xamë, Teófilomëjawabelia. Catoyaquinatsi xamë-ata xaniawaetsia neyapëtaenexa pacuenia Jesús jumaitsi tsaponae caeliwaishi canacujitsia, pexanaponaejawanë yabara-ata. ⁴Copiaya baja picani itsamonaecat sipaeba bajarapaliwaishi. Itsiata, icatsia xanë catoyaquinatsi, tacayapëtaeya-exanaenexa jane baja xaniawaetsia bajarapaliwaishi pexaniajailiwaishicuenë.

Ángelnë tajëwelia yapëtaeya-exana sacerdotenë
Zacarías-jawabelia, pexënato pexainaejawanexa

⁵Mapacueniaje taxuxuaba Jesús peliwaishi. Pamatacabi abaxë Herodes eweta Judea nacua, bajarapamatacabi sacerdotenë Abías pijabitsaëtoyajuwënëñë ponapona sacerdotenë Zacarías. Bajaraponë pijawa pewënë Elisabet, sacerdotenëmi Aarón-pijinë pemomoxiyajuwënëwa. ⁶Bajarapajiwibeje xaniawaetsia ponaponabeje Dioso pitabarata. Nexata, jumecowënëtsiaponaponabeje daxita pacuenia Dioso itoroba judíowi pexanawanapaenexa. ⁷Itsiata, bajarapajiwibeje pexi apoxainabeje, tsipaji Elisabet mawecowa. Bitso baja perujujiwiyojebe.

⁸Nexata, pasemanata Abías pijabitsaëto, daxita sacerdotewi, tsicarucatsi penajua-ewetsinexa templo, bajarapamatacabijawa Zacarías tocopatatsi

a 1:0 Lucas: Bajaraponë barëñajetarucabiaba apóstolnë Pablo itsa tsipaebanajetaruca Jesucristo peliwaishi apojudíowi pejinawanapaenacuanëjawa. Lucas raja griegonë, apojudíonë. Bajaraponë pewaëbicuene peyapëtaenëna.

penacuenebinexa templobo-ënëta, Dioso pitabarata. ⁹Abaxë sacerdotewi petaxuxuabiwajënaeya penacuenebijawa, pijacujirucuenia exana, penaya-pëtaeponaenexa xua caenë canacujitsia nacuenebijitsia templobota. Nexata, Zacarías tocopatatsi templobo-ënëalia petajuitsinexa inciensopërë, petuxu-juwijawa. Bajaraxuata, bajaraponë joneya temploboyalia, petajuitsinexa^b jane baja inciensojawanë. ¹⁰Paepatota tajuitanuca bajarapa-inciensopërë, jiwi ayaibitsaëttoxaneto templobojumawelia wajëcanubena Diosojawabelia. ¹¹Nexata, paepatota tajuitanuca incienso, altar-muxuneneta, pecuajuanenia tsitanaitajëtatsi ángelnë. ¹²Nexata, Zacarías itsa taenuta ángelnë, apoyapëtae pacuenia exanaejitsia, bitso pejamatabëcuenenajunawiacaexae.

¹³Nexata, ángelnë jumaitsi Zacarías-jawabelia:

—¿Zacarías, pëtsa junawame! Dioso baja cajena cajumetane newajëtsijawa. Nexata, nijawa Elisabet, catonacoxitsiana. Nexënatonëyo raja xainaename. Wënërübiana bajaronëyo Juan. ¹⁴⁻¹⁵Pinijicuenia, jiwi ayaibitsaëto yajawa, barëyamë tsane bajaraponëyo itsa catonaexanaena, tsipaji bajaraponëyo ayai-jamatabëcuenenë tsane Dioso pitabarata. Apo-apae tsane piataneranë, vinorata. Pena pecototojawaweliacujinae, tsijamatabëwënëcaenatsi Espíritu Santo, pitorobicueniatsi pexanabiabinexa. ¹⁶Nexënat Juan pejamatabëcueneta, ayaibitsaëto Israel nacuapijiwi najamatabëcuenepënëyorbiana petuxanenë Diosojawabelia, pibisiacueni pexanaejawawecua. ¹⁷Bajaraponë Espíritu Santo jamatabëcuenecaëjëpaeya-exanaenatsi, Dioso pesaëta petsipaebinexa Dioso peli-waisi, pacuenia bajayata jamatabëcuenecaëjëpaeya-exana profeta Elías^c. Nexata, bajaraponë petsipaebiliwaisita, penacoxi-ityawimi-ata, icatsia nacoxi barajamatabëcueni xanepanaena. Pamona-ata pijinia piagamatabëcuenebewimi-ata, jamatabëcuenexanepanaeya-exanaenatsi, pepoPetuxanenë penajetarucaewajënaeya. Bajarapacuenia exanaena, xaniawaetsia bajarapamonae pecopiapitsinexa pepoPetuxanenë, pamatacabi najetarucaena —jai ángelnë.

¹⁸Zacarías nexata yanijoba ángel-nëjawabelia. Jumaitsi:

—¿Detsa pacuenia yapëtaenajë pexaniajaijawa taxënato taxainaejawanexa?, tsipaji rabaja xanë perujunë. Tajawa-ata baja perujuwa —jai.

¹⁹Nexata, ángelnë jumaitsi Zacarías-jawabelia:

—Xanë raja Gabrielnë, Dioso pijajiwiwonë. Dioso baja cajena nitoroba tacatsipaebinexa mapapexanialiweisije. ²⁰Nexata, xaniajanë. Itsiata, tanejume-aebixaemë tacatsipaebiliwaisi, nexata baja, aeconoxae apocacajëpae tsane necuaicuajaijawa. Pamatacabi catocopiapatsiana xua yabara najumecapanepaeya catsipaebatsi, matapania jane baja, icatsia cuacuajamë tsane —jai ángelnë.

b 1:9 *petajuitsinexa*: Bajarapa-inciensopërë petajuitsijawa nacatocuenecatane wajawajëcaecueni Diosojawabelia. Pacuenia petajuitsitsëxë athëbëabetsia patsia, bajarapacuenia wajawajëcaejumenë patsia Diosojawabetsia. Pacuenianua petajuitsituxu nacatsipumutuxuxanepana, bajarapijinia pacuenia wajawajëcaejumenë tsimuxuxanepanatsi Dioso. Bajarapa-inciensopërë tajuitabiaba templobo-ënëta, peyatu-ucutsipana pewajënaeya, anijatobeje caematacabi canacujitsia; bajayacunua las nuevejawa, caniwiyo pijinia las tres-jawa. Nexata, pacujinae sacerdotenë tajuita inciensopërë templobo-ënëta, bajarapabojumawelia jiwi wajëcabiabanubena Diosojawabelia. **c 1:17** *Elías*: Bajaraponë bayatami ponapona Israel nacuta. Baitsi, apo-asaë tsaponapona mapanacutaje, Jesús peponaponaematacabi. Itsiata, bajaraponë Dioso ya-asaëya caponatsi athëbëabetsia. (2Re 2:1-11.) Bajaraxuata apopayaquinarubinë «Elías-pijinë». Daxita bajaraponë peliwaisi ruca 1Re 18-2Re 2-jawabelia.

²¹ Paepatojebi Zacarías templobo-ěněalia ponapona, jiwi pijinia templo-bojumawelia ewetanubenatsi pepitsapaejawarena. Bajarapamonae najumaitsi tsaponae: «¿Demeta xuajitsia Zacarías bepíjia apopitsapaerena?», najai tsaponae. ²² Itsa jane baja Zacarías pitsaparena templobowecua, apocajěpaetsi pecuaicuaijajawa pejumepitsapaenexa. Biji rajane, pecobeta tsipaeba besiyaněcuenia, jiwi peyapětaeya-exanaenexa. Nexata, pamonaewetanubenatsi templobojumawelia, yapětane pacuenia bajaraponě bema-jitsinaebota templobo-ěněalia itsacuene tane. ²³ Itsa baja Zacarías wereta Dioso pijacuene penacuenebijawa templobota, pamatacabibeje tocopatatsi, nawiata baja pijaboyabelia.

²⁴ Caematacabibeje pexainaecujinae penawiatsijawa, bajaraponě pijawa, Elisabet, nacoxita jane baja. Peyapětaecujinae penacoxitsijawa, cinco pajuametobejecuenia apopitsapae itsajawabelia pijabowecua. ²⁵ Bajarapowa jamatabějumaitsi: «Dioso raja bajarapacuenia neto-exana tane-itaxutotsoniataexae. Neyawenona tanacoxitsinexa. Nexata baja, apo-auraně tsane tacoxibijawa yabara itsamonae pitabarata», jamatabějai Elisabet.

Ángelně tajěwelia yapětaeya-exana Maríajawabelia, penacoxitsijawanexa

²⁶ Elisabet baja seis pajuametobeje pepuaxinae penacoxitsijawa, Dioso icatsia itoroba pija-ángelně, Gabriel, Nazaret tomarabelia, Galilea nacuata pe-ecaetomara. ²⁷ Itoroba Maríajawabelia, petsipaebinexa penacoxitsijawanexa. Bajarapamatacabijawa, Maríabeje baja cajena Josěbeje, najumecapanepaeya najumeliwaisicajunuabeje penapitsinexabeje. Josě, nacua-ewetsiněmi, David-pijině, pemomoxiyajuwěnně. María abaxě pebi apopimoxoyobiwatsi. ²⁸ Ángelně nexata joneya María peponaponaebota. Jumaitsi bajarapowajawabelia:

—María, cabajacobatsi. Dioso pecataewa pexaniajamataběcuenia. Dioso baja cajena cayajawaponapona. Xamě bitso pexaniacuenia cayawenonaena xamě daxita newěnapetiriawi matatoxenetsia —jai.

²⁹ Bajarapacuenia María itsa jumetane ángelně pejumaitsiyawatsi, jamataběcuenenabenajaca. Nexata, jamatabějumaitsi: «¿Detsa meta pitsijamataběcuenen yabara mapacuenia nejumaitsi je ángelně?», jamatabějai.

³⁰ Ángelně icatsia jumaitsi bajarapowajawabelia:

—¡María, pětsa junawame, tsipaji raja Dioso pexaniajamataběcuenia catane! ³¹ Xamě raja nacoxitsianame. Cawecuaanaxanaena raja pebiněyo. Bajaraponěyo wěńerubianame Jesús. ³² Ayaijamataběcueneně tsane. Bajaraponěyo yabara itsamonae jumaitsi tsane: «Pepo-ayaijamataběcueneně Dioso, athěbětatsia pe-ecaeně, pexěnato», jai tsane. Orijibia, pepoPetuxaneně Dioso, nacua-ewetsině exanaenatsi. Cuenejěpaena pijasalinainěmi David-pijině nacua-ewetsiněmi. ³³ Nexata, peyanacua-ewetsině naexanaena Israel nacuapijiwi daxita matabijawabelianexa —jai ángelně Maríajawabelia.

³⁴ Nexata, bajarapowa jumaitsi ángel-nějawabelia:

—¿Detsa pacuenia nacoxitsipajě? Xaně raja tamona apoxainaeně —jai.

³⁵ Ángelně nexata jumaitsi Maríajawabelia:

—Espíritu Santo raja patsianica xamějawabetsica. Nexata, Dioso pesaě catsijopaena nenacoxitsinexa. Bajaraxuata, panacuetoněyo

cawecuaanaxanaena, Dioso baja cajena tsatatsi pijacuene petonacuenebinē-nexa. Bajaraxua yabara, itsamonae jumaitsi tsane: «Dioso raja pexēnato», jai tsane. ³⁶ Nijamonaewa, Elisabet, perujuwa-ata exanaena penacuetonēyo. «Mawecowa raja», jai-atatsi jiwi, itsiata baja, penacoxitsicujinae xaina seis pajuametobeje. ³⁷ Dioso baja cajena daxitacuene pecuenecaējēpaenētsi pexanaenexa, xua jiwi tsita-ayapēbejetsi pexanaenexa —jai ángelnē tajēwelia Maríajawabelia.

³⁸ Nexata, María jumaitsi ángel-nējawabelia:

—Xanē rabaja cajena Dioso pijajiwitowanē. Pacuenia nejumaitsimē, baja rapacuenia Dioso xanējawaberena exanaena —jai.

Nexata baja, María wecuaponatsi ángelnē.

María siwaxaina Elisabet-jawabelia

³⁹ María penacoxitsijawanexa petsipaebicujinaetsi ángelnē, caematacabibecujinae, bajarapowa pona petsutonējawata pe-ecaetomarajawabelia, Judea nacuata pe-ecaetomara. ⁴⁰ Nexata, María itsa baja pata, joneya Zacarías pijaboyalía. Bajacobanuta pijamonaewa Elisabet. ⁴¹ Pebajacobanucawajawata, Elisabet peyacotajinaenacueto tscotonayucutajarabatsi. Nexata jane baja, Elisabet tsijamatabēwēnēcatsi Espiritu Santo. ⁴² Pitorobicueniatsi, pinijijumeta jumaitsi Maríajawabelia mapacueniaje:

—Dioso cajena bitso pexaniacuenia cayawenona, daxita petiriawi matatonenetsia. Panacuetonēyo-ata exanaename, Dioso bitso pexaniacuenia peyawenonababinētsi tsane. ⁴³ ¿Detsa xuajitsia, xamē, nesiwaxainame beweliamatabēcuenewanē, tajatuxanenē penanexamē? ⁴⁴ Itsa nebajacobanutame, tayacotajinaenacueto netsicotojirewajunua, pebarēyaxae. ⁴⁵ Wajatuxanenē Dioso casiwajamatabēcuenenēbarēya, nejumexaniataexae xua cacuenewajunupaeba pecatocopiapatsijawanexa. Nexata, pepacuene catocopiapatsiana daxita pecajumaitsicuenia —jai Elisabet Maríajawabelia, Espiritu Santo pitorobicueniatsi.

⁴⁶ Nexata, María jumaitsi Diosojawabelia:

«Tajamatabē-ēthētojawawetsina cawēnēxaniatsiaya cajumaitsi: Dioso, bitso ayaijamatabēcuenenēmē daxitacuenewecua.

⁴⁷ Tajamatabē-ēthētojawawetsina casiwajamatabēcuenenēbarēyatsi, xamē, tanecapanepaenēmē.

⁴⁸ Casiwajamatabēcuenenēbarēyatsi, tsipaji nitapetame xanē nijajiwitowanexanē, beweliamatabēcuenewa-atanē.

Tane-itapetsixaemē, daxitanacuanēpijiwi, ajenacujinae, daxitamatabijawabelianexa-ata, xanē yabara jiwi jumaitsi tsabiabi tsane: 'Dioso bitso pexaniacuenia peyawenonaewatsi,' jai tsabiabi tsane.

⁴⁹ Bajarapacuenia jiwi neyabarajumaitsi tsabiabi tsane, tsipaji ayaiacuenenēawanē neto-exanabianame, xamē, Dioso, ayaijamatabēcuenenēmē. Xamē bitso peponianeconijibiwenē nexainaenē.

⁵⁰ Daxita pamonaesiwaya pecayaiyataewi itaxutotsoniataeyabiabame.

⁵¹ Xamē raja pinijicuenejawanē nesaēta tsita-exaname. Nexata, nesaēta nacayajatsia-exaname pamonaesiwaya ayaijamatabēcuenenē penataewi.

⁵² Ayaijamatabëcuene pexainaewi peyanacua-ewetsijawata, wecuacapitsapaeya-exaname. Pamonaewi beweliamatabëcuene xaina, ayaijamatabëcuenewi exaname.

⁵³ Pamonaewi pexaejawa apopexainaewi, nawitsia rajutame, pexainaenexa pexaniacuenejawanë. Bitso pijinia pexainaewi mapanacuapijicuene, bajarapamonaewi nawiabia-exanabiabame itsacuene yawenonaenewamë.

⁵⁴ Xamë yawenonabiabame nijajiwi, Israel nacuapijiwi. Aponacofënëtsimë cajena, nijajiwi nitaxutotsoniataeyabiabinexa nejumaitsicuenia.

⁵⁵ Bajaraxua yabara najumecapanepaeya jumaitsimë patajasalinainëmi, Abraham-pijinëjawabelia, paxanë, papemomoxinëjawaberena-ata, patanitaxutotsoniataeyabiabinexamë, daxitamatacabijawabelia», jai María, Dioso pewënëxaniatsijawata peto-exanaejawatsi yabara.

⁵⁶ Nexata, María acueyabi pajuametobeje naponapona Elisabet pijabota. Bajaraxuacujinae baja, nawiata pijaboyabelia, Nazaret tomarabelia.

Naexana Juan, jiwibautizabinënexa

⁵⁷ Elisabet itsa tocopiatatsi pamatacabijawa penacuetu wecuanaexanae-jitsiatsi. Wecuanaxanatsi jane baja penacuetonëyo. ⁵⁸ Daxita pamonaewi ena imoxoyo, pijabomuxuneneta, bajarapowa pijamonaeyajuwënëwi-ata, itsa jumetane jamatabëcuenebarëya, Dioso pitaxutotsoniataexaetsi, penacuetonëyo pexainaexae, bajayajebi mawecowa-ata. ⁵⁹ Itsa baja penacuetonëyo xaineca caesemana penaexanaecujinae, bajarapamonaewi yajawanacaetuata Elisabet, Zacarías-beje pijabota, pexënatonëyo pebo-upiperabëcaucutsia-exanaenexa judfowicuenia. Bajarapanacuetonëyo wënërubijitsiatsi picani paxa pewënëcuenia, pewënëxainaenexa. ⁶⁰ Elisabet itsiata jumaitsi bajarapamonaewiawabelia:

—¡Jume! ¡Pewënë raja tsane Juan! —jai.

⁶¹ Nexata, bajarapamonaewi jumaitsi:

—¿Detsa xuajitsia jitsipame Juan-wënë? Itsanë-ata cajena nijamonaeyaju-wënëñë apoxainae bajarapawënë —jai Elisabet-jawabelia.

⁶² Nexata, bajarapamonaewi pecobeta yanijoba Zacarías-jawabelia, pena-cuetonëyo paxa, pawënë jitsipa petowënërubinexatsi. ⁶³ Nexata, Zacarías wajëta tablapayo pewënëyaquinaenexa. Jumaitsi tsarutsi: «Juan rabaja pewënë», pejai-itaneto. Nexata, daxita bajarapamonaewi jamatabëcuene-nabenajaca. ⁶⁴ Bajarapaepatota, jemata icatsi Zacarías cuaicuajai baja. Nexata, jiji pitabarata, bajaraponë pexaniacuenia wënëxaniata Dioso ayai-jamatabëcuenenë yabara. ⁶⁵ Daxita pamonaewi bajarapatomarata imoxoyo pe-enaewi, itsa cuenetane pacuenia Zacarías Dioso yawenonaponatsi, pini-jicuenia jamatabëcuenenabenajaca. Bajarapamonaewi tsipaebanajetarubena bajarapanacuata petsutonëjawa pe-enaewijawabelia, bajarapacuene yabara. ⁶⁶ Daxita pejumetaewi bajarapacuene yabara, jumeliwaisi cana-ëjëbiaya jamatabëcuene pexainaenë tsane bajarapanacuetonëyo itsa witsabiana?», najai tsabiabi bajarapamonaewi, tsipaji bajarapanacuetonëyo bitso Dioso yawenonaponatsi.

Zacaríaš tajëwelia wajunupaeba pexënato yabara

⁶⁷Zacaríaš, pejewaxinëyo paxa, tsijamatabëwënëcatsi Espíritu Santo. Nexata, pacuenia Dioso yapëtaeya-exanatsi, tajëwelia wajunupaeba mapacueniaje:

- ⁶⁸«Pexaniajatabëcuene rajutsianatsi wajatuxanenëjawabelia, waxaitsi Israel nacuapijiwitsi wajaDioso, tsipaji patsica wajanacacapanepaenexa.
- ⁶⁹Nexata, nacato-itorobica pinijicuenesaë pexainenë, wajanacacapanepaenexa. Bajaraponë Dioso pijajiwitonëmi, David-pijinë, pemomoxiyajuwënë.
- ⁷⁰Bajaraponë yabara, bajayajawawerena Dioso pitapetsiwi, pijaprofetawi, tajëwelia najumecapanepaeya wajunupaeba bajaraponë wajanacacapanepaejawanexa.
- ⁷¹Bajaraponë nacacapanepaejitsia wajawajabitsaëwiwecua, daxita wajanaca-itoyawi-ata pecobewecua.^d
- ⁷²Profetawimi najumecapanepaeya wajunupaebanua wajasalinaiwimijawabelia, pewajënaeyabelia Dioso pitaxutotsoniataejawanexatsi. Apopenacofënëtsijawanua peto-exanaenexatsi pacuenia najumeliwaisi cajunua pijasalinainëmijawabelia.
- ⁷³Bajayata, copiaya Dioso najumecapanepaeya najumeliwaisicajunua wajasalinainëmi Abraham-pijinëjawabelia, waxaitsi pemomoxitsi yabara.
- ⁷⁴Najumecapanepaeya jumaitsi bajaraponëmijawabelia, wajanacacapanepaejawanexa wajawajabitsaë pecobewecua,^e ajunawijibia wajato-exanawanapaenexa Dioso pejitsipaecuenia.
- ⁷⁵Nexata, jinawanapaenatsi pibisiacuene exanaenejewatsi Dioso pitabarata, waja-asaëtsawanapae-epato abaxë mapanacuataje», jai Zacaríaš tajëwelia pewajunupaebijawata Jesús Dioso pitorobijawanexatsitsica wajanacacapanepaenexa.
- ⁷⁶Orijibia, Zacaríaš wajunupaeba pexënatonëyo yabara mapacueniaje: «Taxënatonëyo, xamë yabara jiwi jumaitsi tsabiabi tsane: ‘Mara ponëje ayajamatabëcuenenë Dioso, athëbëtatsia pe-ecaenë, pijaprofetanëje’, jai tsabiabi tsane. Bajarapacuenia xamë yabara jumaitsi tsane, tsipaji raja xamë pewajënaeya jiwi tsipaebanajetarucaenename itsaxuayo pepopetuxanenë najetarucaejitsia, pesiwanajamatabëcuenecopabiwin exa bajaraponëjawabelia pamatacabi najetarucaena.
- ⁷⁷Tsipaebanajetarucaenename neyapëtaeya-exanaenexa Dioso pijajiwi, judiowijawabelia, pecapanepaejawanexatsi, pewecua-ajibia-exanaenexatsinua pibisiacuene pexanaeneconimi.

d 1:71 wajanaca-itoyawi-ata pecobewecua: Bajarapajumejawabelia junua daxitacuenewiria wajanaca-itoyajawanë, pacuenia wajaperujumatabëcuene wajanacanamatataitorobisaë wecua, dowathi pesaëwecua-ata. Apo-ëwajawënjawittonë yabara. **e 1:74 wajawajabitsaë pecobewecua:** Jesucristo petëpaewajënaeya, daxita judiowi canaëjëtabiaba bajaraponë pecapanepaejawanexatsi Roma nacua pewetsinë pecobesaëwecua. Apocanaëjëtsi pecapanepaejawanexatsi Dioso penaneconitsia-exanaejawanexatsi pijaneconijamatabëcuene. Saya canaëjëta, Abraham-pijinë pemomoxixae, Dioso apopenaneconitsia-exanaejawanexatsi pijaneconi yabara. Bajaraxuata, Zacaríaš apojumaitsi Dioso pecapanepaejawanexatsi pijaneconiwecua.

⁷⁸ Bajarapacuenia wajaDioso nacato-exanaena, ayaicuenia wajanaca-itaxutotsoniataexae. Nexata, pacuenia matababipijiuameto pepitsapaejawatatsina taxuxuaba pejanamatacabi, bajarapijinia pacuenia Dioso pejanacuenia nacayapëtaeya-exanaena wajanaca-itaxutotsoniataejawa, wajanacato-itorobijawatatsica athëbëwetsica wajanacapanepaenënexa.

⁷⁹ Nexata, pacuenia matababipijiuameto ajibia-exana pitaquirijawa, bajarapijinia pacuenia bajaraponë jiwijawabelia petsipaebanajetarucaejawata pexaniajailiwaissi, jamatabëcuene-itayotsiana daxita pijamatabëcuene-itaquiriwimi. Baitsi, pamonaepicani cujunawa petëpaejawa, yapëtaena jamatabëcueneexanepanaeya pejinawanapaenexa, bajaraponë petsipaebiliwaissi pejamatabëcueneta», jai Zacarías tajëwelia pewajunupaebijawata pexënatonëyo yabara.

⁸⁰ Nexata jane baja, xuacujinae bajaraponëyo, Juan, ponë jiwibautizabinënexa, witsabanajetaruca. Yajawajamatabëcuene witsabaponanua Dioso pesaë. Itsa baja penaweretsinë, ponapona petusatonacuata, petaxuxuabijawabelianexa petsipaebijawa Dioso peliwaissi daxita Israel nacuapijiwijawabelia.

Pacuenia Jesús naexana, yabara peliwaissi

(Mt 1:18-25)

2 ¹ Jesús baja itsa imoxoyo penaexanaejawanexa, pewajënaeyota Romano nacua pepopewetsinë, Augusto, itoroba pijajiwi petonamata-ëjëtsinexatsi jiwi, peyanacua-ewetsinacuanëjawa. ² Bajarapanamata-ëjëtsicuene copiya exana pamatacabi Cirenio yanacua-eweta gobernador-nëcuenia Siria nacuata, Augusto peyanacua-ewetsinacuanëyajuwënjawa.

³ Nexata, nacua-ewetsinë Augusto pitorobixae, caejiwi canacujitsia nawiabapona pijasalinaiwimi pejinawanapaetomaranëjawa, bajarajota penawënëjucaenexa penamata-ëjëtsijawatatsi. ⁴ Bajaraxuata, José-ata barëpitsapa David-pijinë pemomoxae, Nazaret tomarawecua, Galilea nacuata pe-ecaetomarayo. Barëpona Belén tomarabelia, Judea nacuata pe-ecaetomarayo, patomarata José pijasalinainëmi, David-pijinë, bajayata ponapona. ⁵ José barëpona pijawa María, pebarënwënëyaquinaenexa bajarajota. Bajarapowa yacotapona penacueti. ⁶ Bajarapajiwiibeje peponaponaejawatabeje Belén tomarata, María jane baja, wixanotatsi, pewecua-naexanaenexatsi pejewaxinacueti. ⁷ Nexata, wecuanaexanatsi matapijinacuetonëyo. Bajarapamatacabi, ponaponabeje dajubi pewetabiabibota, tsipaji pabota jiwi patabiaba, pewajënaebeje jiwi yawënëca. Bajaraxuata, barë-eca penacuetonëyo bajarapabota. Jumaquioneta papaëbërëpanaxita. Buateta dajubi pexaejawa pemitsa-othocabiabimo-ënëta.

Ángelewi patsica, Jesús penaexanaejawa yabara petsipaebinexa oveja pewetsiwiawabelia

⁸ Belén tomara imoxoyo wayafotajawata, oveja pewetsiwi merawi ewetabiabawanapa pija-ovejabitsaëtonë. ⁹ Jemata bajarapamonae tsitanaitajëtatsi Dioso pija-ángelnë. Nexata, Dioso pijapeniweniwenacotia matatoyorotsia-itayotatsi. Bajarapamonae pinijicuenia najunawiaca.

¹⁰Nexata, ángelnē jumaitsi bajarapamonaejawabelia:

—¡Pětsa panajunawiacame, tsipaji raja pexanialiwaissi pacatocanajetarucatsi, xua yabara daxitajiwi siwajamataběcuenebarəyajitsia! ¹¹Ajena rabaja, mapamerawitaje, naexana baja daxitajiwi pecapanepaenənexa Belén tomarata, patomarata bajayata nacua-ewetsinēmi David-pijinēmi ponapona. Ponē naexana, bajaraponē pepoPetuxanenē Cristo, Dioso athěběwetsica pitorobinětsitsica. ¹²Paneyapětaenexa panacueto yabara pacatsipaebatsi, pacaxitajarabianame mapacueniaje: Bajarapanacuetoněyo pataeyabuatetsianame papaěběrepanaxita pejumaquionaenacuetoněyotsi. Boquecaena dajubi pemitisa-othocabiabimota —jai ángelnē oveja pewetsiwijawabelia.

¹³Bajarajota jemata ángelewí ayaibitsaětoxaneto tsitanaitajětatsi oveja pewetsiwi, pa-ángelnějawata copiaya tsitanaitajětatsi. Penaxěanaejawata, wěnxaniata Dioso mapacueniaje:

¹⁴«¡Diosomē, athěbětatsia ne-ecaenē, bitso cajena ayaijamataběcuenenēmē! Pamonae asiwaya taneme, jamataběcuenexanepanaeya jinawanapa», jai ángelewí pewěnxaniatsijawata.

¹⁵Itsa baja ángelewí nawiaba athěběabetsia, oveja pewetsiwi pecowěta najumaitsi:

—Ponaliatsi Belén tomarabelia, wajataenexa xua copiapata, pacuene yabara petuxanenē Dioso pitorobi-ángel-nětsica nacatsipaeba —najai.

¹⁶Bajarapamonae bepjiayo ponalia Belén tomarabelia. Nexata jane baja, caxitajaraba itsajota ponaponabeje María, Josěbeje, penacuetoněyo-ata, peboquecae-jawa dajubi pemitisa-othocabiabimota. ¹⁷Nexata, oveja pewetsiwi petaeyabuatetsijawata penacuetoněyo, tsipaeba Josě, Mariabejewawabelia, pacuenia ángelnē yapětaeya-exanatsi bajarapanacuetoněyo yabara. ¹⁸Daxita pamonaе jumetane oveja pewetsiwi pepaebiliwaissi, jamataběcuenenabenajaca. ¹⁹María baja cajena pejamatabě-ěthětota jamataběnaponapona nacofěnětsinejewa daxita bajarapacueni yabara. ²⁰Oveja baja pewetsiwi penawiabaponaejawatalia, pexaniacuenia wěnxaniatanajetarubena Dioso. Pexaniajamataběcuenenua rajutanajetarubena Doisojawabelia pijamuxucujaya pejumetaexae, pitaxutocujaya-ata petaexae. Daxita baja copiapata pacuenia ángelnē tsipaebatsi.

Pacuenia Jesús-něyo itajětatsi Diosojawabelia templobota

²¹Bajarapanacuetoněyo penaexanaecujinae, itsa baja xaina ocho pamatacabibeje, bo-upiperaběcaucutatsi judiowicuenia. Wěnrubatsinua jane baja, «Jesús», pacuenia tajěwelia jumaitsi ángelnē Mariajawabelia, penacoxitsiwajěnaeya.

²²Nexata jane baja, tocopiajopatsibeje Josě, Mariabeje, pexanaenexabeje pacuenia Dioso penajumecopatsiliwaissi Moisés-pijiněta itorobatsi penawecua-ajibia-exanaenexa bepenaxuirabicuenemí Dioso pitabarata, pewecuaenexaenacujinaetsi copiyapijinacuetoněyo. Nexata, Jerusalén tomarabelia barěponabeje

f 2:22 bepenaxuirabicuenemi: Dioso penajumecopatsiliwaissi Moisés-pijiněta nacayapětaeya-exana pacuenia Dioso tane bepenaxuirabiwacuenia 7 pamatacabibejecuenia powa wecuanaexanatsi pebiněyo. Itsiata matapania, 40 pamatacabibeje penacuetoněyo penaexanaecujinae, itsa baja janacopata, matapania jane baja, petiriwa capatsipa oveja pejananěyo, petajuitsinexa altariumata. Itsa bepejobiwa, cuenecaějěpatsi pecapatsijawa anija-uccutobeje. Taema Lev. 12:2-4. Bajaraxuata, Josě, Mariabeje, patabeje 40 pamatacabibeje Jesús penaexanaecujinae, María penawecua-ajibia-exanaenexa penaxuirabicuenemi Dioso pitabarata.

bajarapanacuetonëyo petsitajëtsinexabeje Diosojawabelia templobota. Rajutabejenua⁸ penacuetonëyo Diosojawabelia, pijajiwitonëcuenia petonacuenebinexa, itsa penaweretsinë. ²³ Bajarapacueni yabara Dioso penajumecopatsiliwaisi Moisés-pijinëta jumaitsi mapacueniaje: «Daxita copiaya penaexanaenacuetonëxi, totsatsiana Dioso pijajiwitonënexa»,^h jai. ²⁴ Bepenaxuirabicuene yabara, itorobatsinua pecapatsinexa dajubi, itsa jume, tsiquiriwiria ucucutoyobeje, itsa jume, pinijiwiria ucucutobeje pejananëbeje, petajuitsinexa altar-jumata Diosojawabelia. Nexata, José, Mariabeje, bepejiobijiwixaebeje, rajutabeje anija-ucucutobeje altar-jumata petotajuitsinexatsibeje Diosojawabelia.

²⁵ Bajarapamatacabi, ponapona Jerusalén tomarata Simeón-wënënë, piasiwänë Dioso. Pejumecowënëtsinë pacuenia Dioso pejumeliwaisibaxutota jumaitsi. Copia-ewetaponaponanua Dioso pijamatabëcuenesaëya-exanaenexa Israel nacuapijiwi, pitorobijawata Cristo, ponë capanepaejitsia pijajiwi. Simeón baja cajena yajawaponaponatsi Espíritu Santo. ²⁶ Nexata, Espíritu Santo tajëwelia yapëtaëya-exanatsi pacuenia petëpaewajënae taejitsia Cristo, Dioso ponë athëbëwetsica itorobiapaebica jiwi pecapanepaenexa. ²⁷ Simeón Espíritu Santo jamatabëcuenematacaponatsi peponaenexa temploboyabelia. Bajaraxuata, tane María, Josébeje, pebarëjonejawatabeje Jesús-nëyo temploboyarena, pexanaenexabeje pacuenia Dioso penajumecopatsiliwaisi Moisés-pijinëta itorobatsibeje. ²⁸ Nexata, Simeón isapita Jesús-nëyo. Pexaniajamatabëcuene perajutsijawata Diosojawabelia, jumaitsi mapacueniaje:

²⁹ «Tajatuxanenë, baja rajane netocopatsianame jamatabëcuenexanepanaëya tatëpaenexa nijajiwitonënë. Netaëya-exaname tatëpaewajënaëya pacuenia tajëwelia najumecapanepaëya nejumaitsimë.

³⁰ Taja-itaxutocujaya rabaja taniji maponëje, nitorobinëtsica jiwi pecapanepaenënexa xamëjawabelia.

³¹ Ponë itorobimica jiwi pecapanepaenënexa, daxitanacuanëpijiwi.

³² BajaraPonë petsipaebiliwaisita, jamatabëcuene-itayotsiana apojudfowi, bajarapamonae-ata peyapëtaëya-exanaenexa pacuenia jamatabëcuene-itsimë. Nexata, apojudfowi paneyaiyataena panijajiwinë, pajudfowinë, bajaraPonë pejamatabëcueneta», jai Simeón Diosojawabelia pexaniajamatabëcuene perajutsijawata Jesús-nëyo yabara.

³³ Nexata, José, Mariabeje, jamatabëcuenenabenajacabeje pejumetaejawatabeje, Simeón pejumaitsi jawata Jesús-nëyo yabara. ³⁴⁻³⁵ Bajaraxuacujinae, Simeón pexaniacuenia cuenewajunupaëba Dioso peyawenonaenexatsibeje José, Mariabeje, Jesús-nëyo yajawa. Icatsia, Simeón jumaitsi María, Jesús penajawabelia:

—Dioso itapeta mapanacuetonëyoje, peliwaisipaebinexatsi Israel nacuapijiwijawabelia. Bajarapaliwaisi pejamatabëcueneta, ayaibitsaëto Dioso naneconitsia-exanaenatsi, apo pejumexaniataexae tsane petsipaebiliwaisi. Ayaibitsaëto xaneto pijinia Dioso capanepaenatsi, pejumexaniataexae tsane petsipaebiliwaisi. Dioso nutsianatsinua pecuenecaranatsinëcuenia jiwi

pibisiacuene pexanaeyaniwa, xua jiwi exana apotsitapibisiacuene-atatsi picaní. Nexata, bajaranPonē itajētsiana pacuenia jiwi ayaibitsaētozaneto, caejiwi canacujitsia, bēpēnēa pibisiajamatabēcuenē najamatabēxainabiaba. Bajaraxuata, pibisiacuenia saya baranatsipaebianatsi. Xamē, penamē, nexata peponejamatabē-ēthētojawawetsina bitso siwajamatabēcuenēbējamē tsane, itsa yapētaename pacuenia exanaejitsiatsi —jai Simeón Maríajawabelia, tajēwelía pewajunupaebijawata pacuenia Jesús exanaejitsiatsi.

³⁶⁻³⁷ Bajarapijinia pamatacabi, templobota ponapona Ana, Diosojume-paebiwa, profetawa. Bajarapowa Fanuel-pijinē pexēnatoyo, Aser-pijinē pemomoxibitsaētoyajuwēnēwa. Bajarapowa bitso baja perujuwa. Ochenta y cuatro pawai-beje baja xaina. Nacojioba picaní abaxē itsa pejanawa, itsiata penacojiobicujinae wecuatēpatsi, siete pawai-beje pepuaxainae pamonajawabelia. Itsajawabelia apowecuaponabiabi templobo, tsipaji matocabijebi, merawijebi-ata, Dioso tonacuenēbabiaba. Itsajawata, pexaejawa apoxaeyabiabi pamatacabibeje wajēcabiaba Diosojawabelia. ³⁸ Nexata, bajarapowa patajopa itsajota José, Maríabeje, nucabeje, paepatota Simeón wajunu-paebanua Jesús-nēyo yabara. Nexata, bajarapowa-ata pexaniajamatabēcuenē rajuta Diosojawabelia Jesús-nēyo yabara. Xuacujinae, tsipaebabiaba Jesús-nēyo peliwaisi Jerusalén tomarata pejinawanapaewijawabelia, pamonae copia-ewetawanapa Dioso pitorobijawanexa ponē capanepaejitsiatsi pijawajabitsaēwecua.

Jesús-nēyo pijamonaewiwebeje barēnawiaarenatsibeje Nazaret tomaraberena

³⁹ José, Maríabeje, Jerusalén tomarata, templobota pexanaeweretsicujinae-beje daxita pacuenia Dioso penajumecopatsiliwaisi Moisés-pijinēta itorobatsi, bajaraxuacujinae baja, barēnawiaarenabeje¹ Jesús-nēyo pijatomaraberena, Nazaret tomara, Galilea nacuada pe-ecaetomara. ⁴⁰ Bajarapatomarata, Jesús-nēyo witsabanajetaruca. Bajaraponēyo Dioso pesaēta ajamatabēcuenesaē tsaponae pewajēnaeyabelia pecanaējētsijamatabēcuenē, jamatabēcuenewitsabaponanua. Dioso yawenonaponatsi ayaicuenia.

Jesús-nēyo templobota barēcuaicuajai judíowi pecujarubiwiwawabelia

⁴¹ Caewai canacujitsia José, Maríabeje, ponabiababeje Jerusalén tomarabelia, Pascuafiesta penataeyabiabinexabeje. ⁴² Nexata baja, Jesús-nēyo doce pawai-beje² itsa xaina, barēponabeje icatsia Jerusalén tomarabelia, Pascuafiesta penataenexa. ⁴³ Itsa baja copiaruca Pascuafiesta, daxita baja penataewi, nawiaba baja pijabonējawabelia. Itsiata, Jesús-nēyo nacopatuncalia Jerusalén tomarata. José, Jesús penabeje, abaxē apoyapētaebeje pewecuanacopatsijawatsiliabeje. ⁴⁴ Jamatabējumaitsidebeje saya: «Bajaraponēyo raeta nanajetaruca wajanajuaponaewita», jamatabējai-beje. Bajaraxuata,

i 2:39 *barēnawiaarenabeje*: Lucas apoyaquinae tulupu pecanaēcobiwi peliwaisi yabara, José, Maríabeje pebarēnajatēbijirawijawa Jesús-nēyo Egipto nacujawabelia peliwaisi-ata yabara. Taema Mateo capítulo 2. j 2:42 *doce pawai-beje*: Bajarapawaita, doce pawai-beje pexainaejawa, judíowi tsitatsi petaxuxuabijawa pebi peliwaisinaweretsinēcuenia pena-ewetsijawanexa. Nexata, caponabiaba templobojawabelia, itsa jume, sinagogabojawabelia, bajarajota penubenaewi, pecujarubiwi, pecujarubinxatsi pacuenia xaniawaetsia ponaponaejitsia judíonēcuenia. Maparucaeje bajarapapexanaecuenē pewēnē, «pebinēyo pijaBar-Mistva».

caematacabi baja pepuaponaebeje namutua, itaxanabeje. Nexata, yani-jobabeje pijamonaejawabelia, peyapëtaewitsibejewawabelia-ata. ⁴⁵Itsia, apocaxitajarabibeje. Nexata, nawiatecabeje Jerusalén tomarabelia, pejait-sinexabeje bajaraponëyo. ⁴⁶Acueyabimatacabita, caxitajarababeje templo-bota. Jesús-nëyo na-eca judíowi pecujarubiwiutuajëta. Jumetaeyeca baja-rapamonaë penabarëcuaicuajijailiwaissi. Yanijobaponanua bajarapamonaë penabarëcuaicuajijailiwaissi yabara. ⁴⁷Nexata, Jesús-nëyo xaniawaetsia peya-pëtaejamatabëcuene yabara, xua-ata judíowi pecujarubiwi yanijobapona, itsa xaniawaetsia jumecanawiataponatsi, itaxutuanabenajaquena bajaraPo-nëyo. ⁴⁸José, Mariabeje, itsa tanebeje bajarajota Jesús-nëyo pena-ecaejawa, nexata itaxutuanabenajacabeje. Nexata, Jesús pena jumaitsi:

—Taxënato, ¿detsa xuajitsia panewepënacoparemenabeje? Paxanëbeje patacajaitarutsijawatabeje. Bitso paca-itaxanatsibeje —jai pena.

⁴⁹Nexata, Jesús-nëyo jumaitsi penajawabelia:

—¿Detsa xuajitsia bajarapacuenia panejaitarutamebeje? Panejaitsi-pamebeje raja majotaje, tsipaji raja xanë taxa Dioso pijacuene ta-exanaenexa mapabotaje, nejamatabëcuene-enabiaba —jai.

⁵⁰Itsia, bajarapajiwiibeje apojumeyapëtaebeje pajamatabëcuene yabara jumaitsi Jesús-nëyo.

⁵¹Itsia baja cajena, María pejamatabë-ëthëtota jamatabënapanona daxita bajarapacuene yabara. Nexata baja, bajarapajiwiibeje pepëta Jesús-nëyo napona baja Nazaret tomarabelia. Bajarapatomara xaniawaetsia jumecowënëtsiaponaponacuenia José, Mariabeje, itorobabiababeje.

⁵²Jesús pewitsabanajetarucaejawata, ayainë baja tsaponae. Yajawajamatabëcuene witsabanajetaruca, xaniawaetsia pecanacuenebinexa peyapëtae-cuene. Nexata, pexaniajamatabëcuenia tanetsi, Dioso. Bajarapacuenia jiwi-ata asiwaya tanetsi.

Juan jiwibautizabinë jiwi liwaisi tsipaebanajetaruca petusatonacujawa

(Mt 3:1-12; Mc 1:1-8; Jn 1:19-28)

3 ¹Emperador, Tiberio, itsa xaina quince pawaiabeje peyanacua-ewetsijawa Imperio Romano nacua, bajarapijinia pamatacabijawa, Poncio Pilato, gobernador-nëcuenia, yanacua-eweta Judea nacua. Herodes pijinia yanacua-eweta Galilea nacua. Herodes pejuyapijinë-ata, Felipe, pijinia yanacua-eweta anijanacuabeje, Iturea nacua, Traconite nacua-ata. Lisantias pijinia yanacua-eweta Abilinia nacua. ²Bajarapijinia pamatacabi Anás, Caifás-beje, Israel nacua sacerdote wi pepo-penamatacaitorobinëbeje tsaponaponae. Pamatacabi bajarapapewet-siwi ewetawanapa pijanacuanëpijiwi, bajarapamatacabijawa Dioso yapëtaeya-exanapona Juan, Zacarías pexënatojawabelia, petusatonacuata peponaponaejawata, paliwaisi tsipaebanajetarucaejitsia jiwi-jawabelia. ³Nexata, Juan tsipaebanajetaruca bajarapaliwaisi daxita Jordán-mene imoxoyo pe-enaenacuanëjawa pejinawanapaewi. Jumaitsi tsanajetarucæ jiwijawabelia: «¡Panajamatabëcuenepëñëyore Dioso-jawabelia, pibisiacuene pane-exanabiabijawawecua, juya Dioso pejit-sipaecuenia panejinawanapaenexa! Nexata, pacabautizabianatsi Dioso

papecawecua-ajibia-exanaenexa^k pibisiacuene pane-exanaeconimi», jai tsanajetaruca^e jiwijawabelia. ⁴Bajarapacuenia Juan jiwi itsa tsipaebanajetaruca, copiajopa jane baja, pacuenia profeta Isaías-pijinē bajayata tajēwelia yaquina bajarapacuenē yabara. Jumaitsi mapacueniaje:

«Tanejumeliwaisipaebinē wawajaiya jumaitsi tsane petusatonacuata mapacueniaje: ‘Tsiwajēnaexanebi, Tsiwajēnaerowia-exanaenua panamutowerena najetarucaejitsia petuxanenē.

⁵»Daxita namutua perubenaefotonē, atsa othocae penamatajēpaeya-exanaenexa. Daxita petsutonēmi, piniji-ibotsutoxanetonēmi-ata, namatajēpaeya-exanae. Rowia-exanae penatoxorobinamutonēmi-ata. Namutua pebobaenēmthēanēmi acabinua, penamatajēpaeya-exanaenexa.

⁶»Nexata, daxitanacuanēpijiwi taena Dioso peto-itorobijawatsi pecapanepaenēnexatsi pijaneconiwecua⁷»,^l jai baja cajena profeta Isaías-pijinē bajayata peyaquinaeliwaisita, Juan pexanaecuenenexa yabara.

⁷Bajarapamatacabi, jiwi ayaibitsaētoxaneto patapona Juan-jawaberena pebautizabinexatsi picani, Dioso pewecua-ajibia-exanaenexatsi pijaneconi, apanajamatabēcuenepēñeyorotsi-ata Diosojawabelia, pibisiacuene pexanaejawawecua. Nexata, Juan jumaitsi bajarapamonaejawabelia:

—¡Panajamatabēcuenenawēxaniabiwi cajena! Pacuenia jomo rēcēpeca itsa tane isoto petajuenajetarucaejawa, bajarasaya pajamatabēcuenē-itsimē. Patacabautizabijawata picani pajitsipame panewecuapanepaenexa Dioso papecananeconitsia-exanaematacabi. Itsiata baitsi jane, paca-imoxoyota baja Dioso pamatacabi pacananeconitsia-exanaejitsia. ⁸!Itsa pajitsipame Dioso papecacapanepaejawa, panajamatabēcuenē-itajēre pexaniacuene pane-exanawanapaejawata, Dioso pejitsipaecuenia pane-exanawanapaenexa! Nexata, daxitajiwi pacayapētaena pepacuene baja panenajamatabēcuenepēñeyorotsijawa Diosojawabelia, pibisiacuene pane-exanaejawawecua. ¡Jamatabēcuenenawēxaniabiaya pētsa panajumaitsimē: «Waxaitsi cajena Abraham-pijinē pemomoxitsi. Nexata, Dioso tsiteca nacacapanepaena pibisiacuene exanawanapae-atatsi», panajamē pētsa! Xania-jai rabaja picani Abraham-pijinē papemomoximē. Bajarapacuenē itsiata apopacatonamatamotsi tsipae, papecacapanepaenexa Diosojawabelia. Itsa Dioso siwabējai tsipae bepemomoxi ayaibitsaēto petaenexa, bajaraPonē caējēpatsi baja cajena jiwi pexanaenexa mapa-ibotonēmi-ataje, Abraham-pijinē bepemomoxi petaenexa. !Itsiata, Dioso pesiwabējaixae jiwi pijaneconi yabara, panajamatabēcuenepēñeyorore Diosojawabelia! ⁹¡Xania baja tsane, tsipaji raja, Dioso papecananeconitsia-exanaenexa paca-imoxoyota baja!

k 3:3 *papecawecua-ajibia-exanaenexa*: Bajayatami, Juan, jiwibautizabinē, peponaponaematacabi, pacujinae apojudfowiyajuwēñējiwi jamatabēnacajunua judfocuenējawabelia, pexanaecujinae daxita pacuenia sacerdotewi itorobatsi, nexata matawanetsi jabutsiaya merata, pewecua-ajibia-exanaenexatsi bepenaxuirabicuene Dioso pitabarata. Bajaraxua wenēruba pebautizabicuene. Nexata, matapania jane baja, Juan taxuxuaba bajarapabautizabicuene pewēnajuđfowijawabelia penajamatabēcuenepēñeyorotsicujinae Diosojawabelia, pibisiacuene pexanaejawawecua. Bajara-pacuenia exana pewecua-ajibia-exanaenexatsi bepenaxuirabicuenēmi, pibisiacuene pexanaejamatabēcuenē. **l 3:6** Taema Isa. 40:3-5; Tit. 2:11.

Pe-ubinaenē pexainaenē, ponaenē itsa apotonacuaititsi pexaniacuai, daxita nicata bajaraponaenēmi sipalita. Nexata baja, penionaecujinae, bajaraponaenē caetuata. Xuaba isotojawabelia petajuitsinexa. Bajarapijinia pacuenia, paxamē-ata Dioso pacaxuabiana apopewerewerecae-isotojawabelia papecatajuenexa, apopanenuene-itajētsixae pexaniacuene panexanawanapaejawa —jai Juan bajarapamonaejawabelia.

¹⁰ Nexata, bajarapamonaē jumaitsi Juan-jawabelia:

—¿Detsa xua pa-exanaenajē, patanacuene-itajētsinexa patanajamatabēcuenepēñeyorotsijawa Diosojawabelia? —jai.

¹¹ Nexata, Juan jumaitsi bajarapamonaejawabelia:

—¡Pajiwi xaina anijacamisabeje, caecamisa rajutsi apopexinaejijawabelia! ¡Pajiwi xaina pexaejawa, tsicobetsatsi pexaejawa apopexinaejijawabelia! —jai Juan.

¹² Impuestojamatabēcuenē pematamoyanijobabiwi-ata, pata picani Juan-jawaberena pebautizabinexatsi. Nexata, bajarapamonaē jumaitsi:

—Necujarubinē, ¿detsa nexata xua pa-exanaenajē, patanacuene-itajētsinexa patanajamatabēcuenepēñeyorotsijawa Diosojawabelia? —jai.

¹³ Nexata, Juan jumaitsi bajarapamonaejawabelia:

—¡Itsa pematamoyanijobame, pētsa pematatsēñē pawajēcabiabame bajarapamatamowecua! ¡Pa-exanawanapare saya papeca-itorobiwi papecatonajumecopatsicuenia! —jai Juan.

¹⁴ Nexata, icatsia wajabitsaē-ata jumaitsi Juan-jawabelia:

—Paxanē pijinia, ¿detsa xua pa-exanaenajē, patanacuene-itajētsinexa patanajamatabēcuenepēñeyorotsijawa Diosojawabelia? —jai.

Nexata, Juan jumaitsi bajarapamonaejawabelia:

—¡Pētsa itsajiwi-ata palata payacajērētame paneyabara-atiobicuenia! ¡Pētsa najumetsēñētsiaya itsajiwi-ata pananeconitsia-exaname, saya palata papecarajutsinexa papecacujunawixae! ¡Pasiwajamatabēcuenēbarēyame saya pacueneta pacamatamotapona papeca-itorobiwi! —jai Juan wajabitsaējawabelia.

¹⁵ Daxitajiwi jamatabēcuenenabenajaca Juan pecuēnetaejawata, pejumetaejawatanua petsipaebiliwaisi yabara. Bajarapamonaē pecopiaewetawanapaexae Cristo, ponē Dioso itorobiapaebica athēbēwetsica, daxitajiwi pecapanepaenēnexa, jamatabēcuenenawēxaniabiaya jamatabējumaitsi: «Baja raeta jane, maCristoje», jamatabējai Juan yabara.

¹⁶ Peyanijobiweretsicujinaetsi, Juan jumaitsi daxita bajarapamonaejawabelia:

—Xanē apobajaraponēñē. Xanē raja saya pacabautizabaponatsi merata. Bajaraponē raja ayaijamatabēcuenenē tsane xanēwecua. Xanē raja beweliamatabēcuenenēñē bajaraponēwecua. Nexata, acobe-uranē pijazapato-ata tataxujonotsinexa, bepijajiwitonēcuenianē. Ponē rajane tacowēwerena najetarucaena, pacatsijamatabējoneya-exanaena Espíritu Santo. Itsamonaē pijinia naneconitsia-exanaenatsi isotota pijaneconijamatabēcuenē.

¹⁷ Nexata, bajaraPonē xaniawaetsia pacatsatsiana, pacuenia jiwi batsata arrozxu pesiwecua. Arroz pexainaenē baja itsa wereta pesiricaejawa, jēaba pewecuatsatsinexa pesijawanē, ēpexu pepitsinexa. Bajarapaxu xaniawaeteta pe-etsibojawabelia. Pesi pijinia penetapona wayafuabelia,

petajuitsinexa. Bajarapijinia pacuenia, paxamë-ata tacowëwerena penajetarucaenë tsatsiana pexaniacuen pexanaewi, pibisiacuen pexanaewiwe-cua. Nexata, pamona Dioso pejisipaecuenia exanawanapa, capanepaenatsi, pejinawanapaenexa Dioso pijanacuatatsia. Pamona pijinia Dioso apopejisipaecuen exanawanapa, naneconitsia-exanaenatsi daxitamatacabijawabelianexa apowewerewerecae-isotojawabelia —jai Juan daxita bajarapamonaejawabelia.

¹⁸ Bajarapacuenia Juan muxujiobapona jiwi pecuenecataeliwaisianëta. Tsipaebanajetaruca pexanaliwaisi pecapanepaeliweisinexatsi Diosojawabelia. ¹⁹ Bajarapacuenia pexananajetarucaexae, jiwijawabelia itsamatacabi Juan muxujioba nacua-ewetsinë Herodes, tsipaji bajaraponë pejuyapijinë pijawa yacajërëta pepitsinexa, Herodías-wa. Orijiibia, cuene-itaweta Herodes daxita papibisiacuenjawanë exana. ²⁰ Itsiata baitsi jane, Juan apojumecowënëtsitsi Herodes. Biji saya caranata, pematatsënë Herodes pibisiacuen exana, tsipaji itoroba pijajiwi Juan pewaetabinexatsi, penaneconitsiwi pejebabiabibota pe-etsinexatsi.

Juan pebautizabijawa Jesús

(Mt 3:13-17; Mc 1:9-11)

²¹ Juan penaneconitsia-exanaewajënaeyatsi, jiwi ayaibitsaëttoxaneto bautizabaponapona. Bajarapacuenia Jesús-ata bautizabatsi. Pebautizabijawajatsi,^m paepatota Jesús wajëta Diosojawabelia, athëbëatsia itaboxo napata. ²² Athëbëwetsica Espiritu Santo tsimatarunaicatsi be-ucucutocuenia. Nexata, jumetane athëbëwetsica Dioso pejumajitsijawatsi: «Xamë raja taxënatomë, bitso taca-asiwanë. Bitso casiwajamatabëcuenebarëyatsi», pejaijawatsi.

Jesús pijasalinaiwimi pewënëanë, yabara peliwaisi

(Mt 1:1-17)

²³ Itsa baja Jesús xaina treinta pawaijebe, taxuxuaba jane baja jiwijawa pexanaponaponaenexa Dioso pijacuen. Jiwi canaëjëta Jesús yabara, José pepopexënatocuen. José paxapijinë pewënë Elí. ²⁴ Elí paxapijinë pewënë Matat. Matat paxapijinë pewënë Leví. Leví paxapijinë pewënë Melqui. Melqui paxapijinë pewënë Jana. Jana paxapijinë pewënë José. ²⁵ José paxapijinë pewënë Matatías. Matatías paxapijinë pewënë Amós. Amós paxapijinë pewënë Nahum. Nahum paxapijinë pewënë Eslí. Eslí paxapijinë pewënë Nagai. ²⁶ Nagai paxapijinë pewënë Maat. Maat paxapijinë pewënë Matatías. Matatías paxapijinë pewënë Semei. Semei paxapijinë pewënë Josec. Josec paxapijinë pewënë Judá. ²⁷ Judá paxapijinë pewënë Joanán. Joanán paxapijinë pewënë Resa. Resa paxapijinë pewënë Zorobabel. Zorobabel paxapijinë pewënë Salatiel. Salatiel paxapijinë pewënë Neri. ²⁸ Neri paxapijinë pewënë Melqui. Melqui paxapijinë pewënë Adi. Adi paxapijinë pewënë Cosam. Cosam paxapijinë pewënë Elmadám. Elmadám paxapijinë pewënë Er. ²⁹ Er paxapijinë pewënë Josué. Josué paxapijinë pewënë Eliezer. Eliezer paxapijinë pewënë Jorim. Jorim paxapijinë pewënë Matat. ³⁰ Matat paxapijinë

pewënë Leví. Leví paxapijinë pewënë Simeón. Simeón paxapijinë pewënë Judá. Judá paxapijinë pewënë José. José paxapijinë pewënë Jonam. Jonam paxapijinë pewënë Eliaquim. ³¹Eliaquim paxapijinë pewënë Melea. Melea paxapijinë pewënë Mainán. Mainán paxapijinë pewënë Matata. Matata paxapijinë pewënë Natán. ³²Natán paxapijinë pewënë David. David paxapijinë pewënë Isaí. Isaí paxapijinë pewënë Obed. Obed paxapijinë pewënë Booz. Booz paxapijinë pewënë Sala. Sala paxapijinë pewënë Naasón. ³³Naasón paxapijinë pewënë Aminadab. Aminadab paxapijinë pewënë Admin. Admin paxapijinë pewënë Arni. Arni paxapijinë pewënë Esrom. Esrom paxapijinë pewënë Fares. Fares paxapijinë pewënë Judá. ³⁴Judá paxapijinë pewënë Jacob. Jacob paxapijinë pewënë Isaac. Isaac paxapijinë pewënë Abraham. Abraham paxapijinë pewënë Taré. Taré paxapijinë pewënë Nacor. ³⁵Nacor paxapijinë pewënë Serug. Serug paxapijinë pewënë Ragau. Ragau paxapijinë pewënë Peleg. Peleg paxapijinë pewënë Heber. Heber paxapijinë pewënë Sala. ³⁶Sala paxapijinë pewënë Cainán. Cainán paxapijinë pewënë Arfaxad. Arfaxad paxapijinë pewënë Sem. Sem paxapijinë pewënë Noé. Noé paxapijinë pewënë Lamec. ³⁷Lamec paxapijinë pewënë Matusalén. Matusalén paxapijinë pewënë Enoc. Enoc paxapijinë pewënë Jared. Jared paxapijinë pewënë Mahalaleel. Mahalaleel paxapijinë pewënë Cainán. ³⁸Cainán paxapijinë pewënë Enós. Enós paxapijinë pewënë Set. Set paxapijinë pewënë Adán. Adán-pijinë Dioso pexanaenëtsi.

Jesús pacuenia jamatabëcuene-ëjëbatsi dowathi

(Mt 4:1-11; Mc 1:12-13)

4 ¹Jesús pebautizabicujinaetsi, Espíritu Santo tsijamatabëcuenewënë-catsi. Jordán menewecua nawiataponarena. Nexata, Espíritu Santo ponaeya-exanatsi petusatonacuayabelia. ²Bajarajotalia, Jesús ponapona cuarenta pamatacabibeje, pexaejawa xaenejewa. Bajarapamatacabibeje pepanepaecujinae, Jesús bitso pïajani. Nexata, pïajanijawata dowathi jamatabëcuene-ëjëba,ⁿ pibisiacuene picani pexanaeya-exanaenexa.

³Dowathi jumaitsi Jesús-jawabelia:

—¡Itsa pepacuene Dioso pexënatomë, itorobare mapa-ibotoyoje penaexanaenexa panbë! —jai.

⁴Nexata, Jesús jumaitsi dowathijawabelia:

—¡Jume raja! Dioso raja pejumeliwaisibaxutota jumaitsi mapacueniaje: «Jiwi raja aponamatawenonae ëpexaejawata piasaëtsawanapaenexa. Biji rajane, namatawenona daxita Dioso peliwaisi pejumexaniataejawa pïajamatabëcuenesaëtsawanapaenexa. Namatawenonanua pejumecowënëtsijawa»,^o jai raja Dioso pejumeliwaisibaxutota —jai Jesús dowathijawabelia.

⁵Bajaraxuacujinae, Jesús barëliatsi dowathi pinijitsutoxanetojawabetsia, pebarëjunaenexatsi. Bajarawetsica Jesús tsitajëtatsi bepïiacuenia daxitanacuanë, papexaniacuenenua xaina. ⁶Nexata, jumaitsi Jesús-jawabelia:

n 4:2 dowathi jamatabëcuene-ëjëba: Itsamonae Dioso peliwaisi pejucaewi griegojumewerena wowajumejawabelia, canaëjëta pacuenia dowathi jamatabëcuene-ëjëba Jesús cuarenta pamatacabibeje pecopiarucaejawatalia. Itsamonae pijinia canaëjëta pacuenia jamatabëcuene-ëjëbapona daxita bajarapacuarenta pamatacabibejewawa. o 4:4 Taema Deut. 8:3.

—Xanë raja carajutsianatsi daxita mapanacuanëje, neyanacua-ewetsinënexa daxita bajarapanacuanë. Ayaijamatabëcuenenëmë nenaexa-naenamenua. Daxita bajaraxuanë Dioso nerajuta. Nexata, necaëjëpa juya tarajutsinexa pajiwiwajawabelia jamatabërajutajë. ⁷Daxita bajaraxuanë nija-jawa tsane, itsa baitsi jane, nematabacabëta netonucajonename ayaijamatabëcuenenënë netaeya taitabarata —jai dowathi.

⁸Nexata, Jesús jumaitsi dowathijawabelia:

—¡Satanás,^p newecuanatixire! Dioso raja pejumeliwaisibaxutota jumaitsi mapacueniaje: «Daxitajiwi asiwaya, yaiyataeya, pematabacabëta nubenae caenë, pepopetuxanenë Dioso pitabarata. Tonacuenebinua bajara-ëPonënexa»,^q jai raja Dioso pejumeliwaisibaxutota —jai Jesús dowathijawabelia.

⁹Bajaraxuacujinae abaxë, icatsia Jesús barëliatsi dowathi Jerusalén tomarabelia. Bajarajota, barëjunayatsi temploboxanetomatatuyabetsia. Bajarajotatsia dowathi icatsia jumaitsi Jesús-jawabelia:

—Itsa pepacuene Dioso pexënatomë, jirewaremeca irabereca, ¹⁰tsipaji xamë ne-itsacueneyaniwa peca-ewetsinexa, Dioso pejumeliwaisibaxutota jumaitsi mapacueniaje: «Dioso itorobianica pija-ängelewi peca-ewetsinexa. ¹¹Nexata, pecobeta cayotsiana pecataxutsaquitsiyaniwa ibotonëjawabelia»,^r jai raja Dioso pejumeliwaisibaxutota —jai dowathi.

¹²Jesús nexata, icatsia jumaitsi dowathijawabelia:

—Jume raja! Dioso raja pijinia pejumeliwaisibaxutota jumaitsi mapacueniaje: «¡Pëtsa jamatabëcuene-ëjëtame petuxanenë Dioso, neyapëtaenexa itsa xaniajai pecato-exanaejawanexa pejumaitsicuenia!»,^s jai raja Dioso pejumeliwaisibaxutota —jai Jesús dowathijawabelia.

¹³Bajaraxuacujinae, itsa baja dowathi daxitacuene Jesús jamatabëcuene-ëjëbiweretatsi pibisiacuene picani pexanaeya-exanaenexatsi, nexata abaxë copatatsi, itsamatacabijawabelia^t icatsia pejamatabëcuene-ëjëtsinexatsi.

Jesús taxuxuaba pexanaponaponaejawa Dioso pijacuenejawanë, Galilea nacuata

(Mt 4:12-17; Mc 1:14-15)

¹⁴Jesús baja itsa nawiata petusatonacuawerena, Galilea nacuayaberena, Espíritu Santo tsijamatabëcuenewënëcatsi, Dioso pijacuene pexanaponaponae-nexa. Nexata, daxita Galilea nacuapijiwi wënëliwaisitanetsi. ¹⁵Judíowi pasinagogabonëjawa nacaetuatabiaba, Jesús cujarubanajetaruca jiwijawabelia Dioso peliwaishi. Daxitajiwi pexaniacuena wënëxaniatatsi pecujarubicuene yabara.

Jesús nawiata pijatomara, Nazaret-jawabelia

(Mt 13:53-58; Mc 6:1-6)

¹⁶Penajetarucaejawata Galilea nacujajawa, Jesús pata pewitsa-bitomarata, Nazaret-jawata. Nexata, pexanabiabicuenia, judíowi

p 4:8 *Satanás*: Jesús canacueneba dowathiwënë, pepopewënë Satanás, peyamaxë-itojorobinë pejaiwënë, tsipaji bajarapayanacua-ewetsicuene Satanás apopijajawa, xua yabara rajutsiapaeba peyamaxë-itojorobicuenia. Biji rajane, Dioso pijajawa. Satanás saya naxainaeyaba, paepatota abaxë Dioso apo-itorobi apopewerewerecae-isotojawabelia. Taema Deut. 10:14; Sal. 89:11; Apoc. 19:1. **q 4:8** Taema Deut. 6:13. **r 4:11** Taema Sal. 91:11-12. **s 4:12** Taema Deut. 6:16. **t 4:13** *itsamatacabijawabelia*: Taema Lc 22:3, 39-46, Mt 26:38-46. Mar. 14:32-42.

penacuera-ewetsimatacabita, Jesús najoneya judíowi pasinagogabota nacaetuatabiaba. Bajarajota nonotapuna, Dioso pejumeliwaisibaxuto petsimuxulebinexa, daxita pejumetaenexa, bajarajota pe-enaewi. ¹⁷Nexata, Jesús tsi-coberutatsi profeta Isaías-pijinë bajayata peyaquinaebaxuto. Nexata, Jesús pebaxupatsijawata caxitajaraba paliwaisi tsimuxulebijitsia. Nexata jane baja, tsimuxulebanuca itsajota Mesías yabara jumaitsi mapacueniaje:

¹⁸ «Dioso petuxanenë pija-Espíritu Santo nejamatabëcuenecaëjëpaeya-exana, pijacuenë tato-exanaponaponenexa. Nexata, tane-itapetsixae, tsipaebaponajë pexanialiwaissi pijapibisiacuenë bepeyajamatabëcuenëjiobiwijawabelia. Tatsipaebiliwaissita, jamatabëcuene-isaenajë bepejamatabëcuenecëbiwitsi pijaneconi, jamatabëcuene-itayotsianajë pijajamatabëcuene-itaquiriwimi, apoeyapëtaexae pexaniajailiwaissi, jamatabëcuene-yawenonaenajënuu tacapanepaenexa pejamatabëcuenëbejiobitabiabiwitsi pijawajabitsaë.

¹⁹ Nexata, tsipaebanajetarucajë pacuenia copiapata jane baja, pamatacabi Dioso tsiwajënaenajamatabëcuenewereta pecapanepaenexa pijajiwi»,^u pejaijawata Isaías-pijinë peyaquinaebaxutota, Jesús tsimuxulebanuca.

²⁰ Bajarapabaxuto pebaxu-acatsicujinae, tocanawiata penacuenëbabia-binëjawabelia sinagogabojawata. Bajaraxuacujinae, Jesús baja ecareca pelebicujinae penajumeliwaisipaebinexa^v pelebiliwaissi. Daxita bajarapabota pe-enaewi, asaëya taeyenatsi. ²¹Nexata, icatsia Jesús jumaitsi bajarapamonaejawabelia:

—Aeconoxae, xua pacatsimuxulebatsi Dioso pejumeliwaisibaxutota, mamatacabitaje copiapata jane baja —jai bajarapamonaejawabelia.

²² Nexata, daxitajiwi pexaniacuenia wënëcacuaicuajiai Jesús yabara. Jamatabëcuenënenabenajaca, Jesús petsipaebixae pexanialiwaissi. Itsiata, bajarapacuenia cuenetae-ata, bajarapamonaeyajuwënëwi jamatabëcuene-aebiataetsi. Nexata, nayanijobenaeya najumaitsi:

—Apoxaniajai cajena. ApoMesías. Biji rajane, saya Josépijinë pexë nato — najai tsenae Jesús yabara.

²³ Nexata, Jesús pejamatabëcuene-yapëtaexae pacuenia siwajamatabëjumaitsi, jumaitsi bajarapamonaejawabelia:

—Yapëtaniji cajena patanejumaitsi-jawanexamë panijanacuapijiwi pejumaitsicuenia, xanëjawaberena: «Xamë jiwi newaëbinë, copiaya nijacuata nawaëbianame patacajumexaniataenexa», patanejamëjawanexa. Bajarapacuenia panejumaitsimë tsane, tsipaji pajitsipame patacatsita-exanaejawa papinijicuenejawanë panewënëliwaisitaneme tatsita-exanaejawa Caper-naüm tomarapijiwijawabelia, jamatejema patanejumexaniataenexamë patacajumaitsi-jawa —jai sinagogabota pe-enaewijawabelia.

²⁴ Mataropotsia Jesús jumaitsi:

—Xaniajanë cajena pacuenia pacatsipaebijitsiatsi. Itsanë-ata, Diosojumepaebinëmi, profetanë, pijanacuapijiwi

u 4:19 Taema Isa. 61:1-2. **v 4:20** *penajumeliwaisipaebinexa*: Judíowi nucabiaba petsimuxulebinexa Dioso peliwaissi, penajamatabëcuene-itajëtsinexa peyaiyataejawa Dioso peliwaissi. Xuacujinae, ecabiaba pebaebinexa, itsa jume, pecujarubinexa bajarapaliwaissi yabara. Nexata, Jesús itsa eca pelebicujinae, daxitajiwi yapëtane pepaebijawanexa.

xaniawaetsia apojumexaniataeyabiabitsi petsipaebiliwaisi. Jamatabëcuene-
aebiataeyabiabatsi, pacuenia paxamë patajanacuapijiwimë
panejamatabëcuene-aebiataneme. ²⁵ ¡Paneyapëtaenexa pexaniajailiwaissi-
cuene patacatsipaebijawa, pacanaëjère xua profetawimi exana! Bajayata,
pamatacabi profeta, Elías^w ponapona Israel nacuata, bajarapamatacabi,
emarapae-ata, itsiata ema apojopae acueyabi pawaiheje pematatsënëa.
Bajaraxuata, daxita nacuanëjawa bitso janibo. Bitso bejiobi tsawanapae.
Bajarapamatacabita, jinawanapa pamonajiwi pewecuatëpaewanëtsi ayai-
bitsaëto Israel nacuata. ²⁶ Itsiata, profeta Elías Dioso apo-itorobitsi peya-
wenonaenexa bajarapamonaeyajuwënëwa. Biji rajane, itorobatsi pepo-
naenexa Israel nacuawecua, Sarepta tomarajawabelia, itsajota ponapona
powa apojudiowa, pamona pewecuatëpaewatsi, peyawenonaenexa. Sarepta
tomara eca Sidón nacuata. ²⁷ Bajarapijinia pacuenia, profeta Eliseopijinë
peponaponaematacabita, jinawanapa ayaibitsaëto bajayajebi bitso peper-
abëtsabanaewi Israel nacuata. Itsiata, bajarapamatacabi profeta Eliseopi-
jinë bajarapamonaeyajuwënëwi-ata, caenë-ata apojamatejemaya-exanae.
Biji rajane, caenë bajayajebi bitso peperabëtsabanaenë Naamán, Siria
nacuawerena pepatsinë, jamatejemaya-exana —jai Jesús sinagogabota
pe-enaewijawabelia.

²⁸ Bajarapamonae itsa jumetane bajarapacuenia Jesús pejumaitsijawa,
bitso bara-anaepanatsi. ²⁹ Bajaraxuata, tsimaxënonobapunatsi. Jesús baja
waetabatsi. Caponaliatsi tomarapënëyabelia. Cajunayatsinua patsutoyene-
panata eca Nazaret tomara, petorotajarabinexatsireca picaní bajarapabëxë-
fotuareca. ³⁰ Itsiata baitsi jane, Jesús bajarapamonaetuatuajëta najetaruca-
ata, wecua-ajibi tsarucacae. Pona Capernaúm tomarabelia, pëtaenejewatsi.
Bajarapacuenia Jesús wecuapanepa bajarapamonae.

Jesús wecuacapsapa dowathi peyajawaponaponaenë

(Mc 1:21-28)

³¹ Jesús itsa pata Capernaúm tomarata, Galilea nacuata pe-ecaetomara,
nexata jiwi liwaisi tsipaebabiaba, caesábado canacujitsia, pamatacabi
judíowi nacuera-ewetabiaba. ³² Itsa bajarapamonae jumetane Jesús petsi-
paebijawa, jamatabëcuenenabenajaca, tsipaji peyapëtaenëcuenia xaniawaet-
sia tsipaebabiaba, Dioso pitorobinëtsicuenia.

³³ Itsa sábadomatacabijawa,^x judíowi penacatuatabiabisinagogabota pebi,
dowathi peyajawaponaponaenë, na-eca. Nexata, bajaraponë Jesús-jawabelia
wawajai tsaxuabi. Jumaitsi:

³⁴ —¡Jesús, Nazaret tomarapijinëmë,^y panewecuaponare baja!
¿Detsa xua pane-exanaejitsiamë? ¿Najetarucame tsaja patanewere-
biabinexamë? Xanë cajena cayapëtanetsi. Dioso pexënatocuenemë,

w 4:25 *Elías*: Bajaraponë bayatami ponapona Israel nacuata. Baitsi, apo-asaë tsaponapona
mapanacuataje, Jesús peponaponaematacabi. Itsiata, bajaraponë Dioso ya-asaëya caponatsi
athëbëabetsia. (2Re 2:1-11.) Bajaraxuata apopayaquinarubinë «Elías-pijinë». Daxita baja-
raponë peliwaissi ruca 1Re 18-2—Re 2-jawabelia. x 4:33 *sábadomatacabi*: Judíowi penacuera-
ewetsimatacabi wënërubabiaba sábadomatacabi. y 4:34 *Nazaret tomarapijinëmë*: Imata vr
22-jawata yapëtanetsi pacuenia Nazaret tomarapijiwi cuene-aebatsi Jesús Mesías-nëcuene,
Nazaret tomarapijinëxae. Itsiata, dowathi yapëtane Jesús pepoMesías-nëcuene.

pepopexaniajamatabēcuenenēmē —jai dowathi peyajawaponaponaenē Jesús-jawabelia.

³⁵ Jesús pejume-itawetsijawata dowathi, jumaitsi:

—¡Moyamëre! ¡Wecuapitsapare baja maponëje! —jai Jesús.

Nexata, dowathi pebi xuabatsi irata, daxita bajarapamonae pitabarata. Itsiata, itsacue ne exanaenejewatsi, wecuapitsapatsi. ³⁶ Daxitajiwi, bajarapacue ne itsa tane, bitso jamatabēcuenenabenajaca. Najumaitsi mapacueniaje:

—¡Bajaraponë penamatacaitorobisaë xaina! Pitawetsicuenia dowathi jumecowënëtatsi, pepitsapaenexa jiwiwecua. ¿Depitsicue ne meta nacacujaruba bajarapacuenia pexanaejawata? —najai bajarapamonae.

³⁷ Nexata, bajarapacuenia Jesús pexanaponaejawa yabara, itsamonae pae-bapona. Nexata, wënëliwaisitanetsi daxita bajarapanacuapijiwi.

Jesús jamatejemaya-exana Simón Pedro pame

(Mt 8:14-15; Mc 1:29-31)

³⁸ Jesús pewecuapitsapaecujinae sinagogabo, pona Simón Pedro pijaboyalia. Itsiata pepatsiwajënae, Simón, pijawa pena bitso romaebanucatsi. Jesús pejonecujinae, bajarapabota pejinawanapaewi wajëca bajaraPonëjawabelia pejematajemaya-exanaenexa bajarapowa. ³⁹ Jesús nexata cujilia bajara-powa. Wecua-itaweta peromaebijawatsi. Nexata baja, bajarapowa jamatejema. Pejamatejemacujinae, Jesús-bana pexaejawa to-exanatsi.

Jesús jamatejemaya-exana ayaibitsaëto piawitanewi

(Mt 8:16-17; Mc 1:32-34)

⁴⁰ Itsa baja ajena merawijitsia, daxitawiriawixae pexainaewi, tocapataponatsi Jesús-jawaberena, Pedro pijabojawata. Jesús nexata, caejiwi canacujitsia peperabëjayataponaejawata jamatejemaya-exanapona. ⁴¹ Itsamonae ayaibitsaëto, dowathi peyajawajinawanapaewi, Jesús wecuacapitsapapona. Nexata, dowathi itsa pitsapabiaba, wawajai tsabiabi Jesús-jawabelia:

—¡Xamë raja Dioso pexënatomë! —jai tsabiabi.

Nexata, Jesús jume-itawetabiaba bajarapadowathiwi. Apotocopatabiabi pecuaicuaijainexa, petsipaebiyaniwa itsamonaejawabelia, tsipaji dowathi xaniawaetsia yapëtanetsi bajaraPonë Cristonëcueni, athëbëwetsica Dioso pitorobijawatsi jiwi pecapanepaenexa.

Jesús tsipaebanajetaruca pexanialiwaishi Galilea nacujawa

(Mc 1:35-39)

⁴² Pepobajayacunua, Jesús pitsapa Capernaúm tomarawecua, peponaponaenexa caenë pija-epato pesaicayojawabelia. Itsiata, jiwi yapëjaitatsi itsajota Jesús eca. Itsa caxitajarabatsi bajarapamonae, asiwatsi pewecuaponaeyaniwatsi itsajawabelia. ⁴³ Nexata, Jesús jumaitsi bajarapamonaejawabelia:

—Itsatomaranëjawa-ata raja netsicaruca tatsipaebijawa pexanialiwaishi, pacuenia Dioso yanacua-ewetsijitsia pijajiwi mapanacuataje. Bajaraxua yabara, Dioso baja cajena nitoroba —jai Jesús.

⁴⁴ Nexata, Jesús wecuapona bajarapamonae, petsipaebanajetarucaenexa Judea nacujawa pejinawanapaewi, judíowi pasinagogabonëjawa-ata nacaetuatabiaba.

**Pacuenia Simón-bana bitso ayaijawaxaneto dujuai
yamatajuta, yabara peliwaisi**

(Mt 4:18-22; Mc 1:16-20)

5 ¹Itsamatacabi, Jesús penucaponaejawata Genesaret^z pucaxaneto-itapaya, jiwi ayaibitsaëtoxaneto cënënaponatsi, imoxoyo pejumetaenexatsi Jesús petsipaebijawa Dioso peliwaisi. ²Nexata, Jesús anijajerabeje taeruta puca-itapata. Bajarapamobeje dujuai peyamatajucaeui Simón-bana wecuanono-bajunarëcëpa, pequiatsinexa dujuai peyamatajucaejawanë. ³Nexata, Jesús runareca Simón pijajera-ënëabereca. Itoroba Simón, jeraxainaenë, peyatorotsinexatsilia pucatuatujëyojawabelia. Jesús jera-ënëjawawerena liwaisi tsipaebeca bajarapajiwibitsaëtoxanetojawabelia. ⁴Itsa baja Jesús copata jiwi liwaisi petsipaebijawa, nexata jumaitsi Simón-jawabelia:

—Jera pawaeremelia piawajubujawabelia! ¡Pacoparemeca paneyamatajucaejawa, dujuai paneyamatajutsinexa! —jai.

⁵Nexata, Simón jumaitsi Jesús-jawabelia:

—Necujarubinë, payamatajucajë rabaja picani merawijebi. Apopayamatajutsinë caenëyo-ata. Itsiata, pacuenia pane-itorobame, pacopatsiarecajë dujuai patayamatajucaejawa —jai Simón.

⁶Nexata, copareca pitorobicueniatsi. Itsa jutsina peyamatajucaejawa, ayaijawaxaneto bitso dujuai yajutsina. Nexata, bajaraxua imoxoyo peyamaë-ucu-ucuae. ⁷Nexata, itacowaebarena penajuayamatajucaeui, penubenaewi puca-itapatalia, peponaenexarena itsamota, peyawenonaenexatsi. Nexata, bajarapamonae ponarena. Wënëta bajarapamobeje dujuai. Imoxoyo peyabubunae bajarapamobeje. ⁸Nexata, Simón Pedro itsa tane bajarapacueni, pematabacabëta tonuca Jesús pitabarata. Jumaitsi Jesús-jawabelia:

—¡Tajatuxanenë, newecuanatixire, tsipaji xanë pibisiacueni ta-exanaenë! —jai Simón.

⁹Bajarapacuenia Simón jumaitsi, tsipaji penajuayamatajucaeui yajawa bitso jamatabëcuenenabenajaca, bitso ayaijawaxaneto dujuai peyamatajutsixae. ¹⁰Bajarapacuenia peyanatsinëtsibeje Santiago, Juan-beje, Zebedeo pexënatobeje, jamatabëcuenenabenajacabeje. Itsiata, Simón pematabacabëta penucaejawata Jesús jumaitsi mapacueniaje:

—¡Pëtsa najunawiacame! Ajena mapamatacabijawaweliacujinaeje, naexanaename jiwi nejucaenënexa. Nexata, pacuenia dujuai jucabiabame, bajarapacuenia jiwi jucaename Dioso pijajiwineja —jai Jesús Simón-jawabelia.

¹¹Nexata, bajarapamonae perobobocaecujinae jerabeje tajetabojawabelia, pecajinawanapaejawaximi pueneba itsamonaejawata. Bajaraxuacujinae, pënapona baja Jesús.

Jesús jamatejemaya-exana bajayajebi bitso peperabëtsabanaenë

(Mt 8:1-4; Mc 1:40-45)

¹²Jesús itsa ponapona Galilea nacuata, bajarapanacuapijitomaranëya-juwënë, patajopa Jesús-jawaberena bajayajebi bitso peperabëtsabanaenë.

z 5:1 *Genesaret*: Genesaret puca, xaina itsawënë Galilea puca. Itsajawata, Genesaret-wënë canacuenebabiaba Galilea pucamatatu yabara.

Itsa bajaraponë tane Jesús, pematabacabëta irataeya bocajunua pitabarata. Wajëta pinijicuenia Jesús-jawabelia. Jumaitsi:

—Tajatuxanenë, yapëtaniji pecacuenecaëjëpaejawa tanejamatejemaya-exanaenexamë mapawitanewecuaje. ¿Apojitsipae më meta tanejamatejemaya-exanaenexamë? —jai.

¹³Nexata, Jesús pecobeta perabëjayalia bitso peperabëtsabanaenë.

Jumaitsi bajaraponëjawabelia:

—Jājā, jitsipajë cajena. Jamatejemamë rabaja —jai.

Bajarapaepatota, peperabëtsabanaenëmi perabëxanepananaje-reca. ¹⁴Nexata, Jesús jume-itaweta bajaraponë petsipaebiyanawa itsajiwiyojawabelia-ata, pacuenia jamatejemaya-exanatsi. Jumaitsi:

—iSacerdotenëjawabelia tsitanaitajëremelia, templobota penacuene-babiabinë, pecataenexa pecawecua-ajibijawa neperabëtsabanaejawami! Yajawacapatsianamenua dajubi pacuenia ca-itoroba^a nexanaenexa Dioso penajumecopatsiliwaisi Moisés-pijinëta. Nexata, sacerdotenë catotajuitsiana altar-jumata Diosojawabelia, pecawecua-ajibinexa nenaxuirabicuenemi Dioso pitabarata, niawitanejamatabëcuene. Nexata, jiwi yapëtaena pepacuene baja pecawecua-ajibijawa nenaxuirabicuenemi^b —jai picani bajaraponëjawabelia jiwi ayaibitsaëto pewënëliwaisitaeyaniwatsi.

¹⁵Itsiata, Jesús pewajënaeyabelia wënëliwaisitaeponatsi daxita bajara-panacuapijiwi. Bajaraxuata, ayaibitsaëtoanaxeto patapona bajaraPonëja-waberena, penamuxuna-ewetsinexatsi petsipaebiliwaisi, pejamatejemaya-exanaenexanua piawitanewanewecua. ¹⁶Itsiata, Jesús itsajawata jiwi wecuaponabiaba pesaicayojawabelia, pewajëtabiabinexa Diosojawabelia.

Jesús jamatejemaya-exana petabusipacuenabinëtsi

(Mt 9:1-8; Mc 2:1-12)

¹⁷Itsamatacabi, Jesús jiwi liwaisi petsipaebijawata, bajara-jota na-ena fariseowi, itsamonae-ata peyapëtaeya-exanaewi pajamatabëcueneliwaisi xaina caejawa canacujitsia Dioso pena-jumecopatsiliwaisi Moisés-pijinëta. Bajarapamonae pata Gali-lea nacuata pe-enaetomaranëjawawerena, Judea nacuata pe-enaetomaranëjawawerena, Jerusalén tomarawerena-ata. Nexata, bajarapamatacabi Jesús Dioso pesaëta caëjëpaeya-exanatsi jiwi pejamatejemaya-exanaenexa piawitanewanewecua. ¹⁸Bajarapaepatota, capatabuatapona itsamonae, pebijiwi, piawitanenë, ponë petabusipacuenabinëtsi, camayota peyawëtaranajetarubeneawewi. Bajarapamonae picani bajaraponë boyalia yawëtararajonebitsialia, peyabuatsinexa Jesús pitabarata. ¹⁹Itsiata, acuenebi boyalia pecajonejawa, tsipaji bitso

a 5:14 *ca-itoroba*: Taema Lev. 14:1-32. **b 5:14** *nenaxuirabicuenemi*: Dioso penajumecopatsiliwaisi Moisés-pijinëta, itorobatsi judiowi, petaenexa daxita peperabëtsabanaewi bepenaxuirabiwicuenia Dioso pitabarata. Itorobatsinua daxita peperabëtsabanaewi pewecujinawanapae-nexa saicayojawabelia, daxitajiwi pejinawanapaetaxunaenewecua. Pewecua-ajibicujinaetsi bajarapatsabanaecueni, ponabiaba sacerdotenëjawabelia pewajunupaebinxatsi pepacuene pewecua-ajibijawatsi. Xuacujinae, sacerdotenë totajuitabiaba dajubi altar-jumata, pewecua-ajibia-exanaenexatsi bepenaxuirabicuenemi Dioso pitabarata. Matapania jane baja, bajarapajiwi toxanepanatsi icatsia caewëarena peponaponaejawa jiwituatujäta.

jiwi bajarapabo yawënëca. Nexata, bajarapamona petabusipacuenabinëtsi bojumabetsi cajunaya. Bomatatu jawawetsica wojo-exana. Nexata, bajarapawojotuatsica petabusipacuenabinëtsi camayota yacopatsicatsi jiwituatujëatsica, Jesús pitabarayatsica. ²⁰ Jesús jamatabëcueneyapëtane pacuenia bajarapamona siwanajamatabëcuenecopatatsi, petojamatejemaya-exanaenexa ponë yacopatsicatsi. Nexata, Jesús petabusipacuenabinëtsi jawabelia jumaitsi mapacueniaje:

—Pibisiacue rabaja nexanaeconimi Diosojawabelia cawecua-ajibia-exanatsi —jai bajaraponëjawabelia.

²¹ Nexata, judíowi pecujarubiwi, fariseowinua, itsa jumetaeyena Jesús pejumaitsi jawa bajarapacuenia, najamatabëxainena bëpënëa mapacueniaje: «¿De meta maponëje? ¡Dioso apopejitsipacuenia pecuai-cuaijainë! Diosowecua itsanë-ata cajena apocaëjëpaetsi itsajiwi pibisiacue pexanaeconimi pewecua-ajibia-exanaenexa. Caenë Dioso cuenecaëjëpatsi bajarapacuenia pexanaejawa», jamatabëjai tsenae Jesús yabara.

²² Nexata, Jesús pejamatabëcueneyapëtaexae bajarapacuenia bëpënëa pesiwanajamatabëxainaejawatsi, jumaitsi bajarapamonaejawabelia:

—¡Pëtsa patanecue-ne-aebicueniamë panesiwanajamatabëxainame, tsipaji baja cajena xanë Dioso necopata jiwi pibisiacue pexanaecononi tawecua-ajibia-exanaenexa! ²³ Xaniawaetsia patanejumecanaëjët-sinexamë tajumaitsi jume yabara, pacayanijobatsi mapacueniaje: ¿Detsa xua tsiyapëxanepanatsi jiwi pejumaitsinexa, xaniajaiya penacujumataenexa mapatabusipacuenabinëtsi jawabelia: «Cawecua-ajibia-exanatsi rabaja pibisiacue nexanaeconimi», ¿pejaijawa? Itsa jume, «¡Nonotapunare! ¡Ponare baja!», pejaijawa. Bajarapacuenia jiwi jumaitsi-ata tsipae, pejumaitsicuenia itsa apotopitsapaetsi, ajumematamobi tsipae, tsipaji baja cajena caenë Dioso cuenecaëjëpatsi bajarapacue pexanaenexa. ²⁴ Nexata, paneyapëtaenexa Dioso tanecuenecaëjëpaeya-exanaejawa, Xanë, Daxitajiwi Pematapijinënë, mapanacuata jiwi pibisiacue pexanaeconimi tawecua-ajibia-exanaenexa, pataename pacuenia tjamatejemaya-exanaejawata maponëjawabeliaje —jai Jesús bajarapamonaejawabelia.

Nexata, Jesús jumaitsi petabusipacuenabinëtsi jawabelia:

—¡Nonotapunare! ¡Nijacamayo pire! ¡Nijaboyabelia baja ponare! —jai Jesús.

²⁵ Nexata jane baja, bajarapacuenia Jesús pejumaitsi jawata, petabusipacuenabinëtsi nonotabapuna, daxitajiwi pitabarata. Pebocacamayoy pita. Pona baja pijaboyabelia. Penajetarucaejawata, namutua, wënëxaniatanajetaruca Dioso: «¡Diosomë, ayaijamatabëcuenenëmë! ¡Pexaniacue neto-exaname!», jai tsanajetarucacae. ²⁶ Nexata, daxita pamona tane petabusipacuenabinëtsi baja pejamatejemajawa, pinijicuenia jamatabëcuenenabenajaca. Bëpënëa bitso junawanua. Nexata, pexaniacuenia wënëxaniatapon Dioso pexanaecue yabara. Najumaitsi:

—Ajena, mapamatacabitaje, tanetsi Dioso pinijicue pexanaejawa — najai bajarapamona.

Jesús junata Leví pijajiwitonēnexa

(Mt 9:9-13; Mc 2:13-17)

²⁷ Jesús pejamatejemaya-exanaecujinae petabusipacuenabinētsi, bajarapabowecua pitsapa. Penajetarucaejawata, Jesús taeyeta Leví,^c impuestomatamo pematamoyanijobabiabinē. Bajaraponē eca pabota jiwijawabelia matamoyanijobabiaba impuestojamatabēcuenē. Nexata, Jesús jumaitsi bajaraponēbelia:

—¡Leví, nepēnaponare! —jai Jesús.

²⁸ Jejai Leví. Nexata, nonotapuna. Copata baja daxita pacuene bajarajota nacuenebabiaba. Pēnapona baja Jesús.

²⁹ Bajaraxuacujinae, Leví pijabota pinijifiesta to-exana Jesús, pijajiwinexata. Nexata, Jesús napata bajarapabota. Leví yajawa-eca mesamuxuneneta ayaibitsaēto jiwijawabelia impuestojamatabēcuenē pematamoyanijobabiabiwi, itsamona-ata Leví peyapētaewitsi. Daxita bajarapamonae najuaxane.

³⁰ Nexata, fariseowi, itsamona-ata peyapētaeya-exanaewi pajamatabēcueneliwaisi xaina caejawa canacujitsia Dioso penajumecopatsiliwaisi Moisés-pijinēta, pecuenetaejawata anaeya baracuaicuaijai Jesús pijajiwijawabelia. Jumaitsi:

—Jesús rabaja naneconita Diosojawabelia, tsipaji impuestojamatabēcuenē pematamoyanijobabiabiwi, pijamatabēcuenēbejewijawatana, naxaeyeca pexaejawa —jai bajarapamonae Jesús yabara.

³¹ Jesús itsa jumetane fariseowi, judíowi pecujarubiwi-ata, pebaracuai-cuaijajawatsi, jumaitsi bajarapamonaejawabelia mapacueniaje:

—Pajamatabēcuenenawēxaniabame. Pewaēbinē raja apowaēbi pejamatejemawi. Biji rajane, waēba piawitanewi. ³² Bajarapijinia xanē-ata itsinē. Apopatajopaenē tajunatsinexa pianeconijibiwi, penajamatabēcuenepēñeyorotsinexa Diosojawabelia, pibisiacuene pexanaejawawecua. Biji rajane, patajopajē tajunatsinexa pijaneconi pexainaewi, penajamatabēcuenepēñeyorotsinexa Diosojawabelia, bajarapamonae Dioso pejisipaecuenia pexanawanapaenexa —jai Jesús anaeya pebaracuaicuaijawiwsijawabelia.

Jesús yanijobatsi xua yabara pijajiwi japasa

apojinawanapae Dioso pitabarata

(Mt 9:14-17; Mc 2:18-22)

³³ Itsamatacabi, itsamona-ata fariseowi, judíowi pecujarubiwi-ata, jumaitsi Jesús-jawabelia:

—Juan pijajiwi, fariseowi pijajiwinua, japasa jinawanapabiaba, patacabiheje jitsipa caejamatabēcuenē pexainaejawa Diosojawabelia. Bajarapacuenia wajēcabiabana Diosojawabelia. ¿Detsa xuajitsia xamē nijajiwi japasa apojinawanapae Diosojawabelia pewajēcaematacabianē-ata? —jai bajarapamonae.

³⁴ Jesús nexata pecuenecataeliwaisicuenia jumaitsi bajarapamonaejawabelia:

—Pamonae junatatsi penapitsijiwiheje pijafiestajawabelia penaxaenexa, japasa apo-ena-ata itsa abaxē yajawa-ecatsi pejananacojobinē. ³⁵ Itsiata baitsi

^c 5:27 *Leví*: Itsawēñē pijinia Mateo, ponē yaquina Mateobaxuto.

jane, itsa pejananacojobinē tsi maxēpatsipatsi pijawajabitsaē pewecuacaponanexatsi itsajawabelia, nexata pecowēta bajarapamonae apoxae tsi-pae pexaejawa, tsipaji bitso wēnajamatabēxainaejitsipa. Bajarapijinia itsi tajajiwi-ata. Tayajawaponaponae-epato abaxē acuenebi japasa pejinawana-paejawa. Itsiata, pamatacabi xanē necaponae bajarapamonaewecua, bajarapamatacabi jane baja, japasa jinawanapaena, bitso tane-itaxanaexae —jai Jesús peyanijobiwitsijawabelia.

³⁶Nexata, bajarapamonae perujumatabēcuenē baja penawecuacopatsinexa, Jesús liwaisi itsa tsipaeba pecuenecataeliwaisicuenia, bajarapamonae pejumexaniataenexa ēpejanaliwaisi. Anijajamatabēcuenēbeje pexainaeyaniwa, jumaiti mapacueniaje:

—Perujunaxatatsijawa itsa wojoruaejitsipa, itsajiwi-ata apocaucutsi tsi-pae pepanayo pejananaxatatsijawata, pecatsatarutsinexa perujunaxatatsiesetojawabelia. Bajarapacuenia itsa exanaejitsipa, najēpaeya daxitajawabeje bijianaejitsipa. Nexata, pejananaxatatsijawa pewojoto xainaejitsipa. Pijinia perujunaxatatsijawa pejanapanayo apoyajawaxanepanae tsipae. Bajarapijinia pacuenia, apopacotoxanepanae paneyajawajumecowēnētsijawa papejanaliwaisi pacatsipaebatsi, panijaperujumecowēnētsicuenē^d yajawa.

³⁷»Bajarapijinia pacuenia, itsajiwi-ata apo-epacae pejanavinoranē perujubocodoruanējawabelia, bajayajebi peyajebinexa, piatanevinoranē pexanaenexa. Bajaraporanē pejumalitsēxē abaxē pexainaexae, yatititibia tsipae perujubocodoruanē apo peyanayeretsixae tsipae xaniawaetsia. Nexata, itsa yatititibia tsipae, naxuabijitsipa vinoranēmi, perujubocodoromi-ata. ³⁸Bajaraxuata, pejanavinoranē be-epaca pejanabocodoruanējawabelia, peyatititibiayaniwa, pemenenaxuabiyanianuwa vinoranē, pebocodoruanē-ata.

³⁹Orijibia, pajiwi piatanevinora apa, apojitsipae piapaenexa pejanavinora, tsipaji jamatabējumaiti: «Perujuvinora bitso xanepana pejanavinora mata-toxenetsia», jamatabējai —jai Jesús bajarapamonaejawabelia, pejanaliwaisi pematajērēatsiyaniwa perujumecowēnētsicuenējawabelia.

Jesús yapētaeya-exana fariseowijawabelia petuxanenēcuenē

penacuera-ewetsimatacabita

(Mt 12:1-8; Mc 2:23-28)

6 ¹Judíowi penacuera-ewetsimatacabita, Jesús, pijajiwi yajawa, naje-taruca namutua trigo pabianējawa. Nexata, Jesús pijajiwi piajanixae, trigoruanē siricanajetarubena. Pecobeta nacobenacaquiatanajetarubena, ēpexutoxi pexaenexa. Nexata, namutua xuxaeyabuatapona.

²Nexata, fariseowiyajuwēnēwi pecuenaetajawata Jesús pijajiwi, jumaiti bajarapamonaejawabelia:

d 5:36 panijaperujumecowēnētsicuenē: Jesús canacueneba anijawabeje, perujunaxatatsijawa, perujubocodorobeje, pecuenecataenexa jiwi pijaperujumecowēnētsicuenē: baitsi jiwi pejumecowēnētsijawa Dioso penajumecopatsiliwaisi Moisés-pijinēta, itsa jume, jiwi pijasalinailiwaisibeje. Canacuenebanua anijawabeje, pejananaxatatsijawa, pejanarabeje, pecuenecataenexa Jesús peliwaisi. Bajarajota, nacayapētaeya-exana pacuenia jiwi itsa matajērētsipa Dioso penajumecopatsiliwaisi Moisés-pijinēta, itsa jume, pijasalinailiwaisi, Jesús peliwaisijawabelia, daxita bajarapaliwaisibeje najēpaeya nabijianaejitsipa. Nexata, Jesús peliwaisi amatamobia-exanaejitsipa pexanaliwaisimi. Taema Mateo 9:16-17, Mar. 2:21-22.

—Paxamē raja apopajumecowēñetsimē pacuenia naca-itoroba Dioso penajumecopatsiliwaisi Moisés-pijinēta. Bajarapaliwaisi naca-itawetsi-ata wajanacuenebiyaniwa sábadomatacabi, paxamē itsiata pasiricanajetarubename. Paxunacobenacaquiatanajetarubenamenua pamatacabita Dioso nacatocaējēta wajanacuera-ewetsimatacabinexa —jai fariseowi Jesús pijajiwijawabelia.

³ Jesús nexata jumaitsi fariseowijawabelia:

—Ajena, penacuera-ewetsimatacabita, tajajiwi bajarapacuenia exanae-ata, itsiata apopibisiacuene, tsipaji bitso pīajanixae bajaraxua exana. ¿Apo-palebimē tsaja Dioso pejumeliwaisibaxuto, paneyapētaenexa pacuenia wajasalinainēmi David-pijinē, pebarēponaponaewi yajawa, exana pamatacabi bitso pīajani? ⁴ Bajaraponē joneya Dioso pijatemploboyalia. Bajarapabō-ēñēta, mesajumata Dioso pitabarata pejebipan-bēanē nota, pexaenexa pijajiwi yajawa. Bajarapapan-bēanē picani sacerdotewiwecua, itsajiwi-ata apotocopatsitsi pexaenexa, penaneconitsiyaniwa Diosojawabelia. David-pijinē, pijajiwi yajawa, aposacerdotewi-ata, barēxae-ata, itsiata, apowēnana-neconitsi Diosojawabelia —jai Jesús.

⁵ Icatsia, pematatsēñēta Jesús jumaitsi fariseowijawabelia:

—Xanē raja, Daxitajiwi Pematapijinēñē, penacuera-ewetsimatacabi pīa-tuxanenēñē, bajaraxuata netoxanepana tatsipaebinexa pacuene xanepana jiwi pexanaenexa bajarapamatacabita-ata —jai Jesús.

Jesús jamatejemaya-exana pebi pecobetsaquenaenē

(Mt 12:9-14; Mc 3:1-6)

⁶ Judíowi itsa penacuera-ewetsimatacabita, Jesús joneya judíowi pīa-sinagogaboyalia,^e jiwi liwaisi petsipaebinexa. Bajarajota, pebi, pecu-juanenia pecobetsaquenaenē, na-eca. ⁷ Nexata, judíowi pecujarubiwi, fariseowi-ata, naitaxutocaewetenatsi Jesús, peneconitsinexatsi itsa jamatejemaya-exanaejitsia pecobetsaquenaenē sábadomatacabita.^f ⁸ Jesús pejamatabēcueneyapētaexae xua siwanajamatabēxainatsi, jumaitsi pecobetsaquenaenējawabelia:

—¡Nonotapunare! ¡Nucare majotaje, mapamonae pitabarataje! —jai Jesús.

Nexata, pecobetsaquenaenē nonotapuna. Nuca bajarapamonae pitabarata.

⁹ Nexata, Jesús jumaitsi penaitaxutocaewetenaewitsijawabelia:

—Xaniawaetsia panejume canaējētsianame, patanejumecanawiatsine-xamē paliwaisi pacayanijobijsiatsi. Penacuera-ewetsimatacabita, ¿dexua Dioso nacatocopata bajarapamatacabita waja-exanaenexa, pexania-cuene, itsa jume, piabejecuene? ¿Nacatocopata meta itsajiwi waja-asaēya-exanaenexa wajanacayawenonaecuenia? Itsa jume, ¿wajacopatsinexa petēpaejawa yawenonaenejewatsi? —jai Jesús penaitaxutocaewetenaewitsi-jawabelia. Itsiata, bajarapamonae moya ena.

¹⁰ Nexata, Jesús matatoyorotsianaēcoba daxita pamona ena bajarajota. Jumaitsi pecobetsaquenaenējawabelia:

e 6:6 *pijasinagogaboyalia*: Bajarapacuenia judíowi wēñerubabiaba penacaetuatsibo, itsajota nacujarubabia Dioso peliwaisi caesábado canacujitsia. **f 6:7** *sábadomatacabita*: Judíowi penacuera-ewetsimatacabi wēñerubabiaba sábadomatacabi.

—¡Namaxërowire! —jai Jesús.

Nexata baja, pecobetsaquenaenë namaxërowita. Bajarajota baja, cobexanepana baja. Pecobetsaquenaewawami ajibi. ¹¹Nexata, judfowi pecujarubiwi, fariseowi-ata, itsa tane Jesús pecobexanepanaeya-exanaejawa pecobetsaquenaenë sábadomatacabita, bitso anaepana. Nexata jane baja, najumejaita pacuenia Jesús beyaxuabijitsiatsi, pet-sitananeconitsixaetsi Dioso pitabarata.

**Jesús itapeta saya doce ponëbeje apóstolewinexa,
pijajiwi ayaibitsaëtoxanetoyajuwënëwi**

(Mt 10:1-4; Mc 3:13-19)

¹² Bajarapamatacabijawa, Jesús pitapetsiwajënaeya pija-apóstolewinexa, junaya petsutojumabetsia pewajëtsinexa Diosojawabelia. Merawijebi, bajarapatsutojumataatsia wajëta-pona Diosojawabelia. ¹³ Pepobajayacunua, Jesús junata daxita pijajiwi bitsaëtoxaneto pepatsinexa bajaraponëjawaberena, pitapetsinexa doce saya ponëbeje, bajarapabitsaëtoyajuwënëwi. Pamonae itapeta, wënëruba apóstolewi. ¹⁴ Jesús pamonae itapeta mapewënëanëje: Simón, ponë Jesús wënëruba Pedro. Itsanë Andrés, Simón Pedro pejuyapijinë. Itsanë Santiago. Itsanë Juan. Itsanë Felipe. Itsanë Bartolomé. ¹⁵ Itsanë Mateo. Itsanë Tomás. Itsanë Santiago, Alfeo pexënato. Itsanë Simón, Zelotenë. ¹⁶ Itsanë Judas, Santiago pejuyapijinë. Itsanë Judas Iscariote, ponë bexëajawabelia Jesús canajetsijitsiatsi pijawajabitsaë pecobeyabelia, pebeyaxuabinexatsi.

Jesús liwaisi tsipaeba jiwi ayaibitsaëtoxanetoyawabelia

(Mt 4:23-25)

¹⁷ Jesús baja, pija-apóstolewi, jiwi ayaibitsaëtoxaneto yajawa, runaica petsutojumawetsica. Nexata, eputua petsutoyenepanajawata, piranamatajëpaejawata, pijajiwi barënucajopa, itsajota itsamonae pijajiwi wajënae-ewetawanapatsi. Bajarajota nacaetutanua itsamonae pepatsiwi Judea nacuajawawerena, Jerusalén tomarawerena, Tiro tomarawerena, Sidón tomarawerena-ata. Tiro tomara, Sidón tomarabeje, manuamene-itapata ecabeje. Daxita bajarapatomaranëpijiwi nacaetuata, pejumetaenexa Jesús petsipae-biliwaisi, pejamatejemaya-exanaejawanua piawitanejawawecua. ¹⁸ Pamonae-ata dowathi ayaicuenia jamatabëcuene-itonotabiabatsi, Jesús jamatejemaya-exanapona. ¹⁹ Daxita pamonae bajarajota nacaetuata, Jesús picani jamatabëjayabatsi, tsipaji bajaraPonë pesaëta, daxitajiwi pejayataponaejawata piawitanejawawecua jamatejema tsaponae.

**Jesús cujaruba pajamatabëcuene yabara Dioso pijajiwi
siwajamatabëcuenebarëyajitsia, xua-ata yabara aposiwajamatabëcueneba
rëyajitsia**

(Mt 5:1-12)

²⁰ Jesús pijajiwi jawabelia naëcolia asaëyata. Jumaitsi:

- Dioso pacasiwajamatabëcuenebarëya paxamë panenatoyapëtaewi bepanejamatatabëcuenejibijawa^g Dioso pitabarata.
Nexata, pacatocopata baja panejinawanapaejawa Dioso peyanacua-ewetsiliwaisijawata.
- 21 »Dioso pacasiwajamatabëcuenebarëya paxamë mapamatacabitaje papecatoyapëtaewi panejitsipaejawa, panesiwajamatabëcueneba rëyajawanua pijacuene. Nexata, pacarajutsiana daxitacuene xua panamatawenoname.
- »Dioso pacasiwajamatabëcuenebarëya paxamë mapamatacabitaje papecatoyapëtaewi panenasiwajamatabëcueneuejawa, pibisiacuene pane-exanaeneconi yabara. Nexata, pacajamatabëcuenebarëyaya-exanaena, papecawecua-ajibia-exanaejawata panijaneconimi.
- 22 »Dioso pacasiwajamatabëcuenebarëya paxamë pacujinae itsamonae paca-itoya, itsa pacanawecua-itaweta, pibisiacuena itsa pacabijatane, pibisiacuena itsa pacabaracuaicuajainua, Xanë, Daxitajiwi Pematapijinënë, patajajiwi xaemë.
- 23 »Paepatota bajarapacuena paca-exanaena, pasiwajamatabëcuenebarëyamë tsane, tsipaji raja Dioso athëbëtatsia pacatoxaina bitso pexaniacuenejawa, papecarajutsijawanexa, papecabejibia-exanaejamatabëcuene. Bajarapacuena itsa pacato-exana, payapëtaename Dioso papijajiwi mëcuene, tsipaji bajarapacuena bajayata profetawi-ata bejibia-exanaponatsi.
- 24 »!Itsiata, xania paxamë bitso panexainaewi daxitacuene mapanacuataje, tsipaji Dioso apopacatoxinae tsane itsacuenejawa, athëbëtatsia pexaniacuenejawa, papecarajutsijawanexa! Nexata, bajarajotatsia pematatsënë apopaxainaemë tsane xua yabara pabarëyamëjitsia, tsipaji saya pacabarëyamë tsawanapae ëpanexainaewi mapanacuataje.
- 25 »Bitso bepajamatabëcuenejibimë tsane daxitacuene mapanacuata panenatojitsipaeuene panexainaewi, tsipaji itsamatacabijawabelia panatoyapëtaename ayaicuena papecatsisajinaejawa Dioso pijacuene, nexata panajamatabëxainaename ayaicuena.
- »Bepajamatabëcuenejibimë tsane mapamatacabitaje panejëajëajitsabiabiwi siwabarëyaya mapanacupijicueneje, tsipaji itsamatacabijawabelia bajarapacuene yabara bitso panuename pibisiacuene pane-exanaeneconi yabara.
- 26 »!Paxamë panewënajiwi pexaniacuena papecawënëliwa isibaracuaicuajaiwi, xania baja tsane! Bajarapacuena-ata cajena panijasalinaiwimi bajayata pexaniacuena wënëliwaisibaracuaicuajai tsabiabi pamonaë bepexaniajailiwa isi itajara paebabiaba Dioso pewënëta. Paebabiaba saya jiwi petsimuxuxanepanaeliwaitsi, Dioso

g 6:20 *bepanejamatatabëcuenejibijawa*: Natoyapëtane pijacuata apopexainaewi itsacuenejayawo xua yabara Dioso siwajamatabëcuenebarëyajitsiatsi, xua yabaranua Dioso wecua-ajibia-exanaejitsiatsi pijaneconi. Baitsi, bajarapajamatabëcuenejibijawa apopexainaewi xua yabara pecobecowëjawanë.

peliiwaisiwecua. Panecuenejëpaexae bajarapamonaemi,
Dioso pacayajawananeconitsia-exanaena —jai Jesús pijajiwi
ayaibitsaëttoxanetojawabelia.

Jesús pijajiwi cujaruba piasiwanea pitoyajiwi-atatsi

(Mt 5:38-48; 7:12)

²⁷Icatsia, Jesús jumaitsi petsutoyenepanajawata
penacaetuatsiwijawabelia:

—¡Paxamë, patanenamuxuna-ewetsiwimë, panejumetaema xaniawaetsia
xua pacatsipaebijitsiatsi! ¡Pa-asiwamëre papeca-itoyawi-ata! ¡Pexaniacuene
pato-exanare pamonaë paca-itoya! ²⁸¡Cuenecanawiatsiaya pexaniacuena
payawenonare pamonaë pacabijatane pibisiacuena! ¡Pamonaë pacabara-
cuaicuaijai pibisiacuena, cuenecanawiatsiaya, patowajëre Diosojawabelia,
peyawenonaenexatsi! ²⁹¡Itsajiwi itsa paca-itabarapacabixuaba anaeya,
nexata, icatsia itsanenia-ata patonaitabaracaewere! ¡Pajiwi jitsipa papecaya-
cajerëtsijawa panijacamisajumawelia panenaxatatsijawa, pëtsa pawecua-
asiwamë panijacamisa-ata! ³⁰¡Pajiwi itsacuenejawayo amoneya pacawajëta,
parajure! ¡Pajiwi itsa pacawecuapita itsacuenejawayo panexainaeyajuwënë-
jawa, pëtsa payanijobame papecatocanawiatsinexa! ³¹¡Xua pexaniacuene,
paxamë pajitsipame itsamonaë papecato-exanaenexa, copiaya paxamë baja-
rapapexaniacuene pato-exanare bajarapamonaëjawabelia! —jai Jesús pija-
jiwi ayaibitsaëttoxanetojawabelia.

³²Icatsia, Jesús jumaitsi petsutoyenepanajawata
penacaetuatsiwijawabelia:

—Itsa pa-asiwamë saya tsipae ëpapeca-asiwawi, nexata apopaxai-
naemë tsipae xua yabara Dioso pacasiwajamatabëcuenebarëyajitsia,
tsipaji piamatabëcuenebejewi-ata, pamonaë asiwatsi, bajarapamo-
naë banamatamo-asiwa. ³³Pexaniacuene itsa pato-exanaëjitsipame
pexaniacuene ëpapecato-exanaewijawabelia, nexata apopaxainaemë
tsipae xua yabara Dioso pacasiwajamatabëcuenebarëyajitsia, tsipaji
pijamatabëcuenebejewi-ata, pamonaë pexaniacuene to-exanatsi, baja-
rapamonaë banamatamo-exana pexaniacuene. ³⁴Itsa patsicopatsipame
ëpanecueneyapëtaewijawabelia panetsicopatsicuenia papecatocanawiatsi-
jawanexa, nexata apopaxainaemë tsipae xua yabara Dioso pacasiwajamata-
bëcuenebarëyajitsia, tsipaji piamatabëcuenebejewi-ata, batsicopata pena-
jamatabëcuenejëpawijawabelia, petsicopatsicuenia petocanawiatsinexatsi.
³⁵¡Bajaraxuata, Dioso papecasiwajamatabëcuenebarëyanexa, pa-asiwamëre
panijawajabitsaë! ¡Pexaniacuene pato-exanare papeca-itoyawi! ¡Patsico-
parenua, panajamatabëxainaenejewamë papecatocanawiatsinexa panera-
jutsicowëya! Nexata, bajarapacuenia itsa pa-exanawanapaename, Dioso,
athëbëtatsia pe-ecaenë, pacatoxainaena bitso athëbëtatsia pexaniacuene-
jawa papecarajutsinexa. Pexicuenia-ata pacataena. Bajarapacuenia, Dioso-
ata pexaniacuena yawenonabiaba piamatabëcuenebejewi, pamonaë-ata
pexaniacuene to-exanaë-atatsi, apopecueneacanawiatsiwi xaniawaetsia.
³⁶¡Nexata, pacuenia pane-axa, Dioso, daxitajiwi itaxutotsoniataeyabiaba,
bajarapacuenia paxamë-ata pa-exanawanapare itsamonaëjawabelia! —jai
Jesús pijajiwi ayaibitsaëttoxanetojawabelia.

**Jesús pijajiwi muxujioba pitaxutotsoniataenexa itsamonae-ata,
pacuenia bajarapamonae-ata Dioso itaxutotsoniatanetsi**

(Mt 7:1-5)

³⁷Icatsia, Jesús jumaitsi petsutoyenepanajawata penacaetuatsiwi jawabelia:

—¡Pëtsa pacuenetaenejewamë pananeconitsia-exaname itsajiwi-ata paneju-meta Diosojawabelia, bepane-aneconijibiwi panenataexae! Nexata, paxamë-ata juya, bajarapacuenia itsamonae apopacato-exanae tsane. ¡Itsamonae pibisiacuene paca-exanae-ata, pajamatabëcuenecaeware! ¡Pabarajamatabëcuenexanepanarena! Nexata pijinia, Dioso pitabarata pibisiacuene pane-exanaejawa Dioso pacajamatabëcuenecaewiana. Pacabarajamatabëcuenexanepanaenanua. ³⁸¡Parajutaponare itsamonaejawabelia penamatawenonaejawaxi! Nexata, juya paxamë, Dioso pacarajutaponana ayaijawa panerajutsijawa matatoxenetsia. ¡Pëtsa panacofënë-tame! Pacuene paxamë pa-exaname itsamonaejawabelia, bajarapacuenia juya, Dioso pacato-exanaena —jai Jesús daxitajiwijawabelia petsutoyenepanajawata.

³⁹Orijibia, pecuenecataeliwaisicuenia Jesús tsipaeba bajarapamonaejawabelia mapaliwaisije:

—Ponë bitso itaxutotsëcëna,^h apocaejëpaetsi pematacaponaenexa itsapitaxutotsëcënaenë. Itsa matacaponaejitsipa, nexata najuajopaejitsiparecabeje caemëthëxanetowareca. ⁴⁰Penacujarubinë apojamatabëcuenematatoxenetsi pecujarubinëtsi. Itsiata baja, itsa wereta xaniawaetsia penacujarubijawa, najamatabëcuenejëpabeje bajaraponëbeje —jai Jesús pijajiwi jawabelia.

⁴¹⁻⁴²Petsipaebijawata, Jesús muxujioba pajiwi bepianeconijibijiwi natane itsamonaewecua. Jumaitsi:

—¿Detsa xuajitsia pasiwabëjamë tsabiabi itsajiwi pijaneconiyi pexainae-jawa Diosojawabelia, panasiwajamatabëjamënejewa panijacuata ayaineconipanenatsixainaejawaw Dioso jawabelia? Bajaraxua apoxanepanae cajena. Bajarapacuenia itsa pa-exaname, bepanejumaitsi jawaw itsajiwi jawabelia: «Abaxë. Cawe-itaxutojutsianatsi papërëtoyo catsi-itaxutoruca», bepane-jai jawaw, copiaya panawecua-itaxutojutsinejewamë panaesituruto pacatsi-itaxutoruca. Copiata picani bepanawecua-itaxutojutame panaesituruto pacatsi-itaxutoruca, xaniawaetsia panetaenexa pacuenia payawenonaejitsiamë pepërëtoyo petsi-itaxutorucaenëtsi. Bajarapijinia pacuenia, bepa-exaname panijaneconi yabaraⁱ —jai Jesús.

Pe-ubinaenë itsa nacuaia, nayapëtane pawirianaecuenë

(Mt 7:17-20; 12:34-35)

⁴³Icatsia, Jesús jumaitsi petsutoyenepanajawata penacaetuatsiwi jawabelia:

h 6:39 itaxutotsëcëna: Bajaraponë xaniawaetsia apopecujarubinë Dioso peliwaissi, apopeyapëtaexae. **Itsapitaxutotsëcënaenë:** Bajaraponë apopeyapëtaenë Dioso peliwaissi. **Caemëthëxanetowareca:** Najëpaeya apopeyapëtaexaebeje Dioso peliwaissi, jumexaniataejitsipabeje penajumetsënëtsiliwaissi Dioso peliwaissiwecua. Nexata, naxuabijitsipabeje Diosowecua. **i 6:41-42 panijaneconi yabara:** Pepërëtoyo nacatocuenecatane itsajiwi bewelianeconi pexainae-jawa. **Naesituruto** pijinia nacatocuenecatane pemuxujiobinë papiniijineconi xaina, itsa jume, paneconi xaina siwabëjainejewa. Nexata, Jesús naca-itoroba copiaya wajanajamatabëcuenepë-nëyorotsijawa pibisiacuene waja-exanaejawawecua, wajamuxujiobiwajënaeya itsajiwi pijaneconi pexainaewi, tsitatsi bewelianeconi-ata.

—Pexaniawirianaenë itsa ubatsi, nacuaitsa pijinia pexaniacuai. Aponacuaitsi pibisiacuai. Pona pini pibisiawiriana, aponacuaitsi pexaniaacuai. ⁴⁴Caewiriana canacujitsia yapëtanetsi itsa nacuaitsa. Higocuaitsi apopa-ucutsimë pe-ejuwinaeta. Uvaru pijinia apopa-ucutsimë saya pejuwi-ënëbotota. ⁴⁵Bajarapijinia cuene-itsi jiwi-ata. Pexaniajatabëcuenenë exanabiaba pexaniacuene, pejamatabë-ëthëtota penajamatabëxainaecuenia. Pibisiajatabëcuenenë pijinia, pibisiacuene exanabiaba, pejamatabë-ëthëtota penajamatabëxainaecuenia. Pajamatabëcuenejawanë jiwi jamatabëcuenewënëca, bajaraxua capitsapabiaba pecuaicuaijijawata, pexanaejawatanua —jai Jesús pijajijawabelia.

**Jesús tsipaeba pecuenecataeliwaisicuenia jiwijawabelia,
anijanëbeje bo pexanaenëbeje peliwaitsi
(Mt 7:24-27)**

⁴⁶Icatsia, Jesús jumaitsi petsutoyenepanajawata penacaetuatsijawabelia: —¿Detsa xuajitsia: «Tajatuxanenë», napëna panejamë tsabiabi-ata, itsiata, itsa apopanejumecowënëtsimë pataca-itorobicuenia? ⁴⁷⁻⁴⁸Pajiwi xanëjawaberena pata tanenamuxunaewetsinexa, tanejumecowënëtsinexanua, bajarapajiwi aponacueratsi tsane. Bajarapajiwi cuenejëpa piataja-irata bo bepexanaenë. Bajaraponë peyapëtaexae pebubutsijawanexa itsajota pijabo exanaejitsia, nexata pijabo exananeta ibotojumata, toyabubutsi-atatsi, petojopaeyaniwatsi. Bo pewateretetsicujinae, itsa baja mene awajubuatsica, pijabo toyabubutsi-atatsi, mera asaëtsica-ata, itsiata apotonanequetsitsi, tsipaji bo xaniawaetsia nacuenëbata ibotojumata. Nexata, bajaraponë aponacueratsi tsane bo pexanaejawa. Bajarapijinia pacuenia, pajiwi nesiwanajamatabëcuenecopsatsiana xanëjawaberena, aponacuerotsinua tsane, piyapëbejeliwaisianë tocopiapatsijitsia-atatsi, petsiwajënaeyapëtaexae liwaisianë penatsixainaejawanexa piasaëtsaponaponaepato. ⁴⁹Pajiwi nejumetae-ata tatsipaebiliwaitsi, itsiata, itsa aponejumecowënëtsi, nacueratsiana. Bajarapajiwi cuenejëpaena tajetabota bo bepexanaenë. Bajaraponë tajetabota pijabo exaneta, yapëtae-ata emarapae pecopiapatsijawanexa. Nexata, bajaraponë nacuerata bo pexanaejawa, tsipaji bo pewateretetsicujinae, mene itsa awajubuatsica, toyabubutatsi. Bo nexata jopaica. Pepacuene baja to-abejetsi. Bajarapijinia pacuenia, nacueratsiana pajiwi exanaena pijacuata penatojitsipaecuenia, xanëjawaberena aponesiwanajamatabëcuenecopsatsixae —jai Jesús pijajijawabelia.

**Jesús tojamatejemaya-exana wajabitsaë pijacapitán pijabota
petonacuenëbaponaponaenëtsi
(Mt 8:5-13)**

7 ¹Jesús baja itsa najumewereta pijajiwi ayaibitsaëtoxaneto liwaisi petsipaebijawa, petsutoyenepanajawata, pona baja Capernaúm tomarabelia. ²Bajarapatomarata ponapona Romano nacuaipijinë, wajabitsaë pijacapitán.¹ Bajaraponë pijajiwitonë, bitso piasiwänë, to-awitanetsi. Totëpaejitsiatsi baja. ³Bajaraponë, capitán, wënëliwaisitanetsi Jesús

j 7:2 pijacapitán: Bajaraponë 100 ponëbeje wajabitsaë pewetaponaponaenë. Bajaraxuata, wënërubatsi «centurión», wowaijumeta.

pejamatejemaya-exanaponaejawa piawitanewi. Nexata, jumaitsi judíowi pija-ancianowijawabelia:^k

—¡Panetojunaremelia Jesús! ¡Pabarëpatsiaremena tajaboyaberena, tanetojamatejemaya-exanaenexa tajajiwiwonë! —jai capitán.

⁴⁻⁵ Nexata, bajarapamonae pona Jesús-jawabelia. Itsa pata bajaraPonëja-wabelia, ayaicuenia junata. Jumaitsi:

—Bajarapacapitánnë, bitso pexaniajamatabëcuenenë. Nexata, tojamatejemaya-exanaename pijajiwiwonë, tsipaji raja bajaraponë naca-asiwa waxaitsi judíowitsi. Matamota cajena pijapalatata wajanacato-exanetsinexa wajasinagabob^l —jai judíowi pija-ancianowi Jesús-jawabelia.

⁶ Nexata, Jesús nalia bajarapamonae pepëta. Itsa baja imoxoyotanajetaru-bena capitán pijabo, nexata, bajaraponë icsia peyapëtaewitsi itoroba Jesús pemata-enenaenexatsi, pejumaitsinexa Jesús-jawabelia mapacueniaje:

—¡Petuxanenë, pëtsa paremena tajaboyaberena! Apocajamatabë-itonotsijitsipaetsi. Beweliamatabëcuenenënë raja saya xanë, xamëwecua. Apoxanepanaenua nenajonejawa tajaboyaberena, apojudíonëxaenë. ⁷ Baja-raxuata, aponejamatabëcuenecaëjëpaenua taponaejawa xamëjawabelia-ata. ¡Saya, bajarawerena itorobare ënijume, tanetojamatejemaya-exanaenexamë tajajiwiwonë! ⁸ Yapëtaniji pepacuenie tanetojamatejemaya-exanaenexamë, tsipaji xanë-ata xainajë tane-itorobabiabiwi, tane-itorobicuenia tajumecowë-nëtabiabinexa. Xanë-ata juya xainajë wajabitsaë, tajajiwi, ta-itorobicuenia taneto-exanabiabinexa. Nexata, itsa itorobajë caenë, wajabitsaënë, pepo-naenexa, ponabiaba. Itsa junarenajë itsanë pepatsinexa maberenaje, patabiabarëna. Itsa itorobajë tajajiwiwonë taneto-exanaenexa itsacuenë-jawayo, neto-exanabiaba. Bajarapijinia pacuenia, xamë-ata cacaëjëpa nexanaenexa. ¡Nexata saya, bajarawerena ënijume itorobare tajajiwi-wonë tanetojamatejemaya-exanaenexamë! —jai capitán bajarapacuenia petonajume-itorobijume Jesús-jawabelia.

⁹ Jesús itsa jumetane bajarapacuenia capitán petonajume-itorobijumetsi, jamatabëcuenenabenajaca. Nexata, napënëyorotaxuaba, pejumaitsinexa pepënanajetarubenaewitsijawabelia:

—Xaniajanë pacuenia pacatsipaëbijitsiatsi. Caeto-ata cajena, Israel nacua-pijinë apocaxitajarabaxuabinë xanëjawaberena bitso tanesiwanajamatabëcuenecopsinë pacuenia mapacapitán jamatabëcuene-itsije —jai Jesús capitán yabara.

¹⁰ Nexata baja, pamona capitán itorobalia Jesús petsipaëbinexatsi penajume-itorobiliwaisi, nawiabarëna baja capitán pijaboyaberena. Itsa baja pata boyaberëna, caxitajaraba baja capitán pijajiwiwonë pejamatejemanë.

Jesús to-asaëya-exana petëpaenëmi, pamona pewecuatëpaewatsi pexënato

¹¹ Itsamatacabijawabelia, Jesús pona Naín tomarabelia. Nexata, yanatatsi pijajiwi, ayaibitsaëtoخانeto itsamonae yajawa. ¹² Itsa baja patanajetaruca

k 7:3 pija-ancianowijawabelia: Bajarapamonae apopewetsiwi Jesús pijajiwi. Tomara pewetsiwi saya judíowinexa. Perujujiwixae, wënërubatsi «ancianowi». 1 7:4-5 wajasinagabob: Bajarapacuenia judíowi wënërubabiaba penacatuatsibo, itsajota nacujarubabia Dioso peliwaisi caesábado canacujitsia.

Naín tomara imoxoyojawata, petëpaenë camata-enenatsi pecanajetarubenaewi. Bajarapamonae tomarawelia capitsapa, pemëthëtsinexa tomarapënyabelia. Ponë tëpa, bajaraponëmi pamona pewecuatëpaewatsi pexënato, pepocaenë. Nexata, bajarapowa pexënato, petëpaenë, itsa caponaliatsi pemëthëtsinexatsi, tomarawerena jiwi ayaibitsaëtoxaeneto pënaponatsi.

¹³ Jesús itsa tane bajarapowa, bitso petsitabejiobijawatatsi. Nexata, jumaitsi bajarapowajawabelia:

—¡Pëtsa matanueyabame! —jai Jesús.

¹⁴ Nexata, Jesús cujitabilia petëpaenë peyacajoniacanajetarubenaewijawabelia, peyacajoniajayatsinexa. Nexata, payacajonia canajetarubenaewi nubena-othopa. Nexata, Jesús jumaitsi petëpaenëjawabelia:

—Pewëjëato, xanë raja cajumaitsitsi. ¡Namatacore! —jai Jesús.

¹⁵ Nexata baja, petëpaenëmi namatacota. Cuaicuajai. Jesús baja tocanawiaata piasaenë penajawabelia. ¹⁶ Nexata, daxita petawewitsi jamatabëcuenenabenajaca. Wënëxaniatsiaya najumaitsi bajarapamonae Jesús yabara: «Dioso bitso ayaijamatabëcuenenë. Pinijijamatabëcuene pexainaeprofetanë, nacatsitanajamatabëcuene-itajëta. Dioso pinijicuene pexanaejawa-ata nacatsitajëta wajataenexa», najai bajarapamonae Jesús yabara.

¹⁷ Daxita Judea nacuapijiwi, imoxoyo nacuanëjawa-ata pejinawanapaewi, Jesús wënëliwaisitanetsi xua exana.

**Juan, jiwibautizabinë, itoroba pijajiwitonëbeje
peyanijobinexa Jesús, Mesías-cuene**

(Mt 11:2-19)

¹⁸ Juan, jiwibautizabinë, naneconitsia peponaponaejawata penaneconitsiwi pejebabiabibota, pijajiwi tsipaebatsi daxita Jesús pexanaponaejawa yabara. Nexata, pijajiwitonëbeje junata, pitorobinexa Jesús-jawabelia.

¹⁹ Pitorobiwajënae, jumaitsi bajaraponëbejajawabelia:

—Pajumaitsimëbeje tsane Jesús-jawabelia: «¿Xamë tsabaja Cristomë, ponë yabara tajëwelia profetawi, wajunupaebapona pepatsijawanexatsica, daxitajiwi pecapanepaenënexa? Itsa apoCristomë, ¿abaxë tsaja pacopia-ewetawanapaenajë itsanë athëbëwetsica Dioso pitorobinexatsicatsi, jiwi pecapanepaenënexa?» jai raja Juan», pajamëbeje tsane Jesús-jawabelia —jai Juan pijajiwitonëbejajawabelia.

²⁰ Nexata, Juan pijajiwitonëbeje itsa patabeje Jesús-jawabelia, jumaitsibeje:

—Juan raja, jiwibautizabinë, pane-itorobabeje patacayanijobinexabeje. «¿Xamë tsabaja Cristomë, ponë yabara tajëwelia profetawi wajunupaebapona pepatsijawanexatsica jiwi pecapanepaenënexa? Itsa apoCristomë, ¿abaxë tsaja pacopia-ewetawanapaenajë itsanë pepatsijawanexatsica?», jai raja Juan —jaibeje jane baja Jesús-jawabelia.

²¹ Nexata, bajaraponëbeje pitabëta, Jesús jamatejemaya-exanapona ayabitsaëtoxaeneto piawitanewi. Dowathi peyajawajinawanapaewi-ata wecuacapitsapa. Itaxuto xanepanaeya-exananua pamona bitso pitaxutotsëcënaewi.

²² Nexata, Jesús jumaitsi bajaraponëbejajawabelia:

—¡Paponarebeje baja! Patsipaebianamebeje Juan-jawabelia pacuenia baja patanemebeje ta-exanaponaejawa, pacuenianua

pajumetanemebeje tatsipaebiliwaisi jiwijawabelia. Patsipaebianamebeje pacuenia apopetaewimi-ata itaxutoxaniawaetaponajë, xaniawaetsia petanenexa. Petabusipacuenabiwitsi daxita jinawanapaeya-exanaponajë. Bajayajebi bitso peperabëtsabanaewi wecua-ajibia-exanaponajë. Bitso pemuxusipanaewi jumetaeya-exanaponajë, xaniawaetsia pejumetaenenexa. Petëpaewimi-ata icatsia asaëya-exanaponajënuu. Patsipaebianamebejenua pacuenia tsipaebanajetarucajë bepejiobiw jawabelia pexanialiwaissi, jiwi pecapanepaeliwaissinexatsi. Daxita bajaraxuanë patsipaebianamebeje, xaniawaetsia pecanaëjëtsinexa xanë yabara. ²³ Pajumaitsimëbejenua tsane Juan-jawabelia: «Jesús raja jumaitsi: 'Jamatabëcuenenexa tsane pajiwi pewajënaeyabelia nesiwanajamatabëcuenecopata xanë jawaberena Dioso pexënatocuenenë',^m jai raja Jesús», pajamëbeje tsane Juan-jawabelia —jai Jesús Juan pijajiwitonëbej jawabelia.

²⁴ Itsa baja Juan pijajiwitonëbeje nawiatabeje, pecowëta Jesús taxuxuaba jiwijawabelia petsipaebijawa Juan peliwaissi. Jumaitsi:

—Itsa paponame petusatonacuayabelia, pamatacabi Juan ponapona petusatonacuata, ¿detsa pitsicuene pajamatabënaponaremelia panetaenenexa bajarajotalia? ¿Paponaremelia tsaja, saya panetaenenexa musuli penajëabijawaⁿ jowibota? ²⁵ Itsa apopaponaemëlia panetaenenexa bajaraxua, ¿detsa nexata pitsicuene panetaenenexa paponaremelia? ¿Paponaremelia tsaja, saya panetaenenexa naitabëtsiaya pexaniajawa penaxatatsinë? ¿Jume baja cajena! Pacuencyapëtaneme, pamona naitabëtsiaya pexaniajawa naxatababiaba, pamona-ata xaeyabiaba pexaniapexaejawanë, bajarapamona apojinawanapae petusatonacuata. Biji rajane, jinawanapa nacuanë pewetsiwi pijabonëjawa. ²⁶ ¿Detsa nexata xua pajamatabënaponaremelia panetaenenexa petusatonacuayabelia? ¿Paponaremelia tsaja panetaenenexa Diosojumepaebinë, profetanë? Jājā, bajarapitsinë pataneme. Juan itsiata itsaprofetawiwecua ayaijamatabëcuenenë. ²⁷ Bajaraponë yabara cajena, bajayata tajëwelia Dioso pejumeliwaisibaxutota wajunupaeba mapacueniaje:

«Xanë itorobianajë newajënaeyabelia ponë pecawajunupaebinënexa.

Bajaraponë jiwi jamatabëcuenexaniawaetaponaena, xaniawaetsia pecacopiapsinexa», jai bajayata Dioso pejumeliwaisibaxutota.

²⁸ »Xaniajanë pacuenia pacatsipaebijitsiatsi. Daxita paprofetawi jinawanapa Juan pewajënaeya, bajarapamonaewecua Juan ayaijamatabëcuenenë. Itsiata baitsi jane, pajiwi beweliamatabëcueneniwi-ata, itsa ponapona Dioso peyanacua-ewetsijawata, bajarapajiwi ayaijamatabëcueneniwi Dioso taenatsi Juan matatoxenetsia —jai Jesús, Juan, jiwibautizabinë, yabara.

²⁹ Juan pepaebijawa, daxitajiwi pejumetaecujinae, pamona jume-xaniatane bajarapaliwaissi, nabautizabia-exana. Bajarapacuenia exana Dioso petojitsipaecueniatsi pamona impuestojamatabëcuenenexa,

m 7:23 Dioso pexënatocuenenë: Baitsi, pajiwi apo-aebi Jesús, Cristonëcuen/Mesías-nëcuen bajaraponë apocapanepae-atatsi Romano nacupapiwi pecobesaëwecua. **n 7:24** musuli penajëabijawa: Pamona caeliwaissi apopexainaewi jamatabëcuenenëjapa bemusuli pejëabijawa jowibota. Baitsi, pacuenia musuli pejëabijawata caecowëta aponucae, bajarapijinia itsi pamona nawitsia liwaissi pexainaewi. Ajena cujaruba caeliwaissicuenia jiwi pejinawanapenenexa, merawia icatsia itsaliwaissicuenia. Juan itsiata caeliwaissi pexinaenë. Itorobiabiaba jiwi pibisiacuenenexa, penajamatabëcuenenënyorobinexa Diosojawabelia.

pematamoyanijobabiabiwi, itsamonae tae-atatsi piacuenebewicuene.

³⁰ Itsiata, fariseowi, pamona-ata bitso peyapëtaewi Dioso penajumeco-patsiliwaisi Moisés-pijinëta, jumetae-ata, namuxujemata bajarapaliwaisi. Nexata picani, pacuenia Dioso tojitsipatsi bajarapamonae pexanaenexa, apo-exanae. Bajaraxuata, Juan apobautizabi bajarapamonae.

³¹ Jesús icatsia jumaitsi jiwijawabelia:

—Pamona jinanawapa mapamatacabianëjawa, apotsimuxuxanepa-naetsi patatsipaebiliwaisibeje, Juan-beje. ¿Detsa meta paliwaisicuenia tocuencataenajë bajarapamonae? Jumaitsinë meta tsane mapacueniaje:

³² ‘Bajarapamonae saya bepejewaxijamatabëcuene xaina, tomaratuatuajë-jawa penajuanamuxusitenawanapaewi. Bajarapajiwixi bawawajai tsenae, caejamatabëcuene apopexainaexae, penajuanamuxusitenaewijawabelia. Nexata, bajumaitsi: «Panemuxunabarëyawajiyonexa picani pacato-obecatsi flautata. Itsiata, apopayawajibimë. Pacatonaxëanecatsi picani panemuxunanuwajinexa. Itsiata, appanuëmë», bajai tsenae pejewaxi. Bajarasaya jamatabëcuene-itsi pamona aeconoxae jinanawapa mapanacuataje’, janë meta tsane paxamë yabara. ³³ Juan, jiwibautizabinë, Dioso peliwaisi jiwi petsipaebanajetarucawata, pexaniawiria pexaejawa apoxaeyabiabi. Vinora-ata apo-apaeyabiabi. Nexata, bajaraponë yabara jamatabëcuenenawëxaniabiaya pajumaitsimë tsabiabi: «¡Juan raja dowathi yajawaponapona!» pajamë tsabiabi. ³⁴ Bajaraxuacujinae, icatsia Xanë, Daxitajiwi Pematapijinnënë, najetarucajë. Daxitawiria pexaejawa xaniji. Vinora-ata matawëjëa apaeyabiabajë. Nexata, xanë yabara icatsia jamatabëcuenenawëxaniabiaya pajumaitsimë tsabiabi: «¡Pataema maponëje, piajaniyainë! Ayaijawa xaeyabiabi. Ayaira matawëjëa apaeyabianua, pitajibinexa. Barënajamatabëcuenejëpanua impuestojamatabëcuene pematamoyanijobabiabiwi, pamona-ata piajamatabëcuenebewi», pajamë tsabiabi xanë yabara. ³⁵ Itsiata baitsi jane, pamona jumexaniatane xanë, Juan-beje, patatsipaebiliwaisi, xaniawaetsia yapëtaena Dioso pataneyapëtaeya-exanaejawabeje, pepopexaniajailiwaisicuenenua —jai Jesús mapacueniaje jiwijawabelia.

Pibisiacuene pexanaewa xua to-exanatsi Jesús, Simón pijabota

³⁶ Fariseowiyajuwënënë, Simón, pijabota Jesús pexaenexa, junatatsi. Nexata, napona Simón pijaboyabelia. Na-eca mesamuxuneneta, penaxaenexa pexaejawa. ³⁷ Bajarapatomarata ponapona petiriwa. Pibisiacuene pewitota pexanabiabiwa, palata pepitabiabinexa. Bajarapowa itsa jumetane Simón pijabota Jesús pexaejawa penaxaejawanexa, capata pewënëcaebë pexaniapetuxujuwi-aceitera, alabastrowënë-ibotota pexanaebotellabë, Jesús petsitaxu-epacaenexa. ³⁸ Nexata, bajarapowa Jesús pepënëwerena petaxusalibënénia,^o pematabacabëta nucajunua, petsitaxu-epacaenexa jane baja bajarapa-aceitera. Nexata, saya bajarajota itacarajeta bajarapowa nua, tsipaji pibisiacuene pexanabiabineconi bitso yanajamatabëxaina. Nexata, pitaxutobarëmene othopapona Jesús petaxujawabereca. Pamatanata taxu-iquica. Bajaraxuacujinae, yaiyataeya taxutsutsune. Tsitaxu-epaca jane baja

o 7:38 *pepënëwerena petaxusalibënénia*: Bajarapamatacabi, fiestajawata judfowi tsiwëbobena-biaba mesa matatoyorotsia pexaenexa pexaejawa.

petuxujuwi-aceitera. ³⁹Nexata, Simón, ponë Jesús junatatsi, itsa tane pacuenia petiriwa exana Jesús-jawabelia, jamatabējumaitsi mapacueniaje: «Itsa peneta pepacuenene maponë Jesús, pepoprofetanë tsipaeje, nexata yapëtaejitsipa pitsijamatabëcuenewa taxujayabatsi. Yapëtaejitsipanua bajarapowa pibisiacuene pexanabiabiwacuene. Nexata, apotocopatsi tsipae petaxujayabinexatsi», jamatabējai Simón Jesús yabara.

⁴⁰Nexata, Jesús jumaitsi Simón-jawabelia:

—Simón, xainajë liwaisiyo tacatsipaebinexa —jai Jesús.

Simón nexata jumaitsi:

—¡Necujarubinë, netsipaebare baitsi baja! —jai.

⁴¹Nexata, Jesús jumaitsi Simón-jawabelia pecuenecataeliwaisicuenia:

—Palata petsicopababiabinë amoneyabatsi anijanëbeje. Caenë amoneyabatsi quinients padenariobeje.^p Itsanë pijinia amoneyabatsi cincuenta padenariobeje. ⁴²Nexata, bajaraponëbeje apoxainaebeje pacuenia matomot-sijitsiabeje. Nexata, palata petsicopatsinë jumaitsi bajaraponëbejewabelia: «Iquinajë baja xuami pane-amoneyabamebeje. Jema baja naxuabi», jai. ¿Detsa nexata ponë bitso siwajamatabëcuenebarëya palata petsicopatsinëtsibejewabelia? —jai Jesús Simón-jawabelia.

⁴³Simón nexata jumaitsi Jesús-jawabelia:

—Ponë meta picani ayaijawa amoneyaba, matatoxenetsia siwajamatabëcuenebarëya palata petsicopatsinëtsijawabelia —jai Simón.

Nexata, Jesús jumaitsi:

—Xaniajamë rabaja —jai Jesús Simón-jawabelia.

⁴⁴Jesús napënyorota petiriwajawabelia. Nexata, jumaitsi Simón-jawabelia:

—Simón, ¿taneme tsabaja pacuenia exana xanëjawaberena mapowaje? Xanë junuajë nijaboyaberena. Itsiata, yaiyataeya xaniawaetsia aponecopiapitsimë. Aponerajutsimë mera-ata tanataxuquiatsinexa. Mapowaje, apopijabo-ata, itsiata, netaxuquiata baja pitaxutobarëmeneta. Netaxu-iquicanua pamatanata.

⁴⁵Xamë nijabota patsi-atanë, nebajacobiaya aponitabaratsutsunimë, tanecopia-pitsinexamë xaniawaetsia. Xanë tapatsicujinae, mapowaje apocopatsi cajena yaiyataeya tanetaxutsutsuneponaejawa. ⁴⁶Xamë aponetsimata-epanaemë aceitera, xaniawaetsia tanecopiapitsinexamë. Mapowaje netsitaxu-epaca pexaniapetuxujuwi-aceiterata. ⁴⁷Nexata, catsipaebatsi, neyapëtaenexa mapacueneneje. Mapowaje pinijicuenia nesiwajamatabëcuenebarëya tane-asiwaxae, tsipaji ayaineconi-ata pibisiacuene pexanaeneconimi, wecua-ajibia-exanajë. Itsiata, pajiwi saya tsiquirineconiyo wecua-ajibia-exanajë, pibisiacuene pexanaeneconi, nayapëtane, tsipaji saya bajarapajiwi tsiquirijawayo nesiwajamatabëcuenebarëya, beweliacuena tane-asiwanexa —jai Jesús Simón-jawabelia.

⁴⁸Nexata, Jesús jumaitsi petiriwajawabelia:

—Pibisiacuene rabaja nexanaeneconimi cawecua-ajibia-exanatsi —jai.

⁴⁹Itsamonae-ata, penaxaeyenaewi mesamuxuneneta, najumaitsi tsenae Jesús yabara:

—¿Detsa meta maponëje? Natane saya Dioso bepecuenecaëjëpaeya-exanaenëtsi jiwi pibisiacuene pexanaeneconi pewecua-ajibia-exanaenexa —najai tsenae bajarapamonae.

⁵⁰ Nexata, Jesús jumaitsi petiriwajawabelia:

—Tanesiwanajamatabëcuenecopatsixaemë xanëjawaberena, Dioso caca-panepa baja pibisiacuene nexanaeconimiwecua. ¡Jamatejema baja ponare! —jai Jesús petiriwajawabelia.

Pacuenia Jesús pijajiwituatuajëta nanajetarubena petiriawi-ata

8 ¹ Simón pijabota Jesús penaxaecujinae, tsipaebanajetaruca pinijito-maranëjawa, tsiquiritomaraxijawa-ata, Dioso pijajiwi peyanacua-ewetsijawa yabara. Yajawanajetarucanua pijajiwi doce ponëbeje, apóstolewi. ² Bajarapamonaeta nanajetarubena petiriawi. Bajarapapetiriawiyajuwënëwaxi dowathi pewecuacapsapaewaxitsi, itsawaxi-ata piawitanëjawawecua Jesús pejamatejemaya-exanaeyajuwënëwaxi. Bajarapapetiriawiyajuwënëwa, María, Magdala tomarapijiwa. Bajarapowa Jesús wecuacapsapa siete padowathiwibeje. ³ Itsawa pewënë Juana, Chuza pijawa. Bajaraponë nacua-ewetsinë Herodes pijajiwitonë. Itsawa pewënë Susana. Bajarapapetiriawi pematatsënë, itsapetiriawi, ayaibitsaëto, yajawanajetaruca Jesús. Bajarapapetiriawi pexainaepalatayajuwënëjawa, rajuta Jesús-jawabelia, pijajiwi yajawa, xua namatawenona pebarëcomuatsinexa bajarapapalatata.

Jesús tsipaeba jiwijawabelia pecuenecataeliwaisi pe-ubinë peliwaaisicuenia
(Mt 13:1-9; Mc 4:1-9)

⁴ Imoxoyo pe-enaetomaranëwerena, ayaibitsaëto jiwi patapona Jesús-jawaberena petanexatsi. Bajarajota, ayaibitsaëto penacaetuatsicujinae, Jesús pecuenecataeliwaisicuenia tsipaeba pe-ubinë peliwaaisicuenia bajarapamonaeyawabelia. Jumaitsi mapacueniaje:

⁵ —Pe-ubinë pona pabiabelia, pexu pe-ubinexa. Nexata, itsa pata pabita, pabituatuajëjawa ubanajetaruca pexu cayajabajarabicuenia. Nexata, itsaxu othopa namutojumawereca, pabituatuajëjawa panamuto najetaruca. Nexata, bajarapanamutojawa penajetarubenaewi bajarapaxu taxu-nanonoba. Itsaxu pijinia juwinejewa baratsui xane. ⁶ Itsaxu pijinia othopa ibopananëjumata, itsajota bitso ira apo-aitayaë. Nexata, bajarapaxu juwi-ata, tsaquenapona, tsipaji ira tsewa. ⁷ Itsaxu pijinia othopa pa-irajawata xaina bëpënë pe-ejuwijawanë pejuwijawanexa. Nexata, pe-ubixu itsa juwa, caecuenia najuajuwabeje pe-ejuwijawanë. Itsiata, pe-ejuwijawanë bitso matakënëna pe-ubijawami. ⁸ Itsaxu pijinia othopa pexania-irata. Bajarapaxu pejuwicujinae xaniawaetsia witsabapona. Nexata, penacuaitsijawata, itsabotonë capitsapa cien paxutoyobeje-ata —jai Jesús jiwi ayaibitsaëtoxanetojawabelia.

Bajarapaliwaisi petsipaebiweretsicujinae, Jesús pinijijumeta jumaitsi: «Pajiwi jamatabëjumeyapëtane patacatsipaebiliwaisi, nenamuxuna-ewetsi xaniawaetsia», jai Jesús.

Pajamatabëcuene yabara, Jesús jiwijawabelia liwaisi
tsipaeba ëpecuenecataeliwaisinëcuenia

(Mt 13:10-17; Mc 4:10-12)

⁹ Nexata, Jesús pijajiwi yanijobatsi. Jumaitsi:

—jPaliwaisi jiwijawabelia tsipaebame pe-ubinē peliwaissicuenia, pajamatabēcuenē xaina bajarapaliwaisi, panetsipaebare, patayapētaenexa! —jai Jesús-jawabelia.

¹⁰Nexata, Jesús jumaitsi pijajiwijawabelia:

—Paxamē rabaja xaniawaetsia Dioso pacatocopata xanē patacayapētaeya-exanaenexa, pajamatabēcueneliwaisi xaina tatsipaebiliwaisianē Dioso pijajiwi peyanacua-ewetsijawanexa yabara. Itsiata, Dioso apotocopatsi abaxē daxitajiwi bajarapajamatabēcueneliwaisi peyapētaenexa. Bajaraxuata, bajarapamonae itsa tsipaebajē liwaisi, ēpecuenecataeliwaisianēcuenia tsi-paebaponajē. Nexata, bajarapamonae tae-ata Dioso pesaēta pinijicuenē ta-exanaejawa, apoyapētaecapanepae pajamatabēcuenē yabara exanajē. Namuxuna-ewetsi-ata tatsipaebiliwaisinua, itsiata, apojumeyapētaecapanepae^q pajamatabēcueneliwaisi xaina tatsipaebiliwaisi —jai Jesús pijajiwijawabelia.

**Jesús yapētaeya-exana pijajiwijawabelia pajamatabēcueneliwaisi
xaina pecuenecataeliwaisi, pe-ubinē peliwaissicuenia**

(Mt 13:18-23; Mc 4:13-20)

¹¹Icatsia, Jesús jumaitsi pijajiwijawabelia:

—Mara pajamatabēcueneliwaisi xainaje, paliwaisi pacatsipaebatsi pabita pe-ubinē peliwaissicuenia. Pe-ubixu nacatocuene-itajēta Dioso peliwaisi. Pe-ubinē nacatocuene-itajēta Dioso peliwaisi pepaebinē. Pa-irajumata pexu othopa nacatocuene-itajēta jiwi pejamatabēcuenē yabara. ¹²Nexata, paxu othopa namutojumawereca, nacatocuenecatane pamonaē baja picani jumetane Dioso peliwaisi petsipaebijawatsi. Itsiata baitsi jane, bepijia dowathi najetaruca bajarapamonaejawaberena, pewecuapitsinexatsi pejumetaeliwaisi, penacofēnētsia-exanaenexatsi, pejumexaniataeyaniwa bajarapaliwaisi, pepanepaeyaniwanua Diosojawabelia. ¹³Paxu pijinia othopa ibopananē-jumata, itsajota bitso ira apo-aitayaē, nacatocuene-itajēta pamonaē Dioso peliwaisi pejumetaejawata, jamatabēcuenēbarēya picani. Itsiata, bajarapaxu ibopananējumata pejuwixae, irabereca apo-atabunepepiareca. Nexata, bepijia tsaquena icotiata. Bajaratsijamatabēcuenē-itsitsi pamonaē jamatabēcuenēbarēyaya copiapita picani petsipaebiliwaisitsi, jamatabēcuenewit-sabinejewā Dioso peliwaissita. Nexata, paepatota bajarapaliwaisi yabara tocopiapatatsi piayapēbejecuene, nawecuacopaba, apopijamatabēcuenē-saēxae. Cae-epatoyonexa saya itaxutuajamatejema bajarapaliwaisi. ¹⁴Paxu pijinia othopa pa-irajawata xaina bēpēnēa pe-ejuwijawanē pejuwinexa, nacatocuene-itajēta pamonaē jumetane picani Dioso peliwaisi petsipaebijawatsi. Itsiata baitsi jane, pejamatabēcuenē-enaexaetsi mapanacuapijicuenē yabaraje, ayaijawa pecobecowē pexainaenexa, barēyaya pejinawanapae-nexanua, nexata aponacuene-itajētsi pacuenia Dioso peliwaisi yapētaeya-exanatsi. Pacuenia pe-ubijawanē matacēnēnatsi pe-ejuwijawanē, bajara-xua peyajawajuwixae apoxinae penacuaitsicuenē, bajarapijiniā pacuenia jamatabēcuenē-itsi pamonaē mapanacuapijicuenējawanē jamatabēcuenē-enatsi Dioso peliwaissiwecua, tsipaji siwabarēyatsabiabinua ēpexainaecuenē.

^q 8:10 *apoyapētaecapanepae ... apojumeyapētaecapanepae*: Taema Isa. 6:9-10.

Nexata, jiwi pejamatabë-ëthëtojawawetsina apocapitsapabiabi Dioso pejit-sipaecue ne pexanawanapaejawata. ¹⁵ Paxu pijinia othopa pexania-irata, nacatocuene-itajëta pamona e jumetane Dioso peliwa isi petsipaebijawatsi. Nexata, jumecowënëtsiya^r jinawanapa bajarapaliwa isi pexaniajamatabë-cueneta peyapëtaeya-exanaecueniatsi. Pacuenia pexania-ira xaniawaetsia witsabia-exana pe-ubijawanë. Capitsapaeya-exanana pexaniacuai, bajarapacuai penaweretsijawabelia, bajarapijini pacuenia, pamona e Dioso peliwa isa jamatabëcuenetotowa, casaë tsawanapaenua pewajënaeyabelia Dioso pejumeliwa isi. Bajarapaliwa isi pejumaitsicowëya nawitsia capitsapaponaena pexanawanapaejawata pexaniacuenejawanë —jai Jesús pijajiwijawabelia, peyapëtaeya-exanaejawata pajamatabëcueneliwa isi xaina pabita pe-ubinë peliwa isi.

**Jesús tsipaeba pijajiwijawabelia pecuenecataeliwa isi
lámparabë peliwa isicuenia**

(Mc 4:21-25)

¹⁶ Icatsia, Jesús jumaitsi ayaibitsaëto penacaetuatsiwijawabelia:

—Itsajiw-ata lámparabë pitanojotsicujinae, apomata-acatetsi itsacuenejawata. Camabëxëpanalia-ata apo-etsi. Biji rajane, athëbëyo etsia jiwi boya-berena pejonewi petsiwajënae-itayotecaenexa. Pamona e tatsipaebiliwa isi pejumexaniataewi, apobeneliwa isimatayatsi petsipaebiyaniwa itsamonaejawabelia.^s ¹⁷ Paliwa isianë tsipaebaponajë pecuenecataeliwa isicuenia, najumematayatsia apotsipaebaponaenë picani. Itsiata, itsamona e nejumetae-ata, aeconoxae abaxë aponejumeyapëtae pajamatabëcueneliwa isi xaina tatsipaebiliwa isianë. Itsiata, itsamatacabi bexëajawabelia, daxitajiw nejumeyapëtaena pajamatabëcuenexaina paliwa isianë pecuenecataeliwa isicuenia tsipaebaponajë.^t ¹⁸ ¡Bajaraxuata, patanejumetaewimë xaniawaetsia patacatsipaebiliwa isi panenamuxuna-ewere! ¡Panejumecanaëjërënu! Pajiw nejumeyapëtane, nejumexaniatanenua tatsipaebiliwa isi, Dioso jamatabëcuenecaëjëpaeya-exanaenatsi pewajënaeyabelia peyapëtaeponaenexa pajamatabëcueneliwa isi xaina. Pamona e pijinia aponejumeyapëtae, aponejumexaniatenua tatsipaebiliwa isi, paliwa isiwajëto jumeyapëtane picani, bajarapaliwa isi Dioso nacofënëtsia-exanaenatsi —jai Jesús penacaetuatsiwijawabelia.

**Jesús pejuyapijiwi, pena yajawa, ewetanubenatsi
bojumawelia, pebarëcuaicuajainexatsi**

(Mt 12:46-50; Mc 3:31-35)

¹⁹ Jesús pejuyapijiwi, pena yajawa, pata bajaraponëjawabereña. Itsiata, acuenebi bajarapamona e pimoxoyotsijawa, tsipaji

r 8:15 jumecowënëtsiya: Pamona e pepacujiru jumecowënëta Jesús peliwa isi, bajarapamona e siwanajamatabëcuenecopabiana Jesus-jawabelia, tsipaji bajarapacuenia Jesús peliwa isi itorobatsi pexanaenexa. Taema Jn 3:16. **s 8:16** Itsamona e canaëjëta pejumaitsiawanexa mapacueniaje: Bajarapacuenia pamona e pejumetaewi tatsipaebiliwa isi, apobenawecuajamatabëcuenecacatsi, apobenamuxujematsinua bajarapaliwa isi. Biji rajane, benacopata bajarapaliwa isijawabelia, pejamatabëcuenexanatsinexatsi. **t 8:17** Itsamona e canaëjëta pejumaitsiawanexa mapacueniaje: Xua jiwi muetsia exanawanapa, itsamatacabijawabelia daxitajiw cueneyapëtaenatsi. Daxita xua jiwi matayatsia cajinawanapa, itsamatacabijawabelia daxitajiw xaniawaetsia yapëtaena.

bitso jiwibitsaëto Jesús matatoyorotsiacaranatatsi. ²⁰Nexata, pamonae Jesús petsipaebiliwaisi matatoyorotsia jumetaeyenatsi, jumaitsi bajaraPonëjawabelia:

—Patajatuxanenë, ena raja, nejuyapijiwi yajawa, nubena pata-pënëwerena. Bajarapamonae pina jitsipa pecataejawa —jai Jesús-jawabelia.

²¹Nexata, Jesús jumaitsi daxita bajarapamonaejawabelia:

—Pamonae jumetane Dioso pejumeliwaisi, jumecowënëtanua pacuenia Dioso itorobatsi, bajarapamonae jane baja, tajuyapijiwi, taenajiwinua —jai Jesús bajarapamonaejawabelia.

Jesús itaweta piyaijowiboxaneto, malataca yajawa

(Mt 8:23-27; Mc 4:35-41)

²²Itsamatacabi Jesús Galilea nacuata, pijajiwi yajawa, runareca jera-ënëabereca. Jumaitsi pijajiwi jawabelia:

—Nicabaliatsi mapapucaxaneto itsapanabeliaje —jai.

²³Itsa baja naropobalia, Jesús majitanuca jera-ënëta. Jemata pinijijowiboxaneto najetaruca. Nexata, malataca bitso ayai. Jera-ënëaberena mera epa-bajarabapona. Belia, wënëcapona jera-ënëaberena. Nexata, bubunaejitsia baja bajarapamo. ²⁴Nexata, Jesús pemajitanucaenë, pijajiwi ya-itawabatsi. Jumaitsi bajarapamonae:

—¡Patajatuxanenë, waxaitsimi rabaja ya-othopaenatsi! —jai.

Nexata, Jesús, pemajitanucaenëmi, naëcotapuna. Itawetaxuaba jowibo, malataca yajawa. Nexata, jowiboxanetomi baja, ajibi tsaxuabi. Mene-ata baja, wainae ecaxuaba.

²⁵Xuacujinae, Jesús jumaitsi pijajiwi jawabelia:

—Paxamë cajena apopane-itaxutuajamatejemamë. ¿Bajaraxuata bitso pajunawame? —jai.

Nexata, Jesús pijajiwi itsa tane Jesús pecuene-itawetsijawa jowibo, malataca yajawa, jamatabëcuenenajunawiaca bëpënëa. Nexata, Jesús pijajiwi najumaitsi:

—¿Demeta tsipaji maponëje? ¡Peca-itawetsi jowibo, malataca yajawa, pejumecowënëtsinexatsi! ¡Nexata baja, jowibo, malataca yajawa, ajibi tsaxuabi! —najai Jesús pijajiwi.

Jesús wecuacapitsapa dowathiwi peyajawaponaponaenëmi, Gerasa nacuata

(Mt 8:28-34; Mc 5:1-20)

²⁶Jesús, pijajiwi barëyaëta pucaxaneto itsapanabelia, Gerasa nacua-yabelia, panacua boca puca itsapanawerena, Galilea nacua canacujitsialia. ²⁷Itsa Jesús jerawecua nonotajunaya, bajarapanacuapijinë, dowathiwi peyajawaponaponaenë, mata-enenarenatsi. Bajaraponë bajayajebi baja jumasa ponaponabiaba. Pijabota apoponapona. Jiwimëthëanëjawata saya ponaponabiaba. ²⁸Nexata, itsa pata Jesús-jawaberena, pematabacabëta nucajunua Jesús pitabarata. Pinijijumeta aëjai. Jumaitsi:

—Jesús, Dioso, pepo-ayaijamatabëcuenenë, pexënatomë, ¿detsa xua jaitame xanëjawaberena? ¡Pexaniacuen bitso cawajëtatsi! ¡Pëtsa abaxë

nenabejiobitsia-exaname!“ —jai dowathiwi peyajawaponaponaenë Jesús-jawabelia.

²⁹Bजारपacuénia jumaitsi dowathiwi peyajawaponaponaenë, tsi-paji Jesús pemata-enaejawatatsi, bajaraponë wecua-itaweta dowathiwi pepitsapaenexa. Jumaitsi mapacueniaje: «¡Dowathiwi, bajaraponë baja pawecuapitsapare!», jai. Bजारaponë anijatónë dowathiwi waeta-babiabatsi. Jiwi cadenamaëtonëta cobecëtabiabi-atatsi, taxucëtabiabi-atatsinua, xaniawaetsia picani pe-ecaeenexa, bajaraponë ucubabiaba cadenamaëtonëmi. Dowathiwi pejamatabëcueneta najetabajirawabiaba petusatuabelia.

³⁰Nexata, Jesús jumaitsi bajaraponëjawabelia:

—¿Detsa pawënëmë? —jai.

Nexata, bajaraponë nawënëpaeaba.

—Tawënë raja Legión —jai. Bजारpacuénia nawënëpaeaba, tsi-paji dowathiwi ayaibitsaëtoxaneto tsijamatabëjinawanapatsi.

³¹Bजारapadowathiwi wajëta Jesús-jawabelia, apopewerewerecae-isotojawabelia pitorobiyaniwatsi. ³²Bजारajota, imoxoyo petsuto-jawata, marranobitsaëtoxaneto xaewanapa. Nexata, dowathiwi bitso wajëta Jesús-jawabelia, petocopatsinexatsi pejonejawanexa marranobitsaëtoxanetojawabelia. Jesús nexata pewajëtsicueniatsi tocopata. ³³Nexata, dowathiwi pebi wecuapitsapecatsi. Junua baja marranobitsaëtoxanetojawabelia. Daxita bajarapamarranobitsaëtoxanetomi cujinaeyeca. Pucaxaneto itapajanituareca othopareca. Nexata, meneta bubuna. ³⁴Marrano pewetsiwi itsa tane bajarapacuene, rëcëpeca, petsipaëbinexa tomarapijiwijawabelia, wayafotusatojawa pe-enaewijawabelia-ata. ³⁵Nexata, jiwi ponarena petanenexa bajarapacuene. Itsa parena Jesús-jawaberena, taeyeta dowathiwi peyajawaponaponaenëmi pe-ecaejawa Jesús pemuxuneneta. Penaxatatsijawa baja bajaraponë naxatateca. Jamatejema baja. Xania-waetsia eca. Nexata, bajarapamonae cujunawa Jesús. ³⁶Pamonae pecuënetaewi Jesús pejamatejemaya-exanaejawa dowathiwi peyajawaponaponaenëmi, paeaba pepatsiwijawabelia daxita pacuenia tane. ³⁷Nexata, daxita Gerasa nacuapijiwi, Jesús pecujunawixaetsi itorobatsi peponaenexa pijanacuawecua. Nexata baja, Jesús runareca jera-ënëabereca, peponaenexa. ³⁸Nexata, dowathiwi peyajawaponaponaenëmi bitso picani nawajëca Jesús-jawabelia pepëta penaponaenexa.

Itsiata, Jesús apojejai. Jumaitsi bajaraponëjawabelia:

³⁹—¡Ponare nijamonaejawabelia, netsipaëbinexa pacuenia ayaicuene nija-tuxanenë Dioso cato-exana! —jai Jesús.

Nexata baja, bajaraponë pona. Tsi-paëbapona daxita pijatomarapijiwijawabelia pacuenia Jesús jamatejemaya-exanatsi.

u 8:28 *nenabejiobitsia-exaname*: Padowathiwi yajawaponapona bajaraponë, yapëtane Jesús penaneconitsia-exanaejawanexatsi, pexuabijawata isotopucaxanetojawabereca, nacia pecopia-rucaematacabijawabelia. (Lc 8:31; Apoc. 20:10-14.) Nexata, apojitsipae Jesús bajarapacuénia peto-exanaejawatsi bajarapamatacabiwajënaeya.

**Jesús copiaya namuto-epatota jamatejemaya-exana piawitanewa,
pacuenia-ata cotocaewi to-asaëya-exana Jairo pexénatoyo,
petëpaewayomi**

(Mt 9:18-26; Mc 5:21-43)

⁴⁰ Jesús icatsia pecowëyaberena nawiarena jerata, pucaxaneto itsapanabere-
rena. Bajarajota, jiwi ayaibitsaëtohaneto copiapitatsi barëyaya, tsipaji baja
cajena copia-ewetawanapatsi pepatsijawanexarena. ⁴¹ Nexata, bajarajota
napatajopa Jairo, judiowi pijasinagogabo pewetsinë. Bajaraponë pemataba-
cabëta yayataeya Jesús pitabarata nucajunua. Ajumesaëya junata. Jumaitsi
Jesús-jawabelia:

—¡Tapëta ponare tajaboyabelia! —jai. ⁴² Bajarapacuenia Jairo jumaitsi
Jesús-jawabelia, tsipaji pexénatowayo, caewayo, pexainaewayo, totëpaejit-
siatsi, doce pawaibeje pexainaewayo.

Jesús itsa napona Jairo pepëta, jiwibitsaëtohaneto pepënaponaewitsi
matatoyorotsia cënënanajetarubenatsi. ⁴³ Bajarapajiwibitsaëtohanetotuatua-
jëta, petiriwa nanajetaruca, pijanacuene pecapunaewatsi. Bajarapawitane
pexainaecujinae, xaina baja doce pawaibeje. Bajarapajana beyajamatabë-
jiobi tsabiabi. Daxita pexainaewaximi nawecuawereta, pematamobijawata
pewaëbiwitsi. Itsiata baitsi jane, itsanë-ata apocajëpaeitsi pejamatejemaya-
exanaenexatsi bajarapawitanewecua. ⁴⁴ Nexata, bajarapowa najetabilia
Jesús pepënëwelia, jiwibitsaëtohanetotuatujëalia. Bajarapowa tojayataba
Jesús penaxatatsijawacopia. Bajarapaepatota, pijanacuenemi wecua-ajibitsi
baja.

⁴⁵ Nexata, Jesús jumaitsi:

—¿Jipatsa tanaxatatsijawa netojayataba? —jai.

Daxitajiwi pejumaitsixae, caejiwi-ata apopetoyatsijawa yabara, nexata
Pedrobana jumaitsi Jesús-jawabelia:

—Patajatuxanenë, jiwibitsaëtohaneto raja camatatoyorotsia cënënanaje-
tarubena. Apobeca-ajayatabijibi. ¿Detsa xuajitsia: «Jipatsa tanaxatatsijawa
netojayataba», jamë? —jai Pedrobana.

⁴⁶ Nexata, Jesús jumaitsi:

—Yapëtaniji cajena itsajiwiyo tanaxatatsijawa tanetoyatabijawa, tsipaji
tajamatejemaya-exanaesajawa xanëjawawelia pitsapa —jai.

⁴⁷ Nexata, bajarapowa itsa nayapëthane Jesús peyapëtaejawatsi
pejamatejemaya-exanaejawatsi piawitanewawami, neconecojai pecajunawi.
Pematabacabëta tonucajunua Jesús pitabarata. Bajarapowa nexata nawaju-
nupaeba daxita jiwituatujëta pacuene yabara tojayataba Jesús penaxatatsi-
jawa. Tsipaebanua pacuenia jamatejemaya-exanatsi.

⁴⁸ Nexata, Jesús jumaitsi bajarapowajawabelia:

—Xamë tanesiwanajamatabëcuenecopatsixaemë xanëjawaberena, jamate-
jemamë baja. ¡Ponare baja jamatejema! —jai Jesús bajarapowajawabelia.

⁴⁹ Bajarapacuenia Jesús pejumaitsitsanucaejawata, namuto-epatota
pataba jiwitonë, Jairo pijabojawawerena peponaenë. Bajaraponë jumaitsi
Jairojawabelia:

—Nexénatoyo rabaja tëpa. ¡Pëtsa baja matawëjëa jamatabë-
itonotaponame Jesús! —jai bajaraponë Jairojawabelia.

⁵⁰ Jesús jumetae-ata bajarapajume, itsiata jumaitsi Jairojawabelia:

—¡Pëtsa najamatabëxainame! ¡Nesiwanajamatabëcuenecopare saya ëxanëjawaberena! Nexënatowayo raja wecuapanepaena petëpaejawa —jai Jesús.

⁵¹ Itsa Jesús pata Jairo pijabota, apotocopatsi ayaibitsaëto pepënajoneja-watsi, petëpaewayo pebocaejawabelia. Barëjunua saya mapamatabëxëyoje: Pedro, Santiago, Juan, petëpaewayo paxa, pena-ata. ⁵² Pamonaë Jesús pewa-jënaë ena Jairo pijabota, pinijicuenia matanueyabena petëpanucaewayo.

Nexata, Jesús jumaitsi pematnueyabiwijawabelia:

—¡Pëtsa pamanueyabame! Pejanawa raja apotëpae. Saya raja majitanuca, —jai, tsipaji Jesús yapëtane piasaëya-exanaejawanexa bajarapowayo.

⁵³ Bajarapacuenia Jesús pejumaitsijawa, bajarapamonae jumecapocaponatsi, tsipaji yapëtane bajarapowayo baja picani pepacuene petëpaejawa.

⁵⁴ Nexata, Jesús petëpaewayo cobepita. Jumaitsi pinijijumeta:

—¡Pejanawayo, nonotabapunare! —jai Jesús.

⁵⁵ Nexata, bajarapacuenia pejumaitsijawata, petëpanucaewayomi namata-cotapuna. Asaë baja icatsia.

Nexata, Jesús jumaitsi pejanawayo penajawabelia:

—¡Nexënatowayo pexaejawa rajure! —jai Jesús.

⁵⁶ Nexata, bajarapowayo paxa, pena-ata, bitso jamatabëcuenenabenajacabeje.

Nexata Jesús jumaitsi bajarapajiwiwejejawabelia:

—¡Pëtsa papaebamebeje itsajijawabelia-ata pacuene pacato-exanatsibeje! —jai Jesús.

Jesús itoroba pijajiwi, pepaebanajetarubenaenexa jiwijawabelia,

Dioso pijajiwi peyanacua-ewetsijawanexa yabara

(Mt 10:5-15; Mc 6:7-13)

9 ¹ Itsamatacabita, Jesús junata pijajiwi, doce ponëbeje, penacae-tuatsinexa. Nexata, jamatabëcuenecaëjëpaeya-exanatsi dowathi peyajawajinawanapaewi pewecuacapsapaponaenexa, piawitanewi-ata pejamatejemaya-exanaponaenexa. ² Itorobatsi pepaebanajetarubenaenexa daxitajijawata pacuenia Dioso pijajiwi yanacua-ewetsijitsia, piawitanewi-ata pejamatejemaya-exanaponaenexa. ³ Pijajiwi penaropobiwajënaë, Jesús yajawanajumecopata mapacueniaje:

—¡Pëtsa itsacuenjawa-ata pacaponaë panijanamutonexa! ¡Pëtsa pacaponaë naëbo, doro, panemarue, palata-ata! ¡Caejawa saya pane-naxatatsijawa pajumaponare! ¡Pëtsa anijacamisabeje pacaponaë! ⁴ Itsa papatabiabianame tomarata, pabota pacacapata, bajarajota pajinawana-paenae. Matapania itsatomarajawabelia paponaejitsiamë, bajarapabowecua papitsapaenae. ⁵ Patomarata apopacacopiapitsi tsane, pexanialiwaissi panetsipaëbinexa, pawecuaponaenae. Panewecuaponaewajënaë, bajarapatomarata panataxu-atsapërëwarëbianame, paneyapëtaeya-exanaenexa bajarapatomarapijiwi Diosojawabelia penaneconitsijawa, apopapecacopiapitsixae papecanamuxuna-ewetsinexa panetsipaëbiliwaissi —jai Jesús pijajiwiawabelia.

⁶Bajaraxuacujinae, Jesús pijajiwi naropoba jane baja. Najetarubena daxitatomaraxijawa. Tsipaebanajetarubena jane baja pexanaliwaisi, jiwi pecapanepaeliwaixinexatsi, pibisiacuene pexanaeneconimiwecua. Jamatejemaya-exanaponanua piawitanewi daxitajawa.

Jiwi caejamatabëcuene aponajuaxainae Jesús yabara

(Mt 14:1-12; Mc 6:14-29)

⁷Herodes, Galilea nacua pewetsinë, wënëliwaisitanetsi daxita Jesús pinijicuene pexanaponaejawa. Nexata, bajaraponë najamatabëcuene-epatajërërëcaeya najamatabëxaina Jesús yabara, tsipaji daxitajiwi caejamatabëcuene aponajuaxainae ponëcuene yabara. Itsamonae jamatabëcuene-nawëxaniabiaya jumaitsi tsaponae: «Jesús raeta Juan, jiwibautizabinëmi, petëpaecujinae icatsia asaë», jai tsaponae. ⁸Itsamonae pijinia jumaitsi tsaponae: «Jesús raeta belia profeta Elías tsipae»,^v jai tsaponae. Itsamonae pijinia jumaitsi tsaponae: «Jesús raeta bajayata itsanë profetawimiyajuwë-nënë, icatsia asaë», jai tsaponae. Bajarapacuenia itsamonae jamatabëcuene-nawëxaniabiaya pejumaitsitsaponaejawa Jesús yabara, Herodes jumetane. ⁹Nexata, Herodes jamatabëjumaitsi: «Xanë bajayata itorobajë tajajiwi Juan, jiwibautizabinëmi, pebeyaxuabinexa, pewësi-ucutaxuabicueniatsi. ¿De tsaeta nexata ponë wënëliwaisitaeyabiabajë pinijicuene pexanaponaejawa yabara?», jamatabëjai Jesús yabara. Bajaraxuata, Herodes bitso jamatabë-tane Jesús.

Jesús pexaejawa rajuta cinco mil ponëbeje

(Mt 14:13-21; Mc 6:30-44; Jn 6:1-14)

¹⁰Jesús pija-apóstolewi nawiabanajetarubena baja Jesús-jawaberena, jiwi pexanaliwaisi petsipaebanajetarubenaecujinae. Nexata pepatsicujinae, nawajunupaeba Jesús-jawabelia daxita pacuenia exanawanapa. Nexata, Jesús barëpona pijajiwi, Galilea puca itsapanabelia, Betsaida tomara imoxoyojawata, pesajinaejawata, pijajiwi pebarënacaetuatsinexa picani. ¹¹Itsiata baitsi jane, jiwi ayaibitsaëtoxaneto pepëtaexaetsi, pecowëwelia pëjaitatsi. Nexata, bajarapamonae itsa pata Jesús-jawata, bajaraponë copia-pita xaniawaetsia. Nexata, tsipaeba bajarapamonaejawabelia pacuenia Dioso yanacua-ewetsijitsia pijajiwi mapanacuataje. Jamatejemaya-exananua piawitanewi.

¹²Itsa baja caniwiyo tsaponae, Jesús pijajiwi, doce ponëbeje, cujibare-natsi. Jumaitsitsi:

—Itorobare baja jiwi peponaenexa imoxoyo pe-enaetomaraxijawa, imoxoyo pe-enaebonëjawa-ata, pejaitsinexa itsajota majitsijitsia, pexaejawanua penamitsawajëtsinexa, tsipaji majotaje ajibi pexaejawa! Caejiwi-ata pijabo apoxainae majotaje —jai Jesús pijajiwi.

¹³Nexata, Jesús jumaitsi pijajiwijawabelia:

v 9:8 Elías: Bajaraponë bayatami ponapona Israel nacua. Baitsi, apo-asaë tsaponaponae mapanacuataje, Jesús peponaponaematacabi. Itsiata, bajaraponë Dioso ya-asaëya caponatsi athëbëa-betsia. (2Re 2:1-11.) Bajaraxuata apopayaquinarubinë «Elías-pijinë». Daxita bajaraponë peliwaishi ruca 1Re 18-2Re 2-jawabelia.

—¡Paxamë parajure pexaejawa! —jai Jesús.

Nexata, Jesús pijajiwi jumaitsi:

—Paxainajë saya cinco papan-bëbeje, anijadujuainëyobeje yajawa. ¿Jit-sipame tsaja patacomuacaenexa pexaejawa daxita mapamonae penaxaene-xaje? —jai Jesús pijajiwi.

¹⁴Bajarapajiwibitsaëtozaneto bejamatabëcuene cinco mil ponëbeje.

Nexata, Jesús jumaitsi pijajiwijawabelia:

—¡Pa-enaeya-exanare pepobitsaëtonë! ¡Caebitsaëto canacujitsia pa-enaeya-exanare, bejamatabëcuene cincuenta ponëbeje tsaponae! —jai Jesús pijajiwijawabelia.

¹⁵Nexata, Jesús pijajiwi bajarapacuenia exana. Enaeya-exana jane baja daxita jiwibitsaëtozaneto. ¹⁶Nexata, Jesús pita cinco papan-bëbeje, anijadujuainëyobeje yajawa. Athëbëa benaëcotsia, pexaniajatabaëcuene perajutsinexa Diosojawabelia, pexaejawa yabara. Bajaraxuacujinae, pan-bëanë epatsënëcapona, dujuainëyobeje yajawa. Pe-epatsënëcaponaejawa pijajiwijawabelia rajutapona, petsicobetsanaenexa daxitajiwi. ¹⁷Daxita xaniawaetsia najuaxane. Bajaraxuacujinae, jiwi peyajuwënëcopabijawanë Jesús pijajiwi wënëba pecaetuatsijawa doce xuabeje, beyoxobocuenia pecuejawanë.

Pedro cuenewajunupaeba Jesús Mesías-cuene

(Mt 16:13-19; Mc 8:27-29)

¹⁸Itsamatacabi, Jesús caenë wajëta Diosojawabelia pijajiwi pitabëta.

Nexata xuacujinae, Jesús jumaitsi pijajiwijawabelia:

—¿Detsa jiwi jumaitsi tsabiabi xanë yabara? ¿Detsa meta tsitaponënë? —jai.

¹⁹Nexata, Jesús pijajiwi jumaitsitsi:

—Itsamonae xamë yabara jumaitsi tsabiabi: «Jesús raeta Juan, jiwibau-tizabinëmi, icatsia asaë», jai tsabiabi. Itsamonae pijinia jumaitsi tsabiabi: «Jesús raeta profeta Elías tsipae», jai tsabiabi. Itsamonae pijinia jumaitsi tsabiabi: «Jesús raeta itsanë bajayata, profetawimiyajuwënë, icatsia asaë», jai tsabiabi xamë yabara —jai Jesús pijajiwi.

²⁰Nexata, icatsia Jesús jumaitsi pijajiwijawabelia:

—¿Detsa nexata paxamë pajamatabë-itsimë xanë yabara? ¿Detsa paxamë pacatsitaponëtsi meta? —jai Jesús pijajiwijawabelia.

Nexata, Pedro jumaitsi Jesús-jawabelia:

—Xamë raja cajena Cristomë, athëbëwetsica Dioso peca-itorobinëtsica jiwi necapanepaenexa —jai Pedro.

Jesús tajëwelia nawajunupaeba pebeyaxuabijawanexatsi

(Mt 16:20-28; Mc 8:30–9:1)

²¹Bajarapacuenia Pedro pejumaitsicujinae, Jesús jume-itaweta pijajiwi pewajunupaebiyaniwatsi, Cristocuene. ²²Nexata, Jesús tajëwelia nawajunupaeba pebeyaxuabijawanexatsi. Jumaitsi mapacueniaje:

—Xanë, Daxitajiwi Pematapijinënë, bitso nebejiobia-exanaena apocae-nabejiobitsicueniejawata. Nenawecua-itoya tsane pamona judíowi pija-ancianowi, sacerdotewi penamatacaitorobiwi, judíowi pecujarubiwi-ata. Necuene-aebiana xanë Cristonëcuenenë. Nexata, bitso nebejiobia-exanaena.

Bajaraxuacujinae, nebeyaxuabiana. Itsiata baintsi jane, tatëpaeucujinae, acueyabimatacabita, icatsia asaënë tsane —jai Jesús tajëwelia penawajunupaebijawata.

²³ Bajaraxuacujinae, Jesús jumaitsi pepënaponaewinexatsi yabara, daxita bajarajota penubenaewijawabelia:

—Pajiwi jitsipa tanepënaponaejawa tajajiwitonënexa, becopata pija-cuata penatojitsipaeucenia pexanaponaponaejawa. Pacueneta ponë, cruz pewëtacaranajetarucaenë, exanabiaba pitorobicueniatsi pamonaе bajara-pacruzajawabelia cobematabiabarutsijitsiatsi, bajarapacuenia benajamatabëcuenewereta ta-itorobicuenia pexanabiabinexa, bejiobia-exanaejitsiatatsi, beyaxuabijitsia-atatsinua, tajumeliwaisi yabara. Nexata jane baja, xuacujinae, nepënaponaе. ²⁴ Pajiwi nato-itapeta pexanaponaponaenexa penatojitsipaeucenia ta-itorobicuenewecua, pebeyaxuabiyaniwatsi tajajiwitonëxa, nexata jamatabëcuenenaxuabiana Diosowecua. Pajiwi pijinia nato-itapeta pexanaponaponaenexa ëta-itorobicuenia beyaxuabijitsiatatsi xanë tajumeliwaisi yabara, nexata beyaxuabi-atatsi tsane, yajawaxainaenajë matacabi apowerewererecaejawa. ²⁵ ¿Detsa xua yabara jiwi toxanepanaejitsipatsi, daxitacuene pexinaejawa mapanacuapijicue-nejawanëje pecabarëyanexa, itsa Diosowecua jamatabëcuenenaxuabijitsia daxitamatacabijawabelia? Ajibi cajena. ²⁶ Pajiwi nawënëliwaisica-ura tsane jiwijawabelia xanë tajajiwitonëcuene, tajumeliwaisi-ata yabara, nexata, juya Xanë, Daxitajiwi Pematapijinënë, tajajiwitonëcuene wënëliwaisica-uranë tsane taxa Diosojawabelia. Bajarapacuenia wënëliwaisica-uranë tsane pamatacabita icatsia yajawapatsianicajë taxa Dioso pijapeniwiwenaeocotia, pija-ängelewi-ata, tananeconitsia-exanaenexa daxita pijaneconi pexainaewi. ²⁷ Xaniajanë pacuenia pacatsipaebijitsiatsi. Paxamëyajuwënëwi patëpaenejewamë, pataename Dioso petaxuxuabijawa pijajiwi peyanacua-ewetsicuene mapanacuataje —jai Jesús pijajiwijawabelia.

**Pacuenia Jesús naperabë-ithothiana peperabëniwiwenaejawata,
yabara peliwaisi**

(Mt 17:1-8; Mc 9:2-8)

²⁸ Bejamatabëcuene ocho pamatacabibeje Jesús tajëwelia penawajunupaebicujinae petëpaejawanexa, pijajiwi, acueyabi ponëbeje, barëjunaya petsutojumabetsia. Mapamatabëxëyoje: Pedro, Santiago, Juan. Bajarapamonae barëjunaya petsutojumabetsia, Jesús pewajëtsinexa Diosojawabelia. ²⁹ Penawajëcanuca-epatota Diosojawabelia, itabaraniwiwenena. Penaxatatsijawa-ata bitso niwiwenaeaya niojai.

³⁰ Bajarajota jemata naitajëta Moisés-pijinë, Elías-ata.^w Bajaraponëbeje barëcuaicuaijaitsanucaebeje Jesús. ³¹ Bajaraponëbeje niwiwenaeaya matatoyorotsianaitayotabeje. Bajarapamonae nabarëcuaicuaijai Jesús petëpaejawanexa yabara, pacuenia-ata tocopiapatsijitsiatsi pebejiobia-exanaejawanexatsi Jerusalén tomarata. ³² Pedrobana penajuajinawana-paewi bitso itamajitsipanae-ata, itsiata naëcotawanapa. Bajarapamonae

tane Jesús matatoyorotsia peniweniwenaejawa. Tanenua Moisés, Elías-beje pebarëcuaicuaijajawatsi Jesús. ³³Itsa baja Moisés, Elías-beje Jesús-wecua ponaejitsiatsibeje, bajarapaepatota, Pedro jumaitsi tsaxuabi Jesús-jawabelia:

—¡Patajatuxanenë, pijacuaxae panebarëponame! Pacato-exanaenatsi acueyabi pabobërëtoheje; caebo xamënexa tsane, itsabo Moisés-nexa tsane, itsabo Elías-nexa-ata tsane —jai Pedro.

Pedro xaniawaetsia najamatabëcuenecanaëjësinejewa, bajarapacuenia jumaitsi. ³⁴Pedro abaxë itsa cuaicuajai tsanucacae, itarërëbo najumata-acataxuabatsi daxita bajarapamonae. Jesús pijajiwi najunawiaca itsa mata-acataxuabatsi itarërëbo. ³⁵Nexata, bajarapa-itarërëbojawawetsica Dioso jumaitsiatsica:

—Mara ponë taxënato, ta-asiwanëje. ¡Bajaraponë panamuxuna-ewere! —jai Dioso itarërëbojawawetsica Jesús pijajiwijawabelia.

³⁶Itsa baja Dioso najumewereta bajarapacuenia pejumaitsiyawatsica, Jesús pijajiwi tane caenë baja Jesús penucacajawa bajarajota. Tae-ata bajarapacueni, bajayajebi moya saya jinawanapa, tsipaebinejewa itsamonaëjawabelia.

Jesús jamatejemaya-exana pejewaxinë, dowathi peyajawaponaponaenë
(Mt 17:14-21; Mc 9:14-29)

³⁷Itsamatacabijawabelia, Jesús pebarëcuaicuajaicujinae Moisés, Elías-beje, pijajiwi acueyabi ponëbeje yajawa, nawiatsica pet-sutojumawetsica. Jiwi ayaibitsaëtoxaneto mata-enenatsi. ³⁸Nexata, caenë bajarapajiwiibitsaëtoxanetoyajuwënënë pinijijumeta jumaitsi Jesús-jawabelia:

—¡Necujarubinë, nitaxutotsoniataema! ¡Netotaema taxënatonëyo, tsi-paji raja caenëyo xainajë! ³⁹Paepatota dowathi waetababiabatsi, aëjaiya-exanabiabatsi. Itsa tëpajoneya-exanabiabatsi, daxitanëyo neconecojaiya aperabëbaba tsatababiabirecanua. Bajarajota, pecuaibothamu tsabiabi. Bitso bejiobia-exanabiabatsi. Dowathi abaxë apojamatabëcopatsitsi. ⁴⁰Wajëtajë picaní nijajiwijawabelia tanetowecuacapsapaenexa. Itsiata, apocuenecaëjë-paetsi —jai bajaraponë Jesús-jawabelia.

⁴¹Nexata, Jesús jumaitsi daxita bajarajota penubenaewijawabelia:

—¡Paxamë baja panecueni-aebiwi Dioso papecayawenonaëjawanexa! ¡Pane-ajamatabëcuenebejewi baja cajena! ¿Detsa paepatojebi abaxë paxamëjawata pacayajawaponaponaenatsi, patanesiwanajamatabëcuenecopabinexamë xanëjawaberenä? Belia rabaja, pacasiwajamatabëcuenecueranatsi —jai Jesús daxita bajarapamonaejawabelia.

Nexata, Jesús jumaitsi pejewaxinë paxajawabelia:

—¡Barërenamëre nexënatonëyo! —jai Jesús.

⁴²Ajenä pejewaxinë itsa imoxoyotabarena Jesús, dowathi icatsia irata xuabatsi. Daxitanë aperabëbaba tsatabireca. Nexata, Jesús wecua-itaweta dowathi pewecuapitsapaenexatsi. Nexata baja, jamatejema pejewaxinë. Tocanawiata baja pejamatejemanë paxajawabelia. ⁴³Daxitajiwi bitso jama-tabëcuenenabenajaca Dioso pesaëta Jesús pewecuacapsapaexae dowathi bajaraponëyo.

Jesús icatsia tajëwelia nawajunupaeba pebeyaxuabijawanexatsi

(Mt 17:22-23; Mc 9:30-32)

Paepatota bajarapajiwi bitsaëtöxaneto Jesús siwajamatabëcueneba-rëyatsi daxita pexanaejawanë yabara, Jesús pijajiwi jawabelia jumaitsi mapacueniaje:

⁴⁴—¡Xaniwaetsia panenamuxuna-ewere! ¡Pëtsa panacofënë tame daxita patacatsipaebiliwaisianë, tsipaji Xanë, Daxitajiwi Pematapijinënë, necana-jetsiana itsamona pecobeyabelia! —jai Jesús pijajiwi jawabelia, tajëwelia penawajunupaebijawata pebeyaxuabijawanexatsi.

⁴⁵Itsiata baitsi jane, bajarapamonae apojumeyapëtae xua yabara Jesús jumaitsi, tsipaji Dioso apotocopatsitsi pejumeyapëtaenexa. Ajume-uranua peyanijobinexa Jesús-jawabelia pajamatabëcuene yabara jumaitsi.

Jesús pijajiwi namutua nayanijobanajetarubena ponë

ayaijamatabëcuenenë itsamonaewecua bajarapamonaetuatuajëta

(Mt 18:1-5; Mc 9:33-37)

⁴⁶Jesús pijajiwi anaeya namutua najumenotsiaya nayanijobanajetarubena ponë ayaijamatabëcuenenë itsamonaewecua bajarapamonaetuatuajëta. ⁴⁷Itsiata, Jesús pijajiwi jamatabëcueneyapëtae xua najamatabëxaina. Nexata, cobepita pejewaxinëyo, pemuxuneneta penutetsinexa. ⁴⁸Jumaitsi pijajiwi jawabelia:

—Pajiwi copiapita mapitsipejewaxinëyo,^x tanesiwanajamatabëcuenecopatsinëyo, xanë taniji tanecopiapitsijawa. Pajiwi necopiapita, ëxanë aponecopiapitsi. Taxa Dioso-ata copiapita, ponë nitorobica. ¡Nexata, pëtsa bepa-ayaijamatabëcuenewimë panataneme, tsipaji ponë paxamëyajuwënënë beweliamatabëcuenenë natane paxamëtuatuajëta, bajaraponë bitso ayaijamatabëcuenenë taenatsi Dioso, daxita paxamë matatoxenetsia! —jai Jesús pijajiwi jawabelia.

Jesús pijajiwi caxitajaraba itsanë, dowathi jiwiwecua

pecapitsapaejawa Jesús pewënëta

(Mc 9:38-40)

⁴⁹Bajarapacuenia Jesús pejumaitsijawa ayaijamatabëcuene penataewi yabara, pijajiwitonë, Juan, jumaitsi bajaraponë jawabelia:

—Necujarubinë, pataniji itsanë, apopaxanëyajuwënënë, newënëta dowathi jiwiwecua pecapitsapaejawa. Nexata, pa-itawetajë bajaraponë bajarapacuenia pexanaeyaniwa —jai Juan.

⁵⁰Nexata, Jesús jumaitsi Juan-jawabelia:

—¡Pëtsa pacuene-itawetame, tsipaji pajiwi aponacaliwaisi-itoya, bajarapajiwi nacajamatabëcueneyawenona! Nacaliwaisijëpaponaponanua —jai Juan-jawabelia.

x 9:48 *mapitsipejewaxinëyo*: Mapajumeyoje xaina anijamatabëcueneliwaisibeje: Pejewaxinëyo, itsa jume, beweliamatabëcuene penataewi-ata. Jesús cujaruba pijajiwi pacuenia apobenasiwajamatabëcuenebëjai ayaijamatabëcuene penataejawa itsamonaewecua. Biji rajane, benasiwajamatabëcuenebëjai najëpaeya pena-asianexa, Jesús pijajiwi xae.

Pacuenia Jesús jume-itaweta Santiago, Juan-beje, yabara peliwaisi

⁵¹Itsa baja imoxoyo pewajënae pamatacabi Jesús athëbëabetsia Dioso pecaponaejawanexatsi, ajamatabëcuenesaë baja peponaenexa Jerusalén tomarabelia. ⁵²Pewajënaeyabelia pijajiwitonëbeje natsiwajënae-itoroba, Santiago, Juan-beje, peponaenexabeje Samaria nacuata pe-ecaetomarajawabelia, petocowaetsinexabeje pabota picani Jesús patsijitsia. ⁵³Itsiaa baitsi jane, Samaria nacuapijiwi apojamatabëcopiapitsi Jesús, peyapëtaexae Jesús peponaejawanexa Jerusalén tomarabelia. ⁵⁴Nexata, Jesús pijajiwitonëbeje itsa yapëtanebeje Samaria nacuapijiwi Jesús apopecopiapitsijawanexatsi, jumaitsi beje Jesús-jawabelia:

—Patatutuxanenë, bajayata profeta Elías wajëta Diosojawabelia, Dioso pitorobinexatsica isotocotia pewerebiabinexa pijamatabëcuenëbejewi. ¿Baja tsaja pitsicuene jitsipame pawajëtsinexa Diosojawabelia, peweria-paenexatsi isotota pamonaë apojitsipae pecacopiapitsijawa? —jai beje.

⁵⁵Nexata, Jesús naëcota pijajiwitonëbejéjawabelia. Jume-itaweta bajara-pacuenia pejumaitsiyaniwabeje. Jumaitsi:

—Paxamëbeje apopajamatabëcueneyapëtaemëbeje Dioso pija-Espíritu Santo, ponë neyajawaponapona. ⁵⁶Xanë, Daxitajiwi Pematapijinënë, apopatsinëtsica tawerebiabinexa jiwi. Biji rajane, patsicajë tacapanepaenexa jiwi pibisiacuene pexanaeconiweucia —jai Jesús pijajiwitonëbejéjawabelia.

Nexata baja, Jesús, pijajiwi yajawa, pona itsatomarabelia.

Papiyapëbejecuene xaina Jesús pepënaponaewi

(Mt 8:19-22)

⁵⁷Jesús pijajiwi namutua peyajawanajetarucawata, judíowi pecujarubinë jumaitsi Jesús-jawabelia:

—Petuxanenë, itsabelia poname, xanë-ata cajena capënaponaenatsi —jai judíowi pecujarubinë.

⁵⁸Nexata, Jesús jumaitsi bajaraponëjawabelia:

—Itsa nepënaponaëjitsipame, aponapatsimë tsipae tajabota nenacueraewetsinexa, tsipaji tajabo apoxainaenë. Namo pijamëthëanë xaina pematapiabinexa. Baratsui-ata xaina pematapenanë. Itsiaa baitsi jane, Xanë, Daxitajiwi Pematapijinënë, itsajawabelia-ata apoxainaenë, itsajota nacueraewetabiabijitsianë —jai Jesús.

⁵⁹Bajaraxuacujinae, Jesús jumaitsi icatsia itsanëjawabelia:

—¡Nepënaponare! —jai.

Nexata, bajaraponë itsiaa jumaitsi:

—¡Tajatuxanenë, cae-epatoyo abaxë necopare tamëthëtsinexa taxa itsa tëpa! —jai Jesús-jawabelia.

⁶⁰Nexata, Jesús jumaitsi bajaraponëjawabelia:

—¡Copare Dioso pitabarata pejamatabëcuenetëpaewi, pemëthëtsinexa nijamonaëjiwi itsa tëpaejitsia! ¡Xamë, saicaya tanepënaponaenëmë, ponare jiwi netsipaëbinexa pacuenia Dioso yanacua-ewetsijitsia daxita pija-jiwi mapanacuataje! —jai Jesús bajaraponëjawabelia.

⁶¹Bajaraxuacujinae, icatsia itsanë jumaitsi Jesús-jawabelia:

—Tajatuxanenë, jitsipajë tacapënaponaejawa. ¡Itsiaata, abaxë cae-epatoyo necopare tanapëjioibnexa tajabota pejinawanapaewijawabelia! —jai bajaraponë.

⁶²Nexata, Jesús jumaitsi bajaraponëjawabelia:

—Pajiwi Dioso petonacuenebijawata, itsiaata, jamatabënajinabiaba pijape-rujujamatäbëcuene, bajarapajiwi apocäjäpaetsi xaniawaetsia Dioso petonacuenebinxä pitorobicueniatsi, tsipaji najamatäbëcuene-epatajërërëcaeya nacuenëba —jai bajaraponëjawabelia.

**Jesús pijajiwi itoroba, setenta ponëbeje, Dioso
pejumeliwaisi jiwi petsipaebanajetarubenaenexa**

10 ¹Bajarapacuenia pecujarubicujinae pepënaponaewitsi yabara, Jesús itapeta itsamonae, setenta ponëbeje, petsipaebanajetarubenaewinexa. Bajarapamonae Jesús itoroba anijanëbeje tsaponae, pewajënaeya Dioso pejumeliwaisi jiwi petsipaebanajetarubenaenexa daxita tomaranëjawa, tsiquiritomaraxijawa-ata, itsaxuayo bajaraPonë cujarubanajetarucaejitsia. ²Bajarapamonae peponaewajënaeya, Jesús jumaitsi pijajiwijawabelia mapacueniaje:

—Xaniajanë pacuenia pacatsipaebijitsiatsi. Ayaibitsaëttoxaneto jiwi sajina abaxë pejumetaejawa Dioso pejumeliwaisi, pesiwanajamatäbëcuenecopabinexa bajaraPonëjawabelia. Paxamë, pijinia, Dioso peliwaisi panepaebiwine, patsiquiribitsaëttoyomë. Nexata, pacuenia ayaipabixanetojawata, itsa caejiiwyobeje penotsiwinexa, to-ayapëbejetsi bepjiayo penotsiweretsinexa penaweretsijawanë, bajarapijiniä pa-itsimë paxamë, panetsipaebiwi Dioso peliwaisi, pacaiejiiwoxaemëbeje bepjiayo apopaweretsimë tsane panepaebijawa. ¡Bajaraxuata, Diosojawabelia asaëyata pawajëre icatsia pijajiwi pematatsënëä itsamonae pitorobinexa, papecayawenonaenexa!

³¡Paponare baja jiwijawa Dioso pejumeliwaisi panetsipaebanajetarubenaenexa! Nayajiwitaeya pajinawanapaename. Paca-itorobatsi raja taliwaisi panetsipaebinxä bitso pibisiacuene pexanabiabiwijawabelia. Nexata, pacuenia ovejaji tsiayaitsi, pejinawanapaexae pianaepanaelobomonae-tuatuajëta,⁷ bajarapa-itsimë tsane, taliwaisi panepaebanajetarubenaejawata. ⁴¡Pëtsa pacaponame doro, palata, zapato, itsacuenejawa-ata! ¡Itsa namuto-epatota itsajiwi pacaxitajarabame itsajiwi, panebajacobijawata pëtsa bajayajebi panabarëcuaiicuaijamë tsanucäbeje, panenajematsiyaniwabeje! ⁵Itsa pajonejitsiamë itsamonae pijaboyalä, panejonewajënaeya copiäya pajumaitsimë tsane Dioso pewënëta: «¡Dioso, yawenonare mapabopijiwi, jamatabëcuenexanepanaeya pejinawanapaenexa!», pajamë tsane.

⁶Bajarapabo pexainaenë ita pacacopiäpitsiana jamatabëcuenexanepanaeya, nexata bajaraponë pijabopijiwi Dioso jamatabëcuenexanepanaeya-exanaenatsi panejumaitsicuenia. Itsa apomuxujitsipae tsane bajarapacuenia

y 10:3 *pianaepanaelobomonaetuatuajëta*: Lobomonae jëpa benamo, itsiaata, pecunuanënë, pianaepanaenë-ata. Bajarapamonae apocuenejëpae newëthëmonae, tsipaji jinawanapa pepobitsaëto. Nexata, bajarapalobomonae nacadocuene-itajëta pamonae pianaepanaewi, piäjamatäbëcuenëbejewi, pitoyawi-ata Dioso peliwaisi. Nexata, pianaepanaejawata, pepobitsaëtocuenia tsi-maxëpatabiaba Jesús pijajiwi pebejiobia-exanaenexa, ita jume, pecapocaponäenexa-ata. Taema «lobo», glosariojawata.

panejumaitsijawa, nexata Dioso apojamatabëcuenexanepanaeya-exanaetsi tsane. ⁷Pabojawata xaniawaetsia pacacopiapitsiana, bajarapabota pajinawanapabiabianame. Matapania itsa paponaejitsiamë itsajawabelia, papit-sapaename bajarajotawecua. ¡Pëtsa panatixitaponame itsaboxijawabelia! Paxaeyabiabianame, pa-apaeyabiabianamenua xua pacarajuta bajarapabota. Bajarapacuenia pacato-exanaena panetsipaebixae pataca-itorobiliwaisi, tsipaji itsajiwi itsa tonacueneba itsanëjawabelia, barajutatsi pexaejawa. ⁸Patomarata papatabiabianame, pabopijiwi pacacopiapitanua xaniawaetsia, nexata panaxaename xua paca-abata. ⁹Bajarapatomarata pamonae jinawanapa piawitanewi, pajamatejemaya-exanaename. Pajumaitsimë tsaponae tsane bajarapatomarapijiwijawabelia: «¡Dioso daxita pijajiwi peyanacua-ewetsimatacabinexa, imoxoyo rabaja pewajënae pecopiapatsijawa!», pajamë tsaponae tsane. ¹⁰Itsiata baitsi jane, patomarata panepatsicujinae apopacacopiapitsi tsane, nexata papitsapaename callejawa panejumaitsi tsanajetarubenaenexa mapacueniaje: ¹¹«Panijatomarapiji-at sapërë patataxuta perubenaejawa, panawetaxuwarëbajë, panenayapëtaenexa bajarapacuenia Diosojawabelia panenaneconitsijawa, tsipaji apopanecopiapitsimë, patanenamuxuna-ewetsinexamë papexaniali waisi picani pacatsipaebijitsiatsi. Itsiata, pajitsipajë panenayajiwiypëtaenexa mapaliwaisije. ¡Imoxoyo rabaja pewajënae pecopiapatsijawa, Dioso daxita pijajiwi peyanacua-ewetsimatacabinexa!», pajamë tsanajetarubena tsane. ¹²Xaniajanë pacuenia pacatsipaebijitsiatsi. Pamatacabi Dioso naneconitsia-exanaena daxita pijaneconi pexainaewi, bajarapamatacabi bitso ayaicuenia Dioso naneconitsia-exanaena patomarapijiwi apopacacopiapitsi tsane. Paneconi-wajëtota bajayata Dioso naneconitsia-exana Sodoma tomarapijiwimi, mata-toxetsia Dioso naneconitsia-exanaena patomarapijiwi apopacacopiapitsi tsane xaniawaetsia —jai Jesús pijajiwi, setenta ponëbejewawabelia.

**Jesús muxujioba pejume-aebi witsi anijatomaratabeje pejinawanapaewi,
Dioso penaneconitsia-exanaejawanexa**

(Mt 11:20-24)

¹³Icacia, Jesús jumaitsi pijajiwi, setenta ponëbejewawabelia:

—¡Bitso bejiobi tsane Corazín tomarapijiwi! ¡Bitso bejiobi tsane Betsaida tomarapijiwi-ata! Bajarapatomarapijiwibeje Dioso pesaëta tsita-exanae-atanë pinijicuenejawanë, itsiata abaxë, necuene-aeba, Dioso tane-itorobinëcuene. Apojamatabëcopabi pibisiacuene pexanaejawa. Apojitsipauenya penajamatabëcuenepënëyorotsijawa Diosojawabelia. Bajayata, bajarapitsipinijicuene itsa tsita-exanaejitsipajë, Tiro, Sidón tomarapijiwimibejetuatujëta, copabijitsipa pibisiacuene pexanaejawa. Najamatabëcuenepënëyorobijitsipanu Dioso jawabelia. Orijibia, Diosojawabelia petsitanajamatabëcuene-itajëtsinexa bitso peyajamatabëcuenebëjajawa pibisiacuene pexanabiabineconi yabara, naxatabijitsipa piayopapaëbërëjawanë. Enaejitsipanu irata. Ipumana-ata natsimata-othocaejitsipa. ¹⁴Bajaraxuata, pamatacabi Dioso naneconitsia-exanaena daxita pijaneconi pexainaewi, bajarapamatacabi bitso ayaicuenia Dioso naneconitsia-exanaena Corazín, Betsaida tomarapijiwibeje, matatoxetsia penaneconitsia-exanaejawawecua bajayata Tiro, Sidón tomarapijiwimi-beje. ¹⁵Paxamë paCapernaúm tomarapijiwimë panajamatabëxainame picani

Dioso papecacaponaejawanexa athëbëabetsia, papecayaiyataexae. Itsiata baitsi jane, apopatanejumexaniataexaemë, Dioso pacaxuabiana apowerewerecae-isotojawabelia —jai Jesús bajarapatomaranëpijiwi yabara.

¹⁶ Icatsia, Jesús jumaitsi pijajiwi, setenta ponëbejewabelia:

—Pajiwi pacanamuxuna-ewetsiana, bajarapajiwi taenajë xanë tanenamuxuna-ewetsijawa. Pajiwi pacanayajiwi-itawetsiana, bajarapajiwi taenajë xanë tanenayajiwi-itawetsijawa. Dioso-ata, ponë tane-itorobinë, taenatsi penayajiwi-itawetsijawatsi —jai Jesús setenta ponëbejewabelia, pitorobiwajënaeya.

Jesús pijajiwi, setenta ponëbeje, nawiabanajetarubena, Dioso pejumeliwaisi pepaebanajetarubenaecujinae daxitanacuanëjawa

¹⁷ Jesús pijajiwi, setenta ponëbeje, Dioso pejumeliwaisi jiwi daxitanacuanëjawa petsipaebanajetarubenaecujinae, barëyaya nawiabanajetarubena Jesús-jawaberena. Pepatsicujinae, bajarapamonae jumaitsi Jesús-jawabelia:

—Tajatuxanenë, dowathiwi baja cajena itsa pa-itawetaponajë newënëta, panejumecowënëtabiaba —jai penawajunupaebijawata bajarapamonae.

¹⁸ Nexata, Jesús jumaitsi pijajiwijawabelia:

—Xanë baja cajena taniji Satanás^z athëbëwetsica pejopaejawatsica pacuenia yamaxë bajopaica. ¹⁹ Xanë baja cajena pacarajutatsi tasaë, panejamatabëcuenematatoxenetsinexa wajawajabitsaënë Satanás. Nexata, pataxunanonotsi-atamë tsane jomo, aqueto-ata apopaca-itsacueniabi tsane.

²⁰ ¡Itsiata, pëtsa bitso panasiwajamatabëcuenebarëyamë, dowathi itsa pa-itawetame papecajumecowënëtsijawa yabara! ¡Biji rajane, panasiwajamatabëcuenebarëyamëre Dioso papijajiwixaemë, papecawënëyaquinarubixae athëbëtatsia! —jai Jesús setenta ponëbejewabelia.

Jesús jamatabëcuenebarëyaya, pexaniacuenia wënëxaniata paxa Dioso
(Mt 11:25-27; 13:16-17)

²¹ Jesús bitso jamatabëcuenebarëyaya-exanatsi Espíritu Santo. Nexata, wënëxaniatsiaya jumaitsi paxa Diosojawabelia:

—Axa, xamë raja newetsinë athëbëtatsia, mapanacuajawa-ataje. Ayai-jamatabëcuenenëmë bitso. Pexaniajamatabëcuene carajutatsi, tsipaji apotocopatsimë peyapëtaenexa pamonaenatocanaëjëta bitso peyapëtaewi daxitacuene yabara, xua ajena tsipaebajë tajiwiwijawabelia. Biji rajane, yapëtaeya-exaname bajaraxuanë, pamonaenaweliamatabëcuene penataewijawabelia, pecajumexaniataewi, cajume-aebinejewa bepejewaxijamatabëcuene pexainaexae. Bajarapacuenia xamë exaname pecatsitanepanaecuenia —jai Jesús paxa Diosojawabelia pewënëxaniatsijawata.

²² Icatsia, Jesús jumaitsi bajarajota penubenaewijawabelia:

—Taxa Dioso baja cajena netocopata daxitacuene ta-exanaenexa, tatsipaebinexanua. Itsajiwi-ata cajena, xaniawaetsia aponecueneyapëtae,^a xanë Dioso

z 10:18 *Satanás*: Isa. 14:12; Apoc. 12:7-11. Satanás pejajume: Wajawajabitsaënë, wajanacaneconitabiabinë, peyacaranatsijitsipaenëna Dioso pejitsipaecuenë. a 10:22 *aponecueneyapëtae*: Jesús pepaebijawa pejumetaewitsi, cuenecanaëjëtabiaba Dioso ëpijajiwitonëcuene yabara. Jiwi-tonëcuena saya tanetsi. Apotaetsi Dioso Pexënatocuenia. Nexata, apotaetsi planeconijibinëcuenia pacuenia Dioso planeconijibinë. Apotaetsi ëpexaniajailiwaisi pepaebinë, pacuenia Dioso cuene-itsi. Apoyaiyataetsi pacuenia yayataebiaba Dioso.

pexēnatocuenenē. Caenē, taxa Dioso necueneyapētane. Itsajiwi-ata cajena, xaniawaetsia apocueneyapētae pacuenia taxa Dioso cuene-itsi. Caenēnē, xanē pexēnatonē, cueneyapētaniji. Itsiata, pamonaejawabelia tojitsipajē tayapētaeya-exanaenexa pacuenia taxa Dioso cuene-itsi, bajarapamona-e-ata cueneyapētaena taxa Dioso —jai Jesús bajarajota penubenaewijawabelia.

²³ Nexata, Jesús napēñeyorota, ēpijajiwi, doce ponēbejejawabelia peju-maitsinexa mapacueniaje:

—Bitso pexaniacuene pacato-exana baja Dioso, papecatocopatsixae pane-taenexa pacuenejawanē baja pataeponame, xanē patacatsita-exanaejawanē.

²⁴ Xaniajanē pacuenia pacatsipaebijitsiatsi. Bajayata, ayaibitsaēto profetawi, nacua-ewetsiwimi-ata, necopia-ewetawanapa tapatsijawane-xatsica, tsipaji picani jamatabētane xua paxamē aeconoxae pataneme ta-exanaponaejawanē. Itsiata, tēpa baja, netaenewewa tapatsijawatsica. Jamatabējumetaeyabiabanua picani paliwaisianē baja aeconoxae paxamē pacatsipaebaponatsi. Itsiata, tēpa baja, apojumetaenewewa bajarapaliwaisianē —jai Jesús pijajiwijawabelia.

**Jesús tsipaeba jiwijawabelia pecuenecataeliwaisicuenia Samaria
nacuapijinē, pexaniajamatabēcuenē pexainaenēcuenē yabara**

²⁵ Itsamatacabi, Jesús liwaisi petsipaebanucaejawata pijajiwijawabelia, bajarajota judfowi pecujarubinē nonotapuna. Bajaraponē Jesús-jawabelia jamatabēcuenē-ējēbiaya jumaitsi:

—Necujarubinē, ¿detsa xua exanaenajē Dioso tanerajutsinexa matakabi apowerewerecaejawa? —jai.

²⁶ Nexata, Jesús jumaitsi judfowi pecujarubinējawabelia:

—Necujarubinē, ¿detsa jane jumaitsi bajarapacuenē yabara bajayata Dioso penajumecopatsiliwaisi Moisés-pijinēta? —jai Jesús.

²⁷ Nexata, bajaraponē jumaitsi Jesús-jawabelia:

—Bajarapaliwaisi jumaitsi mapacueniaje: «¡Pa-asiwamēre panijatuxa-nenē, panijaDioso, daxita panejamatabē-ēthētojawawetsina, daxita panejamatabēcueneta, daxita panesaēta, daxita panenajamatabēxainaesaēta-ata! ¡Pa-asiwamērenua itsajiwi-ata pacuenia paxamē panijacuata pana-asiwamē!», jai bajarapaliwaisi —jai judfowi pecujarubinē Jesús-jawabelia.

²⁸ Nexata, icatsia Jesús jumaitsi bajaraponējawabelia:

—Xaniawaetsia nejumecanawiatame. Bajarapacuenia pepacuene itsa exanaponaponaename, xainaename matakabi apowerewerecaejawa —jai Jesús.

²⁹ Itsiata baitsi jane, judfowi pecujarubinē pijacuata penawecua-ajibia-exanaenexa pijaneconi, jumaitsi Jesús-jawabelia mapacueniaje:

—¿Detsa nexata pitsijiwi asiwanē tsane? —jai.

³⁰ Nexata, icatsia Jesús jumaitsi bajaraponējawabelia mapacueniaje:

—Pebi namutua penajetarucaenē Jerusalén tomarawerena, pepatsinexa Jericó tomarajawabelia picani. Itsiata, jiwi pecaponaejawa pewe-cuanacobetoxotabiabiwi, bajaraponē epatua waetabatsi. Daxita peco-becowē, penaxatabijawanēmi-ata, yacajērētatsi. Nexata, pinijicuenia conibabiatsi. Xuababuatsi picani petēpanucaenexa bajarajota. ³¹ Nexata, bajarapanamutua sacerdotenē najetaruca, Dioso pijacuene templobota

penacuenebabiabinë. Nexata, itsa taeyabuata peconibabenëtsi, matawa-quetanucapona. Rowia baja pona. ³² Bajaraxuacujinae, icatsia bajarapanamutua najetaruca Levípijinë pemomoxibitsaëtoyajuwënënë, templobota yawenonaeya penacuenebabiabinë. Bajaraponë itsa patajopa itsajota boca peconibabenëtsi, taenucajopa. Itsiata, bajaraponë-ata matawaquetanucapona. Rowia baja pona. ³³ Bajaraxuacujinae, icatsia bajarapanamutua Samaria nacuapijinë najetaruca. Itsa taeyabuata peconibabenëtsi, tsita-bejiobitsi bitso. ³⁴ Nexata, pecujitsijawatalia, wajënëwaëba olivocuaijiji-aceiterata, vinorata yajawa. Wajënëcëba papaëbërëpanaxita. Bajaraxuacujinae, pijaburrojumata buatsia. Nexata, capona jiwi pepatabiabiboyabelia. Bajarajota, bajarapaSamaria nacuapijinë eweta xaniawaetsia. ³⁵ Merawia pitsijawata, Samaria nacuapijinë itsa baja ponaejitsia itsabelia najetaruca, rajuta anijapalatanëbeje, bitso penamatamotsinëbeje, pematamotsinexa pijabo pexainaenë. Jumaitsi bajaraponëjawabelia: «Neto-ewetsianame maponëje. Itsa matamowerewerecaena bajarapapalatata, icatsia caewëarena camatamotsianatsi», jai Samaria nacuapijinë bo pexainaenëjawabelia —jai Jesús.

³⁶ Bajaraxuacujinae, Jesús yanijoba pecanaëjëtsia-exanaenexa judíowi pecujarubinëjawabelia. Jumaitsi mapacueniaje:

—Pamona, acueyabi ponëmaxëto, taeyabuata pecobecowë peyacajërëtsinëtsi, ¿detsa ponë bajarapamonaeyajuwënënë asiwaya tane peconibabenëtsi? —jai Jesús.

³⁷ Nexata, judíowi pecujarubinë jumaitsi Jesús-jawabelia:

—Ponë pitaxutotsoniataexae yawenona, bajaraponë asiwaya tane —jai.

Nexata, Jesús jumaitsi bajaraponëjawabelia:

—¡Ponare baja! Xamë-ata bajarapacuenia asiwaya itaxutotsoniataeyabianame itsamona-ata —jai judíowi pecujarubinëjawabelia.

Jesús siwaxaina Marta, Maríabeje, pijabota

³⁸ Jesús, pijajiwi yajawa, peponaenë Jerusalén-jawabelia, eputua jonejopa patomarayota ponapona Marta. Bajarapowa pijabota pexaniacuenia copiapita Jesús. ³⁹ Marta xaina pejuypapijiwa, pewënë María. Nexata, María eca Jesús pitabarata penamuxuna-ewetecaenexa Jesús petsipaebiliwaisi.

⁴⁰ Marta juya, bitso jamatabëcuene-enatsi penacuenebijawanë, Jesús pemitxa-exanaenexanua pexaejawanexa. Nexata, Marta cujilia Jesús-jawabelia. Jumaitsi:

—Tajatuxanenë, tajuyapijiwa caewanë necuenecopata, ta-exanaenexa daxita xua exanaejitsianë. ¡Itorobare taneyawenonaenexa! —jai bajarapowa Jesús-jawabelia.

⁴¹ Nexata, Jesús jumaitsi itaxutotsoniataeya Martajawabelia:

—Marta, xamë bitso pecajamatabëcuene-enaewa nexanaenexa daxita xuanë jamatabë-exaname —jai. ⁴² —Itsiata, caejawa bitso xanepana nexanaenexa, tanenamuxuna-ewetsinexamë. María baja cajena catsu-itapeta pexaniacuenia daxitacuene matatoxenetsia, tanenamuxuna-ewetecaexae tatsipaebiliwaisi. Nexata, acuenebi itsajiwi-ata pewecuapitsijawatsi pejumetaeliwaisi —jai Jesús Martajawabelia.

Jesús pijajiwi tsipaeba pacuenia wajëcaejitsia Diosojawabelia

(Mt 6:9-15; 7:7-11)

11 ¹Pamatacabi, Jesús najumewereta pewajëtsijawa Diosojawabelia, pijajiwiwajuwënë jumaitsi Jesús-jawabelia:

—¡Patajatuxanenë, panejumecujarubare pacuenia pawajëtabibijitsianë Diosojawabelia, pacuenia Juan, jiwibautizabinëmi, jumecujaruba pijajiwiwajawabelia! —jai Jesús pijajiwiwajuwënë.

²Nexata, Jesús jumaitsi pijajiwiwajawabelia:

—Itsa pawajëtabiabianame Diosojawabelia, pajumaitsimë tsabiabi mapacueniaje:

«Taxamë, athëbëtatsia ne-ecaenë, jitsipajë caenëmë, daxitacuene matatoxenetsia, pecayaiyataejawa. Jitsipajë naxatsiayo pecopiapatsijawa daxita nijajiwi neyanacua-ewetsijawa mapanacuataje. Jitsipajë daxitajiwi mapanacuata nejitsipaecuenia pecato-exanabiabijawa, pacuenia baja athëbëtatsia nijajiwi nejitsipaecuenia cato-exanabiaba.

³»¡Caematacabi canacujitsia panerajure pataxaejawanexa, pacuenia panamatawenonajë!

⁴»¡Patajaneconi panesiwajamatabëcuenecaeware! ¡Pane barajamatabëcuenexanepanarenua, tsipaji paxanë-ata pasiwajamatabëcuenecaewajë, pabarajamatabëcuenexanepana jënuu, pamonae paxanëjawaberena pibisiacuene paneto-exana! ¡Pëtsa panecopatame patanejamatabëcuene-amoneyabinexa pibisiacuene, patanejamatabëcuene-ëjëbijawata! ¡Biji rajane, panecapanepare dowathi patanejamatabëcuene-ëjëbisaëwecua, pibisiacuene pata-exanaeyaniwa!», pajamë tsane mapacueniaje itsa pawajëtabiabianame Diosojawabelia —jai Jesús pijajiwiwajawabelia.

⁵Xuacujinae, Jesús tsipaeba pijajiwiwajawabelia mapapecuenecataeliwaisije pematatsënëa, pecujarubinexa pacuenia wajëcabiabijitsia Diosojawabelia. Jumaitsi:

—Paxamëyajuwënë merawituatujëta ponaejitsipa bitso peyapëtaenëtsi pijaboyabelia. Nexata, jumaitsi tsipae: «Cacowaetatsi acueyabi papanbëyobeje, ⁶ tsipaji raja, itsanë, taneyapëtaenë, tajëwerena peponaenë, aecnoxae tajabota netopata. Nexata, bitso piyani. Itsiata, xanë apoxainaenë itsacuenejawayo-ata pexaejawa tarajutsinexa», jai tsipae paxamëyajuwënë peyapëtaenëtsijawabelia. ⁷Nexata, bo-ënëwerena bajaraponë jumepitsipatsi. Jumaitsi tsipae: «Nejamatabë-itonotsipame. Baupa rabaja xaniawaetsia xatatanutajë. Taxi raja barëmajitanuajë caecamata. Nexata, acuenebi tanonotapunaejawa, tacarajutsinexa xua newajërame. Itsa nonotapunaejitsipajë, ya-itawabijitsipajë taxi», jai tsipae peyapëtaenëtsi. Itsiata baitsi jane, bajaraponë perajutsinexatsi ajumesaëya wajëcaponaejitsipa. ⁸Xaniajanë pacuenia pacatsipaebijitsiatsi. Bajaraponë apojamatabënonotapuna-ata, itsiata, peyapëtaenëtsi pewajëcaponaexaetsi, nonotapunaejitsipa perajutsinexa daxita xua namatawenona pecowaebijawatsi. ⁹Bajaraxuata, pacatsipaebatsi mapacueniaje. ¡Xua panamatawenoname pawajëre Diosojawabelia payabaracueranaenejewamë! Nexata, bajaraPonë juya pacarajutsiana

panewajëtsicuenia. Pacuenia jamatabënajinaeya pajaitsipame papecatonaxuabijawa panecaxitajarabijawabelia, bajarapacuenia pawajëtaponaename Diosojawabelia panenamatawenonaejawa papecarajutsijawabelia. Pacuenia-nua bajayajebi pabaupadocodocotsipame pacopabinejewamë papecatobau-patsijawabelianexa, bajarapijinia pacuenia Diosojawabelia asaëyata pawajëtabiabianame papecajumecanawiatsijawabelia xua pawajëtime. ¹⁰ Asaëyata itaxutuajamatejemaya pawajëtabiabianame Diosojawabelia, tsipaji pajiwi wajëtabiaba, rajutabiabatsi. Pajiwi jaitabiaba penamatawenonaecueni, caxitajarababiaba. Pajiwi-ata baupa docodocotabiaba, tobaupatabiabatsi —jai Jesús pijajiwijawabelia.

¹¹⁻¹² Icatsia, Jesús jumaitsi pijajiwijawabelia, pecanaëjëtsia-exanaenexa pacuenia paxa Dioso asiwaya eweta jiwi:

—Paxamë, papebijiwiwëm, panexi panexainaewi, panexënatonëyo itsa pacawajëtsipa panbë, apopanacoxirajutsimë tsipae iboto. Itsa pacawajëtsipa dujuainëyo, apopanacoxirajutsimë tsipae jomo. Itsa pacawajëtsipa wacaratabëto, apopanacoxirajutsimë tsipae aqueto. ¹³ Paxamë pane-ajamatabëcuenebejewi-ata, payapëtaneme panenacoxirajutsinexa pexaniajawa. Bitso biji cajena, pane-axa, athëbëtatsia pe-ecaenë, pexaniajamatabëcuenenë paxamë matatoxenetsia. Nexata, bajaraPonë rajutsiana Espiritu Santo daxita pamonaewajëtsi —jai Jesús pijajiwijawabelia.

Itsamonae Jesús pibisiacuenia cuenebaracuaicuajiaitsi,

dowathi pecapitsapaejawa yabara

(Mt 12:22-30; Mc 3:20-27)

¹⁴ Itsamatacabijawa, Jesús wecuacapitsapa dowathi, ponë apopenatsipaebinëmi dowathi pejamatabëcueneta. Nexata, dowathi pewecuacapitsapaecujinae, bajaraponë baja natsipaeba. JiwiBITSaëtoXaneto, bajarapacueniepetawewi, bitso jamatabëcuenenabenajaca. ¹⁵ Itsiata baintsi jane, bajarapamonaetuatujäta nanubena itsamonae fariseowi. Nexata, bajarapamonaewajëtsi Jesús baracuaicuajiaitsi pibisiacuenia. Jumaitsi mapacueniaje:

—Maponë, Jesúsje, dowathi jiwiwecua capitsapabiaba dowathiwi pepopenamatacaitorobinë, Beelzebú,^b pesaëta —jai Jesús yabara, pecuene-aeBixaetsi Dioso pitorobinëcuenetsitsica.

¹⁶ Nexata, itsamonae fariseowiyajuwëñewi, Jesús picani jamatabëcuenejëbiaya itorobatsi petsita-exanaenexa pinijicuene Dioso pesaëta, peyapëtaenexa pepacuene Dioso pitorobinëcuenetsitsica. ¹⁷ Itsiata, Jesús jamatabëcueneyapëtan pacuenia bajarapamonaewajëtsi siwanajamatabëxainatsi. Nexata, bajarapamonaewajawabelia jumaitsi pecanaëjëtsia-exanaenexa mapacueniaje:

—Nacaenacuapijiwi-ata itsa nasiwanawajabitsaëtsipa, nexata namatenetsia nawerebiabijitsipa daxita bajarapamonaewajëtsi. Bajarapijinia pacuenia,

b 11:15 Beelzebú: Mapawëñëañë judfowi xaina caenë dowathi yabara: Beelzebú, Satanás, Dowathi-ata. Beelzebú pejaijume: «Dainamonae pijatuxanenë, itsa jume, tasi-ewetsinë», pejaijume. Satanás pejaijume: «Dioso, jiwi-ata, pijawajabitsaë, itsa jume, peneconitabiabinë», pejaijume. Dowathi/diablo pejaijume: «Pibisiacuenia pebaracuaicuajiainë, itsa jume, Dioso, jiwi-ata, pecuene-itoyanë», pejaijume. Daxita bajarapawëñëañë judfowi canacuenebabiaba, peyabaracuaicuajiaïnexa ponë, pepopenamatacaitorobinë tsaponaponae daxita dowathiwi. Taemanua Mt 12:24 pijanota Beelzebú yabara.

nacaemonae-ata, itsa nasiwanawajabitsaëtsipa, nexata namata-enetsia nawerebiabijitsipa. ¹⁸ Bajarapijinua pacuenia, itsi tsipae Satanás. Itsa nawe-cuajucaejitsipa peyanacua-ewetsiwi, tocopiarucaejitsipatsi peyanacua-ewetsicuenemi pijajiwi. Bajaraponë itsa wecuacapitsaponaejitsipa dowathiwi jiwiwecua, nexata bepijawajabitsaënë taejitsipatsi pijajiwi. Towe-rewerecoejitsipsinua baja peyanacua-ewetsicuenemi bajarapadowathiwi. Bajarapacuenia pacatsipaebatsi, xanë yabara panejumaitsixae: «Jesús raja dowathi jiwiwecua capitsapabiaba Beelzebú pesaëta», patanejamëxae. Pajamatabëcuenenawëxaniabame cajena. ¹⁹ Itsa xaniajai, xanë Beelzebú pesaëta dowathi jiwiwecua capitsapabiabijitsipajë, ¿detsa nexata ponë pesaëta panijajiwi-ata, dowathi jiwiwecua capitsapabiaba? Nexata, paxamë itsa panejumaitsimë tsipae: «Dioso raja pesaëta» itsa panejamë, nexata peneta xanë yabara pajamatabëcuenenawëxaniabame. ²⁰ Itsiata bailsi jane, xanë Dioso pesaëta itsa capitsapabiabajë dowathi jiwiwecua, bajaraxua itajëta Dioso baja petaxuxuabijawa pijajiwi peyanacua-ewetsijawa paxamëtuatua-jëta —jai Jesús fariseowijawabelia.

²¹ Orijibia, fariseowi pecanaëjëtsinexa Jesús bitso piasaënëcuene dowathi matatoxenetsia, pecuenecataeliwaisicuenia jumaitsi mapacueniaje:

—Acuenebi peyacajërëtsijawatsi pecobecowë ponë bitso piasaënë,^c paepa-tota aitatsacaya pijanae cobena-ewetaponapona pijabo. Daxita pecobecowë xaniawaetsia tobobenaejitsipatsi. ²² Itsiata bailsi jane, itsa najetarucaejitsipa itsanë bitso piasaënë^d boxainanë matatoxenetsia, nexata cuene-amoneyabijitsipatsi. Aitatsacaya pijanae cobena-ewetabiabi-ata tsipae, itsiata wecuapitsipatsi, daxita pecobecowëjawaxi yajawa —nayabarajai Jesús pijacuata pecuenecataeliwaisicuenia, dowathi pejamatabëcuene-amoneyabijawa yabara.

²³ Icatsia, Jesús jumaitsi fariseowijawabelia:

—Pajiwi caejamatabëcuene apoxainae^e xanëjawaberena, bajarapajiwi betajawajabitsaëjiwicuenia necuenecaranatabiaba. Pajiwi aponeyaweno-naeyacaetuatsi jiwi Dioso pijajiwinexa, bajarapajiwi betanewecuayorotsi-jiwi, tanesiwanajamatabëcuenecopatsiyaniwa xanëjawaberena —jai Jesús fariseowijawabelia.

**Jiwitonë pewecuapitsapaecujinaetsi dowathi, icatsia caewëa
nawiarena petsijamatabë-ecanexatsi
(Mt 12:43-45)**

²⁴ Icatsia, Jesús jumaitsi fariseowijawabelia:

—Dowathi itsa wejamatabëpitsapa jiwitonë, nexata jinaruta petsewi-iranëjawa penacuera-ewetsinexa. Jaitaponanua itsanëjawabelia petsijamatabëjonenexa picani. Itsiata, apopecaxitarabixae, jamatabëjumaitsi: «Nawiatsianajë meta cajena icatsia tajabomijawabelia, pabowerena pitsapajë», jamatabëjai dowathi, ponëjawawerena pitsapa icatsia

c 11:21 *bitso piasaënë*: Dowathi yabara jumaitsi. **d 11:22** *itsanë bitso piasaënë*: Jesucristo yabara jumaitsi. **e 11:23** *caejamatabëcuene apoxainae*: Bajarapitsiwi cuene-aeba Jesús Dioso pitorobinëtsicueni. Cuene-aeba Jesús Dioso pesaëta pexanaejawa, xua exanaponapona. Cuene-aeba Jesús pejamatabëcuene-amoneyabijawa dowathi. Taema Lc cap. 10, 11-ata yajawa.

petsijamatabëjonexatsi. ²⁵ Dowathi baja caewëa itsa nawiarena, caxitajara peyajawaponaponaenëmitsi, pejamatabë-ëthëto, bepe-ënësajinecaebo, bepe-ënëxaniawaetetsibo, bepiracajuetetsibo-ata. ²⁶ Nexata, dowathi itsa tane jiwitonë pejamatabëcuenesajinaejawa, icatsia siwapon peyajawapatsi-nexarena itsamonae, siete ponëbeje, bitso piacujirubejewi bajaraponë mata-toxenetsia. Daxita bajarapadowathiwi pebi tsijamatabëjunuatsi peyajawaponaponaenexa. Belia jane baja, bajarapadowathiwi bitso bejiobia-exanatsi copaiyanë matatoxenetsia. Nexata, pebi bitso bepejiobicuenia ponapona —jai Jesús fariseowijawabelia.

Xua yabara jiwi pepacuene jamatabëcuenenabarëya tsawanapaejitsia

²⁷ Itsa abaxë Jesús liwaisi tsipaeba fariseowijawabelia, petiriwa, bajarapajiwibitsaëtoخانetoyajuwënëwa, pinijijumeta wawajai tsaxuabi Jesús-jawabelia:

—Jamatabëcuenenabarëya baja cajena powa cayacotaponapona, camirajutanua! —jai petiriwa Jesús-jawabelia.

²⁸ Nexata, Jesús jumaiti bajarapowajawabelia:

—Xaniajamë rabaja. Itsiata baitsi jane, bitso jamatabëcuenenabarëya tsawanapae tsane matatoxenetsia, pamona jumetane Dioso pejumeliwaisi, jume-cowënëtanua —jai Jesús petiriwajawabelia.

**Jesús, pecuene-aebiwitsi itorobatsi Dioso pesaëta
pinijicuene petsita-exanaenexatsi**

(Mt 12:38-42; Mc 8:12)

²⁹ Jiwi, ayaibitsaëtoخانeto, Jesús itsa matatoyorotsia nacaetuatsi, nexata Jesús jumaiti:

—Pamona aeconoxae jinawanapa, bitso pibisiajamatabëcuenewi. Tanecuene-aebabiabixae, nitoroba Dioso pesaëta pinijicuene tatsita-exanaenexa, taneyapëtaenexa Dioso pepacuene athëbëwetsica tane-itorobinëcuenetsica. Itsiata baitsi jane, bajarapacuenia apotsita-exanaenë tsane. Caejawa saya tsita-exanaenajë bajarapamonae tanejumexaniataenexa. Bajayata, pacuenia profeta Jonás-pijinë^f exanatsi, bajara-ëpitsicuene tsitajëtsianajë tane-exanaejawanexa. ³⁰ Bajayata, daxita Nínive tomara-pijiwi yapëtane profeta Jonás-pijinë Dioso pitorobinëcuenetsi, ayaicuene Dioso peto-exanaexaetsi.^g Bajarapijinia pacuenia, Xanë-ata, Daxitajiwi Pematapijinënë, pinijicuene Dioso neto-exanaena,^h daxita pamona aeconoxae jinawanapa, taneyapëtaenexa pepacuene Dioso athëbëwetsica tane-itorobinëcuenetsica.

³¹ »Pamona aeconoxae jinawanapa, tanecuene-aebiwi, pamatacabi Dioso naneconitsia-exanaena daxita pianeconi pexainaewi, bajarapamatacabi,

f 11:29 *Jonás-pijinë*: Taema Jon. 3:3-4. **g 11:30** *ayaicuene Dioso peto-exanaexaetsi*: Jonás acueyabi pamatacabibe pebocaecujinae pinijidujuainë pecotsorotuareca, Dioso jutatsi piasaënë, petsipaebanajetarucaenexa Dioso pejumeliwaisi Nínive tomarapijiwajawabelia. Bajaraxuata, Nínive tomarapijiwi yapëtane Dioso pitorobijawa Jonás. Taema Mt 12:39-42. *Neyapëtaenexa Nínive tomarapijiwi peliwaisi, natoyorobare Jonás-baxuto.* **h 11:30** *pinijicuene Dioso neto-exanaena*: Acueyabi pamatacabibe tanemëthëtsicujinae Dioso icatsia niasaëya-exanaena, daxita jiwi peyapëtaenexa Dioso athëbëwetsica tane-itorobinëcuenetsica. Taema Mt 12:39-42.

bajayata, powami ponapona, Saba nacuapijiwimi pewetsiwami,ⁱ nonotapunaena Diosojawabelia peneconitsinexa, apotanenamuxuna-ewetsixae tatsipaebiliwaisi. Bajayata, bajarapowami tajë nacuatabuwerena-ata muxunana-jetaruca, pejumetaenexa Salomón-pijinë, bitso daxitaliwaisi peyapëtaenëmi, petsipaebiliwaisi. Itsiata, xanë ponapona-atanë majotaje, bitso ayaijamatabëcuenenënë Salomón-pijinëmi matatoxenetsia, pamona-aeconoxae jinawanapa mapanacuataje, aponenamuxuna-ewetsi. Bajaraxuata, ayaineconi xaina Diosojawabelia³² Orijibia, bajarapamatacabita Nínive tomarapijiwimi-ata nonobapunaena Diosojawabelia peneconitsinexa pamona-aeconoxae jinawanapa mapanacuataje, apotanenamuxuna-ewetsixae tatsipaebiliwaisi. Bajayata, Nínive tomarapijiwi, itsa jumetane Jonás-pijinë petsipaebiliwaisi, copaba pibisiacuene pexanaejawa. Najamatabëcuenepëñëyoroba Diosojawabelia. Itsiata, xanë majota ponapona-atanëje, bitso ayaijamatabëcuenenënë Jonás-pijinëmi matatoxenetsia, tsipaebi-atanënuu Dioso pejumeliwaisi, aponajamatabëcuenepëñëyorobi Diosojawabelia, pibisiacuene pexanaejawawecua. Bajaraxuata, Dioso naneconitsia-exanaenatsi bajarapamona- —jai Jesús pewajunupaebijawata itsamatacabi Dioso jiwi penaneconitsia-exanaejawanexa.

Pacuenia waja-itaxuto belámparabë wajaperabëtonexa

(Mt 5:15; 6:22-23)

³³ Icatsia, Jesús jumaitsi jiwibitsaëtoxanetojawabelia:

—Itsiajiwi-ata lámparabë pitanojotsicujinae, apomata-acatetsi itsacuenejawata. Cajoni-ënëalia-ata, apo-etsi. Biji rajane, athëbëyo etsia, pejonewi bo-ënëaberena petsiwajënae-itayotecaenexa. ³⁴ Nexata, pane-itaxuto belámparaxae, xaniawaetsia panatsiwajënaetaeyabiabame. Bajarapijinia itsi panejamatabëcuene-ata. Itsa panetaejawata pacuene-ëbame, be-ayaijamatabëcuenejiwinua panataneme, nexata pajamatabëcuene-wënëcame pitaquirijamatabëcuene. Itsa paxamë pataneme Dioso peliwaisi pexaniajajamatabëcueneta, piasiwajamatabëcueneta, nexata pacajamatabëcuene-itayotsiana panexainaenexa pitawajamatabëcuene. ³⁵ ¡Nexata, panayajiwiwitaema panenajamatabëcuene-yamaxë-itojorobiyaníwa! Paliwaisi picani panatocanaëjëtame papecajamatabëcuene-itayotsijawanexa, belia pacatonaexanaejitsipa papecajamatabëcuene-itaquiria-exanaeliwaisinexa. ³⁶ Pacujinae Dioso peliwaisita pacajamatabëcuene-itayota, nexata apopaxainaemë tsane tsiquirijawayo-ata panejamatabëcuene-aitaquirijawa. Daxita papecajamatabëcuene-itayotsixae, xaniawaetsia panatsiwajënaetaneme, Dioso pejitsipaecuenia pane-exanawanapaenexa. Pacuenia lámparabë daxita bo-ënë xaniawaetsia itayoteca pecotiata, bajarapijinia pacuenia, pacaejiwimë canacujitsia xaniawaetsia pacajamatabëcuene-itayota Dioso peliwaisita —jai Jesús jiwi ayaibitsaëtoxanetojawabelia.

**Jesús yapëtaeya-exana fariseowi, judíowi pecujarubiwijawabelia-ata,
penaneconitsijawa Diosojawabelia**

(Mt 23:1-36; Mc 12:38-40; Lc 20:45-47)

³⁷ Itsa baja Jesús najumewereta liwaisi petsipaebijawa, nexata fariseonë junatatsi Jesús penaxaenexa pijabota. Jesús nexata najoneya bajaraponë

pijaboyalía. Mesa muxuneneta na-eca penaxaenexa. ³⁸ Fariseonë itsa tane Jesús penaxaejawa anijatonë nacobequiatsinejewa pacuenia fari-seowi exanabiaba, jamatabëcuenenabenajaca. ³⁹ Nexata, Jesús jumaitis fariseowijawabelia:

—Paxamë, pafariseowimë, panecaxaewajënae xaniawaetsia paquiatabiabame naniawelia plato, taza, panecobe-ata, panijasalinaiwimi pijacujirucuenia. Pasiwajamatabëcuenebëjamë tsabiabi-ata naniapijicuene, itsiata, Dioso pacatane pane-ajamatabëcuenebejewicuene. Paxamë apopanasiwajamatabëcuenebëjamë panejamatabë-ëthëtota pibisiacuene panajamatabëxainabiabame. Nexata, pacajamatabëcuene-enabiaba itsanë pecobecowë paneyacajërëtsinexa, itsacuenejawanë-ata pibisiacuene pane-exanabiabinexa. Bajaraxuata, Dioso pacatane bepanenaxuirabiwi tsawanapae. ⁴⁰ ¡Dioso baja cajena pijacuene apopanepapëtaewi! BajaraPonë raja daxitacuene pexanaenë. Naniawelia pacaperabë-exana. Bëpënëa-ata pacajamatabë-ëthë-exana. ⁴¹ Nexata, apopanamatawenonaemë panecatsitecaejawa naniapijicuene pane-exanawanapaejawa. ¡Biji rajane, asiwaya bëpënëa panejamatabë-ëthëtójawawetsina parajure panecobecowëyajuwënëjawanë bepejiobiwijawabelia,^j Dioso papecataenexa bepane-axuirajibiwi!

⁴² »¡Paxamë pafariseowimë ayaineconi panatsi-exaname Diosojawabelia! Xaniawaetsia Diosojawabelia ofrendacuenia caejawayo, parajutabiabi-atamë diez xuabejeyajuwënëjawa, panenacanabipalatayajuwënëjawa, pane-ubijawaxi-ata, itsiata, apopanajamatabëcuene-itajëtsimë itsamonae pane-asiwajawa, Dioso pewënëta. Pexaniacuene apopato-exanaemënuu. Bajaraxuata, neconi panatsixainaname Diosojawabelia. Bitso pacatoxanepanaejitsipa itsamonae pane-asiwajawa, pexaniacuene paneto-exanaejawanua, panacofënëtsinejawamë ofrenda panerajutsijawa Diosojawabelia.

⁴³ »¡Paxamë, pafariseowimë, ayaineconi panatsixainaname Diosojawabelia! Pananeconitame, tsipaji bepa-ayaijamatabëcuenewimë panataeyabiabimë itsamonaewecua, judfowi pijasinagogabonëjawa^k itsa panajoneyabiabame, pajitsipabiabame pane-enaejawa peyaiyataewitsi petsinubijawanëta. Pajitsipabiabamenua bitso jiwi yaiyataeya papecabajacobinexa callejawa.

⁴⁴ »¡Paxamë, judfowi panecujarubiwi, paxamë-ata pijinia pafariseowimë, ayaineconi panatsixainaname Diosojawabelia! Paxamë itajara jiwi bepatsitapexaniajamatabëcuenewimë tsabiabi, pibisiajamatabëcuene panexainaewi-ata. Pacuenia itsamonae pona jiwi pemëthëanëmatatsënëa, apoepapëtaexae bëpënëareca patsabanaecuene xaina, bajarapijinia itsi pamonaë pacayaiyatane apopapecajamatabëcuenepapëtaexae pacuenia bëpënëa pajamatabëcuene-itsimë —jai Jesús judfowi pecujarubiwijawabelia, fariseowijawabelia-ata.

⁴⁵ Nexata, bajarapacuenia Jesús pejumaitisijawata, itsanë bitso peyapëtaenë Dioso penajumecopatsiliwaisi Moisés-pijinëta, jumaitsi Jesús-jawabelia:

j 11:41 *parajure panecobecowëyajuwënëjawanë bepejiobiwijawabelia*: Taema Efe. 4:28. Xua Jesús jumaitsi Lc 11:39,41. Pablo najëpaeya bajaraxua yabara jumaitsi. k 11:43 *pijasinagogabonë-jawa*: Bajarapacuenia judfowi wënërubabiaba penacatuatsibo, itsajota nacujarubabia Dioso peliwaysi caesábado canacujitsia.

—Necujarubinē, itsa mapacuenia jumaitsimēje, paxanē yabara-ata pibi-siacuenia jumaitsimē —jai Jesús-jawabelia.

⁴⁶ Jesús nexata jumaitsi bajaraponējawabelia:

—¡Paxamē-ata, judíowi paneyapētaeya-exanaewi pajamatabēcueneliwaisi xaina Dioso penajumecopatsiliwaisi Moisés-pijinēta, ayaineconi panatsixainame Diosojawabelia! Pananeconitame, tsipaji paliwaisianē mataropotsia pajucame bajarapaliwaisiwecua, bitso piayapēbejeliwaisianē jiwi pejumecowēñetsinexa. Bajarapaliwaisianēta pa-itorobabiabi-atamē itsamonae pejumecowēñetsinexa, paxamē itsiata apopanaxamatabēxainamē tsiquiriliwaisiyo-ata panejumecowēñetsinexa —jai Jesús bajaraponējawabelia.

⁴⁷ Icatsia, Jesús jumaitsi bajaraponējawabelia:

—¡Paxamē paneyapētaeya-exanaewi pajamatabēcueneliwaisi xaina Dioso penajumecopatsiliwaisi Moisés-pijinēta, ayaineconi panatsixainame Diosojawabelia, tsipaji apopa-exanawanapaemē pacuenia itorobabiaba profetawī, panijasalinaiwimi! Panenajamatabēcuenē-itajētsinexa picani asiwaya paneyaiyataejawa bajarapamonaemi, panutabiabame pemēthējumawerēca pitajētanubijawanē, itsajota pemēthēanē bobena. Itsiata, apopanejumecowēñetsixae pepaebiliwaisi bajarapaprotetawimi, pacuenejēpame panijasalinaiwimi, pamonaemi beyejeba bajarapaprotetawimi. ⁴⁸ Bajarapacuenia pane-exanaexae, panajamatabēcuenē-itajētame panejamatabēcueneyanatsi-jawa panijasalinaiwimi. Panijasalinaiwi bajayata beyajebi-ata profetawimi, paxamē itsiata bepanetsimēthēcuewi panaexaname —jai Jesús judíowi pecujarubinējawabelia.

⁴⁹ Icatsia, Jesús jumaitsi judíowi pecujarubiwi jawabelia:

—Bajaraxua yabara, Dioso daxitacuene peyapētaenēxae, bajayata, tajēwelia jumaitsi mapacueniaje: «Tajajiwi Israel-pijinē pemomoxijawabelia to-itorobaponaē-atanē¹ profetawī, apóstolewi-ata, itsiata, bajarapamonaeyajuwēñēwi beyabiabiana, itsamonaeyajuwēñēwi pijinia bejiobia-exanabiabiananua», jai baja cajena bajayata tajēwelia Dioso bajarapacuenia paxamē pane-exanaejawanexa yabara. ⁵⁰ Nexata, paxamē panijasalinaiwimi panecuenejēpaexae, Dioso pacayajawatsijumaxuaba bajarapamonaemi pijaneconi, pebeyajebaponaexae Diosojumepaebiwimi, Dioso nacua pexanaejawaweliacujinae, mapamatacabijawaberena-ataje. ⁵¹ Nexata, payajawananeconitame panijasalinaiwimi Abel-pijinējawaweliacujinae, profetanēmi, Zacarías-pijinēmijawaberena, ponē beyaxuabatsi templobo, altar-jawabejetuatajēta. Xaniajanē pacuenia pacatsipaebijitsiatsi. Bajarapaneconi yajawa Dioso pacananeconitsia-exanaena paxamē, aeconoxae mapamatacabitaje panejinawanapaewi, xanē^m ponēñecuene apopatanenamuxuna-ewetsixaemē, Dioso tane-itorobinē paxamējawabelia.

⁵² »¡Paxamē, bitso paneyapētaewi Dioso penajumecopatsiliwaisi Moisés-pijinēta, ayaineconi panatsixainame Diosojawabelia! Payapētaneme picani xaniawaetsia pacuenia jiwi caejamatabēcuenē xainaejitsia Diosojawabelia. Itsiata, bajarapacuenia panijacuata apopa-exanaemē. Orijiibia, mataropotsia

panejucaeliwaisianē Dioso pejumeliwaisiwecua panecujarubijawata, apopatocopatabiabiimē itsajiwi-ata peyapētaenexa pacuenia caejamatabēcuene xainaejitsia Diosojawabelia. Bajaraxuata, paxamē, panecujarubiwi-ata, najē-paeya apopajonemē tsane Dioso pijajiwi peyanacua-ewetsinacujawabelia —jai Jesús judiowi pecujarubiwijawabelia.

⁵³⁻⁵⁴ Bajarapacuenia Jesús pejumaitsicujinae, pitsapa baja fariseonē pijabowecua. Bajarapamatabijawaweliacujinae, judiowi pecujarubiwi, fariseowi yajawa, Jesús pitoyaxaetsi, taxuxuaba ayaicuenia pejamatabē-itonotabiabijawatsi. Jamatabēcuene-ējēbiaya liwaisi yanijobabiabat-sinua. Bijiaya itsa jumecanawiata, peneconitsinexatsi picani judiowi pewetsinējawabelia.

Jesús tsipaeba pijajiwi penayajiwitaenexa fariseowi petsipaebiliwaisianē

12 ¹ Paepatowajēto abaxē Jesús tsipaebanuca bo-ēñēlia, jiwi patapona wayafotarena, pepo-ayaibitsaētozaneto, baitsi miles pajiwiβεje. Nexata, bajarapamonae nataxucuetsabataxuabapona, natorobajarabapona-nua. Wayafotarena, Jesús taxuxuaba copiaya pijajiwijawabelia liwaisi petsipaebijawa, pejumexaniataeyaniwa fariseowi pepaebiliwaisi, saicaya Dioso pejumeliwaisiwecua. Jumaitsi mapacueniaje:

—¡Xania! ¡Panayajiwitaema fariseowi pijalevadura, tsipaji peyamaxē-itojorobiliwaisi pacatsipaebiana, bepexaniajailiwaisi itajara tsane! Fariseowi bepacatsitapexaniajamatabēcuenewi-ata, pepacuenie pibisiajamatabēcuene pexainaewi. Pacuenia levadurajawa fufunaeya-exana pan-matabē, bajara-pijinia pacuenia bajarapamonae papecatsipaebiliwaisi yacaejēpaponaena paxamējawa, panejumexaniataeyaniwa Dioso peliwaisi. ² ¡Panayajiwitaema papecacujarubiwi, tsipaji nacuenematayatsiaya pacayajawacujarubapona aeconoxae apopacueneyapētae-atamē, bajarapaliwaisianē itsamatacabi daxitajiwi yapētaeponaena xaniawaetsia! Papibisiacuenenua muetsia exana jiwi, itsamatacabi xaniawaetsia yapētaena daxitajiwi. ³ Xua-ata muetsia merawi pacuaicuaijamē, bajaraxua itsajiwi pacajumewajunupaebiana matacabita daxitajiwijawata. Xua-ata pēñeyatu-ucutsibo-ēñēta baupa xatatsiaya muetsia wēpaxapaxajaiya pacuaicuaijamē, bajaraxua itsamatacabi itsajiwi pinijijumeta pacajumewajunupaebiana jiwi penacaetuatsijawata —jai Jesús pijajiwijawabelia.

Jesús tsipaeba pijajiwi pecujunawiyaniwa jiwibewi

(Mt 10:19-20, 26-33; 12:32)

⁴ Icatsia, Jesús jumaitsi pijajiwijawabelia:

—¡Paxamē, patane-itaxutuajamatejemawimē, pētsa pacujunawame jiwibewi-ata! Bajarapamonae saya cuenecaējēpatsi papecaperabēbeyaxuabinexa. Acuenebi matawējēa papeca-itsacueniabinexa. ⁵ ¡Biji rajane, pacujunaware Dioso, tsipaji bajaraPonē cuenecaējēpatsi papecabeyaxuabicujinae, papecaxuabinexa daxita panejamatabēcuene yajawa apopewerewerecae-isotojawabelia!

⁶ »¡Pētsa pacujunawame jiwi, tsipaji Dioso apopacanacofēñētsi tsane caeto-ata! Cinco pabaratsuitoyobeje saya namatamota anijapalatanēyobeje. Bajarapacuenia amatamobi-ata, itsiata, caenēyo-ata Dioso aponacofēñētsi

bajarapabaratsuiyajuwënëñxi. ⁷Paxamë rabiji bitso Dioso paca-asiwa baratsui matatoxenetsia. Bitso papeca-asiwaxae, panematanatoxi-ata, caematanatoyo canacujitsia, baja cajena namata-ëjêta. ¡Bajaraxuata, pëtsa pacujunawame itsacuenejawa-ata!

⁸»Daxita pamonae tajajiwi, nawajunupaebiana tajajiwicuene jiwi pita-barata, bajarapamonae juya Xanë-ata, Daxitajiwi Pematapijinënë, wajunu-paebianajë tajajiwicuene Dioso pija-ängelewí pitabarata. ⁹Itsia, pamonae nayawajunuaxaina tajajiwicuene itsamonaejawabelia, xanë juya yawajunuaxainaenajë tajajiwicuene Dioso pija-ängelewí pitabarata.

¹⁰»Pajiwi newënëliwaisi baracuaicuijai pibisiacuenia, Xanë, Daxitajiwi Pematapijinënë, bajarapaneconiwecua itsa najamatabëcuenepëñeyorotsiana Diosojawabelia, itsia, wecua-ajibia-exanaenatsi. Itsia, baitsi jane, pajiwi wënëliwaisi baracuaicuijai pibisiacuenia Espíritu Santo, bajarapaneconi Dioso apowecua-ajibia-exanaetsi tsane.

¹¹⁻¹²»¡Itsa pacacaponaelia tomara-ewetsiwi jawabelia, judíowi pasinagogabonë jawabelia-ata nacaetuatabiaba, papecyanijobinexa, pëtsa panasiwajamatabëcuenebëjamë panenayajiwi cuaicuijai jawanexa, tsipaji raja bajarapaepatota, Espíritu Santo pacacuaicuijaiya-exanaena pacuenia panayajiwi cuaicuijamëjitsia! —jai Jesús pijajiwi jawabelia pecuene-itoyawitsi pecujunawiyaniwa.

**Jesús tsipaeba jiwijawabelia, bitso pesiwbëjaiyaniwa,
ayaijawa pecobecowë pexinaejawanexa**

¹³ Jiwi ayaibitsaëttoxanetoyajuwënëñ jumaitsi Jesús-jawabelia:

—Jesús, taxapijinë picani petëpaewajënae netocopata pewënamuto tapitsinexa pecobecowëyajuwënëñawanë. Itsia, tamatapijinë pita bajaraxuanë. ¡Nexata, itorobare tamatapijinë tanetocanawiatsinexa taxapijinë tanerajutsiapaebijawanë! —jai bajaraponë Jesús-jawabelia.

¹⁴ Nexata, Jesús jumaitsi bajaraponë jawabelia:

—Itsajiwi-ata cajena aponitorobi juez-nënexanë, tananeconitsia-exanaenexa ponë naneconita. Aponitorobinua axapijinë pecobecowë patacatsicobetsatsinexabeje —jai Jesús.

¹⁵ Nexata, icatsia Jesús jumaitsi daxitajiwi jawabelia:

—¡Xania, pataema! ¡Pëtsa bitso panajamatabëxainame ëpaxamënexa ayaijawa panexainaenexa, tsipaji jiwi jamatabëcuenexanepanaeya apojinawanapae, ayaijawa pecobecowë pexinaejawa yabara! —jai Jesús.

¹⁶ Nexata, xaniawaetsia pecanaëjëtsia-exanaenexa pecobecowë yabara, Jesús tsipaeba mapapecuenecataeliwaisicueniaje bajarapamonaejawabelia:

—Itsanë, bitso pecobecowë pexainaenë, pijapabianë tocapitsapabiabatsi ayaijawa pexainaecuenë. ¹⁷Nexata, bajaraponë jamatabëjumaitsi: «¿Demeta pacuenia exanaenajë? Neto-ajibi baja ta-etaponaenexa tacaetuatsijawanë, xuanë netonaweretapona», jamatabëjai. ¹⁸ Xuacujinae, icatsia jamatabëjumaitsi: «Yapëtaniji rajane baja pacuenia exanaejetsianë. Paboxita jebabiabajë tacaetuatsijawanë, penetsianicajë, juya ta-exanaenexa icatsia ayaiboxanetonë bajarapacowëta. Nexata, bajarapaboxanetonëta jane baja, jebianajë daxita tacaetuatsijawanë, daxita tacobecowë yajawa. ¹⁹ Bajarapacuenia xainaenajë baja bajayajebinexa daxitacuene xua namatawenonajë. Nexata jane

baja, xuacujinae nacuera-ewetsianajë. Pexaniacuene xaeyabiabianajë. Pexaniawiria vinoranënua matawëjëa apaeyabiabianajë taitajibinexa. Barëyanë tsabiabi tsane», jamatabëjai bitso pecobecowë pexainaenë. ²⁰ Nexata bajara-paepatota, Dioso jumaitsi bitso pecobecowë pexainaenëjawabelia: «¡Xamë baja cajena aponeyapëtaenë! Ajena baja, mapamerawije, tēpaename. ¿Jipatsa nexata newënamuto pitsiana daxita nexaniawaetejebijawanëmi?», jai Dioso bitso pecobecowë pexainaenëjawabelia.

²¹ »Xanë pacatsipaebatsi: Bajarapijinia pacuenia, tocopiapatsianatsi pajiwi jamatabëcuene-enatsi ayaijawa penatocaetuataponaenexa, ëpajiwi penaxainaeyabinexa. Ayaijawa pecobecowë xainae-ata, itsiata bajarapamonae bitso bejiobi Dioso pijacuenejawalia, asiwaya petaexae pecobecowë Dioso pijacuenewecua. Bajaraxuata, daxitacuenejawabelia ajamatabëcuenecowëbi bajarapamonae —jai Jesús bajarapamonaejawabelia.

Dioso pijajiwi pewetsijawa mapanacuataje

(Mt 6:25-34)

²² Jesús nexata jumaitsi pijajiwi jawabelia:

—Xaniajanë pacuenia pacatsipaebijitsiatsi. ¡Pëtsa pasiwanajamatabëcuenebëjamë tsawanapae panejinawanapaecue yabara, panexaejawa yabara, panenaxatabijawanexa-ata yabara! ²³ Apojinanawapaetsi cajena ëwajaxaejawanexa, ëwajanaperabëxatabinexanua. Biji rajane, juya itaxutuajamatejemaya bejinawanapatsi Dioso, wajanacarajutsinexa daxita wajanamatawenonaecue. ²⁴ ¡Pacuenecanaëjère baratsuimonae! Bajaraponëxi apo-ubi, pexaejawanexa. Aponotsi penaweretaponaejawa. Apoxainaenua pe-etsibonexa pecaetuatsijawa. Itsiata, Dioso rajutabiabatsi pexaejawanexa. ¡Paxamë rabiji, bitsoyo Dioso paca-asiwa baratsuimonae matatoxenetsia, papecarajutsinexa daxita xua panamatawenoname caematacabi canacujitsia! ¡Bajaraxuata, pëtsa pasiwanajamatabëxainame ëpanexaejawanexa, panenaxatabijawanexa-ata! ²⁵ ¿Detsa jane ponë paxamëyajuwënëne penasiwajamatabëcuenebëjaixae, cuenecaëjëpatsi pijacujiruta penatotixitsijawa webeliayo piasaëtsaponaponaenexa? Ajibi. ²⁶ Nexata, panenasiwajamatabëcuenebëjaijawata, itsa apopacacuenecaëjëpae bajarapatsiquiricueneyo pane-exanaejawa, ¿detsa xuajitsia panasiwajamatabëcuenebëjamë tsabiabi itsacuenejawanë yabara? Pajamatabëcuenenacueratame cajena.

²⁷ »¡Pacanaëjère pacuenia bitso papexaniamatono juwa wayafojawa! Bajarapamatono pijacuata aponatsijumanacuenebi. Penaxatatsijawanexa-ata aponato-exanae. Bajayata, nacua-ewetsinë Salomón-pijinë bitso pexainaenëmi. Naitabëtsiaya naxatababiaba bitso pexaniawiriajanë. Itsiata baitsi jane, bajaraponë penaitabëtsijawa matatoxenetsia bitso aitabë mapamatontoxije. ²⁸ ¡Pacanaëjère mapacueneje! Dioso bitso pexaniacuenia aitabëya-exana pematontoxi wayafota. Cae-epatoyonexa saya naitabëtanubena. Xuacujinae, bajarapamatono petsewicuinae, pona yajawatajuita, itsajota pan sebiabiaba. Paxamë bitso panenamamatotsixae Diosojawabelia pematontoxiweucua, matatoxenetsia pexaniacuenia paca-eweta. Panenasiwajamatabëcuenebëjaijawata, panajamatabëcuene-itajëtame bewelia Dioso pane-itaxutuajamatejemajawa, papeca-ewetsijawa-ata. ²⁹ ¡Bajaraxuata, pëtsa pasiwanajamatabëxainawanapame

ëpanexaejawanexa, ëpanematawëjëa-apaejawanexa-ata! ¡Biji rajane, pa-itaxutuajamatejemamëre Dioso papeca-ewetsinexa! ³⁰ Pamonae Dioso apopeyapëtaewi, bitso siwanajamatabëxainabiaba bajaraxuanë yabara. Itsiata baitsi jane, pane-axa Dioso yapëtane cajena daxita xua panamatawenoname. ³¹ Bajaraxuata, bajarapajamatabëcuenianëwecua, Dioso pija-cuene bitso pasiwanajamatabëxainabiabianame paneto-exanawanapaenexa. Nexata, bajaraPonë pacarajutsiana daxita xua panamatawenoname caematacabi canacujitsia —jai Jesús pijajiwijawabelia.

Jesús tsipaeba pijajiwi papexaniacuenejawa xainaejitsia athëbëtatsia
(Mt 6:19-21)

³² Icatsia, Jesús jumaitsi pijajiwijawabelia:

—¡Tajamonae, paxamë patajajiwimë pacaewijawimëbeje-ata, pëtsa paju-nawame, tsipaji pane-Axa papeca-asiwajamatabëcueneta paca-itapeta panecobena-ewetsinexa, pamatacabi bajaraPonë yanacua-ewetsiana daxitacuenel ³³ ¡Bajaraxuata, pacanajere panexainaeyajuwënëjawanë, bajara-papalata panerajutsinexa bitso bepejiobiwijawabelia! Bajarapacuenia itsa pa-exanaename, juya Dioso athëbëtatsia pacatoxaniawaetaponaena bitso penamatamotsijawa papecarajutsinexa, apowerewerecaejawa. Bajara-jotatsia, acuenebi pejonejawa tsane penacobetoxotsiwi, papeyacajjërëtsinexa. Ajibinua tsane pamona pacato-ucubaxaejitsia. ³⁴ Itsajota paxaniawaetabuatsipame penamatamotsijawa, nexata panejamatabë-ëthëtota pajamatabënaponaponaewitsipame. ¡Bajarapijinia pacuenia, Dioso pijanacuatsia panatoxaniawaetaponare pexaniacuenejawanë panacofënëtsinejewamë! —jai Jesús pijajiwijawabelia.

Jesús icatsia pepatsiwajënaetsica, pijajiwi
najamatabëcuenexaniawaetsiaya becopia-ewetawanapa

³⁵⁻³⁶ Jesús tajëwelia nawajunupaeba pepatsijawanexatsica. Jumaitsi pijajiwijawabelia mapacueniaje:

—Paxamë baja najamatabëcueneweretsiaya pajinawanapaename, pacuenia petuxanenë penacojiobifiesta penataenë, pacuenia petuxanenë pijajiwi najamatabëcueneweretsiaya copia-ewetawanapatsi, penacojiobifiesta penataenë, penawiatanajetarucaenë bepijiayo petobaupatsinexatsi. Bajarapijinia pacuenia panecopia-ewetawanapaename jamatabëcuene-aitawaya, tsipaji jemata icatsia patsianicajë mapanacujawabetsicaje. ³⁷ Xaniajanë pacuenia pacatsipaebijitsiatsi. Petuxanenë, itsa caxibajaraba pijajiwi, pamonaewajënae-ewetawanapatsi, majitsinejewa pepatsijawabelia pijabojawaberena, nexata siwajamatabëcuenebarëya tsane, caecuenia petobaupatsixaetsi. BajaraPonë pepatsicujinae, pijacuata xaniawaetsiana mesa. Pijajiwi enaeya-exanaena mesa muxuneneta. Nexata, bepijiawitonë nataeya rajutsiana pexaejawa pijajiwijawabelia. ³⁸ Petuxanenë patanajetarucata merawituatuajëta, itsa jume, nanianaeta, nexata pijajiwi naëcotsiaya pecopia-ewetawanapaejawata pecaxibajarabixaetsi, pijajiwi siwajamatabëcuenebarëya tsane.

³⁹»¡Pacanaëjere mapacuenieje! Bo pexainanenë itsa yapëtaejitsipa penacobetoxotsinë paepatota patsijitsia merawi pijabojawaberena penacobetoxotsinexa,

nexata apomajitsi tsipae. Wajënae-ewetecaejitsipa merawijebi. Apocopatsi tsipae pijaboyaberena petojonejawatsi. ⁴⁰ Bajarapijinia pacuenia, najamatabëcueneweretsiaya paxamë-ata panecopia-ewetawanapaename tapatsijawanexatsica, tsipaji Xanë, Daxitajiwi Pematapijinënë, paepatota apopanejamatabënajinaemë tapatsijawanexatsica, jemata icatsia patsianicajë —jai Jesús pijajiwijawabelia tajëwelia penawajunupaebijawata icatsia pepatsijawanexatsica.

Jesús liwaisi tsipaeba pijajiwijawabelia, petuxanenë pijajiwitonëbeje peliwaisi

(Mt 24:45-51)

⁴¹ Itsa jumetane bajarapacuenia Jesús pejumaitisijawa, Pedro jumaitsi:

—Tajatuxanenë, çpaliwaisi aeconoxae panetsipaebame, baja tsaja paliwaisi ëpaxanë panijajiwinoxanë? Itsa jume, çitsamonaenexa-ata? —jai Pedro.

⁴² Jesús nexata jumaitsi Pedrojawabelia:

—Mara pejamatabëcuene-itsiwi yabara pacatsipaebatsije. Petuxanenë pijajiwitonë, ponë, xaniawaetsia petonacuenebaponaponaenë, caejamatabëcuene pexainaenënu, najamatabëcuene-itajëta mapacueniaje: Petuxanenë pecowëta xaniawaetsia tonacuenebaponapona, itsajamatabëcuene xainaenejewa. Copia-ewetaponaponanua pijatuxanenë pepatsimatacabijawabelianexa. Pecowëta pijajiwi xaniawaetsia to-ewetaponapona. Abataponaponanua pexaejawa, caematacabi canacujitsia, pitorobicueniatsi. ⁴³ Bajaraponë bitso barëya pamatacabi pijatuxanenë pata, pecaxitarabixaetsi xaniawaetsia pijajiwi pecowëta peto-ewetaponaponaexae. ⁴⁴ Xaniajanë pacuenia pacatsipaebijitsiatsi. Ponë bajarapacuenia xaniawaetsia tonacueneba pijatuxanenë pecowëta, bajaraponë icatsia ewetsia-exanatsi daxita xua xaina pijatuxanenë. ⁴⁵ Itsiata, pijajiwitonë itsa jamatabëjumaitsi tsipae: «Tajatuxanenë ajibi tsarucae tsane, tsipaji pona tajënacuyabelia bajayajebinxaxa», itsa jamatabëjai tsipae, nexata pamona pebijiwi, petiriawi-ata ewetsia-exanatsi, taxuxuabijitsipa petoconibabeyabibijawa. Bajara-ëponë ayaijawa pexaejawa wecuaxaeyabiabijitsipa. Aitajibinua tsabiabi tsipae. ⁴⁶ Nexata, paepatota apojamatabënajinae tsipae pijatuxanenë pepatsijawanexa, jemata ita patsipa. Nexata, bajaraponë pijatuxanenë pini-jicuenia naneconitsia-exanaejitsipatsi. Bajarapijinia pacuenia, itsamatacabi, Dioso pinijicuenia naneconitsia-exanaena pamona caejamatabëcuene apoxainae, peto-exanawanapaenexa pitorobicueniatsi.

⁴⁷ »Ponë pijajiwitonë, yapëtae-ata pijatuxanenë pitorobijawatsi peto-exanaenexa, itsiata ita apo-exanae, bajaraponë ayaicuenia jumaconibabebijitsipatsi pejumaconitabiabimacata. ⁴⁸ Ponë-ata pijinia, ita apojumeyapëtae pacuenia pijatuxanenë itorobatsi, xaniawaetsia peto-exanaenexa, nexata saicayacuenia ita to-exanaejitsipa, bajaraponë-ata jumaconitsi-atatsi tsipae, ayaicuenia apojumaconibabe tsipaetsi. Pajiwi pijinia ayaijawa rajutatsi, bajarapajiwi tsicarucatsi petocanawiatsinexa perajutsijawatsi matatoxenetsia. Pajiwi pijinia ewetsia-exanatsi ayaijawa, bajarapajiwi tsicarucatsi ayaijawa petocapitsapaenexa —jai Jesús pijajiwijawabelia.

Jiwi apopenajuasiwanajamatabëcuenecopabixae Jesús-jawabelia, nacaemonae-ata, caejamatabëcuene aponajuaxainae tsane

(Mt 10:34-36)

⁴⁹ Icatsia, Jesús jumaitsi pijajiwijawabelia:

—Xanë raja capatajopajë Dioso pija-isoto" mapanacuajawabetsicaje. Bajarapa-isotota canacuenebijitsianë, tatsatsinexa mapanacuapijiwiye, pija-neconi pexainaewi, Dioso pijajiwiwecua. Canacuenebijitsianënuu tawecua-ajibia-exanaenexa° Dioso pijajiwi pibisiacuene pexanaejawa. Bajaraxuata, bitso jitsipajë picani baja bajarapa-isoto petajuenajetarucaejawa. ⁵⁰ Itsiata baitsi jane, bajaraxua pecopiapatsijawanexa abaxë netosajina betajiobi-cueneta tanebeyaxuabijawanexa. ¡Bitso baja cajena najamatabëxainajë! ¡Matapania nebeyaxuabiana, jamatabëcuenecaewianajë! ⁵¹ ¿Paxamë tsaja pacana-ëjëtame, xanë tapatajopaejawa yabara, najamatabëcuenejëpaeja jiwi pejinawanapaejawanexa? Bajaraxuanexa apopatsinëtsica. Biji rajane, xanë tapatsixaetsica mapanacuayabetsicaje, jiwi aponajamatabëcuenejëpae tsane. Pamonae, tanesiwanajamatabëcuenecopabiwi Xanëjawaberena, apota nesiwanajamatabëcuenecopabiwi-ata, namata-enetsia aponajamatabëcuenejëpaebeje tsane. Biji rajane, napijawajabitsaë naexanaena, nacaemonae-ata. ⁵² Bajaraxua yabara, ajena mapamatacabijawaweliacujinaeje, cinco pajiwi-beje, nacaemonae-ata, caebota pejinawanapaewi-ata, aponajamatabëcuenejëpae tsane, Xanëjawaberena apotenenajuasiwanajamatabëcuenecopabixae. Nexata, acueyabi pajiwi-beje apotaneliwaisijitsipaewi tsane. Anijajiwi-beje pijinia taneliwaisijitsipaewi-beje tsane. Itsa jume, anijajiwi-beje apotaneliwaisijitsipaewi-beje tsane, acueyabi pajiwi-beje pijinia taneliwaisijitsipaewi tsane. Nexata, bajarapaliwaisi yabara, nacaemonae-ata, najume-anaenotabiabiana namata-enetsia. ⁵³ Caebopijiwi-ata, paxa, pexënatobeje, pena, pexënatoyobeje-ata, bajarapijinia pacuenia pame, pecopenabeje-ata, aponajamatabëcuenejëpae tsane, xanë yabara —jai Jesús pijajiwiawabelia.

**Jesús asaëya jiwi muxujioba, xaniawaetsia apopecanaëjëtsixae
bajaraponë pexanaecuenae yabara
(Mt 16:1-4; Mc 8:11-13)**

⁵⁴ Jesús icatsia jumaitsi jiwi ayaibitsaëtoxanetojawabelia:

—Mapanacuataje, itsa pataneme waëwetsica itarërëbo pepitsapaejawa, nexata pajumaitsimë tsabiabi: «Ajena raja emajitsia», pajamë tsabiabi. Nexata, bajarapamatacabi ema jopabiaba. ⁵⁵ Itsa pataneme jowibo pepit-sapaejawa epatajërëtsiarena, sur-jawawerena, pajumaitsimë tsabiabi: «Ajena raja icotia-ataju tsane,» pajamë tsabiabi. Nexata, bajarapamatacabi icotia-ataju tsabiabi. ⁵⁶ Itsiata baitsi jane, xua pa-exanaponajëbeje, Juan-pijinëmibeje, bajaraxuanë patae-atamë pajamatabëcuene xaina

n 12:49 *Dioso pija-isoto*: Mapa-isoto xaina anijajamatabëcueneliwaisibeje: **1)** Pacuenia isotota petajuitsicujinae nacopatabiaba pethijaijawanë, bajarapacuenia Jesús canacuenebijitsia be-isotocuenia pijajiwiawabelia itsamonae ayaicuenia pebejiobia-exanaejawatatsi, penacopabixae epamonae xaniajaiya siwanajamatabëcuenecopaba Jesucristojawabelia. Pamonae pijinia, saya penatotsipaewi Dioso pijacuene, siwanajamatabëcuenecopabinejewa Jesucristojawabelia, wecuapitsaponaejitsia Jesús pijajiwiwecua, pebejiobia-exanaponaejawatatsi. **2)** Pacuenia jiwi canacuenebabiaba isotota pewateriapaenexa piabejéjawanë, bajarapijinia pacuenia Jesús canacuenebiana piayapëbejeliwaisianëta pijajiwiawabelia, itsamonae pebejiobia-exanaejawanëtanua pijajiwi, piajibia-exanaponaeenexa pibisiacuene pexanaejawa, Dioso pijajiwiwecua. Bajarapajamatabëcueneliwaisibeje yabara Jesús yajawapatajopaica be-isoto mapanacuajawabetsicaje. Bajarapacuenia Jesús taxuxuaba pexanaejawa pijajiwiawabelia, pesiwatëpaecujinae pijajiwi cruzata. **o 12:49** *tawecua-ajibia-exanaenexa*: Taema Dan. 11:32-35, Mt 7:19; Mc 9:48, Lc 3:16-17.

apopayapëtaecapanepaemë, pacuenejawanë Dioso pacatsitajëtaona. Paxamë itajara bepaneyapëtaewi panataneme, itsiata cajena apopayapëtaemë. Payapëtaeyabiabame picani pacuenia matacabipijicuene, itsa emajitsia, itsa jume, atajujitsia, panecanaëjësijawata mapanacuapijicuene. Itsiata baitsi jane, patae-atamë daxita xua Juan, jiwibautizabinëmi, xanë-ata, pa-exanaponajëbeje, apopayapëtaemë caranata, pajamatabëcuene xaina bajarapacuenia Dioso papecatsitajëtaonaejawa —jai Jesús jiwi ayaibitsaëtoxanetojawabelia.

Pajiwi naneconita pewënajiwijawabelia, pewajënaeya benaliwaisixaneta, peneconitsiyaniwatsi juez-nëjawabelia

(Mt 5:25-26)

⁵⁷ Jesús icatsia jumaitsi jiwi ayaibitsaëtoxanetojawabelia:

—¿Detsa xuajitsia namata-enetsia pananeconitabiabame juez-nëjawabelia? Pacacuenecaëjëpa picani panijacuata panecanaëjësijawata panenato-itapetsijawa, pexaniacuene pane-exanaejawanexa. ⁵⁸ ¡Pajiwi neconita pewënajiwiji juez-nëjawabelia, nexata itsa capona bajarapajiwi peneconitsinexa jane baja juez-nëjawabelia, namutua penajetarucaejawatabeje benaliwaisixanetajopabeje, pepatsiwajënaeyabeje juez-nëjawabelia! Itsa capatsipatsi juez-nëjawabelia, nexata bajaraponë itorobijitsipa policfawi, pecaponaenexa penaneconitsiwi pejebabiabibojawabelia, pijaneconi yabara. ⁵⁹ Xaniajanë pacuenia pacatsipaëbijitsiatsi. Penaneconitsiwi pejebabiabibota itsa pacananeconitsia-exanetsipa, bajarawerena bepíjia apopapitsapaemë tsipae. Matapania pamatamotsipame daxita xua yabara pacananeconitsia-exaneta, papitsapaëjitsipame —jai Jesús jiwi ayaibitsaëtoxanetojawabelia.

Jiwi benajamatabëcuenepënëyorota Diosojawabelia, pibisiacuene pexanabiabijawawecua

13 ¹ Itsamonae pata Jesús-jawaberena abaxë pecujarubaponaponaejawata, peyapëtaeya-exanaenexa Pilato pitorobijawa píjiajiwi pebeyebia-exanaejawa Galilea nacuapijiwimi Jerusalén tomarata. Yapëtaeya-exanatsi pacuenia bajarapamonaemi pebeyebatsi, paepatota dajubi tajuitanubena altar-jumata, templobopijipanabota. Nexata, jiwi petëpaewimi pejana, yajawanamatajërëata dajubijana.

² Bajarapaliwaisi pejumetaecujinae, Jesús jumaitsi bajarapamonaejawabelia:

—¿Bajarapacuenia petëpaexae,^p paxamë meta pacatsita bitso pibisiacuene pexanaewi itsamonae Galilea nacuapijiwawecua? ³ ¡Jume baja cajena! Dioso tocopatatsi bajarapamonaemi bajarapacuenia pebeyebinexatsi, paxamë abaxë panenacopabiwi, panenatocanaëjësínexa Diosojawabelia panenaneconitsijawa. Nexata, itsa apopacopabimë tsane pibisiacuene pane-exanabiabijawa, panenajamatabëcuenepënëyorotsinexa Diosojawabelia, nexata, paxamë-ata panaxuabianame Diosowecua panetëpaejawata. ⁴ ¡Panajamatabënapire pematacënëbijawatsi dieciocho pajiwiibeje,

p 13:2 *Bajarapacuenia petëpaexae*: Bajayata, judíowi canaëjëta pacuenia pajiwi ayaicuenia naneconita Diosojawabelia, bajarapajiwi tocopiapatsianatsi bitso pibisiacuenia petëpaejawanexa.

papiapiaboxaneto jopanucaya Siloé pucayo imoxoyojawata, Jerusalén tomarata penucaejawami! ¿Pamonaemi tsaja matacënëbatsi, bitso pibisiacuen pexanaexae itsamonae Jerusalén tomarapijiwiwecua? ⁵ ¡Jume baja cajena! Bajarapamonaemi-ata picani bitso pibisiacuen apo-exanae pijatomarapijiwi matatoxenetsia. Bajaraxua yabara, paxamë bepayapëta-neme pacuenia itsa apopacopabinë tsane pibisiacuen pane-exanaejawa, panenajamatabëcuenepënëyorotsinexa Diosojawabelia, daxita paxamë-ata bajarapacuenia panaxuabianame Diosowecua itsa patëpaename —jai Jesús bajarapamonaejawabelia.

**Jesús tsipaeba jiwijawabelia pecuenecataeliwaisi
piacuaijibihigueranae peliwaisicuenia**

⁶ Jesús jiwi liwaisi tsipaeba piacuaijibihigueranae peliwaisicuenia, peypapëtaeya-exanaenexa Dioso petojitsipaejawa penajamatabëcuenepënëyorotsinexa Diosojawabelia, pexaniacuen pexanawanapaenexanua. Jumaitsi mapacueniaje:

—Pebi pijapabituatujëta caenae pe-ubinae xainanuta, higueranae. Nexata, picani taeyojopabiaba bajaraponae penacuaitsijawa. Itsiata baitsi jane, aponacuaitsi. ⁷ Nexata, jumaitsi pijapabi peto-ewetsinëtsijawabelia: «¡Taema maponaeye! Acueyabi picani pawaibeje taeyopajë itsa nacuaia pecuai, tanotabiabinexa. Itsiata, aponacuaibabi. ¡Nexata baja, nicataxuale! Apobecopatanutsitsi bajaraponae. Ira caranatanuca saya», jai pijapabi pexinaenë. ⁸ Itsiata baitsi jane, pijapabi peto-ewetsinëtsi jumaitsi: «Copatanutsianatsibeje abaxë mapawaije. Nexata, yabacamonaenajë. Tsibaca-othocaenajënu vacatasitoxita. ⁹ Baja raeta xuacujinae, xanepa-naena. Nexata, aeconoxae pawai itsa nacuaitsiana, abaxë nucaena. Itsa aponacuaitsi tsane, nexata jane baja, nicataxuabianajë», jai pijapabi peto-ewetsinëtsi —jai Jesús.

**Jesús jamatejemaya-exana judíowi penacuera-
ewetsimatacabita penajumafurutsiwi**

¹⁰ Itsamatacabi, judíowi penacuera-ewetsimatacabita, Jesús jiwi liwaisi tsipaeba judíowi pijasinagogabota. ¹¹ Bajarajota na-eca petiriwa. Dowathi pejamatabëcueneta bajarapowa dieciocho pawai beje xaina penajumafurutsicujinae. Nexata, apocajëpaetsi tsiquirijawayo-ata pen-epasirowitsijawa. ¹² Itsa Jesús taeyeta bajarapowa, nexata junarena. Jumaitsi bajarapowajawabelia:

—Niatanejawa rabaja cawecua-ajibia-exanatsi —jai Jesús.

¹³ Nexata, tsimatanacobeuata bajarapowajawabelia. Bajarapaepatota, na-epasirowitsixanepana baja. Nexata, bajarapowa pexaniacuenia wënë-xaniatapona Dioso ayaijamatabëcuenenë yabara, bitso pexaniacuen peto-exanaexaetsi. ¹⁴ Itsiata baitsi jane, judíowi penacatuatiabibibo pewetsinë, bara-anaepana Jesús, judíowi penacuera-ewetsimatacabita pejamatejemaya-exanaexae penajumafurutsiwa. Jesús pexanaecuen

q 13:10 *pijasinagogabota*: Bajarapacuenia judíowi wënërubabiaba penacatuatsibo, itsajota nacurubabia Dioso peliwaisi caesábado canacujitsia.

petsita-abejexaetsi, judíowi penacaetuatabiabibo pewetsině jumaitsi bajara-pabota penacaetuatsiwi jawabelia:

—Caesemana canacujitsia Dioso nacaocaējēta seis pamatacabibeje wajanacuenebinexa. Nexata, bajarapamatacabijawa nacatoxanepana wajapat-sijawa, wajanacajamatejemaya-exanaenexa. Itsiata baitsi jane, penacuera-ewetsimatacabita apobepatsitsi wajanacajamatejemaya-exanaenexa —jai judíowi penacaetuatabiabibo pewetsině, najumejematsiaya jiwijawabelia.

¹⁵Nexata, Jesús jumaitsi judíowi penacaetuatabiabibo pewetsině jawabelia:

—Paxamě, jiwi panecujarubiwi, apopa-exanabiabimě xua pacuene-itawetabiabame itsamonae pexanaeyaniwa. Penacuera-ewetsimatacabita-ata paxamě panacuenebabiabame, tsipaji pa-isinabiabame panijavaca, panijaburro-ata, panecaponaenexa merajawabelia piapaenexa. ¹⁶Biji rajane, mapowaje, Abraham-pijině pemomoxiyajuwēnēwa, dowathi pejamatabē-cueneta najumafuruta. Xaina baja dieciocho pawai-beje peponaponaejawa Satanás bepecēbiwatsicuenia. Nexata, pacuenia paxamě pexaniacuenia pa-isinabiabame panijadajubi penacuera-ewetsimatacabita-ata, ¿bajarapacuenia tsaja aponetoxanepanae ta-isinaejawa mapowaje Satanás pecobewecua? Jājā, bajarapacuenia xanepana ta-exanaenexa —jai Jesús judíowi penacaetuatabiabibo pewetsině jawabelia.

¹⁷Bajarapacuenia Jesús itsa jumaitsi, nexata pamona pecuene-itoyawitsi moya ena. Aura tsenae. Itsamonae pijinia Jesús siwajamatabēcueneba-rēyatsi pinijicuene Dioso pesaēta pexanaponaejawanē yabara.

**Jesús tsipaeba jiwijawabelia pecuenecataeliwaisi,
bepijiayo pewitsabijawa mostazanaemēcuenia**

(Mt 13:31-32; Mc 4:30-32)

¹⁸Orijibia, Jesús jumaitsi jiwijawabelia:

—¿Demeta paliwaisi jēpa Dioso pijajiwi bepijia ayaibitsaētoxaneto penae-xanaponaejawanexa, bajaraPoně peyanacua-ewetsiwinexa? ¿Depaliwaisicuenia meta pacatocuenecataenatsi? Mostazaxutoyo meta peliwaisicuenia.

¹⁹Pebi capona mostazaxutoyo pe-ubinexa pijapabita. Pe-ubicujinae, bajara-jota mostazanae bepijia witsaba. Bepijia baja pinijinae naexana. Baratsui-ata exana pematapenanē bajaraponaemaxēranaxijawa. Bajarapijinia pacuenia, Dioso papijajiwi-mē-ata pa-itsimě tsane.⁷ Patsiquiribitsaētoyomē-ata, bepijia panaexanaename pa-ayaibitsaētoxanetomě, Dioso papeccayanacua-ewetsinexa —jai Jesús jiwijawabelia.

**Jesús tsipaeba jiwijawabelia pecuenecataeliwaisi
levadurajawa peliwaisicuenia**

(Mt 13:33)

²⁰Icatsia, Jesús jumaitsi jiwijawabelia:

—¿Depaliwaisicuenia meta pacatocuenecataenatsi, jiwi peyapētaenexa Dioso pijajiwi pewetsicuenie peyacaējēpaejawaxitanacuanējawaxi?

r 13:19 *pa-itsimě tsane*: Taema Hch. 1:15. Taxuxuaba 120 pajiwi-beje. Hch. 2:41 itsa 3.000 pajiwi-beje caematacabicujinae, Hch. 4:4 itsa 5.000 pajiwi-beje itsamatacabibejecujinae.

²¹ Pacatsipaebianatsi levadurajawa peliwaisicuenia: Petiriwa pan pexa-naenexa, canacueneba acueyabi patarrobeje trigobenonë pejanapan-matabënexa. Bajarapapejanamatabëjawabelia matajërëaba levadura pexai-naematabëyota. Nexata, tsiquirimatabëyo-ata fufunaeya-exana daxita caecuenia bajarapapan-matabë. Bajarapijinia pacuenia, Dioso pijajiwi peyanacua-ewetsicuenie caecuenia yacaëjëpaponaena daxitanacuanëpijiwi-jawa —jai Jesús jiwijawabelia.

Tsiquiribaupayo peliwaisi

(Mt 7:13-14, 21-23)

²² Jesús penajetarucawata Jerusalén tomarajawabelia, namutualia jiwi liwaisi tsipaebanajetaruca pinijitomaranëjawa, tsiquiritomaraxijawa-ata.

²³ Liwaisi petsipaebijawata, itsanë yanijobatsi. Jumaitsi Jesús-jawabelia:

—Petuxanenë, ¿Dioso tsaja capanepaena caebitsaëtoyo saya? —jai.

Nexata, Jesús jumaitsi daxita jiwijawabelia:

²⁴ —Xaniajanë pacuenia pacatsipaebijitsiatsi. Ayaibitsaëtonë picani jit-sipaena penajonejawa tsiquiribaupayojawalia Dioso pijanacuayabetsia. Itsiata, bajarapamonae apocuenecaëjëpaetsi tsane pejonenexa. ¡Bajaraxuata, pajamatabëcuenesaëmëre bitso panewajënaeyabelia panejonenexa bajara-patsiquiribaupayojawalia! ²⁵ Pacuenia bo pexainaenë, baupa pexatatsicujinae, ayapëbeje wajajonejawa, bajarapacuenia Dioso exanaena. Nexata, pebaupaxatatsicujinae, paxamë bo jumapënëwelia panubenaename. Nexata, picani bitso panejitsipaexae panejonejawanexa, pajumaitsimë tsane: «¡Tajaxuxanenë, panetobaupare!», pajamë tsane. Itsiata, bajaraPonë pacajumaitsi tsane: «Apopacayapëtaetsi cajena paxamë. Itsawerena-ata papatame», pacajai tsane. ²⁶ Nexata, paxamë pajumaitsimë tsane: «Xamë baja cajena panebarëxaneme pexaejawa. Panebarëmatawëjëa-apamenua. Patajatomaranëjawa-ata baja cajena jiwi liwaisi tsipaebabiabame», pajamë tsane. ²⁷ Itsiata, bajaraPonë pacajumaitsi tsane: «Apopacayapëtaetsi cajena paxamë papamonaemë. Itsawerena-ata papatame, apoyapëtaenë. ¡Pibisiacuenie pane-exanaewi, panewecuanatsare baja!», pacajai tsane. ²⁸ Dioso pijanacuatatsia, pataename penajuajinawanapaejawa Abraham-pijinë, Isaac-pijinë, Jacob-pijinë, daxita profetawi-ata. Itsiata, paxamë bajarajota, bitso panejamatabëcuenebëjaixae, pinijicuenia panatsinuenie, panawonosinianamenua, tsi-paji Dioso pijanacuawecua pacaxuabiana apopewerewerecae-isotojawabelia. ²⁹ Bajarapamatacabi, patsiana ayaibitsaëto, apojudfowi, daxitanacuanëjawa-wawerena. Bajarapamonae na-enaena mesa muxuneneta, penaxaenexa xua toxaniawaetatsi Dioso pewetsinacuatatsia. ³⁰ Nexata, xaniawaetsia pacanaë-jëtsianame itsamonae yabara, xua pacayapëtaeya-exanaejitsiatsi: Pamonaë mapamatacabitaje beweliamatabëcuenewi tanetsi, Dioso pijanacuatatsia ayaijamatabëcuenewi exanaenatsi. Pamonaë pijinia mapamatacabitaje ayaijamatabëcuenewi* tanetsi, Dioso pijanacuatatsia beweliamatabëcuenewi exanaenatsi —jai Jesús daxitajiwijawabelia.

s 13:30 *ayaijamatabëcuenewi*: Judfowi ayaijamatabëcuenewi nataeyabiaba daxitanacuanëpijiwiwecua, Dioso pitapetsixaetsi pijajiwinexa. Bajaraxuata, taeyabiaba pamonaë apojudfowi beweliamatabëcuenewi.

Jesús najamatabëxainaeya siwanua Jerusalén tomarapijiwi

(Mt 23:37-39)

³¹ Itsa baja Jesús najumewereta jiwi liwaisi petsipaebijawa, itsamonae fariseowiyajuwënëwi pata Jesús-jawaberena. Bajarapamonaë jumaitsi:

—¡Jesús, majotawecuaaje najetabijirabare, tsipaji nacua-ewetsinë, Herodes, cabeyaxuabiapaeba! —jai fariseowi.

³² Nexata, Jesús jumaitsi bajarapamonaëjawabelia:

—¡Paponaremelia bajarapanamojawabelia! Pajumaitsimë tsane mapacueniaje: «Jesús raja jumaitsi: 'Ajena raja abaxë, icatsia merawia-ata tsane, wecuacapsapaponaenajë dowathi peyajawajinawanapaewi. Piawitanewi-ata jamatejemaya-exanaponaenajë. Nexata, abaxë pamerawia, bajarapacuenia ta-exanaejawa copatsianajë,' jai raja Jesús», pajamë tsane Herodes-jawabelia. ³³ Itsiata baitsi jane, xanë tsitecaeya najetarucaenajë ajena, merawia, pamerawia-ata, tapatsinexa Jerusalén tomarajawabelia, tsipaji bajarapatomarata profetawimi, beyejebabiabatsi. Bajaraxuata, xanë-ata ponajë bajarabelia, tanebeyaxuabinexa —jai Jesús fariseowijawabelia.

³⁴ Nexata, Jesús najamatabëxainaeya pesiwanuejawata Jerusalén tomara-pijiwi, jumaitsi mapacueniaje:

—¡Pajerusalén-tomarapijiwimë, ayaicuenia pataca-asiwawi! Pacuenia wacara banacoxicaetuata pecorofetobëxëpanaberena, bajarapijinia pacuenia xanë-ata picani bitso jitsipabiabajë patacacaetuatsinexa, patacacapanepaenexa picani panijaneconiwecua. ¡Itsiata baitsi jane, paxamë apopajejamë cajena! Pataca-asiwaxae, pacato-itorobabiabatsi picani, profetawi. Itsiata baitsi jane, pabeyejebabiabame. Pacato-itorobabiabatsinua Diosojumeliwaisi pecaponaewi. Bajarapamonaë-ata ibotonëta patseconabiabame, panebeyejebinexa. ³⁵ ¡Panejumetaema! Bajarapacuenia pane-exanaexae, Dioso rabaja pacacopata papeca-ewetabiabijawami. Pijatemplobota-ata apoponaponaë tsane. Bajarapijinia pacuenia, xanë-ata patanebeyaxuabicujinaemë matawë-jëa pepacuenie baja apopanetaemë tsane. Matapania pamatacabijawabelia xanë yabara pajumaitsimë tsane: «¡Dioso, bitso yawenonare maponë, penajetarucaenëje, xamë nejamatabëcueneta!», pajamë tsane. Nexata jane baja, icatsia panetaename itsa patsianicajë —jai Jesús mapacueniaje najamatabëxainaeya pesiwanuejawata Jerusalén tomarapijiwi.

Jesús jamatejemaya-exana pebi, bitso daxitanë peyajinaenë

14 ¹ Itsamatacabijawa, Jesús pona fariseowi penamatacaitorobinë pijaboyabelia, penaxaenexa judíowi penacuera-ewetsimatacabita. Bajarajota, itsamonae fariseowi Jesús naitaxutocaewetatsi. ² Jesús

t 13:32 *bajarapanamojawabelia*: Jesús wënëruba Herodes namo mapajamatabëcuenianë yabara: Judíowi namo itsa wënëruba, **1**) jumaitsi pebejibia-exanaenë yabara, itsa jume, petsiypëtaenë peyamaxë-itorobicuene yabara **2**) jumaitsi natsiquejemacuene pexainaenë yabara, **3**) jumaitsinua pebijianaenëcuene yabara. Nexata, Herodes bejibia-exanaeya beyaxuabia-exana Juan, jiwi pebautizabinëmi. Naxainaeyaba judíowi pewetsicuene Cristowecua, nexata apopepowetsinë. Orijibia, Herodes jitsipa pewecua-ajibia-exanaexa saicaya judíowi penaewetsicuene, juya judíowi penacuenëjëpaenexa Romano nacuapijiwi pejinawanapaecuenie. Bajarapacueniejawanë yabara Jesús wënëruba namo.

pitabaracanacujitsialia eca pebi, daxitanë peyajinaenë. ³ Jesús nexata jumaitsi pamona bitso peyapëtaewijawabelia Dioso penajumecopatsiliwai si Moisés-pijinëta, fariseowijawabelia-ata:

—¿Aponaca-itawetsi tsaja penacuera-ewetsimatacabita wajajamatejemaya-exanaenexa piawitanewi? —jai Jesús bajarapamonaewijawabelia.

⁴ Itsiata, bajarapamona apojumecanawiatsi. Moya saya ena. Nexata, Jesús cobepita peyajinaenë. Jamatejemaya-exana baja. Bajaraxuacujinae, itoroba peponaenexa bajarapabowecua. ⁵ Nexata, Jesús jumaitsi bajarapamonaewijawabelia:

—Itsa panijaburro, panijavaca-ata, pacatojopaejitsipareca meramëthë-jawareca, nexata, ¿penacuera-ewetsimatacabixae, bepíjia apopajutsimë tsipae? —jai Jesús pamona bitso peyapëtaewijawabelia Dioso penajumecopatsiliwai si Moisés-pijinëta, fariseowijawabelia-ata.

⁶ Nexata, to-ayapëbejetsi bajarapamona pejumecanawiatsijawa Jesús-jawabelia.

Jesús jiwi muxujioba ayaijamatabëcuenewi penataeyaniwa

⁷ Fariseonë pijabota penapatsicujinae, Jesús tane pacuenia fariseonë pejunatsiwi, natsi-itapeta pena-enaenexa peyaiyataewitsi petsinubijawanëta mesa muxuneneta. Nexata, Jesús muxujioba bajarapamonaewijawabelia beweliamatabëcuenewi penataenexa. Nexata jumaitsi:

⁸ —¿Itsa pacajunata panenaxaenexa penacojiobinë pijafiestajawabelia, pëtsa panatsi-itapetame panena-enaenexa peyaiyataewitsi pena-enaenexa petsinubijawanëta, tsipaji itsanë, ayaijamatabëcuenenë, paxamë matatoxenetsia, itsa najunatatsi, napatsipa! ⁹ Nexata, papecajunatsinë pacacujitsiparena papecajumaitsinexa: «¿Tocopare bajarapape-ecaejawa maponë pe-ecaejaxe!», pacajai tsipae. Nexata, paxamë pa-auramë tsipae, itsa pacanatixitsia-exana pane-ecaeenexa beweliamatabëcuenewi petsinubijawanëta. ¹⁰ Bajaraxuata, itsa pacajunata, pa-enaename saya beweliamatabëcuenewi petsinubijawanëta. Matapania, itsa pacajumaitsi tsipae papecajunatsinë: «¿Natixiremena! ¡Ecare peyaiyataewitsi tatsinubijawanëta!», itsa pacajai tsipae, nexata daxita mesa muxuneneta panenajua-enaewi pacataena papecayaiyataejawa papecajunatsinë. ¹¹ Pajiwi ayaijamatabëcuenejiwi natane, bajarapajiwi beweliamatabëcuenejiwi taenatsi Dioso. Pajiwi pijinia beweliamatabëcuenejiwi natane, bajarapajiwi ayaijamatabëcuenejiwi taenatsi Dioso —jai Jesús judíowi pecujarubiwiawabelia, fariseowijawabelia-ata.

¹² Nexata, Jesús icatsia jumaitsi pejunatsifariseonëtsijawabelia:

—¿Itsa junatame itsamona nebarëxaenexa nijabota matonejepijijawa, itsa jume, caniwiyo pijijawa-ata, pëtsa junatame ëneyapëtaewi, ënijamona, ënijamonaewiriawi, ëdaxitacuene bitso pexainaewi, pamona nijabomuxuneneta pejinawanapaewi, bajarapamona juya canamatamojunatsipa pijabota pecabarëxaenexa! Pacuenia bajarapamona to-exaname, itsamatacabi juya camatamojunatsiana, pijabota pecabarëxaenexa. ¹³ Biji rajane, itsa fiesta exaname nebarëxaenexa, junatsianame bepejiobiwi, penabejenaewi, pejayujayunaewi, bitso pitaxutotsëcënaewi-ata. ¹⁴ Nexata bajarapacuenia,

pepacuene Dioso casiwajamatabëcuenebarëya tsane, tsipaji bajarapitsiwi acuenebi juya pecanamatamojunatsijawa tsane. Nexata, nijamatamo xai-naename pamatacabi Dioso asaëya-exanaena pamonae tëpa, pexaniacuene pexanawanapaewimi —jai Jesús pejunatsifariseonëtsijawabelia.

**Jesús tsipaeba jiwijawabelia pecuenecataeliwaisi,
pinijifiesta pexanaenë peliwaicuenia**

(Mt 22:1-10)

¹⁵Pejumetaejawata Jesús petsipaebiliwaisi, bajarajota pe-enaewiyajuwënëñë mesa muxuneneta jumaitsi Jesús-jawabelia:

—Jamatabëcuenebarëya tsane pajiwi naxaena Dioso peyanacua-ewetsinacuatatsi —jai fariseowiyajuwënëñë.

¹⁶Nexata, Jesús pejumecanawiatsijawata, tsipaeba pecuenecataeliwaisi-cuenia. Jumaitsi:

—Itsamatacabi, itsanë siwanajamatabëcuenewereta pexanaenexa pini-jifiestaxaneto. Nexata, tajëwelia junatsia-exana jiwi ayaibitsaëtozaneto petopatsinexatsi, pejunatsiwi pebarëxaenexa. ¹⁷Pexaejawa baja pexanaeweretsicujinae, fiesta pexanaenë itoroba pijajiwitonë, peponaenexa pejunatsi-wijawabelia: «¡Naxatsia baja! Pexaejawa rabaja wereta», pejainexa. ¹⁸Itsiaa baitsi jane, daxita pejunatsiwi apotopatsitsirena. Itsanë saya peponaeyaniwa, pijajiwitonëta tonajume-itorobarenatsi pejumaitsililwaisi mapacueniaje: «Xanë aeconoxaeta ira comuatabajë. Nexata, ponaejitsianë bajarabelia, tataenexa bajarapa-ira. Pexaniacuene neto-exanaename. ¡Pëtsa jamatabëcuene-anaepaname xanëjawaberena!», pejailiwaishi tonajume-itorobarenatsi pijajiwitonëta. ¹⁹Itsanë pijinia saya peponaeyaniwa, pijajiwitonëta tonajume-itorobarenatsi mapacueniaje: «Xanë comuatajë diez ponëbeje bueyu, tane-torobobocaewinexa. Nexata, ponaejitsianë ta-ëjëtsinexa bajarapabueyu. Pexaniacuene neto-exanaename. ¡Pëtsa jamatabëcuene-anaepaname xanë-jawaberena!», pejailiwaishi tonajume-itorobarenatsi pijajiwitonëta. ²⁰Itsanë pijinia saya peponaeyaniwa, pijajiwitonëta tonajume-itorobarenatsi mapacueniaje: «Xanë raja aeconoxaeta nacojiobajë. Bajaraxuata, acuenebi tapo-naejawa», pejailiwaishi tonajume-itorobarenatsi pijajiwitonëta. Bajarapacuenia fiesta pexanaenë pejunatsiwi apopatsi. Peponaeyaniwa saya tonajume-itorobatsi pijajiwitonëta. ²¹Nexata, fiesta pexanaenë pijajiwitonë nawiarena pijatuxanenëjawaberena. Tsipaeba baja, daxita pacuenia tonajume-itorobatsi. Nexata, fiesta pexanaenë anaepana. Jumaitsi pijajiwitonëjawabelia: «¡Naxatsiayo, liamëre tomarabelia! Junatanajetarucaename jiwi pinijicallexanetonëjawa, tsiquiricallexijawa-ata. Junatsianame bepejiobiwi, penabejenaewi, pejajuyayunaewi, bitso pitaxutotsëcënaewi, penaxaenexa tajabota», jai. Nexata baja, pijajiwitonë pona pejunatsinexa jiwi. ²²Jiwi pebarëpatsicujinae-rena, jumaitsi pijatuxanenëjawabelia: «Tajatuxanenë, exanajë rabaja tane-itorobicueniamë. Itsiata, abaxë sajinanubena itsamesanë itsamonaenexa», jai bajaraponë. ²³Nexata, petuxanenë icatsia jumaitsi pijajiwitonëjawabelia: «¡Liamëre icatsia carreteranëjawabelia, namutonëjawabelia-ata! Junatanajetarucaename asaëyata carreterajawa peponaewi, namutojawa-ata, penaxaenexa tajabota, jamatejema jiwi pewënëcaenexa. ²⁴Pamonae picani copiata junatajë penaxaenexa, caenë-ata bajarapamonaeyajuwënëñë, aponaxae tsane

bajarapapexaejawa», jai petuxanenë pijajiwitonëjawabelia —jai Jesús fariseo-wiyajuwënëjawabelia peyapëtaeya-exanaenexa pacuenia Dioso itsamonae junatsi-ata, apopejumecowënëtsijawanexa.

Pamonae jamatabëpënapona Jesús, matatoxenetsia biasiwa

bajaraPonë pijamonaewecua

(Mt 10:37-38)

²⁵ Jiwibitsaëtoxaneto Jesús pënajinawanapatsi. Nexata, Jesús jemata napënëyorotojopa bajarapamonaejawabelia. Jumaitsi mapacueniaje:

²⁶ —Pajiwi jitsipa tanepënaponaejawa tajajiwitonënexa, itsiata, itsa aponiasiwa tsane daxita pijamona piasiwajawa matatoxenetsia, nexata apocuenecaëjpaetsi tsane tajajiwitonë penaexanaenexa. Nexata, itsa aponiasiwa tsane paxa, pena-ata, pematapijiwi, pejuyapijiwi-ata, piasiwajawa matatoxenetsia, apocuenecaëjpaetsi tsane tajajiwitonë penaexanaenexa. Itsa aponiasiwa tsane pijawa, pexi, pijacuata-ata pena-asiwajawa matatoxenetsia, nexata apocuenecaëjpaetsi tsane tajajiwitonë penaexanaenexa. ²⁷ Pajiwi aponacopatsi jiwi pebejiobia-exanaenexatsi, pebeyaxuabinexa-atatsinua xanë yabara, nexata apocuenecaëjpaetsi tsane tajajiwitonë penaexanaenexa. ²⁸ ¡Pacanaëjère mapacuneje! Paxamëyajuwënëñ bo itsa jamatabë-exana, athëbëabetsia piapiaboxanetotsia, copiaya caëjëtsipa pijapalata itsa tocaëjpaëjitsiatsi xaniawaetsia pewateretsijawabelia. ²⁹ Nexata, taxuxuabi-ata pijabo pexanaejawa, itsa apoweretsi tsipae, petaewitsi capocaponaëjitsipatsi apoweretsixae. ³⁰ Bajarapamona baracuaicuaijaitsi tsipae: «¡Pataema maponëje! Picani taxuxuaba pijabo pexanaejawa. Itsiata, apotocaëjpaetsi pijapalata, pewateretsinexa», jaitsi tsipae capocaponaeya petotaewitsi. Bajaraxuata, paxamë-ata pacatoxanepana copiaya panenajamatabëcueneweretsijawa patanepënaponaewajënaeyamë.

³¹ »Bajarapacuenia exanaejitsipa nacua-ewetsinë-ata. Copiaya najamatabëcueneweretsipa pacuenia petsimaxëponaewitsi itsa tsimaxëpatatsi cuenecanawiatsijitsia, itsanacuawerena pebarënewajabitsaëtsiwajënaeyatsi. Nexata, copiaya cuenecanaëjëtsipa pijajiwi diez mil ponëbeje itsa barëcuene-amoneyabijitsia veinte mil ponëbeje pexainaenëjawabelia. ³² Bajarapacuenia pesiwacanaëjëtsicujinae, itsa natoyapëtaëjitsipa apopebarëcuenecaëjpaëjawatsi pebarënenexa pijawajabitsaënë pijajiwijawabelia, nexata abaxë, itsa tajë pewajënae pepatsijawarena pijawajabitsaënë, najumexuabijitsipalia pijajiwita penabarajamatabëcuenexanepanaenexabeje, wajabitsaëcuene pexanaeyaniwabeje. ³³ Bajarapijinia pacuenia, paxamëyajuwënëñ-ata itsa aponajamatabëcueneweretsi copiaya penajamatabëcuenepënëyorotsinexa daxita pexinaejawawecua, nexata apoxanepanae tajajiwi ta-exanaenexa — jai Jesús jiwi ayaibitsaëtoxanetojawabelia.

Jesús tsipaeba jiwijawabelia pecuenecataeliwaisi, yajo peliwaicuenia

(Mt 5:13; Mc 9:50)

³⁴ Jesús icatsia pecuenecataeliwaicuenia jumaitsi jiwi ayaibitsaëtoxanetojawabelia mapacueniaje:

—Yajo abaxë itsa xaica, xanepana. Itsiata, pexaicaejawami itsa ajibi tsipae, ¿detsa pacuenia icatsia naxaicaeya-exanaejitsipa? Acuenebi.

³⁵ Itsacuenejawayonexa-ata baja apoxanepanae tsipae, irajawabelia pe-ubijawa-ata petsibaca-othocaenexa. Nexata, saya jiwi xuabijitsipa bajarapayajomi. Pajiwi jamatabënejumeyapëtane patacatsipaebiliwaisi, nenamuxuna-ewetsi xaniawaetsia —jai Jesús Dioso pijacuene penacuene-biwi piacuenematamobiyanwa.

Jesús tsipaeba jiwijawabelia, acueyabi pacuenecataeliwasibeje, peyapëtaeya-exanaenexa xua yabara aponaneconitsi Diosojawabelia

Jesús tsipaeba jiwijawabelia pecuenecataeliwaisi oveja penaxuabinë peliwaaisicuenia
(Mt 18:10-14)

15 ¹ Impuestojamatabëcuene pematamoyanijobabiabiwi, itsamonae piajamatabëcuenebejewi-ata, pata Jesús-jawaberena, penamuxuna-ewetsinexatsi petsipaebiliwaisi. ² Petaejawata bajaraxua, fariseowi, judíowi pecujarubiwi-ata, Jesús cuenecarapuabiaya baracuaicuajaitsi mapacueniaje:

—Mara ponëje naneconita Diosojawabelia, tsipaji copiapitabiaba piajamatabëcuenebejewi-ata. Naxaeyabiabanua pexaejawa bajarapamonaeta —najai Jesús yabara.

³ Bajarapacuenia pebaracuaicuajiaxaetsi, bajarapamonaejawabelia pecuenecataeliwaaisicuenia Jesús tsipaeba mapaliwaisije:

⁴ —Paxamëyajuwënë xainaejitsipa cien ponëbeje oveja. Itsa toyajuwënë naxuabijitsipatsi caenë, oveja pexainaenë petusatota puenetsipa noventa y nueve ponëbeje. Jaitsipa petonaxuabinëtsi, pecaxitajarabijawabelianexa.

⁵ Itsa baja caxitajarabijitsipa petonaxuabinëmitsi, barëyataejitsipa. Boyaberenen wëtarapatsipa. ⁶ Itsa capatsipa boyaberenen, junatsipa peyapëtaewitsi, pijabomuxuneneta imoxoyo pe-enaewi-ata. Nexata, jumaitsi tsipae bajarapamonaejawabelia: «¡Panecobenabarëyamëre, tsipaji taja-ovejayo, tane-tonaxuabinëyomi picani, caxitajarabajë baja!», jai tsipae oveja pexainaenë bajarapamonaejawabelia. ⁷ Xaniajanë pacuenia pacatsipaebijitsiatsi. Pacuenia oveja pewetsinë bitso siwajamatabëcuenebarëya pecaxitajarabixae petonaxuabinëmitsi, noventa y nueve ponëbeje pesiwajamatabëcuenebarëyawawecua, bajarapijina pacuenia bitso siwajamatabëcuenebarëya tsabiabi tsane athëbëtatsia pejinawanapaewi, pacujinae pijaneconi pexainaewi copatsiana pibisiacuene pexanabiabijawa, penajamatabëcuenepeñëyorotsixae Diosojawabelia pesiwajamatabëcuenebarëyawawecua noventa y nueve pajiwiweje Dioso pitabarata planeconijibitsawanapaewi matatoxenetsia —jai Jesús fariseowijawabelia, judíowi pecujarubijawabelia-ata.

*Jesús tsipaeba jiwijawabelia pecuenecataeliwaisi,
penaxuabipalatanëyo peliwaaisicuenia*

⁸ Itsaliwaisi pecuenecataecuenia Jesús tsipaeba fariseowijawabelia, judíowi pecujarubijawabelia-ata:

—Petiriwa xinaejitsipa diez ponëbeje palatanëanë, bitso penamatamat-sinëanë. Itsa toyajuwënë naxuabijitsipatsi caenë, itanojotsipa lámpara pejait-sinexa. Bo-ënë-ata ira cajuetsipa petonaxuabipalatanëmitsi pecaxitajarabijawabelia. Matapania itsa pitabuatsipa, copatsipa baja pejaitsiyaw. ⁹ Itsa baja

caxitajarabijitsipa petonaxuabipalatanēmitsi, junatsipa peyapētaewitsi, pija-bomuxuneneta imoxoyo pe-enaewi-ata. Nexata, jumaitsi tsipae bajarapamonaewawabelia: «¡Panecobenabarēyamēre, tsipaji tajapalatanēyo, tanetona-xuabinēyomi picani, caxitajarabajē baja!», jai tsipae. ¹⁰Xaniajanē pacuenia pacatsipaebijitsiatsi. Bajarapijinia pacuenia, pajiwi copatsiana pibisiacuene pexanabiabijawami, itsa najamatabēcuenepēñeyorotsiananua Diosojawabelia, athēbētatsia pejinawanapaewi, ángelewí, siwabarēyatsi tsane —jai Jesús fariseowijawabelia, judíowi pecujarubiwijawabelia-ata.

*Jesús tsipaeba jiwijawabelia pecuenecataeliwaisi, juyapijinē,
paxawecua penaxuabaponaponaenē, peliwaicsuenia*

¹¹Icatsia, Jesús tsipaeba itsapecuenecataeliwaisicuenia fariseowijawabelia, judíowi pecujarubiwijawabelia-ata. Jumaitsi mapacueniaje:

—Pebi xaina anijanēbeje pexēnatobeje. ¹²Itsamatacabi, juyapijinē jumaitsi paxajawabelia: «Axa, xuanē picani netocopatsiapaebame tapit-sinexa newēnamuto, bajaraxuanē, abaxē apotēpae-atamē, jitsipajē aecoxae tanerajutsijawamē», jai juyapijinē. Nexata, pexēnatobejewawabelia tsicobetsata daxita pexainaejawanēmi. ¹³Paxa perajutsicujinaetsibeje, caematacabibecujinae, juyapijinē xuanē rajutatsi canajeta, pecaetuatsinexa palata. Bajaraxuacujinae jane baja, pona tajēnacuyawabelia. Bajara-jotalia, pijapalatami werebiaba bijiaya pecanacuenebixae, pibisiacuene pexanaponaponaewawata. ¹⁴Nexata, panacuata ponapona, daxita bajarapanacuapijiwi janibocuene tsipatatsi. Bajaraponē peweretsicujinae daxita pijapalatami, piajani bitso tsabiabi. ¹⁵Nexata, jaita penacuenebinexa bajarapanacuata pe-ecaenējawabelia. Bajaraponē itorobatsi pija-iranējawa peto-ewetaponaponaenexa pijamarrano. ¹⁶Nexata, bajaraponē bitso piagianixae, pepenenexa picani ayaijawa jamatabēxaeyabiaba bopocuai, marrano pexae-yabiabijawa. Bajarajota, itsajiwi-ata aporajutsitsi pexaejawanexa. ¹⁷Nexata, belia bajaraponē xaniawaetsia najamatabēxaina. Jamatabējumaitsi: «Taxa pijabota pexaejawa ayaijawa xaina pijajiwi, ayaibitsaēto, piabatsinexa. Tonacopatabiabatsi ayaijawa pexaejawa. Itsiata, xanē majotaje tēpaejitsianē baja, tajani. ¹⁸Nexata, taxajawabelia nawiatsianajē. Jumaitsinē meta tsane taxajawabelia: ‘Axa, pibisiacuene exanajē Diosojawabelia, xamējawabelia-ata. ¹⁹Abejenē raja. Auranē baja cajena xamējawabelia: «Apoxanepanaenē taxēnato», tanejamējawa. ¡Nexata, saya netaema tacatonacuenebinēcuenia!’, janē meta tsane taxajawabelia», jamatabējai juyapijinē.

²⁰»Nexata jane baja, nawiata paxajawabelia. Itsa abaxē tajēwerena najetaruca, pexēnato pexainaenē pewajēnaetaejawata, bitso itaxutobejiobiatane. Nexata, mata-enetsia cujinaejinalia pecopiapitsinexa pexēnato. Nacoxiwaetabarucapona. Copiapitsiaya itabaratsutsunexuaba. ²¹Nexata, pexēnato jumaitsi paxajawabelia: «Axa, pibisiacuene raja exanajē Diosojawabelia, xamējawabelia-ata. Abejenē raja. Nexata baja, apoxanepanaenē taxēnato tanejamējawa», jai paxajawabelia. ²²Itsiata baitsi jane, pexēnato pexainaenē bajarajota jumaitsi pijajiwiawabelia: «¡Naxatsia! ¡Bepijiayo taxēnato patocaponaremena daxita matatoxenetsia pexaniapana, penajumaxuabi-pana! ¡Pajuma-acare! ¡Anillonua pacobesixatare! ¡Zapatonua pataxuxa-tare! ²³¡Penasitsinē becerro papiremelia! Pabeyaxuabianame wajaxaenexa.

¡Fiesta exanaenatsi wajabarëyanexa! ²⁴Barëyatsi tsane, tsipaji raja maponë taxënatoje: ‘Tëpa meta baja,’ siwajamatabëjanë picani. Itsiata, tsaena ponapona. ‘Naxuaba meta baja,’ siwajamatabëjanë picani. Itsiata baja, icatsia patajopa», jai pexënato pexainaenë pijajiwijawabelia. Nexata jane baja, taxuxuaba fiesta pexanaejawa.

²⁵»Bajarapamatacabi, matapijinë pabiabelia nacuenebaponapona. Nexata, penawiatsinë bo itsa imoxoyotanajetaruca, jumetane música. Jumetane-nua peyawajibijawa. ²⁶Nexata, bajaraponë junata paxa pijajiwijawuwënë. Jumaitsi: ‘¿Detsa pitsicuene yabara fiesta pa-exaname?’ jai matapijinë.

²⁷Nexata, paxa pijajiwitonë jumaitsi: ‘Nejuyapijinë baitsi patajopa. Axa nexata pane-itoroba patabeyaxuabinexa becerro, penasitsinë. Jamate-jema tsaena ponapona nejuyapijinë,’ jai bajaraponë matapijinëjawabelia.

²⁸Nexata, matapijinë bitso anaepana. Apojitsipae boyabelia pejonejawa. Nexata, paxa siwapitsaparenatsi. Jumaitsi pexënatojawabelia: «¡Naxatsia! ¡Najonemeya!», jai pexënatojawabelia. ²⁹Itsiata, matapijinë jumaitsi paxajawabelia: «¡Jume! ¡Xanë baja cajena bajayajebi catonacuenebaponaponatsi! ¡Caeto-ata cajena apocajumexuabitsi! Itsiata baitsi jane, caeto-ata aponerajutsimë chivoyo-ata, fiesta tabarë-exanaenexa tayapëtaewi. ³⁰Itsiata, aecnoxae patajopa baja nexënato, ponë wereta nijapalatami petiriawijawabelia. Nexata, tobeyaxuabame becerro, penasitsinë», jai paxajawabelia. ³¹Nexata, bajaraponë jumaitsi pexënatojawabelia: «Taxënato, xamë cajena xanëjawata ponaponame daxitamatacabi. Nexata, daxita xua taxainaejawa nijajawa baja cajena. ³²Itsiata, aeconoxae namatawenonatsi wajabarëyanexa, tsipaji nejuyapijinë: ‘Tëpa meta baja,’ tasiwajamatabëjainëmi, itsiata tsaena asaë abaxë. Penaxuabaponaponaenëmi icatsia baja patajopa», jai pexënatojawabelia —jai Jesús fariseowijawabelia, judiowi pecujarubiwijawabelia-ata.

Jesús tsipaeba jiwijawabelia pecuenecataeliwaisi, pijatuxanenë pecobecowë bijiaya peto-ewetsinëtsi peliwaaisicuenia

16 ¹Jesús pijajiwijawabelia tsipaeba pecuenecataeliwaisicuenia, mapaliwaisije:

—Itsamatacabi, ponapona petuxanenë, bitso pexainaenë. Bajaraponë xaina pijajiwitonë peto-ewetsinënexatsi pecobecowë. Itsiata, belia wënëthane piijawitonë pepëya pecobecowë petoweretaponaejawatsi. ²Nexata, petuxanenë junata pijajiwitonë. Jumaitsi: «Xanë cawënëliwaisitanetsi tapëya tanetowere-taponaejawamë taca-ewetsia-exanaejawa. ¡Netsitajëre pabaxutota matamoya-quinarubame xuanë canajetaponaenë tacobecowë, xuanëna netocomuaponaenë! Nexata baja, itsa netocanawiatsianame bajarapabaxuto, matawëjëa aponeto-ewetsimë tsane tacobecowë», jai pijajiwitonëjawabelia. ³Nexata, pesiwaponaejawata bajarapabaxuto petsitajëtsinexa, pijajiwitonë jamatabë-jumaitsi: «¿Detsaeta xua exanaenajë? Tajatuxanenë baja necapitsapaejitsia tanacuenebijawawecua. Aponecaëjëpae tsane tanacuenebinexa pabi, tajacuata tana-ewetsinexa. Bitso auranëna tsipae itsamonaejawabelia palata amoneya tawajëcaejawa, tana-ewetsinexa. ⁴Yapëtaniji baja pacuenia exanaejitsianë, itsa necapitsapaena tanacuenebijawawecua, itsamonaenë tanecopiapitsinexa pijabota ». ⁵Bajaraponë jane baja penajamatabëcueneweretsicujinae, bajaraponë junatapona daxita pamonaenë abaxë amoneyaba petuxanenë. Nexata,

bajarapamonaē, caenē canacujitsia, patapona bajaraponējawaberena. Copiaya petopatsinētsijawabelia jumaiṡi: «¿Detsa pacuenia amoneyabame abaxē, xua tajatuxanenē pijajawa catsicopatatsi?», jai bajaraponē. ⁶Nexata, piamoneyabinēṡi jumaiṡitsi: «Amoneyabajē abaxē tarajutsinexa ochocientos pagalón-beje aceiteranē», jaiṡi. Nexata, bajaraponē jumaiṡi piamoneyabinēṡijawabelia: «¿Taema mapabaxutotaje xuawajēto amoneyabame! Ayaijawa raja picani. Itsiata, bewelia saya catocopatsianatsi. ¡Bepijiayo yaquinare itsabaxutojawa-belia cuatrocientos pagalón-bejecuenia niamoneyabijawa! Bajarapacuenia saya tajatuxanenē rajutsianame», jai bajaraponē. ⁷Bajaraxuacujinae, icatsia itsanē topatatsi. Nexata, icatsia jumaiṡi bajaraponējawabelia: «¿Jica xamē? ¿Detsa pacuenia amoneyabame?», jai. Nexata, bajaraponē jumaiṡitsi: «Amoneyabajē abaxē tacarajutsinexa cien pabultobeje trigoxu», jaiṡi. Nexata, bajaraponē jumaiṡi piamoneyabinēṡijawabelia: «¿Taema mapabaxutotaje xuawajēto amoneyabame! Ayaijawa raja picani. Itsiata, bewelia saya catocopatsianatsi. ¡Bepijiayo yaquinare itsabaxutojawabelia ochenta pabultobejecuenia niamoneyabijawa! Bajarapacuenia tajatuxanenē rajutsianame», jai bajaraponē. Bajarapacuenia exanapona daxita piamoneyabiwiṡijawabelia, pesiwajamatabēcuenexanepanaenexatsi, xaniawaetsia pecopiapitsinexatsi pijabota penaponaponaenexa, pijatuxanenē itsa nawecuacapsapatsi. Nexata jane baja, daxita pamonaē amoneyaba tocanawiabatsi. Bewelia matamota peto-itanerutaponaebaxutonēṡi. ⁸Petocanawiatsicujinae, pabaxutojawata matamoyaquinapona xuanē comuaca, xuanē-ata canajeta, nexata pijatuxanenē siwa-itaxutuanabenajacatsi, penatsiwajēnaejaiṡisixae pamonaē copiapitsiṡitsiatsi; piacujirubejenē-ata petsiyapētaenēcuenia penacuenebixae. Mapanacuapijiwije, bitso batsiyapētane pacuenia exanaejitsia, Dioso pexi pexanaecuenewecua Dioso pijajiwiwecua —jai Jesús pijajiwiwajawabelia.

⁹Icatsia, Jesús jumaiṡi pijajiwiwajawabelia:

—Bajaraxuata, pacamuxujiobatsi. Mapanacuapijipalatata xaniawaetsia pacanacuenebianame paneyawenonaejawata itsamonaejawabelia, panexainaenexa ayaibitsaēto papecasiwajamatabēcuenexanepanaewi. Pacuenia pijatuxanenē pecobecowē peto-ewetsinē, pesiwajamatabēcuenexanepanaewiṡi xaina, xaniawaetsia pecopiapitsinexatsi pijabota penaponaponaenexa, bajarapijinia pacuenia, paxamē-ata athēbētatsia paxainaename papecapiapitsiwinexa papecasiwajamatabēcuenekarēyawī. Nexata, pamatacabi patēpaename, itsajota apopanamatawenonaemē tsane palata, Dioso pacacopiapitsiana apopewerewerecaebonējawatatsia —jai Jesús pijajiwiwajawabelia.

¹⁰Icatsia, Jesús jumaiṡi pijajiwiwajawabelia:

—Pajiwi nacobecowē eweta xaniawaetsia, tsiquirijawayo-ata, nexata pecunuacuenejawa-ata xaniawaetsia ewetsiana. Pajiwi itsanē pecobecowē bijiaya to-eweta, tsiquirijawayo-ata, pecunuacuenejawa-ata bijiaya to-ewetsiana. ¹¹Bajaraxuata, paxamē mapanacuapijipalata bijiaya itsa pa-ewetsipame, ¿detsa nexata pacuenia xaniawaetsia pacacuenecaējēpaejitsipa panenacuenebijawa Dioso pijapexaniajaicue, xua picani bitso namatamota matatoxenetsia, mapanacuapijicuenewecuae? ¹²Itsa paxamē xaniawaetsia apopato-ewetsimē tsipae itsajiwi pijajawa mapanacuata, xua pacatsicopata papecato-ewetsinexa, ¿jipatsa nexata pa-ewetsia-exanaejitsipa bitso penamatamotsijawa, xua picani pacatoxaina panijajawanexa?

¹³»Itsa jiwi-ata acuenebi caecuenia petonacuenebijawa anijanēbeje pijatu-xanenēbejewabelia, tsipaji caenējawabelia bitso jitsipaejitsipa petonacuenebijawa. Itsanējawabelia apojitsipae tsipae petonacuenebijawa. Bajarapijini pacuenia, apoxanepanae caecuenia pejitsipaejawabeje anijacuenēbeje, Dioso pijacuene, palatacuene-ata, bajarapacuenēbeje pataeyaniwa bepijatu-xanenēbeje. Belia bitso asiwa tsipae Dioso. Itsa jume, asiwa tsipae palata. Nexata, tonacuenebijitsipa xua bitso asiwa —jai Jesús pijajiwijawabelia.

¹⁴Bajarajota, fariseowi, bitso palata pejitsipaewi, jumetaeyena Jesús pet-sipaebiliwaisi pijajiwijawabelia. Nexata, bajarapamonae jumecapocaponatsi.

¹⁵Jesús nexata jumaitsi fariseowijawabelia:

—Paxamē pajitsipabiabame jiwi papecataejawa bepapexaniajamatabēcuenewimē itsamonae pitabarata. Itsiata baitsi jane, Dioso pacajamatabēcueneyapētane pexaniajamatabēcuenē apopanexainaewicuene. Pacuenējawanē yabara jiwi bitso tsitapexaniacuenetsi, bajarapacuenē juya Dioso apotsitape-xaniacuenetsi —jai Jesús fariseowijawabelia.

**Paepatota Jesús taxuxuaba pepaebijawa Dioso pijajiwi
peyanacua-ewetsijawanexa, bajarapaepatota aliwaisimatamobi
Dioso penajumecopatsiliwaisi Moisés-pijinēta jiwi
pejonejawanexa Dioso peyanacua-ewetsinacuajawabelia**

¹⁶Icatsia, Jesús jumaitsi fariseowijawabelia:

—Juan, jiwibautizabinēmi, peponaponaematacabita copiaruca peliwaisimatamotsijawami Dioso penajumecopatsiliwaisi Moisés-pijinēta, profetawi pepaebiliwaisianē-ata. Itsiata, Juan-pijinē pepatsicujinae, pexanaliwaisi tsi-paebaponajē, Dioso pijajiwi peyanacua-ewetsijawanexa. Nexata, daxitajiwi bitso jitsipa penajonenexa Dioso pijanacuayabetsia.

¹⁷»Mapanacuaje, itaboxo, ira yajawa, jemata werewerecaena. Itsiata baitsi jane, apojumenaxuabi tsane caejumeyo-ata, Dioso paliwaisi najumecopata Moisés-pijinēta. Daxita pacuene yabara tajēwelja wajunupaeba bajarapali-waisita, pepacuene copiapatsiana —jai Jesús fariseowijawabelia.

**Jesús liwaisi tsipaeba penacojobinē pijawa pewecuanawiatsiyaniwa
(Mt 19:1-12; Mc 10:1-12)**

¹⁸Icatsia, Jesús jumaitsi fariseowijawabelia:

—Ponē pijawa wecuanawiata, icatsia itsawa itsa pita, bajaraponē pibisiacuenē exana. Nexata, naneconita Diosojawabelia, tsipaji pepopijawawecua jaita itsawa. Dioso cajena abaxē bajaraponē pexuabiwa pepopijawacuenia totanetsi. Ponē-ata itsanē pexuabiwa pita, pibisiacuenē exana. Nexata, naneconita Diosojawabelia, tsipaji itsanē pijawa yacajērēta, powa abaxē Dioso tanetsi itsanē pepopijawacuenia —jai Jesús fariseowijawabelia.

Pecobecowē bitso pexainaenē, Lázarobeje peliwaisi

¹⁹Icatsia, Jesús tsipaeba daxitacuene bitso pexainaenē, Lázarobeje peliwaisi fariseowijawabelia:

—Bitso pexainaenē ponapona. Caematacabi canacujitsia, pecobecowē naxatababiaba pexaniawirijawanē, bitso penamatamotsijawanē. Nawitsia pexaniawiria pexaejawa xaeyabiaba. ²⁰Bajaraponē pijabo matatoyorotsia

peyacaranatsi-ibopanaxanetojumawelia baupamuxuneneta, bepejiobinē, Lázaro, boquecabiaba. Daxitanēreca perabētsabana. ²¹ Jamatabēxaeyabiaba picani bitso pexainaenē pexaeyabiabijawata piothopaepērē mesabēxēpanareca. Awirixi-ata patabiaba itsajota bocabiaba, petsabanaejawa peraebine-xatsi. ²² Belia baja, Lázaro tēpa. Petēpaecujinae, ángelewi caponayatsi itsajotatsia^a Abraham-pijinē petēpaecujinae ponapona. Bajaraxuacujinae, bitso pecobecowē pexainaenē-ata baja tēpa. Mēthētatsi.

²³ »Bitso pecobecowē pexainaenēmi petēpaecujinae, pata itsajotalia petēpaewi jinawanapa nawixaetaeya. Nexata, bajaraponē athēbēa benaē-cotsia. Taenutsia Abraham pewaetabanucaejaawa namipabēcataitsiaya Lázarojawabelia. ²⁴ Nexata, bitso pecobecowē pexainaenēmi wawajai. Jumaitsi Abraham-jawabelia: «¡Amo, Abraham, nitaxutotsoniataema! Neto-itorobimica Lázaro. Nacobe-upijabutsi merata ne-ebarẽtocaïnejebia-exanaejitsia, tsipaji raja bitso jamatabēfaenajē mapatajutaje», jai bitso pecobecowē pexainaenēmi. ²⁵ Nexata, Abraham jumaitsi bajaraponēmijawabelia: «¡Tamomo, najamatabēnapire! Pamatacabi abaxē asaēmē tsaponaponaē nenaexanaē-irata, ēpexaniacuene picani xainame. Lázaro pijinia pamatacabi abaxē asaē tsaponaponaē, bitso picani bejiobi. Itsiata juya, mapamatacabije pexaniacuenia majotaje catsuponapona. Xamē pijinia nawixaetaeya ponaponame. ²⁶ Orijibia, waxaitsi nacanawecuanatsia-exana piniji-itapajanitoxaneto. Bajaraxuata nacato-ayapēbeje namata-enetsia wajanicabijawa. Paxanē-ata paneto-acuenebi pataponaejaawa bajarabereca, paxamē-ata pijinia pacato-ayapēbeje panepatsinexa paxanējawabetsina», jai Abraham.

²⁷ »Nexata, icatsia bitso pecobecowē pexainaenēmi jumaitsi Abraham-jawabelia: «Amo Abraham, pexaniacuene cawajētatsi. Tonajume-itorobianame Lázaro taxā pijaboyabelia. ²⁸ Bajarajotalia, xainajē cinco ponēbeje tajuyapijiwi. Bajarapamonaējawabelia Lázaro tsipaebiana, muxu-jiobiananua, pepatsiyaniwa mapanawixaetaeyabiabinacuayaberenaje», jai bitso pecobecowē pexainaenēmi. ²⁹ Nexata, icatsia Abraham jumaitsi bajaraponējawabelia: «Bajarapamonaē baja xaina Moisés-pijinē, profetawi-ata peyaquinaeliwaisianē. Nexata, nejuyapijiwi itsa apojitsipae tsane peponaenexa bajarapanacuayabelia, jumecowēnētsiana bajarapamonaemi peyaquinaeliwaisianē», jai bitso pecobecowē pexainaenēmijawabelia. ³⁰ Bitso pecobecowē pexainaenēmi icatsia jumaitsi Abraham-jawabelia: «¡Jume raja! Tajuyapijiwi apojumecowēnētsi tsane cajena bajarapaliwaisianē. Itsiata, itsajiwi itsa asaē tsane petēpaecujinae penawiatsinexa pecowēyabelia, tsipaebiana bajarapamonaējawabelia. Nexata, copabiana pibisiacuene

u 16:22 *itsajotatsia*: Bajarapataxunae wēnēruba, «Abraham pemipabē nacua». Bajarapamatacabi judiowi canaējēta pejinawanapaenexa daxita petēpaewi pejumapiānē peponaejaawa caetaxunaejawabelia. Bajarapataxunae yatu-ucuta anijataxunaebejenexa. Caetaxunae petajueyabiabita-xunae, itsajota daxita pamonaē Dioso apojeumecowēnētsi naneconitsiaya jinawanapaejitsia daxitamatacabijawabelianexa. Bajarapataxunae wēnēruba Hades nacua. Itsayatu-ucutsitaxunae pijinia jamatabēcuenabarēyaya pejinawanapaenacuānexa pamonaē pesiwanajamatabēcuenecopabiwi Diosojawabelia. Bajarapataxunae wēnēruba Abraham pemipabē nacua, tsipaji canaējēta Abraham-pijinē penamipabēcataitsijawanexa daxita pamonaē Dioso pijajiwi, petēpaecujinae. Nexata, bajarapanacuabejtuatujēta ruca pinijifotoxaneto, jiwi penicabiyaníwa itsanacuajawabelia.

pexanabiabijawa. Najamatabëcuenepëñëyorotsiananua Diosojawabelia», jai Abraham-jawabelia. ³¹ Nexata, icatsia Abraham jumaitsi bajaraponëmi-jawabelia: «Nejuyapijiwi itsa apojumecowënëtsi Moisés-pijinë, profetawi-ata peyaquinaeliwaisianë, nexata pajiwi asaë petëpaecujinae, mawelia ponae-ata tsipaeje petsipaebinexa nejuyapijiwijawabelia, itsiata, apojumexaniatae tsipae bajarapajiwi-ata petsipaebiliwaisitsi», jai Abraham bitso pecobe-cowë pexainanëmijawabelia —jai Jesús fariseowijawabelia, peyapëtaeya-exanaejawata bijjata pecanaëjëtsixae palatacuene yabara.

Jesús cujaruba pijajiwi penayajiwitaenexa xuanë tsiyaijitsiatsi, itsajiwi pejamatabëcuene-ëjëbijawatatsi pibisiacuene pexanaeya-exanaenexatsi
(Mt 18:6-7,21-22; Mc 9:42)

17 ¹ Itsamatacabi, Jesús jumaitsi pijajiwijawabelia:
—Mapanacuataje nawita picani jiwi pejamatabëcuene-ëjëbijawanëtsi, pibisiacuene pexanaenexa. Itsiata, pajiwi pejamatabëcuene-ëjëbicuenia itsajiwi pibisiacuene exanaeya-exana, ayaineconi natsi-exana Diosojawabelia. ² Nexata, bajarapajiwi pejamatabëcuene-ëjëbiwajënaeya tanesiwanajamatabëcuenecopabiwi, toxanepanatsi picani ibotoxanetota pewësicëtsinexatsi, pepomenetuatuajëareca pexuabinexatsireca, peto-copiapatsiyaniwatsi ayaicuenia Dioso penaneconitsia-exanaejawatsi. ³ ¡Nexata, xania! ¡Panayajiwitaema pibisiacuene pane-exanaeyaniwa, itsajiwi panejamatabëcuene-ëjëbijawatanua, pibisiacuene pane-exanaeya-exanaeyaniwa!
»Itsiata, itsanë panenajuasiwanajamatabëcuenecopabiwi Diosojawabelia pibisiacuene itsa pacato-exanaejitsipa, xaniawaetsia pacuene-itawetsianame panemuxujibijawata. ¡Nexata, itsa najamatabëcuenepëñëyorota bajaraxuawecua, itsa pacanawajunupaebiananua pecopatsijawanexa, pasiwajamatabëcuenecaeware! ⁴ ¡Caematacabita, siete xuabeje pibisiacuene itsa paca-exana, itsiata, caepapecato-exanae canacujitsia itsa pacanawajunupaebaponaena penajamatabëcuenepëñëyorotsijawa, bajaraxuabeje pasiwajamatabëcuene-caeware! —jai Jesús pijajiwijawabelia.

**Jiwi bejamatabëcuenewitsabapona Dioso
pitaxutuajamatejemajawa pewajënaeyabelia**

⁵ Itsamatacabi, Jesús pija-apóstolewi jumaitsi Jesús-jawabelia:
—¡Patajatuxanenë, paneyawenonare patajamatabëcuenewitsabinexa pata-itaxutuajamatejemajawa Diosojawabelia! —jai.

⁶ Nexata, Jesús jumaitsi pija-apóstolewijawabelia:
—Mostazaxutoyo, tsiquirixutoyo-ata, itsa ubatsi bepijia juwa. Wit-sabanua. Paxamë-ata itsa paxinaejitsipame tsiquirijawayo pane-itaxutuajamatejemajawa Diosojawabelia, bajaraxua pacatonaexanaena ayai-jawa. Nexata, itsa pajamatabëjumaitsimë tsipae: «¡Xaniajai cajena! Dioso cuenecaëjëpatsi daxitacuene pexanaenexa», itsa pajamatabëjamë tsipae, nexata paxamë-ata pacacuenecaëjëpaejitsipa ayaicuenene pane-exanaenexa. Nexata, itsa pajumaitsimë tsipae mapanaejawaxanetojawabeliaje: «¡Yatabu-topaya natixire! ¡Nucaename pucaxanetotatuajëtalial!», itsa pajamë tsipae, nexata naejawa pacajumecowënëtsipa —jai Jesús pija-apóstolewijawabelia.

**Jesús pijajiwi betonacuenebawanapa Dioso
caejamatabëcueneliwaisita itsajamatabëcuene xainaenejewa**

⁷Icatsia, Jesús jumaitsi pija-apóstolew jawabelia:

—Paxamëyajuwënënë xinaejitsipa pijajiwitonë. Nexata, pitorobicueniatsi, pijatuxanenë to-ira catafunuca ponaponaejitsipa, itsa jume, ovejabitsaëto to-eweta ponaponaejitsipa. Nexata, penacuenebinë penawiatsicujinae, patsipa pijaboyaberena. Nexata, petuxanenëxae, pijajiwitonë jawabelia apojumaitsi tsipae: «¡Jonemena baja! ¡Ecare, nexaejawa tacarajutsinexa!», apojai tsipae pijajiwitonë jawabelia. ⁸ ¡Jume baja cajena! Biji rajane, jumaitsi tsipae pijajiwitonë jawabelia: «¡Neto-exanare taxaejawanexa! Nexata, abaxë taxaejawata ne-ewetanucaename. Bajaraxuacujinae, xamë naxaename», jai tsipae pijajiwitonë jawabelia. ⁹ «Xanepana rabaja. Pexaniacuen bitso neto-exaname», apojai tsabiabinua, petonacuenebabiabijawatsi yabara. Bajarapacuenia apojumaitsi tsabiabi, tsipaji saya pijajiwitonë tsaponaponae. Nexata, pacuenia pijatuxanenë itorobatsi, bajaraponë exanabiabijitsipa. ¹⁰ ¡Bajarapacuenia paxamë-ata, Dioso papijajiwixaemë, patonacuenebawanapare papeca-itorobicuenia, itsajamatabëcuene paxainaenejewamë! ¡Itsa patoweretsianame daxita Dioso papeca-itorobicuenia panetonacuenebawanapaejawa, pëtsa pa-ewetame Dioso pexaniajamatabëcuene papecarajutsijawa paneto-exanawanapaejawa yabara! ¡Biji rajane, pajumaitsimëre Diosojawabelia: «Paxanë saya panijajiwinë. Nexata, panetsicaruca patacato-exanawanapaenexa patane-itorobicueniamë. Bajaraxuata, apopaxainaenë itsacuenejawayo-ata xua yabara pexaniajamatabëcuene panerajutsijitsiamë», pajamëre! —jai Jesús pija-apóstolew jawabelia.

**Jesús jamatejemaya-exana diez ponëbeje,
bajayajebi bitso peperabëtsabanaewi**

¹¹ Jesús penajetarucaejawata Jerusalén tomarabelia, najetaruca itsaxuayo Samaria nacza, Galilea nacuabeje namuxunenecaxitajarababeje.

¹² Itsa baja Jesús patsijitsia tsiquiritomarayojawabelia, mata-enenatsi diez ponëbeje, bajayajebi bitso peperabëtsabanaewi. Itsiata, tajëyo bajarapamonae wecuanubena-othopatsi. ¹³ Bajarapamonae ayaijumeta jumaitsi Jesús-jawabelia:

—¡Jesús, pane-itaxutotsoniataema! —jai.

¹⁴ Nexata, Jesús itsa tane bajarapamonae, jumaitsi:

—Panaitajëtsianame sacerdotewijawabelia papecaperabëtaenexa —jai Jesús bajarapamonaejawabelia.

Nexata, bajarapamonae pona sacerdotewijawabelia. Namuto-epatualia penajetarubenaejawata, perabë xanepana najetarubena, patsinejewasacerdotewijawabelia. ¹⁵ Daxita bajarapamonae peperabë xanepanaejawa itsa natane, nexata caenë bajarapamonae yajuwënënë nawiatega Jesús-jawabelia. Bajaraponë namutua ayaijumeta Diosojawabelia jumaitsi tsanajetarucæ: «¡Diosomë, bitso ayaijamatabëcuenenëmë! ¡Tawitanewawami baja, nejamatejemaya-exaname!», jai tsanajetarucæ Diosojawabelia. ¹⁶ Bajaraponë itsa pata Jesús-jawabelia, pematabacabëta irataeya bocajunua, penajamatabëcuene-itajëtsinexa pexaniajamatabëcuene perajutsijawa. Bajaraponë Samaria nacuapijinë.

¹⁷Nexata, Jesús jumaitsi bajarajota penubenaewijawabelia:

—¿Diez tsaja ponēbeje bitso peperabētsabanaewi apojamatejemaya-exanaenē? ¿Detsa xuajitsia meta daxita aponajuapatsi? ¹⁸Maponēje, caenē, saicaya nacuapijinē, apojudíonē-ata, nawiateca pexaniacuenia pewēnēxaniatsinexa Dioso, bitso ayaijamatabēcuenenē yabara —jai Jesús bajarajota penubenaewijawabelia, Samaria nacuapijinē yabara.

¹⁹Nexata, Samaria nacuapijinējawabelia Jesús jumaitsi:

—¡Nonotapunare! ¡Ponare baja! Jamatejemamē rabaja, tanesiwanajamatabēcuenecopatsixaemē xanējawaberena —jai Jesús.

**Jesús wajunupaeba pecopiapatsijawa baja, Dioso pijajiwi
peyanacua-ewetsijawa mapanacuataje**

(Mt 24:23-28,36-41)

²⁰Itsamatacabi, itsamonae fariseowiyajuwēnēwi, jumaitsi Jesús-jawabelia:

—¿Detsa paepatota copiapatsiana Dioso pijajiwi peyanacua-ewetsijawa mapanacuataje? —jai fariseowi.

Nexata, Jesús jumaitsi fariseowijawabelia:

—Dioso pijajiwi peyanacua-ewetsijawa mapanacuataje, apowajacopiatējawa waja-itaxutota. ²¹Nexata, itsajiwi-ata apocaējēpaetsi pejumaitsinexa Dioso pijajiwi peyanacua-ewetsijawa yabara: «Copiapata rabaja majotaje. Itsa jume, copiapata rabaja bajarajotalia», pejainexa. Dioso rabaja aeconoxae yanacua-ewetapona² pijajiwi paxamētuatujēta —jai Jesús fariseowijawabelia.

²²Nexata, Jesús tajēwelia nawajunupaeba pijajiwiawabelia daxita mapanacupijiwi peyanacua-ewetsijawanexa yabara. Jumaitsi mapacueniaje:

—Itsamatacabijawabelia, paepatota pacatocopiapatsiana piayapēbejeliwaisianē, cae-epatoyonexa-ata bitso picani, pajiitsipaename panetaējawa Xanē, Daxitajiwi Pematapijinēnē, patacayanacua-ewetsijawa mapanacuataje. Itsiata baitsi jane, apopataemē tsane tayanacua-ewetsicuenē. ²³Nexata, itsamonae pacajumaitsi-ata tsane: «Majotaje, itsa jume, bajarajotalia eca Cristo, mapanacua pepopeyanacua-ewetsinēje», pacajai-ata tsane xanē yabara. ¡Itsiata, pētsa paponame panetaenexalia! ¡Pētsa bajarapamonae pepēta panamuxunaponamenua! ²⁴Yamaxē itsa niwejai tsajuni athēbēwetsica, caecuenia jiwi bacotiatane daxitajawa. Bajarapijinia pacuenia, Xanē, Daxitajiwi Pematapijinēnē, daxitajiwi caecuenia netaena pamatacabi patsianicajē, tayanacua-ewetsinexa mapanacuapijiwi. ²⁵Itsiata, bajarapacuenia tayanacua-ewetsiwajēnaeya, mapamatacabijawa mapanacuataje pejinawanapaewi, copiya ayaicuenia nebejiobia-exanaena. Nenawixaetaeya-exanaenanua. Necuene-aebiana Dioso athēbēwetsica tane-itorobinēcuenetsica. ²⁶Pacuenia bajayata jiwi ayaicuenia exanawanapa pibisiacuene, Noépjinē peponaponaematacabita, bajara-icatsia itsi tsane, Xanē, Daxitajiwi Pematapijinēnē, pamatacabita icatsia patsianicajē. ²⁷Bajarapamatacabita, jiwi picani xaniawaetsia jamatejema pexaējawa xaewanapa. Apaewanapanua. Nacojiobapona itsamonae. Itsamonae pexēnatowaxi

v 17:21 *aeconoxae yanacua-ewetapona*: Bajarapamatacabi Jesús, Dioso pitorobinētsicaxae, eweta Dioso pijajiwi. Orijibia, maparucae-ataje tsiteca yajawajamatabēcuenē-eweta Dioso pijajiwi daxitanacuanējawa peyanacua-ewetsinēcuenia.

pebijawabelia canajetapona petonacojiobinexatsi. Bajarapamonae jamatejema saya jinawanapa, nasiwajamatabëcuenebëjainejewa pijaneconi. Pae-pato apocanaëjëtsi penaneconitsia-exanaejawanexatsi, bajarapamatacabita Noëpijinë ëpijamonae pinijibarcojawabelia barëjunua. Jemata mera ira itsa bubuta, nexata daxitajiwi merata bubuna. Bajarapijinia pacuenia, itsi tsane pamatacabi jemata itsa patsianicajë. ²⁸ Bajarapijinia pacuenia, itsi bajayata Lot-pijinë peponaponaematacabi. Jiwi saya jamatejema jinawanapa, siwajamatabëcuenebëjainejewa pijaneconi. Pexaejawa xaewanapa. Apaewananpanua. Comuacapona. Canajetapona. Ubapona pijapabianë. Pijabonë-ata nacuenebapona. ²⁹ Itsiata baitsi jane, paepato apocanaëjëtsi penaneconitsia-exanaejawanexatsi pijaneconi yabara, bajarapamatacabita Lot-pijinë Sodoma tomara wecuapitsapa. Nexata, jemata athëbëwetsica pinijicuenia isotonë othopaica, pitarunutsi-azufre-ibotonë yajawa. Nexata, daxita Sodoma tomara-pijiwiimi tajuatsi. Nexata baja, werebiabatsi. ³⁰ Bajarapijinia pacuenia, icatsia jemata itsi tsane pamatacabi Xanë, Daxitajiwi Pematapijinënë, jemata icatsia patsianicajë.

³¹ »iBajarapamatacabi,«^w pajiwi athëbëyo bojumatatsia ecaya, perunaecuinaetsica, pëtsa siwanajamatabëxaina pijabo-ënëalia pebobenaejawanë pepitsinexa! iPajiwi pijinia pijapabita nacuenebaponapona, pëtsa najamatabëxaina penawiatsinexa pijaboyabelia! ³² iPanajamatabënapire pacuenia bajayata Lot-pijinë pijawami exanatsi! Bajarapowami pesiwanajamatabëxainaexae pecobecowë, mapanacuapijicue, napijiwitaeyojopa. Nexata, bajarapowami naexana yajo-ibotowa.^x ³³ Pajiwi siwanajamatabëcuenebëjai mapanacuapijiwicueje, pecabarëyanexa pexinaejawa, wecuanaxuabiana matacabi apopewerewerecaejawa. Pajiwi pijinia aposiwanajamatabëcuenebëjai mapanacuapijicue pexinaejawanexa, bajarapajiwi xainaena matacabi apopewerewerecaejawa.

³⁴ »Pamatacabi patsianicajë, bajarapamerawi anijajiwi beje majitanucaenabeje caecamata. Caejiwi pitsianatsi ángelnë.^y Itsajiwi pijinia

w 17:31 *Bajarapamatacabi*: Pamatacabi imoxoyo pewajënae Cristo pepatsijawanexatsica, peyanacua-ewetsinexa daxita mapanacuapijiwi, copiaya ayaicuenia naneconitsia-exanaena mapanacuapijiwi pecuene-aebixaetsi Dioso pitorobinëtsicacue. Apoc. cap. 5—cap. 19-jawabelia. Bajaraxuata, Jesús itoroba jiwi bepjiayo penajetabijirawinexa pepanepaenexa Dioso penaneconitsia-exanaejawawecua, pacuenia itorobatsi picani bepjiayo peponaenexa Lot-pijinë pijawami. Itsiata, bajarapowa pecobecowëjanë pesiwanajamatabëcuenebëjaixae, pijamonae-ata, yajawatëpa pijaneconi pexinaewi Sodoma tomarapijiwi. (Penajetabijirawijawa nacatocuenecatane pesiwanajamatabëcuenecopatsinexa Cristojawabelia, tsipaji to-acuenebitsi jiwi penajetabijirawijawa Dioso penaneconitsia-exanaejawaminexawecua). **x 17:32** *yajo-ibotowa*: Taema Gén. 19:26 Bajarapowa aposiwabëjai ëpecobecowë. Bitso yajawanajamatabëxaina pexi, pemomoxi-ata, tsipaji yajawayamatatajuejitsia Sodoma tomarapijiwi pejume-aebixae ángelnëbeje peliwaissi. **y 17:34** *pitsianatsi ángelnë*: Jesús tajëwelia pewajunupaebixae pamatacabi yanacua-ewetsijitsia daxita mapanacuapijiwi, yapëtanetsi pajiwi ángelnë pitsijitsiatsi, bajarapajiwi Jesús-jawabelia apopesiwanajamatabëcuenecopatsijiwi yabara jumaitsi. Baitsi, pibisiacue pexanaponaponaajiwi. Nexata, ángelnë pitatsi pecaponaenexatsi penaneconitsia-exanaenacuajawabelia. Pajiwi pijinia, copatanutatsi, bajarapajiwi Jesús-jawabelia pesiwanajamatabëcuenecopatsijiwi. Nexata, nacopatsiana mapanacuataje, pejinawanapaenexa Cristo peyanacua-ewetsinacua mil pawabejecuenia. Itsiata, itsamona, Dioso peliwaissi pecujarubiwi, itsacuenia canaëjëta. Bajarapamonae, canaëjëta pacuenia Jesús tajëwelia wajunupaeba pamatacabi athëbëyo, itaboxotatsia, patsiana pepitsinexa daxita pamonae, pesiwanajamatabëcuenecopabiwi bajaraPonëjawabelia. ITs 4:16-18. Nexata, bajarapamonae canaëjëta ángelnë pepitsiwi, pajiwi pesiwanajamatabëcuenecopatsijiwi Jesús-jawabelia. Pajiwi pijinia pecopatsijiwi, pibisiacue pexanaejawa.

copatabuatsianatsi. ³⁵ Anijawabeje pijinia najuacuabanucaeabeje caejawata. Nexata, caewa pitsianatsi. Itsawa pijinia copatanutsianatsi. ³⁶ Anijanebeje pijinia najuanacuenebanucaeabeje pabita. Caenë pitsianatsi. Itsanë pijinia copatanutsianatsi —jai Jesús tajëwelia pijajiwijawabelia.

³⁷ Nexata, pijajiwi itsa jumetane bajarapacuenia Jesús pejumaitsijawa, bajarapamonae jumaitsi:

—Patajatuxanenë, ¿detsa jota bajarapacuenia naitajëtsiana? —jai.

Nexata, Jesús jumaitsi tajëwelia pijajiwijawabelia:

—Pacuenia jiwi itsa tane quequeremonae penacaetuatsijawa, bayapëtane bajarajota pebocaejawa petëpaenë, bajarapijinia pacuenia daxitajiwi bepijia netaena tapatsijawatsica —jai Jesús pijajiwijawabelia.

**Jesús tsipaeba pecuenecataeliwaisicuenia pijajiwijawabelia,
jueznë, pamona pewecuatëpaewatsibeje, peliwaiasi**

18 ¹ Itsamatacabi, Jesús tsipaeba mapaliwaisije pijajiwijawabelia, piajamatabëcuenesaëya-exanaenexa jamatabëcuenecueranaenejewapewajëtabiabinexa Diosojawabelia. ² Jumaitsi pijajiwijawabelia:

—Tomarata ponapona jueznë, petocanaëjëtsinë jiwi penaneconitsia-exanaecuenë. Bajaraponë apoheyaiyataenë Dioso, jiwijawabelia-ata.

³ Bajarapatomarata pijinia ponapona pamona pewecuatëpaewatsi. Bajarpowa ponabiaba jueznë-jëjawabelia pejumaitsitsabiabinexa: «¡Xaniawaetsia neliwaisi yawenonare, paliwaisi natsixainajë tane-itoyanëjawabelia!», pejaitsabiabinexa jueznë-jëjawabelia. ⁴ Itsiata abaxë, bajayajebi jueznë apojamatabëcueneyawenonae bajarapowa. Napëna pepatabiabixae, belia jueznë jamatabëjumaitsi: «Xanë picani Dioso cujunawiaya apotaponaponaenë. Tawënajiwi-ata apotayaiyataenë. ⁵ Itsiata, mapowaje tanejamatabë-itonotabiabixae, liwaisi yawenonaenajë pacuenia nitorobabiaba. Nexata baja, matawëjëa apopatabiabiarena tsane xanëjawaberena, tanejamatabëcuenë cueranaëya-exanaeyaniwa», jamatabëjai jueznë —jai Jesús pijajiwijawabelia.

⁶ Orijibia, Jesús jumaitsi pijajiwijawabelia:

—Bajarapacuenia jueznë najamatabëxaina, pibisiamatabëcuenenë-ata. Yawenona bajarapowa, asaëya pewajëcabiabixae. ⁷ Bajarapijinia pacuenia, Dioso-ata pijajiwi yawenonaena, pamonaen penato-itapetsiwi, paepatota itsamonae pibisiacuenë to-exanatsi. ¡Paxamë pacatsita cuenenajematsi-ata, pëtsa pacuene-aebame papecayawenonaejawanexa! Biji rajane, itaxutuajamatemajaya Diosojawabelia pawajëtabiabiabianame matakabijebi, merawi-ata. ⁸ Xaniajanë pacuenia pacatsipaebijitsiatsi. Dioso raja apocunenajematsi tsane papecayawenonaenexa. Itsiata, pacayanijobatsi mapacueniaje. Pamatacabi Xanë, Daxitajiwi Pematapijinënë, icatsia patsianicajë, ¿caxitajarabianajë tsaja abaxë tanejumexaniataewi tapatsijawanexatsica Cristocuenenë? —jai Jesús pijajiwijawabelia.

**Jesús tsipaeba jiwijawabelia pecuenecataeliwaisi, fariseonë,
impuestojamatabëcuenë pematamoyanijobinëbeje, peliwaisicuenia**

⁹ Itsajota Jesús jiwi liwaisi tsipaeba, bajarapamonaetuatuajëta nubena itsamonaewecua pijacuata aneconijibia bepenataewi.

Nexata, bajarapamonaewawabelia Jesús tsipaebe mapaliwaisi. Jumaitsi mapacueniaje:

¹⁰—Anijanëbeje pona templojawabetsia, pewajëtsinexabeje Diosojawabelia; fariseonë, itsanë impuestojamatabëcuene pematamoyanijobabiabinë. ¹¹Nexata, fariseonë pewajëtanucaejawata Diosojawabelia, bitso bepexaniajamatabëcuenenë nataeya jumaitsi mapacueniaje: «Diosomë, pexaniajamatabëcuene carajutatsi, tsipaji pacuenia itsamonaewawatabëcuene-itsi tsenae, bajaraxanë apojamatabëcuene-itsinë. Xanë yamaxë-itojorobiaya jiwi apotawecuanacobetoxotsinë. Apotacujirubejenë cajena. Apotajaitsinë itsawa tajawawecua. Pacuenia maponëje, impuestojamatabëcuene pematamoyanijobabiabinë jamatabëcuene-itsije, bajaraxanë apotajamatabëcuene-itsinë. ¹²Caesemana canacujitsia, anijamatacabibeje, najamatabëcuene xania-waetsiaya ponaponabiabajë xaenejewanë taxaejawa, tanajamatabëcuene-itajëtsinexa tasiwajamatabëcuenebëjajawa pibisiacuene ta-exanaejawa yabara. Daxita pacuene nacanabajë, diez xuabeje yajuwënëjawa, caejawa, xamëjawabelia carajutabiabatsi ofrendacuena», jai tsanucaewawacueniaje fariseonë templobota pewajëtsijawata Diosojawabelia. ¹³Juya, ponë, impuestojamatabëcuene pematamoyanijobabiabinë, pewajëtsijawata Diosojawabelia tajëyo nucalia pia-uraxae. Athëbëabetsia-ata penawëyotsijawa cujunawa. Namëpabëbenuca pecobeta, pejamatabëbëjajaxae pibisiacuene pexanaeneconi yabara. Nexata, bajaraponë Diosojawabelia pewajëtsijawata jumaitsi mapacueniaje: «¡Diosomë, nitaxutotsoniataema! ¡Pibisiacuene cajena bitso xanë exanabiabajë!», jai bajaraponë templobota pewajëtsijawata Diosojawabelia. ¹⁴Xaniajanë pacuenia pacatsipaebijitsiatsi. Ponë impuestojamatabëcuene pematamoyanijobabiabinë, bajarapacuenia pewajëtsixae Diosojawabelia, Dioso baja wecua-ajibia-exanatsi pibisiacuene pexanaenecomimi. Nexata baja, bajaraponë nawiata pijaboyabelia pianeconijibinë. Juya, ponë aneconijibia nataeya nawajëta Diosojawabelia, bajaraponë pijaneconi yajawa nawiata pijaboyabelia, be-ayaijamatabëcuenenë penataexae, pewajëtsijawata Diosojawabelia. Bajaraxuata, pajiwi be-ayaijamatabëcuenejiwi natane itsamonaewecua, bajarapajiwi Dioso beweliamatabëcuenejiwi exa-naenatsi. Pajiwi saya beweliamatabëcuenejiwi natane itsamonaewecua, bajarapajiwi ayaijamatabëcuenejiwi exanaenatsi Dioso —jai Jesús bepianeconijibiwi penataewijawabelia.

Jesús pejumaitsijawa pejewaxijiwi yabara

(Mt 19:13-15; Mc 10:13-16)

¹⁵Itsamatacabi, itsamonaewaw pejewaxijiwiwixi tocapataponatsi Jesús-jawaberena, pecobeta pematajayataponenexa, pexaniacuene Dioso pewë-nëta pecuenejawunupaebinxatsinua. Nexata, Jesús pijajiwi itsa tane bajarpacuene, itaweta pexi pecapatsiwi.

¹⁶Nexata, Jesús jumaitsi pijajiwijawabelia:

—¡Pëtsa pa-itawetame! ¡Pacopare pejewaxijiwiwixi pepatsinexa xanëjawaberena! Mapitsipejewaxijiwixije, paliwaisi tsipaebatsi, xaniawaetsia bajumexaniatane, jume-aebinejewa. Bajarapijinia pacuenia, pamonaewaw jitsipa pejonejawa Dioso pijanacuayabetsia, bajarapamonaewaw xaniawaetsia bejumexaniatane Dioso pejumeliwaisi, jume-aebinejewa. ¹⁷Xaniajanë

pacuenia pacatsipaebijitsiatsi. Pajiwi apo-itaxutuajamatejema tsane Dioso pejamatabëcuene-ewetsinexatsi pacuenia mapapejewaxijiwiwixe, bajarapajiwi apojone tsane Dioso pijanacuayabetsia —jai Jesús pijajiwijawabelia.

**Pacuenia pewëjëato, bitso pecobecowë pexainaenë,
cuaicuaijai Jesús-jawabelia, yabara peliwaissi**

(Mt 19:16-30; Mc 10:17-31)

¹⁸ Itsamatacabi, judfowituatuajëta penamatacaitorobinë yanijoba Jesús-jawabelia. Jumaitsi mapacueniaje:

—Necujarubinë, pexaniajamatabëcuenenëmë, ¿detsa pitsicuene exanaenajë taxainaenexa matacabi apopewerewerecaejawa? —jai bajaraponë.

¹⁹ Nexata, Jesús jumaitsi bajaraponëjawabelia:

—¿Detsa xuajitsia xanë yabara nejumaitsimë: «pexaniajamatabëcuenenë», nejamë? Ajibi raja itsajiwi-ata pexaniajamatabëcuenejiwi mapanacuataje. Caenë rabaja Dioso pexaniajamatabëcuenenë. ²⁰ Xanë itsiata, xua neyanijobame matacabi apopewerewerecaejawa nexainaewanexa yabara, cajumecanawiatsianatsi mapacueniaje. Xamë baja yapëtaneme pacuenia Dioso pejumeliwaisita itoroba jiwi pejumecowënëtsinexa. Jumaitsi: «¡Pëtsa jaitame itsapetiriwa nijawawecua! ¡Pëtsa beyaxuabame jiwitonë! ¡Pëtsa nacobetoxotame! ¡Pëtsa itsamonae pexanaejawa yabara najumetsënëtsiaya paebame! ¡Axa, enabeje, yaiyataema!», jai raja Dioso pejumeliwaisibaxutota —jai Jesús judfowi tuatuajëta penamatacaitorobinëjawabelia.

²¹ Nexata, bajaraponë jumaitsi Jesús-jawabelia:

—Daxita rabaja bajarapaliwaisianë jumecowënëtsiaponaponajë pejewaxinëjawaweliacujinaenë —jai.

²² Itsa Jesús jumentane bajarapacuenia pejumecanawisijawatsi, nexata, icatsia jumaitsi bajaraponëjawabelia:

—Abaxë raja catosaica caejawa nexanaenexa. ¡Canejere daxita nexainaewanami! Bajarapamatamomi tsicobetsanaename bepejiobiwi. Bajarapacuenia itsa exanaename, bitso pexaniacuene xainaename Dioso pijanacuatsia. Netsicobetsanaecujinae bajarapamatamo bepejiobiwijawabelia, nexata jane baja, nepënaponaename —jai Jesús.

²³ Bajarapacuenia Jesús pejumaisijawa itsa jumentane, bajaraponë bitso bejamatabëjiobi tsanajetsireca, tsipaji daxitacuene bitso pexainaenë. Bajaraponë, Jesús petsipaebiliwaisitsi, apojamatabëjumecowënëtsi. ²⁴ Itsa Jesús tane bajaraponë pewecuaponaejawatsi, bepejamatabëjiobi tsanajetsijawareca. Nexata, jumaitsi pijajiwijawabelia daxitacuene bitso pexainaewi yabara:

—¡Pamonaë, daxitacuene bitso pexainaewi, tsi-ayapëbejetsi tsane, pejoenenexa Dioso peyanacua-ewetsicuenejawabelia! ²⁵ Pacuenia camello, ayainëxae, ayapëbeje pejoenajawa paluta-eto-itaxutowojotualia, bajarapijinia pacuenia bitso pexainaenë pecobecowë to-ayapëbejetsi tsane pijatuxanenë^z

^z 18:25 *pexanaenexa Dioso pijatuxanenë*: Mapaliwaisiyoje nacayapëtaeya-exana xua jumaitsi wowaijumeta «entrar el reino de Dios». Pajiwi Dioso apo-exanaë pijatuxanenë, tsi-ayapëbejetsi penaponaponaejawata Dioso peyanacua-ewetsijawata. Tsi-ayapëbejetsi pexanaenexa pijatuxanenë, pejamatabëcuenenamatacaitorobinexatsi-ata. Tsi-ayapëbejetsinua panajamatabëcueneceawetsinexa Diosojawabelia, pewetsinexatsi, tsipaji canaëjetabiaba pijacuata pena-ewetsijawa Diosonejewa. Bajaraxua yabara najuta pacuenia jumaitsi tsarucae versículojawata.

Dioso pexanaenexa penajamatabëcuenecaewetsijawa Diosojawabelia, pejamatabëcuene namatacaitorobinexatsi pewetsinëtsicuenia —jai Jesús pijajiwi jawabelia.

²⁶ Nexata, Jesús pijajiwi jumaitsi Jesús-jawabelia:

—Bitso pexainaewi-ata^a itsa apopanepae tsane Diosojawabelia, ¿detsa pit-siwi nexata panepaena? —jai Jesús pijajiwi.

²⁷ Jesús nexata jumaitsi pijajiwi jawabelia:

—Xua jiwi apocuenecaëjēpaetsi pexanaenexa, bajaraxua Dioso cuenecaë-jēpaetsi pexanaejawa —jai Jesús pijajiwi jawabelia.

²⁸ Nexata, Pedro jumaitsi Jesús-jawabelia:

—Patajatuxanenë, paxanë rabaja pacopabajë daxitacuene pataxainaejawa. Nexata baja, pacapënjawanapatsi —jai Pedro.

²⁹⁻³⁰ Jesús nexata jumaitsi:

—Xaniajanë pacuenia pacatsipaebijitsiatsi. Pajiwi, Dioso pijacuene petonacuenebinexa, pueneta pijabomi, paxa, pena-ata, pematapijiwi, pejuyapijiwi-ata, pijawa, pexi-ata, nexata bajarapajiwi mapanacuataje pepuenetsijawami matatoxenetsia Dioso rajutsianatsi. Rajutsianatsinua petë-paecujinae maticabi apowerewerecaejawa —jai Jesús pijajiwi jawabelia.

Acueyabijawa Jesús tajëwelia nawajunupaeba pebeyaxuabijawanexatsi

(Mt 20:17-19; Mc 10:32-34)

³¹ Jesús barënacatuata saicaya itsajawayojawabelia, ëpijajiwi, doce ponë-beje. Nexata, pebeyaxuabijawanexatsi, tajëwelia nawajunupaeba pijajiwi jawabelia. Jumaitsi mapacueniaje:

—¡Panejumetaema! Mara Jerusalén tomarabelia ponatsije. Bajarapatomarata netocopiapatsiana daxita pacuene bajayata Diosojumepaebiwiimi, profetawi, tajëwelia yaquina Xanë, Daxitajiwi Pematapijinënë, yabara.

³² Nexata, judíowitsi wajanaca-ewetsiwi, apojudíowi pecobeyabelia necanajetsiana tanebeyaxuabinexa. Bajarapamonae necapocaponaena. Nebijataena pibisiacuenia. Nesuabiana. ³³ Nejumatitibabena penaneconitsiwi pejumaconitabiabimacata. Bajaraxuacujinae, nebeyaxuabiana. Itsiata baitsi jane, tanebeyaxuabicujinae, acueyabimatacabita, icatsia asaënë tsane —jai Jesús pijajiwi jawabelia tajëwelia penawajunupaebijawata pebeyaxuabijawanexatsi.

³⁴ Itsiata, xua yabara Jesús jumaitsi, pijajiwi apojumeyapëtaecapanepae.

**Jesús itaxutoxanepanaeya-exana bitso
pitaxutotsëcënaenë, Jericó tomarapijinë**

(Mt 20:29-34; Mc 10:46-52)

³⁵ Jesús itsa baja imoxoyotanajetaruca Jericó tomara, namutomuxuneneta eca bitso pitaxutotsëcënaenë, apopetaenë. Bajaraponë amoneya palata

a 18:26 bitso pexainaewi-ata: Deut. 7:11-15-jawata Moisés yapëtaeya-exana israelitawi pacuenia Dioso bitso pexaniacuenejawanë to-exanaenatsi, pamona xaniawaetsia jumecowënëta wanapajitsipa Dioso petonajumecopatsiliwaitsi Moisés-pijinëta. Bajaraxua yabara judíowi canaëjëta daxita pamona pexainaewi mapanacuapijawanë, tsitatsi pexaniajamatabëcuenewi Dioso pitabarata. Bajaraxuata, Jesús pijajiwi jamatabëcuenenabenajaca bitso, itsa bajaraponë jumaitsi petsi-ayapëbejajawatsi pexainaewi pepanepaenexa Diosojawabelia.

wajëcabiabeca jiwijawabelia. ³⁶Nexata, bajaraponë itsa jumetaeyeca jiwi-bitsaëtöxaneto pecuaicuajaitsanajetarubenaewaja namutua, yanijobeca xua copiapata.

³⁷Nexata, jiwi jumaitsi bajaraponëjawabelia:

—Jesús raja, Nazaret tomarapijinë, maxuayo najetarucaje —jai jiwi.

³⁸Nexata, pitaxutotsëcënaenë wawajai tsecae.

—¡Jesús, David-pijinë pemomomë, nitaxutotsoniataema! —jai tsecae.

³⁹Nexata, picani itsamona, Jesús pewajënaeya penajetarubenaewi, jume-itaweta bajaraponë pemoyanexa. Itsiata biji, bitsoyo wawajai tsecae.

—¡David-pijinë pemomomë, nitaxutotsoniataema! —jai tsecae
pitaxutotsëcënaenë.

⁴⁰Nexata, Jesús muxunanucojopa. Jumaitsi pijajiwijawabelia:

—Panetocomacaponaremena bajarapapitaxutotsëcënaenë —jai.

Itsa baja imoxoyo tocanajetarubenatsi, Jesús jumaitsi
pitaxutotsëcënaenëjawabelia:

⁴¹—¿Detsa xua jitsipame tacato-exanaenexa? —jai.

Nexata, bitso pitaxutotsëcënaenë jumaitsi Jesús-jawabelia:

—Petuxanenë, jitsipajë raja ta-itaxutoxanepanaewaja —jai.

⁴²Jesús nexata jumaitsi bajaraponëjawabelia:

—Itaxutoxanepaname rabaja, tanesiwanajamatabëcuenecopsixamë
xanëjawaberena —jai Jesús pitaxutotsëcënaenëjawabelia.

⁴³Bajarapacuenia Jesús pejumaitsiyawata, bitso pitaxutotsëcënaenëmi
xaniawaetsia baja tane. Nexata, bajaraponë napona baja Jesús pepëta.
Namutua pexaniacuenia wënëxaniatanajetaruca Dioso bitso ayaijamata-
bëcuenenë yabara. Pexaniajamatabëcuene rajutaponanua Diosojawabelia,
pitaxutoxanepanaeya-exanaexaetsi. Petaecujinae, xaniawaetsia xua Dioso
bajaraponë to-exanatsi, daxita bajarajota penubenaewi-ata pexaniacuenia
wënëxaniata Dioso ayaijamatabëcuenenë yabara.

Jesús, Zaqueobeje, penabarëcuaicuajaijawabeje yabara

19 ¹Jesús pejonecujinae Jericó tomarajawabelia, epanicabanajetaruca baja-
rapatomarata. ²Bajarapatomarata ponapona Zaqueo, impuesto jama-
tabëcuene pematamoyanijobabiabiwi penamatacaitorobinë. Bajaraponë bitso
pexainaenë pexainaewaja. ³Zaqueo picani jamatabëtane Jesús. Itsiata, petoyae-
caenëxae, apocajëpaetsi petaejawa, tsipaji jiwibitsaëtöxaneto Jesús matatoyoro-
natsi, bajaraponë pewajënae. ⁴Nexata, Zaqueo cujinaeponalia jiwibitsaëtöxaneto
pewajënaeyabelia, itsaxuayo Jesús najetarucajitsialia. Nexata, bajaraponë junaya
sicómoronaewajatsia,⁵ athëbëwetsica petaenucaenexa Jesús penajetarucaewaja.
⁵Nexata, Jesús itsa najetaruca bajaraxuayo, bajaraPonë naëcotsia ponaeta Zaqueo
athëbëyo nucaya. Nexata, Jesús taenutsia. Jumaitsi bajaraponëjawabelia:
—¡Zaqueo, naxatsiayo runaimica, tsipaji raja ajena jitsipajë tapatsijawa
nijaboyabelia! —jai.

⁶Nexata, Zaqueo naxatsiayo runajopaica. Barëyaya copiapita Jesús,
pijaboyabelia pebarëponaenexa. ⁷Daxita pamona, Jesús matatoyorotsia

b 19:4 sicómoronaewajatsia: Bajarapona picani behigueranae. Itsiata baitsi jane, pinijinaexa-
neto, pinijibaxutonënae. Yapëxanepananua wajajunaenexa bepijia.

penajetarubenaewi, itsa tane bajarapacuenae, anaeya baracuaicuajaiti tsanajetarubena. Najumaiti tsanajetarubena Jesús yabara: «Jesús raja naponaponaajitsia Zaqueo pijabota, caranata pewenajonenē pibisiacuenae pexanabiawia. Apoxanepanae cajena bajaraxua pexanaejawa», najai tsanajetarubena Jesús yabara.

⁸Nexata, Zaqueo pijabota, Jesús na-eca mesa muxuneneta. Bajarajota, Jesús pitabarata, Zaqueo nonotapuna. Jumaiti Jesús-jawabelia:

—Tajatuxanenē, nejumetaema! Tsatsianajē epatua taxainaeyajuwēnējawanē, tarajutsinexa bepejiobiwijawabelia. Pamonaenua yamaxē-itojorobiaya wecuanotajē tamatamoyanijobijawata impuesto jamatabēcuenae, tocanawia-bianajē tayamaxē-itojorobijamatabēcuenemiwecua cuatro xuabeje tsaponae caejawayomijamatabēcuenae —jai Zaqueo Jesús-jawabelia.

⁹Nexata, Jesús jumaiti Zaqueojawabelia:

—Ajena rabaja pamatacabi, catocopiapata, nijabopijiwi yajawa, Dioso papecacapanepaejawanexa, tsipaji pasiwanajamatabēcuenecopatame Dioso-jawabelia, pacuenia panijasalinainē Abraham-pijinēmi. Pajamatabēcuenae-itajētamenue. Pajamatabēcuenae-itajētamenue Abraham-pijinē pemomocuenemē. ¹⁰Bajaraxua yabara xanē, Daxitajiwi Pematapijinēnē, siwapatajopajē tajaitsinexa Diosowecua penaxuabiwi, tacapanepaenexa pijaneconiwecua —jai Jesús Zaqueojawabelia.

Jesús tsipaeba jiwijawabelia pecuenecataeliwaisi, diez ponēbeje, oronanitota pexanaenēnē peliwaicsuenia

(Mt 25:14-30)

¹¹Zaqueo pijabota itsamonae namuxuna-ewetena Jesús petsipaebiliwaisi Zaqueojawabelia. Bajarapamonae jamatabēcuenenawēxaniabiaya jamatabē-jumaiti tsenae: «Imoxoyo rabaja ecalia Jerusalén tomara, itsajota Jesús ita-petsianatsi pepopeyanacua-ewetsinēnexa. Nexata, copijapopaena jane baja, daxita Dioso pijajiwi peyanacua-ewetsijawanexa», jamatabējai tsenae bajarapamonae. Bajarapacuenia jamatabējumaiti tsenae, tsipaji baja, yapētane Jesús penajetarucaejawa Jerusalén tomarajawabelia. ¹²Bajaraxuata, Jesús mapapecuenecataeliwaisije tsipaeba bajarapamonaejawabelia. Jumaiti mapacueniaje:

—Ponē ayaijamatabēcuenenē, pijanacuata peponaponaenē, pona tajēna-cuayabelia, pewēnērubinexatsi peyanacua-ewetsicuenae. Pepopeyanacua-ewetsinē,^c pewēnērubicujinaetsi jane baja, nawiataponaerena pijanacua-yaberena, peyanacua-ewetsinexa jane baja, pijanacuata. ¹³Bajaraponē peponaewajēnaeya, junata pijajiwi, diez ponēbeje, pewetsia-exanaenexa pijapalatanēnē, oronēnē, bitso penamatamotsinēnē. Caenē canacujitsia caepalatanē ewetsia-exanapona. Nexata, jumaiti pijajiwi jawabelia: «Bajarapapalatata pacanacuenebianame, ayaijawa tanetopitsapaenexa», jai

c 19:12 Pepopeyanacua-ewetsinē: Mapaliwaisije nacatocuenecatane mapamonaeje:

Pepopeyanacua-ewetsinē raja nacatocuenecatane Dioso. Ayaijamatabēcuenenē nacatocuenecatane Jesús. Pijajiwi, diez ponēbeje, nacatocuenecatane daxita Jesús pijajiwi. Nexata, Jesús itsa pona paxajawabetsia pewēnērubinexatsi nacua-ewetsinēnexa, tsicopata pijajiwi pecowēta peto-nacuenebawanapaenexatsi. Jesús penawiatsicujinaetsica paxawetsica, yanacua-ewetsiana jane baja, daxitanacuanēpijiwi.

petuxanenē pijajiwijawabelia. Bajaraxuacujinae, pona jane baja. ¹⁴ Itsiata baitsi jane, pewetsinacuatanea pejinawanapaewi, bitso itoyatsi bajaraponē. Nexata, pecowēwelia itsamonaē itorobalia, itsajotalia nacua pewetsinē-nexa exanaejitsiatsi, pejumlahitsinexa: «Apopajitsipaenē bajaraponē patane-ewetsinēnexa patajanacuata», pejainexa petuxanenē yabara.

¹⁵ »Nacua-ewetsinēnexa pewēnērubicujinaetsi, bajaraxuacujinae, nawia-rena pijanacuayaberena, pewetsinexa jane baja pijanacua. Nexata, pepat-sicujinaerena, junata icatsia pijajiwi, peyapētaenexa jane baja pacuenia caenē canacujitsia pijapalatanēanē tocanacuenebatsi pecowēta. ¹⁶ Copiaya pepatsinē jumlahsi pijatuxanenējawabelia: «Tajatuxanenē, nijapalatanē, tane-ewetsia-exanaenēmē, tacanacuenebijawata matatoxenetsia catocapit-sapatsi diez ponēbeje. Nexata baja, daxitata catoxainatsi once ponēbeje», jai. ¹⁷ Nacua-ewetsinē nexata jumlahsi pijajiwitonējawabelia: «Xanepana rabaja. Xaniawaetsia neto-ewetaponaponame. Tsiquirijawayo-ata xania-waetsia taneto-ewetsixaemē, xanē juya catocopsianatsi diez patomarabeje taneto-ewetaponaponaenexamē», jai nacua-ewetsinē pijajiwitonējawabe-lia. ¹⁸ Icatsia, itsanē, pijatuxanenē pijapalatanē peto-ewetsinē, pata. Baja-raponē jumlahsi: «Tajatuxanenē, nijapalatanē, tane-ewetsia-exanaenēmē, tacanacuenebijawata, catocapitsapatsi baja cinco ponēbeje pematatsēnē», jai. ¹⁹ Nacua-ewetsinē nexata jumlahsi pijajiwitonējawabelia: «Xamē icat-sia cinco patomarabeje neto-ewetaponaponaename», jai nacua-ewetsinē pijajiwitonējawabelia.

²⁰ »Nexata, icatsia, itsanē, pijatuxanenē pijapalatanē peto-ewetsinē, pata. Jumlahsi pijatuxanenējawabelia: «Tajatuxanenē, mara nijapalatanēje, tane-ewetsia-exanaenēmē. Pañuelopanayota yamatacētsiaya cato-ewetatsi. ²¹ Bajarapacuenia exanajē, tsipaji cacujunawatsi, niajumesaēnēxae. Xamē bitso nitorobijitsipaenē nijajiwi, pamonaē cato-eweta nijajawa. Naxainae-yababiabame xua aponijajawa-ata. Notsia-exanabiabamenua apone-ubia-exanaejawa-ata», jai pijatuxanenē pijapalatanē peto-ewetsinē. ²² Nexata, nacua-ewetsinē jumlahsi pijajiwitonējawabelia: «¡Xamē bitso niacujirube-jemē! Bijiaya neto-ewetame. Naneconitame bajarapacuenia tanejumlahit-sijawamē yabara. Xamē baja cajena yapētaneme tajamatabēcuenesaēnē-jawa tajajawa yabara. Pacuenia itorobabiabajē tajajiwi tanetopitsinexa apotajajawa-ata. Pacuenia-ata notsia-exanabiabajē, apota-ubia-exanaejawa-ata. ²³ Xanepanaejitsipa xamē banco pewetsiwi itsa netocanacuenebia-exanaejitsipame tajapalatanē. Nexata, banco pewetsiwi aeconoxae taja-palatanē netocanawiatsipa, pecacowaetsijamatabēcuenē yajawa», jai nacua-ewetsinē pijajiwitonējawabelia.

²⁴ »Nexata, nacua-ewetsinē jumlahsi itsamonaē pijajiwijawabelia: «¡Taja-palatanē panetowecuapire maponēje! ¡Nexata, juya parajure ponējawabelia xaniawaetsia netocanacueneba tajapalatanē, pecapitsipaenē pematatsēnē diez papalatanēbeje!», jai nacua-ewetsinē. ²⁵ Nexata, nacua-ewetsinē pija-jiwi jumlahsi pijatuxanenējawabelia: «Patajatuxanenē, bajaraponē xaina baja ayaijawa. ¿Detsa xuajitsia rajutsijitsiamē pematatsēnē?», jai pijajiwi. ²⁶ Nexata, nacua-ewetsinē jumlahsi pijajiwijawabelia: «Pacatsipaebatsi rabaja. Pajiwi baja ayaijawa xaina, pematatsēnē icatsia itsajawa rajut-sianatsi. Itsiata, pajiwi tsiquirijawayo xaina, bajarapatsiquirijawayomi

wecuapitsianatsi.^d ²⁷Tajawajabitsaë, pamonaë picani apojsitipae mapanacua ta-ewetsijawaje, bajarapamonaë pacaponaremena maberenaje patanewecuawerebiabinexamë taitabëta», jai nacua-ewetsinë pijajiwijawabelia —jai Jesús liwaisi petsipaebijawata Zaqueo pijabota.

Jesús nacua-ewetsinëcuenia pecopiapitsijawatsi itsamonae

Jerusalén tomarapijiwi

(Mt 21:1-11; Mc 11:1-11; Jn 12:12-19)

²⁸ Jesús baja itsa najumewereta liwaisi petsipaebijawa Zaqueo pijabota, pona baja Jerusalén tomarabelia. ²⁹ Jerusalén tomarawecua imoxoyo eca Olivobacabowënëtsuto. Bajarapacanacujitsialia anijatamarayobeje eca, Betfagé, Betania tomarayobeje. Jesús natsiwajënaë-itoroba pijajiwitonëbeje imoxoyo pe-ecaetomarayojawabelia.^e ³⁰ Jesús jumaitsi bajaraponëbeje peponaewajënaeya:

—¡Paliámërebeje mapatomarayojawabeliaje! Itsa baja papatsiaremelia-beje, pataenutsianamebeje burro, pecëtanutsinëtsi, itsajiwi-ata abaxë apo-pejumaponaponaenë. Pa-isinaenamebeje. Payamaëcarenamëbeje tsane.

³¹ «¿Detsa xuajitsia pa-isinamebeje burro?», itsa pacajibeje tsane itsajiwi, nexata pajumaitsimëbeje tsane: «Wajatuxanenë raja namatawenona», pajamëbeje tsane —jai Jesús pijajiwitonëbejajawabelia.

³² Nexata, Jesús pijajiwitonëbeje liabeje. Pacuenia Jesús jumaitsi, bajara-pacuenia caxitajarabanutabeje burro. ³³ Nexata, itsa isinabeje, burro pexainaewi jumaitsisibeje:

—¿Detsa xuajitsia pa-isinamebeje burro? —jaitsibeje.

³⁴ Nexata, Jesús pijajiwitonëbeje jumaitsibeje burro pexainaewijawabelia:

—Wajatuxanenë raja namatawenona. Bajaraxuata, pa-isinajëbeje —jaibeje.

³⁵ Nexata jane baja, burro capatabeje Jesús-jawaberena. Nexata, Jesús pijajiwi burro tsijumajeba pijacamisajumawelia penaxatabijawanë. Jesús baja bajarapaburrojumata ecaya. ³⁶ Jesús itsa yanajetaruca burrota, panamutowelia Jesús patsijitsia Jerusalén tomarabelia, bajarapanamutua jiwi pijacamisajumawelia penaxatabijawanë namutua tsiwajënaeyerequejebaponatsi, yaityataeya pecopiapitsinexatsi. ³⁷ Olivobacabotsuto canacujitsialia itsa najetarubena, taxuxuaba perunanajetarubenaëjawa pebëxëfotuareca. Bajarajota, taxuxuaba daxita Jesús pepënanajetarubenaewitsi pewawajait-sabuataponaëjawa jamatabëcuenenëyaya Diosojawabelia. Pexaniacuenia wënëxaniatanajetarubena Dioso, ayaijamatabëcuenenë yabara, pecujirutae-yabiabixae Jesús, Dioso pesaëta, ayaicue pexanaponaejawanë. ³⁸ Wawajai tsanajetarubenaë Jesús yabara mapacueniaje:

«¡Dioso bitso pexaniacuenia yawenonaetsi maponëje, penajetarucaenë Dioso pewënëta, peyanacua-ewetsinënexa pijajiwi! ¡Jamatabëcuenexanepanaeya jinawanapae daxita pamonaë athëbëtatsia pejinawanapaewi! ¡Dioso rabaja pinijicue exana!», jai tsanajetarubenaë namutua daxita Jesús pijajiwi.

d 19:26 *wecuapitsianatsi*: Taema 1Co 3:10-15. **e 19:29** *pe-ecaetomarayojawabelia*: Betania tomara tsaena yabara jumaitsi.

³⁹Nexata, itsamonaē fariseowi, penajetarubenaewi bajarapajiwibitsaēto-xanetotuatuaĵeta, jumaitsi Jesús-jawabelia:

—iNecujarubinē, jume-itawere baja nijajiwi bajarapacuenia pejumaitsiyaniwa xamē yabara! —jai fariseowi.

⁴⁰Nexata, Jesús jumaitsi fariseowijawabelia:

—Xaniajanē pacuenia pacatsipaebijitsiatsi. Mapamonaēje moya itsa naje-tarubenaējitsipa, nexata juya, ibotonē wawajai tsenae tsipae bajarapamonaē pejumaitsitsanajetarubenaecuenia —jai Jesús fariseowijawabelia.

⁴¹Itsa baja Jesús imoxoyo taeyeta Jerusalén tomara, siwanua bajarapatoma-rapijiwi. ⁴²Pesiwanuejawata, jumaitsi bajarapamonaē yabara mapacueniaje:

—iPaxamē paJerusalén-tomarapijiwimē, bitso picani jitsi-pajē mapamatacabitaje paneyapētaejawa pacuenia Dioso pepacuenē pacajamatabēcuenexanepanaeya-exanaejitsipa, itsa panejumexaniataejitsipame patacatsipaebiliwaisi! Abaxē raja aeconoxae Dioso apopacatocopatsi paneyapētae-yaniwa bajarapacuenē. ⁴³Imoxoyo rabaja pewajēnaē papecatocopiapatsijawanexa panijawajabitsaē papecatsimaxēpatsijawa. Nexata, panijatomara matatoyorotsia jinawanapaena. Natsinacuenebiananua papecatsimaxē junaenamutonēnexa, panijatomara peyacaranatsijawa matatoxenetsia piapiajawanē. Nexata, bajara-papiapiajawanējumawetsica pacatseconaena. ⁴⁴Nexata, panijabonēmi irabetsica pacatopenetsianica. Daxita paJerusalén-tomarapijiwimē pacabena. Panijatomara matatoyorotsia peyacaranatsi-ibopanaxanetomi-ata sarababena. Cae-ibopana-ata apobocae tsane itsa-ibopanajumawereca. Bajarapacuenia pacatocopiapatsiana, tsipaji xanē apopaneyapētaemē Dioso athēbēwetsica tane-itorobinēcuenetsica, Daxitajiwi Pematapijinēnē —jai Jesús pesiwanuejawata Jerusalén tomarapijiwi.

**Jesús pitsapaeya-exana templobowecua pecanajetabiabiwi,
pecomuacabiabiwi-ata**

(Mt 21:12-17; Mc 11:15-19; Jn 2:13-22)

⁴⁵Jesús pepatsicujinae Jerusalén tomarata, joneya temploboyalialia. Bajara-jota, tane penawijatsiwi. Daxita bajarapamonaē Jesús capitsapa templobopi-jipanabowecua. ⁴⁶Bajarapaepatota, Jesús jumaitsi bajarapamonaējawabelia:

—Dioso baja cajena pejumeliwaisibaxutota mapatemplobo yabara tajē-welia jumaitsi mapacueniaje: «Tajabo raja jiwi xanējawaberena penawajēca-biabibo tsane», jai Dioso pejumeliwaisibaxutota. Itsiata baitsi jane, paxamē bajarapabota panenacobetoxotsiwi panaexaname, tsipaji ayaimatamota pancanajetabiabame —jai Jesús penawijatabiabiwijawabelia.

⁴⁷Jesús bajarapamonaē pecapitsapaecujinae, caematacabi canacujitsia jiwi liwaisi tsipaebabiaba bajarapatemplobota. Nexata, sacerdotewi penamatacatorobiwi, judfowi pecujarubiwinua, tomara-ewetsiwinua, najumejaita picani Jesús pebexuabinexatsi. ⁴⁸Itsiata, acuenebi Jesús pebexuabijawatsi, tsipaji bajaraponē itsacueneneconi apoxainae, tsipajinua daxitajiwi yaiyata-netsi. Petsipaebiliwaisianēnua xaniawaetsia namuxuna-ewetabiabatsi.

Papenamatacatorobisaēta Jesús canacueneba mapanacuataje

(Mt 21:23-27; Mc 11:27-33)

20

¹Itsamatacabi, templobota Jesús jiwi liwaisi tsipaeba, pexaniali-waisi, jiwi pecapanepaeliwaisinexatsi pibisiacuenē

pexanaeconiwequa. Nexata bajarapaepatota, pata sacerdotewi penamata-caitorobiwi, judfowi pecujarubiwi, judfowi pija-ancianowi-ata. ²Bajarapamona jumaitsi Jesús-jawabelia :

—¡Panetsipaebare cajena! ¿Detsa ponë penamatacaitorobisaëta, capitsapame penawijatabiabiwi mapatemplobo pijipanabowecuaje? —jai.

³Nexata, Jesús jumaitsi bajarapamonaejawabelia:

—Xanë copiaya caejumeyo pacayanijobianatsi, patanejumecanawiatsine-xamë. ⁴¿Jipatsa jane penamatacaitorobisaëta Juan-pijinë jiwi bautizabaponapona? ¿Dioso tsaja pejamatabëcueneta? Itsa jume, ¿jiwi tsaja pejamatabëcueneta? —jai Jesús bajarapamonaejawabelia.

⁵Nexata, epamona nabarëcuaicuaijai. Najumaitsi:

—¿Demeta pacuenia jumecanawiatsianatsi? Waxaitsi itsa jumaitsi tsi-paetsi: «Dioso raja pejamatabëcueneta», itsa jai tsipaetsi, nexata Jesús naca-jumaitsi tsipae: «¿Detsa nexata xuajitsia apopajumexaniataemë Juan-pijinë pepaebiliwaisianë?», nacajai tsipae. ⁶«Jiwi raja saya pejamatabëcueneta Juan-pijinë jiwi bautizabaponapona», itsa jai tsipaetsi, nexata daxitajiwi anaeya ibotonëta nactaseconaëjitsipa wajanacabeyejebinexa, tsipaji bajarapamona Juan-pijinë yabara siwajamatabëjumaitsi: «Juan-pijinë raja pepacuene Diosojumepaëbinëmi», siwajamatabëjai, najai sacerdotewi penamatacaitorobiwi, judfowi pecujarubiwi-ata, judfowi». ⁷Nexata, saya bajarapamona jumaitsi Jesús-jawabelia:

—Apopayapëtaenë cajena ponë Juan-pijinë itorobatsi jiwi pebautizabaponaenexa —jai.

⁸Nexata, Jesús jumaitsi bajarapamonaejawabelia:

—Nexata, xanë-ata apopacatsipaëbi tsanetsi ponë nitoroba tacapitsapapexa bajarapamona templobowecua —jai Jesús.

**Pecuenecataeliwaisicuenia Jesús tsipaëba jiwijawabelia,
pajamatabëcuenebejewi, itsanë pija-uvabacabo bijiaya
peto-ewetsijawa peliwaisi
(Mt 21:33-44; Mc 12:1-11)**

⁹Bajarapacuenia pejumecanawiatsicujinae judfowi pewetsiwijawabelia, Jesús taxuxuaba mapapecuenecataeliwaisi^f petsipaëbijawa jiwijawabelia. Jumaitsi mapacueniaje:

—Pija-ira pexainaenë, bajarapa-irata uba ayai-uvabacaboxaneto. Bajaraxuacujinae, itsamona ewetsia-exana pija-uvabacabo. Jumaitsi bajarapamonaejawabelia: «Pamatacabi cuainaweretsiana, natsicobetsanaenatsi, bajarapamatacabi tajajiwitonë itorobiarenajë, tanetopitsinexa xua panetotsatsianame», jai uvabacabo pexainaenë peto-ewetsiwitsijawabelia. Nexata, uvabacabo pexainaenë tajënacuyabelia pona. Bajayajebi ajibi tsarucae. ¹⁰Itsa baja yapëtane pecopiapatsijawa

f 20:9 mapapecuenecataeliwaisi: Uvabacabo pexainaenë nacatocuenecatane Dioso. Uvabacabo pijinia nacatocuenecatane judfowi. Pabi pexainaenë pamona ewetsia-exana pijapabi, nacatocuenecatane, sacerdotewi, judfowi pecujarubiwi, judfowi pija-ancianowi, tomara pewetsiwinua. Daxita bajarapamonaë ejudfowi Dioso ewetsia-exana. Uvabacabo pexainaenë pijajiwi, nacatocuenecatane profetawi. Uvabacabo pexainaenë pexënato nacatocuenecatane Jesús, ponë itsamatacabijawabelia yanacua-ewetsijitsia judfowi.

uvacuai penaweretsimatacabi penotsinexa, nexata itoroba pijajiwitonē peto-ewetsiwitsijawabelia, petsicobetsatsinexatsi. Nexata, uvabacabo pexainaenē pijajiwitonē towaetabatsi. Toconibabiatsi. Petoconibabecu-jinaetsi cobesa nawiatsia-exanaliatsi. ¹¹ Itsiata, uvabacabo pexainaenē icatsia itoroba itsanē pijajiwitonē petsicobetsatsinexatsi. Bajaraponē-ata icatsia pibisiacuenia tobijatanetsi. Toconibabiatsi. Peconibabecu-jinaetsi cobesa nawiatsia-exanaliatsi. ¹² Itsiata, uvabacabo pexainaenē icatsia itoroba itsanē pijajiwitonē. Icatsia bajaraponē-ata tomatajorobabiatsi. Uvabacabopēñeyabelia xuabatsi.

¹³ »Nexata, uvabacabo pexainaenē jamatabējumaitsi: «¿Detsa nexata xua exanaenäjē? Itorobianajē cajena taxénato, ta-asiwanē, tsipaji raeta taxénato netoyaiyataenatsi», jamatabējai. ¹⁴ Itsiata baitsi jane, uvabacabo peto-ewetsiwitsi, pexénato-ata apotoyaiyataetsi. Itsa pexénato wajēnaet-netsi penajetarucaejawa, bajarapamonae najumaitsi: «Mara ponēje itsamatacabi paxa pewēnamuto pija-uvabacabo pitsipaje. ¡Naxatsia! Beyaxuabatsi. Nexata raja, waxaitsi waja-uvabacabo tsane», najai uvabacabo peto-ewetsiwitsi. ¹⁵ Nexata, pexénato-ata towaetabatsi. Caponaliatsi bajarapa-uvabacabopēñeyabelia. Bajarajota tobeyaxuabatsi —jai Jesús.

Nexata, Jesús yanijoba bajarapaliwaisi petsipaebiwwawabelia. Jumaitsi: —¿Demeta nexata xua exanaena uvabacabo pexainaenē peto-ewetsiwitsijawabelia? ¹⁶ Bajaraponē pexainaenē, patsiarena. Werebiabiana daxita bajarapamonaemi. Nexata, icatsia itsamonae ewetsia-exanaena bajarapa-uvabacabo —jai.

Jesús penamuxuna-ewetsiwitsi itsa jumetane bajarapacuenia pejumaitsi-jawa, bajarapamonae jumaitsi:

—¡Dioso pētsa copata bajarapacuenia pexanaenexa paxanējawaberena! —jai bajarapamonae.

¹⁷ Bajarapacuenia pejumaitsixae, Jesús asaēyata naēcota bajarapamonae-jawabelia. Jumaitsi mapacueniaje:

—Bajarapacuenia pajumaitsi-atamē, ¿demeta xua yabara Dioso pejumeliwaisibaxutota tajēwelia jumaitsi iboto peliwaissicuenia Mesías yabara mapacueniaje?:

«Pa-iboto itsamonae bo-exanaewi, petsita-abejexaetsi, naitaxutojematabuata, bajarapa-iboto itsamonaenexa toxanepanatsi, pecanacuenebinexa copiaya pebuatsi-ibotonexa boyenepanatotsotota», jai tajēwelia Dioso pejumeliwaisibaxutota Mesías yabara.^g

¹⁸ »Itsjawata, tajēwelia Dioso pejumeliwaisibaxutota jumaitsi Mesías yabara mapacueniaje:

«Pamonae necuene-aebiana xanē, Mesíasnē, Dioso tane-itorobinētsicacueni, bitso bejamatabējiobi tsane. Cuenejēpaena be-ibotojumata pefirapecaejiwi, itsa tsaquitecatsi, pewixae bitso yana-bejiobita. Pamonae pijinia nitoya tanecuene-aebixae, naneconitsia-exanaenajē. Bajarapamonae pepacuene naxuabiana daitamatacabija-wabelia. Cuenejēpaena be-iboto pematacēñēbinētsi. Apo-asaē tsane», jai

tajëwelia Dioso pejumeliwaisibaxutota xanë, Mesíasnë, yabara^h —jai Jesús bajarapamonaejawabelia.

**Jesús jamatabëcuene-ëjëbiaya yanijobatsi impuestojamatabëcuene
pematamotsijawa yabara
(Mt 22:15-22; Mc 12:13-17)**

¹⁹Pejumetaejawata uvabacabo pexainaenë peliwaisi, sacerdotewi penamatacaitorobiwi, judfowi pecujarubiwi-ata, jumeypëtane Jesús petsipaebijawa bajarapamonae pexanaecue yabara. Nexata, bajarapaepatota najumejaita pacuenia exanaeijtsia, pewaetabinexa Jesús penaneconitsia-exanaenexa. Itsiata, pecujunawixae Jesús pejumetaewitsi petsipaebiliwaisi, caecuenia apowaetabitsi.

²⁰Bajarapamonae itsamatacabijawabelia itorobarena pijajiwi, bepexania-jamatabëcuenewi itajara pejinawanapaewi, ya-enebiaya petonamuxunawetsinexatsi Jesús, xua paeba. Nexata, Jesús bijiaya itsa jiwi liwaisi tsi-paeba, pewaetabinexatsi picani, pecaponaenexatsi nacua-ewetsinëjawabelia penaneconitsia-exanaenexatsi. ²¹Pamonae itoroba peya-enebinexa, jamatabëcuene-ëjëbiaya yanijoba Jesús-jawabelia mapacueniaje:

—Necujarubinë, pacayapëtanetsi jiwi pepacue pexaniajailiwaisi netsipaebijawa, beweliacuenia taenejewamë itsajiwi-ata. Najëpaeya yayiataeya pexaniajailiwaisi tsipaebabiabame, ayaijamatabëcuenewi, beweliamatabëcuenewi-ata, pejinawanapaenexa Dioso pejitsipaecuenia. ²²Nexata, mapacuenia pacayanijobatsije, xaniawaetsia pataneyapëtaeya-exanaenexamë, xua bepa-exanajë Dioso pejitsipaecuenia. ¿Nacatoxanepana tsaja wajamatamotsijawa impuesto jamatabëcuene Romano nacua pepopewetsinëjawabelia? Itsa jume, japonacatoxanepanae tsaja? —jai bajarapamonae jamatabëcuene-ëjëbiaya Jesús-jawabelia.

²³Itsiata baitsi jane, Jesús jamatabëcueneyapëtane pacuenia jamatabëcuene-ëjëbiaya yanijobatsi, penaneconitsia-exanaenexatsi picani. Nexata, jumaitsi bajarapamonaejawabelia:

—¿Detsa xuajitsia saya panejamatabëcuene-ëjëbame, bajarapacuenia pataneyanijobijawatamë? ²⁴¡Nexata, panetsitajëre Romano nacupijipalatanëyo! —jai Jesús.

Bajarapamonae petsitajëtsijawatatsi, Jesús jumaitsi:

—¿Jipatsa mapitabarajumapeje, pewënë-ata, ruca bajarapalatanëyojumataje? —jai bajarapamonaejawabelia.

Bajarapamonae jumaitsi:

—Romano nacua raja pepopewetsinë pitabara, pewënë-ata —jai.

²⁵Nexata, Jesús jumaitsi bajarapamonaejawabelia:

—¡Paxaniajamë rabaja! ¡Nexata, xua Romano nacua pepopewetsinë pijajawa, parajutabiabare! ¡Xua pijinia Dioso pijajawa parajutabiabare! —jai.

²⁶Nexata, peya-enebiwitsi apocaxitarabi itsacueneyawayo-ata, xua yabara naneconitsia-exanaeijtsiatsi jiwi pitabarata, petsipaebiliwaisi yabara, tsipaji xaniawaetsia Jesús jumecanawiata xua yabara yanijobatsi. Caranata, jamatabëcuenenabenajaca, xaniawaetsia Jesús pejumecanawiatsixae. Nexata baja, moya ena.

**Saduceowi Jesús jamatabëcuene-ëjëbiaya yanijobatsi jiwi
petëpaecujinae icatsia piasaëjawanexa yabara**

(Mt 22:23-33; Mc 12:18-27)

²⁷ Bajarapacuenia Jesús pejumecanawiatsicujinae pejamatabëcuene-ëjëbiwitsi, saduceowi saicayacuenia jumexaniatane jiwi petëpaejawa yabara. Bajarapamonae cuene-aebabiaba jiwi icatsia piasaëjawanexa petëpaecujinae. Nexata, bajarapamonae imoxoyobarena Jesús, liwaisi-ëjëbiaya peyanijobinexatsi. Jumaitsi mapacueniaje:

²⁸ —Necujarubinë, Moisés-pijinë bajayata wajanacatoyaquinaeliwaisi, jumaitsi mapacueniaje: «Ponë matapijinë pepuapenacojiobinë baja, itsa tëpa pexi xainaenejewa, nexata juyapijinë bepita pematapijinëmi pijawaco-wëwa, pexi pexainaenexa bajarapowajawabelia, matapijinëmi pexicueniaⁱ penacopatsinexa», jai Moisés-pijinë bajayata wajanacatoyaquinaeliwaisi.

²⁹ Itsamatacabijawa jinawanapa ënacaemonae, siete ponëbeje. Pepomatapijinë copiata nacojioba. Bexëajawabelia bajaraponë pijawa wecuatëpa, pexi xainaenejewa. ³⁰ Nexata, pematapijinëmi pepënarucaenë pita bajarapowa. Bajaraponë-ata tëpa, pexi xainaenejewa bajarapowajawabelia. ³¹ Nexata, acueyabinë, icatsia pita bajarapowa. Bajara-icatsia ponë-ata tëpa, pexi xainaenejewa bajarapowajawabelia. Bajarapacuenia daxita baja siete ponëbeje, nacaemonae, pitaponae-ata, itsiata, itsanë-ata pexi apoxinae bajarapowajawabelia. Bajarapacuenia daxita siete ponëmibeje tëpa. Werewereca baja. ³² Belia baja, bajarapowa-ata tëpa. ³³ Nexata, itsa xaniajai Dioso icatsia piasaëya-exanaejawanexa jiwi petëpaecujinae, ¿detsa nexata ponë canacopatsiana bajarapowami bajarapamatacabi, daxita bajarapasiete ponëbeje penacojiobaponaenexae caewajawabelia? Daxita xaina picani pijawacuenia bajarapowami —jai saduceowi Jesús-jawabelia.

³⁴ Nexata, Jesús jumaitsi:

—Aeconoxae, mapanacuataje pebijijiwi, petiriawi-ata, nacojiobapona. Itsamonae, pexënatoyonë pexainaewi, pebijawabelia canajetapona peto-nacojiobinexatsi. ³⁵ Itsiata baitsi jane, pamona Dioso, petsitaxanepa-naexaetsi, itapeta icatsia piasaëya-exanaenexa petëpaecujinae, jinawana-paena apopewerewerecaenacuataatsia. Piasaëya-exanaecujinaetsi, jiwi aponacojiobi tsane. Pexënatoyo apocanajetsi tsanenua pebijawabelia petonacojiobinexatsi, ³⁶ tsipaji ajibi baja tsane petëpaecuene. Athëbëtatitsia jinawanapaena daxitamatacabijawabelianexa pacuenia ángelewi. Dioso pamona icatsia asaëya-exanaena, pexi exanaena. ³⁷ Xaniajanë. Dioso icatsia asaëya-exanaena jiwi petëpaecujinae. Bajaraxua yabara, Moisés-pijinë nacayapëtaeya-exana bajayata itsa yaquina pacuenia Dioso tsipaebatsi wajasalinaiwimi piasaëwicuenia yabara, tsiquirinaemëyo petajueye-caecotiajawawerena. Dioso pejumaitsijawa mapacueniaje: «Xanë rabaja Abraham, Isaac, Jacob-ata, pijaDiosonënë tsaponapona», pejaijawa. Apo-jumaitsinua baja cajena: «Bajayatami bajarapamonaemi pijaDiosonënë»,

i 20:28 *pexicuenia*: Matapijinëmi pexënatoyonë pebi namatawenona pecanacopatsijiwinexa pijairanë, pecobecowë-ata, pewetsitaxunaeminexanua pijajiwituatujëta, penaweretsicujinae. Taema Deut. 25:5-10.

apojai. Bajarapacuenia pacayapëtaeya-exana Dioso icatsia jiwi petëpaewimi piasaëya-exanaejawanexa. ³⁸ Dioso raja petëpaewi apopijaDioso. Biji rajane, piasaëtsawanapaewi pijaDioso, tsipaji jiwi tēpae-ata Dioso cajena apotsitatē-paetsi —jai Jesús saduceowijawabelia.

³⁹ Nexata, judíowi pecujarubiwiwajuwënëwi jumaitsi Jesús-jawabelia:

—Necujarubinë, saduceowi xaniawaetsia jumecanawiatame —jai.

⁴⁰ Bajaraxuacujinae jane baja, saduceowi cujunawa icatsia peyanijobijawa Jesús-jawabelia.

Jesús penaliwaisiyanijobijawa, judíowi pecujarubiwiwawabelia

Mesías, yabara

(Mt 22:41-46; Mc 12:35-37)

⁴¹ Nexata, Jesús yanijoba judíowi pecujarubiwiwawabelia mapacueniaje:

—¿Detsa xuajitsia jiwi jamatabëcuenenawëxaniabiaya canaëjëta Cristo, Dioso pitorobinëtsica, nacua-ewetsinë, David-pijinë, pemomocuenia saya?

⁴² ¡Pacanaëjëre! David-pijinë bajayata tajëwelia Cristo yabara Salmos-baxutota jumaitsi mapacueniaje:

«Petuxanenë Dioso jumaitsi tajaTuxanenëjawabelia: ‘¡Ecare abaxë tacujuanenia! ⁴³ Abaxë copiaya wecatsiwajënaecuenen- amoneyabatsi nijawajabitsaë, nitorobicuenia pecajumecowënëtawanapaenexa,’ jai Petuxanenë Dioso tajaTuxanenëjawabelia»,^j jai David-pijinë Salmos-baxutota Cristo yabara.

⁴⁴ »Nexata, David-pijinë bajarapacuenia Cristo yabara pejumaitsixae:

«Tajatuxanenë», pejaixae, yapëtanetsi David-pijinë, apopemomo. Saicaya baja cajena Dioso pexënato —nayabarajai Jesús judíowi pecujarubiwiwawabelia, pecanaëjëtsia-exanaenexa Cristo, Dioso pexënatocuenen.

Jesús muxujioba pijajiwi pecuenejëpaeyaniwa judíowi pecujarubiwi, peyajawananeconitsiyaniwa Diosojawabelia

(Mt 23:1-36; Mc 12:38-40; Lc 11:37-54)

⁴⁵ Itsa abaxë daxitajiwi namuxuna-ewetatsi petsipaebiliwaisi, Jesús jumaitsi pijajiwiwawabelia:

⁴⁶ —¡Xania! ¡Panayajiwiwitaema panecunejëpaeyaniwa judíowi pecujarubiwi! Bajarapamonae jitsipabiaba tomara tuatuajëjawa piapijawanë pena-xatababiabawanapaenexa, jiwi peyaiyataenexatsi. Jitsipabiabanua bitso yaiyataeya pebajacobinexatsi callejawa. Nexata, itsa najoneyabiaba judíowi pasinagogabonëjawa nacaetuatabiaba, fiestajawa-ata, natsi-itapetabiaba pe-enaenexa peyaiyataewitsi petsinubijawanëta. ⁴⁷ Yamaxë-itojorobiaya wecuanotabiabanua pamonajiwi pewecuatëpaewanëtsi pecobecowëjawa-xaxi. Pinijicuenia wajëcabiabanua Diosojawabelia, daxitajiwi petaenexatsi Dioso bepejitsipaecuenia pexanawanapaewi. Bajarapacunejawanë pexanawanapaexae, Dioso pinijicuenia naneconitsia-exanaenatsi pama-tacabi naneconitsia-exanaena daxita pijaneconi pexainaewi —jai Jesús pijajiwiwawabelia.

Pamona pewecuatëpaewatsi pa-ofrenda rajuta Diosojawabelia

(Mc 12:41-44)

21 ¹ Jesús abaxë templobota peponaponaewawata, cobetane bitso pexai-naewi ayaijawa palata pejeponaejawa, pacajonijawabelia jiwi jeyabiaba Dioso pija-ofrendanexa. ² Cobetanenua bepejiobiwa, pamona pewecuatëpaewatsi, penajejawa bajarapacajonijawabelia anijapalatanëyobeje, piamatamobinëyobeje. ³ Jesús nexata jumaitsi pijajiwijawabelia:

—Xaniajanë pacuenia pacatsipaebijitsiatsi. Mapowaje, pamona pewecuatëpaewatsi, bitso bepejiobiwa-ata, pa-ofrendayo jia cajonita ofrendacuenia perajutsinexa Diosojawabelia, Dioso bitso siwajamatabëcuenebarëya daxita xua itsamonae pejejawawecua, ⁴ tsipaji pamona pexainaewi, xua aponamatawenonae jia bajarapacajonita, ofrendacuenia perajutsinexa Diosojawabelia. Itsiata baitsi jane, mapowaje, bepejiobiwa-ata, daxitajawayo pena-ewetsijawayotaminexa jia bajarapacajonita. Bajaraxuata, Dioso ayaicuenia siwajamatabëcuenebarëyatsi, pexainaewiwecua, ayaijawa pejewiwecua-ata —jai Jesús pijajiwijawabelia.

Jesús tajëwelia tsipaeba pijajiwijawabelia pacuenia itsijitsia Jerusalén tomarata, daxitanacuanëjawa-ata, mapanacuaje pecopiarucaewajënaeya

(Mt 24:1-28; Mc 13:1-23)

⁵ Itsa abaxë cobetaenubena ofrenda perajutaponaewi, Jesús pijajiwijawawënëwi nabarëcuaijai tsaponae templobo pitabëtetsijawa yabara. Tsi-tapexaniatemplobotsi, tsipaji exaneta pexaniawiria ibotonëta, itsamonae pijinia ofrendacuenia perubixae pitabëtsijawanë, Diosojawabelia perajutsijawanë. Pejumetaejawata pexaniacuenia templobo peyabaracuaijaijawa, Jesús tajëwelia wajunupaeba pacuenia itsamatacabi itsanacupijiwi xuabijitsiatsica bajarapatemplobo, pebijianaenexa. Jumaitsi mapacueniaje:

⁶ —Itsamatacabi, itsanacupijiwi xuabianica mapatemplobomiye. Nexata, daxita xua pataneme, pitabëcuene yajawa, penetsianica. Bajarapabopiji-ibotonë, cae-iboto-ata, pejumawereca apobocae tsane —jai Jesús pijajiwijawabelia.

⁷ Jesús pijajiwijawajumaitsi:

—Patajatuxanenë, pajitsipajë patanetsipaebijawamë, patayapëtaenexa paepatota copiapatsijitsia xua wajunupaebame. ¿Detsa pitsicuene peneta pataenajë, itsa copiapatsijitsia xua jumaitsimë templobo yabara? —jai.

⁸ Jesús nexata jumaitsi mapacueniaje:

—¡Xania baja! ¡Panayajiwitaema papecayamuxu-itojorobiyanewa! ¡Pëtsa panacopatame itsajiwia-ata papecayamaxë-itojorobiyanewa, tsipaji raja ayai-bitsaëto tawënëta najetarubenaena, jiwi peyamaxë-itojorobinexa! Najumetsënëtsiaya jumaitsi tsaponae tsane: «Xanë raja Cristonë, athëbëwetsica Dioso tane-itorobinëtsica, jiwi tacapanepaenexa. Imoxoyo rabaja pewajënae nacua pewerewerecaenexa», jai tsaponae tsane. ¡Itsiata, pëtsa pajumexania-taneme, bajarapamonae pepaebiliwaisi! ⁹ ¡Nexata, pawënëliwaisitae-atamë tsane wajabitsaë pexanaejawa imoxoyonacuanëjawa, tajënacuanëjawa-ata, pëtsa pajunawame! Bajarapacuenia peneta copiaya copiapatsiana mapanacuaje pewerewerecaewajënaeya. Itsiata baitsi jane, bepijia mapanacuaje abaxë apowerewerecajuni tsane —jai Jesús pijajiwijawabelia.

¹⁰ Icatsia, Jesús jumaitsi:

—Mapanacuae pewatererecaewajënaeya, peneta copiaya itsawiriawi nabena itsawiriawijawabelia. Itsanacuanëpijiwi pijinia nabena itsanacuanëpijiwijawabelia. ¹¹ Ayaicuenia daxita nacuanëjawa ira najëbiana. Yajawana-jetarucaena ayaijaniboxaneto, daxitawiria witanecuenen-ata. Taena piayai-cuenejawanë. Naitajëbiana itaboxotatsia-ata pinijicuene pexanaejawanë.

¹² »Itsiata, bajarapacueni pecopijopaewajënaeya, tane-itoyawi pacataicaena patajajiwxiaemë. Pacabejiobia-exanaena. Pacacoponaena judiowi penacatuatabiabibonëjawabelia, papecaneconitsinexa. Pacajebiananua penaneconitsiwi pejebabiabibota. Patajajiwxiaemë, pacanubiana pepopeyanacua-ewetsiwi, gobernadorwi pitabarata-ata. ¹³ Bajarapacuenia papeca-exanaejawata, pacatoxanepanaena juya pataneliwaaisipabine-xamë. ¹⁴ ¡Pëtsa tajëwelia panatsiwajënaecanajëtame pacuenia panayajiwicuaicuaijamëjitsia bajarapamonaejawabelia! ¹⁵ Bajarapaepatota, xanë pacacuaicuaijaiya-exanaenatsi panenayapijiwicuaicuaijainexa bitso peyapëtaewicuenia. Nexata, caenë-ata panijawajabitsaënë apocuenecaëjëpaetsi tsane papecajumecanawiatsinexa, panejumaitsiyawa yabara. ¹⁶ Bajarapamatacabi, pane-axa, pane-ena, panematapijiwi, panejuyapijiwi, panijamonaëjiwi, papecayapëtaëjiwi-ata, pacacanajetsiana nacua-ewetsiwi pecobeyabelia, papecabeyejebine-xa patajajiwxiaemë. Paxamëyajuwënëwi-ata patajajiwxiaemë pacabeyajebiana. ¹⁷ Daxitajiwi paca-itoya tsabiabi tsane patajajiwxiaemë. ¹⁸ Itsiata baitsi jane, bajarapamonae papecabeyaxuabi-ata tsane, apocuenecaëjëpaetsi tsane papecajamatabëcuenebeyaxuabinexa Diosowecua. ¹⁹ Itsa pajamatabëcuenesaëmë tsawanapae tsane, nexata matacabi apopewatererecaejawa paxainaename —jai Jesús pijajiwijawabelia tajëwelia pewajunupaëbijawata pacuenia itsamatacabi itsijitsia mapanacuataje.

²⁰ Icatsia, Jesús jumaitsi pijajiwijawabelia Jerusalén tomara yabara:

—Itsa pataename wajabitsaë, itsanacuawerena pepatsiwi, Jerusalén tomaramatatoyorotsia peyacaranatsijawatsi, payapëtaename imoxoyo baja pewajënae Jerusalén tomara pewatererecaejawanexa. ²¹ ¡Nexata, bajarapamatacabi Judea nacua pejinawanapaewi, itsa taena bajarapacueni, rëcëpecae ibot-sutonëjawabelia! ¡Jerusalén tomarapijiwi-ata rëcëpecae pijatomarawecua! Pamonae pijinia, Jerusalén tomarapënëyabelia itsa jinawanapa, apobenawiabi pijaboyabelia. ¡Caecuenia rëcëpecae! ²² Bajarapacuenia be-exana, tsipaji, bajarapamatacabi Dioso jane baja, naneconitsia-exanaena pijaneconi pexainaewi, pacuenia baja cajena pepobajayatami tajëwelia wajunupaëba Dioso pejumeliwaaisibaxutota. ²³ Bajarapawajabitsaëmatacabi, bitso ayaicuenia bejiobi tsane mapanacuapijiwiye. ¡Peyacotajinawanapaewaxi, powaxinua isajinawanapa mito-apaenacuetoxi, bitso bejiobi tsane, tsipaji to-ayapëbejetsi tsane perëcëpecaejawa! Daxita mapanacuapijiwiye bitso bejiobi tsane, tsipaji pinijicuenia Dioso naneconitsia-exanaenatsi. ²⁴ Nexata, itsabitsaëtomi, Jerusalén tomarapijiwi, pijawajabitsaë beyejebianatsi. Itsabitsaëtomi pijinia, taicaenatsi peca-ponaenexatsi daxitanacuanëjawabelia. Bajaraxuacujinae, apojudiowi bejiobia-exanawanapaena Jerusalén tomarata pejinawanapaewi. Bajarapacuenia exanaena pamatacabijawabelia Dioso tocopatsiana apojudiowi pewetsijawanexa Jerusalén tomara —jai Jesús pijajiwijawabelia tajëwelia pewajunupaëbijawata papiyaicuene itsamatacabi copiapatsijitsia Jerusalén tomarata.

Jesús tajëwelia nawajunupaeba icatsia pepatsijawanexatsica

(Mt 24:29-35, 42-44; Mc 13:24-37)

²⁵ Orijibia, Jesús tajëwelia wajunupaeba pacuenia itsijitsia, pepatsiwajë-naeyatsica. Jumaitsi pijajiwijawabelia mapacueniaje:

—Xanë tapatsiwajënaetsica, pitothiacuenejawanë naitajëbiana matabacapijijumetojawata, merawipijijumetojawata, tulupujawata-ata. Manuamene pijimalataca bitso penajumetsijawata, daxita nacuanëpijiwi bitso najuna-wiacaena. Jamatabëcuenebëjainua tsane.^k ²⁶ Daxitanacuanëjawa bitso jiwi ajamatabëcuenesaëjibi tsane, petaejawata bajarapapiayaicuenejawanë petocopiapatsijawatatsi. Daxita najëbiananua athëbëtatsia perubenaajawanë, xuanëjawabelia jiwi siwanajamatabëcueneocopaba peyawenonaenexatsi. Xaniwaetsia aporubena tsane. Nexata, jiwi tëpajoneyabiabiana bitso pecapunawi. ²⁷ Bajarapaepatota jane baja, jiwi netaena, Daxitajiwi Pematapijinënë, athëbëwetsica itarërëbota tanajetaruaejawa, pinijisaë, tajapeniweniwenacotia yajawa, daxitacuene ta-ewetsinexa. ²⁸ Itsa pataename pecopajopaejawa bajarapacuene, nexata panajamatabëcuenesaëtsianame, tsipaji rabaja imoxoyo pewajënae tsane Dioso papecacapanepaejawanexa jiwi papecabëjiobia-exanabiabijawamiwecua —jai Jesús.

²⁹ Icatsia, Jesús pijajawabelia tsipaeba pecuencataeliwaicsuenia pepatsimatabacijawanexatsica yabara. Jumaitsi mapacueniaje:

—¡Pacanaëjere pacuenia itsi higueranae, itsawirianaenë-ata! ³⁰ Pacujinae bajaraponaenë pejanabaxu juwa, payapëtaneme imoxoyo baja pewajënae tsaponae wai pecopiapatsijawanexa. ³¹ Bajarapijinia pacuenia, peneta itsi tsane, itsa pataeponaename pecopiapatsijawa xuanë yabara pacatsipaebatsi. Nexata, payapëtaename imoxoyo baja pewajënae pecopiapatsijawanexa pamatacabi daxita Dioso pijajiwi ewetsijitsia mapanacuataje.

³² »Xaniajanë pacuenia pacatsipaebijitsiatsi. Pamona asae tsawanapae pamatacabi copiapatsiana^l patacawajunupaebijawanë, bajarapamona apo-tëpae tsane copiapatsinejewa daxita xuanë tajëwelia wajunupaebajë pecopiapatsijawanexa. ³³ Itaboxo, ira yajawa, werewerecaena. Itsiata baitsi jane, tajumeliwai si apowerewerecae tsane.

³⁴ »Bajaraxuata, nayajiwitaeya pajinawanapaename. ¡Pëtsa panajamatabëxainame pibisiacuene pane-exanaenexa, pane-aitajibinexa, panesiwajamatabëcuenebëjaiyaniwa ma-ëpanacuapijijamatabëcuene yabaraje! Belia, bajarapacuenia pane-exanawanapaejawata, jemata copiapatsipa tapatsimatocabinexatsica. ³⁵ Baitsi, pacuenia dujai jemata jopa mallata, aponatsiwajënae canaëjëtsinejewa, bajarapijinia pacuenia apopatanecopia-ewetsijawatamë jemata daxitanacuanëjawa copiapatsiana,

k 21:25 Taema Hab. 3:3-16. **l 21:32** *pamatacabi copiapatsiana*: Bajarapaliwai si Jesús pija-jiwi pejumetaejawata, canaëjëta pacuenia bajaraponë bepijiayo pepatsijawanexatsica, peyanacua-ewetsinexa daxitanacuanëpijiwi. Baitsi, bajarapamatacabi Romano nacuapijiwi pebejiobia-exanapona judiowi, Jesús pebeyaxuabimatacabitsi 3 pahorabejecuenia matabacapijijumeto aitaquiri, ira najëaba, itsamona petëpaewimi-ata namatacoba pemëthëwecua. Daxita bajarapacuenejawanë petaxae, pijajiwi canaëjëta bepijiayo Jesús pepatsijawanexatsica. Nexata, bajaraxua yabara ajamatabëcuenesaëya-exanabiaba penajujumexaniataewi Jesús peliwaissi, petoyaquinaebaxutonëta. «Ajena meta patsianica wajatuxanenë Jesús», jai tsabiabi pijajamatabëcuenesaëya-exanaejawata.

xanë tapatsimatacabinexatsica. ³⁶ Bajaraxuata, nayajiwitaeya pajinawa-napaename. Caematacabi canacujitsia, panayajiji wajëcabiabianame Diosojawabelia papeca-ajamatabëcuenesaëya-exanaenexa, panewecua-panepaponaenexanua daxita papiayaicuenejawanë pacatocopiapata-ponaena tapatsiwajënaeyatsica. Nexata pamatacabi, Xanë, Daxitajiji Pematapijinënë, patsianicajë, pacacuenecaëjëpaena panenubenaejawa pa-auranejewamë taitabarata —jai Jesús pijajiwijawabelia tajëwelia pewanunupaebijawata pacuenia itsamatacabi itsijitsia mapanacuataje.

³⁷ Caematacabi canacujitsia, Jesús liwaisi tsipaebabiaba templobota. Nexata, icatsia caemerawi canacujitsia, Jesús tomarawecua pitsapabiaba, pemajitabiabinexa Olivobacabowënëtsutojumabelia. ³⁸ Caebajayacunua canacujitsia jiwi patabiaba templobota, penamuxuna-ewetabiabinexatsi Jesús petsipaebiliwaisi.

Judas pona pecanajetsinexa Jesús pijawajabitsaë pecobeyabelia

(Mt 26:1-5,14-16; Mc 14:1-2,10-11; Jn 11:45-53)

22 ¹ Imoxoyo baja pewajënae pejonenexa Pascuafiesta, pamatacabanë-jawa judíowi baxane levadurata matajërëabinejewa pexanaepan.^m

² Sacerdotewi penamatacaitorobiwi, judíowi pecujarubiwinua, jiwi pecujunawixae, najumejaita picaní muetsiacuenia Jesús pebeyaxuabijawanexatsi.

³ Nexata, dowathi tsijamatabëjunuatsi Judas, ponë wënëbjiarubatsi, Iscariote.ⁿ Bajaraponë Jesús pijajiji, doce ponëbejeyajuwënënë. ⁴ Nexata, bajaraponë pona itsajota nacaetuata sacerdotewi penamatacaitorobiwi, templobopijipolicíawi penamatacaitorobiwi yajawa. Barëcuaicuajai pacuenia rajutsijitsia Jesús bajarapamonae pecobeyabelia. ⁵ Bajarapamonae bajaraxua yabara siwabarëya. Nexata, rajutsipaebatsi palata. ⁶ Judas muxunajai bajarapaliwaisi. Nexata, bajaraponë jaitapona paepatota toyapëxanepanaejitsiatsi, perajutsinexa jane baja Jesús bajarapamonae pecobeyabelia, itsajota bitso jiwi aponawitsi.

Jesús pijajiji barëxane pecopiarutsipexaejawa, pebeyaxuabiwajënaetsi

(Mt 26:17-29; Mc 14:12-25; Jn 13:21-30; 1Co 11:23-26)

⁷ Junua jane baja pafiestamatacabi judíowi baxane levadurata matajërëabinejewa pexanaepan. Bajarapafiesta petaxuxuabimatacabita, ovejaxi babia, pexaenexa Pascuafiestamatacabi.^o ⁸ Nexata, Jesús itoroba pijajiwitonëbeje, Pedro, Juan-beje, Jerusalén tomarajawabelia. Jumaitsi:

—¡Paponarebeje panenacuenebinexabije wajaxaejawanexa, xua jiwi baxane Pascuafiestamatacabi! —jai Jesús bajaraponëbejeyawabelia.

⁹ Nexata, jumaitsibeje Jesús-jawabelia:

m 22:1 *levadurata matajërëabinejewa pexanaepan*: Pascuafiestamatacabita taxuxuaba pafiesta judíowi wënëruba, levaduranejewa pexanaepan-pijifiesta. Bajaraxuata, xaina anijawënëbeje bajarapafiestamatacabanë. Bajarapafiestata 8 pamatacabibebenexa xaeyabiaba levadurata matajërëatsinejewa pexanaepan. Taemanua Mc 14:1-pijinota bajarapafiestabeje yabara. **n 22:3** *Iscariote*: «Queriot tomarapijinë», pejaijume. Itsanë Jesús pijajiji doce ponëbejeyajuwënënë wënërubatsinua Judas (Santiago pexënato taema Lc 6:16), bajaraxuata Judas, Queriot tomarapijinë, pewënë-itothianaecueniatsi wënëbjiarubatsi «Iscariotewëncuenia». **o 22:7** Taema Éxo. 12:1-28.

—¿Detsa jota jitsipame bajaraxua patanacuenebinexabeje, itsajota xaejitsiatsi? —jaibeje.

¹⁰ Jesús nexata jumaitsi pijajiwitonëbejajawabelia:

—Tomarabelia itsa papatsianamebeje, pacaxitajarabianamebeje meracanalito pewëtaranajetarucaenë. Bajaraponë papënanajetarucaenenamebeje. Paboyabelia joneyojopaena, panapatsianamebeje. ¹¹ Bajarapabo pexainanëjawabelia pajumaitsimëbeje tsane: «Wajanacacujarubinë raja cajumaitsi: ‘¿Detsa jota eca pënëyatu-ucutsibo pabo-ënëta tajajiwi barëxaejitsianë xua jiwi baxane Pascuafiestamatacabi?’ cagai raja», pajamëbeje tsane bajara-pabo pexainanëjawabelia. ¹² Nexata, pacatsitajëtsianabeje ayai-ënëtuatuajë pexainaejawa athëbëyo irajawatatsia, itsajota xaina daxitacuenë. Bajarajota, panacuenebianamebeje pexaejawa —jai Jesús pijajiwitonëbejajawabelia.

¹³ Nexata, bajaraponëbeje jane baja, ponabeje. Caxitajarababeje daxita pacuenia Jesús jumaitsiabeje. Nexata, nacuenëbabeje xua jiwi baxane Pascuafiestamatacabi, bajaraxuanë Jesús pijajiwi pebarëxenexa.

¹⁴ Itsa baja copiajopa pexae-epatotanexa, Jesús, pijajiwi, apósto-lewi, doce ponëbeje yajawa, eca mesa muxuneneta. ¹⁵ Nexata, jumaitsi bajarapamonaejawabelia:

—Tatëpaewajënae bitso jitsipajë paxamë patacayajawaxaejawa mapaPascuafiestapijipexaejawa. ¹⁶ Xaniajanë pacuenia pacatsipaebijitsiatsi. Matawëjëa rabaja, mapanacuataje apoxaenë tsane Pascuafiestapijipexaejawa. Matapania, daxita xua nacamotocuenecatane mapaPascuafiestaje pecopiapatsijawabelia, icatsia jane baja barëxaenajë Dioso peyanacua-ewetsiwi —jai Jesús pijajiwiawabelia.

¹⁷ Nexata, Jesús yapita copajawata pijajiwi pebarë-apaeranexa. Bajarapora yabara pexaniajamatabëcuene perajutsicujinae Diosojawabelia, jumaitsi pijajiwiawabelia:

—¡Maporaje payapire! ¡Papaema padaxitamë mapacopataje! ¹⁸ Xaniajanë pacuenia pacatsipaebijitsiatsi. Matawëjëa rabaja mapanacuataje apo-apaenë tsane uvacuaira. Matapania itsa copiajopaena daxita Dioso pijajiwi pewetsimatacabi, apaenajë icatsia —jai Jesús.

¹⁹ Bajaraxuacujinae, Jesús pita panbë. Bajarapapanbë yabara, pexaniajamatabëcuene perajutsicujinae Diosojawabelia, epatsënëquejeba. Rajuta pija-jiwi. Jumaitsi:

—¡Paxaema! Mara tawitoje,^p patacasiwatëpaejawa paxamënexa. Tatëpae-cujinae, mapacuenia pa-exanabiabianameje patanenajamatabënapitabiabinexamë —jai Jesús.

p 22:19 *Mara tawitoje:* Panbë apopeerabëto Jesús. Vinora-ata apojejana Jesús. Bajaraxua-beje saya nacamotocuenecatane xua Cristo nacato-exana wajanacasiwatëpaejawata. Pacuenia pan pexanaenexa, jiwi sebiabiaba piatajutaxunaeta, hornojawa, bajarapijinia pacuenia Jesús ayaicuenia bejiobia-exanatsi, wajanacacapanepaenexa Dioso wajanacananeconitsia-exanaejawaminexawecua, wajaneconijamatabëcuene. Pacuenia uvacuairarëmene jucabiaba vinoranexa, bajarapijinia pacuenia Jesús pejanarunaejawata, nacamotamatamota daxita wajaneconi-mi. Nexata, pacuenia jiwi wëna-asaë tsawanapae pan/peri pexaejawata, bajarapijinia pacuenia jiwi jamatabëcuene-aitawa Diosojawabelia, Jesucristo pejamatabëcuena. Pacuenianua jiwi jamatabëcuenebarëya piapaejawata piatanevinora, bajarapijinia pacuenia Jesús pijajiwi jamatabëcuenebarëya, penajamatabënapitsijawata Jesucristo petomatamotsijawatsi daxita pijaneconimi.

²⁰Nexata jane baja, daxita Jesús pijajiwi pebarëxaeweretsicujinae Pascua-fiestapijipexaejawa, Jesús icatsia yapita pijajiwi pebarë-apaeranexa. Jumaitsi:

—Mapacopapijivinoraje itajëta tajana, patacasiwatëpaejawa paxamë yabara. Tajana newecuarunaena. Bajarapajana pejamatabëcueneta, Dioso pejanacuenia najumecapanepaeya pacanajumeliwaisicajonena, papecacapanepaejawanexa.

²¹»Itsiata baitsi jane, bepayapëtaneme pena-ecaejawa mapamesamuxu-nenetaje, ponë necanajetsijitsia tajawajabitsaë pecobeyabelia. ²²Xaniajanë, Xanë, Daxitajiwi Pematapijinënë, tëpaenajë pacuenia tajëwelia Dioso netocopata. Itsiata baitsi jane, ponë necanajetsiana tajawajabitsaë pecobeyabelia, bitso bejiobi tsane —jai Jesús.

²³Bajarapamonae pejumetaejawata Jesús pejumaitsiyawa, namata-enetsia nayanijobapona, peyapëtaenexa pajiwi bajarapacuenia pexanaejawanexa yabara jumaitsi.

**Jesús pijajiwi najumejaitena, peyapëtaenexa ponë bajarapamonae
tuatuajëta bitso wecua-ayaijamatabëcuenenë**

²⁴Bajarapaepatota, Jesús pijajiwi anaeyacuenia nayanijobapona, peyapëtaenexa ponë bajarapamonae tuatuajëta wecua-ayaijamatabëcuenenëtsi.

²⁵Pejumetaejawata bajaraxua, Jesús jumaitsi pijajiwiawabelia:

—Pamonae apojudfowi, nacua-ewetsiwi, ayaijamatabëcuene penataewi, ajumesaëya paca-itorobabiaba, pejitsipaecuenia panejumecowënëtabiabinexa. Bajarapacuenia paca-itorobabiabi-ata, jitsipabiaba bajarapamonae yabara panejumaitsinexa: «Bajaraponë wajanacayanacua-ewetsinë, bitso pexaniacuene nacato-exanabiaba», panejainexa. ²⁶¡Pëtsa paxamë bajarapamonae pacuenejëpame, bepa-ayaijamatabëcuenewimë panenataenexa! Ponë raja peneta paxamëyajuwënëne pacawecua-ayaijamatabëcuenenë, peneta raja daxitajiwi pijajiwitonëcuenia yawenonaponaponaena. ²⁷¡Pacanaëjère mapacueneje! ¿Detsa pajiwi ayaijamatabëcuene xaina? ¿Mesajawata pexaeyecaenë? Itsa jume, ¿pexaejawa pemitacajucaenë? Paxamë pajumaitsimë tsipae: «Mesa muxuneneta pexaeyecaenë», pajamë tsipae. Itsiata, xanë bajarapitsijamatabëcuene apoxainaenë, panijatuxanenë-atanë. Paxamëjawata ponaponajë panijajiwitonënëcuenia, patacayawenonaenexa. Bajarapacuenia bepanecuenjëpame —jai Jesús.

²⁸Icatsia, Jesús jumaitsi pijajiwiawabelia:

—Paxamë apopenanawecuacopabimë jiwi nitoya-ata, nebejiobia-exanabiabi-atanua. Tsitecaeya paneyajawajinawanapame. ²⁹Bajaraxuata, xanë pacatocopatsianatsi jiwi paneyanacua-ewetsinexa, pacuenia taxa Dioso netocopata. ³⁰Ta-ewetsinacuatsia pacatocopatsianatsinua tajamesa muxuneneta panenaxaenexa, panenamatawëjëa-apaenexanua. Pa-enaenamenua peyanacua-ewetsiwi pijataxunaenëta trono juez-nëcuenia, panenaneconitsia-exanaenexa pijaneconi pexainaewi, Israel-pijinëmi pexi, doce ponëmibeje, pemomoxibitsaëttoyajuwënëwi —jai Jesús pijajiwiawabelia.

**Jesús yapëtaeya-exana Pedrojawabelia,
penayawajunuaxainaejawanexa pijajiwitonëcuenë**
(Mt 26:31-35; Mc 14:27-31; Jn 13:36-38)

³¹Jesús jumaitsi Pedrojawabelia:

—Simón, Simón, dowathi baja cajena wajëca Diosojawabelia, paxamë pacaewiwimë canacujitsia papecajamatabë-ëjëbijawanexa patanenawe-cuacopabinexamë. Pacuenia arrozxu bajëaba pesi pewecuaxuabinexa, bajarapijinia pacuenia paca-exanaejitsia, xanëwecua papecaxuabinexa papecajamatabëcuene-ëjëbijawata. ³² Pedro, itsiata baitsi jane, xanë catowajëtaaponatsi Diosojawabelia, pecatosajinaeyaniwa tane-itaxutuajamatejemajawamë. Xamë nenatsatsicujinae xanëwecua, caewëa-rena itsa najamatabëcuenepënyorotsianame xanëjawaberena. nexata ajamatabëcuenesaëya jamatabëcuene babataponaponaename itsamonae tajajiwi —jai Jesús Pedrojawabelia.

³³ Pedro itsiata jumaitsi Jesús-jawabelia:

—Tajatuxanenë, najamatabëcueneweretajë rabaja xamë yajawa taponaponaenexa penaneconitsiwi pejebabiabibojawabelia, itsa cacapona pecaetsinexa. Bajarapacuenia itsa cabeyaxuaba, tacayajawatëpaenexanua —jai Pedro.

³⁴ Nexata, Jesús jumezanawiata bajaraponëjawabelia:

—Pedro, xaniajanë pacuenia catsipaebijitsiatsi. Ajena, pamerawi, acueyabi xuabeje nayawajunuaxainaename tajajiwitonëcuenemë, wacara pefia-biwajënaeya —jai Jesús Pedrojawabelia.

**Jesús yapëtaeya-exana pijajiwijawabelia itsa baja
imoxoyo pewajënae pebeyaxuabijawanexatsi**

³⁵ Bajaraxuacujinae, Jesús yanjoba pijajiwijawabelia. Jumaitsi mapacueniaje:

—Pacujinae paca-itorobatsi panepaebanajetarubenaenexa Dioso pejumeli-waisi, jiwi pejinawanapaenacuanëjawa, paca-itawetatsi panecaponaeyaniwa doro, palata, zapato-ata.^q ¿Bajarapamatacabi, pacatsisajina itsacuenejawa panenamatawenonaejawa? —jai.

Nexata, bajarapamonae jumaitsi:

—¡Jume! Apopanetsisajinae cajena itsacuenejawa-ata —jai.

³⁶ Jesús nexata jumaitsi:

—Aeconoxae rajane baja, xanepana, panecaponaejawa panijadoro, panijapalata-ata. ¡Pajiwi tsisajinatsi espada, canajetsi pena-jumaxuabipana penatocomuatsinexa! ³⁷ Xaniajanë pacuenia pacatsipaebijitsiatsi. Netocopiapata jane baja, jiwi taneto-exanaenexa xua Dioso pejumeliwaisibaxutota xanë yabara pejumaitsijawa: «Naneconitsia-exanaenatsi bepibisiacuene pexanaenëcuenia»,^r pejajawa. Bajarapacuenia netocopiapataponaena caejawa canacujitsia daxita xua wajunupaeba tajëwelia profetawi, xanë yabara —jai Jesús pijajiwijawabelia.

³⁸ Nexata, Jesús pijajiwijawabelia:

—¡Tajatuxanenë, taema, marajotaje anija-espadabeje paxainajë! —jai.

Nexata, Jesús jumaitsi:

—Xanepana rabaja —jai.

Pacuenia Jesús wajëta Diosojawabelia Getsemanijawata, yabara peliwaisi
(Mt 26:36-46; Mc 14:32-42)

³⁹Bajarapacuenia pejumaitsicujinae, Jesús pitsapa bowecua, pijajiwi yajawa peponaenexa Olivobacabotsutojawabelia, pacuenia exanabiaba.^s

⁴⁰Pebarëpatsicujinae, jumaitsi:

—¡PawajëtaPONARE aeconoxae Diosojawabelia, papecajamatabëcuene-asaëya-exanaenexa, dowathi papecajamatabëcuene-ëjëbijawata papecajopaëya-exanaeyaniwa patanesiwanajamatabëcuenecopabijawamë-wecua! —jai.

⁴¹Nexata, Jesús pijajiwi wecuanatixilia, bejamatabëcuene treinta pametrobecuena. Bajarajota, pematabacabëta nucajunua, pewajëtsinexa Diosojawabelia. ⁴²Jumaitsi: «Axa, jitsipajë picani tanewecua-ajibia-exanaenexamë betajiobicuena tanebeyaxuabijawaminexa. ¡Pëtsa itsiata, neto-exaname xanë tajitsipaecuenia! Pacuenia xamë jitsipame netocopatsiana-name», jai Jesús pewajëtsijawata Diosojawabelia.

⁴³Nexata, bajarapaepatota tsitanaitajëtatsi ángelnë, athëbëwetsica pepatsinë, pejamatabëcuene-asaëya-exanaenexatsi. ⁴⁴Jesús bitso natsinajamatabëxaina, pebeyaxuabijawanexatsi yabara. Orijibia, asaëyata wajëtaPONA paxa Diosojawabelia. Nexata, pejamatabëcuenejëbijawata yajanetatsi. Pejanetsijawatatsi janetopitopijai irabereca pejanacuenia.

⁴⁵Jesús pewajëtsicujinae, nonotapuna baja. Lia pijajiwiJawabelia. Caxitaraba pijajiwi pemajitanubenaewi, tsipaji bitso cuerana penajamatabëxainaejawa. ⁴⁶Nexata, Jesús jumaitsi pijajiwiJawabelia:

—¿Detsa xuajitsia pamajitanubename? ¡Panonobapunare!, jai peyatixobijawatatsi. ¡PawajëtaPONARE aeconoxae Diosojawabelia papecajamatabëcuene-asaëya-exanaenexa, dowathi papecajamatabëcuene-ëjëbijawata papecajopaëya-exanaeyaniwa patanesiwanajamatabëcuenecopabijawamë! —jai Jesús.

Jesús pijajiwiTonë pecanajetsicujinaetsi pijawajabitsaëJawabelia,
waetabatsi jane baja

(Mt 26:47-56; Mc 14:43-50; Jn 18:2-11)

⁴⁷Itsa abaxë Jesús cuaicuajiai tsanucæ pijajiwiJawabelia, bajarapaepatota, jiwi najetarubena ayaiBITSaëtoXaneto, petsimaxëponaewitsi. Matacanajetarua Judas-wënëNë, Jesús pijajiwi, doce ponëMibeJeyajuwënëNë. Nexata, bajaraponë najetabalia Jesús-jawabelia, pebajacobinexa itabaratsutsuniaya.

⁴⁸Nexata, Jesús bajarajota jumaitsi:

—Judas, ¿Xanë mapacueniaje neBajacobame nitabaratsutsuniaya, tanecanajetsinexamë, Daxitajiwi Pematapijinënë, tajawajabitsaë pecobeyabeliaje? —jai.

⁴⁹Pijajiwi itsa tanetsi pacuenia Jesús exanaejitsiatsi, jumaitsi:

—Tajatuxanenë, ¿bajarapamonaeJawabelia tsaja canamaxëwanitsianatsi espadata? —jai.

^s 22:39 *exanabiaba*: Jerusalén peponaponaematacabita, caemerawi canacujitsia Jesús barëponabiaba pijajiwi bajarapatsutojawabelia pemajitsinexa. Taema Lc 21:37.

⁵⁰Bajarapaepatota, caenë Jesús pijajiwiyajuwënënë namaxëwanita. Tomuxuyoropaebiaxuaba pecujuanenia pamuxuyoroto sacerdotewi pepopenamatacaitorobinë pijajiwitonë. ⁵¹Nexata Jesús jumaitsi:

—¡Xanepana rabaja! ¡Copare! —jai pijajiwitonëjawabelia.

Jesús muxuyororoyataba bajaraponë. Xaniawaetsia muxuyororuta baja.

⁵²Bajaraxuacujinae, Jesús jumaitsi pamona caponaejitsiatsi petsimaxëpat-siwitsirenajawabelia, sacerdotewi penamatacaitorobiwi, templobopijipolicíawi penamatacaitorobiwi, judfowi pija-ancianowijawabelia-ata. Nexata Jesús jumaitsi:

—¿Detsa xuajitsia panetsicaponame espadanë, naebonë-ata, tsipaji panetaneme betanacobetoxotsinë? ¿Bajaraxuata tsaja, panetsicaponame espadanë, naebonë yajawa, patanewaetabinexamë pacuenia pawaetababiabame penacobetoxotsinë? ⁵³Xanë caematacabi canacujitsia Dioso pejumeliwaisi pacatsipaebabiabatsi templobota paxamëjawabelia. Itsiata, bajarapamatacabi apopanewaetabimë. Nexata, mapaepatotaje panetsimaxëpatame dowathi, jiwi piamatabäcuenë-itaquiriya-exanaenë, papeca-itorobixae —jai Jesús bajarapamonaejawabelia.

Pedro jane baja nayawajunuaxaina Jesús pijajiwitonëcuenë

(Mt 26:57-58,69-75; Mc 14:53-54,66-72; Jn 18:12-18,25-27)

⁵⁴Nexata jane baja, Jesús caponaliatsi pewaetabicujinaetsi, sacerdotewi pepopenamatacaitorobinë pijaboyabelia. Pedro bajarapamona pecowëwelia tajëyo pënacotocaewanajetaruca. ⁵⁵Nexata, pabota Jesús capatatsi, bajarapanabotuatuajëta wajabitsaë isoto itajuruteta. Bajarapamona isoto matatoyorotsia-ena. Bajarajota, Pedro naitaxutocaewetsiaya bajarapamonaejawata na-eca. ⁵⁶Bajarapabota penacuenëbiwa, Pedro ita taeyetatsi penanonopecaejawa isotomuxuneneta, naitaxutobabatsia asaëya taenucatsi. Nexata, jumaitsi Pedro yabara itsamonaejawabelia:

—Mara ponë-ata Jesús pijajiwitonëje —jai bajarapowa.

⁵⁷Nexata, Pedro nayawajunuaxainaeya jumaitsi:

—¡Jume raja! Xanë cajena apoyapëtaenë bajaraponë —jai bajarapowajawabelia.

⁵⁸Bajaraxuacujinae, itsajiwi icatsia taeyetatsi. Bajarapajiwi-ata jumaitsi Pedrojawabelia:

—Xamë-ata rabaja cajena Jesús pijajiwiyajuwënënë —jai.

Nexata, Pedro nayawajunuaxainaeya jumaitsi bajarapajiwiawabelia:

—¡Jume raja! Xanë raja cajena bajaraponë apopijajiwiyajuwënënë —jai Pedro.

⁵⁹Bejamatabëcuenë caehoracujinae, icatsia itsanë jumaitsi Pedro yabara:

—Xaniajai rabaja cajena. Maponëje Jesús-jawata naponapona, tsipaji rabaja bajaraponë-ata Galilea nacupijinë —jai bajaraponë.

⁶⁰Itsiata, Pedro nayawajunuaxainaeya jumaitsi bajaraponëjawabelia:

—Apoyapëtaenë cajena xua yabara jumaitsimë —jai.

Bajarapaepatota, Pedro pejumaitsiyawata, wacara jane baja fiaba.

⁶¹Nexata, Jesús bo-ënëwerena namuxufetsiaya naëcorena Pedroja-waberena. Taeyerenatsi. Bajarapaepatota, Pedro najamatabënapitarabara Jesús pejumaitsiyawatsi: «Ajena, pamerawi, acueyabi xuabeje

nayawajunuaxainaename tajajiwitonëcuenemë, wacara pefiabiwajënaeya», pejaijwatsi Jesús. ⁶² Nexata bajarajota, Pedro pitsapalia bopanabowecua. Piniijicuenia bitso najamatabëxainaeya nua.

Jesús wajabitsaë capocaponatsi, yabara peliwaissi

(Mt 26:67-68; Mc 14:65)

⁶³ Pamonaë Jesús ya-ewetatsi penaneconitsia-exanaewajënaeyatsi, baja-rapamonaë capocaponatsi. Itabaratsaquiababeponatsinua pecobethaitonëta. ⁶⁴ Papaëbërëpanata itaxutocëtatsi. Xuacujinaë, itabaratsaquiababeponatsi pecobethaitonëta. Nexata, jumaitsi tsaponae Jesús-jawabelia:

—¡Profeta, wajunupaebare ponë caitabaratsaquiababa! —jai tsaponae.

⁶⁵ Bajarapamonaë pibisiajumenë jumaitsi tsaponae Jesús-jawabelia.

Jesús nutatsi judíowi penamatacaitorobiwi pitabarata

(Mt 26:59-66; Mc 14:55-64; Jn 18:19-24)

⁶⁶ Ajena baja matacabi tsarucaponaë, nacaetuata judíowi pija-ancianowi, sacerdotewi penamatacaitorobiwi-ata, judíowi pecujarubiwi-ata yajawa. Nexata, Jesús caponaliatsi bajarapamonaë penacaetuatsijawabelia. Bajara-jota, yanjibapona Jesús-jawabelia:

⁶⁷ —¡Panetsipaebare! ¿Xamë tsabaja Cristomë, athëbëwetsica Dioso peca-itorobinëtsica jiwi necapanepaenënexa? —jai tsaponae.

Nexata, Jesús jumaitsi bajarapamonaëjawabelia:

—«Jājā, Cristonë rabaja», pacajai-atatsi, apopanejumexaniataemë tsi-pae. ⁶⁸ Itsaliwaisiyo pacayanijobi-atatsi, apopanejumecanawiatsimë tsipae.

⁶⁹ Itsiata baitsi jane, ajena pamatacabicujinaë, Daxitajiwi Pematapijinënë, ecaenajë taxa Dioso, ayaijamatabëcuenenë, pecujuanenia, patanajua-ewetsinexabeje daxitacuene —jai Jesús.

⁷⁰ Daxita bajarapamonaë jumaitsi Jesús-jawabelia:

—¿Xamë tsabaja nexata Dioso pexënatomë? —jai.

Nexata Jesús jumaitsi:

—Jājā, xanë rabaja pacuenia panejumaitsimë. Bajaraponënë cajena —jai Jesús.

⁷¹ Nexata bajarapamonaë najumaitsi:

—Ajibi rabaja matawëjëa waja-ewetaponaëjawa, jiwi wajanacatsipaebaponaenexa pacuene yabara naneconitsia-exanaejitsiatsi maponëje, tsipaji pijacuata naneconita. Waxaitsi rabaja wajacuaya jumetanetsi pacuenia maponëje nayabaracuaicuajai Dioso apopejitsipaecuenia^t —najai bajarapamonaë.

Jesús nutatsi Pilato pitabarata

(Mt 27:1-2, 11-14; Mc 15:1-5; Jn 18:28-38)

23 ¹ Daxita pamonaë judíowi penamatacaitorobiwi,^u Jesús peneco-nitsicujinaetsi, nonobapuna, pecaponaenexatsilia Judea nacua

^t 22:71 Dioso apopejitsipaecuenia: Bajarapamonaë pecuene-aebixae Jesús, Cristocuene, Dioso pexënatocuene-ata, tsitatsi Jesús najumetsënëtsiaya penawajunupaëbjawa bajarapacuenia. Baja-raxuata, tsitatsi penaneconitsijawa Diosojawabelia. ^u 23:1 judíowi penamatacaitorobiwi: Taema Lc 22:66.

pewetsinē, Pilato, pijaboyabelia. ² Bajarajota, Pilato pitabarata, neconitsiya jumaitsi tsaponae Jesús yabara:

—Mara ponēje pataneconicanaējētsicujinae, patocaxibajarabajē penaneconitsijawa Romano nacua pepopewetsinējawabelia, tsipaji muxubijiapenetapona jiwi impuesto jamatabēcuene pematamotsiyaniwa. Orijibia, jumaitsi tsaponae: «Xanē raja Cristonē, jiwi pepotayanacua-ewetsinēnexa», jai tsaponae Jesús —jai bajarapamonae neconitsiya Pilatojawabelia.

³ Nexata, Pilato yanijoba Jesús-jawabelia:

—¿Xamē tsaja judíowi peponeyanacua-ewetsinē? —jai.

Nexata Jesús jumaitsi:

—Jājā, xanē rabaja pacuenia nejumaitsimē —jai.

⁴ Pilato nexata jumaitsi sacerdotewi penamatacaitorobiwijawabelia, jiwi ayaibitsaētoxanetojawabelia-ata:

—Apocaxitajabinē cajena maponēje itsacujiruneconi-ata pexinaejawa, xua yabara naneconitsia-exanaejitsianē —jai.

⁵ Itsiata, bajarapamonae ajumesaē. Orijibia, neconitsiajumaitsi tsaponae Jesús yabara:

—Bajaraponē daxita Judea nacuapijiwi muxubijiapenetapona, pianaepanaenexa Judea nacua pewetsiwiwijawabelia. Taxuxuaba cajena Galilea nacujawawerena, pexanaejawa mapanacuayaberena-ataje —jai tsaponae Pilatojawabelia.

Jesús nutatsi Herodes pitabarata

⁶ Itsa jumetane Pilato bajarapamonae peneconitsijawatsi Jesús, jumaitsi:

—¿Matsa ponēje Jesús, Galilea nacuapijinēje? —jai Pilato. ⁷ Peyapētaeya-exanaecujinaetsi Jesús Galilea nacuapijinēcuene, nexata Pilato itoroba pijajiwi pecaponaenexatsilia Galilea nacua pewetsinē, Herodes-jawabelia. Bajarapamatacabi pijinia, Herodes siwaxainaponapona Jerusalén tomabelia. ⁸ Bajaraxuata, Herodes, itsa tane Jesús, barēya, tsipaji bajaraponē wēnēliwaisitaeyabiaba Dioso pesaēta pinijicuene pexanaponaejawanē. Nexata, bajaraponē-ata jamatabētane Dioso pesaēta pinijicuene pexanaejawa. ⁹ Nexata, Herodes ayaicuenia yanijobapona Jesús-jawabelia. Itsiata, apojumecanawiatsi caejumeyo-ata. ¹⁰ Bajarajota nubena sacerdotewi penamatacaitorobiwi, judíowi pecujarubiwi yajawa, pamonae ayaijumeta neconitaponatsi Jesús, Herodes-jawabelia. ¹¹ Nexata, Herodes, pijajiwi wajabitsaē yajawa, Jesús capocaponatsi. Bitso pexanianaxatatsijawa jumaxatatatsi, xua nacua-ewetsinē banaxatata, benacua-ewetsinēcuenia petaenexatsi. Bajaraxuacujinae, icatsia canawiabarenatsi Pilatojawaberena. ¹² Pewajēnaeya picani, Pilato, Herodes-beje, naitoyabeje. Itsiata, bajarapamatacabi nabaramatabēcuenexanepanabeje. Najamatabēcuenējpabeje baja icatsia.

Pilato jane baja, tocopata Jesús pebeyaxuabinexatsi

(Mt 27:15-26; Mc 15:6-15; Jn 18:39–19:16)

¹³ Pilato nexata junata penacaetuatsinexa sacerdotewi penamatacaitorobiwi, judíowi pewetsiwi-ata, bajarapatomarata pejinawanapaewi-ata.

¹⁴ Nexata, bajaraponē jumaitsi Jesús yabara:

—Paxamē maponēje panetocapatame, ponē paxamē pataneme pena-neconitsinēcuenia pemuxubijiapenetaponaejawa jiwi pianaepanaenexa

nacua-ewetsiwi jawabelia. Itsiata baitsi jane, xanë picani tajacuata yanijo-bajë xaniawaetsia pane-itabëta, tayapëtaenexa xua yabara paneconitame. Itsiata, itsacujiruneconi-ata apocaxitajarabinë xua yabara naneconitsia-exanaejitsianë. ¹⁵ Herodes-jawabelia itorobi-atanë, itsacujiruneconi-ata apotocaxitajarabitsi. Nexata, aponaneconitsia-exanaetsi. Saya icatsia caewëarena nacatocanawiarena. Pataneme rabaja bajaraponë itsacujiruneconi apopexainaejawa xua yabara beyaxuabijitsiatsi. ¹⁶ Nexata, saya tajajiwi wajabitsaë itorobianajë pejumaconibabenexa penaneconitsiwi pejumaconitabiabimacata. Bajaraxuacujinae, copatsianajë —jai Pilato bajarapamonaejawabelia.

¹⁷ Bajarapacuenia Pilato jumaitsi, tsipaji copatabiaba caenë, caewai canacujitsia, pepitsapaenexa penaneconitsiwi pejebabiabibowecua, Pascuafiesta-matacabi. Penaneconitsiwi yawüwënë, ponë wajëtatsi pecopatsinexa, capitsapabiaba, jiwi pesiwajamatabëcuenexanepanaenexatsi.

¹⁸ Nexata, bajarapamonaë ita jumetane Pilato picani Jesús pecopatsia-paebijawa, caecuenia wawajai. Jesús yabara Pilato jawabelia jumaitsi:

—¡Maponë jane beyaxuareje! ¡Barrabás jane juya panetocapitsapare! —jai bajarapamonaë.

¹⁹ Jesús pewaetabi wajënaeyatsi, Barrabás Jerusalén tomarata barë nabia gobierno pijajiwi jawabelia. Bajaraponë nua beyaxuaba jiwitonë. Bajarapaneconibeje jamatabëcuene naneconitsiaponapona penaneconitsiwi pejebabiabibota. ²⁰ Pilato picani tsiteca jamatabëcopata Jesús. Nexata, barë najumejaita bajarapamonaejawabelia, Jesús baja pecopatsi jawanexa. ²¹ Itsiata baitsi jane, bajarapamonaë orijibia wawajai:*

—¡Cruzajawabelia cobematabiabarutsia-exanare! ¡Cruzajawabelia cobematabiabarutsia-exanare! —jai tsaponae Pilato jawabelia.

²² Icatsia, acueyabijawa Pilato jumaitsi bajarapamonaejawabelia:

—¿Detsa papibisiacuenexa maponëje, cruzajawabelia tacobematabiabarutsia-exanaenexa? Apocaxitajarabinë cajena itsacujiruneconi-ata, paneconi yabara beyaxuabijitsiatsi. Nexata, saya taja-jiwi itorobianajë, bajaraponë pejumaconibabenexa penaneconitsiwi pejumaconitabiabimacata. Bajaraxuacujinae, copatsianajë peponaenexa baja —jai Pilato.

²³ Itsiata, bajarapamonaë ajumesaëya itorobapona pebeyaxuabinexatsi. Wawajaiya jumaitsi tsaponae:

—¡Cruzajawabelia cobematabiabarutsia-exanare! —jai tsaponae Pilato jawabelia. Bajarapacuenia bajarapamonaë, sacerdotewi penamatacitorobiwi yajawa, bitso pewawajaitsaponaexae, apojitsipae-ata picani, Pilato belia baja jumejejai. ²⁴ Nexata baja, tocopata pacuenia bajarapamonaë wajëtatsi.

²⁵ Jiwi pejitsipaecuenia, Pilato itoroba pijajiwi pejutsia-exanaenexa Barrabás, ponë picani naneconitsiaponapona penaneconitsiwi pejebabiabibota,

v 23:21 *orijibia wawajai*: Pilato nacua pewetsinëxae Romano nacua pepopewitsinë pejamatabëcuene, jiwi tsicarucatsi picani pejumecowëñëtsinexa pacuenia Pilato itorobatsi. Itsiata, sacerdotewi penamatacitorobiwi, judiowi pewetsiwi-ata, Jesús pitoyaxaetsi, anaëya-exanapona bajarapanaëtuatsibitsaëto jawabelia, Jesús penaneconitsia-exanaenexatsi. Bajaraxuata, Pilato, liwaisi penatsixainaeanyiwa Romano nacua pepopewetsinë jawabelia, planaëpanaëya-exanaexae pamonaë yanacua-eweta, jejai Jesús pebeyaxuabinexatsi, bajaraponë apojitsipae-ata picani.

gobierno pijawijawabelia pebarēnabexae, jiwitonē-ata pebeyaxuabixae. Caranata, tocopata Jesús, pianeconijibinē, pebeyaxuabinexatsi.

Jesús jane baja, cruzajawabelia cobematabiabarutatsi

(Mt 27:32-44; Mc 15:21-32; Jn 19:17-27)

²⁶ Wajabitsaē ita caponaliatsi Jesús cruzajawabelia pecobematabiabarut-sinexatsi, bajarapaepatota, wayafowerena najetaruca Simón, Cirene toma-rapijinē. Bajaraponē waetabatsi wajabitsaē. Itorobatsi petocaponaenexa pacruzajawabelia Jesús cobematabiabarutsijitsiatsi. Nexata, Simón towēta-caranajetaruca cruza Jesús pecowēya.

²⁷ Jesús pēnanajetarubenatsi, jiwi ayaibitsaētoخانeto, petiriawibitsaēto-ata. Bajarapowaxi ayaijumeta Jesús pēnueyanajetarubena, bitso pebejiobia-taexae. ²⁸ Nexata, Jesús napēñeyorota. Bajarapowaxijawabelia jumaitsi:

—¡Paxamē paJerusalén tomarapijipetiriawimē, pētsa xanē panepē-nueyabame! ¡Biji rajane, paxamē panatsinuema! ¡Patsinuema panexi-ata, ²⁹ tsipaji copianajetaruca piayaimatacabi, jiwi penabejiobitsimatacabi-nexa! Bajarapamatacabitā, petiriawi jumaitsi tsane: «Nacatsujamatabē-cuenebarēya powaxi apocuenecaējēpaetsi pexi pexainaejawa, powaxinua aponamirajutsi-ata caeto-ata penacueto», jai tsane petiriawi mawecowaxi yabara. ³⁰ Bajarapamatacabi, jiwi ayaicuenia penabejiobitawanapaexae, petsutonējawabelia jumaitsi tsane: «¡Panematacēñēbare patatēpaenexa!», jai tsane. Bepeyajatsutoxijawabelia pijinia, jumaitsi tsane: «¡Panemata-acabare, patanemēthēcaecueniamē!» jai tsane. ³¹ Mapacueniaje jiwi ita nebejiobia-exana xanē, itsacujiruneconi apoxinae-atanē,^w ¿detsa pacue-nia nexata exanaena Dioso, pamonaē pijaneconi pexinaewijawabe-lia piayaimatacabitā? Ayaicuenia cajena bejiobia-exanaena —jai Jesús bajarapapetiriawijawabelia.

³² Itsabelia wajabitsaē Jesús caponatsi, anjanēbeje, penaneconitsixae-beje, yajawacaponatsi, peyajawabeyaxuabinexatsibeje. ³³ Itsa baja capaliatsi Jiwimatasipawēñētsutojawabelia, nexata jane baja, cruzajawabelia Jesús cobematabiabarutatsi. Bajaraponēbeje-ata saicaya cobematabiabarutatsi-beje. Itsanē Jesús pecujuanenia itsacruzata rutatsi. Itsanē pijinia Jesús pet-sawenonenia itsacruzata rutatsi. ³⁴ Jesús baja cruzajawabelia pepuarutsitsi, jumaitsi tsarucaē paxa Diosojawabelia:

—¡Axa, mapamonaēje siwajamatabēcuenecaeware pijaneconi, tsipaji raja apoyapētaē xua exana! —jai Jesús paxa Diosojawabelia.

Nexata, pawajabitsaē Jesús cobematabiabarutatsi cruzajawabelia, Jesús penaxatatsijawa natsicobetsanapona, pecanamuxusitsicuenia ibotoxita. Pecanamuxusitsijawata, irata natsipenetanajetarubena, peyapētaenexa ponē pitaponaējitsia caejawa canacujitsia. ³⁵ Bajarajota, daxitajiwi petanubenae-jawata perutsijawatatsi cruzajawabelia, bajarapaepatota, judīowi pewetsiwi Jesús capocaponatsi. Najumaitsi Jesús yabara:

^w 23:31 *itsacujiruneconi apoxinae-atanē*: Wowaijumeta canacueneba piasianae, petsewinaebeje yabara. Piasianae ita jai: «Pianeconijibinē», pejaijume. Nexata, pacuenia piasianae apoxane-panae isonexa, bajarapacuenia apotoxanepanaetsi jiwi pebejiobia-exanaenexa pianeconijibinē. Petsewinae ita jai: «Pijaneconi pexinaenē», pejaijume. Pacuenia petsewinae xanepana petajue-nexa isotota, bajarapacuenia toxanepanatsi Dioso pebejiobia-exanaenexa pijaneconi pexinaewi.

—Maponëje pina itsamonae capanepa.* Nexata, pijacuata nacapanepae, itsa xaniajai pepacuene Cristo, Dioso athëbëwetsica pitorobinëtsitsica jiwi pecapanepaenexa —najai judíowi pewetsiwi Jesús yabara.

³⁶Wajabitsaë-ata capocaponatsi. Capocaponaeya Jesús cujibarenatsi, perajutsinexatsi piajatuvinora. ³⁷Nexata jumaitsi Jesús-jawabelia:

—¡Itsa xamë judíowi peponewetsinë, nacapanepare nijacuata! —jai wajabitsaë.

³⁸Jesús pematabocotomatatsënëyo ruta peyaquinaetablapyo. Bajarapatablapajumata, Pilato pijajiwi wajabitsaë yaquinaruta acueyabi pawiriawi-beje pijajumeta, griegojumeta, latín-jumeta, hebreojumeta-ata, mapejumait-sijumeje: «Mara ponëje judíowi pepopeyanacua-ewetsinë», pejaijume.

³⁹Piajamatabëcuenebejenëbejeyajuwënë, pecobematabiabarutsinëtsi cruzajawabelia Jesús pemuxuneneta, pibisiacuenia bijataerucatsi. Jumaitsi:

—¡Itsa xamë Cristomë, athëbëwetsica Dioso peca-itorobinëtsica jiwi necapanepaenexa, nijacuata nacapanepare! ¡Paxanëbeje-ata panecapanepare-beje! —jai tsarucac Jesús-jawabelia.

⁴⁰Itsanë pijinia, itsacruzajawata pecobematabiabarutsinëtsi, jume-itawetaruca. Jumaitsi tsarucac:

—¿Dioso tsaja apocujunawimë cacobematabiabarutsi-ata mapacueniaje nijaneconi yabara netëpaejawabelia? ⁴¹Waxaitsibeje rabiji wajaneconi waxaxainaexaebeye, mapacueniaje nacarutabeje wajatëpaejawabeliabeje. Biji raja maponëje, caeto-ata pibisiacuene apo-exanae-ata, itsiata cobematabiabarutatsi —jai tsarucac penajuananeconitsinëbejeyawabelia.

⁴²Bajarapaepatota, bajaraponë jumaitsi Jesús-jawabelia:

—Jesús, xanë nenajamatabënapitsianame pamatacabi xamë taxuxuabianame newetsijawa mapanacuaje —jai bajaraponë.

⁴³Nexata, Jesús jumaitsi bajaraponëjawabelia:

—Xaniajanë pacuenia catsipaebijitsiatsi. Ajena rabaja, neyajawaponapo-naename Paraíso nacujawatatsia —jai Jesús.

Jesús jane baja tēpa

(Mt 27:45-56; Mc 15:33-41; Jn 19:28-30)

⁴⁴Jesús baja itsa tēpaejitsia matoneje-epatota, daxita nacujawawa aitaquiri tsajuni. Matapania caniwijawabelia, nacua icatsia napebeta, acueyabi pahorabejecujinae. ⁴⁵Pitaquiri-epatota, templobo ënëtuatuajëalia pënëyatu-ucutarutsipana tuatuajëatsica titititicaica. ⁴⁶Nexata, Jesús ayaijumeta jumaitsi Diosojawabelia:

—¡Axa, xamëjawabelia daxita tjamatabëcuene carajutatsi! —jai Jesús.

Bajarapacuenia pejumaitsiyawa itsa najumewereta, tēpanajereca jane baja.

⁴⁷Romano nacuapijinë, wajabitsaë pijacapitán, itsa tane daxita bajarapacuene, wënëxaniatsiaya Diosojawabelia jumaitsi:

—Xaniajai tsaena baja. Maponë tēpaje, planeconijibinë —jai wajabitsaë pijacapitán.

x 23:35 *capanepa*: Piawitanewi jamatejemaya-exana. Itsamonae icatsia asaëya-exana petëpae-cujinae. Itsamonae dowathinë wecuacapitsapaeya-exana. Bajarapacuenia capanepa itsamonae, itsiata, judíowi pewetsiwi cuene-aeba Jesús bajarapacuenia pexanaejawa.

⁴⁸Daxita pajiwi bitsaët oxaneto nacaetuata petäenexa Jesús petëpaejawa, itsa tane pejumaliwerewerecaejawa, bitso najamatabëxainäyë nawiaba pijabonëjawabelia. ⁴⁹Daxita pamonaë Jesús peyapëtaewitsi, pebijäwi, petiriawi-ata, pamonaë Galilea nacuawerena pënaponatsi, tajëyojawawerena taenubena^y Jesús pebeyaxuabijawatsi.

Jesús petëpaenë buatatsi ibowajualia

(Mt 27:57-61; Mc 15:42-47; Jn 19:38-42)

⁵⁰⁻⁵¹Jerusalén tomarata ponapona José, Arimatea tomarapijinë, Judea nacuata pe-ecaetomara. Bajaraponë pexaniajamatabëcuenenë, xaniawaetsia peponaponaenë Dioso pitabarata. Copia-ewetapona pëcopiajopaejawa pamatacabi caenë Dioso ewetsijitsia daxita pijäwi mapanacuataje. Bajaraponë judiowi pewetsiwyajuwënenë-ata, apojamatabëcuenëjapae pacuenia penajuawi exana Jesús peneconicäëjtsijawata. ⁵²José nexata lia nacua-ewetsinë Pilatojawabelia, pewajëtsinexa petocopatsijawatsi petëpaenë Jesús, pemëthëtsinexa. ⁵³Pilato pejeaicujinaë, José jane baja petëpaenë Jesús cruzajawawetsica pitsica.^z Daxitanëreca mataquionaëyë matacacëba pexaniawiria piapiasábanapanata. Nexata xuacujinaë, José bualia Jesús petëpaenë pejana-ibowajujawalia,^a pa-ibowajualia abaxë apobuatsi caejiwi-ata petëpaewi. ⁵⁴José bepijiayo mëthëta Jesús petëpaenë, tsipaji baja, imoxoyo pewajënaë pecopiapatsijawa judiowi penacuera-ewetsimatacabinexa.

⁵⁵Papetiriawi Jesús pënaponatsi Galilea nacuawerena, tajëyo José pëcowaëyë najetarubena. Nexata, tane petëpaenë Jesús pacuenia José buata bajarapa-ibowajualia. ⁵⁶Bajarapapetiriawi penawiabicujinaë baja pijabonëjawabelia, xaniawaeta pexaniapetuxujuwira, pexaniapetuxujuwitsapato yajawa, petëpaenë Jesús peperabë-exabinexa, pepanepaecujinaë judiowi penacuera-ewetsimatacabi. Bajarapacuenia nacuera-eweta sábadó matacabitä, pacuenia Dioso itoroba penajumecopatsiliwaisi Moisés-pijinëta.

Jesús petëpaecujinaë, icatsia baja asaë

(Mt 28:1-10; Mc 16:1-8; Jn 20:1-10)

24 ¹Judiowi penacuera-ewetsimatacabi pewerewerecaecujinaë, merawia pitsijawata, pepobajayacunua, bajarapapetiriawi icatsia ponalia petëpaenë Jesús pebuatsi-ibowajutsijawabelia. Caponalia papexaniatuxujuwijawa xaniawaeta, petëpaenë Jesús peperabë-exabinexa. Itsapetiriawi yajawa ponalia, peyanabinexatsi. ²Itsa baja palia, bajarapapetiriawi tane pewecuatixitsijawa pa-ibotoxanetota José picani yawëpa-acatanuta petëpaenë Jesús pebuatsi-ibowajujawata. ³Jesús pebuatsi-ibowajutsijawalia pejonecujinaë, apocaxitajarababuatsi petëpaenë, pepopetuxanenë Jesús. ⁴Nexata, bajarapapetiriawi bitso jamatabëcuenenajunawiaca. Apoyapëtaë pacuenia exanaëjitsia. Bajarajota, jemata tsitanaitajëtanucatsibeje

y 23:49 tajëyojawawerena taenubena: Taema Sal. 38:11. z 23:53 cruzajawawetsica pitsica: Caenë José apopitsitsica Jesús cruzajawawetsica. Nicodemo-ata yawenonatsi (Jn 19:39-40). Belia, itsamonaë, José, Nicodemobeje, petonacuenebiwitsi, barëponatsinua peyawenonaenexa. a 23:53 pejana-ibowajujawalia: Bajarapa-ibowaju José itoroba picani pijäwi petoexanabuatsinexatsi ibo-itapajanitowata, bajaraponë itsa tëpa pemëthëtsinexatsi bajarapa-ibowajuta. Taema Mt 27:60.

anija-ängel-nēbeje. Bajaraponēbeje penaxatatsijawabeje niweniweni bitso.

⁵Bajarapapetiriawi bitso pecajunawi, pematabacabēta irataeya bobenajunua bajarapa-ängel-nēbeje pitabarata.

Nexata, bajarapaponēbeje jumaitsi bajarapapetiriawijawabelia:

—¿Detsa xuajitsia pajaitame petēpaewituatujēta ponē piasaētsapona-ponaenē? ⁶Jesús rabaja majotaje ajibi tsarucacae, tsipaji Dioso rabaja icatsia asaēya-exanatsi. ¡Panajamatabēnapire pacuenia pacatsipaeba Galilea nacuada, pamatacabi abaxē asaē tsaponapona! ⁷Tajēwelia pacajumaitsi: «Xanē, Daxitajiwi Pematapijinēnē, necanajetsiana pibisiajamatabēcuenewi pecobeyabelia. Nexata, cruzajawabelia necobematabiabarutsiana, tanebeyaxuabinexa. Itsiata baitsi jane, tanebeyaxuabicujinae, acueyabimatacabita, icatsia asaēnē tsane», pacajai baja cajena —jai āngel-nēbeje petiriawijawabelia.

⁸Bajarapapetiriawi jumenajamatabēnapita Jesús pejumaitsiyawami.

⁹Nexata baja, nawiabarena petēpaenē Jesús pebuatsi-ibowajutsijawawerena, petsipaebinexa daxita bajarapacueni yabara once ponēbeje, Jesús pija-apóstolewijawabelia, daxita itsamonae Jesús pijajiwijawabelia-ata. ¹⁰Bajarapapetiriawiyajuwēnēwi itsawa María, Magdala tomarapijiwa, itsawa pijinia Juana, itsawa pijinia María, Santiago pena. Bajarapowaxi, itsapetiriawi yajawa, tsipaeba bajarapacueni yabara apóstolewijawabelia. ¹¹Bajarapacuenia tsipaebi-ata, apóstolewi apojumexaniataetsi. Bajarapaliwaisi yabara jamatabējumaitsi: «Saya meta bajarapapetiriawi pijacuata exana bajarapaliwaisi», jamatabējai apóstolewi. ¹²Itsiata baitsi jane, Pedro cujinaepit-sapalia bowecua, Jesús petēpaenē pebuatsi-ibowajutsijawabelia. Bajarapa-ibowajualia itsa naēcolia, taeyejeba pebobenaejawa Jesús mataquionaeya pematacacēbipanamitsireca. Nexata baja, Pedro jamatabēcuenenabenajacaeya nawiarena boyaberena. Canaējēbanajetaruca bajarapacueni yabara.

Jesús piasaēcujinae, pēcaxitajarabaxuaba pijajiwitonēbeje,

Emaús tomarabelia peponaenēbeje

(Mc 16:12-13)

¹³Pamatacabi petiriawi wajunupaeba Jesús penamatacotsijawa apóstolewijawabelia, bajarapamatacabi Jesús pijajiwitonēbeje naropotabeje Jerusalén tomarawelia, Emaús tomarabelia. Bajarapatomara eca once pakilómetrobeje Jerusalén-wecua. ¹⁴Bajaraponēbeje namutua penajetarucacajawata, natsipaebanajetarucabeje daxita xuanē copiapata. ¹⁵Bajaraxua yabara pecuaicuajai tsanucaponaecawatabeje, Jesús pēcaxitajarabatsibeje. Nexata, muxunenia najetarucatsibeje. ¹⁶Bajaraponēbeje tae-atabeje, itsiata apoyapētaebeje Jesús-cuene.

¹⁷Nexata, Jesús yanijoba bajaraponēbejajawabelia. Jumaitsi:

—¿Detsa pitsicuene yabara panaliwaisita najetarucamebeje namutua? — jai Jesús.

Bajaraponēbeje nucajopabeje. Penaēcotsijawataliabeje Jesús-jawabelia itabarayapētanetsibeje penajamatabēxainaejawabeje. ¹⁸Nexata, bajaraponēbeje yajuwēnēnē, Cleofas, jumecanawiatsiaya jumaitsi Jesús-jawabelia:

—¿Xamē tsaja caenēmē aponijanayapētae bajarapacueni, nasiwaxainae-atamē bajarapatomarata? Daxitajiwi baja cajena, yapētane pacuene copiapata Jerusalén tomarata mapamatacabitaje —jai caranata Cleofas.

¹⁹Nexata, Jesús jumaitsi bajaraponëbejewabelia:

—¿Detsa pitsicuene pija copiapatsi? —jai.

Nexata, icatsia jumaitsibeje Jesús-jawabelia:

—Panaliwaisita najetarucajëbeje raja profeta Jesús-pijinë yabara, Nazaret tomarapijinë. Bajaraponëmi pinijicuene pexanaponaponaenë Dioso pesaëta. Bitso xaniawaetsia jiwi pexanaliwaisi petsipaebinëmi. Nexata, daxitajiwi, Dioso-ata siwajamatabëcuenebarëyatsi bajaraponëmi. ²⁰Bajaraponëmi canajetatsi sacerdotewi penamatacaitorobiwi, wajanaca-ewetsiwi yajawa, pijawajabitsaë pecobeyabelia, cruzajawabelia pecobematabiabarutsine-xatsi, bajarapacuenia pebeyaxuabinexatsi. ²¹Paxanë picani bajaraponëmi yabara pajamatabëjumaitsinë, waxaitsi judiowitsi, wajanacacapanepaenexa wajanacayanacua-ewetsijawawecua pamonaë apojudiowi. Itsiata baja, ajena xaina acueyabi pamatacabibeje Jesús-pijinë pebeyaxuabicujinaetsi. ²²Piaya-pëbejecuene pataë-atanë wajanacacapanepaejawanexa, ajena paxanëyajuwënëwi, petiriawi, bajayacunua panenabenajacaëya-exana. Bajarapamonae pepobajayacunua, ponalia petëpaenë Jesús pebuatsi-ibowajutsijawabelia. ²³Itsiata, apocaxitajarababuatsi bajarajota. Nexata, bajarapapetiriawi nawiabarena. Panetsipaëba pacuenia bemajitsinaebota tane ángel-nëbeje. Bajaraponëbeje pina jumaitsibeje petiriawijawabelia: «Jesús rabaja asaë tsaponaponaë icatsia», jai pina. ²⁴Nexata, itsamonae paxanëyajuwënëwi pona petëpaenë Jesús pebuatsi-ibowajutsijawabelia. Pacuenia baja petiriawi panetsipaëba, bajarapamonae-ata apotaeyabuatsi petëpaenë Jesús —jaibeje Jesús-jawabelia.

²⁵Nexata, Jesús jumaitsi bajaraponëbejewabelia:

—¡Paxamëbeje saya pane-ajamatabëcuenecowëbinëbeje! Apopajumexaniataemëbeje daxita profetawi peyaquinaeliwaisianë Cristo yabara. ²⁶Bajarapaliwaisianë nacayapëtaëya-exana pacuenia Cristo, Dioso athëbëwetsica pitorobinëtsitsica, jiwi pecapanepaenënexa. Nacayapëtaëya-exana copiaya pebejiobia-exanaejawanexatsi, bajaraxuacujinaë peponaejawanexa paxa Diosojawabetsia, athëbëtatsia pemuxuneneta pe-ecaenexa —nayabarajai Jesús.

²⁷Nexata, xaniawaetsia peyapëtaenexabeje, Jesús nawajunupaëba bajaraponëbejewabelia daxita pacuenia Dioso pejumeliwaisibaxutota tajëwelia jumaitsi Cristo yabara. Taxuxuaba jane baja, penawajunupaëbijawa pacuenia Moisés-pijinë peyaquinaebaxutota tajëwelia jumaitsi, daxita itsaprofetawimi-ata peyaquinaebaxutonëta pejumajitsijawa.

²⁸Itsa baja imoxoyotanajetarubena patomarata bajaraponëbeje patsijitsia-beje, Jesús itajara rowia pewajënaeyabelia bepeponaejitsia bajaraponëbeje-wecua. ²⁹Itsiata, bajaraponëbeje bitso asiwabeje Jesús penajumajitsinexa bajarapatomarata. Jumaitsibeje Jesús-jawabelia:

—¡Namajire abaxë mapatomarataje! Caniwiyo rabaja bitso. Merawijitsia rabaja —jaibeje.

Nexata baja, Jesús najoneya penajuanacopabinexa picani, pabota bajaraponëbeje patabeje. ³⁰Bajaraxuacujinaë, itsa yajawa-ecabeje mesa muxuneneta pexaenexa, Jesús pita panbë. Pexaniajamatabëcuene rajuta Diosojawabelia pan yabara. Epatsënëca bajarapapanbë. Rajuta bajaraponëbejewabelia. ³¹Bajarapaepatota, matapania yapëtanebeje Jesús-cuene.

Itsiata baitsi jane, bajarapaepatota jemata wecua-ajibitsarucaetsibeje. Apo-taebeje baja matawējēa. ³² Nexata, bajaraponēbeje najumaisibeje:

—Namutua wajanacanawajunupaeba nucaponaejawatabeje, bitso nacajamatabēcuenenabarēyaya-exanabeje, wajajumetaejawatabeje, pacuenia nacatsipaebabeje paliwaisi ruca Diosojumeliwaisibaxutota, wajapaebinexabeje bajarapaliwaisi itsamonaejawabelia —najaibeje.

³³ Nexata, bepījia naropotabeje Emaús tomarawecua, penawiatsinexabeje Jerusalén tomarabelia. Itsa patajopabeje, caxitajarababeje penacaetuatsijawata once ponēbeje apóstolewi, itsamonae yajawa Jesús pijajiwi. ³⁴ Pecopia-pitsijawatatsibeje penacaetuatsiwi, mataenetsia tsipaebatsibeje. Jumaitsi:

—Xaniajai tsaena baja, wajatuxanenē icatsia asaē tsaponaponae, tsipaji Simón baja tsitanaitajētatsi —jai bajarapamonaē.

³⁵ Bajaraxuacujinae, ponēbeje Emaús tomarawerena patabeje, juya tsi-paebabeje bajarapamonaejawabelia pacuenia Jesús namuto-epatualia pēcaxinatsibeje. Pacuenia-ata yapētanebeje matapania Jesús-cuene, panbē pe-epatsēnēcaejawata.

Jesús petēpaecujinae, tsitanaitajēta pijajiwi jawabelia

(Mt 28:16-20; Mc 16:14-18; Jn 20:19-23)

³⁶ Itsa abaxē paepatota bajaraponēbeje tsipaebabeje pacuenia tanebeje, bajarapaepatota, Jesús tsitanaitajēta pijajiwi tuatujēta. Pebajacobijawata, pijajiwi jawabelia jumaitsi:

—Pacatojitsipatsi Dioso papecajamatabēcuenexanepanaeya- exanaejawa —jai.

³⁷ Nexata, Jesús pijajiwi bitso nabenajaca petaejawata, tsipaji saya jamatabēcuenē-itsi: «Petēpaenēmi raeta pejumape maje», jamatabējai Jesús yabara.

³⁸ Nexata, Jesús jumaitsi bajarapamonaejawabelia:

—¿Detsa xuajitsia pajunawame? ¿Detsa xuajitsia panejamatabē-ēthētowetsina panejume-aebame icatsia tasaējawa? ³⁹ ¡Pataema tacobewajēnē, tataxuwajēnēbeje-ata! Xanē rabaja maje. ¡Xaniawaetsia paneyapē-taenexa taxaniajaicuene, panejayabare! ¡Paneyorobarena! Petēpaenē raja pejumape peneta awijibi. Asijibi. Peperabēto-ata apoxinae, pacuenia xanē perabē-itsinē —jai Jesús pijajiwi jawabelia.

⁴⁰ Bajarapacuenia pejumaitsitsanucawata, nacobewajēnē-itajēta. Nataxuwajēnē-itajētanua pijajiwi jawabelia. ⁴¹ Jesús pijajiwi jamatabēcuenenajunawiacaeya jamatabēcuenenabarēya. Itsiata baitsi jane, abaxē apojumexaniatae Jesús-cuene.

Nexata Jesús jumaitsi:

—¿Paxainame tsabaja itsacuenējawayo pexaejawa,^b patanerajutsinexamē? —jai Jesús.

⁴² Nexata, pijajiwi rajutatsi pesebidujuainē-epatoyo, jabēperiyo yajawa.

⁴³ Jesús pita baja. Nexata, pijajiwi pitabarata xane.

⁴⁴ Nexata, Jesús jumaitsi pijajiwi jawabelia:

b 24:41 *pexaejawa*: Judfowi tsitatsi petēpaenē pejumape apopecuenecaējēpaejawatsi pexaejawa pexaenexa.

—Xua baja netocopiapata, bajaraxua cajena tajëwelia pacanawajunupae-babiabatsi tanebeyaxuabiwajënaeya, itsa abaxë pacayajawaponaponatsi. Pacayapëtaeya-exanatsi tanetocopiapatsijawanexa daxita pacuenia bajayata tajëwelia peyaquinaebaxutonëta xanë yabara jumaitsi Moisés-pijinë, profetawi, Salmos-baxutota-ata. Daxita rabaja bajarapacuenene netocopiapata —jai Jesús.

⁴⁵ Nexata, Jesús pijajiwi tsipaeba, xaniawaetsia pejumeyapëtaenexa pacuenia Dioso pejumeliwaisibaxutota tajëwelia jumaitsi bajaraPonë yabara. ⁴⁶ Jumaitsi mapacueniaje:

—Dioso pejumeliwaisibaxutota tajëwelia jumaitsi pacuenia xanë, Cristonë, athëbëwetsica Dioso tane-itorobinëtsica, jiwi tacapanepaenexa, ayaicuenia tanebejiobia-exanaecujinae tanebeyaxuabinexa. Tajëwelia jumaitsinua pacuenia tatëpaecujinae, acueyabimatacabita, icatsia Dioso niasaëya-exanaejitsia.^c ⁴⁷ Jumaitsinua patajajiwiwimë patatsipaebaponaejawanexa tajumeliwaisi daxitajiwijawabelia, bajarapamonae penajamatabëcuenepënëyobinexa Diosojawabelia, Dioso pewecua-ajibia-exanaenexatsinua pibisiacuenene pexanaenekonimi. Bajarapabaxutota jumaitsinua copiaya panetaxuxuabijawanexa tajumeliwaisi panetsipaebijawa Jerusalén tomarata. Xuacujinae, daxitanacuanëjawa panetsipaebanajetarubenaenexa. ⁴⁸ Paxamë rabaja pataneme daxita pacuene netocopiapata. Bajara-xuanë jiwi pejumexaniataenexa, bepatsipaebanajetarubename. ⁴⁹ Xanë pacato-itorobianicatsi Espíritu Santo papecatsijamatabëjonenexa, ponë taxa Dioso najumecapanepaeya pacarajutsiapaeba. Abaxë majotaje Jerusalén tomarata pajinawanapaenename, Dioso pesaëta^d athëbëwetsica papecajamatabëcuenecaëjëpaeya-exanaejawabelia. Matapania jane baja, paponanename, jiwi panetsipaebanajetarubenaenexa tajumeliwaisi daxitanacuanëjawa —jai Jesús pijajiwiwawabelia.

Jesús jane baja nawiatsia athëbëabetsia

(Mc 16:19-20)

⁵⁰ Jesús pijajiwi matalalia imoxoyo Betania tomarabelia. Bajarajota, nacobeyotsiaya pijajiwi towajëcanuca Diosojawabelia peyawenonaenexatsi.

⁵¹ Petowajëtanucaejawata, Jesús baja wecuapona pijajiwi athëbëabetsia. Dioso baja caponatsi athëbëabetsia. ⁵² Jesús pecaponaecujinaetsi, bajarapamonae wënëxaniata ayaijamatabëcuenenë yabara. Xuacujinae, barëyaya nawiabapotalia Jerusalén tomarabelia. ⁵³ Bajarapatomarata, caematacabicanacuajitsia Jesús pijajiwi ponabiaba templobojawabelia, pewënëxaniatabiabinxa, pexaniajamatabëcuenenua perajutabiabinexa Diosojawabelia.

Juan

Pexanialiwaishi, Jesucristo peliwaishi, apóstolnē Juan peyaquinaeliwaishi

Cristo, paxa Dioso pejamatabēcueneliwaishi-itajětsinēnexa,
naexana mapanacuataje jiwitonēcuenia

1 ¹Mapanacua petaxuxuabiwajěnaeya pexanaejawaje, ponapona baja cajena athěbětatsia, paxa Dioso pejumeliwaishi-itajětsinēnexa jiwijawabelia. Bajaraponě raja Cristo. Bajaraponěbeje, paxa Diosobeje najuaponaaponabeje. BajaraPoně-ata rabaja cajena Dioso. ²BajaraPoně yajawaponaaponatsi paxa Dioso, petaxuxuabiwajěnaeya pexanaejawa daxitacue. ³Cristo pejamatabēcueneta, Dioso baja cajena exana daxitacue mapanacuaapijicueje, athěběpijicue-ata. BajaraPoně exanaenejewa, aponaitajětsi itsacuejawayo-ata, pewajěnaeyabelia penacopsijawanēnexa. ⁴BajaraPoně baja cajena xaina piasaėjumali. Nexata, daxitacuenewiria rajuta piasaėjumali piasaětsawanapaenexa mapanacuataje. BajaraPoně xainanua pecotia. Pacuenia pecotia napebetsia-exana daxitacue pitaquirijawata, bajarapijinia pacuenia bajaraPoně bajarapacotiata jiwi jamatabēcue-itayota pexaniajailiwaishi, penatoyapětaenexa penajamataběxainaeliwaishi. ⁵Pacuenia pecotia itayota pitaquirijawata, bajarapijinia pacuenia bajaraPoně jiwi jamatabēcue-itayota pejamatabēcue-itaquirijawamiwecua. Nexata, pacuenia pitaquirijawa apocuenecaējěpaetsi pitaxupaeyabijawa pecotia, bajarapijinia pacuenia pitaquirijamatabēcue pexainaewi apocuenecaējěpaetsi tsane piajibia-exanaejawanexa bajarapapexanialiwaishi. ⁶Jiwi peyapětaenexa Pecotia Pexinaeně yabara, Dioso itoroba caeně pebi, Juan-wěneně. ⁷Nexata, bajaraponě patajopa, pewajunupaebana-jetarucaenexa jiwijawabelia Pecotia Pexinaenēcue yabara. Bajara-pacuenia Juan exana, pamona, pejumetaewitsi, pejumexaniataenexa bajarapaliwaishi. ⁸Juan raja Pecotia apoPexinaeně, jiwi pejamatabēcue-itayotsinexa. Biji rajane, pewajunupaebině saya Pecotia Pexinaeně. ⁹Nexata, itsamatacabi bajaraPoně patsica mapanacuayabetsicaje pecotia jane baja pepoPexinaeně, Cristo, pejamatabēcue-itayotsinexa daxitajiwi. ¹⁰Cristo patsi-atatsica pexanaenacuayabetsica, paxa Dioso pejumeliwaishi-itajětsinexa jiwijawabelia. Mapanacuapijiwi apoyapětaetsi bajarapana-cua pexanaenēcue. ¹¹Patsi-atatsica pepopexanaenacuayabetsica, itsiata baitsi jane, pamona, pijawiriawi, penato-itapetsiwi, cuene-aebatsi Dioso

pitorobinëtsicuene. ¹² Itsiata, pamonaenatocopiapita Ponë Dioso itorobica, siwanajamatabëcueneecopaba bajaraPonëjawabelia, bajarapacuenia bajara-pamonaenaxana Dioso pexi. ¹³ Pamonaen Dioso pexi naexana, bajarapamonaenaxana Dioso pejamatabëcuene. Aponaexanae pebi, pijawabeje, pena-imoxoyobijamatabëcuenebeje, itsa jume, pebi pijacuata penatojit-sipaejamatabëcueneta. Biji rajane, naexana Dioso pexi, Cristojawabelia pesiwanajamatabëcueneecopabijawata.

¹⁴ Ponë, Dioso pejumeliwaisi-itajëtsinë jiwijawabelia, naexana baja mapanacuataje, pacuenia waxaitsi banaexanatsi. Nexata, waxaitsijawata naponapona. Bajaraxuata, xaniawaetsia cueneyapëtanetsi pexainaejawa bitso piasiwajamatabëcuene, pexaniajaijamatabëcuene, ayaijamatabëcuene-ata. Bajarapacuenie pexainaexae, yapëtanetsi pepocaenë Dioso pexënatocuene.

¹⁵ Itsamatacabi, Juan, jiwibautizabinë, pewajunupaebanajetarucaejawa Dioso pejumeliwaisi-itajëtsinë yabara, jemata petaejawata Jesús penajetarucaejawa, jumaitsi jiwijawabelia mapacueniaje:

—¡Pataema! Maponë yabara pacajumaitsi: «Ponë tacowëwerena pat-siana, bitso xanë newecua-ayaijamatabëcuenenë tsane, tsipaji baja cajena, bajaraPonë ponapona tanaexanaewajënaeya-ata», pacajaitsi baja cajena — jai Juan.

¹⁶ Wajaneconi wajaxainaewi-ata, Jesucristo pejamatabëcueneta, Dioso wajanaca-itaxutotsoniataejawa wajawajënaeyabelia natoyapëtaeponatsi, bitso wajanaca-asiwajawa. ¹⁷ Dioso bajayatami nacayapëtaeya-exana wajanaca-asiwajawa, wajanacatonajumecopatsijawata pitorobiliwaisianë Moisés-pijinëta. Itsiata baitsi jane, maparucaeje itsacuenia nacayapëtaeya-exana bitso matatoxenetsia wajanaca-itaxutotsoniataejawa, wajanaca-asiwajawa-ata Jesucristo pejamatabëcueneta. ¹⁸ Itsajiwi-ata baja cajena apotae Dioso. Nexata, apoyapëtaetsi pacuenia Dioso jamatabëcueneliwaisi-itsi. Itsiata, pepocaenë Dioso pexënato cueneyapëtane, asiwaya penajua-ponaponaexaebeje. Bajaraxuata, bajaraPonë patsica, wajanacayapëtaeya-exanaenexa pacuenia paxa Dioso jamatabëcueneliwaisi-itsi.

**Juan, jiwibautizabinë, peyanijobiwitsijawabelia xaniawaetsia
wajunupaeba Jesucristo ponëcuene yabara**

(Mt 3:11-12; Mc 1:7-8; Lc 3:15-17)

¹⁹ Itsamatacabi, judiowi penamatacaitorobiwi, Jerusalén tomarawerena itoroba Juan-jawabelia, sacerdotewi, itsamonaen Levipijinë pemomoxiya-juwëñewi, templobo pewetsiwi-ata, peyanijobinexatsi ponëcuene yabara. Bajarapamonaen jumaitsi Juan-jawabelia:

—¿Jipatsamë xamë? ¿Xamë tsaja Cristomë, ponë Dioso itorobiapaebijitsiatsica? —jai.

²⁰ Nexata, Juan xaniawaetsia jumecanawiata. Bajarapamonaenjawabelia jumaitsi:

—Xanë raja apoCristonë, ponë Dioso athëbëwetsica itorobijitsiatsica, jiwi pecapanepaenënexa —jai.

²¹ Nexata, icatsia yanijobatsi:

—¿Detsa nexata ponëmë? ¿Xamë tsaja Elíasmë, paproftanëmi bajayata ponapona? —jai bajarapamonaen.

Nexata Juan jumaitsi:

—¡Jume raja! Xanë raja apobajaraponenë —jai.

Nexata icatsia yanijobatsi:

—¿Xamë tsabaja profetanëmë, ponë yabara Moisés-pijinë nacawaju-nupaeba, wajacopia-ewetawanapaenexa pepatsijawanexatsica? —jai bajarapamonae.

—¡Jume raja! ¡Xanë raja apobajaraponenë! —jai Juan.

²² Nexata, bajarapamonae jumaitsi bajaraponëjawabelia:

—¿Detsa nexata ponëmë? Pajitsipajë patanenawajunupaebijawamë, xania-waetsia patayapëtaenexa, juya patatsipaebinexa patanitorobiwijawabelia ponëcuenemë. ¿Detsa nexata pacuenia nawajunupaebianame? —jai.

²³ Nexata, Juan jumaitsi bajarapamonaejawabelia:

—Xanë raja saya tajëwelia profeta Isafas-pijinë tanewajunupaebinë petu-satonacuajawa, wawajaiya tawajunupaebanajetarucaenënexa mapacueniaje: «¡Panajamatabëcuenexaniawaere pepoPetuxanenë pepatsiwajënaeyarena!», tajainënexa —jai Juan.

²⁴ Nexata, fariseowi pitorobiwitsi icatsia yanijobatsi.

²⁵ —Itsa xamë apoCristomë, apo-Elíasmë,^a apopatacacopia-ewetawanapaeprofetanëmënu, ¿detsa nexata xuajitsia xamë jiwi bautizabaponame? —jaitsi bajarapamonae.

²⁶ Nexata Juan jumaitsi:

—Xanë saya jiwi bautizabaponajë ëmerata. Itsiata, itsanë ponapona, paxamëtuatuajëta mapanacuataje. Ponë apopanepapëtaenë. ²⁷ BajaraPonë tacowëwerena patsi-ata, itsiata tanaexanaewajënaeya peponaponaenë. BajaraPonë bitso ayaijamatabëcuenenëxae xanëwecua, pijajiwitonë-atanë tsipae acobe-uranë tato-isinaenexa pijazapatomaëto, tataxujonotsinexa —jai Juan bajarapamonaejawabelia Jesucristo yabara.

²⁸ Bajarapacuenia Juan yanijobatsi Jordán-mene itsapanatalia, Betania tomarajawata, itsajota jiwi bautizabaponapona.

Juan wajunupaeba Jesús, Dioso bepija-ovejayonexa

²⁹ Fariseowi pijajiwi peyanijobicujinaetsi ponëcuenë yabara, itsamataca-bijawabelia, Juan taetaba Jesús penajetarucaejawa bajaraponëjawaberena. Nexata Juan jumaitsi jiwijawabelia:

—¡Pataema! Mara ponëje, Dioso pija-ovejane^b daxita nacuanëpijiwi pibisiacuenë pexanaeconimi petomatamotsijawata pewecua-ajibia-exanaenënexa. ³⁰ Baja rajane, maponë yabara pacajumaitsitsi mapacueniaje: «Tacowëwerena patsiana itsanë, bitso newecua-ayaijamatabëcuenenë, tsipaji baja cajena, bajaraponë ponapona tanaexanaewajënaeya-ata», pacajaitsi.

³¹ Maponëje apoyapëtaenë picaní Ponëcuenë. Itsiata, paxamë, paIsrael-nacuapijiwimë, pacabautizabanajetarucatsi merata, panepapëtaenexa

a 1:25 apo-Elíasmë: Bajaraponë bayatami ponapona Israel nacuata. Baitsi, apo-asaë tsapanaponaë mapanacuataje, Jesús peponaponaematacabi. Itsiata, bajaraponë Dioso ya-asaëya caponatitsi athëbëabetsia. (2Re 2:1-11.) Bajaraxuata apopayaquinarubinë «Elías-pijinë». Daxita bajaraponë peliwaitsi ruca 1Re 18-2Re 2-jawabelia. **b 1:29 pija-ovejane:** Pacuenia jiwi ovejayo babeyaxuaba pijaneconijamatabëcuenë, bajarapijinia pacuenia bajaraPonë nacaewetsiana pebeyaxuabinexatsi jiwi pijaneconijamatabëcuenë.

bajaraPonë Mesías-cuene itsa waxaitsituatujëta nacuene-itajëta —jai Juan jiwijawabelia.

³²⁻³³ Icatsia, Juan jumaitsi jiwijawabelia Jesús yabara:

—Apoyapëtaenë picani Ponëcuene. Itsiata, paepatota taniji Espiritu Santo perunaejawatsica athëbëwetsica be-ucucuto bajaraPonëjawabet-sica, petsijamatabë-ecaenexatsi. Bajarapaepatota matapania yapëtaniji baja Mesías-nëcuene. Itsiata, Dioso, Ponë nitorobinë merata jiwi tabauti-zabaponaenexa, pewajënaeya baja cajena neyapëtaeya-exana mapacue-niaje: «Papebi pematatsënëatsica taename Espiritu Santo perunaejawatsica be-ucucuto, petsijamatabë-ecaenexatsi, bajaraPonë rajane baja Mesías tsane. Nexata, bajaraPonë tsijamatabëjoneya-exanaena Espiritu Santo^c jiwijawabelia», nejai baja cajena Dioso. ³⁴ Tanejumaitsicuenia jane baja, taniji. Nexata, bajarapacuenia pacatsipaebatsi, paneyapëtaenexa bajaraPonë baja cajena Dioso pexënato —jai Juan jiwijawabelia, Jesús yabara.

Pamonae copiaya Jesús yajawaponapona

³⁵ Merawia pitsijawata, Juan icatsia bajarajota, yajawaponapona anijanë-beje pijajiwitonëbeje. ³⁶ Juan itsa tane Jesús pexenetanajetarucawatsi, jumaitsi pijajiwitonëbejajawabelia:

—¡Pataemabeje! Mara Ponë najetarucaje, Dioso bepija-ovejayo tsane —jai Jesús yabara.

³⁷ Nexata, Juan pijajiwitonëbeje, itsa jumetanebeje bajarapacuenia peju-maitsijawa, bajarapaepatota pënaponabeje Jesús.

³⁸ Jesús napëñëyorotojopa. Petaenucajopaejawata, yanijoba bajaraponëbejajawabelia:

—¿Detsa xua pajaitamebeje? —jai.

Nexata, bajaraponëbeje jumaitsibeje:

—Necujarubinë, ¿detsa jota ponaponame? —jaibeje Jesús-jawabelia.

³⁹ Nexata Jesús jumaitsi:

—¡Naxatsia! Panataenamebeje itsajota ponaponajë —jai Jesús.

Nexata, bajaraponëbeje naponabeje baja Jesús pepëta, caniwiyo-epatota. Tanebeje baja itsajota ponapona. Nexata, bajarapamatacabi nayacaniwiyo-beje tsaponapona Jesús-jawata. ⁴⁰ Bajaraponëbejeyajuwënë, itsanë pewënë Andrés, Simón Pedro pejuyapijinë. ⁴¹ Bajaraponë nexata bepijia pona pematapijinë, Simón, pejaitsinexa. Itsa baja caxitajaraba, jumaitsi pematapijinëjawabelia:

c 1:32-33 *tsijamatabëjoneya-exanaena Espiritu Santo*: Wowaijume canacueneba «él que bautiza con el Espíritu Santo», pejaicuenia. Nexata, jiwijumeta pitsapaejitsipa «ponë paca-bautizabiana Espiritu Santota» pejaicuenia. Itsiata Cristo aponacajabutsia-exanae Espiritu Santojawabelia. Bijai rajane, nacatsijamatabëcuene-ecaeya-exana Espiritu Santo wajasiwana-jamatabëcopabicujinae bajaraPonëjawabelia. Pacuenia Juan, jiwibautizabinë, merata bauti-zaba jiwi, penajamatabëcuene-itajëtsinexa penajamatabëcuenepeñëyorotsijawa pibisiacueni pexanaejawamiwecua, xaniawaetsia pecopiapitsinexa Mesías/Cristo. Nexata, Cristo, Espiritu Santo tsijamatabëjoneya-exana pijajiwi, 1) Penajamatabëcuene-itajëtsinexa pepacuene pesi-wanajamatabëcuene copabijawa Jesús-jawabelia. (2Co 1:21; Efe. 1:12; 4:30; Rom. 8:9.) 2) Pejamatabëcuene caëjëpaeya-exanaenexatsi Jesús peliwaissi pawajunupaebanajetarubena-ewa. (Hch. 1:7-8) 3) Pejamatabëcuene matacaponanexatsi, pejamatabëcuene caëjëpaeya-exanaenexatsinua pejinawanapaenexa Dioso pejitsipaenexa. (Jn 14:26; Rom. 8:5,9,14; Efe. 5:18)

—Pacaxitajarabajë rabaja Mesías —jai Andrés. (Mesías-jume pitsapa Cristo^d griegojumeta). ⁴²Nexata, Andrés barëlia pematapijinë Simón Jesús-jawabelia. Petaenucaejawata, Jesús jumaitsi Simón-jawabelia:

—Simón, xamë raja Jonás pexënatomë. Cawënërübianatsi Cefas^e —jai Jesús. (Cefas-wënë arameojumeta, Pedro pejaiwënë pijinia griegojumeta).

Jesús junata Felipe, Natanael-beje, pijajiwitonëbejenexa

⁴³Jesús baja ponaejitsia Galilea nacuayabelia. Nexata, peponaewajë-naeya, caxitajarabaxuaba Felipe. Jumaitsi Felipejawabelia:

—Nepënaponaename —jai Jesús.

⁴⁴Bajaraponë Felipe, Betsaida tomarapijinë. Bajarapatomaratanua nae-xana Andrés, Pedrobeje. ⁴⁵Felipe nexata pona, pejaitsinexa Natanael. Pecaxitajarabicujinae, jumaitsi Natanael-jawabelia:

—Pacaxitajarabajë rabaja ponë peliwaissi^f bajayatami Moisés-pijinë, Diosojumepaebiwiimi, profetawi-ata tajëwelia yaquina. Bajaraponë raja Jesús, Nazaret tomarapijinë, Josépijinë pexënato —jai Felipe Natanael-jawabelia.

⁴⁶Nexata, Natanael aebiaya jumaitsi:

—Nazaret tomarata, ¿depitsipexaniacuene capitsapabiaba? —jai Natanael.

Nexata Felipe jumaitsi:

—¡Naxatsia! Nijacujaya jane nataename —jai Felipe.

⁴⁷Jesús itsa tane Natanael pecujitanajetarucaejawatsi, nexata jumaitsi pijajiwijawabelia:

—Mara ponë najetarucaje, Israel-pijinë pepopemomo, tsipaji Dioso pitabarata xaniawaetsia peponaponaenë. Apopeyamaxë-itojorobinë itsajiji-ata —jai Jesús Natanael yabara.

⁴⁸Nexata, Natanael jumaitsi Jesús-jawabelia:

—¿Detsa pacuenia nejamatabëcueneyapëtaneme? —jai.

Nexata, Jesús jumaitsi bajaraponëjawabelia:

—Felipe pecajunatsiwajënaeya, catanetsi cajena ne-ecaejawa higeranaebëxëpanata. Nexata, cajamatatabëcueneyapëtanetsi^g —jai.

⁴⁹Natanael jumaitsi Jesús-jawabelia:

—Necujarubinë, xamë rabaja Dioso pexënatomë. Mesíasnëmë, Israel nacua peponewetsinë —jai.

⁵⁰Nexata Jesús jumaitsi:

—Tacajumaitsixae: «Catanetsi cajena ne-ecaejawa higeranaebëxëpanata», tacajaixae, ¿baja tsaja nexata jumexaniataneme Mesías-nëcuenenë? Bajarapacuenewecua, xamë taename matatoxenetsia Dioso pesaëta piniucuene ta-exanaejawanë, jiwi apopexanaecapanepaejawanë, tanecueneyapëtaenexamë Dioso pexënatocuenenë —jai Jesús Natanael-jawabelia.

⁵¹Icatsia, Jesús jumaitsi pijajiwijawabelia:

d 1:41 Cristo: «Ponë athëbëwetsica Dioso itorobijitsiatsica jiwi pecapanepaenexa», pejajjume.
e 1:42 Cefas: Cefas, Pedrowënëbeje, caejamatatabëcueneliwaisi xainabeje: «Iboto», pejaiwënëbeje.
f 1:45 ponë peliwaissi: Mesías yabara. Taema Moisés peyaquinaeliwaisianë: Gén. 3:15 22:18; 49:10; Deut. 18:18-22. Taemanua profetawi, peyaquinaeliwaisianë: Isa. 4:2; 7:14; 9:6; 53:2; Miq. 5:2; Zac. 6:12; 9:9. **g 1:48** cajamatatabëcueneyapëtanetsi: Jesús itsa cuenecaëjëpatsi petaejawa tajënacujawabelia, nexata cuenecaëjëpatsi pejamatabëcueneyapëtaenexa daxitajiwi.

—Xaniajanë pacuenia pacatsipaebijitsiatsi. Xaniaawaetsia patanecueneya-pëtaenexamë, pataename itaboxo penapatsijawa. Pataenamenua Dioso pija-ängelewî pejunaejawatsia athëbëabetsia, perunaejawatsica-ata xanëja-wabetsica, Xanë, Daxitajiwi Pematapijinënë, tajamatabëcueneta^h —jai Jesús pijajiwijawabelia.

**Jesús xua exana Caná tomarata, pamatacabi
nacojioba bajarapatomarapijinë**

2 ¹Jesús pebarëcuaicuajiaicujinae Natanael, acueyabi pamatacabibecucujinae, Caná tomarapijinë exana penacojiobifiestanexa. Caná tomara eca Galilea nacuata. Jesús pena naponapona fiesta pexanaejawata. ²Jesús pijajiwi nabarëjunatatsi penacojiobifiestajawabelia. Nexata, nabarëpata pijajiwi. ³Fiesta pexanaenë itsa baja towerewerecatsi vinora, Jesús pena jumaitsitsi: —Vinora rabaja towerewerecatsi —jai pexënatowawabelia.

⁴Nexata, Jesús jumaitsi penajawabelia:

—Ena, ¿detsa xuajitsia netsipaebame bajarapacuenë? Abaxë raja apone-tocopiapatsi paepatota jiwijawabelia tanacuene-itajëtsinexa ponëcuenenëⁱ —jai Jesús.

⁵Itsia, mesa pewetsiwijawabelia Jesús pena jumaitsi:

—Daxita pacuenia taxënato aeconoxae paca-itorobiana, pa-exanaename —jai.

⁶Bajarajota, nubena seis pacanalitobeje, ibocanalitonë. Caecanalito canacujitsia mera caëjëpapon bejamatabëcuene quince pagalón-beje. Bajarapacanalitonëta meranë yanubabiaba judíowicuenia penacobequiatabiabinxana anijatonë^j pexaejawa pexaewajënaeya, bepenaxuirabiwicuenia penacopabiyaniwa Dioso pitabarata. ⁷Jesús nexata jumaitsi mesa pewetsiwijawabelia: —¡Pawënëbare mera mapacanalitonë nubenaje! —jai.

Nexata, bajarapamonae xaniaawaetsia mera wënëba. Piupiyorotoxijawa copabapona.

⁸Nexata, Jesús jumaitsi bajarapamonaejawabelia:

—¡Papuare tsiquirirayo, panetocaponaenexalia, fiesta pewetsinë pemene pajaninexa! —jai.

Nexata baja, tocaponalia. ⁹Nexata jane baja, fiesta pewetsinë menepajane bajarapora, pexanaevinora merami. Bajaraponë abaxë apoyapëtae itsawerena capitsapa bajarapavinora. Itsia, mesa pewetsiwi yapëtane. Bajara-pavinora pemene pajanicujinae, fiesta pewetsinë junata fiesta pexanaenë, ponë pejananacojiobinë. ¹⁰Jumaitsi pejananacojiobinëjawabelia:

—Mapavinoraje bitso xanepana, porayowecua copiya tsaname. Daxita pamonae, fiesta pexanaewi, copiya batsanaeya-exana pexaniavinora.

h 1:51 *tajamatabëcueneta*: Jesús pijacuata nacuenecataeya-exana Jacob-pijinë pa-escalera tane piamajitsinaejawata. Taema Gén. 28:12. Nexata, pacuenia Dioso yapëtaeya-exana Jacob-pijinëjawabelia pemomoxiyajuwënë pejamatabëcueneta jiwi pepatsijawanexa Diosojawabetsia, bajarapacuenia Jesús nayabarajumaitsi be-escaleracuenia, jiwi pepatsijawanexa Diosojawabetsia, Jesús pejamatabëcueneta. Taema Jn 14:6; 1Ti 2:5. **i 2:4** *ponëcuenenë*: Baitsi, abaxë Jesús apotaxuxuabijitsia pinijicuenejawanë petsita-exanaejawa, jiwi peyapëtaeya-exanaenexa Dioso pitorobinëcuenetsi. **j 2:6** *anijatonë*: Baitsi, 7 xuabeje napëna petsicobe-epacaecueniatsi nacobequiatabiaba.

Nexata baja, pejunatsiwi ayaijawa piapaecujinae, cotocaewi batsanaeya-exana bewelia penamatamotsivinoranë. Itsiata baitsi jane, xamë bajara-pacuenia apo-exanaemë. Ewetame abaxë cotocaewi patanerajutsinexamë pexaniavinora —jai fiesta pewetsinë pejananacojiobinëjawabelia.

¹¹ Jesús bajarapapiniijicuene exana Dioso pesaëta Caná tomarata, Galilea nacuata pe-ecaetomara. Bajarapatomarata Jesús jane baja taxuxuaba Dioso pesaëta pinijicuene pexanaponaejawanexa. Najamatabëcuene-itajëtanua pecaëjëpaenëcuenetsi Dioso pesaëta ayaicuene pexanaejawa. Nexata, pija-jiwi orijibia siwanajamatabëcuenecopabaponatsi bajaraPonëjawaberena, Cristonëcuene yabara.

¹² Bajaraxuacujinae, Jesús baja pona Capernaúm tomarabelia. Yajawapona pena, pejuyapijiwi, pijajiwinua. Bajarapatomarata caematacabibeje jinawanapa.

**Jesús pitsapaeya-exana templobowecua pecanajetabiabiwi,
pecomuacabiabiwinua**

(Mt 21:12-13; Mc 11:15-18; Lc 19:45-46)

¹³ Imoxoyo baja pexanaejawanexa Pascuafiesta,^k Jesús pona Jerusalén tomarabelia. ¹⁴ Nexata, Jerusalén tomarata, templobota, Jesús caxitajaraba-xuaba pecanajetanubenaewi vaca, oveja, ucucu-ata. Tanenua palata pecambiabenaewi. ¹⁵ Petaexae bajarapacueni, nota pemaëtoxi, petsiquiobinexa peconitsimaca pexanaenexa. Nexata, daxita bajarapajiwiibitsaëto peconitsicuenia capitsaparena templobo-ënëwecua, pija-ovejamonae, pijavacamona-ata yajawa. Pamona-ata, palata pecambiabenaewi, pijapalatanëxi irabelia tocayajabajaraba. Pijamesaxi-ata topëñëyorobajaraba. ¹⁶ Nexata, ucucumona-ae pecanajetanubenaewijawabelia Jesús jumaitsi:

—¡Mapa-ucucuje pacapitsaparemelia! ¡Pëtsa pa-ithothianame taxa pijabo, pabota tocaëjëta jiwi pewajëcabiabinexa bajaraPonëjawabelia! ¡Paxamë saya patobijianame, pane-exanaexae panenawijatabiabibonexa! —jai Jesús.

¹⁷ Nexata, Jesús pijajiwi, itsa jumetane bajarapacuenia pejumaitsijawa, jumenajamatabënapita pacuenia Dioso pejumeliwaisibaxutota tajëwelia jumaitsi Mesías yabara pejumaitsijawanexa: «Ayaicuenia nejamatabëcuene-enaena ta-asiwajawa Dioso pijabo, jiwi petoyaiyataenexatsi»,^l pejaijawa Dioso pejumeliwaisibaxutota.

¹⁸ Nexata, judíowi itsa tane Jesús jiwi pecapitsapaejawa templobo-ënëwecua, jumaitsi Jesús-jawabelia:

—Xaniawaetsia patayapëtaenexa ponë ca-itoroba necapitsapaejawanexa bajarapamonae, çdetsa nexata pitsipiniijicuene panetsita-exanaejitsiamë Dioso pesaëta? —jai judíowi Jesús-jawabelia.

¹⁹ Nexata, Jesús jumaitsi judíowijawabelia:

—Itsa pabijianaename mapaboje, Dioso peyaiyataetaxunae, xanë, acue-yabi matacabita, pejanacuenia icatsia weretetanutsianajë —nayabarajai Jesús.

k 2:13 Pascuafiesta: Bajarapafiesta judíowi exanabiaba, penajamatabënapitsinexa Dioso peca-panepaejawatsi Egipto nacuapijiwi pecobewecua, pitaxutotsoniataejawatsinua pexënatonëxi pepomatapijinëxi, ángelnë petobeyejebiyaniwatsi. Éxo. 11:1—12:27; Deut. 16:1-8 Pascuafiesta tsicarucatsi judíowi pexanaejawa ëJerusalén tomarata. **l 2:17 Taema Sal.** 69:9; 119:139.

²⁰ Judíowi itsiata, apojumeyapētae xua yabara Jesús jumaitsi. Nexata, jumaitsi mapacueniaje:

—Xamē acueyabi pamatacabibejecujinae apocacuenecaējēpae newere-tanutsinexa pejanacuenia mapatemploboxanetoje. Itsamonaе baja cajena, nacueneba cuarenta y seis pawaibeje peweretsinexa mapaboje —jai judíowi.

²¹ Itsiata baitsi jane, Jesús: «Mapaboje», itsa jai, nayabarajumaitsi peperabēto yabara. ²² Bajaraxuata, icatsia Jesús itsa asaē petēpaecujinae, pijajiwi jumenajamatabēnapitatsi tajēwelia penawajunupaebijawami. Nexata matapania jane baja, Jesús pijajiwi jumexaniatane pacuenia jumaitsi Dioso pejumeliwaisibaxutota, Jesús pijacuata-ata penayabarajumaitsiyawa, icatsia piasaējawanexa petēpaecujinae.

Jesús pejamatabēcueneyapētaenē daxitajiwi

²³ Pamatacabi Pascuafiesta exana, Jesús ponapona Jerusalén toma-rata. Bajarapamatacabijawa jiwi ayaibitsaētozaneto jumexaniatane Cristonēcuenе, pecuenaetaexaetsi Dioso pesaēta pinijicuene pexanae-jawanē, jiwi apopexanaecapanepaejawanē. ²⁴ Itsiata baitsi jane, Jesús apo-itaxutuajamatejema bajarapamonaеjawabelia, tsipaji jamatabē-cueneyapētane pacuenia jamatabēcuenе-itsi tsawanapae. ²⁵ Baitsi, Jesús aponamatawenonae itsajiwi petsipaebinxatsi, pacuenia jiwi jamatabēcuenе-itsi tsawanapae, tsipaji raja pejamatabēcueneyapētaenē daxitajiwi.

Jesús tsipaeba Nicodemojawabelia, pacuenia jiwi benaexana bepejananaexanaеjiwiycuenia

3 ¹ Bajarapamatacabijawa, ponapona Nicodemowēnēnē, judíowi pewetsiwiyajuwēnēnē, fariseoliwaisijawabelia penajumecajonenē.

² Itsamatacabi, merawi, bajaraponē pona Jesús-jawabelia, peyanijobinexa petsipaebanajetarucaliwaisi yabara. Pepatsicujinae, Jesús-jawabelia jumaitsi:

—Necujarubinē, pacayapētanetsi baja cajena athēbēwetsica Dioso peca-itorobinēcuenetsica, patanetsipaebaponaenexamē Dioso pejume-liwaisi. Dioso itsa apocayajawaponaponaе tsipae, apocacuenecaējē-pae tsipae, nexanaponaponaenexa papinijicuenejawanē exanaponame. Bajaraxuata, payapētaniji Dioso peca-itorobijawa —jai Nicodemo Jesús-jawabelia.

³ Nexata, Jesús jumaitsi bajaraponējawabelia:

—Xaniajanē pacuenia catsipaebijitsiatsi. Pajiwi Dioso pejamatabēcueneta icatsia bepejananaexanaеjiwiyo aponaexanaе tsane, bajarapajiwi apojone tsane Dioso peyanacua-ewetsicuenejawabelia —jai Jesús.

⁴ Nexata Nicodemo jumaitsi:

—¿Detsa jane pacuenia penaweretsijiwi baja icatsia bepejananaexa-еjiwiyo naexanaеjitsipa? ¡Apocaējēpaetsi rabaja icatsia pejonejawa pena pecototualia, penaexanaenexa icatsia bepejananaexanaеjiwiyo! —jai.

⁵⁻⁶ Jesús pejumecanawiatsijawata jumaitsi:

—Xaniajanë pacuenia catsipaebijitsiatsi. Pajiwi mera,^m pejamatabëcueneta aponaexanae, Espiritu Santo pejamatabëcueneta-ata aponaexanae tsane bepejananaexanaejiwiyo, apojone tsane Dioso pijajiwi peyanacua-ewetsinacuajawata. Pajiwi naexana pena pecototowerena, peperabësaëjumali yajawanaexana.ⁿ Itsiata, pajiwi naexana Espiritu Santo pejamatabëcueneta, piaitawajamatabëcuene yajawanaexana. Bajarapacuenejawatabeje penaexanaejiwi jonena Dioso peyanacua-ewetsinacuajawabelia. ⁷Itacajumaitisijawa yabara pëtsa jamatabëcuenenabenajacame: «Xamë-ata baja cajena namatawenoname icatsia nenaexanaejawa bepejananaexanaejiwiyoenuia», tacajaijawa jamatabëcuenenabenajacame pëtsa! ⁸Yapëtaneme jowibo penajetarucaejawa itsabelia jamatabënajetaruca. Saya jumetaneme ëpijume. Itsiata, apoyapëtaemë itsawerena najetaruca, itsabelia-ata pona. Bajarapijinia pacuenia, apoyapëtaemë pacuenia jiwi Espiritu Santo pejamatabëcueneta naexanaeya-exanatsi bepejananaexanaejiwi —jai Jesús Nicodemojawabelia.

⁹Nexata, icatsia Nicodemo jumaitsi Jesús-jawabelia:

—¿Detsa pacuenia itsi tsipae bajaraxua? —jai.

¹⁰Nexata Jesús jumaitsi:

—Xamë picani Israel nacupajiwi necujarubabiabinë. ¿Itsiata tsaja, apojumeyapëtaemë paliwai si catsipaebatsi? ¹¹Xaniajanë pacuenia catsipaebijitsiatsi. Paxanëbeje,^o Juan, jiwibautizabinë, jiwijawabelia patsipaebaponajëbeje patayapëtaeliwaisibeje, xua-ata pepacueni patanijibeje. Itsiata baitsi jane, patacatsipaebiliwaisianëbeje, apopanejumexaniataemë. ¹²Nexata, xamë itsa aponejumexaniataemë tacatsipaebijawa xua Dioso exanapona mapanacuataje, ¿detsa nexata pacuenia nejumexaniataejitsipame itsa tacatsipaebijawa yabara xua Dioso exanapona athëbëtatsia? ¹³Itsajiwi-ata cajena apoponae Dioso pijanacuayabetsia, caewëa penawiatsinexatsica, pecayapëtaeya-exanaenexa pacuenia itsi athëbëtatsia. Xanë saya, caenënë, Daxitajiwi Pematapijinënë, tapatsinëtsica athëbëwetsica, necuenecaëjëpa patacayapëtaeya-exanaenexa pacuenia itsi.

¹⁴«Pacuenia bajayata, petusatonacuata Moisés-pijinë jomo jumapecataeya pexanaenë, naejawata athëbëyo ruta, jomo pesiniwitsi petaejawata piasaënexa, bajarapijinia pacuenia, Daxitajiwi Pematapijinënë-ata, athëbëyo nerutsiana cruzajawabelia tatëpaenexa. ¹⁵Nexata, pajiwi nesiwanajamatabëcuenecopsiansa xanëjawaberena, aponaxuabi tsane. Biji rajane, xainaena matakabi apowerewerecaejawa —nayabarajai Jesús pijacuata Nicodemojawabelia.

m 3:5-6 *mera*: Bajarapamera caeto-ata aponacatocuenecatae wajanabautizabia-exanaejawa yabara. Biji rajane, nacatocuenecatane mapajamatabëcuenebeje: **1)** Pena pecototowerena penaexanaejawa, pematabarëmene yajawa. **2)** Espiritu Santo pejamatabëcuenequiatsijawa Dioso peliweisita. Jn 15:5; 17:17; Efe. 5:26; Tit. 3:5; 1Pd 1:23. **n 3:5-6** *peperabësaëjumali yajawanaexana*: Nicodemo judfonëxae, natocanaëjëta Dioso peyanacua-ewetsinacuajawabelia pejone-jawanexa Abraham-pijinë pemomoxae. Apocanaëjëtsi penamatawenonaejawa Espiritu Santo pejamatabëcuene-aitawaya-exanaejawanexatsi. **o 3:11** *Paxanëbeje*: Apoyapëtaetsi xaniawaetsia pajiwi yabara Jesús jumaitsi: Itsamonae canaëjëta Juan, jiwibautizabinë yabara pejumaitsi-jawa. Itsamonae pijinia canaëjëta Jesús pijajiwi yabara pejumaitsi-jawa. Itsamonae pijinia canaëjëta Paxa Dioso, itsa jume, Espiritu Santo yabara pejumaitsi-jawa.

Xua Dioso to-exana, mapanacuapijiwije piasiwajamatabëcuene

¹⁶ Icatsia, Jesús pijacuata nayabarajumaitsi Nicodemojawabelia:

—Pinijicuenia Dioso mapanacuapijiwije piasiwaxae, to-itorobica pepocaenë pexënato mapanacuayabetsicaje, Diosowecua bajarapamonae penaxuabiya-niwa. Nexata, pajiwi siwanajamatabëcuenecopatsiana Dioso pexënatojawabelia, aponaxuabi tsane. Biji rajane, bajarapajiwi xainaena matacabi apo-pewerewerecaejawa. ¹⁷ Dioso apo-itorobitsica pexënato mapanacuayabetsicaje, penaneconitsia-exanaenexa mapanacuapijiwije, biji rajane, pecapanepaenexa pibisiacuene pexanaenconimiwecua, bajaraPonë pejamatabëcueneta ¹⁸ Nexata, pajiwi siwanajamatabëcuenecopatsiana Dioso pexënatojawabelia, bajarapajiwi Dioso aponaneconitsia-exanaetsi tsane, pibisiacuene pexanaenconimi yabara. Itsiata, pajiwi aposiwanajamatabëcuenecopatsi tsane Dioso pexënatojawabelia, Dioso tocajëtsiana penaneconitsia-exanaejawanexatsi, apopesiwanajamatabëcuenecopatsixae pexënatojawabelia. ¹⁹ Maxua yabaraje mapanacuapijiwi naneconita Diosojawabelia, apo-pejumexaniataexae Pecotia Pexainaenë petsipaebiliwaisitsi. BajaraPonë patajopaica jane baja mapanacuayabetsicaje, pexaniajailiweisita jiwi pejamatabëcuene-itayotsinexa. Mapanacuapijiwije bitso piasiwaxae pibisiacuene pexanaejawanexa, jumetae-ata bajarapaliwaisi, apojitsipae pejamatabëcuene-itayotsinexatsi. Caranata saya asiwa pitaquirijamatabëcuene. ²⁰ Daxita pamona pibisiacuene exanawanapa, bitso cuene-itoya Pecotia Pexainaenë, pejamatabëcuene-itayotsiyaniwatsi pexaniajailiweisita. Bajaraxuata, apopatsi bajaraPonëjawaberena, itsamonae pewënëtaeyaniwatsi daxita pexanaecuenemi, xuanë Dioso tsitapibisiacuenetsi. ²¹ Pamona pijinia, exanawanapa pexaniajailiweisitsi pitorobicueniatsi, bajarapamonae pata Pecotia Pexainaenëjawaberena, pejamatabëcuene-itayotsinexatsi. Bajarapamonae apocujunawi itsamonae pewënëtaejawatsi papexaniacuene exanawanapa, tsipaji Dioso yawenonaponatsi bajarapacuenia pexanawanapaenexa —nayabarajai Jesús pijacuata Nicodemojawabelia.

Juan, jiwbautizabinë, wajunupaeba Jesús yabara

²² Jesús, Nicodemobeje penabarëcuaijaijicujinaebeje, itsamatacabijawabelia, Jesús, pijajiwi yajawa, pona Judea nacuyabelia. Bajarapanacuata bajayajebi pijajiwi barëponapona. Bajarajota, bajarapamonae jiwi bautizabapona. ²³ Juan pijinia itsamonae bautizabaponapona Enón tomarata, Salim tomara imoxoyojawata pe-ecatomara. Bajarajota, Juan jiwi bautizabaponapona, tsipaji bajarajota nawita meramatathaibëanë. Nexata pebautizabaponaejawata, jiwi topataponatsi pebautizabinexa. ²⁴ Bajarapacuenia Juan jiwi bautizabaponapona, abaxë itsa apo-etsitsi penaneconitsiwi pejebabiabibota.

²⁵ Bajarapamatacabijawa, Juan pijajiwiyajuwënëwi anaeya barënajume-nota judíonëjawabelia, xua jiwi toxanepanaejitsiatsi pexanaejawanexa, penawecua-ajibia-exanaenexa xua yabara bepenaxuirabiwi jinawanapa Dioso pitabarata.

²⁶ Bajaraxuacujinae, pijajiwi parena Juan-jawaberena, petsipaebinxatsi Jesús yabara. Jumaitsi:

—Necujarubinë, Ponë caxitajarabame Jordán-mene itsapanatalia, Ponë wajunupaebame paxanëjawaberena Cristocuene, bajaraPonë-ata aeconoxae

jiwi bautizabapona. Nexata, daxitajiwi pona bajaraPonējawabelia, waxaitsi-jawaberenawecua —jai.

²⁷Nexata, Juan jumaitsi pijajiwi jawabelia:

—Xuawajëto xaina caejiwi canacujitsia, bajarapacuenia xaina Dioso perajutsixaetsi. ²⁸Paxamë panejumetaeyabiabame tajumaitssabiabijawa jiwi jawabelia mapacueniaje: «Xanë raja apoCristonë, Ponë Dioso athëbëwetsica itorobijitsiatsica jiwi pecapanepaenexa. Saya raja tane-itorobinë Cristo pewajënaeya, taliwaisipaebanajetarucaenënexa», tajaitsabiabijawa. ²⁹Cristo raja bepejananacojiobinënexa. Xanë pijinia bitso betaneyapëtaenë bajaraPonë. Nexata, yapëtanetsi ponë pijajarawa xaina, bapita bajarapowa. Peyapëtaenëtsi pijinia namuxunabarëya tsecae, pejumetaejawata penajumeliwaisicajonejawabeje penapitsijawabejenexa. Bajarapijia pacuenia, xanë-ata, aeconoxae bitso jamatabëcuenebarëyanë, itsa wënëliwaisitaniji jiwi pepo-naejawa Jesús-jawabelia. ³⁰BajaraPonë pewajënaeyabelia toxanepanatsi jiwi matatoxenetsia ayaijamatabëcuenenë petaejawatsi, xanë juya bajaraPonëwecua beweliamatabëcuenenë tanetaejawa —jai Juan pijajiwi jawabelia.

**Juan tsipaeba pijajiwi jawabelia, Jesús
athëbëwetsica pepatsinëcuene yabara**

³¹Icatsia, Juan jumaitsi pijajiwi jawabelia:

—Athëbëwetsica pepatsinë, bitso cajena ayaijamatabëcuenenë daxitajiwi matatoxenetsia. Pamona naexana mapanacuataje, bajarapamona saya cuaicuajai tsabiabi ëmapanacuapijicuene yabaraje; xua taewanapa. Itsiata baitsi jane, Ponë athëbëwetsica pepatsinë, bajaraponë daxitajiwi matatoxenetsia bitso pejumenamamotsinë. ³²BajaraPonë tsipaebabiaba, pacuene tane, paliwaisi-ata jumetane athëbëtatsia, itsiata ayaibitsaëto jume-aebatsi. ³³Pajiwi jumexaniatane athëbëwetsica pepatsinë pepaebiliwaisi, najamatabëcuene-itajëta pejumexaniataejawa Dioso pexaniajailiwaissi pepaebinëcuene. ³⁴Ponë Dioso itoroba pejumewajunupaebinxatsi jiwi jawabelia, paebabiaba Dioso pejumeliwaisi, tsipaji Dioso rajutatsi Espiritu Santo, pejamatabëcuenyawenonaponaenexatsi daxitacuenejawalia, wecuaasiwanejewa itsacuenejawayo-ata Espiritu Santo pijajawa. ³⁵Dioso bitso asiwa pexënato. Nexata, tocopata daxitacuene penamatacaitorobinënexa. ³⁶Bajaraxuata, pajiwi siwanajamatabëcuene copata Dioso pexënato jawabelia, bajarapajiwi xainaena matababi apowerewererecaejawa. Pajiwi pijinia aposiwanajamatabëcuene copatsi Dioso pexënato jawabelia, bajarapajiwi matababi apowerewererecaejawa apoxinae tsane. Biji rajane, Dioso baranaepanaena bajarapajiwi, penaneconitsia-exanaenexa daxitamatabijawabelia —jai Juan pijajiwi jawabelia.

Jesús barëcuacuajai Samaria nacuapijiwa pitawamera yabara

4 ¹Belia, itsamatabijawa fariseowi jumetane pacuenia Jesús baja pijajiwi ayaibitsaëto xaneto tsaponae pewajënaeyabelia. Pacuenia-ata bautizabapona jiwi ayaibitsaëto, Juan, jiwibautizabinë, matatoxenetsia. ²(Jesús picani pijacuata apobautizabi caejiwi-ata. Biji rajane, pijajiwi bautizabapona.) ³Jesús itsa yapëtane fariseowi pewënëliwaisitaejawatsi, nexata liwaisiyaniwa, pona Judea nacuwawecua, icatsia penawiatsinexa

Galilea nacuayabelia. ⁴Pepatsinexa Galilea nacuayabelia, Jesús, pijajiwi yajawa, najetaruca Samaria nacujawa, tsipaji bajaraxuayo namuto najetaruca. ⁵Penajetarucaejawata Samaria nacujawa, Jesús nacuera-ewetajopa Sicar tomarata. Bajarapatomarawecua imoxoyo boca pa-irayo Jacob-pijinë bajayata rajuta pexênato Josépijinëjawabelia. ⁶Bajarapa-irayota eca meramêthê Jacob-pijinë bajayata pecueyetsimêthê. Jesús pesicueranaexae pepo-naejawa namuto, matoneje-epatota ecajopa bajarapameramêthêmuxuneneta. ⁷⁻⁸Pijajiwi peponaecujinae tomarabelia pecomuacaenexa pexaejawa, Jesús, caenê, eca meramêthëjawata. Bajarapaepatota, Samaria nacupijiwa patajoparena, mera pepuatsinexa bajarapamêthêta. Nexata, Jesús jumaitsi bajarapowajawabelia:

—¡Mera nerajure! —jai.

⁹Nexata, bajarapowa jumaitsi Jesús-jawabelia:

—¿Detsa xuajitsia xamê, judfônê-atamê, newajêtame xanê, mera niapae-nexa, Samaria nacupijiwanëjawaberena? —jai. (Bajarapacuenia jumaitsi, tsipaji judfowi, Samaria nacupijiwi beje naitajitsibiaya nanaëcotabiaba.)

¹⁰Nexata, Jesús jumaitsi Samaria nacupijiwjawabelia:

—Itsa xamê natoyapêtaejitsipame xua Dioso jitsipa pecarajutsinexa, itsa yapêtaejitsipamenua Ponëcuenenê, cawajêtatsi mera, nexata copiaya mera newajêtsipame xanëjawaberena tacarajutsinexa. Nexata, carajutsipatsi pitawamera, jiwi pejamatabëcuene-asaëya-exanaemera daxitamatacabijawabelianexa —jai Jesús.

¹¹Nexata, bajarapowa jumaitsi Jesús-jawabelia:

—Xamê apoxainaemê nijawaxiyo, mera nepuatsinexa. Meramêthê raja tajêreca bitso. ¿Detsa jota pitsipame nexata pitawamera tanerajutsinexamê?

¹²Wajasalinainêmi Jacob-pijinë, ayaijamatabëcuenenêmi, bajayata naca-tocopata mapameramêthêje. Bajaraponêmi, pexi, pijadajubi-ata, mera apa mapamêthêtaje. ¿Xamê tsaja Jacob-pijinëmi matatoxenetsia bitso ayaijamatabëcuenenêmi? —jaitsi bajarapowa.

¹³Nexata Jesús jumaitsi:

—Jiwi apaeyabiabi-ata tsane mapamêthëpijimeraje, tsiteca mera jitsipaponaena piapaejawa. Pejitsipaejawa mera apowecua-ajibitsi tsane. ¹⁴Itsia, pajiwi apaena xanê tarajutsimera,^p bajarapajiwi mera pematatsënêa apojitsipae tsane, tsipaji bajarapamera pejamatabëcuenejawawetsina pitsaparucaena, matababi apowerewererecaejawa pexainaenexa —jai Jesús.

¹⁵Nexata, bajarapowa jumaitsi Jesús-jawabelia:

—¡Bajarapamera nerajure, icatsia mera tanamatawenonaponaeyaniwa, tapuanabiabiyanianua mapamêthëjawaberena! —jai.

¹⁶Nexata Jesús jumaitsi bajarapowajawabelia:

—¡Amona junaremelia! Yajawarenamê tsane —jai.

¹⁷Nexata bajarapowa jumaitsi:

—Apoxainaenê raja tamona —jai.

p 4:14 *tarajutsimera*: Espíritu Santo yabara jumaitsi. Taema 1Co 12:13; Jn 6:35,63; 7:37. Baitsi, pajiwi siwanajamatabëcuenecopata Jesús-jawabelia (Jn 3:16.) Espíritu Santo tsijamatabëcuene-ecaejitsiatsi, pejamatabëcuenexanepanaeya-exanaenexatsi, mera bepiapacujinae. Mera bepepit-saparucaemêthê Espíritu Santo jamatabëcuenyawenonaponaenatsi, pexanawanapaenexa Dioso pejitsipacuene, Jesús peliwaissi pewajunupaebanajetarucaenexa.

Nexata Jesús jumaitsi:

—«Apoxainaenë raja tamona», itsa jamë, aponajumetsënëtsimë cajena.

¹⁸ Xainame picani amonajiwi cinco ponëbeje. Ponë aeconoxae xainame, apomona cajena, tsipaji saya nijajaranë. Bajaraxuata, xaniawaetsia netsipae-bame —jai Jesús Samaria nacuapijiwajawabelia.

¹⁹ Bajarapowa itsa jumetane bajarapacuenia pejumaitsiyawatsi, jumaitsi Jesús-jawabelia:

—¿Xamë tsabaja Diosojumepaebinëmë, profetanëmë? —jai—. ²⁰ Paxanë, paSamaria nacuapijiwinë, patajasalinaliwiwimi baja cajena nawajëcabiaba Diosojawabelia mapatsutojumataliaje. ⁴ Itsiata baitsi jane, paxamë, pajudíowimë, pa-itorobabiabame jiwi penawajëcaenexa Diosojawabelia ëJerusalén tomarajawabelia —jai Samaria nacuapijiwa.

²¹ Nexata Jesús jumaitsi:

—¡Nejumexaniataema pacuenia catsipaebijitsiatsi! Imoxoyo rabaja pewajënae papecatocopiapatsimatacabinexa Diosojawabelia panewajëcabiabi-jawa, paponaeñejewamë mapatsutojawabeliaje, Jerusalén tomarajawabelia-ata. ²² PaSamaria nacuapijiwimë, pawajëcabiabi-atamë Diosojawabelia, xaniawaetsia apopayapëtaemë Dioso. Paxanë rajane, pajudíowinë, xania-waetsia payapëtaniji Dioso, ponëjawabelia pawajëcabiabajë, tsipaji raja, judíowijawawerena pitsapaena daxitajiwi pecapanepaenënexa. ²³ Xua najetaruca pecopiapatsijawanexa, ajena rabaja mapamatacabitaje, copiapata, pewajënaeyabelia-ata. Pamona xaniajaiya wajëcaponaiejitsia Diosojawabelia, bajarapamona Espíritu Santo pejamatabëcuenematacaponaecueniatsi, pepopexaniajaijamatatabëcuenetanua. Bajarapitsijamatatabëcuene pexainaewi Dioso jitsipa pewajëcaponaejawatsi. ²⁴ Dioso cajena apowajataenë. Bajara-xuata, pamona wajëta bajaraPonëjawabelia, xaniawaetsia bewajëta Espíritu Santo pejamatabëcuenematacaponaecueniatsi, pexaniajaijamatatabëcuenetanua wajëcaena, —jai Jesús Samaria nacuapijiwajawabelia.

²⁵ Nexata bajarapowa jumaitsi:

—Yapëtaniji rabaja pepatsijawanexatsica Mesías, ponë pewënë Cristo. BajaraPonë athëbëwetsica Dioso itorobijitsiatsica, jiwi pecapanepaenexa. Itsa bajaraPonë patsianica, nacatsipaebiana daxitacueneliwaisianë —jai.

²⁶ Jesús nexata jumaitsi bajarapowajawabelia:

—Xanë rabaja Cristonë, tacabarëcuaicuaijainë —jai.

²⁷ Nexata, bajarapaepatota Jesús pijajiwi parena tomarawerena. Bajara-pamona jamatabëcuenenabenajaca, Jesús pebarëcuaicuaijaitsanucaexae Samaria nacuapijiwajawabelia. Itsiata, itsanë-ata apoyanijobi bajarapowajawabelia: «¿Detsa xua jitsipame bajaraPonë pecato-exanaenexa?», apojai. Orijiibia: «¿Dexua yabara barëcuaicuaijamë bajarapowa?», apojai itsanë-ata Jesús-jawabelia.

²⁸ Nexata, Samaria nacuapijiwa, bajarajota pueneteta pijacanalito. Nawialia pijatomarabelia. Tsipaebalia jiwi Jesús yabara mapacueniaje:

²⁹ —¡Panataemelia ponë netsipaeba daxita pacuenia exanajë! ¿Baja tsaeta jane apoCristo, ponë athëbëwetsica Dioso itorobijitsiatsica jiwi pecapanepaenexa? —jai pijatomarapijiwajawabelia.

³⁰ Nexata, bajarapamonae pijatomarawelia ponalia. Tae-othopalia Jesús.

³¹ Itsa abaxë bajarapamonae apopatsilia Jesús-jawabelia, Jesús pijajiwi jumaitsi:

—¡Necujarubinë, naxaema pexaejawayo! —jai.

³² Itsiata, Jesús jumaitsi:

—Xainajë raja saicaya taxaejawanexa, paxamë apopanepätaejawa —jai.

³³ Nexata, Jesús pijajiwi, ëpamonae, nayanijoba. «¿Itsjawi tsaeta wajaco-wëta Jesús pexaejawa tocapatatsi pexaenexa?», najai.

³⁴ Nexata Jesús jumaitsi:

—Betaxaejawa rabaja taniiji, tane-itorobinësica pejitsipaecuene ta-exanaejawa. Bitso jitsipajë baja tanacueneweretsijawa xua nitoroba. Bajarajane xua taniiji betaxaejawa. ³⁵ Mapamatacabianëjawa, trigo pane-ubijawa yabara paxamë pajumaitsimë tsabiabi: «Saica raja abaxë cuatro pajuametobeje pe-ubijawa penaweretsinexa», pajamë tsabiabi. Itsiata, xanë pacajumaitsi itsa penotsicuene yabara. ¡Taema, mapamonaeje najetarubena! Pacuenia baja pe-ubijawa nawereta penotsinexatsi, bajara-itsi mapamonaeje, pejumexaniataejawanexa itsa tsipaebianatsi Dioso pejumeliwaisi. ³⁶ Pajiwi tsipaebiana tajumeliwaisi apoepäpëtaewijawabelia, pajiwi-ata cotocaewi jamatabëcueneyawenonaena pejumetaewi pejumexaniataenexa bajarapaliwaisi, bajarapajiwi beje Dioso najëpaeya pexaniacuenia matamot-sianatsi. Nexata, bajarapajiwi beje najuasawanajamatabëcuenobarëyatsibeje tsane. ³⁷ Payapëtaneme rabaja jiwi pejumaitsi jawa pe-ubijawa yabara mapacueniaje: «Copiaya itsanë uba. Itsa baja nawereta pe-ubijawa, juya itsanë nota», pejajawa. Xaniajai rabaja bajarapaliwaisi. ³⁸ Bajaraxuata, paca-itorobatsi patajajiwiwimë bepanenotsiwinexa itsaxuayo itsamonae copiaya Dioso pejumeliwaisi asaëyata tsipaebapona. Bajarapamonae copiaya Dioso pejumeliwaisi tsijamatabë-uba, ayaibitsaëto. Itsiata maparucaeje, paxamë cotocaewi panetsipaebaponaexae taliwaisi, panacujumataneme bajarapamonae pesiwanajamatabëcuenecopabijawa Diosojawabelia, panacueratsinejwamë ayaicuenia pane-ubijawa taliwaisi —jai Jesús pijajiwijawabelia.

³⁹ Ayaibitsaëto Samaria nacuata pejinawanapaewi, Sicar tomarapijiwi, jumexaniatane Jesús Cristocuene, mera pepuanaewa penawajunupaebijawa pejumaitsixae: «BajaraPonë netsipaeba daxita pacuene exanajë», pejaixae.

⁴⁰ Nexata, bajarapanacuapijiwi itsa parena Jesús-jawaberena, asiwatsi penaponaponaenexa bajarapamonaejawata. Nexata, bajaraPonë cucarubapona-pona anijamatacabibeje. ⁴¹ Itsa bajarapamonae pijacuata jumetane Jesús petsipaebiliwaisi, nexata icatsia ayaibitsaëto xaneto jumexaniatane Cristocuene. ⁴² Nexata, bajarapamonae jumaitsi penawajunupaebiwajawabelia:

—Aeconoxae pajumexaniataniji apo-ëpatanetsipaebiliwaisimë yabara. Biji rajane, pajumexaniataniji, tsipaji baja patajacuata-ata pajumetaniiji Jesús wajanacatsipaebiliwaisi. Nexata, payapëtaniji baja cajena bajaraponë pexaniajaijawa Cristocuene, mapanacuapijiwije pecapanepaenënexanua, pibisia-cuene pexanaeneconimiwecua —jai bajarapamonae.

Jesús tojamatejemaya-exana nacua-ewetsinë pijajiwitonë pexënatonëyo

⁴³ Samaria nacuata anijamatacabibeje Jesús peponaponaecujinae, xucujinae jane baja, wecuapona Galilea nacuyabelia. Barëpona pijajiwi

yajawa. ⁴⁴Jesús picaní nayabarajumaitsi tsabiabi mapacueniaje: «Diosojumepaebiwi itsa tsipaebabiaba Dioso peliwaishi jiwijawabelia, pijanacuapijiwi ba-apoyaiyataetsi», nayabarajai tsabiabi Jesús. ⁴⁵Itsiata baja, Jesús itsa palia Galilea nacuyabelia, peponaponaenacuayabelia, bajarapanacuapijiwi xaniawaetsia copiapitatsi, tsipaji baja cajena, bajarapamonae-ata, Pascua fiestamatacabi Jerusalén tomarata, Jesús cuenetanetsi pinijicuene pexanaejawa Dioso pesaëta.

⁴⁶Nexata, icatsia Jesús nawiata Caná tomaraberena, Galilea nacuata pe-ecaetomara, patomarata Jesús copiya pinijicuene exana Dioso pesaëta, merami pexanaejawa vinora. Capernaúm tomara, eca Galilea nacuata. Bajarapatomarata ponapona peyanacua-ewetsinë pebarënacuenëbinëtsi, ayaijamatabëcuenenë. Bajaraponë pexënatonëyo to-awitanë tsanucaetsi.

⁴⁷Nexata, nacua-ewetsinë pijajiwiwonë itsa wënëliwaisitanetsi Jesús pepatsijawa Galilea nacuyaberena, Judea nacujawawerena, bajaraponë lia Caná tomarajawabelia, itsajota Jesús ponapona. Nexata, pinijicuenia junata pijaboyabelia pebarëponaenexa, petojamatejemaya-exanaenexatsi pexënatonëyo, tsipaji baja, pexënatonëyo totëpaejitsiatsi.

⁴⁸Nexata Jesús jumaitsi bajaraponëjawabelia:

—Paxamë, pajudíowimë, cajena apopanejumexaniataemë patacat-sipaebiliwaishi. Matapania, itsa pataename pinijicuene Dioso pesaëta ta-exanaejawa, panejumexaniataename Cristonëcuene —jai Jesús.

⁴⁹Nexata, peyanacua-ewetsinë pebarënacuenëbinëtsi jumaitsi:

—¡Jesús, naxatsiayo tapëta ponare, taxënatonëyo abaxë petëpaewajë-naeya! —jai.

⁵⁰Nexata Jesús jumaitsi bajaraponëjawabelia:

—¡Nawiaremëlia nijaboyabelia! Nexënatonëyo rabaja newajënaelia catojamatejema —jai Jesús.

Bajaraponë jumexaniatane pacuenia Jesús jumaitsi. Nexata baja, lia pijaboyabelia. ⁵¹Itsa patanajetarucalia, pijajiwi mata-enenarenatsi. Jumaitsi: —Nexënatonëyo rabaja icatsia jamatejema tsecae —jaitsi.

⁵²Nexata, bajaraponë yanijoba pijajiwiawabelia:

—¿Detsa xuayota itsa ruca juameto, jamatejema baja? —jai tsapatsi bajaraponë.

Nexata pijajiwi jumaitsi:

—Caniwi raja, matoneje-epatota, wecua-ajibitsi baja peromaebijawatsi —jai.

⁵³Itsa jumetane bajaraxua, bajaraponë jamatabëjumaitsi: «Bajarapapatota cajena, caniwi Jesús nejumaitsi: 'Nexënatonëyo rabaja newajënae catojamatejema,' nejai», jamatabëjai. Nexata, bajaraponë, daxita pijamonae yajawa, jumexaniatane Jesús Cristonëcuene.

⁵⁴Jesús penawiatsicujinae Judea nacujawawerena, cotocaewi bajarapapinijicuene Dioso pesaëta exana Galilea nacuata.

Betesda pucayojawata, Jesús jamatejemaya-exana petabusipacuenabinëtsi

5 ¹Itsamatacabijawabelia, judíowi itsa exana fiesta Jerusalén tomarata, Jesús nalia. ²Bajarapatomarajawalia pejonebaupa, pewënë Ovejapijibaupa, bajarapabaupa imoxoyojawata eca pecueyetsipucayo.

Bajarapapucayo pewënë hebreojumeta Betesda.⁷ Bajarapapucayo matatoyo-rotsia ena cinco pabobërëtoheje. ³Nexata, bajarapabobërëtonëjawata, apocae-wiriawitane pexainaewi bobena. Itsamonae bitso pitaxutotsëcënaewi. Itsamonae pejayujayunaewi. Itsamonae peperabëcuenabiwitsi. Daxita bajarapamonae ewetanubena pucayo pemenenacujirubijawa. ⁴Bajarapamonae canaëjëta athëbëwetsica ángel jemata itsa runabiabica pucayojawabetsica, menenacujirubia-exanabiaba. Nexata, pemenenacujirubijawata, pajiwi copiaya runareca pucayojawabereca, pawitanecueña xaina, wecua-ajibi tsabiabitsi. ⁵Bajarapamonae yajuwënëbë bajarajota naboca treinta y ocho pawaiheje, piawitanetsanucaenë, petabusipacuenabinëtsi. ⁶Itsa Jesús tae-yabuata bajaraponë, yapëtaeyabuata bajayajebi piawitanenëcuenë. Nexata jumaitsi bajaraponëjawabelia:

—¿Jitsipame tsaja nejamatejemajawa? —jai Jesús.

⁷Nexata bajaraponë jumaitsi:

—Itsajiwi-ata apoxainaenë tanecarunaenexareca pucayojawabereca, paepatota mene nacujirubabiaba. Ajena narunabiabijitsianëreca, itsajiwi copiaya netsurunabiabareca —jai petabusipacuenabinëtsi.

⁸Nexata Jesús jumaitsi bajaraponëjawabelia:

—¡Namatacore! ¡Pire nijapanayo! ¡Ponare baja! —jai.

⁹Bajarapacuenia Jesús pejumaitsijawata, caecuenia jamatejema baja piawitanetsanucaenëmi. Pita baja pijapanayo. Ponaexanepana baja. Bajarapacuenia petabusipacuenabinëtsi Jesús jamatejemaya-exana judíowi penacuera-ewetsimatacabita.

¹⁰Nexata, judíowi jumaitsi petabusipacuenabinëmitsijawabelia:

—Ajena raja sábado, wajanacuera-ewetsimatacabi. Nexata, apoxanepanae cajena necaponaponaejawa nijapanayo —jai.

¹¹Nexata, bajaraponë jumaitsi judíowijawabelia:

—Tanejamatejemaya-exanaenë raja nejumaitsi: «¡Nijapanayo pire! ¡Ponare baja!», nejai —jai.

¹²Nexata, icatsia judíowi jumaitsi bajaraponëjawabelia:

—¿Jipatsa nexata cajumaitsi: «¡Nijapanayo pire! ¡Ponare baja!», cajai? —jaitsi.

¹³Itsiata baitsi jane, bajaraponë apowënëyapëtae pawënëbë jamatejemaya-exanatsi, tsipaji bitso jiwi ayaibitsaëtoxaneto jinawanapa. Nexata, Jesús baja, wecua-ajibi tsarucae bajarapamonaetuatuajëta, nawënë-paebinejewa bajaraponëjawabelia.

¹⁴Bajaraxuacujinae, icatsia Jesús caxitajarabaxuaba bajaraponë templo-bota. Nexata jumaitsi bajaraponëjawabelia:

—¡Taema! Aeconoxae baja jamatejemamë. ¡Icatsia, pëtsa baja matawëjëa exaname pibisiacuenë, tsipaji bitsomë tsipae! —jai.

r 5:2 Betesda: Itsajawata, bajarapapecuyetsipucayo wënërubanua Betsaida. s 5:4 Wowaijuna, itsaversión-xijawata aporuca versículo 4, tsipaji bajarapaversículo aporucae pabaxutonëta jiwi caxibajaraba ibowajujawata, Mar Muerto manuamene imoxoyojawata. Bajarapacaxi-bajarabibaxutonë wënërubana «Los papiros del Mar Muerto». Bajarapabaxutonë caxibajaraba 345 pawaiheje pexainaecujinae, Reina Valerabaxuto pejutsicujinae. Bajarapabaxutonë bitso mata-toxetsia perujujawanë pabaxutonëwecua jiwi canacueneba pejutsinexa Reina Valerabaxuto. Bajaraxuata, cotocaewi pecaxibajarabibaxutonë itsamonae bitso tsitanamatamotatsi.

¹⁵Nexata, bajaraponë pona baja, petsipaebinxaxa judíowijawabelia.

Jumaitsi:

—Jesús tsaena raja nejamatejemaya-exana —jai.

¹⁶Bajaraxuata, judíowi taxuxuaba Jesús peliwaissicaranabijawa, pejamatejemaya-exanaponaexae piawitanewi penacuera-ewetsimatacabi.

¹⁷Itsia, Jesús jumecanawiata bajarapamonaejawabelia:

—Taxa Dioso raja, caematacabi canacujitsia yawenonabiaba penamatawenaewi, bajayajawawerenacujinae, ajena pamatacabijawaberena-ata. Baja-raxuata, xanë-ata cuenejëpaeya exanabiabajë —jai Jesús.

¹⁸Bajarapacuenia judíowi pecuenaetaexae Jesús pejamatejemaya-exanaejawa piawitanewi, judíowi penacuera-ewetsimatacabita, pejumaitsixaenua: «Taxa raja Dioso», pejaixae, matatoxenetsia jamatabëbeyaxuabatsi.^t

Jesús nawajunupaeba Paxa Dioso pejamatabëcuenejëpaejawa

¹⁹Judíowi pecuene-itoxaxaetsi, Jesús jumecanawiata mapacueniaje.

Jumaitsi bajarapamonaejawabelia:

—Xaniajanë pacuenia pacatsipaebijitsiatsi. Xanë, Dioso pexënatonë-ata, itsacuenejawayo apo-exanaenë ëxanë tajamatabëcueneta. Biji rajane, pacuenia taniji taxa pexanaejawa, bajarapacuenia xanë-ata exanajë. ²⁰Tane-asiwaxae, taxa neyapëtaeya-exanabiaba daxita pacuene exanaponapona. Tawajënaeyabelia neyapëtaeya-exanaponaena itsapini-jicuenejawanë, patacatsita-exanaponaenexa ta-exanaejawanëmiwecua, ayaicuenia papecajamatabëcuenenabenajacaeya-exanaejawanënexa, xaniawaetsia paneyapëtaenexa Dioso pexënatonëcuene. ²¹Pacuenia taxa icatsia asaëya-exana jiwi petëpaejawawecua piasaëjumali perajutsinexa, bajarapijinia pacuenia xanë, pexënatonë-ata, rajutajë piatawajamatabëcuene" pamonaejawabelia jitsipajë." ²²Taxa raja aponaneconitsia-exanae tsane itsajiwi-ata. Biji rajane, xanë, pexënatonë, netocopata tananeconitsia-exanaenexa pibisiacuene pexanaewi. ²³Bajarapacuenia netocopata pexënatonëjawaberena, daxitajiwi taneyaiyataenexa pacuenia taxa-ata yayiatane. Pajiwi aponeyaiyatae, Dioso pexënatonë, bajarapajiwi taxa-ata apoyaiyatae.

²⁴»Xaniajanë pacuenia pacatsipaebijitsiatsi. Pajiwi nenamuxuna-eweta tapaebiliwaisi, nejumexaniatanenua, Ponë athëbëwetsica tane-itorobinëcuenetsica, bajarapajiwi xainaena matacabi apopewerewerecaejawa. Nexata, aponaneconitsia-exanaenë tsane pibisiacuene

t 5:18 *jamatabëbeyaxuabatsi*: Judíowi pitabarata, Jesús anijaneconibeje natsi-exana. Caejawa tsitananeconitsi Diosojawabelia, tsipaji canaëjëta Jesús penacuenebijawa sábadomatacabita, itsa jamatejemaeya-exana piawitanewi. Itsaneconipi jinia natsi-exana, itsa jumaitsi: «Taxa raja Dioso» itsa jai, tsipaji najamatabëcuene-itajëta beDiosonë penataejawa. Bajarapacotocaewineconibito pinijineconicopiaya pijaneconiwecua. Bajaraxua yabara matatoxenetsia jamatabëbeyaxuabatsi. **u 5:21** *piatawajamatabëcuene*: Bajarapacuenia jumaitsi anijacuenebeje yabara. **1)** Cristo asaëya-exana petëpaeawimi pacuenia exana Paxa. (Taema Jn 11:43-44, Lc 7:14-15.) **2)** Orijibia, Cristo petëpaejamatabëcuene pexainaewi jamatabëcuene-aitawayaxana. (Taema Efe. 2:1-5; Col. 2:13.) **v 5:21** *pamonaejawabelia jitsipajë*: Jesús rajuta piatawajamatabëcuene pamonaesiwanajamatabëcuenecopabatsi. Taema Jn 3:16-18; Heb. 11:6. Bajara-ëpitsiwi jitsipa perajutsinexa piatawajamatabëcuene daxitamatacabijawabelia.

pexanaeneconi yabara, tsipaji baja, jamatabëcuene-aitawaya-exanatsi^w petëpaejamatabëcuenemiwecua, juya piaitawajamatabëcuene pexainae-nexa. ²⁵Xaniajanë pacuenia pacatsipaebijitsiatsi. Pamonaë pejamatabëcuenetëpaewi Dioso pitabarata, pijamatacabi baja tocopiapatatsi tane-jumetaenexa, xanë Dioso pexënatonë, tatsipaebiliwaisi. Nexata, pajiwi nesiwanajamatabëcuenecopata xanëjawaberena, xainaena matacabi apopewerewerecaejawa. ²⁶Pacuenia taxa pijacuata piasaëjumali pexainaenë tsaponaponaë, bajarapijiniä pacuenia bajarapapiasaëjumali xanë, Pexënatonë, netocopata itsamonae tarajutsinexa, pexainaenexa matacabi apopewerewerecaejawa. ²⁷Orijibia, taxa Dioso nerajuta Daxitajiwi Pematapijinëxaenë tanamatacaitorobisaë, tananeconitsia-exanaenexa pibisiacuene pexanaewi. ²⁸¡Pëtsa pajamatabëcuenenabenajacame patacatsipaebiliwaisi yabara, tsipaji itsamatacabi nejumetaena daxita petëpaewimi-ata! ²⁹Nexata, pamonaë pexaniacuene pexanaewi, namatacobiana pexinaenexa matacabi apopewerewerecaejawa. Pamonaë pijiniä pibisiacuene pexanaewi, namatacobiana naneconitsiäya pejinawanapaenexa daxitamatacabijawabelia —jai Jesús judíowijawabelia.

Xuanë yabara jiwi beyapëtane Jesús, Cristonëcuene

³⁰Icatsia, Jesús jumaitsi judíowijawabelia:

—Xanë tajamatabëcueneta apo-exanaenë itsacuenejawayo-ata, taxa nitorobinejewa. Nexata, itsa naneconitsia-exanaenajë pijaneconi pexinaewi, naneconitsia-exanaenajë pacuenia taxa nitoroba ta-exanaenexa. Bajaruatu, aponaneconitsia-exanaenë tsane itaxutejema. Biji rajane, caejiwi naneconitsia-exanaponaenajë pijaneconicanacujitsia. Apo-exanaenë tsane tajacuata tanatojitsipaecuenia. Biji rajane, exanaenajë taxa tanetojitsipaecuenia. ³¹Itsa xanë tajacuata nawënëliwaisipaebijitsipajë ayaijamatabëcuene taxainaejawa yabara, aliwaisimatamobinë tsipae jiwijawabelia. ³²Itsiata baja, Juan, jiwibautizabinëmi, newajunupaeba xaniawaetsia. Yapëtaniji bajaraponë tanewajunupaebijawa pexaniajaijamatabëcueneta. ³³Paxamë itsamonae pa-itorobame Juan, jiwibautizabinëmi jawabelia tane-wënëliwaisiyanijobinexa. Nexata, bajaraponëmi xanë taliwaisi, pexaniajaicuenia tsipaeba pane-itorobiwijawabelia. ³⁴Xanë aponamatawenonaenë picani itsajiwi taneliwaisi wajunupaebijawa ta-exanaejawa yabara. Saya pacanajamatabënapitsia-exanatsi xua Juan-pijinë newënëliwaisipaeba,^x panejumexaniataenexa bajarapaliwaisi, taxa Dioso papecacapanepaenexa. ³⁵Juan-pijinë abaxë itsa ponapona mapanacuataje, papecatsipaebiliwaisi belämpara pacajamatabëcuene-itayota. Cae-epatoyo picani pasi-wajamatabëcuenebarëyamë panejumetaejawata papecatsipaebiliwaisi. ³⁶Itsiata baitsi jane, xanë xainajë itsajawa, bitso penamatamotsijawa, xua

w 5:24 *jamatabëcuene-aitawaya-exanatsi*: Pamonaë jinawanapa mapanacuata pecanaëjëtsicueniaje, saicaya wecuajinawanapa Dioso. Nexata, Dioso tsitatsi petëpaejamatabëcuene pexinaewi. Itsiata, pajiwi siwanajamatabëcuenecopata Jesús-jawabelia, Dioso jamatabëcuene-aitawaya-exanatsi petëpaejamatabëcuenemiwecua. Nexata, piaitawajamatabëcuene pexinaexae, xua wajëta Diosojawabelia, namuxuna-ewetatsi. Xua-ata exana Diosonexa, siwajamatabëcuenebarëyatsi. Itsiata, pamonaë petëpaejamatabëcuene pexinaewi Dioso pitabarata, bajarapacuenia bajaraPonë apoto-exanaetsi. Taema Prov. 15:8-9. x 5:34 *newënëliwaisipaeba*: Taema Jn 3:27-36.

betanewēnēliwaisipaebicuenejawa, pejumaitsijawawecua Juan-pijinē. Papi-nijicuenejawanē taxa netocopata patacatsita-exanaenexa, bajaraxuanē pacayapētaeya-exana baja pepacuene taxa Dioso athēbēwetsica tane-itorobinēcuene. ³⁷Taxa, ponē nitorobica, newēnēliwaisipaebanua. Itsiata, caeto-ata papecatsipaebiliwaisi, panijamuxucujaya apopajumetaemē. Apopataemēnua panija-itaxutocujaya. ³⁸BajaraPonē pejumeliwaisi apopacatsijamatabējone, tsipaji apopanesiwanajamatabēcuenecopabimē xanē-jawaberena, taxa athēbēwetsica tane-itorobinētsica-ata. ³⁹Paxamē picani xaniawaetsia payorobabiabame Dioso pejumeliwaisibaxuto, bajarapacuenia panexainaejawanexa matababi apopewerewerecaejawa. Itsiata, bajarapaliwaisi pacayapētaeya-exana xanē yabara baja cajena. ⁴⁰Bajarapacuenia xanē yabara pacayapētaeya-exanae-ata, apopajitsipaemē patanesiwanajamatabēcuenecopatsijawamē xanējawaberena, panexainaejawanexa matababi apopewerewerecaejawa.

⁴¹»Xanē aponamatawenonaenē itsajiwi tanecuene namatamotsia-exanaenexa, Dioso tane-itorobinētsicuenetsica, ayaicuene ta-exanaejawa yabara. ⁴²Bajarapacuenia apopacatojitsipaetsi patanejumaitsijawamē, tsipaji pacajamatabēcueneyapētanetsi, apopanexainaejawa Dioso pane-asiwajamatabēcuenē. ⁴³Xanē patsi-atanē mapanacuayabetsicaje taxa Dioso pewēnēta, paxamē apopanecopiapitsimē. Itsiata, itsanē itsa patsipa pija-cuata pena-itorobicuenia, papecatsipaebinexa saya bajaraponē pejamatabēcuenepijiliwaisi, xaniawaetsia pacopiapitsipame, panejumexaniataenexa. ⁴⁴Paxamē pajitsipabiabame mapanacuapijiwi pexaniacuenia papekawēnēliwaisibaracuaicuajaijawa. Bajaraxuata, apopacacuenecaējēpae patanesiwanajamatabēcuenecopabinexamē xanējawaberena. Biji rajane, picani bepajaitame pane-exanaenexa xua yabara pepocaenē Dioso, pacasiwajamatabēcuenēbarējajitsia. ⁴⁵¡Pētsa panatocanaējētame xanē patacanēconitsijawanexa taxa Diosojawabelia! ¡Jume baja cajena! Biji rajane, Dioso penajumecopatsiliwaisi Moisés-pijinēta pacaneconitsiana Diosojawabelia, daxita bajarapaliwaisi apopanejumecowēnētsicapanepaexae, paliwaisi picani pajamatabēcuenē-ewetame, Dioso aneconihibia papecataejawanexa. ⁴⁶Itsa pepacuene pajumexaniataejitsipame paliwaisianē Moisés-pijinē yaquina, nexata xanē-ata panejumexaniataejitsipame, tsipaji cajena bajayatami tajēwelia Moisés-pijinē peyaquinaebaxutota yaquina xanē yabara. ⁴⁷Itsa paxamē apopajumexaniataemē Moisés-pijinē peyaquinaeliwaisi, ¿detsa nexata pacuenia pajumexaniataejitsipame xanē patacatsipaebiliwaisi? ¡Ajibi cajena! —jai Jesús judiowijawabelia.

Jesús rajuta pexaejawa cinco mil ponēbejejawabelia

(Mt 14:13-21; Mc 6:30-44; Lc 9:10-17)

6 ¹Bajarapaliwaisi penajumeweretsicujinae, Jesús, pijajiwi yajawa, nicaba Galilea pucaxaneto itsapanabelia. Bajarapapuca itsawēnē Tiberias. ²Nexata, jiwi ayaibitsaētohaneto Jesús pēnaponatsi, tsipaji cunetanetsi Dioso pesaēta ayaicuene pexanaponaejawa, piawitanewi-ata pejamatejemaya-exanaponaejawa. ³Nexata, Jesús junaya petsutojumbetsia. Bajarajotatsia, ecaya pijajiwi yajawa. ⁴Bajarapamatacabijawa pijinia bitso baja imoxoyo pewajēnae pejonejawanexa Pascuafiesta. ⁵Itsa

Jesús tane jiwibitsaëtoxañeto matatoyorotsia pecujibijawarenatsi, jumaitsi Felipejawabelia:

—¿Detsa belia comuatsianatsi mapabitsaëtoxañeto pexaejawa wajarajut-sinexaje? —jai. ⁶Bajarapacuenia Jesús jumaitsi jamatabëcuene-ëjëbiaya. Yapëtane picani xua exanaejitsia.

⁷Nexata, Felipe jumaitsi Jesús-jawabelia:

—Doscientos denariocuena⁷ comuatsi-atatsi tsipae pan, apoyacaëjëpaetsi tsipae pexaenexa daxita mapajiwibitsaëtoxañetoje —jai.

⁸Itsanë Jesús pijajiwitonë, Andrés, Simón Pedro pejuyapijinë, jumaitsi Jesús-jawabelia:

⁹—Majotaje napatajopa pejewaxinëyo. Bajaraponëyo caponapona cinco papan-bëbeje, cebadabenota pexanaepan-bëanë, anijadujuainëyobeje yajawa. Itsiata, bajaraxuaxi apocaëjëpae tsipae wajarajutsinexa mapajiwibitsaëtoxañetoje —jai Andrés.

¹⁰Nexata Jesús jumaitsi pijajiwijawabelia:

—¡Daxita bajarapamonae pa-enaeya-exanare! —jai.

Nexata, Jesús pijajiwí itoroba bajarapamonae pe-enaeya-enaenexa pona-jumawereca. Bajarapajiwibitsaëtoxañeto bejamatabëcuene cinco mil meta ponëbeje. ¹¹Nexata, Jesús pita bajarapacincó papan-bëyobeje. Bajaraxuacujinae, pexaniajamatabëcuene rajuta Diosojawabelia bajarapapan-bëxi yabara. Xuacujinae, tsanaeya-exana pijajiwí jiwijawabelia. Bajara-icatsia pacuenia, pexaniajamatabëcuene rajuta Diosojawabelia dujuainëyobeje yabara. Xuacujinae, tsanaeya-exana pijajiwí jiwijawabelia. Daxita bajarapamonae xaniawaetsia xane. ¹²Itsa baja bajarapamonae penia, Jesús jumaitsi pijajiwijawabelia:

—¡Pacaetuare baja peyajuwënëcopabenaejawanë, penaxuabenaeyaniwa! —jai.

¹³Bajarapamonae caetuata cinco papan-bëmibeje peyajuwënëcopabijawanë. Doce xuabeje wënëba beyoxobocuena pecuejawanë.

¹⁴Nexata, bajarapajiwibitsaëtoxañeto, itsa tane Jesús bajarapapiniñicuene Dioso pesaëta pexanaejawa, najumaitsi Jesús yabara:

—¡PaDiosojumepaebinë, profeta, copia-ewetawanapatsi pepatsijawane-xatsica, bajarajane maponëje! —najai Jesús yabara.

¹⁵Itsiata, Jesús wecuapona, pejamatabëcueneyapëtaexae pacuenia siwanajamatabëxainatsi bajarapamonae, pesaëta pexanaenexatsi picani pepopeyanacua-ewetsinëxexa. Pewecuaponaecujinae, caenë najetaruca pinijitsutonëjawa.

Jesús najetaruca mene-itaboxoya

(Mt 14:22-27; Mc 6:45-52)

¹⁶Itsa baja merawi, Jesús pijajiwí puca-itapayabereca pona, pewetsinexa.

¹⁷Itsiata, Jesús abaxë pecuenaenajematsixae, itsa baja ajena merawitsia Jesús pijajiwí runareca jera-ënëabereca, penicabinexalia Capernaúm tomarabelia.

y 6:7 *Doscientos denariocuena*: Bajarapamatacabi jiwí bamatamota caedenario caematacabi penacuenebijamatabëcuene. Nexata Felipe jumaitsi, «Doscientos pamatacabibeje penacuenebi-matamo apoyacaëjëpae tsipae pecomuatsinexa pan, bajarapajiwibitsaëtoxañeto pexaenexa», jai.

¹⁸ Pucaxanetotuatujätalia pepuanajetarubena, pewajënaewerena najeta-ruca ayaijowiboxaneto pebubujaijawa. Nexata, malataca bitso ayai. ¹⁹ Baja-rapamonae pepuanajetarubenaelia bajarapawëpawecua bejamatabëcuene cinco, itsa jume, seis pakilómetrobeje, bajarapamonae tane Jesús penajeta-rucaejawarena mene-itaboxoya. BajaraPonë itsa imoxoyotanajetarucarena barcojawaberena, nexata bajarapamonae cujunawatsi.

²⁰ Nexata, Jesús jumaitsi pijajiwijawabelia:

—¡Xanë raja najetarucajé! ¡Pëtsa panecujunawame! —jai.

²¹ Nexata, jamatabëcuenebarëyaya copiapitatsi. Jesús baja nexata nono-rena jera-ënëaberena. Caecuenia baja Jesús, pijajiwí yajawa, pata Capernaúm tomarawëpajawabelia.

Jesús nawajunupaeba pitawapan-nëcuenia

²² Merawiapitsijawata matapania yapëtane pamona nacopabilia puca itsapanatalia, Jesús apopenaponaejawa pijajiwí pepëta. Saya tane ëJesús pijajiwí penicabijawa itsapanabelia. Bajarapamonae yanicabilia caemota, pajera boca jerapanabota. Bajaraxuata, penacopabiwi jamatabëcuenejumaitsi: «Jesús abaxë majota nacopatanucaje», jamatabëcuenejai. ²³ Bajara-paepatota, Tiberias tomarawerena, itsamonae jeranëta yaparena. Yaëba-othopa imoxoyojawata, itsajota caniwipitsijawata, Jesús pexaejawa rajuta jiwi ayaiBITSÄTOXANETOJAWABELIA, pexaniajamatabëcuene perajutsicujinae Diosojawabelia. ²⁴ Bajarapamonae itsa yapëtane Jesús pijajiwí pebarë-ajibitsarucaejawa bajarajota, nexata pamona Tiberias tomarawerena pamonëta yapata, juya bajarapamonëjawabereca runareca, penicabinexalia Capernaúm tomarabelia, Jesús pepëjaiTSINEXA. ²⁵ Nexata, pecaxitajarabicuji-naetsi Capernaúm tomarata, bajarapamonae jumaitsi Jesús-jawabelia:

—Necujarubinë, ¿detsa pacujinae patame baja maberenaje, puca-itsapanaberena? —jai.

²⁶ Nexata, Jesús jumaitsi bajarapamonaejawabelia:

—Xaniajanë pacuenia pacatsipaebijitsiatsi. Paxamë panejaitame, tsipaji xaniawaetsia pexaejawa paxaneme xanëjawata. Apopanejaitsimë panenatoyapëtaexae pajamatabëcuene yabara pacatsi-exanatsi bajarapapiniijicue-nejawanë Dioso pesaëta. Bajaraxuanë patae-atamë, tsiteca pacuene-aebame Dioso tane-itorobinëtsicacuene. ²⁷ ¡Pëtsa pasiwanacuenebame ëpewerewere-caepexaejawa yabara! ¡Biji rajane, pasiwanacuenebare apopewerewerecaepexaejawa, panexainænexa matacabi apopewerewerecaejawa! Xanë, Daxitajiwí Pematapijinënë, pacarajutsianatsi bajarapawiria pexaejawa, tsipaji caenënë Taxa Dioso netocopata bajarapacuenia ta-exanaenexa jiwijawabelia —jai Jesús bajarapamonaejawabelia.

²⁸ Nexata, bajarapamonae jumaitsi Jesús-jawabelia:

—¿Detsa nexata xua bepa-exanajë Dioso pejitsipaecuene? —jai.

²⁹ Nexata, Jesús jumaitsi bajarapamonaejawabelia:

—Mara pacuene Dioso jitsipa pane-exanaenexaje. ¡Panexumexaniataema xanë Dioso tane-itorobinëcuenetsica! —jai.

³⁰ Nexata, icatsia bajarapamonae jumaitsi Jesús-jawabelia:

—Dioso peca-itorobinëcuenetsica patacajumexaniataenexa, ¿detsa papi-nijicue, Dioso pesaëta nexanaejawa, panetsita-exanaenexa? ³¹ Dioso

pejumeliwaisibaxuto nacayapëtaeya-exana, pacuenia wajasalinaiwimi bajayata baxaewanapa maná petusatonacuata. Bajaraxua yabara Dioso pejumeliwaisibaxutota jumaitsi mapacueniaje: «Bajarapamonae rajutababatsi athëbëpijipan pexaenexa», jai Dioso pejumeliwaisibaxutota wajasalinaiwimi yabara —jai bajarapamonae Jesús-jawabelia.

³² Jesús nexata bajarapamonaejawabelia jumaitsi:

—Xaniajanë pacuenia pacatsipaebijitsiatsi. Moisés-pijinë petusatonacuata wajasalinaiwimi aporajutsi athëbëpijipan. Biji rajane, taxa Dioso bajara-papan rajutabiaba pexaejawanexa. Nexata, pijinia aeconoxae paxamë-ata Dioso pacarajutsiana pepacuenie pexaniajaipan, athëbëpijijawa. ³³ Bajarapa-athëbëpijipan raja, Ponë athëbëwetsica pepatsinë. BajaraPonë mapanacua-pijiwijawabeliaje rajutsiana matakabi apopewerewerecaejawa —nayabarajai Jesús pijacuata.

³⁴ Nexata, bajarapamonae apopejumeyapëtaexae, jumaitsi:

—Tajatuxanenë, bajarapapan panerajutaponaename caematacabi canacujitsia —jai.

³⁵ Nexata, Jesús jumaitsi bajarapamonaejawabelia:

—Papan jiwi rajutsianatsi matakabi apopewerewerecaejawa, xanë rabaja bajarapapannë. Nexata, pajiwi patsiana xanëjawaberena, apopijani cajena tsane^z pejamatabë-ëthëtota. Pajiwi xanëjawaberena nesiwanajamatabë-cuenecopata, mera apojitsipae tsane. ³⁶ Paxamë patae-atamë Dioso pesaëta pinijicuenie ta-exanaejawa, itsiata panecuenie-aebame. ³⁷ Daxita pamonaie taxa tanerajutsiwi, patsiana xanëjawaberena. Pajiwi patsiana xanëjawaberena, aponawecua-itawetsinë tsane. ³⁸ Xanë apopatsinëtsica athëbëwetsica ta-exanaenexa ëtajamatabëcujirupijijawa. Biji rajane, patsicajë, ta-exanaenexa tane-itorobinëtsica pejitsipaecuenia. ³⁹ Mara pacuene Taxa Dioso jitsipa tato-exanaenexaje. Apojitsipae cajena tatoxuabijawa caejijiwi-ata tanerajutsiwiya-juwënëwi. Biji rajane, jitsipa ta-asaëya-exanaejawa daxita bajarapamonae, nacua pecopiarucaematacabita, pamatacabi tocanaëjëtsianajë jiwi pijaneconi pexainaewi. ⁴⁰ Taxa Dioso, Ponë nitorobica, bitso baja cajena jitsipa, jiwi pexainaejawa matakabi apopewerewerecaejawa, daxita pamonaie tanetaewi Dioso pexënato, nesiwanajamatabëcuenecopabanua xanëjawaberena. Bajara-pamonae petëpaejawamiwecua icatsia asaëya-exanaenajë, nacua pecopiarucaematacabita —jai Jesús bajarapamonaejawabelia.

⁴¹ Jesús pijacuata penayabarajumaitsixae: «Xanë rabaja athëbëwetsica tapatsipan», pejaixae, judfowi cuenebaracuaicuaijaitsi pepënëwelia.

⁴² Nexata najumaitsi:

—Mara ponëje Jesús, Josépijinë pexënato. Waxaitsi baja cajena yapëtanetsi paxapijinë, pena-ata. Bajaraxuata picani, apoxanepanae pejumaitsi-jawa: «Athëbëwetsica tapatsinë», pejaijawa —najai Jesús yabara.

z 6:35 *apopijani tsane*: Jesús bajarapacuenia itsa nayabarajumaitsi jiwi pepatsijawa yabara bajaraPonëjawaberena, nacamocuenie-itajëta jiwi pesiwanajamatabëcuenecopabijawa bajaraponë-jawabelia. Nexata, wajasibanajamatabëcuenecopatsijawata Jesús-jawabelia, bewajanacawecua-ajibia-exanaejawa wajanijawami, tsipaji Jesús pejamatabëcueneta, Dioso aneonijibia nacatane, itsacueniejawa exanaenewatsi. Mera wajaitsipaecuenemi bewajanacawecua-ajibia-exanae Espiritu Santo wajanacatsijamatabë-ecaexae, wajanacajamatabëcueneyawenonaenexa, Dioso pejitsipaecuenia wajaninawanapaenexa. Taema Jn 4:14.

⁴³ Nexata, Jesús jumaitsi bajarapamonaewawabelia:

—¡Pacopabare baja jamatabëcuenenawëxaniabiaya patanebaracuai-cuaijijawamë! ⁴⁴ Itsajiwi-ata apocajëpaetsi pijacuata pepatsijawa xanë-jawaberena, taxa Dioso, tane-itorobinëtsica, itsa apojitsipaeya-exanaetsi tanesiwanajamatabëcuenecopatsinexa. Matapania pajiwi taxa Dioso cuenecaëjëpaeya-exanatsi, nesiwanajamatabëcuenecopatsiana xanëjawaberena. Bajarapajiwi asaëya-exanaenajë petëpaejawamiwecua, nacua pecopiarucaematacabi. ⁴⁵ Bajayata, Diosojumepaebiwimi peyaquinaeliwaisi jumaitsi mapacueniaje: «Dioso cajena cujarubiana daxitajiwi pexaniajailiwaishi», jai. Nexata, pajiwi namuxuna-eweta taxa xua cujarubatsi, yapëtaenanua pecujarubiliwaitsi, bajarapajiwi xanë-ata nesiwanajamatabëcuenecopatsiana.

⁴⁶ »Itsajiwi-ata cajena taxa apotae. Xanë raja, caenëñë, taxa Dioso taniji, tsipaji bajarawetsica tapatsinë. ⁴⁷ Xaniajanë pacuenia pacatsipaebijitsiatsi. Pajiwi nesiwanajamatabëcuenecopatsiana xanëjawaberena, xainaena matacabi apopewerewerecaejawa. ⁴⁸ Xanë rabaja pitawapan-nënë. Nexata, xanë tamatabëcueneta, jiwi xainaena matacabi apopewerewerecaejawa. ⁴⁹ Bajayata, panijasalinaiwimi xaewanapa picani maná petusatonacuata. Itsiata baitsi jane, bajayajebi xaewanapae-ata, belia baja tëpa bajarapamonaë. ⁵⁰ Biji rajane, xanë pacatsipaebatsi athëbëwetsica pepatsipan yabara. Nexata, pajiwi xaena bajarapapan, pepacuenie apotëpae tsane. ⁵¹ Xanë, athëbëwetsica tapatsinë, bajarapapitawapan-nënë. Nexata, pajiwi xaena bajarapapan, xainaena matacabi apopewerewerecaejawa. Papan yabaraju-maitsinë, tawito rabaja. Nawirajutsianajë,^a daxitanacuapijiwi pexainaenexa matacabi apopewerewerecaejawa —nayabarajai Jesús judfowijawabelia.

⁵² Nexata, judfowi najume-anaenota ëpamonaë bajarapacuenia Jesús peju-maitsijawa yabara. Najumaitsi bajarapamonaë:

—¿Detsa pacuenia maponë nacanawirajutsipa wajawixaenexaje? Acue-nebi raja wajawixaenexa —najai.

⁵³ Jesús nexata jumaitsi judfowijawabelia:

—Xaniajanë pacuenia pacatsipaebijitsiatsi. Xanë, Daxitajiwi Pematapiji-nënë, itsa paxamë apopanewixaemë tsane, apopanejana-apaemëña tsane, nexata matacabi apopewerewerecaejawa, apopaxainaemë tsane. ⁵⁴ Pajiwi xaena tawito, apaenanua tajana, xainaena matacabi apopewerewerecaejawa. Nexata, bajarapajiwi icatsia asaëya-exanaenajë petëpaejawamiwecua, nacua pecopiarucaematacabi. ⁵⁵ Tawito rabaja cajena pepopexaniajai pexaejawa. Tajana-ata rabaja pijinia pepopexaniajai piapaera. ⁵⁶ Nexata, pajiwi newixaena, nejana-apaenanua, bajarapajiwi yajawaponaponanajë. Bajarapijina pacuenia, neyajawaponaponana. ⁵⁷ Taxa, Ponë nitorobica, piasaëjumali pexainaponaponanë. Nexata, bajaraPonë pejamatabëcueneta, xanë-ata daxitamatabicijawabelianexa asaënë tsaponaponae. Nexata, pajiwi newixaena, bajarapajiwi pijinia tamatabëcueneta asaë tsaponaponae tsane

a 6:51 *Nawirajutsianajë*: Jesús nacuenecataeya cacuaicuaijai manájawabelia: Bajayata, Israel-pijinë pemomoxi petusatonacuata pejinawanapaejawata, Dioso athëbëwetsica to-itorobicatsi maná pexaenexa, petëpaeyaniwa. Nexata icatsia, Dioso nacato-itorobica pexënato peperabëto pexainaenëcuenia, wajanacasawatëpaenexa wajaneconijamatabëcuenë, wajatëpaeyaniwa Diosowecua. Baitsi, wajasawanajamatabëcuenecopabijawa Jesucristojawabelia nacato-itajëta bewajawixaejawa bajaraPonë.

daxitamatacabijawabelianexa. ⁵⁸ Xanë, athëbëwetsica betapatsipannë, xua yabara baja pacatsipaebatsi, apocuenejëpaenë papan bajayata panijasalinai-wimi xaewanapa. Bajarapapanmi bajayajebi xaewanapae-ata, bajarapamonaemi itsiata tēpaponā. Biji rajane, pajiwi xanë tawito xaena, ponaponaena daxitamatacabijawabelianexa —jai Jesús judfowijawabelia.

⁵⁹ Bajarapacuenia Jesús jumaiti judfowijawabelia, liwaisi petsipaebijawata Capernaúm tomarata, judfowi pijasinagogabota.^b

Paliwaisi rajutsijitsia matababi apowerewerecaejawa

⁶⁰ Jesús penayabarajumaitisijawa pijacuata, ayaibitsaëto, pepëñajinawana-paewitsi, pejumetaecujinaetsi bajarapamonae najumaiti:

—Piayapëbejeliwaisi cajena nacacujaruba waja-exanaenexa. ¿Jipatsa caë-jëpatsi pexanaejawa bajarapacueni? ¡Ajibi cajena! —najai ëpamonae.

⁶¹ Jesús pejamatabëcueneyapëtaexae pebaracuaicuajijawatsi, nexata yanijoba bajarapamonaejawabelia. Jumaiti:

—¿Apobepexaniajailiwaisi tsaja pajumetaneme? ¿Pataneca-amuxujitsibimë patacatsipaebiliwaisi? ⁶² ¿Paxamë detsa pajamatabëcuene-itsimë tsipae itsa panetaejitsipame, xanë, Daxitajiwi Pematapijinënë, tatsiajawa athëbëabetsia, taponaponaenacuamijawabetsia? ¿Matapania meta panejumexaniataejitsipame patacatsipaebiliwaisi? ⁶³ Caenë rabaja, Espiritu Santo, piaitawajamatabëcuene perajutsinë. Jiwi cajena apocaëjëpaetsi, pesaëta pexainaenexa bajarapajamatabëcuene. Espiritu Santo paliwaisi nejamatabëcuenecaëjëpaeya-exana patacatsipaebinxia, bajarapaliwaisi pejamatabëcueneta, paxainame pitawajamatabëcuene. ⁶⁴ Itsiata baitsi jane, paxamëyajuwënëwi abaxë apojumexaniatae bajarapaliwaisi —jai Jesús.

(Bajarapacuenia jumaiti,^c tsipaji tajëwelia petaxuxuabijawata Dioso pijacuene penacuenebijawa, Jesús jamatabëcueneyapëtane baja pamonaë apozejumexaniataewinexatsi, ponë pijinia canajetsijitsiatsi pijawajabitsaë pecobeyabelia.) ⁶⁵ Bajaraxuata, Jesús orijibia itsaliwaisi jumaiti pepënaponaewitsijawabelia:

—Apopatanejumexaniataejawamë yabara pacajumaititsi picani: «Itsajiwi-ata raja apocaëjëpaetsi pijacuata xanëjawaberena tanesiwanajamatabëcuenecopatsinexa. Matapania taxa Dioso, tane-itorobinëtsica, itsa caëjëpaeya-exanaenatsi, nesiwanajamatabëcuenecopatsiana», pacajaiti baja cajena —jai Jesús.

⁶⁶ Bajarajota nexata, ayaibitsaëto Jesús pepënaponaewitsi wepëñawia-batsi. Pematatsënë baja apopënaponaetsi. ⁶⁷ Jesús bajarapacueni petaejawa, yanijoba doce ponëbeje pijajiwijawabelia. Jumaiti:

—¿Paxamë-ata tsabaja panajamatabënawiabame? —jai.

⁶⁸ Nexata, Simón Pedro jumaiti Jesús-jawabelia:

—Tajatuxanenë, itsa panawiabajë, ¿jipatsa nexata, xamëwecua papënaponaëjitsipajë? Xamë rabaja paliwaisi xainame, panerajuta matababi

b 6:59 *pijasinagogabota*: Bajarapacuenia judfowi wënërubabiaba penacatuatsibo, itsajota nacu-jarubabia Dioso peliwaisi caesábado canacujitsia. **c 6:64** *Bajarapacuenia jumaiti*: Paliwaisi ruca paréntesis-bejetuatujëta (), bajarapaliwaisi apozejumaitisijawa Jesús. Apóstolnë Juan, mapabaxutoliwaisi peyaquinaenë, ruta bajarapatsiquiriliwaisiyo (nota), jiwi peyapëtaeya-exanaenexa pelebiwi Jesús pitsijamatabëcuene xaina.

apopewerewerecaejawa pataxainaenexa. ⁶⁹Paxanë rabaja pacajumexania-tanetsi patanetsipaebiliwaismë. Pacayapëtanetsinua baja cajena Cristocuenemë, pexënatomë, Dioso, piasaëtsaponaponaenë daxitamatacabijawabelia-nexa —jai Simón Pedro.

⁷⁰Jesús nexata jumaitsi pijajiwijawabelia:

—Xanë rabaja paca-itapetatsi doce paponëmëbeje. Itsiata baitsi jane, paxamëyajuwënënë, itsanë, dowathi pijajiwitonë baja cajena tsaponapona —jai Jesús.

⁷¹Jesús bajarapacuenia jumaitsi Judas yabara, Simón Iscariote pexë nato. Judas, doce ponëbejeyajuwënënë-ata Jesús pijajiwijawata, canajetsijitsia Jesús, pijawajabitsaë pecobeyabelia.

Jesús pejuyapijiwi cuene-aebatsi Cristocuene

7 ¹Pepënaponaewitsi pewecuanawiabicujinaetsi, Jesús ponapona Galilea nacujawa. Apojitsipae peponaponaejawa Judea nacujawa, tsipaji bajarajota, judíowi jamatabëbeyaxuabatsi. ²Bajarapamatacabijawa, imoxoyo baja pewajënae pejonenexa Bobërëtonëpijifiesta. ⁴³Nexata, Jesús pejuyapijiwi junatatsi penaponaenexa bajarapafiestajawabelia. Bajarapamonae jumaitsi:

—Xamë apobenacopatsimë majotaje. ¡Naponare Judea nacujawabelia, bajarajotalia netsita-exanaenexa Dioso pesaëta pinijicuene nexanaponaejawa, petaenexa nijajiwi, bajarapanacuata pejinawanapaewi! ⁴Pajiwi jitsipa pewënëliwaisitaejawatsi daxitanacuapijiwi, muetsia apo-exanae. ¡Nexata, pepacuene Dioso pesaëta pinijicuene itsa tsita-exanaponaename, bajarapafiestajawata tsita-exanare pecayapëtaenexa daxitanacuapijiwi! —jaitsi Jesús pejuyapijiwi.

⁵Jesús pejuyapijiwi-ata apojumexaniataetsi Cristocuene. Bajaraxuata, bajarapacuenia jumaitsi. ⁶Nexata, Jesús jumaitsi pejuyapijiwijawabelia:

—Abaxë raja tamatacabí aponetocopiapatsi, tanaitajëtsinexa daxitajiwi-jawabelia Dioso pexënatocuenenë. Itsiata, paxamë apopa-itsimë. Paepatota jamatabëpaponame, pacatoxanepana paneponaenexa. ⁷Mapanacuapijiwije cajena acuenebi paxamë papeca-itoyajawa. Itsiata baitsi jane, xanë nitoya, tsipaji nacueneyapëtaeya-exanaponajë pibisiacuene pexanawanapaejawa. ⁸¡Paxamë baja paponare! Xanë raja abaxë apoponaenë bajarapafiestajawabelia, tsipaji abaxë aponetocopiapatsi daxitanacuanëpijiwi paepatota tane-cueneyapëtaenexa Ponëcuenenë —jai pejuyapijiwijawabelia.

⁹Bajarapacuenia Jesús pejumaitsicujinae, abaxë nacopatenua Galilea nacuata, pecotocaewinexa.

Jesús penaponaejawa bobërëtonëpijifiestajawabelia

¹⁰Jesús pejuyapijiwi pepuapona, cotocaewi Jesús napona bajarapafiestajawabelia, muetsia pepatsinexa jiwi yapëtaenejewatsi. ¹¹Jesús apopatsi-ata abaxë, jaitatsi judíowi pewetsiwi bajarapafiestajawa. Najumaitsi judíowi pewetsiwi:

d 7:2 Bobërëtonëpijifiesta: Bajarapafiestamatacabinexa judíowi bobërëtonë exanabiaba Jerusalén tomarata, caesemanacuenia pejinawanapanaenexa, penajamatabënapiitsinexa pijasalinaiwimi pejinawanapaejawa petusatnacuata. Lev. 23:42-43.

—¿Detsa xania jota ponapona bajaraponē? —najai Jesús yabara.

¹² Ayabitsaēto jiwi wēpaxapaxajaiya baracuaicuaijaitsi Jesús. Itsamonaē jumaitsi Jesús yabara: «Pexaniajamatabēcuenenē raja», jai. Itsamonaē pijinia jumaitsi: «Apopexaniajamatabēcuenenē raja Jesús. Peyamaxē-itojorobinē ra saya jiwi», jai Jesús yabara. ¹³ Itsajiwi-ata apocuaicuai-jai ayaijumeta Jesús yabara, tsipaji jumejunawa judfowi pewetsiwi pejumetaeyaniwatsi.

¹⁴ Itsa baja bobērētonēpijifiesta epatua tsaponae pewaterewercaenexa, nexata Jesús joneya temploboyalia. Taxuxuaba jane baja, liwaisi petsipaebi-jawa. ¹⁵ Judfowi pewetsiwi jamatabēcuenenabenajaca, itsa jumetane Jesús pepaebiliwaisi. Nexata, bajarapamonaē najumaitsi:

—Maponēje bitso liwaisi yapētane. Aponacujarubi picani liwaisi pacuenia waxaitsi nacujarubatsi —najai tsanubenae Jesús yabara.

¹⁶ Jesús nexata jumaitsi judfowi pewetsiwi jawabelia:

—Tatsipaebiliwaisi raja apotajamatabēcuenepijiliwaisi. Dioso raja, ponē nitorobica, pejumeliwaisi tsipaebaponajē. ¹⁷ Pajiwi jitsipa pexanaejawa Dioso pejitsipaecuenia, bajarapajiwi cuenecaējēpatsi peyapētaejawa itsa tsipaebajē Dioso pejumeliwaisi, itsa jume, tajamatabēcuenepijiliwaisi. ¹⁸ Pajiwi tsipaeba ēpejamatabēcuenepijiliwaisi, bajarapajiwi jaita saya jiwi peyaiya-taenexatsi. Itsiata baitsi jane, pajiwi tsipaeba pexaniajailiwaisi, bajarapajiwi jaita jiwi peyaiyataenexa Dioso. Bajarapajiwi apoyamaxē-itojorobi jiwi, tsipaji tsipaeba saya pacuenia Dioso itorobatsi.

¹⁹ »Bajayata, Dioso pacatonajumecopatsi-ata Moisés-pijinēta, paliwaisianē jitsipa jiwi pejumecowēnētsinexa, itsiata paxamējajuwēnējiwi, caejiwi-ata, apojumecowēnētsi bajarapaliwaisi. Bajarapaliwaisi pacacuene-itawetsi-ata jiwi panebeyaxuabiyanīwa, ¿detsa xuajitsia itsiata xanē jamatabēpanebeyaxuabame? —jai Jesús bajarapamonaejawabelia.

²⁰ Nexata, bajarapamonaeyajuwēnēnē jumaitsi Jesús-jawabelia:

—Dowathi baja cajena yajawaponaponame. Itsajiwi-ata raja apojamatabēcabeyaxuabi —jai.

²¹ Jesús nexata jumaitsi bajarapamonaejawabelia:

—Caejawayo, Dioso pesaēta pinijicuene ta-exanaejawa, exanajē penacuera-ewetsimatacabita. Nexata, itsa panecuenetaneme bajaraxua, daxita paxamē panecuene-ataejitsibimē, ta-exanaexae penacuera-ewetsimatacabita. ²² Paxamē-ata raja penacuera-ewetsimatacabita-ata panacuenebabiabame, tsipaji penacuetonēyo pabo-upiperabēcaucubabiabame, ocho pamatacabibeje penaexanaecujinae. Baitsi, pabo-upiperabēcaucutabiabame, Moisés-pijinē papeca-itorobiliwaisicuenia. (Itsiata, bajarapanabo-upiperabēcaucubicuene Moisés-pijinē apotaxuxuabi. Pewajēnaeya cajena, panijasalinaiwimi bajaraxua exanawana.) ²³ Bajarapacuenia penacuetonēyo pabo-upiperabēcaucubabiabame penacuera-ewetsimatacabita-ata, xaniawaetsia panajumecowēnētsinexa Dioso penajumecopatsiliwaisi Moisés-pijinēta. ¿Detsa nexata xuajitsia xanē panebara-anaepaname penacuera-ewetsimatacabita pebi tajamatejemaya-exanaejawa yabara? ²⁴ ¿Xaniawaetsia abaxē payapētaenewamē itsajiwi pibisiacuene pexanaejawa, pētsa abaxē pananeconitsia-exaname! Matapania xaniawaetsia paneyanijobicujinae, itsa baja payapētaenename xaniajai

penaneconitsijawa, baja rajane pananeconitsia-exanaename —jai Jesús judíowijawabelia.

Jesús xaniajaiya nawajunupaeba Cristonëcuene

²⁵ Itsamonaë, Jerusalén tomarata pejinawanapaewi, itsa jumetane xua Jesús jumaitsi, nayanijoba bajaraPonë yabara:

—¿Matsa ponëje apojaitarutsitsi picani pebeyaxuabinexatsi? ²⁶ ¡Pataema! Jaitsi-atatsi pebeyaxuabinexatsi, bajaraPonë cuaicuaijai tsanucae daxita-jiwi pitabarata. Itsajiwi-ata apojume-itawetsitsi. ¿Nexata meta, wajanacawetsiwi-ata jumexaniatane bajaraPonë pepacuene Dioso athëbëwetsica pitorobinëtsicuene? ²⁷ Pamatacabi Cristo patsiana, itsajiwi-ata apoyapëtae tsane itsawerena patsiana. Itsiata, yapëtanetsi maponëje itsawerena patsiana. Nexata, tsaena apoCristo —najai bajarapamonaë.

²⁸ Jesús liwaisi petsipaëbijawata templobota, jumetane bajara-pamonaë pebaracuaicuaijijawatsi. Nexata, ayaijumeta jumaitsi bajarapamonaëjawabelia:

—Xanë yabara pajumaitsimë: «Yapëtanetsi bajaraponë. Yapëtanetsinua itsawerena pata», pajamë. Itsiata baitsi jane, apopatsinë tjamatabëcueneta. Biji rajane, xanë patsicajë tane-itorobixae. Ponë nitorobica, xanepana pane-itaxutuajamatejemajawa picani bajaraPonëjawabelia. Itsiata, paxamë cajena apopayapëtaemë bajaraPonë. ²⁹ Xanë itsiata, yapëtaniji bajaraPonë, tsipaji bajaraPonëjawawetsica tapatsinë. Bajaraponë baja cajena nitorobica mapanacuayabetsicaje —jai Jesús bajarapamonaëjawabelia.

³⁰ Bajarapacuenia pejumaitsijawata, Jesús picani bajarapamonaë jamatabëwaetabatsi, penaneconitsia-exanaenexatsi. Itsiata, abaxë itsajiwi-ata apowaetabitsi Jesús, tsipaji pijamatacabi apotocopiapatsitsi pewaetabinexatsi.

³¹ Itsiata baitsi jane, bajarapamonaëyajuwënëwi, ayaibitsaëto, jumexania-tane Cristocuene. Nexata bajarapamonaë najumaitsi:

—Itsa Cristo patsianica, ¿exanaena meta bitso pinijicuenejawanë, Dioso pesaëta pexanaëjawa, maponë pexanaëjawanëwecuaje? ¡Ajibi cajena! Maponë pepacuene Cristoje, ponë Dioso athëbëwetsica itorobijitsiatsica, jiwi pecapanëpaenexa —najai Jesús yabara.

Fariseowi itoroba templobopijipolicíawi, Jesús pewaetabinexatsi

³² Fariseowi jumetane jiwi pejumaitsijawa Jesús yabara: «Pepacuene rabaja maponë Cristoje», pejajawa. Nexata, fariseowi, pamonaënuu ayai-jamatabëcuenewi sacerdotewituatujëta, itoroba templobopijipolicíawi pewaetabinexatsi picani Jesús.

³³ Nexata, Jesús templobota jumaitsi judíowijawabelia:

—Abaxë raja saya cae-epatoyo pacayajawaponaponaenatsi. Bajaraxuacujinae jane baja, nawiatsianajë tane-itorobinëtsicajawabetsia. ³⁴ Nexata, paxamë panejaitsi-atamë, apopanecaxitajarabimë tsane, baja tsipaji, apopacacuenecaëjëpae tsane paneponaenexa itsabetsia ponaejitsianë —jai Jesús judíowijawabelia.

³⁵ Nexata, judíowi nayanijoba ëpamonaë.

—¿Debelia maponë pijaponaëjitsiaje, itsajota waxaitsi apocaxitajarabijitsiatsi? Ponaëjitsia raeta griegowi pijatomaranëjawabelia, itsabelia judíowi

nacayajatsiaya jinawanapa. Bajarapatomaranëta raeta cujarubaponaponaejitsia griegowi. ³⁶ ¿Detsa pitsijamatabëcuene yabara meta nacajumaitsi: «Paxamë panejaitsi-atamë apopanecaxitajarabimë tsane, baja tsipaji, apopacacuenecaëjêpae tsane, paneponaenexa itsabetsia ponaejitsianë», itsa naciai Jesús? —najai judfowi.

Jesús wajunupaeba apowerewerecaemera yabara

³⁷ Bobërëtonëpijifiestamatacabi pecopiarucaematacabita, bitso penamata-motsimatacabixae, jiwi najamatabëcuenerewiabiaya bajinawanapa. Nexata, bajarapamatacabi Jesús nonotabapuna jiwi ayaibitsaëto pitabarata. Ayaijuma meta jumaitsi tsanuae:

—Pajiwi mera^e jitsipa, xanëjawaberena ponae piapaenexa. ³⁸ Bajara-xua yabara, Dioso pejumeliwaisibaxutota jumaitsi mapacueniaje: «Pajiwi nesiwanajamatabëcueneocopatsiana, bajarapajiwi pejamatabë-ëthëtota xainaena daxitamatacabi pepitsaparucaemera, pexainaenexa matacabi apowerewerecaejawa», jai Dioso pejumeliwaisibaxutota —jai Jesús judfowijawabelia.

³⁹ Bajarapacuenia Jesús itsa jumaitsi mera yabara, jumaitsi Espíritu Santo yabara. Baitsi, pajiwi siwanajamatabëcueneocopata baja Jesús-jawabelia, tsijamatabë-ecaenatsi Espíritu Santo. Itsiata baitsi jane, bajarapamatacabi abaxë Espíritu Santo apopatsitsica, tsipaji abaxë Jesús apoponae athëbëabetsia.

Daxitajiwi aponajamatabëcuenejêpae Jesús yabara

⁴⁰ Bajarajota, penamuxuna-ewetanubenaewiyajuwënëwi, itsa jumetanetsi Jesús bajarapacuenia pejumaitsiyawa, bajarapamonae jumaitsi:

—Xaniajai rabaja. Maponëje, Diosojumepaebinë, profetanë, ponë copia-ewetawanapatsi pepatsijawanexa, Cristo penaitajësiwajënaeya —jai.

⁴¹ Itsamonae pijinia jumaitsi:

—Bajaraponë raja Cristo, Ponë Dioso athëbëwetsica itorobjitsiatsica, jiwi pecapanepaenexa —jai itsamonae.

Itsiata, itsamonae pijinia jumaitsi:

—¡Jume raja! Cristo raja apoGalilea nacupijinë tsipae. ⁴² Bajaraxua yabara, Dioso pejumeliwaisibaxutota nacayapëtaeya-exana pacuenia Cristo, peyanacua-ewetsinë, David-pijinë, pemomoxiyajuwënënjitsia. Nacayapëtaeya-exananua penaexanaejawanexa Belén tomarata, patomarata David-pijinë bajayata ponapona —jai bajarapamonae.

⁴³ Bajaraxuata, Jesús pejamatabëcueneta jiwi ayaibitsaëto aponajamatabëcuenejêpae. ⁴⁴ Itsamonae pijinia Jesús jamatabëwaetabatsi picani, penaneconitsia-exanaenexatsi. Itsiata, itsajiwi-ata apowaetabitsi.

e 7:37 mera: Pasieta pamatacabibeje jinawanapa judfowi Bobërëtonëpijifiestajawa, caematacabi canacujitsia sacerdotewi pepopenamatacaitorobinë epanaxuababiaba mera altar-jumata. Bajara-pacuenia exana penajamatabënapitsia-exanaenexa fiesta penataewi, pacuenia Dioso bajayatami petusatonacuata, ibotojawawerena tocapiatsiatsi mera pijasalinaliwi piapaenexa. Bajarapa-iboto nacatocuenecatane Jesús. Bajarapijinia pacuenia, bajarapapecapitsaparucaemera naca-tocuenecatane Espíritu Santo. Bajaraxuata, Jesús junata bajarapafiesta penataewi pejaitsinexa pitawamera bajaraPonëjawata.

Judíowi pewetsiwi jume-aeba Jesús Cristonëcuene

⁴⁵ Policíawi picani ponalia Jesús pewaetabinexa, itsiata cobesa nawia-barena pitorobiwitsijawaberena, pamona fariseowi, pamona-ata ayai-jamatabëcuenewi sacerdotewituatuajëta. Nexata, pitorobiwitsi jumaitsi bajarapapolicíawijawabelia:

—¿Detsa xuajitsia apopacaponamërena bajaraponë? —jai.

⁴⁶ Nexata policíawi jumaitsi:

—¿Caeto-ata apopajumetaenë itsajiwi-ata pecujarubijawa pacuenia baja-raPonë cujaruba! Bajaraxuata, apopawaetabinë patacaponaenexarena —jai policíawi.

⁴⁷ Nexata fariseowi jumaitsi:

—¿Paxamë-ata tsabaja panacopatame baja-raPonë papecayamaxë-itojorobinexa? ⁴⁸ Caenë-ata wajanaca-ewetsiwiwajuwënë, fariseowiwajuwënë-ata, apojumexaniatae baja cajena bajaraponë Cristonëcuene. ⁴⁹ Pamona jumexaniatane bajaraponë Cristonëcuene, xania-waetsia apoyapëtae pacujarubicuene xaina Dioso penajumecopatsiliwaisi Moisés-pijinëta. Bajaraxuata, Disojawabelia naneconita bajarapamona, pejumexaniataexae Cristo yabara —jai fariseowi policíawijawabelia.

⁵⁰ Bajarapamonawajuwënë, Nicodemo, ponë copiaya Jesús taeyojopalia merawi. Bajaraponë jumaitsi pewënafariseowijawabelia:

⁵¹ —Dioso penajumecopatsiliwaisi Moisés-pijinëta naca-itaweta baja, itaxutejema itsajiwi-ata wajananeconitsia-exanaeyaniwa. Naca-itoroba copiaya xaniawaetsia wajanamuxuna-ewetsinexa pijaneconi pexinaenë penayajiwinawajunupaebiliwaisi, wajayapëtaenexa xua yabara pepacuen naneconita —jai pewënafariseowijawabelia.

⁵² Nexata, bajarapamona jumaitsi Nicodemojawabelia:

—¿Xamë-ata tsabaja Galilea nacupijinë, necajumexaniatae bajaraponë Cristonëcuene? ¡Lebare Dioso pejumeliwaisibaxuto, neyapëtaenexa! Caenë-ata cajena profetanë, apopitsapae Galilea nacujawawerena —jai bajarapamona.

⁵³ Bajaraxuacujinae, caenë canacujitsia nawiaba pijabonëjawabelia.

Petiriwa peneconitsijawatsi pibisiacuene pexanaejawa yabara pamona pepëya

8 ¹ Pecopiarucaematacabita Bobërëtonëpijifiestajawata pepaebiweretsicujinae, Jesús pijajiwi barëpona Olivocabotsutojawabelia.^f ² Nexata, merawia pitsijawata, bajayacunua, Jesús icatsia nawiarena temploboyaberena. Itsa pata Jesús templobota, daxitajiwi itaxutuanacaetuanatsi. Baja-raPonë pe-ecojopaecujinae templobota, liwaisi tsipaeba bajarapamonaejawabelia. ³ Nexata bajarapaepatota, judíowi pecujarubiwi, fariseowi-ata, temploboyaberena caparenatsi petiriwa Jesús-jawaberena. Bajarapamonaewaetaba pamona pepëya pewitota pibisiacuene pexanaponaponaejawata

f 8:1 *Olivocabotsutojawabelia*: Bajarapatsutoyenepanajawatalia Jesús barëponabiaba pija-jiwi caemerawi canacujitsia pebarëmajitanubenaenexa, pijawajabitsaë petaicaeyaniwatsi. Apoxinae-ata bo itsajota patabiabijsia. Taema Mt 8:20; Lu 9:58.

itsanëjawabelia. Nexata, bajarapowa nutatsi daxitajiwi pitabarata. ⁴Nexata, bajarapamonaë jumaitsi Jesús-jawabelia:

—Necujarubinë, mara powaje pawaetabajë, pamona pepëya pewitota pibisiacue pexanaponaponaëjawata itsanëjawabelia. ⁵Dioso penajumecopatsiliwaisi Moisés-pijinëta naca-itoroba baja cajena bajarapitsiwa waja-beyaxuabinexa, wajatseconacuenia ibotonëta. ¿Detsa pacuenia canaëjëtame bajarapaliwaisi yabara? —jai Jesús-jawabelia.

⁶Bajarapamonaë bajarapacuenia yanijoba Jesús, saya pejamatabëcuene-ëjëtsinexatsi. Nexata, Dioso penajumecopatsiliwaisiweucia Moisés-pijinëta, saicayacuenia itsa jumecanawiatatsi, bajarapamonaë neconitsijitsiatsi picani. Itsiata, Jesús jamatabëcueneypëtane pacuenia siwanajamatabëxainatsi. Nexata, Jesús ira taeyaxuaba. Pecobesitota ira yaquineca. ⁷Bajarapamonaë napënyanijobapona Jesús-jawabelia. Nexata jane baja, Jesús nonotapuna. Jumaitsi bajarapamonaëjawabelia:

—Ponë paxamëyajuwënënë caeto-ata pibisiacue apo-exanaë, bajara-ponë copiaya iboto bixanaë bajarapowajawabelia —jai.

⁸Bajarapacuenia pejumaitsicujinaë, icatsia Jesús irataeya ecareca. Ira yaquineca. ⁹Bajarapamonaë pejumetaëjawata bajarapacuenia Jesús pejumaitsiyawa, najamatabënapita, caenë canacujitsia, pibisiacue pexanawanapaejawa. Nexata, peneconitsiwitsi, caenë canacujitsia, pitsapapona templobowecua. Copiaya pitsapapona perujuwi, xuacujinaë pewëjëawi-ata. Itsa baja daxita napëwereta pepitsapaejawa, caenë Jesús templobota nacopateca. Petiriwa-ata abaxë nuca bajarajota. ¹⁰Nexata, Jesús, pirataeyecaenë, itsa nonotapuna, caewa taenuta. Jumaitsi bajarapowajawabelia:

—¿Detsa belia pona pamonaë caneconita? ¿Itsanë-ata tsaja apocabixanaë ibotota, nenaneconitsixaë? —jai Jesús bajarapowajawabelia.

¹¹Nexata bajarapowa jumaitsi:

—¡Jume! Caenë-ata aponebixanaë ibotota —jai.

Nexata, Jesús jumaitsi bajarapowajawabelia:

—Xanë-ata apocananeconitsia-exanaëtsi. ¡Ponare baja! ¡Pëtsa baja icatsia pibisiacue exaname! —jai Jesús.

Jesús mapanacuapijiwije pexaniajailiwaitsita pejamatabëcuene-itayotsinë

¹²Bajarapamonaë pepitsapacujinaë templobowecua, Jesús icatsia jumaitsi bajarajota penacopabiwijawabelia:

—Xanë raja penaitayotsicotia taxainanë,^g daxitajiwi tajamatabëcuene-itayotsinexa, pexaniajailiwaitsita. Nexata, pajiwi nepënaponaëna, jamatabëcuene-itayotsianajë. Xainanana matacabi

g 8:12 penaitayotsicotia taxainanë: Bajarapacuenia Jesús nayabarajumaitsi mapajamatabëcuë-nianë yabaraje: 1) Pexaniajailiwaitsita jiwi jamatabëcuene-itayota, peyapëtaeya-exanaenexatsi pacuenia exanawanapaejitsia, Dioso apopejitsipacue pexanaeyaniwa. 2) Pexaniajailiwaitsita jamatabëcuene-itayotatsi, piasaëjamatabëcuene pexainanexa, pijamonaë peyamaxë-itojorobiyaniwatsi mapanacuapijiwi pecanaëjëtsiliwaitsita. Pacuenia tablapabëxëpanata pejuwipona tsuanaejitsipa pecotia piajibixae, bajarapijinia pacuenia mapanacuapijiwi pecanaë-jëtsiliwaitsita pijawanapaewije, jamatabëcueneafaena Dioso peliwaitsiwecua, pexaniajailiwaitsi apopejumexaniataexae. 3) Pexaniajailiwaitsita jamatabëcuënewitsabia-exanaponatsi pewa-jënaeyabelia Dioso pejitsipacueñejawanë pesiwacanaëjëtaponanexa.

apopewerewerecaejawa. Bajarapajiwi itsamatacabijawabelia-ata apo-
ajamatabëcuene-itaquiri tsane —jai Jesús jiwijawabelia.

¹³Nexata, fariseowi jumaitsi Jesús-jawabelia:

—Xamë saya nijacuata nayabaracuaicuaijamë. Nexata, xuanë nayabara-
cuaicuaijamë apoxaniajamë. Bjaraxuata, apopacajumexaniataetsi —jai.

¹⁴Nexata, Jesús jumeconawiaata mapacueniaje fariseowijawabelia:

—Xanë tajacuata nayabaracuaicuaijai-atanë, itsiata cajena xaniajanë, tsipaji
yapëtaniji itsawerena patajë. Yapëtanijinua itsabelia ponaejitsianë. Itsiata baitsi
jane, paxamë apopayapëtaemë itsawerena patajopajë, itsabelia-ata ponaejitsianë.

¹⁵Paxamë pacuenebaracuaicuaijamë tsabiabi mapanacuapijiwije pexanaecue-
nia. Itaxutojema jiwi pananeconitsia-exanabiabame, payapëtaenejewamë pepa-
cuene paneconiwajëto xaina. Xanë abaxë aponaneconitsia-exanaenë itsajiwi-
ata. ¹⁶Itsiata, itsamatacabi, itsa naneconitsia-exanaenajë, pexaniajaicuenia

naneconitsia-exanaenajë pijaneconi pexainaewi, tsipaji caenë aponaneconitsia-
exanaenë tsane, jiwi tananeconitsia-exanaematacabi. Taxa Dioso, Ponë nitoro-
bica, bajaraPonë neyajawa tsane. ¹⁷Dioso penajumecopatsiliwaisi Moisés-pijinëta,
peyaquinaebaxutota pacatocaëjëta pacujinae jiwi pexanaecue yabara anijaji-
wibeje najumëjëpaeya itsa paebabeje, bajarapaliwaisi jumenamatamota paneju-
mexaniataenexa pejaicuenia. ¹⁸Xanë baja cajena tajacuata nayabaracuaicuaijanë
taxaniajaicuenia. Taxa-ata, Ponë nitorobica, newajunupaeba bajarapacuenia.
Nexata, paxanëbeje najëpaeya pexaniajaicue patacatsipaebixabeje xanë
yabara, xanepana saya patanejumexaniataejawamë —jai Jesús.

¹⁹Nexata fariseowi jumaitsi:

—¿Detsa jota nexata ponapona axa? —jai.

Nexata Jesús jumaitsi:

—Paxamë jane cajena apopaneyapëtaemë. Bajarapacuenia-ata taxa apo-
payapëtaemë. Itsa paneyapëtaejitsipame, taxa-ata payapëtaejitsipame —jai
Jesús fariseowijawabelia.

²⁰Bajarapacuenia Jesús jumaitsi liwaisi petsipaebecaejawata templobota,
itsajota bobena ofrendacuenia palata pejebabiabicajonianë. Itsiata abaxë,
itsajiwi-ata Jesús apowaetabitsi penaneconitsia-exanaenexatsi, tsipaji abaxë
pijamatacabi apotocopiapatsitsi pewaetabinexatsi.

Jesús yapëtaeya-exana jiwijawabelia athëbëwetsica pepatsinëcuene yabara

²¹Cae-epatoyocujinae, Jesús, templobota tajëwelina nayabarajumaitsi
fariseowijawabelia:

—Itsamatacabi xanë pacawecuaponaenatsi. Nexata, paxamë tacowëta
panejaitsianame. Itsiata, apopanecaxitajarabimë tsane. Biji rajane, panija-
neconi payajawatëpaename,^h Dioso apopacawecua-ajibia-exanaexae tsane.

h 8:21 payajawatëpaename: Jesús nawajunupaebabiaba jiwijawabelia, Cristonëcuene, Dioso
pitorobinëtsiacuene, jiwi pecapanepaenexa. Itsiata, fariseowi jume-aebabiaba. Jesús tajëwe-
lia yapëtae pacuenia wai 70 d.C.-jawata ayaibitsaëto wajabitsaë tsimaxëpatsijitsia Jerusalén
tomarapijiwjababerena, pewerebiabinexatsi. Nexata, bajarapamatacabijawa fariseowi bitso
jitsipaena itsanë pecapanepaenexatsi pijawajabitsaëwecua. Itsiata, Ponë Dioso to-itorobicatsi
pecapanepaenënexatsi picani, ajibi baja tsarucae tsane. Bjaraxuata, fariseowi pijaneconi yaja-
watëpaena. Ponaenanua apopewerewerecae-isotojawabelia. Baitsi, Dioso pijanacuajawabetsia
apoponaejitsia, itsajotatsia Jesús ponapona. Itsiata baitsi jane, fariseowi apojumeyapëtae xua
yabara Jesús jumaitsi.

Bajaraxuata, xanë itsabelia ponaejitsianë, paxamë apopacacajëpae tsane paneponaenexa bajarabelia —nayabarajai Jesús fariseowijawabelia.

²² Nexata, judiowi jamatabëcuenenawëxaniabiaya najumaitsi Jesús yabara:

—¿Dexuajitsia meta aponacacuenecajëpae wajaponaejawa itsabelia ponaejitsia? ¿Tsipaji tsaeta pijacuata nabeyaxuabijitsia? —najai bajarapamonae.

²³ Nexata, Jesús jumaitsi judiowijawabelia:

—Paxamë baja cajena mapa-irajawatatsicaje panejinawanapaewi. Xanë saicaya athëbëtatsia taponaponenë. Paxamë raja mapanacuapijiwimëje. Xanë raja apomapanacuapijinënëje. ²⁴ Bajaraxuata, xanë pacajumaitsiitsi baja paxamëjawabelia: «Matapania panesiwanajamatabëcuenecopabianame xanëjawaberena, itsa pajumexaniataenamenua Ponëcuenenë,¹ pibisiacuenepane-exanaeneconi apopayajawatëpaemë tsane Diosowecua», pacajaitsi baja —jai Jesús judiowijawabelia.

²⁵ Nexata fariseowi jumaitsi:

—¿Detsa xamë ponëmë? —jai.

Nexata Jesús jumaitsi:

—Tataxuxuabijawaweliacujinae baja cajena, liwaisi patacatsipaebijawata pacanawajunupaebaponatsi Ponëcuenenë. ²⁶ Xanë ayailiwaishi pacatoxainatsi paxamë pancuene yabara, paneconijawanë yabara-ata pacananeconitsia-exanaejitsiatsi. Itsiata, bajarapacuenia apopacato-exanaetsi. Itsiata baitsi jane, Ponë nitorobica, xua jumaitsi apojumenaxuababiabi. Nexata, xanë pacuenia jumetaniji bajaraponë, juya tajumetaecuenia pacatsipaebabiabatsi mapanacuata panejinawanapaewije —jai Jesús fariseowijawabelia.

²⁷ Itsiata baitsi jane, fariseowi apojumeyapëtae bajarapacuenia Jesús pet-sipaebijawa paxa Dioso yabara. ²⁸ Bajaraxuata, pematatsënëa Jesús jumaitsi bajarapamonaejawabelia:

—Itsa xanë, Daxitajiwi Pematapijinënë, paneyotarutsia-exanaename cruzajawabelia patanebeyaxuabia-exanaenexamë, nexata matapania bajarapamatacabi paneyapëtaename Ponëcuenenë. Payapëtaenamenua itsacuenejawa tajacuata apota-exanaejawa. Bajaraxuata, pacuenia taxa copiata neyapëtaeya-exana, bajarapacuenia juya pacatsipaebatsi paxamëjawabelia. ²⁹ Taxa, Ponë nitorobica neyajawaponapona baja cajena. Caenënë, taja-epato aponecopatsi, tsipaji pacuenejawanë exanabiabajë siwajamatabëcueneba-rëya tsabiabi —jai Jesús bajarapamonaejawabelia.

³⁰ Bajarapacuenia Jesús pejumaitsiitsaponaejawata, ayaibitsaëtoxaeto judiowi jumexaniatanetsi Cristonëcuene.

**Pamonae pejamatabëcuene-isicaewitsi, pamonae-ata
abaxë pejamatabëcuenecëbiwitsi tsawanapae**

³¹ Pajudiowi jumexaniatane Cristonëcuene, bajarapamonaejawabelia Jesús jumaitsi:

i 8:24 *Ponëcuenenë*: Jesús baitsi nawënëruba pacuenia Dioso nawënëpaeba Moisés-pijinëjawabelia. Jumaitsi: «Xanë raja tsaponaponae», jai penajamatabëcuene-itajëtsinexa daxitamatacabi peyamatacabitsitecaenëcuene, pacuenia Dioso itsi. (Taema Éxo. 3:14-15.) Bajarapacuenia pejumaitsixae, najamatabëcuene-itajëta pacuenia jiwi bejumexaniatane Jesús Diosonëcuene, bajaraPonë pewecua-ajibia-exanaenexa pibisiacuenepexanaeneconi.

—Itsa paxamē tsitecaya pa-exanawanapaename patacacujarubicuenia, nexata baja pepacuene patajajiwiwimē tsane. ³² Payapētaenamenua patacat-sipaebiliwaisi pexaniajailiwaicuene. Nexata, bajarapapexaniajailiwaishi paneypētaexae, pacajamatabēcuenecapanepaena papecanamatacaitorobili-waisimi¹ —jai Jesús.

³³ Nexata, bajarapamonaē jumaitsi Jesús-jawabelia:

—Paxanē rabaja cajena Abraham-pijinē papemomoxinē. Paxanē cajena itsanējawabelia apopanecanajetsi, amoneya patatonacuenebabibinexa. Itsa xamē panejumaitsimē: «Pacacapanepaenatsi papecanamatacaitorobiliwaisi-miwecua» itsa panejamē, ¿Detsa pitsiliwaisi yabara panejumaitsimē? —jai bajarapamonaē.

³⁴ Jesús nexata jumaitsi bajarapajudfowijawabelia:

—Xaniajanē pacuenia pacatsipaebijitsiatsi. Daxita pamonaē, pibisiacuene pexanawanapaewi, bajarapamonaē pijapibisiacijamatabēcuenē namatacaitorobabiabatsi pijatuxanenēcuenia. ³⁵ Ponē, tonacuenebaponapona amoneya petuxanenē, bajaraponē apopexiyajuwēnēnē; pijajiwitonē saya. Itsiata, ponē petuxanenē pepopexēnato, bajaraponē daxitamatacabijawabelia-nexa pexēnato tsaponaponaē. ³⁶ Bajaraxuata, Xanē, Dioso pexēnatonē, itsa pacawejamatabē-iscatsi panijapibisiacijamatabēcuenē papecanamatacaitorobisaēwecua, pepacuene baja panacopatsianame pacajamatabēcuenēcēbi-nejewa. ³⁷ Yapētaniji cajena Abraham-pijinē papemomoxicuenemē. Itsiata baitsi jane, jamatabēpanebyaxuabame, tsipaji panejamatabē-ēthētota apopacatsijamatabē-ecae patacatsipaebiliwaisi. ³⁸ Xanē rabaja pacatsipae-babiabatsi pacuenia taxa netsitajēta, pamatacabi panajuaponaponajēbeje. Paxamē-ata pane-axa^k papeca-itorobicuenia pa-exanabiabame —jai Jesús judfowijawabelia.

³⁹ Nexata judfowi jumaitsi:

—Patajasalinainē raja, Abraham-pijinē —jai.

Jesús nexata jumaitsi bajarapamonaējawabelia:

—¡Jume raja! Itsa pepacuene paxamē Abraham-pijinē papemomoximē tsipae, peneta pa-exanaējitsipame pacuenia exanabiaba bajaraponēmi.

⁴⁰ Pacatsipaebi-atatsi pexaniajailiwaishi, pacuenia taxa Dioso netsipaeba, paxamē itsiata jamatabēpanebyaxuabame. ¡Abraham-pijinē cajena, apo-exanaē caeto-ata bajarapitsicuene! ⁴¹ Paxamē pa-exanabiabame pacuenia itsanē pane-axa paca-itorobabiaba —jai.

Nexata judfowi jumaitsi:

—Paxanē cajena mapanacuataje itsanē pataxa apopaxainanē. Paxainajē caenē pataxa, athēbēpijinē Dioso —jai.

⁴² Nexata, Jesús jumaitsi bajarapamonaējawabelia:

j 8:32 *papecanamatacaitorobiliwaisimi*: Bajarapajamatabēcueneliwaisi xaina anijamatabēcuenēbeje: 1) Jiwi pijaperujamatabēcueneliwaisi, xua jamatabēcuenenamatacaitorobabiabatsi pibisiacuene pexanaēya-exanaenexatsi. 2) Dioso penajumecopatsiliwaisi Moisés-pijinēta pejume-cowēnētsijawa yabara. k 8:38 *pane-axa*: Judfowi canacueneba caejume, «patér», peyabaraju-maitsinexa pepopaxa, pijasalinainēnexa-ata. Bajaraxuata, vr 39-jawata yabaracuaicuajiai pijasalinainē, Abraham-pijinē paxacuenia. Judfowi casaē Dioso aneconijibia petanexatsi pijasalinainē pejamatabēcuenē. Itsiata, Jesús towēnēnē ruba judfowi paxacuenia dowathi, tsipaji bajarapamonaē pibisiacuene exanabiaba, dowathi pejitsipaecuenia. Taema vrs 41-44.

—Itsa pepacuene Dioso pane-axa tsipae, nexata paxamë asiwaya pane-taejitsipame, tsipaji Diosojawawetsica tapatsinë pacayajawaponaponatsi. Xanë tajamatabëcueneta apopatsinëtsica. Dioso raja nitorobica. ⁴³Paxamë apopanejumeyapëtaemë patacatsipaebiliwaisi, tsipaji apopajitsipaemë patanenamuxuna-ewetsinexamë bajarapaliwaisi. ⁴⁴Paxamë rabaja cajena pane-axa, dowathi. Nexata, pejitsipaecuene pato-exanabiabame bajaraponë. Dowathi rabaja cajena jiwibenë, Dioso nacua pexanaejawa petaxuxuabijawaweliacujinae. Caeto-ata cajena pexaniajaili waisi apopaebi, tsipaji pexaniajaili waisi aponajamatabëxainae. Bajaraponë cuaicuajai tsabiabi, ëpenajumetsënëtsili waisianë. Jiwi jamatabëcuene-itorobabiaba penajumetsënëtsia-exanaenexa. ⁴⁵Bajaraxuata, xanë pexaniajaili waisi pacatsipaebi-atatsi, apopanejumexaniataemë, panejamatabëcuenejëpaexae dowathi. ⁴⁶¿Jipatsa paxamëyajuwënë cuenecaëjëpatsi taneneconitsijawa pibisiacuene ta-exanaejawa yabara? Ajibi cajena. Itsacuenejawayo-ata, xua pibisiacuene, apo-exanaenë. Pexaniajaili waisi pacatsipaebabiabi-atatsi, ¿detsa xuajitsia itsiata apopanejumexaniataemë? ⁴⁷Pajiwi Dioso pijajiwi-tonë, jitsipaeya namuxuna-ewetabiaba Dioso pejumeliwaisi. Itsiata baitsi jane, paxamë Dioso apopapijaji wixae, apopajitsipaemë patanenamuxuna-ewetsinexamë Dioso pejumeliwaisi patacatsipaebijawa —jai Jesús judfowijawabelia.

Cristo baja cajena, ponapona Abraham-pijinë pewajënaeya-ata

⁴⁸Judíowi jumaitsi Jesús-jawabelia:

—Xamë raja Samaria nacuapijinëmë,¹ dowathi neyajawaponaponaenë, pacacajajawa yabara, paxaniajanë cajena —jai judfowi.

⁴⁹Jesús nexata jumaitsi bajarapamonaejawabelia:

—Xanë cajena dowathi apoyajawaponaponaenë. Biji rajane, taxa Dioso yaiyataeya ponaponajë. Bajarapacuenia panejumaitsijawata, pane-urabame apopataneiyataexaemë. ⁵⁰Xanë raja apojaitsinë jiwi pexaniacuenia tanewënëbaracuaicuajainexa. Itsiata baitsi jane, taxa netojitsipa jiwi taneyaiyataenexa. Bajaraxuata, naneconitsia-exanaena pamonae aponeyaiyatae. ⁵¹Xaniajanë pacuenia pacatsipaebijitsiatsi. Pajiwi exanaponaponaena tacujarubiliwaisicuenia, bajarapajiwi daxitamatacabijawabelianexa pepacujiru apotëpae tsane —jai Jesús jiwi pexinaejawanexa matababi apowerewerecaejawa.

⁵²Nexata, judíowi xaniawaetsia apopejumeyapëtaexae xua yabara Jesús jumaitsi, bajarapamonae jumaitsi bajaraPonëjawabelia:

—Aeconoxae, payapëtaniji pepacuene dowathi pecayajawaponaponaejawa, tsipaji najumetsënëtame jiwi petëpaejawa yabara. Abraham-pijinëmi, daxita Diosojumepaebi wimi, profetawi-ata, tëpa. Itsiata, xamë jumaitsimë tsaponae: «Pajiwi exanaponaponaena tacujarubiliwaisicuenia, bajarapajiwi daxitamatacabijawabelianexa pepacujiru apotëpae tsane!», jamë tsaponae.

⁵³Wamopijinëmi Abraham-pijinë, ayaijamatabëcuenenëmi-ata, bajayata

¹ 8:48 *Samaria nacuapijinëmë*: Bajarapacuenia jumaitsi tsipaji judíowi canaëjëta Samaria nacuapijiwi bitso apopeyapëtaewicuene Dioso. Bajarapacuenia Jesús yabara-ata canaëjëta apopeyapëtaenëcuene Dioso.

tëpa. Bajarapacuenia-ata daxita Diosojumepaebiwiimi, profetawi, tëpapon. ¿Xamë tsaja Abraham-pijiniëmi matatoxenetsia ayaijamatabëcuenenëmë? ¿Detsa beponëmë nataneme? —jai judíowi.

⁵⁴ Jesús nexata jumaitsi bajarapamonaejawabelia:

—Itsa xanë tajacuata nawënëxaniatsipajë ayaijamatabëcuenenënë yabara, nexata ajumematamobinë tsipae. Itsiata baitsi jane, taxa Dioso, Ponë paxamë-ata pataneme panijaDiosocuenia, bajaraPonë newënë-itajëta ayaijamatabëcuene taxainaenëcuene. ⁵⁵ Itsiata, paxamë apopayapëtaemë bajaraPonë. Xanë cajena yapëtaniji. Nexata, xanë Dioso yapëtae-atanë, itsa nayawajunuaxainaejitsipajë, najumetsënëtsipajë, pacuenia paxamë panaju-metsënëtabiame. Itsiata, xanë pepacuene Dioso yapëtaniji. Exanabiabajënu tane-itorobicuenia. ⁵⁶ Bajayata, panijasalinainëmi, Abraham-pijinë, ayaicuenia jamatabëcuenebarëya itsa yapëtane itsamatacabi tapatsijawanexatsica yabara mapanacuayabetsicaje. Abraham-pijinëmi betanetaenëmi tanaexanaematacabi, nexata bajaraponëmi bitso nesiwajamatabëcuenebarëya —jai Jesús judíowijawabelia.

⁵⁷ Nexata, judíowi jumaitsi Jesús-jawabelia:

—Abaxë raja xamë apoxainaemë cincuenta pawaiheje-ata. ¿Detsa pacuenia nexata taejitsipame Abraham-pijinë, itsa bajayatami baja tëpa? —jai judíowi jume-aebiaya.

⁵⁸ Jesús nexata jumaitsi bajarapamonaejawabelia:

—Xaniajanë pacuenia pacatsipaebijitsiatsi. Xanë raja cajena ta-asaëtsaponaponaenë,^m Abraham-pijinë penaexanaewajënaeya-ata —jai.

⁵⁹ Nexata, bajarapacuenia Jesús itsa jumaitsi judíowijawabelia, bajarapamonae nota ibotonë, petseconaenexatsi picani. Itsiata baitsi jane, Jesús bajarapamonae petuatuajëalia namatayatsia wecuapitsapalia templobowecua. Nexata baja, itsajawabelia wecuapona.

Jesús itaxutoxanepanaeya-exana penaexanaejawawerenacujinae pitaxutotsëcënaenëmi

9 ¹ Jesús penajetarucaejawata namutua, taeyeta penaexanaejawawelia-cujinae bitso pitaxutotsëcënaenë. ² Nexata Jesús pijajiwi jumaitsi:

—Necujarubinë, ¿detsa meta xuajitsia maponëje pena pecototojawawerenacujinaeje, naexana bitso pitaxutotsëcënaenë? ¿Paxa tsaeta pibisiacuene pexanaeconijamatabëcuene? Itsa jume, ¿pena-ata pexanaeconijamatabëcuene? Itsa jume, ¿baja tsaeta bajaraponë pijacuata pibisiacuene pexanaeconijamatabëcuene? —jaitsi Jesús pijajiwi.

³ Jesús nexata jumaitsi pijajiwiawabelia:

—Jume raja! Mara ponëje paxa, pena-ata, pibisiacuene pexanaeconijamatabëcuene, apo-itaxutotsëcënae. Biji rajane, naexana bitso pitaxutotsëcënaenë Dioso penacuene-itajëtsinexa piacuenesaenëcuene daxitajiwijawabelia, pitaxutoxanepanaeya-exanaejawata. ⁴ Payapëtaneme rabaja

m 8:58 *ta-asaëtsaponaponaenë*: Bajarapacuenia Jesús itsa nawajunupaeba, pawënëcuenia Dioso nawajunupaeba pebarëcuaiacuaijajawata Moisés-pijinëjawabelia. Éxo. 3:14-15-jawata. Bajara-jota Dioso nawajunupaeba mapacueniaje: «Xanë rabaja tsaponapona», jai. Bajaraxuata, judíowibara-anaepana Jesús-jawabelia, beDiosonë penataxae penawajunupaebijawata.

mapacueneje. Matababita xanepana wajanacuenebinexa. Itsa baja merawi, acuenebi wajanacuenebinexa. Bajarapijina pitsicuene xainajë xanë-ata. Taponaponaematababi xanepana tatonacuenebinexa Ponë nitorobica, tsipaji tanebeyaxuabicujinae, acuenebi tsane tatonacuenebinexa. ⁵ Abaxë paepatojebi ponaponaenajë mapanacuataje, daxitajiwi jamatabëcuene-itayotsianajë pexaniajailiwaitsa, bajarapamonae peyapëtaenexa pacuenia cuene-itsi Dioso —jai Jesús pijajiwijawabelia.

⁶ Bajarapacuenia Jesús pejumaitsicujinae, irabelia suabaxuaba. Pionitota tsorobojawayo exana. Xuacujinae, bitso pitaxutotsëcënaenë itaxuto-exaba.

⁷ Nexata jumaitsi bajaraponëjawabelia:

—¡Ponare baja! ¡Naitaxutoquiaremelia pecueyetsipucayojawabelia, Siloé-wënë pucayojawabelia! —jai Jesús. Bajarapamonae pijajumeta, «Siloé», itsa jai, «Pitorobinëtsitsica», pejaijume.

Nexata, bitso pitaxutotsëcënaenë lia baja. Naitaxutoquiatajopalia. Nawiarena jane baja, pitaxutoxanepanaenë. ⁸ Bajaraxuata, pamona imoxoyo pe-enaewi, pamona-ata taeyabiabatsi bajarapapitaxutotsëcënaenëmi yabara, nayanijoba.

—¿Matsa ponë palata amoneya pewajëcabiabecaenëmije? —najai.

⁹ Nexata itsamonae jumaitsi:

—Jājā, bajaracowë ponë —jai.

Itsiata, itsamonae jumaitsi:

—Apononë raja. Bajasasaya itsiata beponë —jai.

Nexata, pitaxutotsëcënaenëmi pijacuata jumaitsi:

—Jājā, xanë rabaja —jai bajaraponë.

¹⁰ Nexata, bajarapamonae jumaitsi bajaraponëjawabelia:

—¿Detsa nexata baja pacuenia taneme? —jai.

¹¹ Nexata, pitaxutotsëcënaenëmi jumaitsi:

—Ponë raja Jesús-wënënë, exana tsorobojawayo. Nitaxuto-exaba. Nexata nejumaitsi: «¡Liamëre Siloé pucayojawabelia! ¡Naitaxutoquiaremelia!», nejai. Nexata baja, lianë. Itsa naitaxutoquiatajë bajarapapucayota, taniiji baja xaniawaetsia —jai.

¹² Nexata bajarapamonae jumaitsi:

—¿Detsa jota bajaraponë ponapona? —jai.

Nexata, icsiata pitaxutotsëcënaenëmi jumaitsi:

—Apoyapëtaenë itsajota ponapona —jai.

Fariseowi yanijoba bitso pitaxutotsëcënaenëmi jawabelia, penaneconitsinëcuenia

¹³ Bajarapacuenia peyanijobicujinaetsi, bajarapamonae pitaxutotsëcënaenëmi caponaliatsi fariseowijawabelia. ¹⁴ Pamatababi Jesús exana tsorobojawayo, pitaxutoxanepanaeya-exanaenexa bitso pitaxutotsëcënaenëmi, bajarapamatababi judíowi penacuera-ewetsimatababi.

¹⁵ Nexata jane baja, fariseowi-ata yanijoba pitaxutotsëcënaenëmi jawabelia.

—¿Detsa pacuenia nexata itaxutoxanepaname? —jai.

Nexata bajaraponë jumaitsi:

—Nitaxuto-exaba raja tsorobojawayota. Bajaraxuacujinae, tajacuata naitaxutoquiatajë tane-itorobicuenia. Nexata jane baja, aeconoxae xaniawaetsia taniiji —jai pitaxutotsëcënaenëmi.

¹⁶Nexata, itsamonaē fariseowiyajuwēnēwi najumaitsi:

—Ponē bajarapacuenē exana, Dioso apopitorobinētsi cajena, tsipaji apoyaiyatae penacuera-ewetsimatacabiⁿ —najai.

Itsiaata, bajarapamonaeyajuwēnēwi itsamonaē najumaitsi:

—Itsa pibisiacuene pexanaenē tsipae, apocaējēpae tsipaetsi bajarapitsipi-nijicuene pexanaenēxa —najai itsamonaē.

Bajarapacuenia daxita fariseowi aponajamatabēcuenējēpae. ¹⁷Nexata, icatsia fariseowi yanijoba pitaxutotsēcēnaenēmijawabelia.

—¿Detsa jane xamē bejamatabē-itsimē ponē caitaxutoxanepanaeya-exana yabara? —jai.

Nexata bajaraponē jumaitsi:

—BajaraPonē cajena Diosojumepaebinē, profetanē —jai.

¹⁸Judfōwi pewetsiwi cuene-aeba picani bajaraponē pitaxutotsēcēnaecuenēmi. Cuene-aebanua itsanē pitaxutoxanepanaeya-exanaejawatsi. Nexata, junata pitaxutotsēcēnaenēmi paxa, pena yajawa, pepatsinēxa bajarapamonaejawaberena. ¹⁹Pepatsicujinaerena, bajarapamonaē jane baja yanijoba pitaxutotsēcēnaenēmi paxa, penabejējawabelia. Jumaitsi:

—¿Xaniajai? ¿Maponēje, pepacujiru panexēnatobeje, penaexanaejawaweliacujinae bitso itaxutotsēcēnaponapona? ¿Detsa pacuenia nexata aeconoxae baja tane? —jai judfōwi pewetsiwi.

²⁰Nexata, pitaxutotsēcēnaenēmi paxa, penabeje, jumaitsibeje:

—Mara ponēje pataxēnatobeje. Payapētaniibeje cajena, penaexanaejawaweliacujinaenua bitso pitaxutotsēcēnaejawa. ²¹Itsiaata baitsi jane, aeconoxae apopayapētaenēbeje pacuenia baja itaxutoxanepana. Apopayapētaenēbejenua pajiwi-ata itaxutoxanepanaeya-exanatsi. ¡BajaraPonē payanijobare! ¡Penaweretsinē rabaja! Pijacuata pacatsipaebiana —jai paxa, penabeje, judfōwi pewetsiwi jawabelia.

²²Bajarapacuenia jumecanawiatabeje pecujunawixaebeje, judfōwi pewetsiwi tsipaji baja cajena bajarapamonaē najamatabēcuenējēpa, pewajēnae-itawetsinēxa pajiwi jumexaniatane Jesús, Cristonēcuenē,^o pena-joneyaniwa judfōwi pijasinagogabonējawaberena.^p ²³Bajarapacuenia peto-exanaeyaniwatsibeje, bajaraxuata bajarapajiwiibeje jumaitsibeje: «¡Taxēnatō-jawabelia payanijobare! ¡Penaweretsinē rabaja!», jaiibeje.

²⁴Nexata, judfōwi pewetsiwi icatsia junata pitaxutotsēcēnaenēmi. Jumaitsi bajaraponējawabelia:

—¡Panetsipaebare xaniawaetsia Dioso pitabarata! Paxanē baja cajena payapētaniiji Ponē caitaxutoxanepanaeya-exana, pibisiacuene pexanaenēcuenē —jai Jesús yabara.

²⁵Nexata, pitaxutotsēcēnaenēmi jumaitsi:

—Pibisiacuene meta pexanaenē. Xanē apoyapētaenē. Itsiaata baitsi jane, caejawa yapētaniiji, bajaraPonē tane-itaxutoxanepanaeya-exanaejawa, xanē ta-itaxutotsēcēnaenējawamiwecua —jai.

n 9:16 *apoyaiyatae penacuera-ewetsimatacabi*: Jesús neconi xaina fariseowi pitabarata anijacuenēbeje yabara: Tsorobojawayo pexanaexae, pitaxutotsēcēnaenēmi pejamatejemaya-exanaexaenua penacuera-ewetsimatacabi. **o 9:22** *Cristonēcuenē*: Judfōwi cuene-aebabiaba Dioso pitorobjawatsica Jesús mapanacuayabetsicaje, jiwi pecapanepaenēxa. **p 9:22** *pijasinagogabonējawaberena*: Bajarapacuenia judfōwi wēnērubiabiaba penacatuatsibo, itsajota nacujarubiabi Dioso peliwaissi caesábado canacujitsia.

²⁶ Nexata, icatsia judíowi pewetsiwi jumaitsi:

—¿Detsa pacuenia cato-exana netaenexa? —jai.

²⁷ Nexata, pitaxutotsēcēnaenēmi jumaitsi pewetsiwi jawabelia:

—Pacatsipaebatsi rabaja picani xaniawaetsia. Itsiata, apopanejumexaniataemē. ¿Detsa xuajitsia pajitsipame patacatsipaebaponaenexa icatsia? ¿Paxamē-ata tsaja pajitsipame panejumexaniataenexa bajaraPonē, papijajiwimē panenaexanaenexa? —jai bajaraponē.

²⁸ Nexata, judíowi pewetsiwi pebijataejawata, jumaitsi bajaraponē jawabelia:

—Xamē raeta baja cajena bajaraponē pijajiwitonēmē. Paxanē raja saicaya Moisés-pijinē petsipaebiliwaisi pajumecowēnētawanapajē. ²⁹ Paxanē baja cajena payapētāniji pepacuenē Dioso pebarēcuaicuajijawatsi Moisés-pijinē. Itsiata baitsi jane, ponē cabarēcuaicuajiai, apopayapētaenē itsawerena itorobatsi bajaraponē —jai judíowi.

³⁰ Nexata, pitaxutotsēcēnaenēmi jumaitsi judíowi pewetsiwi jawabelia:

—Ayaicuenia jamatabēcuenenabenajacajē bajaraxua yabara. «BajaraPonē nitaxutoxanepanaeya-exanae-ata, itsiata, paxamē apopayapētaemē itsawerena itorobatsi», panejamē —jai bajaraponē—. ³¹ Daxitatsi, yapētanetsi baja cajena mapacueneje. Dioso baja cajena aponamuxuna-ewetsi pibisiacuene pexanaewi, bajaraPonē jawabelia wajētsi-ata. Itsiata, pamonaē Dioso pejitsipaecuenia yaiyataeya pejinawanapaewi, bajarapamonaē baja cajena banamuxuna-eweta, itsa wajētatsi. ³² mapanacua pexanaejawaweliacujinaeje, caeto-ata apowēnēliwaisitaetsi itsajiwi-ata pecaējēpaejiwitsi pitaxutoxanepanaeya-exanaenexa, penaexanaejawaweliacujinae bitso pitaxutotsēcēnaenē. ³³ Peneta, bajaraPonē itsa apopatsi tsipae Dioso pitorobi-xaetsi, nexata apocuenecaējēpaetsi tsipae pexanaenexa Dioso pesaēta pinijicuene pexanaejawa, pacuenia neto-exana —jai pitaxutotsēcēnaenēmi.

³⁴ Nexata, judíowi pewetsiwi jumaitsi bajaraponē jawabelia:

—Xamē cajena nenaexanaejawaweliacujinae, pibisiacuene yajawanaexaname.^q ¿Itsiata, caranata pibisiacuene nexanaenē jamatabēpanemuxujibame? —jai pitaxutotsēcēnaenēmijawabelia.

Bajarapacuenia judíowi pewetsiwi pejumaitsicujinaetsi, torotajarabaxuabatsi, pijasinagogabowecua, pecapitsapaenexa.

**Pamonaē aposiwanajamatabēcuenecopabi Dioso
pexēnatojawabelia, tsiteca bepita xutotsēcēnawanapaewi**

³⁵ Jesús wēnēliwaisitane pitaxutoxanepanaeya-exanaenē judíowi petoro-bajarabijawatsi, pijasinagogabowecua pecapitsapaenexa. Nexata, itsa caxitaraba pitaxutoxanepanaeya-exanaenē, Jesús jumaitsi bajaraponē jawabelia:

—¿Siwanajamatabēcuenecopatame tsabaja Dioso pexēnatojawabelia? —nayabarajai Jesús.

³⁶ Nexata bajaraponē jumaitsi:

q 9:34 *pibisiacuene yajawanaexaname*: Bajaraponē penaexanaejawaweliacujinae pitaxutotsēcēnaenēxae, judíowi tsitatsi bajaraponē paxa, itsa jume, pena pibisiacuene pexanaejawa yabara bajarapacuenia naexana. Taema Jn 9:18. Juya bajarapajudíowi natocanaējēta aneconijibia penaexanaejawa Dioso pitabarata, tsipaji itaxutoxanepana penaexanaejawaweliacujinae.

—¿Detsa ponë Dioso pexënato, tasiwanajamatabëcuenecopatsinexa baja raponëjawabelia? —jai.

³⁷ Jesús nexata pijacuata nayabarajumaitsi:

—Ponë baja taneme. Ponë cabarëcuaicuaijai, bajaraPonë rabaja Dioso pexënato —nayabarajai Jesús.

³⁸ Nexata, bajaraponë yaiyataeya pematabacabëta nuca Jesús pitabarata. Jumaitsi:

—Tajatuxanenë, casiwanajamatabëcuenecopatatsi baja cajena —jai.

³⁹ Nexata, Jesús jumaitsi bajaraponëjawabelia:

—Xanë patajë mapanacuayabetsicaje tayapëtaeya-exanaenexa jiwi pija-neconi pexinaejawa. Nexata, pamonaë pexaniajailiwaitsi tatsipaebijawata natoyapëtaena bepitauxtotsëcënaejamatabëcuene pexinaejawa, bajara-pamonaë jamatabëcuene-itayotsianajë, xaniawaetsia penayajiwitaenexa. Pamonaë pijinia jamatabëcuenenawëxaniabiaya natotane bepitauxtotaenepanaejamatabëcuene pexinaewi, yapëtaeya-exanaenajë bepitauxtotsëcënaejamatabëcuene pexinaejawa —jai Jesús.

⁴⁰ Nexata, itsamonae fariseowi, bajarajota penanubenaewi, jumetane bajarapacuenia Jesús pejumaitsiyawa. Nexata, bajarapamonaë jumaitsi Jesús-jawabelia:

—¿Paxanë-ata tsabaja bepitauxtotsëcënaejamatabëcuene pataxainaewi tsawanapae? —jai.

⁴¹ Jesús nexata jumaitsi bajarapamonaëjawabelia:

—Jājā, bitso bepene-itaxutotsëcënaejamatabëcuene panexainaewi.

Itsa pepacuene pane-itaxutotsëcënaejamatabëcuenewi tsipae Dioso pija-cuene yabara, nexata apopananeconitsimë tsipae Diosojawabelia. Itsiata, paxamë pajumaitsimë tsabiabi paneyapëtaewicuenia: «Waxaitsi rabaja Dioso peliwaitsi bepaneyapëtaewi», pajamë tsabiabi. Nexata, pibisiacuene itsa pa-exanabiabame, bitso pananeconitame Diosojawabelia —jai Jesús fariseowijawabelia.

**Jesús tsipaeba jiwijawabelia pecuenecataeliwaisicuenia,
oveja pewetsinë peliawaisicuenia**

10 ¹ Jesús orijibia jumaitsi fariseowijawabelia:

—Xaniajanë pacuenia pacatsipaebijitsiatsi. Ponë corral-baupajawalia apojone, juna saya peyenepanajawatsia pejonenexalia, bajaraponë oveja penacobetoxotsinë. ² Ponë peneta joneya corral-baupayalia, bajaraponë cajena baja oveja pewetsinë. ³ Nexata, corral-pijibaupa pewetsinë tobaupata pija-oveja. Oveja pewetsinë junatapona pewënëta caenë canacujitsia. Oveja pejumeyapëtaexae pewetsinëtsi, pejunatsicanacujitsiatsi pitsapapona. Bajaraxuacujinae oveja pewetsinë matabapona wayafuabelia. ⁴ Pecapitsapaecujinae, daxita pija-oveja, bajaraponë pewajënaeya namataxainanajetaruca. Nexata, pija-oveja pënaponatsi, tsipaji jumeyapëtanetsi. ⁵ Itsiata baitsi jane, oveja apopënaponaë tsipae apoepayapëtaenë, tsipaji apojumeyapëtae tsipae bajaraponë. Nexata wecuarëcëpecaejiatsipa —nayabarajai Jesús fariseowijawabelia.

⁶ Bajarapacuenia Jesús oveja pewetsinë pecuenecataeliwaisicuenia nacue-newajunupaeba fariseowijawabelia. Itsiata, bajarapamonaë apojumeyapëtaetsi xua yabara nacuenecataeya naliwaisipaeba.

Jesús pewetsijawa xaniawaetsia pijajiwi

⁷Fariseowi apopejumeyapëtaexae xua yabara naliwaisipaeba, Jesús icatsia jumaitsi bajarapamonaewawabelia:

—Xaniajanë pacuenia pacatsipaebijitsiatsi. Xanë raja baupanë oveja pejonexa corralënëaberena, tsipaji xanëjawa jiwi jonena, pepanepaenexa Diosojawabetsia. ⁸Itsamonaë xanë tawajënaeya, tajajiwi pewetsiwi, nawajunupaebabiaba bepexania-ewetsiwi itajara. Itsiata, bajarapamonaë saya oveja bepenacobetoxotsiwi, bepeyacajërëbabiabiwi tajajiwi. Itsiata baitsi jane, taja-jiwi aponamuxuna-ewetsi tsane bajarapamonaë pacuenia itorobatsi. ⁹Xanë rabaja cajena baupanë. Pajiwi jonena bajarapabaupajawa, nexata capanepaenatsi Diosojawabetsia tanesiwanajamatabëcuenecopatsixaë. Xaniawaetsia oveja pewetsinë, capitsapabiaba corral-wecua, caebajayacunua canacujitsia. Matacaponabiaba oveja wayafuabelia, pexaniapona piabatsitsinexa. Caecaniwiyo canacujitsia, icatsia cajoneyabiaba corral-jawaberena. Bajarapijini pacuenia, pajiwi ne-itaxutuajamatejema tsane, xanë-ata xaniawaetsia jamatabëcuene-abatsianajë taliwaisita. Ewetsianajënu piaiaicuenewecua.

¹⁰»Biji rajane, penacobetoxotsinë bajarapacuenia ba-apo-exanaë. Basiwapata saya oveja penacobetoxotsinexa, pebeyejebinexa, pewerebiabinexanua. Bajarapijinia jamatabëcuene-itsi pamonaë pata bepexaniacuenia itajara pewetsiwi, tajajiwi taneto-ewetsinexa. Itsiata baitsi jane, xanë patajopaicajë mapanacuayabetsicaje, tajamatabëcueneta jiwi pexainanenexa piaitawajamatabëcuene, pewajënaeyabelia ayaicuenia pecabarëyatsawanapaenexa bajarapapitawajamatabëcuene.

¹¹»Xanë raja tajajiwi pexaniacuenia ta-ewetsinë. Pacuenia xaniawaetsia oveja pewetsinë yapijiwinacaewetsipa pebeyaxuabinexatsi, pija-oveja peganepaenexa, bajarapijinia pacuenia xanë-ata nacaewetsianajë tanebeyaxuabinexa, tajajiwi tacapanepaenexa. ¹²Itsiata, ponë ëpematamotsijawane-xatsi yabara to-ewetsipa itsanë pija-oveja, itsa totsimaxënajetarucæjitsipatsi pianapanaenë lobo^r oveja pexaenexa, bajaraponë xuabatabajirawijitsipa ovejabitsaëtomì. Nexata, lobo itsa yajuwënëwaetabijitsipa, natsanecæjitsipa bajarapabitsaëtomì. ¹³Bajaraponë najetabijirawijitsipa, tsipaji saya nacuene-baponaponaëjitsipa pematamotsinexatsi. Nexata, aposiwajamatabëcuenebë-jai tsipae oveja yabara.

¹⁴»Xanë rabaja tajajiwi pexaniacuenia ta-ewetsinë. Nexata, yapëtaniji caenë canacujitsia. Tajajiwi-ata pijinia neyapëtane. ¹⁵Pacuenia taxa neyapëtane, bajarapijinia pacuenia xanë-ata yapëtaniji taxa. Xanë nacopatsianajë tasiwatëpaenexa tajajiwi yabara. ¹⁶Xanë baja cajena xainajë itsabitsaëto tajajiwi, pamonaë abaxë apoyajawajinawanapae mapabitsaëtojawataje. Bajarapamonaë itsamatacabi capatsianajë mapabitsaëtojawaberenaë, caebitsaëto ta-exanaenexa. Nexata, daxita bajarapamonaë exanawanapaena ta-itorobicuenia. Caebitsaëtoxaneto jane baja tajajiwi netonaexanaena. Xanë, caenënë, bajarapamonaë ewetsianajë.

r 10:12 lobo: Lobomonaë jëpa benamo. Itsiata, pecunuanënë, pianapanaenë-ata. Bajarapamonaë apocuenejëpae newëthëmonaë, tsipaji jinawanapa pepobitsaëto, pexaenë pejaitsijawata. Taema «lobo», glosariojawata.

¹⁷»Bajaraxuata, taxa niasiwa, tsipaji tajajiwi yabara nacaewetsianajë tanebeyaxuabinexa. Itsiata baitsi jane, icatsia tatëpaecujinae asaënë tsane.

¹⁸Itsajiwi-ata cajena apocaëjëpaetsi tanebeyaxuabinexa. Biji rajane, xanë tajacuata nacaewetsianajë tanebeyaxuabinexa. Necuenecaëjëpanua tasaë-nexa tatëpaecujinae. Bajarapacuenia baja cajena, taxa netocopata —jai Jesús fariseowijawabelia.

¹⁹Judíowi bajarapacuenia icatsia itsa jumetane Jesús pejumaitsijawa, aponajamatabëcuenejëpae. ²⁰Ayaibitsaëto bajarapamonaeyajuwënëwi naju-maitsi Jesús yabara:

—Dowathi raja bajaraponë yajawaponaponatsi. Matajemabatsi ra saya. ¿Detsa xuajitsia bajaraponë panamuxuna-ewetame? —najai bajarapamonaë.

²¹Itsiata, itsamonae jumaitsi:

—Ponë dowathi yajawaponaponatsi, apocaëjëpaetsi tsipae cajena pecuai-cuajainexa mapacueniaje. Apocaëjëpaetsi tsipaenua pitaxutoxanepanaeya-exanaenexa bitso pitaxutotsëcënaenëmi —jai Jesús yabara.

Judíowi nawecua-ataejitsibi Jesús

²²Emarapaejuametonëta fiesta^s exana, judíowi penajamatabënapitsi-nexa bajayata pijasalinaiwi templobo pexanebetsijawa Jerusalén tomarata.

²³Bajarapafiestamatacabi-epatojawa, Jesús ponapona bajarapatemplobopi-jibaupa, Portal de Salomón-jawata. ²⁴Bajarajota, judíowi pewetsiwi Jesús matatoyorotsia tsimaxënaeatuatsi. Jumaitsi:

—¿Detsa pamatacabijawabelia panewecua-ajibia-exanaename caejama-tabëcuene apopataxainaejawa xamë yabara? ¡Xaniawaetsia panenawa-junupaebare xamë pepacuene itsa Cristomë, Dioso athëbëwetsica peca-itorobinëtsica, jiwi necapanepaenexa! —jai judíowi pewetsiwi.

²⁵Nexata, Jesús jumaitsi bajarapamonaëjawabelia:

—Pacanawajunupaebatsi rabaja picani rowialia. Itsiata, apopanejumexania-taemë. Taxa Dioso pesaëta papijinicuenejawanë exanajë, bajaraxuanë rabaja picani necuenewajunupaeba Cristonëcuene. ²⁶Itsiata, paxamë apopanejume-xaniataemë Cristonëcuene, tsipaji baja cajena apopatajiwiyajuwënëwimë. ²⁷Pamonae baja tajajiwi nejumeyapëtane, ta-itorobicuenia pexanaenexa. Bajara-pamonaë tajajiwicuene yapëtaniji. Bajarapamonaë-ata nepënapona. ²⁸Bajarapa-monaëjawabelia rajutajë matacabi apopewerewerecaejawa. Taxa Diosowecua-ata, aponaxuabi tsane. Pamonae tajajiwi, itsajiwi-ata ta-ewetsicuenewecua^f aponeyacajërëtsicapanepae tsane. ²⁹Taxa, daxitawecua ayaijamatabëcueneën-xae, pamonaë nerajuta ta-ewetsinexa, itsajiwi-ata apocaëjëpaetsi tsane baja-raPonë pewetsicuenewecua pepitsinexatsi. ³⁰Taxa Dioso, paxanëbeje, caenë rabaja panaexanajëbeje —jai Jesús judíowi pewetsiwijawabelia.

s 10:22 *fiesta*: Bajarapafiesta pewënë, La Fiesta de Dedicación, itsa jume, Hanukah. Dedicación pejumaitsijume: «Petotsatsijawa itsacuenejawanexa» pejaijume. Nexata, bajarapafiestajawata judíowi najamatabënapitabiaba, pamatacabi pijasalinaiwi totsata Dioso, pabo Judas Macabeo to-exaneta, Dioso pijatemplobonexa. Bajarapafiesta exanabiaba diciembre juametota, ocho pamatacabibejuenua. Baitsi Israel nacuata, emarapae copiajopabiaba noviembre juametota, copiaruca pijinia marzo juametota. t 10:28 *ta-ewetsicuenewecua*: Wowaijumeta jumaitsi: «de mi mano», jai. Jiwijumeta pijinia «tacobewecua», jai. Bajarapacobe yabara nacatocuene-itajëta Jesús pijajiwi pewetsijawa yabara.

³¹ Bajarapacuenia pejumaitsixae, bajarapamonae icatsia nota ibotonë, Jesús picani pebeyaxuabinexatsi petseconaejawata.

³² Jesús itsa tane bajaraxua, jumaitsi bajarapamonaejawabelia:

—Paxamë baja cajena, panecuenetaneme ayaijawa pexaniacuene taxa Dioso pesaëta ta-exanaponaejawa. ¡Nexata panejumaitsimëre! ¿Detsa pitsi-cuenejawa bajarapapexaniacuene yajuwënëjawa wemaxënanconitajë, xua yabara ibotonëta panetseconaejitsiamë? —jai.

³³ Nexata judfowi jumecanawiatatsi:

—Bajarapapexaniacuene nexanaejawanë yabara, apopacatseconaejitsiatsi. Biji rajane, xamë cuaicuajiamë Dioso apojejitsipaejumenë, jiwitonëmë-ata beDiosonëmë nenataxae. Bajarapacuenia nejumaitsixae, naneconitame Diosojawabelia. Bajaraxuata pacatseconaejitsiatsi ibotonëta, Dioso patane-najumeliwaisicopatsicuenia Moisés-pijinëta —jai Jesús-jawabelia.

³⁴ Nexata Jesús jumaitsi judfowijawabelia:

—Yapëtanetsi Dioso pejumeliwaisibaxutota pejumaitsijawa mapacueniaje: «Paxamë-ata rabaja padiosowimë»,^u pejaijawa. ³⁵ Yapëtanetsinua pacuenia daxita xua Dioso jumaitsi pejumeliwaisibaxutota, pexaniajaijawa. ³⁶ Itsa xanë Dioso nitapeta, tane-itorobinexatsica mapanacuayabetsicaje, pejitsi-pacuenia tato-exanaponaponanexa, ¿detsa xuajitsia paxamë pajumait-simë: «BajaraPonë Dioso apojejitsipacuenia, jumaitsi: ‘Xanë raja Dioso pexënatonë’, jai» panejamë? ³⁷ Itsa apo-exanaenë taxa tane-itorobicuenia, nexata apopaxainaemë xua yabara panejumexaniataejitsiamë. ³⁸ Itsiata, taxa tane-itorobicuenia exanaponaponajë. Apopajitsipae-atamë pataneju-mexaniataenexamë xua pacatsipaeabatsi xanë, taxa Dioso yabara-ata, itsiata bepajumexaniataneme Dioso pesaëta ta-exanaejawanë, tsipaji bajaraxuanë pacayapëtaeya-exana xanë, taxa Diosobeje caenë patanaexanaejawabeje —jai Jesús judfowijawabelia.

³⁹ Bajarapacuenia Jesús pejumaitsixae, judfowi icatsia jamatabëwaeta-batsi, penaneconitsia-exanaenexatsi. Itsiata, wecuapanepa.

⁴⁰ Pewecuapanepaecujinae, Jesús cawëa nawialia Jordán-mene itsapanabelia, itsajotalia copiaya Juan-pijinë jiwi bautizabaponapona. Bajarajotalia Jesús ponapona cae-epatoyowajëto. ⁴¹ Jiwi ayaibitsaëto xaneto ponalia Jesús petaenexatsi. Nexata bajarapamonae jumaitsi:

—Juan-pijinë Dioso pesaëta pinijicuene apo-exanaponae-ata, itsiata daxita pacuenia tajëwelia wajunupaeba maponë yabaraje, xaniajai cajena —jai bajarapamonae Jesús yabara.

⁴² Nexata jane baja, bajarajota jiwi ayaibitsaëto xaneto jumexaniatane Jesús Dioso athëbëwetsica pitorobinëcuenetsi.

Lázaro petëpaejawa yabara

11 ¹ Pamatacabi Lázaro,^v Betania tomarapijinë, bitso awitane tsanucacae, Jesús abaxë ponapona Jordán mene itsapanatalia. Bajaraponë Jesús

u 10:34 Taema Sal. 82:1-8. Dioso raja jiwi pijaneconi pepopacanaëjëtsinëxae, bajaraxuata pamonae jiwi itapeta pijaneconi petocanaëjëtsiwinexatsi itsajawata wënërubatsi «diosowi».

v 11:1 Lázaro: MapaLázaro apoyabaracuaicuajaijawa paLázaro boquecabiaba daxitacuene bitso pexainaenë pijabobaupamuxuneneta. Taema Lc 16. 20-25.

peyapëtaenëtsi. Bajarapatomarata, ponaponabeje pematapijiwabeje, María, Martabeje. ²BajarapaMaría itsamatacabi, Jesús tsitaxu-epanaena petuxu-juwirata. Taxutsewiapaenanua, pematana. ³Nexata, pamatacabi Lázaro bitso awitane tsanucæ, pematapijiwabeje tonajume-itorobaliabeje Jesús-jawabelia. Jumaitsibeje:

—Tajatuxanenë, niasiwänë raja Lázaro bitso awitane —jaibeje.

⁴Bajarapaliwaisi pejumetaecujinae, Jesús jumaitsi pijajiwijawabelia:

—Lázaro xua bitso awitane tsanucæ, bajarapawitaneta raja pepocuene apotëpae tsane. Biji rajane, bajarapawitanewata Dioso nacuene-itajëtsiana pinijisæ pexainaenëcuene, xanë Pexënatonë-ata tanecuenecaëjëpaenë-cuene, pinijicuene patacatsita-exanaejawanexabeje. Bajaraxua pejama-tabëcueneta jiwi pexaniacuenia patanewënëxaniatsinexabeje —jai Jesús pijajiwijawabelia.

⁵Jesús bitso asiwaya tane Marta, María, Lázaro-ata. ⁶Itsia, Jesús wënëliwaisitae-ata Lázaro bitso piawitanewata, bepijiayo apoponae Betania tomarabelia. Anijamatacabibeje abaxë ponapona Jordán mene itsapanatalia. ⁷Bajaraxuacujinae, Jesús jumaitsi pijajiwijawabelia:

—Ponaliatsi icatsia Judea nacuyabelia —jai.

⁸Nexata Jesús pijajiwi jumaitsitsi:

—Necujarubinë, caniwita saya judfowi bajarajotalia jamatabëcatsecona pican i ibotonëta. ¿Itsia tsabaja, icatsia ponaeliatsi bajarabelia? —jai.

⁹Nexata Jesús jumaitsi pijajiwijawabelia:

—Matacabi raja xaina doce pahorabeje. Nexata, pajiwi matacabita ponapona, apofirapecae, tsipaji icotiata napebeta^w xaniawaetsia. ¹⁰Itsia, pajiwi merawi ponapona, firapeca, tsipaji merawi aponapebetsi xaniawaetsia —jai.

¹¹Bajaraxuacujinae, peponaewajënaeya Jesús jumaitsi pijajiwijawabelia:

—Wajayapëtaenë rabaja Lázaro majitanuca. Nexata, ponajë, taya-itawabinexa —jai Jesús.

¹²Nexata pijajiwi jumaitsi:

—Patajatuxanenë, itsa Lázaro saya majitanuca, itsia meta jamatejema tsane —jai Jesús-jawabelia.

¹³Jesús bajarapacuenia jumaitsi Lázaro petëpaejawa yabara. Itsia, Jesús pijajiwi apojumeyapëtaetsi. Bajarapamonae jamatabëjumaitsi: «Lázaro meta saya majitanuca, pacuenia majitanucabiaba merawi», jamatabëjai.

¹⁴Bajaraxuata, Jesús jumenapebetsiaya jumaitsi pijajiwijawabelia:

—Lázaro rabaja tëpa. ¹⁵Paxamë yabara jamatabëcuenëbarëyanë, apotananucaexae bajarajotalia, paepatota Lázaro tëpa, tsipaji bajarapacuenewata matapania xaniawaetsia panejumexaniataename Cristonëcuenenë. Baja nexata ponatsi Lázaro wajataenexa —jai pijajiwijawabelia.

w 11:9 *icotiata napebeta*: Jesús nayabarajumaitsi Jn 8:12-jawata: «Xanë raja penaitayotsicotia taxainaenë, daxitajiwi jamatabëcuene-itayotsinexa», nayabarajai. Nexata, itsa jumaitsi, matacabi yabara, yapëtaeya-exana pijajiwi piasaëtsaponaponae-epato peyajawaponaponae cuene yabara. Merawi itsa jai pijinia yapëtaeya-exana pijajiwi pewecua-ajibitsarucaejawanexa yabara. Nexata, bajarapona abaxë itsa ponapona mapanacuataje, yapëtaeya-exanaejitsia pijajiwi pacuenia be-exana, pefirapecaeyaniwa Dioso pejitsipaecuenewecua. Itsia, piajibitsarucaecujinae, pijajiwi to-ayapëbejitsia xaniawaetsia penatsiwajënaetaejawanexa.

¹⁶ Bajarapacuenia Jesús pejumaitsicujinae, Tomás, Jesús pijajiwijajuwë-nënë, ponë wënërubatsi Sapalanë, ^x jumaitsi penajuaponaewijawabelia:

—Naponatsi Jesús pepëta. Ibotonëta itsa tseconaenatsi, wajajawatëpae-nexa bajaraponë —jai Tomás.

Jesús pejamatabëcueneta, petëpaewimi-ata icatsia asaëjitsia

¹⁷ Pepuaxainae baja cuatro pamatacabibeje, Lázaropijinë pemëthëtsicujinaetsi, Jesús matapania patajopa Betania tomarata. ¹⁸ Bajarapatomarayo eca imoxoyo Jerusalén tomarawecua. Bejamatabëcuene anijakilómetrobeje epatua nawecua-ecabeje. ¹⁹ Jesús pepatsiwajënaeya Betania tomarata, ayaibitsaëtoxaeto judíowi pata Marta, Maríabejebawaberena, pejamatabëcueneyanabinexatsibeje pema-tanueyabijawata pejuyapijinë, Lázaropijinë. ²⁰ Itsa Marta wënëliwaisitane Jesús pepatanajetarucajawa, pitsapa pijabowecua pemata-enenaenexa. María itsiata, bota nacopateca. ²¹ Nexata, Marta itsa mata-enenatsi, jumaitsi Jesús-jawabelia:

—Tajatuxanenë, itsa majotaje ponaponaejitsipame, apotëpae tsipae tajuyapijinë. ²² Itsiata, yapëtaniji, aeconoxae-ata pecato-exanaejawanexa daxita pacuene wajëtame Diosojawabelia —jai.

²³ Nexata Jesús jumaitsi bajarapowajawabelia:

—Nejuyapijinë raja itsiata, icatsia asaë tsaponaponae tsane —jai.

²⁴ Nexata, Marta xaniawaetsia apojejumeyapëtaexae xua yabara Jesús jumaitsi, nexata bajarapowa jumaitsi Jesús-jawabelia mapacueniaje:

—¡Xaniajamë! Yapëtaniji bajaraponëmi icatsia Dioso piasaëya-exanaejawanexatsi, pamatacabita icatsia asaëya-exanaenatsi daxita petëpaewimi —jai.

²⁵ Nexata Jesús jumaitsi Martajawabelia:

—Xanë rabaja, piasaëjamatabëcuene taxainaenë. Nexata, pajiwi xanëja-waberena nesiwanajamatabëcopatsiana, bajarapajiwi tëpae-ata, icatsia asaë tsaponaponae tsane. ²⁶ Pajiwi abaxë asaë tsaponaponae mapanacuataje, itsa xanëjawaberena nesiwanajamatabëcopatsiana, bajarapajiwi apotëpae tsane^y daxita matacabijawabelia. ¿Xamë tsabaja jumexaniataneme bajarapaliwaisi? —jai Jesús.

²⁷ Nexata Marta jumaitsi:

—Tajatuxanenë, jumexaniataniji rabaja. Xamë rabaja cajena Cristomë, Dioso pexënatomë, ponë pacopia-ewetawanapajë athëbëwetsica pepatsijaw-anexatsica mapanacuayabetsicaje, jiwi pecapanepaenexa —jai Marta.

Pacuenia Jesús wënua Lázaro pemëthëjawata, yabara peliwaissi

²⁸ Itsa baja Marta najumeliwaisiwereta bajarapaliwaisi, nawiata pijaboyabelia, pejunatsinexa pejuyapijiwa María. Muetsia jumaitsi Maríajawabelia:

—Wajanacacujarubinë rabaja pata. Cajunalia raja —jai Marta. ²⁹ Cae-jumetae Jesús pejunatsijawatsilia, María nonotabapuna. Pona petaenexa Jesús-jawabelia, itsajotalia ecajopa.

x 11:16 *Sapalanë*: Wowaijumeta canacueneba Dídimowënë. Bajarapawënë xaina anijajamatabëcuenebeje. Arameojumeta: «Sapalanë» pejaiwënë. Griegojumeta pijinia: «Pejume-aebinë», pejaiwënë. y 11:26 *apotëpae tsane*: Baitsi pitawajamatabëcuene xainaena daxitamatacabijawabelianexa. Caejamatabëcuene xainaenanua Diosojawabelia daxitamatacabijawabelianexa.

³⁰ Jesús abaxë apopatsi Betania tomaraberena. Ecojopa abaxë, itsajotalia Marta mata-enenatsi. ³¹ Pajudíowi bajarapowabeje pijabota pata peyanabinexatsibeje Lázaro petëpaexae, bajarapamonae tane Maríá penonotabapunaewaja, bepíjia pepitsatabijawalia bowecua. Nexata, bajarapamonae Maríá pënaponatsi, tsipaji jamatabëjumaitsi: «Maríá raeta pejuyapijinëmi pemëthëjawabelia pona, pemataneyabinexa», jamatabëjai. ³² Itsa Maríá palia, itsajotalia Jesús ecojopa, pematatabacabëta nucajunua Jesús pitabarata. Jumaitsi: —Tajatuxanenë, itsa majotaje ponaponaejitsipame, apotëpae tsipae tajuyapijinë Lázaro —jai Jesús-jawabelia.

³³ Jesús itsa tane Maríá penueyaxuabijawa, judíowi-ata penanuejawa, pamonae yajawapata Maríá, bajaraponë nexata bitso itaxutuanajamatabëxainaxuaba.^z ³⁴ Nexata, Jesús jumaitsi bajarapamonaejawabelia:

—¿Detsa jota Lázaropijinë pamëthëtame? —jai.

Nexata, bajarapamonae jumaitsi Jesús-jawabelia:

—¡Naxatsia! Taename pa-ibowajujawata bajaraponëmi pamëthëtabuatajé —jai.

³⁵ Nexata, Jesús bajarapaepatota nua.

³⁶ Petaejawata Jesús penuejawa, bajarajota penubenaeyajuwënëwi najumaitsi:

—¡Pataema! Jesús picani bitso asiwa petëpaenëmi —najai.

³⁷ Itsamonae pijinia najumaitsi Jesús yabara:

—Mara ponëje itaxutoxaniawaeta bitso pitaxutotsëcënaenëmi-ataje xania-waetsia petanenexa. ¿Apocajëpaetsi tsaeta tsipae itsacuenejawa pexanaejawa Lázaropijinë petëpaeyaniwa? —najai.

Jesús, icatsia asaëya-exana Lázaro petëpaenëmi

³⁸ Bajarapacuenia pejumaitsixaetsi Lázaropijinë yabara, Jesús icatsia bitso muxunajamatabëxainaxuaba. Nexata, pa-ibowajujawabelia Lázaropijinë buatatsi. Bajarapa-ibowaju yamëthëwëpa-acatabuatatsi ibopanaxanetota.

³⁹ Jesús nexata jumaitsi bajarajota penapatsiwijawabelia:

—¡Patixire mapa-ibopanaxanetoje! —jai.

Petëpaenëmi pematapijiwa, Marta, jumaitsi:

—Tajatuxanenë, bitso raeta tuxutsaeba, tsipaji rabaja petëpaecujinae, ajena xaina baja cuatro pamatacabibeje —jai.

⁴⁰ Jesús nexata jumaitsi Martajawabelia:

—¿Apocajumaitsitsi tsaja, itsa xanëjawaberena nesiwanajamatabëcuene-copatsianame, netaejawanexa Dioso pesaëta pinijicuene pexanaejawanexa? —jai Jesús.

⁴¹ Nexata, bajarapamonae Lázaropijinë pemëthëtsi-ibowajuwëpawecua tixilia ibopanaxaneto. Bajarapaepatota, Jesús athëbëa benaëcotsiajumaitsi:

—Taxa, pexaniajamatabëcuene carajutatsi, tsipaji xamë nejumeta-neme. ⁴² Yapëtaniji cajena tanejumetaeyabiabijawamë. Bajarapacuenia

z 11:33 *itaxutuanajamatabëxainaxuaba*: Jesús aponajamatabëxainae Lázaro petëpaexae, tsipaji yapëthane piasaëya-exanaejawanexa bajaraponëmi. Jiwi pecuene-aebixaetsi Jesús pejamatabëcueneta petëpaenëmi icatsia piasaëya-exanaejawanexa, perajutsinexanua matacabi apowewere-werecaejawa, bajaraxua yabara bitso itaxutuanajamatabëxainaxuaba bajarapamonae.

icatsia cawajětatsi mapamonaēje, ayaibitsaētoḡaneto, pitabarata, bajara-pamonaē pecajumexaniataenexa tane-itorobinēmēcuenetsica —jai Jesús Diosojawabelia.

⁴³ Jesús pewajętsicujinae, ayaijumeta jumaitsi Lázaro pebuatsi-ibowajutsijawabelia:

—¡Lázaro, pitsaparemena bajarapamēthēwecua! —jai Jesús.

⁴⁴ Nexata, Lázaro, petēpaenēmi, pitsaparena jane baja mēthēwecua. Daxitanēreca piapiasābanata mataquionaeya pematacacēbicujinaetsireca abaxē, yajawapitsaparena. Pitabara-acatsipapaēbērēpanatsi abaxē tsiteca yajawapitsaparena.

Jesús nexata jumaitsi bajarapamonaejawabelia:

—¡Pawecua isinare bajarapapanē! ¡Pacopare peponaenexa pijaboyabelia! —jai.

Jesús pijawajabitsaē najumejaita pebeyaxuabinexatsi

(Mt 26:1-5; Mc 14:1-2; Lc 22:1-2)

⁴⁵ Petaexae pajudfowi María yanabatsi, Jesús piasaēya-exanaejawa Lázaro petēpaenēmi, ayaibitsaēto jumexaniatane Jesús, Cristonēcuene, Dioso pitorobinētsitsica. ⁴⁶ Itsiata, itsamonaē, pona fariseowijawabelia, petsipaebinexa pacuenia Jesús asaēya-exana Lázaro, petēpaenēmi. ⁴⁷ Nexata, fariseowi, sacerdotewi penamatacaitorobiwi-ata, junatsia-exana Conciliomonaē,^a pebarēnacaetuatsinexa. Penacaetuatsicujinae, bajarapamonaē najumaitsi:

—¿Detsa meta itsi tsanetsi waxaitsi? Maponēje Dioso pesaēta pinijicue-nejawanē tsita-exanapona jiwijawabelia. ⁴⁸ Itsa waxaitsi cuenecopatsipatsi bajarapacue pexanaponaejawa, daxitajiwi jumexaniataeponaējitsipatsi bajarapone Cristonēcuene, wajanacayanacua-ewetsinēnexa. Nexata baja-raxua yabara, Romano nacua pewetsiwi nacabara-anaepanaējitsipa. Itoro-bijitsiparena pijajiwi, wajabitsaē, wajatemplobo wajanacatobijianaenexa, wajanacawerebiabinexa-ata —najai bajarapamonaē.

⁴⁹ Bajarapabitsaētoyajuwēnēnē, Caifás, ponē sacerdotewi pepope-namatacaitorobinē tsaponaponaē bajarapamatacabianējawa, jumaitsi penajuanacaetuatsiwijawabelia:

—Paxamē cajena liwaisi bijiaya panetsiwajēnaecanaējēbiwi. ⁵⁰ Xaniawaet-sia apopanatsiwajēnaecanaējētsimē panepanepaejawanexa. Matatoxenetsia nacatoxanepana caenē wajanacasiwatēpaejawa daxitatsi yabara, judiowitsi wajanacawerebiabiyanīwa —jai Caifás, Jesús yabara.

⁵¹ Itsiata bailsi jane, Caifás apojumaitsi bajarapacuenia pijacuata penajamatabēxainaecuenia. Biji rajane, bajarapamatacabi Caifás sacerdotewi pepopenamatacaitorobinēxae, Dioso bajarapacuenia tajē-welia wajunupaebia-exanatsi pacuenia Jesús siwatēpaejitsia daxita

a 11:47 *Conciliomonaē*: Itsawēnē Concilionexa, Sanedrín. Bajarapaconciliobitsaēto xaina 70 ponēbeje, ayaijamatabēcuenewi. Bajarapabitsaētoyajuwēnēwi, itsamonaē fariseowi, itsamonaē saduceowi, itsamonaē judiowi pecujarubiwi, judiowi pija-ancianowi-ata. Bajarapabitsaēto matacaponabiaba, sacerdotewi pepopenamatacaitorobinē penacaetuatsijawata. Bajarapabitsaēto tocaējētabiaba itsamonaē peneconitsiwitsi, peyapētaenexa pacuenia naneconitsia-exanaējitsia pijaneconi yabara, itsa jume, pewecua-ajibia-exanaenexa pijaneconimi. Najumejaitabiabanua pacuenia pewēnajudfowi be-exanawanapa Dioso pesiwajamatabēcuenebarēyanexatsi.

judíowi. ⁵² Itsiata, Jesús, ejudíowi yabara aposiwatëpae tsane. Siwa-tëpaejitsianua pamona-ata Dioso pexi, nacayajatsia daxitanacuanë-jawa jinawanapa, pecaetuatsinexa caebitsaëto pexanaenexa, caenë pesiwatëpaejamatabëcueneta.

⁵³ Penajumejaitsicujinae, conciliobitsaëto najamatabëcueneweretawanapa Jesús pebeyaxuabijawanexatsi. Nexata, bajarapamatacabijawaweliacujinae jaitapona pacuenia Jesús beyaxuabijitsiatsi.

⁵⁴ Bajaraxuata, Jesús apoponabiabi baja itsabelia judíowi nacaetuata-biaba. Nexata, Judea nacuawecua pitsapa, peponaenexa Efraín tomara-jawabelia, patomara eca imoxoyo petusatonacuata. Bajarajota, pijajiwi yajawaponapona, tsipaji Jesús apojitsipae judíowi peyapëtaejawatsi itsajota ponapona.

⁵⁵ Itsa baja imoxoyo pewajënae Pascuafiesta, pejonematacabinexa, judíowi pijafiesta, jiwi ayaibitsaëtoxaneto pijatomaraxijawawerena pona Jerusalén tomarabelia. Bajarapamona pona pexanaenexa pacuenia exana-biaba fiestawajënaeya, penajamatabëcuenexaniawaetsinexa Diosojawabelia.

⁵⁶ Pepatsicujinae, bajarapamona jaitarutatsi Jesús. Itsa nacaetuata templo-bota, nayanijoba. Najumaitsi:

—¿Detsa xamë jamatabë-itsimë? ¿Jesús meta napatsiana mapafiestaja-waje? Jume. Apopatsi meta tsane —najai ëpamona.

⁵⁷ Nexata, fariseowi, sacerdotewi penamatacaitorobiwi-ata, najumecopata jijiawabelia petonaitaxutoca-ewetsinexatsi Jesús. Nexata, pajiwi yapëtane itsajota ponapona, petsipaebinxatsi bajarapamonaejawabelia, jamatejema pewaetabinexa, Jesús penaneconitsia-exanaenexatsi.

Petiriwa tsitaxu-epana Jesús bitso penamatamotsituxujuwi-aceiterata

(Mt 26:6-13; Mc 14:3-9)

12 ¹ Itsa saica seis pamatacabibeje pejonenexa baja Pascuafiesta, Jesús baja pona Betania tomarabelia, itsajota ponapona Lázaro, ponë Jesús asaëya-exana petëpaenëmi. ² Bajarajota, Jesús pexaejawa to-exanatsi^b ya iyataeya, caniwiyopijipexaejawa. Bajarapapexaejawa Marta tsanapona-pona. Jesús pamesata xayeca, Lázaro bajarajota na-eca. ³ Nexata, María carena epatuabotellabëyota petuxujuwi-aceitera, nardowënëra. Bajarapora bitso namatamota. Nexata, bajarapa-aceitera María tsitaxu-epanaxuaba Jesús. Bajaraxuacujinae, icsatia pematana taxutsewiapa. Daxita bo-ënëtuatuajë petuxujuwijawa tuxuyacaëjëpa.

⁴ Bajarapacune petaejawata, Jesús pijajiwi yajuwënë, Judas Iscariote, ponë itsamatacabi Jesús canajetsijitsia pijawajabitsaë pecobeyabelia, jumaitsi:

⁵ —¿Detsa xuajitsia apocanajetsi bajarapatuxujuwira, pematamopitsinexa trescientos padenariobeje? Bajarapapalata rajutsipa bepejiobiwi, bajarapacuenia peyawenonaenexa —jai Judas.

b 12:2 pexaejawa to-exanatsi: Bajarapapexaejawa tsaena exana Simon lepraxainanëmi. (Mt 26:6; Mc 14:3.) Jesús imata bajaraponë wecua-ajibia-exana lepradomae. Itsa abaxë xainae-jitsipa lepra acuenebi fiesta pebarë-exanaejawa itsamonae lepra apopexainae. Bajarapapexae-jawa tsaena fiestacuenia, tsipaji Jesús asaëya-exana Lázaro petëpaejawawecua.

⁶Bajarapacuenia Judas jumaitsi apopesiwanajamatabëcuenebëjajaxae bepejiobiwi. Biji rajane, bajaraponë penacobetoxotsinë. Bajara-ponë Jesús-bana pijapalatadoro pewetsia-exanaenëtsi, bajarapapalata yajuwënënacobetoxotabiaba.

⁷Nexata Jesús jumaitsi Judas-jawabelia:

—¡Cuenecopare saya bajarapowa xanëjawaberena bajarapacuenia pexa-naenexa, tsipaji mapowaje xaniawaeta picaní bajarapora tanetsiperabë-epanaenexa, tatëpaenë tanemëthëtsiwajënaeya! ⁸Daxitamatacabi raja bepejiobiwi jinawanapa itsaxuayo pajinawanapame, paneyawenonaenexa. Itsiata baitsi jane, xanë daxitamatacabi apoponaponaenë tsane paxamëjawata —jai Jesús Judas-jawabelia.

Judíowi penamatacaitorobiwi najamatabëxaina pebeyaxuabinexatsi Lázaro

⁹Ayaibitsaëtoxaeneto judíowi wënëliwaisitanetsi Jesús pepatsijawa Betania tomarata. Nexata, bajarapamonae ponalía Betania tomarabelia, petae-nexatsi Jesús. Itsiata, apoponae ëJesús petaeenexa. Ponalianua petaeenexa Lázaro, ponë Jesús asaëya-exana, petëpaenëmi.

¹⁰Nexata, sacerdotewi penamatacaitorobiwi, daxita baja siwanajamata-bëjëpa pebeyaxuabinexatsi Lázaro, Jesús yajawa. ¹¹Lázaro, petëpaenëmi piasaëya-exanaexaetsi, judíowi ayaibitsaëto natsanapona sacerdotewiwe-cua, pejumexaniataexae Jesús, Dioso pitorobinëtsicuenetsica.

**Jesús nacua-ewetsinëcuenia pecopiapitsijawatsi,
itsamonae Jerusalén tomarapijiwi
(Mt 21:1-11; Mc 11:1-11; Lc 19:28-40)**

¹²Jiwi ayaibitsaëtoxaeneto pepatsicujinae Pascuafiesta petaewinexa Jeru-salén tomarata, merawia pitsijawata, Jesús wënëliwaisitanetsi pepatsijawa-nexa bajarapatomarata. ¹³Bajarapamonae Jesús pewajënae becotsibotonë baxu-ucubaba, penotsinexa. Bajaraxuacujinae, ponalía baja panamutowe-rena Jesús najetarucaejitsia, pecopiapitsinexa ayaijamatabëcuenenëcuenia. Bajarapamonae pecopiapitsijawata, wawajai tsabuataponae mapacueniaje:

«¡Dioso panecapanepae!«^c ¡Dioso pexaniacuenia yawenonaetsi, maponë penajetarucaenëje, wajatuxanenë pewënëta, peyanacua-ewetsinexa pijajiwi, Israel nacuapijiwi!», jai tsanajetarubenae bajarapamonae Jesús yabara.

¹⁴Imoxoyo baja pepuapepatsijawanexa Jerusalén tomarata, Jesús caxita-jarabaxuaba pejananaweretsinë^d burro. Bajarapaburro Jesús jumaponatsi pepatsinexa Jerusalén tomarata. Bajarapacuenia itsa exana, copiapata jane baja, pacuenia tajëwelia Dioso pejumeliwaisibaxutota jumaitsi Cristo yabara, mapacueniaje:

¹⁵«¡Pajunawame pëtsa baja, paJerusalén-tomarapijiwimë!
¡Pataema! ¡Najetaruca ra jane baja papecayanacua-ewetsinënexa!

c 12:13 *panecapanepae*: Bajarapajume arameojumeta, «*hosana*», hebreojumeta pijinia «*hosha'na*». Taema Sal. 118:25. Bajarapajume judíowi bawawajai Diosojawabelia, itsa jitsipa pecapanepaejawanexatsi. **d 12:14** *pejananaweretsinë*: Bajaraponë pejananaweretsinëxae, itsajiwi-ata abaxë apojumaponapona.

Pejananë burroyota yapatanajetaruca»,^e jai tajëwelia Dioso pejumeliwaisibaxutota Cristo yabara.

¹⁶ Bajarapacuenia pecopiapitsijawatatsi Jesús, apoyapëtae pija-jiwi pajamatabëcuene yabara bajarapacuenia to-exanatsi. Matapania, Jesús pepuaponae athëbëabetsia, bajarapacuenia petocopiapatsijawatsi yapëtane jane baja, pacuenia tajëwelia Dioso pejumeliwaisibaxutota jumaitsi Cristo yabara. ¹⁷⁻¹⁸ Jesús piasaëya-exanaejawata Lázaro petëpaenëmi, pamona cuenetaenubenatsi wajunupaebatsi Jerusaleñ tomarapijiwijawabelia. Bajaraxuata, bajarapamonae pitsapa Jesús pecopiapitsinexa.

¹⁹ Nexata, fariseowi, itsa tane bajarapacuene, najumaitsi:

—¡Pataema! ¡Xaniajaitsi baja cajena! ¡Daxitajiwi pënaponatsi Jesús! Waxaitsi baja nexata acuenebi wajacuenecaranatsijawa Jesús jiwi pepënaponaejawatsi yabara —najai fariseowi.

Grecia nacuapijiwi Jesús jamatabëtanetsi

²⁰ Bajarapamatacabijawa, itsamonae Grecia nacuapijiwi napata Jerusalén tomarata, Pascuafiesta pexanaejawata, peyaiyataejamatabëcuene penacuene-itajëtsinexa Diosojawabelia. ²¹ Nexata, bajarapaGrecia nacuapijiwi cujibaliatsi Felipe, Betsaida tomarapijinë, Galilea nacuata pe-ecaetomara. Nexata, bajarapamonae jumaitsi Felipejawabelia:

—Felipe, pajitsipajë raja Jesús patanataejawa —jai.

²² Nexata, bajaraponë pona Andrés-jawabelia, petsipaebinexa pacuenia Grecia nacuapijiwi jumaitsi. Xuacujinae, bajaraponëbeje najuaponabeje, petsipaebinexabeje Jesús-jawabelia.

²³ Petsipaebicujinaetsibeje, Jesús jumaitsi bajaraponëbejewawabelia:

—Xanë, Daxitajiwi Pematapijinënë, netocopiapata jane baja, pamatacabi Dioso natocaëjëta daxita jiwijawabelia taneyapëtaëya-exanaenexa xaniajaiya Dioso tane-itorobinëtsicuene.^f ²⁴ Xaniajanë pacuenia pacatsipaebijitsiatsi. Trigoxuto itsa apo-ubitsi irabelia, saya tsitecanuca daxitaxutoyo. Itsiata, waja-ubicujinae irabelia, xutsabana pejuwinexa, pejanaboto pepitsapaenexa. Itsa nacuita bajarapaboto, ayaijawa pexu capitsapa. Bajarapacuenia xanë netocopiapatsiana.^g ²⁵ Bajarapijinia pacuenia, pajiwi bitso jitsipa piasaëtsaponaponaejawawa mapanacuataje, Diosowecua naxuabiana. Pajiwi pijinia nawecua-ataejitsibi mapanacupijicuenewecua, bajarapajiwi xainaena matacabi apowerewererecaejawa daxitamatacabijawabelia. ²⁶ Pajiwi jitsipa tanetonacuenebijawa nepënapona, nejumecowënëtsinua ta-itorobicuenia. Xanë, itsajota ponaponajë, bajarapajiwi bajarajota-ata ponaponaena. Pajiwi netonacuenebaponapona, bajarapajiwi taxa Dioso exanaenatsi peyaiyataejiwitsi —jai Jesús Felipe, Andrés-bejewawabelia.

e 12:15 Taema Zac. 9:9. **f 12:23** *Dioso tane-itorobinëtsicuene*: Peyaiyataenexa Jesús Cristo-nëcuene yabara, Ponë Dioso itorobica mapanacuayabetsicaje jiwi pecapanepaenexa pijaneconiweucua. **g 12:24** *netocopiapatsiana*: Mapaliwaisije pexu yabara petsipaebijawata, Jesús nayabarájumaitsi. Baitsi, Jesús itsa apotëpae tsipae, icatsia itsa piasaënë aponamatacotsi tsipae pemëthëwecua, nexata nacopatsipa caenë. Itsiata, penamatacotsicujinae petëpaejawawecua, ayaibitsaëto xainaëjitsia pepënaponaewitsi.

Jesús tajëwelia nawajunupaeba pebeyaxuabijawanexatsi

²⁷Bajarapacuenia petëpaejawanexa penayabarajumaitsicujinae, Jesús jumaitsi:

—Aeconoxae jamatabëcuenebëjaiya najamatabëxainajë. ¿Detsa meta jumaitsinë tsane taxajawabelia? Jumaitsinë meta tsane: «¡Axa, necapane-pare betajibicueneta tanebeyaxuabijawaminexawecua!», janë meta tsane. ¡Jume raja! Bajarapacuenia apowajëtsinë tsane, tsipaji mapanacuayabetsi-caje patajë betajibicueneta tanebeyaxuabinexa. ²⁸Bajaraxuata, jumaitsinë tsane Diosojawabelia: «¡Axa, najamatabëcuene-itajëre jiwijawabelia peca-wënëyaiyataenexa!», janë tsane —jai Jesús.

Nexata bajarapaepatota, Jesús jumetane athëbëwetsica pejumaitsijawat-sica mapacueniaje: «Jiwijawabelia rabaja najamatabëcuene-itajëtajë ayaija-matabëcuene taxinaejawa. Icatsia, orijibia nawënëyaiyataeya-exanaenajë ayaijamatabëcuene taxinaejawa yabara», pejaijawatsica. ²⁹Jiwibitsaëto, bajarajota penubenaewi, jumetane bajarapajume. Itsiata, apojumeyapëtae xua yabara jumaitsi. Nexata, bajarapamonaeyajuwënëwi jumaitsi:

—Yamaxë raeta najumeta —jai.

Itsamonae pijinia jumaitsi:

—Ángelnë raeta barëcuaijaijaitsi Jesús —jai.

³⁰Nexata, Jesús jumaitsi bajarapamonaejawabelia:

—Xanë raja tajumetaenexa bajarapajume apojumaitsitsica, biji rajane, paxamë raja panejumetaenexa. ³¹Aeconoxae rabaja copiapatsiana Dioso penaneconitsia-exanaematacabinexa daxita pijaneconi pexainaewi. Wecua-ajibia-exanaenanua dowathi penamatacaitorobisaë, ponë maparucaje namatacaitorobaponapona mapanacuapijiwi. ³²Itsa nerutsiana athëbëyo cruzajawabelia tanebeyaxuabinexa, nexata daxitajiwi nitaxutunacaetuatsiana, xanëjawaberena tanesiwanajamatabëcuenecopabinexa —jai Jesús.

³³Bajarapacuenia Jesús tajëwelia jumaitsi jiwijawabelia, peyapëtaeya-exanaenexa pitsicueneta tëpaejitsia. ³⁴Nexata, bajarapamona jumaitsi bajaraPonëjawabelia:

—Dioso penajumecopatsiliwaiis Moisés-pijinëta tajëwelia nacayapëtaeya-exana pacuenia, Cristo, ponë athëbëwetsica Dioso itorobijitsiatsica, asaë tsa-ponaponaejitsia daxitamatacabijawabelianexa, jai bajarapaliwaisita. Itsiata, xamë, Cristomë, aithothia panejumaitsimë mapacueniaje: «Xanë, Daxitajiwi Pematapijinënë, nerutsiana athëbëyo cruzajawabelia, tanebeyaxuabinexa», panejamë. ¿Detsa nexata xamë ponëmë, Daxitajiwi Pematapijinëmë? —jai bajarapamona.

³⁵Nexata, Jesús jumaitsi bajarapamonaejawabelia:

—Imoxoyo rabaja pewajënae, xanë, pecotia taxinaenë, patacawecuaponaematacabinexa. Nexata, pamatacabibeje abaxë pacayajawa-ponaponatsi, xaniawaetsia pajinawanapaename, pexaniajailiweisita patacjamatabëcuene-itayotsicuenia. Yapëtaeya pajinawanapaename, tsipaji jemata pacatocopiapatsiana bepitaquirijawa ta-ajibitsarucaejawata. Nexata, apopayapëtaemë tsipae xua pa-exanaejitsiamë. Pacuenia pitaquirijawata jiwi xaniawaetsia aponatsiwajënaetae itsabelia ponaejitsia, bajarapaxamë pane-itsiyaniwa. ³⁶Xanë rabaja pecotia taxinaenë pacayajawaponaponatsi,

pexaniajailiweisita patacajamatabëcuene-itayotsinexa. ¡Nexata, panejume-xaniataema patacatsipaebiliwaisi panenaexanaenexa panejamatabëcuene-naitayotsiwi! —jai Jesús bajarapamonaejawabelia.

Bajarapacuenia pejumaitsicujinae, Jesús baja pona, pewecuanamatayabi-nexa bajarapamonae.

Judíowi cuene-aeba Jesús Cristonëcuene

³⁷ Jesús nawitsia tsita-exanaponae-ata ayaicuene pexanaejawa Dioso pesaëta judíowi pitabarata, bajarapamonae apojumexaniataetsi Cristo-cuene. ³⁸ Bajarapacuenia judíowi pecuene-aebijawatatsi, copiapata jane baja bajayata tajëwelia profeta Isaías-pijinë. Bajarapamonae yabara, Isaías-pijinë peyaquinaeliweisita tajëwelia pejumaitsijawa mapacueniaje:

«PATAJATUXANENË, itsajiwi-ata apopanejumexaniatae patatsipaebiliwaisi. Patsita-exanaponae-atanë ayaicuenejawanë xamë, Diosomë, nesaëta, bajarapamonae tsiteca apopanejumexaniatae»,^h jai bajayata tajëwelia profeta Isaías-pijinë, judíowi apopejumexaniataejawanexa Cristocuene.

³⁹ Bajaraxuata, Cristo patsi-ata, judíowi apojumexaniatae Cristo-cuene. Orijibia, bajaraxua yabara profeta Isaías-pijinë tajëwelia jumaitsi mapacueniaje:

⁴⁰ «Bajarapamonae Dioso itaxutotsëcënaeya-exana.

Ajamatabëcuenetajaya-exananua. Bajarapacuenia exana, bajarapamonae tae-ata pinijicuene Dioso pesaëta pexanaejawa, xaniawaetsia apoyapëtae tsane pajamatabëcueneliwaisi xaina petaejawa. Bajarapamonae xanëjawaberena aponajamatabëcuenepënyorotsi tsane perujumatabëcuenewecua. Nexata, apojamatabëcuenexaniawaetsinë tsane»,ⁱ jai bajayata tajëwelia profeta Isaías-pijinë, judíowi pejume-aebijawanexa yabara Cristo.

⁴¹ Bajarapacuenia Isaías-pijinë yaquina, tsipaji bajayata bemajitsinaebota tane Cristo ayaijamatabëcuene pexainanëcuene. Bajaraxuata, bajayata bajarapacuenia Cristo yabara wajunupaeba baja cajena.

⁴² Bajarapacuenia profeta Isaías-pijinë bajayata wajunupaebi-ata bajarapamonae yabara, itsiata ayaibitsaëto judíowiyajuwënëwi, pewetsiwi-yajuwënëwi-ata, jumexaniatane Jesús Cristocuene. Itsiata, fari-seowi pecujunawixae, aponawajunupaebi pejumexaniataejawa yabara, pecapitsapaeya-exanaeyaniwatsi judíowi pijasinagogabowecua.^j ⁴³ Bajarapacuenia aponawajunupaebi, tsipaji jitsipa pesiwarabarëyajawatsi penajua-ewetsiwi, Dioso pesiwarabarëyajawatsiwecua.

Dioso naneconitsia-exanaena jiwi, apopejumexaniataexae Jesús petsipaebiliwaisi

⁴⁴ Nexata, Jesús jumaitsi ayaijumeta jiwijawabelia:

h 12:38 Taema Isa. 53:1. **i 12:40** Taema Isa. 6:10, Mt 13:14-15; Hch. 28:26-27. **j 12:42** *pijasi-nagogabowecua*: Bajarapacuenia judíowi wënërubabiaba penacaetuatsibo, itsajota nacujarubabia Dioso peliwaishi caesábado canacujitsia.

—Pajiwi nejumexaniatane Cristonëcuene, bajarapajiwi baja éxanë yabara aponejumexaniatae. Biji rajane, jumexaniatanenua Ponë-ata nitorobica. ⁴⁵Pajiwi necueneyapëtane, bajarapajiwi tane-itorobinëtsica-ata cueneyapëtane. ⁴⁶Xanë rabaja pecotia taxainaenë, pexaniajailiwasita tajamatabëcuene-itayotsinexa mapanacuapijiwije. Nexata, pajiwi neju-mexaniataena Cristocuenenë, ajamatabëcuene-itaquiriaya apoponaponae tsane. ⁴⁷Pajiwi jumeyapëtae-ata tatsipaebiliwaisi, itsiata itsa apojumecowë-nëtsi tsane bajarapaliwaisi, bajarapajiwi abaxë aponaneconitsia-exanaenë tsane, tsipaji apopatsinëtsica tananeconitsia-exanaenexa mapanacuapiji-wije. Biji rajane, xanë patsicajë tacapanepaenexa, Dioso penaneconitsia-exanaejawamitsinexawecua. ⁴⁸Itsiata, pajiwi nenayajiwi-itawetsiana, aponejumexaniataenua tsane tatsipaebiliwaisi-ata, bajarapajiwi taxa Dioso naneconitsia-exanaenatsi, pamatacabi naneconitsia-exanaena daxita pija-neconi pexainaewi, tatsipaebiliwaisi apocejumexaniataexae. ⁴⁹Xanë raja, tajamatabëcueneta apopaebinë bajarapaliwaisi. Taxa raja, ponë nitorobica, nerajuta bajarapaliwaisi jiwi tatsipaebinexa. ⁵⁰Yapëtaniji baja cajena pali-waisi^k taxa nitoroba jiwi tatsipaebinexa, bajarapaliwaisi pejamatabëcueneta jiwi pexinaejawanexa matacabi apopewerewerecaejawa. Bajaraxuata, bajarapaliwaisi tsipaebaponajë jiwijawabelia taxa Dioso étane-itorobicuenia —jai Jesús jiwijawabelia.

**Jesús beweliamatabëcuenenë nataeya
taxuquiatapona pijajiwi, caenë canacujitsia**

13 ¹Jesús peyajawaponaponae-epato pijajiwi, mapanacuapijiwije, bitso asiwa. Itsiata, Pascuafiesta petaxuxuabiwajënaeyota,¹ tsitanajamatabëcuene-itajëta pijajiwiwajabelia bitso piasiwajawa. Bajara-Ponë pewajënaeya yapëtane baja petocopiapatsijawanexatsi pamatacabita pijawajabitsaë beyaxuabijitsiatsi, pewecuaponaejawanexanua mapanacuaje, paxa Diosojawabetsia. ²Judas Iscariote, Simón pexënato, dowathi baja tsijamatabëjunuatsi. Nexata, jamatabëcuene-itorobatsi caeliwaisi pexinaejawa, pecanajetsinexa Jesús pijawajabitsaë pecobeyabelia, paepatota bajaraPonë pijajiwi caniwiyopijipexaejawa barëxaeyeca. ³Jesús yapëtane paxa Dioso perajutsijawatsi penamatacaitorobisaë, daxitacuene pewetsinënexa. Yapëtanenua paxa Diosojawawetsica pepatsijawa, icatsia penawiatsijawanexatsia caewëa paxa Diosojawabetsia. ⁴Jesús, pijajiwi pebarëxaeyecaejawata, nonotabapuna mesajawata. Najumajonota naniawelia penaxatatsijawa. Toallapanata na-epacëta. ⁵Xuacujinae, mera epata penacobequiatsiwa-xiyota, petaxuquiatsinexa pijajiwi. Nexata, Jesús petsitanajamatabëcuene-itajëtsinexa pijajiwi bitso piasiwajawa, beweliamatabëcuenenë nataeya taxuquiatapona pijajiwi, caenë canacujitsia. Bajaraxuacujinae, taxutse-wiapapona pena-epacëtsitoallapanata. ⁶Itsa Jesús taxuquiatsijitsia, Simón Pedro jumaitsi Jesús-jawabelia:

—Tajatuxanenë, apoxanepanae cajena tanetaxuquiatsijawamë, tsipaji xamë ayaijamatabëcuenenëmë xanëwecua —jai.

k 12:50 paliwaisi: Taema Jn 3:16; 6:63; 1Jn 2:25. **1 13:1** Pascuafiesta petaxuxuabiwajënaeyota: Itsa jume, «petëpaewajënaeya» pejainexa.

⁷Jesús nexata jumaitsi:

—Aeconoxae abaxē apoyapētaemē pajamatabēcuene yabara cataxuquiat-sijitsiatsi. Itsiata bailsi jane, bexējajawabelia yapētaename —jai.

⁸Nexata Pedro jumaitsi:

—Apocatonataxucopatsi tsanetsi tanetaxuquiat-sinexamē —jai.

Jesús nexata jumaitsi:

—Itsa apocataxuquiat-si tsanetsi, nexata apotajaji-witonēmē tsane —jai
Jesús Pedrojawabelia.

⁹Simón Pedro nexata jumaitsi:

—Tajatuxanenē, ētaxu nexata aponetoquiat-simē tsane. Tacobe-ata, matatabocoto-ata, netoquiat-sianame —jai.

¹⁰Jesús nexata jumaitsi Pedrojawabelia:

—Pajiwi baja nawane, aponamatawenonae baja pequiat-sinexatsi daxi-tanē. Saya namatawenona ēpetaxuquiat-sinexatsi, tsipaji baja daxitanē axui-rajibi. Paxamē rabaja pa-ajamatabēcuenexuirajibimē. Itsiata bailsi jane, apopadaxitamē —jai Jesús Pedrojawabelia.

¹¹«Padaxitayomē apopajamatabēcuenexuirajibimē», jai Jesús, tsipaji yapē-tane tajēwelia ponē canajetsijitsiatsi pijawajabitsaē pecobeyabelia.

¹²Petaxuquiat-sicujinae pijajiwi, Jesús baja icatsia naniawelia penaxatatsi-jawa naxatata. Eca icatsia mesamuxuneneta. Jumaitsi pijajiwijawabelia:

—¿Payapētaneme tsabaja paxamē pajamatabēcuene yabara pacataxuquia-tatsi? ¹³Paxamē panejunatabiabame mapacueniaje: «Patanecujarubinē, itsa jume, Tajatuxanenē», panejamē tsabiabi, panenajamatabēcuene-itajētsinexa pataneyaiyataejawamē. Bajarapacuenia panejumait-sijawa panexania-jamē, tsipaji bajarapacuenia tacuene-itsinē. ¹⁴Xanē, patacacujarubinē-ata, panijatuxanenē-atanēnua, bepanijaji-witonēnēcuenia nataeya, bewelija-matabēcuenenēnē pacataxuquiatatsi. Bajaraxuata, paxamē-ata, bewelija-jamatabēcuenewi nataeya, panataxuquiatatabianame namata-enetsia.

¹⁵Xanē pacatsita-exanatsi pane-exanaejawanexa. Nexata, bajarapacuenia paxamē-ata namata-enetsia panato-exanaename. ¹⁶Xaniajanē pacuenia pacatsipaebijitsiatsi. Ponē, itsajiwi petonacuenebabiabinē, apojamatabē-cuenematatoxenetsi pijatuxanenē. Pejumeliwaisicaponanē-ata apojama-tabēcuenematatoxenetsi pitorobinētsi. Bajarapijinia pacuenia, paxamē-ata apopanejamatabēcuenematatoxenetsimē patajajiwimē. ¹⁷¡Nexata, itsa payapētaneme pajamatabēcuene yabara pacato-exanatsi, bajarapacuenia pa-exanawanapare! Bajarapacuenia beweliamatabēcuenewi nataeya pane-exanawanapajawata, Dioso pacasiwajamatabēcuenebarēya tsane.

¹⁸»Bajarapacuenia patacadjumait-sijawata, padaxitamē yabara apojumait-sinē Dioso papecasiwajamatabēcuenebarēyajawa. Xanē, pacaenēmē canacu-jitsia, paca-itapetatsi patajajiwineexamē. Itsiata, caenē paxamējajuwēnēnē, necanajetsiana tajawajabitsaē pecobeyabelia. Bajarapacuenia exanaena, tsipaji bajaraxua yabara, tajēwelia jumaitsi pecopiapatsijawanexa Dioso pejumeliwaisibaxutota mapacueniaje: «Ponē panajuaxaenajēbeje caepexae-jawa, bajaraponē tajawajabitsaēnē tsane»,^m jai Dioso pejumeliwaisibaxu-tota, tajajiwiyajuwēnē tajawajabitsaējawabelia tanecanajetsijawa yabara.

¹⁹ Pacatsipaebatsi bajarapacuenia pecopiapatsiwajënaeya. Nexata, itsa netocopiapatsiana, panejumexaniataename xanë, Cristonëcuene, pacuenia baja cajena pacatsipaebabiabatsi. ²⁰ Xaniajanë pacuenia pacatsipaebijitsiatsi. Pajiwi copiapitsiana tanejumeliwaisicaponanë, xanë neyajawacopia-pitsiana. Yajawacopiapitsiananua taxa Dioso, ponë nitorobica —jai Jesús pijajiwijawabelia.

**Jesús nawajunupaeba jane baja Judas pecanajetsijawanexatsi,
pijawajabitsaë pecobeyabelia**

(Mt 26:20-25; Mc 14:17-21; Lc 22:21-23)

²¹ Bajarapacuenia Jesús pejumaitscujinae pijawajabitsaënë yabara, jamatabëcuenebëjai bitso, penatsinajamatabëxainaejawa. Nexata, rowialia jumaitsi pijajiwijawabelia:

—Xaniajanë pacuenia pacatsipaebijitsiatsi. Caenë paxamëyajuwënënë necanajetsiana tajawajabitsaë pecobeyabelia —jai.

²² Nexata, Jesús pijajiwi nataeyena, tsipaji apoyapëtae ponë yabara Jesús jumaitsi. ²³ Jesús pijajiwiyajuwënënë, ponë bitso asiwaya tane, bajaraponë, Jesús-beje, namuxunenixaeyecabeje. ²⁴ Nexata, bajaraponë Jesús-jawabelia petoyanijobinexatsi, Simón Pedro pecobeta itorobeca. «¡Yanijobare ponë yabara Jesús jumaitsi!», jai tsecae. ²⁵ Nexata, Juan natixireca, Jesús pemuxuneniabereca nacataitanucae peyanijobinexa. Jumaitsi Jesús-jawabelia:

—Tajatuxanenë, ¿jipatsa yabara jumaitsimë? —jai Juan.

²⁶ Nexata, Jesús jumaitsi bitso piasiwane, pijajiwitonëjawabelia:

—Ponë peneta tacajabutsipan-jawayo rajutsianajë, bajaraponë raja tsane —jai.

Nexata, Jesús pan-jawayo pita. Cajabuta. Rajuteta jane baja Judas Iscariote, Simón pexënatowawabelia. ²⁷ Judas pexaejawata bajarapapan, caecuenia dowathi tsijamatabëjunuatsi pejamatabëcuene-itorobinexatsi. Nexata, Jesús jumaitsi Judas-jawabelia:

—¡Xua najamatabëxainame nexanaenexa, bepijiayo baja exanare! —jai.

²⁸ Itsiata baitsi jane, pamona najuaxaeyena bajarapamesata, apojumeyapëtae xua yabara Jesús jumaitsi Judas-jawabelia. ²⁹ Judas peto-ewetabiabinëxae bajarapamonae pijapalatadoro, itsamonae bajaraponë yabara jamatabëjumaitsi: «Jesús raeta itoroba Judas pecomuatsinexa pexaejawa fiestajawata-nexa. Itsa jume, itoroba meta perajutsinexa palata bepejiobiwawabelia», jamatabëjai bajarapamonae. ³⁰ Itsa baja Judas pan pexaeweretsicujinae, bowecua pitsapalia wayafuabelia; bitso baja cajena pinijimerawi.^o

Jesús pijajiwi itoroba namata-enetsia pena-asiwatsawanapaenexa

³¹ Judas pepitsapaecujinaelia bowecua, Jesús jumaitsi pijajiwijawabelia:

—Aeconoxae rabaja Xanë, Daxitajiwi Pematapijinënë, najamatabëcuene-itajëtsianajë ayaijamatabëcuene taxainaejawa. Bajarapacuenia

n 13:23 *ponë bitso asiwaya tane*: Bajarapacuenia Juan, beweliamatabëcuenenë nataeya naya-barajumaitsi. o 13:30 *pinijimerawi*: Pascuafiestapijipexaejawa, judiowi taxuxuaba pexaejawa bejamatabë las seis-jawa caniwiyo. Icatsia xaewereta merawi tuatuajëta. Nexata, Judas pitsapa meta bejamatabë las diez-jawa.

ta-exanaejawata taxa Dioso-ata ayaijamatabëcuene pexinaejawa najamatabëcuene-itajëtsiana, daxita jiwi peyapëtaenexa. ³² Nexata, Xanë, Pexënatonë, itsa jamatabëcuene-itajëtsianajë jiwijawabelia Dioso ayaijamatabëcuene pexinaejawa, Dioso juya nejamatabëcuene-itajëtsiana jiwijawabelia ayaijamatabëcuene taxinaejawa. Bajarapacuenen baja bepijiayo taxa Dioso neto-exanaena. ³³ Bepataximë patacataewi, bajaramaje bajayajebi apopacayajawaponaponae tsanetsi. Nexata, paxamë panejaitsi-atamë, itsiata apopanecaxitajarabimë tsane, tsipaji ajibinë baja tsarucae tsane. Pacuenia jumaitsinë itsamonae judiowijawabelia, bajarapacuenia paxamëjawabelia-ata pacajumaitsi: Apopacacäjëpae tsane paneponaenexa itsabelia ponaejitsianë.

³⁴ »Pacatonajumecopatatsi icatsia pataca-itorobiliwaisi pejanacuenia. Paxamë, patajajiwimë, pa-exanawanapaename mapacueniaje. ¡Namata-enetsia pana-asiwamëre tsawanapae tsane, pacuenia xanë paca-asiwatsi! ³⁵ Bajarapacuenia namata-enetsia itsa pana-asiwamë tsawanapae tsane, papecacuenetaejawata, daxitanacuanëpijiwi pacayapëtaena patajajiwicuenemë —jai Jesús pijajiwijawabelia.

Jesús tajëwelia yapëtaeya-exana Pedro, penayawajunuaxinaejawanexa

Jesús pijajiwitonëcuene yabara

(Mt 26:31-35; Mc 14:27-31; Lc 22:31-34)

³⁶ Jesús penajumeweretsicujinae bajarapacuenia pejumaitsiyawa, nexata Simón Pedro yanijobiaya jumaitsi Jesús-jawabelia:

—Tajatuxanenë, ¿detsa belia ponaejitsiamë? —jai.

Nexata Jesús jumaitsi Pedrojawabelia:

—Itsa belia ponaejitsianë, aeconoxae apocacäjëpae tanepënaponaenexamë. Itsiata bailsi jane, itsamatacabi nepënaponaename —jai.

³⁷ Nexata Pedro jumaitsi Jesús-jawabelia:

—Tajatuxanenë, ¿detsa xuajitsia aponecäjëpae aeconoxae tacapënaponaenexa? Nebeyaxuabijitsia-ata tsipae xamë yabara, apocacopatsi tsipaetsi —jai.

³⁸ Jesús nexata jumaitsi bajaraponëjawabelia:

—¿Xaniajamë tsaja? ¿Nacaewetsipame pecabeyaxuabinexa tane-asiwaxaemë? Xaniajanë pacuenia catsipaebijitsiatsi. Merawia pepobajayacuna, wacara pefiabiwajënaeya, acueyabi xuabeje nayawajunuaxinaename tajajiwitonëcuenemë yabara —jai Jesús Pedrojawabelia.

Pacuenia Jesús nacatonamuto paxa Diosojawabetsia

14 ¹ Jesús icatsia jumaitsi pijajiwijawabelia:

—¡Pëtsa bitso pajamatabëcuenebëjamë panenajamatabëxinaejawata, patacawecuaponaejawanexa yabara! ¡Pasiwanajamatabëcuenecopabare Diosojawabelia, xanëjawaberena-ata, patacayawenonaenexabeje!

² Taxajawatatsia, xaina bitso pexaniabonë, panejinawanapaenexa. Itsa bajara-apo-itsi tsipae, apopacatsipaebi tsipaetsi, bajarabetsia taponaejawa, patacatsiwajënaexaniaawaetsinexa itsajota papatsijitsiamë. ³ Bajarabetsia itsa pacawecuaponaenatsi, itsa pacatsiwajënaeweretsianatsinua panepatsitaxunaenexa, nexata xanë icatsia patsianicajë, patacacaponaenexatsia

jane baja. Nexata, pacayajawa-ecaenatsi, itsajotatsia ecaenajë. ⁴Paxamë baja payapëtaneme itsabelia ponaejitsianë. Payapëtanemenua rabaja panamuto panatopitsijitsiamë, panepatsinexa itsajotatsia ecaeijitsianë —jai Jesús pijajiwijawabelia.

⁵Nexata, Tomás, Jesús pijajiwitonë, jumaitsi:

—Tajatuxanenë, apopayapëtaenë cajena itsabelia ponaejitsiamë. ¿Detsa nexata pacuenia namuto payapëtaenajë, pataponaenexa itsabelia ponaejitsiamë? —jai Jesús-jawabelia.

⁶Nexata Jesús jumaitsi:

—Xanë rabaja namutonë,^p pepopexaniajailiwaissi^q taxainaenë, piasaëjamatabëcuene-ata taxainaenë. Nexata, xanënejewa itsajiwi-ata apopatsicapaneapae tsane taxajawabetsia, xanëjawaberena itsa aponesiwanajamatabëcueneocopatsi. ⁷Itsa paxamë panamuxuna-ewetsipame patacatsipae-biliwaissi, pepacuene paneyapëtaejitsipame, taxa-atanua payapëtaejitsipame. Matapania jane baja payapëtaneme taxa, tsipaji baja patanemenua —jai Jesús.

⁸Nexata Felipe jumaitsi Jesús-jawabelia:

—Tajatuxanenë, pacawajëtatsi axa panetsitajëtsinexamë. Pajitsipajë baja cajena bitso patataejawa —jai.

⁹Nexata Jesús jumaitsi bajaraponëjawabelia:

—Felipe, bajayajebi rabaja pacayajawaponaponatsi. ¿Itsiata tsaja, abaxë xaniawaetsia apopaneyapëtaemë? Pajiwi netane, bajarapajiwi taxa-ata tane. ¿Detsa xuajitsia nexata newajëcame taxa netaenexa? ¹⁰Taxa baja cajena neyajawaponapona. Xanë-ata taxa yajawaponaponajë. ¿Abaxë tsaja jume-aebame bajaraxua? Paliwaissi pacatsipaebatsi, tajamatabëcuene pijiliwaissi baja cajena apopacatsipaebitsi. Biji rajane, Taxa, Ponë neyajawaponapona, daxita pacuenia nitoroba, bajara-ëxua exanaponaponajë. ¹¹Panejumexaniataema, xanë tayajawaponaponaejawa taxa, bajaraPonë-ata taneyajawaponaponaejawa! Itsa jume bepanesiwanajamatabëcueneocopabamenua patacatsita-exanabiabixae pinijicuenejawanë Dioso pesaëta. ¹²Xaniajanë pacuenia pacatsipaebijitsiatsi. Pajiwi nesiwanajamatabëcueneocopatsiana, bajarapajiwi exanaena pacuenia xanë exanajë. Orijiibia, ayaicuene ta-exanaejawa matatoxenetsia exanaena, tsipaji xanë nawiatsianajë taxa-jawabetsia. ¹³Daxita xua xanë tawënëta pawajëtsianame taxajawabelia, pacato-exanaenatsi cajena. Bajarapacuenia, xanë, Dioso pexënatonë, pacato-exanaenatsi, tajamatabëcuene-itajëtsinexa taxa ayaijamatabëcuene pexinaejawa. ¹⁴Bajaraxuata, itsacuenejawayo itsa pawajëtaeme xanë tawënëta, pacato-exanaenatsi cajena —jai Jesús pijajiwijawabelia.

p 14:6 *namutonë*: Bajarapacuenia Jesús nayabarajumaitsi mapajamatabëcueneliwaissianë yabaraje: 1) Namuto, tsipaji caenë Jesucristo pejamatabëcueneta jiwi patsijitsia Diosojawabetsia. (Hch. 4:12.) 2) Pepopexaniajailiwaissi pexainaenë, tsipaji ajibi itsaliwaissi, Jesús peliwaissiwequa, wajanacayapëtaeya-exanaeliwaissinexa, pacuenia panepaeijitsiatsi Dioso wajanacananeconitsia-exanaejawanexa apopewerewerecae-isotojawata wajaneconijamatabëcuene. Bajarapaliwaissi pejamatabëcuenetanua, dowathi wajanacajamatabëcuenecebijawami nacajamatabëcuene-isina. (Jn 8:32.) 3) Piasaëjamatabëcuene pexainaenënu, tsipaji caenë Jesucristo pejamatabëcueneta jamatabëcuene-aitawatsi Diosojawabelia, daxitamatabibijawabelianexa. Bajaraponë pejamatabëcuenetanua xainatsi matababi apopewerewerecaeajawa. (Jn 3:16; Efe. 2:5; Rom. 6:11.)

q 14:6 *pepopexaniajailiwaissi*: Taema Heb. 1:1-2.

**Jesús najumecapanepaeya itorobiapaebica
Espíritu Santo pijajiwijawabetsica**

¹⁵ Icatsia, Jesús jumaitsi pijajiwijawabelia:

—Itsa pane-asiwamē, pa-exanabiabianame pacuenia paca-itorobatsi.

¹⁶ Xanē pacatowajētsianatsi taxajawabelia itsanē juya papecato-itorobinexatsica, Ponē pacajamatabēcueneyawenonaponaponaejitsia daxitamatacabijawabelia. ¹⁷ Bajarapa-Espíritu Santo yabara jumaitsinē, pepope-xaniajailiwaissi jiwi peyapētaeya-exanaenē. Pamonaē mapanacuapijicuene jamatabēcuenē-enatsi, Espíritu Santo apotsijamatabē-ecaetsi, tsipaji apotae, apoyapētaenua peponaponaeuene. Itsiata baitsi jane, paxamē payapētaneme baja, tsipaji baja bajaran Ponē pacayajawaponapona. Bajaran Ponē papecatsijamatabē-ecaexae, payajawajinawanapaename papecajamatabēcueneyawenonaponaponaeenexa daxitamatacabijawabelia.

¹⁸ »Nexata, ponae-atanē tsane taxajawabetsia, itsiata apopacacopatsitsi tsane, panija-epato ēpaxamē panejinawanapaenexa. Icatsia raja patsianicajē,^r patacayajawaponaponaeenexa. ¹⁹ Caematacabibejucujinae baja, mapanacujawije aponetae tsane. Itsiata, icatsia paxamē panetaeneme. Xanē piasaējamatabēcuenē taxainaexae, tjamatabēcueneta, paxamē-ata pasaēmē tsawanapae tsane daxitamatacabijawabelianexa. ²⁰ Espíritu Santo pepatsimatacabitsica, paxamē payapētaeneme taxa, paxanēbeje, caenē panaxanajēbeje. Paxamē pijinia pataneyajawajinawanapaexaemē, xanē-ata pijinia patacayajawaponaponaeexae, becaejiji naexanatsi. ²¹ Pajiji caeliwaissi xaina pexanaenexa ta-itorobiliwaissi, bajarapajiji najamatabēcuenē-itajēta xaniajaiya tane-asiwajawa. Pajiji bajarapacuenia niasiwa, taxa juya bajarapacuenia asiwaissi. Nayapētaeya-exanaenajēnua bajarapajiwijawabelia pitsijamatabēcuenē taxainaenēcuenē —jai Jesús pijajiwijawabelia.

²² Itsanē Judas-wēnēnē, (itsiata apo Judas Iscariote), jumaitsi Jesús-jawabelia:

—Tajatuxanenē, ¿detsa xuajitsia ēpaxanē panetsitanaitjētsianame?

¿Detsa xuajitsia apotsitanaitjētsimē tsane itsamonaējawabelia? —jai.

²³ Jesús nexata jumaitsi Judas-jawabelia:

—Pajiji niasiwa, exanaponaponaeenexa ta-itorobicuenia. Bajarapajiji juya taxa asiwa tsanetsi. Nexata, paxanē, taxabeje, bajarapajiji payajawaponaeenajēbeje. ²⁴ Pajiji aponiasiwa, bajarapajiji aponejumecowēnētsi tsane tatsipaebiliwaissi. Bajarapaliwaissi xanē apotajumeliwaissi. Taxa raja, ponē nitorobica, pejumeliwaissi —jai Jesús Judas-jawabelia.

²⁵ Icatsia, Jesús jumaitsi pijajiwijawabelia:

—Mapacuenia pacatsipaebatsije baja, abaxē patacayajawaponaponae-epato. ²⁶ Itsiata, itsamatacabi itsanē papecajamatabēcueneyawenonaponaponaeenēnexa Taxa tawēnēta pacato-itorobianica. Bajaran Ponē raja Espíritu Santo pacacujarubaponaeenexa daxitaxuanē abaxē pacatsisajina paneyapētaejawa. Pacanamatabēnapitsia-exanaenana daxita paliwaissi pacatsipaebaponatsi.

r 14:18 *patsianicajē*: Bajarapacuenia Jesús itsa jumaitsi, yapētaeya-exana pijajiji pacuenia Espiritu Santo itsa patsianica, Jesús-ata yajawapatsianica, penajuatsijamatabēcuenē-ecaenexabeje.

²⁷ »Patacanapëjibijawata jitsipajë mapaliwaisije patacatonajumepuenet-sijawa: Pacatsijamatabërutatsi bëpënëa panejamatabëcuenexanepanaejawa. Apopacarajutsitsi pitsijamatabëcuenenbarëyajawa xaina mapanacuapijiwi, xua bepïjia werewerecaejitsia. Biji rajane, xanë pajamatabëcuenexanepanaejawa xainajë, bëpënëa pacatsijamatabëcuenenrutatsi. ¡Bajaraxuata, pëtsa pajamatabëcuenenbëjamë, pacujunawamenua itsacuenejawa! ²⁸ Panejumetaneme rabaja patacajumaitisijawa mapacueniaje: «Xanë baja ponaenajë taxajawabetsia. Itsiata baitsi jane, icatsia pacasiwapatsianicatsi», patacajaijawa. Itsa bitso pane-asiwamë tsipae, nexata pasiwayamatabëcuenenbarëyamë tsipae taponae-jawanexa taxajawabetsia, tsipaji bajaraPonë ayaijamatabëcuenenë xanëwecua. ²⁹ Bajarapacuenia pacatsipaebatsi taponaejawënaeya. Itsa pacatocopiapatsiana patacajumaitsicowëya, patacatsipaebiliwaisi panejumexaniataename.

³⁰ »Aponecuenecaëjëpae rabaja pematatsënëa liwaisi patacatsipaeba-ponaenexa, tsipaji rabaja imoxoyo dowathi tanetsimaxëpatsinexa, ponë mapanacuapijiwi pijatuxanenëje. Itsiata baitsi jane, bajaraponë xanë aponejamatabëcuenematatoxenetsicapanepae tane-itorobinexa. ³¹ Biji rajane, bajarapacuenia netocopiapatsiana mapanacuapijiwi peyapëtaenexa taxa Dioso bitso ta-asiwajawa, tato-exanaejawanua tane-itorobicuenia.

»¡Panonobapunare! ¡Ponatsi baja mapacowëwecua! —jai Jesús pijajiwi jawabelia.

Jesús nacuenewajunupaeba uvamacanaecuenia

15 ¹⁻² Jesús namutua pebarënajetarucaejawata, jumaitsi pijajiwi jawabelia: —Xanë rabaja pexaniawiria uvamacanaenë. Nexata, paxamë, patajiwiwëmë, bepatamaxëranamë. Pacuenia pe-ubijawa pewetsinë xaniawaetsia eweta, bajarapijïnia pacuenia taxa naca-eweta. Uvamacanae pewetsinë bawecuacucuba piacuaijibimaxëranaxi, penacopabinexa ëpexaniamaxërananë. Pamaxërananë pijïnia xaina pecuai, bawecuacucuba piabejewanë, matatoxenetsia ayaijawa petonacuaitsinexatsi. Bajarapijïnia pacuenia, taxa Dioso pacawecua-ajibia-exanaena piabejewanë, nawitsia panecapitsapae-nexa pexaniacuenejawanë. ³ Paxamë rabaja, bajarapacuenia Taxa pacawecua-ajibia-exana papibisijamatabëcuenejawanë pacacuenecaranatabiaba, panejumexaniataejawata paliwaisi pacatsipaebatsi. ⁴ Paxamë daxita matakabi itsa paneyajawajinawanapaename, xanë-ata pacayajawaponaponaeatsi. Pamaxërana cajena apotabunucae tsipae peponaejawabelia, bajarapamaxërana aponacuaitsi. Bajarapijïnia paxamë-ata pa-itsimë tsipae, itsa xaniawaetsia apopaneyajawajinawanapaemë.

⁵ »Xanë rabaja bepepo-uvamacanaenë. Paxamë pijïnia bepatamaxërananëmë. Nexata, pajiwi caejamatabëcuene xainaponapona^s xanëjawaberena, xanë-ata pijïnia yajawaponaponaeajë. Bajarapijiwi pexaniacuenejawanë

s 15:5 *caejamatabëcuene xainaponapona*: Pacuenia pemaxërana na-abatabiaba pematabacabarëmeneta, pebaxu naxaniabinexa, pecuai pecapitsapaenexanua, bajarapijïnia pacuenia Jesús pijajiwi benajamatabëcuene-abata Jesucristojawabelia pijamatabëcuenesaënexa Diosojawabelia, ayaijawanua pexaniacuenejawanë pecuenecapitsapaenexa. Pematabacabarëmene nacatocue-necatane Espëritu Santo. Bajaraxuata, caejamatabëcuene waxaxainaenexa Jesucristojawabelia, benajamatabëcuene-ewetawanapatsi Espëritu Santo wajanacatsitajëtsinexa pacuenia exanaejit-siatsi. Benajamatabëcuene-abatabiabatsinua Dioso Peliwaisita.

ayaicuenia nacuenecapitsapabiabiana. Itsiata, xanënejewa' apopacacue-necaëjêpae, paxamë panijacuata pexaniacuene pane-exanaenexa. ⁶Pajiwi, caejamatabëcuene apoxainaponaponae xanëjawaberena, bajarapajiwi petsewimaxëranacuenenia xuabianatsi. Pacuenia uvabacabo pewetsinë wecuacucubabiaba petsewimaxërananë, caetuanua, pexuabinexa isotojawabelia, bajarapijinia pacuenia taxa Dioso exanaenatsi Xanë pamonaë aponeyajawajinawanapae tsane.

⁷»Itsa paxamë caejamatabëcuene paxainawanapame xanëjawaberena, nexata patacacujarubiliwaisi pacatsijamatabëcuene-ecaena. Bajaraxuata panejitsipaecuene itsa pawajëtabiabianame taxa Diosojawabelia, pacato-exanaena. ⁸Paxamë taxa Dioso pejitsipaecuena, nawitsia pexaniacuene-jawanë panetsita-exanawanapaejawata jiwijawabelia. Nexata, jiwi yayi-yataenatsi taxa Dioso. Daxita jiwi pacayapëtaenanua patajajiwiimëcuene. ⁹Pacuenia taxa niasiwa, bajarapijinia pacuenia xanë-ata paca-asiwatsi. ¡Bajaraxuata, pana-asiwamëre tsawanapae! ¹⁰Ta-exanaexae taxa tane-itorobicuenia, natoyapëtaniji tane-asiwajawa. Bajarapijinia pacuenia, paxamë-ata payapëtaename pataca-asiwajawa, itsa pa-exanawanapaename pacuenia paca-itorobatsi. ¹¹Daxita bajaraxuanë pacatsipaebatsi, paxamë panejamatabëcuenewënëcaenexa pabarëyajamatabëcuene xanë xainajë. Bajarapacuenia pacatojitsipatsi, ayaicuenia panejamatabëcuenebarëyatsa-nawanaenexa —jai Jesús pijajiwijawabelia.

¹²Icatsia, Jesús jumaitsi:

—Mapacuenia paca-itorobatsi pane-exanawanapaenexaje: ¡Paxamë patajajiwiimë, pacaenëmë canacujitsia, namata-enetsia pana-asiwamëre tsawanapae, pacuenia xanë paca-asiwatsi! ¹³Pajiwi bitso asiwa peyapë-taejiwitsijawabelia, bajarapajiwi benajamatabëcuene-itajëta peyapijiwi-nacaewetsijawata pebeyaxuabinexatsi. Ajibi bajarapapexanaejawawecua itsacuenejawa, xua yabara najamatabëcuene-itajëtsijitsia bitso piasiwacuene itsajiwijawabelia. ¹⁴Paxamë panajamatabëcuene-itajëtame patajamonaemëcuene, itsa pa-exanawanapame pataca-itorobicuenia. ¹⁵Aeconoxae baja bepatajajiwicueniamë apopacataetsi, tsipaji petuxanewi ba-apoyapëtaeya-exanae daxita xuanë exanaejitsia pijajiwijawabelia Biji rajane, bepatajamo-naemëcuena pacataeponaponatsi, tsipaji pacayapëtaeya-exanatsi daxita pacuenia taxa nitoroba ta-exanaenexa. ¹⁶Paxamë raja apopane-itapetsimë patanepënaponaewinexamë. Biji rajane, xanë paca-itapetatsi patajajiwineexamë. Bajaraxuata, xanë paca-itorobatsi taliwaisi panetsipaebawanapaenexa, panecapitsapaenexanua pexaniacuenejawanë,“ xua Dioso pejitsipaecuenejawanë, apopewerewerecaejawanëxexa. Bajarapacuenia pane-exanawanapaxae tsane, daxita pacuene tawënëta pawajëtsianame taxa Diosojawabelia, pacarajutsiana cajena. ¹⁷Mapacueneje paca-itorobatsi pane-exanawanapaenexa: «¡Namata-enetsia pana-asiwamëre tsawanapae!» —jai Jesús pijajiwijawabelia.

t 15:5 *xanënejewa*: Pitaxutuajamatejemanewewa Jesús-jawabelia peyawenonaenexa.

u 15:16 *pexaniacuenejawanë*: Pecapitsapaenexa papexaniacuenejawanë yabara rubena Gál.

5:22-23. Nacajunua-ata pecujarubicuene Jesús peliwaissi apopeyapëtaewijawabelia, bajarapamonae pesiwanajamatabëcueneecopabinexa Jesucristojawabelia, pecueneccujarubinexanua Jesús pijajijiwejamatabëcuenenaweretsia-exanaejawabelia Dioso pijacuene.

Jesús pitoyajawatsi mapanacuapijiwije

¹⁸ Bajarapacuenia Jesús pepaebiweretsicujinae pijajiwi jawabelia, namata-enetsia pena-asiwajawanexa, icatsia jumaitsi:

—Mapanacuapijiwi, Dioso apo pejumexaniataewije, itsa paca-itoya tsane, panajamatabēnapitsianame xanē baja cajena copiaya tane-itoyajawa bajaramonae. ¹⁹ Paxamē itsa pajamatabēcuenejēpaejitsipame mapanacuapijiwije pena-asiwacuene, nexata bajarapamonae paca-asiwa tsipae. Itsiata baitsi jane, xanē apomapanacuapijinēnēje paca-itapetatsi mapanacuapijiwiwe-cua, patajajiwinexamē. Nexata, paxamē patajajiwi xaemē, bajarapamonae apopajamatabēcuenejēpaemē. Bajaraxua yabara, paca-itoya tsane. ²⁰ Panajamatabēnapitabiabianame xua patacajumaitsi jawami: «Ponē pijatuxanenē tonacuenebaponapona, apojamatabēcuenematatoxenetsi», patacaji jawawa. Xanē pacuenia nebejiobia-exana itsamonae, paxamē-ata bajarapacuenia pacabejiobia-exanaena. Xanē pacuenia nejumexaniatane tatsipaebiliwaisi itsamonae, paxamē-ata bajarapacuenia pacajumexaniataena panetsipaebiliwaisi. ²¹ Bajarapacuenia paca-exanaena mapanacuapijiwije, xanē patajajiwi xaemē, tsipaji apoyapētae Dioso, ponē nitorobica.

²² »Xanē itsa apopatsinētsica tsipae mapanacuayabetsicaje, itsa apotsipae binēnua tsipae paliwaisi Dioso netocopata tatsipaebinexa mapanacuapijiwi jawabeliaje, bajarapamonae aponaneconitsi tsipae Diosojawabelia. Itsiata, tapatsixaetsica baja, bajarapamonae pejume-aebixae tatsipaebiliwaisi, apoxinae penacaranatsiliwaisi, Dioso penaneconitsia-exanaeyaniwatsi. ²³ Pamonae xanē nitoyanaēcota, bajarapamonae itoyanaēcota taxa-ata. ²⁴ Bajarapamonae jawata Dioso pesaēta pinijicuene ta-exanaejawa tsita-exanabiabajā, xuanē itsajiwi-ata apo-exanae mapanacuataje. Bajarapacuenia itsa apotsita-exanaenē tsipae, bajarapamonae aponaneconitsi tsipae Diosojawabelia. Itsiata, tae-ata bajarapapinijicuene jawanē, apo-nejumexaniatae Cristonēcuene. Biji rajane, Xanē nitoyanaēcota. Taxa-ata itoya. Bajaraxuanē yabara naneconita Diosojawabelia. ²⁵ Daxita xuanē taneto-exanaejawanēnexa, tajēwelia Dioso pejumeliwaisibaxutota jumaitsi mapacueniaje: «Bajarapamonae nitoya tsane, apoxinae-atanē xua yabara-itoyajitsia», jai tajēwelia Dioso pejumeliwaisibaxutota xanē yabara —jai Jesús pijajiwi jawabelia.

²⁶ Icatsia, Jesús jumaitsi:

—Pamatacabi pacato-itorobianicatsi Ponē papecajamatabēcuene yawenonaenēnexa, itorobianicajē taxa Diosojawawetsica. Bajara Ponē raja Espiritu Santo, pexaniajailiwaisi pepaebinē. Bajara Ponē xaniawaetsia newajunupaebiana. ²⁷ Bajarapijinia pacuenia, paxamē-ata xaniawaetsia panewajunupaebianame, tsipaji baja cajena xanē paneyajawajinawana-pame tataxuxuabijawaweliacujinae jiwi liwaisi tatsipaebijawa —jai Jesús pijajiwi jawabelia.

16 ¹ Jesús pijajiwi pitorobicujinae pewajunupaebinexatsi pexanaecue yabara, icatsia jumaitsi pijajiwi jawabelia:

—Bajarapacuenia pacatsipaebatsi, jiwi papeca-itoyajawanexa, panecopabiyaniwa xanē jawaberena patanesiwanajamatabēcuene copabijawamē, papecabejiobia-exanaejawata. ² Bajarapamonae pacacapitsapabiabiana

judíowi pijasinagogabonēwecua.^v Belia jane baja, itsamatacabijawabelia pacabeyejebiana, tsipaji jamatabēcuenenawēxaniabiaya jamatabējumaitsi tsane: «Dioso nesiwajamatabēcuenenabarēya tsane tatobeyejebijamatabēcuenen mapamonaaje», jamatabējai tsane paxamē yabara. ³ Bajarapacuenia paca-exanaena, tsipaji aponeyapētae xanē. Apoyapētae taxa-ata. ⁴ Bajarapacuenia tajēwelia pacatsipaebatsi, itsa pacatocopiapata bajarapacuenen, patanejume-najamatabēnapitsinexamē —jai Jesús pijajiwijawabelia.

Espíritu Santo pexanaecuenejawanēnexa jiwijawabelia

Icatsia, Jesús jumaitsi pijajiwijawabelia:

—Tataxuxuabijawaweliacujinae jiwi liwaisi tatsipaebijawa, abaxē apopacatsipaebitsi bajarapacuenen yabara, tsipaji abaxē pacayajawaponaponatsi, pataca-jamatabēcueneyawenonaenexa. ⁵ Itsiata baitsi jane, aeconoxae nawiatsianijā tane-itorobinētsicajawabetsia, itsanē-ata, paxamējajuwēnēnē, aponeyanijobi. «¿Detsa belia ponaejitsiamē?», aponejai. ⁶ Biji rajane, bajarapacuenia pataca-nawajunupaebijawata, bitso panajamatabēxainame. ⁷ Xaniajanē cajena pali-waisi pacajumaitsi. Xanē cajena netoxanepana taponaejawa taxajawabetsia, patacato-itorobinexatsica Espíritu Santo, papecajamatabēcueneyawenonaenēnexa. Itsa apopacawecuaponaetsi tsipae, nexata bajaraPonē apopatsitsica tsipae. ⁸ Espíritu Santo pepatsicujinaetsica, mapanacuapijiwi yapētaeya-exanaena mapaliwaisianēje: Jiwi pibisiacuenen pexanawanapaewicuenen, Dioso pepopianeconijibinēcuenen, Dioso penaneconitsia-exanaejawanexanua daxita pijaneconi pexainaewi. ⁹ Nexata, yapētaeya-exanaenatsi pibisiacuenen pexanaejiwicuenen, xanējawaberena apotanesiwanajamatabēcuenenecopabixae. ¹⁰ Yapētaeya-exanaenatsinua Dioso pepopianeconijibinēcuenen, tsipaji baja xanē taxajawabetsia nawiatsinajē. Pematatsēnē baja apopanetaemē tsane. ¹¹ BajaraPonē yapētaeya-exanaenanua pajiwi Dioso nanekonitsia-exanaejitsiatsi. Dioso baja cajena bajayajawawerena siwanajamatabēcuenenewereta dowathi penaneconitsia-exanaenexa, ponē petuxanenēcuenen namatacaitorobabiaba mapanacuapijiwi, pibisiacuenen pexanawanapaenexa.

¹² «Ayailiwaisi picani abaxē xainajē patacatsipaebinexa. Bajarapaliwaisi abaxē apopacajamatabēcuenenecaējēpae panejumeyapētaenexa. ¹³ Itsiata, pamatacabi patsianica Espíritu Santo, Ponē pepopexaniajailiwaisi pepaebinē, bajaraPonē pacajamatabēcuenenematacaponaena, paneyapētaenexa daxita pexaniajailiwaisi. BajaraPonē raja apopacayapētaeya-exanae tsane saicaya pejamatabēcuenenepijiliwaisi, biji rajane saya, daxita pacuenia taxa Dioso jumaitsi. Pacayapētaeya-exanaenanua pacuenejawanē pewajēnaeyabelia copiapataponaejitsia. ¹⁴ Espíritu Santo pejamatabēcueneneta jiwi neyaiyataena, tsipaji xanē taliwaisi, pexaniajailiwaisi, pacayapētaeya-exanaena. ¹⁵ Daxita taxa pexinaejawa, xanē-ata rabaja tajajawa. Bajaraxuata, pacatsipaebatsi Espíritu Santo papecayapētaeya-exanaenexa xanē yabara pexaniajailiwaisicuenen —jai Jesús pijajiwijawabelia.

Bitso penajamatabēxainaewimi juya pejamatabēcuenenabarēyawī tsane

¹⁶ Icatsia, Jesús jumaitsi pijajiwijawabelia:

^v 16:2 *pijasinagogabonēwecua*: Bajarapacuenia judíowi wēnērubabiaba penacaetuatsibo, itsajota nacujarubabia Dioso peliwaisi caesábado canacujitsia.

—Cae-epatoyocujinae rabaja, apopanetaemë tsane. Itsiata, itsamatacabibejecujinae icatsia panetaename. Bajaraxuacujinae jane baja, ponaenajë taxajawabetsia —jai Jesús.

¹⁷Nexata, pijajiwiwajuwënëwi nayanijoba ëpamonaë.

—¿Detsa pitsijamatabëcuene yabara nacajumaitsi mapacueniaje: «Cae-epatoyocujinae rabaja, apopanetaemë tsane. Itsiata itsamatacabibejecujinae, icatsia panetaename. Bajaraxuacujinae jane baja, ponaenajë taxajawabetsia», nacajai? ¹⁸¿Detsa meta xua yabara pejumaitsiyume: «Cae-epatoyocujinae rabaja, apopanetaemë tsane», nacajai? Apojumeyapëtaetsi cajena xua yabara nacajumaitsi —najai Jesús pijajiwi.

¹⁹Jesús jamatabëcueneyapëtane pacuenia picani pijajiwi jamatabëyanijobatsi. Nexata jumaitsi bajarapamonaëjawabelia:

—Pacajumaitsi mapacueniaje: «Cae-epatoyocujinae rabaja, apopanetaemë tsane. Itsiata, itsamatacabibejecujinae icatsia panetaename», patacajaijawa. ¿Baja tsaja pajume yabara panayanijobame? ²⁰Xaniajanë pacuenia pacatsipaëbijitsiatsi. Xanë itsa tēpaenajë, apopanetaemë tsane. Nexata paxamë panuename. Bitso xanëjitsia panajamatabëxainaename. Mapanacuapijiwije juya barëya tsane, tatēpaejawa yabara. Itsiata baitsi jane, paxamë patanewënwewimë, icatsia bitso panesiwajamatabëcuene-barëyamë tsane, itsa panetaename. ²¹Pamatacabi tocopiapatatsi petiriwa pewixaenotsijawatsi penacueto pewecuaanaexanaenexatsi, bitso bayana-jamatabëxaina. Itsiata, penacueto pewecuaanaexanaecujinaetsi, pewixae aponajamatabënapitsi. Panacueto baja wecuaanaexanatsi, siwajamatabëcuene-barëya. ²²Bajarapijinia pacuenia, paxamë-ata pa-itsimë tsane. Bitso pana-jamatabëxainaename tatēpaejawa yabara. Xanë itsiata, icatsia pacacaxitarabianatsi, paxamë patanetaejawatamë pajamatabëcuenebarëyamë tsane. Nexata, itsajiwi-ata apocaëjēpaetsi tsane papecawecua-ajibia-exanaenexa panejamatabëcuenebarëyajawa.

²³»Bajarapamatacabi, apopaneyanijobimë baja tsane itsacueneyawayo-ata. Xaniajanë pacuenia pacatsipaëbijitsiatsi. Patajajiwiwaxamë, taxa pacarajutsiana daxita xua tawënëta pawajëtabiabianame. ²⁴Abaxë tawënëta taxajawabelia apopawajëtsimë itsacueneyawayo-ata. ¡Aeconoxae rajane baja, tawënëta pawajëtabiabare taxajawabelia! Nexata, bajaraPonë pacarajutsiana xua pawajëtsianame, bitso panejamatabëcuenebarëyanexa panejamatabë-ëthëtowetsina —jai Jesús pijajiwiwajawabelia.

Jesús raja jamatabëcuene-amoneyaba dowathi

²⁵Icatsia, Jesús jumaitsi pijajiwiwajawabelia:

—Pacatsipaëbabiabatsi baja cajena, najumematayatsiaya pecuene cataëliwaisianëta. Itsiata, itsamatacabi bajarapacuenia liwaisi apopacatsipaëbi tsanetsi. Biji rajane, jumenapebetsiaya pacatsipaëbianatsi taxa peliwaisi yabara. ²⁶Bajarapamatacabi, pematatsënëa baja apopanamatawenonaemë tsane xanë patacatowajëtabiabinxaxa taxajawabelia. Paxamë panijacuata pawajëtabiabianame tawënëta bajaraPonëjawabelia, baja tsipaji patajajiwiwimë. ²⁷Taxa paca-asiwa, tsipaji paxamë pane-asiwamë. Pajumexanatanemenua bajaraPonë tane-itorobinëcuenetsica. ²⁸Xanë baja cajena, taxajawawetsica tapatsinëtsica mapanacuayabetsicaje. Nexata, icatsia

ponaenajë mapanacuawecuaje, tanawiatsinexatsia baja taxajawabetsia —jai pijajiwijawabelia.

²⁹Nexata pijajiwi jumaitsi:

—Aeconoxae rajane baja, jumenapebetsiaya panetsipaebame, canacuenenebinezamë pecuenecataeliwaisianë. ³⁰Nexata baja, pacajamatabëcueneyapëtanetsi daxitacuene neyapëtaenëcuene. Orijibia, xamë panejamatabëcueneyapëtaneme, paliwaisi picani jamatabëpacayanijobatsi. Bajaraxuata, pacajumexaniatanetsi baja Dioso athëbëwetsica peca-itorobinëcuenetsica —jai Jesús pijajiwi.

³¹Jesús nexata jumaitsi pijajiwijawabelia:

—¿Matapania jane baja, panejumexaniataneme taxa Dioso athëbëwetsica tane-itorobinëcuenetsica? —jai. ³²Copiapata rabaja, xua pacatsipaebatsi pane-exanaejawanexa. Imoxoyo rabaja pewajënae panenacayajatsinexa xanëwecua, panenawiabinexa panijabonëjawabelia. Panexuabanutsi-anamenua caenëne. Itsiata baitsi jane, caenëne aponacopatsinë tsane, tsi-paji taxa Dioso neyajawa. ³³—Bajarapacuenetajëwelia paneyapëtaenexa, pacatsipaebatsi baja cajena. Nexata, xanëjawaberena patanesiwanajamatabëcuenecopabixaemë, jamatabëcuenexanepanaeya pajinawanapaename. Mapanacuata panejinawanapae-epato, mapanacuapijiwije pacabebiobia-exanabiabiana. Itsiata, pajamatabëcuenesaemë tsawanapae tsane, tsipaji xanë baja jamatabëcuene-amoneyabajë dowathi, ponë namatacaitorobabiaba mapanacuapijiwije, pibisiacuene pexanaeya-exanaenexa —jai Jesús pijajiwijawabelia.

Jesús pijajiwi towajëta paxa Diosojawabelia

17 ¹Jesús, pijajiwijawabelia petsipaebicujinae dowathi pejamatabëcuene-amoneyabijawa, athëbëa benaëcotsia. Nexata jumaitsi paxa Diosojawabelia:

—Axa, netocopiapata rajane baja tanetocaëjët simatacabimë jiwijawabelia tanecuene-itajëtsinexamë xanë nexënatonë, bitso ayaijamatabëcuene taxainænëcuene. Bajarapijinia pacuenia nexënatonë, tacacuene-itajëtsinexa, ayaijamatabëcuene nexainæjawa, pexaniajamatabëcuene-ata nexainænëcuene. ²Xamë rabaja netocopatame taxainænexa tanamatacaitorobisaë daxitajiwijawabelia, matababi apowerewerecaejawa tarajutsinexa daxita pamonaerajutame. ³Bajarapamatababi apowerewerecaejawa, xainaenajiwi paepatota cayapëtane xamë, caenëmë, pepoDiosonëcuenemë, xanë-ata, Jesucristonë, athëbëwetsica tane-itorobinëmëtsica mapanacuayabetsicaje.

⁴«Xanë rabaja cajamatabëcuene-itajëtatsi bitso ayaijamatabëcuene nexainæjawa mapanacuapijiwijawabeliaje, paepatota weretajë baja daxita xua nitorobame tacato-exanaenexa bajarapamonaetuatuajëta. ⁵Axa, icatsia nerajutsianame taxainænexa ayaijamatabëcuene xua najuaxainatsibeje wajanajuaponaponaejawatabeje, pamatababi abaxë ajibi mapanacuaje.

⁶«Mapanacuataje, pamonaenitapetsiwi, netocopatame tajajiwinexa, xamë picani nijajiwi. Bajarapamonaexaniawaetsia cajumecowënëta nejumeli-waisita, nitorobicuenia. Xanë nexata yapëtaeya-exanajë bajarapamonaejawabelia pacuenia xamë jamatabëcuene-itsimë. ⁷Bajarapamonaeconoxae baja, yapëtane xamëjawawerena daxitaxuanë nerajutame pepitsapaejawanë

xamëjawawerena; tapaebijawanë, ta-exanaejawanë-ata. ⁸Daxita paliwaisi netsipaebame tayapëtaeya-exanaenexa, xanë juya tsipaebajë bajarapaliwaisi bajarapamonaejawabelia. Nexata, tatsipaebiliwaisi nejumexaniatane. Bajaraxuata, yapëtane pepacuene tapatsijawa xamëjawawetsica. Nejumexaniatanenua xamë-ata athëbëwetsica tane-itorobinëmëjawatsica. ⁹Cawajëtatsi raja pamona yabara nerajutame. Apocawajëtsitsi raja pamona mapanacuapijicuene yabaraje pesiwanajamatabëxainaewi. Biji rajane cawajëtatsi, tanerajutsiwimë yabara, tsipaji bajarapamona nijajiwi. ¹⁰Daxita pamona nijajiwi, xanë-ata tajajiwi. Daxita pamona pijinia tajajiwi, xamë-ata nijajiwi. ¡Bajarapamona pecajumexaniatæxae taxa Diosomë, tane-itorobinëmëcuenetsica, daxitajiwi neyapëtane ayaijamatabëcuene taxainaewi!

¹¹»Axa, xanë baja apoponaponaenë tsane mapanacuataje, tsipaji baja ponaëjitsianë xamëjawabetsia. Itsiata baitsi jane, abaxë tajajiwi jinawapapena mapanacuataje, itsajota nawita pibisiacuene pexanaewi. Xamë, taxamë, bitso nianeconijibinë. ¡Yajawamëre tanerajutsiwimë, nesaëta newet-sinexa pibisiacuenewecua! Tojitsipajë bajarapamona caejamatabëcuene pexainaenexa waxaitsibejewaberena, pacuenia waxaitsibeje caejamatabëcuene xainatsibeje. ¹²Itsa abaxë yajawaponaponajë bajarapamona mapanacuataje, nesaëta ewetaponaponajë. Nexata, aponewecuanaxuabi caenë-ata. Itsiata, caenë naxuabiana, tsipaji tocopiapatsianatsi pacuenia baja cajena tajëwelia jumaitsi nijumeliwaisibaxutota bajaraponë yabara.

¹³»Aeconoxae baja ponaenajë xamëjawabetsia. Itsiata, abaxë taponaponatabi-epatoyo mapanacuataje, cawajëtatsi tajajiwi pejamatabë-ëthëtojawawetsina bitso pejamatabëcuenebarëyanexa, pacuenia xanë jamatabëcuenebarëyanë. ¹⁴Xanë baja tsipaebajë tajajiwi paliwaisi netocopatame tatsipaebinexa. Bajarapamona jumexaniatane bajarapaliwaisi. Nexata, tajajiwi apopejamatabëcuenejëpaexae, mapanacuapijiwi itoyatsi, tsipaji apoxainae mapanacuapijiwi pecanaëjëtsijamatabëcueneje, pacuenia xanë-ata mapanacuapijiwi pecanaëjëtsijamatabëcuene apojamatabëcuenejëpaenë.

¹⁵Apocawajëtsitsi raja, nejuitsinexa tajajiwi mapanacuawecuaaje. Biji rajane, cawajëtatsi necaranatabiabinexa dowathiwecua, ponë pijamatabëcuenebejenë. ¹⁶Pacuenia xanë apomapanacuapijinënëje, bajarapijinia pacuenia tajajiwi-ata apomapanacuapijiwinexaje. ¹⁷Taxa Diosomë tsatsianame tajajiwi mapanacuapijiwiwecuaaje, peponijajiwinexa. Nejumeliwaisi, pexaniajaili-waisita, jamatabëcueneyawenonaenae nijacuene pexanawanapaenexa. ¹⁸Pacuenia xamë bajarobame pexaniajaili-waisi tatsipaebinexa mapanacuapijiwijawabeliaje, bajarapijinia pacuenia juya, xanë-ata tajajiwi itorobajë pexaniajaili-waisi petsipaebinexa mapanacuapijiwijawabeliaje. ¹⁹Bajarapamona yabara, taponapona-epato mapanacuataje, canarajutatsi xamëjawabelia, ënejitsipaecuenia tacato-exanaenexa. Bajarapacuenia exanajë,

w 17:16 *apomapanacuapijiwinexaje*: Jesús saya pepatsinë mapanacuayabetsicaje. Nexata, apoxainae mapanacuapijiwi pecanaëjëtsijamatabëcuene. Pacujinae itapeta pijajiwi, Jesús tsata bajarapamona mapanacuapijicueneewecuaaje, paxa Dioso pijacuene pejamatabëcuene-enaenexatsi. Bajaraxuata, pijajiwi yabara pewajëtsijawata paxa Diosojawabelia, towajëta peto-ewetsinexatsi dowathiwecua, tsipaji pijajiwi apopejinawanapaewinexa mapanacuataje. Nexata, bajarapamona apopejinawanapae mapanacuapijiwi pecanaëjëtsicueniaje.

tajajiwi-ata xamējawabelia pexaniajailiwaitsita penajamatabēcuenearajutsi-nexa, ěnejitsipaecuenia pexanawanapaenexa.

²⁰ »Itsiata, apocawajětsitsi ětajajiwi yabara. Cawajětatsinua pamonae-ata bexěajawabelia nesiwanajamatabēcuenecopabijitsia xanějawaberena, pejumexaniataexae tajumeliwaisi, tajajiwi petsipaebijawata. ²¹ Nexata, cawajě-tatsi daxita bajarapamonae caejamatabēcueneliwaisi penajuaxainaenexa,^x pacuenia xaně, xamě, taxamě, caejamatabēcueneliwaisi najuaxainatsibeje. Bajarapacuenia tojitsipajě bajarapamonae caejamatabēcueneliwaisi pena-juaxainaejawa waxaitsibejejawaberena, mapanacuapijiwi pecuenetaejawa-tatsi, pejumexaniataenexa xamě athěběwetsica tane-itorobiněmēcuenetsica. ²² Xaně rajutajě tajajiwiawabelia, payaiyataejamatabēcueni, xamě nera-jutame, caejamatabēcueni penajuaxainaenexa, pacuenia waxaitsibeje caejamatabēcueni najuaxainatsibeje. ²³ Tojitsipajě tajajiwi caejamatabēcueneliwaisi penajuaxainaenexa, xaně pacuenia caejamatabēcueni xainajě bajarapamonaejawabelia. Pacuenia pijinia xamě caejamatabēcueni xainame xanějawaberena. ¡Bajarapacuenia caejamatabēcueneliwaisi itsa najuaxai-naena, daxita mapanacuapijiwije pecuenetaejawatatsi, yapětaena xamě athěběwetsica tane-itorobiněmēcuenetsica, niasiwajawanua tajajiwi, pacue-nia xaně-ata niasiwamě!

²⁴ »Axa, jitsipajě pamonae-ata nerajutame penajinawanapaenexa itsabelia ponaėjitsianě, taneyajawajinawanapaenexa, taneyapětaenexanua bitso ayai-jamatabēcueni taxainaejawa. Xamě baja cajena nacua nexanaewajěnaeya-ata, xamě niasiwamě. Bajaraxuata, ayaijamatabēcueneně nexaname.

²⁵ Axa, itsaneconi-ata aponexainaeně. Mapanacuapijiwije apocayapětae, pacuenia jamatabēcueni-itsimě. Itsiata, xaně cayapětanetsi. Tajajiwi, mapamonaeje, neyapětane baja xamě athěběwetsica tane-itorobijawamětsica.

²⁶ Xaně, tajajiwi yapětaeya-exanajě baja ayaijamatabēcueni nexainaeně-cueni. Abaxě itsiata, pewajěnaeyabelia yapětaeya-exanaponaenajě, peca-cueneyapětaeponaenexa, namata-enetsia pena-asiwanexa, pacuenia xamě niasiwamě, peyapětaenexanua tayajawaponaponaecueni —jai Jesús peto-wajětsijawata paxa Diosojawabelia pijajiwi yabara.

Jesús pijawajabitsaě jane baja waetabatsi, pebeyaxuabinexatsi

(Mt 26:47-56; Mc 14:43-50; Lc 22:47-53)

18 ¹ Jesús pewajětsicujinae paxa Diosojawabelia, pijajiwi barě-nicaba Cedrón-najato itsapanabelia. Nexata, Jesús pijajiwi barěpatajopa itsajota xaina olivobacabo. ² Bajarajota cajena, Jesús pijajiwi barěnacaetuatiaba. Bajaraxuata, Judas, Jesús pijajiwiwoně-ata, poně canajětsijitsiatsi pijawajabitsaě pecobeyabelia, yapětane bajarajota pebarěpatsijawanexa. ³ Nexata, Judas bajarajota waja-bitsaě barěpata, itsamonae-ata templobopijipolicfawi, pitorobiwitsi

^x 17:21 *caejamatabēcueneliwaisi penajuaxainaenexa*: Bajarapacuenia caejamatabēcueneliwaisi penajuaxainaexae, nexata pacuenia Jesús, Paxa Diosobeje, na-asiwabeje, bajarapijinia pacuenia Jesús pijajiwi namata-enetsia bena-asiwa. Paliwaisi Jesús, Diosobeje tsitapexaniajailiwaitsitsi, bajarapijinia pacuenia Jesús pijajiwi-ata benatocanaějěta pexaniajailiwaitsicueni. Pacuene Jesús, Paxa Diosobeje, tsitapibisiacuenetsi, bajarapijinia pacuenia Jesús pijajiwi-ata benatocanaějěta pibisiacueni.

sacerdotewi penamatacaitorobiwi, fariseowi-ata. Judas pematacapo-naewi canajetarubena espadanë, naebonë-ata. Canajetarubenana lãmparabëanë, be-isotabuqueranë-ata, penatsiwajënae-itayotsinexa.

⁴Nexata baja, Jesús pewajënaeya peyapëtaexae daxita pacuenia exa-naejitsiatsi, najetabilia pemata-enaenexa bajarapamonae. Jumaitsi bajarapamonaejawabelia:

—¿Jipatsa pajaitame? —jai.

⁵Nexata bajarapamonae jumaitsi:

—Jesús raja, Nazaret tomarapijinë, pajaitajë —jai.

Jesús nexata jumaitsi:

—Xanë rabaja maje —jai.

Judas, ponë Jesús pijawajabitsaë pecobeyabelia canajetatsi, nanuca bajarapamonaejawata.

⁶Jesús pejumaisijawata: «Xanë rabaja maje», pejaijawata, daxita petsima-xëpatsiwiitsi caewëabelia othopa irata pematabëxëpayabelia.

⁷Nexata, icatsia Jesús jumaitsi bajarapamonaejawabelia:

—¿Jipatsa nexata pajaitame? —jai.

—Jesús raja, Nazaret tomarapijinë, pajaitajë —jai bajarapamonae.

⁸Nexata Jesús jumaitsi bajarapamonaejawabelia:

—«Xanë rabaja», pacajaitsi. Nexata, xanë itsa panejaitame, pacopatsia-name mapamonaeje peponaenexa —jai pijajiwi yabara.

⁹Bajaraxua jane baja copiapata Jesús tajëwelia pejumaisijawa pijajiwi yabara: «Taxamë, pamonae nerajutame, itsanë-ata aponewecuanaxuabi tsane», pejaijawa.

¹⁰Nexata, Simón Pedro, penamaracëtaaponapona-espada, nawe-marajonotaxuabina. Muxupaebiaxuaba Malcowënënë pecujua-nenia pamuxuyorotomi, sacerdotewi pepopenamatacaitorobinë pijajiwitonë.

¹¹Nexata Jesús jumaitsi Pedrojawabelia:

—¡Nija-espada baja pewënojojawareca xataremeca! Taxa baja cajena netocopata tanebejiobia-exanaenexa. Bajaraxuata, nacaewetsianajë tanebejiobia-exanaenexa —jai Pedrojawabelia.

Jesús nutatsi sacerdotewi pepopenamatacaitorobinë pitabarata

(Mt 26:57-58; Mc 14:53-54; Lc 22:54)

¹²Wajabitsaëwi pijacapitán, pijajiwi yajawa, templobopijipolicíawia-ata, nacobenawaetabatsi Jesús. Nexata, cobecëtatsi. ¹³Caponatsi baja Anás pijaboyabelia, Caifás paxuyojawabelia. Bajarapamatacabi^y Caifás sacerdotewi pepopenamatacaitorobinë tsaponapona. ¹⁴Caifás baja cajena, pewajënaeya jumaitsi penajua-ewetsiwijawabelia Jesús

y 18:13 *bajarapamatacabi*: Copiaya Anás sacerdotewi pepopenamatacaitorobinë tsaponapona mapawainëjawa, 6-15-jawabelia d.C. (Cristo penaexanaecujinae). Anás pepitsapaecujinae bajarapanacuenibijawawecua, piopaxa, Caifás, naexana sacerdotewi pepopenamatacaitorobinëx mapawaijawataje, 18-36-jawabelia d.C. Pamatacabianëjawa Caifás sacerdotewi pepopenamatacaitorobinë tsaponapona, judiowi piasiwaxae Anás, tsitecaeya tocopatatsi penacuenibinexa sacerdotewi pepopenamatacaitorobinëcuenia, piopaxa, Caifás, yajawa. Taema Lc 3:2; Hch. 4:6. Bajaraponëbeje pitabarata Jesús nutatsi bejamatabë wai 33 d.C.-jawata.

yabara, petoxanepanaejawatsi caenë peyapijiwitonëpaenexatsi,^z daxita judíowi.

Pedro jane baja nayawajunuaxaina Jesús pijajiwitonëcuene

(Mt 26:69-70; Mc 14:66-68; Lc 22:55-57)

¹⁵Itsa baja Jesús caponaliatsi sacerdotewi pepopenamatacaitorobinë pija-boyabelia, Simón Pedro, itsanëbeje, Jesús pijajiwitonëbeje, tajëyo pënanaje-tarucabeje. Ponë^a Simón Pedro yanatatsi, yapëtanetsi sacerdotewi pepopenamatacaitorobinë. Nexata, Anas pijabopanabobaupa pewetsiwa, tocopata Pedro peyanatsinëtsi pejonenexalia, itsabelia Jesús cajunuatsi. ¹⁶Itsia, Pedro nucojopa abaxë peyacaranatsijawaxanetobaupajumawelia. Nexata, ponë Pedro yanatatsi, caewëa pitsaparena, peyapijiwicuaicuaijainexa baupa pewetsiwajawabelia. Bajarapowa nexata tocopata Pedro penajonenexalia bopanobojawabelia.

¹⁷Nexata, baupa pewetsiwa jumaitsi Pedrojawabelia:

—¿Xamë-ata tsaja Jesús apopijajiwiyajuwënënmë? —jai.

Pedro nexata jumaitsi:

—¡Jume raja! ¡Xanë raja Jesús apopijajiwitonënë! —jai Pedro.

¹⁸Bajarapaepatota, bajarapamerawi bitso cainejeba. Nexata, bajarapabota penacuenebiwi, policíawi yajawa, isoto itajuruteta bopanabota, penonopaenexa. Bajarajota, Pedro nanonopanuca bajarapamonaejawata.

Sacerdotewi pepopenamatacaitorobinë Jesús yanijobatsi,

xua yabara naneconitsia-exanaejitsiatsi

(Mt 26:59-66; Mc 14:55-64; Lc 22:66-71)

¹⁹Bo-ënëalia pijinia, sacerdotewi pepopenamatacaitorobinë, Anás, yanijoba Jesús-jawabelia pijajiwí yabara, paliwaisianë-ata tsipaebabiaba jiwijawabelia.

²⁰Jesús nexata jumaitsi Anás-jawabelia:

—Xanë tsipaebabiabajë daxitajiwijawabelia pexanaliwaisi. Tsipaeba-biabajë judíowi pijasinagogabonëjawa, templobota-ata, itsajota judíowi nacaetuatabiaba. Caeto-ata cajena muetsia apotsipaebinë. ²¹¿Detsa xuajitsia nexata neyanijobame? ¡Yanijobare pamonaejawabelia nejumetaeyabiaba tatsipaebiliwaisi! Bajarapamonae yapëtane xua yabara pexanaliwaisi tsipaebabiabajë. Nexata, cayapëtaeya-exanaena —jai Jesús.

²²Itsa bajarapacuenia Jesús jumaitsi, nexata, bajarajota penucaenë, templo-bopijipolicianë, itabarapacataxuabatsi. Bajaraponë jumaitsi Jesús-jawabelia:

—¡Pëtsa bajarapacuenia cuaicuaijamë sacerdotewi pepopenamatacaitorobinëjawabelia! —jai.

z 18:14 *peyapijiwitonëpaenexatsi*: Taema Jn 11:49-51. Caifás cujunawa romano nacuapijiwi pewerebiabijawanexa daxita judíowi, Jesús pejamatabëcueneta. Bajaraxuata, canaëjëta Jesús peyapijiwitonëpaenexatsi daxita judíowi, bajarapacuenia daxita judíowi romano nacuapijiwajabitsaë pewerewerebiabiyaniwatsi. Caifás bajarapacuenia apojumaitsi, tsipaji canaëjëta Jesús pesiwatëpaejawanexa daxita jiwi pijaneconi yabara. **a 18:15** *Ponë*: Bajaraponë Juan nayabaraju-maitsi, ponë yaquina mapaliwaisibaxutoje. Itsia, beweliamatabëcuenenë nataeya yaquina. Bajaraponë peyaquinaejawata, aponawënrubabiabi, itsamonae be-ayaijamatabëcuenenë petayaniwatsi.

²³ Jesús nexata jumaitsi policíañjawabelia:

—¡Itsa pibisiacuenia cuaicuaijanë, netsipaebare xua yabara cuaicuaijanë!
¿Detsa xuajitsia saya jema nebiame, xaniawaetsia tajumaitsijawa yabara?
—jai.

²⁴ Nexata, Anás itoroba, Jesús, pecobecëtsinëtsi, pecaponaenexatsi Caifás, sacerdotewi pepopenamatacaitorobinëjawabelia.

Pedro icatsia nayawajunuaxaina Jesús pijajiwitonëcuene yabara

(Mt 26:71-75; Mc 14:69-72; Lc 22:58-62)

²⁵ Paepatowajëto Jesús abaxë yanijobaponatsi, Pedro bopanabota nanono-panuca isotojawata. Bajarajota penubenaewi jumaitsitsi:

—¿Xamë-ata tsaja Jesús apopijajiwiyajuwënënmë? —jaitsi.

Pedro nexata nayawajunuaxainaeya jumaitsi:

—¡Jume raja! Xanë raja Jesús apopijajiwitonë —jai.

²⁶ Nexata, icatsia bajarajota sacerdotewi pepopenamatacaitorobinë pijajiwitonë, Pedro pemuxuyoropaebiaxuabinë pijamonaenë, jumaitsi:

—Xamë cajena cowë catanetsi Jesús-jawata, olivobacabojawata —jai.

²⁷ Pedro icatsia nayawajunuaxainaeya jumaitsi:

—¡Jume raja! ¡Xanë cajena apoyapëtaenë Jesús! —jai.

Itsa baja Pedro najumeweretaba bajarapacuenia pejumaitsijawa, bajara-paepatota jane baja wacara fiaba.

Jesús nutatsi Pilato pitabarata peneconitsinexatsi

(Mt 27:1-2,11-14; Mc 15:1-5; Lc 23:1-5)

²⁸ Itsa baja ajena matabi tsina, Jesús capitsapatsi Caifás pijabowecua.

Caponaliatsi nacua-ewetsinë, Pilato, pijaboyabelia, peneconitsinexatsi. Pebarë-patsicujinaetsi, pamonae Jesús peneconitsiwitsi, aponajonelia nacua-ewetsinë pijaboyalia, tsipaji bajaraponë apojudíonë. Judíowi itsa najonejitsipa apojudíowi pijabojawabelia, nexata bepenaxuirabiwicuenia nacopatsipa Dioso pitarabara. Nexata, pewënajudíowi apotocopatsitsi tsipae, penaxaenexa Pascua-fiestapijipexajawa. ²⁹ Nexata, Pilato pitsaparena. Jumaitsi judíowijawabelia:

—¿Detsa paneconi penatsixainaexae pacaparemena maponëje? —jai.

³⁰ Nexata judíowi jumaitsi:

—Itsa raja pibisiacuenia apopexanaenë tsipae, apopacatocapatsi tsipaetsi maberenaje —jai.

³¹ Nexata icatsia Pilato jumaitsi:

—¡Pacaponaremelia caewëalia! Pananeconitsia-exanaename panijacuata, pacuenia panijaliwaisi paca-itoroba pane-exanaenexa —jai.

Nexata judíowi icatsia jumaitsi:

—Paxanë baitsi jane, apopanetocopatsimë patabeyaxuabinexa itsajiwí-ata, cruzajawabelia patabematabiabarutsinexa, pijaneconi yabara —jai bajarapamonae.

³² Bajarapacuenia bajarapamonae pejumaitsijawata, Jesús tocopiapatsi jane baja, pacuenia tajëwelia nawajunupaebapona pijajiwijawabelia pebeyaxuabijawanexatsi.^b

b 18:32 pebeyaxuabijawanexatsi: Taema Jn 3:14; 8:28; 12:32.

³³ Nexata, Pilato icatsia joneya pijaboyalía. Jumaitsi Jesús-jawabelia:

—¿Xamě tsaja judíowi peponeyanacua-ewetsině? —jai.

³⁴ Jesús nexata jumaitsi Pilatojawabelia:

—¿Xamě tsaja nejamatabēcueneta neyanijobame? Itsa jume, ¿catsipaeba tsaja itsamonae xaně judíowi pepota-ewetsiněcuene? —jai.

³⁵ Pilato nexata jumaitsi:

—Xaně raja apojudíoně. Nexata, apoyapětaeně neyanacua-ewetsiněcuene yabara. Judíowi raja, caranata nijanacuapijiwi, sacerdotewi penamatacaitorobiwi-ata, cacapata maberenaje, pecaneconitsinexa xanějawaberena. ¿Detsa jane xua exaname, xua yabara cananeconitsia-exanaejitsia nijanacuapijiwi? —jai Pilato.

³⁶ Nexata Jesús jumaitsi Pilatojawabelia:

—Tayanacua-ewetsicue apomapanacuapijiwaja. Itsa ra peneta tayanacua-ewetsicue tsipae mapanacuapijiwaje, nexata paepatota judíowi newae-taba, daxita tajajiwi neyapijiwinamaxěwanitsipa, tapanepaenexa. Itsiata, tayanacua-ewetsicue apomapanacuapijiwaja cajena —jai Pilatojawabelia.

³⁷ Nexata Pilato jumaitsi:

—¿Xamě tsaja nexata jiwi newetsině? —jai.

Jesús nexata jumaitsi:

—Jājā, xaně raja jiwi ta-ewetsině, pacuenia nejumaitsimě. Bjaraxuata, patajě mapanacuayabetsicaje, jiwi tatsipaebinexa pexaniajailiwaishi. Daxita pamonaē jitsipa pexaniajailiwaishi, nenamuxuna-ewetabiaba bajarapaliwaishi —jai Jesús.

³⁸ Nexata Pilato jumaitsi Jesús-jawabelia:

—¿Detsa pacuenia nayapětane pexaniajailiwaishicue? —jai.

Pilato jane baja tocopata Jesús pebeyaxuabinexatsi

(Mt 27:15-31; Mc 15:6-20; Lc 23:13-25)

Bajarapacuenia peyanijobicujinae Jesús-jawabelia, Pilato icatsia pitsapalia bowecua. Nexata jumaitsi judíowijawabelia:

—Apocaxitarabině cajena itsacujiruneconi-ata pexanaejawa, paneconi yabara bajaraponě naneconitsijitsia. ³⁹ Pascuafiesta matacabi, xaně pacatocapitsapabiabatsi caeně, penaneconitsiwi pejebabiabibota naneconitsia peponaponaeně. Poně panewajětame tacapitsapaenexa, pacatocapitsapabiabatsi. ¿Pajitsipame tsaja patacatocopatsinexa maponěje, pajudíowimě papeca-ewetsině? —jai Pilato judíowijawabelia Jesús yabara.

⁴⁰ Nexata, bajarajota daxitajudíowi wawajai.

—¡Pětsa abaxě copatame bajaraponě! ¡Panetocapitsapaename jane Barra-bás! —jai judíowi.

Barrabás raja bitso penacobetoxotsině. Bjaraxuata, penaneconitsiwi pejebabiabibota, naneconitsiaponapona.

19 ¹ Bajarapacuenia judíowi pejumaitsixae, Pilato pijajiwi itoroba Jesús pejumaconibabenexatsi, penaneconitsiwi pejumaconitabiabimacata.

² Nexata, Jesús pejumaconibabecujinaetsi, wajabitsaě tsimata-exanatsi becoronacuenia pe-ějuwitoyoroto. Xuacujinae, mataxatatatsi. Jumaxatatatsinua peraēnaeyatsautsaucaejawa benacua-ewetsiněcuenia. ³ Nexata, wajabitsaě imoxoyoliatsi Jesús. Capocaponaeya jumaitsi tsaponae:

—¡Bitso pacatojitsipatsi newajënaeyabelia niasaëtsaponaponaejawa pajudíowi neyanacua-ewetsinë! —jai tsaponae. Xuacujinae, pecobeta itabarapacabiayuabaponatsi.

⁴ Bajarapacuenia wajabitsaë pebejiobia-exanaecujinae Jesús, Pilato nexata icatsia pitsapalia. Jumaitsi judíowijawabelia:

—Pacatocanawiarenatsi icatsia maponëje, paneyapëtaenexa apota-tocaxitajarabijawa itsacujiruneconi-ata pexanaejawa, paneconi yabara naneconitsia-exanaejitsianë —jai Jesús yabara.

⁵ Nexata pe-ejuwitoyoroto matapitsaparena. Jumapitsaparenanua peraënaeyatsautsaucaenaxatatsijawa.

Nexata Pilato jumaitsi bajarapamonaejawabelia:

—¡Baja rajane, maponë pacatonucae! —jai.

⁶ Nexata, sacerdotewi penamatacaitorobiwi, templobopijipolicíawi-ata, petaejawata Jesús, wawajai tsabuataponae mapacueniaje:

—¡Cruzajawabelia cobematabiabarutsia-exanare! ¡Cruzajawabelia cobematabiabarutsia-exanare! —jai tsaponae Jesús yabara.

Pilato nexata jumaitsi bajarapamonaejawabelia:

—¡Paxamë pacaponaremelia, panijacuata cruzajawabelia panecobematabiabarutsinexa, tsipaji raja xanë, apocaxitjarabinë itsacujiruneconi-ata pexanaejawa! —jai Pilato.

⁷ Nexata bajarapamona jumaitsi Pilatojawabelia:

—Mara ponë Dioso apopejitsipaecuenia jumaitsije: «Xanë raja Dioso pexënatonë», jai. Bajarapacuenia pijacuata Dioso pexë nato penaexanaexae, bajarapaneconi yabara, betëpa. Paxanë, pajudíowinë, patajaliwaisita, pane-itoroba bajarapejumaitsiwi patabeyaxuabinexa —jai judíowi Jesús yabara.

⁸ Pilato itsa jumetane xua bajarapamona jumaitsi Jesús yabara, nexata bitso junawa.^c ⁹ Nexata, icatsia pijaboyalia barëjoneya Jesús. Yanijoba icatsia Jesús-jawabelia.

—¿Detsa werena nexata neponaenë? —jai.

Itsiata, Jesús apojumepitsi.

¹⁰ Nexata Pilato jumaitsi:

—¿Detsa xuajitsia aponejumepitsimë? ¿Apoyapëtaemë, tsipaji mapanacua ta-ewetsinëcueneje? Nejamatabëcuenecejëpa raja ta-itorobinexa tajajiwi cruza-jawabelia pecacobematabiabarutsinexa, itsa jume, pecacopsinexa —jai Pilato.

¹¹ Jesús nexata jumaitsi:

—Itsa Dioso apocatocopsi tsipae nenamatacaitorobisaë nexainaenexa, nexata xanëjawaberena-ata apocacjëpae tsipae tane-itsacueniabinxamë. Itsiata baitsi jane, ponë necanjeta xamë necobeyabelia, bitso naneconita Diosojawabelia xamë matatoxenetsia —jai Pilatojawabelia.

c 19:8 junawa: Pilato junawa, tsipaji canaëjëta Dioso pewerebiabijawanexatsi daxita pijabopi-jiwi yajawa, itsa beyaxuabia-exanaejitsipatsi Dioso pexë nato, judíowi pejitsipaecuenia. Romano nacuapijiwi, jumexaniantane ayaibitsaëto diosowi pejinawanapaewi athëbëtatsia Nexata, canaë-jëta Dioso bajarapamonaeyajuwënëne saya. Jumexaniantanenua bajarapadiosowi peyajawa-ponaponaecujawa jiwituatuajëta itsajawata. Nexata, nacua-ewetsinë itsa bejiobia-exanaejitsipa bajarapadiosowi pijamonaeyajuwënëne, bajarapadiosowi juya yamatamotsiya werebiabijitsipa penaneconitsinë, pijabopijiji yajawa. Bajaraxuata, Pilato jamatabëjumaitsi: «Jesús pepacuenie itsa Dioso Pexë nato tsipae, ayaineconi natsi-exanaejitsipajë, itsa beyaxuabijitsipajë bajaraponë», jamatabëjai Pilato Jesús yabara.

¹²Bajarapacuenia Pilato itsa jumetane Jesús pejumaitsijawa, nexata picani jamatabëcopata. Itsiata baitsi jane, judíowi wawajai Jesús pecopat-siyaniwatsi. Jumaitsi:

—Bajaraponë raja nawajunupaeba penaexanaejawanexa jiwi peyanacua-ewetsinë. ¡Nexata, itsa copatsianame maponëje, naneconitsianame nija-tuxanenë César-jawabelia, ponë Romano nacua pepopewetsinë! Pajiwi nawajunupaeba pijacuata peyanacua-ewetsinëcuene, bajarapajiwi César pijawajabitsaëjiwi. Nexata, necopatsijawata Jesús, naexanaename jane baja pepowajanacayanacua-ewetsinë pijawajabitsaënëmë —jai judíowi Pilatojawabelia.

¹³Nexata, Pilato itsa jumetane bajarapacuenia judíowi pejumaitsijawa, eca tribunal-jawata, xuata nacua-ewetsinë ecabiaba, jiwi itsa naneconitsia-exanaejitsia. Pataxunae hebreojumeta pewënë Gábata, bajarapataxunae pirafaratsi-ira. Nexata, Pilato itorobeca pijajiwi, pijabowecua pecapitsapae-nexatsi Jesús. ¹⁴Pascuafiesta pejonematacabinexa, pewajënaeya pamata-cabi, matoneje, bajarapacuenia Jesús exanatsi. Nexata, Pilato jumaitsi tse-cae judíowijawabelia:

—¡Mara nucaje papeca-ewetsinëje! —jai Jesús yabara.

¹⁵Itsiata, bajarapamonae wawajai.

—¡Beyaxuabia-exanare! ¡Cruzajawabelia cobematabiabarutsia-exanare! —jai tsaponae judíowi.

Pilato nexata jumaitsi:

—¿Pajitsipame tsaja cruzajawabelia tacobematabiabarutsia-exanaejawa papeca-ewetsinëmi? —jai.

Nexata, sacerdotewi penamatacatorobiwi jumaitsi Pilatojawabelia:

—Paxanë raja apopaxainaenë itsanë patane-ewetsinënexa. Caenë raja Romano nacua pewetsinë paxainajë pepopatane-ewetsinë —jai sacerdotewi penamatacatorobiwi.

¹⁶Nexata, baja Pilato rajuta judíowi pecobeyabelia, Jesús pecobematabiabarutsinexatsi cruzajawabelia. Itsiata, itoroba pijajiwi wajabitsaë, Jesús pecaponaenexatsilia petsutojumabelia.

Jesús jane baja cruzajawabelia cobematabiabarutatsi

(Mt 27:32-44; Mc 15:21-32; Lc 23:26-43)

¹⁷Bajarajotawecua, wajabitsaë Jesús caponaliatsi, pacruzajawabelia cobematabiabaruttsijitsiatsi natsicaponaeya-exanatsi. Pataxunaeyabelia caponatsi, pewënë Jiwimatasipatsuto. Hebreojumeta pijinia Gólgota. ¹⁸Bajarapatsuto-jumata, cruzajawabelia jane baja cobematabiabarutatsi. Anijanëbeje yajawa cobematabiabarutatsi. Caenë canacujitsia pijacruzata saicaya rutaponatsi. Itsanë ruca Jesús pecujuanenia, itsanë pijinia petsawenonenia. ¹⁹Pilato pijajiwi itoroba petoyaquinaenexatsi tablapayojumata mapejumaitsicueniaje: «Mara ponëje Jesús, Nazaret tomarapijinë, judíowi pepopeyanacua-ewetsinë», pejai-jume. Nexata, itoroba pijajiwi, bajarapatablapayo petomatabiabarutsinexatsi, Jesús pematabocotomatatsënëyo. ²⁰Patsutojumata Jesús cobematabiabarutatsi cruzajawabelia, eca imoxoyo tomarawecua. Bajaraxuata, judíowi ayaibitsaëto-xaneto tomarapijiwi leba bajarapa-itane. Bajarapa-itane yaquinaruta acueyabi pawirijumetabeje: hebreojumeta, griegojumeta, latín-jumeta-ata.

²¹ Nexata, sacerdotewi penamatacaitorobiwi, petaerutsijawata peyaquinaeya-exanae-itaneto, jumaitsi Pilatojawabelia:

—Apoxanepanae raja neyaquinarutsia-exanaejawa mapejumaitsi-itaneje. «Mara ponëje, judiowi pepopewetsinëje», pejai-itane. ¡Biji rajane, icatsia yaquinarutsia-exanare mapejumaitsi-jumeje: «Mara ponë pijacuata nayabarajumaitsije: ‘Xanë raja judiowi pepotawetsinë’, nayabarajai», pejai-itane yaquinarutsia-exanare! —jai Pilatojawabelia.

²² Nexata, Pilato jumaitsi sacerdotewi penamatacaitorobiwijawabelia:

—Pacuenia yaquinarutsia-exanajë, bajarapacuenia baja jema rucae —jai.

²³ Wajabitsaë pecobematabiabarutsicujinaetsi cruzajawabelia, Jesús pena-xatatsijawami, xua jumaponapona, wajabitsaë nota. Cuatro xuabeje tsanaeya jeba. Caejawa, caenë canacujitsia pitaponaejitsia. Saicaya tsatabuata itsa-jawa, xua Jesús naxatatabiaba, piapijawareca. Bajaraxua apoxinae pejoro-caeucene. Pecuejawa saya caepanacujinae. ²⁴ Nexata wajabitsaë najumaitsi:

—Apotiticae tsanetsi bajaraxua. Canamuxusitsianatsi be-ibotoxi, wajaya-pëtaenexa ponë bajaraxua pitsijitsia —najai wajabitsaë.

Bajarapacuenia wajabitsaë itsa exana, Jesús jane baja tocopiapatatsi pacuenia baja cajena Dioso pejumeliwaisibaxutota, tajëwelia jumaitsi Mesías penaxatatsijawa yabara. Bajaraxua yabara jumaitsi mapacueniaje:

«Natsicobetsanaena tanaxatatsijawa. Canamuxusitsiana be-ibotoxi, peyapëtaenexa ponë pitsijitsia»,^d jai baja cajena tajëwelia Dioso pejumeliwaisibaxutota.

Nexata, wajabitsaë canamuxusita be-ibotoxi, peyapëtaenexa ponë pitsijitsia piapijawareca, Jesús penaxatatsijawami.

²⁵ Pacujinae abaxë Jesús athëbëyo ruca cruzata, pebëxëpanata nubena acueyabi powamaxëto ëMariawënëwanë. Itsawa Jesús pena. Itsawa Jesús penawa, Cleofas pijawa. Itsawa María, Magdala tomarapijiwa. ²⁶ Nexata, Jesús itsa taerucaica, taenutsica pena, pijajiuitonë bitso piasiwane^e yajawa, pena pemuxuneneta penucaejawa. Jumaitsi penajawabelia:

—Ena, ponë nuca nemuxuneneta, nexënatocuenia taename —jai.

²⁷ Xuacujinae, jumaitsi pijajiuitonëjawabelia:

—Mapowaje be-enacuenia taename —jai Jesús, cruzata perucaenë.

Bajarapaepatota pejumaitsicujinae, bajaraponë pijaboyabelia barëpona Jesús pena, pena-ecaenexa pijabota.

Jesús jane baja tëpa

(Mt 27:45-56; Mc 15:33-41; Lc 23:44-49)

²⁸ Bajarapacuenia penajawabelia pejumaitsicujinae, Jesús baja cajena, yapëtane petocopiarucaejawatsi daxita pacuenia tajëwelia wajunupaebatsi Dioso pejumeliwaisibaxutota. Nexata, pecopiarutsinexa, xua abaxë tosai-catsi petocopiapatsijawanexatsi, jumaitsi mapacueniaje:

—Mera bitso jitsipajë —jai Jesús.

²⁹ Bajarajota, pewënëcaewaxi ya-eca piijatuvinora. Nexata, waja-bitsaënë pita hisopona. Bajaraponaëbo-upita cëtaruta esponjajawa.

d 19:24 Taema Sal. 22:18. e 19:26 bitso piasiwane: Bajarapacuenia Juan nayabarajumaitsi, beweliamatabëcuenenë nataeya.

Bajaraponaebo-upita cêtaruta esponjajawa. Bajarapa-esponjajawa jabuta bajaraporayalia. Xuacujinae tsicuiboyotsiatsi picani, Jesús petsutsuninexa. ³⁰Pepajanicuujinae bajaraxua, Jesús jumaitsi:

—Daxita rajane baja weretajê ta-exanaejawa —jai. Nexata, piasaējumali perajutsicujinae paxa Diosojawabetsia, irataeya tēpanajereca.

Jesús peyenecacuatsijawatsi becuererebota

³¹Pascuafiesta bitso imoxoyo pejonewajēnaeyota, pecopiapopaejawanexa Jesús tēpa. Bajarapaepatota, judfowi fiestawajēnaeya nacuenexaniawaeta, tsi-paji caniwio-epatota, totaxuxuabijitsiatsi penacuera-ewetsimatacabinexa. (Bajarapapenacuera-ewetsimatacabi, bitso peyaiyataematacabi judfowinexa). Bajaraxuata, judfowi apojitsipae Jesús-bana baja matawējēa perubenaejawa cruzata penacuera-ewetsimatacabijawabelia. Nexata, bajarapamonae wajēta Pilatojawabelia, pijajiwi wajabitsaē pitorobinexa, pesi-epatsicababenexa cruzajawata perubenaewi, bepijia petēpaenexa. Nexata baja, itsa tēparubena, bepijiayo penotsinexatsitsica cruzawecua, pecaponaenexatsi itsajawabelia.

³²Nexata, wajabitsaē itsa ponalia, Jesús peyajawacobematabiabarutsinētsi-beje asaēbeje abaxē tsarucae. Bajaraxuata, copiaya itsanē si-epatsicabiabatsi. Xuacujinae, icatsia itsanē si-epatsicabiabatsi. ³³Itsiaata, wajabitsaē itsa cujibalia Jesús, taerutatsi baja petēpaenē. Bajaraxuata, aposi-epatsicabiabatsi.

³⁴Itsiaata, wajabitsaēwiyajuwēnēnē becuererebota Jesús yenecacuatatsi. Bajarapawajēnēyarena pitsapa pijana, mera yajawa. ³⁵Xanē raja, Juannē, tataenē, pacatoyaquinatsi mapaliwaisije. Bajaraxuata, yapētaniiji bajarapacuenē pexaniajaicuenē. Nexata, bajarapaliwaisi pacatoyaquinatsi, paxamē-ata panejumexaniataenexa. ³⁶Bajarapacuenia Jesús aposi-epatsicabiabitsi, petocopiapatsixaetsi pacuenia baja cajena Dioso pejumeliwaisibaxutota tajēwelia jumaitsi Mesías yabara. Bajaraxua yabara jumaitsi mapacueniaje: «Caesitoyo-ata aposi-epatsicabiabi tsanetsi»,^f jai baja cajena tajēwelia Dioso pejumeliwaisibaxutota. ³⁷Itsabaxutota pijinia jumaitsi mapacueniaje: «Bajarapamonae taena pecacuat-siwajēnētsi»,^g jai baja cajena Mesías peyenecacuatsijawanexatsi yabara.

Jesús petēpaenē mēthētatsi

(Mt 27:57-61; Mc 15:42-47; Lc 23:50-56)

³⁸José, Arimatea tomarapijinē, judfowi pewetsiwiwajuwēnēnē. Bajaraponē muetsia jumexaniataeponapona Jesús, Cristocuene. Itsiaata, aponacuene-itajētsi pejumexaniataejawa, pecujunawixae penajua-ewetsiwi judfowi. Jesús itsa baja tēpa, José pona Pilatojawabelia pewajētsinexa Jesús petēpaenē petocopsijawatsi, cruzajawawetsica pepitsinexatsica. Pilato baja jejai. Nexata, José lia Jesús perucaejawabelia, pecaponaenexa jane baja Jesús petēpaenē pemēthētsinexa. ³⁹Nicodemo, ponē merawi pona Jesús-jawabelia pebarēcuai-cuaijainexa, bajaraponē-ata judfowi pewetsiwiwajuwēnēnē. Nexata, bajaraponē nalia José pepēta. Caponabeje treinta pakilobeje petuxujuwinanijawanēta^h pematajērēabibeno. ⁴⁰Nexata, José, Nicodemobeje, cruzajawawetsica

f 19:36 Taema Sal. 34:20. g 19:37 Taema Zac. 12:10; Apoc. 1:7. h 19:39 petuxujuwinanijawanēta: Mirranani, áloenanibeje, yacaranata bepijiayo petēpaenē peperabētsabanaeyaniwa, piatuxubejeyaniwanua.

pitsicabeje Jesús petëpaenë. Bajaraxuacujinae, petuxujuwibenonëta petsi-othocaepanaxita cacëbabeje. Xuacujinae, piapiasábanapanata mataquionaya matakacëbabeje daxitanëreca. Bajarapacuenia exanabeje, tsipaji judíowi baxaniawaeta petëpaejiwiyo, pemëthëtsinexa bajarapacuenia. ⁴¹ Itsajota Jesús cruzajawabelia cobematabiabarutatsi, bajarajota imoxoyo pe-ubinaenë ayaiabacabaxaneto eca. Bajarapabacabojawata, Jesús petëpaewajënaeya, José cajena exanaeya-exanabuata piniji-ibowaju ibo-itapanjanitojawata, pebuata-ponaenexa pijamonaewiwi itsa totëpatsi. Nexata, bajarapa-ibowajuta abaxë itsajiwiyo-ata petëpaejiwiyo apobuatsitsi. ⁴² Nexata, bajarapa-ibowajualia José, Nicodemobeje, Jesús petëpaenë buatabeje, tsipaji bajarapa-ibowaju boca imoxoyo. Judíowi-ata baja penacuera-ewetsimatacabinexa, bitso baja imoxoyo pejonenexa. Bajaraxuata, bajarapa-ibowajualia Jesús petëpaenë buataatsi.

Jesús icatsia asaë petëpaecujinae

(Mt 28:1-10; Mc 16:1-8; Lc 24:1-12)

20 ¹ Judíowi baja penacuera-ewetsimatacabi pewaterewerecaecujinae, copiaya matakabi, domingo, bajayacunua, ajenā matakabi tsarucaponae, abaxë paepatota aitaquiri, María, Magdala tomarapijiwa, pona Jesús petëpaenë pebuatsi-ibowajutsijawabelia. Nexata, tane ibo-panaxanetomi petixitanutsijawalia pemëthëtsi-ibowajutsiweëpawecua. ² Nexata, bajarapowa cujinaejinarena itsaberena ponaponabeje Simón Pedro, itsanë-ata Jesús pijajiwitonë, ponë bitso piasiwänë. Nexata jumaitsi bajaraponëbejajawabelia:

—Wajatuxanenëmi raja cowë jutatsi pebuatsi-ibowajutsiweëcua. Apopaya-pëtaenë⁴ raja itsabelia icatsia buataatsi —jai María.

³ Nexata, Pedro, Jesús pijajiwitonëbeje, ponabeje Jesús pebuatsi-ibowajutsijawabelia. ⁴ Najuacujinaejinaliabeje. Itsiata, itsanë Jesús pija-jiwitonë bitsojinaeya cujinaejinalia, Pedro matatoxenetsia. Bajaraponë copiaya palia Jesús pebuatsi-ibowajutsijawabelia. ⁵ Itsa bajaraponë nabëxëtsutsiaya naëcolia ibowaju-ënëalia, taeyabualia Jesús daxitanë pematakacëbipanamitsireca pebocaejawa. Bajaraponë itsiata abaxë apojonelia. ⁶ Bajaraxuacujinae, Simón Pedro cotocaewi pata. Nexata, joneya ibowajualia. Tanenua Jesús pematakacëbipanamitsireca pebocaejawa bajarajota. ⁷ Papanaxita matakacëbatsi, saicaya weëcuaquiobejeba. Papinijisábanapanaxanetota pijinia Jesús matakacëtatsi, saicayajawata quionabuata xaniawaetsia. ⁸ Nexata, ponë copiaya pata Jesús pebuatsi-ibowajutsijawata, najoneya jane baja. Tane pacuenia Jesús weëcupitsapa bajarapa-ibowaju. Nexata jane baja, bajaraponë jumexaniatane xania-waetsia Jesús icatsia piasaëjawa petëpaecujinae. ⁹ Abaxë picani bajara-ponë apojumeyapëtae. Bajarapaepatota, matapania jumeyapëtane pacue-nia Dioso pejumeliwaisibaxutota jumaitsi Jesús petëpaecujinae, icatsia piasaëjawanexa. ¹⁰ Bajaraxuacujinae, Jesús pijajiwitonëbeje nawiatabeje baja pijaboyabelia.

i 20:2 Apopayapëtaenë: María, Magdala tomarapijiwa, barëponatsi itsawaxi. Taema Mar. 16:1-2; Lc 24:1-10.

Jesús tsitanaitajëta petëpaecujinae María, Magdala tomarapijiwajawabelia

(Mc 16:9-11)

¹¹ María nuenuca Jesús petëpaenë pebuatsi-ibowajujumapënëwelia. Ya-itaxutonueya nabëxëtsutsiaya, naëcolia ibowaju-ënëalia. ¹² Nexata, penaëcotsijawatalia taeyelia anija-ängel-nëbeje, penioponaejawa penaxatatsinëbeje. Ecabeje itsajota picani Jesús petëpaenë buata-tsi. Itsanë eca Jesús pematocabocotomijawawereca. Itsanë pijinia eca petaxumijawawetsina.

¹³ Nexata, ángel-nëbeje jumaitsibeje Maríajawabelia:

—¿Detsa xuajitsia nuame? —jaiibeje.

María nexata jumaitsi:

—Tajatuxanenëmi cowë itsamonae jutatsi, tsipaji ajibi tsarucae. Nexata, apoyapëtaenë itsabelia icatsia buata-tsi —jai ángel-nëbejajawabelia.

¹⁴ María ajenañ najumeweretanañajelia pejumaitsijawa, napënëyorotsiaya naëcolia peponaenexa. Bajarajota, taenuta Jesús penucaejawa. Itsiata, abaxë apoyapëtae Jesús-cuene.

¹⁵ Nexata Jesús jumaitsi Maríajawabelia:

—¿Detsa xuajitsia nuame? ¿Jipatsa jaitame? —jai.

María saya Jesús yabara jamatabëjumaitsi: «Mameta ponëje majotaje pitabëtsinaejawanë pewetsinë», jamatabëjai. Bajaraxuata, jumaitsi Jesús-jawabelia mapacueniaje:

—¡Xamë itsa jutame, necaponaenexa itsajawabelia, Jesús petëpaenë, net-sipaebare, tasiwaponanexa, tapitsinexa itsajota buata-tsi! —jai María.

¹⁶ Jesús nexata junataxuaba María pewënëta.

—¡María! —jai Jesús.

María nexata napënëyorolia Jesús-jawabelia. Judíowi pijajumeta jumaitsi Jesús-jawabelia:

—¡Raboni! —jai. «Raboni», itsa jai hebreojumeta, mapejumaitsijumeje: «Xamë tanecujarubinëmë», pejaijume.

¹⁷ Jesús nexata icatsia jumaitsi Maríajawabelia:

—¡Pëtsa nejayaremena, tsipaji raja abaxë apoponaenë taxa pe-ecaejawabetsia! ¡Ponare jane tajajiwijawabelia, netsipaebinexa taponae-jawanexa taxajawabetsia, Ponë, paxamë-ata pane-axa! Ponë tajaDioso, bajaraponë paxamë-ata panijaDioso —jai Jesús Maríajawabelia.

¹⁸ Nexata, María, Magdala tomarapijiwa, pona baja petsipaebinexa Jesús pijajiwijawabelia, pacuenia tane pepopetuxanenë Jesús. Tsipaebanua daxita pacuenia Jesús jumaitsitsi.

Petëpaecujinae, Jesús tsitanaitajëta pijajiwijawabelia

(Mt 28:16-20; Mc 16:14-18; Lc 24:36-49)

¹⁹ Copiyamatacabi, domingo, pamatacabi María tane Jesús pia-saënë petëpaecujinae, bajarapamerawí, daxita Jesús pijajiwí nacaetuata bo-ënëta. Daxita baupanë xaniawaetsia nayabaupaxataba, tsipaji cuju-nawa judíowi. Jemata Jesús tsitanaitajëta pijajiwituatujëta. Jumaitsi pijajiwijawabelia:

—¡Paxamë pajamatejemamëre! ¡Pëtsa pajunawame! —jai.

²⁰ Bajarapacuenia Jesús pejumaitscujinae, tsitajëta pecobewajënë, peyenewajënëbeje pijajiwijawabelia. Bajarajota, Jesús pijajiwi bitso barëya icatsia, petaexae pijatuxanenë.

²¹ Nexata icatsia Jesús jumaitsi:

—¡Paxamë pajamatejemamëre! ¡Pëtsa pajunawame! Pacuenia taxa nitoroba, bajarapacuenia juya paca-itorobatsi jiwijawabelia pexanialiwaissi panetsipaebaponaenexa —jai pijajiwijawabelia.

²² Nexata, Jesús, asaëyata uxunelia pijajiwi pematatsënëalia. Jumaitsi bajarapamonaewawabelia:

—¡Espíritu Santo pacopiapiire!¹ ²³ Nexata, paxamë, pajiwi pasiwajamatabëcueneceawame pibisiacuene pexanaeneconi, bajarapajiwi Dioso baja wecua-ajibia-exanatsi^k bajarapaneconi. Pajiwi pijinia apopasiwajamatabëcueneceawimë, bajarapajiwi Dioso baja apowecua-ajibia-exanaetsi bajarapaneconi^l —jai Jesús pijajiwijawabelia.

**Jesús pijajiwitonë, Tomás, cuene-aebatsi picani
icatsia piasaëjawa petëpaejawawecua**

²⁴ Jesús tsitanaitajëta pijajiwijawabelia, Tomás, pijabitsarucaejawata, bajarapamonaeyajuwënë. Tomás pijinia itsawënë Sapalanë. ²⁵ Nexata, bajaraponë itsa pata, itsamonae penajuawi jumaitsi Tomás-jawabelia:

—Pacatsutanetsi rabaja necowëta wajatuxanenë Jesús —jai.

Nexata, Tomás jume-aebiaya jumaitsi:

—Matapania taenajë cruzajawabelia clavota pecobematabiabarutsiwajënëtsibeje, nacobesibëtsianajë pecobewajënëyalia, peyenewajënëyalia-ata, nexata jane baja, matapania jumexaniataenajë xua panetsipaebame —jai Jesús yabara.

²⁶ Bajaraxuacujinae, Jesús pijajiwi icatsia bota nacaetuata, ocho pamatacabibecujinae. Tomás bajarapamatacabi jane baja naponapona. Nexata, daxita baupanë icatsia xaniawaetsia nayabaupaxataba. Jemata Jesús, icatsia tsitanaitajëta pijajiwituatuajëta. Jumaitsi pijajiwijawabelia:

—¡Paxamë pajamatejemamëre! ¡Pëtsa pajunawame! —jai Jesús.

²⁷ Xuacujinae, jumaitsi Tomás-jawabelia:

—¡Tomás, taema rajane baja tacobewajënëbeje! ¡Bajarajane, nacobesibëtsiaremelia, tacobewajënëyalia! ¡Nacoberowire, daxitacobe tayenewajënëyalia nebëtsinexa! ¡Pëtsa baja xuacujinae, jume-aebame! ¡Jumexaniataema jane baja, pecatsipaebijawa icatsia tasaëjawa tatëpaeucujinae! —jai Jesús.

j 20:22 *pacopiapiire*: Aponayapëtae pepacuene xua yabara Jesús jumaitsi bajarapacuenia. Itsiata, yapëtanetsi apopetsijamatabë-ecaejawatsi Espiritu Santo yabara, tsipaji Hch. 1:4-jawata Jesús itoroba pijajiwi, pewetsinexa Jerusalén tomarata, Espiritu Santo pepatsijawabelia. Xuacujinae, Hch. 2:1-4-jawata nacayapëtaeya-exana Espiritu Santo matapania jane baja petsijamatabë-ecaejawa bajarapamona. Bajaraxuata, itsamonae canaëjëta Jesús bajarapacuenia pejumait-sijawa, mapacuenejawanë yabaraje: 1) Perajutsinexa penamatacaitorobisaë pijajiwijawabelia, pejumenamatamotsinexa Jesús pijajiwituatuajëta. 2) Itsa jume, pejamatabëcuene-aitawaya-exanaenexa Diosojawabelia, pacuenia Dioso exana Adán-pijinëjawabelia, piasaëya-exanaejawata atsatonëmi. 3) Itsa jume, pejamatabëcuene-xaniawaetsinexa, pecopiapitsinexa Espiritu Santo pepatsimatacabita. k 20:23 *wecua-ajibia-exanatsi*: Espiritu Santo pejamatabëcuene-yaweno-naejawatsi, bajarapamona peyapëtaeya-exanaenexa pamonae Dioso wecua-ajibia-exanatsi baja pibisiacuene pexanaeneconi. (Rom. 8:16.) Nexata, bajarapamona yapëtaena pamonaejawabelia toxanepanatsi pesiwajamatabëcueneceawinexa pijaneconi. Caenë Dioso caëjëpatsi bajarapaneconi pewecua-ajibia-exanaenexa. l 20:23 Taema Mt 9:2-8; 16:19; 18:18.

²⁸ Nexata, Tomás jumaitsi Jesús-jawabelia:

—¡Tajatuxanenēmē, tajaDiosomē! —jai.

²⁹ Jesús nexata, icatsia jumaitsi:

—Tomás, aeconoxae rajane baja jumexaniataneme pecatsipaebijawa icatsia tasaējawa tatēpaecujinae, tsipaji baja nijacuata netaneme. Xamē matatoxenetsia bitso itsamonae nesiwajamatabēcuenebarēya tsane. Bajarapamonae aponetae-ata, itsiata jumexaniatane petsipaebijawatsi icatsia tasaējawa tatēpaecujinae —jai Jesús Tomás-jawabelia.

Pajamatabēcuene yabara Juan yaquina mapacuyalatoje

³⁰ Peponaponaematacabi abaxē mapanacuataje, Jesús exanaponaponaenae orijibia itsajawanē pijajiwi pitabēta, pinijicuene Dioso pesaēta pexanaejawanē, mapabaxutotaje apoyajawayaquinaenē bajarapacuenejawanē yabara. ³¹ Itsiata, pacuenejawanē yabara pacatoyaquinatsi, paxamē panejumexaniataenexa Jesús raja Cristo^m, Dioso pexēnato. Pacatoyaquinatsinua, panesiwanajamatabēcuenecopabinexa bajaraPonējawabelia, panexainae-nexa matacabi apowerewerecaejawa.

Jesús petēpaecujinae, icatsia tsitanaitajēta siete ponēbeje pijajiwiawabelia,

21 ¹ Itsamatacabianē pepanepaecujinae, Jesús icatsia tsitanaitajēta pijajiwiawabelia Tiberias pucaxaneto-itapata, mapitsicuenejawataje.

² Jesús papijajiwinē panajuajinawanapajē mapamatabēxēyoje: Simón Pedro, Tomás, ponē wēnērubatsi itsawēnē, Sapalanē, Natanael, Caná tomarapijinē, Galilea nacuata pe-ecaetomara, xanē,ⁿ tamatapijinē-ata, Zebedeo papexēnatonēnēbeje, itsanēbeje-ata. ³ Nexata Simón Pedro panejumaitsi:

—Dujuai raja yamatajucaejsianē —panejai.

Nexata paxanē pajumaitsinē:

—Paxanē-ata panaponaenajē xamēta —pajanē.

Nexata, pucaxanetojawabelia paponajē. Bajarajotalia jerata panaropobajē. Itsiata, bajarapamerawi caenē-ata dujuainē apopayamatajutsinē cajena.

⁴ Ajena baja matacabi tsina, Jesús panetsitanaitajēta Tiberias pucaxaneto-itapata. Itsiata, apopayapētaenē picani Jesús-cuene. ⁵ Nexata Jesús panejumaitsi:

—¿Jica? ¿Dujuai apopayamatajutsimē, caenē-ata? —panejai.

Nexata pajumaitsinē Jesús-jawabelia:

—Ajibi cajena —pajanē.

⁶ Nexata icatsia Jesús panejumaitsi:

—¡Dujuai paneyamatajucaejawa, panecujuanenia pamuxunene, pacopare-meca jerayenepanareca! Bajarapacuenia payamatajutsianame —panejai.

Nexata, Jesús papijajiwinē dujuai patayamatajucaejawa bajara-pacuenia pacoparecajē. Xuacujinae, patajutsinexatsina menewecua

m 20:31 Cristo: «Dioso athēbēwetsica pitorobinētsica, jiwi pecapanepaenēnexa», pejaiwēnē.

n 21:2 xanē: Bajarapacuenia Juan nayabarajumaitsi, pematapijinē Santiagobeje.

apopanecuenecaējēpae, tsipaji bitso ayaijawa dujuai payamatajutajē.

⁷Nexata, Jesús pijajiwitonē, ponē Jesús bitso asiwa, jumaitsi Pedrojawabelia:

—¡Wajatuxanenē tsaena rabaja maje! —jai.

Nexata, Simón Pedro caejumetaetabi bajarapacuenia pejumaitsiyawa Jesús yabara, jumasa penucaenē, naxatataxuaba penaxatatsijawa. Jopanucalia menialia, naxatsiayo pepatabinexa Jesús-jawabelia. ⁸Paxanē patanacopabiwi jerata, papatajē tajetabo-itapayabelia, patayarobotanajetarubenaecuenia dujuai peyamatajucaejawata, tsipaji bitso panetowēnēca. Tajē picani apopayarubenaenē mene-itapawecua; cien pametrobejecuenia saya. ⁹Itsa panonobajunajē tajetabuabelia, pataeyetajē isoto-ita-ire! Bajarapa-isoto-ita-irejumawereca pataeyabuatajē dujuainē, pan-bēanē yajawa.

¹⁰Nexata Jesús panejumaitsi:

—¡Aeconoxae, paneyamatajutsi dujuai yajuwēnējawa, wajasebinexa! —panejai.

¹¹Pedro nexata jera-ēnēaberunareca. Tajetabuaberena yarobobocarena dujuai peyamatajucaejawa. Nexata, bajaraxua dujuai wēnēca pinijidujuainēanē. Ciento cincuenta y tres ponēbeje. Itsiata, dujuai peyamatajucaejawa, ayaijawa-ata, apoya-ucu-ucuae.

¹²Nexata Jesús panejumaitsi:

—¡Naxatsia! Wepaxaename —panejai.

Itsanē-ata Jesús papijajiwiyajuwēnēnēnē apoyanijobi Jesús-jawabelia.

«¿Jipatsamē?», apojai, tsipaji baja payapētaniji patajatuxanenē Jesús-cuene.

¹³Jesús nexata cujilia bajarapa-isoto. Pita baja pan-bēanē. Panetsicobetsana. Bajarapacuenia icatsia dujuaijawanē-ata panetsicobetsana. ¹⁴Bajarapacuenia, penamatacotsicujinae petēpaejawawecua, Jesús acueyabijawa panetsitanaitajēta papijajiwīnējawaberena.

Jesús itoroba Simón Pedrojawabelia pijajiwī peto-ewetsinexatsi

¹⁵Pataxaeweretsicujinae, pesaicayojawabelia Jesús jumaitsi Simón Pedrojawabelia:

—Simón, Jonás pexēnatomē, ¿xamē tsaja bitso niasiwamē mapamonae tane-asiwajawa matatoxenetsiaje? —jai.

Pedro nexata jumaitsi:

—Jājā. Xamē rabaja nejamatabēcueneyapētaneme tacajitsipaejawa —jai Jesús-jawabelia.

Jesús nexata jumaitsi Pedrojawabelia:

—Nexata, pacuenia oveja pewetsinē, xaniawaetsia ba-eweta, bajarapijinia pacuenia xamē xaniawaetsia neto-ewetabiabianame pamonaē ajenā nesiwanajamatabēcuenecopaba. Bajarapamonae taniji betaja-oveja, pejananēxi —jai Jesús.

¹⁶Nexata icatsia Jesús jumaitsi Pedrojawabelia:

—Simón, Jonás pexēnatomē, ¿xamē tsaja niasiwamē? —jai.

Pedro nexata icatsia jumaitsi:

—Jājā. Xamē rabaja nejamatabēcueneyapētaneme tacajitsipaejawa —jai.

Jesús nexata icatsia jumaitsi:

—Nexata, xamē neto-ewetsianame tajajiwī, pamonaē taniji betaja-ovejamonae, tanesiwanajamatabēcuenecopabiwi xanējawaberena —jai.

¹⁷Icatsia, matawējëa Jesús jumaitsi Pedrojawabelia:

—Simón, Jonás pexênatomë, çxamë tsaja nejitsipame? —jai icatsia.

Pedro nexata bejamatabëjiobireca matawējëa, peyanijobaponaexaetsi Jesús, piasiwajawa yabara. Nexata Pedro jumaitsi Jesús-jawabelia:

—Xamë baja cajena yapëtaneme daxitacuene. Nexata baja, nejamatabë-cueneypëtaneme bitso tacajitsipaejawa —jai Pedro.

Jesús nexata tajëwelia jumaitsi Pedrojawabelia:

—Nexata, xamë neto-ewetsianame tajajiwi, pamonaë taniji betaja-ovejacuenia. ¹⁸Xaniajanë pacuenia catsipaebijitsiatsi. Itsa abaxë pamatacabi pewëjëatomë, nijacuata naxatatabiabame, itsabelia apojitsipaemë neponae-jawa. Itsiata, itsa pamatacabijawa perujunëmë tsane, namaxëyotsianame itsajiwi pecaxatatsinexa, pecacaponanexa itsabelia picani apojitsipaemë tsane neponaejawa —jai tajëwelia Pedrojawabelia.

¹⁹Bajarapacuenia Jesús jumaitsi Pedrojawabelia, peyapëtaeya-exanaenexa pitsicuenia tëpaejitsia pebeyaxuabijawatatsi, penajamatabëcuene-itajëtsinexa Dioso ayaijamatabëcuene pexinaejawa yabara.

Jesús orijibia jumaitsi Pedrojawabelia:

—¡Bajarapacuenia catocopiapatsi-ata tsane, itsiata, newajënaeyabelia nepënaponare^o tajajiwitonëxaemë! —jai Jesús.

²⁰Bajarapacuenia pesaicayojawabelia penabarëcuaicuajijawatabeje, Pedro itsa napënyorotaba caewëarena, netaetaba bajaraponëbeje pecowëya tanajetarucawajawa. Xanë Juannë, Jesús pijajiwitonënë, bitso tane-asiwanë. Pamatacabi caniwiyopijijawa panaxaniji Jesús pebeyaxuabiwajënaetsi, xanë Jesús pemuxuneneta ecajë. Nexata bajarajota, pemuxuneniabereca nacataitanucaeya yanijobecajë. «Tajatuxanenë, çjipatsa cacanjetsiana nijawajabitsaë pecobeyabelia?», janë Jesús-jawabelia. ²¹Nexata, Pedro itsa netane, xanë yabara, yanijoba Jesús-jawabelia.

—Tajatuxanenë, çdetsa xua tocopiapatsianatsi maponëje? —jai Pedro.

²²Jesús nexata jumaitsi Pedrojawabelia xanë yabara:

—Itsa xanë tojitsipaejitsipajë bajaraponë piasaëtsaponaponaewanexa, icatsia tapatsimatacabitsicajawabelia, asaë tsaponaponae tsipae. ¡Bajaraxua yabara pëtsa siwajamatabëcuenebëjamë! ¡Biji rajane, siwabëjamënejewa itsajiwi petocopiapatsijawanexatsi yabara, tsitecaeya newajënaeyabelia nepënaponare tajajiwitonëxaemë! —jai Pedrojawabelia.

²³Bajarapacuenia Jesús pejumaitsixae xanë yabara, patanajuajumexan-iatæwi Jesús peliwaishi, jamatabëcuenenawëxaniabiaya najumaitsi tsa-biabi: «Juan raeta apotëpae tsane», najai tsabiabi. Itsiata baitsi jane, Jesús bajarapacuenia apojumaitsi. Biji rajane, jumaitsi mapacueniaje: «Itsa xanë tojitsipaejitsipajë bajaraponë piasaëtsaponaponaenexa, icatsia tapatsimatacabitsicajawabelia, asaë tsaponaponae tsipae. ¡Bajaraxua yabara pëtsa siwa-jamatabëcuenebëjamë!», jai Jesús xanë yabara.

o 21:19 *nepënaponare*: Pedro tsiwajënaeyapëtae-ata cruzajawata pecobematabiabarutsinexatsi, Jesús peliwaishi pepaebanajetarucaexae, itsiata, Jesús tojitsipatsi pecuenejëpaenexa pijatuxanenë. Nexata, tojitsipatsi pepaebanajetarucaenexa Jesús peliwaishi, penacawetsinexa jiwi pebejiobia-exanaenexatsi, pebeyaxuabinexatsinua bajarapaliwaishi pejamatabëcuene, pacuenia tocopiapatsi Jesús.

²⁴ Xanë, Juannë, Jesús pijajiwitonënë, daxita tajacuata taniji Jesús pexanaponajawanë. Nexata, pacatoyaquinatsi bajaraxuanë yabara. Yapëta-netsi baja cajena paliwaisianë Jesús nacatsipae, pexaniajailiwaisianë.

²⁵ Jesús itsajawanë, pinijicuene Dioso pesaëta pexanaejawanë, ayai-jawa exana mapanacuataje, patacatoyaquinaejawawecua mapabaxutotaje. Nexata, bajaraxuanë yabara, caejawayo canacujitsia, peliwaishi, itsamonae itsa yaquinaejitsipa, bajaraxuanë peliwaishibaxutonë bitso ayaijawa tsipae. Nexata meta, bajarapaliwaishibaxutonë apoyacaëjêpae tsipae mapanacuataje pexaniawaetsinexa.

Hechos

Pacuenia exanawanapa apóstolewi, Jesús peliwaishi pepaebanajetarubenaewajawata

Jesús tajëwelia wajunupaeba Espiritu Santo pepatsijawanexatsica

1 ¹ Teófilo, xanë Lucasnë, catoyaquinatsi mapabaxutoje. Copiayapijibaxu-tota^a baja cajena catoyaquinatsi daxita Jesús pexanaewajanë peliwaishi, xuamaxëto exana, paliwaishi-ata cujarubaponapona, petaxuxuabijawaweliacujinae, abaxë itsa ponapona mapanacuataje. ² Matapania weretajë tayaquinajawa pamatacabi Jesús athëbëabetsia Dioso caponatsi. Pecaponaewajënaetsi Jesús athëbëabetsia, Espiritu Santo pejamatabëcueneta,^b tonajumecopata^c pitapetsiwiwawabelia apóstolewi pacuenia exanaejitsia pewecuaponaecujinae. ³ Jesús pebeyaxuabicujinaetsi, icatsia itsa namatacota petëpaejawawecua, Dioso athëbëabetsia pecaponaewajënaeyatsi, pijajiwiwawabelia tsitanaitajëtabiaba,^d cuarenta pamatacabiwejawawa. Bajarapamatacabianëjawa cujarubapona itsaliwaisianë Dioso peyanacua-ewetsijawanexa yabara.^e Nawitsiacuenianua tsitanacueni-itajëtabiaba peyapëtaenexatsi pijajiwi pepacuene piasaëjawa petëpaeacujinae.

⁴ Nexata, bajarapamatacabianëjawa, Jesús, pijajiwi itsa abaxë yajawaponapona,^f jumaitsi pijajiwiwawabelia mapacueniaje:

a 1:1 *copiayapijibaxutota*: Lucas-wënëbaxuto. Taema Lc 1:3. **b 1:2** *Espiritu Santo pejamatabëcueneta*: Hechos-baxuto peliwaishi nacayapëtaeya-exana Espiritu Santo pexanaecueni Jesús peliwaishi pejumexaniataewijawalia, ajenaj iwi taxuxuaba penacetauatsijawa Jesús pewënëta. Nexata, copiaya Espiritu Santo pexanaecueni, itoroba Jesús pijajiwi, petsipaebinexa Jesús peliwaishi daxitanacuanëjawa. **c 1:2** *tonajumecopata*: Jesús itoroba pijajiwi anijacueniwebe pexanaenexa, pewecuaponaecujinae. **1)** Itoroba pewetsinexa Jerusalén tomarata pepatsijawabelia Espiritu Santo pejamatabëcueneyawenonaenënexatsi vr 4-5, **2)** Itorobanua petsipaebaponaenexa Jesús peliwaishi daxitanacuanëjawa vr 8. **d 1:3** *tsitanaitajëtabiaba*: Apoyapëtaetsi patobeje Jesús naitajëta pijajiwiwawabelia penamatacotsicujinae petëpaejawawecua. Itsiata, Dioso pejumeliwaishi nacatowënëjonapona mapamonaeje: Papetiriawi pata pemëthëjawata Mt 28:9-10; María Magdalena Mc 16:9-11, Jn 20:11-18; Anijanëbeje Emaus peponaenamutota Mc 16:12, Lc 24:13-32; Pedro Jerusalénta Lc 24:34, 1Co 15:5; Diez ponëbeje pijadiscípulowi Lc 24:36-43, Jn 20:19-23; Once ponëbeje pijadiscípulowi Jn 20:24-29, 1Co 15:5; Siete ponëbeje pijadiscípulowi Jn 21:1-23; Once ponëbeje pijadiscípulowi Mt 28:16-20, Mc 16:14-18; Quinientos ponëbeje iwi 1Co 15:6; Santiago, Jesús peyuyapijinë 1Co 15:7; bexëjawabelia tsitanaitajëta Pablojawabelia 1Co 15:8. **e 1:3** *Dioso peyanacua-ewetsijawanexa yabara*: Taema Mt 28:16-20; Mc 16:12-19; Lc 24:13-51; Jn 20:19-21:25; 1Co 15:5-7. Taemanua Mt 3:2; 4:17,23; Mt 5-7; Mt 9:35; Mc 12:34; 14:25; Lc 1:33; 4:43; 8:1; 9:2; 11:12; 21:19,31; 22:16-18; Hch 1:6; 8:12; 14:22; 19:8; 28:23,31. **f 1:4** *yajawaponapona*: Itsacuenia pejucaenexa: «Jesús itsa barëxane pijajiwi». Taema Lc 24:26-43; Hch. 10:40-41.

—jPëtsa abaxë paponame mapaJerusalén tomarawecuaaje! Pacopia-ewetawanapaename abaxë taxa papecato-itorobinexatsica Espiritu Santo najumecapanepaeya pejumlahitsicuenia. Xanë-ata baja cajena bajaraponë yabara pacatsipaebatsi.⁸ ⁵ Juan-pijinë baja cajena bautizabanajetaruca ëme-rata penajamatabëcuenepënëyorobiwi Diosojawabelia. Itsiata, paxamë caematacabibejecujinae Dioso pacabautizabiana Espiritu Santota^h —jai Jesús pijajiwijawabelia.

Jesús baja pona athëbëabetsia

⁶ Itsamatacabi, Jesús pijajiwi pebarënacaetuatsijawata, bajarapamonae yanijobatsi mapacueniaje:

—Patajatuxanenë, ¿xaniajai tsabaja? ¿Mapamatacabianëjawa xamë juya jane baja paneyanacua-ewetsianame,ⁱ itsanacuapijiwi wajanacayanacua-ewetsijawawecua? —jai Jesús pijajiwi.

⁷ Nexata, Jesús jumlahsi pijajiwijawabelia:

—Xua yabara paneyanijobame, taxa Dioso apopacatocopatsi paneya-pëtaenexa. Caenë taxa Dioso, daxitacuene pewetsinëxae,^j yapëtane pamatacabita, paepatota-ata, bajaraxua copiapatsijitsia. ⁸ Itsiata, mapaliwaisije taxa Dioso pacatocopata paneyapëtaenexaje. Espiritu Santo itsa pacatsijamatabëpatsianica paxamëjawabetsica, bajaraPonë pesaëta pacajamatabëcuenecaëjpaeya-exanaena, ajumejunawijibia panepaebanajetarubenaenexa xanë taliwaisi.^k Nexata, paneliwaisipaebanajetarubenaename Jerusalén tomarajawa, Judea nacuaajawa, Samaria nacuaajawa, tajënacuatubujawa-ata —jai Jesús pijajiwijawabelia.

⁹ Bajarapacuenia Jesús pejumlahitsicujinae, pijajiwi petanubenaewawatatsi, pitabënejewa jane baja athëbëabetsia Dioso caponatsi. Itarërëbota baja Jesús pepëcaewicujinae, Jesús pijajiwi icatsia baja apotae. ¹⁰ Nexata, Jesús pijajiwi itsa abaxë pëtaenubena athëbëabetsia Jesús pepëcaewijawatsia, ángel-nëbeje, penioponaajawa penaxatatsinëbeje, jemata bajarajota tsitanai-tajëtatsi. ¹¹ Nexata, ángel-nëbeje jumlahsibeje Jesús pijajiwijawabelia:

—PaGalilea nacuaapijiwimë, ¿detsa xuajitsia athëbëabetsia pataenubename? Jesús, ponë pataneme paxamëjawawetsia Dioso pecaponaewawatsi athëbëabetsia, bajara-icatsia pacuenia itsamatacabi pataename bajaraPonë pepatsijawatsica^l —jai ángel-nëbeje Jesús pijajiwijawabelia.

g 1:4 *pacatsipaebatsi*: Taema Jn 14:16-26; 15:26; 16:7-15. h 1:5 *pacabautizabiana Espiritu Santota*: Taema Mt 3:11; Lc 3:16; Hch. 11:16. Wowaijume canacueneba pacabautizabiana Espiritu Santota. Bajarapacuenia itsa jumlahsi aponacayapëtaeya-exanae Jesús pejabutsia-exanaenexa Espiritu Santojawabelia pacuenia exanabiaba jiwijawabelia pebautizabijawata merata. Biji rajane, nacayapëtaeya-exana mapajamatabëcuenenebeje yabara: Espiritu Santo tsijamatabëjone-jitsiatsi payawenonaenexatsi daxitacuenejawabelia, pacuenia yawenonabiaba Jesús peponaponaematacabita mapanacuataje. Nacayapëtaeya-exananua pacuenia Espiritu Santo exanaejitsia pamonaesiwanajamatabëcuenecopabiwi Jesucristojawabelia becaenë bajaraPonëjawabelia. i 1:6 *paneyanacua-ewetsianame*: Taema Mt 20:21. j 1:7 *daxitacuene pewetsinëxae*: Caenë Dioso tsicarucatsi peyapëtaeya-exanaenexa bajarapaliwaisi pajiwiawabelia jitsipa peyapëtaenexa. Bajaraxuata, Jesús apotoxanepanaetsi peyapëtaeya-exanaenexa xua paxa Dioso apotocopatsitsi. Taema Jn 12:49-50; Flp. 2:5-8. k 1:8 *panepaebanajetarubenaenexa xanë taliwaisi*: Pacujinae jiwi siwanajamatabëcuenecopata Jesucristojawabelia pecapanaenexatsi, Jesucristo tonaexanatsi petuxanenë. Nexata, bepeyanacua-ewetsinë tonaexanatsi. Tamaanua Mt 28:18-20; Mc 16:15-29. l 1:11 *pepatsijawatsica*: Taema Dan. 7:13; Mt 26:64; Mc 13:26; 14:62; Lc 21:27; Apoc. 1:7.

Jesús pijajiwi natsicueya-itapeta Matías apóstol-nēnexa

¹² Nexata, Jesús baja peponaecujinae athēbēabetsia, pijajiwi apóstolewi, nawiabaponarena Jerusalén tomaraberena, olivonaenē penubenaetsutoja-wawerena. Bajarapatsuto eca caekilómetrocuenia^m Jerusalén tomarawecua.

¹³ Nexata, itsa pata Jerusalén tomarata, petsicopatsibojawatatsi, athēbēyo pexanae-irajawabetsia junaya, pejinawanapaenexa. Pamonaē Jesús pijajiwi apóstolewi, mapewēñāñē: Pedro, Juan, Santiago,ⁿ Andrés, Felipe, Tomás, Bartolomé, Mateo, Santiago, Alfeo pexēnato, Simón, ponē Zelotenē.^o Judas-ata, Santiago pexēnato. ¹⁴ Daxita bajarapamonaē nacaetuatabiaba paboja-wata najinawanapa, athēbēyopiji-irajawatatsia. Barēnacaetuatabiabanua Jesús pena, María, Jesús pejuyapijiwi, itsapetiriawi-ata yajawa, pewajēcabiabinexa Diosojawabelia, caejamatabēcuene penajuaxainaexae.

¹⁵ Bajarapamatacabianējawa daxita penacaetuatsiwi namata-ējēta ciento veinte pajiwi beje, Jesús peliwaisi pejumexaniataewi. Nexata, bajarapamonaē tuatua jēta Pedro nonotapuna. Jumaitsi penacaetuatsiwi jawabelia:

¹⁶ —Tajamonaē, copiapata rajane baja pacuenia jumaitsi Dioso pejumeli-waisibaxutota. Bajarajota, nacayapētaeya-exana pacuenia bajayata David-pijinē, Espiritu Santo pejamatabēcueneta, tajēwelīa wajunupaeba Judas-pijinē pexanaejawanexa,^p ponē matacapona pamonaē Jesús waetabijitsiatsi. Nexata, tocopiapatatsi jane baja, pacuenia David-pijinē tajēwelīa jumaitsi.

¹⁷ Judas-pijinē picani paxanēyajuwēñēñēmi. Jesús picani bajaraponēmi itapeta patanajuanacuenēbinexa. ¹⁸ Bajaraponēmi ira comuata pibisiacuenē pexanaematamopalatata, itsajota pijacuata nabeyaxuaba.^q Nexata, petē-paenē pematono ira bejopaica. Nexata, cototititicajunua. Daxita pēñēmi pitsatajarabarena. ¹⁹ Daxita Jerusalén tomarapijiwi wēñēliwaisitanetsi xua tocopiapatatsi Judas-pijinēmi. Nexata, bajaraponēmi pecomuatsi-ira, wēñē-ruba Acēldama. Acēldama itsa jai, «Papalata pejamatabēcueneta jiwitonē beyaxuabatsi, bajarapapalatata pecomuatsi-ira», pejaijume judiowi peju-meta —jai Pedro.

²⁰ Icatsia, Pedro jumaitsi penacaetuatsiwi jawabelia:

—Bajaraxua yabara Salmos-baxutota^r tajēwelīa Judas-pijinē yabara comparación-cuenia jumaitsi mapacueniaje:

«Jema baja pijabo tonaxuabecaetsi.^s Itsajiwi-ata apoponaponae tsane bajarapabota», jai.

m 1:12 caekilómetrocuenia: Dioso penajumecopatsiliwaisi Moisés-pijinēta tocopatabiaba judiowi penucaponaenexa ēcaekilómetrocuenia penacuera-ewetsimatacabita, bajarapacuenia peyaiya-taenexa Dioso. Judiowi, Dioso pitorobicueniatsi nacuera-ewetabiaba sábadomatacabī. Bajara-xuata, itsa Bibliabaxutonēta wēñēruba «sábadomatacabī peponaenamuto». **n 1:13 Santiago:** Itsa tanetsi Santiagowēne, beyapētanetsi pacuenia pepacuenē Jacobowēñē picani. Pamonaē juca griegojumewerena yaquinabiaba Santo Yiacobo, bajaraxuata Jacobowēñēmi nabijiana Santiagonexa. **o 1:13 Zelotenē:** Bajarapacuenia wēñērubatsi, tsipaji Simón najumeliwaisi cajunua Zelotecuene pexanaewijawabelia, pesiwanajamatabēcuenecopatsi wajēnaeya Jesucristojawabelia. Nexata, zelotecuene pejumecowēñētsiwi, Israel nacuata bitso piasiwajamatabēcuene, be-unupijiwicuenia tsimaxēpatabiaba Romano nacuapijiwajabitsaējawabelia, pecapitsapaeya-exanaenexa Judea nacuwecua. **p 1:16 Judas-pijinē pexanaejawanexa:** Taema Lc 22:47-48, Sal. 41:9. **q 1:18 nabeyaxuaba:** Taema Mt 27:5-8. **r 1:20 Salmos-baxutota:** Taema Sal. 69:25; 109:8. **s 1:20 tonaxuabecaetsi:** Itsa yorobatsi Mt 27:5-8 yapētanetsi pacuenia Judas-pijinē pecomuatsi-irami nacopata cementeriocuenia, itsajota caejiwi-ata apoponaponae.

»Itsajawata pijinia Salmos-baxutota jumaitsi mapacueniaje:

«Bajaraponëmi penacuenebijawami, itsanë pitsiana», jai Dioso pejumeliwaisibaxutota, itsanë icatsia apóstolnë penaexanaejawanexa yabara Judas-pijinë pecowëtaxunaeta.

²¹ »Nexata, bajarapacuenia pejumaitsixae Dioso pejumeliwaisibaxutota, namatawenonatsi itsanë waja-itapetsijawa, doce paponëbejenexanë. Nexata, bitapetatsi ponë patanajuapënajinawanapaewi wajatuxanenë Jesús, pamatacabi abaxë ponapona mapanacuataje. ²² Ponë paneyajawaponaponanua Juan-pijinë Jesús pebautizabimatacabijawaweliacujinaetsi, matapania athëbëabetsia Dioso patanewecuacaponamatacabitsijawabelia. Nexata, bajarapitsinë bitapetatsi Jesús petëpaecujinae, Dioso icatsia piasaëya-exanaejawatsi patataejawa patanajuapaebinxeta —jai Pedro penacaetuatsi wijawabelia.

²³ Nexata, bajarapamonae penacaetuatsijawata, itapeta anijanëbeje, Pedrobana jane baja Jesús penajuapënajinawanapaewinxeta. Ponëbeje itapeta bajarapamonae, mapawënënenëbeje. José, itsawënë Barsabás, ponë jiwi wënërubatsi Justo. Itsanë pijinia, pewënë Matías. ²⁴ Bajaraponëbeje pitapetsicujinae, bajarapamonae wajëca Diosojawabelia, peyapëtaenexa ponë Dioso itapetsijitsiatsi apóstolenënexa. Diosojawabelia jumaitsi mapacueniaje: «Patatituxanenë, daxitajiwi nejamatabëcueneyapëtaenë. Nexata, maponëbejeyajuwënënenë, ponë itapetame apóstol-nënexa, panetsitajëtsianame.

²⁵ Nexata, ponë itapetame, pitsiana Judas-pijinë pecowëtaxunaemi, tsipaji bajaraponëmi pona panacuajawabelia tocajëtëame pijaneconijamatabëcuenë», jai bajarapamonae pewajëtsijawata Diosojawabelia.

²⁶ Bajaraxuacujinae, bajarapamonae pijacujirucuenia exana, ^t peyapëtaenexa jane baja ponë apóstol-nënexa. Bajarapacuenia pexanaejawata, bajarapamonae yapëtane Matías apóstol-nënexa. Nexata baja, Matías najunua once ponëbeje apóstolewijawabelia. Nexata baja, apóstolewi icatsia doce ponëbeje naexana.

Jesús pejumaitsicuenia, Espíritu Santo jane baja patsica,

Jesús pijajiwi petsijamatabëjonenexatsi

2 ¹ Itsa baja panepa cincuenta pamatacabibeje Pascuafiesta pewerewerecaecujinae, icatsia junua Pentecostés-fiesta. ^u Nexata, bajarapamatacabi daxita Jesús pijajiwi nacaetuata ^v caejawata. ² Nexata, bajarapamatacabi athëbëwetsica jemata najumeta bepinijijowiboxaneto. Nexata, pabota Pedrobana nacaetuatenä, daxitabo najumeteca. ³ Bajarapamonae tane athëbëwetsica perunaejawatsica bepitarunutsicotia. Nexata, bajarapamonae caejiwi canacujitsia bajarapacotia tsimatanatsanaeyarunaicatsi. ⁴ Nexata, daxita bajarapamonae Espíritu Santo tsijamatabëwënëcatsi. ^w Bajarapaepatota, jemata taxuxuaba pecuaicuajaijawa

t 1:26 *pijacujirucuenia exana*: Taema Prov. 16:33. **u** 2:1 *Pentecostés-fiesta*: Griegojumeta najumetane, «cincuentamatacabi». Bajarapafiesta xaina itsawënëbeje pematatsënë: Semananëpijifiesta, Penacuaitsicujinae penotsimatacabipijifiesta. Taema Lev. 23:15-16; Deut. 16:9-12; Éxo. 23:16; Núm. 28:26. **v** 2:1 *Jesús pijajiwi nacaetuata*: Nacaetuata meta 120 pajiwi beje. Taema Hch. 1:15. **w** 2:4 *Espíritu Santo tsijamatabëwënëcatsi*: Taema Lc 24:49; Hch. 1:8 neyapëtaenexa Dioso najumecapanepaeya pejumaitsicuenia.

itsawiriajumenëta, ^x apopecuaicuaijajumenëmi picani, Espíritu Santo pejamatabëcuenecaëjëpaeya-exanaecueniatsi.

⁵Bajarapamatacabita, Jerusalén tomarata jinawanapa ayaibitsaëtozaneto judíowi, daxitanacuanëjawawerena pepatsiwi. Bajarapamonae bitso pejumecowënëtsiwi paliwai si Dioso tonajumecopata Moisés-pijinëta. Nexata, bajarapamonae napata Jerusalén tomarata penataenexa Pentecostés-fiesta. ⁶Nexata, bajarapamonae itsa jumetane bajarapanajumetsijawa bepinijijowiboxaneto athëbëwetsica, ayaibitsaëtozaneto muxunapona Jesús pijajiwi penacaetuatsibojawaberena. Itsa pata bajarapabojawata, ayaicuenia nabena-jaca, tsipaji Jesús pijajiwi Espíritu Santo jamatabëcuenecaëjëpaeya-exanatsi pecuaicuaijainexa bajarapamonae pijajumenëta, apopecuaicuaijajumenëmi picani. Nexata, bajarapamonae caenacuapijiwi canacujitsia xaniawaetsia jumetane xua yabara Jesús pijajiwi tsipaebapona. ⁷Bajarapamonae bitso jamatabëcuenenabenajacaeya najumaitsi:

—Daxita mapamonae nacatsipaebanubenaje, Galilea nacuapijiwi. Apopecuaicuaijajimi picani wajajumenë. ⁸Waxaitsi itsanacuanëjawawerena wajapatsiwi, saicaya xainatsi wajajumenë, mapamonaewecujaje. ¿Detsa pacuenia itsiata cuenecaëjëpatsi pecuaicuaijainexa wajajawanaexanae-jumenëta mapamonaaje? ⁹Waxaitsi raja wajapatsiwi mapanacuanëwerena: Partia nacua, Media nacua, Elam nacua, Mesopotamia nacua, Judea nacua, Capadocia nacua, Ponto nacua, Asia nacua, ¹⁰Frigia nacua, Panfilia nacua, Egipto nacua, Libia nacua-ata, ^y Cirene tomarapëñëwerenapijiwi. Itsamona waxaitsiyajuwënëwi judíowi Roma tomarapijiwi. Itsamonae pijinia apojudíowi, pejumecowënëtanapawewi judíowicuenia, Roma tomarapijiwi. ¹¹Itsamonae Creta nacuapijiwi. Itsamonae Arabia nacuapijiwi-ata. Daxita bajarapanacuanëjawawerena wajapatsiwi-ata, itsiata daxitatsi jumetanetsi xaniawaetsia Jesús pijajiwi wajanacatsipaebiliwaisianë waja-jumenëta. Caenacuapijiwitsi canacujitsia jumetanetsi ² bajarapamonae Dioso pinijicuene pexanaejawa yabara wajanacatsipaebaponaejawa waja-jumenëta —najai athëbëwetsica bepinijijowiboxaneto penajumetsijawa pemuxunanacaetuanawewi.

¹²Nexata, daxita bajarapamonae jamatabëcuenenajunawiacaeya nayanijoba:

—¿Detsa meta mapitsijamatabëcuene yabara itsije? —najai. ¹³Itsamonae saya jumecaponaeya jumaitsi Jesús pijajiwi yabara:

—Aitajibi ra saya mapamonaaje —jai.

Pedro paliwai si tsipaeba athëbëwetsica bepinijijowiboxaneto penajumetsijawa pemuxunanacaetuanawijawabelia

¹⁴Itsa jumetane bajarapamonae pejumecaponaecuenë, apóstolnë Pedro nonotapuna, once ponëbeje apóstolewi yajawa. Nexata, Pedro pinijijumeta jumaitsi:

x 2:4 *itsawiriajumenëta*: Itsanacuanëpijiwi pijajumenëta. Taema Hch. 2:5-11 **y 2:10** *Libia nacua-ata*: Bajarapanacua África nacuanaxetoyajuwënënacua. **z 2:11** *Caenacuapijiwitsi canacujitsia jumetanetsi*: Bajarapamonae bejamatabë 16 panacuawerena pepatsiwi. Itsiata, itsa Jesús pijajiwi namata-ëjëta bejamatabë 120 pajiwi beje penacaetuatsiwi, yacaëjëpa pecuaicuaijainexa bajarapanacuanëwerena pepatsiwi pijajumenëta.

—[Tajamonaē judfowi, Jerusalén tomarata panenapatsiwi, paxamē-ata Jerusalén tomarata pane-enaewi, xaniawaetsia panenamuxuna-ewere paneyapētaenexa, xua yabara pacatsipaebijitsiatsi! ¹⁵ Mara pamonaē apo-aitajibije, pacuenia paxamē pacanaējētame. Abaxē raja matapania las nueve, bajayacunua-epato, paepatota jiwi ba-aponā-aitajibi. ¹⁶ Biji rajane, mapamonaēje paxamē panijajumenēta Espiritu Santo cuaicuaijaiya-exanatsije, pecopiapatsixae jane baja xua bajayata tajēwelīa profeta Joel-pijinē, Diosojumepaebinēmi, wajunupaeba, Dioso peyapētaeya-exanaexae bajaraponē. Jumaitsi mapacueniaje:

«Dioso jumaitsi: ¹⁷ «Itsa baja imoxoyo pewajēnaē tsane mapanacua pewerewerecaenexaje, to-itorobianicajē Espiritu Santo daxitanacuapijiwi, pamonaē tajajiwi, petsijamatabējonexatsi. Nexata, daxita panexi, pebijīwi, petiriawi-ata, paebiana paliwaisi Espiritu Santo paebia-exanaenatsi, xanē taliwaisi. Pewējēawi pebijīwi taena xua tsitajētsianajē bemajitsinaebocuenia. Perujuwi pebijīwi piamajitsinaejawata tsipaebianajē. ¹⁸ Daxita pamonaē tanetonacuenebiwi, pebijīwi, petiriawi-ata, bajarapamatacabi Espiritu Santo to-itorobianicajē petsijamatabējonexatsi. Nexata, paebiana xanē taliwaisi.

¹⁹ »Bajarapamatacabitanua tsitajētsianajē itaboxotatsia, mapanacuajawata-ata pinijicuene ta-exanaejawanē.

Mapanacuataje ayai tsane pejana, isotocotia, petsēxē-ata.^a

²⁰ Nexata, matabicipijiuameto aitaquiri tsane. Merawipijiuameto bepejana itatsobia tsane. Bajaraxuanē jane baja, copiapatsiana mapanacuataje, itsa baja imoxoyo pewajēnaē pepoPetuxanenē Cristo icatsia pepatsimatacabinexatsica, penaneconitsia-exanaejawanexa pijaneconi pexainaewi. Bajarapamatacabi bitso ayai tsane itsamatacabianēwecua, pinijicuene Dioso petsita-exanaexae daxitajiwijabelia, penajamatabēcuene-itajētsinexa ayaijamatabēcuenenēcuene, itsa baja peneta imoxoyo pewajēnaē tsane. ²¹ Itsiata baitsi jane, pajiwi siwanajamatabēcuenecopata pepopetuxanenējawabelia, bajarapajiwi capanepaenatsi, jai Dioso», jai bajayata tajēwelīa profeta Joel-pijinē Dioso pejumeliwaisibaxutota.

²² »[Nexata, xaniawaetsia paneyapētaenexa bajarapaliwaisi, tajamonaē, Israel-pijinē papemomoximē, panenamuxuna-ewere xua pacatsipaebijitsiatsi! Paxamē xaniawaetsia payapētaneme Jesús, Nazaret tomarapijinē, Dioso pesaēta pinijicuenejawanē exanaponapona paxamētuatuajēta. Bajaraxuata, payapētaneme baja Dioso pitorobinēcuenetsi. ²³ Payapētanemenua bajaraponē Jesús, paxamē panecobeyabelia canajetatsi panebexayuabinexa. Bajarapacuenia tocopiapatatsi Dioso tajējawawerenacujinae penajamatabēcueneweretsicuenia bajaraponē yabara. Nexata, paxamē pabeyaxuabame, tsipaji patocopatame piamajamatabēcuenebejewijawabelia, Jesús

a 2:19 *pejana, isotocotia, petsēxē-ata*: Joel-baxutota itsa jumaitsi bajarapacuenia, nacayapētaeya-exana pacuenia pebarēnawajabitsaētsijamatabēcuene jiwi ayaibitsaēto tēpaena, itsamonae tajuitsia-exanaena pecobecowējawanē.

b 2:25 *David-pijnē tajēwēlia yaquina:* Taema Sal. 16:8-11. **c 2:27** *petēpaewi*
pejinawanapanacnaweta: Hades-wēnē nacua wowajumeta. **d 2:30** *nacua-ewetsinē:* Taema
Sal. 89:3-4; 132:11-12. **e 2:30** *Cristo:* Pedro yabarapaebi-ata Jesús, canacuneba Cristo-
wēnē (Mesías hebreojumeta) tsipaji daxita judfowi ewetawanapa Cristo pepatsijawanexa.
f 2:30 *nemomoxiyajuwēnēnē ewetsiana:* Taema Sal. 89:3-4; 132:11-12. **g 2:31** *apocopatsi tsa-*
netsi: Sal. 16:10.

pe-ecaeya-exanaenexatsi, bitso peyaiyataenëtsicuenia. Bajarawetsica aeconoxae najua-ewetabeje daxitacuene. Nexata, paxa Dioso perajutsicujinaetsi Espiritu Santo, najumecapanepaeya pejumaitsicuenia,^h Jesús juya itorobica Espiritu Santo paxanëjawabetsica. Bajarapacuenia pataneto-exanaexae, xua pinijicuene pexanaejawa aeconoxae pataenubename, pajumetanemenua, paliwaisianë mapamonae panijajumenëta pacatsipaebaje, bajaraxua Espiritu Santo pejamatabëcueneta exana. ³⁴Itsiata bailsi jane, ponë athëbëabetsia Dioso caponatsi, apoDavid-pijinë, tsipaji David-pijinë bajayata tajëwelia jumaitsi mapacueniaje:

«Pepopetuxanenë Dioso jumaitsi tajatuxanenëjawabelia:

«¡Ecare abaxë tacujuanenia, pecayaiyataetaxunaeta,

³⁵wecatsiwajënaejamatabëcuene-amoneyabatsi abaxë nijawajabitsaë nitorobicuenia pecajumecowënëtabiabinexa!», jai Dioso tajatuxanenëjawabelia», jai bajayata tajëwelia David-pijinë Cristo yabara.

³⁶»Daxita bajarapacuenia David-pijinë tajëwelia pejumaitsixae Cristo yabara, yapëtanetsi Dioso pitapetsijawa Jesús pepopetuxanenënexa. Bajaraponë Cristo cajena,ⁱ ponë yabara Dioso itorobiapaeba mapanacujawabetsicaje wajanacapanepaenexa. Bajaraxuata, daxita Israel nacupijijiwi xaniawaetsia beyapëtane Jesús peliwaissi. Ponë Dioso itapeta, paxamë pacobematabiabarutame cruzajawabelia —jai Pedro athëbëwetsica bepinijijowiboxaneto penajumetsijawa pemuxunapatsiwi jawabelia.

³⁷Itsa bajarapamonae jumetane Pedro bajarapacuenia pejumaitsi jawawa, nexata bejamatabëjiobireca pinijicuena. Nexata, bajarapamonae yanijobiayi jumaitsi Pedrojawabelia, itsamonae apóstolew jawabelia-ata:

—Tajamonae, ¿detsa nexata pitsicuene pa-exanaenajë patajaneconi yabara? —jai bajarapamonae.

³⁸Pedro nexata jumaitsi:

—¡Pacaejiwimë canacujitsia panajamatabëcuenepënëyorore Diosojawabelia pibisiacuene pane-exanaejawawecua, Dioso pejitsipaecuenia pane-exanawanapaenexa! Nexata, pacabautizabianatsi Jesucristo pewënëta.^j Bajarapacuenia itsa pa-exanaename, Dioso pacawecua-ajibia-exanaena daxita pibisiacuene pane-exanaeneconi. Pacarajutsiananua Espiritu Santo papecatsijamatabëjonenexa. ³⁹Bajarapanajumecapanepaeliwaissi baja cajena paxamë pajudiówimënexa, panexinexa, panemomoxinexa-ata, itsamonae-ata Diosowecua tajënacuanëjawa pejinawanapaewi.^k Daxita pamona Dioso

h 2:33 najumecapanepaeya pejumaitsicuenia: Pedro najamatabënapitsia-exana bajarapamonae xua Dioso jumaitsi tajëwelia Joel-pijinëjawabelia. Taema Hch. 2:17-18. **i 2:36 Cristo cajena:** Pepacujiru Pedro jumaitsi, «Mesías-jume», tsipaji Jesús peliwaissi tsipaeba pewënajudiówijawabelia. Ponë David-pijinë pemomo Dioso itorobiapaeba peyanacua-ewetsinexa pacuenia David-pijinëmi, hebreojumeta wënëruba «Mesías». Nexata, Mesías-jume itsa jai griegojumeta, «Cristo», jai tsabiabi. **j 2:38 Jesucristo pewënëta:** Pacujinae jiwi nabautizabia-exana Jesucristo pewënëta najamatabëcuene-itajëta mapacuenewanë: 1) Najamatabëcuene-itajëta pejumexaniataejawa Jesús, Cristonëcuene pejumecowënëtabiabinexa daxita pacuenia itorobatsi pexanaenexa. 2) Najamatabëcuene-itajëta penajamatabëcuenepënëyorotsijawa pibisiacuene pexanaejawawecua Diosojawabelia, pesiwanajamatabëcuenecopatsinexa Jesucristojawabelia, pijaneconi petomatomotsinëcueniatsi. Taema Mt 28:19; Hch. 8:36-38; 16:14-15; 18:8. **k 2:39 tajënacuanëjawa pejinawanapaewi:** Apojudiówi yabara Efe. 2:17.

junatsiana¹ pijajiwinexa, bajarapamonae tsijamatabëjonenatsi Espíritu Santo —jai Pedro bajarapamonaejawabelia.

⁴⁰ Bajarapacuenia Pedro itsa tsipaeba, itsaliwai si pematatsënëa tsipaeba bajarapamonaejawabelia. Pinijicuenia muxujiobanua mapacueniaje:

—¡Pawecuanatsare pamonae Jesús beyaxuaba, Dioso papecananeconitsia-exanaeyaniwa bajarapa-acujirubejewi yajawa! ¡Nexata, bajarapamonae pawecuanajamatabëcuenepënëyorore Diosojawabelia! —jai Pedro.

⁴¹ Nexata, Pedro petsipaebiliwai si bajarapamatacabi jumexaniatanetsi bejamatabëcuene tres mil pajiwiweje. Daxita bajarapamonae Jesús pijajiwi bautizaba. Nexata, najunua baja Jesús pijajiwi jawabelia. ⁴² Ca-asaë tsawana-pae paliwai si apóstolewi tsipaebapona. Daxita bajarapamonae, Jesús pijajiwi, apóstolewi yajawa, najamatabëcuenejëpaeya jinawanapa. Daxita nacaetuatabiaba pewajëcabiabinexa Diosojawabelia. Najuaxaeyabibanua, penajamatabënapitabiabinexa xua yabara Jesús siwatëpatsi.

**Pacuenia jinawanapa copiyami Jesús peliwai si
pejumexaniataewi, yabara peliwai si**

⁴³ Bajarapamatacabianëjawa daxita Jerusalén tomarapijiwi cujunawiaya yaiyatane Dioso, petaexae Dioso pesaëta pinijicuenejawanë pexanaejawa apóstolewita. ⁴⁴ Bajarapamatacabianëjawanua, daxita pamonae jumexaniatane Jesús peliwai si, nacaetuatabiaba najamatabëcuenejëpaeya. Daxita pexinaejawa nacobenaxainaeya ewetabiabanua. ⁴⁵ Bajarapamonae yajuwë-nëwi canajetapona pexinaeyajuwënëjawanë, pecobecowëyajuwënëjawanë-ata, bajarapamatamopalatata peyawenonaenexa bitso penamatawënonaejiwi jawabelia, caejiwi canacujitsia, penamatawenonaecuenia.

⁴⁶ Bajarapamonae caematacabi canacujitsia nacaetuatabiaba templobopijipanabota Dioso pewënëxaniatsinexa. Bajarapijinia pacuenia, pijabonëjawa jamatabëcuenebarëyaya najuaxaeyabiaba pexaejawa najamatabëcuenejëpaeya, penajamatabënapitabiabinexa^m Cristo pesi watëpaejawatsi. ⁴⁷ Nexata, paepatota nacaetuatabiaba, templobopijipanabojawata penajuaxaejawatanua pijabonëjawa, bajarapamonae wënëxaniatsiaya jumaitsi tsabiabi Diosojawabelia: «Diosomë, bitso ayaijamatabëcuenenëmë. Paneyawenonabiabame», jai tsabiabi. Pecuenetaejawatatsi, nexata daxita Jerusalén tomarapijiwi bajarapamonae pexaniacuenia yaiyataeyabiabatsi. Orijibia, caematacabi canacujitsia, wajatuxanenë Jesucristo pejamatabëcueneta, itsamonae-ata jumexaniataepona Jesús peliwai si, pecapanepaenexatsi pibi-siacuene pexanaeneconiwecua. Nexata, bajarapamonae najonepona Jesús pijajiwi jawabelia.

**Pedro, Jesús pejamatabëcueneta, xanepanaeya-
exana apoceajëpaenëtsi peponaponaejawa**

3 ¹ Nexata, itsamatacabi, Pedro, Juan-beje, naponabeje templobojawabelia caniwiyo-epatota, bejamatabë a las tres, penawajëcaenexabeje

1 2:39 Dioso junatsiana: Taema Isa. 57:19. m 2:46 penajamatabënapitabiabinexa: Caematacabi canacujitsia penajuaxaejawata Santa Cenacuenia, najamatabënapitabiaba Jesús pesi watëpaejawatsi.

Diosojawabelia, paepatota judfowi nawajęcabiaba Diosojawabelia caematacabi canacujitsia. ²Itsa pata templobojawata, bajarapabopijibaupajawata taeyetabeje apopecaejěpaenětsi peponaponaejawa penaexanaejawaweliacujinae. Bajaraponě capatabiabatsi pijamonae, pe-etabiabinexatsi caematacabi canacujitsia templobobaupamuxuneneta, Pexaniabaupawěnjawata. Nexata, bajaraponě amoneya palata wajęcabiabeca bajarapabaupajawa pejonepo-naewijawabelia. ³Nexata, itsa bajaraponě taeyeca Pedro, Juan-beje pejonenajetarucaejawabeje templobojawaberena, wajęqueca palata. ⁴Nexata, Pedro, Juan-beje naęcotabeje bajaraponějawabelia. Nexata, Pedro jumaitsi bajaraponějawabelia:

—¡Panetaemabeje! —jai Pedro.

⁵Nexata, bajaraponě naitaxutocaewetsiaya jamatabějumaitsi tsecae: «Nerajutsianabeje meta itsacuenejawayo», jamatabėjai tsecae.

⁶Pedro nexata jumaitsi bajaraponějawabelia:

—Palata, oro-ata^a raja apoxainaeně. Itsiata baitsi jane, xua xainajě, carajutsianatsi. Jesucristo, Nazaret tomarapijině, pewěněta^o cajumaitsitsi mapacueniaje: ¡Nonotapunare! ¡Ponaponare baja! —jai Pedro.

⁷Nexata, bajaraponě pecujuanenia pacobe, Pedro cobewaetabiayotsia. Bajarajota, bajaraponě caecuenia anijaneniabeje asisaěreca. ⁸Nexata, bajaraponě jirewajunua. Petaxuta nuca. Ponapona jane baja. Bajaraxuacujinae, bajaraponě jirewanajetarucaeya templobo-ěněabelia najoneya Pedro, Juan-beje pepěta. Wěněxaniatsiaya jumaitsi tsanajetarucae Diosojawabelia: «Diosomě, bitso ayaijamatabēcueneněmě, tsipaji baja nexanepanaeya-exaname», jai tsanajetarucae Diosojawabelia.

⁹Nexata, daxitajiwi tanetsi peponaponaejawa. Jumetanetsinua pexania-jamatabēcuenenabajawata Diosojawabelia. ¹⁰Bajarapamonae itsa tanetsi, yapětanetsi palata pewajęcabiabecaeněmi templobobaupajawata, Pexania-baupawěněmuxuneneta. Nexata, daxita bajarapamonae itsa tane bajaraponě baja pexanepanaejawa, bitso jamatabēcuenenajunawiaca.

**Pedro tsipaeba Jesús peliwaisi jiwijawabelia templobo-
ěnětuatuajěta, Portal de Salomón-wěnjawata**

¹¹Nexata, jamatabēcuenenabenajacaeya jiwi ayaibitsaěto itaxutua-othopatsi templobopijipanabota, Portal de Salomón-wěnjawata. Bajarajota, Pedro, Juan-beje, najuamaxěwaetabanucatsibeje, poně apopecuenecaějěpaeněmitsi peponaponaejawa. Pedro pexanepanaeya-exanaecujinae, bajaraponě apocopatsibeje. ¹²Nexata, Pedro, itsa tane bajarapamonae pejamatabēcuenenabenajacaewa, bajaraponě jumaitsi bajarapamonaejawabelia:

—Tajamonae, Israel-pijinė papemomoximě, źdetsa xuajitsia pajamatabēcuenenabenajacame maponě yabaraje? ¿Detsa xuajitsia bitso panenaěcobamebeje mapacueniaje? Paxaněbeje yabara meta pajamatabějumaitsimě mapacueniaje: ‘Maponěbeje xanepanaeya-exanabeje apopecaejěpaeněmitsi

n 3:6 *Palata, oro-ata*: Bajarapamatacabi bajarapamonae canacuenebabiaba peponěaně, bemonedajawaně palatanexa. Nexata, itsajawaně exana palatananitota, itsajawaně pijinia oronanitota. o 3:6 *pewěněta*: Judfowi canaejěta pacuenia itsa itoroba pexanaenexa itsaně pewěněta, bebajaroně pitorobijawa, pecuenecaějěpaeya-exanaejawanua.

peponaponaejawa, tsipaji baja caējēpatsibeje bajarapacuenē pexanaenexa-beje, itsa jume, tsipaji meta Dioso pitabarata aneconiibia ponaponabeje,⁷ pajamatabējamē meta paxanēbeje yabara. Paxanēbeje raja patajamatabēcuenetabeje apopa-exanaenēbeje. ¹³ Biji rajane, Jesús exana bajarapacuenē, tsipaji wajasalinaiwi baja cajena Abraham-pijinē, Isaac-pijinē, Jacob-pijinē, pijaDioso tocopata pexēnato Jesús bitso ayaijamatabēcuenē pexainaenē-nexa daxitawecua. Bajarapacuenia Dioso to-exanae-ata Jesús, paxamē itsiata patocopatame wajanacayanacua-ewetsiwi pecobeyabelia. Nexata, wajanacayanacua-ewetsinē Pilato copatsijitsia-ata Jesús, itsiata, paxamē pa-ajumesaēmē, pane-itoyaxae, pecopatsiyaniwatsi ¹⁴ Apopawajēcaemē Pilatojawabelia pecopatsinexatsi Jesús, itsacueneneconiyo apopexainaenē, pepopianeconiibinē.⁸ Caranata biji, pa-ajumesaēmē panewajēcaejawa Pilatojawabelia pibisiacuenē pexanaenē, jiwibenē, pecopatsinexatsi penanecoiniwi pejebabiabowecua. ¹⁵ Ponē Dioso itorobia wajanacarajutsinexa matabacabi apopewerewerecaejawa, bajaraponē caranata pabeyaxuabame. Itsiata baitsi jane, Jesús petēpaecujinae, Dioso icatsia asaēya-exanatsi. Bajarapacuenē patataexae, pacatsipaebatsi. ¹⁶ Maponēje, apopecajēpaenēmitsi peponaponaejawa, pesiwanajamatabēcuenecopatsixae Jesús-jawabelia,⁹ pepacuenē baja xanepanaeya-exanatsi pane-itabarata, panetaeyabiabinē, paneyapētaenē —jai Pedro.

¹⁷Icatsia, Pedro jumaitsi Cristo yabara:

—Tajamonae, yapētaniji pacuenē pacabarē-exana itsamonae, papeca-ewetsiwi yajawa. Bajarapacuenia pa-exaname xaniawaetsia apopanya-pētaexae bajaraponē yabara. Bajaraxuata, pabeyaxuabame Jesús. ¹⁸ Bajarapacuenia panebeyaxuabijawata, Dioso copiapatsia-exana jane baja xua tajēwelia wajunupaeba profetawimi Cristo⁷ yabara. Bajarapamonaemi wajunupaeba pacuenia Cristo bitso bejiobia-exanaejitsiatsi, daxitajiwi peca-panepaenexa pijaneconiawecua. ¹⁹ Nexata, xaniawaetsia aeconoxae paneyapētaexae Jesús peliwaisi, panajamatabēcuenepēnēyorore baja pibisiacuenē pane-exanaejawawecua Diosojawabelia, panesiwanajamatabēcuenecopatsinexa Jesucristojawabelia! Nexata, pibisiacuenē pane-exanaeneconimi, Dioso pacawecua-ajibia-exanaena. ²⁰ Bajarapacuenia itsa pa-exanawanapaenae, Dioso pacayawenonaena pexaniacuenia panejinawanapaenexa. Orijiibia, itsamatabacabi Dioso athēbēwetsica icatsia itorobianica Jesús, ponē bajayata Dioso itapeta papecayawenonaenexa, papecayanacua-ewetsinexanua, pacuenia tajēwelia Dioso najumecapanepaeya jumaitsi profetawi pejamatabēcueneta. ²¹ Maparucaeje abaxē Jesús eca athēbētatsia. Matapania

p 3:14 *pepopianeconiibinē*: Taema Mt 27:15-26; Mc 1:24; Hch. 7:52; 22:14; 1Jn 2:1. Taemana 2Sa 23:3-4; Isa. 32:1; 53:11; Zac. 9:9.

q 3:16 *pesiwanajamatabēcuenecopatsixae Jesús-jawabelia*: Pedro jumaitsi: «*Jesucristo, pecaxanepanaeya-exanaexae/pewēnēta, nonotapunare*», jai. Bajarapacuenia Pedro pejumaitsixae, najamatabēcuenē-itajēta pitaxutuajamatejemajawa Jesús-jawabelia pexanepanaeya-exanaejawanexa peticuenebinētsi. Bajarapacuenia peticuenebinētsi itsa nonotapuna, najamatabēcuenē-itajēta pejumexaniataejawa Jesús pecuenecaējēpaejawatsi pexanepanaeya-exanaejawanexatsi. Nexata, Jesús-jawabelia siwanajamatabēcuenecopata. Nexata, Pedro, peticuenebinētsibeje siwanajamatabēcuenecopatabeje Jesús-jawabelia.

r 3:18 *Cristo*: Jesús yabarajumaitsi. Itsiata, Pedro peyapētaeya-exanaexae xua Diosojumepaebinē yaquina bajayatami, canacueneba Cristowēnē, tsipaji Diosojumepaebiwimi canacueneba Mesías-wēnē hebreojumeta, Jesús-nexa.

pamatacabi Dioso xanebijitsia daxitacuene, Jesús icatsia patsianica, pacuenia profetawi bajayata tajëwelia wajunupaeba. ²²Wajasalinaiwimijawabelia baja cajena bajayata tajëwelia profeta Moisés-pijinë Jesús yabara jumaitsi mapacueniaje: «Pacuenia xanë nitoroba profetanëxanë, bajarapacuenia icatsia wajatuxanenë Dioso itorobiana itsanë profetanë. Paxamë bajaraponë panemomoxiyajuwënë tsane. Nexata, bajarapaprofetanë paliwaisi pacat-sipaebiana, panamuxuna-ewetsianame, xaniawaetsia panejumecowënëtsinexa. ²³Nexata, daxita pamonaë apojumecowënëtsi tsane bajarapaprofetanë petsipaebiliwaisi, Dioso tsatsiana bajarapamonae pijajiwiwecua, pewere-biabinexa», jai Moisés-pijinë wajasalinaiwimijawabelia Jesús yabara —jai Pedro bajarapamonaejawabelia.

²⁴Icatsia, Pedro jumaitsi:

—Xua baja aeconoxae mapamatacabitaje copiapatapona, bajaraxua yabara bajayata tajëwelia wajunupaebapona daxita profetawimi Samuel-pijinëjawaweliacujinae mapamatacabijawaberenaje. ²⁵Paxamë panejume-xaniataexae profetawimi pepaebiliwaisi, bepapemomoximë. Nexata, xua Dioso najumecapanepaeya jumaitsi perajutsinexa panijasalinaiwimijawabelia, bajaraxua paxamë Dioso pacarajutsiana. Bajayata tajëwelia Dioso jumaitsi wajasalinainëmi Abraham-pijinëjawabelia Jesús yabara: «Caenë nemomoxiyajuwënë itorobianajë jiwi peyawenonaenexa. Nexata, nemomoxiyajuwënë pexaniacuenia yawenonaena^a daxitanacuanëpijiwi», jai Dioso tajëwelia Abraham-pijinëmijawabelia Jesús yabara. ²⁶Dioso baja cajena, Israel-pijinë papemomoximë, copiaya paxamëjawabetsica Dioso pexënato pacato-itorobica profetanëcuenia,^t pexaniacuenia papecayawenonaenexa, pacaewimimë canacujitsia panenajamatabëcuenepënëyorotsinexa pibisiacueni pane-exanaejawawecua —jai Pedro bajarapamonaejawabelia, Portal de Salomón-wënëjawata.

**Pedro, Juan-beje, Jesús peliwaisi tsipaebabeje
templobo pewetsiwijawabelia**

4 ¹Pedro, Juan-beje, itsa abaxë Jesús peliwaisi tsipaebanucabeje bajarapamonaejawabelia Portal de Salomón-wënëjawata, bajarapaepatota jemata patanajetarubena itsamonae sacerdotewi, saduceowinua, itsanë capitán^u yajawa, templobopijipolicíawi pewetsinë. ²Daxita bajarapamonae bara-anaepanatsi Pedro, Juan-beje, tsipaji bajaraponëbeje Jesús peliwaisi petsipaebijawata, jumaitsibeje tsaponae:

—Jiwi tëpae-ata tsane, icatsia asaë tsane petëpaecujinae. Bajarapaliwaisi cajena pexaniajailiwaisi, tsipaji baja icatsia Jesús asaëya-exanatsi petëpaecujinae —jai tsaponaebeje.

s 3:25 *nemomoxiyajuwënë pexaniacuenia yawenonaena*: Taema Gén. 12:3; 22:18. t 3:26 *profetanëcuenia*: Taema Hch. 3:22-23. u 4:1 *capitán*: Bajaraponë sacerdotewiyajuwënë, ponë ewetabiaba templobopijipolicíawi. Nexata, bajarapacapitán pejumenamatamotsinë itsasacerdotewiwecua. Caenë sacerdotewi pepopenamatacaitorobinë jumenamatamota bajarapacapítanwecua. Templobopijipolicíawi ewetabiaba templobo itsamonae pexanaeyaniwa xua yabara bajarapatemplobo nacopatsipa bepenaxuirabibocuenia Dioso pitabarata, petaicænexanua pamonaë penajumetsënëtsiliwaisi pepaebiwi, pecaponaenexatsi judíowi pewetsiwijawabelia, itsa jume, pecapitsapaeya-exanaenexatsi templobowecua.

³Nexata, apopetsimuxuxanepanaexaetsi bajaraponëbeje pepaebiliwaisi, bajarapamonaë waetabatsibeje. Caponaliatsibeje pe-etsinexatsibeje penaneconitsiwi pejebabiabibota. Merawia pitsijawata jutsijitsiatsibeje, pijaneconi petocanaëjëtsinexatsibeje, tsipaji baja bitso caniwiyo-epatota^v waetabatsibeje. ⁴Itsiata baitsi jane baja, jiwibitsaëtoxanetonë capanepaeya jumexaniatanetsibeje pepaebiliwaisi pewaetabiwajënaeyatsibeje. Nexata, daxita pamonaë jumexaniatane Jesús peliwaisi, ëpebijiwi namata-ëjëtatsi bejamatabëcujiru cinco mil ponëbeje, namata-ëjëtsinejewa petiriawi, pejewaxi-ata.

⁵Nexata, merawia pitsijawata nacaetuata judíowi pewetsiwi, piñancianowi, pecujarubiwinua Moisés-piñinëta penajumecopatsiliwaisi, Jerusalén tomarata. ⁶Bajarajota, napatanua Anás,^w sacerdotewi pepopenamatacaitorobinë, Caifás, Juan, Alejandro, itsamonaë-ata sacerdotewi pijamonaë. ⁷Nexata, Pedro, Juan-beje, nutatsibeje daxita bajarapamonaë pitabarata. Nexata, bajarapamonaë jumaitsi bajaraponëbejéjawabelia:

—¿Jipatsa pejamatabëcueneta paxanepanaeya-exanamebeje apopecajëpaenëmitsi peponaponaëjawa? —jai.

⁸⁻⁹Nexata, bajarapaëpatota Pedro Espíritu Santo ayaicuenia jamatabëcuenecaëjëpaeya-exanatsi^x ajumëjunawijibia pejumecanawiatsinexa mapacueniaje:

—Paxamë judíowi pane-ewetsiwi, paxamë-ata piñinia pa-ancianowimë, paneyanijobame, paneyapëtaenexa pacuenia paxanepanaeya-exanajëbeje apopecajëpaenëmitsi peponaponaëjawa, pexaniacuene pato-exanaë-atanëbeje. ¹⁰Nexata, pacatsipaebianatsi daxita paxamë paneyapëtaenexa, daxita Israel nacupijiwi-ata peyapëtaenexa. Maponë pane-itabarata nucaje, apopecajëpaenëmitsi peponaponaëjawa, Jesús, Nazaret tomarapijinë, pejamatabëcueneta xanepanaeya-exanatsi, ponë picani paxamë pacobematabiabarutame cruzajawabelia. Bjaraponë baja cajena Dioso icatsia asaëya-exanatsi petëpaecujinaë —jai Pedro.

¹¹Icatsia, Pedro jumaitsi:

—Bjarapacuenia paxamë, judíowi pane-ewetsiwi, panenaitaxutojematsijawanexa Jesús, bajayata Dioso pejumeliwaisibaxutota^y tajëwelia jumaitsi mapacueniaje:

«Pa-iboto itsamonaë bo-exanaewi, petsita-abejexaetsi, naitaxutojematabuata, bajarapa-iboto itsamonaenexa tonamatamotatsi, pecanacuenëbinexa copiaya pebuatsi-ibotonexa boyenepanatotsotota», jai tajëwelia Dioso pejumeliwaisibaxutota paxamë yabara.

¹²»Tajamonaë, caenë Jesús caëjëpatsi wajanacacapanepanexa pibisia-cuene waja-exanaëneconiwequa. Bjaraxuata, Dioso itorobica Jesús, tsipaji

v 4:3 *bitso caniwiyo-epatota*: Judíowi apotsitaxanepanaetsi merawi petocaëjëtsijawa itsajiji pijaneconi. Bjaraxuata, etatsibeje penaneconitsiwi pejebabiabibota. w 4:6 *Anás*: Bjaraponë sacerdotewi pepopenamatacaitorobinëmi. Nexata, bajaraponë pepuaperujunë, piopaxa Caifás naexana sacerdotewi pepopenamatacaitorobinë. Itsiata, itsajawata Anás tsiteca napatabiaba jiwi peliwaisi petocanaëjëtsinexa judíowi pewetsiwi yajawa. Bjarapacuenianua Juan, Alejandrobeje sacerdotewi pepopenamatacaitorobinëmibeje-ata. x 4:8-9 *Espíritu Santo ayaicuenia jamatabëcuenecaëjëpaeya-exanatsi*: Pacuenia Jesús yapëtaeya-exanatsi peto-exanaenexa, bajarapacuenia Espíritu Santo to-exanatsi Pedro. Taema Mt 10:17-20; Mc 13:9-11; Lc 12:11-12; Hch. 1:8 y 4:11 *Dioso pejumeliwaisibaxutota*: Taema Sal. 118:22. Bjarapacuenia Jesús-ata nayabaracuacuaijai. Taema Mc 12:10-11; 1Pd 2:5-7.

baja ajibi pematatsënëa mapanacuataje itsanë-ata pejamatabëcueneta wajanacacapanepaenexa Diosojawabelia —jai Pedro bajarapamonaejawabelia.

¹³ Bajarapamonae jamatabëcuenenabenajaca itsa tane Pedro, Juan-beje, ajumejunawijibia Jesús peliwaishi petsipaebijawabeje bajarapamonaejawabelia, tsipaji yapëtane bajaraponëbeje bajayajebi apopenacujarubinëbeje peyaquinaejawa. Nexata, jamatabëjumaishi Pedro, Juan-beje yabara: «Bajaraponëbeje cajena penaponaponaenëbeje Jesús-jawata. Bajaraxuata, tsaena bitso baja yapëtanebeje bajarapaliwaishi», jamatabëjai. ¹⁴ Nexata, petaexae apoecaëjëpaenëmitsi peponaponaejawa penanucaejawa Pedro, Juan-bejejawata, bajarapamonae acuenebi pejumaishijawa: «¡Jume raja! Jesús raja pejamatabëcueneta apoxanepanae maponëje», pejaijawa. Acuenebinua piajumematamobia-exanaenexa bajaraponëbeje pepaebiliwaishi. ¹⁵ Nexata, bajarapamonae Pedro, Juan-beje, cae-epatoyo nawecuacapsapatsibeje, pecowëta ëpamonae penajumejaitsinexa pacuenia exanaejitsia bajaraponëbeje pexanaejawa yabara. ¹⁶ Nexata, Pedro, Juan-beje, pecowëta, bajarapamonae najumaishi:

—¿Detsamë raja pacuenia exanaenatsi bajaraponëbejejawabelia? Daxita Jerusalén tomarapijiwi xaniawaetsia yapëtane bajaraponëbeje pexanepanaeya-exanaejawabeje apoecaëjëpaenëmitsi peponaponaejawa. Nexata, acuenebi jiwijawabelia wajajumaishijawa: «Apoxanepanaeya-exanaebeje raja bajaraponëbeje», wajajaijawa. ¹⁷ Pinijicuenia waxaishi bajaraponëbeje itawetsianatsi petsipaebiyaniwabeje matawëjëa Jesús peliwaishi itsajiwiyojawabelia-ata. Nexata, bajarapacuenia apotsipaebibeje baja tsane itsamonaejawabelia Jesús peliwaishi —najai bajarapamonae Pedro, Juan-beje pecowëta.

¹⁸ Nexata, icatsia Pedro, Juan-beje caewëalia junaliatsibeje. Nexata jane baja, bajarapamonae jumaishi bajaraponëbejejawabelia:

—¡Pëtsa baja icatsia matawëjëa pa-exanamebeje itsacuenejawa Jesús pewënëta! ¡Pacoparebejenua baja jiwi panetsipaebaponaejawabeje Jesús peliwaishi! —jai bajarapamonae.

¹⁹ Nexata, Pedro, Juan-beje, jumecanawiatsiajumaishibeje:

—¡Paxamë panijacuata panajamatabëxainare, Dioso pitabarata itsa panetoxanepanabeje paxamë patacajumecowënëtsijawabeje, Dioso patajumecowënëtsijawabewecua! ²⁰ Dioso patane-itorobixabeje, apoxanepanae patacopatsijawabeje jiwi patatsipaebaponaejawabeje xua patanijibeje, paliwaishi-ata pajumetanijibeje —jai beje bajarapamonaejawabelia.

²¹ Icatsia, judfowi pewetsiwi orijibia atiobiaya itawetatsibeje, jiwi petsipaebaponaeyaniwabeje Jesús peliwaishi. Bajaraxuacujinae, copatatsibeje baja peponaenexabeje, tsipaji apocaxitajarabi pacuenia naneconitsia-exanaejitsiatsibeje, pecujunawixae penacaetuatsiwi. Bajaraponëbeje pexanaecueni yabara daxitajiwi jumaishi tsaponae wënëxaniatsiaya Diosojawabelia:

—Diosomë, bitso ayaijamatabëcuenenëmë —jai tsaponae bajarapamonae.

²² Bajarapacuenia daxitajiwi pexaniajamatabëcuene rajutapona Diosojawabelia, tsipaji Dioso pesaëta pinijicuene pexanaejawata, Pedro, Juan-beje, xanepanaeya-exanabeje apoecaëjëpaenëmitsi peponaponaejawa, bajaraponë xainae-ata cuarenta pawai beje pematatsënëa penaexanaecujinae.

**Jesús peliwaishi pejumexaniataewi wajëca Diosojawabelia
pejamatabëcuenecaëjëpaeya-exanaenexatsi,
ajumejunawijibia Jesús peliwaishi pepaebaponaenexa**

²³Itsa baja Pedro, Juan-beje, judíowi pewetsiwi copatatsibeje peponaene-xabeje, nawialiabeje baja itsabelia jinawanapa Jesús peliwaishi pejumexaniataewi. Nexata, bajaraponëbeje tsipaeba bajarapamonaejawabelia daxita pacuenia sacerdotewi penamatacaitorobiwi, judíowi pija-ancianowi-ata jumaitsitsibeje. Nawajunupaebabenua pitawetsijawatsibeje Jesús peliwaishi jiwijawabelia petsipaebaponaeyaniwabeje.

²⁴Nexata, Jesús peliwaishi pejumexaniataewi itsa jumetane bajaraponëbeje penawajunupaebijawabeje, bajarapaepatota daxita bajarapamonaë Pedroana najamatabëcuenëjëpaeya wajëca Diosojawabelia. Daxita bajaramonaë pewajëcaejawata Diosojawabelia, jumaiti mapacueniaje: «Xamë, Diosomë, ayaijamatabëcuenenëmë daxitawecua. Nexanaenë itaboxo, ira, manuamene, daxita xua yajawa exaname caejawa canacujitsia. ²⁵Xamë Diosomë, bajayata Espíritu Santo pejamatabëcueneta tajëwelia yapëtaeya-exaname patajasalinainëmi David-pijinë Jesús yabara. Nexata, nijajiwitonë David-pijinë jumaiti^z mapacueniaje:

»¿Detsa xuajitsia itsanacuanëpijiwi, pamonaë apojudíowi, bitso bara-anaepanaeya nacaetuatabiaba petsimaxëpatsinexa Dioso pijajiwijawabelia? ¿Detsa xuajitsia pijinia judíowi saya jema najamatabëxainabiaba pexanaenexa xua apocaëjëpaetsi pexanaenexa Diosojawabelia?

²⁶»Bajarapacuenia exana, tsipaji pinijnacuanë pewetsiwi, tomaranë pewetsiwi-ata, caejamatabëcuene xaina xamë Diosomë, nijacuenë pecatobijianaenexa. Najamatabëxainanua pebejiobia-exanaenexa Cristo, ponë itorobiapaebimica jiwi pecapanepaenënexa», jai David-pijinë Espíritu Santo pejamatabëcueneta, Jesús pebejiobia-exanaejawanexatsi yabara.

²⁷»¡Xaniajai baja cajena! Mapatomarataje Herodes, Poncio Pilato-beje,^a barënacaetuatabeje itsanacuanëpijiwi, pamonaë apojudíowi, judíowi-ata yajawa, penajumejaitsinexa pacuenia beyaxuabijitsiatsi nexë-nato Jesús, ponë itapetame Mesías-nexa.^b Bajarapacuenia copiapata jane baja, xua bajayata tajëwelia David-pijinë wajunupaeba bajaraponë yabara. ²⁸Nexata, bajarapamonaë exanatsi daxita pacuenia baja cajena bajayata nexëno tocopatame pexanaenexatsi. ²⁹Patajatuxanenë, yapëtaneme pacuenia aeconoxae judíowi pewetsiwi atiobiaya pane-itaweta jiwi patatsipaebaponaeyaniwa nexënato peliwaishi. Itsiata, pacawajëcatsi patanejamatabëcuenecaëjëpaeya-exanaenexamë, paxanë, panijajiwinë, ajumejunawijibia jiwi patatsipaebaponaenexa nexënato peliwaishi. ³⁰Orijibia, patomarata patsipaebianajë nexënato peliwaishi, jamatejemaya-exanaename piawitanewi, pinijicuene tsita-exanamenua jiwi pepapëtaenexa bitso

z 4:25 *David-pijinë jumaiti*: Taema Sal. 2:1-2. **a 4:27** *Herodes, Poncio Pilato-beje*: Taema Lc 23:7-11; Mt 27:1-2. **b 4:27** *Mesías-nexa*: Mapacuenia itsa jumaitisije Jesús yabara, nacayapëtaeya-exana pacuenia Dioso itapeta Jesús pepopeyanacua-ewetsinënexa.

ayaijamatabëcuene nexainaenëcuene. Bajarapapiniijicuene exanaename nexênato Jesús pewênëta»,^c jai Pedrobana pewajëcaejawata Diosojawabelia.

³¹ Itsa baja bajarapamonae wereta pewajëcaejawa Diosojawabelia, bajara-jota ira nanequetajaraba. Daxita bajarapamonae Espiritu Santo ayaicuenia jamatabëcuene caejëpaeya-exanatsi,^d nexata ajumejunawijibia jane baja, jiwi tsipaebapona Jesús peliwaishi.

Jesús peliwaishi pejumexaniataewi pexinaejawanë daxita nacobenaxaina

³² Daxita pamonae^e Jesús peliwaishi pejumexaniataewi, najamatabëjëpaeya jinawanapa. Nexata, xua xaina aponajamatabëxainae caejiwi pexinae-nexa. Biji rajane, xua xaina, daxita nacobenaxaina. ³³ Apóstolewi pijinia asaëya tsipaebabiaba jiwijawabelia Jesús peliwaishi, pacuenia icsatia Dioso asaëya-exanatsi wajatuxanenë Jesús petëpaecujinae. Dioso bitso pexania-cuenia yawenonabiabatsi daxita bajarapamonae. ³⁴ Nexata bajarapamo-naetuatujëta, caenë-ata apoyajuwënëbejiobi pexinaejawa yabara, tsipaji Jesús peliwaishi pejumexaniataewituatujëta, pamonae pexinaewi iranë, bonë-ata, bajaraxuanë canajetabiaba. Nexata, bajarapamonae xua canajeta, bajarapamatamopalata capatabiaba. ³⁵ Nexata, bajarapapalata rajutabiaba apóstolewijawabelia. Apóstolewi juya tsicobetsanabiaba penajuajinawa-napaewijawabelia pacuenia baja caejiwi canacujitsia namatawenonapona. ³⁶ Bajarapamonaeyajuwënënë itsanë pewënë José, Chipretunaetota penae-xanaenë, Levípijinë pemomoxiyajuwënënë. Bajaraponë apóstolewi wënëru-batsi itsawënë, Bernabé. Bajarapawënë hebreojumeta pejumaitisijume: «Jiwi pejamatabëcuenebarëyaya-exanaenë», pejaiijume. ³⁷ Nexata, José-ata pija-ira canajeta. Bajaraxuacujinae, capata pija-iramatamopalata, perajutsinexa apóstolewijawabelia.

**Ananías, pijawa Safirabeje, tëpabeje,
penajumetsënëtsixaebeje Espiritu Santojawabelia**

5 ¹ Bajarapamatacabijawa, naponaponabeje Jesús pijajiwituatujëta Ananías, pijawa Safirabeje. Bajarapajiwibeje yajuwënëcanajeta-beje pija-ira. ² Nexata, Ananías pija-iramatamoyajuwënëpalata muet-sia copata. Bajaraponë, pijawabeje caejamatabëcuene najuaxainabeje, bajarapacuenia pexanaenexabeje. Bajaraxuacujinae, Ananías peyaju-wënëcopatsipalata calia apóstolewijawabelia. Nexata, Ananías jumaitis apóstolewijawabelia:

c 4:30 *Jesús pewênëta:* ËDioso pinijicuene pexanaenë. Nexata, apóstolewi pacujinae paebanaje-taruca Jesús peliwaishi, itsa Dioso pesaëta pinijicuenejawanë tsita-exanaponanua jiwijawabelia, bajarapacuenia jiwi yapëtaejitsia Dioso bajarapacuenia pexanaejawa Jesús pejamatabëcueneta. **d 4:31** *ayaicuenia jamatabëcuene caejëpaeya-exanatsi:* Wowaijume canacueneba, petsijamatabë-wënëcaejawa (Ileno), itsa jume, asaëyata pejamatabëcuenenamatacaitorobijawa (controlado), bajarapajamatabëcuene yabara. Bajarapajumebeje canacuenebanua itsa dowathiwi tsijamata-bëjunua jiwi pejamatabëcuenenamatacaitorobinexatsi pejitsipaecuenia, bajarapacuenia jiwi-tonë apojitsipae-ata pexanaejawa. Itsiata, Espiritu Santo bajarapacuenia aponacato-exanae. Biji rajane, ayaicuenia nacajamatabëcuene caejëpaeya-exana. Nexata, itsa jejaitsi, nacajamatabë-cueneyawenona wajato-exanaenexa pejitsipaecuenia. Taema Hch. 1:8 e **4:32** *Daxita pamonae:* Bajarapamatacabijawa, bajarapamonae bejamatabë 10.000-15.000 pajiwiibeje pematatsënëa itsa namata-ëjëta petiriawi, pejewaxi yajawa. Taema Hch. 2:41; 4:4.

—Taja-ira raja yajuwënëcanajetajë. Nexata, pacarajutsijitsiatsi daxita bajarapa-iramatamopalata, panetsicobetsanaenexa wajanajuajinawanapae-wijawabelia —jai.

³Nexata, Pedro jumaiti bajaraponëjawabelia:

—Ananías, ¿detsa xuajitsia tocopatame dowathi pecajamatabëcuene-itorobijawa, nenajumetsënëtsinexa Espíritu Santojawabelia? Xamë baja cajena nija-iramatamo palata yajuwënëcopatame. ⁴Nija-irami necanajetsi-wajënaeya, nija-ira baja cajena picaní saicaya. Xua nija-iramatamo pitame, nijajawa baja cajena. ¿Detsa xuajitsia nexata mapacuenia neyamaxë-itojorobijawa najamatabëxainameje? Ëpaxanëjawaberena baja cajena apojumetsënëtsimë. Najumetsënëtame baja cajena Diosojawabelia-ata —jai Pedro.

⁵Ananías paepatota jumetane bajarapacuenia Pedro pejumaitisijawa, petë-paenë irata jopa. Nexata, daxita pamonaë wënëliwaisitane bajarapacuenia Ananías petëpaejawa, pinijicuenia jamatabëcuenenajunawiaca. ⁶Nexata, pabota Ananías petëpaenë boca, bajarapaboyarena pewëjëawi jonena. Mataquiona petëpaenë. Bajaraxuacujinae, capitsapalia pemëthëtsinexa.

⁷Bajaraxuacujinae, bexëa, acueyabi pahorabejucujinae, Ananías-pijinë pijawa jonena, abaxë apoyapëtaenejewawa pamona pewecuatëpaejawatsi.

⁸Pedro icatsia yanijoba bajarapowajawabelia. Jumaiti:

—¡Netsipaebare! ¿Xaniajai tsabaja? ¿Mapamatamotaje pacanajetamebeje panija-iramibeje? —jai Pedro.

Nexata bajarapowa jumaiti:

—Xaniajai rabaja. Bajarapacuenia pacanajetajëbeje —jai bajarapowa.

⁹Nexata, Pedro jumaiti bajarapowajawabelia:

—¿Detsa xuajitsia amonabeje panajamatabëcuenejëpamebeje, panenajumetsënëtsinexabeje Espíritu Santojawabelia? ¡Namuxuna-ewere! Jumia rabaja nawiabanajetarubena rabaja amonami pemëthëcaewitsilia. Bajarapamonae icatsia xamë-ata cacaponaelia, pecamëthëtsinexa —jai Pedro.

¹⁰Nexata, bajarajota Pedro pitabarata bajarapowa-ata icatsia petëpaeawa irata jopa. Itsa jonena pewëjëawi penawiabanajetarubenaewi, Ananías-pijinë pemëthëcaewilia, caxitajarababuata petëpanucaewa. Nexata, icatsia bajarapamonae capitsapalia bajarapowa pemëthëtsinexa pamonami pemëthëmuxuneneta. ¹¹Nexata, daxita Jesús pijajiwi, itsamonae-ata, pamonaë bajarapajiwiabeje petëpaejawa wënëliwaisitanetsi, bitso junawa.

Apóstolewi tsita-exanapona Dioso pesaëta pinijicuene pexanaejawanë

¹²Apóstolewi tsita-exanapona Dioso pesaëta pinijicuene pexanaejawanë Jerusalén tomarapijiwi pitabarata. Daxita Jesús peliwaisi pejumexaniataewi tsiteca nacaetuatabiaba templobopijipanabota, Portal de Salomón-wënëjawata. ¹³Daxita Jerusalén tomarapijiwi pexaniacuenia yayataeyabiabi-ata Jesús peliwaisi pejumexaniataewijawabelia, itsiata, pamonaë pejume-aebiwi abaxë Jesús peliwaisi, junawa bajarapamonae yajawa penanajuanacaetuatsijawa. ¹⁴Pewajënaeyabelia jiwibitsaëttoxaneto jumexaniataepona Jesús peliwaisi, pebijiwi, petiriawi-ata. Nexata, daxita bajarapamonae nanacaetuatabiaba Jesús peliwaisi pejumexania-taewijawabelia. ¹⁵Apóstolewi pexanaponaexae Dioso pesaëta pinijicuene

pexanaejawanë, itsamonae tocapatabiabatsi piawitanewi callejawaberena. Tojebabiabatsi camata, itsa jume, betulimacuenejawanëta. Nexata, Pedro itsa najetaruca callejawa, piawitanewi jitsipabiaba Pedro pejayatsijawatsi, itsa jume, pitacaënae-ata petsijopaejawatsi bajarapamonae pejamatejemanexa piawitanejawawecua. ¹⁶Orijibia, jiwibitsaëtoxanetonë patabiaba Jerusalén tomaraberena, imoxoyo pe-enaetomaraxijawawerena penaropobiwi. Bajarapamonae Pedro tocapatabiabatsi piawitanewi, itsamonaua dowathi pecanacuenebiwitsi, bitso pebejibia-exanaewitsinua. Daxita bajarapamonae Pedro, itsamonae apóstolewi yajawa, Dioso pesaëta jamatejemaya-exanabiaba.

**Sacerdotewi pepopenamatacitorobinë taicaeya-
exana apóstolewi, penaneconitsia-exanaenexa**

¹⁷Bajarapacuenia pecuenaetaexae, sacerdotewi pepopenamatacitorobinë, pamonae-ata yajawaponapona, saduceowi,^f pinijicuenia bara-anaepana apóstolewijawabelia, pecuena-ëbixae. ¹⁸Bajaraxuata, itoroba templobopijipolicíawi petacaenexa apóstolewi. Jebatsi penaneconitsiwi pejebabiabibota. ¹⁹Itsia baitsi jane, bajarapamerawi Dioso pija-ángelnë tobaupanatsi penaneconitsiwi pejebabiabibobaupanë. Nexata, ángelnë pematacapitsapae-cujinaelia, jumaiti apóstolewijawabelia:

²⁰—¡Paponare templobojawabelia! Bajarajotalia patsipaebianame mapaliwaisije^g jiwijawabelia: «Dioso rajutsiana matabi apowerewerecaejawa^h jiwijawabelia, Jesús piasaëya-exanaexae petëpaejawawecua», pajamë tsane—jai ángelnë.

²¹Apóstolewi itsa jumetane bajarapacuenia ángelnë pejumaitisijawa, nexata ajena matabi tsina, ponalia templobojawabelia. Nexata, templobota Jesús peliwaisi jiwi tsipaebanubena.

Bajarapaepatota, pijinia sacerdotewi pepopenamatacitorobinë, peyajawaponaponaewi-ata barënaetuata itsabojawata. Nexata, junata penacaetuatsinexa bajarapabota judíowi pija-ancianowi, judíowi pecujarubiwi-ata, pebarëcanaëjëtsinexa apóstolewi pijaliwaisi. Xuacujinae, itoroba templobopijipolicíawi petocaponanexatsirena apóstolewi penaneconitsiwi pejebabiabibojawawerena, petonubinxatsi bajarapamonae pitabarata. ²²Nexata, templobopiji-policíawi itsa ponalia, apocaxitarabi apóstolewi penaneconitsiwi pejebabiabibota. Nexata, nawiabarena cobesa, petsipaebinexa pewetsiwi penacaetuatsiwijawabelia. ²³Nexata, templobopijipolicíawi jumaiti bajarapamonaejawabelia:

f 5:17 *saduceowi*: Bajarapamonae jume-aebabiaba jiwi piasaëjawanexa petëpacujinae.

g 5:20 *mapaliwaisije*: Mapacuenia pitsapa griegojumeta, «mapaliwaisije jiwi piasaëtsawanapaeliwaisi yabara». Dioso pejumeliwaisi penacujarubiwi caejamatabëcuene apoxinae paliwaisi yabara jumaiti. Itsamonae canaëjëta, «*jiwi matabi apowerewerecaejawa pexainaejawanexa pacuenia Jesús asaë tsaponaponaenamatacotsicujinae*», jai. Itsamonae pijinia canaëjëta, «*petsipaebinexa Jesús peliwaisi, pexanaliwaisi, jiwi pecapanepaliwaisinxatsi*», jai. Itsamonae pijinia canaëjëta, «*petsipaebinexa pacuenia jiwi pejanacuenia jinawanapaejitsia Jesucristo pejamatabëcueneta*», jai. Daxita xanepana picani, tsipaji daxita bajarapacuenia najumetane «*VIDA-jume*» yabara. **h 5:20** *matabi apowerewerecaejawa*: Saduceo jume-aeba jiwi piasaëtsawanapaejawanexa petëpacujinae. Bajaraxuata, tsaena ángelnë itorobatsi apóstolewi pepaebinexa, jiwi petëpacujinae icatsia piasaëtsawanapaejawanexa, Jesucristo pejamatabëcueneta.

—Itsa papaliajë penaneconitsiwi pejebabiabibojawabelia, daxitabaupanë xaniawaetsia nabaupaxatabanubena. Bajarajota, nubena picani baupanë pewetanubenaewi. Itsiata baitsi jane, itsa pabaupatajë, caenë-ata, apóstolnë, apo-ecae bajarapabo ënëtuatuajëalia —jai policíawi.

²⁴Nexata, templobopijipolicíawi pijacapítan, sacerdotewi penamatacitorobiwinua, itsa jumetane bajarapacuenia policíawi pejumaitsi-jawa, bajarapamonae jamatabëjumaitsi: «¿Detsa meta nexata itsi apóstolewi?»,ⁱ jamatabëjai bajarapamonae. ²⁵Nexata, bajarapaepatota itsanë pebi parena, templobojawawerena peponaenë. Jumaitsi bajaraponë bajarapamonaejawabelia:

—¡Panejumetaema! Pamonae picani pajebame penaneconitsiwi pejebabiabibota, bajarapamonae cajena templobotalia, jiwijawabelia tsipaebanubena Jesús peliwaishi —jai bajaraponë.

²⁶Nexata, templobopijipolicíawi pijacapítan barëlia pijajiwi, apóstolewi icatsia petaiacaenexa. Itsiata, xaniawaetsia caponarena bajarapamonae, tsipaji cujanawa jiwi petseconaeyaniwatsi ibotonëta, pamonae namuxunaeweta apóstolewi petsipaebiliwaishi. ²⁷Itsa baja apóstolewi caparenatsi, nexata nubatsi sacerdotewi penamatacitorobiwi, judíowi pija-ancianowi, judíowi pecujarubiwi-ata pitabarata. Nexata, bajarajota sacerdotewi pepo-penamatacitorobinë jumaitsi apóstolewijawabelia:

²⁸—Paxanë baja cajena, paca-itawetatsi picani matawëjëa jiwi panetsipaebiyaniwa Jesús peliwaishi. ¿Itsiata, tsabaja cajena apopanejumecowënëtsimë? ¡Pataema jane pacuenia Jerusalén tomarata yacajëpapon panetsipaebiliwaishi! Paxamë jamatabëpaneneconitame Jesús pebeyaxuabijawatsi yabara⁷ —jai sacerdotewi pepopenamatacitorobinë apóstolewijawabelia.

²⁹Nexata, Pedro, itsa-apóstolewi yajawa, jumecanawiata mapacueniaje:

—Paxanë panamatawenonajë patajumecowënëtsinexa xua Dioso pane-itoroba, patawënajiwi penamatacitorobiwi-ata patane-itorobijawawecua. ³⁰Paxanë baja cajena payapëtaniji paxamë Jesús panebeyaxuabijawa, pamacabi pacobematabiabarutame cruzajawabelia.^k Itsiata, wajasalinaiwimi pijaDioso, Jesús icatsia asaëya-exanatsi petëpaecujinae. ³¹Bajaraxuacujinae, Jesús piasaëya-exanaecujinaetsi, Dioso pecujanenia ecaeya-exanatsi, ayaijamatabëcuenenëcuenia daxita jiwi peyaiyataenexatsi, bajarawetsica pewetsinexa jiwi. Tocopatatsi pematacaponaenexa Israel-pijinë pemomoxi penajamatabëcuenepënëyorotsinexa Diosojawabelia, pibisiacuen pexana-biabijawawecua. Tocopatatsinua jiwi pecapanepaenexa pijaneconiweua, tsipaji Dioso jitsipa Jesús pejamatabëcueneta daxitajiwi aneconijibia petaenexa. ³²Daxita xua tocopiapatatsi Jesús paxanë raja pataniji, Espiritu Santo-ata. Nexata, bajarapacuenie yabara jiwijawabelia itsa patsipaebaponajë, Espiritu Santo paneyajawa tsabiabi, tsipaji Dioso cajena rajutapona Espiritu Santo pamonaejawabelia jumecowënëta Dioso —jai Pedro, itsa-apóstolewi yajawa, daxita bajarapamonaejawabelia.

i 5:24 «¿Detsa meta nexata itsi apóstolewi?»: Itsa jume, jucaejitsipa mapacueniaje: «¿Detsa xua nexata exanaenatsi bajarapa-apóstolewi yabara? Bajarapacuenia itsa cuenecajëpatsi pepanepajawa penaneconitsiwi pejebabiabibowecua, nacato-acuenebi wajacuenecaranatsijawa Jesús peliwaishi petsipaebaponaeayaniwa itsamonaejawabelia». j 5:28 Jesús pebeyaxuabijawatsi yabara: Taema Mt 27:25. k 5:30 cruzajawabelia: Taema Hch. 10:39; 13:29; 1Pd 2:24; Deut. 21:22-23.

³³ Nexata, daxita bajarapamonae itsa jumetane bajarapacuenia Pedrobana pejumaitsiyawa, bitso anaepana. Jamatabëbeyejebatsi picani apóstolewi.

³⁴ Itsiata, apobeyejebitsi, tsipaji bajarapamonaeyajuwënënë judíowi pecujarubinë, Gamaliel-wënënë,¹ nonotapuna daxita penajuawi pitabarata. Bajaronë fariseonë, Dioso penajumecopatsiliwaisi Moisés-pijinëta pecujarubinë. Daxitajiwi peyaiyataenëtsi. Nexata, Gamaliel itoroba wajabitsaë apóstolewi cae-epatoyo pecapitsapaenexatsilia. ³⁵ Nexata, apóstolewi pecowëta, Gamaliel jumaitsi penajuawijawabelia:

—¡Tajamonae judíowi, panajamatabëxainare xaniawaetsia! ¡Pëtsa pa-exaname pacuenia panajamatabëxainame mapamonaejawabeliaje!

³⁶ ¡Panajamatabënapire pacuenia Teudas-pijinëmi bajayata exanatsi! Bajaronëmi picani nacua pewetsinënexa, ayaijamatabëcuenenë bitso jamatabënaexana. Nexata, picani pijajiwinexa pëñajinawanapatsi cuatrocientos ponëbeje. Itsiata, Teudas-pijinëmi wajabitsaë beyaxuabatsi. Bajaronëmi pepëñajinawanapaewitsi, pamonae pijajiwinexa picani, daxita nacayajateca. Nexata baja, copiaruca bajarapacuenemi. ³⁷ Bajaraxuacujinae, icatsia pamatacabi gobierno pejamatabëcueneta daxitajiwi namata-ëjëta. Bajaramatacabi Judas-pijinëmi, Galilea nacuapijinëmi, bajarapijinia pacuenia jiwi ayaibitsaëtoxaneto pëñajinawanapatsi. Bajaronëmi-ata wajabitsaë beyaxuabatsi. Nexata, daxita pepëñajinawanapaewitsi nacayajateca. Nexata baja, copiaruca bajarapacuenemi-ata. ³⁸ Bajaraxuata nexata, mapamonaeje apóstolewi yabara pacatsipaebijitsiatsi. ¡Pëtsa pa-itsacueniabame bajarapamonae! Itsa bajarapamonae peneta mapanacuapijiwi pejamatabëcueneta tsi-paebawanapaje, bepíjia petsipaebiliwaisi werewerecaena. ³⁹ Itsa jume, Dioso pejamatabëcueneta bajarapamonae bajarapaliwaisi jiwi itsa tsipaebawanapa, nexata acuenebi tsipae paxamë bajarapacueni panewerewerecaeyaxanaejawa. Belia ayaineconí panatsi-exanaejitsipame Diosojawabelia —jai Gamaliel daxita penajuawijawabelia.

⁴⁰ Nexata, daxita bajarapamonae jumecowënëtatsi Gamaliel. Apóstolewi icatsia caewëalia pejonenexalia junaliatsi. Bajaraxuacujinae, apóstolewi, caenë canacujitsia, ayaicuenia jumatitibabeponatsi penaneconitsiwi pejumaconitabiabimacata. Itawetatsi icatsia matawëjëa jiwi petsipaebiyaníwa Jesús peliwaishi. Bajaraxuacujinae, copabatsi jane baja peponaenexa.

⁴¹ Apóstolewi nexata pitsaparena bajarapabowecua. Barëyaya ponalia, tsipaji Dioso tocopatatsi bajarapacuenia pebejiobia-exanaponaenexatsi,^m Jesús pijajiwixae. ⁴² Nexata, caematacabi canacujitsia templobota, jiwi pijabonëjawa-ata, apóstolewi asaëya Jesús peliwaishi tsipaebapona jiwi-jawabelia. Cujarubaponanua pacuenia Dioso itorobica Jesucristo jiwi pecapanepaenexa.

Jesús pijajiwi itapeta siete ponëbeje díaconowinexa

6 ¹ Jesús pijacuene penacujarubiwi, pewajënaeyabelia ayaibitsaëtoxanetonë tsaponae. Daxita judíowi-ata, itsiata, itsamonae griegojume

1 5:34 *Gamaliel-wënënë*: Bajaronë pecujarubinë apóstolnë Pablonë, itsa bajaraponë fariseocuenejawabelia penajonenë. Taema Hch. 22:3. m 5:41 *pebejiobia-exanaponaenexatsi*: Taema Mt 5:10-12; 1Pd 4:13; 2Co 12:10; Flp. 1:29.

pecuaicuaijaiwi,^a itsamonae pijinia hebreojume pecuaicuaijaiwi. Nexata, caematacabi canacujitsia pacujinae apóstolewi rajutabiaba penamatawenonaejawanë bitso bepejiobiwijawabelia, pamonaе griegojume pecuaicuaijaiwi apotsitaxanepanaetsi beweliacuenia peyawenonaponaejawatsi papetiriawi pamonajiwi pewecuatëpaewanëtsi. Nexata, cuenecarapuabiaya jumaitsi judfowijawabelia:

—Apóstolewi itsa tsicobetsanabiaba pexaejawa pamonajiwi pewecuatëpaewanëtsijawabelia, xuawajëtonë panijawiriawijawabelia rajutabiaba, bajaraxuawajëtonë patajawiriawijawabelia aporajutabiabi —jai griegojume pecuaicuaijaiwi hebreojume pecuaicuaijaiwijawabelia.

²Doce ponëbeje, apóstolewi, itsa nayajumetane pebaracuacuajawatsi, nexata junata penacaetuatsinexa daxita pamonaе Jesús pijacuene penacujarubiwi, bajarapaliwaisi pexanebinexa. Nexata baja, itsa nacaetuata daxita bajarapamonaе, apóstolewi jumaitsi bajarapamonaеjawabelia:

—Tajamonaе, apopanetoxanepanaе cajena paxanë patacopabijawa jiwi patatsipaebabiabijawa Dioso peliwaisi, juya xaniawaetsia patatsicobetsanabinexa pexaejawa bitso penamatawenonaewijawabelia. ³Bajaraxuata, patajamonaemë Cristo pejamatabëcueneta, bepa-itapetame, paxamëyajuwënëwi, siete ponëbeje, caejamatabëcuene pexainaewi, Espíritu Santo bitso pejamatabëcuenecaëjëpaeya-exanaewitsi, bitso petsiyapëtaewinua pexanaejawanexa. Nexata, bajarapamonaе paxanë patocopatsianajë bepejiobiwijawabelia petsicobetsanabinexa penamatawenonaecuene. ⁴Paxanë juya patsitecawanapaenajë patawajënaeyabelia patawajëcabiabijawa Diosojawabelia, patatsipaebabiabinexanua Dioso peliwaisi jiwijawabelia —jai apóstolewi penacaetuatsiwijawabelia.

⁵Nexata, daxita bajarapamonaе itsa jumetane apóstolewi bajarapacuenia pejumaitsiyawa, tsitaxanepanatsi. Nexata, itapeta bajarapamonaeyajuwënëwi mapamatabëxëyoje. Itapeta Esteban, ponë bitso Dioso pitaxutuajamatejemanë, Espíritu Santo bitso pejamatabëcuenecaëjëpaeya-exanaenëtsi. Itape-tanua Felipe, Prócoro, Nicanor, Timón, Parmenas, Nicolás-ata. Nicolás itsanacupijjinë, Antioquía tomarapijjinë. Apojudionë-ata, itsiata, judfowicuenia najumecowënëtaaponapona. ⁶Daxita bajarapamatabëxëyo pitapetsicujinaetsi, nubatsi apóstolewi pitabarata. Nexata, apóstolewi, caenë canacujitsia, pematatocotojumawereca nacobebuatanubena, Diosojawabelia petowajëtsijawata.

⁷Nexata jane baja, apóstolewi, itsamonae yajawa, Dioso peliwaisi jiwi tsipaebapona Jerusalén tomarata. Nexata, Jerusalén tomarata ayaibitsaëtoxaneto tsaponae Jesús pijacuene penacujarubiwi. Sacerdotewi-ata ayaibitsaëto jumexaniataepona Jesús peliwaisi.

**Diácono Esteban waetabatsi, penaneconitsia-
exanaenexatsi Jesús peliwaisi pepaebixae**

⁸Dioso bitso pexaniacuenia yawenonabiabatsi Esteban. Nexata, bajaraponë tsita-exanabiaba Dioso pesaëta pinijicuene pexanaejawanë, daxitajiwi

n 6:1 griegojume pecuaicuaijaiwi: Bajarapamonaе judfowi itsanacuanëjawabelia pejinawanapae-wimi Judea nacuaewecua. Nexata, bajarapamonaе cuacuajai griegojume. Nexata, wënërubatsi judfowi, helenistawi. Pamonaе judfowi Judea nacuaata pejinawanapae-wi, cuacuajai tsabiabi anijajumebeje, hebreojume, arameojumebeje. Itsiata, xaniawaetsia jumetane griegojume.

pitabarata. ⁹Esteban Jesús peliwaissi petsipaebaponaponaejawata, itsamonae barënajume-anaenotatsi, pamona nacaetuatabiaba judíowi penacaetua-tabiabibota, Esclavos Libertados-wënë° sinagogabojawata. Bajarapamonae judíowi pepatsiwi Cirene nacuawerena, Alejandría tomarawerena, Cilicia nacuawerena, itsamonae pijinia Asia nacuawerena. ¹⁰Itsia, bajarapamonae asaëya barënajume-anaenotsi-ata Esteban-jawabelia, apocuenecaëjē-paetsi peliwaissi-amoneyabijawa, tsipaji Espiritu Santo jamatabēcueneyawenonatsi xaniawaetsia pejumecanawiatsinexa bajarapamonaejawabelia. Bajaraxuata, juya bajarapamonae Esteban apojumecanawiatsicapaneapaetsi. ¹¹Nexata, bajarapamonae matamota itsamonae najumetsënëtsiaya Esteban peneconitsinexatsi jiwijawabelia. Nexata, pematamotsiwi, najumetsënëtsiaya jane baja jumaitsi jiwijawabelia Esteban yabara:

—Pajumetaniji pibisiacuenia Esteban pebaracuaicuajitsabiabijawa Moisés-pijinë, Dioso-ata —jai bajarapamonae Esteban yabara.

¹²Bajarapacuenia bajarapamonae pejumaitsixae, nexata daxitajiwi, judíowi pija-ancianowi, judíowi pecujarubiwi-ata, anaepana Esteban-jawabelia. Nexata, Esteban cujibarenatsi. Waetabatsi. Caponaliatsi penut-sinexatsi pitabarata sacerdotewi penamatacitorobiwi, judíowi pija-ancianowi, judíowi pecujarubiwi-ata. ¹³Nexata, icatsia, bajarapamonae junata pamona jane baja matamota najumetsënëtsiaya peneconitsinexatsi Esteban. Nexata, bajarapamonae itsa pata, jumaitsi Esteban yabara:

—Mara ponëje Esteban apocueranae Dioso apojejitsipaecuenia pebaracuaicuajitsabiabijawa Dioso pijatemplobo. Apocueranaenua Dioso penajumecopatsiliwaissi-ata Moisés-pijinëta pebaracuaicuajitsabiabijawa. ¹⁴Pajumetaniji maponëje pejumaitsiyawa mapacueniaje: «Jesús, Nazaret tomarapijinë, xuabianica mapatemploboje. Dioso penajumecopatsiliwaissi-ata Moisés-pijinëta wajajumecowënëtsiyawa, nacacopabia-exanaena Jesús», jai maponëje —jai najumetsënëtsiaya Esteban yabara pamona matamotatsi.

¹⁵Nexata, sacerdotewi penamatacitorobiwi, judíowi pija-ancianowi, judíowi pecujarubiwi-ata, naëcobarëcëpatsi Esteban. Nexata, bajarapamonae Esteban pitabaranaëcobarëcëpaejawatatsi, betsita-ángelnë-itabaratsi.

**Pacuenia Esteban jumecanawiata sacerdotewi pepope
namatacitorobinëjawabelia, yabara peliwaissi**

7 ¹Sacerdotewi pepopenamatacitorobinë jumaitsi Esteban-jawabelia:
—¿Xaniajai tsabaja, pacuenia mapamonae caneconitsiajumaitsiye?
—jai.

²Nexata, sacerdotewi penamatacitorobiwijawabelia, judíowi pija-ancianowijawabelia, judíowi pecujarubiwijawabelia-ata, Esteban jumaitsi mapacueniaje:

—¡Tajamonae, patane-ewetsiwimë, panenamuxuna-ewere! Waja-Dioso, bitso ayaijamatabēcuenenë, tsitanaitajëta baja cajena bajayata

o 6:9 *Esclavos Libertados*: Bajarapamonae judíowi, amoneya petonacuenebiwi. Itsia, belia pitsapa bajarapacuenewecua. Bajaraxuata, nawënërua «Amonya petonacuenebiwi pepitsapaewi» (esclavos libertados). Bajarapamonae judíowi-ata, itsia griegowi pejinawanapacuenia jinawanapa; Helenistamonae baitsi.

wajasalinainē Abraham-pijinējawabelia, itsa abaxē ponapona Mesopotamia nacuata. Bajarapanacuata Abraham-pijinē ponapona pewarapaewajēnaeya Harán nacuayabelia. ³Nexata, Dioso jumaitsi Abraham-pijinējawabelia: «¡Nija-irawecua ponare! ¡Daxita nijamonae-ata wecuaponare! ¡Ponare pa-irajawabelia catsitajētsianatsi!», jai Dioso Abraham-pijinējawabelia. ⁴Bjaraxuata, Abraham-pijinē Caldea nacuajawawerena pona, peponaponaenexa Harán nacuata. Bajarapanacuata Abraham-pijinē itsa ponapona, nexata paxapijinēmi wecuatēpatsi. Paxapijinēmi pewecuatēpaecujinaetsi, Dioso icatsia Abraham-pijinē warapaeya-exanatsi mapa-irajawaberena, itsajota waxaitsi aeconoxae jinawanapatsi. ⁵Itsia, abaxē Dioso aporajutsi Abraham-pijinējawabelia pepopija-iranexa. ¡Jume baja cajena! Tsiquiri-irayo-ata aporajutsitsi. Bjarapacuenia aporajutsi-atatsi, tajēwelia Dioso najumecapanepaeya jumaitsi Abraham-pijinējawabelia mapacueniajē: ‘Cara-jutsianatsi nija-iranexa daxita mapa-ira tanemeje, newēnamuto nemomoxi bajarapa-ira pecanacopataponaenexa’»,^p jai Dioso Abraham-pijinējawabelia, pexi abaxē itsa apoxainae.

⁶«Icacia, Dioso tajēwelia jumaitsi: «Itsamatacabi nemomoxi mapa-iraje wecuaponaena, penajinawanapaenexa itsanacuawerena pepatsiwicuenia, itsanacuapijiwi pijanacuata. Bjarapanacuapijiwi nemomoxi pijajiwi exanaenatsi. Nexata, bejiobia-exanaenatsi penacuenebia-exanaejawatatsi cuatrocientos pawaijebe.» ⁷Xanē itsia naneconitsia-exanaenajē panacua-pijiwi nemomoxi pijajiwi exanatsi. Bjaraxuacujinae, nemomoxi bajarapanacuawecua pitsapaena, icatsia mapanacuayaberena pepatsinexa. Nexata, mapanacuataje xanējawaberena nesiwanajamatabēcuenecopatsiaya nawajē-cabiabiana», jai baja cajena tajēwelia Dioso Abraham-pijinējawabelia.

⁸«Nexata, Abraham-pijinē Dioso itorobatsi pebo-upiperabēcaucutaponaenexa daxita papebinacuetoxi naexana pija-bota, penajamatabēnapitabiabinexa Dioso penajumeliwaisicajonejawa bajarapamonaejawabelia peyawenonaeyapaebijawatsi. Nexata bexēcujinae, Abraham-pijinē pijawa wecuanaexanatsi pebinēyo. Bjaraponēyo pewēnē Isaac. Ocho pamatacabibeje itsa xaina, Abraham-pijinē bo-upiperabēcaucuta pexēnatonēyo, pacuenia Dioso itorobatsi. Bjaraxuacujinae, icatsia juya Isaac-pijinē pexēnato xaina, pewēnē Jacob. Bjaraponē-ata icatsia bo-upiperabēcaucuta pexēnatonēyo. Bjaraxuacujinae, icatsia Jacob-pijinē pexi xaina doce ponēbeje. Bajara-icatsia pacuenia Jacob-pijinē-ata bo-upiperabēcaucuba pexi. Bjarapadoce ponēbejajawawerena, penae-xanaponaewi doce pabitsaētobeje naexana.

⁹«Jacob-pijinē pexi waxaitsi wajasalinaiwimi. Bjarapamonaemi José-pijinē cueneca-ēbatsi pematapijiwi. Bjaraxuata, canajetaxuabatsi pematapijiwi, pecaponaenexatsi Egipto nacuayabelia.» Itsia, Josépijinē Dioso yajawaponaponatsi. ¹⁰Nexata, wecuapanepaponapona daxita pebejiobia-exanaejawaminexatsi Egipto nacuata. Orijibia, Dioso jamatabēcueneyawenonaponatsi, peyapētaenexa pacuenia exanaejitsia daxitacuenejawalia.

p 7:5 bajarapa-ira pecanacopataponaenexa: Taema Gén. 12:7; 13:15; 15:18; 17:8. **q 7:6** Cuatrocientos pawaijebe: Gén. 15:13 400 pawaijebe. Éxo. 12:40 430 pawaijebe daxitata. **r 7:9** Egipto nacuayabelia: Taema Gén. 37:11, 28. **s 7:9** Dioso yajawaponaponatsi: Taema Gén. 39:2-3, 21.

Bajaraxuata, Egipto nacua pewetsinēmi, faraón,^t Josépíjinē pexaniajamata-bēcuenia tanetsi. Nexata, tocopatatsi pecobena-ewetsinexa gobernadorñ-cuenia Egipto nacua. Tocopatatsinua pijabo-ata peto-ewetsinexa.

¹¹»Nexata, Josépíjinē pamatacabijawa ewetaponapona bajarapanacua-pijiwi, pinijijaniboxaneto tocopiapatatsi daxita Egipto nacujawa, Canaán nacujawa-ata. Nexata, bitso bejiobi bajarapamonaemi, bajarapanacuanē-jawa pejinawanapaewi. Bajaraxuata, Canaán nacuaata wajasalinaliwi jane baja apoxainae pexaejawa^u. ¹²Itsiata, Josépíjinē, Egipto nacuaata janibowajēnaeya, ayaijawa xaniawaetejeba trigoxu. Nexata, Jacob-píjinē itsa wēnētane Egipto nacuaata pexaejawa pexainaejawa, pexi itoroba Egipto nacujawabelia pesiwaponaenexalia trigoxu. Copiaya^v namuto jane baja ponalia, pexaejawa pesiwaponaewi Jacob-píjinē pexi, pamonaē jane baja wajasalinaliwi. ¹³Bajaraxuacujinae, cotocaewi namuto itsa siwaponalia pexaejawa, bajarapanamutota Josépíjinē nayapētaeya-exana pematapijiwijawabelia pejuypíjinēcuenē. Nexata, Egipto nacua-ewetsinēmi yapētae bajarapamonaē Josépíjinē pijamonaecuenē. ¹⁴⁻¹⁵Nexata, Josépíjinē tonajumexuabapaxa, Jacob-píjinē, penawarapaenexa Egipto nacuyabelia. Nexata, Jacob-píjinē daxita pexi, pemomoxi yajawa, pamonaē warapa Egipto nacuyabelia, nanamata-ējēta setenta y cinco pajiwiweje. Bajarapanacuata Jacob-píjinē tēpa. Bajarapíjinia pacuenia, Jacob-píjinē pexi-ata, wajasalinaliwimi, tēpa bajarapanacuata. ¹⁶Bexēajawabelia wajasalinaliwimi jane baja, sicaponatsi Siquem tomaraberena, pesijebinxatsi ibowajuta. Abraham-píjinē, abaxē itsa asaē wajasalinaliwimi pewajēnaeya, comuata bajarapa-ibowaju Hamor-píjinē pexita,^w pemēthētsinexa pijawami. Nexata, bajarapa-ibowajuta sije-batsi wajasalinaliwimi —jai Esteban pijasalinaliwimi yabara.

¹⁷Icatsia, Esteban jumaitsi sacerdotewi penamatacitorobiwijawabelia, judfowi pija-ancianowijawabelia, judfowi pecujarubiwijawabelia-ata Moisés-píjinē yabara:

—Nexata jane baja, itsa imoxoyo pewajēnaē tsaponae pecopiapatsinexa^x pacuenia Dioso najumecapanepaeya jumaitsi^y Abraham-píjinējawabelia, wajasalinaliwimi pinijibitsaētozaneto tsaponae Egipto nacuaata. ¹⁸Nexata, bajarapamatacabi itsanē, junua pejana-ewetsinēnexa Egipto nacua. Bajaraponē apoyapētaē Josépíjinē^z Egipto nacua pewetsinēmícuene, tsipaji baja bajayata, bajaraponē pewajēnaeya, tēpa Josépíjinē. ¹⁹Nexata, Egipto nacua pejana-ewetsinē, bitso piamatabēcuenēbejenē naexana wajasalinaliwimijawabelia. Nexata, ayaiucuenia nacuenēbia-exanabiabatsi, bejiobia-exanabiabatsinua. Orijiibia, itorobatsi pejananaexanaenacuetonēxi wayafuabelia penacoxipenetejebinxexa, bajarapacuenia petēpaenexa, wajasalinaliwimi pinijibitsaētozaneto penaexanaeyaniwa^a bajarapamonaewecua.

t 7:10 faraón: Taema Gén. 41:15-16, 25-26, 37-41. **u 7:11** apoxainae pexaejawa: Taema Gén.

41:54-57. **v 7:12** copiaya: Taema Gén. 42:1-3. **w 7:16** Hamor-píjinē pexita: Taema Gén.

23:1-20; 49:29-32; 50:7-13; Josépíjinē Taema Josué 24:32. **x 7:17** imoxoyo pewajēnaē tsaponae pecopiapatsinexa: Itsamonaē canaējēta bejamatabē 320 pawaiweje pepanepacujinae, Israel-píjinē pemomoxi pepatsicujinae Egipto nacuaata, tsipaji Moisés-píjinē naexana itsawainējawabelia, bejamatabē veinte pawaiwejecujinae. **y 7:17** najumecapanepaeya jumaitsi: Dioso tajēwelia yapētaeya-exana Abraham-píjinējawabelia pacuenia capanepaejitsia pemomoxi pebejiobia-exanaejawatsiwecua. Taema Gén. 15:13-16. **z 7:18** apoyapētaē Josépíjinē: Taema Éxo. 1:7-9.

a 7:19 pinijibitsaētozaneto penaexanaeyaniwa: Éxo. 1:10-11, 22.

²⁰ Bajarapamatacabi naexana Moisés-pijinë, Dioso bitso pitajitsipaenëyotsi. Bajaraponëyo penaexanaecujinae, paxa, penabeje muetsia ewetatsi bota acueyabi pajuametobeje. ²¹ Bajaraxuacujinae, paxa, penabeje, xuabatsi baja. Nexata, Egipto nacua pewetsinë pexënatoyo Moisés-pijinë pitatsi, naco-xiyabijitsiatsi. ^b Nexata, bajarapowa witsata pexënatonëyocuenia. ²² Nexata, Moisés-pijinë cujarubatsi daxitacuene, Egipto nacuapijiwi peyapëtaecuene. Bajaraxuata, Moisés-pijinë naexana bitso peyapëtaenë liwaisi, pecueneacë-jëpaenëtsinua pinijicuene pexanaejawa.

²³ »Nexata, itsa baja Moisés-pijinë xaina cuarenta pawaiabeje, siwanajamatabëxaina petanenexa pijamonae Israel-pijinë pemomoxi, itsajota jina-wanapa. ²⁴ Itsa siwaxainaponapona pijamonae itsajota nacuenebawanapa, pitabëta Egipto nacuapijinë tobejiobia-exanatsi pijamonaenë. Nexata, Moisés-pijinë bajarajota pijamonaenë yamatamobexuaba bajarapaEgip-tonacuapijinë. ²⁵ Moisés-pijinë bajarapacuenia peyamatomatsijawata pijamonaenë, natocanaëjëta picani peyapëtaenexatsi Israel-pijinë pemomoxi, Dioso pitorobinëcuenetsi, pecapanepaenënexa Egipto nacuapijiwiwecua. Itsiata baitsi jane, pijamonae juya bajarapacuenia aposiwanajamatabëxainaetsi. ²⁶ Biji rajane, bajarapamonae nawecua-itawetatsi. Icatsia, merawia pitsijawata, itsa siwaxaina, caxitajaraba anijanëbeje penabeponaponaejawatabeje, Israel-pijinë pemomobeje. Moisés-pijinë xaniawaetsia itaweta penabeyaniwabeje matawëjëa. Jumaitsi: «Panabejitsipamebeje. Panapijamonaenëmëbeje raja. ¿Detsa xuajitsia panabiamebeje?», jai Moisés-pijinë. ²⁷ Nexata, ponë matapita penabejawabeje, torotajarabatsi Moisés-pijinë. Bajaraponë jumaitsi Moisés-pijinëjawabelia: «¿Jipatsa catocopata patanewetsinëexamë? ¿Jipatsa catocopata, pibisiacuene itsa pa-exanajë, patanenaneconitsia-exanabiabinexamënu? ²⁸ ¿Nebeyaxuabijitsiamë tsaja icatsia xanë-ata pacuenia caniwi beyaxuabame Egipto nacuapijinë?», jaitsi pijamonaenë Moisés-pijinë. ²⁹ Nexata, Moisés-pijinë itsa jumetane bajarapacuenia pejumaitsiyawatsi pijamonaenë, najetabajirawa Madián nacua-yabelia. Bajarapanacuatalia ponapona itsanacuawerena pepatsinëcuenia. Nexata, bajarapanacuatalia Moisés-pijinë nacojioba. Xaina anijanëbeje pexënatobeje.

³⁰ »Madián nacuata Moisés-pijinë peponaponaecujinae, cuarenta baja pawaiabeje itsa panepa, ponapona petusatonacuata, Sinaifuto canacujitsita. Bajarajota Dioso tsitanaitajëtatsi be-ángel-nëcuenia, tsiquirinaemëyo petajueyecaecotiatuatuajëta. Itsiata, bajarapatsiquirinaemëyo apoweriajawatsi. ³¹ Moisés-pijinë bajaraxua itsa tane apoweriajawajawa, jamatabëcuenenabenajaca. Nexata, cujitalia xaniawaetsia imoxoyo petanenexa tsiquirinaemëyo petajueyecaecotia. Itsa imoxoyotanajetaruca, bajarapacotiajawawerena Dioso jumaitsi bajaraponëjawabelia: ³² «Xanë raja nijasalinaiwimi pijaDiosonë. Abraham-pijinë, Isaac-pijinë-ata, Jacob-pijinë-ata, pijaDiosonë», jai Dioso. Nexata, bajarajota Moisés-pijinë neco-necojai pecajunawi. Pematatsënëa baja aponaëcotsilia icatsia. ³³ Icatsia, Dioso jumaitsi: «¿Nataxujonore nijazapato, tsipaji raja taitabarata nucame! ³⁴ Taniji rabaja tajajiwi, nijamonae, Egipto nacuata bitso bepejiobicuenia

pejinawanapaejawa. Jümetanijinua bajarapamonae penatsinueyabiabijawa, pebejiobia-exanabiabijawatsi yabara. Bajaraxuata, runaicajē bajarapamonae tacapanepaenexa Egipto nacuapijiwi pematacatorobisaewecua. ¡Naxatsia! Bajaraxua yabara ca-itorobijitsiatsi^c Egipto nacuyabelia», jai Dioso Moisés-pijinējawabelia tsiquirinaemēyo petajueyecaecotiajawawerena.

³⁵»Bajarapacuenia Dioso jumaitsi-ata Moisés-pijinējawabelia, wajasaliniawimi bajayata nawecua-itaweta Moisés-pijinējawabelia pejumait-sijawata mapacueniaje: «¿Jipatsa catocopata patane-ewetsinēnexamē? ¿Jipatsa catocopata, pibisiacuene itsa pa-exanajē, patanenaneconitsia-exanabiabinexamēnua?», jai. Itsiata, Dioso itorobatsi bajaraponē pematacaponaenexa wajasaliniawimi. Copatatsinua penamatacatorobinēnexa, pecapanepaenēnexanua Egipto nacuapijiwi pebejiobia-exanaejawatsiwecua. Bajarapacuenia Moisés capanepaejitsia pijamonae, peyawenonaejawatatsi pa-ángelnē^d tsitanaitajētatsi tsiquirinaemēyo petajueyecaecotiajawawerena.

³⁶Nexata, bajaraponē pona Egipto nacuyabelia. Dioso pesaēta pinijicuene pexanaejawanē pexanaponaecujinae Egipto nacuada, wajasaliniawimi jane baja matabanajetaruca bajarapanacuawecua. Orijibia, Dioso pesaēta pinijicuene exana pacujinae epatuarena barēnicaba Rojo manuamenejawa. Itsajawanē pijinia Dioso pesaēta exanapona pacujinae barēnajetaruca cuarenta pawaiheje petusatonacuajawa. ³⁷Bajarapamatacabi cajena Moisés-pijinē jumaitsi wajasaliniawimijawabelia: «Pacuenia xanē Dioso nitoroba profetanēnexanē, bajarapacuenia Dioso pacato-itorobiana itsanē, paxamēyajuwēnēnē, profetanēnexa. Bajaraponē pajumecowēnētsianame», jai cajena Moisés-pijinē bajayata tajēwelia wajasaliniawimijawabelia Cristo yabara.^e ³⁸Moisés-pijinē, ponē jumaitsi bajarapacuenia Cristo yabara, bajaraponē barēnacaetuata wajasaliniawimi petusatonacuata, Sinaītsutojumabetsia,^f itsajotatsia ángelnē rajutatsi Dioso penajumecopatsiliwaisi, paliwaisi nacayapētaeya-exana wajajinawanapaecuenenexa. Nexata, Moisés-pijinē yapētaeya-exana juya bajarapaliwaisi wajasaliniawimijawabelia, waxaitsi-ata bajarapaliwaisi^g wajaxainaenexa mapamatacabijawaberenaje.

³⁹»Itsiata, wajasaliniawimi apojitsipae pejumecowēnētsijawa Moisés-pijinē. Apojitsipaenua penamatacatorobinexatsi. Bajarapamonaemi picani najamatabēxaina epatua pewepēnawiabinexatsi Egipto nacuyabelia.

⁴⁰Moisés-pijinē bajayajebi peponaponaexae Sinaītsutojumatatsia, nexata pecowēta wajasaliniawimi jumaitsi Aarón-pijinējawabelia: «¡Paneto-exanare diosonē wajanacamatacaponaenēnexa, tsipaji apoyapētaetsi xua tocopiapatatsi Moisés, wajanacamatacaponaenē Egipto nacuawerena!», jai. ⁴¹Nexata, wajasaliniawimi exananuta oronanitota becerro jumapecataeya pexanaenē.

c 7:34 *ca-itorobijitsiatsi*: Taema Éxo. 3:1-10. **d 7:35** *pa-ángelnē*: Taema Éxo. 3:2-4. Dioso pejumeliwaisi perujuliwaisibaxutota, bajaraponē wēnērübatsi, «Jehová pija-ángelnē». Bajarapacuenia itsa wēnēruba, nacayapētaeya-exana Jesús pena-itajētsijawa mapanacuataje be-ángel-nēcuenia, penaexanaewajēnaeya Maríajawata. Nexata, Esteban wajunupaebi-ata, Dioso pija-ángelnē yabara ponē Moisés tsitanaitajētatsi, yapētanetsi pepacujiru Dioso pijacujaya pēbārcēuacuijaijawa Moisés-jawabelia. **e 7:37** *Cristo yabara*: Jesús yabara picani. Taema Deut. 18:15, 18 **f 7:38** *Sinaītsutojumabetsia*: Taema Éxo. 19:1-20; 24:12; Deut. 5:1-21. **g 7:38** *bajarapaliwaisi*: Taema Lev. 18:5; Deut. 4:1; 8:1-3; 30:15-20; Eze. 33:15; Rom. 10:5; Hch. 5:20; Heb. 4:12; 1Pd 1:23.

Bajarapajumapecataenējawabelia yaiyataeya dajubi totajuitabiaba diosonē-cuenia. Orijiibia, jamatabēcuenēbarēyaya fiesta to-exana bajaraponējawabelia. ⁴² Bajaraxuata, Dioso wajasalinaiwimi wecuanatsatsi. Copatatsinua baja peyawenonabibijawamitsi. Nexata juya, Dioso tocopata wajasalinaiwimi siwanajamatabēcuenecopatsiaya penawajēcabiabinexa itaboxopijitulu-pujawabelia. Bajaraxuata, Diosojumepaebinēmi, profetanē, peyaquinaeba-xutota Dioso pejumaitsiyawa yabara jumaitsi mapacueniaje:

«Paxamē Israel-pijinē papemomoximē, pamatacabi abaxē pajinawanapame cuarenta pawaibeje petusatonacuatalia, ¿xanējawaberena tsaja yaiyataeya panetotajuitabiabame vaca, oveja yajawa?

⁴³ »Jume baja cajena! Bajarapawi yaiyataeya patotajuitabiabame panenato-exanaediosowijawabelia, tsipaji bajarapamatacabi pacajinawanapame carpabo bepanijadiosonē panetaenē Moloc^h pijabonexa. Pacajinawanapamenua jumapecataeya panenato-exanaeRefán-tuluputo,ⁱ patuluputo pataneme bepanijadiosocuenia. Panecobeta saya pane-exanaediosowi pacajinawanapame, siwanajamatabēcuenecopatsiaya bajarapadiosowijawabelia panenawajēcabiabinexa. Bajaraxuata, naneconitsiaya panijanacuawecua pacacaponae-ya-exanaenatsi tajējawabelia, Babilonia nacuapēnēyabelia,⁷ jai Dioso», jai profetanē peyaquinaebaxutota wajasalinaiwimi yabara —jai Esteban Moisés-pijinē yabara.

⁴⁴ Icatsia, Esteban jumaitsi sacerdotewi penamatacaitorobiwijawabelia, judiowi pija-ancianowijawabelia, judiowi pecujarubiwijawabelia-ata, Dioso pijacarpaboxaneto yabara:

—Bajayata wajasalinaiwimi itsa jinawanapa petusatonacuata, cajnawanapa Dioso pijacarpaboxaneto, itsa pabota Diosojawabelia wajēcabiabijitsia. Bajarapacarpabo wajasalinaiwimi exana daxita pacuenia Moisés-pijinē Dioso tsitajētatsi pexanetsinexa. ⁴⁵ Nexata, bajarapacarpabo wajasalinaiwimi canacopata pecajinawanapaenexa, pecaponabiabinexa itsabelia warapa. Nexata, Moisés-pijinē petēpaecujinae, juya Josuépijinē itsa matacapona bajarapamonaemi, yajawacaparena bajarapacarpabo mapanacuaya-berenaje, pecuene-amoneyabicujinae copiaya pejinawanapaewimi, pebarē-nawajabitsaētsijawata. Pamonaecopiaya pejinawanapaewimi, apojudiowi, Dioso rēcēpecaeya-exanatsi Josuébana pewajēnaetarena. Nexata, wajasalinaiwimi mapa-iraje yacajērēta. Nexata bexējawaberena-ata, pamatacabi David-pijinē mapanacua ewetaje, wajasalinaiwimi abaxē cajnawanapa bajarapacarpabo. ⁴⁶ Nexata, Dioso pexaniajamatabēcuenia tanetsi David-pijinē, mapanacuaje pewetsinēmi. Nexata, picani David-pijinē bitso jitsipa Dioso pijabonexa templobo pexanaeya-exanaenexa, paDioso bajayata Jacob-pijinē jumecowēnēta, David-pijinē jane baja pamopijinēmi. ⁴⁷ Itsiata baitsi

h 7:43 Moloc: Bajarapajumapecataenē amonitamonaepijadiosonē. Bajarapamonaepexi jiwixi totajuitabiaba pijadiosonē peyawenonaenexatsi pewajētsicuenia. **i 7:43 Refán-tuluputo:** Bajarapatuluputo Egipto nacuapijiwi pijadiosonē, Babilonia nacuapijiwi pijadiosonē pijinia. Maparucaeje bajarapatuluputo pewēnē Saturno.

jane, David-pijinē Dioso apotocopatsitsi templobo pexanaeya-exanaenexa. David-pijinē pexēnato, Salomón-pijinē, Dioso pijabonexa templobo exanaeya-exana, David-pijinē baja pepuatēpae. ⁴⁸ Salomón bo tonacuenebi-ata, yapētanetsi pacuenia pepoDioso athēbētatsia pe-ecaenē, bajaraponē apoponaponae bota, jiwi pexanaebota. Bajaraxuata, Diosojumepaebinēmi, profetanē, bajayata Dioso pejumaitsijawa yabara jumaitsi mapacueniaje:

⁴⁹ «Athēbēwetsica daxitacuene ta-ewetsitaxunae. Mapanacua pijinia betanataxuyaētsitaxunaeje, daxitajawa-ata ta-ewetsinexa. Bajarapacuenia ta-itsinēxae, ¿detsa nexata pitsipexaniabo paneto-exanetsipame ta-ecaetaxunaewecua? ¿Pacacuenecaējēpa tsaja pataneto-exanaenexamē tanacuera-ewetsitaxunaenexa, bitso pexaniataxunae ta-ecaetaxunaewecua? ¡Ajibi cajena!

⁵⁰ »Xanē rajane daxitacuene ta-exanaenē,⁷ jai Dioso», jai profeta peyaquinaebaxutota —jai Esteban.

⁵¹ Icatsia, Esteban jumaitsi sacerdotewi penamatacitorobiwijawabelia, judíowi pija-ancianowijawabelia, judíowi pecujarubiwijawabelia-ata: —Pacuenia jamatabēcuene-itsi panijasalinaiwimi, bajarasaya icatsia pa-itsimē. Nexata, paxamē-ata pane-ajamatabēcuenetajawi. Pane-amatabocotajawinua. Apopajumecowēnētsimē Dioso pejumeliwaisi. Apopanacopatabiabimēnua Espiritu Santo papecajamatabēcuene-itorobicuenia pane-exanaenexa. ⁵² Pacuenia panijasalinaiwimi bejibia-exanabiaba, beyejebabiabanua, daxita profetawi, pewajunupaebaponaewimi Cristo, pepopianeconijibinē, pepatsijawanexatsica, bajarapacuenia pa-exaname paxamē-ata. Nexata jane baja, Cristo itsa patsica, paxamē pijawajabitsaē pecobeyabelia pacanajetaxuabame, pebeyaxuabinexatsi. ⁵³ Dioso pejamatabēcueneta ángelewi pacarajutsi-ata Dioso penajumecopatsiliwaisi Moisés-pijinēta, jiwi pejumecowēnētsinexa, itsiata paxamē apopajumecowēnētsimē bajarapaliwaisi —jai Esteban bajarapamonaejawabelia.

Pacuenia Esteban beyaxuabatsi, yabara peliwaissi

⁵⁴ Bajarapacuenia itsa jumetane bajarapamona Esteban pejumaitsijawatsi, bitso anaepana bajaraponējawabelia. Nexata, peca-anae nawono-quiarabaxane. ⁵⁵ Itsiata, Esteban athēbēabetsia penaēcotsijawata, Espiritu Santo petsijamatabēwēnēcaexaetsi, tane Dioso pijapeniweniwenaecotia. Taenutsianua Jesús penucaejawa paxa Dioso pemuxuneneta, pecujuanenia. ⁵⁶ Nexata, Esteban jumaitsi daxita bajarapamonaejawabelia:

—¡Panataema! Taniji itaboxo penapatsijawatsia. Nexata, taniji Daxitajiwi Pematapijinē,^k penucaejawa paxa Dioso pemuxuneneta, pecujuanenia —jai Esteban.

⁵⁷ Nexata, sacerdotewi penamatacitorobiwi, judíowi pija-ancianowi, judíowi pecujarubiwi-ata, pecobenēta namuxuwojo-acaba, wawajainua pinijicuenia, pejumetaeyaniwa^l Esteban pejumaitsitsaponaejawa. Daxita

j 7:50 Taema Isa. 66:1-2. k 7:56 Daxitajiwi Pematapijinē: Bajarapajumebejecuenia wēnērubatsi Jesús, pepojiwitonēcuenia penaexanaexae petiriwata. l 7:57 pejumetaeyaniwa: Bajarapamona canaējēta pacuenia xua Esteban tsipaebapona pepopiabejeliwaisi Dioso pitabarata. Nexata, itsa jumetaejitsipa, yajawananeconitsipa Diosojawabelia.

caecuenia cujibarenatsi, pewaetabinexatsi. ⁵⁸ Pewaetabucujinaetsi, caponaliatsi tomarapënyabelia. Bajarajotalia tseconatsi ibotonëta. Nexata, daxita pamona neconitatsi, najumajonejeba pijacamisajumawelia penaxatabijawanë. Nexata, Esteban petseconaewajënaetsi ibotonëta, bajarapamona penajumajonebijawanë pewëjëato, Saulowënënë, ewetsia-exanatsi.

⁵⁹ Petseconanubenaewawatatsi ibotonëta, Esteban wajëta Diosojawabelia.

Jumaitsi:

—¡Tajatuxanenë Jesús, daxita pepotajamatabëcuene pire! —jai.

⁶⁰ Bajaraxuacujinae, pematabacabëta nucaeya, aëjai pinijijumeta.

—¡Tajatuxanenë, itaxutobejiobiataema mapamonaaje! ¡Wecua-ajibia-exanare paneconi natsi-exana xamëjawabelia tanebejiobia-exanaexae mapacueniaje! —jai Esteban.

Bajaraxuacujinae, Esteban baja tëpanajereca.

Saulo jaitapona Jesús peliwaisi pejumexaniataewi, pebejiobia-exanaponaenexa, penaneconitsia-exanaenexa-ata

8 ¹ Pacujinae Esteban-pijinë beyaxuabatsi judíowi pewetsiwi, Saulo bajarajota nanuca. Caejamatabëcuenenua xaina Esteban pebeyaxuabijawatsi yabara. ² Nexata, itsamonae pebiijiwi, Dioso bitso peyaiyataewi, Esteban-pijinë mëthëtatsi. Matanueyabatsi bitso. ³ Bajarapamatacabi jane baja sacerdotewi penamatacaitorobiwi, judíowi pija-ancianowi, judíowi pecujarubiwi-ata, taxuxuaba pebejiobia-exanaponaewi Jesús pijajiwi, Jerusalén tomarata pejinawanapaewi. Saulo jane baja, Jesús pijajiwijawuwë-nëwi jaitaruta Jerusalén tomarajawa. Nexata, caebo canacujitsia jonepona, petacaponae enexa pebiijiwi, petiriawi-ata, pecajoneponae enexa penaneconitsiwi pejebabiabiboyabelia. Bajaraxuata, ayaibitsaëttoxaneto Jesús pijajiwijawuwë-nëwi, rëcëpeca Jerusalén tomarawecua, itsatomaranëjawabelia Judea nacujawa, Samaria nacujawabelia-ata. Itsiata, apóstolewi nacopaba Jerusalén tomarata.

Diácono Felipe tsipaebapona pexanialiwaishi, Jesús peliwaisi, Samaria nacujawa

⁴ Pamona, perëcëpecaewi Jerusalén tomarawecua, Jesús peliwaisi pejumexaniataewi, bajarapamona itsaxuayo najetarubena, jiwi tsipaebanajetarubena pexanialiwaishi, Jesucristo peliwaisi. ⁵ Bajaraparëcëpecaewijawuwë-në, pewënë Felipe,^m lia Samaria tomarajawabelia.ⁿ Bajarajotalia tsipaeba Jesús peliwaisi. Jumaitsi:

—Jesús raja Cristo,^o ponë Dioso itorobica jiwi pecapanepaenexa —jai tsaponae Felipe Samaria tomarapijiwijawabelia.

⁶ Itsajota Felipe Jesús peliwaisi tsipaebabiaba, jiwi ayaibitsaëttoxaneto nacaetuatabiaba. Daxita bajarapamona xaniawaetsia

m 8:5 Felipe: Bajaraponë pitapetsinëtsi diácononë enexa. Taema Hch. 6:5. **n 8:5 Samaria tomarajawabelia:** Bajarapatomara eca Samaria nacuata. Itsawënë xaina Sebaste Felipe peponaponaematacabi. **o 8:5 Cristo:** Mesías-jume picani, tsipaji Jesús peliwaisi tsipaebapona pamonaewajawabelia ewetawanapa Mesías pepatsijawanexa, judíowi mestizowijawabelia. Mesías-jume yabara cuacuajai Cristo. Caenë yabara. Hebreojume pecuacuajaiwi canacueneba Mesías, griegojume pecuacuajaiwi pijinia Cristo.

namuxuna-ewetabiabatsi, itsa tsipaebabiaba Jesús peliwaisi. Tanetsinua bajaraponë Dioso pesaëta pinijicuene pexanaejawanë. ⁷Nexata wecuacapitsapapona, pamonaë dowathi peyajawajinawanapaewi. Bajarapamonae baja jamatejema tsabiabi. Pewecuacapitsapaponaejawata, dowathi pinijijumeta aëjai tsabiabi. Felipe jamatejemaya-exanaponanua petabusipacuenabiwitsi, pejayujayunaewi-ata. ⁸Bajaraxuata, daxita bajarapatomarapijiwi jamatabëcuenenabarëya.

⁹Bajarapatomarata Simón-wënëñë ponapona. Bajaraponë jiwi pejorobabiabinë. Bajayajebi daxita Samaria nacuapijiwi yamaxë-itojorobaponapona. Nexata, Simón nayabarajumaitsi tsabiabi bajarapatomarapijiwijawabelia:

—Xanë raja bitso ayaijamatabëcuenenëñë, tsipaji bitso jiwi taxaniawaetsinë —jai tsabiabi.

¹⁰Daxitajiwi, beweliamatabëcuenewi, petuxanewi-ata, Simón pejumaitsiyaw namuxuna-ewetabiabatsi. Bajarapamonae nexata Simón yabara jumaitsi tsabiabi: «Maponëje, Dioso pesaë pexainaenë, pinijicuene pexanaenexa», jai tsabiabi.

¹¹Bajaraxuata, Samaria nacuapijiwi xaniawaetsia jumecowënëtabiaba, tsipaji bajayajebi tsita-exanabiabatsi pinijicuenejawanë, beDioso pesaëta pexanaejawanë, bajarapacuenia jiwi peyamaxë-itojorobinexa pejorobicueneta. ¹²Bajarapamonae jumecowënëtawanapae-ata Simón petsipaebiliwaisi, itsiata Felipe itsa patajopa petsipaebinexa pacuenia Dioso pijajiwi ewetsijitsia, caecuenia tsipaebanua Jesucristo Dioso pitorobinëtsicuene. Nexata, Samaria nacuapijiwi itsa jumetane bajarapapexanialiawaisi, ayaibitsaëto jumexaniatane. Nexata, Felipe bajarapamonae, pebijiwi, petiriawi-ata, bautizaba. ¹³Nexata jane baja, Simón-ata jumexaniatane Felipe pepaebiliwaisi. Nexata baja, Simón-ata Felipe bautizaba. Pebautizabicujinaetsi, bajaraponë Felipe pepëta naponapona. Nexata, jamatabëcuenenabenajacabiaba itsa tae-yabiaba Dioso pesaëta Felipe pinijicuene pexanaponaejawanë.

¹⁴Nexata apóstolewi, Jerusalén tomarata pejinawanapaewi, wënëliwaisitane Samaria nacuapijiwi Jesús peliwaisi pejumexaniataejawa. Nexata, bajarapamonae itoroba apóstolewiyajuwënëñëbeje, Pedro, Juan-beje, Samaria nacujawabelia, petaenexabeje pacuenia jumexaniatane Dioso peliwaisi.

¹⁵Pedro, Juan-beje, itsa patabeje Samaria nacujawabelia, towajëtabeje Dioso-jawabelia Espiritu Santo petsijamatabëpatsinexatsitsica bajarapatomarapijiwi, Jesús peliwaisi pejumexaniataewi. ¹⁶Bajarapacuenia towajëtabeje, tsipaji abaxë bajarapamonae Espiritu Santo apotsijamatabëpatsitsitsica. Abaxë saya bautizabatsi Jesús pewënëta. ¹⁷Nexata, Pedro, Juan-beje petowajëtsijawatabeje Diosojawabelia, tsimatanacobeuatabeje bajarapamonae. Nexata jane baja, Espiritu Santo tsijamatabëpatsicatsi.

¹⁸Nexata, Simón, itsa tane Samaria nacuapijiwi Espiritu Santo petsimatarunaejawatsitsica, apóstolenëbeje tsimatanacobeuatsiya petowajëtsijawatabeje Diosojawabelia, nexata Simón palata tsipaeba apóstolenëbejejawabelia. ¹⁹Jumaitsi:

—¡Xanë-ata panerajurebeje pasaë paxainame! Nexata, pajiwi tsimatanacobeuatajë tatowajëtsijawata Diosojawabelia, petsimatarunaenexatsitsica Espiritu Santo —jai Simón apóstolenëbejejawabelia.

²⁰Nexata Pedro jumaitsi Simón-jawabelia:

—Xamě cajena Dioso caxuabiana apopewerewerecae-isotojawabelia. Nexata, werewerecaename nijapalata yajawa, tsipaji najamataběxainame necomuatsinexa epälatata xua Dioso amoneya rajuta jiwijawabelia. ²¹ Xamě pepacuene apopaxanējajuwēnēnēmē. Bajaraxuata, Dioso apocacopatsi bajarapacaējēpaejamataběcuene nenaxainaenexa, perowiajamataběcuene aponexainaexae Diosojawabelia. ²² ¡Najamataběcuene pēñēyore bajarapapibisiacuenia nenajamataběxainaejawawecua, caejamataběcuene nexainaenexa Diosojawabelia! ¡Wajēre Diosojawabelia pecawecua-ajibia-exanaenexa papibisiacuenia najamataběxainame! ²³ Xaně cajena yapētāniji nexainaewawa necueneca-ēbijamataběcuene, pecajamataběcuene cēñēnaejawanua pibisiacuenia nexanabiabinexa —jai Pedro.

²⁴ Nexata Simón jumaitsi:

—¡Panetowajērebeje Diosojawabelia tanewecua-ajibia-exanaenexa paneconi xainajē, Dioso tanexuabiyaniwa apopewerewerecae-isotojawabelia pacuenia panejumaitsimēbeje! —jai Simón.

²⁵ Bajaraxuacujinae, Pedro, Juan-beje, bajarapatomarapijiwawabelia tsi-paebabeje Jesús peliwaishi, daxita pacuenia tanebeje Jesús pexanaejawanē-ata. Pedro, Juan-beje, Samaria nacua pe-enaetomaranējawa petsipaebicujinaebeje pexanialiwaishi, Jesús peliwaishi, nawialiabeje baja Jerusalén tomarabelia.

Felipe bautizaba Etiópia nacuapijinē

²⁶ Itsamatacabi Dioso pija-āngelnē jumaitsi Felipejawabelia:

—¡Nonotapunare! ¡Maxuayolia rowia liamēreje, panamuto naropota Jerusalén tomarawerena petusatnacujawa, pepatsinexa Gaza tomarabelia! —jai āngelnē Felipejawabelia.

²⁷ Nexata, Felipe xaniawaeta pijajawaxi peponaenexa baja. Bajaraxuacujinae, naropolia jane baja. Nexata, bajarapanamutualia Felipe caxitajaraba Etiópia nacuapijinē, eunuconē. ^q Bajaraponē palata pewetsinē, Etiópia nacua pewetsiwa, Candace, pijapalata. Bajaraponē Jerusalén tomarajawabelia pona, siwanajamataběcuene copatsiaya pewajētsinexa Diosojawabelia templobota. ²⁸ Nexata baja, bajaraponē Jerusalén tomarawerena nawiatana-jetaruca pijanacuayabelia. Pijacarrozamoyota, yanajetarucaeya lebanajetaruca ayaijumeta profeta Isafas-pijinē bajayata peyaquinaebaxuto.

²⁹ Nexata, Espíritu Santo jumaitsi Felipejawabelia:

—¡Bitsojinaremelia! ¡Pēcaxinaeremelia mapamoje! Imoxoyo muxunenia nucaponaename —jai Espíritu Santo.

p 8:21 *perowiajamataběcuene aponexainaexae Diosojawabelia:* Itsacuenia pejutsinexa Mapaver-sículoje: «Xamě Dioso apocatocopatsi tsane bajarapacaējēpaejamataběcuene, tsipaji caejamataběcuene apoxainaemē Diosojawabelia», pejaicuenia pejutsinexa. **q 8:27** *eunuconē:* Eunucojume mapajamataběcuene xainaje: «pe-ēthėjutsinētsi». Bajayatami pacujinae petiriawi yanacuaeweta, ita pebi nanacuenibijitsa pijajiwitoněcuenia bajarapowa, nexata bajaraponē ēthėjutatsi, peyanacua-ewetsiwa pejamatabě-itonotsiyaniwa. Bajarapijinia pacuenia exanabiaba papebijiwijawabelia to-eweta peyanacua-ewetsinē pijawajiwi. Dioso penajumecopatsiliwaitsita Moisés-pijinēta, Dioso itaweta pajiwi pe-ēthėbijianaewi pebarē-exanaeyaniwa itsajawa Dioso pijacarpabojawata. Bajaraxuata, Lucas nacayapētaeya-exana pacuenia bajarapaEtiopia nacuapijinē pe-ēthėjutsinētsi. Baitsi, pacujinae Jesús nacasiwatēpa nacawecua-ajibia-exana daxitawiria neconi wajaxainaewawa Dioso pitabarata. Taema Lev. 21:18-21; Deut. 23:1.

³⁰ Felipe nexata cujinaejinalia. Itsa baja pëcaxinalia, jumetane Etiópia nacuapijinë peleanajetarucajawa profeta Isafas-pijinë peyaquinaebaxuto. Nexata, Felipe jumaitsi bajaraponëjawabelia:

—¿Xamë tsaja pepacuene jumeyapëtaneme paliwaisi lebanajetarucame? —jai.

³¹ Nexata, Etiópia nacuapijinë jumaitsi:

—¿Detsa pacuenia jumeyapëtaejitsipajë itsa aponetsipaebi xaniawaetsia itsanë-ata? —jai.

Nexata, Etiópia nacuapijinë junatatsi Felipe pijacarrozamoyo ënëabetsia penajunaenexatsia, penamuxunenia-ecaenexabeje. ³² Profeta Isafas-pijinë peyaquinaebaxutota, paliwaisi Etiópia nacuapijinë lebanajetaruca, tajëwelia Dioso pitorobinënexatsica yabara jumaitsi mapacueniaje:

«Pacuenia oveja moya, caponae-atatsilia pebeyaxuabinexatsi, bajarapijinia pacuenia, bajaraPonë-ata moya tsane, pecaponaejawatatsilia pebeyaxuabinexatsi. Pacuenia ovejajo naxunae-atatsi moya, bajarapijinia pacuenia, bajaraPonë-ata moya tsane, yapëtae-ata pebejiobia-exanaejawanexatsi.

³³ »Bejiobia-exanaenatsi. Pexaniacuene apoto-exanaetsinua tsane. Biji rajane, naneconitsia-exanaenatsi, pibisiacuene apo-exanae-ata. Itsajiwi-ata bajaraponë yabara apojumaitsi tsane: ‘Mara pamonaeye bajaraponëmi pemomoxije,’ apojai tsane, tsipaji beyaxuabianatsi», jai tajëwelia mapacueniaje Isafas-pijinë peyaquinaebaxutota.’

³⁴ Nexata, Etiópia nacuapijinë jumaitsi Felipejawabelia:

—¡Pexaniacuene neto-exanare! ¡Netsipaebare ponë yabara yaquina profeta Isafas-pijinë mapacueniaje! ¿Bajaraponë tsaja pijacuata nayabarajumaitsi? Itsa jume, ¿itsanë yabara tsaja jumaitsi? —jai Felipejawabelia.

³⁵ Nexata, paliwaisi Etiópia nacuapijinë lebanajetaruca, bajarapaliwaisi Jesús yabara pejumaitsiijawa copiaya Felipe yapëtaeya-exana. Bajaraxuacujinae, icatsia tsipaeba pexanialiwaisi, Jesús yabara. ³⁶ Penajetarucaejawatabeje bajarapanamutua, patabeje itsajota merayo eca. Nexata, Etiópia nacuapijinë, eunuconëxæ,^s jumaitsi Felipejawabelia:

—Mara jota meraje. Jitsipajë picani xanë tanebautizabinexamë. ¿Xamë yapëtaneme xua yabara picani apoxanepanae tanebautizabinexamë? —jai.

³⁷ Nexata Felipe jumaitsi:

—Itsa jumexaniataneme Jesús peliwaisi xaniawaetsia daxita nejamatabë-ëthëtojawawetsina, nexata necaëjëpa tacabautizabinexa —jai.

Nexata bajaraponë jumaitsi:

—Jumexaniataniji rabaja. Jesucristo raja xaniajai Dioso pexënato —jai Etiópia nacuapijinë.

³⁸ Nexata, bajaraponë pijamo nucojopaeya-exana. Bajaraponëbeje runarecabeje merajawabereca. Nexata, Felipe bautizaba Etiópia nacuapijinë.

³⁹ Nexata, penonotajunaecujinaetsinabeje, Espiritu Santo pitajarabatsi Felipe Etiópia nacuapijinë pitabarata. Bajaraxuacujinae, Etiópia nacuapijinë

r 8:33 *Isafas-pijinë peyaquinaebaxutota*: Taema Isafas capítulo 53. **s 8:36** *eunuconëxæ*: Baja-
raponë peyapëtaexæe Dioso pitawetsijawa bajarapitsiwi Jehová pijajiwicuenia petayaniwatsi,
nexata yanijoba itsa cuenecaëjëpatsi penabautizabia-exanaejawa, Jesús pijajiwiwajuwënëncue-
nia petanexatsi. Taema Lev. 21:18-21.

apotae baja pematatsënëa Felipe. Itsiata, Etiópia nacuapijinë pona baja barëyaya pijanacuayabelia.

⁴⁰ Felipe Espíritu Santo caliatzi Azoto tomarabelia. Nexata, bajaraponë daxita tomaranëjawa tsipaebanajetaruca pexanialiwaizi, Jesús peliwaizi. Matapania Felipe itsa patajopa Cesarea tomarata, caejawata ponapona.

Pacuenia Saulo siwanajamatabëcuenecopata

Jesús-jawabelia, yabara peliwaizi

(Hch 22:6-16; 26:12-18)

9 ¹Jerusalén tomarawecua perëcëpecaewi itsa cujarubanajetarubena Jesús peliwaizi itsanacuanëjawa, Saulo' pijinia tsiteca Jerusalén tomarata apocopatsi petaicaponaejawa daxita pamonaie Jesús pijacuene penacujarubiwi, pebeyejebia-exanaenexa. Jamatabëbeyejebia-exana daxita bajarapamonae, apojinawanapae-ata Jerusalén-jawata. Bajaraxuata, Saulo pona daxita sacerdotewi pepopenamatacaitorobinëjawabelia, petocopatsinexatsi bajarapacuenia pexanaenexa. ²Nexata, Saulo wajëca sacerdotewi pepopenamatacaitorobinë-jawabelia petsicobeyaquinaebaxutonëtsi, pecaponaenexa judíowi pijasinagogabonë pewetsiwijawabelia, Damasco tomaratalia. «Nexata, bajarapamonae itsa taena tanetsicobeyaquinaebaxutonë, netocopatsiana daxita Jesús peliwaizi pejumexaniataewi, pebijijiwi, petiriawi-ata, tataicaenexa, tacapatsinexanua mapatomaraberenaje, penaneconitsiwi pejebabiabibota tajebinexa», jai Saulo.

Nexata, sacerdotewi pepopenamatacaitorobinë jejai. Tsicobeyaquinatsi Saulo, pecaponaenexa Damasco tomarabelia.

³Bajaraxuacujinae, Saulo jane baja pona Damasco tomarabelia. Paepatota Saulo imoxoyotanajetaruca Damasco tomara, jemata matatoyorotsia itayotatsi athëbëwetsica. ⁴Nexata, irataeya bocajunua irata. Jumetaenuca athëbëwetsica pejumaitsijawatsi Jesús mapacueniaje:

—Saulo, Saulo, ¿detsa xuajitsia neliwaisibarajiname, tajajiwi tanetobejiobia-exanaponaejawatamë? —jai Jesús.

⁵Nexata Saulo jumaitsi:

—Petuxanenë, ¿detsa ponëmë? —jai.

Nexata, icatsia Jesús jumaitsi Saulojawabelia:

—Xanë raja Jesúsne, ponë xamë liwaisibarajinaponame —jai.

⁶Nexata, Saulo neconecojai pecajunawi. Jumaitsi:

—Petuxanenë ¿detsa xua jitsipame ta-exanaenexa? —jai.

Nexata Jesús jumaitsi:

—¡Nonotapunare! Ponaename baja Damasco tomarabelia. Bajarajotalia itsanë catsipaebiana pacuenia exanaejitsiamë —jai Jesús.

⁷Nexata, papebijijiwi Saulo yajawanajetaruca, najunawiacanubena. Nexata, moya nubena, tsipaji jumetae-ata bajarapajume, itsiata, apotae jiwitonë.

⁸Nexata, Saulo, irata pebocaenëmi, nonotapuna. Naëcobaruta picani.

Itsiata, aponaëcotsixanepanae, tsipaji itaxutomerawibatsi. Nexata, papebijijiwi yajawanajetaruca, comacaponaliatsi Damasco tomarabelia. ⁹Pepatajopaecujinae, Saulo natsiwajënaetaenewewa, ponapona acueyabi pamatacabi-beje. Apoxae pexaejawa. Apo-apaenua mera.

¹⁰ Damasco tomarata ponapona Ananías, Jesús pijacuene penacujaru-binë. Nexata, Jesús bemajitsinaebocuenia tsitanaitajëta Ananías-jawabelia. Nexata Jesús junataxuaba.

—¡Ananías! —jai.

Nexata, Ananías jumaitsi Jesús-jawabelia:

—Petuxanenë, canamuxuna-ewetatsi rabaja —jai.

¹¹ Nexata, Jesús bajarajota jumaitsi bajaraponëjawabelia:

—¡Nonotapunare! ¡Ponare pacallejawabelia jiwi wënëruba Perowiacalle! Bajarajotalia, Judas pijabota, wënëyanijobianame Saulo, Tarso tomarapi-jinë. Bajaraponë maparucaje xanëjawaberena nawajëqueca. ¹² Bajaraponëjawabelia bemajitsinaebocuenia tsitajëtajë pacuenia xamë, Ananiasmë, nejonecujinaelia, bajaraponë tsmatanacobeuatsijitsiamë, petaenexa icatsia xaniawaetsia —jai Jesús Ananías-jawabelia.

¹³ Nexata, Ananías itsa jumetane bajarapacuenia pejumaitsiyawatsi, jumaitsi Jesús-jawabelia:

—Tajatuxanenë, anijatonë bajaraponë wënëliwaisitaniji pebejiobia-exanaponejawa daxita nijajiwi, nitapetsiwi,“ Jerusalén tomarata.

¹⁴ Aeconoxae maberena-ataje icatsia itorobatsi pina sacerdotewi penamatacitorobinë, petaicaenexa daxita pamona, newënëta nacaetuatabiaba mapatamarataje —jai Ananías Jesús-jawabelia.

¹⁵ Itsiata, Jesús jumaitsi Ananías-jawabelia:

—¡Ponare baja, tsipaji bajaraponë itapetajë baja taneliwaipaebinë-nexa panacuanëjawa jinawanapa apojudíowi, nacua pewetsiwijawabelia, Israel-pijinë pemomoxijawabelia-ata, ¹⁶ tsipaji xanë orijibia tsitajëtsianajë bajaraponë pacuenia itsamatacabi itsamona bitso bejiobia-exanaejitsiatsi taliwaisi yabara! —jai Jesús Ananías-jawabelia, bemajitsinaebocuenia petsitanaitajëtsijawata.

¹⁷ Bajaraxuacujinae, Ananías jane baja pona pabojawabelia Saulo ponapona. Pejonecujinaelia, tsmatanacobeuata Saulo pematabocotojumawereca. Jumaitsi bajaraponëjawabelia:

—Tajabananë Saulo, pepopetuxanenë raja Jesús, ponë catsitanaitajëta namutua nenajetarucaejawata, bajaraponë nitoroba, pecawecua-ajibinexa baja peca-itaxutomerawibijawa, icatsia baja netaenexa xaniawaetsia, pecatsijamatabëwënëcaenexanua Espíritu Santo —jai Ananías Saulojawabelia.

¹⁸ Bajarapacuenia Ananías pejumaitsiyawata Saulojawabelia, we-itaxutothopatsi xua itaxutocaranatatsi, bedujauitseboco. Nexata jane baja, icatsia Saulo xaniawaetsia tane. Nonotapuna. Bajaraxuacujinae, bautizabatsi baja. ¹⁹ Pexaejawa pexaecujinae, aperabësaëreca baja icatsia. Nexata, Damasco tomarata caematacabibeje naponapona Jesús pijacuene penacujarubiwiawata.

Saulo tsipaeba Jesús peliwaisi Damasco tomarata

²⁰ Saulo pejumexaniataecujinae Jesús, Dioso pexënatocuene, bepijiayo taxuxuaba jiwi petsipaebijawa Jesús peliwaisi judíowi

u 9:13 *nitapetsiwi*: Wowaijume canacueneba santos. Santojume nacayapëtaeya-exana pacuenia Jesús itapeta bajarapamona pijajiwinexa mapanacuapijiwiwecua.

pijasinagogabonējawa. Jumaitsi tsaponae mapacueniaje: «Cristo raja pepa-cuene Dioso pexēnato», jai tsaponae Saulo.

²¹ Nexata, daxita pamonaē jumetane Saulo petsipaebiliwaisi, jamatabē-cuenenabenajaca. Najumaitsi bajaraponē yabara:

—Mara ponēje bejiobia-exanapona Jerusalén tomaratalia daxita pamonaē jumexaniatane Jesús peliwaisi. Bajaraxua yabara pata picani mapatomara-berenaje, itsamonaē petaicaenexa, pecaponaenexanua Jerusalén tomarabelia, sacerdotewi penamatacaitorobiwijawabelia ¿Detsa meta nexata xuajitsia tsipaebanajetaruca pitoyaliwaisimi? —najai bajarapamonaē Saulo yabara.

²² Itsiata, Saulo ajumejunawijibia orijibia asaēyata tsipaebapona Jesús peliwaisi. Xaniawaetsia jiwijawabelia yapētaeya-exanapona Jesús Cristo-cuene, ponē Dioso itorobiapaeba jiwi pecapanepaenexa. Nexata, judíowi, Damasco tomarata pejinawanapaewi moya, tsipaji apoyapētae pacuenia liwaisicaranatsijitsia Saulo pepaebiliwaisi, itsamonaē pejumexaniataeyaniwa bajarapaliwaisi.

Pacuenia Saulo wecuapanepa judíowi pitoyawitsi, yabara peliwaisi

²³ Matabianē pepanepaecujinae, Saulo jiwi petsipaebanajetarucaejawa Jesús peliwaisi Damasco tomarata, bexējawabelia judíowi siwanajamatabēcueneyanabatsi, pebeyaxuabinexatsi. ²⁴ Nexata, caematacabi, caemerawitata canacujitsia, Saulo judíowi wajēnae-ewetabiabatsi, pebeyaxuabinexatsi picani baupaxanetojawata, pabaupajawalia jiwi pitsapabiaba Damasco tomarawelia, penaropobiwi. Itsiata, Saulo nayaliwaisijumetane judíowi pebeyaxuapiapabijawatsi. Bajaraxuata, bajaraponē bajarapabaupaxanetojawalia apopitsapaelia. ²⁵ Damasco tomara matatoyorotsia yacaranata piaitayāē-ibopanaxanetota, piapiajawa. Nexata, pamonaē jumexaniatane Jesús peliwaisi Saulo petsipaebixae, itsa baja merawí, Saulo ecaeya-exanatsi bemapirecuenia pexanaejawaxaneto-ēnēta. Nexata, Damasco tomara matatoyorotsia peyacaranatsi-ibopanaxaneto yenepanata athēbēyo perucaeentanawojotualia, yacoparecatsi irabereca, Damasco tomarapē-nēyabelia. Bajarapacuenia Saulo Damasco tomarata judíowiwequa panepa pebeyaxuabiyaniwatsi.

Pacuenia Saulo copiapitatsi Jerusalén tomarata, yabara peliwaisi

²⁶ Damasco tomarawecua penajetabijirawicujinae, Saulo itsa patajopa Jerusalén tomarata, picani jitsipa penaponaponaejawa Jesús pijacuene penacujarubiwijawata. Itsiata, daxita bajarapamonaē Saulo cujunawatsi, tsipaji apojumexaniataetsi pepacuene Jesús peliwaisi pejumexaniataenēcuenē. ²⁷ Itsiata, Bernabé barēlia Saulo apóstolewijawabelia, bajarapamonaē peyapētaenexatsi. Nexata, Bernabé tsipaeba apóstolewijawabelia pacuenia Saulo namutua penajetarucaejawata tane Jesús bemajitsinaebota, pacuenia-ata Jesús barēcuaicuaijatsi. Tsipaebanua pacuenia Saulo ajumejunawijibia tsipaebapona Damasco tomarata Jesús peliwaisi. ²⁸ Nexata, bajarapacuenia Bernabé peyapijiwicuaicuaijaixatsi, Saulo baja naponapona Jerusalén tomarata, apóstolewijawata, itsamonaē Jesús peliwaisi pejumexaniataewijawata-ata. Nexata, Jerusalén tomarata bajaraponē tsipaebapona ajumejunawijibia Jesús peliwaisi jiwijawabelia. ²⁹ Barēcuaicuaijai

tsabiabi judfowi, griegojume pecuaicuaijaiwi.^v Barēnajumenotabiaba bajara-pamonaē, Jesús peliwaishi yabara. Itsiata baitsi jane, bajarapamonaē najama-tabēxaina pacuenia beyaxuabijitsiatsi Saulo.³⁰ Jesús peliwaishi pejumexania-taewi, Jerusalén tomarata, itsa jumetane Saulo pebeyaxuabiapaebijawatsi, bajarapamonaē pēnaxuabatsi Cesarea tomarabelia. Bajarajotacujinaē, itorobatsi pewajēnaeyabelia penajetarucaenexa, pepatsinexa Tarso tomarabelia.

³¹ Saulo pejumexaniataecujinaē Jesús peliwaishi, nexata daxitajawa, itsaxuayo Jesús pijajiwi jinawanapa, xaniawaetsia baja jinawanapa. Copabatsi baja pebejibia-exanabiabijawatsi Judea nacuaajawa, Galilea nacuaajawa, Samaria nacuaajawa-ata. Nexata, daxita bajarapamonaē jamatabēcueneliwai-siwitsabapona Jesús pijacuenejawata, yaiyataeya pejinawanapaenexa Dioso pejitsipacuenia, Espiritu Santo peyawenonaponaecueniatsi-ata. Orijibia, itsamonaē-ata Jesús peliwaishi pejume-aebiwi, ayaibitsaētoxaneto jumexaniataepona bajarapaliwaishi.

Jesucristo pejamatabēcueneta, Pedro jamatejemaya-exana Eneas

³² Itsamatacabi Pedro najetaruca daxita tomanējawa pesiwaxainaenexa Jesús peliwaishi pejumexaniataewi. Itsamatacabi najetaruca Lida tomara-jawa, petaenexa pamonaē Jesús pēwēnēta nacaetuatabiaba.³³ Nexata, bajarapatomarata taeyabuata Eneas-wēnēnē. Bajaraponē ocho pawai-beje xaina camata pebocaecujinaē, tsipaji tabusipacuenabatsi.³⁴ Pedro nexata jumaitsi bajaraponējawabelia:

—Eneas, camatejemaya-exana rabaja Jesucristo. ¡Nonotapunare! ¡Quionare baja nebocabiabipanayo! —jai Pedro.

Nexata, Eneas bajarajota nonotapuna.³⁵ Nexata, daxita Lida tomarapijiwi, Sarón nacuaapijiwi-ata, tanetsi Eneas pejamatejemajawa. Bajarapamonaē nexata najamatabēcuenepēnēyoroba pijaperujamatabēcuenē pecatsite-caejawamiwecua, pesiwanajamatabēcuenecopabinexa baja wajatuxanenē Jesucristojawabelia.

Pedro icatsia asaēya-exana Dorcas, petēpaewami, Jope tomarata peponaponaewa

³⁶ Jope tomarata ponapona Tabitawēnēwa, Jesús pijacuene penacujarubiwa. Griegojumeta pijinia pewēnē Dorcas. Bajarapowa caematacabi canacujitsia pexaniacuene to-exanabiaba itsamonaējawabelia. Bepejiobiwijawabelianua rajutabiaba penamatawenonaējawaxi.³⁷ Pamatacabi Pedro abaxē ponapona Lida tomarata, Dorcas awitane Jope tomarata. Tēpa baja. Peperabēquitsicujinaetsi, petēpaewa buatatsi bo-ēnēta anija-irabejejawatatsia.³⁸ Jope tomara eca imoxoyo Lida tomarawecua. Nexata, Jesús pijacuene penacujarubiwi itsa wēnēliwaitsanetsi Pedro peponaponaējawawa Lida tomarata, itoroba anijanē-beje pejunatsinexabeje Pedro. Lida tomarata pepatsicujinaebeje, jumaitsi-beje: «¡Pedro, naxatsiayo liamēre Jope tomarabelia!», jaibeje Pedrojawabelia.

^v 9:29 *griegojume pecuaicuaijaiwi*: Bajarapamonaē helenistawi. Helenistawi, judfowi picani. Itsiata, nagriegoba, pexanawanapaenexa griegowicuenia. Nexata, griegowicuenia naxatatabiaba, asiwaya nawajēcabiaba jumapecataeya pexanaenēnējawabelia, Diosojawabelia-ata caecuenia, siwanajamatabēcuenecopatabiabanua Romano nacua pewetsinē César-jawabelia, peyawenonaenexatsi bediosocuenia.

³⁹Nexata, Pedro narena bajaraponëbeje pepëta. Pedro itsa napata pabota petëpaewa buatatsi, tsitajëtatsi. Nexata, pamonajiwi pewecuatëpaewanëtsi, Dorcas-pijiwa pewënewitsi, Pedro matatoyorotsia itaxutuanuenubenatsi. Bajarapamonae Pedro tsitajëbatsi Dorcas-pijiwa pejorocaejawanë, penaxa-tabijawanë, penajuma-acabipananë-ata, xuanë Dorcas-pijiwa rajuta bajara-pamonaejawabelia, pamatacabi abaxë asaë tsaponaponae. ⁴⁰Nexata, daxita pamonae nubena pa-ënëtuatujëta petëpaewa buatatsi, Pedro pitsapaeya-exana. Pija-epatojawata, Pedro pematatabacabëta nuca, pewajëtsinexa Dioso-jawabelia. Pewajëtsicujinae, napënëyorota petëpaewajawabelia. Jumaitsi:

—¡Tabita, nonotapunare! —jai Pedro.

Nexata, petëpaewami naëcota. Pedro petaejawatatsi, namataco-teca. ⁴¹Pedro nexata bajarapowa cobewaetabiaya nonotapunaeya-exana. Junarena daxita Jesús peliwaissi pejumexaniataewi, pamonajiwi pewecuatëpaewanëtsi-ata, petsitajëtsinexa petëpaewami icatsia piasaëjawa. ⁴²Nexata, daxita Joje tomarapijiwi wënëtane, Dioso pinijicuene pexanae-jawa. Bajaraxuata, ayaiabitsaëtoxaneto siwanajamatabëcuenecopaba Jesucristojawabelia bajarapaliwaissita. ⁴³Nexata, Pedro bajayajebi ponapona Joje tomarata, Simón, vacabocotonë peyacueyacuecaeya-exanaenë, pijabota.

Pedro pona Corneliojawabelia, apojudionë-ata

10 ¹Cesarea tomarata ponapona Cornelio, apojudionë. Bajaraponë Italia nacuawerena pepatsiwi wajabitsaëwi pijacapitán. ²Bajaraponë pijabopijiwi yajawa Dioso bitso yayiataeya ponapona. Barëjumecowënëta-ponaponanua Dioso penajumecopatsiliwaissi Moisés-pijinëta. Nexata, wajë-cabiaba Diosojawabelia. Orijibia, palata ayaijawa yawenonaeya rajutabiaba judíowi bepejiobiwijawabelia. ³Itsamatacabi caniwio-epatota, bejamatabë-cuene a las tres,* Cornelio bemajitsinaebota tane Dioso pija-ángelnë pejone-jawarena pijaboyarena. Nexata junataxuabatsi.

—¡Cornelio! —jaitsi.

⁴Cornelio petaejawata ángelnë, bitso junawa. Cujunawi-ata, itsiata naëcolia. Nexata, yayiataeya jumaitsi ángel-nëjawabelia:

—Tajatuxanenë, ¿detsa xua jitsipame? —jai Cornelio.

Nexata ángelnë jumaitsi:

—Newajëtabijawa Diosojawabelia, nerajutabiabijawa-ata penamatawenonaecueene bepejiobiwijawabelia, daxita bajaraxuanë Dioso tsitaxane-panatsi. Nexata, catotane be-ofrenda nerajutsijawa bajaraPonëjawabelia. Aponacofënëtsinua bajaraxua. ⁵¡Ilorobare nijajiwi Joje tomarabelia, peca-tobarëpatsinexarena Simón, ponë wënërubatsi itsawënë Pedro! ⁶Bajaraponë Pedro naponapona itsanë Simón-wënënë pijabota, vacabocotonë peyacueyacuecaeya-exanaenë. Bajaraponë pijabo eca manuamene-itapata.

w 10:3 bejamatabëcuene a las tres: Caematacabi canacujitsia Judíowi pijasacerdotewi, Dioso pitorobicuenia, anijatobeje oveja daxitanë tajuitabiaba Diosojawabelia, judíowi pijaneconijamatabëcuene. Caenë oveja tajuita bajayacunua-epato, bejamatabë a las nuevejawa, itsanë pijinia caniwio-epato, bejamatabë a las tres. Nexata, bajarapaepatotabeje judíowi, judíocuene pejumecowënëtsiwi-ata templobota wajëcabiaba Diosojawabelia, itsa jume, itsa tajë templobowecua jinawanapa, pijabota. Bajaraxuata, yapëtanetsi Cornelio pewajëcaejawata Diosojawabelia, bemajitsinaebota tane Dioso pija-ángelnë.

Nexata, Pedro, itsa patsiarena, catsipaebiana pacuenia exanaejitsiamē —jai ángelnē Corneliojawabelia bemajitsinaebota.

⁷Ajena pewecuaponaecujinaetsi pa-ángelnē barēcuaicuajaitsi bemajit-sinaebota, Cornelio jane baja junata anijanēbeje pijabota petonacueneba-ponaponaenētsibeje. Pematatsēnēa junata caenē wajabitsaēnē, peyawe-nonabiabinētsi, Dioso peyaiyataenē. ⁸Nexata, Cornelio petsipaebicujinae bajarapamonaejawabelia daxita pacuenia tsipaebatsi ángelnē, itoroba baja-rapamona peponaenexa jane baja Joje tomarabelia, Simón Pedro pesiwa-ponaenexa. Nexata baja, bajarapamona naropoba.

⁹Merawia pitsijawata, matoneje-epatota, bajarapamona Joje tomara imoxoyotanajetarubena. Bajarapijina paepatota Pedro pabota naponapona, junaya bajarapabojumatatsia, pewajētsinexa Diosojawabelia. ¹⁰Pedro, pewa-jēcaenē, bitso pīajani. Jamatabēxane picani. Paepatota jiwi jayabawanapa pexaejawa, bajarapaepatota Pedro bemajitsinaebocuenia tsitajētatsi. ¹¹Tane itaboxo penapatsijawa. Tanenua athēbēwetsica perunaejawa irabetsica ayai-panaxaneto, besábanapanaxaneto. Bajarapapanaxaneto yamaēya copatsica cuatro pa-upibeje namata-enetsia pecētsijawa. ¹²Bajarapapanaxanetotua-tuajēta nubena daxitacuenewiria, cuatro pataxutabeje pejinawanapaewi, pecotobēxēta pejinawanapaewi, pepunaewi-ata, pawiriawi Dioso jani-itaweta^x judfowi pexaeyaniwa. ¹³Nexata, Pedro jumetane athēbēwetsica pejumaitisijawa:

—¡Pedro, nonotapunare! ¡Beyaxuabare mapamonaeyajuwēnēwije nexae-nexa! —pejaijawa jumetane.

¹⁴Nexata Pedro jumaitis:

—¡Jume raja tatatuxanenē! Dioso penajumecopatsiliwaisi Moisés-pijinēta, panejani-itaweta pataxaeyaniwa bajarapitsiwiriawi pewi. Bajaraxuata, caeto-ata xanē apoxaenē patanejani-itawetsiwi —jai Pedro.

¹⁵Icatsia, athēbēwetsica jumaitisitsi Pedro:

—¡Pawiriawi nexaenexa ca-itorobatsi, xaema! ¡Xamē pētsa janijunawame nexaejawa, pecajani-itawetsixae!^y —jai athēbēwetsica.

¹⁶Pedro bajarapacuenia jumaitisitsi acueyabi xuabeje napēna athēbē-wetsica. Bajaraxuacujinae, bajarapapanaxaneto athēbēabetsia baja icatsia yapēcaewaya. ¹⁷Pedro itsa abaxē canaējēteca pajamatabēcuenē yabara tsitajētatsi bajaraxua, bajarapaepatota Cornelio pijajiwi pata pabota Pedro naponapona. Bajarapamona nubena bajarapabo matatoyorotsia peyacaranatsi-ibopanapijibaupa pēnēwerena. Pepatsiwajēnaeya, namutua-rena yanijobanajetarubena picani jiwijawabelia, peyapētaenexa itsajota eca Simón, vacabocotonē peyacueyacuecaeya-exanaenē, pijabo. ¹⁸Nexata, baupa pēnēwelia ayaijumeta yanijoba. Jumaitis:

—¿Mapabota aponaponapona Simón, ponē wēnērubatsi itsawēnē, Pedro? —jai bajarapamona.

¹⁹Cotocaewi irajawatatsia, Pedro paepatota canaējēbeca pajamatabēcuenē xaina bemajitsinaebota petaejawa yabara. Bajarajota, Espíritu Santo jumaitis Pedrojawabelia:

^x 10:12 jani-itaweta: Taema Levítico capítulo 11. ^y 10:15 pecajani-itawetsixae: Taema Mc 7:15, 19.

—¡Taema! Acueyabi ponēbeje cajaitanajetarubena.²⁰ ¡Nexata, nonotapunare! ¡Runaremea baja nenaponaenexa bajarapamonae pepēta! Jamatejema saya ajamatabēcuenecowēbia naponaname, tsipaji raja xanē itorobarenajē bajarapamonae —jai Espíritu Santo Pedrojawabelia.

²¹Nexata baja, Pedro runareca itsajotareca Cornelio pijajiwi nubena. Jumaitsi bajarapamonaejawabelia:

—Ponē pajaitame, xanē rabaja maje. ¿Detsa xua yabara panejaitanajetarubename? —jai Pedro.

²²Nexata, Cornelio pijajiwi jumaitsi Pedrojawabelia:

—Panajetarubenajē raja Cornelio, wajabitsaē pijacapitán-nē, pejamatabēcueneta. Bjaraponē pexaniajamatabēcuenenē. Dioso asiwaya, peyaiya-taenē. Bjaraponē asiwaya tanetsi daxita judíowi. Yaiyataeyanua copiapitabiabatsi. Cornelio, tsitanaitajētatsi Dioso pija-ángelnē. Nexata, itorobatsi pecajunatsinexa. Cajumetaejitsia paliwaisi tsipaebijitsiamē bajaraponējawabelia. Bjaraxuata, paxanē pacasiwaponarenatsi, pijaboyabelia nenaponaenexa —jai Cornelio pijajiwi Pedrojawabelia.

²³Nexata, Pedro copiapita bajarapamonae boyaberena pejonenexa. Bjarapamerawi abaxē namajita bajarapabota.

Bjayacunua jane baja, Pedro napona bajarapamonae pepēta. Pedro pēyanatatsi itsamonae Jope tomarapijiwi, Jesús peliwaishi pejumexaniataewi.

²⁴Nexata, merawia pitsijawata, Pedrobana jane baja palia Cesarea tomarabelia. Cornelio nexata pijabota yajawanuca pejunatsiwi, pijamonaewiriawi, itsamonae-ata bitso peypātaewitsi. Pedro jane baja barēwajēnae-ewetanucatsi. ²⁵Pedro itsa patanajetaruca pijabopanabota, pecopiapitsijawatatsi, Cornelio pematabacabēta nucajunua Pedro pitabarata, bitso yaiyataeya bediosonēcuenia pecopiapitsinexa picani. ²⁶Nexata, Pedro apojitsipae bajarapacuenia bitso yaiyataeya pecopiapitsijawatsi. Maxēwaetabiaya nonotapunaeya-exana. Nexata, jumaitsi Corneliojawabelia:

—¡Nonotapunare, tsipaji raja saya xanē-ata jiwitonēnē, pacuenia xamē itsimē! —jai Pedro.

²⁷Nexata, Pedro Cornelio barēcuaicuaijai tsanucaponae panabojawarena. Pedro itsa najoneya Cornelio pijaboyalía, tane jiwibitsaē-toxaneto bajarapabota penacaetuatsijawa. ²⁸Nexata, Pedro jumaitsi penacaetuatsiijawabelia:

—Paxamē baja cajena xaniawaetsia payapētaneme mapacuneje. Paxanē pajudíowinē patajasalinaliwiwi apopanetocopatsi apojudíowi patayajawajinawanapoenexa, patajonenexa-ata pijaboyalía, bepatanaxuirabiwicuenia^z patanacopatsiyaniwa Dioso pitabarata. Itsiata baitsi jane, aeconoxaeta baja Dioso neyapētaeya-exana tacopatsinexa bijiaya patacanaēcotsijamatabēcuenemi apopajudíowimē. ²⁹Bjaraxuata, itsa nijajiwi nejunata taponaeenexa maberenaje, narenanē bepíjia ajamatabēcuenecowēbia.

z 10:28 *bepatanaxuirabiwicuenia*: Judíowi bepenaxuirabiwi taeyabiaba apojudíowi Dioso pitabarata, apopenabo-upiperabēcaucubia-exanaexae. Pamonae Dioso bepenaxuirabiwicuenia tanetsi, to-acuenebitsi penajua-exanaenexa itsacuenejawa Dioso pewēnēta, pepatsijawanua templobojawabelia, itsa abaxē aponawecua-ajibia-exanae bepenaxuirabineconimi. Paepatojebi ponapona bepenaxuirabijiwi pijamonaewiwi aposiwxainaetsi, bepenaxuirabijiwicuenia Dioso peyajawataeyaniwatsi.

Nexata, jamatabëypëtaniji xua yabara panejunatame —jai Pedro penacaetuatsiwi jawabelia.

³⁰ Nexata, bajarajota Cornelio jumaitsi Pedro jawabelia:

—Xanë baja ajena xainajë cuatro pamatacabibeje tataecujinae ángelnë. Caniwiyo-epatota, bejamatabëcuene a las tres, tawajëtsijawata Diosojawabelia, bajarapaepatota jemata taitabarata netsitanaitajëta ángelnë, peniweniwenaejawa penaxatatsinë. ³¹ Nexata ángelnë nejumaitsi: «Cornelio, Dioso rabaja cajumetane newajëtsijawa. Siwajamatabëcuenebarëyaya yapëtanenua nerajutabiabijawa bepejiobiwijawabelia penamatawenonaecueene. ³² ¡Nexata, nijajiwi itorobare Jope tomarajawabelia, pecatojunatsinexa Simón, ponë wënërubatsi itsawënë, Pedro! Bajaraponë naponapona itsanë Simón, vacabocotonë peyacueyacucaeaya-exanaenë, pijabota. Bajaraponë pijabo eca manuamene-itapata. Nexata, Pedro, itsa patsiarena, catsipae-biana pacuenia exanaejitsiamë», nejai ángelnë. ³³ Bajaraxuata, bepjiayocasiwaponaeaya-exanatsi. Xamë baja nexata pexaniajamatabëcuenia netopatame. Bajaraxuata, newajënae daxita paxanë panacaetuatajë Dioso pita-barata. Paca-ewetatsi patacajumetaenexa daxita paliwaisi Dioso ca-itoroba patanetsipaebinxamë —jai Cornelio Pedro jawabelia.

Pedro Jesús peli waisi tsipaeba Cornelio pijabota penacaetuatsiwi jawabelia

³⁴ Pedro jane baja taxuxuaba liwaisi petsipaebijawa. Jumaitsi:

—Matapania rajane baja yapëtaniji mapacuenije. Najëpaeya^a tsaena Dioso nacatane daxitawiriawitsi. ³⁵ Caenacuapijiwi canacujitsia, pamona Dioso yayiataeya jinawanapa, jumecowënëtsiajinawanapanua pacuenia Dioso itorobatsi, bajarapamonae Dioso najëpaeya tane. ³⁶ Dioso cajena pexaniali waisi, Jesucristo peli waisi, panetonajumecopata paxanë Israel-pijinë papemomoxinë jawaberena, pataneyapëtaeya-exanaenexa pacuenia caejamatabëcuene paxinaejitsianë Diosojawabelia, patanesiwajamatabëcuenecaewicujinae pibisiacuene pata-exanaeneconi Jesucristo pejamatabëcueneta. Itsiata, aeconoxae yapëtaniji pacuenia Jesucristo baja daxitajiwi pijatuxanenë-ata. ³⁷ Payapëtaneme rabaja mapacuenije. Juan, jiwibautizabinëmi, jiwi liwaisi petsipaebanajetarucaecujinae, pebautizabaponaecujinaenua, Jesús cotocaewi tsipaebanajetaruca Galilea nacujawaja, Judea nacujawaja-ata. ³⁸ Payapëtanemenua pacuenia Jesús, Nazaret tomarapijinë, Dioso tsmatarunaeya-exanatsi Espiritu Santo, pesaëtanua jamatabëcuenecaëjëpaeya-exanatsi pinijicuenejawanë pexanaenexa. Bajarapacuenia Dioso peto-exanaexaetsi, Jesús exanapona pexaniacuenejawanë wijawabelia. Jamatejemaya-exanaponanua daxita pamona bejiobia-exanatsi wixaeta, dowathi pejamatabëcueneta, tsipaji bajaraponë Dioso yajawaponaponatsi.

³⁹ »Paxanë, pa-apóstolewinë, pataniji baja daxita xua Jesús exanapona Judea nacuada, Jerusalén tomarata-ata. Patanijinau pacuenia itsamonae beyaxuabatsi Jesús, pecobematabiabarutsijawata cruzajawabelia. ⁴⁰ Itsiata baitsi jane, Jesús, petëpaenë pemëthëtsicujinaetsi, acueyabimatacabita Dioso icatsia

asaëya-exanatsi. Tocopatatsinua Jesús patanetsitanaitajëtabiabinexa paxanë-jawaberena. ⁴¹ Itsiata, Jesús apotsitanaitajëtsi daxitajiwijawabelia. Ëpaxanë-jawaberena saya panetsitanaitajëtabiaba, tsipaji tajëwelia baja cajena Dioso pane-itapeta patawajunupaebiwinexa patataejawa Jesús petëpaecujinae icatsia piasaëjawa. Bajaraxuata, Jesús petëpaecujinae, icatsia itsa asaë, panetsitanaitajëtabiaba, patanebarëxaenexa, patanebarëmatawëjëa-apaenexanua. ⁴² Nexata, Jesús pane-itoroba patatsipaebaponaenexa daxitajiwijawabelia pexanaliwaisi, Jesús peliwaishi. Pane-itorobanua patatsipaebaponaenexa Dioso pejamatabëcueneta itsamatacabi Jesús penaneconitsia-exanaejawanexa^c daxita pijaneconi pexainaewi, piasaëwi, petëpaewimi-ata. ⁴³ Ëpaxanë apopawajunupaebinë Jesús peliwaishi. Bajayata-ata Diosojumepaebiwimi, profetawi, tajëwelia wajunupaebapona Jesús pejamatabëcueneta Dioso pewecua-ajibia-exanaejawanexa pibisiacuene pexanaeconimi, pajiwiyo jumexaniatane^d Jesús peliwaishi —jai Pedro Cornelio pijabota penacatuatsiwijawabelia.

**Espíritu Santo tsijamatabëjunuatsi apojudíowi-ata,
pacuenia tsijamatabëjunua judíowijawabelia**

⁴⁴ Pedro abaxë liwaisi petsipaebanucaejawata Cornelio banajawabelia, Espíritu Santo tsijamatabëjunuatsi daxita pamonae jumetaeyena Pedro petsipae-biliwaishi. ⁴⁵ Nexata, judíowi, Jesús peliwaishi pejumexaniataewi, Pedro peyajawapatsiwi, itsa tane bajarapacueni, jamatabëcuenenabenajacanubena bitso, tsipaji Dioso rajuta apojudíowi-ata Espíritu Santo petsijamatabëjone nexatsi. ⁴⁶ Yapëtane Espíritu Santo petsijamatabëjone jawatsi Cornelio bana, tsipaji bajarapamonae cuaicuajiai itsawirijajumenëta, apocuaicuajiaijumenëmi, Dioso pexaniacuena pewënëxaniatsinexa,^e ayaijamatabëcuenenë yabara.

⁴⁷ Bajarapacuenia petaejawata, Pedro jumaisi peyajawapatsiwijawabelia: —Pacuenia waxaitsi Dioso nacarajuta Espíritu Santo, bajarapijinia pacuenia mapamonae-ata rajutatsi Espíritu Santo. Bajaraxuata, acuenebi itsajiwia-ata pitawetsijawa bajarapamonae pebautizabijawa merata —jai Pedro.

⁴⁸ Nexata, Pedro peyajawapatsiwi itoroba penabautizabinexa Cornelio bana, Jesucristo pewënëta. Pebautizabicujinae, bajarapamonae asiwatsi abaxë Pedro bana caematacabibeje bajarajota penajinawanapaenexa.^f

**Jerusalén tomarata, Pedro nawajunupaeba Jesús
pijajiwijawabelia, pexanaejawanë Cornelio pijabota**

11 ¹ Jerusalén tomarata, apóstolewi, itsamonae-ata Jesús peliwaishi pejumexaniataewi, Judea nacuata pejinawanapaewi,

b 10:41 *patanebarëmatawëjëa-apaenexanua*: Jesús penayapëtaeya-exanaenexa bajarapamonaejawabelia pepopiasaëncuene, apopejumapenëcuene-ata, nexata bajaraponë barëxane, barëmatawëjëa-apanua. Judíowi canaëjëtabiaba pejumapewi pexaejawa apopexaewi, mera-ata apopiapaewinua. Taema Lc 24:30-43; Jn 21:4-13. **c 10:42** *penaneconitsia-exanaejawanexa*: Taema Mt 25:31-46; Jn 5:26-29; Rom. 14:9-10; 2Ti 4:1, 8; 1Pd 4:5; Apoc. 5:1-9; 21; 15:1-16:21; 20:11-5; 22:12. **d 10:43** *jumexaniatane*: Taema Isa. 53; Joel 2:32; Jn 1:12; 3:16-18, 36. **e 10:46** *pewënëxaniatsinexa*: Taema Hch. 2:1-11. **f 10:48** *penajinawanapaenexa*: Pedro bana itsa nacopata penajinawanapaenexa apojudíowi pijabota, najamatabëcuene-itajëta Dioso petaejawatsi nacaemonaecuenia apojudíowi, judíowi-ata Jesucristo pejamatabëcueneta. Tocopiarucatsi jane baja, judíowi bepenaxuirabiwicuenia penacopatsijawa Dioso pitabarata, apojudíowi pijabojawabelia pejonexae.

wēnēliwaisitane apojudíowi-ata pejumexaniataejawa Dioso peliwaisi Jesús yabara. ²Nexata, pamatacabi Pedro pata Jerusalén tomarata, judíowi barēnajume-anaenotatsi. Bajarapamonae Jesús peliwaisi pejumexaniataewi-ata, bitso casaē pejumecowēnētawanapaejawa judíowi pena-ewetsicuene apojudíowiwequa. Nexata, bajarapamonae anaeya jumaitsi Pedrojawabelia:

³—¿Detsa xuajitsia Cesarea tomarata naponaponame apojudíowi pija-bota? ¿Detsa xuajitsia apojudíowijawata naxaeponaponame? —jai judíowi anaeya Pedrojawabelia.

⁴Nexata, Pedro tsipaeba bajarapamonaejawabelia pacuenia taxuxuaba bajarapacuenia yabara. Jumaitsi:

⁵—Pamatacabi naponaponajē Jope tomarata, Simón, vacabocotonē peyacueyacuecaeya-exanaenē, pijabota, bajarapamatacabi wajētajē Diosojawabelia. Nexata, Diosojawabelia tawajētsijawata, bemajitsinaebota taniji athēbēwetsica perunaepjawatsica ayaipanaxaneto, besábanapanaxaneto. Bajarapapanaxaneto yamaēya copatsica xanējawatsica cuatro pa-upibeje namata-enetsia pecētsijawa. Xanējawabetsica yamaēya copatsica. ⁶Itsa naitaxutobabatsia naēcotajē, xaniawaetsia tataenexa xua yajawanajetaruca bajarapapanaxanetotuatujēta, nexata taniji daxitawiria dajubi, unupijiwi pianaešanaewi, pecotobēxēta pejinawanapaewi, pepunaewi-ata, daxita pawiriawi Dioso nacajani-itaweta judíowitsi wajaxaeyaniwa. ⁷Nexata, jumetaniji athēbēwetsica tanejumaitsiyawata: «¡Pedro, nonotapunare! ¡Beyaxuare, mapamonaeyajuwēnēwije nexaenexa!», nejai. ⁸Nexata jumaitsinē: «¡Jume raja tajatuxanenē! Dioso penajumecopatsiliwaisi Moisés-pijinēta panejani-itaweta pataxaeyaniwa bajarapitsiwiriawi pawi. Bajaraxuata xanē apoxaeyabiabinē xua nejani-itaweta bajarapaliwaisi», janē. ⁹Icatsia, athēbēwetsica nejumaitsi: «¡Pawiriawi nexaenexa ca-itorobatsi, xamē pētsa janijunawame nexaejawa pecajani-itawetsixae!», nejai athēbēwetsica. ¹⁰Bajarapacuenia nejumaitsi acueyabi xuabeje napēna athēbēwetsica. Bajaraxuacujinae, bajarapapanaxaneto daxita bajarapamonae yajawa athēbēabetsia baja icatsia yapēcaewaya.

¹¹»Bajarapaepatota jane baja, acueyabi ponēbeje nesiwapata pabota naponaponajē. Bajarapamonae itorobatsi Cesarea tomarawerena. ¹²Nexata, Espíritu Santo nitoroba bajarapamonae pepēta, apojudíowi-ata, ajamatabē-cuenecowēbia tanaponanexa Cesarea tomarabelia. Orijibia, mapamonaeye wajamonae, seis ponēbeje, Jesús peliwaisi pejumexaniataewi, nepēyanata. Nexata, ita papatajē bajarapatomarata, panajoneyajē Cornelio, wajabitsaē pijacapitán, pijaboyalia. ¹³Bajaraponē panetsipaeba pijabota petsitanaitajētsijawatsi ángelnē. Bajarapa-ángelnē pina jumaitsi: «¡Itorobare nijajíwi Jope tomarabelia, pecatojunatsinexa Simón, ponē wēnērubatsi itsawēnē Pedro! ¹⁴Bajaraponē ita patsiarena, catsipaebiana pacuenia exanaejitsiamē Dioso pecawecua-ajibia-exanaenexa daxita pibisiacuene nexanaeconeimi, daxita nijabopijiwi yajawa», jaitsi pina ángelnē. ¹⁵Nexata jane baja, ita taxuxuabajē liwaisi tatsipaebijawa Corneliobanajawabelia, bajarapaepatota bajarapamonae Espíritu Santo tsijamatabēpatsicatsi, pacuenia waxaitsi copiya nacatsijamatabēpatsica Espíritu Santo. ¹⁶Nexata, najamatabēnapitajē Jesús pejumaitsiyawata^s mapacueniaje: «Juan-pijinē raja jiwi bautizabanajetaruca ēmerata. Itsiata,

baitsi jane, caematacabibecucujinae paxamë Dioso pacatsijamatabějoneya-exanaena Espíritu Santo», pejaijawa. ¹⁷¡Xaniajai baja cajena! Dioso rajutapona Espíritu Santo apojudíowi-ata, pacuenia waxaitsi nacarajuta wajasiwanajamataběcuenecopabixae wajatuxanenë Jesucristojawabelia. Nexata, acuenebi tacaranatsijawa Dioso perajutsijawa Espíritu Santo apojudíowi-ata —jai Pedro anaeya pejumejumaitsiwijawabelia.

¹⁸Nexata, bajarapamonae itsa jumetane bajarapacuenia Pedro pejumaitsi-jawa, copaba baja pebara-anaepanaejawatsi. Biji rajane, jamataběcueneba-rěya Diosojawabelia. Wëněxaniatsiaya Dioso yabara jumaitsi mapacueniaje:

—¡Cuaë! Apowajacanaējětsicuenia Dioso exana. Tocopata apojudíowi-ata penajamataběcuenepěñeyorobinexa Diosojawabelia, pibisiacueni pexanaejawawecua, matababi apopewerewerecaejawa pexainanexanua pacuenia waxaitsi judíowitsi —jai judíowi.

Pacuenia Jesús peliwaisi pata, Antioquía tomarata, yabara peliwaisi

¹⁹Pamatacabi Esteban-pijinë beyaxuabatsi, bajarapamatacabijawaweliacujinae itsamonae, Jesús peliwaisi pejumexaniataewanapaewi Jerusalén tomarawecua rěcěpeca, nacayajatsiaya pejinawanapaenexa itsanacuanějawa, Jesús peliwaisi yabara pebejiobia-exanaponaexaetsi. Nexata, itsamonae tajěbelia rěcěpeca Fenicia tomarabelia, Chipretunaetota pe-enaetomaranějawabelia, Antioquía tomarajawabelia-ata. Nexata, bajarapamonae pepatsicujinae, Jesús peliwaisi tsipaebapona bajarapatomaranějawa epewěnajudíowijawabelia. ²⁰Itsamonae Jesús peliwaisi pejumexaniataewi, Chipretunaetota pe-ecaetomarapijiwi, Cirene tomarapijiwi-ata, pona Antioquía tomarabelia. Bajarapamonae pijinia Antioquía tomarata apojudíowijawabelia-ata tsipaebapona pexanialiwaisi, Jesús peliwaisi.

²¹Pamonae apojudíowijawabelia tsipaeba Jesús peliwaisi, Dioso yawenonatsi. Nexata, apojudíowi ayaibitsaětoxaeto najamataběcuenepěñeyoroba Diosojawabelia pijaperujumecowěñětsicuenewecua, juya pejumexaniataenexa Jesús peliwaisi.

²²Belia wëněliwaisitane Jesús pijajiwi, Jerusalén tomarata pejinawana-paewi, pacuenia apojudíowi Antioquía tomarata, jumexaniataepona Jesús peliwaisi. Nexata, bajarapamonae Bernabé itorobaliatsi Antioquía tomarabelia, peyapětaenexa pexaniajaicueni. ²³Nexata, bajaraponë itsa pata Antioquía tomarata, tane pacuenia Dioso itaxutotsoniataeya, pexaniacuenia yawenonapona daxita Jesús peliwaisi pejumexaniataewi bajarapatomarata. Bernabé siwajamataběcuenabarěya bajarapamonae. Muxujiobanua daxita pejamatabě-ěthětowetsina ajamataběcuenesaěya pitaxutuajamatejematsawanapaenexa Dioso, pejitsipaecuenianua pexanawanapaenexa. ²⁴Bernabé bitso pexaniajamataběcuenenë. Espíritu Santo petsijamataběcuenewěñěcaenětsi. ^hBitso Dioso pitaxutuajamatejemanë. Bajaraxuata, bajaraponë petsipaebaponaejawata jiwibitsaětoxaeto jumexaniataepona Jesús peliwaisi.

²⁵Bajaraxuacujinae, Bernabé baja pona Tarso tomarabelia, pejaitsinexa Saulo, peyawenonaenexatsi pecujarubijawata Antioquía tomarata

h 11:24 *petsijamataběcuenewěñěcaenětsi*, Pamonae Espíritu Santo tsijamataběcuenewěñěcatsi, bajarapamonae exanabiaba Espíritu Santo pitorobicueniatsi.

pejinawanapaewi. ²⁶ Nexata baja, Bernabé ita caxitajaraba Saulo, barërena bajarapatomaraberena. Bajarajota, caewai naponaponabeje Jesús pijajiwijawata. Cujarubaponaponabeje jiwi ayaibitsaëto. Pamonae Jesús pijacuene penacujarubiwi Antioquía tomarata, pepocopiaya jane baja wënërubatsi cristianowi, ⁱ «Cristo pijacuene pepënaponaeui», pejaijume.

²⁷ Pamatacabi abaxë Bernabé, Saulobeje, ponaponabeje Antioquía tomarata, Diosojumepaebiwi, profetawi, Jerusalén tomarawerena penaropobiwi, pata Antioquía tomarata. ²⁸ Bajarapaprofetawiyajuwënë, Agabo nono-tapuna Jesús peliwaisi pejumexaniataewi penacaetuatsijawata. Nexata, Espiritu Santo peyapëtaeya-exanaecueniatsi tajëwelia wajunupaeba ayai-janiboxaneto pecopiapatsijawanexa daxitanacuanëjawa. Nexata jane baja, bajarapajaniboxaneto bexëa copiapata Agabo pejumaitsicuenia, pamatacabi Claudio yanacua-ewetaponapona Roma nacuapijiwi. ²⁹ Bajaraxuata, cajena janibowajënaeya, daxita Jesús pijacuene penacujarubiwi, Antioquía tomarata pejinawanapaewi, najamatabëcuenejëpa peyawenonaenexa Judea nacuapijiwi, Jesús peliwaisi pejumexaniataewi. Nexata, caenë canacujitsia rajutapona palata pacuenia cuenecaëjëpatsi. ³⁰ Nexata baja, bajarapatomapijiwi ita tocaetuatsiwereta bajarapapalata, itorobatsibeje Bernabé, Saulobeje, petocaponaenexabeje Judea nacuapijiwijawabelia. Bajaraponëbeje rajuta penamatacaitorobawanapaewi Jesús pijajiwituatujëta, bajarapamonae juya petsicobetsanaenexa bepejiobiwijawabelia.

Pedro etatsi penaneconitsiwi pejebabiabibota

12 ¹ Bajarapamatacabianëjawa abaxë Bernabé, Saulobeje, ponaponabeje Jerusalén tomarata, nacua-ewetsinë Herodes taxuxuaba bepejiobia-exanaponaewi Jesús pijajiwiyajuwënëwi. ² Orijibia, bajaraponë pijajiwit itoroba espadata pebeyaxuabia-exanaenexa apóstol Santiago, Juan pematapijinëmi. ³ Herodes ita tane judíowi petsitaxanepanaejawatsi Santiago pebeyaxuabijawatsi, nexata icatsia itoroba pijajiwit Pedro pewaetabinexatsi, pebeyaxuabinexatsi picani. Bajarapacuenia Herodes exana fies-tamatacabi, pafiestajawata^j judíowi baxane levadurata matajërëabinejewa pexanaepan. ⁴ Pedro pewaetabicujinaetsi, penaneconitsiwi pejebabiabibota etatsi. Bajarapabota cuatro pabitsaëtobeje wajabitsaëwi Pedro ya-ewetsia-exanatsi. Caebitsaëtowata cuatro ponëbeje tsaponae. Itsabitsaëto ita pitsapa, juya itsabitsaëto ewetabiabatsi. Nexata, picani Herodes najamatabëxaina Pedro penutsinexatsi daxita judíowi pitabarata Pascuafiesta pewerewerecaecujinae, pebeyaxuabia-exanaenexatsi.^k ⁵ Paepatowajëto Pedro eca penaneconitsiwi pejebabiabibota, daxita Jesús pijajiwit pijinia, asaëyata towajëcapona Diosojawabelia.

i 11:26 cristianowi: Cristo peliwaisi pejumexaniataewi, pejaijume. Bajarapacuenia wënërubatsi tsaina, tsipaji bajarapamonae jumaitsi tsabiabi: «Cristo rabaja wajatuxanenë», jai tsabiabi.

Baitsi, César pepopetuxanenë, apojai pacuenia jumaitsi tsabiabi itsamonae César peyanacua-ewetsiwi. **j 12:3 pafiestajawata:** Bajarapafiesta judíowi, Dioso pitorobicueniatsi, ba-exanabiaba sietepamatacabibejenexa. Taema Exo. 12:15. **k 12:4 pebeyaxuabia-exanaenexatsi:** Pedro apoxainae picani caeneconi-ata gobierno pitabarata, xua yabara beyaxuabijitsiatsi. Itsiata, Herodes yapëtae judíowi pitoyajawa Jesús peliwaisi. Nexata, Pedro neconixainaenewi, Herodes beyaxuabijitsiatsi, pebarëyaya-exanaenexa judíowi. Bajarapamonae juya asiwaya petanenexa Herodes peyanacua-ewetsijawatsi.

Dioso capanepa Pedro penaneconitsiwi pejebabiabibowecua

⁶Pamatacabi Herodes jutsijitsia picaní Pedro, penutsinexatsi daxita judíowi pitabarata, pebeyaxuabia-exanaenexatsi, bajarapamerawi, Pedro majitanuca anijanēbeje wajabitsaēnēbeje, petuatuajēta. Bajaraponēbeje Pedro pecobecaxatatsicujinaetsibeje, yamaēcabocatsibeje anijacadenamaē-totabeje. Itsanēbeje pijinia yabaupa-ewetatsi. ⁷Jemata Dioso pija-ángelnē tsitanaitajētatsi Pedro. Nexata, penaneconitsiwi pejebabiabibo ēnētua-tuajēta naitayota. Pedro pemajitanucaenē ángelnē yenejayatabatsi, penaēcot-sinexa. Jumaitsi Pedrojawabelia: «¡Naxatsiayo nonotapunare!», jai ángelnē. Nexata, Pedro pecobecētsicadenamaētotsibeje wecobejoparecatsi baja. ⁸Icatsia, ángelnē jumaitsi Pedrojawabelia: «¡Nijacorrea xaniawaetsia naepa-catarērēre! ¡Nataxuxatare baja nijazapato!», jai. Bajarapacuenia pexanaecu-jinae Pedro, icatsia ángelnē jumaitsi: «¡Naxatare nijacamisajumawelia nena-xatatabiajibawa! ¡Nepēnaponare jane baja!», jai.

⁹Pedro nexata napona ángelnē pepēta. Itsiata, xaniawaetsia aponajamatabē-cueneyapētae pepacuenē ángelnē pebarēponaejawatsi. Saya jamatabējumaitsi: «Amajitsinaenē meta», jamatabējai. ¹⁰Bajaraponēbeje itsiata xenetsiabeje copiaya pewetecaewajabitsaēnē, xuacujinae cotocaewi pewetecaewajabitsaēnē-ata. Bajaraxuacujinae, pepitsapaenexabeje callejawabelia, nucajopabeje jane hierronanitota pexanaebaupaxanetojawata. Nexata, bajarapahierrobaupaxa-neto pijacuata tonabaupatatsibeje. Pitsatabaliabeje jane baja callejawabelia. Nexata, callejawareca penajetarucaejawatabeje, ángelnē jemata ajibi tsajopae.

¹¹Pedro jane baja, xaniawaetsia itsa najamatabēcueneyapētane, jamata-bējumaitsi: «Aeconoxae rajane baja xaniawaetsia yapētaniji Dioso taneto-itorobijawatsica pija-ángelnē, tanecapanepaenexa Herodes pecobewecua. Nexata baja, judíowi aponetae tsane Herodes pijajiwi tanebeyaxuabijawa», jamatabējai.

¹²Pedro bajarapacuenia peyapētaexae, caecuenia pona María pijaboyabelia. Bajarapowa Juan pena, ponē wēnērubatsi itsawēnē, Marcos. Bajarapowa pija-bota ayaibitsaētoxaneto Jesús pijajiwiwajuwēnēwi nacaetuata, Diosojawabelia petowajēcaenexatsi Pedro. ¹³Bajaraponē baupa docodocota, petobaupatsine-xatsi, María pijabo panabopijibaupa. Nexata, bajarapabota penacuenebiwayo, Rodewēnēwa, pitsaparena petaenexa ponē baupa docodocotanunuca. ¹⁴Rode itsa jumeypapētane Pedrocuene, abaxē itsiata apotobaupatsi. Biji rajane, jama-tabēcuenenarēyaya caewēalia cujinaeponalia bo-ēnēabelia, petsipaebinxaxa bajarapabota penacatuatsiwiwawabelia, Pedro baupata penucaejawa.

¹⁵Itsiata, bajarapamonae jume-aebatsi. Jumaitsi:

—¡Camatajemaba raja saya! —jai.

Itsiata, icatsia Rode jumaitsi:

—¡Xaniajanē raja pepacuenē! Pedro raja nucalia baupa pēnēwerena —jai.

Bajarapamonae nexata jumaitsi:

—ApoPedro raeta. Pewetsi-ángelnētsi' raeta —jai.

1 12:15 Pewetsi-ángelnētsi: Bajarapamatacabijawa tsitatsi judíowi caejijiwo canacujitsia xaina ángelnē pewetsinexatsi. Nexata, itsa bajarapa-ángelnē tsitanaitajēta naperabējēpaeya tsitajēta pewetsinētsi peperabētocuenia. Taema Mt 18:10; Heb. 1:14; 13:2.

¹⁶ Pecuaicuajaitsanubenaewawata, Pedro tsiteca baupa docodocotanunua. Nexata jane baja, bajarapamonae matapania tobaupata Pedro pejo-nenexarena. Bajarapamonae itsa tane Pedro, jamatabēcuenenajunawiaca. ¹⁷Nexata, Pedro nacobeyota bajarapamonae pemoyanexa. Bajaraponē tsi-paeba pacuenia Dioso pejamatabēcueneta capanepatsi penaneconitsiwi pejebabiabowecua. Jumaitsi:

—Patsipaebianame mapaliwaisije Santiogjawabelia,^m itsamonae Jesús pijajiwijawabelia-ata —jai.

Bajaraxuacujinae, Pedro pitsapalia. Pona baja itsajawabelia.

¹⁸ Itsa baja matakabi tsina, pawajabitsaēwi Pedro ewetabiabatsi penaneconitsiwi pejebabiabibota, bitso jamatabēcuenebėjai, tsipaji apoyapē-tae itsabelia Pedro pona. ¹⁹Nexata, Herodes itoroba itsamonae wajabitsaē pejaitsinexatsi Pedro. Bajarapamonae apopecaxitajarabixae, nexata Herodes yanijoba pawajabitsaēwijawabelia picani Pedro ewetabiabatsi, peyapētae-nexa pacuenia pitsapa penaneconitsiwi pejebabiabibowecua. Itsiata, bajarapamonae xaniawaetsia apopetsipaebixae, Herodes anaeya itoroba itsamonae wajabitsaē bajarapamonaemi pebeyejebinexatsi, pijaneconijamatabēcuenē. Nexata baja, beyejebatsi. Bajaraxuacujinae, nacua-ewetsinē Herodes wecua-pona Judea nacua, Cesarea tomarabelia, peponaponaenexa bajarajotalia.

Pacuenia nacua-ewetsinē Herodes tēpa, be-ayaijamatabēcuenenē penataexae

²⁰ Nacua-ewetsinē Herodes itsa ponapona Cesarea tomarata, baranaepana bitso Tiro tomarapijiwi, Sidón tomarapijiwijawabelia-ata. Nexata, apocopatsi bajarapatomarabejepijiwi pecomuacaenexa pexaejawa pija-nacuajawaberena. Bajaraxuata, bajarapatomarabejepijiwi siwanajamatabēcueneyanaba, xaniawaetsia pebarēcuaicuajainexa nacua-ewetsinē Herodes-jawabelia, tsipaji jitsipa icatsia petocopatsinexatsi pecomuacaenexa pexaejawa. Pepatsiwajänaeya Herodes pijabota, bajarapamonae muetsia palata rajuta Blastojawabelia, Herodes pijabo peto-ewetsinētsi. Bajarapamonae jitsipa, petocuaicuajainexatsi Herodes-jawabelia, pesiwajamatabēcuenecaewinexatsi pebara-anaepanaejawamitsi. Nexata, Blasto jejai. Tocuaicuajai Herodes-jawabelia, icatsia pebarajamatabēxanepanaenexa bajarapatomarabejepijiwijawabelia. ²¹Nexata, pamatakabi Herodes tocaējēta bajarapatomarabejepijiwi pepatsinexa pijaboyabelia, bajarapamatakabi Herodes naitabētsia naxatata nacua-ewetsinē penaxatatsicuenia. Bajaraponē eca jane baja, nacua-ewetsinē pe-ecaejawata. Bajaraxuacujinae jane baja bajarapatomarabejepijiwi barēcuaicuajai. Nexata, penacactuatsiwi pitabarata pexaniajamatabēcuenenēcuenia naliwaisipaeba. ²²Nexata, penacactuatsiwi wawajaiya Herodes yabara jumaitsi:

—¡Maponēje nacabarēcuaicuajaije, apojiwitonē! ¡Diosonē tsaena! —jai tsaponae Herodes yabara. ²³Bajarapacuenia pejumaisijawa Herodes apocejume-itawetsixae, apopitorobixanua juya Dioso pewēñexaniatsinexa, bajarapaepatota Dioso pija-ángelnē naneconitsia-exanatsi. Tocopatatsi oro pe-ēñewereninexatsi. Nexata, oro pe-ēñewerenijawatsi yatēpa.

m 12:17 Santiago: MapaSantiago je Jesús pejuyapijinē tsaena, tsipaji apóstolnē Santiago-pijinē, Juan pematapijinē, Herodes beyaxuabatsi.

²⁴ Daxita bajarapacuenia Herodes Jesús peliwaishi pejumexaniataewi bejiobia-exanapona-atarena, itsiata apocopabi petsipaebaponaejawa Jesús peliwaishi daxitanacuanējawa. Nexata, Jesús pijajiwi ayaibitsaëtoخانeto tsa-ponae pewajënaeyabelia.

²⁵ Bernabé, Saulobeje palata petocaponaewijawabelia, itsa baja nacuene-weretabeje Jerusalén tomarata, nawiatabeje baja icatsia Antioquia tomarabelia. Barëliabejenua Juan, ponë wënerubatsi itsawënë Marcos.^a

Bernabé, Saulobeje, Jesús pijajiwi Antioquia tomarata itapetatsibeje, Dioso peliwaishi jiwi petsipaebanajetarucaenexabeje daxitanacuanējawa

13 ¹ Antioquia tomarata Jesús pijajiwiawata, itsamonae jinawanapa profetawi, Dioso peliwaishi pecujarubiwi-ata. Mapamonaaje: Bernabé, Simón, (ponë wënerubatsi itsawënë, Negro), Lucio, Cirene tomarapijinë, Saulo, Manaën-ata. Herodes, Galilea nacua pewetsinë, Manaën-beje penajuwitsabinëbeje.

² Bajarapamatabëxëyo,^o itsamatacabi, paepatota nacaetuata^p culto pexanaewajënaeya, pexaejawa apoxaewanapae, pewajëcanubenaenexa Diosojawabelia. Pena-wajëcanubenaejawata Espiritu Santo jumaitsi bajarapamonaejawabelia:

—¡Panetotsare saicaya Bernabé, Saulobeje, xua yabara junatajëbeje tane-tonacuenebinexabeje! —jai Espiritu Santo.

³ Bajarapamona tsitecaeya pexaejawa xaenejewa wajëcapona Diosojawabelia. Bajaraxuacujinae Bernabé, Saulobeje, tsimatanacobeuatsiaya towajë-tatsibeje Diosojawabelia. Nexata jane baja, itorobatsibeje peponaenexabeje daxitanacuanējawa jiwi petsipaebaponaenexabeje Jesús peliwaishi.

Bernabé, Saulobeje, Dioso peliwaishi jiwi tsipaebabeje Chipretunaetoxanetota pe-enaetomaranējawa

⁴ Antioquia tomarata, Bernabé, Saulobeje, Espiritu Santo itorobatsibeje, peponaenexabeje Seleucia tomarabereca, itsajota manuamenepijipanabo boca. Nexata, Seleuciapijipanabota naponabeje Chipretunaetoxanetojawabelia peponaebarcota. ⁵ Bajaraponëbeje itsa paliabeje Salamina tomarata, Chipretunaetojawata pe-ecaetomara, taxuxuaba petsipaebijawabeje Dioso peliwaishi Jesús yabara, judíowi pijasinagogabonējawa.^q Bajaraponëbeje, Juan Marcos^r barëponabeje peyawenonababinexatsi.

⁶ Nexata, bajarapamona Chipretunaetoxanetojawata daxita patomaxi ena pesiwxainaeweretsicujinae, pata-othopa Pafos tomarajawabelia.

n 12:25 Juan Marcos: Juan, ponë wënerubatsi itsawënë Marcos. Itsiata, pacujinae bajaraponë barëliabeje Pablo, Bernabébeje Chiprejawabelia, bajarajota wënerubatsi Juan Marcos. Taema Hch. 13:5. **o 13:2 bajarapamatabëxëyo:** Taema Efe. 4:12. **p 13:2 nacaetuata:** Jiwi caejamatabëcuene apoxainae pajamatabëcuene yabara nacaetuata. Itsamonae canaëjëta pacuenia bajarapamatabëxëyo nacueneba Santa Cena cultota. Itsamonae pijinia canaëjëta pacuenia bajarapamatabëxëyo nacaetuata culto pexanaewajënaeya, asiwaya pewënxaniatsinexa Jesús, pewajëcaenexa Diosojawabelia, peyapëtaenexa pacuenia exanaejitsia Jesús pijajiwiutuajëta. Griegojumeta jumaitsi: «itsa tonacueneba wajatuxanenë Jesús, cultowajënaeya», pejaicuenia. **q 13:5 pijasinagogabonējawa:** Bajarapacuenia judíowi wënerubabiaba penacaetuatsibo, itsajota nacujarubabia Dioso peliwaishi caesábado canacujitsia. **r 13:5 Juan Marcos:** Bajaraponë itsawënë-ata xaina, Marcos. Nexata, mapabaxuto peyaquinaenë, Lucas, itsajawata wënerubatsi, Marcos, itsajawata Juan, itsajawatannua Juan Marcos. Taema Hch. 12:12; 25; 13:13; 15:37-38. Bajaraponë Bernabé pejuyapijinë. Col. 4:10. Juan Marcos peyaquinaenë-ata tsaena Marcos-wënë evangeliobaxuto.

Bajarapatomarata bajarapamonae caxitajaraba judfonē, Barjesús-wēnēnē, jiwi pejorobinē. Nataeya beprofetanēcuenia, jiwi yamaxē-itojorobiaya jumaitsi tsaibiabi: «Xanē raja paebabiabajē Dioso tane-itorobicuenia», jai tsaibiabi. ⁷Barjesús, Sergio Paulobeje, najuaponaponabiababeje. Sergio Paulo Chipretunaetoxaneto pewetsinē. Bajaraponē cajena bitso bepíjia peypā-taenē paliwaisi tsipaebatsi. Nexata, itoroba pijajiwi petojunatsinexatsi Bernabé, Saulobeje, tsipaji bitso jamatabējumetane Dioso peliwaisi. ⁸Itsia baitsi jane, Barjesús, jiwi pejorobinē, (ponē wēnērubatsi griegojumeta Elimas), bajaraponē najamatabēcuene-epatajērērēcaeya-exana Sergio Pauloja wabelia, pejumexaniataeyaniwa Jesús peliwaisi, paliwaisi tsipaebaponabeje Bernabé, Saulobeje. ⁹Nexata, Saulo, ponē wēnērubatsi itsawēnē Pablo,^s tsijamatabēwēnēcatsi Espíritu Santo. Nexata, asaēyata naēcota Barjesús-jawabelia. ¹⁰Nexata, Pablo jumaitsi bajaraponējawabelia:

—¡Xamē cajena jiwi neyamaxē-itojorobinē! ¡Pibisiacuene nexanaenē! ¡Dowathi pijajiwitonēmē! ¡Pexaniacuene pexanaejawa nitoyanē! ¿Detsa xuajitsia apocopatsimē Dioso peliwaisi nebijianaponaejawa, itsamonae pejumexaniataeyaniwa bajarapapexaniajailiwaisi? ¹¹Dioso raja aeconoxae cananeconitsia-exanaena. Nexata, itatsēcēnaename. Apotaemē tsane bajayajebi matabipijicotia. Matapania pepanepaecujinae pamatacabianē Dioso catocaējēta, icatsia xaniawaetsia natsiwajēnaetaename —jai Pablo Barjesús-jawabelia.

Bajarapaepatota, Barjesús itaxutotsēcēnajunua. Nexata, saya naco-benajayabaruta itsanē pecobewaetabinexatsi, pecomacaponanexatsi pijaboyabelia.

¹²Sergio Paulo itsa tane bajarapacuene, nexata jumexaniatane Jesús peliwaisi. Siwajamatabēcuenebarēya bitso itsa jumetane Jesús peliwaisi, Pablo,^t Bernabébeje petsipaebijawatabeje.

Pablo, Bernabébeje, Jesús peliwaisi tsipaebabeje Antioquía tomarapijiwíjawabelia, Pisidia nacuata pe-ecaetomara

¹³Chipretunaetota Jesús peliwaisi petsipabawanapaecujinae, Pablo-bana nanaropoba Pafos tomarata, Panfilia nacuayabelia peponaebarcota. Nexata, pata Perge tomarata, Panfilia nacuata pe-ecaetomara. Bajarajota, Juan Marcos baja itsajamatabēcuene najamatabēxaina. Nexata baja, nawiataca Jerusalén tomarabelia. ¹⁴Nexata, Pablo, Bernabébeje, icatsia nanaropotabeje Perge tomarawerena, peponanexabeje Antioquía tomarabelia, Pisidia nacuata pe-ecaetomara. Bajarapatomarata

s 13:9 Pablo: Hebreojumeta bajaraponē pewēnē Saulo, griegojumeta pijinia Pablo. Caewēnē picani. Hch. 19:13-15, Jesús yapētaeya-exana Ananías pacuenia itapeta Saulo petotsipabinēnēxatsi Jesús peliwaisi apojudíowijawa. Bajaraxuata, wēnērubatsi Pablo «apojudíowi pija-apóstolnē». Hch. 13:13-jawaweliacujinae Pablo taxuxuabijitsia pexanaejawa apojudíowi pija-apóstol-nēcuene, bajaraxuata Lucas canacueneba Pablo pijagriegowēnē. Chipretunaetota Bernabé, Saulobeje bapatabiaba judíowi pijasinagogabonējawa, bajaraxuata, Lucas canacueneba Saulowēnē Pablonea. Orijiibia, Hch. 13:13-jawaweliacujinae Lucas namataxainae wēnējona Pablo itsamonaewecua, tsipaji naexana pepopenamatacaponaenēnexa. t 13:12 Pablo: Espíritu Santo peyawenonaecueniatsi pebijataecujinae Barjesús, Pablo nacopata penamatacaitorobinēnexa bajarapanamutota Bernabéwecua. Bajaraxuata, Pablōwēnē namataxainabiabiana majotacujinae mapaliwaisijawataje.

pepatsicujinaebeje, judfowi penacuera-ewetsimatacabita najunuabeje judfowi pijasinagogabota. Bajarajota, na-ecabeje. ¹⁵ Nexata, daxita baja-rapabota pejonewi, namuxuna-eweta itsanë petsimuxulebijawatsi Dioso penajumecopatsiliwaisi Moisés-pijinëta, itsanë pijinia petsimuxulebijawatsi bajayata Diosojumepaebiwimi, profetawi, peyajuwënëyaquinaeliwaisi-ata. Bajaraxuacujinae, judfowi penacaetuatabiabibo pewetsiwi, pijajiwi-tonë itoroba, pejunatsinexatsibeje. Nexata, bajaraponë jumaitsi Pablo, Bernabébejebawabelia:

—Tajabananëbeje, itsa payapëtanemebeje itsaliwaisiyo panetsipaebinexa-beje, aeconoxae patsipaebianamebeje jiwi piajamatabëcuenesaënexa Dioso-jawabelia —jai bajaraponë Pablo, Bernabébejebawabelia.

¹⁶ Nexata jane baja, Pablo nonotapuna. Nacobeyota jiwi pemoyanexa. Nexata, jumaitsi:

—¡Tajamonae judfowi, paxamë-ata apopajudfowimë, Dioso panejitsi-paewi, panenamuxuna-ewere pacuenia jumaitsinëjitsia! ¹⁷ PaDioso aecconoxae judfowitsi wajaDioso, bajarapaDioso bajayata baja cajena itapetatsi wajasalinaiwimi pijajiwinexa. Nexata, Dioso pejamatabëcueneta pexi ayaibitsaëttoxaneto xainapona. Nexata, bajarapamonae ayaibitsaëttoxaneto tsaponae pamatacabi jinawanapa Egipto nacuata, itsanacuawerena pepatsiwiucuenia. Xuacujinae, Dioso pesaëta matacaponatsi Egipto nacuawecua. ¹⁸ Bajarapamonaemi Dioso pejitsipaecuenia apo-exanabiabi-ata, itsiata Dioso cuarenta pawaiabeje xaniawaetsia ewetatsi petusatonacuata. ¹⁹ Bajaraxuacujinae, Dioso cajena werebiaba Canaán nacuata siete pawiriawibitsaëtomibeje, pamonaë saicayacuenia xaina pena-ewetsicuenë. Nexata, bajarapamonaemi pijanacuami Dioso juya rajuta wajasalinaiwimijawabelia, pecanacopabinexa, bajarapa-irata pejinawanapaenexa. ²⁰ Bajaraxuacujinae, Dioso to-itapetaponatsi itsamonae, juez-monaë" pewetawanapaenexatsi. Cuatrocientos cincuenta pawaiabecujinae, matapania profeta Samuel-pijinë ewetatsi. Bajaraponë pepopcotocae-wijueznë, tsipaji wajasalinaiwimi wajëca Samuel-pijinëjawabelia, peto-itapetsinexatsi pepopeyanacua-ewetsinënexatsi. ²¹ Nexata, bajarapamonae pewajëtsixae, profeta Samuel-pijinëjawabelia Dioso tocapatatsi Saúl-pijinë peyanacua-ewetaponaponaenexatsi cuarenta pawaiabeje. Saúl-pijinë raja Cis-pijinë pexënato, wajasalinainëmi Benjamín-pijinë pemomoxibitsaëtoyajuwënë. ²² Bajaraxuacujinae, Saúl-pijinë Dioso copatsia-exanatsi peyanacua-ewetsijawa. Nexata, juya Dioso to-itapeta David-pijinë, wajasalinaiwimi peyanacua-ewetsinexatsi. Bajaraponë yabara Dioso jumaitsi mapacueniaje: «Isaí pexënato, David, jamatabëcueneyapëtaniji.

u 13:20 juez-monaë: Bajarapamonae judfowiyajuwënëwi. Xaina acueyabi pajamatabëcueneliwaisibeje: pecapanepaenëcuenë, profetanëcuenë, pewetsinë peneconicanaëjëtsinëcuenë. **1)** Pecapanepaenëcuenë najamatabëcuenë-itajëtabiaba pecapanepaejawata israelitawi pijawajabitsaë pecobewecua, jamatejema icatsia pejinawanapaenexa Canaán nacuata. **2)** Profetanëcuenë najamatabëcuenë-itajëta penamatacaponaëjawata israelitawi penajamatabëcuenepënëyorotsinexa asiwaya penawajëcaejawami jumapecataeya pexanaenëanëjawabelia, juya ëDiosojawabelia pesiwanajamatabëcuenecopabinexa, pejumecowënëtsinexanua Dioso penajumecopatsiliwaisi Moisés-pijinëta. **3)** Pewetsinëcuenë najamatabëcuenë-itajëta israelitawi pewetsijawata, pijaneconi petocanaëjëtabiabijawatana, pacuenia juez-monaë exana maparucaje. Bajaraxuata, wënë-rubatsi juez-monaë, apocuenëjëpae-ata daxitacuenëjawalia.

Bajarapitsijamatabēcuenenē jitsipajē.^v Daxita pacuenia jitsipajē, bajaraponē neto-exanaena», jai Dioso David-pijinē yabara.

²³»Xua Dioso najumecapanepaeya jumaitsi wajasalinaiwimijawabelia, pitorobiapaebijawa wajanacacapanepaenēnexa Israel nacuapijiwitsi, bajaraxua nacatocopiapata jane baja itsa naexana Jesús David-pijinē pemo-moyota. ²⁴Jesús petaxuxuabiwajēnaeya jiwi liwaisi petsipaebaponaejawa, copiaya Juan, jiwibautizabinēmi, tsipaebanajetaruca daxita Israel nacua-pijijawawa. Jumaitsi tsanajetaruca: «¡Pacopabare baja daxita pibisiacuene pane-exanabiabijawa! ¡Panajamatabēcuenepēnēyorore Diosojawabelia! Bajaraxuacujinae, pacabautizabianatsi», jai tsanajetaruca Juan-pijinē.

²⁵Bajaraponē abaxē itsa apobeyaxuabitsi, jumaitsi tsaponae jiwijawabelia: «Ponē pacopia-ewetawanapame papecacapanepaenēnexa, xanē raja apobajaronēnē. Xanēcujinae rajane bajaraponē najetarucaena. Nexata, ayaijamatabēcuenenēxa xanēwecua, bepijiawitonēnēcuenia tataxujonotsinexa pijazapato, wecua-auranē»,^w jai tsaponae Juan-pijinē Jesús yabara —jai Pablo judíowijawabelia.

²⁶Icatsia, Pablo jumaitsi sinagogabota penacatuatsiwijawabelia, Jesús jiwi pecapanepaenēnexa yabara:

—Tajamonae Abraham-pijinē papemomoximē, paxamē-ata apopaju-díowimē, Dioso paneyaiyataewi, Dioso raja nacato-itoroba mapaliwaisije wajanacacapanepaeliwasinexa. ²⁷Bajarapaliwaisi Dioso nacato-itorobi-ata, itsiata Jerusalén tomarapijiwi, bajarapatomara pewetsiwi-ata, apoyapē-tae Jesús pecapanepaejawanexatsi. Apojumeyapētaenua pacuenia jumaitsi Jesús yabara, bajayata profetawi peyaquinaebaxutota, paliwaisianē leba-biaba picani caepenacuera-ewetsimatacabianē canacujitsia pijasinagoga-bota. Nexata, bajarapamonae itsa neconita Jesús pebeyaxuabinexatsi, exana pacuenia baja cajena, profetawi, tajēwelía wajunupaeba Jesús pexanaejawanexatsi. ²⁸Bajarapamonae apotocaxitajarabi-ata Jesús itsacueneneconi pexainaejawa, itsiata wajēca nacua-ewetsinē Pilatojawabelia Jesús pebeyaxuabinexatsi.^x ²⁹Nexata jane baja, Jesús itsa beyaxuabatsi, copiapata jane baja daxita pacuenia Jesús yabara tajēwelía jumaitsi Dioso pejumeliwaisibaxutota. Bajaraxuacujinae, Jesús petēpaenē pitsicatsi cruzajawawetsica. Nexata baja, mēthētatsi.^y ³⁰Itsiata baitsi jane, Dioso icatsia asaēya-exanatsi Jesús petēpaecujinae. ³¹Nexata, Jesús piasaēcujinae, tsitanaitajētabiaba nawitsiamatacabianē^z pijajiwijawabelia, pamona-ata yanatatsi pamatacabi pona Galilea nacujawawerena Jerusalén tomaraberena. Bajarapamonae petaewi maparucaeje tsipaebapona jiwijawabelia Jesús peliwaisi.

³²»Nexata, paxanēbeje bajarapapexanaliwaisi, pacatsipaebatsibeje Dioso paliwaisi wajasalinaiwimijawabelia tajēwelía najumecapanepaeya jumaitsi peto-exanaenexa. ³³Dioso tajēwelía najumecapanepaeya pejumaitsicuenia wajasalinaiwimijawabelia, waxaitsi jane baja nacatocopiapata pemo-moxitsi, tsipaji baja Jesús Dioso icatsia asaēya-exanatsi petēpaecujinae,

^v 13:22 Bajarapitsijamatabēcuenenē jitsipajē: Taema 1Sa 13:13-14; 16:12; Sal. 89:20.

^w 13:25 wecua-auranē: Taema Mt 3:11; Mar. 1:7; Lc 3:16; Jn 1:26-27. ^x 13:28 pebeyaxuabinexatsi: Taema Mt 27:22-23; Mc 15:13-14; Lc 23:20-23; Jn 19:15.

^y 13:29 mēthētatsi: Taema Mt 27:57-61; Mc 15:42-47; Lc 23:50-56; Jn 19:38-42. ^z 13:31 nawitsiamatacabianē: 40 pamatacabibejawa. Taema Hch. 1:3.

pacuenia jumaitsi Salmos-baxutota: «Ajena raja, pamatacabi, canutatsi daxitajiwi pitabarata, pecayapëtaenexa xanë taxënatocuenemë»,^a pejai-jawa Salmos-baxutota, Dioso pejumaitsiijawa Jesús-jawabelia. ³⁴Dioso baja cajena tajëwelia yapëtaeya-exana piasaëya-exanaejawanexa Jesús petëpae-jawawecua, apopeerabëtsabanaejawanexanua mëthëabelia. Bajarapacuenia yabara profeta Isaías-pijinë peyaquinaebaxutota jumaitsi mapacueniaje: «Pexaniacuene cato-exanaenatsi, pacuenia baja cajena najumecapanepaeya jumaitsinë David-pijinëjawabelia»,^b jai profeta Isaías-pijinë peyaquinaebaxutota, Dioso pejumaitsiijawa Jesús-jawabelia. ³⁵Bajaraxua yabara, orijibia itsaSalmos-baxutota jumaitsi mapacueniaje: «Tane-itapetsinëmë nijajiwitonënë»^c yayiataeya tacatonacuenebinë nejitsipacuenia, aponecopatsimë tsane mëthëjawata taperabëtsabanaejawa»,^d jai ibajarapabaxutota. ³⁶Yapëtanetsi bajarapaliwaisi apopejumaitsiijawa David-pijinë yabara, tsipaji bajaraponë abaxë itsa asaë tsaponapona, jumecowënëtsiaponapona pacuenia Dioso itorobatsi. Bajaraxuacujinae, David-pijinë tëpa baja. Nexata, mëthëtatsi pamojiwimi pemëthëanëmuxuneneta. Bajaraponë mëthëabelia perabëtsabana baja. ³⁷Itsiaata baitsi jane, Jesús, ponë Dioso icatsia asaëya-exanatsi petëpae-cujinae, bajaraponë apoperabëtsabanae cajena mëthëabelia. ³⁸Tajamonae, bepaya-pëtaneme ponë yabara pacatsipaebatsi. Jesús raja pejamatabëcueneta Dioso baja pacawecua-ajibia-exana pibisiacuene pane-exanaeneconimi. ³⁹Dioso penajumecopatsiliwaisi Moisés-pijinëta pejumecowënëtsijamatabëcuenë, caejiwiyo-ata aneconijibia aponacopatsi Dioso pitabarata. Biji rajane, pajiwi jumexaniatane Jesús peliwaisi, pesiwanajamatabëcuenecopatsinexa bajaraponëjawabelia, bajarapajiwi daxita pibisiacuene pexanaenecon Dioso wecua-ajibia-exanatsi, aneconijibia petanexatsi Jesús pejamatabëcueneta. ⁴⁰¡Xania baja tsane, bijiya panetaeyaniwa patacatsipaebiliwaisi, papecatocopiapatsiyaniwa pacuenia profetanë, peyaquinaebaxutota tajëwelia jumaitsi mapacueniaje!

⁴¹«¡Xania baja tsane! Paxamë taliwaisi panecapocaponaewi, panajunawiacaname raja, tsipaji raja panewecuanaxuabianame. Panejinawanapae-epato mapanacuataje xanë, Diosonë, exanaenajë ayaicuene ta-exanaejawanë. Nexata, ta-exanaejawanë peliwaisi, itsamonae xaniawaetsia pacatsipaebi-ata tsane, itsiata apopajumexaniataemë tsane»,^e jai profetanë, peyaquinaebaxutota Dioso penaneconitsia-exanaejawanexa yabara pamona Dioso peliwaisi apopejumexaniataewi —jai Pablo penacaetuatsijudíowijawabelia sinagogabota.

⁴²Peweretsicujinae penacaetuatsijawa, Pablo, Bernabébeje, pepitsapae-jawatabeje sinagogabowecua, judíowi, apojudíowi-ata, junatatsibeje icatsia itsapenacuera-ewetsimatacabita, petsipaebinxabeje bajarapaliwaisi.

⁴³Nexata, bajarapabowecua penawiabijawata pijabonëjawabelia, Pablo, Bernabébeje, ayaibitsaëto pënaponatsibeje, judíowi, apojudíowi-ata, pamona

a 13:33 Taema Sal. 2:7. **b 13:34** Taema Isa. 55:3. **c 13:35** *Tane-itapetsinëmë nijajiwitonënë-cuenia*: Dioso pejumeliwaisibaxuto perujuliwaisibaxutota, pamona Dioso itapeta itsacuenejawato peto-exanaenexatsi, wënërubatsinua Dioso pijajiwitonë. Nexata, Diosojumepaebiwi, profetawi, tajëwelia itsa wajunupaeba Jesús yabara, wënërubatsi Dioso pijajiwitonë. Taema Isa. 42:1-4; 52:13; 53: 1-12. **d 13:35** Taema Sal. 16:10. **e 13:41** Taema Hab. 1:5.

penacajonewi judíowi pejumecowënëtsicuenejawalia. Nexata, Pablo, Bernabébeje, muxujiobabeje bajarapamonae pewajënaeyabelia ajamatabëcuenesaëya pejumexaniataenexa Dioso itaxutotsoniataeya pewecua-ajibia-exanaejawatsi pibisiacuene pexanaeneconi, Jesucristo pejamatabëcueneta.

⁴⁴ Bajarajane xuacujinae, icatsia judíowi penacuera-ewetsimatacabita, bajarapatomarapijiwi muxunana-caetuatatsibeje ayaibitsaëtoxanetonë, Dioso peliwaishi penamuxuna-ewetsinexatsibeje. ⁴⁵ Nexata, judíowi itsa tane bajara-pajiwi bitsaëtoxanetonë Pablo, Bernabébeje, pemuxunanacaetuatsijawatsibeje, bitso cueneca-ëbatsibeje. Bajarapamonae muxubijiapenet-siaya jumaitsi jiwijawabelia:

—Pacuenia Pablo pacatsipaeba, apoxaniajai cajena —jai tsaponae. Bitso pibisiacuenianua baracuaicuaijaitsi Pablo.

⁴⁶ Itsiata, Pablo, Bernabébeje ajumejunawijibia tsipaebaponabeje Dioso peliwaishi. Jumaitsi beje judíowijawabelia^f mapacueniaje:

—Panetsirucabeje picani copiaya baja patacatsipaebinxabeje Dioso peliwaishi paxamë pajudíowimëjawabelia. Itsiata, apopajitsipaemë bajara-paliwaishi panejumexaniataejawa. Bijiaya patanemenua matababi apopewerewerecaejawa panexainaejawaminexa. Paxanëbeje baja nexata pacawecua-ponaenatsibeje, patatsipaebinxabeje bajarapaliwaishi apojudíowijawabelia, ⁴⁷ tsipaji baja pepoPetuxanenë Dioso bajarapacuenia pane-itorobabeje. Bajaraxua yabara Dioso cajena pejumeliwaisibaxutota tajëwelia jumaitsi mapacueniaje:

«Ca-itorobianatsi nejamatabëcuene-itayotsinexa apojudíowi, natsipaebanajetarucaenexanua tajumeliwaishi daxitanacuanëjawa, nacuatubujawa pejinawanapaewi-ata, bajarapamonae penatojumetaenexa pecapanepaeliwaishinexatsi»,^g jai Dioso pejumeliwaisibaxutota, —jai Pablo judíowijawabelia.

⁴⁸ Apojudíowi itsa jumetane bajarapacuenia Pablo pejumaitsi jawa, bitso jamatabëcuenenarëya. Nexata, Dioso peliwaishi yabara wënëxaniatsiaya jumaitsi: «Dioso cajena peliwaishi pexanaliwaishi bitso», jai. Nexata jane baja, bajarapamonae jumexaniatane Jesús peliwaishi, pamonae baja cajena tajëwelia Dioso itapeta^h matababi apopewerewerecaejawa pexainanexa. ⁴⁹ Nexata jane baja, Jesús peliwaishi pejumexaniataewi pejamatabëcuene, daxita bajarapanacuata pejinawanapaewi jumetane wajatuxanenë Jesús peliwaishi.

⁵⁰ Itsiata baitsi jane, pajudíowi Pablo, Bernabébeje, cuene-itoyatsibeje, muxubijiapenetsiaya barëcuaicuaijai tomara-ewetsiwi jawabelia, petuxanewi pijawajiwijawabelia-ata. Nexata, bajarapamonae anaepana bajaraponëbejewawabelia. Capitsapatsibeje bajarapanacuawecua. ⁵¹ Nexata, Pablo,

f 13:46 *Jumaitsi beje judíowijawabelia*: Bajaraponëbeje exanabeje pacuenia Jesús itoroba pijajiwi pexanaenexa. Taema Mt 10:14. **g 13:47** Taema Isa. 42:6; 49:6. Mapaversículoje canacueneba Lucas Jesús yabara Lc 2:32-jawata, itsiata jota Pablo canacueneba Jesús peliwaishi pepaebiwi yabara. **h 13:48** *Dioso itapeta*: Taema Jn 1:12; 3:14-18; Rom. 8:29-30, orijibia Dan. 12:1; Lc 10:20; Flp. 4:3; Apoc. 13:8; 21:27.

Bernabébeje, bajarapatomarata nataxu-atsapërëwarëbabeje, ⁱ bajarapatomarpijiwi peyapëtaenexa penaneconitsijawa Diosojawabelia, apojumexaniataexae Dioso peliwaishi. Bajaraxuacujinae, bajaraponëbeje Iconio tomarabelia baja ponabeje. ⁵² Itsiata, daxita Jesús pijacuene penacujarubiwi, Antioquia tomarata pejinawanapaewi, jamatabëcuenebarëya. Espiritu Santo pejamatabëcuenewënëcawanapaexae, exanabiaba pacuenia bajaraPonë itorobatsi.

**Pablo, Bernabébeje, tsipaebabeje Jesús peliwi
Iconio tomarapijiwajawabelia**

14 ¹ Iconio tomarata pepatsicujinaebeje, Pablo, Bernabébeje, judíowi pijasinagogabota/ najoneyabeje. Bajarajota, xaniawaetsia petsipae-bixaebaje Jesús peliwaishi, jiwbitsaëtoخانeto judíowi, apojudíowi-ata, jume-xaniatane Jesús peliwaishi. ² Itsiata bailsi jane, pajudíowi apojumexaniatae bajarapaliwaishi, anaeya-exana apojudíowijawabelia pejumexaniataeyaniwa Jesús peliwaishi. Orijibia, itoroba pebara-anaepanaenexa Pablo, Bernabébejajawabelia. ³ Bajarapacuenia to-exanae-atatsibeje, itsiata bajayajebi ponaponabeje bajarajota. Nexata, bajaraponëbeje aítatsacaeya tsipaebabiababeje Jesús peliwaishi ajumejunawijibia, tsipaji itaxutuajamatejemabeje Diosojawabelia pewetsinexatsibeje. Yapëtaeya-exanaponabejenua bajarapamonae Dioso pitaxutotsoniataejawatsi. Bajaraponëbeje pepaebiliwaishi Jesús yabara, bajarapatomarapijiwi peyapëtaenexa pexaniajaicuene, Dioso pesaëta caëjëpaeya-exanatsibeje pinijicuenejawanë petsita-exanaponaenexabeje.

⁴ Itsiata, bajarapatomarapijiwi natsanaeya jinawanapa bajaraponëbeje pepaebiliwaishi. Nexata, itsamonae jitsipa pejumexaniataenexa judíowi petsipaebiliwaishi, itsamonae pijinia apóstol-nëbeje petsipaebiliwaishi.

⁵ Belia, bajarapatomarapijiwi, judíowi, apojudíowi-ata, tomara pewetsiwi-ata, pejume-aebiwi Jesús peliwaishi, bara-anaepanatsibeje. Bajaraxuata, najumejaita petsimaxëpatsinexatsibeje, ibotonëta petseconaecuenia pebeyaxuabinexatsibeje. ⁶ Nexata, Pablo, Bernabébeje, itsa nayajumetanebeje pacuenia exanaejitsiatsibeje, najetabijirawabeje Listra tomara, Derbe tomarabejajawabelia-ata, Licaonia nacuata pe-ecæetomarabeje. Nexata, bajarapatomarabeje pepënëya pe-enaetomaraxijawa-ata najetaru-cabeje. ⁷ Daxita bajaraxuayo tsipaebanajetarucabeje pexanialiwaishi, Jesús peliwaishi.

i 13:51 nataxu-atsapërëwarëbabeje: Taema Mt 10:14; Mc 6:11; Lc 9:5; 10:11. Orijibia, Eze.

33:7-9-jawata Dioso jumatsi: «Xamë yabara catsipaebatsi mapacueniaje: Xanë canutatsi israelitawi neyajiwiitenucaenënexa piyauicunewecua. Pacujinae jumetaneme paliwaishi jitsipajë tanetopaebine-xamë, caecuenia betsipaebame bajarapamonaejawabelia. 8) Itsa ca-itorobatsi tanetotsipaebine-xamë pibisiacuene pexanaejijawabelia mapacueniaje: 'Xamë raja tēpaename pibisiacuene nexanapona-ponaexae,' itsa janë, bajarapajiwi pepacuene tēpaena pijaneconijamatabëcuene. Itsiata, xamë itsa apoyapëtaeya-exanaemë tsane bajarapajiwiawabelia, penajamatabëcuenepeñëyorotsinexa pibisiacuene pexanaejawawecua, nexata xamë netonaneconitsianame, bajarapajiwi pijaneconi itsa yajawa-tēpaena. 9) Biji rajane, xamë yapëtaeya-exanae-atamë penacuenexanetsinexa, itsiata itsa aponacuenexanetsi bajarapajiwi, nexata xamë aponetonaneconitsimë tsane, pijaneconi yajawatēpae-ata», jai Dioso. Bajaraxuata, apóstolewi nataxu-atsapërëwarëba, peyajawananeconitsiyaniwa bajarapajudíowi Diosojawabelia. **j 14:1** pijasinagogabota: Bajarapacuenia judíowi wënërúbabiaba penacætuatsibo, itsajota nacujarubabia Dioso peliwaishi caesábado canacujitsia.

Pablo ibotonëta tseconatsi Listra tomarata

⁸Listra tomarata ponapona petaxucuenabinëtsi, ponë apopecuenecaë-jëpaenëtsi peponaponaejawa penaexanaejawaweliacujinae. ⁹Bajaraponë najumetaeyeca Pablo petsipaebiliwaisi. Nexata, Pablo naitaxutobabatsiaya naëcota bajaraponëjawabelia. Jamatabëcueneyapëtane pesiwanajamatabëcuenecopatsijawa Diosojawabelia petaxuxanepanaeya-exanaenexatsi.

¹⁰Nexata, Pablo pinijijumeta jumaitsi petaxucuenabinëtsijawabelia:

—¡Nonotapunare! ¡Ponaponare baja! —jai.

Nexata bajaraponë jirewapuna. Ponapona baja.

¹¹Jiwibitsaëtoxanetonë itsa tane Pablo petaxuxanepanaeya-exanaejawa petaxucuenabinëmitsi, nexata bajarapamonae Licaoniajumeta, pinijijumeta jumaitsi mapacueniaje:

—¡Diosonëbeje cajena! Bewaxaitsi jiwitonëbejecuenia patsica waxaitsijawabetsica —jai bajarapamonae. Itsiata, bajaraponëbeje apojumeyapëtaebeje.

¹²Bajarapanacuapijiwi xaina jumapecataeya pexanaenëbeje, Zeus, Hermes-beje. Nexata, Bernabé tanetsi beZeus-wënëdiononë, Pablo pijinia beHermes-wënëdiononë,^k tsipaji Pablo peliwaisinamataxainanë pepaebanajetarucawata. ¹³Zeus-wënëdiononë pijatemplobo eca Listratomara pejonebaupa canacujitsialia. Nexata, bajaraponëbeje, bediosonëbeje petaxaatsibeje, Zeus pijatemplobota penacuenebabiabisacerdotenë capata torobeje templobo pejonebaupajawaberena. Bajarapatorobeje mataboco-itabëtsiaya tsmataruba pematono. Nexata, sacerdotenë, Listra tomarapijiwi yajawa, tobexyauabijitsiatsibeje picani bajarapatorobeje, bajarapawi petotajuit-sinexatsibeje bajaraponëbeje pewënëta. ¹⁴Nexata, Bernabé, Pablobeje, matapania itsa jumetanebeje^l bajarapacuenepeto-exanaejawanexatsibeje, apotsitaxanepanaetsibeje. Penaxatatsijawabeje mipatitinaxuabarecabeje, penajamatabëcuene-itajëtsinexabeje bitso penawecua-itoyajawa bajaraxua. Cujinaejinaliabeje jiwibitsaëtoxanetonë penacaetuanajawabelia pitawetsinexabeje. Nexata, bajarapamonaeatuajëta, Pablo, pinijijumeta jumaitsi:

¹⁵—¿Detsa xuajitsia bajarapacuenepaneto-exanaejitsiamë? Paxanëbeje-ata raja saya pajiwitonenëbeje. Pacuenia paxamë pajamatabëcuene-itsimë, bajarasaya paxanëbeje-ata patajamatabëcuene-itsinëbeje. Bajaraxua yabara papatajopajëbeje patacatsipaebinxabeje pexanialiwaitsi, paxamë panenawecucopabinexa papiamatamobicuene pa-exanawanapame, juya panesinawamatabëcuenecopabinexa pepoDiosojawabelia, Ponë peyamatacabiat-sitecaenë. Bajaraponë raja exana mapanacuapijicueni, itaboxopijicueni, manuamenepijicueni-ata. ¹⁶Bajayatami, wajawajënaeya, Dioso copatsi-ata daxitanacuapijiwi pejinawanapaenexa, jinawanapa pijacuata penatojit-sipaecuenia. ¹⁷Bajarapacuenia jinawanapae-ata, itsiata Dioso apocopatsi

k 14:12 *Hermes*: Bajarapanacuapijiwi canaëjëtabiaba Hermes pecaponabiabinë liwaisixi jiwijawabelia itsajumapecataeya pexanaenëanëjawawerena. **l 14:14** *jumetanebeje*: Pablo, Bernabé-beje, apojumetae Licaoniajume, nexata apoyapëtae xua yabara jumaitsitsibeje pewawajaijawata. Baitsi, Licaonia nacuapijiwi najumetae-ata griegojume, itsiata nacaemonaejawata cuaicuajai tsabiabi pijanacuapijiwi pecuacuajaijumeta, pacuenia waxaitsi jiwitsi. Yapëtae-atatsi wowajume, cuaicuajaiitsi tsabiabi jiwijumeta wajatomarapijiwijawata.

bajarapamonae nayapëtaeya-exanaenejewa peponaponaejawa pepoDiosonëcuene. Biji rajane, pexaniacuene peto-exanabiabijawata,^m nayapëtaeya-exanabiaba peponaponaenëcuene bajarapamonaejawabelia. Nexata, bajaraPonë tocopatabiaba ema perunaenexa, pe-ubijawanë petonaxaniabinexatsi, penacuitabinexanua pijamatacabianëjawa, bajarapacuenia daxitajiwi pexaejawa pexainaenexa, jamatabëcuenebarëyaya pejinawanapaenexa, bajaraPonë pejamatabëcueneta —jai Pablo pamonaejawabelia picani torobitsaëto tobejitsiatsibeje.

¹⁸ Bajarapacuenia Pablo jumaitsi-ata picani bajarapamonaejawabelia, itsiata ajamatabëcuenesaë petotajuitsinexatsibeje dajubi, ofrendacuenia perajutsinexatsibeje. Bajaraponëbeje pijinia, itsiata nayajiwi-ajumesaëbeje bajarapacuenia petotajuitsiyaniwatsibeje. Nexata, bajarapamonae belia baja copaba.

¹⁹ Nexata, itsamatacabijawabelia, itsamonae judíowi, parena Listra tomaraberena, peponaewi Antioquíaⁿ tomarawerena, Iconio tomarawerena-ata. Nexata, bajarapamonae najumetsënëtsiaya neconitatsibeje Pablo, Bernabébeje, Listra tomarapijiwijawabelia. Nexata, ayaibitsaëto Listra tomarapijiwi bara-anaepana bajaraponëbejejawabelia. Bajaraxuata, Pablo tseconatsi ibotonëta. Bajaraponë jopajunua irabelia bepetëpaenë. Bajaraxuacujinae, tomarapënyabelia robobocaliatsi, tsipaji baja bepetëpaenë^o taeyabuatsi. ²⁰ Itsiata baitsi jane, Jesús pijacuene penacujarubiwi Listra tomarata pejinawanapaewi, pexuababuatsinëtsi matatoyorotsia petaenubenaejawata, bajaraponë nototabapuna icatsia. Caewëarena jonena Listra tomaraberena. Merawia pitsijawata Pablo, Bernabébeje, ponabeje baja Derbe tomarabelia.

²¹ Nexata, Derbe tomarata nacopatabeje caematacabibeje, petsipaebaponaponaenexabeje pexanaliwaisi, Jesús peliwaisi. Bajarajota, jiwibitsaëttoxaneto pejumexaniataexae bajarapaliwaisi, cujarubabeje Jesús pijacuene. Bajaraxuacujinae, icatsia nawiatanajetarucabeje Listra tomarajawa, Iconio tomarajawa, Antioquía tomarajawa-ata. ²² Bajarapatomaranëjawa Jesús pijacuene penacujarubiwijawabelia ajamatabëcuenesaëya-exanaponabeje. Muxujiobaponabejenua pewajënaeyabelia ajamatabëcuenesaëya pecatsitecawanapaenexa Jesucristojawabelia pitaxutuajamatejemajawa, itsamonae bejiobia-exanae-atatsi. Nexata jumaitsi tsaponaebeje:

—Wajapatsiwajënaeya Dioso pijanacuayabetsia, dowathi pejamatabëcueneta, pinijicuenia jiwi mapanacuataje nacabejiobia-exanaponaena —jaibeje tsaponae bajarapamonaejawabelia.

²³ Pablo, Bernabébeje, Jesús pijajiwi barënacaetuatabeje, pexaejawa xaenejewa pebarënawajëcaenexabeje Diosojawabelia. Bajaraxuacujinae, caetomara canacujitsia to-itapetaponabeje ancianowí, Jesús pijajiwi pewetsinexa. Nexata, peponaewajënaeyabeje, penapëjiobijawata, towajëtaaponabeje Diosojawabelia, peyawenonaenexatsi pamonaewajatuxanenë Jesús-jawabelia siwanajamatabëcuenecopaba pecapanepaenexatsi.

m 14:17 *pexaniacuene peto-exanabiabijawata*: Taema Hch. 17:22-31; Rom. 1:19-32.

n 14:19 *Antioquía*: Pa-Antioquía tomara eca Pisidia nacuata. Bajarapatomara eca 190 pakilómetrobeje Listra tomarawecua. Taema Hch 13:13-14. **o 14:19** *bepetëpaenë*: Taema 2Co 11:24-25; 2Ti 3:11.

**Pablo, Bernabébeje, nawiatabeje Antioquía
tomarabelia, Siria nacuata pe-ecaetomara**

²⁴ Pablo, Bernabébeje, Pisidia nacua pexenetsicujinaeabeje, patabeje Panfilia nacuayabelia. ²⁵ Nexata, Perge tomarata, Jesús peliwaisi jiwi tsipaebabeje. Bajaraxuacujinae, icatsia patabeje Atalia tomarata, manuamene-itapata pe-ecaetomara. ²⁶ Nexata, Atalia tomarata naropotabeje menia barcota. Nawiataponaliabeje jane baja Antioquía tomarabelia, Siria nacuata pe-ecaetomara, itsawerena bajaraponébeje naropotabeje Jesús peliwaisi pepaebanajetarucaenexabeje. Jesús pijajiwi, Antioquía tomarata pejinawanapaewi, penaropotsiwajënaeyabeje, tsmatanacobeuatatsibeje Dioso peyawenonaponanexatsibeje jiwi petsipaebanajetarucaejawatabeje Jesús peliwaisi. Pablo, Bernabébeje, petoweretsixaabeje daxita pacuenia Dioso itorobatsibeje, nawiatanajetarucabeje icatsia. ²⁷ Itsa baja Antioquía tomarata patabeje, junatabeje penacaetuatsinexa daxita Jesús pijajiwi, petsipaebinexabeje pijanamuto yabara. Nexata, tsipaebabeje daxita pacuenia Dioso yawenonaponatsibeje. Nawajunupaebabegenua pacuenia Dioso tocopatatsibeje apojudíowi-jawa petsipaebanajetarucaenexabeje Jesús peliwaisi, bajarapamonae-ata pejumexaniataenexa bajarapaliwaisi. ²⁸ Nexata, Pablo, Bernabébeje, Antioquía tomarata bajayajebi naponaponabeje Jesús peliwaisi pejumexaniataewijawata.

**Apóstolewi, ancianowi yajawa, nacaetuata Jerusalén
tomarata, pexanebinexa pena-itoyaliwaisi yabara
judíowi, apojudíowi-ata, Jesús pijajiwituatujëta**

15 ¹ Pamatacabi Pablo, Bernabébeje, ponaponabeje Antioquía tomarata, itsamonae judíowi, pejumexaniataewi Jesús peliwaisi, pata-othopa Judea nacuawerena. Nexata, bajarapamonae cujaruba penabo-upiperabëcaucubicuene apojudíowijawabelia, Jesús peliwaisi pejumexaniataewi. Pacuenia pajudíowinë Dioso penajumecopatsiliwaisi Moisés-pijinëta panetonajumecopata pata-exanawanapaenexa, itsa bajarapacuenia apopa-exanaemë tsi-pae, nexata Dioso apopacacapanepae tsipae,^p pejailiwaissicuenia cujarubapona.

² Bajarapacuenia pecujarubaponaexae, nexata Pablo, Bernabébeje, pinijicuenia namata-enetsia barënajumenotabeje pajudíowi pata Judea nacuawerena. Itsiata, caejamatabëcuene aponajuaxainae bajarapaliwaisi yabara. Nexata, Jesús pijajiwi Antioquía tomarata, Pablo, Bernabébeje, itapetatsibeje, pitorobinexatsibeje Jerusalén tomarabelia,

p 15:1 *Dioso apopacacapanepae tsipae:* Judíowi canaëjëtabiaba jiwi saya pesiwanajamatabëcuenecopatsijawa Jesucristojawabelia amatamobi Dioso pecapanepaejawanexa pijaneconiweucia. Yajawanamatawenona penabo-upiperabëcaucubijawa, judíowi pijafiestamatacabianë betaeyabiaba, sábadomatacabianë beyaiyatanenua penacuenebiyaniwa. Apobe-exanae-ata itsacuenejawa xua yabara Dioso bepenaxuirabiwicuenia taejitsia. Baitsi bajarapamonae mataropotsiayapaebabiaba Dioso pejumecopatsiliwaisi Moisés-pijinëta Jesús peliwaisijawabelia. Taema Gál. 2:4,14; 5:2-3; Efe. 2:5-8.

peyanijobinexabeje penabo-upiperabëcaucubicuene yabara apóstolewijawabelia, ancianowijawabelia-ata.⁴

³Nexata, bajarapacuenia pitorobixaetsi Jesús pijajiwi, Pablobana itsa pona, najetarubena Fenicia nacuaajawa, Samaria nacuaajawa-ata. Bajaruayo Jesús pijajiwijawabelia wajunupaebapona pacuenia apojudíowi-ata siwanajamatabëcuenecopaba Jesucristojawabelia. Nexata, daxita bajarapamonae bitso jamatabëcuenebarëya, itsa jumetane bajarapaliwaisi.

⁴Pablobana itsa pata Jerusalén tomarabelia, Jesús pijajiwi, apóstolewi, ancianowinua, xaniawaetsia copiapitatsi. Nexata, Pablo, Bernabébeje, bajarapamonaejawabelia tsipaebabeje daxita Dioso peyawenonaponaejawatsibeje, pamatacabi Jesús peliwaishi jiwi tsipaebanajetarucabeje. ⁵Itsiata, Jesús pijajiwituatuajëta na-ena itsamonae fariseowi, Jesús peliwaishi pejumexania-taewi. Nexata, bajarapamonae nonobapuna. Jumaitsi mapacueniaje:

—Daxita, Jesús peliwaishi pejumexaniaetaewi, pamonae apojudíowi, namatawenona pebo-upiperabëcaucubineatsi, pejumecowënëtsinexanua Dioso penajumecopatsiliwaisi Moisés-pijinëta —jai fariseowi penacaetuatsiwijawabelia.

⁶Nexata, Pablo, Bernabébeje, saicaya barënacaetuatabeje apóstolewi, ancianowi yajawa, xaniawaetsia penajuaxanebinexa apojudíowi penabo-upiperabëcaucubijawa yabara. ⁷Bajayajebi baja namata-enetsia penabarëcuaicuaijajicujinae, caejamatabëcuene caxinaenejewaw, nexata Pedro nonotapuna. Jumaitsi:

—Tajamonae, payapëtaneme pacuenia baja cajena bajayayo xanë, paxamëyajuwënënenë, Dioso nitapeta apojudíowijawabelia tatsipaebinexa⁷ pexanialiwaishi, Jesús peliwaishi. Nexata, xanë tatsipaebinexa, bajarapamonae-ata jumexaniatane Jesús peliwaishi. ⁸Dioso, Ponë daxitajiwi pejamatabëcueneyapëtaenë, rajuta Espiritu Santo bajarapamonae, pejumexaniaetaexae Jesús peliwaishi, pacuenia waxaitsi, judíowitsi, Dioso nacarajuta. Bajarapacuenia Dioso pexanaexae, yapëtanetsi apojudíowi-ata petocopiapatsijawatsi pijajiwineja. ⁹Dioso najëpaeya nacatane judíowitsi, apojudíowi-ata, tsipaji najëpaeya wajanaca-asiwaxae pibisiacuene waja-exanaeoneconimi Dioso nacawecua-ajibia-exana, Jesús peliwaishi wajajumexaniaetaejawata. ¹⁰Bajarapacuenia Dioso najëpaeya wajanacataexae, ¿Detsa xuajitsia pajitsipame aitothia pane-exanaejawa Dioso pexanaejawawecua? Dioso itsa aneconijibia tane apojudíowi, jumecowënëtsinejewaw Dioso penajumecopatsiliwaisi Moisés-pijinëta, ¿detsa xuajitsia nexata pajaitame pane-itorobijawa pejumecowënëtsinexa paliwaishi waxaitsi, wamojiwimi-ata, apojumecowënëtsicapanepae? ¹¹Bajarapaliwaisi jumecowënëtsinejewatsi, biji rajane jumexaniatantsi wajatuxanenë Jesús wajanacapanepaejawanexa pibisiacuene waja-exanaeoneconiwecua, wajanaca-itaxutotsoniataejamatabëcueneta.⁸

q 15:2 *apóstolewijawabelia, ancianowijawabelia-ata*: Bajarapamatacabijawa, jinawanapa bajarapamonae Jesús pijajiwituatuajëta pewetsiwi, pepopeyaiyataewitsinua, Jerusalén tomarata. Bajarapamonae yayiatanetsi, tsipaji daxita apóstolewi yajawajinawanapa Jesús, peponaponae-matacabi mapanacuataje. r 15:7 *apojudíowijawabelia tatsipaebinexa*: Taema Hch. 10:1-43.

s 15:11 *wajanaca-itaxutotsoniataejamatabëcueneta*: Jesucristo mapanacuapijiwi pitaxutotsoniataexae, bajaraPonë siwatëpa cruzata, petomatamotsinexa pijaneconí. Nexata, amoneya nacapanepa pibisiacuene waja-exanaeoneconiwecua, naca-itorobinejewaw wajananeconimatamotsinexa wajajumecowënëtanawapaejawata Dioso penajumecopatsiliwaisi Moisés-pijinëta.

Bajarapacuenia apojudíowi-ata to-exanatsi pitaxutotsoniataexaetsi —jai Pedro itsamonaе apóstolewíjawabelia, ancianowíjawabelia-ata.

¹² Bajarapacuenia Pedro penajumeweretsicujinae, daxita bajarajota penacae-tuatsiwi moya ena. Xaniawaetsia namuxuna-ewetenanua Bernabé, Pablobeje, penawajunupaebíjawabeje papinijicuenejawané Dioso exana bajaraponébeje-jawata apojudíotuatujéta, itsa tsipaebanajetarucabeje Jesús peliwaishi. Daxita bajarapamonaе moya ena petsipaebíjawatabeje daxita apóstolewíjawabelia, ancianowíjawabelia-ata. ¹³ Bajaraponébeje itsa najumeweretabeje petsipaebíja-wabeje, nexata Santiago jumaitsi apóstolewíjawabelia, ancianowíjawabelia-ata:

—¡Tajamonaе, panenamuxuna-ewere! ¹⁴ Simón Pedro raja nacatsipaeba pacuenia apojudíowi-ata matapania jane baja Dioso itapeta pijajíwinexa, Jesucristo pejamatabécueneta. ¹⁵ Xua nacatsipaeba Pedro, liwaisijépa pacue-nia bajayata baja cajena tajéwelia profetawí, peyaquinaeliwaishita wajunu-paeba, apojudíowi yabara mapacueniaje:

¹⁶ «Dioso jumaitsi: 'Daxita bajarapacuenia pecopiapatsicujinae,' David-pijiné pijamonaе peyanacua-ewetsicuenemi petobijianaecujinaetsi, bexéa itsamatacabíjawabelia tocopatsianajé icatsia pemomoxiyajuwénén^u peyanacua-ewetsinexa pijanacuapijiiwi. Bajarapacuenia xanebianajé David-pijiné peyanacua-ewetsicuenemi, tsipaji bajayajebi ajibi tsarucae pewetsiné, pacuenia pepopiabejebota ajibi jiwi. ¹⁷ Bajarapacuenia exanaenajé, jamatejema daxitanacuanépijiiwi, apojudíowi-ata, xanéjawaberena penawajécaenexa. Nejaitsiana tatonacopatsinexa pijatuxanenénexané,' ¹⁸ jai bajayata Dioso, Poné tajéwelia peyapétaeya-exanaené, bajarapacueni yabara»,^v jai Santiago apóstolewíjawabelia, ancianowíjawabelia-ata.

¹⁹ Icatsia, Santiago jumaitsi:

—Bajarapacuenia Dioso bajayata pejumaitsixae, xané jamatabé-itsiné mapa-cueniaje. Aponacatoxanepanae wajajamatabé-itonotsijawa tsane matawéjéa apojudíowi, pamonaе baja Diosojawabelia wecuanajamatabécuenepénéyoroba pijasalinailiwaishi pejumecowénétsijawami, juya pejumexaniataenexa Jesús peliwaishi. ²⁰ Itsiata, saya toyaquinaenatsi caeliwaishiyobeje Dioso penajumeco-patsiliwaishi Moisés-pijinéta, wajayapétaeya-exanaenexa pacuenia exanawana-paejitsia, bajarapamonaе pexaeyaniwa dajubi pewi, ofrendacuenia perajutsiya-juwénéjawa jumapecataeya pexanaenéanéjawabelia, pamonaе penacojiobiwi, apopenacojiobiwi-ata, pibisiacueni pexanaeyaniwa pewitota,^w pexaeyaniwa

t 15:16 *bajarapacuenia pecopiapatsicujinae*: Babilonia nacuapijiiwi pijawajabaisá pebijianaecuenia Jerusalén tomara. Taema 2Re 25:1-7. **u 15:16** *David-pijiné pemomoxiyajuwénén*: Bajaraxua Cristo yabara. Nexata, Cristo canacopatsiana peyanacua-ewetsinénexa Israel nacuapijiiwi, daxitanacuapijiiwi yajawa. Orijiibia, pacuenia David-pijiné capata Dioso pijatabernáculobo Jerusalén tomarajawabelia, jamatejema israelitawí penawajécaenexa Diosojawabelia bajarapatabernáculobojawatatalia, bajarapijinia pacuenia Jesús pejamatabécueneta daxitanacuanépijiiwi siwanajamatabécuenecopabiana Diosojawabelia. **v 15:18** Taema Amós 9:11-12; Isa. 45:21. **w 15:20** *pibisiacueni pexanaeyaniwa pewitota*: Bajarapajume «fornicación», itsa jume, «inmoralidad», wowaijumeta. Mapajamatabécueni xainaje: Itaweta apopenacojiobiwi pibisiacueni pewitota pexanaeyaniwa itsajiwíjawabelia, penacojiobiwi pibisiacueni pewitota pexanaeyaniwa panapitsijiwibewecua, pewénapebi, itsa jume, pewénapetiriwa pibisiacueni pewitota pexanaeyaniwa, penaweretisijiwi pibisiacueni pewitota pexanaeyaniwa pejewaxijiwiyojawabelia, pibisiacueni pewitota pexanaeyaniwanua dajubijawabelia, unupijinéjawabelia-ata.

cuaibocuetsacaeya pebeyaxuabinē pewi, pexaeyaniwanua peja-ata. ²¹ Dioso bajarapaliwaisi penajumecopatsicujinae Moisés-pijinēta, wajasalinaliwimi baja cajena cujarubanajetarubena bajarapacuenē yabara, caetomara canacujitsia, penacuera-ewetsimatacabinē canacujitsia sinagogabonējawa —jai Santiago apóstolew jawabelia, ancianow jawabelia-ata.

²² Nexata, bajarapacuenia Santiago pejumaitsicujinae, daxita apóstolewi, ancianowi, daxita Jesús pijajiwi-ata Jerusalén tomarata, najamatabē-jēpa pena-itapetsinexa bajarapamonaeyajuwēnēwi pitorobinexa Antioquía tomarabelia Pablo, Bernabébeje pepēta. Nexata, bajarapamonaetuatuajēta naitapeta penamatacaitorobinēbeje, pitorobinexa Silas, Judas-beje.^x Judas wēnērübatsi itsawēnē, Barsabás. Bajaraponēbeje itorobatsibeje Antioquía tomarabelia, Pablo, Bernabébeje, pepēta. ²³ Nexata, paliwaisi toyaquina Jesús pijajiw jawabelia, jumaitsi mapacueniaje: «Patajamonaemē Cristo peja-matabēcueneta, paxanē pa-apóstolewinē, wajamonaē ancianowi-ata, paca-jamatabēnajinaliatsi daxita apopajudíowimē, panejinawanapaewi Antioquía tomarata, Siria nacuata, Cilicia nacuata-ata. ²⁴ Pawēnēliwaisitaniji maweliaje peponaewi, paxanēyajuwēnēwi, papecasiwaxainaewilia. Bajarapamonaē pina pacanajamatabēcuenē-eatajērērēcaeya-exanapona, papecacujarubiliwaisianēta. Bajarapamonaē pina pacajumaitsi: ‘Panamatawenoname paxamē-ata papecabo-upiperabēcaucubinexa, panejumecowēnētsinexanua Dioso penajumecopatsiliwaisi Moisés-pijinēta,’ papecajaijawa. Pamonaē pacajumaitsi bajarapacuenia, paxanē cajena apopa-itorobinē paxamējawabelia. ²⁵ Nexata, paxanē patanacaetuatsijawata, panajamatabēcuenējēpajē pata-itapetsinexa anijanēbeje, pata-itorobinexa paxamējawabelia, pecaponaenexabeje patacatoyaquinaeliwaisi. Nexata, Judas, Silas-beje, pa-itorobaliājē Bernabé, Pablobeje, pepēta. ²⁶ Wajabananēbeje, Bernabé, Pablobeje, bitso waxaitsi asiwatsi. Bajaraponēbeje wajatuxanenē Jesucristo pejumeliwaisi yabara itsamonaē jamatabēbeyaxuababiabi-atatsibeje, itsiata ajamatabēcuenesaēbeje tsaponaponaē. ²⁷ Nexata, bajaraponēbeje pepēta pacato-itorobatsi Judas, Silas-beje, xaniawaetsia papecatsipaebinexa pacuene yabara paca-toyaquinatsi. ²⁸ Itsa panacaetuatajē, Espíritu Santo paneyawenona, xania-waetsia patayapētaenexa, pataca-itorobiyaníwa panejumecowēnētsinexa piayapēbejeliwaisi, paliwaisi daxita pajudíowinē pajumecowēnētajē. Paca-itorobatsi saya paliwaisi bitso panamatawenoname panejumecowēnētsinexa ²⁹ ¡Nexata, pētsa paxaneme jumapecataeya pexanaenēanējawabelia ofrendacuenia perajutsiyajuwēnēwijawanē, pejajawanē, cuaibocuetsanaeya pebeyaxuabinē pewijawanē-ata! ¡Pētsa pibisiacuenē panewitota pa-exaname paxamē apopanacojiobiwi! ¡Paxamē-ata pijinia panenacojiobiwi-ata pētsa pibisiacuenē panawecua-exaname panewitota itsajiw jawabelia! Itsa bajarapa-itawetsiliwaisi pajumecowēnētame, nexata xaniawaetsia pajinawanapenāname. Bajasaya paliwaisiyo pacatoyaquinatsi», jai apóstolewi, ancianowi-ata, apojudíow jawabelia petoyaquinaebaxutota.

³⁰ Nexata jane baja, bajarapabaxuto petocaponaenexabeje, Judas, Silas-beje, naponabeje Pablo, Bernabébeje, pepēta. Bajarapamonaē itsa pata

x 15:22 *Judas-beje*: Judas itsawēnē Barsabás. Mapanamuto pexanaecujinaeje, icatsia Dioso peliwaisi aponacayapētaeya-exanaē itsaliwaisi pematatsēnēa Barsabás yabara.

Antioquía tomarabelia, junata daxita Jesús pijajiwi penacaetuatsinexa. Penacaetuatsijawata rajutabeje bajarapabaxuto. ³¹ Nexata, Jesús pijajiwi Antioquía tomarata, pelebicujinae bajarapabaxuto, bitso jamatabëcuenebarëya, tsipaji baja wecua-ajibia-exanatsi pebëjaiya-exanaeliwaisitsi judíowi, apojudíowi-ata. ³² Judas, Silas-beje Diosojumepabinëxabeje, nexata ayailiwaisi tsipaebabeje Jesús pijajiwijawabelia, pejamatabëcuenebarëyaya-exanaenexabeje, pejamatabëcuene-asaëya-exanaenexabenua pitaxutuajamatejemajawa Diosojawabelia, bajarapamonae pejamatabëcueneceawixae pejamatabëcuenebëjaijawami. ³³ Bajayajebi baja Antioquía tomarata Judas, Silas-beje, penaponaponaecujinaeabeje, Jesús pijajiwijawabelia xaniawaetsia napëjiobabeje, penawiatsinexabeje picani pitorobiwitsijawabelia. ³⁴ Itsiata, Silas itsajamatabëcuene xaina, penacopatsinexa abaxë bajarajota.

³⁵ Pablo, Bernabébeje-ata, nacopatabeje Antioquía tomarata itsamonae yajawa, ayaibitsaëto. Cujarubaponabeje wajatuxanenë Jesús peliwaisi.

**Pablo icatsia pona cotocaewi namuto, jiwi
petsipaebanajetarucaenexa Jesús peliwaisi**

³⁶ Antioquía tomarata Pablo, Bernabébeje, bajayajebi penajuaponaeponecujinaeabeje, Pablo jumaitsi Bernabéjawabelia:

—Ponaenatsibeje icatsia wajataenexabeje Jesús pijajiwi, daxita patomaranëjawa, itsaxuayo baja imata tsipaebanajetarucatsibeje Jesús peliwaisi, wajataenajetarucaenexabeje pacuenia jinawanapa bajarapamonae —jai Pablo.

³⁷ Bernabé jejai. Nexata, bitso jitsipa icatsia pebarëponaenexabeje Juan Marcos. ³⁸ Itsiata bailsi jane, Pablo apojitsipae baja icatsia Juan Marcos pebarëponaenexabeje, tsipaji copiaya panamuto itsa barëponabeje, bajaraponë epatua nawiataca Panfilia nacuata. Nexata, xaniawaetsia apoyaweno-naeyaweretsi Jesús peliwaisi jiwi petsipaebaponaejawa. ³⁹ Nexata, Pablo, Bernabébeje, aponajamatabëcuenejëpabeje Juan Marcos pebarëponaenexabeje. Nexata, bajaraxua yabara Pablo, Bernabébeje, nawecuanatsatabeje, saicaya nacujawabelia peponaenexabeje. Bernabé jane baja nexata, Juan Marcos barëpona velapanata peponaebarcota, Chipretunaeto nacuyabelia. ⁴⁰ Nexata pijinia, Pablo itapeta Silas peyanatsinexatsi. Jesús pijajiwi Antioquía tomarata towajëtatsibeje Diosojawabelia, peyawenonaponaenexatsibeje penajetarucaejawatabeje. ⁴¹ Nexata, bajaraponëbeje Siria nacujawa, Cilicia nacujawa-ata, caebitsaëto canacujitsia jamatabëcuene-asaëya-exanaponabeje Jesús pijajiwi, pewajënaeyabelia pitaxutuajamatejemanexa Dios.

Timoteo nanaropota Listra tomarata, Pablo, Silas-beje, pepëta

16 ¹ Petsipaebanajetarucaecujinaeabeje Siria, Cilicia nacujawabeje, Pablo, Silas-beje, ponabeje, Derbe tomarabelia, pesiwaxainanexabeje Jesús peliwaisi pejumexaniataewi. Xuacujinae, ponabeje Lистра tomarajawabelia. Bajarapatomarata caxitajarababeje Jesús pijacuene penacujarubinë, Timoteo. Bajaraponë pena judíowa, Jesús peliwaisi pejumexaniataewa. Paxa pijinia griegonë. ² Daxita Jesús peliwaisi pejumexaniataewi, Lистра tomara, Iconio tomarapijiwibeje, Timoteo pexaniacuenia

baracuaicuaijai tsabiabitsi, xaniawaetsia peponaponaejawa yabara Dioso pejitsipaecuenia.

³ Pablo jitsipa Timoteo pebarëponaejawa, Jesús peliwaishi petsipaeba-najetarucaejawata. Nexata, pebarëponaewajënaeya, judíowi pijacuenia bo-upiperabëcaucutsia-exana, pebara-anaepanaeyaniwatsi pewënaju-díowi, tsipaji daxita bajarapanacuapijiwi yapëtane Timoteo apopebo-upiperabëcaucutsijawatsi, paxapijinë griegonëxae.

⁴ Patomaranëjawa najetarubena Pablobana,⁷ caetomarajawa canacujit-sia tsipaebapona Jesús peliwaishi pejumexaniataewijawabelia, yapëtaeya-exanapona paliwaishi toyaquinatsi apóstolewi, ancianowi-ata Jerusalén tomarawerena, peyapëtaeya-exanaenexa pacuenia exanaejitsia judíowi pena-ewetsicuene yabara. ⁵ Bajaraxuata, daxita Jesús pijajiwi, caebitsaëto canacujitsia, bitso ajamatabëcuenesaë tsaponae Diosojawabelia. Caemata-cabi canacujitsianua Jesús peliwaishi ayaibitsaëto jumexaniataepona.

Pablo bemajitsinaebota tane Macedonia nacuapijinë

⁶ Bajaraxuacujinae, Pablobana canaëjëta picani peponaenexa Asia nacua-yabelia, petsipaebinexa Jesús peliwaishi. Itsiata, Espíritu Santo apotocopat-sitsi bajarabelia peponaejawa. Bajaraxuata, bajarapamonaë juya pona Frigia nacujawabelia, Galacia nacujawabelia-ata. ⁷ Bajaraxuacujinae, Pablobana najetarubena Misia nacuamuxubërëa. Jamatabëpata picani Bitinia nacua-jawa. Itsiata baitsi jane, Espíritu Santo apotocopatsitsi pepatsinexa bajara-panacuajawa. ⁸ Nexata, Misia nacua rowia xanetabuatapona Troas tomara-wëpajawabelia. ⁹ Nexata, Troas tomarata, merawi Pablo bemajitsinaebota taenuta Macedonia nacuapijinë. Bajaraponë asaëyata junatatsi Pablo:

«¡Naxatsia! Macedonia nacuyaberena ponaename, pataneyawenonaene-xamë», jai.

¹⁰ Pablo bemajitsinaebota petaenutsicujinae Macedonia nacuapijinë, bepi-jia paxaniawaetajë² patajajawaxi, patanicabinexalia Macedonia nacuyabe-lia, tsipaji caejamatabëcuene paxainajë Dioso pepacuene patane-itorobijawa Macedonia nacuapijiwijawabelia, patatsipaebinexa pexanialiwaishi, Jesús peliwaishi.

Pablo, Silas-beje, tsipaebabeje Jesús peliwaishi Filipos tomarapijiwijawabelia

¹¹ Troas tomarata panaropobajë, barcota patanaponaenexa Macedonia nacujawabelia. Rowialia panayanicabaliajë patapatsinexa Samotraciatu-naeto nacuyabelia. Merawia pitsijawata bajarajotawecua paponajë, pata-napatsinexa Neápolis tomarabelia, Macedonia nacuata pe-ecaetomara.

¹² Bajarajotacujinae, matatsënëa paponajë Filipos tomarabelia, patomara ayaitomaraxaneto daxitawecua Macedonia nacuata. Bajarapatomarata naji-nawanapa ayaibitsaëto xaneto Romano nacuwawerena pepatsiwi. Nexata,

y 16:4 *Pablobana*: Jumaitsi Pablo, Silas, Timoteo-ata yabara. z 16:10 *paxaniawaetajë*: Hechos-baxuto peyaquinaenë Lucas, naponaejitsia Pablobana Macedonia nacujawabelia. Bajaraxuata, copata Pablobana pexanaecuenia yabara. Biji rajane, taxuxuaba pacanacuenebijawa, «paxanë paxaniawaetajë», tsipaji Lucas naponaejitsia bajarapamonaë yajawa.

bajarapatomarata panajinawanapajë caematacabimaxëto. ¹³ Nexata, sábadomatacabi^a papitsapajë tomarapëñëyabelia, pataponaenexa mene-itapajawabelia, patajaitsinexa itsajota nacaetuatabiaba^b judíowi, pewajë-cabiabinexa Diosojawabelia. Pataeyejebajë petiriawi penacaetuatsijawa mene-itapata, penawajëcaenexa Diosojawabelia. Pana-enajë bajarapamonaewata, Jesús peliwaishi patatsipaebinxexa bajarapapetiriawijawabelia. ¹⁴ Bajarapapetiriawijawuwëñëwa pewëñë Lidia, Tiatira tomarapijiwa. Bajarapowa penamatamotsipapaëbërë, perajejaijawa, pecanajetabiabiwa. Dioso pejisipaecuene pexanaponaponaewa. Bajarapowa xaniawaetsia namuxunaeweteca Pablo petsipaebiliwaishi. Nexata, Dioso jamatabëcueneyawenonatsi, pejumexaniataenexa bajarapaliwaishi. ¹⁵ Bajarapowa pabautizabajë, daxita pijabopijiwi yajawa. Patabautizabicujinae, bajarapowa ajumesaëya panejunata:

—Itsa paxamë panetaneme pepacuene Jesús peliwaishi tajumexaniataewa-cuene, nexata tajabota abaxë panajinawanapaenexa —panejai bajarapowa.

Bitso bajarapowa asaëyata panejunata patanajinawanapaenexa pijabota. Nexata, panaponajë bajarapowa pijaboyabelia, pijabota patanajinawanapaenexa.

¹⁶ Itsa matacabi paponajë icatsia mene-itapayabelia, itsajota judíowi nacaetuatabiaba penawajëcabiabinexa Diosojawabelia. Namutua patanajetarubenaewata, panemata-enena petiriwa, dowathi peyajawaponaponaewa. Bajarapowa amoneya petonacuenebabiabiwa itsamonae. Nexata, bajarapowa xua copiapatsijitsia, pewajënaeya yapëtaeya-exanabiaba dowathi peyapëtaeya-exanaecueniatsi. Ayaijawa palata pitabiaba petsipaebabiabijamatabëcuene. Bajarapowa pejumata pijatuxanewi bajarapapalata wecuapitabiabatsi. ¹⁷ Bajarapowa caematacabi canacujitsia paxanë, Pablo-ata panepënanajetarucabiaba. Pinijijumeta wawajai tsanajetarucabiabi paxanë yabara mapacueniaje:

—Mapapebijiwi, pepo-Ayaijamatabëcuenenë Dioso pijajiwi. Pacatsipae-bapona papecacapanepaeliwaishinexa pibisiacuene pane-exanaeneconiwecua —jai tsanajetarucabiabi paxanë yabara.

¹⁸ Bajarapacuenia patajinawanapaematacabianë pejumaitssabiabixae, Pablo bitso apotsitaxanepanaetsi. Belia, bajarapowajawabelia napëñëyoro-taxuaba. Anaeya dowathijawabelia jumaitsi:

—Dowathi, ca-itawetatsi Jesucristo pewëñëta. ¡Wecuapitsapare baja mapowaje! —jai Pablo.

Bajarapacuenia Pablo pejumaitssijawata, dowathi baja petiriwa wecuapitsapatsi. ¹⁹ Nexata, bajarapowa pijatuxanewi itsa yapëthane baja petocopiarucaejawatsi bajarapowa pejumata palata ayaijawa penotabiabijawa, bajarapamonae waetabatsibeje Pablo, Silas-beje. Robobocaponaliatsibeje tomaratuatujëabelia, pecaponaenexatsibeje tomara pewetsiwijawabelia. ²⁰ Nexata, nutatsibeje juez-monae pitabarata, pijaneconi jane baja

a 16:13 *sábadomatacabi*: Judíowi Sábado matacabi nacuera-ewetabiaba, pitorobicueniatsi Dioso penajumecopatsiliwaishi Moisés-pijinëta. Nexata, penacuera-ewetsimatacabi itsa jai sábadomatacabi yabara jumaitsi. Bajarapajumebeje caejawa yabara jumaitsi penacuera-ewetsijawa yabara. b 16:13 *itsajota nacaetuatabiaba*: Filipos tomarata ajibi tsaena sinagababo, judíowi penacaetuatabibinxexa.

petocanaējēbinexatsibeje. Bajarapamonae najumetsēnētsiaya jumaitsi juez-monaejawabelia:

—Mapajudfōnēbeje, anaepanaeya-exanaponaponabeje, wajatomarapijiwi.

²¹ Orijibia, tsipaebaponabeje wajanacuapijiwi pejumecowēnētsinexa pali-waisi waxaitsi Romano nacuapijiwitsi aponacatocopatsi wajajumecowēnētsinexa —jai najumetsēnētsiaya Pablo, Silas-beje yabara.

²² Bajarapanajumetsēnētsiliwaisi pejumetaexae, jiwi ayaibitsaētoخانeto, bajarajota pejumetaenubenaewi, bara-anaepanatsibeje Pablo, Silas-beje. Nexata, juez-monae itoroba wajabitsaē pewejumajonotsinexatsibeje penaxatatsijawa, ayaicuenia pejumaconitsinexatsibeje naebota. ²³ Pejumacōnitsicujinaetsibeje, juez-monae icatsia itoroba wajabitsaē penaneconitsiwi pejebabiabibota pe-etsinexatsibeje. Bajarapamonae itoroba penaneconitsiwi pejebabiabibota pewetsinējawabelia, xaniawaetsia pewetsinexatsibeje bajarapabo-ēnētuaatujēta, pepitsapaeyaniwabeje. ²⁴ Bajarapacuenia pitorobixaetsi, pewetsinē xaniawaetsia pewetsinexa, Pablo, Silas-beje etatsibeje pēnēyatu-ucubijawanē pecopiarucaejawatareca. Orijibia, sixataliatsibeje cepowēnējawata, naitabarataeya pewojorutsitablapabejetusatalia.

²⁵ Nexata, merawituatujēta bajaraponēbeje Diosojawabelia nawajēquecabeje. Naxēanecabegenua Diosojumewajianē. Itsamonae pijinia penanecōnitenaeui bajarapabota, jumetanetsibeje penaxēanecaejawabeje. ²⁶ Bajarapacuenia pexanaejawatabeje, jemata ira najēabapeneta pinijicuenia. Penaneconitsiwi pejebabiabibota, daxitabo, nanequebeca. Caecuenia daxita bajarapabopijibaupanē pijacuata nabaupana. Daxita penaneconitsiwi pacadenamaētonēta cobecēbejebatsi,^c wecobe-othopatsinua. ²⁷ Penaneconitsiwi pejebabiabibota pewetsinē naēcotapuna pemajitecaenēmi. Nexata, itsa tane daxita baupanē penabaupanaejawa, nawemarajonotaxuabina pija-espada, penabeyaxuabinexa picani. «Daxita meta baja rēcēpeca penaneconitsiwi», pejamatabējaixae.

²⁸ Nexata, bajarajota itacarajeta Pablo pinijijumeta jumaitsi tsaxuabi:

—¡Pētsa nabeyaxuabame! Daxita raja patananeconitsiwi panubenajē —jai Pablo.

²⁹ Nexata, penaneconitsiwi pejebabiabibota pewetsinē itoroba pijajiwitonē petocarenanexatsi pitayotabiabijawa. Petocarenacujinaetsi, cujinaereca bo-ēnēabereca, itsabereca Pablobana nubena. Bajaraponē pematabacabēta nucajunua Pablo, Silas-beje, pitabarata. Bitso neconecojai tsanucac pecajunawi. ³⁰ Bajaraxuacujinae, bajaraponē barēpitsapaliatsibeje Pablo, Silas-beje. Nexata, bajaraponē jumaitsi:

—¿Detsa xua exanaenajē Dioso tanecapanepaenexa, pibisiacuene ta-exanaejamatabēcuenē Dioso tanenaneconitsia-exanaejawanexawecua? —jai bajaraponē.

³¹ Nexata bajaraponēbeje jumaitsiibeje:

—¡Siwanajamatabēcuenecopare pepopetuxanenē Jesucristojawabelia! Bajarapacuenia itsa exanaename, Dioso cacapanepaena nijaneconiwecua

c 16:26 *pacadenamaētonēta cobecēbejebatsi*: Griegojumeta najumetane «daxita pecēbijawanē», mapacadenamaētonē yabara. Nexata, ēcadenamaētonē apowecua-othopaetsi. Cepojawanē-ata wecusarapajunujunuatsi penaneconitenaeui.

pecananeconitsia-exanaejawaminexa. Bajarapijinia pacuenia, capanepae-natsinua nijabopijiwi, itsa siwanajamatabëcuenecopabiana Jesucristojawabelia —jaibeje.

³² Nexata, Pablo, Silas-beje, tsipaebabeje bajaraponëjawabelia Jesús peli-waisi, daxita pijabopijiwijawabelia-ata. ³³ Bajarapamerawi-epatota penaneconitsiwi pejebabiabibo pewetsinë, Pablo, Silas-beje, jumawajënëquia-tatsibeje. Bajaraxuacujinae, Pablo, Silas-beje, bautizababeje bajaraponë, pijabopijiwi yajawa. ³⁴ Nexata, bajaraponë pijaboyabelia barëliatsibeje. Pexaejawa rajutatsibeje. Bajaraponë, pijabopijiwi yajawa, pinijicuenia jama-tabëcuenenabarëya, pesiwanajamatabëcuenecopatsixae Jesucristojawabelia.

³⁵ Nexata, merawia pitsijawata, bajayacunua, juez-monae itorobalia waja-bitsaë penaneconitsiwi pejebabiabibo pewetsinëjawabelia pejumaitsinexa: —Capitsapaename pina baja Pablo, Silas-beje —pejainexa.

³⁶ Nexata, bajaraponë jumaitsi Pablojawabelia:

—Juez-monae rabaja netonajume-itorobarena patacacapitsapaenexabeje. jPaponarebeje baja xaniawaetsia! —jai.

³⁷ Itsiata baitsi jane, Pablo jumaitsi juez-monae pitorobiwajabitsaëwijawabelia:

—Juez-monae naneconita pijatuxanewijawabelia, paxanëbejejawaberena-ata, tsipaji abaxë copiata xaniawaetsia yapëtaenejewa paneconi paxaina-jëbeje, paxanëbeje paRomanonacuapijinë-atanëbeje,⁴ itoroba paxamëya-juwënëwi patanejumaconibabenexabeje, daxita tomarapijiwi pitabarata. Bajaraxuacujinae, pane-etabeje mapabotaje. Nexata, aeconoxae saya paxamë paca-itorobarena pepëya patanecapitsapaenexamëbeje. Bajarapacuenecajena apoxanepanae pexanaejawa. Bajarapamonae ponaerena pijacuata patanecapitsapaenexabeje —jai Pablo juez-monae pitorobiwajabitsaëwijawabelia.

³⁸ Nexata, wajabitsaë tsipaeba juez-monaejawabelia pacuenia Pablo jumaitsi. Nexata, bajarapamonae itsa jumetane Pablo, Silas-beje, Romano nacuapijinëbejecuene, bitso jamatabëcuenenajunawiaca. ³⁹ Nexata, parena bajarapamonae. Jumaitsi bajaraponëbejejawabelia:

—Pauranë paxamëbejejawabelia, wajabitsaë patacatsi-itorobixae papeca-conitsinexabeje, papeca-etsinexabejenua penaneconitsiwi pejebabiabibota —jai juez-monae.

Nexata, bajarapamonae pijacuata capitsapatsibeje Pablo, Silas-beje, penaneconitsiwi pejebabiabibowecua. Barajamatabëcuenexanepanaeya itorobatsibeje peponaenexabeje baja tomarawecua. ⁴⁰ Pecapitsapaecujinaetsibeje, ponabeje baja Lidia pijaboyabelia. Bajarapowa pijabota, itsa tanebeje Jesús peli-waisi pejumexaniataewi, muxujiobabeje pijamatabëcuenesaënexa Diosjawabelia. Bajaraxuacujinae, ponabeje baja bajarapatomarawecua.

d 16:37 *paRomanonacuapijinë-atanëbeje*: Romano nacuapijiwi peyanacua-ewetsixae ayai-bitsaëtonacuanë pijanacuacuenia, nexata pamonae tomara pewetsiwi tsicarucatsi bitso peyaiyataejawa pepoRomano nacuapijiwi itsamonawecua. Pamonae Romano nacuapijiwi cuenecaëjëpatsi penaneconitsia-exanaenexatsi matapania itsaneconi yapëtane, petocanaë-jëbicujinaetsi juez-monae. Itsiata, pewetsiwi itsa naneconitsia-exanaejitsipa, neconicanaë-jëtsinejewa, nexata Romano nacuapijiwi cuenecaëjëpatsi juya peyapëtaeya-exanaenexa pepopeyanacua-ewetsiwi jawabelia bajarapapewetsiwi apopeyaiyataejawa Romano nacuapiji-wiyajuwënëjiwi. Nexata, pepopeyanacua-ewetsiwi naneconitsia-exanaejitsia bajarapamonae apopeyaiyataejamatabëcuenecua.

**Pablo, Silas-beje Tesalónica tomarata, judíowi
jaitatsibeje, pewaetabinexatsibeje**

17 ¹Filipos tomara pewecuaponaecujinaebeje, Pablo, Silas-beje, naje-tarucabeje Anfípolis tomarajawa, Apolonia tomarajawa-ata. Bajaraxuacujinae, patabeje Tesalónica tomarata, itsajota judíowi xaina pijasinagogabo. ²Nexata, bajaraponēbeje Tesalónica tomarata naponaponabeje acueyabi pasemanabeje. ³Pablo peponabiabinēxae sinagogabojawabelia, napēna pona, acueyabi pasábadobeje. Nexata, bajarapabota barēnajume-nota penacaetuatabiabiwijawabelia, pacuenia Dioso pejumeliwaisibaxutota jumaitsi Jesús yabara. ⁴Pablo jumaitsi tsabiabi bajarapamonaejawabelia:

—Dioso baja cajena pejumeliwaisibaxutota tajēwelia wajunupaebatsi Mesías, pacuenia tēpaejitsia, namatacotsijitsia-ata. Paxanēbeje Jesús yabara itsa pacatsipaebatsibeje, bajaraPonē raja Mesías, ponē Dioso itorobiapaeba jiwi pecapanepaenexa —jai tsabiabi Pablo judíowijawabelia, penacaetuatsiwi sinagogabota.

⁵Itsamonae, judíowiyajuwēnēwi, jumexaniatane Pablo petsipaebabiabiliwaisi. Bajarapamonae nexata naexana Jesús peliwaisi pepēnaponaewi. Nexata, daxita bajarapamonae nacaetuatabiaba Pablo, Silas-bejejawata. Bajarapijinia pacuenia, ayaibitsaēto griegowi, Dioso pejitsipaewi, ayabitsaēto petiriawi-ata, petuxanewi pijawajiwi peyaiyataewitsi, jumexaniatanenua Pablo petsipaebiliwaisi. Nexata, daxita bajarapamonae nacaetuatabiaba Pablo, Silas-bejejawata. ⁶Itsia, judíowi, pamonae pejume-aebiwi Jesús peliwaisi, Pablo cueneca-ēbatsi, tsipaji Pablojawabelia jiwi ayaibitsaēto jonepona. Nexata, bajarapajudíowi natsicueya junata jiwi ayaibitsaēto xaneto pibisijamatabēcuenewi, pejitsipaewi saya jema pejinawanapaewi tomarapijicallejawa, pebarēnajamatabēcuenejēpaenexa. Nexata, judíowi penatsicueyajunatsiwi itoroba Tesalónica tomarapijiwi pebara-anaepaenexa Jesús peliwaisi pejumexaniataewijawabelia, Pablo, Silas-bejejawabelia-ata. Bajaraxuata, jemata tsimaxēpatatsibeje Jasón pjabota, itsajota bajaraponēbeje naponaponabeje, pewaetabinexatsibeje picani, penutsinexatsibeje tomara pewetsiwi pitabarata. ⁷Itsia, apopecaxitajarabixaetsibeje, bajarapamonae anaeya waetabatsi Jasón, itsamonae Jesús peliwaisi pejumexaniataewi yajawa. Robobocaponaliatsi Jasón-bana tomara pewetsiwijawabelia. Nexata, najumetsēnētsiaya pinijijumeta jumaitsi Pablo, Silas-beje yabara pewetsiwijawabelia:

—Pablo raja, Silas-beje daxitanacuanējawa pejinawanapaewi liwaisi petsi-exanaenēbeje. Nexata jane baja, aeconoxae wajatomarajawaberena-ata patabeje, bajarapacuenia liwaisi wajanacatsi-exanaenexa. ⁸Maraponē, Jasónje, copiapita bajaraponēbeje pijabota penaponaponaenexabeje. Daxita pamonae Jasón yajawanuca, Pablo-bana-ata, apojumecowēnētsi cajena Romano nacua pepopewetsinē pitorobiliwaisi, tsipaji jumaitsi tsabiabi: «Romano nacua pepopewetsinē rabaja aponacayanacua-ewetsi. Itsanē

e 17:1 pijasinagogabo: Bajarapacuenia judíowi wēnērubabiaba penacaetuatsibo, itsajota nacujarubabia Dioso peliwaisi caesábado canacujitsia. **f 17:2 pasábadobeje:** Taema Hechos 16:13, notajawata.

rabaja nacayanacua-eweta. Bajaraponë pewënë Jesús», jai tsabiabi daxita bajarapamonae —jai najumetsënëtsiaya tomara pewetsiwijawabelia pamonae anaepana.

⁸Nexata, bajarapacuenia pejumaitsijawa itsa jumetane, daxitajiwi, tomara pewetsiwinua, bitso jamatabëcueneliwaisi nawita. ⁹Nexata, tomara pewetsiwi wajëca⁸ palata Jasón, Jesús peliwaisi pejumexaniataewijawabelia-ata pijaneconi yabara. Nexata jane baja, Jasón-bana copabatsi penawiabinexa pijabonëjawabelia.

Pablo, Silas-beje, tsipaebabeje Jesús peliwaisi Berea tomarapijiwijawabelia

¹⁰Tomara pewetsiwi Jasón-bana pecopabicujinaetsi, bajarapamerawi Jesús peliwaisi pejumexaniataewi, bepíjia itorobatsi Pablo, Silas-beje, pepo-naenexabeje Berea tomarabelia. Pepatsicujinaeliabeje Berea tomarata, najunuabeje judíowi pijasinagogabojawabelia. ¹¹Berea tomarata pejinawanapaejudíowi pexaniajamatabëcuenewi Tesalónica tomarata pejinawanapaejudíowiwehua. Nexata, Berea tomarapijiwi apojamatabëcuenëjæpae Tesalónica tomarapijiwi pitoyajawa Jesús peliwaisi. Biji rajane, tsimuxuxanepanatsi paliwaisi Pablo tsipaebabiaba caematacabi canacujitsia judíowi penacatuatabiabibota. Orijibia, Pablo itsa copata petsipaebabiabijawa, bajarapamonae pijacuata Dioso pejumeliwaisibaxutota xaniawaetsia nacujarubabiaba, peyapëtaenexa pexaniajaijawa Pablo petsipaebabiabiliwaisi.

¹²Nexata, Berea tomarata pejinawanapae, ayaibitsaëto judíowi, griegowi, pebijiwi, petiriawi-ata, petuxanewi pijawajiwi, peyaiyataewanëtsi, jumexaniatane Pablo petsipaebabiabiliwaisi.

¹³Itsamatacabijawabelia, pajudíowi jinawanapa Tesalónica tomarata, itsa wënëliwaisitanetsi Pablo petsipaebabiabijawa Dioso peliwaisi Jesús yabara Berea tomarata, bajarapajudíowi ponalia Berea tomarabelia. Nexata, bajarapajudíowi muxubijiapeneta Berea tomarapijiwi, ayaibitsaëto pebara-anaepanaenexa Pablojawabelia. ¹⁴Bajaraxuata, pamonae pejumexania-taewi Jesús peliwaisi Berea tomarata, Pablo bepíjia itorobatsi peponaenexa manumene-itapata pe-ecaetomarabelia. Itsiata, Silas, Timoteobeje, abaxë nacopatabeje Berea tomarata. ¹⁵Pamonae Pablo yanataponaliatsi, barcomota pënxuabatsi Atenas tomarabelia. Nexata, Atenas tomarawerena penawiabiwi, bajarapamonaeta Pablo tonajumexuaba Silas, Timoteobeje, bepíjia perenanexabeje, pecaxitajarabinexatsibeje Atenas tomarata.

**Pablo tsipaeba Jesús peliwaisi Atenas
tomarapijiwijawabelia, Areópagotsutojumata**

¹⁶Pablo Atenas tomarata pewajënae-ewetaponaponaejawata Silas, Timoteobeje, pepatsijawanexabeje, bajaraponë bitso bejamatabëjiobi tsanajetsireca, tsipaji tane pecobeta jumapecataeya pexanaenëanë piapaxoyajawa. Tanenua Atenas tomarapijiwi pematabacabëta penubenaebiabijawa, asiwaya

g 17:9 *palatamatamo wajëca*: Bajarapamatamo pewënë «fianza», wowaijumeta. Pewënëananecónitsinë bajarapalata barajuta juez-monaejawabelia, pejumecowënëtsijawabelia pacuenia jueznë tocajëjtatsi pexanaenexa. Nexata, itsa exanaejitsia pitorobicueniatsi, jueznë tocanawiatsijitsiatsi bajarapapalata.

penawajęcabiabinexa bajarapajumapecataenëanëjawabelia. ¹⁷Bajaraxuata, judfowi penacatuatabiabiabota Pablo barënajumenotabiaba Jesucristo peli-waisi yabara pewënajudfowijawabelia, itsamonaë apojudfowijawabelia-ata, Dioso pejitsipaewi. Caematacabi canacujitsia barënajumenotabiabianua pamo-naë Pablo caxibajarabatsi jiwi pepatabiabitaxunaëjawata tomaratuatujëta. ¹⁸Nexata bajarajota, Pablo caxibajaraba pebijijiwi liwaisiyapëtaewi, epicúreo-monaë peliwaishi^h pebaraponaewi, itsapebijijiwi-ata estoicos-monaë peliwaishiⁱ pebaraponaewi. Bajarapamonaë-ata Pablo barënajumenota. Nexata, pebarëna-jumenotsijawata, bajarapamonaeyajuwënëwi Pablo yabara muetsia najumaitsi:

—Maponëje namatatsapatsia pecuaicuaijainë ¿detsa meta pitsiliwaishi yabara cuacuaijai? —najai Pablo yabara.

Itsamonaë pijinia Pablo yabara najumaitsi:

—Itsanacuapijiwi racowë pijadiosowi peliwaishipaëbinë —najai bajarapamonaë.

Bajarapacuenia najumaitsi, tsipaji Pablo tsipaëbapona pexanialiwaishi, Jesús peliwaishi. Tsipaëbaponanua petëpaewimi icatsia itsamatacabi piasaë-jawanexa petëpaecujinaë. ¹⁹Nexata, bajarapamonaë Pablo barëponaliatsi Areópagotsutojawabelia, itsajota tomara pewetsiwi nacaetuatabiaba pena-barëcuacuaijainexa, jiwi pijaliwaishi petocanaëjëbinexanua. Itsa baja palia bajarabelia, bajarapamonaë jumaitsi bajaraponëjawabelia:

—¡Panetsipaëbare xaniawaetsia patayapëtaenexa papejanaliwaishi tsipaë-baponaë, ²⁰tsipaji panetsimuxu-aitothia abaxë bajarapaliwaishi! Nexata, pajitsipajë patayapëtaenexa pajamatabëcueneliwaishi xaina paliwaishi tsipaë-baponaë —jai Atenas tomarapijiwi Pablojawabelia.

²¹Bajarapacuenia jumaitsi, tsipaji Atenas tomarapijiwi, itsanacuawerena pepatsiwinua, bajarapatomarata penajinawanapaenexa, daxita bajarapamonaë jamatabëcuene-enabiabatsi pejanaliwaishi pejumetaeyabiabinexa, petsi-paëbabiabinexanua bajaraxua yabara itsamonaëjawabelia.

²²Nexata, Pablo nonotapuna bajarapamonaëtuatujëta, Areópagotsutoja-wata. Jumaitsi:

—Atenas tomarata panejinawanapaëjiwi, pacatanetsi rabaja panijadio-sowi bitso papecajamatabëcuene-enabiabijawa. ²³Tapitsapabiabijawata

h 17:18 *epicúreomonaë peliwaishi*: Pacuenia wajasalinaiwimi canaëjëta Cuwai, Matsuludane, Nacuanë, Furunamineli apopesiwabëjjaijawa jiwi pexanawanapaecuenë yabara. Bajarapijinia pacuenia epicúreoliwaishi pebaraponaewi canaëjëta pijadiosowi apopesiwabëjjaijawa jiwi pexanawanapaecuenë yabara. Baitsi, apotonajumecopatsitsi liwaishi, peyapëtaeya-exanaenexa pacuenia xaniawaetsia jinawanapaëjitsia bajaraponë pitabarata. Bajaraxuata, epicúreoliwaishi pebaraponaewi aposiwabëjai pibisiacuene pexanaeyaniwa. Biji rajane, jaitabiaba pexanawanapaenexa xua pijacuata tsitapexaniacuenetsi, najamatabëcuenecataitsinejewa, itsamonaë tsitapibisiacuene-atatsi. Baitsi, jamatabëcuenëjai tsabiabi: «Apo-itsacuene ta-exanaëjawaxua xua itsamonaë tsitapibisiacuenetsi, itsa jume, pia-uracuene, itsa xanënexa xua netsitapexania-cuene. Matapania itsa nacueratsipajë, itsa jume, pibisiacuene netocopiapatsipa bajarapacuenia ta-exanaëjamatabëcuene, najamatabëcuenecataitsipajë ta-exanaeyaniwa. Nexata, daxita xua nejamatabëcuenebarëya-exana, jamatejema bajarapacuenia exanaponaponaenajë», jamatabëjai tsabiabi. **i 17:18** *estoicos-monaë peliwaishi*: Bajarapamonaë nawecua-itoya tsabiabi daxita xua pebarëyacuene, pexaniacuenenua. Nexata, baracuacuaijai tsabiabi epicúreoliwaishi pebaraponaewi. Estoicos-monaë itaxutejema asiwaya nawajęcabiaba daxitacuenewiria jumapecataeya pexanaenëanëjawabelia. Orijibia, canaëjëta pacuenia pijadiosowi yacajëpa daxitacuenëjawalia be-ainawicuenia, bajaraxuata jiwi toxanepanatsi peyayataejawa bajaraxuanë pitsacueniabiyaniwatsi.

callejawa panijatomarata taeyabiabajë pataxunaenëjawa panawajëcabiabame panijadiosowijawabelia. Nexata, caxitajarabajë altar-jawa, itsajota yaquinaruta mapejumaitsijumeje: «Padioso abaxë apoyapëtaetsi, pija-altar-jawaje», jai tsarucae peyaquinarutsi-itane. BajarapaDioso, apopaneyapëtaenë yabara, jane baja aeconoxae pacatsipaebijitsiatsi —jai Pablo Atenas tomarapijiwijawabelia.

²⁴ Pablo icatsia jumaiti, pepoDioso, athëbëtatsia pe-ecaenë yabara:

—PaDioso yabara pacatsipaebijitsiatsi, mapanacua exanaje, daxita mapanacuapijicuene yajawa. BajaraPonë pepopewetsinë jane baja daxita mapanacuaje, itaboxo-ata. Bajaraxuata, apoponaponae jiwi pexanaetemplobonëta. ²⁵ Aponamatawenonaenua jiwi peyawenonaenexatsi itsacuenejawayota piasaënexa. Biji rajane, bajaPonë nacarajuta jiwitsi wajaasaëtsawanapejamatabëcuene, jowibo-ata wajanajumalipitsinexa; daxita xua namatawenonatsi wajaasaëtsawanapae-epato.

²⁶ »BajarapaDioso copiai caenë pebi exana. Bajaraponëjawawerena jane baja naexanapona daxitawirijumewi mapanacuataje, peyacaëjë-paenexa daxitanacuanëjawa. Nexata, Dioso caewirijumewi canacujitsia tocopatapona pamatacabibeje asaë tsawanapaejitsia, itsapanacuanëjawa-ata jinawanapaejitsia. ²⁷ Bajarapacuenia Dioso exana, tsipaji jitsipa daxitanacuanëpijiwi pejaitsinexatsi, pecaxinaejawabeliatsi. Dioso cajena tajë aponacawecuaponaponae. ²⁸ BajaraPonë pejamatabëcueneta asaë tsawana-paetsi, nacujirubawanapatsi, nacuenecataeya-ata wajanaca-exanaecuenia jinawanapatsi. Bajarapacuenia Dioso nacuenecataeya wajanaca-exanaejawa yabara, paxamëyajuwënëwi bajayata peyaquinaeliwaisita jumaiti mapacueniaje: «Waxaitsi-ata rabaja Dioso pexitsi», jai. ²⁹ Nexata, Dioso itsa pexitsi, jamatabëcuenenawëxaniabiaya apobejamatabëjumaititsi mapacueniaje: «Dioso raja oronanitota, palatananitota, ibotota-ata pexanaenëtsi,^j pacuenia bitso pecujaniwitsi pecobeta ba-exana pexanaenëanë pexania-cuenia bajarapitsinë Dioso», apobejamatabëjaiti Dioso yabara. ³⁰ Jiwi bajayata bajarapacuenia exanawanapa bajayajebi, itsa abaxë apoyapëtae Dioso pejitsipaeuene.^k Itsiata, Dioso abaxë najamatabëcuenecaitabiaba, caecuenia penaneconitsia-exanaeyaniwa, bajarapacuenie pexanaejawa yabara. Itsiata baitsi jane, maparucaeje Dioso itoroba daxitajiwi, daxitanacuanëjawa pejinawanapaewi. ³¹ Bajarapacuenia Dioso itoroba, tsipaji baja Dioso jiwi penaneconitsia-exanaematacabinexa tocaëjëtaruta, pamatacabi naneconitsia-exanaejitsia daxitanacuanëpijiwi. Caejiwi canacujitsia panconiwajëto xainapona, bajarapaneconiwajëtota naneconitsia-exanaponaena. Dioso baja cajena itapeta Ponë jiwi naneconitsia-exanaejitsia. Nexata, daxitajiwi beyapëtane Dioso pitapetsinë, tsipaji Dioso icatsia asaëya-exana

j 17:29 *pexanaenëtsi*: Dioso raja apocuenëjëpae jiwi pecobeta jumapecataeya pexanaejawanë oronanitota, palatananitota, ibotota, naejawata-ata, tsipaji bajaPonë asaë tsaponaponae. Nexata, nacujirubabiaba, exanaponaponanua pexanaecuenëjawanë, pacuenia jiwi cuene-itsi. Nexata, jiwi itsa Dioso pexi, peneta jiwi pecobeta apopexanaenëtsi. k 17:30 *Dioso pejitsipae-cuene*: Rom. 1:18-25 Pablo nacayapëtaeya-exana pacuenia bajarapamonae yapëtane picani Dioso peponaponaejawa, itsiata apojitsipae peyaiyataenexa Diosonëcuene. Biji rajane, natonacuenëbiabiaba jumapecataeya pexanaenëanë, pesiwanajamatabëcopatabiabinexa bajaraxuanëjawabelia Diosowecua. Nexata, xua bajarapamonae apoyapëtae mapaliwaisije: Pitsicuene Dioso tsitapibisiacuenetsi, pacuenianua capanepaejitsia jiwi Jesús pejamatabëcueneta.

bajaraPonë petëpaecujinae —jai Pablo Atenas tomarapijiwijawabelia Jesús yabara.

³² Nexata, Atenas tomarapijiwi itsa jumetane bajarapacuenia Pablo pejumaitsiyawa, Jesús petëpaecujinae Dioso icatsia piasaëya-exanaejawatsi yabara, bajarapamonae pejume-ataejitsibixaetsi, jumecaponatsi. Itsamonae pijinia itsiata jumaitsi Pablojawabelia:

—Icatsia, itsamatacabijawabelia pacanamuxuna-ewetsianatsi bajarapaliwaisi —jai itsamonae.

³³ Itsa baja, bajarajota Pablo najumewereta petsipaebijawa, wecua-pona baja. ³⁴ Itsamonae itsiata jumexaniatane Pablo petsipaebiliwaisi. Nexata, pënaponatsi Dionisio Areópagotsutojawata, penacaetuatabiabiwi pewetsiwiyajuwënëñë, bajarapacuenia-ata petiriwa, Dámaris-wënëwa, itsamonae-ata.

Pacuenia Pablo ponapona Corinto tomarata, yabara peliwaisi

18 ¹ Atenas tomarata Pablo jiwi petsipaebaponaponaecujinae Jesús peliwaisi, pona baja Corinto tomarabelia, Acaya nacuata pe-ecatomara. ² Bajarapatomarata Pablo caxitajaraba judíonë, Aquila, Ponto nacuapijinë. Bajaraponë, pijawa Priscilabeje, caematacabibeje abaxë xainabeje, Corinto tomarata pepatsicujinae Italia nacuawerena. Bajarapacuaawerena patabeje, tsipaji Imperio Romano nacua pepopewetsinë, Claudio, capitsapapona daxita judíowi Roma tomarawecua. Nexata, Pablo pona Aquila pijaboyabelia, penaponaponaenexa. ³ Aquila, Pablobeje, peyapëtae-xaebije pejorocaejawa carpaonë, nexata nayawenonaeya jorocabiababeje. ⁴ Judíowi pijasinagogabota, caesábado canacujitsia, Pablo barënajumotabiaba Jesús peliwaisi yabara judíowijawabelia, apojudíowijawabelia-ata, bajarapamonae pejumexaniataeya-exanaenexa paliwaisi Pablo tsipaebabiaba.

⁵ Silas, Timoteobeje, Corinto tomarata itsa patabeje Macedonia nacua-werena, Pablo baja copata Aquila peyawenonaeyajorocabiabijawa carpananë. Nexata, caematacabi canacujitsia tsipaebabiaba judíowijawabelia pacuenia Jesús pepoCristo, ponë judíowi copia-ewetawanapa pepatsijawa-nexatsica, pecapanepaenexatsi. ⁶ Judíowi apopeliwaisijitsipaexae Pablo, pibisiacuenia bijatanetsi. Pablo bajarapacuenia pejumaitsixaetsi, penaxatatsijawa nëñëbabia, ¹ penajamatabëcuene-itajëtsijawa apojejitsipaejawa, bajarapamonae peyapëtaenexa penaneconitsijawa Diosojawabelia, apo-pejumexaniataexaetsi, tsipaebi-ata Jesús yabara. Pablo nexata jumaitsi judíowijawabelia:

—Paxamë saya penajamatabëcueneta panaxuabianame Diosowecua. Xanë tajaneconi apoxainaenë tsane panenaxuabijawa yabara Diosowecua, tsipaji pacatsipaebi-atatsi Jesús peliwaisi, apopajumexaniataemë baja-rapaliwaisi. Nexata, apopanejumexaniataexae, aeconoxae baja copatajë

1 18:6 *penaxatatsijawa nëñëbabia*: Bajarapacuenia judíowi exanabiaba penajamatabëcuene-itajëtsinexa aneonijibia pepitsapaejawa. Baitsi, penaxatatsijawa penëñëbabejawata yapëtaeya-exana pecanacopatsijawa bajarapamonae pijaneconi. Pepaebinë apoyajawananeconitsi bajarapamonae.

patacatsipaebijawa paxamëjawabelia bajarapaliwaisi, juya baja tawajënaeyabelia tatsipaebaponaenexa apojudfowijawa —jai Pablo judfowijawabelia.

⁷Nexata, Pablo judfowi penacaetuatabiabi bowecua pitsapa. Pona Justo pijaboyabelia, bajarajota penaponaponaenexa. Bajaraponë asiwaya peyaiyataenë Dioso. Pijabo eca sinagogabomuxuneneta. ⁸Judfowi pijasinagogabo pewetsinë, Crispo, daxita pijabopijiwi yajawa siwanajamatabëcuenecopaba Jesús-jawabelia. Pablo petsipaebabiabiliwaisi pejumetaecujinae, ayai-bitsaëto Corinto tomarapijiwi-ata, siwanajamatabëcuenecopaba Jesús-jawabelia. Nexata, bajarapamonae Pablobana bautizaba. ⁹Nexata, merawi bemajitsinaebota wajatuxanenë Jesús jumaitsi Pablojawabelia: «¡Pëtsa juna-wame! ¡Pëtsa copatame netsipaebaponaejawa tajumeliwaisi, ¹⁰tsipaji raja xanë cayajawatsi! Nexata, itsajiwi-ata apoca-itsacueniabi tsane. Tsipaebaponaename tajumeliwaisi, tsipaji mapatomarata jiwi ayaiBITSaëto jinawanapa, pamonae nesiwanajamatabëcuenecopabaponaëjitsia», jai wajatuxanenë Jesús. ¹¹Nexata, Pablo ponapona Corinto tomarata dieciocho pajuameto-beje. Tsipaebaponaepa Jesús peliwaisi Corinto tomarapijiwijawabelia.

¹²Bajarapamatacabijawa Galión Acaya nacua ewetaponapona. Nexata, judfowi najamatabëcuenëjëpaeya tsimaxënacaetuatatsi Pablo pewaetabinexatsi. Nexata, pewaetabicujinaetsi, caponaliatsi penutsinexatsi nacuaewetsinë Galión pitabarata, pijaneconi petocanaëjëtsinexatsi. ¹³Nexata, judfowi neconitsiaya jumaitsi Galión-jawabelia:

—Mara ponëje itorobapona jiwi penawajëcabiabinexa Diosojawabelia apopecuene-itorobicuenia, Dioso penajumecopatsiliwaisi Moisés-pijinëta —jai judfowi Galión-jawabelia, Pablo yabara.

¹⁴Ajenā picani Pablo jumepitsijitsia judfowi, itacarajeta nacuaewetsinë Galión jumaitsi judfowijawabelia:

—Paxamë pajudfowimë, bepayapëtaneme mapacueneje. Itsa maponëje nacobetoxotsipa, jiwitonë-ata itsa beyaxuabijitsipa, pacajumexaniataejitsipatsi. Nexata, naneconitsia-exanaejitsipajë. ¹⁵Paxamë saya pabarënajumenotame maponëje papecatsipaebaponaeliwaisi yabara, panijasalinaiwipi jaliwaisi yabara-ata. ¡Nexata, saya paxamë panijacuata bajaraxua yabara pabarëcuaicuaijamëre pacuenia pajitsipame! Xanë raja apopacatocanaëjëtsitsi tsane bajarapaliwaisi —jai Galión judfowijawabelia.

¹⁶Nexata baja, nacuaewetsinë Galión pitsapaeya-exana judfowi, jiwi pijaneconi petocanaëjëtsitaxunaewecua. ¹⁷Judfowi bajaraxuawecua pepit-sapaejawata, griegowi, bajarajota penubenaewi, nacobenawaetaba judfowiyajuwënë, Sôstenes, judfowi pijasinagogabo pewetsinë. Nexata, bajarapamonae Sôstenes conibabia nacuaewetsinë Galión pitabarata, ajibi-ata peyabaraconibabewawa. Galión tae-ata bajarapacuene, apo-itawetsi.

**Pacuenia Pablo wecuapona Corinto tomara,
pepatsinexa Cesarea tomarajawabelia**

¹⁸Bajaraxuacujinae, Pablo abaxë bajayajebi ponapona Corinto tomarata. Bajayajebi peponaponaecujinae, belia jane baja napëjioba Jesús peliwaisi pejumexaniataewijawabelia. Napona barcota Siria nacuyabelia, Priscila, Aquilabeje yajawa. Nexata, epatua, Cencrea tomarata, Pablo mataxunatsi dexitamatanami, jiwi peyapëtaenexatsi petoweretsijawa

Dioso petonacuenebijawa, pacuenia baja cajena Dioso jawabelia najumecapanepaeya jumaitsi. ¹⁹ Pablo, Aquila, Priscilabana, itsa pata Éfeso tomarata, Pablo baja wecuanatsata Priscila, Aquilabeje. Nexata, joneya judíowi penacatuatabiboyalia. Bajarajota, barënaliwaisita judíowi. ²⁰ Nexata, bajarapamonae picani Pablo asiwatsi abaxë penaponaponaenexa anijamatacabianë. Itsiata, bajaraponë apojejai. ²¹ Nexata, itsa napëjioba, bajarapamone jawabelia jumaitsi:

—Naxanetajë tapatsinexa Jerusalén tomarabelia, tataenexa pafiesta baja imoxoyo pewajënae pejonenexa. Itsiata, icatsia najetarucaenajë paxamëjawa waberena itsa Dioso jitsipa —jai Pablo judíowijawabelia.

Nexata, Pablo Éfeso tomarata barcota nanaropota Cesarea tomarajawabelia.

**Pablo icatsia naropota, acueyabinamuto jiwi
petsipaebanajetarucaejawa Jesús peliwaisi**

²² Itsa baja Pablo pata Cesarea tomarata, bajaraxuacujinae pona matatsënëa Jerusalén tomarabelia, cae-epatoyo pesiwaxainaenexa daxita Jesús pijajiwi. Pesiwaxainaecujinae nawiata jane baja Antioquía tomarabelia. ²³ Antioquía tomarata bajayajebi peponaponaecujinae, icatsia naropota, najetarucaenexa daxita patomaranë ena, Galacia nacuata, Frigia nacuata-ata. Bajarapatomaranëjawa pejinawanapaewi, Dioso peliwaisita Pablo ajamatabëcuenesaëya-exananajetaruca daxita Jesús pijacuenenacujarubiwi.

**Apolos Jesús peliwaisi tsipaeba Éfeso tomarapijiwijawabelia,
Acaya nacuapijiwijawabelia-ata**

²⁴ Bajarapamatacabianëjawa pijinia, Alejandría tomarapijinë, Apolos, judionë, pata Éfeso tomarata. Bajaraponë bitso jiwijawabelia pexaniacuenia pecuaicuajainë, pejumeyapëtaenëna pacuenia Dioso pejumeliwaisibaxutota jumaitsi. ²⁵ Apolos itsamonae tsipaebi-atatsi Jesús peliwaisi, itsiata apoyapëtaeya-exanaetsi daxitaliwaisi Jesús yabara. Nexata, bajaraponë tsipaebanajetaruca saya Juan jiwibautizabinëmi pepaebiliwaisi^m Jesús yabara. Xaniawaetsia Jesús peliwaisi apoyapëtae-ata, itsiata ajamatabëcuenesaëya peyapëtaecuenia tsipaebanajetaruca. ²⁶ Bajarapaliwaisi ajumejunawijibia tsipaebabiabanua judíowi penacatuatabibota. Nexata, Priscila, Aquilabeje, itsa jumetanebeje Apolos petsipaebiliwaisi, junatabeje pijaboyabelia penaponaenexa. Pijabotalia daxitaliwaisi jane baja, Jesús peliwaisi, xaniawaetsia tsipaebabeje Apolos-jawabelia, xaniawaetsia peyapëtaenexa Jesús peliwaisi. ²⁷ Itsamatacabijawabelia baja Apolos itsa naropotsijitsia Éfeso tomarawecua, peponaenexa Acaya nacuayabelia, Jesús peliwaisi pejumexaniataewi Éfeso tomarata yawenonatsi peponaenexa. Rajutatsinua petsicobeyaquinaebaxutotsi, pecaponaenexa Jesús pijacuenenacujarubiwijawabelia, Acaya

m 18:25 *Juan jiwibautizabinëmi pepaebiliwaisi:* Juan-pijinë yapëtaeya-exanabiaba judíowijawabelia Jesús, Mesías-cuenia imoxoyo pepatsijawanexa, nexata judíowi xaniawaetsia pecopiapitsinexa Jesús, benajamatabëcuenepënyorota pibisiacuenenexa jawawecua, benabautizabianexanua penajamatabëcuenen-itajëtsinexa aneconijibia pecopia-ewetawanapaejawa bajaraPonë.

nacuata pejinawanapaewi xaniawaetsia pecopiapitsinexatsi. Apolos baja itsa pata Acaya nacuayabelia, bitso yawenona bajarapanacuapijiwi, pamonaе Dioso asiwaya capanepatsi, Jesús peliwaisi pejumexaniataexae. ²⁸ Bajara-ponë bitso yawenona Jesús peliwaisi pejumexaniataewi, tsipaji daxitajiwi pitabarata xaniawaetsia yapëtaeya-exanapona judíowijawabelia Jesús pepacuene Dioso athëbëwetsica pitorobijawatsitsica, jiwi pecapanepaenexa, bajarapamonaе jume-aebi-ata Jesús peliwaisi. Tsitajëtaponanua bajarapamonaеjawabelia Dioso pejumeliwaisibaxutota pexaniajaicuene. Nexata baja, judíowi moya ena, tsipaji acuenebi piamatamobia-exanaejawa Apolos petsi-paebiliwaisi Jesús yabara.

Pablo tsipaeба Dioso peliwaisi Éfeso tomarapijiwijawabelia

19 ¹ Pamatacabi Apolos abaxë ponapona Corinto tomarata, bajara-pamatacabi pijinia Pablo ibotsutonënacujawawerena najetaruca, pepatsinexa Éfeso tomaraberena. Bajarapatomarata Pablo itsa pata, caxitajaraba caejiwibeje Jesús pijacuene penacujarubiwi. ² Nexata, yanijoba bajarapamonaеjawabelia:

—¿Espíritu Santo tsabaja pacatsijamatabëjunua pamatacabi pajumexania-taneme Jesús peliwaisi? —jai Pablo.

Nexata, bajarapamonaе jumaitsi:

—Ajibi cajena. Caeto-ata cajena apopawënëliwaisitaenë Espiritu Santo yabara —jai bajarapamonaе Pablojawabelia.

³ Nexata, Pablo jumaitsi:

—¿Detsa pitsijamatabëcuene yabara pacabautizaba? —jai Pablo.

Nexata, bajarapamonaе jumaitsi:

—Paxanë panabautizabajë Juan jiwibautizabinëmi pecujarubiliwaisita —jai.

⁴ Pablo nexata jumaitsi bajarapamonaеjawabelia:

—Juan-pijinë raja bautizabapona pamonaе baja najamatabëcuenepënëyo-roba Diosojawabelia, pibisiacuene pexanaеjawawecua. Itsiata baitsi jane, orijibia jumaitsi tsaponaе jiwijawabelia: «Pasiwanajamatabëcuenecopabia-name ponëjawabelia xanë tacowëwerena patsiana, baitsi Jesús-jawabelia. Bajaraponë Cristo, ponë Dioso itorobica», jai tsaponaе Juan-pijinë jiwijawabelia —jai Pablo.

⁵ Bajarapamonaе itsa jumetane Jesús peliwaisi, nexata Pablo bautizaba petuxanenë Jesús pewënëta, penajamatabëcuene-itajëtsinexa pejumexaniataejawa bajarapaliwaisi. ⁶ Nexata, caenë canacujitsia Pablo petsi-matanacobeuataponaеjawata, Espiritu Santo tsijamatabëjoneponatsi. Jamatabëcuenecaëjëpaeya-exanatsi, pecuaicuaijainexa itsawiriajumenëta, apopecuaicuaijajumenëmi. Dioso peliwaisi tsipaebaponanua jiwijawabelia, Espiritu Santo peyapëtaeya-exanaeliwaisitsi. ⁷ Daxita bajarapamonaе bejamatabëcuene doce ponëbeje daxitata.

⁸ Éfeso tomarata Pablo peponaponaеjawata, acueyabi pajuametobeje, ajumejunawijibia sinagogabota^a tsipaebaponapona Jesús peliwaisi judíowijawabelia.

^a 19:8 *sinagogabota*: Bajarapacuenia judíowi wënërubabiaba penacaetuatsibo, itsajota nacujarubabia Dioso peliwaisi caesábado canacujitsia.

Pablo barënajumenotabiaba judíowi Dioso pijajiwi peyanacua-ewetsicue ne yabara, Jesús pejamatabëcueneta.^o Jaitabiabanua pacuenia jumexaniataeyae-xanaejitsia bajarapaliwaisi bajarapamonaeJawabelia. ⁹Itsamonae itsiata ajamatabëcuenetaja. Apojitsipae pejumexaniataejawa bajarapaliwaisi. Nexata, daxitajiwi pitabarata pibisiacuenia baracuaicuajai Jesús peliwaisi, pamonae-ata Jesús peliwaisi pepënaponaewi. Bajarapacuenia pexanaexae, Pablo baja wecuanatsata. Napona Jesús peliwaisi pejumexaniataewi yajawa Tirano pija-escuelabojawabelia, saicaya penacaetuatabinexa. Bajarapabota nexata Pablo caematacabi canacujitsia pexanialiawaisi, Jesús peliwaisi, jiwi tsipaebabiaba. ¹⁰Bajarapacuenia Pablo tsipaebaponapona anijawaibeje. Nexata, daxita Asia nacupajiwi, judíowi, apojudíowi-ata, jumetane petuxanenë Jesús peliwaisi.

¹¹Bajarapamatacabianëjawa Dioso pesaëta pinijicuenëjawanë exanapona, Pablojawata. ¹²Nexata, piawitanewi pijamonae, Pablo pijapañueloxi, penaxatabijawanë-ata, xuanë Pablo naperabëcayajaba, tocaponabiaba piawitanewi petsiperabëbuatsinexa. Bajarapacuenia pexanaejawata, Dioso jamatejemaya-exanabiabatsi. Dowathiwi peyajawajinawanapaewi-ata Dioso wecuacapitsapabiabatsi.

¹³⁻¹⁴Bajarapamatacabianëjawa pijinia, itsamonae judíowi, tomaranë-jawa penajetarubenaewi, pata-othopa baja Éfeso tomarata. Bajarapamonae pejitsipaewi pexanaejawa Jesús pewënëta, jiwi dowathi pewecuapitsapaponaenexa. Bajarapamonae siete ponëbeje, Esceva, sacerdotewi penamatacaitorobinë,^p ëpexi tsawanapae. Nexata, bajarapamonae itsa tane dowathi peyajawaponaponaenë, jumaiti dowathijawabelia:

—¡Dowathi, paca-itawetatsi, ponë Pablo wajunupaebapona, petuxanenë Jesús pewënëta! ¡Wecuapitsapare baja maponëje! —jai.

¹⁵Itsiata, paepatota bajarapamonae Jesús pewënëta itaweta dowathiwi, juya jumecanawiatatsi mapacueniaje:

—Yapëtaniji raja Jesús. Yapëtaniji Pablo-ata. Itsiata, paxamë apopacaya-pëtaetsi. ¿Detsa jane paxamë papamonaemë pija? —jai dowathi Esceva pexijawabelia.

¹⁶Nexata, bajarajota dowathi peyajawaponaponaenë pejamatabëcuene-itorobicueniatsi, tsimaxëjiwarenatsi bajarapamonae. Pinijisaëta tsaquiba-biatsi. Bajarapacuenia pexanaejawatatsi wejumatitcatsi penaxatabijawanë. Belia bajarapamonae pebejawatatsi, yawajënëya jumasa rëcëpeca dowathi peyajawaponaponaenë pijabowecua. ¹⁷Nexata, daxita Éfeso tomarapijiwi, judíowi, apojudíowi-ata, itsa wënëliwaisitane pacuenia dowathi peyajawaponaponaenë exanatsi Esceva pexi, bajarapatomarapijiwi bitso jamatabëcuenenajunawiaca. Nexata, daxita bajarapamonae ayaicuenia wënëyaiyatane wajatuxanenë Jesús.

¹⁸Pewënëliwaisitaexae bajarapacuenia, ayaibitsaëtoخانeto Jesús peliwaisi pejumexaniataewi, patapona Pablobanajawaberena,

o 19:8 *Jesús pejamatabëcueneta:* Jesús yajamatabëcuene-eweta pamonae siwanajamatabëcuenecopata bajaraPonëjawaberena. Bajaraxua yabara jumaiti «reino de Dios». Taema Hch. 8:12; 14:22; 19:8; 20:25; 28:23, 28:31, Mc 1:15; Lc 4:43; 9:2; Jn 3:3-21. **p 19:13-14** *sacerdotewi penamatacaitorobinë:* Esceva tsarena apopenamatacaitorobinë sacerdotewi. Bajarapacuenia nawënë-ruba be-ayaajamatabëcuenenë penataexae. Lucas, Hechos-baxuto peyaquinaenë, saya yaquina bajaraponë penawënërubicuenia.

penawecuapaebaponaenexa pibisiacuene pexanabiabijawami. ¹⁹ Orijibia, ayaibitsaëto penajorobiwi capata pecanacuenebixutonë, petajuitsinexa. Bajarapabaxutonëmi picani ayaimatamota natocomuata. Itsiata bajara-pamonaë tajuita isotota, daxitajiwi pitabarata. Bajarapabaxutonëmi itsa comuata, namatamota cincuenta mil ponëbeje palatanëanë,^q bitso penamatamotsinëanë. ²⁰ Nexata, bajarapacuenia Jesús peliwaishi yacaëjëpaponä baja daxitanacuanëjawa. Orijibia, bajarapaliwaishi pejamatabëcueneta, ayaibitsaëto tsaponae pejumexaniataewi Jesús peliwaishi.

²¹ Bajaraxuacujinae, Pablo najamatabëxaina peponaenexa Jerusalén tomarabelia. Peponaenë najetarucaejitsia Macedonia nacujawa, Acaya nacujawa-ata, petaenajetarucaenexa Jesús peliwaishi pejumexaniataewi bajarapanacuanëjawa. Bajaraxuacujinae jane baja, ponaejitsia Jerusalén tomarabelia. Bajarapacuenia peyapëtaeya-exanaecujinae pebarënacuenëbiwijawabelia, jumaitsi: «Tapatsicujinae Jerusalén tomarabelia, ponaeñajë icatsia Roma tomarabelia-ata», jai. ²² Nexata, Pablo itoroba Macedonia nacuyabelia anijanëbeje pijajiwitonëbeje, Timoteo, Erastobeje. Bajaraponë pijinia abaxë nacopata caematacabibecuenia Asia nacuata.

Pablo, Éfeso tomarata, Demetriobana jamatabëbeyaxuabatsi

²³ Pablo itsa abaxë ponapona Asia nacuata, Éfeso tomarapijiwi bitso anaepana Jesús peliwaishi pejumexaniataewijawabelia, Demetrio pejamatabëcueneta. ²⁴ Bajaraponë palatananitota templobo jumapecataeya exana-biaba, tsiquiriboxi, Artemisa^r jumapecataeya pexanaediosowa, pijatemplobo jumapecataeya. Demetrio, bajarapaboxi pebarënacuenëbiwi yajawa, bitso ayaicuenia palata barëpitabiaba bajarapaboximatamo. ²⁵ Nexata, bajaraponë junata pebarënacaetuatsinexa daxita pebarënacuenëbabiabiwi bajarapaboxi, itsamonaë-ata, jumapecataeya pexanaejawanë penacuenebiwi. Nexata, Demetrio jumaitsi bajarapamonaejawabelia:

—Paxamë rabaja payapëtaneme mapacueneje. Jumapecataeya waja-exanabiabijawanë wajacanajetabiabixae, xaniawaetsia jinawanapatsi, namatawenonaenejewatsi itsacuenejawa. ²⁶ Pataneme rabaja. Pajumetane-menua baja Pablo pejumaitsi tsaponaejawa daxita Asia nacujawa jiwi xua exana pecobeta jumapecataeya pexanaenëanë, apopexaniajaidiosowicuenë. Nexata, jiwi ayaibitsaëto xaneto mapatomarapijiwi, Asia nacujapijiwi-ata jumexaniataepona Pablo bajarapacuenia petsipaebaponaejawa. ²⁷ Bajarapacuenia jiwi ayaibitsaëto itsa jumexaniataeponaena Pablo petsipaebiliwaishi, bajarapamonaë aponacacomuatsi tsane wajadiosowa, Artemisa, pijatemploboxi wajanacuenebijawanë. Belia, Artemisa, pinijijamatabëcuenë pexanaediosowa, pijatemplobo-ata, apoyaiyatae tsipae. Cuenecopiarucaeya-exanaejitsipatsi jiwi yaitataeya pematabacabëta petonubenabiabijawa, pewajëcabiabijawata Artemisajawabelia, petaexae beweliasaë pexainaejawa. Aponacatoxanepanae cajena wajacuene copatsijawa bajaraxua, tsipaji daxita Asia nacujapijiwi, daxitanacuanëpijiwi-ata, bajarapajumapecataeya

q 19:19 *cincuenta mil ponëbeje palatanëanë*: Bajarapacincuenta mil ponëbeje papalatanëanë matamojëpa 150 pawabeje pematamotsijawa pabicuene penacuenebijawa. **r 19:24** *Artemisa*: Itsawënë bajarapajumapecataeya pexanaewa pijinia Diana.

pexanaediosowa yaiyataeyabiaba —jai Demetrio tsiquiritemploboxi jumapecataeya pexanabiabiwijawabelia.

²⁸ Nexata, bajarapamonae itsa jumetane bajarapacuenia Demetrio peju-maitsijawa, bitso anaepana. Pinijijumeta wawajaiya jumaitsi:

—¡Pinijijamatabëcuene raja pexainaediosowa Artemisa, Éfeso tomarapiji-witsi wajadidosowa! —jai tsaponae bajarapamonae.

²⁹ Nexata, belia daxita Éfeso tomarapijiwi, xaniawaetsia yapëtaenejewa xua yabara jiwi wawajai tsanubenae, muxunapata bajarapataxunaeta. Nexata, bajarapamonae Gayo, Aristarcobeje, Macedonia nacuapijinëbeje, ponëbeje Pablo yanatatsi, waetabatsibeje. Daxitajiwi waetabiaya nacobenacaponatsibeje pinijiboxanetojawabelia, itsabelia baja cajena daxita tomarapijiwi nacaetuatabiaba. ³⁰ Pablo picani najonejitsia bajarapabojawabelia, peyajiwicuaicuaijainexa peyanatsinëtsibeje penacaetuatsiwiawabelia. Itsiata, Jesús pijacuene penacujarubiwi apocopatsitsi. ³¹ Bajarapijinia pacuenia itsamonae Asia nacuapijiwi pewetsiwiyajuwënëwi, Pablo peyapëtaewitsi, asaëya tonajume-itorobarenatsi penajoneyaniwa bajarapaboyabelia, pebeyaxuabiyaniwatsi. ³² Éfeso tomarapijiwi penacaetuatsijawata, naliwaisijëpaeya apocuaicuaijai. Nexata, pewawajaijawata itsamonae itsaliwaisicuenia wawajaiya jumaitsi tsaponae. Itsamonae pijinia itsaliwaisicuenia wawajai tsaponae, tsipaji jiwi ayaibitsaëtöxaneto apoyapëtae paliwaisi yabara nacaetuata. ³³ Nexata, bajarapabitsaëtötuatuajëta penanacaetuatsi-judíowi, itapeta pewënajudíonë, Alejandro, peyapijicuaicuaijainexatsi Éfeso tomarapijiwijawabelia. Nexata, bajaraponë pënatorotajarabatsi daxitajiwi pitabarata penucaenexa. Nexata, Alejandro nacobeyota jiwi pemoyanexa, petsipaebinexa Éfeso tomarapijiwijawabelia pianaeapaneyaniwa daxita judíowijawabelia, Pablobana pejamatabëcuene. ³⁴ Itsiata bailsi jane, bajarapamonae itsa yapëtane judíonëcuene, apotocopatsi pecuaicuaijainexa. Biji rajane, wawajaiya jumaitsi tsaponae anijahorabejecuenia mapacueniaje: «¡Pinijijamatabëcuene raja pexainaediosowa Artemisa, waxaitsi Éfeso nacuapijiwitsi wajadidosowa!», jai tsaponae bajarapamonae.

³⁵ Bajaraxuacujinae, nexata tomara jane baja pewetsinë, secretarionë, daxitajiwi moya-exana. Nexata, jume-itawetsiaya jumaitsi:

—PaÉfesotomarapijiwimë, daxitanacuanëpijiwi baja cajena yapëtane wajanacatocopatsijawa waja-ewetsinexa mapatomarataje pe-ecaëbo, pinijijamatabëcuene pexainaediosowa, Artemisa pijatemplobo. Daxitanacuanëpijiwi baja cajena yapëtanenua diosojumape-ibotowa,^s Artemisa, athëbëwetsica pejopaejawa mapatomarataje. ³⁶ Xaniajai, bajarapa-iboto athëbëwetsica jopa cajena wajadiosowanexa. Acuenëbi itsajiwi-ata: «Jume», pejaijawa bajaraxua yabara. ¡Nexata, pajamatejemamëre! ¡Pëtsa abaxë itsacuene pa-exaname copiaya panajamatabëxainaenejewamë xaniawaetsia!

s 19:35 *diosojumape-ibotowa*: Bajayatami Éfeso tomara imoxoyojawata pecanua-iboto athëbëwetsica jopa. Bajarapawiria iboto wowai wënërubabiaba, «asteroide», jai; jiwijumeta pijinia japito. Nexata, Éfeso tomarapijiwi nacuenëbanuta tempolobo bajarapa-iboto pewënëta. Wënë-rubana bajarapa-iboto Artemisa. Belia nacuenëbabiaba petiriwa jumapecataeya pexanaewa bajarapajopae-iboto pewënëta, jiwi asiwaya petanexa. Nexata, pacujinae pematabacabëtanubena Artemisa pijatemplobo pewajënaeya, pewajëcaenexa Artemisajawabelia, asiwaya nawajëcabiaba saya athëbëwetsica pejopae-ibotojawabelia.

³⁷Mapapebibeje paxamē pacapatameje, apopenacobetoxotsinēbeje templo-bopijijawa. Pibisiacuenia apobaracuaicuaijibejenua wajadiosowa Artemisa —jai secretarionē Éfeso tomarata penacaetuatsiwijawabelia.

³⁸Icatsia, jumaitsi bajarapamonaewajawabelia:

—Demetriobana itsajiwi itsa jamatabēneconita, nexata ponae, peneconitsinexa juez-monae pitabarata. Bajarasaya xua juez-monae ewetawanapa. ³⁹Itsa apopenaconitsijitsiamē jiwi, saya itsa panacaetuata me itsacueneliwaisiyo yabara, nexata saya rowialia papaebare xaniawaetsia daxitajiwi penacaetuatsijawata, pacuenia gobierno naca-itoroba! ⁴⁰Xaniajanē pacuenia pacatsipaebijitsiatsi. Ajena mapamatacabitaje, mapacuenia itsa exanaponaejitsipatsije, nacananeconitsia-exanaejitsipa gobierno, tsipaji itsacueneneconita itsajiwi xainaenejewawa, mapacuenia anaewa nacaetuatsije —jai secretarionē penacaetuatsiwijawabelia.

⁴¹Itsa baja bajaraponē najumewereta bajarapacuenia petsipaebijawa, itoroba baja daxitajiwi penawiabinexa pijabonējawabelia.

Pablo najetaruca Macedonia nacujawa, Grecia nacujawa-ata

20 ¹Itsa baja, Éfeso tomarapijiwi jamatabēcaewa pianaeponaejawawa, nexata Pablo junata penacaetuatsinexa daxita Jesús pijacuene penacujarubiwi, pemuxujiobinexa pewajēnaeyabelia pijamatabēcuenesaētsawanapaenexa pitaxutuajamatejemajawa Dioso. Bajaraxuacujinae, napējioba. Pona baja Macedonia nacuyabelia. ²Pepatsicujinae bajarapanacuata, bajaraponē jane baja taenajetaruca caetomara canacujitsia, itsajota Jesús peliwaesi pejumexaniataewi jina-wanapa. Pexaniacuenia muxujiobapona caebitsaēto canacujitsia Jesús pijajiwi, pewajēnaeyabelia pijamatabēcuenesaētsawanapaenexa pitaxutuajamatejemajawa Dioso. Bajaraxuacujinae, pata Grecia nacua. ³Bajarapanacuata ponapona acueyabi pajuametoheje. Bajaraxuacujinae, picani, Pablo barcota naponaejitsia Siria nacuyabelia. Itsiata, itsa nayajumetane Siria nacua judiowi pewajēnae-ewetsijawatsi pebeyaxuabinexatsi, Pablo najamatabēxaina icatsia pecowēya penawiatsinexa matatsēnē Macedonia nacujawa. ⁴Pamonae Pablo yanatatsi, mapewēnēanēje. Pirro pexēnato, Sópater, Berea tomarapijinē, Aristarco, Segundobeje, Tesalónica tomarapijinēbeje, Gayo, Derbe tomarapijinē, Timoteo, Listra tomarapijinē, Tíquico, Trófimobeje-ata, Asia nacupijinēbeje. Daxita bajarapamonae Pablo yanatatsi. Nexata, Pablo itsa barēpata Filipos tomarata, xanē Lucasnē, necaxitajaraba. ⁵Nexata, daxita pamonae Pablo yanatatsi, namataxainaewa baja ponalia Troas tomarabelia, bajarajota patane-ewetawanapaenexabeje. Paxanēbeje, Pablobeje abaxē panacopatājēbeje Filipos tomarata, Macedonia nacua pe-eaetomara. ⁶Nexata, pepuawerewerecae baja pafiestajawa judiowi baxane levadurata matajērēabinejewa pexanaepan, matapania paxanēbeje Filipos tomarata barcota pananaropotājēbeje, pataponaenexabeje jane baja Troas tomarabelia. Cinco pamatacabibejecujinae, papaliajēbeje bajarapatomarabelia. Nexata, pamonae pane-ewetawanapabeje, bajarajota panamataxēnājēbeje baja. Nexata, abaxē Troas tomarata pajinawanapajē siete pamatacabibeje.

Peponaejawānaewa, Pablo cujaruba Dioso peliwaesi peyamatacabijawabelia, Troas tomarata

⁷Troas tomarata domingomatacabi panacaetuatajē Jesús pijacuene penacujarubiwi yajawa, patanajamatabēnapitsinexa xua yabara Cristo

panesiwatēpa. Pablo nexata liwaisi tsipaeba merawituatuajējawabelia, tsipaji merawia pitsijawata, bajayacunua, naropotsijitsia Mileto tomarabelia. ⁸ Panacaetuatajē athēbēyo pēnēyatu-ucubibota, acueyabi pa-irabejējawatatsia. Bajarajotatsia pitayotsijawanē ayaijawa rubena, xaniawaetsia pitayotsinexa. ⁹ Nexata, pewējēato, Eutico, ventanajawata eca. Belia, pewējēato bitso itamajitsipaneca, Pablo bajayajebi liwaisi petsipaebixae. Nexata, Eutico baja majiteca. Pemajitecaenē jopareca acueyabi pa-irabejējawawereca. Nexata, itsa siwarunareca, peyotsinexa, caxitajaraba baja petēpaenē. ¹⁰ Nexata, Pablo siwarunareca. Tsijumabocajunua. Petēpaenē wēwaetaba. Nexata, Pablo jumaitis Jesús pijajiwijawabelia:

—¡Pētsa panajamatabēxainame! Asaē rabaja icatsia pewējēato —jai Pablo.

¹¹ Bajaraxuacujinae, Pablo icatsia caewēa junaya athēbēyo pēnēyatu-ucubibojawabetsia. Bajarajotatsia, epatsēnēca jane baja pan, petsicobetsa-naenexa, daxita Jesús peliwaisi pejumexaniataewi pexaenexa, penajamatabēnapitsinexa Jesús pesiwatēpaejawatsi. Bajarapacuenia pexanaecujinae, abaxē icatsia Pablo bajayajebi cuaicuajiai tsecae peyananianaejawabelia. Bajaraxuacujinae jane baja, pona Mileto tomarabelia. ¹² Nexata, pewējēato, Eutico, piasaenē barēnawiabatsi pijaboyabelia. Bajaraxua yabara barēya bitso daxita Jesús pijajiwī.

Pablobana naropoba Troas tomarata, pepatsinexa Mileto tomarabelia

¹³ Paxanē Pablo panenamataxainaeya-exana, barcota menia patanaponae-nexa Asón tomarabelia. Pablo pijinia matatsēnēa najetarucaejitsia. Bajaronē itsa pata Asón tomarata, patayapitsinexa. ¹⁴ Nexata jane baja, itsa pata Asón tomarata, Pablo baja payapitajē. Nexata baja, panajuaponajē Mitilene tomarabelia. ¹⁵ Mitilene tomaracujinae, itsa pananaropobajē merawia pitsijawata, paxenebajē Quíotunaeto. Icatsia, merawia pitsijawata, panapatajē Samos-tunaetota pe-ecaetomarata. Bajarajotacujinae icatsia pananaropobajē, patanapatsinexa Trogilio tomarabelia. Bajarapatomarawecua patanaropobicujinae, caematacabicujinae, icatsia panapatajē jane baja Mileto tomarabelia. ¹⁶ Pablo rowia jamatabēxeneta Éfeso tomara, Asia nacuata pe-ecaetomara, tsipaji apojamatabēponaponae bajayajebi bajarapanacuata. Bepijia jamatabēpata Jerusalén tomarabelia, Pentecostēs-fiestawajēnaeya.

Pablo Mileto tomarata liwaisi tsipaeba Éfeso tomarawerena pepatsiwī, ancianowijawabelia

¹⁷ Éfeso tomarajawabelia peponaeyaniwa, Pablo tonajume-itoroba Mileto tomarawelia ancianowī pepatsinexarena. ¹⁸ Nexata baja, ancianowī itsa parena Miletojawaberena, Pablo jumaitis bajarapa-ancianowijawabelia:

—Paxamē baja cajena payapētaneme Dioso pijacuene tonacuenebijawaw Asia nacuata, tapatsimatacabijawaweliacujinae. ¹⁹ Bajarapacuenia Dioso pijacuene tonacuenebaponaponajē beweliajamatabēcuenenēnē nataeya. Bitso siwanueyabiabajē tataejawata pamona xaniawaetsia apojinawanapae Dioso pitabarata. Bitso bejiobinē tsabiabi, tsipaji judiowī jamatabēnebexuababiaba. Bajarapacuenia tonacuenebajē, xaniawaetsia tatoweretsinexa daxita pacuenia wajatuxanenē Jesús nitoroba. ²⁰ Nexata, apopacawecua-siwatsi caeliwaisi-ata Dioso peliwaisi patacatsipaebijawata. Biji rajane,

Dioso peliwaisi papecajamatabëcueneyawenonaenexa pacatsipaebabiabatsi itsajota nacaetuatabiaba daxitajiwi, panijabonëjawa-ata. ²¹ Nexata, asaëya tsipaebabiabajë judíowi, apojudíowi-ata, daxita bajarapamonae pecopabinexa pibisiacuene pexanabiabijawa, penajamatabëcuenepënyorobinexa Diosojawabelia, pesiwanajamatabëcuenecopabinexanua wajatuxanenë Jesucristojawabelia. ²² Mara jotacujinaeje ponaenajë Jerusalén tomarabelia, Espíritu Santo tane-itorobixae. Itsiata, xaniawaetsia apoyapëtaenë xua netocopiapatsijitsia Jerusalén tomaratalia. ²³ Caejawa yapëtaniji. Caetomara canacujitsia itsa xuayo najetarucabiabajë, Espíritu Santo neyapëtaeya-exanapona Jerusalén tomarapijiwi tane-etsijawanexa penaneconitsiwi pejebabiabibota. Pacuenia-ata nebejibia-exanaejitsia. ²⁴ Xanë cajena apojunawinë bajarapacuenetocopiapataponae-ata, tanebeyaxuabijawanexa. Itsiata baitsi jane, caejawa siwabëjanë, xaniawaetsia tatoweretsinexa pacuenia wajatuxanenë Jesús nitoroba. Bajaraxuata, jamatabëpaebajë daxitajiwi-jawa pexanialiwaishi, Jesús peliwaisi, paliwaisi nacayapëtaeya-exana Dioso wajanaca-itaxutotsoniataejawa Jesucristo pejamatabëcuene. Bajarapacuenia itsa toweretsipajë, nexata apobëjanë tsipae nebeyaxuabijitsia-ata.

²⁵ »Panejumetaema: Paxamë rabaja patacatsipaebiwi Dioso pewetsijawanexa daxita pijajiwi, caejiwi-ata rabaja paxamëyajuwënëjiwi mawejëa aponetae tsane. ²⁶ Itsajiwi paxamëyajuwënëjiwi itsa naxuabiana Diosowecua, aponaxuabi tsane xanë tajaratabëcueneta, ²⁷ tsipaji baja xanë daxita Dioso peliwaisi xaniawaetsia baja cajena pacatsipaebatsi. Caeliwaishiyo-ata apopacawecua-asiwatsi.

²⁸ »¡Bajaraxuata, paxamë xaniawaetsia nayajiwitaeya pajinawanapare, Dioso pejitsipaecuenia!« ¡Bajarapacuenia-ata yajiwitaeya pa-ewetawanapare Jesús pijajiwi, pacuenia oveja pexainaewi xaniawaetsia ewetawanapa pija-ovejabitsaëto! Bajarapamonaetuatuajëta raja pacanuba Espíritu Santo, paneto-ewetsinexa wajatuxanenë Jesús, pamonaenatocomuata pijanata.

²⁹ Bajarapacuenia paca-itorobatsi pane-ewetsinexa, tsipaji cajena yapëtaniji xanëcujinae, najetarubenaejawanexa Dioso pejumeliwaisiwecua saicayacuenia petsipaebiwi. Pacuenia pianaepanaelobomonaenë werenepona daxita ovejabitsaëto itaxutotsoniataenejewa, bajarajamatabëcuene-itsi tsane daxita Jesús pijajiwijawabelia pepaebiliwaishi pewerewerecaeya-exanaenexa.

³⁰ Orijibia, paxamëyajuwënëwi-ata saicayacuenia Dioso pejumeliwaisiwecua tsipaebaponaena, bepexanialiwaishicuenia itajara, peyamaxë-itojorobinexa Jesús pijajiwiyajuwënëwi. Nexata, itsamonae nawecuanatsanaena pexanajailiwaishiwecua, juya bajarapamonae peliwaishipënaponaenexa. ³¹ ¡Bajaraxuata, nayajiwitaeya pajinawanapare! ¡Xaniawaetsia pa-ewetawanapare Jesús pijajiwi! ¡Panajamatabënapire pacuenia xanë baja cajena acueyabi

t 20:28 *Dioso pejitsipaecuenia:* Mapaliwaishianë yabara toxanepanatsi ancianowi nayajiwitaeya pejinawanapaejawaje: Itsamonae peyamaxë-itojorobiyaniwatsi pexanajailiwaishiwecua, pecopat-siyaniwa pewajënaeyabelia pejamatabëcueneliwaishinaweretaponaenexa Dioso pijacuenejawata, pijacuata penacujarubijawata Dioso peliwaisi, pibisiacuene pexanaeyaniwa, bijaya pewetsiyaniwa Jesús pijajiwi, pewecua-asiwayaniwanua pecuexanetsijawa, pewetsiwiwiyajuwënëjiwi itsa xaniawaetsia apoponaponaenë Dioso pitabarata. Taema 2Pd 3:17; Mt 24:24; Hch. 17:11; 2Ti 2:15; Efe. 4:11-16; Gál. 6:1-3; 1Pd 5:2-3. **u 20:29** *pianaepanaelobomonaenë:* Lobomonaenë jëpa benamo. Itsiata, pecunuanënë, pianaepanaenë-ata. Bajarapamonae apocueniejëpae newëthëmonae, tsipaji jinawanapa pepobitsaëto. Taema lobo glosariojawata.

pawaibeje, caematacabi canacujitsia, merawi yajawa-ata, apocopatsinë patacamuxujiobijawa pacaewiwimë canacujitsia, bitso pataca-asiwaxae! Itsajawata, ya-itaxutonueya pacamuxujiobabiabatsi. Pacuenia xanë pacato-exanatsi, bajarapijinia pacuenia pa-ewetawanapaename Jesús pijajiwi —jai Pablo Éfeso tomarapiji-ancianowijawabelia.

³² Icatsia, Pablo jumaitsi:

—Tajamonae, nexata baja pacacopatatsi Dioso pecobeyabelia, papeca-ewetsinexa. Pacatocopatatsinua Dioso wajanaca-asiwajawa wajanacayapëtaeya-exanaeliwaisijawabelia, papecajamatabëcueneyawenonaenexa caematacabi canacujitsia xaniawaetsia panejinawanapaejawa. Bajarapaliwaisi panejumexaniataejawata, pacajamatabëcuenenaweretsia-exanaponaena Dioso pijacuenejawata. Pacajamatabëcuene-asaëya-exanaenanua Diosojawabelia. Nexata, bajarapaliwaisi pejamatabëcueneta, itsamatacabijawabelia pacabarëyamë tsane daxita xua Dioso toxaina^v perajutsinexa pamona aneonijibia tane. ³³ Xanë itsa naponaponajë paxamëjawata, aponajamatabëxainaenë tanaxainaeyabinexa^w itsanë pijapalata, penaxatabijawa-ata. ³⁴ Biji rajane, payapëtaneme tajacuata tanacuenebijawa, tanamatawenonaejawaxi tanatocomuataponaenexa, tayajawaponaponaewi-ata tatocomuatsinexa. ³⁵ Bajarapacuenia ta-exanaejawata, pacatsitanacuene-itajëtatsi baja cajena paxamë-ata pacuenia bepanacuenebame, paneyawenonaenexa itsamonae bitso bepejiobiwi. Bepanajamatabënapitame xua wajatuxanenë Jesús jumaitsi bajaraxua yabara. Jumaitsi: «Bitso jamatabëcuenebarëya tsane itsamonaejawabelia perajutabiabiwi,^x pepitsijiwiwecua itsajiwi perajutsijawatsi», xua jai Jesús —jai Pablo ancianowijawabelia.

³⁶ Itsa baja, Pablo najumewereta bajarapacuenia petsipaebijawa, daxita ancianowi pematabacabëta barënuca, pebarënawajëtsinexa Diosojawabelia. ³⁷ Bajaraxuacujinae, Pablo peponaewajënaeya, ancianowi nua ayaicuenia. Nexata, Pablo itsa napëjioba, bajarapamona ya-itaxutonueya waetabiaya itabaratsutsunepontsi. ³⁸ Bitso najamatabëxaina, tsipaji Pablo jumaitsi: «Apopanetaemë rabaja tsane matawëjëa», jai. Bajaraxuacujinae, bajarapamona Pablo pënxuabaliatsi barcojawabelia.

Pablo pona Jerusalén tomarabelia

21 ¹ Itsa baja, panapëjiobiweretajë ancianowi, Éfeso tomarapijiwi, Mileto tomarata, panarunarecajë baja barco ënëabereca, patanaponaenexa rowialia Cos tomarabelia. Bajaraxuacujinae, merawia pitsijawata, panapatajë abaxë epatua Rodas tomarata. Bajaraxuacujinae, abaxë icatsia panapatajë Pátara tomarabelia. ² Bajarapatomarata icatsia pacaxitajarabajë itsabarco, pamo ponaejitsia Fenicia nacuayabelia. Bajarapamota icatsia panaponajë jane baja. ³ Nexata, patanajetarubenaejawata, pataeyetajë patatsawenononia Chipretunaeto. Rowia panajetarubenaë Siria nacuayabelia. Nexata itsa baja, papatajë Tiro tomarata, Siria nacuata pe-ecaetomara,

^v 20:32 *toxaina*: Rom. 8:17; Gál. 4:7; Tit. 3:7; Heb. 9:15; 1Pd 1:4. ^w 20:33 *aponajamatabëxainaenë tanaxainaeyabinexa*: Baitsi, Pablo namatawenonae-ata itsacuenejawawa, apowajëcae bajarapamonaejawabelia. Pablo saya eweta Dioso perajutsinexatsi, itsamonaejawabelia wajëcae-nejewa, itsa jume, pijacuata nacueneba penatocomuatsinexa penamatawenonaejawanë. Taema 1Co 9:12-18; 2Co 7:2; 11:9; Flp. 1:7; 4:14-16. ^x 20:35 *perajutabiabiwi*: Taema Lc 6:38.

bajarapamo pecanajetarubenaewi bajarapatomarata juca-othopa abaxë bajarajota. ⁴Tiro tomarata pacaxitajarabajë Jesús pijacueene penacujarubiwi. Nexata, bajarapamonaewawata panajinawanapajë siete pamatacabibeje, barco abaxë pewecuajucae-epato. Bajarapamonaë Espíritu Santo pejamatäbëcueneta yapëtaeya-exanatsi Pablo pebejiobia-exanaejawanexatsi Jerusalén tomarata. Picani asaëyata muxujibatsi peponaeyaniwa bajarabelia, pitsacueniabiyaniwatsi.

⁵Itsiata baja, icsia siete pamatacabibejecujinae panaropobajë. Nexata, bajarapatomarapijiwi panepënaponalia pewëpajawabelia, patanepëtaenexa pataponaewawa. Nexata, mene-itapatalia, pataponaewajënaeya, tajetabota daxita Jesús peliwaisi pejumexaniataewi, pijawajiwi, pexi-ata yajawa, panubenajë patamatabacabëta, patawajëtsinexa Diosojawabelia. ⁶Patana-pëjiobijawata nawëwaetabiaya namata-enetsia panapëjiobaponajë. Bajaraxuacujinae baja, panarunarecajë barco ënëabereca. Bajarapamonaë pijinia nawiabaponalia pijabonëjawabelia.

⁷Tiro tomarata patananaropobicujinae, panapatajë Tolemaida tomara-belia. Bajarapatomarata pabajacobajë Jesús peliwaisi pejumexaniataewi. Bajarapamonaewawata panajinawanapajë caematacabi. ⁸Merawia icsia pitsijawata paponajë Cesarea tomarabelia. Bajarapatomarata patapatsicujinae, panapatajë Felipe pijabota, Jesús peliwaisi petsipaebinë jiwijawabelia. Bajaraponë siete ponëbeje diáconowiyajuwënëñë,⁹ copiaya pitapetsiwi Jerusalén tomarata. Nexata, bajaraponë pijabota panajinawanapajë. ⁹Felipe xaina cuatro powabeje pexi, abaxë apopenacojiobiwaxi. Bajarapowaxi tsipae-babiaba jiwijawabelia paliwaisi Espíritu Santo jamatabëcuenecaëjëpaeya-exanatsi. ¹⁰Itsa baja, paxainajë anijamatacabianë Felipe pijabota patana-patsicujinae, Judea nacuaawerena pata Diosojumepaebinë, profeta Agabo. ¹¹Bajaraponë pata paxanëjawaberena. Nexata, Pablo pijacorreabocoto we-epajonotatsi. Bajarapabocotota nacobecëtabeje. Nataxucëtabeje yajawa. Nexata, Agabo jumaitsi:

—Espíritu Santo raja neyapëtaeya-exana mapacueniaje: «Jerusalén tomarata pamonaë judíowi jinawanapa, mapacorreabocoto pexinaenëje cëtsianatsi bajarapacuenia. Bajaraxuacujinae, apojudíowi pecobeyabelia copatsianatsi», nejai raja Espíritu Santo —jai Agabo Pablo yabara.

¹²Nexata, itsa pajumetaniji bajarapacuenia Agabo patanetsipaebijawa, paxanë patayanatsiwi, Cesarea tomarapijiwi yajawa, panacobena-asiwanë picani Pablo peponaeyaniwa Jerusalén tomarabelia.

¹³Itsiata, Pablo panejumaitsi:

—¿Detsa xuajitsia panuame? Bajarapacuenia itsa pa-exaname, bitso panenajamatabëxainaeya-exaname. Aponasiwabëjanë bajarapacuenia tane-exanaejawanexa. Biji rajane, aponacaewetsinë tsane ëtanecëtsijawanexa. Nacaewetsianajënuu tanebeyaxuabijawanexa Jerusalén tomarata, wajatuxanenë Jesús peliwaisi yabara —panejai Pablo.

¹⁴Pa-asiwa-atanë tsabiabi, Pablo itsiata aponajamatabëcopatsi peponaejawa Jerusalén tomarabelia. Nexata baja, belia pacopatajë pata-asiwatsabiabijawa.

Pajumaitsinē nexata:

—Pacuenia Dioso tojitsipatsi pexanaenexatsi, be-exanaenatsi baja
—pajanē.

¹⁵Caematacabibecucujinae, paxaniawaetajē patacobecowējawaxi. Nexata jane baja, panaropobajē Jerusalén tomarabelia. ¹⁶Itsamonae Jesús pijacuene penacujarubiwi, Cesarea tomarapijiwi, paneyanalia. Bajarapamonae panebarēpona Mnasón, Chipretunaeto nacuapijinē, pijaboyabelia, itsajota panajinawanapaejitsianē Jerusalén tomarata. Bajaraponē copiaya Jesús peliwaisi pejumexaniataewiyajuwēnēnē, pamatacabijawa jiwi taxuxuaba Jesús peliwaisi pepaebanajetarubenaejawa.

Pablo barēcuaiuaijai Santiagojawabelia Jerusalén tomarata

¹⁷Itsa papatajē Jerusalén tomarabelia, Jesús peliwaisi pejumexaniataewi panecopiapiṭa jamatabēcuenebarēyaya. ¹⁸Nexata, merawia pitsijawata, Pablo panebarēsiwaxaina Santiagojawabelia. Bajaraponē pijabota na-ena daxita ancianowi. ¹⁹Nexata, Pablo bajarapamonae bajacoba. Bajaraxuacujinae, nawajunupaebapona daxita pacuene Dioso exanapona apojudíowijawa, Pablo pejamatabēcuene. ²⁰Itsa bajarapacuenia jumetane, nexata Santiago, ancianowi yajawa, jamatabēcuenebarēya. Nexata, bajarapamonae wēnēxaniata Dioso pexanaecuene yabara. Bajaraxuacujinae, Santiagobana jumaitsi Pablojawabelia:

—Patajabanānē, yapētaneme baja cajena mapacuenēje. Judíowi bitso ayaibitsaētoxaneto, miles pajiwiḃeje, Jesús peliwaisi pejumexaniataewi tsawanapae. Itsiata, abaxē bajarapamonae tsiteca jumecowēnētawanapa Dioso penajumecopatsiliwaisi Moisés-pijinēta. ²¹Bajarapamonae raja, jumetane xamē netsipaebiliwaisi yabara. Najumetsēnētsiaya itsamonae judíowi, pepatsiwi panacuawerena xamē tsipaebanajetarucame, mapacuenia pejumaitsiyawaje: «Itsa raja Pablo liwaisi tsipaebapona judíowijawa, itsanacuanējawa pejinawanapaewi, bajaraponē itawetabiaba judíowi, pecopabinexa Dioso penajumecopatsiliwaisi Moisés-pijinēta pejumecowēnētsijawami, pecopabinexa pebo-upiperabēcaucubijawa pexi, pecatsitecaeyaniwanua wajasalinaíwi pijacuene», jai tsabiabi bajarapamonae najumetsēnētsiaya xamē yabara.

²²»Bajaraxua yabara xamē liwaisi natsixainame bajarapamonaejawabelia. ¿Detsa nexata paxanē pa-itsinē tsane, itsa bajarapamonae cawēnēliwaisitane nepatsijawa? ²³Liwaisiyaniwa pajitsipajē ne-exanaejawa mapacueniaje. Majotaje cuatro ponēbeje jinawanapa, paxanējajuwēnēwi, penajamatabēcueneweretsiwi najumecapanepaeya penajumecajonenexa Diosojawabelia, nazarenocuenia pejinawanapaenexa.^{*} Nexata, bajarapamonae ponaejitsia temploboyabelia, pexanaenexa judíowitsi wajanacato-caējētsicuenia Dioso penajumecopatsiliwaisi Moisés-pijinēta. ²⁴Nexata, xamē bajarapamonae barēponaename temploboyabelia. Bajarajotalia barē-najamatabēcuenexaniawaetsianame niajamatabēcuenesaēnexa Diosojawabelia. Tomatamotsianamenua bajarapamonae daxita xua wajēcaejitsiatsi bajarapacuenia pexanaenexa, daxitamatanāmi pematacasibīnexatsi-ata,

penajamatabëcuene-itajëtsinexa penacajonejawa Diosojawabelia. Daxita bajarapacuenia itsa barë-exanaename, nexata daxita judíowi cayapëtaena xaniawaetsia nejumecowënëtsijawa Dioso penajumecopatsiliwaisi Moisés-pijinëta. Yapëtaenanua najumetsënëtsiaya pecabaracuaicuajaitsabiabijawa pajudíowi jume-aeba Jesús peliwaisi.

²⁵ »Xua ajena paca-itorobatsi, apojumaitsinë apojudíowi pexanaenexa bajaraxua. Bajarapamonae tsicarucatsi pexanaenexa saya pacuenia patoya-quinajë^a apojudíowi, Jesús peliwaisi pejumexaniataewi. Bajarapabaxutota pajumaitsinë mapacueniaje: «¡Pëtsa paxaneme jumapecataeya pexanaenëa-nëjawabelia ofrendacuenia perajutsiyajuwënëwijawanë, pejajawanë, cuaibocuetsanaeya pebeyaxuabinë pewijawanë-ata! ¡Pëtsa pibisiacuene panewitota pa-exaname paxamë apopenenacojiobiwi! ¡Paxamë pijinia panenacojiobiwi-ata, pëtsa pibisiacuene panawecua-exaname panewitota itsajiwijawabelia!», pajanë patatoyaquinaejawata apojudíowijawabelia, pecatsitecaeyaniwa judíowitsi daxita wajajumecowënëtsicuene —jai Santiagobana Pablowawabelia.

**Pablo templobota waetabatsi, penaneconitsiwi
pejebabiabibota pe-etsinexatsi**

²⁶ Santiagobana pitorobicueniatsi, merawia pitsijawata, Pablo barëpona cuatro ponëbeje temploboyabelia. Templobo pejonejawënaeya, barënajamatabëcuenexaniawaeta. Bajaraxuacujinae, Pablo temploboyalia barëjoneya, petsipaebinxsa sacerdotewijawabelia pamatacabibeje jinawanapaejitsia nazarenowicuenia. Yapëtaeya-exananua dajubi rajutsiaya petotajuitsinexa altar-jumata Diosojawabelia, petowerewerecaematacabitsi nazarenowicuenia pejinawanapaejawa. Nexata, picani, daxita bajaraxuanë Pablo cobecowëmatamotsijitsia pecanajetsiwiawabelia. ²⁷ Pepuaweretanajetarubenaë baja siete pamatacabibeje, nazarenowicuenia pejinawanapaejawa, Pablo jane baja, cuatro ponëbeje, barëpata templobota, Diosojawabelia rajutsiaya petotajuitsinexa dajubi altar-jumata. Bajarapitsijawata Pablo tanetsi judíowi, Asia nacuwereña pepatsiwi. Bajarapamonae peliwaisita anaeya-exanapona daxita Jerusalén tomarapijiwi, planaepanaenexa Pablowawabelia. Nexata, daxita bajarajota penacatuatsiwi, judíowi, nacobenawaetabatsi Pablo.

²⁸ Nexata, bajarapamonae wawajai pinijijumeta. Najumetsënëtsiaya jumaitsi:

—Tajamonae judíowi, ¡naxatsia, paneyawenonare! Maponëje dexitanacuanëjawa liwaisi tsipaebanajetaruca apowajanacanatsixanepanaeliwaisicuenia, apojudíowi wajanaca-itoyanexa waxaitsi judíowitsi. Itawetaponanua Dioso penajumecopatsiliwaisi Moisés-pijinëta jiwi pejumecowënëtsiyaniwa. Mapatemplobo-ataje apoyaiyatae, tsipaji apojudíowi-ata barëjoneyabiaba^b

a 21:25 *patoyaquinajë*: Taema Hch. 15:20, 28-29. **b 21:28** *apojudíowi-ata barëjoneyabiaba*: Dioso penajumecopatsiliwaisi Moisés-pijinë itaweta pejoneyaniwa templobojawabelia, pamonaë apopenabo-upiperabëcaucubiwi, jumapecataeya pexanaenëanëjawabelia penawajëcabiabiwi, pexaewinua Dioso pejani-itawetsinëanë, bepenaxuirabiwicuenia petaeanyiwatsi. Nexata, apojudíowi penaneconitsixae bajarapapitawetsijawanë yabara, apotoxanepanaetsi pejonejawa Dioso pijatemplobojawabelia. Baitsi, Dioso pijatemplobo itsa nacopatsipa bepenaxuirabibo Dioso pita-barata, apojudionë pejonexae, nexata daxita papewajëcaejawanë bajarapatemplobota, Dioso amuxijitsibi tsipae peyawenonaeyaniwa, daxita dajubi petotajuitsijawa-ata ataejitsibi tsipae, aneconijibia petaeanyiwatsi.

mapatemploboyarenaje. Bajarapacuenia pexanaexae, mapatemploboje bepe-naxuirabibocuenia nacopata Dioso pitabarata. Bajaraponē cajena pexanae-cuene abeje —jai najumetsēnētsiaya judíowi Pablo yabara.

²⁹Bajarapacuenia wawajaiya jumaitsi, tsipaji baja copiaya bajarapaju-díowi Pablo tanetsi pebarēponaponaejawa Jerusalén tomarata, apojudíonē, Trófimo, Éfeso tomarapijinē. Nexata, bajarapamonae jamatabējumaitsi: «Pablo raeta apojudíonē barējuna mapatemploboyarenaje», jamatabējai Trófimo yabara. Itsiata, Pablo cajena apobarējone Trófimo temploboyalia.

³⁰Nexata, Asia nacuawerena pepatsijudíowi, bajarapacuenia Pablo yabara penajumetsēnēsixae, daxita Jerusalén tomarapijiwi, bitso bara-anaepanatsi. Nexata, daxita bajarapamonae tsimaxēparenatsi pewaetabine-xatsi. Robocatsi wayafuabelia templo-ēnēwecua, pebeyaxuabinexatsi picani. Nexata, templobo pewetsiwi baupaxanetonē bepíjia wecuabaupa-xataba, pianaepanaewi pejoneyaniwa. ³¹Paepatota picani bajarapamonae Pablo beyaxuabijitsiatsi, bajarapaepatota itsamonae tsipaeba wajabitsaē pepopewetsinē, comandantejawabelia, pacuenia daxita Jerusalén tomara-pijiwi bitso anaepanawanapa. ³²Nexata, comandante bepíjia barēlia píja-jiwi wajabitsaēwi, wajabitsaēwi pijacapitánwi³ yajawa. Cujinaejina jiwi penacactuatsijawabelia. Nexata, judíowi itsa tane comandante wajabit-saēwi pebarēpatsijawa, copaba baja pebejawatsi Pablo. ³³Nexata, coman-dante Pablo cujirenatsi. Waetabia-exanatsi pijajiwi. Nexata, itoroba pijajiwi Pablo pecētsinexatsi anijacadenamaētotabeje. Bajaraxuacujinae, yanijoba judíowijawabelia.

—¿Detsa maponēje? ¿Detsa xuanua exana maponēje? —jai comandante.

³⁴Nexata, bajarapajiwi bitsaētoxanetonēyajuwēnēwi comandantejawabelia najuatsipaebanubena pinijijumeta, itsiata caeliwaisicuenia aponeconitsitsi Pablo. Nexata, comandante apojumetae xaniawaetsia, bitso jiwi penajuawa-wajaixae. Nexata, comandante itoroba wajabitsaē Pablo pecaponaenexatsi wajabitsaē pijaboyabelia. ³⁵Pablo capatatsi wajabitsaē pijabo-itapata. Baja-rapabo pepēnēwelía xaina be-escalercuenia pexanaejawa. Nexata, bajara-jota Pablo wajabitsaē nacobenayotsiaya cajunayatsi, wajabitsaē pijaboyalia pecajonenexatsi, tsipaji icatsia bajarajota picani Pablo jiwi bejitsiatsi, bitso pianaepanaexae. ³⁶Jiwibitsaētoxanetonē Pablo barabocabuataponatsi. Wawajai tsabuataponae bajarapamonae.

—¡Pabeyaxuare! —jai tsabuataponae Pablo yabara.

Pablo nawajunupaeba judíowibitsaētoxanetojawabelia

³⁷Itsa baja Pablo wajabitsaēwi pijaboyalia cajonejitsiatsi, nexata Pablo griegojumeta jumaitsi comandantejawabelia:

—¡Netocopare tacatsipaebinexa caejumeyo! —jai Pablo.

Nexata, comandante jumaitsi:

—¿Xamē tsaja cuaicuaijamē griegojume? ³⁸¿Xamē tsaja apo-Egipto nacuapijinēmē? ¿Xamē tsaja imata jiwi aponenamatacaitorobinē,

c 21:32 *pijacapitánwi*: Wowaijumeta, «centuriones». Caecenturión canacujitsia namatacaitoroba-biaba cién ponēbeje wajabitsaē. Nexata, comandante yajawapata 200, itsa jume, 300 ponēbeje wajabitsaēwi.

pianaepanaenexa gobiernojawabelia? ¿Xamë tsaja imata penamaxëwanit-siwi cuatro mil ponëmaxëto apobarënajetabijirawimë petusatonacuayabelia? —jai comandante Pablojawabelia.

³⁹Nexata, Pablo jumaitsi:

—¡Jume raja! Xanë raja saicaya judíonënë, Tarso tomarapiji-nënë. Bajarapatomara cajena pinijitomara, daxita Cilicia nacuada pe-enaetomaranëwecua. ¡Pexaniacuene neto-exanare! ¡Netocopare liwaisi tatsipaebinxeta mapamonaejawabeliaje! —jai Pablo.

⁴⁰Nexata, comandante tocopatatsi liwaisi petsipaebinxeta. Pablo penu-caenë wajabitsaë pijabo pepënëwelia be-escaleracuenia pexanaejawajumata, nacobeyota jiwi pemoyanexa. Nexata baja, jiwi itsa moya, Pablo nawajunu-paeba bajarapamonaejawabelia hebreojumeta.

22 Pablo jumaitsi Jerusalén tomarapijiwijawabelia:

¹—¡Paxamë patajawiriawimë, paxamë-ata wajanacua pane-ewetsiwi, panenamuxuna-ewere! Wepacanawajunupaebatsi daxita ta-exanaecuenia yabara —jai Pablo hebreojumeta judíowijawabelia.

²Bajarapajudíowi itsa jumetane paliwaisi Pablo tsipaeba hebreojumeta, nexata bitso ajumebibia namuxuna-ewetena. Nexata, Pablo icatsia jumaitsi:

³—Xanë raja judíonënë. Naexanajë Tarso tomarata, Cilicia nacuada pe-ecaetomara. Itsiata, witsabajë mapatomarataje, Jerusalén tomarata. Pecujarubinë Gamaliel-jawabelia xaniawaetsia nacujarubajë, paliwaisi Dioso najumecopata Moisés-pijinëjawabelia, daxita wajasalinaiwi pijacuene-ata. Bajaraxuata, bitso jitsipabiabajë picani asaëyata tajumecowënëtapo-naponaejawa ëbajarapaliwaisianë, pacuenia aeconoxae daxita paxamë-ata pajumecowënëtawanapame.

⁴»Xanë abaxë picani bajayata, barajinabiabajë pamonaë jumexania-tane paliwaisi wënërubatsi pejanaliwaisi. ^d Nexata, bajarapamonaeyajuwënëwi taicaponajë, pebijiwi, petiriawi-ata, tajibaponaenexa penaneconitsiwi pejebabiabibota. Jitsipajë picani pebeyejebinxatsi daxita pejumexaniataewi bajarapaliwaisi. ⁵Bajaraxua ta-exanaecuenemi yapëtane sacerdotewi pepopenamatacaitorobinë, daxita judíowitsi waja-ancianowi-ata. Nexata, itsa payanijobijitsipame, pacatsipaebijitsipa pacuenia baja xaniawaetsia pacanawajunupaebatsi. Orijibia, bajarapamonaejawabelia wajëtajë tanetsicobeyaquinaenexa, bajarapabaxuto tatocaponaenexa pamonaë judíowi jinawanapa Damasco tomaratalia, tanetocopatsinexa picani pejanaliwaisi pejumexaniataewi, tataicaenexa. Nexata jane baja, picani lianë tataicaenexa daxita bajarapaliwaisi pejumexaniataewi, pejinawanapaewi bajarapanacuatalia, tacapatsinexa picani maberenaje Jerusalén tomaraberena, pamonaë pewetsiwi penaneconitsia-exanaenexatsi —jai tsanucae Pablo judíowijawabelia.

d 22:4 wënërubatsi pejanaliwaisi: Pablo yapëtane judíowi pitoyajawa Jesús peliwaitsi. Nexata, xaniawaetsia penamuxuna-ewetsinexatsi apowënërubí Jesús peliwaitsi. Biji rajane, wënërubapajanaliwaisi jiwijumeta, wowaijumeta pijinia «seguidores del Camino». Jesús pewënë-ata apocuaicuaijai penawajunupaebijawata judíowi pianaepanaejawata. «Petuxanenë», itsa jume, «pepopetuxanenë», jai tsabiabi judíowi matatoxenetsia pianaepanaeyaniwa.

**Pablo nawajunupaeba pacuenia taxuxuaba Jesús
peliwaisi pejumexaniataejawa
(Hch 9:1-19; 26:12-18)**

⁶Pablo icatsia jumaitsi judíowijawabelia:

—Nexata jane baja, Damasco tomarabelia tanajetarucaenë, itsa baja imoxoyotanajetarucajë bajarapatomara, jemata matoneje-epatota, pini-jicotia nematatoyorotsia naitayota athëbëwetsica. ⁷Nexata, bajarajota bocajunuajë irata. Jumetaenucajë athëbëwetsica tanejumaitsiyaw: «Saulo, Saulo, ¿detsa xuajitsia neliwaisibarajiname, tajajiwi tanetobejiobia-exanaponaejawatamë?», tanejaijawa. ⁸Nexata, xanë jumaitsinë: «Tajatuxanenë, ¿detsa ponëmë?», janë. Nexata, icatsia nejumaitsi: «Xanë raja Jesúsne, Nazaret tomarapijinënë, ponë xamë liwaisibarajinapona», nejai. ⁹Papebi-jiwi yajawanajetarucajë, tane baja cajena athëbëwetsica penaitayotsicotia. Itsiata baitsi jane, apojumetae xua yabara nebarëcuaicuajai athëbëwetsica.

¹⁰»Nexata, xanë jumaitsinë: «Tajatuxanenë, ¿detsa xua nexata exanae-najë?», janë. Nexata, petuxanenë nejumaitsi: «¡Nonotapunare baja! Ponae-name baja Damasco tomarabelia. Bajarajotalia itsanë^e catsipaebiana pacuenia exanaejitsiamë», nejai. ¹¹Nexata, bajarapacotia tataecujinae bitso nitaxuto-merawiba. Aponecaëjëpae tataejawa. Nexata saya, tayajawaponae wi necomacaponalia Damasco tomarabelia. ¹²Bajarajota, Damasco tomarata, ponapona Ananías, Dioso penajumecopatsiliwaisi Moisés-pijinëta bitso pejumecowënëtsinë. Bajaraponë daxita judíowi, Damasco tomarapijiwi, bitso peyaiyataenëtsi. ¹³Nexata, Ananías xanëjawaberena pona tanetaenexa. Bajaraponë pepatsijawata nejumaitsi: «¡Tajabananë Saulo, icatsia rabaja itaxutoxanepanare!», nejai. Bajarapaepatota, tanejumaitsiyawata, icatsia baja itaxutoxanepanajë. Nexata, taniji Ananías. ¹⁴Nexata, icatsia bajaraponë nejumaitsi: «Wamojiwimi rabaja pijaDioso ca-itapeta, neyapëtaenexa pacuenia catojitsipa neto-exanaenexa. Ca-itapetanua netaenexa Ponë pepopianeconijibinë^f Dioso pitabarata, nejumetaenexanua bajaraPonë pecatsipaebiliwaisi.^g ¹⁵Bajarapacuenia ca-itapeta daxitanacuanëpijiwijawabelia netsipaebanajetarucaenexa pacuenia taneme, pacuenia-ata jumetaneme bajaraPonë peliwaisi. ¹⁶¡Pëtsa cuenenajematame! ¡Nonotapunare! Cabautizabianatsi. Petuxanenëjawabelia nesiwanajamatabë-cuenecopatsixae, daxita pibisiacuene nexanaeconimi Dioso cawecua-ajibia-exanaena», nejai Ananías —jai Pablo judíowijawabelia.

**Pablo nawajunupaeba pacuenia Dioso itorobatsi Jesús
peliwaisi petsipaebanajetarucaenexa apojudíowijawa**

¹⁷Pablo icatsia jumaitsi judíowijawabelia:

—Bajaraxuacujinae, Damasco tomarawerena nawiarenajë baja Jeru-salén tomaraberena. Nexata, itsa patajë Jerusalén tomarata, ponajë

e 22:10 itsanë: Jesús barëcuaicuajai Pablojawabelia. Nexata, cuenecaëjëpatsi picani pijacuata penawajunupaebijawa pacuenia siwatëpa, petomatamotsinexatsi pijaneconi pexainaejawa Dioso-jawabelia. Itsiata, bajarapacuenia apo-exanae. Biji rajane, tocopata jiwi, pewajunupaebinxatsi pewënajiwijawabelia. **f 22:14 Ponë pepopianeconijibinë:** Jesús yabara picani. Itsiata, Pablo apocacuaicuajai Jesús pewënë, bajarapamonae pianapanaeyaniwa. **g 22:14 bajaraPonë pecatsipaebiliwaisi:** Taema Gál. 1:11-18.

templobojawabelia, tawajëtsinexa Diosojawabelia. Tawajëtsijawata, taniiji bemajitsinaebota petuxanenë. ¹⁸Nexata, bajaraPonë nejumaitsi: «¡Naxat-siayo! ¡Bepijia wecuaponare Jerusalén tomara, tsipaji raja mapatomarapiji-wije nepaebiliwaisi apocajumexaniatae tsane xanë yabara!», nejai petuxanenë bemajitsinaebota. ¹⁹Nexata, xanë jumaitsinë: «Tajatuxanenë, judfowi xaniawaetsia baja cajena neyapëtane, xanë tataicaponaejawa daxita sinogabonëjawa pamonaе casiwanajamatabëcuenecopaba xamëjawabelia, pena-neconitsiwi pejebabiabibota tananeconitsia-exanaponaejawa. Yapëtanenua bajarapamonaе taconibabeyabiabinexa naebota. ²⁰Bajarapamonaе neyapëtanenua, xanë-ata tajamatabëcuenejëpaejawa, tataenucaejawa pamatacabi Esteban-pijinë, pecaliwaisipaebinëmi, beyaxuabatsi. Pamonaе Esteban-pijinë beyaxuaba, penajumajonejebijawanë to-ewetanucajë», janë petuxane-nëjawabelia. ²¹Nexata, petuxanenë nejumaitsi: «¡Ponare itsiata baja Jerusalén tomarawecua, tsipaji raja ca-itorobijitsiatsi itsanacuanëpijiwijawabelia, apojudfowijawabelia, taliwaisi tanetotsipaebinexamë!», nejai Petuxanenë —jai Pablo judfowijawabelia.

**Pacuenia wajabitsaë pijacomandantenë Pablo
picanı jamatabëneconitsia-exanatsı**

²²Judfowi namuxuna-ewetatsi picanı Pablo penawajunupaebijawa. Itsiata, itsa jumetane penawajunupaebijawa Dioso pitorobijawatsi apojudfowijawa, nexata bajarapamonaе wawajai pinijijumeta. Jumaitsi tsaponaе:

—¡Maponëje pabeyaxuare! ¡Mara pitsinë apobecopatsitsi cajena pepona-ponaenexaje! —jai tsaponaе Pablo yabara.

²³Bajarapamonaе pewawajaitsanubenaеjawata, pijacamisajumawelia penaxatabijawanë, webabia pianapanaejamatabëcuene. Atsabenonë athë-bëabetsia cayajabajarabanua, bitso pebara-anaepanaexae Pablowawabelia.

²⁴Bajaraxua petaejawata, wajabitsaë pijacomandantenë, pijajiwi itoroba Pablo pecajonenexatsi pijaboyalia, pejumaconibabenexatsi penaneconitsiwi peconitabiabimacata, Pablo penawajunupaebinexa xua yabara judfowi neconitsiaya pinijicuenia wawajai tsaponaе. ²⁵Nexata jane baja, Pablo itsa cëte-tatsi wajabitsaë, picanı pejumaconibabenexatsi, peyanijobijawata jumaitsi wajabitsaë pijacapitán-jawabelia:

—Xanë raja Romano nacuapijinënë. ¿Paxamë tsabaja Romano nacua pewetsinë pacatocopata, Romano nacuapijinë-ata, panejumaconitsinexa pijaneconi pexainaejiwi, itsa jume, pijaneconi apopexainaejiwi-ata, xania-waetsia patoyapëtaenewamë xua yabara naneconita? —jai Pablo wajabit-saë pijacapitán-jawabelia.

²⁶Capitán itsa jumetane bajarapacuenia Pablo pejumaitsijawa, cujunawa bitso Romano nacua pewetsinëjawabelia. Nexata, lia wajabitsaë pijacomandantenëjawabelia. Jumaitsi:

—¡Xania baja tsane, xua exanaejitsiamë Pablowawabelia! Maraponë tsaena Romano nacuapijinëje —jai capitán comandantejawabelia.

²⁷Nexata, comandante rena Pablowawaberena. Jumaitsi:

—¿Xaniajai tsabaja? ¿Xamë Romano nacuapijinëmë? —jai.

—Jājā —jai Pablo.

²⁸Nexata, comandante jumaitsi Pablowawabelia:

—Xanë-ata baja maparucaeje Romano nacuapijinënë naexanaxjē, tsipaji baja matamotajē ayaimatamota, bepepoRomanonacuapijinënë tanaexanae-nexa —jai comandante. Bajarapacuenia jumaitsi, tsipaji comandante saicaya nacuata penaexanaenē.

Pablo nexata jumaitsi comandantejawabelia:

—Xanë apomatomotsinē bepepoRomanonacuapijinē tanetaenexa, tsipaji baja cajena pepoRomano nacuapijinënë, tanaexanaexae Romano nacuata —jai Pablo comandantejawabelia.

²⁹Nexata, picani pawajabitsaē Pablo jumaconibabejitsiatsi, wecuaponatsi baja. Wajabitsaēwi pepopewetsinē-ata, comandante, Pablo cujunawatsi itsa yapētanetsi Romano nacuapijinēcuene. Cujunawatsi pecētsiaexanaexaetsi cadenamaētonēta, copiya neconitsinejewatsi juez-monae pitabarata.

Pablo nawajunupaeba daxita judíowi pewetsiwi pitabarata

³⁰Pablo penawajunupaebicujinae Romano nacuapijinēcuene, merawia pit-sijawata, wajabitsaē pepopewetsinē, comandante, jamatabēyapētane xania-waetsia paneconi yabara judíowi neconitsijitsiatsi Pablo. Nexata, pijajiwi itoroba Pablo pewecua-isinaenexatsi cadenamaēto. Bajaraxuacujinae, junata sacerdotewi penamatacaitorobiwi, judíowi pija-ancianowi-ata, judíowi pecujarubiwi-ata yajawa, penacaetuatsinexa. Nexata, caponarenatsi Pablo, penutsinexatsi daxita penacaetuatsiwi pitabarata.

23 ¹Nexata, Pablo naēcotsiaya penacaetuatsiwi jawabelia, jumaitsi:

—Tajamonae, xaniawaetsia cajena ponaponabiabajē, najamatabēcuenebijianaenejewanē Dioso pitabarata, mapamatacabijawaberena-ataje —jai Pablo.

²Nexata, Ananías, sacerdotewi pepopenamatacaitorobinē, itoroba Pablo pimoxoyotanubenaewitsijawabelia, pe-upipacabiauxuabinexatsi.

³Nexata, Pablo jumaitsi Ananías-jawabelia:

—Dioso rajane juya, pepacuene xamē ca-upipacabiauxuabiana, benianeco-nijibinē nenataexae, nijaneconi xainae-atamē. Xamē majotaje ecame picani tanenaneconitsia-exanaenexamē, pacuenia itoroba Dioso penajumecopatsiliwaisita Moisés-pijinēta. Itsiata, apojumecowēnētsimē bajarapaliwaisi, nitorobijawata mapamonaeje tane-upipacabiauxuabia-exanaenexamē —jai Pablo Ananías-jawabelia.

⁴Bajarajota, penubenaewi jumaitsi Pablojawabelia:

—¿Detsa xuajitsia bajarapacuenia anaeya jumaitsimē? Bajaraponē raja Dioso pijajiwitonē, sacerdotewi pepopenamatacaitorobinē —jai bajarapamonae Ananías yabara.

⁵Nexata, Pablo jumaitsi bajarapamonaejawabelia:

—Tajamonae, xanē apoyapētaenē Ananías sacerdotewi pepopenamatacaitorobinēcuene. Itsa yapētaejitsipajē, apojumaitsinē tsipae bajarapacuenia, tsipaji Dioso pejumeliwaisibaxutota jumaitsi mapacueniaje: «¡Pētsa pibisiacuenia jumaitsimē peca-ewetsinē!»,^h jai Dioso pejumeliwaisibaxutota —jai Pablo Ananías yabara.

⁶Nexata, Pablo xaniawaetsia penaëcotsijawataⁱ tane penacaetuatsiwi, anijabitsaëtobeje penubenaejawa bajarajota, saduceowi, fariseowi-ata. Jama-tabëcuenyapëtane caeliwaisi apopexainaejawa bajarapabitsaëtobeje Dioso peliwaisi pecujarubijawa yabara. Nexata, bajarapamonae namata-enetsia pebarënajumenotsinexa, Pablo pinijijumeta jumaitsi:

—Tajamonae, xanë raja fariseonënë pacuenia taxpijinë, tamojiwimi-ata. Nexata, pacuenia fariseowi jumexaniatane jiwi petëpacujinae Dioso icatsia piasaëya-exanaejawanexatsi, bajarapacuenia xanë-ata cujarubajë. Bajaraxua yabara baja majotaje neneconitsijitsia —jai Pablo.

⁷Bajarapamonae itsa jumetane bajarapacuenia Pablo pejumaitsiijawa, nexata najume-anaenota fariseowi, saduceowibeje. Bajarapamonae nexata apope-najamatabëcuenejëpaexae, anaeya bajarajota nawecuanatsana. ⁸Saduceowi jume-aebabiaba Dioso piasaëya-exanaejawanexatsi jiwi petëpacujinae. Jume-aebanua ángelewi pejinawanapaejawa, pamonae-ata waja-itaxutota apowajataecapanepaewi.¹ Fariseowi pijinia jumexaniatane daxita bajaraliwaisianë.

⁹Bajarapacuenia apopenajamatabëcuenejëpaexae, daxita bajarapamonae bajarajota pinijijumeta wawajai tsaponae. Nexata, pamonae judíowi pecujarubiwi, fariseowiyajuwëñewi, nonobapuna. Anaeya jumaitsi saduceowijawabelia:

—Itsacuen-ata cajena, pibisiacuen, apo-exanae maponë Pabloje. Xania-jai meta cajena, waja-itaxutota apowajataecapanepaewiyajuwëñëñë tsipaebatsi. Itsa jume, ángelnë meta tsipaebatsi. Paxanë nexata itsacuen-ata apopa-exanaenë tsane Pablo, Diosojawabelia patananeconitsiyaniwa —jai fariseowi saduceowijawabelia.

¹⁰Bajarapamonae pinijicuenia nabijataeya pewajënaeyabelia penajume-anaenotaponaexae, nexata wajabitsaë pepopewetsinë, comandante, cacujunawa Pablo pebeyaxuabiyaniwatsi petupatiticaecueniatsi. Nexata, comandante junata pijijiwi pesiwapatsinexatsirena, Pablo pejutsinexatsi bajarapamonaewecua, peca-ponaenexatsi caewëlia wajabitsaë pijaboyabelia. Bajarapacuenia exana baja.

¹¹Nexata, bajarapamerawi wajabitsaë pijabota Pablo peponaponaejawata, Jesús tsitanaitajëtatsi. Nuca Pablo pemuxuneneta. Jumaitsi:

—¡Jamatabëcuenesaëmëre newajënaeyabelia! Pacuenia tsipaebame xanë taliwaisi majotaje Jerusalén tomarata, bajara-icatsia pacuenia tsipaebia-name xanë taliwaisi Roma tomarata-ata —jai Jesús Pablojawabelia.

Judíowi jaitapona pacuenia beyaxuabijitsia Pablo

¹²Merawia pitsijawata, pepobajayacunua, itsamonae judíowi nacaetuata. Najamatabëjëpa Pablo jane baja picani pebeyaxuabinexatsi. Bajarapamonae

i 23:6 *penaëcotsijawata*: Saduceowi, fariseowi saicayacuenia naxatatabiaba, penajamatabëcuene-itajëtsinexa pecatsitecaecuen. Saduceowi cujarubabiaba jiwi petëpacujinae apopenamatacot-sijawanexa icatsia, petëpacujinae pepopiajibijawanexa. Fariseowi pijinia cujarubabiaba jiwi icatsia piasaëjawanexa petëpacujinae. Nexata, Pablo, fariseoliwaisijawabelia penacajonenë-mixae, nawëñëruba bajarapacuenia bajarajota penubenaefariseowi pejamatabëcueneyanabinexatsi. j 23:8 *waja-itaxutota apowajataecapanepaewi*: Bajarapajumebeje pitsapa, «espíritu», wowaijumeta. Espiritujumejawabelia nacajunua, Dioso pija-Espíritu Santo (Dioso pe-Espíritu), ángelewi, demoniowi (dowathimonae), jiwi pejumape – (pe-espíritu-ata). Baitsi, espíritu itsa jumaitsi wowaijumeta aponacayapëtaeya-exanae itsa pexaniajamatabëcueneñë, itsa jume, pibisiamatabëcueneñë. Nacayapëtaeya-exana saya waja-itaxutota apowajataecapanepaejawa, piasaëtsaponaponaenë-ata.

penajumecajonejawata, najumecapanepaeya najumaitsi: «Waxaitsi apoxae tsanetsi itsacuenejawayo-ata, mera-ata apo-apae tsanetsi, ewajabeyaxuabijawabelia Pablo. Bajaraxuacujinae jane baja, xaenatsi, mera-ata apaenatsi», najai bajarapamonae.

¹³Pamonae picani Pablo jamatabëbeyaxuabatsi, cuarenta ponëbeje pematatsënëa. ¹⁴Bajarapamonae pona sacerdotewi penamatacaitorobiwijawabelia, judfowi pija-ancianowijawabelia-ata, pebarëcuaiuaijainexa penacae-tuatenaewawata, peliwaisiyawenonaewawanexatsi Pablo pebeyaxuabinexa. Nexata, jumaitsi bajarapamonaejawabelia:

—Paxanë raja najumecapanepaeya panajumaitsinë pataxaeyaniwa itsacuenejawayo-ata, pabeyaxuabinejewanë abaxë Pablo. ¹⁵¡Nexata, bajarapacuenia pata-xanaenexa, paxamë panewënëta patoyaquinare wajabitsaë pijacomandantejawabelia, merawia papecatocarenanexa Pablo, bepaneniconicanaëjëbinexa itajara bajaraponë pijaneconi! Mapacuenia pajumaitsimë tsaneje: «Pajitsipajë icatsia matawëjëa patayanijobijawa Pablo, pijaneconi patayapëtaenexa xaniawaetsia, paneconi xaina», pajamë tsane. Nexata, paxanë epatotalia pawajënae-ewetsianajë Pablo, patabeyaxuabinexa patsinejewa maberenaje —jai bajarapacuaarenta ponëbeje, sacerdotewi penamatacaitorobiwi, judfowi pija-ancianowi, pecujarubiwijawabelia-ata.

Nexata, bajarapamonae jejai. ¹⁶Itsiaata baitsi jane, Pablo pematapijiwa pexënato jumetane Pablo pewajënae-ewetsiapaebijawatsi, pebeyaxuabine-xatsi picani. Nexata, bajaraponë pona wajabitsaë pijaboyabelia petsipaebinexa. Bajaraponë itsa pata, joneya bajarapaboyalia. Nexata, bajarapaliwaisi tsipaeba Pablojawabelia. ¹⁷Bajaraxuacujinae, Pablo junata caenë wajabitsaë pijacapitán. Jumaitsi:

—¡Barëponare mapapewëjëatoje papecanamatacaitorobinë, comandantejawabelia! Itsaliwaisiyo xaina petsipaebinexa —jai Pablo.

¹⁸Nexata, Pablo piopaxa, capitán barëponatsi wajabitsaë pijacomandantejawabelia. Nexata, capitán jumaitsi comandantejawabelia:

—Naneconitsia raja peponaponaenë Pablo nejunata. Nexata, nitoroba tabarëponaenexa mapapewëjëatoje xamëjawaberena, tsipaji pina catsipaebijsia itsaliwaisiyo —jai capitán comandantejawabelia.

¹⁹Nexata, comandante cobepitatsi pewëjëato. Barëliatsi pesaicayajawabelia. Nexata, jumaitsi pewëjëatojawabelia:

—¿Detsa pitsiliwaisi xainame tanetsipaebinexamë? —jai comandante.

²⁰Nexata, pewëjëato jumaitsi:

—Sacerdotewi penamatacaitorobiwi, judfowi pija-ancianowibeje, najamatabëcunejëpa pecawajëtsinexa merawia netocalianexa Pablo bajarapamonaejawabelia. Bajarapamonae cayamaxë-itojorobiaya cajumaitsiapaebi: «Pajitsipajë icatsia matawëjëa patayanijobijawa Pablo, pijaneconi patayapëtaenexa xaniawaetsia, paneconi xaina», pecajainexa bajarapamonae. ²¹¡Itsiaata, pëtsa jumecowënëtame bajarapamonae, tsipaji cuarenta ponëbeje pematatsënëa namuto-epatota namatayabiaya Pablo wajënae-ewetsiapaebatsi, pebeyaxuabinexatsi! Petonamatamotsinexatsi pebeyaxuabiapaebiliwaisi, bajarapamonae daxita najumecapanepaeya najumaitsi baja: «Apoxae tsanetsi itsacuenejawayo-ata. Mera-ata apo-apae tsanetsi, ewajabeyaxuabijawabelia Pablo. Bajaraxuacujinae, xaenatsi, mera-ata apaenatsi»,

najai baja capanepaeya bajarapamonae. Aeconoxae saya bajarapamonae eweta Pablo necaliajawa —jai pewējēato comandantejawabelia.

²² Nexata, comandante jumaitsi pewējēatojawabelia:

—¡Pětsa tsipaebame itsajiwi-ata tanetsipaebiliwaisimē! —jai comandante. Bajaraxuacujinae, pewējēato baja itorobatsi caewēalia.

Pablo itorobatsi gobernadornē Félix-jawabelia

²³ Pewējēato pewecuaponaecujinaetsi, comandante junata anijanēbeje, wajabitsaē pijacapitán-nēbeje. Jumaitsi:

—¡Panaxaniawaetsia-exanarebeje wajabitsaē petaxuta peponaewinexa doscientos ponēmāxēto, setenta pijinia ponēbeje caballojumata peponaewinexa, doscientos pijinia ponēmāxēto becuerereboxanetonē, lanzajawanē, pecaponaewinexa! ¡Panaxaniawaere, paneponaenexa Cesarea tomarabelia ajena, mapamerawitaje, bejamatabēcuenē a las nuevejawa! ²⁴ ¡Itsacaballo-beje pijinia Pablo peyaponaenexa, patoxaniawaere! Xaniawaetsia ewetsiya pacaponaename Pablo gobernadornē Félix-jawabelia —jai comandante capitán-bejējawabelia.

²⁵ Bajaraxuacujinae, comandante tsicobeyaquina, peto-itorobinexa gobernadornē Félix-jawabelia. Peyaquinaebaxutota jumaitsi mapacueniaje:

²⁶ «Félix, pecayaiyataenē, nacua newetsinē. Xanē raja Claudio Lisiasnē catoyaquinsati. Cabajacobatsi. ²⁷ Maponē, Pabloje, cato-itorobaliatsi, judíowi pewaetabinētsi. Bajaraponē picani beyaxuabijitsiatsi. Nexata, itsa wēnēliwaisitaniji Romano nacuapijinēcuenē, siwalianē. Tajajiwi wajabitsaē taneyawenonaecueneta yacajērētājē judíowi pecobewecua, ajēna baja picani beyaxuabijitsiatsi. Nexata, caponaeya-exanajē tajajiwi wajabitsaē pijaboyabelia. ²⁸ Bajaraxuacujinae, sacerdotewi penamatacaitorobiwi, judíowi pija-ancianowi, judíowi pecujarubiwi-ata pitabarata, nutsia-exanajē, tayapētaenexa jane baja picani paneconi yabara Pablo judíowi neconitsijitsiatsi. ²⁹ Itsiata baitsi jane, Pablo itsacueneneconi-ata apoxainae, paneconi yabara beyaxuabijitsiatsi, paneconi yabara-ata etsijitsiatsi penaneconitsiwi pejebabiabibota. Judíowi saya Pablo neconitsijitsiatsi bajarapamonae pijasalinaiwi pijacuene yabara. ³⁰ Nexata, itsajiwi netsipaeba judíowi namuto-epatota Pablo pewajēnae-ewetsiapaebijawatsi pebeyaxuabinexatsi. Bajaraxuata nexata, najamatabēxainajē tacato-itorobinexa xamējawabelia. Nexata, pajudíowi Pablo neconitsijitsiatsi, itorobajē peneconitsinexatsi xamē nitabarata. Bajaramasaya daxitajumeyoje», jai mapacueniaje comandante petoyaquinaebaxutota nacua-ewetsinē Félix-jawabelia.

³¹ Nexata, wajabitsaē exana baja, pacuenia itorobatsi comandante.

Bajarapamerawi wajabitsaē baja Pablo caponaliatsi Antípatris tomarabelia. ³² Nexata, merawia pitsijawata bajarapawajabitsaējajuwēnēwi, petaxuta peponaewi, Antípatris tomarata nawiabarena baja pijaboyaberena. Pamonae caballojumata peponaewi, pewajēnaeyabelia abaxē caponaliatsi Pablo. ³³ Caponaliatsi Cesarea tomarabelia. Nexata, Cesarea tomaratalia pepatsicujinae, wajabitsaē rajuta petocaponaebaxuto gobernadornē Félix-jawabelia. Yajawarajutanua Pablo bajaraponē pecobeyabelia. ³⁴ Nexata,

gubernadornë Félix leba baja petocapatsibaxutotsi. Bajaraxuacujinae, jumaitsi Pablojawabelia:

—¿Detsa panacuapijinëmë? —jai.

Nexata, Pablo jumaitsi:

—Xanë raja Cilicia nacuapijinënë —jai.

Nexata, itsa yapëtanetsi Pablo Cilicia nacuapijinëcuene, ³⁵ gubernadornë Félix jumaitsi Pablojawabelia:

—Cajumetaenatsi nijaliwaisi, abaxë itsa parena judíowi pecaneconitsiwi-nexa —jai gubernadornë.

Bajaraxuacujinae, bajaraponë itoroba pijajiwi xaniawaetsia pewetsine-xatsi Pablo, Herodes-pijinë pabo nacuenebia-exaneta.

Pablo nawajunupaeba gubernadornë Félix pitabarata

24 ¹ Pablo Cesarea tomarata wajabitsaë pecapatsicujinaetsi, cinco pamatacabibecujinae, Ananías, sacerdotewi pepopenamatacaito-robinë, parena Cesarea tomaraberena, judíowi pija-ancianowi, abogadonë-ata yajawa, ponë wenërubatsi Tértulo. Nexata, daxita bajarapamonae nubena gubernadornë Félix pitabarata, peneconitsinexatsi jane baja Pablo.

² Wajabitsaë itsa caparenatsi Pablo penacaetuatsijawata, Tértulo taxuxuaba peneconitsijawatsi gubernadornë Félix-jawabelia mapacueniaje:

—Xamë, gubernadornëmë, xaniawaetsia newetsixae mapanacuaje, paxanë pajudíowinë bajayajebi aliwaisijibia pajinawanapajë. Xamë nejamatábëcueneta daxita mapanacuapijiuene, piabejejawanëmi, canaëjëtisiaya xanibia-exanaponame pewajënaeyabelia. ³ Bajaraxuata, barëyaya pacacopiapitabiabatsi, ayaijamatabëcuenenëxamë, daxita patanesiwaxainaejawatamë, panacuanëjawa pajinawanapajë neyanacua-ewetsinacuata. ⁴ Cae-epatoyo saya ajena pacajamatabë-itonotsianatsi. ¡Pexaniacuene paneto-exanare, patanenamuxuna-ewetsinexamë caejumeyobeje! ⁵ Payapëtaniji baja cajena maponëje Pablo bitso piacujirubejenëcuene. Daxitanacuanëjawa, itsaxuayo judíowi jinawanapa, bajaraponë peliweisita anaeya-exanapona, penawecuanatsanaenexa. Mara ponëje Nazaret tomarapijinëmi^k petsipaebiliwaisi pejumexaniataewi, penamatacaitorobinëje. ⁶ Mara ponëje Dioso pijatemplobo Jerusalén tomaratalia jamatabëbijiana picani, bepenaxuirabibo penacopatsinexa Dioso pitabarata, pebarëjonejawata apojudíonë templobo-ënëalia. Bajaraxuata, pawatabajë, patananeconitsia-exanaenexa pajudíowinë patajaliwaisi patane-itorobicuenia. ⁷ Jamatabëpabeyaxuabajë picani, patanetsitananeconitsixae. Itsiata baitsi jane, itacarajeta wajabitsaë pepopewetsinë, comandante Lisias, barëpata pijajiwi. Pinijsaëta paneyacajërëta Pablo. Nexata, comandante Lisias panejumaitsi: «Pajiwi jamatabëneconita Pablo, ponae gubernadornë Félix-jawabelia bajaraponë pitabarata peneconitsinexa», panejai. ⁸ Nexata, xamë, itsa yanijobianame maponëje Pablo, yapëtaenae baja daxita pexaniajajawa xua pacatsipaebatsi, Pablo pexanaejawa yabara —jai Tértulo gubernadornë Félix-jawabelia.

⁹ Judíowi, bajarajota Tértulo pemuxuneneta penubenaewi-ata, bajarapacuenia daxita jumaitsi Félix-jawabelia.

k 24:5 Nazaret tomarapijinëmi: Bajarapacuenia judíowi pewetsiwi wënëjonabiaba Jesús, pewitsatsixaetsi Nazaret tomarata.

¹⁰ Bajarapamonaē penajumeweretsicujinae, gobernadornē Félix naco-beyota, juya Pablo penawajunupaebinea. Nexata, Pablo jumaitsi:

—Yapētaniji baja cajena xamē ponaponame bajayajebi mapanacuapiji-wije nenaneconitsia-exanabiabijawa juez-nēcuenia. Bajaraxuata, barēyanē tacanacuenewajunupaebinea ajena xua exanaponaponajē. ¹¹ Itsa xamē jitsipame neyapētaejawa taxaniajajawa, nexata yanijobianame itsamonaejawabelia. Ajena raja abaxē saya xainajē doce pamatacabibeje¹ tapatsicujinae Jerusalén tomarata, tanajamatabēcuenē-itajētsinea Diosojawabelia, pijatemplobota ta-asiwajawa, tayaiyataejawa-ata, pejisipaecuenia tato-exanaejawata. ¹² Mapamonaēje aponetae anaeya tabarēnajumenotsijawa itsamonaejawabelia templobota, judíowi pijasinagogabonējawa-ata. Aponetaenua tomaranējawa jiwi ta-anaeya-exanaponaejawa tatsipaebili-waisita. ¹³ Caejiwi-ata bajarapamonaeyajuwēñējiwi acuenēbi peyapētaeya-exanaenēxa pexaniajaicuenē xua yabara neneconita xamē nitabarata, tsipaji aponetae^m bajarapacuenia ta-exanaejawa. ¹⁴ Caejawa yabara itsiata bajarapamonaē xaniajai. Xanē baja cajena tajumecowēñētaponaponaenē patajasalinaiwi pijaDioso, xua bajarapamonaē wēñēruba pejanaliwaisi, aithiacuenia pecujarubiliwaisi. Bajarapamonaē ayaicuenia itoya bajarapaliwaisi. Bajarapacuenia jumecowēñētsiaponaponaē-atanē Dioso, xanē tsiteca jumexaniantaniji Dioso penajumecopatsiliwaisi Moisés-pijnēta, profetawia-ata, peyaquinaeliwaisianē. ¹⁵ Pacuenia bajarapamonaeyajuwēñēwi jumexaniantane Dioso icatsia piasaēya-exanaejawanēxa petēpaewimi, pexaniajamatābēcuenewimi, pibisiajamatabēcuenewimi-ata, bajarapacuenia xanē-ata jumexaniantaniji. ¹⁶ Bajaraxuata, bitso jitsipajē najamatabēcuenēbijianaē-nejewanē xaniawaetsia taponaponaejawa, Dioso pitabarata, daxitajiwi-ata pitabarata.

¹⁷ »Bajayajebi wecuaponaponajē Jerusalén tomarata. Pamatacabi icatsia patajopajē, tocanajetarucajē palata tarajutsinea bepejiobiwi, judíowi-yajuwēñēwi, tarajutsinexanua ofrenda Diosojawabelia templobota. ¹⁸ Bajarajane xuacujinae, ponajē templobojawabelia tarajutsinea ofrenda. Papatota weretajē baja tanajamatabēcuenexaniawaetsijawa Diosojawabelia, pajudíowinē patanetonajumecopatsicuenia Dioso pejumeliwaisibaxutota, bajarapaepatota judíowi, Asia nacuapijiwi, necaxitajaraba templobota. Bajarajota, apoyajawanucaenē ayaibitsaēto. Daxita templobopijiwi yāijai. Ajumējibia saya jinawanapa. Caejiwi-ata apo-anaeya-exanaenē tatsipaebiliwaisita templobota. ¹⁹ Biji rajane, pamonaē judíowi, Asia nacuawerena pepatsiwi, cuenematapita jiwi pianaepanaeya-exanaejawa. Nexata, bajarapamonaē itsa necuenetane pibisiacuenē ta-exanaejawa, beparena jane baja maberenaje taneneconitsinea. ²⁰ Bajarapamonaē itsa apopatsi, nexata mapamonaē penubenaewije, wecaeta-itabēta catsipaebi paneconi netocaxitajaraba, pamatacabi nucajē pitabarata sacerdotewi penamatacaitorobiwi,

1 24:11 *doce pamatacabibeje*: Taema Hch. 21:27 – siete pamatacabibeje, Hch. 24:1 cinco pamatacabibeje. Nexata, doce pamatacabibeje daxitata. m 24:13 *aponetae*: Peneconitsinea itsajiwi petēpajawabelianēxa, Dioso penajumecopatsiliwaisi Moisés-pijnēta itoroba copiaya pecuenewajunupaebineaxatsi paneconi xaina, pijacuata pecuenetaewitsi. Itsa pijacuata apotae paneconi yabara neconita, nexata acuenēbi pebeyaxuabijawa. Taema Deut. 17:6; 19:15; Mt 18:16; 2Co 13:1; 1Ti 5:19; Heb. 10:28.

judíowi pija-ancianowi, judíowi pecujarubiwi-ata. ²¹ Saya meta caeliwai-siyo bajarapamonae catsipaebiana xanë taliwaisi, tsipaji pamatacabi nucajë bajarapapewetsiwi pitabarata, ayaijumeta jumaitsinë: «Mapamatacabitaje paxamë paneneconitsianame, tsipaji jumexaniataniji Dioso icatsia piasaëya-exanaenexa jiwi petëpaecujinae», janë. Nexata, meta bajarapacuenia tajumaitsiyawa yabara bajarapamonae jamatabëneneconita xamëjawabelia —jai Pablo Félix-jawabelia.

²² Gobernadorñë Félix xaniawaetsia yapëtane papejanaliwaisi yabara Pablo jumaitsi. Itsiata, apojitsipae caecuenia penaneconitsia-exanaejawa Pablo, yanijobinejewa Lisias-jawabelia. Nexata, Félix jumaitsi Tértulobana-jawabelia, Jerusalén tomarawerena pepatsiwi jawabelia:

—Itsa patsiarena wajabitsaë pijacomandante, Lisias, yapëtaenajë pacuenia exanaejitsianë Pablowabelia —jai.

²³ Nexata, Félix itoroba wajabitsaë pijacapitán-jawabelia xaniawaetsia pebarë-ewetsinexa, Pablo penajetabijirawiyaniwa. Tocopatanua peponaponaenexa cëtsinejewatsi, peyapëtaewitsinua pesiwaxainaenexatsi, perajutsinexatsinua penamatawenonaejawaxi.

²⁴ Bajaraxuacujinae, caematacabibejecujinae, gobernadorñë Félix icatsia pata pijawa yajawa, Drusila.ⁿ Bajarapowa judíowa. Patabeje peyanijobine-xabeje Pablo, Jesús peliwaisi yabara. Nexata, Félix itoroba pijajiwitonë petojunatsinexatsi Pablo. Nexata, itsa Pablo pata bajarapajiwi beje pitabarata, bajaraponë tsipaeba bajarapajiwi beje jawabelia, jiwi pesiwanajamatabëcuenecopabaponaejawanexa Jesucristojawabelia. ²⁵ Itsiata, itsa Pablo paeba pacuenia Dioso itoroba jiwi pejinawanapaenexa, pibisiacuene exanaenejewa Dioso pitabarata, pacuenia jiwi benajamatabëcuenecataita pibisiacuene pexanaeyaniwa, pacuenianua itsamatacabi Dioso naneconitsia-exanaejitsia daxita pibisiacuene pexanaewi, nexata gobernadorñë Félix najunawiaca. Nexata, bajarajota bajaraponë jumaitsi Pablowabelia:

—¡Pitsapare baja abaxë! Icatsia, cajunatsianatsi itsajota cuenesajinajë, pematatsënëa tanetsipaebinexamë bajaraxua yabara —jai.

²⁶ Gobernadorñë Félix jamatabëjumaitsi Pablo yabara: «Pablo meta nerajutsiana palata, tacopatsinexa penaneconitsijawawecua», jamatabëjai. Bajaraxuata, napëna pijajiwi itorobabiaba Pablo petojunatsinexatsi, pebarëcuai-cuaijainexatsi. ²⁷ Anijawai beje bajarapacuenia Félix pijajiwi itorobabiaba Pablo petojunatabiabinexatsi, itsiata Pablo aporajutsiapaebi palata, pepit-sapaenexa. Belia baja, Félix wecuapitsapa gobernadorñëcuene, juya Porcio Festo penacopatsinexa Félix pecowëta. Félix baja pitsapae-ata, itsiata Pablo apotocopatsitsi pepitsapaenexa penaneconitsijawawecua, tsipaji jitsipa judíowi pesiwajamatabëcuenebarëyanexatsi.

Pablo nawajunupaeba pejanagobernadorñë Festo pitabarata

25 ¹ Festo itsa patajopa Cesarea tomarata, pexanaenexatsi gobernadorñë, Félix pecowëta pewetsinexa, acueyabi pamatacabibeje

n 24:24 *Drusila*: Bajarapowa Herodes Agripa pexënatoyo. Bajarapowa copiaya nacojioba nacuaewetsinë Aciz-jawabelia itsa xaina 14 pawai beje. Bajaraxuacujinae, pepuenetetsicuenia, Félix yacajërëta bajarapowa. Juya, pita pijawanexa.

pexainaecujinae, pona Jerusalén tomarabelia. ²Nexata, Jerusalén tomarata sacerdotewi penamatacaitorobiwi, judíowi-ata, pamona petuxanewi, Pablo neconitatsi pepëya gobernadornë Festojawabelia. ³Bajarapamona pinijicuenia wajëta gobernadornë Festojawabelia pitorobinexa pijajiwi petocaponaenexatsirena Pablo Jerusalén tomaraberena, peneconicanaëjëbinexatsi. Bajarapacuenia wajëta saya, tsipaji bajarapamona njamatabëcuenewereta picani Pablo pebeyaxuabia-exanaenexa namuto-epatota, pecanajetarubenaewatatsi. ⁴Itsia, Festo jumaiti bajarapamonaewawabelia:

—¡Jume! Pablo raja naneconitsiaponapona Cesarea tomarata. Xanë raja caematacabibecujinae ponaëjitsianë Cesarea tomarabelia. ⁵Paxamë papecanamatacaitorobiwi, tapëta naponæna Cesarea tomarabelia, Pablo pibisiacuene itsa exana, peneconitsinexa bajarajotalia —jai Festo bajarapamonaewawabelia.

⁶Bajarapacuenia gobernadornë Festo pejumaitsicujinae, bajaraponë abaxë ponapona Jerusalén tomarata ocho pamatacabibeje, itsa jume, diez meta pamatacabibeje. Xuacujinae jane baja, pona Cesarea tomarabelia. Pepatsicujinae, merawia pitsijawata bajaraponë eca, itsajota nacua-ewetsinë ecabiaba, jiwi penaneconitsia-exanaenexa. Nexata, pijajiwi itoroba petocapatsinexatsi Pablo. ⁷Pablo itsa jonena, nexata judíowi, Jerusalén tomawerena pepatsiwi, matatoyorotsia imoxoyotatsi Pablo. Najumetsënëtsiaya neconitatsi be-ayaineconi pexainaenë. Itsia baitsi jane, xua yabara picani Pablo neconitatsi, bajarapamona apojumenamatamotsi peneconitsijawatsi.

⁸Nexata, Pablo nayapijiwicuaicuaijai:

—Itsapibisiacuene-ata apo-exanaenë Dioso penajumecopatsili-waisi Moisés-pijinëjawabelia, templobojawabelia, Romano nacua pewetsinëjawabelia-ata —jai Pablo Festojawabelia.

⁹Nexata, Festo, judíowi pesiwajamatabëcuenebarëyanexatsi, yanijoba Pablowawabelia mapacueniaje:

—¿Jitsipame tsaja neponaewawa Jerusalén tomarabelia, bajarajotalia taneconitsinexa mapacuene yabaraje? —jai Festo.

¹⁰Pablo nexata jumaiti:

—Xamë rabaja, Romano nacua pepopewetsinë catocopata, nenaneconitsia-exanaenexa pibisiacuene pexanaewi. Nexata, xanë nucajë nitabarata majotaje. ¡Caecuenia neneconicanaëjëre paneconi xainajë! Bajaraxuata, apobene-itorobimë itsajawabelia tanenaneconitsia-exanaexamë. Orijibia, xamë xaniawaetsia yapëtaneme itsapibisiacuene apota-exanaewawa judíowijawabelia. ¹¹Itsa pepacuene naneconitsipajë tatëpaejawabelianexa, nexata aponajamatabëxainænë tsipae tawecuapanepaenexa tatëpaejawa. Itsia baitsi jane, pacuenia mapamona neneconitsia jumaitsi, apoxaniajai cajena. Nexata, acuenebi itsajiwi-ata tanecopatsinexa mapamona pecobeyabeliaje, saya aneonijibia tanebeyaxuabinexa. Nexata jane baja, xanë cawajëtatsi tane-itorobinexamë nijatuxanenëjawabelia, Romano nacua pepopewetsinëjawabelia, bajaraponë pitabarata taneneconitsinexa —jai Pablo gobernadornë Festojawabelia.

¹²Nexata, Festo barëcuaiicuaijai pijajiwi, pejamatabëcueneyawenonae-witsi, peyapëtaenexa pacuenia exanaejitsia. Bajaraxuacujinae, jumaiti Pablowawabelia:

—Xamë newajëtame taca-itorobinexa tajatuxanenëjawabelia, Romano nacua pepopewetsinëjawabelia, bajaraponë pitabarata pecaneconitsinexa pibisiacuene itsa exaname. Nexata, bajaraponëjawabelia ponaename —jai Festo Pablojawabelia.

Pepopeyanacua-ewetsinë Agripa nasiwaxaina Festojawabelia

¹³Pablo pewajëtsicujinae gobernadornë Festojawabelia pitorobine-xatsi Romano nacua pepopewetsinëjawabelia, caematacabibecujinae, pepopeyanacua-ewetsinë Agripa,^o pijawa Berenice^p yajawa, parena Cesa-rea tomaraberena, pebajacobinexabeje Festo, pejanagobernadornëxae.

¹⁴Agripa, Berenicebeje caematacabibeje ponaponabeje Cesarea tomarata. Nexata, gobernadornë Festo tsipaeba Agripajawabelia Pablo yabara. Bajara-ponë jumaitsi:

—Majotaje xainajë Pablo, naneconitsia peponaponaenë penaneconit-siwi pejebabiabibota. Félix abaxë mapanacua itsa ewetaje, bajaraponë naneconitsia-exanatsi. ¹⁵Nexata, itsa ponajë Jerusalén tomarabelia, sacer-dotewi penamatacaitorobiwi, judíowi pija-ancianowinua, neconitatsi Pablo xanëjawaberena. Bajarapamonae newajëta xanë tatocopatsinexa, bajara-ponë pebeyaxuabinexatsi. ¹⁶Nexata, xanë jumaitsinë bajarapamonaejawabe-lia: «Romano nacua raja pepopewetsinë pejamatabëcueneta apopacopatsinë itsajiwi-ata pebeyaxuabinexatsi, abaxë xaniawaetsia payapëtaenejewanë paneconi xaina. Bajaraxuata, itsajiwi pibisiacuene itsa exana, namatawe-nona pecuenetaewitsi pitabarata copiaya peneconitsinexatsi. Xuacujinae, pajiwi naneconita, bajarajota xanepana penayajiwicuaucauijainexa paneconi yabara neconitatsi», janë bajarapamonaejawabelia.

¹⁷»Nexata, pajudíowi yajawaparenajë Cesareajawawerena, merawia pit-sijawata, xanë copiaya joneyajë ta-ecaenexa itsajota ecabiabajë jiwi itsa naneconitsia-exanaejitsianë. Nexata, tajajiwi itorobajë tanetocapatsinexa Pablo xanëjawaberena. ¹⁸Itsia baitsi jane, pamonaе Pablo neconitatsi, itsa pata, aponeconitsitsi pibisianeconi pexinaejawa gobiernojawabelia yabara, pacuenia picani xanë canaëjtajë. ¹⁹Biji saya, judíowi neconitaponatsi Dioso pejumecowënëtsicuene yabara, pewajunupaebixaenua Jesús-wënëne petë-paecujinae, icatsia Dioso piasaëya-exanaejawatsi. ²⁰Nexata, xaniawaet-sia apoyapëtaenë pacuenia exanaejitsianë bajarapacuenie yabara. Nexata, yanjibajë Pablojawabelia itsa jitsipa peponaejawa Jerusalén tomarabelia, bajarajotalia peneconicanaëjëtsinexatsi. ²¹Itsia baitsi jane, Pablo newa-jëta ta-itorobinexa Roma tomarajawabelia, bajarajota wajatuxanenëbeje, Romano nacua pepopewetsinë, peneconicanaëjëtsinexatsi. Itsia, abaxë xanë mapatomarataje Pablo naneconitsiaya ponaponaeya-exanajë tacaxi-naejawabelia pamota itorobijitsianë. Bajaraxuacujinae, itorobianajë wajatu-xanenëbeje, César Augustojawabelia —jai gobernadornë Festo.

o 25:13 *Pepopeyanacua-ewetsinë Agripa:* Gobernadornë Festo yanacua-eweta Judea nacuayo, Cesarea tomarawerena. Pepopeyanacua-ewetsinë Agripa juya ayajamatabëcuenenë Festowecua, tsipaji yanacua-eweta cuatro panacuabeje, Judea, Galilea, Perea, Nabatera-ata. Agripa judfonë-ata yanacua-eweta Romano nacua pewetsiwi pejamatabëcueneta. **p 25:13** *Berenice:* Bajara-powa Agripa pepopejuyapijiwa picani. Itsia, Agripa caponapona bajarapowa pijawacuenia. Bajarapowa pematapijiwanua Drusila, Félix pijawa.

²² Nexata, pepopeyanacua-ewetsinē Agripa jumaitsi Festojawabelia:

—Xanē-ata jitsipajē tajumetaejawa Pablo penawajunupaebijawa —jai Agripa.

Nexata, gobernadornē Festo jumaitsi bajaraponējawabelia:

—Merawia rabaja jumetaename Pablo penawajunupaebijawa —jai.

²³ Nexata, merawia pitsijawata pepopeyanacua-ewetsinē Agripa, pijawa Berenicebeje bitso naitabētabeje, peyanacua-ewetsiwi pena-itabētsicuenia. Nexata, naponabeje jiwi penacaetuatabibiboxanetojawabelia. Pēyanatatsi-beje wajabitsaē pepopewetsiwi, itsamonae Cesarea tomarapijipetuxanewi-ata. Penacaetuatsiboxanetojawalia pebarējonecujinae-beje, gobernadornē Festo pijajiwi itoroba petocaponanexatsirena Pablo. ²⁴ Nexata, Pablo penawajunupaebiwajēnaeya, Festo jumaitsi pepopeyanacua-ewetsinē Agripajawabelia, itsamonaejawabelia-ata:

—Agripa, peponeyanacua-ewetsinē, daxita paxamē-ata majotaje wajana-juanacaetuatsiwi, pataneme rabaja mapapebi nuca pane-itabarataje. Ayai-bitsaēto judíowi, Jerusalén tomarapijiwi, bajaraponē neconitatsi xanējawa-berena Jerusalén tomaratalia. Bajara-icatsia pamonae tapēta naponarena Cesarea tomaraberena, bajara-icatsia pacuenia peneconitsinexatsi xanējawaberena. Bajarapamonae wawajaiya nejumaitsi tsabiabi: «Pajitsipajē Pablo pebeyaxuabinexatsi», nejai tsabiabi. ²⁵ Itsiata baitsi jane, xanē apoyapētaenē paneconi yabara beyaxuabijitsiatsi. Maponē newajēta pīcani ta-itorobinexa tajatuxanenējawabelia, Romano nacua pepopewetsinējawabelia, bajaraponē pitabarata peneconitsinexatsi, itsa pibisiacuenē exana. Bajaraxuata, itorobijitsianē bajaraponējawabelia, juya peneconicanaējētsinexatsi. ²⁶ Itsiata baitsi jane, apoyapētaenē pacuene yabara toyaquinaejitsianē tajatuxanenējawabelia. Bajaraxuata, daxita paxamē pane-itabarata Pablo penucaenexa pacatocapatatsi maberena, paneyanijobinexa paneconi yabara naneconita. Matatoxenetsia itsapewetsiwiwecua neyapētaexae judíowi pecuene, jitsipajē xamē Agripa, nacua newetsinē, neyanijobinexa bajaraponē. Bajarapacuenia daxita paxamē paneyanijobicujinae, xanē yapētaenajē xua yabara naneconita. Nexata, bajarapaliwaisi toyaquinaenajē tajatuxanenējawabelia, bajaraponē peyapētaenexa paneconi yabara Pablo itorobijitsianē bajaraponējawabelia. ²⁷ Acuenēbi ta-itorobijawa maponēje tajatuxanenējawabelia, yapētaeya-exanaenejewanē paneconi yabara itorobijitsianē —jai Festo, pepopeyanacua-ewetsinē Agripajawabelia.

Pablo nawajunupaeba pepopeyanacua-ewetsinē Agripa pitabarata

26 ¹ Festo bajarapacuenia pejumaitsicujinae, pepopeyanacua-ewetsinē Agripa jumaitsi Pablowawabelia:

—Catocopatatsi rabaja nayapijiwicuaicuajainexa —jai Agripa.

Bajarapaepatota, Pablo nacobeyotsiaya bajacoba pepopeyanacua-ewetsinē Agripa. Nexata, jumaitsi bajaraponējawabelia, pamonae peyajawanacaetuatsiwiawabelia-ata mapacueniaje:

² —Barēyanē, tsipaji ajena pamatacabi netocopatame nitabarata tana-wajunupaebinexa daxita paneconi yabara judíowi neneconita. ³ Bajaraxua matatoxenetsia bitso barēyanē, tsipaji xamē xaniawaetsia yapētaneme daxita paliwaisi paxainajē pajudíowinē, pajamatabēcueneliwaisi yabara

panajume-anaenotabiabajëna. Nexata, cawajëtatsi ajamatabëcuenesaëya bajaya-epato xaniawaetsia tanenamuxuna-ewetecaenexamë tacanawajunu-paebijawa —jai Pablo pepopeyanacua-ewetsinë Agripajawabelia.

Pablo nawajunupaeba Agripajawabelia peponaponaecue ne yabara, pamatacabi abaxë apojumexaniatae Jesucristo peliwaishi

⁴Pablo icatsia jumaitsi pepopeyanacua-ewetsinë Agripajawabelia, pamonae peyajawanacaetuatsiwijawabelia-ata:

—Daxita judíowi baja cajena neyapëtane pacuenia copiaya ponaponajë bajarapamonaetuatuajëta, tajanacuata pejewaxinënëjawaweliacujinae. Neyapëtanenua pacuenia ponaponajë Jerusalén tomarata-ata. ⁵Daxita judíowi yapëtane pacuenia paxanë fariseocuene patanacajonewi, bitso jumecowënëtsia pajinawanapajë Dioso penajumecopatsiliwaishi Moisés-pijinëta, itsajudíowiwehua. Nexata, xanë pejewaxinënëjawaweliacujinae catsitecaponaponajë fariseowi pecujarubicuene. Bajaraxuata, tawënafari-seowi, itsa jitsipa, cuenecaëjëpatsi pecayapëtaeya-exanaenexa taxaniajai-jawa bajaraxua yabara. ⁶Bajarapacuenia exanae-atanë, aeconoxae judíowi neneconita, tsipaji baja xanë jumexaniataniji petëpaewimi itsamatacabi Dioso icatsia piasaëya-exanaejawanexa. Bajarapacuenia baja cajena Dioso najumecapanepaeya jumaitsi patajasalinaliwiwimijawabelia. Nexata, bajarapaliwaishi jumexaniataeya copia-ewetaponaponajë pecopiapatsinexa. ⁷Bajarapacuenia ëxanë apocopia-ewetaponaponaenë Dioso pexanaejawanexa. Daxita raja paxanë, Israel-pijinëmi doce ponëmimebeje pexi papemomoxibitsaëtonë, pacopia-ewetawanapajë Dioso icatsia piasaëya-exanaejawanexa petëpaewimi, pacuenia baja cajena tajëwelia Dioso najumecapanepaeya jumaitsi patajasalinaliwiwimijawabelia. Bajaraxuata, paxanë Dioso asiwaya patonacuenebawanapajë, yaiyataeyanua pawajëcabiabajë caematacabi canacujitsia, caemerawi canacujitsia-ata. ¡Xamë neyanacua-ewetsinë nejume-taema! Xaniawaetsia apopejumexaniataexae xua Dioso najumecapanepaeya jumaitsi patajasalinaliwiwimijawabelia, bajaraxua yabara bajarapamonae neneconita. ⁸¿Detsa xuajitsia paxamë pajume-aebame Dioso pecuenecaëjë-paejawatsi petëpaewimi icatsia piasaëya-exanaejawanexa?

⁹»Xanë abaxë Jesús peliwaishi itsa apojumexaniataenë, jamatabëcuene-nawëxaniabiaya najamatabëxainabiabajë tawerebiabinexa daxita pamonae jumexaniatane Jesús, Nazaret tomarapijinë, peliwaishi. ¹⁰Nexata, tanajamatabëxainaecuenia exanaponaponajë Jerusalén tomarata. Sacerdotewi penamatacaitorobiwi tane-itorobixae, ayaibitsaëto Jesús peliwaishi pejumexaniataewi jebaponajë penaneconitsiwi pejebabiabibota. Itsa bajarapamonaeyajuwënëwi naneconitsia-exanatsi pebeyaxuabinexatsi, netsita-xanepanabiaba bajarapacuenia pebeyejebinexa. ¹¹Bajarapamonae napëna jumaconibabeya-exanabiabajë judíowi pijasinagogabonëjawa,^q tacopabia-exanaenexa picani Jesús peliwaishi pejumexaniataejawa. Xanë bitso tacuene-itoyaxae, bajarapamonae itsanacuajawa pe-enaetomaranëjawa-ata, jaitarutajë Jesús peliwaishi pejumexaniataewi, tataicaenexa tajëbinexa

q 26:11 pijasinagogabonëjawa: Bajarapacuenia judíowi wënërubabiaba penacaetuatsibo, itsajota nacujarubabia Dioso peliwaishi caesábado canacujitsia.

penaneconitsiwi pejebabiabibota —jai Pablo, pepopeyanacua-ewetsinē Agripajawabelia, pamonaē peyajawanacaetuatsiwi jawabelia-ata.

**Pablo nawajunupaeba Agripajawabelia pacuenia Jesús
peliwaisi jumexaniatane**

(Hch 9:1-19; 22:6-16)

¹² Pablo icatsia jumaitsi pepopeyanacua-ewetsinē Agripajawabelia pamonaē peyajawanacaetuatsiwi jawabelia-ata:

—Bajarapacuenia picanī icatsia tataicaenexa Jesús peliwaisi pejumexaniataewi, ponajē Damasco tomarabelia. Nitoroba sacerdotewi penamatacaitorobiwi tataicaenexa bajarapamonaē, taje binexa penaneconitsiwi pejebabiabibota. ¹³ ¡Agripa, peponeyanacua-ewetsinē, abaxē nenamuxuna-ewere! Xanē Damasco tomarabelia, tanajetarucaejawata namutua taniji, matoneje-epatota, athēbēwetsica pinijicotia tanemata-toyorotsianaitayotsijawa. Naitayota matabipijijumetocotia matatoxenetsia. Daxita tayajawanajetarucaewi panematatoyorotsia naitayota. ¹⁴ Nexata, daxita paxanē irata pabobenajunuajē. Bajarajota, irata, jumetaenucajē hebreojumeta athēbēwetsica tanejumaitsijawa: «Saulo, Saulo, ¿detsa xuajitsia neliwaisibarajiname, tajajiwi tanetobejiobia-exanaponaejawatamē? Xamē nijacuata najamatabēcuenēbijianaponame, bajarapacuenia nexanaponaponaexae», tanejaijawa, jumetaenucajē irata. ¹⁵ Nexata, xanē jumaitsinē: «Tajatuxanenē, ¿detsa ponēmē?», janē. Nexata, icatsia nejumaitsi: «Xanē raja Jesús nē. Ponē xamē liwaisibara-jinaponame, tajajiwi tanetobejiobia-exanaponaejawatamē. ¹⁶ ¡Nonotabapunare! Catsitanaitajētatsi raja taca-itapetsinexa tajajiwitonēnexamē, netsipae baponaenexa itsamonaejawabelia pacuenia aeconoxae neta-neme, pacuenianua icatsia itsamatabijawabelia catsitanaitajētsianatsi. ¹⁷ Ca-itorobianatsi neponaenexa judíowi, apojudíowi pijanacuanējawabelia. Ca-ewetsianatsi raja newēnajudíowi pecobewecua, apojudíowi-ata pecobewecua, peca-itsacueniabiyaniwa. ¹⁸ Nexata, ponaename, netsipae binexa bajarapamonaejawabelia xanē taliwaisi. Bajarapaliwaisita xania-waetsia petaenexa pamonaē bepita xutotsēcēnaewicuenia jinawanapa, apopeyapētaexae taliwaisi. Nexata, bajarapaliwaisi bepecotia pexainaexae, pitaquirijamatabēcuenewecua jamatabēcuenē-itayotsianatsi, penatoyapētaenexa papibisiacuenē-exanawanapa. Nexata najamatabēcuenēpēnyorobiana Diosojawabelia. Bajarapacuenia Dioso capanepaenatsi Satanás pecobewecua, juya Dioso piasaēnē pewetsinexatsi. Orijibia, xanējawaberena tanesiwanajamatabēcuenecopabixae, Dioso wecua-ajibia-exanaenatsi pibisiacuenē pexanaeneconimi, pijajiwicuenia petaenexatsi», nejai Jesús mapacueniaje athēbēwetsica —jai Pablo nacua-ewetsinē Agripajawabelia.

**Pablo nawajunupaeba Agripajawabelia pacuenia
jumecowēnēta Jesús pitorobicueniatsi**

¹⁹ Icatsia, Pablo jumaitsi:

—¡Agripa, peponeyanacua-ewetsinē, nenamuxuna-ewere! Xanē baja cajena, pacuenia Jesús netsitanaitajēta, xua-ata nejumaitsi,

bajarapacuenia jumeowenētājē. ²⁰ Bajaraxuata, Jesús peliwaissi tsipae-banajetarucājē Damasco tomarapijiwi, Jerusalén tomarapijiwi, Judea nacuarijiwi,⁷ apojudfowijawabelia-ata. Nexata, daxita bajarapamona-ejawabelia yapētaeya-exanaponajē Diosojawabelia⁸ penajamatabēcuenepēnyorotsinexa pibisiacuene pexanabiabijawawecua. Bajarapamona-e pexaniacuene pexanawanapaejawata, nacuenep-itajētsiana jiwijawabelia pepacuene penajamatabēcuenepēnyorobijawa Diosojawabelia. ²¹ Bajarapacuenia tatsipaeboxae, nexata judfowi newaetaba templobota, tanebeyaxuabinexa picani. ²² Itsiata baitsi jane, tawajēnaeyabelia tsipae-baponajē Jesús peliwaissi daxita nacuanējawa, ayaijamatabēcuenewijawa, beweliamatabēcuenewijawa-ata. Bajarapacuenia tapae-baponaejawata, Dioso newetaponapona, nejamatabēcuenep-asaēya-exanaponanua ajena mapamatacabijawaberena-ataje. Nexata, daxita bajarapamona-e najē-paeya tsipae-babiabajē, peyapētaenexa xua bajayata tajēwelia profetawī, Moisés-pijinē-ata wajunupaeba Cristo yabara.⁹ Itsaliwaissi bajarapamonaemi peliwaissiwecua apopaebinē cajena. ²³ Bajarapamonaemi nacayapētaeya-exana pacuenia Cristo, ponē Dioso itorobiapaeba jiwi pecapanepaenēnexa, bejiobicuenia pebeyaxuabijawanexatsi. Pacuenia-ata Dioso icatsia asaēya-exanaejitsia petēpaejawawecua, acueyabi matacabita. Dioso namataxainaeya asaēya-exana¹⁰ Cristo daxita petēpaewiwecua. Bajarapanamatacotsiliwaissi, bepecotia pexainaeliwaissi, xanē tsipae-baponajē,¹¹ pacuenia Dioso jiwi capanepaejitsia Cristo pejamatabēcueneta, judfowi, apojudfowi-ata —jai Pablo pepopeyanacua-ewetsinē Agripajawabelia, pamona-e peyajawanacaetuatsiwijawabelia-ata.

**Pacuenia Pablo petsipae-biliwaissi pejumetaewitsi
tocanaējētatsi pianeconijibijawa, yabara peliwaissi**

²⁴ Pablo penawajunupaebaponaejawata Agripajawabelia, gobernador-nē Festo jumewabaxuabatsi:

—¡Pablo, xamē saya camatajemaba! Ayailiwaissi bitso necujarubixae, camatajemabia-exana —jai Festo.

²⁵ Pablo nexata jumaitsi:

—Festo, pecayaiyataenē, nacua newetsinē, gobernador-nēmē, xanē raja aponematajemabi. Paliwaissi raja pacatsipae-batsi, apojemaliwaissi,

r 26:20 *Judea nacuarijiwi*: Paliwaissi Pablo toyaquina Galacia nacuarijiwi, bajaraponē yapētaeya-exana pacuenia apopaebanajetarucae Jesús peliwaissi Judea nacuarijawa. (Taema Gál. 1:21-23). Orijibia, Hechos-baxutota aporucae caeliwaissi-ata Pablo petsipae-bijawa Jesús peliwaissi Judea nacuaata, Jerusalén tomarawecua. Bajaraxuata, itsamona-e canaējēta vr 20 bejuca mapacueniaje: *Bajaraxuata, Jesús peliwaissi tsipae-banajetarucājē Damasco tomarapijiwi, Jerusalén tomarapijiwijawabelia-ata, Judea nacuaata pe-ecaetomara. Bajaraxuacujinae, icatsia tsipae-banajetarucājē daxitanacuanējawa judfowi, apojudfowijawabelia-ata.* **s 26:20** *Diosojawabelia*: Pacujinae bajarapamona-e najamatabēcuenepēnyorota pibisiacuene pexanaejawawecua Diosojawabelia, bajarapamona-e najamatabēcuenepēnyorota pecatsitecaejawa Dioso penajumecopatsiliwaissi Moisés-pijinēta, Dioso aneconijibia petaenexatsi, juya pesiwanajamatabēcuenecopabinexa Jesucristojawabelia, Dioso aneconijibia petaenexatsi. Najamatabēcuenepēnyorotanua pesiwanajamatabēcuenecopabijawami jumapecataeya pexanaenēanējawabelia peyawenonaenexatsi, juya pitaxutua-jamatejematsawanapaenexa Dioso. **t 26:22** *Cristo yabara*: Taema Lc 24:27, 44; Rom. 1:2; 16:26; 1Co 15:3-4. **u 26:23** *namataxainaeya asaēya-exana*: Taema 1Co 15:20; Col. 1:18. **v 26:23** *tsipae-baponajē*: Taema Isa. 42:6; 49:6.

pepopexaniajailiwaishi cajena. ²⁶ Bajarapaliwaishi ajumejunawijibia pacat-sipaebatsi, tsipaji maponē ecaje, pepopeyanacua-ewetsinē Agripa, xania-waetsia yapētane bajarapaliwaishi, tsipaji daxita xua Jesús exana, abaxē pamatacabi ponapona mapanacuataje, muetsia apo-exanae. Bajaraxuata, apojitsipaenē bajarapaliwaishi apobepeyapētaenē penaexanaejawa ²⁷ Agripa, nacua newetsinē, ¿xamē tsabaja jumexaniataneme profetawi bajayata peya-quinaeliwaishi? Nejumexaniataejawa baja cajena cayapētanetsi —jai Pablo Agripajawabelia.

²⁸ Nexata, pepopeyanacua-ewetsinē Agripa jumaitsi Pablojawabelia:

—¿Bepijia tsabaja Jesús peliwaishi jamatabēnejumexaniataeya-exaname? —jai Agripa.

²⁹ Nexata, Pablo jumaitsi:

—Bitso jitsipajē Dioso pecayawenonaejawa bepijiacuenia, itsa jume, be-axayocuenia-ata, xamē Agripa, daxita pamona-ata nejumetaeyena, panejumexaniataenexa Jesús peliwaishi. Pacatojitsipatsinua patanecuenē-jēpaejawamē, tajumexaniataejawa Jesús peliwaishi. Itsiata, apopacatojitsipaetsi mapitsicadenamaētonētaje papecacēbijawa, pacuenia xanē necētanuta —jai Pablo.

³⁰ Itsa baja Pablo najumewereta bajarapacuenia petsipaebijawa, nexata nonobapuna pepopeyanacua-ewetsinē Agripa, gobernadornē Festo, Agripa pijawa Berenice, peyajawanacaetuatsiwi-ata, peponaenexa. ³¹ Pepitsapaecujinaelia itsajawayota, bajarapamonae najumaitsi:

—Maponēje Pablo itsacuene baja cajena apo-exanae, xua yabara picani beyaxuabijitsiatsi pijaneconijamatabēcuenē. Ajibinua paneconi yabara etsijitsiatsi penaneconitsiwi pejebabiabibota —najai bajarapamonae Pablo yabara.

³² Pepopeyanacua-ewetsinē Agripa jumaitsi gobernadornē Festojawabelia:

—Itsa Pablo apocawajētsi tsipae nitorobinexa wajatuxanenēbejajawabelia, Romano nacua pepopewetsinējawabelia, bajaraponē pitabarata peneconitsinexatsi, nexata baja picani copatsipatsi pepitsapaenexa penaneconitsiwi pejebabiabibowecua —jai Agripa, Festojawabelia, Pablo yabara.

Pacuenia Pablo caponatsi Roma tomarabelia pepatsinexa, yabara peliwaishi

27 ¹ Pacujinae, gobernadornē Festo, pijajiwi yajawa, najamatabēcuenewereta pitorobinexa Pablo Italia nacuyabelia, Romano nacua pepopewetsinē, Augustojawabelia, Festo tocopata Pablo, itsamonae penaneconitsiwi yajawa, capitán Juliojawabelia. Julio raja penamatacaitorobinē cién ponēbeje wajabitsaēwi, pabitsaēto jiwi wēñeruba pepopewetsinē Augusto pijajiwiwibitsaēto. ² Paxanē Julio panecapona pewēpajawabelia. Bajarajota, pacaxitajarabajē barco, Adramitio tomarawerena pepatsimo. Bajarapamo ponaejitsia Asia nacuyabelia. Nexata, bajarapamo-ēñēabereca panarunarecajē. Bajarapamo yaētanajetarucaejitsia manuamenemuxubērēa pe-enaetomaranējawa, Asia nacuata. Aristarco, paneyanababeje. Bajaraponē Tesalónica tomarapijinē, Macedonia nacuata pe-ecaetomara. ³ Mera-wia pitsijawata, epatua panapatajē Sidón tomarata. Bajarajota, capitán Julio

pitaxutobejiobiataexae Pablo, tocopata Sidón tomarata penonotajunaenexa. Nexata, nasiwaxaina peyapêtaewitsijawabelia. Bajarapamonae rajutatsinua xua namatawenona. ⁴Patapitsapaecujinae Sidón tomarawecua, patawajënaewerena jowibo najetaruca. Nexata, pacujibaliajê Chipretunaeto, tsipaji bajarapamuxubêrëwelia jowibo beyajetayo. ⁵Bajaraxuacujinae, panicabaliajê Cilicia, Panfilia nacuabeje, canacujitsialia. Nexata, payaëtajê Mira tomarata, Licia nacuata pe-ecaetomara. ⁶Nexata, Mira tomarata capitán Julio caxitajaraba itsabarco, pepatsimo Alejandría^x tomarawerena, peponaemonexa Italia nacuayabelia. Nexata, capitán Julio bajarapabarco-ënëabereca, panerunaeya-exana, icatsia pataponaenexa. ⁷Nawitsiamatacabianê be-axayocuenia pananajetarubenaajê, tsipaji jowibo abaxê tsiteca patawajënaewerena. Bajarapajowibo pinijicuenia patanecuenecaranatsicujinae, itsiata papatajê Gnido tomara canacujitsialia. Bajaraxuata panicabajê Cretatunaetowawabelia, patamatawaquebinexa payenepanawelia eca Salmón tomara, tsipaji bajarapa-itapawelia jowibo beyajetayo. ⁸Piayapêbejecuenia panajetarubenaajê manuamenemuxubêrëa. Belia, papatajê Buenos Puertos-jawata, Lasea tomara imoxoyojawata.

⁹Bitso baja nawitsiamatacabianê patanajetarubenaexae, panewecuapane-papona pexanepanaematacabianê menia patanajetarubenaenexa. Emarapae baja pecopijapoaexae, bitso panetsi-ayai menia pataponaenexa. Nexata, bitso jowibo ayai tsabiabi. Bajaraxuata, Pablo picani muxujioba barcota patanajuaponaewijawabelia. ¹⁰Jumaitsi mapacueniaje:

—Xanê raja yapêtaniji wajanacatsi-ayaijawanexa bitso, menia wajaponae-jawa wajawajënaeyabelia. Belia raeta naxuabijitsipa mapamoje, xuanê-ata canajetarubena bajarapamotaje. Bajaraxuanê caejawa aponaxuabi tsipae, waxaitsi-ata cajena aponacatsiayai tsipae wajanaxuabinexa, itsa abaxê majotaje ewetawanapaenatsi emarapae ëpepanepaejawabelia —jai picani Pablo.

¹¹Itsiata, capitán Julio jume-aeba Pablo pejumaitsiyawa. Caranata, jume-xaniatane pacuenia jumaitsiabeje barco pexainaenê, pecaponaenê-ata, tsipaji tsitaliwaishinamatamotatsi bajaraponêbeje. ¹²Buenos Puertos-wëpajawata, apopexaniataxunae bajayajebi barco perucaenexa emarapaematacabianê. Nexata, Barco pexainaenê, pecaponaenê-ata, apojitsipaebeje bajarajota pata-ewetawanapaenexa emarapae pepanepaejawata. Bajaraxuata, daxita pamonaenajetarubena bajarapamota, caeliwaisi xaina icatsia patawajënaeyabelia pataponaenexa, itsa cuenecaëjêpatsi, patapatsinexa picani Fenice tomarata. Bajarajota, picani jamatabëyaëta pata-ewetawanapaenexa emarapae pepanepaejawata. Fenice tomara eca Cretatunaetototsotota, itsajota xanepana barco perubenaenexa, tsipaji bitso jowibo apojoneyabiabi. apotsitapexaniataxunaetsibeje

Pinijijowiboxaneto barco caponatsi Cretatunaetowecua

¹³Itsa pajinawanapajê Buenos Puertos-jawata, jemata patacowëwerena be-axayo jowibo najetaruca sur-jawawerena. Nexata, barco pexainaenê,

^x 27:6 *Alejandría*: Bajarapatomara eca Egipto nacuata. Nexata, bajarapamo capona tsaena tri-goxu Roma tomarajawabelia.

itsamonae-ata tsitaxanepanatsi bepíjia peponaenexa pewajënaeyabelia. Bajarapamonae jane baja, pejitsipaecuenia panaropobajë. Nexata, panajetarubenajë Cretatunaetomuxubërëa. ¹⁴Nexata, jemata cae-epatoyocujinae piníjijowiboxaneto najetaruca Cretatunaeto epatajërëtsiarena barcojawa-berena, pajowibo jiwi wënëruba Norestejowibo.^y ¹⁵Bajarapajowibo barco torotaponatsi Cretatunaetowecua, tajëjawabelia. Apopanecaëjëpae barco patamuxufetsinexa jowibo pewajënaewelia. Nexata baja, pacopatajë pataneyacaponanexa jowibo. ¹⁶Panajetarubenajë tsiquiritunaeto, Claudatunaeto, pepënënenia. Bajaraxuayo bitso jowibo apo-ayai. Nexata, itsajota jowibo beyajetayo, pajerayo natsicaponabiaba jiwi pepanepaenexa, piayapëbejecuenia pajutabuatsinajë barco-ënëabetsina. ¹⁷Bajaraxuacujinae, bajarapamonae barco epacëbaponaya piníjibumacaxanetonëta, bajarapamo pesarasaraëcaeyaniwa malatacata. Junawanua patayayaëyaëcaeyaniwa Sir-tewënë iratsaubonëjumata. Bajaraxuata isica barcopijivelapananë. Nexata, bajarapamonae copata barco itsabelia jowibo pona, pataneyacaponanexa. ¹⁸Merawia abaxë pitsijawata tsiteca piníjijowibo piayaixae, bajarapamonae barco-ënëta pecaponaejawanë barcojawata, menia yajuwënëpenereca, barco pefafanaenexa. ¹⁹Bajaraxuacujinae, icatsia merawia pitsijawata, acueyabimatacabita jowibo pataneyacaponaecujinae, bajarapamonae icatsia menia penereca barco-ënëta pecanacuenebijawanë. ²⁰Bajayajebi baja cajena apopataenë matacabipíjijumameto, tulupu-ata, tsipaji piníjijowibo, ema yajawa, tsitecanuca. Belia, panatotaniji apopatapanepaejamatabëcuenenexa.

²¹Pamatacabibejewa bajarapa-ayaicueene patataewanapaejawata, apopaxaenë pataxajewa. Nexata, Pablo nonotapuna bajarapamonaetuatuajëta. Jumaitsi:

—Bitso cajena xanepanaejitsipa itsa panejumexaniataejitsipame pacuenia pacajumaitsitsi. Nexata, itsa apowecuaponaetsinua tsipae Cretatunaetowecua, nabebiobitsiaya apojinawanapaetsi tsipae, pijinia wajacaponaejawanë-ata aponapenetsi tsipae. ²²¡Itsia baitsi jane, aeconoxae pëtsa panatsinajamatabëxainame! Itsajiwi-ata raja paxamëyajuwënëjiwi apotëpae tsane. Itsia rajane, ëbarco naxuabiana. ²³Ajena baja cajena, pamerawí, netsitanaítajëta ángelnë, Dioso pitorobinëtsica. BajarapaDioso xanë pijajiwitonëne. Tonacuenebaponaponajënu. ²⁴Nexata, ángelnë nejumaitsi: «¡Pablo, pëtsa junawame! Itsia raja, apotëpaemë tsane, tsipaji raja naitajëtsijitsiamë Romano nacua pepopewetsinë pitabarata. Xamë raja nejamatabëcueneta Dioso capanepaenatsi petëpaeyaniwa daxita pamonaeyajawanajetarucame mapabarcotaje», nejai ángelnë. ²⁵¡Nexata, daxita paxamë panajamatabëcuenesaëre, panejamatabëcuenebëjaijawawecua! Itaxutuajamatejemanë Diosojawabelia wajanacacapanepaenexa, tsipaji yapëtaníji wajanacacapanepaejawanexa pacuenia baja ángelnë netsipaeba. ²⁶Itsia baitsi jane, jowibo nacayacapatsiana itsatunaetojawabelia —jai Pablo.

²⁷Catorce baja pamatacabibeje patapuaxinae patanaropobicujinae, toquebiaya merawí jowibo paneyacapona Adriático manuamenejawa. Nexata, merawituatuajëta barcota penacuenebiwi tsitatsi ira pataimoxoyotsijawa. ²⁸Nexata, bajarapamonae peyapëtaenexa xuawajëto mene

y 27:14 *Norestejowibo*: Bajarapajowibo itsamonae wënëruba Euroclidón.

awajubua pemaëtota caëjëtaponä. Copiaya pecaëjësijawata piawajubujawa xaina treinta y seis pametrobeje, mene piawajubujawa irabereca. Bajara-xuacujinae, cae-epatoyocujinae, icatsia cotocaewi pecaëjësijawata, mene piawajubujawa xaina veintisiete pametrobeje. ²⁹Nexata, barcota penacue-nebiwi junawa peyayaëyaëcaejawa ibotojawabelia. Nexata, bajarapamona-nae barco petabufewetsina, cuatro xuabeje piarewejawanë, anclajawanë, yamaëya copabareca, menejawabereca bëpënëa irabelia itsa waetaba, barco perucojopaenexa. Bajarapamona picaní bitso jitsipa bepíjia peyamatacabi-bijawatsi, penatsiwajënaetaenajetarubenaenexa. ³⁰Nexata, bajarapaepatota bajar-ëpamona picaní bitso jitsipa barcowecua penonobajunecaenexa, pepanepaenexa. Nexata, bajarapamona penajuaponaewijawabelia yamaxë-itojorobiaya jumaiti:

—Icatsia raja, pacopabijitsianëreca itsa-anclajawanë barco-upitatsia —jai yamaxë-itojorobiaya. Nexata, bajarapamona taxuxuaba jera pexuabi-jawareca, pamo pajutabuatsinajë, peyaponaenexa picaní pitapayabelia.

³¹Nexata, Pablo itsa tane bajarapamona jera pexuabijawareca, jumaiti wajabitsaë pijacapitán-jawabelia, pijajiwi wajabitsaëjawabelia-ata:

—Mapamonaaje barcota penacuenebiwi, itsa ponaena mapajerataje, paxamë-ata pawajabitsaëmë panapenetsianame meneta —jai Pablo.

³²Nexata, barcota penacuenebiwi peponaeyaniwa jerata, wajabitsaë caucutaxuaba jera pecëtarutsimaëto. Nexata baja, jera pona barcowecua.

³³Ajenä baja matacabi tsina, Pablo itoroba daxita barcota peponaewi pexae-jawa pexaenexa. Jumaiti bajarapamonaejawabelia:

—Catorce baja cajena pamatacabibeje xaniawaetsia apopamajitsimë.

Panaxejawa-ata apopaxaëmë, panenasiwajamatabëcuenebëjaixae xua pacatocopiapatsijitsia. ³⁴Bajaraxuata, paca-itorobatsi panexajawa panexaenexa, panesaë panexainaenexa panepanepaenexa. Itsiata raja, daxita apopa-itsacuenemë tsane —jai Pablo bajarapamonaejawabelia.

³⁵Bajarapacuenia Pablo pejumaitsijawata, daxita bajarapamona pita-barata panbë pita. Nexata, Diosojawabelia pexaniajamatabëcuene rajuta panbë yabara. Pe-epatsënëcaecujinae panbë, rajuta bajarapamonaejawabelia. Nexata, xane baja. ³⁶Daxita bajarapamona pecuetaejawatatsi Pablo, ajamatabëcuenesaëreca. Nexata, bajarapamona-ata naxane pexaejawa.

³⁷Doscientos setenta y seis papajiwinëbeje daxitata paponajë bajarapabar-cota. ³⁸Nexata, daxita xaniawaetsia pataxaecujinae, barcota penacuenebiwi menia penereca trigoxu doruanë, pefafanaenexa barco.

Pablo peyaponaebarco bubuna manuameneta

³⁹Itsa baja matacabi tsarucapona, barcota penacuenebiwi apoyapëtae itsajota panajetarubenajë. Itsiata, taeyeta tsiquiri-irayo, yapëtaenejewa pa-irayocuene. Tanenua menetotsoto, itsajota boca tajetabo. Nexata, picaní bajarapamona najamatabëxaina peyaëtsinexa barco bajarapatajetojawa-belia. ⁴⁰Nexata, pa-anclajawanë, yamaëya copabareca, bajaraxuanëmi yamaëcaucuba. Sarasaranaeya-exanania barco petabufecajëbanajetarubenaepabeje. Barco-upitatsia penucaenaeta velapana upicëtarutsia, bajarapanata jowibo petorotsinexa ira-itapayabelia. Nexata, barco jane baja, imo-xoyotanajetaruca tajetabo. ⁴¹Itsajota anijamenebeje pesaë namata-enetsia

patabeje, itacarajeta bajarajota barco payajumanayaëtajarabajë iratsaubojumata. Nexata, barco-upi mëthëmëthëcajunua iratsaubojawabelia. Bajaraxuata, barco ataja tsanucæ. Nexata, malataca pesaëta barco petabufejawawetsina tabufesarabajarabatsi. ⁴² Nexata, picani wajabitsaë bajarajota beyejebijitsiatsi daxita penaneconitsiwi, pewecuapanepaeyaniwatsi pejuejawa. ⁴³ Itsiata, wajabitsaë pijacapitán apotocopatsi, tsipaji apojitsipae Pablo yajawa pebeyaxuabijawatsi. Nexata, capitán itoroba daxita pamonaë yapëtane pejuejawa, copiaya itoroba pejuenexa, pepatsinexa matatsënëabelia. ⁴⁴ Bajaraxuacujinaë, pamonaë apoyapëtaë pejuejawa, cotocaewi itoroba tab-lapanëjumata, barcopijitablapanëmijumatanua, pejuenexa. Bajarapacuenia daxita panepa itsacuenenejewa matatsënëabelia.

**Pablo ponapona Maltawënëtunaetowawata peyaponaebarco
pebubunaecujinaë manuameneta**

28 ¹ Itsa baja, daxita paxanë xaniawaetsia papanepajë matatsënëabelia, nexata matapania pawënëtaniji Maltatunaetocuene. ² Bajarapataunetopijiwi bitso pexaniacuenia paneyawenona. Piniji-isotoxaneto itajuruteta, patanonopaenexa, tsipaji bitso ema tsanucæ. Cainejebanua. ³ Bajarajota, Pablo nota petsewi-iso, pitamata-etsinexa. Nexata, Pablo pet-simatajebinë iso, jomo bitso piatanenë, bebula, pitsatabijirawa isotojawa-werena piatajujawawecua. Nexata, Pablo cobesinetsi. Pecobesinijawatatsi, tsiteca yajumaruca. ⁴ Maltatunaetowawata pejinawanapaewi itsa tane Pablo jomo pecobesinerucaejawatsi, nexata najumaitsi bajarapamonae: —Maraeta ponë jiwibenëje, tsipaji manuamene wecuapanepae-ata, itsiata padiosowa^z pijaneconi pexainaewi penaneconitsia-exanaediosowa, tocopatsi jomo pesininxatsi, pijaneconijamatabëcuene peyatëpaenexa —najai Pablo yabara.

⁵ Nexata, Pablo jomo pecobesinijawatatsi, xuaba isotualia penacobenënë-biaxuabijawata. Bajaraponë itsiata apo-itsacuene. ⁶ Daxita bajarapamonae bajaya-epato ewetawanapa Pablo peyacobeyajinaejawa jomo pecobesinijawatsi, itsa jume, jemata caecuenia petëpaenë pejopaëjawanexa. Itsiata baitsi jane, apo-itsacuene. Nexata, icatsia bajarapamonae itsacuenia najamatabëxaina Pablo yabara. Najumaitsi:

—Maraeta papebi, diosonëje —najai.

⁷ Nexata, itsajota panubenajë, imoxoyo bobena Publio, Maltatunaeto pewetsinë, pija-iranë. Nexata, bajaraponë panecopiapita pexaniacuenia, patanajinawanapaenexa pijabota acueyabi pamatacabibeje. ⁸ Bajarapamatacabijawa, Publio paxa awitane tsanucæ camata. Romæbanucatsi. Bitso suliabatsinua. Nexata, Pablo taeyojopalia. Towajëta Diosojawabelia. Piawitanenë pematabocotojumawereca Pablo penacobebuatsijawata, bajaraponë jamatejema baja. ⁹ Bajarapacuenia Pablo pexanaejawa itsa tane, Maltatunaetopijiwi, daxita piawitanewi, pata Pablojawaberena, pejamatejemaya-exanaponaenexa. ¹⁰ Pablo pejamatejemaya-exanaexaë,

^z 28:4 *padiosowa*: Bajarapajumapecataeya pexanaewa griegojumeta pewënë Dike. Bajara-pajume jiwijumeta pitsapa, «jiwi pijaneconi pexainaewi peyamamatotsidiosowa, itsa jume, penaneconitsia-exanaediosowa», pejaijume.

daxita bajarapamonae najamatabëcuene-itajëtabiaba pinijicuenia pataneyai-yataejawa. Bexëajawabelia icatsia itsa panaponaejitsianë itsabarcota, nexata panerajuta daxita patanamatawenonaejawaxi, patajanamutonexa.

Pablo pata jane baja Roma tomarata

¹¹Acueyabi pajuametobeje, patanajinawanapaecujinae Maltatunaetota, icatsia baja panaponajë itsabarcota. Pamo ruca patawajënae Maltatunaetota, Alejandría tomarawerena pepatsimo. Bajarapamo baja cajena ruca daxita emarapae Maltatunaetototsotota. Ewetaruca pepanepaejawa emarapaejuametonë. Bajarapabarco-upimuxuneneta jumaperutabeje, Cástor, Pólux diosonëbeje.^a ¹²Bajarapamota patanaponaecujinae, panapatajë Siracusawëpajawata, Siliciatunaetota pe-ecaetomara. Bajarajota abaxë panajinawanapajë acueyabi pamatacabibeje. ¹³Bajarajotacujinae, icatsia panaropobajë. Panajetarubenajë manuamenemuxubërëa. Papata-othopajë Regio tomarata. Merawia pitsijawata, patacowëwerena najetaruca pexania-jowibo sur-jawawerena. Bajarapajowibo paneyacapona patawajënaeyabelia. Nexata, anijamatacabibecujinae, papata-othopajë Puteoli tomarata. ¹⁴Bajarapatomarata pacaxitajarabajë itsamonae, Jesús peliwaishi pejumexaniataewi. Bajarapamonae pane-asiwa caesemana patanajinawanapaenexa bajarapamonaejawata. Bajaraxuacujinae jane baja, paponajë matatsënëa, patapatsinexa Roma tomarabelia. ¹⁵Roma tomarapijiwi, Jesús peliwaishi pejumexaniataewi, patawajënaelia panewënëliwaishitane patanajetarubenaejawa. Nexata, bajarapamonae panecopijairena. Copiaya penamataxainaebitsaëto panemata-enena Foro de Apiojawata. Bajaraxuacujinae, icatsia cotocaewibitsaëto panemata-enena Tres Tabernas-jawatalia. Nexata, Pablo itsa tane bajarapamonae, pexaniajamatabëcuene rajuta Diosojawabelia. Ajamatabëcuenesaërecanua bajarapamonae petaejawata. ¹⁶Nexata jane baja, itsa papatajë Roma tomarata, capitán Julio rajuta baja pamonae penaneconitsiwi canajetaruca Cesarea tomarawerena, rajuta baja waja-bitsaëwi pepopenamatacaitorobinëjawabelia. Itsiata, Pablo saicayabota capatatsi peponaponaenexa. Caenë wajabitsaënë ya-ewetaponaponatsi^b penajetabijirawiyaniwa.

Pablo tsipaeba Jesús peliwaishi Roma tomarapijiwijawabelia

¹⁷Pablo baja itsa xaina acueyabi pamatacabibeje pepatsicujinae Roma tomarata, tonajumexuaba judíowi penamatacaitorobiwi pepatsinexa bajaraponëjawaberena. Itsa baja nacaetuata, nexata Pablo jumaitsi bajarapamonaejawabelia:

—Tajamonae, itsacune apo-exanae-atanë wajawënajudíowijawabelia, wajasaliniawi pecujarubicuene jumecowënëtsiaponaponaen-atanë, itsiata bajarapamonae newaetaba Jerusalén tomaratalia. Nexata, itsa-neconi apoxainae-atanë, necopata Romano nacuapijiwi pecobeyabelia, tanenaneconitsia-exanaenexa. ¹⁸Nexata, Romano nacuapijiwi, jiwi

a 28:11 *Cástor, Pólux diosonëbeje*: Bajaraponëbeje pina sapananëbeje. Bajaraxuata, itsawënë bajaraponëbejenexa, Sapoladiosonëbeje. **b 28:16** *ya-ewetaponaponatsi*: Pablo pepanepaeyaniwa, cëtatitsi cadenamaëtota pewetsiwajabitsaënëtsi.

penaneconitsicue ne wetsiwi, neyanijoba xua yabara neneconita. Picani necopatsijitsia, apocaxitajarabixae paneconi yabara nebeyaxuabia-exanaejitsia. ¹⁹Itsia baitsi jane, wajawənajudíowi, pamona taneliwaishi-itoyaw, apojitsipae Romano nacuapijiwi tanecopatsinexa. Jitsipa picani tanebeyaxuabinexa. Bajarapacuenia taneneconitaponaexae, xanə wəjə-tajə tane-itorobinexa maberenaje, Romano nacua pepowetsinə pija-cuata taneneconicanaəjətsinexa pibisiacue ita exanəjə. Bajarapacuenia exanae-atanə, xanə apojitsipaenə wajawənajudíowi liwaisi penatsixai-naejawa. ²⁰Bajaraxuata, pacajunata patacataenexa, patacayapətaeya-exanaenexanua xua yabara naneconitsiaponaponajə. Xanə naneconitsiaponaponajə tajumexaniataexae, pepatsijawa baja, Ponə daxita Israel nacuapijiwi copia-ewetawanapa athəbəwetsica pepatsijawanexa. Bajara-xuata, necobecətsiya yamaəya ponaponajə mapacadenamaətoje —jai Pablo Roma tomarata judíowi penamatacaitorobiwijawabelia.

²¹Nexata, bajarapamona jumaitsi Pablowawabelia:

—Itsaliwaisi-ata baja cajena xamə yabara apopanetonajume-itorobi Judea nacuawerena. Wajawənajudíowi patsi-ata bajarawerena, itsia apopanetsipaebi pibisiacue xamə nexanaejawa yabara. ²²Itsia baitsi jane, pajitsipajə patanetsipaebijawamə pacuenia najamatabəxainame Jesús peliwaishi yabara, tsipaji daxitanacuanəpijiwi baja cajena baracuaicuajai tsabiabi bajarapapejanapitsapeliwaisi. Paliwaisi xamə jumexaniataneme, bajarapamona tsitapenajumetsənətsiliwaisitsi —jai judíowi penamatacaitorobiwi Pablowawabelia.

²³Nexata, judíowi penamatacaitorobiwi caəjəta pamatacabi icatsia nacaetuatsijitsia, pabota Pablo ponapona, pebarəcuaicuajainexa bajarapaliwaisi yabara. Nexata jane baja, ita nacaetuata, bajarapamona yajawapata ayai-bitsaətoxaneto. Nexata, Pablo bajayacunuajawaweliacujinae caniwijojawabelia liwaisi tsipaeba. Yapətaeya-exana bajarapamonaejawabelia Dioso pijajiwi pewetsijawa mapanacuataje Jesucristo pejamatabəcuene. Bajarapamona pejumexaniataenexa, Pablo tsitajəta pona pacuenia Dioso peliwaishi jumaitsi Jesús yabara, Dioso penajumecopatsiliwaisi Moisés-pijinəta, profetawi, bajayata peyaquinaeliwaisita-ata. ²⁴Pablo petsipaebijawata, itsamonae jumexaniatane baja. Itsamonae pijinia jume-aeba bajarapaliwaisi. ²⁵⁻²⁶Nexata, daxita bajarapamona apopenajamatabəcuenejəpaexae bajarapaliwaisi yabara, itsamonae pitsapapona. Penawibiawəjənae Pablo icatsia jumaitsi bajarapamonaejawabelia mapacueniaje:

—Espíritu Santo baja cajena bajayata yapətaeya-exana profeta Isaías-pijinəjawabelia, pejumaitsinexa panijasalainiwiwijawabelia paxamə yabara. Jumaitsi:

«Ponaename bajarapanacuapijiwijawabelia netsipaebinexa mapacueniaje: 'Napəna jumetaeyabiabi-ata tsane petsipaebiliwaisitsi, itsia apojumeyapətae tsane pajamatabəcuene xaina. Napəna taeyabiabi-ata tsane petsita-exanaecuenetsi, itsia apoyapətae tsane pajamatabəcuene yabara tsita-exanatsi,' jamə tsane.

²⁷»Orijibia, Dioso jumaitsi: Bajarapamona apojumeyapətae tsane, tsipaji ajamatabəcuenetaja tsawanapae. Apojumetae tsane, tsipaji namuxu-acabiaya bepejinawanapaewi tsane, pejumetaeyaniwa.

Apotae tsane, tsipaji naitaxutotsaquebiaya bepejinawanapaewi tsane, petaeyaniwa. Bajarapacuenia exanawanapaena, pejamatabë-ëthëtojawawetsina pejumeyapëtaeyaniwa petsipaebiliwaisitsi, penajamatabëcuenepënyorotsiyaniwa Diosojawabelia perujujamatabëcuenewecua, tajamatabëcuenexanepaneya-exanaeyaniwanua pibisiacuenewecua»,^c jai baja cajena Espiritu Santo Isafas-pijnëjawabelia paxamë yabara.

²⁸ »Paxamë baja bepayapëtaneme, Dioso pejitsipaejawa pecapanepaenexa apojudíowi. Bajaraxuata, bajarapamonae namuxuna-ewetsiana petsipaebiliwaisitsi, pejumexaniataenexa Jesús peliwaisi —jai Pablo judíowijawabelia.

²⁹ Itsa baja Pablo najumewereta bajarapacuenia petsipaebijawa, nexata jane baja, daxita judíowi nawiaba. Nexata, bajarapaliwaisi yabara, namutua ayaicuenia nabarëcuaicuaijai tsanajetarubena.

³⁰ Pablo, anijawaibeje ponapona penacowaetsibota, pematamotaponae-cuenia. Bajarapabota xaniawaetsia copiapitabiaba daxita pamona siwaxainabiabatsi. ³¹ Pesiwaxainabiabiwitsijawabelia tsipaebabiaba Dioso pijajiwi pewetsijawa mapanacuataje. Ajumejunawijibia tsipaebabiabanua pepo-petuxanenë Jesucristo peliwaisi. Itsajiwi-ata cajena apojume-itawetsitsi, petsipaebiyaniwa.

Romanos

Mapabaxutoje apóstolnë Pablo toyaquina Jesús peliwaishi pejumexaniataewi, Roma tomarata pejinawanapaewijawabelia

Pablo pebajacobiliwaishi, penawajunupaebijawa-ata apóstol-nëcuene

1 ¹ Xanë, Pablonë, Jesucristo pijajiwitonënë. Dioso nejunata, nita-petanea apóstol-nënexanë.^a Nexata, nitoroba tatotsipaebaponaenexa jiwijawabelia pexanialiwaishi, Jesucristo peliwaishi, Dioso jawabelia pecapanepaeliwaishinexatsi.

² Dioso baja cajena tajëwelia najumecapanepaeya pejumaitsi-jawa pijaprofetawijawabelia, Jesús penaexanaejawanexa mapanacuataje, jiwi pecapanepaenënexa. Nexata, bajarapapexaniali-waisianë yaquinapona Dioso pejumeliwaisibaxutonexa, tajëwelia Dioso peyapëtaeya-exanaponaecueniatsi. ³ Bajarapapexanialiwaishi jumaitsi wajatuxanenë Jesucristo, Dioso Pexënato yabara. Jesucristo pacujinae naexana mapanacuataje, penaexanaexae David-pijinë pemomoxiyajuwënëwata,^b yapëtanetsi pepojiwitonëcuene. ⁴ Oriji-bia, yapëtanetsi Espíritu Santo pecuene-itajëtsijawa wajatuxanenë Jesucristo, Dioso pexënatocuene, pesaëta petëpaejawawecua icatsia penamatacotsia-exanaexaetsi. Daxita bajarapaliwaishi tsipaebanajeta-rucajë Jesús peliwaishi, Dioso pexënato yabara.

⁵ Wajatuxanenë Jesucristo pejamatabëcueneta, Dioso bitso pexaniacuene neto-exana. Tane-asiwaxae, nitapeta^c apóstolnënexanë, tatsipaebaponaenexa daxitanacuanëjawa Jesús peliwaishi. Nexata, pamona nejumetane, Jesús peliwaishi tatsipaebijawa, jumexania-taepona siwanajamatabëcuenecopabaponanua Jesús-jawabelia. Bajarapacuenia itsa jumecowënëta bajarapaliwaishi, Dioso bitso

a 1:1 *apóstol-nënexanë*: Apóstolewi pijacuata aponaitapetsi, aponaitorobinua. Dioso to-exanatsi bajaraxua. Nexata, ita tsipaebapona Dioso peliwaishi, Dioso pewënëta paebapona.
b 1:2-3 *David-pijinë pemomoxiyajuwënëwata*: Taema 2Sa 7:13, Lc 1:27. c 1:5 *nitapeta*: Itsamonae canaëjëta Pablo apopenayabaracuaicuaijajawa pijacuata pexanaecuenet yabara. Baitsi, canaëjëta peyabaracuaicuaijajawa daxita pamona Dioso pitapetsiwi petotsipaebaponaewi Jesús peliwaishi. Bajaraxuata, bajarapamona canacuenebabiaba «paxanë», pejaicuenia, penajua-paebiwi yabara ita yaquina Mapaversículoje.

tojitsipa jiwi pewënëxaniatabiabinexa^d Pexënato papexaniacuenetoxanatsi.

⁶Bajarapijinia pacuenia, paxamë-ata, Roma tomarata Jesús peliwaisi panejumexaniataewi, Dioso baja cajena pacajunata Jesucristo papijajiwinexamë. ⁷Nexata, bajaraPonë bitso ayaicuenia paca-asiwa. Paca-itapetanua, aneconijibia panejinawanapaenexa mapanacuapijiwiwecuaje, Dioso ëpijacuene pane-exanawanapaenexa. Bajaraxuata, xanë pexaniacuenia pacatojitsipatsi waxa Dioso, wajatuxanenë Jesucristobeje, papecajamatabëwënëtsinexa papeca-itaxutotsoniataejamatabëcuene,^e papeca-asiwajamatabëcuene, papecabarajamatabëxanepanaejamatabëcuene-ata, jamatabëcuenexanepanaeya panenajuajinawanapaenexa.

**Pablo yapëtaeya-exana pacuenia picani
jamatabëponabiaba Roma tomarapijiwijawabelia**

⁸Jesucristo pejamatabëcueneta,^f paxamë yabara copiaya pexaniajamatabëcuene rajutabiabajë Diosojawabelia patacatowajëcaejawata, tsipaji daxitanacuanëpijiwi pexaniacuenia pacawënëliwaisicacuai-cuaijai, Jesucristojawabelia panesiwanajamatabëcuenecopabijawa yabara. ⁹Dioso baja cajena yapëtane paxamë yabara patacatowajëcabiabijawa, apopacatae-atatsi abaxë. BajaraPonë daxita taja-matabëcuenesaëta tonacuenebaponaponajë tatsipaebabiabijawata pexanialiwaishi, pexënato peliwaishi. ¹⁰Diosojawabelia wajëcabiabajë taponanexa paxamëjawabelia, pacuenia picani tsiwajënaenajamatabëcueneweretajë ta-exanaejawanexa. Nexata, Dioso itsa netojitsipa taponanexa paxamëjawabelia, paepatota netocopatsiana, matapania jane baja, ponaenajë. ¹¹Bitso jitsipabiabajë patacataeyabiabijawa, xua pacatsisajina patacajamatabëcueneyawenonaenexa Espiritu Santo tanejamatabëcuenecaëjëpaeya-exanaecuenia, bajarapacuenia paxamë Dioso peliwaishi pane-ajamatabëcuenesaëtsaponanexa panewajënaeyabelia. ¹²Jitsipajënuu namata-enetsia wajana-jamatabëcueneyawenonaejawa wajawajënaeyabelia asaëyata

d 1:5 *pewënëxaniatabiabinexa*: Pajumexi griegojume juta «pewënëxaniatsijawa Cristo» jiwijumeta, najumetane Pablo pewënëxaniataponaejawa Cristo, jiwi pejumexaniataejawata Jesús peliwaishi, bajaraponë petsipaebanajetarucaejawata. Yajawanajumetanenua daxitanacuanëpijiwi peticarucaejawatsi pewënëxaniatsijawanexa Cristo. Taema Flp. 2:10. Orijibia, Pablo natocanaëjëta Dioso pewënëxaniatsijawa, pepaebanajetarucaejawata Jesús peliwaishi. Baitsi, Jesús wënëxaniatanajetaruca peyapëtaeya-exanaponaejawata xua Jesús toxana jiwi pecapanepaenexa Dioso penaneconitsia-exanaejawanexawecua, bajarapamonae penaneconitsixae pijaneconijamatabëcuene. **e 1:7** *papeca-itaxutotsoniataejamatabëcuene* Bajarapajume «karis-jume» griegojumeta. Jiwijumeta pijinia, «itaxutotsoniatane» itsajawata pijinia «ayaicuenia asiwa», pejaijume. Nexata, itsa griegowi canacueneba karis-jume Dioso yabara, nacayapëtaeya-exana pacuenia ëpexaniacuenie jamatabë-exanabiaba, toxanae-atatsi pejitsipaecuenie, itsa jume, apopejitsipaecuenie-ata. Dioso tsicarucae-atatsi picani jiwi penaneconitsia-exanaejawanexa pijaneconijamatabëcuene, itsiata siwacanaëjëta asiwaya peyawenonaenexa, pewecuapanepaenexa bajaraxua, Jesucristo pejamatabëcueneta. Nexata, Dioso asiwa-ata tsane jiwi, apocopatsi tsane naneconitsia-exanaenejewajaneconi pexainaejiwi. Biji rajane, caranata bajarapaneconimi Cristo tsijumaxuaba penaneconitsia-exanaenexa. **f 1:8** *Jesucristo pejamatabëcueneta*: Bajaraxua apojumaitsi «Jesús pewënëta» wajanaewajëcaejawa yabara. Biji rajane, saya jumaitsi pacuenia jiwi itsa siwanajamatabëcuenecopaba Jesús-jawabelia, matapania cuenecaëjëpatsi pewajëcaejawa Diosojawabelia. Taema Prov. 3:33; 15:8.

wajanajua-itaxutuajamatejematsawanapaenexa Cristojawabelia. Ëxanë apojitsipaenë pataca-ajamatabëcuenesaëya-exanaenexa Diosojawabelia. Jitsipajë paxamë-ata bajarapacuenia patanejamatabëcueneyawenonae-nexamë. Bajaraxua yabara picani jamatabëpacataeyabiabatsi.

¹³Patajamaenemë Cristo pejamatabëcueneta, pacatojitsipatsi paneyapë-taenexa mapacueneye. Bajayajebi picani jamatabëponabiabajë paxamëja-wabelia patacataenexa, patacayawenonaenexa panejamatabëcueneliwai-sinaweretsijawa Dioso pijacuenejawata. Itsiata, aponecuenecaëjöpabiabi. Itsacueneliwaisianë abaxë neyacaranatabiaba taponaeanyiwa. Pacuenia yawenonajë itsamonae apojudíowi panacuanëjawa tsipaebanajetarucajë Jesucristo peliwaisi, bajarapijinia pacuenia, jitsipajë tanacujumataenexa^g paxamëjawata-ata. ¹⁴Jamatabëponabiabajë apo-ëtajitsipaejamatabëcuene yabara. Dioso baja, nitoroba tatsipaebaponaenexa Jesús peliwaisi daxita-jiwijawa. Bajaraxuata, netsicaruca Jesús peliwaisi tatsipaebaponaenexa pinijitomaranëjawa, sasawia pe-enaewijawa-ata, pamona-ata mapanacua-pijiliwaisi bitso peyapëtaewijawa, apopeyapëtaewijawa-ata. Netsicaruca paxamëjawabelia-ata patacatsipaebinexa. ¹⁵Nexata picani, bitso naxanetajë jamatabëcuenebëjaiya bepijiayo paxamë patacatsipaebinexa bajarapapexa-nialiwaisi, Roma tomarata panejinawanapaewijawabelia.

Pablo yapëtaeya-exana pacuenia Dioso aneconijibia jiwi taejitsia

¹⁶Bajaraxuata apo-ajume-uranë tsabiabi tatsipaebabiabijawa pexaniali-waisi, Jesús peliwaisi, tsipaji xaina Dioso pesaë jiwi pecapanepaenexatsi, daxita pamona, jumexaniatane bajarapaliwaisi. Bajaraxuata, jamatabë-cuenebarëyaya tsipaebanajetarucajë bajarapaliwaisi daxitanacuanëjawa, judíowijawa, apojudíowijawa-ata. ¹⁷Bajarapapexanialiwaisi nacatsitajëta Dioso pijapianeconijibicuene. Nacatsitajëtanua pajiwi siwanajamatabëcuene-copata Jesucristojawabelia, Dioso aneconijibia petaejawatsi. Bajarapajamatabëcuene yabara, Dioso pejumeliwaisibaxutota jumaitsi mapacueniaje: «Pajiwi siwanajamatabëcuene-copatsiana Diosojawabelia peto-exanaejawatsi najumecapanepaeya pejumaitsicueniatsi, bajarapajiwi Dioso aneconijibia taenatsi. Xainaanua matababi apowerewerecaejawa»,^h jai, profetanë, Dioso pejumeliwaisibaxutota.

Pacuenia Dioso naneconitsia-exanaena daxita mapanacuapijiwi, judíowi, apojudíowi-ata, tsipaji daxitajiwi najëpaeya naneconita Diosojawabelia, Dioso peliwaisi apoxinae-ata

(Rom 1:18–3:23)

¹⁸Jesús peliwaisi tsipaebanajetarucajë, tsipaji Dioso, athëbëtatsia pe-ecaenë, najamatabëcuene-itajëta pebara-anaepanaejawaⁱ daxita xua jiwi

g 1:13 tanacujumataenexa: Pablo, Jesús peliwaisi ita tsipaebanajetaruca, bajaraponë yawe-nona pecujarubijawata, pamona abaxë jume-aeba Jesús peliwaisi, pesiwanajamatabëcuene-copabinexa Jesucristojawabelia. Yawenonaua pamona Jesús peliwaisi pejumexanataewi pejamatabëcueneliwaisinaweretsinexa Dioso pijacuenejawata, pewajënaeyabelia pijamatabë-cuene-saëtsaponaponaenexa pitaxutuajamatejemajawa Dioso. **h 1:16-17** Taema Hab. 2:4, Gén. 15:6. **i 1:18 pebara-anaepanaejawa:** Xua yabara Dioso bara-anaepana, bajaraxua naneconitsia-exanaena. Taema Rom. 3:10-26.

exanawanapa pibisiacuenejawanë, apopexanepanaecuenejawanë-ata. Baja rapapexanaecuenejawanëta cuenematayata Dioso pijapianeconijibicuene. Jumematayatanua Dioso pijapexaniajailiwaishi.

¹⁹Daxitajiwi baja cajena picani, yapêtane^l Dioso yabara, tsipaji bajaraPonë pijacujaya tsitanajamatabëcuene-itajëtabiaba bajarapamonaejawabelia. Baja rapacuenia exanabiabi-ata itsiata bajarapamonae apoyaiyatae bajaraPonë.

²⁰Bajaraxuata jiwi apocuenecaëjêpaetsi Dioso apopayapêtaenë pejaijawa. Jiwi yapêtane baja, Dioso pitsijamatabëcuene xaina, petaejawata daxita xua pexanaecuene, apopesaëwerewerecaejawanexa, apopetaecapanepaecuene-ata pitaxutota. Bajarapacuenia cuene-itsi tsaponaponae pepobajayajawawerenacujinae daxita pexanaewajënaeya, daxitamatacabijawabelianexa-ata. Orijibia, jiwi pijacuata yapêtane pepoDiosonëcuene, daxitamatacabi peyamatacabitsitecaenëcuene.^k

²¹Bajarapamonae yapêtae-ata Dioso peponaponaejawa, itsiata apoyaiyatae pacuenia picani beyaiyatane. Nexata, caeto-ata apowënëxaniatae bajaraPonë ayaijamatabëcuenenëcuene^l pexinaejawa yabara daxitawecua. Pexaniajamatabëcuene aporajutsinua bajaraPonëjawabelia, yawenonabiabi-atatsi. Biji saya caranata, Dioso yabara najamatabëxainabiaba ênatsiquejemacuenia.^m Nexata, bajarapacuenia penajamatabëxainaexae, pewajënaeyabelia ajamatabëcuene-itaquiri tsaponae pexaniajailiwaishiweua. ²²Nexata, bajarapamonae nataeyabiaba bepeyapêtaewi. Itsiata, saya piajamatabëcuenecowëbiwiⁿ Dioso pitabara ta naexana.

²³Bajarapamonae yapêtae-ata penawajëcaejawanexa Diosojawabelia, pepo-ayaijamatabëcuenenë, apopetëpaenënexa-ata daxitamatacabijawabelia, itsiata apowënëxaniatabiaba. Caranata saya bajarapawëñëxaniatsicuene ithiana pepoDiosowecua,^o juya siwanajamatabëcuenecopatsiaya penawajëcaenexa jiwi pecobeta jumapecataeya pexanaenëanëjawa-belia pepoDiosowecua. Nexata, itsamonae asiwaya nawajëcabiaba jiwi pecobeta jiwi jumapecataenëjawabelia. Nawajëcabiaba pepunaewi jumapecataenëjawabelia. Nawajëcabiaba jomo jumapecataenëjawabelia. Nawajëcabiabanua cuatro pataxutabeje pejinawanapaewi

j 1:19 yapêtane: Jota Pablo taxuxuabiana pewënëjonaponaejawa pacuenia bajarapamonae jumematayata pexaniajailiwaishi. Yapêtae-ata Dioso piasaëtsaponaponaejawa: 1) apojumexaniatae paliwaishi yapêtaeya-exanatsi. vr 19, 2) apoyaiyatae Dioso, apowënëxaniatsi, pexaniajamatabëcuene aporajutsi-ata, 3) ênatsiquejemacuenia najamatabëxaina Dioso yabara vr 21, 4) siwanajamatabëcuenecopaba itsacuenejawanëjawabelia Diosowecua, pena-ewetsinexa vr 23. Daxita bajarapacuenia pexanaejawata, jiwi jumematayata pexaniajailiwaishi. k 1:20 daxitamatacabi peyamatacabitsitecaenëcuene: Mapajumeyoje nacayapêtaeya-exana acueyabi pajamatabëcuene-beje Dioso yabara. BajaraPonë asaë tsaponaponae baja daxitacuene petaxuxuabiwajënaeya. Asaë tsaponaponaeuua maparucaje. Orijibia, asaë tsaponaponae tsane daxitamatacabijawabelianexa. Bajaraxua yabara wowai canacueneba «eternojume». l 1:21 ayaijamatabëcuenenëcuene: Dioso pecobecowë petaejawata, tsicarucatsi jiwi pewënëxaniatsinexa Dioso ayaijamatabëcuenenë yabara, pitaxutuajamatejemanexa Diosojawabelia perajutsinexatsi penamatawenonaejawanë, pejumecowënëtanapanapenexanua pacuenia tojitsipatsi pexanaenexa. Bajarapacuenia pexanaejawata jiwi najamatabëcuene-itajëta Diosojawabelia peyaiyataejawa. m 1:21 ênatsiquejemacuenia: Bajarapamonae yapêtae-ata pepopiasaënë Dioso yabara, pecuene-aebixae, natojaitapona pena-ewetsinexa pitaxutuajamatejemajawanënexa, xuanë Dioso tane penatsiquejemacuenëjawanë. n 1:22 piajamatabëcuenecowëbiwi: Taema Sal. 14:1, 1Co 1:20. o 1:23 ithiana: Taema Sal. 106:20.

jumapecataenëjawabelia. Bajaraxuanë saya natsiquejemajawanë, tsipaji cuene-itajëta petëpæcuenejawanë.

²⁴ Bajaraxuata, Dioso penaneconitsia-exanaecuenia tocopata bajarapamonae pia-uracuenejawanë, pewitota pibisiacuene namata-enetsia penato-exanawanapaenexa. Nexata, daxita papibisiacuenejawanë najamatabë-xainawanapa pexanabiabinexa, exanawanapa copabinejewa. ²⁵ Orijiibia, bajarapamonae pepoDiosojawabelia yayiataeya penawajëcabiabijawami ithothiana. Juya Diosowecua nawajëcabiaba yayiataeya natsiquejema diosowijawabelia,^p Dioso pecobecowëjawanëjawabelia-ata peyawenonaenexatsi. Nexata, Dioso pexaniajailiwaissiwehua, jumecowënëtanawanapa penajumetsë-nëtsiliwai. ^q Daxita bajarapacuene pexanaejawata, cuene-ithothiana pepoDiosojawabelia pexanaejawaminexa. Dioso ayaijamatabëcueneenëxae daxitawecua, pexanaenëxae-ata daxitacuene, nexata daxita pecobecowëjawanë toxanepanatsi Diosojawabelia pejumaitsiabiabinexa: «jDiosomë, bitso ayaijamatabëcueneenëmë!», pejainexa wënëxaniatsiaya dexitamatabijawabelianexa. Itsiata, bajarapacuenia bajarapamonae apo-exanae. Caranata, saya Diosowecua yayiataeya, asiwayanua, siwanajamatabëcueneocopaba Dioso pecobecowëjawabelia peyawenonaenexatsi.

²⁶ Bajarapamonae pewajënaeyabelia Dioso apopeyayataexae, bajaraPonë tocopata penaneconitsia-exanaecuenia bajarapamonae pijapibisiabajamatabëcuene pejamatabëcuenenamatacaponaenexatsi, matatoxenetsia pia-uracuenejawanë pexanawanapaenexa. Nexata, pepacuene najamatabëcuenebijiana Dioso petojitsipaecuenemitsiwehua. Mapanacuataje picani Dioso tocopata petiriawi, pebi pejitsipaenexa. Itsiata baitsi jane, ayabitsaëto ëpetiriawi namata-enetsia najitsipabiaba. Naperabëquenetsiataeyabiabanua. ²⁷ Bajarapijinia pacuenia, Dioso tocopata picani pebijijiwi, petiriwa pejitsipaenexa. Bajarapacuenia tocopatsi-ata, itsiata ayabitsaëto ëpebijijiwi namata-enetsia najitsipabiaba. Naperabëquenetsiataeyabiabanua. Nexata, Dioso tocopata bajarapamonae penatoyapëtaenexa peperabëtota penaneconitsia-exanaejawanexatsi,^r bajarapitsipibisiacuene pexanaejamatabëcuene. Dioso naneconitsia-exanaena daxita bajarapapibisiacuenejawanë pexanaewi, pamatacabita naneconitsia-exanaena, pijaneconi pexainaewi.

*Pablo pematatsënëa yapëtaeya-exana Dioso pijacuene
apopejamatabënajinaewi xua exanawanapa*

²⁸ Bajarapamonae apopejitsipaexae peyapëtaejawa pepoDioso-cuene, nexata Dioso naneconitsiaya tocopata piabejelijamatabëcuene

p 1:25 *natsiquejema diosowijawabelia:* Bajaraxuanë yabara cuaicuaijai xuanë jiwi pecobeta pexanaejawanë. Apopexainaejawanë piasaëjamatabëcuene, xuanë apocuenecaëjëpaetsi wajana-cayawenonaenexa itsacuenejawa-ata. Taema Sal. 115:4-7; 135:15-17-jawabelia. **q 1:25** *jumeco-wënëtanawanapa penajumetsënëtsiliwai:* Baitsi, pacuenia penajorobiwi jaitabiaba waja-itaxutota apowajataecapanepawijawabelia, juya peyapëtaeya-exanaenexa peyanijobiwitsijawabelia, bajarapijinia pacuenia jumapecataeya pexanaenëanë pewetsiwi exanabiaba, tsipaji caenajumetsënëtsiliwai jumexaniatane bajarapabitsaëtobeje. Taema 1Co 10:19-20. **r 1:27** *peperabëtota penaneconitsia-exanaejawanexatsi:* Bajaraxua yabara, jiwi caejamatabëcuene apoxinae pajamatabëcuene yabarajumaitsi. Itsamonae pijinia, canaëjëta penaperabëbijianaejawanexa, itsa jume, penajamatabëcuenebijianaejawanexa-ata. Itsamonae pijinia, canaëjëta Dioso matatoxenetsia penaneconitsia-exanaejawanexa, pamatacabi naneconitsia-exanaena pijaneconi pexainaewi.

pexainawanapaenexa. Bajarapajamatabëcuene pitorobicueniatsi exanawanapa, Dioso apopetsixanepanaejawanëtsi. ²⁹ Bajaraxua, petsijamatabëwënëcaexaetsi, najamatabëxainabiaba daxitacuenewiria pibisiacuenejawanë. Exanawanapa pibisiacuenejawanë peperabëtota. Nasiwanajamatabëxainabiaba ëpamonaenexa, cobecaëbiaya jamatabënaxainaeyababiaba itsamona pecobecowë. Pibisiacune jamatabëxanabiaba itsamonaejawabelia. Cueneca-ëbabiaba itsamonaejawabelia. Jamatabëbeyabiaba jiwi. Jitsipabiaba nabijataeya namata-enetsia penajume-anaenotsijawa. Yamaxë-itojorobabiaba jiwi. Jamatabëxanabiaba pibisiacuenejawanë. Najumetsënëtsiaya cuenebaracuaicuaijai tsabiabi itsamona. ³⁰ Itsamona pepëya pibisiacuenia baracuaicuaijai tsabiabi. Bajarapamona apojitsipae Dioso, pijacune-ata itoya. Apoyaiyataeyabiabi itsamona-ata. Naitaxutojematabiaba itsamona. Ayaijamatabëcuenewi nataeyabiaba itsamonaewecua. Pejamatabë-ëthëtojawawetsina^s pijacueneta pecapitsapaepibisiacuenejawanë exanabiaba. Apojumecowënëtabiabi paxajiwi, penajiwi-ata. ³¹ Naexana pijamatabëcuenecowëbiwi. Nexata, amuxujitsibi tsabiabi pemuxujio-bijawatsi. Itsajiwijawabelia najumecapanepaeya pejumlahitsijawa apoxanabiabi. Asiwaya apotaeyabiabi itsajiw-ata peyawnonaenexa. Bajarapamona apojitsipabiabi icatsia pexaniabinexa pajiwi itsacueniabatsi. Apoxainanua jiwi pebejiobiataejamatabëcuene. Daxita bajarapapibisiacuenejawanë exanawanapa najamatabëcuenecatatsinejewa, apopejamatabënajinaexae Dioso.

³² Bajarapamona yapëtae-ata Dioso penaneconitsia-exanaejawatsi, petocaëjëtsijawatsinua pijaneconijamatabëcuene petëpaejawanexa, itsiata tsiteca pibisiacune exanawanapa. Orijiaba, siwabarëya tsabiabi itsamona pibisiacune pexanaejawa yabara.

Pablo yapëtaeya-exana pacuenia Dioso naneconitsia-exanaejitsia caejijiyo canacujitsia

2 ¹ Paxamë, pajudíowimë, pabaracuaicuaijamë tsabiabi bajarapitsipibisiacune pexanaewi, tsipaji pacatsitaxanepana Dioso penaneconitsia-exanaenexa. Paxaniajamë, tsipaji yapëtanetsi Dioso bajaraxua pexanaejawanexa. Itsiata, bajarapacuenia panejumlahitsijawata payajawananeconitame, tsipaji paxamë-ata bajarapitsipibisiacune pa-exanawanapame. ² Bajaraxuata, paxamë-ata Dioso pacananeconitsia-exanaena, pamatacabi naneconitsia-exanaena daxita pijaneconi pexainaeawi. Bajarapamatacabita, caejiji canacujitsia, paneconiawajëto xaina, bajarapaneconiawajëtota Dioso naneconitsia-exanaponaena, judíowi, apojudíowi-ata. ³ Nexata, paxamë pajudíowimë-ata, pibisiacune itsa pa-exanawanapaename, ¿detsa nexata pacuenia pawecuapanepaename^t Dioso papecananeconitsia-exanaejawaminexa? Ajibi cajena, tsipaji Dioso

^s 1:30 *Pejamatabë-ëthëtojawawetsina*: Taema Mc 7:21-23. ^t 2:3 *pawecuapanepaename*: Itsamona canaëjëta Pablo yabaracuaicuaijai judíowi Dioso pijajiwicune, taema Jn 8:32-42; Jota mapacaptulujawataje Pablo apowënëjone ëpijajiwicune Dioso yabara, yajawawënëjonapona Dioso pitaxutotsioniatuene yabara 2:4, judíowi pexainaejawa yabara paliwaisi Dioso tonajumecopatatsi Moisés-pijinëta 2:17-24, judíowi penabo-upiperabëcaucubixae-ata 2:25-3:2.

najëpaeya naneconitsia-exanaena daxita pijaneconi pexainaewi,“ judíowi, apojudíowi-ata.

⁴ Paxamë bewelia pataneme Dioso papeca-itaxutobejiobiataejawa, pape-casiwanajamatabëcuenecataitsijawa” papecananeconitsia-exanaeyaniwa, papecasiwa-ajamatabëcuenesaëjawanua pibisiacuene pa-exanabiabi-atanë. Paxamë xaniawaetsia bepacanaëjëtame xua yabara Dioso bepíjia apopacananeconitsia-exanae panijaneconi paxinae-atamë. Bajarapa-cuenia exana, tsipaji abaxë pacajamatabëcuene-ewetaponapona pibisiacuene pane-exanaejawawecua panenajamatabëcuenepëñëyorotsinexa bajaraPonëjawabelia. ⁵ Itsiata, paxamë bitso pajamatabëcuenetajamë. Apopajitsipaemë panenajamatabëcuenepëñëyorotsijawa. Nexata, apopajamatabëcopatsimë pibisiacuene pane-exanaejawa. Bajaraxuata, ayaineconi panatsi-exanaponame panewajënaeyabelia. Nexata, paxamë-ata Dioso pacayajawananeconitsia-exanaena apojudíowi, pamatacabi naneconitsia-exanaena daxita pijaneconi pexainaewi.

**Dioso najëpaeya neconi canaëjëtsiana judíowi,
apojudíowi-ata**

⁶ Nexata, pamatacabi” Dioso tocanaëjëbiana* caejiwi canacujitsia pexa-naecuenemi, tocaëjëtsiananua pacuenia matamotsijitsia caejiwi cana-cujitsia pexanaecueni yabara. ⁷ Nexata, daxita pijaneconi pexainaewi naneconitsia-exanaena, paneconiwajëtota naneconitaponapona. Bajara-pijinia pacuenia, pajiwi pexaniacuene exanaponapona, bajarapapexaniacuene pexanaejamatabëcuene matamotsianatsi. ⁷ Dioso rajutspatsi matacabi apopewerewerecaejawa, pamonaesasaë tsawanapae tsipae

u 2:3 *daxita pijaneconi pexainaewi*: Ma-itsije: Judíowi canaëjëta Dioso petomatatsënëtaene-xatsi pijaneconi, caejamatabëcuene pexainaexae Diosojawabelia itsamonae pijaneconi yabara. Nexata, judíowi bitso tsitapibisiacuenetsi pexanawanapaewi Dioso pitabarata apojudíowi. Bajarapamonae canaëjëtana penaneconitsia-exanaejawanexatsi pamonaes apojudíowi. Juya, judíowi natocanaëjëta pijaneconi bewelianeconi pexanaejawa apojudíowiwehua. Baitsi, pali-waisi Dioso tonajumecopatatsi Moisés-pijinëta bajarapamonae tsitaxaniajaisi penaneconitsija-wanexa apojudíowi. Itsiata, aponatocanaëjëtsi peyajawananeconitsijawanexa bajarapaliwaisita. **v 2:4** *papecasiwanajamatabëcuenecataitsijawa*: Judíowi canaëjëta Dioso pijaneconi petomat-sënëtaenexatsi, Abraham pemomoxiax. (Taema Jn 8:32-42.) Dioso petsiwajënaeyapëtaenëxax daxitacuene, yapëtane baja pamonaes najamatabëcuenepëñëyorotsijitsia bajaraPonëjawabelia, pamonaes pijinia, apo-exanaes tsane bajarapacuenia. Bajaraxuata, Dioso aponamatawenonaes pewetsijawa jiwi petëpaematacabijawata, peyapëtaenexa pamonaes naneconitsia-exanaejitsia. Bajaraxuata, jiwi apobejumaitsi: “Itsa xamë ne-ewetsipame orijibia, najamatabëcuenepë-ñëyorotsipajë xamëjawabelia. Itsiata, caecuenia nenaneconitsia-exanamae, netocopatatsineje-wamë matacabianë tanajamatabëcuenepëñëyorotsinexa”, apobejai. **w 2:6** *pamatacabi*: Pablo xaniawaetsia apo-itajëtsi pamatacabi yabara jumaitsi, tsipaji cajunua anijacuenebeje yabara: Dioso mapanacuataje caëjëta pematamotsinexatsi jiwi pexanaecueni yabara. Nexata, jiwi piasaëtsawanapae-epato abaxë, pibisiacuene pexanawanapaewi Dioso tocaëjëtsipa pibisiacuene petanexa. Bajarapijinia pacuenia, pexaniacuene pexanawanapaewi, petanexa pexaniacuene. Orijibia, nacia pecopiarucaematacabijawabelia, Dioso tocaëjëtsiana pibisiacuene pexanawana-paewi penaneconitsia-exanaejawanexa, pijaneconijamatabëcuene. Juya, pamonaes pexaniacuene pexanawanapaewi, Dioso tocaëjëtsiana perajutsinexa pexaniacuenejawanë. Taema Rom. 1:27; Mt 25:31-46; Mt 6:1-18; Mt 7:8-11. **x 2:6** *tocanaëjëbiana*: Pamonaes ayaineconi pexainaewi, bajarapamonae matatoxenetsia Dioso naneconitsia-exanaenatsi. Taema Mt 23:14, Mc 12:40. Pamonaes pijinia, bitso pexaniacuene pexanaewi Dioso pejitsipacuenua, bajarapamonae mata-toxenetsia pexaniacuene taejitsia Dioso pijanacuatsia. Taema Mt 5:12; Lc 6:23,35; 1Co 3:8; 2Jn 1:8; Apoc. 22:12. **y 2:6** *pexanaecueni yabara*: Taema Sal. 62:11-12; Jer. 17:10; 2Co 5:10.

ëpexaniacuene pexanawanapaejawa,⁸ pejitsipaewi Dioso pewënëcacuai-
cuaïjainexatsi^a pexaniajamatabëcuenewicuenia, peyaiyataewitsicuenia-ata.^b
⁸Itsiaata bailsi jane, penatojitsipaewi ëbajarapamonaenexa apo pejitsipaewi
pejumexaniataejawa Dioso peliwaisi, pejitsipaewi tsitecaeya pibisiacuene
pexanawanapaejawa-ata, daxita bajarapamonae ayaicuenia Dioso anaeya
naneconitsia-exanaenatsi. ⁹Bajaraxuata, daxita pibisiacuene pexanawana-
paewi, Dioso najëpaeya tocopatsianatsi bitso penabejiobitsicuenia peji-
nawanaenexa, pejamatabëcuenebëjaicuenia-ata pijaneconijamatabëcuene.
Bajaraxua Dioso to-exanaena judíowijawabelia, tsipaji copiaya bajarapa-
monae apojumecowënëtsi Dioso peliwaisi. Bajarapacuenia-ata to-exanaena
apojudíowijawabelia, apo pejumecowënëtsixae bajarapaliwaisi. ¹⁰Itsiaata
bailsi jane, pamonaë ëpexaniacuene pexanawanapaewi, Dioso rajutsianatsi
ayaijamatabëcuene pexainaenexa, peyaiyataejamatabëcuenetsi pexaina-
nexa, jamatabëcuenexanepanaeya peponaponaenexa-ata. Bajaraxua Dioso
to-exanaena copiaya judíowijawabelia, tsipaji bajarapamonae nato-itapeta
pijajiwinexa. Bajarapacuenia-ata to-exanaena apojudíowijawabelia, ¹¹tsipaji
Dioso apoxinae caejiwi penato-itapetsijamatabëcuene. Biji rajane, daxita-
jiwi pexanaecuene najëpaeya tane.

**Mapanacuaijiwi naneconitsiaya jinawanapa Dioso pitabarata,
tsipaji caejiwiyo-ata apo pejumecowënëtsicapanepaexae
Dioso penajumecopatsiliwaisi Moisés-pijinëta**

¹²Daxita pamonaë pibisiacuene exanawanapa jumetaenejewa Dioso pena-
jumecopatsiliwaisi Moisés-pijinëta, bajarapamonae itsiata tēpaena Diosowe-
cua pijaneconijamatabëcuene. Daxita pamonaë pibisiacuene exanawanapa
pejumetaecujinae Dioso penajumecopatsiliwaisi Moisés-pijinëta bajarapa-
monae naneconitsia-exanaenatsi bajarapaliwaisi apo pejumecowënëtsixae.

¹³Bajaraxuata Dioso apotae aneconijibia judíowi pejumetaejamatabëcuene
Dioso penajumecopatsiliwaisi Moisés-pijinëta. Biji rajane, matapania aneco-
nijibia tane^c pajiwi jumecowënëtsicapanepa bajarapaliwaisi. ¹⁴⁻¹⁵Apojudíowi
apoxinae-ata bajarapayaquinaeliwaisibaxuto, Dioso itsiata tsijamatabë-
cuenerutatsi pitorobiliwaisi, penajumecopatsiliwaisi Moisés-pijinëta pejë-
paeliwaisi, jamatejema bajarapamonae peyapëtaenexa pejamatabë-ëthëtota
pacuenia be-exanawanapa. Nexata, bajarapamonae apoxinae-ata baja-
rapayaquinaebaxuto, itsa exanawanapaejitsipa Dioso penajumecopatsiliwaisi
Moisés-pijinëta pitorobicueniatsi, najamatabëcuene-itajëtsipa Dioso petsi-
jamatabëcuenerutsijawatsi bajarapaliwaisi. Najamatabëcuene-itajëtsipanua
peyapëtaejawa pejamatabë-ëthëtota xua pibisiacuene pexanaeyaniwa,

z 2:7 ëpexaniacuene pexanawanapaejawa: Taema Rom. 3:10-12,23. **a 2:7** pewënëcacuaicuaïjai-
nexatsi: Itsacuenia pejumaitsinexa bajarapagriegojume yabara: Dioso pepacuene pesiwajamatabë-
cuenebarëyanexatsi. **b 2:7** peyaiyataewitsicuenia-ata: Pamonaë apo pejumecowënëtsiwi aposiwa-
bëjai peyajawawënëxaniatsijawatsi Dioso, itsamonae peyaiyataejawanexatsi, pecuenejëpaexae
Dioso pexaniacuene pexanabiabijawata. Pablo yapëtane picani jiwi apopecuene caëjëpaejawatsi
ëpexaniacuene pexanaejawa. Itsiata, yapëtane pacuenia Dioso rajutsipatsi jiwi matakabi apo pe-
werewerecaejawa itsa cuene caëjëpaejitsipatsi ëpexaniacuene pexanawanapaenexa. **c 2:13** ane-
conijibia tane: Pagriegojumeyo Pablo canacueneba majotaje pitsapa wowajumeta, «justificar». Bajarapajume
nacayapëtaeya-exana jiwijumeta, «Jueznë pewajunupaebijawa planeconijibinë-
cuene, orijibia, penaneconitsia-exanaeyaniwatsi pacuene yabara neconitatsi jueznë pitabarata».

xua-ata pexaniacuene pexanaenexa. Bajaraxuata, Dioso naneconitsia-exanaena apojudfowi ita apo-exanawanapae pitorobicueniatsi petsijamatabëcuenerutsiliwaisitsicuenia. Bajaraxuata, yapëtanetsi Dioso najëpaeya penaneconitsia-exanaejawanexa judfowi, apojudfowi-ata, tsipaji najëpaeya naneconita bajaraPonëjawabelia. ¹⁶Nexata, Dioso pecaëjëtsimatacabi daxita pijaneconi pexainaewi, penaneconitsia-exanaenexa judfowi, apojudfowi-ata, bajarapamatacabi jane baja, Jesucristo tocopatsianatsi petocanaëjëtšinexa jiwi pijaneconi, xuanë-ata muetsia siwanajamatabëxainawanapa pexanaenexa. Bajarapaneconijawanë yabara, Dioso petonajumecopatsicueniatsi, Jesucristo najëpaeya naneconitsia-exanaena pijaneconi pexainaewi. Pamatacabi tsipaebanajetarucajë Jesucristo peliwaissi, jiwi pecapanepaeliwaissine-xatsi, bajarapacuenia jiwijawabelia yajawatsipaebaponajë.

**Pablo muxujioba judfowi, apo pejumecowënëtsixae
Dioso penajumecopatsiliwaisi Moisés-pijinëta, Dioso
pexaniacuena yawenonabiabi-atatsi**

¹⁷Paxamë, judfowi papecawënërubijiwi, xaniajai paxainame^d Dioso penajumecopatsiliwaisi Moisés-pijinëta. Bajaraxua yabara panatocanaëjëtame panepanepaejawanexa, Dioso papijajiwiwaxamë, papecananeconitsia-exanaejawawecua. Orijiibia, panataneme be-ayaijamatabëcuenewi itsamonaewecua bajaraxuabeje yabara.

¹⁸Panaxainaexae Dioso penajumecopatsiliwaisi Moisés-pijinëta, payapëtaneme baja cajena xua Dioso pacatojitsipa pane-exanaenexa. Bajarapaliwaisi panenacujarubixaenua, xaniawaetsia payapëtaneme xua bitso pexaniacunejawa pane-exanawanapaenexa. Bajaraxua paneyapëtaexae, bepanato-itapetame picanì ëpexaniacuenejawanë pane-exanawanapaenexa. ¹⁹Paxamë paneyapëtaexae xaniawaetsia bajarapaliwaisi, pana-itaxutujamatejemamë panematacaponaenexa panecujarubijawata Dioso pejumeliwaisiweucua bepitaxutotsëcënaewijawabelia, panejamatabëcuene-itayotsinexanua Dioso peliwaissi panetsipaebijawata piamatabëcuene-itaquiriwijawabelia Dioso pejumeliwaisiweucua. ²⁰Orijibia, panaexanamenua panecujarubiwinexa apo-peyapëtaewijawabelia Dioso peliwaissi. Pacujarubabiabamenua pejanajumecowënëtsiwi Dioso peliwaissi, xaniawaetsia pexanawanapaenexa pacuenia itorobatsi Dioso penajumecopatsiliwaisi Moisés-pijinëta. Bitso paneyapëtaewicuenia panataeyabiabame itsamonaewecua, panexainaexae pexaniajailiwaissi, Dioso penajumecopatsiliwaisi Moisés-pijinëta.

²¹¡Panacuenecanaëjëre pane-exanaejawa yabara! Paxamë, pajudfowimë, pacujarubabiabi-atamë itsamonaejawabelia Dioso penajumecopatsiliwaisi Moisés-pijinëta, apopacueniejëpawanapaemë bajarapaliwaisi pitorobicuenia. Biji rajane, copiaya pacatoxanepana panijacuata panenacujarubijawa panejumecowënëtsinexa, tsipaji pacuene-itawetsi-atamë itsamonaenacobetoxotsiyaniwa, itsiata paxamë caranata panacobetoxotabiabame. ²²Paxamë, pacuene-itawetsi-atamë, pijawawecua pibisiacuene pexanaeyaniwa ita petiriwajawabelia, itsiata paxamë panijawajiwiweucua, pibisiacuene pa-exanabiabame itsapetiriwajawabelia. Pacuene-itawetabiabamenua,

penawajëcaeyaniwa jumapecataenëñjawabelia. Itsiata, paxamë jumapecataenëñ penubenaebota pajoneyabiabame,^e penamatamotsijawanë ofrendacuenia pejebijawanë, panenacobetoxotabiabinexa.^f Bajarapacuenia pane-exanaejawata Dioso apopayaiyataemë.

²³ Paxamë pajudíowimë be-ayaijatabäcuenewi panataeyabiabame, Dioso penajumecopatsiliwaisi Moisés-pijinëta panexainaexae itsamonae-wecua. Pacatsitapexaniacuene-ata panexinaejawa bajarapaliwaisi, itsiata panajamatabëcuene-itajëtabiabame apopaneyaiyataejawa bajaraPonë apopane-jumecowënëtsijawata bajarapaliwaisi. Bajarapacuenia pane-exanawanapaexae itsamonae apoyaiyatae Dioso. ²⁴ Bajaraxua yabara itsaprofeñanë bajayatami yaquina baja Dioso pejumeliwaisibaxutota. Jumaitsi mapacueniaje: «Pamonae apojudíowi pibisiacuenia Dioso wënëbaracuaicuaijai tsabiabi, paxamë pajudíowimë xaniwaetsia apopanejumecowënëtabiabixae, pawajunupaebabiabi-atamë panijaDiosonëcuene»,^g jai Dioso pejumeliwaisibaxutota.

²⁵ Orijiabia, pacanaëjere: Paxamë, pajudíowimë, papebijiwimë, papecabo-upiperabëcaucubijawa, panenacuene-itajëtsinexa Dioso papijajiwiwimëcuene, pacatonamatamota matapania itsa pajumecowënëñawanapame Dioso penajumecopatsiliwaisi Moisés-pijinëta. Papecabo-upiperabëcaucubiwi-ata, apopacatonamatamotsi itsa apopajumecowënëtsimë bajarapaliwaisi. Nexata, Dioso-ata pacatane be-apopenenabo-upiperabëcaucubiwi.^h ²⁶ Bajarapijinia pacuenia, pamonae apojudíowi, apopenabo-upiperabëcaucubiwi-ata, itsa xaniwaetsia jumecowënëñawanapaejitsipa pitorobicuenia Dioso penajumecopatsiliwaisi Moisés-pijinëta, nexata Dioso taejitsipa bepenabo-upiperabëcaucubiwi.ⁱ ²⁷ Pamonae apojudíowi, apopenabo-upiperabëcaucubiwi-ata, itsiata jumecowënëta Dioso penajumecopatsiliwaisi Moisés-pijinëta, pacananeconitsia-exanaena paxamë pajudíowimë

e 2:22 pajoneyabiabame: Pepacujiru judíowiyajuwënëñ apojone picani jumapecataenë penacuenebanutsibojawata, caeto-ata. Itsamonae canaëjëta pacuenia judíowi tsaena penamatamotsijawanëmi beweliacuenia comuacabiaba, xuanë itsamonae nacobetoxota. Penacobetoxotsiwi notabiaba jumapecataenëñ, xuanë-ata bobena bajarapabo-ënëta, pecanacuenibijawanë. Bajaraxuanë canajetabiaba judíowijawabelia, jamatejema pecanacuenibabiabinexa penanijawanë, pecanajetsinexa. Itsamonae pijinia, canaëjëta pacuenia judíowi nacuenibabiaba jumapecataenëñ, juya pecanajetsinexa apojudíowijawabelia. Bajarapacuenia itsa exana, bepenacobetoxotsijawa jumapecataeya pexanaenëñ pijamatamominexa pecanajetsijawata bajarapajumapecataenë. Apoyapëtae-atatsi pepacujiru xua yabara Pablo yaquina, itsiata yapëtanetsi Dioso tsitatsi bitso pibisiacuene pexanaejawa. Taema Deut. 7:25. **f 2:22 panenacobetoxotabiabinexa:** Itsacuenia pejucaejawanexa mapaliwaisije: «Paxamë pabara-anaepanabiabame *itsi peyayataejawa jumapecataeya pexanaenëñ Diosowecua, nexata pacuene-itawetabiabame itsamonae pewajëcabiabiyaníwa bajaraponëñjawabelia. Bajarapacuenia pacuene-itoya-atamë, paxamë itsiata panajamatabëcuene-itajëtabiabame apopaneyaiyataejawa Dioso apopanejumecowënëñtabijawata paliwaisi Dioso tonajumecopata Moisés-pijinëta. Bajaraxua pane-exanaejawata bepanacobetoxotsijawa panyaiyataejawaminexa Dioso*». **g 2:24** Taema Eze. 36:20-23; Isa. 52:5. **h 2:25 be-apopenenabo-upiperabëcaucubiwi:** Itsa Dioso tane judíowi apobepenabo-upiperabëcaucubiwicuenia, nexata daxita xua Dioso najumecapanepaeya jumaitsi Abraham-pijinëñjawabelia, Israel-pijinë pemomoxijawabelia Moisés peponaponamatacabita-ata, peyawenonaenexatsi pijajiwiwaxae, daxita bajaraxuanë judíowi apotae tsane. Caranata, apojudíowicuenia taejitsiatsi saya. **i 2:26 bepenabo-upiperabëcaucubiwi:** Bajaraxua yabara yapëtanetsi pepacujiru pamonae apojudíowi aponamatawenonae penabo-upiperabëcaucutsia-exanaejawa. Baitsi, Jesucristo wajanacatojumecowënëñscapanepaexae Dioso penajumecopatsiliwaisi Moisés-pijinëta, itsa itaxutujamatejematsi Jesucristojawabelia wajanecomimi wajanacatomatamotsinëcuenia, Dioso nacataeyabiaba bewajanabo-upiperabëcaucubiwicuenia.

Diosojawabelia, tsipaji panenabo-upiperabëcaucubiwi-ata, panexainaewi-atanua Dioso penajumecopatsiliwaisi Moisés-pijinëta, apopajumecowënëta-wanapaemë bajarapaliwaisi. Bajaraxuata, Dioso pacayajawananeconitsia-exanaena pajudfowimë, pamatacabi naneconitsia-exanaena daxita pijaneconi pexainaewi.

²⁸ Bepayapëtaneme mapacueneje: Jiwi aponaexanae pepojudfônë saya peperabëcaucutsijawatatsi, penacopatsinexa Dioso pijajiwitonëcuenia. ¡Jume baja cajena! Baitsi, xua jiwi exana naniawelia peperabëtota amata-mobi, itsa apojumecowënëtsi Dioso penajumecopatsiliwaisi Moisés-pijinëta.

²⁹ Biji rajane, pajiwi pejamatabë-ëthëtojawawetsina Dioso jumecowënëta, bajarapajiwi naexana pepacuene judfojiwi. Bajarapijinia pacuenia, jiwi aponaexanae pepacuene penabo-upiperabëcaucutsia-exanaewi Dioso pitabarata, bajarapananiapijicuene pexanaexae. Biji rajane, pajiwi Espiritu Santo bepewecuacacutsijiwiitsi pijaperujumatabëcuenemi^l pewecuaxuabine-xatsi,^k peponaponanexa Dioso pijajiwitonëcuenia, bajarapajiwi naexana penabo-upiperabëcaucutsia-exanaewi Dioso pitabarata. Bajarapacuenia aponaexanae pijajiwineja, saya naniapijicuene pexanaexae,^l pejumecowë-nëtsixaenua Dioso penajumecopatsiliwaisi Moisés-pijinëta. Dioso siwajamatabëcuenëbarëya xua Espiritu Santo to-exana jiwijawabelia, Dioso pijajiwipexanaenexatsi. Itsiata jiwi siwajamatabëcuenëbarëya tsabiabi naniapijicuene yabara.

**Dioso pexaniajamatabëcuenenëxae, caejamatabëcuenë xaina
penaneconitsia-exanaenexa pijaneconi pexainaewi**

3 ¹ Canaëjësianatsi mapacueneje: ¿Detsa pitsicuenejawata judfowi naexana bitso penamatamotsiwi Diosojawabelia apojudfowiwehua? ¿Detsa xua yabara toxanepanatsi penabo-upiperabëcaucubijawa?

² Judfowineja paliwaisianëta yanamatamota Diosojawabelia apojudfowiwehua, bitso tonawitatsi cajena. Copiaya, apojudfowiwehua namataxainaeya Dioso pejumeliwaisi tonajumecopatatsi pijasalinaiwimijawabelia.

³ Ayaibitsaëto bajarapamonaeyajuwënëwi jume-aeba^m baja papexania-cuene Dioso yawenonaeyapaebatsi, nexata apojinawanapae Dioso peliwaisi pitorobicueniatsi. Bajarapamonae apopejumexaniataexae xua Dioso jumaitsi bajayatami, ¿bajaraPonë meta najume-amatamobia-exanaena? ⁴ ¡Jume cajena! Dioso raja penajumecowë-exanaenë pejumaitsicuenia pexaniajainëxae.ⁿ Jiwi rajane banajumetsënëta. Dioso pejumeliwaisibaxutota bajaraxua yabara jumaitsi mapacueniaje:

j 2:29 bepewecuacacutsijiwiitsi pijaperujumatabëcuenemi: Taema Deut. 10:16; 30:6.

k 2:29 pewecuaxuabine-xatsi: Taema Efe. 1:13-14. Pablo cuenecatane xua Espiritu Santo nacato-exana wajajamatabëcuenëjawata pebo-upiperabëcaucubiwicueniatsi judfowi. Nexata, waxaitsi Espiritu Santo bewajanacajamatabëcaucubinë. 1 2:29 naniapijicuene pexanaexae: Taema Lev. 26:41; Eze. 44:9. m 3:3 jume-aeba: Bajarapamonae jume-aeba anijaliwaisibeje, Dioso najumecapanepaeya pejumaitsiyawabeje. 1) Dioso penaneconitsia-exanaejawanexatsi pijaneconijamatabëcuenë. Canaëjëta saya pewecuapanepaejawanexa bajaraxua, Dioso pitapetsixae Abraham-pijinë pemomoxi pijajiwineja. 2) Jume-aebanua Dioso pexaniacuene peto-exanaejawanexatsi matapania itsa xaniawaetsia jumecowënëta Dioso penajumecopatsiliwaisi Moisés-pijinëta. Canaëjëta saya Dioso pexaniacuene peto-exanaejawanexatsi, Abraham-pijinë pemomoxixae.

n 3:4 pexaniajainëxae: Taema Núm. 23:1.

«Diosomē, daxitajiwi cayapētaejitsia nexaniajatsabiabijawa, nenaneconitsia-exanaejawata xaniajaiya^o pijaneconī pexainaewi. Bajarapacuenia nexanaejawata, jume-amoneyabianame pamonae cananeconitsia-exana juez-monae pitabarata nexanaecuene yabara», jai David-pijinē Dioso pejumeliwaisibaxutota.^p

⁵ Itsamonae, pajudfowimēyajuwēnēwi, jamatabēcuenenawēxaniabiaya jumaitsi tsipae: «Pibisiacuene pata-exanaejawa pejamatabēcuenē, daxitajiwi yapētaejitsipa Dioso pepopianeconijibinēcuenē. Bajaraxuata, apopansitaxanepanae Dioso patanenaneconitsia-exanaejawa pibisiacuene pata-exanaejawa yabara», jamatabēcuenenawēxaniabiaya jai tsipae.

¿Xaniajai tsipae bajarapacuenia pejumaitsiyawa? ¡Jume cajena! Bajarapacuenia itsa cuaicuajai, najamatabēcuenē-itajēta saya mapanacuapijiwi pecanaējētsicuenia, Dioso apopecanaējētsicuenia. ⁶ Dioso baja cajena apocopatsi tsane itsajiwi-ata naneconitsia-exanaenejewa pijaneconijamatabēcuenē. Itsa Dioso copatsipa judfōwi naneconitsia-exanaenejewa pijaneconī xainae-ata, ¿detsa nexata pacuenia naneconitsia-exanaejitsipa apojudfōwi pijaneconī pexainaewi? Dioso itsa aponaneconitsia-exanae tsipae pijaneconī pexainaewi, naitajētsipa penajumetsēnētsinēcuenē daxitajiwi pitabarata.

⁷ Yapētanetsi baja Dioso pexaniajainēcuenē, jiwi pijinia, penajumetsēnētsiwiucuene. Belia itsanē, paxamēyajuwēnēnē, jamatabēcuenenawēxaniabiaya jumaitsi tsipae Dioso pexaniajainēcuenē yabara: «Pacujinae najumetsēnētsiaya jumeowēnētājē Dioso jawabelia tanaliwaisicajonecuenia, nexata tanajumetsēnētsicuenē yabara, jiwi juya pexaniacuenia wēnēxaniata Dioso pepopexaniajainēcuenē daxitawecua. Bajaraxuata, apoxanepanae Dioso tanenaneconitsia-exanaejawa pibisiacuene ta-exanaejamatabēcuenē, tsipaji jiwi Dioso pexaniacuenia wēnēcacuaicuajai tsane, pibisiacuene ta-exanaejawa pejamatabēcueneta», jai tsipae meta itsanē judfōwi yajuwēnēnē jamatabēcuenenawēxaniabiaya. ⁸ Bajarapacuenia itsa jumaitsi bajaraponē, jēpa saya jamatabēcuenenawēxaniabiaya bepejumaitsiyawa mapacueniaje: «Pibisiacuene waja-exanaejawa xanepana, tsipaji pibisiacuene waja-exanabiabijawa pejamatabēcueneta, daxitajiwi canaējētsiana Dioso pibisiacuene apopexanaenēcuenē. Nexata, pibisiacuenejawanē nawitsia exanabiabianatsi, jiwi juya, nawitsia pexaniacuenia Dioso pewēnēcacuaicuajaitsabibinexa», bepejaiyawa bajaraponē. Bajarapacuenia pejumaitsiwi, pepocuene neconī natsi-exana Dioso pitabarata.

Bajarapacuenia raja itsamonae xanē yabara najumetsēnētsiaya jumaitsi tsabiabi mapacueniaje: «Pablo raja itorobapona jiwi bajarapacuenia pibisiacuene pexanaenexa, Dioso juya, pexaniacuene peto-exanabiabinexatsi», jai tsabiabi najumetsēnētsiaya xanē yabara. Bajarapacuenia pejumaitsiwi xanē yabara, yapētanetsi Dioso penaneconitsia-exanaenexatsi.

o 3:4 xaniajaiya: Itsajume pijinia, «xanepanaeya». **p 3:4 pejumeliwaisibaxutota:** Taema Sal. 51:4. David-pijinē, Israel nacua peyanacua-ewetsinēmi, apotsitapibisiacuenetsi Dioso penaneconitsia-exanaejawatsi pibisiacuene pexanaeneconī yabara. Biji rajane, tsitapexanepanaecuenetsi, tsipaji yapētane Dioso apopenajumexuabinē. Baitsi, Dioso itsa aponaneconitsia-exanaetsi tsipae, pijaneconī xainae-ata, peneta Dioso pibisiacuene pexanaenē, apopexanaexae pejumaitsiwewēya. Najumetsēnētsipa.

Pablo yapētaeya-exana daxitajiwi penaneconitsijawa Diosojawabelia

⁹ ¿Detsa pacuenia pacanaējētame? ¿Ējudīowitsi tsaja aneconijibia Dioso nacatane daxita mapanacuapijiwiwecuaje? ¡Jume raja! Jumait-sinē baja cajena mapacueniaje. Daxitatsi mapanacuapijiwitsije, judīowi, apojudīowi-ata, najēpaeya pibisiajamatabēcuene nacanamatacaitoroba, pibisiacuene waja-exanawanapaewinexa. Bajaraxuata, daxitatsi Dioso nacananeconitsia-exanaena.

¹⁰ Xaniajanē xua pacatsipaebatsi. Daxitatsi pibisiacuene waja-exanawanapaewi. Bjarapijinia pacuenia, bajayatami Diosojumepaebiwimi, profetawi, Dioso pejumeliwaisibaxutota jumaitsi mapacueniaje:

«Pepacujiru caejiwiyo-ata aneconijibia apoponaponae^q Dioso pitabarata.

¹¹ »Ajibi peyapētaejiwi pacuenia Dioso jamatabēcuene-itsi. Ajibi pepacuene pejitsipaejiwi Diosojawabelia caejamatabēcuene pexainanexa.

¹² Daxita Diosowecua naxuabiaya jinawanapa. Daxita ajamatabēcuenebeje. Ajibi pepacuene pexaniacuene pexanabiabijiwi.

¹³ »Bjarapamonae pecuaibowojoto cuenejēpa petēpaenē pemēthē petuxutsaebijawa, tsipaji cuaicuajiai tsabiabi pepopibisialiwaianē, jiwi piamuxujitsibiliwaianē. Pejumeta jiwi yamaxē-itojorobabiaba.^r Bjarapamonae pecuaicuajiajawata capitsapabiaba bitso piatanejumenē.^s Pacuenia jomo pecuaibowojotota xaina piatanejawa, bjarajumeliwaisi-itsi bjarapamonae pecuaicuajiajawata.

¹⁴ »Pecuaibowojotota ēpibisialiwaishi wēnēcacuaicuajiai^t tsabiabi Diosojawabelia. Pewēnajiwiawabelia-ata pejumeta tojitsipabiaba pibisiacuene petocopiapatabiabinexatsi. Orijiibia, cuaicuajiai tsabiabi piatanejumenē itsamonaewawabelia penajamatabēxainaeya-exanaenexa.

¹⁵ »Apotsita-itsacuenetsi^u bepijia jiwi pebeyaxuabinexa. Nexata, itaxutotsoniataenejewewa beyaxuababiaba.

¹⁶ »Itsabelia ponabiaba, jiwi bejiobia-exanabiaba. Pecobecowējawanē tobijianabibanua.

¹⁷ »Bjarapamonae apoyapētae xaniawaetsia jiwi aliwaisijibia peyajawajinawanapaejawa.

¹⁸ »Bjarapamonae caeto-ata apoxainae peyaiyataejamatabēcuene Dioso^v, jai mapacueniaje profetawi Dioso pejumeliwaisibaxutota, daxitatsi mapanacuapijiwitsi wajaneconi wajaxainaejawa yabara.

¹⁹⁻²⁰ Nexata, waxaitsi, daxita nacuapijiwitsi, yapētanetsi pacuenia paliwaisi Dioso tonajumecopata Moisés-pijinēta, bjarapaliwaisi

q 3:10 *anecojibia apoponaponae*: Taema Sal. 14:1-3; 53:1-3. r 3:13 *yamaxē-itojorobabiaba*: Taema Sal. 5:9. s 3:13 *piatanejumenē*: Taema Sal. 140:3. Mapapiatanejumenējawabelia cajunua, «penajumetsēnētsiliwaisita pebeyaxuabinexa itsanē, itsa jume, petēpaejanitsijawa, itsa jume, pewecua-ajibia-exanaenexa papexanialiwaishi pewēnēbaracuaicuajiajawami, juya ēpibisiacuena pewēnēbaracuaicuajiajainexa», pejaiajamatabēcuene xaina bjarapajume. Bjaraxuata, cuenejēpa pacuenia jomo pecuaibowojotota caponapona piatanejawa, pebeyaxuabinexa jiwi pesinijawata. t 3:14 *wēnēcacuaicuajiai*: Taema Sal. 10:7. Orijiibia, najumetanenua pibisiacuena pecacuaicuajiajawata pia-urajumenē, itsa jume, pibisiajumenē-ata. u 3:15 *Apotsita-itsacuenetsi*: Taema Isa. 59:7-8. v 3:18 *peyaiyataejamatabēcuene Dioso*: Taema Sal. 36:1.

tonajumecopata ejudjowinexa, pejumecowënëtanapanexa pacuenia itorobatsi. Itsiata, bajarapamonae apocuenecaëjpaetsi pejumecowënëtsicapanepaejawa bajarapaliwaisi. Nexata, naneconita Diosojawabelia. Dioso penajumecopatsiliwasi Moisés-pijinëta pejumecowënëtsijamatabëcueneta, caejiwi-ata, judjowi, apojudjowi-ata Dioso aneconijibia apotae. Bajaraxuata, caejiwi-ata acuenebi pejumaitsinexa: «Xanë cajena apotoneconitsinë Dioso», pejainexa. Dioso najumecopata bajarapaliwaisi, daxita mapanacuapijiwi penatoyapëtaenexa pibisiacuenepexanawana-paewicuene, Dioso penaneconitsia-exanaejawanexanua, bajarapaliwaisi apopejumecowënëtsixae.

**Pablo yapëtaeya-exana pacuenia Dioso aneconijibia
taejitsia ejumexaniataewi Jesús peliwaisi**

²¹ Daxita jiwi apocuenecaëjpaetsi pejumecowënëtsicapanepaejawa paliwaisi Dioso najumecopata Moisés-pijinëta. Nexata, aeconoxae Dioso jane baja, mapamatacabitaje nacayapëtaeya-exana pacuenia aneconijibia nacataejitsia, jumecowënëtsinejewatsi bajarapaliwaisi. Bajaraxua yabara, bajayata profetawi tajëwelia yaquina Dioso pejumeliwaisibaxutota, pacuenia Dioso wecua-ajibia-exanaejitsia pijaneconi pexainaewimi. ²² Pajiwi jumexaniatane, itaxutuajamatejemanua, Jesucristo cruzata pesiwatëpaejawatsi, Dioso wecua-ajibia-exana^w bajarapajiwi pibisiacuenepexanaeconi. Ebajarapajamatabëcueneta Dioso wecua-ajibia-exanaena daxita pijaneconi pexainaewi, judjowi, apojudjowi-ata, tsipaji Dioso najëpaeya tane. ²³ Daxitajiwi pibisiacuenepexanawanapaexae, nexata naxuabiaya Diosowecua jinawanapa, tsipaji caejiwi-ata Dioso pejitsipacuenia apotonaponae, pacuenia picani copiyami nacuenecataeya^x aneconijibia exanatsi.^y ²⁴ Daxitajiwi pijaneconi xainae-ata, itsiata Dioso pinijicuenia piasiwaxae, bajarapamonae aneconijibia tane Cristo Jesús^z pejamatabëcueneta. Jiwi aponamatawenonae pijacuata penaneconimatamotsinexa Diosojawabelia, tsipaji

w 3:22 wecua-ajibia-exana ... pijaneconimi: Pacujinae Dioso nacawecua-ajibia-exana wajaneconimi, bitso tajë nacawecuatsata wajaneconi penajamatabënapitsiyaniwa icsatia. Taema Sal. 103:12. **x 3:23 nacuenecataeya:** Taema Gén. 1:26-27; 1Co 11:7. **y 3:23 aneconijibia exanatsi:** Wowaijumeta canacueneba «gloria de Dios». Dioso pepopianeconijibinë, tsipaji caeto-ata pibisiacuenepo-exanae. Adán, Evabeje, Dioso pexanaejawatabeje, Dioso apopejitsipacuenepo-exanaebeje abaxë. Nexata, caegloria najuaxaina Diosobana. Itsiata, pacujinae apojumecowënëtsibeje Dioso, wecuanaxuababeje bajarapagloriawata. **z 3:24 Cristo Jesús:** Mapawë-nëanëje canacueneba Jesucristonexa Dioso pejumeliwaisibaxutota, pejanaliwaisibaxutota. Itsajawata, wënërubatsi judjowinexa «Mesías». Hebreojumeta Mesías-jume pitsapa, «Dioso petsimata-epanaenëtsi pepopeyanacua-ewetsinëtsi», pejaijume. Bajarapacuenia wënërubatsi, tsipaji canaëjëta pacuenia Jesús, Dioso petsimata-epanaenëtsi pepopeyanacua-ewetsinënexa israelitawi, Ponë pepopeyanacua-ewetsinëmi David-pijinë pemomo, pacuenia Dioso jumaitsi David-pijinëjawabelia 1Cró. 17:12-15-jawata. Nexata, Mesías-wënë itsa juta griegojumewawabelia, pitsapa «Cristo», griegojumeta. Nexata, «Cristo» itsa jai, nacayapëtaeya-exana pacuenia Jesús pepopeyanacua-ewetsinënexa mapanacuapijiwi, Dioso najumecapanepaeya pitorobiayapaebinë. Jesús-wënë pijinia, nacayapëtaeya-exana, «jiwi pecapanepaenë», pejaiwënë, pacuenia Dioso jumaitsi peto-itorobiayapaebijawanexa Eva-pijiawawabelia, Gén. 3:15. Nexata, itsa Dioso pejumeliwaisi peyaquinaenë namatamotsia-exanaejitsia Jesús peyanacua-ewetsinëcuenepa, jiwi pecapanepaenëcuenewecua, nexata wënërubatsi Cristo Jesús. Juya, itsa namatamotsia-exanaejitsia Jesús jiwi pecapanepaenëcuenepayanacua-ewetsinëcuenewecua, nexata wënërubatsi Jesucristo.

baja Jesucristo amoneya tomatamotatsi pibisiacune pexanaeoneconimi, pesiwatëpaejawatatsi cruzata. Nexata, daxita pamona siwanajamatabëcuenecopaba Jesucristojawabelia, cruzata pesiwatëpaejawatsi pijaneconi yabara, bajarapamona Dioso aneconijibia tanetsi. Capanepatsinua^a pianeconijamatabëcuene penaneconitsia-exanaejawaminexatsiwecua. ²⁵ Dioso copata Jesucristo petëpaenexa cruzata, daxitajiwi peneconimatamotsinexa, pibisiacune pexanaeoneconimi yabara. Nexata, bajarapacuenia Jesucristo capanepaeya neconimatamota baja daxitajiwi, maparucaeje pejinawana-paewi, pepobajayata pejinawanapaewimi-ata. Bajarapacuenia penecconimatamotsixae jiwi pijaneconi, nexata Dioso siwanajamatabëcuenecaewa pebara-anaepanaejawami, pajiwi siwanajamatabëcuenecopata Jesucristoja-wabelia, cruzata pesiwatëpaejawatsi. Bajarapacuenia pexanaexae, yapëtanetsi Dioso planeconijibinëcuene bajayatami itsa najamatabëcuenecataita^b penaneconitsia-exanaejawaminexa pamona pijaneconi pexainaewi, Cristo pepatsiwajënaeya. ²⁶ Bajarapacuenia najamatabëcuenecataita, tsipaji jitsipa mapamatacabijawaberena penajamatabëcuene-itajëtsinexa pexaniajamatabëcuene pexainaenëcuene, wajanacayapëtaeya-exanaejawata pacuenia jiwi wecua-ajibia-exanaejitsia pijaneconi pexainaewi, Jesucristo pejamatabëcueneta. Nexata, pajiwi siwanajamatabëcuenecopata Jesucristojawabelia cruzata pesiwatëpaejawatsi pijaneconi yabara, Dioso wecua-ajibia-exanatsi pijaneconi. Aneconijibia tanetsi, pacuenia bajaraPonë aneconijibi.

²⁷ Nexata, Dioso itsa wecua-ajibia-exana jiwi pijaneconimi pesiwanajamatabëcuenecopatsixae Jesucristojawabelia, caejijiwo-ata apoxinae xua yabara ayajamatabëcuenejiwi nataejitsia. To-acuenebitsi, tsipaji Dioso apowecua-ajibia-exanae jiwi pijaneconimi, pejumecowënëtsicapanepeaxae Dioso penajumecopatsiliwaisi Moisés-pijinëta. Biji rajane, Dioso jiwi aneconijibia tane pesiwanajamatabëcuenecopatsixae Jesucristojawabelia. Ajibi cajena itsacuenejawa xua yabara Dioso jiwi aneconijibia taejitsia, itsa aposiwanajamatabëcuenecopatsi Jesucristojawabelia. ²⁸ Bajarapaliwaisi yabara yapëtanetsi pacuenia jiwi pijaneconi apowecua-ajibia-exanaetsi pejumecowënëtsixae Dioso penajumecopatsiliwaisi Moisés-pijinëta. Biji rajane, Dioso jiwi pijaneconi wecua-ajibia-exana pesiwanajamatabëcuenecopatsijawata^c Jesucristojawabelia, pesiwatëpaexaetsi pijaneconi yabara.

²⁹ Dioso raja ëjudiowi apopijaDioso. Dioso raja apojudiowi-ata pijaDioso.

³⁰ Caenë rabaja Dioso. Pematatsënëa baja ajibi itsaDioso. Bajaraxuata, najëpaeya caecuenia wecua-ajibia-exanaena pijaneconi pexainaewi judiowi,

a 3:24 *capanepatsinua*: Pablo itsa jumaitsi Cristo jiwi pecapanepaejawa yabara, anijajamatabëcuenebeje xaina. 1) Cristo capanepa Dioso penaneconitsia-exanaejawaminexawecua pijaneconijamatabëcuene. 2) Capanepanua jiwi pijapibisijamatabëcuene penamatacaitorobisaëtsiwecua. b 3:25 *najamatabëcuenecataita*: Dioso aneconijibia tane bajayatami pejinawanapaewimi itsa itaxutuajamatejemaya copia-ewetawanapa petocopiapatsinexatsi Dioso najumecapanepaeya pejumaitsicuenia, tsipaji yapëthane Jesucristo petomatamotsijawanexatsi pijaneconimi. Bajarapacuenia Dioso wajunupaebatsi planeconijibijawa pamona siwanajamatabëcuenecopaba Jesucristojawabelia. Caenë neconimatamota daxitajiwi. Taema Rom. 1:16-17. c 3:28 *pesiwanajamatabëcuenecopatsijawata*: Romanos capítulo 5-jawata Pablo nacayapëtaeya-exana xua yabara Dioso cuenecaëjëpatsi pewajunupaebinexa planeconijibijawa ayaibitsaëto jiwi caenë Cristo pejamatabëcuene.

apojudíowi-ata,^d pamonaе siwanajamataběcuenecopaba Jesucristojawabelia, pesiwatěpaejawatsi cruzata pijaneconi yabara. ³¹ Dioso itsa wajaneconi nacawecua-ajibia-exana wajasivanajamataběcuenecopatsixae Jesucristojawabelia, wajaneconi wajanacatomatamotsijawa cruzata wajanacasiwatěpaejawata, ¿wajajumexaniataejawata tsaja amatamobia-exanatsi Dioso penajumecopatsiliwaisi Moisés-pijinė? ¿Jume baja cajena! Biji rajane, Jesucristojawabelia wajasivanajamataběcuenecopatsijawata liwaisi namatamotsia-exanatsi xua nacacujaruba bajarapaliwaisi wajaneconi wajaxainaejawa yabara.

Pacuenia bajayata Dioso aneconiibia tane Abraham-pijinė, pejumexaniataexae xua Dioso najumecapanepaeya pejumaitsijawatsi, yabara peliwaisi

4 ¹ Itsa Dioso aneconiibia tane jiwi pesiwanajamataběcuenecopabijawata Jesucristojawabelia, ¿detsa nexata pacuenia bajayatami aneconiibia tane Abraham-pijinė, pajudíowině patajasalinaině? ² Abraham-pijinė aneconiibia itsa taejitsipatsi pejumecowěnětsixae pacuenia Dioso itorobatsi, nexata bajaraponě xainaejitsipa xua yabara ayaijamataběcueneně nataejitsipa. Itsiata, yapětanetsi pacuenia caejiwi-ata apocuenecaějěpaetsi ayaijamataběcueneniwi penataenexa Dioso pitabarata. ³ Wajayapětaenexa bajaraxua yabara, canaějětsianatsi xua Dioso nacayapětaeya-exana pejumeliwaisibaxutota Abraham-pijinė yabara. Jumaitsi: «Abraham-pijinė itaxutujamatejemaya^e pejumexaniataexae^f Dioso pejumaitsijawatsi najumecapanepaeya, nexata Dioso aneconiibia tanetsi», jai Dioso pejumeliwaisibaxutota Abraham-pijinė yabara. Nexata, yapětanetsi Dioso aneconiibia petaejawa bajaraponě, itsacuenejawayo apoto-exanae-ata.

⁴ Canaějětsianatsi: Pajiwiyo itsaně pijajawa tonacuenebaponapona, bajarapajiwiyo xua rajutatsi, amoneya aporajutsitsi. Biji rajane, piamoneyabinětsi tsicarucatsi pematamotsijawatsi petonacuenebijamataběcuene. ⁵ Bajarapacuenia Dioso aneconiibia apotae jiwi. Biji rajane, Dioso aneconiibia tane jiwi, pejumexaniataexae xua Dioso najumecapanepaeya jumaitsi, itsacuenepexaniacuene, apoto-exanae-ata. Baitsi, wecua-ajibia-exanatsi pibisiacuene pexanaeconimi, pejumexaniataexae Jesús peliwaisi.

⁶ Dioso amoneya aneconiibia jiwi petaejawa yabara, bajayata David-pijinė wajunupaeba pacuenia siwajamataběcuenebarěya pamonaе baja Dioso aneconiibia tanetsi, itsacuenejawayo-ata pexaniacuene to-exanaenejewa.

⁷ David-pijinė tajěwelía jumaitsi^g mapacueniaje:

«Jamataběcuenebarěya baja tsawanapae pamonaе Dioso siwajamataběcuenecaewatsi pebara-anaepanaejawatsi pibisiacuene

d 3:30 judíowi, apojudíowi-ata: Wowaijumeta itsa canacueneba: «penabo-upiperaběcaucubiwi, apopenabo-upiperaběcaucubiwi-ata», Jumaitsi saya judíowicuene, apojudíowicuenebeje yabara, apojudíowicuenebeje. Itsajawata, bajarapacuenia pijacueneta Nayabarajumaitsi judíowi be-ayaijamataběcuene nataeya. **e 4:3 itaxutujamatejemaya:** Taema Heb. 11:8-10. **f 4:3 pejumexaniataexaenua:** Taema Gén. 15:6. Abraham tsitaxaniajaitsi pepacuene Dioso petoitorobiapaebijawatsi jiwi pecapanepaeněnexa pemomoxijawata. Nexata, itaxutujamatejemaya copia-ewetaponapona bajaraponě pepatsijawanexa. Bajaraxuata, Dioso bajarapajumexaniataecuene yacajěbiaya tocajětiatsi bepetomatamotsijawatsi pijaneconi, Cristo aposiwatěpae-atatsi abaxě. Nexata, tajěwelía Dioso aneconiibia tane bepesiwatěpaejawatsi Cristo Abraham pijaneconi yabara. **g 4:7 tajěwelía jumaitsi:** Taema Sal. 32:1-2.

pexanaeneconimiwecua, tsipaji baja pibisiacuene pexanaeneconimi wecua-ajibia-exanatsi. ⁸ Jamatabēcuenenabarëya baja tsaponaponae pajiwi Dioso aneconijibia tanetsi, tsipaji apotocanaëjëtsitsi pijaneconipexinaejawa», jai mapacueniaje David-pijinë bajayata.

Xaniajai rabaja. Bitso pexaniacuene Dioso amoneya aneconijibia wajana-cataejawa, wajajumexaniataexae Jesucristo wajanacasiwatëpaejawa wajaneconiconi yabara.

Pablo yapëtaeya-exana pacuenia Abraham-pijinë Dioso aneconijibia tanetsi, itsa abaxë aponabo-upiperabëcaucutsia-exanae

⁹ ¿Detsa pacuenia pacanaëjëtame? Pajamatabēcuenenabarëyajawa yabara David-pijinë jumaitsi, jëpenabo-upiperabëcaucubiwinexa yabara jumaitsi? Itsa jume, japopenabo-upiperabëcaucubiwinexa-ata? Jäjä, bajarapamonae-ata yabarajumaitsi. Mapacueniaje: Pacatsipaebatsi baja cajena pacuenia Dioso aneconijibia tane Abraham-pijinë, pejumexaniataexae najumecapanepaeya pejumaitsijawatsi. ¹⁰ ¿Abraham-pijinë tsabaja pepuanabo-upiperabëcaucutsia-exanae, Dioso aneconijibia tanetsi? ¡Jume raja! Abaxë apobo-upiperabëcaucutsi-atatsi, aneconijibia baja tanetsi, pejumexaniataexae Dioso najumecapanepaeya pejumaitsijawatsi.

¹¹ Dioso baja aneconijibia pepuatae Abraham-pijinë, ayaibexëacujinae, ^h bo-upiperabëcaucutatsi, pecuene-itajëtsinexatsi Dioso aneconijibia petaejawatsi. Bajaraxuata, Abraham-pijinë tonaexana bepijasalinainënexa daxita pamona apojudíowi, apopenabo-upiperabëcaucubiwi-ata, pejumexaniataexae Jesús peliwaisi, pesiwanajamatabēcuenecopabijawata Jesucristojawabelia. Bajarapacuenia, caejumexaniataecuene pexinaejawa yabara bajarapamonae, Dioso tane Abraham-pijinë bepemomoxi.

¹² Bajarapacuenia-ata pijinia, Dioso tane Abraham-pijinë pemomoxicueniaⁱ daxita pajudíowi bo-upiperabëcaucubatsi, itsa jamatabēcueneliwaisi-jëpa Abraham-pijinë pejumexaniataejawa xua Dioso najumecapanepaeya jumaitsitsi, itsa abaxë apobo-upiperabëcaucutsitsi.

Xuanë tocopiapatsijitsiatsi pajiwi jumexaniatane Dioso najumecapanepaeya peto-exanaeyapaebijawanexatsi

¹³ Abraham-pijinë peliwaisi nacayapëtaeya-exana xua jiwi canacopatsijitsia, Dioso najumecapanepaeya perajutsiapaebijawa, pejumexaniataejamatabēcuenenabarëya. Bajayata, Dioso najumecapanepaeya itsa jumaitsi Abraham-pijinëjawabelia^j pemomoxi pecanacopatsijawanexa-pija-iracuenia daxita mapanacuaje, ^k bajarapacuenia Dioso aporajutsiapaebi Abraham-pijinëjawabelia pejumecowënëtsicapanepaexae Dioso

h 4:11 *ayaibexëacujinae*: Taema Gén. 15:6 Dioso aneconijibia tanetsi itsa xaina 86 pawaijeje. Xuacujinae, bo-upiperabëcaucutatsi itsa xaina 99 pawaijeje. Taema Gén. 17:24. **i 4:12** *pemomoxicuenia*: Taema Jn 8:39-42. **j 4:13** *Abraham-pijinëjawabelia* Taema Gén. 17:4-6; 22:17-18; Gál. 3:29; 1Pd 1:4. **k 4:13** *pija-iracuenia daxita mapanacuaje*: Mapanajumecapanepaejumeje caxitajarabatsi Gén. 12:7. Dioso najumeliwaisi cajunua mapajamatabēcuenianë peto-exanaenexaje: 1) Ayaibitsaëto pemomoxi pexinaenexa Gén. 12:2, 2) Pecanapotsinexa Canaán nacua pijanacuanexa Gén. 13:15-17, 3) Pexaniacuenia peyawenonaenexa daxitanacuanëpijiwi bajaraponë pemomo pejamatabēcueneta Gén. 12:13, 4) Pemomo peyanacua-ewetsinexa daxitanacuanëpijiwi Sal. 2:4-9, Dan. 2:44; 7:13-14, Zac. 8:3; 9:9-10, Apoc. 19:11-16; 20:1-16.

penajumecopatsiliwaisi Moisés-pijinēta.¹ Biji rajane, rajutsiapaebatsi, tsipaji bajaraponē jumexaniatane^m Dioso peto-exanaejawanexatsi, pacuenia najumecapanepaeya jumaitsi.

¹⁴Tajamonae, Abraham-pijinē pemomoxi canacopata daxita xua Dioso najumecapanepaeya rajutsiapaebatsi,ⁿ Dioso pejumaitsicuenia. Baitsi, bajarapamonae itsa rajutsipatsi pejumecowēñetsijamatabēcuenē Dioso penajumecopatsiliwaisi Moisés-pijinēta, nexata najumecapanepaeya pejumaitsiyawami najume-amatamobia-exanaejitsipa. Abraham-pijinē-ata nacueratsipa pejumexaniataejawa bajarapaliwaisi. ¹⁵Yapētanetsi xaniajai apopitsi bajaraxua pejumecowēñetsicapanepaexae Dioso penajumecopatsiliwaisi Moisés-pijinēta, tsipaji bajarapaliwaisi nacayapētaeya-exana wajananeconitaponaejawa Diosojawabelia, tsipaji caejiwi-ata apojumecowēñetsicapanepae bajarapaliwaisi. Itsa ajibi tsipae pitawetsiliwaisi,^o nexata pijinia, ajibi tsipae jiwi peyabarananeconitsia-exanaejawanexatsi. Itsiata, bajarapaliwaisi penajumecopatsixae Moisés-pijinēta, daxita jiwi natoya-pētane Dioso penaneconitsia-exanaejawanexatsi, apo pejumecowēñetsixae bajarapaliwaisi.

¹⁶Bajaraxuata, pejumenaxuabiyaniwa xua najumecapanepaeya jumaitsi Abraham-pijinējawabelia, Dioso amoneya rajuta bajaraxua pamonaē siwanajamatabēcuenecopabatsi, matamowēñējonaenejewa. Bajaraxua yabara apojumaitsi ēpamonae jumecowēñēta Dioso penajumecopatsiliwaisi Moisés-pijinēta. Biji rajane, yabarajumaitsinua pamonaē Dioso tane Abraham-pijinē bepemomoxicuenia. Bajaraxuata, bajarapamonae canacopatsiana xua Dioso rajutsiapaebatsi pesiwanajamatabēcuenecopabixae Jesucristojawabelia, pacuenia Abraham-pijinē itaxutuajamatejemaya jumexaniatane Dioso pejumaitsiyawatsi. Caejumexaniataecuenē pexanaexae Abraham-pijinējawabelia, nexata bajaraponē tonaexana bepijasalinainēnexa, pamonaē jumexaniatane Jesús peliwaisi. ¹⁷Bajaraxua yabara, Dioso pejumeliwaisibaxutota nacayapētaeya-exana tajēwelīa xua jumaitsi Abraham-pijinējawabelia. Jumaitsi mapacueniaje: «Ayaibitsaēto itsanacuanēpijiwi bepijasalinainēmē^p ca-exanaenatsi», jai Dioso tajēwelīa Abraham-pijinējawabelia, waxaitsi Jesús peliwaisi wajajumexaniataewi yabara.

1 4:13 *Dioso penajumecopatsiliwaisi Moisés-pijinēta:* Abraham-pijinē petēpaecujinae, panepa bejamatabēcuenē 450 pawaijeje. Matapania Dioso najumecopata Moisés-pijinēta, paliwaisi jiwi jumecowēñetsijitsia. Nexata, Abraham-pijinē jumecowēñetsinejewa Dioso penajumecopatsiliwaisi Moisés-pijinēta, Dioso rajutsiapaebatsi Canaán nacua. **m 4:13** *Jumexaniatane:* Dioso aneconijibia petaxae Abraham-pijinē, pejumexaniataejamatabēcuenē xua najumecapanepaeya jumaitsi, bajaraxuata, yapētanetsi pexaniajajawa Dioso aneconijibia wajanacataejawanexa, wajajumexaniataexae Dioso wajanacawecua-ajibia-exanaejawanexa wajaneconi Jesús pejamatabēcuenēta, pacuenia Dioso najumecapanepaeya nacayapētaeya-exana pejumeliwaisibaxutota. **n 4:14** *rajutsiapaebatsi:* Dioso aporajutsiapaebi ē-ira Abraham-pijinējawabelia. Orijibia, pexania-cuenia yawenonaeyapaebatsinua, pexaniacuenia yawenonaeyapaebanua daxitanacuanēpijiwi Abraham pemomo pejamatabēcuenē. Daxita bajaraxuanē cajunua Dioso najumecapanepaeya pejumaitsiyawa Abraham-pijinējawabelia. Taema Gén. 12:1-3. **o 4:15** *itsa ajibi tsipae pitawetsiliwaisi:* Dioso yapētane Abraham-pijinē pemomoxi apopecuenecaējēpajawatsi, pejumecowēñetsicapanepaejawanexa Dioso penajumecopatsiliwaisi Moisés-pijinēta. Yapētanenua waxaitsi-ata apowajumecowēñetsicapanepaejawa bajarapaliwaisi. Nexata, Dioso siwanajamatabēcuenewereta, perajutsinexa jiwi jawabelia xua najumecapanepaeya rajutsiapaeba, jumecowēñetsicapanepaenējewa pitorobicueniatsi. Baitsi, Dioso pejume bitso xaniajaiya namatamota, jiwi pexanaecuenewecua. **p 4:17** *bepijasalinainēmē:* Taema Gén. 17:5.

Nexata, yapētanetsi xaniajai Abraham-pijinē bewajasalinainē tsaponaponaē, aponacaewiriawi-atatsi, wajanajua-itaxutuajamatejemaxae Diosojawabelia, Ponē piasaēya-exanaenē petēpaewimi,^q pecuenecaējēpaenētsi-ata daxita-cuene pexanaenexa, piajibijawata itsacuenejawa^r pecanacuenebinexa.

¹⁸ Abraham-pijinē pejumexaniataexae Dioso najumecapanepaeya perajutsiapaebijawatsi, itaxutuajamatejemaya Diosojawabelia copia-ewetaponapona, pexēnato pexinaejawanexa, tsi-ayapēbeje-atatsi picanī. Itsiata, ewetaponapona jiwi ayaibitsaētozaneto pamocuenia penaexanaenexa, pamonaē jumexaniatane pacuenia Dioso najumecapanepaeya jumaitsi. ¹⁹ Abraham-pijinē itsa xaina cien pawai-beje,^s pijawa bitso perujuwa-ata picanī, bajaraponē apoja-matabēcuenefaefanae Diosojawabelia. Tsiteca ajamatabēcuenesaē pejumexaniataejawa Dioso peto-exanaejawanexatsi pacuenia najumecapanepaeya jumaitsi. Bajarapacuenia exana, pijawa mawecowa-ata, bajaraponē nayapētae-ata petēpaejawanexa perujunējamatabēcuenē yabara. ²⁰ Apojume-aebi pacuenia Dioso najumecapanepaeya jumaitsi. Bitso biji, pewajēnaeyabelia jumexaniataeya jamatabēcuenē-ewetaponapona xua Dioso najumecapanepaeya jumaitsi petocopiapatsinexatsi. Nexata, Abraham-pijinē pecopia-ewetaponaponaejawata, pexēnato bepexinaenēcuenia, wēnēxaniatabiaba Dioso ayaijamatabēcuenenē yabara, apopejume-naxuabinēcuenē yabara-ata, ²¹ tsipaji cueneyapētane Dioso bitso piacuenesaenēcuenē, pecuenecaējēpaenētsinua peto-exanaenexatsi daxita pacuenia najumecapanepaeya jumaitsi. ²² Bajarapacuenia itaxutuajamatejemaya pejumexaniataexae, Dioso aneconijibia tanetsi.

²³ Dioso pejumeliwaisibaxutota nacayapētaeya-exana pacuenia Abraham-pijinē Dioso aneconijibia tanetsi, pejumexaniataexae najumecapanepaeya pejumaitsicueniatsi. Itsiata, bajarapacuenia aponacayapētaeya-exanae ēwajayapētaejawanexa Abraham-pijinē peli-waisi. ²⁴ Biji rajane, nacayapētaeya-exana pacuenia waxaitsi-ata aneconijibia nacatane, itsa siwanajamatabēcuenecopatatsi Diosojawabelia, Ponē wajatuxanenē Jesucristo icatsia asaēya-exanatsi petēpaecujinae. ²⁵ Dioso raja athēbēwetsica itorobica Jesús, cruzata wajanacasiwatē-paenexa, pibisiacuene waja-exanaeneconimi wajanacaneconimata-motsinexa. Xuacujinae, icatsia asaēya-exanatsi petēpaejawawecua, wajanacawecua-ajibia-exanaenexa wajaneconimi. Nexata, daxita bajarapacuenia itsa jumexaniataenatsi, Dioso aneconijibia nacataena Jesús pejamatabēcueneta.

q 4:17 *piasaēya-exanaenē petēpaewimi*: Isaac altar-jumata, pebocaenē Abraham tane petēpaenēcuenia, tsipaji siwanajamatabēcuenewereta pebeyaxuabijawanexa. Taema Heb. 11:17-19.
 r 4:17 *piajibijawata itsacuenejawa*: Pacujinae Abraham-pijinē apoxainae-ata abaxē pexēnato, pona pepitsinexa Canaán nacua, pemomoxi pecanacopatsinexa. Taema Heb. 11:1-2. s 4:19 *cien pawai-beje*: Pacujinae Dioso copiaya junatatsi, Gén. 12:1-3-jawata, bajarapamatacabī Abraham-pijinē xaina bejamatabē 75 pawai-beje. Icatsia, Gén. 18:1-14 itsa Dioso yapētaeya-exanatsi pexēnato pexinaejawanexa, Abraham-pijinē xaina 100 pawai-beje. Abraham, pijawa-ata xaina bejamatabēcuenē 99 pawai-beje bajarapamatacabijawa.

**Pitsicuenejawanë Jesucristojawabelia
pesiwanajamatabëcuenecopabiwi natotaewanapa,
yabara peliwaishi**

(Taema nota pebëxëpanayo.)^t

5 ¹Dioso baja aneconijibia wajanacataexae Jesucristo pejamatabëcueneta, nexata Dioso nacasiwajamatabëcuene-caewa wajanacabara-anaepanaejawami, pibisiacuene waja-exanaeoneconimiwecua. ²Jesucristo pejamatabëcuenetanua, caejamatabëcuene xainatsi Diosojawabelia. Nexata, pexaniacuene nacato-exanabiaba, wajanaca-itaxutotsoniataexae. Orijiibia, jamatabëcuenebarëyaya copia-ewetawanapatsi Dioso wajanacarajut-sinexa pitsijamatabëcuene xaina, "pijapeniweniwenacuatatsia. Bajarapaliwaisita najamatabësaëtaaponatsi, tsipaji yapëtanetsi xaniajai wajanacato-exanaenexa bajarapacuenia, Jesucristo pejamatabëcueneta. ³Aposiwajamatabëcuenebarëyatsi ëbajaraxua yabara. Biji rajane, yajawasiwajamatabëcuenebarëyatsi mapanacuata wajanacabejiobia-exanaejawanexa," Jesucristo pijajixwaetsi, tsipaji yapëtanetsi bajaraxua pejamatabëcueneta wajanacajamatabëcuene-asaëya-exanaponaejawa Diosojawabelia. Nexata, najamatabëcuenecaëjëpaëya-exanaena wajanajamatabëcuene-saëtsinexa, daxita apowajajitsipaecuene nacamotocopiapatsi-ata. ⁴Pacujinae nacamotocopiapata wajanacabejiobitsicuene najamatabëcuenesaëtatsi, tsipaji yapëtanetsi Dioso wajanacasiwajamatabëcuenebarëyajawa.

t 5:0 Taema nota pebëxëpanayo: Xua yabara nacacujaruba mapacapítulooyoje: Pablo nacayapëtaëya-exana pacuenia Dioso najamatabëcuene-itajëta bitso piasiwajawa mapanacuapijiwiije, pecapanepaenexatsi penaneconitsia-exanaejawanexatsiweucia Jesucristo pejamatabëcueneta. Baitsi, pacujinae jiwi bitso pibisiacuene exanawanapa Dioso pitabarata, bajarapaepatota, Dioso matatoxenetsia canaëjëta asiwaya peyawenonaenexa, pitaxutotsoniataejawanexanua Jesucristo pejamatabëcueneta. **u 5:2 pitsijamatabëcuene xaina:** Pacanacuenebajë bajarapajume patacuene-itajëtsinexa «glorijume» Pablo xua yabara jumaitsi. Itsa Pablo canacueneba «la gloria de Dios», yabaracuaicuijai mapitsijamatabëcueneliwaishi: «xua yabara jiwi wëñëxaniatsijitsia Dioso, xua yabaranua ayaijamatabëcuenenëcuenia taejitsia, itsa jume, Dioso pijapeniweniwenacuene yabara». Rom. 3:23 wajalebijawata, yapëtanetsi jiwi pibisiacuene pexanaexae, apojëpae Dioso pijagloria/pianeconijibicuene. Nexata, bajaraxuata, yapëtanetsi Jesús peliwaishi pejumexaniataewi matapania pexainaejawanexa pepopianeconijibicuene, pacuenia Dioso pianeconijibinë, pamatacabita yajawajinawanapaena Dioso, pijanacuataatsia. Mapanacuataje Dioso saya jiwi aneconijibia tane, Jesucristo pejamatabëcueneta. Abaxë apopepopianeconijibixwae, itsajawata pibisiacuene exana. Itsiata, Dioso pijanacuataatsia, pepacueniane baja pianeconijibiwi tsane, ëpexaniacuene pexanawanapaenexa, pacuenia cuene-itsi Dioso. Daxita bajaraxua nacato-exanaena Jesucristo pejamatabëcueneta. **v 5:3 wajanacabejiobia-exanaejawanexa:** Bajarapajume «tribulación» wowaijume. Pablo peponaponamatacabita, griegowi canacuenebabiaba «tribulum-wëñënaejawa» trigoxu petanabataxubinexa, jamatejema petsatsinexa pexu saicayawecua pemësiawanë. Nexata, bajarapacuenia Dioso canacueneba wajasiwanabejiobitsicuene wajanacawecuatsatsinexa waja-aebicuene, pibisiacuene wajajitsipaajamatabëcuene-ata. Pacuenia jiwi tsatabiaba pexu pemësiwecua petanabataxubinajawata, bajarapacuenia Dioso tsatsijitsia pepacuenie pamonaë jumexaniatane Jesús peliwaishi, pejume-aebiwecua, pamonaë itajara jinawanapa bepejumexaniataewicuenia Jesús peliwaishi. Taema Dan. 11:32-35.

Yapëtanetsinua pepacuene wajaxainaejawanexa pitsijamatabë-cuene Dioso xaina, xua abaxë copia-ewetawanapatsi⁷ wajaxainae-nexa. ⁵Wajacopia-ewetawanapaejawata, yapëtanetsi pepacuene Dioso wajanacato-exanaenexa, apowajasiwanacueratsijawanexanua, tsipaji Dioso nacayapëtaeya-exana bitso wajanaca-asiwajawa. Dioso ayaicuenia wajanaca-asiwajawa^x nacayapëtaeya-exanabiaba, Espiritu Santo pejamatabëcueneta; Ponë nacarajuta wajanacatsijamatabë-ecaenexa.

⁶Yapëtanetsi pepacuene Dioso wajanacato-exanaenexa pacuenia copia-ewetawanapatsi, tsipaji paepatota bitso aponacacuenecaëjêpae wajuacuta wajanacapanepaejawata Diosojawabelia, pecaëjêtsimatacabita jane baja, Cristo nacasiwatëpa pibisiacuene waja-exanaeneconi wajanacaneconimatamotsinexa. ⁷Pacuenia Dioso nacato-exana Jesucristota, bajaraxua acuenie-ithothia jiwi pena-siawacuene wecua. Mapanacuataje jiwi ba-aponacacawetsi piasiwajamatabëcuene penabeyaxuabia-exanaenexa itsanë pijaneconi yabara. Pebeyaxuabinënexatsi aneconi jibi-ata tsipae, tsiteca aponacacawetsi tsipae petëpaenexa bajaraponë yabara. Matapania itsa pebeyaxuabinënexatsi bitso pexaniacuene peto-exanaenë tsipae itsamonaewajawabelia, belia meta bajaraxua yabara itsajiwiyo nacaewetsipa penabeyaxuabia-exanaenexa bajaraponë pejamatabëcuene. ⁸Itsia baitsi jane, bajarapacuenia Dioso aponacato-exanae. Paepatota abaxë waxaitsi bitso pibisiacuene exanawanapatsi Dioso pitabarata, bajarapaepatota Dioso pexënato athë-bëwetsica itorobica wajanacasiwatëpaenexa. Bajarapacuenia pexanaejawata, Dioso nacatsitanajamatabëcuene-itajëta bitso wajanaca-asiwajawa.

⁹Wajanaca-asiwajamatabëcueneta itsa Dioso aneconi jibia nacatane, Jesucristo pejamatabëcueneta, orijibia yapëtanetsi wajanacapanepaejawanexa wajanacananeconitsia-exanaejawaminexawecua, pamatacabi naneconitsia-exanaena daxita pijaneconi pexainaewi, nacua pecopiarucaematacabita. ¹⁰Yapëtanetsi pepacuene wajanacapanepaejawanexanua, tsipaji itsa abaxë Dioso pija-wajabitsaëwitsicuenia nacatane, Dioso copata Pexënato wajanacasiwatëpaenexa, wajanacawecua-ajibia-exanaenexa pijawajabitsaëwitsi wajanacataejawami, juya caejamatabëcuene wajaxainanexa Diosojawabelia. Jesucristo wajanacasiwatëpaejawata^y Dioso baja nacasiwajamatabëcuenexanepana. Jesús penamatacotsixae^z petëpaejawawecua, icatsia piasaëtsaponaponaenexa, yapëtanetsi

w 5:4 xua ... *copia-ewetawanapatsi*: ¿Detsa xua copia-ewetawanapatsi wajaxainanexa? Apocopia-ewetawanapatsi Dioso wajanacapanepaenexa wajanacananeconitsia-exanaejawawecua, tsipaji wajasiwanajamatabëcuenecopatsijawata Jesucristojawabelia bajaraxua nacato-exana baja. Nexata, Dioso aneconi jibia nacatae-ata, itsiata, mapanacuataje abaxë pepacuene apowaja-aneconi jibiwi. Dioso nacayajawa-ata, itsiata, pepacuene apo-itabarataetsi. Bepejiobicuenetanua abaxë jinawanapatsi. Itsiata, Dioso pijanacuataetsia pepacuene wajananeconi jibiwi tsane pacuenia Dioso jamatabëcuene-itsi. Xaniawaetsia itabarataenatsi Dioso. Nacato-ajibi tsanenua daxita wajanacabejiobia-exanaecuenie. x 5:5 *ayaicuenia wajanaca-asiwajawa*: Pajumeyo Pablo canacueneba, nacayapëtaeya-exana pacuenia Dioso wajanaca-asiwajawa, apoxainae peyacaranatsicuenie pacuenia pepamene penawotsijawa, itsajiwi-ata apocaranatsicapanepe. y 5:10 *wajanacasiwatëpaejawata*: Jesucristo wajanacasiwatëpaejawata, wajaneconi nacatomatamota. Nexata, wajaneconi wajanacatomatamotsixae, Dioso jamatabëcuene caewa wajanacabara-anaepanaejawami. Jesús penamatacotsijawata petëpaejawamiwecua, Dioso aneconi jibia nacatane. Bajaraxuata, nacapanepaena wajanacananeconitsia-exanaejawaminexawecua, pamatacabita Dioso naneconitsia-exanaena daxita pamonaë pijaneconi pexainaewi. Taema Rom. 4:25. z 5:10 *penamatacotsixae*: Jesús itsa apomatacotsi tsipae petëpaejawawecua, amatamobi tsipae wajaneconi wajanacatomatamotsijawami. Peneta, ëpijaneconi yabara tëpaejitsipa.

pepacuene wajanacapanepaejawanexa Dioso wajanacananeconitsia-exanaejawaminexawecua. ¹¹ Bajarapacuenia wajanacato-exanaexae, caenë Jesucristo pejamatabëcueneta, Dioso baja bitso pexaniacuenia nacabarajamatabëcuenexanepana wajanacabara-anaepanaejawamiwecua. Nexata, waxaitsi bitso jamatabëcuenenbarëyatsi Diosojawabelia, namata-enetsia caejamatabëcuenen wajaxainaexae.

Pacuenia Adán, Cristobeje, nawecua-acuene-itothiabeje, yabara peliwaissi

¹² Xaniawaetsia paneyapëtaenexa caenë pexanaecuenejawata yabara daxitajiwi petsijumajopaejawanexatsi, pacatsitajëtatsi mapacueniaje: Bajayatami copiaya caenë, Adán-pijinë, pibisiacuene exana. Nexata, mapanacuataje daxitajiwi pibisiacuene pexanaejawanexa taxuxuaba. Taxuxuabanua jiwi petëpaejawanexa, pibisiacuene pexanaejamatabëcueneta. Nexata, jiwi petëpaejawa, yacaëjëpa daxitanacuanëjawa, tsipaji daxitanacuanëpijiwi pibisiacuene exana. ¹³ Xaniajai, Dioso penajumecopatsiliwaissi Moisés-pijinëta pewajënaeya jiwi pibisiacuene exanawanapa. Nexata, acuenebi jiwi penaneconitsijawa, tsipaji ajibi abaxë pitawetsiliwaissi. ¹⁴ Pitawetsiliwaissi ajibi-ata, itsiata yapëtanetsi pibisiacuene pexanawanapaejawa^a bajarapamonae, tsipaji daxita jiwi tëpaponna Adán-pijinëjawawerenacujinae, Moisés-pijinë peponaponaematacabijawaberena-ata. Bajarapacuenia Dioso tocaëjëta jiwi petëpaejawanexa, apocuenejëpae-ata Adán-pijinë papibisiacuene exana.^b Pacuenia Adán-pijinë pijaneconi tsijumaxuaba daxitanacuanëpijiwijawabelia, bajaraxua copiaya nacamatuene-itajëta Cristo pexanaejawanexa itsamatacabijawabelia Adán-pijinëcujinae.

¹⁵ Itsiata baitsi jane, papibisiacuene Adán-pijinë exana, aponajëpaebeje Dioso papexaniacuene nacato-exana Jesucristo pejamatabëcueneta. Caenë, Adán-pijinë, pibisiacuene pexanaejawa pejamatabëcueneta, daxitajiwi tëpaponna. Biji rajane, papexaniacuene Dioso amoneya nacato-exana wajanaca-asiwaxae,^c caenë Jesucristo pejamatabëcueneta, bajaraxua bitso matatoxenetsia pexaniacuenejawa Adán-pijinë pexanaecuenewecua. Orijibia, jiwi ayaibitsaëtohaneto natoyapëtaena bajarapapexaniacuene peto-exanaejawa, Dioso pecapanepaejawatatsi Jesucristo pejamatabëcueneta. ¹⁶ Copiaya caenë, Adán-pijinë, caepibisiacuene pexanaejamatabëcueneta, daxita mapanacuapijiwiije naexana pibisiacuene pexanawanapaewinexa. Nexata, Dioso tocaëjëta penaneconitsia-exanaejawanexa pijaneconijamatabëcuenen. Itsiata baitsi jane, mapanacuapijiwi bajaya-jebi pibisiacuene nawitsia pexanawanapaexae, cotocaewi caenë, Jesucristo, caeto siwatëpa daxitajiwi pijaneconijamatabëcuenen. Nexata, Dioso wecua-ajibia-exana pijaneconimi, pamona siwanajamatabëcuenecopaba Jesucristojawabelia, cruzata pesiawatëpaejawatsi pijaneconi yabara. ¹⁷ Nexata, caenë, caeto pibisiacuene pexanaejamatabëcuenen, daxitajiwi itsa

a 5:14 *pibisiacuene pexanawanapaejawa*: Taema Eze. 18:4, 20. **b 5:14** *papibisiacuene exana*: Adán xane ponaecuaaito Dioso jani-itawetatsi. Taema Gén. capítulo 3. **c 5:15** *wajanaca-asiwaxae*: Griegojumeta capitsapa, Karis-jume. Bajarapajume nacayapëtaeya-exana anijacuenebeje yabara. Dioso pexaniacuenia nacayawenona wajanaca-asiwaxae. Itsa jume, Dioso pexaniacuenia nacayawenona, tsicaruae-atatsi picani, wajanacananeconitsia-exanaejawanexa wajaneconijamatabëcuenen.

canacopata petēpaejawanexa, nacua pexanaematacabijawawerenacujinae mapamatacabijawaberena-ataje. Yapētanetsi bitso matatoxenetsia Dioso pexaniacuene wajanacato-exanaejawa caenē, Jesucristo, caeto wajanaca-siwatēpaexae. Nexata, Jesucristo pejamatabēcueneta Dioso aneconijibia nacatane, nacarajutanua waja-asaējamatabēcueneta daxitamatacabijawabelianexa. Itsacuenejawayo-ata Dioso apoto-exanae-atatsi, ayaicuenia asiwaya wajanaca-itaxutotsoniataexae, Dioso pexaniacuena nacayawenona, pamonatsi siwanajamatabēcuenecopabatsi Jesucristojawabelia, wajanacasiwatēpaejawa wajaneconia yabara.

¹⁸Nexata, pacuenia Dioso tocaējēta daxitajiwi penaneconitsia-exanaenexa caenē, Adán-pijinē, caepibisiacuene pexanaejamatabēcueneta, bajarapijinia pacuenia, caenē, Jesucristo, caepexaniacuene pexanaejamatabēcueneta, Dioso tocaējēta pewecua-ajibia-exanaenexa pijaneconi, daxita pamonae siwanajamatabēcuenecopaba Jesucristojawabelia, pesiwatēpaejawatsi pibisiacuene pexanaeneconi yabara. Orijibia, rajutsianatsinua matacabi apowerewerecaejawa^d pexainaenexa. ¹⁹Pacuenia caenē, Adán-pijinē, apopejumecowēñetsixae Dioso pitorobicueniatsi, jiwi ayaibitsaētoxaeneta naexana pibisiacuene pexanawanapaewinexa, bajarapijinia pacuenia, bexējawabelia caenē, Jesucristo, xaniawaetsia pejumecowēñetsicapaneapaexae Dioso pitorobicueniatsi, jiwi ayaibitsaētoxaeneta Dioso aneconijibia taenatsi.

²⁰Jiwi pibisiacuene exanawanapae-ata Dioso penajumecopatsiliwaisi Moisés-pijinēta pewajēnaeya, Dioso najumecopata bajarapaliwaisi jiwi peyapētaenexa bitso penaneconitsijawa bajaraPonē pitabarata. Paepatota mapanacuapijiwi matatoxenetsia pewajēnaeyabelia pibisiacuene exanapona, bajarapaepatota Dioso itsiata bitso matatoxenetsia najamatabēcueneta-itaēta ayaicuenia pitaxutotsoniataejawa penaneconitsia-exanaejawanexawecua.

²¹Bajarapacuenia wajanaca-itaxutotsoniataexae, Dioso aneconijibia nacatane daxitamatacabijawabelianexa wajatuxanenē Jesucristo pejamatabēcueneta. Daxita jiwi canacopata petēpaejawanexa Diosowecua Adán-pijinējawawerenacujinae ajena pamatacabijawaberena-ataje bajaraponē pibisiacuene pexanaejamatabēcueneta. Nexata, pacuenia daxitajiwi canacopata petēpaejawanexa caenē Adán pejamatabēcueneta, bajarapijinia pacuenia Dioso nacatocaējēta Jesucristo pejamatabēcueneta, wajanacacopatsinexa caejamatabēcueneta wajaxainaejawanexa Diosojawabelia daxitamatacabijawabelianexa wajanaca-itaxutotsoniataejawata.

**Pamonae siwanajamatabēcuenecopaba Jesucristojawabelia,
bajarapamonae Cristo capanepatsi pijaperujamatabēcueneta
penamatacaitorobisaētsiwecua**

6 ¹Jiwi pejumetaexae Dioso asiwaya pitaxutotsoniataejawa yabara mapanacuapijiwi, ¿detsa nexata bejamatabējumatsitsi? ¿Xanepana

d 5:18 *matcabi apowerewerecaejawa*: Pacujinae tanetsi mapajumebeje Dioso pejumeliwaisibaxutota, bajarapajumebeje nacayapētaeya-exana mapajamatabēcuenenebeje pejumatsicueniaje: 1) Pecopiarucaejawa naxuabiaya wajajinawanapaecuenemi Diosowecua. Juya, Dioso wajanacarajutsijawanexa piaitawajamatabēcueneta, caejamatabēcueneta wajaxainawanapaenexa Diosojawabelia, daxitamatacabijawabelianexa, 2) Wajayajawajinawanapaenexa Dioso Pijanacuatsia daxitamatacabijawabelia.

tsaja meta waja wajañeayabelia pibisiacuene waja-exanawanapaejawa, Dioso penajamatabëcuene-itajëtsinexa orijibia wajanaca-itaxutotsoniatæjawa?

² ¡Jume raja! Waxaitsi rabaja pibisiacuene pematatsënëa apobe-exanawanapaetsi, tsipaji baja pibisiacuene wajanacajitsipaeya-exanaejamatabëcuene bewajawecuatëpaewi. Yapëtanetsi baja cajena pacuenia petëpaenë aponajamatabëxainae pibisiacuene pexanaenexa. Baja-rapacuenia waxaitsi-ata pematatsënëa baja apobenajamatabëxainaetsi pibisiacuene waja-exanawanapaenexa.

³ Bepayapëtaneme mapacueneje: Pacujinae nabautizabatsi^e Cristo Jesús^f pewënëta, najamatabëcuene-itajëtatsi Jesucristojawabelia Espiritu Santo becaeperabëto^g wajanaca-exanaejawa. Becaperabëto wajanaca-exanaexae Jesucristojawabelia, nexata benatoyapëtanetsi bewajanacayajawatëpaejawa^h bajaraPonë, pacujinae tëpa cruzata. ⁴ Jesucristo petëpacujinae, itsa mëthëtsi petëpaenë, waxaitsi-ata bewajanacayajawamëthëtsi.ⁱ Nexata, bewajanacayajawamëthëtsixae, pacujinae Dioso, ayajamatabëcuenenë, pesaëta namatacotsia-exanatsi Cristo, pejanacuenia piasaëtsaponaponaenexa, waxaitsi-ata bewajanacayajawanamatacotsi^j pejanajamatabëcuenewicuenia

e 6:3 nabautizabatsi: Mapabautizmo yabara Dioso pejumeliwaisi penacujarubiwi caejamatabëcuene apoxainae. Itsamonae canaëjëta pacuenia Pablo yabaracuaicuajai Espiritu Santo xua nacato-exana waja-itaxutuajamatejemajawata Jesucristojawabelia, pacuenia jumaiti 1Co 12:13. Bajarajota, Espiritu Santo naca-exana becaeperabëtotsi Cristota, Cristo pecanacopatsinexa bewajamatabocotonë (wajatuxanenë). Waxaitsi juya, beeperabëto naexanatsi waja-exanawanapaenexa wajanacanamatacaitorobicuenia. Bajarapacuenia canaëjëta itsamonae, tsipaji apotsitapecuene cataeli waisitsi xua Pablo cacuaicuajai bautizmo yabara. Biji rajane, canaëjëta pepoxenajaiacuenia petaejawa, Espiritu Santo pejamatabëcueneta. Nexata, itsa canaëjëta xua yabara nabautizabijitsia jamatabëjumaiti: «Espiritu Santo tane-exanaexae becaeperabëto Cristota, Dioso apotanenaneconitsia-exanaexae tsane tajaneconi yabara. Pejanajamatabëcuene tanerajutsixanua, necuenecaëjëpa Dioso pejitsipacuenua ta-exanaponaponaenexa», jamatabëjai. Itsamonae itsiata, itsacuenia canaëjëta wajanabautizabijawata yabara. Bajarapamonae canaëjëta saya Pablo wajanacayapëtaeya-exanaejawa xua najamatabëcuene-itajëtatsi wajanabautizabijawata merata. Nexata, aponatota becaeperabëto Espiritu Santo pexanaejawatsi Jesucristojawabelia. Bepecuene catæjawacuenia saya tane. Bajaraxuata, itsa canaëjëta xua yabara nabautizabijitsi, nawëxaniabiya jamatabëjumaiti: «Benatotaniji betatëpaenëcuenua tajaperujamatabëcuene jawawecua, juya, tanataenexa beta-aitawanëcuene Dioso jawabelia, ëDioso pejitsipacuenua ta-exanaponaponaenexa», jamatabëjai, tsipaji natocanaëjëta pija-cuata pexanaejawanexa. **f 6:3 Cristo Jesús:** Taema Rom. 3:24-pijinota. **g 6:3 becaeperabëto:** Taema Gál. 3:27, 1Co 12:13. **h 6:3 bewajanacayajawatëpaejawa:** Bewajanacayajawatëpaejawa yabara Pablo cuenecatæya canacuenebi-ata, yapëtanetsi pacuenia Dioso nacatane bewajanacayajawatëpaejawa pepacuene Cristo. Taema Gál. 2:20; 2Ti 2:11. Nexata, pepacujiru bewajanacayajawatëpaexae Cristo, Dioso apowecuatëpaetsi tsane itsamatacabijawabelia. Ma-itsije: Dioso nacatocaëjëta caeto wajatëpaejawanexa, xuacujinae, wajanacananeconitsia-exanaenexa wajaneconi pejamatabëcuene (Heb. 9:27). Dioso nacatocaëjëtsi-ata bajarapacuenia wajatëpaejawanexa, pibisiacuene waja-exanaejamatabëcuene, (Eze. 18:20), itsiata Dioso aponajumetsënëtsi apowajanacananeconitsia-exanaexae, tsipaji paepatota itaxutuajamatejematsi Jesucristojawabelia wajaneconi wajanacatomatamotsinëcuenua, bajarapaepatota, Dioso nacatane Pexënato bewajanacayajawatëpaejawa. Nexata, nacacapanepa baja wajanacananeconitsia-exanaejawawecua wajaneconi yabara. **i 6:4 bewajanacayajawamëthëtsi:** Pablo cuenecatæya nacuenebi-ata bajarapajumeyo, yapëtanetsi pepacuene Dioso wajanacataejawa bewajanacayajawamëthëtsi Cristo. Baitsi, bewajawecuatëpaejawa wajaperujamatabëcuene. Taema Col. 2:12. **j 6:4 bewajanacayajawanamatacotsi:** Baitsi, pacuenia Jesús yajawaponapona Dioso penamatacotsicujinae, bajarapacuenia waxaitsi-ata wajanamatabëcuene-aitawawi Dioso jawabelia bewajanacayajawanamatacotsi Jesús. Pablo cuenecatæya nacuenebi-ata, yapëtanetsi pepacuene Dioso wajanacataejawa bewajanacayajawa-asaëya-exanae Cristo. Taema Efe. 2:5; Col. 2:13.

wajajinawanapaenexa, Dioso pejitsipaecuenia waja-exanawanapaenexa.^k

⁵ Becaeperabêto wajanaca-exanaexae baja Jesucristojawabelia, daxitatsi Jesucristo cruzata bewajanacayajawatêpae. Nexata, Jesucristo petêpae-cujinae, Dioso icatsia itsa asaëya-exanatsi, najêpaeya^l bewajanacayajawa-asaëya-exanae. ⁶ Jesucristo itsa cobematabiabarutatsi cruzajawata pebeyaxuabinexatsi, wajaperujumatabêcuenemi yajawarutatsi^m wajanacawecua-ajibia-exanaenexa, pibisiacuene wajanaca-exanaeya-exanaejamatabêcuene wajanacanamatacaitorobijawami. Nexata, baja-rapajamatabêcuenemi nacawecua-asaëjibia-exana baja, pematatsênêa wajanaca-itorobiyanawa pibisiacuene waja-exanaeyaniwa. Bajaraxuata, caewêalia apobenajamatabêcuenecaewitsitsi icatsia wajapibisiajamatabêcuenemijawabelia, wajanacajamatabêcuene-itorobiyanawa pibisiacuene waja-exanawanapaeyaniwa, tsipaji baja nacawecucopiaruca bajarapajamatabêcuenemi. ⁷ Bajarapajamatabêcuenemi baja wecuâtêpatsi bewajanacayajawatêpaexae Cristo, pacuenia baja petêpaenê pibisiacuene apo-exanaponaponae petêpae-cujinae, bajarapijina pacuenia pibisiacuene wajanacanamatacaitorobicuenemi nacawecua-ajibi baja. ⁸ Cristo cruzata bewajanacayajawatêpae-jawa wajayapêtaexae, jumexaniatanetsi wajayajawajinawanapaenexa Cristo daxitamatacabijawabelianexa. ⁹ Yapêtanetsi bajaraxua pexaniaajijawa, tsipaji Cristo, Dioso icatsia piasaëya-exanaecujinaetsi petêpaejawawecua, pematatsênêa baja apotêpae tsane, tsipaji petêpae-cuene asaëjibi bajaraPonêjawabelia. ¹⁰ Nexata, Cristo itsa siwatêpa daxitajiwi pibisiacuene pexanaeconi yabara, caecuenia caeto siwatêpa daxitamatacabijawabelianexa. Bajaraxuata baja, Cristo icatsia pematatsênêa aposiawatêpae tsane pijaneconi pexainaewi. Nexata, jiwi pesiawatêpaejawata, caecuenia jamatabêcuene-amoneyabanua pibisiajamatabêcuene penamatacaitorobisaêmitsi. Bajaraxuacujinae, Jesucristo piasaëcujinae petêpaejawawecua, daxitamatacabijawabelia ponaponaⁿ Dioso pejitsipaecuenia. ¹¹ Bajarapacuenia paxamê-ata panewajênaeyabelia

k 6:4 waja-exanawanapaenexa: Nacayapêtaeya-exana caejamatabêcuenecuenia yajawa wajajinawanapaenexa Dioso, Pexênatobeje. Bewajayajawa-enaewi Jesucristo, Dioso pijanacuatsia, wajacabarêyanexa daxita papexaniajawanê nacatoxaina wajanacajamatabêcuenenayawenonaenexa, (Efe. 2:6). Itsamatocabijawabelia cobenaxainaenatsinua daxitacuene, Cristo pewên-xaniatsijawanexanua Rom. 8:17, yajawa cobenayanacua-ewetsianatsi Cristo daxitanacuanê-pijiwi 2Ti 2:12. **l 6:5 najêpaeya:** Daxita xua yabara, pitsicuenia-ata asaëya-exanatsi Cristo petêpae-cujinae, bajaraxua yabara waxaitsi-ata nacayajawa-asaëya-exana pijinia, daxitajiwi pewên-xaniatsinexa Dioso, wajajinawanapaecuenia yabara. Taema Rom. 6:10. **m 6:6 waja-perujumatabêcuenemi yajawarutatsi:** Wowaijumeta canacueneba «viejo hombre», itsa jume, «naturaleza pecaminosa». Pablo itsa yaquina pacuenia wajaperujumatabêcuenemi yajawarutatsi Jesús, aponacayabaracuaicuaijai pepacuene wajanacawecuâtêpaejawa bajaraxua. Jume! Nacayapêtaeya-exana mapajamatabêcueneliwaisianêje bewajanacayajawatêpaejawa yabara Cristo: 1) Bewajawecuâtêpaejawa wajapibisiajamatabêcuene wajanacanamatacaitorobijamatabêcuenemi. 2) Bewajawecuâtêpaejawa wajasalinaliwiwi pesiwacanaêjêtsicuenemi mapanacuapijicuene yabaraje. 3) Bewajawecuâtêpaejawa mapanacuapijiwi pena-ewetsicuenemi yabara-ata. Bajaraxuata, nacayapêtaeya-exana pejanajamatabêcuene wajaxainaecuenia yabara 2Co 5:17-jawata. Nexata, bewajanacayajawatêpaexae Cristo, nacajamatabêcuenenamatacaitorobabiaba Espíritu Santo, wajaperujumatabêcuenemiwecua. Nexata, Espíritu Santo wajanacajamatabêcuenenamatacaitorobijawata, canacueneba Dioso peliwaissi wajanacayapêtaeya-exanabinexa pacuenia Dioso siwacanaêjêta mapanacuapijicuene yabaraje. Pacuenianua benaewetubiabatsi Dioso peliwaissi wajanacajarubicuenia. Nacayapêtaeya-exananua Dioso pexicuenetsi-ata. Nexata, êwajaperujumatabêcuenemi aponacawecuâtêpae. Biji rajane, caecuenia nacayajawatêpa Cristo.

panatocanaējēre panenawecuatēpaeyabijawa panijaperujumatabēcuenē
papecajamatabēcuenenamatacaitorobisaēwecua, juya panenatocanaē-
jētsinexa pane-asaētsawanapaejawa Cristo Jesús^o pejamatabēcue-
neta! Bajarapacuenia pane-asaētsawanapaexae, Dioso pejetsipaecuenia
pa-exanawanapaename, pacuenia wajatuxanenē Jesucristo exanaponapona.

¹² ¡Tajamonae, pētsa baja orijibia panajamatabēcuenecaewetame panijape-
rujujamatabēcuenējawabelia, icatsia papeca-itorobabiabinexa pibisiacuene
pane-exanaenexa, panijacuata panenatojitsipaecuenia! Xua-ata panepera-
bēto jitsipa pexanaenexa, bajaraxua piamatamobijawa, tsipaji paneperabēto
werewerecaena. ¹³ ¡Bajaraxuata, pētsa panacopatame pewerewerecaepera-
bēto papibisiacuene jitsipa pane-exanaenexa, pacuenia pa-exanabiabame
panejamatabēcuenē-aitawawajēnaeya Diosojawabelia! ¡Biji rajane, patonaja-
matabēcuenecaewetawanapare Diosojawabelia, paneto-exanawanapaenexa
papeca-itorobicuenia! Bajarapacuenia ita pa-exanaename, panaperabē-
copatsianame Dioso papecaperabēcanacuenēbinexa pane-exanaejawata
pexaniacuenejawanē. ¹⁴ Nexata, panijaperujumatabēcuenē baja apo-
xinae tsane papecanamatacaitorobinexa pematatsēnē, tsipaji apopa-
jinawanapaemēnua tsane Dioso penajumecopatsiliwaisi Moisés-pijinēta
papeca-itorobicuenia, aneconijibia Dioso papecataenexa. Biji rajane, Dioso
papeca-itaxutotsoniataejamatabēcueneta panejinawanapaexae, Jesucristo
pejamatabēcueneta aneconijibia pacatane.

**Pablo tsitajēta jiwijawabelia pacuenia xuajawabelia
namatabēcuenecaewetabiaba pitorobicueniatsi pexanaenexa,
bajaraxuanē bepetonaexanaejawatsi pijatuxanenē**

¹⁵ Itsamonae jamatabēcuenenawēxaniabiaya jamatabējumaitsi meta tsi-
pae Dioso wajanaca-itaxutotsoniataejawa yabara: «Aponamatawenonaetsi
baja pematatsēnē wajajumecowēnētsijawa Dioso penajumecopatsiliwaisi
Moisés-pijinēta. Dioso baja wajanaca-itaxutotsoniataejawata, aneconijibia
nacatane, Jesucristo pejamatabēcueneta, jumecowēnētsinejewatsi bajara-
paliwaisi. Nexata, pibisiacuene exanawanapae-atatsi tsipae, Dioso tsite-
caeya aneconijibia nacataena Jesús pejamatabēcueneta», jamatabējai meta
tsipae jamatabēcuenenawēxaniabiaya. ¡Jume baja cajena! Pibisiacuene
apobe-exanawanapaetsi, ¹⁶ tsipaji yapētanetsi pajiwi nacopata pijapibisia-
jamatabēcuenējawabelia,^p pitorobicueniatsi pejumecowēnētabiabinexa,
bajarapapibisiajamatabēcuenē tonaexanatsi bepijatuxanenē, ēpibisiacuene
pexanabiabinexa. Bajarapacuenia pexanaewi Dioso tocaējētatsi naxuabiaya
pejinawanapaenexa bajarapōnēwecua. Pajiwi pijinia, nacopata Diosojawa-
belia, pitorobicueniatsi pexanabiabinexa, bajarapajiwi Dioso tonaexanatsi

o 6:11 Cristo Jesús: Taema Rom. 3:24-pijinotajawata. **p 6:16** pijapibisiajamatabēcuenējawa-
belia: Pablo canacueneba bajarapajamatabēcuenēbeje bejiwitonē pijatuxanenēbejecuenia.
Itsia, «pibisiajamatabēcuenē» ita yabaracuaicuaijai, cajunua jiwi pijaperujumatabēcuenē
yabara, Satanás-ata yabara. Baitsi, bajaraxuabeje caejamatabēcuenē xainabeje, jiwi pexanaeya-
exanaenexa pibisiacuene. Bajarapijinia pacuenia, ita yabaracuaicuaijai «pexaniajamatabē-
cuenē», cajunua papejanajamatabēcuenē Dioso tsijamatabēruta jiwijawabelia, petojitsipaecue-
netsi pexanaenexa, paliwaisi-ata cujarubatsi Dioso pejumeliwaisibaxutojawawerena, tsipaji
caejamatabēcuenē xainabeje pexanaeya-exanaenexatsi ēpexaniacuene.

pijatuxanenē, pexaniacuene pexanaponaponaenexa. Nexata, ponaponaena Dioso pejitsipaecuenia.⁹

¹⁷Bajarapacuenia paxamē bajayatami picani panijapibisiajamatabē-cuene bepapijajiwimēcuenia patojinawanapame, pane-exanawanapaenexa papeca-itorobicuenia, pibisiacuene. Aeconoxae baja, bajarapacuenia apopajinawanapaemē maparucaeje. Biji rajane, panejamatabē-ēthētojawawetsina pajumecowēnētawanapame^r baja daxita papexaniajailiwaishianē itsamonae pacacujaruba. Bajaraxuata, xanē pexaniajamatabēcuenē rajutabiabajā Diosojawabelia paxamē yabara, ayaicuenia papecayawenonaexae. ¹⁸Nexata, Dioso papecacapanepaexae panijapibisiajamatabēcuenemi papecanamatacaitorobijawawecua, Jesús pejamatabēcueneta, paxamē baja, paxainame itsanē panijatuxanenēnexa, bajaraPonē papeca-itorobicuenia epexaniacuene pane-exanawanapaenexa.

¹⁹Paxamē abaxē apopanejamatabēcueneliwaisinaweretsixae Dioso pijacuenejawalia, peyapēxanepanaeliwaisicuenia pacatocuenecatanetsi panejumeypētaenexa. Baitsi, cuenecataeya canacuenebajē anijanēbeje petuxanenēbeje, pijajiwitonēbeje, petonacuenebijawatsi peliwaishicuenia. Bajayatami picani panacopatame panijapibisiajamatabēcuenējawabelia, pibisiacuene pane-exanawanapaenexa papeca-itorobabiabicuenia. Nexata, pibisiajamatabēcuenē bepapijajiwimē tsawanapae.^s Paneperabēto pejitsipaecuenia paxanaxaeya-exanabiaba bitso pia-uracuenejawanē, pepopiabejējawanē-ata. Bajarapacuenia aeconoxae panajamatabēcuenērajure Diosojawabelia, epexaniacuene pane-exanawanapaenexa panewajēnaeyabelia!

²⁰Panacuene canaējētsianame panejinawanapaecuenemi yabara. Pamatacabi picani abaxē paxainame panijapibisiajamatabēcuenē, bepapijatuxanenē pacatonaexana, jumecowēnētsiaya epibisiacuene pane-exanawanapaenexa. Nexata, apopacatsitanamatamotsi Dioso papecatojitsipaecuenia, epexaniacuene pane-exanawanapaenexa. ²¹Bajarapacuenia panejinawanapaejawa yabara, apopacayawenonae caejawa-ata, tsipaji maparucaeje paya-auramē tsabiabi bajarapapibisiacuene pane-exanaejawami yabara. Payapētane-menua bajarapacuenia pane-exanawanapaexae, Diosowecua naxuabiaya picani panejinawanapaejawa daxitamatacabijawabelianexa. ²²Itsiaata, maparucaeje Dioso papecawecua-ajibia-exanaexae pibisiajamatabēcuenē

q 6:16 *Dioso pejitsipaecuenia*: Jiwi caejamatabēcuenē apoxinae pajamatabēcuenē xaina mapajume mapaversiculotaje, («dikaiousunē», griegojumeta – wowaijumeta pijinia, «justicia»). Ayaitsaēto canaējēta Jesús pijajiwī pejinawanapaejawa Dioso pejitsipaecuenia. Itsa jume, pexaniacuene pexanawanapaexae, belia cuenejēpaena Dioso pexaniacuene pexanaejawa yabara. Itsamonae pijinia, canaējēta itsacuenia. Canaējēta pacuenia pajiwi xaina Dioso pijatuxanenēnexa, bajarapajiwi Dioso yajawatsi. Itsa jume, bajarapajiwi peyajawaponaponaenexa Dioso pijanacuatatsia. **r 6:17** *pajumecowēnētawanapame*: Pablo toyaquina Jesús pijajiwījawabelia. Nexata, itsa jumaitsi, «pajumecowēnētawanapame daxita papexaniajailiwaishianē», itsa jai, bajarapacuenia apojumaitsi bajarapamonae Dioso aneconijibia petaxaetsi pejumecowēnētsijamatabēcuenē bajarapapexaniajailiwaishianē. Biji rajane, pejumexaniataexae Jesús peliwaishi, bajarapamonae siwanajamatabēcuenecopaba Jesucristojawabelia pecapanepaenēnexatsi. Orijibia, siwanajamatabēcueneweretanua epejitsipaecuenia Dioso pejinawanapaenexa, pecujarubicueniatsi. **s 6:19** *bepapijajiwimē tsawanapae*: Pajumeyo Pablo canacueneba «pijajiwitonē yabara», nacayapētaeya-exana pitsiwi bedajubicuenia amoneya tonacuenebaponapona pexainanenētsi. Nexata, pacuenia itorobatsi pexanaenexa, bajara-ēpacuenia tsicarucatsi pexanaenexa, apo-pejitsipaecuenē-ata.

papecanamatacaitorobisaë, juya paca-exana Dioso papijajiwinexamë, pane-exanawanapaenexa papeca-itorobicuenia. Bitso pacatoxanepana Dioso papeca-itorobicuenia panejinawanapaejawa, tsipaji bajarapacuenejawanë pacajamatabëcueneyawenonaena aneconijibia panejinawanapaenexa Dioso pitabarata, pecopiarucaematacabita-ata paxainaename matacabi apope-werewerecaejawa Dioso yajawa. ²³ Pajiwi pibisiacuene exana, natopitsiana petëpaejawa penaneconimatamotsinexa, Diosowecua penaxuabinexa daxitamatacabijawabelia. Pajiwi pijinia, jumexaniatane wajatuxanenë Cristo Jesús⁴ pesiwatëpaejawatsi pijaneconi yabara, bajarapajiwi Dioso amoneya rajutsianatsi pexainaenexa matacabi apopewerewerecaejawa.

Pablo canacueneba jiwi penacojiobiliwaisicuenia, petsitajëtsinexa pacuenia jiwi pejumecowënëtsijawata Dioso penajumecopatsiliwaisi Moisés-pijinëta, apowecua-ajibia-exanaetsi jiwi pijaneconi

7 ¹ Tajamonaë, paxamë, paneyapëtaewi Dioso penajumecopatsiliwaisi Moisés-pijinëta, payapëtaneme pacuenia saya jiwi piasaëtsawanapae-epato bejumecowënëtanawana bajarapaliwaisi. Itsiata bailsi jane, Cristo wajanacasiwatëpaejawata, nacawecua-ajibia-exana baja wajajumecowënëtsijawami bajarapaliwaisi, Dioso aneconijibia wajanacataenexa.

² Canaëjëtsianatsi mapaliwaisije: Dioso penajumecopatsiliwaisi Moisés-pijinëta petiriwa, pamona pexainaewa, itawetatsi itsanëjawabelia penacojiobiyanewa, itsa abaxë asaë tsaponaponae pamona. Itsiata bailsi jane baja, bajarapowa pamona itsa wecuatëpatsi, wecua-ajibitsi baja pejumecowënëtsijawa bajarapapitawetsiliwaisitsi. Matapania jane baja toxanepanatsi penacojiobinexa icatsia itsanëjawabelia, itsa jitsipa penacojiobijawa. ³ Itsiata, bajarapowa itsa nacojiobijitsipa itsanëjawabelia, itsa abaxë asaë tsaponaponae pamona, nexata bajarapowa ayaineconi natsi-exanaejitsipa⁴ Diosojawabelia, tsipaji pamonawecua itsanëjawabelia naperabëquenetsiataepona-ponaejitsipa. Itsiata bailsi jane baja, bajarapowa pamona itsa wecuatëpatsi, wecua-ajibitsi paliwaisi itawetatsi penacojiobijawa itsanëjawabelia. Nexata, nacojiobi-ata icatsia itsanëjawabelia, neconi apoxinae Diosojawabelia.

⁴ Tajamonaë, bajarapacuenia picanì paxamë-ata⁵ pa-itsimë tsawana-pae. Copiaya paxainame Dioso penajumecopatsiliwaisi Moisés-pijinëta, bajarapaliwaisi bepapecanamatacaitorobinë tsaponaponae. Nexata, papeca-itorobicuenia pajumecowënëtanawapame. Itsiata, Cristo bepaneyawatëpaexae, bepanewecuatëpae Dioso penajumecopatsiliwaisi Moisés-pijinëta papenamatacaitorobicuenemi. Nexata, pacawecucopia-biaba Dioso penajumecopatsiliwaisi Moisés-pijinëta. Itsiata, apojudfowi natocanaëjëta Dioso aneconijibia petaejawanexatsi pejumecowënëtsijawata bajarapaliwaisi. Nexata, mapaliwaisije daxita pamonaenexa casaë Dioso penajumecopatsiliwaisi Moisés-pijinëta.

t 6:23 Cristo Jesús: Taema Rom. 3:24-pijinota. **u 7:3** ayaineconi natsi-exanaejitsipa: Pagriegojumeyo Pablo canacueneba bajaraxua yabara, wowaijumeta pitsapa «adulterio». Bajarapagriegojumejawabelia cajunua mapajamatabëcueneliwaisianëje: Penacojiobiwi penawecuanamatayajitsicueni, penacojiobicuene itsajiwijawabelia itsa abaxë asaë tsaponaponae penapitsijiwiibeje. Dioso pitabarata bajarapaneconibeje caeneconi, tsipaji penajumejejailiwaismibeje natobjianabeje. **v 7:4** paxamë-ata: Pablo picanì toyaquina judfowi yabara, tsipaji bajarapamonae canacueneba-biaba Dioso penajumecopatsiliwaisi Moisés-pijinëta. Itsiata, apojudfowi natocanaëjëta Dioso aneconijibia petaejawanexatsi pejumecowënëtsijawata bajarapaliwaisi. Nexata, mapaliwaisije daxita pamonaenexa casaë Dioso penajumecopatsiliwaisi Moisés-pijinëta.

pejanacuenia bepaneyajawajinawanapae, Dioso papeca-itorobicuenia panejumecowënëtabiabinexa.

Bajarapacuenia Cristo bewajanacayajawanamatacotsixae, capitsapabianatsi pexaniacuenejawanë, Dioso pesiwabarëyajawanë. ⁵ Itsiata, wajasowanajamatabëcuenecopatsiwajënaeya Jesucristojawabelia, bajarapacujinaeta, wajapibisiajamatabëcuene^w nacamatacaponabiaba, pibisiacuene waja-exanawanapaenexa, wajaperabëto pejitsipaecuenia. Orijibia, bajaramatacabi, xua naca-itaweta Dioso penajumecopatsiliwaisi Moisés-pijinëta waja-exanaeyaniwa, bajarapaliwaisi aponacacuenecaranatsi. Caranata, bitsoyo nacajitsipaeya-exana bajarapapibisiacuene waja-exanaenexa. Bajarapapibisiacuene waja-exanawanapaexae, neconi natsi-exanaponatsi, Dioso-wecua naxuabiaya wajajinawanapaenexa.

⁶ Cristo bewajanacayajawatëpaexae, nacawecucopiaruca baja Dioso penajumecopatsiliwaisi Moisés-pijinëta wajanacanamatacaitorobijawa, pexaniacuene waja-exanabiabinexa, Dioso aneonijibia wajanacataenexa. Ajibinua pematatsënëa baja bajarapaliwaisi wajanacajitsipaeya-exanaejawa pibisiacuene waja-exanaenexa. Bajaraxuata, maparucaeje tonacuenebawanapatsi Dioso pijajiwitsicuenia. Nexata, papexaniacuene exanawanapatsi maparucaeje, apo-exanaetsi Dioso penajumecopatsiliwaisi Moisés-pijinëta wajanaca-itorobixae. Biji rajane, exanawanapatsi bajaraxuanë Espiritu Santo wajanacajamatabëcuenecaëjëpaeya-exanaponaecuenia.^x Nexata, aeconoxae pejanacuenia jinawanapatsi, copiyami wajajinawanapaecuenemiwecua.

Pablo natoyapëtane pexinaejawa pibisiajamatabëcuene Dioso penajumecopatsiliwaisi Moisés-pijinëta pejamatabëcueneta

⁷ Itsajiwi meta jamatabëcuenenawëxaniabiaya jamatabëjumaitsi tsipae: «Dioso penajumecopatsiliwaisi Moisés-pijinëta, itsacuenejawayonexa-ata apoxanepanae, tsipaji nejitsipaeya-exanabiaba pibisiacuene ta-exanaenexa», jamatabëjai meta tsipae. ¡Jume raja! Biji rajane, bajarapaliwaisi bitso pexaniali waisi, tsipaji bajarapaliwaisi itsa ajibi tsipae, xanë aponacueneyapëtaenë tsipae xua Dioso tsitapibisiacuenetsi. Dioso penajumecopatsiliwaisi Moisés-pijinëta jumaitsi mapacueniaje: «¡Pëtsa to-itajitsipame itsajiwi pexinaejawanë!»,^y pejajawa. Nexata, bajarapaepatota jane baja, natoyapëtaniji pibisiacuene ta-exanaejawa, bajarapacuenia ta-exanaejawata. ⁸ Itsiata,

w 7:5 *wajapibisiajamatabëcuene*: Bajarapajumebeje yabara Pablo jitsipa wajanacayapëtaeya-exanaenexa mapajamatabëcueneliwaisianëje: 1) Wajaperabëto pejitsipaecuenie pibisiacuene pexanaenexa, 2) Pacuenia jamatabëcuene-itsitsi wajajumexaniataewajënaeya Jesucristo peli waisi, 3) Wajasalinaili waisi wajana-ewetsicuenie, 4) Xua jiwitsi taewanapatsi, 5) Wajanacajitsipaeya-exanaejawa wajanaperabëquenetsiataenexa.

x 7:6 *wajanacajamatabëcuenecaëjëpaeya-exanaponaecuenia*: Pamonaë pijaperujujamatabëcuene pitorobicuenia pexanawanapaewi (wowaijumeta – seguidores de la carne), bajarapamonae jumecowënëta Dioso penajumecopatsiliwaisi Moisés-pijinëta, saya pexanaenexa pitorobicueniatsi, asiwanejewa Dioso. Pamonaë pijinia, Espiritu Santo pejamatabëcuenematacaponaewitsi (wowaijumeta – seguidores del Espíritu), bajarapamonae jumecowënëta bajarapaliwaisi, penajamatabëcuene-itajëtsinexa piasiwajawa Dioso. Bajarapamonae pejumexaniataexae Jesucristo peli waisi, Espiritu Santo tsijamatabë-ecatsi, pejamatabëcuenecaëjëpaeya-exanaenexatsi, pexanawanapaenexa Dioso pejitsipaecuenia. y 7:7 Taema Éxo. 20:17.

tajapibisiajamatabëcuene canacueneba bajarapaliwaisi, ayaicuenia tane-itajitsipaeya-exanaenexa itsamonae pecobecowë. Pamatacabi apojumeya-pëtaenë abaxë xaniawaetsia Dioso penajumecopatsiliwaisi Moisés-pijinëta, tajapibisiajamatabëcuene nasaëtabiaba bajarapaliwaisita, pibisiacuene tanejitsipaeya-exanaenexa. Itsiata, bajarapa-itawetsiliwaisi, itsa ajibi tsipae, nexata tajapibisiajamatabëcuene asaëjibi tsipae tanejitsipaeya-exanaenexa tane-itawetsijawami. ⁹Bajayata, abaxë copiaya itsa ponaponajë yapëtaenejewanë Dioso penajumecopatsiliwaisi Moisés-pijinëta, aponasiwabëjanë tananeconitsijawanexa xua yabara exanaponaponajë. Itsiata, pamatacabi jumetaniji bajarapaliwaisi tane-itawetsijawa tato-itajitsipaejawa itsamonae pecobecowë, nexata tajapibisiajamatabëcuene nasaëta bajarapaliwaisita, ayaicuenia tato-itajitsipaejawa^z itsamonae pecobecowë. Nexata, bajarapaliwaisi pejamatabëcueneta natoyapëtaniji naxuabiaya Diosowecua tatëpaejawanexa. ¹⁰Nexata, yapëtaniji paliwaisita picani natocanaë-jëtajë tawecuapanepaenexa Dioso tanenaneconitsia-exanaejawaminexa, Dioso yajawa ta-asaëtsaponaponapanaenexanua daxitamatacabijawabelia, bajarapacuenia caranata aponeto-exanae. Biji rajane, netocaëjëta naxuabiaya Dioso tawecuataëpaejawanexa tajaneconijamatabëcuene. Nexata, bitso nasiwanajamatabëxainajë, ¹¹tsipaji papibisiajamatabëcuene xainajë tajamatabë-ëthëtota canacueneba bajarapa-itawetsiliwaisi pibisiacuene tane-exanaeya-exanabiabinexa. Paliwaisi picani jitsipajë tanejamatabëcuene yawenonaenexa pibisiacuene ta-exanaeyaniwa, caranata netonaexana betaneyamaxë-itojorobiliwaisi, tsipaji betanejitsipaeya-exanaeliwaisi netonaexana pibisiacuene ta-exanaenexa. Nexata, tane-itawetsiliwaisi apotajumecowënëtsijamatabëcuene, netonaexana tanenaneconitsia-exanaeliwaisi, Diosowecua tanaxuabinexa.

¹²Bajarapacuenia netocopiapatsi-ata tayapëtaecujinae bajarapaliwaisi, Dioso penajumecopatsiliwaisi Moisés-pijinëta caeto-ata aponitorobi picani pibisiacuene ta-exanaenexa. Bajarapaliwaisi pexanepanaeliwaisi cajena. Nexata, xua naca-itoroba pepopexaniacuene, pexanepanaecueni-ata waja-exanawanapaenexa. ¹³Belia, bajarapaliwaisi yabara paxamëyajuwënëne jamatabëjumaitsi tsipae: «¿Dioso tsaeta nacatonajumecopata bajarapapexaniali waisi, ëwajanacatëpaeyabinexa bajara Ponëwecua apowajajumecowënëtsixae?», jamatabëjai meta tsipae jamatabëcuenenawëxaniabiaya. ¡Jume baja cajena! Biji rajane, Dioso penajumecopatsiliwaisi Moisés-pijinëta, pexaniali waisi-ata picani, tajapibisiajamatabëcuene canacueneba

z 7:9 ayaicuenia tato-itajitsipaejawa: Mapaversículobeje xaina anijajamatabëcueneliwaisi-beje wajacanaëjëtsinexa. Paxanë panetsita versículo 9-10-beje caejamatabëcuene xaina-beje vr. 8-wecua. Itsiata, itsamonae canaëjëta peli waisijëpaejawa vr. 8. Nexata, mapacuenia jumaitsi tsipaeje: **9** «Imatami abaxë copiaya ponaponajë yapëtaenejewanë Dioso penajumecopatsiliwaisi Moisés-pijinëta. Nexata, xua exanaponaponajë, aponasiwabëjanë bajaraxua yabara tananeconitsijawa. Itsiata, pamatacabi jumetaniji bajarapaliwaisi, xaniawaetsia yapëtaniji xua yabara Dioso nitaweta. Nexata, bajarapaliwaisi betanejamatabëcuene-itawabi, bitso pibisiacuene ta-exanaejawanexa. Bajarapaliwaisi pejamatabëcueneta, yapëtaniji tananeconitsijawa Diosojawabelia, bajara Ponëwecua naxuabiaya tatëpaejawanexa picani. **10** Orijibia, natocaëjëtajë paliwaisita picani tanejamatabëcuene-aitawayaxanaeliwaisinexa Diosojawabelia. Itsiata, bajarapacuenia aponeto-exanae caeto-ata. Caranata, bajarapaliwaisita natoyapëtaniji saya Diosowecua tatëpaejawanexa», jai tsipae.

bajarapapexanialiwaishi, pibisiacuene tane-exanaeya-exanaenexa, naxua-biaya Diosowecua taponaponaenexa. Nexata, bajarapaliwaishi pejamatabécueneta, yapétaniji pexaniajaijawa ayaicuenia tananeconitsijawa Diosojawabelia. Natoyapétanijinua xua picani xanë netsitapexaniacuene ta-exanaenexa, bajaraxua juya, Dioso tsitapibisiacuenetsi. Nexata, bajarapaliwaishi pejamatabécueneta, yapétanetsi pacuenia bitso abeje pibisiacuene waja-exanaejawa Dioso pitabarata.

Pablo yapétaeya-exana apopejamatabécueneyawenonaejawatsi peyaja wanaitajétsijamatabécuene, Dioso pejitsipaecuenia peponaponaenexa

¹⁴Yapétanetsi paliwaishi Dioso najumecopata Moisés-pijinëta jiwi pejumecowënëtsinexa pexanepanaeliwaishi tsipaji Espiritu Santo pejamatabécueneta^a peyaquinaeliwaishi. Itsiata baitsi jane, jiwitonëxaenë, ajamatabécuenesaëjibinë tajumecowënëtsinexa bajarapaliwaishi, tsipaji pibisijamatabécuene tayajawanaitajétsijawa nenaxainaeyaba betajatuxanenëcuenia, tane-itorobinexa, pibisiacuene ta-exanabiabinexa pejitsipaecuenia. ¹⁵Bajaraxuata, jamatabécuenenabenajacajë ta-exanaecuene yabara. Pape-xaniacuene jamatabë-exanabiabajë picani, bajaraxua apo-exanabiabinë. Biji saya caranata, papibisiacuene bitso itoyanë ta-exanaeyaniwa, bajaraxua juya exanabiabajë. «¿Detsaeta xuajitsia bajarapacuenia exanabiabajë?», jamatabëjanë belia. ¹⁶Itsa exanabiabajë papibisiacuene picani apojitsipaenë ta-exanaejawa, natoyapétaniji pexanialiwaishicuene Dioso penajumecopatsiliwaishi Moisés-pijinëta, tsipaji bajarapaliwaishita Dioso neyapétaeya-exana xua tsitapibisiacuenetsi. ¹⁷Bajarapacuenia itsa exanabiabajë, yapétaniji xanë apota-exanaejawa tajitsipaëjamatabécuene. Biji rajane, papibisijamatabécuene abaxë xainajë tajamatabë-ëthëtota, ne-exanaeya-exanapona. ¹⁸Bajaraxua yabara xanë natoyapétaniji apotaxainaejawa caejawayo-ata pexaniajamatabécuene tayajawanaitajétsijamatabécuene. Biji rajane, bajarapajamatabécuene bitso cajena abeje. Asaëjibinua tanejamatabécueneyawenonaenexa pexaniacuene ta-exanaenexa. Bajaraxuata,

a 7:14 *Espiritu Santo pejamatabécueneta*: Pajumeyo Pablo canacueneba majotaje, Dioso pejumeliwaishi penacujarubiwi caejamatabécuene aponajuaxainae pejumaitisijamatabécuene yabara: Bajarapajume griegojumeta pitsapa «pneumatikos», wowaijumeta pijinia, «espiritual», jiwijumeta capitsapaëjitsipa: «pejumapecuenepijiliwaishi», itsa jume, «pejamatabécuenepijiliwaishi». Nexata, itsamonae pecanaëjétsijawata, jumaitis bajarapa-espiritu yabara: **1)** Espiritu Santo tsaena, ponë Dioso Pija-Espiritu (pejumapenë). Espiritu Santo pejamatabécueneta, Dioso pitorobiliwaishanë tonajumecopata Moisés-pijinëta, jiwi pejumecowënëtabiabinexa. (2Ti 3:16; 2Pd 1:19-21.) Nexata, Espiritu Santo planeconijibinëxae, bajarapanajumecopatsiliwaishita apo-itorobi jiwi, pibisiacuene pexanaenexa. Bajarapitsijamatabécuenenëxae wowai wënëruba «espiritual», Dioso pija-Espiritu yabara, (Espiritu Santo baitsi). **2)** Itsamonae itsacuenia canaëjëta bajarapa-espiritu yabara. Dioso najumecopata bajarapaliwaishi, jiwi pejamatabécuenenamataaitorobinexatsi, ëpexaniacuene pexanawanapaenexa. Itsiata, jiwi abaxë perujumatabécuene pexinaewixae, piaitawajamatabécuene apoxinae Diosojawabelia. Nexata, apocuenecaëjëpaetsi pexanaenexa pitorobiciueniatsi Dioso penajumecopatsiliwaishi Moisés-pijinëta. Bajaraxua-ata yabara wowai wënëruba «espiritual», jiwi pija-espiritu yabara, tsipaji jiwi ajamatabécuenesaëjibi, xaniawaetsia pejumecowënëtsinexa bajarapaliwaishi. Itsiata, Pablo, Jesús peliwaishi pejumexaniataenëxae, mapacotocaewiliwaishije bewelia tsitaxaniajaitis meta. Nexata, xua Pablo yabarayaquina Rom. 7:7-25-jawabelia yapétanetsi pitsicuene pamonaë, Jesucristojawabelia pesiwanajamatabécuenecopabiwi, natotane pijaperujumatabécuene, pijapejanajamatabécuenebeje namata-enetsia penajamatabë-itonotsijawabeje, caeliwaishi apopenajuaxainaexaebeje.

jitsipae-atanē pexaniacuene ta-exanaejawa, aponejamatabēcuenecaējē-pabiabi.^b ¹⁹ Nexata, papexaniacuene picani jitsipajē ta-exanabiabinexa picani, apo-exanabiabinē. Caranata saya, exanabiabajē papibisiacuene apojitsipae-nē picani ta-exanaejawa. ²⁰ Papibisiacuene picani apojitsipae-nē ta-exanaejawa, itsa exanabiabajē, bajarajota natoyapētaniji xanē tajacuata apota-exanaejawa. Biji rajane, papibisiajamatabēcuenē yajawanaitajētājē pajamatabēcueneta exanajē bajaraxua, tsipaji abaxē xainajē tajamatabē-ēthētota tane-exanaeya-exanaponanexa.

²¹ Nexata jane baja, itsa nacuenecanaējētājē ta-exanaecuenē yabara, natocaxitarabajē pacuenia jamatabēcuenē-itsinē taya-jawanaitajētsijamatabēcuenē. Bajaraxuata, paepatota picani jitsipajē pexaniacuene ta-exanaejawa, bajarapaepatota, neyacarantabiaba papibisiajamatabēcuenē abaxē yajawaponaponajē, tsipaji tayajawanaitajētsijamatabēcuenē nitorobabiaba ēpibisiacuene ta-exanabiabinexa. ²² Tajamatabēcuenewetsina itsa canaējētājē, netsitaxanepana picani bitso Dioso penajumecopatsiliwaisi Moisés-pijinēta. ²³ Itsiata, tayajawanaitajētsijamatabēcuenējawata caxitarabajē xua pejamatabēcueneta neyacarantabiaba tajumeco-wēnētsiyaniwa bajarapaliwaisi, tsipaji bajarapajamatabēcuenē itoya tsabiabi Dioso penajumecopatsiliwaisi Moisés-pijinēta. Daxita xua taperabētopijijawanē, caejamatabēcuenē najuaxainabiaba tayajawanaitajētsijamatabēcuenējawabelia, pibisiacuene tane-exanaeya-exanaenexa. Bajarapapibisiajamatabēcuenē pejamatabēcueneta, nataniji pibisiacuene betanejamatabēcuenē-amoneyabinēcuenia, pibisiacuene tane-exanaeya-exanaenexa.

²⁴ Ta-exanaecuenē yabara itsa nacuenecanaējētājē, jamatabēcuenē jumaitsinē: «¡Xanē raja bitso bejiobinē! ¡Bajarapajamatabēcuenē bitso abeje! ¿Detsa pajiwi meta newecua-ajibia-exanaena tayajawanaitajētsijamatabēcuenē tanenamatacaitorobisaēwecua?, tsipaji bajarapajamatabēcuenē nematacapona tatēpaejawanexa Diosowecua», jamatabējanē. ²⁵ Bajaraxua yabara pexaniajamatabēcuenē rajutajē Diosojawabelia, tsipaji caenē Dioso baja cajena necapane^c bajarapajamatabēcuenewecua, wajatuxanenē Jesucristo pejamatabēcueneta.

Pacuenia xanē natotaniji tayajawanaitajētsijamatabēcuenē pejamatabēcueneta tanaxuabijawa, paxamē-ata tsaena bajarapacuenia panajamatabēcueneyapētaneme. Bajaraxuata, beyapētanetsi mapacuenēje. Wajajamatabē-ēthētowawetsina jamatabējumecowēnētsijitsipae-atatsi Dioso penajumecopatsiliwaisi Moisés-pijinēta, itsiata, wajajawanaitajētsijamatabēcuenē aponacacopatsi bajarapacuenia waja-exanawanapanexa. Biji saya caranata naca-itorobabiaba pibisiacuene waja-exanabiabinexa.

b 7:18 *aponejamatabēcuenecaējēpabiabi* Tayajawanaitajētsijamatabēcuenējawata apoyarucae caejawa pexaniajamatabēcuenē, tanejamatabēcueneyawenonaenexa Dioso petsipacuenia ta-exanaponaponanexa. **c 7:25** *necapane*: Pablo yabaracuacuijai daxita pamonaesiwanajamatabēcuenecopabiwi Jesucristojawabelia. Bajaraxuata, jumaitsi, «Jesucristo pejamatabēcueneta», jai.

**Espíritu Santo nacajamatabëcueneyawenona
wajajumexaniataewi Jesús peliwaishi**

8 ¹Tajamonae, Cristo Jesús^d pejamatabëcueneta Dioso aneconijibia wajanacataexae, Espiritu Santo-ata wajanaca-exanaexae becaeperabëto Jesucristojawabelia, Dioso aponacananeconitsia-exanae tsane.^e ²Bajara-pacuenia paxamë-ata Cristo papekawecua-ajibia-exanaexae panijaneconi, Espiritu Santo pesaëta pacajamatabëcueneyawenona, caejamatabëcuene panexainawanapaenexa Cristojawabelia. Pacawecua-ajibia-exananua panijapibisiajamatabëcuene papecanamatacaitorobisaë, xua picani pacamatacapona Diosowecua, naxuabiaya panetëpaejawanexa. ³Canaëjët-sianatsi xua Dioso nacato-exana. Xua Dioso penajumecopatsiliwaishi Moisés-pijinëta apocuenecaëjëpaetsi wajanacato-exanaenexa, pibisiajamatabëcuene wajayajawanaitajëtsixae, bajaraxua baja Dioso nacato-exana. Pibisiajamatabëcuene wajayajawanaitajëtsixae, nacato-acuenebi waxaitsi wajacuata wajajumecowënëtsicapanepaejawa bajarapaliwaishi, Dioso aneconijibia wajanacataenexa. Itsiata, Dioso pexaniacuene nacato-exana. Waja-ajamatabëcuenesaëjibixae, nacato-itorobica pepocaenë pexënato mapanacuataje, penaexanaenexa jiwitonëcuenia, daxita wajaneconimi wajanacatomatamotsinexa wajanacasiwatëpaejawata. Nexata baja, Dioso aponacananeconitsia-exanae tsane wajaneconi pejamatabëcueneta, tsipaji Cristo naneconitsia-exanatsi bepibisiacuene pexanaenë, waxaitsi wajajamatabëcueneta. Wajanacasiwatëpaejawata, nacawecua-ajibia-exananua papibisiajamatabëcuene yajawanaitajëtatsi wajanacanamatatacaitorobisaëmi. ⁴Bajarapacuenia Dioso nacato-exana Cristo pejamatabëcueneta, xaniawaetsia wajajumecowënëtanapanapaenexa daxita Dioso penajumecopatsiliwaishi Moisés-pijinëta wajanaca-itorobicuenia, Espiritu Santo wajanacajamatabëcuenecaëjëpaeya-exanaecuenia. Nexata, maparucaeje apojinawanapaetsi papibisiajamatabëcuene yajawanaitajëtatsi wajanacanamatatacaitorobicuenia. Biji rajane, jamatabëcuene-ewetsiya jinawanapatsi Espiritu Santo wajanacanamatatacaitorobicuenia.

⁵Tajamonae, bajarapacuenia jinawanapatsi, tsipaji pamonaë abaxë jamatabëcuene-ewetsiya jinawanapa peyajawanaitajëtsijamatabëcuene pejitsipaecuenia pexanabiabinexa, bajarapamonae jamatabëcuene-enabiabatsi ëpibisiacuene pexanaenexa. Pamonaë pijinia, jamatabëcuene-ewetsiya jinawanapa Espiritu Santo pejitsipaecuenia pexanabiabinexa, bajarapamonae jamatabëcuene-enabiabatsi Espiritu Santo pejitsipaecuenia pexanawanapaenexa. ⁶Bajarapabitsaëto beje aponacuenëjëpabeje pexanaecuenëjawanë. Nexata, pamonaë jamatabëcuene-enabiabatsi pexanaenexa peyajawanaitajëtsijamatabëcuene pejitsipaecuenia, bajarapamonae bepejamatabëcuenetëpaewi Dioso pitabarata. Pamonaë pijinia, jamatabëcuene-enabiabatsi, pexanaenexa Espiritu Santo pejitsipaecuenia,

d 8:1 *Cristo Jesús*: Taema Rom. 3:24-pijinota. **e 8:1** *aponacananeconitsia-exanae tsane*: Itsacuenia pejutsinexa mapaversúculo: «*Pamonaë Espiritu Santo exanaeya-exanatsi becaeperabëto Jesucristojawabelia, pesiwanajamatabëcuenecopabixae bajaraPonëjawabelia, bajarapamonae apoxainae caeneconi-ata xua yabara Dioso naneconitsia-exanaejitsia*», pejaicuenenexa.

bajarapamonae ajamatabēcuenesaē tsawanapae, jamatabēcuenexanepanana Dioso jawabelia. Xainaenanua matacabi apowerewerecaejawa. ⁷Pamonae jamatabēcuenenabiabatsi pexanaenexa peyajawanaitajętsijamatabēcuenen pejitsipaecuenia, bajarapamonae naexana Dioso pitoyawi, tsipaji apojamatabę-exanae Dioso pejitsipaecuenia. Orijibia, apojamatabęcuenecaęjępaetsi, pejumecowęńętsinexa Dioso penajumecopatsiliwaisi Moises-pijįnęta. ⁸Pamonae najamatabęcuenecaeweta pejumecowęńętsinexa peyawanaitajętsijamatabęcuenen pejitsipaecuenia pexanaenexa, bajarapamonae apocuenecaęjępaetsi pesiwajamatabęcuenenaręyajawa Dioso.

⁹Paxamę baja, maparucaeje apopa-exanawanapaemę pejitsipaecuenia papibisijamatabęcuenen payajawanaitajętame, tsipaji Dioso pija-Espřitu Santo pacatsijamatabę-eca panesiwana jamatabęcuenecopabixae Jesucristojawabelia, bajaPonę juya pejitsipaecuenia pane-exanawanapaenexa. Yapętanetsi baja cajena pajiwi Espřitu Santo apotsijamatabę-ecaetsi, bajarapajiwi Cristo apopiјajiwiwonę. ¹⁰Itsia, paxamę, Cristo paneyajawajawanapaewi, paneperabęto tępae-ata tsane pibisijamatabęcuenen paneyajawanaitajętsixae, itsia, pepopanejamatabęcuenen aitawa tsane Dioso jawabelia, daxitamatacabijawabelianexa, aneonijibia papecataexae Jesucristo pejamatabęcueneta. ¹¹PaEspřitu Santo pejamatabęcueneta Dioso namatacotsia-exana Cristo Jesús petępaejawawecua, bajarapa-Espřitu Santo pacatsijamatabę-eca. Nexata, pacuenia Espřitu Santo asaęya-exana Jesucristo petępaejawawecua, bajarapiјinia pacuenia, paxamę-ata, papecatsijamatabę-ecaexae, pacaperabę-asaęya-exanaena panetępacujinae.

¹²Tajamonae, bajarapacuenia Dioso wajanacato-exanaexae tsane, nexata apobe-exanawanapaetsi wajajawanaitajętsijamatabęcuenen pejitsipaecuenia. Biji rajane, exanawanapaenatsi pacuenia Dioso nacatoјitsipa. ¹³Itsia, paxamę itsa jamatabęcuenen ewetsiaya pa-exanawanapaęjitsipame paneyajawanaitajętsijamatabęcuenen pejitsipaecuenia, nexata naxuabiaya Dioso-wecua patępaeјitsipame daxitamatacabijawabelianexa. Itsia baitsi jane, Espřitu Santo pesaęta itsa panawecuacopabaponame paneyajawanaitajętsijamatabęcuenen panajumecowęńętsijawa, juya Espřitu Santo pejitsipaecuenia pa-exanawanapaename. Nexata, apopawecuanaxuabimę tsane Dioso. Paxainaenamenua matacabi apowerewerecaejawa.

¹⁴Daxita pamonae Espřitu Santo jamatabęcuenenamatacaponatsi, bajarapamonae raja Dioso pexi. ¹⁵Paxamę baja Espřitu Santo pacatsijamatabę-eca. Nexata, Dioso papeximę paca-exana. Apopaca-exanae bepapiјajiwięcuenia papeca-itorobinexa, cuјunawiaya^f panetonacuenenawanapaeyaniwa. јJume baja cajena! Biji rajane, pepacuenen Dioso papeximę paca-exana. Nexata, pexixaetsi, Espřitu Santo pejamatabęcueneta: «јAxa!», nacaјaiya-exana Dioso jawabelia wajawajętsijawata. ¹⁶Bajarapacuenia jumaitsi

f 8:15 cuјunawiaya: Jesús-jawabelia јiwi pesiwanajamatabęcuenecopabiwaјęnaeya, bajarapamatacabi xaina pijatuxanenęnexa peyajawanaitajętsipibisijamatabęcuenen. Nexata, pacuenia itorobatsi, bajarapacuenia exanabiaba apojitsipae-ata. Nexata, јiwi cuјunawiaya јinawanapa, pewęnajiwi peyamatomotsinexatsi pibisiacuenen peto-exanaejawami yabara, Dioso penanenconitsia-exanaejawatsi pijaneconijamatabęcuenen, bajarapiјinia pacuenia pecueyawi pibisiacuenen peto-exanaejawanexatsinua. Itsia, pacujinae јiwi naexana Dioso pexi, tocopiarucatsi baja bajarapacujunawicuenen Dioso jawabelia, јiwi jawabelia-ata. јinawanapa nacaemonacuenia.

Diosojawabelia, tsipaji Espiritu Santo caejamatabëcuene xaina wajajamatabëcuenejawaberena wajananayapëtaeya-exanaenexa Dioso pexicue-netsi. ¹⁷Nexata, Dioso pexixaetsi, itsamatacabi Jesucristo yajawa Dioso nacatsicobetsanaena daxita xua toxaina pexi perajutsinexa. Yapëtanetsi pepacuene Cristo yajawa bajaraxuanë wajanajuanacobenaxainaenexa, tsipaji pacuenia Jesucristo bejiobia-exanatsi, bajarapijinia pacuenia, waxaitsi-ata itsamonae nacabejiobia-exanapona.^g Nexata jane baja, pacuenia Dioso Pexënato Jesucristo tocopata ayaijamatabëcuenenëcuenia petaenexatsi, bajarapacuenia waxaitsi-ata nacamocopatsiana Pexënato yajawa Dioso pijapeniweniwenenacuataatsia.

**Daxita Dioso pecobecowëjawanë mapanacuataje copia-ewetawanapa
pamatacabi Dioso tsitajëtsiana daxitanacuapijiwajawabelia
pamonae pepacujiru pexi tsawanapae**

¹⁸Tajamonae, xaniawaetsia benatoyapëtanetsi xua pepacuene nacatona-matamota. Daxita apowajajitsipaejawanë,^h xua nacamocopiapata mapanacuataje wajajinawanapae-epato, apobesiwabëjaiti, tsipaji saya bajaraxuanë nacamocopiapata cae-epatoyonexa. Itsiata, xua Dioso nacatoxaina wajanacajajutsijawanexa itsamatacabijawabelia, bitso pexaniajawanë daxitawecua. Bajaraxuanë cabarëyatsi tsawanapae tsane daxitamatacabijawabelianexa. Bajarapapexaniajawanë, bitso penamatamotsijawanë nabebiobitsiacuenia wajajinawanapaejawawecua mapamatacabianëtaje. ¹⁹Itsiata, ëwaxaitsi itatsacajinaeya apocopia-ewetawanapaetsi pamatacabi Dioso naca-itajëtsijitsia daxitanacuanëpijiwi pitabarata, pepacuene pexitsi wajanaca-exanaejawa. Orijiibia, daxita Dioso pecobecowëjawanë-ata itatsacajinaeya wajënae-ewetawanapa bajarapamatacabi, ²⁰tsipaji mapanacuataje Dioso pexanaejawanë, maparucaeje natoyapëtaewanapa pecopiarucaejawanexa, bepejiobicuenia-ata pejinawanapaejawa. Bajarapabejiobicuene Dioso apotocopatsi picani pexanaejawawerenacujinae, penaneconitsicuenia penacopat-sinexa. Biji rajane, bajarapaneconi canacopata Adán-pijinë pijaneconijamatabëcueneta.ⁱ Itsiata bairiatsi jane, itsamatacabi Dioso copiarucaeja-exanaena daitacuene pewaterewerecaponaejawa. ²¹Pamatacabi Dioso pexitsi pepacuene nacawecua-ajibia-exanaena daxita xua nacamocopiapata Adán-pijinë pibisiacuene pexanaejamatabëcuene. Nexata jane baja, jamatabëcuenebarëya tsawanapae tsanetsi, bajarapajamatabëcuenewecua wajanacacapanepaexae. Bajarapamatacabitanua, Dioso wecua-ajibia-exanaena pewaterewerecaecuene daxita pecobecowëjawanë, bepejiobicuenia pejinawanapaejawa. Bajaraxuata, daxita Dioso pecobecowëjawanë yajawa itatsacajinaeya copia-ewetawanapatsi bajarapapexaniacuenejawanë wajanacato-exanaenexa.

g 8:17 *nacabejiobia-exanapona*: Pablo nacayapëtaeya-exana pacuenia wajanacabejiobia-exanaejawanexa Dioso nacamocopata bewajanacatsicobetsanaejawa Cristo yajawa. Nexata, pacuenia Cristo bejiobia-exanatsi, Dioso Pexënatoxae, waxaitsi-ata nacabejiobia-exanaena, pexixaetsi. Bajaraxuata, Cristo jumaiti mapacuenia wajabarëyajamatabëcuenenexaje wajanacabejiobia-exanaejawata Mt 5:11. Taema Jn 15:20; Col. 1:24; 2Ti 3:12; 1Pd 4:12.

h 8:18 *apowajajitsipaejawanë*: Bajarapajumejawabelia cajunua jiwí piawitanecuene, bepejiobicuene, penajamatabëxainacuene, pebejiobia-exanaecuenetsi, daxita xua nacatsita-abeje-ata.

i 8:20 *Adán-pijinë pijaneconijamatabëcueneta*: Taema Gén. 3:17.

²² Yapëtanetsi baja cajena pacuenia Adán-pijinë pibisiacuene pexanae-cujinae, daxita Dioso pecobecowëjawanë mapanacuataje nabejiobitsiaya nacopata mapamatacabijawaberena-ataje. Nabejiobitsiaya pejinawana-paexae, nexata pacuenia petiriwa itsa wixaepitatsi penacueto bayajamatabëcuenebëjai bepijiayo pewecuaexanaenexatsi, bajarapijinia pacuenia, daxita Dioso pexanaejawanë bëjaiya copia-ewetawanapa, bepijiayo petocopiapatsinexatsi pewecua-ajibia-exanaejawatsi piawitanecuene, petëpaecuene itsa piabecucuenejawanë-ata. ²³ Itsiata, ëmapanacuapiji-cuenejawanë bëjaiya apojinawanapae, bajarapacuene pewecua-ajibia-exanaenexatsi. Waxaitsi-ata, wajasiwanajamatabëcuenecopabiwi Jesucristojawabelia, jamatabëcuene-aitatsacaeya copia-ewetawanapatsi, bepijiayo wajanacawecua-ajibia-exanaenexa wajaperabëto petëpaejawa. Yapëtanetsi xaniajai bajarapapexaniacuene wajanacato-exanaejawanexa, tsipaji copiyana catsisjamatabë-ecaeya-exana Espiritu Santo bajaraxuanë pewajënaeya, wajayapëtaenexa pitsipexaniacuene nacato-exanaejitsia. Bajaraxuata, bëpënëa jamatabëcuenuatsi, bepijiayo wajanacatocopiapatsijawanexa Dioso wajanaca-itajëtsijawanexa pexicuenetsi daxitanacuanëpijiwijawabelia, wajanacaperabë-itothianaenexanua pacuenia Cristo perabë-itothianatsi. ²⁴ Bajarapacuenia abaxë copia-ewetawanapatsi, Dioso wajanacato-exanaenexa bajarapapexaniacuenejawanë, wajasiwanajamatabëcuenecopatsijawata Jesucristojawabelia. Xua baja xainatsi, bajaraxua apocopia-ewetawanapaetsi wajapitsinexa. ²⁵ Biji rajane, xua abaxë apoxainae-atatsi, itaxutuajamatejemaya copia-ewetawanapatsi, jamatabëcuenenaxanetsinejwatsi Dioso wajanacarajutsijawanexa.

²⁶ Nexata, Espiritu Santo nacajamatabëcueneyawenonabiaba paepatota jamatabëcuenefaefaenatsi, siwanabejiobitsiaya jinawanapae-atatsi papexaniacuene Dioso nacarajutsijitsia. Nexata, paepatota apoyapëtaetsi pacuenia wajëtsijitsiatsi Diosojawabelia, bajarapaepatota, Espiritu Santo bëpënëa bitso nacasiwanajamatabëxainaeya, petsixanepanaecueniatsi nacatowajëtabiaba asaëyata Diosojawabelia. Xua picani apowënëjonecapanepaetsi, Espiritu Santo nacatowajëtabiaba. ²⁷ Dioso baja cajena nacajamatabëcueneyapëtane xua najamatabëxainatsi. Nexata, xaniwaetsia apoyapëtae-atatsi xua yabara wajëcaejitsiatsi Diosojawabelia, itsiata, Espiritu Santo nacatowajëtabiaba,^j daxitatsi Dioso wajanaca-itapetsiwi. Espiritu Santo, Diosobeje, caejamatabëcuene pexainaexaebeje, nacatowajëcabiaba ëDiosojawabelia pejitsipacuena.

**Pajiwi Diosojawabelia itaxutuajamatejema,
jamatabëcuenematatoxenetaabiaba daxitacuene, pibisiacuene
tocopiapatsi-atatsi, Jesucristo peyawenonabiabixatsi**

²⁸ Bajarapacuenia Espiritu Santo wajanacato-exanabiabixae, nexata apo-bejamatabëcuenefaefaenatsi Diosojawabelia pacujinae nacatocopiapata

j 8:27 *Espiritu Santo nacatowajëtabiaba*: Yapëtanetsi xua Espiritu Santo nacatowajëcapona, bajaraxua Dioso wajanacarajutsijawanexa, tsipaji Espiritu Santo, Diosobeje, caejamatabëcuene xainabeje. Caenë Dioso, acueyabi ponëbeje tsaponaponae, Dioso Paxa, Dioso Pexëno, Dioso Espiritu Santo. Nexata, Espiritu Santo apo-itsanë Diosowecua. Biji rajane, pepoDiosojawabelia. Baitsi, pacujinae Espiritu Santo nacatsijamatabë-eca, yajawa-eca Dioso, Jesús-beje; caenë baja tsipaji. Bajaraxuata, caejamatabëcuene xaina.

apowajajitsipaecuenejawanë-ata. Biji rajane, bejamatabëcuenematatoxenetatsi daxita xua nacatocopiapata, tsipaji yapëtanetsi Dioso bajaraxuanë pecanacuenebijawa. Daxita xua nacatocopiapata pexaniacuenejawanë, pibisiacuenejawanë-ata, Dioso canacueneba pecapitsapaenexa papexaniacuene tsitaxanepanatsi, wajanacajamatabëcueneyawenonaenexa. Bajarapacuenia Dioso canacueneba petsiwajënaecanaëjëtsicuenia, petoxanepanaenexatsi daxita pamonae Dioso asiwa tsawanapae. ²⁹ Tajamonaë, tajëjawawerenacujinaë wajanaexanaewajënaëya, Dioso yapëtane pexitsi wajanaca-exanaejawanexa. Nexata, nacasiwanajamatabëcuenewereta pacuenia Pexënato jamatabëcuene-itsi, bajarapacuenia waxaitsi-ata wajanamatabëcuene-itsinexa. Bajarapacuenia Dioso nacato-exana waxaitsi-jawaberena, Pexënato pecanacopatsinexa pepomatapijinëcuene pexitsitua-tujëta ayaibitsaëto-atatsi. ³⁰ Tajëjawawerenacujinaë, nacasiwanajamatabëcueneweretanua, wajanacajamatabëcuenejëpaëya-exanaenexa pacuenia Pexënato jamatabëcuene-itsi. Nacajunatanua, pexitsi wajanaca-exanaenexa. Wajanacajunatsiwi pijinia, nacawecua-ajibia-exana pibisiacuene waja-exanaeconimi, aneonijibia wajanacataenexa. Aneconijibia wajanacataëwi nacatocaëjëta itsamatacabi ayaijamatabëcuenewi wajanacataenexa^k Pexënato yajawa, Dioso pijapeniweniwenacuatsia.

**Pajiwi Dioso itaxutuajamatejema, apocuenecaëjëpaetsi
itsacuenejawa pejamatabëcuenematatoxetsinexatsi,
pewecuatsatsinexatsinua Dioso piasiwajawatsiwecua**

³¹ Nexata, ¿debejamatabëjumaitsitsi bajaraxuanë yabara? Itsa waxaitsi Dioso nacayajawa tsaponaponae, ¿itsajiwi caëjëpatsi wajanacajamatabëcuenematatoxetsinexa, wajanacacuenecaranatsinexanua Dioso wajanacayawenonaejawanexa? ¡Jume baja cajena! ³² Yapëtanetsi pepacujiru Dioso asiwaya wajawajënaeyabelia wajanacayawenonaejawanexa, tsipaji aponacawecua-asiwa pepoPexënato-ata. Caranata, copata Pexënato wajanacasiwatëpaenexa, daxita waxaitsi wajaneconi yabara. Itsa bajarapacuenia aponacawecua-asiwa Pexënato, ¿detsa pacuenia biji, aponacarajutsi tsipae daxita xua namatawenonatsi, wajatojinawanapaenexa pejitsipaecuenia? Nacayawenonaena cajena. ³³ ¿Jipatsa cuenecaëjëpatsi, wajanaca-itapetsiwi wajanacaneconitsinexa Diosojawabelia? ¡Ajibi cajena! Dioso baja cajena

k 8:30 ayaijamatabëcuenewi wajanacataenexa: Taema Rom. 8:17. Pajumeyo juta jiwijumeta «ayaijamatabëcuene» pitsapa «gloriajumejawawerena» wowaijumeta. Bajarapajume xaina mapejumaitsijamatabëcuenejawanëje: Peyaiyataejamatabëcuene, ayaijamatabëcuene pexainaejamatabëcuene, pexaniacuena pewëñëxaniatsijawa, peniweniwenaejawa-ata. Nexata, Rom. 8:30 nacayapëtaëya-exana Dioso wajanacarajutsijawanexa pijagloriayajuwëñëjawa. Bajaraxua yabara pamonae Dioso peliwaissi pejucaewi caejamatabëcuene apoxinae. Nexata, itsamonae canaëjëta itsa Dioso nacarajutsiana Jesús pijagloriayajuwëñëjawa, nexata bajarapapetota, matapania Dioso pijapeniweniwenacuatsia jane baja, nacajamatabëcuenejëpaëya-exanaena pacuenia Pexënato jamatabëcuene-itsi. Itsamonae pijinia, canaëjëta Dioso wajanacatocaëjëtsinexa itsamonae wajanacayaiyataejawanexa pexicueniatsi, pacuenia yayiataeyabiaba Pexënato Jesús. Itsamonae-ata canaëjëta wajaperabëniweniwenaejawanexa Dioso pijanacuatsia, pacuenia Dioso peniweniwenanë. Itsamonae canaëjëta pacuenia Dioso nacatocaëjëta wajayajawajinawanapaenexa pijapeniweniwenacuatsia. Daxita bajarapajamatabëcuenejawanë nacajunua gloriajumejawabelia.

pijacuata nacacuenewajunupaeba waja-aneconijibijawa,^l Jesucristo pejamatäbäcueneta.³⁴ Dioso wajanaca-aneconijibia-exanaecujinae, ¿jipatsa cuene-caējēpatsi wajanacananeconitsia-exanaejawa bajaraPonējajawabelia? ¡Ajibi cajena! Cristo baja wajanacasiwatēpaejawata, capanepaeya nacaneconimata-mota. Xuacujinae, icatsia namatacota petēpaejawamiwecua, pe-ecaenexa athēbētatsia Paxa Dioso pemuxuneneta, pecujuanenia. Bajarajotatsia, Jesucristo nacayapijiwicuauicuaijai tsecae Diosojawabelia. Itsa wajanacanecanimatamotsinē nacayapijiwicuauicuaijai, acuenebi itsamonae pejumeta wajanacananeconitsia-exanaejawa Diosojawabelia.

³⁵ ¿Cuene-caējēpatsi tsaja itsacuenejawata Cristo wajanaca-asiwacuene wajanacawecuatsatsinexa? ¡Ajibi cajena! Nexata, wajanabejiobitsicueneta ponaponae-atatsi, nacatonawitsi-ata wajanacatsi-ayapēbejecuene, itsamonae nacabejiobia-exanabiabi-ata, Jesús pijajiwixaetsi, janibocuene nacatocopiapatsi-ata, nacato-ajibi-ata wajanaxatatsicueni, itsacujirujawa nacatsi-ayai-ata, itsamonae itsacuenejawata nacabeyaxuabijitsia-ata, daxita bajaraxuanē nacatocopiapatsi-ata, aponacawecuatsatsi Cristo wajanacasiwajawa.³⁶ Pacuenia waxaitsi nacatocopiapatapona, bajarapijiniä pacuenia bajayata, Dioso pijajiwi nawajunupaeba Diosojawabelia pacuenia itsamonae bejiobia-exanaponatsi, bajaraPonē pijajiwixae. Bajaraxua yabara Dioso pejumeliwaisibaxutota jumaitsi mapacueniaje:

«Xamē, Diosomē, panijajiwixaenē daxitamatacabi itsamonae jamatabēpanebejebababiaba picani. Pacuenia oveja pebeyaxuabinexa, caponabiaba pebetaxunaeyabelia, bajarapacuenia jamatabēpane-exanabiaba»,^m jai Dioso pejumeliwaisibaxutota.

Bajarapijiniä pacuenia, waxaitsi-ata aeconoxae jiwi nacato-exanapona Dioso pexixaetsi.³⁷ Bajaraxuanē nacatocopiapatapona-ata, aponacajamatäbäcuenematatoxenetsi wajacuene-aebinexa Cristo wajanaca-asiwajawa. Caranata, bajaraxuanē jamatabäcueni-amoneyababiabatsi, tsipaji, Cristo, wajanaca-asiwanē, nacayawenonabiaba.³⁸ Bajaraxuata, xanē pexaniajai-cuene natoyapētaniä mapacuenije. Itsacuenejawaya-ata apocaējēpaetsi Cristo wajanaca-asiwajawa wajanacawecuacopiarucaeya-exanaenexa. Pacuenia petēpacuene, paliwaisi natsixainatsi abaxē waja-asaētsawanapae-epato, ángelewi, dowathiwi,ⁿ daxita penamatacaitorobisaē pexainaewi-ata, pitsicuene maparucaeje wajajinawanapae-epato taewanapatsi, pitsicuene-ata taeponaenatsi itsamatacabijawabelia. Daxita bajaraxuanē apocaējēpaetsi Cristo wajanaca-asiwacuene wajanacawecuacopiarucaeya-exanaenexa.

³⁹ Bajarapacuenia ponae-atatsi tsipae athēbēabetsia, itsa jume, ira bēxēpa-nabereca, apowecuaponaetsi tsipae Cristo wajanaca-asiwajawawecua. Taja-monae, itsacuenejawaya-ata, Dioso pexanaeyajuwēnjawanē, apocaējēpaetsi

l 8:33 *nacacuenewajunupaeba waja-aneconijibijawa*: Taema Rom. 1:16-17. Pablo matapania copiarutapona peyapētaeya-exanaejawa paliwaisi vangelioliwaisi tsipaebanajetaruca.

m 8:36 Taema Sal. 44:22; 2Co 4:11. **n 8:38** *dowathiwi*: Bajarapajumeyojawabelia cajunua mapitsimonaeje: Daxitacuenewiriawi waja-itaxutota apowajataecapanepaewi, pamonaenua jitsipa wajanacayamaxē-itojorobinexa Dioso peliwaisiwecua. Cajunua-ata pamonaē pematawajibiwi, pexu-iranotsiwi, pematacaetsiwina, tsipaji bajarapamonae dowathi pesaēta canacuenabatsi. Dowathijamatabäcueni pexainaexae, naca-itoya tsabiabi, Cristo wajanaca-asiwajawa yabara.

Dioso wajanaca-asiwajawa wajatuxanenë Jesucristo pejamatabëcueneta wajanacawecucopiarucaeya-exanaenexa. Bajaraxuata, caejawayo-ata apocajamatabëcuenematatoxenetsi tsane, wajanacacuenae-aebia-exanaenexa bajaraxua.

**Dioso itapetsi-ata judíowi pijajiwinexa, ayaibitsaëto
itsiata ayaibitsaëto jume-aeba Jesús peliwaissi**

9 ¹Tasiwanajamatabëcuenecopatsixae Cristojawabelia, xaniajanë pacuenia majota yaquinajë tawënajudíowi yabaraje. Aponajumetsënëtsinë cajena. Biji rajane, Espíritu Santo tanejamatabëcuenematacaponaexae, neyapëtaeya-exana taxaniajaijawa bajaraxua yabara. ²Bitso siwanajamatabëxainaponaponajë tawënajudíowi, Israel-pijinë pemomoxi yabara. Belia, beta-ajamatabëtane^o tsaponaponae tasiwanajamatabëxainaejawa bajarapamonae. ³Bajarapamonae pejume-aebixae Jesús peliwaissi, bitso siwanajamatabëxainajë. Nexata, bajarapamonae yabara jamatabëjumaitsinë: «Itsa Dioso netocopatsipa xanë tanaxuabinexa Cristowecua, nexata bajarapacuenia nacaewetsipajë, bajarapamonae juya pecapanepaenexatsi», jamatabëjanë, bitso ta-asiwaxae. ⁴Bajarapamonae Israel-pijinë^p pemomoxixae, Dioso bajayata picani itapetatsiⁱ pexi pexanaenexatsiⁱ daxitawiriawiwecua. Nexata, bajarapamonaemijawabelia bajayata picani Dioso ayaicuenia yawenonabiaba itsamonaewecua. Pitapetsixae pexi pexanaenexa, tsitanaitajëtabiabatsi pijapeniweniwenaeotiata.^s Bajarapamonaemijawabelia Dioso namata-enetsia najumecapanepaeya najumeliwaissicajoneyabiabanua.^t Orijibia, Dioso rajutatsi penajumecopatsiliwaissi Moisés-pijinëta pejume-cowënëtanapanapenexa. Itorobatsinua pexanaenexa templobo, itsa pabota najamatabëcuenae-itajëtabiabijitsia Diosojawabelia asiwaya peyaiyataejawa pitorobicueniatsi. Orijibia, Dioso baja najumecapanepaeya jumaitsinua bajarapamonaemijawabelia, pexaniacuenia peyawenonabiabinexa, petoitorobinexatsicanua, pecapanepaenënexatsi. ⁵Bajarapamonaemi pijasalinaiwimi,^u pewënëjonewimi, Dioso pejume pejumexaniataexae, Dioso itapeta daxita judíowi, Cristo-ata pijasalinaiwinexa. Nexata, Cristo itsa naexana

o 9:2 beta-ajamatabëtane: Dioso itapetsi-atatsi, petotsipaebaponaponapenexa Jesús peliwaissi apojudíowijawa, penajetarucaejawata Pablo copiaya patajopabiaba judíowi pijasinagogabonëjawa caetomara canacujitsia. Taema Hch. 13:14-15, 42; 14:1; 17:1; 18:4-7; 19:8. **p 9:4 Israel-pijinë:** Itsawënë pijinia, Israel-nexa, Jacob, Esaú pejuyapijinë, Isaac pexënatobeje. Taema Gén. 32:22-28; Gén. 25:19-26. **q 9:4 itapetatsi:** Bajarapamatacabijawa, itsamonaenatocanaëjëta Dioso penawecua-itoyajawa judíowi, juya, piasiwanaxa pamonae apojudíowi judíowiwecua. Baitsi, judíowi xaniawaetsia apopejumecowënëtsixae Dioso petonajumecopatsiliwaissi Moisés-pijinëta, nexata Dioso tsaena apocapanepaejitsipae bajarapamonae. Itsiata, Pablo yapëtaeya-exana capítulo 9-jawata pacuenia Dioso asiwaya itapeta judíowi pijajiwinexa. Capítulo 10-jawata pacuenia Dioso asiwaya tsiteca itapetatsi maparucawe. Capítulo 11-jawata pijinia, pacuenia Dioso tsiteca asiwaya itapetsiana pijajiwinexa itsamatacabijawabelia. **r 9:4 pexi pexanaenexatsi:** Taema Éxo. 4:22; 19:5; Os 11:1. **s 9:4 pijapeniweniwenaeotiata:** Mapajumeje wowaijumeta, «gloríajume». Gloriajumewajawabelia cajunua mapajamatabëcueneliwaissianëje: Pecotiaceuene, pinijicuene pexanaejawanua, xua yabara jiwi wënëxaniatsijitsia Dioso pinijicuene pexanaejawa yabara. Pecotia yabara taema mapaversículoxi, Éxo. 13:21; 40:34-37; Lev. 16:2; Núm. 14:10; 16:19,42; 20:6,12-12; 2 Cró. 7:1-2. Pinijicuene pexanaejawa yabara, taema: Éxo. 5:1-12,42; 14:1-22; 16:1-36; 17:1-7. **t 9:4 najumeliwaissicajoneyabiabanua:** Taema Gén. 12:1-3; 17:7; 22:15-19; Éxo. 20:1-21. **u 9:5 pijasalinaiwimi:** Pablo yabaracuaicuaijai Abraham-pijinë, Isaac-pijinë, Jacob-pijinë-ata.

mapanacuataje, judíonēcuenia naexana. Bajaraxuata, naexana judíowiyaju-wēnēnē. Bajaraponē Cristo, Diosonē baja cajena. Daxitacuene pewetsinēnua. Nexata, bajaraponējawabelia jiwi jumaitsi tsabiabi tsane: «Xamē Cristomē, bitso baja cajena, ayaijamatabēcuenenēmē», jai tsabiabi tsane daxitamata-cabijawabelianexa. Bajara-itsi tsane. Daxita bajarapapexaniacuenejawanē Dioso to-exanae-atatsi, tawēnajudfowi jume-aeba Jesús peliwaissi, pesiwana-jamatabēcuenecopabiyaniwa bajaraPonējawabelia.

⁶ Ayaibitsaēto judíowi jume-aebi-ata daxita Dioso najumecapanepaeya pejumaitsijawami bajarapapexaniacuene yabara, bajarapamonae apojume-amatamobiaya-exanae Dioso pejumaitsijawami. Biji rajane, yapētanetsi pacuenia daxita Abraham-pijinē pemomoxi Dioso apo-itapetsi pijajiwinexa. ⁷ Bajaraxua yabara, Dioso pejumeliwaisibaxutota nacayapētaeya-exana pacuenia bajayata Abraham-pijinē pemomoxi ayaibitsaēto xainae-ata, daxita itsiata Dioso apototaetsi Abraham-pijinē pepopemomoxicuenia. Bajayatami Dioso jumaitsi bajaraponējawabelia:» «Caenē nexēnato, Isaac, pemomoxi itapetajē peponemomoxicuenia tacatotaenexa, daxita itsamonae nemomoxiwecua», jai Dioso Abraham-pijinējawabelia. ⁸ Bajaraxuata, yapētanetsi mapacueneje: Daxita pamonaē Abraham-pijinē pemomoxi naexanae-ata, itsiata Dioso apotaetsi Abraham-pijinē pepopemomoxicuenia. Matapania pajiwi jumexaniatane» pacuenia Dioso najumecapanepaeya jumaitsi, bajarapajiwi jane baja, Abraham-pijinē pepopemomoxicuenia tanetsi. ⁹ Dioso tajēwelia najumecapanepaeya jumaitsi Abraham-pijinējawabelia mapacueniaje: «Icatsia, caewaicujinae patsianajē. Nexata, bajarapamatacabijawa nijawa, Sara, xainaena pexēnatonēyo»,^x jai Dioso Abraham-pijinējawabelia, Isaac-pijinēnexa yabara.

¹⁰ Orijibia, yapētanetsi daxita Abraham-pijinē pemomoxi, Dioso apopitapetsijawa pepopemomoxicuenia petanexatsi, tsipaji bexēajawabelia bajaraponē pexēnato Isaac-pijinē baja pepuanacojiobi, Dioso icatsia tajēwelia jumaitsi Isaac-pijinē pijawa Rebecajawabelia. Bajarapamatacabijawa bajarapowa baja yacotaponapona sapalanēbeje.^y ¹¹⁻¹³ Itsa abaxē bajara-ponēbeje aponaexanaebeje, pexaniacuene, pibisiacuene-ata, abaxē itsa apo-exanaebeje, bajarapamatacabi Dioso tajēwelia jumaitsi Rebecapijiwajawabelia mapacueniaje: «Panacuetonēyo copiaya cawecuaanaexanaena, bajaraponēyo jamatabēcuenē-ewetsiana pejuyapijinē pitorobabiabinexatsi pijajiwitonēcuenia»,^z jai Dioso tajēwelia Rebecapijiwajawabelia. Bajarapacuenia Dioso pejumaitsijawa Rebecapijiwajawabelia, najumejēpabeje pacuenia jumaitsi Dioso pejumeliwaisibaxutota pexēnatobeje yabara: «Asiwanē juyapijinē Jacob, matapijinē Esau matatoxenetsia»,^a jai Dioso pejumeliwaisibaxutota bajaraponēbeje yabara. Nexata, bajaraponēbeje tocopiapatatsibeje pacuenia Dioso tajēwelia jumaitsi pitapetsijawanexa pijajiwitonēnexa juyapijinē, matapijinēwecua. Nexata, bajarapacuenia yapētanetsi mapacueneje:

v 9:7 Dioso jumaitsi bajaraponēmijawabelia: Taema Gén. 17:18-19,21; 21:12. w 9:8 pajiwi jume-xaniatane: Itsacuenia petraduciabinexa pijinia.; «pajiwi naexanaena ēDioso najumecapanepaeya pejumaitsicowēya, Abraham pepopemomoxicuenia tanetsi». Pacuenia Isaac naexana Dioso najumecapanepaeya pejumaitsicuenia, Abraham-pijinē pijacuata apopejitsipacuenia. x 9:9 Taema Gén. 18:14. y 9:10 sapalanēbeje: Itsajume pijinia, «mofalanēbeje». z 9:11-13 Taema Gén. 25:23. a 9:11-13 Taema Mal. 1:2-3.

Dioso cajena ba-itapeta pajiwi jamatabê-itapeta pijajiwitonênexa. Dioso apo-itapetsi bajarapajiwi pexaniacuene pexanaejawa yabara. Bajara-pacuenia penaexanaewajënaeyabeje Dioso tajëwelia itapeta juyapijinë, matapijinëwecua.

¹⁴Dioso pajiwi jitsipa pitapetsinexa, itapetabiaba. Nexata, bajaraxua yabara waxaitsi apobejumaitsitsi mapacueniaje: «Dioso baja cajena pacuenia exana, apoxanepanae», apobejaisi, tsipaji Dioso ëpexaniacuene pexanaenë. ¹⁵Dioso bajayata jumaisi Moisés-pijinëjawabelia: «Pajiwi jamatabê-itaxutotsoniataniji, itaxutotsoniataenajë»,^b jai Dioso. ¹⁶Nexata, pajiwi Dioso jamatabê-itaxutotsoniatane, itaxutotsoniataeyabiaba, itsacuenëjawayoyata bajarapajiwi Dioso pejitsipaecuenia apo-exanabiabi-ata. Dioso apo-itaxutotsoniataetsinua, bajarapajiwi pijacuata penatojitsipaejamatabëcuene yabara. ¹⁷Dioso, pejumeliwaisibaxutota, nacayapëtaeya-exana pacuenia bajaraPonë bajayata jumaisi Egipto nacua pewetsinëjawabelia: «Xanë catocopatatsi newetsinexa nijanacua, tacatsitajëtsinexa pinijicuenesaë taxainae-nëcuene, daxitanacuanëpijiwi tanewënëyapëtaenexanua tasaenëcuene, pini-jicue ta-exanaejawa paxamëtuatujëta»,^c jai tsarucac Dioso Egipto nacua pewetsinëjawabelia. ¹⁸Bajaraxuata, yapëtanetsi pacuenia pajiwi Dioso jamatabê-itaxutotsoniatane, itaxutotsoniataeyabiaba. Pajiwi pijinia, Dioso jitsipa pejamatabëcuene-atajaya-exanaejawa, pejumecowënëtsiyaniwatsi, ajamatabëcuenetajaya-exanabiaba.

¹⁹Nexata, meta, Dioso yabara pajumaitsimë tsipae: «Itsa Dioso jiwi ajamatabëcuenetajaya-exana pejumecowënëtsiyaniwatsi, nexata bajarapajiwi Dioso apobenaneconitsia-exanae, tsipaji bajarapajiwi apojumecowënëtsi Dioso pajamatabëcuenetajaya-exanaexaetsi», pajamë meta tsipae Dioso yabara. ²⁰¡Tajamonae, pëtsa bajarapacuenia pajumaitsimë Dioso yabara, tsipaji bajaraPonë paca-exana! Canalito itsa caëjëpaejitsipatsi pecuaicuaijainexa, itsacanalitowecua saicayacuenia faratsi-atatsi, pefaratsiwatsijawabelia apojumaisi tsipae: «¿Detsa xuajitsia nefaratame saicayacuenia itsacanalitowecua?», apojai tsipae pefaratsiwatsijawabelia, ²¹tsipaji atsananitota pefaratsiwa caëjëpatsi canalito pefaratsinexa pacuenia jamatabëfarata. Nexata, caëjëpatsi pefaratsinexa pexaniacanalito, botuatujëta itabëtsiaya pe-etsinexa. Caëjëpatsinua pefaratsinexa beweliacanalito, saya pecajayabiabinexa. Cae-atsananitota caëjëpatsi pefaratsinexa pitsicanalito jamatabëfarata, bajarapananito cuene-itawetsinejewatsi.

²²Bajarapijinia pacuenia, Dioso baja exana jiwijawabelia pacuenia tsitanexanepanatsi. Ayaicuenia Dioso jamatabëneconitsia-exana daxita pamonaenaneconita bajaraponëjawabelia. Jamatabëtsitajëtanua pesaë bajarapamonaejawabelia. Itsiata bailsi jane, abaxë bajayajebi Dioso najamatabëcuenecataita pewerebiabijawabelianexa, toxanepanae-atatsi picani bajarapacuenia pexanaenexa. ²³Bajarapacuenia Dioso najamatabëcuenecataita, jamatejema nawënëxaniatsiaya penajamatabëcuene-itajëtsinexa ayaicuenia pitaxutotsoniataejawa pamonaenajamatabëcapanepa. Bajarapacuenia Dioso jamatabë-exana waxaitsijawaberena, petsitanajamatabëcuene-itajëtsinexa daxitanacuapijiwijawabelia ayaijamatabëcuene pexanaejawa, tsipaji baja

cajena wajanaexanaewajënaeya-ata, Dioso naca-itapeta wajayajawajina-wanapaenexa athëbëtsia. ²⁴ Dioso nacajunata daxitatsi pijajiwinexatsi, paxanë pajudfowiyajuwënëwinë, paxamë apopajudfowiyajuwënëwimë-ata.

²⁵ Bajaraxua yabara profeta Oseas-pijinë tajëwelia yaquinaruta peyaquinae-baxutota Dioso pejumaitisijawa apojudfowi yabara. Jumaitsi mapacueniaje:

«Pamonae picani apotajajiwi, ^d bajarapamonae yabara jumaitsinë tsane: ‘Tajajiwi raja mapamonaeje’, janë tsane. Bajarapamonae picani apojitsipaenë. Itsiata, bajarapamonae yabara jumaitsinë tsane: ‘Tajajiwi raja mapamonaeje, ta-asiwawi’, janë tsane.

²⁶ Panacuapijiwiyawabelia picani jumaitsinë tsane: ‘Paxamë raja apopatajajiwiwimë’, janë tsane picani, itsiata bexëa bajarapanacuapijiwi yabara itsamonae jumaitsi tsane: ‘Mara pamonaeye Dioso piasaëtsaponaponaenë pexije’, jai tsane, jai Dioso», ^e jai profeta Oseas-pijinë bajayata peyaquinaebaxutota, pamonae apojudfowi-ata, Dioso pijajiwi pexanaejawanexatsi yabara.

²⁷ Profeta Isafas-pijinë pijinia, bajayata tajëwelia judfowi yabara jumaitsi mapacueniaje: «Israel-pijinë pemomoxi bitso ayaibitsaëtoxaneto tsane. Pacuenia manuamenepijitajetabo-atsapërë aponacacuenecaëjêpae wajana-mataëjêtsinexa, bajara-itsi tsane. Itsiata bailsi jane, bajarapamonaeyajuwënëwi, caejiiwyobeje saya, Dioso capanepaenatsi. ²⁸ Daxita pamonaenaneconita Diosojawabelia, naxatsiayo Dioso naneconitsia-exanaena», ^f jai profeta Isafas-pijinë peyaquinaebaxutota. ²⁹ Icatsia, wajayapëtaenexa Dioso pecapane-paejawanexa ëpamonae itaxutotsoniatane, itsajawata pijinia, Isafas-pijinë peyaquinaebaxutota, icatsia jumaitsi mapacueniaje:

«Itsa Dioso, ayaijamatabëcuenenë daxitawecua, aponac-itaxutotsoniatæ tsipae, nexata daxitatsi waxaitsi, Israel-pijinë pemomoxitsi, nacawerebiabijitsipa pacuenia bajayata werebiabatsi daxita Sodoma, Gomorra tomarapijiwimibeje, pijaneconijamatabëcuene», ^g jai profeta Isafas-pijinë peyaquinaebaxutota.

**Pacuenia judfowi jume-aeba Jesús peliwaisi, jiwi
pecapanepaeliwaisinexatsi, tsipaji casaë pijacuata
penacapanepaejawanexa, pejumecowënëtsijawata Dioso
penajumecopatsiliwaisi Moisés-pijinëta, yabara peliwaisi**

³⁰ Bajarapaprofetanëmibeje nacayapëtaeya-exana mapacueneye, judfowi, apojudfowi-ata yabara: Pamonae apojudfowi, aposiwabëjai-ata pejumecowënëtsinexa Dioso penajumecopatsiliwaisi Moisés-pijinëta, bajarapamonae itsiata, Dioso aneconijibia tanetsi, pejumexaniataexae Jesucristo pesiwatëpaejawatsi pibisiacueni pexanaeneconi yabara, pesiwanajamatabëcuenecopabijawata Jesucristojawabelia. ³¹ Itsiata bailsi jane, pamonae judfowi, asaëyata jumecowënëtanapae-ata Dioso penajumecopatsiliwaisi Moisés-pijinëta, Dioso aneconijibia petanexatsi, itsiata aneconijibia apotaetsi pacuenia picani natocanaëjêta. ³² Bajarapamonae Dioso aneconijibia

d 9:25 apotajajiwi: Taema Os 8:23; 1Pd 2:10. e 9:26 Taema Os 1:10. f 9:28 Taema Isa. 10:22-23. g 9:29 Taema Isa. 1:9.

apotaetsi, tsipaji jume-aeba Jesucristo pesiwatëpaejawatsi pibisiacuene pexanaeneconi yabara. Aposiwanajamatabëcuenecopabinua Cristojawabelia, pacuenia picani Dioso tocaëjëtatsi. Biji rajane, natocanaëjëta Dioso aneconijibia petanexatsi, pejumecowënëtsijawata Dioso penajumecopatsiliwaisi Moisés-pijinëta. Nexata, Jesús peliwaisi tonaexanatsi benamutota pebocae-iboto, pefirapanucaeya-exanaenexatsi bajarapaliwaisi pejumexaniataejawawecua. Bajaraxuata, judíowi Diosowecua naxuabiaya jinawana, pejume-aebixae Jesús peliwaisi. ³³Bajarapacuenia yabara Dioso tajëwelia jumaitsi Cristo yabara pejumeliwaisibaxutota mapacueniaje:

«Puenetabuatsianajë Jerusalén tomarata bepefirapanucaeya-exanae-ibotocuenia ponë itorobijitsianë jiwi pecapanepaenexa. Pamonae aposiwanajamatabëcuenecopabi tsane bajaraponëjawabelia Dioso wecuanaxuabiana. Pacuenia jiwi bafirapanuca iboto pejamatabëcueneta, bajara-itsi tsane bajarapamonae. Itsiata baitsi jane, pajiwi siwanajamatabëcuenecopatsiana bajaraponëjawabelia, bajarapajiwi aponacueratsi tsane»,^h jai tajëwelia Dioso pejumeliwaisibaxutota, Cristo jiwi pesiwatëpaejawanexa pibisiacuene pexanaeneconi yabara.

**Pablo bitso tojitsipa daxita pewënajudíowi
pejumexaniataejawa Jesús peliwaisi**

10 ¹Tajamonae, tawënajudíowi abaxë jume-aebi-ata Jesús pesiwatëpaejawatsi pijaneconi yabara, tojitsipajë bitso tajamatabë-ëthëtowetsina Dioso pecapanepaenexatsi. Bajaraxuata, towajëcabiabajë Diosojawabelia, bajarapamonae pejumexaniataenexa Jesús Peliwaisi, Dioso pecapanepaenexatsi. ²Bajarapajudíowi picani ayaicuenia bitso jamatabëtonacueneba Dioso, pesiwabarëyanexatsi. Itsiata baitsi jane, bajarapamonae apoyapëtae pacuenia Dioso tojitsipatsi peto-exanawanapaenexa. ³Bajarapamonae xania-waetsia aponatoyapëtae pacuenia Dioso pepacuene aneconijibia taejitsiatsi. Bajaraxuata, jamatabëcuenenawëxaniabiaya pijacuata natocanaëjëta Dioso aneconijibia petanexatsi, pejumecowënëtsijawata Dioso penajumecopatsiliwaisi Moisés-pijinëta. Pejume-aebixae Jesús peliwaisi, apojitsipae pexanaenexa pacuenia Dioso itorobatsi, aneconijibia petanexatsi. ⁴Mapacuenia Dioso caëjëta aneconijibia jiwi petaejawanexaje: Pajiwi siwanajamatabëcuenecopata Jesucristojawabelia, pijaneconi petomatamotsinëxaetsi, bajarapajiwi Dioso aneconijibia taenatsi. Bajaraxuata, bajarapajiwi pematatsënëa baja apobenajamatabëxainae, pejumecowënëtsinexa icsia Dioso penajumecopatsiliwaisi Moisés-pijinëta, Dioso aneconijibia petanexatsi, tsipaji baja Cristo tocopiarucaeya-exanatsi bajarapajumecowënëtsicuene.

⁵Pamonae jitsipa Dioso aneconijibia petanexatsi, pejumecowënëtsixae Dioso penajumecopatsiliwaisi Moisés-pijinëta, bajayata peyaquinaeliwaisi jumaitsi mapacueniaje: «Pajiwi jumecowënëtsicapaneapaena daxita pacuenia bajarapaliwaisita itorobatsi, bajarapajiwi matapania Dioso aneconijibia taenatsi»,ⁱ jai Moisés-pijinë bajayata peyaquinaeliwaisita. ⁶Nexata, pamonae pijinia, jumexaniatane Cristo pesiwatëpaejawatsi, pibisiacuene

pexanaeneconi yabara, bajarapamonae pejume-itawetsinexatsi, Dioso jumaitsi mapacueniaje: «¡Pëtsa pajamatabëjumaitsimë: ‘¿Jipatsa meta athëbëabetsia ponæna mapanacuayabetsicaje, pebarëpatsinexatsica wajanacayawenonaenënexa?’ pajamatabëjamë pëtsa! ⁷¡Pëtsa pajamatabëjumaitsimënua: ‘¿Jipatsa meta ponæna, itsabereca petëpæwi jinawanapa, piasaëya-exanaenexa petëpæjawawecua wajanacayawenonaenënexa?’ pajamatabëjamë pëtsa!»,⁷ jai Dioso jiwi pejume-itawetsijawa. Nexata, itsajiwi-ata apobejamatabëjumaitsi bajarapacuenia, tsipaji baja, Cristo athëbëwetsica patsica baja, wajanacasiwatëpaenexa mapanacuataje. Petëpæcujinae-ata baja, icatsia Cristo asaë petëpæjawawecua wajanacacapanepaenexa.⁸ ¡Taema xua yabara, Dioso pejumeliwaisibaxutota jumaitsi mapacueniaje!: «Dioso rabaja pejumeliwaisi panatoxainame. Bajarapaliwaisi yabara panabarëcuaijamë tsabiabi. Panejamatabë-ëthëtota-ata baja bajarapaliwaisi yabara panajamatabëxainabiabame»,⁸ jai Dioso pejumeliwaisibaxutota. Bajarapaliwaisibeje naliwaisijëpabeje paliwaisi paxanë pacatsipaebatsi panejumexaniataenexa Cristo papecasiwatëpæjawa pibisiacueni pane-exanaeneconi yabara.⁹ Itsa panawajunupaebianame itsamonaejawabelia paxamë paneyapëtaejawa Jesús petuxanenëcuene, Dioso pexënatocuene-ata, itsa pajumexaniatanemenua panejamatabë-ëthëtowawetsina Jesús petëpæcujinae icatsia Dioso piasaëya-exanaejawatsi, nexata Dioso paccapanepaena.¹⁰ Pajiwi baja pejamatabë-ëthëtowawetsina jumexaniatane Cristo pesiawatëpæjawatsi, pibisiacueni pexanaeneconi yabara, bajarapajiwi Dioso aneconijibia taenatsi. Nexata, bajarapajiwi nawajunupaebiana pecuai-bowojotota, pejumexaniataejawa Cristo pesiawatëpæjawatsi pibisiacueni pexanaeneconi yabara. Bajarapacuenia nayapëtane bajarapajiwi Dioso pepacueni pecapanepæjawatsi.¹¹ Xaniajanë, tsipaji Dioso pejumeliwaisibaxutota jumaitsi mapacueniaje: «Pajiwi siwanajamatabëcuenecopata wajatuxanenëjawabelia, bajarapajiwi aponacueratsi tsane»,¹¹ jai Dioso pejumeliwaisibaxutota, Cristo jiwi pesiawatëpæjawanexa pibisiacueni pexanaeneconi yabara.¹² Bajarapacuenia jumaitsi, tsipaji wajatuxanenë Cristo najëpaeya tane judíowi, apojudíowi-ata. Nexata, daxita pamonae siwanajamatabëcuenecopaba bajaraPonëjawabelia, bajarapamonænaenexa najëpaeya pijatuxanenë tsaponaponæ. Bajaraxuata, itsa wajëta^m bajaraPonëjawabelia peyawenonaenexatsi, wajatuxanenë ayaicuenia itaxutotsoniataeyabiaba, najëpaeya yawenonabiabanua, judíowi, apojudíowi-ata.¹³ Bajaraxua yabara Dioso pejumeliwaisibaxutota jumaitsi mapacueniaje: «Pajiwi pepetuxanenëjawabelia nawajëta pecapanepaenexatsi, bajarapajiwi capanepaenatsi»,ⁿ jai Dioso pejumeliwaisibaxutota.

¹⁴ Itsiata, acuenebi itsajiwi-ata penawajëtsinexa Cristojawabelia pecapanepaenexatsi itsa abaxë apojumexaniatae Cristo pesiawatëpæjawatsi pibisiacueni pexanaeneconi yabara. Itsajiwi-ata acuenebi pejumexaniataenexa Cristo peliwaisi itsa abaxë apojumetae bajarapaliwaisi. Itsajiwi-ata acuenebi peyapëtaenexa Cristo peliwaisi itsa abaxë apotsipaebitsi.¹⁵ Dioso pijajiwi itsa apo-itorobi tsipae daxitajiwijawa Cristo peliwaisi petsipaebaponaenexa,

j 10:7 Taema Deut. 30:12-13. k 10:8 Taema Deut. 30:12-14. l 10:11 Taema Sal. 34:22; Isa. 28:16; Jer. 17:7. m 10:12 wajëta: Taema Gál. 3:28; Col. 3:11. n 10:13 Taema Joel 2:32.

nexata itsajiwi-ata apoyapētae tsipae bajarapaliwaisi. Dioso pejumeliwaisi jiwi petsipaebaponaewinexa yabara, Dioso pejumeliwaisibaxutota jumaitsi mapacueniaje: «Pexaniacuene bitso itsa jiwi najetarubena, pexanialiwaisi petsipaebanajetarubenaenexa»,^o jai.

¹⁶Pexanialiwaisi itsamonae tsipaebi-ata judiowijawabelia, itsiata baja-rapamonae apojitsipae pejumexaniataenexa pexanialiwaisi pecapane-paeliweisinexatsi picani Diosojawabelia. Bajayata, Isaías-pijinē-ata jiwi apojumexaniataetsi. Nexata, Isaías-pijinē Diosojawabelia jumaitsi mapacueniaje: «Tajatuxanenē, daxitajiwi aponejumexaniatae tatsipaebiliwaisi nijajiwitonē yabara. Caejiwiyojebe saya nejumexaniatane»,^p jai bajayata Isaías-pijinē Diosojawabelia. ¹⁷Nexata, jiwi itsa jumetane Cristo pesiwatē-paejawatsi, pibisiacuene pexanaeneconiconi yabara, matapania cuenecaējēpatsi pejumexaniataenexa bajarapaliwaisi, pesiwanajamatabēcuenecopabinexa bajaraPonējawabelia.

¹⁸Xanē nayanijobajē: «¿Judiowi meta itsamonae apotsipaebitsi Cristo pesiwatēpaejawatsi pibisiacuene pexanaeneconiconi yabara?», jamatabējanē. Bajarapamonae baja cajena jumetane picani. Itsiata, apojumexaniatae pet-sipaebiliwaisitsi. Bajaraxua yabara Dioso pejumeliwaisibaxutota jumaitsi mapacueniaje:

«Dioso pijajiwi tsipaebanajetarubena daxitanacuanējawa
Dioso pejumeliwaisi. Nexata, bajarapaliwaisi baja yacaējēpa
daxitanacuanējawa»,^q jai Dioso pejumeliwaisibaxutota.

¹⁹Icatsia, nayanijobajē: «¿Judiowi meta apoyapētae pajamatabēcuenē yabara Cristo siwatēpatsi?», jamatabējanē. Yapētane baja picani. Itsiata, apojitsipae pejumexaniataejawa. Moisés-pijinē bajaraxua yabara yaquina mapacueniaje:

«Xanē, Diosonē, apojudiowi taenajē tajajiwicuenia. Bajarapacuenia
exanaenajē panecueneca-ēbinexa, panecuenēbara-
anaepanaenexanua. Nexata, panecuenetaejawata asiwaya tataejawa
bajarapamonae, caewēarena icatsia xanējawaberena panajamatabēc
uenepēnēyorotsianame, asiwaya patajiwimēcuenia patacataenexa»,^r
jai Moisés-pijinē bajayata peyaquinaebaxutota Dioso tajēwelia
pejumaitsiyawa judiowi yabara.

²⁰Profeta Isaías-pijinē-ata bajayata ajumejunawijibia apojudiowi yabara Dioso tajēwelia pejumaitsiyawa, jumaitsi mapacueniaje:

«Pamonae picani aponejaitsi tayawenonaenexa,
bajarapamonaejawabelia itsamatacabi naitajētsianajē
tayawenonaenexa. Nexata baja, neyapētaena. Pamonae
aponenwēnēliwaisiyanijobi-ata, najamatabēcuenē-itajētsianajē
bajarapamonaejawabelia»,^s jai Dioso tajēwelia, jai bajayata Isaías-
pijinē Dioso pejumaitsiyawa apojudiowi yabara.

Bajaraxuata, nayapētane tajēwelia Dioso penajamatabēcueneweretsijawa, pecapanepaejawanexa apojudiowi-ata.

o 10:15 Taema Isa. 52:7; Nah 1:15. p 10:16 Taema 53:1. q 10:18 Taema Sal. 19:1-4; Rom. 1:18-20. Pacuenia daxitajawa jiwi yapētane Dioso peponaponaecuenē pecanaējētsijawata bajaraPonē pecobecowē athēbētatsia perubenaejawa, bajarapijinia, pacuenia judiowi daxitajawa jumetane pexanialiwaisi Jesūs peliwasī. r 10:19 Taema Deut. 32:20-21; Rom. 11:11-14. s 10:20 Taema Isa. 65:1.

²¹ Biji rajane, judfowi yabara Dioso pejumlahitsijawa, Isaías-pijinē bajayata jumaitsi mapacueniaje:

«Daxitamatacabi asiwaya junatabiabajē picani, tayawenonaenexa pamonaē apotanejumecowēñetsiwi. Itsiata, ajamatabēcuenetaja, pexanaenexa ta-itorobicuenia»,^t jai bajayata Isaías-pijinē Dioso pejumlahitsijawa judfowi yabara.

**Pacuenia judfowi, Israel nacuapijiwiyajuwēñewi,
Dioso capanepaejitsiatsi, yabara peliwaisi**

11 ¹ Bajarapacuenia judfowi apopejumecowēñetsixae^u Dioso, apopejume-xaniataexaenua Jesús peliwaisi, ¿Dioso tsabaja nexata, pijajiwi, judfowi, nawecuaxuaba, pematatsēñē piasiwaniwa pijajiwicuenia? ¡Jume raja! Aponawecuaxuabi cajena. Xanē-ata rabaja judfonēñē, Israel nacua-pijinēñē. Tajasalinainē cajena Abraham-pijinē. Benjamin-ata^v pemomoxi-bitsaētoyajuwēñēñēñē, itsiata Dioso asiwaya necapanepa. ² Bajayata baja cajena, wajawajēnaeyami, Dioso itapeta judfowi pijajiwinexa, Israel-pijinē pemomoxi. Nexata, Dioso daxita bajarapamonaē apojumecowēñetsi-atatsi, itsiata aponawecuaxuabi tsane daxita bajarapamonaē, apojumecowēñetsi-ata. Bajaraxua yabara Dioso pejumeliwaisibaxutota jumaitsi profeta Elías^w pewajētsijawata Diosojawabelia neconitsiaya mapacueniaje: ³ «Tajatuxanenē, mapamonaēje, Israel nacuapijiwi, catobepona daxita pecajumeliwaisipaebi-wimi profetawi. Toxobabianua altar-jawanē, itsajota tajuitabiaba dajubiwi pecarajutsinexa pijaneconijamatabēcuenē. Nexata baja, xanē, caenēñē, nija-jiwitonēñē, nacopatajē. Xanē-ata baja jamatabēnebeyaxuaba»,^x jai profeta Elías Diosojawabelia Israel nacuapijiwi yabara. ⁴ Itsiata baitsi jane, Dioso jumaitsi profeta Elías-jawabelia mapacueniaje: «Apocaenēmē raja. Xainajē baja tajajiwi, siete mil ponēbeje, Israel nacuapijiwiyajuwēñewi. Bajarapamonaē xaniawaetsia nejumecowēñētawanapa. Pematabacabēta apotonu-benaē, asiwaya penawajēcaenexa Baal-wēñē, jumapecataeya pexanaenē pitabarata»,^y jai Dioso bajayata profeta Elías-jawabelia. ⁵ Bajarapijinia itsi maparucae-ataje. Caejiwiyobeje pijinia, Dioso itapetatsi pijajiwinexa, pitaxutotsoniataexaetsi, daxita bajarapamonaē apojumecowēñetsi-ata. ⁶ Bajarapamonaē Dioso apo-itapetsitsi, pexaniacuene peto-exanawanapaejawa yabara. Biji rajane, itapetatsi pitaxutotsoniataexaetsi. Dioso itsa itapetsipa bajarapamonaē, ēpexaniacuene peto-exanawanapaejawa yabara, nexata amatamobi tsipae pitaxutotsoniataecuene.

⁷ Nexata, mapacueniaje natotaewanapa Israel nacuapijiwije: Pamonaē, ayaibitsaētoxaneto, natocanaējēta Dioso pecapanepaejawanaxatsi, pexaniacuene peto-exanawanapaejawata, bajarapamonaē Dioso apocapanepaetsi. Apopitsi bajarapacuene pejumecowēñētawanapaejamatabēcuenē Dioso penajumecopatsiliwaisi Moisés-pijinēta. Biji rajane, saya naexana

t 10:21 Taema Isa. 62:2. **u 11:1** *apopejumecowēñetsixae*: Taema Rom. 10:3. **v 11:1** *Benjamín-pijinē*: Bajaraponē Israel-pijinē pexēnato, juyapijinē. Taema Gén. 35:18. **w 11:2** *Elías*: Bajaraponē bayatami ponapona Israel nacuata. Baitsi, apo-asaē tsaponaponaē mapanacuataje, Jesús peponaponaematacabi. Itsiata, bajaraponē Dioso ya-asaēya caponatsi athēbēabetsia. (2Re 2:1-11.) Bajaraxuata apopayaquinarubinē «Elías-pijinē». Daxita bajaraponē peliwaisi ruca 1Re 18-2Re 2-jawabelia. **x 11:3** Taema 1Re 19:10, 14. **y 11:4** Taema 1Re 19:18.

pijamatabëcuenetajawi, pejumexaniataeyaniwa Jesús peliwaisi. Itsiata baitsi jane, Israel nacuapijiwi yawwëñëwi, caejiwi yobeje, Dioso itapetatsi pijajiwinexa, pejumexaniataexae pexaniajailiwaisi, Cristo peliwaisi, peca-panepaeli waisinexatsi Diosojawabelia. ⁸ Nexata, judíowi, maparucaeje pejinawanapaewi, cuenejëpa saya pijasalinaiwimi, pamona yabara profeta Isaiás-pijinë jumaitsi Dioso pejumeliwaisibaxutota mapacueniaje: «Dioso copata bajarapamona bepejamatabëcuenemajitsiwicuenia pejinawanapaenexa. Bajarapamona jinawanapanua bepena-itaxuto-acabiwi, penatsiwajënaetaeyaniwa xua pexaniacue, Dioso pejitsipaecue. Jinawanapanua bepenamuxu-acabiwi, pejumetaeyaniwa Dioso peliwaisi. Bajarapacuenia jamatabëcuene-itsi tsawanapae bajarapamona mapamatacabijawaberena-ataje», ⁹ jai Dioso pejumeliwaisibaxutota, Israel nacuapijiwi, bajarapejamatabëcuene-itsijawa yabara. ⁹ Orijibia, bajayata nacula-ewetsinëmi-ata, David-pijinë, jumaitsi bajarapamonaemi yabara mapacueniaje:

«Xuanëjawabelia Israel nacuapijiwi itaxutuajamatejema^a tsabiabi, Dioso pesiwabarëyanexatsi picani, bajaraxuanë tonaexanatsi bepetsi-ayailiwaisinexatsi. Pafiestajawanë exanabiaba Dioso pewëñëta, caranata bajaraxuanë tonaexanatsi Diosojawabelia penaneconitsia-exanaejawanënexatsi.

¹⁰ »Bajarapamona naexana bepita xutotsëcënaewi, penatsiwajënaetaeyaniwa papiayaicue tocopiapatsijitsiatsi pijaneconijamatabëcuene. Pacuenia bitso piarewejawa pecaponaewi bacanajumafuruta, bajarajamatabëcuene-itsi pijaneconi yabara», ^b jai bajayata David-pijinë Israel nacuapijiwi yabara, bajarapamona epejanaecuejawa pita xutuajamatejemaxae Dioso pesiwabarëyanexatsi.

Pacuenia apojudíowi-ata Dioso capanepaejitsiatsi, yabara peliwaisi

¹¹ Bajarapa Diosojumepaebiwi pejumaitsicuenia^c judíowi maparucaeje nacopatsi-ata apopejumexaniataejawanexa Cristo pesiwatëpaejawatsi, ¿bajarapacuenia nacopatsiana meta, naxuabiaya pejinawanapaenexa daxitamatacabijawabelia? ¡Jume cajena! Cae-epatoyonexa saya. Judíowi apopejumexaniataexae Jesús peliwaisi, Dioso juya tocopata apojudíowi, pejumexaniataenexa bajarapaliwaisi, pecapanepaenexatsi, pacuenia tocajëta picani judíowi. Bajarapacuenia exana, judíowi pecuene caëbia-exanaenexa, Dioso pecapanepaewi yabara apojudíowi. ¹² Dioso itsiata apotocopatsi tsane judíowi bepita xutotsëcënaewicuenia pejinawanapaewi pijaneconi yabara daxitamatacabijawabelianexa. Itsamatacabi bajarapamona-ata,

z 11:8 Taema Deut. 29:4; Isa. 29:10. a 11:9 itaxutuajamatejema: Dioso aneconijibia petanenexatsi, pexaniacuenia peyawenonabinexatsinua ayajawa pexainaenexa, israelitawi itaxutuajamatejema tsabiabi pejumecowëñëtabibixae Dioso penajumecopatsiliwaisi Moisés-pijinëta. Bajarapaliwaisi petocajëtsicueniatsi fiestajawanë exanabiaba. Nexata, bajarapamona apopita xutuajamatejemaxae Diosojawabelia, nacula-ewetsinë David-pijinë tojitsipa pijamona bajarapaliwaisi petonaexanaenexatsi penaneconitsia-exanaeliwaisinexatsi, pejamatabëcuene barëyaya-exanaeliwaisi siwecua. b 11:10 Taema Sal. 69:22-23. c 11:11 Bajarapa Diosojumepaebiwi pejumaitsicuenia: Taema Rom. 11:8-11.

jumexaniataena Jesús peliwaisi pecapanepaenexatsi Diosojawabelia. Paxamê apopajudfowimê pacaxitajarabame baja pexaniacuene, panejume-xaniataexae Jesús peliwaisi, papecapanepaenexa Diosojawabelia, judfowi apocejumexaniatae-epato bajarapaliwaisi. Bajaraxua matatoxenetsia bitso pexaniacuene panatoyapêtaename pacujinae ayaibitsaêto judfowi pacayajawajumexaniataena Jesús peliwaisi.

¹³ Aeconoxae paliwaisi pacatsipaebatsi, bajarapaliwaisi picani apopajudfowine-xamê. Dioso itsiata nitapeta, tatsipaebaponaponanênexa Cristo peliwaisi daxita apojudfowijawa. Bajaraxuata, bitso siwabarëyanê patacatsipaebijawa yabara bajarapaliwaisi. Nexata, Dioso tane-itorobicuenia, daxita tajamatabêcuenesaêta tsi-paebabiabajê Jesús peliwaisi apojudfowijawa, ¹⁴ tsipaji bitso jitsipajê tajitsipaeya-exanaenexa tajawiriawi, judfowi, pejumexaniataenexa Jesús peliwaisi, pecapanepaenexatsi Diosojawabelia. Bitso jitsipajê Dioso peto-exanaenexatsi tajawiriawi, pacuenia paxamê pacato-exana papecacapanepaenexa. ¹⁵ Dioso nawecua-itaweta ayaibitsaêto judfowi, apocejumexaniataexae Cristo peliwaisi. Nexata juya, apojudfowi maparucaeje Dioso barajamatabêcuenexanepana, pesi-wajamatabêcuenecaewixae pebara-anaepanaejawa pijaneconi yabara, Cristo pejamatabêcueneta. Bajarapacuenia Dioso itsa barajamatabêcuenexanepana daxita mapanacuapijiwi, judfowi penawecua-itawetsijawata, matatoxenetsia cajena siwajamatabêcuenabarëya tsane, pamatacabi judfowi-ata jumexaniataena Cristo peliwaisi. Bajarapamatacabi Dioso caewëalia pitsiana, asiwaya petaenexa pijajiwicuenia. Aeconoxae abaxê Dioso tane judfowi bepetêpaewi, apocejumexaniataexae Cristo peliwaisi. Nexata, pamatacabi judfowi jumexaniataena Cristo peliwaisi, Dioso taena bepisaëya-exanaewitsi petêpaecujinae.

¹⁶ Xaniawaetsia wajayapêtaenexa, ayaibitsaêto judfowi pejumexaniataejawanaxa Cristo peliwaisi, canaêjêtsianatsi mapaliwaisibeje. Jiwi itsa pitsipa pan-matabêyajuwênêjawa panbê pesebinexa, nexata itsa rajutsipa copiaya pexanaepanbê ofrendacuenia Diosojawabelia, penacopatsi pan-matabê Dioso taejitsipa pijajawacuenia. Bajarapacuenia itsi tsipae naejawajawabelia-ata. Itsa jiwi rajutsipa petabunepe ofrendacuenia Diosojawabelia, nexata daxita pemaxërananê-ata Dioso taejitsipa pijamaxërananêcuenia. Bajarapijinia itsi judfowijawabelia-ata. Dioso pitapetsixae judfowi pijasalinainêmi^d pijajiwitonênexa, nexata tane pemomoxi-ata pijajiwicuenia. ¹⁷ Nexata, Dioso petaxae pijasalinainê bepexaniawiria olivonae, tane pijinia pemomoxi bepemaxërananê bajaraponae. Apopajudfowimê pijinia pacatane besaicayawiria olivonaemaxërananê. Bajaraxuata, pexaniawiria olivonae pecuai^e xaniawaetsia apocapitsapaexae, pexainaenê pejitsipaecuenia, nexata itsamaxëranajawanê caucuba, juya saicayawiria olivonaemaxëranaxi perubinxa bajarapamaxërananêcowëta. Nexata, pexaniawiria olivonae-ênëtuatuajêpijimerax^f junua

d 11:16 *pijasalinainêmi*: Abraham-pijinë yabara. Taema Rom. capítulo 4. **e 11:17** *pecuai*: Pacuai Dioso jitsipa judfowi pecapitsapaenexa mapitsicuenejawanêje: Dioso jitsipa picani judfowi pejumexaniataenexa Cristo peliwaisi, pesiwanajamatabêcuenecopabinexa bajaraponêjawabelia, bajarapacuenia Dioso aneconihibia petaenexatsi. Nexata, Dioso pecapanepaexaetsi, bajarapamonae pexaniacuene exanawanapaejitsia bajaraPonê pejitsipaecuenia, tsipaebanajetarubenaepjitsianua Jesús peliwaisi daxitanacuanêpijiwijawa. **f 11:17** *olivonae-ênëtuatuajêpijimerax*: Bajaraxua nacatocuenecatane Abraham-pijinë pejumexaniataejawa, pepitsinexa xua Dioso rajutsipaebatsi, Dioso pexaniacuena peyawenonaenexanua daxitanacuanêpijiwi pemomo pejamatabêcueneta.

bajarapacatsanarubimaxërana-ënëtuatujëjawa, bajarapacuenia pecapitsapae-nexa pexaniacuai. Bajarapijinia pacuenia, Dioso pacato-exana paxamë apopajudfowimë. Judfowi apopejumexaniataexae Cristo peliwaishi, paxamë juya Dioso papijajiwinimë paca-exana, pane-exanaenexa xua judfowi apo-exanae.⁸ ¹⁸ ¡Bajaraxuata, pëtsa bepa-ayaijamatabëcuenewimë panataneme judfowiwe-cua, tsipaji panijacuata apopana-itapetsimë Dioso papijajiwinexamë panenae-xanaenexa! Pacuenia naejawa, petabunepe^h pejamatabëcueneta, xaniawaetsia nuca. Aponucae xaniawaetsia pemaxërananë pejamatabëcueneta. Pacuenianua naemaxërananë-ënëtuatujëpijimer aponasaërajutsi petabunepejawabereca, bajarapijinia paxamë-ata pa-itsimë. Apopajudfowimë apopacacajëpae cajena paneyawenonaenexa judfowi pijasalinainëjawabelia. Biji rajane, judfowi pijasalinainë pacanasaërajutaⁱ apopajudfowi-atamë. Judfowi apopejumexaniataexae Cristo peliwaishi, pacuenia pijasalinainë jumexaniatane Dioso, bajarapacuenia apopejumexaniataexae, nexata juya paxamë Dioso paca-itaxutotsoniatane. Pacatocopatanua paxamë-ata Cristo peliwaishi panejumexaniataenexa, jiwi pecapanepaeliwaishinexatsi.

¹⁹ Bajarapacuenia Dioso papecato-exanaexae, belia apopajudfowimë pajumaitsimë tsipae: «Waxaitsi wajanacarajutsinexa bajarapamonaemi pija-taxunae,^j judfowiyajuwënëwi wecuatsatatsi pijataxunaemiwecua. Nexata, bajarapataxunaecowëta nacanuba», pajamë meta tsipae. ²⁰ Paxaniajamë rabaja. Bajarapamonaë baja cajena pijataxunanaemi Dioso wecuatsatatsi apopejumexaniataexae Cristo peliwaishi. Paxamë, apopajudfowimë, bajarapamonaemi pijataxunaemita Dioso pacanuba, panejumexaniataexae Cristo peliwaishi. ¡Bajaraxua Dioso papecato-exanaexae, pëtsa panata-neme bepa-ayaijamatabëcuenewimë bajarapamonaewecua! ¡Biji rajane, bajaraxua, panayajiwiataema! Belia, Dioso paxamë-ata pacawecuatsatsipa bajarapataxunaewecua, itsa paxamë-ata pacopatsipame pane-exanaejawa papexaniacuenejawanë Dioso pacatojitsipa pane-exanaenexa. ²¹ Itsa Dioso

g 11:17 xua judfowi apo-exanae: Judfowi tsiteca Dioso pitapetsiwiitsi itsamonaewecua daxita mapanacuapijiwituatujëta. Itsiata, pataxunaemi xaina picani Dioso asiwaya petanexatsi, Dioso peliwaishi pewajunupaëbiwinexanua, bajarapataxunaewecua «cacubatsi», juya, pecanacopatsi-nexa apojudfowi mabarucaeje. h 11:18 Naejawa, petabunepe: Pablo cuenecataeya canacueneba naejawa petabunepe peyabaracuaicuajainexa judfowi pijasalinainëanë pacuenia Abraham-pijinë, Isaac-pijinë, Israel-pijinëbana, pamonaë copiaya jumexaniatane Cristo peliwaishi. Nexata, pacuenia bajarapamonaemi copiaya jumexaniatane xua Dioso najumecapanepaeya jumaitsi, jiwi pecapanepaenënexa yabara, bajarapacuenia apojudfowi najëpaeya jumexaniatane Dioso pecapanepaewanaxatsi Cristo pejamatabëcueneta. Bajaraxuata, bajarapamonaemi benaejawa petabunepacuenia tanetsi. i 11:18 pacanasaërajuta: Baitsi, apojudfowi pecapanepaenënexatsi judfowiyajuwënëwë. Nexata, Jesús judfonëxae, bepenasajutsijawa judfowi pijasalinainë apojudfowijawabelia. Orijibia, Pablo nacayapëtaeya-exana Romano capítulo 4-jawata, pacuenia apojudfowi xaina Abraham-pijinë bepijasalinainënexa, pejumexaniataexae Dioso pacuenia bajaraponëmi jumexaniatane. Paliwaishi apojudfowi jumexaniatane Jesús pecapanepaenëcuenë yabara, bajarapaliwaishi copiaya Dioso yapëtaeya-exana bajayata judfowi pijasalinaiwimijawabelia. Bajarapacuenë yabara Abraham-pijinë tonaexana bepetabunepe apojudfowinexa. j 11:19 pijataxunae: Judfowi xuanë yabara pijataxunae mapajamatabëcuenëjawanëje: 1) Pamonaë Dioso penato-itapetsiwi pijajiwinexa, asiwaya petawinexa daxitanacuaneëpijiwiwecua, 2) pejitsipaecuenia peto-exanawanapaewinexa, 3) pejumeliwaishipaëbiwinexatsinua daxitanacuaneëpijiwawabelia. Nexata, apojudfowi itsa siwanajamatabëcuenecopabijitsipa Jesucristojawabelia, bajarapacue-nejawanë canacopatsipa judfowi pecowëta. Itsiata, Apocalipsis-baxutota nacayapëtaeya-exana pacuenia Dioso wecuapitsiana bajarapanaxainaeyabitaxunaemi apojudfowiwecua, juya perajut-sinexa caewëalia judfowijawabelia, matapania pejumexaniataexae Cristo peliwaishi.

apo-itaxutobejiobiatae judíowi, copiaya pitapetsiwi-ata pijajiwínexa, bitsoyo biji, apopajudíowimë apopaca-itaxutobejiobiatae tsipae bajara-pamona pecowëta panenubenaetaxunaetami papecawecuaxuabinexa, itsa pacopabijitsipame pane-exanawanapaejawa Dioso pejitsipaecuenia. ²² ¡Pacuenecanaëjère papexaniacuen Dioso pacato-exana! ¡Pacuenecanaë-jërenua pacuenia Dioso naneconitsia-exanabiaba apopejumecowënëtsiwiitsi! Bajaraxuata, paxamë apopajudíowimë, tsiteca panewajënaeyabelia itsa pa-exanawanapaename Dioso pejitsipaecuenia, bajaraPonë asiwaya pexaniacuen pacato-exanaena judíowi pecowëta. Itsiata, itsa pacopatsipame pane-exanawanapaejawa bajaraxuanë, paxamë-ata Dioso pacananeconitsia-exanaejitsipa, pacuenia exana judíowijawabelia. ²³ Nexata, judíowi itsa copabiana Dioso pejume-aebijawa, pejumexaniataenexa Cristo pesiwatë-paejawatsi, pecapanepaenexatsi Diosojawabelia, nexata bajaraPonë icatsia caewëarena capatsianatsi pijataxunaemijawaberena, pexainaenexatsi pijajiwicuenia. Dioso cajena cuenecaëjëpatsi bajarapacuenia peto-exanaenexa judíowijawabelia. ²⁴ Paxamë, apopajudíowimë Dioso pacanuba, judíowi pijataxunaemita, besaicayawiria olivonaejawawerena papeca-ucutsiwi, pecatsatarutsiwinexa pexaniawiria olivonaejawaberena. Bajarapacuenia itsa pacato-exana paxamë, Dioso bitsoyo biji, jitsipaena pijajiwí judíowi peto-exanaenexa. Nexata, itsa jumexaniataejitsipa Cristo peliwaisi, icatsia caewëarena capatsipa pepopijataxunaeta, bepexaniawiria olivonaemaxërena petawitsi.

Dioso itsamatacabijawabelia capanepaejitsia judíowi, Israel nacuapijiwi

²⁵ Tajamona, jitsipajë paneyapëtaenexa mapaliwaisije, panejamatabë-jumaitsiyaniwa mapacueniaje: «Waxaitsi cajena bitso wajayapëtaewi»,^k panejamatabëjaiyaniwa, tsipaji Dioso caenë bitso peyapëtaenë waxaitsi jiwitsiwecua. Bajaraxuata, jitsipajë paneyapëtaenexa Dioso muetsia pexainabuatsiliwaisimi. Itsiata, maparucaeje Dioso nacayapëtaeya-exana pacuenia apojudíowi-ata capanepaejitsia,^l petaenexa pijajiwicuenia pacuenia copiaya taeyabiaba Israel nacuapijiwi. Bajaraxuata, ayaibitsaëto judíowiya-juwëñewi baja cajena ajamatabëcuenetaja maparucaeje, pejumexaniataeyaniwa Cristo peliwaisi. Bajarapacuenia Dioso tocopata piamatabëcuene-tajanexa abaxë judíowi, pecaxinaejawabelia pabitsaëtowajëto natocaëjëta apojudíowi, pejumexaniataenexa Cristo peliwaisi. Bajaraxuacujinae jane baja, judíowi matapania copatsiana piamatabëcuenetajajawa, pejume-xaniataenexa Cristo peliwaisi. ²⁶ Nexata, itsa baja copabiana pejume-aebijawami, daxita judíowi, Israel nacuapijiwi, Dioso capanepaenatsi pacuenia baja Dioso pejumeliwaisibaxutota tajëwelia jumaitsi mapacueniaje:

«Jerusalén tomarawerena najetarucaena daxitajiwi pecapanepaenënexa.

Bajaraponë daxita judíowi, pamona Israel-pijinë pemomoxi, wecua-ajibia-exanaena pibisiacuen pexanaeconimi. ²⁷ Itsa bajaraponë

k 11:25 *wajayapëtaewi*: Itsacuenia pijinia: paxamë apopajudíowimë panejamatabëjumaitsiyaniwa: «Waxaitsi baja cajena Dioso naca-asiwa bitso judíowiwecua», panejamatabëjaiyaniwa apopajudíowimë. **l 11:25** *apojudíowi-ata capanepaejitsia*: Taema Rom. 16:25; Efe. 3:3-9; 5:32; 6:19; Col. 1:26-27.

wecua-ajibia-exanaena pibisiacuene pexanaeoneconimi, nexata jane baja, to-exanaenajë pacuenia bajayata tajëwelia najumecapanepaeya jumaitsinë bajarapamonae pijasalinaiwimijawabelia»,^m jai tajëwelia Dioso pejumeliwaisibaxutota, judíowi pecapanepaejawanexatsi, Cristo pejamatabëcueneta.

²⁸ Ayaibitsaëto judíowiyajuwënëwi, pejume-aebixae Cristo peliwaissi, naexana Dioso pecueyawí, jamatejema paxamë juya, apopajudíowimë, panesiwanajamatabëcuenecopabinexa Cristojawabelia, panejumexania-taexae bajarapaliwaissi. Itsiata, abaxë tsiteca Dioso asiwa judíowi, tsipaji bajayata copiaya Dioso itapeta bajarapamonae pijasalinaiwimi pijajiwinexa. ²⁹ Xuanë Dioso rajuta judíowijawabelia pecanacopabinexa,ⁿ bajaraxuanë apowecuacanawiabi tsane. Pamonaë pijinia, Dioso junata pijajiwinexa, aponawecuaxuabi tsane. ³⁰ Bajayata, Cristojawabelia panesiwanajamatabëcuenecopabiwajënaeya, paxamë, apopajudíowimë, apopajumecowënëtsimë picani Dioso. Itsiata, maparucaeje Dioso paca-itaxutotsoniatane, panejumexaniataexae Cristo peliwaissi. Bajarapacuenia Dioso pacato-exana, tsipaji judíowi apojitsipae pejumecowënëtsijawa Dioso, pejumexaniataejawanua Cristo peliwaissi. ³¹ Nexata, pacuenia bajayata paxamë apopajudíowimë apopajumecowënëtsimë Dioso, bajarapijinia pacuenia, maparucaeje judíowi apojumecowënëtanapae, pacuenia paxamë Dioso paca-itaxutotsoniatane, panejumexaniataexae Cristo peliwaissi, bajarapacuenia bajarapajudíowi Dioso itaxutotsoniatanaenatsi ita jumexaniataena Cristo peliwaissi. ³² Bajarapacuenia icatsi, Dioso to-exanaena judíowijawabelia, tsipaji Dioso najëpaeya tocaëjëta judíowi, apojudíowi-ata penaneconitsia-exanaenexa^o apopejumecowënëtsijamatabëcuene, bajarapijinia pacuenia najëpaeya-ata itaxutotsoniatana.^p

³³ Bajarapacuenia pexanaexae judíowijawabelia, apojudíowijawabelia-ata, Dioso najamatabëcuene-itajëta pitsijamatabëcuene pexinaenë waxaitsi jiwitsiwecua. ¡Dioso baja cajena^q pitaxutotsoniatanë daxitajiwi pecapaneapenexa! ¡Dioso cajena bitso peyapëtaenë! ¡Daxitaliwaissi bitso pejumeyapëtaenënu! Pacuenia Dioso pexanaenexa najamatabëcuenewereta, pacuenia-ata baja exanapona, waxaitsi bajaraxua Dioso apojamatabëcueneyapëtaetsi. ³⁴ Dioso pejumeliwaisibaxutota jumaitsi mapacueniaje: «Waxaitsi apojamatabëcueneyapëtaetsi xua Dioso najamatabëxaina. Aponacacajëpaenua wajamuxujobinexa-ata. ³⁵ Dioso cajena itsajiwijawabelia-ata apo-amoneyabi. Nexata, xua Dioso rajuta itsajiwijawabelia, aporajutsi piamoneyabimatamo», jai Dioso pejumeliwaisibaxutota Dioso yabara.

³⁶ Dioso cajena pijacuata pexanaenëxae daxitacuene, pewetsinëxanua, nexata daxitacuene baja cajena Dioso pijajawa. Nexata, Diosojawabelia waxaitsi bejumaitsi tsabiabi mapacueniaje: «¡Diosomë, bitso

m 11:27 Taema Isa. 59:20-21; 27:9; Jer. 31:33-34. **n 11:29** *pecanacopabinexa*: Xuanë Dioso rajuta pecanacopabinexa, mapacuenejawanëje: Ira, Dioso pitapetsijawatsi pijajiwinexa, pexania-cuenia peyawenonaeyapaebicuenetsi, peto-itorobijawanexatsica pecapanepaenënexatsi. Daxita xuanë Dioso rajutsiapaebatsi rubena pejumeliwaisibaxutota, perujuliwaisibaxutota, Génesis capítulo 12-cujinae Malaquías-jawabelia. **o 11:32** *najëpaeya ... penaneconitsia-exanaenexa*: Taema Rom. 3:23. **p 11:32** *itaxutotsoniatana*: Taema Rom. 1:16-17, 3:20-28; Efe. 2:9-10. **q 11:33** *Dioso baja cajena*: Taema Isa. 55:8-9; Job 5:9; Isa. 40:13; Jer. 23:18.

ayaijamatabëcuenenëmë!», bejaitsi tsabiabi daxitamatacabijawabelianexa. Bajara-itsi tsane.

**Jesús-jawabelia pesiwanajamatabëcuene copats
ijwi benajamatabëcuenerajuta Diosojawabelia,
petonacuenebinexa pijajiwitonëcuenia**

12 ¹ Tajamona, daxita bajarapacuenia^r Dioso asiwaya wajanacato-exanaexae wajanaca-itaxutotsoniataejamatabëcuene, ayaicuenia pacawajëtatsi panenajamatabëcuenerajutsinexa Diosojawabelia, paneto-exanawanapaenexa ëpapecatojitsipaecuenia daxita pane-asaëtsawanapaeepato. ¡Pacuenia dajubinë altar-jumata pebuatsinëtsi apocuenecaëjëpaetsi pijacuata penatojitsipaecuenie pexanaejawa, bajarapijinia pacuenia panataema Dioso pitabarata, pane-exanawanapaejawa papecatojitsipaecuenia, papecasiwabarëyanexa! Bajarapacuenia bitso pacatoxanepana paneto-exanawanapaejawa, panenajamatabëcuene-itajëtsinexa Dioso pane-asiwajawa, panenajamatabëcuenerajutsixae bajara Ponëjawabelia. ² ¡Pëtsa panacopatame panejamatabëcuenejëpaejawa itsamona mapanacuapijijamatabëcuene pecajinawanapaewi, papecajamatabëcuenematacaponaeyaniwa, panecueniejëpaeyaniwa-ata! ¡Biji rajane, panajamatabëcuenerajure Diosojawabelia, papecajamatabëcuene-itothianaponaenexa,^s ëpejanajamatabëcuene panexainaejawabelia! Nexata, bajarapapejanajamatabëcuene panexainaexae, saicayacuenia pacanaëjëtsianame daxitacuenie yabara, mapanacuapijijamatabëcuene pexainaewije pecanaëjëtsijawawecua. Bajarapapejanajamatabëcueneta itsa pacanaëjëtaponaname, payapëtaename pane-exanaenexa xua Dioso pacatojitsipa, xua Dioso tsitaxanepanatsi, xua-ata yabara Dioso pacasiwabarëyajitsia, xaniawaetsia panejinawanapaenexa ëDioso papecatojitsipaecuenia.

**Pacuenia Espíritu Santo pejamatabëcuene caëjëpaeya-exanaejawanë
canacuenebijitsia pejanajamatabëcuene pexainaewi, yabara peliwaissi**

³ Dioso raja tane-itaxutotsoniataexae, nitoroba tatonacuenebinexa, apoxainae-atanë picaní xua yabara nitapeta bajaraxuanexa. Bajarapacuenia Dioso tane-itorobixae, pacaejiwimë canacujitsia pacajumaitsitsi mapacueniaje: ¡Pëtsa paxamëyajuwënëjiwi natane be-ayaijamatabëcuenejiwi, itsa jume, beweliamatabëcuenejiwi, Dioso papecajamatabëcuene caëjëpaeya-exanaejawa yabara! ¡Biji rajane, pacuenia Dioso pacajamatabëcuene caëjëpaeya-exanapona pacaejiwimë canacujitsia, panesiwanajamatabëcuene copatsixae Cristojawabelia, bajarapacuenia

r 12:1 *daxita bajarapacuenia*: Mapacuenia Dioso nacato-exanaje: **1)** Jesucristo pejamatabëcueneta, Dioso nacacapanepa wajanacananeconitsia-exanaejawaminexa, **2)** nacacuenewajunupaeba waja-aneconijibijawa, **3)** wajanaca-asiwajawa bitso, **4)** nacajamatabëcuenexatata Jesús pianeconijibicuene, **5)** Espíritu Santo nacatsijamatabë-ecaeya-exana, nacajamatabëcuenejëpaeya-exanapona Pexënatowabelia, **6)** naca-exanaenanua pepowajaneconijibiwi Pijanacuataatsia. **s 12:2** *papecajamatabëcuene-itothianaponaenexa*: Pagriegojumeyo Pablo canacueneba, pejamatabëcuene-itothianaejawa yabara, nacayapëtaeya-exana pacuenia tolenaito pematapeneta naitothiana sonoto penaexanaejawabelia. Bajarapacuenia Dioso nacajamatabëcuene-itothianaejitsia wajaperujamatabëcuenemiwecua, wajaxainaenexa pejanajamatabëcuenejawabelia.

saya baja panataema! ⁴ Jiwi itsa naexana, peperabêto yajawanaexana. Itsiata, caeperabêto saicaya xainapona pewênêanê caewito canacujitsia. Saicaya xainaponanua pexanabiabijawanexa. ⁵ Bajarapijinia pacuenia, waxaitsi-ata itsitsi, Jesucristojawabelia wajasiwanajamatabêcuenecopabiwi. AyaiBITSaêto-atatsi, itsiata caenê Cristo bepeperabêtotsi. Nexata, namata-enetsia benayawenonabiabatsi, be-ayaijamatabêcuenewicuenia nataenejeweatsi itsamonaewecua.

⁶ Be-ayaijamatabêcuenewi apobenataetsi, tsipaji caejiwitsi canacujitsia, pacuenia Dioso nacatojitsipa, saicaya nacajamatabêcuenecaējēpaeya-exanapona^t wajato-exanabiabinexa, wajanaca-asiwaxae. Nexata, Dioso betonacuenebawanapatsi pacuenia nacajamatabêcuenecaējēpaeya-exanapona. Dioso itsa nacajamatabêcuenecaējēpaeya-exana jiwi wajatsipaebabiabinexa Dioso pejumeliwaisi, nexata betsiapaebabiabatsi xaniawaetsia pacuenia nacajamatabêcuenecaējēpaeya-exana. ⁷ Itsa pijinia, Dioso nacajamatabêcuenecaējēpaeya-exana wajayawenonabiabinexa itsamonae wajanajuajumexaniataewi Jesús peliwaisi, nexata xania-waetsia beyawenonabiabatsi bajarapamonae. Pajiwi pijinia, Dioso jamatabêcuenecaējēpaeya-exanatsi Dioso pejumeliwaisi jiwi pecujarubabiabinexa, xaniawaetsia becujarubabiaba daxita pejamatabêcuenesaêta. ⁸ Pajiwi pijinia, Dioso jamatabêcuenecaējēpaeya-exanatsi pemuxujobiawata pejamatabêcuenekarēyaya-exanaenexa itsamonae Jesús peliwaisi pejumexaniataejawa, bajarapajiwi bejamatabêcuenekarēyaya-exanabiaba xaniawaetsia pemuxujobiawata bajarapamonaejawabelia. Pajiwi pijinia, Dioso jamatabêcuenecaējēpaeya-exanatsi perajutababinexa pexainaeyajuwênējawa penamatawenonaejiwijawabelia penamatawenonaeacuenia, berajutabiaba itsajamatabêcuenexainaenejewa. Pajiwi pijinia, Dioso jamatabêcuenecaējēpaeya-exanatsi Jesús pijajiwi peto-ewetsinexa, betonamatacapona xaniawaetsia. Pajiwi pijinia, Dioso jamatabêcuenecaējēpaeya-exanatsi pitaxutobejiobiataenexa penamatawenonaei, beyawenonabiaba karēyaya.

**Pacuenia pejanajamatabêcuenexainaewi
exanawanapaejitsia, yabara peliwaisi**

⁹ ¡Dioso pejanajamatabêcuenexapaparajutsixae, xaniawaetsia namata-enetsia pana-asiwamere tsawanapae! ¡Ayaiacuenia panawecuaataejitsibimere pibisiacuenajawa! ¡Paca-asaemere tsawanapae epexania-cuenexane-exanaejawa! ¹⁰ ¡Pacuenia nacaenapijiwi bitso na-asiwa, bajarapacuenia pana-asiwamere tsawanapae Cristo papijajiwixae! ¡Pamonae panenajuajumexaniataewi Jesús peliwaisi, patojitsipare itsamonae petaenexatsi ayaijamatabêcuenewi paxamē matatoxenetsia! ¡Namata-enetsia panayaiyataeyabiabarena!

¹¹ ¡Pêtsa pafaetabimē Dioso pijacuene panetonacuenebawanapaejawa! ¡Bijirajane, paca-asaemere tsawanapae! ¡Daxita panejamatabêcuenesaêta patonacuenebabiabare Dioso pijacuene!

¹² ¡Paneyapëtaexae pepacuene Jesús pijajiwi pepitsijawanexa, jamatabëcuenebarëyaya^a pacopia-ewetawanapare bajarapamatacabi pecopiapatsijawanexa! ¡Nexata, apopanejitsipaecuene pacatocopiapatsi-ata itsacuenejawa yabara, itsamonae apopanejitsipaecuene pacato-exanae-ata, pajamatabëcuenesaëmëre Diosojawabelia! ¡Pa-itaxutuajamatejemamëre panewajënaeyabelia, bitso bajayajebi bajarapacuene pataewanapae-atamë! ¡Daxitamatacabi pawajëtabiabarenua Diosojawabelia pacopatsinejewamë!^v

¹³ ¡Itsajota Jesús peliwaishi panenajuajumexaniataewi namatawenona, payawenonabiabare! ¡Pamonae pacasiwaxaina panijaboyaberena, xania-waetsia pacopiapitabiabare!

¹⁴ ¡Pamonae pibisiacuena pacabejiobia-exanapona,^w patowajëtabiabare Diosojawabelia, pexaniacuena peyawenonaenexatsi! ¡Pëtsa patowajëtime pibisiacuene juya petocopiapatsinexatsi!

¹⁵ ¡Pamonae barëya, bajarapamonae paxamë-ata pajamatabëcueneyawenonaeyabarëyamëre! ¡Pamonae pijinia, najamatabëxaina, bajarapamonae paxamë-ata pajamatabëcueneyawenonaeyanajamatabëxainare!^x

¹⁶ ¡Najëpaeya panataeyabiabare^y daxita Jesús peliwaishi panenajuajumexaniataewi, asiwaya paneyawenonaenexa! ¡Pamonae beweliamatabëcuenewi-ata, xaniawaetsia payajawajinawanapare yayi-taeya! ¡Nexata, pëtsa panataneme bepa-ayaijamatabëcuenewimë! ¡Pëtsa panatanemenua bitso bepaneyapëtaewi^z itsamonaewecua, xaniawaetsia panenajuajinawanapaenexa!

¹⁷ ¡Itsajiwi^a pibisiacuene itsa paca-exana, pëtsa juya pibisiacuene panamatamo-exaname! ¡Biji rajane, cuenecanawiatsiaya pa-exanabiabare ëpexaniacuene, xua jiwi tsitaxanepanatsi! ¹⁸Pejanajamatabëcuene Dioso papecarajutsixae,^b jamatabëcuenexanepanaeya panajuajinawanapaenamedaxita, itsaliwaishi paxainaenejewamë itsamonaejawabelia. Bajarapamonae cuenematapitsi-ata, tsiteca pajaitsianame icatsia panenasiwajamatabëcuenexanepanaenexa.^c ¹⁹¡Tajamonae, bitso pataca-asiwawi, itsamonaepibisiacuene itsa paca-exana, pëtsa panamatamotame!^d ¡Pacopare saya bajarapamonae Dioso penaneconitsia-exanaenexatsi, tsipaji Dioso

u 12:12 *jamatabëcuenebarëyaya*: Taema Rom. 5:2-5; 1Pd 1:6-9. Daxita xua Dioso nacato-exana Jesucristo pejamatabëcueneta, nacajamatabëcuenebarëyaya-exana bitso wajacopia-ewetawanapajawata Dioso orijibia wajanacato-exanaenexa pacuenia najumecapanepaeya nacayapëtaeya-exana, bewajajiobicuena jinawanapae-atatsi jiwi pitabarata mapanacuataje. **v 12:12** *pacopatsinejewamë*: Taema Efe. 6:18; Flp. 4:4-6. **w 12:14** *pibisiacuena pacabejiobia-exanapona*: Taema Mt 5:44; Lc 6:28. **x 12:15** *pajamatabëcueneyawenonaeyanajamatabëxainare*: Taema 1Co 12:26. **y 12:16** *Najëpaeya panataeyabiabare*: Itsacuena pejucaenexa: «¡Pacuenia jamatabëcuenebarëyaya nataeyecame, nijacuata nena-asiwanexa, bajarapacuenia pataeyabiabare itsamonae Jesús peliwaishi panenajuajumexaniataewi!». Taema Flp. 2:2. **z 12:16** *beapaneyapëtaewi*: Taema Prov. 3:7; Rom. 11:25. **a 12:17** *Itsajiwi*: Mapajumejawabelia cajunua anijabit-saëtobeje yabara; pamonae Jesús peliwaishi pejume-aebiwi yabara, pamonae Jesús peliwaishi pejumexaniataewi-ata yabara. Jota Rom. 12:17-21-jawata Pablo nacayapëtaeya-exana pacuenia Jesús peliwaishi pejumexaniataewi jinawanapaejitsia Jesús peliwaishi apopejumexaniataewitua-tuajëta. **b 12:18** *papecarajutsixae*: Taema Rom. 12:1-2. **c 12:18** *panenasiwajamatabëcuene-xanepanaenexa*: Taema Mt 5:9, Mc 9:50. Pablo nacamuxujioba, wajajaitsinexa pacuenia jamatabëcuenexanepanaeya jinawanapaejitsiatsi Jesús peliwaishi apopejumexaniataewitua-tuajëta daxitacuenejawalia. Baitsi, apobematapitsitsi, bajarapacuenia apobeyamatotsitsi liwaishi. Bejaitatsi liwaishi xanebijitsiatsi pexaniacuena. **d 12:19** *jpëtsa panamatamotame!:* Lev. 19:18; Mt 5:39.

pejumeliwaisibaxutota jumaitsi mapacueniaje!: «Pamonae pibisiacuene exana itsamonaejawabelia, Xanë, Diosonë, naneconitsia-exanaenajë, tsi-paji ëXanë natocaëjëtajë daxitajiwi tayamatamotsijawa itsamonaejawabelia pibisiacuene pexanaejamatabëcuene»,^e jai Dioso pejumeliwaisibaxutota.²⁰ Dioso pejumeliwaisibaxutota, itsabaxutota, pijinia, jumaitsi mapacueniaje: «¡Nijawajabitsaënë itsa piajani, rajure pexaejawa! ¡Mera itsa jitsipa, rajure mera piapaenexa! Bajarapacuenia itsa to-exanaename, bitso aura tsane. Nexata, pia-urajamatabëcuene bitso itabaratsobia tsane, benetsimata-othotajarabi^f tsane bepitatsajawi-ipumanata»,^g jai Dioso pejumeliwaisibaxutota.²¹ ¡Pëtsa panacopatame itsamona pibisiacuene papecato-exanaejawata papecajamatabëcuenematatoxenetsinexa, panecuenecanawiatsiyaniwanua pibisiacuena! Biji rajane, pexaniacuenejawata pacuenecanawiatsianame, panecuene-amoneyabinexa pibisiacuene. Nexata, bajarapacuenia pibisiacuene papecato-exanaejawi-ata, pajamatabëcuenecaewia-exanaename.

Pejanajamatabëcuene pexainaewi beyaiyatane peyanacua-ewetsiwi

13 ¹¡Daxita pamonae gobierno pijajiwi, papecayanacua-ewetsiwi, pacuenia bajarapamonae paca-itoroba, xaniawaetsia jamatabëcuene-ewetsiaya pajumecowënëtabiabare, tsipaji bajarapamonae, caenë canacujitsia, Dioso pejamatabëcueneta pacayanacua-eweta! Daxita pamonae nacua pewetsiwi, paca-eweta Dioso petocopsixaetsi.^h Bajaruata, daxitatsi bejumecowënëtatsi wajanacayanacua-ewetsi. ²Nexata, pajiwi apojumecowënëtsi pacuenia nacua-ewetsinë itorobatsi, bajarapajiwi Dioso-ata apojumecowënëtsi. ⁱPamonae apojumecowënëtsi pewetsiwi, nexata bajarapamonae naneconitsia-exanaenatsi pamonae Dioso copata nacua pewetsiwinexa, tsipaji Dioso tocopata bajarapajamatabëcuene daxita nacua-ewetsiwi jawabelia. ³Dioso apotocopsatsi nacua pewetsiwi, pejunawia-exanaenexa pamonae pexaniacuene exanawanapa. Biji rajane, tocopata pecujunawinexatsi pamonae pibisiacuene exanawanapa. ¡Nexata, paxamë ajunawijibia itsa jamatabëpajinawanapame, pexaniacuene pa-exanawanapare! Nexata, pacasiwabarëya tsane papecayanacua-ewetsiwi. Pexaniacuena pacawënëxaniatsiananua, pexaniacuene pane-exanawanapaecuene yabara. ⁴Nexata, daxita pamonae, nacua pewetsiwi, Dioso tonacuenebawanapa^j pewetsijawata, peyanacua-ewetsiwi pexaniacuena peyawenonaenexa. Bajaruata, pibisiacuene itsa pa-exaname, papecayanacua-ewetsiwi bepacujunawame, tsipaji bajarapamonae Dioso tocopatatsi, pibisiacuene pexanaewi penaneconitsia-exanaenexa, jama-tejema aliwaisijibia peyanacua-ewetsiwi pejinawanapaeenexa. ⁵Bajaruata, bejumecowënëtatsi pamonae wajanacayanacua-ewetsiwi.

e 12:19 Taema Deut. 32:35; Sal. 94:1-3; Heb. 10:30. f 12:20 *benetsimata-othotajarabi*: Taema Prov. 25:21-22. g 12:20 *bepitatsajawi-ipumana*: Bajayatami judfowi natximata-othocabiaba impumana, itsa jume, atsapërë, penajamatabëcuene-itajëtsinexa pia-urajawa, penajamatabëxainaejawa, bitso peyabarabëjajawanua itsacuene petocopiapatsixaetsi. Taema 2Sa 13:1-18; Jer. 6:26; Mt 11:21. h 13:1 *Dioso petocopsixaetsi*: Taema Tit. 3:1; 1Pd 2:13-17; Prov. 8:15. i 13:2 *Dioso-ata apojumecowënëtsi*: Taema Éxo. 16:7-8; Núm. 12:8. j 13:4 *Dioso tonacuenebawanapa*: Bajarapamonae, pejume-aebiwi-ata Jesús peliwaissi, tsiteca tonacuenebawanapa Dioso, tsipaji copatatsi peyanacua-ewetsinexa.

Apojumecowënëtsitsi saya wajanacananeconitsia-exanaeyaniwa. ¡Jume baja cajena! Biji rajane, jumecowënëtatsi waxaitsi, Jesús pijajiwitsi, tsipaji nacatoxanepana wajayaiyataejawa bajarapamonae nacua-ewetsiwi. ⁶Bajaraxuata, nacua-ewetsiwi jawabelia impuestomatamo^k pamatamotabiabame panematamotsipalatata pena-ewetsinexa, tsipaji bajarapamonae Dioso pejamatabëcueneta nacua-ewetawanapa. Nexata, cuene-enatsi ênacia pewetsicuene. ⁷¡Bajaraxuata, pacaejiwimë canacujitsia parajure gobierno pejamatabëcueneta penacuenebiw jawabelia, papecatsicarucaecuenia! ¡Bajarapamonae-yajuwënëwi itsa caetuata impuestomatamo, xuawajëto pa-amoneyabame, pamatamotabiabare! ¡Pamonae peyaiyataewitsi, payaiyataeyabiabare! ¡Bajarapijiniya pacuenia, payaiyataema pamonae ayaitaxunae pewetsiwi!

Pablo muxujioba Jesús pijajiji pacuenia namata-enetsia benato-exanawanapa

⁸¡Pëtsa baja pa-amoneyabame itsacuenejawayo-ata itsajiw jawabelia, pamatamotsinejewamë! ¡Caejawa yabara, bepane-amoneyabiwicuenia paji-nawanapare! ¡Namata-enetsia pana-asiwamëre tsawanapae Jesús peliwaisi panenajuajumexaniataewi, pacuenia Cristo paca-asiwa! Bajarapacuenia itsa pana-asiwamë tsawanapae tsane, pajumecowënëtsicapaneaname^l Dioso penajumecopatsiliwaisi Moisés-pijinëta. ⁹Dioso penajumecopatsiliwaisi Moisés-pijinëta, naca-itaweta mapacueniaje: «¡Panenacojiobiwi pëtsa pibisiacuene panewitota panawecua-exaname itsajiw jawabelia!^m ¡Pëtsa beyaxuabame jiwitonë! ¡Pëtsa nacobetoxotame! ¡Pëtsa najumetsënëtsiaya baracuaicuajamë itsajiw! ¡Pëtsa itsajiw pexinaejawa to-itajitsipame!», jai bajarapaliwaisita. Itsiata, itsa pajumecowënëtsipame mapejumaitsilwaisiyo: «¡Asiwamëre itsajiw-ata pacuenia xamë nijacuata nasiwamë!», pejailiwaisiyo, pajumecowënëtsicapaneapejitsipame daxita Dioso penajumecopatsiliwaisi Moisés-pijinëta papeca-itorobicuenia. ¹⁰Nexata, pajiwi asiwa itsajiw-ata, pibisiacuene apo-exanae bajarapajiw jawabelia. Bajaraxuata, itsa asiwatsi itsamonae-ata, nexata jumecowënëtsicapaneapatsi daxita pacuenia Dioso naca-itoroba.

¹¹Daxita patacamuxujiobicuenia baja xaniawaetsia pa-exanawanapaename, tsipaji baja yapëtanetsi bitso imoxoyo pewajënae icatsia Jesucristo pepatsijawanexatsica, wajanacacapanepaenexa jane baja,

k 13:6 *impuestomatamo*: Mapajumeyojawabelia cajunua anijajamatabëcueneliwaisibeje, xua wowaijume canacueneba anijajumebejecuenia, «tributo/contribución, impuestos». Tributo/contribución nacayabaracuaicuajai pa-impuestomatamo jiwi matamotabiaba peyanacua-ewetsiwi jawabelia, nacua pewetsijamatabëcuene. Juya, impuestojume nacayabaracuaicuajai pa-impuestomatamo jiwi matamotabiaba, pecapatsixae itsacuenejawa itsanacua jawawerena, IVAmatamo, bajarapijiniya pacuenia, pamatamo gobiernomonae wajëca wajanacuenebimata-moyajuwënëjawa. Daxitawiria impuestomatamo nacatoxanepana wajamatamotsinexa Dioso pexixaetsi. Taema Mt 22:21. **l 13:8** *pajumecowënëtsicapaneaname*: Taema Mt 22:36-40, Gál. 5:14, Sant. 2:8. **m 13:9** *pëtsa panawecuaajaitame ... itsajiw jawabelia!*: Dioso peliwaisijawata, wowaijumeta bajarapajume pitsapa, «adulteriojume». Adulteriojume itsa jumaitsi Bibliabaxutota, najumetane mapacuenejawanëje: Pebi pejaitsijawa itsawa pijawawecua, petiriwa pijiniya, pejaitsijawa itsanë pamonawecua, pebi pejaitsijawa pewënapebi petiriwawecua, petiriwa-ata pejaitsijawa pewënapepetiriwa pebiwecua, pimisiarubenaewi-ata pimoxoyobijawa nacojiobinejewa. Daxita bajaraxuanë Dioso tane adulterio, nexata itaweta pexanaeyaniwa bajarapacueni.

mapapiabejenacuawecuaje. Pepacuene Jesucristo baja pepatsimatacabinexa, bitso matatoxenetsia imoxoyo pewajënae ajena wajajumexaniataematacabiwecua Jesucristo peliwaishi. ¡Nexata, panamatacobare bepanejamatabëcuenemajitsijawawecua, mapanacuapijicueneje papecajamatabëcuene-enaejawawecua, juya panecopia-ewetawanapaenexa bajarapapamatacabi pecopiapatsijawa! ¹² Pacuenia itsa ajibi tsaponae pitaquirijawami, yapëtanetsi imoxoyo pewajënae matacabijawanexa, pecopiarucaenexa pitaquirijawami, bajarapijini pacuenia, yapëtanetsi baja imoxoyo pewajënae pecopiarucaenexa mapanacuapijiwije pibisiacuene pexanaejawa yabara, piamatabëcuene-itaquirijawami, tsipaji baja imoxoyo pewajënae icatsia Jesucristo pepatsijawanexatsica. Bajaraxuata, becopabatsi pibisiacuene waja-exanaejawa, juya waja-exanawanapaenexa ëpexaniacuene Dioso pejitsipaecuenia. Benajamatabëcuenexatatatsi pexaniajailiwaisha, paliwaisha nacacueneyacaranatsijitsia pibisiacuene waja-exanaeyaniwa, pacuenia wajabitsaë xaniawaetsia banaxataba piatajawanë" matacabita penawajabitsaëtsiwajënaeya. ¹³ Aeconoxae baja waxaitsi Jesús peliwaishi wajanjajumexaniataewi, bewajajinawanapaewi matacabita, Jesucristo pepatsicujinae. Bajaraxuata, wajawajënaeyabelia jinawanapaenatsi xaniawaetsia, wajayapëtaexae pexaniajailiwaishi. Nexata, apoponae tsanetsi pitajibiwiwija, fiestajawa-ata, itsajota pibisiacuene exanawanapa. Apo-exanae tsanetsi pibisiacuene wajawitota, itsacuenejawa-ata xua pibisiacuene. Nabijataeya aponajume-anaenotsi tsanetsi. Itsamonae-ata apocueneca-ëbi tsanetsinua pacuenia exana piamatabëcuene-itaquiriwi. ¹⁴ Biji rajane, bajarapajamatabëcuenemi benawecuaxuabatsi, juya wajanjajamatabëcuenexatatsinexa wajatuxanenë Jesucristo pijapexaniajamatabëcuene. Nexata, copatsianatsi waja-exanawanapaejawa wajaperujujamatabëcuene pejitsipaejawanë, juya waja-exanawanapaenexa xuanë siwajamatabëcuenebarëya wajatuxanenë.

Jesús pijajiwi namata-enetsia benayaiyatane pena-asiwaxae^o

14 ¹ ¡Tajamonae, asiwaya, yaiyataeyanua, pacopiapiire bepanacae-monaemëcuenia, pamona, paxamëyajuwënwëwi, abaxë jamatabëcuenefaeafaena^o pitaxutuajamatejemajawa Jesucristo! ¡Xua itsajiwi tsitapibisiacuenetsi, caejamatabëcuene apopanjuxainae-atamëbeje, pëtsa bajaraxua yabara namata-enetsia panajume-anaenotamebeje! ² Mapacuenia namata-enetsia pa-exanawanapaenameje. Itsamonae Jesús pijajiwi

n 13:12 *banaxataba piatajawanë*: Taema Efe. 6:10-17. **o 14:0** *pena-asiwaxae*:

Mapacapítulojawataje Pablo muxujioba pacuenia Jesús peliwaishi pejumexaniataewi be-exanawanapa, caejamatabëcuene aponajuaxainae-ata pacuenia exanaejitsia penajamatabëcuene-itajëtsinexa Dioso piasiwajawa. Nexata, apobenacuene-itaxutuajinae pexaejawa yabara, penacaetuatsimatacabianë yabara, itsacuenejawa-ata yabara. **p 14:1** *jamatabëcuenefaeafaena*: Pamona pejamatabëcuenefaeafaenaewi pitaxutuajamatejemajawa Jesucristo, jaitabiaba Dioso asiwaya petaejawanexatsi, pexanawanapaejawata Dioso petonajumecopatsicuenia judfowijawabelia bepanaxuirabiwicuenia petaeyaniwatsi, petaeyabiabijawatanua judfowi pijafiestamatacabianë. Pamona pijinia xaniawaetsia itaxutuajamatejema Jesucristo, natoyapëtane Dioso asiwaya petaejawanexatsi ëJesucristo pejamatabëcuenet. Pablo apo-itorobi Jesús pijajiwi pejumecowëntsia-exanaenexa Dioso penajumecopatsiliwaishi Moisés-pijinëta. Biji rajane, Espiritu Santo pejamatabëcueneta, itoroba yaiyataeya namata-enetsia pena-asiwajawanexa, caejamatabëcuene apoxainae-ata.

paxamëyajuwënëwi, canaējëta Dioso petocopsatsijawatsi daxitacuene pexaenexa.⁴ Itsamonae pijinia, canaējëta Dioso pejani-itawetsijawatsi itsawirianëanë pewi⁷ pexaeyaniwa, jumapecataeya pexanaenëjawabelia perajutsiyajuwënëwi-ata. Nexata, ëpe-ubijawanë bajarapamonae xaeya-biaba, itsawirianëanë pewi pexaeyaniwa.³ ¡Nexata, pajiwi itaxutejema xaeyabiaba daxitawiriawi pewi, pëtsa bijiya tane pajiwi apoxae bajara-pawi! ¡Pajiwi pijinia, na-ewetabiaba paxaeyaniwa itsawiriayajuwënëanëanë pewi, pëtsa neconitsiya jumaitsi daxitacuene pexaewijawabelia: «Pibisia-cuene raja pa-exaname, bajarapawi itsa paxaneme», jai pëtsa, tsipaji Dioso jamatabëcuenebarëyaya nacoxitane⁵ bajarapamonae itaxutejema xae-ata, Cristojawabelia pesiwanajamatabëcueneocopabixae! ⁴Daxitatsi, Jesús pijajiwitsi, xainatsi caenë wajatuxanenënexa. Bajaraxuata, apopacatoxanepanae cajena paneneconitsijawa panetonajuanacuenebiwi Dioso pijacuene, be-pajituxanenëmëcuenia. Caenë cajena, Dioso, toxanepanatsi bajarapacuenia pexanaenexa pijajiwitonëjawabelia. Nexata, pijajiwitonë xaniawaetsia itsa tonacueneba, itsa jume, xaniawaetsia itsa apotonacuenebi, caenë, Dioso, toxanepanatsi, pacuenia jamatabëjumaitsi, pejumaitsinexa pijajiwitonëjawabelia. Nexata, yapëtanetsi Dioso pijajiwitonë pacuenia ajamatabëcuene-saëjitsia pijatuxanenë pitabarata, tsipaji Dioso caëjëpatsi cajena peyaweno-naenexa pijajiwi, pejitsipacuenia xaniawaetsia petojinawanapaenexatsi, pesiwabarëyanexa.

⁵Itsajawa xua yabara namata-enetsia bepanayaiyataneme: Itsamonae, Jesús pijajiwiyajuwënëwi, yayiataeyabiaba caematacabi itsamatacabianëwecua, penajamatabëcuene-itajëtsinexa peyayataejamatabëcuene⁶ Diosojawabelia. Itsamonae pijinia, najëpaeya tane daxitamatacabianë. Bajaraxuata, caejijiwo canacujitsia pijacuata beyapëthane pajamatabëcueneliwaisi yabara yayiataeyabiaba caematacabi itsamatacabianëwecua, penajamatabëcuene-itajëtsinexa Diosojawabelia peyayataejawa. Itsa jume, pajamatabëcueneliwaisi yabara najëpaeya tane daxitamatacabianë. ⁶Pajiwi nato-itapeta caematacabi itsamatacabianëwecua, najamatabëcuene-itajëta peyayataejawa pijatuxanenë, Dioso. Pajiwi pijinia, itaxutejema xaeyabiaba daxitacuene, najamatabëcuene-itajëta peyayataejawa pijatuxanenë, tsipaji pexaniajamatabëcuene rajutabiaba Diosojawabelia pexaejawa yabara. Bajarapijini pacuenia, pajiwi na-eweta pexaeyaniwa itsawiriayajuwënëanë pewi, bajarapacuenia exana penajamatabëcuene-itajëtsinexa peyayataejawa

q 14:2 *daxitacuene pexaenexa*: Taema Hch. 10:11-16, Rom. 14: 15;20; 1Co 6:12-20; 1Co 8:9; 1Co 10:14-33. r 14:2 *itsawirianëanë pewi*: Dioso judfowi jani-itaweta pexaeyaniwa jumapecataeya pexanaenëjawabelia perajutsiyajuwënëwi. Orijiibia, jani-itawetanua pexaeyaniwa itsawiriawiyajuwënëwi pewi: pacuenia irajumawereca pejinawanapaewi, menepijiwi peperabëto pexainaedujuai, pepunaewi-ata piabejejawa pexaewi. Taema Lev. capítulo 11. Taemanua 1Co capítulo 8. s 14:3 *nacoxitane*: Taema Jn 1:12-13; Jn 13:20; Col. 2:6; 1Jn 5:11-12. t 14:5 *penajamatabëcuene-itajëtsinexa peyayataejamatabëcuene*: Roma tomarata, judfowi jinawanapa, itsamonae Jesús peliwaitsi pejumexaniataewi. Nexata, bajarapamonae itapetabiaba sábadomatacabi, pafiestamatacabianënu Dioso tocaējëta bajarapamonae penajamatabëcuene-itajëtsinexa peyayataejawa Dioso, penacuera-ewetsijawata. Itsamonae pijinia, apojudfowi, apoyaiyataeyabiabi sábadomatacabi. Bijirajane, nato-itapetabiabi itsamatacabi penajamatabëcuene-itajëtsinexa peyayataejawa Dioso, domingo matacabi. Taema Gál. 4:7-11; Col. 2:14-17; 1Co 10:30-31; 1Ti 4:3-5.

pijatuxanenë, tsipaji bajarapajiwi-ata pexaniajamatabëcuene rajutabiaba Diosojawabelia, ëpe-ubijawanë xaeyabiabi-ata.

⁷Bajarapacuenia yaiyataeya namata-enetsia bepajinawanapame, tsipaji itsajiwi-ata Jesús pijajiwiwajuwënëjiwi apoponaponae ëpijacuata penatojitsipaecuenia pexanaponaponae nexa. Biji rajane, exanaponapona pacuenia pijatuxanenë Cristo tojitsipatsi. Bajarapijinia pacuenia, itsajiwi-ata pijacuata aponato-itapetsi petëpaematacabinexa, pacuenia-ata tēpaejitsia. ⁸Waxaitsi abaxë waja-asaëtsawanapae-epato, tojinawanapatsi wajatuxanenë. Bajarapacuenia itsa tēpaenatsi, wajatuxanenë pejitsipaecuenia tēpaenatsi. Nexata, abaxë waja-asaëtsawanapae-epato, wajatēpaecujinae-ata, tsiteca wajatuxanenë pijajiwitsi tsawanapae tsane, pejitsipaecuenia waja-exanawanapaenexa. ⁹Bajaraxua yabara jane baja, Cristo nacasiwatēpa. BajaraPonë petëpaecujinae, icatsia namatacota piasaëtsaponaponae nexa, wajanacatonaexanaenexa wajatuxanenë daxita pamonaetsi wajasiwana-jamatabëcuenecopabiwi bajaraPonëjawabelia, waja-asaëtsawanapaewi, petëpaewi-ata.

¹⁰Nexata, Cristo wajatuxanenëxae, daxitatsi pijajiwitsi, aponacatoxanepanae namata-enetsia wajananeconitsijawa wajaxaejawa yabara, waja-yaiyataematacabianë yabara, itsacuenejawayo-ata xua yabara exanatsi wajanajamatabëcuene-itajëtsinexa Dioso wajayaiyataejamatabëcuene yabara. Aponacatoxanepanae cajena. Bajaraxuata nexata, bijiaya apobetaetsi itsajiwi-ata Jesús pijajiwitsiyajuwënëjiwi bajaraxua yabara, tsipaji cajena itsamatacabi daxitatsi waxaitsi Cristo pitabarata nubenaenatsi, bajaraPonë wajanacawajunupaebine xua, caejiwitsi canacujitsia, daxita waja-exanawanapaecuenie yabara mapanacuataje itsa tsitapexaniacuenetsi, itsa jume, itsa tsitapibisiacuenetsi. ¹¹Bajaraxua yabara Dioso pejumeliwaisibaxutota tajëwelija jumaitsi mapacueniaje:

«Xanë, Diosonë, daxitamatacabijawabelianexa ta-asaëtsaponaponae nexa. Xua jumaitsinë, xaniajanë cajena. Itsamatacabi daxitajiwi taitabarata pematabacabëta netonubenaena, taneyaiyataexae. Daxitajiwi newajunupaebiana Diosonëcuenenë»,^u jai Dioso pejumeliwaisibaxutota daxitajiwi yabara.

¹²Bajaraxuata, yapëtanetsi pacuenia waxaitsi itsamatacabi, caejiwitsi canacujitsia, nawajunupaebaponaenatsi Diosojawabelia daxita pacuenejawanë exanawanapatsi mapanacuataje.

Pablo cuene-itaweta Jesús pijajiwi Diosowecua pejopaeya-exanaeyaniwa petsita-exanaejawata xua itsajiwi tsitapibisiacuenetsi

¹³Waxaitsi baja yapëtanetsi, itsamatacabijawabelia wajanubenaejawanexa wajatuxanenë Cristo pitabarata, wajanacawajunupaebaponaenexa pacuenia nacacuenetane wajato-exanawanapaejawa mapanacuataje. Bajaraxuata, aponacatoxanepanae wajananeconitsijawa itsajiwi pexanaecuenie yabara Dioso peyaiyataejamatabëcuene. Biji rajane, bejamatabëjumaitsitsi: «Apotsita-exanaenë tsane itsacuenejawayo-ata Jesús pijajiwiwajuwënëjiwi

xua tsitapibisiacuenetsi pexanaenexa, penajamatabëcuenebijianaeyaniwa», bejamatabëjaitsi. Itsa patsita-exanaejitsipame xua tsitapibisiacuenetsi, baja-rapajiwi belia wecuajopaejitsipa pexaniacuenia petoponaponaejawami pija-tuxanenë. ¹⁴ Xanë, Pablonë, yapëtaniji mapacueneye: Ajibi itsacuenejawayo-ata^w tanejamatabëcuenebijianaenexa, taxaejawa, tajayatsicuene-ata,^x xua yabara Dioso netaejitsia beta-acuenebejenë. Yapëtaniji pexaniajaicuene bajaraxua, tsipaji xaniawaetsia wajatuxanenë Jesucristojawabelia itaxu-tuajamatejemanë daxitacuene yabara. Itsiata meta, itsanë Jesús pijaji-wituatuajëta canaëjësipa Dioso pitawetsijawa bajaraxua. Nexata, tane-cuenetaexae, itsa exanaejitsipa xua cujunawa Dioso pitawetsijawatsi, pibisiacuene exanaejitsipa Dioso pitabarata. ¹⁵ ¡Bajaraxuata, panijabananë Jesús pejamatabëcueneta pëtsa pajamatabëcuenebijianame! Bajaraponë pitabarata itsa patsitaxaejitsipame^y xua cujunawa Dioso pitawetsijawatsi, belia pibisiacuene exanaejitsipa papecacuenetaejawata. Bajarapacuenia itsa pa-exaname, apopanajamatabëcuene-itajëtsimë pane-asiwajawa baja-raphonëjawabelia. Nexata, panajamatabëcuenecataitsianame, panetsita-exanaeyaniwa xua yabara panijabananë cujunawa Dioso pitawetsijawatsi, Diosowecua panejamatabëcuenebijianaeyaniwa panijabananë, tsipaji rabaja wajatuxanenë Cristo siwatëpa bajaraponë-ata, penaxuabiyaníwa. ¹⁶ Baja-rapacuenia panajamatabëcuenecataitsianame, itsacuenejawa panetsita-exanaeyaniwa, xua yabara itsajiwi pacaneconitsiya pacabaracuaicuajiai tsipae bepibisiacuene pane-exanaewi. Paxamë apopacatsitapibisiacuene-ata tsipae xua pa-exaname, itsiata pacabaracuaicuajiai tsipae pibi-siacuene bepene-exanaewi, Jesús peliwaissi panejumexaniataewi-ata. ¹⁷ Tajamonae, wajanajamatabëcuene-itajëtaponaenexa wajayaiyatae-jawa wajatuxanenë Jesucristojawabelia, bajaraPonë aponaca-itawetsi wajaxaejawa, waja-apaejawa-ata yabara. ¡Jume baja cajena! Biji rajane, najamatabëcuene-itajëtatsi wajayaiyataejawa Cristo, pexaniacuene waja-exanawanapaejawata, jamatabëcuenexanepanaeya namata-enetsia wajana-juajinawanapaejawata, jamatabëcuenebarëyanua wajajinawanapaejawata, Espíritu Santo wajanacajamatabëcuenecaëjëpaeya-exanaecuenia. ¹⁸ Pajiwi bajarapacuenia toponapona pijatuxanenë Cristo, siwajamatabëcueneba-rëyatsi Dioso. Jiwi-ata xaniawaetsia yayiatanetsi.

¹⁹ Asiwaya wajayaiyataexae wajabananë Cristo pejamatabëcueneta, nexata apobetsita-exanaetsi itsacuenejawa xua yabara jamatabëcuenebi-jianaejitsipatsi Diosowecua. Biji rajane, xua Dioso nacayawenona jamata-bëcuenexanepanaeya wajanajuajinawanapaenexa, xua-ata nacayawenona

w 14:14 *Ajibi itsacuenejawayo-ata:* Taema Mc 7:7-23; Hch. 10:9-16. **x 14:14** *tajayatsicuene-ata:* Bajayata, Dioso yapëtaeya-exana judíowi xua yabara bepenaxuirabiwicuenia taejitsiatsi pexaejawa yabara, pejayatsijawa-ata yabara. Taema mapacápítuloxi Levíticopijijawanë 12-15. **y 14:15** *patsitaxaejitsipame:* Pablo canacueneba pexaejawa xua yabara judíowi canaëjëta Dioso pitabarata bepenaxuirabiwicuenia penataeyaniwa pexaejawata. Itsiata, daxita Romanos-baxutojawata, Pablo nacayapëtaeya-exana itsacuenejawanë-ata, xua yabara judíowi canaëjëta apopexanaejawanexa bepenaxuirabiwicuenia penataeyaniwa, pacuenia: Apojudíowi itsa yawa-naxaejitsipa, itsa aponabo-upiperabëcaucutsia-exanae tsipae, itsa aponacuenexaniawaetsi tsipae sábadomatacabita-ata. Nexata, daxita bajarapitsicuenejawanë yabara Pablo nacamuxu-jioba wajatsita-exanaeyaniwa pamona abaxë catsiteca bajaraxuanë, wajajopaeya-exanaeyaniwa Dioso peliwaissiweua.

namata-enetsia wajanajamatabëcuene-asaëya-exanaenexa Diosojawa-belìa, bajara-ëxua be-exanawanapatsi. ²⁰ ¡Nexata, pëtsa patsitaxaneme xua panijabananë Jesucristo pejamatabëcueneta, tane bepitawetsijawatsi pexaeyaniwa, tsipaji bajarapacuenia panetsita-exanaejawata, belìa pajamatabëcuenebijianaejitsipame Dioso pijajiwitonë! Baitsi, itsa pacajanitaejitsipa panexaejawa, bajarapajiwi-ata naxaejitsipa. Nexata, bepenaneconitsinë Diosojawabelìa nataejitsipa. ¡Bajaraxuayaniwa, pëtsa patsitaxaneme xua cujunawa panijabananë! Xaniajai rabaja. Daxitacuene rabaja picani Dioso nacatocopata wajaxaenexa. Apopacatsitapibisiacuene-ata picani, itsiata pibisiacuene pa-exanaejitsipame, itsa patsitaxaejitsipame xua panijabananë Jesucristo pejamatabëcueneta tsitapibisiacuenetsi panexaejawata. Apoxanepanae pane-exanaejawa bajarapacuenia. ²¹ ¡Bajara-xuata, pëtsa patsita-exaname itsacuenejawa-ata, xua yabara panijabananë Jesucristo pejamatabëcueneta pajamatabëcuenebijianaejitsipame; pewi panexaejawata, piatanevinora-ata pane-apaejawata! ¡Bajarapacuenia, pëtsa pajamatabëcuenefaefaenaeya-exaname panijabananë Jesucristo pejamatabëcueneta, xaniawaetsia pijatuxanenë petoponaponaecuenemi-wecua! ²² Xaniawaetsia nitaxutuajamatejemaxae Jesucristo, itsa xamë natocanaëjëtame neconi aponexainaejawanexa Dioso pitabarata nexaejawa, nexanaejawa-ata yabara, jamatejema exanaename. Jamatabëcuene-barëyamë tsane itsa apoxainaemë nenaneconitsijawanexa nexanaecueneyabara. ¡Itsiata, bajarapacueney xamë xainare bëpënëa Dioso pitabarata! ¡Pëtsa itaxutejema nawajunupaebame nexanaecueney yabara! ¡Pëtsa jaitame-nua nijaliwaisita nenajamatabëjëpaeya-exanaenexa pajiwi cujunawa bajaraxua pexanaeyaniwa, tsitapibisiacuenexaetsi! ²³ Pajiwi cuene-aeba Dioso bajarapapexaejawa petocopatsijawatsi, apobexae, nexata apobe-exanaenua, tsipaji xua jiwi exana itaxutuajamatejemanewja Jesucristo,^z pibisiacuene exana. Matapania, pajiwi pijinia xaniawaetsia itsa natoyapëtane pitaxutuajamatejemajawa Jesucristo, neconi apopexainaejawanexa, toxanepanatsi jane baja pexanaejawa.

**Wajabanajiwi Jesucristo pejamatabëcueneta, pacuenia
betocanaëjëtatsi wajajamatabëcueneyawenonaenexa**

15 ¹ Waxaitsi wajajamatabëcueneliwaisinaweretsiwi Dioso pijacuenelia, asiwaya betanetsi pamonae abaxë jamatabëcuenefaefaena pitaxutuajamatejemajawa Cristo. Bajarapamonae cujunawabiaba bepiacuenebejewicuenia penacopatsijawa Dioso pitabarata, itsacuene pexanaejawa yabara. Nexata, apobetsita-exanaetsi waxaitsi wajacuata wajanatojitsipaecuenia, wajajamatabëcuenebijianaeyaniwa wajamonaëjiwiyo. ² Biji rajane, caejiwitsi canacujitsia becanaëjëtatsi wajabananë Jesucristo pejamatabëcueneta, wajajamatabëcueneyawenonaenexa. Betsita-exanawanapatsi pacuenejawata

z 14:23 itaxutuajamatejemanewja Jesucristo: Pajiwi xaniawaetsia itaxutuajamatejema Jesucristo, natoyapëtane bajaraPonë capanepaeya pewecua-ajibia-exanaejawatsi daxita pibisiacuene pexanaeconimi, daxita penaxuirabia-exanaecueneminexatsinua pesiwatëpaejawata cruzata. Nexata, jamatabëcuenebarëyaya ponapona Dioso pitabarata, cujunawinejewa Dioso penaneconitsia-exanaejawanexatsi, penaxuirabijiwicuenia petaejawanexatsinua, pexanaecueneyabara.

ajamatabēcuenesaējitsia, bajaraxua beto-exanawanapatsi pejamatabēcue-nefaefaenaējiwiyo pejamatabēcuenewitsabinexa Diosojawabelia. ³ Bajara-pacuenia bejinawanapatsi, tsipaji wajatuxanenē Cristo abaxē ita ponapona mapanacuataje, pijacuata penatojitsipaecuenia apo-exanaponaponaē. Biji rajane, nacopata pebejiobia-exanaenexatsi pacuenia Dioso tojitsipatsi. Cristo bajarapacuenia pexanaejawanexa yabara Dioso pejumeliwaisiba-xutota tajēwelia jumaitsi mapacueniaje: «Xamē, pibisiacuenia jiwi peca-baracuaicuaijatsabiabijawa, bajaraxua xanē juya netsijumajopaena»,^a jai Dioso pejumeliwaisibaxutota, Cristo pejumaitsiyawa paxa Diosojawabelia. ⁴ Paliwaisi bajayata yaquina Dioso pejumeliwaisibaxutota, bajarapaliwaisi waxaitsi-ata nacacujaruba wajacuenējēpaenexa pacuenia Wajatuxanenē nacatsita nacuene-itajēta. Bajaraxuata, bajayajebi nacabejiobia-exanabiabi-ata Dioso pijajiwixaetsi, itsiata ajamatabēcuenesaē tsawanapae tsanetsi, tsipaji yapētanetsi pacuenia Dioso najumecapanepaeya jumaitsi, bajarapali-waisita wajanacato-exanaenexa.

⁵ Tajamonaē, bitso pacatojitsipatsi Dioso papecajamatabēcue-neyawenonaenexa, najamatabēcuenējēpaeya daxita panejinawana-paenexa, namata-enetsia panenato-exanawanapaejawata pacuenia Cristo Jesús^b exanaponapona mapanacuataje, tsipaji bajaraPonē wajanacajamatabēcueneyawenonaenē, wajanacajamatabēcue-ne-asaēya-exanaponaenēnua wajanacajamatabēcue-ne-ējēbijawata.

⁶ Bajarapacuenia nexata daxita paxamē najamatabēcuenējēpaeya pawēnēxaniatsianame wajatuxanenē Jesucristo paxa Diosojawabelia mapacueniaje: «¡Diosomē, bitso ayaijamatabēcuenenēmē!», pajamē tsabiabi tsane.

⁷ Pajudfowinē, apopajudfowi-atamē, najēpaeya Cristo nacajunata pijajiwinoxatsi. ¡Bajaraxuata, najēpaeya xaniawaetsia namata-enetsia panacopiapitabiabare! Bajarapacuenia ita pa-exanabiabianame, daxitajiwi Dioso yaiyataena. Nexata, daxitajiwi jumaitsi tsabiabi tsane Dioso yabara: «Dioso cajena bitso ayaijamatabēcuenenē, tsi-paji pijajiwī yawenona xaniawaetsia petojinawanapaenexatsi», jai tsabiabi tsane. ⁸ Mapacuenia pacajumaitsijsi. Cristo Jesús athēbē-wetsica patsica mapanacuayabetsicaje peyawenonaenexa judfowi, pacuenia bajayata Dioso najumecapanepaeya jumaitsi judfowi pijasalinaiwijawabelia. Bajarapacuenia Dioso pexaniajainēcue-ne najamatabēcue-ne-itajēta judfowijawabelia. ⁹ Patsicanua peyawenonaē-nexa apojudfowi-ata. Bajarapamonaē-ata, Jesucristo pejamatabēcue-neta, wēnēxaniatabiaba Dioso mapacueniaje: «¡Diosomē, bitso ayaija-matabēcuenenēmē!», jai tsabiabi, bajaraPonē pitaxutotsoniaetaeatsi, pacuenia exana judfowijawabelia. Bajaraxua yabara Cristo paxa Diosojawabelia pejumaitsiyawanexa, Dioso pejumeliwaisibaxutota tajēwe-lia jumaitsi mapacueniaje:

«Daxita panacuanējawa apojudfowi jinawanapa, xanē
cacuenewēnēxaniatsianatsi bitso ayaijamatabēcuenenēmē yabara.
Cawēnēxaniatsianatsinua tacatonaxēanaejawata wajianē bajaraxua

yabara»,^c jai Dioso pejumeliwaisibaxutota, Cristo pejumaitisijawanexa paxa Diosojawabelia, apojudíowi-ata pitaxutotsoniataexaetsi.

¹⁰ Itsabaxutota pijinia, Dioso pejumeliwaisibaxutota jumaitsi mapacueniaje apojudíowi yabara:

«¡Pajamatabëcuenebarëyamëre apopajudíowimë Dioso papijajiwimë, judíowi yajawa!»,^d jai Dioso pejumeliwaisibaxutota apojudíowi-ata Dioso pijajiwi pexanaejawanexatsi yabara.

¹¹ Itsabaxutota pijinia, Dioso pejumeliwaisibaxutota David-pijinë yaquina mapacueniaje:

«¡Paxamë apopajudíowimë, Diosojawabelia pajumaitsimëre: 'Diosomë, bitso ayaijamatabëcuenenëmë', pajamëre! ¡Padaxitamë, itsamonaejawabelia pajumaitsimëre: 'Caenë Dioso bitso ayaijamatabëcuenenë', pajamëre!»,^e jai Dioso pejumeliwaisibaxutota, David-pijinë peyaquinaebaxutota.

¹² Isaías-pijinë pijinia, itsabaxutota tajëwelia yaquina Jesucristo yabara. Jumaitsi mapacueniaje:

«Panacuetonëyo naexanaena, Isaípijinë pemomonëyo tsane. Itsa witsabiana bajarapanacuetonëyo, Dioso tocopatsiana pewetsinexa daxita panacuanëjawa apojudíowi jinawanapa. Nexata, bajarapamonae-ata siwanajamatabëcueneocopabiana bajaraPonëjawabelia»,^f jai Isaías-pijinë peyaquinaebaxutota Jesucristo yabara, wajayapëtaenexa pacuenia apojudíowi-ata Jesucristojawabelia siwanajamatabëcueneocopabijitsia, peyawenonaenexatsi.

¹³ Bajarapacuenia judíowitsi, apojudíowi-ata, najëpaeya wajanacayawenonaexae, pacatowajëtabiabatsi Diosojawabelia, papecajamatabëcueneya wenonabiabinexa, paxamë, pane-itaxutuajamatejemawí Diosojawabelia. Yapëtanetsi pacuenia Dioso wajanacajamatabëcuenecaëjëpaeya-exanaenë wajajamatabëcuene-ewetawanapaejawanexa. Nexata, pacato-wajëtatsi Diosojawabelia, Espíritu Santo pesaëta, ayaicuenia papecajamatabëcuenebarëyaya-exanaenexa, jamatabëcuenexanepanaeya panenajuajinawanapaenexanua, panejamatabëcuene-ewetawanapae-epato papecacapanepaematacabijawabelianexa.

Pablo yapëtaeya-exana petonacuenebicuene Dioso

¹⁴ Patajamonaemë Cristo pejamatabëcueneta, paxamë cajena xaniawaetsia pacayapëtanetsi bitso pexaniajamatabëcuene panexainaewi, bitso paneya-pëtaewinua Cristo peliwaissi. Bajaraxuabeje papecatsijamatabëwënëcaexae, nexata pacacuenecaëjëpa xaniawaetsia namata-enetsia panenamuxujio-babiabinexa. ¹⁵ Tajamonae, bajarapanecuenen-itsiwi-ata, ajume-urajibia pacatoyaquinatsi mapabaxutotaje, patacanajamatabënapitsia-exanaenexa

^c 15:9 Taema Sal. 18:49, 2Sa 22:50. Bajarapasalmo yaquina David-pijinë, pecuenewënëxaniatsinexa Dioso peyawenonaexaetsi, pecuene-amoneyabijawata pijawajabitsaë. Itsiata, bajarapacuenia-ata tajëwelia yajawa-itajëta Cristo pejumaitisijawa Paxa Diosojawabelia. Bajaraxuata, wënëruba bajarapasalmo Mesías-yabarapijisalmo. ^d 15:10 Taema Deut. 32:43. ^e 15:11 Taema Sal. 117:1. ^f 15:12 Taema Isa. 11:10. Isaípijinë raja, Israel nacua pewetsinë, David-pijinë, paxa. Taema Rut 4:22; 1Sa 17:17.

bajarapayajuwënëliwaisi. Dioso nitoroba bajarapaliwaisi tatsipaebana-jetarucaenexa, pacujinae asiwaya nitapeta^g apóstol-nënexanë. ¹⁶ Nexata, Jesucristo pijajiwitonënë, tatsipaebaponaenexa Jesucristo peliwaisi apojudíowijawa. Nexata, apojudíowi tsipaebabiabajë pexanialiwaisi, Jesucristo peliwaisi, pecapanepaeliwaixinexatsi Diosojawabelia, jamatejema bajaramonae pejumexaniataecujinae bajarapaliwaisi, penacopatsinexa Diosojawabelia bepexania-ofrendacuenejawa,^h Espíritu Santo petsatsixaetsi Jesús pijajiwínexa.

¹⁷ Cristo Jesús pijajiwitonëxaenë, xanë bitso nasiwajamatabëcuenebarëyanë itsa tonacuenebabiabajë Dioso pijacuene. BajaraPonë neyawenonabiaba itsa tonacuenebabiabajë. BajaraPonë neyawenonabiaba tatsipaebaponaenexa itsamonaejawabelia Cristo peliwaisi. ¹⁸ Apotsipaebabiabinë tajacuateda ta-exanajawa yabara. Biji rajane, rowialia tsipaebabiabajë ajumeturajibia Cristo taneyawenonabiabijawa, tatonacuenebinexa Dioso pijacuene apojudíowijawa, bajarapacuenia pejumexaniataenexa Jesús peliwaisi. Nexata, apojudíowi, itsa jumetane tatsipaebabiabiliwaisi, itsa tanenua Dioso pesaëta pinijicuene ta-exanaponaejawanë, bajarapamonae jumexaniatane baja Jesucristo pesiwatëpaejawatsi pibisiacuene pexanaeneconi yabara. ¹⁹ Daxita bajarapacuenia pinijicuenejawanë exanaponajë Espíritu Santo pesaëta tanejamatabëcueneyawenonaejawata. Bajaraxuata, tsipaebaponajë pexanialiwaisi, Cristo peliwaisi, Diosojawabelia pecapanepaeliwaixinexatsi, Jerusalén tomarajawawerenacujinae, tajënacujawabelia, tapatsinexa Ilírico nacujawabelia. ²⁰ Bajaraxuata itsa tsipaebaponajë pexanialiwaisi, Jesucristo peliwaisi, jitsipajë tatsipaebaponaenexa itsaxuayo abaxë jiwi apowënëliwaisipaebi Cristo. Apojitsipaenë tatsipaebaponaejawa itsaxuayo baja copiya tawajënaeyaⁱ itsamonae tsipaebapona, tsipaji jitsipajë tanejumetaewi xaniawaetsia pejumexaniataenexa Jesús peliwaisi. Bajarapacuenia itsa exanaejitsipajë, cuenejëpaejitsipajë copiya bo pexanaenë petsiwajënaebuatsijawa piatajawa betatsimatatsënëcatsanaejawa itsanë pejebijawajumawereca, yapëtaenewanë itsa pexaniacuena tsiwajënaejeba.^j ²¹ Bajaraxuata, itsa tsipaebaponajë Jesucristo peliwaisi apojudíowijawa, jitsipajë ta-exanaponaejawa pacuenia Diosojumepaebinëmi, profeta Isafas-pijinë, tajëwelía yaquinaruta Dioso pejumeliwaisibaxutota, mapacueniaje:

g 15:15 *asiwaya nitapeta*: Taema Rom. 1:5. **h 15:16** *bepexania-ofrendacuenejawa*: Taema Rom. 12:1-2. **i 15:20** *tawajënaeya*: Pablo apocuene-itawetsitsi picaní jiwi petsipaebiyaníwa Jesús peliwaisi itsaxuayo pewajënaeya itsamonae tsipaeba. ¡Jumel! Saya yapëtaeya-exana pacuenia bajaraponë apojamatabë-exanae bajarapacuenia, bepíjiayo pewateretsinexa pacuenia Dioso itorobatsi. Baitsi, pacuenia bo pexanaenënexa. Itsa exanaejitsia bajarapabo itsanë petsiwajënaebuatsijawa pejumata, copiya becanaëjëta perowiatsaruaecuenia boyenepana petojeyoyocaeyaniwatsi. Becuene-ëjëbanua piatajacuene, peyapëtaenexa itsa xaniawaetsia boyenepanayotsijitsia nayaebinejewa. Bajarapijinia pacuenia, liwaisi pepaebinë. Itsa tsipaebijitsia pepopexaniajalliwaisi itsaxuayo pewajënaeya itsamonae tsipaeba baja, copiya belliwaisi-ëjëba, peyapëtaenexa perowialiwaisicuene, pexaniajaicuenenua, jiwi penayamaxë-itojorobiyaníwa pejumexaniataejawata paliwaisi capitsapa, peliwaismatajërëatsijawata copiya petsipaebiliwaisi, cotocaewiliwaisi yajawa. **j 15:20** *pexaniacuena tsiwajënaejeba*: Itsa copiya pepaebiwi pexaniajaicuenia apotsipaebi Jesús peliwaisi, nexata belia Pablo pejumetaewitsi bijíaya jumetajitsipa petsipaebiliwaisi. Baitsi, Jesús peliwaisi itsa matajërëatsipa pijasalinailiwaisi, nexata apojamatabëcuenesaë tsipae. Itsa perowiacuenia apopaebi tsipae, nexata pexaniacuena pijinia, pejumetaewi apojinawanapae tsipae.

«Pamonae abaxë apowënëliwaisitae^k Ponë athëbëwetsica Dioso itorobjitsiatsica jiwi pecapanepaenexa, bajarapamonae taena bajaraPonë. Nexata, bajarapamonae jumeyapëtaena, itsa tsipaebianatsi bajaraPonë peliwaisi», jai tajëwelia Dioso pejumeliwaisibaxutota Dioso pitorobinëtsica yabara peliwaisi apojudfowijawa mapamatacabitaje petsipaebaponaejawanexatsi.

Pacuenia picani Pablo jamatabëponabiaba

Roma tomarabelia, yabara peliwaisi

²² Bajayajebi picani bitso jamatabëpacataeyabiabatsi. Itsiata aponecuenecaëjëpabiabi taponaeenexa paxamëjawabelia, daxitanacuanëjawa Dioso pejumeliwaisi tatsipaebanajetarucaexae. Bajaraxua yabara cuenenajematajë taponaejawa paxamëjawabelia. ²³ Aeconoxae baja taweretsixae tana-cuenebijawa mapanacuajawaje, nexata jane baja, ponaenajë paxamëjawabelia, pacuenia picani bajayajebi jamatabëpacataeyabiabatsi. ²⁴ Nexata, pamatacabi ponaenajë España nacuyabelia, patsianajë paxamëjawata, patacataenexa. Itsa baja nataenatsi, bitso jamatabëcuenebarëya tsawana-pae tsanetsi. Bajaraxuacujinae, jitsipajë pataneyawenonaenexamë tajanamutonexa, taponaeenexa jane baja, España nacuyabelia. ²⁵ Itsiata, copiaya mapamatacabitaje ponaenajë Jerusalén tomarabelia, ofrenda tatocaponaenexa, pamonae jinawanapa bajarajota, Jesús peliwaisi pejumexaniataewi. ²⁶ Bajarapa-ofrenda caetuata Jesús peliwaisi pejumexaniataewi Macedonia, Acaya nacupijiwibeje, peyawenonaenexa pamonae jinawanapa Jerusalén tomarata, Jesús peliwaisi pejumexaniataewiyajuwënëwi, bepejio-biwi. ²⁷ Bajarapanacuapijiwibeje apojudfowi-ata, caejamatabëcueneliwaisi xaina bajarapacuenia ofrenda peto-exanaenexa, peyawenonaenexa juya judfowijawabelia, Jerusalén tomarapijiw, tsipaji judfowi copiaya peyapëtaexae pexanialiwaisi, tsipaeba apojudiowijawabelia Dioso peliwaisi, pecapanepaeliwaisinexatsi. Nexata, judfowi pejamatabëcueneta, pamonae apojudfowi-ata, yapëtane baja pecapanepaeliwaisinexatsi Diosojawabelia. Bajaraxuata, apojudfowi aeconoxae beyawenona judfowijawabelia, pamonae penajuajumexaniataewi Jesús peliwaisi, mapanacuataje penamatawenonaejawaxi yabara. ²⁸ Bajarapa-ofrenda tatocaponaecujinae Jerusalén tomarapijiwijawabelia, matapania jane baja ponaenajë España nacuyabelia. Bajarapanamuto ta-exanaejawata, patsianajë paxamëjawata. ²⁹ Itsa patsianajë paxamëjawabelia, yapëtaniji Cristo bitso pexaniacuenia wajanaejamatabëcuenebarëyaya-exanaejawanexa.

³⁰ Tajamonae, daxitatsi, wajatuxanenë Jesucristo pijajiwitsi, bajarapacuenianua Espíritu Santo daxitatsi nacajamatabëcueneecaëjëpaeya-exanapona, namata-enetsia wajana-asiwanexa nacaemonaetsicuenia. Bajaraxuata, pexaniacuenia pacawajëtatsi asaëyata patanetowajëtsinexamë Diosojawabelia taneyawenonaenexa, ³¹ tane-itsacueniabiyanawa^l Judea nacuata pejinawana-paewi, Jesús peliwaisi pejume-aebiwi, piamatabëcuenebejewi. Panetowajëtsianamenua Jesús peliwaisi pejumexaniataewi, Jerusalén tomarapijiw,

k 15:21 *apowënëliwaisitae*: Taema Isa. 52:15. **l 15:31** *tane-itsacueniabiyanawa*: Taema 2Co 1:11, Hch. 21:6-30.

xaniawaetsia tanewecuapitsinexa^m pa-ofrenda tocaponaejitsianē. ³² Orijibia, panetowajētsianamenua, barēyaya tapatsinexa paxamējawabelia, bajara-pacuenia Dioso itsa netojitsipa, paxamē patacayajawanexanua tanacuera-ewetaponaponaewata. ³³ Xanē pacatowajētabiabatsi Diosojawabelia, Ponē wajanacarajutsinē jamatabēcuenexanepanaeya wajanajuajinawanapaenexa. Pacatojitsipatsinua bajaraPonē papecayajawaponaponaenexa. Bajara-itsi tsane.

Pablo najamatabēnajinalia peyapētaewitsi, Roma tomarapijiwi

16 ¹ Mapaliwaisijawataje pacatoyaquinatsinua, patacayapētaeya-exanaenexa wajanabawa Febe yabara, diáconisawa.ⁿ Bajarapowa bitso pexaniajamatabēcuenewa. Yawenonabiabanua Jesús pijajiwi, Cencrea^o tomarata pejinawanapaewi. ² Bajarapowa itsa ponaena paxamējawabelia, pacopiapitsianame xaniawaetsia wajatuxanenē Jesucristo pejamatabēcueneta, pacuenia daxitatsi benacopiapitabiabatsi Jesús peliwaishi wajanajuajumexaniataewi. Xua namatawenona bajarapowa, payawenonaename, tsipaji bajarapowa yawenonabiaba ayaibitsaēto Jesús peliwaishi pejumexaniataewi. Xanē-ata bajarapowa neyawenonabiaba.

³ Nebajacobiana Priscila,^p pamona Aquila-ata. Bajarapajiwi beje tayajawanacuenebijiwi beje Cristo Jesús^q pijacuene. ⁴ Bajarapajiwi beje tsi-ayai-atatsibeje, petēpaejawanexabeje picani taneyawenonaewata beje, itsiata necapanepabeje tanebeyaxuabijawaminexawecua. Nexata, pexaniajamatabēcueneta rajutajē bajarapajiwi beje jawabelia. Itsiata, ēxanē bajarapacuenia apojumaitsinē. Daxita pamona apojudíowi, Jesús peliwaishi pejumexaniataewi, bajarapamona-ata bajarapacuenia jumaitsi sibeje tanecapanepaexabeje. ⁵ Jesús peliwaishi pejumexaniataewi, pamona nacaetuatabiaba Priscila, Aquilabeje pijabota, bajarapamona-ata nebajacobiana. Nebajacobiananua ta-asiwanē Epeneto. Bajaraponē daxita Asia nacupapijiwiwecua copiya jumexaniatane Cristo peliwaishi. ⁶ Nebajacobiananua María, powa bitso tonacuenebabiaba Dioso pijacuene paxamētuatuajēta. ⁷ Nebajacobiananua tajanacuapijinē beje, Andrónico, Junias-beje. Bajayata, bajaraponē beje panenajuajeba penaneconitsiwi pejebabiabibota. Bajaraponē beje yayataeya baracuaicuajitsibeje apóstolewi-ata. Xanē-ata tajumexaniataewajēnaeya Cristo peliwaishi, bajaraponē beje baja jumexaniatane beje.

⁸ Nebajacobiananua Amplias. Bitso ta-asiwanē, tsipaji bajaraponē-ata wajatuxanenē pijajiwitonē. ⁹ Nebajacobiananua Urbano. Bajaraponē-ata tonacuenebaponapona wajatuxanenē Cristo Jesús pijacuene, pacuenia waxaitsi tonacuenebawanapatsi. Nebajacobiananua Estaquis, bitso ta-asiwanē. ¹⁰ Nebajacobiananua Apeles, ponē dowathi

m 15:31 *tanewecuapitsinexa*: Taema Hch. 21-23. Pablo canaējēta bajarapa-ofrenda yabara mapacueniaje: «Pamona apojudíowi pejebipalataxae, belia judíowi aponewecuapitsi tsipae», jamatabējai meta Pablo. **n 16:1** *diáconisawa*: Mapajumeje nacayapētaeya-exana petiriwa pena-cuenebijawa diáconocuene. Baitsi, diáconojume nacayapētaeya-exana pacuenia pebi, itsa jume, petiriwa yawenonabiaba penamatawenonaewi, Jesús pijajiwiwatuajēta. Nexata, xuanē Jesús pijajiwi, penotsijawanē perajutsinexa penamatawenonaewijawabelia, bajaraxuanē tsanabiaba Jesús pijajiwi pewēnēta. Bajaraxuata, wēnērubatsi diácononē, diáconisawa-ata. **o 16:1** *Cencrea*: Taema Hch. 18:18. **p 16:3** *Priscila...Aquila-ata*: Taema Hch. 18:1-26; 1Co 16:19; 2Ti 4:19. **q 16:3** *Cristo Jesús*: Taema Rom. 3:24-pijinota.

jamatabëcuene-ëjëbi-atatsi, itsiata, ajamatabëcuenesaë pejumexaniataejawa Cristo peliwaishi yabara. Nebajacobiananua Aristóbulo pijamonae. ¹¹ Nebajacobiananua tajanacuapijinë Herodión. Nebajacobiananua Narciso pijamonae, pamonaë itaxutuajamatejema Cristojawabelia. ¹² Nebajacobiananua Trifena, Trifosabeje, powabeje tonacuenebabiaba Dioso pijacuene. Nebajacobiananua waja-asiwawa Pérsida, powa bitso tonacuenebabiaba Dioso pijacuene. ¹³ Nebajacobiananua Rufo,^r ponë bitso peyaiyataenëtsi wajatuxanenë pijajiwiutuajëta. Bajaraponë pena-ata nebajacobiana. Bajarapowa bepe-xënatonë netaeyabiaba. ¹⁴ Nebajacobiananua Asíncrito, Flegonte, Hermas, Patrobas, Hermes, itsamonae-ata, pamonaë najinawanapa bajarapamonae-jawata. ¹⁵ Nebajacobiananua Filólogo, Julia, Nereo, Nereo pejuyapijiwa-ata, Olimpas-ata, daxita itsamonae-ata, Jesús peliwaishi pejumexaniataewi, pamonaë najinawanapa bajarapamonaejawata.

¹⁶ ¡Paxamë-ata Jesús peliwaishi panexumexaniataexae, xaniawaetsia namata-enetsia bitso nasiwaya panabajacobabiabare! Daxita pina Cristo peliwaishi pejumexaniataewi, majotaje pejinawanapaewi, pacabajacobalia.

¹⁷ ¡Tajamonae, panayajiwiataema pamonaepenajumetsënëtsiliwaishita Jesús pijajiwi natsanaeya-exanapona, nacaemonaecuenia penataejawami, tsipaji bajarapamonae tsipaebapona jiwi peyamaxë-itojorobinexa pexaniajailiwaishi Jesús peliwaishiwecua! ¡Bajaraxuata, pawecuanatsare bajarapamonae, pejamatabëcueneta namata-enetsia panenajume-anaenotsiyaniwa bajarapamonae peliwaishita, najamatabëcuenejëpaeya panenajuajinawanapaejawamiwecua!

¹⁸ Bajarapamonae apotonacuenebi pacuenia jitsipa wajatuxanenë Jesucristo. Biji rajane, saya jamatabë-exana bajarapamonae pijacuata penatojitsipaecuenia.^s Jiwi jawabelia tsipaebapona bepexaniajailiwaishi itajara. Itsiata baitsi jane, bajarapamonae saya jamatabëyamaxë-itojoroba pamonaë abaxë xaniawaetsia apojumeyapëtae pexaniajailiwaishi. Petsipaebijawata, canacuenebabiaba jiwi petsimuxuxanepanaeliwaishianëtsi peyamaxë-itojorobinexa.

¹⁹ Daxitajiwi Jesús peliwaishi pejumexaniataewi daxitanacuanëjawa, paxamë pacawënëliwaishitane xaniawaetsia panejinawanapaejawa Dioso pejitsipaecuenia. Bajaraxuata, pacasiwabarëyatsi. Pacatojitsipatsi paneyapëtaenexa bitso ëpexaniacuene pane-exanaenexa. ¡Pëtsa panacopatame itsajiwi-ata papecayamaxë-itojorobijawa pibisiacuene pane-exanaenexa! ²⁰ Bajarapacuenia itsa panayajiwiataewanapaename bajarapitsiwi, nexata Dioso, ponë baja cajena wajanacajamatabëcuenexanepanaeya-exanaenë najamatabëcuenejëpaeya wajajinawanapaenexa, bajaraPonë bepíjia pacayawenonaena, panexamatabëcuene-amoneyabinexa dowathi, itsajiwi-ata papecayamaxë-itojorobiyaníwa penajumetsënëtsiliwaishita. Pacatowajëtabiabatsi Diosojawabelia wajatuxanenë Jesucristo asiwaya papecayawenonabiabinexa.

r 16:13 Rufo: Taema Mc 15:21. **s 16:18** *pijacuata penatojitsipaecuenia*: Dioso pejumeliwaishi penacujarubiwi caejamatabëcuene apoxainae xua yabara Pablo yaquina bajarapacuenia. Caebitsaëto jumaitsi: «Bajarapamonae penajumetsënëtsiliwaishianë paebabiaba, penotsinexa pejumetaewitsiwecua itsacuenejawa xua cabarëyajitsia pijacuata, pacuenia palata, pexaejawa, peyaiyataejawatsi, itsacuenejawa-ata», jai. Juya, itsabitsaëto itsacuenia canaëjëta. Jumaitsi: «Bajarapamonae xaniawaetsia apojumexaniatae xua yabara Jesucristo siwatëpatsi pijaneconi yabara, Dioso aneconijibia petaejawanexatsi, Biji rajane, canaëjëta pematatsënëa pecatsiteac-nexa pexaeyaniwa xuanë Dioso jani-itaweta bajayatami Israel-píjinë pemomoxi, bajarapacuenia matapania jane baja Dioso aneconijibia petanexatsi», jai tsabiabi bajarapamonae.

²¹ Pabajacobianame pina Timoteo, ^t Dioso pijacuene patatonajuanacue-nebinēbeje. Pabajacobianamenua pina tajanacuapijiwi Lucio, ^u Jasón, ^v Sosípater-ata.

²² Xanē, Tercionē, Pablo tajumeyaquinaponaenē mapabaxutotaje. Xanē-ata pacabajacobialiatsi, tsipaji Jesús peliwaishi xanē-ata tajumexaniataenē.

²³ Pabajacobianame pina Gayo, ^w ponē pijabota naponaponajē. Bajaraponē tocopatabiaba daxita Jesús peliwaishi pejumexaniataewi penacaetatabiababinexa pijabota. Pabajacobianamenua pina Erasto, ponē to-ewetabiaba Corinto tomarapijiwi pewetsiwi pijapalata. ^x Pabajacobianamenua pina wajanabanē Cuarto.

²⁴ Pacatojitsipatsi paneyapētaeponaejawa Dioso, wajatuxanenē Jesucristo-beje asiwaya papecayawenonabiabijawabeje. Bajara-itsi tsane.

Pablo xua yabara jumaitsi cotocaewiliwaishi

²⁵ ¡Waxaitsi wēñexaniatsianatsi Dioso, bitso ayaijamatābēcuenenē yabara, daxitamatacabijawabelia peponaponaenē yabara, wajanacajamatābēcuenē-asaēya-exanaenē-ata yabara! Pacatojitsipatsi nexata papecajamatābēcuenē-asaēya-exanaenexa pejumeliwaishi, paliwaishi jiwi tsipaebaponajē, Jesucristo peliwaishi, jiwi pecapanepaeliwaishinexatsi Diosojawabelia. Bajarapaliwaishi bajayajebi picanī Dioso muetsia xainabuata, nacua pexanaejawaweliacujinae. ²⁶ Itsiata, muetsia pexainabuatsiliwaishimi, maparucaeje xaniawaetsia nacayapētaēya-exana pajamatābēcuenē yabara bajayata profetawī, tajēwelīa yaquina Jesús peliwaishi yabara. Nexata, Dioso paxanē panē-itorobapona daxitanacuanējawa, apojudíowī pejinawanapaenacuanējawa, patatsipaebinxā Jesucristo peliwaishi, pamonaē jumetane pejumexaniataenexa bajarapaliwaishi, pejumecowēñētsinexanua pacuenia tonajumecopatatsi pexanaenexa.

²⁷ ¡Caenē rabaja Dioso daxitacuene peyapētaenē! ¡Xaniawaetsia liwaishi pecanaējētsinēnua! ¡Bajaraxuata, daxitamatacabijawabelianexa waxaitsi wajatuxanenē Jesucristo pejamatābēcueneta^y Dioso wēñexaniatsianatsi! Bajara-itsi tsane.

t 16:21 *Timoteo*: Taema Hch. 16:1-3; 17:14-15; 18:5; 19:21-22; 20:14; 1Co 4:17; Flp. 2:22; Heb. 13:23. **u 16:21** *Lucio*: Taema Hch. 13:1. **v 16:21** *Jasón*: Taema Hch. 17:5-7. **w 16:23** *Gayo*: Taema Hch. 19:29-30; 20:3-4; 1Co 1:14; 3Jn 1:1. **x 16:23** *Corinto tomarapijiwi pewetsiwi pijapalata*: Baitsi, tesoreronē, Corinto tomara pewetsiwi pecanacuenēbipalatanexa, gobiernocuenē penacuenēbijawata. **y 16:27** *Jesucristo pejamatābēcueneta*: Jesucristo wajanacacapanepaexae, matapania caejamatābēcuenē xainatsi Diosojawabelia. Nexata, nacacuenēcaējēpa wajawēñēca-cuaicuaijainexa Dioso, bajaraPonē aneñijibia wajanacataexae Jesús pejamatābēcueneta.

1 Corintios

Mapabaxutoje apóstolnë Pablo copiaya toyaquina Jesús peliwai pejumexaniataewi, Corinto tomarata pejinawanapaewijawabelia

Pablo pebajacobiliwai Jesús pijajiwi, Corinto tomarapijiwijawabelia

1 ¹Xanë, Pablonë, Dioso pejitsipaecuenia nitapeta, Jesucristo pija-apóstolnëxanë. Nexata, nitoroba tatsipaebaponaenexa bajaraPonë peliwai daxitanacuanëpijiwajawa. Wajabananë Sóstenes-beje, pacabaja-cobatsibeje padaxitamë Jesús papijajiwimë, Corinto tomarata panejinawanapaewi. Bajaraponë neyawenona mapaliwaisije patacatoyaquinaejawa paxamëjawabelia. ²Mapabaxutoje patacatoyaquinatsibeje Jesús papijajiwimë, Corinto tomarata panejinawanapaewi. Paxamë rabaja Dioso aneonijibia pacatane, Cristo Jesús pejamatabëcueneta. Paca-itapetanua papijajiwine-xamë, xaniawaetsia panejinawanapaenexa pejitsipaecuenia, pacuenia tocaë-jëta pexanawanapaenexa daxita pamonae pijatuxanenë Jesucristojawabelia siwanajamatabëcuenecopaba, daxitanacuanëjawa pejinawanapaewi. Jesucristo raja wajatuxanenë. Pijatuxanenë-ata daxita pamonae siwanajamatabëcuenecopaba bajaraPonëjawabelia. ³Pexaniacuenia pacatojitsipatsi, waxa Dioso, wajatuxanenë Jesucristobeje, papecajamatabëwënëtsinexa papeca-siwajamatabëcuene, papecabarajamatabëxanepanaejamatabëcuene-ata, jamatabëcuenexanepanaeya panenajuajinawanapaenexa.

**Pablo pexaniajamatabëcuene rajuta Diosojawabelia Jesús
pijajiwi yabara, Corinto tomarata pejinawanapaewi**

⁴Paxamë yabara, pexaniajamatabëcuene rajutabiabajë Diosojawabelia, ayaicuenia papeca-itaxutotsoniataexae, Jesucristo pejamatabëcueneta. ⁵Nexata, Jesucristo pejamatabëcueneta, Dioso ayaicuenia daxitacuenejawalia pacajamatabëcueneyawenonabiaba, xaniawaetsia jiwi panetsipaebinxexa Dioso pejumeliwai, panejumeyapëtaeya-exanaenexanua pepopexaniajai-liwai. ⁶Bajarapacuenia pacajamatabëcueneyawenona, tsipaji paliwai pajumetaneme Cristo yabara, xaniawaetsia baja pajumexaniataneme. ⁷Bajarapacuenia panejumexaniataexae, apopacatosajinae caejawayo-ata, Dioso papecajamatabëcuenecaëjëpaeya-exanaejawa, paneto-exanawanapaenexa

daxita pacuene bajaraPonë pacatojitsipa, paepatojebi abaxë pacopia-ewetawanapame wajatuxanenë Jesucristo, icatsia pepatsimatacabijawabelianexa. ⁸Nexata, Dioso pacajamatabëcueneyawenonaena ajamatabëcuenesaëya pane-itaxutuajamatejematsawanapaejawa, itsajiwi-ata papecaneconitsiyaniwa bepibisiacuene pane-exanaewi yabara, wajatuxanenë Jesucristo icatsia pepatsimatacabijawabelianexa. ⁹Dioso cajena exanabiaba najumecapanepaeya pejumaitsicuenia. BajaraPonë pacajunatanua, caejamatabëcuene panexainawanapaenexa pexënato, Jesucristojawabelia, Ponë wajatuxanenë.

**Corinto tomarata Jesús pijajiwi nawecuanatsanapona,
pepaebiwi pejamatabëcuene**

¹⁰Itsiata bailsi jane, paxamë caejamatabëcuene apopaxainawanapaemë Cristojawabelia. Bajaraxuata, patajamonamemë Cristo pejamatabëcueneta, ayaicuenia pacawajëtatsi Jesucristo pewënëta, najamatabëcuenejëpaeya panenajuajinawanapaenexa. ¡Pëtsa paxamëjawata itsamonae peliwaitsita panawecuanatsanaponame!^a ¡Biji rajane, najamatabëcuenejëpaeya caeliwaisi panajuaxainawanapare! ¹¹Bajarapacuenia pacatoyaquinatsi, tsipaji Cloë pijajiwi netsipaeba najamatabëcuenejëpaeya apopanenuajinawanapaejawa yabara. Biji rajane pina, paxamëtuatuajëta nabijataeyabiaba namata-enetsia, najume-anaenotabiabanua, caenë wajatuxanenë Jesucristo papijajiwi-atamë. ¹²Penajume-anaenotsijawata pina, itsamonae jumaisi tsabiabi mapacueniaje: «Xanë raja saicaya Pablo pijajiwitonënë», jai pina. Itsamonae, «Xanë raja saicaya Apolos pijajiwitonënë», jai pina. Itsamonae, «Xanë raja saicaya Pedro^b pijajiwitonënë», jai pina. Itsamonae, «Xanë raja saicaya Cristo pijajiwitonënë», jai pina tsabiabi. ¹³Apoxanepanae picani bajarapacuenia paxamëyajuwënëwi nabijataeya namata-enetsia panenajume-anaenotabiabijawa, panenawecuanatsanaponaenexa, tsipaji baja cajena Cristo caenë tsaponapona. Aponawitsanae baja cajena. Nexata, pamona-ata Cristo pijajiwi, caebitsaëto rabaja tsawanapae. Pacayanijobatsi: ¿«Xanë, Pablonë, itsajiwiyo meta siwanabeyaxuabia-exanajë cruzata, pijaneconi tatomatamotsinexa?» ¿«Detsa pajiwi paxamëyajuwënëjiwi nabautizabia-exana tawënëta, tajajiwitonë penaexanaenexa?» ¡Ajibi cajena! ¹⁴Orijibia, xanë pexaniajamatabëcuene rajutajë Diosojawabelia, tsipaji baja cajena apobautizabinë jiwi ayaibitsaëto paxamëtuatuajëta. Saya bautizabajë anijanëbeje Cristo pewënëta, Crispo, Gayobeje. Bajaraponëbeje apobautizabinë tawënëta. ¹⁵Nexata, acuenebi itsajiwi-ata pejumaisijawa: «Xanë raja nebautizaba Pablo pewënëta, pijajiwitonë tanaexanaenexa», pejaijawa. ¹⁶Jemajanë tsaena. Bautizabajënu Estéfnas pijamonae. Pematatsënëa baja aponajamatabënapitsinë pajiwiyo bautizabajë Corinto tomarata. ¹⁷Cristo aponitorobi bitso jiwi tabautizabaponaenexa. Biji rajane, nitoroba pexanialiwaitsi tatsipaebaponaenexa, jiwi pecapanepaeliwaitsinexatsi Diosojawabelia. Nexata, pacuenia Dioso nejamatabëcuenecaëjëpaeya-exanapona,

a 1:10 *panawecuanatsanaponame*: Cristo-ata nacayapëtaeya-exana piayaicuene bajaraxua. Taema Lc 11:17. **b** 1:12 *Pedro*: Itsawënë «Cefas», arameojumeta. Griegojumeta pijinia, «Pedro». Itsiata, caenë yabara pewënë.

bajarapacuenia pacatsipaebaponatsi. Apopacatsipaebaponaetsi bajarapaliwaisi, pacuenia ma-ëpanacuapijiliwaisi peyapëtaewije. Bajarapacuenia itsa pacatsipaebaponaejitsipatsi Jesús peliwaisi, nexata Jesucristo wajanacasiwatëpaejawa cruzata tsipaebi-atanë tsipae jiwijawabelia, ajumematamobinë tsipae.

Dioso pecopatsijawata Cristo cruzata pesiwatëpaenexa, najamatabëcuene-itajëta jiwijawabelia bitso peyapëtaenëcuene, piasaënëcuene-ata

¹⁸ Pamonaë pijaneconi yajawa penaxuabiwinexa Diosowecua, tsipaebi-atanë tsipae Cristo pesiwatëpaejawatsi cruzata pijaneconi yabara bajarapamonaë tsitatsi natsiquejemaliwaisi. Itsiata baitsi jane, waxaitsi Dioso wajanacacapanepaewinexa, bajarapaliwaisi nacayapëtaeya-exana Dioso piasaënëcuene. ^c ¹⁹ Bajaraxua yabara, Dioso baja cajena pejumeliwaisibaxutota tajëwelia jumaitsi^d mapacueniaje:

«Xanë raja itsamatacabi, liwaisi amatononobia-exanaenajë,^e
pamonaë pecanaëjësiliwaisi pexainaewi, bitso peyapëtaewi-
ata mapanacuapijicueneje. Nexata, daxitajiwi yapëtaenatsi
bewelia peyapëtaewicuene», jai baja cajena tajëwelia Dioso
pejumeliwaisibaxutota.

²⁰ Bajarapacuenia Dioso pejumaitsixae, yapëtanetsi pacuenia mapanacuapijiliwaisi apoyawenonaë jiwi peyapëtaenexa Dioso pijacuene. Mapanacuapijiwije, pamonaë pecanaëjësiliwaisi pexainaewi, pamonaë pecujarubiwi, pamonaë-ata pexaniacuenia pebarënajumenotsiwi, naliwaisisaëtabiaba mapanacuapijiwiliwaisita. Itsiata, paliwaisita nasaëtabiaba bajarapamonaë, Dioso to-exanatsi jemaliwaisi. ²¹ Dioso baja cajena bitso daxitajiwiwecua peyapëtaenëxae, apotocopatsi mapanacuapijiwije peyapëtaenexatsi mapanacuapijiliwaisi pecanaëjësicuena. Biji rajane, bajaraPonë najamatabëcuenewereta, pecapane-paenexa pijaneconiwe-cua pamonaë jumexaniatane Jesús peliwaisi, paliwaisi patsipaebanajetarubenajë, bajarapaliwaisi mapanacuapijiwi tsitanatsiquejemaliwaisi-atatsi.

²² Judfowi tsitanatsiquejemaliwaisitsi Jesús peliwaisi, tsipaji jitsipabiaba pepaebiwi petsita-exanaejawatsi^f Dioso pesaëta pinijicue-nejawanë, petonamatamotsinexatsi bajarapaliwaisi. Griegowi^g juya jitsipabiaba petsipaebijawatsi pepaebiwi mapanacuapijiliwaisi pecujarubiwi pecanaëjësicuena, petonamatamotsinexatsi Jesús peliwaisi. ²³ Bajarapabitsaëtobeje, bajarapacuenia jitsipae-ata, itsiata paxanë pejitsipaecuenia apopapaebaponaenë Jesús peliwaisi. Biji rajane, payapëtaeya-exanabiabajë pacuenia Cristo nacasiwatëpa cruzata, wajanacacapanepaenexa wajaneconiwecua. Bajarapacuenia

c 1:18 *Dioso piasaënëcuene*: Taema Rom. 1:16-17. **d 1:19** *tajëwelia jumaitsi*: Taema Isa. 29:14.

e 1:19 *liwaisi amatononobia-exanaenajë*: Pecanaëjësicuena apotopitsapaetsi pexanaenexa.

Baitsi, pejumexaniataejawami, tonaexanatsi jemaliwaisi. **f 1:22** *petsita-exanaejawatsi*: Taema Mt 12:38-50; Mc 8:11; Lc 11:29; Jn 2:18; Jn 6:30. **g 1:22** *griegowi*: Itsamonaë canaëjëta Pablo

apoyabaracuauiajai ëgriegowi. Canaëjëta peyajawacuauiajaijawa daxita apofudfowi peyaiya-taewi bëpënëajumenë pecanacuenebiwi peliwaisi pepaebijawata bepetsiyapëtaewicuena. Taema 1Co 1:17; Mt 6:7-8, Efe. 5:6-7; 2Pd 2:18-19; Apoc. 13:5.

patatsipaebixae, judíowi anaepanabiaba, petsitapibisialiwaishi-
xaetsi.^h Apojudíowi juya saya tsitanatsiquejemaliwaishitsi.²⁴ Itsiata
baitsi jane, pamona Dioso junatatsi pecapanepaenexatsi, judíowi,
apojudíowi-ata, Cristo pesiwatëpaejawata cruzata, bajarapamona-
jawa wabelia Dioso tsitanajamatabëcuene-itajëta bitso piacuenesaënëcuene,
peyapëtaenëcuene-ata, pecapanepaexaetsi pejumexaniataejawata Jesús
peliwaishi.²⁵ Pamona mapanacuapijiliwaishicuenia pecanaëjëtswi, tsita-
natsiquejamecuenetsi, Dioso pacuene exana jiwi pecapanepaenexa pija-
neconiwecua. pamona pesiwacanaëjëtswi mapanacuapijiliwaishicuenia,
tsitanatsiquejamecuenetsi. Itsiata, bajarapacuen bitso peyapëtaecuen
matatoxenetsi mapanacuapijiwi daxita pecanaëjëtswi jawawecua. Baja-
rapijinia pacuenia, Dioso pexanaejawa saëmatoxeneta daitacuene,
mapanacuapijiwi pecanaëjëtswicuenia tsita-asaëjibi-atatsi. Bajaraxuata,
Dioso itsa copata Cristo pebeyaxuabinexatsi cruzata, mapanacuapi-
jiwi tae-atatsi piasaëjibinëcuenia, apo peyapëtaenëcuenia-ata, baja-
rapaepatota Dioso tsitanajamatabëcuene-itajëta pepopiasaënëcuene,
pepo peyapëtaenëcuene-ata, jiwi pecapanepaexae pijaneconiwecua
Cristo pesiwatëpaejawata.

²⁶ ¡Patajamaonemë Cristo pejamatabëcueneta, pacanaëjëre mapacuene
yabaraje! Paxamë Dioso pacajunata papijajiwinexamë, beweliamatabëcuene
panexainaewi-ata. Paxamëtuatuajëta jinawanapa caejiwibeje saya pecanaëjët-
swi mapanacuapijiliwaishije, pamona ayaijamatabëcuenewi, petuxanewi pexi-
ata.²⁷ Paxamë panenacujarubiliwaishi apopanexainaewixae, itsamona bewelia-
jamatabëcuenewiⁱ pacatane. Itsiata, bajarapane-itsiwi-ata, Dioso paca-itapeta
papijajiwinexamë pe-urabinexa pamona picani natane bitso peyapëtaewi
mapanacuapijiliwaishije. Mapanacuapijiwi pe-pacatae-ata bewelianamatacitoro-
bisaë^j panexainaewi, Dioso paca-itapeta pe-urabinexa pamona picani natane
ayaijamatabëcuenewi, ayainamatacitorobisaë pexainaewi-ata.²⁸ Dioso baja
cajena, paca-itapeta papijajiwinexamë, daitajiwi bijiya papecanaëcotsiwi,
pamamobiwicuenia papecataewi-ata, pe-urabinexa pamona bitso ayaijama-
tabëcuenewi picani natane mapanacuataje. Nexata, paxamë panejamatabëcu-
neta, daxita xua mapanacuapijiwi tsitanamatamotatsi, peyayataexae, baja-
raxuanë Dioso amatamobia-exanaena.²⁹ Bajarapacuenia Dioso paca-itapeta,
mapanacuapijiwi apopepacyayataewimi-ata. Bajaraxuata, Dioso pitabarata
caejwi-ata jamatabëcuenenawëxaniabiaya apobenatae ayaijamatabëcuenewi,
Dioso papeca-itapetsixae papijajiwinexamë.³⁰ Ajibi cajena itsacuenejawa xua
yabara be-ayaijamatabëcuenewi panetaejawanexa, tsipaji raja Dioso papeca-
itaxutotsoniatexae, paca-exana becaenë Cristo Jesúsata, caejamatabëcuene
panexainaenexa bajara Ponëjawabelia. Nexata, yapëtanetsi pacuenia Cristo

h 1:23 *petsitapibisialiwaishixaetsi*: Judíowi jume-aeba Jesús peliwaishi anijamatabëcuenebeje
yabara. Caejawa tsitapibisialiwaishitsi, tsipaji canaëjëta Dioso ayaicuenia pitoyajawa daitajiwi
cruzata petëpaewi. Itsajawa pijinia jume-aeba Mesías petëpaejawanexa. Bajarapijinia pacuenia,
apojudíowi-griegowi tsitabenatsiquejemaliwaishitsi, tsipaji jume-aeba petëpaenë peliwaishi peya-
wenonaejawanexatsi. Baitsi, petëpaewi taeyabiaba piasaëjibiwicuenia. Taema Mt 13:57; Lc 2:24;
Rom. 9:32. **i 1:27** *beweliamatabëcuenewi*: Waxaitsi apowajayapëtaewi, apocuenejëpaetsi
pamona penacujarubiwi, petsiyapëtaewi-ata, bajarapamona beweliamatabëcuenewi nacatae-
yabiaba. Taema Mt 11:25; Lc 10:21; Rom. 1:18-23; 1Co 3:18-20; 2Ti 3:15. **j 1:27** *bewelianamata-
citorobisaë*: Taema Mt 20:25; 23:5-7; Mc 9:35; 12:38-44; 1Ti 4:12; Sant. 2:1-9.

Jesús pejamatabëcueneta, Dioso paca-exana bitso paneyapëtaewi, pacawecua-ajibia-exana panijaneconimi,^k paca-itapeta papijajiwinexamë itsamonaewecua, pacaneconimatamotanu^l Cristo pejanata. ³¹ Bajarapacuenia Dioso wajanacato-exanaexae Jesucristo pejamatabëcueneta, nacatoxanepana waja-exanaenexa pacuenia jumaitsi Dioso pejumeliwaisibaxutota: «Pexaniacuenia pewënëxaniatsijawata, jiwi apobenacuenewënëxaniatsi pijacuata pexanaejawa yabara, itsamona peyaiyataenexatsi. Biji rajane, pexaniacuenia bewënëxaniatabiaba wajatuxanenë Jesucristo, peto-exanaejawatsi yabara, jiwi peyaiyataenexa waja-tuxanenë»,^m jai Dioso, pejumeliwaisibaxutota.

Pacuenia Pablo tsipaeba Jesucristo jiwi pesiawatëpaejawa, yabara peliwai

2 ¹ Patajamaonemë Cristo pejamatabëcueneta, pamatacabi ponajë paxamë-jawabelia, pacatsipaebabiabatsi beweliamatabëcuene taxainenëcuenia, Dioso taneyapëtaeya-exanaeliwai, jiwi aneonijibia petaejawanexa yabara. Bajarapaliwai mapanacuapijiwi caeto-ata apoyapëtae. Pamona bitso peyapëtaewi mapanacuapijiliwaisije canacuenebabiaba bëpënëajumënë pepaebijawata, itsamona peyaiyataenexatsi. Bajarapajumenë xanë apocanacuenebinë, Jesús peliwai patacatsipaebijawata. Biji rajane, jumenapebetsiaya pacatsipaebatsi, xaniawaetsia panejumeyapëtaenexa patacatsipaebiliwai. ² Bajarapacuenia xanë najamatabëcueneweretajë patacatsipaebinexa ë Jesucristo peliwai, "pacatsipaebinejewatsi itsacueneliwai pematatsënë. Nexata, bitso pacatsipaebabiabatsi Jesucristo wajanacasiwatëpaejawa cruzata, wajanacaneconimatamotsijawa yabara. ³ Pacujinae paxamëjawata pacatsipaebaponaponatsi Jesucristo peliwai, beweliamatabëcuenenë nataeya pacatsipaebatsi. Bitso natsijunawajë, bijiya patacatsipaebiyaniwa. Natsijamatabëcuenebëjanë, jamatabëcueneconeconecunajë Dioso pitabarata bajarapaliwai patacatsipaebijawata. ⁴ Xanë, pamatacabi Jesús peliwai pacatsipaebabiabatsi, jumenapebetsiaya pacatsipaebaponatsi, peyapëxanepanaeliwaisinëcuenia. Apopacatsipaebitsi bëpënëajumenëta pataneyaiyataenexamë, penamatamotsiliwaisinëcuenia-ata panetaenexa. ¡Jume baja cajena! Biji rajanë, Espiritu Santo, Dioso pesaëta tanejamatabëcueneceajëpaeya-exanaecuenia paebaponajë. Nexata, Espiritu Santo pacajumexaniataeya-exana^o patacatsipaebiliwai, panesiwanajamatabëcuene copabinexa Jesucristojawabelia. ⁵ Bajarapacuenia pacatsipaebatsi, pane-itaxutuajamatejemayaniwa mapanacuapijiwi pepaebiliwai pecanaëjësicuenewajaliawe, papecatsitaxanepanaexae bajarapaliwai. Biji rajane, pacatojitsipatsi pane-itaxutuajamatejemajawa Dioso pesaëta patacatsipaebaponaejawata Jesús peliwai.

Espiritu Santo pejamatabëcueneta, Dioso yapëtaeya-exana paliwai
bajayajawawerena muetsia xaina, Jesús pijajiwajawabelia

⁶ Itsiata baitsi jane, itsa patsipaebaponajë pejamatabëcuenenawe-retawanapaewijawabelia Dioso pijacuene, bajarapamonaejawabelia

k 1:30 *pacawecua-ajibia-exana panijaneconimi*: Taema Rom. 3:24. **l 1:30** *pacaneconimatamotanu*: Taema 2Co 5:21. **m 1:31** Taema Jer. 9:22-24, 2Co 10:17. **n 2:2** *ë Jesucristo peliwai*: Pablo pata Corinto tomarata, Jesucristo peliwai pepaebicujinae Atenas tomarata. Taema Hch. 17:16-34. Bajarapatomarata peyapëtaewi junatatsi pepaebinxexa Cristo peliwai. Nexata, Pablo peyapëtaewi pecuacuajiaucuenia paeba. Itsiata, bajarapamonae liwaisicapocaponatsi. Taema Hch. 17:32. **o 2:4** *pacajumexaniataeya-exana*: Taema Jn 16:8-11.

patsipaebaponajë pabëpënëaliwaisi Dioso paneyapëtaeya-exana. Bajara-pacuenia patsipaebi-atanë, itsiata apopapaebinë mapanacuapijiwi pecanaëjëtsicuenia, mapanacuapijiwi pewetsiwi-ata peyapëtaecuenia, tsipaji mapanacuapijiwi penamatacaitorobisaë bepijia werewerecaena. ⁷Pabëpënëaliwaisi patsipaebawanapajë, bajarapaliwaisi Dioso cajena bajayata tajëwelïa muetsia xainabuata.^p Matapania baja aeconoxae mapamatacabitaje Dioso nacayapëtaeya-exana bitso papexaniacuenëjawa^q nacato-exanaejitsia, wajajumexaniataexae Jesús peliwaisi. Bajarapacuenia nacua pexanaewajënaeya Dioso siwanajamatabëcuenewereta wajanacato-exanaenexa, mapanacuapijiwi wajanacayaiyataenexa,^r wajatuxanenë Jesucristo yajawa. ⁸Paliwaisi Dioso muetsia xainabuata bajayajawawerena Cristo yabara, itsanë-ata mapanacuanë pewetsiwiyajuwënë^s apojumeyapëtaecapanepae. Bajarapamonae peneta itsa jumeyapëtaejitsipa bajarapaliwaisi, nexata Cristo apobeyaxuabi tsipaetsi cruzata, ponë pepopetuxanenë, yajawa peyaiyataenëtsi Dioso. ⁹Bajarapaliwaisi, Dioso muetsia pexainabuatsiliwaisi yabara, bajayata profetanë, Isaías-pijinë, tajëwelïa yaquina bajaraxua pecopiapatsi-jawanexa. Dioso pejumeliwaisibaxutota jumaitsi mapacueniaje:

«Xua abaxë itsajiwi-ata apotae, apojumetae,
aposiwanajamatabëxainaenua, bajaraxua Dioso baja cajena tajëwelïa
tsiwajënaexaniawaeta perajutsinexa pamonaë Dioso piasiwawi»,^t jai
tajëwelïa Dioso pejumeliwaisibaxutota, jiwi peyawenonaejawanexa
yabara, Jesucristo pejamatabëcueneta.

¹⁰Itsiata baitsi jane, waxaitsi,^u Dioso nacayapëtaeya-exana Espiritu Santo pejamatabëcueneta, daxita xua Dioso nacatsiwajënaenajamatabëxaina wajanacato-exanaenexa, Cristo wajanacasiwätëpaejawa yabara. Orijiibia, Espiritu Santo, pejamatabëcueneyapëtaenëxae Dioso daxita xua bëpënëa siwanajamatabëxaina muetsia pexanaejawanexa, bajaraxua nacayapëtaeya-exana.

¹¹Espiritu Santo nacayapëtaeya-exanaenejewa, apoyapëtaetsi tsipae Dioso pesiwanajamatabëxainaëjawa. Yapëtanetsi pacuenia itsajiwi-ata apocuenecaëjëpaetsi peyapëtaenexa pacuenia itsajiwi bëpënëa siwanajamatabëxaina. Itsiata, bajarapajiwi pijacuata najamatabëcueneyapëtane. Bajarapijinia pacuenia, ëDioso pija-Espiritu Santo, yapëtane pacuenia Dioso bëpënëa siwanajamatabëxaina pexanaejawanexa. ¹²Waxaitsi baja cajena Dioso aponacatocopatsi wajamatabëcueneyapëtaenexa mapanacuapijiwi pecanaëjëtsicuenia. Biji rajane, nacatsijamatabëcuene-ecaeya-exana Espiritu Santo, peponaenë Diosojawawerena wajanacayawenonaenexa, xania-waetsia wajayapëtaenexa bitso papexaniacuenëjawanë Dioso nacato-exana,

p 2:7 *muetsia xainabuata*: Taema Rom. 16:25; Col. 1:26-27; 2:2; 4:3. **q 2:7** *papexaniacuenëjawa*: Taema Rom. 8:28-30; Efe. 1:6,12,14; Jn 17:22-24. **r 2:7** *wajanacayaiyataenexa*: Bajarapajume, gloriajume, wowaijumeta. Gloriajume anijamatabëcueneliwaisibeje xaina. Caejamatabëcueneliwaisi nacayapëtaeya-exana pacuenia Jesús pijajiwiitsi yajawa-ewetsianatsi mapanacuapijiwiije bajaraponaë. Itsajamatabëcueneliwaisi pijinia nacayapëtaeya-exana pacuenia mapanacuapijiwiije wënëxaniatsiana Jesús planeconijibinëxae, bajarapacuenia-ata Jesús pijajiwiitsi nacawënëxaniatsiana bajaraxua yabara, Dioso pijanacuatsia. **s 2:8** *pewetsiwiyajuwënë*: Nacua pewetsiwi yabara taema Hch. 3:17; 4:25-28; Lc 23:24. Itsa yabarajumaitsi Satanás-bana, itaboxowetsica pewetsiwi, taema Efe. 6:12; Col. 2:15. **t 2:9** Taema Isa. 64:4. **u 2:10** *waxaitsi*: Jesucristojawabelia wajasowanajamatabëcuenecopabiwi yabara jumaitsi.

Jesucristo pejamatabëcueneta. ¹³ Bajaraxuata, bajarapaliwaisi patacatsi-paebijawata, apopacatsipaebaponaetsi mapanacuapijicuene peyapëtaewije pecanaëjëtsicuenia. Biji rajane, pacatsipaebaponaetsi pacuenia Espíritu Santo paneyapëtaeya-exanapona, paxamë-ata Espíritu Santo papecajamatabëcuenematacaponaewi, paneyapëtaenexa bajarapaliwaisianë.

¹⁴ Biji rajane, pajiwi apojamatabëcuenematacaponaetsi Espíritu Santo, bajarapajiwi apocopiapitsi paliwaisi picani Espíritu Santo yapëtaeya-exanaejitsiatsi, tsipaji saya betsitantsiquejemaliwaisitsi. Apojumeyapëtaenua bajarapaliwaisianë, tsipaji apoxainae Espíritu Santo pejamatabëcuenematacaponaenexatsi, pejumeyapëtaeya-exanaenexatsi pajamatabëcuenexaina. ¹⁵ Itsiata, waxaitsi, Espíritu Santo wajanacatsijamatabëcuene-enaewi, bajaraPonë pejamatabëcueneta naca-cuenecaëjëpa wajacanaëjëtsinexa, xaniawaetsia wajayapëtaenexa pajamatabëcuene xaina daxita Espíritu Santo wajanacayapëtaeya-exanaejawanë. Nexata, Espíritu Santo apopetsijamatabëcuene-enaewitsi, Jesús peliwaisi pejume-aebiwi, apocuenecaëjëpaetsi xaniawaetsia wajanacatocanaëjëtsinexa Espíritu Santo pejamatabëcueneta, xua yabara nacayapëtaeya-exana. ¹⁶ Bajarapamonae apopecuenecaëjëpaejawatsi yabara, Dioso pejumeliwaisibaxutota, bajayata profetanëmi, Isafas-pijinë yaquina mapacueniaje:

«¿Detsa pajiwi cuenecaëjëpatsi pejamatabëcueneyapëtaejawa xua pepoPetuxanenë Dioso najamatabëxaina? ¡Ajibi cajena! ¿Jipatsa cuenecaëjëpatsi pemuxujiobijawa Dioso? ¡Ajibi cajena!»,^v jai Dioso pejumeliwaisibaxutota.

Itsiata, waxaitsi pacuenia Cristo jamatabëcuene-itsi,^w bajarajamatabëcuene-itsitsi, tsipaji Espíritu Santo nacatsijamatabëcuene-eca, wajanacayapëtaeya-exanaenexa pacuenia Cristo najamatabëxaina.

**Pacuenia Jesús pijajiwi Corintojawata najamatabëcuene-
itajëta abaxë apopejamatabëcueneliwaisinaweretsij
awa Dioso pijacuenejawalia, yabara peliwaisi**

3 ¹ Patajamonamë Cristo pejamatabëcueneta, aponecuenecaëjëpae patacacujarubinexa piayapëbejeliwaisianë, abaxë apopanejamatabëcueneliwaisi naweretsixae Cristo pijacuenejawalia. Espíritu Santo pacatsijamatabëcuene-ena-ata, patacasiwaxainaematacabianë^x pacatanetsi panejinawanapaejawa Espíritu Santo apopapecajamatabëcuenematacaponaewicuenia. Biji rajane, paxainame bepejewaxijamatabëcuene, papecajamatabëcuenematacaponaexae mapanacuapijiwi pecanaëjëtsicuenia. Bajaraxuata, pacacujarubatsi saya peyapëxanepanaeliwaisianë. ² Pacuenia penacuetojiwiyo rajutatsi saya ëmitobarëmene piapaenexa. Abaxë piatajawa wito aporajutsitsi pexaenexa. Bajarapijinia pacuenia, paxamë-ata, Cristo pijacuene apopacapanepaemë, apopanejamatabëcuene liwaisi naweretsixae.

v 2:16 Taema Isa. 40:13. w 2:16 pacuenia Cristo jamatabëcuene-itsi: Taema Jn 16:13-16; Rom. 8:28-29; Efe. 3:2-6. x 3:1 patacasiwaxainaematacabianë: Taema Hechos capítulo 18.

Bajaraxuata, apopacacujarubitsi piyapëbejeliwaisianë.⁷ Pacacujarubatsi saya bepenacuetojiwixicuenia, peyapëxanepanaeliwaisixi.⁸ Orijibia, abaxë tsiteca aeconoxae-ata, apopanejamatabëcuene liwaisi naweretsiwi Cristo pijacuenejawalia.³ Bajaraxuata, panajamatabëcuene-itajëtabiabame panejamatabëcuenefaefaenaejawa Cristojawabelia, mapanacuapijiwi peca-naëjëtsijamatabëcuene papecajamatabëcuenematacaponaexae, Espiritu Santo papecajamatabëcuenematacaponaejawawecua. Bajarapaliwaisi panexainaexae, namata-enetsia panacuenecaëbiababame. Nabijataeya namata-enetsia panajume-anaenotabiabame. Pepaebinë peli waisi yabara-ata panawecuanatsaname. Bajarapacuenia pane-exanawanapaexae, abaxë pacatsitecawanapame ëmapanacuapijicueneye.⁴ Pacujinae paxamëyaju-wënëwi jumaitsi tsabiabi paxanëbeje, yabara mapacueniaje: «Xanë raja saicaya Pablo pijaji witonënë», jai tsabiabi paxamëyajuwënëwi. Itsajiwi pijinia jumaitsi tsabiabi: «Xanë raja saicaya Apolos pijaji witonënë», ita jai tsabiabi paxamëyajuwënëwi, peneta catsitecawanapa ëmapanacuapijiwi pejamatabëcuenematacaponaecueniatsi.

⁵ Paxamë bajarapacuenia panajumaitsi-atamë paxanëbeje yabara, pa-aliwaisimatamobimë, tsipaji xanë, Apolos-beje, apopayaijamatabëcuenenënëbeje. Paxanëbeje-ata saya Dioso papijaji witonënëbeje. Patacatsipaebijamatabëcuenetabeje, pajumexaniataneme Jesús peli waisi. Paxanëbeje-ata saya patonacuenebajëbeje wajatuxanenë Jesucristo pacuenia pane-itorobabeje.⁶ Bajarapacuenia, patacatsipaebixae Jesús peli waisi, xanë copiaya beta-ubinë bajarapaliwaisi panejamatabë-ëthëtota. Apolos pijinia cotocaewi bepetsimata-epacaponanë merata, pematatsënë paliwaisianë pacatsipaebapona pewajënaeyabelia. Itsiata baitsi jane, Dioso juwia-exanapona bajarapaliwaisi panejamatabë-ëthëtota, panejamatabëcueneliwaisi witsabaponaenexa pijacuenejawalia.⁷ Bajaraxuata, ponë pe-ubinë, ponë-ata petsimata-epacaenë najëpaeya apo-ayaijamatabëcuenenëbeje Dioso pitabarata. Biji rajane, caenë Dioso ayaijamatabëcuenenë dexitawecua, tsipaji bajara Ponë pacatsijamatabëcuenewitsabia-exanapona pejumeliwaisi, itsamonaepacatsipaebijawa.⁸ Nexata, pajiwi copiaya tsipaeba Jesús peli waisi, bajarapajiwi bepetsijamatabëcuene-ubiwi Dioso pejumeliwaisi. Pajiwi pijinia cotocaewi tsipaebapona pewajënaeyabelia Dioso pejumeliwaisi bajarapamonaejawabelia, bajarapajiwi bepetsimata-epacaewi, pejamatabëcuenewitsabia-exanaenexa. Saicaya penacuenebicuene

y 3:2 *piyapëbejeliwaisianë*: Bajarapitsiliwaisianë bepiatajawito, tsipaji bepijiayo apojumeyapëtaetsi, ita jume, nacatsita piataneliwaisianë. Mapitsiliwaisianëje: Jesús pijajiwi itsamonae bejibobia-exanaenatsi Jesús pijaji wixae (Hch. 5:41, 9:16, Rom. 8:17), Jesús pijajiwi matatoxetsia benacaemonaecuenia benatane, pepopijamonaewecua (Lc 14:26), Jesús pijajiwi besai-cayawiriawi bejinawanapa pijatomarapiji wituatujëta (2Co 6:17), Jesús pijajiwi bexainanua saicaya jamatabëcueneliwaisi (Efe. 1:4, 1Pd 1:15), saicaya pena-ewetsiliwaisianëna pijanacuapiji wewecua. Baitsi, paliwaisianë nacatsita piataneli waisi, piyapëbejeliwaisianë-ata, waja-exanawanapanaexa, ita jume, wajanacatocopiatsijawanexa Jesús pijaji wixae, bajaraxuanë bepiatajawito waxaitsinexa. z 3:2 *peyapëxanepanaeliwaisixi*: Bajarapitsiliwaisianë mapawiriawaisianëje: Jesús peli waisi, xua yabara mapanacuapiji wixae jinawanapa Diosowecua, xua yabara Dioso aneonjibia taejitsia pijaneconi pexainaewimi, xua yabara jiwi nabautizabia-exana, pacuenianua Jesús pijajiwi jinawanapaejitsia Dioso pijanacuatatsia. Taema Heb. 5:12-13.

xainae-ata bajarapajiwi beje Dioso pijacuenejawalia, caenajamatabëcuene-jëpaecuene xainabeje. Nexata, Dioso matamotsianatsi caenë canacujitsia saicaya petonacuenebimatamo. ⁹Paxanëbeje raja Dioso pijacuene patatonajuanacuenebinëbeje. Paxamë raja pijinia Dioso bepapijapabimë, itsajota paxanëbeje panebarë-ubaponabeje Dioso pejumeliwaisi.

Bajarapijinia pacuenia, Dioso bepapijabomë, paboxaneto^a paxanëbeje patonacuenebaponajëbeje. ¹⁰Nexata xanë, Dioso pijabonexa, tatotsiwajënaebuatsinë piatajajawa,^b copiaya pejumeliwaisi patacat-sipaebixae paxamëjawata. Dioso tane-asiwajamatabëcuene neyawenona bajarapacuenia tatsiwajënaejebijawa bepepotayapëtaenëcuenia bo ta-exanaejawa. Bajarapacuenia ta-exanaecujinae, Dioso tocopata itsamonae pematatsënëa pepaebaponaenexa pejumeliwaisi paxamëjawabelia. Nexata, pacuenia itsamonae petsiwajënaebuatsijawa piatajajawa pejumawereca adobetonë bacatsanapona, boyenepanajawanë penacuenebaponaenexa, bajarapacuenia exana bajarapamonae. Itsiata, pamona cotocaewi Dioso pejumeliwaisi pacatsipaebapona, xania-waetsia benaliwaisi-eweta pebijianaeyaniwa pabo tonacueneba Dioso paxamëtuatuajëta. ¹¹Bonexa piatajajawa petsiwajënaebuatsicujinae, itsajiwi-ata apocuenecaëjëpaetsi icatsia petsiwajënaebuatsinexa itsapiatajajawa, tsipaji boyenepananë bijianaejitsipa. Bajarapijinia pacuenia, copiaya patacatsipaebiliwaisi, xua jumaiti Jesucristo yabara, bajaraxua betatsiwajënae buatsipiatajajawa. Bajaraxuata, apoxanepanae itsajiwi-ata petsipaebinexa itsaliwaisi, pejanaliwaisicuenia, becopiaya pepaebiliwaisi, tsipaji caeliwaisi bepetsiwajënae buatsiliwaisi, Jesús peliwaisi. ¹²Nexata, bo piatajajawa petsiwajënaebuatsicujinae, boyenepananë pexanaenexa jiwi xaina anijacuenebeje pecanacuenebinexa; piatajawajanëta, apopiajamatabësaëjawanë-ata. Pamona piatajawanë canacueneba, pacuenia ibotonë, oronanijawanë, palatananijawanë, penamatamotsi-ibojawanë-ata, bajarapamonae pexanaebo bajayajebi ajamatabësaë tsabiabi. Bajarapijinia pacuenia, pamona xaniawaetsia Dioso peliwaisi cujaruba pejumetaewitsijawabelia, ajamatabëcuensaë tsawanapae pewajënaeyabelia, pexanawanapaenexa Dioso pejitsipaecuene. Pamona pijinia canacueneba apopiajamatabësaëjawanë, pacuenia naejawanë, patebaxutoxita, be-arroz-baxutoxita-ata, bajarapamonae pexanaebo bajayajebi apo-ajamatabësaë. Nexata, daxitabo isotota weriajawijitsipa. Bajarapijinia pacuenia, pamona cujaruba saya pejamatabëcueneta pecapitsapaeliwaisianë pejumetaewitsijawabelia, apo-ajamatabëcuenesaë tsane Dioso peliwaisijawabelia. Bepijiayo wejamatatabëcuenewerewerecaenatsi. ¹³Pamatacabi Cristo patsianica, caejiwi

a 3:9 paboxaneto: Taema 1Co 3:16-17, 6:19; Efe. 2:18-22. **b 3:10 tatotsiwajënaebuatsinë piatajajawa:** Bajaraxua wowaijumeta pewënë fundamento. Pacuenia jiwitonë xaniawaetsia naesiturutonë mëthëca, boyenepana piasaënexa, bajarapijinia pacuenia adobëbonë penacuenebiwi tsiwajënaejeba piatajafundamentojawa, xaniawaetsia boyenepana penucaenexa. Nexata, pacuenia pexaniacuenia pexanaefundamentojawa xaniawaetsia boyenepana yotabiaba, bajarapijinia pacuenia Jesús Peliwaisi xaniawaetsia pepaebixae, jiwi itsa jumexaniatane, bajarapaliwaisi jamatabëcueneyotabiabianatsi, pejinawanapaenexa Dioso pejitsipaecuenia.

canacujitsia cuenecanaējētaṭonaena,^c peyapētaenexa pacuenia rajuta-
ponaejitsiatsi petonacuenebijamatabēcuene. Bajarapamatacabī Cristo
yajawapatsianica isoto.^d Nexata, bajarapa-isotota ējētaṭonaena pena-
cuenebijawanē, peyapētaeya-exanaenexa petonacuenebijiwitsijawabelia
itsa canacueneba piatajajawata, itsa jume, apopijamatabēsaējawata.
¹⁴Daxita bajarapapenacuenebijawanē,^e itsa nacopatsipa itsacuenejawa
weriapaenejewa, isotota pe-ējētsicujinae, nexata wajatuxanenē Jesuc-
risto rajutsiana bitso pexaniajawa, bajarapapenacuenebijamatabēcuene.
¹⁵Itsiata baitsi jane, bajarapanacuenebijawa isotota itsa toweriapae-
natsi pe-ējētsijawata, nexata wajatuxanenē Jesucristo apoxinae tsane
xua yabara pexaniajawa rajutsijitsiatsi. Penacuenebijawa toweriajawi-
atatsi, itsiata penacuenibinē aponaxuabi tsane Diosowecua. BajaraPonē
bepeyasipitsapaenē tsane isoto.

¹⁶¿Paxamē tsaja apopayapētaemē Dioso papijatemplobocuenemē,^f
Espíritu Santo-ata papecatsijamatabēcuene-ecaejawa?^g ¹⁷Bajaraxuata,
pajiwi bijianaena^h bajarapatemplobo, juya bajarapajiwi Dioso werebiabia-
natsi.ⁱ Bajarapacuenia exanaena, tsipaji pijatemplobo papeca-exanaexae
Jesús papijajiwimē, caecuenia pacatsata mapanacuapijiwiwecua, saicaya

c 3:13 cuenecanaējētaṭonaena: Jesús pijajiwi pecuenecanaējētsijawata, bajarapacuenia apo-
exanae peyapētaenexa itsa jonejitsia Dioso pijanacuayabetsia, itsa jume, apowerewerecae-
isotojawabelia. Bajarapacuenia exana peyapētaenexa pacuenia caejiwi canacujitsia rajuta-
ponaejitsia, pecabarēyanexa petonacuenebijamatabēcuene. Taema 2Co 5:10. Nexata, pajiwi
beweliamatabēcuene nataeya, xaniawaetsia cujaruba Dioso peliwaissi, xaniawaetsia ponapo-
nanua Dioso pejitsipaecuenia, bajarapajiwi matatoxenetsia pexaniajawa rajutsianatsi. Pajiwi
pijinia cujaruba Dioso peliwaissi, matajērētsiaya pijacuata pecapitsapaeliwaissi, pijasalinailiwaissi-
ata, itsa bijiaja ponapona Dioso pejitsipaecuenewecua, itsa tonacuenebaponaponanua Dioso
pijacuene ayaijamatabēcuenejiwi nataeya, bajarapajiwi aporajutsitsi tsane bitso pexaniajawa
pecabarēyajawanexa. Baitsi, daxita penacuenebijawanēmi toweriapenaenatsi isotota. Taema
1Co 1:19-2:16. **d 3:13 isoto:** Bajaraxua yabarajumaitsi Dioso Peliwaissi. Taema Jer. 5:14; 20:9;
23:29; Mal. 3:2-3; Lc 24:32; Sal. 119:8-9; 139:23-24. **e 3:14 Bajarapapenacuenebijawanē:**
Pacuenia oronani, palatanani-ata isotota pesetsijawata cotanaeya-exana piabejewanē, peset-
sinē pexuabaponaenexa, bajarapacuenia Cristo canacueneba, Dioso peliwaissi be-isotocuenia
pecanaējētsijawata pijajiwi, yapētaeya-exana itsa pepaebiliwaissi, pexanaecueniawanēnua,
cunejēpa Dioso peliwaissi pejumaitsicuenia, itsa jume, itsa cunejēpa mapanacuapijiwi pexanae-
cuenije. **f 3:16 Dioso papijatemplobocuenemē:** Bajarapajumebeje nacayapētaeya-exana pacue-
nia Dioso nacatane, caejiwitsi canacujitsia, pijabocuenia wajanacatsijamatabē-ecaexae Espíritu
Santota. Daxita Jesucristojawabelia wajasiiwanajamatabēcuenecopabiwi, Dioso naca-exana
pijatemplobo. Bajarapijinia pacuenia, daxitatsi pamonaē Jesús peliwaissi pejumexaniataewi
caenacuata Dioso pijabo exanatsi. Jiwi tane be-adobetonē pijabo pecanacuenebinexa. Taema
1Pd 2:5-7. **g 3:16 Espiritu Santo papecatsijamatabēcuene-ecaejawa:** Yapētanetsi pacuenia Dioso
caenē-ata, acueyabi ponēbejecuenia naitajētabiaba; Dioso, Jesús paxa; Jesús, Dioso pexēnato;
Espíritu Santo, Dioso apowajataecapanepaenē. Nexata, Espíritu itsa nacatsijamatabēcuene-eca,
yajawa-ecabeje Dioso, Jesús-beje. Bajaraxuata, daxita Jesucristojawabelia pesiiwanajamatabē-
cuenecopabiwi, Dioso pijatemplobo exanatsi. **h 3:17 bijianaena:** ¿Detsa pacuenia bijianaen-
jitsiatsi Dioso pijatemplobo? Waja-exanaejawata wajanacaetuatsitaxunae penawijatabiabitaxu-
naenexa, taema Mt 21:12-13; Mc 11:15-17; Jn 1:14-17. Corintios-baxutota Pablo wēnējonapona
mapacueniawanēje: Penajuajumexaniataewi penawecuatsanaecueni, taema 1Co 1:10-17; Dioso
pexi pecanaējētsijawa mapanacuapijiwi pecanaējētsicuenia Espiritu Santo pejamatabēcueneya-
wenonaecuenetsiawecua, taema 1Co 1:18-3:23, pijacuata pecapitsapaeliwaissi itsa paeba pexania-
jailiwaissicuenia Jesús pijajiwi pejumexaniataenexa, taema 1Co 3:9-17. Najamatabēcuenecataitsi-
nejewa pibisiacuene pexanaeyaniwa pejinawanapaecueni, taema 1Co 4:1-5:12, itsa matajērēta
mapanacuapijiwi pena-ewetsicueni Dioso pewetsicuenetsijawabelia, taema 1Co 6, daxita pena-
juajumexaniataewi Jesús peliwaissi xaniawaetsia itsa apo-asiwa xaniawaetsia, taema 1Co 13.
i 3:17 werebiabianatsi: Taema 1Co 5:5; 2Pd 2:12.

paneyajawajinawanapaenexa Dioso. Bajaraxuata, apopacatoxanepanae pane-exanaejawa mapanacuapijiwi pexanaecuenē,^j tsipaji bajarapacuenē pane-exanaejawata pabijianaējitsipame Dioso pijatemplobo.

¹⁸ Bajaraxuata, Dioso pijatemplobo panebijianaēyaniwa, pētsa paxamēya-juwēnējiwi panajamatabēcueneyamaxē-itojorobame, peyapētaexae itsamonaewecua mapanacuapijiliwaisi pecanaējētsicuenia!^k Biji rajane, benaexana apo-peyapētaenēcuenia mapanacuapijicuene yabaraje, juya Dioso pejumeliwaisita pecanaējētsinē, penaexanaenexa. ¹⁹ Daxita mapanacuapijiwi paliwaisi tsitanamatamotatsi, Diosonexa tsitanatsiquejemaliwaisitsi. Pacuenia jumaitsi Dioso pejumeliwaisibaxutota:

«Dioso cajena wecuapitsiana mapanacuapijiwi pecanaējētsiliwaisi, bitso peyapētaewi-ata, juya Dioso petocopsatsinexa bajarapaliwaisita penajamatabēcueneyamaxē-itojorobinexa»,^l jai Dioso pejumeliwaisibaxutota.

²⁰ Orijiibia, itsabaxutota nacua-ewetsinēmi David-pijinē jumaitsi mapacueniaje:

«Pepopetuxanenē, Dioso, baja cajena yapētane piamatamobicuene mapanacuapijiliwaisije, bitso peyapētaewi penajamatabēxainaecuene-ata»,^m jai Dioso pejumeliwaisibaxutota.

²¹ Dioso baja cajena pacatocopata padaxitamē najēpaeya panenamatawenonaejawa, panexainawanapaenexa. Bajaraxuata, itsajiwi-ata paxamēyajuwēnējiwi, apobenatae be-ayaijamatabēcuenējiwi, pewēnajiwitonē pecujarubixaetsi, tsipaji paxanē-ata saya pajiwinē. ²² Dioso peyapētaexae daxita panenamatawenonaejawa, panecopata paxanē, Pablonē, Apolos, Pedro, najēpaeya patacajamatabēcueneyawenonaenexa. Pacatocopatana mapanacuae, piasaējamatabēcuenē, petēpaejamatabēcuenē, ajenapijicuene, merawiapijicuene-ata. Daxita xua Dioso pacarajuta panijajawa tsawanapae. ²³ Bajarapacuenia Cristo, paxamē papijajiwimē tsawanapae papecaxainaexae, pejitsipaecuenia paneto-exanawanapaenexa. Cristo-ata rabaja pijinia Dioso xainatsi pijajiwitonēcuenia, Dioso pejitsipaecuenia peto-exanaponaponaexae. Bajaraxuata, aponacatoxanepanae wajataejawa Cristo pijajiwiyajuwēnēwi, be-ayaijamatabēcuenewi Cristowecua.

j 3:17 *mapanacuapijiwi pexanaecuenē*: Bajarapacuenējawalia junua daxita xua jiwi exana pena-ewetsinexa Diosowecua, pitaxutuajamatejemanexa. Pacuenia jumaitsi 1Co 3:18-23 pajiji ayaijamatabēcuenewi natane, siwanajamatabēcuenecopatabiaba peyapētaecuenējawalia, itsa jume, itsanē pepaebiliwaisijawalia pena-ewetsinexa Diosonējewa. Itsamonae pijinia siwanajamatabēcuenecopatabiaba mapanacuapijiwi pematawajibicuene, Diosowecua pena-ewetsinexa. Penacobetoxotsinē pijinia siwanajamatabēcuenecopatabiaba penacobetoxotsicuenējawalia pena-ewetsinexa. Bajarapacuenia waja-exanaejawata, bijianatsi Dioso pijatemplobo. k 3:18 *mapanacuapijiliwaisi pecanaējētsicuenia*: Majotaje Pablo yabaracuaicuaijai pacuenia itsamonae Jesús peliwaisi pejumexaniataewi be-ayaijamatabēcuenewi natane, itsamonae pijajiwitonēcuenia penataexae (1Co 1:12-13; 15:1-4), ayaibitsaēto be-ayaijamatabēcuenewi natane, tsipaji apomuxujiobi pibisiacuene pexanaejijiwi, pecopatsinexa pexanaecuenē (1Co 5:1-2, 6:1-13), itsamonae be-ayaijamatabēcuenewi natane, tsipaji natocanaējēta pibisiacuene apo-pexanaejawa, itsa exana xua itsamonae tsitapibisiacuenetsi (1Co 8:1-13), itsamonae pijinia, be-ayaijamatabēcuenewi natane, tsipaji asiwaya aponajuanabani penajuanacaeuatsiwi Santa Cena pexanaejawata (1Co11:28-34), itsamonae pijinia, be-ayaijamatabēcuenewi natane, Espiritu Santo pejamatabēcuenecaējēpaeya-exanaejawatsi yabara (1Co 12:1-9). l 3:19 Taema Job 5:13. m 3:20 Taema Sal. 94:11.

Apóstolewi, penacuenebawanapaejawa, yabara peliwaishi

4 ¹¡Paxamē saya panataema Cristo papijajiwicuenenē, tsipaji raja bajaraPonē panetsicopata jiwi patatsipaebawanapaejawa, paliwaishi picanī Dioso, pepobajayata, muetsia xainabuata! ²Xua wajatuxanenē Cristo panetsicopata paxanē patato-exanaenexa, bepa-exanawanapajē, patanajamatabēcuenē-itajētsinexa caejamatabēcuenē pataxainaejawa bajaraPonējawabelia. ³Bajaraxuata, xanē bitso aponebējaiya-exanae, jiwi tanecuenecanaējētsijawa yabara, xua Dioso netsicopata. Tajacuatnua apocuenecanaējētsinē bajaraxua yabara, tsipaji caenē Dioso tsicarucatsi tane-cuenecanaējētsinexa tatonacuenebijawa. ⁴Xanē tanacuenebijawa yabara itsaliwaishi aponatoxainanē picanī, xua yabara meta xaniawaetsia apotonacuenebinē wajatuxanenē. Itsiata, apocanaējētsinē ta-aneconijibijawa wajatuxanenē pitabarata, tsipaji caenē, wajatuxanenē, tsicarucatsi itsamatacabijawabelia wajatuxanenē pijacuata xaniawaetsia tanacuenecanaējētsijawanexa bajaraxua yabara. ⁵Bajaraxuata, paca-itawetatsi panebaracuaicuajijawa itsamonae Dioso petonacuenebawanapaewi, wajatuxanenē pepatsiwajēnaeya. BajaraPonē rajane pepatsimatacabi, bajarapamonae petonacuenebawanapaejawanēmi cuene-itajētaponanatsi muetsia pexanaejawanēmi, bēpēnē penajamatabēxainaejawanēmi-ata. Bajaraxuacujinae, Dioso wēnē-xaniataponanē caejiwi canacujitsia, petonacuenebijamatabēcuenetsi.

⁶Patajamonaemē Cristo pejamatabēcueneta, bajaraxuata pacatoyaquinatsi paxanēbeje, Apolos-beje patacatsitanacuenē-itajētsijawatabeje, patacayapētaeya-exanaenexa xaniawaetsia pepaebiwi panejumecanaējētsinexa ēDioso peliwaishi, pacuenia nacayapētaeya-exana Dioso pejumeliwaishibaxutota.^a Bajarapacuenia pane-exanaejawata, apopataemē tsane itsanē Dioso pejumeliwaishi pepaebinē be-ayaijamatabēcuenē pexainanē. Bajaraxuata, apopacatoxanepanae asiwaya panetaejawa caenē, bewelia panetaenexa itsanē. ⁷Dioso cajena caejiwi-ata apopacatocopatsi bijiaya panecuenecanaējētsinexa panewēnajiwi. Daxita xua paxainame, Dioso baja cajena pacarajuta.^o Apopacatoxanepanaenua bepanijacuata panepitsijawa bajaraxuanē, xua yabara be-ayaijamatabēcuenewi panataejitsiamē.

⁸Paxamē baja aeconoxae panaexaname bitso panexainae. Apopacatosajinae itsacuenejawa panenamatawenonaejawa. Panatanemenua paxanēnejewa bepaneyanacua-ewetsiwi daxitajiwi. Bajaraxuata, paxanē, patacacujarubiwi, apopanamatawenonaemē itsacuenejawa yabara. Itsiata, panijacuata panacuenebaranajume-itacanitame. Bitso picanī, xanepanaejitsipa itsa paxaniajamē tsipae panacuenewajunupaebijawa, tsipaji bajarapacuenia pacayajawayanacua-ewetsipatsi^p daxita nacuapijiwi. ⁹Bajarapacuenia netsita Dioso apopanecopatsi pa-apóstolewinē pata-exanaenexa, pacuenia picanī paxamē panacuenebabaracuaicuajiamē. Biji rajane, panecopata patajinawanapaenexa daxitawecua pecotocaewibitsaētojawatalia, itsapabitsaētojawata panajetarubenajē patananeconitsiwicuenia patanebeyebinexa.

n 4:6 *pejumeliwaishibaxutota*: Taema Isa. 2:22; Jer. 17:5-6; Mt 23:8-10; Rom. 12:3; 1Co 3:21; Flp. 2:3-8; 1Pd 5:5. **o 4:7** *Dioso baja cajena pacarajuta*: Taema Deut. 8:11-20; Prov. 30:7-9.
p 4:8 *pacayajawayanacua-ewetsipatsi*: Taema 2Ti 2:12; Apoc. 20:6.

Nexata, daxitanacuapijiwi, ángelewi-ata, nacaetuata patanetaenexa patanebeyejebijawa.⁹ ¹⁰Paxanë, pa-apóstolewinë, Cristo papijajiwixaenë, itsamonae panetane bepata-ajamatabëcuenecowëbiwi. Paxamë juya pacatane bitso paneyapëtaewicuenia, Dioso papecajamatabëcueneyawenonaexae, Cristo pejamatabëcueneta. Paxanë pijinia Cristo papijajiwixaenë, itsamonae panetane bepata-ajamatabëcuenesaëjibiwi. Paxamë juya pacatane pane-ajamatabëcuenesaëwi. Paxanë itsamonae apopaneyaityatae, bewelia patanetaexae Cristo pejamatabëcueneta, paxamë juya itsamonae pacayaiyatane. ¹¹Bajarapacuenia patanetaexae, tsitecaeya apopacopatsinë nabejio-bitsiaya patajinawanapaejawa. Nexata, itsajawata patajani tsabiabi. Mera pajitsipabiabjê. Apopaxainabiabinë patanaxatabijawa. Jiwi panebejiobia-exanabiaba, pecobeta patanebecuenia. Apopaxainaenë pepacune patajabonë. ¹²Pacueranabiabjê bitso, patanacuenebabiabixae patacobeta,[†] patanaewetsinexa. Jiwi pibisiacuenia itsa panebijataeyabiaba, paxanë itsiata, patojitsipabiabjê bajarapamonae Dioso pexaniacuenia peyawenonabiabine-xatsi. Pa-ajamatabëcuenesaenë tsabiabi itsamonae panebejiobia-exanabiabi-ata. ¹³Pibisiacuenia panebaracuaicuaijai-ata itsamonaejawabelia, itsiata jamatabëcuenexanepanaeya pajumecanawiatabiabjê. Orijiibia, Jesús peliwaisi patatsipaebanajetarubenaexae, ajena, mapamatacabijawaberena-ataje, mapanacuapijiwi panetaeyabiaba bepenapenetsijawanë.

¹⁴Apopacatoyaquinaetsi mapacueniaje pataca-urabinexa, biji rajane, taxicuenia xaniawaetsia patacamuxujiobinexa, pataca-asiwaxae. ¹⁵Paxainae-atamë tsipae diez mil ponëbeje papecacujarubiwinexa, Cristo peliwaisi, Jesús papijajiwixaemë. Itsiata, caenëne panexainame pane-axanëcuenia, patacatsipaebixae Cristo peliwaisi, panesiwanajamatabëcuenecopabinexa Jesucristojawabelia. Bajaraxuata, xanë bepane-axanë panetaneme, tsipaji Cristo peliwaisita pacawitsatsi. ¹⁶Bajaraxuata, asaëyata pacamuxujiobatsi, patacatsita-exanaponaponaecuenia[‡] baja necuenejëpaeya panejinawanapaenexa.

¹⁷Bajarapajamatabëcuene yabara, Timoteo pacato-itorobaliatsi paxamëjawabelia. Bajaraponë bitso ta-asiwanë; betaxënato tataenë Cristo pejamatabëcueneta. Caejamatabëcuene pexainaenë Diosojawabelia. Nexata, itsa patsialia, bajaraponë pacanajamatabënapitsia-exanaena, pacuenia xanë ponaponajê, Jesucristo pijajiwitonë-xaenë, paxamëtuatuajêta.[†] Pacanajamatabënapitsia-exanaenanua patacacujarubiliwaisimi, paliwaisi cujarubanajetarucajê daxita Jesús pijajiwijawabelia, panacuanëjawa jinawanapa. ¹⁸Itsamonae paxamëyajuwënëwi, be-ayaijamatabëcuenewi natane xanëwecua.

q 4:9 *patanebeyejebijawa*: Taema 1Co 15:32. Bajayatami, Roma nacuapijiwi pijawajabitsaë, pecuene-amoneyabicujinae itsanacuapijiwi, caponabiaba petaicaewimi pepobërëtocuenia. Nexata, petaicaewituatuajêta, pamonae capata coliseojawata pebeyejebia-exanaenexatsi daxitajiwi pitabarata, bajarapamonae najetarubenabiaba pecotocaewibitsaëttojawatalia. r 4:12 *patanacuenebabiabixae patacobeta*: Taema 1Ts 2:9; 2Ts 3:8; 2Co 11:9. s 4:16 *patacatsita-exanaponaponaecuenia*: Taema 1Co 11:1; Flp. 3:17. t 4:17 *paxamëtuatuajêta*: Taema Hch. 18. Bajarajota, yapëtanetsi Timoteo peyajawaponaejawa Pablo Corinto tomarajawabelia, petsipaebinexa Jesús peliwaisi. Bajaraxuata, yapëtane daxita Pablo pexanaecune bajarapatomarata. Nexata, Pablo icatsia itorobijitsia Timoteo, Corinto tomarajawabelia, pecuene-xanetsinexa Jesús pijajiwi, Corinto tomarata.

Bajarapamonae jamatabëcuenenawëxaniabiaya jamatabëjumaitsi: «Pablo rabaja apopatsi tsane, patanecuenexanetsinexa», jamatabë-jai xanë yabara. ¹⁹Itsiata baitsi jane, Dioso itsa netocopatsiana patacataenexa, ponaenajë bepijiayo paxamëjawabelia. Bajarapacuenia tajacuata taenajë, pacuenia jamatabëcuene-itsi tsawanapae pamonae, be-ayaijamatabëcuenewi penataewi. Yapëtaenajë itsa bajarapamonae pepacuenie ajamatabëcuenesaë, pexanaenexa pacuenia jumaitsi, itsa xaniajai penacuenecacuaicuaijaicuenia exanawanapa. ²⁰Pamonae penacajonewi Dioso peyanacua-ewetsicueniejawalia, peneta nacuenie-itajëtawanapa pejinawanapaejawata Dioso pesaëta; apo-ëpenacuenewajunupaebicuenia. ²¹¿Detsa pacuenia pajitsipame patacasiwaxainaejawa? ¿Pajitsipame anaeyacuenia patacananeconitsia-exanaejawa? Itsa jume, ¿Asiwaya, patacataejawa jamatabëcuenexanepanaeya? ¡Panacuenecanaëjëre nexata!

Pablo itoroba penawecuapitsapaenexa Jesús pijajiwiutuajëta, bitso pibisiacuene pexanaponaponaenë

5 ¹Daxitajiwi yapëtane paxamëtuatuajëta peponaponaejawa itsanë pepitaponaponaejawa penawa,“ baitsi paxa pijawacowëwa. Bajaraponë papibisiacuene exanapona, bitso piabejewa. Jesús peliwaitsi apocejumexaniataewi-ata, bajarapitsipibisiacuene apo-exanae. ²Bitso bajarapapiabejecuene exanaponaponae-ata, paxamë apopacuenie-itawetsimë. Bitso picanı bepayapijiwi-auramë, bajarapapibisiacuene pexanaponaponaexae. Caranata, saya be-ayaijamatabëcuenewi panataneme,“ tsipaji jamatabëcuenenawëxaniabiaya panatocanaëjëtame panejamatatabëcueneliwaitsi naweretsijawa” Dioso pijacuenejawata. Apopacatoxanepanae cajena bajarapacuenia panenataejawa. Peneta, itsa Dioso pijacueniejawalia pajamatabëcueneliwaitsi naweretsipame, nexata pacatsi-atane tsipae bajaraponë pijaneconi. Bitso payapijiwi-auramënua tsipae. Nexata baja, panawecuapitsapaejitsipame. ³Xanë aponaponaponae-atanë paxamëjawata, itsiata tajamatabëcuene pona-pona paxamëjawata. Bajarapacuenia tajamatabëcuene peponaponae-xae paxamëjawata, nexata naneconitsia-exanaë. ⁴Nexata, pacujinaeta panacaetuatsianame bajaraponë pijaliwaitsi yabara, bajarapaepa-tota xanë bepatacayajawa tsane. Panajamatabënapirenua wajatuxanenë Jesucristo-ata pesaë, papecayajawajawa bajarajota. Bajarapacuenia panenacaetuatsijawata, wajatuxanenë Jesucristo pewënëta,

u 5:1 penawa: Dioso itaweta pijajiwi pitapetsiyaniwa penawajiwi. Taema Lev. 18:8, 20:11.

v 5:2 be-ayaijamatabëcuenewi panataneme: 1Ti 1:20; Mt 18:17-18, 2Co 6:14-17; Efe. 5:11-12. Yapëtanetsi bajarapamonae be-ayaijamatabëcuenewi penataejawa mapajamatabëcuenianë yabaraje: itsamonae pijajiwitonëcuenia saicaya natane (1Co 1:12-13; 15:1-4), apomuxujiobi pibisiacuene pexanaejiji, pecopatsinexa pexanaecuenie (1Co 5:1-2, 6:1-13), exanae-ata xua itsamonae tsitapibisiacuenetsi, aponatocanaëjëtsi pibisiacueniejawa (1Co 8:1-13), asiwaya apopenajuaxaexae Santa Cena pexanaejawata (1Co 11:28-34), ayaijamatabëcuenewi natanenua itsamonaewecua, Espiritu Santo pejamatabëcuenecaëjëpaeya-exanaecuenetsi yabara (1Co 12:1-9). Daxita bajaraxua yabara, jamatabëcuenenawëxa niabiaya natane bepejamatabëcueneliwaitsinaweretsiwi Dioso pijacueniejawata, mapanacuapijiwiliwaitsije tsitecaeya jamatabëcuenematacaponae-atatsi.

w 5:2 panejamatabëcueneliwaitsi naweretsijawa: Taema 1Co 4:18-19; 6:12; 10:23; 3:18; 8:12.

⁵paca-itorobatsi panenawecuacapsapaenexa^x pibisiacuene pexanaponaponaenē paxamētuatujēta. ¡Pacopare pepodowathi, Satanás pecobeyabelia, bepejiobicuena peponaponaenexa,^y bajarapacuenia penacuenecopatsinexa pibisiacuene pexanaejawa! Satanás pecobeyabelia pacopatsi-atamē, itsiata baitsi jane, pejamatabēcujiruyo capanepaenatsi pamatacabi wajatuxanenē Jesús icatsia patsianica.

⁶Paxamē picani apopaxainaemē xua yabara ayaijamatabēcuenewi panataejitsiamē, tsipaji bajaraponē papibisiacuene exanaponapona, pacajamatabēcuenebijianaejitsipa.^z Bajarapacuenia yabara jiwi jumaitsi tsabiabi: «Tsiquirilevadurajawayo-ata bafufunaeya-exana daxita pan pexanaematabēnexa, ayaimatabē-ata», jai tsabiabi. Bajarapijini pacuenia, jiwi pibisiacuene pexanaejawa. Caejiwi pibisiacuene exanae-ata, belia itsiata, yacāē-jēpaejitsipa daxita Jesús pijajiwijawa. ⁷Bajarapacuenia paca-itorobatsi, panenawecuacapsapaenexa bajaraponē, padaxitamē papecajamatabēcuenē bijianaeyaniwa. Pacuenia paxanē pajudíowinē Pascuafiestamatacabi^a panawecuapenetabiabajā patajabonēwecua daxita perujumatabē,^b levadura pexanaematabēanē, pataxaeyabiabinexa ēpejanamatabē pexanaepan-jawanē, levadura matajērēabinejewa. Bajarapacuenia perujumatabēcuenia panawecuacapsapaenexa pibisiacuene pexanaponaponaejijiwi, pejanamatabēcuenia levaduramatajērēatsinejewa papecataenexa, aneconijibia panejinawanapaenexa, wajatuxanenē Jesucristo pitabarata. Bajarapacuenia bepa-exaname, tsipaji baja Cristo bewajacordero Pascuafiestanexa. Nexata, ovejacuenia nacasiwatēpa, wajanacawecua-ajibia-exanaenexa wajaneconimi, paneconi Dioso tane belevadura, pexuabijawanexa.

⁸Pascuafiesta wajataewicuenia, benajamatabēnapitaponatsi wajacordero, Cristo, wajanacacapanepaejawa wajaperujumatabēcuenewecua.

x 5:5 *panenawecuacapsapaenexa*: Pecapitsapaenē tsiteca Jesús pijajiwiyajuwēnē. Itsiata, pecapitsapaexaetsi, Jesús pijajijiw apoyawenonaejitsiatsi. Dioso-ata apoyawenonaejitsiatsi, pacuenia yawenonatsi picani, penacopatsinexa Satanás pewetsinēnexatsi. y 5:5 *bepejiobicuena peponaponaenexa*: Jesús peliwaitsi penacujarubiwi caejamatabēcuenē apoxainae bajaraxua yabara. Itsamonae canaējēta itsa copatsipa Jesús pijajiwiyajuwēnē Satanás pecobeyabelia, nexata bepejiobicuena Jesús pijajiwewecua peponaponaejamatabēcuenē, wecua-ajibia-exanaejitsipatsi papibisiijamatabēcuenē peperabēto jitsipabiaba pexanaenexa. Itsamonae pijinia canaējēta Satanás bejiobia-exanaenatsi wixaeta. Itsamonae pijinia canaējēta Satanás beyaxuabijitsiatsi. Itsiata, daxita Jesús peliwaitsi pejumexaniataewi caejamatabēcuenē xaina pajamatabēcuenē yabara naneconitsia-exanaejitsiatsi Jesús pijajiwiyajuwēnē bajarapacuenia. 1) Pecopabia-exanaenexa pibisiacuene pexanaejawa. Penajamatabēcuenēpēyorotsinexa pibisiacuene pexanaejawecua, Dioso pejitsipaenexa pexanaenexa. Taema 2Co 2:6-11. 2) Peyapētaeya-exanaenexanua mapanacuapijijawabelia, pacuenia bajarapamonae caejamatabēcuenē xaina Diosojawabelia, piataejitsibijawa pibisiacuene pexanaejawa. z 5:6 *pacajamatabēcuenebijianaejitsipa*: Taema Jos. capítulo 7. a 5:7 *Pascuafiestamatacabi*: Taema Éxo. 12, Lev. 23:5-11. b 5:7 *perujumatabē*: Perujumatabē nacatocuenecatane wajaperujumatabēcuenē. Pejanamatabē pijinia nacatocuenecatane Dioso wajanacawecua-ajibia-exanaejawa pibisiacuene waja-exanaenconimi, pejanamatabēcuenia wajanacataenexa, Dioso pejitsipaenexa wajajinawanapaenexa. Pacuenia jiwi matajērēababiaba mului newajēmatabējawabelia, daxitamatabē piijatunexa, bajarapacuenia judíowi perujumatabē matajērēababiaba pejanamatabējawabelia, daxitamatabē petofufunaenexatsi. Nexata, pacuenia judíowi Pascuamatacabi apoxae perujumatabēta pexanaepan-jawanē, penajamatabēcuenē-itajētsinexa peyaiyataejawa Dioso, bajarapacuenia Jesús pijajijiw apobecopatsi bajarapamonaeayajuwēnjijiwi, pibisiacuene pexanaponaponaejijiwi, peponaponaenexa bajarapamonae tuatujēta, penajamatabēcuenē-itajētsinexa peyaiyataejawa wajatuxanenē Jesucristo.

Bajaraxuata, aponacatoxanepanae wajapibisijamatabëcuene yajawa waja-exanawanapaewawa. Biji rajane, pejanajamatabëcueneta bejinawanapatsi, wajaxaniajajamatabëcueneta, yamaxë-itojorobinejewatsi.

⁹Itsabaxutota baja cajena pacatoyaquinatsi pewitota pibisiacuene pexanaponaewi paneyajawajinawanapaeyaniwa. ¹⁰Bajarapaliwaisi apotoya-quinaenë pamona mapanacuata pibisiacuene exanawanapa pewitota, pamona najamatabëxainabiaba ëpamonaenexa ayaijawa pexainanexa, pamona nacobetoxotabiaba, pamona asiwaya nawajëcabiabanua jumapecataeya pexanaenëanëjawabelia. Bajarapitsicuene pexanaewi, ita panawecuatsatsipame, nexata pepacuene mapanacuawecuaje ëpaneponaenexa tsipae athëbëabetsia, tsipaji daxita bajarapitsicuene pexanaewi yacajëpa mapanacuataje. ¹¹Patacatoyaquinaebaxutota raja paca-itorobatsi paneyajawajinawanapaeyaniwa, pamona itajara penawënrubiwi Jesús pijajiwi. Bajarapamona pepacuene pibisiacuene pexanawanapaewi pewitota, ëpamona penasiwajamatabëxainabiabiwi, asiwaya penawajëcabiabiwi jumapecataeya pexanaenëanëjawabelia,^c pibisiacuenia pebaracuicuajaiwi Jesús pijajiwi yajuwënëjiwi, pitajibitsabiabiwi, penacobetoxotabiabiwinua. ¡Bajarapitsiwi pëtsa payajawajinawanapame! ¡Pëtsa payajawaxanemenua caejawata, pacajunatsi-ata! ¹²⁻¹³Dioso aponetocopatsi jiwi pijaneconi tatocanaëjëbinënexa mapanacuapijiwi, pamona abaxë Jesucristojawabelia apopesiwanajamatabëcuenecopabiwi. Dioso cajena abaxë saicaya pepacuene naneconitsia-exanaena bajarapamona. Itsiata baitsi jane, paxamë Dioso pacatocopata panecuenecanaëjëtsinexa Jesús pijajiwi, pibisiacuene ita exana. ¡Nexata, panawecuacapsipare baja ponë paxamëtuatuajëta pewitota pibisiacuene exanapona!

**Jesús peliwaisi pejumexaniataewi, pacuenia benatoxaneba
liwaisi penatoxainaejawata, yabara peliwaisi**

6 ¹Paxamë, Dioso papecatocopatsixa, panecuenecanaëjëtsinexa Jesús pijajiwi, nexata ita paca-itsacueniaba itsajiwi paxamëyajuwënë, Jesús peliwaisi pejumexaniataenë, pacatoxanepana paxamë panijacuata panenatoxanebijawa. ¡Pëtsa paponame pamona nacua-ewetsiwi jawabelia^d papecaliwalisixanebinexa, tsipaji bajarapamona Dioso apoeyapëtaewi! Nexata, ëmapanacuapijiwi pecanaëjëtsicuenia,^e pacatoxanebijitsipa Dioso peliwalisinejewa. ²¡Paxamë tsaja apopayapëtaemë itsamatacabijawabelia daxitatsi Jesús pijajiwi! Wajananeconitsia-exanaenexa mapanacuapijiwi pijaneconi pexanaewi? Bajarapacuenia ita nacacuenecaëjëpaejitsia itsamatocabi wajananeconitsia-exanaenexa pijaneconi pexanaewi, ¿detsa xuajitsia apopacacuenecaëjëpae tsipae panexanebinexa tsiquirineconiliwalisixi-ata,

c 5:11 *penawajëcabiabiwi jumapecataeya pexanaenëanëjawabelia:* Bajaraxua cuenejëpa jiwi pematawajibijawa. Baitsi, pamona asiwaya nawajëca jumapecataeya pexanaenëanëjawabelia, siwanajamatabëcuenecopababiaba bajarapajumapecataenëjawabelia peyawenonaenexatsi, pacuenia jiwi siwanajamatabëcuenecopababiaba wajijawabelia peyawenonaenexatsi. **d 6:1** *nacua-ewetsiwi jawabelia:* Wowaijumeta ita jume pijinia, juez-mona, pamona tsicarucatsi petocanaëjëtsinexa jiwi pijaneconi, mapanacuapijiwi pena-ewetsiliwalisijawalia. Itamona juez-mona, nacua-ewetsiwi, itamona pijinia penacujarubiwi pijanacuapijiwi peyanacua-ewetsiliwalisianë, pitawetsiliwalisianë. **e 6:1** *ëmapanacuapijiwi pecanaëjëtsicuenia:* Neyapëtaenexa xua yabara apoxanepanae, taema 1Co 1:19-25; 2:6-8; 3:19; 12:8, 12; Col. 1:9; Sant. 1:5; 3:14-17; Rom. 11:33.

Jesús pijajiwituatujëta? ³Bajarapamatacabi waxaitsi tocanajëtsianatsinua ángelewi-ata pijaneconi. Nexata, abaxë aeconoxae panejinawanapae-epato mapanacuataje, paxamë pacacuenecaëjëpanua paneliwaisixanebinexa paneconi exana itsajiwi panetuatuajëta. ⁴Paxamëyajuwënë panetua-tuajëta liwaisi itsanatsixaina, ¿detsa xuajitsia pacaponabiabame juez-monaejawabelia papecaliwaisixanebinexa pamona Dioso peliwaisi apopeyapëtaewijawabelia? Caranata, pacatoxanepana panejunatsijawa pajiwi pacatsita bitso beweliamatabëcuene pexainaejiwi Jesús pijajiwituatua-jëta, papecaliwaisixanebinexa. ⁵¿Ajibi tsabaja caenë-ata paxamëtuatujëta pexanaliwaisi peyapëtaenë, papecaliwaisixanebinexa? Bajarapacuenia pacajumaitsitsi pataca-urabinexa, tsipaji yapëtaniji Jesús pijajiwituatujëta pejinawanapaejawa pexanaliwaisi pecanaëjëtsiwi. ⁶Itsia, bajarapamona apopajaitsimë papecaliwaisixanebinexa cajena, Jesús papijajiwimëtuatua-jëta. Biji rajane, panewënajumexaniataejwi Jesús peliwaisi paneconitababame mapanacuapijiwi pewetsiwijawabelia, Dioso apopeyapëtaewi, papecaliwaisixanebinexa Dioso peliwaisinejewa. ¡Abeje cajena bajarapacuenia pane-exanaejawa!

⁷Paxamë rabaja panacaemonaemë panaexaname Cristo pejama-tabëcueneta. Nexata, apopacatoxanepanae cajena liwaisi panenato-exanaejawa. Bajarapacuenia itsa pa-exaname, panatobijianame panenasiwajamatabëcuenemi. Pacatoxanepana picani panenajamatabëcataitsijawa piabejecuene pacato-exanae-ata, bajarapacuenia yamaxë-itojorobiaya pacawecuanacobetoxotsi-ata. ⁸Itsia baitsi jane, paxamë caranata namat-enetsia, piabejecuene panato-exanabiabame, yamaxë-itojorobiaya pawecuanacobetoxotabiabamenua, panewënajumexaniataejwi Jesús peliwaisi, mapanacuapijiwi pewetsiwi papecamuxujiobiwaisi panejumecowënëtsixae.

⁹⁻¹⁰¡Abeje cajena bajaraxua! ¡Pëtsa panayamaxë-itojorobame! Payapëta-neme rabaja piabejecuene pexanawanapaewi apopejonejawanexa itsamatacabi Dioso peyanacua-ewetsinacuajawabelia. Apojone tsane pamona mapitsicuene pexanawanapaewije: pewitota pibisiacuene pexanawanapaewi, jumapecataeya pexanaenëanëjawabelia pesiwanajamatabëcuenecopatabiwi, penanotsiwi penawecuanamatayajitawanapaewi, penaperabëcanajetawanapaewi, nacaewë-napebiwi penaquenetsiataewanapaewi, nacaewënapetiriwi-ata penaquenetsiataewanapaewi, penacobetoxotawanapaewi, ëpamonaenexa pexainacuene penatojitsipawanapaewi, pitajibicuene pejitsipawanapaewi, pamona-ata itsajiwi pibisiacuene pecuenebaracuaicuaijaiwi. Daxita bajarapitsicuene pexanawanapaewi apoyajawajinawanapaetsi tsane Dioso peyanacua-ewetsinacuata. ¹¹Bajayata paxamëyajuwënëwi bajarapacuenia picani exanawanapa. Itsia baitsi jane, Jesucristojawabelia panesiwanajamatabëcuenecopabixae, Dioso pacacapanepa baja bajarapapibisiagamatabëcuenewecua. Pacawecua-ajibia-exana baja pibisiacuene pane-exanaeconomics. Espíritu Santo pesaëta. Waja-tuxanenë Jesucristo pejamatabëcuenetanua, pacatsata baja mapanacuapijiwiwecua papijajiwinebamë, itsajamatabëcuene panexainawanapaenexa. Aneconijibia baja pacatanenua.^f Bajaraxuata, apopacatoxanepanae pane-exanawanapaejawa, pacuenia bajayatami pa-exanawanapame.

**Pacuenia Jesús pijajiwi xaniawaetsia bejinawanapa
Dioso pitabarata, yabara peliwaissi**

¹²Paxamë Dioso papecacapanepaejawa yabara asiwaya apopataemë. Nexata, itsamonae jumaitsi tsabiabi: «Xanë daxita xua jamatabë-exanajë,^g aponecuene-caranatsi ta-exanaeyaniwa», jai tsabiabi itsamonae. Xaniajai-ata tsipae, itsiata baitsi jane, daxita waja-exanaecuene, aponacajamatabëcuencyawenonae waja-jamatabëcuenesaëjawa Dioso jawabelia, bajarapacuenia itsamonae-ata apoja-matabëcuencyawenonaetsi. Xua exanatsinua apobenacopatsitsi wajanacajamatabëcuenenamatacaitorobinexa. ¹³Paxamëyajuwënëwi apotsitaneconicuenetsi^h daxita xua exana peperabëtota, nexata jumaitsi tsabiabi: «Wajaxaejawa saya wajacotsorotonexa. Wajacotsoroto pijinia wajaxaejawa pe-ecaenexa», jai tsabiabi. ¡Xaniajai baja cajena picani! Itsiata baitsi jane, itsamatacabi Dioso bajaraxuanë werewecaeya-exanaena. Dioso, nacatocopatsi-ata wajaperabëtota wajaxainaenexa, itsiata aponacatocopatsi pibisiacuene itaxutejema waja-exanawanapaenexa wajawitota,ⁱ pajiwi jawabelia jamatabë-exanatsi. Biji rajane, wajaperabëtota Dioso nacatocopata waja-exanawanapaenexa wajatuxanenë Jesucristo pejetsipacuenia. ¹⁴Nexata, pacuenia Dioso icatsia asaëya-exanatsi wajatuxanenë petëpaecujinae, bajarapijini pacuenia, waxaitsi-ata itsamatacabi Dioso pesaëta naca-asaëya-exanaena^j wajaetëpaecujinae.

¹⁵Waxaitsi baja cajena yapëtanetsi pacuenia Cristojawabelia becaeperabëtota naca-exana. Nexata, xua exanatsi wajaperabëtota, Cristo yajawa bewaja-exanaewi. ¿Netoxanepana tsaja Cristojawabelia caepeperabëtota tanaexanaecujinae, pibisiacuene ta-exanaenexa tawitota penaperabëcane-jetsiwajawabelia? ¡Jume baja cajena! Bajarapacuenia itsa exanaejitsipajë, Cristo betayajawa-exanae tsipae. ¹⁶Bajarapacuenia pacajumaititsi, tsipaji Dioso pejumeliwaisibaxutota jumaitsi mapacueniaje: «Anijajiwi mibeje naexana becaejiji peperabëtocuenia», jai. Nexata, pebi itsa imoxoyoba penaperabëcanajetsiwajawabelia, becaejiji naexanabeje. ¹⁷Nexata pijinia, pajiwi siwanajamatabëcuenecopata wajatuxanenë Jesucristojawabelia, bajarapijiwi becaejiji naexana wajatuxanenë Jesucristojawabelia.

¹⁸¡Bajaraxuata, nayajiwiponare daxita pibisiacuene ne-exanaejawa newitota, tsipaji pibisiacuene pexanaejawa pewitota jiwi napërabëbijiana

g 6:12 jamatabë-exanajë: Taema 1Co 10:23; Rom. 7:6; Gál. 5:1,13. **h 6:13 apotsitaneconicuenetsi:** Itsamonae Corinto tomarapijiwi jamatabëcuenenawëxaniabiaya canaëjëta Dioso apopenaneconitsia-exanaejawanexa xua jiwi exana peperabëtota. Nexata, pacuenia Dioso exanabeje wajaxaejawa, wajacotsorotobeje, wajacabarëyanexa wajaitsipaejawata, bajarapijini pacuenia, Dioso pebi, petiriwabeje exanabeje pena-imoxoyobabiabinexabeje. Bajaraxuata, pebi, petiriwabeje, toxanepanatsibeje itaxutejema pena-imoxoyobabiabinexabeje, pejetsipaejawata apopenapitsijiwibeje-ata. Bajarapacuenia jamatabëcuenenawëxaniabiaya canaëjëta itsamonae Jesús pijajiwi Corinto tomarata pejinawanapaewi, pibisiacuene pewitota pexanaejawa yabara. **i 6:13 wajawitota:** Mapajumeyo griegojumeta yabara cuaicuaijai penaperabëquenetsiataeyaniwa penaperabëcanajetsijiwi jawabelia, pajiwi jinawanapabiaba jumapecataeya pexanaenëanë pijatemplobota. Baitsi, Corinto tomarata pamonae jumapecataeya pexanaenëanë jawabelia pesiwana-jamatabëcuenecopababiabiwi, jumapecataeya pexanaenëanë jawabelia asiwaya penawajëcaecujinae, matamotabiaba penaperabëcanajetsijiwiyo, pebi, itsa jume, petiriwa bajarapacuenia penaperabëquenetsiataenexa, xaniajaiya pina pexainaenexa penawajëcaecuenemi. **j 6:14 naca-asaëya-exanaena:** Dioso itsa asaëya-exana Jesucristo peperabëtota yajawa, itsa naca-asaëya-exanaena wajaperabëtota yajawa, yapëtanetsi Dioso pesiwbëjaijawa xua exanatsi wajaperabëtota.

pijacueneta!^k Bitso najamatabëcuenebijiana, itsaneconi pexanaejawawecua.¹⁹ Payapëtaneme rabaja mapacueneye. Paxamë Dioso papijatemplobomë, Espiritu Santo papecatsijamatabë-ecaexae, Dioso papecarajutsijamatabëcuene. Nexata, paneperabëto baja cajena Dioso pijajawa. Bajaraxuata, apobepacanacuenebawanapaemë panijacuata panenatojitsipacuenia.²⁰ Dioso itsa pacacapanepa panijaperujumatabëcuene papecanamatacaitorobisaëwecua, ayaimatamota^l pacacomuata.^m ¡Bajaraxuata, yaiyataeya paneperabëtota panacuenebawanapare Dioso pejitsipacuenia, papecasiwajamatabëcuenebarëyanexa daxita xua pa-exanawanapame paneperabëtota!

Pemuxujiobiliwaisi penapitsijiwibeje yabara

7 ¹ Xua yabara panetoyaquinaremena pataneyanijobinexamë, aeconoxae pacajumecanawiatsianatsi. Paneyanijobame pebi, pijawabeje, penawecuanaperabë-asiwajawabeje yabara. «¿Xaniajai tsaja, apoxanepanae jiwi penacobjijawa?», pajamërena patanetoyaquinaejawatamë. Tajacuataⁿ xanë netsita xanepana picani jiwi apopenacobjijawa.² Itsiata baitsi jane, xanë pacajumaitsitsi mapacueniaje. Mapanacuataje nawita jiwi pewitota pibisiacuene pejitsipaewi pexanaenexa. Bajaraxuayaniwa caepebi canacujitsia pijawa bexainapona. Bajarapijinia pacuenia, caepetiriwa canacujitsia bexainapona pamona. Bajaraxuata, apotoxanepanaetsibeje, pebi, pijawabeje penawecuanaperabë-asiwanexabeje, pacuenia exana itsamonae paxamëtua-tuajëta.³ Pebi, pijawabeje namata-enetsia xaniawaetsia benaewetaponapona-beje. Penapitsixabeje, tsicarucatsibeje pena-imoxoyobinexabeje paepatota pebi jitsipa pijawajawabelia. Paepatota-ata pijinia petiriwa jitsipa pamonajawabelia.⁴ Nexata, petiriwa, penacobjiobiwa, pijacuata aponaperabëxainae ëbarapowanexa. Biji rajane, pamona pijaperabëtocuenia xainatsi. Bajarapijinia itsi pebi-ata. Aponaperabëxainae ëbajaraponënexa. Pijawa pijaperabëtocuenia xainatsi. Nexata, namata-enetsia naperabëxainabeje.⁵ Bajaraxuata, apotoxanepanaetsibeje, penapitsijiwibeje bajayajebi penawecuanaperabë-asiwajawabeje^o pena-imoxoyobiyanawabeje. Toxanepanatsi penaperabë-asiwanexabeje,

k 6:18 *napërabëbijiana pijacueneta*: Bajarapacuenia jumaitsi mapajamatabëcuene yabaraje. Pacujinae jiwi naperabëquenetsiatane penaperabëcanajetsiwiwajawabelia, jumapecataeya pexanaenëanë pijatemplobota penacuenebiwi, nexata najamatabëcuene-itajëta caejamatabëcuene pexainaejawa bajarapajumapecataenëjawabelia peyawenonaenexatsi, pacuenia pematawajibiwi najamatabëcuene-itajëta pesiwanajamatabëcuene copababiabijawa wajijawabelia, Diosowecua, pematawajibiawata. Orijibia, mutsuali perabëbijianaenatsi, bajarapitsicuene pexanawanapaewi. Pablo yapëtanenua pacuenia pibisiacuene pexanaejawa pewitota bitso pexanaejiwi najamatabëcuenebijiana, tsipaji becaejiwi naexanabeje itsajiwijawabelia, penapitsijiwibejewecua. Nexata, beweliacuenia taejitsipa copiaya penapitsijiwibeje. Apo-asiwa pacuenia copiaya asiwa. Apo-ewetsi pacuenia copiaya eweta. **l 6:20** *ayaimatamota*: Taema 1Co 7:23; 1Pd 1:18; Apoc. 5:9; Hch. 20:28; Heb. 9:12. **m 6:20** *pacacomuata*: Daxita comuata; wajajamatabëcuene, waja-espiritu, wajaperabëto-ata. Wajaperabëto comuata pecanacuenebinexa pejitsipacuenia. Itsiata, wajaperabëto apojone tsane Dioso pijanacuata tsipaji ëmapanacupijijawa. Dioso pejanaperabëto nacarajutsiana. Taema 1Co 15:52-53. **n 7:1** *Tajacuata*: Taema 1Co 7:6-9, 26-28. **o 7:5** *penawecuanaperabë-asiwajawabeje*: Dioso tocopata penacobjiobiwibeje pena-atsobjiawajawajawabelia, pacuenia pexaejawa, piapaejawa, pena-imoxoyobiawanua penawajëcaenexa bajaraPonëjawabelia. Taema Éxo. 19:15; Mt 6:16-18; Hch. 13:2-3. Bajarapacuenia apo-atsobi xaniajaiya pexainanexa xua wajëca, rabiji penajamatabëcuene-itajëtsinexa Diosojawabelia peyaiyataejawa, penajamatabëcuene-enayabijawanexanua Diosota, jiwitonë pijacuata penatojitsipacuenewecua.

matapania pamatacabimaxëto Diosojawabelia nawajëcaejitsiabeje. Bajara-pacuenia exanaenabeje itsa najamatabëcueneyëpabeje penawajëcaenexabeje Diosojawabelia. Itsa baja weretsianabeje Diosojawabelia penawajëcaemata-cabianëbeje, icatsia baja naimoxoyobianabeje. Itsa tsiteca nawecuanaperabë-asiwabeje tsipae, Satanás jamatabëcueneyamaxë-itojorobijitsipatsibeje, pibisiacuene pexanaenexabeje pewitota, pacuenia picani apobe-exanaebeje penapitsijiwiibeje.

⁶Bajarapaliwaisita apopaca-itorobitsi daxita panenacojiobinexa. Biji rajane, patacabejiohiataexae, bajarapacuenia pacamuxujiobatsi pibisiacuene pane-exanaeyaniwa panewitota. ⁷Xanënexa, netsita pexaniacuene pane-jinawanapaejawa panacojiobinejewamë. Itsiata bailsi jane, Dioso caejiwi canacujitsia jamatabëcuenecaëjëpaeya-exanapona pacuenia exanawanapo-naejitsia. Itsamonae jamatabëcuenecaëjëpaeya-exanatsi penacojiobinexa, itsamonae pijinia imasia pejinawanapaenexa, nacojiobinejewa.

⁸Pamonae abaxë apopenacojiobiwi, papetiriawi pamonajiwi pewecuatëpaewitsi-ata, tojitsipajë picani imasia pejinawanapaejawa, pacuenia xanë imasia ponaponajë. ⁹Itsiata bailsi jane, itsa apocaëjëpaetsi penajamatabëcuenecataitsijawa pibisiacuene pewitota pexanaeyaniwa, nexata rowialia bena-cojioba, tsipaji itsa aponacojiobi tsipae, jamatabëcuene-enaejitsipatsi ëpibisia-cuene pewitota pexanaenexa. Nexata, najamatabëcuenebijianaponaejitsipa.

¹⁰Itsiata, pamonae penacojiobiwi, itorobajë mapacueniaje. Tajacuata apota-itorobijawa. Watutuxanenë Jesucristo raja paca-itoroba.^p ^qPapetiriawi Jesús peliwaitsi jumexaniatane, pëtsa wecuanawiaba pamonajiwi! ¹¹Itsiata bailsi jane, penacojiobiwa itsa wecuanawiatsipa pamona, nexata imasia beponapona. Apobenacojiobi baja. Itsa jume, benapitabeje icatsia pamonacowënëbeje. Bajarapijinia itsi pebi-ata, Jesús peliwaitsi pejumexaniataenë, apobexuabi pijawa.

¹²Aeconoxae itsaliwaitsi xainajë tatsipaebinexa itsamonaejawabelia, taja-cuata tatocanaëjëtsicuenia. Apotane-itorobicuenia watutuxanenë Jesucristo. Jumaitsinë mapacueniaje: «Paxamë tuatuajëta, itsanë itsa pitaponapona baja Jesús peliwaitsi apopejumexaniataewa, itsa bajarapowa jitsipa peponaponae-jawa bajaraponëjawabelia, nexata pijawa apobenawecua-itawetsi, pexuabinexa. ¹³Bajarapijinia pacuenia, itsi petiriwa-ata. Itsa pamona, apopejume-xaniataenë Jesús peliwaitsi, itsiata bajaraponë itsa jitsipa peponaponaejawa bajarapowajawabelia, nexata pamona apobenawecua-itawetsi pexuabinexa», janë tacanaëjëtsicuenia. ¹⁴Bajarapacuenia jumaitsinë, tsipaji petiriwa, Jesús peliwaitsi pejumexaniataewa, itsa pita Jesús peliwaitsi pejume-aebinë, bajarapajiwiibeje itsiata, Dioso yayiatanetsibeje^a penapitaponaponaejawabeje

p 7:10 *paca-itoroba*: Taema Mt 5:31-32; 19:3-9; Mc 10:2-9; Mal. 2:14-16. **q 7:14** *Dioso yayiatanetsibeje*: Griegojumeta canacueneba **jaglázo-jume**, pewecua-ajibia-exanaejawa penaxuirabicuenemi, Dioso icatsia asiwaya petanexa. Bajayatami, judfojiwi itsa nacojiobijitsipa apojudfojiwijawabelia, tocaëjëtatsi ëpexuabinexa, pexi yajawa, penawecua-ajibia-exanaenexa penaxuirabicuenemi. Matapania xuabijitsipa, Dioso icatsia asiwaya taejitsipatsi, cuenecaëjë-paejitsipatsinua penawajëcaenexa Diosojawabelia templobota. Taema Esdras 9:1-10:3. Itsiata, Pablo nacayapëtaeya-exana itsacuenia. Nexata, Dioso toyaiyatae-atatsibeje penacojiobicuene, itsiata pajiwi abaxë aposiwanajamatabëcuenecopatsi Jesucristojawabelia, tsiteca Jesús apopi-jawijawuwënëjiwi Dioso pitabarata. Itsiata, nacojiobi-ata apopejumexaniataejijawabelia, Jesús peliwaitsi pejumexaniataejiji cuenecaëjëpatsi peponaejawa cultojawabelia penacuenebinexa. Itsacuene-ata apocuenecaranatsitsi, pacuenia picani cuenecaranatatsi judfowimi bajayata.

yabara. Bajarapijinia pacuenia, itsi pebi, Jesús peliwaisi pejumexaniataenë. Itsa pita Jesús peliwaisi pejume-aebiwa, bajarapajiwi beje itsiata, Dioso yayatanetsibeje penapitaponaponaewabeje yabara. Bajarapacuenia Dioso itsa apo-exanae tsipae, nexata totaejitsipatsibeje pexi bejowibonacuetoxi. Itsiata, Dioso totanetsi pepopexicuenia. ¹⁵ Itsiata, Jesús peliwaisi apopejumexaniataejiwi, pijacuata itsa ajamatabëcuenesaë pewecuanawiatsijawa, nexata apobecuenecaranatsi pewecuanawiatsiyaniwatsi. Benacopatabeje rowialia. Nexata, Jesús peliwaisi pejumexaniataejiwi, pebi, petiriwa-ata penawecuanawiatsiliwaisi apotsicarucaetsibeje. Bajaraxua yabara pijaneconi apoxinae-beje Diosojawabelia, tsipaji Dioso nacajunata jamatabëcuenexanepanaeya wajajinawanapaenexa. ¹⁶ Bajarapacuenia pacamuxujibatsi xaniawaetsia panenabarëjinawanapaenexa panenanotsiwi. Paxamë papetiriawimë, itsa jume, papebijiwimë, Dioso pejitsipaecue neanetsita-exanaejawata, pajitsipaeya-exanaejitsipame pejume-aebijiwi, pejumexaniataenexa Dioso peliwaisi. Belia bajarapacuenia Jesús peliwaisi apopejumexaniataejiwi-ata, nasiwanajamatabëcuenecopatsipa Jesucristojawabelia, paxamë xaniawaetsia panetsitajinawanapaexae.

¹⁷ Pacaejiwimë canacujitsia, pitsicuenejawata^r Dioso pacajunata papijajiwinexamë, bajarapacuenia tsitecaeya bepacanacopatame, panesiwanajamatabëcuenecopatsicujinae Jesucristojawabelia. Bajarapacuenia itoroboponajë daxita Jesús pijajijawabelia, panacuanëjawa tsipaebanajetarucajë. ¹⁸ Nexata, paxamëyajuwënë, itsa nabo-upiperabëcaucutsia-exana pewajënaeya, Jesucristo siwanajamatabëcuenecopatsinejewa, tsitecaeya ponaponae bajarapacuenia pesiwanajamatabëcuenecopatsicujinae. ¡Bajarapijinia pacuenia-ata, ponë apopenabo-upiperabëcaucutsia-exanaenë, pëtsa pa-itorobame penabo-upiperabëcaucutsia-exanaenexa, pesiwanajamatabëcuenecopatsicujinae Jesucristojawabelia! ¹⁹ Bajarapacuenia paca-itorobatsi, tsipaji Dioso aposiwabëjai jiwi penabo-upiperabëcaucutsijawa yabara, apopenabo-upiperabëcaucutsijawa-ata yabara, caejamatabëcuene pexinaenexa Diosojawabelia. Biji rajane, siwajamatabëcuenebëjai jiwi pejumecowë-nëtsijawatsi pacuenia itoroba. ²⁰ Pacaejiwimë canacujitsia pitsicuenejawata Dioso pacajunata papijajiwinexamë, bajarapacuenia tsitecaeya bepacanacopatame, panesiwanajamatabëcuenecopatsicujinae Jesucristojawabelia. ²¹ ¡Nexata, pajiwi paxamëyajuwënëjiwi amoneya tonacuenebaponapona itsanë, Jesucristojawabelia siwanajamatabëcuenecopatsinejewa, pëtsa nasiwajamatabëcuenebëjai! Itsa pasiwanajamatabëcuenecopatame Jesucristojawabelia, Jesús baja papijajiwimë panaexanaename.^s ¡Jamatejema saya patonacuenebawanapare^t panijatuxanewi! Itsiata baitsi jane, itsa paca-cuenecaëjëpa panewecupitsapaejawa,^u nexata bepanawecupitsapame.

r 7:17 *pitsicuenejawata*: Bajarapacuenia jumaitsi peyapëtaeya-exanaenexa pacuenia aponamatawenonaetsi penawecupatsijawa; jiwi penacobiocue yabara, jiwi pijawiriacue yabara, jiwi penacuenebicue-ata yabara, itsa Dioso apotsitapibisiacuenetsi xua exanapona. Taema pacuenia muxujoba 1Co 7:18-40. **s 7:21** *papijajiwimë panaexanaename*: Taema Gál. 3:28; Col. 3:11. **t 7:21** *patonacuenebawanapare*: Taema 1Ti 6:1-3; 1Pd 2:18-24. **u 7:21** *pewecupitsapaejawa*: Itsamonea pitsapa bajarapacuenewecua pematamotsicueniatsi taema Hch. 22:28, itsacuenia pijinia «itsamonea copatatsi pewecuponaenexa amoneya penacuenebicue-jawa itsa xaina 30 pawabeje penacuenebaponaponaejawa», jai bajayanacuapijiwi penacujaru-biwi jiwi pexanawanapaecuenemi.

²² Pajiwí pijatuxanenë amoneya petonacuenebaponaponaewawata, Dioso junatatsi pesiwanajamatabëcuenecopatsinexa Jesucristojawabelia, baja-rapajiwí baja Dioso capanepatsi* Satanás pecobewecua. Bajarapajiwí juya nacopata wajatuxanenë Jesucristo petonacuenebaponaponaenexa. Bajara-pijinía itsi pajiwí-ata apocanajetsitsi itsajiwíjawabelia, amoneya petonacuenebaponaponaenexa, itsa siwanajamatabëcuenecopata Cristojawabelia. Naexana baja Cristo pijajiwitonë. ²³ Dioso baja cajena pacacomuata ayaimatamota, ëpapeca-itorobicuena pane-exanawanapaenexa. ¡Bajaraxuata, pëtsa baja panacopatame mapanacuapijiwiyajuwënëjiwíjawabelia, papeca-itorobinexa pejisipaecuenia bepapijajiwimëcuenia!w ²⁴ Patajamonaemë Cristo pejamatabëcueneta, pacaëjiwimë canacujitsia pitsicuenejawata Dioso pacajunata papijajiwínexamë, bajarapacuenia tsitecaeya bepacanacopatame, panesiwanajamatabëcuenecopatsicujinae Jesucristojawabelia.

²⁵ Aeconoxae pacajumecanawiatsianatsi xua paneyanijobame abaxë apopenacojiobiwí yabara. Bajaraxua yabara apoyapëtaenë pacuenia wajatuxanenë Jesucristo pitorobiliwaisi bajarapitsiwi yabara. Itsiata baitsi jane, pacuenia siwanajamatabëxainajë bajarapitsiwi yabara, pacatoyaquinatsi, pacuenia Dioso neyapëtaeya-exana tane-itaxutotsoniataexae. Nexata, pacuenia pacamuxujibatsi, pacatoxanepana panejumecowënëtsinexa. ²⁶ Maparucaeje pitsipiayapëbejeliwaisita^x wajajinawanapaexae, nexata xanë netsitaxanepana pamonaë apopenacojiobiwí, pejinawanapaenexa nacojobinejewa. ²⁷ Itsa baja ponë capanepaeya nacojoba, apoxanepanaë pijawa pexuabetsijawa. ¡Itsiata baitsi jane, itsa abaxë apopenacojiobi, pëtsa jaita pijawanexa! ²⁸ Ponë baja capanepaeya nacojoba, pibisiacuene apo-exanaë. Petiriwa-ata, pejanawa, itsa baja nacojoba, pibisiacuene apo-exanaë. Itsiata, piayainacuata wajajinawanapaexae, pacamuxujibatsi panenacojiobiyaníwa paxamë abaxë apopenacojiobiwí, piayapëbejeliwaisi papecatocopiapatsiyaniwa.

²⁹ Patajamonaemë Cristo pejamatabëcueneta, bajarapacuenia pacajumait-sitsi, tsipaji imoxoyo rabaja pewajënaë wajatuxanenë icatsia pepatsijawanexatsica. Bajaraxuata, pijawajiwí pexainaewi, apobenajamatabëcuene-enayabi penacojiobijamatabëcuene. Biji rajane, benajamatabëcuene-enayaba Dioso pijacuene petonacuenebawanapaenexa, pijawajiwí apobepexainaë-wicuenia. ³⁰ Pamonaë-ata bitso najamatabëxaina peyajuwënëtpaexae, bajarapamonaë apobenajamatabëcuene-enayabi penajamatabëxainaë-cuene. Biji rajane, benajamatabëcuene-enayaba Dioso pijacuene petonacuenebawanapaenexa, pacuenia pejamatabëcuenebarëyawi tonacuenebawanapaëjitsipa. Pamonaë-ata jamatabëcuenebarëya tsawanapaë, bajarapamonaë apobenajamatabëcuene-enayabi pebarëyajamatabëcuene. Biji rajane, benajamatabëcuene-enayaba Dioso pijacuene petonacuenebawanapaenexa, pacuenia tonacuenebawanapaëjitsipa bitso apopejamatabëcuenebarëyawí. Pamonaë-ata pecomuacaewi pexainaëjawanexa,

v 7:22 *capanepatsi*: Taema Rom. 6:16-18; Jn 8:32, 36; Gál. 5:1; 1Pd 2:16. w 7:23 *bepapijajiwimëcuenia*: Taema Mt 6:24; Lc 16:13; Jn 8:34; Rom. 6:11-18; 2Pd 2:19. x 7:26 *pitsipiayapëbejeliwaisita*: Bajarapamatacabi mapanacuapijiwí bejioaba-exanapona Jesús pijajiwí, itsa jume, beyejebapona. Bajaraxua yabara Pablo jumaitsi apopenacojiobijawanexa imasia pejinawanapaewi.

bajarapamonae apobenajamatabëcuene-enayabi pecomuacaejawanëta. Biji rajane, benajamatabëcuene-enayaba Dioso pijacuene petonacuene-baponaponaenexa, asiwaya apobetae xua natocomuaca. ³¹ Pamonae-ata, mapanacuapijicuenejawanëta canacuenebawanapa, bajarapamonae apobenajamatabëcuene-enayabi bajaraxuanë pecanacuenebijawa. Biji rajane, benajamatabëcuene-enayaba Dioso pijacuene petonacuenebawana-paenexa, apobepecanacuenebawanapaewicuenia. Bajarapacuenia pacamuxujobatsi panenajamatabëcuene-enayabiyaniwa, tsipaji daxita bajaraxuanë werewerecaponaena, mapanacuapijicuenejawanëxae.

³² Xanë pacatojitsipatsi panejamatabëcuenesajinaejawa, papecajamatabëcuene-enaejawawecua mapanacuapijicueneje. Ponë abaxë imasia ponapona, jamatabëcuene-enabiabatsi ëwajatuxanenë Jesucristo pijacuene pexanapona-poneajawa. Siwanajamatabëxainabiabanua pesiwajamatabëcuenebarëyanexatsi. ³³ Itsiata baitsi jane, penacojiobinë caejamatabëcuene apoxainae Dioso pijacuenejawalia. Yajawajamatabëcuene-enabiabatsi pewetsinexa pijawa, pesiwajamatabëcuenebarëyanexatsi. ³⁴ Bajarapijinia pacuenia, jamatabëcuene-itsi pimasiarucaewa, powa-ata pamona pewecuatëpaewatsi. Bajarapitsipetiriawi, pamona apopexainaexae, jamatabëcuene-enabiabatsi ëwajatuxanenë Jesucristo pijacuene. Nexata, xaniawaetsia najamatabëcuenecaeweta, naperabëcaewetanua ëDioso pijacuene pexanawanapaenexa, pesiwajamatabëcuenebarëyanexatsi. Itsiata baitsi jane, penacojiobiwa, caejamatabëcuene apoxainae Dioso pijacuenejawalia. Yajawajamatabëcuene-enabiabatsi pewetsinexa pamona, pesiwajamatabëcuenebarëyanexatsi.

³⁵ Bajarapacuenia pacamuxujobatsi, patacajamatabëcueneyawenonaenexa, tsipaji baja imoxoyo pewajënae wajatuxanenë Jesucristo pepatsijawanexatsica. Nexata, apojitsipaeñë panenajamatabëcuene-enayabijawa itsacuenejawa wajatuxanenë pijacuenewecua. Itsiata, apopaca-itawetsitsi panenacojiobijawa. ³⁶ Nexata, ponë, pijajarawa^y pexainaenë, itsa tsitaxanepanatsi pepitsinexa, caecuenia bepita, tsipaji baja yapëtane penaweretsiwacuene. Napitsi-atabeje, pibisiacuene apoxanaebeje. ³⁷ Ponë pijinia pijacuata apojitsipae penacojiobijawa, cuenecaëjëpat-sinua penajamatabëcuene-ewetsijawa, itsa aponacojiobi, pexaniacuene exana. ³⁸ Nexata, ponë aponacojiobi bitso pexaniacuene exana, ponë pijajarawa pepitsinëwecua, tsipaji apopenacojiobinë caejamatabëcuene xaina wajatuxanenë Jesucristo pijacuene pexanaenexa.

³⁹ Powa baja nacojioba acuenebi pewecuanawiatsinexa pamona piasaëtsaponaponae-epato. Itsiata baitsi jane, pamona itsa wecuatëpatsi, bajarapowa tocopatatsi icatsia penacojiobinexa ponëjawabelia jamatabë-nacojioba, itsa bajaraponë-ata Jesús peliwaissi pejumexaniataenë. ⁴⁰ Itsiata, xanë netsita matatoxenetsia jamatabëcuenebarëya^z tsaponaponae tsi-pae, itsa bajarapowa, pamona pewecuatëpaecujinaetsi, nacojiobinejewa

y 7:36 *pijajarawa*: Griegojume *pardsénos-jume*, mapajamatabëcuene xainaje: «Imasia peponaponaewa, pejanawa», pejaijume. Nexata, pijapejanawa, itsa jai, xaniawaetsia aponayapëtae itsa yabara jumaitsi pebi pijajarawa yabara, itsa jume, pebi pexënatoyo yabara. Itsiata, Pablo pejumaitsixae: «apopaca-itawetsitsi panenacojiobiyanawa», pejaixae, bajaraxuata, najuta pijajarawa pejaicuenia. z 7:40 *matatoxenetsia jamatabëcuenebarëya*: Bajarapacuenia najamatabëxaina Pablo, tsipaji imasia itsa ponaponaëjitsipa, najamatabëcuene-enayabijitsipa ëDioso pijacuene mapanacuapijicueneewecua.

ponapona. Bajarapacuenia tajacuata najamatabëxainajë bajarapacueneyabara, itsiata netsita Espiritu Santo neyajawacuaicuijai bajaraxua.

Pacuenia Pablo muxujioa jumapecataeya pexanaenëanëjawabelia perajutsiyajuwënëwijawanë, yabara peliwaishi

8 ¹ Aeconoxae pacajumecanawiatsijitsiatsi xua paneyanijobame pexaejawanë, jumapecataeya pexanaenëanëjawabelia perajutsiyajuwënëwijawanë yabara. Xaniajai rabaja daxitatsi yapëtanetsi bajarapacueneyamamobijawa. Nexata, bajarapayajuwënëwi xae-atatsi, aponacajamatabëcueneyawenonae,^a aponacajamatabëcuenebijianae-ata. Xaniajai-ata, itsiata ëwajayapëtaecueney,^b be-ayaijamatabëcuenewi nacanataeya-exana itsamonaewecua. Biji rajane, namata-enetsia wajana-asiwajawa wajanajuajumexaniataewi Jesús peliwaishi, nacajamatabëcueney-asaëya-exana. ² Pajiwi natocanaëjëta bitso peyapëtaejawa daxitacueney itsamonaewecua, bajarapajiwi jemajai. Apoyapëtae. Abaxë tosa-jinatsi xaniawaetsia peyapëtaejawa. ³ Itsiata baitsi jane, pajiwi asiwa Dioso, juya bajarapajiwi Dioso jamatabëcueneyapëtanetsi piasiwajawatsi.

⁴ Matapania jane baja, pacayapëtaeya-exanaenatsi perajutsiyajuwënëwijawanë yabara jumapecataeya pexanaenëanëjawabelia. Waxaitsi baja cajena yapëtanetsi jumapecataeya pexanaenëanë piamamobijawa, tsipaji saya jiwi pecobeta pexanaejawanë. Yapëtanetsinua baja cajena, caenë Dioso peponaponaejawa. ⁵ Xaniajai. Mapanacuapijiwiye, ayaibitsaëto, nawitsia xaina pijadiosowi, pesiwanajamatabëcuenecopatibabinexa bajaraponëanëjawabelia peyawenonaenexatsi. Itsanëanë athëbëtatsia pejinawanapaenëanë. Itsanëanë pijinia iratatsica pejinawanapaenëanë. Xainanua pamonaenawowënëruba petuxanewi.^c ⁶ Itsiata baitsi jane, waxaitsi yapëtanetsi caenë waxa Dioso peponaponaejawa,^d ponë daxitacueney pexanaenë.^e Nexata, yayiataeya tojinawanapatsinua waja-asiwaxae. Yapëtanetsinua caenë waja-xinaejawa pepowajatuxanenë Jesucristo,^f ponë Dioso pejamatabëcueneta exana daxitacueney.^g Bajaraponë pejamatabëcuenetanua asaë tsawanapaetsi, wajatojinawanapaenexa Dioso,^h wajanacacapanepaxae wajaneconiwecua.

⁷ Itsiata, itsamonaen Jesús pijajiwiyajuwënëwi xaniawaetsia abaxë apoyapëtae jumapecataeya pexanaenëanë Dioso pitabarata piamamobijawa. Bajarapamonae pesiwanajamatabëcuenecopatsiwajënaeya Jesucristojawabelia, asiwaya nawajëcawanapa jumapecataeya pexanaenëanëjawabelia, peyawenonaenexatsi, tsipaji tsitapexaniajaidiosowitsi. Maparucay-ataje tsiteca

a 8:1 jumapecataeya pexanaenëanë: Bajayanacuapijiwiimi jumapecataeya pexanaenëanë bepjiadiosowicuenia petaxae, dajubi rajutabiaba bajaraponëanëjawabelia, peyawenonaenexatsi pewajëcaecuenia. Itsiata, daxitanë apotajuitsi. Penacopabiyajuwënëwijawa canajetabiaba pataxunaeta capatabiaba pexaejawanë pecanajetsinexa, jamatejema pamonaen, pesiwanajamatabëcuenecopababiabiwi bajarapajumapecataenëjawabelia, penatocomuacabiabinexa. Natocanaëjëtabiaba pexaeujinae bajarapawi peyawenonaenexatsi. Itsiata, itsamonaen, Jesús peliwaishi pejumexaniataewi, natocomuacabiaba bajarapawi bewelliamatamoxae, bitso pexaniawi-ata; canaëjët-sinejewa pajumapecataenëjawabelia perajutsiyajuwënëwijawa. **b 8:1 ëwajayapëtaecueney:** Taema 1Co 13:1-3. **c 8:5 natowënëruba petuxanewi:** Pamonaen tane be-ayaijamatabëcuenewi, pewajëcaenexa penamatawenonaecueney; pacuenia bitso pexainaewi pecobecowë, nacuaewetsiwi, penajorobiwi-ata. **d 8:6 waxa:** Taema Mal. 2:10; Mt 6:9; Jn 20:17; Efe. 4:6; 1Jn 3:1-3. **e 8:6 daxitacueney pexanaenë:** Taema Rom. 11:36; Efe. 4:6. **f 8:6 pepowajatuxanenë:** Taema Mt 11:27; 28:18; Jn 13:13; Efe. 4:5. **g 8:6 pejamatabëcueneta exana daxitacueney:** Taema Jn 1:1-3; Col. 1:15-17. **h 8:6 asaë:** Taema Rom. 6:4-11; Efe. 2:5-6; Col. 2:12-13; 3:1-3.

tsitatsi pesaë pexainaewi.ⁱ Bajaraxuata, itsa xaeyabiaba perajutsiyajuwë-nëwijawanë jumapecataenëjawabelia, natonacanaëjëta caejamatabëcuene pexainaewata bajarapajumapecataenëjawabelia. Nexata, natocanaëjëta pexaejawata penajamatabëcuenebijianaewata.^j ⁸Yapëtanetsi rabaja waxaitsi, wajaxaejawa yabara^k mapacueniaje. Apoxae-ata tsipaetsi, Dioso aponacasiwajamatabëcuenebarëya, itsa jume, xae-ata tsipaetsi aponacajamatabëcuenebijianaë bajaraPonëwecua. Bajaraxuata, xae-atatsi, apoxae-atatsinua, caecuene xainabeje; Dioso apowajanacawënananeconitsia-exanaejawanexa.⁹ Itsiata baitsi jane, apopacawënananeconitsia-exanae-ata, apopacatoxanepanae itaxutejema panetsitaxaejawa abaxë bewelia pejamatabëcuenenaweretsiwi pitabarata, tsipaji belia pajopaeya-exanaejitsipame^l pitaxutuajamatejemajawa Dioso peliwaissiweucua. ¡Xania baja tsane bitso bepaneyapëtaewi panenaexanaewi, bajarapitsicuene pane-exanaeyaniwa! ¹⁰Nexata, paxamë, bitso paneyapëtaewi Jesús peliwaissi, bewelia pejamatabëcuenenaweretsijiwi, itsa pacataejitsipa panexaeyenaejawa perajutsiyajuwënwijawa jumapecataeya pexanaenëanë pijatemplobota, belia bajarapajiwi-ata naxaejitsipa papecacueneataejawata, natoyapëtae-ata picani penajamatabëcuenebijianaejawanexa. ¹¹Bajarapacuenia panetsita-exanaejawata, bitso paneyapëtaewi Jesús peliwaissi panenataexae, pajamatabëcuenebijianaejitsipame pajiwi abaxë bewelia jamatabëcueneliwaisinawereta Dioso pijacuenejawalia. Apopacatoxanepanae cajena bajarapacuenia pane-exanaejawa, tsipaji baja cajena bajarapajiwinexa-ata Cristo siwatëpatsi, pacuenia paxamë pacasiwatëpa. ¹²Bajarapacuenia itsa pajamatabëcuenebijianaejitsipame panenajumexaniataewi, pibisiacuene apopato-exanaemë tsipae ëpanewënjajiwi-tonëjawabelia. Biji rajane, pepacujiru pananeconitsipame Cristojawabelia. ¹³Bajaraxuata, xanë caeto-ata apotsita-exanaenë tsane itsacuenejawa, apotsitaxaenëna tsane xua yabara jopaeya-exanaejitsipajë Jesús pijajiwiwajuwë-nëjiwi, pibisiacuene pexanaeyaniwa.

**Pablo apóstol-nëxae, toxanepanatsi Jesús pijajiwi
perajutsinexatsi penamatawenonaejawa**

9 ¹Payapëtaneme rabaja xanë tjamatabëcueneliwaissi naweretsinë Dioso pijacuenejawata. Nexata, tanejamatabëcuene-liwaissi caranatsijawa. Xanë raja apóstol-nënë tataenë wajatuxanenë Jesucristo, pacuenia itsa-apóstolemonae. Orijibia, xanë patacatsipaebicuenia paxamë pasiwanajamatabëcueneocopabame Jesucristojawabelia. ²Itsamonae aponetae-ata apóstol-nëcuenia, itsiata paxamë paneyapëtaneme apóstol-nëcuenenë, tsipaji pasiwanajamatabëcueneocopabame Jesucristojawabelia, patacatsipaebixae pexanialiwaissi, Jesús peliwaissi. Bajarapacuenia nacuene-itajëtajë apóstol-nëcuenenë.

i 8:7 pesaë pexainaewi: Pamonae Jesucristojawabelia pesiwanajamatabëcueneocopatsicujinae, itsa tsiteca canaëjëta pematawajibijumenë pesaë pexainaewi, cuenejëpa Jesús pijajiwi, pejinawanapaewi Corinto tomarata, pejumexaniataewi jumapecataeya pexanaenë pesaë pexainaewi pawayenonaenexatsi. **j 8:7 penajamatabëcuenebijianaewata:** Taema Mc 7:14-23; Hch. 10:14-16; Rom. 14:17; 1Ti 4:3-5; Heb. 13:9. **k 8:8 wajaxaejawa yabara:** Taema Mc 7:14-23. **l 8:9 pajopaeya-exanaejitsipame:** Taema Rom. 14:1-2, 14-21.

³Marapacuenia nayapijiwi jumezanawiatibiabajë pamonaë pibisiacuenia nebaracuaicuajai Jesús peliwaishi tatsipaebanajetarucaejawa^m yabara. ⁴Paxanëbeje, Bernabébeje-ata, pacatsicaruca picani patanerajutsinexamëbeje pataxaejawanexa, pata-apaeranënexabeje-ata, Jesús peliwaishi patatsipaebanajetarucaexabeje, pacuenia pato-exanabiabame itsamonae apóstolewi. ⁵Itsa patajawa pataxainanëbeje tsipae, paxanëbeje-ata pata-barëponanexabeje Jesús peliwaishi pejumexaniataewabeje. Bajarapacuenia tsipaji, exanawanapa itsamonae apóstolewi, wajatuxanenë Jesucristo pejuyapijiwi,ⁿ apóstolnë Pedro-ata. ⁶Paxamë tsaena itsacuenia panetocanaëjëtamebeje itsa-apóstolewiwecua, pataneyawenonaeyaniwamëbeje. Panetocanaëjëtamebeje, ëpaxanëbeje patajacuatabeje patanatocuenebicuenia patana-ewetsinexabeje. ⁷Pacayanijobatsi: ¿Detsa pawajabitsaënë pijacuata natomatotaponapona pijapalatata, daxita penamatawenonaejawanë penawajabitsaëtsijawata? ¡Ajibi cajena! Pitorobinëtsi tomatotaponatsi. ¿Detsa pajiwi uvabacabo pe-ubicujinae itsa tonacuaitatsi apoxae? Banacujumaxane. ¡Ajibi cajena! ¿Jipatsa pewetsijiwi pijadajubi apo-mileche apae? ¡Ajibi cajena! Bajarapacuenia pacatoxanepana picani pataneto-exanaejawanexamëbeje.

**Pacuenia Dioso itoroba Jesús pijajiwi pematamotabiabinexa
Dioso peliwaishi pepaebiwi, yabara peliwaishi**

⁸Itsa xanë pacamuxujibatsi xaniawaetsia pane-ewetsinexa Jesús peliwaishi papecatsipaebiwi, ¿bajarapacuenia tsaja pacamuxujibatsi jiwi pecanaëjëtsicuenia? ¡Jume baja cajena! Dioso penajumecopatsiliwaishi Moisés-pijinëta bajarapacuenia itoroba. ⁹Jumaitsi mapacueniaje: «¡Pabueyu pacanacuenebame trigoxu petanabataxuabinexa, pëtsa papumuxatatame,^o trigoxu pexaeyaniwa papecatotanabataxubijawata! ¡Biji rajane, paco-pare pexaeponanexa!», jai Dioso pejumeliwaisibaxutota. Bajarapacuenia itsa jumaitsi, ëbueyu yabara apojumaitsi. ¹⁰Biji rajane, bajarapacuenia jumaitsi, tsipaji Dioso nacasiwajamatabëcuenebëjai waxaitsi yabara, wajanacueratsiyaniwa wajanacuenebijawata. Bajaraxuata, ponë canacueneba iracuemo, trigoxu pe-ubinexa, bajarapijinia pacuenia, ponë tanabataxuaba bajarapatrigoxu penaweretsicujinae, bajaraponëbeje jamatabëcuene-ewetaponaponabeje najëpaeya pepitsinexabeje bajarapaxuyajuwënëjawa, penacuenebijamatabëcuene. ¹¹Nexata, paxanëbeje,^p patacacujarubixabeje Cristo peliwaishi, bepata-ubinëbeje panejamatabë-ëthëtota Dioso pejumeliwaishi. Nexata, juya paxamë pacatoxanepana patanerajutsinexamë patanamatawenonaejawabeje. Bajarapacuenia itsa paneyawenonamebeje, bepata-nacujumanotsinëbeje pata-ubijawabeje panejamatabë-ëthëtota. ¿Pacatsita pinijicuene tsaja tsipae bajarapacuenie? ¹²Itsa paxamë bajarapacuenia

m 9:3 tatsipaebanajetarucaejawa: Pamonaë apóstolewi Dioso tocopatsi perajutsinexatsi penamatawenonaejawaxi, pamonaejawabelia tsipaebanajetarubena Jesús peliwaishi. Nexata, rajutatsi pexaejawa, piapaeranë, palata-ata pijanamutonexa, pemajitsitaxunaenë-ata. Itsiata, Pablo, Bernabébeje, bajarapacuenia apo-exanaebeje, pacuenia exanawanapa itsamonae apóstolewi. Bajaraxuata, itsamonae cuene-aebatsi Pablo apóstol-nëcuene. **n 9:5** wajatuxanenë Jesucristo pejuyapijiwi: Taema Mt 12:46, 13:55 Santiago, José, Simón, Judas; Jn 2:12; Gál. 1:19. **o 9:9** ipëtsa papumuxatatame!: Taema Deut. 25:4. **p 9:11** paxanëbeje: Taema 1Co 9:6.

pa-ewetabiabame itsamonaē Dioso peliwaishi papecacujarubiwi, ¿bajarapacuenia tsaja apopacatsicaruae patane-ewetsinexamēbeje, Bernabēbeje? Jājā cajena.

Pacatsicaruae-ata picani bajarapacuenia pataneyawenonaenexamēbeje, itsiata paxanēbeje apopacawajēcaetsibeje. Biji rajane, panajamatabēsaēta-jēbeje bejiobicueneta paponaponaē-atanēbeje patanamatawenonaējawabeje yabara. Bajarapacuenia apopacajamatabē-itonotsitsibeje, tsipaji apopajitsipae-nēbeje Jesús peliwaishi bijiya panetaejawa, panejumexaniataeyaniwa.

¹³ Payapētaneme rabaja mapacuenēje. Dioso pijatemplobota petonacue-nebiwi, tocopatatsi pexaenexa ofrendacuenia pecapatabiabijawanē. Nexata, pajiwi tajuitabiaba altar-jumata pecapatabiabidajubiwiawanē, bajarapajiwi bajarapayajuwēnēwijawa pitabiaba pexaenexa. ¹⁴ Bajarapijinia pacuenia, wajatuxanenē Jesucristo tocopata pamonaē pejumeliwaishi pepaebanajetarubenaewi, peyawenonaenexatsi pamonaē baja, jumexaniatane petsipaebiliwaishitsi. ¹⁵ Itsiata baitsi jane, xanē bajarapacuenia netocopatsi-ata, apopacawajēcaetsi itsacuenejawayo-ata patanerajutsinexamē. Orijibia, mapabaxutoje apopacatoyaquinaetsi patanerajutaponaenexamē itsacue-nejawaxi tanamatawenonaexae. Biji rajane, ayaicuenia jamatabēcuenebarēyanē Jesús peliwaishi tapaebanajetarucaexae, itsajiwi neyawenonaenejewawa. Nexata, netoxanepanaejitsipa tatēpaejawa itsajiwi newecua-ajibia-exanaenejewawa tanasiwajamatabēcuene barēyajawa, tatsipaebanajetarucaejawa yabara Jesús peliwaishi, itsajiwi nematamotsinejewawa.

¹⁶ Xanē Jesús peliwaishi tatsipaebanajetarucaexae, aponataenē be-ayaijamatabēcuenenēnē. Biji rajane, bajarapaliwaishi aponejamatabēcuenecaējēpae tanawecua-ajibia-exanaejawa. Bitso meta naneconitsipajē Diosocajabelia, jiwi itsa apotsipaebinē tsipae bajarapaliwaishi. ¹⁷ Xanē itsa tajitsipaejamatabēcuene jiwi tsipaebaponaējitsipajē Jesús peliwaishi, nexata jamatabēcuene-ewetabiabijitsipajē patanerajutsinexamē itsacuenejawawa patacatsipaebijamatabēcuene. Itsiata baitsi jane, apotsipaebaponaenē tajitsipaējamatabēcuene. Biji rajane, wajatuxanenē Jesucristo tanetocopatsicuenia pacatsipaebaponaetsi. ¹⁸ Bajarapacuenia ta-exanaexae, aponaca-ējētsinē tapitsijawa itsacuenejawawa paxamējawata. Biji rajane, bitso siwajamatabēcuenebarēyanē tapitsijawanexa amoneya patacatsipaebixae Jesús peliwaishi, pacawajēcaenejewatsi xua pacatsicarua picani patanerajutsinexamē, apóstol-nēxaenē.

¹⁹ Xanē, itsajiwi apopijajiwitonēnē-ata, amoneya tatonacuebanaponaenexa, itsiata tajacuata naexanajē daxita jiwi beprijajiwitonēnē, amoneya tatsipaebanajetarucaenexa Jesús peliwaishi, ayaibitsaētoxaeto pesiwanajamatabēcueneocopabinexa Cristojawabelia. ²⁰ Bajaraxuata, itsa tsipaebaponaenajē Jesús peliwaishi judíowijawa, judíowinēcuenia ponaponajē, tajumexaniataeya-exanaenexa bajarapaliwaishi. Bajarapijinia pacuenia, itsa tsipaebaponaenajē pamonaē peca-asaewi Dioso penajumecopatsiliwaishi Moisés-pijinēta, bajarapaliwaishi jumecowēnētsiaponaponajē, tajumexaniataeya-exanaenexa Jesús peliwaishi, aponetsicaruae-ata tajumecowēnētsijawa Dioso penajumecopatsiliwaishi Moisés-pijinēta, aneonijibia tanetaenexa.

²¹ Bajarapijinia pacuenia, itsa tsipaebaponaponajë apojudfowijawa, apopeyapëtaewi Dioso penajumecopatsiliwaisi Moisés-pijinëta, cuenejëpaeya naponaponabiabajë,^q be-apotayapëtaenëcuenia bajarapaliwaisi. Be-apotayapëtaenëcuenia naponaponabiabi-atanë, itsiata apocopsinë tajumecowënëtsijawa Dioso penajumecopatsiliwaisi Moisés-pijinëta, saicaya tajitsipaecuenia taponaponaenexa. ¡Jume baja cajena! Biji rajane, jumecowënëtsiaponaponajë Cristo tane-itorobicuenia. Bajarapacuenia exanaponaponajë, tajumexaniataeya-exanaenexa Cristo peliwaisi itsa tsipaebajë, pesiwanajamatabëcuenecopatsinexa Cristojawabelia. ²² Itsa naponaponajë pamonaen penacuene-ewetsiwi tuatujëta, jamatabëcuenejëpaeya naponaponabiabajë, ta-exanaeyaniwa xua tsitapibisiacuenetsi bajarapamonaen. Bajarapacuenia exanajë, tajamatabëcueneayawenonaenexa pewajënaeyabelia, pejumexaniataenexa Cristo peliwaisi, xaniawaetsia pitaxutuajamatejemanexa Cristojawabelia. ²³ Bajarapacuenia exanaponaponajë baja jiwi pejumexaniataenexa Jesús peliwaisi, jiwi pecapanepaeliwaesinexatsi Diosojawabelia, bajarapamonaen yajawa patanajuabarëyanexa pesiwanajamatabëcuenecopabijawata Jesucristojawabelia.

²⁴ Panenacueratsiyaniwa xua Jesucristo pacarajutsiapaeba panetonacuenebijamatabëcuene,^r payapëtaneme rabaja mapacueneje. Penayacopia-ucubiwi pecujinaejinaejawata, banajuacujinaejina daxita, caecujinaejinaecuenexanaen-ata penayacopia-ucubinexa. Itsiata baitsi jane, ponë bitsojina daxitawecua pecujinaejinaejawata, bajaraponë, caenë, bapita xua tsipaebatsi perajutsinexatsi pecujinaejinaematamo, premiowënëjawa. ¡Bajarapijinia pacuenia, paxamë-ata, pacaenëmë canacujitsia, panenayacopia-ucubiwicuenia daxita panesaëta panewajënaeyabelia patonacuenebawanapare, panepitsinexa Jesucristo xua pacarajutsiapaeba! ²⁵ Xaniawaetsia pepitsinexa premiojawa, daxita pamonaen penayacopia-ucubiwinexa, pecujinaejinaejawata, tajëwelia banacuene xaniawaetawanapa, pebitsojinaenexa itsamonaen mata-toxetsia. Orijiibia, penacuene xaniawaetsimatacabianëjawa, nawecuatsata daxita xua yabijianaejitsipatsi penayacopia-ucubimatacabia. Bajarapacuenia exana pepitsinexa tsiquirinaemaxëranaxita pequiobicononajawa, bepijiayo pebaxutsaquenaejawa. Biji rajane, waxaitsi Jesús peliwaisi wajajumexaniataewi, Dioso nacatoxaniawaeta^s bitso pexaniajawa athëbëtatsia wajana-carajutsinexa, apowerewerecaejawanexa. Bajaraxuata, pacatoxanepana bitso panenacuene xaniawaetsijawa, panenayajiwiwitaenexa xuanë pacacue-nebijianaejitsipa,^t xaniawaetsia panetonacuenebawanapaejawa wajatuxanenë Jesucristo. ²⁶ Xanë apotonacuenebaponaponaenë jemacuenia pacuenia cucujinaejinaejitsipa pitaxutotsëcënaenë. Bajarapacuenia-ata penabenënexa

q 9:21 cuenejëpaeya naponaponabiabajë: Taema Gál. 2:11-14; Col. 2:11, 16; Hch. 21:21.

r 9:24 panetonacuenebijamatabëcuene: Taema 1Co 9:21b. **s 9:25** nacatoxaniawaeta: Taema Mt 10:41; 16:25; 25:19-23; 2Pd 1:8-11; 2Jn 1:8; Apoc. 22:12. **t 9:25** xuanë pacacuenebijianaejitsipa: Jesús pijajiwi baxaina acueyabi pajamatabëcuenebeje, xuanë cuenebijianaejitsiatsi: pepodowathi, mapanacuapijiliwaisi, peperabëto pejitsipaejamatabëcuene-ata, pepitsiyaniwa xua wajatuxanenë Jesucristo nacarajutsiapaeba, premiocuenia.

jemacuenia apocawetsi tsipae pija-epatota. ²⁷Biji rajane, tanacueratsiyaniwa, najamatabëcuenexaniawaetaponaponajë, pacuenia peyanacopia-ucubinënexa naperabëxaniawaeta piäjumalisäënexa. Bitso ajamatabëcuenesaëya jitsipajë wajatuxanenë Jesucristo xaniawaetsia tatonacuenebaponaponaeenexa, tsipaji belia tacujarubinë-ata tsipae itsamonae Jesús peliwaisi, nacueratsipajë.

Pemuxujobiiliwaisi penawajëcabiabinexa ëDiosojawabelia

10 ¹Patajamonaemë Cristo pejamatabëcueneta, panenacueratsiyaniwa pane-exanawanapaejawa Dioso pijacuene, pëtsa panacofënëtame xua tocopiapatatsi paxanë, pajudíowinë, patajasalinaiwimi petusatonacuata! Bajayatami daxita bajarapamonae pënanajetarubena itarërëbo" pematacaponaecueniatsi, Moisés-pijinë pebarënajetarucaejawata. Barënicabanua" daxita petaxuta Rojo manuamene-epatuarena. ²Bajarapamonae manuamene pe-epanicabijawata," naexana bepenabautizabiwi. Itarërëbo pepënaponaejawata,* najamatabëcuene-itajëta caeliwaisi pexainaejawa Moisés-pijinëjawabelia. ³Bajarapacuenia-ata caewiriapexaejawa najua-xenajetarubena, xua Dioso rajutaponatsi,⁷ itsa najetarubena bajarapatu-sato nacuyarena. ⁴Caewiria mera najua-apaenajetarubena, pamera Dioso tocapiatsipatsi ibotoxanetojawawerena.⁸ Pa-ibotoxaneto bajarapamonae pëna najetarucatsi, Cristo baja cajena.⁹ Bajarapamera piapaejawata wecuajibitsabiabitsi mera pejitsipaejawa. ⁵Daxita bajarapacuenia Dioso pexania-cuenia yawenonaponae-atatsi, ayaibitsaëto patajasalinaiwimi jume-aeba pacuenia Dioso najumecapanepaeya jumaitsitsi. Nexata, Dioso aposiwajamatabëcuenebarëyatsi. Bajaraxuata, bajarapamonaemi nacuerata. Nexata, werebiabitsi nacayajatsiaya petusatonacuata, jonenejewa pa-irajawabelia Dioso najumecapanepaeya picani rajutsiapaebatsi.

⁶Bajarapitsicuenejawanë tocopiapatatsi bajarapamonaemi, wajanacatsitanacuene-itajëtsinexa wajacuenejëpaeyaniwa. Bajaraxuata, apobe-itajitsipaetsi waja-exanaejawa pitsipibisiacuene exana bajarapamonaemi. ⁷Nexata, jumapecataeya pexanaenëanëjawabelia apobe-exanaetsi itsacuenejawa, wajanajamatabëcuene-itajëtsinexa asiwaya wajayaiyataejawa, pacuenia exana bajarapamonaemi. Bajaraxua yabara Dioso pejumeli-waisibaxutota jumaitsi mapacueniaje: «Bajarapamonae penajamatabëcuene-itajëtsinexa, caejamatabëcuene pexainaejawa jumapecataenëjawabelia, ena pexaenexa, piapaenexanua, jumapecataenë pewënëta. Bajaraxuacujinae,

u 10:1 itarërëbo: Taema Éxo. 13:21-22; 14:24. v 10:1 barënicabanua: Taema Éxo. 14:26-31. w 10:2 manuamene pe-epanicabijawata: Taema Éxo.14:22-29. x 10:2 itarërëbo pepënaponaejawata: Taema Éxo.13:21-22; 14:19. y 10:3 Papexaejawa: Taema Éxo. 16:12-35. z 10:4 ibotoxanetojawawerena: Taema Éxo. 17:5-6; Núm. 20:8-11; Sal. 78:15-20; 105:41. a 10:4 Cristo baja cajena: Ayajawa, xua Dioso to-exana Israel-pijinë pemomoxi, petusatonacuata, nacatocuene-catane Cristo yabara. Pa-itarërëbo matacaponatsi, Cristo rabaja. Éxo. 14:19 Papexaejawa Dioso rajutatsi, manájawa, Cristo rabaja. Jn 6:33-35. Pamera pitsapa ibotoxanetojawawerena, Cristo rabaja. Jn 4:10; 7:3. Pa-ibotoxaneto capitsapa mera, Cristo rabaja. 1Co 10:4 Pacuenia Dioso caeto itoroba Moisés-pijinë peconitaxuabinexa bajarapa-ibotojawawerena mera pepitsapaenexa, jiwi merajitsia petëpaeyaniwa, bajarapacuenia Dioso tocopata Jesucristo caeto pebeyaxuabinexatsi, jiwi penaxuabiyanwa Diosowecua. Pacuenia pecotocaewijawata Dioso itoroba Moisés-pijinë pejumeta pitorobinexa mera pepitsapaenexa ibotoxanetojawawerena, bajarapijinia pacuenia, maparucacataje. Jiwi icatsia apobeyaxuabi tsane Cristo. Biji rajane, pejumeta wajëcaena bajara-ponëjawabelia, pejamatabëcuenexanepanaeya-exanaenexatsi.

nonobapuna naitacanitsiaya peyawajibinexa»,^b jai Dioso pejumeliwaisibaxutota. ⁸ Apobenacuenecajitsipaetsinua wajawitota pibisiacuene wajanawecua-exanaejawa wajanacojiobiwi, pacuenia bajarapamonaemiyajuwënëwi exana. Bajarapitsipibisiacuene pexanaewi Dioso naneco-nitsiaya tocopata petëpaenexa caematacabita,^c veintitrés mil pajiwiubeje. ⁹ Apobejamatabëcuene-ëjëtsitsi, pibisiacuene waja-exanaejawata, wajatuxanenë Cristo, pacuenia bajarapamonaemiyajuwënëwi Dioso jamatabëcuene-ëjëba, pibisiacuene pexanaejawata. Bajarapacuenia pexanaexae, Dioso naneconitsiaya tocopata petëpaenexa jomo pesinicueniatsi.^d ¹⁰ ¡Pëtsa pibisiacuena Dioso pabaracuaicuajamë,^e pacuenia judíowi pijasalinaiwimiya-juwënëwi pibisiacuene exana, pecuenebaracuaicuajaijawata Moisés-pijinë, Aarón-pijinëbejajawabelia! Bajaraxuata, Dioso tsi-itoroba pija-ángelnë, pewerebiabinexatsi bajarapamonaemiyajuwënëwimi.

¹¹ Daxita bajarapacuenejawanë bajarapamonaemi tocopiatatsi, wajanacayapëtaeya-exanaenexa pacuenia naneconitsia-exanatsi pibisiacuene pexanaexae. Bajarapaliwaisi Dioso yaquinaeaya-exana pejumeliwaisibaxutota, wajanacamuxujobinexa, waxaitsi-ata bajarapacuenia pibisiacuene waja-exanaeyaniwa, nacia pewerewerecae-itabarayota wajajinawanapaewi. ¹² ¡Bajaraxuata, paxamë, panenatocanaëjëtsiwi, apopanejopaejawanexa bajarapitsipibisiacuenejawabelia, xania baja, panayajiwitaema panejopaeyaniwa! ¹³ Xua baja aeconoxae pataeponame, papecajamatabëcuene-ëjëtsijawa,^f bajaraxua daxita jiwi tocopiapataponatsi mapanacuataje. ¡Itsiaata baitsi jane, paxamë, Jesús papijajiwimë, pa-itaxutuajamatejemamëre Diosojawabelia papecayawenonaponaenexa! BajaraPonë caejamatabëcuene xaina papecayawenonaponaenexa papecajamatabëcuene-ëjëtsijawata. Nexata, apopacacopatsi tsane papecajamatabëcuene-amoneyabinexa paneajamatabëcuenesaëjawawecua. Biji rajane, Dioso pacayawenonaponaena, panewecuapanepaponaenexa^g pibisiacuene pane-exanaeyaniwa.

¹⁴ Bajaraxuata, patajamonaemë pataca-asiwawi, pacamuxujobatsi panewecuanajetabijirawinexa jumapecataeya pexanaenëanëjawabelia penawajëcaejawawecua. ¹⁵ Paxamë pacatanetsi panejumeyapëtaewicuenia. Nexata, pacajamatabëcuenecaëjëpa baja panejumeyapëtaenexa patacatsipaebiliwaisi, pexaniajailiwaicsiucene. ¹⁶ ¡Nexata, pacanaëjëre mapaliwaisije itsa pacatsitaxaniajai! Itsa nacaetuanatsi wajanajamatabënapitsinexa xua yabara Cristo nacasiwatëpa, wjamatawejëa-apaera yabara pexaniajamatabëcuene rajutatsi Diosojawabelia. Nexata, itsa najua-apatsi najamatabëcuene-itajëtatsi caejamatabëcuene wajaxainaejawa Jesús wajanacasiwatëpaejawa yabara. Bajarapijinia pacuenia,

b 10:7 Taema Éxo. 32:3-6. **c 10:8** *petëpaenexa caematacabita*: Taema Núm. 25:1-9. Bajara-jota, naperabëquenetsiataeyabiaba Moabitamonae petiriawi, penajamatabëcuene-itajëtsinexa caejamatabëcuene pexainaejawa pijipetiriawi pijadiosowijawabelia. **d 10:9** *jomo pesinicueniatsi*: Núm. 21:5-6 Bajarajota, bajarapamonaemi cuenecarapuaba Diosojawabelia pape-xaejawa yabara rajutatsi, petosajinaexaetsinua mera. **e 10:10** *pabaracuaicuajamë*: Taema Núm. cap. 14 cap., 16-ata. ¡Pëtsa pibisiacuena cuenecarapuabame! Taema Flp. 2:14; Sant. 5:9; 1Pd 4:9. **f 10:13** *papecajamatabëcuene-ëjëtsijawa*: Itsajawata, pepodowathi nacajamatabëcuene-ëjëta. Taema Mt 4:1-11; 1Ts 3:5; Efe. 6:12,16, itsajawata wajajitsipaejamatabëcuene nacajamatabëcuene-ëjëta. Taema Sant. 1:13-14; Mt 5:28; Mc 7:21-23; Efe. 4:22; itsajawata mapanacuapijiwije nacajamatabëcuene-ëjëta. Taema Sant. 4:4; 1Jn 2:15-16. **g 10:13** *panewecuapanepaponaenexa*: Taema 1Pd 1:3-7; 2Pd 1:3-4; 2:9.

itsa daxitatsi najuaxanetsi caepan, najamatabëcuene-itajëtatsi caejamatabëcuene wajaxainaejawa becaeperabëto wajanaexanaejawa Jesucristojawabelia. ¹⁷Ayaibitsaëtoxaneto-atatsi, caepan itsiata wajanajuaxaexae, najamatabëcuene-itajëtatsi becaeperabëto wajanaexanaejawa Jesucristojawabelia. ¹⁸Bajarapijinia pacuenia, Israel-pijinë pemomoxi. Bajarapamonae itsa capata dajubi pebeyajebinexa, bajarapayajuwënëwijawa tajuita altar-jumata Diosojawabelia. ^hPenacopabiwijawa bajarapamonae najuaxane, penajamatabëcuene-itajëtsinexa caejamatabëcuene pexainaejawa Diosojawabelia, nacaemonaecuenia-ata penataejawa.

¹⁹Bajarapaliwaisibeje yabara canaëjësianatsi. Apojumaitsinë jumapecataenë yabara, perajutsiyajuwënëwijawa-ata tanamatamotsia-exanaenexa. Biji rajane, bajarapacueniejawabeje najua-amatamobibeje Dioso pitabarata. ²⁰Bajarapacuenia jumaitsinë xaniawaetsia panecanaëjëtsinexa. Padajubiwi jiwi rajuta ofrendacuenia jumapecataeya pexanaenëanëjawabelia, bajarapawi pepacujiru rajuta dowathimonaejawabelia. ApoDiosonexa cajena. Bajaraxuata, apopacatojitsipaetsi caejamatabëcuene panexainaenexa, panenaxaejawata bajaraparajutsiwiwajuwënëjawaw, bajarapadowathimonaejawabelia. ²¹Apopacatoxanepanae anijacue-nebeje caecuenia pane-exanaejawa, wajatuxanenë Jesucristo peca-apaejawata, ⁱpanenaca-apaenexa, icatsia, xuacujinae, jumapecataeya pexanaenëanë^j pewënëta peca-apaejawanë, panenaca-apaejawata panenajamatabëcuene-itajëtsiyaniwa caejamatabëcuene panexainaejawa dowathimonaejawabelia. Bajarapijinia pacuenia, apopacatoxanepanaenua panenajuaxaejawata pan panenajamatabëcuene-itajëtsinexa becaeperabëto panexainaejawa Jesucristojawabelia, xuacujinae icatsia, panenaxaejawata jumapecataeya pexanaenëanëjawabelia perajutsiyajuwënëwijawa, panenajamatabëcuene-itajëtsinexa caejamatabëcuene panexainaejawa dowathimonaejawabelia. ¡Bajarapacuenie bitso cajena abeje pane-exanaejawa! ²²Waxaitsi bajarapacuenie waja-exanaejawata, anaeya-exanatsi wajatuxanenë Jesucristo. Waxaitsi baja cajena, beweliasaë wajaxainaewi bajaraPonë pitabarata. Nexata, apowecuapanepaetsi tsane itsa nacananeconitsia-exanaena, caejamatabëcuene wajaxainaexae dowathimonaejawabelia.

Jesús pijajiwi apobetsita-exanae xua penajuajumexaniataewi

Jesús peliwaishi jamatabëcuenebijianaejitsipatsi

²³Daxitacuenie nawita waja-exanaenexa, xua jamatabë-exanatsi. Itsiata, daxitacuenie waja-exanaejawa aponacacueneyawenonae.

h 10:18 tajuita altar-jumata: Pablo najamatabënapitsia-exana padajubi judiowi capata penajamatabëcuene-itajëtsinexa caejamatabëcuene pexainaejawa Diosojawabelia, copiaja pecapatsidajubi petajuitsicujinae daxitanë altar-jumata pijaneconijamatabëcuene. Cotocaewi pecapatsidajubi daxitanë apotajuitsi. Itsayajuwënëwijawa saya copata. Nexata, penacopabiwi sacerdotewi, dajubi pecapatsinë-ata, pijabopijiwi-ata najuaxane, penajamatabë-itajëtsinexa caejamatabëcuene pexainaejawa Diosojawabelia. Bajarapacuenia exana Dioso pesiwajamatabëcuene-caewixae pijaneconi yabara, pexaniajamatabëcuene perajutsinexanua Diosojawabelia peyawenonaexatsi. Taema Lev. Cap. 3, 7:11-18. **i 10:21 peca-apaejawata:** Bajarapeca-apaejawabeje nacatocuenecatane waja-itaxutuajamatejemajawa. Majotaje Pablo nacayapëtaeya-exana pacuenia aponacatoxanepanae caecuenia waja-itaxutuajamatejemajawa Jesucristo, itsajume dowathimonaie, itsajume wajamatawajibicuene wajanacacapanepaenexa, pexaniacuenia wajanacayawenonabiabinexanua wajanamatawenonaejawata. **j 10:21 jumapecataeya pexanaenëanë:** Bajarapajumapecataejawanë nacatocuenie-itajëta daxitaxujawabelia jiwi siwanajamatabëcuene-copatabiaba peyawenonaenexatsi, pewetsinexatsi piayaicuenewecua, pexaniacuenia petopitsapaenexatsinua xua exana.

Aponacajamatabëcuene naweretsia-exanaenua Dioso pijacuenejawabelia. Bajarapacuenia pexanaejawata apojamatabëcueneyawenonaenua itsajijiwi-ata. ²⁴Apoxanepanae wajanasiwajamatabëcuenebëjajawa wajacuata. Biji rajane, nacatoxanepana itsamonae yabara, Jesús pijajijiwi, wajasiwajamatabëcuenebëjajawa wajajamatabëcueneyawenonaenexa.^k

²⁵Dioso baja cajena nacatocopata wajaxaenexa itaxutejema daxitawiria-wijawanë. ¡Nexata, paxamë itsa panatocomuatame pewi pecanajetabiabibonëjawata, pëtsa payanijobame pecanajetsiwijawabelia, bajarapawi yabara, itsa jumapecataeya pexanaenëanëjawabelia perajutsiyajuwënëwijawa! Itsa xaniawaetsia apopayapëtaemë tsipae jumapecataeya pexanaenëanëjawabelia perajutsiyajuwënëwijawa, nexata panexaejawata, apopanamatabëcuenebijianaemë tsipae Diosojawabelia. ¡Saya pacomuare payanijobinejewamë!²⁶ Wajatuxanenë Jesucristo baja cajena pacatocopata itaxutejema panexaenexa, tsipaji daxita mapanacuaje, daxita mapanacuapijicuene-ataje, bajara-Ponë baja cajena pijajawa.^l

²⁷¡Nexata, Jesús peliwaissi pejume-aebinë, itsa pacajunata panenaxaenexa pijaboyabelia, panaponare panenajuaxaenexa itsa pajitsipame! ¡Xua paca-abata, itaxutejema paxaema, payanijobinejewamë itsa jumapecataeya pexanaenëanëjawabelia peyajuwënërajutsiwijawa, panenajamatabëcuenebijianaeyaniwa Diosojawabelia!²⁸ ¡Itsiata, itsanë itsa pacajumaitsi tsipae: «Mara pawije jumapecataeya pexanaenëanëjawabelia ofrendacuenia perajutsiyajuwënëwijawaje», itsa pacajai tsipae, pëtsa patsitaxaneme, penajamatabëcuenebijianaeyaniwa bajaraponë!²⁹ Mapaliwaisije jumaitsinë pamonae abaxë natocanaëjëta bajaraxua yabara neconicuene. Apojumaitsinë paxamë yabara, panenatoyapëtaewi baja aponeconicuene. Itsiata, itsamonae bepasiwajamatabëcuenebëjamë papecacuenetaewi yabara. ¡Bajaraxuata, pëtsa pa-exaname itsajawa, xua yabara itsajijiwi pacaneconitsipa pibisiacuene pane-exanaewicuenia!³⁰ Pexaniajamatabëcuene rajutsi-atanë tsipae Diosojawabelia taxaejawa yabara, ¿detsa xuajitsia tsitaxaejitsipajë tanetaewi xua tsitapibisiacuentsi tanebaracuaicuajainexa? Bajaraxuata, aponetoxanepanae bajarapacuenia tajamatabëcuenebijianaejawa itsajijiwijawabelia, pexaniacuene rajutsi-atanë Diosojawabelia bajaraxua yabara.

³¹Bajaraxuata, daxita xua pa-exaname, panexaejawata yabara, pane-apaejawata-ata yabara, patsita-exanaename papecacuenetaewi pexaniacuena pewënëxaniatsinexa Dioso. ³²¡Pëtsa patsita-exaname itsacuenejawayo-ata, xua yabara pacueneccaranatsipame, judíowi, apojudíowi-ata pesiwanajamatabëcueneccopabiyaníwa Jesucristojawabelia! ¡Bajarapijinia pacuenia, pëtsa patsita-exaname itsacuenejawayo-ata, xua yabara pajamatabëcuenebijianaejitsipame Jesús pijajijiwiawuwënëjiwi!³³ Mapacueniaje exanapononajë xanë. Daxita xua tsita-exanapononajë, bajarapacuenia exanajë itsamonae tanesiwajamatabëcuenebarëyanexa. Aponajamatabëxainabiabinë ta-exanaenexa xua ëxanënexa netoxanepana. Biji rajane, najamatabëxainabiabajë ta-exanaejawa xua toxanepanatsi itsamonae-ata, ayaibitsaëto pesiwanajamatabëcueneccopabinexa Jesucristojawabelia.

k 10:24 wajajamatabëcueneyawenonaenexa: Taema Flp. 2:4. l 10:26 pijajawa: Taema Sal. 24:1; 50:12.

11 ¹ Xanë pacuenia pacatsita-exanaponatsi, bajarapacuenia necuene-jëpaeya itsamonaejawabelia patsita-exanawanapare, pacuenia xanë cuenejëpaeya ponaponajë Cristo pexanaecuenē!

**Pacuenia Jesús pijajiwi be-exanawanapa culto
pexanaejawata, yabara peliwaishi**

² Patajamonaemë Cristo pejamatabëcueneta, pacasiwajamatabëcueneba-rëyatsi, tsipaji panejamatabënajinawanapame, pa-exanawanapamenua pata-cacujarubicuenia. ³ Itsiata, pacatojitsipatsi paneyapëtaenexa mapacueneje. Dioso baja cajena penamatacaitorobinë Cristonexa, bepematabocotocuenia. Nexata, Dioso juya tocopata Cristo penamatacaitorobinëxexa caepibi canacujitsia, bepematabocotocuenia. Bajarapijinia pacuenia, Dioso tocopatatsi pebi penamatacaitorobinëxexa pijawa, bepematabocotocuenia. ⁴ Bajaraxuata, cultojawata pebi itsa namata-acatsipa Diosojawabelia penawajëcaejawata, Dioso pejumeliwaishi pepaebijawatanua, najamatabëcuene-itajëta apo peyaiyataejawa pijatuxanenë Cristo, ponë Dioso tocopatatsi peyaiyataenëxexa. ⁵ Petiriwa cultojawata namata-acatsinejewa itsa wajëcaejitsipa Diosojawabelia, paebijitsipana Dioso peliwaishi, najamatabëcuene-itajëtsipa pamona apo peyaiyataejawa, ponë Dioso copatatsi peyaiyataenëxexatsi. Bajarapacuenia itsa exanaejitsipa, pamona yapijiwi-aura tsipaetsi, tsipaji daxitajiwi penacaetuatsijawata taejitsipatsi bepemataxunaewatsi,^m pacuene yabara daxita petiriawi baya-aura tsabiabi. ⁶ Nexata, powa apojitsipae cultojawata penamata-acatsijawa papaëbërëpanayota. Itsiata, itsa namataca-ura tsipae pemataxunaecujinaetsi, nexata namata-acatsi pepanata, Diosojawabelia penawajëcaenexa, Dioso peliwaishi pepaebinxanua, paepatota jiwi nacaetuata Jesús pewënëta. ⁷ Pebi apobenamata-acatsi, tsipaji Dioso copiaya exanatsi nacuenecataeya. Nexata, pebi cuene-itajëta Dioso ayaijamatabëcuenenëcuene. Petiriwa juya cuene-itajëta pamona pejamatabëcuene-ewetsiwa. ⁸ Dioso apojutsi pebi petiriwajawawerena. Biji rajane, Dioso cotocaewi exana petiriwa, pebi peyenesitoyajuwënëjawawerena. ⁹ Orijibia, Dioso baja cajena pebi apo-exanaetsi petiriwa pejamatabëcueneta. Biji rajane, Dioso baja cajena Daxitajiwi exana petiriwa pebi pejamatabëcueneta, penamatawenonaexae pejamatabëcueneyanabiwanexatsi.ⁿ ¹⁰ Bajarapajamatabëcuenebeje yabara, petiriwa benamata-acata, penajamatabëcuene-itajëtsinexa pamona peyaiyataejawa. Nexata, ángelewi itsa tanetsi pamona peyaiyataejawa, siwajamatabëcuenebarëyatsi. ¹¹ Bajarapacuenia Dioso exanae-ata petiriwa pebinexa, itsiata waxaitsi, Jesús pijajiwiitsi, yapëtanetsi pacuenia pebi, petiriwabeje, namata-enetsia nanamatawenonabeje. Nexata, pebi apo-asaë tsipae petiriwanejewa. Petiriwa pijinia apo-asaë tsipae pebinejewa. ¹² Nexata, Dioso exanae-ata copiyapijiwa, pebi peyenesitoyajuwënëjawata, bajaraxuacujinae, pebijiwi naexanapona petiriwata. Diosojawawerena baja cajena daxitacuene naexana.

m 11:5 *bepemataxunaewatsi*: Bajayatami bajarapanacuapijiwi mataxunabiaba powa mataya-jibatsi pamonawecua, daxitajiwi petanexatsi penaperabëcanajetsiwacuene. Bowecua pepit-sapaewaxi namata-acababiaba papaëbërëpanayota, penajamatabëcuene-itajëtsinexa penacojiobiwacuene, pamona peyaiyataejawanua. Bajaraxuata, Pablo muxujioba bajarapamona peyaiyataenexa. **n 11:9** *pejamatabëcueneyanabiwanexatsi*: Taema Gén. 2:18, 20.

¹³ Panijacuata pacanaëjère, itsa xanepanaejitsipa petiriawi cultojawata penawajëcaenexa Diosojawabelia, papaëbërëpanayota namata-acatsinejewa!
¹⁴ Waxaitsi baja cajena, pebijiwitsi, ba-auratsi waja-amatanapiajawa.
¹⁵ Juya, petiriwa piamatanapiajawa yajawaxanepana. Asiwayanua tanetsi, piamatanapiajawa yabara. Bajarapacuenia Dioso petiriwa toco-patatsi piamatanapiajawa bepenamata-acatsicuenianexa.^o ¹⁶ Itsajiwi itsa jamatabëpanejume-anaenota, caejamatabëcuene apopexainaexae petiriawi penamata-acatsijawa yabara, bajarapajiwi beyapëtane mapacueneye. Paxanë pa-apóstolewinë, daxita Jesús pijajiwi-ata, daxita nacuanëjawa pejinawana-paewi, caejamatabëcuene paxainajë bajarapacuenia petiriawi penamata-acatsijawa yabara.

Santa Cena pexanaejawa yabara pemuxujiobiliwaisi

Bijiaya pexanaejawa yabara

¹⁷ Paliwaisi aeconoxae pacatoyaquinatsi, apopatacasiwajamatabëcuene-barëyaliwaisi, tsipaji panenacaetuatsijawata bijiaya pa-exanabibame. Culto pane-exanaejawata, xaniawaetsia najamatabëcuenejëpaeya namata-enetsia xaniawaetsia apopanamatabëcueneyawenonaemë. Caranata, saya panajamatabëcuenebijianaponame Jesús peliwaisi panenajuajumexaniataewijawabelia. ¹⁸ Najamatabëxainajë copiaya patacajumaitsinexa mapacueniajë. Pacawënëliwaisitanetsi paxamë panenacaetuatabibijawata, Jesús papijajiwimë apopanenajamatabëcuenejëpabiabijawa. Pacawënëtanetsinua nawecuanatsanaeya pane-enabiabijawa pacaebitsaëtöximë canacujitsia. Xaniajai raeta baja, bajarapacuenia pa-exanabiabame. ¹⁹ Xanë baja netsita xaniajai natsanaeya panenawecua-enabiabijawa. Paxamë, pacaebitsaëtöximë canacujitsia, cowë panatocanaëjëtame panenajamatabëcuene-itajëtsijawa bitso caejamatabëcuene panexainaewi Diosojawabelia itsabitsaëtöxiwecua.^p

²⁰ Bajarapacuenia itsa panacaetuatabiabame Cristo papecasiwatëpajawa panenajamatabënapitsinexa nacaemonaecuenia,^q nexata pepacujiru Santa

o 11:15 *bepemata-acatsicuenianexa*: Dioso peliwaisi penacujarubiwi caejamatabëcuene apoxainae bajarapajume yabara. Itsamonae canaëjëta Dioso tocaëjëtatsi piamatanapiajawa bepenamata-acatsijawanexa. Nexata, aponamatawenonae penamata-acatsinexa papaëbërëpanayota. Itsamonae pijinia canaëjëta pacuenia petiriawi piamatanapiacuene nacacujaruba pacuenia petiriawi benamata-acatabiaba penawajëcaejawata Diosojawabelia, pepaebijawatanua Dioso peliwaisi pabota jiwi nacaetuatabiaba Jesús pewënëta. **p 11:19** *itsabitsaëtöxiwecua*: Itsabitsaëtö natocanaëjëta bitso pexaniacuenia pepaebiwi. Taema 1Co 1:11-12, 3:4-6, itsabitsaëtö natocanaëjëta Dioso pexaniacuenia peyawenonaejawatsi, ayaijawa pecobecowë pexainaenexa. Taema 1Co 11:20-22; Sant. 2:1-6, itsabitsaëtö natocanaëjëtanua Espiritu Santo bitso pexaniacuenia pejamatabëcuenejëpaeya-exanaejawatsi itsamonaewecua. Taema 1 Co 13:1-3, itsabitsaëtötonua bitso pinijiliwaisi penatsixainaejawata, Dioso jamatabëcueneyawenonatsi piajamatabëcuene-saënexa Diosojawabelia, bara-anaepanaenejewa pajiwi bejiobia-exanatsi. **q 11:20** *panajuaxaenexa nacaemonaecuenia*: Bajayatami, Jesús pijajiwi nacaetuatabiaba penajuaxaenexa, nacaemonaecuenia penataexae. Bajarapanajuapexaejawanë, wënërübabiaba «Pena-asiwajawa pitajëtsifiesta», wowaijumeta «fiesta de amor». Nexata, bajarapafiestajawata, yajawa-exanabiaba Santa Cena-ata. Petaxuxuabijawata caepan epatsënëca, penajamatabënapitsinexa caenë Jesús bepejiobicueneeta pesiwatëpaejawatsi. Xuacujinae, daxita najuaxane Pena-asiwajawa pitajëtsifiestapijipexaejawa. Cotocaewijawata, matapania jane baja, pematawëjëa-apaera, najua-apa, penajamatabënapitsinexa Dioso pejanacuenia penajumeliwaisicajonejawa jiwijawabelia, Cristo pejana pejamatabëcuene.

Cena yabara apopanacaetuatsimë, tsipaji bajarapapexaejawa Jesús pija-jiwi exanabiaba penajamatabëcuene-itajëtsinexa nacaemonaecuenia, caenë Jesucristo pesiwatëpaxaetsi. ²¹ Itsiata baitsi jane, bajarapacuenia apopa-exanaemë. Panenaxae-epatota,^r itsamonae canaxaneta bepijia pija-epato pexaenexa paxaejawanë capata. Apo-ewetabiabi abaxë itsamonae pepatsi-jawa caecuenia panenajuaxaenexa. Nexata, itsamonae paxamëyajuwënëwi ayaijawa xaeyabiaba. Ayaira, vinora, matawëjëa-apaeyabiabanua. Nexata, wëna-aitajibi tsabiabi. Pamonaë baja cotocaewi pepatsiwi, yawerewere-cabiaba. Nexata, pijani tsabiabi. ²² Bajarapacuenia pane-exanaejawata, pexaniacuenie cajena apopa-exanaemë. Beweliacuenia pataeyabiabame Jesús pijajiwi yajuwënëwi. Orijibia, pa-urababiabame pamonaë pexaejawa apoxinaë paxamëtuatujëta. Itsa ayaijawa pajitsipame panexaejawanexa, pane-apaejawanexa-ata, nexata bajarapacuenia panijabonëjawa paxaename. Itsiata, itsa panajuaxaneme panenajamatabëcuene-itajëtsinexa Cristo papecasiwatëpaejawa padaxitamë, daxita caecuenia najëpaeya bepanajuaxaneme. ¿Detsa pacuenia netoxanepanaejitsipa patacajumaitisijawa pane-exanaejawa yabara? ¿Netoxanepana meta pexaniacuenia patacawënëxaniat-sijawa? ¡Jume baja cajena! Paxamë saya pananeconitame Diosojawabelia, asiwaya namata-enetsia apopanenataexaë.

Pacuenia Cristo tsita-exana pijajiwi penajamatabënapitabiabinexatsi

pesiwatëpaejawa, yabara peliwaissi

(Mt 26:26-29; Mc 14:22-25; Lc 22:14-20)

²³ Pacuenia wajatuxanenë Jesús neyapëtaeya-exana pexanaecuenie yabara, bajarapijinia pacuenia, pacacujarubatsi Santa Cena pexanaecuenie yabara. Pamerawi wajatuxanenë pijawajabitsaë pecobeyabelia canajetsijitsiatsi, bajara-pacaniwi yopijipexaejawa petaxuxuabijawata, wajatuxanenë Jesús cobenanuca panbë. ²⁴ Pexaniajamatabëcuene perajutsicujinaë Diosojawabelia pan yabara, epatsënëca jane baja. Xuacujinaë rajuta pijajiwi jawabelia. Nexata jumaitsi: «Mara papan tawije,^s tanacaewetsijawanexa paxamë yabara, betajiobicueneta patacasiwatëpaenexa. Bajarapacuenia tacowëta pa-exanawanapaename, pata-nenajamatabënapitabiabinexamë patacasiwatëpaejawa», jai wajatuxanenë Jesús pijajiwi jawabelia. ²⁵ Pexaeweretsicujinaë, bajara-icatsia Jesús cobenanuca peca-apaejawa. Nexata icatsia jumaitsi: «Pora eca mapapeca-apaejawata tajana raja, pajana itajëtsiana tanewecuarunaejawata Dioso pejanacuenia

r 11:21 *panenaxae-epatota*: Bajayatami penajamatabënapitsinexa Cristo pesiwatëpaejawatsi, Santa Cena pexanaejawata pecunapexaejawa najuaxaeyabiaba. Caebopijiji canacujitsia capatabiaba pexaejawa daxita penajuaxaenexa. Itsajawata, pijinia boxainaenë toseta daxitanexa. Taema Hch. 2:42, 46-47. **s 11:24** *tawije*: Panbë apoeperabëto Jesús. Vinora-ata apojejana Jesús. Bajaraxuabeje saya nacatocuenecatane xua Cristo nacato-exana wajanacasiwatëpaejawata. Pacuenia pan pexanaenexa, jiwi sebiabiaba piatajutaxunaeta, hornojawa, bajarapijinia pacuenia Jesús ayaicuenia bejiobia-exanatsi, wajanacacapanepaenexa Dioso wajanacananeconitsia-exanaejawaminexawecua, wajaneconijamatabëcuene. Pacuenia uvacuai-barëmene jucabiaba vinoranexa, bajarapijinia pacuenia Jesús pejanarunaejawata, nacatomatamota daxita wajaneconimi. Nexata, pacuenia jiwi wëna-asaë tsawanapae pan/peri pexaejawata, bajarapijinia pacuenia jiwi jamatabëcuene-aitawa Diosojawabelia, Jesucristo pejamatabëcueneta. Pacuenianua jiwi jamatabëcuenebarëya piapaejawata piatanevinora, bajarapijinia pacuenia Jesús pijajiwi jamatabëcuenebarëya, penajamatabënapitsijawata Jesucristo petomatamotsijawatsi daxita pijaneconimi.

penajumeliwaisicajonejawanexa^t mapanacuapijiwajawabelia. Bajarapajana pejamatabëcueneta Dioso aneconihibia taena mapanacuapijiwi, pijaneconi tatomatamotsixae tasiwatëpaejawata. Bajarapacuenia pane-apaeponeajawata, panenajamatabënapitabiabianame», jai wajatuxanenë Jesús pijajiwiwajawabelia. ²⁶Nexata, paxamë caepaxaecanacujitsiamë, mapapanje, mapamatawëjëa-apaera pane-apaejawatanua, pawajunupaebabiabianame itsamonaejawabelia wajatuxanenë Jesús wajanacasiwatëpaejawa cruzata. ¡Bajarapacuenia pa-exanabiabare wajatuxanenë icatsia pepatsimatcabitsicajawabelianexa!

Pacuenia Jesús pijajiwi benaxaniawaeta, Santa Cena pexanaewajënaeya

²⁷ Jesús bajarapacuenia pejumaitsixae, pijajiwiwajuwënëjiwi itsa yaneconiaya naxaejitsipa mapapan-jawaje, itsa yaneconiaya na-apaejitsipanua mapamatawëjëa-apaeraje, bajarapajiwi naneconitsipa^a wajatuxanenëjawabelia, apopeyayataexae wajatuxanenë pewito, pejana-ata. ²⁸Bajaraxuayaniwa caejiwi canacujitsia xaniawaetsia benajamatabëcuenejaita, pecaxitajarabinexa paneconi xaina Dioso pitabarata,^v pan penaxaewajënaeya, pematawëjëa-apaera-ata pena-apaewajënaeya. ²⁹Nexata, Jesús pijajiwiwajuwënëjiwi itsa naxaejitsipa, na-apaejitsipanua yayataenejewa Cristo peperabëto, pejana-ata, bajarapajiwi pijacuata neconinatsi-exanaejitsipa Diosojawabelia. ³⁰Bajarapacuenia yaneconiaya pane-exanaexae, paxamë yaibitsaëto payajuwënë-awitanemë, payajuwënëcueranamenua. Itsamonae payajuwënëtëpame baja. ³¹Itsiata, xaniawaetsia wajacuata itsa najamatabëcuenejaitsipatsi wajaneconi yabara, Santa Cena wajaexanaewajënaeya, nexata Dioso aponacaneconitsia-exanae tsipae. ³²Itsiata, wajatuxanenë itsa nacananeconitsia-exana wajanacacuenexanetsinexa, bajarapacuenia naca-exana wajanacayajawananeconitsia-exanaeyaniwa daxita mapanacuapijiwije, Cristo peliwaissi pejume-aebiwi.

³³¡Patajamonaemë Cristo pejamatabëcueneta, itsa panacaetuatame, abaxë pana-ewetabiabare daxita pepatsijawa caecuenia panenajuaxaenexa,^w

t 11:25 *pejanacuenia penajumeliwaisicajonejawanexa*: Bajayatami, penajumeliwaisicajonejawata itsajiwiwajawabelia, bajarapajiwi wësiñepecaucutsiaya beyaxuaba dajubi, bajarapajana pejamatabëcueneta petonamatamotsinexatsi najumecapanepaeya pejumaitsiñunenë. Xuacujinae, daxita penajumeliwaisicajonewi, najuaxane bajarapadajubiwi pesebicujinae, penajamatabëcuenetajëtsinexa caejamatabëcuenepexinaejawa xua yabara najumeliwaisicajunua. Bajaraxuata, itsa najuaxanetsi pan, matawëjëa-apatinsua, najamatabëcuenetajëtsi caejamatabëcuenewajaxinaejawa Jesús wajanacasiwatëpaejawa yabara. **u 11:27** *naneconitsipa*: Bajarapamonaenaneconita mapajamatabëcuenejawanë yabaraje: Yaneconiaya Santa Cena pexanaexae, naxuiriabia-exana Dioso pitabarata xua xane, xua-ata apanua, penajamatabënapitsijawata Cristo pesiwatëpaejawatsi. Yaneconiaya itsa exana, najamatabëcuenetajëta apopejumexaniataejawa Cristo pesiwatëpaejawatsi, aneconihibia peponaponaeñexa Dioso pitabarata. Biji rajane, najamatabëcuenetajëta caejamatabëcuenepexinaejawa Jesús pebeyaxuabiwitsijawabelia. **v 11:28** *paneconi xaina*: Taema Sal. 139:23; Co 1:10-13; 8:9-12; 11:17-22; 13:1-3; Jn 17:22; Rom. 12:5; 1Co 10:17; Gál. 3:28; Efe. 4:4. **w 11:33** *caecuenia panenajuaxaenexa*: Bajayatami, Jesús pijajiwi nacaetuatabiaba penajuaxaenexa nacaemonaecuenia, naca-axapijiwi penaetaexae. Bajarapanajuapexaejawané, wënërubabiaba pena-asiwajamatabëcuenetajëtsisifesta, wowajumeta fiesta de amor. Nexata, bajarapafiestajawa yajawa-exanabiaba Santa Cena-ata. Petaxuxuabijawata caepan epatsënëca, penajamatabënapitsinexa caenë Jesús bepejiobicueneta pesiwatëpaejawatsi. Xuacujinae, daxita najuaxane pena-asiwajamatabëcuenetajëtsisifestapipijepexaejawa. Cotocaewijawata, matapania jane baja, pexaeweretsicujinae, pematawëjëa-apaera najua-apa caewaxiopiñira, penajamatabënapitsinexa Dioso pejanacuenia penajumeliwaisicajonejawa jiwi-jawabelia, Cristo pejana pejamatabëcueneta.

panenajamatabēnapitsinexa xua yabara Cristo pacasiwatēpa! ³⁴ Panepatsiwajē-naeya, pajijiwi pijajani, copiaya bexane pijabota xua xaina, pecanaxanetsiyaniwa pijajanijamatabēcuenē. Nexata, panenacaetuatsijawata, bajarapajijiwi neconi aponatsi-exanae tsane Diosojawabelia, itsamonae, Jesús pijajiwi, beweliacuenia petaexae.

Itsajamatabēcuenējawaxi pematatsēnēa xua yabara paneyanijobame, abaxē apopacatoyaquinaetsi mapabaxutotaje. Pamatacabi ponaenajē paxa-mējawabelia, bajarajotalia xaniawaetsia pacatsipaebianatsi.

**Espíritu Santo pejamatabēcuenecaējēpaeya-
exanaejawanē Jesús pijajiwi jawabelia**

12 ¹ Patajamaonaemē Cristo pejamatabēcueneta, jitsipajē patacayapētaeya-exanaejawa pacuenia Dioso pejamatabēcueneta, Espiritu Santo jamatabēcuenecaējēpaeya-exanapona caejiwi canacujitsia, Jesús pijajiwi, pexanawanapaenexa pejamatabēcuenecaējēpaeya-exanaecueniatsi. Apojitsipaenē bijiya panejumetaejawa bajaraxua yabara.

² Paxamē payapētaneme baja, itsa abaxē apopasiwanajamatabēcuenecopabimē Jesucristojawabelia, dowathi pacajamatabēcuenematacapona Diosowecua, asiwaya panenawajēcaenexa jumapecataenēanējawabelia. Bajarapajumecataenēanē apopenatsipaebiwi, apopecuenecaējēpaewitsinua papecayawenonaenexa. ³ Bajaraxuata, pacayapētaeya-exanaejitsiatsi mapacuenēje. Caejiwi-ata, Espiritu Santo peyajawaponaponaejawatatsi,* apocuenecaējēpaetsi pejumaitsijawa mapacueniaje: «Jesús raja pijaneconi jamatabēcuenē tēpa», pejaijawa. Bajarapacuenia itsa jumaiatsi, peneta apo peyapētaeya-exanaeliwaisi Espiritu Santo. Bajarapijinia pacuenia, caejiwi-ata apocuenecaējēpaetsi pejumaitsijawa: «Jesús raja cajena pepoPētuxanenē», pejaijawa, itsa Espiritu Santo apoyajawaponaponaetsi.

⁴ Aeconoxae jane baja pacayapētaeya-exanaenatsi Espiritu Santo pexanaecuenējawanē Jesús pijajiwi tuatujēta. Espiritu Santo saicaya jamatabēcuenecaējēpaeya-exanapona-ata caejiwi canacujitsia, Jesús pijajiwi, itsiata caenē Espiritu Santo jamatabēcuenecaējēpaeya-exanapona daxita bajarapamonae. ⁵ Nexata, saicayacuenia tonacuenebapona-ata, daxita bajarapamonae caenē wajatuxanenē Jesucristo tonacuenebawanapa pitorobicueniatsi. ⁶ Jesús pijajiwi nacuenējēpaeya apo-exanawanapae-ata, itsiata caenē Dioso pesaēta yawenonatsi bajarapacuenia daxita petonacuenebawanapaenexa. ⁷ Nexata, pacujinae Dioso tocopata Espiritu Santo pejamatabēcuenecaējēpaeya-exanaejawa caejiwi canacujitsia, Jesús pijajiwi, bajarapacuenia exana, namata-enetsia penayawenonaenexa pejamatabēcuenecaējēpaeya-exanaecueniatsi. ⁸ Nexata, itsamonae, Jesús pijajiwi, Espiritu Santo jamatabēcuenecaējēpaeya-exanaponaetsi itsamonaejawabelia

x 12:3 *Espiritu Santo peyajawaponaponaejawatatsi*: Pesiwanajamatabēcuenecopabibijawata jumapecataeya pexanaenēanējawabelia, itsamonae Corinto tomarapijiwi, asiwaya wajēcabiaba jumapecataenējawabelia, peyapētaeya-exanaenexatsi itsaliwaisi, malicaiwi pejamatabēcuenē, bemajitsinaebocuenia-ata. Nexata, itsamonae Jesús pijajiwi Corinto tomarata, xaniawaetsia tsarena apoliwaisitsatsi Espiritu Santo peyapētaeya-exanaeliwaisitsi, itsamonae peyapētaeya-exanaeliwaisitsiwecua. Taema 1Jn 4:1-3; 2Pd 2:1; 1Ts 5:21.

xaniawaetsia pemuxujiobinexa tsiwajënaecanaëjëtsiaya,^y xania-waetsia pejinawanapaenexa Dioso pitabarata. Itsamonae pijinia jamatabëcuenecaëjëpaeya-exanaponatsi, petsipaebinexa itsamonaewabelia, xuanë Dioso yapëtaeya-exanatsi. ⁹Itsamonae pijinia jamatabëcuenecaëjëpaeya-exanaponatsi ajamatabëcuenesaëya pitaxutuajamatejemanexa Dioso. Itsamonae pijinia jamatabëcuenecaëjëpaeya-exanaponatsi pejamatejemaya-exanaenexa piawitanewi. ¹⁰Itsamonae pijinia jamatabëcuenecaëjëpaeya-exanaponatsi Dioso pesaëta pini-jicuene pexanaejawanë petsita-exanaponaenexa. Itsamonae pijinia jamatabëcuenecaëjëpaeya-exanaponatsi, petsipaebinexa Dioso pewënëta^z itsamonaewabelia, paliwaisi jitsipa pejumetaenexa. Itsamonae pijinia jamatabëcuenecaëjëpaeya-exanaponatsi pejumeliwaisiyapëtaenexa pepaebijiwi itsa pepacujiru Espiritu Santojawawerena pepitsapaeli-waisi, itsa jume, itsa drowthijawawerena najetaruca. Itsamonae pijinia jamatabëcuenecaëjëpaeya-exanaponatsi pecuaicuaijainexa apopejume-taejumenëta.^a Itsamonae pijinia jamatabëcuenecaëjëpaeya-exanaponatsi pejumeyapëtaenexa bajarapajumenë, juya pejumewajunupaebaponaenexa itsamonaewabelia pecuaicuaijajumenëta. ¹¹Jesús pijajiwi saicaeyacuenia jamatabëcuenecaëjëpaeya-exanae-atatsi, itsiata caenë, Espiritu Santo, bajarapacuenia exana. BajaraPonë to-itapetapona caejiwi canacujitsia pacuenia jamatabëcuenecaëjëpaeya-exanaponaejitsia.

Espiritu Santo saicayacuenia jamatabëcuenecaëjëpaeya-exanapona caejiwi canacujitsia, namata-enetsia penayawenonabiabinexa

¹² Jiwi peperabëtojawata xaina saicaeya pewënëanë. Xainanua cae-wito canacujitsia pexanaejawanexa. Itsiata baitsi jane, caeperabëto nae-xana. Bajarapijinia itsitsi Cristo pijajiwiwsijawata. ¹³Daxitatsi waxaitsi

y 12:8 *pemuxujiobinexa tsiwajënaecanaëjëtsiaya*: Pagriegojume, «sofia-jume», capsapa «tsi-wajënaecanaëjëtsiaya pemuxujiobinexa», bajarapajume xaina mapejumaitsijamatabëcueneli-waisianëje: 1) Espiritu Santo yawenonatsi pexaniacuenia peliwaissi pecanaëjëtsinexa paliwaisi natsixaina, 2) Yapëtaeya-exanatsi pacuenia liwaisi xanebijitsia, 3) Jamatabëcuenecaëjëpaeya-exanatsi peyapëxanepanaejumenëta pemuxujiobinexa piayapëbejeliwaisi-ata. z 12:10 *petsipaebinexa Dioso pewënëta*: Bajarapajumenë wowaijumeta juca, «profecia-jume». Bajayatami, itsa abaxë apoyaquinaeweretsi daxita Dioso pejumeliwaisibaxuto, profetawi anijajamatabëcueneli-waisibeje xaina Dioso pitabara. Copiaya liwaisi, yapëtaeya-exana jiwijawabelia pejanaliwaisi, Dioso peyapëtaeya-exanaeliwaisitsi. Bajaraxuata, Dioso Pejumeliwaisi Perujuliwaisibaxutota, profetawi jumaitsi tsabiabi: «Mapacuenia jumaitsije Jehovah Dioso:», jai tsabiabi. Itsajawatanua yapëtaeya-exana jiwi pacuenia Dioso naneconitsia-exanaejitsiatsi, itsa aponajamatabëcuenepë-nëyorotsi pibisiacuene pexanaejawawecua, icatsia caewëalia pexanawanapaenexa Dioso pejit-sipaecuenia. Pecuenexanetsijawata icatsia jumaitsi tsabiabinua: «Mapacuenia jumaitsije Jehovah Dioso:», jai tsabiabi. Maparucaje itsiata, pajiwi Espiritu Santo jamatabëcuenecaëjëpaeya-exanatsi profetawicuenia pepaebinexa, Dioso pejumeliwaisibaxuto peyaquinaeweretsicujinae, Apoc. 22:18-19, bajarapamonae canacuenebabiaba Dioso pejumeliwaisi, pecuenexanetsinexa Jesús pijajiwi, pamona pibisiacuene exanawanapa. Bajarapacuenia tsiteca jumaitsi: «Dioso raja nacajumaitsi mapacueniaje:» jai tsabiabi pemuxujiobjawata. a 12:10 *apopejumetaejumenëta*: Itsajawata, Espiritu Santo jamatabëcuenecaëjëpaeya-exanatsi itsamonae pecuaicuaijainexa itsa-wiriawi pejume, apopenatsipaebijumemi-ata. Taema Hch. 2:4,11; 1Co 13:1. Itsajawata, Espiritu Santo jamatabëcuenecaëjëpaeya-exanatsi pecuaicuaijainexa jiwi apopejumetaejumenëta. Taema Hch. 10:46; 19:6; 1Co 12:28,30; 13:8. Itsajawata, pijinia cuaiacuaijaiya-exanatsi ángelewi pejume, 1Co 13:1.

wajasiwanajamatabëcuenecopabiwi Jesucristojawabelia, caenë, Espí-ritu Santo, bewajanacabautizabiwi^b naca-exanaeya-exana becaeperabëto Cristojawabelia. Nexata, itsamonae judíowi-ata, apojudíowi-ata, itsamonae amoneya petonacuenebawanapaewi-ata pijatuxanewi, amoneya apopetonacuenebawanapaewi-ata, daxitatsi, caenë, Espíritu Santo, nacatsijamatabë-eca,^c wajanaca-exanaenexa becaeperabëto Cristojawabelia, namata-enetsia wajana-ewetsinexa.

¹⁴ Jiwi perabëtota caewëñewiriawijawa apoxinae. Biji rajane, nawitsia xania. Bajarapijinia pacuenia, Cristojawabelia becaeperabëto penae-xanaewi, caenacuenebicuene apoxinae. Nawitsia pexanaecue xainanua. ¹⁵ Nexata, jiwi petaxu itsa meta jumaitsi tsipae: «Apopecobenëxae, nexata apoeperabëtoyajuwëñëjawanë», jai-ata tsipae pejumeta, itsiata aponawecua-ajibia-exanae tsipae, tsitecaeya bajarapaperabëtoyajuwëñëjawa tsipae. Pejumeta saya aponaexanae tsipae saicayajawa. ¹⁶ Bajarapacuenia jiwi pemuxuyoroto-ata, itsa meta jumaitsi tsipae: «Apopitaxutonëxae, nexata apoeperabëtoyajuwëñëjawanë», jai-ata tsipae pejumeta, itsiata aponawecua-ajibia-exanae tsipae, tsitecaeya bajarapaperabëtoyajuwëñëjawa tsipae. Itsiata baitsi jane, tsitecaeya bajarapaperabëtoyajuwëñëjawa tsipae. ¹⁷ ¡Pacanaëjère! Jiwi daxitanë peperabëtuaerca itsa xinaeajitsipa ëpitaxutonë, ¿detsa nexata pacuenia jumetaejitsipa? Acuenebi tsipae. Daxitanë peperabëtuaerca itsa xinaeajitsipa ëpemuxuwojoto, ¿detsa nexata pacuenia tuxunijitsipa? Acuenebi tsipae. ¹⁸ Bajarapacuenia Dioso apo-exanae jiwi peperabëto pexanaejawata. BajaraPonë wëñërutapona itsajota jitsipa caewiriawito canacujitsia peruaenexa. ¹⁹ Jiwi peperabëtota itsa xinaeajitsipa caewiriawitorea, aithothia tsipae. Nexata, aponayapëtae tsipae peperabëtocuene. ²⁰ Xaniajanë. Jiwi peperabëtuaerca nawitsia xinae-ata saicaya caewëñëwito canacujitsia, itsiata saya caeperabëtorea.

²¹ Orjibia, acuenebi tsipae pitaxutobeje pejumaitsinexabeje pecobebejejawabelia: «Apopacanamatawenonaetsibeje cajena», pejainexabeje. Jiwi pematabocoto-ata acuenebi tsipae pejumaitsinexa petaxubejejawabelia: «Apopacanamatawenonaetsibeje cajena», pejainexa, tsipaji daxita pawixainatsi wajaperabëtota, namatawenonatsi. ²² Itsa nacatosajinaejitsipa caewëñëwijawa wajaperabëtota, ayaicuenia cajena nacatsisajinaejitsipa. Bajaraxuata, wajaperabëtota pawijawanë nacatsita beweliasaë pexainajawa,^d bajarapawi bitso pepacuenenamatawenonatsi itsawiweucia

b 12:13 bewajanacabautizabiwi: Itsamonae canaëjëta Pablo yabara jumaitsi pacuenia Espíritu Santo bewajanacajawa Cristo bepeperabëttojawabelia, caebitsaëto wajanaca-exanaenexa. Nexata, pacuenia jiwi pebautizabijawata pëcaewa merata, pepitsapanexa pesucuenaejiwi, bajarapijinia pacuenia Espíritu Santo nacapëcaewia-exana Jesucristojawabelia, jiwi wajanacataenexa wajacuenejëpawewi Jesucristo. Baitsi beCristotsi wajanacataejawa. Taema Rom. 6:3-6; Gál. 3:27. Itsamonae canaëjëta pacuenia yabara jumaitsi Espíritu Santo wajanacatsijamatabë-ecaejawata caebitsaëto wajanaca-exanaenexa. Taema Mt 3:11; Hch. 1:5. Caejamatabëcuene apoxinae-ata, itsiata caeliwaisi yabara jumaitsi, Espíritu Santo caebitsaëto wajanaca-exanaejawa pacujinae siwanajamatabëcuenecopatatsi Jesucristojawabelia tsipaji jumaitsi «daxitatsi». Taemanua Rom. 8:9-11. **c 12:13 nacatsijamatabë-eca:** Taema Jn 7:37-39. **d 12:22 beweliasaë pexainajawa:** Pablo tsaina yabarajumaitsi pawiruca bënëña waja-ñëñawata, peyacueyacuejawanë, pacuenia wajajamatabë-ëthëto, waja-ënë, wajamara-ëthëtobeje tsaponae. Baitsi, ayaisaë apoxinae-ata, itsa nacatosajinaejitsipa caejawa tēpaejitsipatsi.

wajaperabētota. ²³ Pawijawanē waxaitsi bewelia tanetsi, naperabēcaranatsi naitabētsiaya. Pawijawanē ca-auratsi jiwi petaeyaniwa, xaniawaetsia, asiwaya, naperabēcaranatsi. ²⁴ Itsiata, pawijawanē aponaperabēcauratsi, aposiwabējaitsi bitso wajanaperabēcaranatsinexa. Bajarapacuenia Dioso nacatorutapona caewi canacujitsia wajaperabētota, matatoxenetsia asiwaya wajayaiyataejawanexa, pawijawanē ca-auratsi. ²⁵ Nexata pawī wajaperabētota xainatsi, aponawecuanatsanae. Bajaraxuata, daxita pawī xainatsi wajaperabētota, namata-enetsia naeweta. ²⁶ Nexata, wajapera-bētota caewito itsa atane, daxita itsawijawabelia-ata ba-atane. Caewito-ata pijinia itsa naitabētsianaxatatatsi, nexata daxita perabētotsireca bayajawabarēyatsi.

²⁷ Bajarapacuenia pacatsipaebatsi wajaperabētopijicuene yabara, tsipaji daxita paxamē, pacaejiwimē canacujitsia, caenē Cristo bepeperabēto panaexaname, namata-enetsia panenayawenonaenexa. Bajaraxuata, saicayacuenia panacuenebawanapame Cristo pijajiwituatujēta. ²⁸ Dioso pejisipaexae, itsamonaē mapacuenejawanēje pexanawanapaewinexa Jesús pijajiwi tuatujēta, Espiritu Santo jamatabēcuenecaējēpaeya-exana Jesús pijajiwi mapacueniaje: Copiaya^e itapeta apóstolewinexa. Cotocaewi itapeta itsamonaē petsipaebiwinexa Dioso pewēnēta itsamonaejawabelia, paliwaisi jitsipa pejumetaenexa. Acueyabijawata itapeta itsamonaē pecujarubiwinexa. Bajaraxuacujinae, jamatabēcuenecaējēpaeya-exanapona itsamonaē Dioso pesaēta pinijicuenejawanē petsita-exanaenexa, itsamonaē piawitanewi pejamatejemaya-exanaewinexa, itsamonaē pijinia peyawenonaewinexa^f itsamonaejawabelia, itsamonaē canaējētsiaya penamatacaitorobiwinexa, itsamonaē-ata itsawirijumenē pecuaicuajijaiwinexa.^g ²⁹ Nexata, Jesús pijajiwi daxita apo-ē-apóstolewi, daxita apo-ēpetsipaebiwi Dioso pewēnēta itsamonaejawabelia, paliwaisi jitsipa pejumetaenexa, daxita apo-ēpecujarubiwi, daxita Dioso pesaēta apo-ēpetsita-exanaponaewi pinijicuene pexanaejawanē, ³⁰ daxita piawitanewi apo-ēpejamatejemaya-exanaewi, daxita itsawirijumenēta apo-ēpecuaicuajijaiwi, daxita apo-ēpejumeyapētaeya-exanaewi-ata bajarapajumenē pecuaicuajijaijawa pajamatabēcuenē xaina. ³¹ Xanepana picanī panesiwajamatabēcuenebējaijawa Espiritu Santo papecajamatabēcuenecaējēpaeya-exanaejawa yabara, itsiata bepasiwajamatabēcuenebējamē papecajamatabēcuenecaējēpaeya-exanaponaejawa xuanēta payawenonaejitsiamē itsamonaē itsacuenejawanēwecua.

e 12:28 *Copiaya*: Jesús pijajiwi Corinto tomarata bitso jitsipa Espiritu Santo pejamatabēcuenecaējēpaeya-exanaejawatsi pecuaicuajijaijawa itsawirijumenēta, itsapejamatabēcuenecaējēpaeya-exanaejawatsiwecua, tsipaji tsitapexaniacuenetsi itsajawanēwecua. Itsiata, Pablo yapētaeya-exana pacuenia apóstol-cuene bitso copiaya penamatamotsijawa itsajawanēwecua. **f 12:28** *peyawenonaewinexa*: Taema Rom. 16:3, 9; 1Co 16:16; 2Co 1:11, 24; Flp. 4:3; 3Jn 3:8. Bajarapajumejawabelia apocajone ēpeyawenonaejawa bepejiobiwi, cajunua-ata diáconocuene, peyawenonaejawa Dioso peliwaisi pepaebiwi, itsamonaē-ata penamatawenonaewi peyawenonaejawanexatsi piawitanewixae, perujuwixae, pesicuenabiwitsixae, pecoxanaewixaetsi-ata. **g 12:28** *itsawirijumenē pecuaicuajijaiwinexa*: Xua itsamonaē siwajamatabēcuenebējai bitso Espiritu Santo pejamatabēcuenecaējēpaeya-exanaenexatsi, Pablo ruta pepocotocaewijawata, tsipaji bewelia jamatabēcueneyawenona itsamonaē, itsajawanē Espiritu Santo pejamatabēcuenecaējēpaeya-exanaejawanēwecua.

**Jiwi namata-enetsia pena-asiwajawa, bitso
penamatamotsijawa itsajawanēwecua**

13 ¹Dioso nejamatabēcuenecaējēpaeya-exanae-ata tsipae tacuai-cuaijainexa itsawiriawi pejumenēta, apotanatsipaebijumemi, itsa jume, ángelewi-ata pijajumeta, itsamonae itsa asiwaya apotaenē tsipae, bajaraxua neto-amatamobi Dioso pitabarata. Biji rajane, jumejēpaejitsipajē penajumetsijawa tambor, itsa jume, penajumetsia-exanaeplatojawanē, xuanē pecobeta najumetsia-exana. Bajaraxuanē najumetsi-exanae-ata, apojamatabēcueneyawenonae pejumetaewi. Bajarapijinia cuene-itsinē tsipae, itsa cuai cuaijanē itsajumenēta, asiwaya taenejewanē itsajiwi-ata. ²Dioso nejamatabēcuenecaējēpaeya-exanae-ata tsipae tatsipaebinexa Dioso taneyapētaeya-exanaeliwaisi itsamonaejawabelia, nejamatabēcuenecaējēpaeya-exanae-ata tsipae tayapētaenexa xuanē Dioso abaxē apoyapētaeya-exanae itsajiwi jawabelia, tayapētaenexa daxita Dioso pijacuene-ata, nejamatabēcaējēpaeya-exanae-ata tsipae bajaraPonējawabelia tasiwanajamatabēcuenecopatsinexa, tanecuenecaējēpaeya-exanaenexa najumeta petsuto tanatixitsia-exanaenexa, bajaraxuanē neto-amatamobi Dioso pitabarata, itsamonae asiwaya itsa apotaenē tsipae. ³Rajutaponae-atanē tsipae daxita taxainaejawaximi bepejiobiwijawabelia, bajarapacuenia nacaewetsi-atanē tsipae dajubicuenia tanetajuitsinexa^h itsajiwi pejamatabēcuenē, bajaraxuanē neto-amatamobi Dioso pitabarata itsamonae asiwaya itsa apotaenē tsipae. Bajarapijinia pacuenia, paxamē-ata pacuene-amatamobimē tsipae, Jesús pijajiwi asiwaya itsa apopataemē. ⁴Pajiwi pepacuene asiwa itsamonae-ata, ajamatabēcuenesaē, cuenecanawiatsinejewa, bajayajebi itsacueniabi-atatsi, pexaniacuene to-exanabiabanua. Pajiwi asiwa itsamonae-ata, apocueneca-ēbi. Be-ayaijamatabēcuenējiwi aponatae, aponayabaracuaicuaijai-ata itsamonae-wecua. ⁵Pajiwi asiwa itsamonae-ata, bajarapajiwi apojumejemabitsi. Daxita xua xanepana, ēponēnexa aponatonajamatabēxainaenua. Pajiwi asiwa itsamonae-ata, bajarapajiwi bepijia apo-anaepanae, apojamatabēcuenetsitecaenua juya pecuenecanawiatsinexa. ⁶Pajiwi asiwa itsamonae-ata, aposiwajamatabēcuenēbarēya pecuenetaejawata piabejecuene pexanaejawa. Biji rajane, siwajamatabēcuenēbarēya pecuenetaejawata Dioso pejitsipaecuenia pexanaejawa. ⁷Pajiwi asiwa itsamonae-ata itsacueniababiabi-atatsi, bajarapajiwi najamatabēcuenecataitabiaba. Nexata, copia-ewetabiaba ēpexania-cuene petocopiapatsinexatsi, xaniawaetsia jamatabēcuenē-ewetaponapona petocopiapatsinexatsinua. Daxita xua tocopiapatabiatsi, xaniawaetsia natocopiapitabiaba, jamatabēcuenēbējainejewa. Bajarapacuene pexanaewi najamatabēcuenē-itajēta pepacuene piasiwajawa itsamonae-ata. ⁸Jiwi pena-asiwacuene tsitecaena daxitamatacabijawabelia. Itsiata baitsi jane, Espíritu Santo pejamatabēcuenecaējēpaeya-exanaponaejawa

^h 13:3 *tanetajuitsinexa*: Griegojume penacujarubiwi xaniawaetsia apoyapētae itsa Pablo naya-barajumaitsi penacaewetsijawa petajuitsinexatsi altar-jumata, itsa jume, ayaicuenia pebejiobia-exanaejawatsi, Jesús peliwaitsi pejumexaniataexae, itsa jume, pebeyaxuabijawatsi Dioso petonacuenebinēxae.

petsipaebinxexa Dioso peyapëtaeya-exanaeliwaisitsi itsamonaewawabelia, itsamatacabijawabelia ajibi tsane. Itsawirijumenëta Jesús pijajiwi pecuaicuajiaucene itsamatacabijawabelia ajibi tsane. Espiritu Santo pejamatabëcuenecaëjëpaeya-exanaponaejawa itsajiwi peyapëtaeya-exanaejawa xuanë Dioso abaxë apoyapëtaeya-exanae itsajiwijawabelia, itsamatacabijawabelia amatamobi tsane. ⁹Maparucæje, xua Dioso nacajamatabëcuenecaëjëpaeya-exana wajayapëtaenexa, epatua nacayapëtaeya-exana; apodaxita. Paliwaisi-ata tsipaebatsi itsamonaewawabelia Dioso pewënëta, daxita apotsipaebicanepaetsi. ¹⁰Itsiata, pamatacabi icatsia Cristo patsianica, daxitacueneyapëtaenëxae, copiarucaeya-exanaena daxita epatua wajayapëtaejawanëmi.

¹¹Pamatacabi abaxë pejewaxinëyonë, cuaicuajianë pejewaxinëyonëcuenia. Najamatabëxainajë pejewaxinëyonëcuenia. Liwaisi canaëjëtajënua abaxë pejewaxinëyonëcuenia. Itsiata, tanaweretsicujinae, pejewaxijamatabëcuenemi baja copatajë. ¹²Bajarapijinia pacuenia, waxaitsi jamatabëcueneyapëtaetsi, Dioso pecuene yabara. Maparucæje xaniawaetsia daxitacueneyapëtaetsi. Pacuenia jiwi xaniawaetsia apobenajumapetae pitatsëcë-naetsaxuta, bajarapacuenia bijiaya abaxë Dioso jamatabëcueneyapëtanetsi. Itsiata baitsi jane, itsamatacabijawabelia Dioso xaniawaetsia jamatabëcueneyapëtanetsi, bewajanaitabarataenëcuenia, pacuenia aeconoxae baja Dioso xaniawaetsia nacajamatabëcueneyapëtene.

¹³Mapa-acueyabixuabeje daxitamatacabijawabelia petsitecaejawanënexaje. Apowerewerecae tsane waxaitsi waja-itaxutuajamatejematsawanapaejawa. Dioso, wajawajënaeyabelia wajacopia-ewetawanapaejawa¹ Dioso wajanacato-exanaenexa najumecapanepaeya pejumaitsicuenia, waja-asiwajawanua itsamona-ata. Itsiata baitsi jane, bajarapa-acueyabi xuabejetuatujëta, matatoxenetsia namatamota pena-asiwajamatabëcueneyapëtene.

**Xuanë bitso cuenenamatamota Espiritu Santo
pejamatabëcuenecaëjëpaeya-exanaejawanë itsajawanëwecua**

14 ¹¡Bajarapana-asiwacueneyapëtaetsi pacasaëmëre tsawanapae, tsipaji apowerewerecaejanexa! ¡Panatojitsipare Espiritu Santo pejamatabëcueneta papecajamatabëcuenecaëjëpaeya-exanaenexa! ¡Matatoxenetsia pasiwajamatabëcueneyapëtaetsi, papecajamatabëcuenecaëjëpaeya-exanaenexa, panetsipaebijawa Dioso papecayapëtaeya-exanaeliwaisi² itsamonaewawabelia! ²Panenacaetuatsijawata, paxamëyajuwënë, itsa cuaicuajiai itsawirijumeta Espiritu Santo pejamatabëcueneta, bajarapajiwi apojamatabëcueneyawenona pejumetaewitsi, apopepaebixae pejumetaejumeta. Caenë, Dioso, jumetane xua yabara cuaicuajiai. Pejumetaewitsi juya apoyapëtae xua yabara cuaicuajiai. ³Itsiata, paxamëyajuwënëjiwi itsa tsipaeba penacaetuatsiwijawabelia paliwaisi Dioso

i 13:13 wajacopia-ewetawanapaejawa: Copia-ewetawanapatsi Dioso wajanacacaponaejanexa pijanacuajawabetsia, capanepaeya pijanacuataetsia wajanacawecua-ajibia-exanaenexa pibisia-cuene wajanacajitsipaeya-exanaejamatabëcueneyapëtaetsi, wajawajawaxainaenexanua daxita xua Dioso rajutsipaeba pexënato, Jesús-jawabelia. j 14:1 Dioso papecayapëtaeya-exanaeliwaisi: Taema panotayo ruca 1Co 12:10 pebëxëpanata.

jitsipa pejumetaenexa jiwi pejumetaejumeta, bajarapajiwi jamatabë-cueneyawenona pejumetaewitsi pejamatabëcueneliwaisinaweretapo-naenexa Dioso pijacuenejawata, pejamatabëcuenebarëyaya-exanaenexa, penajamatabëcuenesaëtsia-exanaenexanua bitso penajamatabëxai-naewi. ⁴Pajiwi cuaiuaijai itsawirijumeta Espíritu Santo pejamatabë-cueneta, bajarapajiwi najamatabëcuenewitsabia-exana. Itsiata, pajiwi Dioso peyapëtaeya-exanaeliwaisitsi tsipaeba jiwijawabelia, bajarapajiwi jamatabëcuenewitsabia-exanapona daxita Jesús pijajiwi.

⁵Netsitaxanepanaejitsipa padaxitamë panecuaiuaijaijawa itsawirijumeta, Espíritu Santo pejamatabëcueneta. Itsiata, bajaraxuawecua bitso pacatojitsipatsi panetsipaebinexa Dioso paneyapëtaeya-exanaeliwaisi itsa-monaejawabelia, tsipaji bajaraxua bitso jamatabëcueneyawenona Jesús pijajiwi. Xanë pacatojitsipaejitsipatsi itsawirijumeta panecuaiuaijaijawa panenacaetuatsijawata, itsa matapania paxainame itsajiwi papecajumewajunupaebijiwínexa xua pacuaiuaijamë jiwi apopejumetaejumeta. Pejumetaejumeta pacajumewajunupaebijitsipa papecajumetaewijawabelia xua pacuaiuaijamë tsaponae jiwi apopejumetaejumeta. Bajarapacuenia itsa pacajumewajunupaeba pejumetaejumeta, jamatabëcuenewitsabia-exanaena daxita Jesús pijajiwi. ⁶Patajamonaemë Cristo pejamatabëcueneta, canaë-jëtsianatsi mapacueniaje. Xanë itsa patsipajë paxamëjawata patacatsipaebinexa liwaisi apopanejumetaejumeta, apopacajamatabëcueneyawenonaetsi tsipae caejawayo-ata. Pacajamatabëcueneyawenonaejitsipatsi, matapania itsa pacatsipaebijitsipatsi paliwaisi picani abaxë Dioso apopacayapëtaeya-exanae, itsa jume, paliwaisi Dioso neyapëtaeya-exana, itsa jume, itsa pacacujarubijitsipatsinua itsaliwaisi. Bajarapacuenia itsa exanaejitsipajë, nexata pacajamatabëcuenewitsabia-exanaejitsipatsi Diosojawabelia.

⁷Bajarapacuenia nacayapëtaeya-exananua jiwi pecanaxëanaejawanë. Jiwi xaniawaetsia itsa aponajumetsia-exanae tsipae jiwabo pe-obijawata, itsa jume, itsa xaniawaetsia aponajumetsia-exanae tsipae arpa peracatsijawata, nexata itsajiwi-ata apojumeyapëtae tsipae pawaji picani najumetsia-exana. ⁸Bajarapacuenia-ata wajabitsaë trompeta piobijawata. Xaniawaetsia itsa aponajumetsia-exanae tsipae pajumeta nacaetuatsia-exanabiaba, nexata wajabitsaë apomuxuna-othopae tsipae, pebarë nawajabitsaësinexa pijawajabitsaëjawabelia. ⁹Bajarapijinia pacuenia, paxamë-ata panecuaiuaijaijawata. Itsa pacuaiuaijamë jiwijawabelia apopejumetaejumeta, ¿detsa pacuenia pacajumetaejitsipa? Pajumenaxuabijitsipame saya, bajarapaliwaisi panetsipaebijawa. ¹⁰Xaniajai. Mapanacuataje bitso nawita daxitawirijumenë. Nexata, caewirijume canacujitsia saicaya xainapona pecuaiuaijaicuenë. ¹¹Itsiata, tajanacuapijinë-ata, itsa nebarëcuaiuaijai tsipae itsawiriawi pijajumeta, apotajumetaejumeta, nexata bepasaicayana-cuapijinënëbeje panataejitsipajëbeje. ¹²¡Nexata, paxamë ayaicuenia panejitsipaexae, Dioso papecajamatabëcuenecaëjëpaeya-exanaejawa, Espíritu Santo pejamatabëcueneta, panecanacuenebijawanënexa, panatojitsipare Dioso nawitsia papecajamatabëcuenecaëjëpaeya-exanaenexa, xuanëta pajamatabëcueneyawenonaejitsiamë daxita Jesús pijajiwi pejamatabëcueneliwaisi witsabinexa Dioso pijacuenejawata, piajamatabëcuenesaënexanua Diosojawabelia!

¹³Nexata, xaniawaetsia pejamatabëcueneyawenonaenexa daxita Jesús pijajiwi, pajiwi Espiritu Santo jamatabëcuenecaëjëpaeya-exanatsi itsawirijumeta pecuaicuaijajawa, bajarapajiwi bewajëta Diosojawabelia caecuenia peyawenonaenexatsinua jiwi pejumetaejumeta penajumewajunupaebinxaxa bajarapaliwaisi. ¹⁴Bajarapacuenia xanë-ata, wajëcae-atanë tsipae Diosojawabelia, tacuaicuaijainexa itsawirijumeta, apotajumetaejumeta, nexata saya Espiritu Santo necuaicuaijaiya-exanaejitsipa tawajëtsijawata taja-espíritu. Itsiata, aponajumeyapëtaenë tsipae xua wajëtajë Diosojawabelia. ¹⁵Bajaraxua yabara, ¿detsa xua nexata be-exanajë? Xanë, itsa wajëtajë Diosojawabelia Espiritu Santo nejamatabëcueneyawenonaeya, bewajëtajë tanajumeyapëtaecuenia. Itsa naxëanajë Espiritu Santo nejamatabëcueneyawenonaeya, benaxëanajë tanajumeyapëtaecuenia. ¹⁶Bajarapacuenia-ata, itsa paxamë Espiritu Santo pacajamatabëcueneyawenonaejitsipa, pexania-jamatabëcuene panerajutsinexa Diosojawabelia penacaetuatsiwi apopejumetaejumeta, bajarapamonae apocuenecaëjëpaetsi tsipae yawenonaeya pexaniajamatabëcuene panenajuarajutsinexa Diosojawabelia, Espiritu Santo papecacuaicuaijaiya-exanaexae itsawirijumeta. ¹⁷Bitso pexaniacuenia pawënëxaniatsi-atamë tsipae Diosojawabelia, pexaniacuenia papecato-exanaejawa yabara, itsiata, panecuaicuaijiaxae penacaetuatsiwi apopejumetaejumeta, pexaniacuenia panetsipaebijawa apojamatabëcueneyawenonaetsipae caejiwi-ata.

¹⁸Pexaniajamatabëcuenecuenia rajutajë Diosojawabelia, Espiritu Santo tanejamatabëcuenecaëjëpaeya-exanaexae tacuaicuaijainexa itsawirijumenëta padaxitamëwecua. ¹⁹Itsiata baitsi jane, Jesús pijajiwi penacaetuatsijawata, netoxanepana caejumebeje tatsipaebijawa jiwi pejumetaejumeta, tatsipaebijawawecua ayailiwaisi jiwi apopejumetaejumeta, tsipaji tsiquiriliwaisiyo-ata paebi-atanë tsipae jiwi pejumetaejumeta, xaniawaetsia cujarubijitsipajë.

²⁰¡Patajamonamë Cristo pejamatabëcueneta, pëtsa pajamatabëcuenejëpame pejewaxi Espiritu Santo papecajamatabëcuenecaëjëpaeya-exanaejawanë yabara! Biji rajane, pacatoxanepana bepejewaxijamatabëcuene panexainajawa, pibisiacuenia pane-exanaeyaniwa. Bajaraxuata, penaweretsiwicuenia pacanaëjëtsianame daxita bajaraxuanë yabara.

²¹Dioso pejumeliwaisibaxutota, profeta Isafas-pijinë tajëwelija jumaitsi mapacueniaje judíowi yabara: «Itsamatacabijawabelia tajumeliwaisi yapëtaeya-exanaenajë Israel-pijinë pemomoxijawabelia apopejumetaejumeta, itsanacuawerena pepatsiwi saicayajume pecuaicuaijaiwi pejamatabëcuene. Itsiata baitsi jane, bajarapamonae tsiteca apojumecowënëtsi tsane^k tajumeliwaisi»,^l jai Isafas-pijinë, tajëwelija Dioso pejumeliwaisibaxutota judíowi Dioso apopejumecowënëtsijawanexa yabara. ²²Bajaraxuata, yapëtanetsi Espiritu Santo itsa jamatabëcuenecaëjëpaeya-exanapona Jesús

k 14:21 *apojumecowënëtsi tsane*: Israel-pijinë pemomoxi Dioso apopejumecowënëtsiaxe, naneconitsia-exanaeya Dioso tsi-itorobatsi itsanacuanëpijiwi pecuene-amoneyabinexatsi. Bajarapacuenia exana Israel-pijinë pemomoxi penajamatabëcuenepënëyorotsinexa pibisiacuenia pexanaejawawecua, caewëalia pejinawanapaenexa Dioso pejitsipaecuenia. Nexata, Dioso siwacanaëjëta picani bajarapamonae pijaneconi yabara penasiwajamatabëcuenebëjainexa, pejumetaejawata pijatuxanewi pecuaicuaijajawa apopejumetaejumeta. **l 14:21** Taama Isafas 28:11-12.

pijajiwijawuwënëwi pecuaicuaijainexa jiwi apopejumetaejumeta, bajaraxua copiapata Jesús peliwaishi pejume-aebiwi peyapëtaenexa pexaniaxaniajai-cuene^m pepaebiliwaishi, pejumexaniaetaenexa. Pamona pejinia pejumexania-taewi Jesús peliwaishi, itsawiriajume pejumetaejawa apojamatabëcueneyawenonaetsi caejawayo-ata. Itsiata, pejumetaejawa itsajiwi petsipaebijawatsi Dioso peyapëtaeya-exanaeliwaishitsi, bitso jamatabëcueneyawenonatsi. Pamona pejinia apopesiwanajamatabëcuenecopabiwi Jesucristojawabelia, bajarapaliwaishi aponamatawenonae. ²³Nexata, paxamë, Jesús papijajiwimë, panenacaetuatsijawata padaxitamë itsa pacuaicuaijamë tsipae itsawiriajumenëta, itsa napata itsajiwi, Jesucristojawabelia apopesiwanajamatabëcuenecopatsijiwi, itsa jume, apopeyapëtaejawi xua yabara bajarapacuenia pa-exaname, bajarapajiwi pacabarajamatabëjumaitsi tsipae: «Mara pamonaeye saya pematajemabiwitsije», pacabarajamatabëjai tsipae, apopejumetaexae paliwaishi patsipaebame. ²⁴Itsiata, padaxitamë itsa patsipaebijitsipame Dioso pewënëta, paliwaishi jitsipa pejumetaenexa, nexata bajarapajiwi itsa pacajumetaejitsipa pijajumeta panetsipaebijawa, natoyapëtaejitsipa penaneconitsijawa Diosojawabelia. ²⁵Papecajumetaejawata, Dioso yapëtaeya-exanaena bajarapajiwi papibisiacuene muetsia najamatabëxainabiaba pexanaenexa. Natoyapëtaenanua penaneconitsijawa Diosojawabelia. Nexata, bajarapajiwi pematatabacabëta nucaena. Cuenewënëxaniatsiaya pejumaitsinexa Diosojawabelia mapacueniaje: «¡Diosomë, bitso baja cajena ayaijamatabëcuenenëmë!», pejainexa Diosojawabelia. Orijibia, yapëtaena Dioso papecayawaponaponaejawa.

Pablo yapëtaeya-exana Jesús pijajiwi culto pexanaecueneyabara

²⁶Patajamonaemë Cristo pejamatabëcueneta, itsa panacaetuatame culto pane-exanaenexa, daxita xua pa-exaname, bajaraxua bejamatabëcueneyawenona panenajuanacaetuatsiwi. Nexata, panenacaetuatsijawata itsamona meta naxëanaena waji. Itsamona meta cujarubiana Dioso peliwaishi. Itsa jume, Dioso pewënëta paebiana paliwaishi jitsipa pejumetaenexa. Itsamona meta cuaicuaijai tsane itsawiriajumeta, penacaetuatsiwi apopejumetaejumeta. Itsajiwi meta pijinia jumewajunupaebiana jiwi pejumetaejumeta, xua itsajiwi cuaicuaijai itsawiriajumeta. ²⁷Itsiata, panenacaetuatsijawata, itsajiwi itsa cuaicuaijai tsipae itsawiriajumeta, penacaetuatsiwi apopejumetaejumeta, Dioso tocopatatsi petsipaebinexa anijajiwibeje, acueyabi pajiwibeje-ata. Itsiata, caecuenia apobenajuacuaicuaijai. Biji rajane, caejiiwiyo canacujitsia becuacuaijai tsaponae, penajumeweretsicujinae copiaya pecuaicuaijaijiwi. Xuacujinae, bejumewajunupaeba jiwi pejumetaejumeta, xua Espiritu Santo cuaicuaijaiya-exana pecuaicuaijainë itsawiriajumeta. Bajaraxuacujinae, itsanë betaxuxuaba pepaebijawa. ²⁸Itsiata baitsi jane, itsa ajibi itsajiwi, pejumewajunupaebijiwinexatsiⁿ jiwi pejumetaejumeta,

m 14:22 *pexaniaxaniajaicueneyabara*: Taema Hch. 2:17. **n 14:28** *pejumewajunupaebijiwinexatsi*: Espiritu Santo itsa jamatabëcuenecaëjëpaeya-exana Jesús pijajiwijawuwënëwi pejumewajunupaebiniexa jiwi pejumetaejumeta, xua itsajiwi cuaicuaijai itsawiriajumeta, penacaetuatsiwi apopejumetaejumeta, nexata daxita pajumenë Espiritu Santo cuaicuaijaiya-exana itsajiwi, bajarapajiwi cuenecaëjëpatsi pejumewajunupaebinexa jiwi pejumetaejumeta, tsipaji caenë pecuaicuaijaiya-exanaenë, pejumeyapëtaeya-exanaenë-ata.

daxitajiwi peyapëtaenexa xua cuaicuajai itsawirijumeta Espiritu Santo pejamatabëcueneta, nexata bajarapamonae moya be-ena. Bëpënëa saya pejamatabë-ëthëtota becuacuajai tsenae Diosojawabelia. ²⁹ Bajarapijini pacuenia, Dioso tocopata itsamonae-ata jiwijawabelia petsipaebinexa bajaraPonë pewënëta, jiwi pejumetaejumeta, paliwaisi Dioso yapëtaeya-exanatsi, anijajiwi beje, acueyabi pajiwi beje-ata. Nexata, petsipaebijawata, itsamonae xaniawaetsia benamuxuna-ewetena, pejumeyapëtaenexa itsa xaniajai paliwaisi tsipaebatsi Dioso pewënëta. ³⁰ Nexata, bajarapamonae liwaisi petsipaebaponaejawata, bajarapaepatota penamuxuna-ewetenaewituatujëta, itsajiwi Dioso pejamatabëcueneta liwaisi itsa yapëtaeya-exanatsi, nexata petsipaebaponaenë benajumecopata, juya cotocaewi peyapëtaeya-exanaenëtsi daxitajiwijawabelia, petsipaebinexa paliwaisi Dioso yapëtaeya-exanatsi. ³¹ Bajarapacuenia caenë canacujitsia paebaponaena paliwaisi Dioso yapëtaeya-exanatsi petsipaebinexa jiwijawabelia. Dioso pacatocopata panepaebijawata, daxita jiwi panejamatabëcuene-asaëya-exanaenexa bajarapaliwaisianëta. ³² Pamonae Dioso pewënëta tsipaeba daxitajiwijawabelia, paliwaisi Dioso yapëtaeya-exanatsi, bajarapamonae yapëtane paepatota najumecopatsijitsia, tsipaji Espiritu Santo pejamatabë-ëthëtota itorobatsi bajarapacuenia. Nexata, itsa najumecopata bajaraponë, juya itsanë petsipaebinexa daxitajiwijawabelia. ³³ Bajarapacuenia Dioso pacatocopata pane-exanaenexa, bijiaya pane-exanaeyaniwa, xaniawaetsia jiwi pejumetaenexa, tsipaji Dioso xaniawaetsia pexanaenë.

Pacatsipaebijitsiatsi pacuenia exanabiaba daxita Jesús pijajiwi penacae-tuatsijawata petiriawi yabara. ³⁴ Petiriawi moya be-ena° Jesús pijajiwi penacae-tuatsijawata, tsipaji Dioso apotocopatsitsi bajapaepatota pecuacuajait-senaenexa. Petiriawi pamonajiwi yayiataeya bejinawanapa, pacuenia Dioso pejumeliwaisibaxutota itorobatsi.^o ³⁵ Petiriwa itsa jamatabëyanijoba itsaliwaisiyo, nexata bota beyanijoba pamonajawabelia. Pia-uracueni exanaejitsipa Jesús pijajiwi penacae-tuatsijawata, petiriwa itsa cuaicuajai tsecae tsipae.

³⁶ Paxamë bepanatoyapëtaneme pacuenia Dioso peliwaisi apotaxu-xuabi paxamëjawata. Paxamë pacaemonaemë apopacatsipaebi bajarapaliwaisi. Itsamonae-ata baja cajena. ³⁷ Pajiwi nataeyabiaba Espiritu Santo pejamatabëcuenecaëjëpaeya-exanaejawatsi, pepaebijiwinexa Dioso peyapëtaeya-exanaeliwaisitsi itsamonaejawabelia, itsa jume, peyapëtaeya-exanaejiwitsi, bajarapajiwi beyapëtane paliwaisianë pacatoyaquinatsi mapabaxutotaje, wajatuxanenë Jesucristo papeca-itorobiliwaisi panejumecowënëtsinexa. ³⁸ !Itsiata, piwi tajumaitsiliwaisi apotsitapexaniajaili-waisitsi, nexata pëtsa pataneme Dioso pewënëta pepaebinëcuene! ¡Pëtsa pepaebiliwaisi-ata pajumexaniataneme!

o 14:34 *moya be-ena:* 1Co 11:2-7 Pablo yapëtaeya-exana pacuenia toxanepanatsi petiriawi pewajëcaenexa Diosojawabelia, liwaisi pepaebinexanua, Jesús pijajiwi penacae-tuatsijawata, itsa najamatabëcuene-itajëtsipa pamona pejamatabëcuene-ewetsijawa. Orijibia, 1Co 14:26 Pablo jumaitsi: «itsamonae», wënërubinejewa itsa yabara jumaitsi pebijawi, itsa jume, petiriawi. Bajaraxuata, yapëtanetsi Dioso apopitawetsijawa petiriawi pecuacuajaiyaniwa cultojawata. Saya cuene-itaweta peyanijobiyaniwa, paepatota abaxë itsanë paebapona Dioso peliwaisi. Bajarapowaxi jamatabëcuene-ewetsiaya beyanijoba pamonajiwijawabelia, itsanë pepaebiliwaisi yabara, cultocujinae. **p 14:34** *itorobatsi:* Taema Gén. 3:16.

³⁹ ¡Bajaraxuata, asaëyata panatojitsipare Dioso papecajamatabëcuenecaëjèpaeya-exanaenexa Espíritu Santo pejamatabëcueneta panetsipaebinxexa Dioso pewënëta daxitajiwijawabelia paliwai si jitsipa pejumetaenexa! ¡Itsiata bailsi jane, pëtsa pajume-itawetame itsamona pecuaicuajaijawa itsawirijajumenëta, Espíritu Santo pecuaicuajaiya-exanaecueniatsi! ⁴⁰ ¡Itsiata, daxita xuanë pa-exanaename panenacae-tuatsijawata, xaniawaetsia pa-exanaponare, wajatuxanenë Jesucristo papeca-itorobicuenia, bijiaya pane-exanaeyaniwa!

Jesucristo petëpaecujinae, Dioso icatsia piasaëya-exanaejawatsi, yabara peliwai si

15 ¹ Patajamonaemë Cristo pejamatabëcueneta, jitsipajë patacanajamatabënapitsia-exanaenexa paliwai si imata pacatsipaebatsi, Jesús peliwai si. Bajarapaliwai si baja pajumexaniataneme, panesiwanajamatabëcuenecopabinxexa Jesucristojawabelia. Panewajënaeyabelia tsiteca bajarapaliwai si pajumexaniataewanapame. ² Patacatsipaebicuenia panejumexaniataexae bajarapaliwai si, Dioso pacacapanepa baja pibisiacuene pane-exanaeneconiweewa. Itsiata bailsi jane, patacatsipaebiliwai si^q itsa apopajumexaniataemë tsane panejamatabë-ëthëtojawawetsina, nexata Dioso apopacacapanepae tsane.

³ Copiaya baja cajena pacatsipaebatsi paliwai si wajatuxanenë Jesucristo pijacuata netsipaeba. Cristo wajanacasiwatëpaejawa pibisiacuene waja-exanaeneconi yabara, pacuenia tajëwelia jumatsi Dioso pejumeliwaisibaxutota. ⁴ Cristo petëpaenë pemëthëtsicujinaetsi, acueyabimatacabita, Dioso icatsia asaëya-exanatsi, pacuenia tajëwelia jumatsi Dioso pejumeliwaisibaxutota Cristo yabara. ⁵ Nexata, Cristo Dioso piasaëya-exanaecujinaetsi, copiaya Pedrojawabelia tsitanaitajëta. Bajaraxuacujinae, Jesús pijajiwi, doce ponëbeje apóstolewijawabelia, tsitanaitajëta. ⁶ Bajaraxuacujinae, Jesús pijajiwijawabelia, quinientos pajiwi beje pematatsënë, penacaetuatsijawata tsitanaitajëta. Bajarapamonaeyajuwënëwimi Jesús petawitsi itsamona baja tēpae-ata, itsiata ayaibitsaëto xaneto abaxë asaë tsawanapae. ⁷ Bajaraxuacujinae icatsia, Santiagojawabelia^r Jesús tsitanaitajëta. Icatsia xuacujinae, tsitanaitajëta daxita apóstolewijawabelia.

⁸ Daxita apóstolewiweewa bexëajawaberena netsitanaitajëta apóstol-nënë tane-exanaenexa. Xanë nataniji pacuenia pexi pexinaejiji bexëajawabelia baxaina cotocaewipijinacueto, bajarapacuenia itsinë bajarapamonaewewa, cotocaewi Jesús tanetsitanaitajëtsixae xanëjawaberena. ⁹ Daxita apóstolewiweewa xanë nataniji beweliamatabëcuenenënë, tsipaji abaxë xanë Jesús-jawabelia itsa aposiwanajamatabëcuenecopatsinë, Jesús pijajiwi bejiobia-exanabiabajë. Bajaraxuata: «Apóstolnë», tanejainexa-ata, auranë tsabiabi. ¹⁰ Itsiata bailsi jane, Dioso tane-itaxutotsoniataexae, nitapeta baja apóstol-nëxanë. Xanëjawaberena Dioso tane-itaxutotsoniataejawa, apnacueratsi. Biji rajane, xanë, daxita bajarapa-apóstolewi matatoxetsia, bitso Dioso tonacuenebaponaponajë. Itsiata, xanë tadjamatabëcuenesaëta

q 15:2 *patacatsipaebiliwai si*: Taema 1Co 15:16-17. **r 15:7** *Santiagojawabelia*: Bajaraponë Jesús pejujapijinë tsaena. Taema Hch. 12:17; Gál. 1:19.

apotonacuenebaponaponaenë. Biji rajane, Dioso pesaëta tonacuenebapona-ponajë. Nexata, bajarapasaëta nejamatabëcueneyawenonapona bajarapacuenia tatonacuenebaponaponaenexa.

Pacuenia itsamatacabi Dioso icatsia asaëya-exanaena petëpaewimi, yabara peliwaishi

¹¹ Bajarapacuenia Dioso tonacuenebaponaponaenë, xanë, caenënë, aponataenë taliwaishi namatamotsijawa. Itsa-apóstolewi-ata liwaishi namatamota, tsipaji paxanë caeliwaishi pacanajuatsipaebatsi, Jesús petëpaecujinae icatsia penamatacotsijawa yabara. Bajarapaliwaishi^s paxamë baja pajumexaniataneme. ¹² Itsa pacatsipaebatsi Cristo petëpaecujinae Dioso icatsia piasaëya-exanaejawatsi, ¿detsa xuajitsia itsamonae paxamëyajuwë-nëwi jamatabëcuenenawëxaniabiaya jumaiti tsabiabi: «Jiwi rabaja petëpaecujinae ajibi icatsia piasaëjawanexa», jai tsabiabi? ¹³ Bajarapacuenia apobejumaiti bajarapamonae, tsipaji peneta, itsa pepacuenae ajibi tsipae petëpaewi icatsia piasaëjawanexa, nexata baja Cristo-ata Dioso icatsia apo-asaëya-exanaetsi tsipae petëpaecujinae. ¹⁴ Itsa baja Cristo petëpaecujinae Dioso icatsia apo-asaëya-exanaetsi tsipae, nexata paliwaishianë pacatsipaebawanapatsi, amatamobi tsipae. Bajarapacuenia-ata paxamë panesiwanajamatabëcuenecopabijawa Cristojawabelia, Dioso papecacapanepaenexa panijaneconiwecua, pacato-amatamobi tsipae. ¹⁵ Paxanë pa-apóstolewinë pawajunupaebanajetarubenajë daxitajawa Cristo petëpaecujinae Dioso icatsia piasaëya-exanaejawatsi. Nexata, jiwi icatsia itsa apo-asaëjitsia tsipae petëpaecujinae, paxanë panajumetsënëtsipajë Dioso piasaëya-exanaejawa Cristo. ¹⁶ Itsa peneta pepacuenae ajibi tsipae petëpaewi icatsia piasaëjawanexa, nexata Cristo-ata petëpaecujinae Dioso baja icatsia apo-asaëya-exanaetsi tsipae. ¹⁷ Nexata, Cristo petëpaecujinae, Dioso baja icatsia itsa apo-asaëya-exanaetsi tsipae, nexata paxamë-ata, panesiwanajamatabëcuenecopabijawa Cristojawabelia Dioso papecacapanepaewi-jawanexa panijaneconiwecua, saya panacueratsipame. Tsiteca abaxë panijaneconi paxainaejitsipame. ¹⁸ Bajarapacuenia itsa itsi tsipae, nexata baja pamonaemi tëpa Cristojawabelia pepuapesiwanajamatabëcuenecopabiwi, bajarapamonaemi-ata baja naxuabijitsipa. ¹⁹ Itsa waxaitsi siwanajamatabëcuenecopabijitsipatsi Cristojawabelia, Dioso wajanacayawenonabiabinexa saya ëwajajinawanapae-epato^t mapanacuataje, ayaicuenia nacueratsipatsi. Apoxainaetsinua tsipae matakabi apowerewererecaejawa Dioso pijanacuatatsia wajatëpaecujinae. Nexata, itsamonae nacasiwacanaëjëtsipa bitso wajajamatabëcuenenaxuabiwicuene.

²⁰ Itsiata baitsi jane, paxaniajanë cajena. Cristo petëpaecujinae, Dioso baja icatsia asaëya-exanatsi. BajaraPonë copiaya Dioso asaëya-exanatsi daxita petëpaewimi piasaëya-exanaewajënaeyatsi. Nexata, Cristo namataxainae ya icatsia penamatacotsixa petëpaewi-jawawecua, yapëtanetsi pexaniajajawa daxitatsi Dioso

^s 15:11 *Bajarapaliwaishi*: Pepaebijiwi apocapanepae itsajiwi Dioso penaneconitsia-exanaejawaminexawecua; biji rajane, jiwi pejumexaniataejawata Jesús peliwaishi. Taema Rom. 1:16-17. ^t 15:19 *ëwajajinawanapae-epato*: Mapanacuataje jiwi bejiobia-exanabiaba Jesús pijajiwi. Nexata, Jesús pijajiwi itsa apoyajawaponapona tsipae Dioso pijanacuatatsia, bajarapamona bitso bejiobi tsipae.

icatsia wajanaca-asaëya-exanaejawanexa wajatëpaecujinae. ²¹Caenë, Adán-pijinë, pibisiacuene pexanaejawa pejamatabëcueneta, taxuxuaba jiwi petëpaejawa mapanacuataje. Bajarapijinia pacuenia, caenë, Cristo, jiwi pesiwatëpaejawa pejamatabëcueneta, taxuxuaba Jesús pijajiwi petëpaewimi itsamatacabi Dioso icatsia piasaëya-exanaejawanexatsi. ²²Daxitajiwi tëpapon Adán-pijinë pemomoxixae. Bajarapijinia pacuenia, daxita pamonaë, Cristo pijajiwi, Dioso icatsia asaëya-exanaenatsi, pacuenia Cristo asaëya-exanatsi. ²³Dioso, pejitsipaecuenia, icatsia asaëyaexanaponaena petëpaewimi. Namataxainaëya Cristo asaëya-exanatsi petëpaecujinae, daxita petëpaewimiwecua. Bajaraxuacujinae, Cristo pijajiwi, icatsia asaëya-exanaenatsi petëpaejawawecua, pamatacabi Cristo patsianica. ²⁴Pepatsicujinae, bajaraPonë copiapatsiana jane baja daxitacuene pecopiarucaëya-exanaejawanexa. Nexata, Cristo capanepaëya pecuene-amoneyabicujinae daxita pijawajabitsaëwi,“ pamonaë petuxanewi, penamatacaitorobisaë pexainaewi, daxitacuene pesaë pexainaëjawanë-ata, bajaraxuacujinae, Dioso tocopatsiana Cristo pewetsinexa. Icatsia, itsamatacabijawabelia bajarapa-ewetsicuene tocanawiatsiana paxa Diosojawabelia. ²⁵Cristo yanacua-ewetaponaponaena daxita pijawajabitsaëwi pecuene-amoneyabicujinae. ²⁶Pepocotocaewijawa jane baja, Cristo matapania copiarucaëya-exanaena jiwi petëpaecuenemi. ²⁷Dioso pejumeliwaisibaxutota tajëwelia jumaitsi mapacueniaje: «Dioso itsamatacabi pexënato Cristo tocopatsiana daxitacuenewiria peto-ewetsinexatsi»,“ jai Dioso pejumeliwaisibaxutota. Itsiata baitsi jane, bajarapacuenia jumaitsi-ata, Dioso aponacopatsi Pexënato pewetsinexatsi, tsipaji Dioso Pexënato tocopata peto-ewetsinexatsi daxitacuene. ²⁸Pamatacabi Dioso tocopatsiana daxitacuene Cristo peyanacua-ewetsinexa, bajaraPonë nacopatsiana pejamatabëcuene-ewetsinexa paxa Dioso pitorobicueniatsi pexanaenexa. Itsiata baitsi jane, Dioso penamatacaitorobinë tsane daxitanacuanëjawa, daxitacuenewiria-ata, penamatacaitorobinë tsane.

²⁹Petëpaewimi Dioso icatsia itsa apo-asaëya-exanaejitsiatsi tsipae çdetsa xua yabara paxamëyajuwënwëwë itsamonae jamatabëcuenenawë-xaniabiaya nabautizabia-exanapona pijamonaemi, petëpaewi pewënëta,“ beJesús pijajiwicuenia Dioso petotaenexatsi? ³⁰Bajarapacuenia Dioso itsa apo-exanaejitsia tsipae petëpaewimi, nexata pa-apóstolewinë baja-rapaliwaisi apopatsipaebanajetarubenaenë tsipae, tsipaji daxitamatacabi panetsi-ayai tsabiabi-ata, patatsipaebixae. ³¹Patajamonaemë Cristo pejamatabëcueneta, paxamë baja xaniawaetsia payapëtaneme daxitamatacabi tanetsi-ayai tsabiabijawa, tsipaji itsamonae picani jamatabënebeyaxuababiaba. Xaniajanënuu cajena patacayapëtaëya-exanaejawa

u 15:24 *pijawajabitsaëwi*: Taema Dan. 10:13, 20; Mt 9:34, 12:24; Lc 4:5-7; Efe. 2:2, 6:12.

v 15:27 *peto-ewetsinexatsi*: Taema Sal. 8:4-6; 110:1; Mt 28:18; Efe. 1:22; Heb. 2:8; 1Pd 3:22.

w 15:29 *petëpaewi pewënëta*: Itsamonae, Jesús pijajiwi Corinto tomarata, matajërëta tsaena pijasalinailiwaitsi Dioso Peliwaisijawabelia. Baitsi, griegowi pijasalinaiwi cujaruba pacuenia jiwi nawaenejewa manuameneta apoxainaëjitsia matacabi apopewerewerecaejawa. Nexata, itsamonae Jesús pijajiwi matajërëta bajarapasalinailiwaitsi bautismoliwaisijawabelia. Nexata, jamatabëcuenenawëxaniabiaya canaëjëta jiwi apopexainaëjawanexa matacabi apopewerewerecaejawanexa, itsa aponabautizabia-exanae. Bajaraxuata, nabautizabia-exana pijamonaemi petëpaewi pewënëta, Dioso peyajawa-asaëya-exanaenexatsi daxita Jesús pijajiwi, Cristo pepatsimatacabi. Pablo apojumexaniatae bajarapaliwaisi. Saya canacueneba bajarapaliwaisi comparacióncuenia, itsamonae Jesús pijajiwi pejumexaniataenexa Dioso icatsia piasaëya-exanaejawa Cristo petëpaecujinae.

patacasiwajamatabëcuenecopabixae. ³²Itsa Dioso icatsia apo-asaëya-exanaejitsia tsipae Jesús pijajiwi petëpaecujinae, nexata xanë nacuerat-sipajë pacujinae netsi-ayai-ata, jiwi tatsipaeaponaejawa Dioso pejumeli-waisi. Êfeso tomarapijiwi jamatabënebeyaxuaba picani. Bajarapamonae benewëthëjamatabëcuene pexainaewi.* Tsiquirijawayota wecuapanepajë. Wajatëpaecujinae icatsia Dioso itsa aponaca-asaëya-exanaejitsia tsipae, nexata xaniawaetsia jumecowënëtsipatsi pamonae jamatabëcuenenawë-xaniabiaya nacatsipaeba mapacuenia pejumaitsiliwaisije:† «Ayaijawanë wajaxaejawa xaeyabiabianatsi. Aitajibitsinua tsabiabi tsane wajabarëyatsa-biabinexa, tsipaji raja bepijia tëpaenatsi», pejaili waisi wajanacatsipaebiwi jumecowënëtsipatsi.

³³†Itsiata baitsi jane, pëtsa panacopatame papecayamaxë-itorobinexa bajarapacuenia pejumaitsiwi, tsipaji raja itsamonae bajumaitsi! «Itsa yajawaponaponaejitsipame pibisiajamatabëcuenewi, belia pexaniacuene ne-exanabiabijawami cacuenebijianaejitsipa. Nexata, bajarapamonae cuenejëpaeya ponaponaejitsipame»,‡ bajai itsamonae. ³⁴‡Panajamatabëcuene-aitawamëre, xaniawaetsia panenajamatabëxainaenexa pane-exanawanapaejawa! †Pëtsa baja pematatsënëa pibisiacuene pa-exaname! Bajarapacuenia paca-itorobatsi, tsipaji itsamonae paxamëyajuwënëwi caejamatabëcuene apoxinae^a Dioso jawabelia. Nexata, Dioso pejitsipacuenia apojinawanapae. Mapacuenia pacajumaitsi tsije pane-auranexa.

**Pacuenia Dioso petëpaewimi perabë-itothianaena, icatsia
piasaëya-exanaecujinaetsi, yabara peli waisi**

³⁵Itsamonae meta yanjibiana petëpaewimi icatsia Dioso piasaëya-exanaejawanexatsi yabara. Jumaitsi meta tsane bajarapamonae: «¿Detsa meta pacuenia petëpaewimi namatacobiana petëpaejawawecua? ¿Detsa meta nexata pitsiperabëto icatsia xainaena bajarapamonae?», jai meta tsane bajarapamonae. ³⁶Bajarapacuenia jamatabëcuenenawëxaniabiaya yanjibijitsipa, canaëjëtsinejewa. Waja-ubijawa, pexuto itsa ubatsi, peju-wicujinae bajarapaxutomi batsabana, pepitsapaenexa pejananae. Pexu itsa apotsabanae tsipae, ajibi tsipae pejananae. ³⁷Arroz-xuto, itsawiriauxutoxi-ata, pexu saya ubatsi. Apomëthëcaetsi pepabotonë. ³⁸Pe-ubixu, caewiriauxu

x 15:32 *benewëthëjamatabëcuene pexainaewi*: Wowaijumeta pitsapa «barëntorobajë (fiera), baitsi unupijijiwi piayaiwi», pejaicuenia. Dioso peli waisi penacujaru biwi caejamatabëcuene apoxinae xua yabara Pablo jumaitsi. Itsamonae canaëjëta pacuenia pamonae jamatabëbexuabatsi Pablo, bajarapamonae xaina benewëthëjamatabëcuene. Itsamonae pijinia canaëjëta Êfeso tomarapijiwi penutsijawatsi estadiojawa, newëthëmonaetuatujëta, pebeyaxuabine-xatsi. Nexata, Pablo Dioso yawenonatsi pepanepaenexa peponewëthëmonaewecua, itsa jume, benewëthëjamatabëcuene pexainaewiwecua. y 15:32 *pejumaitsiiliwaisije*: Taema Ecc. 8:15; Isa. 22:12-13; Lc 12:19. z 15:33 *cuenejëpaeya ponaponaejitsipame*: Jiwijume pejumaitsicuenia: «†Pëtsa napënaponapona me piacuenebejewi! Nacuenejëpaejitsipame raja», jai jiwijume pecuacuaijaicuenia. a 15:34 *caejamatabëcuene apoxinae*: Bajarapamonae pijasalinaiwimi, pijatomarapijiwi pexanaecuenenata, yajawacanacuenebabababa, Dioso pijacuene pexanaejawata, canaëjëtsinejewa pexanaecuenenawëthëjamatabëcuene itsa Dioso tsitapibisiacuenetsi, itsa jume, tsitapexaniacuene, bajarapacuenia pijajiwi pexanaenexa. Bajaraxuata, bajarapamonae aponasibabëjai bajarapacuenia exanae-ata, Dioso tsitapibisiacuenenata. Bajaraxua yabara Pablo tsitatsi Dioso apo peyapëtaewi.

canacujitsia, pe-ubicujinae capitsapona pijawiriabotonë, pijawiriabaxu yajawa, Dioso baja cajena pecopatsicuenia. ³⁹Mapanacuataje Dioso copatsi-ata daxitacuenewiriawi pejinawanapaenexa, itsiata aponaperabëjëpae. Jiwi saicaya itsawiriaperabëto xaina. Itsawiriaperabëto saicaya xainapona, unu-pijidujuai, pepunaewi, menepijidujuai-ata. ⁴⁰Bajarapijinia itsi athëbëtatsia pejinawanapaewi, mapanacuata pejinawanapaewi-ata, nawecuaperabë-ithothia. Athëbëtatsia pejinawanapaewi saicaya xaina pexaniaperabëto. Mapanacuata pejinawanapaewi-ata xaina saicayacuenia pexaniaperabëto. ⁴¹Bajarapacuenia athëbëtatsia perubenaewjanë saicayacuenia pexania-itayotsicue xaina. Nexata, matabapijiuameto saicaya itayota, merawipijiuametowecua. Tulupu-ata saicayacuenia itayota bajarapajuametobejewecua. Orijiibia, caetuluputo canacujitsia saicayacuenia nawecua-itayotapona.

⁴²Bajarapijinia pacuenia, nacawecua-itsi tsane petëpaewimi, Dioso icatsia itsa asaëya-exanaenatsi. Saicayaperabëto nacawecuaxainaena. Petëpaejiwi irabelia itsa mëthëtatsi, tsabana baja. Bajaraxuacujinae, Dioso icatsia itsa asaëya-exanaenatsi Jesús pijajiwi, apopetsabanaeperabëtonexa jane baja xainaena. ⁴³Petëpaejiwi mëthëtatsi waja-ataejitsibiperabëto yajawa. Bajaraxuacujinae, Dioso icatsia itsa asaëya-exanaenatsi, pexaniapeniweniwenae-perabëto jane baja xainaena. Petëpaejiwi mëthëtatsi pecueranaeperabëtom i yajawa. Bajaraxuacujinae, Dioso icatsia itsa asaëya-exanaenatsi, daxita matabacijawabelianexa jane baja pesaë pexainaeperabëto xainaena. ⁴⁴Petëpaejiwi mëthëtatsi mapanacuapijiperabëto yajawa. Bajaraxuacujinae, Dioso icatsia itsa asaëya-exanaenatsi, athëbënacuapijiperabëto xainaena. Itsawiriaperabëto abaxë aeconoxae xainatsi, mapanacuata wajajinawanapae-epatoje. Bajara-icatsia pacuenia itsamatababi itsawiriaperabëto xainaenatsi, athëbënacuatsia wajayajawajinawanapaeperabëtonexa.

⁴⁵Dioso pejumeliwaisibaxutota jumaitsi mapacueniaje: «Adán-pijinë Dioso copiaya pexanaenëtsi atsatota, asaë tsaponaponae pepumu-uxunicueniatsi», jai Dioso pejumeliwaisibaxutota. Itsiata baitsi jane, Cristo, cotocaewi nae-xana jiwitonëcuenia, penacopatsinexa cotocaewi Adán-cuenia.^b Cristo acuenie-ithothia copiayapiji-Adán-wecua, tsipaji bajaraPonë jiwi piasaëya-exanaenë, Espíritu Santo pejamatabëcueneta. Nexata, bajarapacuenia wajanacato-exanaexae, waxaitsi, pijajiwiitsi, jamatabëcuene-aitawatsi Diosojawabelia. Xainatsinua matababi apopewerewerecaejawa. ⁴⁶Paperabëto xainatsi maparucaeje, saya mapanacuapijiperabëto, copiaya pexanaecuenia. Nexata, paperabëto Dioso itsamatababi nacarajutsiana Espíritu Santo peca-nacuenebinexa, abaxë aeconoxaeta bajarapaperabëto copia-ewetawanapatsi, wajaxainaenexa. ⁴⁷Adán-pijinë copiaya Dioso exanatsi mapanacuataje, atsabenota. Bajaraxuacujinae, bexëajawabelia, cotocaewi Cristo patsica athëbëwetsica jiwitonëcuenia. ⁴⁸Daxitatsi waxaitsi, mapanacuapijiwiitsije, perabëjëpatsi Adán-pijinë, atsabenota pexanaenëtsi. Itsiata baitsi jane, itsamatababi daxitatsi, Cristo pijajiwiitsi, perabëjëpaenatsi bajaraPonë. ⁴⁹Nexata, pacuenia aeconoxae perabëjëpatsi Adán-pijinë, ponë atsabenota

b 15:45 *cotocaewi Adán-cuenia:* Cristo wënërubatsi cotocaewi-Adán, tsipaji pacuenia daxita jiwi naexana Adán-pijinëjawa, bajarapijinia pacuenia, jiwi taxuxuaba penaexanaenexa Dioso pexi, Cristo pejamatabëcueneta.

pexanaenëtsi, bajara-icatsia pacuenia itsamatacabi Cristo perabëjëpaenatsi, ponë athëbëwetsica pepatsinë, athëbënacupijiperabëto wajaxainaenexa.

⁵⁰ Patajamonaemë Cristo pejamatabëcueneta, jitsipajë patacatsipaebi-nexa mapacueneye. Acuenebi caejiwi-ata mapanacuapijiperabëto yajawa, pejonenexa Dioso pijanacuayabetsia, tsipaji bajarapaperabëto saya petsa-banaejawanexa, apopiajamatabësaëjawa, daxita matacabijawabelianexa.

⁵¹ Nexata, pacatsipaebianatsi paliwaisi Dioso bajayata muetsia xainabuata, yapëtaeya-exanaenejewa abaxë itsajiwijawabelia. BajaraPonë neyapëtaeya-exana pacuenia daxitatsi waxaitsi Cristo icatsia pepatsimatacabitsica pewajënaeya, apotëpaetsi tsane. Itsiata baitsi jane, apotëpae-atatsi tsane, pamatacabi Cristo patsianica, daxitatsi nacaperabë-itothianaena Dioso.

⁵² Itsa najumetsiana cotocaewi trompeta piobijawa, bepjiyayo tsatabi tsane, paepatoyowajëto banaitatsaquetajarabatsi, bajarapaepatoyowajë-tota Dioso petëpaewi icatsia asaëya-exanaena athëbëpijiperabëto yajawa, daxitamatacabijawabelia jane baja piasaëtsawanapaenexa. Waxaitsi pijinia, waja-asaëtsawanapaewi, nacaperabë-itothianajonena. ⁵³ Baitsi, waxaitsi waja-asaëtsawanapaewi abaxë, Dioso nacaperabë-itothianaena, apowerewerecaeperabëto wajaxainaenexa. Pewerewerecaeperabëtomi baja nacato-ajibi tsane. ⁵⁴ Nexata, paepatota bajarapacuenia nacaperabë-itothianajonena, copiajopaena jane baja pacuenia Dioso pejumeliwaisi-baxutota tajëwelia jumaitsi: «Dioso pinijicuenia copiarucaeya-exanaena^c jiwi petëpaecuenemi. Nexata baja, pematatsënëa apojamatabëcuene-amoneyabi tsanetsi jiwi petëpaecuenemi. ⁵⁵ Ajibi baja tsane, witanecuene, petëpaecuene-ata^d,^d jai Dioso tajewelia. ⁵⁶ Pibisiacuene waja-exanaeoneconiyabara tëpaenatsi. Dioso penajumecopatsiliwaisi^e Moisés-pijinëta nacayapëtaeya-exana wajananeconitsiwicuene Diosojawabelia. Bajarapaliwaisi wajanaca-itawetsiliwaisi-ata picani, nacatonaexana bewajanacatorobiliwaisi^f matatoxenetsia pibisiacuene waja-exanaenexa. Nexata, bajarapaliwaisi bepenasaërajutsi wajapibisiacuenejamatabëcuenejawabelia, pibisiacuene waja-exanawanapaenexa, bajarapacuenia wajatëpaenexa wajananeconijamatabëcuene. ⁵⁷ Bitso pexaniajamatabëcuene berajutatsi Diosojawabelia, tsipaji cajena bitso pexaniacuene nacato-exana. Wajatuxanenë Jesucristo pejamatabëcueneta, Dioso baja nacacapanepa^g bajaraPonë wawecuanaxuabijawaminexa, wajaperujumatabëcuene wajanacajamatabëcuenenamatacaitorobisaëwecua-ata.

⁵⁸ Patajamonaemë Cristo pejamatabëcueneta, bitso pataca-asiwawi. jBajarapacuenia Dioso wajanacato-exanaexae, panewajënaeyabelia

c 15:54 *petëpaecuene-ata*: Taema Isa. 25:8. **d 15:55** Taema Oseas 13:14. **e 15:56** *penajumecopatsiliwaisi*: Itsacuenia pijinia wajajucaenexa: «Dioso pejumecopatsiliwaisi Moisés-pijinëta caejamatabëcuene xaina pibisiacuene waja-exanaeoneconijawabelia. Bajarapaliwaisi-ata nacato-caëjëta wajatëpaejawa, pibisiacuene waja-exanaeoneconijamatabëcuene. Bajaraxuata, bajarapaliwaisi bepësaërajutsijawa pibisiacuene waja-exanaeoneconijawabelia», pejaicuenia wajujucaenexa. **f 15:56** *bewajanaca-itorobiliwaisi*: Taema Rom. 7:25. **g 15:57** *nacacapanepa*: Wowajumeta canacueneba caejume, victoriajume saya. Bajarapajume nacayapëtaeya-exana pacuenia Dioso, Jesús pejamatabëcueneta nacacapanepa, Satanás pecobewecua, wajaperujupibisijamatabëcuene wajanacajamatabëcuenenamatacaitorobisaëwecua, Diosowecua wajanaxuabijawaminexa, cotocaewipatëpaejawata; baitsi isotopucaxanetojawabelia wajaponaejawanexawecua, pibisiacuene waja-exanaejamatabëcuene.

ajamatabëcuenesaëya patonacuenebawanapare jamatabëcuenebarëyaya wajatuxanenë Jesucristo! Pacatsitecawanaparenua panejumexaniataejawa xua Dioso nacato-exana Jesucristo pejamatabëcueneta. Paxamë payapëta-neme baja pacuenia apopanacueratsimë tsane, daxita xua patonacueneba-wanapame wajatuxanenë Jesucristo.

**Pacuenia Pablo itoroba ofrenda pexanaenexa Jesús pijajiwi,
Corinto tomarata pejinawanapaewi, yabara peliwaishi,**

16 ¹Aeconoxae pacajumecanawiatsijitsiatsi xua paneyanijobame ofrenda panecaetuatsijawa yabara, xua pa-itorobijitsiamë Jesús pijajiwi jawabelia, Jerusalén tomarata pejinawanapaewinexa. Xaniawaetsia pacayapëtaëya-exanatsi pacuenia pa-exanaejitsiamë. ¡Pa-exanare pacue-nia itorobajë daxita Jesús pijajiwi, caebitsaëto canacujitsia, Galacia nacuata pejinawanapaewi jawabelia, ofrenda pecaetuataponaejawanexa! ²Caedomingo canacujitsia, panenacanabipalatayajuwënëjawa pacaewiwimë canacujitsia, xuawajëto^h papitaponame, pajebaponaename saicaya ofrendanexa. Nexata, tapatsimatacabi paxamë jawabelia, palata apopacaetuataponaemë tsane ofrendanexa. ³Nexata, pamatacabi paxamë jawabelia patsianajë, pa-itapetsianame pecaponaewinexa bajarapapalata Jerusalén tomarapijiwi-jawabelia. Bajarapamonae caponaena tatsicobeyaquinaebaxuto, xaniawaetsia pecopiapitsinexatsi Jesús pijajiwi, Jerusalén tomarata pejinawanapaewi, petocaponaewi panecaetuatsi-ofrenda. ⁴Itsa paxamë pacatsitaxanepana bajarapamonae tapëta penaponaejawa, nexata xanë yajawaponaenajë.

**Xua Pablo tajëwelia siwanajamatabëxaina
pexanaejawanexa, yabara peliwaishi**

⁵Itsa ponaenajë paxamë jawabelia, copiaya patsianajë Macedonia nacua-jawata. Bajaraxuacujinae jane baja, ponaenajë paxamë jawabelia, tapatsi-nexa Corinto tomarata. ⁶Ponaponaenajë meta paxamë jawata bajayajebi; daxita emarapaejuametone. Nexata, bajaraxuacujinae, paneyawenonaename tajanamutonexa, itsabelia icatsia jitsipajë taponanexa. ⁷Mapanamutotaje, cae-epatoyo saya apojitsipaenë taponaponatabinexa paxamë jawata. Biji rajane, jitsipajë bajayajebi taponaponaenexa paxamë jawata, itsa wajatuxanenë Jesucristo bajarapacuenia netojitsipa. ⁸Itsiata baitsi jane, abaxë aeconoxae ponaponaenajë majotaje Éfeso tomarata, pepanepaejawabelia Pentecostés fiesta. Bajarajane xuacujinae, wecuaponaenajë Éfeso tomara. ⁹Majotaje nacopatsianajë, tsipaji aeconoxae netoyapëxanepana tatsipae-baponaenexa Dioso pejumeliwaishi ayaibitsaëto mapatomarapijiwi jawabelia. Bajarapamonae bitso jitsipapona pejumetaenexa bajarapaliwaishi. Itsamonae picani jamatabë necuenecaranatabiaba, bajarapaliwaishi tatsipaebiyaniwa. Jamatabë copabia-exanaponanua jiwi pejumexaniataejawa bajarapaliwaishi.

h 16:2 xuawajëto: Pajiwi tsiquirimatamoyo nacanaba, bajarapajiwi tsiquirijawayo tsataponaena. Pajiwi pijinia matatoxenetsia nacanaba, matatoxenetsia palata tsataponaena ofrendanexa. Itsiata, caejiji canacujitsia berajutapona pacuenia pijacuata siwanajamatabëcuenewereta petsataponaenexa, pecuenecaëjëpacueniatsi, itsajiwi itorobinejewatsi. Jamatabëcuenebarëyayanua betsatapona. 2Co 9:7.

¹⁰Timoteo itsa patsiana paxamëjawabelia, pacopiapitsianame xania-waetsia, jamatabëcuenenabarëyaya peponaponaenexa paxamëjawata, tsipaji pacuenia xanë wajatuxanenë Jesucristo pejamatabëcueneta tonacuenenabaponaponajë, bajarapijinia pacuenia, bajaraponë-ata tonacuenenabaponapona. ¹¹¡Bajaraxuata, pëtsa itsajiwi-ata pacopatame beweliacuenia petanenexatsi! Biji rajane, payawenonaeneme pijanamutonexa, jamatabëcuenexanepanaeya pepatsinexa xanëjawaberena. Xanë, itsamonae yajawa, barëwajënae-ewetaponaponajë Timoteo, pepatsinexa xanëjawaberena.

¹²Paxamë payanijobamenua wajabananë Apolos yabara. Bajaraponë peli-waisi pacatsipaebianatsi. Xanë picanî napëna-itorobaponajë, itsamonae Jesús pijajiwi pepëta, penaponaenexa paxamëjawabelia papecataenexa. Itsiata baitsi jane, aeconoxae abaxë apojamatabëponae. Ponaena meta itsiata, itsajota cuenecaëjëpatsi.

**Pacotocaewiliwaisi Pablo toyaquina Jesús pijajiwi,
Corinto tomarata pejinawanapaewijawabelia**

¹³¡Nayajiwiitaeya pajinawanapare, itsajiwi papecayamaxë-itojorobiyanîwa Dioso peliwaisiwecua! ¡Pajamatabëcuenesaëmëre tsawanapae, panejû-mexaniataejawa Jesús peliwaisi! ¡Pajamatabëcuene-aitatsacamëre, Dioso pejitsipaecuene pane-exanawanapaenexa! ¡Pajamatabëcuenesaëmëre tsawanapaenua, Dioso pijacuene pane-exanawanapaenexa, itsajamatabëcuene paxainaenewamë! ¹⁴¡Daxita xua pa-exanawanapame, asiwaya pa-exanawanapare itsamonaejawabelia-ata!

¹⁵Patajamonaemë Cristo pejamatabëcueneta, payapëtaneme rabaja mapacueneje. Estëfnas pijabopijiwi, itsamonaewecua copiaya barëjû-mexaniatane Jesús peliwaisi, Acaya nacua. Nexata, bajarapamonae jamatabëcuene-enabiabatsi ëDioso pijacuene. Bajaraxuata, asaëyata bitso yawenonabiaba itsamonae, Jesús pijajiwi. ¹⁶Pacatojitsipatsi xaniawaetsia panejumecowënëtsinexa xua paca-itoroba Estëfnas-bana. ¡Pajumecowënërenua pamona-ata jamatabëcuene-enabiabatsi, ëDioso pijacuene pexanaenexa, pacuenia exana Estëfnas-bana!

¹⁷Bitso siwajamatabëcuenebarëyanë, paxamëjawawerena pepatsixae Estëfnas, Fortunato, Acaicobana, tsipaji bajarapamonae pexaniacuenia neyawenonabiaba, pacuenia paxamë paneyawenonaëjitsipame, itsa papatsiparemena. ¹⁸Pacuenia nejamatabëcueneyawenona tabëjaijawami taja-matabëcuenecaewinexa, bajarapijinia pacuenia, paxamë-ata pacajamatabëcueneyawenonaena, penawiabicujinae paxamëjawabelia. ¡Bajarapitsiwi xaniawaetsia pataema! ¡Payaiyataemanua!

Pebajacobiliwaisianë, penapëjiobiliwaisi-ata

¹⁹Daxita Jesús pijajiwi, caebitsaëto canacujitsia, Asia nacua pejinawanapaewi, pacabajacobalia. Aquila, pijawa Priscilabeje, asiwaya pacabajacobaliabejenua wajatuxanenë Jesucristo pewënëta, daxita Jesús peliwaisi pejumexaniataewi yajawa, penacaetuatsiwi bajarapajiwibeje pijabota.

²⁰Daxita Jesús pijajiwi, majotaje pejinawanapaewi, pacabajacobalia. ¡Paxamë-ata Jesús papijajiwiwimë, xaniawaetsia namata-enetsia bitso nasiwaya panabajacobabiabare!

²¹ Xanë Pablonë, tajacuata tacobeta pacatoyaquinatsi patacabajacobili-waisi. Apo-itorobinë taneyawenonabiabinë tanetoyaquinaenexa.

²² Pajiwi apo-asiwa wajatuxanenë Jesucristo, bajarapajiwi naneconitsi, Diosowecua penaxuabinexa. Xanë juya jumaitsinë Jesucristojawabelia: «Patajatuxanenëmë Jesucristo bepijiayo patsianimica», janë.

²³ Pacatojitsipatsi wajatuxanenë Jesucristo asiwaya papecayawenonabia-binexa. ²⁴ Daxita paxamë asiwaya pacajamatabënajinatsi caenë Jesucristo pijajiwixaetsi.

2 Corintios

Mapabaxutoje apóstolnē Pablo cotocaewi toyaquina Jesús peliwaisi pejumexaniataewi, Corinto tomarata pejinawanapaewijawabelia

Pebajacobiliwaisi

1 ¹Xanē, Pablonē, Dioso pejitsipaecuenia nitapeta, Jesucristo pija-
apóstol-nēnexanē. Nexata, pacatoyaquinatsibeje, wajabananē Timo-
teobeje, mapaliwaisije, Jesús papijajiwiimē panejinawanapaewi Corinto
tomarata, Acaya nacujawa-ata. ²Pexaniacuenia pacatojitsipatsi, waxa
Dioso, wajatuxanenē Jesucristobeje, papecajamatabēwēnētsinexa papeca-
asiwajamatabēcuenē, papecabarajamatabēxanepanaejamatabēcuenē-ata,
jamatabēcuenexanepanaeya panenajuajinawanapaenexa.

**Pablo yapētaeya-exana pacuenia Dioso jamatabēcueneyawenonabiaba
pijajiwi peto-ayapēbejējawatatsi**

³Nacatoxanepana ayaicuenia wajawēnēxaniatsinexa waxa Dioso, wajatu-
xanenē Jesucristo paxa, tsipaji Dioso wajanaca-itaxutotsoniataeyabiabinē,
wajanacajamatabēcueneyawenonabiabinēnua, bitso wajanajamatabēxai-
naejawata. ⁴Bajarapacuenia Dioso paneto-exanabeje pamatacabi paneto-
copiapatabiababeje daxita xua bitso panenajamatabēxainaeya-exanabeje.
Bajarapijinia pacuenia, panejamatabēcuenecaējēpaeya-exanabeje, itsa-
monae juya patajamatabēcueneyawenonaenexabeje, pamatacabi toco-
piapatatsi bajarapitsinajamatabēxainaecuenē. ⁵Paxanēbeje itsamonae
bitso panebejiobia-exanabiababeje Jesucristo peliwaisi yabara, pacuenia
wajatuxanenē copiya bejiobia-exanatsi. Itsiata baitsi jane, bajarapa-
cuenia panebejiobia-exanae-atabeje, Cristo pejamatabēcueneta, Dioso
ayaicuenia panejamatabēcuenēbarēyaya-exanabiababeje, bitso pata-
najamatabēxainaeyaniwabeje. ⁶Paxanēbeje, itsamonae panebejiobia-
exanaponabeje Jesús peliwaisi patatsipaebixaebeje. Bajarapacuenia
pataponaponaejawatabeje pajumetaneme Jesús peliwaisi, papecacapa-
nepaeliwaisinexa, Dioso papecajamatabēbarēyaya-exanaenexa. Paxa-
nēbeje Dioso panejamatabēcuenēbarēyaya-exanabeje patanebejiobia-
exanaejawatabeje, juya patacamatabēcueneyawenonaenexabeje,

papecabebiobia-exanaejawata panejamatabëcuenebarëyanexa. Nexata, paepatota itsamonae pacabebiobia-exanabiabiana Jesús papijaji-wixaemë, bajayajebi pajamatabëcuenesaemë tsane Dioso pane-itaxutuajamatejemajawa, matapania bajaraPonë papecacapanepaejawabelianexa. ⁷Paxanëbeje payapëtanijibeje, pane-ajamatabëcuenesaëjawanexa itsamonae papecabebiobia-exanaejawata, tsipaji Dioso pacajamatabëcueneyawenonaena, pacuenia paneto-exanabiababeje, itsamonae patanebejiobia-exanabiabijawatabeje. Daxitatsi Jesús pijajiwixaetsi, najëpaeya itsamonae nacabebiobia-exanabiaba. Najëpaeyanua Dioso nacajamatabëcueneyawenonaena, wajajamatabëcuenebarëyanexa icatsia.

⁸Patajamonaemë Cristo pejamatabëcueneta, pajitsipajëbeje patacayapëtaeya-exanaenexabeje itsamonae Asia nacuata patanebejiobia-exanaejawabeje. Ayaicuenia bitso patanebejiobia-exanabiabixabeje, nexata baja picani, pa-asaëjibinëbeje tsaponae. Apopanecaëjëpaebeje baja picani patawajënaeyabelia pataponaenexabeje. Belia panatota-nijibeje patatëpaejawanexabeje. ⁹«Pepacuene raeta baja panebexuabianabeje», pajamatabëjanëbeje tsabiabi. Itsiata baitsi jane, bajarapacuenia patanebejiobia-exanabiabijawatabeje, panecujarubabeje pata-itaxutuajamatejemanexabeje Dioso, patana-itaxutuajamatejemaj awabewecua, tsipaji raja, caenë Dioso icatsia jiwi piasaëya-exanaenë, petëpaejawawecua. ¹⁰Dioso jane baja, panecapanepabeje bajarapamonae patanebeyaxuabiyaniwabeje. Orijibia, itsamatacabi itsamonae itsa panebejiobia-exanaenabeje, Dioso icatsia panecapanepaenabeje bajarapiayaicuenewecua. BajaraPonëjawabelia pa-itaxutuajamatejemanëbeje, patawajënaeyabelia pataneyawenonabinexabeje. ¹¹Bajarapacuenia Dioso patawajënaeyabelia paneyawenonaenabeje, paxamë itsa paneyawenonae-yawajëtaponaename bajaraPonëjawabelia, pataneyawenonabinexabeje. Nexata, pa-ayaibitsaëttoxanetomë itsa panetowajëtaponaename Diosojawabelia, ayaibitsaëto pijinia pexaniajamatabëcuene rajutsiana Diosojawabelia, bajaraPonë ayaicuenia pataneyawenonaexabeje patanebeyaxuabijawaminexabewecua, paxamë patanetowajëcaexaemë tsane Diosojawabelia.

**Pajamatabëcuene yabara Pablo apoponae Corinto tomarabelia
pacuenia picani natocaëjëta, yabara peliwaissi**

¹²Itsamonae tsaena bijiaya panecuenecanaëjëtabeje, apopatapsixabeje paxamëjawabelia patacajumaitsicuenia. ⁴Biji rajane, Dioso asiwaya panejamatabëcueneyawenonabeje, bajarapacuenia patacayapëtaeya-exanaenexabeje. Bajaraxuata, panasiwajamatabëcuenebarëyanëbeje bitso, tsipaji mapanacuapijiliwaisita pecanaëjëtsicuenia apopacanawajunupaebitsibeje. ¹³Paliwaisianë baja pacatoyaquinabiabatsibeje, caeliwaisita anijajamatabëcueneliwaisibeje apoxainaponae. Saya caejamatabëcueneliwaisi xainapona. Apopacatoyaquinaetsibeje piyapëbejemenëta. Nexata, panelebijawata, xaniawaetsia pajumeyapëtaeyabiabame xua pacatoyaquinatsibeje. Itsiata, apopanejumeyapëtae-atamëbeje, xua yabara apopapatsinëbeje paxamëjawata, pacatojitsipatsibeje xaniawaetsia paneyapëtaejawanexa

itsamatacabijawabelia. ¹⁴ Nexata, xua abaxë aeconoxae apopajumeya-pëtaemë, patapatsijawabejenexa paxamëjawabelia, pamatacabi wajatu-xanenë Jesús icatsia patsianica xaniawaetsia baja pajumeyapëtaename. Nexata, paxamë panesiwajamatabëcuenebarëyamë tsane, bajarapacuenia paxanëbeje-ata pacasiwajamatabëcuenebarëyatsibeje tsane.

¹⁵ Tayapëtaexae patanesiwajamatabëcuenebarëyajawamë, xanë canaë-jëtajë picani anijatobeje patacasiwaxainaejawata, patacabarëyaya-exanaejawa. ¹⁶ Nexata, pamatacabi ponajë Macedonia nacuyabelia, talianë picani copiaya bajaraxuayo jamatabëpacataeponatsi. Bajaraxuacujinae, tanawiatsinërena, canaëjëtajë picani tapatsinexanua paxamëjawabelia, pataneyawenonaenexamë tajanamutonexa, Judea nacuyabelia taponaenë. ¹⁷ Paxamë meta picani pacanaëjëtame xaniawaetsia canaëjëtsine-jewanë patacajumaitsijawa taponaejawa yabara paxamëjawabelia, itsa jume, anijajamatabëcuenebeje betaxainaejawa. Bajarapacuenia itsiata xanë apojamatabëcuene-itsinë. Paxamë baja cajena panecueneyapëtaneme.

¹⁸ Dioso-ata baja cajena panejamatabëcueneypëtaneebeje pataxaniajaijawabeje yabara. Xua pajumaitsinëbeje, pa-exanabiabajëbeje. Nexata, itsa pa-exanaejitsianëbeje, «jājā», pajanëbeje. Itsa pijinia apopaxanaejitsianëbeje, «jume», pajanëbeje tsabiabi. ¹⁹ Paxamë payapëtaneme, pacuenia Jesucristo, Dioso pexënato, caejamatabëcuene xainabiaba, ponë yabara pacatsipaebabiabatsi xanë, Pablonë, Silvano, Timoteo-ata. Nexata, caejamatabëcuene pexainanëxae, caecuenia «jājā», «jume», apojai cajena. Biji rajane, Dioso, «jājā», jai tsabiabi, Jesucristo pejamatabëcueneta. ²⁰ Bajaraxuata, Dioso najumecapanepaeya pejumaitsijawa wajanacato-exanaenexa, pepacuene nacatocopiapataponna Jesús pejamatabëcueneta. Bajaraxuata, wajawënëxaniatsijawata Diosojawabelia, jumaitsitsi tsabiabi: «¡Xaniajai! ¡Xamë Diosomë nenajumecowë-exanaenë!», jaitsi tsabiabi. ²¹ Paxanëbeje, paxamë-ata, caenë Dioso, caebitsaëto naca-exana Cristojawabelia, wajawajënaeyabelia nacajamatabëcueneypawenonapona, wajawajënaeyabelia nacajamatabëcueneypawenonapona, wajawajënaeyabelia nacajamatabëcueneypawenonapona, waja-ajamatabëcuenesaëtsaponaenexa-ata. Daxitatsi Dioso naca-itapetanua Jesucristo pijajiwinexatsi, Dioso pijacuene wajatonacuenebawanapaenexa. ²² Orijibia, wajanayapëtaenexa pepacuene Dioso pexicuenetsi, pexaniajaijawanua wajanacato-exanaejawanexa najumecapanepaeya pejumaitsicuenia, Dioso baja cajena nacayacajebiaya^b Espiritu Santo nacatsijamatabë-ecaeya-exana.

²³ Dioso yapëtane apotanaelumetsënëtsijawa mapacuenia itsa pacajumaitsitsije. Pamatacabi picani jamatabëponabiabajë paxamëjawabelia, caecuenia itsa ponaejitsipajë, nexata pacabijataejitsipatsi, tsipaji abaxë apopa-exanawanapaemë pataca-itorobicuenia. Bajaraxuata, abaxë aponayajiwiaponanë paxamëjawabelia, itsa pacabijatanetsi, bitso panenajamatabëxainaeyaniwa. ²⁴ Nexata, apopajitsipañëbeje bitso pataca-itorobaponaejawabeje pacuenia bepa-exanawanapame, pane-itaxutuajamatejematsaponaenexa Dioso, tsipaji baja xaniawaetsia Jesucristojawabelia pasiwanajamatabëcuenecopabame. Biji rajane, pajitsipajëbeje

patacajamatabëcueneyawenonaejawabeje, panejamatabëcuenebarëyat-sawanapaejawa, matatoxenetsia icatsia panejamatabëcuenebarëyanexa Diosojawabelia.

2 ¹Nexata, patacanajamatabëxainaeya-exanaeyaniwa patacabijataeja-wata, najamatabëcopatajë baja taponaejawa paxamëjawabelia. ²Jit-sipajë picani paxamë patanejamatabëcuenebarëyaya-exanaejawamë pata-casiwaxainaejawata. Itsiata, itsa pacanajamatabëxainaeya-exanaejitsipatsi, nexata apopajamatabëcuenebarëyamë tsipae. Nexata, çjipatsa nejamatabëcuenebarëyaya-exanaejitsipa, patacanajamatabëxainaeya-exanaecujinae? Ajibi tsipae. ³Bajaraxuata, taponaejawënaeya paxamëjawa-belie, copiata pacatoyaquinaliatsi itsabaxuto, patacayapëtaeya-exanaenexa tapatsiwajënaeyalia pacuenia bepa-exaname, patanenajamatabëxainaeya-exanaeyaniwamë. Jitsipajë picani paxamë patanejamatabëcuenebarëyaya-exanaejawamë, tsipaji yapëtaniji bajarapacuenia pataneto-exanabiabijawamë, panejamatabëcuenebarëyajawata. ⁴Apojitsipañë picani patacatoyaquinaenexa bajarapabaxuto, bitso pacayapëtaeya-exanatsi. Nexata, patacatoyaquinaejawata, bitso jamatabëcuenebëjaiya tajamatabë-ëthëtowetsina, pacatoyaquinatsi najamatabëxainaeya. Nuajënuu paxamëjit-sia. Itsiata, apopacatoyaquinaetsi patacanajamatabëxainaeya-exanaenexa, biji rajane, patacayapëtaeya-exanaenexa ayaicuenia pataca-asiwajawa.

Pablo itoroba Jesús pijajiwi, Corinto tomarapijiwi, pebarajamatabëcuene xanepanaenexa pibisiacuene pexanaponaponaenëmi, yabara peliwaissi

⁵Aeconoxae pacamuxujiobianatsi pibisiacuene pexanaponapo-naenëmi^c yabara, paxamëtuatuajëta. Bajaraponë, caenënë xanë aponenajamatabëxainaeya-exanae. Daxita paxamë-ata bajarapacuenia pacanajamatabëxainaeya-exana. ⁶Paxamë pane-exanaexae pacuenia pacatoyaquinatsi itsabaxutota, panenawecuacapsapaenexa paxamëtua-tuajëta pibisiacuene pexanaenë, nexata baja bajaraponë belia copata pibi-siacuene pexanaejawa. Xanepana rabaja. ¡Pëtsa baja pematatsënëa icatsia panawecua-itawetame bajarapacuenia! ⁷¡Biji rajane, aeconoxae baja pasiwa-jamatabëcueneaware, pabarajamatabëcuene xanepanarenua bajaraponë pibisiacuene pexanaejawami! ¡Pajamatabëcueneyawenonare pia-urayaniwa, pejamatabëcuene matatoxenetsiyaniwatsi bitso pejamatabëcuenebëjai-jawa pijaneconi yabara! ⁸Bajaraxuata, bitso pacatojitsipatsi bajaraponë panetsitanajamatabëcuene-itajëtsinexa pane-asiwajawa. ⁹Copiayapijibaxu-tota pacatoyaquinatsi bajaraponë pecuene yabara, patacajamatabëcuene-ëjëtsinexa, xaniawaetsia tayapëtaejawa itsa panejumecowënëtsijitsiamë daxita pataca-itorobicuenia, panija-apóstol-nëxaenë. ¹⁰Nexata baja, itsa pasiwajamatabëcueneaware papibisiacuene picani exana bajaraponë paxamëtua-tuajëta, xanë-ata baja siwajamatabëcueneawarewajë. Pacujinae siwajamatabëcueneawarewajë itsajiwi pijaneconi yabara, exanajë Cristo tane-itorobicuenia. Bajarapacuenia exanajë, daxita paxamë caejamatabëcuene icatsia panenajuaxainaenexa, nabarajamatabëcuene xanepanaeya panena-juajinawanapanaenexa. ¹¹Nacatoxanepana wajasiwajamatabëcueneawarewajawa

^c 2:5 *pibisiacuene pexanaponaponaenëmi*: Taema 1Co 5:1-13.

itsajiwi pijaneconi yabara, Satanás wajanacaliwaisi canacuenebiyaniwa. Waxaitsi baja Satanás cueneyapêtanetsi papibisiajamatabêcuene xaina, liwaisi wajanacatocapitsapabiabinexa, nabarajamatabêcuenexanepanaeya wajanajuajinawanapaeyaniwa.

Pacuenia Pablo bitso siwanajamatabêxaina Tito, yabara peliwaisi

¹² Copiyabaxuto Titota patacato-itorobicujinae,^d ponajê Troas tomarajawabelia tatsipaebinxexa Cristo peliwaisi. Bajarapatomarata tapatsicujinae, taniji Wajaxutanenê tanetoyapêxanepanaeya-exanaejawa tatsipaebinxexa Jesús peliwaisi bajarapatomarata. Nexata, Troas tomarata itsa tsipaebabiabajê Jesús peliwaisi, bajarapatomarapijiwi nenamuxuna-ewetabiaba xaniawaetsia. ¹³ Itsiata baitsi jane, bajarajota abaxê apojamatabêcuenebarêyanê, tsipaji abaxê wajabananê Tito apopatsi Macedonia nacuawerena, taneyapêtaeya-exanaenexa paxamê yabara. Nexata baja, napêjiobajê Jesús pijajiwi, Troas tomarapijiwi, taponae-nexa jane baja, Macedonia nacuayabelia, tacopijajitsinê Tito.^e

Pablo pexaniajamatabêcuene rajuta Diosojawabelia, pijajiwi pejamatabêcueneyawenonabiabixae Cristo pejamatabêcueneta

¹⁴ Pexaniajamatabêcuene parajutabiabajê Diosojawabelia, tsipaji paxanê, patatonacuenebiwi Cristo, panejamatabêcueneyawenonabiaba, patacuene-amoneyababiabinexa daxita xuanê panecuenecaranatabiaba. Nexata, Dioso paneyajawaponabiaba, patacuene-amoneyabinexa xaniawaetsia patatsipaebinxexa Jesús peliwaisi itsamonaejawabelia. Nexata, daxitajawa itsa paponajê, pamonaê jumexaniatane bajarapaliwaisi, tsitapexanialiweisitsi bitso. ¹⁵ Pacuenia pexaniatuxujuwijawa yacaejêpa daxitajawa, daxitajiwi petuxuninexa, bajarapacuenia Jesús peliwaisi patatsipaebijawa yacaejêpaponaxa daxitajawa, daxitajiwi pejumetaenexa. Nexata, Dioso panesiwajamatabêcuenebarêya bajaraxua yabara. Pamonaê jumexaniataena bajarapaliwaisi, Dioso capanepaenatsi. Itsiata, pamonaê jume-aebiana Cristo peliwaisi, Diosowecua naxuabiana. ¹⁶ Pamonaê penaxuabiwinexa Diosowecua, patatsipaebiliwaisi tsitapetuxutsaebiliwaisitsi, tsipaji yapêtaeya-exanatsi Diosowecua penaxuabi-jawanexa, pejume-aebixae Cristo peliwaisi. Pamonaê Dioso pecapanepawinexatsi patatsipaebiliwaisi tsitapexaniatuxujuwiliwaisitsi, tsipaji jumexaniatane Cristo peliwiiasi. Yapêtaeya-exanatsinua Dioso pecapanepaejawanexatsi piasaetsawanapaenexa daxitamatacabijawabelia. Tasiwacanaêjêtsijawata bajarapanamatamotsiliwaisi yabara, nayanijobabiabajê: «¿Jipatsa meta cuenecaêjêpatsi petsipaebinxexa bajarapaliwaisi Dioso yawenonaenejewatsi?»^f Ajibi cajena», jamatabêjanê. Paxanê, pa-apóstolewinê, Dioso paneyawenonabiaba,

d 2:12 *Copiyabaxuto Titota patacato-itorobicujinae*: Mapabaxuto 2 Corintiobaxuto Pablo yaquina Filipo tomarata. 1 Corintiobaxuto pijinia Pablo yaquina Éfeso tomarata (1Co 16:8.) Nexata, Éfeso tomarawecua peponaecujinae, Pablo pona Troas tomarajawabelia. Xuacujinae, pona Macedonia nacujawabelia, panacuata eca Filipo tomara. Nexata, Pablo itsa abaxê ponapona Filipo tomarata, Tito pata Corinto tomarawerena. (2Co 7:13-15.) Nexata, Tito yapêtaeya-exana Pablo pacuenia Jesús pijajiwi, Corinto tomarata, xaniawaetsia copiapita paliwaisi Pablo toyaquinaitsi imata pabaxutota. Bajaraxuata, Pablo icatsia toyaquina Jesús pijajiwiawabelia mapabaxutoje, 2 Corintiobaxuto. **e 2:13** *tacopijajitsinê Tito*: Mapaliwaisije Tito yabara Pablo weretsijitsia capítulo 7-jawata, versículo 1-cujinae. **f 2:16** *Dioso yawenonaenejewatsi*: Taema 2Co 3:5.

patatsipaebabiabinexa pexanaliwaisi, Cristo peliwaisi, jiwi pecapanepaeliwaisinexatsi. ¹⁷Itsamona, ayaibitsaëtonë, pæbanajetarubena yamaxë-itojorobiaya beCristo peliwaisicuenia, pebarëyajamatabëcuene pematamotsinexatsi. Bajara-pacuenia paxanë apopacuene-itsinë. Biji rajane, bajarapaliwaisi patsipaebabiabajë Cristo patane-itorobicuenia, itsajamatabëcuene-ata pasiwanajamatabëxainaenejewanë, tsipaji payapëtaniji Dioso patanenaitaxutocaewetsijawa.

3 ¹Itsa pacanawajunupaebatsi paneyapëtaenexa Dioso patane-itorobijawa Cristo peliwaisi patacatsipaebinexa, apopanawënëxaniatsinë paxamë patanetaenexamë ayaijamatabëcuenewicuenia. Paxamë xaniajaiya payapëtaneme Dioso pijacuene patatonacuenebijawa. Nexata, pacuenia itsamona wajëca petsicobeyaquinaenexatsi, itsa jume pacawajëta panetsicobeyaquinaenexa cuyalato,⁸ itsamona xaniawaetsia panecopiapitsinexa Dioso pitorobiwitsicuenia, bajarapacuenia paxanë apopanamatawenonaenë itsamona patanetsicobeyaquinaenexa patajacuene yabara, ²Paxanë baja cajena patajacuata bepatanatsicobeyaquinaebaxuto patajamatabë-ëthëtota. Paxamë panejinawanapaecuene Jesucristojawabelia panesiwanajamatabëcuene copatsicujinae, daxitajiwi papecataejawata bepapecacuenelebi-jawa. Bajarapacuenia daxitajiwi yapëtane xaniawaetsia patanacuenebijawa Dioso pijacuene paxamëtuatuajëta. ³Paxamë xaniawaetsia panejinawanapaexae Cristo pejitsipaecuena, itsamona, apopataneypapëtaewi-ata, yapëtane Dioso patane-itorobiwicuene, Cristo peliwaisi patatsipaebinexa. BeCristo patanetsicobeyaquinaebaxuto panacopatame itsamona pitabarata. Itsiata, pabaxuto Cristo panetsicobeyaquina, apoyaquinae itsacueneitanetota pebaxutota, ibotota-ata. Biji rajane, piasaëtsaponaponaenë, Espiritu Santo, bepatanetsicobeyaquinaebaxuto paxamë panejamatabë-ëthëtota, pacajamatabëcuene caëjëpaeya-exanabiaba xaniawaetsia panetsitajinawanapaenexa Cristo pejitsipaecuena, jiwi peypapëtaenexa xaniajai Dioso patane-itorobiwicuene.

⁴Paxanë payapëtaniji Dioso pepacuene patane-itorobijawa, Cristo peliwaisi jiwi patatsipaebawanapaenexa, tsipaji baja pa-itaxutuajamatejemanë Dioso pataneyawenonabiabinexa, Jesucristo pejamatabëcueneta. ⁵Paxanë patasaëta Dioso patatonacuenebinexa, apopanejamatabëcuene caëjëpae. Nexata, xua Dioso pato-exanawanapajë, Dioso baja cajena paneyawenonabiaba. ⁶Dioso baja cajena, panecuene cucaruba xaniawaetsia pacuenia papijajiwinë patonacuenebawanapaejitsianë Dioso pejanacuena penajumeliwaisicajonejawa jiwijawabelia, Jesucristo pejamatabëcueneta, pecapanepaenexatsi penaneconitsia-exanaejawaminexatsiwecua. Nexata,

g 3:1 *panetsicobeyaquinaenexa cuyalato*: Bajayatami, ayaibitsaëto Jesús pijajiwi, judfowi, siwanajamatabëcuene copabi-ata Jesucristojawabelia, bitso casaë pena-ewetsinexa, bepenaxuirabiwicuenia penacopabijawa Dioso pitabarata. Nexata, bitso cuene-itoya pamonaenajëpaeya aponaewetsi bajaraxuawecua. Itsa siwaxainaejitsia, pewënajudfowijawabelia, itsanacuanëjawa pejinawanapaewi, penaropobiwajënaeya Jerusalén tomarawerena, wajëcabiaba Jesús pijajiwi pewetsiwijawabelia, Santiago, Juan, Pedrobana, cuyalato petsicobeyaquinaenexatsi, bajarapabaxuto pecaponanexa pamonaejawabelia patsijitsia, xaniawaetsia pecopiapitsinexatsi. Itsiata, pepatsicujinae, nawajunupaebabiaba ancianowi bepitorobiwitsicuenia, apo-itorobi-atatsi picani. Nexata, taxuxuababiaba pecuene-itawetsijawa Jerusalén-pijiwi pija-ancianowi pewënëta, apojudfowi pexanaeyaniwa xua yabara Dioso taejitsiatsi bepenaxuirabiwicuenia. Itorobabiabanua, pebiijiwi penabo-upiperabëcaucubia-exanaenexa.

bajarapapejaniwaisita apotonajumecopatsi pitorobiliwaisianë jiwi pejumecowënëtabiabinea, aneonijibia petaenexatsi. Biji rajane, jiwi patsipae-babiabajë pacuenia Espiritu Santo jamatabëcuene-asaëya-exanaejiatsiatsi. Paliwaisi bajayata Dioso najumecopata Moisés-pijinëta, itoroba pebeyaxua-babiabinea pajiwi apojumecowënëtsi bajarapaliwaisi. Itsiata baitsi jane, pajiwi jumexaniatane papejaniwaisi jiwi patsipae-babiabajë, pesiwanajamatabëcuenecopabinexa Jesucristojawabelia, nexata Espiritu Santo bajara-pajiwi rajutabiaba pitawajamatabëcuene.

Dioso pejaniwaisita, najumecajunua jiwijawabelia pecapanepaejawanexa

⁷Pacujinae Dioso najumecopata Moisés-pijinëta, bajarapaliwaisi Dioso yaquina ibopanabejumatata. Bajarapaliwaisita Dioso itorobi-ata pebeyaxuabinexatsi pajiwi apojumecowënëtsi, itsiata bajarapaliwaisi perajutsijawatatsi, Moisés-pijinë itabaraniweniwenana bitso.^h Nexata, Israel-pijinë pemomoxi apocuenecaëjpaetsi pitabarataecapanepaejawa, itsiata bexëajawabelia itabaracotiacaewapona baja, Sinaítsutojawawetsica perunaecujinaetsica. ⁸Dioso penajumeliwaisirajutsijawata Moisés-pijinëta, yajawa-itabaraniweniwenana-eyaxana, jiwi asiwaya petaenexa penamata-motsiliwaisicuenia. Bajarapaliwaisijawata najamatabëcuene-itajëta jiwi pianeconijamatabëcuene petocaëjëtsijawa petëpaenexa. Itsiata, matatoxenetsia bitso pijinicuene xua Espiritu Santo nacato-exanaejiatsia mapamatacabitaje, wajajumexaniataexae papejaniwaisi Dioso nacanajumeliwaisicajunua wajanacacapanepaenexa. ⁹Paliwaisi Dioso najumecopata Moisés-pijinëta pexanialiwaici cajena, tsipaji bajarapaliwaisi apojumecowënëtsijamatabëcuene jiwi yapëtane penaneconitsijawa Disojawabelia. Bajarapaliwaisiwecua, bitso xanepana papejaniwaisi pejamatabëcueneta, Dioso aneonijibia nacataejiatsia, wajanacacapanepaenexa. ¹⁰Paliwaisi bajayata Dioso Moisés-pijinëta najumecopata, pexanialiwaici cajena picani. Itsiata baitsi jane, papejaniwaisi Dioso cotocaewi najumecopata, bajarapaliwaisi bitso pexaniajawa copiyapijiliwaisiwecua. Bajaraxuata, paliwaisimi copiya Dioso najumecopata Moisés-pijinëta, wajajumecowënëtsinexa, aeconoxae baja yapëtanetsi pajumematamobicuene,ⁱ Dioso aneonijibia wajanacataenexa. ¹¹Nexata, itsa copiyapijiliwaisi xanepana, pewerewerecaeliwaisinexa-ata, matatoxenetsia bitso xanepana papejaniwaisi cotocaewi Dioso najumecopata, tsipaji daxitamatacabijawabelianexa tsitecaena.

¹²Patayapëtaexae apowerewerecaejawanexa bajarapapejaniwaisi, apopajumejunawabiabinë patatsipaebinea jiwijawabelia. ¹³Nexata, paxanë apopa-exanawanapaenë pacuenia bajayata exana Moisés-pijinë itsa itabaraniweniwenana, naitabara-acata papabërëpanata, jiwi pitabarataeyaniwatsi

h 3:7 *itabaraniweniwenana bitso*: Taema Éxo. 34:30-35. **i 3:10** *pajumematamobicuene*: Pacujinae Dioso najumecopata pitorobiliwaisianë Moisés-pijinëta, bajaraPonë najumeliwaisicajunua Israel-pijinë pemomoxijawabelia mapacueniaje: «Itsa paxamë pajumecowënëtabiabianame daxita pataca-itorobiliwaisianë, xanë juya, pexaniacuenia pacayawenonabiabianatsi», jai. Itsiata, pejanacuenia itsa najumeliwaisicajunua jiwijawabelia pecapanepaenexatsi, jumaitsi mapacueniaje: «Pexaniacuenia pacayawenonabiabianatsi, taxënatato Jesús papecatopojumecowënëtsixae daxita bajarapaliwaisianë, papecatamatamotsixaenua daxita panijanecon, papacasawatëpaejawata cruzata», jai. Bajaraxuata, cotocaewi penajumeliwaisicajonejawa bitso pexaniajawa copiya panajumeliwaisicajonejawawecua.

pitabaracotiaaewaponaejawa. Bajarapacuenia apopanaitabara-acatsinē, tsipaji pejanaliwaisi apo-ajumematamobi tsaponaejitsia, pacuenia itsi Dioso penajumecopatsiliwaisi Moisés-pijinēta. ¹⁴ Itsiata baitsi jane, Israel-pijinē pemomoxi bajarapamatacabita apoyapētae piamumematamobijawanexa bajarapaliwaisi, pejumecowēntsijawata Dioso aneconiibia petanexatsi. Bajarapijinia pacuenia, ajena mapamatacabijawaberena-ataje, itsa tsimu-xulebatsi Dioso penajumecopatsiliwaisimi Moisés-pijinēta, tsiteca apojumeyapētaeyabiabi pajamatabēcueneliwaisi xaina, tsipaji bajarapaliwaisi bepita-xuto-acatsijawa, bajarapamonae pejumexaniataeyaniwa Cristo peliwaisi. Bajarapamonae itsa jumexaniataejitsipa Cristo pesiwatēpae-jawatsi, nexata matapania jumeyapētaejitsipa pajamatabēcueneliwaisi xaina paliwaisi bajayata Moisés-pijinē tsipaebabiaba. ¹⁵ Xaniajanē. Ajena mapamatacabijawaberena-ataje, judfowi penacatuatabiabibota itsa leba-biaba Dioso penajumecopatsiliwaisimi Moisés-pijinēta, apojumeyapētaeyabiabi pajamatabēcueneliwaisi xaina. Bajarapaliwaisi pejumeyapētaeyaniwa, jamatabē caranatatsi, tsipaji tonaexanatsi bepita-xuto-acatsipanatsi. ¹⁶ Itsiata baitsi jane, pajiwi siwanajamatabēcuenecopata wajatuxanenē Jesucristoja-wabelia, bajarapajiwi Dioso wecua-ajibia-exanatsi bajarapajamatabēcuenecaranatsijawatsi, xaniawaetsia pejumeyapētaenexa pajamatabēcueneliwaisi xaina bajayata Moisés-pijinē paliwaisi tsipaebabiaba. ¹⁷ Wajatuxanenē Jesucristo, Espiritu Santobeje, najamatabēcuenepabeje. Nexata, Espiritu Santo wajanacatsijamatabē-ecaexae, nacajamatabēcueneyawenonapona, Cristo pejitsipaecuenia wajajinawanapaenexa, nacawecua-ajibia-exananua wajajumecowēntsijawami Dioso penajumecopatsiliwaisi Moisés-pijinēta, aneconi-jibia wajanacataenexa. ¹⁸ Nexata, daxitatsi wajanacawecua-ajibia-exanaewi bajarapajamatabēcuenecaranatsiliwaisi, Jesucristo pejamatabēcueneta, Espiritu Santo nacajamatabēcueneyawenona, wajajamatabēcuenepaenexa/ pacuenia Cristo jamatabēcuenen-itsi. Bajarapacuenia wajajamatabēcuenepaenexa, tsitanacuene-itajētatsi jiwijawabelia Cristo ayajamatabēcuenepexainaenēcuenen. Bajarapacuenia nacacuenecaējēpa wajatsitanacuene-itajētsinexa, Espiritu Santo wajanacajamatabēcueneyawenonaponaexae.

4 ¹ Dioso baja cajena, patane-itaxutotsoniataexae, panetocopata patatsipaebinexa jiwijawabelia pexanaliwaisi Jesucristo peliwaisi. Bajaxuata, itsajawata panetsi-ayai tsabiabi-ata, itsiata apopajamatabēcopatsinē patatsipaebabiabijawa Jesucristo peliwaisi. Apopajamatabēcopatsinē, tsipaji baja Dioso panetocopata bajarapacuenia patato-exanawanapaenexa, patane-itaxutotsoniataexae. ² Nexata, muetsia apopa-exanaenē itsacuenejawa-ata, xua yabara pa-auranējitsia. Jiwi patayamaxē-itojorobinexa, itsacuenejawa-ata apopa-exanaenē. Apopatsipaebabiabinēnua saicayaliwaisi bepexaniajailiwaicsuenia Dioso pejumeliwaisiwecua. Biji rajane, jiwijawabelia epexaniajailiwaicsi patsipaebabiabājē, tsipaji payapētaniji Dioso patanenaitaxutuacaewetsijawa. Bajaxuata, apopaxainaenē itsaneconi Diosojawabelia, jiwijawabelia-ata. ³ Pamonae Diosowecua penaxuabiwinexa, Jesús peliwaisi patsipaebi-atanē, apopanejumeyapētaeyabiabi. Paxanē xania-waetsia patsipaebi-atanē peyapēxanepanaejumenēta, itsa apojumeyapētae

bajaraxua baja apopatajamatabëcuene. ⁴ Baitsi, Jesús peliwaishi pejume-aebixae, mapanacuapijiwiije pijadioso, Satanás, ajamatabëcuene-itaquiriayaxanatsi pejumexaniataeyaniwa bajarapapexanialiwaishi, Cristo peliwaishi. Bajarapaliwaishi nacayapëtaeya-exana Cristo yabara, ponë pinijicotiata jiwi jamatabëcuene-itayotsiana,^k itsa jumexaniataena bajarapaliwaishi. Nacayapëtaeya-exanaenanua pacuenia Cristo pejamatabëcuene-itajëtsinë jiwijawabelia, pacuenia Dioso jamatabëcuene-itsi. ⁵ Paxanë liwaishi itsa pacatsipaebabiabatsi, paxanë apopanaliiwaishipaebabiabinë pataneyaiyataenexamë. Biji rajane, wajatuxanenë Jesucristo peliwaishi pacatsipaebabiabatsi. Paxanë saya panataniji bepanijajiwinë, patacajamatabëcuene-yawenonabiabinexa, Jesús pata-asiwaxae. ⁶ Bajayatami, Dioso itoroba penaexanaenexa pitayotsicotia pitaquirijawata^l mapanacuataje. Maparucaataje, bajaraPonë paxanë panejamatabëcuene-itayota patajamatabëcuene-aitaquirijawami, Jesús peliwaishi patajumexaniataejawata. Bajarapacuenia patanejamatabëcuene-itayotsixae, payapëtaniji Jesucristo itsa itabaraniweniweni,^m jamatabëcuene-itajëta paxa Dioso bitso ayaijamatabëcuene pexinaejawa.

**Pablo itaxutuajamatejema tsaponaponae pewajënaeyabelia
Dioso pejamatabëcuene-yawenonabiabinexa, piyapëbejecuene
tocopiapatabiabi-atatsi, Dioso pijacuene petonacuenebijawata**

⁷ Pacujinae Dioso panetocopata patatsipaebawanapaenexa jiwijawabelia Jesús peliwaishi, pejamatabëcuene-itayotsiliwaishinexatsi, panetsijamatabëruta bitso penamatamotsiliwaishi, paxanë apopaxinae-atanë pijamatabësaëperabëto. Pacuenia jiwi itsa xaniawaetsipa bitso penamatamotsijawa atsawaxita, bajarapacuenia Dioso xaniawaeta penamatamotsiliwaishi apopijamatabësaëperabëtota. Bajarapacuenia Dioso itsiata pane-itoroba, patatsipaebabiabinexa bajarapanamatamotsiliwaishi, apopatajamatabëcuenesaëwi-ata, patayapëtaeya-exanaenexa jiwijawabelia pacuenia pajamatabëcuenesaënë tsawanapae ëDioso pesaëta. ⁸ Nexata, Dioso pesaëta pata-ajamatabëcuenesaëxae, nawitsia panetocopiapatabiabi-ata itsacuene, pataneto-ayapëbejecuenejawanë, itsiata apopajamatabëcuenefaefaenë, tsipaji Dioso paneyawenonabiaba patawecuapanepaenexa bajara-pacuene. Apopayapëtaeyabiabi-atanë pajamatabëcuene yabara panetocopiapata pataneto-ayapëbejecuene, itsiata apopanejamatabëcuene-amoneyabi, patanecopabia-exanaenexa Dioso pata-itaxutuajamatejemajawa.ⁿ ⁹ Itsamonae panebejiobia-exanabiabi-ata Jesús papijiwiixanë, itsiata Dioso apopane-copatsi pataja-epato. Itsamonae ayaicuenia panebeyabiabi-ata, itsiata pepacuene apopanebeyaxuababiabi, Dioso pataneyawenonabiabixae. ¹⁰ Itsabelia

k 4:4 *jamatabëcuene-itayotsiana*: Taema Jn 1:4, 9; 8:12; 12:35-36; 1Jn 1:5-10; 2:6-11; Apoc. 21:23. Baitsi, wajasiwanajamatabëcuene-copatsijawata Cristojawabelia, bajaraPonë jitsipa wajanacawecua-ajibia-exanaenexa daxita xua waja-ajamatabëcuene-itaquirijawa capitsapabiaba, pacuenia pecotia ajibia-exanabiaba pitaquirijawa. **l 4:6** *pitayotsicotia pitaquirijawata*: Taema Gén. 1:3-8. **m 4:6** *itabaraniweniweni*: Taema Mt 17:2. **n 4:8** *Dioso pata-itaxutuajamatejemajawa*: Itsamonae canaëjëta mapacuenia pejutsinexaje: «...itsiata apopanejamatabëcuene-amoneyabi, patanecopabia-exanaenexa Jesús peliwaishi patatsipaebabiabi-jawa», pejaicuenia pejutsijawa itsamonae.

paponajë, itsamonae jamatabëpanebejejababiaba Jesús papijajiwixanë, pacuenia Jesús pijawajabitsaë beyaxuabatsi. Itsiata, apopanebejejebicapane-pae, jiwi peyapëtaenexa Jesús piasaëtsaponaponaejawa pebeyaxuabicujinaetsi, pataneyawenonabiabijawata, patapanepaenexa patatëpaejawaminexawecua. ¹¹ Daxitamatacabi, patajinawanapaematacabianë, panetsi-ayai tsabiabi, itsamonae patanebejejebinexa Jesús papijajiwixanë. Bajarapacuenia panetocopiapatabiaba jiwi pataneyapëtaenexa Jesús pataneyajawaponaponaejawa pata-ajamatabëcuenesaënexa, pewerewerecaeperabëto payajawajinawanapae-atanë. ¹² Patacatsipaebabiabixae Jesús peliwaishi, paxanë pacopia-ewetawanapajë patatëpaejawa. Paxamë juya, panejume-xaniataexae patacatsipaebiliwaishi, Dioso pacarajuta pitawajamatabëcuene daxitamatacabijawabelianexa.

¹³ Paxanë pajamatabëcuenejëpajë ponë yaquina Dioso pejumeliwaishi-baxutota mapacueniaje: «Jumexaniataniji Dioso pejumaitsiijawa. Nexata, tsipaebajë jiwijawabelia bajarapaliwaishi», pejainë. Bajaraxuata, patajumexaniataexae Jesús peliwaishi, patsipaebaponajë jiwijawabelia bajarapaliwaishi.

¹⁴ Pajumexaniataniji wajatuxanenë Jesús petëpaecujinae, Dioso icatsia piasaëya-exanaejawatsi. Bajaraxuata, payapëtaniji baja pexaniajaicuene Dioso icatsia paxanë, paxamë-ata, wajanaca-asaëya-exanaejawanexa waja-tëpaecujinae, wajanacayajawaponaponaenexa pijanacuatatsia. ¹⁵ Daxita bajaraxuanë panetocopiapatapona paxanë, Jesús peliwaishi patatsipaebiabiwi, pexaniacuene papecatocopiapatsinexa paxamë. Bajarapacuenia patatsipaebaponaejawata, ayaibitsaëto baja tsaponae jumexaniataeponanua Dioso pitaxutotsoniataejawatsi Jesucristo pejamatabëcueneta. Nexata, bajarapamonae pexaniajamatabëcuene rajutapona Diosojawabelia, pewënëxaniatsinexa bajaraPonë, ayaijamatabëcuene pexainaejawa yabara.

¹⁶ Bajarapacuenia ayaibitsaëto pejumexaniataeponaexae, paxanë apopajamatabëcopatsinë jiwi patatsipaebabiabijawa pexaniajailiwaishi, itsamonae panebejiobia-exanabiabi-ata bajaraxua yabara. Xaniajai, pataperabëto asaëjibi tsaponae patanebejiobia-exanaponaexae. Itsiata, patawajënaeyabelia, caematacabi canacujitsia, Dioso panejamatabëcuene-asaëya-exanapona, pejitsipaecuenia patatonacuenebawanapaenexa. ¹⁷ Bajarapacuenia patawajënaeyabelia patonacuenebawanapajë Dioso, tsipaji payapëtaniji xua panetocopiapatabiaba patajinawanapae-epato mapanacuataje, itsamonae patanebejiobia-exanabiabijawa, saya cae-epatoyonexa, apobajayajebinexa. Payapëtanijinua patanetsiwajënaexaniawaetsijawa bitso pexaniacuenejawanë, patacabarëyanexa Dioso pijanacuatatsia, itsamonae patanebejiobia-exanaejamatabëcuene. ¹⁸ Bajaraxuata, apopansiwabëjanë bitso, papiaya-pëbejewanë panetocopiapatabiaba mapanacuataje, tsipaji bajaraxuanë bepijiayo ajibi tsane. Biji rajane, pajamatabënajinawanapajë patanetocopiapatsinexa, xuanë jiwi apocuenecaëjëpaetsi petaejawa, Dioso patanerajutsi-jawanënexa, tsipaji bajaraxuanë bitso tsitecaena daxitamatacabijawabelianexa. Baitsi, xua jiwi cuenecaëjëpatsi petaejawa, bajaraxua werewerecaena. Itsiata baitsi jane, xua jiwi apocuenecaëjëpaetsi petaejawa, daxitamatacabijawabelianexa apowerewerecae tsane.

5 ¹ Waxaitsi yapëtanetsi baja mapacuenije. Mapanacuata jiwi pexanaebobërëto bepijia ba-abeje, bajarapijinia itsi tsane

wajajawajinawanapaerabêto. Bepijia werewerecaena. Itsiata baitsi jane, wajatêpaecujinae, itsamatacabi Dioso athêbêtatsia nacarajutsiana apowerewerecaerabêtonexa. ² Bajaraxuata, itsa abaxê jinawanapatsi mapanacuataje, bitso picani jitsipabiabatsi wajaxainaenexa athêbêpijiperabêto, apowerewerecaerabêtonexa. ³ Nexata, mapanacuapijiperabêto werewerecae-ata tsane, aperabêjibia apojinawanapaetsi tsane Dioso pijanacuatsia. Biji rajane, pejanaperabêto yajawajinawanapaenatsi. ⁴ Itsa abaxê yajawajinawanapatsi mapanacuapijiperabêto, bêjia yajinawanapatsi, tsipaji yapêtanetsi wajatêpaejawanexa. Bajaraxuata, bitso picani jitsipabiabatsi, wajanacaperabê-ithothianaenexa. Apojitsipaetsi picani wajatêpaejawa. Bajaraxuata, jitsipatsi pejanaperabêto,^o apowerewerecaerabêto, wajanacarutsinexa jane baja. Nexata, wajajawajinawanapaerabêtomî daxita wajanacabêjaiya-exanaejawanêmi, ajibi baja tsane. ⁵ Bajarapacuenia Dioso pijacuajaya nacajamatabêcuenewereta, wajanacaperabê-ithothianaejawanexa. Nexata, wajanacayapêtaeya-exanaenexa pexaniajaijawa bajarapacuenia wjabacato-exanaenexa, Espiritu Santonaca tsijamatabê-ecaeya-exana.

⁶ Bajaraxuata, wajawajênaeyabelia copia-ewetawanapatsi itaxutuajamatejemaya, Dioso najumecapanepaeya pejumaitsicuenia wajanacarajutsinexa pejanaperabêto, tsipaji yapêtanetsi, itsa abaxê mapanacuapijiperabêto yajawajinawanapatsi, wajatuxanenê tajê wecuajinawanapatsi. ⁷ Bajarapapejanaperabêto apoxainae-atatsi abaxê, apojume-aebitsi wajanacarajutsijawanexa, tsipaji taenejewatsi itaxutuajamatejemaya jinawanapatsi Dioso. ⁸ Bajarapacuenia waja-itaxutuajamatejemaxae, bitso jitsipatsi wajanacawecua-ajibia-exanaejawa wajajawajinawanapaerabêto, juya wajatuxanenê pijanacuatsia wajajawajinawanapaenexa. ⁹ Bajaraxuata, mapanacuataje wajanawanapae-epato, itsa jume, pijanacuatsia wajajinawanapaecujinae, bitso bejitsipawanapatsi waja-exanawanapaenexa daxita xua wajatuxanenê nacasiwajamatabêcuenebarêyajijsia. ¹⁰ Wajatuxanenê pejitsipaecuenia bejinawanapatsi mapanacuataje wajanawanapae-epatoje, tsipaji yapêtanetsi pacuenia caejiwitsi canacujitsia Cristo pitabarata wajanaitajêtaponaenexa. Nexata, bajarapamatacabi caejiwitsi canacujitsia nacarajutaponaena, xua nacatoxaina wajanacarajutsinexa, daxita pijajiwiitsi wajatonacuenebijawa yabara. Pamona xaniawaetsia wajatuxanenê tonacuenebawanapa, rajutsianatsi^p xua toxaina perajutsinexatsi. Pamona pijinia xaniawaetsia apotona-cuenebawanapae, naceratsiana.

**Dioso siwajamatabêcuenecaewa jiwi pijaneconimi
Cristo pesiwatêpaejawata**

¹¹ Patayapêtaexae itsamatacabi cunawia yapatnubenaejawanexa, wajatuxanenê Jesucristo pitabarata, itsajamatabêcuenê paxainaenejewanê,

o 5:4 wajanacarutsinexa pejanaperabêto: Espiritu Santo peyapêtaeya-exanaexaetsi, Pablo yapê-tane mapaliwaisije: Pamona, Jesús pijajiwi, abaxê asaê tsawanapae, Jesús pepatsimatacabit, bajarapamona perabê-ithothianaenatsi têpaenejewa. Baitsi, mapanacuapijiperabêto wecuat-satsianatsi, pejanaperabêto penajamatabêcuenexatatsinexa bepejananaxatatsijawa. (1Tes. 4:17.) Bajaraxuata, Pablo bitso jitsipa têpaenejewa bajarapapejanaperabêto penajamatabêcuenexatatsinexa, tsipaji bajarapapejanaperabêto apo-awitane tsane, apowerewerecae tsane-ata. 1Co 15:51-52. **p 5:10 rajutsianatsi:** Taema 1Co 3:11-15.

asaëyata patsipaebabiabajë Jesucristo jiwi pesiwatëpaejawa yabara, bajarapamonae-ata pesiwanajamatabëcuenecopabinexa bajaraponëjawabelia, bajarapaliwaisi pejumexaniataejawata. Dioso baja cajena, panejamatabëcueneyapëtane, pacuenia pajamatabëcuene-itsinë. Pajitsipajë paxamë-ata patanejamatabëcueneyapëtaenexamë. ¹² Bajarapacuenia paxanë apocanawajunupaebitsi saya pataneyaiyataenexamë. Pacanawajunupaebatsi rajane, patanesiwajamatabëcuenebarëyanexamë wajatuxanenë papijajiwinëcuene. Nexata, pacujinae itsamonae pibisiacuenia panebaracuaucaijai, liwaisi panetsi-exanabiabanua, paxamë-ata papecajamatabëcuenecaëjëpae-nexa panejumecanawiatijawa bajarapamonaejawabelia. Bajarapamonae be-ayaijamatabëcuenewi nataeyabiabi-ata, itsiata baitsi jane, apoxaniajai tsabiabi. Saya jitsipa jiwi peyaiyataenexatsi, beDioso pitorobiwiitsicuenia. ¹³ Bajarapacuenia asaëyata patatsipaebabiabixae Jesús peliwaissi, belia itsamonae paxanë yabara jumaitsi tsipae: «Pematajemabiwitsi raja saya», jai tsipae.^q Itsiata, bajarapaliwaisi itsa pacatsipaebabiabatsi, bajarapacuenia pacato-exanatsi, paxamë-ata Dioso papecacapanepaenexa. Nexata, paxamë apopanetaemë bepatanematajemabiwi. ¹⁴ Jesús piasiwajamatabëcuene mapanacuapijiwije, nacaeweta pebeyaxuabinexatsi jiwi peneconimatamot-sinexa, bajarapa-asiwajamatabëcuene panejamatabëcuene namatacaitorobapona, patatsipaebinxaxa Jesús peliwaissi daxitanacuanëpijiwijawa. Patsipae-baponajë bajarapaliwaisi, tsipaji payapëtaniji pexaniajaicuene caenë, Cristo, pesiwatëpaejawa daxitanacuanëpijiwi. Pajumexanitanijinua, daxitatsi wajasiiwanajamatabëcuenecopabiwi Cristojawabelia, bewajawecuatëpaewi wajaperujumatabëcuene. ¹⁵ Nexata, wajajumexaniataexae Cristo wajanacasiwatëpaejawa, apobejinawanapaetsi wajacuata wajanatojitsipaecuenia. Bijai rajane, bejinawanapatsi wajanacatojitsipaecuenia Cristo, Ponë petëpaejawawecua, namatacota, wajanacarajutsinexa pitawajamatabëcuene.

¹⁶ Bajaraxuata, ajena mapamatacabitaje, wajawajënaeyabelia apobenajamatabëxainaetsi' itsamonae yabara, pacuenia mapanacuapijiwije banajamatabëxaina, peyaiyataenexa, itsa jume, apopeyaiyataejawanexa. Xanë-ata rabaja picani, Jesucristojawabelia tasiwanajamatabëcuenecopatsi wajënaeya, bijiaya Jesucristo yabara najamatabëxainajë, mapanacuapijiwi penajamatabëxainaecuenia. Itsiata baitsi jane, aeconoxae baja bajarapacuenia aponajamatabëxainaenë Cristo yabara, tsipaji baja yapëtaniji Cristo pexaniajainëcuene. ¹⁷ Pajiwi siwanajamatabëcuenecopata Jesucristojawabelia, jamatabëcuene-itothianatsi. Nexata, pejanajamatabëcuene xaina. Pijaperujumatabëcuenemi baja wecua-ajibia-exanatsi. Nexata, bajarapajiwi pejanacuenia siwanajamatabëxainabiaba pejanacuenejawanë dexitacuene yabara.

¹⁸ Bajarapacuenia daxita Dioso nacato-exana, wajanacabarajamatabëcuenexanepanaenexa Cristo pejamatabëcueneta. BajaraPonë juya, panetocopata patatsipaebanajetarubenaenexa daxitajiwiwaja, pacuenia Dioso

q 5:13 Taema Hch. 26:16-24. r 5:16 *apobenajamatabëxainaetsi*: Bijiaya apobetaetsi itsajiwi-ata itsacuenejawa yabara, pacuenia pijawiriacuene, pecuaucauijaicuene, penacujarubicuene, penacuenebicuene-ata yabara. Bajarapacuenia apobecanaëjëtisnuu waja-asiwanexa, tsipaji wajasiiwanajamatabëcuenecopabijawata Jesucristojawabelia, Dioso nacajamatabëcuene-itothiana, pejanajamatabëcuene wajaxainaenexa. Taema 2Co 5:17.

barajamatabëcuenexanepanaejitsia^s Cristo pejamatabëcueneta. ¹⁹ Xanë xua jitsipajë patacajumaitisijawa, Cristo pejamatabëcueneta Dioso baja cajena, jitsipa mapanacuapijiwije pebarajamatabëcuenexanepanaponaejawa, najamatabënapiatsinejewa bajarapamonae pijaneconi itsa jumexaniatane Cristo pesiwatëpaejawatsi. Bajarapaliwaisi panetocopata patatsipaebaponaenexa daxitajiwijawabelia. ²⁰ Nexata, bajarapacuenia Dioso patane-itorobixae, pawajunupaebanajetarubenajë Cristo pejamatabëcueneta Dioso pebarajamatabëcuenexanepanaejawanexa mapanacuapijiwi. Pacuenia Dioso pijacujaya pacatsipaebijitsipa, bajarapacuenia paxanë pa-itsinë. ²¹ Cristo pibisiacuene apo-exanae,^t tsiquirijawayo-ata. Itsiata baitsi jane, Dioso tsijumaxuaba Cristo daxitatsi pibisiacuene waja-exanaeeneconimi. Nexata, bepibisiacuene pexanaenëcuenia,^u cruzata beyaxuabatsi. Bajarapacuenia Cristo cruzata wajanacasiwatëpaexae, Dioso juya, aneconijibia^v nacatane, wajasiwanajamatabëcuenecopatsijawata Cristojawabelia.

6 ¹ Bajarapacuenia Dioso pebarajamatabëcuenexanepanaexae mapanacuapijiwije, paxanë yawenonaeya Dioso patatonacuenebaponaewi, asaëyata pacamuxujiobaponatsi, beweliacuenia panetaeyaniwa Dioso pini-jicuenia papeca-itaxutotsoniatæjawa. ² Bajaraxua yabara tajëwelia Dioso pejumeliwaisibaxutota jumaitsi mapacueniaje:

«Paepatota panamatawenoname, pacajume-itaxutotsoniatanetsi patanewajëcaejawatamë. Paepatota pijinia panamatawenoname patacapanepaejawa, pacayawenonatsi,^w jai Dioso pejumeliwaisibaxutota.

jPanejumetaema! Copiapata rajane baja aeconoxae Dioso wajanacaitaxutotsoniatæmatatcabi, wajanacacapanepaenexa.

**Pacuenia Pablobana tsiteca tsipaebapona Jesús peliwaishi
itsamonae bejiobia-exanae-atatsi, yabara peliwaishi**

³ Patatonacuenebijawata Dioso, paxanë apopacatsita-exanaetsi itsacuenejawa, xua yabara jiwi beweliacuenia tæjitsipa Dioso pitaxutotsoniatæjawatsi. ⁴ Biji rajane, daxita xua pa-exanawanapajë, xaniawaetsia jiwi patsita-exanawanapajë, pataneyapëtaenexa Dioso papijajiwinëcuene. Nexata, Dioso papijajiwiixanë, pajamatabëcuenesaenë tsawanapae Dioso pejumeliwaisi jiwi patatsipaebawanapaejawa, itsamonae panebejiobia-exanabiabi-ata, itsajawata itsacuenejawaxi bitso panamatawenonabiabi-atanë, itsajawata bitso panetsi-ayai tsabiabi-ata itsamonae patanebeyejebinxæ. ⁵ Bajarapacuenianua panejumatitibabeyabiabi-ata. Itsajawata, penaconitsiwi pejebabiabibota panejebabiabi-ata. Itsamonae anaeya panebarajinabiabi-ata, patanebeyejebinxæ picani Cristo peliwaishi patatsipaebijawata. Bitso panacuenebabiabi-atanë patacueranaejawabelia, apopamajitabiabi-atanë merawi, Dioso pejitsipaecuenia pata-exanaenexa. Itsajawatanua, bitso patajani tsabiabi-ata, itsiata bajayajebi pajamatabëcuenesaenë tsawanapae

s 5:18 barajamatabëcuenexanepanaejitsia: Pajiwi siwanajamatabëcuenecopata Cristojawabelia peneconimatotsinëcueniatsi, Dioso juya, siwanajamatabëcuenecaewianatsi pijaneconimi, asiwaya petanexatsi pexijiwicuenia. **t 5:21** pibisiacuene apo-exanae: Taema Heb. 4:15; 1Pd 2:22; 1Jn 3:5. **u 5:21** bepibisiacuene pexanaenëcuenia: Taema Isa. 53:6,9; Rom. 8:3; Gál. 3:13.

v 5:21 aneconijibia: Taema Rom. 1:17; 3:2; 5:15-21; Flp. 3:9. **w 6:2** Taema Isa. 49:8.

Dioso pejumeliwaisi jiwi patatsipaebawanapaejawa. Daxita bajaraxuanë panetocopiapataponae-ata, xaniwaetsia jiwi patsitajinawanapajë, peya-pëtaenexa Dioso papijajiwinëcuene. ⁶ Orijibia, jiwi yapëtane Dioso papijajiwinëcuene, tsipaji apopanamatabëcuenebijianaenë patajinawana-paejawata, pexaniali waisi patayapëtaewi. Apopacuenecanawiatabiabinë, bajayajebi itsamonae pibisiacuene pane-exanabiabi-ata. Pexaniacuene pato-exanabiabajë itsamonaejawabelia. Espiritu Santo panejamatabë-cuenematacaponabiaba daxita pata-exanaecuenejawanë. Itsamonae-ata pa-asiwanë tsawanapae patajamatabë-ëthëtojawawetsina. ⁷ Orijibia, jiwi pexaniajaili waisi patsipaebabiabajë. Patsitanacuene-itajëtawanapajë, Dioso pesaëta pataneyawenonabiabijawa, daxita xua pa-exanawanapajë. Bajarapa-pexaniajaili waisi patacu jarubonaejawata Dioso pejitsipaecuenia, pacana-wajabitsaëtabiabajë, patanayajiwicaranatsinexa* dowathi pijacuenejawalia. Bajarapacuenia patatsitajinawanapaexae, jiwi paneyapëthane Dioso papijajiwinëcuene. ⁸ Bajarapacuenia patsitajinawanapae-atanë, jiwi najëpaeya apopanetaeyabiabi. Itsamonae paneyaiyataeyabiaba. Itsamonae pijinia apopaneyaiyataeyabiabi. Itsamonae pexaniacuena panebaracuaicuajai tsabiabi. Itsamonae pijinia pibisiacuena panebaracuaicuajai tsabiabi. Itsamonae panetaeyabiaba pexaniajaili waisi patatsipaebi wicuene. Itsamonae pijinia panetaeyabiaba bepatanajumetsënëtsiwi. ⁹ Itsamonae pataneyapëtaewi-ata, itsiata apobepataneyapëtaewi panetaeyabiaba. Itsamonae itsajawata, jamatabëpanebeyejabiaba picani. Itsiata, tsiteca pa-asaënë tsawanapae. Itsamonae ayaicuenia panebejobia-exanabiabi-ata, itsiata apopanebeyejebi. ¹⁰ Panajamatabëxainabiabi-atanë itsamonae pejume-aebixae patatsipaebi-li waisi, itsiata bëpënëa pepacuene pajamatabëcuenebarëyanë tsawanapae, daxitamatabacijawabelianexa Dioso pataneyawenonabiabixae. Itsamonae panetae-ata patabejobiwi, itsiata, jiwi, ayaibitsaëtoxonetonë, bitso pexainaewi pa-exanaponajë Dioso pejumeli waisita, patatsipaebijamatabëcueneta. Apopaxainaenë picani ayaijawa mapanacuapijicuene. Itsiata baitsi jane, Dioso jawabelia daxitacuene paxainajë, apowerewerecaejawanënexa jane baja.

¹¹ Tajamonae, Corinto tomarata panejinawanapaewi paxamë xaniajaiyi baja cajena pacatsipaebabiabatsi, itsali waisi pacawecua matayatsinejewatsi.

¹² Asiwaya pacatae-atatsi, paxamë itsiata bajarapacuenia asiwaya apopane-taemë. ¹³ Pacuenia xanë paca-asiwatsi, bajarapijinia pacuenia, paxamë-ata pane-asiwamëre, bepataximëcuenia patacataewi!

Pacuenia Dioso nacatane bepijatemplobotsi, yabara peli waisi

¹⁴ Dioso papijaji wixamë, apopacatoji tsipaetsi paneyajawajinawanapae-jawa bajayajebi Jesús peli waisi pejume-aebiwi, bajarapamonae xua exanawanapa* panejamatabëcuenejëpaeyaniwa. Bajaraxuata, apopacatoji tsipaetsi panenacoji bi jawa Jesús peli waisi apo pejumexaniataewijawabelia, tsipaji

x 6:7 *pacanawajabitsaëtabiabajë, patanayajiwicaranatsinexa*: Taema Efe. 6:16-17. y 6:14 *xua exanawanapa*: Bajarapajumebejajawabelia nacajunua ayaili waisi. Dioso itaweta pexi penacajoneyaniwa Jesús peli waisi pejume-aebi wijawabelia, pebarënacuenebicuene, penawijatsicuene, poltícocuene, penacoji bicuene, baitsi daxita pacuenejawanë, xua yabara Jesús pijajiwi caejamatabëcuene apobexainae mapanacuapiji wawabelia.

aponajamatabëcuenejêpaebeje pexaniacuene pexanawanapaewi, pibisiacuene pexanawanapaewibeje. Bajarapacuenia-ata, Dioso pejamatabëcuene-itayotsiwitsi, mapanacuata pitaquirijamatabëcuene pexainaewibeje, aponajamatabëcuenejêpaebeje. ¹⁵ Cristo, dowathibeje,^z aponajamatabëcuenejêpaebeje. Bajarapijinia pacuenia, Jesús peliwaisi pejumexaniataeiwi, pejume-aebijiwiibeje, aponajamatabëcuenejêpaebeje. Nexata, acuenebi bajayajebi penajuanacuenebaponaponaenexabeje. ¹⁶ Bajarapijinia pacuenia, pamona peponaewi Dioso pijatemplobojawabelia, caejamatabëcueneliwaisi apoxinae pamona pona jumapecataeya pexanaenëanë pijatemplobojawabelia. Bajarapabitsaëtobeje saicaya nawecua-itothia ponëjawabelia siwanajamatabëcuene copaba. Waxaitsi baja cajena, Espiritu Santo pejamatabëcuene, Dioso, piasaëtsaponaponaenë, pijatemplobotsi tsawanapae, tsipaji bajara Ponë nacatsijamatabë-eca. Nexata, ëbajara Ponë jawabelia^a siwanajamatabëcuene copabatsi daxitacuene yabara. Bajarapajamatabëcuene yabara, bajayata Dioso pejumeliwaisibaxutota tajëwelia jumaitsi mapacueniaje:

«Tsijamatabë-ecaenajë bajarapamona, tayajawaponaponaenexa.

Bajarapamona pija Diosonë tsane. Bajarapijinia pamona tajajiwi tsane»,^b jai Dioso bajayata tajëwelia waxaitsi yabara.

¹⁷ Dioso wajanacayajawaponaponaexae, naca-itoroba wajapitsapaejawanexa, Jesús peliwaisi pejume-aebiwiwecua. Bajaraxua yabara wajatuxanenë Dioso tajëwelia jumaitsi pejumeliwaisibaxutota mapacueniaje:

«Pamonaetuatuajëta pajinawanapame, pawecuapitsapaename, saicayacuena panejinawanapaenexa. ¡Paxamë pëtsa pibisiacuene pa-exaname bajarapamona xua exanawanapa, papecajamatabëcuene ebijianaeyaniwa! Nexata, xanë pacataenatsi patajajiwimëcuena.

¹⁸ Xanë, pane-axanë tsane. Paxamë pijinia pataximë tsane»,^c jai bajayata wajatuxanenë Dioso tajëwelia waxaitsi yabara, Ponë ayajamatabëcuenenë daxitawecua.

7 ¹ Tajamona, bitso pataca-asiwawi, Dioso najumecapanepaeya pejumaitsixae pexicueniatsi wajanacataenexa, nexata na-ewetsia bejinawanapatsi pibisiacuene exanaenejewatsi wajaperabëtota, wajanajamatabëxainaejawatanua. Jinawanapaenatsi aneconijibia, bajara Ponë wajanacatojitsipaecuena, Dioso wajajaiyataexae.

z 6:15 *dowathibeje*: Wowaijumeta canacueneba Belial-wënë. Hebreojumeta Belial-wënë xaina mapajamatabëcueneliwaisije: «Pejamatabëcuenebijiianaenë, itsa jume, itsacuenejawanexa apopejamatabëcueneyawenonaenë», pejaiwënë. Dowathi yabara nawitsiacuena wënërubatsi: Satanás («peyamaxë-itojorobinë», pejaiwënë), Belial («pejamatabëcuenebijiianaenë», pejaiwënë), diablo/dowathi («pibisiacuena pebaracuaicuajainë», pejaiwënë), tentador («pejitsipaeya-exanaenë pibisiacuene pexanaenexa», pejaiwënë), Lucifer/Lucero («bajayacunuapijituluputo», pejaiwënë). Abadón/Apolión («pewerebiabi-àngelnë», pejaiwënë), Beelzebú («petasi pewetsinë», itsa jume, «dainamona pewetsinë», itsa jume, «dowathimona pewetsinë», pejaiwënë), Dragón Pinijitsawaliwalinë-ata. Orijibia, nawitsiacuena xaina itsawënëanë pecuene yabara. **a 6:16** *ëbajara Ponë jawabelia*: Itsamona Jesús pijajiwi, Corinto tomarata pejinawanapaewi, caejamatabëcuene apoxinae pitaxutuajamatejemanexa ëDiosojawabelia daxitacuene yabara. Nexata, penamatawenonaewata, wajëcabiaba Diosojawabelia, jumapecataeya pexanaenëanëjawabelia-ata yajawa. Itaxutuajamatejema Dioso pewetsinexatsi, itsiata pijasalinaiwi pena-ewetsicuena yajawa-exanabiabanua. Bajaraxuata, Pablo yapëtaeya-exana pacuenia to-acuenebitsi Jesús pijajiwi anijacuenebeje peyajawa-exanaejawa, tsipaji Dioso, dowathibeje, aponajamatabëcuenejêpaebeje. **b 6:16** Taema Lev. 26:12; Jer. 32:38; Eze. 37:27. **c 6:18** Taema Isa. 52:11.

Pablo siwajamatabëcuenebarëya Jesús pijajiwi, Corinto tomarapijiwi, penajamatabëcuenepeñëyorotsixae pibisiacuene pexanaejawawecua

² ¡Bepataximëcuenia patacataexae, nexata paxamë juya panaja-matabëcueneacaware, patane-asiwanexamë pacuenia paca-asiwatsi! Caejiwi-ata, paxamëyajuwënëjiwi, apopacayajuwënë-itsacueniabitsi. Apopacajamatabëcuenebijianaetsi. Apopacayamaxë-itojorobitsinua, pani-japalata patacawecuapitsinexa. ³ Bajarapacuenia apopacajumaitsitsi, tali-waisita panena-urabinexa panijacuata. ¡Jume baja cajena! Biji rajane, pacanajamatabënapitsia-exanatsi pacuenia copiaya pacajumaitsitsi, patacajamatabënaponaponaejawata pataca-asiwaxae, wajanajua-asaë tsawana-paenexa, itsa jume, wajanajuatëpaenexa. ⁴ Paxamë patane-itajuanixaemë, pexaniajaicuenia pacatsitanacuene-itajëtatsi, itsaliwaisi pacawecumatayatsinejewatsi. Bajarapijinia pacuenia, yapëtaniji patanejumecowënëtsinexamë pacuenia pacamuxujobatsi. Bajaraxuata, bitso pacasiwajamatabëcuenebarëyatsi, itsa pacawënëliwaisitanetsi xaniawaetsia panenatocopiapitsijawa patacamuxujobiliwaisi. Jamatabëcueneacawajënu ayaicuenia patacasiwabëjaijawami. Nexata, nabejibitsiaponaponae-atanë, jamatabëcuenebarëyanë tsaponaponae paxamë yabara.

⁵ Paxanë patapatsicujinae Macedonia nacuata, caeto-ata cajena xania-waetsia apopanacuera-ewetsinë, tsipaji daxitajawa, itsaxuayo panajetarubenajë, liwaisi panetsi-exanabiaba. Nexata, patanetsi-ayaijawata, bëpënëa payajunawiajinawanapabiabajë. ⁶ Bajarapacuenia patajinawanapaejawata, Dioso jiwi pejamatabëcuene-asaëya-exanaenëxae, Tito itsa patajopa paxanë-jawata, panejamatabëcuene-asaëya-exana, paxamëjawawerena peponaenë. ⁷ Apopanejamatabëcuene-asaëya-exanae ëpepatsijawa yabara. Biji rajane, panejamatabëcuene-asaëya-exana, Tito itsa pacawajunupaeba paxanëjawaberena pacuenia paxamë pajamatabëcuene-asaëya-exaname, papecasiwaxainaejawata pane-ajamatabëcuenesaëya-exana. Bajarapaliwaisi pamuxunanajamatabëcuenesaëtajë. Orijibia, pacawajunupaeba pacuenia bitso picani jamatabëpanetaneme, pacuenianua bitso payanajamatabëxainame pibisiacuene pane-exanaeneconi. Panetsipaebanua bitso patanesiwanajamatabëxainaejawamë xanë, itsa panewënëliwaisitaneme bitso patacasiwanajamatabëxainaejawata. Bajarapacuenia Tito itsa pacawajunupaeba paxanëjawaberena, bitso pamuxunajamatabëcuenebarëyanë.

⁸ Pabaxutomi copiaya pacatoyaquinatsi, itsa palebame, bitso pacanajamatabëxainaeya-exanae-ata picani, papecatsi-atanexae patacamuxujobiliwaisi, itsiata maparucaeje aponajumecowënjamaenë, tsipaji saya cae-epatoyonexa. Bajarapabaxutomi patacato-itorobicujinae bitso najamatabëxainaeya ponaponajë, tayapëtaexae papecanajamatabëxainaeya-exanaejawa. Patacasiwabëjaijawata jamatabëjumaitsinë: «Apobetoyaquinaenë picani bajarapacuenia», jamatabëjanë. ⁹ Itsiata baitsi jane, aecnoxae baja siwabarëyanë patacato-itorobixae bajarapabaxutomi. Itsiata, aposiwabarëyanë xua pacanajamatabëxainaeya-exanatsi panijaneconi yabara. Biji rajane, siwabarëyanë, tsipaji patacanajamatabëxainaeya-exanaejawata bajarapabaxutomita, pacopabame baja pibisiacuene pane-exanabiabijawa, panenajamatabëcuenepeñëyorotsinexa Diosojawabelia.

Dioso pejitsipaecuenia pacanajamatabëxainaeya-exanae-atatsi, apopaca-itsacuenibitsi patacatoyaquinaeliwaisita. Biji rajane, bajarapabaxutomi pejamatabëcueneta, pacajamatabëcueneyawenonatsi. ¹⁰Yapëtanetsi pacuenia Dioso itsa nacanajamatabëxainaeya-exana wajaneconi yabara, nacajamatabëcuene-itoroba wajanajamatabëcuenepënyorotsinexa pibisiacuenewa-exanaejawamiwecua, bajaraPonë wajanacacapanepaenexa. Bajarapacuenia Dioso wajanacato-exanaejawa yabara, caejiiwyotsi-ata aponacatsita-abeje. Itsiata baitsi jane, pamona, pibisiacuenewa-pexanaeconi ya-aura-ata, mapanacuapijiwi pexanaecuenia, bajarapa-auracuenewa-itsiata aponajamatabëcuenepënyorotsia-exanaetsi Diosojawabelia, pibisiacuenewa-pexanaejawawecua. Nexata, bajarapamona Diosowecua naxuabiana daxitamatacabijawabelianexa. ¹¹Paxamë panenatolebijawata patacatoyaquinaeliwaismi, Dioso pacanajamatabëxainaeya-exana panijaneconi yabara. Bajarapacuenia Dioso papecanajamatabëxainaeya-exanaexae, pacajamatabëcuene-itoroba panecopabinexa panenajamatabëcuenepënyorotsinexa pibisiacuenewa-pane-exanaejawamiwecua. Bajarapajamatabëcuene pacajamatabëcuene-itorobanua panenawecua-itoyanexa pane-exanaecuenemi. Pacacujunawia-exana, Dioso paneyaiyataexae. Orijibia bajarapajamatabëcuene yabara, patsitanajamatabëcuene-itajëtamecaejamatabëcuene panexainaejawa xanëjawaberena, Diosojawabelia-ata, panenaneconitsia-exanaejawata pibisiacuenewa-pexanaponaponaenë^d paxamëtuatuajëta. Patsitanajamatabëcuene-itajëtamenua xanëjawaberena pijinia ayaicuenia patane-asiwajawamë panija-apóstol-nëxaenë. ¹²Bajaraxua yabara pacatoyaquinatsi copiaya pabaxutomi, tsipaji jitsipajë panijacuata panenajamatabëcueneyapëtaenexa juya patane-asiwajawamë. Baitsi, Dioso panetsitajamatabëcuene-itajëtsinexa patane-asiwajawamë, panejumecowënëtsijawata patacamuxujobicuenia. Apopacatoyaquinaetsi padaxitamë patacamuxujobinexa, itsa jume, tamuxujobinexa ponë pibisiacuenewa-exanaponapona, itsa jume, pajiwiwajabelia tsi-atanetsi bajaraponë pijaneconi yabara. Biji rajane, pacatoyaquinatsi patanetsitanajamatabëcuene-itajëtsinexamë asiwaya patanetaejawamë panija-apóstol-nëxaenë. ¹³Nexata, bajarapacuenia pane-exanaexae, bitso pacasiwajamatabëcuenebarëyatsi. Panejamatabëcaewia-exanamenua patacasiwabëjaicuenemi.

Patajamatabëcuenecaewijawawecua patacasiwabëjaicuenemi, matatoxenetsia pacasiwajamatabëcuenebarëyatsi ayaicuenia pane-ajamatabëcuenesaëya-exanaexae Tito. Bajaraponë bitso pacasiwanajamatabëxaina picani panejinawanapaecuenewa yabara. Itsiata baja, paxamë pexaniacuenia pacopiapitame bajaraponë. Pajamatabëcuenecaewia-exanamenua papecasiwabëjaijawami, tsipaji aeconoxae daxita paxamë Dioso pitabarata xaniawaetsia pajinawanapame. Bajarapacuenia pane-ajamatabëcuenesaëya-exanaexae Tito, paxanë-ata bitso pacasiwajamatabëcuenebarëyatsi.

¹⁴Xanë yapëtaniji bajarapacuenia pane-exanaejawanexa. Bajaraxuata, Tito

d 7:11 *pibisiacuenewa-pexanaponaponaenë*: Taema 1Co 5:1-5. Pepacujiru 2Co 7:11-jawata Pablo apowënërubi bajaraponë pijaneconi. Saya jumaitsi: «*ponë pibisiacuenewa-exanaponapona paxamëtuatuajëta*», jai. Bajarapacuenia jumaitsi asiwaya petaeaxae, pecopatsijamatabëcuene bajarapapibisiacuenewa, penajamatabëcuenepënyorotsixaenua Diosojawabelia, Dioso pejitsipaecuenia icatsia peponaponaenexa.

peponawajënaeya paxamëjawabelia, jumaitsinë bajaraponëjawabelia: «Jesús pijajiwi Corinto tomarajawata, xaniawaetsia copiapitsiana pamuxujiobiliwaissi toyaquinajë mapabaxutotaje», janë paxamë yabara Titojawa-belia. Bajarapacuenia jane baja, pa-exaname. Daxita pacuenia jumaitsinë bajaraponëjawabelia paxamë yabara, xaniajanë baja. Bajaraxuata, paxanë bitso pacasiwajamatabëcuenebarëyatsi. ¹⁵Tito bitso paca-itaxanapona pewajënaeyabelia, penajamatabënapitsijawata pacuenia paxamë bitso yayiyataeya pacopiapitame, pajumecowënëtabiabianamenua pacuenia paca-itoroba. ¹⁶Pacasiwajamatabëcuenebarëyatsi, tsipaji xaniawaetsia yapëtaniji pane-exanawanapajewa pacuenia Dioso pacatojitsipa.

**Pacuenia Jesús pijajiwi ofrenda rajutabiaba, peyawenonaenexa
itsamonaejawabelia, yabara peliwaissi**

8 ¹Tajamona, aeconoxae jitsipajë patacayapëtaeya-exanaejawa pacuenia Dioso jamatabëcueneyawenona Jesús pijajiwi, Macedonia nacuata pejinawanapaewi. ²Bajarapamona peto-ayapëbejecuenetsi tocopiapatapona-atatsi, ayaicuenia pejamatabëcuene-ëjëtsinexatsi, bitso bepejiobiwi-ata, itsiata jamatabëcuenewënëca peyawenonaenexa itsamona penamatawenonaewi. Nexata, ofrenda itsa exana peto-itorobinexa bepejiobiwi, Jerusalén tomarapijiwijawabelia, ayaijawa jebabiaba. ³Xaniajanë pacuene xanë pacyapëtaeya-exanatsi. Bajarapamona bepejiobiwi-ata, pijacuata, itsajiwi-ata itorobinejwatsi, pecuenecaëjëpaecueniatsi ayaijawa jebabiaba ofrenda itsa exanabiaba. Itsamona pijinia pejitsipaexae, jebabiaba pematatsënëca pecuenecaëjëpaejwatsiwecua. ⁴Macedonia nacupijiwi pewënëliwaissitaexae pacuenia itsanacuanëpijiwi ofrenda jebapona, peyawenonaenexa Jesús pijajiwi, Jerusalén tomarata pejinawanapaewi, bajarapamona-ata bitso jitsipa peyawenonaenexa. Nexata, ayaicuenia panewajëca peyawenonaenexa ofrenda Jerusalén tomarapijiwijawabelia, bajarapa-ofrenda paxanë juya patatocaponaenexa. ⁵Bajarapamona, bepejiobiwi-ata, ayaijawa jeba ofrenda, patacanaëjëtsijawawecua pejebijawanexa. Bajarapa-ofrenda pejebiwajënaeya, copiaya najamatabëcuenerajuta Diosojawabelia, pitorobicueniatsi pexanawanapaenexa. Bajaraxuacujinae, panejamatabëcuene-eweta, patayapëtaeya-exanaenexa pacuenia exanaejitsia bajarapa-ofrenda. Bajarapacuenia exana Dioso petojitsipaecueniatsi. ⁶Patayapëtaexae panejitsipaejawanua paneyawenonaenexa Jesús pijajiwi Jerusalén tomarapijiwijawabelia, xua Tito, pacabarëtaxuxuaba panecaetuatsijawa, bajaraponë icatsia pa-itorobajë panecaetuatsijawanë papecabarëweretsinexa. Payapëtaniji paxamë bitso pexania-ofrenda panenacaetuatsijawanexa, Dioso pane-asiwaxae. ⁷Bajarapacuenia pa-exaname, tsipaji itsamonaewecua, xaniawaetsia Dioso patojinawanapame. Xaniawaetsia pa-itaxutuajamatejemamë Dioso. Pemuxujitsipaejumenëta, pacujarubababame Dioso pejumeliwaissi. Paxamë bitso paneyapëtaewi. Bitso panecuenejitsipaewi paneyawenonaejawa itsamona. Namata-enetsia pana-asiwamënuu, xua panacuenecujarubame paxanëjawata. Daxita bajarapacuenia matatoxennetsia itsamonaewecua pexaniacuenia pane-exanabiabixae, pacatojitsipatsi ayaijawa ofrenda panejebinexa itsamonaewecua.

⁸Bajarapacuenia patacajumaitsixae, apopaca-itorobitsi ayaijawa panejebinexa. Biji rajane, saya pacatsipaebatsi paneyapëtaenexa pacuenia

Macedonia nacuapijiwi bitso jamatabëcuenebarëyaya to-exana ofrenda, bepejiobiwi peyawenonaenexa. Bjarapijiniä pacuenia, paxamë-ata bepa-exaname, ita payawenonaejitsiamë penamatawenonaewijawabelia, itsamonaë panetsitanajamatabëcuene-itajëtsinexa panexaniajaicuene Dioso paneasiwajawa. ⁹ Bjarapacuenia paxamë-ata ofrenda parajutsianame, tsipaji payapëtaneme pacuenia wajatuxanenë Jesucristo nacayawenona, wajanacasiwaxae. Ayaicuenia papeca-itaxutotsoniataexae, bajaraPonë pueneta daxita pexainaecuenejawanë athëbëtatsia, penaexanaenexa jiwitonëcuenia, peponaponaenexanua bepejiobinëcuenia. Bjarapacuenia nabejibia-exana, ayaicuenia juya papecajamatabëcueneyawenonaenexa. Nexata, Jesucristo ayaijawa apoxinae-ata mapanacuapijijawanë, nawitsia pacajamatabëcueneyawenona, bitso panexainawanapaenexa Dioso pijacuenejawanë.

¹⁰ Paxamë patacajamatabëcueneyawenonaenexa, jitsipajë patacatsipaebi-jawa, xua panetsitaxanepana pane-exanaenexa bajarapa-ofrenda yabara. Paxamë picani imata pawaimi, itsamonaë pewajënaeya copiaya bitso jamatabëpayawenoname Jesús pijajiwi, Jerusalén tomarapijiwi. Nexata, paxamë, bajarapamatacabi, daxitajiwiwajënaeya, jamatabëcuenebarëyaya patojebaponaë ofrenda. ¹¹ Nexata, pacamuxujibatsi aeconoxae paneweretsinexa jane baja, palata panecaetuatsijawa bajarapa-ofrendanexa. Bjarapacuenia ita pa-exanaenexa, copiaya paweretsianame panecaetuatsijawa itsamonaewecua, pacuenia copiaya pataxuxuabame panecaetuatsijawa bajarapa-ofrenda. Pacaenëmë canacujitsia parajutaponaenexa papecacueneceajëpae-cuenia. ¹² Dioso apo-itorobi jiwi perajutsinexa xua apoxinae. Nexata, ita pepacuene parajutsianame pacuenia pacacueneceajëpa, Dioso pacasiwajamatabëcuenebarëya tsane.

¹³ Bjarapacuenia apopaca-itorobitsi paxamë papecatsisajinaenexa panenamatawenonaejawanë, bajarapa-ofrenda panetojebijamatabëcuene. Bjarapacuenia paca-itorobatsi, paxamë, ofrenda panetojebiwi-ata, saya najëpaeya panexainaenexa panenamatawenonaejawanë. ¹⁴ Aeconoxae baja, paxainame panenamatawenonaejawanëwecua. Nexata, pacacueneceajëpa paneyawenonaejawa Jesús pijajiwi, bepejiobiwi, Jerusalén tomarapijiwi. Itsamatacabijawabelia, pamatacabi paxamë panamatawenonaenexa, cueneceajëpaenatsi juya bajarapamonae papecayawenonaenexa. Bjarapacuenia daxita paxamë najëpaeya namata-enetsia panayawenonaenexa. ¹⁵ Bjarapajamatabëcuene-liwaisi yabara Dioso pejumeliwaisibaxutota jumaiti mapacueniaje: «Pajiwi ayaijawa notsi-ata, apotoyajuwënënacopatsitsi. Pajiwi pijiniä tsiquirijawayo pita, apotosajinaetsi penamatawenonaejawa»,^e jai Dioso pejumeliwaisibaxutota. Bjaraxuata, paxamë-ata panexainaeyajuwënëjawa, beparajutame penamatawenonaewijawabelia.

**Pacuenia Pablo itoroba Tito, anijanëbeje yajawa,
Corinto tomarabelia, yabara peliwaishi**

¹⁶ Bitso pexaniajamatabëcuene rajutajë Diosojawabelia, tsipaji Espiritu Santo pejamatabëcueneta, caejamatabëcuene panerajutabeje, Titobeje,

e 8:15 Taema Éxo. 16:18. Mapaliwaisije Éxodobaxutota nacayapëtaeya-exana pacuenia Dioso nacuenëjëpaeya yawenona Israel-pijinë pemomoxi, manájawa penotsimatacabi.

patacayawenonaenexa. ¹⁷Nexata, Tito itorobajë papecataenexalia, pape-cayawenonaenexanua bajarapa-ofrenda itsa baja paweretame panecaetuatsijawa tawajënaelia. Bajaraponë pijacuata pejitsipaexae, barëyaya ponaena paxamëjawabelia, papecayawenonaenexa.

¹⁸Tito pepëta pa-itorobajë itsanë, Jesucristojawabelia pesiwanajamatabëcuenecopatsinë. Bajaraponë Macedonia nacuata, daxita Jesús pijajiwi bitso peyapëtaenëtsi, peyaiyataenëtsinua, tsipaji xaniawaetsia tsipaebabiaba Jesús peliwaissi, jiwi pecapanepaeliwaissinexatsi. ¹⁹Bajaraponë Jesús pijajiwi Macedonia nacuata itapetatsi patayajawaponaenexa Jerusalén tomarajawabelia, bajarapa-ofrenda pejebijawa patacaponaenexa Jesús pijajiwi patarajutsinexa Jerusalén tomarata. Bajarapa-ofrenda pacaponaiejtsianë bajarapamonaejawabelia, patatsitanajamatabëcuene-itajëtsinexa patayaiyataejawa wajatuxanenë Jesucristo, patajitsipaejawanua bitso patayawenonaejawa Jesús pijajiwi, bepejiobiwi. ²⁰Bajarapacuenia Macedonia nacupijinë payajawaponaenajë, patanebaracuaicuaijaniwa itsajiwi-ata pata-ewetsijawa yabara bajarapapalataxaneto. ²¹Bajarapacuenia pajitsipajë pata-exanaejawa, patatsitanajamatabëcuene-itajëtsinexa xaniawaetsia patatonacuenebijawa Dioso yaityataeya, jiwijawabelia-ata.

²²Titobeje, icatsia itsanë patsicueya-itorobajë, Jesucristojawabelia pesiwanajamatabëcuenecopatsinë, peyajawaponaenexabeje paxamëjawabelia. Bajaraponë patacuenetaejawata anijatonë, pajamatabëcueneyapëtaniji bitso pejitsipaejawa xaniawaetsia petonacuenebijawa Dioso. Nexata, aeconoxae, paxamë bitso jamatabëpacayawenona, tsipaji pacawënëliwaissitane paneyawenonaejawanexa Jerusalén tomarapijiwi. ²³Payapëtaneme rabaja Tito tayajawanacuenebaponaponaejawa, Dioso pijacuene paxamëtuatujëta. Ponëbeje pijinia yajawapona paxamëjawabelia, bajaraponëbeje Jesús pijajiwi to-itapetatsi peyanabinexatsibeje, tsipaji bajaraponëbeje xaniawaetsia Cristo toponaponaabeje. ²⁴Nexata, bajaraponëbeje itsa patsianabeje paxamëjawata, patsitanajamatabëcuene-itajëtsianame pane-asiwajawa bajaraponëbeje. Nexata, Jesús pijajiwi, pamonaë itorobatsibeje bajaraponëbeje, pacawënëliwaissitaena pane-asiwajawa, pataxaniajaijawanua paxamë daxitajiwi pane-asiwajawa yabara.

Jesús peliwaissi pejumexaniataewi caetuata ofrenda, peyawenonaenexa

Jesús pijajiwi, Jerusalén tomarata pejinawanapaewi

9 ¹Aponamatawenonaenë picani patacatoyaquinaejawa ofrenda yabara, xua pacaetuapomane paneyawenonaenexa bepejiobiwi, Jesús peliwaissi pejumexaniataewi, Jerusalén tomarata pejinawanapaewi. ²Xanë yapëtaniji baja cajena pacuenia bitso jamatabëpayawenoname bajarapamonae. Bajaraxua yabara, jumaitsinë Macedonia nacupijiwijawabelia: «Acaya nacupijiw, Corinto tomarata penacaetuatabiabiwi, imata baja cajena pawaimi najamatabëcuenewereta perajutsinexa ofrenda Jesús pijajiwiawabelia, Jerusalén tomarapijiwinexa», janë paxamë yabara, patacasiwajamatabëcuenobarëyaxae. Nexata, Macedonia nacupijiw itsa pacawënëliwaissitane paneyawenonaejawanexa Jerusalén tomarapijiwi, bajarapamonae-ata, ayai-bitsaëto caeliwaissi xaina, petocaetuatsijawa peyawenonaenexa ofrenda.

³Nexata, tanajumecowë-auranëyaniwa Macedonia nacupijiwijawabelia,

tapatsiwajënaeya pacato-itorobatsi Titobana papecayawenonaeyacaetuatsinexa bajarapa-ofrenda, panerajutsijawanexa Jerusalén tomarapijiwi. ⁴Itsamona Macedonia nacuapijiwi belia ita naponaejitsipa tapëta paxamëjawa-belia, ita taejitsipa bajarapa-ofrenda apopanecaetuatsiweretsijawa, nexata bitso pacayapijiwi-auratsi tsipae. Paxamë-ata pa-auramë tsipae, pataju-maitsixae paxamë yabara: «Corinto tomarapijiwi rabaja jamatabëwereta-pona ofrenda pecaetuatsijawa», patajaixae paxamë yabara. ⁵Bajaraxuata, xanë tajamatabëcuene-itsixae, copiaya itorobajë bajarapamona. Nexata, Titobana pacacueneyawenonaena ofrenda panecaetuatsiweretsinexa baja, pacuenia najumecapanepaeya panetocaëjëtame. Nexata baja, tawajënaelia bajarapa-ofrenda ita paxaniawaetabuatsianame, panajamatabëcuene-itajëtsianame Jerusalén tomarapijiwijawabelia pane-asiwajawa. Tapatsijawata matapania ita pacaetuatsipame, panajamatabëcuene-itajëtsipame ëpataca-itorobicuenia pane-exanaejawa.

⁶Bajarapa-ofrendacuene yabara jitsipajë panecanaëjëtsijawa mapacueniaje. Pajiwi tsiquirijawayo uba, tsiquirijawayo pijinia batopitsapatsi. Pajiwi pijinia ayaijawa uba, ayaijawa batopitsapatsi. Nexata, ayaijawa ita parajutsianame itsamonaejawabelia, Dioso juya pacarajutsiana ayaijawa. ⁷Nexata, caejiwi canacujsitsia berajuta pacuenia najamatabëcuenecaëjëta perajutsinexa. ¡Pëtsa parajutame pane-asiwajamatabëcueneta, papeca-itorobicuenia-ata, ⁸tsipaji Dioso asiwa^h pajiwi rajuta jamatabëcuenebarëyaya itsajiwijawabelia! ⁸Dioso baja cajena caëjëpatsi papecarajutaponaenexa matatoxenetsia panenamatawenonaecueni, bajarapacuenia panexainaponaenexa, panerajutsijawanexa bepejiobiwijawabelia. ⁹Dioso pejumeliwaisibaxutota jumaitis pamona jamatabëcuenebarëyaya perajutabiawi yabara mapacueniaje:

«Pajiwi rajutabiaba bepejiobiwijawabelia penamatawenonaecueni, pexaniacuene exanabiaba Dioso pitabarata. Nexata, bajarapapexaniacuene peto-exanaejawa cuenetsitecaenaⁱ daxitamatacabijawabelianexa», ^jjai Dioso pejumeliwaisibaxutota.

¹⁰Xaniajai rabaja. Dioso raja rajuta jiwi pe-ubixunexa. Bajarapaxu pejuwicuinae, pexaejawa pexainaenexa. Bajarapijinia pacuenia, Dioso pacarajutsiana ayaijawa panexainaejawanexa, bajaraxuayajuwënëjawa panerajutsinexa bepejiobiwijawabelia. ¹¹Bajarapacuenia Dioso pacarajutsiana panexainaenexa ayaijawa panecobecowëjawanë. Nexata, pacacuenecaëjëpaena bajaraxuayajuwënëjawa, juya panerajutsinexa bepejiobiwijawabelia. Nexata, pa-ofrenda panerajutsianame patatocaponaenexa Jesús peliwaisi pejumexaniataewi, Jerusalén tomarapijiwijawabelia, ita parajutsianajë bajarapamona, pexaniajamatabëcuene rajutsiana Diosojawabelia, bajarapacuenia paneyawenonaexae. ¹²Bajarapacuenia Jesús peliwaisi pejumexaniataewi, bepejiobiwi, ita parajutame penamatawenonaejawata, bitso payawenoname. Bajarapamona paneyawenonaejawa ita taena,

f 9:6 Taema Prov. 11:24-25. **g 9:7** *papeca-itorobicuenia*: Itsajume pijinia, «papeca-urabijamatabëcuene». **h 9:7** Taema Prov. 22:9. **i 9:9** *cuenetsitecaena*: Itsamona, Dioso peliwaisi pecanaëjëtsiwi canaëjëta pejucaenexa mapacueniaje: «*bajarapacueni Dioso aponacofënëtsi daxitamatacabijawabelianexa*», pejaicuenia. Itsamona pijinia canaëjëta pejucaenexa mapacueniaje: «*Dioso pexaniacuena yawenonaena bajarapajiwi, pexainaponaenexa perajutsijawanënexa bepejiobiwijawabelia*», pejaicuenia pejucaenexa. **j 9:9** Taema Sal. 112:9.

pematatsënëa bitso pexaniajamatabëcuene rajutsiana Diosojawabelia.
¹³ Bajarapacuenia Jesús pijajiwi, Jerusalén tomarata pejinawanapaewijawabelia, itsa parajutsianame ofrenda jamatabëcuenebarëyaya, paneyawenonaenexa, patsitanajamatabëcuene-itajëtsianame pepacuen panejumexaniataejawa pexanialiwaishi, Cristo peliwaishi. Nexata, papecacuenetaejawata, pexaniacuenia paneyawenonaejawa Jesús pijajiwi Jerusalén tomarata, itsamonaejawabelia-ata, bajaraxua yabara pexaniajamatabëcuene rajutsiana Diosojawabelia. ¹⁴ Orijibia, bajarapamonae bitso asiwaya pacajamatabëna-jinaeya pacatowajëtabiabiana Diosojawabelia, tsipaji pacacuenetane panejamatabëcuenewënëcaejawa Dioso piasiwajamatabëcuene panexainaejawa Jesús pijajiwiawabelia. ¹⁵ Bitso pexaniajamatabëcuene rajutabiabianatsi Diosojawabelia daxita wajanacarajutsijawanë yabara. Daxita Dioso wajanacarajutsijawanëwecua, bitso pexaniajawa wajanacarajutsijawa amoneya Pexënato wajanacasiwatëpaenexa.^k Bajaraxua yabara nacato-ayapëbeje wajawënëxaniatsijawata Dioso xaniawaetsia wajacuene-itajëtsinexa bitso wajanaca-asiwajamatabëcuene.

Pablo nayapijiwicuaicuaijai Cristo pitorobijawatsi, Dioso pejumeliwaishi daxitanacuanëjawa jiwi petsipaebanajetarucaejawa yabara

10 ¹ Pacuenia Cristo asiwaya pacamuxujobijsipa, bajarapacuenia xanë-ata asiwaya, ajumesaëya, pacato-exanatsi,^l tsipaji Jesús peli-waishiwecua itsamonaë itsacuenia pacajamatabëcuenematacapona patacatsipaebiliwaishiwecua. Bajarapacuenia pacatoyaquinae-atatsi, itsamonaë, paxamëyajuwënëwi, xanë yabara jumaitsi tsabiabi: «Itsa abaxë Pablo tajë nacawecuaponapona, ajumeliwaishisaëya nacatoyaquinabiabarena. Itsiata baitsi jane, majotaje, waxaitsijawata, itsa patajopaena, pitejepabinëcuenia patajopaena. Ajumejibia ponaponaena piajume-uraxae», jai tsa-biabi. Itsiata, bajarapacuenia pejumaitsiyawa apoxaniajai, tsipaji Cristo tane-itorobinëcuene aponeyapëtae. ² Nexata, pexaniacuenie pacawajëtatsi, bajarapamonae panenamuxuna-ewetsiyaniwa penajumetsënëtsiliwaishi. Apojitsipañë patacayajawabijataejawa pacujinae patsialiajë paxamë-jawabelia. Patanecuenie-aebiwi bajarapamatacabi ayaijumeta bijataeya muxujobianajë, tsipaji panecuenecanaëjëta Cristo patane-itorobicuenia apopatanacueniebijawa. Biji rajane, saya panetane^m mapanacuapijiwiije patatsitacueniejëpaejawa patanacueniebijawata, patajacuata patanatojitsipaecuenia,ⁿ Dioso pijacuene. ³ Xaniajai rabaja. Paxanë pajiwinë. Itsiata baitsi jane, apopabarënacuenie-ëjëbinë pacuenia mapanacuapijiwiije exanabiaba pecuenecaranabiwitsijawabelia. ⁴ Bajaraxuata, paxanë apopacacacueniebinë mapanacuapijiwi pecanaëjëbicuenia, pata-ajibia-exanaenexa

k 9:15 wajanacasiwatëpaenexa: Taema Rom. 8:32. **l 10:1 pacato-exanatsi:** Xua yabara Pablo muxujobijsia bajarapamonae, aporucacae mapacapítulojawata. Matapania, capítulo 11-jawata Pablo xaniawaetsia wajunupaeba bajarapaliwaishi. Taema 2Co 11: 1-5. **m 10:2 panetane:** Copiaya, vr 1-2a-jawabelia Pablo caenë nayabaracuaicuaijai. Aeconoxae, vr2b-jawaweliacujinae, yajawacuauicuaijai daxita peyajawaponaewi, pepaebanajetarubenaejawata Jesús peliwaishi daxitanacuanëpijiwiawabelia. **n 10:2 patajacuata patanatojitsipaecuenia:** Bajarapamonae canaëjëta pacuenia Pablo tsipaebanajetaruca Jesús peliwaishi, be-ayaijamatabëcuenenë itsamonaë petaene-xatsi, itsa jume, jiwi palata perajutabiabixatsi.

patanebaracuaicuajiaicuene. Biji rajane, pacanawajabitsaëtajë Dioso patane-rajutsijawanëta.⁴ Dioso pesaëta pacanacuenebajë bajaraxuanë, pata-ajibia-exanaenexa mapanacuapijiwi pecanaëjësijamatabëcuenemi, itsamonaë-ata najumetsënëtsiaya patanebaracuaicuajiaitsabiabijawa.⁵ Orijibia, ayaijamatabëcuene penataewi, jamatabëpanecuene caranatabiaba, itsamonaë Cristo peliwaisi pejumexaniataeyaniwa patatsipaebijawa. Itsiata, pa-ajibia-exanaponajë Dioso pesaëta bajarapacuene caranatsiliwaisi. Nexata, daxita jiwi penajamatabëxainaecuene pajamatabëcuene-amoneyabaponajë Dioso peliwaisita. Bajarapacuenia pajamatabëcuenejëpaeya-exanaponajë Cristo patanejumetaewi bajarapapexanialiawaisi.⁶ Nexata, paxamë Cristo panejamatabëcuenejëpaecujinae, papeca-itorobicuenia pane-exanawanapaenexa, pacuene-itawetsianame⁷ najumetsënëtsiaya patanebaracuaicuajiajiwi. Bajarapamonaë paxanë-ata baja pasiwanajamatabëcueneweretajë patacuenexanetsinexa.

⁷Bajarapamonaë saya naniapijiuene panecuenecanaëjëta, Jesús papijajiwinëcuene yabara. Pajiwi nayabarajumaitsi: «Xanë raja Cristo pija-jiwitonënë», itsa nayabarajai, bajarapajiwi bepanyapëtane paxanë-ata Cristo papijajiwinëcuene.⁸ Xanë raja Cristo pijajiwitonënë. Dioso tane-itapetsixae, Cristo baja pija-apóstol-nënë yabara. Xanë baja napëna pacanawajunupaebabiabatsi. Bajarapanamatacaitorobisaë Cristo apone-rajutsi, patacajamatabëcuenefaefaenaeya-exanaenexa patacawecua-ajibia-exanaejawabelia panejumexaniataejawa Cristo peliwaisi. Biji rajane, nerajuta, patacajamatabëcuene-asaëya-exanaenexa Panejamatabëcuene naweretsijawabelia Dioso pijacuene. Bajaraxuata, apo-auranë tacanacuenebijawa bajarapanamatacaitorobisaë paxamëtuatujëta.⁹ Bajaraxua yabara, apojitsipænë patacajamatabëcuenenabenajacaeya-exanabiabijawa patacatoyaquinaeliwaisianëta, patanecujunawinexamë.¹⁰ Xaniajai. Itsamonaë paxamëyajuwënëwi, xanë yabara jumaitsi tsabiabi: «Pablo ajumeliwaisisaëya nacatoyaquinabiabarena. Itsiata, bajaraponë itsa patajopa majotaje, waxaitsijawata, apo-ajumesaë tsabiabi. Saya ajumeliwaisixaebi tsabiabi», jai tsabiabi itsamonaë xanë yabara.¹¹ Itsiata baitsi jane, pamonaë bajarapacuenia paxanë yabara panejumaitsi tsabiabi, panecueneyapëtaena pacuenia patacatoyaquinaeliwaisita ajumesaëya pacajumaitsi, bajarapijinia pacuenia, patapatsijawatalia, ajumesaëya jumaitsinë tsane bajarapamonaëjawabelia, tacuenexanetsinexa.

o 10:4 *patanerajutsijawanëta*: Pacujinae mapanacuapijiwi pibisiacuene to-exanatsi, piajibia-exanaenexa bajarapaliwaisi, bajarapamonaë cuenecanawiatsiaya namatamotsipa, itsa jume, pejumeta pibisiacuenia baracuaicuajiai tsipae pibisiacuene peto-exanaejiwitsijawabelia. Liwaisi pexanebinexa, mapanacuapijiwi canacuenebabiaba mapitsicuenejawanë: peyapëtaecuene, ayaijamatabëcuene penataejawa itsamonaewecua, pexainaexae peyaiyataetaxunae, bitso pecujanixaetsinua pexaniacuenia pecuaicuajiaijawa. Bajaraxuanë Pablobana apocacuenebi. Biji rajane, canacueneba itaxutujamatejemaya pewajëcaejawa Diosojawabelia, peto-ajibia-exanaenexa pibisialiawaisi. Canacuenebanua Dioso peliwaisi piajibia-exanaenexa penajumetsënëtsiliwaisi. Najamatabëcuenecaewetanua Diosojawabelia, piajamatabëcuenesaëya-exanaenexatsi, pejamatabëcuenefaefaenaeyaniwa itsamonaë najumetsënëtsiaya pibisiacuenia pebaracuaicuajiaijawatatsi. **p 10:6** *pacuene-itawetsianame*: Dioso bitso cuene-itoya jiwi najumetsënëtsiaya pebaracuaicuajiaijawa pamonaë to-itapetatsi penamatacaitorobiwinexa. Taema Núm. 11:1. Cuene-itoyanua pamonaë, ayaijamatabëcuenewi penataexae, pibisiacuenia baracuaicuajiai Dioso pitapetsiwi. Taema Núm. cap. 16.

¹² Xaniajai. Paxanë apopanecuenecaējēpae patajamatabēcueneliwaisi-jēpaejawa, patacuenējēpaejawanua, pacuenia bajarapamonae nacenecanaējēta pexanaejawanē yabara, pijacuata namata-enetsia penasiwajamatabēcuenekarēyatsabiabinexa. Bajarapacuenia pexanaexae, bajarapamonae jemacuenia saya nacenecanaējēta penacuenējēpaejawa pexanaecuenē yabara. Bajaraxuata, bitso ayaijamatabēcuenewi nataeyabiaba, bepexaniajamatabēcuenewi penataexae itsamonaewecua. ¹³ Bajarapamonae, be-ayaijamatabēcuenewi penataexae, apotocopatsi-atatsi, pejitsipaecuenia pacanamatacaitorobapona. Itsiata baitsi jane, paxanë Dioso patanerajutsi-jamatabēcuenesaē, apopacanacuenēbinē patanetocaējētsijawawecua. ^q Biji rajane, panacuanēpijiwijawa Dioso pane-itoroba patatsipaebanajetarubenaenexa Jesús peliwaisi, ēbajarapamonaejawa panetoxanepana patanamatacaitorobaponaenexa. Nexata, paxamē, paCorintotomarapijiwimē-ata, copiaya patacatsipaebixae Jesús peliwaisi, panetsicaruca patacanamatacaitorobinexa. ¹⁴ Nexata baja, paxanē pacatsipaebatsi bajarapaliwaisi bajarapamonaewecua, copiaya patapatsixae paxamējawabelia. Nexata, Dioso panetocaējēta patacanamatacaitorobinexa. Itsa copiaya apopapatsinē tsi-pae paxamējawata, pacatsipaebinexa Cristo peliwaisi, nexata Dioso peneta apopanetocaējētsi tsipae bajarapacuenia pata-exanaejawa. Bajarapacuenia itsa paexanaejitsipajē, pajumematatoxenetsipajē Dioso patanetocaējētsijawawecua, itsa bajarapacuenia pacanamatacaitorobijitsipatsi. ¹⁵ Pamonaē baja jumexaniatane Jesús peliwaisi, itsamonaē petsipaebixaetsi, bajaraxua yabara tajacuata aponasiwajamatabēcuenekarēyanē, pacuenia exana bajarapamonae be-ayaijamatabēcuenewi penataewi. Biji rajane, bitso pajitsipajē pematatsēnē patacacujarubinexa paxamējawabelia, panejamatabēcuenewitsabaponaenexa Dioso pane-itaxutuajamatejemajawa. Bajarapacuenia itsa pajamatabēcuenewitsabaponaē, nexata payapētaenē Dioso patanetocaējētsijawa bajarapacuenia pata-exanaenexa. Bajara-ēxua pajitsipajē pata-exanaenexa paxamētutuajēta. ¹⁶ Dioso patane-itorobixae, patatsipaebanajetarubenaenexa Cristo peliwaisi itsanacuanēpijiwijawa, tajē paxamēwecua pe-enaetomaranējawa, bajarapacuenia pa-exanaenajē. Itsiata, apopapaebinē tsane itsajota baja itsamonaē copiaya pata, petsipaebinexa Cristo peliwaisi. Apopajitsipaeñēnua itsamonaē penacuenēbijawa patanaxainaeyabijawa, bepaxanē pata-exanaejawa patanasiwajamatabēcuenekarēyanexa.

¹⁷ Jiwi penasiwajamatabēcuenekarēyajawa yabara, jumaitsi Dioso pejumeliwaisibaxutota mapacueniajē:

«Pajiwi jitsipa nasiwajamatabēcuenekarēyaya penawajunupaebijawa itsamonaejawabelia pexanaejawa yabara, nexata benawajunupaeba Dioso peyawenonaejawatsi, bajarapacuenia pejumetaewitsi peyaiyataenexa Dioso», jai Dioso pejumeliwaisibaxutota.^r

¹⁸ Pajiwi pijacuata nasiwajamatabēcuenekarēyaya nawajunupaebabiaba pexanaejawa yabara, bajarapajiwi aliwaisimatamobi

q 10:13 *Dioso...patanetocaējētsijawawecua:* Pamonaē pibisiacuenia baracuaicuaijai Pablo, bajarapamonae natane pepo-apóstolewicuenia Pablowecua. Nexata, Dioso apo-itapetsi-atatsi apóstolewinexa, bajarapamonae namatacaitoroba Jesús pijajiwi Corinto tomarata, Jesús peliwaisiwecua. Cujarubana Jesús pijajiwi pecuene-aebinexa Pablo apóstol-ñecuenē. **r 10:17** Taema Jer. 9:24, 1Co 1:31.

penacuenewajunupaebijawa. Itsiata bailsi jane, pajiwi wajatuxanenë Jesús wënëxaniata pesiwajamatabëcuenebarëyaxae pexanaecuene yabara, bajara-pajiwi cuenenamatamota penacuenebijawa, Dioso pitabarata.

**Pablo pexanaecuene, penajumetsënëtsiliwaisi
pepaebaponaewi pexanaecuene-ata, yabara peliwaisi**

11 ¹Pexaniacuene pacawajëtatsi, patanenamuxuna-ewetsinexamë ajamatabëcuenesaëya, patacanawajunupaebijawanexa, pacatsitanatsiquejemaliwaisi-ata tsane. Be-ayaijamatabëcuene penataewi^s paxamëtuatuajëta najumetsënëtsiaya tanebaracuaicuajiaixae, jitsipajë patacayapëtaeya-exanaenexa patacasiwacanaëjëtsicuene. ²Xanë raja bitso pacacuene-asiwatsi pacuenia Dioso pacacuene-asiwa, panejumexaniataeya-niwa itsaliwaisi^t Cristo peliwaisiwecua. Petiriwa ponë jitsipa pamonanexa^u jamatabëcuene- ewetsiaponapona caenë, jaitsinejewa itsanë pijajaranë-wecua, bajarapacuenia pacatojitsipatsi caenë Cristo panejamatabëcuene-ewetsinexa, papecacopiapitsinexa pibisiacuene pawecua-exanaenejewamë. ³Itsiata, pacacacujunawatsi dowathi papecayamaxë-itojorobiyaniwa, bajara-pamonae penajumetsënëtsiliwaisi pepaebijawata, pacuenia exana bajayata Evapijiwamijawabelia. Nexata, bajarapamonae pepaebiliwaisita, caejamatabëcuene apopaxainaemë tsipae Cristojawabelia, bajarapamonae pepaebiliwaisita. ⁴Paxamë picanì caejamatabëcuene paxainame Cristojawabelia. Itsiata, itsamonae itsa pata papecatsipaebinexa, itaxutejema panamuxuna-ewetabiabame, paliwaisi canaëjëtsinejewamë pexaniaajijawa. Aeconoxae Jesús-wecua saicayanëjawabelia pasiwanajamatabëcuenecopabame. Espí-ritu Santowecua saicaya espíritujawabelia panajamatabëcueneceawetame, papecajamatabëcueneceajëpaeaya-exanaenexa pejitsipaecuenia. Panejumexaniataeliwaisiwecua, Jesús peliwaisi, saicaeyaliwaisijawabelia papënaponame panenamuxuna-ewetsinexa. Itsaliwaisijawabelia pajumexaniantaneme, beJesús peliwaisi panetaexae. Patacacujarubiliwaisiwecua, pajumexaniantaneme papenajumetsënëtsiliwaisi pacatsipaeba pamonae be-ayaijamatabëcuene penataewi xanëwecua. ⁵Xanë itsiata, beweliamatabëcuenenënë aponataenë bajarapamonae pitabarata, xanëwecua natae-ata pepo-apóstolewicuenia. ⁶Jiwijawabelia xaniawaetsia liwaisi tatsipaebinexa aponecujani-ata, itsiata, xaniawaetsia yapëtaniji xua yabara tsipaebajë. Xaniawaetsia Jesús peliwaisi tayapëtaejawa paxamë paneyapëtaenexa, pacatsitanajamatabëcuene-itajëtabiabatsi paxamëjawata itsa pacatsipaebaponaaponatsi Jesús peliwaisi.

s 11:1 *Be-ayaijamatabëcuene penataewi:* Bajarapamonae jamatabëcuenenawëxaniabiaya natocanaëjëtabiaba Dioso pitapetsijawatsi pija-apóstolewinexa, Jesús pijajiwituatuajëta, Corinto tomara. Nexata, cujarubabiaba saicayaliwaisi Jesús peliwaisiwecua. Cujarubania jiwi pecuene-aebijawa Dioso pitapetsijawa Pablo apóstol-nënexa. **t 11:2** *panejumexaniataeyaniwa itsaliwaisi:* Pacujinae jiwi jumexaniantane itsaliwaisi Dioso peliwaisiwecua, bajaraxua Dioso pitabarata tsitatsi jiwi pejaitsijawa itsanë bajaraPonëwecua, pewetsinënexatsi pamonacuenia. **u 11:2** *caenë jitsipa ëpamonanexa:* Taema Gén. 24:1-25:20. Pablo bëpënëacuena canacueneba Eliezer peliwaisi. Bailsi, pacuenia Eliezer tajënacujawabelia pona pejaitsinexa petiriwa, pijatuxanenë Isaac pijawanexa, bajarapacuenia Pablo pona tajëjawabelia, Corinto nacujawabelia, pejaitsinexa jiwi, penacopatsinexa Jesús bepjiwacuenia, pejumexaniataecujinae Jesús peliwaisi. Nexata, pacuenia Rebeca pimisiarucaewa tsaponapona (virgen), bajarapacuenia Pablo jitsipa Jesús pijajiwi caeliwaisi pejumexaniataenexa, itsaliwaisi pejumexaniataeyaniwa Dioso peliwaisiwecua.

⁷Paxamëjawata, itsa pacatsipaebaponaponatsi pexanialiwaishi, papecacapane-paeliwaishinexa Diosojawabelia, itsacuenejawayo-ata apocamatamoyanijobitsi. Bajarapacuenia ta-exanaexae, ¿pacatsitapibisiacuene meta xanë tacobeta asaëyata nacuenebabiabajë, tana-ewetsinexa, tanajamatabëcuene-itajëtsinexa beweliamatabëcuene tanataejawa paxamëwecua. ⁸Orijibia, bajarapacuenia patacayawenonaenexa, itsamonae Jesús peliwaishi pejumexaniataewi, itsamonae neto-itoroba palata, amoneya patacatsipaebinexa Jesús peliwaishi. Itsiata, bajarapapalata itsa pitajë, netsita betayacajërëtsijawa bajarapamonae, juya patacayawenonaenexa. ⁹Nexata, pamatacabi paxamëjawata ponaponajë, itsacuene namatawenonae-atanë, apocawajëtsitsi panexainaeyajuwënëjawa, patanerajutsinexamë. Itsiata, Jesús pijajiwi, Macedonia nacuawerena pepatsiwi, netocapata tanerajutsinexa daxita tanamatawenonaejawa. Paxamëjawata itsa ponaponajë nacuene-ewetajë. Nexata, itsacuenejawayo-ata pacawajëtsinejewatsi, patacajamatabë-itonotsiyaniwa. Bajarapacuenia cuenetsitecaenajë. Aponajamatabëxainanë bexëjawabelia-ata patacawajëtsinexa. ¹⁰Xanë, pepacuene xaniajaiya natoyapëtaniji Cristo peliwaishi pexaniajailiwaishicuene. Bajarapacuenia xaniajanë cajena, daxita Acaya nacujawa Cristo peliwaishi amoneya asaëyata tsipaebaponajë. Bajaraxuata, itsajiwi-ata aponejumecaranatsi tsane, bajaraxua yabara tanacuenewajunupaebijawa nasiwajamatabëcuene-barëyaya. ¹¹¿Detsa xuajitsia bajarapacuenia pacajumaitsi? ¿Pataca-ityoxae meta apocawecupitsitsi pataneyawenonaejawamë, pacuenia itsamonae neyabarajumaitsi? ¡Jume cajena! Dioso raja yapëtane bitso pataca-asiwajawa.

¹²Nacuenecopatsinejewanë, tawajënaeyabelia Dioso pejumeliwaishi pacatsipaebaponaenatsi, pacawajëtsinejewatsi itsacuenejawayo-ata. Bajarapacuenia exanajë, taliwaishicaranatsinexa pamonae, penajumetsënëtsiliwaishi papecatsipaebiwi, pewajënaeyabelia nawënëxaniatsiaya papecajumaitsiatsaponaeyaniwa: «Paxanë-ata patonacuenebawanapajë Dioso, pacuenia Pablo tonacuenebapona Dioso», papecajaiyaniwa, papecatsipaebijamatabëcuene papecamatamoyanijobiyaniwa. ¹³Bajarapamonae apopepo-apóstolewi picani. Itsiata, bajarapacuenia nawënërubabiaba, papecayamaxë-itojorobinexa. Bajarapamonae saya cuenecataewanapa apóstolewi. ¹⁴Paxamë apobepasiwajamatabëcuenenabenajacaemë bajarapamonae. Saya exanawanapa papecayamaxë-itojorobinexa. Cuenejëpa Satanás, tsipaji bajaraponë-ata naitajëta ángel-nëcuena pecotia yajawa, jiwi petanexatsi bepexaniajailiwaishi itajara petsipaebinë. ¹⁵Bajarapijinia pacuenia, dowathi pijajiwi-ata, pexaniacuene itajara exanawanapa, jiwi peyamaxë-itojorobinexa. Itsiata, apobesiwajamatabëcuenenabenajacaetsi bajarapamonae pexanaecuene yabara, tsipaji itsamatacabi Dioso naneconitsia-exanaena bajarapamonae paneconiwajëtota tocaëjëtatsi.

Pacuenia Pablo apóstol-nëxae nabejiobitsiaponapona, yabara peliwaishi

¹⁶Icatsia, pexaniacuene pacawajëtsi, patanenamuxuna-ewetsinexamë. ¡Xua aeconoxae pacajumaitsi tsanetsi, bajaraxua yabara pëtsa

v 11:15 *dowathi pijajiwi-ata*: Bajarapacuenia Pablo apojumaitsi ëdowathi pija-ängelewimi yabara. Jumaitsinua penajumetsënëtsiliwaishi pepaebiwi, tsipaji bajarapamonae cujarubabiaba itsiliwaishi, bepexanialiwaishi itajara, Dioso peliwaishiwecua. Taema 2Co 11:4.

panetaneme betanematajemabinë! ¡Panetae-atamë betanematajemabinë, itsiata panenamuxuna-ewere paliwai si pacatsipaebijitsiatsi! Pacuenia peyamaxë-itojorobi-apóstolewi ajume-urajibia pacanawajunupaeba-biaba, paneyaiyataenexa, bajarapijinia pacuenia, xanë-ata ajume-urajibia pacanawajunupaebijitsiatsi, pataneyaiyataenexamë. ¹⁷Wajatuxanenë picani aponitorobi patacanawajunupaebinexa. Itsiata, pacuenia pema-tajemabinëtsi ajume-urajibia banawajunupaeba xua exana, bajara-pacuenia xanë-ata aeconoxae ajume-urajibia pacanawajunupaebatsi, pataneyaiyataenexamë. ¹⁸Pamonae peyamaxë-itojorobi-apóstolewi, ayaijamatabëcuenewi nataeyabiaba. Nexata, ajume-urajibia pacanajamatabëcuenewajunupaebabiaba bajarapamonae. Nexata, xanë-ata bajarapacuenia ajume-urajibia pacanajamatabëcuenewajunupaebijitsiatsi. ¹⁹Paxamë bitso ayailiwa si bepaneyapëtaewi itajara, tsipaji jamatabëcuenëbarëyaya panamuxuna-ewetabiabame paliwai si pacatsipaebabiaba peyamaxë-itojorobi-apóstolewi, itsa pacanacuenewajunupaeba ajume-urajibia bepematajemabiwitsicuenia. ²⁰Bajarapamonae xaniawaetsia panamuxuna-ewetabiabame, bepapijajiwiwimëcuenia paca-itorobabiabi-ata, panexainaejawaxi pacawecuaweretaponae-ata, bijiaya pacanaëcotabiabi-ata, paca-itabara pacababeyabiabi-ata. Daxita bajarapacuenia pacato-exanae-ata, itsiata xaniawaetsia panamuxuna-ewetabiabame. ²¹Paxanë bajarapacuenia apopaca-exanaetsi, pamatacabi pajinawanapajë paxamëjawata.

Itsiata, bajarapamonae ajume-urajibia itsa pacanacuenewajunupaebabiaba, xanë-ata necaëjëpa bajarapitsicuenie yabara ajume-urajibia patacanacuenewajunupaebinexa, pataneyaiyataenexamë. ²²Bajarapamonae ayaijamatabëcuenewi nataeya itsa pacanacuenewajunupaebabiaba, pijajudíocuene yabara, xanë-ata rabaja judíonënë. Itsiata, bajarapacuenia apopacajumaitsi, pataneyaiyataenexamë. Bajarapamonae itsa pacanacuenewajunupaeba Israel-pijinë pemomoxicuene, xanë-ata rabaja Israel-pijinë pemomonë. Bajarapamonae itsa pacanacuenewajunupaebabiaba Abraham-pijinë pemomoxicuene yabara, xanë-ata rabaja Abraham-pijinë pemomonë. Daxita bajarapacuenëjawanë panacuenëjëpae-atanë, itsiata bajarapacuenia apopacajumaitsi. ²³Bajarapamonae itsa pacanacuenewajunupaebabiaba pacuenia tonacuenëbawanapa Cristo pijajiwicuenia, xanë-ata rabaja Cristo xaniawaetsia tonacuenëbaponaponajë, bajarapamonae matatoxenetsia. Xanë picani apojitsipaenë bajarapacuenia patacanawajunupaebijawaxi, tsipaji betanematajemabinëcuenia natani, itsa ajume-urajibia pacanacuenewajunupaebatsi. Itsiata, mapacuenia pacanawajunupaebijitsiatsije. Xanë bitso Cristo tonacuenëbaponaponajë bajarapamonae matatoxenetsia, tsipaji xanë bitso nejumaconitabiaba penaneconitsiwi pejumaconibabeyabiabimacata bajarapamonaewecua. Matatoxenetsia nenaneconitsia-exanabiaba penaneconitsiwi pejebabiabibota tane-etsinexa. Matatoxenetsianua anijatonë imoxoyo tanebeyaxuababiabi. ²⁴Orijibia, cinco xuabeje judíowi newaetaba, tanenaneconitsia-exanaenexa. Caenewaetabi canacujitsia nejumaconitabiaba treinta

y nueve xuabeje,^w penaneconitsiwi pejumaconibabeyabiabimacata.

²⁵ Acueyabi icatsia xuabeje apojudiowi newaetaba, tanenaneconitsia-exanaenexa. Bajaraxuanë saicaya naebota nejumaconibabia. Icatsia, itsamatacabijawabelia caeto judíowi ibotonëta netsecona. Acueyabi pijinia panamutobeje, menia barcota tanaponaejawata, acueyabi xuabeje nayabubunajë manuameneta. Caejawa pataya-othopaejawata, caemerawi, caematacabi yajawa, manuameneta juenajetarucajë.

²⁶ Xanë ayaicuenia tajinarutabiabixae, Cristo peliwaisi jiwi tatsipae-baponaenexa, netsi-ayai tsabiabi mapitsicuenejawanëje. Netsi-ayai tsabiabi menia taponaejawata. Netsi-ayai tsabiabi namutua taponaejawata. Netsi-ayai tsabiabi penacobetoxotsiwi tanewecuanacobetoxotsiyaniwa tacobecowëjawaxi. Itsajawata, netsi-ayai tsabiabi tajanacuapijiwi tane-itsacueniabinexa, itsajawata pijinia saicayana-cuapijiwi tane-itsacueniabiyanianua. Netsi-ayai tsabiabi tomananëjawa, petusatonacuanëjawa-ata, manuamenejawa-ata. Bajarapacuenia netsi-ayai tsabiabi pamonae Jesús peliwaisi bepejumexaniataewi.

²⁷ Itsajawata, bitso nacuenebabiabajë. Cueranabiabajënua. Itsajawata, apomajitabiabinë. Itsajawata, bitso tajani tsabiabi. Meranua jitsipabiabajë. Itsajawata, taxaejawa xaenejewanë, ponaponabiabajë. Itsajawata, bitso aquenë tsabiabi, apotaxainaexae tanaxatatsijawa. Bajarapacuenia nabebiobitsiaya najetarucacae-atanë, Cristo peliwaisi tapaebanajetarucacajawa, apocopatsinë baja tatonacuenebijawa wajatuxanenë pijajiwitonëxaenë.

²⁸ Bajarapacuenia netocopiapatabiabi-ata, pematatsënëa xainajë itsajawa bitso tasiwanajamatabëxainabiabijawa, caematacabi canacujitsia, Jesús pijajiw pamonae jinawanapa caetomaranë canacujitsia. ²⁹ Nexata, bajara-pamonaeyajuwënëjiwi, itsa jamatabëfaefaenapona Dioso pijacuenejawalia, xanë-ata betaneyajawajamatabëcuenefaefaenae. Pajiwi itsajiwi pejamatabëcueneta pibisiacuenexanaeya-exanatsi, pejopaenexa Dioso pejumeliwaisiwecua, bajarapajiwi yapijiwi-auranë tsabiabi Diosojawabelia. Baranaepanabiabajënua pajiwi pejamatabëcueneta jopae-eyanatsi.

³⁰ Itsajiwi itsa nitoroba tanawajunupaebinexa, ayaijamatabëcuenenënë yabara, itsiata, xanë nawajunupaebianajë xua nejamatabëcuenefaefaenae-eyanexana Diosowecua. ³¹ Xaniajanë rabaja. Dioso, wajatuxanenë Jesucristo paxa, Ponë tsicarucatsi daxitajiwi pewënëxaniatsinexatsi daxitamatacabijawabelia. BajaraPonë yapëtane apotanaumetsënëtsijawa. ³² Pamatacabijawa ponaponajë Damasco tomarata, pepo-ira-ewetsinë, Aretas-wënënenë, eweta bajarapara. Nexata, bajaraponë itoroba pijajiw wabajitsaë penubenaenexa Damasco tomara matatoyorotsia peyacaranatsi-ibopanaxanetopijibaupajawata, bajara-jota tanewaetabinexa, tanecaponaenexa picani penaneconitsiwi pejebabibiboyabelia. ³³ Itsiata baitsi jane, itsamonae, Jesús pijajiw, bemapirecuenia pexanaejawaxaneto-ënëta ne-ecaeya-exana. Nexata, tomara matatoyorotsia peyacaranatsi-ibopanaxanetojumabelia neyamaëyacopareca, athëbëyo

w 11:24 *treinta y nueve xuabeje*: Judíowi itsa jumaconibabejitsia penaneconitsinë pejumeconitabiabimacata, itawetatsi pejumeconitsiyaniwa treinta y nueve xuabeje pematatsënëa. Cuarenta xuabeje itsa jumaconitsipa, tēpaejitsipa bajarapajiwi.

perucaeventanawojotualia. Bajarapacuenia wecuapanepajë Damasco tomara pewetsinë pijajiwi.

**Pablo nawajunupaeba bemajitsinaebota wajatuxanenë
pacuenia tsitanaitajëtabiabatsi**

12 ¹ Xanë aponetsitaxanepanae picani ajume-urajibia patacanawajunupaebijawa, tsipaji bajarapaliwaisi apojamatabëcueneyawenonae tsipae itsamonae-ata. Itsiata bailsi jane, pamonae peyamaxë-itojorobi-apóstolewi, bajarapacuenia papecanacuene wajunupaebabiabixae, xanë-ata bajarapacuenia exanaenajë. Nexata, aeconoxae pacatsipaebianatsi xuanë bemajitsinaebota wajatuxanenë Jesucristo tanetsitanaitajëtabiabijawa. BajarapOnë neyapëtaeya-exananua pajamatabëcueneliwaisi xaina xuanë netsitajëta. ²⁻³ Catorce baja pawaiheje xainajë tanecaponaecujinae athëbëabetsia, Dioso pijanacuayabetsia. Aponayapëtaenë athëbëabetsia tanecaponaejawa taperabëto yajawa. Itsa jume, ëtajamatabëcuene meta saya capona. Caenë Dioso yapëtane pacuenia necapona athëbëabetsia. ⁴ Itsiata, yapëtaniji tanecaponaejawa paraísojawabetsia, Dioso pijanacuayabetsia. Bajarajotatsia, jumetaniji Dioso muetsia pexainabuatsiliwaisi. Bajarapaliwaisi Dioso aponetocopatsi tatsipaebinxae itsajiwi-ata. ⁵ Bajaraxuabeje yabara necaëjëpa picani tanawajunupaebijawa, jiwi taneyaiyataenexa. Itsiata bailsi jane, aponawajunupaebinë tsane bajarapacuenia. Biji saya, nawajunupaebianajë tasaëjibicuenejawanë yabara. ⁶ Nawajunupaebaponaenë tsipae betanematajemabinëcuenia, tsipaji ëpexaniajailiawaisi nawajunupaebaponaëjitsipajë. Itsiata bailsi jane, aponawajunupaebaponaenë tsane bajaraxua yabara, tsipaji apojitsipaeenë bajarapaliwaisita jiwi taneyaiyataenexa. Biji rajane, jitsipajë jiwi taneyaiyataenexa, ta-exanaponaejawa yabara, liwaisi tatsipaebaponaejawa-ata yabara.

⁷ Be-ayaijamatabëcuene tanataeyaniwa, daxita jiwi matatoxenetsia, Dioso tanetsitajëtsijawanë yabara, bajaraPonë netocopata necuenecaranatsiaya nawixaetaeya taponaponaenexa. Nexata, dowathi pijajiwitonë pejamatabëcueneta nawixaetaeya^x neponaponaeya-exanabiaba daxitamatacabi. ⁸ Cristojawabelia picani wajëtajë acueyabi xuabeje tanewecua-ajibia-exanaenexa bajarapawixae. ⁹ Itsiata bailsi jane, bajarapacuenia aponeto-exanae. Caranata, wajatuxanenë nejumaitsi mapacueniaje: «Jume. Apocawecua-ajibia-exanaetsi tsane. jBiji rajane, itaxutuajamatejemamëre taca-asiwajawa yabara, tsipaji xamë niajamatabëcuenesaëjibijawata, daxita jiwi yapëtaena, xanë, Cristonë, tasaëta tanetonacuenebijawamë!», nejai wajatuxanenë. Bajaraxuata, wajatuxanenë pijacuene tatonacuenebinexa, xanë tasaëta

x 12:7 nawixaetaeya: Wowaijumeta apocanacuenebi pewixaejume. Canacueneba saya «aguijón-jume». Aguijón raja pe-upisojainaebo, panaebota pecanacuenebinë bueyumonae, bacatseque-bajaraba pecanacuenebijawata. Bajaraxua yabara, Dioso peliwaissi penacujarubiwi caejamatabëcuene apoxinae, pajamatabëcuene xaina «aguijón». Ayaibitsaëto canaëjëta pepopewixae yabara. Itsamonae canaëjëta, pamonaen Pablo pecuene-itoyawitsi, pecujarubiwi judaïsmoliwaisi yabara, tsipaji bajarapamonaen cotocaewi patabiaba itsajota Pablo cujarubabiaba, peliwaissibijianaenexa, Jesús peliwaissi. Bajaraxuata, Pablo natotane bepecatsequebajarabijawatsi bajarapamonaen pexanaecuene yabara.

apotanejamatabëcuenecaējēpaejawa yabara, nasiwajamatabëcueneba-rëyanë, tsipaji Cristo pesaëta neyawenonabiaba daxitacuene. ¹⁰ Nexata, aponejamatabëcuenecaējēpae-ata, tasaëta tatonacuenebinexa wajatuxanenë pijacuene, itsiata nasiwajamatabëcuenebarëyanë. Bajarapijinia pacuenia, wajatuxanenë itsa tonacuenebajë, namatawenonabiabi-atanë itsacuenejawa-xi, itsamonae apotamuxujitsipaejumenë nejumlahitsisabiabi-ata, nebejiobia-exanabiabi-ata Cristo pijajiwitonëxaenë, netsi-ayapëbeje tsabiabi-atanua tatonacuenebinexa Cristo pijacuene, nasiwajamatabëcuenebarëyanë. Daxita bajaraxuanë yabara nasiwanajamatabëcuenebarëyanë, tsipaji paepatota, aponejamatabëcuenecaējēpae, wajatuxanenë bitso nejamatabëcueneyawenonabiaba, tane-asiwajamatabëcuene.

**Pacuenia Pablo bitso siwanajamatabëxaina Jesús
pijajiwi, Corinto tomarapijiwi, yabara peliwaishi**

¹¹ Xanë bajarapacuenia apojitsipaanë itsa pacanawajunupaebaponae-jitsipatsi, jemaliwaishi saya tacuaicuaijainë tsipae. Itsiata, paxamë pane-itorobame patacanacuenewajunupaebinxaxa. Biji rajane, picani paxamë bepanacuenewajunupaebame xua exanaponaponajë paxamëjawa, pacuenia peyamaxë-itojorobi-apóstolewi pacuenewajunupaebame. Xanë picani apoxainanë itsacuenejawa xua yabara itsamonae be-ayaijamatabëcuenenënë netaejitsia. Itsiata, pamonae peyamaxë-itojorobi-apóstolewiwecua, bewelia-jamatabëcuenenënë aponataenë. ¹² Pacanaējēre: Paxamëjawata itsa ponaponajë, netsi-ayapëbeje-ata, bajayajebi pacatsita-exanaponaponatsi pacuenia Dioso nitoroba. Pacatsipaebaponaponatsi Jesús peliwaishi. Pacatsita-exanabiabatsinua pinijicuene ta-exanaejawa Dioso pesaëta. Daxita bajara-pacuenia ta-exanaejawata, payapëtaneme xaniajai Dioso tane-itorobijawa paxamëjawabelia, pija-apóstol-nëxaenë. ¹³ Caejawa saya pacatosajina pataneto-exanaenexamë, pacuenia neto-exana itsamonae, Jesús pijajiwi, itsatomaranëjawa pejinawanapaewi. Paxamë apopacawajëtsitsi. Biji rajane, wajëcabiabajë itsamonaejawabelia, Jesús pijajiwijawabelia, tanamatawenonaejawata, taneyawenonaenexa. Bajarapacuenia apopacawajëtsitsi paxamëjawabelia, patacajamatabë-itonotsiyaniwa. Bajaraxua yabara itsa pacatsita-abeje, pexaniacuenia pacawajëtatsi patanesiwajamatabëcuenecaewinexamë.

¹⁴ Mabaja panamutotaje, acueyabinamuto, taponaenexa paxamëjawabelia, naxaniawaetaponaponajë baja. Itsiata, apopacamatomoyanijobi tsanetsi Dioso pejumeliwaishi patacatsipaebimatamo, pacuenia pacawajëcabiaba peyamaxë-itojorobi-apóstolewi. Apojamatabëcuenebëjanë patanerajutsinexamë panijapalata. Biji rajane, bitso pacasiwajamatabëcuenebëjaitsi, asiwaya patanecopiapitsinexamë. Pacuenia pexi pexinaewi aposiwabëjai pexi pijapalatata, pena-ewetsinexa. Biji rajane, pexi caranata basiwabëjai, penamatawenonaecuenenawerajutsinexa. Bajarapijinia pacuenia, xanë-ata pacasiwabëjaitsi, bepataximë patacataexae, panenamatawenonaecuenenawerajutsinexa. Jitsipajë rajane xaniawaetsia patacajamatabëcuenenawerajutsinexa, panewajënaeyabelia panenamatawenonaenawerajutsinexa Dioso pijacuenejawabelia. ¹⁵ Bajarapacuenia xanë patacayawenonaenexa, daxita taxainaejawami, tajaamatabëcuenesaë-ata yajawa weretsipajë jamatabëcuenebarëyaya, patacayawenonabiabinexa, xaniawaetsia Diosojawabelia

pane-itaxutuajamatejematsaponaenexa. Tawajënaeyabelia bitso paca-asiwa tsapona-e-atatsi, itsiata cowë, paxamë juya bewelia saya pane-asiwamë tsapona-e.

¹⁶Xaniawaetsia paxamë payapëtaneme baja palata apopatacawajëca-biabijawa. Itsiata, itsamonae paxamëyajuwënëwî xanë yabara jumaitsi tsabiabi, bajarapacuenia patacayamaxë-itojorobicuene. Canaëjëta muet-siacuenia, patacamatamoyanijobinexa itsamatacabijawabelia. ¹⁷Xanë ap-itorobinë paxamëjawabelia itsanë, tabarënacuenebiwiyajuwënëwî, yamaxë-itojorobiaya palata papecawajëcaenexa. ¹⁸Pacujinae itorobaliajë Tito, itsanë yajawa, peponaenexabeje paxamëjawabelia, ¿bajaraponëbeje tsaja pacawa-jëtabeje palata? Jume. Apopacawajëtsibeje cajena, tsipaji panajamatabëc-nejëpajë patanacuenebijawata, amoneya patatsipaebinexa Dioso peliwaisi, pamatamoyanijobinejewanë.

¹⁹Bajarapacuenia apopacajumaitsi, tanayapijiwicuaicuaijainexa, neconi tanatsi-exanaexae paxamëjawabelia, pacuenia panesiwanajamatabëxai-name paxamë, paxanë yabara. Ajibi cajena. Biji rajane, Dioso pitabarata xaniajaiya pacanawajunupaebatsi, Cristo papijajiwixanë. Bajaraxuata, daxita paliwaisi pacatsipaebatsi, bajarapacuenia pa-exanajë patacaj-matabëcueneyawenonaponaenexa, bitso pataca-asiwaxae. Nexata, bitso pajitsipajë bajarapaliwaisi panewajënaeyabelia papecatsijamatabëwit-sabaponaejawa Dioso pijacuenejawalia. ²⁰Bajaraxuata, bitso pacasiwa-jamatabëcuenebëjaitsi, tsipaji pacacacujunawatsi patacacaxitajarabiya-niwa tapatsimatacabi paxamëjawabelia apopatacacuenecajitsipaecuenë. Belia paxamëyajuwënëwî meta itsamonae Dioso apopejitsipaecuenia jinawanapajëtsipa. Bajarapacuenia pejinawanapaexae xanë juya cuene-xanetsianajë, apotsitaxanepanae-atatsi. Apojitsipañë picanî tataejawa bajarapajamatabëcuenë. Itsiata, itsa patsianajë paxamëjawata, paca-taenatsi meta panenajume-anaenotabiabijawa, panenacaëbabiabijawa, panenabara-anaepanabiabijawa-ata. Pacataenatsi meta apopanewaye-nonaejawa itsajiwîyo-ata, itsamonae pepëya pibisiacuenia najumetsë-nëtsiaya panebaracuaicuaijaitsiabijawa-ata. Pacataenatsi meta itsa-monaewecua ayaijamatabëcuenewî panenataejawa, nawecuanatsanaeya panejinawanapaejawa-ata, apopanenajamatabëcuenëjëpaexae. Daxita baja-raxuanë yabara apopajitsipañë patacacuenetaejawa. ²¹Orijibia, paxamëja-wata tapatsicujinae, Dioso meta pitabarata pacayapijiwi-aura tsanetsi, pibi-siacuene pane-exanawanapaejawa yabara. Nexata, siwajamatabënuenajë ayaibitsaëto paxamëyajuwënëwî, bajayajawawerenacujinae pibisiacuenë pexanawanapaexae tapatsiwajënaeya. Apojamatabënacuenecopatsi pibisiacuenë pexanaejawa. Tsiteca, pewajënaeyabelia pibisiacuenë pewitota exana-biaba, itsacuenëjawanënuwa, xua yabara be-aura Dioso pitabarata.

**Pacuenia icatsia Pablo itaweta Corinto tomarapijiwi
Diosojawabelia penaneconitsiyaniwa, yabara peliwaisi**

13 ¹Aeconoxae baja icatsia ponaëjitsianë paxamëjawabelia acueya-binamutonexa. Nexata, paxamëjawabelia itsa patsianajë, tocanajëtsianajë pijaneconi pibisiacuenë pexanaewi, pecuenewajunupaebicujinaetsi pijaneconi yabara, anijajiwibeje, acueyabi pajiwibeje-ata,

pecuenaetawitsi, pacuenia Dioso naca-itoroba pejumeliwaisibaxutota.
² CotoCaewi namutojawata, patacasiwaxainaejawata, bajarapamataca-
 bijawa pacayapëtaya-exanatsi tananeconitsia-exanaejawanexa pibisia-
 cuene pane-exanawanapaewi, pamona-ata pibisiacuene-exanawanapa
 tanawiatsicujinaerena. Bajarapijini pacuenia, ta-exanaejawanexanua
 pamona tanawiatsicujinae pibisiacuene exanawanapa. Aeconoxae tajë
 pacawecuaponaponae-atatsi, pacatoyaquinatsi icatsia pataca-itawetsinexa
 pibisiacuene pane-exanaeyaniwa. Icatsia, paxamëjawabelia itsa patsianajë,
 pacananeconitsia-exanaenatsi, daxita pibisiacuene pane-exanawanapaewi.
 Caejiwi-ata apobejiobiataenë tsane, pibisiacuene pexanaeneconi yabara.
³ Bajarapacuenia exanaenajë paneyapëtaenexa, tsipaji paxamë pajitsipa-
 biabame patacatsita-exanaejawa tayajawacuaicuaijaitisabiabijawa Cristo.
 Cristo raja apo-acuenesaëjibi, papecananeconitsia-exanaenexa pibisia-
 cuene pane-exanaejawa yabara. Biji rajane, pacuenesaë xainaponapona,
 pacatsitanajamatabëcuene-itajëtsiana itsa pacananeconitsia-exanaena.
 Bajarapijini pacuenia, xanë-ata Cristo pesaëta pibisiacuene pexanaewi
 naneconitsia-exanaenajë. ⁴ Pacujinae Cristo pijawajabitsaëwi cobematabia-
 barutatsi cruzajawabelia, piacuenesaëjibinëcuena tēpa, pacuenia jiwitsi
 batëpatsi. Itsiata, aeconoxae Dioso pesaëta, asaë tsaponaponae pewajë-
 naeyabelia. Paxanë-ata baja cajena Cristo pacuenejëpawanapajë. Pacuenia
 bajaraPonë acuenesaëjibi, bajarapacuenia paxanë-ata pa-acuenesaëjibinë.
 Pacuenianua Dioso pesaëta Cristo asaë tsaponaponae, bajarapiji-
 nia pacuenia, paxanë-ata Dioso pesaëta panacuenebaponajë, paxamë
 patacajamatabëcueneyawenonaenexa.

⁵ ¡Paxamë rajane, panajamatabëcueneliwaisicanaëjère, panenacue-
 neyapëtaenexa itsa xaniajai pepacuene Cristojawabelia pasiwanajama-
 tabëcuenecopabame! Pacaenëmë canacujitsia bepanacuenecanaëjëtame
 panenayapëtaenexa itsa pepacuene Cristo papijajiwitonëmë. Nexata,
 panayapëtaenamenua Cristo papecatsijamatabë-ecaejawa.⁷ Itsa pijinia,
 Cristo papecatsijamatabë-ecaejawa apopanayapëtaemë, nexata Cristo
 apopapijajiwitonëmë. ⁶ Cristo papecatsijamatabë-ecaexae, panacueneya-
 pëtaneme Cristo papijajiwimëcuene. Bajarapacuenia panenayapëtaexae,
 xaniawaetsia paneyapëtaneme paxanë-ata Cristo papijajiwitëcuene. ⁷ Cristo
 papijajiwixaemë, pacatowajëtaponatsi Diosojawabelia, ëpexaniacuene
 pane-exanawanapaejawa, pibisiacuene pane-exanaponaeyaniwa. Bajara-
 pacuenia apopatowajëtaponaetsi, itsamonae paxanë pataneyaiyataenexa
 pa-apóstolewinë yabara. Pacatowajëtsi rajane xaniawaetsia paxamë pane-
 jinawanapænexa Dioso pitabarata. Biji rajane, Cristo papijajiwixaenë, Dio-
 sojawabelia pacatowajëcaponatsi papecajamatabëcueneyawenonaenexa,
 ëpexaniacuene pane-exanawanapaejawanexa, itsamonae apopaneyaiyatae-
 ata apóstolewicuenia. ⁸ Nexata, Cristo papijajiwixaenë, pamona pexania-
 cuene exanawanapa, acuenebi patananeconitsia-exanaejawa, tsipaji baja
 jumexaniatane pexanaliwaisi, Jesús peliwaisi. Apoxanepanænua pata-
 ajibia-exanaenexa bajarapapexanaliwaisi, jiwi anaeya patabijataejawata.
 Bajaraxuata, itsa papatsianajë paxamëjawata, pananeconitsia-exanaenajë

ëpijaneconi pexainaewi. ⁹Nexata, itsa pajinawanapaename ajamatabë-cuenesaëya Dioso pejitsipaecuenia, pacasiwajamatabëcuenebarëyatsi tsanetsi, tsipaji apopaxainaemë tsane paneconi yabara pacananeconitsia-exanaejitsiatsi, itsamonae panetae-ata pata-ajamatabëcuenesaëjibiwicuenia. Bajaraxuata, pacatowajëtaPONatsi DiosoJawabelia, panewajënaeyabelia panejamatabëcueneliwaisi naweretaponaenexa Dioso pijacuenejawalia, ëpexaniacuene pane-exanawanapaenexa. ¹⁰Pacatoyaquinaliatsi mapabaxutoje taponawajënaeya paxamëJawabelia, tawajënaelia pibisiacuene pane-exanaejawa panenajamatabëcuenexanebinexa. Nexata, itsa patajopaeliajë paxamëJawabelia, aponamatawenonaenë tsane patacabijataejawa, patacananeconitsia-exanaejawanua. Panamatacaitorobisaë Dioso nerajuta, apojitsipaenë patacananeconitsia-exanaejawa. Biji rajane, jitsipajë bajarapasaëta patacajamatabëcuene-asaëya-exanaejawa, panewajënaeyabelia pajamatabëcueneliwaisi naweretaponaenexa Dioso pijacuenejawata.

Pablo penapëjiobilwaisi

¹¹Bajarasaya paliwaisiyo pacatoyaquinaliatsi. Tajamonae, pacatojitsipatsi panejamatabëcuenebarëyatsawanapaejawa. ¡Panewajënaeyabelia pajamatabëcueneliwaisi naweretaponare Dioso pijacuenejawata, ëpexaniacuene pane-exanawanapaenexa! ¡Pa-ajamatabëcuenesaëmëre najamatabëcuenëjëpaeya panejinawanapaenexa jamatabëcuenexanepanaeya! Bajarapacuenia itsa pajinawanapaename, Dioso pacayajawaponaponaena, tsipaji bajaraPONë wajanaca-asiwanë, jamatabëcuenexanepanaeya wajanacajinawanapaeya-exanaenë-ata. ¹²¡Jesús peliwaisi panejumexaniataexae, xaniawaetsia namata-enetsia bitso nasiwaya panabajacobabiabare! ¹³Daxita pamonaë Cristo pijajiwi, majotaje pejinawanapaewije, pacabajacobalia.

¹⁴Bitso pacatojitsipatsi wajatuxanenë Jesucristo pexaniacuena papecaya-wenonabiabijawa, Dioso penajamatabëcuene-itajëtsinexa paxamëJawabelia bitso papeca-asiwajawa, Espíritu Santo papecajamatabëcueneYawenonaejawanua, panejinawanapae-epato mapanacuataje. Bajara-itsi tsane.

Gálatas

Mapabaxutoje apóstolnë Pablo toyaquina Jesús peliwaisi pejumexaniataewi, Galacia nacuata pejinawanapaewijawabelia

Pablo pebajacobiliwaisi

1 ¹⁻² Xanë, Pablonë, pacatoyaquinatsi mapabaxutoje Jesús papijajiwimë, Galacia nacuata panejinawanapaewi. Daxita pamonaë yajawaponaponajë, Jesús pijajiwi, pacabajacobalia.

Apóstol-nënexanë^a nitapeta Jesucristo, paxa Diosobeje. Xanë jiwi apoitapetsi. Aponitorobinua tatsipaebanajetaruaenexa Jesús peliwaisi.

Biji rajane, nitapeta Dioso, Ponë asaëya-exana Jesucristo petëpaecujinaë.

³ Pexaniacuenia pacatojitsipatsi, waxa Dioso, wajatuxanenë Jesucristobeje, papecajamatabëwënëtsinexa papeca-asiwajamatabëcuene, papecabarajama tabëxanepanaejamatabëcuene-ata, jamatabëcuenexanepanaëya panenajua-jinawanapaenexa. ⁴ ¡Bajarapacuenia pajinawanapare, tsipaji wajatuxanenë Jesucristo pijacuata nacaeweta waxa Dioso petojitsipaecueniatsi pebeyaxuabinexatsi, pibisiacuene waja-exanaeneconi yabara! Nacacapanepanua^b waja-pibisijamatabëcuene wajanacanamatacaitorobiabijawami mapanacuataje.

⁵ Bajaraxuata, daxitajiwi tojitsipajë pewënëxaniatabiabinexa Dioso ayaijamatabëcuene pexinaejawa yabara. Bajara-itsi tsane.

Jesús peliwaisiwecua ajibi baja pematatsënëa

itsaliwaisi jiwi pecapanepaeliwasinexatsi

⁶ Ita xanë pacawënëliwaisitanetsi itsaliwaisi panejumecowënëtsijawa, bitso pacasiwajamatabëcuenenabenajacatsi, tsipaji bepjiayo panawecuacopabame panejumexaniataejawa patacatsipaebiliwaisi, Jesús taneyapëtaëya-exanaeliwaisi.^c Bitso cajena, bajaraxua yabara

a 1:1-2 apóstol-nënexanë: Bajarapacuenia Pablo nawënëruba anijajamatabëcuenebeje yabara.

1) Caeliwasibaxuto canacujitsia toyaquina Jesús peliwaisi pejumexaniataewijawabelia, Pablo nayapëtaëya-exanabiaba apóstol-nëcuene, peliwasinamatamotsinexa xua toyaquinapona: Rom. 1:1; 1Co 1:1; 2Co 1:1; Efe. 1:1; Col. 1:1; 1Ti 1:1. **2)** Pedro-ata nawajunupaëba apóstol-nëcuene bajarapajamatabëcuene yabara (1Pd 1:1-2). Itsamonae Jerusalén tomarawerena pepatsiwi cuene aëba Pablo apóstol-nëcuene. Nexata, bajarapamonae muxubijiapenetapona Jesús peliwaisi, pejumexaniataewi penamuxuna-ewetsiyaniwa Pablo pecujarubiliwaisi. Hch. 9:15; 1Co 9:1-2; Gál. 2:7-8. **b 1:4 Nacacapanepanua:** Taema Rom. 12:1-2; Efe. 2:1-2; 1Jn 2:15-17; 1Jn 5:4-5. **c 1:6 Jesús taneyapëtaëya-exanaeliwaisi:** Taema Gál. 1:12.

pacasiwajamatabëcuenenabenajacatsi. Pacawëñetanetsi bepjiyao pane-nawecuacopabaponaejawa panejumexaniataejawami Jesús peliwaishi. Dioso pexaniacuene pacato-exana, papecajunatsijawata papecaca-panepaenexa papecananeconitsia-exanaejawaminexawecua. Nexata pacatsitanajamatabëcuene-itajëta papeca-asiwajawa. Itsiata baitsi jane, jamatabëcuenenawëxaniabiaya pajumexaniataneme saicayaliwaishi Jesús peliwaishiwequa,⁴ bepapecapanepaeliwaishinexa, itajara panejumetaejawata.⁷ Itsiata baitsi jane, pematatsënëa ajibi baja cajena itsaliwaishi* jiwi peca-capanepaeliwaishinexatsi Jesús peliwaishiwequa. Itsamonae pata Jerusalén tomarawerena, paxamë papecatsipaebinxexa Jesús bepeliswaishicuenia. Itsiata, itsaliwaishi yajawa pematatsënëa paca-itorobapona panejumecowënëtsinexa. Nexata, bajarapaliwaishi pacamatabëcuenena-epatajërërëcaeya-exana, panecopabinxexa panejumexaniataejawami pexanialiwaishi, Cristo peliwaishi.⁸ Copiaya paliwaishi paxanë pacatsipaebatsi, pexaniajailiwaishi baja cajena Cristo yabara. Bajaraxuata, itsa patsipa ángelnë, paxanëyajuwënëñë-ata, papecatsipaebinxexa saicayaliwaishi Jesucristo peliwaishiwequa, bajarapa-jiwi baja jema Dioso naneconitsia-exanaetsi.⁹ Copiaya baja cajena pacuenia pacatsipaebatsi, bajara-icatsia pacuenia aeconoxae-ata pacatsipaebatsi. Pajiwi pacatsipaebiana saicayaliwaishi Jesucristo peliwaishiwequa, bajarapa-jiwi baja jema Dioso naneconitsia-exanaetsi.

Pablo yapëtaeya-exana pexaniajailiwaishicuenepaliwaishi paebanajetaruca

(Gál 1:10–2:21)

Jesús yapëtaeya-exana Pablo paliwaishi paebanajetarucaejitsia

¹⁰ Bajarapacuenia itsa pacatsipaebatsi Jesús peliwaishi, apopacatsipaebitsi saya jiwi tanesiwajamatabëcuenebarëyanexa, pacuenia itsamonae^f xanë yabara jumaitsi. ¡Jume baja cajena! Biji rajane, jitsipajë Dioso tanesiwajamatabëcuenebarëyajawa. Saya jema Jesús peliwaishi itsa tsipaebijitsipajë jiwi tanesiwabarëyanexa, nexata naitajëtsipajë Cristo apopijajiwitonëcuenenë.

¹¹ Xanë paliwaishi tsipaebaponajë Jesucristo yabara, jiwi pecapanepaeliwaishinexatsi Diosojawabelia, bajarapaliwaishi jiwi pejamatabëcueneta apopecapitsapaeliwaishi.¹² Biji rajane, itsajiwi-ata cajena bajarapaliwaishi aponetsipaebi. Aponecujarubi-ata. Jesucristo raja pijacujaya neyapëtaeya-exana bajarapaliwaishi. Nexata, nitoroba jiwi tatsipaebanajetarucaenexa bajarapaliwaishi.

d 1:6 *Jesús peliwaishiwequa*: Taema Rom. 1:16-17. **e 1:7** *ajibi baja cajena itsaliwaishi*: Taema Hch. 4:10-12; Rom. 10:9. **f 1:10** *itsamonae*: Bajarapamatacabi itsamonae judowi, Jesús peliwaishi pejumexaniataewi-ata, catsiteca abaxë pejumecowënëtabibijawa paliwaishi Dioso tonajumecopata Abraham-pijinëjawabelia penabo-upiperabëcaucubinxexa, daxita paliwaishianënu Dioso tonajumecopata Moisés-pijinëjawabelia. Bajarapaliwaishianë jumecowënëtanawana, Dioso asiwaya petaeayabiabinexatsi, bepenaxuirabiwicuenianua petaeayaniwaitsi. Nexata, Pablo pecujarubabiabixae Dioso aneconijibia petaejawanexa jiwi ëJesucristo pejamatabëcueneta jumecowënëtsinejewa pacuenia Dioso tonajumecopatabeje Abraham-pijinë, Moisés-pijinëbeje. Bajaraxuata, bajarapajudowi jumaitsi tsabiabi Pablo yabara: «Bajarapacuenia Pablo cujarubabiaba Jesús peliwaishi, apojudowi pesiwabarëyanexatsi», jai tsabiabi.

¹³ Tajamonaē, paxamē rabaja panewēnēliwaisitaneme copiyami pacuenia ponaponajē, pamatacabi abaxē jumecowēnētsiaponaponajē Dioso penajumecopatsiliwaisi Moisés-pijinēta. Asaēyata bajarapaliwaisi tajumecowēnētsixae, tawēnajuđfowicuenia itoyanē bitso Jesús peliwaisi pejumexaniataewi. Nexata, bajarapamonaē barajinabiabajē itaxutobejiobiataenejewanē. Jamatabēwerebia-xuababiabajēnua. ¹⁴ Bajarapamatacabi xanē asaēyata jumecowēnētaponaponajē Dioso penajumecopatsiliwaisi Moisés-pijinēta, tajamonaē juđfowi pejumecowēnētsijawawecua, caewai patanajuaxainaewi-ata, tsipaji bajarapamonaē matatoxenetsia casaēnē tsaponaponae tajumecowēnētsijawa juđfowi pijasalinailiwasianē. ¹⁵⁻¹⁶ Xanē tanaexanaewajēnaeya, Dioso tane-itaxutotsoniataexae, nitapeta Jesucristo pija-apóstol-nēnēxanē. Nexata, bajarapacuenia barajinae-atanē^g Jesús pijajiwi, Dioso tane-asijawamatabēcuene nejunata taneyapētaeya-exanaenexa pexēnato, Jesucristo, peliwaisi. Nexata, nitoroba tatsipaebanajetarucaenexa apojuđfowijawa. Bajarapaliwaisi Dioso taneyapētaeya-exanaecujinae, xanē apoponaenē itsajiwijawabelia-ata tayanijobinexa Dioso pexēnato, Jesús, peliwaisi yabara. ¹⁷ Itsiata, aponawiatecaenē Jerusalén tomarabelia tayanijobinexa pamonaejawabelia xanēwecua copiya exanatsi apóstolewi. Biji rajane, caecuenia xanē rowia ponajē Arabia nacuyabelia.^h Nexata, bajarapatusatonacuata, Dioso xaniawaetsia neyapētaeya-exanapona pexēnato peliwaisi. Bajaraxuacujinae, icatsia, bexēaⁱ Arabia nacuawerena nawiarenajē Damasco tomaraberena.

¹⁸ Bajaraxuacujinae, tapuaxainae baja acueyabi pawaiabeje tajumexania-taecujinae Dioso pexēnato, Jesús, peliwaisi, matapania ponajē jane baja Jerusalén tomarabelia, tasiwaxainaenexa^j apóstolnē Pedro. Nexata, Jerusalén tomarata, Pedrojawata, naponaponajē quince pamatacabibeje. ¹⁹ Itsiata, Jerusalén tomarata pematatsēnē itsa-apóstolnē apotaenē. Caenē saya Santiago^k taniji, wajatuxanenē pejuypijinē. Bajaraponēbeje saya siwaxainajē. ²⁰ Paliwaisi pacatoyaquinatsi pexaniajailiwaisi Jesús yabara. Dioso-ata yapētane apotanaumetsēnētsijawa.

²¹ Jerusalén tomarata taponaponaecujinae, bexēajawabelia rowia ponajē icatsia Siria nacuyabelia, Cilicia nacuyabelia-ata, Jesucristo peliwaisi jiwi tatsipaebaponaenexa. ²² Rowia taponaeaxae, Judea nacupijiwi, Jesús

g 1:15-16 barajinae-atanē: Taema Gál. 1:13-14. Pablo bejiobia-exanabiaba Jesús pijajiwi, bitso asiwanua Dioso penajumecopatsiliwaisi Moisés-pijinēta, Jesús peliwaisiwecua. **h 1:17 Arabia nacuyabelia:** Neyapētaenexa pacuenia Jesús naitajēta Pablojawabelia, xua-ata exana Pablo pepatsicujinae Damasco tomaratalia, taylorobianame Hch. 9:1-19. Versículobeje 19-20-bejatuatujēta, Pablo pona Arabia nacuyabelia Damasco tomarawerena. Matapania versículo 20-jawata nacayapētaeya-exana Pablo pexanaecuenē penawitsicujinae Arabianacujawawerena, Damasco tomarajawabelia. **i 1:17 bexēa:** Pablo ponapona Arabia nacuata bejamatabē anijawaiabeje pematatsēnē, Jesucristojawabelia pesiwanajamatabēcuene copatsicujinae. **j 1:18 tasiwaxainaenexa:** Pedro tsaena apocujarubi Pablo Jesús peliwaisi bajarapamatacabita, tsipaji 14 pawaiabejecujinae Pablo pona icatsia Jerusalén-jawabelia, petsitajētsinexa pepaebanajetarucaejawa Jesús peliwaisi, Jerusalén tomarata Jesús pijajiwi pewetsiwijawabelia. Taema Gál. 2:1-2, 7-8, 10. **k 1:19 Santiago:** Bajaraponē Jesús pejuypijinē. Itsanēbeje, Jesús pijajiwi doce ponēbejeyajuwēnēbeje, Santiagowēnē xainae-atabeje, apobajaraponēbeje yabara. (Mt 10:2-4.) Santiagowēnē, itsawēnē Jacobo. Bajayata, Jacobo, Jesús pejuypijinēxae, pewēnē yaquina Santo Yacobo. Belia, jiwi Santo Yacobo jai tsabiabi bijiya pecuaicuajajawata, Santiagowēnē yabara. Bajaraxuata, Reina Valera Bibliabaxutota yaquinaruba «Jacobo». Juya, itsaBibliabaxutonēta yaquinaruba «Santiago». Bajaraxua yabara yapētanetsi pacuenia Jesús pejuypijinē Jacobo/Santiago ponē yaquina Santiagowēnēbaxutoyo. Bajarapamatacabi Jesús pejuypijinē, Santiago/Jacobo, penamatacaitorobinē Jesús pijajiwi pewetsiwituatujēta, Jerusalén tomarata.

pijajiwi, aponeyapētae. Bajarapamonae-ata aponecujarubi¹ Jesús peliwaishi. ²³Bajarapamonae saya newēñliwaishitane itsamonae xanē yabara pejumait-sijawa: «Ponē copiyami nacabarajinabiaba, wajanacawerebiabinexa Jesucristo peliwaishi wajajumexaniataewi, aeconoxae baja bajaraponē-ata siwanajamatabēcuenecopata Jesucristojawabelia. Nexata, pina itsamonae-ata pejumexaniataenexa Jesucristo peliwaishi, bajaraponē tsipaebanajetaruca», pejajawa xanē yabara, newēñliwaishitane Jesucristo peliwaishi pejumexaniataewi, Judea nacuata pejinawanapaewi. ²⁴Bajarapacuenia xanē tanewēñliwaishitaexae, Jesús pijajiwi Judea nacujawa pejinawanapaewi, wēñexaniatabiaba Dioso tanejamatabēcuenene-itothianaejawa yabara.

**Jerusalén tomarata pejinawanapae-apóstolewi
caejamatabēcuenene xaina Pablo pepaebiliwaishi yabara**

2 ¹ Catorce pawaijajecujinae^m jiwi tatsipaebanajetarucajawa Jesucristo peliwaishi Sirianacuajawa, Cilicianacuajawa-ata, matapania icatsia patajē tacowēyaberena, Jerusalén tomarata. Yajawapatajopajē Bernabé, Titobeje. ² Apopatajopaenē Jerusalén tomarata tanejunatsixae. Biji rajane, patajopajē Dioso tane-itorobixae,ⁿ tayapētaeya-exanaenexa bajarapamonaejawabelia tatsipaebanajetarucaeliwaishi yabara apojudfowijawa. Nexata, taponaponae-epato bajarajota, yajawanacaetuatajē Jesús pijajiwi, ēpenamatacaitorobiwi. Bajarapamonaejawabelia nawajunupaebajē pacuenia Jesucristo peliwaishi tsipaebanajetarucajē apojudfowijawa, jiwi pecapanepaeliwaishinexatsi Diosojawabelia. Bajarapacuenia nawajunupaebajē pamonaejawabelia itsamonaenexa tsita-ayaijamatabēcuenewitsi, tsipaji apojitsipaenē tatsipaebanajetarucaeliwaishi apojudfowijawa taneto-amatamobijawa^o

1 1:22 aponecujarubi: Paliwaishi Pablo tsipaebanajetaruca Jesús yabara, bajarapaliwaishi apotsipaebitsi itsajiwi-ata. Apotsipaebitsi Pedro, Santiagobeje vr 18-19. Apotsipaebitsinua Dioso pejumecowēñtsiwi Judea nacuapijiwi. Pablo-ata pijacuata aponatocapitsapae bajarapaliwaishi, tsipaji itoya picani Jesús Peliwaishi. Jesús pijacujaya cujarubatsi. Bajaraxuata, toxanepanatsi Dioso penaneconitsia-exanaenexa daxita pamonaē liwaisibijiana Jesús peliwaishi Gál. 1:8-9. **m 2:1 Catorce pawaijajecujinae:** Pacujinae Pablo pona Jerusalén-jawabelia, bajarapamatacabita xaina 17 pawaijajecujinae daxitata pesiwanajamatabēcuenecopatsicujinae Jesucristojawabelia. **n 2:2 Dioso tane-itorobixae:** Pablo apoponaē Jerusalén-jawabelia pebarēcuaicuajainexa Jesús pijajiwi penamatacaitorobiwijawabelia, bajaraponē pe-aebixae paliwaishi paebanajetaruca apojudfowijawa. Jumexaniatane baja bajarapaliwaishi, Jesús peyapētaeya-exanaexaetsi. Apoponaenua apóstolewi pejunatsixaetsi, bajarapaliwaishi yabara peyanijobinexatsi, apóstolewi petsita-abejexaetsi paliwaishi Pablo tsipaebanajetaruca. Biji rajane, Pablo pona, tsipaji yapētane itsamonae Judea nacuaawerena pepatsiwi itorobanajetarubena apojudfowijawa daxita pebijiji penabo-upiperabēcucubinexa, pejumecowēñtsinexanua Dioso penajumecopatsiliwaishi Moisés-pijinēta, xaniawaetsia Dioso aneconijibia petanexatsi. Nexata, Pablo pona, itsamonae apóstolewi pejamatabēcueneyanabinexatsi, pecuene-itawetsijawa bajarapaliwaishi. **o 2:2 taneto-amatamobijawa:** Pablo yapētane pexaniajaijawa paliwaishi Cristo yapētaeya-exanatsi, pacuenia Dioso aneconijibia taejitsia daxitajiwi, apojudfowi, judfowi-ata pesiwanajamatabēcuenecopabijawata Jesucristojawabelia, itsacuenejawa exanaenewewa pematatsēñēa. Nexata, jiwi aponamatawenonae penabo-ubiperabēcucubijawa, pejumecowēñtsijawanua Dioso penajumecopatsiliwaishi Moisés-pijinēta, matapania Dioso aneconijibia petanexatsi. Itsiata, pancuanējawa Pablo paebanajetaruca Jesús peliwaishi apojudfowijawabelia, patabiaba itsamonae Jerusalén tomarawerena, bepitorobiwitsi itajara Jesús pijajiwi pewetsiwi Jerusalén tomarata. Nexata, bajarapamonae cujarubabiaba pacuenia Dioso capanepaejitsia jiwi matapania penabo-upiperabēcucucujinae, pejumecowēñtsicujinae Dioso penajumecopatsiliwaishi Moisés-pijinēta. Pablo nacuerotsipa, Jesús pijajiwi penamatacaitorobiwi itsa caejamatabēcuenene xainae-jitsipa bajarapamonae pecujarubiliwaishijawabelia.

bajarapamonae pitabarata. Nexata, Jesús pijajiwi penamatacaitorobiwi, tsitaxanepanatsi tanawajunupaebiliwaisi. ³Orijibia, Tito, taneyanabinë, apojudíonë-ata, bajarapamonae apo-itorobitsi penabo-upiperabëcaucutsia-exanaenexatsi, pecopiapitsinexatsi Jesús pijajiwitonëcuenia.

⁴Bajaraxua yabara napata patanacaetuatsijawata itsamonae judíowi, Jesucristo peliwaisi bepejumexaniataewi itajara, pataneya-enebinexa Tito pebo-upiperabëcaucutsijawanexatsi yabara. Jesús pijajiwi penamatacaitorobiwi aposiwajamatabëcuenebëjai picani bajaraxua yabara. Itsiata, pamonaenapata, jitsipa icatsia caewëarena patajumecowënëtawanapaenexa Dioso penajumecopatsiliwaisi Moisés-pijinëta, bepapijajiwinëcuenia patajumecowënëtawanapaenexa daxita pacuenia bajarapaliwaisi pane-itoroba. Itsiata, payapëtaniji pacuenia Dioso aneonijibia panetaejitsia Jesucristo pejamatabëcueneta. Bajaraxuata baja, pacopabajë bajarapaliwaisi patajumecowënët-sijawami. ⁵Nexata, bajarapacuenia jitsipae-ata pebijianaenexa Jesús peliwaisi, paxanë tsiquirijawayo-ata apopa-exanaenë pacuenia bajarapamonae pane-itoroba. Bitso pajitsipajë paxamënexa panecanacopatsijawa Jesús peliwaisi, pexaniajailiwaicuenia, pamatajërëatsinejewamë judíowi pejumecowënëtsicuenia Dioso penajumecopatsiliwaisi Moisés-pijinëta.

⁶Jerusalén tomarata Jesús pijajiwi penamatacaitorobiwijawabelia itsa nawajunupaebajë Jesucristo peliwaisi tatsipaebaponaejawa yabara apojudíowijawa, bajarapamonae pejanaliwaisiyo-ata aponetsipaei Jesucristo peliwaisi tayajawatsipaebaponaenexa. Bajarapamonae ayaijamatabëcuenewi tae-atatsi itsamonae,^p xanë itsiata aponajamatabëxainanë be-ayaijamatabëcuenewi tataanexa,^q tatsipaebiliwaisi ta-itothianaenexa. Baitsi, Dioso ayaijamatabëcuenewi apotae caejiwi-ata, jiwi petsitaliwaishinamatamotsiwiitsi-ata. Biji rajane, daxita waxaitsi, Jesucristojawabelia wajasiwanajamatabëcuenecopabiwi, Dioso najëpaeya nacatane. ⁷Itsiata, bajarapamonae bijiaya aponetae. Caranata, neyaiyatane. Beweliascuenianua apotae tatsipaebiliwaisi apojudíowijawa. Biji rajane, neyapëtane Dioso tane-itorobinëcuenia tatsipaebanajetarucaenexa Jesús peliwaisi apojudíowijawa, pacuenia copiaya Pedro Dioso itorobatsi Jesús peliwaisi petsipae-baponaenexa judíowijawa. ⁸Ponë Pedro, itorobatsi apóstol-nënexa, pepaebanajetarucaenexa Jesús peliwaisi judíowijawa, bajaraPonë xanë-ata nitoroba apóstol-nënexanë, tatsipaebaponaenexa Jesús peliwaisi apojudíowijawa.

⁹Bajarapamatacabijawa Jerusalén tomarata, Jesús pijajiwi namatacaitorobawanapa Santiago,^r Pedro, Juan-bana. Bajarapamonae

p 2:6 *itsamonae*: Pamonaen peca-asaewi jiwi penabo-upiperabëcaucubijawa, tsitaliwaishinamatamotsi Pedro, Juan, Jacobo-ata, Pablouwecua. Baitsi, Pablo apopecujarubixae pebijiji penabo-upiperabëcaucubinexa, apotsitapepo-apóstolnëtsi. **q 2:6** *be-ayaijamatabëcuenewi tataanexa*: Pablo yayiatae-ata pamonaen penamatacaitorobiwi Jesús pijajiwiwituatujëta, bajaraponë itsa nawajunupaeba petsipaebiliwaisi apojudíowijawa, apopaebi petonamatamotsia-exanaenexatsi petsipaebiliwaisi apojudíowijawabelia. Biji rajane, itsamonae judíowi pepataponaexae panacuanëjawa Pablo tsipaebanajetaruca Jesús peliwaisi, bajarapamonae paebapona apojudíowijawabelia yajawa penamatawenonaejawa pejumecowënëtsijawa Dioso penajumecopatsiliwaisi Moisés-pijinëta, pesiwajamatabëcuenabarëyanexatsi Dioso. Nexata, bajarapamonae nawajunupaebabiaba bepitoborbiyawatsi Pedro, Santiagobeje. Pablo jaita bajaraponëbejajawabelia pecuene-itawetsinexa bajarapajudíowijawabelia, Jerusalén-jawawerena peponaewi. **r 2:9** *Santiago*: Itsawënë pijinia Jacobo.

peluwaisinamatamotsiwi tsawanapae itsamonaewecua. Nexata, bajarapamonae itsa neyapētane Dioso tane-itorobinēcuene tatsipaebaponaenexa Jesús peluwaisi apojudíowijawa, bajarapamonae panetanebeje paxanēbeje, Bernabébeje, patatonajuanacuenebínēbeje Dioso pijacuene. Bajaraxuata, panejamatabēcuene-asaēya-exanabeje patawajēnaeyabeliabeje patatsipaebaponaenexabeje Jesús peluwaisi apojudíowijawa. Bajarapamonae pijinia Santiago, Pedro, Juan-bana, bajarapamonae pijinia tsipaebanajetarubenaiejitsia judíowijawa. ¹⁰Bajarapamonae caeliwaisiyo muxujiobiaya panejumaitisibeje, patanajamatabēnapitsinexabeje pamona bitso bepejiobiwi, patayawenonaenexabeje, Jerusalén tomarata pejinawanapaewi,^s Jesús pijajiwijawuwēnēwi. Bajaraxua yabara xanē jamatabēcuenenaxanetajē bajarapamonaeenexa. Nexata, ofrenda to-exanaeya-exanaponajē itsxuayo tsipaebaponaejē Jesús peluwaisi.

Pablo muxujioba Pedro Antioquia tomarata, bijiaya petaexae apojudíowi

¹¹Pamatacabi Pedro patajopa Antioquia tomarata, xanē asaēyata muxujio-bajē, tsipaji Dioso apozejitsipaecuenia exana. ¹²Pedro copiaya jamatejema naponapona apojudíowijawata. Yajawanabaneponapona. Itsiata, itsa pata Antioquia tomarata itsamona judíowi Santiagojawawerena^t peponaewi, pijaperujuliwaisimi^u pecatsitecawanapaewi, bajarapaepatota Pedro wecuanasaicayaba apojudíowi, tsipaji cujunawa bajarapamonae petaeyaniwatsi apojudíowijawata penaxaejawa. ¹³Pedro yapētae-ata pacuenia picani apobewecuanasaicayabi apojudíowi Dioso nacaemonaecuenia petaexae, itsiata wecuanasaicayaba. Nexata, pecuenaetajawatatsi, daxita judíowi, pesiwanajamatabēcuenecopabiw Jesucristojawabelia, cuenejēpatsi Pedro xua exana. Belia, Bernabé-ata cuenejēpa bajarapajudíowi.

¹⁴Bajarapacuenia pexanaejawata, bajarapamonae liwaisi-itothiana^v pacuenia jumaitsi pexanaliwaisi jiwi pecapanepaeliwasinexatsi Diosojawabelia. Pedro wecuanasaicayaba apojudíowi bepenaxuirabiwicuenia petaexae, nacaemonaecuenia Dioso tae-atatsi. Bajaraxuata, itsa taniji Pedro pewecuanasaicayabijawa apojudíowi, asaēyata muxujiobajē. Daxita

s 2:10 *Jerusalén tomarata pejinawanapaewi*: Wowaijumeta jumaitsi «Los pobres de la iglesia de Jerusalén», jiwi jumeta pijinia jumaitsi, «patayawenonaenexa pamona bepejiobiwi Jesús pijajiwijawuwēnēwi Jerusalén-tomarata pejinawanapaewi». Itsiata, najumetane Pedrohana peyabara-jumaitsiyawa, Jerusalén-jawata pejinawanapaewi, Jesús peluwaisi pejumexaniataewi. Taema Hch. 11:29-30; Rom. 15:25-27; 1Co 16:1-3. **t 2:12** *Santiagojawawerena*: Yapētanetsi Santiago apopitorbijawa pajudíowi pata Antioquia tomarata, tsipaji Santiagobana, Pedrobana, Juanbana caejamatabēcuene xaina apojudíowijawabelia, apopetsicarucawatsi judíowi pijaperujuliwaisi pejumecowēnētsia-exanaejawa. Itsiata, pamona pata Santiago pewēnēta, pijacuata nacuenie-itajēta bepitorobiwitsi Santiago. **u 2:12** *judíowi pijaperujuliwaisimi*: Judíowi aponaxaeyabiabi pajiw apopenabo-upiperabēcaucutsijiwijawata, bepenaxuirabiwicuenia penacopatsiyaniwa Diosojawabelia. Baitsi, Dioso penajumecopatsiliwaisi Moisés-pijinēta, Dioso itawetabiaba apopenabo-upiperabēcaucutsijiwi pejoneyaniwa Diosojawabelia penawajēcabiabibojawata, tsipaji itsa jonejitsipa, bepenaxuirabibo nacopatsipa Dioso pitabarata. Orijibia, itsa judíonē jayatsipa apopenabo-upiperabēcaucutsinē, xua-ata bajaraponē copiaya jayata, nexata judíonē canacopatsipa bepenaxuirabinē Dioso pitabarata. Itsiata, wajanacasiwatēpaejawata Jesucristo nacatomatamota daxita bibisiacuene waja-exanaeneconi, daxita bewajanaxuirabineconi yajawa. Bajaraxuata, aponatawewenonaetsi wajacatsitecaenexa Dioso penajumecopatsiliwaisi Moisés-pijinēta, aneonijibia wajanacataenexa, judíowi penaewetsiliwaisi-ata, bepenaxuirabiwi Dioso wajanacataeyaniwa. **v 2:14** *liwaisi-itothiana*: Taema Gál. 1:7-9; Hch. 10:10-16; 11:1-10.

Jesús peliwaishi pejumexaniataewi pitabarata jumaitsinē Pedrojawabelia: «Xamē, judíonē-atamē, itsa naponaponame apojudíowijawata, pacuenia bajarapamonae jinawanapa naponaponabiabame, tsipaji yapētaneme picani apopecanaxuirabia-exanaenexa Dioso pitabarata. ¿Detsa nexata xuajitsia caranata apojudíowi aeconoxae jamatabējinawanapaeya-exaname judíowicuenia?», janē Pedrojawabelia pewecuanasaicayabixae apojudíowi.

**Judíowi, apojudíowi-ata, najēpaeya siwanajamatabēcuenecopaba
Cristojawabelia, aneconijibia Dioso petaenexatsi**

¹⁵Orijibia, jumaitsinē Pedrojawabelia bajarapamonae pitabarata: «Waxaitsi baja cajena judíowitsi wajanaexanaejawaweliacujinae nacayajawawitsata, wajajumecowēñetsinexa pexaniajailiwaishi, Dioso pejumeliwaishi. Nexata, waxaitsi apocuenējēpaetsi apojudíowi, pamonaē apoepayētaewi Dioso pejumeliwaishi. ¹⁶Nexata, waxaitsi baja cajena yapētanetsi mapacueneje: Itsajiwi-ata apocuenecaējēpaetsi pejumecowēñetsicapanepaejawa Dioso penajumecopatsiliwaishi Moisés-pijinēta, Dioso juya aneconijibia petaenexatsi. Waxaitsi judíowitsi-ata matapania itsa siwanajamatabēcuenecopatsianatsi Cristojawabelia, Dioso aneconijibia nacataena. Dioso aneconijibia aponacatae wajajumecowēñetsijamatabēcuenē Dioso penajumecopatsiliwaishi Moisés-pijinēta.

¹⁷»Waxaitsi baja yapētanetsi Dioso aneconijibia wajanacataejawa, waja-siwanajamatabēcuenecopatsixae Jesucristojawabelia, jumecowēñetsinejewatsi Dioso penajumecopatsiliwaishi Moisés-pijinēta. Nexata, bajarapacuenia itsa jaitsipatsi Dioso aneconijibia wajanacataenexa, jumecowēñetsinejewatsi bajarapaliwaishi, naneconitsipatsi meta Diosojawabelia itsa apo-exanaetsi wajanaca-itorobicuenia» Dioso penajumecopatsiliwaishi Moisés-pijinēta? ¿Bewajanaca-itorobijawa meta Cristo pibisiacuene waja-exanaejawanexa? ¡matapania itsa siwanajamatabēcuenecopatsianatsi Cristojawabelia! ¹⁸Diosojawabelia rajane naneconitsipajē tacopatsicujinae, tajumecowēñetsijawa Dioso penajumecopatsiliwaishi Moisés-pijinēta itsa caewēalia icatsia siwana-jamatabēcuenecopatsipajē tajumecowēñetsinexa bajarapaliwaishi, Dioso aneconijibia tanetaenexa. ¹⁹Bajarapacuenia natoyapētaniji, tsipaji pamatacabi

w 2:17 wajanaca-itorobicuenia: Paliwaishi Dioso najumecopata Moisés-pijinēta xaina anijajamatabēcuenēbeje. Copiayapijiliwaishi nacayapētaeya- exana diez paitorobiliwaishi beje yabara, paliwaishianē rubena Éxo. 20:1-17-jawabelia, xuanē toxanepanatsi daxitanacuanēpijiwi pejumecowēñetabiabinexa. Cotocaewi pijiliwaishianē pijinia nacayapētaeya-exana pematatsēñēa itsaliwaishianē Dioso petonajumecopatsijawa ējudíowinexa, penajamatabēcuenē-itajētsinexa Dioso pijajiwicuenē, peyaiyataejawanua. Judíowi bajarapaliwaishi beje tsitacaeliwaishitsi, nexata tocaējēta daxitanacuanēpijiwi najēpaeya pejumecowēñetabiabinexa. Nexata, Dioso petonajumecopatsixae judíowi penabo-upiperabēcaucubia-exanaenexa, penacuenexania-waetsinexana bepenaxuirabiwi penacopatsiyaniwa Dioso pitabarata, bajaraxuata judíowi beweliacuenia taeyabiaba apojudíowi tsipaji bajarapacuenējawanē apo-exanawanapae. Biji rajane, taeyabiaba bepenaxuirabiwi Dioso pitabara. Bajaraxuata, judíowi itsa jayatsipa apojudíowiyajuwēñējiwi, itsa jume, yajawaxaejitsipa, bepenaxuirabiwi nacopatsipa Dioso pitabarata. Nexata, bepenaxuirabiwi penacopatsixae, to-acuenebitsi templobojawabelia pejonejawa, penajua-exanaejawanua itsacuenējawa Dioso pewēñēta itsamonae judíowi yajawa. Nexata, Gál. 2:16-jawata Pablo najamatabēnapitsia-exana Pedrojawabelia pacuenia Dioso aneconijibia apotae tsane caejijiwi-ata, pejumecowēñetsixae paliwaishi beje Dioso tonajumecopata Moisés-pijinēta. Juya, Gál. 2:17 Pablo najamatabēnapitsia-exana paliwaishianē Dioso tonajumecopata ējudíowi pejumecowēñetabiabinexa.

abaxë ajamatabëcuenesaëya jaitajë Dioso aneconijibia tanetaenexa tajumecowënëtaponaponaejawata Dioso penajumecopatsiliwaisi Moisés-pijinëta, bajarapamatacabi Dioso aneconijibia aponetae. Biji rajane, saya caranata bajarapaliwaisi nenaneconitsia-exana tatëpaejawabelia tajaneconijamatabëcuene. Bajaraxuata, maparucaeje nawecuacopatajë baja tajumecowënëtsijawami bajarapaliwaisi, Dioso aneconijibia tanetaenexa. Juya, exanaponaponajë Dioso pejitsipaecuenia Cristo pejamatabëcueneta. ²⁰ Bajarapacuenia exanaponaponajë, tsipaji Cristo cruzajawabelia itsa cobematabiabarutatsi, tajaneconijamatabëcuene betaneyajawacobematabiabarutatsi. Bajaraxuata, apoponaponaenë tajaperujumatabëcueneta. Biji rajane, ponaponajë pejanajamatabëcueneta, papejanajamatabëcuene Dioso nerajuta, tasiwanajamatabëcuenecopatsixae Pexënato Cristojawabelia, Ponë tane-asiwaxae nacaeweta pijacuata tanesiwatëpaenexa. ²¹ Bajaraxuata, aponamuxujematsinë Dioso asiwaya wajanaca-itaxutotsoniataejawa, tsipaji Dioso aneconijibia jiwi itsa taejitsipa, pejumecowënëtsijamatabëcuene Dioso penajumecopatsiliwaisi Moisés-pijinëta, nexata Cristo jiwi aposiawatëpae tsipae pijaneconi yabara. Nexata, Cristo saya jema tēpaejitsipa», janë Pedrojawabelia daxita bajarapamonaë pitabarata, tamuxujiobjawata.

**Wajasiwanajamatabëcuenecopatsijaw
ata Jesucristojawabelia, nacawecua-ajibia-
exana wajanacajumecowënëtsia-exanaejawami
Dioso penajumecopatsiliwaisi Moisés-pijinëta,
aneconijibia Dioso wajanacataenexa**

(3:1–5:12)

**Wajasiwanajamatabëcuenecopatsijawata Jesucristojawabelia,
Espíritu Santo nacatsijamatabë-eca**

3 ¹ Paxamë paGalacianacuapijiwimë, bitso cajena pane-ajamatabëcuenecowëbiwi paneyapëtaeyaniwa. Paxanë picani baja xaniawaetsia jumenapebetsiaya pacatsipaebatsi Jesucristo cruzajawabelia pecobematabiabarutsijawatsi yabara, wajanacaneconimatamotsinexa. Nexata, bepanetaewi panijacujaya Jesucristo pecobematabiabarutsijawatsi. ¿Jipatsa nexata pacajamatabëcuenecowëbia- exana, bajarapaliwaisiweucia pane-ajamatabëcuenecowëbiwinexa? Paxamë pajumexaniataneme picani Dioso papecawecua-ajibia-exanaejawa panijaneconimi Jesucristo pejamatabëcueneta. ² Nexata, caejumeyo pacayanijobatsi. ¿Detsa xua yabara pacatsijamatabëjunua Espíritu Santo? ¿Panejumecowënëtsixae tsaja Dioso penajumecopatsiliwaisi Moisés-pijinëta? ¡Jume raja! Biji rajane, Espíritu Santo pacatsijamatabëjunua, panejumexaniataexae Jesús peliwaisi. ³ Paxamë saya bitso pane-ajamatabëcuenecowëbiwi. Bepijiayo saya pajumexaniataneme piamatamobiliwaisi. Pamatacabi pasiwanajamatabëcuenecopabame Jesucristojawabelia, bajarapamatacabi Espíritu Santo pacatsijamatabëjunua, papecajamatabëcueneyawenonabiabinexa, Dioso pejitsipaecuenia panejinawana-paenexa. Bajarapacuenia Espíritu Santo pacato-exanae-ata, ¿detsa xuajitsia aeconoxae panajamatabëxainame pane-ajibia-exanaejawa Dioso pijacuene

Espíritu Santo papecajamatabêcueneyawenonaejawami, pane-exanaejawata pexaniacuenepanesaêta? ⁴ Itsamonae baja cajena pacabejiobia-exanapona panejumexaniataexae Jesús peliwaisi. Nexata, itsa pacopabijitsipame Jesús peliwaisi, panejumexaniataenexa itsaliwaisi, bitso panacuerotsipame. Itsiata, xanê yapêtaniji apopenenacuerotsijawanexa, tsipaji caenê Jesús pejamatabêcueneta Dioso pacawecua-ajibia-exana panijaneconimi. ⁵ Icatsia pacayanijobatsi. Ponê pacarajuta Espíritu Santo papecatsijamatabê-ecaenexa, Ponê-ata pacatsita-exana pinijicuenejawanê^x paxamêtuatujêta, ¿bajaraxuanê tsaja Dioso pacato-exana panejumecowênêtabiabixae Dioso penajumecopatsiliwaisi Moisés-pijinêta? Itsa jume, ¿pacato-exanabiaba tsaja panejumexaniataexae paliwaisi pacatsipaebatsi, Jesucristo peliwaisi? Panejumexaniataexae raja Jesucristo peliwaisi, bajarapacuenia pacato-exana.

**Abraham-pijinë-ata Dioso aneconijibia tanetsi, pejumexaniataexae
Dioso pejumaitsijawa najumecapanepaeya**

⁶ Pacuenia Dioso aneconijibia pacatane panejumexaniataexae Jesús peliwaisi, bajarapijinia pacuenia Abraham-pijinë Dioso aneconijibia tanetsi, pejumexaniataejamatabêcuene najumecapanepaeya pejumaitsi-jawatsi.⁷ Bajaraxuata, paxamê bepapapêtaneme mapacueneye: Pamona apopemomoxi-ata picani, naexana Abraham-pijinë bepemomoxi, najêpaeya pejumexaniataexae Dioso najumecapanepaeya pejumaitsijawa. ⁸ Dioso peyapêtaexae, itsamatacabijawabelia apojudíowi-ata aneconijibia petaejawanexa pejumexaniataejamatabêcuene yabara, pejumeliwaisibaxutota tajêwelia jumaitsi mapacueniaje: «Tacatsipaebiliwaisi xamê nejumexaniataexae, daxitanacuanêpijiwi-ata natoyapêtaena pexaniacuenia^z tayawenonaejawanexa, xamê tanejumexaniataejamatabêcuenemê», jai Dioso pejumeliwaisibaxutota. ⁹ Nexata baja, waxaitsi xaniawaetsia yapêtanetsi mapacueneye: Bajayata, Abraham-pijinë Dioso pexaniacuenia yawenonatsi, aneconijibianua tanetsi pejumexaniataejamatabêcuene.^a Bajarapijinia pacuenia maparuaeye, pamona jumexaniatane Jesucristo peliwaisi, judíowi, apojudíowi-ata, Dioso pexaniacuenia yawenonaenatsi, aneconijibianua taenatsi.

¹⁰ Itsiata baitsi jane, pajiwi natocanaêjêta Dioso aneconijibia petaenexatsi pejumecowênêtsixae Dioso penajumecopatsiliwaisi Moisés-pijinêta,

x 3:5 *pacatsita-exana pinijicuenejawanê*: Majotaje yapêtanetsi Pablo apoyabarajumaitsi pinijicuene pexanaejawanê petsita-exanaejawa. Biji rajane, yabara jumaitsi papinijicuenejawanê Dioso to-exana pesiwanajamatabêcuenecopatsiwi Jesucristojawabelia. **1)** Pijaneconimi wecua-ajibia-exana. **2)** Espíritu Santo tsijamatabê-ecaeya-exanatsi. **3)** Espíritu Santo pejamatabêcuenecaêjêpaeya-exanaejawatsi pejinawanapaenexa Dioso pejitsipacuenia. **4)** Espíritu Santo jamatabêcuenecaêjêpaeya-exanatsinua 1Cor. Capitulo 12-14-bejewata. **y 3:6** *pejumexaniataejamatabêcuene ... pejumaitsiyawatsi*: Taema Gén. 15:6; Rom. 4:3. **z 3:8** *natoyapêtaena pexaniacuenia*: Pacujinae Dioso yapêtaeya-exana Abraham-pijinë pexaniacuenia peyawenonaenexa daxitanacuanêpijiwi pemomo pejamatabêcuene, Abraham-pijinë xaniawaetsia abaxê apoyapêtae xua yabara Dioso jumaitsi. Itsiata, bajarapexaniacuenia yabara, Pablo yapêtaeya-exana Galacia nacuapijiwi Jesucristo pesiwapêpacujinae daxitanacuanêpijiwi, pacuenia Dioso aneconijibia tane Abraham-pijinë pemomo, Jesucristo, pejamatabêcueneta. **a 3:9** *pejumexaniataejamatabêcuene*: Bajayata, Abraham jumexaniatane Dioso pexaniacuenia peyawenonaejawanexa daxitanacuanêpijiwi pemomo/Cristo pejamatabêcueneta. Maparuaeye pijinia jiwi jumexaniatane Dioso peyawenonaenexatsi Abraham-pijinë pemomo pejamatabêcueneta. Caēju-mexaniataejamatabêcuene xaina nexata.

bajarapajiwi jamatabëcuenenacuerotsiana, tsipaji Dioso tocaējēta penaneconitsia-exanaejawanexatsi. Bajaraxua yabara Dioso pejumeli-waisibaxutota jumaitsi mapacueniaje: «Pamonae apojumecowënëtsica-panepae tsane daxita pacuenia itorobatsi Dioso penajumecopatsiliwaisi Moisés-pijinēta, bajarapamonae cajena Dioso naneconitsia-exanaenatsi^b», jai Dioso pejumeliwaisibaxutota. ¹¹ Bajaraxua yapētanetsi jumenapebet-siaya pejumaitsiyawa Dioso aneconijibia apopetaejawanexa itsajiwi-ata, bajarapaliwaisi pejumecowënëtsijamatabëcuene. Biji rajane, Dioso pejume-liwaisibaxutota pejumaitsiyawa mapacueniaje: «Pajiwi siwanajamatabëcuenecopatsiana Diosojawabelia peto-exanaejawanexatsi najumecapanepaeya pejumaitsiucuenia, bajarapajiwi aneconijibia Dioso taenatsi. Xainaenanua maticabi apopewerewerecaejawa»,^c pejaiyawa Dioso pejumeliwaisibaxutota. ¹² Dioso penajumecopatsiliwaisi Moisés-pijinēta aponacayapētaeya-exanae wajasiwanajamatabëcuenecopatsijamatabëcueneta Diosojawabelia waja-wecuapanepaejawanexa, bajaraPonē wajanacananeconitsia-exanaeyaniwa. Biji rajane, bajaraxua yabara Dioso pejumeliwaisibaxutota jumaitsi mapacueniaje: «Pajiwi matapania jumecowënëtsicapaneapaena daxita pacuenia itorobatsi Dioso penajumecopatsiliwaisi Moisés-pijinēta, bajarapajiwi capaneapaenatsi Diosojawabelia. Aponaxuabi tsane Diosowecua^d», jai Dioso pejumeliwaisibaxutota.

¹³ Itsiata baitsi jane, Cristo nacacapanepa baja Dioso penajumecopatsiliwaisi Moisés-pijinēta wajanacananeconitsia-exanaejawaminexawecua. Bajarapacuenia Cristo nacato-exana itsa nacopata bitso pibisianeconi bepexainaenëcuenia waxaitsi wajaneconijamatabëcuene, perutsinexatsi cruzata, pecobematabiabaratsijawatatsi. Bajarapacuenie yabara Dioso pejumeli-waisibaxutota pejumaitsiyawa mapacueniaje: «Pajiwi petēpaenexa rutatsi pijaneconijamatabëcuene athëbëyo naejawata, bajarapajiwi bitso naneconita Dioso pitabarata»,^e pejaiyawa Dioso pejumeliwaisibaxutota. ¹⁴ Nexata, Cristo nacopata bitso pibisianeconi bepexainaenëcuenia peneconitsinexatsi, juya bajarapacuenia apojudiowi-ata penatotaenexa papexaniacuene^f Dioso rajuta Abraham-pijinējawabelia. Bajaraxuata, daxitatsi wajasowanajamatabëcuenecopabiwi Jesucristojawabelia, judiowi, apojudiowi-ata, Dioso aneconijibia nacatane. Nacarajutanua Espíritu Santo najumecapanepaeya pejumaitsiucuenia.

Dioso penajumecopatsiliwaisi Moisés-pijinēta apowecua-ajibia-exanae najumecapanepaeya Dioso pejumaitsiyawa Abraham-pijinējawabelia

¹⁵ Tajamonae, xaniawaetsia paneyapētaenexa xua pacatsipaebatsi Dioso najumecapanepaeya penajumeliwaisicajonejawa yabara Abraham-pijinējawabelia pexaniacuena peyawenonaenexatsi, canaējëtsianatsi mapaliwaisitaje: Mapanacuataje jiwitonē, pecobecowë pexainaenë, petē-paewajënae bayaquinabuata pecobecowë yabara, peyapētaeya-exanaenexa pexi, xaniawaetsia pewënamuto pecobecowë penatsicobetsanaenexa.

b 3:10 *Dioso naneconitsia-exanaenatsi*: Taema Deut. 27:26; Mt 25:41; 1Co 16:22. **c 3:11** *Taema Habacuc 2:4*. **d 3:12** *Aponaxuabi tsane Diosowecua*: Taema Lev. 18:5. **e 3:13** *bitso naneconita Dioso pitabarata*: Taema Deut. 21:23. **f 3:14** *penatotaenexa papexaniacuene*: Taema Gén. 15:6.

Nexata, pecobecowë pexainaenë peyaquinaeliwaisi pewateretsicujinae, penawënëyaquinarutsicujinae,⁸ matapania jumenamatamota. Nexata, acuenebi itsajiw-ata peyaquinaeliwaisimi piamatamobia-exanaenexa, peliwaismataropotsinexa-ata. ¹⁶ Bajayatami, copiaya Dioso najumecapanepaeya jumaitsi Abraham-pijinëjawabelia daxitanacuanëpijiwi pexaniacuenia peyawenonaenexa,^h pemomo pejamatabëcueneta. Baitsi, apoyawenonae-yapaebi daxita pemomoxi pejamatabëcueneta. Pemomo itsa jai, tajëwelia caenë Cristo yabara jumaitsi. ¹⁷ Paliwaisi pacatsipaebatsi, ma-itsije: Bajayatami, copiaya Dioso tajëwelia najumecapanepaeya jumaitsi Abraham-pijinëjawabelia peyawenonaejawanexa daxitanacuanëpijiwi pemomo pejamatabëcueneta. Nexata, papexaniacuenejawanë Dioso yawenonaeya-paeba Abraham-pijinëjawabelia, peto-exanaponaejawata pejumaitsiyawa namatamotsia-exana.ⁱ Bexëjawabelia, icatsia cotocaewi cuatrocientos treinta pawaijecujinae, Dioso najumecopata Moisés-pijinëta paliwaisi jiwi jumecowënëtanapaejitsia, Dioso peyawenonaenexatsi. Itsiata, bajarapacotocaewiliwaisi apo-ajibia-exanae payawenonaeyapaebicueneta sua Dioso copiaya najumecapanepaeya pejumaitsiyawa Abraham-pijinëjawabelia. Itsa cotocaewiliwaisita najume-amatamobia-exanaejitsipa copiyapijiliwaisimi, nexata Dioso penajumetsënëtsinë tsipae. ¹⁸ Dioso jiwi itsa aneconihibia taejitsipa, pejumecowënëtsixae penajumecopatsiliwaisi Moisés-pijinëta, nexata ajumematamobi tsipae paliwaisi Dioso tajëwelia najumecapanepaeya jumaitsi Abraham-pijinëjawabelia, peyawenonaenexa daxitanacuanëpijiwi pemomo pejamatabëcueneta. Itsiata, Dioso aneconihibia tane Abraham-pijinë, pejumexaniataexae najumecapanepaeya pejumaitsicueniatsi. Nexata, yapëtanetsi Dioso aneconihibia jiwi petaejawa, pejumexania-taexae Jesús peliwaisi, apojumecowënëtsi-ata Dioso penajumecopatsiliwaisi Moisés-pijinëta.

Pajamatabëcuene yabara Dioso peliwaisi najumecopata Moisés-pijinëta

¹⁹ Nexata, itsa matatoxenetsia jumenamatamota baja, paliwaisi Dioso tajëwelia najumecapanepaeya jumaitsi Abraham-pijinëjawabelia, wajanacapanepaenexa wajaneconiwequa, ¿detsa xuanexa nacatoxanepana Dioso penajumecopatsiliwaisi Moisés-pijinëta? Dioso mataropotsia naca-tonajumecopata bajarapaliwaisi, wajanacueneyapëtaenexa pibisiacueneta waja-exanawanapaejawa Dioso pitabarata. Nacatonajumecopatanua

g 3:15 *penawënëyaquinarutsicujinae*: Mapacueniaje Dioso nawënëyaquina sua najumecapanepaeya jumaitsi Abraham-pijinëjawabelia. Copiaya najumecapanepaeya pejumaitsiyawata, Gén. 12:1-3 Dioso yawenonaeyapaeba daxitanacuanëpijiwi Abram pemomo pejamatabëcueneta. Nexata, Dioso apopenajumetsënëtsinëxae ëpijumeta jumenamatamota pacuenia penawënëyaquinarutsijawa. Xuacujinae, Gén. 15-jawata Dioso najumenamatamotsia-exana najumecapanepaeya pejumaitsiyawa Abraham pebeyaxuabijawata dajubi. Dioso peponaexae bajarapadajubitupanëtuatuajëalia, bepenawënëyaquinaejawa. Icatsia, Abraham petonamatamotsinexatsi sua najumecajunua Diosojawabelia, daxita Abraham pijamonae pebiwi nabo-upiperabëcaucubia-exana. Bajaraxua bepenawënëyaquinarutsijawa israelitawi. **h 3:16** *pexaniacuenia peyawenonaenexa*: Papexaniacueneta Dioso yawenonaeyapaeba mapanacuapijiwiye Abraham-pijinë pemomo pejamatabëcueneta, yabaracuaicuajai Dioso aneconihibia petaejawanaxa mapanacuapijiwiye Cristo cruzata pesiwatëpaejawata peneconimatamotsinexa. **i 3:17** *namatamotsia-exana*: Taemanua Gén. 15:8-17 neyapëtaenexa itsacuenianua Dioso penajumenamatamotsia-exanaejawa Abraham-pijinëjawabelia.

wajajumecowënétawanapaenexa matapania Abraham-pijinë pemomo, Cristo, pepatsimatacabitsicajawabelianexa, ponë yabara tajêwelia Dioso najumecapanepaeya jumaiti Abraham-pijinëjawabelia, peyawenonaenexa daxitanacuanëpijiwi. Nexata, yapëtanetsi Dioso penajumecopatsiliwaisi Moisés-pijinëta beweliacuenia jumenamatamota, Dioso najumecapanepaeya pejumaitisijawawecua Abraham-jawabelia, tsipaji pijacuata Dioso apojumaiti Moisés-pijinëjawabelia. Itoroba saya ángelewí Moisés-pijinë petsipaebínexatsi. Nexata juya, Moisés-pijinë tsipaeba jiwijawabelia. Moisés-pijinë-ata jiwi petocuaicuaijinë Diosojawabelia. ²⁰ Itsiata, pamatacabi Dioso najumecapanepaeya jumaiti Abraham-pijinëjawabelia pepacuenie peyawenonaejawanexa daxitanacuanëpijiwi pemomo pejamatabëcueneta, apo-itorobi ángelewí petsipaebínexatsi. Biji rajane, Dioso pijacujaya jumaiti Abraham-pijinëjawabelia.

Cristo copiarucaeya-exana wajajumecowënëtsijawami
Dioso penajumecopatsiliwaisi Moisés-pijinëta,
Dioso aneconijibia wajanacataenexa

²¹ Pacayanijobatsi mapacueneye: ¿Dioso paliwaisi cotocaewi najumecopata Moisés-pijinëta, yacaranata meta papexaniacuenie yawenonaejitsia Abraham-pijinëjawabelia xua copiaya najumecapanepaeya jumaiti? ¡Jume baja cajena! Jiwi itsa cuenecaëjëpaejitsipatsi pejumecowënëtsicapane-paejawa Dioso penajumecopatsiliwaisi Moisés-pijinëta, Dioso caëjësipa bajarapacuenia jiwi aneconijibia petaenexa. Itsiata, jiwi apopecuene-caëjëpaeaxatsi pejumecowënëtsicapane-paenexa bajarapaliwaisi. Nexata, Dioso jiwi apotae aneconijibia. ²² Biji rajane, paliwaisi Dioso najumecopata Moisés-pijinëjawabelia daxita mapanacuapijiwije tonaexanatsi penaneconitsia-exanaeliwaisinexatsi Diosojawabelia. Bajaraxuata, jinawana bepenaneconitsiwi. Itsiata, pamonae siwanajamatabëcuenecopabiana Jesucristojawabelia,^j Dioso capane-paenatsi baja pacuenia tajêwelia najumecapanepaeya jumaiti Abraham-pijinëjawabelia.

²³ Itsiata, Dioso wajanacayapëtaeya-exanaewajënaeya wajanacapanepaejawanexa Cristojawabelia wajasivanajamatabëcuenecopatsijawata, bajarapamatacabi Dioso penajumecopatsiliwaisi Moisés-pijinëta naxaina bewajananeconitsiwi, pejitsipaecuenia wajanaca-itorobabiabinexa Cristo pepatsimatacabitsicajawabelia, matapania nacayapëtaeya-exanaena pacuenia jane baja Dioso aneconijibia nacataejitsia. ²⁴ Nexata, Dioso penajumecopatsiliwaisi Moisés-pijinëta nacatonaexana wajanacamatacaponaeliwaisi, Cristo penaexanaematacabijawabelia. Bajarapaliwaisi nacajamatabëcuene-eweta, pacuenia pejewaxi pewetsijiwi ba-eweta pibisiacuenie pexanaeyaniwa. Bajarapijinia pacuenia, bajarapaliwaisi wajanacacuenie-itawetsijawata, nacajamatabëcuenematacapona wajasivanajamatabëcuenecopatsinexa Cristojawabelia. Nexata, Cristojawabelia wajasivanajamatabëcuenecopatsicujinae, Dioso aneconijibia nacatane. ²⁵ Aeconoxae baja Cristo pepatsixaetsica, nacawecucopiaruca paliwaisi

j 3:22 siwanajamatabëcuenecopabiana Jesucristojawabelia: Jesucristo bebaupanë corral-jawata. Taema Jn 10:7-9.

nacatonaexana bewajanaca-itorobinē wajanacacujarubinexa, Dioso penaju-mecopatsiliwaisi Moisés-pijinēta.

²⁶Nexata, Cristo pepatsixaetsica, aeconoxae baja padaxitamē, judfowi, apojudfowi-ata, panaexaname Dioso papeximē, panesiwanajamatabē-cuenecopabixae Cristo Jesús-jawabelia. ²⁷⁻²⁸Nexata baja, daxita paxamē Espiritu Santo pacajia Jesucristojawabelia bepapecabautizabiwicuenia, becaenē panenaexanaenexa bajaraPonējawabelia. Nexata, pacajamatabē-cuenexatata Cristo pejamatabēcuenē, pejanajamatabēcueneta panejinawana-paenexa Cristo cuenejēpaeya. ¡Bajaraxuata, becaejiji panataeyabiabare daxita paxamē panesiwanajamatabēcuenecopabiwi Jesucristojawabelia! Xaniajai, paxamējawata itsamonae jinawanapa judfowi, apojudfowi, itsamonae amoneya petonacuenebiwi, itsamonae pijinia amoneya apopetona-cuenebiwi itsajiwi-ata, itsamonae petiriawi, pebijijiwi-ata. ¡Bajarapacuenia panawecua-acuene-itothia-atamē, pētsa panawecuanatsaname bajara-xuanē yabara, bijiaya panetaeyaniwa itsajiwi-ata pijacuene yabara! ¡Biji rajane, asiwaya panataema, tsipaji raja padaxitamē becaenē panaexaname Cristo Jesús pejamatabēcueneta! ²⁹Bajarapacuenia Cristo papijajiwixamē, nexata Abraham-pijinē pepocuene bepapemomoximē^k Dioso pacatane. Nexata, xua Dioso tajēwelia najumecapanepaeya Abraham-pijinējawabelia yawenonaeypaeba pemomo pejamatabēcueneta, bajaraxua-ata baja paxamē pajudfowimē, apopajudfowimē-ata, Cristo pejamatabēcueneta pacanacopatame.

**Jesús pijajiwi wecuacopiarucatsi amoneya
petonacuenebiwicuenē, juya penaexanaenexa Dioso pexi**

4 ¹Mara pacuenia jitsipajē patacajumaitsinexaje: Pejewaxinēyo paxa itsa wecuatēpatsi, riconēmi-ata, abaxē aporajutsitsi pecobecowē-jawanēmi pepitsinexa pijajawanexa, tsipaji abaxē pejewaxinēyo. Biji rajane, bajarapapejewaxinēyo cuenejēpa pamonaē amoneya petona-cuenebiwi, tsipaji jumecowēnētsiaponapona pijamonaējiwi pitorobabi-cueniatsi, daxitacuene pexainaenēnexa-ata paxapijinēmi pecobecowē. ²Bajarapapejewaxinē ewetabiabatsi pewetsijiwitsi penaweretsijawabe-lia. Nexata, xuanē-ata pijajawanēnexa, to-ewetatsi abaxē. Matapania paxapijinēmi petocājētsimatacabitsijawabelia, tocopatatsi jane baja pewetsinexa pijacuata. Pewetsijawatsinua baja copatatsi. ³Bajarapijini pacuenia, waxaitsi-ata nacato-exana. Itsa abaxē apopatsi Cristo, apoyapētaetsi pexaniajailiwaisi, Jesucristo peliwaisi. Bajaraxuata, waxaitsi jinawanapatsi bepejewaxicuenia. Jamatabēcuenē-ewetsiaya jinawanapatsi mapanacuapijiliwaisianē^l penaewetsicuenia. Pacuenia petuxanewi itorobabiaba amoneya petonacuenebiwi, bajarapacuenia nacajamatabēcuenē-itorobabiaba. ⁴Itsia baitsi jane, itsa copiapata baja Dioso pecaējētsimatacabi, itorobica pexēnato mapanacuayabetsicaje,

k 3:29 *bepapemomoximē*: Pablo imata nacayapētaeya-exana pamonaē pejumexaniataewi Jesucristo peliwaisi naexana bepemomoxi Abraham-pijinē, tsipaji caepejumexaniataecuenē xaina bajaraponējawabelia. Gál. 3:6-9; 16-18. l 4:3 *mapanacuapijiliwaisianē*: Mapajumeyota Pablo cajunua daxitawirialiwasianē jiwi Penaewetsijawanē yabara; Dioso penajumecopatsiliwaisi Moisés-pijinēta, jiwi pijasalinailiwaisi pecujarubicueniatsi-ata.

penaexanaenexa judíowiwiwariwata. BajaraPonë naexana paepato Dioso penajumecopatsiliwaisi Moisés-pijinëta, itorobaponapona, ⁵ bajarapacuenia wajanacacapanepaenexa bajarapapitorobiliwaisiwecua, bitso wajanacajamatabëcuenebarëyaya-exanaenexa, wajanaca-exanaexae Dioso pexicueniatsi.^m ⁶ Nexata, Dioso pexitsi wajanaca-exanaexae, Pexë nato pija-Espíritu Santo^a nacato-itorobica jane baja, wajanacatsijamatabë-ecaenexa. Nexata, Espíritu Santo pejamatabëcueneta: «¡Axa!», nacajaiya-exana Diosojawabelia. ⁷ Nexata, Dioso pexixaetsi, aeconoxae baja apojinawanapaetsi wajanacajamatabëcuene-itorobicuene mapanacuapijiliwaisita.^o Biji rajane, Dioso pexi wajanaca-exanaexae, pexicuenia jinawanapatsi. Nexata, itsamatacabijawabelia xua Dioso rajutsiana Cristo waxaitsi-ata nacarajutsiana wajanaxainaenexa.

**Pablo siwabëjai Jesús peliwaisi pejumexaniataewi,
caewëalia pejumecowënëtsixae pijacuenemi**

⁸ Paxamë, apopajudíowimë, pamatacabi abaxë paxamë Dioso apopayapëtaemë, pa-exanawanapame papeca-itorobicuenia^p bediosowi^q panetaewijawabelia. Bajarapamonae cajena apodiosowi, saya peyamaxë-itojorobiwi. Nexata, panacuenecueratabiabame. ⁹ Itsiata baitsi jane, aeconoxae baja paneyapëtaecujinae pepo-Dioso, ¿detsa nexata xuajitsia icatsia caewëarena pajumecowënë-tame piamatamobiliwaisi? ¿Detsa xuajitsia, Dioso papexi-atamë, panacopatame icatsia panejumecowënëtsinexa mapanacuapijiliwaisi bepanijatuxanenëcuenia? ¹⁰ Paxamë, tsitecaeya payaiyataneme Dioso papecato-itapetsimatacabianë, papecato-itapetsijumetonë,

m 4:5 *pexicueniatsi*: Pacuenia Espíritu Santo nacoxtitsia-exana María, judíowata, Dioso pexë nato penaexanaenexa jiwitonëcuenia, (Lc 1:34-35), bajarapacuenia Espíritu Santo nacanaexanaeya-exana bepejananaexanaejiwiyocuenia Dioso pexinexatsi, wajasiwanajamatabëcuenecopatsijawata Jesucristojawabelia. Jn 3:1-18. **n 4:6** *Pexë nato pija-Espíritu Santo*: Dioso pejumeliwaisi nacayapëtaeya-exana pacuenia waxaitsi jiwitsi xainatsi acueyabi xuabeje caejijiwiyotsi: Wajaperabëto, wajanamatabëcuene, wajajumape/waja-espiritu. Bajarapijinina pacuenia, itsi Dioso; acueyabi ponëbeje tsaponapona, caenë-ata: Ponë naitajëtabiaba Jesús paxacuenia, ponë naitajëtabiaba Dioso Pexë natocuenia, ponë naitajëtabiaba Espíritu Santocuenia, Dioso, Jesús-beje pija-Espíritu. Daxita caenë Dioso yabara jumatsi. Bajaraxuata, Pablo itsa nacayapëtaeya-exana Dioso wajanacato-itorobinexa Jesús pija-Espíritu Santo, saicaya Espíritu Santo yabara apojai. Caë-Espíritu Santo baja tsipaji. **o 4:7** *mapanacuapijiliwaisita*: Bajarapajumecowënëtsinexa, Dioso penajumecopatsiliwaisi Moisés-pijinëta, wajasalinailiwaianë-ata; daxitawirialiwaianë canacuenebatsi wajana-ewetsinexa, xaniawaetsia wajajinawanapaenexa. **p 4:8** *pajumecowënëtabiabame papeca-itorobicuenia*: Galacia nacua pejinawanapaewi, pamona apojudíowi, xainabiaba jumapecataeya pexanaenëanë, bediosowicuenia petaenexa. Nexata, pepoDiosowecua siwanajamatabëcuenecopatabiaba bajaraxuanëjawabelia, peyawenonaenexatsi pewajëcaecuenia. Bajaraxuanë pewetsiwi pitorobicueniatsi jumecowënëtabiabanua. Bajarapijinina pacuenia, judíowi-ata. Bajarapamonae pepoDiosowecua siwanajamatabëcuenecopatabiabanua Dioso pitorobiliwaisi pijacuata pejumecowënëtabiabiawabelia, pijasalinailiwaianua (Mc 7:7-9), bajarapacuenia Dioso peyawenonaenexatsi. Bajarapijinina pacuenia, waxaitsi jiwitsi exanatsi. PepoDiosowecua siwanajamatabëcuenecopatabiabatsi wajanëjawabelia, wajanatsi-atsobicuenejawalia, penajorobiwi wajanaca-itorobiliwaisinëjawabelianua, pexaniacuene wajataewanapaenexa. Bajaraxuata, Pablo bitso bëjai, tsipaji Dioso pexaniacuene nacato-exanae-ata, canajëtabiabatsi wajana-ewetabiabinexa wajasalinailiwaitsita Diosonejewa. **q 4:8** *bediosowi*: Taema Isa. 37:19; 1Co 8:4-6. Bajarapajumecowënëtsinexa jumapecataeya pexanaenëanë, pawajianë-ata matawajibatsi. Baitsi, daxita xuajawabelia najamatabëcuenerutatsi, wajanacayawenonaenexa Diosowecua, bajaraxuanë bediosowi pepoDioso pitabarata.

papecato-itapetsiwainē-ata. Bajarapacuenia pa-exanabiabame pafies-tajawanē^r Dioso paca-itoroba panexanaenexa penajamatabēcuene-itajētsinexa Dioso papijawimēcuene. ¹¹ Bajarapaliwaisi yabara, bitso pacasiwanajamatabēxainatsi, tsipaji paxamē yabara jamatabējumaitsinē: «Ayaicuenia Jesucristo peliwaisi tatsipaebabiabijawa bajarapamonaejawabelia, saya meta nacueratajē», jamatabējanē belia paxamē yabara, bajarapacuenia panecasaētsawanapaexae^s pane-exanabiabijawa.

¹² Tajamonae, paca-itorobatsi panejinawanapaenexa pacuenia xanē ponaponajē, siwabējanēnejewa tajumecowēnētsijawa judiowi pijaperujuliwaisi. Pamatacabi copiaya pacatsipaebatsi Jesús peliwaisi, ponaponajē apojudionēcuenia paxamētuatuajēta. Bajarapacuenia ponaponae-atanē, apopane-itsacueniabinē bajaraxua yabara. ¹³ Paxamē baja cajena xaniawaetsia payapētaneme patanecopiapitsijawamē. Pacujinae paxamējawata ta-awitanenē patajopajē, bajarapamatacabi copiaya pacatsipaebatsi pexanialiwaisi, Jesucristo peliwaisi, papecacapanepaliwaisinexa Diosojawabelia, paliwaisi picani abaxē apopayapētaemē. ¹⁴ Pawitane yajawapatajopajē paxamējawata, bajarapawitane yabara picani bepanenawecuacapisapame. Itsiata baitsi jane, bijiata apopanetaemē. Apopanenawecua-itorobimēnua patacawecuaponaenexa itsajawabelia. Biji rajane, xaniawaetsia panecopiapi-tame be-ángelnē Dioso papecato-itorobinēcuenia, itsa jume, beCristo Jesús panecopiapitsicuenia. ¹⁵ Pacayanijobatsi. ¿Detsa baja aeconoxae pa-itsimē panejamatabēcuenebarēyajawami xanējawaberena, pexaniacuenia patanecopiapitsijawamē? Bajarapamatacabi itsa pacawajētsipatsi pane-itaxuto patane-asiwaxaemē, panebarēyajamatabēcuene patanerajutsinexamē,^t pana-itaxutojutsipame, juya patanerajutsinexamē. ¹⁶ Bajarapacuenia pane-asiwa-atamē, aeconoxae meta bepanijawajabitsaēnēnē panetaneme patacatsipaebixae pexaniajailiwaisi, Jesucristo peliwaisi, pacuenia baja copiaya pacatsipaebatsi.^u

¹⁷ Pamonaē saicayaliwaisi Jesucristo peliwaisiwecua pacatsipaebapona, najamatabēxainabiaba pexanaenexa xua yabara pasiwabarēyamējitsia bajarapamonae. Itsiata baitsi jane, bajarapamonae aponajamatabēxainae papecatsipaebinexa pexaniajailiwaisi papecacapanepaliwaisinexa

r 4:10 *fiestajawanē*: Bajarapafiestajawanēta judiowi exanabiaba Dioso petocaējētsicueniatsi. Nexata, Dioso pewēnēta penacaetuatsijawawecua, pematatsēnē itsajawata nacuera-ewetabiaba. Itsajawata, xaeayabiaba xua Dioso tocaējētatsi pexaenexa. Itsajawata, bobērētōxita jinawanapabiaba. Itsajawata-ata, capatabiaba ofrendacuenia perajutsinexa Diosojawabelia pijapabita penot-sijawanē, pijadajubiyajuwēnēwi-ata. Bajarapacuenia judiowi exanabiaba, Dioso pejumaitsixaetsi pexaniacuenia peyawenonaenexatsi, xaniawaetsia itsa exanabiaba. Itsiata, pamonaē siwanajamatabēcueneocopaba Jesucristojawabelia, Dioso pexaniacuenia yawenonaeyapaebatsi Jesucristo pejamatabēcueneta, exanaenējewa bajarapafiestajawanē. **s 4:11** *bajarapacuenia panecasaētsawanapaexae*: Pamonaē apojudiowi najuacasaē tsawanapae pexanabiabinexa judiowi pijafiestajawanē pecaējētsimatocabianē Dioso pesiwabarēyanexatsi. Orijiibia, yayiataeyabiaba itsamatatabianē pijacuata penato-itapetsimatocabianē bajarapamatabecabianēwecua. **t 4:15** *pane-itaxuto patanerajutsinexamē*: Itsamonae canaējēta pacuenia Pablo ayaicuenia aitaixutobeje pepatsimatatabita Galacia nacuata. Nexata, pitaxutotsabanaexae, jiwi ya-aitajitsibitsi. Itsamonae juya canaējēta pacuenia comparación-cuenia canacueneba, pesiwanajamatabēcuene-itajētsinexatsi bitso piasiwajawatsi, perajutsijawatatsi xua jiwi bawecua-asiwa picani. **u 4:16** *copiaya pacatsipaebatsi*: Taema Gál. 1:8-9.

Diosojawabelia. Bajarapamonae jitsipa paxanë patanewecuanasaicayabinexamë, bajarapamonae juya panejamatabëcuenejëpaenexa. ¹⁸ Xanepana rabaja picani itsamonae panesiwanajamatabëxainaejawa paneyawenonae-jawanexa yaiyataeya pane-asiwajamatabëcuene, bajarapamonae itsa pexaniacuenia jamatabëpacayawenona, bepacayawenona itsajamatabëcuene xainaenejewa panepëya. Bajarapacuenia xanëjawaberena apopaneto-exanaemë. Pacuenia ajena matacabita asiwa panecopiapitame, bajarapacuenia tsiteca bepane-asiwamë tsabiabi ajibinë tsarucacae-ata. ¹⁹ Xanë juya bajarapacuenia apopacato-exanaetsi. Biji rajane, paxamë pacatanetsi bepataximë. Nexata, pacuenia petiriwa, itsa wixanotatsi penacueto, pewixaecobexae bayanajamatabëxaina, bajarapacuenia xanë-ata bitso pacasiwanajamatabëxainatsi panejamatabëcuenejëpaejawabelia pacuenia Cristo jamatabëcuene-itsi. ²⁰ Bajaraxuata, bitso picani jitsipajë aeconoxae panitararata asiwaya patacadjumaitsinexa. Itsiata, tajë paxamëwecua taponaponaexae, bitso patacasiwanajamatabëxainaexaenua beta-anaepanænecuenia pacadjumaitsi. Itsiata, apoyapëtaenë paliwaisicuenia patacadjumaitsinexa.

**Pablo cuenecataeya canacueneba Agar-pijiwa,
Sarapijiwabeje peliwaaisicuenia, petsitajëtsinexa paliwai
apobejumecowënëtsi Cristo peliwai pecañawanapaewi**

²¹ Xanë pacayanijobatsi, paxamë panejitsipaewi panejumecowënëtsijawa Dioso penajumecopatsiliwai Moisés-pijinëta, Dioso aneconijibia papecataenexa. ¿Payapëtaneme xua pepacuene Dioso jumaitsi Moisés-pijinë peyaquinaebaxutonëjawata? ²² Bajarapaliwaisijawata jumaitsi pacuenia bajayata Abraham-pijinë xaina anijanëbeje pexënatobeje. Caenë xaina Agar-pijiwata, powa natocomuata amoneya petonacuenebaponaponaewanexatsi pijabota. Bajaraxuacujinae, icatsia Abraham-pijinë itsanë xaina Sarapijiwata, pepopijawajawata jane baja. Bajarapowa aponatocomuatsi, amoneya petonacuenebaponaponaewanexatsi. ²³ Panacuetonëyo Agar-pijiwa, ^w nacoxta Abraham-pijinë pejamatabëcueneta, bajaraponëyo naexana pebi, pijawabeje, pijacuata penatojitsipaejamatabëcueneta. Itsiata baitsi jane, panacuetonëyo Sarapijiwa, ^x nacoxta, bajaraponëyo naexana Dioso najumecapanepaeya pejumait-sicueniatsi ^y pecopiapatsinexa.

²⁴ Bajarapowabeje peliwaaisijawata nacetocuenecatane anijaliwaisibeje-cuenia, Dioso anijatobeje penajumeliwaisicajonejawa jiwijawabelia. Nexata,

v 4:21 *Moisés-pijinë peyaquinaebaxutonëjawata*: Judíowi pecanaëjëtsicue *«pitorobiliwai-Ley»* yabara. Bajarapamonae xaina pecanaëjëtsijawata anijamatabëcueneliwaisibeje. 1) Dioso pena-jumecopatsiliwai Moisés-pijinëta. 2) Daxita pabaxutonë Moisés-pijinë peyaquinaebaxutonë – Génesis, Éxodo, Levítico, Números, Deuteronomio-ata. Bajarapabaxutonëjawata yabaracuai-cuajai anijanëbeje pexanaecue yabara, Abraham, Moisés-ata. Bajarapacincó pabaxutobeje judíowi wënëruba «Torah». w 4:23 *Agar-pijiwa*: Bajaraponëyo pewënë Ismael. Taema Gén. 16:15. Bajarapowa badajubicuenia amoneya petonacuenebiwa pijatuxanewa, Sarapijiwami. Taema Gén. 16:1,6; 21:10-14. Ismael Agar pexënatoxae, bajaraponë-ata badajubicuenia amoneya petonacuenebinëxena paxa. Bajaraxuata, pena pecapitsapaejawata, bajaraponë-ata wecuapona Abraham-pijinë. x 4:23 *Sarapijiwa*: Bajaraponëyo pewënë Isaac. Taema Gén. 21:2-5. Sara Abraham pepopijawa, apopenatocomuatsiwa, badajubicuenia amoneya petonacuenebaponaponaewanexatsi. Taema Gén. 17:15,19. Isaac penaexanaexae Sarata, nacopata pepopexënatonexa pacuenia Sarapijiwami pepopijawa Abraham-pijinë. y 4:23 *najumecapanepaeya pejumaitsicueniatsi*: Taema Gén. 15:4; 17:19,21; 18:10,14; 21:1-2.

Agar-pijiwa nacatocuenecatane Sinaíwënëtsuto, itsajota Dioso najumeliwaisi-cajunua jiwijawabelia, pacujinae najumeliwaisicopata Moisés-pijinëta. Pacuenia naexana Agar pexënato amoneya picani petonacuenebaponaponaenënexa pitorobicueniatsi pijatuxanenë, pena pacuenia amoneya tonacuenebaponapona, bajarapijinia pacuenia Dioso penajumecopatsiliwaisi Moisés-pijinëta, pamonaejawabelia najumeliwaisicajunua, tonaexanatsi bepijatuxanenëcuenia. ²⁵ Nexata, yapëtanetsi pacuenia Agar-pijiwa nacatocuenecatane Sinaít-suto, Arabia nacuata pebocaetsuto. Bajarapatsuto pijinia nacatocuenecatane Jerusalén tomara, mapanacuaje pe-ecaetomaraje. Bajarapatomara pijinia nacatocuenetane daxita pamonaë jinawanapa bajarapatomarata. Bajarapatomarapijiwi jumecowënëtsiaya jinawanapa Dioso penajumecopatsiliwaisi Moisés-pijinëta pitorobicueniatsi pexanabiabinexa. ²⁶ Bajarapacuenia yapëtanetsinua, Sarapijiwami, Abraham-pijinë pepopijawami, nacatocuenecatane pejanaJerusalén tomara, athëbëtatsia pe-ecaetomara yabara. Bajarapatomara pijinia nacatocuenecatane waxaitsi, wajasibanajamatabëcuenecopabiwi Jesucristojawabelia, waja jinawanapaenexa bajarapatomaratsia. Bajaraxuata, Sarapijiwami nacatocuenecatanenua waenacuenia. Pacuenia bajarapowami apoxinae pitorobijiwitsi pejumecowënëtabiabinexa, bajarapacuenia waxaitsi-ata apoxinaetsi Dioso penajumecopatsiliwaisi Moisés-pijinëta waja jumecowënëtanapaenexa. ²⁷ Sarapijiwa yabara Dioso pejumeliwaisibaxutota profeta Isaías-pijinë, tajëwelia jumaitsi mapacueniaje:

«Jamatabëcuenebareyamë mawecowamë, nexi aponexainaewa-ata! Caeto-ata aponenawixaetaewa, itsiata jamatabëcuenebareyaya wawajamë tsaxuabi tsane, nawixaetae-atamë, tsipaji nemomoxi ayaibitsaëto xainaename, nijajiwitowa pemomoxi matatoxenetsia»,^z jai tajëwelia Dioso pejumeliwaisibaxutota waxaitsi ayaibitsaëtoti yabara, wajasibanajamatabëcuenecopabiwinexa Jesucristojawabelia.

²⁸ Tajamonae, paxamë rabaja panesiwanajamatabëcuenecopabiwi Jesucristojawabelia, pacuenejëpame penaexanaejawa Isaac. Nexata, bajaraponëyo naexana Dioso tajëwelia najumecapanepaeya pejumaitsicuenia. Paxamë-ata rabaja panaexaname Dioso papeximë, Dioso tajëwelia najumecapanepaeya pejumaitsicuenia. ²⁹ Itsiata, Ismael, ponë copiaya Abraham-pijinë barëxaina Agara-pijiwata, pebi, pijawabeje, pijacuata penatojitsipaejamatabëcueneta, bajaraponëyo nacatocuenecatane pamonaë jumecowënëtsiajinawanapa Dioso penajumecopatsiliwaisi Moisés-pijinëta. Nexata, Ismael jamatabë-itonotabiaba pejuyapijinë Isaac, ponë naexana Sarapijiwata, Espíritu Santo peyawenonaexaetsi. Bajarapacuenia paxamë maparucaje pacajamatabë-itonotapona pamonaë casaë Dioso penajumecopatsiliwaisi Moisés-pijinëta, paxamë panenaexanaewi Dioso papeximë Espíritu Santo pejamatabëcueneta.^a

³⁰ Wajayapëtanexa Dioso apopetaejawa Ismael Abraham-pijinë pepopexënatocuenia, Dioso pejumeliwaisibaxutota jumaitsi mapacueniaje: «Ponë nexënato xainame necomuatsiwata, apocanacopatsi tsane

z 4:27 pemomoxi matatoxenetsia: Taema Isa. 54:1. Pablo canacueneba bajarapaversículo Isaías-jawata pecuenecatacuenia daxita Jesucristojawabelia pesiwanajamatabëcuenecopatsiwi yabara. a 4:29 Espíritu Santo pejamatabëcueneta: Taema Jn 3:1-16.

nexainaeyajuwënëjawa^b newënamuto pepitsinexa. Biji rajane, daxita cana-copatsiana ponë xainame peponijawajawata. Bajaraxuata, nijabowecua pitsapaeya-exanaename necomuatsiwa, nexënato yajawa», jai Dioso pejume-liwaisibaxutota Abraham-pijinëjawabelia, Dioso pejumaitisijawa. ³¹ Tajamona, Dioso aponacatae Abraham-pijinë penatocomuatsiwa amoneya petonacuenebaponaponaewanexatsi bepemomoxitsi, Dioso penajumecopatsiliwaisi Moisés-pijinëta wajajumecowënëntawanapaenexa bewajatuxanenëcuenia. Biji rajane, wajajumexaniataexae Dioso wajanacapanepaejawanexa Jesús pejamatabëcueneta, najumecapanepaeya pejumaitisicuenia, Dioso nacatane Abraham-pijinë pepopijawa bepemomoxitsi, powa apopenatocomuatsiwa.

**Dioso penajumecopatsiliwaisi Moisés-pijinëta
wajajumecowënëntisijawawecua, Cristo nacacapanepa
Dioso aneconijibia wajanacataenexa**

5 ¹ Tajamona, Dioso penajumecopatsiliwaisi Moisés-pijinëta, Cristo baja wajanacasiwatëpaejawata, nacawecua-ajibia-exana wajana-cajumecowënëntisijawami, Dioso aneconijibia wajanacataenexa. Maparucaeje Dioso aneconijibia nacatane Cristo pejamatabëcueneta. ¡Nexata, ajamatabëcuenesaëya tsiteca baja pajumexaniataewanapare xua Cristo pacato-exana, papecacapanepaenexa! ¡Pëtsa baja icatsia caewëlia panacaewetame papecawecua-ajibia-exanaeliwaisimi, papecajamatabëcuene-itorobiabinexa bepanijatuxanenëcuenia!

² ¡Xanë Pablonë, panenamuxuna-ewere paliwaisi pacatsipaebijitsiatsi! ¡Jamatabëcuenenawëxaniabiaya pëtsa pajamatabëjumaitsimë: «Xanë rabaja tanebo-upiperabëcaucutsixae, Dioso necapanepaena tajaneconiweccua», pajamatabëjamë pëtsa! Bajarapacuenia itsa panajamatabëxainaejitsipame, nexata Cristo papecasiwatëpaejawa panijaneconiweccua papecacapanepaejawanexa, apopacatonamatamotsi tsipae. ^c ³ Icatsia pacamuxujiobatsi. Ponë nabo-upiperabëcaucutsia-exana, Dioso aneconijibia petanexatsi, bejumecowënëntaponapona^d daxita pacuenia itorobatsi Dioso penajumecopatsiliwaisi Moisés-pijinëta. ⁴ Nexata, paxamë panejitsipaewi Dioso aneconijibia papecataejawanexa panejumecowënëntisijawata Dioso penajumecopatsiliwaisi Moisés-pijinëta, panawecua-itoyamë Cristo papecasiwatëpaejawa panijaneconijamatabëcuene. Panawecua-itoyamënu Dioso aneconijibia papecataejawami papeca-itaxutotsoniataejamatabëcuene.

⁵ Bajarapacuenia pacajumaitisitsi, tsipaji daxitatsi Espíritu Santo pejamatabëcueneta copia-ewetawanapatsi Dioso aneconijibia wajanacataejawanexa

b 4:30 *nexainaeyajuwënëjawa*: Jota Dioso apocuaicuaijai Abraham-pijinë pecobecowë yabara. Biji rajane, apotocaëjëtsi Ismael pecanacopatsijawanexa xua Dioso najumecapanepaeya jumaiti Abraham-pijinëjawabelia pemomo yabara. Taema Gén. 21:10,12. Baitsi, to-acuenebitsi jiwi pepitsinexa xua Dioso najumecapanepaeya rajutsiapaebatsi pijacuata pexanaecueneta.

c 5:2 *apopacatonamatamotsi tsipae*: Xua yabara Pablo muxujioba bajarapamona, bajarapaliwaisi nacayapëtaeya-exana waxaitsi-ata pacuenia itsa canaëjëtatsi Dioso aneconijibia wajanacataejawanexa wajajumecowënëntisijawata catesismoliwaisi, Dioso penajumecopatsiliwaisi Moisés-pijinëta, itsa jume, wajanabautizabijawatannua. Nexata, wajasivanajamatabëcuenecopatsijawa bajaraxuanëjawabelia Cristowecua, amatamobia-exanatsi Cristo wajanacasiwatëpaejawa waneconi yabara. Taema Gál. 5:4; Rom. 9:31-32; 3:20, 28. **d 5:3** *bejumecowënëntaponapona*: Taema Gál. 3:10; Sant. 2:10-11.

Jesucristojawabelia wajasiwanajamatabëcuenecopabixae. ⁶ Bajarapacuenia copia-ewetawanapatsi, tsipaji Cristo Jesús-jawabelia wajasiwanajamatabëcuenecopatsixae, nacabo-upiperabëcaucutsi-ata, aponacabo-upiperabëcaucutsi-ata, itsiata bajarapacuenia amatamobi Dioso pitabarata. Biji rajane, namatamota wajasiwanajamatabëcuenecopatsijawa Jesucristojawabelia, tsipaji bajarapajamatabëcuene nacatocapitsapa asiwaya wajataenexa^e Diosojawabelia, asiwaya wajayawenonaponaejawanexa itsamonae-ata.

⁷ Paxamë baja picani copiaya xaniawaetsia pajumexaniataneme pexania-jailiwaishi, Jesús peliwaishi. Itsiata, maparucaeje icatsia pajumecowënëtawanapame Dioso penajumecopatsiliwaishi Moisés-pijinëta, Dioso aneconijibia papecataenexa. ¿Jipatsa nexata pacajamatabëcueneyamaxë-itojoroba Jesús peliwaishi panejumexaniataejawawecua? ⁸ Bajarapayamaxë-itojorobiliwaishi raja apopitsapae Diosojawawerena, Ponë pacajunata Jesucristojawabelia panesiwanajamatabëcuenecopabinexa. ⁹ Xania baja tsane! Pacuenia levadura tsiquirijawayo-ata, pematajërëabicujinae cuenecaëjëpatsi ayaimatabë-ata pematajërëabijawata, bepijia pefufunaeya-exanaenexa, bajarapijinia itsi bajarapanajumetsënëtsiliwaishi. Pacatsitatsiquiriliwaishiyo-ata,^f cuenecaëjëpatsi daxita papecajamatabëcuenebijanaejawa Cristo peliwaishiwequa. ¹⁰ Wajanajuasiwanajamatabëcuenecopabixae wajatuxanenë Jesucristojawabelia, yapëtaniji Dioso papecajamatabëcueneyawenonaejawa bajarapanajumetsënëtsiliwaishi panejumexaniataeyaniwa. Yapëtanijnua itsamatacabijawabelia Dioso penaneconitsia-exanaejawanexatsi, ayaijamatabëcuenewiwi-ata, pajiwi pacajamatabëcuenebijiana Jesucristo peliwaishiwequa.

¹¹ Tajamonae, Jesucristo peliwaishi tatsipaebabiabijawata apojudíowijawabelia, itsa tsiteca itorobijitsipajë apojudíowi penabo-upiperabëcaucubia-exanaenexa, Jesucristojawabelia pesiwanajamatabëcuenecopabicujinae, nexata peneta judíowi aponebejiobia-exanabiabi tsipae, pacuenia baja neto-exanawanapa. Nexata, Jesucristo cruzata petëpaeliwaishi tsipaebi-atanë, judíowi aponitoya tsipae. ¹² Tayapëtaexae piamatamobicuene jiwi penabo-upiperabëcaucubijawa Dioso aneconijibia petaenexatsi, nexata pamonae paca-itorobapona bajarapaliwaishi panecatsitecaenexa, tojitsipajë picani pija-cuata daxita penayajawa-ëthëcaucubijawa.

Pacuenia jinawanapaejitsiatsi Cristo wajanacapanepaecujinae

(5:13–6:10)

Namata-enetsia bena-asiwa tsawanapaetsi

¹³ Tajamonae, Dioso pacajunata aneconijibia panejinawanapaenexa baja-raPonë pitabarata, apopaca-itorobinejewa Dioso penajumecopatsiliwaishi Moisés-pijinëta, pematatsënëa judíowi penaewetsiliwaishianë-ata. ¡Itsiata,

^e 5:6 asiwaya wajataenexa: Taema Mc 12:33; Sant. 2:24-26. ^f 5:9 pacatsitatsiquiriliwaishiyo-ata: Paliwaishi Pablo yabaracuaicuaijai, pebiijiwi penabo-upiperabëwecaucutsijawa yabara.

bajarapaliwaisianë apopaca-itorobi-ata, pëtsa itaxutejema pibisiacuenë pa-exaname paneperabëto pejitsipaecuenia! ¡Biji rajane, bajarapaliwaisi panenawecuacopabixae panejumecowënëtsijawami, juya namata-enetsia panayawenonabiabare, panena-asiwaxae nacaemonaecuenia! ¹⁴ Bajarapacuenia namata-enetsia itsa pana-asiwamë tsane, pajumecowënëtsi-capanepaename daxita paliwaisi Dioso najumecopata Moisés-pijinëta. Bajaraxua yabara jumaitsi Dioso pejumeliwaisibaxutota: «¡Asiwamëre itsamona-ata pacuenia nijacuata nasiwamë!», ⁸ jai. ¹⁵ Itsiata baitsi jane, itsa pana-itoyamë tsawanapae, itsa panabaracuaicuajiamë tsabiabinua pibisiacuenia panejumecowënëtsiliwaisianë yabara, nexata xaniawaetsia panayajiwitaema panenacuenë-itawetsinexa, tsipaji itsa panacuenecopatsipame namata-enetsia Dioso peliwaesiwecua panajamatabëcuenefaefaenaeya-exanaejitsipame. Pacopabijitsipamenua baja Dioso pejumeliwaisi yabara panenacaetuatabijawata-ata.

Pacuenia jamatabëcuene-ewetsiaya bejinawanapatsi Espiritu Santo wajanacayawenonaenexa daxitacuenëjawalia

¹⁶ ¡Nexata, bajarapabiabecuenëjawanë pane-exanaeyaniwa, juya pajinawanapare jamatabëcuene-ewetsiaya Espiritu Santo papecajamatabëcuene-itorobicuenia, caematacabi canacujitsia pejitsipaecuenia pane-exanabiabinexa! ¡Pëtsa panacopatame pejitsipaecuenia panijaperujumatabëcuenejawabelia, papecajamatabëcuene-itorobinexa, pibisiacuenë pane-exanabiabinexa! ¹⁷ Bepaya-pëtaneme baja pacuenia panijaperujumatabëcuenebeje, Espiritu Santobeje pejitsipaecuenë nawecua-acuene-itothiabeje. Nexata, xua panijaperujumatabëcuene pacatojitsipa pane-exanaenexa, Espiritu Santo juya apopacatojitsipae. Xua pijinia Espiritu Santo pacatojitsipa pane-exanaenexa, panijaperujumatabëcuene juya apopacatojitsipae. Bajarapajamatabëcuenebeje panejamatabë-ëthëtota najamatabëcuenesaë-ëjëbabeje. ^h Nexata, anijajamatabëcuenesaëbeje panexainaexae, apopa-exanabiabimë papexaniacuenëjawanë jamatabëpa-exaname. ¹⁸ Itsiata baitsi jane, jamatabëcuene-ewetsiaya itsa pa-exanawanapaename Espiritu Santo papecatojitsipaecuenia, nexata apopacasaëmë tsawanapae tsane papeca-itorobicuenia Dioso penajumecopatsiliwaisi Moisés-pijinëta, pane-exanawanapaenexa. Apopa-exanaemënu tsane panijaperujumatabëcuene papeca-itorobicuenia, ¹⁹ tsipaji xua jiwi exanawanapa pijaperujumatabëcuene pitorobicueniatsi capitsapabiaba mapitsicuenëjawanë: Capitsapa penapitsiji-wibeje penawecuanamatayajitsijamatabëcuene. Capitsapa daxitacuenewiria pibisiacuenë pewitota pexanaejamatabëcuene. Capitsapa daxitacuenewiria pia-uracuenëjawanë jiwi pitabarata petsita-exanaejamatabëcuene. Capitsapa pibisiacuenë pexanabiabinexa pijacuata penato-itapetsijamatabëcuene. ²⁰ Capitsapa jiwi pesiwanajamatabëcuenecopabijawata itsacuenëjawanëjawabelia, ⁱ

g 5:14 *nijacuata nasiwamë*: Lev, 19:18; cf. Mt 22:39; Mc 12:31; Rom. 13:9; Sant. 2:8.

h 5:17 *najamatabëcuenesaë-ëjëbabeje*: Wajaperujumatabëcuene, Espiritu Santobeje, namata-enetsia aponaëjëbibeje. Biji rajane, caenë canacujitsia nacajunata waja-exanaenexa bajaraponë pejitsipaecuenia, waxaitsi wajanato-itapetsinexa ponë jumecowënëtsijitsiatsi. **i 5:20** *itsacuenëjawanëjawabelia*: Idolatria-wowaijumeta: Bajarapajumëjawata cajunua, jumapecataeya pexanaenëanë, wajianë, sebocuene, penajorobiwi, daxita xua jiwi canacuenëba pena-ewetsinexa Diosonejewa.

Diosonejewa penaewetsijamataběcuene. Capitsapa jiwi penajorobijamataběcuene. Capitsapa jiwi namata-enetsia pecatsitecaenexa pena-itoyajamataběcuene. Capitsapa pejume-anaenotabiabijamataběcuene. Capitsapa penacueneca-ěbabiabijamataběcuene. Capitsapa bepíjia pianaepeanaejamataběcuene. Capitsapa daxitacuene epamonaenexa penato-exanabiabijamataběcuene. Capitsapa Jesús pijajiwiwecua penawecuanasaicayabijamataběcuene. Capitsapa penawecuatsanaejamataběcuene.²¹ Capitsapa itsamonae pecobeca-ěbabiabijamataběcuene. Capitsapa jiwi pebeyaxuabijamataběcuene. Capitsapa piaitajibitsabiabijamataběcuene. Capitsapa pibisiacuene fiestajawa pexanabiabijamataběcuene. Capit-sapabiaba orijibia itsacuenejamataběcuenejawaně, bajarabepitsipibisiacuene pexanabiabinexa, pijaperujujamataběcuene pitorobicueniatsi. Ajena, icatsia pacamuxujiobatsi bajarapitsicuene pane-exanaeyaniwa copiaya pacuenia pacamuxujiobatsi. Bajaraxuata, pamonaе bajarapitsipibisiacuene exanawanapa, aponajone tsane Dioso peyanacua-ewetsinacuata.¹

²² Biji rajane, pamonaе jamataběcuene-ewetsiaya jinawanapa Espí-ritu Santo pitorobicueniatsi pexanawanapaenexa, bajarapamonaе pejamatabě-ěthětowawetsina capitsapabiaba mapajamataběcuene-jawaněje: Capitsapa itsamonae-ata piasiwajamataběcuene.^k Capitsapa bēpēnējawawerena pebarējajamataběcuene. Capitsapa Diosojawabelia, jiwijawabelia-ata, caejamataběcuene pexinaejamataběcuene. Capitsapa itsamonae itsacueniabi-atatsi pewājēnaeyabelia pīajamataběsaējamataběcuene. Capitsapa pexaniacuene peto-exanaejamataběcuene. Capitsapa itsamonae penamatawenonaejawa peyawenonaejamataběcuene. Capit-sapa Diosojawabelia, jiwijawabelia-ata, pexinaejawa caejamataběcuene.¹ ²³ Capitsapa pia-itejepaebijamataběcuene. Capitsapa pibisiacuene pexanaeyaniwa penajamataběcataitsijamataběcuene-ata. Espíritu Santo daxita jiwi pejamatabě-ěthětowetsina pecapitsapaejamataběcuene bitso xanepana. Itsaliwaisi-ata cajena apo-itawetsi daxita bajarapacuenejawaně yabara. ²⁴ Bajarapajamataběcuenejawaně xainawanapa pamonaе Cristo pijajiwi, tsipaji baja natotane Jesucristo cruzajawabelia bepeyajawacobematabiabarutsitsi, pijaperujujamataběcuenemi pewecuatēpaenexa. Nexata, wecua-ajibia-exanatsi pajamataběcuene itorobabiabatsi pibisiacuene pexanaenexa.

²⁵ Espíritu Santo wajanacajamataběcuene-aitawaya-exanaexae Diosojawabelia, nexata benajamataběcuenecaewetatsi waja-exanawanapaenexa pejitsipaecuenia. ²⁶ ¡Bajarapacuenia

j 5:21 *Dioso peyanacua-ewetsinacuata*: Pablo apojumaitsi jiwi icatsia pewecuanaxuabijawanexa Dioso bajarapitsipibisiacuene pexanaejamataběcuene. Biji rajane, yapētaeya-exana pacuenia pajiwi tsiteca exanaponapona bajarapitsipibisiacuenejawaně, penawajunupaebicujinae pesiwanajamataběcuenecopatsijawa Jesucristojawabelia, bajarapajiwi najamataběcuene-itajēta pepacuene apopesiwanajamataběcuenecopatsijawa Jesucristojawabelia. Nexata, Cristo apojamataběcuene-ewetsitsi pewetsinēcuenia. Aponajone tsanenua Jesucristo peyanacua-ewetsinacuata Dioso pejamataběcueneta; Mil pawaibeje peyanacua-ewetsijawa, Mileniowēnējawa. k 5:22 *piasiwajamataběcuene*: Taema 1Co 13. l 5:22 *pexinaejawa caejamataběcuene*: Itsacuenia pijinia wajajumaitsinexa caejamataběcuene pexinaejawa: «ajamataběcuenesaēya waja-itaxutuajamatejemajamataběcuene Diosojawabelia daxitacuenejawalia».

panejinawanapaexae,^m pëtsa ayaijamatabëcuenewi panataewanapame!
 ¡Pëtsa panato-exanabiabame daxitacuene ëpaxamënexa! ¡Pëtsa namata-
 enetsia panacobeca-ëbabiabamenua!

**Pacuenia bejamatabëcueneyawenonatsi pamonae pibisiacuene
 exana Jesús pijajiwituatujëta, yabara peliwaishi**

6 ¹¡Tajamona, itsa payapëtaneme Jesús peliwaishi pejumexaniatae-
 jiwi pejopaejawa, pibisiacuene pexanaexae, ayaijamatabëcuenewi
 nataeya pëtsa pabijataneme! Biji rajane, paxamë panejinawanapaewi
 ¡Espíritu Santo papecajamatabëcuene-itorobicuenia, pajamatabëcue-
 neyawenonare bajarapajiwi penacuenexanetsinexa! ¡Pato-exanare bewe-
 lijamatabëcuenewiwicuenia! Panayajiwitaema paxamë-ata panejopae-
 yaniwa, dowathi itsa pacajamatabëcuene-ëjëta bajarapitsipibisiacuene
 pane-exanaeyaniwa.

²Paxamëtuatujëta itsa tocopiatatsi itsajiwi piayapëbejeli-
 waishi, namata-enetsia panayawenonabiabare! Bajarapacuenia itsa
 pa-exanawanapaename, pajumecowënëtanawanapaenamenua pacuenia Cristo
 paca-itoroba" namata-enetsia panena-asiwatsawanapaenexa.

³Pajiwi natane be-ayaijamatabëcuenewiwejawa, bajarapajiwi
 najamatabëcueneyamaxë-itojoroba piagamatabëcuenesaëjawa yabara, tsipaji
 bajarapajiwi-ata dowathi itsa jamatabëcuene-ëjëtatsi pibisiacuene pexanae-
 nexa, apo-ajamatabëcuenesaë tsipae pibisiacuene pexanaeyaniwa. ⁴Bajara-
 xuata, caejiwi canacujitsia benacuenecanaëjëta peyapëtaenexa pacuenia pona-
 pona Dioso pitabarata. Nexata, pajiwi Dioso pejitsipacuenia exanaponapona,
 benasiwajamatabëcuenebarëya tsaponaponae Dioso pitabarata. Itsiata, apobe-
 natae becaejiwi pexaniacuene pexanaponaponaejawa itsamonaewecua, peyai-
 yataenexatsi, ⁵tsipaji caejiwi canacujitsia tsicarucatsi penajamatabëcuene-
 ewetsijawa, pexanaponaponaenexa Dioso pitorobicueniatsi.

⁶Pamonae jumetane Dioso pejumeliwaishi petsipaebixaetsi, nexata petsi-
 paebinëtsijawabelia berajuta° pexainaeyajuwënëjawa, Dioso pejumeliwaishi
 petsipaebixaetsi.

⁷¡Tajamona, pëtsa jamatabëcuenenawëxaniabiaya saicayacuenia
 pa-exaname Dioso papeca-itorobijawawecua, bepexaniacuene itajara

m 5:26 *Bajarapacuenia panejinawanapaexae*: Galacia nacuata judíowi be-ayaijamatabëcuenewi nataeyabiaba apojudíowiwehua, tsipaji natocanaëjëta xaniawaetsia pejumecowënëtabi-
 bijawa Dioso penajumecopatsiliwaishi Moisés-pijinëta apojudíowiwehua. Apojudíowi juya
 be-ayaijamatabëcuenewi nataeyabiaba judíowiwehua, tsipaji jumexaniatane Jesucristo peca-
 panepaejawatsi pejumecowënëtsijawawecua bajarapaliwaishi Dioso asiwaya aneonijibia
 petanexatsi. Nexata, bajarapabitsaëtobeje namatajunatabiaba pejumeta saicaya pejumexa-
 niataecuene pexainaexaëbeje. **n 6:2** *Cristo paca-itoroba*: Taema Jn 13:34; Gál. 5:14; Sant.
 2:8. Cristo nacatsitanacuene-itajëta pacuenia bena-asiwatsi: Jesús najamatabëcuene-itajëta
 piasiwajawa pibisiacuene pexanaewajawabelia itsa najamatabëcuenepënyorota bajarapa-
 cuenewecua Lc 7:36-50; najamatabëcuene-itajëta piasiwajawa penacobetoxotsinëjawabelia,
 itsacruzata perucaenë Lc 23:43; najamatabëcuene-itajëta piasiwajawa Simón Pedrojawabelia
 nayawajunuaxainae-ata pijajiwitonëcuene yabara Lc 22:61; najamatabëcuene-itajëta piasiwa-
 jawa powajawabelia jaita itsanë pamonawecua Jn 8:11, yapëtaeya-exanarua pacuenia Dioso
 najamatabëcuene-itajëta piasiwajawa pajiwi najamatabëcuenepënyorota pibisiacuene pexa-
 naejawawecua Lc 15:11-24. **o 6:6** *petsipaebinëtsijawabelia berajuta*: Rom. 15:27; 1Co 9:13-14;
 1Ti 5:17-18.

pane-exanaecuenia, tsipaji itsajiwi-ata peyamaxë-itojorobicuenia apowecua-panepae tsane Dioso penaneconitsia-exanaejawanexatsi! Yapëtanetsi baja xua jiwi ba-uba pabita, pamatacabi baja nawereta, bajaraxua icatsia banota. Baja-rapijinia itsi tsane Dioso-ata waja-exanaecue yabara. ⁸Nexata, pajiwi pibisia-cuene exanaponapona, pijacuata penatojitsipaecuenia, bajarapajiwi tocopiapatsianatsi naxuabiaya Diosowecua petëpaejawa, daxitamatacabijawabelianexa. Pajiwi pijinia pexaniacuene exanaponapona, Espíritu Santo pejamatabëcuene-itorobicueniatsi, bajarapajiwi tocopiapatsianatsi pexainaenexa matacabi apopewerewerecaejawa daxitamatacabijawabelianexa. ⁹Bajaraxuata, apo-beyabaracueranaetsi pexaniacuene waja-exanawanapaejawa, Espíritu Santo wajanacajamatabëcuene-itorobicuenia. Itsa apoyabaracueranaetsi tsane, Dioso pecaëjëtsmatacabita nacatocopiapatsiana papexaniacuenejawanë Dioso nacarajutsiapaeba. ¹⁰Nexata, pacuenia nacacuenecaëjëpa pexaniacuene wajato-exanawanapaejawa itsamonaejawabelia, bajarapacuenia beto-exanabiabatsi. Matatoxenetsia xanepana pexaniacuene wajato-exanawanapaejawa pamonaë Jesucristojawabelia siwanajamatabëcuenecopaba.

Pablo pecopiarutsimuxujiobiliwaisi

¹¹Pepacuene xanë, Pablonë, pacatoyaquinatsi mapaliwaisije patacatoyatorobinexa. Pataema mapa-ayai-itanetonëje patacatoyaquinaejawa tacobeta mapapecopiarutsiliwaisije. ¹²Nexata, mapacuenia pacamuxujiobatsije: Pamonaë judíowi ajumesaëya paca-itorobabiaba panenabopiperabëcaucubia-exanaenexa, bajarapacuenia apo-exanaë ayaicuenia peyaiyataexae Dioso penajumecopatsiliwaisi Moisés-pijinëta. ¡Jume raja! Biji rajane, bajarapacuenia paca-itoroba, pewënajudíowi pesiwajamatabëcuenebarëyanexatsi. Bajarapamonaë apojitsipae pebejiobia-exanaejawatsi papecatsipaebixae ëCristo cruzata papecasiwatëpaexae, Dioso pacapanepaejitsia itsacuenejawa pematatsënëa pa-exanaenejewamë. ¹³Pajudíowi bajarapacuenia pacajumaitsi tsabiabi, pijacuata naperabëcaucubia-exanaë-ata, itsiata, apo-exanawanapae daxita pacuenia itorobatsi Dioso penajumecopatsiliwaisi Moisés-pijinëta. Caranata, bajarapamonaë paca-tojitsipa panenaperabëcaucubia-exanaenexa, saya papecawajunupaebinxaxa⁹ pewënajudíowijawabelia: «Paxanë patajamatabëcueneta Galacia nacuapijiwi naperabëcaucubia-exana», pejainexa paxamë yabara, tsipaji bajarapajudíowi jitsipa pesiwajamatabëcuenebarëyajawatsi pewënajudíowi. ¹⁴Xanëxana neto-amatamobi bajaraxuanë. Nexata, xanë apojitsipaenë tanawënxaniatsijawa itsajawa ta-exanaecue yabara. Biji rajane, bitso jitsipajë caeliwaisiyo jamatabëcuenebarëyaya jiwi tatsipaebinxaxa, Jesucristo tanesiwatëpaejawa cruzata, tsipaji bajara-ëpaliwaisi namatamota. Cruzata tanesiwatëpaexae, newejamatabëcuenecaewa baja tajitsipaejawami mapanacuapijicueneje. Nexata mapanacuapijicuene

p 6:13 *papecawajunupaebinxaxa*: Jota Pablo cuenecataeya-exana bajarapajudíowi David-pijinëjawabelia pacujinae paxuyo Saúl itorobatsi penawajabitsaëtisijawata petobeyaxuabine-xatsi 100 ponëbeje filisteowi. Nexata, Pebeyajebicujinae tocapatsijitsia paxuyo, bajaraponëanë pebo-upiperabëtöxi peyapëtaenexa pepacujiru pebeyaxuabijawa bajarapaciën ponëbeje. Taema 1Sa 18:25-27. Nexata, bajarapajudíowi apotsitajëbijiitsia-ata Galacia nacuapijiwi pebo-upiperabëtöxi, itsiata wajunupaebijitsia pexanaecue yabara pewënajudíowijawabelia.

tanejitsipaeya-exanaejamatabëcuenemi-ata ajibi baja. Bajaraxua yabara, apocopatsinë tsane tawajunupaebijawa xua Dioso neto-exana Jesucristo pejamatabëcueneta. ¹⁵Waxaitsinexa, Jesús peliwaisi wajajumexania-taewi, nacato-amatamobi wajanacabo-upiperabëcaucutsijawa, aponacabo-upiperabëcaucutsi-ata, tsipaji saya bajarapacuenebeje najëpabeje. Biji rajane, wajajinawanapaejawa pejanajamatabëcueneta^q bajaraxua nacato-namatamota Dioso pitabarata. ¹⁶Nexata, pamonaë pënapona bajarapapejanajamatabëcuene Jesús peliwaisi pejumexaniataexae, bajarapamonaë jamatabëcuenexanepanaeya jinawanapaena. Natoyapëtaenanua Dioso pitaxutotsoniataecuenetsi. Bajarapacuenia pacatojitsipatsi paxamë pajudíowimë, apopajudíowimë-ata, Dioso papeca-itapetsiwi papijajiwinexamë.

¹⁷Tawajënaeyabelia baja apojitsipaenë tanejamatabë-itonotaponaenexa pamonaë nejume-aeba Jesucristo tane-itorobinëcuene, tanejume-aebijawanua pepopexaniajaicuenia tatsipaebanajetarucaejawa Jesús peliwaisi, tsipaji bajarapaliwaisi yabara tanejumaconibabeyabiabijawata, nejumatitibabeyabiaba. Nexata, bajarapawajëncowëanë^r tanetsijumarubenaexae, daxitajiwi neyapëtane pepacuene Jesucristo pijajiwitonëcuenenë.

¹⁸Tajamonaë, pacatojitsipatsi pacaejiwimë canacujitsia wajatuxanenë Jesucristo asiwaya papecajamatabëcueneyawenonabiabinexa. Bajara-itsi tsane.

q 6:15 *pejanajamatabëcueneta*: Bajarapapejanajamatabëcuene Dioso nacarajuta wajasiwanajamatabëcuenecopatsijawata Jesucristojawabelia. Nexata, Espíritu Santo nacanaexanaeya-exana bepejananaexanaejiwiyo. Nacatsijamatabëcuene-ecanua pejanajamatabëcuene wajanajamatabëxainaenexa. Bajarapajamatabëcuene yabarajumaitsi, «nueva creación», wowaijumeta.

r 6:17 *bajarapawajëncowëanë*: Taema 2Co 11:23-27; 2Co 1:5; Col. 1:24.

Efesios

Mapabaxutoje Apóstolnë Pablo toyaquina Jesús peliwaisi pejumexaniataewi, Éfeso tomarata pejinawanapaewijawabelia

Pablo pebajacobiliwaisi

1 ¹ Xanë, Pablonë, Dioso pejitsipaecuenia nitapeta, Jesucristo pija-apóstol-nënexanë. Nitoroba jiwijawabelia pexanaliwaisi tatsipae-baponaenexa, Jesucristo peliwaisi. Pacatoyaquinatsi mapabaxutoje, paxamë Dioso papijajiwimë papeca-itapetsiwi,^a Éfeso tomarata panejinawanapaewi. Caejamatabëcuene paxamë panexainawanapaewi pane-itaxutuajamatejemajawa Cristo Jesús. ² Pexaniacuenia pacatojitsipatsi, waxa Dioso, wajatuxanenë Jesucristobeje, papecajamatabëwënëtsijawa piasiwajamatabëcuene, pebarajamatabëxanepanaejamatabëcuene-ata, jamatabëcuenexanepanaeya panenajuajinawanapaenexa.

**Dioso tajëwelia siwanajamatabëcuenewereta
papexaniacuenejawanëta yawenonaejitsia pijajiwijawabelia**

³ Pexaniajamatabëcuene rajutsianatsi Dioso, wajatuxanenë Jesucristo, paxajawabelia, tsipaji Cristo pejamatabëcueneta bitso pexaniacuenia nacayawenonabiaba. Pematatsënëa, Dioso nacarajutanua baja daxitacuenewiria pexaniacuenejawanë, pija-athëbënacupijicuenejawanë.^b Bajarpacuenejawanëta daxitacuenejawabelia nacajamatabëcueneyawenonaena, wajajamatabëcuene-asaënexa Dioso pijacuenejawabelia. ⁴ Orijibia, Dioso nacua pexanaewajënaeya, naca-itapeta pijajiwitsi wajanaca-exanaenexa Cristo pejamatabëcueneta, aneconijibia wajajinawanapaenexa bajaraPonë pitabarata. ⁵ Dioso bitso wajanaca-asiwaxae, najamatabëcuenewereta pijacuata penatojitsipaecuenia, pepoexitsi wajanaca-exanaenexa, Jesucristo pejamatabëcueneta. ⁶ Bajarpacuenia daxita nacato-exana, Pexënato, piasiwanë, pijajiwixaetsi,

a 1:1 *Dioso papeca-itapetsiwi*: Pagriegojume Pablo canacueneba mapajumeyojawata, «jágios», pejajjume. Bajarpagriegojume nacayapëtaeya-exana pacuenia Dioso tsata pamona pejumexaniataewi Jesús peliwaisi, pijajiw saicaeyacuenia petanenexa mapanacupijijiwehua, saicayacuenia-ata peyawenonaenexa. b 1:3 *pija-athëbënacupijicuenejawanë*: Taemanua Efe. 1:20; 2:6; 3:10; 6:12. Bajarapa-athëbënacupijicuenejawanë yabara Pablo nacatowënëjonapona Efe. 1:4-14-jawabelia.

wajawëñexaniatabiabinexa Dioso wajanaca-itaxutotsoniataejawa, wajanaca- asiwajawa-ata yabara, wajanaca-asiwajawa-ata yabara. ⁷Cristo wajanacasiwatëpaexae cruzata, pejanarunaejawata nacaneconimata-mota pibisiacuene waja-exanaeneconimi. Nexata, Dioso pinijicuenia wajanaca-itaxutotsoniataexae, bajarapaneconimi nacasiwajamatabë-cuenecaewa baja. ⁸Orijibia, wajanaca-itaxutotsoniataejamatabëcuene, nacatsijamatabëcuenewënëta wajaxainenexa wajacanaëjëtsijamatabë-cuene, wajayapëtaejamatabëcuene-ata. ⁹Nacayapëtaeya-exananua, xua picaní abaxë itsajiwi-ata apoyapëtae, papexaniacuene Dioso tajëwelia siwanajamatabëcuenewereta, pexanaenexa Cristojawata. ¹⁰Mapacueniaje tsiwajënaenajamatabëcuenewereta baja. Pamatacabi copijajopaena Dioso pecaëjëtsimatacabi, pecaetuatsijawanexa daxitajiwi, daxita mapanacuapijicueneye, athëbëpijicueneye-ata, petocopatsinexa jane baja Cristo pewetsijawa.

¹¹Cristo pejamatabëcueneta, Dioso pane-itapeta paxanë, pajudíowinë, papijajiwinexanë, patacanacopatsinexanua^c daxita xua najumecapanepaeya panerajutsiapaeba. Xaniajai, bajarapacuenia exanabiaba daxita xua Dioso siwanajamatabëcuenewereta pexanabiabinexa petsitaxanepanaecueniatsi. ¹²Paxanë pajudíowinë patawajënae-ewetawanapaewi bajayajawawerenacujinae, Dioso panetojitsipa patawëñexaniatsinexa bajaraPonë, bitso pexaniacuene pataneto-exanaexae, copiaya patasiwanajamatabëcuenecopabixae Jesucristojawabelia. ¹³Bजारapijini pacuenia, paxamë-ata, apopajudíowimë panejumetaexae pexaniajailiwaishi, Jesús peliwaishi, papecacapanepaeliwaishinexa, panejumexaniataneme bajarapaliwaishi. Nexata, pasiwanajamatabëcuenecopabame Jesucristojawabelia. Nexata, pacuenia jiwi itaneruta sellojawata cataitsiaya pebaxutojawabelia, peyapëtaeya-exanaenexa pexaniajaijawa,^d bajarapijini pacuenia Dioso pacatsijamatabëcuene-ecaeya-exana Espíritu Santo,^e najumecapanepaeya pejumaitsicuenia, xaniajaiya panenayapëtaenexa Jesucristo papijajiwicuenemë. ¹⁴Bजारapacuenia Espíritu Santo, wajana-cayacajebixae, nacatsijamatabëcuene-eca, nexata nayapëtanetsi pepacuene wajaxainaejawanexa daxita xua najumecapanepaeya nacarajutsiapaeba, Cristo pejamatabëcueneta. Dioso wajanacacomuatsiwi, pepacuene xainenatsi daxita bajaraxuanë, pamatacabita nacacaponena pijanacujawabetsia. Bजारapacuenia Dioso wajanacatsijamatabëcuene-ecaeya-exanaexae Espíritu Santo, nacacuenecaëjëpa pexaniacuena wajawëñexaniatsinexa Dioso.

c 1:11 *patacanacopatsinexanua*: Bजारajota, Pablo yabarajumaitsi-ata picaní judíowi, itsiata daxita Jesús pijajiwi, caebitsaëto wajanaca-exanaexae Espíritu Santo pejamatabëcueneta, yapëtanetsi apojudíowi-ata peyabarajumaitsiyawa. Nexata, nacacajunua Dioso pijajiwi wajanexanaenexa, wajamatabëcuene-ewetawanapaejawanexanua wajacabarëyanexa daxita xua Dioso nacarajutsiapaeba. Taema Deut. 7:6; 32:9; Rom. 8:17; Gál. 3:29; 4:7; Efe. 1:14,18. **d 1:13** *pexaniajaijawa*: Taema Rom. 8:9; 2Co 1:22; Efe. 4:30. **e 1:13** *nacatsijamatabëcuene-ecaeya-exana Espíritu Santo*: Pacuenia Dioso copiaya exana judíowijawabelia, (Hch. 2:3-4) bajarapacuenia to-exana apojudíowijawabelia-ata. (Hch. 10:44-48.) Bजारapacuenia najëpaeya exana, wajanacayapëtaeya-exanaenexa pacuenia judíowi, apojudíowi-ata, Dioso naca-itapeta pexitsi wajanaca-exanaenexa, Cristo pejamatabëcueneta.

Pablo towajëta Diosojawabelia pejamatabëcuene yawenonaenexa Jesús peliwaishi pejumexaniataewi, Éfeso tomarata pejinawanapaewi

¹⁵ Bajarapacuenia pacawënëliwaisitanetsi xaniawaetsia pane-itaxutuajamatejemajawa wajatuxanenë Jesús-jawabelia, asiwayanua^f pane-taejawa daxita Jesús peliwaishi pejumexaniataewi. ¹⁶ Bajarapacuenia ita pacawënëliwaisitanetsi paxamë yabara, apocopatsinë pexaniajatabëcuene tarajutabiabijawa Diosojawabelia, tawajëtabiabijawata. ¹⁷ Patacato-wajëtabiabatsi wajatuxanenë Jesucristo paxa Dioso ayaijatabëcuene-jawabelia, Espíritu Santo papecarajutsinexa panecanaëjëtisijatabëcuene, paneyapëtaejatabëcuene nua, Dioso yabara xaniawaetsia paneyapë-taenexa pacuenia Dioso jatabëcuene-itsi. ¹⁸ Pacatowajëtabiabatsinua Diosojawabelia papecajatabëcuene-itayotsinexa pexaniajailiwaitsia, xaniawaetsia paneyapëtaeponaenexa panewajënaeyabelia pitsicuenejawanë pacopia-ewetawanapame^g Dioso papecato-exanaenexa papecajunatsiwi. Paneyapëtaeponaenexanua papexaniacuenejawanë patatoxaniawaeta pija-nacuatatsia, nawitsia papecarajutsijawanënexa, xuanë-ata pacanacopabijitsiamë^h Jesús papijajiwi xamë. ¹⁹ Pacatowajëtabatsinua Diosojawabelia, paneyapëtaeponaenexa bajara Ponë papini jicuenesaë xaina. Bajarapasaëta nacayawenonabiaba waxaitsi, waja-itaxutuajamatejematsawanapaewi Cristojawabelia. Bajarapapini jicuenesaë cajena apoxainae pecopiarucaecue. ²⁰ Bajarapasaëta, Dioso baja cajena Cristo asaëya-exanatsi petëpaecujinae, athëbëtatsia pemuxuneneta pe-ecaëya-exanaenexatsi pecujuanenia, penajua-ewetsinexabeje daxitacuene. ²¹ Nexata, Dioso tocopata bajarapasaë Cristojawabelia, pewetsinexa daxitacuene. Nexata, jatabëcuene matatoxenetaⁱ daxitacuenewiria ayaijatabëcuenewi,^j pamonaë pepopenamatacaitorobiwi, pitorobiwi, penamatacaitorobisaë pexainaewi, petuxanewi, pewënëjonewi-ata ayaijatabëcuenewi yabara. Cristo ayaijatabëcuene pexainaewi wënëjoneponapona mapamatacabitaje. Tsiteca canacopatsiana bajarapa-ayaijatabëcuenejawa pejananacia pexanaecujinae-ata. ²² Bajarapacuenia Dioso tocopata Cristo daxitacuene penamatacaitorobinexa pewetsijawata. Orijiibia, tocopata baja Cristo pijajiwi tuatujëta

f 1:15 asiwayanua: Ita Pablo toyaquina bajarapamonaë, bajaraponë wënëliwaisitane pacuenia asiwa tsabiabi daxita Jesús pijajiwi. Itsiata, pacujinae Apóstolnë Juan toyaquina bajarapamonaë Apocalipsis-baxutota, Jesús yapëtaëya-exana Éfeso tomarapijiwi pacuenia copata baja bajarapa-asiwacuenemi. Taema Apoc. 2:4. **g 1:18 pacopia-ewetawanapame:** Jesús pijajiwi itsi jatabëcuene-ewetawanapatsi pepacuene Dioso wajanacawecua- ajibia-exanaejawanexa wajapibisijatabëcuene, waja-awitanejawawecua, wajanajatabëxainaejawawecua-ata. Bajaraxua Dioso nacawecua-ajibia-exanaena matapania wajapatsicujinae pijanacuatatsia. **h 1:18 pacanacopabijitsiamë:** Mapapecanacopabicuene yabara xaina mapajatabëcuenebeje. Bajaraxua yabara, Dioso peliwaishi penacujarubiwi caejatabëcuene apoxainae. **1)** Itsamonaë canaëjëta xua Dioso nacarajutsijitsia pijanacujawatatsi pexixaetsi. **2)** Itsamonaë pijinia canaëjëta pacuenia Dioso nacatane pexitsi bitso wajanamatamotsiwicuenia, ayaimatamota wajanacomuatsixae Jesucristo pejanata. Nexata, ita patsianatsi pijanacuayabetsia Dioso nacanacopatsiana (Pijaherenciacueniatsi) pepowajanamatamotsiwicuenia. **i 1:21 jatabëcuene-matatoxeneta:** Taema 1Jn 4:4; Flp. 2:9-10; Col. 2:10; Heb. 1:4. **j 1:21 daxitacuenewiria ayaijatabëcuenewi:** Bajarapa-ayaijatabëcuenewijawabelia nacajunua pamonaë ayaijatabëcuenewi jiwituatujëta, pamonaenua ayaijatabëcuenewi waja-itaxutota apowajatacapanepaewitua-tujëta. Taema Col. 1:16; 2:10; 1Pd 3:21; Efe. 3:10; 6:10.

bepematabocotonë, penamatacaitorobinexa.^{k 23} Daxita Cristo pijajiwi, baja-rapamona naexana Cristo bepeperabëto. Nexata, pacuenia jiwi peperabëto xaniawaetsia nacueneba pematabocoto pejamatabëcueneta, bajarapijina pacuenia Cristo jamatabëcuenecaëjëpaeya-exana pijajiwi, pejitsipaecuenia pexanawanapaenexa. Cristo pasaëta eweta daxitacuene, bajarapasaëta piji-nia yawenona pijajiwi.

Wajanaca-itaxutotsoniataexae, Dioso nacacapanepa baja Cristo pejamatabëcueneta wjatëpaejamatabëcuenejawamiwecua

2 ¹ Paxamë, apopajudiowimë, bajayata Dioso pitabarata pajamatabëcuenetëpawanapame panijaneconijamatabëcuene, pibisiacuene pane-exanaexae. ² Bajarapajamatabëcuene copiyami pacajinawana-pame, mapanacuapijiwi pecanaëjësiliwaisicuenia pibisiacuene pane-exanawanapaenexa. Nexata, pajumecowënëtanawanapame dowathi, ponë namatacaitorobaponapona daxita apowajataecapanepaewi, itaboxojawa pejinawanapaewi. ¹ Bajaraponë jamatabëcuenenamatacaitoroba^m Jesús peliwaissi pejume-aebiwi, pibisiacuene pexanaenexa. ³ Daxitatsi picani najëpaeya jinawanapatsi. Nexata, exanawanapatsi wajaperujujamatabëcuene wajanaca-itorobicuenia. Bajarapacuenia waja-exanawanapaexae, ewetawanapatsi Dioso wajanacananeconitsia-exanaenexa, wajanacabaraanaepanaexae wajaneconijamatabëcuene. ⁴ Itsiata baitsi jane, Dioso bitso jiwi pitaxutotsoniataenëxae, najamatabëcuene-itajëta ayaicuenia wajanacaasiwajawa wajanacajamatabëcuene-aitawaya-exanaejawata. ⁵ Paepatota jamatabëcuenetëpawanapatsi wajaneconijamatabëcuene, bajarapaepatota Dioso nacajamatabëcuene-aitawaya-exana, Cristo penamatacotsia-exanaejawatatsi petëpaejawawecua. (Tajamona, Dioso pacacapanepa ëpapeca-itaxutotsoniataejamatabëcueneta.) ⁶ Pacujinae Dioso itsa asaëya-exana Cristo petëpaejawawecua, waxaitsi-ata bewajanacayajawa-asaë, waja-xainaenexa pitawajamatabëcuene. Orijiibia, Dioso itsa ecaeya-exana Cristo Jesús athëbëtatsia, waxaitsi-ata bewajanacayajawa-ecae bajarajotatsia, daxitacuene wajanacabarë-ewetsinexa. ⁷ Bajarapacuenia Dioso nacato-exana, penajamatabëcuene-itajëtsinexa pamona jinawanapaejitsia itsamatacabijawabelia, peypätaeya-exanaenexa waxaitsi ayaicuenia wajanacaasiwajawa, wajanaca-itaxutotsoniataejawanua Cristo Jesús pejamatabëcueneta.

⁸ Xaniajai. Dioso cajena paca-asiwa. Nexata, papeca-itaxutotsoniataexae,ⁿ pacacapanepa baja panijaneconiawecua, Jesucristojawabelia panesiwana-jamatabëcuenecopabijawata. ^o Paxamë panijacuata apopanacapanepaemë, Dioso papecananeconitsia-exanaejawaminexawecua. Biji rajane, Dioso amoneya pacacapanepa baja, ayaicuenia papeca-itaxutotsoniataexae.

k 1:22 *penamatacaitorobinexa*: Taema Efe. 4:15; Col. 1:18. **1 2:2** *itaboxojawa pejinawanapaewi*: Taema Efe. 6:10-12; Rom. 8:38; Col. 2:15; 1Pd 3:22; Job 2:2. **m 2:2** *jamatabëcuenenamatacaitoroba*: Efeso tomarapijiwi bajayatami naewetabiaba wajianëta. Taema Hch. 19:18-19. Bajaraxuata, Pablo wënëjonabiaba Efesios-baxutota ponë eweta apowajataecapanepaewi, Diosojawabelia pesiwanajamatabëcuenecopabiwi peypätaenexa pacuenia Jesucristo pejamatabëcueneta, Dioso capanepatsi, ewetatsinua bajarapitsiwiwecua. **n 2:8** *papeca-itaxutotsoniataexae*: Taema Rom. 3:24; Tit. 3:5-7. **o 2:8** *panesiwanajamatabëcuenecopabijawata*: Taema Lc 7:50; Jn 3:14-18, 36; Hch. 16:31; Rom. 3:22-26.

⁹ Bajarapacuenia Dioso pacacapanepa, itsacuenejawa apopato-exanae-atamē.^p Bajaraxuata itsajiwi-ata be-ayaijamatabēcuenējiwi apobena-tae itsamonaewecua Dioso pecapanepaejawatsi yabara. ¹⁰ Waxaitsi Dioso pecobecowēwixaetsi icatsia pejanacuenia^q naca-exana, Cristo Jesús pejamatabēcueneta, bitso pexaniajawa.^r Bajarapacuenia naca-exana, pexaniacuenejawanē waja-exanawanapaenexa, Dioso tajēwelīa wajanacasiwanajamatabēxainaecuenia.

Dioso aeconoxae najēpaeya tane apojudīowi, judīowi-ata, caebitsaēto pexanaexaetsi Jesucristo pejamatabēcueneta

¹¹ ¡Paxamē apopajudīowimē panajamatabēnapire mapacueneje! Bajayata, pajudīowinē pacawēñējonabiabatsi: «Apopenabo-upiperabēcaucubiwi, Dioso apoepyapētaewinua», pacajaitsi tsabiabi. Paxanē, pajudīowinē patanabo-upiperabēcaucubiwxiae, ayaijamatabēcuenewi panataeyabiabājē paxamēwecua. Itsiata, panabo-upiperabēcaucubi-atanē, bajaraxua apopanejamatabēcueneyawenonae, tsipaji saya naniapijicuenejawa. ¹² Bajarapamatacabita, paxamē pajinawanapame Cristonejewa. Pacato-acuenebi panenacajonejawa, Israel nacuapijiwicuenia papecataenexa. Abaxē apopayapētaemē Dioso penaliwaisicajonejawamibeje, najumecapanepaeya patanejumaitsiliwaisimi, pataneyawenonaeyapaebijawa pajudīowinējawa-berena. Bajarapacuenia Diosonejewa panejinawanapaexae, mapanacuataje apopacopia-ewetawanapaemē papecacapanepaejawanexa. ¹³ Itsiata baitsi jane, aeconoxae baja paxamē, apopajudīowimē, saicaya tajē Diosowecua panejinawanapaewimi-ata, caenējawabelia wajanajuasiwanajamatabēcuenecopabixae Cristojawabelia, Cristo pejana pejamatabēcueneta, nacana-imoxotsia-exana. Caebitsaētotsinua naca-exana baja.

¹⁴ Cristo raja wajanaca-wecua-ajibia-exanaenē namata-enetsia wajanacuene-itoyajawami. Nexata, paxamē apopajudīowimē, paxanē pajudīowinē-ata, caebitsaēto naca-exana baja. BajaraPonē wajanacasiwatēpaejawata, nacawecua-ajibia-exana pajamatabēcuenē picani nacayacaranata, asiwaya nacaemonaecuenia wajanataeyaniwa. Bajaraxuata, aeconoxae Cristo pejamatabēcueneta, daxitatsi namata-enetsia na-asiwa tsawanapaetsi benacaemonaetsi. ¹⁵ BajaraPonē wajanacasiwatēpaejawata, nacawecucopiarucaeya-exana baja namata-enetsia wajanacuene-itoyajawami,^s tsipaji baja, amatamobia-exana^t jiwi pejumecowēñētsijawami daxita paliwaisimi bajayata Dioso najumecopata Moisés-pijinēta, aneonijibia petanexatsi. Bajarapacuenia amatamobia-exana, caebitsaētotsi wajanaca-exanaenexa paxanē pajudīowinē, paxamē apopajudīowimē-ata, namata-enetsia nabarajamatabēcuenexanepanaeya

p 2:9 *apopato-exanae-atamē*: Rom. 3:20, 27-28; 2Ti 1:9; Tit. 3:3-5; 2Co 5:17; Gál. 6:15.

q 2:10 *pejanacuenia*: Taema 2Co 5:17. r 2:10 *pexaniajawa*: Taema Sal. 100:3; Jn 3:3,5;

s 2:15 *wajanacuene-itoyajawami*: Judīowi asaēyata jumexaniataeyabiaba Dioso aneonijibia petaejawanexatsi, pejumecowēñētabibijawata daxita Dioso penajumecopatsiliwaisi Moisés-pijinēta, itsaliwaisianē-ata penaewetsiliwaisianē bepenaxuirabiwi Dioso petaeyaniwatsi. Pamonae apojudīowi pijinia apojumecowēñētsi bajarapanaewetsiliwaisianēta bepenaxuirabiwicuenia Dioso petaeyaniwatsi. Apotsixanepanaetsinua penabo-upiperabēcaucutsia-exanaejawa. Bajaraxua yabara aponabarajamatabēcuenexanepanaebeje. t 2:15 *amatamobia-exana*: Col. 2:14; Rom. 8:3.

wajanajuajinawanapaenexa. ¹⁶ Cristo wajanacasiwatëpaejawata, anijabitsaëtotsibeje nacanabarajamatabëcuenexanepanaeya-exana Diosojawabelia, wajaneconimi wajanacatomatamotsixae. Namata-enetsia wajanabara-anaepanaejamatabëcuenemi wajanacawecua-ajibia-exanaexae, anijabitsaëtomitsibeje becaeperabëto" naca-exana.

¹⁷ Cristo baja nacatocapatajopaica mapanacuayabetsicaje, pexanialiwaissi wajanacatsipaebinxexa, paxamë apopajudfiowimë, Dioso apopaneyapëtaewimijawabelia, paxanë pajudfiowinë-ata, Dioso patayapëtaewijawaberena. ¹⁸ Nexata, Cristo pejamatabëcueneta, anijabitsaëtomitsibeje cae-Espíritu Santo wajanacayawenonaexae, caejamatabëcuene xainatsi waja-imoxoyotsinexa" waxa Diosojawabelia.

¹⁹ Bajaraxuata, paxamë, apopajudfiowimë, Dioso bepasaicayawimë apopacatae, paxanë, pajudfiowinëwecua. Biji rajane, aeconoxae baja, wajanajuajumexaniataewi Jesús peliwaissi, Dioso naca-exana benacaenacupijiwitsi, benacaemonaetsinua, Cristo pejamatabëcueneta. Bajaraxuata, be-itsanacuawerena panepatsiwiwicuena apopacatae baja cajena. ²⁰ Jesús pecanacuenebixae profetawi, apóstolewi-ata petsipaebiliwaisianë, anijabitsaëtomibeje caebitsaëto exana, Dioso petanexa xaniawaetsia bepenacue-nebetsiboxaneto, peponaponaenexa bajarapamonaetuatuajëta. Profetawi, apóstolewi-ata," petsipaebiliwaissi, nacatocuenejëpa piatajajawa bepetsiwayënaebuatsijawa, boyenepana pebabatanucaenexa. Bajarapijinia cuene-itsi bajarapamonaepaebiliwaissi, jiwi piajamatabëcuenesaëya-exanaenexa Diosojawabelia. Boyenepanatotsotota, copiaya pebuatatsi-iboto^x piatajajawa petsiwayënaebuatsijawajumawereca, bajarapa-iboto itajëta itsaxuayo catsanaponaëjitsia itsa-ibotonë. Copiaya pa-ibota buata cuene-itajëta Jesucristo. Cotocaewi pijinia pecatsanapona-ibotonë cuene-itajëta Jesús pijajiwi, judfiowi, apojudfiowi-ata, pejumexaniataewi Jesús peliwaissi. ²¹ Pacuenia bo pexanaenë cae-iboto canacujitsia," jumanamatajëpaeya-exanapona, xaniawaetsia ibotobeje penacataitsinexa, bajarapijinia pacuenia Cristo pejamatabëcueneta Dioso nacanacuenejëpaeya-exana, xaniawaetsia wajanajuajinawanapaenexa. Bajarapacuenia nacato-exana, daxita bitsaëtotsi, wajanacopatsinexa bepexaniatemplobotsi, pataxunaeta ponaponaëjitsia

u 2:16 *becaeperabëto*: Itsa jume, caebitsaëto. Itsa jume, nacaemona. Taema Col. 1:20-22;

Rom. 5:10; 2Co 5:18-20; Efe. 1:22-23. **v 2:18** *waja-imoxoyotsinexa*: Taema Heb. 4:15-16.

w 2:20 *profetawi, apóstolewi-ata*: Bajarapabitsaëtobeje xaina caenacuenebicuene nexata nacue-nejëpabeje pexanaejawa; bajarapamonaebeye yapëtaeya-exana Dioso pewënëta itsamonaejawabelia paliwaissi Dioso toxaina pejumetaenexa. Nexata, bajarapaprofetawi jinawanapa, Jesús penaexanaewajënaeya, itsamona-ata jinawanapa Jesús pijajiwiutuatuajëta pamonae yaquinnawanapa Dioso pejumeliwaissi pejanaliwaisibaxutonexa. Padoceponëbeje-ata Jesús itapeta

pija-apóstolewinexa, caenacuenebicuene-exanawanapa. **x 2:20** *copiaya pebuatatsi-iboto*: Itsataxunaenëta wënëruba penamataxinae-iboto. Taema Rom. 9:33; 10:11; 1Pd 2:4-6; Mt 21:42. **y 2:21** *jumanamatajëpaeya-exanapona*: Bajayatami, templobonë pexanaewi canacuenebabiaba ibopanaxanetonë. Cae-ibopana canacujitsia xainabiaba 2 pametrobeje piapijajawa, 1 metro 10 pacentfmetrobeje yajawa epatajërëtsialia, athëbëabetsia piapijajawa pijinia 25 pacentfmetrobeje. Nexata, cae-ibopana canacujitsia pesababiaba 50 patoneladabeje pematatsënë. Nexata, bajarapa-ibopana jawanë apocatsanae. Xaniawaetsia saya jumanamatajëpaeya-exana cae-ibopana canacujitsia, xaniawaetsia pebobenaenexa pejebicuena. Bajaraxuata, Pablo jumaiitsi versículo 21-jawata, pacuenia Dioso xaniawaetsia nacanacuenejëpaeya-exana, bepexania-iboto, pepopexaniatemplobo pexanaenexa.

bajaraPonē. ²² Bajarapacuenia paxamē, apopajudíowimē, pajudíowinē-ata, Cristojawabelia wajanajuasiwanajamatabēcuenecopabiwi, wajatuxa-nenē pejamatabēcueneta, caebitsaēto naca-exana Dioso pexitsi. Nexata, bepexaniatemplobotsi naca-exana, itsajota Dioso pija-Espíritu Santo ponaponaejitsia.²

**Dioso itoroba Pablo pepaebanajetarucaenexa pexanialiwaishi,
Jesucristo peliwaishi, apojudíowijawa**

3 ¹ Bajarapacuenia Dioso najēpaeya wajanacataexae, nitoroba patacat-sipaebinexa Jesús peliwaishi apopajudíowimējawabelia. Bajaraxuata, xanē, Pablonē, Cristo Jesús pijajiwitonēnē, bajarapaliwaishi tatsipaebaponaexae apojudíowijawabelia, nexata tawēnajudíowi^a nenaneconitsia-exaneta^b penaneconitsiwi pejebabiabibota. ² Paxamē baja cajena panewēñetanema tsaena Dioso tane-itorobijawa, patacatsipaebinexa pexanialiwaishi apopajudíowimējawa, paneyapētaenexa Dioso papeca-itaxutotsoniatæjawa, pexaniacuenia papecayawenonaejawanexanua, pacuenia paxanē paneto-exana pajudíowinējawaberena. ³ Dioso najēpaeya wajanacataejawa yabara, bajaya-jawawerenacujinae abaxē apoyapētaeya-exanae caejiwi-ata bajarapaliwaishi. Itsiata, aeconoxae, matapania baja, Dioso neyapētaeya-exana. Bajaraxua yabara imata pacatoyaquinatsi petoyaecaeliwaishicuenia. ⁴ Itsa palebianame mapaliwaishije patacatoyaquinaejawa, payapētaename pacuenia xanē Dioso neyapētaeya-exana. Nexata, payapētaenamenua xua bajaraPonē najamatabēcuenewereta, pexanaenexa jiwijawabelia Cristo pejamatabēcueneta. ⁵ Bajayata abaxē, itsajiwijawabelia-ata Dioso apoyapētaeya-exanae bajaraxua yabara. Aeconoxae baja, Espíritu Santo pejamatabēcueneta, Dioso paxanē paneyapētaeya-exana papija-apóstolewinējawaberena, pijaprofetawijawabelia-ata. ⁶ Bajarapacuenia Dioso bajayata najamatabēcuenewereta najēpaeya peyawenonaenexa apojudíowi, judíowi-ata, Cristo Jesús pejamatabēcueneta. Nexata, pacuenia pajudíowinē Dioso panecapanepa patasiwanajamatabēcuenecopabijawata Jesucristojawabelia, bajara-pijinia pacuenia apopajudíowimē-ata, Dioso pacacapanepaena, najēpaeya pexaniacuenia wajanacajamatabēcueneyawenonabiabinexa. Najamatabēcueneweretanua Jesucristota becaeperabēto wajanaca-exanaenexa,

z 2:22 ponaponaejitsia: Espíritu Santo itsa nacatsijamatabē-eca, Dioso-ata nacatsijamatabē-eca; Caenē baja tsipaji. Taema Mt 18:20; Apoc. 2:1. Pamonae Dioso pijabo pexanaewinexa, Dioso raja pejumeliwaishi pepaebiwi. Dioso peliwaishi pepaebijawata, bajarapamonae becanacueneba saya profetawi, apóstolewi-ata pepaebiliwaishianē pecujarubijawata. (Petsiwajēnaebuatsijawa pijatatajawa-Base). Tsicarucatsinua pecuene-itajētabiabinexa Jesús ayajamatabēcuenē pexinaenē daxitajiwiwecua. (Penamataxainae-iboto). Bajarapacuenia itsa exanaejitsia, Dioso nacuenejēpaeya-exanaena daxita pamonae Jesús peliwaishi pejumexaniataewi, caebitsaēto pexanaenexa Caetomarata pejinawanapaewi. (Dioso pijabonexa) Nexata, Dioso, Espíritu Santotobeje, ponaponaenabeje bajarapamonaetuatuajēta. **a 3:1 tawēnajudíowi:** Mara xua yabara judíowi bara-anaepanabiabaje Pablo: Bajarapamonae apobara-anaepanae picani Pablo, petsipaebijawa yabara Jesús peliwaishi apojudíowijawabelia. ¡Jume! Biji rajane, itoyatsi, tsipaji Jesús peliwaishi petsipaebijawata, Pablo cujaruba pacuenia Dioso capanepaejitsia apojudíowi ēpesiwanajamatabēcuenecopabijawata Jesucristojawabelia, jumecowēñetsinejewawa Dioso penajumecopsitiliwaishi Moisés-pijinēta, nabo-upiperabēcaucutsinejewanua. Bajaraxua yabara itoyatsi. **b 3:1 nenaneconitsia-exaneta:** Pablo toyaquina tsaena mapabaxuto, Éfeso tomarapijiwijawabelia, pacujinae eca penaneconitsiwi pejebabiabibota, Roma tomarata.

wajanajua-ewetawanapaenexanua xua Dioso najumecapanepaeya nacara-jutsiapaeba wajanacajamatabëcueneyawenonaejawanënexa. ⁷Xanë Dioso tane-itaxutotsoniataexae, bajarapapexanialiwai si netocopata tatsipaebaponaenexa^c itsamonaejawabelia. Dioso pesaëtanua necaëjëpaeya-exana, xania-waetsia jiwi tatsipaebaponaenexa bajarapaliwai si.

⁸Bajarapacuenia Dioso neto-exana, bitso beweliamatabëcuenenënë-ata^d daxita itsamona Jesús peli wai si pejumexaniataewiwecua. Bajaratajamatabëcuene-itsinë-ata, mapapexaniacueneje Dioso netocopata, apojudiowijawa tatsipaebaponaenexa pexaniali wai si, Jesucristo peli wai si. Bajarapamona-ata tayapëtaeya-exanaenexa pacuenia Cristo ayaicuenia yawenonaponatsi,^e jiwi pecanaëjësijawawecua. ⁹Orijibia, Dioso netocopata patacayapëtaeya-exanaponaenexa padaxitamë, pecopiapatsijawa jane baja xua Dioso tajëwelia najamatabëcuenewereta pexanaejawanexa jiwijawabelia Cristo pejamatabëcueneta. Dioso, daxitacuene pexanaenë, tajëwelia najamatabëxaina cajena apopajudiowimë-ata papeccapanepaenexa. Bajarapali wai si apoyapëtaeya-exanae bajayajawawerenacujinae itsajiwijawabelia-ata. ¹⁰Bajarapali wai si nacayapëtaeya-exana Dioso pexinaejawa nawitsia pecanaëjësicuene pexanaejawanexa. Bajaraxuata, Dioso anijabitsaëto-mibeje, pena-itoyawimibeje-ata, caebitsaëto exana Jesús pijajiwinexa, namata-enetsia pena-asiwatsawanapaenexa. Bajarapacuenia, ángelewí, pamona-ata, ayaijamatabëcuenewí apowajataecapanepaewí tuatuajëta, itaboxojawa pejinawanapaewí,^f bajarapamona Jesús pijajiwi pecuene-tae-jawata cueneyapëtaena Dioso pexaniacuenia pecanaëjësínë daxitacuene pexanaenexa. ¹¹Dioso tajëwelia pesiwacanaëjësicuena pexanaejawanexa, bajarapacuenia baja exana, wajatuxanenë Cristo Jesús pejamatabëcueneta. ¹²Cristojawabelia wajasowanajamatabëcuenecopabixae, itaxutuajamaten-jematsi Dioso. Nexata, apocuenejunawitsinua. Biji saya jamatejema waju-cuata wajëtabiabatsi bajaraPonëjawabelia. ¹³Bajaraxuata, pacawajëtatsi patanesiwajamatabëcuenecueranaeyaniwamë, tanebejiobia-exanaejawa^g yabara tawënajudiowí, patacatsipaebaponaexae apopajudiowimëjawa Jesús peli wai si. ¡Biji rajane, panasiwajamatabëcuenebarëyamëre, tsipaji

c 3:7 tatsipaebaponaenexa: Col. 1:23. **d 3:8** beweliamatabëcuenenënë-ata: Taema 1Co 15:9-10; 1Ti 1:15. **e 3:8** yawenonaponatsi: Mapajumeyo aponacayapëtaeya-exanae, Cristo wajanacayawenonaejawanexa émapanacupijicuenejawanë, wajacabarëyajawanexa mapanacuataje. Biji rajane, nacayapëtaeya-exana xuanë Cristo nacatoxaina, wajanacajamatabëcueneyawenonaenexa. Xuanë-ata nacatoxaina, wajanacarajutsinexa pijanacuata si. Pacuenianua nacayawenone-najitsia waja-asäëtsawanapae-epato mapanacuataje pejitsipacuena waji jinawanapaenexa, papexaniacuenejawanënua nacato-exana wajasowanajamatabëcuenecopabijawata bajaraPonë-jawabelia wajanacapanepaenexa wajaneconiwecua. Taema Efe. 3:16,19; Efe. 1:7-8; 2:7; Sal. 31:19; Jn 1:16; Rom. 11:33; 1Co 1:30; 2:9; Flp. 4:19; Col. 1:27; 2:1-3; Apoc. 3:18. **f 3:10** itaboxojawa pejinawanapaewi: Bajarapajumebeje Nacayapëtaeya-exana anijabitsaëto beje yabara. Caebitsaëto Dioso pija-ángelwí, pamona Dioso itorobabiaba mapanacupiji-itaboxojawa, peto-exanaenexatsi pejitsipacuene. (Peli wai si caponaenexatsi, peto-ewetsinexa pijajiwi, penaneconitsia-exanaenexa pibisiacuene pexanaewi, pecueneccaranatsinexa dowathi pija-ángelwí-demoniowí.) Itsabitsaëto pijinia dowathi pija-ángelwí yabara, pamona itaboxoya jinawanapa peyamaxë-itojorobinexa jiwi, pejaitsinexa pamonae nacaeweta petsijamatabë-ecaenexa, cueneccaranatanua xua Dioso jitsipa pexanaenexa mapanacuataje. Taema Efe. 1:21, 6:12; Rom. 8:38; Col. 1:16; 1Pd 3:22. **g 3:13** tanebejiobia-exanaejawa: Pamatacabi Pablo toya-quina Éfeso tomarapijiwi, bajarapamatacabi bajaraponë ponapona penaneconitsiwi pejebabiabibota, judiowí pejamatabëcuene.

tanebejiobia-exanaejamatabëcueneta, paxamë panatoyapëtaename bitso panenamatomotsijawa Dioso pitabarata!

**Pablo towajëta Diosojawabelia Jesús pijajiwi
pejamatabëcuenewitsabinexa, Éfeso tomarata pejinawanapaewi**

¹⁴ Daxita bajarapacuenia Dioso papecato-exanaexae Cristo pejamatabëcueneta, tamatabacabëta nucabiabajë, asaëyata patacatowajëtsinexa wajatuxanenë Jesucristo paxa Diosojawabelia. ¹⁵ Daxita Jesús pijajiwi, pamonaë jina-wanapa athëbëtatsia, pamonaë-ata abaxë jinawanapa mapanacuataje, Dioso tane benacaemonaë. Nexata, bajarapamonaë caenë paxa Dioso najua-exana. ¹⁶ Nacaemonaë papeca-exanaexae, pacatowajëtabiabatsi Dioso ayaijamatabëcuenenëjawabelia, pesaëta papecajamatabëcuene-asaëya-exanaenexa, Espiritu Santo pejamatabëcueneta, tsipaji bajaraPonë athëbëtatsia nawitsia xaina daxitacuene papecajamatabëcueneyawenonaenexa. ¹⁷ Pacatowajëtabiabatsinua Cristo papecatsijamatabë-ecaenexa, pane-itaxutuajamatejemaxae. Pacatojitsipatsinua pane-asiwajawa Dioso, itsamonaë-ata, panenajuajumexania-taewi Jesús peliwaissi. ¹⁸ Bajarapacuenia paxamë pacacuenecaëjëpaena, daxita Jesús pijajiwi yajawa, paneyapëtaeponaejawa panewajënaeyabelia ayaicuenia Cristo bitso papeca-asiwajawa. ¹⁹ Cristo pijajiwi pena-asiwacuene bitso pinijicuene cajena, apowajayapëtaecapanepaejawa xaniawaetsia. Nexata, bajarapa-asiwacuene panexainaexae, pacatowajëtabiabatsinua Diosojawabelia, papecajamatabëcuenewënëcaëya-exanaenexa daxita xua pacatoxaina papecajamatabëcuenecaëjëpaëya-exanaenexa. Dioso pajamatabëcuene xaina. ²⁰ Bitso pexaniacuenia wënëxaniatsianatsi Dioso, pexainaenëxae ayaijamatabëcuene, tsipaji bitso pecuenecaëjëpaenëtsi pesaëta daxitacuene pexanaejawa, wajawajëtsijawawecua, wajacanaëjëtsijawawecua-ata. Bajarapasaë wajanacatsijamatabëcuene-ecaexae, bajarapacuenia nacato-exana wajanacayawenonaenexa. ²¹ Bajarapacuenia Dioso wajanacayawenonabiabixae Cristo Jesús pejamatabëcueneta, nacatoxanepana Jesús pijajiwi, wajawë-nëxaniatabibijawa Dioso daxitamatacabijawabelianexa, bitso ayaijamatabëcuene pexainaenëcuene yabara. Bajara-itsi tsane.

Capítulo 4-6-jawabelia, Pablo yapëtaëya-exana pacuenia Jesús pijajiwi jinawanapaëjitsia, itsamonaë pecuenetaejawatatsi pexaniacuenia pewënëxaniatsinexa Diosojawabelia

(4:1–6:20)

**Espíritu Santo pejamatabëcueneta, daxita Jesús
pijajiwi najamatabëcuenejëpawanapa**

4 ¹ Maparucaeje, xanë naneconitsiaponaponajë penaneconitsiwi pejeba-biabibota, tajumecowënëtsixae wajatuxanenë Cristo tane-itorobicuenia. Itsiata, Dioso bitso pexaniacuenia wajanacato-exanaexae, asaëyata pacamuxujiobatsi panejinawanapaenexa Dioso papecatojitsipacuena,^h

^h 4:1 Dioso papecatojitsipacuena: Taema Flp. 1:27; Col. 1:10; 1Ts 2:11-12.

papecajunatsixae papijajiwinexamē. ² Dioso pacajunata panexainawana-paenexa beweliamatabēcuene, pane-asiwajamatabēcuene-ata. ¡Nexata, Jesús papijajiwiwaxamē bajarapajamatabēcuenebejeⁱ yabara, namata-enetsia pajamatabēcuenesaēmēre tsawanapae, itsamonae Jesús pijajiwiwajuwēnēwi bajayajebi paca-itsacueniababiabi-ata! ³ ¡Caebitsaēto papeca-exanaexae Espiritu Santo, pajamatabēcuenesaēmēre tsawanapae najamatabēcuenejē-paeya panejinawanapaejawa! Panajuajinawanaparenua nabarajamatabē-cuenexanepanaeya. ⁴ Bajarapacuenia bejinawanapatsi, tsipaji pajudfiowinē, apopajudfiowimē-ata, Espiritu Santo naca-exana caeperabēto Jesucristo-jawabelia. Cae-Espiritu Santo-ata nacatsijamatabēcuene-eca. Paxamē-ata Dioso pacajunata caecuenejawa wajanajuacopia-ewetawanapaenexa^j waja-xinaejawanexa, wajajamatabēcuene-ewetawanapaenexa xua xainaejitsiatsi itsamatacabijawabelia, Cristo pepatsimatacabita. ⁵ Caenē Jesús xainatsi wajatuxanenēnexa. Caejumexaniataecuene xainatsi, Jesús peliwaisi, Dioso wajanacacapanepaenexa wajaneconiwecua. Caenabautizabicuene xainatsi, wajanajamatabēcuene-itajētsinexa Jesucristo pijajiwicuenetsi. ⁶ Caenē rabaja Dioso, paxanua^k daxita Jesús pijajiwinexa. Nexata, daxitacuene nacanama-tacaitorobaponapona. Nacajamatabēcuenecaējēpaeya-exana pejitsipaecue-nia wajato-exanawanapaenexa. Nacatsijamatabēcueneponaponanua,^l Jesús pijajiwiwaxaetsi.

⁷ Cristo wajanaca-asiwajamatabēcuene, pejitsipaecuenia caeji-witsi canacujitsia saicaya nacajamatabēcuenecaējēpaeya-exanapona,^m bajaraxuanē wajacanacuenebinexa wajanaca-itorobicuenia. ⁸ Bajara-xuata, Dioso pejumeliwaisibaxutota tajēwelija jumaitsi Cristo yabara mapacueniaje:

«Pepuajamatabēcuene-amoneyabi pitoyawitsi,ⁿ petaicaewimitsi-ata pecapanepaecujinae, bajaraPonē bajarapapecananepaewi yajawa, barēnawiatsiana athēbēabetsia. Rajutsiananua pexaniajawanē^o pijajiwiwawabelia»,^p jai tajēwelija Dioso pejumeliwaisibaxutota.

⁹ Bajarapacuenia itsa nacayapētaeya-exana Cristo penawiatsi-jawa athēbēabetsia, caecuenia nacayapētaeya-exananua pacue-nia copiaya pepatsijawatsica apanacuayabetsicaje. Pepatsijawa-ata

i 4:2 bajarapajamatabēcuenebeje: Taema Gál. 6:2; Col. 3:12-13. j 4:4 wajanajuacopia-ewetawanapaenexa: Taema Efe. 1:18; Col. 1:12. k 4:6 paxanua: Taema Jn 3:5-6. Judfiowi canaējēta pijasalinainē, Abraham-pijinē bepaxacuenia, tsipaji bajaraponējawawerena pitsapa daxita judfiowi. Itsiata, daxita pamonaē siwanajamatabēcueneecopaba Jesucristo-jawabelia, Espiritu Santo naexanaeya-exanatsi bepejananaexanaejwi, Dioso pexinexa. Bajaraxuata, daxita bajarapamonae Dioso paxa exana. l 4:6 nacatsijamatabēcueneponaponanua: Dioso paxa, pexenato Jesús, Espiritu Santo-ata, nacatsijamatabē-eca, tsipaji caenē tsaponaponae. Nexata, pacujinae Espiritu Santo nacatsijamatabē-eca, yajawa-ecabeje Dioso, Jesús-beje. m 4:7 nacajamatabēcuenecaējēpaeya-exanapona: Taema Rom. 12:6; 1Co 12:11. n 4:8 Pepuajamatabēcuene-amoneyabi pitoyawitsi: Jesús itsa nacasiwatēpa, pitoyawi pecuene-amoneyabicuenia nacacapanepa Satanás pecobesaēwecua, daxita pijajiwi apowajataecapanepaewi yajawa, wajapibisijamatabēcueneewecua, naxuabiaya-ata Dioso wajawecuataēpaejawaminexa. Taema Col. 2:15. o 4:8 Rajutsiananua pexaniajawanē: Bajarapajumebeje nacayapētaeya-exana pacuenia Espiritu Santo nacajamatabēcuenecaējēpaeya-exana Jesús pejitsipaecuenia, (Efe. 4:11-12). Nacayapētaeya-exananua pacuenia Jesús pexaniacuenia yawenonaējitsia pijajiwi. p 4:8 pijajiwiwawabelia: Taema Sal. 68:18; Col. 1:15; 2Co 2:14-17.

irabëxëpanajawabereca.⁹ ¹⁰ Nexata, Ponë patsica mapanacuayabetsi-
caje, icatsia nawiatsia caewëabetsia tajënacuyabetsia, pecanacopat-
sinexa ayaijamatabëcuene pexainaenëcuene daxitawecua. ¹¹ Nexata,
ayaijamatabëcuenenëxae daxitawecua, nato-itapeta itsamonae após-
tolewinexa,^r itsamonae profetawinexa,^s itsamonae petsipaebapona-
winexa abaxë apoepapëtaewi Jesucristo peliwaishi, itsamonae peto-
ewetsiwinexatsi pijajiwi, itsamonae-ata xaniawaetsia pecujarubiwinexa
Dioso peliwaishi. Daxita bajarapamonae Espíritu Santo saicayacuenia
jamatabëcuene caëjëpaeya-exanapona,^t xaniawaetsia penacuenebinexa
Cristo pijajiwiutuajëta. ¹² Bajarapacuenia exana bajarapapitapetsiwi-
jawabelia,^u xaniawaetsia petocuenecujarubinexa daxita Jesús pijajiwi,
peyabaracuenecujaninexatsi Dioso pijacueni petonacuenebawanapae-
jawa. Petocuenecujarubinexanua becaeperabëto penaxanaewi Cris-
tojawata, pewajënaeyabelia pejamatabëcueneliwaisinaweretaponaen-
exa^v Dioso pijacuenejawata. ¹³ Cuenecujarubijitsianua Jesús pijajiwi,
peyabaracujaninexatsi caejamatabëcuene penajuaxainawanapaejawa,

q 4:9 *irabëxëpanajawabereca-ata*: Pamonae, Dioso peliwaishi penacujarubiwi, apoyapëtae xania-
waetsia pajamatabëcuene xaina bajarapajume. Itsamonae canaëjëta Cristo pemëthëtsijawane-
xatsi yabara. Taema Jn 3:13; Flp. 2:7-8. Itsamonae pijinia canaëjëta pacuenia mapanacujaje bitso
bewelianacua Dioso pijanacuawecua. Itsamonae pijinia canaëjëta pacuenia Cristo pemëthëtsi-
cujinaetsi, pona Hades-nacuajawabereca, pataxunaeta jinawanapa petëpaewimi pejumapianë.
r 4:11 *apóstolewinexa*: Cristo nato-itapeta saya doce ponëbeje apóstolewinexa. Nexata, Espíritu
Santo pamatatsënëa apojamatabëcuene caëjëpaeya-exanae itsanë-ata apóstol-nënexa. Cristo
itoroba Espíritu Santo pejamatabëcuene caëjëpaeya-exanaenexa bajarapadoce ponëbeje, apósto-
lewi, peyapëtaenexa paliwaisianë becujaruba, aporucac-ata abaxë Dioso pejumeliwaisibaxutota.
Jamatabëcuene yawenonatsinua, peyaquinaejawa bajarapaliwaisianë pejumeliwaisibaxutota.
(Jn 16:12-13.) Bajaraxuata, maparucacaeje, waxaitsi-ata yapëtanetsi apóstolewi peliwaishi, wajale-
bijawata bajarapabaxutonë. **s 4:11** *profetawinexa*: Profetawi raja Diosojumepaebiwi, xua copia-
patsijitsia pewajunupaebiwi, xua-ata pepacueni Dioso jumaitsi peyapëtaeya-exanaewi. «Dioso
raja jumaitsi mapacueniaje», pejaiwi. Nexata, tsipaebabiaba jiwijawabelia Dioso peyapëtaeya-
exanaeliwaisitsi. Bajarapamonae yabara Jesús pijajiwiutuajëta anijamatabëcueneliwaisibeje
xaina. **1)** Pemuxujobinexa Jesús pijajiwi, pecopabinexa pibisiacuene pexanaejawa, penajamata-
bëcuene pëñëyorotsinexanua Diosojawabelia. (1Jn 1:18-20). Bajarapacuenia pemuxujobiujawata,
profetawi yapëtaeya-exanabiabanua pibisiacuene pexanaejawabelia, Dioso penaneconitsia-
exanaejawanexatsi, itsa apocopabi pibisiacuene pexanaejawa. Bajarapacuenecaranatsiliwaishi
tsicarucatsi profetawi ayaicuenia pexanaejawanexa. Bajarapitsicuenia pexanaeprofetawi abaxë
naitajëtabiaba Jesús pijajiwiutuajëta. **2)** Bajayata, pamatacababi abaxë Dioso pejumeliwaisiba-
xuto apoyaquinaeweretsi, bajarapamatacababi itsajiwi profetawiyajuwënëjiwi, pacuenia apóstolnë
Juan-pijinë, Espíritu Santo jamatabëcuene caëjëpaeya-exanatsi, peyapëtaenexa xua copiapat-
sijitsia itsamatacabijawabelia. Bajarapaliwaishi bitso beweliciacuenia exana profetawi. Maparu-
cacaeje ajibi baja bajarapitsiprofetawi, tsipaji Dioso wereta baja penajaliwaisianë peyapëtaeya-
exanaejawa. (Apoc. 22:19). **t 4:11** *saicayacuenia jamatabëcuene caëjëpaeya-exanapona*: Taema
Rom. 12:4-16; 1Co 12:4-20. **u 4:12** *bajarapapitapetsiwi jawabelia*: Jesús nuba cinco pacuenibeje
pexanaewanapaewinexa pijajiwiutuajëta. **1)** Apóstolewi, **2)** Profetawi, **3)** Jesús peliwaishi
pepaebanajetarubenaewi, **4)** Pewetsiwi-pastorwi, **5)** Pecujarubiwi Dioso peliwaishi. Nexata,
bajarapapewetsiwi xainapona saicaya pexanaecuenenexa. Mapajamatabëcueneliwaisianëje: **1)**
Pejamatabëcuene caëjëpaeya-exanaenexa Jesús peliwaishi pejumexaniataewi, xaniawaetsia Dioso
pijacueni petonacuenebawanapae (vr 1), **2)** pejamatabëcuenewitsabia-exanaenexa, pejamata-
bëcueneliwaisinaweretsijawabelianua Dioso pijacuenejawata, **3)** pepaebanajetarubenaenexa
Jesús peliwaishi apoepumetaewijawabelia, orijibia Jesús pijajiwi pewajënaeyabelia ayaibitsaëto
penaxanaponaenexa. **v 4:12** *pejamatabëcueneliwaisinaweretaponaenexa*: Pewetsinë pijacuat
coplaya itsa apotsiwajënaejamatabëcueneliwaisinaweretsi tsipae Dioso pijacuenejawalia, nexata
to-acuenebitsi tsipae pexanaecuenejawata pejamatabëcueneliwaisiwiitsabia-exanaenexa itsajiwi-
belia. Taema Mt 10:24.

pitaxutuajamatejemajawa^w Jesucristojawabelia, xaniawaetsia pecue-
neyapëtaejawanua^x wajatuxanenë, Dioso pexënato. Cuenecujarubapona-
nua pejamatabëcuenenaweretsia-exanaenexa, pejamatabëcuenejëpaeja-
wabelia pacuenia Cristo jamatabëcuene-itsi.

¹⁴ Waxaitsi, Jesús pijajiwiitsi, itsa jamatabëcuenejëpatsi Cristo, apojama-
tabëcuenejëpaetsi pejewaxi, pacuenia caejamatabëcuene apoxinae peju-
mexaniataeliwaisi yabara. Nexata, pamonaë petsiyapëtaewi peyamaxë-
itojorobinexa, bepexaniajailiwaaisicuenia petsipaebiwi, apocuenecaëjëpaetsi
tsane pexaniajailiwaaisiwecua wajanacayamaxë-itojorobinexa. ¹⁵ Biji
rajane, bajarapapexaniajailiwaitsi wajajumexaniataewanapaewi, asiwaya
betsipaebaponatsi itsamonaejawabelia. Bajarapacuenia asiwaya waja-
exanawanapaejawata, jamatabëcuenenaweretaponaenatsi, daxitacueneja-
walia wajajamatabëcuenejëpaenexa Cristo. BajaraPonë bewajamataboco-
tonëxae nacanamatacaitorobabiaba. Nexata, waxaitsi bepeperabëtoxaetsi,
be-exanabiabatsi pacuenia naca-itorobabiaba. ¹⁶ Cristo pejamatabëcueneta,
daxita pijajiwiitsi xaniawaetsia namata-enetsia nayawenonatsi. Nacanasä-
rajutanua. Pacuenia wajaperabëtota caewito canacujitsia, itsa exanapona
petsicarucaecueniatsi, nayawenona daxita penacuenebixanepanaenexa,
bajarapijinia pacuenia Cristo pijajiwiitsi wajanacuenebixanepanaenexa
namata-enetsia benayawenonatsi. Bajarapacuenia nexata, itsa exanawa-
napaenatsi, xaniawaetsia najuajamatabëcueneliwaisinaweretaponaenatsi
Dioso pijacuenejawata. Namata-enetsia cuenenaweretaponaenatsinua
wajana-asiwacuenejawata.

Bejinawanapatsi papejanajamatabëcueneta nacarajuta Cristo

¹⁷ Wajatuxanenë Cristo pewënëta, paca-itawetatsi Dioso apoepayapëtaewi-
cuenia panejinawanapaeyaniwa. Bajarapamonaë najamatabëxainawanapa
pexanaenexa piamatamobicuenejawanë Dioso pitabarata. ¹⁸ Bajarapamo-
naë ajamatabëcuene-itaquiri tsawanapae. Pijamatabëcuenetajaxae, naja-
matabëcuenewereta apojejitsipaejawanexa Dioso. Aponatoyapëtaenua
pejamatabëcuene-aitawayaxanaejawatsi. Nexata, naxuabiaya jinawanapa
Diosowecua. ¹⁹ Apoyapëtae pia-uracuenejawanë. Nexata, acuene-urajibia
exanawanapa. Casaë bitso pexanaenexa daxita xua pibisiacuene.

²⁰ Itsiata baitsi jane, panejumexaniataejawata Cristo peliwaitsi, apopana-
cuenecujarubimë cajena pibisiacuene pane-exanawanapaenexa. ²¹ Paneju-
metaexae bajarapaliwaitsi Cristo yabara, payapëtaneme pexaniajailiwaitsi.
Nexata, bajarapapexaniajailiwaitsi pacacujaruba pacuenia pajinawanapae-
jitsiamë Cristo papecatojitsipaecuenia. ²² ¡Pacuenia panajumajonojitsipame
piaxuiira-eseto, bajarapacuenia pacopabare baja panijaperujumatabëcuene
papecanamatacaitorobabiabijawa! Bajarapajamatabëcuene baja cajena bitso
abeje, tsipaji pacayamaxë-itojorobabiaba pexaniajailiwaaisiwecua. ²³ ¡Biji
rajane, panajamatabëcuenecaewere pejanacuena Espíritu Santo pape-
cajamatabëcuenexanebaponaenexa! ²⁴ ¡Dioso pejamatabëcueneta pane-
xainaexae bajarapapejanajamatabëcuene, pajinawanapare aneconijibia,

pexaniajaicuenia-ata, pacuenia Dioso, papeca-exanaenë, cuene-itsi, panecuenejëpawanapaenexa!

²⁵ ¡Bajaraxuata, pëtsa baja pematatsënëa panajumetsënëtawanapame! y ¡Biji rajane, namata-enetsia panatsipaebare pexaniajailiwaishi, tsipaji daxitatsi caenë Jesucristo pijajiwitsi!

²⁶ ¡Itsa pa-anaepaname, pëtsa panacopatame pane-anaepanaejawa pibisia-cuene papeca-exanaeya-exanaenexa! ¡Pëtsa pasiwajamatabëcuenetsitecame itsamatacabijawabelia-ata panebara-anaepanaejawa! ²⁷ ¡Bajarapacuenia pëtsa panacopatame, dowathi papecayamaxë-itojorobinexa!

²⁸ Pajiwí nacobetoxotabiaba, copatsi baja penacobetoxotabiabijawa. Juya, nacuenebi, pepitsinexa xua namatawenona, peyawenonaenexanua bepejiobiwijawabelia.

²⁹ ¡Pëtsa baja pacuaicuajiamë pibisialiwaishi, pia-uraliwaishi-ata! ¡Biji rajane, pacuaicuajiamëre pexanialiwaishi, papecajumetaewi panejama-tabëcueneyawenonaenexa, pane-ajamatabëcuenesaëya-exanaenexanua Diosojawabelia!

³⁰ ¡Pëtsa Espíritu Santo panajamatabëxainaeya-exaname, itsacuene pane-exanaejawata, panecuaicuajijawatanua! Dioso pacatsijamatabë-ecaeya-exana pija-Espíritu Santo, panenayapëtaenexa² pepacuene Dioso papijajiwimëcuene, papecacapanepaejawanexanua.⁴

³¹ ¡Pacopabare bajayajebi bëpënëa panebarajamatabëcuene-anaepanabiabijawa, jema bitso pane-anaepanabiabijawa, anaeya panenabijataeyabiabijawa-ata! ¡Pacopabarenua pibisiacuena itsamonaepanebaracuaicuajijawata, itsamonaejawabelia-ata pibisiacuenenewanë paneto-exanabiabijawa! ³² ¡Biji rajane, Jesús papijajiwixaeëmë, namata-enetsia pexaniajamatabëcuene panatoxinare! ¡Pana-itaxutobejiobiataemanua! ¡Pacuenia Dioso pacabarajamatabëcuenexanepana Cristo pejamatabëcueneta, pibisiacuene pane-exanaewi-ata, bajarapijini pacuenia namata-enetsia panabarajamatabëcuenexanepanawanapare!

Dioso pexitsi bejinawanapatsi pejitsipaecuenia

5 ¹ ¡Dioso papeximë, papeca-asiwawinua, pacuenia Dioso jamatabëcuene-itsi, bajarapacuenia pajamatabëcuene-itsimëre tsawanapae. ² ¡Pacuenia Cristo naca-asiwa, bajarapijinia pacuenia paxamë-ata pana-asiwamëre tsawanapae! Nacopatana Cristo pijacuata

y 4:25 *panajumetsënëtawanapame*: Versículo 25-32-jawabelia Pablo nacayapëtaeya-exana pacuenia bewajanajumajonotsijawa wajaperujujamatabëcuene juya wajanajamatabëcuenexatatsinexa papejanajamatabëcuene Dioso nacarajuta. Nexata, nawecuacopabatsi baja wajanajumetsënëtsicuenemi, juya wajaxaniajatsabiabinexa. Nawecuacopabatsi waja-anaepanaejamatabëcuenemi, juya namata-enetsia wajana-asiwanexa wajanasiwajamatabëcueneacawinexanua. Nawecuacopabatsi pibisialiwaishianë wajacuacuajijawami, juya wajacuacuajitsabiabinexa pexanialiwaishianë. Nawecuacopabatsi wajanacobetoxotsicuenemi, juya wajanacuenebabiabinexa, wajaxanaejawanexa xua rajutsijitsiatsi penamatawenonaewiyojawabelia. z 4:30 *panenayapëtaenexa*: Taema Efe. 1:13-14. a 4:30 *papecacapanepaejawanexanua*: Pamatacabita Jesús pijajiwitsi patsianatsi Dioso pijanacuayabetsia, Dioso jane baja nacarajutsiana pejanaperabëto. Pepacuene nacawecua-ajibia-exanaenanua wajaperujujamatabëcuene. Nexata jane baja, jamatabëcuenenëpaenati wajatuxanenë Cristo, pibisiacuene exanaenewatsi. Taema Rom. 3:34; 2Co 3:18; Flp. 3:20-21.

pebeyaxuabinexatsi wajaneconijamatabëcuene, penajamatabëcuene-itajëtsinexa wajanaca-asiwajawa. Pacuenia altar-jumata petajuitsidajubinë jiwi pijaneconijamatabëcuene capitsapa Dioso pexaniatuxusi^b Diosonexa, bajarapacuenia Dioso tsitabepexaniatuxusitsi Cristo wajanacasiwatëpaejawa wajanecanijamatabëcuene. Nexata, bitso siwajamatabëcuenebarëya.

³ ¡Dioso papeximë, pëtsa payabaracuaicuaijamë pane-exanaejawa pibisiacuene panewitota,^c pia-uracuenejawanë-ata! ¡Pëtsa pajitsipame ayaijawa panexainaenexa, panenamatawenonaejawawecua! Bajarapitsipibisiacuene-jawanë Dioso pexi apobe-exanae. ⁴ ¡Pëtsa pacuaicuaijamë pibisiajumenë, natsiquejemajumenë-ata! ¡Pëtsa panenajume-itacanitsijawata pacuaicuaijamë pia-uracuene yabara! Bajarapitsipibisiajumenë Dioso papeximë apobepacuaicuaijaimë. ¡Biji rajane, Diosojawabelia pexaniajamatabëcuene parajutabibare, panewënëxaniatabibijawata! ⁵ Payapëtaneme rabaja pexaniajaicuene pibisiacuene pewitota pexanaponaponejiwi,^d daxita pibisiacuene pia-uracuenejawanë pexanaejiwi, ayaijawa pexainaenexa pejitsipaejiwi-ata penamatawenonaejawawecua, apojone tsane Dioso, Cristobeje, pijanacuayabetsia. (Bajarapajiwi jamatabëcuenejëpa bepewajëcaeiwi jumapecataeya pexanaenëanëjawabelia, mapanacuapijicuenejawanëje asiwaya petaexae Diosowecua.)

⁶ ¡Pëtsa itsajiwi-ata pacayamaxë-itojoroba natsiquejemaliwaisianë papecatsipaebijawata, tsipaji Dioso ayaicuenia naneconitsia-exanaena bajarapitsipibisiacuenejawanë pexanawanapaewi, pamona apojumecowënëtsitsi! ⁷ ¡Pëtsa pana-exaname xua bajarapamona exanawanapa!

⁸ Paxamë picani bajayata pajamatabëcuene-aitaquirimë tsawanapae. Itsiata baja, aeconoxae paxainame penaitayotsijamatabëcuene Cristo pejamatabëcueneta. ¡Bajaraxuata, pajinawanapare Dioso papeximë papecajamatabëcuene-itayotsiwicuenia! ⁹ ¡Nexata, pitayotsijamatabëcuene panexainaexae, jiwi asiwaya payawenonare! ¡Perowialiwaissi paxainare! ¡Xaniajaiya daxitacuene pa-exanawanapare!

¹⁰ ¡Panacuenecanaëjere Dioso itsa pacasiwajamatabëcuenebarëya pane-exanaejawa yabara! ¹¹ ¡Nexata, pëtsa pa-exaname papibisiacuene exana pijamatabëcuene-itaquiriwi, tsipaji bajarapacuenia Dioso tsitapiamatamobicuenetsi! Nexata, apopacajamatabëcueneyawenonae tsipae caejawayo-ata. Biji rajane, Dioso peliwaissita payapëtaeya-exanaename, bajarapamona peyapëtaenexa xua piabejecuene. Pa-itawetsianamenua bajarapapibisiacuene pexanaeyaniwa. ¹² Pijamatabëcuene-itaquiriwi pibisiacuene muetsia exanawanapa, bitso waja-ajume-uracuene wajapaebijawa itsamonaejawabelia. ¹³ Itsiata baitsi jane, pacuenia pitayotsicotia napebetsia-exana daxitacuene, bajarapijinia pacuenia bajarapamonaenacueneyapëtaena bitso pibisiacuene pexanaejawa, pane-itawetsijawata Dioso pejumeliwaisita.

¹⁴ Bajaraxua yabara, itsamona Dioso pijajiwi jumaitsi mapacueniaje:

b 5:2 *pexaniatuxusi*: Dioso tsitapexaniatuxusitsi, tsipaji yapëtaeya-exanatsi jiwiyo pewecuanajamatabëcuenepeñëyorotsijawa pibisiacuene pexanaejawami, juya pesiwanajamatabëcueneconipatsinexa Diosojawabelia, pesiwajamatabëcueneacawinexa pijaneconi. **c 5:3** *pexanaponaponejiwi*: Taema Rom. 1:18-32; 1Co 5:9-11; 6:9-10; Gál. 5:19-21; Col. 3:5-9; 1Ts 4:3-7; 1Ti 1:9-10; 2Ti 3:2-5; Tit. 3:3. **d 5:5** *pibisiacuene pewitota*: Bajarapajumenëjawabelia cajunua pamona pibisiacuene exana pewitota apopenacojiobiwi abaxë, pamonaenua pibisiacuene nawecua-exana pewitota penacojiobiwi.

«¡Panajamatabëcuene-itawabare panetëpaejamatabëcuenewecua, pibisiacuene pane-exanawanapaejamatabëcuene! Nexata, Cristo pacajamatabëcuene-itayotsiana pexaniajailiwaitsita»,^e jai itsamona Dioso pijajiwi.

¹⁵ ¡Nexata, xania baja tsane! ¡Nayajiwiwitaeya pajinawanapare! ¡Pëtsa pajinawanapame Dioso apoepayëtaewicuenia! ¡Biji rajane, pajinawanapare Dioso paneyapëtaewicuenia! ¹⁶ ¡Nexata, caematacabi canacujitsia, xua pacatocopiapatapona pane-exanaenexa, bajarapaepatota xaniawaetsia pa-exanawanapare Dioso papecatocaëjësicuenia, tsipaji raja jinawanapatsi piabejematacabita! ¹⁷ ¡Pëtsa pajinawanapame pijamatabëcuenecowëbiwicuenia! ¹⁸ ¡Biji rajane, paneyapëtaewicuenia pa-exanawanapare Dioso papecatojitsipaecuenia! ¹⁸ ¡Pëtsa paitajibimë tsabiabi, tsipaji raja apopanacuenecataitsimë tsipae pibisiacuene pane-exanaeyaniwa! ¡Biji rajane, Espiritu Santo patonacopare papecatsijamatabëwënëcaenexa, pepecajamatabëcuene-matacaponaenexa Dioso pejitsipaecuenia pane-exanabiabinexa! ¹⁹ ¡Nexata, Espiritu Santo panejamatabëcuenewënëcaexae, daxita panejamatabë-ëthëtowetsina namata-enetsia panatsipaebabiabare wajatuxanenë ayaijamatabëcuene pexainaejawa yabara! ¡Panaxëanabiabare pawajianë rubena Salmos-baxutota, himnobaxutotana, pawajianë-ata Espiritu Santo jemata pacanaxëanaeya-exanaena! ²⁰ Bajarapacuenia pacopatsinejewamë, pexaniajamatabëcuene parajutabiabianame Diosojawabelia dexitacuene yabara, wajatuxanenë Jesucristo pewënëta.

Pablo muxujioba penacojiobiwi peliwaaisicuenia

²¹ ¡Jesús papijajiwiwimë, Cristo asiwaya paneyaiyataexae, padaxitamë namata-enetsia panajamatabëcuene-ewere, beweliagamatabëcuene nataeya panenajamatabëcueneyawenonaenexa!

²² ¡Paxamë papetiriawimë, pane-amonajiwi panexainaewi, pacuenia wajatuxanenë Cristo^g yayiyataeya pajamatabëcuene-ewetawanapame^h pejitsipae-cuenia pane-exanawanapaenexa, bajarapijinia pacuenia yayiyataeya pane-amonajiwi pajamatabëcuene-ewetawanapare! ²³ Pacuenia Dioso copata Cristo bepematabocoto daxita pijajiwinexa, pamona bepeperabëto penae-xanaewi penamatacaitorobinexa, bajarapijinia pacuenia pacatocopata pane-amonajiwi bepanematabocotonexa, asiwaya papecanamatacaitorobinexa. Cristo penamatacaitorobinë-ata, pijajiwi piasiwaxae, nacaeweta pebeyaxuabinexatsi pecapanepaenexaⁱ pijaneconiwe-cua. ²⁴ Nexata, pacuenia daxitatsi wajatuxanenë Cristo pijajiwiitsi yayiyataeya jamatabëcuene-ewetawanapatsi,

e 5:14 Bajarapacuenia tsaena bajayata naxëana wajita Jesús pijajiwi. Juca tsaena mapaversiculoxijawawerena, Isa. 26:19; 51:17; 52:1; 60:1. f 5:17 *pijamatabëcuenecowëbiwicuenia*: Bajarapitsijamatabëcuene pexainaewi apojumexanatae Dioso peponaponaejawa. Nexata, bitso pibisiacuene exanawanapa. Taema Sal. 14:1. g 5:22 *wajatuxanenë Cristo*: Taema Col. 3:18; cf. 1Co 14:34; Tit. 2:4-5; 1Pd 3:1. h 5:22 *pjamatabëcuene-ewetawanapame*: Mapajume aponacayapëtaeya-exanae pebi pijawa ajumesaëya pitorobijawa yabara. ¡Jume cajena! Nacayapëtaeya-exana saya pacuenia petiriwa pijacuata jamatabëcuene-ewetsia-ponapona peyayataexae xua pamona jitsipa, penajamatabëcuene-itajëtsinexanua piasiwajawa. i 5:23 *pijajiwi ... pecapanepaenexa*: Caematacabi canacujitsia Cristo nacaeweta asiwaya pijajiwi pewetsinexa daxitacuenejawabelia. Bajarapijinia pacuenia, pebijwi pijawajiwi yabara be-ewetaponapona, beyaxuabijitsia-atatsi.

pejitsipaecuenia waja-exanawanapaenexa, bajarapijinia pacuenia petiriawi, pamonajiwi pexainaewi, bejamatabëcuene-ewetawanapa daxitacuene yabara.

²⁵ ¡Paxamë pijinia pabebijiwiwimë, panexainaewi panijawajiwi, pa-asiwamëre pacuenia Cristo asiwa pijajiwi! Piasiwaxae bajarapamonae yabara, nacaeweta pebeyaxuabinexatsi, pecapanepaenexa pijaneconiwecua. ²⁶ Nexata, pijajiwi petsatsinexa saicaya mapanacuapijiwiwecua, ajamatabëcuenexuirajibia-exana peliweisita, merata bepejamatabëcuene-quitsiwi. ²⁷ Cristo bajarapacuenia exana, itsamatacabi pijajiwi, pejamatabëcuenenaitabësiwicuenia^k penaitajëbinexa Dioso pitabarata. Cristo pewecua-ajibia-exanaexae pijaneconimi, bajarapamonae apoxainae itsacujirunecon, xua yabara bijiaya copiapitsijitsiatsi. Biji rajane, pepopianeconibiwixae, apopexainaexaenua caejawayo-ata bepenaxuirabicuene, jamatabëcuenenaitabëtanubenaena Dioso pitabarata.

²⁸ Pacuenia Cristo asiwa pijajiwi, pamonae bepeperabëto pexanaewitsi, bajarapijinia pacuenia pebijiwi biasiwa pijawajiwi, pacuenia pijacuata naperabë-asiwa. Ponë asiwa pijawa, pepacuene pijacuata na-asiwa. ²⁹ Itsajiwi-ata pijacuata aponaperabë-itoya. Biji rajane, xaniawaetsia naperabë-eweta. Pexaejawanua xaeyabiaba pewëna-asaënexa. ³⁰ Nexata, bajaraPonë pijajiwiitsi bepeperabëtotsi,^l bepeyajuwëñëwitotsi, bepeyajuwëñësitotsinua. Nexata Cristo xaniawaetsia naca-eweta. ³¹ Bajaraxua yabara Dioso pejumeliwaisibaxutota jumaitsi mapacueniaje: «Pebi itsa pita petiriwa pijawanexa, bawecuanatsata paxa, pena-ata, saicaya pebarëponaponaenexa pijawa. Nexata, anijajiwiwimibeje naexana becaejiwi, peperabëto»,^m jai. ³² Mapaliwaisije Dioso bajayawerena muetsia xainabuata. Itsiata, maparucaeje, matapania neyapëtaeya-exana, pacuenia Cristo pijajiwiitsi bepeperabëtotsiⁿ wajanaca-exanaejawa, paxanë pajudfowinë, paxamë apopajudfowimë-ata. ³³ Bajaraxuata, icatsia pacatsipaebatsi. ¡Paxamë pabebijiwiwimë, pacaenëmë canacujitsia, pa-asiwamëre panijawajiwi, pacuenia panijacuata panaperabë-asiwamë! ¡Paxamë pijinia papetiriawimë pane-amonajiwi payaiyataema!

Pemuxujiobiliwaisi pexijawabelia, paxajiwijawabelia-ata

6 ¹ ¡Paxamë papeximë, watuxanenë Cristo papijajiwiwaxamë, paneaxajiwi, pane-enajiwi-ata, pajumecowënëtabiabare! Bajarapacuenia

j 5:26 merata bepejamatabëcuenequitsiwi: Jesús peliwaisi itsa jumexaniantanetsi wajasowanajamatabëcuenecopatsinexa Jesucristojawabelia, Dioso nacawecua-ajibia-exana wajanecon, anconijibia wajanacataenexa. Taema Jn 15:3; 17:17; 1Co 6:11; Tit. 2:14; 3:5. k 5:27 pejamatabëcuenenaitabësiwicuenia: Jota Pablo canacueneba judfowimi pe-exanaecuenenacacujibimatacabita. Bajayatami, penacocijibiwanexa pijamonae bamatawanetsi, aceiterata itabara-exabatsi pewecua-ajibia-exanaenexa pitabaranatsirunaejawa, xatatatsinua pexanianaxatatsijawa, perajutsiwayënaeya pamonanexajawabelia. Nexata, Cristo natane pamonanexa pijajiwi. Pijajiwi pijinia tane bepjawanexa, powa itsamatacabijawabelia tsitajëtsijitsia Diosojawabelia. (Taema Apoc. 19:7-8.) Bajaraxuata, Cristo pijacuata bewajanacamatawae peliweisita waja-asaëtsawanapae-epato, bewajanaca-itabara-itabëtsi Espiritu Santota (be-aceitera), bewajanaca-itabëtsicuene nacawecua-ajibia-exana daxita wajanconimi, daxita bepenaxuirabicuene wajaxainaejawami, wajanacaitajëtsiwayënaeya bepjawacueniatsi paxa Diosojawabelia. 1 5:30 bepeperabëtotsi: Taema Gén. 2:24. m 5:31 Taema Gén. 2:24; Mt 19:5-6; 1Co 6:16. n 5:32 caenë bepeperabëtotsi: Taema Efe. 3:3-9.

pane-exanaejawa Dioso tsitaxanepanatsi. ²Bajaraxua yabara, Dioso pejumeliwaisibaxutota jumaitsi mapacueniaje: «¡Yaiyataema axa, ena-ata!»,^o jai. Bajarapaliwaisi Dioso yajawanajumecopatanua pexaniacuenia peya-wenonaenexa, pajiwi jumecowënëta bajarapaliwaisi. ³Yawenonaeyapaeba xaniawaetsia peponaponaenexa, bajayajebi piasaëtsaponaponaenexanua mapanacuataje.

⁴¡Paxamë pijinia, panexi panexainaewi, pëtsa pa-anaeya-exaname panexi bijiaya pane-ewetsijawata, papecabara-anaepanaeyaniwa! ¡Biji rajane, xaniawaetsia panacoxiwitsare panecuenecujarubijawata, panecuenexanetsi-jawatanua,^p Dioso pejumeliwaisita^q papecayapëtaeya-exanaecuenia!

Pemuxujobiliwaisi petuxanewi, pamona-ata petonacuenebawanapaewi

⁵¡Paxamë pijinia, itsamona papijajiwimë, amoneya panetonacuenebawanapaewi,^r pacuenia Cristo pajumecowënëtsipame, bajarapijinia pacuenia, pato-exanabiabare panijatuxanewi mapanacuataje papeca-itorobicuenia! Yaiyataeya, xaniawaetsia, patonacuenebianame panijatuxanewi barajitsipaeya. ⁶¡Pacuenia paxamë, patonacuenebijitsipame Cristo, bajarapijinia pacuenia xaniawaetsia patonacuenebabiabare panijatuxanewi caematacabi canacujitsia! ¡Pëtsa xaniawaetsia patonacuenebame papecacuenetaenucaejawata, papeca-siwabarëyanexa! ¡Pecowëta-ata pijinia, xaniawaetsia patonacuenebare! ¡Patonacuenebabiabare panijatuxanewi, daxita panejamatabë-ëthëtojawawetsina, Dioso papecatojitsipaecuenia paneto-exanaenexa!

⁷¡Jamatabëcuenekarëyaya, pa-afaetabinejewamë patonacuenebawanapare panijatuxanewi, pacuenia patonacuenebijitsipame Cristo! ¡Pëtsa patonacuenebame, pacuenia mapanacuapijiwije batonacueneba pijatuxanewi!

⁸Paxamë rabaja payapëtaneme mapacuenije. Dioso najëpaeya matamot-siana daxita pamona pexaniacuen to-exana itsamonaejawabelia, pamona amoneya tonacuenebawanapa itsamonaejawabelia, pamona-ata pijacuata natonacuenebawanapa.^s ¡Nexata, pexaniacuenia patonacuenebawanapare panijatuxanewi!

⁹Paxamë pijinia, papijatuxanewimë, pacamuxujibatsi mapacueniaje. ¡Xaniawaetsia pataema panijajiwi, papecatonacuenebiwi! ¡Pacopare panijajiwi pane-atiobabiabijawa, asaëya papecatonacuenebabiabinexa!

o 6:2 ¡Yaiyataema axa, ena-ata!: Éxo. 20:12; Deut. 5:16; Col. 3:20-21. **p 6:4** *panecuenexanetsi-jawatanua*: Griegojumeta canacueneba, «paideia», pejaijume. Bajarapajume nacayapëtaeya-exana pacuenia wajaxijiwixi becuenexanetsi liwaisita wajamuxujibijawata, itsa jume, wajaconitsijawata. Itsiata, aponaca-itorobi wajaxijiwixi wajacuenexanetsijawata wajacuata wajana-anaecaewia-exanaenexa. Biji rajane, naca-itoroba wajacuenexanetsijawata waja-jamatabëcuenesaëya-exanaenexa bajarapamona waja-itorobicuenia apojitsipae-ata. Taema

Prov. 13:4; 15:5; 22:6,15; 23:13; 29:15, 17; Prov. 19:18, 20, 27; Heb. 12:5-11; Apoc. 3:19. **q 6:4** *pejumeliwaisita*: Taema 2Ti 3:16. **r 6:5** *amoneya panetonacuenebawanapaewi*: Pacuenia Pablo muxujoba amoneya petonacuenebiwi, bajarapacuenia waxaitsi-ata, Jesús pijajiwitsi, yaiyataeya xaniawaetsia betonacuenebatsi, wajatuxanewi barajitsipaeya. Taema Deut. 24:14-15; Lc 10:7; Sant. 5:4. **s 6:8** *pijacuata natonacuenebawanapa*: Wowaijumeta, «libre». Bajarapajume yabarajumaitsi pamona apocesanajetsiwitsi itsanëjawabelia, amoneya petonacuenebina. Pecomuatsicujinaetsi pexinaenëtsi tsicarucatsi pexaejawa piabatsinexatsi, penaxatibijawa perajutsinexatsi, peticopatsinexatsi peponaponaetaxunaenexa, pewetsinexatsinua piawitane-jawata, itsiata apomatamotsitsi palata penacuenebijamatabëcuene. Itsiata, itsa apocomuatsi-nëtsi, ëpalata rajutabiabatsi.

o 6:2 ¡Yaiyataema axa, ena-ata!: Éxo. 20:12; Deut. 5:16; Col. 3:20-21. **p 6:4** *panecuenexanetsi-jawatanua*: Griegojumeta canacueneba, «paideia», pejaijume. Bajarapajume nacayapëtaeya-exana pacuenia wajaxijiwixi becuenexanetsi liwaisita wajamuxujibijawata, itsa jume, wajaconitsijawata. Itsiata, aponaca-itorobi wajaxijiwixi wajacuenexanetsijawata wajacuata wajana-anaecaewia-exanaenexa. Biji rajane, naca-itoroba wajacuenexanetsijawata waja-jamatabëcuenesaëya-exanaenexa bajarapamona waja-itorobicuenia apojitsipae-ata. Taema Prov. 13:4; 15:5; 22:6,15; 23:13; 29:15, 17; Prov. 19:18, 20, 27; Heb. 12:5-11; Apoc. 3:19. **q 6:4** *pejumeliwaisita*: Taema 2Ti 3:16. **r 6:5** *amoneya panetonacuenebawanapaewi*: Pacuenia Pablo muxujoba amoneya petonacuenebiwi, bajarapacuenia waxaitsi-ata, Jesús pijajiwitsi, yaiyataeya xaniawaetsia betonacuenebatsi, wajatuxanewi barajitsipaeya. Taema Deut. 24:14-15; Lc 10:7; Sant. 5:4. **s 6:8** *pijacuata natonacuenebawanapa*: Wowaijumeta, «libre». Bajarapajume yabarajumaitsi pamona apocesanajetsiwitsi itsanëjawabelia, amoneya petonacuenebina. Pecomuatsicujinaetsi pexinaenëtsi tsicarucatsi pexaejawa piabatsinexatsi, penaxatibijawa perajutsinexatsi, peticopatsinexatsi peponaponaetaxunaenexa, pewetsinexatsinua piawitane-jawata, itsiata apomatamotsitsi palata penacuenebijamatabëcuene. Itsiata, itsa apocomuatsi-nëtsi, ëpalata rajutabiabatsi.

¡Pacanaējēre pacuenia paxamē-ata, panijajiwi yajawa, paxainame caenē panijatuxanenē Dioso, Ponē eca athēbētatsia! Bajaraponē saya najēpaeya tane daxita jiwi. Nexata, paneconiwajēto xaina caejiwi canacujitsia, petuxanewi-ata, amoneya petonacuenebiwi-ata, bajarapaneconiwajētota naneconitsia-exanaponaena. Bjaraxuata, panijajiwi-ata itorobajē xania-waetsia papecatonacuenebabiabinexa.

**Dioso rajuta Jesús pijajiwijawabelia, xuanēta naewetsijitsia,
dowathi pejamatabēcuenē-ējēbijawatatsi**

¹⁰ Tajamonae, icatsia cotocaewi patacatoyaquinaeliwaisita, paca-jumaitsitsi mapacueniaje. ¡Pa-ajamatabēcuenesaēmēre tsawanapae wajatuxanenē Cristojawabelia, bajaraPonē pesaēta xaniawaetsia pane-nayajiwitaewanapaenexa dowathi pijacuenē! ¹¹ ¡Pacuenia wajabitsaēnē banayajiwinaxatata piatajajawa pijawajabitsaēnē pejororonaeyani-watsi, bajarapijinia pacuenia, paxamē-ata panayajiwinajamatabēcuenē-xatare Dioso papecarajutsijawanēta, panecanawajabitsaētsinexa dowathi panejamatabēcuenematatoxenetsinexa, paepatota pacajamatabēcuenē-ējēba! Nexata, dowathi pawecua-ajamatabēcuenesaēmē tsane,^t papecajamatabēcueneyamaxē-itojorobiyanīwa.

¹² Bjarapacuenia bepa-exaname, tsipaji raja apoxainaetsi wajanacabarēnawajabitsaētsinēnexa wajawēnajiwiwonē. Biji rajane, ayaibitsaētoxaneto barēnawajabitsaētaponatsi apowajataecapanepaewi, itaboxojawa pejina-wanapaedowathiwijawabelia, bajarapabitsaētotuatuajēta itsamonae ayai-jamatabēcuenewi. Pamonae mapanacuataje namatacaitorobabiaba daxita pitaquirijamatabēcuenē pexainaewi, pibisiacuene pexanaeya-exanaenexa. Nexata, itsa nacatsimaxēpatabiaba, jaita wajanacajitsipaeya-exanaejawa, pibisiacuene waja-exanaenexa. ¹³ ¡Nexata, papecajamatabēcueneyamaxē-itojorobiyanīwa dowathi, Dioso papecarajutsijawanēta panecanawajabitsaētsinexa panayajiwijamatabēcuenexatare pane-ajamatabēcuenesaēnexa! Pamatacabi pacatsimaxēpatsiana papecajamatabēcuenē-ējēbinexa, itsa jume, pibisiacuenejawa papecatocopiapatsinexa, apopacayamaxē-itojorobicapanepae tsane. Biji rajane, panijawajabitsaēnē dowathi pawecua-ajamatabēcuenesaēmē tsane.

¹⁴ ¡Nexata, pajamatabēcuenesaēmēre panenajamatabēcuenexatatsi-xae Dioso pijacuenējawanēta, pacuenia wajabitsaēnē piatajajawa naya-jiwinaxatatabiaba pebarēnawajabitsaētsiwajēnaeya! Wajabitsaēnē penayajiwinaxatatsicujinae, caecowēta banuca, natixitsinejewa peco-wēwecua pijawajabitsaēnē pebarēnawajabitsaētsijawata. Wajabitsaēnē bana-epacēta" penawajabitsaētsiwajēnaeya. ¡Bjarapijinia pacuenia

t 6:11 *pajamatabēcuenesaēmē tsane:* Cristo pijapinijsaēta waja-ajamatabēcuenesaēcujinae, Dioso wajanacarajutsijawanēta wajanayajiwinajamatabēcuenexatatsicujinaenua, matapania nacajamatabēcuenecaējēpa waja-ajamatabēcuenesaējawa dowathiwecua. Taema vr 12, itsajota Pablo nacayapētaeya-exana pacuenia dowathi ayaijamatabēcuenenē waxaitsiwecua. Waxaitsi waja-saēta aponacacuenecaējēpae wajajamatabēcuenematatoxenetsijawa dowathi. **u 6:14** *bana-epacēta:* Wajabitsaēnē pena-epacētsipana na-epacētabiaba xaniawaetsia pebarēnawajabitsaētsinexa, penaxatatsijawa pesarabiyanīwatsi. Xainanua itsajota rubijitsia pija-espada, pijacusiupa, padorotanua caponabiaba piapaera. Taema Isa. 11:5; Lc 12:35; 1Pd 1:13.

panajamatabëcuenexatare Dioso pijapexaniajailiwaitsa, dowathi papecayamaxë-itojorobiyaníwa penajumetsënëtsiliwaitsa! Wajabitsaënë piatajajawa banamipabëxatata.” ¡Bajarapacuenia Dioso pijapexania-cuenejawanëta panajamatabëcuenexatare pexaniacuenejawanë pane-exanawanapaenexa, dowathi papecajitsipaeya-exanaeyaniwa pibisiacuen pane-exanaenexa! ¹⁵ Wajabitsaënë banataxuxatata” pijazapato. ¡Bajarapacuenia panajamatabëcuenewerere pexanaliwaitsi, Jesús peliwaitsi, jiwi panetsipaebawanapaenexa, daxita pejumexaniataewi bajarapaliwaitsi, jamatabëcuenexanepanaeya pejinawanapaenexa Diosojawabelia! ¹⁶ Daxita-cuenewecua, wajabitsaënë escudopana banamaxëcëta, penacaranatsinexa pe-upaxuabiyaniwaitsi pijawajabitsaënë. ¡Bajarapacuenia panewajënaeyabelia pa-ajamatabësaëmëre pane-itaxutuajamatejemajawa Dioso pepelayawenonaenexa! Nexata, pacacuenecaëjëpaena panewecuanajamatabëcuenecaranatsinexa, dowathi papecajamatabëcuenepaxuabiyaniwa* penajumetsënëtsiliwaitsianëta. ¹⁷ Wajabitsaënë banamataxatata piata-jacascowënëjawa.” ¡Bajarapacuenia panayajiwinajamatabëcuenexatare asaëyata panejumexaniataejawa Dioso papecacapanepaejawa baja panijaneconiwecua! Oríjibia, wajabitsaënë pija-espada banayajiwicapona. ¡Bajarapacuenia panayajiwicaponare Dioso pejumeliwaitsi, panebarëna-wajabitsaëtsinexa panijawajabitsaënë dowathijawabelia! Bajarapaliwaitsi Espíritu Santo pacayapëtaeya-exanaena pexaniajailiwaitsi, dowathi papecayamaxë-itojorobiyaníwa” papecajamatabëcuenepañëbjawata. Daxita bajarapacuenejawanëta itsa panajamatabëcuenexatatsianame, pacacuenecaëjëpaena panejamatabëcuenesaënexa dowathiwecua panatixitsinejewamë papecajamatabëcuenepañëbjawata, panecuenepañëbjawabelia.

¹⁸ Daxita matacabi pawajëcaponaenname Diosojawabelia, pane-ajamatabëcuenesaëtsawanapaenexa, papecayawenonaenexa, itsamonaepañëbjawawenonaenexatsi. ¡Patonacopare Espíritu Santo papecajamatabëcuenenamatacaponaenexa, panewajëcaponaepañëbjawata Diosojawabelia! ¡Pa-ajamatabëcuenepañëbjawata tsawanapae, pacopatsinejewamë pane-wajëcabiñëbjawata, pane-ajamatabëcuenesaënexa Diosojawabelia, dowathi papecajamatabëcueneyamaxë-itojorobiyaníwa! ¡Bajarapacuenia-ata daxita Jesús pijajiwi yabara payajiwiwajëtabiabare Diosojawabelia! ¹⁹ ¡Xanë-ata panetowajëtabiabare, Dioso taneyapëtaeya-exanaenexa pacuenia paebijitsianë, liwaitsi tatsipaebijawata jiwijawabelia! Panetowajëtabiabarenua

v 6:14 *banamipabëxatata*: Wajabitsaënë piatajajawa namipabëxatatabiaba, pijawajabitsaë pejororonaeyaniwaitsi pebarëñawajabitsaëtsijawata. Taema Job 29:14; Isa. 59:17; 1Ts 5:8.

w 6:15 *banataxuxatata*: Wajabitsaënë pexaniawiria zapato nataxuxatatabiaba xaniawaetsia penucaenexa, pebarëñawajabitsaëtsijawata pijawajabitsaë, peyataxunajuecaeyaniwanua. Taema Rom. 10:15; Isa. 5:7. x 6:16 *papecajamatabëcuenepañëbjawata*, bewajanacajamatabëcuenet-seconae pibisiajamatabëcueneta, Dioso wajacuenepañëbjawata, bajarapajamatabëcuenepañëbjawata wajanaca-exanaeya-exanaenexa. Bajarapapibisiajamatabëcuenepañëbjawata, cuenecaranatsianatsi matapania waja-itaxutuajamatejemajawa Dioso. y 6:17 *piatajacascowënëjawa*: Bajaraxuata, wajabitsaënë namataxatatabiaba, pematathinaxuabiyaniwaitsi pijawajabitsaënë bebarëñawajabitsaëtsijawata. Taema Isa. 59:17; 1Ts 5:8. z 6:17 *dowathi papecayamaxë-itojorobiyaníwa*: Taema Heb. 4:12; Mt 4:4-11; 1Ts 2:13; Apoc. 1:16; 19:15.

tanejamatabëcuenecaëjëpaeya-exanaenexa, ajume-urajibia jiwijawabelia tatsipaebabiabinexa Jesús peliwaissi, Dioso pecapanepaeliwaissinexa judfowi, apojudfowi-ata. Bajarapaliwaissi picani Dioso bajayata apoyapëtaeya-exanae itsajiwijawabelia-ata! ²⁰ Itsiata maparucaeje, bajarapapexanialiwaissi Dioso necopata ajume-urajibia tatsipaebanajetarucaenexa itsamonaejawabelia. Nexata, tatsipaebabiabixae bajarapaliwaissi, ajena naneconitsiaponaponajë majotaje, penaneconitsiwi pejebabiabibota. ¡Bajaraxuata, Diosojawabelia panetowajëtabiabare, naneconitsiaponaponae-atanë, ajume-urajibia tsiteca jiwijawabelia tatsipaebabiabinexa bajarapaliwaissi pacuenia Dioso netocopata!

Pablo penapëjiobiliwaissi

²¹ Wajabananë Tíquico, bitso waja-asiwanë, itsa patsiana paxamëjawabelia, pacatsipaebiana daxita xuanë necuenetane. Bajaraponë xaniawaetsia paneyawenonabiaba, itsa patonacuenebabiabajë pacuene wajatuxanenë pane-itoroba. ²² Bajaraxuata, bajaraponë pacato-itorobatsi baja paxamëjawabelia, papecatsipaebinxexa pacuenia pajinawanapajë, panemuxunajamatabëcuenesaënexa panejumetaejawata.

²³ Bitso pacatojitsipatsi waxa Dioso, wajatuxanenë Jesucristo-ata, papecayawenonaenexa jamatabëcuenexanepanaeya panejinawanapaenexa. Bajaraxuata, pacatowajëcabiabatsi namata-enetsia panena-asiwanexa, Jesucristojawabelia panenajuasiwanajamatabëcuenecopabixae. ²⁴ Pacatowajëcabiabatsinua Dioso asiwaya papecayawenonabiabinexa, paxamë paneasiwatsawanapaewi wajatuxanenë Jesucristo pacopatsinejewamë. Bajaraitsi tsane.

Filipenses

Mapabaxutoje Apóstolnë Pablo toyaquina Jesús peliwaishi pejumexaniataewi, Filipos tomarata pejinawanapaewijawabelia

Pablo pebajacobiliwaishi Jesús pijajiwi jawabelia,
Filipos tomarata pejinawanapaewi

1 ¹Xanë Pablonë, Timoteobeje, Jesucristo papijajiwi tonënëbeje, paca-
bajacobatsibeje paxamë, Filipos tomarata panejinawanapaewi, Dioso
papeca-itapetsiwi^a papijajiwinexamë Cristo Jesús pejamatabëcueneta. Paba-
jacobajëbejenua ancianowi, diáconowi-ata. ²Pexaniacuenia pacatojitsipatsi,
waxa Dioso, wajatuxanenë Jesucristobeje, papecajamatabëwënëtsinexa
papeca-asiwajamatabëcuene, papecabarajamatabëxanepanaejamatabëcu
ene-ata, jamatabëcuenexanepanaeya panenajuajinawanapaenexa.

Pablo towajëta Diosojawabelia Jesús pijajiwi yabara

³Pexaniajamatabëcuene rajutabiabajë Diosojawabelia tawajëtsijawata
paxamë yabara patacanajamatabënapitatsijawata. ⁴Patacatowajëtsija-
wata Diosojawabelia, jamatabëcuenebarëyaya wajëtabiabajë paxamë
yabara, ⁵tsipaji caejamabëcuene paxainame pataneyawenonabiabine-
xamë tanamatawenonaejawanë yabara. Nexata, xua namatawenonajë
tatsipaebanajetarucaejawata Jesús peliwaishi, panerajutabiabame pane-
jumexaniataecujinae bajarapaliwaishi, mapamatacabijawaberena-ataje.
⁶Jamatabëcuenebarëyaya pacatowajëtabiabatsinua, tsipaji yapëtaniji baja
cajena, pepacuene panexainaejawanexa papexaniacuenë^b Dioso taxu-
xuaba paxamëjawata. Nexata yapëtaniji bajaraPonë pewajënaeyabelia
papecajamatabëcuenexanepanaeya-exanaponaenexa, pexaniajamatabë-
cuene panexainawanapaenexa, Jesucristo icatsia pepatsimatacabitsicaja-
wabelia. ⁷Netoxanepana bajarapacuenia patacasiwanajamatabëxainaejawa,

a 1:1 *papeca-itapetsiwi*: Pamonae siwanajamatabëcuenecopaba Jesucristojawabelia pecapanepae-
nexatsi pijaneconiwequa, Dioso itapeta pijajiwinexa, saicayacuenia pejinawanapaenexa map-
nacuapijiwiwequa. **b 1:6** *papexaniacuenë*: Dioso peliwaishi pecujarubiwi caejamatabëcuene
apoxainae papexaniacuenë yabara jumaitsi. Itsamonae canaëjëta Dioso wajanacacapanepaejawa
yabara. Nexata, papexaniacuenë taxuxuaba wajasivanajamatabëcuenecopatsijawata Jesucris-
tojawabelia, bajaraxua weretsiana Cristo pepatsimatacabita. Itsamonae pijinia canaëjëta, Cristo
pepatsimatacabita, papexaniacuenë Dioso to-exanaejitsia Jesús pijajiwi, Filipo tomarapijiwi,
peyawenonaexae Pablo pepaebanajetarucaejawata Jesús peliwaishi.

tsipaji bitso paca-asiwatsi. Paxamē caejamatabēcuenē paxainame asiwaya pataneyawenonaejawamē, Jesús peliwaishi tapaebanajetarucaenexa, naneconitsia taponaponaē-epatotana penaneconitsiwi pejebabiabibota. Oriji-bia, panejamatabēcueneyawenoname, paepatota nenuta nacua pewetsiwi pitabarata, tanayajiwicuaicuaijainexa Jesús peliwaishi yabara, tayapētaeaya-exanaenexa pexaniajailiwaishicuenē tatsipaebaponaejawa. ⁸ Dioso cajena nejamatabēcueneyapētane ayaicuenia pataca-itaxanaejawa, pataca-asiwajamatabēcuenē-ata. Pacuenia Jesucristo naca-asiwa, bajarapacuenia nejamatabēcuenecaējēpaeya-exana pataca-asiwanexa. ⁹ Pacatowajētabiabatsi Dioso jawabelia papecajamatabēcuenewēnētsinexa namata-enetsia panena-asiwajawa panewajēnaeyabelia panecatsitecawanapaenexa. Pacatowajētabiabatsinua papecarajutaponaenexa paneyapētaejamatabēcuenē, panecanaējētsijamatabēcuenē-ata, xaniawaetsia pane-exanawanapaenexa pane-asiwajawata Dioso papecatojitsipaecuenia. ¹⁰ Bajarapacuenia payapētaename pane-itapetsijawa pitsicuenē Dioso tsitapexaniacuenetsi pane-exanaejawanexa. Nexata, pepocuene aneconijibia pajinawanapaename, Cristo icatsia pepatsimatacabitsicajawabelia. ¹¹ Nexata, Jesucristo papecajamatabēcueneyawenonaexae, nawitsia pexaniacuenejawanē panacuenecapit-sapaponaename pane-exanawanapaejawata. Nexata, itsamonaē papecacuenetaejawata, yayiyataeya Dioso pexaniacuenia wēnēxaniatsiana.

Pablo tsitapexaniacuenetsi bitso, pe-exanaponaejawa Cristo pijacuenē

¹² Tajamonaē, pacatojitsipatsi paneyapētaejawa papibisiacuenejawanē netocopiapatapona, tanecuenecaranatsijawanēnexa, Jesús peliwaishi tapae-baponaeyaniwa. Biji rajane caranata, bajaraxua nejamatabēcueneyawenona tawajēnaeyabelia tapaebinexa bajarapapexanialiwaishi itsamonaejawabelia. ¹³ Tane-etsixae nacua-ewetsinē pijabota penaneconitsiwi pejinawanapaeya-exanaetaxunaejawata, nexata bajarajota pejinawanapaewi, nacua-ewetsinē pijabopijiwi, wajabitsaē-ata, neyapētane majotaje naneconitsiataponaponaejawaje, Jesucristo pijajiwitonēxaenē. ¹⁴ Ayaibitsaētoخانeto, Jesús peliwaishi pejumexaniataewi, itsa newēnētane naneconitsia taponaponaejawa mapatomarataje, najamatabēcuenesaēya-exana ajumejunawijibia Dioso pejumeliwaishi pepaebaponaenexa itsamonaejawabelia. Oriji-bia, pewajēnaeyabelia itaxutuajamatejema tsawanapae Dioso.

¹⁵ Xaniajai rabaja, bajarapacuenia itsamonaē exana. Nexata, bajarapamonaeyajuwēnēwi, Dioso pejumeliwaishi tsipaebapona, tanecuenecaēbi-xae, liwaishi tanetsi-exanaenexa. Itsamonaē pijinia tsipaebapona Cristo peliwaishi pexaniajajamatabēcueneta. ¹⁶ Nexata, bajarapamonaē tsipaebapona Cristo peliwaishi tane-asiwaxae, tsipaji yapētane Dioso tane-etsijawa penaneconitsiwi pejebabiabibota, Jesús peliwaishi yabara tayapijiwicuai-cuaijainexa. ¹⁷ Itsamonaē pijinia tsipaebapona Jesús peliwaishi, penatojitsipaexae pejumetaewitsi peyayataenexatsi, peliwaishipēnaponaenexatsinua. Saya jema Cristo peliwaishi tsipaebapona, tsipaji tawēnētaejawata pepaebijawa jitsipa tanenajamatabēxainaeya-exanaejawa, itsa jume, bitso liwaishi tanetsi-exanaenexa. ¹⁸ Itsiata, apo-itsacuenē bajarapacuenia pexanaejawa. Pexaniajamatabēcuenecuenia paebi-ata, itsa jume, tanecuenecaēbicuenia paebi-atanua, najēpaeya Jesús peliwaishi paeba. Bajaraxuata,

siwajamatabëcuenebarëyanë tsabiabi itsawënëtaniji itsamonae Jesús peliwaishi pepaebaponaejawa yabara. Bitso orijibia tawajënaeyabelia bajaranxua yabara jamatabëcuenebarëyanë tsaponae tsane. ¹⁹ Barëyanënuu, tsipaji yapëtaniji tapitsapaejawanexa penaneconitsibowecua, pataneto-wajëtaponaexaemë Diosojawabelia, taneyawenonaponaexaenua Espiritu Santo-ata, Ponë Jesucristo itorobica. ²⁰ Bitso apojitsipaenë ta-exanaejawa itsacuenejawayo-ata, xua wemaxë-auranë tsipae. Biji rajane, itaxutuajamatejemanë Dioso taneyawenonaenexa, ajunawijibia ta-exanaponaenexa Cristo pejitsipaecuenia daxitamatacabijawabelia. Nexata, ta-asaëtsaponaponaepato, itsa jume, tatëpaejawata-ata mapanacuataje, daxitajiwi tanecuenetaewi yayiataena Cristo, ayaijamatabëcuenenë yabara. ²¹ Bajarapacuenebeje xanënexa bitso netsitanamatamota, ta-asaëtsaponaponaepato mapanacuataje, jitsipabiabajë yayiataeya ta-exanaponaepaejawawa Cristo pejitsipaecuenia. Itsiata, matatoxenetsia bitso netsita pexaniacuene tatëpaejawawa, Cristo tayajawaponaenexa athëbëtatsia.

²² Apoyapëtaenë picani xua netoxanepanaejitsipa, tsipaji itsa asaënë tsaponaponaep abaxë mapanacuataje, necaëjëpa matatoxenetsia tato-exanaponaenexa Cristo tanetojitsipaecuenia. Nexata, xanë apoya-pëtaenë xua pepacuene nato-itapetsijitsianë. ²³ Neto-ayapëbeje cajena tanato-itapetsijawa anijajamatabëcuenebeje. Itsajawata, bitso jitsipabiabajë tatëpaejawawa, taponaeenexa Cristo pijanacuayabetsia. Bajaranxua bitso netoxanepanaejitsipa. ²⁴ Itsiata, paxamë panenamatawenoname abaxë taponaponaenexa mapanacuataje, patacayawenonaponaenexa. ²⁵ Xanë baja cajena, yapëtaniji paxamë abaxë patanenamatawenonaejawamë, taponaponaenexa mapanacuataje, patacayawenonaenexa, paneajamatabëcuenaenëxaxa panewajënaeyabelia, panejamatabëcuenebarëyanexanua, panejumexaniataejawa Cristo peliwaishi. ²⁶ Nexata jane baja, icatsia itsa patsianajë paxamëjawata, Cristo Jesús taneyawenonaecujinae penaneconitsiwi pejebabiabowecua tapitsapaenexa, paxainaename xua yabara matatoxenetsia pexaniacuena pawënëxaniatsijitsiamë Cristo Jesús.

²⁷ Daxitawecua caejawa pacawajëtatsi. ¡Xaniawaetsia pajinawanapare, papeca-itorobicuenia pexanaliwaishi, Cristo peliwaishi! Nexata, ponae-atanë tsipae paxamëjawabelia patacataenexa, itsa jume, apoponaep-atanë tsipae, jitsipajë caeliwaishi patacawënëtaeponaejawa najamatabëcuenejëpaeya panecasaëtsawanapaejawawa Cristo peliwaishi. Jitsipajënuu patacawënëli-waisitaejawawa asaëyata najamatabëjëpaeya jiwi panetsipaebawanapaejawawa Cristo peliwaishi, jiwi pecapanepaeliwaishinexatsi. ²⁸ ¡Papecacuene-itoyawi pacabejiobia-exanaep-ata, pëtsa pacujunawame! Bajarapacuenia panejamatabëcuene-aitatsacajawata, bajarapamonae natoyapëtaena Dioso pewerebiabijawanexatsi. Paxamë pijinia panatoyapëtaename Dioso papecacapanepaejawanexa. ²⁹ Dioso, Ponë pexaniacuena pacatocopata panesiwanajamatabëcuenecepinexa Cristojawabelia, bajaraPonë pacacopatana itsamonae papecabebiobia-exanaenexa Cristo papijajiwiwaxemë. ³⁰ Pacuenia Cristo pijajiwitonëxanë nebejiobia-exanapona, bajarapijinia pacuenia paxamë-ata, itsamonae pacabebiobia-exanaena. Pacuenia baja imata panetaneme tanebejiobia-exanaejawawa, bajarapacuenia abaxë tsiteca nebejiobia-exanapona.

**Beweliamatabëcuene nataeya pajinawanapare
Cristo papecatojitsipaecuenia**

2 ¹¡Paxamë rabaja paneyapëtaneme Cristo wajaca-asiwajawa, wajanacaja-matabëcueneyawenonaejawa, cae-Espíritu Santo wajanacatsijamatabë-ecaejawa-ata, itsa Cristo papeca-asiwajamatabëcuene pacanamatacaitoroba itsamonae panebejiobiataejawa, pexaniacuene pato-exanare! ²Ayaicuenia pacasiwajamatabëcuenebarëyatsi tsane, najamatabëcuenejëpaeya panena-juajinawanapaejawata, namata-enetsia panena-asiwatsawanapaejawata, caejamatabëcuene panesiwanajamatabëxainaejawatanua, xua pa-exanaejitsiamë Dioso pejamatabëcueneta. ³¡Pëtsa patsita-exaname itsa-cuenejawa papecacuenequjanixae xua yabara itsamonae pacataejitsia bepa-ayaijamatabëcuenejiwimë! Biji rajane, beweliamatabëcuenewi pana-taename. Itsamonae pacueneayiyataeyabianame pecuenequjanijawatsi yabara. ⁴¡Pëtsa ëpaxamënexa panasiwanajamatabëxainabiabame xua paca-toxanepanaejitsia! Biji rajane, xanepana itsamonae-ata panesiwanajamatabë-xainaejawa. ⁵¡Pacuenia Cristo Jesús pacasiwanajamatabëxaina, bajarapijinia pacuenia, paxamë-ata itsamonae yabara pasiwanajamatabëxainare!

⁶«Cristo ayaijamatabëcuenenë-ata Diosonëxae,^c aponato-asiwa pijaDiosojamatabëcuene.

⁷Biji rajane, pijacuata nawecuacopata^d ayaijamatabëcuene pexainaejawami, juya penacopatsinexa Dioso pijajiuitonëcuenia.^e Bajaraxuata, naexana mapanacuataje, pacuenia waxaitsi banaexanatsi.

⁸Jiuitonëcuenia penaitajëtsixae mapanacuataje, pijacuata naexana beweliamatabëcuenenë.^f Nexata, Paxa Dioso petonajumecopatsicueniatsi jumecowënëtsiaponapona^g pebeyaxuabijawabelianexatsi, pecobematabibarusinexatsi cruzata, bitso bepijaneconi pexanaenë.

⁹Jumecowënëtsiaya peponaponaexae beweliamatabëcuenenëcuenia, Dioso juya ayaijamatabëcuenenë exanatsi daxitawecua. Tocopatatsinua matatoxenetsia peyayataenexatsi daxitawiriawi.

¹⁰Bajaraxuata, Cristo pitabarata, daxitajiwi pematabacabëta yayiyataeya tonubenaenatsi, athëbëtatsia pejinawanapaewi, mapanacuataje pejinawanapaewi, petëpaewimi-ata.

¹¹Bajarapijinia pacuenia, daxitawirijumewi natoyapëtaena Jesucristo pepopetuxanenëcuene. Bajarapacuenia pexanaejawata, daxitajiwi pexaniacuena Dioso wënëxaniatsiana, bitso ayaijamatabëcuenenë yabara».

**Pacuenia Jesús pijawi bepecotia pexainaewi
tsawanapae mapanacuapijiwituatuajëta**

¹²Tajamonae bitso pataca-asiwawi, patacayajawaponaponaejawata paju-mecowënëtabiabame Dioso peliwaissi papeca-itorobicuenia. ¡Matatoxenetsia

c 2:6 *Diosonëxae*: Taema: Jn 1:1-2; 17:5. **d** 2:7 *nawecuacopata*: Taema 2Co 8:9. **e** 2:7 *Dioso pijajiuitonëcuenia*: Taema Isa. 52:13. **f** 2:8 *beweliamatabëcuenenë*: Taema Isa. 53:3-9; Hch. 8:32-33. **g** 2:8 *jumecowënëtsiaponapona*: Isa. 53:12; Mt 26:39; Rom. 5:19; Heb. 5:8.

Dioso pajumecowëñëtanawapare, tajë pacawecuaponaponae-atatsi! Nexata, pacaewiwimë canacujitsia, yayiataeya pa-exanawanapaename Dioso pape-catojitsipaecuenia, papecacapanepaexae papijawinexamë. ¹³ Pacacuenecaëjëpa bajarapacuenia pane-exanaejawa, tsipaji raja Dioso pacajitsipaeya-exana, pacajamatabëcuenecaëjëpaeya-exananua papecatojitsipaecuenia pane-exanaenexa.

¹⁴ ¡Daxita Dioso papecatojitsipaecuenia pa-exanawanapare, pibisiacuenia panabaracuaicuajainejewamë, anaeyanua panajumenotsinejewamë!

¹⁵ Bajarapacuenia pajinawanapaename, itsaneconi panatsi-exanaenejewamë, panetsitajinawanapaexae Dioso papeximëcuene. Nexata, mapanacuapijiwije, pibisiacuenia pexanaewituatuajëta pajinawanapae-atamë tsane, itsajiwi-ata acuenebi pibisiacuenia papecabaracuaicuajainexa. Pacuenia pitaquirijawata, pecotia pejamatabëcuene jiwi xaniawaetsia natsiwajë-naetane xua tsiyayitsi, bajarapijinia pacuenia, paxamë-ata pexaniacuenia panetsita-exanawanapaejawata payapëtaeya-exanaename mapanacuapijiwije xua pibisiacuenia pexanaeyaniwa. Nexata, paxamë bajarapamonaenexa bepapecotiamë tsane. ¹⁶ ¡Pëtsa baja pacopabame panejumexaniataejawa, Jesús peliwaisi, papecajamatabëcuene-aitawaya-exanaeliwaisi! Nexata, pamatacabi Cristo icatsia patsianica, ayaicuenia pacasiwabarëyatsi tsane. Bajarapaepatota yapëtaenajë apotanacueratsijawa asaëya tanacuenebijawa paxamëjawata. ¹⁷ Itsamonae nebeyaxuabijitsia-ata tsipae Cristo peliwaisi patacatsipaebixae, xanë itsiata nasiwajamatabëcuenebarëyanë tsipae. Aponasiwabëjanë, tsipaji pasiwanajamatabëcueneecopabame Cristojawabelia, pexaniajailiwaisi patacatsipaebixae. Tanebeyaxuabijawa natotaniji tajarunaejawata be-ofrendacuenia^h tarajutsijawa Diosojawabelia, xaniawaetsia panejinawanapaenexa bajaraPonë pitabarata. Nexata, daxita paxamë ayai-cuenia pacayajawajamatabëcuenebarëyatsi tsane. ¹⁸ ¡Bajaraxua yabara pajamatabëcuenebarëyamëre tsawanapae! Xanë-ata pacayajawabarëyatsi tsane.

Timoteo, Epafroditobeje, yabara peliwaisi

¹⁹ Itsa wajatuxanenë Jesús netojitsipa, bepijiayo itorobianajë Timoteo, papecataenexalia. Pepatsicujinaerena, ita pacawëñliwaisitaenatsi pacuenia pajinawanapame nejamatabëcuenebarëyaya-exanaena. ²⁰ Bajaraponë, caenë, xainajë tanejamatabëcuenejëpaenë. Bitso pacasiwajamatabëcuenebëjai panejinawanapaecuenia yabara, ²¹ tsipaji itsamonae ëpijacuenia yabara bitso nasiwajamatabëcuenebëjai tsabiabi, saya penatojitsipaecuenia pexanaenexa. Cristo Jesús pijacuene aposiwanajamatabëcuenebëjai petonacuenebinexa. ²² Paxamë baja pacueneyapëtaneme Timoteo, pexaniacuenia papecatsitaponaponaejawa. Pacuenia pexënato bacueneyawenona paxa penacuenebijawa, bajarapijinia pacuenia Timoteo necueneyawenona, jiwi tatsipaebaponaejawa pexaniali-waisi, Jesucristo peliwaisi.

^h 2:17 *tajaranunaejawata be-ofrendacuenia*: Bajayata, pexaniajamatabëcuene perajutsinexa Diosojawabelia, pexaniacuenia peyawenonaexaetsi, Israel-pijinë pemomoxi, ofrendacuenia epanabiabi vinora altar-muxuneneta. Taema Éxo. 29:38-41. Nexata, Pablo natotane pejanarunaejawa, pebeyaxuabijawatatsi Jesús peliwaisi pepaebanajetarucaexae, bevinora pe-epanaejawa altar-muxuneneta, pexaniajamatabëcuene perajutsinexa Diosojawabelia, petocopatsixaetsi bajarapacuenia peto-exanaenexa.

²³Tayapētaecujinae xaniawaetsia taponaponaejawa yabara penaneconitsiwi pejebabiabibota, bajaraxuacujinae jane baja jamatabē-itorobajē Timoteo paxamējawabelia, papecataenexalia. ²⁴Itsia, xanē itaxutuajamatejemanē Dioso bepijiayo tapitsapaenexa, jamatejema tajacujaya taponaeenexa paxamējawabelia.

²⁵Imata rabaja, paneto-itorobaremena wajabananē Epafrodito, bajara-pacuenia pataneyawenonaenexamē tanamatawenonae-epatota. Nexata, bajaraponēbeje xaniawaetsia panajuaponaponajēbeje. Neyawenonaponaponanua. Asaēyata panajuanacuenebajēbeje patapaebaponaponaejawatabeje Jesús peliwaisi, itsamonae panenajuabebiobia-exanae-atabeje. Itsia, aeconoxae, netsitaxanepana caewēalia bajaraponē patacato-itorobinexalia. ²⁶Majotaje Epafrodito jamatejema baja piawitanecujinae. Bajaraxuata, bitso pacajamatabēnajina. Orijibia, jamatabēcuenebējai peyapētaexae panewēnē-liwaisitaejawa piawitanejawa. Bajaraxuata, jamatabēpona paxamējawabelia papecataenexa. ²⁷Xaniajai rabaja cajena! Bitso awitane. Imoxoyo baja cajena petēpae. Itsia baitsi jane, Dioso pitaxutotsoniataexaetsi, apotocopatsitsi petēpaenexa. Xanē-ata nitaxutotsoniatane, tsipaji itsa newecuatē-paejitsipa, bitso najamatabēxainaejitsipajē, tanajamatabēxainaejawawecua, penaneconitsiwi pejebabiabibota taponaponaexae. ²⁸Bajaraxuata, bepijiayo patacato-itorobaliatsi bajaraponē. Nexata, itsa patsialia panetaejawata pajamatabēcuenebarēyamē tsane. Nexata, xanē juya bewelia pacasiwanajamatabēcuenebējai tsanetsi. ²⁹Pacopiapitsianame wajabananē bitso jamatabēcuenebarēyaya, Dioso pejamatabēcueneta. Payaiyataenamenua pamonaе jamatabēcuenēpa, pacuenia bajaraponē jamatabēcuenē-itsi. ³⁰Bajaraponē imoxo picani petēpae, Cristo pijacuene patanajuanacuenebaponaponaejawatabeje. Paxamē apopapatsi-atamērena maberenaje, pataneyawenonaenexamē, itsia, panejamatabēcueneta bajaraponē neyawenonabiaba, Cristo pijacuene tatonaenuebijawa.

**Dioso jiwi aneconijibia tane, pesiwanajamatabēc
uenecopabijawata Jesucristojawabelia**

3 ¹Tajamonae, imatami pacatoyaquinatsi baja. ¡Panasiwajamatabēcuenebarēyamēre watuxanenē Cristo papijajiwixaemē! Xanē apopacasiwacueranaetsi icatsia patacatoyaquinaejawa, copiaya patacatoyaquinaeliwaisimi, tsipaji xanepana patacajamatabēcueneyawenonaejawa bajarapaliwaisita, itsamonae papecayamaxē-itorobiyaniwa. ²¡Panayajiwitaema be-awiri pianaepanaewiwecua, tsipaji raja apopiacuene-urawi pexanaejawa yabara! ¡Panayajiwitaema pamonaе bijiya Dioso pijacuene petonacuenebawanapaewi! ¡Panayajiwitaemanua pamonaе itorobabiaba Jesús pijajiwijawabelia penabo-upiperabēcaucubinexa judfowicuenia, pepacuene Dioso petaenexatsi pijajiwicuenia! ³Itsia, waxaitsi pepopijajiwitsi Dioso, aponabo-upiperabēcaucubi-atatsi, tsipaji yayiataeya Espíritu Santo wajanacajamatabēcuenematacaponaecuenia tonacuenebawanapatsi Dioso. Natoyapētanetsinua ēCristo Jesús pejamatabēcueneta Dioso wajanacapanepaejawa, itsajawa pematatsēnēa exanaenejewatsi Dioso aneconijibia wajanacataenexa. Bajaraxuata, jamatabēcuenebarēyatsi Cristo Jesús pijajiwixaetsi, exanaenejewatsi wajaperabētota naniapijicuene.

⁴Bajarapamonaē itsa naitaxutuajamatejema Dioso pecapanepaejawane-xatsi penabo-upiperabēcaucubijawata ayaicuenia petonacuenebixaenua Dioso pijacuene, xanē biji matatoxenetsia bajarapamonaewecua xainajē ta-exanaecuenejawanē, xua yabara Dioso necapanepaejitsipa. ⁵Xanē picani mata-itsinēje. Itsa baja xainajē ocho pamatacabibeje tanaexanaecujinae, judfowicuenia nebo-upiperabēcaucuta. Xanē raja Israel-pijinē pemomoxiya-juwēnēnēnē, tsipaji tajasalinainēmi Benjamín-pijinē, Israel-pijinē pexi pebiji-wiyajuwēnēnē. Taxa, taenabeje, judfojiwibeje. Nexata, xanē pepohebreoneēnē. Orijibia, xanē fariseocowēnēnē. Nexata, pacuenia fariseowi bitso casaē pejumecowēnētsijawa Dioso penajumecopatsiliwaisi Moisés-pijinēta, bajarapijinia pacuenia xanē-ata ta-itsinēmi tsaponaponaē. ⁶Bitso ta-asiwajamatabēcuene xainajē Dioso penajumecopatsiliwaisi Moisés-pijinēta, bejiochia-exanabiabajē Jesús pijajiwi, tsipaji picani, netsita saicayaliwaisi jumexaniantane, Dioso aneconijibia petanenexatsi. Bajarapaliwaisi, bitso xaniawaetsia jumecowēnētaaponaponaē, xanetsinejewanē caepitorobiliwaisiyo, Dioso aneconijibia tanetaenexa. ⁷Daxita bajarapaliwaisi netsita namatamota picani, xua yabara xanē siwabarēyanē, Dioso tanecapanepaenexa. Itsiata, aeconoxae bajara-xuanē netsita natsiquejemajawanē, tsipaji baja siwanajamatabēcuenecopatajē Cristojawabelia, tanewecua-ajibia-exanaenexa tajaneconi. ⁸Cristo pejamatabēcueneta, aeconoxae baja yapētaniji daxita bajarapaliwaisi piamatamobiliwaisicuene. Daxita bajarapaliwaisiwecua netonamatamota tayapētaenexa xaniawaetsia tajatuxanenē Cristo Jesús. Cristo taneyajawaponaponaexae, tajumecowēnētsiliwaisimi netonaexana piamatamobijawa. Bajaraxuata, copatajē baja, tsipaji netsita penaxuabiliwaisi. ⁹Bitso jitsipajē caejamatabēcuene taxinaejawa Cristojawabelia. Itsiata, apocaxitajarabinē bajarapajamatabēcuene taxinaenexa tajumecowēnētsijawata Dioso penajumecopatsiliwaisi Moisés-pijinēta. Biji rajane, tasiwanajamatabēcuenecopatsijawata Jesucristojawabelia, Dioso newecua-ajibia-exana tajaneconi. Matapania jane baja, caxitajarabajē caejamatabēcuene taxinaejawa Cristojawabelia. ¹⁰Tawajēnaeyabelia bitso jitsipajē daxitacuenewecua tayapētaejawa pacuenia Cristo jamatabēcuene-itsi. Jitsipajēnua tayajawaponaponaejawa pasaēta^f Cristo petēpaejawawecua Dioso matacotatsi. Cristo pijajiwitonēxaenē, xanē-ata nacaewetsianajē tanebejiochia-exanaejawa, pacuenia bajaraPonē bejiochia-exanatsi. Nacaewetsianajēnua tanebeyaxuabinexa, pacuenia bajaraPonē nacaeweta pebeyaxuabinexatsi. ¹¹Bajaraxua jitsipajē, tsipaji xanē-ata copia-ewetaponaponaē Dioso, tanematacotsinexa tatēpaejawawecua.

Pablo muxujioba Jesús pijajiwi penajamatabēcuenesaētsinexa, xaniawaetsia pejinawanapaenexa Dioso pejitsipaecuenia

¹²Xanē yapētaniji baja apotajamatabēcuenejēpaejawa abaxē pacuenia Cristo Jesús jamatabēcuene-itsi, apotajumecowēnētsicapanejawanua

i 3:10 *pasaēta*: Dioso peliwaesi penacujarubiwi xaniawaetsia apoyapētae pajamatabēcuene yabara Pablo jitsipa peyajawaponaponaejawa bajarapasaē. Itsamonae, ayaibitsaēto canaējēta pacuenia Pablo jitsipa Dioso pecanacuenebinexa bajarapasaēta, pejamatabēcueneyawenonaenexatsi pexanaponaponaenexanua Dioso pejitsipaecuenia, itsamonae bejiochia-exanae-atatsi. Itsamonae pijinia, canaējēta Pablo pejitsipaejawa Dioso bajarapasaēta penamatacotsia-exanaenexatsi petēpaecujinae pacuenia to-exana Cristo.

daxita pacuenia Dioso netocopata ta-exanaenexa. Itsiata, tawajänae-yabelia tanejamatabëcuenecaējëpaponaeenexa, ca-asaēnë tsaponapona-e ta-exanaejawa pacuenia Dioso netojitsipa. Jamatabëcuenecopia-ewetaponaponajë tacaxinaenexa Cristo pajamatabëcuenenaweretsijawa copiaya xaina. Bajaraxua taxainaenexa Cristo nesiwatëpa baja cajena. ¹³ Xaniajanë. Apocaxinaenë abaxë tajamatabëcuenejëpaejawa Cristo pacuenia jamatabëcuene-itsi. Itsiata, copiyapijicuenemi nacofënëtajë baja tajumecowënëtsijawami, Cristo pejamatabëcueneta. Juya, siwanajamatabëcuenesaëtajë tawajänaeyabelia tacaxinaenexa xaniawaetsia tatoponaponaejawa Dioso, itsajamatabëcuenexainaenejewanë. ¹⁴ Pacuenia pecujinaejinaenë nasisaëta penacanabinexa, perajutsinexatsi premiowënëjawa, bajarapijinia pacuenia xanë-ata najamatabëcuenesaëtajë, xaniawaetsia tatoponaponaejawa Dioso, tanerajutsinexa pexaniacuenejawa athëbëtatsia. Dioso athëbëwetsica nejunatsiana bajaraxua tanerajutsinexa, Cristo pejamatabëcueneta.

¹⁵ Bajarapacuenia daxitatsi, wajajamatabëcueneliwaisinaweretsiwi, Dioso pijacuenejawata, benajamatabëcuenesaëtawanapatsi xaniawaetsia waja-tojinawanapaenexa Dioso. Itsa abaxë paxamë saicaya itsajamatabëcuene paxainame, nexata bajaraxua yabara Dioso xaniawaetsia pacayapëtaeya-exanaena. ¹⁶ Itsiata baitsi jane, waxaitsi wajawajänaeyabelia bejinawana-patsi Dioso wajanacatonajumecopatsicuenia.

¹⁷ Tajamonae, pacuenia baja pacatsitaponaponatsi, bajarapijinia pacuenia paxamë-ata pajinawanapare! Panaitaxutocaewetsianamenua paxamëyaju-wënëwi, xaniawaetsia pejinawanapaewi tatsitaponaponaecuenia, bajarapacuenia paxamë-ata panejinawanapaenexa. ¹⁸ Ayaibitsaëttoxaneto paxamëyajuwënëwi nawënërub-ata Cristo pijajiwicuene, bajarapamonae itsiata pexanaecuenejawata nacuene-itajëta pitoyajawa Jesucristo cruzata pesiwa-tëpaejawatatsi, pecapanepaenexatsi. Bajarapamonae yabara pacatsipaebatsi baja anijatonë. Itsiata, icatsia aeconoxae ya-itaxutonueya pacatsipaebatsi. ¹⁹ Bajarapamonae Dioso werebiabianatsi, mapanacua pecopiarucaematacabitaje, tsipaji bitso jitsipa pijacuata penatojitsipaecuenia pexanawanapaenexa. Pia-uracuene pexanabiabijawata najamatabëcuenebarëyaya-exanabiaba. Ëmapanacuapijicuene saya siwanajamatabëxainabiaba. ²⁰ Waxaitsi raja Dioso pijanacuapijiwitsi. Bajaraxuata, copia-ewetawanapatsi wajatuxanenë Jesucristo pepatsijawatsica, wajanacapanepaenexa Dioso pijanacuayabetsia. ²¹ BajaraPonë itsa patsianica, nacaperabë-ithothianaena, wajaperabë-jëpaenexa pacuenia bajaraPonë perabë-itsi athëbëtatsia. Nexata, pasaëta Jesús caējëpatsi pitorobinexa daxitacuene, bajarapasaëta nacaperabë-ithothianaena, apowajätëpaerabëtö wajaxainaenexa.

4 ¹ Bajarapacuenia Cristo wajanacato-exanaexae, tajamonae, bitso pataca-asiwawi, pajamatabëcuenesaëmëre tsawanapae, pacopatsinejewamë, panejumexaniataejawa Jesús peliwaisi! Bitso cajena paca-itaxanatsi. Jamatabëpacatanetsi. Pacasiwajamatabëcuenebarëyatsinua, tsipaji xaniawaetsia pacatsitecawanapame panejumexaniataejawa Jesús peliwaisi patacatsipaebicuenia.

Pablo pemuxujiobiliwaisianë

² Papetiriwamëbeje, Evodia, Sintiquebeje, pacatoyaquinatsi-beje patacacuene-itawetsinexabeje. jPëtsa baja icatsia pematatsënëa

namata-enetsia panajume-anaenotamebeje! ¡Panasiwajamatabëcuene-xanepanarebeje, Jesús peliwaissi panenajuajumexaniataewaxaebeje!
³Xamë, Timoteo, xaniawaetsia taneyawenonaenëmë Dioso pijacuene tanacuenebijawa, cawajëtatsi neyawenonaejawanexa bajarapowabeje namata-enetsia penasiwajamatabëcuene-xanepanaenexabeje, penajume-anaenotsiyaniwabeje. Imatami, bajarapowabeje bitso neyawenonabeje tatsi-paebijawa itsamonaejawabelia pexaniajailiwaissi, pecapanepaeliwaissinexatsi Dioso jawabelia. Bajarapamatacabijawa Clemente, itsamona-ata patanajua-nacuenebiwi, neyawenonawanapa. Daxita baja bajarapamonae wënërubena Dioso pijabaxutota, pabaxutojawata wënëyaquinarubatsi pamona pexai-naewinexa matacabi apopewerewerecaejawa.

⁴¡Pajamatabëcuenebarëyamëre tsawanapae caematacabi canacujitsia, Dioso papecato-exanaejawa yabara wajatuxanenë Cristo pejamatabëcuene-neta! Icatsia, pematatsënëa pacajumaitsitsi. ¡Pajamatabëcuenebarëyamëre tsawanapae! ⁵Jamatabëcuene-xanepanaeya xaniawaetsia pajinawanapae-name, daxitajiwi papecacuene-yapëtaenexa panejamatabëcuene-xanepanaejawa, tsipaji rabaja wajatuxanenë imoxoyo pewajënae pepatsinexatsica.

⁶¡Pëtsa itsacuenejawayo-ata yabara pajamatabëcuenebëjamë! ¡Biji rajane, bajarapajamatabëcuenebëjaijawanë yabara pawajëre Dioso jawabelia! ¡Pexaniajamatabëcuene-nua' parajutabiabare Dioso jawabelia papecayawenonaejawanë yabara! ⁷Nexata, Dioso pacajamatabëcuene-wënëtsiana pijapebaraxanepanaejamatabëcuene panecanaëjëtsijawawecua Cristo Jesús pejamatabëcuene-neta, panewajënaeyabelia panejamatabëcuenebëjaiyaniwa.

⁸Tajamonae, pecopiarutsiliwaissita pacatoyaquinsatsi mapacueniaje. ¡Panajamatabëxainabiabare ëpexaniajailiwaissi, daxita penayaiyataecuene, daxita pexanepanaecuene, daxita pia-urataecuene, daxita piasiwacuene, daxita pesiwabarëyacuene, daxita pepopexanepanaecuenejawanë-ata! Daxita baja-raxuanë pane-exanaejawa yabara jiwi pexaniacuenia pacawënëxaniatsiana. ¡Bajara-ëxuanë panajamatabëxainabiabare pane-exanawanapaenexa!

⁹¡Daxita pacuenia pacatsipaebatsi, pacatsitaponaponatsinua, bajarapacuenia pajinawanapare! Nexata, Dioso ponë xaina pebarajamatabëxanepanaecuene pacajamatabëcuene-wënëtsiana paneyajawajinawanapaenexa, panejamatabëcuenebëjaiyaniwa.

**Pablo pexaniajamatabëcuene rajuta Filipos
tomarapijiwijawabelia ofrenda petojebabiabixae**

¹⁰Wajatuxanenë bitso nejamatabëcuenebarëyaya-exana, tsipaji baja paxamë icatsia panesiwanajamatabëxainame, pataneyawenonaenexamë. Bayajebicujinae, ofrenda apopaneto-itorobi-atamë, yapëtaniji apopatanenacofënëtsijawamë. Pacuenenajematame saya apopanecaxitarabixae pacuenia paneto-itorobijitsiamë. ¹¹Bajarapacuenia apopacatoyaquinaetsi ofrenda pataneto-itorobiwajënaeyamë, bitso tanamatawenonaexae itsacuenejawayo. Dioso tanecujarubixae tajamatabëcuenebëjaiyaniwa daxitacuene yabara, siwajamatabëcuenebarëyanë saya xuayowajëto xainajë. ¹²Yapëtaniji jamatabëcuenebarëyaya taponaponaejawa, tsiquirijawayo xinae-atanë, ayaijawa

taxainaematacabi-ata. Yapëtanijinua pacuenia jamatabëcuenebarëyanëjitsia daxitamatacabijawabelianexa. Nexata, itsa xainajë daxita tanamataweno-naejawaxi, barëyanë. Apoxinae-atanë itsacuenejawayo, itsiata barëyanë tsabiabi. ¹³Daxita xua netocopiapatapona, Cristo pesaëta nejamatabëcuene-caëjëpa tanajamatabëcuenesaëtsinexa. ¹⁴Itsiata baitsi jane, paxamë pexaniacuenen paneto-exaname, itsa paneto-itorobaremena bajarapa-ofrenda, bitso tanamataweno-naejawata.

¹⁵Payapëtaneme rabaja mapacueneye. Pamatacabi taxuxuabajë tatsipae-banajetarucaejawa jiwi pecapanepaeliwaisinexatsi Macedonia nacujawa, itsa ponaejitsianë panijanacuawecua, paxamë Filipos tomarata panejinawanapaewi, panerajutame ofrenda tajanamutonexa, itsamonae Jesús pijajiwiwecua. ¹⁶Orijibia, pamatacabianë ponaponajë Tesalónica tomarata, anijatonë paneto-itorobabiabame ofrenda, tanamataweno-nabiabijawata. ¹⁷Siwabarëyanë tsabiabi itsa paneto-itorobabiabame bajarapacuenia. Itsiata, apopacatoyaquinaetsi pematatsënëa patanerajutsinexamë. ¡Jume baja cajena! Biji rajane, pacatojitsipatsi pataneyaweno-naejamatabëcuene-më Dioso papecarajutsinexa pexaniacuenejawa. ¹⁸Nexata, pitajë daxita pataneto-itorobijawamë Epafroditota. Xainajë baja nexata bitso ayaijawa, tanamataweno-naejawa matatoxenetsia. Pa-ofrenda paneto-itorobame, Dioso bitso siwajamatabëcuenebarëya, tsipaji tsitapexaniatuxujuwijawatsi. ¹⁹TajaDioso, ponë itaxutuajamatejemanë tsaponaponae tane-ewetsinexa, bajaraPonë bitso pexainaenëxae, paxamë-ata pacarajutsiana daxita panenamataweno-naecuenejawanë, Cristo Jesús pejamatabëcueneta. ²⁰¡Waxa Dioso ayaijamatabëcuenenë daxitamatacabijawabelianexa! Bajara-itsi tsane.

Pablo penapëjiobiwaisi

²¹Nebajacobiana paxamëjawata daxita Jesús peliwaisi pejumexaniataewi, pamonae Dioso pitapetsiwi pijajiwinexa. Pamonae xanëjawata jinawanapa, Jesús pijajiwi pacabajacobalia. ²²Daxita Dioso pitapetsiwi pijajiwinexa, Cristo Jesús pejamatabëcueneta, mapatomarataje pejinawanapaewi, pacabajacobalia. Romano nacua pepopewetsinë pijabota penacuenebiwi-ata bitso pacabajacobalia.

²³Pacatojitsipatsi, wajatuxanenë Jesucristo pepeca-itaxutotsoniataejamatabëcuene papecatsijamatabëcuenewënëcaenexa. Bajara-itsi tsane.

Colosenses

Mapabaxutoje Apóstolnë Pablo toyaquina Jesús peliwaishi pejumexaniataewi, Colosas tomarata pejinawanapaewijawabelia

Pablo pebajacobiliwaishi Jesús pijajiwijawabelia,
Colosas tomarata pejinawanapaewi

1 ¹Xanë Pablonë, Dioso tanetojitsipaexae, nitapeta Jesucristo pija-
apóstol-nënexanë. Nexata, Jesucristo nitoroba tatsipaebaponaenexa
pexanialiwaishi jiwijawabelia. ²Xanë pacatoyaquinatsi mapabaxutoje,
paxamë Dioso papeca-itapetsiwi papijajiwinoxamë, Colosas tomarata
panejinawanapaewi. Paxanëbeje, Timoteobeje, pexaniacuenia pacabaja-
cobatsibeje, nacaemonaetsi wajanaca-exanaewi Cristo pejamatabëc-
neta. Pexaniacuenia pacatojitsipatsi, waxa Dioso, wajatuxanenë Jesuc-
ristobeje, p papecajamatabëwëñëtsinexa piasiwajamatabëcuene, peba
rajamatabëxanepanaejamatabëcuene-ata, jamatabëcuenexanepanaeya
panenajuajinawanapaenexa.

Pacuenia Pablo wajëtabiaba Diosojawabelia Jesús pijajiw
yabara, Colosas tomarata pejinawanapaewi

³Paxanëbeje, Timoteobeje, pacatowajëtabiabsibeje wajatuxanenë
Jesucristo paxa Diosojawabelia. Patawajëtsijawatabeje, pexaniajamatabë-
cuene parajutajëbeje, tsipaji pexaniacuenia pacayawenonabiaba paColosas-
tomarapijiwimë. ⁴Bajarapacuenia pawajëtabiabajëbeje, tsipaji pajume-
tanijibeje xaniawaetsia panejumexaniataewanapaejawa Jesús peliwaishi,
itsamona-ata pane-asiwatsawanapaejawa Dioso pitapetsiwi pijajiwinox.
⁵Bajarapajamatabëcuenebeje panexainaexae, xaniawaetsia payapëtaneme
xua Dioso pacatoxaniawaeta athëbëtatsia, papecarajutsinexa panejumexa-
niataexae Jesús peliwaishi. Paxamë baja cajena pajumetaneme bajaraxua
yabara, pamatacabib ajenā pacatsipaeba Jesús peliwaishi, papecacapanepaeli-
waisinexa. ⁶Papexanialiwaishi Epafra copiya pacatsipaeba, aeconoxae baja
daxitanacuanëjawa yacajëpaponā. Nexata, daxitanacuanëjawa pamonaë
jumexaniataepona bajarapaliwaishi, copatapona baja perujujamatabëc-
nemi, juya pexainaenexa pejanajamatabëcuene. Bajarapacuenia paxamë-
ata pacatocopiapata, pamatacabib ajenā pajumetaneme Jesús peliwaishi.
Payapëtaeponomenua pepacuene Dioso papeca-itaxutotsoniataejawa.

⁷Bajarapacuenene payapëtaneme, waja-asiwanë Epafraſ papecatsipaebijawata. Bajaraponë paxanëbeje patayajawanacuenebinëbeje, xaniawaetsia Cristo pijacuene petonacuenebinë. Paxamë tuatuajëta bajaraponë pacayawenonaponapona. ⁸Nexata, pamatacabi Epafraſ pata paxanëbejewaberena, panet-sipaebabeje xaniawaetsia panejinawanapaejawa, Espiritu Santo papecaya-wenonaejawa namata-enetsia panena-asiwanexa.

⁹Nexata, paxanëbeje patacawënëliwaisitaecujinaebeje paxamë yabara, pacatowajëtabiatsibeje Diosojawabelia, papecayapëtaeya-exanaponaenexa xaniawaetsia xua pacatojitsipa pane-exanawanapaenexa panewajënaeya-belia. Pacatowajëtabiatsibejenua Espiritu Santo papecajamatabëcuene-wënëtsinexa pecanaëjëtsijamatabëcuene, peypëtaejamatabëcuene-ata.

¹⁰Bajarapacuenia nexata, Dioso papijajiwimë pacacuenecaëjëpaena xaniawaetsia jiwi panetsitajinawanapaejawa. Bajaraxua jiwi pacacueneya-pëtaena pexaniacuenejawanë pane-exanawanapaejawata, xuanë Dioso siwajamatabëcuenebarëya, panewajënaeyabelia Dioso pecuene payapë-taeponaenamenua. ¹¹Pacatowajëtabiatsibejenua Dioso daxita pesaëta papecajamatabëcuene-asaëya-exanaenexa, papecajamatabëcueneecaëjëpaenexa pane-ajamatabëcuenesaëtsawanapaejawa, bajayajebi piayapëbejecue-nejawanë pacatocopiapatapona-ata tsane. ¹²Bajarapasaëta jamatabëcuene-barëyaya pexaniajamatabëcuene parajutabiabianame waxa Diosojawabelia, tsipaji bajaraPonë papecawecua-ajibia-exanaejawata panijaneconimi, pacacuenecaëjëpaeya-exana panepitsinexa xua Dioso rajutsiapaeba daxita pijajiwi pijapeniweniwenacuataetsia. ¹³Waxaitsi bajayata jinawanapatsi bepitaquirinacuata, dowathi wajanacanamatataitorobisaëta. Itsiata baja, aeconoxae Dioso nacacapanepa bajarapasaëwecua. Xuacujinae, bajaraPonë nacanuba baja Pexënato, piasiwanë, wajanacayanacua-ewetsiliwaisita, juya Pexënato wajanacanamatataitorobabiabinexa. ¹⁴Dioso nacacapanepa dowathi wajanacanamatataitorobisaëwecua, tsipaji Cristo nacatomatamota wajanekonimi wajanacasiwatëpaejawata, Dioso aneconijibia wajanacataenexa.

Cristo ayaijamatabëcuenenë daxitawecua

¹⁵Dioso apowajataecapanepaenë-ata, itsiata Cristo, itsa naexana mapanacuataje, nacayapëtaeya-exana pacuenia paxa cuene-itsi. Cristo, paxa Diosobeje najëpabeje. BajaraPonë baja cajena ponapona athëbëtatsia, Dioso daxitacuene mapanacuaje pexanaewajënaeya. Bajaraxuata, yapëtanetsi ayaijamatabëcuenenë daxita Dioso pecobecowëwecua. ¹⁶Baitsi, najua-exanabeje daxitacuene mapanacuataje, athëbëtatsia-ata. Nexata, Cristo baja cajena pexanaenë daxita xuanë tanetsi, xuanë-ata apotaecapanepaetsi, pecanacopatsinexa daxita pecobecowë pewetsinënexa. Bajaraxuata, waja-itaxutota apowajataecapanepaewi, bajarapamonae tuatuajëta tocopata itsamonae ayaijamatabëcuenewinexa, itsamonae pewetsiwinexa, itsamonae-ata penamatataitorobisaë pexainaewinexa. Bajarapacuenia Cristo daxitacuene pexanaenëxae, nexata yapëtanetsi ayaijamatabëcuenenë daxitawecua, pecueneecaëjëpaejawatsinua pejitsipaecuenia pexanaenexa pecobecowëjawabelia. ¹⁷Cristo baja cajena athëbëtatsia ponapona, daxitacuene pexanaewajënaeya. Pesaëtanua daxitacuene pexanaecuenejawanë

mapamatacabijawaberena-ataje apowerewerecae. Abaxë pewajënaeyabelia tsitecanajetaruca. ¹⁸ Dioso copata Cristo pijajiwi bepematabocotonë, panamatacaitorobinexa, daxita caeperabëto pexanaewitsi. Cristo pejamatabëcueneta, daxita pijajiwi jamatabëcuene-aitawa tsawanapae Diosojawabelia. BajaraPonë copiaya namatacota petëpaejawawecua. Daxita bajarapacuenewanë yabara, matatoxenetsia ayaijamatabëcuenenë, daxitacuene pecuene-namataxainaexae. ¹⁹ Bajarapacuenia Dioso tocopata Cristo ayaijamatabëcuenenënexa, pejamatabëcuenejëpaenexatsi^a daxitacuenejawabelia. ²⁰ Nexata, daxita xuanë abeje Adán pejamatabëcueneta, mapanacuapijicuene, athëbëpijicuene-ata, caewëalia pejanacuenia peliwaixixanebinexa. Nexata, Dioso itorobica Cristo mapanacuayabetsicaje, cruzata janarunaeya pesiwa-tëpaenexa daxita pijaneconi pexainaewi, icatsia pebarajamatabëcuenexanepanenexa, caewëalia aneconijibia petaenexatsi Cristo pejamatabëcueneta. ²¹ Bajarapacuenia pijinia, paxamë-ata pican abaxë bajayata Diosowecua naxuabiaya pajinawanapame. Dioso-ata papijawajabitsaëmë tsawanapae, tsipaji panajamatabëxainabiabame ëpibisiacuene pane-exanawanapaenexa. ²² Itsiata baitsi jane, Cristo pejamatabëcueneta aeconoxae baja Dioso pacabarajamatabëcuenexanepana. BajaraPonë bejiobia-exanatsi cruzata papecasiwatëpaenexa, Dioso pacawecua-ajibia-exana pibisiacuene pane-exanaeneconimi. Athëbëtatsianua Cristo pacanubiana Dioso pitabarata pepopane-aneconijibiwi. ²³ Bajarapacuenia Dioso pacato-exanaena, pane-wajënaeyabelia itsa pajumexaniataewanapaeneme Cristo peliwaixi, papecasiwatëpaejawa panijaneconi yabara. Asaëyata pajumexaniataeneme daxita pacuenia pacacujaruba bajarapaliwaixi, panecopia-ewetawanapaenexa panepitsijawanaxa daxita xua Dioso najumecapanepaeya pacarajutsiapaeba. ¡Pëtsa pacopabame panejumexaniataejawa paliwaixi pajumetaneme, tsipaji yacaëjëpaponaxa daxitanacuanëjawa petsipaebaponaejawa! Xanë-ata, Pablonë, tsipaebaponajë bajarapaliwaixi.

Pablo pacuenejawanë exanapona Cristo pijajiwi jawa

²⁴ Xanë, Pablonë, jamatabëcuenebarëyaya ponaponajë nabejiobitsia ponaponae-atanë majotaje penaneconitsiwi pejebabiabibota paxamë yabara, Cristo papijajiwiwimë.^b Pacuenia Cristo bejiobia-exanatsi paxamë papecapanepaenexa panijaneconiawecua, becaeperabëto papeca-exanaenexa bajaraPonëta, bajarapijini pacuenia Cristo peliwaixi pitoyawi tanebejiobia-exanaejawata, paxamë pajumetaneme Cristo peliwaixi, papecacapanepaeliwaixinexa. Panesiwanajamatabëcuenecopabixae Cristojawabelia, jamatabëcuenebarëyaya ponaponajë itsamonae nebejiobia-exanae-ata. ²⁵ Dioso necopata Cristo pijajiwi tajamatabëcuenejawenonaenënexa, xaniawaetsia

a 1:19 *pejamatabëcuenejëpaenexatsi*: Cristo, daxitacuenejawabelia cuenejëpa, pacuenia Dioso cuene-itsi. Pasaë Dioso xaina, bajarapasaë Pexënat-ata xaina. Panamatacaitorobisaë Dioso xaina, pepoDiosoxae, bajarapanamatacaitorobisaë Pexënat-ata xaina. Nexata Cristo, paxa Diosobeje, najamatabëcuenejëpabeje daxitacuenejawabelia pexanaenexa. **b 1:24** *Cristo papijajiwiwimë*: Pablo toyaquinae-ata pican Jesús pijajiwi, Colosas tomarata pejinawanapaewijawabelia, waxaitsi yapëtanetsi bajara-apo-ëpamonaenexa yabara apobejiobia-exanaetsi Pablo. Bajara-ponë pe-ecaexae penaneconitsiwi pejebabiabibota, pacarta toyaquina Colosas tomarapijiwawabelia, bajarapacarta waxaitsinexa-ata, Jesús pijajiwiwitsi maparucaje wajajinawanapaewi, wajanaca-ajamatabëcuenesaëya-exanaenexa.

daxitajiwijawabelia tatsipaebaponaenexa pexanialiwaishi, Cristo peliwaishi, jiwi pecapanepaeliwaishinexatsi. Bajaraxuata, paxamë-ata pacajamatabëcueneyawenonatsi patacatsipaebijawata Dioso peliwaishi. ²⁶Nexata, pacatsipaebatsi paliwaishi Dioso bajayatami apoyapëtaeya-exanae itsajiwijawabelia-ata. Itsiata baitsi jane, Dioso nacayapëtaeya-exana waxaitsi wajanacaitapetsijawa pijajiwinoxatsi. ²⁷Bajarapaliwaishita, nacayapëtaeya-exana Cristo pejamatabëcueneta Dioso pexaniacuenia peyawenonaenexa pamona apojudiowi-ata. Bajarapaliwaishi ma-itsije: Cristo cajena pacatsijamatabë-eca papecayajawaponaponaenexa. Bajaraxuata nexata, paxamë-ata pacopiaewetawanapame itsamatacabi Cristo paneyajawajinawanapaejawanexa Dioso pijapeniweniwenacuataatsia.

²⁸Bajarapacuenia Dioso pataneyapëtaeya-exanaexae Cristo yabara, daxitajiji xaniawaetsia patsipaebaponajë, pamuxujiobaponajëna canaëjët-siaya xaniawaetsia pejumexaniataenexa Cristo peliwaishi. Bajarapacuenia payapëtaeya-exanaponajë, pamona pejumexaniataewi bajarapaliwaishi, pewajënaeyabelia pejamatabëcuenejëpaenexa Cristo Jesús pejamatabëcuenejëpaejawabelia. ²⁹Bajarapajamatabëcuene yabara, xanë, Pablonë, asaëyata tonacuenebaponajë daxita pasaëta Cristo nerajutapona.

2 ¹Xanë pacatojitsipatsi paneyapëtaenexa bitso patacasiwajamatabëcuenebëjajitsabiabijawa, patacatsipaebinxaxa Cristo peliwaishi, itsamonae nebejibia-exanabiabi-ata bajarapaliwaishi yabara. Nexata, asaëyata tonacuenebanajetarucajë Dioso, paneyapëtaenexa bajarapaliwaishi, paxamë, panejinawanapaewi Colosas tomarata, Laodicea tomarata, pamona-ata aponetae pijacuajaya. ²Bajarapacuenia nebejibia-exanae-ata, itsiata asaëyata tsipaebaponajë Dioso peliwaishi, papecajamatabëcueneasaëya-exanaenexa, najamatabëcuenejëpaeya namata-enetsia na-asiwaya panenajuajinawanapaejawata, panenajuajumeyapëtaenexa paliwaishi pican Dioso apoyapëtaeya-exanae itsajiwijawabelia-ata, Cristo yabara. ^c³Dioso muetsia papexaniacuenejawanë xaina Cristo pejamatabëcueneta, pacajumeyapëtaeya-exanaena, pacacanaëjët-sia-exanaenanua, xaniawaetsia paneyapëtaenexa. ⁴Bajarapacuenia pacatsipaebatsi, itsajiji-ata papecayamaxë-itojorobiyaniwa papecatsimuxuxanepanaexae penajumetsënëtsiliwaishi, Cristo panejumexaniataejawawecua. ⁵Apopacayajawaponapona-atatsi, itsiata nataniji tajajamatabëcuene patacayajawaponaponaejawa paxamëjawata. Nexata, jamatabëcuenebarëyanë itsa pacawënëliwaishitanetsi najamatabëcuenejëpaeya panejinawanapaejawa, panewajënaeyabelia-ata pane-ajamatabëcuenesaëtsawanapaejawa panejumexaniataejawa Cristo peliwaishi.

⁶Paxamë panesiwanajamatabëcueneocopibaxae Jesucristojawabelia, nexata panato-itapetame panijatuxanenënexa. Bajaraxuata,

c 2:2 *Cristo yabara:* Jesús penawiatsicujinae paxajawabetsia, Espíritu Santo yapëtaeya-exana mapacueniaje Cristo yabara: Jesús itsa siwatëpa cruzata jiwi, najëpaeya siwatëpa judiowi, apojudiowi-ata, peneconimatamotsinexa. Nexata, najëpaeya Espíritu Santo tsijamatabëcuene-ecaeya-exana judiowi, apojudiowi-ata, itsa siwanajamatabëcueneocopaba Cristojawabelia. Nexata, najëpaeya copia-ewetawanapa Dioso pexaniacuenene peto-exanaejawanexatsi pijanacuataatsia Cristo pejamatabëcueneta. Judiowi natocanaëjët pican bajaraxua ëbajarapamonaenexa. Nexata, apopaebi apojudiowijawabelia bajarapaliwaishianë yabara.

pajinawanapaename bajaraPonë papecatojitsipaecuenia daxita pane-asaëtsawanapae-epatota, papecasiwajamatabëcuenebarëyanexa. ⁷¡Paliwaisi copiaya Epafra pacacujaruba Jesucristo yabara, tsiteca pajumexaniataewana-
napare! Nexata, pane-itaxutuajamatejemaxae Jesucristo papecayaweno-
naenexa, pacajamatabëcuene-asaëya-exanaena. Pexaniajamatabëcuenenua
parajutabiabianame Diosojawabelia.

**Pacuenia Cristo pijajiwi pejanajamatabëcuene
xainawanapa, yabara peliwaisi**

⁸¡Xania! Nayajiwiitaeya pajinawanapaename. ¡Pëtsa panacopatame
itsamonae papecayamaxë-itojorobinexa Cristo peliwaisiwecua! Bajara-
pamonae pacatsipaebiana mapanacuapijiwi penajamatabëxainaeliwaisi,
penajumetsënëtsiliwaisi, saya natsiquejemaliwaisi. Bajarapaliwaisia-
nëta pacayamaxë-itojorobiana, tsipaji apoliwaisijëpae Cristo, ⁹d peliwaisi.
⁹Waxaitsi itsiata yapëtanetsi Cristo peperabëto xainae-ata yajawapo-
napona daxita Dioso pijacuene, tsipaji jamatabëcuene-itajëtauponapona
pacuenia Dioso jamatabëcuene-itsi. Caejawayo-ata apotsisajinaetsi Dioso
pijacuene pexanaponaponaenexa. ¹⁰Bajarapacuenia pijinia, paxamë-ata
apopacatsisajinae caejawayo-ata Dioso pijacuene, pane-exanawanapaenexa
bajaraPonë papecatojitsipaecuenia, caeperabëto papeca-exanaexae Cris-
tota. Bajaraxuata, Dioso tocopata Cristo paxamëtuatuajëta bepanema-
tabocotocuenia papeca-itorobaponaponaenexa. BajaraPonë raja bitso
ayaijamatabëcuenenë daxitawecua. Jamatabëcuene matatoxenetanua
daxitanacuanë pewetsiwi-ata, pitorobabiabinexa pejitsipaecuenia. ¹¹Pacue-
nia judiowi nabo-upiperabëcaucubabiaba penacuenie-itajëtsinexa Dioso
pijajiwiucuenie, bajarapijinia pacuenia Cristojawabelia panesiwanajamata-
bëcuenecopabixae, Dioso bepapecabo-upiperabëcaucubiwi paca-exana.
Nexata, Dioso pacawecua-ajibia-exana pibisiacuene pane-exanaeoneonimi,
pacawecuatëpaeya-exananua panijaperujumatabëcuenemi. Bajaraxuata,
apopanamatawenonaemë itsajiwi papecabo-upiperabëcaucubinexa, Dioso
papijajiwinexamë. ¹²Panenabautizabijawata merata, papecabubutsijawa-
tareca panajamatabëcuene-itajëtame Cristo bepapecayajawamëthëtsiwi.
Papecajtusijawatatsina menewetsina pijinia, panajamatabëcuene-itajëtame
icatsia Cristo bepapecayajawanamatacotsiwi petëpaecujinae. Nexata,
pajamatabëcuene-aitawamë tsawanapae, panejumexaniataexae Dioso
pesaëta penamatacotsia-exanaejawa Cristo petëpaejawawecua. ¹³Paxamë
picaní abaxë bajayata pajamatabëcuenetëpawanapame pibisiacuene

d 2:8 beweliacuenia panetaenexa Cristo: Pamonae penajumetsënëtsiliwaisi pecujarubiwi, bewe-
liacuenia tane Cristo. Nexata, bajarapamonae pecujarubijawata, itorobabiaba jiwi penabo-
upiperabëcaucubinexa, pejumecowënëtsinexa Dioso pejumecopatsiliwaisi Moisés-pijinëta, Dioso
aneconijibia petaeenaxatsi. Itorobanua beweliacuenia pejumetaenexa Dioso aneconijibia petaeja-
watsi yabara, Cristo pejamatabëcueneta. Cujarubabiabanua itsaliwaisianë, mapanacuapijiliwai-
sianë, jiwi peyajawajumexaniataenexa Jesús peliwaisi, xaniawaetsia pejinawanapaenexa pina
mapanacuataje. Bajaraxuata maparucaje, itsa nacamocopiapatsipa itsacuenie piabejajawa, jiwi
nacatsipaeba caecuenia wajanacatocopiapatsijawa penajorobinë pejamatabëcueneta. Nexata,
naca-itoroba wajanujatsijawa itsapenajorobinë. Bajarapacuenia nacayamaxë-itojoroba bewe-
liacuenia wajataenexa Cristo. Baitsi, siwanajamatabëcuenecopatsipatsi penajorobinëjawabelia
Cristowecua.

pane-exanawanapaexae, naxuabiaya-ata pajinawanapame Diosowecua, apopajudfowixaemë. Itsiata baitsi jane, aeconoxae baja, pajamatabëcuene-aitawamë tsawanapae, tsipaji baja, Dioso pacawecua-ajibia-exana bajarapa-tëpaejamatabëcuenemi, Cristo pejamatabëcueneta. ¹⁴ Cristo wajanacasiwa-tëpaejawata cruzata pecobematabiabijawatatsi, peyaquinaetablapyo ruta pematatsënëyo, xua itajëtaruca paneconi yabara tëpaejitsia. Nexata, bajara-patablapayota bepeyaquinarutsijawa Dioso, caejiwi canacujitsia pijaneconi. Itsiata baitsi jane, Cristo itsa cobematabiabarutatsi cruzata wajanacasiwa-tëpaejawata, Dioso baja nacawecua-ajibia-exana daxita bajarapaneconimi. ¹⁵ Cristo itsa rutatsi cruzata, bajarapaepatota Dioso pesaëta cuene-amoneyaba, asaëjibia-exananua dowathimona, pamona-ata ayaijamatabëcuenewi bajarapadowathimona tuatuajëta, petsitanacuene-itajëtsijawata daxitajiwijawabelia pecuene-amoneyabijawa dowathi, pijajiwi yajawa.

¹⁶ ¡Bajarapacuenia Cristo ayaijamatabëcuenenëxae daxitawecua, pëtsa panacopatame itsajiwi-ata papecananeconitsia-exanaenexa panexae-jawa yabara, panematawëjëa-apaejawa yabara, paneyaiyataematacabianë yabara-ata! Itsamonae abaxë tsiteca jumecowënëtanawapa Dioso penajumecopatsiliwaisi Moisés-pijinëta, aneconijibia pejinawanapaenexa Dioso pitabarata. Nexata, bajarapaliwaisi pitorobicueniatsi, fiestanë exana-biaba caewai canacujitsia, caepejanajuameto canacujitsia, caepenacuera-ewetsimatacabianë canacujitsia-ata. ¹⁷ Pëtsa pasiwabëjamë bajarapaliwaisianë panejumecowënëtsinexa, tsipaji saya pecuene-itajëtsijawanënexa^e xua nacato-exanaejitsia Cristo itsa patsica mapanacuayabetsicaje! Cristo pepat-sixaetsica mapanacuayabetsicaje, nacawecuacopiarucaeya-exana bajarapacuenemi, aneconijibia wajajinawanapaenexa Dioso pitabarata. ¹⁸ ¡Nexata, pëtsa patonacopatame itsamonae, beweliamatabëcuenewi nataeya papecayamaxë-itojorobiyaníwa panejumexaniataejawawecua pexaniajaili-waisi! Bajarapamona, Diosowecua, pacamuxubijiapenetsiana, panenawajëcabiabinexa ángelewijawabelia. Itsajawata pijinia, be-ayaijamatabëcuene nataeya paxamëwecua paca-urabiana, pane-exanaenexa papecacujarubi-cuenia, tsipaji tsitatsi bajarapaliwaisi Dioso peyapëtaeya-exanaejawatsi majitsinaebota. Itsiata, pijacuata saya pecapitsapaeliwasianë. ¡Bajaraxuata, xania baja panayajiwitaema, papecayamaxë-itojorobiyaníwa! ¹⁹ Bajarapamona jumexaniataeyabiaba ëpetsimuxuxanepanaeliwaisianëtsi, tsipaji apojamatabëcuene-ewetawanapae Cristo penamatacaitorobinexatsi pejitsipaecuenia, ponë bepematabocotonë Jesús pijajiwinexa. Cristojawabelia wajasíwanajamatabëcueneecopabixae, nacatonaexana bewajamatabocotonë, tsipaji Dioso naca-exana becaeperabëto bajaraponejawabelia. Nexata, peli-waisita nacajamatabëcuene-abatapona, wajanacajamatabëcueneliwaisi witsabia-exanaponaenexa Dioso pijacuenejawata. Orijibia, pacuenia jiwi peperabëtota pawí rubena nacueneyawenona, bajarapacuenia peperabëtota

e 2:17 *pecuene-itajëtsijawanënexa*: Pacuenia naejawa pejumape bajaraxua apoepona, bajara-pijinia pacuenia Dioso penajumecopatsiliwaisi Moisés-pijinëta, apoepopecapanepaeliwasianexa jiwi, Dioso penaneconitsia-exanaejawanexawecua pijaneconijamatabëcuene. Pacuenianua naejawa-itacaënae apo-abeje, biji rajane, nacuera-ewetatsi bajarapa-itacaënaejawata, bajarapijinia pacuenia Dioso penajumecopatsiliwaisi Moisés-pijinëta apo-abeje, tsipaji pewajënaeya xania-waetsia nacayapëtaeya-exana xua yabara naneconitatsi Diosojawabelia.

nacarubapona itsajota tsitaxanepanatsi, xaniawaetsia pijajiwiitsi namata-enetsia wajanacueneyawenonaenexa.

²⁰⁻²¹ Paxamë rabaja bepaceyajawatëpaewi Cristo. Nexata, pawecua-tëpame baja panejumecowënëtsijawami bajarapaperujuliwaisianë, Dioso aneconijibia papecataenexa. ¿Detsa xuajitsia itsiata abaxë pajumecowënëta-wanapame papecacuene-itawetsiliwaisianë? Paliwaisianë paca-itaweta itsa-cuenejawa panejayatsiyaniwa, panexaeyaniwa, panepitsiyaniwa-ata pane-cobeta, Dioso pitabarata panenajamatabëcuenebijianaeyaniwa. ²² Daxita bajarapaliwaisianë pewerewerecaejawanënexa, tsipaji saya jiwi pejamatabë-cuenepijiliwaisianë. Naca-itawetanua xuanë pewerewerecaejawanë yabara. ²³ Bajarapamonae papeca-itawetsicuene pacatsita meta itajara bepexania-liwaisi. Pacatsitanua bitso liwaisi bepeyapëtaewi, tsipaji paca-itorobapona panijacuata panenaperabëbejiobia-exanaenexa, Dioso papeca-asiwanexa matatoxenetsia. Itsiata, bajarapacuenia pane-exanaejawata apopacajama-tabëcueneyawenonae caejawayo-ata, pibisiacuene pane-exanaeyaniwa. Biji rajane, bajarapacuenia pexanaewi apocuenenamamatotsi, saya nasiwajama-tabëcuenebarëya pijacuata pexanaejawa yabara.

3 ¹ Paxamë baja cajena Cristo bepaceyajawamatacotsiwi. Bajaraxuata, Dioso pacajamatabëcuene-aitawaya-exana. ¡Nexata, panatojaire pane-pitsinexa athëbëpijicuene itsajotatsia Cristo eca, Dioso pemuxuneneta, pecujuanenia, peyanacua-ewetsinexa daxitacuene! ² ¡Pasiwanajamatabëxainabiabare athëbëpijicuene! ¡Pëtsa pasiwanajamatabëxainabiabame mapanacuapijicueneje! ³ Cristo tsipaji bepaneyajawatëpaewi mapanacuapijicuenewecuaje, nexata Dioso pitawajamatabëcuene pacarajuta, Cristo pejamatabëcueneta. Bajarapa-aitawajamatabëcuene mapanacuapijiwiye apotae. Apoyapëtaenua. ⁴ Paxamë Cristo papecajamatabëcuene-aitawaya-exanaexae, pamatacabi Cristo icatsia patsianica athëbëwetsica pijapeni-weniwenaecotia yajawa, paxamë-ata paxainaename peniweniwenaeotia, Cristo papijajiwiwaxemë.

Cristo pejamatabëcuene-aitawaya-exanaewi pejinawanapaeuene

⁵ ¡Cristo papecajamatabëcuene-aitawaya-exanaexae, panawecuacopabare baja daxita panijaperujamatabëcuene papecajitsipaeya-exanaejawanëmi! ¡Pacopare, pibisiacuene panewitota panenawecua-exanaejawabeje pane-napitsijiwiweje! ¡Pacopare itsacuenejawanë pia-uracuenejawanë pane-exanaeyaniwa! ¡Pacopare bitso panenajamatabëcuene-enaeyabijawa pibisiacuene panewitota pane-exanaeyaniwa! ¡Pacopare panejitsipae-jawa pibisijamatabëcuene! ¡Pacoparenua ayaijawa panejitsipabia-bijawa panenaxainaeyabijawa, tsipaji belia, panecobecowëjawabelia pa-itaxutuajamatejemamë tsipae panena-ewetsinexa Diosonejawa! ⁶ ¡Daxita bajarapacuenejawanë pacopabare, tsipaji bajaraxuanë pexanaewi, Dioso ayaicuenia naneconitsia-exanaenatsi! ⁷ Paxamë-ata picani daxita bajarapit-sicuenejawanëmi pa-exanawanapame, Cristojawabelia panesiwanajamatabëcuenecopabiwajënaeya. ⁸ ¡Bajaraxuata aeconoxae baja, pacopabare daxita mapajamatabëcuenejawanëje! Pane-anaepanabiabijawa itsamonaejawabelia, piabejecuene pane-exanaejawa itsamonaejawabelia, pibisiacuenia itsa-monae panebaracuaicuajaijawa, pia-urajumenë panecuaicuajaijawa-ata.

⁹ ¡Pëtsa namata-enetsia panatsipaebame penajumetsënëtsiliwaisianë!
 ¡Daxita bajaraxuanë pacopabare, pematatsënëa pane-exanaeyaniwa, tsi-
 paji baja, panawecuaxuabame panijaperujumatabëcuenemi papecta-
 exanaeya-exanaejawami! ¹⁰ Paxamë pajamatabëcuenejëpawanapame, Ponë
 pacarajuta pejanajamatabëcuene. Nexata bajaraPonë pacajamatabëcuene-
 xanetapona panejamatabëcuenejëpaejawabelia, papectacuenecaëjëpaenexa
 xaniawaetsia paneyapëtaejawa Dioso. ¹¹ Bajarapapejanajamatabëcuene
 panexainaexae, pacato-amatamobi apojudiowicuene, judiowicuene-ata,
 penabo-upiperabëcaucubicuene, apopenabo-upiperabëcaucubicuene-ata.
 Pacato-amatamobinua pexaniacuenia penacuenene-ewetsiwiucuene, bijiya-
 cuenia panecuene-ewetsiwiucuene-ata, amoneya itsamonae petonacuene-
 bicuene, pijacuata penatonacuenebicuene-ata. Bajaraxuanë daxita pacato-
 amatamobi, tsipaji daxita bajarapamonae Dioso najëpaeya tane Cristo
 pejamatabëcueneta. Nexata, Cristo pijajiwi petsijamatabë-ecaexae, najë-
 paeya namatamota, tsipaji caenë, Cristo, namatamota Dioso pitabarata.

¹² ¡Dioso bitso papecta-asiwaxae, papecta-itapetsixaenua papijajiwinexamë,
 namata-enetsia pana-itaxutotsoniataewanapare! ¡Ëpexaniajamatabëcueneta
 pajinawanapare! ¡Beweliamatabëcuenewi nataeya pajinawanapare!
 ¡Namata-enetsia na-asiwaya pajinawanapare! ¡Panajamatabëcuenesaëtawana-
 pare, bajayajebi paca-itsacueniababiabi-ata! ¹³ ¡Liwaisi namata-enetsia pane-
 natoxainaewata, pëtsa bepijiayo panabara-anaepaname! ¡Biji rajane, pana-
 siwajamatabëcuenecaeware, pacuenia Cristo pacasiwajamatabëcuenecaewa
 pibisiacuene pane-exanaeneconimi! ¹⁴ ¡Daxitajamatabëcuenewecua, pana-
 jamatabëcuenexatare namata-enetsia bitso panena-asiwajamatabëcueneta,
 najamatabëcuenejëpaeya panejinawanapaenexa! ¹⁵ ¡Panajamatabëcueneca-
 ware! ¡Pacopare Dioso pijapebarajamatabëcuenexanepanaejawa papecta-
 jamatabëcuenenamatacaitorobinexa, jamatabëcuenexanepanaeya panenajua-
 jinawanapaenexa! Bajaraxua yabara Dioso pacajunata, papecta-exanaenexa
 caeperabëto Cristojawabelia. ¡Nexata, bajarapajamatabëcuene yabara, pexa-
 niamatabëcuene parajutabiabare Diosojawabelia!

¹⁶ Bitso pacatojitsipatsi Cristo peliwaisi papectasijamatabë-ecaenexa,
 papectajamatabëcuenenamatacaponaenexanua daxitacuenejawalia. Baja-
 rapaliwaisi cajena bitso pexanialiawaisi. ¡Nexata, bajarapaliwaisi namata-
 enetsia canaëjëtsiaya panacujarubabiabare! ¡Najamatabëcueneyawenonaeya
 namata-enetsia panamuxujiobiababare panenacueneexanetsinexa bajarapa-
 liwaisita! ¡Daxita panejamatabëcuenewetsina pexaniajamatabëcuene rajut-
 siaya Diosojawabelia panaxëanabiabare pawajianë rubena Salmos-baxutota,
 pawajianë rubena wajibaxutonëtanua, pawajianë-ata Espiritu Santo peja-
 matabëcueneta pacanaxëanaeya-exana! ¹⁷ ¡Daxita xua pa-exanawanapame,
 paliwaisianë-ata pacuaicuajiamë tsabiabi, pa-exanawanapare pejitsipa-
 cuenia wajatuxanenë Jesucristo papijajiwiwixamë! ¡Bajarapacuenia pane-
 exanawanapaexae, pexaniajamatabëcuene parajutabiabare waxa Diosojava-
 belia, wajatuxanenë Jesucristo papectajamatabëcueneyawenonaewata!

Pablo muxujioba pacuenia naewetsijitsia caebopijiwi, Cristo pijajiwi

¹⁸ ¡Paxamë papetiriawimë, panenacojiobiwi, jamatabëcuene-ewetsiaya
 pajinawanapare pane-amonajiwi, tsipaji wajatuxanenë bajarapacuenia

tsitaxanepanatsi pane-exanawanapaejawa! ¹⁹ ¡Paxamë pijinia papebi-jiwimë, pa-asiwamëre panijawajiwi! ¡Pëtsa pa-itorobabiabame anaeya papeca-amuxujitsibiyaniwa!

²⁰ ¡Paxamë pijinia papeximë, pane-axajiwi, pane-enajiwi-ata daxita xua paca-itoroba pane-exanaenexa, pajumecowënëtabiabare, tsipaji bajarapacuenia wajatuxanenë siwajamatabëcuenebarëya! ²¹ ¡Paxamë pijinia panexi panexainaewi, pëtsa pa-anaeya-exaname panexi bijiaya pane-ewetsijawata! Belia bajarapajiwi jamatabëcuenefaefaenaajitsipa papecajumecowënëtsijawami

²² ¡Paxamë pijinia itsamonae amoneya panetonacuenebawanapaewi, pajumecowënëtabiabare panijatuxanewi papeca-itorobicuenia! ¡Pëtsa xania-waetsia patonacuenebawanapame paepatota saya pacana-itaxutocaeweta panijatuxanewi, pacuenia mapanacuapijiwiwe exanabiaba pijatuxanewi pesiwabarëyanexatsi! ¡Biji rajane, daxitamatacabi panejamatabëcuenewet-sina cuenejitsipaeya panijatuxanewi patonacuenebabiabare, apopacana-itaxutocaewetsi-ata! ¡Bajarapacuenia patonacuenebabiabare wajatuxanenë Jesucristo paneyaiyataexae! ²³ ¡Daxita xua patonacuenebabiabame, jamatabëcuenebarëyaya patonacuenebabiabare! ¡Nexata, asaëyata patonacuenebabiabare panijatuxanewi, pacuenia patonacuenebijitsipame wajatuxanenë Cristo! ¡Pëtsa panacuenebawanapame, panewënajiwi panetonacuenebi-cuenia! ²⁴ Paxamë rabaja payapëtaneme wajatuxanenë papecamatamotsi-jawanexa, bitso papexaniajawa pacarajutsiapaeba, Dioso pijanacuataetsia. Bajarapacuenia pacarajutsiana, tsipaji panenacuenebijawa pacatotane Cristo bepanetonacuenebijawa, ponë pepacuene panijatuxanenë. ²⁵ Itsiata, pajiwi pibisiacuene exana, bajarapajiwi itsamatacabi Dioso naneconitsia-exanaenatsi, pibisiacuene pexanaeneconiconi yabara. Itsajiwi-ata, pijaneconiconi pexinaejijiwi, apopanepae tsane Dioso penaneconitsia-exanaejawawecua, tsipaji bajaraPonë najëpaeya naneconitsia-exanaena daxita pijaneconiconi pexinaewi.

4 ¹ ¡Paxamë papetuxanewimë, panijajiwi, amoneya papecatonacuenebabiabiwi xaniawaetsia pa-ewere, Dioso papecatocaëjëtsicuenia! ¡Paxamë-ata Panajamatabënapitabiabare, panexinaejawa panijatuxanenë, athëbëtsia pe-ecaenë!

² ¡Daxita paxamë, Cristo peliwaishi panejumexaniataewi, paca-asaëmëre tsawanapae Diosojawabelia panewajëcabiabijawa, ajamatabëcuene-itatsacaya pacopatsinejewamë! Orijiibia, panewajëtsijawata Diosojawabelia, pexaniajamatabëcuene parajutabiabianame. ³ Paxanë yabara-ata panetowajëtabiabaname Diosojawabelia, pataneyawenonaenexa, nacuanë pewetsiwi patane-itawetsiyaniwa jiwi patatsipaebaponaejawa Cristo peliwaishi. Aliwai-sijibia jiwi patatsipaebinexanua paliwaishi Dioso bajayatami apoyapëtaeya-exanae itsajiwijawabelia-ata; pacuenia Cristo pesiwatëpaejawanexa apojudíowi-ata, pibisiacuene pexanaeneconiconi yabara. Bajarapaliwaishi jiwi tatsipaebaponaexae, aeconoxae ne-eta penaneconitsiwi pejebabiabibota. ⁴ Panetowajëtabiabarenua, Cristo peliwaishi jumenapebetsiaya tatsipaebabibinexa, tanejumetaewi xaniawaetsia pejumeyapëtaenexa.

⁵ ¡Xaniawaetsia patsitajinawanapare pamonaen Cristo peliwaishi apo-pejumexaniataewi, tsipaji rabaja imoxoyo pewajënae Cristo icatsia

pepatsijawanexatsica! ¡Nexata, paepatota pacatoyapëxanepana, bajarapamonaejawabelia patsipaebare pexanialiwaissi, Cristo peliwaissi! ⁶¡Daxita paliwaissianë pacuaicuaijamë, xaniawaetsia pacuaicuaijamëre tsabiabi bajarapamonaejawabelia, papecamuxujitsipaenexa panetsipaebiliwaissi! ¡Panajamatabëcuenewererenua, xaniawaetsia panejumecanawiatsinexa caejiwi canacujitsia xua pacayanijobapona Dioso pejumeliwaissi yabara!

Pablo penapëjibiliwaissianë

⁷Wajabananë Tíquico, bitso waja-asiwanë, daxita pacatsipaebiana pacuenia xanë ponaponajë. Bajaraponëbeje xaniawaetsia patanajuanacuenebinëbeje, xaniawaetsia petonacuenebinë wajatuxanenë pijacuene. ⁸Bajara-xuata, pacato-itorobaliatsi, papecatsipaebinexa pacuenia pajinawanapajë, papecajamatabëcuene-asaëya-exanaenexanua. ⁹Bajaraponë paxamëjawabelia yajawaponaejitsia wajabananë Onésimo, panijatomarapijinë. Bajaraponëata xaniawaetsia tonacuenebabiaba wajatuxanenë. Bajaraponëbeje pacatsipaebiana daxita pacuenia pataewanapajë majotaje.

¹⁰Aristarcobeje naneconitsia panajuaponaponajëbeje Penaneconitsiwi pejebabiabibota. Bajaraponë-ata pacabajacobalia. Marcos-ata, Bernabé pejuyapijinë, pacabajacobalia. Paxamë rabaja payapëtaneme pacuenia pacopiapitsijitsiamë Marcos, itsa patsialia paxamëjawabelia. Nexata, xaniawaetsia pacopiapitsianame. ¹¹Jesús-ata, ponë itsawënë, Justo, pacabajacobalia. Bajara-ëpamatabëxëyo judíowi yajuwënëwi, neyawenonabiaba wajatuxanenë pijacuene tatonacuenebijawa. Bitso nejamatabëcueneyawenona patanajuanacuenebijawata Dioso pijacuene. ¹²Epafras-ata, Cristo pijajiwitonë, panijatomarapijinë, pacabajacobalia. Bajaraponë bitso pacatowajëtabiaba panecatsitecawanapaenexa panejumexaniataejawa Cristo peliwaissi, panejamatabëcuenenaweretaponaenexanua Dioso pijacuenejawabelia. Pacatowajëtabiabanua xaniawaetsia pane-exanabiabinexa pacuene Dioso pacatojitsipa. ¹³Bajaraponë yabara xaniawaetsia pacatsipaebatsi. Bitso papecajamatabë-najinaexae, pacatowajëtabiaba Diosojawabelia. Bajarapacuenia pijinia, bitso towajëtabiaba Jesús peliwaissi pejumexaniataewi, Laodicea tomarata pejinawanapaewi, Hierápolis tomarata pejinawanapaewi-ata. ¹⁴Waja-asiwanë Lucas-ata, ponë jiwi waëbabiaba, pacabajacobalia. Demas-wënënenë-ata pacabajacobalia. ¹⁵Nebajacobi wajamonae, daxita Jesús peliwaissi pejumexaniataewi, Laodicea tomarata pejinawanapaewi. Nebajacobi Ninfas-ata, pamona-ata Jesús pijajiwí, nacaetuatabiaba bajaraponë pijabota. ¹⁶Itsa baja paweretame panelebijawa mapabaxutoje, pato-itorobianame Jesús pijajiwíjawabelia, Laodicea tomarata pejinawanapaewi penalebinexa. Bajarapamonae-ata tatoyaquinaebaxuto, juya pacato-itorobiana panenalebinexa paxamë-ata. ¹⁷Arquipojawabelia pajumaitsimë tsane mapacueniaje: «¡Dioso netonacuenebinexa pecatocopatsijawa, xaniawaetsia tonacuenebare, neweretsijawabelia!», pajamë tsane.

¹⁸Xanë Pablonë, pacatoyaquinatsi baja cajena tacobeta mapaliwaisiyoje patanebajacobinexamë. ¡Panenajamatabënapitabiabare penaneconitsiwi pejebabiabibota taponaponaejawa! Pacatojitsipatsi Dioso asiwaya papecaya-wenonabiabinexa. Bajara-itsi tsane.

1 Tesalonicenses

Mapabaxutoje Apóstolnë Pablo copiaya toyaquina Jesús peliwaisi pejumexaniataewi, Tesalónica tomarata pejinawanapaewijawabelia

Pablo pebajacobiliwaisi

1 ¹Xanë, Pablonë, Silvano, Timoteobeje, yajawa pacabajacobaliatsi, paxamë Jesús papijajiwimë, Tesalónica tomarata panejinawanapaewi. Paxamë raja waxa Dioso, wajatuxanenë Jesucristo-ata, papijajiwimë. Pexaniacuenia pacatojitsipatsi bajaraPonëbeje papecajamatabëwënëtsinexa papeca-asiwajamatabëcuene, papecabarajamatabëxanepanaejamatabëcu ene-ata, jamatabëcuenexanepanaeya panenajuajinawanapaenexa.

**Tesalónica tomarata pejinawanapaewi, Jesús pijajiwi,
xaniawaetsia Dioso itaxutuajamatejemaya jinawanapa**

²Pacopatsinejewanë pacatowajëtabiabatsi Diosojawabelia. Pexania-jamatabëcuenenua parajutabiabajë paxamë yabara. Patawajëtabiabijawata pacanajamatabënapitabiabatsi pane-exanawanapaecuenejawanë yabara. ³Pexaniajamatabëcuene parajutaponajë paxamë yabara waxa Diosojawabelia, pinijicuenia Dioso panetonacuenebawanapaejawa yabara. Asiwaya panetonacuenebawanapaejawa itsamonae. Pane-ajamatabëcuenesaëtsawanapaexae-ata panecopia-ewetawanapae-epato wajatuxanenë Jesucristo icatsia pepatsimatacabijawabelia. Bajarapacuenia pane-exanaejawata, panajamatabëcuene-itajëtaponame pepacuene panesi-wanajamatabëcuenecopabijawa Jesucristojawabelia.

⁴Tajamonaë, Dioso papeca-asiwawi, pexaniajamatabëcuenenua parajutajë Diosojawabelia, tsipaji baja cajena payapëtaniji Dioso papeca-itapetsijawa papijajiwinexamë. ⁵Pamatacabi pacatsipaebatsi Jesús peliwaisi, pexaniajailiwaisi, saya ëpatajumeta apopapaëbinë. Biji rajane, Espiritu Santo pesaë yajawa pacatsipaebatsi. Bajaraponë pacayapëtaeya-exananua pexaniajaijawa patacatsipaëbiliwaisi. Nexata, pajumexaniataneme. Paxamë payapëtaneme xaniawaetsia Dioso pesaëta patanacuenebijawa, patacatsitajinawanapaejawa-ata pamatacabi pajinawanapajë paxamëjawata, patacajamatabëcueneyawenonaenexa xua pacatoxanepanaejitsia.

⁶Paxamë panecuenepitame patajinawanapaecue ne paxanë, Jesús pecuene-ata, pamatacabi patacatsipaebiliwaisi barëyaya pajumexaniata-neme, Espiritu Santo pejamatabëcueneta, itsamonae bitso pacabejiobia-exanabiabi-ata bajarapaliwaisi yabara. Bajarapacuenia barëyaya pane-jumexaniataewanapaexae bajarapaliwaisi, panecuenepame paxanë. Pacuenepamenua wajatuxanenë Jesús. ⁷Nexata, papecawënëliwaisitae-jawata,^a daxita Jesús peliwaisi pejumexaniataewi, Macedonia nacujawa, Acaya nacujawa-ata pejinawanapaewi panetsitanacuenetajëtsixae, bajarapamonae pacacuenepita piajamatabëcuenesaëtsawanapaenexa itsamonae bejiobia-exanae-atatsi, Jesús peliwaisi yabara. ⁸Orijibia, paxamë patsipaebawanapame Jesús peliwaisi apoëMacedonia, ëAcaya nacupijiwi-beje, itsanacuanëpijiwijawabelia-ata. Biji rajane, tajë nacupijiwijawa-ata patsipaebame wajatuxanenë peliwaisi. Nexata, daxitanacuanëpijiwi paca-wënëliwaisitane panesijwanajamatabëcuenecopabijawa Diosojawabelia. Yapëtanenua baja Jesús peliwaisi pexaniajailiweisicue. Bajaraxuata, paxanë pacawajunupaebinejewatsi, daxita bajarapamonae yapëtane baja. ⁹Biji rajane, bajarapamonae pijacuata panetsipaeba paxamë xaniawaetsia patanecopiapitsijawamë pamatacabi pacasiwaxainatsi. Panetsipaebanua pacuenia paxamë pawecuanajamatabëcuenepënëyorotame panenawajëca-biabijawami jumapecataeya pexanaenëanëjawabelia, juya itaxutuajamatejemaya panenawajëcabiabinexa pepopiasaënë Diosojawabelia, asiwaya pane-exanawanapaenexanua pejitsipaecuenia. Nexata, patonacuenebawanapame pepoDioso, ponë piasaëtsaponaponaenë daxitamatacabijawabelianexa. ¹⁰Panetsipaebanua panecopia-ewetawanapaewi Jesús, Dioso pexënat, athëbëwetsica icatsi pepatsijawanexatsica, ponë Dioso baja cajana asaëya-exanatsi petëpaecujinae. Jesús raja wajanacapanepaenë Dioso wajanacananeconitsia-exanaejawaminexawecua pibisiacue ne waja-exanaeneconi yabara. Nexata, Dioso aponacayajawananeconitsia-exanae tsane, pamatacabi naneconitsia-exanaena daxita pamona apopesiwanajamatabëcuenecopabiwi Jesucristojawabelia.

Pablo Dioso pijacue ne panacuenebijawa Tesalónica tomarata

2 ¹Tajamonae, paxamë baja payapëtaneme apopatanacueratsijawabeje^b pamatacabi pacasiwaxainatsibeje, tsipaji baja bajarapamatacabijawa pajumexaniataneme Jesús peliwaisi, papecacapanepaliwaisinexa. ²Paxamëjawabelia patanajetarucaenëbeje, Filipos tomarapijiwi^c bitso pibisiajumenëta panejumaitsiibeje, panebejiobia-exanabejenua Jesús peliwaisi yabara. Bajarapacuenia paneto-exanae-atabeje, Dioso panejamatabëcueneyawenonabeje. Bajaraxuata, patapatsijawatabeje paxamëjawabelia, ajume-urajibia pacatsipaebatsibeje Jesús peliwaisi, patane-itoyawi panecuenecaranatsi-atabeje^d picani patacatsipaebiyaniwa. ³Paliwaisi pacatsipaebatsibeje, pexaniajailiweisicajana. Apopenajumetsënëtsiliwaisi. Itsajamatabëcueneliwaisi

a 1:7 papecawënëliwaisitaejawata: Taema 1Ts 1:3,6. **b** 2:1 apopatanacueratsijawabeje: Pamatacabi Pablo copiya pata Tesalónica tomarata, yanatatsi saya Silas. Itsawënë pijinia Silvano. Nexata, bajaraponëbeje tsipaebabeje Jesús peliwaisi Tesalónica tomarapijiwijawabelia. Taema Hch. 17:1-5. **c** 2:2 Filipos tomarapijiwi: Taema Hch. 16:19-40. **d** 2:2 panecuenecaranatsi-atabeje: Taema Hch. 17:1-9.

yajawa apopacatsipaebitsibeje patacayamaxë-itojorobinexa. ⁴ Biji rajane, Dioso patanecueneyapëtaexabeje, xaniawaetsia patatsipaebijawanexa, pane-itorobabeje jiwi patatsipaebinexabeje Jesús peliwaissi, pecapanepaeliwaissinexatsi. Bajaraxuata, patatsipaebanajetarucaejawatabeje bajarapaliwaissi, apopapaebaponaenëbeje saya jiwi patanesiwajamatabëcuenebareyanexabeje. Biji rajane, bajarapaliwaissi jiwi patsipaebaponajëbeje Dioso patanesiwanajamatabëcuenebareyanexabeje, tsipaji Dioso wajanacajamatabëcueneyapëtaenë xua najamatabëxainatsi. ⁵ Caeto-ata liwaissi patacatsipaebijawatabeje, pexaniacuenia apopacawënëxaniatsitsibeje, patanebareyatanexamëbeje, panejumexaniataenexanua patacatsipaebiliwaissiibeje. Yamaxë-itojorobiaya liwaissi apopacatsipaebitsibeje, palata patacawecua-pitsinexa. Dioso baja cajena daxita bajarapacueni panexamatabëcueneyapëtanebeje. ⁶ Apopajaitsinëbeje itsajiwi-ata be-ayaijamatabëcuenenënë patanetaenexabeje, Jesús peliwaissi patatsipaebijamatabëcueni. Apopajaitsinëbeje bajaraxua paxamëjawata, itsamonaejawa-ata. ⁷ Paxanëbeje Cristo papija-apóstolenëxaenëbeje, pacatoxanepana picani palata patanerajutsinexamëbeje, pataneyaiyataejamatabëcuenemë. Itsiata, bajarapacuenia apopaxanaenëbeje. Biji rajane, asiwaya paca-ewetatsibeje. Pacuenia petiriwa asiwaya xaniawaetsia ba-ewetaponapona pexi, bajarapijinia paxanë-atabeje pa-itsinëbeje. ⁸ Bitso pataca-asiwajamatabëcuene, pacatsipaebatsibeje Dioso pejumeliwaissi. Orijibia, panejumexaniataenexa Jesús peliwaissi, panacopatsipajëbeje itsamona patanebeyaxuabinexabeje, ayaicuenia pataca-asiwajamatabëcuene. ⁹ Tajamonae, panecuenenajamatabënapitsianame pamatacabi paxamëjawata paponaponajëbeje. Pinijicuenia panacuenebiabajëbeje, patajacuata patana-ewetsinexabeje. Pacatsipaebaponatsibejenua pexanialiwaissi, paliwaissi Dioso paneyapëtaeya-exanabeje. Nexata, paepatota pacuenesajinajëbeje, panatonacuenebiabajëbeje matacabita, merawi-ata, itsanë-ata paxamëyajuwënënë peto-ayapëbejeyaniwatsi patane-ewetsijawabeje yabara. ¹⁰ Panecueneyapëtanemebeje baja cajena paxamë. Dioso-ata panecuenetanebeje, xaniawaetsia pataponaponaejawabeje, Jesús peliwaissi panejumexaniataewi tuatuajëta. Bajarapamatacabijawa, pibisiacuene apopacatsita-exanaetsibeje. Pexaniajamatabëcuenetanua paponaponajëbeje. Nexata, itsacueneneconiyo-ata paxamëjawabelia apopaxainaenëbeje. ¹¹ Paxamë baja cajena payapëtaneme pata-exanaecuenenebeje. Pacuenia pexi pexainaenë nacoximuxujioba xaniawaetsia pejinawanapaenexa, bajarapijinia pacuenia pacamuxujiobaponatsibeje, pacaenëmë canacujitsia, pane-ajamatabëcuenesaenëxa Diosojawabelia. ¹² Asaëyata pacamuxujiobatsi Dioso papeximëcuenia panenacuene-itajëtsinexa, xaniawaetsia panejinawanapaejawata. Bajarapacuenia pacamuxujiobatsi, tsipaji bajaraPonë pacajunata papijajiwinexamë, bitso pexaniacuenia papeca-ewetsinexa.

¹³ Bitso pexaniajamatabëcuene parajutaponajë Diosojawabelia paxamë yabara, tsipaji pajumexaniataneme patacatsipaebiliwaissiibeje, Jesús peliwaissi. Bajarapaliwaissi panejumetaejawata, bejiwitonë apopepabiliwaissi. Biji rajane, pacatsita pepopexaniajailiwaissi, panejumexaniataenexa. Bajaraxuata, bajarapaliwaissi nacuenebapona panejamatabëcuenejawata, xaniawaetsia panejinawanapaenexa Dioso pejitsipaecuenia. ¹⁴ Tajamonae, panijanacuapijiwi itsa pacabejiobia-exanapona, Jesús papijajiwiwaxamë,

pacuenejëpame Judea nacuata pejinawanapaewi, pacuenia bejiobia-exanatsi pewênajudíowi. ¹⁵ Bajarapajudíowi pijasalinaiwimi bajayata baja cajena beyejebapona profetawimi. Bajara-icatsia pacuenia bajarapamonaemi pemomoxi beyaxuaba pepopetuxanenë Jesús. Orijibia mapamatacabitaje, Jesús papijajiwxanë, paxanë-ata panecapitsapa judíowi pijasinagoga-bonëwecua. ¹⁶ Bajarapamona Dioso apopejitsipaecuene exanapona. Daxitajiwinua bajarapaliwaisi nawecua-itoya tsabiabi. ¹⁶ Bajaraxuata, paxanë panecuenecaranababiaba patatsipaebabiabiyaníwa Jesús peliwaissi apojudíowijawabelia, pecapanepaeyaniwatsi Diosojawabelia. Bajarapacuenia pexanaexae, ayaineconi pewajënaeyabelia natsi-exanapona Diosojawabelia. Nexata, baja, aeconoxae bajarapamonaecocopiapatatsi ayaicuenia Dioso penaneconitsia-exanaematacabinexatsi.

**Pablo yapëtaeya-exana pejitsipaejawa icatsia petaejawanexa
Jesús pijajiwi, Tesalónica tomarata pejinawanapaewi**

¹⁷ Tajamonaec, paxanëbeje patacawecuaponaecujinaebeje, caematacabi-beje apopacatae-atatsi, itsiata pacajamatabënaponaponatsibeje. Bitso picani icatsia jamatabëpaponajëbeje paxamëjawabelia patacataenexa. ¹⁸ Xaniajanë, jamatabëpaponajë picani paxamëjawabelia. Xanë Pablonë, napënajaitaponajë picani taponaejawanexa. Itsiata, Satanás necuenecaranatabiaba taponaeyaníwa. ¹⁹ Bitso pajitsipajë patacataejawa, tsipaji pacasiwajamatabëcuenebarëyatsi. Pamatacabi wajatuxanenë Jesucristo icatsia itsa patsianica, paxanë baja pawajënae-ewetawanapajë pexaniawiriacoronajawa patanerajutsijawanexa. Bajarapacoronajawa panerajutsiana, tsipaji itsamonaec patacujarubiwiwecua paxamë xaniawaetsia pajinawanapame Dioso pejitsipaecuena. ²⁰ Xaniajai. Paxamë rabaja cajena panejamatabëcuene itsamonaec newënëliwaisiyaiyatane, panajamatabëcuenebarëyaya-exanamenua. Bajaraxuata, paxamë yabara pexaniajamatabëcuene parajutabiabajë Diosojawabelia.

3 ¹ Bajayajebi baja cajena apopatacataexae, belia baja apopanajamatabëcuensaëtaponaejitsipañë matawëjëa pata-ewetaponaejawa bitso pajitsipajë patayapëtaenexa xaniawaetsia panejinawanapaecuene. Nexata baja, caeliwaisi panajuaxainajë, ëTimoteo pata-itorobinexa paxamëjawabelia papecataenexa. Paxanëbeje, pijinia Silvanobeje, panacopatsianajëbeje Atenas tomarata. ² Nexata baja, pacato-itorobatsibeje wajabananë Timoteo, papecayawenonaenexa, papecajamatabëcuene-asaëya-exanaexanua pane-itaxutuajamatejemajawa Jesús-jawabelia. Bajaraponë baja cajena Dioso pijacuene patatonajuanacuenebinëbeje, jiwi patatsipaebaponaenexabeje pexanialiwaissi, Cristo peliwaissi. ³ Timoteo pacato-itorobaliatsibeje, tsipaji apopajitsipañëbeje itsajiwi-ata, paxamëyajuwëñëjiwi, papecajamatabëcuenenawitsia-exanaejawa Jesús peliwaissiwecua, papecabebiobia-exanaejawata bajarapaliwaisi yabara. Paxamë baja cajena payapëtaneme Dioso wajanacatocopsijawa itsamonaec wajanacabebiobia-exanaponaenexa, Jesucristojawabelia wajasiwanajamatabëcueneocopabixae.

e 2:15 *pijasinagogabonëwecua*: Bajarapacuenia judíowi wënërubabiaba penacaetuatsibo, itsajota nacujarubabia Dioso peliwaissi caesábado canacujitsia.

⁴ Pamatacabi abaxë pacayajawajinawanapatsi, tajëwelia baja cajena pacatsi-paebabiabatsi wajanacatocopiapatsijawanexa itsamonae wajanacabejiobia-exanaponaejawa Jesús pijajiwiwaetsi. Nexata jane baja, bajarapacuenaeconoxae pacatocopiapata, xua pewajënaeya payapëtaneme. ⁵ Bajara-xua yabara baja, aponajamatabëcuenesaëtaponaëjitsipañë matawëjëa ta-ewetaponaejawa tayapëtaenexa panejinawanapaecuenae yabara. Nexata, itorobajë Timoteo papecataenexa pane-ajamatabëcuenesaëtsawanapaejawa, pane-itaxutuajamatejematsawanapaejawanua Diosojawabelia. Xanë bitso pacacacujunawatsi picani paxamë yabara, jiwi pejamatabëcuene-ëjëbinë papecajamatabëcuenefaefaenaya-exanaeyaniwa papecajamatabëcuene-ëjëbijawata. Belia, bajarapacuenia pacacopabia-exanaeijitsipa Dioso pane-itaxutuajamatejemajawawecua. Bajarapacuenia Satanás itsa paca-exanaeijitsipa, nexata paxanëbeje panacueratsipajëbeje pexanialiwaissi patacatsipaebijawabeje.

⁶ Itsiata, Timoteo aeconoxae penawiatsinërena paxamëjawawerena, itsa parena Tesalónica tomarawerena, panetsipaebabeje pexaniali-waissi paxamë yabara. Paneyapëtaeya-exanabeje xaniawaetsia Dioso pane-itaxutuajamatejematsawanapaejawa pane-asiwatsawanapaejawa itsamonae-ata. Panetsipaebabejenua paneijitsipaejawanua bitso patane-taejawamë, pacuenia paxanë-ata jamatabëpacatanetsi picani. ⁷ Itsamonae panebejiobia-exanaponae-atabeje majotaje, patacawënëliwaissitaejawata Dioso asaëya pane-itaxutuajamatejematsawanapaejawa, bajarapaliwaissi panejamatabëcuenebarëyaya-exanabeje cajena. ⁸ Xaniajaiya patayapëtae-xae paxamë yabara, nexata panajamatabëcuenesaëtajëbeje. ⁹ Ayaicuenia patanejamatabëcuenebarëyaya-exanaexaemë, bitso pexaniajamatabëcuene parajutajë Diosojawabelia paxamë yabara. ¹⁰ Nexata, daxita patajamatabë-ëthëtowetsina pawajëtaponajë Diosojawabelia paxamë yabara, matacabita, merawi-ata, patanetocopatsinexa icatsia pataponaenexa paxamëjawabelia, patacataenexa. Pajitsipajënuu patacayapëtaeya-exanaejawa paliwaissi abaxë pacatosaiça, pane-itaxutuajamatejemanexa matatoxenetsia Diosojawabelia.

¹¹ Bitso cajena pajitsipajë waxa Dioso, wajatuxanenë Jesucristobeje, pataneyawenonaejawa pataponaenexa paxamëjawabelia. ¹² Pacatowajëtatsi Diosojawabelia panejamatabëcuenewitsabaponaenexa panewajënaeyabelia, namata-enetsia panena-asiwatsawanapaenexa, pacuenia paxanë-ata paca-asiwatsi tsawanapae. ¹³ Pacatowajëtatsinua Dioso papecajamatabëcuene-asaëya-exanaenexa, xaniawaetsia pane-itaxutuajamatejemajawa Diosojawabelia, papecajamatabëcuenecaëjëpaeya-exanaenexanua Dioso pejitsipaecuenia panejinawanapaenexa. Nexata, pamatacabi icatsia patsianica wajatuxanenë Jesús, pijajiwi yajawa, aneconijibia panubenaename waxa Dioso pitabarata.

**Pacuenia Jesús pijajiwi bejinawanapa Dioso pes
iwajamatabëcuenebarëyanexatsi**

4 ¹ Tajamonae, imatami pacacujarubatsi Jesús pijajiwi pejinawanapaecuenae yabara. Bajaraxuata, wajatuxanenë Jesús pewënëta, pinijicuenia pacamuxujiobatsi, pacajamatabëcuene-aitatsacaeya-exanatsinua, pane-wajënaeyabelia nacuenae-ewetsiaya xaniawaetsia panejinawanapaenexa.

Bajarapacuenia xaniajaiya pajinawanapae-atamē, itsiata pacatojitsipatsi, caematacabi canacujitsia, panewajēnaeyabelia tsiteca bajarapacuenia pane-jinawanapaenexa, Dioso papecasiwajamatabēcuenēbarēyanexa. ² Paxamē baja cajena payapētaneme paliwaisi paca-itorobatsi wajatuxanenē Jesús pejamatabēcueneta panejumecowēnētsinexa. ³ Panenajamatabēcuenē-itajētsinexa Dioso papijajiwicuenemē, bajaraPonē pacatojitsipa aneconijibia panejinawanapaenexa. Pacatojitsipanua panecopabijawa daxitawiria pibisiacuenē panewitota pane-exanaejawa.^f ⁴ ¡Nexata, paxamē, pacaējiwimē canacujitsia, panacuenecujarubare xaniawaetsia panenaperabē-ewetsijawa, pibisiacuenē pane-exanaeyaniwa! Panaperabē-ewetawanaparenua, aneconijibia Dioso pitabarata, jiwi papecacueneyaiyataenexa. ⁵ ¡Bajaraxuata, pētsa panacopatame panesiwanajamatabēxainaejawa pibisiacuenē panewitota pane-exanaenexa, pacuenia ba-exana Dioso apopeyapētaewi! ⁶ Itsajiwi-ata apoxanepanae cajena bajarapitsipibisiacuenē peto-exanaejawa penajuasiwanajamatabēcuenecopabiwi Cristojawabelia. Wajatuxanenē cajena pini-jicuenia naneconitsia-exanaena daxita pamonae exana bajarapacuenē. Bajarapacuenē yabara imata baja cajena pacatsipaebatsi, pamatacabi abaxē pajinawanapajē paxamējawata. ⁷ Dioso baja cajena aponacajunatsi pibisiacuenē wajawitota waja-exanawanapaenexa. Biji rajane, nacajunata aneconijibia wajajinawanapaenexa bajaraPonē pitabarata. ⁸ Bajaraxuata, pajiwi nawecua-itoya bajarapaliwaisi pejumecowēnētsiyaniwa, bajaraxua apoto-exanae pecuenē-itawetsijawatsijawabelia. Biji rajane, bajaraxua exana Dioso-jawabelia, Ponē wajanacarajutsinē Espíritu Santo.

⁹ Namata-enetsia panena-asiwatsawanapaejawa yabara, apopanamatawenonaenē baja pematatsēnē patacatoyaquinaejawa, tsipaji Dioso pijacujaya pacacujaruba panena-asiwanexa. ¹⁰ Nexata, pasiwamē tsawanapaenua Jesús pijajiwi, daxita pamonae jinawanapa Macedonia nacujawa. Itsiata, icatsia paca-itorobatsi namata-enetsia orijibia panena-asiwatsawanapaenexa. ¹¹ ¡Pacuenia baja cajena copiaya paca-itorobatsi, jamatabēcuenexanepanaeya pajinawanapare! ¡Panacuenēnaeyabare ēpanijacuenē, panejamatabē-itonotsiyaniwa itsamonaejawabelia! ¡Panijacuata panatonacuenēbare, panena-ewetawanapaenexa! ¹² Bajarapacuenia itsa pa-exanawanapaename, nexata Jesús peli-waisi pejume-aebiwi pacayaiyataena. Apopanamatawenonaemēnua tsane itsamonae panejamatabēcuenē-ewetsijawa, papecarajutsinexa panenamatawenonaejawanē.

Pacuenia itsi tsane wajatuxanenē Jesús icatsia itsa patsianica

¹³ Tajamonae, pamonae apojamatabēcuenē-ewetawanapae Cristo pepatsijawanexatsica, bitso najamatabēxainabiaba, pijamonaejiwi itsa

f 4:3 *daxitawiria pibisiacuenē panewitota pane-exanaejawa*: Wowaijumeta bajarapajume, «fornicación, itsa jume, inmoralidad sexual». Bajarapajumejawabelia nacajunua mapacuenējawanēje: Pibisiacuenē pewitota pexanaejawa nacojobinejewa, penawecujajitsijawabeje penapitsijiwibeje, nacaewēnapetiriwabeje pena-imoxoyobijawa, nacaewēnapetiriwabeje pena-imoxoyobijawa, penaweretsiwi peperabēquenetsiataejawa pejewaxijawabelia, dajubijawabelia-ata pimoxoyobijawa.

wecuatēpatsi. Bajarapacuenia apopacatojitsipaetsi panenajamatabēxai-naejawa,⁸ itsa pacawecuatēpa Jesús peliwaitsi panenajuajumexaniatae-jiwiyo, pacuenia banajamatabēxaina Jesús peliwaitsi pejume-aebiwi. Bajaraxuata, pacatoyaquinatsi paneyapētaenexa baja cajena pacuenia itsijitsia pamatacabi wajatuxanenē Jesús icatsia patsianica. Pitsicue taejitsianua petēpaewi bajarapamatacabi. ¹⁴ Waxaitsi, Jesús pijajiwiitsi, jumexaniatanetsi Dioso icatsia piasaēya-exanaejawa Jesús petēpaejawawecua. Bajaraxuata, yapētanetsi pexaniajaijawa Dioso icatsia itsamatacabi piasaēya-exanaejawanexa daxita petēpaewimi, pamonae pesiwanajamatabēcuenecopabiwi Jesús-jawabelia.

¹⁵ Nexata, pacayapētaeya-exanatsi pacuenia wajatuxanenē Jesús neyapētaeya-exana baja. Waxaitsi, Jesús pijajiwiitsi, abaxē mapanacuata waja-asaētsawanapaewije, pamatacabi wajatuxanenē Jesús icatsia patsianica, athēbēabetsia aponamataxainaetsitsia tsane. Biji rajane, copiaya namataxainaenia pamonae tēpa pepuapesiwanajamatabēcuenecopabiwi Jesús-jawabelia. ¹⁶ Bajarapamatacabi, wajatuxanenē pijacuata patsianica athēbēwetsica pejunatsinexa pijajiwi. Nexata, itorobiana ángelewi penamata-caitorobinē pewawajainexa. Itsanē pijinia obiana Dioso pijatrompeta. Nexata, pamonae Cristojawabelia pepuapesiwanajamatabēcuenecopabiwi tēpa, bajarapamonae asaēya-exanaenatsi petēpaejawamiwecua. ¹⁷ Bajaraxuacujinae, waxaitsi, abaxē mapanacuata waja-asaētsawanapaewije, nacacaponanica itarērēbojawabetsia, wajanacacaetuatsinexa petēpaewimi yajawa. Nexata, caxitajarabianatsi jane baja athēbētatsia wajatuxanenē Jesús, wajayajawajinawanapaenexa daxitamatacabijawabelianexa. ¹⁸ ¡Bajaraxua pewajēnaeya, namata-enetsia panajamatabēcuenesaēya-exanaponare mapaliwaisitaje!

5 ¹ Tajamonae, itsiata apopanamatawenonaenē patacatoyaquinaenexa patacayapētaeya-exanaejawa pamatacabita, paepatota-ata wajatuxanenē Jesús pepatsijawanexatsica. ² Payapētaneme baja cajena pamatacabi icatsia patsijitsiatsica, paepatota apowajēnae-ewetawanapaetsi. Pacuenia penacobetoxotsinēnexa merawi bapata itsajota apojamatabēnajinaetsi, bajarapijinia pacuenia pepopetuxanenē Cristo jemata patsianica penaneconitsia-exanaenexa pijaneconi pexainaewi. ³ Pamatacabita jiwi najumaitsi tsaponae tsane: «Daxitanacuanējawa baja cajena xanepana. Daxitajiwi xaniawaetsia jinawanapa», najai tsane, bajarapaepatota jemata tocopiapatsianatsi Dioso penaneconitsia-exanaejawanexatsi. Pacuenia petiriwa, penacoxitsiwa, jemata wixanotatsi penacueto pewecuaenexanexatsi, bajarapijinia pacuenia jemata copiapatsiana Dioso penaneconitsia-exanaematacabinexa pijaneconi pexainaewi. Nexata, Cristojawabelia apopesiwanajamatabēcuenecopabiwi acuenebi tsane pewecuapanepaenexa bajarapacueni.

⁴ Tajamonae, paxamē itsiata apopanejamatabēcueni-itaquiriwi, pacuenia jamatabēcueni-itsi tsawanapae pamonae

g 4:13 *panenajamatabēxainaejawa*: Timoteo penawiatsicujinae Tesalónica tomarawerena, Pablo-jawabelia yapētaeya-exanatsi pacuenia itsamonae yamaxē-itojoroba Jesús pijajiwi, bajarapatomarata pejinawanapaewi. «Bajarapamonae tsipaebatsi pacuenia Jesús pijajiwi petēpaeccujinae, Dioso apo-asaēya-exanaejitsia icatsia petēpaejawawecua. Nexata, nacopatsijitsia pemēthējawata, patsinejewa Dioso pijanacujawabetsia. Epamonae, Jesús pijajiwi, abaxē asaē tsawanapae Jesús pepatsimatacabita, ponaena pejinawanapaenexa Dioso pijanacuatsia, Jesús yajawa», jai.

apopesiwanajamatabëcuenecopabiwi Cristojawabelia. Nexata, apopaja-matabëcuenenabenajacaemë tsane pamatacabi wajatuxanenë Jesús icatsia patsianica. Pacuenia penacobetoxotsinë itsa pata, basiwajamatabëcuenenabenajacatsi, apopa-itsimë tsane. ⁵ Daxita paxamë, Jesús papijajiwimë, pexaniajailiwaitsa pajamatabëcuene-itayotawanapame. Waxaitsi baja nexata, Jesús pijajiwitsi, pitaquirijamatabëcuene apoxainawana-paetsi. ⁶ Bajaraxuata nexata, apobejamatabëcuenemajitsitsi, pacuenia jamatabëcuene-itsi tsawanapae pamona apopesiwanajamatabëcuenecopabiwi Cristojawabelia. Biji rajane, jamatabëcuene-aitawaya bejinawanapatsi, xaniawaetsia wajanacuene-ewetsinexa pibisiacuene waja-exanaeyaniwa. ⁷ Pamona majita, merawi majitabiaba. Pamona pitajibiwi, aitajibi tsa-biabi merawi. Bajarapitsiwi xaniawaetsia aponatsiwajënaeyapëtae, xua tsi-ayajitsiatsi. ⁸ Itsiata baitsi jane, waxaitsi baja pexaniajailiwaitsa wajanacajamatabëcuene-itayotsiwi, nayajiwitaeya jinawanapaenatsi, pibisiacuene waja-exanaeyaniwa. Nexata, pacuenia wajabitsaënë nayajiwinoxatata piatajawanë, bajarapacuenia waxaitsi-ata nayajiwijamatabëcuenexatatawanapaenatsi mapacuenejawanëtaje: waja-itaxutuajama tejemajamatabëcueneta waja-itaxutuajamatejajamatabëcueneta, waja-asiwajamatabëcueneta Dioso, wajacopia-ewetawanapaejamatabëcuenetanua Jesús pepacuene wajanacacapanepaejawa yabara. Bajarapacuenia dowathi apocuenecaëjëpaetsi tsane wajanacayamaxë-itojorobijawa, wajacuene-aebinexa Dioso. ⁹ Dioso itsa naca-itapeta, aponacatocanaëjëtsi wajanacananeconitsia-exanaenexa^h waneconijamatabëcuene. Biji rajane, nacatocanaëjëta wajanacacapanepaenexa wajanacananeconitsia-exanaeyaniwa, wajatuxanenë Jesucristo pejamatabëcueneta. ¹⁰ Jesucristo baja cajena nacasiwatëpa wajanacayajawaponaponaenexa Dioso pijanacuatatsia. Nexata, icatsia itsa patsianica, nacapitsiana waja-asaëtsawanapaewi, petëpaewi-ata, wajanacayajawaponaponaenexa dexitamatacabijawabelia. ¹¹ Bajaraxua paneyapëtaexae, namata-enetsia panewajënaeyabelia panajamatabëcuene-asaëya-exanaponaename, pacuenia pa-exanawanapame maparucaje.

Pablo pecopiarutsi muxujiobiwaisi

¹² Tajamonae, pinijicuenia pacamuxujiobatsi paneyaiyataenexa pamona papeca-ewetsiwi paxamë tuatujëta. Bajarapamonae asaëyata Dioso

h 5:9 *aponacatocanaëjëtsi wajanacananeconitsia-exanaenexa*: Taema 1Ts 4:16. Jota Pablo najamatabënapitsia-exana bajarapamonae Dioso pijatrompeta penajumetsijawa yabara. Bajayami, sacerdotewi itsa oba trompeta, mapajamatabëcuenianë yabaraje: **1)** Pejunatsijawa Dioso pijajiwij penacatuatsinexa Dioso pijatabernáculobojawata mapacuenejawanë yabara: **a)** bajarapamonae penajuawëñexaniatsinexa Dioso, **b)** penajuajumetaenexa paliwaisi Dioso tonajumecopatsijitsiatsi, **c)** penajuayapëtaeya-exanaenexa pacuenia Dioso naneconitsia-exanaejitsiatsi. **2)** Pejunatsijawa israelitawi pijajiwij wajabitsaë pepatsinexa itsajota barëñawajabitsaëtsijitsia pijawajabitsaëjawabelia. **3)** Pebarëñawajabitsaëtsijawata peyapëtaeya-exanaenexa wajabitsaë paepatota tsimaxëpatsijitsia pijawajabitsaëjawabelia Dioso pewënëta. (Taema Núm. 10:1-10; Lev. 23:7; Núm. 29:1; 31:6) Nexata, Pablo yapëtaeya-exana Jesús pijajiwij pacuenia wajatuxanenë aponajumetsia-exanae Dioso pijatrompeta penaneconitsia-exanaenexatsi pijaneconijamatabëcuene, biji rajane, peyapëtaeya-exanaenexatsi pecapanepaejawanexatsi jane baja Dioso penaneconitsia-exanaejawaminexawecua pijaneconijamatabëcuene.

tonacuenebawanapa papeca-ewetsinexa, papecamuxujiobinexanua Dioso peliwaitsita. ¹³ ¡Bajarapamonae asiwaya pataema! ¡Payaiyataemanua, Dioso xaniawaetsia petonacuenebawanapaexae! ¡Paxamë pijinia, jamatabëcuene-xanepanaeya panajuajinawanapare!

¹⁴ Paca-itorobatsinua panemuxujiobinexa pamonaë piafaetabiwi. ¡Pajamatabëcuene-asaëya-exanare pamonaë pijinia jamatabëcuene-cueranawanapa! ¡Payawenonare pamonaë jamatabëcuenefaefaena Dioso pejumeliwaisiwecua, peto-ayapëbejewitsi pecopabijawa pijaperujucuenemi! ¡Jamatatabëcuenesaëya, jamatabëcuenexanepanaeyanua, pamuxujiobiababare daxita liwaisi penatsixainaewi!

¹⁵ ¡Pëtsa paxamëyajuwënëwi pibisiacuene papecato-exanaëjiwi juya panamatamocuenecanawiatame pibisiacuenia! ¡Biji rajane, panatojaitaponare pexaniacuene¹ namata-enetsia panenato- exanawanapaenexa!

¹⁶ ¡Daxitamatacabi pajamatabëcuenebarëyamëre tsawanapae! ¹⁷ ¡Daxitamatacabi pawajëtabiabare Diosojawabelia, pacopatsinejewamë! ¹⁸ ¡Pexania-jamatabëcuene parajutabiabare Diosojawabelia daxitacuene yabara, pexaniacuenejawanë, apopanejitsipaecuenejawanë-ata yabara! Bajarapacuenia Dioso pacatojitsipa pane-exanawanapaenexa, Jesucristo papijajiwixaemë.

¹⁹ ¡Espíritu Santo papecajamatabëcuene-itorobijawa pane-exanaenexa, pëtsa pawecuanajamatabëcuene-asiwamë! Bajarapacuenia itsa pa-exanaëjitsipame, bepene-itaxupaeyabi tsipae Espíritu Santo papecajitsipaeya-exanaëjawa. ²⁰ ¡Pëtsa caecuenia panamuxujematame xua Dioso pejumeliwaisianë pepaëbiwi, pacayapëtaëya-exana Espíritu Santo pewënëta! ²¹ ¡Biji rajane, copiaya papecatsipaëbiliwaisi xaniawaetsia pajumecanaëjere Dioso pejumeliwaisita paneyapëtaenexa pexaniajaijawa! ¡Nexata, itsa xaniajai, bajarapacuenia pa-exanare! ²² ¡Itsa pijinia apoxania-jai, panayajiwitaema daxita xua pibisiacuenejawanë!

Pablo penapëjiobiliwaisi

²³ Diosojawabelia pacatowajëtabiabatsi, Ponë pijajiwi pejamatabëcuene-xaniawaetsinë, papecajamatabëcueneyawenonaenexa, aneconijibia panejinawanapaenexa daxitacuenejawalia. Pacatowajëtatinsua Dioso pewetsinexa panejamatabëcuene, paneperabëto-ata, pibisiacuene pane-exanaeyaniwa wajatuxanenë Jesucristo icatsia pepatsimatacabitsicajawabelianexa. ²⁴ Yapë-taniji bajarapacuenia Dioso papecato-exanaëjawanexa, tsipaji caejamatabëcuene pexainanë pexanaenexa xua yabara pacajunata papexinexamë.

²⁵ ¡Tajamonae, Diosojawabelia panetowajëtabiabare!

²⁶ Asiwaya nebajacobiana daxita bajarajotalia Jesús pijajiwi.

²⁷ Wajatuxanenë Jesús pewënëta, paca-itorobatsi panetsimuxulebinexa mapabaxutoje daxita Jesús pijajiwi pejumetaenexa.

²⁸ Pacatojitsipatsi wajatuxanenë Jesucristo asiwaya papecayawenonababinexa, papeca-itaxutotsoniatæjamatabëcuene. Bajara-itsi tsane.

2 Tesalonicenses

Mapabaxutoje Apóstolnē Pablo cotocaewi toyaquina Jesús peliwaishi pejumexaniataewi, Tesalónica tomarata pejinawanapaewijawabelia

Pablo pebajacobiliwaishi

1 ¹Xanē, Pablonē, Silvano, Timoteobeje, yajawa pacabajacobaliatsi, paxamē Jesús papijajiwimē Tesalónica tomarata panejinawanapaewi. Paxamē raja waxa Dioso, wajatuxanenē Jesucristo-ata papijajiwimē. ²Pexaniacuenia pacatojitsipatsi, waxa Dioso, wajatuxanenē Jesucristo-beje, papecajamatabēwēñetsinexa papeca-asiwajamatabēcuene, papecab arajamatabēxanepanaejamatabēcuene-ata, jamatabēcuenexanepanaeya panenajuajinawanapaenexa.

**Dioso naneconitsia-exanaena pibisiacuenē pexanaewi
pamatacabi Cristo icatsia patsianica**

³Tajamonae, caematacabi canacujitsia pexaniajamatabēcuene para-jutaponajē paxamē yabara Diosojawabelia, panewajēnaeyabelia bitso pane-itaxutuajamatejematsaponaexae Dioso, panejamatabēcuenewitsabaponaexaenua namata-enetsia panena-asiwajawa. ⁴Bajarapacuenia panejamatabēcuenewitsabaponaexae, paxanē barēyaya pacawēñeliwaisipaebaponatsi itsatōmaranējawa, Jesús pijajiwijawa. Payapētaeya-exanaponajē pacuenia pajamatabēcuenesaēmē tsaponae Diosojawabelia, itsamonae pinijicuenia pacabijataeyabiabi-ata, pacabejiobia-exanabiabi-atanua. ⁵Bajarapacuenia papecabejiobia-exanaponaejawata, Jesús papijajiwixaemē, Dioso apopacatocopatsi papecananeconitsia-exanaecuenia. Biji rajane, Dioso penajamatabēcuene-itajētsinexa xaniawaetsia pesiwacanaējētsinēcuene jiwi pexanaecuenē yabara. Bajarapacuenia payapētaneme Dioso papecatocopatsijawa panejonejawanexa pijanacuayabetsia papeca-ewetsinexa.

⁶Dioso xaniawaetsia pesiwacanaējētsinēxae, bejiobia-exanaena pamonaē pacabejiobia-exanapona maparucaje. ⁷Paxamē pijinia papecabejiobia-exanaponaewi, paxanē-ata patanebejiobia-exanaponaewi, Dioso nacayawenonaena bajarapacuenewecua, pamatacabi pepopetuxanenē Jesús icatsia patsianica piasaē-ángelēwi, pitarunutsicotia-ata yajawa. ⁸Bajarapamatacabi,

Jesús jane baja naneconitsia-exanaena pamonaē apopejitsipaewi peyapētae-jawa Dioso, pamonaē-ata apopejumecowēnētsiwi^a wajatuxanenē Jesucristo peliwaishi. ⁹Nexata, Jesús naneconitsia-exanaena bajarapamonaē pijane-coni pexainaexae, daxitamatacabijawabelianexa. Tajēnua nawecuaxuabianatsi. Nexata, bajarapamonaē apotaē tsane ayaijamatabēcuenenēcuenē, pajamatabēcuenesaē-ata xaina. ¹⁰Bajarapamatacabitanua, wajatuxanenē pijajiwi pitapetsiwi, yaiyataeya wēnēxaniatsianatsi. Pamonaē-ata, pesiwanajamatabēcuenecopabiwi bajaraPonējawabelia, pinijicuenia siwajamatabēcuenenabenajacaena, bitso pexaniacuenia peyawenonaexae pijajiwi. Bajarapacuenia paxamē-ata pa-exanaename patanejumexaniataexaemē patacatsipaebiliwaishi Jesús yabara.

¹¹Panewēnēxaniatsijawanexa yabara Jesús, pacatowajētabiabatsi waja-Diosojawabelia, papecajamatabēcuenexaniataponanexa, xaniawaetsia panenajamatabēcuenē-itajēbabiabinexa Jesús papijajiwimēcuenē. Bajara-xua yabara, pacajunata Jesús papijajiwinoxamē. Pacatowajētabiabatsinua bajaraPonējawabelia pesaēta papecajamatabēcuenecaējēpaeya-exanaenexa, pane-exanawanapaenexa daxita papexaniacuenē pasiwacanaējētame, daxita panacuenebicuenenua jamatabēpa-exaname panesiwanajamatabēcuenecopabixae Jesucristojawabelia. ¹²Bajaraxuanē xaniawaetsia pane-exanawanapaexae, wajatuxanenē Jesucristo daxitajiwi yaiyataeya wēnēcacuaicuajai tsanetsi. Paxamē-ata bajaraPonē pacayaiyataeya-exanaena daxitajiwi, papeca-itaxutotsoniataexae wajaDioso, wajatuxanenē Jesucristobeje.

Bitso pepopiacuenebejenē, pibisiacuene pexanaejawanexa, yabara peliwaishi

2 ¹Tajamonaē, pacatsipaebatsi baja cajena, paneyapētaenexa pacuenia wajatuxanenē Jesucristo patsijitsiatsica. Pacuenia-ata waxaitsi nacaetuatsijitsiatsi bajaraPonē yajawa pepatsimatacabitsica. ²¡Bajarapaliwaishi paneyapētaecujinae, pētsa panacopabame, itsamonaē papecayamaxē-itojorobinexa patacatsipaebiliwaisiwecua! ¡Pētsa pajamatabēcuenē najunawiacame, itsaliwaisicuenia pacatsipaebi-ata Espiritu Santo bepeyapētaeya-exanaecueniatsi, itsa jume, Pablonē saicaya betatoyaquinaeliwaisicuenia! ¡Bajarapacuenia pacajumaitsi-ata, pētsa baja pajumexaniataneme! ³¡Pētsa panacopabame papecayamaxē-itojorobinexa Jesucristo pepatsijawa yabara! Matapania jiwi ayaibitsaētonē itsa nawecuacopabiana pejumexaniataejawa Dioso pejumeliwaishi, patsianica jane baja. Bajarapaepatota pijinia, naitajētsiana ponē bitso pepopiacuenebejenē,^b pibisiacuene pexanabiabinexa.

a 1:8 *apopejumecowēnētsiwi...Jesucristo peliwaishi*: Bajarapaliwaishi naca-itoroba wajasiwanajamatabēcuenecopatsinexa Jesús-jawabelia, Dioso aneonijibia wajanacataenexa. Jn 3:16-18, Rom. 3:21-25. b 2:3 *bitso pepopiacuenebejenē*: Bajaraponē wēnēnawita Dioso pejumeliwaisi-baxutota. Mapawēnēanēje: 1) pepopecuene-itoyanētsi Cristo (1Jn 2:18); 2) ponē tsiquirimata-etoyo (Dan. 7:8, 7:24-26); 3) peyanacua-ewetsinē, petsiyapētaenē peyamaxē-itojorobicuenia peyanacua-ewetsijawa (Dan, 8:23-25); 4) penaitajētsinē, itsanacua pewetsinē, Cristo petsimata-epanaenētsi petēpaecujinae (Dan. 9:26); 5) ayaijamatabēcuenenē penataenē daxitawiria diosowiweua (Dan. 11:36) 6) manuamenejawatsina pepitsapaejawatsina piayainē (Apoc. 13:1-10); 7) irawetsina pepitsapaejawa itsanē piayainē (Apoc. 13:11-17); 8) piayainē, petsobianē, pexainanē siete pamatabocotobeje, diez pijinia pamata-etobeje (Apoc. 17:3, 8-14); 9) peyamaxē-itojorobiprofetanē (Apoc. 19:20; 20:10).

Bajaraponë Dioso tocaëjêta penaneconitsia-exanaenexa, pexuabijawata isotuabelia daxitamatabijawabelianexa. ⁴Bajaraponë cuene-itoya tsane Dioso pijacuene. Cuene-itoyanua tsane daxita xua jiwi tane bediosocuenia,^c pesiwanajamatabëcopatabiabinexa bajaraxuajawabelia peyawenonaenexatsi. Nexata, itawetsiana jiwi penawajëcabiabiyaniwa itsacuenejawabelia bajaraponëwecua. Belia ecaena Dioso pijatemplobota-ata, bepepodiosonë jiwi petanexatsi. Naitajëtsiana Diosonëcuene petanexatsi. ⁵Pamatacabi abaxë paxamëjawata naponaponajë, tajëwelia pacatsipaebatsi baja picani bajarapaliwaisi. ¿Panejumenacofënètame tsabaja? ⁶Payapëtaneme rabaja xua^d abaxë cuenecaranata bitso pepopiacuenebejenë, pibisiacuene pexanabiabinexa penaitajëtsiyaniwa, Dioso petocaëjëtsimatabiawajënaeya. ⁷Xaniajai. Mapamatacabita-ataje bajarapapiacuenebejenë pecanaëjëtsijawa pexanaenexa exanapona^e pewajënaeyabelia, mapanacuapijiwi pibisiacuene pexanawanapaenexa. Caejawa sajina, Dioso pewecuapitsijawa jiwi-tuatuajëta ponë, pecuenecaranatsinë. Matapania jane baja, naitajëtsiana bajarapapiacuenebejenë, pibisiacuene pexanabiabinexa. ⁸Bajarapamatacabi jane baja, daxitajiwi yapëtaena penaitajëtsijawa pepopiacuenebejenë. Itsiata, wajatuxanenë Jesús belia bajaraponëmi beyaxuabiana pijumali-saëta. Pijapeniweniwenacotiata pepatsijawatatsica mapanacuayabetsicaje, towerewerecaeya-exanaenanua bajaraponëmi daxita penamatacaitorobisaëmi. ⁹Bajarapapiacuenebejenë patsiana dowathi pejamatabëcueneta. Nexata, dowathi pesaëta pinijicuene pexanaejawa exanaponaena, jiwi peyamaxë-itojorobinexa, be-ayaijamatabëcuenenë petanexatsi. ¹⁰Bajaraponë exanaena daxita xua pibisiacuene, jiwi peyamaxë-itojorobinexa. Bajarapamonae Diosowecua naxuabiana, apojejitsipaexae pejumexaniataejawa pexaniajailiwaisi, pecapanepaeliwalisnexatsi Diosojawabelia. ¹¹Bajaraxuata, Dioso tocopatsiana bajarapamonae peyamaxë-itojorobinexatsi ayaicuenia, bajaraponë penajumetsënëtsiliwaisita. Nexata, bajarapamonae jumexania-taena bajarapanajumetsënëtsiliwaisi. ¹²Bajaraxuata, daxita bajarapamonae Dioso naneconitsia-exanaenatsi, apojejumexaniataexae pexaniajailiwaisi, caranata saya, pesiwabarëyatsabiabixae ëpibisiacuene pexanabiabinexa.

**Dioso papeca-itapetsixae papijajiwinexamë, ajamatabëcuenesaëya
pajinawanapaenename Dioso pejitsipacuenia**

¹³Tajamonae, Dioso papeca-asiwawi, pexaniajamatabëcuene parajuta-biabajë Diosojawabelia paxamë yabara, tsipaji paca-itapeta tajëjawawelia, nacua pexanaewajënaeya, papecacapanepaenexa panejumexaniataejawa pexaniajailiwaisi, Jesús peliwaisi, Espiritu Santo pesaëta papeca-jamatabëcuenexaniawaetsixae. ¹⁴Patacatsipaebiliwaisi, Jesús peliwaisi,

c 2:4 bediosocuenia: Taema Dan. 11:36. **d 2:6 xua:** Aponayapëtae xaniawaetsia mapaversiculota xua yabara cuenecaranatatsi. Itsiata, ayaibitsaëto Dioso peliwaisi penacujarubiwi, canaëjêta Espiritu Santo petsijamatabëcuene-ecaexae Jesús pijajiwi, cuenecaranata penaitajëtsiyaniwa, ponë, pepopiacuenebejenë. Bajarapacuenia versículo 7-jawata jumaiti: «Ponë, pecuenecaranatsinë», jai. Nexata, pacujinae Jesús pijajiwi junatsiania pijanacuayabetsia, bajarapaepatota Espiritu Santo caejijiwo-ata apotsijamatabëcuene-ecae tsane. 1Ts 4:16-17 Nexata, ponë bitso pepopiacuenebejenë, pibisiacuene pexanaenexa, apoxinae tsane pecuenecaranatsijiwitsi penaitajëtsiyaniwa. Itsamonae pijinia, Dioso peliwaisi penacujarubiwi, canaëjêta Dioso pijacuata pecuenecaranatsijawa ponë, pepopiacuenebejenë. **e 2:7 exanapona:** Taema 1Jn 4:3; 2:18.

pejamatabëcueneta, Dioso pacajunata papecacapanepaenexa. Nexata, pane-jumexaniataexae bajarapaliwaisi, Dioso pacatocopata payaiyataejamatabë-cuene rajuta wajatuxanenë Jesucristo, paxamë-ata panexainaenexa.

¹⁵ ¡Tajamonae, bajaraxuata, panewajënaeyabelia paca-asaëmëre tsa-wanapae pane-itaxutuajamatejemajawa Dioso! ¡Pëtsa panacofënë-tame patacatsipaebiliwaisi, patacatoyaquinaeliwaisi-ata! ¡Biji rajane, pajumexaniataewanapare!

¹⁶ Wajatuxanenë Jesucristo, waxa Dioso-ata, naca-asiwa. Wajanaca-itaxutotsoniataexae, nacajamatabëcuene-asaëya-exanapona daxitamataca-bijawabelianexa. Nacatocopatanua wajacopia-ewetawanapaenexa pepope-tuxanenë Jesucristo icatsia pepatsijawanexatsica. ¹⁷ Nexata, pacatowajëtatsi bajaraPonëbeje, papecajamatabëcuene-asaëya-exanaenexa, papecayaweno-nabiabinexanua, pexaniacuene pane-exanawanapaenexa, panecuaicuaijait-sabiabinexanua pexanijumenë.

**Pablo wajëta Jesús pijajiwijawabelia, Tesalónica tomarata
pejinawanapaewi, petowajëcaenexatsi Diosojawabelia**

3 ¹ Tajamonae, pecopiarucaeliwaisi rabaja maje pacatoyaquinatsije. ¡Panetowajëre Diosojawabelia wajatuxanenë Jesús pejumeliwaisi bepijia peyacaëjëpaenexa daxitanacuajawa! Patowajërenua daxitajiwi yayataeya pejumexaniataenexa bajarapaliwaisi, pacuenia baja paxamë paju-mexaniataneme. ² Panetowajërenua Diosojawabelia, patane-ewetsinexa pibisijamatabëcuenewiwecua, tsipaji raja daxita bajarapamonae apojit-sipae Jesucristojawabelia pesiwanajamatabëcuenecopabijawa. ³ Itsiata baitsi jane, Dioso najumecapanepaeya pejumaisicuenia pexanabiabinëxae peyawanonaejawanexa, pacacuenecaëjëpa pane-itaxutuajamatejemajawa, papecajamatabëcuene- asaëya-exanaenexa, papeca-ewetsinexa-ata dowathiwecua. ⁴ Bajarapacuenia Dioso papecayawenonabiabixae, paca-itaxutuajamatejematsi xaniawaetsia pane-exanawanapaejawa, panewajë-naeyabelia daxita pacuenia paca-itorobatsii. ⁵ Pexaniacuena pacatojitsipatsi Dioso papecayawenonaejawa, pane-asiwanexa itsamonae-ata pacuenia Dioso asiwa. Pacatojitsipatsinua Cristo papecajamatabëcueneyawenonabia-binexa, panewajënaeyabelia pane-ajamatabëcuenesaëtsawanapaenexa nabe-jiobitsicuenia panejinawanapaejawata.

Pemuxujiobiliwaisi: Jesús pijajiwi benatonacueneba pena-ewetsijawanexa

⁶ Tajamonae, wajatuxanenë Jesucristo pewënëta paca-itorobatsi. ¡Pawe-cuanatsare Jesús pijajiwituatujëta, pamonae apojejitsipaewi penacuene-bijawa, pena-ewetsinexa pacuenia picani pacacujarubatsi! ⁷ Payapëtaneme rabaja pata-exanawanapaecueni, pamatacabi panajinawanapajë paxamë-jawata. Nexata, pacuenia paxanë pacatsitajinawanapatsi, bajarapacuenia bepajinawanapame. Apopafaetabinë tsawanapae. ⁸ Amoneya baja cajena itsajiwi-ata apopawecuaxaenë itsacuenejawayo-ata. Biji rajane, pinijicue-nia matababita, merawi-ata, panatonacuenebabibabjë, patana-ewetsinexa. Bajarapacuenia pa-exanabiabjë, itsajiwi-ata, paxamëyajuwënëwi, peto-ayapëbejeyaniwatsi patane-ewetsijawa patanajinawanapaejawata. ⁹ Paxa-mëjawata pexanaliwaisi patacatsipaebawanapaexae, wajatuxanenë picani

panetocopata patacawajëtsinexa xua panamatawenonajë patanerajut-sinexamë. Itsiata baitsi jane, bajarapacuenia apopa-exanaenë. Paxanë pacatsitanacuenebabiabatsi patapitaponaenexa patanamatawenonaejan-wanë, patanecuenetaecueniamë patanecuenejëpaenexamë, panijacueneta panena-ewetsinexa. ¹⁰ Pamatacabi abaxë panajinawanapajë paxamëjawata, pacatonajumecopatatsi piafaetabiwi yabara: «Pajiwi apojitsipae penacuenebijawa, apobenaxae», pacajaitsi baja cajena. ¹¹ Itsiata, pawënëliwaisitaniji pacuenia itsamonae paxamëyajuwënëwi saya jinawanapa nacuenebinejewa. Bajarapamonae pina bitso cuene-enaeyababiaba^f itsamonae penacuenebiyaniwa. ¹² Paxamë pane-afaetabiwi, wajatuxanenë Jesucristo pewënëta paca-itorobatsi panenatonacuenebinexa, panijacuata panena-ewetsinexa. ¡Pacopabare pematatsënë panejamatabë-itonotsijawa itsamonae!

¹³ ¡Tajamonae, pëtsa pajamatabëcuene cueraname pexaniacuene pane-exanawanapaejawa!

¹⁴ ¡Pajiwi aponacuenebi tsane pena-ewetsinexa, apojumecowënëtsinua tsane paliwaisi pacatoyaquinatsi mapabaxutotaje, bajarapajiwi panawecuatsare! ¡Pëtsa payajawajinawanapame! ¡Pacuenewajunupaebare piafaetabijawa yabara! Nexata, aura tsane, apopenacuenebijawa yabara. ¹⁵ ¡Itsiata baitsi jane, bajarapajiwi bepanijawajabitsaëjiwi pëtsa pataneme! ¡Xaniawaetsia pamuxujiobare panijamonaejiwicuenia, penacuene xanetsinexa!

Pablo penapëjiobiwaisi

¹⁶ Pacatojitsipatsi wajatuxanenë, ponë pejamatabëcuene xanepanaeya-exanaenë, papecajamatabëcuene xanepanaeya-exanaenexa, xaniawaetsia panenajuajinawanapanaenexa, caematacabi canacujitsia, daxitacuene jawaliaata. Pacatojitsipatsinua wajatuxanenë papecajajawaponaponabiabinexa.

¹⁷ Xanë Pablonë, tacobeta pacatoyaquinatsi mapaliwaisiyoje patacajamatabënjajinaexae. Pa-itanecuenia yaquinabiabajë daxita tayaquinaebaxutonëta, bajarapa-itanecuenia pacatoyaquinatsi mapaliwaisiyoje, paneyapëtaenexa xanë patacato-itorobicuene mapabaxutoje. ¹⁸ Pacatojitsipatsi Dioso, wajatuxanenë Jesucristobeje, asiwaya papecayawenonabiabinexabeje.

f 3:11 *cuene-enaeyababiaba*: Bajarapitsicuene pexainaewi jinawanapa Jesús pijajiwituatujëta, pamonaecuenecaranabiabiaba itsajiwi penacuenebiyaniwa xua tsicarucatsi picani pexanaenexa. Baitsi, apopenacuenebixae, cuenesajinabiaba. Nexata, siwaxainabiaba penacuenebiwiminexa. Pablo cuene-itawëta bajarapitsicuene pexanaeyaniwa, tsipaji pecuenecaranatsijawata, to-ayapëbejtsi penacuenebinë xaniawaetsia pewetsinexa pijamonae.

1 Timoteo

Mapabaxutoje Apóstolnë Pablo copiaya toyaquina Timoteojawabelia

Pablo pebajacobiliwaisi Timoteojawabelia

1 ¹ Xanë raja Pablonë Jesucristo pija-apóstol-nënë, Dioso wajanacacapa-nepaenë, wajatuxanenë Jesucristo-ata, pejitsipaecuenia tane-itorobixae pijacuenie tatonacuenebinxexa. Ponë wajënae-ewetawanapatsi icatsia pepat-sijawanexatsica mapanacuayabetsicaje. ² Timoteo, bepepotaxënatomë tacataenë, xanë Pablonë, catoyaquinatsi mapabaxutoje xamë-ata nejume-xaniataexae Jesucristo peliwaishi, tacatsipaebijamatabëcuene. Catojitsipatsi waxa Dioso, wajatuxanenë Jesucristobeje, pecajamatabëcuenewënëtsinexa peca-itaxutotsoniataejamatabëcuene peca-asiwajamatabëcuene, pecab arajamatabëxanepanaejamatabëcuene-ata, jamatabëcuenexanepanaeya neponaponaenexa.

**Pablo itoroba Timoteo pejume-itawetsinexa pamona
bepepexaniajailiwaishi itajara petsipaebaponaewi**

³ Pamatacabi baja ponajë Macedonia nacuyabelia, capuenetatsi nepo-naponaenexa Éfeso tomarata, tsipaji bajarajota itsamonae tsipaebawanapa saicayacuenia Dioso pejumeliwaisiwecua. Nexata, ca-itorobatsi nejume-itawetsinexa bajarapamona, matawëjëa baja petsipaebaponaeyaniwa bajarapanajumetsënëtsiliwaishi. ⁴ Ca-itorobatsinua necuene-itawetsinexa penamuxuna-ewetsiyaniwa^a perujuwënëxi yabara itsa cuaicuajai, judíowi pijasalinaiwimi pewënëxi, perujuliwaisiximi-ata, tsipaji bajarapaliwaisixi ajumematamobi cajena peyabaracuaicuajaijawa. Aponacajamatabëcueneya-wenonaewa itaxutuajamatejemajawanexa Diosojawabelia. Biji rajane, bajarapaliwaisianë pejamatabëcueneta jiwi najume-anaenotabiaba.

⁵ Bajaraxuata, ca-itorobatsi necujarubinexa, daxita Jesús pija-jiwi pejamatabë-ëthëtojawawetsina xaniawaetsia namata-enetsia

a 1:4 *penamuxuna-ewetsiyaniwa*: Taema Tit. 3:9 Wowaijumeta canacueneba «fábulas-jume». Bajarapajume nacayapëtaeya-exana apopexaniajailiwaishi yabara. Nexata, nacayapëtaeya-exana pacuenia Jesús pijajiwi apobenamuxuna-ewetsi paliwaishi Judíowi pijasalinaiwimi mataropotsia matajërëata Dioso peliwaishijawabelia, itsa jume, wajawënajijiwi pejucaeliwaisianë-ata. Bajarapacuenia pijinia apotoxanepanaetsi penamuxuna-ewetsinexa itsamonae pewënëjoneya-exanaeliwaishi itsamonae ayajamatabëcuene pexainacuenie Dioso pitabarata.

pena-asiwanexa. Bajarapa-asiwajamatabëcuene pitsapa pamonaë baja Dioso wecua-ajibia-exanatsi pijaneconi, pebarajamatabëcuenexanepa-naewitsi, pexaniaajiamatabëcueneta pesiwanajamatabëcuenecopabiwi Diosojawabelia. ⁶Bajarapamonaë pexaniaajiliwaisiwecua jamatabëcuenemuxufetabiaba. Jamatabëcuene-enaeyababiabanua piamatamobiliwaisianë pecuaicuaijaisiabinexa. ⁷Bajarapamonaë natane bitso bepeya-pëtaewi itajara Dioso penajumecopatsiliwaisi Moisés-pijinëta. Asaëyata cujarubabiabi-ata, itsiata xaniawaetsia apojumeyapëtaë xua yabara cujaruba, pajamatabëcueneliwaisi-ata xaina bajarapaliwaisi.

⁸Waxaitsi baja cajena yapëtanetsi pexanepanaecueene paliwaisi Dioso najumecopata Moisés-pijinëta, itsa canacuenebatsi xaniawaetsia Dioso pejitsipaecuenia. ⁹Dioso aponajumecopatsi bajarapaliwaisi, penaneconitsia-exanaenexa pamonaë Dioso aneconijibia petaewi, pesiwanajamatabëcuenecopabiwi Jesucristojawabelia. Biji rajane, tonajumecopata penaneconitsia-exanaenexa pamonaë apocejumecowënëtsiwi, apoceyayataewi itsacuenewayo-ata Dioso pijacueene, pamonaë najamatabëcuenebijiana Dioso pijacuenewecua, pamonaë-ata jiwibewi, paxa-ata, pena-ata, pebewi. ¹⁰Tonajumecopatanua penaneconitsia-exanaenexa pamonaë pewitota pibisiacueene exanawanapa nacojibinejewa, pamonaë-ata penacojibiwi nawecua-exanawanapa pibisiacueene pewitota, pamonaë-ata nacaewënapetiriwi, nacaewënapetiriwi pewitota pibisiacueene naexana. Tonajumecopatanua penaneconitsia-exanaenexa pamonaë jiwi petaicaewi pematamowajëcaenexa palata, pamonaë-ata itsamonae yabara najumetsë-nëtsiaya baracuaicuajiai tsabiabi bepexaniajaicuenia itajara. Baitsi, bajarapaliwaisi tonajumecopata Moisés-pijinëta, penaneconitsia-exanaenexa Dioso peliwaisiwecua aitothia pexanawanapaewi. ¹¹Bajarapapexania-liwaisi Cristo yabara, Dioso, pexaniajamatabëcuenenë, netocopata jiwi tatsipaebaponaenexa.

Pablo pexaniajamatabëcuene rajuta Jesucristojawabelia

¹²Pexaniajamatabëcuene rajutajë wajatuxanenë Jesucristojawabelia, tsipaji caejamatabëcuene netoxaina. Nexata, nerajuta pesaë xaniawaetsia tatonacuenebinexa. ¹³Copiata abaxë itsa aposiwanajamatabëcuenecopatsinë Jesucristojawabelia, pibisiacuenia tabaracuaicuajainëmi tsabiabi. Jesucristo pijajiwi tobarajinabiabajë tabejiobia-exanaenexa. Pibisiacuenia tobijataeyabiabajë. Jesucristo itsiata nebejiobiatane bajarapacuenia ta-exanabiabinë-ata, tsipaji jamatabëcuenenawëxaniabiaya bajarapacuenie exanabiabajë. Aponacueneyapëtaenë xua exanaponajë, tsipaji abaxë apojumexaniataenë Jesucristo peliwaisi. ¹⁴Itsiata baitsi jane, wajatuxanenë Jesucristo pinijicuenia nitaxutotsoniatane. Nejamatabëcuenecaëjëpaeya-exana tasiwanajamatabëcuenecopatsinexa bajaraponëjawabelia. Nejamatabëcuenecaëjëpaeya-exananua pijajiwitonëxaenë ta-asiwanexa itsamonae-ata. Bajaraxuata, pexaniajamatabëcuene rajutabiabajë Jesucristojawabelia.

¹⁵Paliwaisi ajena pacatsipaebianatsi, pexaniajiliwaisi cajena. Nexata, daxitajiwi xaniawaetsia bajarapaliwaisi bejumexaniatane: «Jesucristo baja cajena patsica mapanacuayabetsicaje pecapanepaenexa pibisiacueene

pexanaewimi, Dioso penaneconitsia-exanaejawaminexa», pejailiwaissi bejumexaniatane. Xanë baja cajena, pibisiacuene pexanawanapaewi-tuatujäta bitso pibisiacuene ta-exanaenëmi daxitajiwi matatoxenetsia. ¹⁶ Bajarapacuenia tacuene-itsinëmi-ata, itsiata tanebejiobiataexae, Jesucristo necapanepa baja, bitso pibisiacuene ta-exanaponaponaenë-ata daxitajiwiwecua, penajamatabëcuene-itajëtsinexa bitso tanesiwa-ajam atabëcuenesaëtsaponaponaajawa. Bajarapacuenia neto-exana, daxita pibisiacuene pexanawanapaewi peyapëtaenexa tanecuenetaejawata, bajarapamonae-ata Dioso pecapanaepejawanexatsi itsa siwanajamatabëcuenecopaba Jesucristojawabelia, bajarapacuenia perajutsinexatsi matababi apowerewerecaajawa. ¹⁷ Bajaraxuata, nacatoxanepana pexaniacuenia wajawënëxaniatsijawa caenë pepoDioso, Ponë daxitanacuanë-pijiwi peyanacua-ewetsinë daxitamatabacijawabelia. Wënëxaniatsianatsi Dioso, Ponë piasaëtsaponaponaenë daxitamatabacijawabelia, Ponë apowajataecapanepaenë, Ponë daxitacuene peyapëtaenë, Ponë bitso ayaijamatabëcuenenë, Ponë bitso ayaicuene pexanaenë-ata. Bajaraxuanë yabara Dioso bewënëxaniataponatsi daxitamatabacijawabelianexa. Bajara-itsi tsane.

¹⁸ Timoteo, betaxënatomë tacataenë, bajarapacuenia ca-itorobatsi nexanaenexa, tsipaji bajaraxua yabara bajayata baja cajena itsamonae Dioso pejamatabëcueneta tajëwelia cawajunupaeba ne-exanaejawanexa. ^b ¡Nexata, Dioso asaëyata tocanacuenebaponare mapaliwaisije, jamatabëcuenefae-faenaenewamë cato-ayapëbeje-ata! ¹⁹ ¡Ca-asaëmëre nitaxutuajamatejemajawa Dioso! ¡Najamatabëcuene-ewere xaniawaetsia nenajamatabëcuenebijianaeyaniwa Diosowecua! Itsamonae baja yapëtae-ata pacuenia Dioso jamatabëcuene-itorobatsi, apopexanaexae najamatabëcuenebijiana. Nexata, nawecucopaba pitaxutuajamatejemajawa Dioso. ²⁰ Bajarapamonaeyajuwënënebeje, Himeneo, Alejandrebeje, Dioso pibisiacuenia baracuaicuaijabeje tsabiabi. Nexata, xanë bajaraponëbeje capitsapajë Jesús pijajiwiwecua, penajoneyabiabijawamibeje. Bajarapacuenia to-exanajëbeje, penatoyapëtaenexabeje apopexanepanaajawa Dioso pibisiacuenia pebaracuaicuaijajawabeje. Bajaraxuata, xanë copatajëbeje dowathijawabelia, xua jitsipa pexanaenexatsibeje.

**Pablo yapëtaeya-exana xua yabara Jesús pijajiwi
betowajëta itsamonae Diosojawabelia**

2 ¹ Timoteo, daxitacuenewecua copiaya ca-itorobatsi nitorobinexa Jesús pijajiwi petowajëcabiabinexa daxitajiwi Diosojawabelia. Bewajëtapona peyawenonaenexatsi. Pexaniajamatabëcuene berajutaponanua bajaraPonëjawabelia daxita jiwi yabara. ² Bajarapacuenia Diosojawabelia betowajëtaPONATSINUA daxita wajanacayanacua-ewetsiwi, pamona-ata peyajawanacuenebiwi, peyawenonaenexatsi, xaniawaetsia wajanacayanacua-ewetsinexa. Nexata, peyawenonaecueniatsi itsa nacayanacua-eweta, jamatabëcuenexanepanaeya, aliwaisijibianua, najuajinawanapaenatsi. Nexata, liwaisi natsixainaenejewatsi Dioso

pejitsipaecuenia exanawanapaenatsi epexaniacuene. ³ Bajarapacuenia wajatowajëtsijawa itsamonaë yabara Diosojawabelia, bitso xanepana. Dioso, wajanacacapanepaenë, nacasiwajamatabëcuenebarëya. ⁴ Bajara-Ponë jamatabëcapanepa daxitajiwi pijaneconiwehua. Tojitsipana daxitajiwi xaniawaetsia peyapëtaenexa pexaniajailiwaissi, Jesucristo peliwaissi. ⁵ Bajarapapexaniajailiwaissi pejamatabëcueneta, jiwi yapëtaena caenë Dioso peponaponaejawa. Yapëtaenanua, daxitajiwi petocuaicuaijainë-nexa Diosojawabelia, caenë Jesucristo, jiwiyajuwënënë, ⁶ tsipaji bajara-Ponë nacaeweta pebeyaxuabinxatsi, pesiwatëpaejawata daxitajiwi pijaneconimi petomatamotsinexa. Bajarapacuenia Jesucristo exana Dioso pecaëjëtsimatacabita, jiwi peyapëtaenexa Dioso pejitsipaewata daxitajiwi pecapanepaenexa. ⁷ Bajarapapexaniajailiwaissi Dioso nitoroba tatsipae-binexa apojudfowijawabelia, bajarapamonaë-ata pejumexaniataenexa bajarapaliwaissi, pesiwanajamatabëcueneocopabinexa Diosojawabelia. ¡Xaniajanë cajena! Aponajumetsënëtsinë Dioso tane-itorobijawa yabara apojudfowijawabelia.

⁸ Bajaraxuata, pacatojitsipatsi panenacaetuatabiabitaxunaenëjawa, pebiijiwi pewajëtsijawata Diosojawabelia, nacobeyotsiaya bewajëta, ^c pamonaë baja Dioso pitabarata aneconihibia jinawanapa. Bewajëta anaepanaenejewa, jume-anaenotsinejewanua itsajiwiyojawabelia. ⁹ Jitsipajë pijinia petiriawi xanepanaeya penaxatabawanapaenexa. Apobenasiwabëjai penamata-itabëtsinexa pexaniacuena penamata-tiatsijawata, penamata-itabëtsinexanua oronanitota pexanaejawanëta, penamatamotsiwiria ibotoxita, penaxatabinexanua bitso penamatamotsinaxatabijawanë, pexaniawacuenia petaenexatsi. ¹⁰ Biji rajane, pexaniawacuenia petaenexatsi, besiwabëjai penacuene-itabëtsinexa pexaniacuenejawanë pexanaejawata, pacuenia tsicarucatsi pexanawanapaenexa papetiriawi Dioso yayiatane. ¹¹ Petiriawi benacueneocuparuba ajumehibia penamuxuna-ewetenaewata Dioso peliwaissi Jesús pijajiwi penacatuatsijawata. Bajarapacuenia be-exana penajamatabëcuene-itajëtsinexa peyayataewata Dioso jumeliwaissipaebinë. ¹² Petiriawi apotocopatsinë ayaiBITSaëto penacatuatsiwituatujëta pecujarubinexa. Apotocopatsinëna be-ayaijamatabëcuenewi nataeya pitorobabiabinexa pebiijiwijawabelia. Biji rajane, petiriawi beweliamatabëcuenewi nataeya ajumehibia benamuxuna-ewetena. ¹³ Bajarapacuenia itorobajë, tsipaji copiya Dioso exana pebi. Bajaraponë pewënë Adán. Bajaraxuacujinaë, cotocaewi exana petiriwa. Bajarapowa pewënë Eva. ¹⁴ Adán cajena picani dowathi apoyamaxë-itojorobitsi. ^d Biji rajane, copiya petiriwa dowathi yamaxë-itojorobatsi. Nexata, copiya pibisiacuene

c 2:8 *nacobeyotsiaya bewajëta*: Nacobeyotsiaya pewajëtsijawa Diosojawabelia anijamatabëcuenebeje xaina: Najamatabëcuene-itajëta penatoyapëtaejawa itsacueneneconi apopexainaejawa Dioso pitabarata, xua yabara naneconitsia-exanaejitsiatsi. Najamatabëcuene-itajëtanua pejamatabëcuene-ewetsijawa Dioso peyawenonaenexatsi pacuenia wajëta bajara-Ponëjawabelia. Nucaeya itsa wajëta Diosojawabelia, najamatabëcuene-itajëta peyayataejawa Dioso. Bajara-pacuenia exana bajayata Jesús pijajiwi. **d 2:14** *apoyamaxë-itojorobitsi*: Adán apoyamaxë-itojorobitsi dowathi. Biji rajane, pijacuata jitsipaeya Dioso apojumecowënëtsi, yapëtae-ata pibisiacuene pexanaejawanexa.

exana. ¹⁵ Itsiata, petiriawi aponaxuabi tsane^e daxita pecujarubicuene. Tsiteca Dioso tocopatatsi pecujarubabiabinexa pexijawabelia, pamonaexainaponaejitsia, pewitsatsinexa Dioso pejitsipaecuenia. Toxanepanatsinua pitaxutuajamatejematsawanapaenexa Dioso jawabelia, piasiwatsawanapaenexa itsamonaexa, Dioso-ata, xaniawaetsia pejinawanapaenexa nacuene-ewetsiaya Dioso pejitsipaecuenia.

Pitsijamatabëcuene pebijwi bexainawanapa ancianowinexa

3 ¹ Mapaliwaisije pexaniajajawa cajena. Ponë jitsipa penacuenebijawa ancianonëcuenia, peto-ewetsinexa Jesús pijajiwi, pexanianacuenebijawa natojitsipa. ² Ancianonënexa,^f xanepana ponë apoxinae paliwaisi yabara jiwi neconitsijitsiatsi. Caewayo pepitsinë. Penajamatabëcuenerewia-binë. Xaniawaetsia penajamatabëxainaenë. Peyaiyataenëtsi. Xaniawaetsia pecopiapitabiabinë pijaboyaberena pesiwaxainaewitsi. Pecaëjəpaenëtsinua xaniawaetsia jiwi pecujarubinexa Dioso pejumeliwaisi. ³ Xanepananua ponë apocejitsipaenë piapaejawa pīataneranë pia-itajibinexa. Apocejitsipaenë pebejawa pewənajiwi. Apocejitsipaenënuu itsajiwi-ata yamaxë-itojorobiaya pewecuanacobetoxotsinexa palata. Biji rajane, ancianonënexa xanepana ponë pexaniajamatabëcuenenë. Anaeya itsajiwi-ata apocejumepitsinë, pebarənajume-anaenotsinexa. Apopenajamatabëxainaenë bitso pexainaenexa-ata pexinaejawa. ⁴ Xaniawaetsia pewetsinë pexi, pijawa-ata. Pexi pejumecowënëtsinëtsi. Pejume yayiataenëtsinua. ⁵ Baitsi, itsa apocaëjəpaetsi xaniawaetsia pewetsinexa pexi, pijawa-ata, nexata apocaëjəpae tsipaetsi pewetsinexa Jesús pijajiwi. ⁶ Apoxanepanae ancianonënexa ponë abaxë pejanasiwanajamatabëcuene copatsinë Jesucristojawabelia, tsipaji belia be-ayaijamatabëcuenenë nataejitsipa. Nexata, naneconitsipa Dioso jawabelia, pacuenia bajayata dowathi naneconita, be-ayaijamatabëcuenenë penataexae Diosowecua. ⁷ Xanepana ponë pexania-cuenia pebaracuaicuaijinëtsi, peyayataenëtsinua pamonaexa Jesús peliwaisi

e 2:15 aponaxuabi tsane: Mapaversículoje bitso ayapëbeje pajamatabëcuene yabara jitsipa peyapëtaeya-exanaejawa. Bajaraxuata, Dioso peliwaisi penacujarubiwi caecanaëjətsijamatabëcuene apoxinae xua yabara petiriawi aponaxuabi tsane pexi pexinaejamatabëcuene.

1) Itsamonaexa canaëjəta pacuenia Pablo petiriawi itawetsi-ata pecujarubiyaniwa ayaibit-saëtutuajəta Jesús pijajiwi, penamatacatorobiwi penaexanaeyaniwanua Jesús pijajiwi penacatuatsijawata, itsiata apowecuanaxuabi tsane bajarapacuenebeje, tsipaji baja cajena bajarapacuenia tsicarucatsi pexanaejawa pexijawabelia. Nexata bajarapacuenia cujarubijitsia, namatacatorobijitsianua, pamonaexa itsamatacabijawabelia naexanaejitsia Dioso peliwaisi pepaebiwi, penamatacatorobiwinexanua Jesús pijajiwiutuajəta. **2)** Itsamonaexa pijinia canaëjəta petiriawi apocejamaxë-itojorobijawanexatsi pacuenia Eva yamaxë-itojorobatsi. **3)** Itsamonaexa pijinia canaëjəta petiriawi, pebijwi-ata pewecupanepaejawanexa Dioso penaneconitsiaexanaejawaminexatsi, Jesús penaexanaexae petiriwajawata, jiwi pecapanepanaenënexa.

f 3:2 Ancianonënexa: Bajarapajume griegojumeta «episkopos», pejaijume. Jiwijumeta pijinia «pemataponaenë penacuenebijawata», itsa jume, «pewetsinë», pejaijume. Bajayata judfowitua-tuajəta, pebi itsa xaina 35-50 pawai-beje, itsa pexaniacanaëjətsinë, pexanaliwaisi pexinaenënuu, nexata pijajiwi itapetatsi pewetsinënexatsi. Bajarapapitapetsiwi wënërubiaba ancianowi (judfowi pija-ancianowi Mt 26:3). Nexata, Jesús pijajiwicuene petaxuxuabixae judfowitua-tuajəta, bajarapamonaexa wënërubiaba pewetsiwitsi ancianowi. Itsiata, Pablo nacayapëtaeya-exana pacuenia apobe-itapetsitsi itsanë ancianonënexa saya pijawainë yabara. Be-itapetsi ponë pejamatabëcuenenaweretsinë Dioso pijacuenejawalia. Orijibia Efe. 4:11-12-jawata nacayapëtaeya-exana pitsipewetsicuene bexaina ancianowi.

pejume-aebiwi. Bajarapitsinē xanepana, tsipaji ancianonē pexanaecujinaetsi, jiwi ya-itacania pibisiacuenia pebaracuaicuaijaniwatsi, dowathi-ata peyamaxē-itojorobiyaniwatsi.

Diáconowinexa pitsijamatabēcuene bexainawanapa

⁸Diáconowinexa pijinia, xanepana pitapetsinexa pamonaē penajamatabēcuenereuiabiwi, pexaniajaitsabiabiwi, apopiapaewinua pīataneranē pia-itajibinexa. Apopejitsipaewi itsajiwi-ata yamaxē-itojorobiaya pewecuanacobetoxotsinexa palata. ⁹Xanepana pamonaē caejamatabēcuene xaina pejumexaniataenexa patacatsipaebiliwaisi, Dioso pataneyapētaeya-exanaecuenia, aneconijibia pejinawanapaenexa Dioso pitabarata. ¹⁰Pitapetsiwajēnaeya itsanē diácononēnexa, copiya becuenecanaējēta pexanaecuenemi,^g pecueneyapētaenexa pecueneceajēpaejawatsi pewetsijawa xua ewetsia-exanatsi. Xaniawaetsianua itsa ponapona Dioso pitabarata. Nexata, xaniawaetsia itsa ewetsicapanepa, xanepana jane baja wajawēnērubinexa diácononē, penacuenebinexa xua diáconowi banacueneba.

¹¹Diáconowi pijinia pijawajiwi^h xanepana peyaiataewitsi, penajamatabēcuenereuiabiwi, apopebaracuaicuaijainua najumetsēnētsiaya itsamonae. Daxitaxua exana, xaniawaetsia be-exanabiaba, itsajamatabēcuene xainaenejewa.

¹²Diácononēnexa, xanepana ponē caewa pepitsicujinae pebarēponaponaenē. Pecaējēpaenētsinua xaniawaetsia pewetsinexa pexi, pijawa yajawa. ¹³Bajaraponē xaniawaetsia itsa eweta penacuenebijawa, nexata diácononē xaniawaetsia wēnēliwaisiayataenatsi daxitajiwi. Ajume-urajibianua jiwijawabelia nawajunupaebiana Jesucristojawabelia pesiwanajamatabēcuenecopatsijawa yabara.

Pablo yapētaeya-exana Timoteojawabelia pacuenia

Jesús pijajiwi be-exanawanapa

¹⁴Timoteo, bepjiacuenia jamatabēponajē xamējawabelia, tacataenexa. Itsiata, tawajēnaeyabelia daxita mapacuene yabaraje catoyaquinatsi.

¹⁵Itsa abaxē cuenenajematsianajē tapatsijawa xamējawabelia, catoyaquinatsi tacayapētaeya-exanaenexa pacuenia Jesús peliwaisi pejume-xaniataewi namata-enetsia nacuene-ewetawanapaejitsia Dioso pexixae. Jesús pijajiwi raja Dioso piasaēnē pijajiwi bitsaēto. Bajarapamonae raja

g 3:10 *pexanaecuenemi*: Daxita peponaponaē-epato pesiwanajamatabēcuenecopatsijawawelicujinae Jesucristojawabelia, jiwi becuenecanaējēta bajaraponē, xaniawaetsia pecueneyapētaenexa itsa najamatabēcuene-itajēta pexinaejawa diáconojamatabēcuene. Pitapetsiapaebicujinae pijinia, itsa-epato becuene-ējēta, pecueneyapētaenexa xaniawaetsia itsa ewetsicapanepa xua ewetsia-exanatsi. Bajaraxuacujinae, matapania jane baja, wēnērubiana diácononē. Bajarapacuenia Jesús pijajiwi be-exana, pitapetsiwajēnaeya itsanē ancianonēnexa, itsajiwi-ata diáconowinexa, Jesús peliwaisi pepaebiwineja-ata apopeyapētaewijawabelia. **h 3:11** *pijawajiwi*: Griegojumeta canacueneba «gunē», pejaijume. Bajarapajume mapajamatabēcuenebeje xaina: «pebi pijajawa» itsa jume, «petiriwa», pejaijume. Bajaraxuata, itsamonae canaējēta apo-ēdiácononē pijawa yabara jumaiitsi Mapaversículoje. Nacajunua petiriwa-ata diáconisawanexa. Nexata, mapaversículo jucaejitsipa mapacueniaje: «*Petiriawi pijinia, diáconisawanexa xanepana peyaiataewitsi, penajamatabēcuenereuiabiwa, apopebaracuaicuaijainua najumetsēnētsiaya itsamonae*», pejaicuenia. Taema Rom. 16:1. Nexata, itsa diácononē pijawa, itsa jume, diáconisawa, caecuene bexaina.

peliweisi-ewetsiwi, itsamonae piajibia-exanaeyaniwa pexaniajailiwaishi pejumexaniataejawa. Apotocopatsinua itsajiwi-ata pexaniajailiwaishiwehua saicayaliwaishi pepaebiyaniwa. ¹⁶ Xaniajai, paliwaishi Dioso nacayapëtaeya-exana maparucaje, bitso pexaniajailiwaishi cajena itsaliwaishianëwehua, tsipaji nacayapëtaeya-exana pacuenia jinawanapaejitsiatsi Dioso pejisipacuenia. Bajarapaliwaishi Dioso apoyapëtaeya-exanae bajayatami itsajiwijawabelia. Bajarapapexaniajailiwaishi Cristo yabara nacayapëtaeya-exana mapacueniaje:

BajaraPonë naexana jiwitonëcuenia. Espíritu Santo yapëtaeya-exana daxitajiwi Cristo planeconijibinëcuenia. Ángelewi-ata cuenetanetsi. Cristo pijajiwi wënëliwaishipaebaponatsi daxitanacuanëpijiwajawa. Nexata, daxitanacuanëjawa jiwi siwanajamatabëcuenecopabapona Cristojawabelia. Dioso pijanacuatsia-ata Cristo copiapitatsi ayaijamatabëcuenenëcuenia.

**Pacuenia cujarubijitsia itsamonae bepexaniajailiwaishi
itajara pepaebiwiwajuwënëwi**

4 ¹ Espíritu Santo baja cajena tajëwelia nacayapëtaeya-exana pacuenia bexëjawabelia itsamonae nawecuacopabijitsia pexaniajailiwaishi, pejumexaniataenexa saicayaliwaishi Dioso peliwaishiwecua. Nexata, namuxuna-ewetsiana dowathiwi¹ peyapëtaeya-exanaeliwaishianëtsi, pejumexaniataenexa saya penajumetsënëtsiliwaishianë. ² Bajarapapenajumetsënëtsiliwaishianë capitsapa pamona bepexaniajailiwaishi itajara pepaebiwi. Bajarapamona raja penajumetsënëtsiwi, bepejamatabëcuenetëpawanapaewinua Dioso pitabarata. Nexata, apo-acuene-ura cajena tsane pepaebicuene. ³ Nexata, itawetsiana penacojiobicuene. Itawetsiananua itsacuenëjawanë jiwi pexaeyaniwa, xuanë pican Dioso nacato-exana wajaxaenexa. Waxaitsi itsiata, pexaniajailiwaishi wajaxumexaniataewi, yapëtanetsi Dioso wajanacarajutsijawa wajaxaejawanënexa. Bajaraxuata, pexaniacuene rajutabiabatsi bajaraPonëjawabelia wajaxaejawa yabara. ⁴ Daxitacuene, xua Dioso exana wajaxaejawanexa, pexaniacuene bitso. Nexata, apobiatsohitsi itsacuenëjawayo-ata papexaejawa Dioso nacarajuta. Biji rajane, itsa pitatsi bajaraxua, «Xanepana rabaja», bejai tsabiabitsi Diosojawabelia, wajanacarajutsixae wajaxaejawanexa. ⁵ Bajara-pacuenia Dioso pexanaejawa yabara: «tsitapexaniacueneitsi»,¹ pejaixae pejumeliwaishibaxutota, pexaniajamatabëcuene wajarajutsixaenua waxaejawa yabara bajaraPonëjawabelia, ajibi xua yabara bewajanaxuirabiwicuenia nacopatsijitsiatsi wajaxaejawa pejamatabëcuene.

**Pablo muxujioba Timoteo xaniawaetsia peponaponaenexa,
xaniawaetsia pecujarubinexanua Dioso pejumeliwaishi**

⁶ Xaniawaetsia Jesucristo netonacuenebinë tsane, Jesús pijajiwijawabelia itsa tsipaebianame pexaniajailiwaishi, bajarapamona pejumexaniataeyaniwa

i 4:1 *dowathiwi*: Bajarapamona raja apowajataecapanepaewi waja-itaxutota, itsajamatabëcuene pexainaewi Diosowecua. Bajarapamona wënërubatsi: «demonio», wowaijumeta. j 4:5 «tsitapexaniacueneitsi»: Taema Gén. 1:9-23.

penajumetsënëtsiliwaisi petsipaebaponaewi. Najamatabëcuene-itajëtsianamenua xamë xaniawaetsia Dioso peliweisita nenajamatabëcuene-abatsijawa, neca-asaëjawanua nejumexaniataeliwaisi. ⁷¡Bjaraxuata, nawe-cuatsare pamona mapanacuapijiliwaisianëje, natsiquejemaliwaisianë-ata pecuaicuajajitsabiabiwi! ¡Biji rajane, daxita nesaëta nacujarubare, Jesús pijajiwitonëmëcuenia xaniawaetsia neponaponaenexa Dioso pejitsipae-cuenia! ⁸Xaniajai, mapanacuataje waja-aperabësaënexa nacatoxanepana wajacujinaejinaejawa wajajumalixanepanaenexa. Itsiata baitsi jane, daxita-cuenewecua xanepana wajajinawanapaenexa daxita wajasäta Dioso pejitsipae-cuenia. Bjarapacueni nacajamatabëcueneyawenona wajajinawanapae-pato mapanacuataje, wajapatsicujinae-ata Dioso pijanacuayabetsia, wajanamatacotsicujinae wajatëpaejawawecua. ⁹Bjarapaliwaisi pexaniajaili-waisi cajena. Nexata, bjarapaliwaisi daxitajiwi bejumexaniatane. ¹⁰Bjaraxuata, Dioso asaëyata tonacuenebaponaponatsibeje nacato-ayapëbeje-ata, tsipaji itaxutuajamatejemaya copia-ewetaponaponatsibeje, piasaënë Dioso wajanacato-exanaenexabeje najumecapanepaeya pejumaitsicuenia. Xaniajai, Dioso pecapanepaenë jiwi pijaneconiwe-cua, daxita pamona pepocuene siwanajamatabëcuenecopaba bajaraPonëjawabelia.

¹¹¡Bjarapaliwaisi cujarubaponare! Itorobaponarenua bajara-pacuenia pexanaenexa. ¹²¡Pewëjëatoxaemë, pëtsa nacopatame itsajiwi-ata beya-itacania pecajumaitsi-jawa nexanaecueni yabara! ¡Biji rajane, xaniawaetsia tsitanacuene-itajëtaponaponare, Dioso pijacuene necuaicuajajawata, nexanaecueni-jawata, itsajiwi niasiwajawata, nitaxutuajamatejemajawata Dioso pecayawenonaenexa, ëpexaniacuene ne-exanaponaejawatanua! Bjarapacuenia itsa tsita-exanaponaenapenane, nexata Jesús pijajiwi pecacuenetaejawata cacue-nejëpaeya jinawanapaena.

¹³¡Xanë tapatsiwajënaelia Jesús pijajiwi penacaetuatsijawata, Dioso pejumeliwaisibaxuto tsimuxulebabiabare! ¡Ajamatabëcuenesaëya-exanaponare! ¡Cujarubaponarenua! ¹⁴¡Pëtsa bijiyataneme xua Dioso cajamatabëcaëjëpaeya-exana Espíritu Santo pejamatabëcueneta! Bjaraxua yabara catowajunupaeba ancianowi, pamatacabi catsimatanacobe-buata pecatowajëtsijawata Dioso-jawabelia, pecayawenonaenexa netonacuenebaponaenajawata. ¹⁵¡Daxita nesaëta nacueni-enaeyabare pacueni-jawanë catsicarua nexanaenexa! Nexata, daxitajiwi cayapëtaena xaniawaetsia nenacuenebijawa pewajënaeyabelia pecatoxanepanaponaejawa. ¹⁶¡Nayajiwi-taeyaponaponare pibisiacuene-wecua, netsipaebiliwaisi-ata yabara, saicaya-cuenia nepaebiyaniwa Dioso peliweisiwecua! ¡Bjarapacuenia nexanaejawa casaëmëre tsaponapona, tsipaji bjarapaliwaisita Dioso cacapanepaena. Capanepaenatsinua pamona-ata xaniawaetsia canamuxuna-ewetsiana netsipaebiliwaisi!

Pablo muxujioba Timoteo pacuenia caebitsaëto canacujitsia liwaisi yawenonaejitsia, Jesús pijajiwituatujëta

5 ¹¡Pëtsa ajumesaëya cuene-itaweta pamona newajënaeyapijiwi! ¡Biji rajane, be-axacuenia xaniawaetsia yayataeya muxujiobare! ¡Necowëpijiwi pijinia, benejuyapijiwicuenia muxujiobare! ²¡Petiriawi-ata,

newajënaeyapijiwi, be-enacuenia muxujiobare! ¡Necowëpijiwaxi pijinia, benejuyapijiwaxicuenia muxujiobare, itsajamatabëcuene bëpënëa pibisia-cuene siwanajamatabëxainaenejewamë!

³ ¡Pamonajiwi pewecuatëpaewaxitsi, Jesús pijajiwiwajuwënëwaxi, yai-yataeya yawenonare, itsa apoxinae pijamonae peyawenonaenexatsi!

⁴ Itsiata baitsi jane, itsa xaina pexi, pemomoxi-ata, bajarapamonae xane-pana pewetsinexatsi. Bajarapacuenia betaxuxuaba peyawenonaecuenie pijamonaejawata, pewetsijamatabëcuenetsi juya peyawenonaenexa paxa, pena, pamo, pacue-ata. Bajarapacuenia itsa exana, bitso pexaniacuene.

Nexata, Dioso barëyataenatsi. ⁵ Powa, pamona pewecuatëpaewatsi, pepo-penamatawenonaewa, itsa apoxinae itsajiwi-ata pewetsinexatsi, nexata be-itaxutuajamatejema tsaponaponae Dioso peyawenonaenexatsi. Nawajëtabiabi Diosojawabelia matakabita, merawi-ata. ⁶ Itsiata baitsi jane, powa, pamona pewecuatëpaewatsi, penatojitsipaecuenia itsa exanaponapona penabarëyaya-exanaenexa nacuenecataitsinejewa, Dioso bajarapowa tanetsi bepejamatabëcuenetëpaewa, asaë tsaponaponae-ata. ⁷ ¡Bajarapacuenia ito-robare Jesús pijajiwi xaniawaetsia pijamonae peyawenonaenexa penamatawenonaecuenie, itsajiwi-ata pebaracuaicuaijaiyaniwatsi bajaraxua yabara!

⁸ Pajiwi, Jesús pijajiwiwajuwënëjiwi, xaniawaetsia itsa apoyawenonae pijamonae, pijabopijiwi-ata, penamatawenonaekiwi, bajarapajiwi apo-exanae Jesús peliwaissi pejumexaniataewicuenia. Biji rajane, bitso ajamatabëcuene-beje Jesús peliwaissi pejume-aebijiwi matatoxenetsia.

⁹ Petiriwa sesenta pawai-beje pexainaewa, caeto penacojiobicujinae pamonajawabelia, bajaraponë pewecuatëpaecujinaetsi, xanepana pewënëyaquin-rutsinexatsi pabaxutota wënëyaquinabiaba pamona pewecuatëpaewitsi. Nexata, daxita Jesús pijajiwi bajarapowa yawenonaena penamatawenona-ejawanë. ¹⁰ Yawenonaena saya bajarapowa, itsa cueneyapëtanetsi pexania-cuene pexanaewacuene, pexi xaniawaetsia pewitsatsiwanua. Yawenonaen-anua itsa xaniawaetsia jiwi pijabota pecopiapitsiwa, pesiwaxainaewitsi, beweliamatabëcuene nataeya peyawenonaewa itsamonae Jesús pijajiwi penamatawenonaejawata, itsamonae-ata bepejiobicuena pejinawanapae-winua. Bajarapitsicuene pexanaewaxi, toxanepanatsi Jesús pijajiwi peyawe-nonaenexa, penamatawenonaejawata.

¹¹ ¡Itsiata baitsi jane, powa abaxë sesenta pawai-beje apopexainaewa, pëtsa wënëyaquinarutame pabaxutota wënëyaquinarubabiabame pamona pewe-cuatëpaewaxitsi! Bajarapitsiwaxi, nacajone-ata picani petonacuenebawana-paenexa Dioso pijacuene, belia jitsipaejitsipa icatsia penacojiobinexa. Nexata, ëpamona pexainaewajawa pejitsipaejawanë jamatabëcuene-enaiejitsipatsi.

¹² Nexata, bajarapacuenia pijaneconi natsixainaiejitsipa Diosojawabelia, apo-pexanawanapaexae penacajonecuenia. ¹³ Pematatsënëa bajarapitsiwaxi itsa cuenesajinaejitsipa, siwaxainarutsipa itsa bonëjawa. Afaetabinua tsipae. Pematatsënëa pesiwaxainarutsijawata baracuaicuaijai tsabiabi tsipae itsa-monae. Jamatabë-itonotabiabijitsipa itsamonae. Xuaxi yabara-ata apobecuai-cuaijatsi, cuai-cuaijai tsabiabi tsipae. ¹⁴ Bajaraxuata, muxujiobajë pamona pewecuatëpaewaxitsi, powa abaxë bitso apoperujuwa. Xanepana icatsia penacojiobinexa, pexi pexainaenexa, pijabo-ata xaniawaetsia pewetsinexa. Nexata, bajarapacuenia wajanacacuene-itoyawi-ata to-acuenebitsi tsane

pebaracuaicuajaijawatsi bajarapitsiwa. ¹⁵ Bajarapacuenia jumaitsinē, tsipaji baja itsamonae pamonajiwi pewecuatēpaewitsi nawecuacopaba baja Cristo peliwaishi, juya pexanawanapaenexa dowathi pitorobicueniatsi.

¹⁶ Petiriwa,^k Jesús peliwaishi pejumexaniataewa, itsa xaina pijamonaeyaju-wēnēwaxi pamona pewecuatēpaewaxitsi,^l nexata beyawenona penamatawēnonaejawata. Bajarapapetiriawi aponamatawēnonae tsane peyawēnonaenexatsi daxita Jesús pijajiwi, tsipaji baja pijamonaewa ewetatsi. Nexata, Jesús pijajiwi caējēpaejitsiatsi peyawēnonaenexa pamona pewecuatēpaewitsi, pijamona apoxainaewi.

¹⁷ Pamona, ancianowi, xaniawaetsia ewetabiaba Jesús pijajiwi, xanepana bajarapamona pematamotsijawa peyaiyataejamatabēcuene, perajutsijawanua penacuenebimatamo, pexaniacuenia pewetsijamatabēcuene. Itsa pepocuene Dioso peliwaishi tsipaebawanapa, cujarubawanapanua, matatoxenetsia bajarapacuenia beto-exana. ¹⁸ Bajaraxua yabara Dioso pejumeliwaisibaxutota jumaitsi mapacueniaje: «¡Pabueyu canacuenebame trigoxu pecatotanabataxuabinexa, pētsa pumuxatatame trigoxu pexaeyaniwa! ¡Biji rajane, tocopare pexaenexa pecatotanabataxubijawata!», jai. Itsaliwaisita pijinia jumaitsi mapacueniaje: «Penacuenebinē bematamotatsi penacuenebijamatabēcuene», jai Dioso pejumeliwaisibaxutota. Bajaraxuata, bematamotatsi ancianowi Dioso pejamatabēcueneta bitso penacuenebiwi. ¹⁹ Pacujinae caejiwi paeba ancianonē pibisiacuene pexanaejawa yabara, pētsa jumexaniataneme! Matapania itsa catsipaebiana petaewitsi anijajiwi beje, acueyabi pajiwi beje-ata, jumexaniataeneme.

²⁰ Nexata, ancianowiyajuwēnēnē tsiteca pibisiacuene itsa exanapona-pona, caecuenia cuene-itawere daxita Jesús pijajiwi pitabarata! Itsamonae, ancianowi, itsa cacuenetane nitawetsijawa pibisiacuene pexanaewi, nexata cuenejunawiana pibisiacuene pexanaejawa. ²¹ Ca-itorobatsi Dioso, Jesucristo, Dioso penato-itapetsi-ánglewi-ata pitabarata, nexanaponaponaenexa pacuenia ca-itorobatsi. Daxita pamona ancianowi, pibisiacuene pexanaewi, najēpaeya cuene-itawetsianame. ¡Caenē-ata pētsa siwa-ajume-uramē necuene-itawetsijawa pibisiacuene pexanaejawa yabara!

²² Nitapetsiwajēnaeya ancianonēnexa, copiya cuenecanaējētsianame. ¡Pētsa itsanē-ata bepíjia tsmatanacobebuatame netowajētsinexa ancianonēnexa! Bajarapacuenia itsa exanaejitsipame, bajaraponē bepíjia pibisiacuene itsa exanaejitsipa, nexata itsamonae cataejitsipa pibisiacuene pexanaewi benejamatabēcueneyawēnonaenē. ¡Daxita pibisiacuenewecua, xaniawaetsia naewetsiaya ponaponare!

²³ Xamē raja ajamatabē-epatanemē tsabiabi. ¡Pētsa apaeyabiabame ēpitara-nae! Tsiquirivnorayo yajawa apaeyabiabianame.

²⁴ Itsamonae pibisiacuene pexanaejawa bacueneyapētanetsi. Bajaraxua yabara bananeconitsia-exanatsi daxitajiwi pepuacueneyapētaetsi. Itsamonae

k 5:16 *Petiriwa:* Efe. 5:8-jawata Pablo nacayapētaeya-exana pacuenia daxitajiwi, pebi, petiriwata tsicarucatsi pewetsijawa pijamona. Itsiata, peyapētaexae pejinawanapaejawa Éfeso tomarata, powaxi pexainaewi pamona pewecuatēpaewaxitsi pijamona tuatua jēta. Belia bajarapowa apoxinae tsipae pamona, itsa jume, pamona apopesiwanajamatabēcuene copatsinē Jesucristoja-wabelia. **l 5:16** *pamona pewecuatēpaewaxitsi:* Bajarapacuenia jumaitsi pena, pame, pacue-ata yabara.

pijinia pibisiacuenae exanae-ata, bepíjia apocueneyapëtaetsi. Matapania, bexëajawabelia xaniawaetsia wënëliwaisitanetsi. ²⁵Bajarapíjinia pacuenia, itsamonae pexaniacuenae pexanaejawa bepíjiayo daxitajiwi cueneyapëtaetsi. Itsajawata, pexaniacuenae exanae-ata, bajayajebi jiwi apocueneyapëtaetsi. Itsiata baitsi jane, bajarapamonae acuenebi nawënëmatayatsia pejinawanapaejawa. Nexata, bexëajawabelia daxitajiwi wënëliwaisitaenatsi pexaniacuenae pexanaejawa.

6 ¹Pamonae amoneya itsamonae tonacuenebawanapa, Jesús peli-waisi itsa pejumexaniataewi, yaiyataeya tonacuenebi pijatuxanenë, pesiwajamatabëcuenebarëyanexatsi. Nexata, pijatuxanenë Dioso pibisiacuenia apobaracuaicuajai tsane, paliwaisi-ata waxaitsi tsipaebaponatsi, Jesús peliwaisi. ²Pamonae amoneya tonacuenebawanapa pijatuxanenë, itsa Jesús peliwaisi pejumexaniataenë, apobecopabawanapae pejumeco-wënëtsijawa pijatuxanenë, penajuajumexaniataexae Jesús peliwaisi. Biji rajane, asaëya xaniawaetsia tonacuenebi pijatuxanenë, tsipaji raja Jesús peliwaisi pejumexaniataenë yawenonaeya tonacuenebawanapa penaewetsijawanexa. ¡Bajarapaliwaisi tsipaebaponare! Itorobarenua bajarapacuenia pexanawanapaenexa.

**Pamonae bepexaniajailiwaisi itajara pecujarubiwi
siwabëjai tsabiabi palata yabara**

³Belia, itsamatacabijawabelia pacacujarubijitsipa itsamonae apopejëpaeliwaisi wajatuxanenë Jesucristo peliwaisi, panejinawanapaenexa saicaya Dioso pejitsipaejawawecua. ⁴Bajarapacuenia pecujarubiwi, cueneyapëtanetsi be-ayaijamatabëcuenewi itajara penataewi. Itsiata, xaniawaetsia apoyapëtae xua yabara cujaruba. Bajarapamonae pecujarubiliwaisianëjawata, capitsapabiaba jiwi penajume-anaeyanotsijawa natsiquejemajawanë yabara. Apopebarënamatabëcuenejëpaexae, capitsapabiabanua jiwi pianaepanaejamatabëcuene, pecuenecaëbijamatabëcuene-ata. Nexata, Jesús pijajiwi pibisiacuenia nabijataeyabiaba. Itsamonae bijiaya cuenecanaëjëta xua yabara picani apoto-exanaetsi. ⁵Bajarapamonae piamatabëcuenebejexae, anaeya namata-enetsia najumenotabiaba. Apoyapëtaenua pexaniajailiwaisi Cristo yabara, jiwi petsipaebinexa. Bajarapacuenia tsipaebapona, ayaijawa palata pepitabiabinexa. ¡Bajarapitsiwi xamë nayajiwiitsare, necuenejëpaeyaniwa! ⁶Yapëtanetsi cajena bitso penamatamotsijawa palatawecua, wajajinawanapaejawa Dioso pejitsipacuenia, itsa siwajamatabëcuenebarëyatsi xuayowajëto Dioso nacatocopata, waja-xainanenexa mapanacuataje. ⁷Pamatacabi waxaitsi naexanatsi mapanacuataje, itsacuenejawayo-ata apocapatsitsi. Pamatacabi pijinia tëpaenatsi, apocaponae tsanetsi itsacuenejawayo-ata mapanacuapijicueneye. ⁸Bajaraxuata, itsa xainatsi wajaxaejawa, wajanaxatabijawa-ata, besiwajamatabëcuenebarëyatsi. ⁹Itsiata baitsi jane, pamonae siwanajamatabëxaina ëpexainaejawanexa, bajarapamonae dowathi jamatabëcueneçëtatsi, pecobecaëbijamatabëcueneta, pitajitsipaejamatabëcuenetanua. Nexata, pibisiacuenae exana palata pepitsinexa. Jamatabëcuenebijianatsi. Nexata, bajarapamonae Diosowecua naxuabiaya

jinawanapa. ¹⁰ Pamona bitso jitsipa palata ayaijawa pexainaejawa, tsijamatabëcuenepitsapatsi pibisiacuene pexanaenexa. Itsamona ayaijawa palata pejitsipaexae, nawecuacopaba pejumexaniataejawa Dioso pejumeliwaisi. Nexata, bajarapajamatabëcuene bëpënëa bitso yajamatabëcuenebëjai.

Pablo pecopiarutsimuxujiobiwaisi Timoteojawabelia

¹¹ Timoteo, xamë Dioso pijaji witonëmë. ¡Nawecuatsare daxita bajaraxuanë, jiwi palata pejitsipaejamatabëcuene, saicayaliwaisi nejumexaniataeyaniwanua Dioso peli waisi wecua! ¡Biji jane, ajamatabëcuenesaëmëre maxuanë nexanaenexajel! Dioso pejitsipae-cuenia neponaponaejawa, niasiwajawa Dioso, itsamona-ata, itaxutuajamatejemaya Diosojawabelia neponaponaejawa, bajayajebi niajamatabëcuenesaëtsaponaponaejawa, catocopiapatapona-ata pecato-ayapëbejawanë, beweliamatabëcuenenë nataeya neponaponaejawanua. ¹² ¡Daxita pecacuenecaranabijawanë Dioso pejitsipae-cuenia neponaponaeyaniwa, wecua-ajamatabëcuenesaëmëre, nitaxutuajamatejemawata Diosojawabelia, nepitsijawabelia matacabi apowerewerecaejawa! Pamatacabi nawajunupaebame, ayai-bitsaëtoxaneto pitabarata, nejumexaniataejawa Jesús peli waisi, Dioso cajunata pecarajutsinexa matacabi apowerewerecaejawa. ¹³ Ca-itorobatsi mapacueniaje Dioso pitabarata, Ponë piasaëjamatabëcuene perajutsinë daxitacuenejawabelia, Jesucristo pitabarata-ata, Ponë ajumejunawijibia nawajunupaeba pexaniajaili waisita Poncio Pilato pitabarata. ¹⁴ Ca-itorobatsi xaniawaetsia nejumecowënëtaponaponaenexa pacuenia catonajumecopatsi, wajatuxanenë Jesucristo icatsia pepatsimatacabitsicajawabelianexa. Nexata, itsajiwi-ata apoxainae tsane xua yabara cacuenabaracuaicuaijajitsia. ¹⁵ Cristo icatsia patsianica Dioso pecaëjëtsimatacabita. Pexaniacuena wënëxaniatsianatsi mapacueniaje:

Caenë Dioso bitso ayaijamatabëcuenenë daxitanacuanë
pewetsiwiwecua.

¹⁶ Caenë Dioso apotëpae tsane daxita matacabijawabelianexa.

BajaraPonë yacotia peponaponaenë. Bajaraxuata, itsajiwi-ata acuenebi pimoxoyotsijawa, petaejawanua Dioso.

Daxitamatacabi Dioso pijajiwi yaiyatanetsi. ¡Dioso cajena ayaijamatabëcuenenë daxitamatacabijawabelianexa! ¡Bajara-itsi tsane!

¹⁷ Pamona bitso pexainaewi mapanacuapijicueneje, muxujiobare be-ayaijamatabëcuenewi penataeyaniwa, pitaxutuajamatejemayaniwanua pijapalata pena-ewetsinexa, tsipaji saya jemata pewerewerecaejawa! ¡Biji rajane, itorobare pitaxutuajamatejemanexa Diosojawabelia, Ponë piasaëtsaponaponaenë! BajaraPonë raja wajanacarajutsinë nawitsiacuenia daxita wajanamatawenonaejawanë, wajacabarëyatsawanapaenexa. ¹⁸ Itorobarenua pexaniacuene peto-exanabiabinexa itsamonaejawabelia itsamonaejawabelia, penaexanaenexa bitso pexainaewi bajarapapexaniacuene pexanaejawanë. Toxanepanatsinua penajamatabëcueneweretsijawa perajutsinexa,

petsicobetsanaponaenexa, pexainaeyajuwënëjawanë.^m ¹⁹ Bajarapacuenia peyawenonaexae itsamona mapanacuataje, Dioso juya athëbëtatsia tobua-taponaenatsi pepacuene penamatamotsijawanë pexainaewawanexa, pepopitawajamatabëcuene pexainaenexanuaⁿ daxitamatacabijawabelia.

²⁰ ¡Timoteo, exanaponaponare daxita xua Dioso catocopata nexanaenexa! ¡Pëtsa namuxuna-ewetame pamona bitso pecuaicuaijaiwi saya mapanacuapijicuene yabaraje, natsiquejemaliwaisixi pecuaicuaijaiwi, penajumet-sënëtsiliwaisi petsipaebaponaewi-ata! Bajarapamona tsipaebapona itajara pepacuene bepexaniajailiwaisi. Itsiata, cajena apopexaniajailiwaisi. ²¹ Itsamona bajarapaliwaisi pejumexaniataexae, nawecuacopaba Dioso peliwaisi pejumexaniataejawami.

Pacatojitsipatsi Dioso asiwaya pecayawenonaejawa ayaicuenia peca-itaxut otsoniataejamatabëcuene.

m 6:18 *pexainaeyajuwënëjawanë*: Pamonae pexainaewi toxanepanatsi perajutsijawa itsajiwijawabelia pexainaeyajuwënëjawa, palata, itsa jume, pecobecowëyajuwënëjawa-ata, Dioso petsijamatabëcuenecuaicuaijaicueniatsi. Nexata, rajutsipa meta xua tsisajina iglesiabojawata, itsa jume, itsajiw mision-namuto pexanaenexa, itsa jume, Jesús pijajiwi pewetsiwinexa, itsa jume, penamatawenonaewiwinexanua. Dioso nawitsiacuenia xaina peyawenonaejawanexa itsamona Jesús pijajiwi. **n 6:19** *pexainaenexanua*: Bajarapapitawajamatabëcuene xainaejitsia, tsipaji siwanajamatabëcuenecopata Jesucristojawabelia. Bajarapacuene najamatabëcuene-itajëta, perajutaponaejawata pexainaeyajuwënëjawanë Dioso pejamatabëcueneyapëtaecueniatsi. Bajarapacuenia peyawenonaejawata itsamona bepenatsiwajënae-itorobijawa Dioso petoxaniawaetaponaenexatsi athëbëtatsia. Baitsi, matacabi apopewerewerecaejawa caejiw-ata apoxinae tsane perajutsijamatabëcuene palata penamatawenonaewijawabelia.

2 Timoteo

Mapabaxutoje Apóstolnë Pablo cotocaewi toyaquina Timoteojawabelia

Pablo pebajacobiliwaisi Timoteojawabelia

1 ¹ Xanë, Pablonë, Jesucristo nitapeta pija-apóstol-nënexanë, Dioso pejitsipaecuenia tatonacuenebinexa. Nexata, nitorobanua daxitanacuanëjawa jiwi tatsipaebinexa pacuenia Dioso najumecapanepaeya jumaitsi perajutsijawanexa matacabi apopewerewerecaejawa, pamonaesiwanajamatabëcuenecopaba Jesucristojawabelia. ² Timoteo, betaxënatomë bitso taca-asiwanë, catoyaquinatsi mapabaxutoje. Catojitsipatsi waxa Dioso, wajatuxanenë Jesucristobeje, pecajamatabëcuenewënëtsinexa peca-itaxutotsoniatæjamatabëcuene, peca-asiwajamatabëcuene, pecabarajamatabëxanepanaejamatabëcuene-ata jamatabëcuenexanepanaeya neponaponaenexa.

Pablo ajamatabëcuenesaëya-exana Timoteojawabelia, pexanaponaponaenexa Dioso pejamatabëcuenecaëjëpaeya-exanaecueniatsi

³ Tawajëtsijawata Diosojawabelia, merawi, matacabita-ata, pexaniajamatabëcuene rajutabiabajë, tacanajamatabënapsijawata xamë yabara. Dioso tonacuenebabiabajë itsajamatabëcuene xainaenejewanë, pacuenia bajayata tajasalinaiwimi-ata tonacuenebawanapa. ⁴ Najamatabënapiabiabajë tane-pëneyabaxuabijawamë pamatacabi nawecuanatsatsibeje. Bajaraxuata, bitso icatsia jitsipajë tacataejawa, tajamatabëcuenebarëyanexa. ⁵ Najamatabënapiabiabajënu xaniawaetsia nesiwanajamatabëcuenecopsijawa Jesucristojawabelia. Copiaya pajamatabëcuenexainabeje acue Loida, ena Eunicebeje, bajarapacuenia xamë-ata siwanajamatabëcuenecopatame Jesucristojawabelia.

⁶ Bajaraxuata, ca-itorobatsi icatsia nexanaponaponaenexa Dioso pecacaejëpaeya-exanaejamatabëcueneta, xua carajuta pamatacabi catsimatanacobebuatatsi Diosojawabelia tacatowajëtsijawata. ⁷ Dioso baja cajena aponacatsijamatabë-ecaeya-exanae pitejepaebijamatabëcuene pexinae-Espíritu Santo. Biji rajane, nacatsijamatabë-ecaeya-exana, pesaë pexinae-Espíritu Santo. Bajarapasaëta nacajamatabëcuenecaëjëpaeya-exana, wajaasiwanexa itsamona, wajanajamatabëcuenecataitsinexanua pibisiacuene waja-exanaeyaniwa. ⁸ Nexata, pëtsa auramë newajunupaebaponaejawa

wajatuxanenë Jesús peliwaishi! ¡Pëtsa ajume-uramë xanë yabara-ata, tapo-
naponaexae majotaje, penaneconitsiwi pejebabiabibota, Jesucristo peliwaishi
tatsipaebaponaponaexae! ¡Biji rajane, Dioso pecajamatabëcuenecaëjpaeya-
exanaesaëta, xamë-ata nacopare itsamonae pecabejiobia-exanaenexa,
Jesús peliwaishi netsipaebijamatabëcuene! ⁹Dioso baja cajena nacaca-
panepa wajanacananeconitsia-exanaejawaminexa, pibisiacuene waja-
exanaejamatabëcuene. Nacajunatanua pijajiwinoxatsi, pejitsipaecuenia
wajatojinawanapaenexa. Bajarapacuenia nacato-exana itsacuenejawa pexa-
niacuene to-exanaenejewatsi. Biji rajane, Dioso tajëwelia nacua pexanae-
wajënaeya najamatabëcuenewereta wajanaca-itaxutotsoniataenexa Jesuc-
risto pejamatabëcueneta. ¹⁰Dioso cajena nacatsitanajamatabëcuene-itajëta
wajanaca-asiwajawa, wajanacacapanepaenënexa Jesucristo pitorobijawatat-
sica. Nexata, wajanacasiwatëpaejawata, nacawecua-ajibia-exana naxuabiaya
Diosowecua wajatëpaejawaminexa.^a Orijibia, wajajumexaniataejawata Jesús
peliwaishi, xainaenatsi matakabi apopewerewerecaejawa.

¹¹Dioso cajena nitapeta apóstol-nënexanë, jiwi tatsipaebaponaenexa,
tacujarubaponaenexanua, Jesús peliwaishi. ¹²Bajarapaliwaishi jiwi tatsi-
paebaponaexae, itsamonae nebejiobia-exanapona penaneconitsiwi peje-
babiabibota. Itsiata baitsi jane, apo-auranë tanebejiobia-exanaejawa
Jesús peliwaishi yabara, tsipaji yapëtaniji pecuenecaëjpaenëtsicuene
Ponëjawabelia siwanajamatabëcuenecopatajë. Xanë Ponë necopata pexa-
niajailiwaishi jiwi tatsipaebaponaenexa, cuenecaëjpatasi penaliwaishi-
ewetsinexa, itsamonae piajibia-exanaeyaniwa. Nexata, pewajënaeya-
belia jiwi tsipaebaponaena bajarapapexaniajailiwaishi, icatsia Cristo
pëpatsimatacabitsicajawabelianexa.

¹³Timoteo, papexaniajailiwaishi yapëtaneme xanëjawata, ¡casaëmëre
tsaponaponaë bajarapacuenene ne-exanaponaponaenexa! Pacuenia baja cat-
sipaeabatsi, juya itsamonaejawabelia tsipaebabiabianame. ¡Bajarapacuenia
exanaponaponare, nitaxutuujamatejemaxae, niasiwaxaenua Cristo Jesús!
¹⁴Espíritu Santo, ponë nacatsijamatabëcuene-eca, pesaëta xaniawaetsia
ewetsianame papexaniajailiwaishi nacatocopata wajapaebinxexa. ¡Nexata,
xaniawaetsia tsipaebaponaaponare, saicayaliwaisicuenia tsipaebinejewamë
bajarapaliwaisiwecua!

¹⁵Xamë baja cajena yapëtaneme pacuenia daxita Jesús pijajijiwi, Asia
nacuata pejinawanapaewi, nexuabarëcëpeca. Bajarapamonaeyajuwënë-
beje Figelo, Hermógenes-beje. ¹⁶Bitso jitsipajë Dioso pexaniacuenia peya-
wenonaenexatsi Onesíforo, pijamonae yajawa, tsipaji bajaraponë ayaicuenia
nejamatabëcuenebabatabiaba. Bajaraponë nesiwaxainabiaba, penaneco-
nitsiwi pejebabiabibota ecae-atanë, apotaneyapijiwi-auraxae. ¹⁷Biji rajane,
bajaraponë nejaitaruta pacujinae patajopa Roma tomarata. Apocopatsi
cajena tanejaitarutsijawa, tanecaxitajarabijawabelia penaneconitsiwi peje-
babiabibota. ¹⁸Bajaraxuata, ayaicuenia jitsipajë Dioso bitso pexaniacuene
peto-exanaenexa Onesíforojawabelia, pamatacabí icatsia Cristo patsianica.
Xamë baja cajena yapëtaneme pacuenia Onesíforo xaniawaetsia nacayawe-
nonabeje, pamatacabí ponaponatsibeje Éfeso tomarata.

**Jesús pijajiwitonē be-ajamatabēsāē Dioso pijacuene
pexanaejawa, itsamonaē bejiobia-exanae-atatsi**

2 ¹¡Timoteo, xamē betaxēnatomē tacataenē, ajamatabēcuenesaēmēre Dioso pecajamatabēcueneyawenonabiabixae, Cristo Jesús pejamatabēcueneta! ²¡Nexata, paliwaisianē jumetaeyabiabame tatsipaebabiabijawata jiwi ayaibitsaētōxanetonējawabelia, bajarapaliwaisianē juya tsipaebare pamonaejawabelia caejamatabēcuenē xaina Diosojawabelia, pecuenecaējēpaewitsinua xaniawaetsia pecujarubinexa! ¡Nexata, bajarapamonaē juya itorobare mataropotsia petsipaebinexa itsamonaejawabelia!

³¡Xamē pijinia, ajamatabēcuenesaēmēre Dioso pejumeliwaisi jiwi netsipaebaponaenexa, cato-ayapēbeje-ata, itsamonaē cabejiobia-exanae-ata! ¡Jesucristo pijajiwitonēxaemē, jamatabēcuenē-ewetaponaponare pacuenia ca-itoroba nexanaenexa! ¡Pacuenia itsi pexaniawajabitsaēnē, bajara-itsimēre! ⁴Pawajabitsaēnē jitsipa pesiwajamatabēcuenēbarējajawatsi pitorobabiabinētsi, jamatabēcuenē-ewetaponapona pitorobicueniatsi pexanaenexa. Nexata, aponacajonenua itsacuenejawawa pexanaenexa pijawajabitsaēcuenewecua, saicayacuene pewetaponaenexa. ⁵Pamonaē pijinia pecujinaejinaewi, penayacopia-ucubijawata, apopitsi tsane xua rajutsiapabatsi pecujinaejinae matamo, itsa xaniawaetsia apocujinaejinae petocaējētsicueniatsi. Bajarapijiniā pacuenia, xamē catōxanepana netonacuenebi-jawawa, Dioso pecatocaējētsicuenia. ⁶Ponē pijinia pabi pe-ubiniē, bajaraponē copiaya nacuenēba asaēyata. Pe-ubijawawa itsa tonaweretatsi, penotsijawata pita penacuenebimatamo. ¡Bajarapacuenia pijinia, xamē-ata asaēya tonacuenebare wajatuxanenē, pecarajutsinexa netonacuenebimatamo! ⁷¡Canaējēre mapacuenejawanēta tacatsipaebijawata! Nexata, juya wajatuxanenē cajumeyapētaēya-exanaena bajarapaliwaisijawata.

⁸Najamatabēnapitabiabianame Jesucristo yabara, David-pijinē pemomoxiyajuwēnēncuene, Dioso Ponē asaēya-exana petēpaejawawecua. Bajaraponē cajena peliwaisi tsipaebabiabajē jiwijawabelia, Dioso pecapanepaenexatsi pejumexaniataejawata bajarapaliwaisi. ⁹Bajarapapexaniajailiwaisi tatsipaebaponaexae daxitanacuanējawawa, nacueratsiaya ponaponajē penaneconitsiwi pejebabiabibota. Cadenamaētonēta xanē necēbanua, pacuenia bitso pibisiacuene pexanaenē bacēbatsi. Itsiata, Jesucristo peliwaisi apocētsicapanepeatsi. Bajaraxuata, xanē majotaje naneconitsiaponaponae-atanē, aeconoxae baja Jesucristo peliwaisi yacajēpawona daxitanacuanējawawa. ¹⁰Bajaraxuata yajapētaexae, netocopiapataponaē-ata bajarapa-ayapēbejewanē, najamatabēcuenesaētajē, pamonaē Dioso nato-itapeta peyapētaejawabelia pecapanepaejawanexa, Jesús peliwaisi pejumexaniataejawata. Bitso jitsipajē Cristo Jesús pecapanepaejawawa bajarapamonaē-ata, peyajawajinawanapaenexa baja-
raPonē pijapinijicotia yajawawa, daxita matacabijawabelianexa.

¹¹Paliwaisi aeconoxae jumaitsinējitsia Jesús pijajiwi yabara, pexaniajailiwaisi cajena:

«Itsa Cristo yajawatēpatsi, nexata icatsia, nacayajawawa-asaē tsaponaponae tsane.

¹²Itsa najamatabēcuenesaētsianatsi itsamonaē nacabejiobia-exanae-ata Cristo peliwaisi yabara, nexata daxitacuene Cristo

cobena-ewetsianatsi, pamatacabi daxitacuen ewetsiana mapanacuaje.^b Itsa nayawajunuaxainaenatsi jiwijawabelia wajajumexaniataejawa bajaraPonë peliwaissi, nexata juya pijajiwiwitsicuen nacayawajunuaxainaena^c paxa Diosojawabelia.

- ¹³ Caejamatabëcuene Pamonae pijinia pecujinaejinaewi, penayacopia-ucubijawata, apopitsi tsane xua rajutsiapaebatsi pecujinaejinae matamo, itsa xaniawaetsia apocujinaejinae petocaëjëtsicueniatsi. Bajarapijinia pacuenia, xamë catoxanepana netonacuenebijawa, Dioso pecatocaëjëtsicuenia, Dioso itsiata caejamatabëcuene xainaena pexanaenexa pacuenia baja cajena najumecapanepaeya jumaitsi, tsipaji apocuenecaëjëpaetsi saicayacuenia pexanaejawa pijacuata pejumaitsiyawawecua».

**Pacuenia jamatabëcuene-itsi xaniawaetsia Dioso
petonacuenebinë, yabara peliwaissi**

- ¹⁴ Paliwaissi catsipaebatsi, bajaraxua najamatabënapitsia-exanaename daxita Jesús pijajiwi. ¡Wajatuxanenë pitabarata, xaniawaetsia muxujiobare penajume-anaenotsiyaniwa xua bitso apopenamatamotsiliwaisianë yabara, tsipaji bajarapaliwaissi apojamatabëcueneyawenonae caejijiwo-ata! Biji rajane, saya jamatabëcuenebijianaejitsipa daxita pejumetaewitsi. ¹⁵ ¡Xamë, daxita nejamatabëcuenesaëta exanaponaponare Dioso pejitsipaecuenia, pecasiwajamatabëcuenebarëyanexa! Bajarapacuenia itsa exanaponaponae-name, apoxainaemë tsane xua yabara acuenë-uramëjitsia Diosojawabelia pamatacabi naitajëtsianame bajaraPonë pitabarata, xaniawaetsia necujaru-babiabixae pepopexaniajailiwaissi. ¹⁶ ¡Pëtsa namuxuna-ewetame pamonae cuaicuaijai tsabiabi natsiquejemaliwaissi, mapanacuapijiliwaissi, tsipaji raja bajarapaliwaisianëta jiwi jamatabëcuenematacapona pewajënaeyabelia pexanaponaeenexa mapanacuapijicuenejawanëje, Dioso peliwaissiwehua! ¹⁷ Bitso cajena abeje bajarapaliwaissi. Pacuenia pewajënëtsabanana-jeta-rucaejawata ayaiwajënë banaexanapona, bajarapijinia pacuenia, petsi-paebaponaeliwaissita jamatabëcuenebijianapona pejumetaewitsi. Belia, yacaëjëpapona daxitajiwijawabelia. Bajarapitsiliwaissi paebaponabeje Himeneo, Filetobeje. ¹⁸ Bajaraponëbeje wecuanatsatabeje pexaniajaili-waissiwehua. Nexata, pecujarubiliwaissita jumaitsi tsaponaebeje jiwijawa-belia: «Copiaruca^d baja Dioso icatsia piasaëya-exanaponaejawaminexa, jiwi petëpaecujinae», jai tsaponaebeje. Bajarapaliwaissita jamatabëcuene-epatajërërëcaponabeje Dioso peliwaissiwehua. Nexata, itsamonae-ata Jesucristojawabelia pesiwanajamatabëcuenecopabijawamiwehua jamatabëcuene-epatajërërëcaëya-exanaponabeje. ¹⁹ Itsiata baitsi jane, itsajiwi-ata

b 2:12 *mapanacuaje*: Pamatacabi Cristo yanacua-ewetsiana mapanacuaje mil pawaijebecuenia. Apoc. 20:4. **c 2:12** *nacayawajunuaxainaena*: Taema Mt 10:32-33; Mc 8:38; Lc 12:9.

d 2:18 *copiaruca*: Pablo cuenecataëya yaquina Rom. 6:1-11-jawata pacuenia jiwi pesiwanajamatabëcuenecopatsijawata Jesucristojawabelia, bajarajota bepeyajawatëpaetsi, bepeyajawamëthëtsitsi, bepeyajawanamatacotsitsi petëpaëjawawecua. Nexata, Pablo peyaquinaejawata pejumaitsi, «bepeyajawanamatacotsitsi petëpaëjawawecua», pejaixae, bajaraxua yabara tsanea Himeneo, Filetobeje jamatabëcuenenawëxaniabiaya canaëjëtabeje, «pematatsënëa ajibi baja tsane Dioso piasaëya-exanaejawanexa jiwi petëpaecujinae, tsipaji baja Cristo yajawanamata-cota», jamatabëjaibeje bajaraxua yabara.

apocaējēpaetsi pejumetixitsijawa Dioso peliwaishi, saicayacuenia pecujaru-binexa. Pacuenia ibotoxaneto apotixitsicapanepaetsi, bajarapacuenia itsi Dioso peliwaishi, tsipaji bajarapaliwaishi tsiteca. Bajarapaliwaishijawata Dioso yaquinaeaya-exana mapacueniaje: «Pepopetuxanenē cajena yapētane pamonae pijajiwi»,^e jai. Itsaliwaishijawata pijinia mapacuenia pejumaitisiliwaishiyo rucaje: «Pajiwi jumaitsi: ‘Xanē raja Cristo pijajiwitonēnē,’ jai, bajarapajiwi becopata pibisiacuene pexanaejawa»,^f pejailiwaishiyo.

²⁰ Riconē pijaboxanetota jiwi pecaxaenēanēnexa, xaina daxitacuenewi-rianēxi. Pexaniawiria waxianē, pexanaejawanē oronanitota, platananitotana, bajaraxuanē canacuenebabiaba peyaiyataewitsijawabelia, pamatacabi siwaxainatsi petuxanewi. Juya xuanē bewelijaawanē, pexanaejawanē naejawanēta, atsananitota-ata, bajaraponēxi canacuenebabiaba daxitamatacabi.

²¹ Bajarapacuenia pijinia, itsi Jesús pijajiwi tuatujēta. Pajiwi xaniawaetsia najamatabēcuene-ewetaponapona pibisiacuene pexanaeyaniwa, bajarapajiwi Dioso taenatsi be-oronanitota pexanaewaxitsi, peyaiyataetaxunae perajutsinexatsi. Baitsi baja, itsa ajamatabēcuene xuirajibi, nexata pijatuxanenē tsitaxanepana pitorobinexatsi xua pexaniacuene pijatuxanenē petonacuene-binexa. Timoteo, bajaraxuata xaniawaetsia bena-ewetaponaponame pibisiacuene nexanaeyaniwa.

²² ¡Timoteo, pewējēawī pejitsipaejamatabēcuenejawanē^g pētsa tonacopatame! ¡Biji rajane, wecuanajetabijirawaponare! ¡Casaēmēre tsaponaponae ēpexaniacuene nexanaponaponaejawa! ¡Diosojawabelia itaxutuajamatejemaya ponaponare! ¡Asiwamēre tsaponaponae itsamonae-ata! ¡Jamatabēcuenexanepanaeaya ponaponare Dioso pitabarata! ¡Bajarapacuenia barē-ajamatabēcuenesaēmēre tsaponaponae, pamonaē xaniawaetsia pena-ewetawanapaewi pibisiacuene pexanaeyaniwa, penawajēcabiabiwinua Diosojawabelia peyawenonaenexatsi! ²³ ¡Namuxujemare natsiquejemaliwaishixi pecuaicuaijaiwi, tsipaji rabaja yapētaneme, jiwi penajumeanaenotabiabijawa bajarapaliwaishixi yabara! ²⁴ Jesús cajena pijajiwitonē, apobeponaponae itsamonae pebarēnabijataeyabiabinēcuenia. Biji rajane, pexaniajamatabēcuene bexaina daxitajiwijawabelia. Pecuenecaējēpae-nētsinua Dioso peliwaishi pecujarubijawa. Penajamatabēcuene cataitsinē pianae panaejawa itsamonae jamatabēcuene-itonotabiabi-atatsi. ²⁵ Jesús pijajiwitonē bewelijaamatabēcuene nataeaya bemuxujioba, pecuenexanetsinexa pamonaē Dioso apopejitsipaewi-ata. Nexata belia, bajarapacuenia Dioso tocopatsipatsi bajarapamonae penajamatabēcuene pēnēyorotsinexa pibisiacuene pexanaejawawecua, juya peyapētaenexa Jesús peliwaishi pexaniajailiwaishicuene. ²⁶ Nexata, bajarapaliwaishi pejumexaniataejawata, wecuapanepaena panajumetsēnētsiliwaishita dowathi jamatabēcuene cēbatsi, pejitsipaecuenia-ata jamatabēcuenenamatacitorobabiabatsi. Itsiata, Jesús peliwaishi pejumexaniataejawata, bajarapamonae juya jinawanapaena Dioso pejitsipaecuenia.

e 2:19 Taama Núm. 16:5; Jn 10:14-15; Rom. 8:29; 1Co 8:3. **f 2:19** Taama Isa. 36:13.

g 2:22 *Pewējēawī pejitsipaejamatabēcuenejawanē*: Bajarapajumebeje nacayapētaeaya-exana papibisiacuenejawanē pewējēawī peperabēto jitsipaeya-exanatsi pexanaenexa: Pacuenia penaimoxoyobijawa apopenanotsiwi abaxē, pitajibicuene, ayajamatabēcuene penataejawa, ayaijawa penamatacitorobisaē pexainanenexa, ayaijawa pecobecowē pexinaejawanexanua.

**Pacuenia jiwi cuene-itsijitsia itsa baja imoxoyo pewajënae
nacia pewaterewerecaenexa, yabara peliwaishi**

3 ¹Timoteo, xaniawaetsia beyapëtaneme pacujinae imoxoyo pewajënae tsane nacia pewaterewerecaenexa, bitso piayapëbejecuene copia-patsiana daxitacuenejawabelia. ²Bajarapamatacabita cajena, jiwi ayai-bitsaëtonë tsane, asiwaya pijacuata penataewi. Nexata, nato-asiwa tsane ëbajarapamonae ayaijawa pexainaenexa. Nawajunupaebiananua saya peyaiyataenexatsi pejumetaewitsi. Be-ayaijamatabëcuenewi nataena. Bepe-liwaisi namatamotsiwi nataena itsamonaewecua. Orijibia, bajarapamonae pibisiacuena baracuaicuaijai tsane Dioso. Apojumecowënëtsi tsane paxa-jiwi, penajiwi-ata, pitorobicueniatsi. Apojitsipaenua tsane pexaniacuene perajutsijawa, itsamonaewawenonae-atatsi. Beweliacuena petaewi tsane daxita Dioso pijacuene. ³Bajarapamonae asiwaya apotae tsane itsamonaen-ata. Itsa to-exanatsi, apopejitsipaecuene, aposiwajamatabëcuenewerewerecae tsane, itaxutotsoniataenejewaw. Najumetsënëtsiayanua baracuaicuaijai tsabiabi tsane itsamonaen. Apocaëjëpaetsi tsane penajamatabëcuene-ca-taitsijawa, pibisiacuene pexanaeyaniwa. Pebejiobia-exanaewi tsane itsamonaen itaxutobejiobiataenejewaw. Bajarapamonae itoya tsane daxita xua Dioso tane pexaniacuene.^h ⁴Bajarapamonae canajetsiana pijabopijijiwi, itsa jume, penajuajinawanapaewi-ata pitoyawitsi pecobeyabelia. Xaniawaetsia cuenecana-ëjëtsinejewaw pejumaitsiwi, pexanaewi-ata. Bijiaya naëcotsiana itsamonaen. Dioso apojamatabënajinae tsane. Bajarapamonae nato-asiwa tsane mapanacuapijibarëyjamatabëcuene, Dioso piasiwajawawecua. ⁵Bajarapamonae cuenejëpae-ata tsane itajara Dioso bepejitsipaecuena pexanawanapaewi, itsiata pexanaecuenejawata, nacuene-itajëtsiana Dioso apopijajiwiucuene.ⁱ

⁶Bajarapamonae nawecuatsatsianame, tsipaji bajarapamonaeyajuwë-nëwi itsamonaen pijabonëjawabelia joneyabiabiana, peyamaxë-itojorobinexa powaxi copiapitabiabianatsi, pejamatabëcuenefaefaenawewi. Bajarapowaxi pibisiacuene pexanawanapaewi. Nexata, jamatabëcuene-enatsi daxita pibisiacuene pexanabiabinexa. ⁷Bajarapapetiriawi picani jitsipaena petsipaebabiabinexatsi pejanaliwaisi Dioso pejumeliwaisi yabara. Itsiata baitsi jane, apotsijamatabëjonetsi tsane pepopexaniajailiawaisi, pecapanepaeliwaishinexatsi Diosojawabelia. ⁸Bajayata, penajorobinëmibeje, Janes, Jambres-pijinëmibeje, cuenecaranababeje Moisés-pijinë petsita-exanaejawanë, faraón

h 3:3 tane pexaniacuene: Dioso tane pexaniacuene mapacuenejawanëje: **1)** Jiwi pexaniacuene pexanaejawa, **2)** jiwi pexaniajamatabëcuene pexainaewi, **3)** papexanaliwaisi muxujioba jiwi Dioso pejitsipaecuena pejinawanapaewi, **4)** xua jiwi to-exana Dioso piasiwajamatabëcuene, itsa jume, peyaiyataejamatabëcuene, penajamatabëcuene-itajëtsinexa bajaraPonëjawabelia.
i 3:5 Dioso apopijajiwiucuene: Itsacuena pejucaejawanexa pijinia vr. 5b «itsiata, pexanaecuenejawata nacuene-itajëtsiana penawecua-itoyajawa Espiritu Santo, ponë pesaëta jamatabëcueneyawenonaejitsiatsi pejinawanapaenexa Dioso pejitsipaecuena», pejaicuena. Bajarapamonae culto taeyabiabi-ata, yawenonabiabi-ata Dioso pijacuenejawanë, ofrenda rajutabiabi-ata, itsiata, aposesiwanajamatabëcuenecopabaxae Jesucristojawabelia Dioso apopijajiwi. Nexata, Espiritu Santo apotsijamatabë-ecaetsi, pesaëta pejamatabëcueneyawenonaeenexatsi, Dioso pejitsipaecuena pejinawanapaenexa. Najamatabëcuene-itajëta Dioso apopijajiwi pena-ewetabiabixae pijasalinaecuenia, pitaxutujamatejemajawawecua Dioso.

pejumecowënëtsiyaniwa Dioso pitorobicueniatsi. Bajarapacuenia pijinia, pamonaē penajumetsënëtsiliwaisi pecujarubiwi cuenecaranabiana, jiwi pejumexaniataeyaniwa Dioso peliwaisi. Bajarapapebijiwi jamatabëcuene-wënëca ëpibisiacuene pexanaenexa. Nawajunupaebabiabiana bepesiwanajamatabëcuene copabiwi itajara Jesucristojawabelia. ⁹Itsiata, bajarapamonaē pepaëbiliwaisi apo-aliwaisisaë tsane, tsipaji belia daxitajiwi cueneyapë-taenatsi bajarapamonaē saya jemaliwaisi petsipaebaponaējawa, pacuenia bajayata tocopiapatatsibeje Janes, Jambres-pijinëmibeje.

Pablo pemuxujiobiliwaisi Timoteojawabelia Dioso peliwaisi yabara

¹⁰Timoteo, xamë baja cajena yapëtaneme tatsipaëbiliwaisi jiwibitsaëtöxanetojawabelia, xaniawaetsia taponaponaēcuene Dioso pitabarata, caejamatabëcuene taxainaējawa Dioso tatonacuenebaponaponaenexa, xaniawaetsia ta-itaxutuajamatejemajawa-ata Dioso daxitacuene yabara. Yapëtanemenua itsamonaē pacuenia taneliwaissicaraniabijawata, tjamatabëcuene saējawa Dioso peliwaisi tatsipaebaponaenexa itsamonaējawabelia copatsinejewanë. Yapëtanemenua pacuenia itsamonaē-ata asiwanë. Pacuenia-ata casaënë tsaponaponaē jiwi liwaisi tatsipaebaponaējawa neto-ayapëbeje-ata. ¹¹Yapëtanemenua pacuenia itsamonaē nebejiobia-exanapona, pacuenia-ata nacueratsiaponaponaē Jesucristo peliwaisi tatsipaëbixae. Bajarapacuenia neto-exana Antioquía tomarata, Iconia tomarata, Listra tomarata-ata. Itsiata baitsi jane, Dioso necapanepa daxita bajarapacuenewecua. ¹²Xaniajai cajena pacuenia catsipaëbijitsiatsi: «Daxita pamonaē jamatabëjinawanapa Dioso pejitsipaecuenia, bajarapamonaē mapanacuapijiwiije bejiobia-exanaponaenatsi, caejamatabëcuene pexainaexae Cristo Jesús-jawabelia», cajiatsi. ¹³Itsiata baitsi jane, pibisiajamatabëcuenewi, pamonaē dowathi pejamatabëcueneta jiwi yamaxë-itojorobapona, orijibia bitso pewajënaeyabelia Dioso peliwaisi wecua-itothianaponaena. Nexata, yamaxë-itojorobaponaena jiwi penajumetsënëtsiliwaisita. Pijacuata pijinia nayamaxë-itojorobiana bajarapaliwaisita.

¹⁴Timoteo, itsiata baitsi jane, xamë juya casaëmëre tsaponaponaē nejumexaniataeliwaisi! Xamë baja cajena yapëtaneme pexaniajailiwaissicuene, tsipaji jamatabëcueneyapëtaneme pamonaē cacujaruba bajarapaliwaisi.

¹⁵Tsiquirinëyomëjawaweliacujinae baja cajena, yapëtaneme Dioso pejumeliwaisi. Bajarapaliwaisi cayapëtaeya-exana pecacapanepaejawanexa Dioso jawabelia, nesiwanajamatabëcuene copatsijawata Cristo Jesús-jawabelia.

¹⁶Dioso pejumeliwaisibaxutota daxita paliwaisianë yaquinaruba, Dioso baja cajena pejumeliwaisi, tsipaji Espiritu Santo peyapëtaeya-exanaecueniatsi Dioso pijajiwi yaquina. Bajaraxuata, daxita bajarapaliwaisianë xanepana pecujarubinexa, jiwi peyapëtaenexa xua pexaniajailiwaissi. Xanepananua pecuene-itawetsinexa, pecuene xanetsinexanua jiwi apopexanepanaecueneta exana. Xanepananua pecuene cujarubinexa jiwi pejinawanapaenexa Dioso pejitsipaecuenia. ¹⁷Nexata, Jesús-jawabelia pesiwanajamatabëcuene copabiwi, bajarapaliwaisita xaniawaetsia jamatabëcuene naweretaponaena Dioso pijacuene jawalia, pesiwanacuene cujarubicuenia xaniawaetsia pexanawanapaenexa daxita xua pexaniacuene.

4 ¹Dioso peliwaisi bajarapacuenia wajanacato-exanaexae, Dioso, wajatuxanenë Jesucristobeje pitabarata, jamatabëcuenerewiya ca-itorobatsi

netsipaebabiabinexa bajarapaliwaisi jiwijawabelia. Yapētanetsi baja Jesucristo pepatsijawanexatsica mapanacuayabetsicaje peyanacua-ewetsinexa. Bajarapamatacabita, naneconitsia-exanaena daxita pibisiacuene pexanaewi, pamonaē piasaētsawanapaewi, petēpaewi-ata. ² ¡Bajaraxuata, caematacabi canacujitsia jiwi tsipaebare Dioso peliwaisi! ¡Ajamatabēcuenesaēya tsipaebaponare, paepatota jiwi jitsipa, paepatota-ata apojitsipae pecanamuxuna-ewetsijawa! Orijibia, Dioso peliwaisi necujarubijawata, caejamatabēcuenexainaēya-exanaename pecanamuxuna-ewetsiwi, cuenejēpaēya pejinawanaēna. Cuene-itawerenua pibisiacuene pexanaeyaniwa. ¡Bajayajebi-ata pexaniajailiwaitsa muxujiobare siwajamatabēcuenecanaxanetsinejewamē, jamatabēcuenecueranaenejewamē-ata! ³ ¡Bajarapacuenia tsipaebaponare, tsipaji raja copiapatsiana jiwi apopejitsipaematacabianē penamuxuna-ewetsijawa pexaniajailiwaitsi! Biji rajane, pijacuata natojaisiana ayaibit-saēto pecujarubiwinexatsi petsimuxuxanepanaeliwaisianētsi, Dioso pejume-liwaisiwecua. Nexata, muxunanacaetuatsiana pejitsipaēya-exanaejumenētsi pejumetaenexa. ⁴ Nexata, amuxujitsibi tsane pexaniajailiwaitsi pejumetaeyaniwa, juya pejumexaniataenexa saya ēnatsiquejemaliwaisixi, pijasalinaiwimi peliwaesianēmi. ⁵ ¡Itsiata baitsi jane, xamē bajarapamonaewecua saicaya nayajiwitaēya ponaponare dexitacuenejawalia! ¡Nexata, catoayapēbeje-ata, itsamonaē cabejiobia-exanaē-ata, casaēmēre tsaponaponae newajēnaeyabelia, jiwi netsipaebijawa pexanialiwaitsi, pecapanepaeliwaixinexatsi Diosojawabelia! Daxita pacuenia Dioso catocopata nexanaenexa, weretsianame xaniawaetsia nenacuenebijawa.

⁶ Xanē baja caematacabibeje netosajina tanebeyaxuabinexa, Jesús peliwaisi tapaebaponaexae. Bajarapacuenia tanebeyaxuabijawata, betanarajutsijawa¹ tsane offendacuenia Diosojawabelia. ⁷ Tanebeyaxuabijawa yabara aponasiwajamatabēcuenebējanē, tsipaji xaniawaetsia Dioso tonacuenebaponaponajē ta-asaētsaponaponae-epato. Itsamonaē netsimaxēpatabiabi-ata, tanecuenecaranatsinexa Jesús peliwaisi tatsipaebaponaeyaniwa, itsiata casaēnē tsaponaponae bajarapaliwaisi tatsipaebaponaejawa. Yapijiwi-ajumesaēnēna tsabiabi. Pacuenia pecujinaejinaenē petocaējētsitaxunaeta patajopa, bajarapacuenia pijinia, xanē-ata Dioso tanetocaējētsijawa ta-exanaejawanexa, weretajē baja. Apocopatsinē cajena ta-itaxutuajamatejematsaponaponaejawata Diosojawabelia. ⁸ Bajarapacuenia ta-exanaponaponaeaxae, netosajina saya wajatuxanenē Jesús xua netoxaniawaeta tanerajutsijawanexa tajamatamocuenia tatonacue-nebijamatabēcuenē. BajaraPonē, xaniawaetsia jiwi pijaliwaisi pecanaējētsinēxae, nerajutsiana pacoronajawa toxaniawaeta xaniawaetsia pejinawanapaewi, pamatacabi pijajiwi liwaisi canaējētsiana.^k Bajarapacoronajawa xanē apone-rajutsi tsane. Rajutsiananua daxita pamonaē ajamatabēcuenesaēya wajēnae-ewetawanapa pepatsijawanexatsica wajatuxanenē Jesucristo.

j 4:6 *betanarajutsijawa*: Bajayata, itsa abaxē Dioso pijatemplobo eca Jerusalén tomarata, Israel-pijinē pemomoxi dajubijana caewetabiaba waxiyota, itsa jume, vinora pewēnēta waxiyo. Nexata, bajaraporanē epanaxuababiaba altar-muxuneneta, pexaniajamatabēcuenē perajutsinexa Diosojawabelia. Nexata, Jesús petonacuenebiwi itsa beyaxuabatsi Dioso peliwaitsi yabara, Dioso totanetsi petēpaējawa beplexaniacuene perajutsijawa bajaraPonējawabelia. Baitsi, Pablo petēpaējawata pexaniacuene rajutsijitsia Diosojawabelia, petocopatsixaetsi pebeyaxuabinexatsi, Cristo petonacuenebaponaponaeaxae. k 4:8 *pijajiwi liwaisi canaējētsiana*: Taema 1Co 3:1-15.

Pablo xuanē tocopiapataponatsi yapētaeya-exana Timoteojawabelia

⁹ ¡Jaire itsiata bepijiayocuenia tanetaeyojopaenexamērena! ¹⁰ Demas, tayajawanacuenebinēmi, nexuabatabijirawa, bitso pejitsipaexae mapanacua-pijicueneye, Dioso pejumeliwaisiwecua. Pona baja nexata Tesalónica tomara-belia. Tayajawanacuenebinē, Crescente, itorobajē Galacia nacuyabelia. Tito pijinia itorobajē Dalmacia nacuyabelia. ¹¹ Caenē, Lucas, nacopata xanēja-wata. Pacujinae renamē, yajawanajetarucaename Marcos, tsipaji xanēnexa netoxanepana, taneyawenonaejawa Dioso tatonacuenebijawa. ¹² Tíquico baja itorobajē Éfeso tomarabelia. ¹³ Itsa renamē tsane xanējawaberena, Troas tomarata tajacamisajumawelia tanaxatatsijawa netopitaponaeeremena. Carpo raja pijabota puenetarutajē. Tajalibrobaxutonē, itsabaxutoxinua, netopitaponaeeremena. Bitso rajane, namatawenonajē tajacuyalatoxutoxi.

¹⁴ Alejandro, cobrenanita daxitacuen pexanaenē, bitso baja cajena apo-tajitsipaecuenene neto-exana. Itsiata baitsi jane, Dioso neyamatomotsiana tanebejiobia-exanaematamo. ¹⁵ ¡Nayajiwiwitaema bajaraponē, tsipaji raja bitso ajamatabēcuenesaē patanecuenecaranatsijawa patatsipaebaponaeliwaisi!

¹⁶ Pamatacabi nayajiwicuaicuaijanē majotaje, Roma tomarata, jueznē pitabarata, itsajiwi-ata aponeyawenonaeyacuaicuaijai. Daxita Jesús pi-jiwi nexuabanuta. Itsiata, bajarapamonae towajētajē Diosojawabelia, penaneconitsia-exanaeyaniwatsi tanexuabanutsijamatabēcuenene. ¹⁷ Baja-rapacuenia nexuabanutsi-ata, wajatuxanenē Jesucristo neyawenona. Nerajuta pesaē, xaniawaetsia tatsipaebinexa Jesús peliwaishi pamonae taneliwaishicanaējēbiwi, apojudfowi, pejumetaenexa bajarapaliwaisi. Tane-xuabanutsijawata picani netsi-ayai tanebeyaxuabinexa. Wajatuxanenē tanecapanepaejawa bajarapapiayaicuenewecua, natotaniji newēthē tanexae-jawaminexawecua betanecapanepaejawa. ¹⁸ Wajatuxanenē cajena nejamata-bēcueneyawenonaponaena tajamatabēcuenematatoxenetsinexa pibisiacuenene ta-exanaeyaniwa, bitso pibisiacuenia tanebejiobia-exanaejawata. Orijiibia, yapētaniiji tanecaponaejawanexa athēbēabetsia, bajaraPonē pewetsinacua-yabetsia. Bajarapacuenia pijajiwi pewetsixae, pexaniacuenia wēnēxaniatsia-natsi Dioso ayaijamatabēcuenene pexainaejawa daxitamatacabijawabelianexa.

Pablo penapējiobiliwaisi

¹⁹ Nebajacobianabeje Prisca, pamona, Aquilabeje. Nebajacobiana One-síforo pijamonae-ata. ²⁰ Erasto nacopatajopa Corinto tomaratalia. Trófimo pijinia puenetajē Mileto tomaratalia, tsipaji awitane. ²¹ Najaire bepijiayo itsiata, nerenanexa emarapae pecopajopaewajēnaeya. Cajamatabēnajinalia Eubulo, Pudente, Lino, Claudia-ata, daxita itsamonae Jesús pijajiwi yajawa.

²² Catojitsipatsi wajatuxanenē Jesucristo pecayajawaponaponaejawa, pecajamatabēcueneyawenonaenexa. Pacatojitsipatsinua daxita bajarajota pecayajawajinawanapaewi Dioso asiwaya papecayawenonaenexa papeca-ita xutotsoniatējamatabēcuenene.

Tito

Mapabaxutoje Apóstolnë Pablo toyaquina Titojawabelia

Pablo pebajacobiliwaisi Titojawabelia

1 ¹ Xanë Pablonë, Dioso pijajiwitonënë. Jesucristo-ata pija-apóstol-nënë. Xanë baja cajena Jesucristo nitoroba tacujarubinexa Dioso pitapetsiwi,^a pamonaë baja siwanajamatabëcuenecopaba Jesucristojawabelia, pewajënaë-yabelia pitaxutuajamatejematsaponaenexa Dioso. Cujarubaponajënu xania-waetsia pejinawanapaenexa Dioso pitabarata, taneyapëtaëya-exanaecuenia pexaniajailiwaishi, Dioso peliwaishi. ² Bajarapamonaë-ata tatsipaebiliwaishi pejumexaniataexae, natoyapëtaëna pepacue ne pexinaejawanexa matacabi apowerewerecaejawa, tsipaji Dioso apopenajumetsënëtsinë xua yabara najumecapanepaëya jumaitsi nacua pexanaewajënaëya perajutsipaebijaw-anexa. ³ Nexata, aeconoxaeta baja, Dioso pecaëjëtsimatacabita, copiapata jane baja jiwi pepaebanajetarubenaenexa bajarapaliwaishi. Nexata, Dioso, wajanacacapanepaenënexa, xanë nitoroba jiwijawabelia tatsipaebinxaxa bajarapaliwaishi.

⁴ Tito, betaxënatomë tacataenë, tacatsipaebixae Jesucristo peliwaishi neju-mexaniataenexa, caenëjawabelia wajanajua siwanajamatabëcuene copatsi-nexabeje. Catoyaquinatsi mapabaxutoje, tsipaji catojitsipatsi pexaniacuenia waxa Dioso, Jesucristo-ata, wajanacacapanepaenënexa, pecajamatabëcuenewënëtsinexa peca-asiwajamatabëcuenebeje, pecabarajamatabëxanepanaejamatabëcuene-ata jamatabëcuenexanepanaëya neponaponaenexa.

**Pablo puenetanuta Tito Cretatunaeto nacuata,
Dioso pijacue ne petonacuenebinxaxa**

⁵ Capuenetanutatsi baja cajena Cretatunaeto nacujawata, necuenexa-nebaponaenexa pamonaë abaxë tosjainatsi xaniawaetsia peypätaejawa Dioso pijacue ne petonacuenebijawa. Capuenetanutatsinua neweretsinexa xua taponawajënaëya ta-exanaejawaminexa. Ca-itorobatsinua baja cajena caetomarapijiwi canacujitsia nitapetsinexa ancianowinexa, Jesús pijajijiwi

a 1:1 *Dioso pitapetsiwi:* Jiwi apoxinae caejamatabëcuene bajarapajume yabara. Itsamonaë canaëjëta pejumaitsiyawa Jesús pijajijiwi yabara. Itsamonaë pijinia canaëjëta pejumaitsiyawa Dioso tajëwelia pitapetsijawa pamonaë capanepaejitsia Jesús pejamatabëcueneta. Taema Efe. 1:4-5

pewetsiwinexa, pacuenia cayajawa najumepuenetatsi ne-exanaenexa.

⁶ Nitapetsijawata ancianonēnexa, xanepana ponē apoxinae jiwi peyabaranekonitsijawanexatsi. Caewa pepitsinē. Pexi Jesús peliwaisi petojumexaniataenētsi. Pexi apopeto-acujirubejenētsi. Pitorobicuenia pexi pejumecowēnētsinētsi. ⁷ Bajarapitsinē baja tsipaji tsicarucatsi Dioso pijacuene petonacuenebijawa. Bjaraxuata, itapetsianame xaniawaetsia peponaponaenē. Planeconijibinē-ata. Be-ayaijamatabēcuenenē apopenataenē. Bepijia apopianaepanaenē. Apopejitsipaeenē piapaejawa pīataneranē pia-itajibinexa. Apopejitsipaeenē pebejawa pewēnajiwi. Apopejitsipaeenē itsajiwi-ata yamaxē-itojorobiaya pewecuanacobetoxotsinexa palata. ⁸ Biji rajane, xanepana ponē jiwi xaniawaetsia pecopiapitabiabinē pijabota pepatsiwi. Piasiwānē daxita xua Dioso tsitapexaniacuenetsi. Xaniawaetsia copiya pesiwacanaējētsinē pexanaewajēnaeya. Pejamatabēcuenexanepanaenē jiwi pitabarata, Dioso pitabarata-ata. Penacuene-ewetsinē xaniawaetsia Dioso pejumeliwaisita pibisiacuene pexanaeyaniwa. Pewajēnaeya pesiwanacueneweretsinē^b xua tsicarucatsi pexanaejawanexa. ⁹ Xanepana ponē casaē tsaponaponaē pejumexaniataejawa papexanaliwaisi cujarubatsi, Dioso peliwaisi, pewecuaponaeyaniwa bajarapapexaniajailiwaisi. Bjaraponē juya nexata pecuenecae-jēpaenexatsi bajarapaliwaisita bijiaya pejinawanapaewi Dioso pitabarata xaniawaetsia pemuxujiobinexa, pamonaē-ata Dioso pejumeliwaisi aithothiacuenia paeba. Nexata, pexaniajailiwaisita pemuxujiobijawata, caejamatabēcuenē pexainaeya-exanaenexa, juya pejumexaniataenexa Dioso.

¹⁰ Jesús pijajiwi tuatujēta, ayaibitsaēto jinawanapa pamonaē Dioso pejumeliwaisi aithothiacuenia pepaebiwi. Apopejitsipaeewi pejumecowēnētsijawa pacuenia itorobatsi pewetsiwi. Itsamonaē saya natsiquejemaliwaisi cuaicuaijai tsabiabi. Itsamonaē-ata peyamaxē-itojorobiwi Jesús peliwaisi pejumexaniataejawawecua. Bjarapitsiliwaisi pexainaewi ayaibitsaēto judfowiyajuwēnēwi. ¹¹ Bjarapaliwaisi pexainaewi bejume-itawetame, tsipaji saya yamaxē-itojorobabiaya cujarubapona Dioso peliwaisiwecua. Bjarapamonaē saya jiwi tsipaebapona palata pematamotsinexatsi. Nexata, peliwaisita caebopijiwi canacujitsia najamatabēcuenē-epatajērērēcaeya-exanapona Dioso pitaxutuajamatejemajawawecua. ¹² Cretatunaeto nacuata pejinawanapaewi yabara, itsanē, petaenēmitsi beprofetanēcuenia jumaitsi mapacueniaje: «Cretatunaeto nacuapijiwi cajena bitso penajumetsēnētsiwi. Bitso piacujirubejewi. Ayaijawa pexaeyabiabiwi. Bitso piafaetabiwinua», jai cajena bajayata bjaraponēmī. ¹³ Xaniajai baja cajena bajarapaliwaisi pacuenia jumaitsi bjaraponēmī. ¡Bjaraxuata, xamē, Tito, asaēyata cuenē-itawere penajumetsēnētsiliwaisi pepaebiwi pecopabinexa, juya xaniawaetsia pesiwanajamatabēcuenecopabinexa Diosojawabelia! ¹⁴ ¡Cuene-itawere Jesús pijajiwi penamuxuna-ewetsiyaniwa judfowi pijasalinaiwimi pijaliwaisixi! Itawerenua pejumecowēnētsiyaniwa pacuenia itorobaponatsi pamonaē nawecuacopaba pexaniajailiwaisi, Dioso peliwaisi pejumexaniataejawami.

b 1:8 *pesiwanacueneweretsinē*: Mapajume xaina mapajamatabēcuenējawanēje: 1) Caejamatabēcuenē xaina pexanaenexa xua tsicarucatsi pexanaejawa. 2) Pexanaewajēnaeya pijacuata nacujaruba xua paebijitsia cultojawata, pacuenia muxujiobijitsianua pamonaē Dioso apopejitsipaecuenia pejinawanapaewi. 3) Xaniawaetsia eweta pijabopijiwi, afaetabinejewa. 4) Pejumaitsicuenia penajumecowēnētsinē. Bjarapa-exanaecuenējawanē yabara wowaijumeta «disciplina».

¹⁵ Pamonae Dioso baja aneonijibia tane, Jesús peliwaishi pejumexania-taexae, ajibi itsacuenejawaxua yabara nataejitsia bepenaxuirabiwicuenia Dioso pitabarata. Itsiata, pamonae jume-aeba Jesús peliwaishi, bajara-pamonaenexa daxita pexanaecuene Dioso totanetsi bepenaxuirabia-exanaejawatsi. Orijibia, pecanaejëtsijamatabëcuene xaina ëpiabejecuene. Caeto-ata aponajamatabëxainae pexaniacuenejawaxua. ¹⁶ Pejumeta jumaitsi-ata: «Xanë rabaja bitso Dioso yapëtaniji», jai tsabiabi-ata, itsiata baitsi jane, pibisiacuene pexanawanapaejawata nacuene-itajëta Dioso apopeyapëtaejawaxua. Itoyanua Dioso. Nexata, apojumecowënëtsi pacuenia itorobatsi. Apo-caejëpaetsinua itsacuenejawaxo-ata pexaniacuene pexanaenexa.

Pablo papexanialiwaishi itoroba Tito jiwijawabelia petsipaebaponaenexa

2 ¹ Tito, xamë baja cajena juya cujarubabiabianame Jesús pijajiwijawabelia, ëpexaniajailiwaishi, xaniawaetsia pejinawanapaenexa. ² Nexata, cujarubianame perujupebijijiwi penajamatabëcuenerewiabinexa, xaniawaetsia pejinawanapaenexa jiwi peyaiyataenexatsi, penajamatabëcueneecatitsinexa pibisiacuene pexanaeyaniwa. Cujarubianamenua pexaniajailiwaishi, Jesús peliwaishi, xaniawaetsia pejumexaniataenexa, asiwaya-ata petaenexa, itsamonae penajamatabëcuenesaëtsinexa piayapëbejecuenejawanë tocopiapatsi-atatsi Dioso pitaxutuajamatejemajawaxua yabara.

³ Bajarapijiniya pacuenia, cujarubianamenua perujupetiriawi jamatabëcuenerewiayaxua pejinawanapaenexa Dioso pitabarata, pibisiacuene itsamonae pebaracuaicuaijaiyaniwa, pia-itajibitsabiabiyaniwanua. Biji rajane, bajarapapetiriawi pexaniacuene betsita-exanawanapa pejanapetiriawijawabelia. ⁴ Becujarubianua pecowëpijipetiriawi xaniawaetsia pamonajiwi piasiwanaxa, penacoxi-asiwanexanua. ⁵ Jamatabëcuene cucjarubiana xaniawaetsia pesiwanajamatabë-exanaenexa xua exanaejitsia, xaniawaetsia pena-ewetsinexa-ata liwaishi penatsixainaeyaniwa. Jamatabëcuene cucjarubiana xaniawaetsia pesiwacanaejëtsinexa xua exanaejitsia, xaniawaetsia pena-ewetsinexa-ata liwaishi penatsixainaeyaniwa. Bajarapaliwaishita, xaniawaetsia itsa jinawanapaena, itsajiwi-ata pibisiacuene Dioso pejumeliwaishi apobaracuaicuaijai tsane.

⁶ Bajarapacuenia pijiniya, cujarubianame pewëjëawaxua xaniawaetsia pesiwacanaejëtsinexa xua exanaejitsia, pibisiacuene pexanaeyaniwa.

⁷ Xamë pijiniya itsamonae pecacuenepitsinexa, xaniawaetsia tsitanacuene-itajëtaaponapona ëpexaniacuene ne-exanaponaponaejawata jiwi pitabarata! Necujarubijawatenua, netsipaebiliwaishi, ne-exanaecuenemibeje, xaniajaiya benajëpabeje. Tsipaebabiabianame pexaniajailiwaishi nenajamatabëcuenerewiabinëcuenia. ⁸ Necujarubijawatenua pexaniajailiwaishi, tsipaebabiabianame mataropotsinejewamë itsaliwaishi. Bajarapacuenia itsa cujarubabiabianame, itsajiwi-ata apoxainae tsane xua yabara xaniajaiya cabaracuaicuaijaijitsia. Nexata, aura tsane, bajarapaliwaishi pecajumetaejawata.

⁹ Pamonae amoneya petonacuenebabiabiwi, muxujobiabianame jamatabëcuene-ewetsiayaxua pejinawanapaenexa pijatuxanenë, pejumecowënëtsinexanua pacuenia itorobatsi, pesiwajamatabëcuenebarëyane-xatsi. ¡Pëtsa bajarapamonae nacuenecaranata itsaliwaishita pejejaiyaniwa!

¹⁰ ¡Pëtsa tonacobetoxota pijatuxanenë pijajawa! Biji rajane, xaniawaetsia betonacuenebabiaba, petsitanajamatabëcuene-itajëtsinexa caejamatabëcuene pexainaenë xua itorobatsi pexanaenexa. Bajarapacuenia itsa exanaena, nexata daxitajiwi yapëtaena Dioso, wajanacacapanepaenë, peliwaissi pexaniacuenejawa.

¹¹ Dioso baja cajena nacayapëtaeya-exana wajanaca-itaxutotsoniaetaejawa, penajamatabëcuene-itajëtsijawata pejitsipaewajawa wajanacacapanepaejawanexa daxitanacuapijiwitsi. ¹² Nexata, bajarapacuenia Dioso nacacujaruba wajacopabinexa pibisiacuene waja-exanaejawami, wajajitsipaeyaniwanua mapanacuapijipibisiacuenejawanë, wajacabarëya yaniwa. Dioso rajane jitsipa mapanacuataje nayajiwitaeya wajajinawanapaenexa pibisiacuene waja-exanaeyaniwa. Nexata, jinawanapaenatsi wajanajamatabëcuenerewiabiwicuena, wajajamatabëcuenexanepanaewicuena jiwi pitabarata, Dioso pitabarata-ata, waja-exanawanapaewicuena-ata Dioso pejitsipaecuenia. ¹³ Bajarapacuenia, paepatojebi abaxë Jesucristo copia-ewetawanapatsi, xaniawaetsia bejinawanapatsi, icatsia pecaëjëtsimatacabita pepatsimatacabijawabelia. Nexata, siwajamatabëcuenebarëyatsi tsane pamatacabijawa Dioso, ayajiamatabëcuenenë, wajanacacapanepaenë-ata, Jesucristo, icatsia yajawapatsianica pijapeniweniwenacotia. ¹⁴ Bajaraponë pijacuata nacaeweta pebeyaxuabinexatsi, wajanacasiwatëpaenexa waxaitsi yabara. Nexata, Jesucristo pebeyaxuabijawatatsi, pijanata nacacomuata pibisiacuene waja-exanaeneconiwecua. Pepocuene nacawecua-ajibia-exana baja bajarapaneconimi. Bajarapacuenia pijajiwiwitsi naca-exana. Nacajitsipaeya-exananua ëpexaniacuene wajato-exanaenexa. ¹⁵ Bajarapacuenia asaëyata daxita muxujiobaponaename. Cuene-itawetsianamenua, nejamatabëcuenebabatsinexa bajarapamonae. Bajarapacuenia exanaponaename, Dioso pecatocopatsixae bajarapanamatacaitorobisaë. ¡Pëtsa nacopatame itsajiwi-ata bijiya pecataenexa!

Xuanë exanawanapaejitsia Jesús peliwaissi pejumexaniataewi

3 ¹ Jesús pijajiwi, Cretatunaetota pejinawanapaewi, najamatabënapitsia-exanaename yayataeya pejumecowënëtsinexa daxita pamona peyanacua-ewetsiwi pitorobiliwaissi. Itorobianamenua bajarapamonae jitsipaeya pexanaenexa daxita xua pexaniacuene. ² Muxujiobabiabianame itsajiwi-ata pibisiacuena pebaracuaicuajiyaniwa, itsaliwaissi-ata yabara anaeya penajumecanawibiyaniwa. Biji rajane, pexaniajamatabëcueneta namata-enetsia benabarëcuaijai tsawanapae beweliamatabëcuenewi nataeya.

³ Copiyami, waxaitsi itsa abaxë aposiwanajamatabëcueneconapabitsi Jesucristojawabelia, jemacuena jinawanapatsi. Apo-exanawanapaetsi pacuenia Dioso naca-itoroba, wajanacayanacua-ewetsiwi-ata. Naxuabiaya saya jinawanapatsi Dioso pejumeliwaissiwehua. Wajaperujujamatabëcuene nacajamatabëcuene namatacaitorobabiaba, pejitsipaecuenia wajanaca-exanaeya-exanaenexa pibisiacuenejawanë. Pibisiacuene bitso exanawanapatsi itsamonaejawabelia. Itsamonae cuenecaëbabiabatsi. Daxitatsi namata-enetsia naitoya tsabiabitsi. ⁴ Bajarawaja-itsiwimi-ata, itsiata Dioso, wajanacacapanepaenënexa, nacayapëtaeya-exana

wajanaca-itaxutotsoniataecuene, wajanaca-asiwacuene-ata daxitatsi mapanacuapijiwitsije. ⁵Nexata, Dioso wajanaca-itaxutotsoniataejamatabëcuene nacacapanepa baja wajaneconiwecua. Nacajamatabëcuenequiatanua, itsacuenejawayo-ata to-exanaenejewatsi, asiwaya wajanacataenexa. Espíritu Santo pejamatabëcueneta pejanacuenia nacajamatabëcuene-aitaway-a-exana. ⁶Dioso baja cajena ayaicuenia wajanacayawenonaenexa, Espíritu Santo nacato-itorobica wajanacatsijamatabë-ecaeya-exanaenexa, Jesucristo, wajanacacapanepaenë, pejamatabëcueneta. ⁷Dioso wajanaca-itaxutotsoniataexae, aneconijibia nacatane Jesucristo pejamatabëcueneta. Nexata, Espíritu Santo nacato-itorobica wajanacatsijamatabëcuene-ecaenexa, wajanacayapëtaeya-exanaenexa pepacujiru wajaxainaejawanexa matacabi apopewerewerecaejawa, xua copia-ewetawanapatsi.

⁸Daxita baja paliwaisi pacatoyaquinatsi, pexaniajailiwaisi cajena. Nexata, jitsipajë ajumesaëya jiwi netsipaebaponaenexa bajarapaliwaisi, pamonae Diosojawabelia pesiwanajamatabëcuenecopabiwi, pejamatabëcuene-enaenexatsi ëpexaniacuene pexanaejawa. Bajarapaliwaisi-ata bitso pexanialiwaisi, jiwi pejamatabëcuenyawenonaeliwaisitsi. ⁹Itsia necujaru-bijawata, nawecua-itawetsianame saya jema natsiquejemaliwaisixi itsamona pecabarëcuaicuajiaiyaniwa, pacuenia judíowi pijamonaemi pewëñëxi yabara,^c Dioso penajumecopatsiliwaisi Moisés-pijinëta yabara-ata, bajarapaliwaisianë yabara anaeya pecajumenotsiyaniwa. Bajarapacuenia pecabarëcuaicuajijawa apoxanepanae, tsipaji jiwi apojamatabëcuenyawenonaenacuenejawayonexa-ata.

¹⁰Pajijiw peliweisita nawecuanatsanaeya-exanapona^d Jesús pijajiwi, jume-itawetsianame caeto, anijatobeje-ata. Nexata, itsa apocopatsi tsane necuene-itawetsicujinae, rowialia pacapitsapaeya-exanaename Jesús pijajiwiwecua.

¹¹Yapëtaneme rabaja mapacueneje. Ponë peneta copata pexaniajailiwaisi pejumexaniataejawami, najamatabëcuenebijiana pibisiacuene pexanaexae. Nexata, bajaraponë pijacuata naneconita Diosojawabelia.

Pablo pematatsënëa itsaliwaisi to-itoroba Titojawabelia

¹²Pacujinae cato-itorobialitsi Artemas, itsa jume, Tíquico, bajaraponë itsa patsialia xamëjawabelia, nexata xamë bepíjia renamë tsane xanë-jawaberena. Nacaxitajarabianatsibeje Nicópolis tomarata, tsipaji bajarapatomarata natocaëjëtajë taponaponaenexa daxita emarapae. ¹³Itsa baja pacawecuaponaena abogadonë Zenas, Apolos-beje, yawenonaename pacuenia namatawenonaenabeje pijanamutobejenexa, itsacuenejawayo-ata petosajinaeyaniwatsibeje penajetarucaejawatabeje namutua. ¹⁴Cujarubianamenua pamona, Jesús peliweis wajanajuajumexaniataewi, pexaniacuene peyawenonabiabinexa pamona pepacuene namatawenona. Bajarapacuenia itsa exanawanapaena, nacopabiana pexaniacuene pexanawanapawewi.

c 3:9 Taema 1Ti 1:4. **d 3:10** *peliiwaisita nawecuanatsanaeya-exanapona*: Bajarapacuenia Pablo muxujioba bepexaniajailiwaisi itajara pecujarubiwi yabara, pamona-ata pibisiacuene baracuaicuajai itsajiwi Dioso peliweis pecujarubijawa yabara. Itsa xaniawaetsia pepaebinë itsa apocujarubi, nexata be-exana pacuenia exanabeje Aquila, Priscilabeje, Apolos-jawabelia. Hch. 18:24-26.

Pablo penapëjibiliwaisi

¹⁵Daxita pamonaē yajawaponaponajë, cajamatabënajinalia. Pajamatabë-najinaliajë daxita pamonaē patane-asiwawi, patanajuasiwanajamatabëcuenecopabiwi Diosojawabelia. Pacatojitsipatsi Dioso asiwaya papecayawenonaponaejawa papeca-itaxutotsoniataexae.

Filemón

Mapabaxutoje Apóstolnë Pablo toyaquina Filemón-jawabelia

Pablo pebajacobiliwaisi

¹Xanë Pablonë, Jesucristo pijajiwitonëxaenë, naneconitsiaponaponajë penaneconitsiwi pejebabiabibota, tapaebanajetarucaexae pexanialiwaisi Jesucristo peliwaisi. Paxanëbeje, wajabananë Timoteobeje, pacatoyaquinatsibeje mapabaxutoje. Filemón, bitso paca-asiwatsibeje patacayajawanacuenebabiabixaebeje. ²Bajarapacuenia pabajacobajëbeje pamonaë Jesús pejumexaniataewi, nijabota penacaetuatabiwi. Pabajacobajëbejenua wajabanawa Apia, Arquipo-ata, pajiwiibeje paneyawenonabiababeje Dioso pijacuene patatonacuenebabiabijawatabeje. ³Pexaniacuenia pacatojitsipatsi waxa Dioso, Wajatuxanenë Jesucristobeje, papecajamatabëwënëtsinexa papeca-asiwajamatabëcuene, papecabarajamatabëxanepanaejamatabëcuene-ata, jamatabëcuenexanepanaeya panenajujinawanapanexa.

Pablo towajëta Diosojawabelia Filemón yabara

⁴Filemón, tawajëtsijawata Diosojawabelia pexaniajamatabëcuene rajutabiabajë xamë yabara, tacanajamatabënapitabiabijawata. ⁵Pexaniajamatabëcuene rajutabiabajë Diosojawabelia, tacawënëliwaisitaejawata nitaxutujamatejematsaponaponaejawa, niasiwajawanua Wajatuxanenë Jesucristo, daxita pamonaë-ata bajaraPonëjawabelia pesiwanajamatabëcuenecopabiwi. ⁶Towajëtabiabajënu Diosojawabelia pamonaë-ata siwanajamatabëcuenecopaba Jesucristojawabelia, xamë netsipaebixae pexanialiwaisi, Cristo peliwaisi. Towajëtabiabajë bajarapamonaë xaniawaetsia pewajënaeyabelia pitaxutujamatejematsawanapaenexa Dioso, pijajiwixae peyapëtaeponaenexanua paxaniacuenëjawanë exanaponaejitsia Jesucristo wajanacayawenonaejawanë. ⁷Casiwajamatabëcuenëbarëyatsi bitso, tsipaji cawënëliwaisitanetsi, niasiwajawa itsamonae Dioso pitapetsiwitsi, Jesús pijajiwixaxa. Cawënëmuxuna najamatabëcuenesaëtatsi, tsipaji daxita Jesús pijajiwixi jamatabëcuenëbataponaponame.

Pablo itoroba, Filemón xaniawaetsia pecopiapitsinexa Onésimo, itsapatajopalia

⁸Bajarapacuenia Jesús pijajiwixi niasiwaxae, pexaniacuenë cawajëtatsi taneto-exanaenexamë. Xanë, Cristo tane-itorobinëxae,

nejamatabëcuenecaējēpa picani taca-itorobinexa xua bexaname, Dioso pecasi-wabarëyanexa. ⁹Itsiata, taca-asiwaxae, saya pexaniacuenia cawajëtatsi. Xanë, Pablonë, perujunënë baja. Maparucæje naneconitsiaponaponajë penaneco-nitsiwi pejebabiabibota, Jesucristo pijajiwitonëxaenë. ¹⁰Nexata, cawajëtatsi pexaniacuenie taneto-exanaenexamë Onésimojawabelia. Bajaraponë, majotaje patajopa, nijajiwitonë, pecawecuanajetabijirawinë. Nexata, bajaraponë naneconitsiaponapona itsa xanë-ata naneconitsia ponaponajë penaneconitsiwi pejebabiabibota. Bajarajota, pataponaponaewawatabeje, tsipaebajë Jesucristo peliwaissi. Nexata baja, siwanajamatabëcuenecopata Jesucristojawabelia. Bajaraxuata, Onésimo⁴ taniji taxënatocuenia ¹¹Bajaraponë picani copiaya xamënexa apocacueneyawenonae. Itsiata, aeconoxae waxaitsibejenexa naca-cueneyawenonabeje, pesiwanajamatabëcuenecopatsixae Jesucristojawabelia. ¹²Nexata, icatsi Onésimo caewëa cato-itorobaliatsi, bitso ta-asiwanë. Bajaraponë xaniawaetsia copiapitsianame, pacuenia xanë necopiapitsipame.

¹³Bitso picani Onésimo asiwanë xanëjawata peponaponaewawa, taneyawenonaenexa naneconitsia taponaponaexae penaneconitsiwi pejebabiabibota, pexanialiwaissi, Jesucristo peliwaissi, jiwi tatsipaebabiabixae. ¹⁴Itsiata baitsi jane, apojitsipaenë, copiaya xamëjawabelia cawajëtsinejewatsi, Onésimo taneyawenonaponaponaenexa. Xanë baitsi, apojitsipaenë taliwaissita taca-urabicuenia tanetsicopatsinexamë. Biji rajane, picani jitsipajë, cawajëtsinejewatsi, nijacuata tanetocopatsinexamë.

¹⁵Belia meta, Onésimo cawecuanajetabijirawa, caematacabibeje saicaya pecawecuaponaponaenexa. Itsiata, aeconoxae penawiatsicujinae xamëjawabelia, panajuaponaponaenamebeje daxitamatacabijawabelia. ¹⁶Itsiata, aponawiatsialia tsane nijajiwitonëcuenia. Biji rajane, patajopalia niasiwanëcuenia, nijamonaenë Cristo pejamatabëcueneta. Xanë picani bitso asiwanë Onésimo. Itsiata, xanë tasiwajawa matatoxenetsia, xamë bitso asiwamë tsane, nijajiwitonëxae, nejuyapijinëxae-ata Cristo pejamatabëcueneta.

¹⁷Nexata, itsa netaneme wajanajuanacuenebaponaponaenëbejecuenia, bajaraponë copiapitsianame, pacuenia xanë necopiapitsipame. ¹⁸Bajaraponë itsa catonaneconita, itsa ca-amoneyabanua, nexata xanë bajarapamatamo neyanijobianame tacamatamotsinexa. ¹⁹Peneta raja pa-itanebërëtoyo jumaitsi: «Xanë Pablonë, camatamotsianatsi cajena», jai, xanë tajacuata tacobeta yaquinajë. Itsiata pijinia pacuenia niamoneyabame, apocato-itajëtsitsi. Xamë picani matatoxenetsia niamoneyabame Onésimo peca-amoneyabijawawecua, tacatsipaebijamatabëcuenie Jesús Peliwaissi, tsipaji xanë tjamatabëcueneta siwanajamatabëcuenecopatame bajaraPonëjawabelia. ²⁰Xaniajainë cajena. Tajabananë, pacuenia cawajëtatsi, xaniawaetsia copiapitsianame Onésimo, Jesucristo pijajiwitonëxaemë. Bajarapacuenia itsa exanaename, bitso nejamatabëcuenebarëyaya-exanaename.

²¹Catoyaquinatsi mapabaxutoje, taca-itaxutuajamatejemaxae, matatoxenetsia ne-exanaejawanexa tacawajëtsicuenia. ²²Caecuenia tawajënaeyabelia

a 1:10 Onésimo: Onésimowënë mapajamatabëcuenie xaina: «pecuexanepanaenë», pejaijume. Onésimo, imata itsa ponapona Filemón-jawata, nacobetoxota penamatamotsijawa Filemón pijajawa. Xuacujinae, wecuanajetabijirawa pijatuxanenë. Bajaraxuata, Filemón-nexa Onésimo apotsitapecuexanepanaenëtsi.

cawajětatsi nijabota tanetoxaniawaetsinexamë, itsajota patsijitsianë itsa ponajë paxamëjawabelia. Bajayajebi patanetowajëcabiabixaemë Diosojawabelia tapatsinexa paxamëjawabelia, canaējëtajë Dioso belia papecajumecanawiatsijawa panewajëcaecuenia.

Pablo penapëjiobiliwaisi

²³ Pacabajacobalia Epafras, ponëbeje panajuaponaponajëbeje penaneconitsiwi pejebabiabibota, Jesucristo pijinia pijajiwitonëxae. ²⁴ Pacabajacobalianua Marcos, Aristarco, Demas, Lucas-ata. Daxita bajarapamonae patanajuanacuenebiwi Dioso pijacuene.

²⁵ Pexaniacuenia pacatojitsipatsi papecajamatabëcuenewënëtsijawa papeca-asiwajamatabëcuene Wajatuxanenë Jesucristo papecajamatabëcueneyawenonabiabinexa. Bajara-itsi tsane.

Hebreos

Mapabaxutoje Dioso pijajiwitonë toyaquina Jesús peliwaishi pejumexaniataewi, judíowijawabelia

Dioso yapëtaeya-exana pejumeliwaishi jiwijawabelia
pexënato pejamatabëcueneta

1 ¹ Bajayatami, Dioso, apocaecueñejawayocuenia, napëñayapëtaeya-exanabiaba^a peliwaishi profetawijawabelia. Nexata juya, profetawimi, pacuenia Dioso itorobatsi, tsipaebabiaba wajasalinaiwimi, judíowijawabelia. ² Nexata jane baja, aeconoxae, mapamatacabitaje, Dioso nacayapëtaeya-exana paliwaishi nacatoxaina wajanacayapëtaeya-exanaenexa, pexënato pejamatabëcueneta. Bajayatami, bajaraPonë exana mapanacuaeje, daxitacuenen yajawa. Dioso tocopatatsinua pewetsinënexa daxitacuenen. ³ Nexata, pexënato nacatsitajëta paxa Dioso, papiniijamatabëcuenesaënë xaina, papexaniajamatabëcuenen-ata. BajaraPonë paxa Dioso pejamatabëcuenen-jëpaenë. Nexata, Dioso pexënato pejumesaëta daxitanacua abaxë tsiteca xaina mapamatacabijawaberena- ataje. Wajanacasiwatëpaejawata cruzata, wajanacawecua-ajibia-exanaecujinae pibisiacuenen waja-exanaenecunimi. BajaraPonë pona jane baja athëbëabetsia, pe-ecaenexa paxa Dioso pemuxuneneta, pecujuanenia, penajua-ewetsinexabeje daxitacuenen.

Pacuenia Dioso pexënato bitso ayaijamatabëcuenenë
ängelewi matatoxenetsia, yabara peliwaishi

⁴ Bajarapitsicuenen pexainaexae, Dioso pexënato bitso ayaijamatabëcuenenë ängelewi matatoxenetsia. Nexata, Dioso tocopata pinijitaxunae, daxitacuenen pewetsinënexa.

⁵ Dioso baja cajena apojumaitsi cae-ängel-nëjawabelia-ata, pacuenia jumaitsi pexënatojawabelia:

«Xamë raja taxëñatomë. Xanë raja axanë»,^b apojai Dioso ängel-nëjawabelia.

Dioso icatsia apojumaitsi cae-ängelnë yabara, pacuenia jumaitsi pexënato yabara:

a 1:1 *napëñayapëtaeya-exanabiaba*: Bajayata, Dioso peliwaishi peyapëtaeya-exanaenexa profetawimijawabelia paliwaishi tsipaebijitsia mapacueniaje yapëtaeya-exanabiaba: Itsajawata, matacabita bemajitsinaebocuenia, itsajawata merawi majitsinaebota, itsajawatanua rowialia barëcuai-cuaijai profetanëmijawabelia. **b 1:5** Taema Sal. 2:7.

«Xanë raja bajaraponë paxanë. Bajaraponë-ata taxënato»,^c apojai Dioso ángelnë yabara.

Bajaraxuata, yapëtanetsi Dioso pexënato bitso ayaijamatábëcuenenëcuene ánglewi matatoxenetsia.

⁶Bajaraxuata, pacujinae Dioso itorobijitsiatsica pepocaenë pexënato mapanacuaie penaexanaenexa, bajaraPonë jumaitsi ánglewíjawabelia:

«Daxita pataja-ánglewimë, yaíyataeya panematabacabëta patonubenaename taxënato pitabarata, panewënëxaniatsinexa ayaijamatábëcuene yabara»,^d jai Dioso piña-ánglewíjawabelia.

⁷Dioso jumaitsi ánglewi yabara mapacueniaie:

«Pacuenia jowibo bitsojina, bajarapacuenia pijinia tajajiwi, ánglewi, cuene-itsi bepíjia taneliwaísicaponanexa. Be-isotocotiata werebiabiananua daxita pamonaenaneconita xanëjawaberena»,^e jai Dioso ánglewi yabara.

⁸Itsia bailsi jane, Dioso pexënato yabara jumaitsi mapacueniaie:

«Diosoxaemë, neyanacua-ewetsicuene apocatocopiarucae tsane daxitamatacabíjawabelianexa. Neyanacua-ewetsijawata, xaniawaetsia ewetabiabianame.

⁹Bajarapacuenia exanaename, tsipaji asiwaya taename jiwi, pexaniacuene pexanawanapaewi. Cuene-itoyamënuu tsane jiwi pibisiacuene pexanaejawa. Bajaraxuata, xanë, nijaDiosonë, bitso cajamatábëcuenebarëyaya-exanatsi, daxita itsamonae matatoxenetsia»,^f jai Dioso pexënato yabara pejumeliwaísibaxutota.

¹⁰Icatisia, Dioso pexënato yabara jumaitsi mapacueniaie:

«Xamë, petuxanenëmë, exaname mapanacuaie, itsa abaxë ajibi daxitacuene. Nesaëtanua exaname daxita itaboxopijicuene yajawa.

¹¹Daxita bajaraxua, nexanaejawa, werewerecaena. Itsiata bailsi jane, xamë apowerewerecaemë tsane daxitamatacabíjawabelianexa. Daxita xamë nexanaejawa, perujujawa tsane. Pacuenia jiwi penaxatatsijawa, perujujawa banaexana, bajarapijiniá itsi tsane nexanaejawa.

¹²Pacuenia jiwi baquiona penaxatatsijawa, bajarapacuenia itsamatacabi xamë quionaename itaboxo, ira yajawa, pejananacua icatisia nexanaenexa. Itsiata bailsi jane, xamë tsitecaename. Apowerewerecaemë tsane»,^g jai Dioso pexënato yabara pejumeliwaísibaxutota.

¹³Dioso baja cajena caeto-ata ánglewíyajuwënënjawabelia apojumaitsi mapacueniaie:

«¡Ecare abaxë tacujuanenia, daxitacuene wajanajua-ewetsinexabeje! Nijawajabitsaë abaxë copiaya wecatsiwajënaejumecowënëtsia-exanaenatsi nitorobicuenianexa»,^h apojai Dioso. Biji rajane, pexënatojawabelia bajarapacuenia jumaitsi.

c 1:5 Taema 2Sa 7:14; 1Cró. 17:13. d 1:6 Taema Duet. 32:43; Sal. 97:7. e 1:7 Taema Sal. 104:4. f 1:9 Taema Sal. 45:6-7. g 1:12 Taema Sal. 102:25-27 Mapa Salmoyo peyaquinaenë jumaitsi bajarapacuenia Dioso yabara. Itsiata, Hebreos-baxuto peyaquinaenë canacueneba bajarapajumenë Cristo yabara, tsipaji Dioso, Pexënatobeje, caenë tsaponaponae. h 1:13 Taema Sal. 110:1.

¹⁴Daxita ángelewi apotaetsi waja-itaxutota. Bajarapamonae saya Dioso tonacuenebabiaba,ⁱ pacuenia itorobatsi. Nexata, itorobiana bajarapamonae peyawenonaenexa pamonae jumexaniataejitsia Cristo^j peliwaishi, pecapanepaeliwaishinexatsi.

Cristo peliwaishi, pexaniajailiwaishi, apobenamuxujematsitsi

Dioso wajanacapanepaeliwaishinexa

2 ¹Dioso pexénato, pewetsixae daxitacuene, xaniawaetsia benamuxunaewetatsi wajanacatsipaebiliwaishi.^k Bitso baja cajena, pexaniajailiwaishi nacatsipaeba. Nexata, wajawajënaeyabelia asaëyata bejumexaniataewanapatsi, itsamatacabijawabelia-ata, bajarapaliwaishiwecua caewëalia wajajopaeyaniwa wajacuenemijawabelia. ²Bajayata, paliwaishi Dioso najumecopata Moisés-pijinëta, bajarapaliwaishi najumeliwaishi-itoroba ángelewita. Bajarapaliwaishi xaina pitorobisaë. Nexata, pamonae pitorobicueniatsi apojumecowënëtsi bajarapaliwaishi, bajarapaneconiwajëtota Dioso naneconitsia-exanaponatsi. ³Nexata, Dioso itsa naneconitsia-exana pamonae apojumecowënëtsiwi pepaebiliwaishi, bitsoyo biji matatoxenetsia Dioso nacananeconitsia-exanaena, itsa namuxujematatsi Pexénato wajanacayapëtaeya-exanaeliwaishi, wajanacapanepaeliwaishinexa. Wajatuxanenë, Cristo, baja cajena, copiya petsipaebinë pacuenia Dioso capanepaejitsia daxitajiwi penaneconitsia-exanaejawanexawecua. Yapëtanetsi pexaniajaijawa bajarapaliwaishi, tsipaji pamonae jumetane Cristo pepaebijawa, juya nacayapëtaeya-exana pexaniajailiwaishicuene. ⁴Orijibia, Dioso pesaëta cuenecaëjpaeya-exanatsi wajanacatsipaebiwi, petsita-exanaponaenexa pinijicuene pexanaejawanë, jiwi pejamatabëcuenenabenajacaeya-exanaejawanëna. Tocopatunua Espiritu Santo, caejjiwitsi canacujitsia, wajanacajamatabëcuenecaëjpaeya-exanaponaenexa, pacuenia Dioso nacatojitsipa. Daxita bajaraxuanë yabara yapëtanetsi pexaniajaijawa Cristo pepaebiliwaishi.

Pacuenia baja Cristo naexana bejiwitonëcuenia, yabara peliwaishi

⁵Papejananacua yabara pacatsipaebatsi, Dioso baja itsa exanaena, apotocopatsi tsane ángelewi pewetsinexa. Biji rajane, tocopatsiana itsanë^l pewetsinexa. ⁶Bajaraxua yabara, Dioso pejumeliwaishibaxutota tajëwelia jumaitsi jiwi ayaijamatabëcuenewi^m pexanaenexatsi ángelewi matatoxenetsia. Jumaitsi mapacueniaje:

i 1:14 *tonacuenebabiaba*: Taema Sal. 34:7; 91:11; Mt 4:11; Lc 1:19. j 1:14 *Cristo*: Hebreos-baxuto peyaquinaenë, petoyaquinaexae pewënajudíowijawabelia, bajaraponë canacuenebabiaba Cristojume, itsa jume, Dioso pexénato, Jesús yabara, Jesucristo-ata yabara. Cristojume mapejumaitisjumeje: «Dioso najumecapanepaeya pitorobinëtsica, itsa jume, Dioso pitapetsinëtsi», pejaijume. Bajaraxuata, judíowi asiwaya petaenexa Jesús, Dioso pitorobinëtsicuenia, Hebreos-baxuto peyaquinaenë canacuenebabiaba Cristowënë, Jesús-nexa. Taemanua Heb. 2:3-7, 10, 14-18; 5:9. k 2:1 *wajanacatsipaebiliwaishi*: Taema Heb. 1:2, 14. l 2:5 *itsanë*: Cristo yabara jumaitsi. m 2:6 *ayaijamatabëcuenewi*: Dioso itsa exana jiwi, beweliamatabëcuenewi exanatsi ángelewewecua. Bajaraxuata, Jesús itsa naexana jiwicuenia, beweliamatabëcuenenë ángelewewecua. Itsiata, Dioso piasaëya-exanaecujinaetsi petëpaejawawecua, naexana icatsia pepoyaijamatabëcuenenë, pewetsinexa daxitacuene. Bajaraxuata, yapëtanetsi pacuenia jumaitsi Salmo 8:4-6, yabara jumaitsi Jesús, Dioso pexénato. Orjibia, bajarapaliwaishi nacayapëtaeyaxananua pacuenia itsamatacabijawabelia waxaitsi, jiwitsi, ayaijamatabëcuenewitsi tsane ángelewewecua. Taema Heb. 2:9.

«Diosomë, jiwi matatoxenetsia bitso ayaijamatabëcuenenë-atamë,
çdetsa xuajitsia bajarapamonae jamatabënajiname newetsinexa?

⁷Jiwi itsa exaname, beweliamatabëcuenewi exaname ángelewiwecua.
Itsiaata bailsi jane, bajarapitsiwi-ata, ayaijamatabëcuenewi exaname,
peyaiyataewinexatsi. Nexata, tocopatame daxita necobecowë
pewetsinexa.

⁸Tocopatamenua pejamatabëcuenematatoxenetsinexa daitacuene
nexanaejawa»,ⁿ jai Dioso pejumeliwaisibaxutota jiwi yabara.

Nexata, Dioso itsa tocopatsiana daitacuene pexanaejawa jiwi pewetsi-
nexa, itsacuenejawayo-ata apowecuacopatsi tsane. Itsiaata bailsi jane, abaxë
daxita bajaraxua apotaetsi waja-itaxutota jiwi pewetsijawa. ⁹Pajiwitonë
yabara pacatsipaebatsi, Cristo raja. Dioso mapanacuapijiwije bitso piasiw-
xae, to-itorobica pexëato, pesiawatëpaenexa jiwi pijaneconi yabara. Nexata,
pamatacabi bejiwitonëcuenia naexana mapanacuataje, bajaraponë-ata ánge-
lewiwecua beweliamatabëcuenenë picani. Itsiaata bailsi jane, Dioso ayaija-
matabëcuenenë exanatsi daitawecua, athëbëtatsia pe-ecaenexa paxa Dioso
pemuxuneneta, penajua-ewetsinexabeje daitacuene.

¹⁰Dioso baja cajena daitacuene nato-exana bajaraponënexa. Dioso
pexanaecujinae, pejamatabëcueneta daitacuene tsiteca xanepana
mapamatacabijawaberena-ataje. Dioso petsitaxanepanaexaetsi, canaëjëta
pamonae pexi exana Cristo pejamatabëcueneta, ayaijamatabëcuene pena-
juaxainaewinexa. Bajaraxuata, Dioso tocopata Cristo cruzata ayaicuenia
bepejiobia-exanaenexatsi, bajarapacuenia pecapanepaenexa daxita pamo-
nae siwanajamatabëcuenecopaba bajaraPonëjawabelia, peyajawaponapo-
naenexa Dioso pijapeniweniwenanacuatsia. Dioso cana-ëjëta Cristo,
pexaniamatacaponaenë penaexanaenexa mapanacuapijiwije pecapanepae-
jawabelia. ¹¹Bajarapacuenia pexanaejawata, Cristo, jiwi pijaneconi wecua-
ajibia-exana, pamonae- ata aneconihibia-exanatsi, nacaemonae naexana,
tsipaji cae-axapijiwi naexana, Cristo yajawa. Bajaraxuata, Cristo, Dioso
pexëato, apo-ajume-ura: «Tajuyapijiwi raja», pejaijawa, pamonae baja
aneconihibia-exanatsi. ¹²Cristo pijajiwi yabara pejumaitsijawanexa, Dioso
pejumeliwaisibaxutota tajëwelia jumaitsi mapacueniaje:

«Taxa Diosomë, tajuyapijiwijawabelia cawajunupaebianatsi. Nexata,
daxita bajarapamonae tabarënacaetuatsijawata, xamënexa
catonaxëanaenatsi, ayaijamatabëcuene tacarajutsinexa»,^o jai Dioso
pejumeliwaisibaxutota.

¹³Cristo icatsia pejumaitsijawanexa pijajiwi yabara, Dioso pejumeliwaisi-
baxutota tajëwelia jumaitsi mapacueniaje:

«Xanë-ata siwanajamatabëcuenecopatsianajë taxa Diosojawabelia
taneyawenonaenexa, pacuenia siwanajamatabëcuenecopaba
tajuyapijiwi»,^p jai Dioso pejumeliwaisibaxutota.

Cristo icatsia pijajiwi yabara pejumaitsijawanexa, Dioso pejumeliwaisiba-
xutota tajëwelia jumaitsi mapacueniaje:

«Yajawaponaponajë baja mapamonaeje, Dioso pexi, tanetocopatsiwi
ta-ewetsinexa», jai Dioso pejumeliwaisibaxutota.

¹⁴ Waxaitsi, Dioso pexitsi, mapanacua je wajajinawanapaewi, wajaperabëto wajaxainaewinua, bajaraxuata, Cristo jiwitonëcuenia naexana mapanacuataje, jiwiperabëto pexainaenexa. Cristo, jiwiperabëto pexainaenëxae, caë-jëpatsi pebeyaxuabinexatsi wajanacasiwatëpaenexa. Nexata, petëpaejawata cuenesaëmatatoxeneta pepodowathi, ponë xaina picani petëpaejamatabëcuenesaë. Bajaraxuata, jiwi tēpae-ata tsane, icsatia asaë tsane petëpaejawawecua, Cristo pejamatabëcueneta. ¹⁵ BajaraPonë pecuenesaëmatatoxenetsixae pepodowathi, nacawecua-ajibia-exana baja wajacujunawabiabijawami wajatëpaejawata, xua picani nacajamatabëcuenematatoxeneta, junawiaya wajajinawanapaenexa. ¹⁶ Cristo apopatsitsica mapanacuayabetsicaje, ángelëwi peyawenonaenexa. Biji rajane, patsica peyawenonaenexa Abraham-pijinë pepopemomoxi,^q pamonaë Diosojawabelia siwanajamatabëcuene-copaba, pacuenia Abraham-pijinë siwanajamatabëcuene-copata. ¹⁷ Cristo pepatsixaetsica jiwi peyawenonaenexa, nexata toxanepanatsi peponaponaëjawata cuenejëpaëya^r daxitacuenejawalia, pamonaëtsi naca-exanaëjitsia pejuyapijiwitsi. BajaraPonë, sacerdotewi pepopenamatacaitorobinëcuenia xaniajaiya nacayapijiwinacuenebaponapona, Dioso pitabarata. Cuenecaë-jëpatsinua asiwaya wajanacatocuaicuaijainexa Diosojawabelia, wajanacaitaxutotsoniataexae. Jiwitonë penaexanaexae, wajanacasiwatëpaejawata Dioso nacawecua-ajibia-exana pibisiacuene waja-exanaeneconimi. ¹⁸ Jiwi daxitacuene cuenejëpaëya peponaponaexae, Cristo bejiobia-exanatsi. Jamatabëcuene-ëjëtatsinua pepodowathi, pibisiacuene pexanaëya-exanaenexatsi. Bajaraxuata, cuenecaëjëpatsi juya pejamatabëcuene yawenonaenexa pijajiwi, dowathi pejamatabëcuene-ëjëtsiwi.

**Pacuenia Cristo bitso ayajamatabëcuenenë
Moisés-pijinëwecua, yabara peliwaissi**

3 ¹ Tajamonaë, Dioso papecajunatsiwi papijajiwinexamë, xaniawaetsia pacanaëjère Cristo Jesús yabara! Bajaraponë Dioso nacato-itorobica apóstol-nëcuenia, wajanacatsipaëbinexa Dioso pejumeliwaissi. Itapetatsinua, sacerdotewi pepopenamatacaitorobinëcuenia wajanacatocuaicuaijainënexa Diosojawabelia, wajanawajunupaëbixae wajasiwanajamatabëcuenecopabijawa Cristojawabelia. ² Pacuenia bajayatami, Moisés-pijinë daxita Dioso pijajiwi to-ewetabiaba Dioso pitorobicueniatsi, bajarapijinia pacuenia Cristo-ata xaniajaiya naca-eweta Dioso pijajiwitsi, Dioso pitorobicueniatsi. ³⁻⁴ Nexata, pacuenia bo pexanaenë ayajamatabëcuene penacue-nebibowecua, bajarapapijinia pacuenia Cristo, daxitacuene pexanaenëxae, ayajamatabëcuenenë Moisés-pijinëwecua. Pacuenia caëbo canacujitsia xaina pexanaenëtsi, bajarapijinia pacuenia caëbitsaëto canacujitsia xaina petotaxuxuabinëtsi. Nexata, Cristo jiwi pecapanepaenëxae, taxuxuaba

q 2:16 *pepopemomoxi*: Mapamonaë Abraham-pijinë pepopemomoxije: Pamonaë judfowi, pejumexaniataewi Dioso, pacuenia pijasalinainë Abraham-pijinë. (Taema. Rom. 9:7-8); Pamonaë-ata apojudfowi pejumexaniataewi Dioso, pacuenia Abraham-pijinë. (Taema Gál. 3:26-29.) Bajarapabitsaëto beje naexana Abraham-pijinë pepopemomoxi, najëpaëya Dioso pejumexaniataexae. **r 2:17** *cuenejëpaëya*: Cristo apocuenejëpae jiwi, pibisiacuene pexanaponaënaenëxae. Biji rajane, cuenejëpa jiwi, pebejiobia-exanaëjawanëtsi, itsamonaë pitoyajawatsi, pebaracuaicuaijajawatsinua.

pejanabitsaëto, Dioso pijajiwinexa. Bajaraxuata, Dioso, daxitacuen pexa-naenë, tocopata pexënato, Cristo, daxitawecua ayaijamatabëcuenenë petanexatsi. ⁵ Xaniajai. Bajayata, Moisés-pijinë baja cajena, Dioso pijajiwi-tonëxae, xaniawaetsia to-eweta daxita Dioso pijajiwi. Nexata, bajarapamonaewawabelia tajëwelia wajunupaebabiaba pacuenia itsamatacabijawabelia Dioso jumaitsijitsia pijajiwijawabelia. ⁶ Itsiata, Cristo, Dioso pexënatoxae, xaniawaetsia naca-ewetaponapona paxa Dioso pijajiwixaetsi. Yapëtanetsi Dioso pijajiwitsi, xaniajaiya itsa siwanajamatabëcuenecopabatsi Cristo-jawabelia. Itsa jamatabëcuenenarëyaya copia-ewetawanapatsinua Dioso wajanacato-exanaejawanexa, najumecapanepaeya wajanacayawenonaeya-paebijawa, Cristo pejamatabëcueneta.

Dioso pijajiwi apobe-ajamatabëcuenetaja, pecuene-aebinexa Dioso peyawenonaejawanexatsi

⁷Wajacuenae-aebiyaniwa Cristo ayaijamatabëcuenenëcuenë, Moisés-pijinë, ängelewi-ata matatoxenetsia, Espiritu Santo jumaitsi Dioso pejumeliwaisibaxutota mapacueniaje:

«¡Ajena, mapamatacabitaje, itsa pajumetaneme pacuenia Dioso jumaitsi, pëtsa pajamatabëcuenetajamë panejumecowënëtsinexa, ⁸pacuenia bajayata panijasalinaiwimi* ajamatabëcuenetaja! Bajarapamonaemi, pamatacabi petusatonacuata jinawanapa, apojitsipae pexanaenexa pacuenia Dioso itorobatsi».

Bajarapacuenia bajayajebi jamatabëcuene-ëjëba Dioso, 'peyapëtaenexa itsa pepacuenë naneconitsia-exanaejitsiatsi.

⁹»Cuarenta picani pawaipeje, Dioso tsita-exanaponatsi ayaicuenë pexanaejawanë, peyawenonabiabinexatsi. Itsiata, petusatonacuata panijasalinaiwimi jamatabë-itonotabiaba Dioso, tsipaji apojumecowënëtabiabi pacuenia itorobatsi.

¹⁰»Bajaraxuata, Dioso bara-anaepana panijasalinaiwimijawabelia. Nexata, najumecapanepaeya jumaitsi: 'Najamatabëxainabiaba saya ëpibisiacuenë pexanawanapaenexa. Apojitsipae pejinawanapaenexa pacuenia picani tojitsipajë,' jai Dioso.

¹¹»Nexata, Dioso bitso pebara-anaepanaexae panijasalinaiwimijawabelia, najumecapanepaeya jumaitsi: 'Bajarapamonaë apojone tsane, jamatabëcuenenarëyaya pejinawanapaenexa, panacua picani toxaniawaetajë, penacueraewetsinexa pejinaruetsicuenewecua,' jai Dioso», " jai Espiritu Santo panijasalinaiwimi yabara, Dioso pejumeliwaisibaxutota.

¹²¡Bajaraxuata tajamonae, xania panayajiwitaema! ¡Pëtsa, pibisiajamatabëcuene panejamatabëcuenewënëcaexae, pacuene-aebame Dioso, daxitamatacabijawabelianexa piasaëtsaponaponaenë, papecayawenonaejawanexa, bajarapa-aebijamatabëcuene papecatsatsia-exanaeyaniwa Diosowecua, juya panesiwanajamatabëcuenecopabinexa itsacuenejawabelia!

s 3:8 *Panijasalinaiwimi*: Bajarapamonaë judiowi, tsipaji Dioso jumaitsi bajarapacuenia judiowiyajuwënënjawabelia. t 3:8 *jamatabëcuene-ëjëba Dioso*: Taema Sal. 95:8; Éxo. 17:1-7; Núm. 20:1-13. u 3:11 Taema Sal. 95: 7-11.

¹³ ¡Bajarapacuenia pane-exanaeyaniwa, namata-enetsia panajamatabë-cueneyawenonare caematacabi canacujitsia, panecasaëtsawanapaenexa Dioso pane-itaxutuajamatejemajawa, paepatowajëto Dioso nacatocaëjëta wajasiwanajamatabëcuenecopatsinexa Cristojawabelia! Bajarapacuenia namata-enetsia pa-exanaename, caejiwi-ata paxamëyajuwënëjiwi pïajamatabëcuenetajayaniwa, pibisiacuene pexanaponaponaeyaniwa. ¹⁴ Pacuena copïaya siwanajamatabëcuenecopabatsi Cristojawabelia, itsa tsitecawana-paenanatsi wajatëpaematacabijawabelianexa, papexaniacuene xainatsi” Cristo pejamatabëcueneta, aponacatocopiarucae tsane. ¹⁵ Bajarapapexaniacuene panewecua-ajamatabëcuenetajayaniwa, Dioso pejumeliwaisibaxutota jumaitis mapacueniaje:

«¡Ajena, mapamatacabije, itsa pajumetaneme Dioso papecajumaitisjawa, pëtsa pajamatabëcuenetajamë, pacuenia bajayata panijasalinaiwimi petusatonacuata jamatabëcuenetaja!»,” jai Dioso pejumeliwaisibaxutota Israel-pijinë pemomoxi yabara, pamatacabita cuene-aeba Dioso peyawenonaejawanexatsi.

¹⁶ ¿Detsa pamonaë, bajayata bajarapacuenia jumetaë-ata Dioso pejumait-sijawatsi, itsiata apojumecowënëtsi? Baitsi, pamonaemi bajayata Moisés-pijinë barënajetaruca Egipto nacuwawerena. ¹⁷ ¿Detsa jane pamonaemijawabelia Dioso bara-anaepana cuarenta pawaijebe? Pamonaemi pibisiacuene exana petusatonacuata. Nexata, daxita bajarapamonaemi pijaneconi yatëpa bajarapanacuata. ¹⁸ ¿Detsa jane pamonaemijawabelia Dioso najumecapanepaeya jumaitis: «Apopajonemë tsane panenacuera-ewetsinexa panacuata pacatoxaniawaetatsi, jamatabëcuenëbarëyaya panejinawanapaenexa», jai? Bajarapacuenia Dioso jumaitis apo pejumecowënëtsi witsijawabelia. ¹⁹ Nexata, yapëtanetsi panijasalinaiwimi apo pejonejawa panacuajawabelia Dioso toxaniawaetatsi, penacuera-ewetsinexa,* pecuene-aebixae peyawenonaejawanexatsi.

4 ¹ Dioso baja cajena, ira rajutsiapaeba panijasalinaiwimijawabelia,^y penacuera-ewetsinexa, ayaicuenia pejinarutsicujinaë nacueratsiaya. Bajarapijinia pacuenia, maparucae-ataje Dioso tsiteca

v 3:14 *papexaniacuene xainatsi*: Judfowi pijasalinaiwimi apojone panacuajawabelia Dioso toxaniawaetatsi picani, pecuene-aebixae Dioso peyawenonaejawanexatsi. Nexata, naco-pata petusatonacuata, 40 pawaijebe pejinarutsicuenia nacuera-ewetsinejewa. Nexata, Cristo wajanacasiwatëpaexae, nacatomatamota daxita wajaneconi, Dioso aneconijibia wajanacataenexa, jumecowënëtsinejawatsi Dioso penajumecopatsiliwaisi Moisés-pijinëta. Bajaraxuata, bewajanacuera-ewetsijawa wajajumecowënëtsijawamiwecua bajarapaliwaisi. Itsiata, itsamonae judfowi, siwanajamatabëcuenecopabi-ata Jesucristojawabelia, bajarapamonaë canaëjëta caewëarena pejumecowënëtabiabinexa Dioso penajumecopatsiliwaisi Moisés-pijinëta, aneconijibia petanexatsi. Bajarapacuenia itsa exana, jamatabëcuene-enatsi pejumecowënëtsinexa bajarapaliwaisi, tsipaji aeba Jesús papexaniacuene to-exanatsi, pejamatabëcuenenacuera-ewetsia-exanaenexatsi bajarapajamatabëcuene-enaëjawatsiwecua. w 3:15 Taema Sal. 95:7-8. x 3:19 *penacuera-ewetsinexa*: Bajarapamonaë itsa siwanajamatabëcuenecopabijitsipa Diosojawabelia peyawenonaenexatsi pecuene-amoneyabinexa bajarapanacuapijiwimi, nexata aliwaisijibia jinawanapaëjitsipa Canaan nacuata. Bajarapacuenia pijinia, pamonaë siwanajamatabëcuenecopaba Cristojawabelia, aliwaisijibia jinawanapa Dioso pitabarata, Cristo capanepaeya petomatomotsixaetsi pijaneconimi. y 4:1 *panijasalinaiwimijawabelia*: Judfowi pijasalinaiwimi yabara jumaitis.

jamatabëcuene-ewetaponapona, perajutsinexa Dioso pijapenacuera-ewetsijamatabëcuene^z pitaxutuajamatejemawitsijawabelia, bajarapacuenia bajarapamonae penawecuacopabinexa pejamatabëcuene-enabiabijawamitsi, Dioso aneonijibia petaejawanexatsi. Bajaraxuata, caejiwi canacujitsia, bejumexaniantane perajutsijawanexatsi bajarapanacuera-ewetsicuene, jamatabëcuenexanepanaeya pejinawana-paenexa, Dioso pitabarata. Bajarapanacuera-ewetsicuene yabara paxamëyajuwënëwi netsita cuene-aebawanapa. Bajaraxuata, bajarapamonae junawiaya jinawanapa, Dioso pitabarata. ²Pacuenia bajayatami, pexanialiwaitsi tsipaeba panijasalinaiwimijawabelia, bajarapacuenia waxaitsi-ata baja jumetanetsi pexanialiwaitsi wajanacacapanepaeliwaitsinexa. Itsiata baitsi jane, panijasalinaiwimi apotoxanepanaetsi bajarapaliwaitsi pecapanepaenexatsi, tsipaji apojumexaniantae xua jumaitsitsi. ³Itsiata, waxaitsi, wajajumexaniantaewi bajarapapexanialiwaitsi, Dioso nacatocaë-jëta wajajamatabëcuenenacuera-ewetawanapaenexa. Itsiata, pamona apojumexaniantae bajarapapexanialiwaitsi, bajarapamonae yabara Dioso bajayata jumaitsi mapacueniaje:

«Tabara-anaepanaexae apotanejumexaniantaewijawabelia, najumecapanepaeya jumaitsinë: 'Bajarapamonae apojone tsane penacuera-ewetsinexa, panacua picani toxaniawaetajë, jamatabëcuenebarëyaya pejinawanapaenexa,' janë»,^a jai Dioso.

Xaniajai, Dioso wemaxënacuera-eweta baja, daxitacuene pexanaeweret-sicujinae, nacua pexanaematacabita. ⁴Bajaraxua yabara itsaliwaisijawata Dioso pejumeliwaisibaxutota nacayapëtaeya-exana mapacueniaje:

«Siete matcabita, Dioso peweretsixae daxita pexanaejawa, bajarapamatacabita wemaxënacuera-eweta»,^b jai Dioso pejumeliwaisibaxutota.

⁵Icitsia, Dioso pijapenacuera-ewetsijawa yabara, itsaliwaisijawata Dioso pejumeliwaisibaxutota jumaitsi mapacueniaje:

«Bajarapamonae apojone tsane penacuera-ewetsinexa, panacua picani toxaniawaetajë, jamatabëcuenebarëyaya pejinawanapaenexa»,^c jai Dioso pejumeliwaisibaxutota.

⁶Copiaya pejumetaewi bajarapapexanialiwaitsi, apojone panacujawabelia Dioso toxaniawaetatsi, penacuera-ewetsinexa, ajamatabëcuenetajaya pecuene-aebixae Dioso peyawenonaejawanexatsi. Itsiata baitsi jane, Dioso

z 4:1 *Dioso pijapenacuera-ewetsijamatabëcuene*: Dioso pijapenacuera-ewetsijamatabëcuene mapanacuataje, nacacuene-itajëta panacuera-ewetsijawa Dioso nacarajutsiapaeba wajaxainaenexa pijanacuatsia. Itsiata, xua nacarajutsijitsia pijanacuatsia, matatoxenetsia pexaniajawa mapanacuapijjawawecua, tsipaji bajarajotatsia apoxinaetsi tsane wajaperujujamatabëcuene, dowat-hibeje wajanacajamatabëcuene-ëjëbinexa. Mapanacuataje, wajanacuera-ewetsicuenejawabelia cajunua mapajamatabëcueneliwaisianëje: **1)** Dioso aneonijibia wajanacataenexa, wajiawana-jamatabëcueneopatsijawata Jesucristojawabelia, jumecowënëtsicapanepeanejewatsi Dioso penajumecopatsiliwaitsi Moisés-pijinëta. Nexata, Dioso cujunawinejewatsi jinawanapatsi. **2)** Jesucristo nacawecua-ajibia-exana wajanacabara-anaepanaejamatabëcuenemi Dioso, jamatabëcuenexanepanaeya wajajinawanapaenexa daxitamatacabijawabelia bajaraPonëta. **3)** Wajaitaxutuajamatejemajawa Dioso, wajanacayawenonaenexa daxitacuene yabara. **4)** Itsamatacabijawabelia wajajawajinawanapaenexa Dioso pijanacuatsia, itsajota wajapibisiyajamatabëcuene aponacajamatabë-itonotsi tsane, pibisiacuene wajanaca-exanaeya-exanaenexa. **a 4:3** Taema Sal. 95:11. **b 4:4** Taema Gén. 2:2. **c 4:5** Taema Sal. 95:11.

tsiteca jamatabëcuene-ewetapona, perajutsinexa pejumexaniataewitsijawabelia penacuera-ewetsijamatabëcuene. ⁷Dioso itsiata, itapeta itsamatacabi jiwi pexinaejawanexa bajarapanacuera-ewetsijamatabëcuene. Bajara-xua yabara, bexëajawabelia David-pijinëjawabelia Dioso pejumaitsijawa nacayapëtaeya-exana. Bajaraponë juya tajëwelia wajunupaeba pacuenia itsamonae Dioso pijapenacuera-ewetsijamatabëcuene pexinaejawanexa ajena mapamatacabitaje. Jumaiti mapacueniaje:

«¡Ajena mapamatacabi itsa pajumetaneme Dioso pejume papecajunatsijawata, pëtsa panamuxujematame panejamatabëcuenetajaxae!»,^d jai David-pijinë tajëwelia.

⁸Bajayata, Josuépijinë matacanajetaruca israelitawi petusatonacuajawawerena, pebarëpatsinexa Dioso panacuajawata tsipaebatsi, nacuera-ewetsiaya pejinawanapaenexa. Peneta, Josuépijinë pepacuene, bajarapanacuata, itsa rajutsipatsi Dioso pijapenacuera-ewetsijamatabëcuene, pematatsënëa Dioso apowajunupaebi tsipae, itsapenacuera-ewetsijamatabëcuene pexinaejawanexa. ⁹Bajaraxuata yapëtanetsi panacuera-ewetsijawa sajina Dioso pijajiwi pexinaejawanexa, Israel-pijinë pemomoxi penacuera-ewetsinacuamiwecua. ¹⁰Pajiwi caxitajaraba apoxainaewajami Dioso pijapenacuera-ewetsijamatabëcuene, matapania jane baja wemaxënacuera-eweta^e pexanaponaponaecueni, xua yabara Dioso aneonijibia taejitsiatsi. Bajarapijinia pacuenia, bajayatami Dioso-ata wemaxënacuera-eweta daxita pexanaecueni, nacua pexanaeweretsicujinae. ¹¹Bajayatami, itsamonae israelitawi apojone panacuajawabelia picani Dioso toxaniawaetatsi penacuera-ewetsinexa, pecuene-aebixae bajaraPonë peya-wenonaejawanexatsi. Wajacuenëjëpaeyaniwa pecuene-aebiwi Dioso, benajamatabëcuenesaëtatsi wajajumexaniataejawa Dioso pepacuene wajanacarasjitsijawa baja bajarapanacuera-ewetsijamatabëcuene.

¹²Dioso cajena pejumeliwaisi xaina bitso piasaëjamatabëcuene. Xainanua bitso pesaë. Nexata, caëjëpatsi ayaicueni pexanaenexa pejumesaëta. Bitso pexuijailiwaixinua, anijabarëneniabeje pexuijai-espada matatoxenetsia. Pacuenia jiwi espadata caucubijitsipa petsatsinexa pesi penamataropobijawanë, bëpënëa perubenaepesitoxi-ata, bajara-itsi Dioso peliwaishi. Nexata, bajarapaliwaisi wajajumetaejawata, bëpënëajawabelia nacatsijamatabëjunua, petsatsinexa wajajamatabëcuene, wacanaëjëtsicueniabeje,^f wajanacayapëtaeya-exanaenexa pacuenia Dioso pitabarata bëpënëa jamatabëcuene-itsitsi wajanajamatabëxainaecueni.

¹³Xua raja Dioso pecobecowëjawa apocuenecaëjëpae pewecuanamatayatsijawatsi. Bajaraxuata, waxaitsi aponacacajëpae Dioso wajawecuanamatayabinexa itsacuenejawayo-ata. Bajaraponë tane daxita xua exanatsi. Nexata, itsamatacabi nawajunupaebianatsi daxita waja-exanaecuenemi

d 4:7 Taema Sal. 95:7-8. **e 4:10** *wemaxënacuera-eweta*: Wemaxënacuera-eweta, tsipaji Cristo tomatamotatsi baja daxita pijaneconimi, pesiawatëpaejawatatsi cruzata. **f 4:12** *wajacanaëjëtsicueniabeje*: Wowajumeta pitsapa, «Espíritu». Jiwijumeta espíritujume, pitsapa «pejumape», itsa jume, «peyati». Pacujinae Dioso exana Adán, pepumu-uxunijawatatsi piasaë-espíritu rajutatsi, Adán pexainaenexa penato-itapetsijamatabëcuene, pecanaëjëtsijamatabëcuene-ata, pacuenia Dioso xaina. Bajaraxuata, canacuenebatsi «wajacanaëjëtsicueni» mapaversiculota Espíritu yabara.

bajaraPonējawabelia, wajanacayapētaeya-exanaenexa itsa tsitapexaniacuenetsi, itsa jume, tsitapibisiacuenetsi.

**Cristo raja asiwaya wajanacatocuaicuajainē Diosojawabelia,
sacerdotewi pepopenamatacaitorobinēcuenia**

¹⁴ Jesús baja cajena Dioso pexēnato. BajaraPonē baja pona Diosojawabet-sia. Nexata, nuca paxa Dioso pitabarata, wajanacatocuaicuajainexa sacer-dotewi pepopenamatacaitorobinēcuenia, bajarapacuenia wajanacayaweno-nabiabinexa. Bjaraxuata, waxaitsi becasaētsawanapaetsi Diosojawabelia waja-itaxutuajamatejemajawa, xua yabara nawajunupaebabiabatsi itsamo-naejawabelia. ¹⁵ Jesús, baja cajena wajanacatocuaicuajainē Diosojawabelia, sacerdotewi pepopenamatacaitorobinēcuenia. Wajajamatabēcuenefae-fae-naejawa wajanacayapētaexae, asiwaya nacayawenonabiaba, pepodowathi wajanacajamatabēcuenē-ējētsijawata, tsipaji Jesús-ata, abaxē itsa ponapona mapanacuataje, jamatabēcuenē-ējētatsi dowathi. Itsiata baitsi jane, Jesús caeto-ata pibisiacuenē apo-exanae. ¹⁶ Jesús paxa Dioso pitabarata penu-caexae, wajanacatocuaicuajainexa, bajaraxuata itaxutuajamatejemaya ajumejunawijibia wajacuata benawajētatsi Diosojawabelia, wajanacayawe-nonaenexa. Nexata, Dioso asiwaya wajanaca-itaxutotsoniataexae, nacaya-wenonaena wajanamatawenonaejawata.

5 ¹ Dioso itapetabiaba sacerdotewituatujēta, caenē pepopenamatacaito-robinēnexa, bajaraponē daxitajiwi petocuaicuajaitsabiabinexa Diosoja-wabelia. Nexata, xuanē jiwi capatabiaba ofrendacuenia perajutsijawanexa, bajaraponē juya rajutabiaba Diosojawabelia. Padajubinē-ata capatabiaba pijaneconijamatabēcuenē, bajaraponē juya totajuitabiaba altar-jumata Dio-sojawabelia, pesiwajamatabēcuenecaewinexatsi pibisiacuenē pexanae-neconimi. ² Nexata, sacerdotewi pepopenamatacaitorobinē jiwitonēxae, caē-jēpatsi dowathi pejamatabēcuenē-ējētsinexatsi pibisiacuenē pexanaenexa, pacuenia daxitajiwi. Bjaraxuata, cuenecaējēpatsi asiwaya pitaxutotsoni-taenexa pamonae dowathi jamatabēcuenē-ējētatsi, pibisiacuenē pexanae-nexa. ³ Orijibia, sacerdotewi pepopenamatacaitorobinē pibisiacuenē itsa exana, tsicarucatsi pijacuata pecapatsijawa pijadajubinē saicaya,^g pijaneconijamatabēcuenē petajuitsinexa Diosojawabelia. Pacuenia itsamonae yabara to-exanabiaba, bajarapacuenia pijacuata nato-exanabiaba, Dioso pesiwaja-matabēcuenecaewinexatsi pijaneconimi. ⁴ Itsanē-ata pijacuata sacerdotewi pepopenamatacaitorobinēnexa aponaexanae, daxitajiwi petocuaicuajainexa Diosojawabelia, peyaiyataenexatsinua. Biji rajane, sacerdotewiyajuwēnēnē, caenē, Dioso itapetatsi sacerdotewi pepopenamatacaitorobinēnexa, pacue-nia bajayata Aarón-pijinē-ata Dioso itapetatsi sacerdotewi pepopenamata-caitorobinēnexa. Nexata, bajayata Aarón-pijinē-ata daxitajiwi yaiyatanetsi. ⁵ Bajara-icatsia itsi Cristo-ata. Pijacuata apona-itapetsi sacerdotewi pepo-penamatacaitorobinēnexa, wajanacatocuaicuajainexa Diosojawabelia. Biji

^g 5:3 *pijadajubinē saicaya*: Itsamonae, sacerdotewi pepopenamatacaitorobinē-ata, pibisiacuenē itsa exana, tsicarucatsi copiya dajubi penatotajuitsinexa pijaneconijamatabēcuenē Diosoja-wabelia. Matapania Dioso pesiwajamatabēcuenecaewicujinaetsi pijaneconimi, toxanepanatsi sacerdotewi petotajuitsinexa itsamonae pecapatsidajubi Diosojawabelia, pesiwajamatabēcuenē-caewinexatsi pijaneconimi.

rajane, Dioso itapetatsi sacerdotewi pepopenamatacaitorobinënexa, daxita-jiwi peyaiyataenexatsi. Dioso peyapëtaeya-exanaenexa Cristo pitapetsijawa, copiaya jumaitsi mapacueniaje:

«Xamë raja taxënatomë. Ajenacujinae canawajunupaebatsi axanëcuene»,^h jai Dioso.

⁶Orijibia itsabaxutota, Dioso pejumeliwaisibaxutota, jumaitsi mapacueniaje:

«Xamë raja sacerdotewi peponenamatacaitorobinë tsane daxitamatacabijawabelianexa. Pacuenia Melquisedec jamatabëcuene-itsi, bajarajamatabëcuene-itsimë tsane»,ⁱ jai Dioso pexënatojawabelia.

⁷Cristo abaxë ita ponapona mapanacuataje, pinijijumeta ya-itaxutonueya napënewajëta Diosojawabelia, petëpaejawawecua pecapanepaenexatsi.

Itsiaata, Cristo nacaeweta paxa Diosojawabelia, peto-exanaenexatsi pejitsipaecuenia. Bajaraxuata, xaniawaetsia Dioso jumetanetsi, pejamatabëcuene-yawenonaenexatsi. ⁸Cristo, Dioso pexënato, ayaijamatabëcuenenë-ata, itsiaata paxa jumecowënëta. Nexata, pijacuata nacopata pebejiobia-exanaenexatsi pacuenia Dioso tojitsipatsi, apoijitsipae-ata picani petëpaejawanexa. Bajarapanabejiobitsijamatabëcuene natoyapëtane pejumecowënëtsijawa paxa Dioso. ⁹Bajarapacuenia pejumecowënëtsixae petëpaejawabelianexa, paxa Dioso cuene-itajëtatsi pecuenecaëjëpaejawatsi sacerdotewi pepopenamatacaitorobinë penaexanaenexa. Naexananua pecapanepaenënexa daxita pamonaie jumecowënëtanawapatsi pacuenia itorobatsi. Nexata, bajarapamonae Dioso rajutsianatsi matababi apopewerewerecaejawa. ¹⁰Dioso baja cajena, itapetatsi Cristo sacerdotewi pepopenamatacaitorobinënexa, jiwi petocuaicuajainexa Diosojawabelia, pacuenia bajayata cuene-itsi Melquisedec.

**Pamonae Cristojawabelia siwanajamatabëcuenecopaba
pewajënaeyabelia jamatabëcueneliwaisi naweretapona
Dioso pijacuene petonacuenebaponaexae**

¹¹Xainajë picani ayailiwaisi patacatsipaebinxaxa, paneyapëtaenexa xua yabara Cristo, Melquisedec-beje nacuenëjëpabeje. Itsiaata baitsi jane, ayapëbeje patacajumeyapëtaeya-exanaenexa bajarapaliwaisi. Pacuenia pejewaxi be-axayo bayapëtaepona wajacujarubijawa, bajarapajamatabëcuene-itsimë. ¹²Bajayajebi baja picani, Cristojawabelia pasiwanajamatabëcuenecopabame. Bajaraxuata, juya baja picani, bepatsipaebaponaie itsamonaejawabelia Dioso peliwaisi, bajarapamonae pejamatabëcueneliwaisinaweretaponaenexa Dioso pijacuenejawata. Itsiaata baitsi jane, abaxë panamatawenoname icatsia papecatsipaebinxaxa bajarapaliwaisi, peyapëxanepanaeliwaisianë, Dioso peliwaisiyajuwënëjawanë, paliwaisianë copiaya pacatsipaebatsi, apopanejumeyapëtaexae. Paxamë apopanejamatabëcuenenaweretsixae, nexata pacuenia pejewaxinacuetoxi ëmitobarëmene apa, apoxae abaxë pexaejawaxa, bajarapajamatabëcuene-itsimë. Paliwaisianë baitsi ajumeyapëbeje, apopacacaejëpae orijibia panejumeyapëtaenexa. ¹³Pamonae abaxë namatawenonona petsipaebinxaxatsi peyapëxanepanaeliwaisixi, Dioso pejumeliwaisi,

bajarapamonae cuenejêpa bemitopiapaenacuetoxi. Bajarapamonae abaxê apojumeyapêtae xaniawaetsia pacuenia Dioso aneonijibia tane jiwi.

¹⁴ Pacuenia penaweretsiwi pijacuata xane pexaejawa, bajarajamatabêcuene-itsi pamona pejamatabêcuenewitsabiwi Diosojawabelia. Nexata, cana-cuenebabiaba Dioso peliwaisi, penato-itapetaponaenexa xua pexaniacuene pexanaenexa, xua-ata pibisiacuene pexanaeyaniwa.

6 ¹⁻² Waxaitsi baja becopabatsi mito piapaenacuetoxi wajajamatabêcuenejêpaejawa, Dioso peliwaisi wajacanaêjêtsicuene yabara. Biji rajane, wajawajênaeyabelia bejamatabêcueneliwaisinaweretaponatsi Dioso pija-cuene wajatonacuenebanawanapaexae. Bajaraxuata, aponamatawenonaetsi baja pematatsênêa wajanajumenotsijawa, Cristo peliwaisi yabara, jiwi pewecuanajamatabêcuene-pênêyrobijawa pexanaecuenemi,¹ juya pesiwanajamatabêcuene-copabinexa Diosojawabelia, aneonijibia petanexatsi, jiwi penabautizabicuene^k yabara-ata. Aponamatawenonaetsi icatsia wajanacucujarubijawa xua yabara ancianowi tsimatanacobeuatabiaba,¹ jiwi petowajêtsijawata, Dioso icatsia piasaêya-exanaejawanexa jiwi petêpaecujinae, pacuenia-ata naneconitsia-exanaejitsia daxita pijaneconi pexainaewi. Bajarapaliwaisianê baja jumexaniatanetsi ajenâ siwanajamatabêcuene-copabatsi Cristojawabelia. ³ Dioso itsa nacatocopataponaena, wajawajênaeyabelia jamatabêcuenewitsabaponaenatsi, pacuenia Dioso nacatojitsipa.

⁴ Itsamonae baja picani, Dioso peliwaisi jamatabêcuene-itayotatsi. Nexata, jumexaniatane baja picani Cristo peliwaisi, Dioso pecapanepaenexatsi. Espíritu Santo-ata baja picani tsijamatabê-ecatsi. ⁵ Yapêtanenua baja picani, pacuenia Dioso pejumeliwaisi bitso xanepana, pacuenia-ata taejitsia Dioso pinijicuene pexanaejawa, pamatacabi pejananacua exanaena. ⁶ Bajarapamonae, yapêtae-ata bajarapapexaniacuenejawanê Dioso peto-exanaejawatsi, itsa nawecuacopaba copiaya Cristo peliwaisi pejumexaniataejawami, nexata to-acuenebi tsipaetsi icatsia^m pejanacuena penajamatabêcuene-pênêyrotsinexa Cristojawabelia. Bajarapacuenia itsa exanaejitsipa, najamatabêcuene-itajêtsipa apoheyaiyataejawa Dioso pexênato, tsipaji bepejanacuena pebeyaxuabijawa tsipae cruzata pijaneconi yabara. ⁷ Jiwijamatabêcuene,

j 6:1-2 *pexanaecuenemi*: Mapajumejawata nacajunua mapajamatabêcueneliwaisije; Pibisiacuene pexanaejawa pecopabinexa. Pecopabinexanua pesiwanajamatabêcuene-copatsijawa, pejumecowênêtsijawata Dioso penajumecopatsiliwaisi Moisés-pijinêta, Dioso aneonijibia petanexatsi. k 6:1-2 *penabautizabicuene*: Griegojumeta canacueneba «lavamientos». Nexata, apoyabarajumaitsi jiwi êpenabautizabijawa. Yabarajumaitsinua, xua judiowi exanabiaba merata pequiatijawata, bepenaxuirabicuenemi penawecua-ajibia-exanaenexa Dioso pitabarata. l 6:1-2 *tsimatanacobeuatsi*: Dioso peliwaisi penacujarubiwi caejamatabêcuene apoxinae xua yabara peyaquinaenê canaêjêta ancianowi jiwi petsimatanacobeuatsijawa yabara. Itsamonae canaêjêta, pacuenia bajayatami ancianowi tsimatanacobeuata jiwi pebautizabicujinae, pecopiapitsinexatsi Jesús pijijiwitonêcuena, itsa jume, Espíritu Santo pejamatabêcuene-caêjêpaeya-exanaenexatsi, Dioso pejitsipaecuenia. Taema Hch. 8:18; 1Ti 4:14. Itsamonae pijinia canaêjêta, pacuenia ancianowi tsimatanacobeuata, Diosojawabelia petowajêcaewinexa, Espíritu Santo pitapetsiwi ancianowinexa, pamona-ata Jesús peliwaisi petsipaebiwinexa itsamonaejawabelia. Orijibia, ancianowi tsimatanacobeuatabiaba pamona piawitanewi, petowajêcaejawata Diosojawabelia. m 6:6 *to-acuenebi tsipaetsi icatsia*: Heb. 7:27-jawata wajanacayapêtaeya-exanaexae pacuenia Cristo caeto jiwi siwatêpa, pematamotsinexa daxitajiwi pijaneconi, nexata yapêtanetsi pacuenia nawitsia apobeyaxuababiabi jiwi pijaneconi yabara pacuenia beyaxuababiaba dajubimonae. Nexata, jiwi beyapêtane pacuenia ajibi itsacuenejawata Cristo pesiawatêpaejawatsiwecua, xua yabara Dioso aneonijibia taejitsiatsi.

irapijicuene-ata, najëpaeya, Dioso pexaniacuenia cueneyawenonatsibeje. Dioso pexaniacuenia ema runaeya-exanabiaba irajumawereca pesucuet-sinexa. Pe-irasucuetsijawata pe-ubijawa nawitsia capitsipabiaba pexania-banacale, nexata pe-ubinë siwajamatabëcuenebarëya tsabiabi. ⁸ Itsiata, bajarapa-ira itsa capitsapabiaba piabejewanë, pe-ejuwijawanë, apoxa-nepanae itsacuenejawayonexa-ata. Nexata, bajarapa-irata penacuenebinë tocaëjëta petajuitsinexa, piajibia-exanaenexa piabejewanë. Bajarapacuenia pijinia, Dioso cuene-ajibia-exanaena pamona capitsapabiaba apopejitsi-paecuenejawanë, yapëtae-ata pexaniacuenia peyawenonaejawatsi Cristo pejamatabëcueneta.

⁹ Tajamona, bitso pataca-asiwawi, bajarapacuenia pacatoyaquinae-atatsi apopanejitsipaejumenë, yapëtaniji Dioso pejitsipaeuene pane-exanaejawa, panesiwanajamatabëcuenecopabixae Cristojawabelia. Pacuenejëpame baitsi copiyabitsaëto, pamona Diosonexa pexaniacuen to-exanabiaba. ¹⁰ Nexata, Dioso ëpexaniacuen pexanabiabinëxae, aponacofënëtsi tsane papexaniacuen baja pa-exaname, paneyawenonaejawata Cristo pijajiwi-jawabelia, panenajamatabëcuene-itajëtsinexa pane-asiwajawa bajaraPonë. Bajarapacuenia abaxë payawenonaponame tsiteca bajarapamona. ¹¹ Ayai-cuenia pacatojitsipatsi, pacaejiwimë canacujitsia, panewajënaeyabelia pexaniacuen Dioso paneto-exanabiabinexa, panenajamatabëcuene-itajëtsinexa panecopia-ewetawanapaejawa pexaniacuen papecato-exanaenexa najumecapanepaeya pejumaitsicuenia. ¹² Apopacatojitsipaetsi paneyabara-afaetabijawa Diosojawabelia pane-itaxutuajamatejemajawa. Biji rajane, pacatojitsipatsi pane-ajamatabëcuenesaënexa, pacuenia itsamonae ajamatabëcuenesaë bajayajebi pesiwanajamatabëcuenecopatsijawa Diosojawabelia, pepitsinexa xua najumecapanepaeya jumaitsi perajutsinexatsi.

Xua Dioso najumecapanepaeya jumaitsi, pepacuene exanaena

¹³⁻¹⁴ Pamatacabita Dioso najumeliwaisicajunua Abraham-pijinëjawabelia peyawenonaenexa, jumaitsi mapacueniaje: «Xanë, Diosonë, najumecapanepaeya cajumaitsi tacyawenonabiabinexa, ayaijawa necobecowë nexainaenexa, ayaibitsaëto xaneto nemomoxi-ata», jai Dioso. Bajarapacuenia Dioso nawënëcacuaicuaijai,ⁿ tsipaji baja ajibi pematatsënëa itsanë, matatoxenetsia ayaijamatabëcuenenë bajaraPonëwecua, penaneconitsia-exanaenexatsi, itsa apo-exanae tsipae pejumaitsicuenia. ¹⁵ Abraham-pijinë bajayajebi Dioso jamatabëcuene-ewetsiaponapona. Nexata jane baja, belia rajutatsi pacuenia najumecapanepaeya jumaitsi. ¹⁶ Mapanacuapijiwije, pecuaicuaijaijawata, canacuenebabiaba Dioso pewënë, itsa jume, itsanë peyaiyataenëtsi pewënë-ata, pejumexaniataenexatsi itsamonae xua jumaitsi peto-exanaejawanexa. Nexata, bajarapacuenia itsa jumaitsi, acuenebi itsajiwi-ata pejume-aebijawa, tsipaji pejumaitsinë natocaëjëta Dioso penaneconitsia-exanaejawanexatsi, itsa apo-exanae pejumaitsicuenia. ¹⁷ Bajaraxuata, Dioso pacujinae najumecapanepaeya jumaitsi

n 6:13-14 *nawënëcacuaicuaijai*: Diosonëxae, acuenebi pejumaitsi jawata, «Dioso pitabarata pepacuene cato-exanaenatsi», pejaijawa, tsipaji ajibi itsadioso bajaraPonëwecua. Baitsi, Dioso natocaëjëta pijacuata penaneconitsia-exanaejawanexa, itsa apo-exanae tsipae pejumaitsicuenia.

jiwi peyawenonaenexa, nawëñëcacuaicuaijai peto-exanaejawanexa. Bajarapacuenia jumaitsi, tsipaji jamatabëyapëtaeya-exana bajarapamonaejawabelia pepacuene peto-exanaejawanexa, najamatabëcueneliwaisiepatajërëtsinejewa. ¹⁸ Bajaraxuata, yapëtanetsi Dioso anijacuenebeje canacueneba pejumaitsiijawa pexaniajaijawanexa. Caejawa Dioso nawëñëcacuaicuaijai. Itsajawanua najumecapanepaeya pejumaitsiijawa pexanaejawanexa. Dioso caeto-ata apopenajumetsënëtsinë,^o wajanacato-exanaejawanexa. Bajarapacuenebeje yabara Dioso apopenaliwaisixanetsinë. Bajaraxuata, waxaitsi apobejamatabëcuenebëjajitsi. Be-itaxutuajamatejematsi tsaponae Dioso, wajanacato-exanaenexa pacuenia baja bajayata tajëwelia najumecapanepaeya jumaitsi. ¹⁹ Bajarapacuenia itaxutuajamatejemaya wajacopia-ewetawanapaejawa, Dioso najumecapanepaeya wajanacato-exanaenexa pejumaitsicuenia, cuenejëpa jera pecëtarutsinaebo. Pacuenia naebojawabelia pecëtarutsijera, acuenebi peponaejawa itsajawabelia, bajarapacuenia waja-itaxutuajamatejemacujinae Cristojawabelia, bajaraPonë aponacajamatabëcuenecopatsi itsacuenejawabelia wajasowanajamatabëcuenecopatsiyaniwa. Cristo wajanacasiwatëpaecujinae, pona athëbëabetsia, pe-ecaenexa Dioso pemuxuneneta,^p wajanacatocuaicuaijainexa sacerdotewi pepopenamatacaitorobinëcuenia Diosojawabelia. Bajaraxuata, ajamatabëcuenesaëtsi tsawanapae Dioso waja-itaxutuajamatejemajawa. ²⁰ Jesús athëbëabetsia wajawajënaeyabetsia pona, wajanacato-exanarutsinexatsia namuto Diosojawabetsia. Bajarajotatsia exanatsi sacerdotewi pepopenamatacaitorobinë, pacuenia bajayatami cuene-itsi Melquisedec, jiwi petocuaicuaijainexa Diosojawabelia daxitamatacabijawabelia.

Jesús raja sacerdote pepopenamatacaitorobinë tsaponaponae, pecuenecowëya Melquisedec bajayatami

7 ¹ Bajayatami, Melquisedec pewetsinë tsaponaponae Salem tomarata. Bajaraponëmi sacerdotenë-ata, jiwi petocuaicuaijainexa, pepoyaijamatabëcuenenë Diosojawabelia. Nexata, pamatacabi Abraham-pijinë barënawiatanajetarucarena pijajiwi wajabitsaë, pewerebiabicujinae itsanacuanë pewetsiwi pebarënawajabitsaëtsijawata, bajarapamatacabi, Melquisedec pitsapa pecopiapitsinexa Abraham-pijinë pebarënawiatsinë. Melquisedec pecopiapitsijawata, cuenewajunupaeba Abraham-pijinë pebarënawiatsinë. Melquisedec pecopiapitsijawata, cuenewajunupaeba Abraham-pijinë, Dioso pexaniacuenia peyawenonaejawanexatsi. ² Nexata, Abraham-pijinë pijawajabitsaë pewerebiabiwimi pecobecowë penotsijawanë, canajetaruca. Bajaraxuayajuwënëjawanë rajutapona ofrendacuenia caejawa, diez xuabejeyajuwënëjawa, Melquisedec-jawabelia. «Melquisedec», itsa jai hebreojumeta: «Dioso pitabarata aneconijibia xaniawaetsia peyanacuaewetsinë», pejaijume. «Salem tomara pewetsinë», itsa jai hebreojumeta:

o 6:18 caeto-ata apopenajumetsënëtsinë: Taema Núm. 23:19. **p 6:19** Dioso pemuxuneneta: Pacuenia sacerdotewi pepopenamatacaitorobinë joneyabiaba tabernáculobo-ënëlia, pepopeyaiyataetaxunae-ënëbelia, penucaenexa Dioso jiwi pitaxutotsoniataetaxunae pitabarata, bajarapacuenia exana Jesús pacujinae pona athëbëabetsia, pe-ecaenexa paxa Dioso pemuxuneneta. Bajaraxuata, wowaijumeta ruca, «penetró detras del velo». Taema Lev. 16:2.

«Jamatabēcuenexanepanaeya peyanacua-ewetsinē», pejaijume. ³Melquisedec yabara, Dioso pejumeliwaisibaxutota aponacayapētaeya-exanae pexainaejawa paxa, pena, pamojiwimi-ata. Bajarapacuenia aponacayapētaeya-exanaenua penaexanaejawa, petēpaejawa-ata yabara. Pacuenia daxitamatacabijawabelia Dioso pexēnato jiwi petocuaicuajainēnexa Dioso jawabelia, bajarapijinia cuene-itsi Melquisedec.

⁴Nexata, beyapētanetsi pacuenia Melquisedec bitso ayaijamatabēcuenenē, wajasalinainēmi Abraham-pijinē matatoxenetsia. Bjaraxuata, Abraham-pijinē ayaijamatabēcuenenēmi-ata, ofrenda rajuta Melquisedec jawabelia. Baitsi, pamatacabi Abraham-pijinē canajetaruca pijawajabitsaē pecobecowējawanēmi, pewerebiabicujinae bajarapamonaemi, bajaraxuanējajuwēnjawanē ofrendacuenia rajutapona caejawa, diez xuabejeyajuwēnjawa, Melquisedec-jawabelia. ⁵Bajayatami, paliwaisi Dioso najumecopata Moisés-pijinējawabelia, bajarapaliwaisi yapētaeya-exana pacuenia itsamonaē, Levípijinē pemomoxiyajuwēnēwi, canacopabijitsia sacerdotecuenē. Nexata, daxita israelitawi caenē, Abraham-pijinē, pemomoxi-ata, Dioso tocopata bajarapasacerdotewi pecanacopabinexa daxita xua israelitawi rajutapona ofrendacuenia pexainaeyajuwēnjawanē, caejawa, diez xuabejeyajuwēnjawa. ⁶Melquisedec picani Levípijinē apopemomo. Itsiata, Melquisedec ayaijamatabēcuenenēxae, Abraham-pijinē rajutatsi pexainae-yajuwēnjawanē ofrendacuenia caejawa, diez xuabejeyajuwēnjawa, tsipaji Melquisedec sacerdotenēxae, cuenewajunupaeba Dioso pexaniacuenia peyawenonaejawanexatsi. ⁷Pajiwi cuenewajunupaeba Dioso pexaniacuenia peyawenonaejawanexatsi, bajarapajiwi ayaijamatabēcuenējiwi Dioso pitabarata, pecuenewajunupaebijiwiyo matatoxenetsia. Daxita baja cajena yapētanetsi bajarapacuenē. ⁸Maparucaje, Leví pemomoxi, pamonaē pitapona xuanē jiwi rajutapona, caejawa, diez xuabejeyajuwēnjawa, bajarapamonaē tēpaponā pacuenia daxitajiwi. Itsiata baitsi jane, Dioso pejumeliwaisibaxutota Melquisedec yabara jumaitsi abaxē mapamatacabita-ataje piasaētsaponaponaejawa,⁹ tsiteca jiwi petocuaicuajainēnexa Dioso jawabelia. ⁹⁻¹⁰Nexata, pacujinae Abraham-pijinē bajayatami rajuta caejawa, diez xuabejeyajuwēnjawa Melquisedec-jawabelia, Abraham-pijinē pijasalinainēxae, bepeyajarajutsi bajarapa-ofrenda daxita Leví pemomoxi, pamonaē sacerdotewi. Nexata, bajarapamonaē aponaexanae-ata abaxē, bajayatami Abraham-pijinē daxitanexa yaiyataeya ofrenda rajuta Melquisedec-jawabelia, itsa pitsapa jamatejema pecopiapitsinexatsi.

¹¹Pamatacabi itapeta Aarón-pijinē, pexi-ata, Levípijinē pemomoxiyajuwēnēwi, sacerdotewinexa, bajarapamatacabijawa pijinia, Dioso tonajumecopata Moisés-pijinēta, paliwaisi canacuenēbijitsia sacerdotewi, judíowi pejumecowēnētsiliwaisinexa. Nexata, bajarapasacerdotewi bajarapaliwaisita itsa cuenecaējēpatsi planeconijibia-exanaejawa jiwi, Dioso aporobitsica tsipae Cristo, sacerdotenēnexa. Bajaraponē sacerdotewi apopepopenamatacaitorobinē cae-epatoyonexa, pacuenia cuene-itsi Aarón-pijinē,

q 7:8 *piasaētsaponaponaejawa*: Dioso pejumeliwaisibaxuto aponacayapētaeya-exanae Melquisedec penaexanaematacabi, petēpaematacabi-ata yabara. Bjaraxuata, Dioso peliwaissi penacujaru-biwi canaējēta pacuenia Melquisedec tsaena Cristo, penaitajētsiwajēnaeya Maríata.

pemomoxi-ata; biji rajane, daxitamatacabijawabelianexa. Nexata, cuenejêpa pacuenia Melquisedec cuene-itsi. ¹²Nexata, Dioso itapetsi-ata Cristo sacerdotewi pepopenamatacaitorobinênexa, apopecuenejêpaexae Aarón-pijinë, yajawacopatatsi pejanaliwaisi Dioso penajumecopatsiliwaisiwecua Moisés-pijinëta, Cristo pijajiwinexa. ¹³Ponê yabara pacatoyaquinatsi, Wajatuxanenê, Jesucristo raja. Bajaraponê Levîpijinê apopemomo. Biji rajane, saicaya itsapemomoxibitsaëtota penaitajëtsinë, pamona caeto-ata sacerdotecuenepopena-exanaewi, apopenacuenebiwinua altar-jawata. ¹⁴Wajatuxanenê itsa naexana mapanacuataje, daxitajiwi baja cajena yapêtane penaexanaejawa Judâpijinê pemomoyota. Yapêtanenua pacuenia bajayata Moisés-pijinë apowajunupaebi Judâpijinê pemomoxibitsaëtoyajuwênênê, sacerdotenê penaexanaejawanexa.

¹⁵Orijibia, waxaitsi, xaniawaetsia jane baja, yapêtanetsi pepatsijawa itsawiria sacerdotenê, Levîpijinê pemomoxiwecua, tsipaji Cristo, peposacerdotenê pacuenia Melquisedec cuene-itsi. ¹⁶Cristo aponaexanae peposacerdotenê, Levîpijinê pemomoxiyajuwênênêxae, pacuenia bajayata itoroba Dioso penajumecopatsiliwaisi Moisés-pijinëta. Biji rajane, Dioso exana Cristo peposacerdotenê, piasaëtsaponaponaenêxae daxitamatacabijawabelianexa. ¹⁷Dioso baja cajena pejumeliwaisibaxutota tajêwelia jumaitsi pexênato yabara mapacueniaje:

«Xamê raja peposacerdotenê tsane daxitamatacabijawabelianexa.

Pacuenia Melquisedec jamatabêcuene-itsi, bajarajamatabêcuene-itsimê tsane»,^r jai baja cajena tajêwelia Dioso pejumeliwaisibaxutota.

¹⁸⁻¹⁹Nexata baja, paliwaisimi copiaya Dioso najumecopata Moisés-pijinëta jiwi pejumecowênëtsinexa, Dioso baja copiarucaeya-exana, tsipaji bajara-paliwaisimi apocaëjêpaetsi jiwi pewecua-ajibia-exanaenexatsi pibisiacuenepexanaeneconi. Nexata, paliwaisi aeconoxae Dioso nacatocopata, Cristo pejamatabêcueneta, xanepana bitso bajarapaliwaisimi matatoxenetsia. Bajarapapejanaliwaisi wajajumexaniataexae, yapêtanetsi Dioso aneconi-jibia wajanacataejawa, Cristo pejamatabêcueneta. Nexata, Cristojawabelia waja-itaxutuajamatejemaxae, nacacuenecaëjêpa waja-imoxoyotsijawa^s Diosojawabelia.

²⁰Yapêtanetsi Cristo penamatamotsisacerdotenê, tsipaji Dioso baja cajena tajêwelia najumecapanepaeya jumaitsi Cristo peposacerdotenê pexanaenexatsi, jiwi petocuaicuajainexa Diosojawabelia daxitamatacabijawabelia. Dioso bajarapacuenia itsiata apoyabarajumaitsi, pamonaemi bajayata copiaya exanaponatsi sacerdotewi, Cristo pewajênaeya. ²¹Itsiata baitsi jane, tajêwelia Dioso pejumeliwaisibaxutota, najumecapanepaeya jumaitsi Cristo yabara mapacueniaje:

«Dioso baja cajena jumaitsi pexaniajaicuenia pexanaenexa, itsajamatabêcuene epatua apopexinaejawanexa

r 7:17 Taema Sal. 110:4. s 7:18-19 waja-imoxoyotsijawa: Paliwaisi Dioso najumecopata Moisés-pijinëta, jiwi apopecuenecaëjêpaexaetsi pejumecowênëtsicapaneapajawa, cujunawabiaba pimoxoyotsijawa Dioso, penaneconitsia-exanaeyaniwatsi pijaneconijamatabêcuene. Itsiata, Dioso aneconijibia petaxae jiwi, Cristo pejamatabêcueneta, nexata pajawi siwanajamatabêcuenecopata Cristojawabelia, itaxutuajamatejema saya pimoxoyotsinexa Dioso, tsipaji yapêtane Dioso asiwaya pecopiapitsijawanexatsi. Jumetanetsinua pacuenia wajêca bajaraPonêjawabelia.

pejumaitsijawawecua. Pexēnatojawabelia jumaitsi mapacueniaje: 'Xamē baja cajena peposacerdotenēmē tsane daxitamatacabijawabelianexa. Pacuenia Melquisedec jamatabēcuenē-itsi, bajarajamatabēcuenē-itsimē tsane'»,^t jai Dioso pejumeliwaisibaxutota pexēnato yabara.

²² Bajarapacuenia tajēwelia Dioso najumecapanepaeya pejumaitsixae Cristo yabara, nexata yapētanetsi xua Cristo nacato-exana, bitso pexania-jawa paliwaisimi copiaya Dioso najumecopata Moisés-pijinēta matatoxetsia. ²³ Copiaya, pamonaemi sacerdotewi, petēpaponaeaxae exanaponatsi ayaibitsaēto, tsipaji apocaējēpaetsi pewetsinexa daxitamatacabijawabelia. ²⁴ Itsiata baitsi jane, Jesús apotēpae tsane. Peposacerdotenē tsaponaponae tsane daxitamatacabijawabelianexa. BajaraPonēcujinae baja, icatsia itsanē apo-exanaetsi tsane peposacerdotenē. ²⁵ Cristo peposacerdotenētsaponaponaeaxae daxitamatacabijawabelianexa, nexata petocuaicuaijainē tsaponaponae Diosojawabelia, pamonaē imoxoyota Dioso, bajarapone pejamatabēcueneta. Pamonaē siwanajamatabēcuenecopaba Cristojawabelia, Dioso wecua-ajibia-exanatsi pijaneconi, aneonijibia petanexatsi daxitamatacabijawabelia.

²⁶ Cristo cajena Dioso pejamatabēcuenējēpaenē. Itsaneconi-ata apope-xainaenē. Apoxainaenua itsacuenējawayo-ata xua yabara Dioso bijiaya taejitsiatsi. Maparucaeje, Dioso tsatatsi pibisiacuene pexanaewiwecua, juya pe-ecaeya-exanaenexatsi athēbētatsia, Dioso pepopijanacuayabetsia. Bajarapitsicuene pexainaenē bitso namatawenonatsi sacerdotewi pepopenamatacaitorobinēnexa. ²⁷ Orijibia, Cristo apocuenējēpae itsamonaē sacerdotewi pepopenamatacaitorobiwi, pacuenia exanabiaba, caematacabi canacujitsia, dajubi pebeyabiabinexa, Dioso pesiwajamatabēcuenecaewia-exanaenexa pijaneconi yabara. Bajarapamonaē copiaya natobeyaxuababiaba dajubi, petajuitsinexa Diosojawabelia pijaneconi yabara. Xuacujinae, itsamonaē bajarapacuenia-ata to-exanabiaba pijaneconi yabara. Bajarapacuenia Cristo apo-exanae. Biji rajane, bajarapone caeto nacopata pebeyaxuabinexatsi, caecuenia pematamotsinexa daxitajiwi pibisiacuene pexanaeneconimi, daxitamatacabijawabelianexa. ²⁸ Bajayata, paliwaisi Dioso najumecopata Moisés-pijinēta, tocopata mapanacuapijiwiije sacerdotewi pepopenamatacaitorobiwi penaexanaenexa. Apocuenecaējēpae-atatsinua pejinawana-paejawa pibisiacuene exanaenējewa. Itsiata baitsi jane, bajaraxuacujinae, Dioso najumecapanepaeya pexaniaajijumeta itapeta Pexēnato, sacerdotewi pepopenamatacaitorobinē penaexanaenexa, daxitamatacabijawabelia. BajaraPonē pepopianeconijibinē Dioso pitabarata, tsipaji caeto-ata pibisiacuene apo-exanae.

**Cristo tonacuenebaponapona pijajiwi sacerdotewi
pepopenamatacaitorobinēcuenia, Dioso pitabarata**

8 ¹ Paliwaisi yabara pacatsipaebatsi, bitso penamatamotsijawa, baja tsipaji, xainatsi Cristo, sacerdotewi pepopenamatacaitorobinē, wajanacatocuaicuaijainēnexa Diosojawabelia. Bajarapone ecaeya-exanatsi

penamatamotsitaxunaeta athëbëtatsia, Dioso ayaijamatabëcuenenë pemu-xuneneta, pecujuanenia, penajua-ewetsinexabeje daxitacuene. ² Bajarajotatsia jane baja, aeconoxae Cristo nacueneba peposacerdotenëcuenia, Dioso pepopijatabernáculobo-ënëta, Dioso pijacuata penato-exanaebo. Jiwi apopexanaetabernáculobo.

³ Daxita pamonaе sacerdotewi pepopenamatacaitorobiwi, tocopatatsi perajutabiabinexa ofrenda Diosojawabelia, dajubi-ata pebeyabiabinexa, rajutsiaya petajuitsinexa Diosojawabelia, pesiwajamatabëcaewinexa jiwi pijaneconi. Bajaraxuata, Jesucristo-ata, xaina xua rajutsijitsia^a Diosojawabelia jiwi pijaneconi yabara. Pijacuata nacopata pebeyaxuabinexatsi, pematamotsinexa jiwi pijaneconi. ⁴ Itsa abaxë Jesucristo, mapamatacabi-ata ponaponaejitsipa mapanacuataje, aposacerdotenë tsipae. Aponacuenebinua tsipae sacerdotenëcuenia, tsipaji jinawanapaejitsipa itsamonaе, dajubi pebeyabiawinexa, rajutsiaya petajuitsinexa Diosojawabelia, Moisés-pijinë pitorobicueniatsi. ⁵ Itsiata, xua exanawanapa bajarapamonaе, bajaraxua cuenecatane saya xua Jesucristo athëbëtatsia exanaponapona Dioso pepopijatabernáculobo-ënëta. Bajaraxuata, pamatacabi Dioso itoroba Moisés-pijinë, itoroba mapanacuaje pexanaenexa Dioso pijacarpaboxaneto, tabernáculobonexa. Moisés-pijinëjawabelia Dioso jumaitsi mapacueniaje: «¡Xania baja taename! Exanaename daxita cuenejëpaeya, pacuenia taneme tacatsitajëtsijawata pet-sutojumata», jai Dioso. Bajaraxuata, mapamatacabijawaberena-ataje sacerdotewi templobota exanapona daxita pacuenia Moisés-pijinë Dioso tsitajëtatsi petsutojumata. ⁶ Itsiata baitsi jane, Cristo, ponë xainatsi sacerdotewi pepopenamatacaitorobinënexa, xua Dioso athëbëtatsia tocopatatsi wajanacatonacuenebinexa, bajaraxua bitso ayaijamatabëcuene, bajayata sacerdotewi xua Dioso tonacuenebawanapa mapanacuataje matatoxenetsia. Orijibia, Cristo canacueneba pejanaliwaisi Dioso penajumecopatsiliwaisiwecua Moisés-pijinëta. Bajarapapejanaliwaisita Dioso najumecapanepaeya nacanajumeli-waisicajunua aneconijibia wajanacataenexa, apojumecowënëtsicapanepae-atatsi Dioso penajumecopatsiliwaisi Moisés-pijinëta. Pepacuene baja, Cristo pejamatabëcueneta, Dioso nacawecua-ajibia-exana wajaneconimi, aneconijibia wajanacataenexa. Bajarapacuene, bitso xanepana, paliwaisi copiaya Dioso najumecopata Moisés-pijinëta, matatoxenetsia.

⁷ Itsa baja xanepanaejitsipa copiaya paliwaisi Dioso najumeliwaisicajunua Israel-pijinë pemomoxijawabelia, aneconijibia petaejawanexatsi, pejumecowënëtanapaejawata paliwaisi najumecopata Moisés-pijinëta, nexata baja icatsia cotocaewi itsaliwaisi Dioso najumecapanepaeya aponacatonajumecopatsi tsipae, xua yabara aneconijibia nacataejitsia. ⁸ Israel-pijinë pemomoxi, xaniawaetsia apopejumecowënëtanapaeaxae paliwaisi bajayata Dioso najumecopata Moisés-pijinëta, Dioso tajëwelia najumecapanepaeya jumaitsi pejumeliwaisibaxutota mapacueniaje:

«Jumaitsi raja pepopetuxanenë Dioso: 'Itsamatacabijawabelia icatsia najumecapanepaeya najumeliwaisicajonenajë Israel nacuapijiwijawabelia, Judá nacuapijiwijawabelia-ata, pejanaliwaisi pejumecowënëtanapaeenexa.

⁹»Bajarapapejanaliwaisi apocuenejëpae tsane paliwaisi najumecajunuajë bajarapamonae pijasalinaiwimijawabelia tayawenonabiabinexa, pamatacabi bajayata matacarenanë Egipto nacuawerena. Itsiata, bajarapamonaemi apopejumecowënëtsixae tanenajumeliwaisicajonecuenia, copatajë baja bajarapamonaemi tayawenonaejawa', jai pepopetuxanenë Dioso.

¹⁰Orijibia, jumaitsi Dioso:

«Nexata, paliwaisi pejanacuenia najumeliwaisicajonenajë Israel-pijinë pemomoxijawabelia, mapaliwaisicueniaje: Caejiwi canacujitsia, tajumeliwaisi yapëtaeya-exanaponaenajë, pacuenia netojinawanapaejitsia. Bajarapaliwaisi tsijamatabërubianajënuua, betayaquinaecuenia pejamatabë-ëthëtota. Nexata, bajarapamonae bajarapaliwaisi jamatabëcuenematacaponaenatsi, tajitsipaecuenia pejinawanapaenexa. Nexata, bajarapamonae piJaDiosonënë tsane, tajajiwinua tsane.

¹¹»Bajarapacuenia tatsijamatabërubixae, nexata itsajiwi-ata aponamatawenonae tsane pecujarubinexatsi pijamonaeyajuwënënë tajumeliwaisi. Itsajiwi-ata bajarapamatacabi itsanëjawabelia, pijamonaenëjawabelia-ata, apojumaitsi tsane: 'Xamë-ata beyapëtaneme Dioso,' apojai tsane, tsipaji baja, daxitajiwi neyapëtaena, beweliamatabëcuenewi, ayaijamatabëcuenewi-ata.

¹²»Xanë baja daxita tajajiwi pibisiacuene pexanaenconimi, wecua-ajibia-exanaenajë. Aponajamatabënapsinë tsane bajarapapibisiacueneimi», jai pepopetuxanenë Dioso pejumeliwaisibaxutota, bajayata tajëwelia Israel-pijinë pemomoxi yabara.

¹³Bajarapacuenia Dioso pejumaitsixae, pejanacuenia penajumeliwaisicajonejawanexa waxaitsijawaberena, nacayapëtaeya-exana pacuenia baja ajumematamobi paliwaisimi copiaya Dioso najumecapanepaeya jumaitsi judiowi pijasalinaiwimijawabelia. Nexata, pacuenia mapanacuapijicuene ajibi tsaponae, bajara-itsi bajarapaliwaisimi. Werewerecapona baja.

**Bajayata jiwi beyaxuababiabi-ata dajubinë
pijaneconi yabara, bajarapadajubijana aponeconi-
iquinaecapanepaetsi, paneconi xaina Diosojawabelia**

9 ¹ Bajayata, copiaya Dioso najumeliwaisicajunua Israel-pijinë pemo-moxijawabelia, paliwaisi tonajumecopata Moisés-pijinëta. Bajarapali-waisita, itorobatsi bajarapamonae pexanetsinexa Dioso pijacarpaboxaneto, tabernáculobu,* pabota nawajëcabiabijitsia Diosojawabelia. Itsajotanua sacerdotewi tonacuenebawanapaejitsia Dioso pijacuene. ² Itsa baja wereteta Dioso pijacarpaboxaneto, bajarapabo-ënë yatu-ucuta ayaipapaëbërëpanata, anija-ënëbeje pexanaenexa. Penamataxainae-ënëtuatuajë pewënë Dioso Peyaiyataetaxunae.* Bajarajota nuta candelabrojawa,^y pitayotanucaenexa.

v 8:12 Taema Jer. 31:31-34. w 9:1 tabernáculobu: Taema Éxo. 26:1-37. x 9:2 Dioso Peyai-yataetaxunae: Wowaijumeta pijinia «Lugar Santo». Taema Éxo. 26:33. Bajarapataxunaeta, sacerdotewi joneyabiaba caematacabi canacujitsia, pewetsinexa pitayotsicandelabro pitaxupae-yaniwa, incienopërëjawanë petajuitsinexa Dioso pitabarata. Orijibia, caesemana canacujitsia, perujupan-jawanë notabiaba, pejebabiabinexa pejanapan-jawanë ofrendacuena mesayojumata. y 9:2 candelabrojawa: Taema Éxo. 25:31-40.

Nutanua mesayo-ata,² pan-jawanë pejebabiabinexa bajarapajumata, Dioso pitabarata. ³Cotocaewi pa-ënëtuatujë, pewënë Dioso Pepopeyaiyataetaxunae^a itsataxunaenëwecua. ⁴Bajarapa-ënëyatu-ucutsijawatuatujëta nuca orojawata pexanae-altar-jawa,^b itsajota tajuitabiaba petuxujuwi-inciensojawanë Diosojawabelia. Bocanua Dioso penajumeliwaisixaniawaet-sibaula. ^cBajarapabaula naniawelia jumaxatata orojawata, piënëjawalia-ata. Bajarapa-ënëtuatujëta nuca oronanitota pexanaebotellabë, pewënëtsijawa manájawa. ^dBocanua Aarón-pijinëmi pijanaeboyoy, pebaxujuwanucaenaebow,^e pitajëtsinexa Dioso pitapetsinëtsicuene. Bocabejenua pa-ibopanatabeje^f najumeliwaisiyaquina Dioso jiwi pitawetsiliwaisianë, penajumeliwaisicajonejawa Israel-pijinë pemomoxijawabelia. ⁵Dioso pijabaulamatapajumawereca nuta anjanëbeje, jumapecataeya oronanijawata pexananutsiquerubinenëbeje, ^gDioso pijapeniweniwenaeotia pitajëtsinëbeje. Bajaraponëbeje be-ángelenëbeje, pecorofeto pexainaenëbeje. Pecorofetotanua matatsënëcaranatanucabeje baula matapajumawereca. Bajarapamatapa pewënë Dioso jiwi pitaxutotsoniataetaxunae.^h Itsiata aeconoxae, aponecuenecaëjëpae caejawa canacujitsia patacatoyaquinaponaenexa pajamatabëcueneliwaisi xainapona daxita bajaraxuanë.

⁶Bajarapacuenia Dioso pijacarpaboxaneto pewateretsicujinae, daxita xua-ata xaina bajarapabo-ënëtuatujë, nexata sacerdotewi joneyabiaba caematacabi canacujitsia bajarapabojawabelia penamataxainae-ënëtuatujëtatsina, penacuenebinexa Dioso pijacuene petonajumecopatsicueniatsi. ⁷Itsiata, cotocaewi-ënëtuatujëjawabereca, caenë, sacerdotewi pepopenamatacaitorobinë, joneyabiaba, caeto caewai canacujitsia. Pejonejawata, cajoneyabiaba dajubijana, pejumatsicababiabinexa bajarapabaulamatapa. Bajarapacuenia jumatsicaba bajaraponë pijaneconi yabara, itsamona yabara-ata, pibisiacuene pexanaeneconi Dioso pesiwajamatabëcuenecaewinexatsi, papibisiacuene exana natoyapëtaenejewawa penaneconitsia-exanaejawanexatsi. ⁸Bajarapapitawetsiliwaisianëta, Espíritu Santo nacayapëtaeya-exana pacuenia daxitajiwi apocuenecopatsitsi, pejonejawanexa Dioso Pepopeyaiyataetaxunaejawabereca, itsa abaxë sacerdotewi nacuenebawanapa Dioso pijacarpaboxanetota. Dioso baja piajibia-exanaecujinae bajarapacuenemi, matapania jiwi cuenecaëjëpaenatsi pejonenexa Dioso

z 9:2 Mesayo: Taema Éxo. 25:23-30; Lev. 24:5-9. a 9:3 Dioso Pepopeyaiyataetaxunae: Wowaijumeta pijinia «Lugar Santísimo». Taema Éxo. 26:33. Bajarapataxunae Dioso pepopijataxunae. Nexata, itaweta jiwi pejoneyaniwa. Pajiwi jonejitsipa, Dioso caecuenia beyaxuabijitsipa. Itsiata baitsi jane, Dioso tocaëjëta caenë, sacerdotewi pepopenamatacaitorobinë, pejonejawanexa caematacabita, caewai canacujitsia, pamatacabi ajibia-exanaejitsia jiwi pijaneconi. Wowaijumeta, pewënë: «Día de la expiación». Bajarapamatacabita sacerdotewi pepopenamatacaitorobinë joneyabiaba Dioso Pepopeyaiyataetaxunae, dajubijana pejumatsicabinexa Dioso pijabaulamatapata, Dioso pepacuene pesiwajamatabëcuenecaewinexa jiwi pijaneconi. b 9:4 altar-jawa: Taema Éxo. 30:1-6 40:26-27. c 9:4 Dioso penajumeliwaisixaniawaetsibaula: Taema Éxo. 25:10-16. d 9:4 manájawa: Taema Éxo. 16:33. e 9:4 pebaxujuwanucaenaebow: Taema Núm. 17:8-10. f 9:4 pa-ibopanatabeje: Taema Éxo. 25:16; Deut. 10:3-5. g 9:5 pexananutsiquerubinenëbeje: Taema Éxo. 25:18. h 9:5 Dioso jiwi pitaxutotsoniataetaxunae: Taema Éxo. 25:18-22. Bajarapa-itaxutotsoniataetaxunaejumata, sacerdotewi pepopenamatacaitorobinë jumatsicabiaba dajubijanata, caeto, caewai canacujitsia, Dioso pesiwajamatabëcuenecaewinexa jiwi pibisiacuene pexanaeneconimi. Taema Lev. 23:26-32; Lev. 16:2-34; Núm. 29:7-11.

Pepopeyaiyataetaxunaejawabelia,ⁱ pijacuata pewajëtsinexa Diosojawabelia. ⁹Daxita xua exana bajayata sacerdotewi jiwi pijaneconi yabara, bajaraxuanë saya nacatocuenecatane xua ajena mapamatacabijawabereña Cristo nacato-exana. Bajayata, jiwi dajubi beyabiaba, rajutsiaya petajuitsinexa Diosojawabelia pijaneconijamatabëcuene. Waxaitsi itsiata baja, yapëtanetsi bajarapacuenia jiwi pexanaejawata, penacuerotsijawa, tsipaji pepacuene apowecua-ajibia-exanaetsi pijaneconimi. Tsiteca saya pijaperujujamatabëcuene yajawajinawanapa. ¹⁰Bajaraxuanë apocuenecaëjëpaetsi jiwi pijaneconi pewecua-ajibia-exanaejawatsi, tsipaji apojamatabëcueneyawenonae xaniawaetsia pejinawanapaenexa Dioso pitabarata. Biji rajane, saya cuene-itorobatsi pena-ewetsinexa xaniawaetsia itsacuenejawanë pexanaejawata. Nexata, itorobatsi xuanë xaejitsia, xua apaejitsianua, xuanë quaitsijitsia, xua yabara-ata naperabëquaitsijitsia. Bajarapacuenia itorobatsi pejumecowënëñtawanapanexa abaxë Cristo pepatsiwayënaeysica. Itsiata baitsi jane, Cristo pepatsicujinaetsica, Dioso jane baja, bajarapaliwaisimi copiarucaeya-exana pejanaliwaisita.

Cristo wajanacasiwatëpaejawata, pepacuene naca-aneconijibia-exana, daxita pibisiacuene waja-exanaeconimi

¹¹Cristo jane baja patsica, sacerdotewi pepopenamatacaitorobinë penaexanaenexa daxitamatacabijawabelia. Nexata, daxita papexaniacuene natotaewanapatsi maparucaeje, bajarapacuenia nacatocopiapata bajaraPonë pejamatabëcueneta, tsipaji wajanacatocuaicuaijainë Diosojawabelia. Cristo baja, pona athëbëabetsia, penacuenebinexa peposacerdotenëcuenia Dioso pijatabernáculobojawatatsia. Bajarapabo bitso pexaniabo jiwi pexanaebo matatoxenetsia mapanacuataje, tsipaji Dioso saicaya pexanaebo, mapanacuapijijawanëña apopecanacuenebibo. ¹²Bajarapatabernáculobota, penacuenebijawata Cristo itsa junua Dioso Pepopeyaiyataetaxunaejawabelia, apocajoneyabiabi chivojana, torojana-ata, jiwi pijaneconi yabara. Biji rajane, Cristo, caeto, pijacuata najanacajunua, caecuenia daxitajiwiitsi wajanacaneconimatamotsinexa, Dioso wajanacacapanepaenexa daxitamatacabijawabelia. ¹³Bajayata, Israel-pijinë pemomoxi pacujinae nacopaba bepenaxuirabiwi Dioso pitabarata, bajarapamonae abaxë apotocopatabiabitsi penajuanacaetuatabiabinexa Dioso pewënëña. Nexata, sacerdotenë pewecua-ajibia-exanaenexa bajarapanaxuirabicienemi, matatsicababiaba chivojanata, torojanata, pamera-ata matajërëña becerro pesorowato^j petajuitsi-ipumanata.

i 9:8 Dioso Pepopeyaiyataetaxunaejawabelia: Bajarapataxunae nacatocuene-itajëña anijacuenebeje. Maparucaeje, jiwi aponamatawenonae sacerdotenë, itsa jume, pastornë-ancianonë, petowajëcaenexatsi Diosojawabelia. Biji rajane, toxanepanatsi pijacuata ajumejunawijibia penatowajëcaenexa Diosojawabelia. Nacacuene-itajëñanua Dioso pijanacuajawabetsia wajajonejawanexa. Matapania Cristo peneconimatamotsicujinae daxitajiwi pijaneconi, Dioso jane baja, tocopata jiwi pejonejawanexa pijanacuajawabetsia. **j 9:13 becerro pesorowato:** Bajarapabecerro, pesorowato petsobianë. Nexata, sacerdotewi pepopenamatacaitorobinë capona bajarapabecerro tomarapëñyabelia, wësicacutsiaya pebeyaxuabinexa. Bajaraxuacujinae, tajuita bajaraponë, daxitanë, pebocoto yajawa, piënë-ata yajawa. Xuacujinae, nota daxita petajuitsi-ipuma waxiyota, pexaniawaetsinexa tomarapëñyabelia. Nexata, itsa wecua-ajibia-exanaeijitsia jiwi bepenaxuirabiciuene Dioso pitabarata, palayota camojota bajarapa-ipumanayajuwënëñawa, pematajërëatsinexa merajawabelia. Xuacujinae, bajarapamerata matatsicababiaba bepenaxuirabijiwiyo Dioso pitabarata, pewecua-ajibia-exanaenexatsi bajarabepanaxuirabicienemi. Taema Núm. 19:1-10.

Nexata jane baja, bajarapacuenia peto-exanaecujinae, matapania tocopatatsi penajuanacaetuatsinexa Dioso pewënëta. ¹⁴ Bajarapacuenia dajubijana itsa wecua-ajibia-exana jiwi bepenaxuirabicuenemi Dioso pitabarata, bitso biji Cristo pejana pepacuenene nacawecua-ajibia-exana baja bajarapacuenemi. Dajubinë pejana matatoxenetsia Cristo wajanacasiwatëpaejawa bitso caëjëpatsi wajana-cayawenonaenexa, Dioso aneconijibia wajanacataenexa. Espíritu Santo, ponë apopewerewerecaenë daxitamatacabijawabelianexa, Cristo yawenonatsi. Nexata, Cristo ponë pepopianeconijibinë, Dioso pitabarata, nacopata pebeyaxuabinexatsi, wajanacasiwatëpaenexa. Bajarapajanata pepacuenene nacawecua-ajibia-exana baja pibisiacuene waja-exanaeneconimi, xua yabara picani Diosowecua naxuabiaya jinawanapatsi. Bajarapacuenia Cristo wajanacato-exanaexae, tonacuenebawana-patsi piasaëtsaponaponaenë Dioso.

¹⁵ Bajarapacuenia Jesucristo penacopatsixae, daxitajiwi peneconimatamot-sinexa, Dioso pejanacuenia najumeliwaisicajunua jiwijawabelia, aneconijibia petaenexa, Cristo pejamatabëcueneta. Nexata, Jesucristo jiwi pesiwatëpae-jawata, neconimatamota baja, daxita paneconimi xaina, apopejumecowë-nëtsicapanepeaxae paliwai si copiaya Dioso najumeliwaisicajunua bajarapa-monaejawabelia. Bajaraxuata, daxita pamona Dioso junata pejanacuenia penajumeliwaisicajonenexa, rajutsianatsi matababi apopewerewerecaejawa, najumecapanepaeya pejumaitisicuenia. ¹⁶⁻¹⁷ Bajarapapejananajumeliwai-sicajonejawa, cuenejëpa paliwai si itsajiwi petëpaewajënae, yaquina peco-becowë yabara, pijamona peyapëtaenexa pacuenia, caejiwi canacujitsia, pitaponaejitsia pewënamuto. Itsiata baitsi jane, abaxë itsa asaë tsaponapona pecobecowë pexinaejiwi, ajumematamobi abaxë bajarapaliwai si. Matapania baja, itsa tëpa pecobecowë pexinaejiwi, jumenamatamota jane baja bajarapaliwai si. Nexata jane baja, xanepana pijamona penatsicobet-sanaenexa pacuenia petëpaejiwi yaquina, petëpaewajënaeya pecobecowë yabara. ¹⁸ Bajarapijinia itsi paperujuliwaisimi bajayata Dioso najumecopata Moisés-pijinëta, Israel-pijinë pemomoxi pejumecowënëtanapanenexa. Jumenamatamotapona Israel-pijinë pemomoxi dajubi pebeyabiabixae, rajut-siaya petajuitsinexa Diosojawabelia. Baitsi, dajubi janarunaeya itsa apotëpae tsipae, ajumematamobi tsipae perujunajumecajoneliwaisimi. ¹⁹ Bajaraxuata, bajayata Moisés-pijinë copiaya tsipaeba daxitajiwi jawabelia, daxita paliwai si Dioso najumecopata pejumecowënëtanapanenexa. Bajarapacuenia petsi-paebiweretsicujinae, nexata pita hisopowiria naeboxi, pepacëtetsicunuyo petsobialanamaëtota. Bajaraxuacujinae, bajarapacunuyo Moisés-pijinë jabuta merata, becerrojana, chivojananua, peyajawamatajërëabijanarata. Nexata, tsicaba pabaxutota itanerubena paliwai si Dioso najumecopata Moisés-pijinëta. Bajaraxuacujinae, daxitajiwi matatsicabapona. ²⁰ Bajarapacuenia jiwi pematatsicabaponaejawata, Moisés-pijinë jumaitsi tsaponae: «Marapa-jana jumenamatamotsia-exana^k paliwai si Dioso najumecajunua ajena, waja-jumecowënëtanapanenexa», jai Moisés-pijinë jiwijawabelia. ²¹ Bajaraxuacujinae, icatsia Moisés-pijinë tsicabapona Dioso pijacarpaboxaneto, daxita

k 9:20 *jumenamatamotsia-exana*: Baitsi, pajiwi apojumecowënëtsi pacuenia itorobatsi Dioso penajumecopatsiliwai si Moisés-pijinë, Dioso tocaëjëtatsi petëpaenexa pijaneconijamatabëcuene, pacuenia dajubinë tëpa, pejanata pematatsicabinexatsi.

xua canacuenebabiaba bajarapabo-ënētuatuajëta, xua-ata xaina pecanacue-nebinexa Dioso pijacuene. ²² Paliwaisi Dioso najumecopata Moisés-pijinëta, itoroba dajubinë pejanata daxitacuene petsicabinexa, Dioso axuirajibia petanenexa, jiwi-ata bepenaxuirabicuenemi pewecua-ajibia-exanaenexatsi. Nacayapëtaeya-exananua pacuenia dajubinë janarunaenejewa petëpaejawa, Dioso acuenebi aneconijibia petaejawa pijaneconi pexainaewi.

**Pacuenia Cristo nacopata pebeyaxuabinexatsi mapanacuapijiwije
pijaneconi pewecua-ajibia-exanaenexa, yabara peliwaisi**

²³ Mapanacuataje, patabernáculobo xaina bajayata, daxita xuanë-ata xaina pecanacuenebinexa, bajarapitsicuenejawanë xaina athëbëtatsia, Dioso pijanacuataatsia. Daxita bajarapitsicuenejëpaejawanë, bajayata Moisés-pijinë dajubinëjana tsicabaponapona, aneconijibia penacopatsinexa, Dioso pitabarata. Itsiata bailsi jane, athëbëpijiacuenejawanë namatawenona penamatamotsijana dajubijanawecua. Bajaraxuata, Cristo nacopata janarunaeya pebeyaxuabinexatsi, bajarapajana pejamatäbëcueneta Dioso pewecua-ajibia-exanaenexa mapanacuapijiwije pibisiacuene pexanaeneconi. Cristo cajena bitso janana-matamota Dioso pitabarata, dajubinë pejana matatoxenetsia. ²⁴ Cristo baja cajena wajanacasiwatëpacujinae, pejana apocajone mapanacuataje pexanaetabernáculobojawabelia, tsipaji bajarapabo cuenecatane saya pacuenia Dioso pepopijabo itsi. Biji rajane, Cristo pona athëbëabetsia wajanacatocuaicuajianexa Diosojawabelia. ²⁵ Bajayatami, sacerdotewi pepopenamatacaitorobinë, caewai canacujitsia, cajoneyabiaba dajubinë pejana Dioso Pepopeyaiyataetaxunaejawabelia, Dioso pesiwajamatabëcuenecaewinexa jiwi pijaneconimi. Bajarapacuenia Cristo apo-exanabi, caewai canacujitsia. Biji rajane, caeto, nacopata pebeyaxuabinexatsi wajanacasiwatëpaenexa, aneconijibia Dioso wajanacataenexa. ²⁶ Cristo pejana itsa aponamatamotsi tsipae dajubijanawecua, nexata Dioso mapanacuaje pexanaejawaweliacujinae, Cristo nawitsia nacopataponaejitsipa pebeyaxuabinexatsi, jiwi pijaneconi yabara. Itsiata bailsi jane, itsa baja copiapata pecopiarucaenexa perujuliwaisimi, Cristo, caeto, nacopata pebeyaxuabinexatsi, jiwi pijaneconi yabara. Icatsia baja, bajarapacuenia apo-exanae tsane. Bajarapacuenia wajanacasiwatëpaexae, nacawecua-ajibia-exana pibisiacuene waja-exanaeneconimi daxitamatacabijawabelianexa. ²⁷ Daxitajiwi caeto tëpaponaeana. Bajaraxuacujinae jane baja, Dioso naneconitsia-exanaponaena daxita pamonaë pijaneconi pexainaewi. ²⁸ Bajarapacuenia pijinia, Cristo, caeto, nacopata pebeyaxuabinexatsi, pesi-watëpaenexa ayaibitsaëtöxaneto, pibisiacuene pexanaeneconi pewecua-ajibia-exanaenexa. Bajaraxuacujinae, Cristo baja pona athëbëabetsia. Itsiata bailsi jane, cotocaewijawa pacujinae patsianica, aposiwatëpae tsane jiwi pibisiacuene pexanaeneconi yabara. Saya baja nacasiwapatsianica, wawajänae-ewetawanapaewi wajanacacaponaeenexa athëbëabetsia.

**Sacerdotewi xua exanabiaba Dioso penajumecopatsiliwaisi
Moisés-pijinë pitorobicueniatsi, pesaë apoxinae
jiwi pijaneconi pewecua-ajibia-exanaenexa**

10 ¹ Paliwaisi bajayata Dioso najumecopata Moisés-pijinëta, tajëwelia Dioso cuene-itajëta papexaniacuene Cristo nacato-exanaejitsia.

Nexata, xua sacerdotewi exanawanapa, bajarapaliwai si pitorobicueniatsi, saya pecuene-itajëtsijawanë. Bajaraxuata, acuenebi pewecua-ajibia-exanaejawa jiwi pijaneconi, caewai canacujitsia, dajubinë beyaxuabapona-ata, rajutsiya petajuitsinexa Diosojawabelia. Cristo wajanacasiwatëpaejawa saëmatatoxeneta bajarapacuenecataejawanë, tsipaji bajaraponë pepacuene nacawecua-ajibia-exana wajaneconimi. ²Xua bajayata sacerdotewi exanabiaba jiwi pijaneconi yabara, pepacuene Dioso itsa wecua-ajibia-exanaejitsipatsi pibisiacuen pexanaeneconi, nexata bajarapamonae apoyanajamatabëxainae tsipae pijaneconi. Itsa aneconijibi tsipae Dioso pitabarata, pematatsënëa dajubinë apobeyaxuababiabi tsipae, pijaneconi yabara. Caeto saya, tajuitsipa dajubinë altar-jumata rajutsiya Diosojawabelia. ³Itsia baitsi jane, bajarapacuenia, caewai canacujitsia pexanaejawata, apowecua-ajibia-exanae jiwi pijaneconi. Biji rajane saya, pewajënaeyabelia tsiteca pijaneconi yanajamatabëxainapona. ⁴Bajaraxuata, yapëtanetsi pacuenia jiwi beyaxuababiabi-ata toro, chivo-ata, bajarapajana apocaëjëpaetsi pijaneconi pepacuene pewecua-ajibia-exanaenexatsi. ⁵Bajaraxuata, Cristo pepatsicujinaetsica mapanacuayabetsicaje, paxa Diosojawabelia jumaitsi mapacueniaje:

«Xamë apo-itajitsipaemë jiwi ofrendajawanë pecarajutabiabijawa, dajubi-ata tajuitsiya pecarajutabiabijawa. Bajaraxuata, xanë nitorobimica jiwicuenia tanaexanaenexa mapanacuataje, jiwiperabëto taxainaenexa,¹ mapanacupijijiwe tasiwatëpaenexa pijaneconi yabara.

⁶Aposiwajamatabëcuenebarëyamë picani jiwi petajuitsijawa dajubi daxitanë altar-jumata pijaneconijamatabëcuene, nesiwajamatabëcuene caewinexa pijaneconimi.

⁷Bajaraxuata, xanë baja cajumaitsitsi: ‘Manucajëje, tacato-exanaenexa xamë, Diosomë, nejtsipaecuenia, tasiwatëpaejawanexa nijajiwi, pacuenia xamë tajëwelia nejumeliwaisibaxutota jumaitsimë’»,^m jai Cristo, paxa Diosojawabelia.

⁸Yapëtanetsi pecopiarucaeya-exanaejawanexa perujucuenemi, tsipaji Cristo copiaya jumaitsi mapacueniaje: «Taxa Diosomë, apo-itajitsipaemë, aposiwajamatabëcuenebarëyamënua, jiwi ofrendajawanë pecarajutabiabijawa, dajubi-ata tajuitsiya pecarajutabiabijawa, jiwi petajuitsijawanua dajubi daxitanë altar-jumata pijaneconijamatabëcuene, nesiwajamatabëcuene caewinexa pijaneconimi», jai Cristo. Bajarapacuenia jumaitsi, Dioso tonajumecopatsi-ata Moisés-pijinëta, bajaraxuanë jiwi pexanaenexa. ⁹Yapëtanetsinua pejanacuene penacopatsijawanexa, tsipaji Cristo cotocaewijawa jumaitsi mapacueniaje: «Bajarajane manucajëje, tacato-exanaenexa pacuenia jitsipame, jiwi pijaneconi yabara»,ⁿ jai. Nexata, bajarapacuenia pejumaitsiyawata, yapëtanetsi pecopiarucaeya-exanaejawanexa sacerdotewi dajubi petajuitabiabijawa altar-jumata, jiwi pijaneconi yabara, wajanacasiwatëpaejawata cruzata wajaneconijamatabëcuene. Yapëtanetsinua copiaya-pijicuenemi pecowëta, penacopatsijawanexa pejana-exanaecueni. ¹⁰Cristo,

paxa Dioso petojitsipaecueniatsi pexanaexae, caeto, nacopata pebeyaxuabinexatsi, wajanacasiwatëpaenexa cruzata, wajanacawecua-ajibia-exanaenexa pibisiacuene waja-exanaeneconimi, daxita mapanacuapijiwitsije.

¹¹ Xaniajai. Copiyami petonajumecopatsicueniatsi, sacerdotewi, cae-matacabi canacujitsia, altar-jumata dajubi rajutsiaya tajuitabiaba Dioso-jawabelia, jiwi pijaneconijamatabëcuene. Itsiata baitsi jane, bajarapacuenia napëna-exanabiabi-ata,^o Dioso pepacuene apowecua-ajibia-exanae jiwi pibisiacuene pexanaeneconimi. ¹² Bajarapacuenia Cristo apo-exanae. Biji rajane, caeto, nacopata pebeyaxuabinexatsi, wajanacaneconimata-motsinexa pibisiacuene waja-exanaeneconimi, daxitamatacabijawabelia. Bajaraxuacujinae, pona athëbëtatsia, pe-ecaenexa paxa Dioso, pemuxuneneta, penajua-ewetsinexabeje daxitacuene. ¹³ Bajarajotatsia Cristo abaxë jamatabëcuene-eweteca, pijawajabitsaë paxa Dioso copiya petsiwajënaejamatabëcuene-amoneyabinexatsi, bajarapamonae pitorobienia pejumecowënëtsinexatsi. ¹⁴ Bajarapacuenia Cristo, caeto, baja penacopatsixae wajanacasiwatëpaenexa, bajarapaliwaisi wajajumexaniataewi, Dioso nacawecua-ajibia-exana pibisiacuene waja-exanaeneconimi, daxitamatacabijawabelianexa. ¹⁵ Espíritu Santo tajëwelia nacayapëtaeya-exana pexaniajaicuene, Cristo baja, caeto, wajanacasiwatëpaejawanexa. Bajaraxua yabara Dioso pejumeliwaisibaxutota tajëwelia jumaitsi mapacueniaje:

¹⁶ «Pecopiarucaecujinae copiyapijiliwaisimi, pejanacuenia najumecapanepaeya najumeliwaisicajonenajë tajajiwi jawabelia. Bajarapacuenia ta-exanaejawata, jumaitsinë tsane mapacueniaje: ‘Pacaejiwimë canacujitsia, panejamatabë-ëthëtota pacatsijamatabëcuenerutsianatsi tajaliwaisi. Pacaejiwimë canacujitsia, bajarapaliwaisi pacajamatabëcuenematacaponaena patanejumecowënëtsinexamë.

¹⁷»Caeto-ata aponajamatabënapitsinë baja tsane daxita pijaneconimi»,^p jai Dioso tajëwelia pijajiwi yabara.

¹⁸ Bajarapacuenia Cristo pejamatabëcueneta Dioso pepacuene wajanacawecua-ajibia-exanaexae pibisiacuene waja-exanaeneconimi, nexata pematatsënëa baja, aponamatawenonaetsi dajubi wajatajuitsijawa, wajaneconi jamatabëcuene.

Pacuenia wajajamatabëcueneta imoxoyotsijitsiatsi Dioso, yabara peli waisi

¹⁹ Tajamonae, aeconoxae baja, caejamatabëcuene xainatsi Diosojawabelia, Jesucristo wajanacasiwatëpaexae.^q Nexata, Jesucristo pejamatabëcueneta, xainatsi baja ajunawijibia^r wajajonejawa Dioso Pepopeyaiyataetaxunaeta, wajawajëtsinexa. ²⁰ Cruzata wajanacasiwatëpaexae,^s Jesucristo nacato-exana pejananamuto, wajanacajamatabëcuene-aitawayaxanaenamuto.

o 10:11 *napëna-exanabiabi-ata*: Nawitsia, napëna dajubimonae beyabiabi-ata, bajaraxua apocuenecaëjëpaetsi jiwi pijaneconimi pewecua-ajibia-exanaejawatsi, tsipaji saya naniapijiucuenajawa. Baitsi, dajubijana saya acata jiwi pijaneconimi, pacuenia pinturarata naniawelia piabejajawa jumacaranata. Itsiata baitsi jane, Jesucristo wajanacasiwatëpaejawata, pajana wecuarunatsi, pepacuene nacawecua-ajibia-exana daxita pibisiacuene waja-exanaeneconimi. **p** 10:17 Taema Jer. 31:33-34. **q** 10:19 *wajanacasiwatëpaexae*: Taema Heb. 9:12. **r** 10:19 *ajunawijibia*: Taema Heb. 4:16; Efe. 3:12. **s** 10:20 *Cruzata wajanacasiwatëpaexae*: Taema Jn 14:6; Rom. 5:2; Efe. 2:18.

Nexata, wajanacasiwatëpaejawata nacawecua-ajibia-exana wajanacaya-caranatsijawami, waja-imoxoyotsiyaniwa Dioso. Nexata, aeconoxaeta xainatsi baja, wajapatabiabinexa Dioso Pepopeyaiyataetaxunaejawata, wajawajëcaenexa. ²¹ Orijibia, xainatsi baja Jesucristo, sacerdotewi pepopenamatacitorobinë, wajanacatonacuenebaponaponaenë Dioso pijatabernáculobota pijanacuatatsia. ²² Bajarapacuenia wajaxainaexae wajanacatocuaicuajainë Dioso jawabelia, itsajamatabëcuene xainaenejewatsi, itaxutuajamatejemaya imoxoyotsianatsi Dioso. Apocujunawitsinua, tsipaji baja Dioso bewajanacajamatabëcuenetsicabiwi Cristo pejanata, wajanacawecua-ajibia-exanaenexa pibisiacuene waja-exanaeneconimi. Bajarapacuenia naca-ajamatabëcuenexuirajibia-exana baja. Wajanacabautizabijawata, ^t bewajanacaperabëquiatsiwi-ata piaxuirajibimerata. ^u ²³ Dioso caejamatabëcuene pexainaenëxae, najumecapanepaeya pejumaitsicuenia pexanabiabinexa, wajawajënaeyabelia asaëyata copia-ewetawanapaenatsi, jume-aebinejewatsi, Dioso wajanacato-exanaenexa najumecapanepaeya pejumaitsicuenia. ²⁴ Orijibia, namata-enetsia nayawenonaenatsi, wajanajamatabëcuene-asaëya-exanaenexa wajanasiwajawa, pexaniacuene-ata wajanato-exanabiabijawa. ²⁵ Bajaraxuata, ^v apobecopabitsi wajanajuanacaetuatabiabinexa Cristo pijajiwi, pacuenia itsamonae waxait-siyajuwënëwi exanapona. Biji rajane, benacaetuatsi, namata-enetsia wajanajamatabëcuene-asaëya-exanaponaenexa, Dioso pejitsipaecuenia wajajinawanapaenexa, tsipaji baja imoxoyo pewajënae Wajatuxanenë icatsia pepatsijawanexatsica.

**Dioso naneconitsia-exanaejitsia jiwi, piajamatabëcuenetajaxae
pejumexaniataeyaniwa Jesús peliwaishi**

²⁶ Waxaitsi wajapuayapëtae pexaniajailiwaishi, tsiteca wajawajënaeyabelia pibisiacuene itsa exanaponaejitsipatsi, wajajume-aebixae^w Cristo wajanacasiwatëpaejawata, nexata nacato-acuenebi tsipae, Dioso wajanacawecua-ajibia-exanaenexa pibisiacuene waja-exanaeneconi. ²⁷ Biji rajane, saya copia-ewetawanapaejitsipatsi pinijicuenia Dioso ëwajanacayajawananeconitsia-exanaejawanexa, pamatacabi pijawajabitsaë naneconitsia-exanaena pinijisotojawabelia, pewerebiabinexa. ²⁸ Bajayata, pajiwi apojumecowënëtsi paliwaishi Dioso najumecopata Moisés-pijinëta, itoroba pebeyaxuabinexatsi itaxutotsoniataenejewata. Bajaraxuata, pijacuata pecueneetaewitsi, anijajiwi beje, itsa jume, acueyabi pajiwi beje-ata, itsa wajunupaebatsi penaneconitsijawa, beyaxuabatsi pijaneconi yabara. ²⁹ Bajarapacuenia itsa naneconitsia-exana pamona apojumecowënëtsiwi Dioso penajumecopatsiliwaishi Moisés-pijinëta, mata-toxenetsia nexata, pinijicuenia naneconitsia-exanaejitsia pamona jume-aeba

t 10:22 *Wajanacabautizabijawata*: Bajayatami, Dioso pijacuene penacuenebiwajënaeya, sacerdotewi matawanetsi merata, jumatsicabatsinua torojanata, pecuene-itajëtsinexatsi petsatsijawatsi Dioso pijacuene petonacuenebawanapaewinexa. Taema Éxo. 29:4; Lev. 16:4; Núm. 8:6-7. Bajarapacuenianua pamona siwanajamatabëcuenecopaba Jesucristojawabelia, Dioso bepejamatabëcuenetsicabiwi Cristo pejanata. Itorobatsinua penabautizabia-exanaenexa, penajamatabëcuene-itajëtsinexa Dioso pijacuene pewajënaeyabelia pexanawanapaewinexa. **u 10:22** *piaxuirajibimerata*: Taema Efe. 5:26; 1Pd 3:2. **v 10:25** *Bajaraxuata*: Taema Heb. 10:22c. Dioso naca-ajamatabëcuenexuirajibia-exana Cristo wajanacasiwatëpaejaxae. **w 10:26** *wajajume-aebixae*: Taema Heb. 11:6.

Cristo pesiwatëpaejawatsi, bajarapapexanaliwaisi pejumetaecujinae. Bajarapamonaē bepīamatamobicujiru tane Dioso pexēnato pesiwatëpaejawatsi. Benatsiquejemacuenia tanenua Espiritu Santo piasiwajawatsi. Bajaraxuata, toxanepanatsi Dioso ayaicuenia penaneconitsia-exanaejawa, Dioso penajumecopatsiliwaisi Moisés-pijinēta apopejumecowēnētsiwiwecua. ³⁰ Yapētanetsi baja cajena Dioso pejumaitsijawa mapacueniaje: «Pamonaē apotajitsipaecue exanapona, bajarapamonaē xanē naneconitsia-exanaenajē», pejaijawa. Jumaitsinua Dioso mapacueniaje: «Xanē, Diosonēnē, tocanaējētsianajē tajajiwi pexanaecue, tananeconitsia-exanaenexa pijaneconi pexainaewi», jainua. ³¹ Tajamonaē, piasaētsaponaponaenē Dioso bitso piayaicueñejawata, naneconitsia-exanaena pijaneconi pexainaewi. ¡Nexata, xania baja tsane panejume-aebijawa!

³² ¡Biji rajane, panajamatabēnapire pacuenia pajamatabēcuene-itsimē tsawanapae, pamatacabi ajena pasiwanajamatabēcuenecopabame Cristojawabelia! Bajarapamatacabi pajamatabēcuenesaēmē tsawanapae, panejumexaniataejawa Wajutuxanenē Jesucristo peliwaisi, itsamonaē ayaicuenia pacabejiobia-exanaeata bajarapaliwaisi yabara. ³³ Itsajawata papecaitoyawi, jiwi ayaibitsaēto pita-barata, pacacapocapona. Pacabejiobia-exananua. Itsajawata pijinia, pamonaē papecayajuwēnēbejiobia-exanaewitsi pajamatabēcuenyawenoname. ³⁴ Oriji-bia, pa-itaxutotsoniataneme pamonaē jebatsi penaneconitsiwi pejebabiabibota, Dioso pejumeliwaisi yabara. Paxamē, Jesús papijajiwixamē, itsamonaē pacawecuanota paniya-iranēmi, panecobecowējawaximi yajawa. Itsiata pajamatabēcuenebarēyamē, tsipaji payapētaneme xua Dioso pacatoxaina athēbētatsia papecarajutsinexa, bitso pexaniacueñejawa papecawecuanotsijawanēwecua. Xua Dioso pacarajutsiana, apopewerewerecaejawanexa daxitamatacabijawabelia. ³⁵ ¡Bajaraxuata, pētsa pacopabame pane-itaxutuajamatejemajawa Dioso papecayawenonaejawanexa, tsipaji cajena, athēbētatsia xaina ayaicueñejawa papecarajutsijawanexa, pane-itaxutuajamatejemajamat abēcuene! ³⁶ Bajaraxua panepitsiwajēnaeya, panamatawenoname pane-ajamatabēcuenesaējawa panewajēnaeyabelia, itsamonaē pacabejiobia-exanaeata pane-itaxutuajamatejemajawa yabara Dioso. ³⁷ ¡Pa-ajamatabēcuenesaēmēre tsawanapae, tsipaji Cristo icatsia patsianica! Bajaraxua yabara, Dioso pejumeli-waisibaxutota tajēwelija jumaiti mapacueniaje:

«Bepijia patsianica, ponē patsiapaebitsica. Apocuenenajematsi tsane pepatsinexa.

³⁸ Pajiwi tajitsipaecuenia ponapona, nitaxutuajamatejema tsaponaponaē,^x bejiobia-exanae-atatsi. Itsiata, pajiwi newecuanawiatsiana pecowēyabelia, aposiwajamatabēcuenebarēyanē tsane», jai Dioso pejumeliwaisibaxutota.

³⁹ Itsiata baitsi jane, waxaitsi wajacowēyabelia Diosowecua aponawiabi tsanetsi, Diosowecua wajanaxuabiyaniwa. Biji rajane, waxaitsi siwanajamatabēcuenecopabatsi Diosojawabelia ēwajanacapanepaejawabelianexa.

**Pamonaemi bajayata yawenonatsi,
pitaxutuajamatejemaxae Diosojawabelia**

11 ¹ Pajiwi xaina pitaxutuajamatejemajawa Dioso, bajarapa-
jiwi jumexaniatane. Xaniajaiya copia-ewetaponapona Dioso

pejumaitsicuenia peto-exanaejawanexatsi, apotae-ata abaxë xua copia-ewetaponapona. Apocuene-aebinua peto-exanaejawanexatsi. ²Bajarapacuenia bajayata wajasalinaiwimi pitaxutuajamatejemaxae Diosojawabelia, siwajamatabëcuenebarëyatsi.

³Waxaitsi, wajajumexaniataexae Dioso, yapëtanetsi pexaniajaicuene nacua pexanaejawa pejumeta, daxitacuene yajawa. Daxita xua aeconoxae waja-itaxutota tanetsi, apowajataecapanepaejawanëta, Dioso baja cajena exana bajaraxuanë.

⁴Bajayatami, Abel-pijinë pesiwanajamatabëcueneecopatsixae Diosojawabelia,^y capata pexaniajawa Caïn-pijinëwecua, rajutsiya petajuitsinexa Diosojawabelia pijaneconijamatabëcuene. Bajaraxuata, Dioso siwajamatabëcuenebarëyatsi. Wajunupaebatsinua planeconijibinëcuene. Nexata, Abel-pijinëmi, bajayatami tëpae-ata, itsiata mapamatacabijawaberena-ataje wënëliwaisitaeponatsi pesiwanajamatabëcueneecopatsijawa Diosojawabelia. Bajarapacuenia nacacujaruba waxaitsi-ata waja-itaxutuajamatejemanexa Dioso.

⁵Bajayata, Enoc-pijinë-ata siwanajamatabëcueneecopata Diosojawabelia. Bajaraxuata, tëpaenewja Dioso caponatsi^z athëbëabetsia. Jemata pitarabatsi. Nexata, itsamonae jaitsi-ata, itsiata apocaxitarabitsi. Dioso, pejumeliwaisibaxutota, nacayapëtaeya-exana pacuenia siwajamatabëcuenebarëyatsi Enoc-pijinë, pepitsiwajënaeyatsi. Nexata, Dioso pesiwanajamatabëcueneecopatsijawa Diosojawabelia. ⁶Baitsi, pajiwi aposiwanajamatabëcueneecopatsi Diosojawabelia, acuenebi pesiwanajamatabëcuenebarëyajawanexatsi. Pajiwi jitsipa caejamatabëcuene pexinaejawa Diosojawabelia, copiaya bejumexaniatane Dioso piasaëtsaponaponaenëcuene, pexaniacuenia peyawenonaenexatsinua, pamonaë jaita pexaniajaijamatabëcueneta.

⁷Bajayata, Noëpijinëmi jumexaniatane Dioso, xua tajëwelia yapëtaeya-exanatsi, mapa-iraje pebubutsia-exanaejawanexa. Nexata, abaxë apotae-ata mapa-irataje pebubutsijawa, Dioso pitorobicueniatsi exana pinijibarcoxaneto,^a pebarëpanepaenexa pijamonae pebubutsijawawecua. Bajarapacuenia Noëpijinë pejumexaniataexae Dioso, pijamonae yajawa capanepatsi. Bajaronë canacopatana Dioso aneconijibia petaejawatsi. Itsiata, mapanacuapijiwije Dioso naneconitsia-exanatsi, pejume-aebixae Noëpijinë pepaebijawa Dioso peliwaishi.

⁸Bajayata, Abraham-pijinëmi-ata pitaxutuajamatejemaxae Dioso, jumexaniatane peto-exanaenexatsi najumecapanepaeya pejumaitsicueniatsi. Nexata, Dioso itsa itorobatsi pewecuapitsapaenexa pijanacuami,^b jume-cowënëta baja. Nexata baja, pitsapa, aponatsiwajënaeyapëtae-ata panacuata patsijitsia, pona panacuayabelia Dioso rajutsiapaebatsi. ⁹Panacuata

y 11:4 *pesiwanajamatabëcueneecopatsixae Diosojawabelia*: Taema Gén. 4:3-7. Abel-pijinë pesiwanajamatabëcueneecopatsixae Diosojawabelia, Dioso siwajamatabëcuenebarëyatsi. Caïn aposiwanajamatabëcueneecopatsi Diosojawabelia. Biji rajane, canaëjëta pijacuata pejamatabëcueneceawia-exanaenexa Dioso pebara-anaepanaejawatsi pijaneconijamatabëcuene, xua bajaraponë nato-itapeta petajuitsijawanexa, asiwaya petaeaxae. z 11:5 *caponatsi*: Taema Gén. 5:21-24. a 11:7 *exana pinijibarcoxaneto*: Taema Gén. capítulos 6-9-jawabelia. b 11:8 *pewecuapitsapaenexa pijanacuami*: Taema Gén. 12:1-6.

Abraham-pijinë Dioso patsia-exanatsi, itsiata pepopijabo apo-exanae, peponaponaebonexa. Biji rajane saya, bepepatsinëcuenia ponapona car-pabota, caematacabibejenexa, Dioso rajutsiapaebi-atatsi pepopija-iranexa. Bajarapacuenia pijinia, ponaponabeje pexënato, Isaac, pemomo, Jacob-ata, Dioso rajutsiapaebi-atatsibeje bajarapanacua pemomoxi pecanacopabinexa. ¹⁰ Bajarapacuenia Abraham-pijinë bajayajebi carpabota ponapona, tsipaji abaxë itaxutuajamatejemaya wajënae-ewetaponapona, pecaponaenexatsi athëbëabetsia, Dioso pexanaetomarabetsia, apowerewerecaetomarabetsia. Bajarapatomaratarsia ponaponaejitsia daxitamatacabijawabelia.

¹¹ Bajarapijini pacuenia, Abraham-pijinë pijawami, Sara-pijiwa, pita-xutuajamatejemaxae Dioso jawabelia, mawecowa-ata picani, Dioso caëjëpaeya-exanatsi penacoxitsijawa. Nexata, bitso pepuaperujuwa-ata, pexënato xaina^c Abraham-pijinë jawabelia, pejumexaniataexae Dioso peto-exanaejawanexatsi, najumecapanepaeya pejumatsicueniatsi.

¹² Bajarapacuenia pijinia, Abraham-pijinë, bitso pepuaperujunë, itsa baja imoxoyo pewajënae petëpaejawanexa, pexënato xaina. Nexata, Abraham-pijinë pewënamuto pemomoxibitsaëto baja tsaponae. Aponamata-ëjëtsicapanepaetsi, tsipaji nawita pacuenia athëbëtatsia, itaboxota perubenaetulupu, pacuenia-ata manuamenepijitajetabo-atsapërë. ¡Bitso cajena, Abraham-pijinë pemomoxi nawita!

¹³ Daxita pamonaemi yabara pacatowajunupaebatsi, tëpa baja, pitsine-jewa xua Dioso najumecapanepaeya jumaitsitsi, perajutsinexatsi. Tajëwelia natoyapëtane xuanë Dioso rajutsijitsiatsi, pepacuene pexainaejawanexa. Nexata, jamatabëcuenebarëyaya namata-enetsia najumaitsi tsabiabi: «Mara panacuataje pepacuene apojinawanapaetsi tsane daxitamatacabijawabelianexa. Waxaitsi saya caematacabibeje wajanapatsiwicuenia wajanajinawanapaewi», najai tsabiabi bajarapamonaemi. ¹⁴ Bajarapacuenia namata-enetsia penajumaitsitsabiabixae, tsitanajamatabëcuene-itajëtanawapa itsamonaejawabelia pewetawanapaejawa athëbëabetsia Dioso pecaponaejawanexatsi, bajarajotatsia jane baja, pejinawanapaenexa daxitamatacabijawabelia.

¹⁵ Bajarapamonaemi aponajamatabëxainawanapae, caewëalia icatsia penawiabinexa pijanacuamijawabelia. Itsa bajarapacuenia najamatabëxainaejitsipa, nexata peneta nawiabijitsipa. ¹⁶ Biji rajane, bajarapamonaemi najamatabëxainawanapa peponaenexa athëbëabetsia, matatoxenetsia pexanianacuajawabetsia. Bajarapacuenia penajamatabëxainawanapaexae, Dioso siwajamatabëcuenebarëyatsi. Bajaraxuata, Dioso aponawënëca-ura itsamona pejumaitsijawa: «Bajarapamonae raja pijaDioso», pejajawatsi, tsipaji tsiwajënaeweretatsi baja pepopexaniatomara, peyajawajinawanapaenexatsi.

¹⁷⁻¹⁸ Copiaya Dioso tajëwelia najumecapanepaeya jumaitsi Abraham-pijinë jawabelia, pexënato Isaac pexainaejawanexa. Yapëtaeya-exanatsinua ayaibitsaëto xaneto pemomoxi penaexanaponaejawanexa, Isaac pejamatabëcueneta. Itsamatacabijawabelia, icatsia Abraham-pijinë Dioso itorobatsi penacoxibeyaxuabinexa^d picani, pejamatabëcuene-ëjëtsinexatsi. Nexata, Abraham-pijinë pejumexaniataexae pexainaejawanexa ayaibitsaëto

c 11:11 *pexënato xaina*: Taema Gén. 18:1-15; 21:1-7. **d 11:17-18** *penacoxibeyaxuabinexa*: Taema Gén. capítulo 22.

pemomoxi, Isaac pejamatabēcueneta, nexata xainae-ata caenē pexēnato, buata altar-jumata, penacoxibeyaxuabinexa, rajutsiaya petajuitsinexa Diosojawabelia. ¹⁹ Bajarapacuenia exana, tsipaji jumexaniatane Dioso najumecapanepaeya pejumaitsicueniatsi peto-exanaejawanexatsi, Isaac pejamatabēcueneta. Nexata, yapētane pacuenia pexēnato itsa beyaxuabijitsipa, «Dioso baja cajena caējēpatsi Isaac icatsia piasaēya-exanaejawanexatsi», pejamatabējaijawa.

²⁰ Bajayata, Isaac-pijinē-ata, Abraham-pijinē pexēnato, jumexaniatane Dioso najumecapanepaeya pejumaitsicueniatsi peto-exanaejawanexatsi. Nexata, itsa baja perujunē, tajēwelīa najumecapanepaeya cuenewajunupaeba pexēnatobeje, Jacob, Esaúbejējawabelia, Dioso pexaniacuenia peyawenonabiabinexatsibeje.

²¹ Jacob-pijinē-ata jumexaniatane Dioso najumecapanepaeya pejumaitsicueniatsi peto-exanaejawanexatsi. Nexata, pamatacabi Jacob-pijinē perujunē, itsa baja nayapētane petēpaejawanexa, tajēwelīa najumecapanepaeya cuenewajunupaeba pemomobeje, Josēpijinē pexēnatobejējawabelia, caenē canacujitsia, Dioso pexaniacuenia peyawenonabiabinexatsibeje. Bajarapacuenia pejumaitsicujinae, Jacob-pijinē pijanaebo-upita nayaētanucaeya, yaiyataeya wajētanuca Diosojawabelia.

²² Bajayata, Josēpijinē-ata jumexaniatane Dioso, Israel-pijinē pemomoxi Canaán nacua perajutsijawanexatsi, bajarapanacuata pejinawanapaenexa. Nexata, pamatacabi Egipto nacuata daxita pijamonae barēponapona, tajēwelīa wajunupaeba^e bajarapamonaejawabelia, Dioso pecapitsapaejawanexatsi Egipto nacuwecua. Orijiibia, petēpaewajēnae najumepueneta pijamonae pesicaponaeenexatsi, pamatacabita bajarapamonae pitsapa, peponaenexa Dioso perajutsiapaebinacuajawabelia.

²³ Bajayata, Moisés-pijinē paxapijinē, penapijiwa-ata, itaxutuajamatejemabeje Diosojawabelia, peyawenonaejawanexatsibeje. Nexata, pexēnatonēyo itsa xainabeje, Moisés-nexa jane baja, penaexanaecujinae matayatsia^f caponaponabeje acueyabi pajuametobeje. Bajarapacuenia exanabeje, tsipaji bitso tsitapexanianēyotsibeje.^g Bajarapacujinaeta, faraón-pijinē, Egipto nacua pepopewetsinē, itoroba Israel-pijinē pemomoxi pexoxibeyaxuabaponaenexa, pebinēxi paepatota naexana. Itsiata, bajarapajiwibeje apojumecujunawibeje faraón pitorobiliwaisi, tsipaji itaxutuajamatejemabeje Diosojawabelia, peyawenonaenexatsibeje.

²⁴ Bajarapacuenia pijinia, Moisés-pijinē-ata itaxutuajamatejema Diosojawabelia, peyawenonaenexatsi. Nexata, itsa baja penaweretsinē tsapona, apojitsipajopae Egipto nacua pewetsinē pexēnatoyo bepe-xēnatocuenia petaejawatsi, bajarapowa witsatsi-atatsi. ²⁵ Biji rajane, siwanajamatabēcuenewereta, peyajawabejiobia-exanaejawatsi pijamonae, Israel-pijinē pemomoxi, pejamatabēcueneyawenonaenexa. Bajarapacuenia tsitapexaniacuenetsi bitso nabejiobitsiaya peponaponaejawa,

e 11:22 *Josēpijinē ... tajēwelīa wajunupaeba*: Taema Gén. 50:24-25. **f** 11:23 *matayatsia*: Taema Éxo. 2:1-3. **g** 11:23 *tsitapexanianēyotsibeje*: Bajarapacuenia jumaitsi, tsipaji judiowi canaējētabiaba penacueto itsa pexanianēyo, Dioso tsaena itapetatsi pejitsipaecuenia petonacuenebaponaenexa, penaweretsinējawata. Moisés Dioso pitapetsijawatsi yabara jumaitsi, bitso pexanianē yabara apojumaitsi.

penasiwajamatabëcuenebarëyajawawecua pibisiacuene pexanaponaewaja, xua saya cae-epatoyonexa. ²⁶ Bajarapacuenia pesiwanajamatabëcueneweret-sixae, Moisés-pijinë nacopata pebejiobia-exanaenexatsi, pacuenia Cristo-ata bejiobia-exanatsi mapanacuataje, Dioso pejitsipaecuene pexanaponaponaexae. Bajaraponë bitso asiwaya tane xua Dioso rajutsiapaebatsi athëbëtatitsia, daxita Egipto nacuapijiwi pexainaecuene matatoxenetsia.

²⁷ Nexata baja, Moisés-pijinë pejumexaniataexae Dioso najumecapanepaeya pejumaitsicueniatsi peto-exanaejawanexatsi, Egipto nacuawecua pitsapa. Nexata, Egipto nacua pepopewetsinë bara-anaepanae-atatsi, apocujunawi. Biji rajane, pewajënaeyabelia ajamatabëcuenesaë tsanajetaruca, pacuenia Dioso itorobatsi pexanaenexa. Bajaraponë najetaruca bepetaenëcuenia Dioso, ponë apowajataecapanepaenë waja-itaxutota. Aponawiatsi pecowëyabelia, tsipaji yapëtane Dioso bitso piasaënëcuene Egipto nacua pepopewetsinë matatoxenetsia. ²⁸ Moisés-pijinë, pejumexaniataexae Dioso, najumecapanepaeya pejumaitsicueniatsi pecapanepaenexatsi, itoroba daxita pijamonae penacuenebijawa Pascuafiesta. ^h Bajaraxuata, itoroba bajarapamonae pijabobaupanë, caebaupa canacujitsia, pemuxunenetsicabinexa ovejajanata. Ängelnë itsa najetaruca, petowerebiabiyaniwatsi pebinacuetoxi, matapijinëxi.

²⁹ Nexata, pamatacabi Moisés-pijinë barëpitsapa pijamonae Egipto nacuawerena, bajarapanacuapijiwi picani barajinatsi, pebeyejebinxatsi. Bajarapamatacabi, Moisés-pijinë, pijamonae yajawa, najuasiwanajamatabëcuenecopaba Diosojawabelia peyawenonaenexatsi. Nexata, ayaicuenia yawenonatsi. Bajaraxuata, nicaba Rojo manuamenetuatuajëalia, ⁱ bepetsewirajawalia. Itsiata baitsi jane, Egipto nacuapijiwi, paepatota nicabarubnapona bajarapatsewijiawalia, mera baja icatsia caewëarena awajubua tsaxuabi. Bubuna baja nexata pamonae pëbarajina Israel-pijinë pemomoxi.

³⁰ Israel-pijinë pemomoxi pesiwanajamatabëcuenecopabixae Diosojawabelia, peyawenonaenexatsi, pitorobicueniatsi Jericó tomara matatoyorotsia najetarubena siete pamatacabibeje. Nexata, sietematacabita jane baja, papitayaë-ibopanaxaneto Jericó tomarapijiwi exananuta pijatomara matatoyorotsia, penayajiwicaranatsinexa pijawajabitsaëwecua, bajarapayacaranatsijawaxanetomi jopaica, ^j Israel-pijinë pemomoxi pesiwanajamatabëcuenecopabixae Diosojawabelia.

³¹ Bajayata, Rahab-pijiwa, Jericó tomarata peponaponaewa, pibisiacuene pewitota pexanabiabiwa. Bajarapowa pesiwanajamatabëcuenecopatsixae Diosojawabelia, peyawenonaenexatsi, pamatacabi Israel-pijinë pemomoxi itoroba anijanëbeje peya-enabanajetarucaenexabeje Jericó tomara, bajarapowa pexaniacuenia bajaraponëbeje copiapita ^k pijabota. Bajaraxuata, Israel-pijinë pemomoxi petsimaxëpatsimatacabi apoyajawabeyaxuabi, daxita apopejumecowënëtsiwi Dioso, Jericó tomarata pejinawanapaewi.

³² Necuenecaëjëpa picani ayaibitsaëto tawajunupaebinxexa, Diosojawabelia pesiwanajamatabëcuenecopabiwi yabara. Itsiata, aponecuenecaëjëpae

h 11:28 *Pascuafiesta*: Taema Éxo. 12:21-30. **i 11:29** *nicaba Rojo manuamenetuatuajëalia*: Taema Éxo. 14:21-15:21. **j 11:30** *jopaica*: Taema Jos. 6:12-21. **k 11:31** *bajaraponëbeje copiapita*: Taema Jos. 2:1-21; 6:22-25.

patacatoyaquinaenexa, tsipaji bitso netopinijiliwaisi tsipae mapamonaemi peliwaishanēje: Gedeón-pijinē,¹ Barac-pijinē,^m Sansón-pijinē,ⁿ Jeftépijinē,^o David-pijinē,^p Samuel-pijinē,^q itsamona-e-ata, profetawimi. ³³ Daxita baja-rapamonaemi itaxutuajamatejema Diosojawabelia, peyawenonaenexatsi. Nexata, Dioso yawenonaponatsi pinijicuenejawanē pexanaenexa. Bajaruata, bajarapamonaemiyajuwēnēwi itsa nawajabitsaētabuatapona itsanacuanēpijiwijawabelia, werebiabapona, Dioso peyawenonaexaetsi. Itsamona-e-pijinia pijanacuanējawa pijajiwi pewetsijawata, xaniawaetsia ewetabiaba, penaneconitsia-exanaenexa daxita pibisiacuene pexanaewi. Itsamona-e-pijinia Dioso yawenonatsi tajēwelia najumecapanepaeya pejumaitscueniatsi. Itsamona-e-pijinia wecuacuaibo-acatatsi newēthēmonae^r pebeya-xuabiyaniwatsi, Dioso peyawenonaexaetsi. ³⁴ Itsamona-e-pijinia, bajarapamonaeyajuwēnēwi, xuabi-atatsi piniji-isotualia,^s itsiata apotajuetsi, Dioso peyawenonaexaetsi. Itsamona-e-pijinia jamatabēbeyaxuabi-atatsi espadata, wecuapanepa, Dioso peyawenonaexaetsi. Pamona-e-pijinia apo-aitatsa picani penawajabitsaētsinexa, bajarapamona-e-ata bitso baja pitatsacawi naexanapona, wajabitsaē pexanabuataponaejawata, Dioso peyawenonaexaetsi. Nexata, bajarapamona-e-pijawajabitsaē cuene-amoneyaba. Wecuarēcēpecatsi. Daxita bajarapamonaemi Dioso yawenonatsi, pitaxutuajamatejemaxae bajaraPonējawabelia. ³⁵ Bajayata pijinia, itsamona-e-petiriawi, pesiwanajamatabēcuenecopabixae Diosojawabelia peyawenonaenexatsi, itsa coxitēpa, Dioso icatsia to-asaēya-exanabiabatsi.^t

Itsiata, itsamona-e, Diosojawabelia pesiwanajamatabēcuenecopabiwiya-juwēnēwi, tēpa pebejiobia-exanaejawatatsi. Yapētane picani pecopatsijawanexatsi pebejiobia-exanaejawatsi, itsa nawecuacopsipa Diosojawabelia pesiwanajamatabēcuenecopabijawa. Bajarapacuenia exanae-atatsi, apocopabi, tsipaji jamatabējumaitsi tsawanapae: «Mapanacuataje taponaponaejawa matatoxenetsia, bitso jitsipajē matababi apopewerewere-caejawa Dioso tanerajutsinexa», jamatabējai tsawanapae bajarapamona-e. ³⁶ Itsamona-e-pijinia Diosojawabelia pesiwanajamatabēcuenecopabixae, pijanacuapijiwi capocaponabiabatsi. Jumatitibabeyabiabatsinua penaneconnitsiwi pejumaconitabiabimacata. Cadenamaētota cēbejebabiabatsi. Penaneconitsiwi pejebabiabibota jebabiabatsi. ³⁷ Itsamona-e-pijinia ibotonēta saya tseconabiabatsi, pebeyaxuabinexatsi. Itsamona-e-pijinia petēpaenexa, epacaucubatsi sierrata. Itsamona-e-pijinia jamatabēcuenē-ējēbatsi, pecopabinexa Diosojawabelia pesiwanajamatabēcuenecopabijawa. Itsamona-e-pijinia espadata beyejebatsi. Itsamona-e-pijinia pijabowecua capitsapatsi. Nexata, jinarutabiaba daxitajawa, xainaenejewa itsajota jinawanapaejitsia. Bajaruata, pebejiobiwicuenia naxatababiaba ovejaboco, chivoboco-ata, apopexainaexae itsacuenejawayo. Barajinabiabatsi. Bitso cajena bejiobia-exanabiabatsinua. ³⁸ Bajarapamonaemi jinaruta petusatonacuanējawa,

1 11:32 *Gedeón-pijinē*: Taema Jueces capítulos 6-8. m 11:32 *Barac-pijinē*: Taema Jueces capítulos 4-5. n 11:32 *Sansón-pijinē*: Taema Jueces capítulos 13-16. o 11:32 *Jeftépijinē*: Taema Jueces capítulos 11-12. p 11:32 *David-pijinē*: Taema 1Sa 16:1-1Re 2:11. q 11:32 *Samuel-pijinē*: Taema 1Sa 1:1-25:1. r 11:33 *wecuacuaibo-acatatsi newēthēmonae*: Taema Jueces 14:5-6, 1Sa 17:34-37; Dan. capítulo 6. s 11:34 *piniji-isotualia*: Taema Dan. capítulo 3. t 11:35 *to-asaēya-exanabiabatsi*: Taema 1Re 17:17-24; 2Re 4:25-37.

petsutonēnacuanējawa-ata. Pitajanitonējawa perubenaewajuanē jaitabiaba, merawi pemajitabiabinexa. Bajarapacuenia bajarapamonae jinawanapae-ata, Dioso bitso asiwatsi, tsipaji apocopabi pesiwanajamatabēcuenecopabijawa bajaraponējawabelia, bejiobia-exanabiabi-atatsi bajaraxua yabara. Bajaraxuata, toxanepanatsi picani Dioso pecapanepaenexa piasiwawi, juya penaneconitsia-exanaenexa mapanacuapijiwiye, bajarapitsipibisiacuene pexanawanapaewi piasiwawijawabelia.

³⁹ Daxita bajarapamonaemi apopecopabixae pitaxutuajamatejemajawa Diosojawabelia, jiwi bejiobia-exanae-atatsi, Dioso siwajamatabēcueneba-rēyatsi. Itsiata, bajarapamonaemi piasaētsawanapae-epato apopitsi abaxē, xua Dioso najumecapanepaeya rajutsiapaebatsi. ⁴⁰ Dioso caecuenia apo-rajutsi daxita xua najumecapanepaeya rajutsiapaebatsi. Biji rajane, abaxē ewetawanapaeya-exanatsi, tsipaji Dioso aponajamatabēxainae ēbajaramonaejawabelia perajutsinexa bajaraxua. Waxaitsi-ata mapamatatabita wajajinawanapaewi, bajarapamonae yajawa, Dioso jamatabēnacarajuta bajarapapexaniacuene, aneconijibia wajanacataejawanexa, Cristo pejamatabēcueneta.

Bijamatabēcuenesaē tsawanapaetsi wajawajēnaeyabelia Dioso waja-itaxutuajamatejemajawa, itsamonae nacabejiobia-exanae-ata

12 ¹ Pamonae yabara pacatoyaquinatsi, wēnēliwaitsitanetsi baja xania-waetsia pitaxutuajamatejemajawa Diosojawabelia, peyawenonaenexatsi, itsamonae bejiobia-exanae-atatsi bajaraxua yabara. Nexata, waxaitsi bemuxunanajamatabēcuenesaētatsi waja-itaxutuajamatejemajawa, Dioso wajanacayawenonaenexa. Pacuenia penayacopia-ucubiwi najonabiaba daxita piarewejawanē, xuanē cuenecaranatsijitsiatsi tajējawawelia penucajopaenexa, bajarapacuenia pijinia benawecua-itoyatsi pibisiacuene waja-exanaeyaniwa, daxita xua-ata nacacuenecaranatsijitsia, Dioso wajanacatojitsipaecuenia wajawajēnaeyabelia xaniawaetsia wajajinawana-paeyaniwa. ² Jesús raja wajanacatomatamotsinē daxita wajaneconimi, Dioso aneconijibia wajanacataenexa. Pacuenia penayacopia-ucubiwi jamatabēcuenene-enatsi itsabelia tocaējētatsi copiaya pepatsinexa, bajarapacuenia pijinia waxaitsi-ata benacajamatabēcuenecaējētatsi xania-waetsia waja-itaxutuajamatejemajawa Jesucristojawabelia, tsipaji bajaraponē petaxuxuabinē, wajanacajamatabēcuenewitsabia-exanaenē-ata waja-itaxutuajamatejemajawanexa Dioso. Bajaraponē nacatsitanacuene-itajētanaa pacuenia itaxutuajamatejemajatsiatsi Diosojawabelia, itsamonae nacabejiobia-exanabiabi-ata. Yapētanetsi Jesús itsamonae capocoponae-atatsi, bejiobia-exanae-atatsinua, apocopatsi pitaxutuajamatejemajawa paxa Diosojawabelia. Biji rajane, nacopata pebeyaxuabinexatsi cruzata, tsipaji natsiwajēnaeyapētane pejamatabēcuenebarējajawanexa, paxa Diosojawatatsia. Aeconoxae baja nexata, Jesús athēbētatsia eca tronowēnjawata Dioso pemuxuneneta, pecujuanenia, penajua-ewetsinexabeje daxitacuene.

³ iPanejamatabēcuenefaefaenaeyaniwa Jesús-jawabelia pane-itaxutuajamatejemajawa, panecueranaeyaniwanua Dioso panetona-cuenebijawa, pacanaējere pacuenia Jesús ajamatabēcuenesaē tsaponaponae, pibisiacuene pexanaewi pinijicuenia bejiobia-exanae-atatsi!

Bajarapacuenia panecanaëjëtsijawata, paca-ajamatabëcuenesaëya-exanaena Diosojawabelia, itsamonaë pacabejiobia-exanae-ata. ⁴Bajarapacuenia panajamatabëcuenesaëtawanapae-atamë, pibisiacuene pane-exanaeyaniwa, itsiata abaxë pibisiacuene pexanaewi apopacayajuwënëbeyaxuabi, pacuenia Jesús beyaxuabatsi. ⁵Paxamë cowë panacofënëtame Dioso papecamuxujio-biliwaisi, papecajamatabëcuene-asaëya-exanaejawa, papeximëcuenia papecataexae. Dioso pexi pecuenexanetsijawa yabara, pijaneconi pexainaewi, pejumeliwaisibaxutota jumaitsi mapacueniaje:

«¡Paxamë pataximë, pëtsa beweliacuena pataneme Dioso papecacujarubiliwaisi, papecacuenexanetsinexa! ¡Pëtsa pajamatabëcuenefaefanamenua, itsa anaeya pacacuene-itaweta panenaneconitsixae!

⁶Dioso pamonaë asiwa, cuenexanetabiaba penaneconitsia-exanaecuenia. Pamonaë pijinia pexi, cuenexanetabiaba peconitsicuenia»,“ jai Dioso pejumeliwaisibaxutota.

⁷Nexata, bajarapacuenia Dioso itsa pacacuenexaneta, bajaraxua pacato-exana papeximëcuenia papecataexae. Jiwi-ata baja cajena pexi bawitsatanajetaruca cuenexanebiaya. ⁸Dioso itsa apopacananeconitsia-exanaë tsipae papecacuenexanetsinexa, pananeconitsi-atamë, peneta Dioso papeximëcuenia apopacataë tsipae, tsipaji daxita pamonaë pexi cuenexanetabiaba. Bajaraxuata, itsa apopacacuenexanetsi, peneta Dioso pacatane paxamë pane-axa apopanexainaewi. ⁹Waxaitsi abaxë pamatacabi pejewaxitsi, waxajiwi mapanacuataje cuenexanetsiaya banacaconita. Bajarapacuenia waxajiwi yaiyatanetsi. Bajaraxuata, waxaitsi, Dioso pexitsi, bitsoyo bejumecowënë-tatsi, beyaiyatanetsinua, waxa Dioso, ponë eca athëbëtatsia, wajanacarajut-sinexa matacabi apowerewerecaejawa. ¹⁰Itsa abaxë pejewaxitsi, waxajiwi mapanacuataje, wajanacawitsatsi-epato banacaconita, wajanacacuenexanetsinexa, tsipaji waxajiwi nacatojitsipa, pejitsipaecuenia xaniawaetsia waja-tojinawanapaenexa. Itsiata baitsi jane, waxa Dioso itsa nacananeconitsia-exana, wajanacacuenexanetsinexa, bajaraxua nacatopexaniacuene waxaitsinexa, waxajiwi wajanacacuenexanetsijawawecua. Bajarapacuenia nacato-exana, tsipaji jitsipa wajanacajamatabëcueneyawenonaejawa, wajacopabinexanua pibisiacuene waja-exanaejawa. Nexata, pacuenia Dioso pianeconijibinë jamatabëcuene-itsi, bajarawaxaitsi-ata wajajamatabëcuene-itsinexa. ¹¹Paepatota waxa Dioso nacananeconitsia-exana wajanacacuenexanetsijawata, bajaraxua aposiwajamatabëcuenebarëyatsi. Nacatsi-atane saya. Itsiata baitsi jane, wajanacacuenexanetsicujinae, itsa copatsianatsi pibisiacuene waja-exanaejawami, juya pexaniacuene exanawanapaenatsi. Jamatabëcuenebarëyayanua, xaniawaetsia jinawanapaenatsi.

¹²¡Dioso papecananeconitsia-exanaeyaniwa, pacopabare baja panejamatabëcuenecueranaejawami, tsipaji saya paxamë pacuenejëpame pamonaë penayacopia-ucubiwi bepijia pecueranaewi namuto-epatua, pemaxëfaefae-naewi, pesicueranaewinua! ¡Nexata, panewajënaeyabelia panajamatabëcuenesaëtaponare, tsipaji baja, pa-itaxutuajamatejemamë Diosojawabelia, papecayawenonaenexa! ¹³¡Pacuenia penayacopia-ucubiwi rowia pona,

namutowecua toquetsinejewa, xaniawaetsia pepatsinexa itsabelia tocajë-tatsi, bajarapacuenia pijinia pëtsa paxamë pajumexaniataneme itsaliwaisi Dioso pejumeliwaisiwecua! ¡Ëpexaniajailiwaisi, Dioso pejumeliwaisi, pane-wajënaeyabelia pajumecowënëtawanapare, xaniawaetsia pejitsipaecuenia panejinawanapaenexa! Nexata, itsamonae Jesús peliwaisi pejumexania-taewi, pamonae abaxë apo-ajamatabëcuenesaë Diosojawabelia, paca-itaxutua ajamatabëcuenesaë tsaponae tsane, pejumexaniataeyaniwa itsali-waisi Dioso peliwaisiwecua.

**Pacuenia tsi-ayaitsi tsane pajiwi namuxujemata
Dioso pejumeliwaisi, yabara peliwaisi**

¹⁴¡Daxitajiwijawabelia pexaniajamatabëcuene patoxainare! Nexata, aneconijibia pajinawanapaename Dioso pitabarata, tsipaji raja pajiwi aneconijibia apoponaponae tsane Dioso pitabarata, Dioso apoyajawapona-nae tsane. ¹⁵¡Xania baja panayajiwitaema! ¡Pëtsa pacuenecopatame itsajiwi, paxamëyajuwënëjiwi, pewecujopaeyaniwa Dioso pitaxutotso-niataejawatsi, Jesucristo pejamatabëcueneta, juya pejumecowënëtsinexa perujuliwaisi! Pacuenia piatsaxa-ënëboto daxitamera bijianaejitsipa, bajarapajamatabëcuene-itsi tsipae caenë-ata, paxamëyajuwënëñë, pibisia-cuene itsa exanaejitsipa. Belia pacajamatabëcuenebijianaejitsipa padaxi-tamë, saicayaliwaisi pejumexaniataexae Jesús peliwaisiwecua. ¹⁶¡Panaya-jiwitaemana paxamëyajuwënëjiwi, panecuenepaeyaniwa Esaúpijinëmi.^v Bajaraponë pibisiacuene exana, bijiaya petaejawata^w Dioso najumecapane-paeya peyawenonapaebijawaminexatsi matapijinëxae! Biji rajane, bitso pijanijawata, pejuyapijinëjawabelia canajetaxuaba xua picani canaco-patsijitsia Dioso pejamatabëcueneta, caepexaejawa pejamatabëcuenetaa. ¹⁷Payapëtaneme baja mapacueneye. Bajarapacuenia pecanajetaxuabicujinae, icatsia itsamatacabijawabelia, Esaúpijinë picani paxa itoroba, Diosojawa-belia petowajëtsinexatsi, Dioso peyawenonabiabinexatsi paxa pewëna-muto. Itsiata baitsi jane, paxa apojumejejaitsi. Nexata, Esaúpijinë bitso nua, pejuyapijinë petocopatsixae xua picani Dioso yawenonabiabijitsiatsi. Itsiata baja, acuenebi pexanaejawa.

¹⁸Paxamë baja cajena apopa-imoxoyotsimë Sinaïtsutojawabelia, mapanacuataje pe-ecaejawa, panenajamatabëcuene-itajëtsinexa Diosojawabe-lia paneyaiyataejawa, pacuenia exana bajayata Israel-pijinë pemomoxi. Pacujinae bajarapamonaemi pata, itawetatsi pejayatsiyaniwa bajarapa-bitso totabuyabereña. Tanenua bajarapatsutojumata be-isotocoti, bitso pitasquiri-itarërëbojawa, ayaijowiboxaneto-ata. ¹⁹Jumetaenubena penaju-metsijawa trompeta, Dioso-ata pecuaicuaijajawatsica athëbëwetsica bajara-pamonaejawabetsica. Nexata, bajarapamonaemi, bitso pecajunawi, wajëca Diosojawabelia, pecuaicuaijajawa pejumetaeyaniwa pematatsënëa. ²⁰Baja-rapacuenia apojitsipae pejumetaejawa, tsipaji bitso jumecujunawa Dioso

^v 12:16 *Esaúpijinëmi*: Taema Gén. 25:29-34. ^w 12:16 *bijiaya petaejawata*: Wowaijumeta pit-sapa, «profanar, despreciar lo sagrado», «bijiaya petaejawa Dioso pecuene, pijajawanë-ata», pejayume. Nexata, najumecajunua mapajamatabëcueneliwaisianë: 1) Dioso apo-peyayataejawa. 2) Yapëtae-ata xua Dioso tsitapibisiacuene, itsiata itsa exana. 3) Pebijianaejawa Dioso peli-waisi, jiwi pecanajëtsicuenia peliwaisijëpaenexa, mapanacuapijiwiwe asiwaya petaeenexa.

pejumaitisijawatsicatsi mapacueniaje: «Pajiwi, dajubi-ata, ponaena mapatsu-toyeneapanajawaje, pabeyaxuabianame panetseconaejawata ibotonëta, itsa jume, panecacuatsijawata becuererebonëta», pejajawatsica athëbëwetsica. ²¹ Daxita xua tane, xua jumetanenua yabara, Israel-pijinë pemomoxi pecajunawi bitso neconecojai. Moisés-pijinë-ata jumaiti: «Xanë-ata rabaja tacajunawi, bitso neconecojanë», jai.

²² Paxamë apopa-imoxoyotsimë-ata Sinaitsutojawabelia, itsiata baitsi jane, Diosojawabelia panesiwanajamatabëcuenecopabixae, pacatocopata baja panepatsinexa Siôn-tsutojawabetsia,* patsutota eca Dioso pijatomara, Jerusalén tomarata. Bajarapatomaratsia eca Dioso, piasaëtsaponaponaenë. Yajawaponapona ayaibitsaëtoxaneto ángelewi, miles pa-ángel-nëbeje, pexaniacuenia pecueneuënëxaniatsiwi. ²³ Bitsamonae, Jesús pijajiwi, copiaya pepatsiwi y payajawanacaetuatsianame Dioso pijanacuatatsia, pewënëya-quinarubiwi bjarapatomaratsia. Panacaetuatsianame Dioso pitabarata, Ponë jiwi pijaneconi petocanaëjëtšinë, penaneconitsia-exanaenexa daxita pamonaë pijaneconi pexainaewi. Payajawanacaetuatsianamenua pamonae Dioso pepacuene aneconihibia-exanatsi, pijanacuatatsia pepatsicujinae. ²⁴ Panacaetuatsianamenua Jesús pitabarata, Ponë pejamatabëcueneta Dioso aneconihibia nacatane. BajaraPonë nacayapëtaeya-exananua' pejanacuenia Dioso wajanacanajumeliwaicajonejawa. Bajayata Abel-pijinë, ponë beyaxuabatsi, xanepana picani itsanë peyamatomobeyaxuabinexatsi. Itsiata baitsi jane, pamatacabi Jesús beyaxuabatsi cruzata, itsajiwi-ata aponajamatabëxainae peyamatomobeyaxuabinexatsi. Biji rajane, Dioso aneconihibia tane daxita pamonaë siwanajamatabëcuenecopaba Jesús-jawabelia. Bajaraxuata, pajana wecuarunatsi Jesús wajanacasiwätëpaejawata, bitso pexaniajawa Abel-pijinë pejanawecua, irata pecayajatsijawa, pebeyaxuabijawatatsi. Baitsi, Abel-pijinë pejanacayajatsijawatatsi, Dioso petaejawata najamatabëxaina^z peyamatomotsinexa pebeyaxuabinëtsi. Juya, Jesús pejanarunaejawata, Dioso petaejawata najamatabëxaina jiwi aneconihibia petaejawa.

²⁵⁻²⁶ ¡Panayajiwi taema panejume-ataejitsibiyaniwa xua Dioso pacacuenetitaweta, Jesús pejamatabëcueneta, tsipaji bajayata Israel-pijinë pemomoxi itsa apojumecowënëtsi xua Dioso cuene-itawetatsi, Moisés-pijinë pejamatabëcueneta, apowecuapanepae Dioso penaneconitsia-exanaejawatsi! Bajarapamatacabita, Dioso athëbëwetsica pecuaicuajijawata Sinaitsutojumawetsica, ira jëabia-exana pejumeta. Waxaitsi-ata bitsoyo Dioso nacananeconitsia-exanaejitsipa, itsa apojumecowënëtsitsi Ponë najacunata athëbëwetsica. Bajaraxua yabara, Dioso tajëwelia najumecapanepaeya jumaiti mapacueniaje: «Itsamatacabi icatsia ira najëabia-exanaenajë,

x 12:22 *Siôn-tsutojawabetsia*: Mapanacuataje, Siôn-tsuto eca Jerusalén tomarata. Siôn-tsutojumata nacuenebanuta Dioso pijatemplobo, pabota jiwi bajayata nawajëcabiaba Diosojawabelia. Nexata, Dioso pijanacuatatsia, Jerusalén tomaratsia ecanua itsaSiôn-tsuto. Bajarapatsutojumatanua eca Dioso pepopijatemplobo, jiwi penawajëcabiabibonexa. Bajayata, Israel-pijinë pemomoxi apojitsipae pimoxoyotsijawa Dioso, pecujunawixae. Itsiata, pamonaë Dioso aneconihibia tanetsi Cristo pejamatabëcuene, pamonaëmi jinawanapa bajayata, pamonaë-ata jinawanapa mapamatacabijawaberenaje, imoxoyotabiaba Dioso cujunawinejewa, Jesús petocuaicuajijainëxae Diosojawabelia. y 12:24 *nacayapëtaeya-exananua*: Taema Mt 26:28; Mar. 14:24; Lc 22:20; Heb. 1:2. z 12:24 *najamatabëxaina*: Taema Gén. 4:8-10.

itaboxo yajawa», jai Dioso. ²⁷Bajarapacuenia Dioso itsa jumaitsi, tajëwelia baja nacayapëtaeya-exana pewerewerecaeya-exanaenexa daxita pexanaejawami mapanacuataje. Itsiata, Dioso pejumeliwaisi,^a pijatomara-ata, apowerewerecae tsane, tsipaji bajaraxuanë acuenebi piajibia-exanaejawa. ²⁸Pexaniajamatabëcuene berajutatsi Diosojawabelia, tsipaji pexaniacuenia naca-ewetsiana pijanacuatsia, daxitamatacabijawabelianexa. Bajara-xua apowerewerecae tsane. Wajasiwajamatabëcuenebarëyaxae bajaraxua yabara, asiwaya tonacuenebianatsi Dioso. Yaiyataeya wajajamatabë-ëthëtowetsina wënëxaniatsianatsinua, bajaraPonë wajanacasiwajamatabëcuenebarëyanexa. ²⁹Pacuenia isoto petajuenajetarucawata wayafo, werebiaba daxita piabejajawa, bajarapijinia pacuenia Dioso werebiania daxita xua tsitapibisiacuenetsi pijajiwi pexanaejawa, ëpejitsipacuenia jiwi pejinawanapaenexa. Bajaraxuata, apobejume-ataejitsibitsi wajanacacueni-itawetsijumenë.

**Jesús pijajiwi xuanë bexanawanapa, Dioso pes
iwajamatabëcuenebarëyanexatsi**

13 ¹¡Pëtsa pacopabame namata-enetsia panena-asiwatsawanapaejawa, Jesucristojawabelia panenajuasiwanajamatabëcuenecopabiwi! ²¡Pëtsa panacofënëtime xaniawaetsia panecopiapitabiabijawa apopanepätaewi-ata, pamonaë pata panijaboyaberena! Bajayata, itsa monaë bajarapacuenia xaniawaetsia jiwi pecopiapitabiabiwi, xaniawaetsia copiapita ángelewi,^b apoyapëtaë-ata ángelewicuene.

³¡Panajamatabënapitabiabare pamonaë jebatsi penaneconitsiwi pejebabiabibota, Jesucristojawabelia pesiwanajamatabëcuenecopabixae! ¡Paxamë-ata, bajarapamonaë yajawa, bepanajananeconitsiwi pana-taema! ¡Bajarapacuenia pijinia, pamonaë-ata bejiobia-exanatsi Dioso pejumeliwaisi yabara, pajamatabëcueneyawenonare! ¡Panataemanua bepepelayawabejiobia-exanaewi!

⁴Daxitajiwi beyaiyatane penacobiobiwi. Pajiwiweje baja napitabeje, apobenawecuanamatayajitsibeje. Pebi apobejaitsi itsawa pijawawecua. Petiriwa pijinia apobejaitsi itsanë pamonawecua, tsipaji Dioso naneconitsia-exanaena bajarapitsipibisiacueni pexanaewi.

⁵¡Pëtsa bitso panajamatabëcuene-enaeyabame palata panejitsipaejawa! ¡Biji rajane, pasiwajamatabëcuenebarëyamëre saya xuayowajëto paxainame, tsipaji Dioso najumecapanepaeya jumaitsi mapacueniaje!: «Apocacopatsitsi tsane patacayajawaponaponaejawa», jai Dioso. ⁶Bajaraxuata, itaxutuajamate-jemaya Dioso yabara namata-enetsia najumaitsi tsane mapacueniaje:

«Dioso cajena wajanacayawenonaenë. Nexata, apojunawitsi tsane, itsajiwi naca-itsacueniabijitsia-ata», najaitsi tsane waxaitsi namata-enetsia.

⁷¡Pacuenenajamatabënapitabiabare pacuenia bajayata pacatsitajinawanapa pamonaemi pacatsipaebawanapa Dioso pejumeliwaisi! Bajarapamonaemi Jesucristojawabelia pesiwanajamatabëcuenecopabijawaweliacujinae,

a 12:27 Dioso pejumeliwaisi: Taema Mt 5:18; Lc 16:17. **b 13:2** copiapita ángelewi: Taema Gén. 18:1-8; 19:1-3.

xaniawaetsia jinawanapa, Dioso pitabarata. ¡Bajarapacuenia paxamë-ata Dioso pitabarata xaniawaetsia pajinawanapare, matapania panetëpaejawabelianexa!

⁸ Jesucristo raja caejamatabëcuene pexainaponaponaenë. Itsajamatabëcuene apoxainae epatua. Pamatacabibeje ponapona, pewajënaeyabelia-ata daxitamatacabijawabelianexa, caejamatabëcuene xainaponaponaena. ⁹ ¡Bajaraxuata, pëtsa pajumexaniataneme itsaliwaisi Jesús peliwaissiwequa! Bajara-papitothialiwaissianë aponacajamatabëcueneyawenonae itsacueneyawayo-ata. Biji rajane saya, caranata Dioso wajanaca-itaxutotsoniataejawawecua, juya nacajamatabëcuene-enaeyabia-exana, xua xanepana wajaxaenexa, xua-ata nacajani-itaweta wajaxaeyaniwa. ¡Bajaraxuata, pajamatabëcuenesaëmëre tsawanapae Dioso aneconijibia papecataejawa Jesucristo pejamatabëcueneta, pacuenia nacayapëtaeya-exana Jesús peliwaissi!

¹⁰ Waxaitsi wajasíwanajamatabëcuenecopabiwi Jesucristojawabelia, yapëtanetsi Dioso aneconijibia wajanacataejawa, Jesucristo pejamatabëcueneta. Itsiata, pamona tsiteca casaë Dioso aneconijibia petaejawanexatsi, ëperujuliwaissimi, Dioso penajumecopatsiliwaisi Moisés-pijinëta, pejumecowënëtsi-jawata, jamatabëcuenenawëxaniabiaya canaëjëta. Bajarapitsijamatabëcuene penajamatabëxainaewi, Dioso aneconijibia apotae tsane,^c tsipaji jume-aeba Jesús peliwaissi. ¹¹ Sacerdotewi pepopenamatacaitorobinë dajubinë wësinpecaucuta pebeyaxuabinexa. Nexata, waxiyota pejanacaewetsicujinae, cajoneyabiaba Dioso pijacarpaboxaneto-ënëabelia, Pepopeyaiyataetaxunae-ënëabelia, pataxunaeta Dioso ponapona. Bajarapayatu-ucutsijawa-ënëta, Dioso pijabaula pebocaejawa, sacerdotenë dajubinë pejanata jumatsicabiabiaba, Dioso pesiwajamatabëcuenecaewinexa pebara-anaepanaejawami, jiwi pibisiacueni pexanababineconi. Nexata, bajarapadajubinë pewi sacerdotenë tajuitabiaba, tomarapënyëyabelia. ¹² Bajaraxuata, Jesús-ata Jerusalén tomarapënyëyabelia beyaxuabatsi pebejibia-exanaecueniatsi. Nexata, daxita pamona jumexaniatane Jesús pesiwatëpaejawatsi, Dioso wecua-ajibia-exanatsi pibisiacueni pexanaeneconi, Jesús pejana pejamatabëcueneta. ¹³ Bajaraxuata, pacuenia naca-itoroba perujuliwaisi, becopabatsi waja-exanaejawami, Dioso aneconijibia wajanacataejawanexa. Biji rajane, aneconijibia wajanacataenexa, besiwanajamatabëcuenecopatatsi Jesús-jawabelia. Nexata, pacuenia Jesús pia-uracuenia beyaxuabatsi tajë tomarawecua,^d bitso pijaneconi pexainanenëcuenia, bajarapacuenia pijinia waxaitsi-ata benacopatatsi itsamonae wajanacabejibia-exanaenexa,

c 13:10 aneconijibia apotae tsane: Wowaijumeta jumaitsi: «los sacerdotes no tiene derecho de comer de Jesús como hacían con algunos de los sacrificios», jai. Jiwiyumeta jumaitsi tsipae: «Sacerdotewi apotoxanepanaetsi pexaejawa Jesucristo pewi, pacuenia xayabiaba dajubinëyajuwë-nëwijawa, peccapatsinë altar-jumata petajuitsinexa», jai tsipae. Itsiata, hebreos-baxuto peyaquinaenë apojumaitsi bajarapacuenia pepopexaejawa yabara. Saya jitsipa peyapëtaeya-exanaenexa, pacuenia to-acuenebitsi sacerdotewi pexaejawa Jesucristo pewiyajuwënwëwi, bajarapacuenia acuenebi Dioso aneconijibia petaejawa jiwi pejumecowënëtsijawata paliwaisi Dioso najumecopatata Moisés-pijinëjawabelia. **d 13:13 tomarawecua:** Taema Lev. 24:11-16, 23; Núm. 15:35; Jos. 7:24-26; Hch. 7:58. Daxita pamona nacayapëtaeya-exana bajarapaversículojawanë, bitso pijaneconi pexainaewi pijajiwi pitabarata. Bajaraxuayabara beyaxuabatsi tomarawecua. Taema Lev. 16:26-28; 23:26-32. Dioso petsijumaxuabixae pexënatojawabelia daxita mapanacuapijiwiwe pijaneconi, bajaraxuayabara beyaxuabatsi tomarawecua (Mt 27:46; Mc 15:34) pacuenia sacerdotenë capata tomarawecua pachivojawabelia pawajunupaebijawata tsijumaxuaba daxita Israel-pijinë pemomoxi pibisiacueni pexanaeneconi, Dioso pamatacabi siwajamatabëcuenecaewa jiwi pijaneconi. Bajaraxuata, Jesús bitso bepenaneconitsinëcuenia beyaxuabatsi.

Jesús pijajiwixaetsi. ¹⁴ Apobenasiwabējaitsi xua nacato-exana mapanacuapiji-wije, Jesús pijajiwixaetsi, tsipaji mapanacuataje apowajajinawanapaewinexa. Biji rajane, abaxē wajēnae-ewetawanapatsi athēbētatsia pe-ecaetomara, itsa-betsia patsijitsiatsi, wajajinawanapaenexa daxitamatacabijawabelia. ¹⁵ Bajaruata, nacabejiochia-exanae-ata, pexaniacuenia bewēnēxaniatabiabatsi Dioso, Jesucristo wajanacasiwatēpaexae. Bajarapacuenia wajajumaitsabiabijawa Diosojawabelia, nexata, taena ofrendacuenia bewajarajutaponaejawa. ¹⁶ ¡Pētsa panacofēnētamenua pexaniacuenia paneto-exanawanapaejawa itsamonaejawabelia, paneyawenonaejawa-ata penamatawenonaewi! Bajarapacuenia itsa pa-exanawanapaename, bajaraxua pacatotaenanua ofrendacuenia bepanerajutaponaejawa. Nexata, Dioso pacasiwajamatabēcuenēbarēya tsane.

¹⁷ ¡Pamonae Dioso tocopatatsi papeca-ewetsiwinexa, Jesús peliwaissi panējumexaniataexae, ancianowi, itsamona-ata, xua paca-itoroba, pajumecowēnētabiabare! Bajarapamonae yapētanenua pacuenia Diosojawabelia naneconitsipa, xaniawaetsia itsa apopaca-ewetsi. Itsa pajumecowēnētabiabianame papeca-itorobicuenia, nexata papeca-ewetsiwi jamatabēcueneyawenonaeya pajinawanapaename. Pacasiwajamatabēcuenēbarēyanua tsane papeca-ewetawanapaejawa yabara. Paxamē itsa apopajumecowēnēt-simē tsipae, nexata papeca-ewetsiwi pacasiwajamatabēcuenēbējai tsipae. To-acuenebitsinua tsipae papecajamatabēcueneyawenonaenexa, xaniawaetsia panejinawanapaenexa Dioso pejitsipaecuenia.

¹⁸ Panetowajētaponae name Diosojawabelia, pataneyawenonaenexa pejitsipaecuenia patajinawanapaenexa. Itsiata, apopanatoyapētaenē xua yabara Diosojawabelia, jiwijawabelia-ata, pananeconitsipajē. Bajarapacuenia patawajēnaeyabelia pajitsipajē Dioso pitabarata aneconijibia patajinawanapaenexa. ¹⁹ Panetowajētaponae name Diosojawabelia patanetocopatsinexa bepījia pataponae xamamējawabelia, patacataenexa.

Penapējiobiwaisianē

²⁰⁻²¹ Pacatojitsipatsi, Dioso wajanacajamatabēcuenexanepanaeya-exanaenē, papecajamatabēcueneyawenonaenexa pejitsipaecuenia panejinawanapaejawa. Jesucristo wajanacasiwatēpaecujinae, icatsia asaēya-exanatsi. Bajaraxuata, yapētanetsi pexaniajaicuene Dioso athēbēabetsia wajanacacapanepaejawanexa daxitamatacabijawabelia. Yapētanetsinua Jesús pijajiwi, xaniawaetsia pewetsinē, pacuenia oveja pewetsinē xaniawaetsia ewetaponapona. ¡Jesucristo bitso ayajiamatabēcuenenē tsaponaponae daxitamatacabijawabelianexa! Bajara-itsi tsane.

²² Tajamonae, paca-itorobatsi xaniawaetsia panenamuxuna-ewetsinexa paliwaissi pacatoyaquinatsi mapabaxutotaje. Tsiquiriliwaisiyo saya pacatoyaquinatsi patacamuxujobinexa, panewajēnaeyabelia paneajamatabēcuenesaenexa Diosojawabelia. ²³ Pexanaliwaisiyo pacatoyaquinatsi, patacatsipaebinexa mapacueneje. Wajabanenē Timoteo rabaja pitsapa penaneconitsiwi pejebabiabibowecua. Itsa bepījiayo patsiarena xanējawabereña, nexata xamamējawabelia barēponaenajē.

²⁴ Nebajacobiana daxita Dioso pejumeliwaisita papeca-ewetsiwi, daxita wajamonae Jesús peliwaissi pejumexaniataewi yajawa. Wajamonae-ata, Italia nacuapijiwi, pacajamatabēnajinalia. ²⁵ Daxita xamamē pacatowajētatsi Diosojawabelia, asiwaya papecayawenonaenexa. Bajara-itsi tsane.

Santiago

Anciano Santiago petoyaquinaebaxuto Jesús pijajiwi, pewënajudíowijawabelia

Pebajacobiliwaisi

1 ¹ Xanë Santiagonë, ^a Dioso, Wajatuxanenë Jesucristobeje, pijajiwi-tonënë. Pacatoyaquinatsi patacabajacobinexa pajudíowimë, Israel-pijinëmi pexi doce ponëmibeje papemomoxiyajuwënwëwimë, nacayajatsia panejinawanapaewi daxita nacuanëjawa, pepopanijanacuawecua.

Jesús peliwaisi pejumexaniataewi xua be-exana, itsa
jamatabëyapëtane pacuene xanepana pexanaenexa

² ¡Tajamonae, pasiwajamatabëcuenebarëyamëre, itsa pacatocopiapata-pona daxitacuenewirijawanë apopanejitsipaecuene, papecajamatabëcuene-ëjëbinexa! ³ Payapëtaneme rabaja bajaraxuanë papecatocopiapataponaejawata, panenajamatabëcuene-itajëtsinexa pane-ajamatabëcuenesaëjawa, panewajënaeyabelia Dioso pane-itaxutuajamatejematsaponaejawa. Bajarapajamatabëcuene pacajamatabëcueneyawenonaena, panenajamatabëcuenesaëtsinexa bepejiobicuena pajinawanapae-atamë. ⁴ ¡Bajaraxuata, pajamatabëcuenesaëmëre tsawanapae bajayajebi, panejamatabëcuenewitsabaponaenexa Diosojawabelia! Bajarapacuenia itsa pajamatabëcueneliwaisi-naweretaponaenename Dioso pijacuene, nexata itsacuenejawa-ata apopacatsisajinae tsane, Dioso pejitsipaecuena panejinawanapaenexa.

⁵ Paxamëyajuwënjëjiwi itsa tsisajinatsi xaniawaetsia pecanaëjëtsijamatabëcuene pacuenia exanaejitsia, bewajëca Diosojawabelia, peyapëtaeya-exanaenexatsi. Nexata, Dioso rajutsianatsi pecunuajawa, wecua-asiwanejewatsi pewajëtsijawa. ⁶ ¡Itsata baitsi jane, bajarapajiwi pëtsa aeba, pewajëtsijawa Diosojawabelia! Biji rajane, be-itaxutuajamatejema, peto-exanaenexatsi pewajëtsicuenia. Pajiwi, pe-aebijamatabëcuene pexainaejawata, wajëta Diosojawabelia, bajarapajiwi apocaxitarabi tsane xua yabara wajëca. Bajarapitsijamatabëcuene pexainaejiwi jamatabëcuenejëpa manua-menepijimalataca. Pacuenia jowibo pesaëta caponabiaba malataca itsabelia

a 1:1 *Santiagonë*: Bajaraponë, Jesús pejuyapijinë. Hebreojumeta wënërübatsi Yacobo, wowaijumeta pijinia, Jacobo. Itsiata, Dioso peliwaisi pejucaewi wowaijumejawabelia, wënërübatsi Santo Yacobo. Belia, pecuaicuaijajawata bajarapajumebeje bijiana, Santiago, pejaitsabiabinexa pecuaicuaijajawata.

bubujai, bajarapijinia jamatabëcuene-itsi pajiwi, jamatabëcuenematacapo-natsi pejitsipaecuenejawabelia. ⁷⁻⁸ Bajarapitsijamatabëcuene pexinaejiwi, apobe-ewetsi perajutsinexatsi xua wajëca Diosojawabelia, tsipaji apoxinae caeliwaisi, xujawabelia itaxutuajamatejemajitsia. Itsajawata, siwanajamatabëcuenecopata Diosojawabelia, itsajawata pijinia itsacuenejawabelia. Bajaraxuata, caejamatabëcuene apoxinae daxita pexanaecuenejawalia.

⁹ Jesús peliwaisi pejumexaniataewiyajuwënë, apoxinae-ata pecobecowëjawayo, jiwi apoyaiyatae-atatsinua, bejamatabëcuenebarëya, Dioso petsitanajamatabëcuene-itajëtsixaetsi piasiwajawa, ayaimatamotanua pecomuatsixaetsi. ¹⁰ Pajiwi pijinia, bitso pexinaejiwi pecobecowëjawanë, bejamatabëcuenebarëya, Dioso beweliamatabëcuenejiwi pexanaexaetsi, najëpaeya petanexatsi itsamonae Jesús pijajiwi yajawa, tsipaji pexinae-cuenemi bepjiia towerewerecaenatsi. Pacuenia ponatoxi bepjiia matono-werewereca, bajarapijinia itsi tsane bitso pexinaecuenen-ata. ¹¹ Paepa-tota juameto tajë rucaina, icotia bitso ataju, nexata ponatoxi tsaquena. Pematono-ata othopa. Yajawawerewerecanua bepjiia pexania-itabëcuenemi. Bajarapijinia itsi tsane bitso pexinaewi. Yajawawerewerecaena pecobecowë, pecanajetsicuene-ata.

Dioso apojamatabëcuene-ëjëtsi jiwi pibisiacuene pexanaeya-exanaenexa

¹² Jamatabëcuenebarëya tsane, pajiwi, najamatabëcuenesaëta, pejamatabëcuene-ëjëtsijawatatsi piayapëbejecuenejawata. Bajarapajiwi pejamatabëcuenematatoxenetsixae tsane, Dioso pitaxutuajamatejemajawata, rajutsianatsi bitso pebarëyajamatabëcuene,^b pewajënaeyabelia pexinaenexa, pacuenia najumecapanepaeya rajutsipaeba pamonaë asi-watsi. ¹³ Itsiata baitsi jane, itsa pacajamatabëcuene-ëjëta pibisiacuene pane-exanaenexa, pëtsa patsijumaxuabame Dioso, papecajamatabëcuene-ëjëtsijawa yabara, tsipaji cajena, caeto-ata Dioso apojamatabëcuene-ëjëtsi itsajiwi-ata pibisiacuene pexanaeya-exanaenexa! Itsajiwi-ata pijinia, apocuenecaëjëpaetsi pejamatabëcuene-ëjëtsinexa Dioso, pibisiacuene pexanaeya-exanaenexa. ¹⁴ Jiwi saya jamatabëcuene-ëjëtsatsi, penajamatabëxainabiabicuenia pibisiacuene pexanaeya-exanaenexa. Nexata, bajara-papibisiajamatabëcuene jitsipaeya-exanaponatsi, pibisiacuene pexanaejawabelia. ¹⁵ Bajarapapibisiajamatabëcuene capitsapa pibisiacuene jiwi pexanaenexa. Pibisiacuene pexanaejawa pijinia capitsapa jiwi Diosowecua petëpaejawanexa, pacuenia Dioso tocaëjëta pibisiacuene pexanaewi.

¹⁶ Tajamonae, bitso pataca-asiwawi, pëtsa panajamatabëcueneyamaxë-itojorobame bajarxuanë yabara! ¹⁷ Dioso, baja cajena pexanaenë daxita xuanë rubena, pitayotsijawanë athëbëtatsia, nexata bajaraPonë pitaquirijamatabëcuene apoxinae. Bajaraxuata, caejamatabëcuene

b 1:12 *pebarëyajamatabëcuene*: Bajaraxua wowaijumeta cuenecataeya jumaitsi: «*Corona de vida. Dioso rajutsianatsi pitawaya-exanaecoronajawa*», jai. Bajarapacoronajumejawabelia nacajunua mapajamatabëcueneliwaisianëje: Bitso pebarëyajamatabëcuene, itsamonae peyaiyataejamatabëcuenetsi, xua yabara apotsisajinaetsi itsacuenejawayo barëyaya pejinawanapaenexa, apopetëpaejawanexa, itsa jume, apopewerewerecaejawanexanua. Daxita bajarapaliwaisianë caju-nua *corona de vida*jawabelia. Bajaraxuata, ayapëbeje pecaxinaenexa pajamatabëcuene yabara jumaitsi.

nacasiwanajamatabëxainabiaba ëpexaniacuene wajanacato-exanaenexa waxaitsijawaberena. ¹⁸ BajaraPonë bajarapacuenia pejitsipaexae, pexitsi naca-exana wajajumexaniataejawata pexaniajailiwaisi, Jesús peliwaisi. Nexata, apojudíowiwehua copiaya wajasíwanajamatabëcuenecopabixae Jesucristojawabelia, waxaitsi, judíowitsi, Dioso nacatane bematapijiwitsi.

**Pacuenia bexanawanapatsi Dioso peliwaisi
wajanaca-itorobicuenia, yabara peliwaisi**

¹⁹ ¡Tajamonae, bitso pataca-asiwawi, Dioso pexi papeca-exanaexae, bepijiayo panamuxuna-ewetabiabare Dioso peliwaisi! ^c Juya, bepijiacuenia ^d apobepacuaucaijamë abaxë copiaya xaniawaetsia panatsiwañëaenecanaëjët-sinejewamë. Bepijianua apobepa-anaepanaemë, ²⁰ tsipaji jiwi pianaepanaejawata apo-exanae papexaniacuene Dioso jitsipa. ²¹ ¡Bajaraxuata, pacopabare daxita pibisiacuene panenajamatabëxainaejawata, pane-exanaejawanua itsamonaejawabelia! ¡Biji rajane, beweliamatabëcuenewi nataeya, panamuxuna-ewere paliwaisi pacatsijamatabë-uba, tsipaji Dioso pejumeliwaisi papeca-itorobicuenia itsa pa-exanaename, bajarapaliwaisi pacacapanepaena Diosojawabelia!

²² Itsiata baitsi jane, apopacatoxanepanae saya ëpanenamuxuna-ewetsijawa Dioso pejumeliwaisi. Biji rajane, bepa-exanabiabamenua pacuenia Dioso pejumeliwaisibaxutota jumaitsi. Itsa panatocanaëjëtame papecasiwajamatabëcuenebarëyajawa Dioso, peliwaisi ëpanenamuxuna-ewetsijamatabëcuene, panajamatabëcueneyamaxë-itojorobame cajena. ²³ Pajiwi saya jumetane Dioso pejumeliwaisi, exanaenejewa pitorobicieniatsi, bajarapajiwi jamatabëcuenejëpa ponë naitabaratan tsaxuta. ²⁴ Tsaxuta penaitabarataejawata, naitabarayapëtane. Itsa baja wecuanapë-nëyorota, bepijia nacofënëta pacuenia itabarajumape-itsi. ²⁵ Itsiata, pajiwi aponacofënëtsi Dioso pejumeliwaisi, xua jumetane, xaniawaetsia natojume-canaëjëta bajarapapexanaliwaisi. Itsa jamatabënaponapona, pexanaenexa pitorobicueniatsi bajarapacapanepaeliwaisitsi, ^e bajarapajiwi Dioso bitso yawenonaenatsi dexitacuenejawabelia. ²⁶ Pajiwi natane bitso Dioso pejitsipa-cuenia peponapanaejawa, itsiata itaxutojema itsa cuaicuajai tsabiabi, bajarapajiwi saya najamatabëcueneyamaxë-itojoroba. Bajarapacuenia natae-ata, to-amatamobitsi Dioso pitabarata. ²⁷ Xua waxa Dioso tsitapexaniacuenetsi pijajiwi pexanawanapaenexa, mapacuenejawanëje: Peyawenonaejawata tsonijiwixi, pamonajiwi pewecuatëpaewaxitsi-ata, paepatota bitso namatawenona itsacuenejawaxi, nayajiwitaeyanua pejinawanapaenexa penajamatabëcuenebijianaeyaniwa, mapanacuapijiwije pexanaejawanëta.

**Jesús pijajiwi najëpaeya jamatabëcuenexanepanaeya
namata-enetsia benatane**

2 ¹ ¡Tajamonae, najëpaeya namata-enetsia panataema, panenajuasiwanajamatabëcuenecopabixae ayaijamatabëcuenenë Wajatuxanenë

c 1:19 *Dioso peliwaisi*: Taema Sant. 1:18, 21-22. **d 1:19** *bepijiacuenia*: Taema Prov. 13:3; 15:1. **e 1:25** *bajarapacapanepaeliwaisitsi*: Paliwaisi yabara Santiago yaquina mapaversículota, bajarapaliwaisi Cristo pitorobiliwaisi: Taema Jn 14:13; 15:12; Gál. 6:2; 1Jn 5:3.

Jesucristojawabelia! ¡Pëtsa itsamonae bijiaya pataneme! ² Bajaraxuata panenacaetuatsijawata, itsa napatsipa pecobecowë pexainaenë, pexaniajawa penaxatatsinë, oro anillo penacobexatatsinë, bajarapaepatota pijinia itsa napatsipa bepejiobinë, peruju-esetoyo penaxatatsinë, ¿detsa pacuenia pacopiapitsipame bajarapitsinëbeje? ³ ¿Najëpaeya meta pacopiapitsipame? Itsa jume, caenë meta xaniawaetsia pacopiapitsipame, pexaniajawa penaxatatsinë. Pa-ecaeya-exanaejitsipame pexaniajawata. Ponë bepejiobinë, juya apopacopiapitsimë tsipae xaniawaetsia. Saya panucaeya-exanaejitsipame. Itsa jume, pa-ecaeya-exanaejitsipame meta irata. ⁴ Bajarapacuenia itsa pa-exanaejitsipame, pexaniacuene apopa-exanaemë tsipae, tsipaji najëpaeya bajaraponëbeje apopataemë Dioso pitabarata. Caenë pecobecowë pexainaenëxae, payaiyataejitsipame. Itsanë saya, bepejiobinëxae, bijiaya pataejitsipame. Nexata, bajarapacuenia itsa pa-exanaejitsipame, bijiaya pacanaejëtsipame.

⁵ Tajamonae, bitso pataca-asiwawi, bepayapëtaneme mapaliwaisije. Pamonae bepejiobiwi mapanacuataje, Dioso baja cajenaitapetatsi itsamonaewecua ayaijawa pexainaewinexa pitaxutuajamatejemajamatabëcuene Diosojawabelia. Nexata, bajarapamonae tocopatsianatsi Cristo pebarëwetsinexatsi daxitacuene, pacuenia baja najumecapanepaeya jumaitsi Dioso, pijajiwi, piasiwawitsi yabara. ⁶ Dioso bitso pexainaewicuenia taetatsi, paxamë juya bijiaya pataeyabiabame bepejiobiwi. Pamonae pijinia pecobecowë pexainaewi, Dioso apopejitsipaewi, asiwaya pataeyabiabame. Itsiata, bajarapamonae bitso pexainaewi naexanapona paxamë papecawecuanaxainaeyabaponaexae. Pacaneconitabiabanua juez-monaejawabelia, papecananeconitsia-exanaenexa. ⁷ Bajarapamonae pibisiacuenia Cristo wënëcacuaicuaijai tsabiabinua, Ponë pewënëta^f panawënërubame papijajiwiwaxemë.

⁸ Dioso pejumeliwaisibaxutota jumaitsi mapacueniaje: «¡Asiwamëre itsamonae-ata pacuenia xamë nijacuata nasiwamë!», jai. Bajarapaliwaisi pexanialiwaisi bitso, daxitaliwasianë matatoxenetsia. Nexata, bajarapaliwaisi pepacuene itsa pajumecowënëtsianame, pexaniacuene pa-exanaename. ⁹ Itsiata, itsa payaiyataejitsipame itsajiwi, itsamonaewecua, nexata pibisiacuene pa-exanaejitsipame, tsipaji najëpaeya apopataemë tsipae daxitajiwi Dioso papeca-itorobicuenia. ¹⁰ ¡Pëtsa panacofënërame mapaliwaisije! Pajiwi jumecowënëtaponapona-ata Dioso penajumecopatsiliwaisi Moisés-pijinëta, itsiata caeliwaisiyo apopejumecowënëtsijamatabëcuene, daxitaliwaisi apobejumecowënëtsijiwi Dioso pitabarata. Nexata, naneconita Diosojawabelia. ¹¹ Bajarapacuenia naneconita, tsipaji caenë Dioso jumaitsi: «¡Panenapitsijiwiwebeje pëtsa panawecuaajaitamebeje itsajiwi!», jai. Itsaliwaisi pijinia jumaitsi: «¡Pëtsa beyaxuabame jiwitonë!», jai. Bajaraxuata, ponë apojaitsi-ata itsawa pijawawecua, itsiata itsa beyaxuaba jiwitonë, Dioso tanetsi daxita penajumecopatsiliwaisi Moisés-pijinëta apopejumecowënëtsijawa. ¹² Nexata, Jesucristo papeca-itorobicuenia^g bepaxanawanapame, bepacuaicuaijamënu tsawanapae itsamonaejawabelia,

^f 2:7 Ponë pewënëta: Taema Hch. 11:26. ^g 2:12 Jesucristo papeca-itorobicuenia: Taema Jn 14:13; 15:12, Gál. 6:2; 1Jn 5:3.

tsipaji paxamē payapētaneme Dioso papecaneconicanaējētsijawanexa, paliwaisita pacacapanepa. ¹³ Nexata, pamonaē itaxutotsoniataenejewah^a naneconitsia-exana itsajiwijawabelia, juya bajarapajiwi itaxutotsoniataenejewatsi naneconitsia-exanaenatsi, pamatacabi Dioso daxitajiwi neconicanaējētsiana pijaneconi yabara. Itsiata baitsi jane, pamonaē itaxutotsoniatane itsamonaē-ata, bajarapamonaē wecuapanepaena Dioso penaneconitsia-exanaejawaminexatsi.

**Pamonaē siwanajamatabēcuenecopaba Jesucristojawabelia,
nacuenenaitajēta pexaniacuene pexanaejawata**

¹⁴ Tajamonaē, ždetsa xua yabara tonamatamotatsi jiwi pejumlahtsijawa: «Xanē raja siwanajamatabēcuenecopatajē Jesucristojawabelia», pejaijawa?, ita apo-exanawanapaeⁱ pexaniacuene itsamonaejawabelia, pacuenia Jesús exanaponapona. Bajarapacuenia saya ita jumlahsi pecuaibota, exanaejewa pexaniacuene, bajarapajiwi Dioso apocapanepaetsi tsane. ¹⁵ Belia meta, itsajiwi, Jesús pijajiwi yajuwēñējiwi, bitso namatawenonaējitsipa penaxatatsijawa, pexaejawa-ata. ¹⁶ Itsiata, paxamē yajuwēñējiwi jumlahsi tsipae bajarapajiwi jawabelia: «¡Xaniawaetsia baja ponare! Dioso cayawenonaē, nenaxatatsijawanexa, ne-aqueyaniwa. Carajutsinua nexaejawanexa-ata, nepenejawabelia», jai tsipae bajarapajiwi jawabelia. Bajarapacuenia asiwaya jumlahsi-ata, rajutsinejewa penamatawenonaejawa, apojumenamatamotsi tsipae, tsipaji bajarapajiwiyo tsiteca yajawanacopata penamatawenonaēcuene. ¹⁷ Bajarapijinia itsi Jesucristojawabelia wajasiwanajamatabēcuenecopatsijawa. Pexaniacuene ita apoto-exanaetsi itsamonaejawabelia, jumlahsi-atatsi: «Xanē siwanajamatabēcuenecopatajē Jesucristojawabelia», jai-atatsi, nexata apojumenamatamotsitsi. Cuenejēpatsi saya petēpaenē, pexaniacuene ita apoto-exanaetsi penamatawenonaējiwiyo jawabelia.

¹⁸ Itsajiwi jumlahsi tsipae: «Xanē raja siwanajamatabēcuenecopatajē Jesucristojawabelia», jai tsipae. Itsiata, pexaniacuene apoto-exanaē itsamonaejawabelia. Itsajiwi pijinia jumlahsi tsipae: «Xanē raja pexaniacuene exanabiabajē itsamonaejawabelia», jai tsipae. Itsiata, aposiwanajamatabēcuenecopatsi Jesucristojawabelia. Bajarapacuenia pejumlahtsiwi jawabelia, jumlahsinē tsipae mapacueniaje: «¡Itsa cacuenecaējēpa, netsitajēre pepacuene nesiwanajamatabēcuenecopatsijawa Jesucristojawabelia, pexaniacuene to-exanaenejewamē itsamonaejawabelia! Xanē juya catsitajētsianatsi pepacuene tasiwanajamatabēcuenecopatsijawa Jesucristojawabelia, pexaniacuene tato-exanaejawata itsamonaejawabelia», janē tsipae. ¹⁹ Xamē rabaja jumlahsimē nejumexaniataejawa caenē Dioso peponaponaejawa yabara. Xanepana rabaja picani pacuenia jumlahsimē. Dowathimonaē-ata rabaja jumexaniatane bajarapaliwaisi. Bajarapacuenia jumexaniataē-ata, pexaniacuene apopexanaexae. Nexata, pecajunawi neconecojai, tsipaji yapētane caenē Dioso penaneconitsia-exanaejawanexatsi. Nexata, xamē cuenejēpame bajarapamonaē, ita saya jumexaniataneme Dioso peponaponaejawa, pexaniacuene to-exanaenejewamē itsamonaejawabelia.

h 2:13 itaxutotsoniataenejewa: Taemana Mt 6:14-15; 5:7; 7:1-2, 18:23-35. **i 2:14** apo-exanawanapae: Taema Mt 7:16-20, 25:41-46.

²⁰ Nijamatabëcuenecowëbinë cajena. Beyapëtaneme mapacueneye. Pajiwi jumaitsi-ata: «Xanë raja Dioso pejitsipaecuene exanaponaponajë. Siwanajamatabëcuenecopatajënua Jesucristojawabelia», jai-ata picani, itsiata pexanacuene yajawa itsa apoto-exanae itsamonaejawabelia, pacuenia Dioso naca-itoroba, bajarapajiwi ajumematamobi penawajunupaebijawa pesiwanajamatabëcuenecopatsijawa yabara Jesucristojawabelia. ²¹ ¡Pacanaëjère! Bajayata, wajasalinainëmi Abraham-pijinë Dioso aneconijibia apotaetsi, ëpejumexaniataejawa yabara. Biji rajane, najamatabëcuene-itajëta pexanaejawata Dioso pitorobicueniatsi, pacujinae nacoixibuata pexënato, Isaac, altar-jumata, petajuitsinexa ofrendacuenia Diosojawabelia. ²² Bajarapacuenia pe-exanaejawata, Abraham-pijinë najamatabëcuene-itajëta pejumexaniataejawa Dioso. Itajëtanua apopetosajinaejawatsi itsajawa, xaniawaetsia pitaxutuajamatejemajawanexa Dioso. ²³ Bajaraxuata, Dioso pejumeliwaisibaxutota jumaitsi Abraham-pijinë yabara mapacueniaje: «Abraham-pijinë jumexaniatane pacuenia Dioso najumecapanepaeya jumaitsi. Nexata, Dioso aneconijibia tanetsi», jai baja cajena Dioso pejumeliwaisibaxutota. Nexata, bajaraponë yabara jiwi jumaitsi tsabiabi: «Abraham raja Dioso pia-siwanëtsi», jai tsabiabi.

²⁴ Nexata baja, paxamë payapëtaneme mapacueneye. Dioso aneconijibia tane jiwi itsa yajawa-exana pacuenia itorobatsi, pitaxutuajamatejemajawa yajawa Dioso. Baitsi, ëpejumexaniataejamatabëcueneta aneconijibia apotaetsi. ²⁵ Bajarapacuenia pijinia, bajayata, Dioso aneconijibia tane Rahab-pijiwami, penaperabëcanajetabiawami-ata, pibisiacuene pewitota pexanabiabinexa. Bajarapowami pejumexaniataexae' Dioso peyawenonaejawanexa Israel-pijinë pemomoxi, pexaniacuenia copiapita Israel-pijinë pemomobeje, jiwi peya-enebinëbeje, wajabitsaë pexanaenexa bajarapatomarapijiwimijawabelia. Orijiibia, yawenona bajaraponëbeje, peponaenexabeje saicaya namutua, pijawajabitsaë pebeyaxuabiyaniwatsibeje. Bajarapacuenia Rahab-pijiwami pexaniacuene pexanaexae, Dioso aneconijibia tanetsi. ²⁶ Canaëjëtsianatsi mapacueneye: Wajaperabëto baja cajena namatawenona pejumali waja-aperabësaënexa. Itsiata, itsa ajumaliijibi, tëpa baja. Bajarapacuenia itsi waja-itaxutuajamatejemajawa Diosojawabelia. Itsa apoxanaetsi pexaniacuene, wajayawenonaenexa itsamonaejawabelia, waja-itaxutuajamatejemajawa bepetëpaejawa, Dioso pitabarata.

Pacuenia itsi waja-ebareto, yabara peliwaisi

3 ¹ ¡Tajamona, panayajiwitaema! Apopacatoxanepanae ayaibit-saëto panenaexanaponaejawa Dioso peliwaisi panecujarubiwinexa. Paxamë payapëtaneme Dioso, daxitajiwi matatoxenetsia, bitso ayaicuenia penaneconitsia-exanaejawanexa pamonaë bijiaya cujaruba Dioso peliwaisi. ² Daxitatsi waxaitsi itsajawata banacajumejemaba, pibisiacuenia wajacuai-cuaijainexa, pacuenia picani apobecuaicuaijaitsi. Nexata, pajiwi pibisiacuenia apocuaicuaijai, caëjëpatsinua penajamatabëcuenesaëtsinexa daxita pibisiacuene pexanaeyaniwa. Bajarapajiwi jamatabëcuenenawereta baja Diosojawabelia. ³ Caballo tsicuiboxatatatsi freno, wajawësimuxufetsinexa

itsabelia jitsipatsi. Nexata, freno caballowecua tsiquirijawayo-ata, itsiata caējēpa caballo wawawēsimumuxufetsinexa, itsabelia jitsipatsi wajaponae-nexa. ⁴Bajarapijinia itsi barco-ata. Pinijimo-ata, jowibo ayai-atanua, itsiata petabufetaicaenē, tsiquiritenapayota barcotabufe cajēnapona, itsabelia jamatabēpona peponaenexa. ⁵Bajarapijinia itsi tsiquiri-isotoyo-ata. Itsa tajua, naexana ayai-isoto, petajuenexa piniji-unu-ata. Waja-ebārēto-ata bajarapitsicuene xaina. Tsiquirijawayo-ata picani, itsiata caējēpatsi pecuaicuaijainexa ayailiwaishi. ⁶Waja-ebārēto cajena cuenejēpa pacuenia isoto ayai, tsipaji wēnēca pibisiajumenē, wajajamatabēcuenebijianaenexa itsamonaewawabelia. Nexata, waja-ebārētota bitso pibisiacuene exanatsi, daxita wajaperabētota waja-exanaewawawecua. Belia, wajuacuaijaijawata daxita jiwitsi najamatabēcuenebijianatsi. Wajajumecowēnētsixae dowathi wajanaca-itorobicuenia, pibisiacuena wajuacuaijainexa, natobijianatsi wajaponaponaepato. ⁷¡Pacanaējēre mapacuenene! Jiwi caējēpatsi penaitajuania-exanaenexa daxitawiria dajubiyajuwēnēwi, unupijiwi, pepunaewi, pecotobēxēta pejinawanapaewi, manuamenepijidujuai-ata. Itsamonaew bajarapacuenia naitajuania-exana baja, pejumecowēnētsinexatsi. ⁸Itsiata baitsi jane, itsajijiwi-ata apocaējēpaetsi pena-ebārēto-itawetsinexa, pejumecowēnētsinexa pibisiacuena pecuaicuaijajawa pecopatsinexa. Waja-ebārēto cajena bitso abeje. Aponacacuenecaējēpae wajanajumecataitsinexa. Nexata, pacuenia jomo pijaveneno xaina pebeyaxuabinexa, bajarapijinia itsi waja-ebārēto. Pibisiajumenē xaina, jiwi wajajamatabēcuenebijianaenexa. ⁹Waja-ebārētota, itsajawata pexaniacuena wēnēxaniatatsi waxa Dioso. Itsajawata pijinia, pibisiacuena cuacuaijaitsi wawawēnajiwiwawabelia, Dioso nacenecataeya pexanaewitsi. ¹⁰Cae-ebārētota pexaniacuena wēnēxaniatatsi Diosojawabelia. Pibisiacuena cuacuaijaitsinua wawawēnajiwiwawabelia. Tajamonaew, apobe-exanaetsi cajena bajarapacuenia. Caecuaijaiacuene bexainatsi. ¹¹¡Pacanaējēre mapacuenene! Mera pepitsapaemēthēatsina pitsapaina caera, pexaniara. Apopitsapae pexaniara, piatsaxara yajawa. ¹²Bajarapijinia itsi pe-ubijawa-ata. Higueranaewawawerena apopitsapae saicayacuai. Uvanaewawawerena-ata apopitsapae saicayacuai. ¡Jume cajena! Bajarapijinia itsi mera pepitsapaemēthē. Caejawatsina apopitsapae pexaniara, piatsaxara^k yajawa. Bajarapacuenia pijinia, waja-ebārētota apobecuacuaijaitsi pexaniajumenē, pibisiajumenē-ata.

Xua be-exana pamonaew Dioso peyapētaeya-exanaecueniatsi jinawanapa

¹³Itsa paxamē xaniawaetsia pajumeyapētaneme Dioso pejumeliwaishi, nexata itsamonaew pexaniacuene bepatsita-exanawanapame, beweliamatabēcuenewi nataeya, pacuenia nacacujaruba Dioso pejumeliwaishi wajajinawanapaenexa. ¹⁴Itsiata baitsi jane, itsa paxainame panecueneca-ēbijamatabēcuenē itsamonaew pecuene yabara, itsa pajitsipabiabamenua jiwi pane-ewetsiwi papeca-exanaenexa itsamonaewecua, panajamatabēcuenē-itajētame apopanexainajawa Dioso papecapapētaeya-exanaewamatabēcuenē, pexaniajailiwaishita. Nexata,

^k 3:12 *piatsaxara*: Wowaijumeta pitsapa «agua salada». Itsanacuanējawa mera pepitsapaemēthēanē capitsapa ayajawa yajo pexainaera. Acuenēbi piapaejawa, tsipaji piapaejawata jiwi be-axayocuenia werewerecaponaewitsipa.

apopaxainaemënu xua yabara be-ayaijamatabëcuenejiwi panataejitsiamë itsa-monaewecua, ¹⁵ tsipaji payapëtaejamatabëcuene paxainame apopitsapae Diosojawawerena. Biji rajane, pacanaëjëtame mapanacuapijiwije pecanaëjëtisicuenia. Itsa jume, dowathi papeca-itorobicuenia panajamatabëxainame. Itsa jume, paxamë panejamatabëcueneta, panajamatabëxainame bajarapacuenia. ¹⁶ Itsajota jiwi cue-necaëba itsamonae, itsa jitsipabiabanua jiwi pewetsiwinexa pexanaenexatsi, bajarajota nexata jiwi najamatabëcuenejëpaeya aponajuajinawanapae. Daxitacuenepibisiacueneta exanawanapa. ¹⁷ Itsiata bailsi jane, pamona canaëjëta Diosopeyapëtaeya-exanaecueniatsi, bajarapamonae, daxitawecua, ëpexaniacuenexanawanapa. Aponamaxëwanitsi. Pexaniacuenia yawenonabiaba itsamonae. Pijacuata aponasiwanajamatabëxainae. Biji rajane, siwanajamatabëxainabiaba itsamonae pejitsipaecueneta. Itaxutotsoniatane itsamonae-ata. Pexaniacuenexana. Aponajamatabëcuene-epatajërërëcae. Apoyamaxë-itojorobi itsamonae-ata. Pamona bajarapitsicuenexanawë exanawanapa, Diosopeyapëtaeya-exanaecuenetsi pecanaëjëtisiwi. ¹⁸ Pajiwi nabarajamatabëcuenexanepanaeya-exanaena namata-enetsia penaitoyawi-ata, xaniawaetsia penajuajinawanapaenexa, bajarapajiwi Diosoyawenonaenatsi jamatabëcuenexanepanaeya peponaponaenexa. Pexaniacueneta to-exanaenatsi.

Mapanacuapijijamatabëcuene pexainaewi pejinawanapaecueneta

4 ¹ Payapëtaneme tsaja xua yabara paxamëyajuwënëwi namata-enetsia najume-anaenotabiaba, penabara-anaepanabiabinexa? Bajarapacuenia bajarapamonae exanabiaba, tsipaji pejitsipaejamatabëcuene jamatabëcuenematacaponabiabatsi pibisiacueneta pexanaenexa. ² Bajaraxuata, paxamë itsa pajitsipame itsacuenexawa panexainaenexa, itsiata itsa apopacacajëpae panepitsinexa, nexata pexainaewi jamatabëpayabarabeyabiabame. Itsa pacobecaëbabiabame itsamonae pexainaexawa, itsiata itsa apopacacajëpae panepitsinexa, nexata pexainaewi jamatabëpayabarabeyabiabame, panepitsinexa pecobecowë. Paxamë apopaxainaemë panejitsipaecueneta, tsipaji apopawajëcabiabimë Diosojawabelia, papecarajutsinexa. ³ Orijibia, pawajëcabiabi-atamë Diosojawabelia, itsiata apopacarajutabiabi xua pawajëcame, tsipaji yajawa pawajëcabiabame pibisijamatabëcuene, panecabarëyanexa ëpanenatojitsipaecuenia. ⁴ Caejamatabëcuene apopanaxainaewi cajena Diosojawabelia. Biji rajane, caejamatabëcuene paxainame mapanacuapijicuenexawabelia. ¿Apopayapëtaemë tsaja, bajarapajamatabëcuene yabara Dioso bepijajawajitsaemë panenaexanaexawa? ¿Xaniajanë cajena! Pajiwi rabaja mapanacuapijicueneta bitso jitsipa, bajarapajiwi Dioso bepijajawajitsaëjiwi naexana. ⁵ Bajaraxua yabara Diosopejumeliwaisibaxutota jumaitsi mapacueniaje: «Dioso ayaicuenia naca-asiwa. Wajanacajamatabëcuene-asiwaxae, nacatsijamatabë-ecaeya-exana Espiritu Santo,¹ caejamatabëcuene wajaxainaeyaniwa mapanacuapijicuenexawalia. Biji rajane, nacajitsipaeya-exana ëDioso

1 4:5 Espiritu Santo: Itsamonae canaëjëta pecanacuenebijawa mapajume, «jiwi pe-espiritu-pejumali» Espiritu Santowecua. Pacujinae Dioso exana jiwi, bajarapamatacabipicani pibisijamatabëcuene apoxainae. Itsiata, Adán-pijinë pibisiacueneta pexanaecujinae, daxita mapanacuapijiwije yajawanaexana pibisijamatabëcuene. Rom. 5:12-14. Dioso raja daxitajiwi pejumali perajutsinë. Deut. 30:20; Hch. 17:25-26. Bajaraxuata, Dioso nacarajuta daxitatsi wajajumali/wajajamatabëcuene. Bajarapacuenia Dioso perajutsixae pe-espiritu jiwijawabelia, apotsitaxanepanaetsi jiwi caejamatabëcuene pexainaexawa itsacuenexawabelia bajaraPonëwecua.

waja-asiwanexa daxitacuenewecua», jai Dioso pejumeliwaisibaxutota. ⁶Itsiata bailsi jane, Dioso asiwaya nacayawenona, wajanajamatabëcuenecataitsinexa pibisiacuenewa- exanaeyaniwa. Wajanaca-asiwacuene yabara, Dioso pejumeliwaisibaxutota jumaiti mapacueniaje: «Dioso asiwaya yawenona pamonaeweweliajamatabëcuenewi natane. Pamonaewewia be-ayajamatabëcuenewi natane, Dioso apojitsipae peyawenonaejawa», jai Dioso pejumeliwaisibaxutota. ⁷¡Bajaraxuata, Dioso jamatabëcuene-ewetsiaya pajinawanapare, beweliamatabëcuenewi nataeyapane-exanawanapaenexa, pacuenia Dioso pacatojitsipa! ¡Pajamatabëcuenesaëmëre dowathiwequa! Nexata, pacawecuanajetabijirawiana. ⁸¡Pajaire caejamatabëcuene panexainaewajawa Diosojawabelia! Nexata, Dioso caejamatabëcuene xainaena papecayawenonaenexa. ¡Paxamë pibisiacuenepane-exanaewi, pacopabare baja bajarapacueni! ¡Paxamë anijamatabëcuenebeje panexainaewi, caejamatabëcuene paxainare Diosojawabelia! ¡Pëtsa baja, pibisiamatabëcuene yajawa pajinawanapame! ⁹¡Pibisiacuenepane-exanaeeneconiyabara, bitso panatsinajamatabëxainare! ¡Bitso paya-auramërenua! ¡Pëtsa payabarëyamë! ¹⁰¡Beweliamatabëcuenewi panataema Dioso pitabarata! Nexata, bajaraPonë juya pacatocopsiana^m itsamonaepapecayaiyataenexa.

Pibisiacuenia apobearacuacuajaiti itsamonaewes Jesús pijajiwi

¹¹¡Tajamonaewepanenajumexaniataewi Jesús peliwaisi, pëtsa pibisiacuenia namata-enetsia panabaracuacuajamë! Pajiwi, itsamonaewipijaneconiyabara pibisiacuenia baracuacuajai pexanaejawawecua pematatsënë, itsa jume, tocaëjëta Dioso penaneconitsia-exanaejawanexatsi pijaneconiyabara, bajarapajiwi naneconita Diosojawabelia. Bajarapacuenia itsa pa-exaname, pibisiacuenia pabaracuacuajamë peliwaisi Dioso nacatocopata wajajumecowënëtsinexa. Baisi, peliwaisi pacatsicarupa picani panajumecowënëtabiabinexa, bajarapacuenia apopa-exanaemë. Caranata, bepanenaneconitsia-exanaewi panataneme, bajarapaliwaisi apopejumecowënëtsiijawabelia. ¹²Caenë raja Dioso bajarapajamatabëcuenebeje pexainaenë. BajaraPonë wajanacatonajumecopatsinë peliwaisi bejumecowënëtatsi. BajaraPonë raja wajanacaneconicanaëjëtsinënua, wajanacayapëtaeyaxanaenexa itsa nacaneconitsia-exanaejitsia wajaneconi jamatabëcuene. Itsa jume, itsa nacapanepaejitsia, aneconi jibia wajanacataexae. Bajaraxuata, Dioso apopatocopatsi paxamë itsamonaewiyabara panajumaitsinexa mapacueniaje: «Bajarapamonaewewecua naxuabiana, pibisiacuenepexanaexae», panajinexa.

Pacuenia itsajiwi-ata aponatsiwajënaeyapëtaewepacueni merawia pitsijawata tocopiapatsijitsiatsi, yabara peliwaisi

¹³¡Panenamuxuna-ewere paxamë, ayajamatabëcuenewi nataeyapanejumaitsabiabiwi! «Ajena, itsa jume, pepacueni jane baja merawia, paponaeajë bajarapatomarabelia. Bajarajotalia caewi panacuenebianajë palata patanacabinexa», panejumaitsabiabiwi. ¹⁴Bajarapacuenia apopatoxanepanaewepanejumaitsijawa, tsipaji raja apopanatsiwajënaeyapëtaemë xua pacatocopiapatsijitsia merawia pitsijawata. Caenë Dioso yapëtane bajaraxua. Wajajinawanapae-epatoyo,

saya tsiquirimatacabiyota jinawanapatsi wajatëpaenexa. Pacuenia bajayacunua nojobo pitsapa, cae-epatoyonexa saya. Xuacujinae, icatsia ajibi baja. Bajara-saya itsitsi waxaitsi. ¹⁵Nexata, saya bepajumaitsimë: «Itsa Dioso panetocopat-siana abaxë pata-asaëtsawanapaenexa, pajinawanapaenajë. Bajarapacuenia pa-exanaenajënu. Itsa jume, itsacuenia pa-exanaenajë», bepajamë saya. ¹⁶Itsiata baitsi jane, paxamë saya be-ayaijamatabëcuenewi panataeyabiabame Diosowecua, panenatocaëjëbijawata xua pa-exanaejitsiamë. Bajarapacuenia ayaijamatabëcuenewi panenataejawa, bitso abeje. ¹⁷Pajiwi yapëtae-ata pacuenia picani bexana, itsiata itsa apo-exanae, bajarapajiwi pibisiacuenexa Dioso pitabarata.

Pemuxujiobiiliwaisi pecobecowë pexainaewi

5 ¹¡Pamonae bitso panexainaewi, panenamuxuna-ewere mapaliwaisije! Panatsinuema bitso ayaijumeta, panabejiobitsicuenexa yabara pataewana-paejitsiamë, pataewanapaejitsiamë. Dioso raja juya pacacuenecanawiat-siana, itsamonae panebejiobia-exanaejamatabëcuene. ²Nexata, panexinae-cuene, panexaniawaetsijawami, pacatotsabanaena. Pexaniawirijawanë, panenaxatabijawanëmi-ata, merawipijisonotoxiⁿ pacato-ucubaxaena. ³Panijapalananë, oronanitonëanë-ata, pacatotasibenaenatsi, bajayajebi panexaniawaet-sixae. Nexata, bajarapatasibijawatsi pacacuenexa-itajëtsiana panenaneconitsijawa Diosojawabelia,^o apopaneyawenonaexae itsamonae. Orijibia, xuanë panajumajebaponame panexaniawaetsinexa, bajaraxuanë-ata pacacuenexa-itajëtsiana panenaneconitsijawa Diosojawabelia. ⁴¡Panajumetaema! Pamamotaxamë yamaxë-itojorobiaya pawecua-asiwamë, panematamotsiyaniwa papecatonacuenebiwi, bajarapamatamo pacacuenexa-itajëtsiana panenaneconitsijawa Diosojawabelia. Dioso, Ponë piacuenesaenë daxitawecua, jumetanenua papecyanijobaponaejawa pijamatamo, pamonae pa-amoneyabame, papecatonacuenexa-itajëtsiana panenaneconitame bajaraPonëjawabelia. ⁵Bajarapacuenia pane-exanabiabixae, mapanacuataje picani panatsitajinawanapame xaniawaetsia. Pacabarëyamë tsawanapae panexinaecuenexa. Pa-exanawanapame panejitsipaecuenia. Pacuenia vacamonae jamatejema nasitapona pexaeponaejawata, yapëtaenejewaxa penasitsicujinae pebeyaxuabijawanexatsi, bajarapacuenia pijinia, paxamë-ata panatonotaponame panexinaejawanë, pacanaëjëtsinejewamë Dioso papecananeconitsia-exanaejawanexa, bitso panenaneconitsixae bajaraPonëjawabelia. Imoxoyo baja pewajënae bajara-pamatacabi. ⁶Orijibia, jiwi aponaneconitsi-ata, pananeconitsia-exanabiabame, pabeyaxuababiabamenua. Bajarapacuenia pa-exanabiabame pamonaejawabelia, apopecuenecaëjëpaewitsi, papecanayajiwi-itawetsinexa.

Pacuenia Jesús pijajiwi jamatabëcuene-ewetawanapa icatsia petuxanenë pepatsijawanexatsica, yabara peliwaisi

⁷Itsiata baitsi jane, paxamë patajamonaemë, bajarapacuenia pibisiacuenexa pacato-exanae-ata, pajamatabëcuenesaemëre tsawanapae tsane

n 5:2 merawipijisonotoxi: Wowaijumeta pewënë «*polilla*». **o 5:3** panenaneconitsijawa Diosojawabelia: Xua Dioso rajutatsi, bajaraxua apocanacuenebi Diosonexa. Apoyawenonaenua bepejiobiwi. Caranata, petonacuenebiwi pematamobijawanexa naxainaeyabapona, ayaijawanë penatoxaniawaetsinexa. Taema Efe. 4:28; 1Ti 6:17-18.

panecopia-ewetawanapaejawa Wajatuxanenē matapania icatsia pepatsi-matacabitsicajawabelianexa! ¡Panecopia-ewetawanapaejawata, pētsa bitso pajamatabēcuenebējāmē, itsamonae papecabebiobia-exanaejawa yabara! Pacuenia pabi penacuenebinē wajēnae-eweta emamatacabianē, petoxa-niabinexatsi pe-ubijawanē. Pe-ubiweretsicujinaenua, bajayajebi pijinia ajamatabēcuenesaēya ewetaponapona, petonaweretsijawabelianexatsi.

⁸ Bajarapacuenia pijinia, paxamē-ata, bajayajebi itsamonae pibisiacuene paca-exanae-ata, pajamatabēcuenesaēmē tsane. ¡Pētsa pajamatabēcuenefae-faename, tsipaji rabaja imoxoyo pewajēnae tsaponae Wajatuxanenē pepatsi-nexatsica, penaneconitsia-exanaenexa bajarapamonae!

⁹ ¡Tajamonae, Jesús peliwaissi panejumexaniataewi, pētsa namata-enetsia panabaracuaicuajāmē ..pane-exanaecuenejawanē yabara, Diosojawabelia panenaneconitsiyaniwa, tsipaji rabaja Jesucristo, wajanacaneconicanaējētsinē, imoxoyo baja pewajēnae tsaponae pepatsijawanexatsica, penaneconitsia-exanaenexa pijaneconi pexainaewi! ¹⁰ ¡Tajamonae, paca-naējēre profetawi pacuenia pacatsitanacuene-itajēta! Bajarapamonaemi bajayajebi bejiobia-exanae-atatsi, ajamatabēcuenesaē tsawanapae, Dioso pejumeliwaissi pepaebaponaejawa, itsajamatabēcuenesaē xainaenewi. ¹¹ Yapē-tanetsi pacuenia Dioso siwajamatabēcuenesabarēya tsabiabi pajiwi siwa-ajamatabēcuenesaētsi pitaxutuajamatejemaxae bajaraPonē, bajayajebi bejiobieneta ponaponae-ata. Pawēnēliwaisitaneme rabaja, pacuenia bajayata Job-pijinē, ayaicuenia bejiobieneta ponaponae-ata, itsiata ajamatabēcuenesaē pitaxutuajamatejemajawa Diosojawabelia. Nexata, bajarapacuenia bajayajebi peponaponaecujinae, Dioso bitso pexaniacuenia yawenonatsi, tsipaji jiwi asiwaya pitaxutotsioniatanē.

¹² Tajamonae, patacatsipaebiliwaisianēwecua, matatoxenetsia mapaliwai-sije pajumecowēnētsianame. Itsa pacuaicuajāmē itsamonaejawabelia pexaniajailiwaissi, caeliwaissi pacuaicuajāmē tsabiabi tsane. ¡Pētsa Dioso pewēnē, athēbēpijicuene, irapijicuene-ata,^p pacuaicuajāmē itsamonae papecajumexaniataenexa! ¡Nexata, itsa pacayanijoba itsacuenejawaya yabara, rowialia pajumaitsimēre pacuenia panajamatabēxainame! ¡Itsa pajejamējitsia: «je», pajamēre! ¡Itsa «jume», pajamējitsia: «jume», pajamēre rowialia! ¡Bajarapacuenia paxaniajamēre tsabiabi, panenaneconitsiyaniwa Diosojawabelia!

Itsapemuxujiobilwaisianē

¹³ Pajiwi, paxamēyajuwēnējiwi, tocopiapatatsi piayapēbejecuene, bajara-pajiwi wajētsi Diosojawabelia, peyawenonaenexatsi. Pajiwi pijinia barēyaya ponapona, tonaxēanae Diosojawabelia, pewēnēxaniatsinexa ayajamatabēcuenenē yabara. ¹⁴ Pajiwi pijinia awitane, junatsi ancianowi, Jesús pijajiwi pewetsiwi, petowajētsinexatsi Diosojawabelia. Nexata, ancianowi piawitanewiwi aceiterata perabēcalirabiana, Wajatuxanenē pewēnēta.

¹⁵ Petowajēcaewi itsa itaxutuajamatejema Diosojawabelia, nexata piawitanewiwi Dioso jamatejemaya-exanaenatsi. Bajarapajiwi itsa awitane,

p 5:12 *athēbēpijicuene, irapijicuene-ata*: Bajaraxua itaweta Jesús. Taema Mt 5:34-37. Bajaraxuata, aponacatoxanepanae wajajumaitsiyawa, «Dioso pitabarata bajarapacuenia cato-exanaenatsi», wajajaijawa itsamonae pejumexaniataenexa pepacuene waja-exanaejawanexa.

pibisiacuene pexanaexae, Dioso siwajamatabëcuenecaewianatsi pijaneconimi. ¹⁶ ¡Bajaraxuata, namata-enetsia panawecuapaebare xua yabara pananeconitame Diosojawabelia! ¡Nexata, namata-enetsia panatowajëre Diosojawabelia papecajamatejemaya-exanaenexa! Ponë, xaniawaetsia peponaponaenë Dioso pitabarata, daxita pejamatabë-ëthëtojawawetsina itsa wajëta, jumenamatamota Diosojawabelia. Ayaicuenia Dioso pexania-cuene to-exanaenatsi. ¹⁷ Bajarapacuenia exana profeta Elías.^q Bajaraponë bewaxaitsijamatabëcuenenëmi-ata, itsiata asaëyata itsa wajëta Diosojawabelia ema pejopaeyaniwa, nexata acueyabi pawaibeje epatua ema apojopae. Nexata, daxita bajarapanacuapijiwi bitso janibo. ¹⁸ Bajaraxuacujinae, icatsia asaëyata Elías wajëta Diosojawabelia, ema pejopaenexa. Nexata icatsia, ema jopa. Ira icatsia capitsapa pexaejawanexa. Bajarapacuenia waxaitsi-ata asaëyata bewajëtatsi Diosojawabelia, cuene-aebinejewatsi.

**Pacuenia bejamatabëcueneyawenonatsi pamonaë Jesús
pijajiwiwajuwënëwi, pibisiacuene itsa exana, yabara peliwaissi**

¹⁹ Tajamonae, paxamëyajuwënëjiwi itsa pexaniajailiwaissi, Dioso pejume-liwaissiwequa najamatabëcuenebijianaëjitsipa, nexata pajiwi liwaissixaneta penajamatabëcuenebijianaëjiwimi, bitso pexaniacuene exana. ²⁰ Bepaya-pëtaneme mapacueneje. Pajiwi, penajamatabëcuenebijianaëjiwimi icatsia caewëarena najamatabëcuenepënëyorotsia-exana pibisiacuene pexanaejawamiwequa, bajarapajiwi jamatabëcueneyawenona, penaxuabiyanawa pibisianacuayabelia. Jamatabëcueneyawenonanua Dioso pewecua-ajibia-exanaenexatsi nawitsia pibisiacuene pexanaeconimi.

q 5:17 *Elías*: Taema 1Re 17 y 18; Lu 4:25-27. Bajaraponë bayatami ponapona Israel nacua. Baitsi, apo-asaë tsaponaponaë mapanacuataje, Jesús peponaponaematacabi. Itsiata, bajaraponë Dioso ya-asaëya caponatsi athëbëabetsia. (2Re 2:1-11.) Bajaraxuata apopayaquinarubinë «Elías-pijinë». Daxita bajaraponë peliwaissi ruca 1Re 18-2Re 2-jawabelia.

1 Pedro

Mapabaxutoje apóstolnë Pedro copiaya toyaquina Jesús peliwaishi pejumexaniataewijawabelia

Pedro pebajacobiliwaishi

1 ¹7Xanë, Pedronë, Jesucristo pija-apóstolnënë, nitoroba jiwijawabelia tatsipaebaponaenexa Jesucristo peliwaishi. Pacatoyaquinatsi mapabaxutoje paxamë, Jesús peliwaishi panejumexaniataewi, itsatomaranëjawa nacayajatsia panejinawanapaewi panijatomara, Jerusalén-tomarawecua.^a Bajaraxuata, pajinawanapame:^b Ponto nacujawa, Galacia nacujawa, Capadocia nacujawa, Asia nacujawa, Bitinia nacujawa-ata. ² Waxa Dioso baja cajena bajayata tajëwelia, wajanaexanaewajënaeya-ata, paca-itapeta paxamë papijajiwinexamë. Orijibia, Espiritu Santo pejamatabëcueneta pacatsata Jesucristo papijajiwinexamë, pane-exanawanapaenexa papecatojitsipaecuenia. Pacawecua-ajibia-exananua daxita pibisiacuen pane-exanaeneconimi Jesucristo pejanata, papecasiwatëpaejawata.^c Bajarapacuenia papecato-exanaexae, pacatojitsipatsi panewajënaeyabelia ayaicuenia

a 1:1 *Jerusalén tomara:* Pedro toyaquina picani daxita Jesús pijajiwi, judiowi, apojudiowi-ata. Bajaraxuata, itsamonaë canaëjëta Pedro pejumajatsijawa mapacueniaje daxita Jesús pijajiwi yabara. «paxamë panejinawanapaewi bepanepatsiwi itsanacuawerena, apopanecuenëjëpaexae panianacuapijiwi, Jesús papijajiwiwaemë». Itsiata, Pedro pecanacuenëbixae, diaspora-jume griegojumeta, bajarapajume ëjudiowi yabara jumajatsi. **b** 1:1 *mapanacuanëjawaje:* Daxita panacuanëxi yabara mapaversiculotaje wënërubapona, maparucaje canacopata caewënëcuenia, Turquifawënënacua. **c** 1:2 *Jesucristo ... papecasiwatëpaejawata:* Peyaquinaejawata, Pedro jumajatsi picani mapacueniaje: «papecawecua-ajibia-exanaenexa pibisiacuen pane-exanaeneconimi, Jesucristo pijanata», jai. Bajarapacuenia pejumajatsixae, nacayapëtaeya-exana anijajamatabëcuenëbeje pexainaejawa. Caejawa, Cristo wajanacasiwatëpaejawata, nacanëconimatamota. Itsajamatabëcuene pijinia, Espiritu Santo wajanacatsatsijawa, ëpejitsipaecuenë Dioso wajanacawapanapenexa. Pacuenia Moisés-pijinë tabernáculobopijijawanënexa caejawa canacujitsia ovejajanata jumatsicabapona, petotsatsinexa ëDiosos pijacuen pecanacuenëbinexa. Bajarapacuenia pijinia Jesucristojawabelia wajasawanajamatabëcuenëcopabixae, Espiritu Santo nacatsataponanapanacuapijiwecua, nexata bewajanacajamatabëcuenëtsicabi Jesucristo pejanata, wajanacatsatsinexa Diosos ëpijacuen wajanacawapanapenexa.

Dioso asiwaya^d papecayawenonaejawa papeca-itaxutotsoniataexae, jamatabëcuenexanepanaeyanua panejinawanapaenexa.

**Pamonaē, Jesucristo peliwaīsi pejumexaniataewi, copia-ewetawanapa
Dioso perajutsinexatsi matacabi apowerewerecaejawa**

³Nacatoxanepana cajena wajawëñexaniatsijawa Dioso, Wajatusanenë Jesucristo paxa, tsipaji pexaniacuene bitso nacato-exana. Ayaicuenia wajanacabejiobiataexae, nacarajuta pejanajamatabëcuene wajaxainaenexa. Nexata, Dioso penamatacotsia-exanaexae Jesucristo petëpaejawawecua, waxaitsi-ata itaxutuajamatejemaya copia-ewetawanapatsi bajarapacuenia Dioso wajanacato-exanaenexa. ⁴Nexata, xua Dioso nacarajutsiapaeba athëbëtatsia, bajaraxua cajena pepopexaniawiriajawa tsane, apopiabejawanexa, apowerewerecaejawanexanua. ⁵Nexata, xaniwaetsia wajapitsinexa xua Dioso nacatoxaniawaeta athëbëtatsia, wajanacarajutsijawanexa, bajaraponë pesaëta naca-ewetaponapona waja-asaëtsawanapae-epato mapanacuataje, waja-itaxutuajamatejemaxae Jesucristojawabelia. Nexata, pamatacabi mapanacuaje werewerecaena, matapania jane baja, pepacuene yapëtaenatsi, pacapanepacuene^e Dioso nacatoxaniawaeta athëbëtatsia.

⁶¡Daxita bajarapacuenia Dioso papecato-exanaexae, pasiwajamatabëcuenebarëyamëre tsawanapae! ¡Aeconoxae abaxë mapamatacabitaje panejinawanapae-epato nawitsia pacatocopiapataponae-ata xuanë pacajamatabëcuenebejiobia-exanapona, ⁷tsipaji bajaraxuanë papecajamatabëcuene-ëjëtsijawata^f Dioso canacueneba, papecajamatabëcuenyapëtaenexa pepacuene panejumexaniataejawa pane-itaxutuajamatejemajawa Jesucristojawabelia! Wajanacajamatabëcuene-ëjëtsijawa, itsa jamatabëcuenematatoxenetsi waja-itaxutuajamatejemaxae Jesucristojawabelia, bajarapajamatabëcuene bitso namatamota pepopexania-oronaniwecua. Oronani, mapanacuapijijawa-ata, matatoxenetsia petonamamatsinexatsi, jiwi baseta isotota, pewecuatsatsinexa xuanë piabejewanë, penacopatsinexa ë-oronanijawa. Bajarapacuenia pijinia, Dioso canacueneba

d 1:2 asiwaya: Taema Lu 10:5-6; Mt 10:12-13. Pedro tsaena jumecowëñëta pacuenia Jesús itoroba pijamonaē, pexaniacuena pebajacobinexa. Griegojume pecuaicuaijaiwi pebajacobijawata jumaitsi: «karis» jiwijumeta pijinia «Catojitsipatsi neyapëtaejawa peca-asiwajawa», pejaicuenia. Judiowi juya bajacoba mapacuenaē: «Chalom», jiwijumeta pijinia, «catojitsipatsi nejamatabëcuenexanepanaejawa liwaīsi natsixainaenejewamë», pejaicuenia. Bajaraxuata, pebajacobinexa Pedro toyaquina ayaicuenia «Karis, chalom» (asiwaya papecayawenonaejawa, jamatabëcuenexanepanaēya panejinawanapaejawa), tsipaji toyaquina griegowi, judiowi-ata.

e 1:5 pacapanepacuene: Xua yabara Dioso najumecapanepaēya jiwi capanepaejitsia daxita pibisiacuene pexanaejawanëmiwecua, jumaitsi maxuanë yabaraje: Wajanacapanepaejawa, **1)** Dioso nacawecua-ajibia-exana wajanacananeconitsia-exanaejawaminexa, pibisiacuene waja-exanaeneconijamatabëcuene, **2)** nacawecua-ajibia-exana wajaperujumatabëcuene wajanacajamatabëcuenenamatacaitorobisaëwecua, **3)** nacawecua-ajibia-exananua dowathi wajanacajamatabëcuenenamatacaitorobisaëwecua. Nexata, wajasivanajamatabëcuene copatsixae Jesucristojawabelia, Dioso nacawecua-asaëjibia-exana bajarapa-acueyabi pajamatabëcuenebeje. Itsiata, mapanacuaje wajajinawanapae-epato itsajawata wajaperujumatabëcuene, dowathi-ata tsiteca bewajanacajamatabëcuenejunataponae wajanacajitsipaēya-exanaenexa, pibisiacuene waja-exanaenexa. Nexata jane baja, matapania athëbëtatsia bajarapajitsipaejamatabëcuene Dioso pepacuene nacawecua-ajibia-exanaena. Pematatsënëa baja pibisiacuene apo-exanaetsi tsane. **f 1:7 papecajamatabëcuene-ëjëtsijawata:** Dioso apojamatabëcuene-ëjëtsi pijajiwi pibisiacuene pexanaēya-exanaenexa. Taema Sant. 1:12-15.

wajanacajamatabëcuene-ëjëtsijawanë, wajanacawejamatabëcuenexuabinexa waja-aebijamatabëcuene, penacopatsinexa ëwaja-itaxutuajamatejemajawa Jesucristojawabelia. Nexata, bajarapacuenia pane-itaxutuajamatejemaxae Jesucristojawabelia, pamatacabi Wajatuxanenë Jesucristo patsianica, Dioso pacasiwajamatabëcuenebarëya tsane. Pexaniacuenia pacawënëxaniatsiananua bajaraxua yabara. Daxitajiwinua pacayaiyataena.

⁸ Paxamë Jesucristo apopatae-atamë, abaxë itsiata pa-asiwamë. Pasiwanajamatabëcuenecopabamenua bajaraponëjawabelia. Bajarapacuenia pane-asiwaxae Jesucristo, bitso pasiwajamatabëcuenebarëyamë tsawanapae. Ayaicuenia panesiwabarëyaxae, pacato-acuenebi xaniawaetsia panenawajunupaebicapaneapajawa itsamonaejawabelia, ⁹ tsipaji baja paxainawana-pame pexaniacuenia Dioso papecacapanepajawa, papecananeconitsia-exanaejawaminexawecua, panesiwanajamatabëcuenecopabixae Jesucristojawabelia.

¹⁰ Xua paxamë paxainawanapame baja, bajayatami profetawi, bajayajebi liwaisijaitapona, peyapëtaenexa bajarapacapanepaecuene yabara. Nexata baja, profetawi itsa yapëtane pacuenia Dioso pijajiwi capanepaejitsia, tajëwelia wajunupaebapona jiwijawabelia, pacuenia, Cristo pejamatabëcueneta, Dioso itaxutotsoniataeya jiwi capanepaejitsia. ¹¹ Bajarapaliwaisi canaëjëtsiaya peyrobaponaejawata, profetawimi pijacuata nayanijobapona. «¿Depamatacabijawa copiapatsiana? ¿Depitsicuenia meta tsane? ¿Depajiwi yabara jumaitsi bajaraxua?», jamatabëcuenejai tsaponae, penayanijobi-jawata. Nexata, Espíritu Santo tajëwelia bajarapajamatabëcuene yabara, yapëtaeya-exanaponatsi pacuenia itsamonae Cristo bejiobia-exanaejitsiatsi pebeyaxuabijawatatsi, pacuenia-ata Cristo piasaëya-exanaecujinaetsi petëpaejawawecua, athëbëabetsia caponaejitsiatsi, pe-ecaenexa paxa Dioso pemuxunenetatsia. ¹² Itsiata baitsi jane, bajarapaprofetawimi Dioso yapëtaeya-exanatsi paliwaisi yaquinaona, apopetaejawanexa bajarapamonaemi. Biji rajane, yapëtaeya-exanatsi, pewënamuto bexëajawabelia pecopiapatsijawanexa. Nexata, waxaitsi, mapamatacabi wajajinawanapaewi matapania jane baja, tanetsi pacuenia tajëwelia Cristo yabara wajunupaebapona profetawimi. Nexata baja, paxamë bajarapaliwaisi itsamonae pacatsipaeba Espíritu Santo pesaëta papecacapanepaeliwaixinexa. Cristo athëbëwetsica itorobica Espíritu Santo, pejamatabëcueneyawenonaenexa bajarapamonae, papecatsipaebinxexa. Jesús peliwaitsi bitso pexanialiwaixi-xae, ángelewi-ata xaniawaetsia naitaxutocaeweta, peyapëtaenexa pacuenia tocopiapatsijitsiatsi jiwijawabelia bajarapaliwaisi.

Dioso nacajunata xaniawaetsia wajatojinawanapaenexa

¹³ Paneyapëtaexae xua Cristo pacato-exana, panecopia-ewetawanapaexaenua Dioso pexaniacuenia papecato-exanaejawanexa Jesús pepatsimatacabita, xaniawaetsia patojinawanapaename Dioso. ¡Nexata, panajamatabëcuenewerere, pane-exanaenexa daxita xua Dioso pacatocopata! Panajamatabëcuenecataitsianamenua, pibisiacuene pane-exanaeyaniwa. ¹⁴ ¡Pajumecowënëtanawapare Dioso! ¡Pëtsa panajamatabëxainame panenatojitsipaecuenia pibisiacuene pane-exanaenexa, pacuenia pa-exanawanapame pamatacabi abaxë Dioso apopayapëtaemë,

tsipaji pacopia-ewetawanapame Dioso papecacapanepaejawanexa, papeca-itaxutotsoniataexae! ¹⁵ ¡Nexata, xaniawaetsia saya pajinawana-pare, pibisiacuene pa-exanaenejewamë, tsipaji raja Dioso, ponë pacajunata papijajiwinexamë, pepopianeconijibinë! Pibisiacuene baja cajena caeto-ata apopexanaenë. ¹⁶ Bajaraxua yabara, Dioso pejumeliwaisibaxutota jumaitsi mapacueniaje: «¡Aneconijibia pajinawanapare, pibisiacuene pa-exanaenejewamë, tsipaji raja Xanë ta-aneconijibinë tsaponaponae!», ^g jai Dioso pejumeliwaisibaxutota.

¹⁷ Paxamë itsa panawajëcabiabame, «Axa», pajamë tsabiabi Diosojawabelia. Nexata, yaiyataeya bepatojinawanapame bajaraPonë pitabarata, daxita panejinawanapae-epato mapanacuataje. ¡Pëtsa panacofënëtame pacuenia bajaraPonë cuenecanaëjësiana najëpaeya daxita jiwi pexanaecuene, ayaijamatabëcuenewi, beweliamatabëcuenewi-ata, peyapëtaenexa paneconiwajëto xainapona caejiwi canacujitsia! ¹⁸ ¡Bjarapacuenia yaiyataeya pajinawanapare, tsipaji paxamë Dioso pacacapanepa baja piamatamobiacuenia panejinawanapaejawamiwecua, pitsijamatabëcuene xainawanapa panijasalinaiwimi! Nexata, papecacapanepaenexa Dioso matamota panijaneconi ayaimatamota. Apopacacomuatsi baja cajena pewaterewerecaematamojawanëta, pacuenia oro, palata-ata. ¹⁹ Biji rajane, Dioso pacacomuata Cristo pijanata, bitso penamatamotsijawa, apopewaterewerecaematamojawata. BajaraPonë pacasiwatëpa panijaneconi yabara, Dioso Ponë tane bepija-oveja.^h BajaraPonë planeconijibinë Dioso pitabarata. Apoxinae-ata xua yabara Dioso tsita-abejejitsiatsi. ²⁰ Bajayatami, Dioso mapanacuaje pexanaewajënaeya-ata, Dioso itapeta Cristo, papecasiwatëpaenexa. Belia jane baja, mapamatacabitaje Cristo patsica papecasiwatëpaenexa. ²¹ Itsiata baitsi jane, Cristo petëpaecujinae, acueyabimatacabita Dioso icatsia asaëya-exana. Athëbëtatsia, paxa Dioso pecujanenia, ecaeya-exanatsi Cristo, ayaijamatabëcuenenëxae. Nexata, Jesucristo papecasiwatëpaenexa, pasiwanajamatabëcuenecopabame Diosojawabelia. Pacopia-ewetawanapamenua, papecarajutsinexa matacabi apopewaterewerecaejawa.

²² Nexata baja, aeconoxae paxamë panejumecowënëtawanapaexae pexaniajailiwaisi, Jesucristo peliwaisi, bajarapaliwaisi pejamatabëcueneta, Dioso pacawecua-ajibia-exana panijaneconimi. Nexata, pacacuenecaëjëpa xaniawaetsia pane-asiwanexa payamaxë-itojorobinejewamë itsamonae-ata, Diosojawabelia pesiwanajamatabëcuenecopabiwi. Bajarapacuenia nexata, asaëyata namata-enetsia bepana-asiwamë tsawanapae, xaniajaiya daxita panejamatabë-ëthëtowetsina. ²³ Bajarapacuenia pa-exanaename, tsipaji pejanajamatabëcuene paxainame, bajarapaliwaisita panenaexanaexae bepapejananaexanaenacuetoymë. Itsiata baitsi jane, bajarapapejanajamatabëcuene apopaxainaemë panijamonaejiwibeje pejamatabëcueneta. Biji rajane, Dioso pejumeliwaisi, apopewaterewerecaeliwaisi,

g 1:16 Taema Lev. 11:44-45; 20:7. **h 1:19 bepija-oveja:** Jesucristo wajanacasiwatëpaewajënaeya caecuenia wajanacaneconimatamotsinexa, jiwi pijaneconi paxainaewi capatabiaba oveja, pejananë pebito, daxitanë peperabëxanepanaenë, apopenabejenaenë caejawayo-ata, petajuitsinexa altar-jumata Diosojawabelia. Nexata, bajarapa-oveja pejamatabëcueneta, Dioso siwajamatabëcuenecaewabiaba perajutsijiwiwotsijawabelia pebara-anaepanaejamatabëcuenemi pijaneconi yabara.

panejumexaniataexae, bajarapaliwaisi pejamatabëcueneta pejanajamatabëcuene baja paxainame. ²⁴Yapëtanetsi bajaraxua, tsipaji Dioso pejumeliwaisi apowerewerecaejawanexa yabara, Dioso pejumeliwaisibaxutota jumaitsi mapacueniaje:

«Pacuenia wayafopijipona bepjiia tsaquena, petsaquinaecujinae tēpa, bajarapijinia saya itsi jiwi-ata. Bepjiia tēpa. Pacuenia pexaniamatono bepjiia tsaquena, nexata othopa, bajarapijinia saya jiwi jamatabëcuene-itsi. Xua yabara itsamonae ayaijamatabëcuenewi tanetsi, bajaraxua bepjiayo werewereca. ²⁵Itsiata baitsi jane, Dioso pejumeliwaisi apowerewerecaeⁱ tsane daxitamatacabijawabelianexa», jai Dioso pejumeliwaisibaxutota.

Bajarapaliwaisi raja Jesús peliwaisi apowerewerecaeliwaisi, itsamonae baja pacatsipaeba, papecacapanepaeliwaisinexa.

2 ¹¡Paneyapëtaexae apowerewerecaejawanexa Jesús peliwaisi, paco-pabare baja daxita pibisiacuene pane-exanabiabijawa itsamonae-jawabelia, itsamonae paneyamaxë-itojorobabiabijawa-ata! Pacopabare yamaxë-itojorobiaya panenayabaracuaicuaijitsabiabijawa bepexania-jamatabëcuenewi papecataenexa itsamonae. Pacopabarena itsamonae panecueneca-ëbabiabijawa, panebaracuaicuaijitsabiabijawa-ata pibisiacuena. ²¡Biji rajane, pacuenia pejananaexanaenacueto bitso bajitsipa mitobarëmene piapaenexa, bajarapacuenia pijinia, paxamë bitso pajitsipare Dioso pejumeliwaisi! Bajarapaliwaisi baja cajena, bewajaxaejawa tanetsi wajajamatabë-ëthëtonexa. Nexata, bajarapaliwaisi itsa palebabiabianame, pewajënaeyabelia pacatsijamatabëcuenewitsabaponaena. Nexata, bajarapaliwaisi pejamatabëcueneta Dioso pacajamatabëcuenenaweretsiaexanaena, xaniawaetsia panejinawanapaenexa Dioso papecatojitsipacuena, papecacapanepaexae. ³Bajarapacuenia pa-exanawanapaenename, tsipaji pepacuene pajamatabëcueneyapëtaneme baja Wajatuxanenë pexaniajamatabëcuenenëcuene.

Pacuenia iboto apowerewerecae mapanacuataje, bajarapacuenia pijinia Cristo apowerewerecaenë tsane daxitamatacabijawabelianexa

⁴¡Wajatuxanenë pexaniajamatabëcuenenëxae, nexata pana-imoxoyore bajaraponëjawabelia, tsipaji pepopitawanë tsaponaponae! Nexata, Dioso itapeta pexënato bepexaniawiria penamatamotsi-iboto. Itapetania bepenamataxainae-ibotonexa.^j Pacuenia bajayatami Dioso pijatemplobo penacuenebiwi naitaxutojematabuata bajarapitsi-ibotomi, copiya pecanacuenebi-ibotonexami, petsita-abejexaetsi, bajarapacuenia pijinia, mapanacuapijiwije naitaxutojemata Cristo. Apo-asiwanua bajaraPonë. ⁵Pacuenia Cristo aitawa tsaponaponae, bajarapacuenia paxamë-ata pajamatabëcuene-aitawamë tsawanapae Dioso pitabarata. Nexata, Dioso pacacanacueneba be-ibotoxicuenia,^k Cristo yajawa, pexananutsinexa bepjiabo panejamatabëcuenejawata,

i 1:25 Dioso pejumeliwaisi apowerewerecae: Taema Isa. 40:6-8; Sant. 1:10-11.

j 2:4 bepenamataxainae-ibotonexa: Taema Mt 17:5. k 2:5 be-ibotoxicuenia: Taema Efe. 2:1, 5; Col. 2:13.

pataxunaeta ponapona bajaraPonë, bepijatemplobo. Orijiibia, paxamë paca-itapetanua sacerdotewicuenia, bajarapatemplobojawata panetona-cuenebiwinexa, bajarajota pexaniajamatabëcuenejawanë panerajutaponaenexa ofrendacuenia,¹ xuanë Dioso siwajamatabëcuenebarëyajitsia. ⁶Nexata, tajëwelia Dioso pejumeliwaisibaxutota Cristo yabara jumaitsi mapacueniaje:

«Ta-itapetsinë netoponaponaena Jerusalén^m tomarata. Bajaraponë copiaya bepecanacuenebi-ibototsi tsane. Ta-itapetsinë bepexanianamatamotsi-ibotonua tsane. Nexata, pajiwi siwanajamatabëcueneecopatsiana bajaraPonëjawabelia, aponacueratsi tsane»,ⁿ jai bajarapacuenia Dioso pejumeliwaisibaxutota tajëwelia Cristo yabara.

⁷Bajaraxuata paxamë, Cristojawabelia panesiwanajamatabëcueneecopabiwi, bajaraponë pacatonamatamota pane-asíwanexa. Itsiata baitsi jane, pamonaë Cristojawabelia aposiwanajamatabëcueneecopabi, bajarapamonaë Cristo tane bepiabeje-ibotocuenia, bepefirapanucae-exanae-iboto tsanucae jiwi, peneconitsixaetsi apopesiwanajamatabëcueneecopabixae bajaraponëjawabelia. Bajaraxuata, copiapata pacuenia Dioso pejumeliwaisibaxutota tajëwelia najumecapanepaeya jumaitsi Cristo yabara:

«Pa-iboto itsamonaë bo-exanaewi, petsita-abejexaetsi, naitaxutojematabuata, bajarapa-iboto itsamonaenexa tonamatamotatsi, pecanacuenebinexa copiaya pebuatsi-ibotonexa boyenepanatotsotota»,^o jai Dioso pejumeliwaisibaxutota tajëwelia pamonaë yabara Cristojawabelia siwanajamatabëcueneecopabijitsia.

⁸Bajarapacuenia pijinia, itsataxunaeta, Dioso pejumeliwaisibaxutota, pamonaë Cristojawabelia apopesiwanajamatabëcueneecopabiwinexa yabara jumaitsi mapacueniaje:

«Bajarapa-iboto itsamonaë firapecaeja-exanaenatsi.^p Bajarapa-iboto pijinia itsamonaë jopaeya-exanaenatsi^q», jai Cristo yabara.

Bajarapamonaë apopejumexaniataexae Jesús peliwaisi, Dioso tocaëjêta penaneconitsia-exanaejawanexa, bepenaxuabia-exanae-ibotonexatsi.^r

Dioso pijajiwi yabara peliwaisi

⁹Itsiata, paxamë Dioso apopepecananeconitsia-exanaewinexa. Dioso baja cajena nacaemonaecuenia paca-itapeta papijajiwinexamë.

¹ 2:5 *ofrendacuenia*: Mapitsicuenejawanë rajutsianatsi ofrendacuenia Diosojawabelia: Wajaperabëto (Taema Rom. 12:1-2); Wajawënëxaniatsijawa Dioso (Heb. 13:15); Pexaniacuene waja-exanaejawa, wajacobecowë asiwaya wajarajutsijawa (Heb. 13:16); Jesús peliwaisi wajapaebijawa (Rom. 15:16). **m** 2:6 *Jerusalén*: Jerusalén tomara itsawënë Sión, tsipaji templo eca Sión-wënëtsutota. Bajaraxuata, wowaijumeta, Sión itsa jai, yabara jumaitsi tomara, itsa jume, templo yabara. **n** 2:6 Taema Isa. 28:16. **o** 2:7 Taema Salmo 118:22. **p** 2:8 *firapecaeja-exanaenatsi*: Taema Isa. 8:14; Rom. 9:33. **q** 2:8 *jopaeya-exanaenatsi*: Bajarapajopaecue cuenecatane Dioso penaneconitsia-exanaejawanexa, naxuabiaya Diosowecua pejinawanapaenexa isotopucajawata, apopesiwanajamatabëcueneecopabixae Jesucristojawabelia. **r** 2:8 *bepenaxuabia-exanae-ibotonexatsi*: Itsacuenia pijinia pejucaenexa: «ibotota bepefirapanucaeja-exanaejawanexatsi». Itsiata, apoyabara jumaitsi jiwitonë pefirapanucaeja. Biji rajane, jiwi petëpaeja yabara, tsipaji pajiwi aposiwanajamatabëcueneecopatsi Cristojawabelia, bajarapajiwi Diosowecua naxuabiana.

Dioso, pepopewetsinē, paca-itapeta papijasacerdotewinexamē, paneyapētaeya-exanaenexa jiwijawabelia pacuenia Dioso cuene-itsi. Papeca-itapetsijawatanua pacatsata aneconijibia panejinawanapae-nexa mapanacuataje, bajaraPonē pitabarata. Papijajiwi xaemē, saicaya Dioso pacaxaina, panewajunupaebawanapaewinexa Dioso ayaicuene pexanaejawanē. Bajarapacuenia pawajunupaebianame itsamonaēja-wabelia, pacuenia bajaraPonē pacajunata panewecuapitsapaejawa pitaquirijamatabēcuene, juya panexainaenexa penaitayotsijamatabēcuene. Dioso pijapena-itayotsijamatabēcuene, bitso pexaniajawa cajena. ¹⁰ Paxamē abaxē Cristojawabelia panesiwanajamatabēcuene-copabiwajēnaeya, Dioso picani apopapijajiwi mē. ⁹ Itsiata, aeconoxae Dioso papijajiwi mē tsawanapae. Imatanua abaxē apopana-toyapētaemē Dioso papeca-itaxutotsoniataejawanexa. ⁴ Itsiata baitsi jane, aeconoxae papijajiwi xaemē, panatoyapētaneme baja Dioso papeca-itaxutotsoniataejawa.

**Pacuenia Jesús peliwaissi pejumexaniataewi bejinawanapa,
Dioso petonacuenebawanapaenexa, yabara peliwaissi**

¹¹ Tajamonaē, bitso pataca-asiwawi, ayaicuena pacawajētatsi panepata-othopaewi cae-epatoyocuena panejinawanapaenexa mapanacuataje. ¡Panataema caecuenia Dioso pijanacuatastia bepanejinawanapaewi, pane-exanaeyaniwa daxita picani papibisiacuene jamatabēpa-exaname; papibisiacijamatabēcuenejawanē jaita papecajamatabēcuene-amoneyabinexa! ¹² ¡Paxamē xaniawaetsia patsitajinawanapare, pamonaē Dioso apopeyapētaewi tuatujēta, itsajota pajinawanapame! Maparucaje bajarapamonaē pacabaracuaicuajai, bepibisiacuene pane-exanaewi, papecacuenaetaexae. Itsiata, pamatacabi“ Dioso tocanaējētsiana daxita jiwi pijaneconi, bajarapamonaē matapania yapētaena pexaniacuene pane-exanawanapaejawa. Nexata, wēnēxaniatsiana Dioso jawabelia, pexaniacuene pexanaponaponaenē yabara.

s 2:10 apopapijajiwi mē: Pesiwanajamatabēcuene-copabiwajēnaeya Jesucristojawabelia, judiowi, apojudiowi-ata nacaemonaecuenia aponataē. Itsiata, aeconoxae bajarapabitsaēto-beje naexana nacaemonaē Jesucristo pejamatabēcuena, Dioso pijajiwinexa. **t 2:10 papeca-itaxutotsoniataejawanexa:** Jesucristo peliwaissi pejumetaewajēnaeya, pamonaē apojudiowi apoyapētaē Dioso bepejibiatataejawatsi. Itsiata, judiowi yapētane picani, pijasalinaiwi pejamatabēcuena, Dioso peliwaissi-ata pejamatabēcuena. **u 2:12 pamatacabi:** Itsajiwi canaējēta Pedro pejumaitsi jawa yabara pamatacabi Dioso tocanaējētsijitsia mapanacuapijiwi pexanaeneconi. Nexata, pacujinaē Dioso wajunupaebiana jiwi pijaneconi, pijaneconi pexainaewi jumaitsi tsane: «Xaniajai. Pananeconitajē cajena, tsipaji pamonaē Jesús peliwaissi pejumexaniataewi panetsitajinawanapa picani bajarapacuenia, itsiata apopajumexaniataenē», jai tsane Dioso jawabelia cuenewēnēxaniatsiaya. Itsamonaē pijinia itsacuenia canaējēta bajaraxua yabara. Bajara-pamonaē Pedro bepejumaitsi tsitatsi jiwi piasaētsawanapae-epato yabara. Nexata, pamatacabi Jesús peliwaissi pejume-aebiwi matapania siwanajamatabēcuene-copabiana Jesucristojawabelia, pecuenaetaeyabiabixae papexaniacuenejawanē Jesús peliwaissi pejumexaniataewi tsitanawanapatsi. Nexata, canaējēta bajarapaversículo pejumaitsinexa mapacueniaje: «*itsiata, itsamatacabijawabelia itsa najamatabēnapitsiana pexaniacuene pane-exanaejawa, bajarapamonaē-ata siwanajamatabēcuene-copabiana Jesucristojawabelia. Nexata, wēnēxaniatsiana Dioso pexaniacuene pexanaponaponaenēcuena*», pejainexa,

**Jesús peliwaisi pejumexaniataewi yayiataeya
bejumecowënëta nacua pewetsiwi**

¹³ ¡Payaiyataema, pajumecowënërenua,* pacuenia paca-itoroba, pamo-nae daxita nacujawa pewetsiwi, itsajiwi-ata pebaracuaicuajaiyaniwa Wajatusanenë Jesucristo! ¡Bajarapacuenia pijinia, pajumecowënëre ponë, pepopewetsinë, panijanacuata daxita pewetsiwiwecua! ¹⁴ ¡Bajarapacue-nia pajumecowënëre papecyanacua-ewetsiwi, tsipaji pepopewetsinë tocopata bajarapamonae, penaneconitsia-exanaenexa pibisiacuene pexa-naewi, yayiataeya-ata pewajunupaebinxatsi, pexaniacuene pexanawa-napaewi! ¹⁵ Bajarapacuenia Dioso pacatojitsipa, xaniawaetsia panetsita-exanawanapaenexa pexaniacuene, panemoya-exanaenexa pamonae pacabaracuaicuajai pibisiacuene bepane-exanawanapaewi. Bajarapamonae apopeyapëtaexae Jesús peliwaisi, jemaliwaisicuenia* pacabaracuaicuajai.

¹⁶ Paxamë, Jesucristojawabelia panesiwanajamatabëcuenecopabiwi, bajaraponë baja panijatuxanenë pa-exaname, panejumecowënëtabiabi-nexa daxita pewetsiwi papeca-itorobicueneewecua. ¡Nexata, Dioso papija-jiwixamë pejitsipaecuenia pa-exanawanapare! ¡Paxainae-atamë papeca-itorobiwi mapanacuataje, pëtsa pa-exaname* Dioso apopejitsipaecue-ne, paca-itorobi-ata* pibisiacuene pane-exanaenexa! ¹⁷ ¡Biji rajane, daxitajiwi yayiataeya pajinawanapare! ¡Pa-asiwamëre daxita Jesucristojawabelia panenajuasiwanajamatabëcuenecopabiwi! ¡Dioso yayiataeya pacujunaware! ¡Payaiyataemanua pepopapecyanacua-ewetsinë!

**Amoneya petonacuenebiwi pijatuxanewi bejumecowënëta pijatuxanenë,
bejibioa-exanae-atatsi pesiwanajamatabëcuenecopabixae Cristojawabelia**

¹⁸ ¡Paxamë itsamonae amoneya panetonacuenebawanapaewi, paju-meyaiyataeyabiabare pacuenia paca-itorobabiaba panijatuxanewi!

v 2:13 ¡Payaiyataema, pajumecowënërenua!: Daxita penamatacaitorobisaë pexainaewi waja-jinawanapaenacuata, beyaiyatanetsi. Bejumecowënëtatatsinua wajanaca-itorobicuene. Itsiata, wajanacayanacua-ewetsinë itsa naca-itorobijitsipa xua Dioso naca-itaweta waja-exanaeyaniwa, bajaraxua yabara Dioso aponacatocopatsi wajajumecowënëtsijawa. Tsiteca itsiata, nacatoxane-pana wajayaiyataejawa bajarapajiwi, pexainaexae pewetsitaxunae. Taema Rom. 13:1-5, Hch. 4:18-19; Tit. 3:1. w 2:15 jemaliwaisicuenia: Taema Gál. 5:13. x 2:16 ¡pëtsa pa-exaname!: Taema Hch. 5:29. y 2:16 paca-itorobi-ata: Bajarapacuenia itsa naca-itoroba wajajinawanapaenexa, aponaca-itorobi wajajumecowënëtsiyaniwa wajanacayanacua-ewetsiwi. ¡Jume! Biji rajane, naca-itoroba wajajinawanapaenexa Dioso pijajiwiitsicuenia, jumecowënëtsia waja-exanabiabinexa wajanacayanacua-ewetsiwi wajanaca-itorobicuenia. Taema Jn 8:32, 36; Rom. 8:2; 2Co 3:17; Gál. 5:1, 15. Bajarapaliwaisi yabara, Dioso peliwaisi penacujarubiwi caejamatabëcuene apoxainae. 1) Itsamonae canaëjëta Pedro pecujarubijawa Jesús peliwaisi pejumexaniataewi, pacuenia apotsicaruae-atatsi pejumecowënëtsijawa nacua pewetsiwi, itsa itorobatsi pibisiacuene pexanaejawanexa, itsiata Jesús pijajiwi apobenatae ayajamatabëcuene pexainaewicuenia. 2) Itsamonae pijinia canaëjëta Pedro pecujarubijawa Jesús pijajiwi, pacuenia Dioso pecapanepaexaetsi pijapibisiyajamatabëcuene penamatacaitorobisaëtsiwecua, nexata apotsicaruaetsi pematatsënëa pejumecowënëtsijawa pacuenia pijaperujumatabëcuene jama-tabëcuenenamatacaitorobatsi, pibisiacuene pexanaenexa. 3) Itsamonae juya canaëjëta Pedro pecujarubijawa Jesús pijajiwi, pacuenia apotsicaruaetsi pejumecowënëtanawanapaenexa Dioso penajumecopatsiliwaisi Moisés-pijinëta, Dioso aneonijibia petaenexatsi. Daxita bajarapapeca-naëjëtsicuenianë xaniajai cajena. Itsiata, copiaya perucaliwaisi xaniawaetsia itajëta xua yabara Pedro muxujioba Jesús pijajiwi.

¡Pa-exanawanapare pacuenia paca-itorobabiaba panijatuxanewi, pexaniajamatabëcuenewi, itsa jume, piajamatabëcuenebejewi-ata! ¹⁹Nexata, panijatu-xanenë piajamatabëcuenebejenë panetonacuenebijawata itsa pacabejiobia-exana, xaniawaetsia patonacuenebi-atamë,^z bajaraxua yabara Dioso pacasiwajamatabëcuenebarëya tsane. ²⁰Itsia, bijiaya panetonacuenebixae, itsa pacabejiobia-exanaejitsipa, bajaraxua yabara Dioso apopacasiwajamatabëcuenebarëya tsipae. Itsia, pexaniacuenia patonacuenebi-atamë, itsa pacabejiobia-exanaejitsipa, bajaraxua yabara Dioso pacasiwajamatabëcuenebarëya.^a ²¹Bajaraxua yabara Dioso pacajunata, papecabebiobia-exanaenexa, pexaniacuene pa-exanawanapae-atamë. Bajarapacuenia itsa pacabejiobia-exanaena, Cristo pacuenejëpaename, tsipaji bajaraPonë-ata bejiobia-exanatsi papecasiwatëpaejawata, pexaniacuene pexanabiabinë-ata. ²²Yapëtanetsi baja cajena pacuenia Cristo, caeto-ata pibisiacuene apo-exanae. Apoyamaxë-itojorobi cajena itsajiwiyojawabelia-ata. ²³Paepatota anaeyacuenia bijatanetsi, anaeyacuenia juya apojumecanawiatsi. Paepatota bejiobia-exanatsi, cuenecanawiatsiaya aponayamatamotsiapaebi. Biji rajane, Cristo tocopata Dioso pecobeyabelia, pebejiobia-exanaewitsi penaneconitsia-exanaenexa pijaneconijamatabëcuene, tsipaji Dioso jiwi pijaneconi xaniawaetsia petocanaëjëtsinë.^b ²⁴Cristo baja tsijumaxuabatsi waxaitsi pibisiacuene waja-exanaeneconi, pijaneconi bepexainenëcuenia itsa nacasiwatëpa cruzata.^c Bajarapacuenia Cristo itsa nacato-exana, bewajanacayajawatëpae pibisiacuene waja-exanaejawamiwecua, bajarapacuenia jamatejema wajajinawanapaenexa wajawajënaeyabelia Dioso pejitsipaecuenia. Cristo nacasiwawajënrubatsi^d wajanacajamatabëcuenexaniawaetsinexa pibisijamatabëcuenewecua, xaniawaetsia wajajinawanapaenexa^e Dioso pitabarata. ²⁵Baitsi, waxaitsi picani Diosowecua naxuabiaya jinawanapatsi, pacuenia oveja, pewetsinëtsiwecua naxuabiaya jinawanapa. Itsia baitsi jane, aeconoxae baja nawiabatsi Cristojawaberena, ponë, wajanaca-ewetsinë pija-ovejawitsicuenia,^f wajanacajamatabëcuene-ewetaponaponanënexa.

Penacojiobiwi pijaliwaisi

Petiriawi pijaliwaisi

3 ¹¡Paxamë papetiriawimë, Jesucristo panesiwanajamatabëcuenecopabiwi, pacaewamë canacujitsia, pane-amona^g jumecowënëtsiaya pajinawanapare! Bajarapacuenia itsa pajumecowënëtanapananame pane-amonajiwi, itsa abaxë jume-aeba Jesús peliwaisi, papecacuetaejawata belia bajaraponë-ata siwanajamatabëcuenecopatsiana Jesús-jawabelia, apopatsipaebi-atamë Jesús peliwaisi. ²Nexata, pane-amonajiwi papecacuetaejawata pexaniacuenia panetsitajinawanapaejawa, yaiyataeya-ata panetsitajinawanapaejawa Dioso pitabarata, nexata bajaraponë belia siwanajamatabëcuenecopatsiana Jesucristojawabelia.

z 2:19 xaniawaetsia patonacuenebi-atamë: Taema Mt 5:10. a 2:20 pacasiwajamatabëcuenebarëya: Taema Efe. 6:5-8; Col. 3:22-25; Tit. 2:9. b 2:23 petocanaëjëtsinë: Taema Mt 27:39-46; Isa. 53:7. c 2:24 cruzata: Taema Hch. 5:30. d 2:24 nacasiwawajënrubatsi: Taema Isa. 53:5. e 2:24 wajajinawanapaenexa: Taema Rom. 6:2-11. f 2:25 pija-ovejacuenia: Taema Salmo 23. g 3:1 pane-amona: Taema 1Co 11:3; Efe. 5:22; Col. 3:18; Tit. 2:5.

³ ¡Papetiriawimë, pëtsa panasiwanajamatabëxainame naniawelia pane-naitabëtsijawa yabara, pexaniawacuenia papecataenexa! Dioso pexaniawacuenia apopacatae, saya pexaniacuenia panenamatafaratsixae, panenaperabë-itabëtsixae oronanitota pexanaejawanëta, panenaxatabixae-ata bitso pexaniawirianaxatabijawanë. ⁴ ¡Biji rajane, panasiwanajamatabëxainare bëpënëa panenajamatabëcuene-itabëtsijawa, pexaniawacuenia papecataenexa Dioso! ¡Nexata, apopewerewerecaejamatabëcuenejawanëta, panajamatabëcuene-itabëre mapacueniaje!: Asiwaya panetaejamatabëcuene itsamonaejawabelia, panesiwanajamatabëcataitsijamatabëcuene itsamonaejawabelia paca-itsacueniabi-ata. Bajarapajamatabëcuenebeje Dioso bitso tsitanamatamotatsi daxitajamatabëcuenianëwecua, panenajamatabëcuene-itabëtsinexa, pexaniawacuenia papecataenexa. ⁵ Bajarapacuenia pijinia, najamatabëcuene-itabëtabiaba bajayatami, papetiriawi Dioso pejitsipaecuenia exanawanapa. Bajarapamonaemi itaxutuajamatejema Diosojawabelia. Yaiyataeyanua jumecowënëtanawapa pamonajiwi. ⁶ Bajarapacuenia bajayatami Sarapijiwami najamatabëcuene-itabëta. Pamona, Abraham-pijinë, jumecowënëtsia ponapona. Nexata, itsa junata pamona «Tajatuxanenë», jai tsabiabi pamonajawabelia. Nexata, paxamë papetiriawimë pacuenejëpae-name Sarapijiwami, itsa pa-exanawanapaename Dioso pejitsipaecuenia, itsa apopacujunawimëna tsane xua pane-amonajiwi pacato-exanaejitsia, Dioso pejitsipaecuenia pane-exanawanapaexae. Bajarapacuenia itsa pa-exanawanapaename, Sarapijiwami bepapexënatowaximë^h tsane.

Pebijiwi pijaliwaisi

⁷ ¡Paxamë papebijiwiwimë, Jesucristojawabelia panesiwanajamatabëcuenecopabiwi, pacuenia panijawajiwi pacayaiyatane, bajarapacuenia pijinia, xaniawaetsiaⁱ yaiyataeya pabarëjijnawanapare panijawajiwi! Payapëtaneme rabaja beweliamatabëcuenesaë pexainaewicue. ¡Bajarapacuenia payaiyataema, tsipaji bajarapamonae-ata yajawa Dioso pacarajutsiana matababi apopewerewerecaejawa! ¡Bajarapacuenia xaniawaetsia pabarëjijnawanapare panijawajiwi, caejamatabëcuene panenajuaxainaenexabeje, papecacueneccaranatsiyaniwa^j panenawajëcaejawa Diosojawabelia!

Daxita Jesucristojawabelia pesiwanajamatabëcuenecopabiwi pijaliwaisi

⁸ Pecopiarucaeliwaisita, jitsipajë padaxitamë patacamuxujiobijawa mapacueniaje: ¡Najamatabëcuenejëpaeya pajinawanapare! ¡Nasiwaya panajamatabëcuenyana bare namata-enetsia, nacaemonaecuenia itsacuee itsa pacatocopiapata! ¡Naitaxutotsoniataeyanua pajinawanapare! ¡Beweliamatabëcuenewinua nataeya pajinawanapare! ⁹ ¡Nexata, itsajiwi pibisiacuene itsa paca-exana, pëtsa pacuenecanawiatame! ¡Pibisiacuenia itsa pacabijatanenua, pëtsa anaeya pajumecanawiatame! ¡Pamonae pijinia pibisiacuene

h 3:6 *Sarapijiwami bepapexënatowaximë*: Pacuenia petiriawi pexënatowaxi caejamatabëcuene baxaina penajawabelia, bajarapacuenia papetiriawi caejamatabëcuene xaina Dioso pejitsipaecuenia pexanaenexa, bajarapajamatabëcuene yabara bepexënatowaxi naexana Sarapijiwami. **i 3:7** *xaniawaetsia*: Taema 1Co 7:3; Efe. 5:25-33; Col. 3:19. **j 3:7** *papecacueneccaranatsiyaniwa*: Baitsi, pebi xaniawaetsia itsa apobarëponaponae pijawa, nexata Dioso namuxujematatsi petoxanaeyaniwatsi pacuenia wajëca Diosojawabelia. Taema Sal. 66:18; Sant. 4:3; Mal. 2:14-16.

pacato-exana, anaeya pacabijatanenua, patowajëre Diosojawabelia pexaniacuenia peyawenonaenexatsi, tsipaji raja Dioso paxamë pacajunata papijajiwinexamë, pexaniacuenia papecayawenonabiabinexa! ¹⁰ Bajarapacuenie yabara Dioso pejumeliwaisibaxutota jumaitsi mapacueniaje:

«Pajiwi jitsipa bajayajebi piasaëtsaponaponaejawa, pejamatabëcuen ebarëyatsaponaponaejawanua, bajarapajiwi bena-ebarëto-eweta pibisialiwaissi pecuaicuaijaiyaniwa, penajumetsënëtsiyaniwa-ata. ¹¹ Nawecuacopatsi daxita pibisiacuenie pexanabiabijawa, exanaponaponae pexaniacuenie. Jaitsi, aliwaisijibia peponaponaeenexa pewajënaeyabelia, ¹² tsipaji raja Dioso naitaxutocaeweta pewetsinexa pexaniacuenie pexanaewi. BajaraPonë namuxuna-ewetanua penawajëtsijawatsi. Itsiata baitsi jane, Dioso cuene-ataejitsibi pibisiacuenie pexanawanapaewi. Naneconitsia-exanabiabanua», ^k jai Dioso pejumeliwaisibaxutota.

Jesús pijajiwi apobenasiwajamatabëcuenebëjai pebejiobia-exanaejawatsi Jesús pejamatabëcueneta

¹³ Paxamë payapëtaneme mapacuenieje: Pamonaë ajamatabëcuenie-saë tsawanapae pexaniacuenie pexanawanapaejawa, bajarapamonae juya pibisiacuenia apocuenecanawiatsitsi, pexaniacuenie pexanaejawa yabara. ¹⁴ Itsiata, belia paxamë itsamonae pacabejiobia-exanaejitsipa, xaniawaetsia pajinawanapae-atamë. Bajarapacuenia itsa pacatocopiapata, bitso pajamatabëcueniebarëyamë tsane, ¹ tsipaji raja Dioso pexaniacuenie pacato-exanaena bajarapacuenie yabara. ¡Pëtsa pacujunawame bajarapamonae! ¡Pëtsa panasiwajamatabëcueniebëjamënuu, papecabebiobia-exanaejawa yabara! ¹⁵ ¡Biji rajane, panejamatabë-ëthëtojawawetsina yaiyataeya pajumecowënére panijatuxanenë Cristo! Orijibia, panajamatabëcueneweretawanaparenua, xaniawaetsia panejumecanawiatsinexa itsajiwi itsa pacayanijoba pane-itaxutuajamatejemajawa yabara Cristo. ¹⁶ ¡Itsiata baitsi jane, yaiyataeya, beweliamatabëcuenewi nataeya, pajumecanawiare xaniawaetsia! ¡Cristo papijajiwiwaxamë, xaniawaetsia patsitajinawanapare, Dioso pitabarata aneconijibia panejinawanapaejawa! Nexata, itsamonae najumetsënëtsiya pacabaracuaicuaijai tsabiabi-ata tsane, bajarapamonae belia najumecopabiana. Naurabiananua papecabaracuaicuaijaitsabibijawa. ¹⁷ Bajarapacuenia itsa Dioso pacatocopatsipa, itsamonae papecabebiobia-exanaenexa, matatoxenetsia bitso xanepana papecabebiobia-exanaejawa^m pexaniacuenie pane-exanaejawa yabara, papecabebiobia-exanaejawawecua pibisiacuenie pane-exanaejamatabëcuenie.

¹⁸ Bajarapacuenia cajena Cristo, pexaniacuenie pexanaenë-ata, bejiobia-exanatsi wajanacasiwatëpaejawata. Caeto rabaja nacasiwatëpa. Nexata, pematatsënëa aponacasiwatëpae tsane. Bajaraponë caeto-ata pibisiacuenie apo-exanae, itsiata bejiobia-exanatsi waxaitsi pibisiacuenie waja-exanaeneconi yabara, wajanacapanepaenexa Diosojawabelia.

k 3:12 Taema Sal. 34:12-16. **1 3:14** *pajamatabëcueniebarëyamë tsane*: Taema Mt 5:10; Flp. 1:29; Sant. 1:2-5; 1Pd 4:21-16. **m 3:17** *papecabebiobia-exanaejawa*: Taema Mt 5:10; Flp. 1:29; Sant. 1:2-5; 1Pd 4:21-16.

Peperabětomi baja picani tēpa. Itsiata baitsi jane, pepopejamatabēcuenē Espíritu Santo icatsia asaēya-exanatsi.

¹⁹Nexata, petēpae-epato Espíritu Santo yawenona Cristo pejamatabēcuenē peponaenexa petēpaewimi pejamatabēcuenexiⁿ pejinawanapaenacuayabelia, panacuata Dioso tocopata naneconitsiaya pejinawanapaenexa. Nexata, tsipaeba xua yabara tēpa, ²⁰pamonaemi bajayata apojumecowēnētsi Noépijinē peponaponaematacabita. Nexata, Noépijinē, abaxē itsa nacue-nebapona pinijibarcoxaneto, Dioso picani bajayajebi jiwi jamatabēcuenē-eweta, Noé petsipaebiliwaisi pejumexaniataenexatsi. Itsiata baitsi jane, apojumecowēnētsitsi. Saya ocho pajiwiyojebe, Noépijinē, pijamonae yajawa, bajarapamota Dioso capanepatsi, mapanacuaje pebubutsijawawecua. Bajarapamera pejamatabēcueneta, Noébana capanepatsi. ²¹Dioso itsa capanepa Noébana bajarapamerata, bajaraxua nacatocuenecatane wajanacabautizabijawa. Wajanacabautizabijawata, najamatabēcuenē-itajētatsi Dioso wajanacacapanepaejawa wajanacananeconitsia-exanaejawaminexawecua, pacuenia bajayatami, capanepatsi bajarapa-ochopajiwiyojebe jiwi penaneconitsia-exanaejawa bajarapamerata. Aponacabautizabi baja cajena saya wajanacaperabēquatsinexa. Biji rajane, nacabautizaba, wajanajamatabēcuenē-itajētsinexa Dioso wajanacajamatabēcuenēquatsijawa, aneconijibia wajanacataexae Cristo wajanacasiwatēpaejamatabēcueneta. Nexata, yapētanetsi pexaniajaicuenē Dioso wajanacajamatabēcuenēquatsijawa, tsi-paji Jesucristo wajanacasiwatēpaecujinae, icatsia Dioso asaēya-exanatsi. Yapētanetsinua pepacuenē Dioso wajanacacapanepaejawanexa, Cristo wajanacasiwatēpaexae. ²²Nexata, piasaēya-exanaecujinaetsi pona jane baja, athēbēabetsia, pe-ecaenexa paxa Dioso pecujuanenia. Nexata, maparucaeje Dioso tocopata Jesucristo penamatacatorobinēnēxa. Bajaraxuata, daxita Dioso pija-ánglewi, pamonaē-ata dowathiwi,^o penamatacatorobisaē pexainaewi, daxita bajarapamonae jamatabēcuenē-ewetawanapa Cristo penematacatorobijawatsi.

**Asaēyata betonacuenebawanapatsi Dioso,
mapanacuapijiwije nacabejibia-exanae-ata**

4 ¹ Cristo abaxē itsa ponapona mapanacuataje, itsamonae bejiobia-exanae-atatsi, penawixaetaenexa peperabētota, itsiata tsitecaeya Dioso pejiitsipaecuenia exanaponapona. ¡Bajarapijini paxamē-ata pajamatabēcuenē-itsimēre tsawanapae papecabejibia-exanaejawanexa

n 3:19 *petēpaewimi pejamatabēcuenexi*: Pamonaē Dioso peliwaisi pecujarubiwi, caejamatabēcuenē apoxinae pamonaē yabara Pedro jumaitsi. **1)** Itsamonae canaējēta Cristo tsipaeba pesiawatēpaejawa, jiwi pijaneconī capanepaeya petomatamotsijawa, pamonaē petēpaewimi itaxutuajamatejema Dioso jawabelia Jesús petēpaewajēnaeya. Taema Lu. 16:19-30; Heb. 9:21; Efe. 4:6-7. **2)** Itsamonae pijini canaējēta Cristo petsipaebijawa pacuenia matapania jane baja, siwatēpa daxita jiwi pijaneconī, pacuenia tajēwelia najumecapanepaeya jumaitsi. Nexata, canaējēta Cristo petsipaebijawa pamonaē petēpaewi apojumexaniataewi Jesús petēpaewajēnaeya, itsa jume, petsipaebijawa itsamonae ánglewiyajuwēnēwi pamonaē naneconitsiaya jinawanapa pinijineconī yabara. Itsiata, apotsipaebi bajarapamonae jawabelia pesiwanajamatabēcuenecopabinexatsi. Biji rajane, yapētaeya-exana Dioso apojumexanaxabinēcuenē, xua tajēwelia najumecapanepaeya jumaitsi Cristo yabara. Taema Heb. 9:27, Jud. 1:9; 2Pd 2:4. **o 3:22** *dowathiwi*: Taema Efe. 6:12.

yabara, tsipaji pajiwi bejiobia-exanatsi penawixaetaenexa peperabëtota pexaniacuene pexanaexae, bajarapajiwi baja nawecuacopata pibisiacuene pexanaejawa! ² Bajarapacuenia pibisiacuene penawecuacopatsixae, peponaponae-epato pewajënaeyabelia exanaponaponaena ëDioso pejitsipaecuenia. Copata baja pijacuata penajamatabëxainacuena pexanabiabijawa. ³ Bajayata, picani paxamë-ata bajarapacuenia bitso pibisiacuene pa-exanawanapame, pacuenia aeconoxae exanawanapa pamona Dioso apoeyapëtaewi. Jesucristojawabelia panesiwanajamatabëcuenecopabiwajënaeya, paxamë-ata najamatabëcuenecataitsinejewa panewitota pibisiacuene pa-exanawanapame. Pasiwanajamatabëxainabiabame pibisiacuene pane-exanaejawa. Panijabonëjawa, pane-exanaefiestanëjawa-ata, paitajibimë tsa-biabi, itsajota apocaewiria pibisiacuenejawanë pa-exanabiabame. Asiwaya pasiwanajamatabëcuenecopatabiabamenua jumapecataeya pexanaenëanëjawa-belia, xuanë Dioso tane pepopitoyajawanë. Itsiata baitsi jane, aeconoxae daxita bajarapacuenia pacopabame baja.

⁴ Aeconoxae baja bajarapacueniejawanë panecopabixae, nexata apopanajua-exanawanapaemë, bitso papibisiacuenejawanë picani panajua-exanabiabame. Bajaraxuata, bajarapamona pacacuene-itothiatane. Nexata, pibisiacuena pacabaracuaicuajai tsa-biabinua. ⁵ Itsiata baitsi jane, bajarapamona itsamatacabi Dioso pitabarata nubenaena,^p penawajunupaebinxaxa pijaneconi. BajaraPonë raja tocanaëjëtsiana pijaneconi pexainaewi, pamona abaxë asaë tsawanapae, pamona-ata petëpaewi, penaneconitsia-exanaenexa. ⁶ Bajaraxuata, Cristo tsipaeba^q baja pexanaliwaisi petëpaewimi pejinawanapaenacuajawabelia. Nexata, pamona mapanacuapijiwije beyejebatsi pitaxutuajamatejemaxae Diosojawabelia, tëpae-ata,^r jamatabëcuene-asaë tsawanapae daxitamatacabijawabelia, Dioso pejamatabëcueneta.

Pacuenia Cristo pijajiwi bejinawanapa itsa baja imoxoyo pewerewerecaejawa mapanacuaje, yabara peliwaishi

Jesús pijajiwi namata-enetsia penayawenonaecuene

⁷ Tajamona, imoxoyo rabaja pewajënae daxitacuene peyajawawerewere-caenexa mapanacuaje. iBajaraxuata, nacenexaniawaetsiaya pajinawanapare pibisiacuene pa-exanaenejewamë, najamatabëcuene-ewetsiaya xaniawaetsia panejinawanapaenexa Dioso pejitsipaecuenia! Panajamatabëcuenesaëtawana-parenua namata-enetsia panenajuwajëcabiabinexa Diosojawabelia. ⁸ Daxita pane-exanaejawawecua, matatoxenetsia pacatoxanepana namata-enetsia panena-asiwatsawanapaenexa, tsipaji itsa asiwatsi itsajiwi-ata, nexata pibisiacuene naca-exanabiabi-ata, bajarapajiwi siwajamatabëcuenecaewatsi.

p 4:5 nubenaena: Taema Mt 12:36. **q 4:6** Cristo tsipaeba: Taema 1Pd 3:19. **r 4:6** tëpae-ata: Pacuenia mapanacuapijiwije beyaxuba Cristo pebejiobia-exanaecueniatsi, pexaniacuene pexanaponaponaexae, bajarapacuenia pijinia, Jesús pijajiwi beyajebianatsi pebepejiobia-exanaecueniatsi, pexaniacuene pexanawanapaexae. Pacuenia-ata Cristo, Dioso pejamatabëcueneta, maparuaeje asaë tsaponapona daxitamatacabijawabelianexa, pebeyaxuabicujinaetsi, bajarapacuenia pijinia, pamona pesiwanajamatabëcuenecopabiwi Jesucristojawabelia, Dioso pejamatabëcueneta, asaë tsawanapae tsane daxitamatacabijawabelia. Taema Mt 5:10-12.

⁹ ¡Namata-enetsia xaniawaetsia panacopiapire panijaboyaberena, jamatabëcuenexanepanaeya! ¡Nexata, papecatopatsijiwi penamatawenonaejawata parajure pexaejawa! ¡Bajarapacuenia patsicopare pataxunaeta majitsijitsia, itsajamatabëcuene paxainaenejewamë bajarapajiwi jawabelia!

¹⁰ ¡Pacaejiwimë canacujitsia, Dioso saicayacuenia papecajamatabëcuenecaëjëpaeya-exanaexae, bajarapajamatabëcuene xaniawaetsia patocanacuenebawanapare, namata-enetsia panenajamatabëcueneyawenonaejawata! ¹¹ Nexata, pajiwi paeba Dioso peliwaisi jiwibitsaëtojawata, bajarapajiwi tsipaebi Dioso pejamatabëcuenecaëjëpaeya-exanaecueniatsi. Pajiwi pijinia yawenona itsamonae, bajarapajiwi yawenona Dioso pejamatabëcuenecaëjëpaeya-exanaecueniatsi. ¡Daxita xua pa-exaname Jesucristo pejamatabëcuene, bajaraxua pa-exanare jiwi peyaiyataenexa Dioso, tsipaji daxita jiwi toxanepanatsi Dioso yaiya-taeya pewënëxaniatsijawa ayaijamatabëcuenenë yabara, piacuene-saënë yabara-ata dexitamatacabijawabelianexa! Bajara-itsi tsane.

Jesucristojawabelia pesiwanajamatabëcuenecopabiwi

bejamatabëcuenebarëya tsawanapae, itsamonae bejiobia-exanaponae-atatsi

¹² Tajamonae, bitso pataca-asiwawi, maparucaeje itsamonae pacabejiobia-exanapona, Cristo papijajiwi xaemë. ¡Bajaraxua yabara pëtsa pajamatabëcuenenabenajacame! ¡Pëtsa panatocanaëjëtamenua papecatocopiapatsijawa pithiacuenia! Bajarapacuenie pacatocopiapata papecajamatabëcuene-ëjëtsijawa,^s papecajamatabëcueneyapëtaenexa pepacuenie panesiwanajamatabëcuenecopabijawa Diosojawabelia. ¹³ ¡Nexata, papecabebiobia-exanaponaejawa yabara panasiwajamatabëcuenebarëyamëre tsawanapae, tsipaji Cristo-ata bejiobia-exanatsi pacuenia paxamë pacabejiobia-exanapona maparucaeje! Nexata, pamatacabi pataename Cristo peyajawapatsijawatsica pijapeniweni-wenaecotia, ayaicuenia pasiwajamatabëcuenebarëyamë tsane. ¹⁴ ¡Bajaraxuata, bitso pajamatabëcuenebarëyamëre pibisiacuenia itsamonae itsa pacabijatane, Cristo peliwaisi panejumexaniataexae, tsipaji raja paepatota itsamonae pacabijatane, ayaijamatabëcuenenë Espíritu Santo, ponë pacayajawaponapona, ayaicuenia pacayawenonaena! ¹⁵ Bajaraxuata, paxamëyajuwënënë apobebejiobia-exanaetsi, jiwibenëxae, penacobetoxotsinëxae, liwaisi itsamonae petsi-exanaenëxae, bajarapacuenia-ata itsamonae pijaliwaisijawabelia penacajonenëxae. ¹⁶ ¡Biji rajane, itsa pacabejiobia-exana Jesucristojawabelia panesiwanajamatabëcuenecopabixae, pëtsa panaca-auramë! ¡Juya, pexaniajamatabëcuene parajure Diosojawabelia, Jesucristo papijajiwi mëcuene paneyapëtaexae!

¹⁷ Yapëtanetsi baja pewajënaeya paliwaisi pacatsipaebatsi, nacua imoxoyo pewajënae pecopiarucaematacabinexa yabara, pecopiapatsijawa jane baja, tsipaji itsamonae nacabejiobia-exanapona, Jesús pijajiwi xaetsi. Bajarapacuenia nacato-exana,

Dioso wajanacatocanaējētsinexa^t waja-exanawanapaecuenejawanē, wajanacacopabia-exanaenexanua pibisiacuene waja-exanaejawa. Nexata, bajarapacuenia itsa nacatocopiapata waxaitsi, Jesucristoja-wabelia wajasiwanajamatabēcuenecopabiwi, pamonae apopejumeco-wēnētsiwi Jesús peliwaissi, "pexanialiwaissi, ¿detsa pitsinabejiobit-sicuene natotaena? Dioso cajena ayaicuenia naneconitsia-exanaena bajarapamonae, apopesiwanajamatabēcuenecopabixae Jesucristoja-wabelia. ¹⁸Bajarapacuenia tajēwelia profetanē, wajunupaeba baja-pamonae yabara. Jumaitsi mapacueniaje:

«Pamonae pexaniacuene pexanaewi, itsa panepa tsiquirijawayota Dioso penaneconitsia-exanaejawatsiwequa,
¿Denexata pacuenia wecuapanepaena pamonae Dioso
apopejumecowēnētsiwi, bitso pibisiacuene pexanawanapaewi?
Bajarapamonae cajena ayaicuenia naneconitsia-exanaenatsi»,^v jai profetanē.

¹⁹¡Nexata, paxamē itsamonae itsa pacabejiobia-exanapona Dioso papecato-jitsipaecuenia, pētsa pajamatabēcuenebējamē! ¡Biji rajane, tsiteca panewajē-naeyabelia pexaniacuene pa-exanawanapare! Pa-itaxutuajamatejemamērenua papeca-exanaenē Diosojawabelia, papecayawenonaenexa. Dioso cajena pacuenia najumecapanepaeya jumaitsi, bajarapacuenia pacato-exanaena.

Nawitsia pemuxujiobioliwaisianē

Ancianowi pewetsicuene yabara

5 ¹Aeconoxae muxujiobiaya pacatoyaquinatsi paxamē pa-ancianowimē. Xanē-ata rabaja ancianonēnē, Jesús pijajiwijawata. Xanē raja tataenē pacuenia Cristo cruzata bejiobia-exanatsi. Pamatacabi Cristo patsianica, Dioso itsa tocopatsianatsi ayajamatabēcuenenēcuenia pewēnēxaniatsine-xatsi pebejiobia-exanaejawatsi yabara, xanē-ata neyajawawēnēxaniatsiana.^w

t 4:17 wajanacatocanaējētsinexa: Dioso pijajiwi tocopiapsia-exana itsamonae pebejiobia-exanaenexatsi, anijamatabēcuenebeje yabara: Pacuenia oronani pecanacuenebiwi, isotota setabiaba bajarapanani, jamatejema pewematapitsinexa piabejejawanē, bajarapacuenia penacopatsinexa pepo-oronanijawa, bajarapacuenia Dioso canacuenebabiaba, itsamonae wajanacabejiobia-exanaejawata. **1)** Dioso nacacopabia-exanaejitsia, apopejitsipaecuenē waja-exanaejawa. **2)** Dioso capitsapaeya-exanaejitsianua pamonae penacajonewi Jesús pijajiwitua-tajēta, siwanajamatabēcuenecopabinejewa Jesucristojawabelia, penacopabinexa pamonae ēJesucristo pijajiwi. Taema Prov. 17:3, Mal. 3:2-3, Dan. 12:10, 1Pd 1:7, 4:12. **u 4:17 apopejumecowēnētsiwi Jesús peliwaissi:** Jesús peliwaissi, Dioso penajumecopatsiliwaissi Moisés-pijinēta, aponajamatabēcueneliwaissijēpaebeje. Dioso penajumecopatsiliwaissi Moisés-pijinēta naci-itorobabiaba, wajajumecowēntawanapaenexa pacuenia Dioso nacatonajumecopata bajarapaliwaissi. Nexata, itsa jumecowēnētsicapaneatsi bajarapaliwaissi, Dioso juya nacasiwabarēya tsane. Itsiata, Jesús peliwaissi aponaca-itorobi bajarapacuenia. Nacayapētaeya-exana saya, wajasiwanajamatabēcuenecopabinexa Jesucristojawabelia, wajaneconi wajanacatomatamot-sinēcuenia. Nexata, bajarapacuenia waja-exanaexae Dioso aneconijibia nacataena, Jesucristo wajanacasiwatēpaejamatabēcuenē. Nexata, pamonae Jesús peliwaissi pejumetaecujinae, itsa apojumexaniatae, pesiwanajamatabēcuenecopabinexa Jesucristojawabelia, apojumecowēnētsi Jesús peliwaissi. **v 4:18** Taema Prov. 11:31. **w 5:1** Taema Rom. 8:18; 1Pd 4:13. Pacuenia bajarapamonae pexaniacuene taena, Dioso pijanacuatatsia, itsamonae pebejiobia-exanaexaetsi, Cristo pijajiwixae, bajarapacuenia Pedro-ata natocanaējēta pexaniacuene petaejawanexa, pebejiobia-exanaexaetsi Cristo pijajiwitonēxae. (Hch. 5:40) Rom. 8:17-18; 2Ti 2:8-13; 2Ti 3:12.

² Bajarapitsijamatabëcuene tayapëtaexae, pacamuxujobatsi mapacueniaje: ¡Pacuenia oveja pewetsiwi xaniawaetsia ba-ewetawanapa pija-ovejabitsaëto, bajarapacuenia pijinia, paxamë-ata xaniawaetsia pa-ewetawanapare Jesús pijajiwi, tsipaji raja Dioso pacatocopata bajarapamonae paneto-ewetawanapaenexa! ¡Pëtsa pato-ewetawanapame, saya papeca-itorobixae! ¡Biji rajane, cuenejitsipaeya pato-ewetawanapare Dioso pejitsipaecuenia! ¡Pëtsa pato-ewetawanapamenua, papecamatamotsijawanexa yabara! ¡Biji rajane, panejamatabë-ëthëtojawawetsina panejitsipaexae, Jesús pijajiwi xaniawaetsia pato-ewetawanapare! ³ ¡Pëtsa bepipijatuxanewimë panata-neme, pane-itorobabiabinexa pamonae pa-ewetawanapame! ¡Biji rajane, xaniawaetsia patsitajinawanapare, pacuenia patojitsipame bajarapamonae pejinawanapaenexa! ⁴ Nexata, pamatacabi Cristo patsianica daxita pijajiwi pewetsiwi pepopenamatacaitorobinë, bajaraPonë paxamë papecabarë-ewetsiwi pacarajutsiana bitso pexaniawiriacorónajawa, apopiabejewanexa daxitamatacabijawabelia, xua yabara jiwi pacayaiyataejitsia pexaniacuenia paneto-ewetawanapaexae.

Daxita pamo nae penacatuatsiwi Jesús pewënëta pecuene yabara

⁵ Paxamë pijinia papewëjëawimë pacamuxujobatsi mapacueniaje: ¡Yaiya-taeya pajumecowënëre^x pacuenia ancianowi paca-itoroba! Daxita paxamë, Jesús papijajiwi^{më}, namata-enetsia panayawenonabianame, bewelija-jamatabëcuenewi nataeya, tsipaji raja Dioso pejumeliwaisibaxutota jumaitsi mapacueniaje:

«Dioso aponacuenecajitsipae peyawenonaejawa pamonae ayaijamatabëcuenewi penataewi. Itsiata bailsi jane, Dioso pexaniajamatabëcueneta yawenona pamonae bewelijaamatabëcuenewi penataewi»,^y jai Dioso pejumeliwaisibaxutota.

⁶ ¡Bajarapacuenia Dioso pexanaexae, bewelijaamatabëcuenewi nataeya pajinawanapare Dioso piacuenesaënë pitabarata! Nexata, bajaraPonë ayai-jamatabëcuenewi paca-exanaena pa-ayaijamatabëcuenewimë, papecato-cajëtsimatacabita. ⁷ ¡Orijiibia, daxita panejamatabëcuenebëjajawa, paco-pare! ¡Biji rajane, panajamatabëcuenerajure Dioso, papecayawenonaenexa! Nexata, bajaraPonë papeca-asiwaxae pacayawenonaena^z daxitacuene xua picaní pasiwajamatabëcuenebëjamë.

⁸ ¡Nayajiwitaeya pajinawanapare, jamatabëcuene-aitatsacaeya panijawa-jabitsaënë dowathiwecua, papecajamatabëcueneyamaxë-itojorobiyaníwa! Pacuenia newëthë jemata pinijijumeta xërëjai perëcëtabinexa dajubi pewetsijiwiwitsiwecua, bajarapacuenia exana jamatejema pewaetabinexa ponë beyaxuabijitsia^a bajarajamatabëcuene-itsi dowathi. Aeconoxaeta,

^x 5:5 yaiyataeya pajumecowënëre: Taema Heb. 13:17. ^y 5:5 Taema Prov. 3:34; Sant. 4:6.

^z 5:7 pacayawenonaena: Taema Sal. 37:5, 55:22; Mt 6:25, 32; Flp. 4:6. ^a 5:8 beyaxuabijitsia: Taema Lu 22:31-32; Mt 9:36; 26:31; Jn 16:32. Pawiria newëthë, petsaunaewi, jinawanapa Israel nacuata, bajarapawiria pinijijumeta xaraëjai, pejunawiaenexa pexayabuatsinënexa, bajarapacuenia perëcëtabinexa pepobitsaëtowecua, itsa jume, pepitsapaeya-exanaenexa corral-wecua. Pija-epato toyapëxanepanajitsiatsi pebeyaxuabinexa. Bajarapacuenia pijinia exana dowathi. Bajaraponë nacajunawiacabiaba wajanacayamaxë-itojorobinexa, wajasíwanajamatabëcueneco-patsinexa itsacuenewawabelia wajanaca-ewetsinë Diosowecua.

jaitaponapona pajiwi jamatabëcueneyamaxë-itojorobijitsia, pejunawia-caejawata. ⁹ ¡Paepatota dowathi pacajamatabëcuenejaita, papecayamaxë-itojorobinexa, pajamatabëcuenesaëmëre pane-itaxutuajamatejemajawa Diosojawabelia! Payapëtaneme rabaja pacuenia daxitajawa itsamonae-ata, Jesús peliwaisi pejumexaniataewi, bejiobia-exanaponatsi dowathi pejamatabëcueneta, pacuenia paxamë-ata pacatocopiapatapona. ¹⁰ Itsiata baitsi jane, saya cae-epatoyonexa^b pacabejiobia-exanaena. Bajaraxuacujinae, Dioso pacajamatabëcueneliwaisinaweretsia-exanaena pijacuenejawata. Pacajamatabëcuene-asaëya-exanaena. Pacarajutsiananua caejamatabëcuene panexainaenexa Diosojawabelia. Bajarapacuenia Dioso pacato-exanaena, tsipaji Dioso asiwaya wajanacayawenonaenë tsaponaponae. Nacajunatanua athëbëtatsia, pijapeniweniwenacuatatsia, wajanacayajawaponaponae-nexa, Jesucristo pejamatabëcueneta. Bajarapacuenianua wajanacayajawaxainaenexa^c Cristota peyaiyataecuenetsi daxitamatacabijawabelianexa. ¹¹ Dioso baja xaina daxita penamatacaitorobisaë, peyanacua-ewetsinexa daxitamatacabijawabelia. Bajara-itsi tsane.

Pedro penapëjiobicuene yabara

¹² Mapaliwaisije yaquinaeya-exanajë wajamonaenë Silvano, paliwaisi pacato-itorobijitsiatsilia. Bjaraponë taniji bepanacaepijinënëbeje, Jesús peliwaisi pejumexaniataexae. Xaniawaetsia ponaponanua bajarapaliwaisita.

Pacatoyaquinatsi mapabaxutoje, patacamuxujibinexa, patacajamatabëcuene-asaëya-exanaenexanua Diosojawabelia. Pacayapëtaeya-exanatsinua pacuenia Dioso pacajamatabëcuene-itajëtabiaba bitso pane-asiwajawa, bitso pexaniacuenejawanë papecato-exanaejawata. ¡Bajaraxuata, itsamonae pacabejiobia-exanabiabi-ata, pajamatabëcuenesaëmëre tsawanapae, paneyapëtaexae baja Dioso bitso papeca-asiwajawa!

¹³ Pamonaë jinawanapa Babilonia tomarata, Jesús pijajiwi, pacabajacobalia. Bajarapamonaë Dioso itapetatsi Jesús pijajiwinexa, pacuenia paxamë-ata paca-itapeta. Marcos, ponë betaxënatocuenia tataenë, bajaraponë-ata pacabajacobalia. ¹⁴ ¡Tajamonaë, panenacopiapitabiabijawata, namata-enetsia na-asiwaya panabajacobare bepanacaemonaemëcuenia, panenajuasiwanajamatabëcuenecopabixae Jesucristojawabelia!

Pacatojitsipatsi daxita paxamë, jamatabëcuenexanepanaeya panenajuajinawanapaenexa Jesucristo papijajiwiwaxaemë. Bajara-itsi tsane.

b 5:10 cae-epatoyonexa: Taema Rom. 8:18; 2Co 4:11; 1Pd 1:6. **c 5:10** wajanacayajawaxainaenexa: Taema Rom. 8:17,30; 1Pd 4:13; 51,4.

2 Pedro

Mapabaxutoje apóstolnē Pedro cotocaewi toyaquina Jesús peliwaishi pejumexaniataewijawabelia

Pedro pebajacobiliwaishi

1 ¹ Xanē, Simón Pedronē, Jesucristo pijajiwitonēnē, apóstolnēnē, tane-itorobinē jiwi tatsipaebaponaenexa Jesucristo peliwaishi. Paca-toyaquinatsi mapabaxutoje paxamē Dioso bitso pexaniacuenia papeca-capanepaewi.^a Pacuenia paxanē panecapanepa, bajarapacuenia pijinia, paxamē-ata pacacapanepa, najēpaeya wajasowanajamatabēcuenecopabixae Jesucristojawabelia. Nexata, wajaDioso, wajanacacapanepaenē Jesucristobeje,^b najēpaeya baja aneconijibia nacatane. ² Nexata, pacatowajētabiabatsi Diosojawabelia, panewajēnaeyabelia, paneyapētaeponaenexa pacuenia jamatabēcuenē-itsi Dioso, Jesucristobeje. Pexaniacuenia pacatojitsipatsi panewajēnaeyabelia ayaicuenia Dioso asiwaya papecayawenonaejawa papeca-itaxutotsoniataexae, jamatabēcuenexanepanayana panejinawanapaenexa, paneyapētaeponaexae pacuenia jamatabēcuenē-itsi bajaraponēbeje.

Dioso jamatabēcueneyawenona pexi, xaniawaetsia pejinawanapaenexa

³ Xaniawaetsia wajajamatabēcueneyapētaeponaexae pacuenia jamatabēcuenē-itsi bajaraponēbeje, nexata yapētanetsi pacuenia Dioso, ayaijamatabēcuenenē, pesaēta nacarajutapona daxita xua namatawenonatsi, wajajinawanapaenexa xaniawaetsia pacuenia nacatojitsipa. Daxita bajaraxuanē xainatsi, tsipaji yapētanetsi Dioso, ponē nacajunata pijajiwinoxatsi, pexaniajamatabēcuenenē. Najamatabēcuenē-itajētanua jiwi-jawabelia ayaijamatabēcuenē pexainaenēcuenē. ⁴ Bajarapacuenia Dioso

a 1:1 *papecacapanepaewi*: Pamonaē Dioso peliwaishi penacujarubiwi caejamatabēcuenē apoxinaē pajamatabēcuenē xaina, «Pisti-jume», griegojumeta (wowaijumeta pijinia fe), pajume Pedro canacuenēba mapaversículotaje. Ayaibitsaēto canaējēta Dioso pecapanepaejawa jiwi Jesús Peliwaishi pejumexaniataejawa yabara. Itsamonae canaējēta daxita paliwaisinē, pexaniajailiwasianē, pecujarubiwi tsipaeba Jesús peliwaishi yabara, xuanē Dioso pexi xaniajaiya jumexaniataejitsia. **b 1:1** *wajaDioso...Jesucristobeje*: Taema Jn 1:2; 2Ts 1:12; Tit. 2:13; 1Jn 5:20. Itsamonae canaējēta mapacuenia pejucaenexaje: «Bajarapacuenia najēpaeya wajasowanajamatabēcuenecopabixae, Diosojawabelia, Jesucristojawabelia-ata najēpaeya nacacapanepabeje baja, pejaicuenia pejucaenexa».

pecuene-itsinëxae, bitso pexaniacuena najumecapanepaeya wajanacaya-wenonaeyapaebiliwaisianë^c nacatocopata baja. Nexata, bajarapaliwaisianë wajajumexaniataejawata, itsa itaxutuajamatejematsi Diosojawabelia, wajanacato-exanaenexa najumecapanepaeya pejumaitsicuena, nacato-exanaena, wajajamatabëcuenejëpaenexa Dioso. Nexata, pacuena Dioso jamatabëcuene-itsi tsaponaponae, bajarawaxaitsi-ata jamatabëcuene-itsi tsawanapae tsanetsi, wajawecuapanepaenexa mapanacuaje pibisiacuene wajanaca-exanaeya-exanaejamatabëcuene.

⁵ Daxita bajarapacuenia Dioso wajanacato-exanaexae, pacawajë-tatsi paxamë. ¡Jesucristojawabelia pane-itaxutuajamatejemacujinae, daxita panejamatabëcuenesaëta, payajawa-exanawanapare pematatsë-nëa mapapexaniacuenejawanëje, panejamatabëcuenejëpaenexa pacuenia Dioso jamatabëcuene-itsi! ¡Pexaniacuene pa-exanawanapare! ¡Pajamatabëcueneypëtaeponare, pacuenia Dioso pacatojitsipa paneto-exanawanapaenexa! ⁶ ¡Najamatabëcuenecataitsiya pajinawanapare, pibisiacuene pane-exanaeyaniwa! ¡Pajamatabëcuenesaëmëre tsitecaeya panewajënaeyabelia pane-itaxutuajamatejemajawa Diosojawabelia, daxitacuene apopanejitsipaejawanë^d bajayajebi pacatocopiapatabiabi-ata! ¡Panajamatabëcuene-itajëre Dioso asiwaya paneyaiyataejawa, ëpejitsipaecuenia pane-exanawanapaejawata! ⁷ ¡Pematatsë-nëa pana-asiwamëre^e nacaemonaecuenia, panenajujumexaniataewi Jesús peliwaissi, panenaya-wenonaenexa namata-enetsia! Pa-asiwamërenua daxitajiwi,^f pacuenia Dioso asiwa mapanacuapijiwi.

⁸ Daxita bajarapapexaniacuenejawanë itsa nawitsia pacatsijamatabëcuenewëñëcaponaena, panewajënaeyabelia pane-exanawanapaenexa, nexata pacuenia Wajatuxanenë Jesucristo jamatabëcuene-itsi tsaponaponae, bajarapajamatabëcuene-itsimë tsane. Bajarapacuenia itsa pa-exanawanapaenexa, Wajatuxanenë Jesucristo panejamatabëcueneypëtaejawa apopanacueratsimë tsane, tsipaji pexaniacuene pane-exanawanapaejawa apopacopabimë tsane. ⁹ Itsiata baitsi jane, pajiwi apo-exanaponaponae bajarapapexaniacuenejawanë, bajarapajiwi apojamatabënapitsi asiwaya Dioso pewecua-ajibia-exanaejawatsi^g pija-neconimi. Caranata saya, asiwa papibisiacuenejawanëmi picani Dioso

c 1:4 najumecapanepaeya wajanacayawenonaeyapaebiliwaisianë: Bajarapaliwaisianëyaju-wëñëjawanë maxuanëje: **1)** Dioso wajanacananeconitsia-exanaejawaminexawecua wajanacapanepaejawa Jn 3:16-18; **2)** pibisijamatabëcuene wajajawananaitajëtsijawa wajanacajamatabëcuenematacaponaejawamiwecua wajanacapanepaejawa Rom. 6:14; **3)** Dioso pesaëta wajanacajamatabëcuenejawanonaenexa, pejitsipaecuenia wajatojinawanapaenexa Fil. 4:13; **4)** Jesús, waxaitsi yajawa xuanë najuanaxainaejitsiatsi athëbëtatsia 1Pd 1:3-5; **5)** Jesús icatsia penawiatsijawanexatsica, wajanacapitsinexa pijajiwi 1Pd 1:9, 13. **d 1:6** apopanejitsipaejawanë: Bajarapajumejawabelia cajunua mapapibisiacuenejawanëje, bajayajebi wajanacajamatabëcuene-ëjëbinexa: Jiwi wajanacajamatabëcuene-itonotabiabijawa, wajaawitanacuene, dowathi wajanacajitsipaeya-exanabiabijawa, pibisiacuene waja-exanabiabinexa, wajajinawanapaejawa-ata wajanamatawenonaecueniejawanëta. Daxita bajarapitsicueniejawanë nacajamatabëcuene-ëjëba, wajanacawecuanatsatsia-exanaenexa Dioso. Itsa pijinia caejamatabëcuene xainaenetsi, Dioso pejitsipaecuenia wajajinawanapaenexa, bajarapacuenia nacajamatabëcuene-ëjëbi-ata, bajaraxua wowaijumeta, «constancia», itsa jume, «paciencia». **e 1:7** pana-asiwamëre: Taema Jn 13:35; 1Jn 4:7-8. **f 1:7** pa-asiwamërenua daxitajiwi: Taema Jn 3:16; Efe. 5:35. **g 1:9** pewecua-ajibia-exanaejawatsi: Taema 2Pd 1:1.

wecuacapanepatsi. Bajaraxuata, bepita¹⁰xutotsēcēnaejiwi Dioso pijacue-
nejawalia. ¹⁰ ¡Tajamonae, paneyapētaexae Dioso papeca-itapetsijawa,
papecajunatsijawanua papijajiwinexamē, nexata matatoxenetsia paja-
matabēcuenesaēmēre tsawanapae bajarapapexaniacuenejawanē pane-
exanawanapaenexa! Bajarapacuenia itsa pa-exanawanapaename, Jesús
peliwaisi panejumexaniataejawa, caeto-ata apopawecuajopaemē tsane.
¹¹ Nexata, Dioso pacacopiapitsiana bitso pexaniacuena panejonejawata
Wajatuxanenē Jesucristo, wajanacacapanepaenē, pewetsinacua, apopewere-
werecaenacuayabetsia, paneyajawajinawanapaenexa.

¹² Daxita rabaja bajaraxuanē payapētaneme, itsamonae papecacu-
jarubixae. Daxita bajarapaliwaisianēnua pajumexaniataneme pexa-
niajailiwaesicuene, panenajamatabēcuenesaētsinexa bajarapaliwaisia-
nēta, pane-exanawanapaenexa papecacujarubicuenia. Itsiata, icatsia
pematatsēnēa pacanajamatabēnapitsia-exanaponaenatsi. ¹³ Abaxē
tasaētsaponaponaepato mapanacuataje, netsitaxanepana patacamu-
xujio¹⁴bijawa patacanajamatabēnapitsia-exanaponaenexa, ¹⁴ tsipaji baja
Wajatuxanenē Jesucristo tajēwel¹⁵ia neyapētaeya-exana bep¹⁵ijia tatē-
paejawanexa. ¹⁵ Itsiata baitsi jane, pacuenia necaējēpa, xaniawaet-
sia patatoyaquinaenatsi bajarapaliwisianē, panenacofēnētsiyaniwa
tawēnamuto.

**Jesucristo pijajiwijawabelia tsitanajamatabēcuenē-
itajēta ayaijamatabēcuenēncuene**

¹⁶ Bajarapacuenia pijinia, paliwaisi copiaya pacatsipaebatsi
pa-apóstolewinē, Wajatuxanenē Jesús peli¹⁶waisi. Xaniawaetsia pacatsi-
paebatsi, pacuenia Wajatuxanenē Jesucristo baja cajena bitso pecue-
necaējēpaenētsi Dioso pesaēta pinijicuene pexanaejawa pexanaenexa.
Pacatsipaebatsinua, pacuenia icatsia patsianica. Apopacatsipaebitsi
jiwi pijacuata pecapitsapaeli¹⁷waisianē penajumetsēnētsicuena, tsi-
paji baja, pata-itaxutota pataniji Wajatuxanenē ayaijamatabēcuenē
pexainaejawa. ¹⁷ Xaniawaetsia baja cajena, pajumetaniji pamatacabi
paxa Dioso athēbēwetsica cuenewajunupaebatsi daxitajiwi peyaiya-
taenexatsi. Bajarapaepatota, daxitanē Cristo niweniwenareca. Athēbē-
wetsica paxa Dioso jumaitsi^h mapacueniaje: «Mara ponē taxēnatoje,
ta-asiwanē. Bitso siwajamatabēcuenēbarēyanē», pejajawa paxa Dioso
athēbēwetsica. ¹⁸ Wajatuxanenē, Jesucristo, payajawanubenajē petsu-
tojumata, itsajota jane baja, paxa Dioso athēbēwetsica barēcuaicuai-
jaitsi. Nexata, bajarapatsutojumata paxanē patajacuata pajumetaniji
paxa Dioso athēbēwetsica pejumaitsi¹⁹jawa bajarapacuenia Wajatuxa-
nenē, Jesucristo, yabara.

¹⁹ Bajarapacuenia patataexae, patajumetaexaenua Cristo yabara,
yapētanetsi pepopexaniajaili²⁰waisi xua bajayata profetawi, tajēwel²⁰ia
wajunupaeba petocopiapatsinexatsi. Bajaraxua jane baja, copiapata.
Pacuenia bajarapamonaemi wajunupaeba, bajaraxua baja pataniji.
¡Bajaraxuata, profetawimi pepaebili²¹waisi pajumexaniataema, tsipaji

^h 1:17 Dioso jumaitsi: Taema Mt 3:17; 17:5.

daxita pepaebiliwaisiⁱ pexaniajailiwaisi! Nexata, bajarapaliwaisi belámpara,^j pawiria lámpara itayota daxitamerawijebi peyanania-naejawabelia.^k Bajarapacuenia bajarapaliwaisi nacajamatabëcuene-itayotsiana, wajanacayapëtaeya-exanaenexa Dioso pitoyacuenejawanë, nayajiwitaeya wajajinawanapaenexa, pibisiacuene waja-exanaeyaniwa Cristo pepatsimatacabijawabelia. Pacuenia lámpara itayota pitaquirija-wata, xaniawaetsia wajanatsiwajënaetaenexa, wajafirapanucaeyaniwa, bajarapijinia itsi profetawimi pepaebiliwaisi, pibisiacuene panenayajiwitaenexa mapanacuataje. Pacuenia bajayacunuapijituluputo^l ayai-cuenia itayota lámparawecua, bajarapacuenia pijinia, Cristo ayaicuenia nacajamatabëcuene-itayotsiana profetawimi pepaebiliwaisiwecua, wajanacajamatabëcueneyawenonaenexa pepatsimatacabijawabelia.²⁰⁻²¹ Xaniawaetsia pacanaëjêre daxitacuenewecua, paneyapëtaenexa mapaliwaisije! Itsajiji-ata apocuenecaëjêpaetsi cajena pijacuata pewajunupaebinxexa pejitsipaecuenia itsamonaejawabelia Dioso peliwaisi yabara. Daxita paliwaisianë profetawi tajëwelia yaquinejeba, peco-piapatsijawanënexa yabara, jiwi pecuenexanetsiliwaisianënexa-ata, jiwi pijacuata apoyapëtae pajamatabëcueneliwaisi xaina. Matapania, Espiritu Santo itsa yapëtaeya-exanatsi paliwaisi paebijitsia, pajamatabëcuene xainanua, caëjêpatsi xaniawaetsia pewajunupaebinxexa itsamonaejawabelia. Peyapëtaenexanua pajamatabëcueneliwaisi xaina. Bajaraxuata, bajayata profetawi, itsa wajunupaeba Dioso peliwaisi itsamonaejawabelia, pejamatabëcueneta apo-exanae bajarapaliwaisi. Profetawimi, Dioso pijajiwixae, pacuenia Espiritu Santo yapëtaeya-exanatsi, paebabiaba bajarapaliwaisi. Bajaraxuata, waxaitsi-ata nama-tawenonatsi Espiritu Santo wajanacayapëtaeya-exanaenexa pajamatabëcueneliwaisi xaina profetawi peyaquinaeliwaisianë.

Jesús peliwaisi pejumexaniataewi muxujibatsi, bepexaniajailiwaisi itajara pepaebiwi pejumexaniataeyaniwa
(Jud 4-13)

2 ¹ Xania baja tsane! Daxita pamonae jinawanapa beDioso pejumeliwaisi pepaebiwi, jane itsiata, daxita bajarapamonae apopacatsipaebi tsane pexaniajailiwaisi. Bajarapacuenia itsi Israel nacuapijiwijawa. Bajayata

i 1:19 *daxita pepaebiliwaisi*: Apoyabaracuaicuajjai wajajumexaniataenexa profetawi ëpaliwaisianë tajëwelia wajunupaeba pecopiapatsijawanënexa, yajawanaca-itoroba wajajumecowënëtsinexa paliwaisianë bajarapamonae tsipaeba jiwijawabelia pecopabinexa pibisiacuene pexanawanapaewaja. j 1:19 *belámpara*: Taema Sal. 119:105; Jn 11:10; 1Jn 1:7; 1Jn 2:10. k 1:19 *daxitamerawijebi peyanania-naejawabelia*: Bajarapajumebeje nacatocuene-itajëta Cristo pepatsimatacabijawabelia. Mapanacuapijiwije bepitaquirinacuata pejinawanapaewi, Dioso peliwaisi xainaenewaja. Nexata, jiwi namatawenona bajarapaliwaisi, peyapëtaenexa pacuenia exanaejitsia, pepatsijawabelia Jesucristo, Ponë pepopitayotsinë. Taema Apoc. 22:5. Pedro peponaponamatacabi, itsamonaë bejiobia-exanabiaba Jesús pijajijiwi. Bajarapabejiobia-exanaecuenie Jesús pijajijiwi tsitapitaquiricuenetsi, tsipaji xaniawaetsia aponatsiwajënaeyapëtae pewecuapane-paejawanexa. Bajaraxuata, toxanepanatsi pitaxutuajamatejemajawa Dioso pejume, pejamatabëcuenesäenexa Diosojawabelia, pepatsijawabelia Cristo. Baitsi, Cristo pepatsimatacabi, bepeyanianaeuene tane, tsipaji tocopiarucaejitsipatsi bajarapabejiobia-exanaecuenie. Caeliwaisi, Dioso pejumeliwaisi, nacajamatabëcuene-itayotsiana Cristo pepatsimatacabijawabelia. l 1:19 *bajayacunuapijituluputo*: Jesucristo yabara. Taema Núm. 24:17; Apoc. 22:16; 21:23; Jn 8:12.

itsamonae tsipaebapona penajumetsënëtsiliwaisi Dioso pewënëta bajara-pamonaejawa, beDioso peliwaissi pepaebiwi petanexatsi.^m Bajara-icatsia aeconoxae-ata itsi tsane paxamëjawa. Itsamonae paxamëtuatuajëta pacat-sipaebiana penajumetsënëtsiliwaisianë,ⁿ papecayamaxë-itojorobinexa. Bepexaniajailiwaissi itajara pepaebiwi tsane. Nexata, bajarapanaumetsë-nëtsiliwaisianëta, pacatobijianaena Dioso peliwaissi, pexaniajailiwaissi pane-jumexaniataejawami, tsipaji bajarapamona jume-aebiana Wajatuxanenë Jesucristo pesiwatëpaejawatsi pecapanepanexatsi pijaperujumatabëcuenemiwecua. Nexata, cujarubiana itsamonae pejume-aebinexa bajaraxua. Bajarapacuenia bajarapamona pecujarubixae tsane, nexata ayaineconi natsixainaponaena. Nexata, bepijia Dioso werebiabiana. ²Nexata, neconi penatsi-exanaponaenexa bajarapamona jitsipaena pewitota pibisiacuene pexanawanapaenexa, najamatabëcuenecataitsinejewa. Xuacujinae, bajaraxua yabara jumaitsi tsane: «Apo-itsacuene itsiata, bajaraxua exanae-atatsi», jai tsane bajarapamona. Nexata belia, ayaibitsaëto paxamëyajuwënëwi jumexaniataena bajarapapenajumetsënëtsiliwaisi, pena-exanaenexa pibisiacuene bajarapamonaeta. Nexata, bajarapacuenia paxamëyajuwënëwi pibisiacuene petsita-exanaexae tsane, pamona apocejumexaniataewi Jesús peliwaissi pibisiacuenia baracuaicuaijai tsane pexanaliwaissi, Dioso peliwaissi. ³Orijibia, bepexaniajailiwaissi itajara pecujarubiwi, bitso jitsipaena palata. Bajaraxuata, pijacuata papecatsipaebiliwaisianë, bepexaniajailiwaissi-cuenia papecatsipaebijumatabëcuene pacawecuanotsiana panijapalata, pexainaewi penaexanaenexa. Itsiata baitsi jane, Dioso tajëwelia najamatabëcuenewereta bajarapamona penaneconitsia-exanaenexa. Nexata, bajarapamona bajarapitsipibisiacuenejawanë pexanaexae tsane, pepacuene jemata Dioso naneconitsia-exanaenatsi.

⁴Yapëtanetsi pepacuene bajarapamona Dioso penaneconitsia-exanaejawanexa, tsipaji bajayata ángelewi-ata, itsa naneconita Diosojawabelia, naneconitsia-exanaenejewa apocopatsi. Biji rajane, Dioso penereca apopewerewerecae-isotojawareca. Nexata, bajarapa-ángelëwi^o pecëbicujinaetsi, naneconitsiaya jinawanapa pitaquirinacuata, pecopiapatsijawabelia pamatacabi Dioso naneconitsia-exanaejitsia daxita pijaneconi pexainaewi pepo-isotopucaxanetojawabelia.^p ⁵Bajarapacuenia-ata Dioso cajena naneconitsia-exanaenejewa apocopatsi bajayatami-ata, pamona pibisiacuene exanawanapa Noé peponaponaematacabita. Biji rajane, ira bubutsia-exana, bajarapamonaemi penaxuabinexa. Itsiata baitsi jane, caenë, Noë-pijinë, Dioso barëcapanepatsi ëpijamonamatabëxëyo, siete pajiwiyojeje. Noëpijinë picani tsipaebabiaba, jiwi penajamatabëcuenepëñëyorotsinexa

m 2:1 *pepaebiwi petanexatsi*: Deut. 18:20; Mt 24:11, 24; Lu 21:8; Hch 20:29-30; 2Co 11:13-15; Efe. 4:14; Col. 2:8, 18; 1Ti 4:1-3; Jud. 3-16, 18; Jer. 14:15; 23:15; 28:15-17. **n 2:1** *pacatsipaebiana penajumetsënëtsiliwaisianë*: Bajarapamona Pedro wënëruba «bepecujarubiwi itajara Dioso peliwaissi». Bajarapacujarubiwi itajara, ëpejitsipaewi saya pebarënacatuatabiabinexa Dioso pexi yajawa. Baitsi, Dioso apopijajiwi. Bajaraxuata, Pedro jumaitsi 1:2-jawata, «Bajarapamona apocejumexaniataewi tsane Wajatuxanenë Jesucristo peliwaissi». Judas 17-19-jawata jumaitsi: «Bajarapamona Espiritu Santo apotsijamatabë-ecaetsi». Nexata, Rom. 8:9-jawata jumaitsi: «Pajiwi Espiritu Santo apotsijamatabë-ecaetsi, bajarapajiwi Cristo apopijajiwitonë». Bajaraxuata, canaëjëtatsi apopijajiwi Dioso bajarapamona. **o 2:4** *bajarapa-ángelëwi*: Taema Judas vr. 6. **p 2:4** *pepo-isotopucaxanetojawabelia*: Taema Apoc. 20:3-15.

Diosojawabelia, pibisiacuene pexanaejawa pecopabinexa, tsipaji Dioso yapëtaeya-exanatsi penaneconitsiaya-exanaenexa pibisiacuene pexanaewi. ⁶Bajarapacuenia-ata bajayata Dioso werebiaba isotota Sodoma, Gomorra tomarapijiwimibeje, bitso pibisiacuene pexanawanapaexae. Nexata, naco-pata ë-ipumana bajarapatomaramibeje. Bajarapacuenia Dioso werebiaba bajarapamonaemi, pamona cotocaewi jinawanapa, peyapëtaenexa xua tocopiapatsijitsiatsi pamona pibisiacuene exanawanapa. ⁷Itsiata baitsi jane, bajarapacuenia apotocopiapatsitsi Lot-pijinë, pamatacabi Dioso werebiaba bajarapatomaramibejepijiwi. Dioso capanepa caenë, Lot-pijinë, pexaniacuene pexanabiabixae. Bjaraponëmi itsa cuenetaeyabiaba bajara-pamonaemi bitso pibisiacuene pexanaejawa, nexata bitso siwanajamatabë-xainabiaba. ⁸Lot-pijinë, caenë, pexaniacuene pexanaenë, naponapona bajarapamonaemituatajëta. Nexata, caematacabi canacujitsia bajaraponë bitso siwanajamatabëxainabiaba, itsa tane, itsa wënëliwaisitanenua bajarapamonaemi pibisiacuene pexanaejawa. ⁹Bajarapacuenia Dioso pexanaexae, yapëtanetsi Petuxanenë Dioso pecuenecaëjpaejawatsi, pamona itaxutuajamatejema bajaraPonëjawabelia wecuacapanepaena piayapëbejejamatabëcuene, tocopiapatsi-atatsi pejamatabëcuene-ëjëtsinexatsi. Yapëtanetsinua Dioso pecuenecaëjpaejawatsi, nabejibitsiaya pejinawanapaeya-exanaenexa pibisiacuene pexanaewi, piasaëtsawanapae-epato mapanacuataje, petëpaecujinae-ata, pecopiapatsijawabelia pamatacabi bajaraPonë caëjëta, penaneconitsia-exanaenexa daxita pijaneconi pexainaewi isotopucaxaneto-jawabelia. ¹⁰Bajarapacuenia bitso ayaicuenia Dioso naneconitsia-exanaena itsamonaewecua, pamona bitso casaë tsawanapae pibisiacuene pewitota pexanaejawa penatojitsipaecuenia, pamona-ata, apopejumejaiyataewi, Petuxanenë Dioso pitorobicueniatsi.

Pamona, bepexaniajailiwaishi itajara pecujarubiwi, bajarapitsipibisiacue-nejawanë exanaena. Bajarapamona apopeyaiyataewi itsamona-ata. Pia-jamatabëcuenetajawi. Apopejumejunawiwina, pibisiacuenia pebaracuai-cuaijainexa waja-itaxutota apowajataecapanepaewi, ayaijamatabëcuenewi.^q

¹¹Ángelewi biji picani, bitso piagamatabëcuenesaëwi bepexaniajailiwaishi pecujarubiwiwecua. Itsiata, ángelewi pibisiacuenia apobaracuaicuaijai bajarapa-ayaijamatabëcuenewi Dioso pitabarata, pacuenia exana bepexaniajailiwaishi itajara pecujarubiwi.

¹²Pamona, bepexaniajailiwaishi itajara pecujarubiwi, aponajamatabë-xinae pexanialiwaishi. Beweliamatabëcuenewi saya, tsipaji pibisiacuenia baracuaicuaijai tsabiabi xua yabara xaniawaetsia apoyapëtae. Pacuenia dajubi, natsiawajënaecana-ëjëtsinejewa ajamatabëcuenecowëbia ba-exana, bajarasaya jamatabëcuene-itsi bajarapamona, pexanaenexa penatojitsipae-cuenia. Be-unupijidujaijamatabëcuene pexainaewi cajena. Jiwitonë itsa

q 2:10 waja-itaxutota apowajataecapanepaewi, ayaijamatabëcuenewi: Taema Judas vr 9. Apo-nayapëtae xaniawaetsia pamona yabarajumaitsi. Itsamona canaëjëta Satanás pijajiwi yabara, pa-ángélewi jamatabëcueneyanabatsi apopejumecowënëtsijawata Dioso. Itsamona juya canaëjëta Satanás apopijajiwi, dowathiwi, yabara. Biji rajane, canaëjëta peyabarajumaitsiyawa pamona, bepexanialiwaishi itajara pecujarubiwi. Nexata, bajarapacuenia itsa xaniajai tsipae, mapaversiculoyo najumetaejitsipa mapacueniaje, «ángélewi pibisiacuenia apobaracuaicuaijai bepexanialiwaishi itajara pecujarubiwi Dioso pitabarata».

tane unupijidujuainē jamatejema peponaponaewawata, tsiyajemata pebeya-xuabinea, natsiawajēnaecanaējētsia apo-peponaponaexae. Bajarapacuenia pijinia, jemata Dioso werebiabiana pamonaē, bepexaniajailiwaissi itajara pecujarubiwi. ¹³ Nexata, cuenecanawiatsiaya Dioso bajarapamonaemi juya bejiobia-exanaenatsi, itsamonaē pebejiobia-exanabiabijamatabēcuene. Bajarapamonaē pibisiacuene itsa exanabiaba, barēya tsabiabi. Daxitajiwi pitabēta, pibisiacuene pia-urajawanē petsita-exanabiabijawata, pacatobijianaena panenajuaxaefiestajawanē Dioso pewēnēta, papecajajawanacaetuatsixae. Pacuenia peniojaipana itsawiriabarēmenejawata itsa cajayatsijitsipa, nexata bajarapabarēmene apo-iquipae tsipae, bajarapacuenia pijinia, bajarapamonaē pexanaecuenewawata pacacuenebijianaena,^r daxita paneyaiyataecuenemi. Bajarapamonaē nabarēyaya-exanaena pibisiacuene pexanabiabijawata, papibisiacuene jiwi ba-exana merawi pia-urajamatabēcuene.

¹⁴ Bajarapamonaē itsa tane petiriwa, pibisiacuene jamatabē-exanabiaba pewitota bajarapowajawabelia. Apoyabaracueranaē pibisiacuene pexanaejawa. Nexata, penajumetsēnētsiliwaissi pecujarubijawata, jitsipaeya-exanaena itsamonaē pibisiacuene pexanabiabinea, pamonaē abaxē apo-ajamatabēcuenesaē Dioso pejumecowēnētsijawa. Bajarapamonaē bitso jitsipa daxitacuene pexinaejawa ēpamonaenexa. Nexata, bitso tsiyapētane-nua pepitsinexa xua jitsipa. Bajaraxuata, bajarapamonaē Dioso bitso ayai-cuenia naneconitsia-exanaena. ¹⁵ Bajarapamonaē copaba baja pexaniacuene pexanaejawami, pexaniajailiwaissi pewecuaponaexae, pibisiacuene pexanaenexa pacuenia Balaam-pijinēmi. Pacuenia Profetanē Balaam-pijinēmi,^s Beor-pijinēmi pexēnato, jitsipabiaba palata pepitsinexa, pibisiacuene pexanaejawata, bajarapacuenia pijinia, exana bepexaniajailiwaissi itajara pecujarubiwi. Balaam-pijinēmi bajayata itsamonaē tsipaebatsi picani palata perajutsinexatsi, pibisiacuene pexanaenexa. Nexata baja, picani jejai, bitso pejitsipaexae bajarapamatamo. Bajarapacuenia pijinia, pamonaē, bepexaniajailiwaissi itajara pecujarubiwi, pibisiacuene exanabiaba, bitso palata pejitsipaexae. ¹⁶ Itsiata baitsi jane, Balaam-pijinē Dioso itawetatsi bajarapapibisiacuene bitso pexanaeyaniwa Dioso pitabarata. Balaam-pijinē pjaburrota peyanajetarucaejawata, Dioso cuaicuajaiya-exana jiwitonēcuenia. Bajarajota, pijaburro pebarēcuaicuajaijawatatsi, itawetatsi pibisiacuene pexanaeyaniwa. Nexata, picani xua Balaam-pijinē jamatabē-exana, copata^t baja.

r 2:13 *pacacuenebijianaena*: Baitsi, pacuenia peniojaipana pecayajibawa ba-apo-iquipae, bajarapacuenia pijinia, jiwi bepjiayo aponacofēnētsi pibisiacuene waja-exanaejawa wajanacawē-nēliwaissitaecujinae. **s 2:15** *Balaam-pijinēmi*: Neyapētaenexa daxita Balaam-pijinē peliwaissi, natoyorobianame Núm. 22:4-35. Judas vr 11-ata. Balaam copatsi-ata xua najamatabēxaina pexanaenexa picani, itsiata bajarapapalata bitso pejitsipaexae, nexata itsacuenia muxubijia-xuaba pepopeyanacua-ewetsinē Balaac-jawabelia. Tsipaeba pacuenia exanaejitsia, Israel-pijinē pemomoxi pejunatsia-exanaenexa, bajarapacuenia bajarapamonaē penaneconitsia-exanaenexa Diosojawabelia. Taema Apoc. 2:14. **t 2:16** *copata*: Balaam saya copata pibisiacuene pecuene-wajunupaebijawa, Israel-pijinē pemomoxi petaewanapaenexa. Itsiata, bitso palata pejitsipaexae, cujaruba Balac-jawabelia, Moab nacuapijiwi pepopeyanacua-ewetsinē, pemuxubijia-penetsinexa israelitawi. Itorobatsi pejunatsinexa israelitawi, penataenexa jumapecataeya pexanaenēpijifiesta, tsipaji yapētane Dioso pewerebiabijawanexa israelitawi, bajarapapibisiacuene pexanaejawata. Taema Apoc. 2:14, Núm. 31:8; Núm. Capítulo 25.

¹⁷Orijibia, bepexaniajailiwaishi itajara pecujarubiwi, apojumena-matamotsi. Nexata, pepaebiliwaishi apojamatabëcueneyawenonae pejumetaewitsijawabelia. Pacuenia irawetsina pepitsaparucaem-rami ita tseweca, apojamatabëcueneyawenonae mera pejitsipaejiwiyo pejamatabëcuene-asaëya-exanaenexa mera pejitsipaejawa, bajaraliwaishi-itsi bajarapamonae. Pacuenia-ata itarërëbo, jowibota xaniawaetsia caecowëta aporuca, ema runaenejewa, bajarajamatabëcuene-itsi bajarapamonae. Caejamatabëcuene apo-xainae. Petsipaebiliwaishi apojamatabëcueneyawenonae caejawayo-ata, itsamonae pejamatabëcuenewitsabaponaenexa Diosojawabelia. Nexata, Dioso bitso ayaicuenia naneconitsia-exanaenatsi, pepopitaquirinacuata naneconitsiaya pejinawanapaenexa daxitamatacabijawabelianexa. ¹⁸Yapëtanetsi Dioso penaneconitsia-exanaenexa, tsipaji bajarapamonae ayaijamatabëcuenewi nataeya cuaicuaijai tsabiabi natsiquejemaliwaisianë, bepexanialiwaishianë itajara. Bajarapanatsiquejemaliwaisianë petsipaebijawata, jitsipaeya-exana icatsia caewëalia pibisiacuene pexanaenexa, pijaperujujamatabëcuene pejitsipacuenia, pamonae ajena jumexaniatane" Jesús peliwaishi, pamonae pican copaba pibisiacuene pexanaejawa. Nexata, bajarapamonae yamaxë-itojorobiaya jumaitsi tsabiabi: «Apo-itsacuene raja petiriwa apopayaiyatae-atamë. ¡Pibisiacuene" ita jamatabëpa-exaname panewitota petiriwajawabelia, pa-exanare saya!», jai tsabiabi. ¹⁹Baitsi, bajarapamonae yamaxë-itojorobiaya jumaitsi tsabiabi: «Ita panejumecowënëtsianame patacatsipaebiliwaishi, nexata pacato-ajibi tsane papeca-itawetsiliwaishi. Panijacuata panejitsipacuenia pajinawanapaename», jai tsabiabi bajarapamonae. Bajarapacuenia jumaitsi tsabiabi-ata, itsiata bajarapamonae xaina pijaperujujamatabëcuene pijatuxanenëcuenia, pibisiacuene pexanabiabinexa pacuenia itorobatsi. Baitsi, xua jamatabëcuenenamatacaitorobatsi jiwi, bajaraxua raja tonaexanatsi bepijatuxanenë, pijajiwitonëcuenia peto-exanaenexa pejitsipacuenia. ²⁰Bajarapamonae pepobejiobi. Yapëtae-ata Dioso pewecua-ajibia-exanaejawanexatsi Wajatuxanenë Jesucristo pejamatabëcueneta, pibisiacuene pexanaeneconomi, pajamatabëcuenemi-ata jitsipaeya-exanabiabatsi pibisiacuene pexanaenexa, caewëalia pibisiacuene exanapona. Nexata, bepejamatabëcuenecëbiwitsi pibisiacuenejawata,

u 2:18 *pejanajumexaniataewi*: Mapajume pepacuene pejanajumexaniataewi Jesús peliwaishi yabaracuaicuaijai. Itsiata, yapëtanetsi itsamonae bepejanajumexaniataewicuenia jinawanapa bajayajawawerena siwanajamatabëcuenecopabi-ata Jesucristojawabelia, baitsi pamonae Dioso Peliwaishijawabelia apojamatabëcuenewitsabiwi. Nexata, bajayawerena siwanajamatabëcuenecopabi-ata Jesucristojawabelia, cuenecaëjëpatsi peyamaxë-itojorobinexatsi bepexanialiwaishita, ita apojamatabëcuenenaweretsi Dioso peliwaishita. **v 2:18** *Pibisiacuene*: Pedro ita canacueneba bajarapajume, nacayapëtaeya-exana daxita xua jiwi jamatabë-exana peperabëtota pejitsipacuenecowëya. Nexata, cajunua pibisiacuene pewitota pexanaejawa pebi petiriwajawabelia, petiriwa pijinia pebijawabelia penacojiobiwajënaeya, ..penapitsiji-wiyobeje pibisiacuene penawecua-exanaejawabeje-ata. Bajarapacuenia ënacawëna pebibije, ënacawëna petiriwabeje pibisiacuene pewitota pexanaejawa, pijacuata pewitota pibisiacuene penato-exanaejawa. Orijibia, itsajawanë pacuenia anaeya pebijataejawa itsamonae, jiwi peyamamatamotsiucuenia, pïatanera piapaejawa. Daxita baitsi xua bajitsipatsi waja-exanaenexa wajanacatsixanepanaecuenia.

bepejamatabëcuene-amoneyabiwitsinua. Nexata, bajarapamonae jinawanapaena bitso bepejamatabëcuenejiobicuena^w copiaya pejinawanapaejawamiwecua. Naneconitsiananua Diosojawabelia copiaya pexainaeneconimi matatoxenetsia. ²¹Bajarapacuenia pibisiacuene caewëarena pexanawanapaexae, juya xanepanaejitsipa itsa apotsipaebi tsipaetsi bajarapapexaniajailiwaishi,^{*} bewelianeconi penatsixainaenexa Diosojawabelia. Nexata baja, peyapëtaexae bajarapaliwaishi, apopejumexaniataexaenua, pexanaenexa pacuenia yapëtaeya-exanatshi, bajarapamonae bitso naneconita Diosojawabelia. ²²Bajarapitsicuene pexanaewi yabara, bajayatapijiliwaishi jumaitshi mapacueniaje: «Awiri peyacabicujinae, icatsia nayacabixane. Marrano pijinia tsorobota pebocaecujinae, pexaniamerata, pematawaecujinaetsi, icatsia caewëalia natsorobuata», jai bajayatapijiliwaishi. Xaniajai baja cajena bajarapaliwaishi. Bajarapijini jamatabëcuene-itsi pamonae icatsia caewëalia pibisiacuene exana, peyapëtaecujinae Dioso pewecua-ajibia-exanaejawatsi pibisiacuene pexanabiabijawami.

Pacuenia icatsia Jesucristo patsijitsiatsica, yabara peliwaishi

3 ¹Tajamonae, bitso pataca-asiwawi, pacuenia copiaya baja cajena pacatoyaquinatsi itsabaxutota, icatsia mapabaxutoje cotocaewi patacotoyaquinatsi, patacanajamatabënapitsia-exanaenexa papecacujarubiliwaishianë, patacamuxujobinexanua, xaniawaetsia panenajamatabëxainaenexa bajarapaliwaishianë yabara. ²¡Nexata, panajamatabënapire pacuenia profetanë, bajayata tajëwelia jumaitshi, Wajatuxanenë Jesucristo icatsia pepatsijawanexatsica yabara! Panajamatabënapirenu pacuenia baja cajena paxanë pa-apóstolewinë pacatsipaebatsi Wajatuxanenë Cristo peliwaishi, ponë wajanacacapanepaenënexa. Bajarapaliwaishi copiaya panetsipaeba pa-apóstolewinëjawaberena, paxanë juya patacatsipaebinexa.

³¡Tajamonae, xaniawaetsia panamuxuna-ewere, daxitacuenewecua paneyapëtaenexa mapacuenije, panejamatabëcuenefaefaenaeyaniwa! Nacua imoxoyo pecopiarucaewajënaeya, najetarubenaena itsamonae peca-pocaponawinexa pexaniajailiwaishi. Bajarapamonae exanawanapaena pibisiacuene, pacuenia pijacuata natojitsipa. ⁴Bajarapamonae Cristo icatsia pepatsijawanexatsica apopejumexaniataexae, najume-itacanitsiaya saya jumaitshi tsane: «¿Jica, detsa baja itsi Cristo icatsia pepatsijawanexatsica,

w 2:20 bepejamatabëcuenejiobicuena: Itsamonae canaëjëta mapaversícuoyo peyabara-cuaicuiaijajawa pejanajumexaniataewi Jesús peliwaishi. Itsamonae pijinia canaëjëta bepexaniajailiwaishi itajara pepaebiwi yabara pejumaitsiyawa. Nexata, itsa pejanajumexaniataewi yabara jumaitshi, toyapëtanetsi bitso pejinawanapaejawanexa bepejamatabëcuenejiobicuena, yapëtae-ata Jesús pecapanepaejawatsi pibisiacuene pexanaeneconiwecua, perujujamatabëcuene penamatacaitorobicuenemitsiwecua-ata. Caewëalia icatsia najamatabëcuene caeweta pejamatabëmatacaponanexatsi pibisiacuene pexanaeya-exanaejamatabëcuenetsi. Bajarapamonae pepocuene bejiobi, tsipaji yapëtae-ata pacuenia panepaejitsia bajaraxuanëwecua, aponajamatabëcuene caewetsi Espíritu Santojawabelia pejamatabëcuene yawenonaenexatsi, Dioso pejitsipaecuenia pejinawanapaenexa. **x 2:21 bajarapapexaniajailiwaishi:** Mapajumejawawelia cajunua anijajamatabëcuenebeje. **1)** Jesús peliwaishi, jiwi pecapanepaliwaishinexatsi, pibisiacuene pejitsipaeya-exanaejamatabëcuenetsiwecua. **2)** Dioso peliwaishi, paliwaishi yapëtaeya-exanatshi pacuenia Dioso tojitsipatsi pejinawanapaenexa.

pacuenia baja tajëwelia najumecapanepaeya jumaitsi? Bajarapacuenia pejumaitsixae, bajayata wajawajënaeyapijiwimi wajënae-ewetawanapa picani Cristo pepatsijawanexatsica. Belia baja bajarapamonaemi tëpa Cristo pat-sinejewatsica. Orijibia, daxitanacua abaxë tsitecanuca Dioso pexanaecujinae», jai tsane, apopejumexaniataexae Cristo icatsia pepatsijawanexatsica. ⁵Yapëtanetsi baja cajena Dioso apopejumenaxuabinë,⁷ tsipaji xua jumaitsi bajayatami, copiapata baja. Bajarapamonaë bajarapacuenia jumaitsi tsane Cristo icatsia pepatsijawanexatsica yabara, pejume-aebixae Dioso pexanaecuenemi. Bajarapamonaë yapëtae-ata Dioso bajayatami pexanaejawa pejumeta itaboxo, mapanacua yajawaje, pepitsapaeya-exanaejawatsinanua mapa-iranexaje, manuamenetuatuajëatsina, jume-aeba bajarapaliwai. ⁶Jume-aebanua Dioso pejumeta pebubutsia-exanaejawa merata mapanacuae, daxitajiwi pewerebiabinexa penaneconitsixae.

⁷Bajarapacuenia mapanacuae bijianaë-ata, yajawawerebiabi-ata bajayata pejinawanapaewimi, itsiata pa-itaboxo, pa-ira yajawa, taewanapatsi maparucaeje, Dioso pejumeta abaxë xaniawaetsia tsitecanuca. BajaraPonë abaxë xaniawaetaponapona bajaraxuanë, itsamatacabi juya isotota pewateriapae-nexa, pamatacabi pejumeta naneconitsia-exanaena daxita pijaneconi pexainaewi. Nexata, pamatacabi Dioso naneconitsia-exanaena pibisiacuene pexainaewi, werebiabiananua daxitacuene pejumeta.

⁸¡Tajamonaë, bitso pataca-asiwawi, pëtsa panacofënëtame mapacuenenje! Petuxanenë Dioso raja apotsitabajayajebitsi matocabianë yabara. Caematacabi betsitamil pawaitsibeje. Mil pawai-beje-ata pijinia betsitacaematacabitsi. ⁹Nexata, yapëtanetsi petuxanenë Dioso apopecuenenajematsijawa, najumecapanepaeya pejumaitsicuenia pexanaenexa, pacuenia itsamonaë canaëjëta pecuenenajematsijawa Jesucristo icatsia pepatsijawanexatsica yabara. Biji rajane, abaxë Dioso jamatabëcuene-eweta jiwi penajamatabëcuenepënyorotsijawa bajaraPonëjawabelia, pibisiacuene pexanaejawawecua, tsipaji apojitsipae itsajiwi-ata pewecuanaxuabijawatsi. ¹⁰Bajarapacuenia baja petuxanenë Dioso jamatabëcuene-ewetsi-ata, jemata baja cajena Jesucristo icatsia patsianica pejumaitsicuenia, penaneconitsia-exanaenexa² pibisiacuene pexanaewi. Patsianica pamatacabi jiwi jamatejema jinawana-paena, pijaneconi yabara siwabëjainejewa, pacuenia penacobetoxotsinë-nexa^a jemata bapata, paepatota apojamatabënajinaetsi. Nexata jane baja, bajarapamatacabita ayaicuenia penajumetsijawata,^b itaboxo copiarucaena. Daxita athëbëpijicuene, mapanacuamije yajawa, werewerecaena isotota. Daxita xua irajawata xaina mapanacuae, yajawatajuena isotota. Dioso bajarapacuenia jiwi naneconitsia-exanaena, pijaneconi pejamatabëcuene.

¹¹Paneyapëtaexae daxita bajarapacuenia Dioso pewerewerecaeya-exanaejawanexa, nexata matatoxenetsia bitso xaniawaetsia bepajinawanapame Dioso papecatojitsipaecuenia. ¹²Bajaraxuata, bepacopia-ewetawanapame jamatabëcuene-aitatsacaeya, Wajatuxanenë Jesucristo

y 3:5 Dioso apopejumenaxuabinë: Taema Núm. 23:19. z 3:10 penaneconitsia-exanaenexa: Taema Heb. 10:25; Eze. 30:3; Hch 2:20; 1Ts 5:2. a 3:10 penacobetoxotsinëxexa: Taema Mt 24:43; 1Ts 5:2,4; Apoc. 16:15. b 3:10 ayaicuenia penajumetsijawata: Bajarapajumebeje yabaracuaicuai-jai pacuenia isoto banajumetanajetaruca.

icatsia pepatsijawanexatsica, pejananacuata wajajinawanapaenexa. ¡Nexata, bepjiayo Wajatuxanenë Jesucristo pepatsinexatsica,^c cuenebitsojinaeya pijacuene patonacuenebawanapare, panenacueneweretsinexa! Bajarapamatacabi, petuxanenë Dioso itaboxo werewerecaeya-exanaena isotota. Nexata, daxita xuanë bajaraPonë canacueneba pexanaenexa daxitacuene,^d peporanë naexanaena petajuta bajarapa-isotota. ¹³ Itsiata baitsi jane, waxaitsi ewetawanapatsi, wajataenexa pejana-itaboxo, pejana-iranua, pacuenia Dioso tajëwelia najumecapanepaeya exanaeyapaeba, itsajota daxitajiwi ëpexanacuene exanawanapaena,^e Dioso petojitsipaecueniatsi.

¹⁴ Tajamonae, bitso pataca-asiwawi, panecopia-ewetawanapaexae, pane-taenexa pejana-itaboxo, pejana-iranua, panecopia-ewetawanapae-epato abaxë xaniawaetsia pajinawanapaename^f Dioso pejitsipaecuenia, Wajatuxanenë papecasiwabarëyanexa pepatsimatacabitsica icatsia. Bajarapacuenia pacasiwabarëya tsane, itsa pacacaxitajarabiana jamatabëcuenexanepanaeya aneconijibia panejinawanapaejawata. ¹⁵ ¡Itsiata, pacanaëjere xua yabara abaxë Wajatuxanenë Jesucristo cuenenajemata pepatsijawanexatsica! Abaxë raja apopatsitsica daxitajiwi apopesiwanajamatabëcuenecopabixae bajara-Ponëjawabelia, tsipaji daxitajiwi Wajatuxanenë jamatabëcapanepa^g pijanacuayabetsia. Bajarapacuenia pijinia, waja-asiwanë, wajabananë Pablo, pacatoyaquina bajaraxuanë yabara, Dioso peyapëtaeya-exanaecueniatsi. ¹⁶ Pablo baja cajena daxita papecatoyaquinaebaxutonëta, pacatoyaquina bajarapitsiliwaisianë yabara, xua xanë pacatoyaquinatsinua mabaxutoyotaje. Yapëtanetsi pacuenia Pablo peyaquinaeliwaisianë, itsaliwaisianë ajumeyapëbeje tsabiabi itsamonae pejumeyapëtaenexa, pajamatabëcuene xaina xua yabara Pablo yaquina. Nexata, pamonaë xaniawaetsia apopejumeyapëtaewi^h Dioso peliwaissi, caejamatabëcuene apopexainaexae pejumexaniataejawa Jesús

c 3:12 bepjiayo ... pepatsinexatsica: Dioso jamatabëcuene-eweta jiwi, penajamatabëcuenepe-
nëyortsinexa bajaraPonëjawabelia. Taema 2Pd 3:9. **d 3:12 daxita xuanë bajaraPonë cana-
cueneba pexanaenexa daxitacuene:** Yapëtanetsi pacuenia Dioso exana daxita pejumeta picani.
Itsiata, nacayapëtaeya-exana Génesis-baxutota pacuenia Dioso canacueneba atsotota pexanae-
nexa jiwi, daxitawiria unupijiwi, daxitawiria dajubi, daxitawiria pepunaewi-ata. Xaniawaetsia
itsa yorobijitsipatsi atsa, yapëtaejitsipatsi pacuenia daxita atsa xaina tajetamaxë, hierronani,
cobrenani, petsabanaenaebaxumi, nawitsia itsacuenejawanë-ata yajawa. Daxita bajararaxuanë
wowai wënërubiabiaba, elementojanë. Baitsi, pacuenia petiriwa irabërëto pexanaenexa,
canacuenebabiaba acueyabi xuaebeje: Atsanani, cawia, mera-ata acueyabi pa-elementobeje.
Nexata, daxita pa-elementobeje Dioso canacueneba, pexanaenexa daxitacuene, pepora naexa-
naena isotota. **e 3:13 ëpexaniacuene exanawanapaena:** Taema Isa. 65:17; 66:22; Apoc. 21:1,
27. **f 3:14 xaniawaetsia pajinawanapaename:** Bajarapacuenia muxujioba Pedro, bajarapamonae
pia-urayaniwa Cristo pitabarata pepatsimatacabita. Taema Mt 24:45-51. Bajarapacuenia muxu-
jiobanua, tsipaji bitso tojitsipa, Dioso pexaniacueneba pecopiapitsinexatsi bajarapamatacabi.
Taema 2Pd 1:11. **g 3:15 jamatabëcapanepa:** Taema 2Pd 3:9. **h 3:16 apopejumeyapëtaewi ...
caejamatabëcuene apopexainaexae:** Pedro itsa canacueneba «apopejumeyapëtaewi» yabaracuai-
cuijai pamonaë apopeyapëtaewi, apopecujarubixaetsi abaxë bajaraxua yabara, pamonaenua
pejanajumecowënëtsiwxae apoyapëtaecapanepae abaxë daxita Jesucristo peliwaissi, pecapa-
nepaeliwaissiti yabara, pejumecowënëtsiwi pejinawanapaecueni yabara, Cristo pesiwapatsi-
jawanexa pijajiwi peliwaissi yabara. Nexata, bajarapitsiwi toyapëxanepanatsi Dioso peliwaissi
pe-itothianaejawa pepabijawata itsamonaejawabelia. Pedro itsa canacueneba pijinia «caejama-
tabëcuene apoxinae pejumecowënëtsinexa» yabaracuai-cuijai pamonaë bepejanaijailiwaissi
pecujarubiwi itajara. Nexata, mapacotocaeuibitsaëto yapëtae-ata xua xaniajai, liwaisitoxoro-
naeya cujarubabiaba, itsajamatabëcuene pecapitsapaenexa pexaniajailiwaissiweuca, jamatejema
pibisiacuene pexanawanapaenexa, Dioso itawetsi-ata picani.

peliiwaisi, bajarapamonae juya liwaisi ithothianabiaba, petsipaebabiabijawata itsamonaejawabelia Pablo peyaquinaeliwaisianë, pacuenia ithothianabiaba itsaliwaisianë, Dioso Pejumeliwaisibaxutota perubenaeliwaisiyajuwënëjawanë. Bajarapacuenia saicayacuenia petsipaebabiabixae Dioso pejumeliwaisiwecua, bajarapamonae pijacuata neconi natsi-exana Diosojawabelia.¹

¹⁷Tajamonae, bitso pataca-asiwawi, bajaraxuata paxamë baja cajena tajëwelia payapëtaneme bajaraxua yabara. ¡Nexata, panayajiwietaema bajara-papithothianaeliwaisi pecujarubiwi, papecayamaxë-itojorobiyanawa! Belia pajume-aebijitsipame paliwaisi asaëyata picani pajumexaniataewanapame, juya panejumexaniataenexa bajarapapithothianaeliwaisi Dioso peliwaisiwecua. ¹⁸Bajaraxuata, pacatojitsipatsi, panewajënaeyabelia paneyapëtaeponaenexa Wajatuxanenë Jesucristo, wajanacacapanepaenë, pacuenia jamatabëcuene-itsi. Pacatojitsipatsinua paneyapëtaeponaenexa asiwaya papeca-itaxutotsoniataejawa.

Bajaraxuata, daxitajiwi Jesucristojawabelia jumaitsi tsabiabi tsane: «Xamë Jesucristomë, bitso cajena ayaijamatabëcuenenëmë», jai tsabiabi tsane daxitamatacabijawabelianexa. Bajara-itsi tsane.

i 3:16 *neconi natsi-exana Diosojawabelia*: Dioso apowerebiabi tsane pamonae Jesús pexiyajuwënëwi bijiaya pecujarubixae apopejumeyapëtaewi pejamatabëcuene. Xaniawaetsia pecujarubicujinaetsi, matapania itsa aponajamatabëcuenepeñëyorotsi tsipae bijiaya pepaebijawawecua, nexata belia apopitsi tsipae xua toxaniawaetatsi Jesús pijanacuatatsia perajutsinexatsi pexania-cuenia petonacuenebaponaponaexae. Itsiata, pamonae bepexaniajailiwaisi pecujarubiwi, daxita pejamatabëcueneyanabiwitsinua, apopejumecowënëtsiwi Dioso, bajarapamonae Dioso werebiabiana petobijianaexaetsi peliwaisi. Taama 1Co 3:13-15.

1 Juan

Mapabaxutoje apóstolnē Juan copiaya toyaquina daxita Jesús peliwaishi pejumexaniataewijawabelia

Cristo peliwaishi wajanacajamatabēcuene-asaēya-exanaeliwaishi

1 ¹⁻²Xanē, Juannē, pacatoyaquinatsi Dioso pexēnato peliwaishi, Ponē athē-bētatsia ponapona, mapanacuae Dioso pexanaewajēnaeya. Paxanē pa-apóstolewinē pacayapētaeya-exanatsi pacuenia bajaraponē naitajēta mapanacuayabetsicaje, pepaebinexa jiwi pejamatabēcuene-asaēya-exanaeliwaishi. Nexata, abaxē itsa ponapona Dioso pexēnato mapanacuataje, paxanē, pajumetaniji patanetsipaebiliwaisianē. Pata-itaxutota pataniji. Pajayabajēnua patacobeta. Bajara-Ponē, caenē, pejamatabēcueneta jiwi xainaena matababi apopewerewerecaejawa. ³Pacatsipaebatsi baja bajarapacuenia, tsipaji pacatojitsipatsi caejamatabēcueneliwaishi panexainaenexa paxanējawaberena, asiwaya namata-enetsia wajanacopiapitabinexa. Bajarapacuenia daxitatsi caejamatabēcueneliwaishi xainaenatsi Diosojawabelia, pexēnato Jesucristojawabelia-ata. ⁴Nexata, pacuenia pataniji, pacuenia-ata pajumetaniji bajaraponē patanetsipaebiliwaisianē, pacatoyaquinatsi mapabaxutotaje, ayaicuenia wajanajuasiwajamatabēcuenēbarēyanexa.

Bejinawanapatsi wajanacajamatabēcuene-itayotsiliwaishi
wajanacayapētaeya-exanaecuenia

⁵Paliwaisianē pajumetaniji Jesucristo patanetsipaebijawa, bajarapaliwaisianē juya paxamējawabelia pacatsipaebatsi. Dioso raja pitayotsicotia pexainaenē, tsipaji itsaneconi-ata apopexainaenē. Pitaquirijamatabēcuenē-ata apopexainaenē, tsipaji caeto-ata aponajamatabēxainae pibisiacuenē pexainaenexa. ⁶Bajaraxuata, waxaitsi jumaitsi-atatsi: «Xanē caejamatabēcuenē xainajē Diosojawabelia», jai-atatsi, itsiata itsa exanawanapatsi pitaquirijamatabēcuenē wajanaca-itorobicuenia, najamatabēcuenecapaebatsi apowajaxaniaajajawa. Najumetsēnētatsi saya. Apo-exanawanapaetsi pexania-cuenē, Dioso wajanacajamatabēcuenē-itayotsiliwaisicuenia. ⁷Itsia, Dioso wajanacajamatabēcuenē-itayotsiliwaisicuenia itsa exanawanapaenatsi, pacuenia Dioso exanaponapona, nexata Dioso pexitsi asiwaya najuajinawanapaenatsi najamatabēcuenējēpaeya. Natoyapētaenatsinua Jesucristo, Dioso pexēnato, wajanacawecua-ajibia-exanaejawa daxita wajapibisijamatabēcuenemi, pejanarunaexae wajanacasiwatēpaejawata.

⁸ Waxaitsi itsa jumaitsitsi tsipae: «Xanë raja aneconijibinë, tsipaji pibisiacuenen apo-exanaenë», itsa jaitsi tsipae, nexata saya nayamaxë-itojorobatsi. Pexaniajailiwaishi, Dioso pejumeliwaishi cajena aponacatsijamatabë-ecaea. ⁹ Itsiata, itsa nawajunupaebatsi Diosojawabelia papibisiacuenen exanatsi, nexata bajaraPonë nacawecua-ajibia-exanaena^b pibisiacuenen waja-exanaeneconimi. Orijibia, nacawecua-ajibia-exanaena daxita wajapibisiacijamatabëcuenemi. Bajarapacuenia nacato-exana, tsipaji bajaraPonë pianeconijibinë, pejumaitsicuenia pexanaenënu. ¹⁰ Bajaraxuata, waxaitsi itsiata itsa jumaitsitsi: «Xanë caeto-ata pibisiacuenen apo-exanaenë», itsa jaitsi, nexata saya Dioso exanatsi bepenajumet-sënëtsinë. Bajarapacuenia najamatabëcuenen-itajëtatsi Dioso peliwaishi apowajanacatsijamatabëcuenen-ecaejawa.

Cristo raja wajanacayapijiwicuaicuaijainë Diosojawabelia

2 ¹ Tajamona, pacatoyaquinatsi mapaliwaishi patacamuxujobinexa, pibisiacuenen pane-exanaeyaniwa. Itsiata baitsi jane, itsajiwi pibisiacuenen itsa exana, xainatsi Jesucristo, wajanacayapijiwicuaicuaijainë Diosojawabelia. BajaraPonë cajena caeto-ata pibisiacuenen apopexanaenë. ² BajaraPonë nacaeweta wajanacasiwatëpaenexa, Dioso wajanacawecua-ajibia-exanaenexa baja daxita pibisiacuenen waja-exanaeneconimi. Itsiata, ëwaxaitsi wajaneconi yabara aponacasiwatëpae. Siwatëpanua daxita mapanacuapijiwije, pibisiacuenen pexanaeneconimi pewecua-ajibia-exanaenexa. ³ Waja-exanawanapaejawata pacuenia Dioso naca-itoroba, natoyapëtanetsi pepacuenen caejamatabëcuenen wajaxainaejawa Diosojawabelia. ⁴ Itsajiwi jumaitsi-ata: «Xanë raja cajena Dioso yapëtaniji», jai-ata, itsiata itsa apojumecowënëtsi pacuenia Dioso itorobatsi, bajarapajiwi saya najumetsënëta. Pexaniajailiwaishi cajena, Dioso pejumeliwaishi, apotsijamatabë-ecaetsi. ⁵ Pajiwi exanaponapona Dioso pitorobicueniatsi, bajarapajiwi najamatabëcuenen-itajëta pepacuenen bitso piasiwajawa Dioso. Bajarapacuenia waxaitsi-ata itsa exanawanapaenatsi, nexata natoyapëtaenatsi caejamatabëcuenen wajaxainaejawa Diosojawabelia. ⁶ Pajiwi jumaitsi: «Xanë rabaja Dioso yajawaponaponajë», jai, bajarapajiwi xaniawaetsia be-exanaponapona ëDioso pejitsipaecuenia, pacuenia Jesús exanaponapona mapanacuataje.

Cristo nacatonajumecopata pejanaliwaishi pijajiwiitsi wajaumecowënëtanapanapenexa

⁷ Tajamona, xua ajena pacatoyaquinatsi panajumecowënëtsinexa, apopejanaliwaishi raja picani. Baitsi, bajarapaliwaishi picani bajayata pacatsipaebatsi, pamatacabi ajena pajumexaniataneme Jesús peliwaishi. ⁸ Nexata, bajarapaliwaishi pacatoyaquinatsi bepejanaliwaishicuenia panajumecowënëtsinexa. Cristo baja cajena pijacuata natoxaina bajarapapexaniajailiwaishi. Paxamë-ata baja panecueneyapëtaexae pacuenia Cristo exanaponapona, pajumecowënëtanapaname bajarapaliwaishi. Bajara-papexaniajailiwaishi pejamatabëcueneta, pacawecua-ajibi baja tsaponae

a 1:8 aponacatsijamatabë-ecae: Taema Rom. 3:23. b 1:9 nacawecua-ajibia-exanaena: Taema Sal. 32:5; Prov. 28:13.

mapanacuapijjamatabëcuenemije, pitaquirijamatabëcuenemi, tsipaji Jesucristo pacajamatabëcuene-itayotapona bajarapaliwaisita. ⁹Itsajiwi jumaitsi-ata: «Xanë raja Dioso tanejamatabëcuene-itayotsiliwaisicuenia exanaponaponajë», jai-ata, itsiata itsa itoya itsajiwi Jesucristojawabelia penajuasiwanajamatabëcuenecopatsiwi, nexata bajarapajiwi abaxë tsiteca ajamatabëcuene-itaquiri tsaponaponae. ¹⁰Pajiwi bitso asiwa itsajiwi-ata, Jesucristojawabelia penajuasiwanajamatabëcuenecopabiwi, bajarapajiwi Dioso jamatabëcuene-itayotatsi pexaniajaili waisita. Nexata, bajarapajiwi apo-exanae tsane itsacuenejawayo-ata xua yabara jopaeya-exanaejitsipa Dioso peliwaisiwecua Jesucristojawabelia penajuasiwanajamatabëcuenecopabiwi. ¹¹Pajiwi itoya itsamonae-ata, Jesucristojawabelia penajuasiwanajamatabëcuenecopabiwi, bajarapajiwi abaxë tsiteca ajamatabëcuene-itaquiri tsaponaponae. Nexata, pitaquirijamatabëcuene pitorobicueniatsi exanaponapona. Apoyapëtae itsabelia caponaejitsiatsi bajarapajamatabëcuene, tsipaji pewajënaeyabelia dowathi ya-ajamatabëcuene-itaquiriaya-exanaponatsi, pijamatabëcuene-itaquirixae.

¹²Tajamonae, bepataximë patacataewi, pacatoyaquinatsi mapaliwaisije, tsipaji baja Dioso pacawecua-ajibia-exana pibisiacueni pane-exanaeneconimi Jesucristo papecasiwatëpaexae.

¹³Paxamë, panenaweretsiwi, pacatoyaquinatsi mapaliwaisije, tsipaji baja payapëtaneme Jesucristo, Ponë baja cajena athëbëtatsia ponapona pepobajayatami-ata, Dioso daxitacueni mapanacuataje pexanaewajënaeya. Paxamë, papewëjëawimë, pacatoyaquinatsi mapaliwaisije, tsipaji baja dowathi pajamatabëcuene-amoneyabame. Bepataximë patacataewi, pacatoyaquinatsi mapaliwaisije, tsipaji baja, payapëtaewanapame Dioso pane-axacuenia.

¹⁴Patawajënaeyapijiwimë, imata pacatoyaquinatsi mapabaxutotaje, tsipaji baja, payapëtaewanapame Jesucristo, Ponë baja cajena athëbëtatsia ponapona pepobajayatami-ata, Dioso daxitacueni mapanacuataje pexanaewajënaeya. Paxamë-ata papewëjëawimë, imata pacatoyaquinatsi mapabaxutoje, tsipaji baja pajamatabëcuenesaëmë tsawanapae Dioso pijacuenejawalia. Pacatsijamatabë-ecanua baja Dioso pejumeliwaisi. Nexata, baja dowathi pajamatabëcuene-amoneyabame.

¹⁵ÿPëtsa pa-asiwamë mapanacuapijicueni, daxita xua-ata xaina, pacuenia mapanacuapijiwije najamatabëxaina piasiwanaxa! Nexata, mapanacuapijicueni itsa pa-asiwamë tsipae, apopacatsijamatabë-ecae tsipae pane-asiwanexa Dioso. ¹⁶Pajamatabëcuene jiwi jitsipaeya-exanabiabatsi mapanacuapijjawanë, bajarapajamatabëcuene apopitsapae Dioso jawawerena. Pitsapa saya mapanacuataje. Nexata, capitsapabiaba mapajamatabëcuenejawanë: Jiwi jitsipabiaba peperabëto pejitsipaecuenia, pexanabiabinexa. Petaejawata, itajitsipabiaba xua jamatabëxainaeyaba. Jitsipabiabanua be-ayaijamatabëcuenewi penataejawa. Daxita bajarapajamatabëcuene pitsapa mapanacuataje. ¹⁷Mapanacuapijjawanë, daxita pejitsipaecuenejawanë-ata capitsapa, bajaraxuanë bepijiayo yajawawerewerecapona. Itsiata baitsi jane, pamona exanawanapa Dioso pejitsipaecuenia, jinawanapaena daxitamatacabijawabelianexa.

Bepexaniajailiwaisi itajara pepaebiwi, yabara peliwaisi

¹⁸ Tajamonaē, imoxoyo rabaja pewajēnaē tsaponae pewerewerecae-nexa mapanacuaje. Pawēnēliwaisitaneme rabaja pacuenia najetaru-caejitsia pepopecuene-itoyanētsi^c Cristo. Pata rabaja cajena ayaibit-saēto, Cristo pecuene-itoyawitsi. Bajaraxuata, yapētanetsi imoxoyo baja pewajēnaē tsaponae pewerewerecae-nexa mapanacuaje. ¹⁹ Pamo-naē, Cristo pecuene-itoyawitsi, nacayajawanacaetuatabiaba picani, bewaxaitsiyajuwēnēwi. Itsiata baja, nacawecuapitsapa. Bajaraxuata, yapētanetsi pepacuene apowaxaitsiyajuwēnēwi.^d Itsa peneta waxait-siyajuwēnēwi tsipae, waxaitsituatajēta tsitecaeya najinawanapae-jitsipa. Bajarapamonaē wajanacawecuapitsapaejawata, daxitajiwi yapētane, wajanajuacaetuatsiwi-ata, caejumexaniataejamatabēcuene apowajanajuaxainaejawata.

²⁰ Bajaraxuata, Cristo baja pacarajuta Espiritu Santo, Ponē pejamatabē-cueneta daxita paxamē payapētaneme xua pexaniajailiwaisi, Dioso peju-meliwaisi, panenayajiwiyapētaenexanua xua penajumetsēnētsiliwaisi.

²¹ Apopacatoyaquinaetsi mapabaxutoje apopaneyapētaexae xua pexaniajai-liwaisi. Biji rajane, pacatoyaquinatsi, tsipaji baja, payapētaneme pexania-jailiwaisicuene Jesús peliwaisi. Payapētanemenua baja Jesús peliwaisija-wawerena acuenebi pepitsapaejawata penajumetsēnētsiliwaisi. ²² ¿De peneta jane jumaitsi penajumetsēnētsijiwi? Pajiwi jumaitsi mapacueniaje: «Jesús raja apoCristo, ponē Dioso athēbēwetsica itorobijitsiatsica, wajanacacapa-nepaenexa», jai, bajarapajiwi jane baja peneta penajumetsēnētsijiwi. Pajiwi cuene-aeba Dioso, Cristo paxacuene, cuene-aebanua Cristo, Dioso pexēna-tocuene, bajarapajiwi peneta Cristo cuene-itoya. ²³ Pajiwi cuene-aeba Jesús, Dioso pexēnatocuene, bajarapajiwi Dioso apoyajawaponaponatsi. Pajiwi pijinia jumexaniatane Jesús, Dioso pexēnatocuene, bajarajane pajiwi Dioso jajawaponaponatsi.

²⁴ Bajarapaliwaisi pajumexaniataneme cajena, ajena Jesucristojawa-belia panesiwanajamatabēcuenecopabijawaweliacujinae. ¡Bajaraxuata, bajarapaliwaisi panewajēnaeyabelia tsiteca pacajinawanapare! Bajara-paliwaisi papecatsijamatabē-ecaexae, panewajēnaeyabelia payajawajina-wanapaename Dioso, pexēnato-ata, Cristo. ²⁵ Wajayajawajinawanapaexae

c 2:18 pepopecuene-itoyanētsi: Bajarapawēnē wowaijumeta pitsapa, «anticristo». Bajarapajume xaina mapajamatabēcueneliwaisianēje: 1) Naitajētsiana Dioso bepitrobinētsicuena, ita jume, bepexaniajailiwaisi itajara pepaebinē. 2) Dioso peliwaisi wajanacacujarubicuenewecua aliwaisi-itothia tsane. Baitsi, xua Dioso tsitapexaniacuenetsi, anticristo tsitapibisiacuenetsi. Xua Dioso tsitapibisiacuenetsi, anticristo tsitapexaniacuenetsi, jiwi pexanaenexa. Xua Dioso naca-itaweta waja-exanaeyaniwa, bajaraxua anticristo nacacujarubiana waja-exanawanapaenexa. 3) Ayai-jamatabēcuenenē nataeya, jamatabēnaexana pepopecuanacua-ewetsinēnēna daxitanacuanēpi-jiwi pacuenia Cristo exanaejitsia nacua pecopiarucaematacabijawabelia, 1,000 pawai-bejenexa. **d 2:19 pepacuene apowaxaitsiyajuwēnēwi:** Juan toyaquina mapaliwaisiyoje Jesús pijajiwijawa-belia. Epamonaē, Jesucristojawabelia pesiwanajamatabēcuenecopabiwi, Jesús pijajiwi. Itsiata, itsajawata itsamonaē barēnacaetuatabiaba Jesús pijajiwi, penajuabarēyanexa. Bajarapana-juabarēyawī caejumexaniataejamatabēcuene apoxainabiabi Jesús pijajiwijawabelia, apopecsiwanajamatabēcuenecopabixae Jesucristojawabelia. Nexata, muxubijapeneta Jesús pijajiwi pejumexaniataeya-exanaenexa pijasalinailiwaisi beDioso peliwaisi. Bajarapitsiwi xaina anticris-tojamatabēcuene, baitsi, Cristo pecuene-itoyawitsi.

bajaraPonëbeje,⁶ Jesucristo najumecapanepaeya nacarajutsiapaeba matacabi apopewerewerecaejawa.

²⁶ Pacatoyaquinatsi mapabaxutoje patacayapëtaeya-exanaenexa panenayajiwiitaenexa pamonaе jamatabëpacayamaxë-itojoroba penajumetsë-nëtsiliwaisita, Dioso peliwaisiwecua. ²⁷ Itsiata baitsi jane, paxamë baja Espíritu Santo pacatsijamatabë-eca, Ponë pacarajuta Jesucristo, papecajamatatabëcueneyawenonaenexa, papecayamaxë-itojorobiyaniwa. Bajaraxuata, apopanamatawenonaemë baja itsajiwi-ata papecatsipaebineхa, paneyapëtaenexa daxitacuene, tsipaji baja daxita xua Espíritu Santo pacayapëtaeya-exanapona, pexaniajaicuene baja cajena. Penajumetsë-nëtsicuene baja cajena Espíritu Santo apopacayapëtaeya-exanaponaе. ¡Pacuenia Espíritu Santo pacayapëtaeya-exanapona, bajarapacuenia pajumexaniataewanapare panewajënaeyabelia, paneyajawajinawanapaejawa Cristo!

²⁸ Tajamonae, ajamatabëcuenesaëya yajawajinawanapaeatsi Cristo, waja-cujunawiyaniwa pamatacabi bajaraPonë patsianica, waja-aurayaniwanua bajaraponëjawabelia. ²⁹ Paxamë payapëtaneme baja Jesucristo planeconijibinëcuene, pexanabiabixae pexaniacuene. Bajaraxuata, bepayapëtanemenua pamonaе peneta pexaniacuene exanawanapa, bajarapamonaе Dioso pexi.

Pamonaе Dioso pexi, yabara peliwaisi

3 ¹ ¡Pacanaëjère waxa Dioso ayaicuenia wajanaca-asiwajawa, pexicueniatsi wajanacataejawa! Xaniajai rabaja. Dioso pexitsi. Mapanacuapijiwije Dioso apoپeyapëtaexae, nexata waxaitsi-ata aponacayapëtaе Dioso pexicuenetsi. ² Tajamonae, bitso pataca-asiwawi, aeconoxae rabaja waxaitsi daxitatsi Dioso pexitsi. Apoyapëtaetsi abaxë pacuenia itsamatacabi waxaitsi cuene-itsijitsiatsi. Itsiata, pamatacabi Cristo patsianica, waxaitsi cuene-taenatsi pacuenia cuene-itsi. Nexata jane baja, cuenejëpaenatsi, pacuenia bajaraPonë cuene-itsi. ³ Xaniajai Cristo icatsia patsianica. Bajarapamatacabi, cuenejëpaenatsi bajaraPonë. Nexata, pamonaе copia-ewetawanapa pecuenejëpaejawa Cristo, najamatabëcuenecataitawanapa pibisiacuene pexanaeyaniwa, aneconijibia pejinawanapaenexa Dioso pitabarata, pacuenia Cristo cuene-itsi tsaponaponaе.

⁴ Pajiwi exana pibisiacuene, bajarapajiwi apojumecowënëtsi Dioso penajumecopatsiliwaisi Moisés-pijinëta, tsipaji daxita apoپejumecowënëtsicuene bajarapaliwaisi, bajaraxua raja pibisiacuene. ⁵ Payapëtaneme rabaja mapacueneye. Cristo patsica mapanacuayabetsicaje wajanacawecua-ajibia-exanaenexa pibisiacuene waja-exanaeneconini. Cristo baja cajena caeto-ata pibisiacuene apopexanaenë. ⁶ Bajaraxuata, pajiwi baja Cristo yajawapona-pona, pibisiacuene apo-exanaponaponaе. Pajiwi pijinia tsiteca pewajënaeyabelia pibisiacuene exanaponapona, bajarapajiwi apotae baja cajena Cristo. Apoyapëtaenua cajena.

⁷ ¡Tajamonae, pëtsa panacopatame itsajiwi-ata papecayamaxë-itojorobineхa! Pajiwi exanaponapona pexaniacuene, Dioso pejitsipaecuene, bajarapajiwi Dioso aneconijibia tanetsi, tsipaji najamatabëcuene-itajëta

pejamatabëcuenejêpaejawa, pacuenia Cristo jamatabëcuene-itsi. ⁸ Pajiwi pijinia tsiteca pewajënaeyabelia pibisiacuene exanaponapona, bajarapajiwi dowathi pijajiwiwonë tsaponapona, tsipaji dowathi pibisiacuene pexanaponaponaenë nacua pexanaejawaweliacujinae, mapamatacabijawaberenaataje. Dowathi pibisiacuene pexanaecujinae, apocopatsi. Tsiteca pewajënaeyabelia pibisiacuene exanaponapona mapanacuataje. Bajarajane xua yabara, Dioso pexênato patsica mapanacuayabetsicaje, piajibia-exanaenexa dowathi penamatacatorobisaë.

⁹ Pajiwi baja naexana^f Dioso pexijiwi, Dioso najamatabëcuenerajutatsi pitawajamatabëcuene. Bajarapajamatabëcuene pexainaexae, bajarapajiwi baja copata pibisiacuene pexanaponaponaejawa, tsipaji baja naexana Dioso pexijiwi. ¹⁰ Bajarapacuenia xaniawaetsia yapëtanetsi^g pajiwi Dioso pexijiwi, pajiwi pijinia dowathi pexijiwi. Yapëtanetsinua pajiwi Dioso apopexijiwi, tsipaji pexaniacuene apo-exanaponapona. Apo-asiwana Jesucristojawabelia pesiwanajamatabëcuene copabiwi.

Pacuenia Jesús pijajiwi namata-enetsia bena-asiwa tsawanapae, yabara peliwaissi

¹¹ Jesucristojawabelia baja cajena panesiwanajamatabëcuene copabijawaweliacujinae, pajumetaeyabiabame pejumaitisiliwaissi mapacueniaje: «Waxaitsi namata-enetsia bena-asiwatsi tsawanapae», pejailiwaissi. ¹² Bajaraxuata, apobecueniejêpaetsi Caín-pijinë, Jesús pijajiwi yajuwënëwi waja-itoyanexa. Caín-pijinë dowathi pijajiwiwonëxae, beyaxuaba pejuyapijinëmi. Pacatsipaebianatsi pajamatabëcuene yabara beyaxuaba pejuyapijinë. Caín-pijinë pibisiacuene pexanaponaponaexae, itoya pejuyapijinëmi pexaniacuene pexanaponaponaexae. Nexata, beyaxuaba pejuyapijinëmi.

¹³ ¡Tajamonae, pëtsa pajamatabëcuenenabenajacame, paxamë-ata itsa paca-itoya pamona Cristo peliwaissi pejume-aebiwi! ¹⁴ Waxaitsi picani bajayata jamatabëcuene tēpawanapatsi Dioso pitabarata. Itsiata, Dioso nacarajuta pitawajamatabëcuene, wajiwanajamatabëcuene copatsijawata Cristojawabelia. Yapëtanetsi bajarapajamatabëcuene wajanacarajutsijawa, tsipaji namata-enetsia na-asiwa tsawanapaetsi wajanajuasiwanajamatabëcuene copabiwi Cristojawabelia. Pajiwi baja apo-asiwa penajuasiwanajamatabëcuene copabiwi Cristojawabelia, tsiteca jamatabëcuene tēpaponapona^h Dioso pitabarata. ¹⁵ Pajiwi itoya penajuasiwanajamatabëcuene copabiwi Cristojawabelia, bajarapajiwi bejiwibenë tsaponapona Dioso pitabarata. Paxamë rabaja payapëtaneme, jiwibenë baja cajena apotsijamatabëcuene-eaetsi Dioso pijapitawajamatabëcuene. Nexata, apoxainae tsane matacabi apopewerewerecaejawa. ¹⁶ Mapacueniaje yapëtanetsi baja cajena wajanacasiwacuene. Wajanacasiwaxae, Jesucristo nacopata pebeyaxuabine-xatsi waxaitsi waneconi yabara. Nexata, bajarapacuenia waxaitsi-ata waja-asiwaxae wajanajuasiwanajamatabëcuene copabiwi Cristojawabelia,

f 3:9 naexana: Taema Jn 3:3-8. **g 3:10 yapëtanetsi:** Taema Mt 7:17-20. **h 3:14 jamatabëcuene tēpaponapona:** Pajiwi apo-asiwa penajuasiwanajamatabëcuene copabiwi, najamatabëcuene-itajëta pepacuene apopesiwanajamatabëcuene copatsijawa Jesucristojawabelia. Saya najipanabiaba Jesús pijajiwi jawabelia bajarabepamonaeyajuwënëjiwi petanexatsi. Bajaraxuata, tsiteca jamatabëcuene tēpaponapona Dioso pitabarata.

benacopatatsi wajayapijiwinacaewetsinexa pebeyaxuabiyaniwatsi.

¹⁷Paxamë, panecobecowë panexainaewi, xaniawaetsia panena-ewetsinexa, patae-atamë penamatawenonaecuene, panenajuasiwanajamatabëcuene-copabiwi Cristojawabelia, itsiata itsa apopa-itaxutotsoniataemë paneyawenonaenexa, nexata pacato-acuenebi panejumaitsijawa: «Xanë bitso Dioso asiwanë tjamatabë-ëthëtojawawetsina», panejaijawa. ¹⁸Tajamonae, apobejumaitsitsi ëwajajumeta waja-asiwajawa yabara. Biji rajane, benajamatabëcuene-itajëtatsi waja-asiwajawa itsajiwiwajawabelia, pexaniaecuene wajato-exanaejawata. Bajarapacuenia itsa yawenonaenatsi, pepacuenie natoyapëtaena waja-asiwacuene.

¹⁹Bajarapacuenia pepacuenie natoyapëtaenatsi Dioso pexicuenetsi, asiwaya wajayawenonaejawata wajanajuasiwanajamatabëcuene-copabiwi Cristojawabelia. Natoyapëtaenatsinua Dioso pejitsipaecuenia wajajinawanapaejawa. Nexata, ajunawijibia jinawanapaenatsi bajaraPonë pitabarata.

²⁰Waxaitsi, apowaja-exanaexae Dioso pejitsipaecuene wajajamatabëcuene nacanajamatabënapsia-exanaponae-ata, itsiata yapëtanetsi wajanajamatabëxainaejawawecua Dioso bitso ayaijamatabëcuenenë. Peyapëtaenë-nua daxitacuene. ²¹Tajamonae, bitso pataca-asiwawi, wajajamatabëcuene itsa aponacajamatabënapsia-exanaponaeⁱ pibisiacuene waja-exanaejawa yabara, nexata itaxutuajamatejematsi wajawajëtsinexa Diosojawabelia.

²²Yapëtanetsinua Dioso wajanacarajutsijawanexa daxita xua wajëcatsi bajaraPonëjawabelia, tsipaji exanawanapatsi pacuenia naca-itoroba, pacue-nejawanënu siwajamatabëcuenebarëya. ²³Marapacueniaje naca-itoroba Dioso: Wajajumexaniataenexa Jesucristo, Dioso pexënatocuene, namatenetsia wajana-asiwatsawanapaenexanua wajanaca-itorobicuenia. ²⁴Pajiwi exanaponapona Dioso pitorobicueniatsi, bajarapajiwi Dioso yajawaponaponaena. Dioso-ata pijinia yajawaponaponaenatsi. Yapëtanetsi pepacuenie Dioso wajanacayajawaponaponaejawa, tsipaji nacarajuta Espiritu Santo, wajanacatsijamatabëcuene-ecaenexa.^j

Pacuenia becueneyapëtanetsi pamonaë bepexanialiwaissi itajara pepaëbiwi

4 ¹Tajamonae, bitso pataca-asiwawi, ¡xania baja tsane! ¡Pëtsa abaxë caecuenia pajumexaniataneme itsamonae papecatsipaëbiliwaissi, pacajumaitsi-ata tsane!: «Espiritu Santo neyapëtaeya-exana mapaliwai-sije», pacajai-ata tsane. Copiaya abaxë paneyapëtaenexa pajamatabëcuene-ëjëbianame bajarapaliwaissi, itsa xaniajai Espiritu Santo peyapëtaeya-exanaeliwaissitsi. Bajarapacuenia pa-exanaename, tsipaji raja daxitajawa mapanacuajawaje yacaëjëpa pamonaë bepexaniajailiwaissi itajara pepaëbiwi. ²Paxamë pacueneyapëtaename mapacueniaje: pamonaë paëba Espiritu Santo peyapëtaeya-exanaecueniatsi. Peneta, paëba Jesucristo pepatsijawatsica mapanacuayabetsicaje, penaexanaejawa pacuenia waxaitsi banaexanatsi. ³Pamonaë pijinia itsacuenia paëba Jesucristo

i 3:21 aponacajamatabënapsia-exanaponae: Taema Sal. 66:18.

j 3:24 wajanacatsijamatabëcuene-ecaenexa: Dioso, pexënatò Jesús, Espiritu Santo-ata, caenë baja tsaponaponaë. Nexata, Espiritu Santo itsa nacatsijamatabëcuene-eca, caecuenia nacatsijamatabëcuene-eca, Dioso, pexënatò-ata.

pepatsijawatsica yabara, bajarapamonae peneta apopaebi Espíritu Santo peyapêtaeya-exanaecueniatsi. Biji rajane, paeba Cristo pecuene-itoyanëtsi pejamatabêcueneliwaisicuenia. Pawênëliwaisitaneme baja pepatsijawanexa bajaraponë. Bajaraponë abaxë apopatsi-ata, itsiata maparucaeje jinawanapa baja pamonae bepexaniajailiwaishi itajara pepaebiwi, pecanacuenebiwi bajaraponë peliwaishi.

⁴Tajamonae, paxamë rabaja Dioso papijajiwimë. Nexata baja, pawecua-ajamatabêcuenesaëmë pamonae bepexaniajailiwaishi itajara pepaebiwi. Nexata, apopacayamaxë-itojorobicapanepae penajumetsënëtsiliwaisita, tsi-paji Ponë pacatsijamatabê-eca, bitso piamatabêcuenesaënë, ponëwecua mapanacuapijiwije jamatabêcuenematacaponabiaba. ⁵Pamonae bepexanialiwaishi itajara pepaebiwi, bajarapamonae saya Dioso apo peyapêtaewi. Bajaraxuata, mapanacuapijicuene yabara cuaicuajai tsabiabi. Nexata, pamonae apo peyapêtaewi Dioso, namuxuna-ewetabiabatsi bajarapaliwaishi. ⁶Paxanë, juya Dioso papijajiwinë, pa-apóstolewinë. Pajiwi panenamuxuna-ewetabiaba patatsipaebiliwaishi, bajarapajiwi yapêtane Dioso. Pajiwi pijinia apopanenamuxuna-ewetabiabi, bajarapajiwi apoyapêtae Dioso.

Nexata, cueneyapêtanetsi pajiwi paeba Espíritu Santo peyapêtaeya-exanaecueniatsi,^k tsipaji xaniajaiya cujarubabiaba Jesucristo yabara. Cueneyapêtanetsinua pajiwi paeba mapanacuapijiwi pejamatabêcuenematacaponaenë peyapêtaeya-exanaecueniatsi,^l tsipaji cujarubabiaba ëmapanacuapijicuene yabara, penajumetsënëtsiliwaisinua Jesucristo yabara.

**Namata-enetsia wajana-asiwatsawanapaejawata,
najamatabêcuene-itajêtatsi Dioso pijajiwicuenetsi**

⁷Tajamonae, bitso pataca-asiwawi, waxaitsi namata-enetsia na-asiwa tsawanapae tsanetsi, tsipaji Dioso nacajamatabêcuenecaëjêpaeya-exana wajana-asiwanexa. Pajiwi, Dioso pexijiwi, peneta asiwa penajuasiwanajamatabêcuenecopabiwi Cristojawabelia. Yapêtanenua Dioso. ⁸Pajiwi apo-asiwa itsamonae-ata, bajarapajiwi apoyapêtae Dioso, tsipaji baja cajena Dioso bitso asiwa daxitajiwi. ⁹Dioso nacatsitanajamatabêcuene-itajêta bitso wajanacasiwajawa waxaitsi, mapanacuapijiwitsi, wajanacato-itorobijawatatsica pepocaenë pexênato mapanacuayabetsicaje, wajanacasiwatêpaenexa, wajaxainaenexa matacabi apopewerewerecaejawa. ¹⁰Bajarapacuenia Dioso wajanacato-exanaejawata, nacuene-itajêta pacuenia namata-enetsia bena-asiwa tsawanapaetsi. Namata-enetsia apona-asiwatsi, copiaya waja-asiwaxae Dioso. Biji rajane, bajarapacuenia na-asiwatsi, tsipaji baja, Dioso copiaya naca-asiwa. Wajanaca-asiwajamatabêcuene, bajaraPonë nacato-itorobica pexênato, cruzata wajanacasiwatêpaenexa, wajanacawecua-ajibia-exanaenexa daxita pibisiacuene waja-exanaeconomie.

k 4:6 *Espíritu Santo peyapêtaeya-exanaecueniatsi:* Bajarapajiwi yapêtane Dioso, nexata cujaruba Jesús penaexanaejawa jiwitonëcuenia, apóstolewi pepaebiliwaishi-ata. Pamonae peyapêtaewi Dioso namuxuna-ewetabiabatsinua. **l 4:6** *mapanacuapijiwi pejamatabêcuenematacaponaenë peyapêtaeya-exanaecueniatsi:* Bajarapajiwi apo peyapêtaewi Dioso, nexata cujaruba itsacuenia Jesús penaexanaejawa yabara mapanacutaje, ëmapanacuapijiwi pecanaëjêtsicuenia, penajumetsënëtsiliwaisianë-ata Jesucristo yabara. Pamonae apo peyapêtaewi Dioso namuxuna-ewetabiabatsinua.

¹¹ Tajamonaē, bitso pataca-asiwawī, bajarapacuenia Dioso bitso wajanaca-asiwaxae, waxaitsi-ata namata-enetsia bena-asiwatsi tsawanapae. ¹² Caejiwi-ata cajena Dioso apotae. Itsiata, yapētanetsi Dioso wajanacatsijamatabē-ecaejawa, namata-enetsia wajana-asiwajawata. Nexata, itsa jamatabēcuenenaweretaponaenatsi Dioso wajanaca-asiwacuenewawalia, namata-enetsia na-asiwa tsawanapaetsi tsane, pacuenia bajaraPonē naca-asiwa. ¹³ Mapacuenē yabara natoyapētanetsi wajajawajinawanapaejawa Dioso, bajaraPonē-ata pijinia wajanacayajawaponaponaē-jawa. Yapētanetsi pexaniajaicuenē bajaraxua, tsipaji baja Dioso nacarajuta Espíritu Santo. ¹⁴ Paxanē, pa-apóstolewinē, pataniji baja cajena, Dioso pexēnato. Nexata, pawajunupaebabiabajē itsamonaējawabelia Dioso pexēnato pitorobijawatsica mapanacuayabetsicaje, pecapanepaenexa daxita mapanacuapijiwi. ¹⁵ Pajiwi nawajunupaeba pejumexaniataejawa Jesús Dioso pexēnatocuenē, bajarapajiwi Dioso yajawaponapona. Dioso-ata pijinia yajawaponaponatsi. ¹⁶ Waxaitsi jamatabēcueneyapētanetsi Dioso bitso wajanaca-asiwajawa. Orijiibia, itaxutuajamatejematsi wajawajēnaeyabelia wajanaca-asiwatsaponaējawa. Dioso raja daxitajiwi piasiwānē tsaponaponaē. Nexata, pajiwi asiwa itsamonaē-ata pacuenia bajaraPonē asiwatsi, bajarapajiwi Dioso yajawaponaponatsi. BajaraPonē pijinia yajawaponapona. ¹⁷ Wajajawajinawanapaejawa Dioso, jamatabēcuenenaweretaponaenatsi, wajana-asiwanexa pacuenia Dioso naca-asiwa. Nexata, pamacacabi Dioso naneconitsia-exanaponaena daxita pibisiacuenē pexanaewi, bajarapamacacabi waxaitsi Dioso pitabarata apojunawitsi tsane, tsipaji baja mapanacuataje waxaitsi asiwatsi itsamonaē-ata, pacuenia Cristo naca-asiwa. ¹⁸ Itsa yapētanetsi Dioso wajanaca-asiwajawa, apojunawitsi, tsipaji wajanaca-asiwaxae, nacawecua-ajibia-exana wajacujunawijawami wajanacananeconitsia-exanaejawaminexa. Pajiwi cujunawa Dioso, tsipaji abaxē copia-ewetaponaē penaneconitsia-exanaejawanexatsi. Bajarapajiwi Dioso piasiwajawatsi abaxē apojamatabēcuenenaweretsi.

¹⁹ Waxaitsi asiwatsi Dioso, tsipaji copiaya naca-asiwa bajaraPonē. ²⁰ Pajiwi jumaitsi-ata mapacueniaje: «Xanē raja Dioso asiwanē», jai-ata, itsiata itsa itoya penajuasiwanajamatabēcuenecopabiwi Cristojawabelia, bajarapajiwi saya penajumetsēnētsijiwi. Baitsi, itsa apo-asiwa itsajiwi-ata, penajuasiwanajamatabēcuenecopabiwi Cristojawabelia, petaejiwi-ata, ¿detsa pacuenia nexata asiwa tsipae Dioso apowajataenē? ¡Ajibi cajena! ²¹ Waxaitsi biasiwatsi wajanajuasiwanajamatabēcuenecopabiwi Cristojawabelia, tsipaji baja cajena Cristo naca-itoroba mapacueniaje: «Pajiwi asiwa Dioso, bajarapajiwi biasiwanua penajuasiwanajamatabēcuenecopabiwi Cristojawabelia», nacajai.

**Waja-itaxutuajamatejemawata Jesucristo, jamatabēcuene-
amoneyabatsi wajanacajamatabēcuene-ējēbijawanē mapanacuataje**

5 ¹ Pajiwi Jesús jumexaniatane Cristocuene,^m bajarapajiwi Dioso pexijiwi exanatsi. Bajarapacuenia pijinia, pajiwi asiwa paxa Dioso,

m 5:1 *Cristocuene*: Cristo yabarajumaitsi, «ponē Dioso athēbēwetsica itorobica mapanacuayabetsicaje wajanacacapanepaenexa», pejaijume.

yajawa-asiwanua pamona pexi. ²Mapacueniaje yapëtanetsi pepacuenewa-asiwajawa pamona Dioso pexi. Itsa asiwatsi Dioso, exanawanapatsinua wajanaca-itorobicuenia. ³Wajanajamatabëcuene-itajëtanapanapenexa waja-asiwajawa Dioso, be-exanawanapatsi wajanaca-itorobicuenia. Xua naca-itorobapona wajato-exanaenexa, aponacatsita-ayapëbeje, ⁴tsipaji baja pexitsi wajanaca-exanaexae, nacajamatabëcuene caëjëpaeya-exanapona wajanajamatabëcuene-amoneyabinexa mapanacuapijicuene jawanë.ⁿ Nexata, waja-itaxutuajamatejemajamatabëcuene waxa Dioso, jamatabëcuene-amoneyabatsi daxita wajanacajamatabëcuene-ëjëbijawanë mapanacuataje. ⁵Pajiwi jumexaniatane Jesús, Dioso pexënatocuene, bajarapajiwi caëjëpatsi pejamatabëcuene-amoneyabinexa mapanacuapijicuene jawanë.

Pacuenejawanë cuene-itajëtatsi Jesús, Dioso pexënatocuene

⁶Jesucristo itsa patsica mapanacuayabetsicaje, yapëtanetsi pepacuenewa Dioso pexënatocuene, tsipaji bautizabatsi merata. Bajaraxuacujinae jancayajatatsi pebeyaxuabijawatatsi cruzata. Bajaraxua yapëtanetsi apo-ëmera pejamatabëcueneta. Biji rajane, pejana pejamatabëcuenetanua. Orijibia, Espíritu Santo, Ponë pexaniajailiwaisi pepaebabiabinë, nacayapëtaeya-exana pexaniajaicuene bajaraxua yabara. ⁷Orijibia, athëbëtatsia itsamonaë jinawanapa, acueyabi ponëbeje, pewajunupaëbiwinexa Jesucristo, Dioso pexënatocuene. Mapamonaëje: Dioso, Jesucristo, Espíritu Santo-ata. Bajarapa-acueyabi ponëbeje, penajamatabëcuenejëpaewi, caenë rabaja picanitsonapona. ⁸Mapanacuata-ataje acueyabi xuabeje pejamatabëcueneta yapëtanetsi Jesucristo, pepacuenewa Dioso pexënatocuene. Maraxuanëje: Espíritu Santo, mera, pejana-ata. Bajarapa-acueyabi xuabeje, caejamatabëcueneliwaisi xaina wajanacayapëtaeya-exanaenexa, Jesucristo, pepacuenewa Dioso pexënatocuene. ⁹Mapanacuapijiwije liwaisi itsa nacatsipaebabiaba jumexaniataeyabiabatsi. Biji rajane, matatoxenetsia bejumexaniatanetsi Dioso wajanacatsipaëbiliwaisi, tsipaji bitso pejumeliwaisinamatamotsinë mapanacuapijiwiwecua. Bajaraxuata, bejumexaniatanetsi xua bajara Ponë nacayapëtaeya-exana pexënatoya barama. ¹⁰Pajiwi siwanajamatabëcuenecopata Dioso pexënatojawabelia, bajarapajiwi pejamatabë-ëthëtota yapëtanewa pepacuenewa Jesús, Dioso pexënatocuene. Pajiwi apojumexaniatae Jesús, Dioso pexënatocuene, bajarapajiwi bepenajumetsënëtsinë tane Dioso, apopejumexaniataexae xua bajara Ponë yapëtaeya-exanatsi pexënatoya barama. ¹¹Bajarapaliwaisita Dioso nacayapëtaeya-exana pexënatoya barama, wajanacaranajutsijawanua matacabi apopewerewerecaejawa. Nacayapëtaeya-exananua, pexënatoya Jesús pejamatabëcueneta, wajaxainaejawa bajaraxua. ¹²Nexata, pajiwi tsijamatabë-ecatsi Dioso pexënatoya, bajarapajiwi baja xaina

n 5:4 mapanacuapijicuenejawanë: Bajarapacuenia itsa jumaitsi nacayapëtaeya-exana wajanajamatabëcuene-amoneyabijawa mapacuenejawanëje: **1)** Copabatsi baja wajanacayajawami wajasalinailiwaisita wajanaca-itorobicuenia. **2)** Apo-exanawanapaetsi mapanacuapijiwi pecanaëjëtsiliwaisicuenia. Nexata, xua wajaperabëto nacajitsipaeya-exana, xua-ata waja-itaxuto naca-itajitsipaeya-exana wajanaxainayabinexa, aposiwabëjaitsi waja-pitsinexa. Aposiwabëjaitsinua be-ayaijamatabëcuenewi itsajiwi wajanacataenexa. **3)** Aposiwatsi waja-exanawanapenexa pacuenia mapanacuapijiwi exana. **4)** Apo-exanawanapaetsi pacuenia dowathi pejamatabëcueneliwaisita, jamatabëcuenematacapona mapanacuajiwi pexanawanapenexa.

pitawajamatabëcuene. Pajiwi pijinia apotsijamatabë-ecaetsi Dioso pexënato, bajarapajiwi apoxainae pitawajamatabëcuene.

Juan pecopiarucaeliwaisi pemuxujobijawa

¹³Pacatoyaquinatsi mapaliwaisije, paxamë, panejumexaniataewi Jesús, Dioso pexënatocuene, paneyapëtaenexa panexainaejawa matababi apopewerewerecaejawa. ¹⁴Itaxutuajamatejamatsi Dioso, tsipaji yapëtanetsi wajanacajumetaejawa wajawajëtsijawa bajaraPonëjawabelia, xua wajëtatsi wajanacato-exanaenexa pejitsipaecuenia. ¹⁵Nexata, itsa yapëtanetsi wajanacajumetaejawa, yapëtanetsinua wajanacarajutsijawanexa xua wajëtatsi.

¹⁶Paxamë itsa pacuenetaneme itsajiwi pibisiacuene pexanabiabijawa, panenajuajumexaniataewi Jesús peliwaisi, paneconi yabara° apopetëpaejawanexa,° patowajëtsianame Diosojawabelia, pejamatabëcuene yawenonae-nexatsi. Nexata, Dioso tocopatsianatsi piasaëtsaponaponaeenexa. ¡Itsia, itsa pacuenetaneme pexanaponaponaejawa paneconi yabara petëpaejawanexa, pëtsa patowajëtame Diosojawabelia! Bajarapitsineconi yabara apopaca-itorobitsi panetowajëtsinexa Diosojawabelia. ¹⁷Daxitacuene xua piabejecuenejawanë jiwi exana, bajaraxua cajena pibisiacuene. Itsia baitsi jane, bajarapapibisiacuene xua jiwi exana, bajarapaneconi yabara Dioso apopewecuanaxuabijawanexa.

¹⁸Yapëtanetsi baja cajena mapacueneje: Pajiwi Dioso pexijiwi exanatsi, pibisiacuene apo-exanaponaponae. Bajarapajiwi Dioso pexënato, Jesucristo, cuenecaranatatsi. Nexata, dowathi apocuenecaëjëpaetsi pitsacueniabinxatsi. ¹⁹Waxaitsi yapëtanetsi baja Dioso pexicuenetsi. Yapëtanetsinua dowathi pejamatabëcuenenamatacaitorobijawa daxita mapanacuapijiwije. ²⁰Pematatsënä, yapëtanetsinua Dioso pexënato, Jesucristo, athëbëwetsica pepatsijawatsica. Nacarajutanua wajayapëtaejamatabëcuenenexa pepo-Dioso. Nexata baja, yajawajinawanapatsi Dioso, pexënato, Jesucristo-ata. PaDioso yajawajinawanapatsi, pepoDioso cajena, wajanacarajutsinë matababi apopewerewerecaejawa.

²¹¡Tajamonae, betaxicuenia patacataewi, panayajiwinatsare pamonae Diosowecua siwanajamatabëcuene copababiaba itsacuenejawanë jawabelia, bajarapamonae panejamatabëcuenejëpaeyaniwa!

o 5:16 *paneconi yabara*: Juan pijacuata aponacayapëtaeya-exanae paneconi yabara jiwi tēpaejitsia. Itsia, itsa tanetsi Mt 12:31-32; Mar. 3:29, Heb. 6:4-6; 10:26-27; 1Ti 5:6; 2Pd 2:20-22, mapaversiculonë nacayapëtaeya-exana paneconijawanë yabara jiwi tēpaejitsia: 1) Pibisiacuena wajabaracuaicuajijawa Espiritu Santo. Itsa jume, wajawëñëxaniatsijawa itsajiwi bepexanaenëcuena, Espiritu Santo xua picani exana. 2) Yapëtae-atatsi Jesús wajanacasiwatëpaejawa, wajanacanecanimatamotsijawa, itsia bajaraxua itsa cuene-aebatsi. 3) Yapëtae-atatsi Dioso wajanaca-itawetsijawa, bajarapacuena waja-exanaeyaniwa, tsiteca pibisiacuene itsa exanawanapatsi. p 5:16 *apopetëpaejawanexa*: Bajarapatëpaejawa yabara nacayapëtaeya-exana pacuenia Dioso pitabarata pexainaejawanexa petëpaejamatabëcuene, itsa jume, pewecuanaxuabijawanexa Dioso daxitamatabijawabelia.

2 Juan

Mapabaxutoje apóstolnē Juan cotocaewi toyaquina Jesús peliwaishi pejumexaniataewijawabelia

Pebajacobiliwaishi

¹Xanē ancianonēnē, pacatoyaquinatsi mapabaxutoje, Dioso peca-
itapetsiwa, nexi yajawa.^a Xanē bitso paca-asiwatsi, pexaniajailiwaishi peja-
matabēcueneta.^b Itsamonae-ata, paca-asiwa, pamonaē pejumexaniataewi
bajarapaliwaishi. ²Bajarapacuenia paca-asiwatsi, wajanacanajuatsijamatabē-
ecaexae bajarapapexaniajailiwaishi. Yapētanetsinua wajanacatsijamatabē-
ecaejawa daxitamatacabijawabelianexa. ³Dioso, pexēnato Jesucristo-ata
pewēnēta, pacatojitsipatsi papecajamatabēcuenewēnētsinexa papeca-
itaxutotsoniataejamatabēcuenē, papeca-asiwajamatabēcuenē, papecab
arajamatabēxanepanaejamatabēcuenē-ata jamatabēcuenexanepanaeya
panenajuajinawanapaenexa. Itsa exanawanapaenatsi Dioso pijapexania-
jailiwaishi wajanacacujarubicuenia, itsa asiwatsi itsamonae-ata pacuenia
naca-asiwa bajaraPonē, nexata xaniawaetsia natoyapētaewanapaenatsi
bajaraponēbeje wajaca-itaxutotsoniataejawa, jamatabēcuenexanepanaeya
wajanajuajinawanapaejawanua.

Pexaniajailiwaishi, jiwi-ata pena-asiwacuene, yabara peliwaishi

⁴Bitso siwajamatabēcuenēbarēyanē, tsipaji caxitajarabaxuabajā nexiyaju-
wēnēwi pexanawanapaejawata pacuenia waxa Dioso naca-itoroba pexania-
jailiwaishita. ⁵Tajabanawa,^c aeconoxae pexaniacuenia pacawajētatsi namata-
enetsia wajana-asiwatsawanapaenexa. Mapaliwaishije apopejanaliwaishi

a 1:1 *peca-itapetsiwa, nexi yajawa*: Bajarapacuenia Juan yaquina pepobitsaēto yabara, pamonaē panajuanacaetuatsiwi. Pitapetsiwa cuenecatane penacaetuatsibitsaēto. Pexi pijinia cuenecatane caejiji canacujitsia pesiwanajamatabēcuenecopatsijiji Jesucristojawabelia. Bajarapacuenia yaquina pewēnērubiyaniwa pamonaejawabelia toyaquina, pitoyawitsi pebejibia-exanaeyaniwatsi Jesús pijajiwixae. b 1:1 *pexaniajailiwaishi pejamatabēcueneta*: Bajarapaliwaishijawabelia cajunua mapajamatabēcueneliwaishianēje: 1) Jesucristo pijacuata nayabara-jumaitsi: «Pepopexaniajailiwaishi taxainaenē», jai. Jn 14:6. 2) Espiritu Santo yabara jumaitsinua: «Espiritu Santo, pexaniajailiwaishi pepaebabiabinē», jai. 1Jn 5:6. 3) Dioso pejumeliwaishi yabara pijinia jumaitsi: «Nijumeliwaishi, pexaniajailiwaishi», jai. Jn 17:17. Bajarapa-acueyabi paliwaishibeje yabara cuaicuaijai, pexaniajailiwaishi, «la verdad» wowaijumeta. c 1:5 *Tajabanawa*: Daxita penajuanacaetuatsibitsaēto Jesús pijajiji. Taema vr. 1-pijinotaliwaishiyo.

picaní. Bajarapaliwaisi xainatsi baja,⁴ petaxuxuabijawaweliacujinae Jesús peliwaisi wajajumexaniataejawa. ⁶Waxaitsi najamatabëcuene-itajëtatsi waja-asiwacuene Diosojawabelia, waja-exanawanapaejawata pacuenia naca-itoroba. Mapacuenia naca-itorobaje: «¡Namata-enetsia pana-asiwamëre tsa-wanapae!»,^e nacajai. Bajarapaliwaisi baja cajena pajumetaneme, Jesús peliwaisi papecatsipaebijawaweliacujinae.

**¡Panayajiwiitaema pamonae bepexaniali waisi itajara
paebanajetarubena daxitanacuanëjawa!**

⁷¡Panayajiwiitaema! Ayaibitsaëto bepexaniajailiwaisi itajara pepaebanajetarubenaewi, najetarubena daxitanacuanëjawa. Bajarapamonae cuene-aeba Jesús penaexanaejawa mapanacuataje, pacuenia waxaitsi banaexanatsi. Pajiwi pacacujaruba bajarapitsicuenia Jesús yabara, peymaxë-itojorobiwi baja cajena. Pacacujaruba saya pejamatabëcuene pijiliwaisi, ponë Cristo cuene-itoyatsi. ⁸¡Panayajiwiitaewanapare bajarapamonae papecayamaxë-itojorobiyaníwa, paxanë-ata patanacueratsiyaniwa^f patacatsipaebiliwaisi panejumexaniataejawa, papecawecuaxuabiyaniwanua papexaniacuene Dioso pacatoxaina papecarajutsinexa papijajiwixae! ¡Biji rajane, paja-matabëcuenesaëmëre tsawanapae panejumexaniataejawa pexaniajai-liwaisi, papecarajutsiapaebijawa Dioso, panepitsinexa daxitajawayo panetonacuenebimatamo!

⁹Pajiwi tsiteca pewajënaeyabelia jumexaniataeponapona paliwaisi Cristo tsipaebapona, bajarapajiwi waxa Dioso, pexë nato-ata, yajawaponaponatsi. Itsiata, pajiwi wecuanatsatajopa paliwaisi Cristo tsipaebapona, mataropatsia itsaliwaisi pecujarubinxexa, bajarapajiwi Dioso apoyajawaponaponatsi. ¹⁰¡Nexata, bajarapitsijiwi itsa pata paxamëjawata, liwaisi papecatsipae-binxexa, pëtsa pacopiapitame panijaboyaberena! ¡Pëtsa pabajacobamenua bajarapitsijiwi! ¹¹Bajarapacuenia itsa pa-exanaejitsipame, payajawananeconitsipame pibisiacuene pexanaponaponaejawa. ¡Bajaraxuata, pëtsa pacopiapitame bajarapitsijiwi!

Juan penapëjiobilíwaisi

¹²Xanë picaní xainajë ayailiwaisi patacamuxujiobinxexa. Itsiata, abaxë apojitsipaenë bajarapaliwaisi patacatoyaquinaenexa mapabaxutotaje. Ewetajë abaxë taponaejawaxamëjawabelia patacataenexa, patacabarëcuai-cuaijainexanua, wajajamatabëcuene barëyanexa bitso. ¹³Nejuyapijiwa, Dioso pitapetsiwatsi pexi, bajarapamonae catonajume-itoroba nebjacobinxexa.

d 1:5 xainatsi baja: Taema Jn 13:34-35. **e 1:6** Taema Jn 14:15, 23-24. **f 1:8** *patanacueratsiyaniwa:* Apóstolewiyabara, itsa jume, itsamonae Jesús peliwaisi pepaebiwi yabara.

3 Juan

Mapabaxutoje, acueyabibaxuto, apóstolnē Juan toyaquina Jesús peliwaisi pejumexaniataewijawabelia

Pebajacobiliwaisi

¹Xanē Juan, ancianonēnē, catoyaquinatsi mapabaxutoje, Gayo, bitso taca-asiwanē, nejumexaniataejamatabēcuenē pexaniajailiwaisi.

²Catowajētabiabatsi Diosojawabelia, pecayawenonaenexa, daxitacuenē-jawanē pecatoxanepanaenexa, jumalixanepanaeya neponaponaenexanua, pacuenia Dioso pitabarata jamatabēcuenexanepanaeya ponaponame. ³Bitso siwajamatabēcuenēbarēyanē itsa parena xanējawaberena itsamonae wajanajuasiwanajamatabēcuenecopabiwi Cristojawabelia, tsipaji cawēnēliwaisi-paeba xaniawaetsia neponaponaejawa. Netsipaebanua xaniawaetsia asaēya nejumexaniataeponaponaejawa pexaniajailiwaisi. ⁴Ajibi pematatsēnēa itsa-liwaisi tanejamatabēcuenēbarēyaya-exanaejawanexa, tawēnētaejawa pexa-niajailiwaisicuenia pejinawanapaejawa pamonaē betaxicuenia tataewi.

Pacuenia be-eweta Dioso pijacuenē petonacuenēbaponaponaenē

⁵Xamē xaniawaetsia Dioso tonacuenēbabiabame, neyawenonabiabijawata Jesús pijajiwi, Dioso pijacuenē petonacuenēbiwi. Bajarapamonae saicayanacua-werena pepatsiwi-ata, yawenoname xaniawaetsia. ⁶Bajarapamonae itsa parena xanējawaberena, daxita majotaje Jesús pijajiwi pitabarata, cawēnēliwaisipaeba bajarajotalia asiwaya neyawenonaejawa. Pexaniacuenia cawajētatsi, newajē-naeyabelia tsiteca neyawenonaenexa bajarapitsiwi, pacuenia namatawenona pijanamutonexa. Yawenonaename pacuenia, Dioso siwajamatabēcuenēbarēya. ⁷Bajarapamonae itsa naropoba Jesucristo pewēnēta pepaebanajetarubenaenexa pexaniajailiwaisi, apowecuapitsi itsacuenējawayo pijanamutonexa, pamonaē Jesucristojawabelia aposiwanajamatabēcuenecopabi pecobecowējawa. ⁸Bajara-xuata waxaitsi, Jesucristojawabelia wajasowanajamatabēcuenecopabiwi, naca-toxanepana wajayawenonaejawa bajarapamonae. Bajarapacuenia itsa exanae-natsi, Dioso nacatane bajarapamonaeta, pijacuenē bewajatonanacuenēbiwi.

Pacuenia Diótfrefes pibisiacuenē exana, yabara peliwaisi

⁹Xanē picani bajayata copiaya toyaquinajē Jesús pijajiwi, nijatomarata pejinawanapaewi. Itsiata, bajarapabaxutota ta-itorobicuenia Diótfrefes

apojumecowënëtsi, tanecuene-aebixae Jesucristo tane-itorobinëcuene. Bajaraponë ayaijamatabëcuenenë jamatabënaexana papecanamatacaïtoro-binënexa. ¹⁰Bajaraxuata, itsa patsianajë xamëjawata, xaniawaetsia pacatsipaebianatsi daxita pacuenia Diótréfes exana. Bajaraponë pibisiacuenia nebaracuaicuaijai. Neyabaranajumetsënëtanua. Pematatsënëa, mapitsipibisiacuenëjawanë exanabiabaje. Apocopiapitabiabi xaniawaetsia pamonae Jesucristo peliwaïsi paebanajetarubena. Cuene-itawetanua itsamonae pecopiapitsiyaniwa. Nexata, pajiwi copiapitabiaba Jesucristo peliwaïsi pepaebanajetarubenaewi, Diótréfes bajarapajiwi capitsapabiaba, Jesús pijajiwi peyajawanacaetuatabiabiawawecua, apopecumecowënëtsixaetsi pitawetsiliwaïsi.

¹¹¡Gayo, bitso taca-asíwanë, pëtsa cuenëjëpame pibisiagamatabëcuene pexainaewi pexanawanapaecuenë! ¡Exanaponaponare jane pacuenia pexaniacuenë pexanaewi ba-exanawanapa! Pajiwi pexaniacuenë exanaponapona, peneta Dioso pexijiwi. Pajiwi pijinia pibisiacuenë exanaponapona, apopecapëtaewi Dioso.

Pacuenia Demetrio pexaniacuenë exana, yabara peliwaïsi

¹²Daxita pecueneyapëtaewi Demetrio, pexaniacuenia wënëliwaïsipaeabapona pexanaponaponaejawa yabara. Pecuenëjawata daxita jiwi yapëtane pexaniajaijawa xua wënëliwaïsitane bajaraponë yabara. Paxanë-ata^a baja cajena payapëtaniji Demetrio pexaniacuenë pexanaponaponaejawa. Nexata, daxitajawa bajaraponë pawënëliwaïsipaeabaponajë. Paxamë-ata payapëtaneme pexaniajaicuenia patawajunupaebijawa.

Apóstolnë Juan penapëjiobilwaïsi

¹³Gayo, xanë picani xainajë ayailiwaïsi tacamuxujiobinexa. Itsiata, abaxë apojitsipaenë bajarapaliwaïsi tacatoyaquinaenexa mapabaxutotaje. ¹⁴Jamatabëcatanetsi bepíjia. Nexata bajarapamatacabita jane baja, tajacuata cabarëcuaicuaijaitsi tsane bajaraxuanë yabara.

¹⁵Catowajëtatsi Diosojawabelia pecayawenonaenexa, jamatabëcuene-xanepanaeya neponaponaeenexa. Daxita pecayapëtaewi, majotaje pejinawanapaewi, cabajacobalia. Nebajacobiana caejiwi canacujitsia, daxita wajayapëtaewibeje.

a 1:12 Paxanë-ata: Bajarapacuenia Juan jumaitsi daxita apóstolwi yabara.

Judas

Judas petoyaquinaebaxuto Jesús peliwaisi pejumexaniataewijawabelia

Pebajacobiliwaisi

¹Xanë Judasnë, Jesucristo pijajiwitonënë, Santiago pejuyapijinënë. Paca-
toyaquinatsi mapabaxutoje paxamë waxa Dioso papeca-asiwawi, papecaju-
natsiwi papijajiwinexamë, Jesucristo papeca-ewetsiwinua. ²Pacatojitsipatsi
Dioso bitso papeca-itaxutotsoniataejawa, nabarajamatabëcuenexanepa-
naeya panenajuajinawanapaejawa, namata-enetsia-ata panena-asiwajawa.

Judas muxujioba Jesús pijajiwi, pejumexaniataeyaniwa bepexaniajailiwaishi itajara pepaebiwi

(2Pd 2:1-7)

³Tajamonae, bitso pataca-asiwawi, jitsipajë picani bitso patacatoyaqui-
naejawa matawëjëa Dioso wajanacacapanepaeliwaishi yabara, paliwaisi
daxitatsi najuajumexaniatanetsi. Itsiata, bajaraxua yabara apopacatoya-
quinae tsanetsi mapabaxutotaje, tsipaji wënëliwaisitaniji paxamëtuatua-
jëta pejinawanapaejawa itsamonae bepexaniajailiwaishi itajara pepaebiwi.
Bajaraxuata, pacatoyaquinatsi asaëyata patacamuxujiobicuenia, panecue-
necopatsiyaniwa bajarapamonae. ¡Nexata, baja, pëtsa pacuenecopatame
itsajiwi-ata pebijanaejawa papexaniajailiwaishi apóstolewi pacatsipaeba,
Jesús peliwaishi yabara! Bajarapapexaniajailiwaishi Dioso tonajumecopata,
daxita pijajiwinexa ⁴Bajarapacuenia pacamuxujiobatsi, tsipaji paxamë-
tuatua-jëta najoneyabiaba nacuenematayatsia bepexaniajailiwaishi itajara
pepaebiwi. Nexata, bajarapamonae papecacujarubijawata, pacajumaitsi
tsabiabi: «Dioso baja cajena ayaicuenia wajanaca-itaxutotsoniataexae,
Jesucristo pejamatabëcueneta, nexata pibisiacuene exanae-atatsi, apo-
itsacuene. Tsiteca nacacapanepaena», pacajai tsabiabi, pibisiacuene
pane-exanabiabinexa panasiwabëjamënejewa. Bajarapacuenia pejina-
wanapaexae, bajarapamonae najamatabëcuene-itajëta pejume-aebijawa
caenë Jesucristo wajatuxanenëcuene, wajanacaxainaenëcuene-ata. Baja-
rapamonae yabara, Dioso tajëwelia pejumeliwaisibaxutota, tocaëjëtatsi
penaneconitsia-exanaejawanexatsi.

⁵Paxamë payapëtae-atamë picani mapaliwaisije, itsiata, orijibia
pacanajamatabënapitsia-exanaenatsi icatsia. Bajayata, daxita Israel-pijinë

pemomoxi petuxanenē Dioso capanepae-atatsi^a Egipto nacuwawecua, bajarapamonaemi yajuwēnēwerebiabatsi, pejume-aebixae^b xua Dioso jumait-sitsi. ⁶Bajara-icatsia pacuenia Dioso exana ángelewijawabelia-ata. Dioso exanae-ata petonacuenebawanapaenexatsi athēbētatsia, itsamonaē ángelewiyajuwēnēwi apo-exanae pacuenia Dioso itorobatsi. Apojinawanapaenua itsajota picani Dioso tocopata pejinawanapaenexa. Bajaraxuata, Dioso ángelewiyajuwēnēwi cēbiaya jinawanapaeya-exana pitaquirinacuata, pecopia-ewetawanapaenexa Dioso penaneconitsia-exanaejawanexatsi, pamatacabi naneconitsia-exanaejitsia daxita pijaneconi pexainaewi. ⁷Bajarapacuenia pijinia Dioso exana Sodoma tomara, Gomorra tomarapijiwimibejewawabelia, pemuxuneneta penaetomaranēpijiwimijawabelia-ata. Bajarapamonaemi bitso pibisiacuene pewitota exanabiaba. Orijibia, pibisiacuene pewitota exanabiaba nacaewēnapēbijiwijawabelia, nacaewēnapetiriawijawabelia-ata. Bajaraxuata, Dioso werebiaba bajarapamonaemi isotota. Bajarapacuenia Dioso pewerebiabixae bajarapamonaemi, nacayapētaeya-exana, mapamatacabita wajajinawanapaewije, pibisiacuene waja-exanaeyaniwa, wajanacayajawananeconitsia-exanaeyaniwa pibisiacuene pexanaewi apopewerewerecae-isotojawabelia.

⁸Bajarapacuenia pijinia, Dioso exanaena bepexaniajailiwaisi itajara pepaebiwijawabelia. Bajarapamonaē pejumenamatamotsinexa papecatsipaebiliwaisi, pacajumaitsi tsabiabi: «Dioso raja bemajitsinaebocuenia neyapētaeya-exana mapaliwaisije», pacajai tsabiabi. Bajarapacuenia jumaitstsabiabi-ata, pacajamatabēcuenematacapona pibisiacuene pane-exanabiabinexa, tsipaji apojitsipae caeto-ata pejumecowēnētsijawa wajatuxanenē pitorobiciueniatsi. Orijibia, pibisiacuene wēnēcacuaicuajai Dioso pija-ánglewi-ata, be-ayaijamatábēcuenewi penataexae bajarapamonaewecua. ⁹Bajarapacuenia apo-exanae, ángelnē Miguel, ánglewi penamatacaitorobinē-ata. Nexata, bajayata pacujinae Moisés-pijinē petēpanucaenē, ^c ángelnē Miguel, dowathibeje najumenotabeje Moisés-pijinēmi peperabēto pepitsijawa^d yabara. Miguel, bitso ayaijamatábēcuenenē-ata, itsiata, pijacuata pibisiacuena apobijatae dowathi. Biji rajane, xania-waetsia jumaitsi dowathijawabelia: «Dioso ca-itaweta, bajarapacuenia ne-exanaeyaniwa», jai. ¹⁰Itsiata baitsi jane, pamonaē penajumetsēnētsiliwaisi pacatsipaebawanapa, bajarapamonaē pibisiacuena baracuaicuajai tsabiabi, xaniawaetsia apoeyapētaecuene-ata yabara. Nexata, pacuenia unupijidujuai natsiwajēnaecanaējētsinejewa jinawanapa pejitsipaecuena, bajarapijina bepexanialiwaysi itajara pecujarubiwi najamatábēcuenecataitsinejewa exanawanapa daxita pibisiacuene. Nexata, Dioso itsamatacabi werebiabiana bajarapamonaē, bajarapapibisiacuene pexanawanapaexae.

a 1:5 *capanepae-atatsi*: Taema Éxo. 14. **b 1:5** *pejume-aebixae*: Taema Núm. 14:29-35; 1Co 10:1-5. **c 1:9** *Moisés-pijinē petēpanucaenē*: Taema Deut. 34:5-6. **d 1:9** *peperabēto pepit-sijawa*: Judfowi pijasalinailiwaisita nacayapētaeya-exana pacuenia Moisés-pijinē tēpa petsuto-jumata, ángelnē Miguel pata pecaponaenexa Moisés-pijinē Dioso pijanacujawabelia. Itsiata, Moisés-pijinē pebeyaxuabixae Egipto nacupajinē (Éxo. 2:11-12), nexata dowathi canaējēta Moisés-pijinē pecaponaenexa pibisiacuene pexanaewi pejinawanapaenacujawabelia. Bajaraxua yabara najumenotabeje, Miguel, dowathibeje. Bajarapaliwaisi aporucac-ata Dioso pejumeliwaisibaxutota, Judas itsiata, canacueneba bajarapaliwaisi ejemplocuena, tsipaji yapētane pewēna-judfowi peyapētaejawa bajarapaliwaisi.

¹¹ Bitso bejiobi tsane pamonae bepexaniajailiwaishi itajara papecatsipaebawanapaewi. Bajarapamonae Dioso naneconitsia-exanaena, tsipaji Caín-pijinë cuenejêpa, pibisiacuene pexanawanapaenexa najamatabêcueneccataitsinejewa. Cuenejêpanua Balaam-pijinë, ponê apojumecowênêtsi pacuenia Dioso itorobatsi, palata pepitsinexa. Cuenejêpa Corépîjinê-ata, ponê apoyaiyatae Moisés-pijinë, Dioso pitapetsinêtsi penamatacaitorobinênexa. Nexata, pacuenia Corépîjinê^e Dioso werebiabatsi pejamatabêcueneyanabiwitsi yajawa, bajarapacuenia pijinia, Dioso werebiabiana bepexaniajailiwaishi itajara papecatsipaebawanapaewi, pecuenejêpaexae bajarapamonaemi. ¹² Bajaraxuata, bepexaniajailiwaishi itajara pepaebiwi paneyajawanacaetuatsixae, paepatota panacaetuatabiabame nacaemonaecuenia panenajuaxaenexa,^f bajarapamonae pacatobijiana namata-enetsia panena-asiwajawamê. Aurajibia ayaijawa xayeyabiaba, apayeyabibanua piapaeranê, siwabêjainejewa itsamonae-ata penaxaenexa. Bajarapamonae natae-ata papeca-ewetsiwicuenia, itsiata, êpamonae nasiwanajamatabêxainabiaba. Nexata, cuenejêpa bijiaja pewetsiwi pija-ovejabitsaêto. Cuenejêpanua itarêrêbo, pecaputsijawa jowibota petsewimatacabita, ema runaenejewa, tsipaji apopacajamatabêcueneyawenonae itsacuenejawayonexa-ata. Cuenejêpanua ponae pe-ubinae, aponacuitabiabi, penacuitasimatacabita. Apoxanepanae itsacuenejawayonexa-ata. Bajarapona nexata pe-ubinê yatabutopaya juta petajuitsinexa isotojawabelia. Bajarapacuenia pijinia, Dioso xuabianatsi apopewerewerecae-isotojawabelia^g bepexaniajailiwaishi itajara papecatsipaebawanapaewi, apopecipatsapaexae jiwi pejamatabêcueneyawenonaeliwaisianê, Dioso pejisipaecuenia pejinawanapaenexa. ¹³ Pacuenia malataca capitsapabiaba piaxuirathamujawanê pitapayabelia, bajarasaya jamatabêcuene-itsi tsawanapae bajarapamonae. Capitsapabiaba pia-uracujenewawanê, pejamatabêcuenebijianabiabinexa itsamonae Jesús pijajiwi, pepaebijawata. Pacuenia japito cae-epatoyo ayai-cotia yajawa najetabijirawa athêbêyo, xuacujinae acotiajibi, bajarapacuenia pijinia bajarapamonae cae-epatoyonexa ayaijamatabêcuenewi natane. Xuacujinae, Dioso xuabianatsi pitaquirinacuajawabereca,^h pejinawanapaenexa daxitamatacabijawabelia. Pacuenia japito xaniawaetsia apomatacaponae namuto pexanaewi itsabelia jamatabêpona, bajarapacuenia bajarapamonae peliwaishita apojamatabêcuenematacaponae Jesús pijajiwi, pexanaenexa Dioso pejisipaecuenene.

e 1:11 *Corépîjinê*: Taema Núm. 16:1-35. f 1:12 *nacaemonaecuenia panenajuaxaenexa*: Bajayata-mi, Jesús pijajiwi nacaeuatabiaba penajuaxaenexa, nacaemonaecuenia penataexae. Bajarapanajuapexaejawanê, wênêrubabiaba «Pena-asiwajawa pitajêtsifiesta», wowaijumeta «fiesta de amor fraternal». Nexata, bajarapafiestajawata, yajawa-exanabiaba Santa Cena-ata. Petaxuxuabijawata, caepan epatsênêca, penajamatabênapsitsinexa caenê Jesús bepejiobicueneta pesiwa-têpaejawatsi. Xuacujinae, daxita najuaxane Pena-asiwajawa pitajêtsifiestapijipexaejawata. Coto-caewijawata, matapania jane baja, pematawêjêa-apaera, najua-apa, penajamatabênapsitsinexa, Dioso pejanacuenia penajumeliwaisicajonejawa jiwijawabelia, Cristo pejana pejamatabêcueneta. Taema 1Co 11:20-22; 2Pd 2:13-14. g 1:12 *xuabianatsi apopewerewerecae-isotojawabelia*: Bajaraxua wênêruba «cotocaewi patêpaejawa», Apocalipsis-baxutota. Taema Apoc. 2:11; 20:6, 17; 21:8. Nexata, bajarapamonae apopesiwanajamatabêcueneccopabixae Jesucristojawabelia, bepetêpaejamatabêcuene pexainaewi Dioso pitabarata. Apopewerewerecae-isotojawabelia pexuabi-xaetsinua, be-anijatobeje petêpaewi Dioso pitabarata. Bajaraxuata, bajarapamonae yabara Judas jumaitsi wowaijumeta: «dos veces muertos – anijatobeje petêpaewi», jai. h 1:13 *pitaquirinacuajawabereca*: Taema Mt 8:12; 22:13; 15:39; 2Pd 2:4,17.

¹⁴Enoc-pijinēⁱ bajayata ponapona. Adán-pijinē pemomoxiyajuwē-nēnē, sietebitsaētojawatarena penaexanaenē. Nexata, Enoc-pijinē Dioso pejamatabēcueneta bajayata tajēwelia wajunupaeba xua Dioso exanae-jitsia, pamonaejawabelia aeconoxae mapamatacabitaje penajumetsēnēt-siliwaisi pacatsipaebawanapa Dioso pewēnēta. Bajarapamonaē yabara tajēwelia wajunupaeba mapacueniaje: «Wajatuxanenē Cristo, pijajiwi ángelewi, ayaibitsaētoخانانو yajawa, najetarucaena. ¹⁵Nexata, tocanaē-jētsiana penaneconitsia-exanaenexa daxita pamonaē apo-exanae Dioso pitorobicueniatsi. Tocaējētsiananua penaneconitsia-exanaejawanexa daxita pamonaē pepopiabejecuene pexanaewi, pamonaenua pibisiacuenia baracuaicuajai Dioso», jai baja cajena bajayata tajēwelia Enoc-pijinē. ¹⁶Bajarapamonaē, beplexaniajailiwaishi itajara pepaebiwi aposiwajamatabēcuenēbarēya itsacuenējawayo-ata. Nexata, pibisiacuenia cuenecarapubabiaba itsamonaē. Pibisiacuenia baracuaicuajai tsabiabi daxita xua bajarapamonaē tocopiapataponaatsi. Nexata, bajarapamonaē exanawanapa saya pijacuata penatojitsipaecuenia. Ayaijamatabēcuenewi nataeya nawa-junupaebabiaba xua exana. Itsamonaejawabelia pexaniacuenia cuaicuajai tsabiabi, saya pesiwajamatabēcuenēbarēyanexatsi, juya perajutsinexatsi penamatawenonaejawanē.

**Pemuxujiobiliwaisi pewajēnaeyabelia piaja
matabēcuenesaētsawanapaenexa**

¹⁷¡Tajamonaē, bitso pataca-asiwawi, panajamatabēnapire paliwaisi baja cajena tajēwelia pacatsipaeba apóstolewi, wajatuxanenē Jesucristo pijajiwi, beplexaniajailiwaishi itajara pepaebiwi yabara! ¹⁸Pacajumaitsi mapacueniaje: «Nacua pecopiarucaewajēnaeyata, itsamonaē capocaponaena pexaniajailiwaishi, Dioso pejumeliwaisi. Exanawanapaenanua pibisiacuenē, pacuenia pijacuata natojitsipa», pacajai baja cajena tajēwelia apóstolewi. ¹⁹Bajarapamonaē cajena papecatsipaebiliwaisi pejamatabēcuenē, pacanatsanaeya-exanapona,^j paxamē Jesús papijajiwi. Bajarapamonaē pibisiacuenē exanawanapa penatojitsipaecuenia, pejamatabēcueneta pitorobicueniatsi. Orijibia, bajarapamonaē apotsijamatabē-ecaetsi Espiritu Santo.^k

²⁰Tajamonaē bitso pataca-asiwawi, bajarapamonaē papecayamaxē-itojorobiyaniwa, namata-enetsia panajamatabēcuenē-asaēya-exanaename pane-itaxutuajamatemajawa Dioso. Bitso pexaniacuenē cajena waja-itaxutuajamatemajawa Dioso. Espiritu Santo papecajamatabēcuenenamatacaitorobicuenia pawajēcaponanena Diosojawabelia. ²¹¡Paneyapētaexae Dioso bitso papeca-asiwajawa, na-asiwaya pajinawanapare! Pacopia-ewetawanaparenua matababi apowerewererecaejawa papecarajutsinexa, wajatuxanenē Jesucristo papeca-itaxutotsoniataexae.

²²¡Pamonaē abaxē apoyapētaē paliwaisi jumexaniataejitsia pexaniajailiwaishicuenia, asiwaya payawenonare pejumexaniataenexa Dioso pejumeliwaisi! ²³¡Pamonaē pijinia jamatabējumexaniatane

i 1:14 *Enoc-pijinē*: Taema Gén. 5:19-24. j 1:19 *pacanatsanaeya-exanapona*: Taema Rom. 16:17; 1Co 1:10; Tit. 3:10. k 1:19 *apotsijamatabē-ecaetsi Espiritu Santo*: Taema Rom. 8:9.

penajumetsënëtsiliwaisi, pacuenenajematsinejewamë pacapanepare^l
 penaneconitsiyaniwa Diosojawabelia, pacuenia pacapanepaejitsipame
 itsajiwi pejopaejiwiminexa isotojawabelia! Itsamonae pijinia bitso
 pibisiacuene exanawanapa, penajumetsënëtsiliwaisi pejumexaniatae-
 xae. ¡Bajarapamonae-ata pa-itaxutotsoniataema, pacuenia Jesús paca-
 itaxutotsoniatane, asiwaya paneyawenonaenexa bajarapapibisiacuene
 pecopatsinexa! Itsiata baitsi jane, xania! ¡Panayajiwiataema! ¡Bajarapapibi-
 siacuene pa-itoyamëre! ¡Pëtsa paxamë-ata bajarapamonaeta pibisiacuene
 pana-exaname!

Judas pexaniacuena wënëxaniata Dioso, penapëjiobijawata

²⁴ Bitso pexaniacuena wënëxaniatsianatsi Dioso, tsipaji caenë Dioso
 cuenecaëjëpatsi papeca-ewetsinexa pibisiacuene pane-exanaeyaniwa,
 aneconijibianua papecanubenaeya-exanaenexa bajaraPonë pitabarata.
 Bajarapamatacabi bitso pabarëyamë tsane, Dioso pijapeniweniwenaeo-
 tiata panenubenaewawata. ²⁵ Bitso nacatoxanepana, daxita wajajamatabë-
 ëthëtojawawetsina wajawënëxaniatsijawa Dioso, tsipaji bajaraponë pepo-
 caenë Dioso, wajanacacapanepaenënuu, wajatuxanenë Jesucristo cruzata
 wajanacasiwatëpaexae wanecony yabara. Bajaraxuata, daxitajiwi bewaju-
 nupaebapona itsamonaejawabelia pacuenia Dioso bitso ayaijamatabëcuene
 pexainaenë, penamatacaitorobisaë pexainaenë, pecuenesaë pexainaenë-ata.
 Bajarapacuena Dioso jamatabëcuene-itsi tsonaponae mapanacujaje pexa-
 naewajënaeya, mapamatacabi-ataje, daxitamatacabijawabelianexa-ata.
 Bajara-itsi tsane.

1 1:23 *pacapanepare*: ¡Baitsi, bepijiayo pacujarubare pexaniajailiwaisi, Dioso peliwaisi,
 penayamaxë-itojorobiyanuwa penajumetsënëtsiliwaisita, tsipaji itsa jumexaniataejitsipa baja-
 rapanajumetsënëtsiliwaisi, naneconitsipa Diosojawabelia, pibisiacuene pexanaponaponaexae,
 pacuenia cujarubatsi bepexaniajailiwaisi itajara pepaebiwi!

Apocalipsis

Apóstolnē Juan peyaquinaeliwaisi, Jesús tajēwelia peyapētaeya- exanaeliwaisitsi, pacuenia Dioso tsitajētatsi xuanē itsamatacabi copiapataponaejitsia mapanacuataje

Paliwaisi Jesucristo yapētaeya-exana Juan-jawabelia

1 ¹Mapaliwaisije Dioso tsitajēta^a tajēwelia Jesucristojawabelia, peyapētaeya-exanaenexa pijajiwijawabelia, xuanē bepijiayo copiapatsiana. Nexata, Jesús itorobica ángelnē, xanē, Juan-nējawabetsica, pijajiwitonēnē, tanetsitajētsinexa, taneyapētaeya-exanaenexanua, pajamatabēcueneliwaisi xaina bajaraxuanē. ²Nexata, paliwaisi neyapētaeya-exana ángelnē, xanē juya pacayapētaeya-exanatsi, daxita xuanē taniji, pacuenia jumetanijinua. Nexata mapabaxutotaje pacatoyaquinatsi Dioso peliwaisi, Jesucristo-ata peliwaisi. ³Pajiwi lebianā, natojumetaena, mapabaxutojawataje perubenaeliwaisi, orijibia bajarapajiwi itsa jumecowēnētsiana pacuenia itorobatsi, jamatabēcuenēbarēya tsaponaponae tsane, tsipaji rabaja imoxoyo pewajēnae tsaponae pecopiapatsinexa daxita xuanē liwaisiyaquinajē mapabaxutotaje.

Juan pebajacobiliwaisi toyaquina Jesús pijajiwijawabelia

⁴Xanē, Juannē, mapaliwaisi pacatoyaquinatsije paxamē, Jesús papijajiwimē, Asia nacuata panejinawanapaewijawabelia. Patacabajacobijawata, pacayapētaeya-exanatsi, pacuenia bitso pacatojitsipa Dioso, ponē peponaponanē ajena pamatacabi, nacua pexanaewajēnaeya, daxitamatacabijawabelianexa-ata, papecajamatabēcuenewēnētsinexa papeca-asiwajamatabēcuenē, papecabarajamatabēxanepanaejamatabēcuenē-ata, jamatabēcuenexanepanaeya panenajuajinawanapaenexa.

Bajaraxuanē pacatojitsipatsinua pewēnēta siete pa-espíritubeje,^b penube-naewi Dioso pe-ecaetrone pitabarata, pewēnēta Jesucristo-ata. ⁵BajaraPonē raja xaniajaiya petsipaebabiabinē Dioso peliwaissi jiwijawabelia, itsajamatabēcuene xainaenejewa. Ponē beyaxuabi-atatsi, Dioso copiaya asaēya-exanatsi daxita petēpaewiwecua. Ponē pepopeyanacua-ewetsinē, daxita pewetsiwi matatoxenetsia.

Bajaraxuata, pexaniacuena bewēnēxaniatatsi Wajatuxanenē Jesucristo, tsipaji bajaraPonē naca-asiwa. Pejanata nacawecua-ajibia-exananua^c daxita pibisiacuene waja-exanaeneconimi, wajanacasiwatēpaejawata. ⁶Orijibia, bajaraPonē pijajiwitsi naca-exana, wajanacayanacua-ewetsiwinexa.^d Pija-sacerdotewitsi^e naca-exananua, wajatonacuenebiwinexa Dioso, Jesús Paxa. «Xanepana rabaja pecanacopatsijawa Jesús ayaijamatabēcuenenēcuene, daxitacuene pewetsijawanua daxitamatabijawabelianexa, tocopiarucaene-jewatsi», jai tsawanapaetsi tsane Wajatuxanenē yabara. ¡Bajara-itsi tsane!

⁷¡Panenamuxuna-ewere mapaliwaisije! Cristo raja najetarucaena athēbēwetsica itarērēbota. Bajarapamatacabi daxitajiwi taenatsi. Nexata, pamonae yenecacuatatsi, daxita nacuanēpijiwi-ata, pecopiataejawata, nuena pecajunaw^f pijaneconi yabara. «¡Bajara-itsi tsane!»,^g jaitsi barēyaya.

⁸Jesús nayabarajumaitsi mapacueniaje: «Xanē rajane baja daxita-cuene pepotataxuxuabinē, icatsia tacopiarucaeya-exanaenē-ata»,^h naya-barajai Wajatuxanenē Jesús, Ponē daxitawecua Piacuenesaenē,ⁱ pepo-naponaenē ajena mapamatacabitaje, nacua pexanaewajēnaeya-ata. Daxitamatabijawabelianexa-ata tsiteca ponaponaena.

b 1:4 siete pa-espíritubeje: Ayaibitsaēto jiwi, Dioso peliwaissi pecujarubiwi, canaējēta pacuenia bajarapajumenē jumaitsi Espiritu Santo yabara. Baitsi, saya jumaitsi bajaraPonē siete pacue-nebeje pexainanenēcuene, pacuenia jumaitsi Isa. 11:2 1) Pa-Espiritu Jehová pija-Espiritu, 2) yapētaeya pexanaenē, 3) xaniawaetsia peyapētaenē, 4) pemuxujiobicuene pexainanenē, 5) piacuenesaenē, 6) pecueneypētaenē, 7) peyaiyataeya-exanaenē Jehovah. Itsamonae pijinia canaējēta pacuenia jumaitsi siete ponēbeje arcángelēwi yabara, ponēbeje Dioso itorobiababa peto-exanaenexatsi pitorobicuena. Apoc. 8:2 Bajarapamonae pewēnēanē maje: Miguel, Gabriel, Rafael, Uriel, Shamuel, Jofiel, Zadkiel. **c 1:5 nacawecua-ajibia-exananua:** Itsamonae mapacuenia jutsipaje: «*pejanata nacawecuaquiata daxita pibisiacuene waja-exanaeneconimi*». **d 1:6 wajanacayanacua-ewetsiwinexa:** Itsamonae mapacuenia jutsipaje: «*pijajiwitsi naca-exana itsamatacabi wajanacabarē-ewetsinexa daxitacuene*». **e 1:6 Pijasacerdotewitsi:** Taema Éxo. 19:5-6, 1Pd 2:5,9 Bajayata sacerdotewi xainabiaba anijajamatabēcueneliwaisibeje, Dioso pitabarata. 1) Peyapētaeya-exanaenexa jiwijawabelia Dioso peliwaissi. 2) Peyawenonaenexa jiwi caejamatabēcuene pexainajewa icatsia Diosojawabelia pibisiacuene pexanaecujinae, itsa jume, bepenaxuirabijijiwo penacopatsicujinae Dioso pitabarata. Nexata, sacerdotewicuena wajatonacuenebijawata Dioso nacatsicarua wajuacujarubinexa Dioso peliwaissi, Jesús peliwaissinua wajasipaebinxaxa jiwijawabelia, wajayapētaeya-exanaenexa pacuenia caejamatabēcuene xainaējitsia Diosojawabelia. **f 1:7 nuena pecajunawi:** Bajarapacuenia nuena, tsipaji yapētaena imoxoyo pewajēnae Jesús penaneconitsia-exanaejawanexatsi, apopesiwananajamatabēcueneconapabixae bajaraPonējawabelia, tsipajinua jamatabēcuenebējai tsane pebejiobia-exanaexae Cristo. Itsiata, cujunawi-ata, aponajamatabēcuenepeñeyorotsi tsane, bajarapaneconiwecua. **g 1:7 Bajara-itsi tsane:** Pamonae, Jesús peliwaissi pejumexaniataewi, bitso jamatabēcuenebarēya tsane, pepatsijawanexa Cristo. Bitso pebarēyajamatabēcuene bajarapacuenia jumaitsi. Biji rajane, pamonae jume-aeba pacajunawi natsinuena. **h 1:8 pepotataxuxuabinē... tacopiarucaeya-exanaenē-ata:** Itsa jume «*el Alfa y el Omega*». Alfa (A) raja penamataxainae-itano griegojumepiji-alfabetojawata, Omega (Ω) pijinia pecopiaruca-itano. **i 1:8 daxitawecua Piacuenesaenē:** Majotaje Jesús nawēnērua Dioso pewēnēta, penajamatabēcuene-itajētsinexa pepo-Diosonēcuene. Taema Gén. 17:1; 35:11; Éxo. 6:3.

Jesús yacotiaya tsitanaitajëta Juan-jawabelia

⁹Xanë, Juannë, panijabananënë, tsipaji najuajumexaniatanetsi Jesús peli-waisi. Bajaraxuata, itsamonae nacanajuabejiobia-exanapona, Dioso pijaji-wixaetsi. Jesucristo nacanajuayanacua-eweta, nacanajuayawenonaponanua wajawajënaeyabelia, wajanajuanasaëtsinexa waja-itaxutuajamatejemajawa Diosojawabelia. Xanë, Jesús peliwaisi jiwi tatsipaebaponaponaexae, naneconitsiaponaponajë Patmos-tunaetota.⁷ ¹⁰Nexata, domingota Espiritu Santo netsijamatabëwënëca, pejitsipaecuenia tanejamatabëcuenemata-caponanexa. Nexata, tapënëwerena pecuaicuaijajawa ayaijume, betrompetajume penajumetsijawa, jumetaniji. ¹¹Pecuaicuaijainë nejumaitsi mapacueniaje: «Xanë rajane baja daxitacuenepopotaxuxuabinë, icsatia daxitacuenetacopiarucaeya-exanaenënëca-ata. Xua baja taneme, xua-ata icsatia taeponaenane, daxita bajaraxuanë baja, peliwaisi yaquinaenane. Bajaraxuacujinae, bajarapabaxuto to-itorobianame Jesús pijajiwi, siete patomarapijiwibejewabeliaje, patomaranë ena Asia nacuata. Mapawënë-tomaranëjawabeliaje: Éfeso, Esmirna, Pérgamo, Tiatira, Sardis, Filadelfia, Laodicea tomarapijiwijawabelia-ata», nejai betrompetajume pecuaicuaijainë.

¹²Nexata, napënëyorotajë tataenexa ponë tapënëwerena cuaicuaijai. Itsa naëcoliajë, taenubajë siete xuabeje penaitayotsicandelabrojananë,^k oronanitota pexanaejawanë. ¹³Bajaraxuanëtuatujëta taenutajë pebi.^l Bajarononë yabara jamatabëjumaitsinë: «Jesús raeta, Daxitajiwi Pematapijinë»,^m jamatabëjanë. Bajaraponë penaxatatsijawa apiareca.ⁿ Nacorobëcëtanuca^o oronanitota pexanaepana. ¹⁴Mataniojai bitso,^p pacuenia baniojai papaëputo matatoxenetsia. Pitaxutobeje naitayota,^q pacuenia isotocotia bacotia-itsi.

j 1:9 naneconitsiaponaponajë Patmos-tunaetota: Imperio Romano nacua-ewetsinë, Dominicano, itoroba pijajiwi wajabitsaë pecaponanexa Juan Patmos-jawabelia. Bajarajota, Juan peponaponaenexa anijawaibejucuenia, pebejiobia-exanaecueniatsi. k 1:12 penaitayotsicandelabrojananë: Bajaraxuanë nacatocuenecatane siete pabitsaëtobeje Jesús pijajiwi, bajarapasiete patomaratabeje. Apoc. 1:20. l 1:13 taenutajë pebi: Bajaraxua nacayapëtaeya-exana pacuenia Jesús yajawaponapona daxita pijajiwi. Nacayapëtaeya-exananua pacuenia toxanepanatsi daxita Jesús pijajiwi petanenexatsi ayaijamatabëcuenenëcuenia, peyaiyataenexanua daxitacuenewecua. m 1:13 Daxitajiwi Pematapijinë: Pepojiwitonë. PepoDioso-ata, itsiata pepojiwitonë. Jesús-wënë nacatocuenenë-itajëta wajanacacapanepaenëcuenenë – Mesías-cuene. n 1:13 penaxatatsijawa apiareca: Nacayapëtaeya-exana Jesús sacerdotenëcuenenë. Pamonae sacerdotewi templobota penacuenebiwi, naxatatabiaba bajarapacuenia. Jesús nexata, sacerdotenë pepopenamatacitorobinëcuenia tonacuenebaponapona daxita pijajiwi. o 1:13 Nacorobëcëtanuca: Nacayapëtaeya-exana Jesús, Juez-nëcuenenë. Juez-monae xainabiaba anijajamatabëcueneneliwaisibeje. Caeliwaisi, jiwi liwaisi petocanaëjëtisinë, peyapëtaenexa penaneconitsicuene, itsa naneconita, itsa jume, itsa aneconijibi. Itsaliwaisi pijinia juez-monae itorobabiaba pacuenia naneconitsia-exanaejitsia pijaneconi pexainaewi. Bajaraxuata, Apocalipsis-pijiliwaisibaxuto nacayapëtaeya-exana pacuenia Ponë daxitajiwi pecapanepaenënëca, naexanaejitsia daxitanacuanëpijiwi pijajueznë, nacua pecopiarucaematacabita. p 1:14 Mataniojai bitso: Nacanajamatabënapitsia-exana Dan. 7:9-itsajota ruca Pepoperujunë peliwaisi. Papaëputo peniojaijawa matatoxenetsia nacayapëtaeya-exana anijajamatabëcueneneliwaisibeje yabara. Jesús raja pepopianeconijibinë, pacuenia papaëputo bitso niojai. Itajëtanua Pepopeyapëtaenëcuenenë, pexaniacuenia pexanaenexa, pacuenia pematananiojaiwi, bajayajebi pejinawanapaewixae, xaniawaetsia canaëjëtabiaba pexanaecuenenë-jëpaetsi pewecumatayatsijawa penajamatabëxainaejawa, muetsia pexanaejawami-ata. Bajaraxuata, Cristo yapëtaeya tocanaëjëtsiana jiwi pijaneconi, penaneconitsia-exanaenexa. Taema Sal. 139:23-24; Lu 8:17; Rom. 2:16; Heb. 4:12.

¹⁵ Petaxubeje-ata niweniwenabeje^r pacuenia baniweniwenena broncenani-tojawa, pe-objawawa, isotota pesetsicujinae, pecuaicuajijawawa najumeta pacuenia banajumeta jōca. ¹⁶ Pecujuanenia cobenanuca siete patuluputo-beje. Pecuaibowojotuatsina pitsapa anijabarēneniabeje pexiujai-espada. Pacuenia matabipijijuumeto itsa aitawajēnae, xaniawaetsia itayota, baja-rapacuenia itabaranaitayota.^s

¹⁷ Itsa taniji bajaraponē, betatēpaenē irataeya bocajunuajē bajaraponē pita-barata. Itsiata baitsi jane, bajaraponē nejayarena pecujacobeta. Nejumaitsi: —iPētsa necujunawame! Xanē rajane baja daxitacuene pepotataxuxua-binē, daxitacuene icatsia tacopiarucaeya-exanaenēnexa-ata. ¹⁸ Xanē rajane baja, pepotasaētsaponaponaeenē daxitamatabacijawabelianexa. Xanē picani tēpajē. Itsiata baitsi jane, tatēpaecujinae icatsia baja asaenē tsaponaponae daxitamatabacijawabelianexa. Xanē rabaja tatocaējētsinē^r jiwi petēpaemata-cabinexa, ta-ewetsinēnua petēpaewi pejinawanapaenacua.

¹⁹ »Yaquinare“ peliwaissi, xua baja taneme, xua aeconoxae taeponaponame, xua-ata icatsia taeponaename pecopiapataponaejawanēnexa! ²⁰ Mapajamata-bēcueneliwaissi xainaje netaejawanē: «Xuanē, siete patuluputobeje, tacujua-nenia cobenancuajē, bajaraxuanē rabaja siete ponēbeje penamatacatorobiwi^r tajajiwi, siete patomarabejepijiwi. Xuanē pijinia siete papitayotsicandelabro-beje, oronanitota pexanaejawanē, bajaraxuanē rabaja pijinia siete pabitsaēto-beje tajajiwi» —nejai Jesús, pitayotsicandelabrojanētuaatujēta penucaenē.^w

**Mapacueniaje Watutuxanenē Jesús itoroba Juan petoyaquinaenexa
Jesús pijajiwi, Éfeso tomarata penamatacatorobinējawabelia**

2 ¹ Jesús icatsia nejumaitsi: —iToyaquinare tajajiwi penamatacatorobinējawabelia,^x Éfeso tomarata peponaponaeenē, pijajiwi yajawa, neyapētaeya-exanaenexa tacatsipaebicuenia!

«Mapacueniaje Jesús, siete patuluputobeje pecujuanenia pecobenanu-caenē, siete papitayotsicandelabrobeje-ata, oronanitota pexanaejawanētua-tujēta penucaenē, pacajumaitsi:

r 1:15 *Petaxubeje-ata niweniwenabeje*: Nacayapētaeya-exana pacuenia Jesús naneconitsia-exanaena pijawajabitsaēwi. Sal. 110:1, Apoc. 14:19-20. **s 1:16** *itabaranaitayota*: Taema Mt 13:43. **t 1:18** *tatocaējētsinē ... ta-ewetsinēnua*: «ta-ewetsinē jiwi petēpaecuenepijillave ... ta-ewetsinēnua petēpaewi pejinawanapaenacuapijillave», jai. Hebreojumeta, «petēpaewi pejinawanapaenacua» pewēnē, «Hades». Nexata, pacuenia llave pewetsinē pexatatanutsibaupa baxajonaata bajarapallaveta, jiwi pejonenexa bajarapataxunaejawabelia, itsa jume, pepitsapaenexa, bajarapacuenia pijinia Jesús bellavexainaenē tocajēta jiwi petēpaematacabinexa mapanacuataje. Tocajētanua pamonaē pitsapaējitsia pemēthēwecua, pejinawanapaenexa Dioso pijanacuataitsia, itsa jume, isotopucajawabelia peponaenexa petēpaecujinae. **u 1:19** *Yaquinare*: Xua baja taneme, yabara jumaitsi, Apoc. 1:1-20; xua aeconoxae taeponaponame, yabara jumaitsi, Apoc. 2:1-3:22, xua-ata taeponaename pecopiapatsijawanēnexa, yabara jumaitsi Apoc. 4:1-22:21. **v 1:20** *penamatacatorobiwi*: Itsa jume pijinia ángelewi yabara jumaitsi. Ángelewi griego jumeta xaina mapejumaitsijamatabēcuenē: «pejumeliwaissi paebiwi», pejajume. Itsa canacueneba ángel-wēnē Dioso pejumeliwaissibaxutota, anijabitsaēto-beje yabara jumaitsi: «Pepo-ánglewi, pamonaē apowajataewi waja-itaxutota. Dioso pijanacuata pejinawanapaewi», itsa jume, yabara jumaitsinua: «Diosojumepaebiwi, pamonaē iglesia pewetsiwi». **w 1:20** *pitayotsicandelabrojanētuaatujēta penucaenē*: Nacayapētaeya-exana pacuenia Jesús yajawa tsabiabi pijajiwi. **x 2:1** *penamatacatorobinējawabelia*: Jesús tsijumaxuababiaba pewetsi-wijawabelia paneconi xaina pijajiwi, tsipaji bajarapamonae peto-ewetsiwi pijajiwi.

²»Yapëtaniji daxita xua pa-exanawanapame. Nexata, yapëtaniji ayai-cuenia taxa Dioso panetonacuenebijawa, ajamatabëcuenesaëya Dioso peliwaissi paneca-asaëtsawanapaejawa, panecuenene-ataejitsibijawanua pibisiacuenene pexanaewi. Yapëtanijinua nayajiwitaeya panejinawanapaejawa itsamonae papecayamaxë-itojorobiyanawa, pamona picani nawënëruba apóstolewicuenia, panejumeyaiyataenexa picani papecatsipaebiliwaissi. Bajarapamonae papecatsipaebiliwaissi panecanaëjëbixae, payapëtaneme penajumetsënëtsiwicuenene. ³Paxamë bajayajebi pa-ajamatabëcuenesaëmë tsawanapae patanejumexaniataejawamë tajumeliwaissi, paliwaissi yabara itsamonae pacabejiobia-exanabiaba. Ayaicuenia panacuenenebame pataca-itorobicuenene. Apopayabaracueranaemë cajena. Bajarapacuenia panenacuenebawanapaexae, pacasiwajamatabëcuenenebarëyatsi. ⁴Itsiaata baitsi jane, caejawayo yabara pananeconitame xanëjawaberena. Aeconoxae baja, paco-pabame xaniawaetsia tajajijiwi pane-asiwajawa, patane-asiwajawamë-ata.⁷ Pacuenia copiya ajena pamatacabi panesiwanajamatabëcuenecopabame, apobajarapajamatabëcuenene-itsimë baja. ⁵¡Bajaraxuata, panajamatabënapire copiya patane-asiwacuenemë, panenajamatabëcuenenepënëyorotsinexa bewelia patane-asiwajawamëwecua, icatsia patane-asiwanexamë, tajajijiwi yajawa, pacuenia copiya pane-asiwamë! ¡Asiwaya panetonacuenebawanapare icatsia, pacuenia bajayata xaniawaetsia tajitsipaecuenene paneto-exanawanapame patane-asiwajamatabëcuenemë! Itsiaata itsa baja apopajamatabëcuenenepënëyorotsimë tsane, nexata baja, pacawecuatixitsianatsi becandelabrocuenia pane-itayotsitaxunaemi,^z panijatamarapijiwituatujëta. ⁶Itsiaata baitsi jane, pacasiwajamatabëcuenenebarëyatsi patanejamatabëcuenëjëpaexaemë mapacueneneje. Pacuenia xanë cuene-itoyanë nicolaftawí^a pibisiacuenene pexanaponaejawa, bajarapacuenia pijinia paxamë-ata pacuenenitoyamë tsawanapae. ⁷Pajiwi muxuwojoruca, natojumetae pacuenia Espíritu Santo jumaitssi daxita Jesús pijajijiwijawabelia.

»Pajiwi ajamatabëcuenesaë pewajënaeyabelia, taxa Dioso pitaxutujamatejematsaponaponaejawa ëpetëpaejawabelia, itsamonae bejiobia-exanae-atatsi pecopatsia-exanaenexatsi, nexata taxa Dioso tocopatsiana bajarapajiwi pexaenexa ponaecuaito wëna-asaëtsaponaponaejitsia daxitamatacabijawabelianexa, ponae nuca^b taxa Dioso pijapexanianacuatsia»,

y 2:4 *patane-asiwajawamë*: Taema Jn 13:35; 2Co 5:14; 1Jn 3:14,17; 4:8, 20; Efe. 1:15-16.

z 2:5 *pane-itayotsitaxunaemi*: Bajarapamonae Dioso tocopatatsi picani Èfeso tomarapijiwituatujëta Jesús peliwaissi petsipaebinexa, pitaquirijamatabëcuenene pexainaewijawabelia. Nexata, pacuenia pitayotsinaebo itayotabiaba pitaquirijawata, bajarapacuenia bajarapamonae bepitayotsiwi pitaquirijamatabëcuenene pexainaewituatujëta. Itsiaata, Jesús yapëtaeya-exana pacuenia wecuatixitsijitsiatsi pijapitayotsinaebo itsajawabelia Èfeso tomarawecua. Nexata, peyaiyataetaxunaemi apoxainaëjitsia pewajënaeyabelia. a 2:6 *nicolaftawí*: Bajarapamonae cujarubabiaba Jesús pijajijiwi pexanawanapaenexa pacuenia Balaam-pijinë cujarubabiaba Israel-pijinë pemoxi pexanaenexa Núm. 25-jawata. Nexata, nicolaftawí cujarubabiaba peyaiyataenexa jumapecataeya pexanaenëanë bediosowicuenia. Cujarubabiabanua jiwi itaxutejema penaperabëcuenetsiataeyabiabinexa. Orijiibia, cujarubania pibisiacuenene itaxutejema pexanabiabinexa, tsipaji Jesús nacatomatamota daxita wajaneconi. Cuenejëpa pamona maparucaje nacamuxubiapeneta waja-itaxutujamatejemajawa wajasalinailiwaissijawabelia Diosowecua, waja-exanaejawanua xua Dioso tsitapibisiacuenetsi. b 2:7 *ponae nuca*: Ponae nuca bajayatami Edén nacuata pebo-caepabita, bajarapona Dioso tsaena capona pijanacuajawabetsia, itsa jume, nawitsia xaina bajarapitsinaejawanë pijanacuatsia. Taema Apoc. capítulo 22.

papecacopabia-exanaenexa xanë patane-itaxutuajamatejemajawamë. ¡Itsiata, pëtsa pacujunawame bajarapamonaë papecabebiobia-exanaejawanexa, tsipaji apobajayajebinexa!^f Nexata, bajarapamataca-bijawa petëpaejawabelianexa, bajarapajiwi rajutsianajë coronajawa,^g pecuene-itajëtsijawa matababi apowerewerecaejawa. ¹¹ Pajiwi muxu-wojoruca, natojumetaë pacuenia Espíritu Santo jumaitsi daxita Jesús pijajiwi jawabelia.

»Pajiwi ajamatabëcuenesaë pewajënaeyabelia, taxa Dioso pitaxutuajamatejematsaponaponaejawa, ëpetëpaejawabelia, itsamonae bejiobia-exanae-atatsi, pecopatsia-exanaenexatsi, bajarapajiwi apo-itsacueniabi tsanetsi cotocaewi patëpaejawa», pacajaitsi xanë, daxitacuenë pepotataxuxuabinë, daxitacuenë icatsia tacopiarucaeya-exanaenënua —nejai Jesús, tatoyaqui-naenexa ponë namatacaitorobapona Jesús pijajiwi Esmirna tomarata.

**Mapacueniaje Wajatuxanenë Jesús itoroba, Juan petoyaquinaenexa
Jesús pijajiwi Pérgamo tomarata penamatacaitorobinë jawabelia**

¹² Jesús icatsia nejumaitsi:

—¡Toyaquinare tajajiwi penamatacaitorobinë jawabelia, Pérgamo tomarata peponaponaenë, pijajiwi yajawa, neyapëtaeya-exanaenexa tacatsipaebicuenia!

»Ponë, pecuaibuatsina pitsapa anijabarëneniabeje pexiuijaiespada, pacajumaitsi mapacueniaje: ¹³ «Yapëtaniji daxita pane-exanawanapaecuenë. Yapëtanijinua pitsitomarata pajinawanapame, itsajota Satanäs xaina pewetsitaxunae, jiwi pejamatabëcuenenamatacaitorobinexa pepopeyanacua-ewetsinëcuenia. Nexata, panijatomarapijiwi bajayata beyaxuaba Antipas-pijinë, ponë tajumeliwaissi ajumesaëya tsipae-babiaba jiwijawabelia, bejiobia-exanae-atatsi. Itsiata baitsi jane, panewajënaeyabelia xanë pane-itaxutuajamatejemamë tsawanapae, pacabejiobia-exanae-ata. Nexata, pacasiwajamatabëcuenëbarëyatsi bajaraxua yabara.

¹⁴ Itsiata baitsi jane, itsajamatabëcuenëjawaxi yabara pananeconitame xanëjawaberena. Bajarajota, itsamonae, paxamëyajuwënëwi, ca-asäë tsawanapae paliwaissi bajayata Balaam-pijinëmi^h muxubijiapenetsiya

f 2:10 *apobajayajebinexa*: Wowaijumeta ruca «*diez pamatacabibejenexa*». Bajarapajumebeje nacayapëtaeya-exana «cae-epatoyonexa; apobajayajebinexa» pebejiobia-exanaejawanexatsi. Itsamonae pijinia canaëjëta bajarapadieze pamatacabibeje pecuene-itajëtsijawa diez patobeje tsaponae pebejiobia-exanaejawanexatsi. Pepodieze pamatacabibeje yabara apojumaitsi.

g 2:10 *coronajawa*: Pacuenia fútbol penamuxusitsiwi premio rajutatsi pecanabixae, bajarapacuenia Jesús premiocuenia rajutsiana coronajawa, pamonaë ca-asäë pitaxutuajamatejemajawa Diosojawabelia, bejiobia-exanae-atatsi. Itsamonae canaëjëta pepocoronajawa, «*Corona de la Vida*» perajutsinexatsi. Itsamonae pijinia canaëjëta itsajawa bitso pexaniacuenë perajutsijawanexatsi. Bajarapacoronajawa cuene-itajëta saya pepacuenë pesiwanajamatabëcuenecopatsijawa Jesucristojawabelia matababi apowerewerecaejawa pexainaenexa, tsipaji apocopatsi pitaxutuajamatejemajawa, bejiobia-exanae-atatsi. **h 2:14** *Balaam-pijinëmi*: Taema Núm. cap 22-cap-30-jawabelia. Nexata, pamonaë casaë tsawanapae Balaam peliwaissi, muxubijiapenetabiaba jiwi pematajërëatsinexa pijasalinailiwaissi Dioso, peliwaissi jawabelia, bajarapamatajërëatsiliwaissita pena-ewetsinexa. Bajayatami itsamonae, Jesús pijajiwi, caecuenia siwanajamatabëcuenecopata Diosojawabelia, jumapecataeya pexanaenëanë jawabelia-ata, pacuenia maparucäe-ataje itsamonae siwanajamatabëcuenecopata Diosojawabelia, pematawajibicuenë jawabelia-ata, pena-ewetsinexa.

cujaruba Israel-pijinë pemomoxijawabelia. Bajaraponëmi itoroba Balac-pijinëmi peyamaxë-itorobinexa Israel-pijinë pemomoxi, bajarapamonae pibisiacuene pexanaenexa, taxa Dioso pitabarata. Nexata, Balac-pijinëmi yamaxë-itorobiaya junata Israel-pijinë pemomoxi penaponaenexa fiesta-jawabelia, bajarajota penaxaenexa dajubinë pewi, perajutsiyajuwënëjawa jumapecataeya pexanaenëanëjawabelia, pibisiacuene pexanaenexanua pewitota bajarapafiestajawata pepatsipetiriawijawabelia. Bajarapacuenia pijinia, aeconoxae paxamëyajuwënëwi-ata muxubijiapeneta-pona taja-jiwi yajuwënëwi, cuenejëpaeya pibisiacuene pexanaenexa. ¹⁵ Itsamonae pijinia paxamëyajuwënëwi ca-asaë tsawanapae nicolaítawi petsipaebaponaeliwaisi. ⁱ Nexata, bajarapamonae muxubijiapeneta-pona tajiwi yajuwënëwi, pibisiacuene pexanaenexa, nicolaítawi pecujarubicueniatsi. Xanë cajena, ayaicuenia cuene-itoyanë bajarapitsiliwaisi jiwi pejumecowënëtsi-jawa. ¹⁶ ¡Bajaraxuata, panajamatabëcuenepëñëyorore pibisiacuene pane-exanaejawawecua, ^j icatsia pane-exanawanapaenexa tajitsipaecuenia! Itsa paxamë apopanamatabëcuenepëñëyorobimë tsane, xanë nexata naxatsiayo ponaenajë paxamëjawabereca, tabarënenexa pamonae apopenajamatabëcuenepëñëyobiwijawabelia, tacuibuatsina pepitsapae-espadata. ^k ¹⁷ Pajiwi muxuwojoruca, natojumetae pacuenia Espíritu Santo jumaitsi daxita Jesús pijajiwi jawabelia

»Pajiwi ajamatabëcuenesaë pewajënaeyabelia, taxa Dioso pitaxutuajamatejematsaponaponaejawa, ëpetëpaejawabelia, itsamonae bejiobia-exanae-atatsi, pecopatsia-exanaenexatsi, nexata, xanë, rajutsianajë bajarapajiwi pexaenexa manáwënëjawa, athëbëtatsia xua xaniawaeta. Rajutsianajë nua penioponae-ibotoyo, pa-ibotoyoyumata xanë wënëyaquinarutsianajë pejanawënë. Bajarapawënë itsajiwi-ata apowënëyapëtae tsanetsi. Cae-jiwi, pepitsijiwi, nawënëyapëtaena», pacajaitsi xanë, tacuibowojotuatsina pepitsapae-espada taxainanë —nejai Jesús, tatoyaquinaenexa ponë namatacitorobapona Jesús pijajiwi Pérgamo tomarata.

**Mapacueniaje Watuxanenë Jesús itoroba, Juan petoyaquinaenexa
Jesús pijajiwi Tiatira tomarata penamatacitorobinëjawabelia**

¹⁸ Jesús icatsia nejumaitsi:

—¡Toyaquinare tajiwi penamatacitorobinëjawabelia, Tiatira tomarata peponaponaenë, pijajiwi yajawa, neyapëtaeya-exanaenexa tacatsipaebicuenia!

i 2:15 *nicolaítawi petsipaebaponaeliwaisi*: Bajarapamonae muxubijiapeneta Jesús pijajiwi, pibisiacuene pexanaenexa, itsiata apocuenejëpae Balaam petsipaebicuenia. Balaam peliwaisi petsipaebi cujaruba jiwi pejumecowënëtsinexa pijasalinailiwaisi, Dioso peliwaisi yajawa, xaniawaetsia pejinawanapaenexa. Nicolaítawi pijinia cujaruba jiwi pibisiacuene itaxutejema pexanawanapaenexa, tsipaji «Jesús nacatomatamota daxita wajaneconi wajanacasiwatëpaejawata. Bajaraxuata, aponamatawenonaetsi wajanajamatabëcuenecataitsijawa pibisiacuene waja-exanaeyaniwa», jai tsabiabi. j 2:16 *pibisiacuene pane-exanaejawawecua*: Balaam, Nicolaíta peliwaisibeje pejumecowënëtsi cuenebeje yabara. Pamonae cueneyapëtae-ata bajarapacuenia itsamonae pexanaejawa, itsiata itsa apocuene-itawetsi, najamatabëcuene-itajëta pejamatabëcuenejëpaejawa pibisiacuene pexanaewijawabelia. Taema Lev. 20:1-5. Daxita bajaraxuawecua Jesús itoroba pijajiwi penajamatabëcuenepëñëyorotsinexa, pewajënaeyabelia pexanaeyaniwa. k 2:16 *tacuibuatsina pepitsapae-espadata*: Taema Heb. 4:12. Jesús wecua-ajibia-exana penajumetsënëtsiliwaisi pexanajailiwaisita.

«Mapacueniaje Jesús, ponë Dioso pexénato, pitaxutobeje penaitayotsinë, pacuenia isotocotia ba-itatsajawa. Petaxubeje-ata niweniwenä, pacuenia broncenaniyawa pe-ojobijawa, pacajumaitsi:

¹⁹»Yapëtaniji daxita pane-exanawanapaecue. Nexata, pacatoyapëtanetsi itsamona-ata pane-asiwatsawanapaejawa. Pacatoyapëtanetsinua patane-itaxutuajamatejemajawamë xanëjawaberena, panetonacuenebijawa-ata taxa Dioso. Pacatoyapëtanetsinua panewajënaeyabelia panenajamatabëcuenesaët-sijawa xanëjawaberena, itsamonaë pacabejiobia-exanabiabi-ata. Yapëtanijinua, pacuenia aeconoxae, bitsoyo panetonacuenebawanapame, patanetonacuenebawanapaejawamëwecua, pamatacabi panesiwanajamatabëcuenecopabame xanëjawaberena. Bajarapacuenia pane-exanawanapaexae, pacasiwajamatabëcuenëbarëyatsi. ²⁰Itsiata baitsi jane, itsajamatabëcueneyo yabara pananeco-nitame xanëjawaberena, tsipaji apopacujiru-itawetsimë Jezabel,¹ bajarapowa pibisiacue pexanaeyaniwa, penajumetsënëtsiliwaisi pepabiyaniwanua taja-jijawabelia. Bajarapowa nawajunupaebabiabi-ata xanë betaitorobijawa profetawacuenia itsiata apoxanajai. Biji rajane, patajajiwimë pacayajuwënëyamaxë-itojorobapona baja. Bajarapowa muxubijapieneta penacojiobiwi penawecuaajaitsinexa penapitsijiwibeje, pibisiacue pewitota itaxutejema pexanabiabinexa. Pacacujarubania patajajiwimë panexaeyabiabinexa dajubinë pewi, perajutsiyajuwënëwim jumapecataeya pexanaenëanëjawabelia. ²¹Bajarapowa picani pecopatsijawa pibisiacue pexanabiabijawa, bajayajebi ewetaponapona-jë. Itsiata baitsi jane, apojamatabëcopatsi pewitota pibisiacue pexanabiabijawa, penajamatabëcuenepënyorotsinexa xanëjawaberena. ²²Bajaraxuata, bajarapowa awitania-exanaenajë, camata pebocaenexa nabejiobitsiaya. Orijibia, pamonaë pibisiacue exanabiaba pewitota bajarapowa pecujarubiciueniatsi, nexata bajarapamona-ata bitso nabejiobitsia-exanaenajë, itsa aponajamatabëcuenepënyorotsi tsane bajaraxuawecua. ²³Werebiabianajë daxita bajarapowa pexi.ⁿ Bajarapacuenia ta-exanaejawata, daxita nacuanëjawa pejinawanapaewi, tajajiw, nejamatabëcueneyapëtaena, xaniawaetsia tajamatabëcueneyapëtaenëcuenë daxitajiw bëpënë pejamatabë-ëthëtota, penajamatabëxainacuene-ata. Nexata, pacaejiwimë canacujitsia, pane-exanawanapaecuenia^o

1 2:20 Jezabel: Apopepopewënë bajarapowa. Saya pecuenejëpaxae, Jezabel-pijiwami, Acab-pijinë pijawa, bajaraxuata wënërubatsi Jezabel-wënëcuenia. Bajayatami, Jezabel-pijiwami cujaruba israelitawi asiwaya penawajëcabiabinexa Baal-wënë jumapecataeya pexanaenëjawabelia. (Taema 1Re 16-21.) Nexata, powa eca Tiatira tomarata, bajarapacuenia pijinia cujaruba Jesús pijajiwijawabelia. Aponayapëta Jezabel powacuene. Itsamonaë canaëjëta bajarapowa ayajamatabëcuenewa pijatomarapijiwituatujäta. Itsamonaë pijinia canaëjëta jumapecataeya pexanaenë pijasacerdotewa, penacajonewa Jesús pijajiwibitsaëtojawabelia. Itsamonaë pijinia canaëjëta ancianonë pijawacuene. Bajarapitsicue pexainaexae bajarapowa, nexata Jesús pijajiw aura pecuene-itawetsijawa. **m 2:20 perajutsiyajuwënëwim:** Bajayatami, jiwi xaeyabiaba padajubinë pewi itsamonaë rajuta jumapecataeya pexanaenëanëjawabelia, penajamatabëcuenë-itajëtsinexa caejamatabëcuenë pexainaejawa bajarapajumapecataenëjawabelia, penajamatabëcuenë-itajëtsinexanua pejumexaniataejawa peyawenonaejawanexatsi. Bajaraxuata, Dioso bitso baranaepanabiaba bajarapapexanaecue. Cuenejëpa baitsi pajiwi caecuenia wajëca Diosojawabelia peyawenonaenexatsi, matawajibabiabanua. **n 2:23 pexi:** Pepopexi yabara apojumaitsi tsanea. Judfowi canacunëbabiaba pexijume, pamonaë pepopexi, pemomoxi, pamonaenua pecujarubiliwaisi pebaraponaewi. Nexata, mapaversiculotaje nacayapëtaeya-exana Jezabel pecujarubiliwaisi pebaraponaewi yabara, «pexi», itsa jai. **o 2:23 pane-exanawanapaecuenia:** Bajarapamonaë pexanaecue yabara, naneconitsia-exanaenatsi, itsa jume, pexaniacue to-exanaenatsi. Taema Sal. 62:11-12; Prov. 24:12; Eze. 18:30; 33:20; Mt 16.27.

pacato-exanaenatsi. ²⁴Itsiata, patajajiwimē Tiatira tomarata panejinawana-paewi, paxamē apopajumecowēñtsimē mapaliwaisianēje: Jezabel pepaebiliwaisianē, paliwaisianēnua itsamonae cujaruba jiwi apopejumeyapētaeliwaisianēmi,^p Satanás pecapitsapaeliwasianē. Paxanē apopaca-itorobitsi, pematatsēñēa itsali-waisi pane-exanawanapaenexa paneyapētaejawamiwecua. ²⁵Itsiata baitsi jane, paca-itorobatsi panewajēnaeyabelia patanesiwa-itaxutuajamatejematsawanapae nexamē, patanejumexaniataewanapaejawamēnua, matapania etapatsimatacabitsicajawabelianexa. ²⁶Pajiwi ajamatabēcuenesaē pewajēnaeyabelia pexanaponaponaejawa ta-itorobicuenia ēpetēpaejawabelia, nexata, xanē itsamatacabi tocopatsianajē bajarapajiwi, pewetsinexa daxitanacuapijiwi. ²⁷Bajarapajiwi pewetsijawata, itorobabiabiana itaxutobejiobiataenejewā. Asaēyata naneconitsia-exanaenanua daxita pibisiacune pexanawanapaewi, bajarapacuenia piajibia-exanaenexa bajarapapibisijamatabēcue. Pacuenia hier-naebota^q batoxobiaxuaba atsananitota pefaratsicanalito, bajarapacuenia bajarapajiwi pewetsijawata ajibia-exanaena jiwi pibisiacune pexanaejawa. Baitsi, pacuenia xanē, taxa netocopata daxitanacuapijiwi ta-ewetsinexa, bajarapacuenia pijinia piyamatabēcuenesaēwi ewetsia-exanaenajē. ²⁸Bajarapajiwi rajutsianajēnua pexainaenexa bajayacunuapijituluputo^r penaitayot-sicotia, bajarapacuenia pexainaenexa papinijicotia xanē xainajē, ayaijamatabēcuenewi petanexatsi. ²⁹Pajiwi muxuwojoruca, natojumetae pacuenia Espiritu Santo jumaitsi daxita Jesús pijajiwijawabelia», pacajaitsi xanē, Dioso Pexēnatonē, ta-itaxutobeje ta-itaxutona-itayotsinē, tataxubeje-ata tataxuniweniwenanē —nejai Jesús, tatoyaquinaenexa ponē namatacaitorobaponapona Jesús pijajiwi Tiatira tomarata.

**Mapacueniaje Watatuxanenē Jesús itoroba, Juan petoyaquinaenexa
Jesús pijajiwi Sardis tomarata penamatacaitorobinējawabelia**

3 ¹Jesús icatsia nejumaitsi:
—[Toyaquinare tajajiwi penamatacaitorobinējawabelia, Sardis tomarata peponaponaenē, pijajiwi yajawa, neyapētaeya-exanaenexa tacatsipaebicuenia!

»Mapacueniaje Jesús, ponē xaina siete pa-espíritubeje, Dioso pija-Espiritu, pecobenanucaenēnua siete patuluputobeje, pacajumaitsi:

«Yapētaniji daxita xua pa-exanawanapame. Paxamē yabara itsamonae pacawēñliwaisitae-ata panejamatabēcue-aitawajawa Diosojawabelia, itsiata xanē taitabarata pepacujiru pajamatabēcuenetēpawanapame.

²¡Panayajiwitaema! ¡Paca-asaēmēre papecatowerewerecaeyaniwa, Dioso pejitsipaecuenejawanē pane-exanawanapaejawa, tsipaji baja imoxoyo

p 2:24 *apopejumeyapētaeliwaisianēmi*: Bajarapamonae cujarubiana bajarapaliwaisianē bebē-pēñēaliwaisiacuenia Dioso yabara, itsa jume, Dioso pijacune yabara. Baitsi, nacajumaitsi tsane: «[Taema xua caxitajarabajē Dioso peliwasita! Mapaliwaisiye caeto-ata abaxē jiwi apopejumeyapētaeliwaisimi. Majotaje Dioso nacayapētaeya-exana pacuenia nacatoxanepana waja-exanawanapaenexa mapacueneye], nacajai tsane. Nexata, caecuenia nacacujarubiana Dioso apopejitsipaecuene waja-exanaenexa, itsa jume, wajasalinailiwasi pematajērēatsijawa Dioso peliwasijawabelia. Bajaraxua, Diosonexa, Satanás pecapitsapaeliwasi. - **q 2:27** *hierronaebota*: Taema Sal. 2:7-9. **r 2:28** *bajayacunuapijituluputo*: Bajarapawēñē itsawēñēnexa Jesucristo. Pacuenia bajayacunuapijituluputo naitayota ayaicuenia ajēna matacabitsina, bajarapacuenia Jesús pexanaecuene penaitajētaponaejawanexa, Dioso pinijicuene pexanaewajēnaeya mapanacuataje. Taema Apoc. 22:16; Núm. 34:17; Mt 2:2.

papecatocopiarucaejawanexa! Pacacuenetanetsi Dioso pejitsipaecuenia bijiya pane-exanawanapaejawa. ³ ¡Panajamatabēnapitaponare copiya pali-waisi paxamē pajumexaniataneme, itsamonae papecacujarubiliwaisi! ¡Paca-asaēmēre tsawanapae bajarapaliwaisi panejumecowēnētawanapaejawa! ¡Panajamatabēcuenepēnēyorore taxa Diosojawabelia, pibisiacuenē pane-exanaejawawecua! Nayajiwitaeya itsa apopajinawanapaemē tsane, tajitsipaecuenia pane-exanawanapaenexa, nexata xanē jemata patsiarecajē, paepatota apopanejamatabēnajinaemē, patacananeconitsia-exanaenexa panijaneconijamatabēcuenē. Pacuenia penacobetoxotsinēnexa jemata bapata, paepatota apojamatabēnajinaetsi, bajarapijina xanē-ata itsinē tsane. ⁴ Itsiata, yapētaniji pacuenia Sardis tomarata, itsamonae, caejiwixi, tajajiwiyajuwēnēwi, penaxatabijawa apopebijianaewi⁵ jinawanapa. Tsitecaeya jinawanapa apopenaxuirabiwicuenia, pibisiacuenē apopexanaexae. Bajarapacuenia pejinawanapaexae, itsamatacabi bajarapamonae xanē neyajawajinawanapaena, naxatabiana penioponaejawanē,⁶ penajamatabēcuenē-itajētsinexa planeconijibiwicuenē. ⁵ Pajiwi ajamatabēcuenesaē pewajēnaeyabelia, pitaxutuajamatejemajawa taxa, Diosojawabelia, ēpetēpaejawabelia, itsamonae bejibia-exanae-atatsi pecopabia-exanaenexatsi, bajarapajiwi-ata naxatabiana penioponaejawanē. Apowēnē-iquinaenē-ata tsane pabaxutota wēnērubena pamonae matacabi apopewerewerecaejawa pexainaewinexa. Biji rajane, wēnyapētaeya-exanaponaenajē taxajawabelia, pija-ángelēwijawabelia-ata, tatsitajētsinexa tajajiwicuenē. ⁶ Pajiwi muxuwojoruca, natojumetae pacuenia Espíritu Santo jumaitsi daxita Jesús pijajiwijawabelia», pacajaitsi xanē, taxainaenē siete pa-espíritubeje, Dioso pija-Espíritu, tacobenanucaenēnua siete patuluputo-beje —nejai Jesús, tatoyaquinaenexa ponē namatacaitorobaponapona Jesús pijajiwi Sardis tomarata.

Mapacueniaje Wajatuxanenē Jesús itoroba, Juan petoyaquinaenexa

Jesús pijajiwi Filadelfia tomarata penamatacaitorobinējawabelia

⁷ Jesús icatsia nejumaitsi:

—¡Toyaquinare tajajiwi penamatacaitorobinējawabelia, Filadelfia^a tomarata peponaponaenē, pijajiwi yajawa, neyapētaeya-exanaenexa tacatsipaebicuenia!

s 3:4 penaxatabijawa apopebijianaewi: Mapanacuapijiwije penajamatabēxainaecuenia, pibisiacuenē apo-exanae, apojumexaniatae itsaliwaisi Dioso peliawaisiwecua, apona-ewetsi-ata pijanacuapijiwi pena-ewetsicuenia Diosowecua. **t 3:4 naxatabiana penioponaejawanē:** Bajayatami, Romano nacuapijiwi pecuene-amoneyabicujinae itsanacuanēpijiwi, bajarapamonae desfilecuenia barējunua ayajamatabēcuenewi, petsitanaitajētsinexa pecuene-amoneyabiwicuenē jiwijawabelia. Nexata, bajarapamonaetuatuajēta, pepoRomano nacuapijiwi ayajamatabēcuenewi, peniopiajanē naxatatabiaba. Bajarapacuenē yabara Jesús cuenecataeya paeba peto-exanaenexa bajarapamonae. Peniojainaxatabijawa nacatocuenecatane pecuene-amoneyabijawa pibisiacuenē, itsamonae pewēnēxaniatsinexatsi bajaraxua yabara. **u 3:7 Filadelfia:** Filadelfiajume xaina mapejumaitsijamatabēcuenē: «pewēnajiwi namata-enetsia pena-asiwawi» pejai jume. Pamonae pecanaējētsiwi mapasiete pabitsaēto-beje Jesús pijajiwije, pecuene-itajētsijawa pacuenia bajarapamonae jinawanapaejitsia, pijamatacabianē canacujitsia (épocas – dispensaciones de la iglesia). Bajarapamonae canaējēta pacuenia Jesús pijajiwibitsaēto Filadelfia tomarata pejinawanapaei nacatocuenē-itajēta waxaitsi Jesús pijajiwitsi waja-exanawanapaecuenē, Jesús pepat-siwajēnaeya, tsipaji baja imoxoyo pewajēnae pijajiwi pepitsijawanexa (rpto), penaneconitsia-exanaewajēnaeya mapanacuapijiwije siete pawabejecuenia.

«Jesús, ponë pepopianeconijibinë, pexanabiabinëua pejumaitscuenia. Ponë xaina pepopeyanacua-ewetsinë David-pijinë pijallave.» Nexata, pacuenia David-pijinë tobaupata Jerusalén tomarapijibaupanë, itsamonae pejonenexa tomaraberena, bajarapacuenianua bajaraPonë tobaupataponaw pamonae jitsipa pejonejawa peyanacua-ewetsinacujawaberena. Wecuabau-paxatatabiabanua pamonae apojitsipae pejonejawa. Nexata, bajaraPonë itsa tobaupata itsajiwi pejonenexa, acuenebi itsajiwi pewecuaxatatsinexa icatsia. Itsa wecuabaupaxatatana, acuenebi pijinia itsajiwi pebaupatsinexa icatsia. BajarapaJesús pacajumaitsi mapacueniaje:

⁸»Yapëtaniji daxita xua pa-exanawanapame, bajaraxuata bepatacatsi-wajënaebaupatanutsi, jamatejema panenacuenebinexa patacatojitsipacuenia.^x Nexata, caejiwi-ata, apocuenecaëjëpaetsi papecacuenecaranatsijawa, patsiquiribitsaëtöyoxaemë. Pinijicuenesaë^y apopaxinae-atamë, itsiata xaniawaetsia panejumecowënëtanawanapame patacajumaitscuenia. Apopanayajawajunuaxainaemëua patajajiwicuenemë. ⁹iPanejumetaema! Itsamonae panijatamarata nataeyabiaba bejudiöwicuene. Itsiata, xanë juya taeyabiabajë Satanás pijajiwicuenia, tsipaji najumetsënëta bajaraxua yabara. Bajarapamonae, itsamatacabi, paxamë pane-itabarata pematabacabëta nubenaeya-exanaenajë, penatoyapëtaexae xanë pataca-siwacuene bajarapamonaewecua. ¹⁰Paxamë rabaja ajamatabëcuenesaëya paca-asaemë tsawanapae panejumexaniataejawa tajumeliwaisi, itsamonae pacabejiobia-exanabiabi-ata bajarapaliwaisi yabara. Bajaraxuata, pamatacabi piayaicuene copiapatsiana^z daxitanacuapijiwi petaeponaenexa, xanë juya, bajarapamatacabi paca-ewetsianatsi papeca-itsacueniabiyanüwa. Bajarapapiayaicuene tocopatsianajë daxitamapanacuanëpijiwi petaeponaenexa, xaniawaetsia tayapëtaenexa itsa najamatabëcuenepëñëyorotsijitsia pibisiacuene pexanaejawawecua, itsa jume, itsa catsitecawanapaejitsia.

v 3:7 *David-pijinë pijallave*: Nacayapëtaeya-exana pacuenia Jesús pepopewetsinë daxita athë-bëpijicuene, mapanacuapijicuene-ata. Nexata, tobaupatsijitsia pamonae jonejitsia pijanacua-jawabetsia, itawetsijitsianua itsamonae pejoneyaniwa. (Taema Apoc. 1:8.) Nacacujarubana pacuenia wajanamatawenonaejawata nacatöxanepana wajawajëtsinexa bajaraPonëjawabelia. w 3:7 *tobaupataponaw*: Jesús siwatëpae-ata daxitanacuanëpijiwi, Filadelfia tomarata pejinawanapaewi, pamonae judiöwi, Jesús pijajiwiutuajëta, apojitsipae pamonae apojudiöwi pebarënacae-tuatsinexatsi, najëpaeya siwanajamatabëcuenecopabi-ata Jesucristojawabelia. Nexata, yacara-natabiaba tsarena pejoneyaniwa. x 3:8 *patacatojitsipacuenia*: Itsamonae ayaibitsaëtö canaëjëta pacuenia Jesús yawenonaëjitsia pepaebinexa Jesús peliwaisi daxitajiwijawabelia, judiöwi, apojudiöwi-ata. (Taema 1Co 6:9, 2Co 2:12; Col. 4:3.) Itsamonae pijinia canaëjëta pacuenia Jesús itorba bajarapamonae pepaebinexa Jesús peliwaisi apojudüwüjawa, xua abaxë xaniawaetsia apo-exanae. Nexata, bajarapacuenia itsa exanaëjitsia, pewënajudiöwi to-acuenebitsi pecuene-caranatsijawa bajaraxua. y 3:8 *Pinijicuenesaë*: Xaniawaetsia aponayapëtae pajamatabëcuene yabara jumaitsi: Itsamonae canaëjëta caejiwiyobeje pecuenesaë yabara, itsamonae pijinia canaë-jëta jüwi pejamatabëcuene yabara, Diosojawabelia pajamatabëcuenesaëjawa. z 3:10 *pamatacabi piayaicuene copiapatsiana*: Ayaibitsaëtö Dioso peliwaisi pecujarubiwi canaëjëta pacuenia bajarapapiayaicuene nacayapëtaeya-exana Dioso penaneconitsia-exanaematacabi daxitanacuanëpijiwi, nacua pecopiarucaematacabita. Taema Dan. 12:1; Mt 24:4-28; Mc 13:5-23; 2Ts 2:1-12. Nexata, canaëjëta pacuenia Jesús pijajiwi Filadelfia tomarata, nacatocuenecatane pamonae Jesús pijajiwi, pejinawanapaewi imoxoyo pewajënae nacua pecopiarucaematacabinexa. Orijibia, canaëjëta Jesús pewetsijawa bajarapamonae pecuenecataejawa Jesús pejutsijawa pijajiwi mapanacuwecuae pacuenia jumaitsi 1Ts 4:16-17. Itsamonae pijinia canaëjëta bajarapapiayaicuene penajamatabëcuene-itajëtsijawa papiayaicuenejawanë copiapataponaw mapanacuapijiwüjawa-belia daxita pejinawanapaewi-epato mapanacuataje.

¹¹ Bepijiayo rabaja ponaenajë paxamëjawabereca. ¡Nexata, panewajë-naeyabelia panesiwa-itaxutuajamatejemamëre tsawanapae, itsajiwi-ata papecawecuapitsiyaniwa xua taxa Dioso pacarajutsiana athëbëtatsia coronajawa! ¹² Pajiwi ajamatabëcuenesaë pewajënaeyabelia taxa Dioso pitaxutuajamatejematsaponaponaejawa, ëpetëpaejawabelia, itsamonae bejibioa-exanae-atatsi, pecopatsia-exanaenexatsi, bajarapajiwi xanë toco-patsianajë peyaiyataetaxunae,^a taxa Dioso pijatemplobota athëbëtatsia. Bajarajotatsia yajawaponaponaena bajaraPonë, daxitamatacabijawabelianexa. Nexata, xanë wënëyaquinaenajë bajarapajiwi jawata taxa Dioso pewënë, pijatomarawënë-ata, pejanaJerusalén, patomara athëbëwetsica patsianica taxa Diosojawawetsica. Bajarapajiwi jawatanua, pejanawënë nawënëyaquinarutsianajë. ¹³ Pajiwi muxuwojoruca, natojumetae pacuenia Espíritu Santo jumaitsi daxita Jesús pijajiwi jawabelia^b, pacajaitsi xanë, pepota-aneconijibinë, ta-exanabiabinënuu tajumaitsicuenia. Taxainaenënuu pepopeyanacua-ewetsinë David-pijinë pijallave —nejai Jesús, tatoyaquinaenexa ponë namatacaitorobaponapona Jesús pijajiwi Filadelfia tomarata.

**Mapacueniaje Wajatuxanenë Jesús itoroba Juan petoyaquinaenexa
Jesús pijajiwi Laodicea tomarata penamatacaitorobinë jawabelia**

¹⁴ Jesús icatsia nejumaitsi:

—¡Toyaquinare tajajiwi penamatacaitorobinë jawabelia, Laodicea tomarata peponaponaenë, pijajiwi yajawa, neyapëtaeya-exanaenexa tacatsipaebicuenia!

«Jesús, ponë pecopiapatsia-exanaenë^b daxita Dioso najumecapanepaeya pejumaitsi jawanë. Ponë pexaniajainë tsabiabi, petsipaebijawata Dioso peli-waisi. Ponë pejamatabëcuenetanua,^c Dioso exana daxitacuen mapanacuataje. BajaraPonë pacajumaitsi mapacueniaje:

¹⁵ »Yapëtaniji daxita xua pa-exanawanapame. Paxamë perëbënaejamatabëcuenë panexainaewi^d xanë jawaberena, pataneto-exanawanapae jawatamë tajitsipaecuenë. Paxamë jawata, apocaxitajarabinë itsamonae

a 3:12 *peyaiyataetaxunae*: Wowaijumeta pitsipa: «*los haré columnas en el templo de mi Dios*», pejaicuenia. Salomón pexanetsitemplobota, baupawajënaeya nucabeje bitso pinijiwiria naesiturutobeje, ibotonëta pexanaejawa. Nexata, asaëyata pitaxutuajamatejemaxae Dioso, bajarapamonae cuenëjëpa piatajatsanucaenae naesituruto, tsipaji apocopabi pitaxutuajamatejemajawa Dioso, bejibioa-exanae-atatsi. Baitsi, pacuenia naesituruto apotafununaetsi jowibota, bajarajamatabëcuenë-itsi. Bajaraxuata, Jesús tocopatsijitsia ayajamatabëcuenewi petanexatsi, pewënëxaniatsinexatsi Dioso pijajiwitonëcuenia, pejanaJerusalén tomarapijiwi-cuenia. **b 3:14** *pecopiapatsia-exanaenë*: Wowaijumeta jumaitsi: «*el amén*», jiwijumeta «*Ponë Amén-pejainë*», jai. Bajarapacuenia itsa jumaitsi griegojume pecuaicuajaiwi, pitsapa «*bajara-itsi tsane*», itsa jume, «*bajarapacuenia xaniajai jitsipajë pecopiapatsi jawanexa*». Nexata, bajarapamonae-jume penawënërubijawata, yapëtanetsi pacuenia daxita xua Dioso najumecapanepaeya jumaitsi, bajaraxua copiapatabiaba Jesús pejamatabëcuenë. **c 3:14** *Ponë pejamatabëcuenetanua*: Taema Jn 1:1-3. **d 3:15** *perëbënaejamatabëcuenë panexainaewi*: ¿Detsa pitsiwi tsitatsi perëbënaejamatabëcuenë pexainaewi Jesús-jawaberena? **1)** Pamonaë apo-asiwa Dioso peli-waisi daxita pejamatabë-ëthëto jawawetsina, **2)** Pamonaë apocuenë-itawetsi itsajiwi pibisiacuenë pexanaeyaniwa, itsa jume, apo-ajamatabëcuenesaëya-exanaetsi Dioso pejitsipaecuenia peponaponaenexa, **3)** Pamonaë aponajamatabëcuenecataitsi pibisiacuenë pexanaejawa, xuanë tsitabeweliatsi pibisiacuenë, **4)** Pamonaë pijacuata na-eweta Diosonejewa ayajawa pecobecowë pexainaexae, pexaniaawajinua peyapëtaexae pena-ewetsinexa. Baitsi, pamonaë itaxutejema jinawanapa nacuenecanaëjëtsinejewa xua yabara Dioso itoya, xua-ata Dioso tsitaxanepanatsi.

piatajujamatabëcuene pexainaewi^e xanëjawaberena, tsipaji caejiwi-ata apo-exanaponaponaë tajitsipaecuenia bitso tane-asiwajamatabëcuene. Apocaxitajarabinëua itsamonaë, pecainaëjamatabëcuene pexainaewi^f xanëjawaberena, tsipaji caejiwi-ata apo-exanaponaponaë tajitsipaecuenia bitso yayiataeya tanecujunawijamatabëcuene. Bitso jitsipajë^g picani ayaicuenia patane-asiwajawamë, ita jume, patanecujunawijawamë. Itsiata, paxamë saya jemacuenia^h tajitsipaecuenie paneto-exanawanapame. ¹⁶Perëbënaëjamatabëcuene panexainaexaë xanëjawaberena, pacanawecuatsatsianatsi. Baitsi, pacuenia mera pejitsipaejiwi perëbënaëmera apotsixanepanaetsi piapaenexa, nexata nawecuasuba apopecainaexaë. Pacuenianua piatajuranë, pecainaecujinaë apoxanepanaë piapaejawa, nexata ëpexuabinexa, bajarapacuenia imoxoyo pewajënaë patacanawecuaxuabinexaⁱ patacayacabiwicuenia, tsipaji apojitsipaeⁿ pacuenia bëpënaë pajamatabëcuene-itsimë tsawanapae, xanë, tajacuene-ata yabara. Baitsi, apojitsipaeⁿ beweliacuenia patanejitsipaejawamë. ¹⁷Paxamë panasiwajamatabëjumaitsimë tsa-biabi: 'Paxanë baja cajena bitso daxitacuene pataxainaewi^f. Pexaniacuenia panetopitsapabiaba patanacuenebijawanë, pataxainaenexa. Nexata, itsacuenejawa-ata apopanetosajinaë patanamatawenonaëjawanë', panasiwajamatabëjamë tsabiabi. Bajarapacuenia panasiwajamatabë-itsi-atamë,

e 3:15 *piatajujamatabëcuene pexainaewi*: Taema Rom. 12:11. «¡Paca-asaëmëre tsawanapae! ¡Daxita panejamatabëcuenesaëta patonacuenebabiabare Dioso pijacuene!». ¡Pagriegojumeyo juca, «paca-asaëmëre!» Rom. 12:11, jëpa piatajujamatabëcuene Apoc. 13:15. Nexata, pamonae bepajamatabëcuenetajuiw Diosojawabelia najamatabëcuene-itajëtabiaba bitso piasiwajawa Dioso, pejitsipaecuenia pexanawanapaejawata, pitaxutuajamatejematsabiabijawatanua daxitacuene yabara. Orijibia, wajunupaebiaba Jesús peliwaitsi itsamonaëjawabelia, piasiwajamatabëcuene pijatuxanenë Jesús. Muxujobabiabanua itsamonaë Jesús pijajiwi, pibisiacuene pexanaeyaniwa. **f 3:15** *pecainaëjamatabëcuene pexainaewi*: Pamonae bepejamatabëcuene-cainaewi Diosojawabelia, jemacuenia taeyabiaba Dioso peliwaitsi. Baitsi, pijasalinailiwaitsi tsitamamatojëpatsi Dioso peliwaitsi. Pejumecowënëtsijawata Dioso, bajarapacuenia exana pecunawixae. Bajarapamonae tsitanamatamotatsi pejumecowënëtsicuene, pexanaecuenie-ata, pejumexaniataëjawawecua. Nexata, culto pexanaëjawata catsitecabiaba, pacuenia jumaitsi pecuene-itajëtsibaxutota peyapëta-ya-exanaecuenia, asiwanejewa Dioso. Orijibia, apowajunupaebi itsamonaëjawabelia Jesús peliwaitsi. Apocuene-itawetsi itsamonaë Jesús pijajiwi pibisiacuene pexanaeyaniwa. Apo-ajamatabëcuenesaëya-exanaenua Jesús pijajiwi, pesiwajamatabëcuenebarëyanexa Dioso pijacuene pexanaëjawata. **g 3:15** *Bitso jitsipajë*: Pagriegojume pajutajë «jitsipajë picani» bajarapajume nacayapëtaëya-exana «bajarapacuenia Jesús jitsipae-ata, yapëtae apopeto-exanaëjawanexatsi». Bajarapamonae bitso ita asiwa tsipae Dioso, pexanawanapaenexa pejitsipaecuenia, nexata Jesús cuenecaëjëpaejitsipatsi pexaniacuenia peyawenonaenexatsi. Itsacuene-itoya tsipae Dioso, nexata Jesús naneconitsia-exanaëjitsipa. Itsiata, bajarapamonae jemacuenia exanabiaba. **h 3:15** *jemacuenia*: Xua exanawanapa natocanaëjëta bajara-ëpamonaenexa. Nexata, nasiwajamatabëcuenebarëya tsabiabi pijacuata pexanaëjawanë yabara. Nawajunupaebiabiaba itsamonaëjawabelia xua to-exana Dioso, bajarapamonae juya bepexaniajamatabëcuenewi petaenexatsi. Cuenejëpa pamonae culto taeyabiaba, pewënjajiwi asiwaya petaenexatsi, siwanajamatabëcueneocopatsinejewa Jesucristojawabelia, penecanimatamot-sinëtsi, pamonaenua napatabiaba cultota penaxëanaenexa, asiwanejewa Ponë yabara tonaxëana, saya peracatsicuene petsimuxuxanepanaëxaetsi. **i 3:16** *patacanawecuaxuabinexa*: Itsamonaë canaëjëta Jesús apopeyawenonaëjawanexa. Itsamonaë pijinia, canaëjëta Jesús penaneconitsia-exanaenexa, pacuenia jumaitsi Lev. 18:24-28. **j 3:17** *bitso daxitacuene pataxainaewi*: Laodicea tomarapijiwi bitso palata pexainaewi. Bajaraxuata, itsamonaë canaëjëta pacuenia Jesús pijajiwi siwarberëya tsabiabi pecobecowë yabara, Dioso pijacuenewecua. Itsamonaë pijinia, canaëjëta itsacuene. Baitsi, Jesús pejumaitsi xae bajarapamonae bepejamatabëcuenebënaewi Dioso pijacuene yabara, nexata jamatabëcuenenawëxaniabiaya natocanaëjëtabiaba bitso peyapëtaewi Dioso pijacuene.

apopanatoyapêtaemë, pacuenia xanë taitabarata bitso apopanexainaewi,^k bepanejioibiwi,^l bepâne-itaxutotsēcēnaewi,^m bepanejumasajinaewi-ata.ⁿ

¹⁸ Bajaraxuata, pacamuxujiobatsi mapacueniaje: ¡Xanëjawaberena panewa-jëre bitso penamatamotsijawanë, bepexaniawiria-oronani pesetsijawanë! Nexata jane baja, taitabarata pepopanexainaewi tsane. ¡Panewajërenua penioponaenaxatatsijawa^o panenaxatatsinexa, panenaperabēcāranatsine-xanua! Nexata jane baja, apopa-auramë tsane taitabarata. Panewajërenua pane-itaxutotsēcēnaewaë, panenaitaxutowaëbinexa. Bajarapacuenia xania-waetsia panatsiwajënaetaename, tajitsipaecuenia panejinawanapaenexa. ¹⁹ ¡Xania baja tsane, tsipaji raja xanë tacuene-itawetsinë, tananeconitsia-exanaenënuā pamonaē asiwanë!^p ¡Nexata, panajamatabēcuenepēñeyo-rore xanëjawaberena, jemacuenia panejinawanapaejawawecua, asaëyata patanejumecowēñētsinexamë! ²⁰ ¡Panejumetaema! Xanë raja pacajunatap-onatsi^q panijabobaupajawata, patanetobaupatsinexamë. Nexata, pajiwi nejumetane, netobaupatsi tajonenexa pijaboyalia, tabarēcuaicuajainexa, tayajawaxaenexanua, bitso tayapētaenēcuenia bajarapabopijjinë. ²¹ Pajiwi ajamatabēcuenesaë pewajënaeyabelia taxa Dioso pitaxutuajamatejemat-saponaponaewi, ēpetēpaejawabelia, itsamonae bejiobia-exanae-atatsi, pecopatsia-exanaenexatsi, nexata, xanë, tocopatsianajë bajarapajiwi tamu-xuneneta pena-ecaenexa tajatronojawata, nacua tayajawa-ewetsinexa. Bajarapajiwi peca-asaëxae tanejumexaniataewi, itsamonae bejiobia-exanae-atatsi, pacuenia xanë casaenë tajumecowēñētsijawa Dioso, jiwi

k 3:17 apopanexainaewi: Bajarapamonae apopejamatabēcueneliwaisinaweretsixae Dioso pijacue-nejawata, bitso siwajamatabēcuenēbarēya pecobecowējawanë, nasiwanajamatabēcuenēbarēya-nua Dioso peto-exanaejawanë yabara. **l 3:17 bepanejioibiwi:** Bajarapamonae nawitsia xainae-ata mapanacupijijawanëje, bitso bepejiobiwi Dioso pejitsipaecuenējanë pexanaenexa. Baitsi, Dioso pejitsipaecue exanae-ata, bajarapacuenia exana itaxutuajamatejemanejewa, Dioso peyawenonāenexatsi, peyapētaeya-exanaenexatsi pacuenia be-exana, pesiwabarēyaxae palata Dioso pijacuenewecua, itsa jume, pesiwabarēyaxae natsiquejemaliwaisianë bepejanaliwaisi peyapētaewicue, yayataenejewa Dioso peliwaishi, Dioso tsitatsi bepejiobiwi. **m 3:17 bepâne-itaxutotsēcēnaewi:** Bajarapamonae najēpaeya pejumexaniataexae pijasalinailiwaishi, Dioso peli-waishi yajawa, bepitaaxutotsēcēnaewi Dioso pitabarata. Baitsi, xaniawaetsia aponatsiwajënaetae pematawaquetsinexa pibisiacue, Dioso apopejitsipaecue pexanaeyaniwa. Aponatsiwajë-naetaenua, pitapetsinexa Dioso pejitsipaecue pexanaenexa, pitapetsiyaniwa dowathi pejitsi-paecue. Bajarapamonae, bewelia piasiwaxae Dioso peliwaishi, aponatoyorobabiabi, peyapē-tanexa xua pexaniacue pexanaejawanexa. **n 3:17 bepanejumasajinaewi:** Bajarapamonae canaējëta Dioso aneconihibia petaejawanexatsi, pexaniacue peto-exanabiabijawata. Nexata, bijaya tane Dioso aneconihibia petaejawatsi, Cristo pejamatabēcueneta. Bajaraxuata, bajarapamonae Cristo bepenaxatatsicue apoxinae. Nexata, pejumasaajinaewi Dioso pitabarata, tsiteca penaneconitsia-exanaenexatsi pijaneconijamatabēcue. **o 3:18 penioponaenaxatatsi-jawa:** Peniojaipana nacatocuenecatane Dioso planeconijibicue, Cristo-ata planeconijibicue. Nexata, itsa siwanajamatabēcuenecopatatsi Jesucristojawabelia, wajanacaneconimatamotsinë, Dioso nacawecua-ajibia-exana daxita wajaneconi, aneconihibia wajanacataenexa; bewajana-cajamatabēcuenexatatsijawa Jesús planeconijibicue. 1Co 1:30; 2Co 5:21; Flp. 3:9. Juya, papexaniacue waxaitsi exanatsi wajuata, Dioso tsitatsi bepiaxuira-esetojawanë. Isa. 64:6. **p 3:19 pamonaē asiwanë:** Taema Prov. 3:12; Heb. 12:6. **q 3:20 pacajunataponatsi:** Jesús pijajiwi-bitsaëto tane bepibocuenia. Nexata, Jesús pijajiwibitsaëto Laodicea tomarata bitso pexinae-wixae, natocanaējëta apopenamatawenonaewi Dioso. Biji rajane, jamatabēcuenē-enabiabatsi pijacuenējanë pexanaenexa. Bajaraxuata, Jesús bewayafowerena pejunatanucaenë, pijajiwi-jawabelia, petobaupatsinexatsi. Jesús picani pepopijabo, itsiata apocuenēcaējēpaetsi pejanejawa peyajawanexa pijajiwi, tsipaji bajarapamonae jamatabēcue-enatsi mapanacupijijawanëje, Dioso peliwaishiwecua.

nebejiobia-exanae-ata, nexata bajarapajiwi tocopatsianajë pe-ecaenexa tajatronojawata, pacuenia baja aeconoxae xanë yajawa-ecajë taxa pijatro-nojawata. ²² Pajiwi muxuwojoruca, natojumetae pacuenia Espiritu Santo jumaitsi daxita Jesús pijajiwijawabelia», pacajaitsi, xanë, tacopiapatsia-exanaenë daxita taxa, Dioso, najumecapanepaeya pejumaitsiawanë —nejai Jesús, tatoyaquinaenexa ponë namatacaitorobaponapona Jesús pijajiwi Lao-dicea tomarata.

Pacuenia Juan tane Dioso pijajiwi athëbëtatsia, yabara peliwaissi

4 ¹ Bajarapacuenia tane-itorobicujinae tatoyaquinaenexa, icatsia taniji penabaupatsijawa itaboxo athëbëtatsia, itsatusatojawabetsia tataenexa. Ponë baja copiaya jumetaniji' pecuaicuaijajawata, betrompetajumecuenia, bajaraponë nejumaitsi mapacueniaje:

—Junaimina xanëjawabetsina. Nexata, catsitajëtsianatsi maxuanëcujinae pacuenia bajarapanacuatareca pewajënaeyabelia pepacuenie copiapatapo-naejitsia —nejai.

² Nexata, bajarapaepatota caecuenia nayapëtaniji tanucaejawa athëbëtatsia, Espiritu Santo pesaëta. Bajarajota taniji tronowënëjawa. Bajarapatronota Dioso taeyetajë,^s daxitacuenie peyanacua-ewetsinëcuenia. ³ Bajaraponë, daxitanë, bitso perabëniweniwenä. Pacuenia cotia-itsi penamatamotsi-ibotonë jaspewënë iboto,^t cornalinawënë iboto-ata, bajaraperabëcotia-itsi. Bajarapatrono matatoyorotsia taenutajë arawalibo, peraënaecotia pexainae-jawa, pacuenia esmeraldawënë iboto-itsi. ⁴ Bajarapatrono matatoyorotsia, taenubajënua veinticuatro patronobeje, itsajota ecapona cae-ancianonë canacujitsia. Bajarapa-ancianowi naxatabena penioponaejawanë. Orona-nitota pexanaecoronajawanë mata-ena. ⁵ Dioso pe-ecaetronojawawerena yamaxë binebinejai. Najumetajunujunua-ata. ^u Siete xuabeje pitayotanubenaejawanë taenubajë bajarapatrono-itabarata. Bajaraxuanë mapajamatabëcueneliwaissi xainaje: siete pa-espíritubeje,^v Dioso pijajawanë pecanacuenebinea. ⁶ Bajarapatrono-itabarata, taeyetajënua bemanuamene picani. Itsiata baitsi jane, pacuenia vidriojawa ataja, nasabanua, bajarapitsicueniejawa.

Bajarapatronojawa matatoyorotsia taenubajë cuatro ponëbeje pitothiawi, ayainëanë. Bajarapamonae pitabarayareca, pejumareca-ata, itaxutorubena-ponareca. ⁷ Copiayanë, benewëthë petsobianë. Cotocaewinë pijinia, betoro. Acueyabinë pijinia, bejiwi-itabaranë. Cuatronë pijinia, jëpa becotsala

r 4:1 *Ponë baja copiaya jumetaniji:* Bajaraponë tsaena Cristo. Taema Apoc. 1:10. **s 4:2** *Dioso taeyetajë:* Bajarapatronojawata pe-ecaexae, nacayapëtaeya-exana Dioso peyanacua-ewetsinëcuenia penaneconitsia-exanaenexa mapanacuapijiwije, pibisiacuenie pexanawanapaewi. Taema Sal. 9:7; Dan. 7:9, 13-14. **t 4:3** *cotia-itsi ... jaspewënë iboto:* Jaspe-iboto xaina apocawiriawecolor-jawanë. Itsajawata petsobijawa, pewayanaejawa, peraënaejawa, pasaë jaijawanua. Bajarapajaspe-iboto nacatocuenecatane tsaena Dioso bitso pexaniajamatabëcuenenëcuenie. Cornalina-iboto itsamonaë wënëruba rubí-iboto. Bajarapa-iboto penasabitsobiacotia xainabiaba. Bajarapacornalina-iboto nacatocuenecatane Dioso piatajumatatabëcuenie, pebara-anaepanaejamatabëcuenie daxita pibisiacuenie pexanaewijawabelia. **u 4:5** *yamaxë binebinejai. Najumetajunujunua-ata:* Nacayapëtaeya-exana imoxoyo pewajënae Dioso penaneconitsia-exanaenexa mapanacuapijiwije. **v 4:5** *siete pa-espíritubeje:* Itsamonae canaëjëta pacuenia bajarapasiete pa-espíritubeje nacatocuenecatane daxitacuenewiria pesaë pexinaejawa Espiritu Santo, itsa jume, siete pacuenebeje xaina penacuenebinea. Itsamonae pijinia canaëjëta siete ponëbeje ángelewí yabara. Taema panota ruca Apoc. 1:4 pebëxëpanayoy.

pepunanajetarucaenē. ⁸Papitothiawi taniji, caenē canacujitsia xainapona seis pacorofetobeje. Pecorofetonē jumawelia, bēxēpanawerena-ata itaxutorubenaponareca. Matabajibebi, merawijebi-ata, apocopatanubenaē pejumaitsanubenaējawa Diosojawabelia:

«¡Pepopetuxanenē Dioso, bitso raja Xamē peponianeconijibinē daxitawecua! ¡Ayaijamatabēcuenenēmēnua daxitawecua, daxitacuenē nexanaenexa! Xamē baja cajena neponaponaenē, daxitacuenē ne-exanaewajēnaeya. Ajena mapamatacabita-ata abaxē ponaponame. Daxitamatacabijawabelianexa-ata tsiteca neponaponaenē tsane», jai tsanubenaē bajarapamonae wēnēxaniatsiaya Diosojawabelia.

⁹Bajarapacuenia, caewēnēxaniataponae canacujitsia, bajarapacuatro ponēbeje, pitothiawi, pexaniajamatabēcuenē rajutapona Diosojawabelia. Wēnēxaniatanua daxitawecua ayaijamatabēcuenenē yabara. Bajarapacuenia pejumaitsiabiabijawata Diosojawabelia, tronota pe-ecaenē, daxitamatacabijawabelianexa peponaponaenē, ¹⁰bajarapijinia paepatota, veinticuatro ponēbeje ancianowi-ata yayiataeya pematabacabēta tonubenabiaba Dioso pitabarata, daxitamatacabijawabelianexa peponaponaenē. Orijiabia, Dioso pijatronojawabelia topenetabiabalia pijacoronanē. Jumaitsinua tsabiabi bajaPonējawabelia:

¹¹«Xanepana rabaja daxitajiwi pecawēnēxaniataponaejawa Petuxanenēmē, patajaDiosomē, nexainaenē neniweniwenaeacotia. Ayaijamatabēcuenenēmē. Pecayaiyataenē. Niacuenesaenē, tsipaji baja daxitacuenē nexanaenē. Nejitsipaecuenia daxitacuenē exaname. Nexata, itsacuenejawayo-ata aponaitajētsi xamē exanaenejewamē», jai tsanubenaē ancianowi Diosojawabelia, pewēnēxaniatsijawata.

**Pacuenia Juan athēbētatsia cobetaeyeta Dioso
pequionaecuyalatobaxuto peca-ecaejawa, yabara peliwaissi**

5 ¹Bajaraxuacujinae, athēbētatsia taeyetajē Dioso, tronota pequionaecuyalatobaxuto pecobena-ecaejawa pecujanenia. Bajarapabaxuto peboxowerena, pejumawelia-ata, xaina peyaquinae-itane. Siete pasellotabeje^w upicatsanaruba. ²Nexata, taenutajē bitso piacuenesaē-ángelnē. Bajaronē pinijijumeta jumaitsi mapacueniaje:

—¿Jipatsa meta, Dioso petocopatsixaetsi, cuenecaējēpatsi bajarapabaxuto piupicatsanarubiselloyawanē pesaracaponaenexa, pebaxupatsinexa? —jai.

³Itsiaa baitsi jane, ajibi caejiwi-ata, Dioso petocopatsijiwiitsi, athēbēpijiwi, mapanacuapijiwi, petēpaewimi-ata, bajarapabaxuto piupicatsanarubiselloyawanē pesaracaponaenexa, pebaxupatsinexa, bēpēnē pa-itane rubena petaenexa. ⁴Nexata, xanē bajaraxua itsa taniji, bitso cajena nuajē, tsipaji baja ajibi caejiwiyo-ata, Dioso petocopatsijiwiitsi, bajarapaquionaecuyalatobaxuto piupicatsanarubiselloyawanē pesaracaponaenexa, pelebinexa. ⁵Itsiaa, itsanē ancianowiyajuwēnēnē nejumaitsi:

w 5:1 *siete pasellotabeje*: Bajayatami, jiwi apoxainae sobrejawanē, pitorobinexa peyaquinaebaxutonē. Nexata, xua toyaquina itsamonae, pitorobiwajēnaeya, upicatsanabiaba bevelananijawanēta. Itsa abaxē naniyacueyacueca, cacuetsana pija-anillota, bajarapajumepe-itaneto penacopatsinexa, peyapētaeya-exanaenexa itsamonae apoplebijawa namuto-epatua. Bajarapapecacuetsanaejawanē wēnērubiabiaba «sello».

—jPëtsa baja nuame, tsipaji raja caenë, Dioso tocopatatsi Judápijinë pemomoxibitsaëtöyajuwënë, bajarapabaxuto pequionaejawa piupicatsanarubisellojawanë pesaracaponae nexa, pebaxupatsinexa! Bajaraponë piasaenë bitso, Judápijinë pemomoxi pijaLeón,* peyanacua-ewetsicuene yabara, nacua-ewetsinëmi David-pijinë pemomoxiyajuwënë-ata. Pejamatábëcuene-amoneyabixae^x baja daxita pijawajabitsaëwi, Dioso tocopatatsi bajarapacuyalotobaxuto, piupicatsanarubisellojawanë pesaracaponae nexa —nejai ancianowiyajuwënë Jesucristo yabara.

⁶Nexata jane baja, Corderonë^z taenutajë, penucaenë trono pitabarata, veinticuatro ponëbeje ancianowi, cuatro ponëbeje pitothiawi pitabarata-ata. PaCorderonë taenutajë nayapëtane pebeyaxuabinëmitsicuene, jiwi pijaneconi yabara, tsipaji pewajënë xaina peperabëtota. BajaraPonë xaina siete pamataetobeje, siete pijinia pa-itaxutobeje. Bajarapasiete pa-itaxutobeje xaina mapajamatábëcueneliwaisije: siete pa-esprítubeje,^a Dioso pijajawanë pecanacue-nebinexa. Bajaraxuanë Dioso baja itoroba daxitanacuanëjawa. ⁷Nexata jane baja, Corderonë cujitalalia Dioso, ponë cobena-eca pecujanenia tronota, pequionaecuyalotobaxuto. Wecupita jane baja bajarapabaxuto. ⁸Paepatota wecupita bajarapabaxuto, nexata cuatro ponëbeje pitothiawi, veinticuatro ponëbeje ancianowi yajawa, bajaraPonë pitabarata pematabacabëta tonubenajunua. Cae-anciano canacujitsia saicaya xainapona pija-arpa. Caponanua pewënëbi petuxujuwi-inciensopërëjawanë, oronanitota pexanaecopajawanëta. Bajarapa-inciensopërëjawanë xaina mapajamatábëcueneliwaisije: Jesús pijajiwi pewajëtaponaejawami Diosojawabelia. ⁹Nexata, cuatro ponëbeje pitothiawi, veinticuatro ponëbeje ancianowi yajawa, naxëana Corderojawabelia mapapejanawajije. Penaxëanaejawata jumaitsi mapacueniaje:

«Xamë rabaja, caenëmë, Dioso catocopata nepitsinexa mapacuyalotobaxutoje, piupicatsanarubisellojawanë nesaracaponae nexa-ata, nebaxupatsinexa. Bajarapacuenia catocopata, tsipaji baja cabeyaxuaba, neneconimatamotsinexa daxita jiwi pijaneconi. Nejanarunaejawata tomatamotame baja pijaneconi daxitawiriawi, daxitawirijumewi, daxitanacuanëpijiwi-ata, tsiquirinacuaxipijiwi, pecunuanacuanëpijiwi-ata, penaexanaenexa Dioso pijajiwi.

¹⁰Daxita necomuatsiwi, exaname baja Dioso pijajiwinexa, bajaraPonë peyanacua-ewetsiwinexa. Exanamenua baja sacerdotewi, petonacuenebinexa Dioso pejitsipaecuenia. Bajarapamonae tocopatsianamenua baja, daxitanacuanëpijiwi pewetsiwinexa», jai cuatro ponëbeje pitothiawi, ancianowi yajawa Corderonëjawabelia, penaxëanaejawata mapapejanawajije.

x 5:5 *Judápijinë pemomoxi pijaLeón*: Bitso piacuenesaenëxae, peyaiyataecuene pexainaejawa yabaranua, jiwi tocaëjëtabiaba león-monae (newëthë pinijiwiria petsobiawi) bepewetsinë tsaponaponae daxita unupijiwi. Nexata, ita wënëruba Cristo Judápijinë pemomoxi pija-león, nacayapëtaeya-exana pacuenia Cristo, Judápijinë pemomoxiyajuwënë, nacopata pepopeyanacua-ewetsinënexa daxita mapanacuapijiwije, pacuenia león yanacua-eweta daxita mapanacuapiji-unupijiwije. y 5:5 *pejamatábëcuene-amoneyabixae*: Taema Apoc. 3:21; Jn 16:33. z 5:6 *Corderonë*: Bajaraponë Jesucristo. Taema Jn 1:29, 36. a 5:6 *siete pa-esprítubeje*: Taema panota ruca Apoc. 1:4 pebëxëpanayo.

¹¹ Nexata, itsa naëcotajë trono matatoyorotsia. Bajarajota taniji ayaibit-saëtoxaneto ángelewi, peyajawanubenaejawa cuatro ponëbeje pitothiawi, veinticuatro ponëbeje ancianowi-ata. Bajarapa-ánglewi aponamata-ëjëtsicapanepaetsi, tsipaji millones, pamillones-beje pematatsënëa. Nexata, jumetanijnua penaxëanaejawa. ¹² Ayaijumeta, becaejumecuenia, naxëana-nubena mapacueniaje:

«BajarapaCorderonë picani beyaxuabatsi, jiwi pijaneconi yabara. Bajaraxuata, Dioso tocopatatsi bitso ayaijamatabëcuenenënexa, pinijicuenesaë pexainaenënexa, daxitacuene pexainaejawa pexainaenënexa, bitso pesiwacanaëjëtsicuene pexainaenënexa, pinijisaë pexainaenënexa, peyaiyataecuenetsi pexainaenënexa, peniweniwnaëcota pexainaenënexa, daxita jiwi pewënëxaniatsinënexatsi-ata pexaniacuenia, bajarapecuene-itsinëxae», jai tsanubenaë ángelewi Corderonë yabara.

¹³ Nexata, jumetanijnua icatsia daxita Dioso pexanaewi, pamonaë athëbëpijiwi, mapa-ira matatsënëwewereca pejinawanapaewi, irabëxë-pana pejinawanapaewi, manuamenepijiwi-ata. Daxita bajarapamonaë penaxëanaejawata ayaijumeta jumaitsi Dioso, Jesús-beje yabara, mapacueniaje:

«Diosomë, tronota ne-ecaenë, xamë pijinia Corderonëmë, paxamëbejebawabelia toxanepanatsi daxita jiwi pexaniajamatabëcuene papecarajutsinexabeje, papecawënëxaniatsinexabejenua, bitso ayaijamatabëcuene panexainaenëxaebeje, peniweniwnaëcota panexainaexaëbeje, pinijicuenesaënua bitso panexainaexaëbeje. Bajarapajamatabëcuene raja, panejamatabëcuenetsitecaenëbeje daxitamatacabijawabelianexa», jai daxita Dioso pexanaewi petonaxaënaejawata, Dioso, Jesús-beje yabara.

¹⁴ Cuatro ponëbeje pitothiawi jumecanawiatsiaya jumaitsi tsaponae mapacueniaje: «¡Bajara-itsi tsane!», jai tsaponae. Veinticuatro ponëbeje pijinia ancianowi, asiwaya yaiyataeya, tonubenajunua pematabacabëta, Dioso, Corderonëbeje pitabarata.

Siete pasellobeje, yabara peliwaissi

6 ¹ Bajaraxuacujinae, taniji Corderonë pequionaecuyalatobaxuto^b pesarananucaejawa penamataxainaesello. Nexata, cuatro ponëbeje pitothiawiyajuwënënë, jumetaniji caenë pecuaicuaijajawa ayaijumeta, beyamaxë penajumetsicuenia. Bajaraponë jumaitsi: «¡Naxatsia!», jai caballojumata peponaenëjawabelia.

b 6:1 *pequionaecuyalatobaxuto*: Bajarapabaxutota xaina pacuenia Dioso, Jesús, Espíritu Santo-ata tsiwajënaecanaëjëta, nacua pexanaewajënaeya, penaneconitsia-exanaejawanexa mapanacuapijiwije, nacua pecopiarucaematacabita, apopesiwanajamatabëcuenecopabixae Jesucristojawabelia, pebejjobia-exanabiabixaenua pesiwanajamatabëcuenecopabiwi Diosojawabelia. Nexata, caesello canacujitsia pesaranaponaejawata, itajëta pona itsacuenia penaneconitsia-exanaponaejawanexa.

² Nexata, bajaraxuacujinae icatsia taniji perenajawa, penioponaecaballota peyanajetarucaenë.^c Bajaraponë cobena-eca bitsabi.^d Rajutatsi corona,^e penamataxatatsinexa. Bajaraxuacujinae, pona pijawajabitsaë pebarënenabexa. Nexata, pebarëna-bejawata cuene-amoneyabanajetaruca daxita pijawajabitsaëwi, pecuene-amoneyabijawabelia.

³ Bajaraxuacujinae, icatsia Corderonë sarananuca itsasello, pecotocaewi-jawa. Nexata, cuatro ponëbeje pitothiawiyajuwënë, icatsia itsanë jumetaniji: «¡Naxatsia!», pejajjawa.

⁴ Nexata, bajaraxuacujinae icatsia taniji perenajawa petsobiaballota peyanajetarucaenë.^f Bajaraponë rajutatsi piapia-espada. Tocopatatsinua pecopiarucaeya-exanaenexa mapanacuata jiwi xaniwaetsia pejinawanapaecuenemi. Jiwi jane baja namata-enetsia nabeya-exanaejitsia daxita nacuanëjawa.

⁵ Bajaraxuacujinae, icatsia Corderonë sarananuca itsasello, acueyabijawa. Nexata, cuatro ponëbeje pitothiawiyajuwënë, acueyabinë jumetaniji: «¡Naxatsia!», pejajjawa.

Nexata, bajaraxuacujinae, icatsia taniji perenajawa petsaebiacaballota^g peyanajetarucaenë. Bajaraponë cobena-eca pepesabapanaejawa. ⁶ Icatsia, jumetaniji cuatro ponëbeje pitothiawijawata pejumaitsjawa mapacueniaje: «Janibomatacabi, caedenariota^h comuatsiana saya caekilo trigoxu. Cebadaxuⁱ pijinia caëjëpaena pecomuatsinexa acueyabi pakilobeje. ¡Itsiata, pëtsa bijianame^j olivonaebacabonë, uvanaebacabonë, pematamojunaeyaniwa aceiteranë, vinoranë-ata!», pejajjawa.

⁷ Bajaraxuacujinae, icatsia Corderonë sarananuca itsasello, cuatrojawa. Nexata, cuatro ponëbeje pitothiawiyajuwënë, pecopiarucaenë, jane baja jumetaniji: «¡Naxatsia!», pejajjawa.

⁸ Nexata, bajaraxuacujinae icatsia taniji perenajawa pewayanaecaballota peyanajetarucaenë. Bajaraponë, pewënë Jiwi Petëpaecuenë. Ponë pijinia pënaponatsi wënërubatsi Hades, petëpaewi pejinawana-paenacua, pejaiwënë. Bajaraponëbeje Dioso tocopatsianatsibeje pebeya-exanaponaenexabeje daxita mapanacuajawaje jiwi ayaibitsaëtonëyajuwë-nëwi. Cuatro pajiwiweyajuwënëwi, caejiwi, beyaxuabia-exanaponaenabeje wajabitsaëcuenia, janibocuenia, piawitanecuenia-ata. Bajaraponëbeje

c 6:2 *penioponaecaballota peyanajetarucaenë*: Anticristonë tsaena. Taema Zac. 1:7-17; Dan. 9:26-27. Mapanacuapijiwe pijawajabitsaë canacuenëbabiaba penioponaepana, penajamatabëcuene-itajëtsinexa pejamatabëcueneexanepanaejawa pijawajabitsaëjawabelia.
d 6:2 *bitsabi*: Wënëjona bitsabi saya, xuatabotonënejewa. Bajaraxuata, jiwi canaëjëta pacuenia Anticristonë cuene-amoneyabiana peliwaitsa piatiobicuenia, jiwi bepejamatabëcueneexanepanaecuenia itajara pejinawanapaenexa. **e 6:2** *corona*: Najamatabëcuene-itajëta pepopeyanacua-ewetsinëcuene. **f 6:4** *petsobiaballota peyanajetarucaenë*: Petsobiaballo nacatocuenecatane jiwi pejunawia-exanaejawa, petëpaejawanua. **g 6:5** *petsaebiacaballota*: Petsaebiacaballo nacatocuenecatane janibomatacabi, itsajota ajibi bitso pexaejawa. **h 6:6** *caedenariota*: Caedenario matamojëpa caematacabi penacuenëbimatamo. **i 6:6** *cebadaxu*: Cebadaxu bewelaxu, trigoxuwecua. Nexata, pamonae pepobepejiobiwi canacuenëbabiaba cebadaxu, pexanaenexa pijapan-bëanë. Beweliacuenia cebadaxu petaexae, bajayatami pamonae palata pexainaewi ba-abatabiaba bajaraxua pijadajubijawabelia. **j 6:6** *pëtsa bijianame*: Bajarapajume bepitorobi-jawa janibomatacabiawabelia pebijianaeyaniwa panaejawanë itsajota jiwi cayujuca aceitera, pa-uvanaenëna itsajota jucabiaba vinora. Baitsi, bajarapamatacabita baja, jiwi namatawenona aceitera pesetsinexa, vinoranua pematajërëatsinexa piapaeranëjawabelia piacotsorotaneyaniwa.

pejamatabēcuenetanua, unupijinēanē piayainēanē pitsapaena, pebeyajeba-ponaenexa jiwi ayaibitsaētonē. Bajarapacuenia itsi tsane mapanacuataje, pamatacabi Dioso jiwi nananeconitsia-exanaena pibisiacuene pexanae-coni yabara.

⁹Bajaraxuacujinae, icatsia Corderonē sarananuca itsasello, cinco-jawa. Nexata, taeyejebajē daxita pamonaemi^k bajayata beyejebatsi Dioso pejumeliwaisi yabara, pebobenaejawa altar-jawabēxēpanata. Bajarapamonaemi beyejebatsi,^l piamatabēcuenesaēxae pewajēnaeyabelia jiwi petsipaebaponaejawa Dioso pejumeliwaisi. ¹⁰Daxita bajarapamonaemi Dioso jawabelia pinijijumeta jumaitsi tsanubenae: «Diosomē, ayaijamatabēcuenenēmē, caeto-ata pibisiacuene aponexanaenē, najumecapanepaeya nejumaitsicuenia-ata nexanabiabinē. ¿Detsa pamatacabibeje abaxē saica nenaneconitsia-exanaenexa mapanacuata pejinawanapaewije, pataneyamata-motsinexamē nejumaitsicuenia patanebeyebijamatabēcue?»^m jai tsanubenae petēpaewimi altar-jawabēxēpanata.

¹¹Nexata jane baja, bajarapamonaemi Dioso rajutatsi penioponaenaxatabijawanē.ⁿ Abaxē, Dioso itorobatsi bajarapamonaenacuera-ewetanubenaenexa, tsipaji abaxē saica itsamonaen Dioso pijajiwi, Jesucristo-ata petonacuenebiwi, pebeyebinxatsi Dioso peliwaisi yabara.

¹²Bajaraxuacujinae, icatsia Corderonē sarananuca itsasello, seis-jawa. Nexata, icatsia taniji bitso ira ayaicuenia penajēabijawa. Matacabipijijuameto bitso itaxutotsaebia,^o pacuenia itsi petsaebiapapaēbē-rēpana. Merawipijijuameto pijinia bitso itaxutotsobia,^p pacuenia itsi pejana. ¹³Nexata, tulupu irabetsica othopaicanua, pacuenia naecuai ba-othopaica, pinijijowibota naejawa pejēabijawata. ¹⁴Pacuenia cuyalato banaquionajunua piupi-isinaecujinae, bajarapacuenia daxita itaboxomi naquionajunua baja. Ajibi baja nexata itaboxo. Ira penajēabijamatabēcue-ne daxita petsutonēmi, petunaetonēmi-ata, natixiba pijataxunae-nēmiwecua. ¹⁵Bajarapacuenia petaejawata, mapanacuapijiwije namatayaba pecajunawi, ibowajuanējawa, ibotoxanetonētuaatjējawa-ata. Daxita mapanacuanējawaje jiwi pewetsiwi, ayaijamatabēcuenewi, bitso pecobecowē pexainaewi, wajabitsaē penamatacaitorobiwi, piacuenesaēwi, itsamonaejawabelia pecanajetsiwiitsi amoneya petonacuenebawanapaenexa, pamonaenua apopecanajetsiwiitsi, daxita bajarapamonaenamatayaba. ¹⁶Nexata, jumaitsi ibotsutonējawabelia, ibotoxanetonējawabelia-ata: «Panetsimata-othopare, patanematayatsinexamē Diosowecua, ponē eca tronota, Corderonēwecua-ata pinijicuenia patanenaneconitsia-exanaeyaniwa, patanebara-anaepanaexae pata-janeconi yabara, ¹⁷tsipaji baja, copiapata pinijicuenia Dioso jane baja

k 6:9 *pamonaemi*: Apotae peperabēto pexainaewicuenia. Tane tsaena bajarapamonaemi pejamatabēcue, itsa jume, piya-Espiritu meta. Matapania daxita Jesús pijajiwi namatacotsia-exanaenatsi petēpaejawawecua, itsa jume, rowialia ponaena Dioso pijanacuajawabetsia, bajarapamonaen xainaena pejanaperabēto. Taema 2Co 5:1-4. **l 6:9** *beyejebatsi*: Daxita bajarapabitsaēto cajunua pamonaen Abel-jawaweliacujinae beyajebatsi, pejumexaniataexae Dioso peliwaisi, pepaebixaenua bajarapaliwaisi itsamonaejawabelia. **m 6:10** *nejumaitsicowēya*: Taema Deut. 32:39-73, Lu 18:7-8. **n 6:11** *penioponaenaxatabijawanē*: Taema Apoc. 3:4-5. **o 6:12** *itaxutotsaebia*: Taema Isa. 13:10; Joel 2:10, 31; Mt 24:29. **p 6:12** *itaxutotsobia*: Taema Joel 2:31; 3:15.

penaneconitsia-exanaematacabinexa pijaneconi pexainaewi! Nexata, itsajiw-ata cajena apocuenecaējēpaetsi pepanepaejawa bajaraxuawecua», jai picani bajarapamonae.

**Juan tane athēbētatsia, pacuenia itsamatacabi itapa-itanerubijitsiatsi
144,000 ponēbeje, Israel nacuapijiwi, Dioso pijajiwixae**

7 ¹ Bajaraxuacujinae, taniji cuatro ponēbeje ángelewi, nacua mata-toyorotsia penubenaejawa, itsanē nortenenia, itsanē sur-nenia, itsanē orientenenia,^q itsanē occidentenenia. Caenē canacujitsia caranatanubena jowibo peponaeyaniwa, irajawa, manuamenejawa, naejawanējawa-ata pebijianaeyaniwa. ² Taniji icatsia itsa-ángelnē orientejawawetsina penajetarucaenē, itsawetsina pitsapa matacabipijijua-meto. Bajaraponē caponapona piasaenē Dioso pijasello, Dioso pijajiwipitapa-itanerubaponaenexa. Bajaraponē wawajai ayaijumeta cuatro pa-ángelnēbejajawabelia, pamonae Dioso tocopatatsi pebijianaenexa ira, manuamene-ata. Jumaitsi mapacueniaje: ³ «¡Pētsa abaxē jowibota pabijianame ira, manuamene, naejawanē-ata! Matapania baja Dioso pijajiwipijasellota paxanē pa-itapa-itanerubianajē, bajarajane pabijianaename», jai ángelnē, orientejawawetsina penajetarucaenē cuatro pa-ángelnēbejajawabelia.

⁴ Bajaraxuacujinae, jumetaniji ayaibitsaētozaneto Dioso pijasellota pitapa-itanerubijawatsi; ciento cuarenta y cuatro mil pajiwi-beje daxitata, Israel-pijinēmi pexi, doce ponēmibeje pemomoxiyajuwēnēwi. ⁵ Nexata, Dioso pijasellota itapa-itanerubatsi doce mil pajiwi-beje, Judápijinēmi pemomoxibitsaētoyajuwēnēwi, doce mil pijinia pajiwi-beje, Rubén-pijinēmi pemomoxibitsaētoyajuwēnēwi, doce mil pijinia pajiwi-beje, Gad-pijinēmi pemomoxibitsaētoyajuwēnēwi, ⁶ doce mil pijinia pajiwi-beje, Aser-pijinēmi pemomoxibitsaētoyajuwēnēwi, doce mil pijinia pajiwi-beje, Neftalípijinēmi pemomoxibitsaētoyajuwēnēwi, doce mil pijinia pajiwi-beje, Manasés-pijinēmi pemomoxibitsaētoyajuwēnēwi, ⁷ doce mil pijinia pajiwi-beje, Simeón-pijinēmi pemomoxibitsaētoyajuwēnēwi, doce mil pijinia pajiwi-beje, Levípijinēmi pemomoxibitsaētoyajuwēnēwi, doce mil pijinia pajiwi-beje, Isacar-pijinēmi pemomoxibitsaētoyajuwēnēwi, ⁸ doce mil pijinia pajiwi-beje, Zabulón-pijinēmi pemomoxibitsaētoyajuwēnēwi, doce mil pijinia pajiwi-beje, Josépijinēmi pemomoxibitsaētoyajuwēnēwi, doce mil pijinia pajiwi-beje, Benjamín-pijinēmi pemomoxibitsaētoyajuwēnēwi. Nexata, bajarapacuenia caejawata, Dioso pijasellota itapa-itanerubatsi ciento cuarenta y cuatro mil pajiwi-beje daxitata, Israel-pijinēmi pexi, doce ponēmibeje pemomoxiyajuwēnēwi.

**Pacuenia Juan athēbētatsia tane jiwi ayaibitsaētozanetonē,
penioponaejawanē penaxatabiwi, yabara peliwaissi**

⁹ Pitapa-itanerubenaecujinaetsi bajarapamonae, icatsia taniji jiwi ayabitsaētozanetonē, itsajiw-ata apopenamata-ējētsicapanepacuenia. Bajarapamonae daxitanacuanēpijiwi-yajuwēnēwi, daxitawiriawiyajuwēnēwi,

^q 7:1 orientenenia ... occidentenenia: Oriente raja pemutowetsina. Occidente pijinia waēwetsica.

daxitawiriajumewiyajuwënëwi-ata. Bajarapamonae nubena Dioso pe-ecaetrono pitabarata, Corderonë-ata pitabarata. Daxita bajarapamonae, ëpenioponaejawanë penaxatabiwi, cobenanubena benaxarebaxutonë,^r penajamatabëcuene-itajëtsinexa pesiwajamatabëcuenebarëyajawa bajaraPonëbejewabelia. ¹⁰Daxita bajarapajiwiwibitsaëttoxanetonë wawajai tsanubena ayaijumeta mapacueniaje:

«WajaDioso, tronota pe-ecaenë, Corderonë-ata, nacacapanepa
baja pibisiacuene waja-exanaeneconimiwecua», jai tsanubena
bajarapamonae.

¹¹Daxita pamonae trono matatoyorotsia nubena, ágelewibitsaëttoxaneto, cuatro ponëbeje pitothiawi, ancianowi-ata, daxita bajarapamonae irataenubenaeya bobena irata, Dioso pe-ecaetrono pitabarata, penajamatabëcuene-itajëtsinexa asiwaya peyaiyataejawa. Nexata, pirataenubenaejawata, pexaniajamatabëcuene rajutanubena Diosojawabelia mapacueniaje. ¹²Jumaitsi:

«¡Bajara-itsi tsane! PatajaDiosomë, daxita jiwi toxanepanatsi
pecawënëxaniatabibijawa, neniweniwenacotia
nexainaenë, daxitacuene neyapëtaenë, daxitajiwi
neyawenonaejamatabëcuene pecasiwajamatabëcuenebarëyanë,
neyaiyataecuene nexainaenë, niacuenesaenë
daxitamatacabijawabelianexa. Bajara-itsi tsane», jai tsanubena
irataeya Diosojawabelia.

¹³Nexata, itsanë, bajarapa-ancianowiyajuwënënenë, nejumaitsi:

—¿Detsa mapamonae, penioponaejawa penaxatabiwi? ¿Detsa werena pata bajarapamonae? —nejai bajaraponë.

¹⁴Xanë nexata jumaitsinë:

—Itsabo. Xamë raeta jane yapëtaneme —janë ancianonëjawabelia.

Nexata, bajaraponë nejumaitsi:

—Mara pamonaeye petëpaewimi nacua pecopiarucaewajënaeya, ayai-cuenia pebejiobia-exanaecujinaetsi.st Bajarapamonae siwanajamatabëcuenecopaba Corderonëjawabelia, nexata Dioso siwajamatabëcuenecaewatsi pijaneconimi baja. Bajarapacuenia pesiwanajamatabëcuenecopabixae, bepequiatsijawa penaxatabijawanë^u Corderonë pejanata, penaxatabinexa penioponaejawanë.

¹⁵Bajaraxuata, baja bajarapamonae nubena, Dioso pe-ecaetrono pitabarata. Copatsinejewa tonacuenebawanapa Dioso

r 7:9 *benaxarebaxutonë*: Wowaijumeta wënërubasaya palmawiriabotonë. Itsiata, Israel nacuata xainabiaba dátil-botonë, bajaraxuata cobenanubena tsaena dátil-baxutonë. **s 7:14** *ayai-cuenia pebejiobia-exanaecujinaetsi*: Taema Dan. 12:1; Mt 24:21; Mc 13:19; Apoc. 3:10, 6:17. Bajarapabejiobia-exanaecuene yabaracuaicuaijai pamatacabi Dioso naneconitsia-exanaena mapanacuapijiwiwe pijaneconi pejamatabëcuene, 7 pawalbejecuenia. Mapanacuapijiwiwe, pijaneconi pexainaewi, peyapëtaexae Dioso penaneconitsia-exanaponaejawatsi (Apoc. 6:17), juya bajarapamonae ayaicuenia bejiobia-exanaponaena pamonae siwanajamatabëcuenecopaba Diosojawabelia. **t 7:14** *petëpaewimi*: Itsamonae canaëjëta pejucaejawanexa «*pecanicabanubenaewimi*», pejaicuenia pejutsijawa, Mt 24:1-13-jawata pejumaitsicuenia. Itsiata, penubenaexae Dioso pijatrono pitabarata, panetsita petëpaewi. Taema Apoc. 7:15. **u 7:14** *penaxatabijawanë*: Bajarapamonae penaxatabijawanë nacatocuenecatane Dioso aneconijibia petaejawatsi Jesucristo pejamatabëcuene. Taema Flp. 3:9; 2Co 5:21; Tit. 3:5; Rom. 3:21-22. Taemanua Isa. 64:5c-6.

pijatemplobota. Dioso, ponë eca tronota, ewetsianatsi
peyajawajinawanapaexae.

¹⁶Nexata, bajarapamonae baja aponatoyapëtae tsane pïajanicuene,
mera-ata pejitsipaecuene. Icotia-ata apotsajawi tsanetsi. Icotia
piatajujawa-ata apojamatabë-itonotsi tsanetsi.

¹⁷Bajara-itsi tsane, tsipaji Corderonë, ponë nuca trono pitabarata,
xaniawaetsia ewetsianatsi bajarapamonae, pacuenia oveja
pewetsinë xaniawaetsia ba-eweta pija-ovejabitsaëto. Pacuenia
oveja pewetsinë mataponabiaba pija-ovejabitsaëto, irawetsina
pëpitsaparubenaemeranë perajutsinexa, bajarapacuenia Corderonë
mataponabiabiana jiwi pi-aitawaya-exanaemeranëjawabelia.”
Bajarapamonae jamatabëcuenebarëya tsawanapae tsane, Dioso
pïjanacuataatsia, tsipaji Dioso wecua-ajibia-exanaena daxita
penuecuene, —nejai ancianonë mapacueniaje.

Sietejawa sellojawa, yabara peliwaishi

8 ¹Icatsia, Corderonë sarananuca cuyalatobaxuto piupicatsatarutsi
siete sellojawa. Nexata jane baja, athëbëtaatsia ajumejibi tsarucae,”
bajaya-epatowajëto.

²Bajaraxuacujinae, icatsia tanihi siete ponëbeje ángelewi, Dioso pitaba-
rata penubenaewi. Bajarapamonae rajutatsi siete patrompetabeje.^x ³Icat-
sia, xuacujinae itsanë ángelnë najetaruca. Nucajopa altar-jawa pitabarata.
Cobenanuca oronanitota pexanaewaxiyo, inciensopërëjawanë, pawaxiyota
tajuitabiaba pitatsajawi-ita-irejumata. Nexata jane baja, rajutatsi ayaijawa
petuxujuwi-inciensopërëjawanë, bajarapa-inciensopërë petajuitsijawata,
petsëxë yajawatsiajitsia, Dioso pijajiwi pewajëtaponaejumenë Diosoja-
wabetsia. Bajaraxuanë buata altar-jumata, oronanitota pexanae-altar-
jawa, penucaejawa Dioso pe-ecaetrone pitabarata. ⁴Nexata jane baja,
ángelnë petajuitsijawata petuxujuwijawanë bajarapatsëxë, Dioso pija-
jiwi pewajëtaponaejumenëmi Diosojawabelia yajawa athëbëa bejunaya
altar-jawawetsia, Diosojawabetsia. ⁵¡Bajaraxuacujinae, ángelnë altar-
jumawecua pijawaxita nota pitatsajawi-ita-ire pewënëtsinexa! ¡Bajarapa-
itatsajawi-ita-ire pewënëtsiwaxi ënëtuatujëwecua othotajarabareca ira-
bereca! Nexata, yamaxë najumeta iratareca, binebinejainua. Iranë jane
baja ayaicuenia najëaba.

Siete patrompetabeje, yabara peliwaishi

⁶Bajaraxuacujinae jane baja, pasiete ponëbeje ángelewijawabelia raju-
tatsi trompetajawanë, bajarapamonae canaweretanubena pijatrompetanë
pe-obinexa.

v 7:17 *pi-aitawaya-exanaemeranëjawabelia*: Taema Apoc. 21:6; Jn 4:11-14; Jn 7:37-38.

w 8:1 *ajumejibi tsarucae*: Pacuenia jiwi pebenajacejawata ajumejibi tsarucae, bajarapacuenia
itsi Dioso pijanacuataatsia, itsa bajarapamonae tane pacuenia Dioso matatoxenetsia bejiobia-
exanaejitsia mapanacuapijiwiije, pijaneconijamatabëcuene. x 8:2 *siete patrompetabeje*: Bajaya-
tami pepopeyanacua-ewetsiwi pejumepaebiwi, trompeta obabiaba, pepaëbiwajënaeya reynë
pijaliwaishi.

⁷Nexata jane baja, penamataxainae-ángelnē oba pijatrompeta. Nexata, bitso pecainejebimatারেjetonē, granizowēnējawanē, isoto yajawa, pematjērēatsijawa pejanata, asaēyata othopareca irabereca. Nexata jane baja, bajaraxua pejamatabēcuenē, daxitanacuajawa ira ayaijawa yajuwēnētajua, naejawanē, pejuwijawanē yajawa. Caejawa tajua acueyabiyajuwēnējawa.⁷ Nacopata pijinia anijajawabeje tajuenējewa.

⁸Bajaraxuacujinae, icatsia pecotocaewi-ángelnē oba pijatrompeta. Nexata, taniji bepinijitsutoxaneto petajueyecaajawa. Bajaraxua asaēyata jopareca manuamenejawareca. Nexata, caetupa manuamenemi pejana naexana, acueyabiyajuwēnējawa. Nacopata pijinia anijatupamanuamenebeje pejana naexanaenejewa. ⁹Pamanuamene ēpejana tsarucae, bajarapamanuamene-pijidujauimi tēpa, perubenaebarcoxanetonēmi-ata napeneta. Pamanuamene pijinia pejananejewa nacopata, dujuai apotēpae, perubenaebarcoxanetonē-ata aponapenetsi.

¹⁰Bajaraxuacujinae, icatsia acueyabi-ángelnē oba pijatrompeta. Nexata, pinijituluputoxaneto bepiniji-isotocotiaxaneto petajuejawa, jopareca irabereca, mapanacuata perubenaemenianēmi, irawetsina mera pepitsaparubenaejawanēmi-ata, pebijianaenexa. Caejawa, menianēmi, mera irawetsina pepitsaparubenaejawanēmi-ata, bijiana acueyabiyajuwēnējawa. Nacopata pijinia, anijajawabeje bajarapamenianē mera irawetsina pepitsaparubenaejawanē-ata bijianaenejewa. ¹¹Patuluputo jopaica, pewēnē Ajenjo,⁸ piatsaxacuenē pejaiwēnē. Pamerajawareca jopareca bajarapatuluputo, bajarapamera atsaxa baja. Jiwi ayaibitsaētoxanetonē tēpa bajarapamera penatsi-apaexae.

¹²Bajaraxuacujinae, icatsia cuatro-ángelnē oba pijatrompeta. Nexata jane baja, itaxutobijiana matocabipijiuameto, merawipijiuameto, tuluputonē-ata. Nexata, caejawa pitaxutobijianaexae acueyabiyajuwēnējawa,⁹ bijiaya naitayota bajaraxuanē. Yajuwēnēnacopata pijinia anijajawabeje itaxutobijianaenejewa.

¹³Bajaraxuacujinae, icatsia taniji pepunanajetarucaenē becotsala. Bajara-ponē pepunanajerucaejawata, jiwi pecuaicuaijaicuenia jumaitsi tsanajetarucae ayaijumeta mapacueniaje: «¡Xania, xania, xania baja tsane! Pepacuenē to-abejetsi baja tsaponae tsane mapanacuapijiwije, itsa obiana trompeta acueyabi pa-ángel-nēbeje penacopabiwi. Bajarapamonae rabaja imoxoyo pewajēnae pe-obijawanexa,» jai tsanajetarucaae pepunanajetarucaenē.

y 8:7 Caejawa ... acueyabiyajuwēnējawa: Bajaraxua pitsapa wowaijumeta: «una tercera parte». z 8:11 Ajenjo: Bajaraxua naejawaxi pejuwijawanē picani, pewēnē. Bitso piatsaxanaexi. Nexata, tocuencataeyabiaba bajayanacuapijiwimi, bitso petsi-atanejawanētsi yabara, pibisiacuenia petocaējētsijawatsi peneconitsicuenē yabara, petsi-atsaxacuenetsi-ata yabara. Bajaraxuata, bajarapatuluputo cuencataeya wēnērua bajarapanaejawaxi pewēnēcuenia. a 8:12 caejawa ... pitaxutobijianaexae acueyabiyajuwēnējawa: Aponayapētae xua yabara jumaitsi. Itsamonae, ayaibitsaēto, canaējēta pacuenia matocabipijiuameto, merawipijiuameto-ata caeterceratupayao acotiajibi tsane, tulupu pijinia itaxupaena caeterceratupayowajēto. Itsiata, itsamonae canaējēta pacuenia matocabipijiuameto apo-itayotsi tsane 4 pahorabejecuenia, caematacabi canacujitsia. Bajarapacuenia pijinia merawipijiuameto, tulupu-ata apo-itayotsi tsane 4 pahorabejecuenia, caemerawi canacujitsia.

9¹ Bajaraxuacujinae, icatsia cinco-ángelnē oba pijatrompeta. Nexata, taniji ángelnē betuluputocuenia pejopaenēmitsica,^b athēbēwetsica irabetsica. Nexata, bajarapa-ángelnē rajutatsi^c pinijimēthēxanetopijillave.^d

² Nexata jane baja, bajarapallaveta bajaraponē wēpacasarana, bajarapa-mēthēxaneto pewēpatsinexa. Nexata, pewēpatsicujinae pitsapaina ētsēxē-xaneto, bepinijipabixaneto petajuitsitsēxēxaneto. Nexata, bajarapatsēxēta matacabipijijuametomi itaxuto-aitaquiriaya-exana. Itaboxo-ata aitaquiria-exana. ³ Bajarapatsēxējawawerena pitsapa bosesemonaenē, pepunana-jetarubenaenexa daxitanacuanējawa. Bajarapabosese caējēpaeya-exanatsi jiwi pecacuatsinexa pebosotota be-aqueto. ⁴ Bajarapabosese apo-itorobitsi pebijianaenexa itsacuenējawa-ata xua pejuwijawa, pōna, naejawanē-ata. Biji rajane, itorobatsi pecacuatsinexa saya ējiwi, pamonaē Dioso pijasel-lota apo-itapa-itanerubitsi. ⁵ Itsiata, apotocopatsitsi caecuenia pebeya-xuabaponaenexa, pecacutsijawata. Biji rajane, tocopatatsi saya jiwi ayaicuenia penawixaetaeya-exanaenexa cinco pajumatobeje. Nexata, itsa cacuatsianatsi bitso nawixaetaena, pawixaewajēto aqueto itsa cacuatatsi. ⁶ Nexata, pecacuatsiwitsi jitsipaena picani petēpaenexa, bajaya-jebi penawixaetaeyaniwa. Itsiata baitsi jane, jaitsi-ata petēpaejawanexa, jamatabēnabeyaxuabijitsia-ata, bajarapamonae Dioso abaxē apotocopatsi tsane petēpaejawa.

⁷ Bajarapabosese amipabētaja. Pacuenia wajabitsaē pijacaballo bamipa-bēxataba hierropanajawanēta penawajabitsaētsiwajēnaeya, pijawajabitsaē petojororonaeyaniwatsi, bajaramipabē-itsi tsanubenae bajarapabosese. Be-oronanitota pexanaecoronajawanē namataxatabanubena. Bejiwi-itabara xaina. ⁸ Amananpia pacuenia petiriwa matanā-itsi. Pewonotonē pijinia benewēthēwonotonē. ⁹ Bajarapamonae baja cajena yajawanaexana behierrojumabocotonē pejorororonaeyaniwatsi itsajiwi-ata. Pepunana-jetarubenaewata pecorofe najumeta, pacuenia wajabitsaē itsa pona

b 9:1 betuluputocuenia pejopaenēmitsica: Pamonaē, bitso penacujarubiwi Dioso peliwaissi, caejamatabēcuene apoxainae pajamatabēcuene xaina bajarapajopaetuluputo. Saya canaējēta ángelewiyajuwēnēnē yabara. Petocopatsinēxaejitsia bitso pibisiacuenejawanē mapanacuapijiwijawabeliaje, wēnērubatsi bejepopaetuluputocuenia. Nexata, itsamonae canaējēta pacuenia bajarapa-ángelnē, Dioso pijajiwitonē, bitso peyaiyataenētsi. Peyaiyataejamatabēcuene, ponējawabelia rajuta mēthēxanetopijillave. Bajaraxuata, bajarapacuenia pecanaējēbiwi Dioso peliwaissi, bitso jume-aeba Dioso perajutsijawa bajarapallave, Satanás-jawabelia, pacuenia itsamonae jumaitsi, tsipaji bajarapallave pejamatabēcuene capitsapaenina irawetsina bitso piacujirubejewi, pebejiobia-exanaenexa mapanacuapijiwi. Orijiibia, nacia pecopiarucaematacabita, Dioso xuabiana Satanás bajarapamēthēxanetojawareca, bajarajotareca peponaponaenexa mil pawaije. Nexata, acuenebi Dioso petocopatsijawa bajarapallave Satanás-jawabelia. Taema Apoc. 11:7; 17:8; 20:1,3; 2Pd 2:4; Judas 6. Itsiata, itsamonae canaējēta itsacuenia bajarapajopaetuluputo yabara. Tsitatsi Satanás, tsipaji bajaraponē ángelewiyajuwēnēnēmi picani, Dioso pexuabi xaetsicanua pijanacuawecua, bejepopaetuluputomi irabetsica. Taema Isa. 14:12-17; Lu 10:18; Apoc. 9:11; 12:9. Nexata, tsitatsinua bajarapamēthē pewetsi-ángelnē pacuenia jumaitsi Apoc. 9:11-jawata. Bajaraxuata, wēnērubatsi Satanás Abadón – Apolión, «pewerebiabinē» pejai-wēnēbejecuenia. **c 9:1 rajutatsi:** Apoyapētaetsi pajiji rajuta bajarapallave bajarapa-ángelnējawabelia. Dioso pijacuata meta rajuta bajarapallave, itsa jume, itsa-ángelnē meta, Dioso pitorobixaetsi (Apoc. 20:1-2). **d 9:1 pinijimēthēxaneto:** Bajarapamēthēta Dioso tsaina xaniawaeta, daxita apowajataecapanepaewi waja-itaxutota, pepopiacujirubejewi, becárelbo pejebiwiacuenia. Apoyapētaetsi itsajota eca bajarapamēthē. Saya yapētanetsi pacuenia apojumaitsi isotopucaxaneto yabara, Dioso penaneconitsia-exanaetaxunaenexa. Taema Lu 8:31, 2Pd 2:4; Judas 6.

pijawajabitsaējawabelia, caballo peyarobobocaecarrozamonēta. ¹⁰ Bajarapabosese pebosotonēcopiata xaina pe-etonē, pacuenia aqueto. Tocopatatsi pe-etota pecacuatsinexa jiwi, penawixaetaenexa cinco pajuametobeje.

¹¹ Bajarapabosese cajena xaina pitorobi-ángel-nētsi, pinijimēthēxaneto pewetsinē. Bajarapa-ángelnē hebreojumeta pewēnē Abadón. Griegojumeta pijinia Apolión, «Pewerebiabinē», pejaiwēnēbeje.

¹² Bajarapapiayaicuene penamataxainaejawa. Itsiata baitsi jane, abaxē saica anijajawabeje, bitso pepopiayaijawabejenexa.

¹³ Bajaraxuacujinae, icatsia seis-ángelnē oba pijatrompeta. Nexata, Dioso pitabarata penucuae-altar-jawawerena penajumetsijawa, ayaijume, jumeta-niji. Bajarapa-altar, oronanitota pexanaejawa. Cae-upi canacujitsia mata-erucapona. Nexata, bajarapacuatro pamata-etobejetuatuajēta jumepitsapa.

¹⁴ Jumatsirena seis-ángelnē trompeta pexainaeñejawabelia mapacueniaje: «¡Isicare cuatro ponēbeje ángelewi, pamonaē cēbejebatsi pinijimenejawata, Éufrates menejawata!», jai bajarapa-altar-jawawerena.

¹⁵ Nexata jane baja, cuatro pa-ángelenēmibeje picani cēbejebatsi, isicatsi jiwi pebeponaenexa. Bajarapa-ánglewi baja cajena Dioso jamatabēcuene-ewetanubena, paepatota tocaējētatsi jiwi pebeponaenexa, ayaibitsaē-tonē daxitanacuanējawa. Nexata, bajarapa-ánglewi caejiwi beyaxua-baponaena acueyabi pajiwiibejeyajuwēnēwi. ¹⁶ Nexata, icatsia jumetaniji bajarapapisicae-ánglewi pijajiwi pitorobijawa, wabajitsaēwi, peponaenexa caballota, jiwi pebeponaenexa daxitanacuanējawa. Jumetanijinua pacuenia pijajiwi, wabajitsaēwi, namata-ējēta doscientos millones ponēbeje.

¹⁷ Nexata, bemajitsinaebota taniji pacuenia itsi bajarapamonaē, caballota peponaewi. Bajarapawabajitsaēwi, pijacaballomonaē yajawa namipabēxataba hierropananē, pejorojoronaeyaniwatsi pijawajabitsaē. Bajarapapenamipabēxatabijawanē itabēta acueyabi pawiriabejawata; petsobiajawata be-isotocuenia, perajenaejawata be-ētsēxēcuenia, pewayanaejawatanua be-azufrejawa. Bajarapacaballuanē xaina benewēthēmatabocoto. Pecuaibowojotonējawawetsinanua pitsapa pitarunutsicotia, ētsēxē yajawa, azufre-ata yajawa. ¹⁸ Xuanē caballuanē pecuaibowojotonējawawetsina pitsapa, bajaraxuanē jiwi ayaibitsaētoxanetonē yatēpaponā daxitanacuanējawa. Caejiwi yatēpaponā acueyabi pajiwiibejeyajuwēnēwi. ¹⁹ Bajarapacaballuanē caējēpatsi jiwi pebeponaenexa pecuaibowojotonēta, pebosotonēta-ata, tsipaji pebosoto-upianē bejomomatabocotonē. Nexata, pacuenia jomo pematabocotota caējēpatsi jiwi pesininexa, pebeyaxuabinexa, bajara-itsi bajarapacaballuanē pebosoto-upianēta.

²⁰ Itsiata baitsi jane, pamonaē penacopabiwi tēpaenejewa, bajarapamonaē tsiteca pibisiacuene exanawanapa, tae-ata itsamonaē petēpaejawa bajarapapiayaicuenejawanē pejamatabēcuenē. Nexata, apocopatsi asiwaya pesiwanajamatabēcuenecopatabiabiawata dowathiwijawabelia, pecobeta jumapecataeya pexanaenēñejawabelia-ata. Bajarapajumapecataenēñē pexanaexae oronanitonēta, palatananitonēta, brancenanonitōnēta, ibotonēta, naejawanēta-ata, apocaējēpaetsi petaenexa, pejumetaenexa, peponaenexa-ata. Itsiata, tsiteca bajarapamonaē asiwaya siwanajamatabēcuenecopatabiaba bajarapajumapecataenēñejawabelia, peyawenonaenexatsi. ²¹ Orijibia, bajarapamonaē apocopabi jiwi pebeponaejawa, penajorobaponaejawa, pewitota pibisiacuene pexanaponaejawa, penacobetoxotaponaejawa-ata.

**Pacuenia Juan tane ángelnē pecobenanucaejava
cuyalatobaxutoyo, yabara peliwaissi**

10 ¹Icatsia, taniiji itsa-ángelnē, bitso piasaenē, athēbēwetsica perunaeja-watsica mapanacuayabetsicaje. Bajarapa-ángelnē itarērēbotuatuajēta najetaruca. Natsimatatsēnērutana najetaruca arawalibo. Itabaranaitayotanajeta-rucanua, pacuenia cotia-itsi matacabipijijumeto. Petopabeje pijinia cotiatso-bia, pacuenia cotia-itsi isoto. ²Cuyalatobaxutoyo baxupatanuca. Pecujanenia pataxu nataxunutanuca manuameneboxowereca. Petsawenonenia pijinia pataxu nataxunutanuca irajumawereca. ³Nexata, wawajai tsaxuabi ayaijumeta. Pacuenia newēthē bafiaba, bajarajume-itsi. Pewawajaitsaxuabicujinae, siete payamaxēbeje najumeta athēbētatsia. ⁴Yamaxē penajumetsicujinae, yaquinae-jitsianē picani pajamatabēcuenē yabara neyapētaeya-exana yamaxē penajumetsijawa. Itacarajeta athēbēwetsica jumetaniji, tanejumaitsijawa mapacueniaje:

—¡Muetsia saya xainare pajamatabēcuenē yabara cayapētaeya-exana yamaxē penajumetsijawa! ¡Pētsa yaquiname bajarapaliwaissi! —nejai athēbēwetsica.

⁵Bajaraxuacujinae, ángelnē, ponē nataxunutanuca manuameneboxowereca, irajumawereca-ata, bajaraponē nacobeyotanuca athēbēabetsia, pecujanenia pacobe. ⁶Nexata, nacobeyotsiaya najumecapanepaeya pexaniajai-jumeta jumaitsi tsanuca:

—Dioso pewēnēta, ponē daxitamatacabijawabelianexa peponaponaenē, ponē caecuenia pexanaenē-ata mapanacuaje, itaboxo, manuamene-ata, bajarapacuenia mapanacuapijicueneje, itaboxopijicuene, manuamenepijicuene-ata yajawa pexanaenē, bajaraPonē pitabarata pacajumaitsi mapacueniaje: «Dioso pematatsēnē aponajamatabēcuenecataitsi tsane. Copiapatsijitsia rabaja pacuenia bajaraPonē tajēwelīa najamatabēxaina pexanaenexa. ⁷Nexata, pae-patota siete ángelnē obiana pijatrompeta, bajarapaepatota rajane baja, Dioso taxuxuabiana pexanaejawa pacuenia baja cajena tajēwelīa najamatabēxaina pexanaponaenexa jiwijawabelia, penaneconitsia-exanaponaejawata pijaneco-nijamatabēcuenē. Muetsia pexainabuatsiliwaisimi itajētsiana. Copiapatsiana jane baja pacuenia bajayata Dioso tajēwelīa najumecapanepaeya jumaitsi profetawimijawabelia,» —jai tsanuca nacobeyotsiaya ángelnē.

⁸Copiaya pajume jumetaniji athēbēwetsica tanejumaitsijawa, icatsia nejumaitsi mapacueniaje:

—¡Ponē ángelnē nataxunutanuca manuameneboxowereca, irajumawereca-ata, bajarapa-ángelnē cujiremelīa! ¡Wecuapire pacuyalatobaxutoyo bajarapaponē baxupatanuca! —nejai athēbēwetsica.

⁹Nexata, cujiliajē ángel-nējawabelia. Wajētajē tanerajutsinexa bajarapacuyalatobaxutoyo.

Tanerajutsijawata nejumaitsi mapacueniaje:

—¡Ājā, pire baja! ¡Xaema! Mapacuyalatobaxutoyoje cuaiboxaicaename, pacuenia jabēra. Itsiata baitsi jane, necotsorotwabereca atsaxa tsane —nejai ángelnē.

¹⁰Nexata baja, bajarapacuyalatobaxutoyo wecuapitajē. Xaniji jane baja. Taxaecuinae baja, cuaiboxaicaejē, pacuenia jabēra. Itsiata baitsi jane, taquicucujinae, tacotsorotwabereca atsaxa.

¹¹Nexata, icatsia ángelnē nejumaitsi:

—Orijibia, catsicaruca netsipaebijawa pacuenia Dioso siwanajamata-bëxaina daxitanacuanëpijiwi, daxitawirijawumewi, caenacua canacujitsia, pewetsiwi-ata yabara, caenacua canacujitsia, pewetsinëanë-ata yabara —nejai ángelnë.

Pacuenia itsamatacabi anijanëbeje jiwi tsipaebaponaenabeje paliwaisi Dioso yapëtaeya-exanaenatsibeje, yabara paliwaisi

11 ¹Bajaraxuacujinae, bajarapa-ánglewiyajuwënënerajuta piapia-naebo. Nejumaitsi mapacueniaje:

—¡Nonotapunare! ¡Caponare mapanaeboje necaëjëbinexa^e Dioso pijate-mplobo, altar-jawa-ata! Namata-ëjëtsianamenua pajiwiabeje bajarapatemplobota nawajëca Diosojawabelia. ² ¡Itsiata, pëtsa caëjëtame templobopanabo, tsipaji bajarapapanabo Dioso tocopata abaxë apojudíowi, pamonaë, apo-peyayiyataewi Dioso, pejinawanapaenexa! Bajarapacuenia Dioso petocopatsixaetsi, bajarapamonae bijianaena petsapabataxuabicuenia ta-itapetsitomara, Jerusalén tomara, cuarenta y dos pajuametobeje.^f Bajarapacuenia bejiobia-exanaponaena bajarapatomarata pejinawanapaewi, judíowi. ³ Bajarapamatacabianëjawa Dioso itorobiana anijanëbeje, profetanëbeje, petsipaebanajetarucaenexabeje paliwaisi Dioso yapëtaeya-exanaenatsibeje. Bajarapaliwaisi tsipaebanajetarucaenabeje jiwijawabelia mil doscientos sesenta pamatacabibeje.^g Bajaraponëbeje naxatatsianabeje piayopapaëbërëjawa, bitso pesiwajamatabëcuenebëjaixabeje tsane pamonaë apo-peyayiyataewi Jerusalén tomara. ⁴ Bajayatami, profetanëmi peyaquinaebaxutota comparación-cuenia tajëwelia jumaitsi bajaraponëbeje yabara mapacueniaje: «Anijanaeabeje, olivonaeabeje, anijajawabeje pijinia pitayotanucaejawabeje, nubenaena Dioso pitabarata, Ponë daxita mapanacuapijiwiije pijatuxanënë^h jai», —nejai ángelnë. ⁵ Itsajiwi itsa jamatabë-itsacueniabianatsibeje, bajaraponëbeje nayajiwitajuitsianabeje, pecuaibowojotowetsina pepitsapaecotiata, pitarunutsicotiata. Bajarapacuenia pepacuene werebiabiana pamonaë picaní jamatabëbeyaxuabatsibeje. ⁶ Bajaraponëbejeⁱ caëjëpaenatsibeje pitawetsinexabeje ema pejopaeyaniwa, daxita pamatacabibeje jiwi tsipaebanajetarucaenabeje paliwaisi Dioso yapëtaeya-exanaenatsibeje. Caëjëpaenatsibejenua mera-ata pejanara pexanaenexabeje. Caëjëpaenatsibejenua daxitawiria piayaicuene pecapitsapaenexabeje pamatacabita jitsipaenabeje. ⁷ Pepaebiweretsicujinaeabeje jiwijawabelia, paliwaisi Dioso yapëtaeya-exanaenatsibeje, nexata bitso piayainë pitsapaenina pinijimëthëxanetojawatsina. Bajarapapiayainë tsmaxëpitsapaeninatsibeje, pebenexatsibeje. Nexata, pecuene-amoneyabijawatatsibeje, beyaxuabianatsibeje.

e 11:1 *necaëjëbinexa*: Juan tocaëjëbijitsia bajarapabo, tonamata-ëjëtsijitsianua penawajëcaewi Diosonexa, penajamatabëcuene-itajëtsinexa Dioso pijajawacuene, pacuenia jiwitonë nato-caëjëba pitsi-unuwajëto nacuenëbijitsia pijapabinexa. **f 11:2** *cuarenta y dos pajuametobeje*: Taema Dan. 9:27; 12:11; 2Ts 2:4. Bajarapajuametobeje namata-ëjëtsiaya jëpa pamil doscientos sesenta pamatacabibeje wënëruba versículo 3-jawata. Baitsi, pamatacabibejawajëto apojudíowi bejiobia-exanaena Jerusalén tomarapijiwi, bajarapamatacabianëjawa profetanëbeje paebiana. **g 11:3** *mil doscientos sesenta pamatacabibeje*: 42 pajuametobeje, itsa jume, acueyabi pawai-beje epatua. **h 11:4** Profetanëmi Zacarías pejumaitsi jume tsarena: Taema Zac. 4:1-3, 11-14. **i 11:6** *Bajaraponëbeje*: Aponayapëtae pepacuene ponëbeje yabara jumaitsi. Itsamonae canaëjëta tsarena Moisés-pijinë, Elías-beje icatsia patsianabeje profetanëbejenexa. Itsamonae pijinia canaëjëta pecuene-caëjëpaenëtsibeje pexanaenexa, pacuenia exana Moisés, Elías-beje bajayatami.

⁸Nexata, petëpaenëbeje bocaenabeje pinijcallexanetojawata, pewënëjone-tomara Jerusalén-pijicallejawata, patomarata bajayatami wajatuxanenë-ata cobematabiabarutatsi cruzajawabelia. Dioso pitapetsitomarami-ata, bajara-patomara yabara jiwi itsajawata jumaitsi tsabiabi: «Bajarapatomara cuene-jëpa Sodoma, Egipto tomaramibeje», jai tsabiabi, tsipaji bajarapatomarapijiwi cuenejëpaeya bitso pibisiacuene exanawanapa. ⁹Nexata, bajaraponëbeje petëpaenëbeje, bocaenabeje acueyabi pamatacabibeje epatua, tsipaji Jerusa-lén tomara pewetsiwi apotocopatsi tsane itsajiwi-ata pemëthëtsinexatsibeje. Nexata, daxitawirijumewi daxitanacuanëpijiwi-ata, taeyabuatsianatsibeje.

¹⁰Bajarapamatacabibejewawa, daxita mapanacupijiwiwe, Dioso apoheyaiya-taewi, jamatabëcuenebarëya tsane, petëpaexaabeje, tsipaji copiarucaena baja bajaraponëmibeje ayaicuenia pejamatabëcuene-itonotabiabijawami bajara-pamona. Bitso cajena pebarëyajamatabëcuene, fiesta exanaena. Namata-enetsia narajutsiananua amoneya itsacuenejawanë, petëpaejawabeje yabara.

¹¹Itsiaata baitsi jane, acueyabi pamatacabibeje epatua itsa xainabeje petë-paecujinaabeje, icatsia Dioso asaëya-exanaenatsibeje petëpaejawawecua. Nexata, daxita cajena pamona petayabuatsiwiwitsibeje petëpanucaejawa-beje, bitso cujunawianatsibeje. ¹²Bajaraxuacujinae, bajaraponëbeje jume-taenabeje, athëbëwetsica pinijijumeta pejumaitsiyawatsibeje: «Pajunaïmina-beje», pejaijawatsibeje. Nexata, bajaraponëbeje junaeniabeje athëbëabetsia itarërëbotuatujëjawatsia. Daxita pitoyawitsibeje pëtaenubenaenatsibeje.

¹³Bajarajane paepatota, ayaicuenia ira najëabiana. Nexata, Jerusalén toma-rata ayaijawa bonë othopaena. Itsajota diez pabobeje najua-ena, caebo yajuwënëjopaponaena. Nueve pabobeje pijinia nacopataponaena. Siete mil pijinia pajiwiibeje tëpaena, ira penajëabijawata. Jerusalén tomarata penaco-pabiwi, bitso cajena junawiana. Nexata, pecajunawi wënëxaniatsiaya Dio-sojawabelia jumaitsi tsane: «Diosomë, ayaijamatabëcuenenëmë bitso», jai tsane pecajunawi Diosojawabelia, athëbëtatsia pe-ecaenëjawabelia.

¹⁴Anijapiayaicunebeje rabaja panepa. Itsiaata baitsi jane, icatsia itsajawa, acueyabijawa, piayaicunejawawa, bepijia najetarucaena.

Pacuenia siete ángelnë oba pijatrompeta, yabara peliwaissi

¹⁵Sietenë jane baja, ángelnë, oba pijatrompeta. Nexata, athëbëwetsica pinijijumeta jumetaniji, pejumaitsiyawawa mapacueniaje:

«Copiapata jane baja, Wajatuxanenë Cristobeje, Diosobeje, peyanacua-ewetaponaponaejawabeje daxitanacuanëpijiwi, daxitamatacabijawabelianexa», pejaijawa jumetaniji athëbëwetsica.

¹⁶Nexata, veinticuatro ponëbeje ancianowi, pe-enaewi pijatronota, Dioso pitabarata, daxita bajarapamona irataeya bobena, penajamatabëcuene-itajëtsinexa asiwaya peyaiyataejawa Dioso. ¹⁷Irataeya jumaitsi tsanubena Diosojawabelia:

«Xamë, Petuxanenëmë, Diosonëmë, nijamatabëcuenesaënë daxita mapanacuanë pewetsiwiwecua. Xamë baja cajena, neponaponaenë daxitacuene ne-exanaewajënaeya. Ajena mapamatacabita-ataje, abaxë ponaponame. Daxitamatacabijawabelianexa-ata tsiteca neponaponaenë tsane. Pexaniajamatabëcuene pacarajutatsi, tsipaji baja taxuxuabame pinijisaëta newetaponaponaenexa daxita mapanacuanëpijiwiwe.

¹⁸ Daxita mapanacuanëpijiwije bitso cabara-anaepana. Bajaraxuata, tocopiapatatsi baja pamatacabi tsiwajënaecanaëjëtame, nenaeconitsia-exanaenexa daxita bajarapamonae, piasaëwi, petëpaewimi-ata. Tocopiapatatsinua baja pamatacabi tsiwajënaecanaëjëtame nijajiwijawabelia nerajutsinexa pexaniacuenejawanë pecatonacuenebawanapaematamo, pamonaë profetawi, pamonaenua asiwaya pecawënëliwaisiyaiyataewi, ayaijamatabëcuene pexainaewi, beweliamatabëcuene pexainaewi-ata. Nexata, pexaniacuene rajutsianame nijajiwijawabelia. Juya, werebiabianame daxita pamonaë bijiana mapanacuapijiwije, pejamatabëcuenebijianaewata Dioso peliawëwecua, pibisiacuene pexanawanapaenexa», jai tsanubenae irataeya ancianowi Diosojawabelia.

¹⁹ Nexata, athëbëtatsia Dioso pijatemplobo nabaupata. Bajarapate-mplobo ënëtatsia taeyabuatsiajë Dioso penajumeliwaisixaniawaetsi-baula.^j Yamaxë binepajunjunua. Ayaicuenia-ata najumetajunjunua. Iranua najëbaba. Bitso pecainejebimatarejetonë, granizojawanë, irabetsica othopaica pinijicuenia.

**Pacuenia Juan athëbëtatsia tane pinijinë betsawaliwalinë
bitso pianaeapanaejawa, yabara peliwaissi**

12 ¹ Athëbëtatsia ayaicueniawaja naitajëta, wajanacacanaëjëtisia-exanaejawanexa. Athëbëtatsia petiriwa^k taenutajë, pejumanawanai-tayotanucaewa, pacuenia cotia-itsi matacabipijijuameto. Nataxunutanuca merawipijijuametojawawelia. Namataxatatatanucanua doce patuluputobeje^l pexainaecorona. ² Bajarapowa penacueto^m peyacotajinaewa. Pewixae-notsi-jawatatsi, pewecuaexanaenexatsi penacueto, bitso ya-äaëjai. ³ Nexata, bajarapaepatota athëbëtatsia pijinia naitajëta piayainë, petsobianë, pini-jinëxaneto betsawaliwalinë,ⁿ baitsi pepodowathi. Xaina siete pamata-bocotobeje, diez pijinia pamata-etobeje. Caematabocoto canacujitsia, namataxatatapona corona. ⁴ Bajarapatsawaliwalinëxaneto penabosowebe-bejawata tulupu yajuwënëpenetsica irabetsica.^o Nexata, daxita athëbëtatsia

j 11:19 *penajumeliwaisixaniawaetsibaula*: Taema Éxo. 25:10-22; Deut. 10:5. k 12:1 *petiriwa*: Bajarapowa nacatocuenecatane Israel nacua, itsajota Jesucristo naexana. Nacatocuenecatane Israel-pijinë pemomoxi, pamonaetuatuajëta Jesucristo naitajëta. Taema Gén. 37:9-11; Isa. 54:3-6; Jer. 31:32; Eze. 16:32; Os. 2:16. l 12:1 *doce patuluputobeje*: Nacatocuenecatane 12 ponëbeje Jacob-pijinë pexi pebijwi, pamonaetuatuajëta Jesús naexanaejitsia. m 12:2 *penacueto*: Bajarapanacueto nacatocuenecatane Jesucristo. Nexata, Jesucristo bitso imoxoyo pewajënaë petaxuxuabijawa peyanacua-ewetsijawa daxitanacuanëpijiwi, 1.000 pawaijenexa. Bajaraxuata, Satanás jamatabëbeyaxuaba. n 12:3 *betsawaliwalinë*: Bajarapatsawaliwalinë nacatocuenecatane Satanás – pepodowathinë baitsi. Taema Gén. 3:1; Dan. 7:7-8; Apoc. 12:9. o 12:4 *tulupu yajuwënëpenetsica irabetsica*: Taema Dan. 8:10; Isa. 14:12; Eze. 28:11. Bajarapatuluputonë nacatocuenecatane ángelewi. Nexata, nacayapëtaeya-exana pacuenia Satanás yamaxë-itojoroba ayaibitsaëto ángelewimi, pamatacabi canaëjëta picani Dioso pijataxunae peyacajërëtsinexa. Taema Isa. 14:12-15. Nexata, yapëtanetsi pacuenia ayaibitsaëto ángelewimi jamatabëcueneyanabatsi bajaraponë. Cae-ángelnë jamatabëcueneyanatatsi, acueyabi pa-ánglewiyajuwënëwi. Nexata, pamatacabi Dioso xuabica Satanás pijanacuawetsica, yajawa-xuaba daxita pejamatabëcueneyanabi-ánglewimitsi.

perubenaetulupujawanë irabetsica othopaica caejawa, acueyabi xuabejeyaju-wënëjawa.^p Itsiata, matatoxenetsia anijawabeje athëbëtsia nacopabarubena. Bajarapatsawaliwalinëxaneto nucajopa pewixaenotsiwatsi pitabarata, pecoxiaenexatsi^q picani, penacueto pewecuaexanaejawatatsi. ⁵Nexata jane baja, petiriwa wecuanaexanatsi pebinëyo. Bajaraponëyo^r caponatsi Dioso jawabetsia, Dioso pijatronota pe-ecaenexa. Nexata baja, bajaraponëyo apoxaetsi bajarapatsawaliwalinë. Bajarapanacuetonëyo itsamatacabi mapanacuataje jiwi pepopewetsinë tsane. Nexata, daxita nacuanëpijiwi peyanacuaewetsijawata, ajumesaëya itorobabiabiana pejumecowënëtsinexatsi.

Aponacopatsi tsane naneconitsia-exanaenejewa^s caejiwiyo-ata apopejumecowënëtsiwatsi. ⁶Petiriwa^t pijinia, pewecuaexanaecujinaetsi penacuetonëyo, najetabijirawa petusatnacuyabelia bajarapatsawaliwalinëxanetowecua, peponaponaenexa itsabelia Dioso tsiwajënaexaniwaetatsi. Bajarajota, pexaejawa baja Dioso rajutatsi mil doscientos sesenta pamatacabibeje.

⁷Bajaraxuacujinae, athëbëtsia ángelewi penamatacatorobinë, Miguel, pija-ángelawi yajawa, barënbabia tsawaliwalinëxanetowawabelia, pija-ángelawimijawabelia-ata.^u ⁸Itsiata baitsi jane, tsawaliwalinë pebarënbabewata barëcuene-amoneyabatsi, daxita pijajiwi yajawa. Nexata, caenë-ata aponacopatsi athëbëtsia.^v ⁹Bajarawetsica, xuabicaetsi irabetsica, daxita pijajiwi yajawa, pecuene-amoneyabixaetsi pebarënbabewawatatsi. Bajarapatsawaliwalinë, bajayata penaitajëtsinë bejomocuenia^w jiwijawabelia, Dowathiwënë. Itsawënë pijinia Satanás. Bajaraponë raja, jiwi peyamaxë-itorobabiabinë daxitanacuanëjawa.

¹⁰Nexata, jumetaniji pinijumeta athëbëwetsica pejumaitisijawa mapacueniaje:

p 12:4 caejawa, acueyabi xuabejeyajuwënëjawa: Wowaijumeta «una tercera parte». **q 12:4** pecoxiaenexatsi: Bajaraxua nacanajamatabënapitsia-exana pacuenia dowathi jamatabëbeyaxuaba picani Jesús, ajëna penaxanaecujinae, Herodes pejamatabëcueneta. Taema Mt 2: 12-18.

r 12:5 Bajaraponëyo: Cristo yabara. Picani Cristo apocaponaetsi penacuetocuenia Dioso pijanacujawabetsia, biji rajane jiwi pesiwatëpaecujinae cruzata. Bajarapanacueto cuene-itajëta saya Cristo petaxuxuabijawanexa picani, jiwi peyanacua-ewetsijawa. Itsiata jiwi beyaxuabatsi, taxuxuabinejewa peyanacua-ewetsijawa. Aeconoxae eca Dioso pemuxuneneta. Taema Mc 16:19; Hch. 7:56.

s 12:5 Aponacopatsi tsane naneconitsia-exanaenejewa: Bajarapajumexi pitsapa wowaijumeta: «cetro de hierro». **t 12:6** Petiriwa: Versículo 6 matatosata 2000 pawabeje pematënëa pepanepacujinae, Cristo peponaecujinae Dioso pijanacujawabetsia. Nexata, pamatacabi Dioso naneconitsia-exanaena mapanacuapijiwije pijaneconi pejamatabëcuene, Israel-pijinë pemomoxiyajuwënëwi wecuanaetabijirawiana petsimaxëpatsiwatsi, pewecuanamatayabinexa petusatnacuaeta. Bajarajota Dioso ewetsianatsi, pijawajabitsaë pebeyaxuabiyniwatsi. Baitsi, ewetsianatsi pexaniacuenia, pacuenia bajayatami eweta pijasalinaiwimi petusatnacuaeta pepitsapaecujinae Egipto nacuawecua. **u 12:7** pija-ángelawimijawabelia-ata: Satanás pija-ángelawi raja demoniowi. Jiwijumeta pijinia dowathimonae, ainawi, pijamatabëcuenebejewi apowajataecapanepaewi waja-itaxutota. Itaboxojawabetsia pejinawanapaewi. Daxita bajarapamonae Dioso pija-ángelawimi picani. Itsiata, apopejumecowënëtsixae Dioso, pijamatabëcuenebejewi naexana. Itsiata, pijawiria yabara Satanás pija-ángelawi wënërubatsi dowathimonae Apocalipsis-baxutota. **v 12:8** athëbëtsia: Job-pijinë peliwaitsa, Job 1:6, nacayapëtaeyaxana pacuenia Satanás naitajëtabia Dioso pitabarata, peneconitsinexa Dioso pijajiwi. Bajarapacuenia jumaitsinua Apoc. 12:10. Orijibia, Efe. 6:12 nacayapëtaeyaxana pacuenia pepodowathi, daxita pijajiwi yajawa, itaboxojawa jinawanapa. Nexata, pacujinae Miguel, pija-ángelawi-ata xuabianica pepodowathi, pijajiwi yajawa athëbëwetsica, to-acuenebtsi tsane caenë-ata penaitajëtsijawa Dioso pitabarata, pejinawanapajawanua itaboxojawa. Nacopatsiana saya mapanacuataje. **w 12:9** bejomocuenia: Taema Gén. 3:1.

«Copiapata rajane baja Dioso, jiwi pecapanepaejawanexa pepodowathi pecobewecua. Copiapata rajane baja patajaDioso pesaëta jiwi peyanacua-ewetaponaponaenexa. Copiapata rajane baja Dioso pitorobiapaebinëtsica Cristo, jiwi pitorobaponaenexa peyanacua-ewetsijawata. Daxita rajane baja, bajarapacueene copiapata, tsipaji baja Dioso nawecuacapsapa pepodowathi pijanacuawetsica, ponë neconitabiaba^x daxita matabijebi, daxita merawijebi-ata Diosojawabelia, wajanajuasiwanajamatabëcuenecopabiwi^y Jesucristojawabelia.

¹¹ Bajarapamonae cuene-amoneyabapona pepodowathi, pejumexaniataexae Cristo^z pesiwatëpaejawatsi cruzata, pewajunupaebaponaexaenua Jesús Peliwaisi itsamonaejawabelia, Cristo pecapanepaejawanexatsi pijaneconiwecua. Bajarapamonae ajumejunawijibia wajunupaebapona bajarapaliwaisi. Beyaxuabiapaebi-atatsi, tsiteca apocopatsi pepaebijawa, pejumexaniataejawanua bajarapaliwaisi.

¹² Bajaraxuata, toxanepanatsi, athëbënacuatsiapijicuene, bajarajotatsia panejinawanapaewinua, pesiwajamatabëcuenobarëyanexa Dioso, pecapitsapaexae pepodowathi, pijajiwi yajawa athëbëwetsica. Itsiata baitsi jane, bitso tsi-ayaitsi tsane irata pejinawanapaewi, manuameneta-ata pejinawanapaewi, tsipaji baja bajarapamonaetuatuajëatsica pepodowathi xuabocatsi. Bajaraponë peyapëtaexae caematacabibeje saya petonacopsijawatsi pexuabinexatsi isotopucaxanetojawabelia, nexata baja, aeconoxae bitso bara-anaepanaponapona daxita bajarajota pejinawanapaewijawabelia», pejajume jumetaniji, athëbëwetsica pinijijumeta.

¹³ Nexata, bajarapatsawaliwalinë ponë pepodowathi, itsa yapëtane athëbëwetsica pexuabijawatsitsica irabetsica, nexata barajinapona powa wecuanaexanatsi pebinëyo. ¹⁴ Itsiata baitsi jane, bajarapowa rajutatsi anijacorofetoxanetobeje, becotsalacorofetobeje. Nexata, tsawaliwalinëxaneto wecuapuna tajëbelia, petusatonacuayabelia, bajarajotalia peponaponaenexa. Bajarajotalia, Dioso rajutabiabatsi pexaejawa acueyabi pawaiubeje eputua. ¹⁵ Bajarapatsawaliwalinë pecuaibowojotuatsina capsapa mera,^a ayaira, bepinijimenecuenia, pecaponaenexatsi picani petiriwa. ¹⁶ Itsiata baitsi jane, bajarapowa Dioso yawenonatsi. Nexata, jemata ira nawoconareca ayajawa. Nexata, pamerami tsawaliwalixaneto pecuaibowojotuatsina pitsapaina, bajarapamëthëareca joneca. ¹⁷ Bajaraxuata, bajaraponë bitso anaepana petiriwajawabelia. Pianaepanaejamatabëcuene,

x 12:10 ponë neconitabiaba: Taema Job 1:6-12; 2:1-5; Zac. 3:1-2. **y 12:10** wajanajuasiw anajamatabëcuenecopabiwi: Juan aponacayapëtaeya-exanae pamona wawajai. Itsiata, mapajume pejamatabëcuenetaje, itsamonae canaëjëta pacuenia pamona altar-bëxëpanata pebobenaewi, pebeyejebiwimitsi, Jesús peliwaitsi pejumexaniataexae, barëyaya wënëxaniata Dioso, pecapanepaexaetsi pepodowathi pecobewecua. **z 12:11** Cristo: Wowaijumeta pitsapa, «Cordero». Itsiata, caenë yabara. **a 12:15** mera: Bajarapamera nacatocuenecatane ayaibitsaëto-xaneto wajabitsaë pepodowathi pijajiwi. Bajarapamonae pepodowathi tsi-itorobjitsia, pewaetabinexa picani Israel-pijinë pemomoxi.

tsimaxëpona petiriwa pexi, pemomoxi-ata, penacopabiwi,^b pebeyejebinexa, pamonae jumecowënëtanawana Dioso pejumeliwaisi pitorobicueniatsi, peca-asaëtsawanapaexaenua penawajunupaebijawa Jesucristo peliwaisi pejumexaniataejawa.

¹⁸ [...] ^c

Juan yaquina piayainëbeje peliwaisi

13 ¹Tanucaejawata manuamene tajetabota, taniji manuame-nejawatsina^d pepitsapaejawatsina piayainë,^e penucaenexa bajarapamene-itapata. Bajaraponë xaina siete pamatabocotobeje, diez pijinia pamata-etobeje.^f Caemata-eto canacujitsia xainapona corona. Caematabocoto canacujitsia yaquinarubapona Diosonexa bitso piamu-xujitsibiwënëanë. ²Papiayainë taenucajë pepitsapaejawatsina, bene-wëthë peyaquijainë picani. Itsiata, petaxu xaina bepianaepanaewiria oso. Pecuaibowojoto pijinia cuaibojëpa benewëthë petsobianë. Tsa-waliwalixaneto penamatacaitorobisaë rajuta bajaraponëjawabelia. Tocopata pijatrono.^g Jamatabëcuenecaëjëpaeya-exananua, ayaicuenia pitorobinexa daxitanacuanëpijiwi mapanacuataje. ³Bajarapapiayainë caematabocoto^h matawajënëbatsi apobepeya-asaëwajënënexa itajara. Itsiata baja, matawajënënacëta.ⁱ Daxitanacuanëpijiwi itsa tane bajaraponë pematawajënënacëtsijawa, bitso jamatabëcuenenabenajaca. Nexata, bajaraponë pepaebiliwaisi pënapona. ⁴Nexata, daxita bajara-pamonae asiwaya, yaiyataeya, tonubena pematabacabëta tsawaliwalixaneto pitabarata, petocopsixae piayainë pitorobinexa daxitajiwi mapanacujawaje. Orijibia, yaiyataeya pematabacabëta tonubenana piayainëjawabelia-ata. Wënëxaniatsiaya jumaiti mapacueniaje piayainë yabara: «Ajibi cajena itsanë-ata pejamatabëcuenecaëjëpaenëtsi pacuenia itsi mapapiayainëje. Ajibi cajena itsanë-ata pecaëjëpaenëtsi pebarënabe-nexa, maponëje pecuene-amoneyabinexa», jai bajarapamonae wënëxaniatsiaya piayainë yabara.

b 12:17 *petiriwa pexi, pemomoxi-ata, penacopabiwi*: Bajarapamonaejawabelia nacajunua judiowi, apojudiowi-ata, pejumexaniataewi Jesús peliwaisi. Baitsi, Gál. 3:6-7 nacayapëtaeya-exana pacuenia daxita pejumexaniataewi Dioso, naexana be-Abraham-pijinë pemomoxi.
c 12:17: Itsabaxutonë wowaijumeta ruta itsa versículo majotaje (vr 18). Itsabaxutonë peju-caewi pijinia saya tixita Mapaversículoje capítulo13:1-jawabelia, tsipaji taxuxuaba itsaliwaisi. Jumaiti mapacueniaje: «Bajarapatsawaliwalinëxaneto nucajopa bepinijimanuamene-itapata», pejaijume.
d 13:1 *manuamenejawatsina*: Bajarapamanuamene nacatocuene mapanacuapijiwi. Nexata, bajarapapiayainë pepitsapapenëxae jiwituatuajëta, apojumaiti pepopiayainë yabara. Biji rajane, jiwi peyanacua-ewetsiwi yabara jumaiti.
e 13:1 *piayainë*: Bajarapapiayainë nacatocuenecatane tsaena panacuanë anticristo yanacua-ewetsijitsia.
f 13:1 *siete pamatabocotobeje, diez pijinia pamata-etobeje*: Caematabocoto canacujitsia cuene-itajëta itsanacua peyanacua-ewetsicuene. Caemata-eto canacujitsia cuene-itajëta pijinia penamatacaitorobisaë pexanaenë. Itsiata bajarapayanacua-ewetsiwi, caejamatabëcuene xainaena anticristojawabelia. Nexata, peyanacua-ewetsinacuanë, penamatacaitorobisaënua, rajutsiana bajaraponëjawabelia pewetsinexa. Bjaraxuata, naitajëta caepiayainë manuamenetuatuajëtsina.
g 13:2 *pijatrono*: Peyanacua-ewetsitaxunae.
h 13:3 *caematabocoto*: Anticristo yabara.
i 13:3 *matawajënënacëta*: Itsamonae canaëjëta pacuenia mapajumebeje, apobepeya-asaëwajënënexa, matanacëta yabara mapacueniaje. Canaëjëta anticristo pepacuene tëpaena, icatsia namatacotsijitsia petëpaejawawecua. Taema Apoc. 13:14. Itsamonae juya canaëjëta peyamaxë-itojorobicuenia petëpaejawanexa. Nexata, icatsia naitajëtsijitsia bepenamatacotsinëcuenia petëpaejawawecua.

⁵ Dioso cuenecopata^j piayainëjawabelia, pibisiacuenia pebara-cuaicuaijainexatsi, ayaijamatabëcuenenë nataeya.^k Tocopatatsinua pitorobinexa jiwi mapanacuajawaje cuarenta y dos pajuameto-beje.^l ⁶ Bajaraponë exanapona pacuenia tocopatatsi. Bitso pibisiacuenia baracuaicuaijai tsabiabi, Dioso, Dioso pewënë, Dioso pijatemplobo, athëbëtatsia pejinawanapaewi-ata. ⁷ Dioso cuenecopatatsinua wajabitsaë pexanaenexa Dioso pijajiwijawabelia, pecuene-amoneyabinexa-ata. Orijibia, tocopatatsi pitorobinexa daxitawiriajumewi, daxita nacuanëpijiwi-ata. ⁸ Nexata, daxita mapanacuapijiwiye pamonaë apowënërubenae Corderonë pijacuyalatobaxutota, yaiyataeya pematabacabëta tonubenabiaba piayainë pitabarata. Bajarapabaxutota, Dioso nacua pexanaejawaweliacujinaë, Corderonë wënëyaquinapona ëpamonaë matakabi apopeerewerecaejawa pexainaewinexa, bajaraPonë pesiwatëpaexae, pijaneconijamatabëcuene.

⁹ Paxamë, Dioso papijajiwimë, itsa pamuxuwojorubename, panatojumetaema Dioso papecatsipaebiliwaisi! Pejumaitsijume mapacueniaje:

¹⁰ «Paxamëyajuwënëwi, pamonaë xanë Diosonë tocajëjtajë pijawajabitsaë petaicaenexatsi, taicaenatsi. Pamonaë pijinia tocajëjtajë espadata pebenexatsi, espadata benatsi», pejajjawa Dioso papijajiwimë yabara. Bajarapacuenia Dioso pijajiwi bejiobia-exanabiabi-atatsi, xanepana pewajënaeyabelia pitaxutuajamatejematsaponaejawa Diosojawabelia, epatua copatsinejewa.^m

¹¹ Bajaraxuacujinaë, icatsia taniji irawetsina pepitsapaejawa itsanë piayainë. Anijamata-etobeje pexainaenë pacuenia oveja pebito mata-e-itsi. Itsiata bailsi jane, pecuaicuaijajawata, jumejëpa pacuenia tsawaliwali jume-itsi. ¹² Cotocaewi pepitsapaepiayainë irawetsina, namatacaitorobisaëjëpa copiaya pepitsapaenë manuamenejawatsina. Nexata, bajarapacuenia bajaraponë namatacaitorobaponapona daxita mapanacuapijiwiye, copiaya piayainë pitabarata. Itorobabiaba yaiyataeya pematabacabëta petonubenaenexa copiaya pepitsapaenëjawabelia, ponë xaina pematabocotota apo bepeya-asaëwajënënexa itajara matawajënënacëta. ¹³ Nexata, papiayainë irawetsina cotocaewi pitsapaina, ayai cuene pexanaejawanë jiwi tsita-exanapona. ¡Bajarapacuenia pexanaponaejawata, pematat-sënëa pitatsajawi-ita-ire athëbëwetsica othopaeya-exana irabetsica,

j 13:5 *cuene copata*: Bajarapacuenia Dioso tocopatatsi ayaineconì penatsinotsinexa, pacuenia Dioso exana faraón-pijinëjawabelia, piagamatabëcuenetajaya-exanaenexa, daxita penaneconitsia-exanaecuenëjawanënexa petsijumajopænexa Egipto nacuapijiwi pebejiobia-exanawanapaexae Dioso pijajiwi, Israel-pijinë pemomoxi. Taema Éxo. 7:13. k 13:5 *ayaijamatabëcuenenë nataeya*: Taema Dan. 7:8,20,25; 11:36. l 13:5 *cuarenta y dos pajuameto beje*: Baitsi, acueyabi pawaibeje epatua. m 13:10 *pitaxutuajamatejematsaponaejawa ... copatsinejewa*: Bajarapacuenia be-exana, tsipaji itsamatacabijawabelia Dioso naneconitsia-exanaena pamonaë Jesús pijajiwi bejiobia-exana. Taema Apoc. 19:19-21; Mt 26:52.

daxitajiwi pitabënejewa! ¹⁴Pa-ayaicuenejawanë tocopatatsiⁿ pexana-ponaenexa, pewënëta papiayainë copiaya manuamenejawatsina pitsapaina pitabarata, bajaraxuanë pejamatabëcueneta yamaxë-itojoroba mapanacuajawa pejinawanapaewije. Nexata, itorobapona daxita pamonaë yamaxë-itojoroba bajaraxuanëta, pexananutsinexa jumapecataenë, papiayainë copiaya manuamenejawatsina pitsapaina jumapecataeya, ponë icatsia asaë, beyaxuabi-atatsi espadata.^o Nexata, bajaraponë jumapecataeya exana jane baja. ¹⁵Nexata, cotocaewi papiayainë irawetsina pitsapaina, Dioso cuenecopatatsiⁿ piasaëya-exanaenexa bajarapajumapecataenë, pecuaicuajaiya-exanaenexanua. Bajarapajumapecataenë jane baja, itoroba pebeyaxuabia-exanaponaenexa daxita pamonaë asiwaya, yaiyataeya, apotonubenaetsi pematabacabëta. ¹⁶Orijibia, bajarapajumapecataenë jane baja pejamatabëcueneta, daxitajiwi mapanacuata pejinawanapaewije, cobejuma-itanerubaponaeya-exanaenatsi, pecujanenia pacobe, itsa jume, pitapathaitota. Bajarapacuenia exanaena daxitajiwi-jawabelia; pamonaë beweliamatabëcuenewi, ayaijamatabëcuenewi-ata, pamonaë bitso pexainaewi, bepejiobiwi-ata, pamonaë amoneya petonacuenebawanapaewi itsamonaëjawabelia, pamonaë-ata amoneya apopetonacuenebawanapaewi itsamonaëjawabelia, apopecanajetsiwitsi-ata itsamonaëjawabelia amoneya petonacuenebabiabinexa. Daxita bajarapamonae itanerubaponaenatsi. ¹⁷Nexata, itsajiwi-ata apocuenecaëjëpaetsi tsane itsacuenejawayo-ata pecomuatsinexa, pecanajetsinexa-ata, pajiwi apoxinae pitanerutsijawatsi. Pa-itanetota jiwi itanerubaponaenatsi, papiayainë copiaya manuamenejawatsina pitsapaina, pewënë, itsa jume, pijanúmero pewënë.

¹⁸Paneyapëtaenexa pajamatabëcuene xaina bajaraponë pijanúmero, xaniawaetsia bepacanaëjëtame. Pajiwi canaëjëtsiana, yapëtaena jiwitonë pijanúmeronexa. Bajarapanúmero raja seiscientos sesenta y seis tsane.

Pacuenia Juan tane 144.000 pajiwi-beje, Dioso pijajiwi, penaxëanaejawa, yabara peliwaissi

14 ¹Bajaraxuacujinae, taniji Corderonë penucaejawa Sióntso-tsojumata. Barënuca ciento cuarenta y cuatro mil ponëbeje,^q pitapa-itanerubiwitsi Corderonë pewënë, paxa-ata pewënë. ²Bajaraxuacujinae, jumetaniji athëbëwetsica pecuaicuajaijawa, pacuenia bitso banajumeta

n 13:14 tocopatatsi: Bajarapapiayainëbeje cuene-itajëta jiwitonëbeje ponëbeje peyanacua-ewetsinënexabeje yabara. Itsamonaë canaëjëta Dioso petocopatsijawa cotocaewi penaitajëtsinë peyanacua-ewetsiwi peyamaxë-itojorobinexa mapanacuapijiwije, bajarapamonae apopecumexa-niataexae Jesucristo peliwaissi. Itsamonaë canaëjëta pijinia copiaya penaitajëtsinë peyanacua-ewetsinënexa penasaërjatsijawa cotocaewi peyanacua-ewetsinënexajawabelia, bajaraponë pitorobinexa daxitanacuanëpijiwi penawajëcabiabinexa bajarapajumapecataeya pexanaenë-jawabelia, ponë copiaya penaitajëtsinë peyanacua-ewetsinëcuenia. **o 13:14 beyaxuabi-atatsi espadata:** Taema Apoc. 13:3. **p 13:15 Dioso cuenecopatatsi:** Bajaraxua Dioso exana daxita mapanacuapijiwije pijamatabëcuenetajanexa, penajamatabëcuenepënyorotsiyaniwa pibi-siacuene pexanaejawawecua. Xuacujinae, Dioso penaneconitsia-exanaenexa bajarapaneco-nijamatabëcuene. Taema Apoc. 13:5-pijinota. **q 14:1 ciento cuarenta y cuatro mil ponëbeje:** Pabitsaëto nacayapëtaeya-exana Apoc. 7:1-4-jawata, bajarapabitsaëto yabara tsaena jumaitsi mapaversculotaje.

pinijijōca, beyamaxē penajumetsijume-ata. Jumejēpanua pacuenia arpa, ayaibitsaētozaneto ita najuaracata. ³Bajarapacuenia najumetane, tsipaji Corderonē pijajiwi, ciento cuarenta y cuatro mil ponēbeje, naxēananubena pejanawaji trono pitabarata, cuatro ponēbeje pitothiawi, ancianowi-ata pitabarata. Itsajiwi-ata cajena apocaējēpaetsi pecujaninexatsi bajarapapejanawaji bajarapamonaewecua, tsipaji bajarapaciento cuarenta y cuatro mil ponēbeje Dioso capanepatsi mapanacuawecua, Corderonē penecónimatamotsixae pejanata. ⁴Bajarapamonae penaexanaejawawerenacujinae apopenaperabēquenetsiataewi petiriawijawabelia. ⁷Xaniawaetsia penajamatabēcuenē-ewetsiwi Dioso pitabarata. Pēnajanawanapanua Corderonē itsaxuayo ponapona. Bajarapamonae baja namataxainaeya Dioso capanepatsi itsamonae pewajēnaeya, Corderonē, Dioso-ata, pijajiwinexa, Corderonē peneconimatamotsixae pejanata. ⁵Bajarapamonae caeto-ata apojumetsēnētsi. Aneconijibi tsawanapae Diosojawabelia.

**Acueyabi ponēbeje ángelewi wajunupaeba pacuenia
itsamatacabi itsijitsia mapanacuataje**

⁶Icatsia, ita-ángelnē taniji pepunanajetarucējawa. Canajetaruca pexanaliwaisi, apopewerewerecaeliwaisi, petsipaebinxā mapanacuajawa pejinawanapaewije. Tsipaebijitsia daxitanacuanēpijiwi, daxitawirijumewi-ata. ⁷Bajarapa-ángelnē pinijijumeta jumaitsi tsanajetarucā: «Dioso cujunawiaya pajinawanapare! Pawēñexaniatabianamenua bitso ayaijamatabēcuenē pexainaejawa yabara, tsipaji rabaja copiapata Dioso penaneconitsia-exanaponaenexa daxitajiwi. Asiwaya, yayiataeyanua, panematabacabēta panawajētabiabianame Diosojawabelia, tsipaji bajaraPonē exana itaboxo, ira, manuaneme, mera pepitsaparubenaejawanē-ata», jai tsanajetarucāe ángelnē pinijijumeta.

⁸Icatsia, cotocaewi taniji itsanē ángelnē pepunanajetarucējawa. Bajara-ponē jumaitsi tsanajetarucā:

«Dioso rabaja werebiaba Babilonia tomaraxanetopijiwimi,
tsipaji bajarapatomarapijiwimi jamatabēcuenēbijianapona
daxitanacuanēpijiwi, pesiwanajamatabēcuenecopababiabin
exa itsacuenējawanējawabelia Diosowecua. Nexata, belia daxita
nacuanēpijiwi jamatabēcuenējēpatsi asiwaya penawajēcabiabinexa
jumapecataeya pexanaenēñajawabelia, bitso⁵ pibisiacuenē pewitota⁷

r 14:4 *apopenaperabēquenetsiataewi petiriawijawabelia*: Mapajumebeje, bēpēñacuenia mapajamatabēcueneliwaisi xainaje: Bajarapamonae aposiwanajamatabēcuenecopabi itsacuenējawabelia Diosowecua, pena-ewetsinexa. Baitsi, asiwaya aponawajēcae jumapecataeya pexanaenējawabelia, aponamatawajibinua, apojunatsinua penajorobiwi. Biji rajane, itaxutuajamatejema tsabiabi ēDiosojawabelia daxitacuenē yabara. Pacujinae Dioso pijajiwi siwanajamatabēcuenecopata itsacuenējawabelia bajaraPonēwecua, bajaraxua tsitatsi bepewecuanamatayajitsijawatsi bajaraPonēwecua. **s 14:8 bitso...***najamatabēcuenecataitsinejewa*: Wowajumeta pitsapa: «el vino de su furor» jiwijumeta pijinia, «pepopewēñacawaxiyo pīatanera», pejaijume. Baitsi, bajarapamonae caejamatabēcuenē xaina bajarapatomarapijiwimijawabelia nawitsia pibisiacuenē pewitota pexanawanapaenexa. Taema Apoc. 15:6; 16:1. **t 14:8 pibisiacuenē pewitota**: Pacujinae jiwi siwanajamatabēcuenecopatabiabi itsacuenējawabelia Diosowecua, pacuenia wajijawabelia, pematawajibinējawabelia, jumapecataeya pexanaenējawabelia-ata, bajaraxua ēbia-exana Dioso, tsipaji daxitajiwi tsicarucatsi picani ēDiosojawabelia pesiwanajamatabēcuenecopabijawa. Bajarapacuenia jiwi ita exana, cuenējēpa Dioso pitabarata petiriwa pejaitsijawa itsanē pamonawecua. Taema Jer. 51:7-8, Apoc. 17:2; 18:2-3.

pexanawanapaenexanua najamatabëcuenecataitsinejewa», jai tsanajetaruae cotocaewi pa-ángelnë punanajetaruca.

⁹Bjaraxuacujinae, icatsia taniji acueyabi-ángelnë pepunanajetaruae-jawa. Bjaraponë pinijijumeta jumaitsi tsanajetaruae:

«Pajiwi najamatabëcuene-itajëta asiwaya peyaiyataejawa copiaya pepitsapaepiyainëjawabelia, bjaraponë jumapecataeya pexanaenëjawabelia-ata, pematabacabëta petonucaejawata, penacopatsijawatanua piayainë pewënë pitapata, itsa jume, pecobejumata pitanerutsinexatsi, bjarapajiwi naneconitsiana Diosojawabelia. ¹⁰Bjarapacuenia pexanaewi natoyapëtaena Dioso bitso pebara-anaepanaejawatsi, ayaicuenia penaneconitsia-exanaenexatsi, najamatabëcuenecataitsinejewa. Nexata, naneconitsia-exanaenatsi azufre yajawa petajue-isotojawabelia,“ Dioso pija-ánglewi pitabarata, Corderonë-ata pitabarata.

¹¹Ayaicuenia Dioso penaneconitsia-exanaexatsi, athëbëabetsia bjarapa-isototsëxë junaenia daxitamatacabijawabelianexa. Baitsi, pamonaenajamatabëcuene-itajëta asiwaya peyaiyataejawa piayainëjawabelia, bjaraponë jumapecataeya pexanaenëjawabelia-ata, pematabacabëta petonubanaejawata, penacopatsijawatanua piayainë pewënë pitanerutsinexatsi, isoto petajuta bitso jamatabëfaefaena. Cae-epatoyo-ata apocopatsi tsane.” Bjarapacuenia Dioso naneconitsia-exanaenatsi pejamatabëcuenewënëcaexae pebara-anaepanaejamatabëcuene bjarapajiwi jawabelia pijaneconi yabara.

¹²»Bjaraxuata, Dioso pijajiwi benacuenecujaruba pijamatabëcuenesaënexa Diosojawabelia, copatsinejewa pitaxutuajamatejemajawa Jesús-jawabelia, pejumecowënëtanapanapaejawanua Dioso pitorobiliwaisitsi, itsamonae bejiobia-exanabiabi-atatsi bjaraxuanë yabara», jai tsanajetaruae pa-acueyabi ángelnë punanajetaruca.

¹³Bjaraxuacujinae, jumetaniji athëbëwetsica tanejumaitsi jawa mapacueniaje:

—Yaquinarutsianame mapejumaitsi liwaisije: «¡Mapamatacabijawawelia-cujinaeje, pewajënaeyabelia-ata, jamatabëcuenebarëya baja tsawanapae tsane pamonaenayaxuabatsi Wajatuxanenë Jesucristo pijajiwi xae,» pejaili-waisi, yaquinarure! —nejai athëbëwetsica.

Orijibia, Espiritu Santo-ata nejumaitsi bjarapamonae yabara mapacueniaje:

—Xaniajai rabaja tsane. Bjarapamonae raja Dioso pexaniacuenia peyawenonaewitsi, tsipaji baja nacuera-ewetsiana penacuenebijawawecua, pebejiobia-exanaejawatsiwecuanua. Bjarapacuenia Dioso matamotsianatsi daxita xua pexaniacuenenexanawanapa, pamatacabi abaxë asaë tsawanapae

u 14:10 *azufre yajawa petajue-isotojawabelia:* Taema Apoc. 19:20; 20:10; Gén. 19:24; Sal. 11:6; Eze. 38:21-22. **v 14:11** *cae-epatoyo-ata apocopatsi tsane:* Mapaliwaisije tsiwajënaepaeba pacuenia Dioso exanaejitsia Apoc. 15:1-19:21. **w 14:13** *Jesucristo pijajiwi xae:* Itsacuenia peju-caenexa: «Jamatabëcuenebarëya baja tsawanapae tsane pamonaenë tépapona Wajatuxanenë Jesucristojawabelia pepuapesiwanajamatabëcuenecopabiwi», itsa jume, «caejamatabëcuene pexainaexae Wajatuxanenë Jesucristojawabelia».

mapanacuataje. Nexata, jamatabëcuenebarëya tsawanapae tsane —nejai Espiritu Santo.

**Pacuenia itsamatacabi Dioso naneconitsia-exanaejitsia daxita
pamonae pijaneconi pexainaewi, yabara peliwaisi**

¹⁴Icatsia, taniji penioponae-itarërëbojumawetsica pe-ecaejawa jiwitonë. Bajaraponë netsita Jesús, Daxitajiwi Pematapijinë. Namataxatateca oronanitota pexanaecorona. Cobena-eca pexiujaijawa, penajumafurutsijawa, bemasete pecaucubinexa penaweretsitrigoruanë. ¹⁵Nexata, icatsia, itsanë ángelnë pitsaparena templobo-ënëwerena. Asaëyata wawajai itarërëbojumawetsica pe-ecaenëjawabelia. Mapacueniaje: «¡Caucubare jane baja penaweretsiruanë mapanacuayaberecaje, tsipaji rabaja copiapata necaetuatsima-tacabinexa penaweretsixu mapanacuatarecaje!», jai itarërëbojumawetsica pe-ecaenëjawabelia.

¹⁶Nexata, bajaraxuacujinae ponë eca itarërëbojumawetsica, penajumafurutsimaseteta irajumawereca caucubanajetaruca penaweretsitrigoruanë.^x Caetuata jane baja daxitanacuanëpijiwi, pacuenia pijapabi pexainaenë notabiaba penaweretsitrigoruanë, petanabataxuabinexa.

¹⁷Bajaraxuacujinae, icatsia athëbëtatsia itsa-ángelnë pitsaparena templobo-ënëwerena. Bajaraponë-ata capona pexiujaijawa, penajumafurutsijawa, bemasete pecaucubinexa penaweretsi-uvaruanë. ¹⁸Orijibia, itsa-ángelnë, altar-piji-isoto pewetsinë, pitsaparena altar-jawawerena. Junata pinijijumeta pexiujaimasete, penajumafurutsijawa, pecapona-ángelnëjawabelia. Jumaitsi mapacueniaje: «¡Mapanacuayaberecaje caucubare-meca daxita penaweretsi-uvaruanë!», jai.

¹⁹Nexata jane baja, bajarapa-ángelnë pexiujaijawa, penajumafurutsimasetejawata irajumabereca caucubanajetaruca penaweretsi-uvaruanë. Pecaucubicujinae, othoca bajarapa-uvacuai^y petaxubataxuabimëthëabelia, pebarëmeneyubataxuabinexa. Bajarapataxuabimëthë nacatocuenecatane Dioso pebara-anaepanaejawa pibisiacuene pexanaewijawabelia.

²⁰Nexata jane baja, uvacuabarëmene yubataxuaba tomarapënëwerena. Nexata, pebarëmeneyubataxuabijawata pinijijinaraxaneto pitsapapona. Bajarapajaraxaneto^z penawotsijawa piapiajawa xaina trescientos pakilómetrobeje. Piawajubuajawa pijinia xaina bejamatabëcuene caemetro epatua.

x 14:16 *caucubanajetaruca penaweretsitrigoruanë*: Apoc. 14-jawata nacayapëtaeya-exana Dioso penaneconitsia-exanaejawa mapanacuapijiwi pijaneconi yabara. Bajaraxuata, itsamonae canaëjëta Jesús pecaetuatsijawa pamonae apopejumecowënëtsiwiitsi penaneconitsinexa, pacuenia pabi pexainaenë caetuata trigo petanatabataxuabinexa, pepabotonë petajuitsinexa. Taema Jer. 51:33, Joel 3:13, Mt 13:39-42. Itsamonae itsiata itsacuenia canaëjëta. Tsitatsi Jesús matapania pijajiwi pepitsijawanexa, mapanacuapijiwi ayaicuenia penaneconitsia-exanaewajënaeya, pacuenia trigo petanabataxuabinë notabiaba ëpexu, pecaponaenexa bojawabelia.

y 14:19 *bajarapa-uvacuai*: Bajarapa-uvacuai nacatocuenecatane pibisiacuene pexanaewi. Nexata, petaxubataxuabijawa nacatocuenecatane pacuenia Dioso bitso bejiobia-exanaena bajarapamonae, penaneconitsia-exanaejawata pijaneconijamatabëcuene. **z 14:20** *Bajarapajaraxaneto*: Mapaversiculoje nacayapëtaeya-exana pacuenia Dioso werebiabia-exanaena ayaibitsaëtoxaneto mapanacuapijiwi, pijaneconijamatabëcuene. Ayaibitsaëtoxaneto pebeyejebia-exanaexaetsi tsane, nexata pejanaraxaneto nawotsiana.

Pacuenia Juan tane athëbëtsia siete ponëbeje ángelewi,
siete xuabeje piayaijawanë pecaponaewi, penaneconitsia-
exanaenexa mapanacuapijiwi, yabara peliwaishi

15 ¹Icitsia, taniji athëbëtsia pinijicuene pitajëtsijawa, xuanë itsa-matacabi bitso pibisiacuenejawanë copiapatsijitsia mapanacuataje; ayaicuenia jiwi pitaxutuanabenajacaejawanë. Taniji siete pa-áγγελ-nëbeje, pecaponaewinexa siete xuabeje piayaijawanë, xuanëta Dioso naneconitsia-exanaejitsia mapanacuapijiwi, pecopiarucaejawanëta. Bajarapapiayai-cuenejawanë pepanepaecujinae, Dioso baja, mapanacuajiwi bitso pebara-anaepanaecueneje, copiarucaena.^a

²Nexata, icatsia taeyetajë bemanuamene picaní. Itsiata baitsi jane, piatajajawa, penasabijawanua pacuenia vidriojawa. Bajarapanasabiboxojawa naitayota, pacuenia cotia-itsi isoto. Bajarapanasabiboxojumawereca nubena pamona pecuene-amoneyabiwi^b piayainë, bajarapapiayainë jumapectaeya pexanaenëtsi-ata. Bajarapamona itorobi-atatsi, apotonubena pematatabacabëta bajaraponëjawabelia, penajamatabëcuene-itajëtsinexa asiwaya peyayataejawa. Aponacopatsinua pitanerubinexatsi piayainë pijanúmerota, panúmero xaina pewënënexa. Pecuene-amoneyabixae, bajarapamona canubena Dioso perajutsi-arpajawanëtsi. ³Nexata, bajarapamona naxëana-nubena Moisés-pijinë pewaji,^c Dioso pijajiwitonëmi, Corderonë-ata pewaji. Wënëxaniatsiaya jumaitsi tsanubena mapacueniaje:

«Xamë, petuxanenëmë Dioso, nijamatabëcuenesaënë daxitawecua.
Daxita nexanaejawanë, pinijicuenejawanë cajena, jiwi
pitaxutuanabenajacaejawanë.

Xamë raja neyanacua-ewetsinë daxitanacuanëjawa. Neyanacua-ewetsijawata, nesiwacanaëjëtsicuenia najëpaeya pexaniacuenia exanabiabame, itsacuenia exanaenejewamë nejumaitsicuenia.

⁴Xamë, petuxanenëmë Diosomë, daxitajiwi pecayiyataenë tsane. Pexaniacuenia cawënëxaniatsiananua, ayajamatabëcuene nexainenë yabara, tsipaji rabaja cajena caenëmë peponianeconijibinë.

Bajaraxuata, daxita nacuanëpijiwi patsiana xamëjawabelia, asiwaya, yayiyataeyanua, pecatonubenaenexa pematatabacabëta, xamë nitabarata. Bajarapacuenia cato-exanaena, tsipaji baja daxitajiwi yapëtaena ëpexaniacuene nexanaponaponaejawa», jai tsanubena naxëanaeya, pewënëxaniatsijawata Diosojawabelia.

a 15:1 copiarucaena: Bajarapasiete xuabeje, penaneconitsia-exanaejawanë, apoto-iquinaetsi tsane jiwi peponaejawanexa isotopucaxanetojawabelia pijaneconijamatabëcuene. Biji saya, tocopiarucaeya-exanaenatsi penajamatabëcuene-pënëyorotsimatacabinexa Diosojawabelia pibisiacuene pexanaejawawecua, apopewereweracae-isotojawabelia peponaeyaniwa.

b 15:2 pecuene-amoneyabiwi: Bajarapamona apopecuene-amoneyabiwi pewecuapanepaxae pebejiobia-exanaejawatsi, Cristo pejamatabëcuene. Biji rajane, Dioso tanetsi pecuene-amoneyabiwicuene, tsipaji bajarapamona apocopatsi Jesús-jawabelia pitaxutujamatejema-jawa, bejiobia-exana-atatsi petëpaejawabelia. Baitsi, pijamatabëcuenesaëxae pecatsitecaenexa pejumexaniataejawa Jesús peliwaishi, beyaxuabi-atatsi bajaraxua yabara, Dioso tanetsi pecuene-amoneyabiwi. **c 15:3 Moisés-pijinë pewaji:** Xua naxëananubena liwaisijëpa pawaji Israel-pijinë pemomoxi naxëana Éxo. 15:1-18-jawata, Dioso pecapanepaexaetsi Egipto nacuapijiwiwecua.

⁵Bajarapacuenia penaxëanaecujinae, icatsia taniji athëbëtatsia templobo-ënëtuatuajëalia peyatu-ucutsipana penapatsijawa, papana ruca Dioso pena-jumecopatsiliwaisi Moisés-pijinëta peyaquinae-ibopananë pexaniawaete-jebibaula pewajënaeya. ⁶Nexata, bajarapayatu-ucutsitaxunae-ënëwerena pitsaparena siete pa-ängel-nëbeje, pecaponaewinexa siete xuabeje piayaijawanë, xuanëta Dioso naneconitsia-exanaejitsia mapanacuapijiwije. Bajarapa-ängelewi naxataba pexaniawiriapapaëbërëjawanë, piaxuirajibi-jawanë. Peniojaijawanë bitso. Nacrobëcëbanubena oronanitota pexanae-pananë. ⁷Bajaraxuacujinae, caenë, cuatro ponëbeje pitothiawiyajuwënë, rajutapona cae-oronanitota pexanaewaxiyo Dioso, pianaepanaejawa pewë-nëcaejawanë, ponë daxitamatacabijawabelianexa peponaponaenë. Rajutapona, caewaxiyo, caenë canacujitsia, bajarapasiete pa-ängelnëbejajawabelia, Dioso ayaicuenia anaeya penaneconitsia-exanaejawanexa mapanacuapijiwije, pibisiacuene pexanawanapaexae. ⁸Bajarapayatu-ucutsi-ënë templobota, bitso wënëca ëtsëxë, penajamatabëcuene-itajëtsinexa peponaponaejawa Dioso ayaijamatabëcuenenë daxitawecua, Dioso pepopiasaënëcuene-ata. Nexata, itsajiwi-ata cajena apocaëjëpaetsi pejone-nexa bajarapatemplobo-ënëtuatuajëabelia, matapania daxita pewateretsijawabelia xuanë siete pa-ängel-nëbeje capona, piayaijawanë.

**Juan tane athëbëtatsia pacuenia itsamatacabi Dioso
naneconitsia-exanaejitsia^d daxita pijaneconi pexainaewi**

16 ¹Icatsia, jumetaniji templobo-ënëjawawerena pinijijumeta peju-maitsijawa, bajarapasiete pa-ängelnëbejajawabelia mapacueniaje: «¡Paponare iranëjawabereca, pane-epacaponaenexa jane baja, xuanë siete pawaxibeje wënëca, piayaijawanë! Dioso jame baja, anaeya ayaicuenia penaneconitsia-exanaejawanexa daxita pamonaë naneconita bajaraponëjawabelia», pejaijawa jumetaniji.

²Nexata jane baja, penamataxainae-ängelnë, waxiyota pecaponaera epatajaraba irajawabereca. Nexata, daxita pamonaë piayainë pewënë-itanetota itanerubatsi, asiwaya, yaiyataeya, tonubenabiabanua pematatabacabëta jumapecataeya pexanaenë pitabarata, bajarapaepatota bitso perabëtsabanareca,^e pepopiatanejawanë.

³Bajaraxuacujinae, pecotocaewi-ängelnë pijawaxiyo pijira epatajaraba manuamenejawabereca. Manuamenemi nexata, naexana bepetëpaenë pejanara.^f Daxita baja tëpa manuameneta pejinawanapaewimi.

⁴Bajaraxuacujinae, acueyabi-ängelnë pijawaxiyo pijira epatajaraba menianëjawabereca, irawetsina pepitsaparubenaëmeranëjawabereca-ata. Nexata, daxita bajarapameranëmi naexana ëpejanaranë. ⁵⁻⁶Bajaraxuacujinae,

d 16:0 *Dioso naneconitsia-exanaejitsia*: Daxita pananeconitsia-exanaejawanë rubena ängelewi pecaponaewaxita, Dioso naneconitsia-exanaena mapanacuapijiwije itsa baja imoxoyo pewajënae Cristo pepatsijawanexatsica mapanacuayabetsicaje, peyanacua-ewetsinexa daxitanacuanëpijiwi. Nexata, bajarapananeconitsia-exanaecuenëjawanë bitso napëna tsaponaë tsane. **e 16:2** *perabëtsabanareca*: Cuenejëpa xua Dioso tsi-itoroba Egipto nacuapijiwimi. Taema Éxo. 9:8-11. **f 16:3** *bepetëpaenë pejanara*: Xua exana cotocaewi-ängelnë, acueyabi-ängelnëbeje cuenejëpa xua Dioso tsi-itoroba Egipto nacuapijiwimi. Taema Éxo. 7:17-21; Sal. 78:44. Cuenejëpanua Apoc. 8:10-11.

jumetaniji mera pewetsi-ángelnë wënëxaniatsiaya pejumlahitsijawa Diosojawabelia mapacueniaje:

«Diosomë, xamë raja cajena caeto-ata pibisiacuene aponexanaenë. Xamë raja daxitamatacabi neyamatacabitsitecaponaponaenë. Ajena pamatacabi ponaponame. Nacua ne-exanaewajënaeya-ata, ponaponame. Pepopexaniacuene nexanaenë raja, bajarapacuenia nenaneconitsia-exanaejawata pijaneconi pexainaewi.

Bajarapacuenia naneconitsia-exaname pecatobeyejebaponaexae nijajiwi, pijaneconimi newecua-ajibia-exanaewi, pamonaeta nijaprofetawimi. Nijajiwi pecatobeyejebiwi, xamë juya meranëmi pejanaranë to-exanaeya-exaname, bajarapamonae penatsi-apaenexa»,⁸ jai Diosojawabelia mera pewetsi-ángelnë.

⁷Icatsia, jumetaniji itsa-ángelnë, altar-jawawerena pejumlahitsijawa mapacueniaje:

«¡Xaniajai cajena! Xamë, Diosomë, niamatabëcuenesaenë daxitajiwiwecua. Jiwi nenaneconitsia-exanaejawata, pexaniajaicuenia naneconitsia-exanabiabame, pijaneconi pexainaewi», pejaijawa jumetaniji itsa-ángelnë wënëxaniatsiaya Diosojawabelia.

⁸Bajaraxuacujinae, cuatro-ángelnë pijawaxiyopijira epatajaraba matacapijijiuametojawabetsica. Nexata, matabapijijiuameto pecotiata jiwi bitso ayaicuenia tsajawatsi. ⁹Itsia, bajarapacuenia tae-ata, bajarapamonae apocopabi pibisiacuene pexanaponaejawa. Aponajamatabëcuenepënëyorotsinua Diosojawabelia, pewënëxaniatsinexa bitso ayaijamatabëcuenenëcueneyabara. Biji saya caranata, pibisiacuena wënëbaracacuaicuajai Dioso, ponë pecaëjëpaenëtsi petsitorobinexatsi, itsa jume, pewecua-ajibia-exanaenexatsi papiayaicuenejawanë tsitorobaponatsi.

¹⁰Bajaraxuacujinae, cinco-ángelnë pijawaxiyopijira epatajaraba piayainë pijatronojawabereca, itsajota yanacua-eweteca daxita nacuanëpijiwi. Nexata, bajarapanacuanëmi aitaquiri tsanuca.^h Orijibia, piayainë peyanacua-ewetsiwi bitso nawixaetane. Nexata, penawixaetaecobexaena-ebarëto ucubaxane. ¹¹Itsia baitsi jane, bajarapacuenia tae-ata, pewixaecobexae, bajarapamonae pibisiacuena wënëbaracacuaicuajai Dioso, ponë athëbëtatsia pe-ecaenë. Aponajamatabëcuenepënëyorotsinua Diosojawabelia, bitso peperabëtsabanaexae. Biji saya caranata, tsiteca pibisiacuene exanawanapa.

¹²Bajaraxuacujinae, seis-ángelnë pijawaxiyopijira epatajaraba, pinijimexananeto Éufrates menejawabereca. Nexata, bajarapamenexaneto tsewajunua, namuto petoruaenexatsi iranë pewetsiwi penicabinexa, penajetarubenaewi orientejawawetsina.

¹³Bajaraxuacujinae, taniji acueyabi padowathinëbeje, becuaitoxicuenia pepitsapaejawa. Copiyanë pitsapa tsawaliwalinë pecuaibowojotuatsina. Cotocaewinë pitsapa piayainë pecuaibowojotuatsina. Acueyabinë pitsapa

g 16:5-6 *penatsi-apaenexa*: Dioso pijajiwi petobeyaxuabaponaexaetsi, bajaraPonë juya yamatamotsiaya apaeya-exana pamonaemi tobeyajebatsi bepejana. h 16:10 *aitaquiri tsanuca*: Cuenejëpa xua Dioso tsi-itorobatsi Egipto nacuapijiwimi. Taema Éxo. 10:21-23.

peyamaxë-itojorobiprofetanë pecuaibowojotuatsina. ¹⁴Bajarapadowathiwi pinijicuene pexanaejawanë, exanapona. Bajarapamonae pona daxitanacuanëñjawa, pebarënacaetuatsinexa caejawata daxitanacuanë pewetsiwi, pijajiwi wajabitsaë yajawa, wajabitsaë pebarë-exanaenexa daxitawecua piajama-tabëcuenesaënë Diosojawabelia. Nexata, wajabitsaë barë-exanaena Dioso tajëwelia penato-itapetsimatacabita. Bajarapamatacabita jane baja, Dioso cuene-amoneyabiana daxita pitoyawitsi, pebarënwajabitsaëtsiwiwsijawabe lia-ata.

¹⁵Bajaraxuacujinae, jumetaniji Wajatuxanenë, Jesús, pejumaitsijawa: «Panenamuxuna-ewere! Itsajota apopanejamatabënajinaemë, baja-rajota jemata patsianajë. Baitsi, pacuenia penacobetoxotsinë jemata bapata, itsajota jiwi apojamatabënajinaetsi, bajara-itsinë tsane. Bitso jamatabëcuenebarëya tsane pajiwi jamatabëcuene-aitawaya ponaponana tanecopiapitsinexa. Nexata, benacuenexaniawaeta tajitsipacuenia, tapatsimatacabita pia-urayaniwa, pacuenia aura tsipae pejumasajinaewi, ⁱpecopiapitsinexa pesiwaxainaewitsi», pejajawa Jesús, jumetaniji.

¹⁶Nexata jane baja, pepodowathi pijajiwi caetuatsi daxitanacuanë pewetsiwi caejawata, Armagedón-wënëjawata^l hebreojumeta.

¹⁷Bajaraxuacujinae, siete-àngelnë pijawaxiypijira epatajaraba ita-boxojawabetsica. Nexata, athëbëtsatia templobo-ënëtuatuajëta Dioso pe-ecaetronojawawerena, pinijijumeta jumaitsi: «Daxita rajane baja, wereta Dioso penaneconitsia-exanaejawa mapanacuapijiwije», jai athëbëtsatia templobo-ënëtuatuajëta.

¹⁸Nexata jane baja, binebinejai yamaxë. Ayaicuenia napëna najumetapona. Iranë-ata najëbaba pinijicuenia. Jiwi pejinawanapaejawaweliacujinae mapanacuataje, caeto-ata apotae bajarapacuenia ira pinijicuenia penajëbijawa. ¹⁹Bajarapacuenia penajëbixae, pinijitomaraxanetomi, Babilonia tomarami, ^kacueyabi xuabeje ira natsana. Bajarapacuenia itsanacuanëpijitoranëmi-ata othopa irata. Bajarapacuenia Dioso exana

i 16:15 pejumasaajinaewi: Pajiwi Jesús pijajiwi cuenejëpa mapanacuapijiwije pexanaecuenë, bajarapamonae pebejiobia-exanaeyaniwatsi, bajarapajiwi Jesús tane bepejumasaajinaewicuenia, tsipaji aponajamatabëcuenexatatsi Jesús planeconijibicuene pacuenia jumaitsi 1Co 15:34-jawata. Taemanua Rom. 6:13; 2Co 5:2-4, 21; Efe. 4:24; Flp. 3:9; 1Pd 3:14; Apoc. 19:8. **j 16:16 Armagedón-wënëjawata:** Mapataxunae caetowënëruuba Dioso pejumeliwaisibaxutota. Bajaraxuata, aponayapëtae pataxunae yabara jumaitsi. Itsiata, hebreojumeta mapajamatabëcueneliwaisi xainaje Armagedón-jume: «Patusato boca Meguidotsutonëmuxuneneta». Bajarapatusato itsawënëbeje xaina: Jezreel-tusato, itsa jume, Esdrelón-tusato. Bajarapatusatota Israel-pijinë pemomoxi bajayatami barënwajabitsaëtabiaba pijawajabitsaëwijiawabelia. Taema Jue. 5:19; 6:33-7:22; 2Re 9:27; 23:29-30; Zac. 12:11. **k 16:19 Babilonia tomarami:** Bajayatami, Gén. 11-jawata daxitanacuapijiwi caejamatabëcuene xaina apopejumecowënëtsijawa Dioso, piapiabo pexanaenexa Babel-jawata. Xuacujinae, itsamatacabijawabelia Babilonia tomarapijiwi bejiobia-exanabiaba Dioso pijajiwi. Bajaraxuata, bajarapatomara nacatocuenecatane, pataxunaejawawerena pewetsiwi yanacua-eweta mapanacuapijiwije, pejamatabëcuenematacaponaenexatsi Dioso apopejisipacuenejawabelia pexanawanapaenexa. Itsiata, pejumaitsixae wowaijumeta, «la gran ciudad», jiwi caejamatabëcuene apoxainae patomara yabara jumaitsi. Itsamonae canaëjëta Babilonia tomara, itsamonae pijinia Roma tomara, itsamonae-ata Jerusalén tomara yabara. Daxita bajarapatomaranë itsajawata wënërubatsi, «la gran ciudad».

bajarapapinijitomaraxanetopijiwimijawabelia, penajamatabēnapitsixae¹ bitso pibisiacuene pexanaejawa. Nexata, Dioso ayaicuenia bara-anaepana. Bajaraxuata, pinijicuenia naneconitsia-exana bajarapatomarapijiwimi.

²⁰ Pinijicuenia ira penajēabixae, daxitatunaetonēmi, daxitatsutonēmi-ata, ajibi baja. Ira baja namatajēpa. ²¹ Orijibia, athēbēwetsica othopaica jiwi-jawabetsica bitso pecainejebimatarejetonē, granizojawanē, pinijijawanē, piarewejawanē cuarenta pakilobeje pexainaejawanē. Bajarapacuenia penaneconitsia-exanaexaetsi, mapanacuapijiwiije bitso pibisiacuene wēnē-cuaicuaijai Dioso, tsipaji tsitatsi pinijinaneconitsia-exanaecuenetsi.^m

**Itsamatacabi Dioso naneconitsia-exanaena Babilonia tomarapijiwi,
patomara Dioso tane bepenaperabēcanajetsiwacuenia**

17 ¹ Siete pa-ángel-nēbeje, siete pawaxiyobeje pecaponaewiyajuwē-nēnē, caenē rena xanējawaberena. Bajaraponē nejumlahitsi:
—¡Naxatsia! Catsitajētsianatsi pacuenia Dioso naneconitsia-exanaejitsia Babilonia tomarapijiwi, patomaraxaneto eca mene-xanetonēboxojumawereca. Bajarapatomarapijiwi cuenejēpa penaperabēcanajetsiwa, ² tsipaji pacuenia bajarapitsiwaxi pebijiji junatabiabatsi peperabēquenetsiataenexatsi pijawajiwiwecua, bajarapacuenia bajarapatomarapijiwi junatabiaba itsanacuanē pewetsiwi pejamatabēcueneyanabinexatsi, pesiwanajamatabēcuenecopatabia-bijawata Diosowecua itsacuenejawanējawabeliaⁿ. Nexata, jamatabēcuenebijianatsi bajarapamonae-ata —nejai bajarapa-ángelnē.

³ Bajaraxuacujinae, Espiritu Santo bemajitsinaebocuenia neyapētaeya-exana ángelnē tanebarēponaejawa petusatonacuayabelia. Bajarajotalia taeyetajē petiriwa, pe-ecaewa piayainē, petsobianē,^o pejumata. Bajarapa-piayainē xaina siete pamatabocotobeje, diez pijinia pamata-etobeje. Peperabētuareca, Dioso apopejitsipaewēnēanē, itanerubena. ⁴ Nexata, bajarpowa penaxatatsijawareca pabanaeya sājējai, itsajawa tsobia. Naitabēteca orojawanēta, perlawawanēta, penamatamotsi-ibotonēta-ata. Cobena-eca

1 16:19 penajamatabēnapitsixae: Dioso aponacofēnētsi cajena itsacuenejawayo-ata. Nexata, Dioso pejumeliwaisibaxutota ita jumaitsi: «Dioso najamatabēnapita», ita jai, nacayapētaeya-exana Dioso pesiwanajamatabēcueneweretsijawa matapania pexanaejawanexa pacuenia tajēwelía canajējēta. Itatsiata, Dioso pecuenenajematsixae bajarapacuenia pexanaejawanexa, jiwi tsitatsi Dioso penacofēnētsinē. Bajaraxua ruca, «Dioso najamatabēnapita», pejaijawa, Dioso pejumeli-waisibaxutota. **m 16:21 tsitatsi pinijinaneconitsia-exanaecuenetsi:** Bajarapamonae cuenejēpa Caín-pijinē. Taema Gén. 4:13. **n 17:2 pesiwanajamatabēcuenecopatibijawata ... itsacuenejawanējawabelia:** Éxo. 20:1-3-jawata Dioso nacayapētaeya-exana pacuenia bajaraPonē, caenē, nacatoxanepana wajasiwanajamatabēcuenecopatsinexa daxitacuene yabara wajanacayaweno-naenexa. Orijibia, Éxo. 20:4-6-jawata Dioso naca-itaweta wajasiwanajamatabēcuenecopatibia-biyaniwa jumapecataya pexanaenēanējawabelia, itsacuenejawabelia-ata bajaraPonēwecua. Rom. 1:20-21, 23-jawata pijinia Dioso nacayapētaeya-exana pacuenia naneconitsia-exanaejitsia jiwi ita wēnēxaniata itsacuenejawa peyaiyataexae ayajamatabēcuenejawa petaxaenua bajaraPonēwecua. Nexata, Babilonia tomarapijiwi pejunatsixae bajarapacuenia jiwi pexanaenexa, Dioso tanetsi bepenaperabēcanajetsiwacuenia, tsipaji najamatabēcuenē-itajētsiana bediosojume-paebiwicuenia itajara. Nexata, pacujinae jiwi taxuxuaba penamatajērēatsijawa pijasalinaliwaisi Dioso peliwaisijawabelia, becaeliwaisi petaxenexa, xania baja tsane. **o 17:3 petsobianē:** Bajara-pacolor cuene-itajēta Satanás Apoc. 13:3; pibisiacuene pexanaejawa-ata Isa. 1:18.

oronanitota pexanaewaxiyo, pewënëcaejawa Dioso bitso piataejitsibijawanē.^p ⁵ Bajarapowa pitapathaitota toyaquinarutatsi pitothiawënë. Itsajiwitane apoyapētae pajamatabēcueneliwaisi xaina bajarapawënë. Mapejumaitsi-itane yaquinarutaje: «Babilonia tomaraxanetopijiwi capitsapabiaba jiwi pejamatabēcuenebijianaewawanēnexatsi Diosowecua,^q jumapecataeya pexanaenēanējawabelia penawajēcabiabijawa. Capitsapanua, daxita papibisia-cuenejawanē Dioso ayaicuenia itoya, pexanawanapaejawa mapanacuataje», pejai-itane, picani bajarapowa pitapathaitota toyaquinarutatsi. ⁶ Taeyetajē bajarapowa pia-itajibitsecajawa Dioso pijajiwimi pejanaranē piapaecujinae, pamonaemi beyejebatsi, Jesús peliwaisi pewajunupaebixae ajamatabēcuenesaēya, bejibobia-exanae-atatsi picani pecopabia-exanaenexatsi.

Daxita bajaraxua itsa taniji, bitso cajena jamatabēcuenenajunawiacajē.

⁷ Nexata, ángelnē nejumatsi:

—¿Detsa xuajitsia itaxutuajamatabēcuenenajunawiacame? Cayapētaeya-exanaenatsi pajamatabēcueneliwaisi xaina mapowaje, papiayainējumata-ata bajarapowa eca, pexainaenē siete pamatabocotobeje, diez pijinia pamata-etobeje. ⁸ Mapapiayainē tanemeje, bajaraponē ponaponae-ata picani bajayata mapanacuataje, aeconoxae baja apoponaponae. Itsiata baitsi jane, itsamatacabi pinijimēthēxanetojawatsina pitsapaenina^r icatsia peponaponae nexa mapanacuataje. Bajarapamēthēwetsina pitsapaenina saya pebeyaxuabinexatsi, pepacuene jane baja pecopiarucaenexa. Bajarapapiayainē pepitsapaejawatsina petaejawata, nexata daxita mapanacuapijiwije jamatabēcuenenajunawiacaeana, pamonaē apowēnērubenaē Corderonē pijacuyalatobaxutota Dioso nacua pexanaewajēnaeya, pabaxutota wēnērubena matakabi apowerewerecaejawa pexainaewi. Bajarapamonae jamatabēcuenenajunawiacaeana, tsipaji bajaraponē pebeyaxuabicujinaetsi, icatsia asaē tsane —nejai ángelnē.

p 17:4 *bitso piataejitsibijawanē*: Babilonia tomarapijiwi, Dioso tane bepenaperabēcanajetsiwa-cuenia, tsipaji pacuenia penaperabēcanajetsiwxii junatabiaba pebijijiwi peperabēquenetsiataenexatsi pijawajiwewecua, bajarapacuenia bajarapatomarapijiwi junatabiaba mapanacuapijiwije pesiwanajamatabēcuenecopatabiabinexa itsacuenejawanējawabelia Diosowecua, bajara Ponē bitso pecuene-itoyajawanē exanawanapanua. Nexata, bajarapawaxiyo wēnēca daxita xua Dioso tsitatsi bepenaxuirabia-exanaejawanē, pesiwanajamatabēcuenecopatsijawa Diosowecua jumapecataeya pexanaenēanējawabelia, penajamatabēcuenē-itajētsijawa Diosowecua asiwaya peyaiataejawa itsanējawabelia, daxitacueneiwiria pibisiacuenē pewitota pexanaejawanē, jiwi pia-uracuenējawanē pexanaenexa, itsacuenejawanēnua Dioso pecuene-itoyajawanē, jiwi pexanaeyaniwa. Taema Éxo. 22:18-19; Lev. 18:21-22; 20:1-27, Deut. 18:1-12; Prov. 6:1-19; 11:1; 12:22.

q 17:5 *pejamatabēcuenebijianaewawanēnexatsi Diosowecua*: Itsamonae canaējēta pacuenia bajarapatomara pepoBabilonia tomara, Éufrates-menemuxuneneta pe-ecatomara, Iraq nacuata, tsipaji bajarapatomarata, bajayatami Nimrod, pijawabeje Semiramis, copiaya jamatabēcuenebijiana mapanacuapijiwije Diosowecua, piapiabo Babel-wēnēbo pexanaejawata. (Gén. 11). Pacuenia bajarapajiwibeje yamaxē-itojoroba jiwi, Dioso apojeitsipaecuenē pexanawanapaenexa, bajarapacuenia daxita xuanējawabelia jiwi siwanajamatabēcuenecopatabiaba Diosowecua, bajaraxuanē jamatabēcuenematacaponatsi Diosowecua. Itsamonae pijinia canaējēta Babiloniawēnē pejamatabēcuenē-itajētsijawa Jerusalén tomarapijiwi, pecuenejēpaexae peyamaxē-itojorobijawa jiwi Diosowecua, tsicarucuae-atatsi picani pecujarubinexa Dioso peliwaisi itsanacuanēpijiwijawabelia. Taema Eze. 5:7; 16:32-34, 46-48, 51; Eze. cap. 23; Mt 23:35, 37-39; Lu 11:50-51; 13:34-35.

r 17:8 *pinijimēthēxanetojawatsina pitsapaenina*: Bajarapanacua nacatocuenecanē panacuata jinawanapa Satanás, daxita pijademoniowi pijademoniowi yajawa. Nexata, nacayapētaeya-exana pacuenia ponē yanacua-ewetsijitsia mapanacuapijiwije, yanacua-ewetsiana pepodowathi pesaēta.

⁹Icatsia, ángelnē nejumlahtsi:

—Paliwaiši aeconoxae catsipaebijitsiatsi, pamonaē baja peyapētaewi, pecanaējētsijamatabēcuenē pexainaewi, bajarapamonaē jumeyapētaena mapaliwaisije. Papiayainējumata taeyetame petiriwa, pexainaenē siete pamatabocotobeje, bajarapamatabocotonē itajēta anijajamatabēcueneli-waisibeje; siete patsutobejējawata,⁸ eca Babilonia tomarata, siete ponēbeje pijinia pewetsiwi Babilonia tomarata. ¹⁰Nexata, cinco ponēbeje bajarapapewetsiwi yajuwēnēwi tēpa baja. Seisnē aeconoxae ewetaponapona Babilonia tomara. Sietenē abaxē apotaxuxuabi pewetsinexa. Itsiata, bajaraponē bajayajebi apo-ewetsi tsane. ¹¹Papiayainē taneme, petsobianē, benewēthē, mapajamatabēcueneliwaisi xainaje: «Ponē picani bajayata eweta Babilonia tomara. Itsiata baja, aeconoxae bajaraponē apo-ewetsi, tsipaji baja tēpa. Itsiata baiṣi jane, pamatacabi pinijimēthēxanetojawawetsina pitsapaenina, bajaraponē Babilonia tomara icatsia ewetsiana ochonēcuenia», pejajamatabēcuenē xaina. Ochonē-ata bajaraponē, itsiata bajarapasiete ponēbeje Babilonia tomara pewetsiwi yajuwēnēnēmi baja cajena. Cae-epatoyonexa saya ewetsiana bajarapatomara, tsipaji bajaraponēmi beyaxuabianatsi, pepacuene jane baja pecopiarucaenexa —nejai ángelnē.

¹²Icatsia, ángelnē nejumlahtsi:

—Papiayainē taneme, diez pamata-etobeje pexainaenē, mapajamatabēcueneliwaisi xainaje: «Diez rabaja pijinia ponēbeje pewetsiwinexa, pamonaē abaxē apotaxuxuabi peyanacua-ewetsicuene», pejajamatabēcuenē xaina. Itsiata, pamatacabi taxuxuabiana pijanacuanē peyanacua-ewetsijawa, Dioso tocopatsiana bajarapamonaē, cae-epatoyonexa saya, peyajawa-ewetaponaenexa piayainē, bepepopeyanacua-ewetsiwicuenia. ¹³Bajarapadieṣ ponēbeje, pewetsiwi, juya caejamatabēcuenē xainaena, petocopatsinexa penamatacaitorobisaē piayainējawabelia, pijanacuanē peto-ewetsinexatsi. ¹⁴Nexata, bajarapamatacabi bajarapadieṣ ponēbeje piayainē yajawa wajabitsaē barē-exanaena Corderonējawabelia. Itsiata baiṣi jane, Corderonē cuene-amoneyabiana daxita bajarapamonaemi, tsipaji yajawapatsiana pijajiwi, pamonaē Dioso pejunatsiwi, Dioso pitapetsiwi, baiṣi caejamatabēcuenē pexainaewi Corderonējawabelia. Corderonē cuene-amoneyabiananua, tsipaji bajaraPonē pepopetuxanenē daxita nacuanē pewetsiwi matatoxenetsia, pepopeyanacua-ewetsinēnua daxita peyanacua-ewetsiwiwecua —nejai ángelnē.

¹⁵Ángelnē icatsia nejumlahtsi:

—Pamenexanetonēboxojumawereca taeyetame pibisiacuene pexa-naewa, mapajamatabēcueneliwaisi xainaje: «Bajarapamenexanetonē

s 17:9 siete patsutobejējawata: Itsamonaē canaējēta pacuenia bajarapapiayainē cuene-itajēta Roma tomara, Italia nacuaṣa pe-ecaetomara, tsipaji bajayatami bajarapatomara eca 7 patsutobejējumata. Maparucaeje itsiata, Roma tomara pecunuatomaraxanetoxae, eca pijinia 10 patsutobejējumata. Itsamonaē canaējēta pacuenia cuene-itajēta Iglesia Católica, pepopenamatamotsi-iglesiabo, Vaticanowēnēbo, pe-ecaexae Roma tomarata. Itsamonaē pijinia canaējēta pacuenia bajarapasiete patsutobeje cuene-itajēta 7 panacuaxanetomibeje peyanacua. Nexata, bajarapanaacuaxanetonēmijawawerena pitsapaena itsapeyanacua-ewetsijawa, ochonacuaxanetonexa. Bajaraxuata, canaējēta pacuenia bajarapa-ochonacuaxaneto cuene-itajēta meta Califato Islámi-conacuapijiwi, payanacua-ewetsijawami wecua-ajibia-exana bajayatami. Itsiata, maparucaeje pejanacuenia naitajēta icatsia.

jamatabëcuene-itajëta jiwibitsaëtoخانetonë, daxitawirijawumi, daxitanacuanëpijiwinua, pamona Babilonia tomarapijiwi jamatabëcuenebijianeca Diosowecua, peyanacua-ewetsijawata», pejaijamatabëcuene xaina. ¹⁶ Diez pijinia pamata-etobeje pecuenecataewi, pamona diez panacuabeje pewet-siwinexa, piayainë yajawa, barë-itoya tsane pibisiacuene pexanaewajawabelia. Nexata, bajarapamona yacajërëtsiana peyanacua-ewetsicuenemi, asiwaya peyaiyataecuenemi, daxita pecobecowë pexanaejawanëmi-ata, pecopatsinexa bejumasawa^t pexuababuatsicuenia. Werenianatsinua, bepexaeyabuatsicueniatsi unupijiwi pianae panaewi. Pijatomarami-ata totajuitsianatsi isotota. ¹⁷ Dioso jamatabëcuene-itoroba bajarapadieze ponëbeje, najamatabëcuenejëpaeya petocopatsinexa piayainë pijanacuanë peto-ewetsinexatsi. Nexata, piayainë bajarapamona pijanacuanë to-ewetsianatsi, matapania pecopiapatsijawabelia daxita pacuenia Dioso tajëwelia najumecapanepaeya jumaitsi. ¹⁸ Powa, pibisiacuene pexanaewa, taeyetame menexanetonëboxojumawereca, mapajamatabëcueneliwaisi xainaje: «Pinijitomaraxaneto Babilonia tomarapijiwi, patomara jamatabëcuenenamatacaitoroba mapanacuanë pewetsiwiye, pibisiacuene pexanaponaenexa», pejaijamatabëcuene xaina —nejai ängelnë.

Pacuenia Babilonia tomaraxanetomi copiaruca, yabara peliwaisi

18 ¹ Icatsia, itsa-ängelnë taniji, perunaejawatsica athëbëwetsica; bitso penamatacaitorobisaë pexanaenë. Pinijicotia yajawarunaica. Nexata, ira itayota daxitanacuanëjawa. ² Ayaijumeta wawajai. Jumaitsi mapacueniaje:

«Werebiabijitsiatsi rabaja Babilonia tomaraxanetota pejinawanapaewi.

Nexata baja, ëjoriminacua tsarucä tsane, ëdowathimona pejinawanapaenexa. Bajarapatomarata juya jinawanapaena, daxitawiria pibisiacuene pexanaedowathiwi, daxita pibisiawiriawi pepunaewi, unupijiwi, dajubi-ata, pawiriawi Dioso itaweta jiwi pexaeyaniwa, pejayatsiyaniwanua, bepenaxuirabiwi penacopatsiyaniwa Dioso pitabarata.

³ Bajarapacuenia Dioso bijiana bajarapatomara, tsipaji bajarapatomarapijiwi daxitanacuanëpijiwi jamatabëcuenebijiana, asiwaya pebarënewajëcabiabinexa jumapecataeya pexanaenëanëjawabelia Diosowecua, bitso pibisiacuene pexanawanapaenexanua. Daxitanacuanë pewetsiwi-ata, caejamatabëcuene xainanua bajarapacuenia pexanaenexa.

t 17:16 bejumasawa: Daxita pacuenia nacayapëtaeya-exana petocopiapatsijawanexatsi Babilonia tomarapijiwi, (patomara cuenecatanetsi penaperabëcanajetsiawacuenia), bajaraxuanë nacayapëtaeya-exana pacuenia Dioso bitso pibisiacuenia bejiobia-exanaena bajarapatomarapijiwi. Aponacuenëjëpae-ata tsipae pacuenia jumaitsi, itsiata yapëtanetsi pecuenëjëpaejawanexa bitso bepejiobicuene yabara. Bajayatami, Asiria nacuapijiwi pebara-anaepanaexae Israel-pijinë pemomoxijawabelia, pecuene-amoneyabicujinae, pamona caponaëjtsia petaicawicuenia Asiria nacujawabelia, wejumajona penaxatabijawanëmi jumasa pecaponaenexa. Yacajërëbanua daxita pecobecowëjawanëmi. Pumuthaicaucuba. Muxuyorocaucubanua. Orijibia, pijatomaranëmi totajuita, jiwi penacopabiwi yajawa. Taema Eze. 16:39; 23:29; 26:19; Oseas 2:5-7. Dioso tsaena cuenecanawiatsiana bajarapapibisiacuene Babilonia tomarapijiwijawabelia peyamatomatsicuenia.

Daxitanacuanëjawawerena pepatsiwi, penawijatsinexa Babilonia tomarapijiw jawaberena, naexanapona bitso ayaijawa palata pexainaewi, bajarapatomarapijiwi pejamatabëcuene. Babilonia tomarapijiwi itaxutejema comuacabiaba daxitacuene, pibisiacuene pexanabiabinexa, bitso pexaniacuena penaitabëtsinexanua. Bajarapacuenia penaneconitsixae, Dioso werebiabijitsiatsi», jai ángelnë.

⁴ Bajaraxuacujinae, jumetaniji athëbëwetsica itsa jume pewawajaijawa Dioso pijaijiw jawabelia mapacueniaje:

«¹ Paxamë patajajiwimë, papitsapare baja Babilonia tomarawecua, panecuenejëpaeyaniwa bajarapamonae pexanaecuene, bajarapatomarapijiwi yajawa Dioso papecananeconitsia-exanaeyaniwa!

⁵ Bajarapatomarapijiwi pijaneconi baja bitso ayaijawa xaina. Pijaneconi itsa napebetsipa, itsa najuma-etaponaëjitsipa, nexata copiapatsipa itaboxojawabetsia. Dioso cajena yapëtane daxita Babilonia tomarapijiwi pibisiacuene pexanaejawa, xaniawaetsia penaneconitsia-exanaenexa.

⁶ Panewerebiabinexa" bajarapatomarapijiwimi, cuenecanawiatsiaya juya pabejiobia-exanaename, pacuenia bajarapamonae bejiobia-exanabiaba itsamonae. Pananeconitsia-exanaename, ayaicuenia panebejiobia-exanaejawata, anijatobeje matatoxenetsia bajarapamonae pexanaecuenemi itsamonaejawabelia.

⁷ Babilonia tomarapijiwi bitso be-ayaijamatabëcuenewi natane. Natocomuacabiaba ayaijawa penamatamotsijawanë penaitabëtsinexa. Nexata, pacuenia bitso siwabëjai tsabiabi bajaraxuanë pexainaenexa, juya cuenecanawiatsiaya ayaicuenia panawixaetaeya-exanaename, panejamatabëcuenebëjaiya-exanaenexa. Bajarapatomarapijiwi jamatabëjumaitsi tsabiabi: «Waxaitsi raja majotaje bitso pexaniacuena jinawanapatsi, nacuanë waja-ewetsiwicuenia. Apojinawanapaetsinua najamatabëxainaeya pamona bepewecuatëpaewatsicuenia. Nexata, apojamatabëcuenebëjaitsi tsane itsacuenejawayo-ata yabara», jamatabëjai tsabiabi bajarapamonae.

⁸ Bajarapacuenia pejamatabëjumaitsixae jamatabëcuenenawëxaniabiaya, ayaicuenia Dioso bejiobia-exanaenatsi. Nexata, caecuenia caematacabita Dioso tocopiapatsia-exanaenatsi petëpaecuene, pematunueyabicuene, janibocuene. Totajuenatsinua isotota bajarapamonae pejinawanapaetomaraxanetomi. Bajarapacuenia Dioso naneconitsia-exanaenatsi bajarapamonae, tsipaji pepopetuxanenë Dioso, bitso piacuenesaënë, daxitajiwi pijaneconi petocaëjëtsinë-ata, siwanajamatabëcuenewereta bajarapacuenia penaneconitsia-exanaenexa», jai itsa jume athëbëwetsica.

⁹ »Daxitanacuanë pewetsiwi, pamonaë pibisiacuene najua-exanawanapa Babilonia tomarapijiwi, najuacabarëyanua ayaijawa penamatamotsijawanë

pexainaejawa, itsa tsëxëtaena petajuejawatsi bajarapatomaraxaneto, ya-itaxutonueya wawajai tsane. ¹⁰ Pecajunawi, tajë wecuanubenaena, petaejawata bajarapatomarapijiwimi peyamatajuejawatsi. Bajarapamonae najumaitsi tsane:

«Bitso baja cajena bejiobi pinijitomaraxaneto, Babilonia tomarata, pejinawanapaewimi peyaiyataewimitsi. Cae-epatoyocujinae baja weriajawatsi, Dioso penaneconitsia-exanaexaetsi», najai tsane bajarapamonae.

¹¹ Daxitanacuanëjawa, pamonae pecanajetabiabawanapaewi, nuena, ya-itaxutonueya wawajai tsanenua, tsipaji baja xua capatabiaba pecanajetsinexa, ajibi baja tsane pecomuacaewitsi. ¹² Bajarapamonae capatabiaba pecanajetsinexa, oronanita, palatananita-ata pexanaejawanë, perlajawanë, penamatamotsi-ibotonë-ata. Capatabiabanua pexaniawiria papaëbërë, lino, seda papaëbërëjawanë-ata. Bajarapapapaëbërë peraënaejawanë, petsobiajawanë-ata. Capatabiabanua daxitawiria petuxujuwinaejawanë, pexaniajawanë-ata, marfil-jawata pexanaejawanë, penamatamotsinaejawanë pexanaejawanë, broncenani, hieronani, mármol-ibo-ata pexanaejawanë. ¹³ Capatabiabanua canelabocojawanë, pexaejawa pematajejawanë pexanepanaeya-exanaenexa, inciensojawanë, mirrajawanë-ata. Capatabiabanua petuxujuwiranë, vinoranë, aceiteranë, pexaniawiria trigobenonë, trigobultonë-ata. Capatabiabanua vaca, oveja, caballo, perobobocaemonë-ata, carrozamonë. Capatabiabanua jiwi pecanajetsinexa itsamonaejawabelia amoneya petonacuenebawanapaenexa. ¹⁴ Nexata, pamonae pecanajetabiabawanapaewi ya-itaxutonueya jumaitsi tsane Babilonia tomarapijiwi yabara:

Daxitacune panejitsipaecuenemi pacatowerewereca baja. Xuanë yabara bitso pasiwarëyamë tsabiabi, pacatowerewereca baja. Daxitamatacabijawabelianexa pacato-ajibi baja tsane daxita panexainaejawanëmi, penamatamotsijawanë, pitabëjawanë-ata», jai tsane bajarapamonae ya-itaxutonueya.

¹⁵ Pamonae naexana ayajawa palata pexainaewi, pecanajetabiabixae xua capata Babilonia tomarapijiwimijawabelia, bajarapamonae tajë wecuanubenaena pecajunawi, itsa taena bajarapatomarapijiwimi petajuejawatsi. Ya-itaxutonueya wawajai tsanubenae tsane. ¹⁶ Jumaitsi tsane Babilonia tomarapijiwi yabara:

«Bitso baja cajena bejiobi pinijitomaraxanetota pejinawanapaewimi. Bajarapatomarapijiwimi naxatabiabiaba picani pexaniawiria linopapaëbërëjawanë. Itsajawanë peraënaejawanë. Itsajawanë pijinia petsobiajawanë. Naitabëtabiabanua picani oronanitota pexanaejawanëta, perlajawanëta, penamatamotsi-ibotonëta-ata.

¹⁷ Itsiata baitsi jane, cae-epatoyocujinae saya werewereca baja bitso pexainaejawanëmi,» jai tsanubenae tsane daxita bajarapamonae.

Daxita pamonae barcoxanetonë pewetsiwi, bajarapamonëta penaponaewi, penacuenebiwi, pecaponaejawanë pecanajetaponaewi-ata, daxita bajarapamonae tajë wecuanubenaena pecajunawi, Babilonia tomarapijiwimi itsa tajuenatsi. ¹⁸ Daxita bajarapamonae tsëxëtaenubenaena Babilonia tomarami itsa tajuenatsi. Nexata, wawajaiya jumaitsi tsanubenae tsane bajarapatomarami yabara:

«Ajibi cajena itsanacuata pecuenejēpaetomara, pacuenia itsi picani mapapinijitomaraxanetoje petajuewajēnaeya», jai tsanubenae tsane.

¹⁹ Bajarapamonae petsēxētaenubenaewata, natsimata-othocaena atsa-benonē, bitso pesiwanajamatabēxainaexae Babilonia tomarapijiwimi, peto-ajibixaetsinua pecomuacaewitsi. Ya-itaxutonueya jumaitsi tsanubenae tsane:

«Bitso baja cajena bejiobi pinijitomaraxanetota pejinawanapaewimi. Babilonia tomarapijiwimi ayaijawa palata pexainaexae, bitso pexainaewi naexana daxita pamonaē barco pexainaewi, pecanajetabiabixae xua capata bajarapatomarajawaberena. Itsiata baitsi jane, Cae-epatoyocujinae saya bajarapatomarami werewereca baja», jai tsanubenae tsane bajarapamonae.

²⁰ Petaejawata pacuenia Dioso naneconitsia-exana Babilonia tomarapijiwimi, itsanē^v Dioso pijanacuatatsia jamatabēcuenebarēyaya jumaitsi tsane:

«Dioso baja cajena naneconitsia-exana Babilonia tomarapijiwi, pebejiobia-exanabiabijamatabēcuene Dioso pijajiwi. ¡Nexata, pasiwanajamatabēcuenebarēyamēre daxita athēbētatsia panejinawanapaewi, paxamē Dioso papijajiwi, paprofetawimē, pa-apōstolewimē-ata, tsipaji Dioso naneconitsiaya cuenecanawiata bajarapatomarapijiwijawabelia, pacuenia paxamējawaberena exana!», jai itsanē athēbētatsia.

²¹ Bajaraxuacujinae, piacuenesaē-āngelnē yotaxuaba piniji-ibotoxaneto bitso. Nexata, manuameniabereca asaēyata xuabareca bajarapa-ibotoxaneto. Āngelnē jumaitsi mapacueniaje:

«Pasaēwajētota xuarecajē mapa-ibotoxanetoje, bajarapitsisaēwajētota itsamatacabi Dioso bijianaena Babilonia tomaraxaneto. Apotaetsi baja nexata tsane icatsia matawējēa.

²² Nexata baja, apojumetae tsane pijacallejawa arpa peracatabiabiawata, flauta, trompeta-ata piobabiabiawata. Itsajiwi-ata baja aponacuenebi tsane bajarajota. Apojumetae baja tsane icatsia matawējēa trigoxu pecaquiatabiabiawata pecaquiatsi-ibotota.

²³ Itsalāmpara-ata baja aponaitayotsi tsane bajarajota. Apojumetae baja tsane jiwi barēyaya penabarēcuaiwaij aitsabiabiawata, penacojiobifiesta pexanaejawata. Daxita bajaraxuanē baja tocopiapatsianatsi, tsipaji bajarapatomarata pecanajetabiabawanapaewi, daxitanacuanējawa wēnējoneyabiaba. Penajorobabiabiawatana yamaxē-itojorobabiaba daxitanacuanēpijiwi.

²⁴ Orijiibia,^w Babilonia tomarapijiwi, beyejeba profetawi, ayaibitsaēto Dioso pijajiwi-ata. Bajaraxuata juya, Dioso

v 18:20 *itsanē*: Apóstolnē Juan aponacayapētaeya-exanae pajiwi bajarapacuenia jumaitsi. Itsiata, itsamonae canaējēta Babilonia tomarapijiwi pebeyaxuabiwiawuēnēnē Jesucristo peli-waisi pejumexaniataexae. Majotaje Babilonia tomarapijiwi nacatocuene-itajēta daxita pamonaē pebejiobia-exanaewi Jesús pijajiwi, pamonaē siwanajamatabēcueneecopaba Diosojawabelia.
w 18:24 *Orijibia*: Itsamonae canaējēta pacuenia versículo 24 tsitca āngelnē pejumaitsiawata. Itsamonae pijinia canaējēta apóstol Juan-pijinē peyaquinaejumenē, caejamatabēcuene pexainaexae bajarapacuenia Dioso penaneconitsia-exanaejawa Babilonia tomarapijiwi.

ayaicuenia naneconitsia-exanaena Babilonia tomarapijiwi»,^x jai bajarapa-ángelnē.

19 ¹ Bajarapacuenia Babilonia tomarapijiwi yabara piacuenesaë-ángelnē pejumaitsicujinae, jumetaniji jiwi ayaibitsaëtoxaneto athëbëtatsia, pinijijumeta pejumaitsitsaponaejawa mapacueniaje:

«¡Dioso raja ayaijamatabëcuenenē bitso! ¡WajaDioso raja jiwi pecapanepaenē pijaneconiwequa! ¡Peniweniwenaecotia pexainaenē! ¡Piacuenesaënēnua bitso daxitacuene pexanaenexa!

² BajaraPonē xaniawaetsia naneconitsia-exanabiaba jiwi, peneconiyapëtaecujinae. Nexata, peneconiyapëtaexae Babilonia tomarapijiwimi, Dioso baja naneconitsia-exana bajarapamonaemi pibisiacuene bitso pexanaexae. Bajarapamonaemi naneconita Diosojawabelia pejamatabëcuenebijanaponaexae daxitanacuanëpijiwi, asiwaya pebarënwajëcaponaenexa jumapecataeya pexanaenëanëjawabelia, pitorobixaenua daxitanacuanëpijiwi Dioso pijajiwimi pebeyejebinxatsi. Bajaraxuata, Dioso juya yamatamotsiaya naneconitsia-exana bajarapamonaemi», jai jiwi ayaibitsaëtoxaneto athëbëtatsia.

³ Bajaraxuacujinae, bajarapamonaie icatsia jumaitsi:

«¡Dioso raja ayaijamatabëcuenenē bitso! Babilonia tomarapijiwimi petajuetsëxëtsi pewajënaeyabelia junaenia athëbëabetsia daxitamatacabijawabelianexa», jai bajarapamonaie.

⁴ Nexata, veinticuatro ponëbeje ancianowi, cuatro ponëbeje pitothiawi yajawa, irataeya bobena Diosojawabelia, penajamatabëcuene-itajëtsinexa asiwaya peyaiyataejawa. Bajarapaepatota jumaitsi tsanubenaie Diosojawabelia, tronota pe-ecaenëjawabelia:

«¡Bajara-itsimë baja! ¡Xanepana rabaja nexanaejawa! ¡Bitso ayaijamatabëcuenenëmë!», jai tsanubenaie Diosojawabelia.

⁵ Bajaraxuacujinae, icatsia tronojawawerena daxita Dioso pijajiwijawabelia jumaitsi:

«¡Daxita paxamë Dioso papijajiwimë, paneyaiyataewi, ayaijamatabëcuene panexainaewi-ata, itsa jume, beweliajamatabëcuene panexainaewinua, wënëxaniatsiaya pexaniajamatabëcuene parajutabiabare wajaDiosojawabelia!», jai tronojawawerena.

Corderonë penacojobifiesta, yabara peliwaiei

⁶ Icatsia, jumetaniji ayaibitsaëtoxaneto jiwi pecuaicuajaijawa. Bajarapacuaicuajaijawa, najumeta bepinijijöcäjume, beyamaxëjume-ata, ayaijume. Jumaitsi tsaponae bajarapamonaie mapacueniaje:

«Bitso pexaniacuenia wënëxaniatsianatsi Dioso. Wajatuxanenë Dioso, ponë piamatabëcuenesaënë daxitawecua, taxuxuaba rajane baja daxitanacuanëpijiwi pewetsijawa.

^x 18:24 *Babilonia tomarapijiwi*: Daxita Dioso pijajiwii apopebeyaxuabixaetsi caetomarajawata, Dioso peliwaiei penacujarubiwi canaëjëta pacuenia bajarapatomara cuenecatane saya patomaranëpijiwi Dioso pijajiwii tobeyejebatsi.

⁷»Copiapata jane baja, fiesta pexanaematacabinexa, Corderonē penacojiobifiestanexa. Powa, Corderonē pebarēnacojiobiwanexa, naxaniawaeta rabaja bajarapafiestanexa. Nexata, siwajamatabēcuenenarēyatsi tsane. Jamatabēcuenewēnēcaenatsi wajabarēyajamatabēcuenē. Wēnēxaniatsianatsi Corderonē, pebarēnacojiobiwanexa.

⁸»Bajarapowa penaxaniawaetsinexa, rajutatsi bitso pexaniawiriapapaēbērējawa penaxatatsinexa, piaxuirajibijawa, bitso peniojaijawa», jai bajarapamonae. (Bajarapanaxatatsijawa jamatabēcuenē-itajēta Corderonē pijajiwi Dioso aneconijibia petaejawatsi.)»

⁹Nexata, bajaraxuacujinae ángelnē nejumaitsi:

—¡Yaquinare mapejumaitsilisijawe: «Jamatabēcuenenarēya pamonae junatatsi penaxanexa pecunapexaejawa, Corderonē penacojiobifiestajawata», pejaiilwaisi yaquinare! Daxita xua catsipaebatsi, Dioso, pexaniajainē, pejumaitsi jawa —nejai ángelnē.

¹⁰Nexata, yaiyataeya tamatabacabēta tonucajunujāē bajarapa-ángelnē pitabarata, tanajamatabēcuenē-itajētsinexa asiwaya tayaiyataejawa. Itsiata baitsi jane, bajaraponē nejumaitsi:

—¡Pētsa bajaraxua exaname! ¡Biji rajane, najamatabēcuenē-itajēre asiwaya neyayataejawa ēDiosojawabelia! Xanē-ata raja saya Dioso pijajiwitonēnē, pacuenia xamē, itsamonae-ata, Diosojawabelia panenajuasiwanajamatabēcuenecopabiwi. Pacuenia paxamē xaniawaetsia pawajunupaebabiabame panesiwanajamatabēcuenecopabijawa Jesús-jawabelia, bajarasaya xanē-ata pacuenia tatsipaebinē. Panewajēnaeyabelia^γ pawajunupaebaponaename Jesús peliwaissi, tsipaji bajarapaliwaissi bitso penamatamotsiliwaissi panetsipaebinexa Dioso pewēnēta —nejai ángelnē.

Pacuenia Juan tane athēbētatsia Cristo

penioponaecaballojumata pe-ecaejawa, yabara peliwaissi

¹¹Bajaraxuacujinae, taniiji itaboxo penapatsijawa. Bajarajota taniiji jiwitonē, penioponaecaballojumata pe-ecaenē. BajaraPonē pewēnē Caejamatabēcuenē Pexainaenē.^z Itsawēnē pijinia Pepopexaniajainē. Bajarapacuenia wēnērubatsi, tsipaji bajaraPonē jiwi xaniawaetsia peyanacua-ewetsinē. Caejamatabēcuenē pexainaenēnua, perowijamatabēcueneta penawajabitsaētabiabinexa pibisiacuene pexanaewijawabelia. ¹²Pitaxutobeje naitayota pacuenia isoto bacotiatsobia. Bajaraponē matapona ayaijawa coronajawanē. Xainanua pewēnēyaquinarutsijawatsi,^a itsajiwi-ata apopewēnēyapētaewēnētsi.^b Ebajaraponē pijacuata nawēnēyapētane.

y 19:10 *Panewajēnaeyabelia*: Biblialiwaissi pejucaewi griegojumejawawerena wowaijumejawabelia, caejamatabēcuenē apoxainae bajarapaliwaissi yabara. Baitsi, aponayapētae itsa ángelnē jumaitsi, itsa jume, itsa Juan jumaitsi. Jota jutaruta ángelnē pejumaitsicuenia. Itsiata, itsa rucaejitsipa Juan pejumaitsicuenia, mapacuenia jumaitsi tsipaēje: (*Jiwi beyapētane mapaliwai-sije: Papexaniajaiilwaisi Jesús pacatsipaeba, bajarapaliwaissita jamatabēcuenē-asaēya-exanatsi pamonae jiwijawabelia tsipaebapona Dioso pejumeliwaissi, jai tsipaē.*) z 19:11 *Caejamatabēcuenē Pexainaenē*: Bajarapawēnē nacayapētaeya-exana mapajamatabēcuenēje: Jesús pepopianeconijibinē, pexanabiabinē daxita xua tsicarucatsi, tosajinaenējewatsi itsacuenējawa pexanaenexa, penajumecowē-exanaenē. a 19:12 *pewēnēyaquinarutsijawatsi*: Peyaquinaenē Juan aponacayapētaeya-exanae itsajota yaquinaruta bajarapa-itaneto, pajiwi-ata toyaquinarutatsi. Taema Apoc. 2:17. b 19:12 *itsajiwi-ata apopewēnēyapētaewēnētsi*: Taema Flp. 2:9.

¹³Penaxatatsijawareca tsobia, pejanarata pejabutsixae. Bajaraponë pewënë, Diosojamatabëcuene-itajëtsinë^c jiwijawabelia. ¹⁴Bajaraponë pënaponatsi wajabitsaë ayaibitsaëtoxaneto, athëbëpijiwi. Bajarapamonae naxataba bitso pexaniawiria linopapaëbërëjawanë, piaxuirajibijawanë, bitso peniojaijawanë. Bajarapamonae-ata yapon penioponaecaballuanëta. ¹⁵Ponë wajabitsaë barë-exana, bajaraponë pecuaibuatsina pitsapa pexiujai-espada^d pecuene-amoneyabinexa daxitanacuanëpijiwi. Nexata, bajaraponë yanacua-ewetsiana daxitanacuanëpijiwi. Pewetsijawata, ajumesaëya itorobabiabiana pejumecowënëtsinexatsi. BajaraPonë pijacuata naneconitsia-exanaena daxitanacuanëpijiwi, bepecuetsabataxuabinë uvaruanë pebarëmenetaxubataxubitaxunaeta. Pacuenia uvaruanë pecuet-sabataxuabijawata ayaibarëmene pitsapa, bajarapacuenia pijinia Dioso, ponë pijamatabëcuenesaëñë daxitawecua, ayaicuenia naneconitsia-exanaena daxitanacuanëpijiwi, pijaneconi pexainaewi, pebara-anaepanaexae. ¹⁶Ponë wajabitsaë barë-exana, pewënë-itanebërëtoyo ruca pijacamisajumawelia penaxatatsijawata, pethaëtojumata-ata. Jumaitsi tsarucae bajarapa-itanebërëtoyo: «Daxitanacuanë pewetsiwi-ata pepopewetsinë. Daxita petuxanewi-ata pepopetuxanenë», jai tsarucae.

¹⁷Bajaraxuacujinae, taenutajë ángelnë, matababipijijumeto pecotiata penucaenë. Pinijijumeta wawajai tsanucac daxitawiria pepunaewi, petëpaewi pewi pexaewijawabelia, mapacueniaje:

—¡Naxatsia! ¡Panacaetuanare payaibitsaëtoxanetomë ayaijawa pewi panexaenexa Dioso pejamatabëcueneta! ¹⁸Paponaremena panexaenexa, nacuanë pewetsiwimi pewi, wajabitsaë penamatacaitorobiwimi pewi, wajabitsaë pitatsacawimi pewi, caballuanëmi pewi, caballuanëjumata peponaewimi-ata pewi. Paxaenamenua pamonaemi amoneya tonacue-nebawanapa pewi, pamonaemi-ata amoneya apotonacue nebawanapae pewi, pamona beweliamatabëcuene pexainaewimi, ayaijamatabëcuene pexainaewimi-ata pewi. Pacajunatatsi daxita bajarapamonae pewi panexaenexa —jai tsanucac ángelnë pepunaewijawabelia.

¹⁹Bajaraxuacujinae, taniji piayainë,^e daxitanacuanë pewetsiwi, pijajiwi wajabitsaë yajawa, pecaetuatsijawa pebarënewajabitsaëtsinexa peniopo-naecaballota peponaenëjawabelia, pijajiwi jawabelia-ata. ²⁰Nexata, peniopo-naecaballota peponaenë waetaba piayainë, peyamaxë-itorobiprofetanë yajawa, ponë bajayata pinijicuene tsita-exanaponapona piayainë pitabarata, jiwi peyamaxë-itorobinexa. Nexata, jiwi nacaeweta piayainë pewënë-itanetota pitanerubaponaenexatsi, asiwaya, yayataeya, petonubenaenexanua pematabacabëta piayainë jumapecataeya pexanaenë pitabarata. Pewaetabucujinaetsibeje, piayainë, peyamaxë-itorobiprofetanëbeje, xubaliatsibeje ya-asaëya isotopucabelia, papuca tajueyeca azufre yajawa.

²¹Nexata, daxita bajaraponëbeje pijajiwi, pamona nacopaba, beyejebatsi peniopo-naecaballota peponaenë. Beyejebatsi pecuaibuatsina pepitsapae-espadata. Nexata jane baja, daxitawiria pepunaewi, petëpaewi pewi pexaewi, napeneyaba bajarapamonaemi pewi.

c 19:13 Diosojamatabëcuene-itajëtsinë: Taema Jn 1:1, 14. d 19:15 pexiujai-espada: Taema Isa. 49:2; Efe. 6:17; Heb. 4:12. e 19:19 piayainë: Ponë petsobianë, benewëthë, menewetsina pepitsapenë. Taema Apoc. 13:1-10; 17:11-14.

**Juan tane pacuenia itsamatacabi Cristo mil
pawaibeje ewetsijitsia mapanacuaje**

20 ¹Icatsia, taniji itsa-ángelnē perunaejawatsica athēbēwetsica. Cobe-narunaica pinijimēthēxanetopijillave, ayaicadenamaētoxaneto yajawa. ²Bajaraponē waetaba tsawaliwali, ponē bajayatami naitajēta jiwi-jawabelia bejomocuenia. Bajaraponē, pepodowathi, itsawēnē pijinia Sata-nás. Nexata, ángelnē ayaicadenamaētoxanetota cētabuata pepodowathi mil pawaibejenexa. ³Pecētsicujinae pinijimēthēxanetojawareca xuareca. Yawē-paxatatabuata bajarapamēthēxanetojawareca. Pematatsēnēa icatsia selloja-wata yamēthēwēpajumacatsata. Daxita bajarapacuenia exana pepodowathi pepitsapaeyaniwa bajarapamēthēwecua, peyamaxē-itojorobiyaníwa mapanacuapijiwi. Bajarapacuenia xuarecatsi bajarapamēthēxanetojawareca mil pawaibejenexa. Itsiata baitsi jane, pepanepaecujinae mil pawaibeje, isinae-natsi, cae-epatoyo icatsia jiwi peyamaxē-itojorobaponaponanexa.

⁴Bajaraxuacujinae, icatsia taniji jiwi tronojawata pe-enaewi. Bajarapa-monae Dioso itorobatsi petocanaējētsinexa jiwi pijaneconi pexainaewi,^f peyapētaeya-exanaenexa pacuenia naneconitsia-exanaejitsia pijaneconi-jamatabēcuene. Tanijinua itsamonae-ata, petēpaewimi, pamonaemi wēsi-ucubejebatsi,^g apopecopabixae jiwi petsipaebaponaejawa Jesús peliwaísi, Dioso pejumeliwaísi-ata. Bajarapamonae asiwaya, yaiyataeya, apotonu-benaenua pematabacabēta piayainē pitabarata, piayainē jumapecataeya pexanaenējawabelia-ata. Aponacopatsinua piayainē pewēnē-itanetota pitapa-itanerubinxatsi, pecobejuma-itanerubinxatsi-ata. Nexata, baja-rapamonae icatsia Dioso piasaēya-exanaejawatsi, taniji. Piasaēya-exanaecujinaetsi, bajarapamonae mil pawaibeje Cristo barē-ewetatsi mapanacuaje. ⁵⁻⁶Dioso piasaēya-exanaejawa pamonaewi pewēsi-ucubiwiitsi, wēnēruba copiaya jiwi piasaēya-exanaematacabi.^h Itsiata, caecuenia Dioso apo-asaēya-exanae daxita petēpaewimi. Mil pawaibejecujinaeⁱ jane baja, Dioso asaēya-exanaena daxita petēpaewimi pamonaewi abaxē apo-asaēya-exanae bajarapamatacabita. Jamatabēcuenebarēya tsane pamonaewi Dioso asaēya-exanatsi copiaya piasaēya-exanaematacabita, tsipaji cotocaewi

f 20:4 *petocanaējētsinexa jiwi pijaneconi pexainaewi:* Itsa jume, jiwi yanacua-ewetsijitsia Cristo yajawa. Bajayatami, nacua pewetsiwi tocanaējētabiaba pijaneconi pexanaewi, peyapētaeya-exanaenexa pacuenia naneconitsia-exanaejitsia, itsa jume, itsa aneconijibia taejitsia jiwi neconitsi-atatsi. **g 20:4** *wēsi-ucubejebatsi:* Bajarapamonae beyejebatsi pamatacabi tsawaliwali, pijapeyamaxē-itororobiprofetabeje yanacua-eweta mapanacuapijiwi. **h 20:5-6** *copiaya jiwi piasaēya-exanaematacabi:* Pamonaewi Dioso copiaya asaēya-exana mapaversícuxita, bajarapamonae piayainē pebeyejebiwiitsi Jesús pijajiwxae. Pamonaewi pijinia cotocaewi Dioso asaēya-exanaena mil pawaibejecujinae, bajarapamonae Dioso apocejumecowēnētsiwi, nexata jane baja, naneconitsia-exanaenatsi isotopucaxanetojawabelia. Bajaraxua wēnēruba cotocaewi patē-pae. **i 20:5-6** *Mil pawaibejecujinae:* Cristo yanacua-ewetsiana daxita nacuanēpijiwi mil pawai-beje. Xuacujinae, pepodowathinē – Satanás pe-isinaecujinae, bajaraponē natsicueyajunatsiana pamonaewi peyamaxē-itojorobiwi, pebarēnawajabitsaētsinexa Cristojawabelia. Cristo pecuene-amoneyabicujinae, nexata jane baja, Dioso matacotsia-exanaena daxita petēpaewimi, pitabarata penubenaenexa, bajaPonē petocanaējētsinexa pijaneconi. Pamonaewi pijaneconi pexainaewi (chivos) xuabiana isopucaxanetojawabelia Satanás yajawa. Pamonaewi pijinia Cristo pejitsipaecue-nia pejinawanapaewi (ovejas) yajawajinawanapaena Cristo PejanaJerusalén tomarata. Taema Mt 25:31-46.

patëpaejawanexa, acuenebi baja tsane itsacuenepexanaenexatsi. Biji rajane, bajarapamonae Dioso, Cristo-ata, pijasacerdotewi exanaenatsi. Bajarapamonae Cristo barë-ewetsianatsi mapanacuaaje mil pawaibeje.

⁷Itsa baja panepaena mil pawaibeje, Satanás icatsia isinaenatsi, mët-hëxanetowecua pepitsapaenexa. ⁸Pitsapaena icatsia daxitanacuanëpijiwi peyamaxë-itojorobinexa, Diosojawabelia apopesiwanajamatabëcuenecopabiwi. Nexata, bajarapacuenia Gog-jawawerena, Magog-jawawerena-ata⁷ Satanás caetuatsiana wajabitsaë. Bajaraponë pijajiwi bitso ayaibitsaëttoxaneto tsane. Pacuenia tajetabo-atsapërë nawita, bajara-itsi tsane. ⁹Bajaramonae wajabitsaë tsimaxënajetarubenaena daxitanacuanëjawawerena, matatoyorotsia jane baja tsimaxë patsiana Jerusalén tomara, Dioso piasiwatamarata, pewerebiabinexa picani Dioso pijajiwi, Jerusalén tomarata pejinawanaepawi. Itsiata baitsi jane, Satanás pijajiwi Dioso tsixuabianicatsi isoto athëbëwetsica. Nexata, bajarapamonaemi tajuenatsi. ¹⁰Nexata, pepodowathi, ponë jiwi yamaxë-itojorobaponaena daxitanacuanëjawa, xuabialiatsi isotopucalia, papuca azufre yajawa tajueyecabiaba, itsaxuayolia copiaya xuabatsibeje piayainë, peyamaxë-itojorobiprofetanëbeje. Nexata, bajarajota bajarapamonae Dioso naneconitsia-exanaenatsi isoto petajuta, matabijebi, merawijebi, daxitamatabijawabelianexa.

**Juan tane jiwi penubenaajawa penioponaetrono
pitabarata, Dioso penaneconitsia-exanaenexatsi**

¹¹Icatsia, taniji penioponaetronexanetojumata pe-ecaenë. Nawecua-ajibia-exanaxuaba nacua, itaboxo-ata. Bajaraxuacujinae, caejiwi-ata apotae baja pematatsënëa bajaraxuabeje. ¹²Taenubajënauxa daxita petëpawimi, ayaiajmatatbëcuene pexainaewimi, beweliajmatatbëcuene pexainaewimi-ata, penubenaajawa Dioso pitabarata. Peneconicanaëjëtšinexatsi,^k cuyalatobaxutonë baxupanejeba, itsajota itanerubena daxita petëpawimi pexanaecuenejawanëmi mapanacuataje. Itsabaxutota pijinia wënërubena pamonae matabi apopewerewerecaejawa pexainaewinexa. Nexata, pali-waisianë rubena bajarapabaxutobejewata, caejiwi canacujitsia Dioso tocaëjëtšijitsiatsi pacuenia tocopiatsijitsiatsi pexanaecuenemi yabara. Nexata, itsa aponawënërubenaepabaxutota wënëyaquinaruba pamonae xainaejitsia matabi aponawerewerecaejawa, bajarapamonae, caejiwi canacujitsia, paneconiwajëto xaina, bajarapaneconiwajëtota Dioso

j 20:8 *Gog-jawawerena, Magog-jawawerena-ata*: Taema Eze. cap 38-cap. 39-ata. Itsamonae canaëjëta pacuenia Gog, Magog-beje cuene-itajëta daxitanacuanëpijiwi Dioso pitoyawi. Itsamonae pijinia canaëjëta itsacuenia. Tsitatsi panacuanë bobena norteyenepanajawabelia, Israel nacumatatuwecua. Nexata, canaëjëta Rusia nacupijiwi meta, itsa jume, Europa nacupijiwi, itsa jume, Turquia, Siria nacupijiwi beje, Iraq, Iran nacupijiwi beje yajawa. Norteyenepanania panacuanë ena, tsimaxëpatsi-ata tsane Israel nacupijiwi jawabelia, daxitanacuanëpijiwi caejamatabëcuene pexainaexae, barënewajabitsaëtsiana Jerusalén tomarapijiwi jawabelia.
k 20:12 *Peneconicanaëjëtšinexatsi*: Daxita pamonae nubena Dioso pijapenioponaetrono pitabarata, ëpijaneconipexainaewi, apopesiwanajamatabëcuenecopatsixae Jesucristojawabelia. Nexata, Jesús pijajiwi aponanubenaep bajarajota, tsipaji Jesús tomatamotatsi pijaneconipesiwatëpaejawatatsi. Jesús pijajiwi pexanaecuenepanacuataje tocanaëjëtšijitsiatsi saicaya tronojawa, Cristo pitabarata, bajaraPonë peyapëtaeya-exanaenexatsi pitsipexaniacuenewajëtota rajut-sijitsiatsi, pexaniacuenepexanaajawa yabara mapanacuataje petëpawajënaeya. Rom. 14:10, 1Co 3:12-15; 2Co 5:10.

naneconitsia-exanaponaenatsi. ¹³ Caejiwi-ata, petēpaewimi, aponacopatsi tsane Dioso naneconitsia-exanaenejewatsi, tsipaji pamonaemi manua-meneta tēpa, pamonaemi-ata jinawanapa petēpaewi pejinawanapae-nacuata,¹ daxita pitsapaina, penubenaenexa Dioso pitabarata. Nexata, caejiwi canacujitsia paneconiwajēto xaina, bajarapaneconiwajētota Dioso naneconitsia-exanaponaenatsi. ¹⁴ Bajaraxuacujinae, jiwi petēpaeya-exanaejamatabēcuenemi, petēpaewi pejinawanapaenacuami-ata, Dioso xualia isotopucalia. Bajarapapuca raja jiwi cotocaewi patēpaejawa^m pexainaewi pejinawanapaepuca. ¹⁵ Pamona apowēnērubena, pabaxutota wēnērubena pamona matacabi apopewerewerecaejawa pexainaewinexa, bajarapamonaen peneliatsi bajarapapucalia.

Juan tane Dioso icatsia pexanaejawa pejana-itaboxo, pejananacua yajawa

21 ¹ Icatsia, taniji pejana-itaboxo, pejananacua yajawa, tsi-paji pa-itaboxo, panacua-ata, Dioso copiaya exana, ajibi baja. Manuamene-ata ajibi. ² Xanē rabaja Juannē, taniji pejanaJerusalén, Dioso pitapetsitomara, athēbēwetsica, Diosojawawetsica, perunaejawa. Daxita rabaja Dioso itabētsiaya xaniawaeteta bajarapatomara, pacuenia petiriwa, pamona pepitsiwajēnaeyatsi, naitabētsiaya banaxaniawae-teca, itsa siwapatsijitsiatsi penacojiobifiestanexa. Bajarapacuenia pijinia, Dioso xaniawaeta pejanaJerusalén tomara, pijajiwi petojinawanapae-nexatsi. ³ Nexata, jumetani piñijijume athēbēwetsica, tronojawawetsica. Jumaitsi mapacueniaje: «¡Taema! Majotaje raja Dioso aeconoxae jiwi yajawaponapona daxitamatacabijawabelianexa. Bajarapamonae pepoDiosonē pijajiwi tsane. Dioso pijinia bajarapamonae pijatuxanenē tsane. ⁴ Dioso itaxutobarēmene-iquinaponaena bajarapamonae. Ajibi baja tsane petēpaecuene, penuecuene, bitso penajamatabēxainaecuene, penawixaetaecuene-ata. Daxita bajarapitsicuenemi copiarucaena jane baja», jai athēbēwetsica.

⁵ Bajaraxuacujinae, Dioso, tronota pe-ecaenē, jumaitsi: «¡Taema! Daxitacuene bajayata ta-exanaejawami, xuanēmi baja picani werewerecaeya-exanajē, pejanajawanē icatsia exanajē», jai.

Bajaraxuacujinae, xanējawaberena icatsia nejumlahitsi:

—¡Yaquinare bajaraxuanē peliwaishi, tsipaji baja paliwaishi catsipaebatsi, bajarapaliwaishi pexaniajailiwaishi cajena! Xanepana nexata daxitajiwi pejuxexaniataenexa bajarapaliwaishi —nejai.

⁶ Bajaraxuacujinae, icatsia Dioso nejumlahitsi:

1 20:13 *petēpaewi pejinawanapaenacuata*: Bajarapanacua itsamonae wēnēruba «Hades nacua», itsamonae pijinia wēnēruba «petēpaewi peyanacua-ewetsinacua». m 20:14 *cotocaewi patēpaejawa*: Bajaraxua nacayapētaeya-exana jiwi naxuabiaya pejinawanapaejawa Diosowecua. Copiaya patēpaejawa taxuxuaba pamatacabi Adán-pijinē apojumecowēnētsi Dioso. Bajarapamatacabijawaweliacujinae, daxita Adán-pijinē pemomoxi naxuabiaya jinawanapa Diosowecua, pesiwanajamatabēcuenecopatsijawabelia Dioso, Jesucristojawabelia-ata. Itsa aposiwanajamatabēcuenecopatsi bajaraponēbejajawabelia, nexata tsiteca naxuabiaya tēpaena. Juya, cotocaewi patēpaejawa apotocopiarucaetsi tsane. Nexata, bajarapatēpaejawa petaei naxuabiaya jinawanapaena isotopucaxanetota daxitamatacabijawabelianexa.

—Daxita rabaja weretajë ta-exanaejawa.ⁿ Xanë rajane baja daxitacuene tataxuxuabinë, icatsia tacopiarucaeya-exanaenënexa-ata. Pajiwí bitso jitsi-paena pia-itawajamatabëcuene, bemerajitsipaejiwi, bajarapajiwí amoneya rajutsianajë pia-itawajamatabëcuene, matababi apopewerewerecaejawa pexainaenexa, Cristo pejamatabëcueneta,^o Ponë jiwi pejamatabëcuene-asaëya-exanaenë. ⁷Pajiwí ajamatabëcuenesaë tanejumexaniataejawa tajumeliwaisi ëpetëpaejawabelianexa, bajarapajiwí canacopatsiana daxita bajarapapexaniacuenejawanë.^p Xanë-ata pijaDiosonë tsane. Bajarapajiwí pijinia taxënotajiwiyo tsane. ⁸Itsia baitsi jane, pamonaë pitajepaebijamatabëcuene pexainaewi,^q itsamonaë pebejiobia-exanaeyaniwatsi tajumeliwaisi yabara, pejume-aebiwi tajumeliwaisi, piabejecuene pexanawanapaewi itsamonaejawabelia, jiwibewi-ata, ponaena isotopucaxanetojawabelia. Bajarapacuenia pijinia, pewitota pibisiacuene pexanaewi, penajorobiwi, jumapecataeya pexanaenëanëjawabelia penawajëcaewi, penajumetsënëtsiwi-ata, daxita bajarapamonaë ponaena isotopucaxanetojawabelia, papuca tajueycabiaba azufre yajawa. Bajarapa-isotopucata raja, jinawanapaena pamonaë cotocaewi patëpaejawa pexainaewi —nejai Dioso, tronota pe-ecaenë.

Pacuenia pejanaJerusalén tomara itsamatababi itsijitsia, yabara peliwaisi

⁹Nexata jane baja, rena caenë ángelnë, siete pa-ángelnëbejeyajuwënë, pecaponaewimi siete pawaxiyobeje, piayaijawanë pewënëcaejawanë. Bajaraponë nexata nejumlahitsi:

—¡Naxatsia! Catsitajëtsianatsi powa Corderonë pijawanexa —nejai ángelnë.

¹⁰Bajaraxuacujinae, Espíritu Santo bemajitsinaebocuenia, neyapëtaeya-exana ángelnë tanebarëponaejawa pinijitsutoxaneto, piapiatsutoxanetojawabelia. Nexata, bajarapatsutoxanetojawatalia ángelnë netsitajëta Dioso pitapetsiJerusalén tomaraxaneto, athëbëwetsica perunaejawa Diosoja-wawetsica. ¹¹Bajarapatomara cotianiweniweneca Dioso pijapeniweniwenae-cotia. Pacuenia penamatamotsijaspewënë-iboto cotianiweniweneca, bajaracotia-itsi. Nasabanua pacuenia vidriojawa. ¹²Bajarapatomara mata-toyorotsia yacaranata pia-itayaë-ibopanaxaneto, piapiajawa athëbëabetsia-ata. Bajarapayacaranatsijawa matatoyorotsia xaina doce pabaupabeje. Nexata, ángelewi, caenë canacujitsia, nucapona caebaupa canacujitsia. Bajarapabaupanëjawa Israel-pijinë pexi, doce ponëmibeje, caenë canacujitsia

n 21:6 ta-exanaejawa: Itsamonaë canaëjëta pacuenia Dioso apojumaitsi ëpejanajawa pexanaejawa yabara. Canaëjëta pacuenia bejumlahitsi picani: «daxita pacuenia tajëwelia siwanajamatabëcueneretajë ta-exanaejawanexa mapanacuataje, weretajë baja». Baitsi, pacuenia Dioso siwanajamatabëcueneretajë nacua pexanaewajënaeya, **1)** nacua pexanaenexa, **2)** jiwi pexanaenexa, **3)** jiwi pewecua-ajibia-exanaenexa pijaneconimi, Cristo pejamatabëcuene **4)** penaneconitsia-exanaenexa daxita pijaneconí pexainaewi isotopucaxanetota, **5)** Dioso peyajawaponaponaejawa daxita pijajiwí PejanaJerusalén tomarata, **6)** pewecua-ajibia-exanaenexanua coplaya pexanaejawanëmi, pejanajawa pexanaenexa icatsia. Daxita bajaraxua yabara tsaena Dioso wereta jane baja. **o 21:6** Cristo pejamatabëcueneta: Taema Jn 4:13-14; Rom. 6:23; Efe. 2:8-9. **p 21:7** bajarapapexaniacuenejawanë: Taema Apoc. 21:1-6 neyapëtaenexa xuanë canacopatsijitsia. **q 21:8** pitajepaebijamatabëcuene pexainaewi: Pamonaë nacajunua Dioso pijajiwijawabelia, tsita-pexaniacueneaxetsi, siwanajamatabëcuenecopatsinejewu Dioso, Jesús-jawabelia-ata. Nexata, itsa bejiobia-exanatsi bajaraxua yabara, copata pebarënacaetuatsijawa Dioso pijajiwí.

pewëñeänë wënërubenapona. ¹³ Acueyabi pabaupabeje xainapona caeyenepana canacujitsia. Orienteyenepananenia xaina acueyabi pabaupabeje. Nor-teyenepananenia pijinia xaina acueyabi pabaupabeje. Sur-yenepananenia pijinia xaina acueyabi pabaupabeje. Oesteyenepananenia pijinia xaina acueyabi pabaupabeje. ¹⁴ Bajarapayacaranatsi-ibopanajawa, petabujawata xainapona doce pa-ibotoxanetobeje, petsiwajënaejibijawanë. Bajarapa-ibotoxanetonëjawata, cae-ibotoxaneto canacujitsia pejumawelia, Corderonë pijajiwi, doce ponëbeje, apóstolewi, caenë canacujitsia wënërubenapona.

¹⁵ Pa-ángelnë nebarëcuaiuaijai, cobenaponapona oronaebo, pecaëjëbi-naebonexa Jerusalén tomara, peyacaranatsi-ibopanaxanetopijibaupanë, matatoyorotsia peyacaranatsi-ibopanaxaneto-ata. ¹⁶ Jerusalén tomara matatoyorotsia peyacaranatsi-ibopanaxaneto, daxitayenepanë najëpaeya xaina piapiajawa, matonotsiareca, epatajërëtsialia, athëbëabetsia-ata. Nexata jane baja, ángelnë pecaëjëbinaebota caëjëba Jerusalén tomara. Matonotsiareca piapiajawa xaina dos mil doscientos pakilómetrobeje. Epatajërëtsialia-ata xaina bajarapacuenia, dos mil doscientos pakilómetrobeje. Athëbëabetsia-ata piapiajawa bajarapacuenia xaina, dos mil doscientos pakilómetrobeje. ¹⁷ Bajaraxuacujinae, ángelnë caëjëba Jerusalén tomara matatoyorotsia peyacaranatsi-ibopanaxaneto, peyapëtaenexa paitayaëtowajëto xaina. Nexata, pitayaëjawa xaina sesenta y cuatro pametrobeje. Pawiriajawata mapanacuapijiwiwe bacaëjëba, bajarapitsijawata ángelnë caëjëba.

¹⁸ Jerusalén tomara matatoyorotsia peyacaranatsipanaxaneto, exana jaspewënë ibotonëta. Pepotomara exaneta ë-orojawanëta. Nexata, bitso nasaba, pacuenia itsi vidriojawa. ¹⁹ Bajarapatomara matatoyorotsia peyacaranatsipanaxanetotabujawata, copiaya piniji-ibotoxanetonë tsiwajënaejeba. Bajarapa-ibotoxanetonë itabëtsiaya jumacatsanaruba daxitawiria bitso penamatamotsi-ibotonëta. Penamataxainae-ibotoxaneto itabëta jaspewënë ibotonëta. Pecotocaewi-ibotoxaneto itabëta zafirowënë ibotonëta. Acueyabi-ibotoxaneto itabëta ágatawënë-ibotonëta. Cuatro-ibotoxaneto itabëta esmeraldawënë ibotonëta. ²⁰ Cinco-ibotoxaneto itabëta ónicewënë ibotonëta. Seis-ibotoxaneto itabëta cornalinawënë ibotonëta. Siete-ibotoxaneto itabëta crisólitowënë ibotonëta. Ocho-ibotoxaneto itabëta berilowënë ibotonëta. Nueve-ibotoxaneto itabëta topaciowënë-ibotonëta. Diez-ibotoxaneto itabëta crisoprasowënë ibotonëta. Once-ibotoxaneto itabëta jacintowënë ibotonëta. Doce-ibotoxaneto itabëta amatistawënë-ibotonëta. ²¹ Doce pabaupabeje doce pijinia paperlawënëjawatabeje, bitso penamatamotsijawanëta, exana caebaupa canacujitsia. Bajarapatomarata caecalle ruca daxitacallewecua bitso ayaicallexaneto. Bajarapacalle ë-orojawanëta pexanaecalle. Nasaba bitso, pacuenia itsi vidriojawa.

²² Bajarapatomarata apotaenë templo, tsipaji Dioso, Ponë pepopiajamatabëcuenesaënë daxitawecua, Corderonëbeje, betemplo, bajarapatomarata peponaponaexaebje. ²³ Bajarapatomara aponamatawenonae pitayotsinexa matabëbipijiuameto, merawipijiuameto-ata, tsipaji Dioso ayaijamatabëcuenë, Corderonëbeje pijapeniweniwenaeotiata itayota bajarapatomara. ²⁴⁻²⁶ Daxitanacuanëpijiwi, pamona baja Dioso capanepatsi pijaneconiwecua, bajarapamonae itsamatacabi jinawanapaena Dioso, Corderonëbeje pijapeniweniwenaeotiata. Daxitanacuanë pewetsiwi,

pijatomaranējawawerena capatsiana bajarapatomaraberena bitso penamamatsijawanē, Dioso yayiyataeya perajutsinexa. Daxitamatacabijawabelianexa, baupatanutsiana, tsipaji bajarapatomarata ajibi tsane merawi. ²⁷Itsiata bairisi jane, bajarapatomaraberena apocopatsi tsane pejonenexa pibisijamatabēcūene pexainaewi, pia-uracuene pexanaewi, penajumetsēnētsiwi-ata. Jonena ēpamonae wēnērūbena Corderonē pijacuyalatobaxutota, pamonae matababi apowerewerecaejawa pexainaewinexa.

22 ¹Bajaraxuacujinae, icatsia āngelnē netsitajēta pepamene, bitso pitaranaemene. Nasaba bitso, pacuenia itsi vidriojawa. Bajarapamene jiwi pejamatabēcūene-aitawayā-exanaemene. ²Bajarapamene pitsaparena Dioso, Corderonēbeje pijatronojawawerena. ³Bajarapamene bocapona ayai-callexanetotuatajēareca. Bajarapamene-itapayareca daxitamuxubērēne-niabeje nubena naejawanē, pecuai pecapitsapaenaenē. Bajarapanaejawanē caewaita nacuaitapona doce panacuaitsibeje. ⁴Caejuameto canacujitsia nacuaitapona. Nexata, jiwi wēna-asaētsawanapaejitsia ⁵bajarapacuai pexaejawata. Pebaxuta pijinia, xanepana daxitanacuanēpijiwi penawaēbinexa, pejamatejemanexa piawitanējawawecua. ⁶Nexata, bajarapatomarata ajibi tsane daxita piabejecuene, ⁷tsipaji Dioso, Corderonēbeje pijatronota ecaenabeje, pijajiwi pitorobabinexabeje daxitamatacabijawabelianexa bajarapatomarata. Nexata, daxita Dioso pijajiwi tonacuenēbawanapaena, penajamatabēcūene-itajētsinexa asiwaya peyayataejawa. ⁸Bajarapamonae Dioso itabarataena. Dioso pewēnē-ata rucaena bajarapamonae pitapathaitota. ⁹Bajarapatomarata ajibi tsane merawi. Pepopetuxanenē Dioso pijapeniweniwenacotia itayotsiana. Nexata, bajarapatomarata pejinawanaepaewi aponamatawenonae tsane lāmparacotia, matababipijijuametocotia-ata. Pamonae jinawanapaena bajarapatomarata, Dioso barē-ewetsianatsi daxitamatacabijawabelianexa.

**Pacuenia baja imoxoyo pewajēnae Jesucristo
pepatsijawanexatsica, yabara peliwaissi**

⁶Icatsia, āngelnē nejumaitsi:

—Paliwaissi baja pacatsipaebatsi neyaquinaenexa, pexaniajailiwaissi cajena. Daxita xua taneme, jumetanemenua, pepacuene copiapatsiana. Nexata, toxanepanatsi jiwi pejumexaniataenexa. Dioso, Ponē baja cajena bajayata tajēwelia yapētaeya-exana profetawimi pacuenia itsamatababi itsijitsia mapanacuataje. BajaraPonē icatsia itoroba pija-āngelnē, peyapētaeyaxanaenexa pijajiwijawabelia, xua baja imoxoyo pewajēnae pecopiapatsijawanexa mapanacuataje —nejai āngelnē.

r 22:1 *pejamatabēcūene-aitawayā-exanaemene*: Bajarapamene cuene-itajēta daxita pebarēyaya-exanaejawanē jiwi natoyapētaena, peyajawajinawanapaexae Dioso, Jesús-beje. Pitaranaeracuene pijinia cuene-itajēta pacuenia caejawayo-ata pibisiacuenejawa apotae tsane. **s 22:2** *doce panacuaitsibeje*: Itsamonae canaējēta pejucaejawanexa: «doce pawiriacuaibeje», pejinexa. Baitsi, caejuameto canacujitsia saicayacuai capitsapapona. **t 22:2** *wēna-asaētsawanapaejitsia*: Taema Gén. 2:9. **u 22:3** *daxita piabejecuene*: Pacujinae Adán, Evabeje pibisiacuene exana-beje, Dioso tocaējēta jiwi penatotaejawanexa petēpaejawa, piawitanējawa, pedomaebijawatsi pe-ejuwijawanē-ata. Tocaējētanua jiwi nacueratsiaya penacuenēbijawa, pijapabianē peto-ajibonexatsi. Daxita bajaraxuanē ajibi tsane Dioso pijanacuatsia. Taema Gén. 3:17; 22-24; Zac. 14:11; Rom. 8:20-21; Apoc. 21:4.

⁷Icatsia, ángelnē nejumaitsi:

—Jesús raja jumaitsi pijajiwijawabelia: «¡Panejumetaema. Bepijia patsianicajē!», jai. Nexata, pajiwi jumexaniataena^v paliwaisi ruca mapabaxutotaje, penajamatabēcuenepēñeyorotsinexa Diosojawabelia, bajarapajiwi jamatabēcuenēbarēya^w tsaponaponae tsane», jai Jesús —nejai ángelnē.

⁸Xanē rabaja, Juannē, tajumetaenē, tataenēnua, daxita baja paliwaisi yaquinajē mapabaxutotaje. Bajaraxuanē tajumetaecujinae, tataecujinaenua, tamatabacabēta picani yaiyataeya nucajē ángelnē pitabarata, ponē netsita-jēta daxita bajaraxuanē.

⁹Itsiaata baitsi jane, bajaraponē nejumaitsi:

—¡Pētsa bajaraxua exaname, tsipaji saya xanē-ata Dioso pijajiwitonēnē, pacuenia xamē, itsamonae-ata profetawī, pamonaē-ata jumexaniataena mapabaxutotaje neyaquinaeliwaisi! Pacuenia paxamē xaniawaetsia pawajunupaebabiabame Dioso peliwaisi, bajarasaya pacuenia xanē tatsipaebinē. ¡Nexata, ēDiosojawabelia yaiyataeya nematabacabēta tonucare!, —nejai ángelnē.

¹⁰Icatsia, nejumaitsi:

—¡Pētsa muetsiacuenia xainame Jesucristo pecayapētaeya-exanaeliwaisi,^x xuanē itsamatacabi copiapatsijitsia, paliwaisi yaquiname mapabaxutotaje! Tsipaebianame daxitajiwijawa, bajarapamonae peyapētaenexa, tsipaji rabaja imoxoyo pewajēnae pecopiapatsijawanexa mapanacuataje. ¹¹¡Nexata, pamonaē pibisiacuene pexanawanapaewi, tocopare pewajēnaeyabelia pibisiacuene pexanawanapaenexa! Pamonaē pijamatabēcuenēbejewi, tocoparenua pewajēnaeyabelia ēpibisiacuene pesiwanajamatabēxainabiabinexa. ¡Bajarapacuenia tocopare, tsipaji pematatsēnēa apoxinae tsane matabacbianē penacuenexanetsinexa! Itsiaata baitsi jane, pamonaē pexaniacuene exanawanapa, catsitecae pewajēnaeyabelia pexaniacuene pexanawanapaewi. Pamonaē-ata Dioso aneconijibia tanetsi, pesiwanajamatabēcuenecopatsixae Jesucristojawabelia, casaē pewajēnaeyabelia aneconijibia pejinawanapaewi Dioso pitabarata —nejai ángelnē.

¹²Icatsia, ángelnē nejumaitsi:

—Jesús raja jumaitsi: «¡Panejumetaema! Bepijia patsianicajē. Capatsianicajē tamatamotsijawanēnexa, caeiwi canacujitsia, pexanawanapaewi jamatabēcuenē mapanacuataje. Pamonaē tajajiwi pexaniacuene exanawanapa, rajutsianajē pexaniacuenejawanē. Pamonaē pijinia pibisiacuene exanawanapa, naneconitsia-exanaenajē. ¹³Xanē rajane baja, daxitacuene tataxuxuabinē, icatsia tacopiarucaeya-exanaenēnexa-ata», jai raja Jesús —nejai ángelnē.

¹⁴Icatsia, ángelnē nejumaitsi:

—Pamonaē Dioso wecua-ajibia-exanatsi pibisiacuene pexanaeconimi, Jesucristo pejamatabēcueneta, bajarapamonae jamatabēcuenēbarēya baja,

^v 22:7 *jumexaniataena*: Bajarapajume griegojume anijajamatabēcueneliwaisibeje xaina. Caejamatabēcueneliwaisi: jiwi asiwaya penajamatabēxaniawaetsinexa, pibisiacuene pexanaeyaniwa, pejamatabēcuenē-ewetaponaponaenexa petocopiapatsinexatsi pacuenia Dioso jumaitsi Apocalipsis-baxutota. Itsajamatabēcueneliwaisi pijinia: «pejumecowēñētsijawa yabara». Baitsi, jiwi pejumecowēñētsinexa pacuenia Apocalipsis-baxuto peliwaisi itorobatsi. ^w 22:7 *jamatabēcuenēbarēya*: Taema Apoc. 1:3. ^x 22:10 *Jesucristo pecayapētaeya-exanaeliwaisi*: Taema Apoc. 1:1.

tsipaji Dioso tocopatsianatsi pejonenexa Dioso pijatomarabaupanējawa, pecuaixanexanua ponaecuai wēna-asaētsawanapaejitsia. ¹⁵ Itsiata baitsi jane, apojone tsane pamonaē pajamatabēcuenēbejewi,⁷ penajorobiwi, pematawajibiwi, pewitota pibisiacuenē pexanaewi, jiwibewi, jumapecataeya pexanaenēanējawabelia penawajēcabiabiwi, penajumetsēnētsicuenē piasiwawi-ata. Daxita bajarapitsicuenē pexanawanapaewi nacopabanubenaena Dioso pijatomarajumawelia —nejai ángelnē.

¹⁶ Nexata, Jesús nejumaitsi:

—Xanē rabaja, Jesúsñē, itorobajē taja-ángelnē pecatsipaebinxata mapaliwaisije, juya neyapētaeya-exanaenexa daxita tajajiwijawabelia. Xanē rabaja tapitsapaenē^z nacua-ewetsinēmi David-pijinē pijawiriamātojawawerena, tacanacopatsinexa peyanacua-ewetsicuenemi. Pacuenia bajayacunuapijitoluputo naitayota pitsapa pejanamatacabinexa, bajaratacuenē-itsinē xanē, tayapētaeya-exanaenexa pejanamatacabipijicuenē tajajiwī petaewanapae-nexa —nejai Jesús.

¹⁷ Espíritu Santo, Corderonē pijawabeje,^a jumaitsi-beje Jesús-jawabelia: «¡Naxatsiayo patsianimica!», jaibeje. Pamonaē-ata jumetane paliwaisi ruca mapabaxutotaje jumaitsi tsane: «¡Naxatsiayo patsianamica!», jai tsane Jesús-jawabelia.

Pamonaē pijinia bitso pejitsipaewi Dioso pecapanepaenexatsi, pacuenia jiwi bitso jitsipa mera piapaenexa, naxatsiayo patsi pesiwanajamatabēcuenecopatsinexa Jesucristojawabelia, Dioso amoneya perajutsinexatsi matacabi apopewerewerecaejawa, petocopatsinexatsinua mera piapaenexa, jiwi pajamatabēcuenē-itawayaxanaemenejawata.^b

¹⁸ Pamonaē jumetane paliwaisi ruca mapabaxutotaje, xuanē wajunupaeba pecopiapatsijawanēnexa, bajarapamonaējawabelia xanē, Jesúsñē, jumaitsinē mapacueniaje: «¡Xania baja tsane! Mapabaxutotaje^c perucaeliwaisiwecua itsa-jiwi saicayaliwaisi itsa mataropotsia yaquinaena, bajarapajiwi naneconitsiana Diosojawabelia. Nexata, bajaraPonē naneconitsia-exanaenatsi, daxita bajara-papiayaicuenējawanēta, xua wajunupaeba mapabaxutotaje. ¹⁹ Mapabaxutotaje peyaquinaeliwaisi, itsajiwi itsa ajibia-exanaena itsaliwaisiyo, tajēwelia pewajunupaebiliwaisi, nexata bajarapajiwi naneconitsiana Diosojawabelia. Nexata, wecua-ajibia-exanaenatsi juya pecuaixaejawaminexa, ponaecuaito jiwi wēna-asaētsawanapaejitsia. Apotocopatsinua tsane pejonejawaminexa Dioso pijatomarabetsia. Daxita bajaraxuanē yabara peli-waisi ruca mapabaxutotaje».

y 22:15 *pajamatabēcuenēbejewi*: Reina-Valera, Nueva Versión Internacional-ata canacuenēba: «awirimonaē», tsipaji judíowi tsita-awiriti pamonaē apojudíowi, Dioso apopeyapētaexae. Nexata, pacuenia awiri pibisiacuenē exanabiaba siwabējainejewa, bajarapacuenia pijinia exana apopeyapētaewi Dioso. z 22:16 *tapitsapaenē*: Itsacuenia pijinia pejucaenexa: *Xanē raja Jesús/ Isaf bepetabutopajawawerena tapitsapaenē, David-pijinē peyanacua-ewetsicuenemi tapitsinexa*, pejaenexa. Taema Isa. 11:1,10; 53:2; Mt 22:42; Rom. 15:12; Apoc. 5:5. a 22:17 *Corderonē pijawabeje*: Jesús pijajiwi. Taema Apoc. 19:7-8; 21:9. b 22:17 *jiwi pajamatabēcuenē-itawayaxanaemenejawata*: Bajaraxua jumaitsi Cristo yabara. Taema Jn 4:13-14. c 22:18 *Mapabaxutotaje*: Mapaversiculobeje (18-19) jumaitsi-beje picani Apocalipsis-baxutota perucaeliwaisi yabara. Itsiata, Jesús pejumaitsixae Mt 5:18-jawata: «cae-itanetoyo-ata, Dioso apo-itothianaē tsane. Pacuenia baja Dioso najumecapanepaeya jumaitsi, bajarapacuenia tsitecaena», pejaixae, Dioso peli-waisi penacujarubiwi canaējēta pacuenia Jesús itaweta peto-itothianaeyaniwatsi caeliwaisi-ata, pali-waisianē rubena Dioso pejumeliwaisibaxutota.

²⁰»Bepijia patsianicajë», jai Jesús.

Nexata, xanë juya jumaitsinë:

—¡Bajara-itsi tsane! ¡Xanepana rabaja! ¡Jesús pepopetuxanenëmë, naxat-siayo patsianimica! —janë.

²¹Pacatojitsipatsi daxita paxamë Wajatuxanenë Jesucristo pexaniacuenia papecayawenonaejawanexa. Bajara-itsi tsane.

Glosario

Apowajayapëtaejumenë pijaliwaisianë

Penacowaebijumexi wowaijumewerena,
piayapëbejumenënu peaijamatabëcueneliwaisianë

- A -

Abib-juameto

Hebreojumeta penamataxainaejuameto pija-almanaquejawata ani-jawënëbeje xaina. Perujuwënë «Abib», pejanawënë pijinia «Nisán». Bajarapajuameto be-enerojumeto judíowinexa. Baitsi caewai canacujitsia bajarapajuameto petaxuxuabijuameto bajarapamonaenexa. Itsiata hebreomonae pija-almanaque aponajëpae pawiria-almanaque canacuenebatsi waxaitsi maparucaeje. Baitsi Nisán-wënë juameto taxuxuababiaba bejamatabëcujiru Marzo tuatuajëjawa. Copiaruca pijinia bejamatabë Abril tuatuajëjawa. Hebreomonae pijajuametonë taxuxuababiaba merawipijijuameto itsa ajenə pejanacuenia ecaica. Nexata pijajuametonë xainabiaba 28 pamatacabibeje caejumeto canacujitsia.

Abimelec

Bajayatami Filistea nacuata pejinawanapaewi wënërubabiaba pepopeyanacua-ewetsiwitsi «Abimelec». Apoepawënë picani; saya pijataxunaewënë pacuenia presidentenë. Pacuenia wowai, «Presidentenë», jai tsabiabi, pacuenianua resguardojawa, «gobernador cabil-donë», jiwi jai tsabiabi, bajarapijinia pacuenia, «abimelec», jai tsabiabitsi peyanacua-ewetsiwi Filistea nacuapijiwimi.

Nexata pa-Abimelec najumeliwaisicajuna Abraham-jawabelia Gén 21:22-jawata apocaenë yabaracuaicuaijai, ponë Abimelec barëcuaicuaijai Isaac-jawabelia Gén 26:26-jawata. Bajaraponë saicayanë nacaetaxunaewënë xainae-ata. Nexata apopearëcuaicuaijainëtsi Abraham-pijinë.

Aceitebëyo

Bajayatami apocanacuenebabiabi botellabëxita petsimata-epacaera pecaponaenexa. Israel pemomoxi xainabiaba ovejamata-etoyo pexanaebëyo, pejenexa bajarapa-aceitera. Orijibia neyapëtaenexa pacuenia canacueneba bajarapora, taemanua página 69 pabaxutota wënëruba «Pacuenia Jinawanapa Judíowi Bajayatami», cotocaewipijibaxutota (segundo partejawata).

Adán

Hebreojumeta Adán itsajai, apojai ëpebiyabara. Cajunua pebi, peti-riwabeje. Najëpa saya «jiwi», pejaijawa jiwijumeta. Dioso pacujinae exana Adán, apo-exanaetsi caenë. Itsiata abaxë petiriwanexa peyenesito tsarucae. Nexata saya caecuenia najua-exanatsibeje nacuene-cataeya. Bajaraxuata jiwijumeta Adánwi apojaitsi jiwi yabara. Saya «jiwi», bajaitsi.

Adoración

Adoración-jumejawabelia cajunua mapitsicuenejawanë: 1. Wajaiyataejamatabëcuene Dioso. 2. Waja-asiwajamatabëcuene. 3. Wajasiwanajamatabëcopatsijamatabëcuene Diosojawabelia wajanacayawenonaenexa. 4. Waja-itaxutuajamatejemajamatabëcuene Diosojawabelia, 5. Wajanawajëcaejawa bajaraponëjawabelia-ata. 6. Pexaniacuenia wajawënëxaniatsijawa Dioso pexanaecuenie yabara. 7. Asiwaya wajajumecowënëtsijawa pacuenia naca-itoroba. Daxita bajaraxuanë yabara wowaijumeta cajunua «adoración-jume».

Nexata jiwi najamatabëcuene-itajëta Dioso peyaiyataejawa pejumecowënëtsijawata, bajarapacuenia Dioso piasiwajawa pexaniajamatatabëcuene perajutabiabijawata, Dioso pewënëcacuaicuaijaijawata-ata. Bajarapacuenia najamatabëcuene-itajëta Diosojawa-belia pesiwanajamatabëcopatsijawa peyawenonaenexatsi, itsapacujinae wajëta bajaraponëjawabelia penamatawenonaejawata, bajarapacuenia Dioso pitaxutuajamatejemajawa itsapacujinae bëjainejewa jinawanapa apopejitsipaecuenie tocopia-patsi-atatsi. Baitsi daxita xua yaiyataeya asiwaya-ata to-exanatsi Dioso, bajaraxuanëyabara «adoración». Daxita mapaliwaisi cajunua itsajawata wowaijumeta, «servir a Dios», baitsi petoexanaenexa petonajume-copatsicueniatsi.

Bajarapajamatabëcuene-ata jëpa itsa exanatsi jumapecataenëanëjawabelia, penajorobinëjawabelia, waji peyapëtaewijawabelia-ata. Baitsi daxita bajaraxuanë itsa itaxuatujamatejematsi, jumecowënëtabiabatsinua wajanaca-itorobicuene, nexata to-exanaponaponatsi adoracióncuene. Águila Bajarapawiria pepunaenë jinawanapa Israel nacuada. Bajaraponëanë bepinijicotsala. Bajarapitsipepunaewi wowai wënëruba, «águila». Bajarapa-águilawi pecorofetojumata pexi bacapuna itsajota tsiyaijitsiatsi, bajarapacuenia bajaraponëxi pepanepaenexa, jamatejema pecapatsinexa caewëarena icatsia pematapenajawatatsia.

Águila

Bajarapawiria pepunaenë jinawanapa Israel nacuada. Bajaraponëanë bepinijicotsala. Bajarapitsipepunaewi wowai wënëruba, «águila». Bajarapa-águilawi pecorofetojumata pexi bacapuna itsajota tsiyaijitsiatsi, bajarapacuenia bajaraponëxi pepanepaenexa, jamatejema pecapatsinexa caewëarena icatsia pematapenajawatatsia.

Altar

Bajaraxua jiwi exana bajayatami petajutabiabinexa dajubi Diosojawabelia. Ibotonë najumajeba bemesacuenia pexanaejawa. Nexata pijaneconi penatoyapëtaenë, bajara pa-altar-jumawereca najuma-eta

pecapatsidajubi, petajuitsinexa Diosojawabelia pijaneconijamatabëcuene, itsajume pexaniajamatabëcueneyabara-ata capatabiaba. Nexata daxita dajubinë tajuitabiaba.

Bजारपacuena itsamonae tonacuenebabiaba jumapecataeya pexanaenëanëjawabelia-ata, pitaxutuajamatejemaxae bajarapa-jumapecataenëjawabelia Diosowecua peyawenonaenexatsi. Itsiata bajapamonae apotajuitabiabi daxita dajubinë. Nexata penacopabiwi tajuitsinejewa, najuanabanebiaba penajamatabëcuene-itajëtsinexa asiwaya caejamatabëcuene pexainaejawa jumapecataeya pexanaenëjawabelia. Bजारaxuata Dioso itoroba Israel-pijinë pemomoxijawabelia pebijianaenexa bajarapitsi-altar-jawanë.

Ancianowi

Israel pemomoxi, pijawiriayajuwënë wënërua ancianonë, pewetsinëxae pijawiriawi. Baitsi penaweretsiwicujinae, itsa ayaijamatabëcuenenë, pexanaliwaisi pecanaëjëtsinë, nexata itapetabiaba pewetsinënexa pijamonae tuatujëta. Bजारaxuata wowaipijiBibliajawata capitsapa ancianowi. Bजारapamonae itsiata apo-iglesia pewetsiwi picani. Saya nacaewirimaëtowî pewetsinë. (Nacaewirimaëto wowaijumeta clan).

Israel-pijinë pexi pemomoxi natsana doce papemomoxibitsaëtobejecuenia. Bजारapadoce papemomoxibitsaëtobeje canacopata pijasalinaiwënëcuenia, Israel pexi pewënëcuenia. Bजारapapemomoxibitsaëtonë wënërubabiaba, «caenë pemomoxibitsaëto». Wowaijumeta pijinia «tribu», pejaiwënë.

Nexata daxita Israel pemomoxi xinae-ata pepopeyanacuaewetsinënexa, caenë pemomoxibitsaëto canacujitsia xainabiaba itsamonae pejinawanapaenacuayo pewetsiwinexa. Bajayatami bajarapamonaemi wënërua peto-ewetsiwitsi pijawiriayajuwënëwi, príncipewi. Bexëajawabelia wënërua pewetsiwi ancianowi pijinia. Bजारapa-ancianowi enabiaba tomaralia pejonenamutomuxuneneta, itsajota nacaetuatabiaba bajarapatomarapijiwi liwaisi yabara. Bजारapamonae tsipaebabiaba penaewetsicuene pijasalinaijawarencujinae, xaniawaetsia jiwi penajuajinawana-paenexa. Xaniawaetsia natocaëjëba xua exanaejitsia, nexata itsa liwaisiyabara penajamatabëxainaewi jamatabëcuene-caewia-exanabiaba. Muxujioba pexanaliwaisita itsamonae nacaewirimaëtowî. Bजारapamonae taicabiaba pijamatabë-cueneliwaisibewi, pacuena penacobetoxotsiwi, jiwibewi-ata penaneconitsia-exanaenexa.

Bजारapijinia itsi aeconoxae-ata pamona to-ewetawanapa Jesucrito pijajiwi, iglesiapijiwi. Pexanaliwaisita muxujioba itsa-mona Dioso pejumecowënëtsiwi, bajaraxuata bajarapamonae-ata aecono-xaeta pewënë ancianowi.

Arpa

Pawiria-arpa canaxëana bajayatami, aponajëpae pitsi-arpa racatabiaba wowai maparucæje. Bajayatapijiwiria-arpa tsiquiri-arpayo tsabiabi. Xainabiaba 6 pamaëtobeje, itsa jume 12 pamaëtobeje saya. Bजारapa-arpaxi racatabiaba pecobesitota, música pexanaenexa.

Bajarapamatacabijawa pa-arpa racatabiaba apoxinae caewënë. Itsa-wënëanë pijinia cítara, salterio, lira-ata.

Asfalto

Bajayanacuapijiwimi canacuenebabiaba asfaltowënëjawa, breawë-nëjawanua mawicuenia pecatsanaenexa. Bajaraxuabeje bemawitsapatojawanë picani. Itsiata pepitsapaejawa saya irajawata. Maparucaeje Colombia nacuata wënëruba breanani «neme».

Asterot – Astarte – Afrodita

Bajarapitsijumapecataewijawabelia Canaán nacuapijiwimi nawa-jëcabiaba petonaxaniabinexatsi peubijawanëmi, pijadujubi-ata petonacoxiwiatsinexatsi, bajarapacuenia jiwi-ata pexi pexainaponaenexa. Nawitsia wënëxainae-ata bajarapajumapecataewi, itsiata caecanacuenebicuenia xaina. Itsaja-wata saya nubabiaba naejawanë bajarapajumapecataenë pewënëta, bajarapanaejawanëjawabelia penawajëcabiabinexa.

- B -

Becaejiwi

Becaejiwi itsa yabarajai pebi, petiriwabeje penapitsicujinae, yapëtanetsi mapajamatabëcuene yabaraje: 1. Caejamatabëcuene pexainaenexabeje. 2. Caejamatabëcuene xainabeje penajuacanaëjët-sijawatabeje. 3. Petsiyapëtaejwiibejenua penacoxi-ewetsi-nexabeje pijamonaewecua. 4. Pena-imoxoyobijawatabeje natoyapëtanebeje becaeperabëto penaexanaejawabeje. Daxita bajarapajamatabëcuene-jawanë jumetanetsi becaejijiwi penaexanaejawayabara. Bajara-xuata jumaitsi, anijajiwi-atabeje naexanabeje becaejijiwi.

Bedelionani

Mapanaejawayo bedelionae. Bajarapanaejawanë nanijucabiaba pecanacuenebinexa petuxujuwijawanë. Bajarapawirianaejawanë nubena Havila nacuata. Taama Gén 2:12 Bajarapanani pejutsicujinae pepërëtoxi-cuenia nacopata.

Beerseba

Beerseba tomara eca Israel nacuami petabujawatareca Neguev nacua canacujitsita. Beerseba tomarajawata eca meramëthëmi, Mera-mëthë pewënë Beerseba. Itsamatacabijawabelia bajarapatomara canacopata bajarapameramëthë pewënëcuenia. Taama Gén 26:33. Bajarapa-taxunaeta Abraham-pijinë copiaya najumeliwaisi cajunua-beje Abimelec-pijinëbeje, pebeyaxuabijawata siete ponëbeje oveja. Taama Gén 21:22-34 Bajaraxuacujinae pacujinaeta ponapona Isaac bajarapacowëta, icatsia najumeliwaisicajunuabeje itsa Abimelec-beje. Bajaraxuata bajarapameramëthë wënëruba, «Penajumeliwaisi cajone meramëthë», pejaiwënë, itsawënë pijinia «Siete ponëbeje pijamera-mëthë», pejaiwënë. Taama Gén 26:26-34

Ben-ammi itsawënë amonitawi

Ben-ammi raja Lot pexënatoyota juyapijiwata penaitajëtsinë. Ponëyo xaina paxa Lot-jawabelia (Gén 19:30-38). Pewënë Ben-ammi hebreojumeta pejumaitsijume: «Nacaemonaewi pexënato», pejaijume.

Najumeljêpabeje pejumaitsiwênê «Bené-Amón», pejaiwênê; Hebreo-jumeta Amón pemomoxi pejajume. Bajaraxuata bajaraponê pewênêcuenia wênêruba pijawiriamaêto amonitawi. Panacujawata jinawanapa amonitawi, bajarapanacua wênêruba Amon nacua pija-salinainê pewênêcuenia. Amon nacua eca Moab nacuamuxuneneta. Bajarapamonae jinawanapa Mar Muerto pucaxaneto itsa-panawetsina. Israel-pijinê pemomoxi nacaemonae-ata Lot-pijinê pemomoxijawabelia, aponanaêcotsi xaniawaetsia, saya jinawanapa pena-itoyacuenia. Deut 2:9,19; Núm 22-24; Jue 3:12-14,26-30; 10:6-11:33

Bendecir

Pacuenia waxaijiwitsi canacuenebabiabatsi bendecirjume, bajarapacuenia apoyabarajumaitsi Dioso pejumeliwaisibaxutota.

Dioso pejumeliwaisibaxutota, bendecir itsajai Dioso yabara cuaicuajai, bajarapajume nacayapêtaeya-exana mapacueniaje: 1. Dioso pexaniacuenia peyawenonaejawanexa yabara, itsa jume 2. Dioso pexaniacuenia pecuenecaêjê-paeya-exanaejawanexanua pexi pexainaponaenexa.

Juya Dioso pejumeliwaisibaxutota itsa jiwitonê yabaraju-maitsi pebendeciabijawa pewênajiwitonêjawabelia, bajarajota nacayapêtaeya-exana pacuenia cuene-itajêta pexaniacuenia petaeponaponaenexa Dioso pewênêta. Baitsi jiwitonê apopecuenecaêjêpaexaetsi pijacuata petocopiapatsia-exanaejawanexa bajarapabendición, nexata bejumaitsi mapacueniaje: «Catojitsipatsi Dioso pecayawenonaenexa pexaniacuenia», bejai.

Itsa bendiciaba jiwitonê Diosojawabelia bajarajota bajarapajume nacayapêtaeya-exana pacuenia jiwitonê pexaniajamatabêcuene rajuta Diosojawabelia pexaniacuenia peto-exanaexaetsi, penabanijawa perajutsixaetsinua. Itsajawata pijinia nacayapêtaeya-exana pacuenia wênêxaniata Dioso pexaniacuenia.

Pacujinae Dioso junata Abraham peponaenexa Canaán nacujawabelia, itsa bajaraponê jumexaniataeya jumecowênêta xua Dioso najumecapanepaya jumaitsi peto-exanaenexatsi, nexata Dioso pexaniacuenia cuene-itajêtatsi petaeponaponaenexa, bajarapacuenia daxita pemomoxijawabelia-ata pecanacopataponaenexa. (taema Gén 12:1-4) Bajaraxuacujinae daxita paxajiwi, Abraham pemomoxiyajuwênêwi, matatsênê-wajêtabiaba pexênato matapijinê, bajaraponê pecanacopataponaenexa xua Dioso najumecapanepaeya jumaitsi Abraham-pijinêjawabelia Gén 12:1-4. Bajarapama-tatsênêwajêcaejawa wênêruba wowai-jumeta «la bendición de la primogenitura», pepo-matapijinê pecanacopatsijawa Dioso peyawenonaeyapaebijawanexatsi Abraham pemomoxae.

Bepecuene-amoneyabiwicuenia

Bajayatami pamatacabimi itsapacujinae caenacuapijiwi pijiwajabitsaê barênawajabitsaêtsipa itsanacuapijiwijawabelia, nexata pecuene-amoneyabicujinae notabiaba daxita pecobecowêjawanêmi. Xuacujinae totsata itsajawanê pepopeyanacua-ewetsinêtsi, itsajawanê pijinia tsi-cobetsanabiaba peyanabiwitsijawabelia, pijamonaejawabelia-ata.

Pacujinae Dioso itoroba israelitawi Éxo 3:21-22-jawata pawajëcaponaenexa Egipto nacuapijiwi jawabelia, Dioso pepopewetsinë israelitawinexa. Nexata itsa Dioso cuene-amoneyaba Egipto nacuapijiwi petsitorobijawata 10 papiayaicuenejawanë, bajarapone tocopata pijajiwi israelitawi penotaponaenexa penotsinexa Egipto nacuapijiwi pecobecowëjawanë pewajëcaejawata. Picani bajarapamonae pijacuata apobarënwajabitsaëtsi Egipto nacuapijiwi jawabelia, pepopewetsinëtsi Dioso bajarapacuenia to-exana saya. Nexata itsa pewajëcaecuenia notapona Egipto nacuapijiwi pecobecowëjawanëmi, bepecueneamoneyabijawa pejamatabëcueneta nota amoneya, Dioso bajarapacuenie to-exanatsi, bajayajebi bedajubiwicuenia petonacuenebawanapajamatabëcuene.

Bepenaxuirabinëcuenia tanetsi

Wajanacujarubijawata Números capítulo 6 yapëtanetsi pacuenia Dioso canaëjëta jiwi petaenexa bepenaxuirabiwicuenia itsapacujinae jayatsipa itsacuenejawaw pecuene-itawetsijawatsi, bajarapacuenia itsa xaejitsipa xuanë jani-itawetatsi. Mapitsijawanë-yabara Dioso bepenaxuirabiwicuenia jiwi taejitsia itsa xaejitsipa, itsa jayatsipana: 1) pepunaewi pawiriawi baxane pewi, pacuenia quequere, watarama-ata, 2) matatsënëwereca pejinawanapaewi pawiriawi baxane pewi, pacuenia newëthë, namo-ata, 3) insectomonae baitsi pamonaesi apopexainaewi pacuenia amaimonaesi, sure, bocobocowa, pëbë, alerito-ata, 4) menepijidujuai piatsebocojibiwi, 5) pecotobëxëta penarobobocaewi matatsënëpijiwi pacuenia bocobë, jomo-ata, bajarapacuenia pijina menepijiwi-ata pacuenia maxëneje. 6) Dioso itaweta pexaejawa itsawiria dajubi pacuenia caballo, camello, marrano-ata. 7) Itawetanua pejayatsiyaniwa pibisiacuene pexanawanapaewi, pamonanua lepratsabanaejawa pexainaewi, xua-ata jiwi canacueneba peyaiyataenexa jumapecataeya pexanaenëanëjawabelianua, xuanë-ata canacueneba penajorobiwi. Daxitaxua Dioso itaweta pexaeyaniwa, jiwi itsa jayatsipana tsiteca nacopatabiaba bepenaxuirabiwi Dioso pitabarata. Orjibia itsa jayatsipa bepenaxuirabinë petaenëtsi, nexata bepenaxuirabinë nanaexanaejitsipa juya. Orijibia bajarapajamatabëcueneyabara nawitsia cuaicuaijai Levíticobaxutota.

Bepijawacuenia caponapona

Pamonae yapëtaen bajayata pijicuenemi, nacayapëtaeya-exana pacuenia nacua-ewetsiwi itsa pitsijitsia itsawa pijawanexa, caecuenia apobarëmajitsi bajarapowa. Pepitsiwajënaeya, bajarapowa copiya anijajuametobejecuenia nacuenexaniawaetsiaya beponapona petocopiarucaejawabelianexatsi bepenaxuirabiwacuenia petae-jawatsi. Baitsi bajarapowa ponaponaejitsia bota taenejewaw itsanë pebi. Nawaejitsianua pexaniatuxujuwijawanë pematajërëabi-merata. Bajayata nacua-ewetsiwi nataeyabiaba bediosowi pijajiwi pitabarata. Bajaraxuata to-acuenebitsi itaxutejema pebarë-majitsinexa pejanapitsiwa, bajarapowa pejamatabëcuene bepenaxuirabinë penaexanaeyaniwa. Bajaraxuata pijawanexa-ata abaxë caecuenia apo pebarëmajitsi-xae caponapona bepijawacuenia, tsipaji pajametobeje tocaëjëtatsi

petocopiarucaejawabeliatsi peyapëtaenexa bajaraponë bajarapowa apopimoxoyotsijawa pebi.

Taemanua concubina – cotocaewi pepitsiwa.

Betaxijiwiyoenia

Bajayatami mawecowaxi bitso acuene-ura tsabiabi apopenaco-xitsixae. Nexata pexi pexainaenexa mapacuenia exanaje: Mawecoway wayo itsa xainaejitsipa amoneya bedajubiwacuenia petonacuenebiwayotsi penatocomuatsixae bedajubicuenia, nexata bajarapoway wayo rajutsipa pamonajawabelia, pepitsinexa cotocaewi pepitsiwacuenia. Belia itsa bajarapowa nacoxita, nexata penacueto penaexanaejawata pepopijawa isapitabiaba pethaëtota. Bajarapacuenia itsa exana, najamatabëcuene-itajëta bepexijiwiyoenia petaejawa. Bajarapacuenia mawecowaxi pexi nanaxainaeyababiaba bajayatami, itsawayo pejumata. Itsiata maparucaeje itsacuene Jesucristo nacatocopata. Taema 1Ti 3:2,12.

Betel

Betel itsa jai Hebreojumeta: «Dioso Pijabo», itsa jume, «Dioso Pijataxunae», pejaijume. Betel-jawata Dioso tsitanaitajëtatsi Jacob pacujinae wecuanajetabijirawa pematapijinë Esaú, Gén 28:19. Bajarajotanua Dioso icatsia tsitanaitajëta Jacob-jawabelia, bajaraponë penawiatsicujinae Padan-Aran nacuawerena, Gén 35:15.

Brújula

Bajayatami judíowi, ajena pamatacabijawaberena wowai-ata itsacanaëjësicuene xaina pacuenia paebijitsia itsabelia pona jiwi, itsajotalia eca itsacuenejawanua. Bajarapamonae tane nacua matonotsia penucaejava. Nexata nacuamatatu wowai wënëruba (Norte). Nacuatapu pijinia wënëruba (Sur). Nexata juameto pepitsapae-jawawetsina wënëruba (Oriente, itsa jume este). Pijinia juameto itsa betsia pëcae-wabiaba (Occidente, itsa jume Oeste). Nexata xua wowai canaëjëta nortenenia waxaitsi jiwitsinexa «matatsënënenia», jaitsi. Bajarapacuenia xua wowai canaëjëta surnenia, waxaitsi jiwitsinexa «ununenia». Baitsi bajarapacuenia canaëjëtabiaba Vichada-menejawareca pejinawanapaewi. Itsamonae pijinia itsanacuanëjava pejinawanapaewi itsacuenia meta canaëjësipa, nortenenia, sur-neniabeje yabara. Bajarapacuenia itsa yabarajumaitsi waëyabetsia, pemutuabereca (tamoyabereca) bibliabaxutota, apoyabarajumaitsi mene penawotsijawabereca yabara; saya juameto pepitsapaenacuajawawetsina, juameto pepëcae-winacuajawabetsia pijinia yabara jumaitsi.

Maparucaeje wowai canacuenebabiaba brújulawënëjava peyapëtaenexa itsabelia ponaëjitsia, matabiata, merawi-ata itsajota matabibipijijuameto apotaeyabiabi, bajarapacuenia nacua pitacaënejawatanua. Bajaraxua pe-etoyo jiarata pitaropitsinexa itsapayenepananenia norte. Nexata jiwitonë pecanucaenë canamatatajiarata pe-eto petoitaropitsinexatsi Nortejawabelia brújulajawata. Bajarapacuenia nexata yapëtane itsabelia ponaëjitsia. Brújulajawata «N» nacayapëtaeyaxana nortenenia, «S» pijinia sur-nenia, bajarapacuenia pijinia «E» Este-nenia o Orientenenia, «O» occidentenenia.

Bueyu

Bajaraponë raja vaca pebito petobëjutsinëtsi, itsa jume vaca peso-rowato, ponëxi canacuenebabiaba piracatafunucaeya-exanaenexa pijapabianënexa peto-iratotowinexatsi, bajarapacuenia-ata pejotsimonë peyarobobocaenexa.

Burro

Maponëyo burroyo. Bajaraponëta jiwi bacanacuenebabiaba peto-jotsinënexa pecobecowë. Bewelianë-ata caballowecua itsiata ajuma-saë tsabiabi. Bajaraponë itsiata apojejai tsabiabi pacuenia pexainanë itorobatsi.

- C -**Cabra – chivo**

Mapitsiwiria chivoxi Israel-pijinë pemomoxi ewetabiaba. Bajaraponëxi Diosojawabelia tajutabiabanua altar-jumata pijaneconi yabara.

Caín pijawa

Adán, Evabeje pajiwiubeje pexi xaina apoyapëtaetsi, tsipaji xania-waetsia aponacatsipaebi Dioso Pejumeliwaisibaxutota. Itsiata pamonae xainabeje itsamone wënëtanetsi pexi, pacuenia Caín, Abel, Set-ata. Bajarapamonaewecua orijibia xainabeje tsaena itsamonae. Taema Gén 5:4. Itsamonae Adán pexi nacayajata tsaena itsanacuanëjawa pejinawanapaenexa. Nexata pacujinae Caín nacojioba apoyapëtae-atatsi powa pita, itsiata tsaena pijabanawa pita. Bexëajawabelia Dioso naca-tonajumecopata wajapitsiyaniwa wajamonaewa. Taema Lev 18:5-23.

Camello

Ponë taneme mapadibujojawata, bajaraponë raja pewënë camello. Peneta bepetsaunaenë. Jiwi bajarapamonae juma-ponabiabatsi, itsa ponaejitsia itsanacujawabelia. Itsajawata caponaeya-exanabiaba pijajawanë. Bajaraponë caëjëpatsi ayaijawa pecaponaenexa, arewe-ata. Tajënamutomi bepijiayocuenia pata caematacabita. Tsipaji asipia, nexata tajë nonotanajetaruca. Judíowi itsa ponaejitsia tajënamuto, itsabelia ajibi mera, nexata pijacamello abata mera ayaira, namuto peponaewajënaeya. Ponae-ata nexata acueyabi pamatacabibeje, apo-apae-ata mera, ajumalisaë.

Camello pijasilla

Camello pijasillanexa bajayatami pinijidoroxanetota petsewipona jeyabiaba, bajarapajumata pe-ecaenexa. Gén 31:34 nacayapëtaeya-exana pacuenia Raquel jia paxa pijadisonëanë bajarapapônadoronëta, bajaraponë pecaxitajarabiyaniwa.

Candelabro

Itsajiwi-ata apotae maparucaeje pacuenia cuene-itsi pitayotsi-candelabrojawa Dioso pijacarpabota penutsijawa. Itsiata itsamonae nacayapëtaeya-exana pecanaëjëbiwi pijacueneta Dioso peliwaisita. Bajaraxuata nacatsitajëta pacuenia tsaena tane.

Carpabo-carpapanabo

Bajayatami pajiwi oweja pewetsiwi, bajarapamonaemi xainabiaba pijacarpaboyo, yapëxanepanaeya pecawarapabiabibo.

Bajarapaboxinexa natojorocabiaba pinijipana dajubibocotonëmita. Nexata itsa warapaejitsia, bajarapaboxi wematajonabiaba pecawara-paenexa itsanacujawabelia. Pepatsicujinae panacujawabelia pona, icatsia nacuenebabiabanuta caxatabiaya pijabonexa.

Carrozawënëmo

Bajayatami pamo caballo roboboca pecanawajabitsaëtsinexa, bajarapamo pewënë carroza. Bajarapamo pecanawajabitsaëtsimo nacua-ewetsinë, itsamonae pijajiwi wajabitsaëwiyajawa. Itsiata itsajawata nacua pewetsiwi yaponabiaba bajarapamota itsabelia jamatabëpona. Pamona pona bajarapamo-ënëta apo-ënae. Saya nubenabiaba. Bajarapamo xainabiaba anijataxutoyorotabeje petabufewetsina.

Cebada

Cebadabotonë najëpabeje arroz-botonë. Cebada bepijiayo nacuai-tabiaba trigobotonëwecua. Itsiata judíowi beweliacuenia taeyabiaba cebadaxu pecanacuenebiyaniwa. Canaëjëta saya perajutabiabinexa amoneya petonacuenebiwitsijawabelia pexaenexa. Maparucaje jiwi pexaejawa matajeyabiaba.

Cepo

Bajayatami itsapacujinae jiwi naneconitabiaba beweliacuenia, nexata taxuxatatetabiabatsi cepowënëjawata. Bajarapaceponaejawa xaina anijawojotobeje itsaxuayo taxuyaweroxatatetsijitsia anijanae-tabeje tuatuajëlia. Bajaraponaebeje bitso arewe. Bajaraponaebeje namataenetsia tsarëta petaxuyawerocaëjëpaecueniatsi jiwitonë. Nexata xuacujinae naitabarataeya buatabeje epatajërëtsialia penaneconitsinë petaxuyaweratojawalia. Xuacujinae bajaraponaebeje caxata candadota. Bajarapacuenia exana penawixaetaeya-exanaenexa, pepanepaeyaniwa-ata pamona penaneconitsiwi. Bajaraponaebeje pewënë cepo. Itsawiriacepo pijinia piapiajawa pecuibosixatatsinexa, pecobetabuyaweretobejeyajawa.

Cetura pemomoxi

Sarapijiwami petëpaecujinae, Abraham nacojioba Ceturawënë-wajawabelia. Xaina bajarapowata 6 ponëbeje pexi pebiijiwi. (Taema Gén 25:1,2.) Cetura pexijawawerena pepitsaponaewi daxita naexana árabemonae, madianitawinua. Bajarapamonae pejinawanapaenacua, ëpetsewitusatonacua tsarucæ. Bajarapa-ira nacua boca Canaán nacua pemutuabereca. Gén 37:28-jawata nacayapëtaeya-exana pacuenia José Abraham-pijinë pemomo caponatsi Madianitawi Cetura pemomoxi Egipto nacujawabelia pecanajetsinexatsi.

Chivo – Cabra

Taema cabrajume.

Concubina – cotocaewi pepitsiwa

Bajayatami itsajawata itsanë xainaejitsipa caewa pepopijawa, itsawa pijinia beweliawa penatocomuatsixae amoneya petonacuenebiwanaxatsi pijabojawata. Bajarapitsiwaxi wënëruba concubinawa wowaijumeta. Powa pepopijawa ayaijamatabëcuenewa concubinawaxiwecua, bajaraxuata judíowinexa concubinawa, cotocaewi pepitsiwa, apocuenejëpae pepopepitsiwa. Copiaya pepitsiwa pepopijawa tsabiabi.

Pebi najëpaeya ewetabeje bajarapowabeje picani. Saya pamonaë pexi xaina pepopijawata, pexainaenë taeyabiaba ayaijamatabëcuenewi concubinawa pexiwecua. Itsiata maparucaeje itsacuenë Jesucristo nacatocopata. Taema Mt 19:3-8; 1Ti 3:2,12; Tit 1:6

Cuervo

Bajaraponë petsaebianëyo pacuenia uni picani, itsiata pepunaponaponaenëyo bajayajebi. Ajamatabëcuenesaë bitso peponaponaenexa bajayajebi. Bepijiayo apocueranae, pacuenia sewesewebo. Bajaraponë petëpaenë pewi xaeyabiaba.

- D -

Dajubibocodoro

Bajayatami judfowi mera jotabiaba itsacuenejawaxita. Bajarapamonae natonacueneba pijacuenia ovejabocotomi, bedoruanë pexanaecuenia. Itsajawata natonacueneba chivobocodorianë-ata. Bajarapadoruanëta pebiijiwi mera jotabiaba.

Bajarapitsidoroxita pijinia xaniawaetabiaba vinoranë. Bajarapamonae bajarapadoruanë bajayajebi pecanacuenebabiabixae, belia yapëtane piabejecuene vinoranexa, itsa baja niona. Bajarapavinoranë caponabiaba tomara imoxoyojawabelia, bajarajotalia pecanajetsinexa. Jumaponabiaba vinoranë pewënëtsidoruanë, pacuenia taenutame dibujojawata.

Diezmo

Diezmo itsa rajuta, exana mapacueniaje: Caejawayo diez xuayomi-bejeyajuwënëmijawa rajutapona. Canacopata pijinia nueve xuayobeje pijajawanexa. Nexata itsa xaina diez xuabeje, rajuta caejawa ofrendacuena. Canacopata pijinia nueve xuabeje. Orijibia itsa xinaejitsipacien xuabeje, rajutsipa diez xuabeje. Canacopatsipa noventa xuabeje. Bajarapacuenia itsa xinaejitsipa mil xuabeje, nexata rajutsipacien xuabeje. Canacopatsipa pijinia novecientos xuabeje. Bajaraxua pewënë diezmo, itsajume décima parte.

Dioso

Bajarapacuenia itsa yaquinarutatsi Dioso pewënë mapabaxutota, nacatsitajëta «El-jume» hebreojumeta. Bajarapahebreojumecacayapëtaeya-exana Dioso piayaijamatabëcuenenëcueneyabara. Xaniawaetsia orijibia neyapëtaenexa bajarapajumeyabara, taema petaxuxuabiliwaisita Dioso pewënëanë yabara.

DIOSO

Mapawënë Dioso pewënë hebreojumeta «Elohim», pejaiwënë. Nexata xaniawaetsia wajayapëtaenexa itsa canacueneba «El», itsa jume «Elohim» hebreowi pijajumeta Dioso Pejumeliwaisibaxutota Perujuliwaisibaxutota, penawecua-aitothiacuenia payaquinartutajë.

Itsa hebreojume canacueneba «El» Dioso-nexa, nexata payaquinartutajë «Dioso». Najëpa saya pacuenia yaquinaruta Dioso Pejumeliwaisibaxutota Pejanalwaisibaxutota. Juya itsa hebreojume canacueneba «Elohim» Diosonexa, nexata payaquinartutajë «DIOSO». BajarapaElohim-wënë pejamatabëcuene yapëtanetsi Dioso caenë-ata,

itsiata acueyabi ponēbeje. Baitsi bajarapawēnē najumejēpa waxaitsi wajajumexi. Pacueneta itsa ayai-bitsaēto «pēbē», bajajitsi. Itsiata itsa caenēyo «pēbēto», jaitsi. Bajarapacuenia pijinia itsa ayaiabitsaēto dujuai jaitsi, itsa caenē «dujuainē», jaitsi, itsa ayaiabitsaēto «amai», jaitsi, itsa caenēyo «amaito». Nexata hebreojumeta itsa «Elohim», jai, nayapētane apocaenē, pepobitsaēto yabara. Itsa jumaitsi «El» nayapētane caenēyabara. Dioso Peliwaisi wajanacujarubijawata yapētanetsi pacuenia Dioso, caenē-ata, itsiata acueyabi ponēbeje; Dioso pepo-Dioso, Dioso pexēnato, Dioso Espiritu, baitsi Espiritu Santo.

Dioso pecotia

Bajarapacotia yabara anijamatabēcuenebeje xaina: Caejamatabēcuene itajēta Dioso ayaijamatabēcuenenēcuene, itsajawa pijinia Dioso planeconijibinēcuene. Pacuenia pecotia napebeta, bajarapacuenia tanetsi yapēxanepanaeya Dioso ayaijamatabēcuenenēcuene wajawēnēxaniatsinexa. Pacuenia-nua pecotia nawecuatsata pitaquirijawa, bajarapacuenia Dioso planeconijibinē nawecuatsatabiaba daxita pibisiacuene pexanaewi. Itsawēnē pijinia bajarapacotianexa wowaijuma, «gloria».

Dioso peEspiritu – Espiritu Santo

Dioso raja caenē-ata acueyabi ponēbeje tsaponaponae; penamataxainaenē Dioso Paxa, pecotocaewinē Dioso Pexēnato, acueyabinē Espiritu Santo (PeEspiritu). Daxita caenēxae acuenebi wajajumaitsi-jawa Dioso pijapaxa, Dioso pijapexēnato, Dioso pija-espiritu, wajai-jawa. Bajaraxuata itsa Dioso peEspiritu jaitsi, yabarajaitsi pepoDiosoyabara. Baitsi apopexainaeyajuwēnējawa Dioso, bajarapacuenia apopocobecowēnē-ata. PepoDioso cajena, penaitajētsinē espíritu-cuenia. Bajarapacuenia peyaquinarutsijawata itsa jumaitsi: «Espiritu Santo bajaraxua exana», itsajume «Dioso peEspiritu bajaraxua exana», itsa jai, nacayapētaeya-exana pacuenia pepoDioso exana bajaraxua. Baitsi Dioso apo-itorobi bajaraponē peto-exanaenexa, pepoDioso saya exana.

Espiritujume itsa jai wowai mapajamatabēcuene xaina: «Apowaja-taecapanepaenē yabara. Apotaecapanepae-atatsi itsiata espíritumonae xaina pejamatabēcueneliwaisi, pecanaējētsicuene, pecuaicuajai-cuene, penato-itapetsicuene, piasiwacuene, pianaepanaecuene-ata pacuenia jiwi», pejaijamatabēcuene. Daxita bajarapacuenia cajunua espíritujumejawabelia yabara-cuaicuajai-ata Dioso pe-espirituyabara, ángelewiyabara, dowathimonaeyabara, jiwi pe-espiritu-atayabara.

Pepacuene jiwijumejawabelia espíritujume pitsapa tsaena «pejuma-pe» pejaijume. Jiwijumeta pejumapenē pexaniacuene apopexanaenē tsabiabi. Bajaraxuata apocanacuenebi Espiritu Santonexa bajarapajumeyo.

Dioso najamatabēnapita

Dioso aponacofēnētsi picani itsacuenejawayo-ata. Bajarapacuenia itsa cuaicuajai Dioso yabara hebreojumeta pecuaicuajaiwi, yabarajumaitsi Dioso penajamatabēcuene-itajētsijawanexa jiwijawabelia pitaxuto-tsoniatējawatsi, pexaniacuene peto-exanaenexa. Matapania

baitsi exanaejitsia pacuenia tajëwelia najumecapanepaeya jumaitsi pexanaenexa. Wainë pepanepaexae bajayajebi pejumlahitsicujinae, jiwinea tsaena tsitatsi Dioso nacofënëta. Bajaraxuata Dioso Peli-waisi peyaquinaewi jumaitsi tsabiabi, «Dioso najamatabënapita», jai tsabiabi. Itsiata Dioso aponacofënëtsi. Saya tsiwajënaecaëjëta pamata-cabi exanaejitsia pejumlahitsicowëya.

Dioso Pewënëanë

Xaniawaetsia neyapëtaenexa daxita Dioso pewënëanëyabara, pawënëanë hebreojume pecuaicuaijaiwi canacuenebabiaba, taema Dioso pewënëanëpjiatabla petaxuxuabiliwaisita.

Dioso pijabaula

Bajarapabaulajawata Dioso pitorobicuenia Moisés Aarón-beje xaniawaetabiaba pa-ibopanabejewata rubena daxita paliwaisi Israel-pijinë pemomoxi jumecowënëtanapaejitsia Dioso juya peto-exanabiabinexa najumecapanepaeya pejumlahitsicowëya penajumeliwaisicajonejawata. Bajarapa-ibopanabeje pebutabiabixae bajarapabaula-ënëta, nexata bajarapabaula wënëruba, «Penajumeli-waisixaniawaetsibaula». Bajarapabaulajawata xaniawaetabiaba ibopanabeje itsajota Dioso yaquinaruta petonajumecopatsiliwaisi, maná pewënëtsi canalitoyo, bajarajota yajawa xaniawaeta Aarón pijanae-bomi penamatonotsinaebo. (Éxo 16:32; Heb 9:4; Núm 17:10).

Dioso pijabaula pematapa

Bajarapamatapa pewënë «Dioso jiwi pijaneconimi pesiwajamatabë-cuenecaewi taxunae». Itsawënë pijinia «Dioso jiwi pitaxutotsoniataetaxunae». Wowaijumeta wënëruba «propiciatorio». Caewai canacujitsia sacerdotewi pepopenamatacitorobinë beyaxubabiaba dajubi jiwi pijaneconijamatabëcuene. Nexata bajarapadajubijana caponabiaba Lugar Santísimojawabelia, pejumlahitsicabinexa Dioso pijabaula pematapajumata. Nexata Dioso bajarapajana petaejawata, itaxutotsoniataeya najamatabëcuenecataita caewaicuenia israelitawi pewerebiabiyaniwa pijaneconijamatabëcuene. Bajaraxuata wënëruba bajarapataxunae, «Dioso jiwi pijaneconimi pesiwajamatabëcuenecaewitaxunae». Itsiata dajubijana itsa apojumatsicabi tsipae, nexata Dioso aposiwajamatabëcuenecaewi tsipae Israel-pijinë pemomoxi pijaneconi, penaneconitsia-exanaeyaniwa. Rowialia saya naneconitsia-exanaejitsipa petocaëjëtsicuenia penajumeliwaisicajonejawata apojumecowënëtsixae.

- E -

Egipto nacuapijiwi pena-ewetsicuene

Bajayatami Egipto nacuapijiwi saicaya nawecuanabane José pijamonaewecua, tsipaji Jacob pexi, hebreowiriawi, oveja pewetsiwi. Nexata Egipto nacuapijiwi bajarapitsiwi taeyabiaba itajunawiaya. Taeyabiabanua beweliamatabëcuenewi. Bajarapacuenia Egipto nacuapijiwi xaina saicaya pena-ewetsicuene, nacacujunawiaya pejinawanapaenexa oveja pewetsiwiwecua. Bajaraxuata apojitsipae pimo-xoyotsijawa José pijamona, penacopatsiyaniwa bepenaxuirabinëcuenia penataejawa.

Emanuel

Isa 7:14 Emanuel: Mapawënë pejumaitsiwënëje: «Dioso nacaya-jawa», pejaiwënë. Itsa Isaías yabaracuaicuaijai peyanacua-ewetsinê Acaz-jawabelia penacueto penaexanaejawanexa pejanawata, yabaracuaicuaijai anijanacuetobeje yabara. Caenacueto penaexanaejawanexa papejanawa Acaz peyapêtaewatsijawabelia. Bajaraponêyo penaexanaecujinae, wênêrubijitsia Emanuel. Bajarapacuenia wênêrubijitsia Acaz peyapêtaenexa pexaniajaicuene Dioso pewetsijawa Judá nacuapijiwi. Bajaraxuata Asiria nacuapijiwajabitsaê cuene-amoneyabijitsia-ata, Dioso nacayapêtaeya-exana bajarapaEmanuel-wênêta pacuenia itsamatacabijawabelia naexanaejitsia Jesús bajarapanacuajawata. Picani Isaías tsitatsi becaenacueto yabara. Pacuenia jumaitsi Acaz-jawabelia copiyacueto yabara, tocopiatatsi baja.

Itsiata Pejanaliwaisibaxutota Mt 1:23-jawata nacayapêtaeya-exana pacuenia paliwaisi Isaías wajunupaeba Acaz-jawabelia, apocaenacueto yabara. Mateo nacayapêtaeya-exana pacuenia itsanacueto naexanaejitsia itsa pejanawajawata, icatsia pebijawabelia apopenaperabê-quenetsiataewa, penacoxitsijawanexa penacuetonêyo. Pacuenia-ata wênêruba copiya panacueto Emanuel-wênê, catocaewi nacuetota jamatabêcuene-itajêtsijitsia Dioso peyajawajawa pijajiwi. Baitsi bajarapacotocaewi nacuetota pepoDiosonê. Nexata xaniajai Dioso yajawa pijajiwi. Taema Mt 1:23; Lc 1:27.

Escudo

Bajayatami wabajabitsaewi pacujinae nawabajabitsaêtsijitsia, itsajawata caponabiaba anija-escudopanabeje, pijawabajabitsaewi pewecuanacaranatsinexa. Cae-escudo, tsiquiri-escudo. Namaxêcêtabiaba, pijawabajabitsaê espadata pecacuatsiyaniwatsi, pe-ucutaxuabiyaniwatsi-ata. Itsa-escudo pijinia ayaijawa. Bajaraxua daxitanê penape-rabêcaranatsinexareca, pejorojoronaeyaniwatsi cuererebota, yawinato-ata. Bajarapapacunua-escudopana namatawenonabiaba petocaponaenênexatsi.

- F -

Faraón

Bajayatami Egipto nacuata wênêrubabiaba pepopeyanacua-ewetsiwi Faraón. Apopepawënë, saya bajarapacuenia jumaitsi pijataxunae yabara pacuenia presidentenê jai tsabiabi wowai, pacuenianua resguardojawa, «gobernador cabildonê», jiwi jai tsabiabi, bajarapijinia pacuenia, «Faraón», jaitsi tsabiabi peyanacua-ewetsiwi Egipto nacuapijiwimi.

Ficol

Bajayatami filisteo nacuapijiwi wênêruba-biaba pepopenamatacatorobinê pijajiwi wabajabitsaewi «Ficol». Apopepawënë, saya bajarapacuenia jumaitsi pijataxunae yabara, pacuenia «comandantenê», jai tsabiabi ejercitopijiwi. Nexata paFicol najumeliwaisicajunua Abimelec-yajawa Abraham-jawabelia Gén 21:22-jawata, nacayapêtaeya-exana saicaeya Abraham peponaponaematacabita.

Itsiata paFicol Isaac barëcuaicuajai Gén 26:26-jawata, saicayanë piji-
nia copiaya ponë barëcuaicuajai Abraham-pijinë.

Filacterias

Pamatacabijawa israelitawi jinawanapa Egipto nacuata, baja-
rapamatacabijawa nacëbabiaba itsacuenejawanëta, pacuenia
Egipto nacuapijiwi, penayajiwitorotsinexa pibisiacuen petoco-
piapatsiyaniwatsi. Bajarapacuenia pijinia israelitawi exanabiaba
pecuenecowëya Egipto nacuapijiwi. Bajarapapexanaecuen Moisés
tsaena pecopiarucaeya-exanaenexa, itoroba itsacuenia penacëba-
biabinexa. Itoroba penacëbabiabinexa Diosojumeliwaisijawawe-
rena pejucaeliwaisixi, peyajawa-ënëaponaecaxaxi. Bajarapacuenia
exana bajara-pamonae penacofënëtsiyaniwa Dioso petonajume-
copatsiliwaisitsi. Maparucae-ataje judiömonae bajarapacuenia
nacëbabiaba pacujinae wajëcaejitsia Diosojawabelia. Bajarapana-
cëbicaxaxi ya-ënëa pona pequionaebaxutoxi. Bajarapabaxutoxi-
jumata yaquinaruba paliwaisianë juca Diosojumeliwaisiwerena,
Deut 11:13-22; Deut 6:4-9; Éxo 13:11-16; Éxo 13:1-10. Bajarapanacëbi-
caxaxi pewënë «filactérias».

Filisteomona

Bajarapamonae jinawanapa Filisteawënë nacuata, bajara-
xuata pijanacuawënëcuenia wënëxaina filisteomona. Filis-
tea nacua eca Mediterraneo manuamene-itapa imoxoyojawata,
Canaán-yajuwënënacuami.

- G -

Gloria

Gloria pejaijume caejamatabëcuene apoxinae. Nacayapëtaeya-
exana pecotia yabara, pecuene yabara, pesaëyabara-ata. Jiwiijumeta,
gloria itsa yaquina bacapitsapa mapacueniaje: «Jehová pijapeniweni-
wenaecotia», pejaicuenia. Gloria itsajai wowaijumeta jumaitsi Dioso
yabara, apojumaitsi ëpecotia yabara. Gloriajume nacayapëtaeya-
exana: Diosos pecuenecaëjëpaenëtsicuenia, Dioso pecuenenamata-
motsinëcuene, Dioso ayaijamatabëcuenenëcuene-ata daxitawecua.
Bajarapacuenia wajacuenetaejawata Dioso pexanaecuenia, nacatsita
ayaijamatabëcuenenë. Nexata «ayaijamatabëcuenenëmë», siwaja-
matabëjaitsi bëpënëa. Bajaraxua-ata pewënë «gloria». Baitsi pacue-
nia pecotia taejunuatsi pebutujaijawata, bajarapacuenia Dioso
pexanaejawa wajataejawa. Bajaraxuata wënërubia gloria. Taema
Éxo 16:7; Éxo 24:16-17; Mt 6:13; 16:27; Lc 2:9; 23:47; Heb 1:3.

- H -

Harán tomara

Bajarapatomarami bajayata eca Eufratés menematatujawa-
betsia, Ur tomarawecua. Bajarapatomarayo apo-ecae Canaán
nacuata. Eca Mesopotamia nacuamita. Bajarapa-tomarayota bajaya-
tami jinawanapa arameowi. Bajarapamonae Diosowecua nawa-
jëcabiaba merawipijijumetojawabelia. Bepijadiosocuenia tane.

Bajarapatomaramijawata ponapona Abraham, paxapijinëyawawa. Bajarajota tsaena tēpa paxapijinēmi. Bajarapatomaramita pijinia ponapona Rebeca pematapijinēmi Labán.

Hebreonē – Hebreowi

Hebreojumeta, «hebreonē», itsa jai, mapajamatabēcuenē yabara jumaitsije: «Heber-pijinē pemomoyajuwēnēnē», pejajamatabēcuenē. Taema Gén 11:10-26-jawabelia. Bajaraponē Heber Sem-pijinē pemomoxiyajuwēnēnē. Sem-pijinē, Noépjinē pexēnato. Hebreowi cuai-cuaijai hebreojume. Bajarapajumeta hebreowi bajayatami toyaquina Dioso pejumeliwaisi. Itsawēnē pijinia hebreowinexa judíowi, itsa jume Israel-pijinē pemomoxi, jai tsabiabi. Itsa jume israelitawi, itsa jume maparucaeje Israelf, jai tsabiabi. Wēnēnawitsi-ata itsiata saya caewiriawi yabara jumaitsi.

Higocuai

Judíowi notabiaba higeranaecuai; bajarapacuai pewēnē higo. Itsawēnē pijina «breva». Notabiaba pexaeyabibinexa. Tsixanepanatsi bitso bajaraponaecuai. Bajaraponaē higeranae bitso apo-apia, itsiata pexania-itacaēnae xaina, tsipaji baxuxatajai. Higeranae nacuaibabiaba anijatobeje caewai canacujitsia. Marzo juametota bajaraponaē pejanabaxutonē juwabiaba, penacuaitsinexa copiyapijinacuaitsi. Nexata bajaraxuacujinae junio juametota icatsia nacuaibabiaba.

Itsa baja nawereta bajarapacuai peneta tsobia, itsajawata purana. Bitso xaica, tsapatsapapanua. Bajarapacuai becumalibē picani, jane baitsi apo-ataja. Saya caējēpa pexaejawa yamatabocua. Nexata itsajawata xane cae-asiaya. Itsajawata pijinia ejebabiaba icotiata, tsipaji itsa pepuanionae, xaniawaetsia, ajamatabēsāē tsabiabi, jebi-ata bajayajebi. Nexata bajarapacuenia daxitawaijebi xanepana wajaxaenexa higocuai abejenejewawa. Itsajawata, namuto itsa exana tajējawabelia, bajarapanonaeacuai natocaponabiaba pexaenexa namuto-epatua.

Horno

Bajayanacuapijiwimi pan pecasebabiabijawanēnexa; nato-exanabiaba tsaena atsata pefaratsiboyo, bajarapabo-ēnēta pesebinexa pijapan-jawanē. Bajaraxuanē wēnēruba wowaijumeta «horno».

- I -

Iboto petsimata-epanaxuabijawa aceiterata

Bajayatami itsapacujinae jiwi najumecapanepaeya naliwaisicajunua itsanējawabelia, itsajawata nutabiaba iboto penajamatabēnapitsinexa penajumeliwaisicajonejawami bajarapataxunaejawata. Nexata bajarapanutsi-iboto pexenetsijawata najamatabēnapitabiaba penajumeliwaisicajonejawami, pexanaenexa pejumaitsicowēya najumecapanepaeya. Jacob itsa tsimata-epanaxuaba aceiterata bajarapanuca-iboto Dioso pewēnēta, najamatabēcuenē-itajēta petotsatsijawa bajarapataxunae Diosojawabelia saicaya. Taema Gén 28:16-22.

Incienso petajuitabiabi-altaryo

Bajarapa-altar nucabiaba bajayatami Dioso pijacarpabo-ēnēta, copiaya peyatu-ucutsi-ēnējawawereca, peyatu-ucutsipana

pënë-wereca. Bajarapa-altar-jumata tajuitabiaba inciensopërēja-waxi anijatobeje caematacabi canacujitsia; bajayacunua, itsajawa caniwio. Bajarapa-altar canacujitsita nuca Zacarías itsajota angelenë yapëtaeya-exana-nucatsi pijawa pexënato pexainaejawanexa. Lc 1:8-17.

Israel-wënë

Israel-wënë xaina mapejumaitsiwënëje: «DIOSO raja piacue-nesaënë», pejaiwënë. Nexata Jacob itsapacujinae ángelenë wënë-rubatsi Israel pebarënorobijawata, jamatabëcuene-itajëtatsi pejanajamatabë-cuene pexainaejawanexa. Baitsi Jacob-wënëmi copat-sijitsia pijaperujucuenemi yajawa, xuanëmita naewetabiaba pijacuata. Aeconoxae Israel itaxutuajamatejemajitsia DIOSO piacuenesaënë-cuene pewayenonaenexatsi daxitajawalia.

- J -

Jacob-wënë

Jacob-wënë xaina mapejumaitsijamatabë-cueneje: 'Penaxinae-yabinë itsanë pijataxunae,' pejaiwënë. Bajarapacuenia wënerubatsi tsipaji taxusalibëwaetabiaya pematapijinë naexana. Bajarapacuenia penaexanaejawa jamatabëcuene-itajëta judíowinexa bajayatami itsa-matacabijawabelia bajaraponë yamaxë-itojorobiaya pepitsinexa pematapijinë pijataxunaemi. Gén 25:26.

Jehová

Bajarapawënë itsawënë Diosonexa. Baitsi pepawënë Dioso Israel-pijinë pemomoxinexa, penajamatabëcuene-itajëtsinexa daxitamatacabi peyamatacabiatitecaenëcuene, pejamatabëcueneitajëtsinexanua Pepopetuxanenë daxitanexa. Bajarapawënë Dioso nawënërubabiaba itsapacujinae naliwaicsicajonejitsia jiwijawabelia. Mapejumaitsiwënëje: «Daxitamatacabi peyamatacabiatitecaenë». Baitsi Ponë aponaexanae, apotëpae-ata tsane, Ponë pitawanë tsabiabi, pejaiwënë. Bajarapejumaitsijamatabëcuene bajarapawënë Diosowënë. Judíomonae bitso ajume-ura tsabiabi «Jehová», pejaijawa itsa yabaracuaicuaijajitsia Dioso, itsa junatsijitsianua pewajëcaejawata. Bajaraxuata canacuenë-babiaba itsawënëanë. Itsajawata jumaitsabiabi: «Dioso», jai tsabiabi. Itsa Jume: «Tajatuxanenë», itsa jume «Wajatuxanenë», jai tsabiabi. Tajatuxanenë itsa jai, najamatabëcuene-itajëtabiaba pacuenia Dioso pepopitorbinë tsaponaponae daxitawecua. Baitsi pepoPetuxanenë.

Jehová pija-ángelenë

Bajayatami Jesús penaitajëtsiwajënaeya mapanacuataje Marfata jiwi pecapanepaenënexa, itsajawata naitajëtabiaba be-ángelenëcuenia. Wajayorobijawata Dioso Pijume Perujuliwaisibaxuto bajarajota tanetsi pacuenia Dioso Pexënato itsajawata naitajëtabiaba jiwijawabelia be-ángelenëcuenia, petsipaëbinexa pecaponaeliwaisi Diosojawawerena. Itsa Dioso Pexënato naitajëtabiaba ángelenëcuenia, Dioso Pijume Perujuliwaisibaxutota jiwi jumaitsi tsabiabi Jehová pija-ángelenë; jai tsabiabi. Juya itsamonae jumaitsi tsabiabi ángelewi; jai, ángelenë; jai, itsa jume Diosojawawerena peponae-ángelenë, jai tsabiabi.

Joyas

Pexaniawiria-itabëtsi-ibotoxi yabara wowai bajumaitsi, «joyas», bajai, tsipaji nawita pijapitabëtsicuene. Joyas itsajai wowaijumeta itajëta acueyabi pajamatabëcuenebeje: pexaniabutuajajawa, penamata-motsijawa, bitso piatajajawa yabara-ata.

Juez-monae

Bajayatami Josué petëpaecujinae, itsa abaxë apotaxuxuabi pepopeyanacua-ewetsinëcuene (reynëcuene), nexata Israel-pijinë pemomoxi xainabiaba peyanacua-ewetsinëtsi. Bajarapamonae pewënë juez-monae. Itsiata bajarapajuez-monae apocuenejëpae pajuez-monae xainatsi maparucaeje wowaiwi tuatuajëta, tsipaji nawecua-aitothiabeje penacuenebicuene. Bajayata pajuez-monae yanacua-eweta israelitawi, xaina cuatro pajamatabëcueneliwaisibeje. Copiaya bajarapajuez-monae matacapona Israel pemomoxi pebarë nawajabitsaëtsijawata, pewecuacapanepaenexa pijawajabitsaë pecobewecua, pamona bajaya-jebi bejiobia-exanawanapatsi. Pecapanepaecujinae, bajaraxuacujinae bajarapajuez-jiwi yanacua-ewetabiaba pecapanepaewi. Pewetsijawata bajarapamone, itsapacujinae itsanë neconitsipatsi itsamonae, bajarapajuez-monae liwaisi canaëjëtabiaba Dioso petonajumecopatsiliwaisi Moisés-pijinëta, peyapëtaeya-exanaenexa xaniajaiya penaneconnitsinëcuene. Pecopiarucaejamatabëcuene-liwaisi, bajarapajuez-monae muxujiobabiaba Israel pijinë pemomoxi pecopaba-othopaenexa jumapecataeya pexanaenëanëjawabelia penawajëcabiabiyaniwa, ëJehovájawa-belía juya penawajëcaenexa. Bajarapacuatro pajamatabëcueneliwaisibeje baxaina Israel-pijinë pemomoxi pewetsiwi juez-cuenia bajayatami.

Jumapecataeya pexanaewi pijasacerdotewi

Mapitsisacerdotewi apoxainae caenacuenebicuene Aarón-pijinë pemomoxi penacuenebicuenebeje. Aarón-pijinë pemomoxi tonacuenebawanapa pepoDioso petonajumecopatsicueniatsi. Juya pasacerdotewi jumapecataeya pexanaewi petonacuenebiwi peliwaisita matacapona jiwi pejumecowënëtabiabinexa dowathimonae, itsa jume pijawiriamalicaí jumaitsitsi jumapecataeya pexanaenë pewënëta. Sacerdotejume itsa canacueneba wowaiwi, Israel-pijinë pemomoxi-ata, bajarapajume yabarajumaitsi, «ponë jiwi peto-exanabiabinë pijadiosowijawabelia petonajumecopatsicueniatsi, ponënu peyapëtaeya-exanaenënexa jiwijawabelia xua bajarapadiosonë tonajumecopatatsi». Nexata sacerdotejume xaina anijajamatabë-cuenebeje: «ponë jiwi peto-exanabiabinë pepoDiosojawabelia petocaëjëtsicueniatsi, itsa jume jumapecataeya pexanaenëjawa-belía peto-exanabiabinë.» Najuacue-nebeje najëpa sacerdotewinexa. Egípto nacuapijisacerdotewi yawenonabiaba Egipto nacuapijiwi pewajëcabiabinexa jumapecataenëanëjawabelia, pacuenia matcabipijijuametojawabelia, bajarapacuenia Nilo menejawabelia-ata. Bajarapasacerdotewi yapëtaeya-exanabiabanua paliwaisianë tonajumecopata pejumecowënëtabiabinexa.

Justo

Justojume jiwijumeta mapajamatabëcuene xaina. Pexaniajainë-cuenia pecanaëjëtsinë: Bajarapaliwaisiyo yabara wowai capitsapa

«justo». Bajarapajumeyo xaina mapajamatabëcueneliwaisibeje: 1) Pexaniajainë. 2) Pexaniajaicuenia pexanabiabinë. 3) Pexaniajaicuenia petocanaëjëtsinë peneconitsiwitsi, pexaniajaijawa yabara, penajumet-sënëtsijawa yabara-ata. 4) Cotocaewijawa pijinia najëpaeya petaenë jiwijawabelia. Apoxinae piasiwacuene caejijawabelia.

- L -

León

Mapitsinewëthëje Israel nacuata jinawanapa. Bajaraponë petso-bianë, itsiata pinijinë wajanacuapijinewëthëwecua. Bajaraponë pijinia itsacuene pexainaenë. Baitsi itsa siwajirewa pexaenënexa, xërëjaiya waetaba. Asaëbeje bitso. Cuenecaëjëpatsi perujuainë pejumajirewi-jawa, tsiquiribacayo-ata.

Leopardo

Bajaraponë newëthë pitaneyaquijainë. Itsiata apojëpae mapanacua-pijinewëthë. Baitsi asipia, nexata babisojina. Mapawirianewëthë jinawanapa, itsanacuanëjawa, Israel nacuata-ata.

Levadura

Bajaraxua levadurawënëjawa bamatajërëaba pan-matabëjawabelia, pefufunaeya-exanaenexa bajarapamatabë. Pefufunamatabë capitsapabiaba petotowipan. Levadurata apopematajërëabimatabë capitsapabiaba pecarëcarënaepan.

Levadurata apopematajërëabipan-pijifiesta

Pamatacabi israelitawi pitsapa Egipto nacuawecua, bepijiayo-cuenia pitsapa. Nexata acuenebi israelitapijipetiriawi pematabëanë pematajërëabinexa levadurata, petotowipan penamitsasebinexa namutua pexaenajetarubenaenexa. Nexata pan-matabë levadura matajërëabinejewa bepijiayo namitsasebaxuaba pecarëcarënaepan namutojawa pexaenexa. Nexata itsa israelitawi exanabiaba bajarapalevadura-matajërëabinejewa pexanaepan-pijifiesta, naja-matabënapitabiaba pacuenia Jehová bepijiayocuenia pecapanepae-jawatsi Egipto nacuapijiwi penamatacaitorobabiabi-cuenemiwecua, pebejiobia-exanawanapae-jawamitsi-atawecua.

Linopana

Bajarapawiriapapaëbërëpana bitso peyacueyacuecaejawa daxitawiriapananëwecua, bajayata xuanë canacueneba penaxatabijawanënexa. Bajarapapanata exanabiaba sacerdotewi penaxatabijawanënexa. Bajarapapana pexanaenexa canacueneba piapiabotojawanë linowiriabotonë. Linobotonë penamatonotsicujinae, itsa niona, nexata meniajeba merata bajarapabotonë pejumaboco pewecuanotsinexa. Nexata not-sijitsia ëpepajawanë. Bajaraxuanëta firaba pemaëtonë pejucaenexa, bajarapamaëtonëta cueyabiaba pepananë.

Lobo

Bajaraponë unupijinë pianaepanaenë. Benamo picani itsiata piniji-wiriawi, matatoxenetsia bitso pianaepanaenë. Pacuenia namoxi nacatowerenebiaba wacaraxi, bajarapacuenia pijinia lobomonae toxae-yabiabatsi Israel nacuapijiwi pija-ovejamonae. Bajarapamonae caenë

pija-epato apoponaponae. Pepabitsaëto najuajinawanapa, bejama-tabë veinte ponëbeje caebitsaëtota. Bajaraxuata ayai bajarapamonae pecuene-amoneyabinexa ayainë-ata pexaenexa.

Lugar Santo

Bajarapajume pejumlahitsijume: «Peyaiyatae-taxunae Diosonexa», pejaijume. Bajarapatusato Dioso Pijacarpabo-ënëyatu-ucutsijawa, penamataxainae-ënë. Bajarapa-ënëta joneyabiaba sacerdotewi caematacabi canacujitsia, pitayotsicandelabro pewënëbi-nexa olivacuaipiji-aceiterata, petuxujuwi-inciensojawanua petajuitabiabinexa.

Lugar Santísimo

Bajarapajume pejumlahitsijume: «Pepopeyaiyataetaxunae Dioso pepopijataxunaenexa daxitataxunaenëwecua», pejaijume. Bajarapataxunae Dioso Pijacarpabo-ënëjawa, coto-caewi peyatu-ucutsi-ënë. Bajarapa-ënëjawata buatabiaba Dioso penajumeliwaisi-xaniawaetsibaula. Bajarapa-ënëlia joneyabiaba ëpepopenamatacatorobinë sacerdotewi caeto caewai canacujitsia, pejumatsicabinexa Dioso penajumeliwaisixaniawae-tsibuala pematapa dajubijanata.

- M -

Mandrágoracuai

Bajayatami petiriawi jitsipabiaba pexaejawa bajarapacuai penacoxitsinexa, powaxi mawecowi. Bepewaëcuenia xaeyabiaba. Itsamonaepijinia xainabiaba pejitsipaenexatsi, pacuenia itsamonae baxaina naecono.

Matapijinëjamatabëcuene paxa pewënamuto

Bajayatami pamonaepexi xaina bitso tonamatamotabiabatsi copiaya pexainaenë pebi. Copiaya penaexanaenë pebi, tsicarucatsi pepitsinexa paxa pijataxunae, bajarapacuenia pijawiriamaëto pecanacopatsinexa, pecobecowë-ata pecanacopatsinexa anijajawanë pematatsënë. Nexata xuabeje Esaú canajetaxuaba matapijinëjamatabëcuene mapacuenejawanëje: 1) Esaú pijasalinaiwiriamaëtojawalia Cristo penaitajëtsijawaminexa. 2) Paxa pewënamuto besacerdotenëcuenia petonacuenebijawaSminexa pijamonae tuatuajëta. Baitsi daxita pijamonae petotajuitabiabijawaminexa dajubimonae altar-jumata pijaneconijamatabëcuene. Pecujarubinëminexa Dioso Peliwaisi pijamonaejawabelia. 3) Paxa pewënamuto pecanacopatsijawaminexa pecobecowë anijajawabeje tsaponae. 4) Itsajamatabëcuene pijinia xua Dioso najumecapanepaeya jumaiti baja pamo Abraham-pijinë, paxa Isaac-jawabelia peyawenonaeyapaebijawatsi picani. Daxita bajaraxuanë Esaú bijiaya naëcota, jumeaebiaya Dioso. Bajarapacuatropajamatabëcueneliwaisibeje canacopatabiaba pexë nato pebi pepomatapijinë, paxa pewënamuto.

Matapijiwi pecuene-itajëtsijawatsi paxajiwi

Pacujinaepaxa petëpaewajënaeya tsiwajënaecuenewajunu-itajëtsijitsia pexë nato matapijinë, bajarapacuenia exana pexë natojawabelia pecanacopatsinexa xua Dioso cuenewajunupaeba

pamopijiwimijawabelia peyawenonaejawanexatsi bajayatami. Bajarapacuenewajunu-itajëtsijawa towajunupaeba Dioso petoyawenonaeexatsi pexënato pexainaponaenexa pexi, dajubi-ata ayaijawa, petonaxaniabinexatsi pe-ubijawanë, pecobecowë-ata, xua xaina petopitsaponaenexatsi xaniawaetsia daxita pejuyapijiwiwecua matapijinëxae. Bajaraxua yabara paxajiwi pexaniacuenia cuenewajunupaeba Dioso pewënëta pexënato pepomatapijinë.

Mallawiriatrampa – baratsui peyataicaebu

Bajayatami israelitawi canacuenebabiaba peyataicaebuxi baratsui. Copiaya bajarapabuxi tsiwajënaeruta. Bajaraxuacujinae baratsui yorotabiaba bajarapabunëjawabelia. Nexata bajarapacuenia baratsui taica-biaba. Petaicaenëxi itsajawata canajetabiaba, itsajawanua xane.

Mesajawata pan pejebabiabijawa Dioso Pijacarpabota:

Éxo 25:23-30; Lev 24:5-8

Itsamonae canaëjëta mapitsimesajawa tsaena nuca Dioso pijacarpabo-ënëta. Bjarapitsimesajumata jebabiaba pan-jawanë sacerdotewi caesemana canacujitsia, Sábado matacabita. Orijibia neyapëtaenexa natoyorobare athëbëyo pawënëbaxutobeje wënëruca.

Moab – moabitawi

Moab raja Lot pexënatoyota matapijiwata penaitajëtsinë. Ponëyo xaina paxa Lot-jawabelia (Gén 19:30-38). Moab-wënë hebreju-meta pejumaitisijume: «Paxa pewënëta pijawiriamäto pecanacopatsinë», pejaijume. Bajaraxuata Moabitawi jaitsabiabi pemomoxi yabara. Saya pewënëcuenia nawënëruba pijawiriamäto. Panacuajawata jinawanapa moabitawi bajarapanacua wënë-ruba Moab nacua, pijasalinainë pewënëcuenia. Moab nacua eca bajayata Amon nacuamuxuneneta. Bajarapamonae jinawanapa Mar Muerto pucaxaneto itsapanawetsina. Israel-pijinë pemomoxi nacaemonae-ata Lot-pijinë pemomoxijawabelia, aponanaëcotsi xaniawaetsia. Bajarapamonae saya jinawanapa pena-itoyacuenia. Deut 2:9,19; Núm 22–24; Jue 3:12-14,26-30; 10:6–11:33.

Molec – Milcom

Bajarapajumapecataenëjawabelia bajayanacuapijiwi pexi tajuitabiaba, bajaraponë pitaxutotsoniataenexatsi, peyawenonaeexatsinua pexaniacuenia pewajëtsicowëya. Pexi piasaënë totajuitabiaba. Nexata pijamonaejiwi pejumetaeyaniwa petajuitsijawata penue-jawa, Molec pijasacerdotewi conitabiaba tambor pejumecaranatsinexa.

Moríah-tsuto

Tajuitsijitsia pexënato Isaac Moríah-tsutojumata, itsiata Dioso tonutatsi oveja, pexënato petoyapijiwitëpaenënexatsi. Taema Gén 22:2

Bexëjawabelia peyanacua-ewetsinë David penaneconitsixae Dioso-jawabelia, bajarapatsutojumata bajaraponë tajuita altar-jumata bueyubeje pijaneconijamatabëcuene. Nexata pawixae Dioso tsitoroba, ángelenë Israel-pijinë pemomoxi pebeyaxuabanajetarucaenexa, bajarapatajuitsijawa Dioso petaexae, nexata itaweta ángelenë orijibia itsamonae pebeyaxuabiyaniwa. Bajarajota ángelenë pebenajeta-rucaenë nucajopa Moríah-tsuto matatsënëta. Nexata David itapeta

bajarapataxunae pexënatō Salomón penacuenēba-nutsinēxa Jehová pijatēmplobo. Taema 1Cró 21:18–22:1

Mosquito

Pacujinae Dioso tsicopata Egipto nacuata wacapemonae pewēñ-caenēxa, apoyapētaetsi xaniawaetsia itsa pepacuene wacape-monae. Wowaijumeta, «mosquito», itsa jai, saya cajunua atsinēxi yabara, pacuenia tsiquiridainatoxi, fiafiatoxi, petinenēxi, wacapetoxi-ata yabara, jai. Bajaraxuata apoyapētaetsi xaniawaetsia pawiriacuene. Bajarapacuenia pijinia Hebreojumeta. Reina-Valerapijibibliabaxuto pejucaewi juya itajēta tarē yabara, tsipaji apocaxitajarabi tsaena paju-merutsijitsia pawirianē yabaracuaicuaijai bajarapahebreojumeta. Saya canaējēta tarē yabara. Tsipaji apocaxitajarabi pawirianē yabaracuaicuaijai, bajaraxuata bajarapacuenia yaquinaruta. Juya Dios Habla Hoy-pijibibliabaxuto pejucaewi itajēta bajarapajume mosquitocuenia.

- N -

Nacobeuata pethaëbëxëpanawitota

Bajayanacuapijiwimi xaina itsacuenējawanē pexanaenēxa pexania-jaicuene penato-exanaenēxa. Pamatacabi ponē najumeliwaisi cajone-jitsia itsanējawabelia, bajaraponē peto-exanaenēxatsi itsacuenējawa, bajarapamatacabi nexata ponē nacobeuatabiabia-exana pethaëbë-xëpanawitojawata. Bajarajota nexata bajaraponē jumaitsabiabi: «Itsa pepacuene neto-exanae-jitsiamē, nejejaijawa nitajëtsinēxa tathaëbë-xëpanawitojawata nacobeuatsianame», jai tsabiabi. Pethaëbëxëpanawitojawata itsa nacobeuata, bajaraxua itajēta yayataeya xua exanaejitsia pacuenia jumaitsi itsanējawabelia. Bajaraxua banato-exana ëpenayapëtaewijawabelia penaliwaisicajonejawatabeje. Nexata itsa apoto-exanae pacuenia najumeliwaisi cajonejitsia, cuenecaējëpa bajaraponëbeje pemomoxijawabelia penayabara-itoyajawa. Apocopiarucae pena-itoyajawa apopenato-exanaexae bajaraxua.

Nacuenecataeya exanaenatsi

Dioso asiwaya jiwi exana aithothiaya daxita pecobecowëwecua mapanacuataje. Dioso itsa jumaitsi: «nacuenecataeya exanaenatsi» itsa jai, apojumaitsi peperabëto yabara, saya pijumali yabara, tsipaji pa-epatota pumu-uxunetsi bajarapajumali rajutatsi. Bajaraxuata caej-wiyo canacujitsia cuenējëpa Dioso. Baitsi xaina pija-espíritu pacuenia Dioso jamatabëcuene-itsi. Bajarapanacuene cataejamatabëcuene perajutsixae, caejijiyo canacujitsia xaina penato-itapetsijamatabëcuene, penato-itapetsinēxa pejumecowënëtsinēxa Dioso, pexanabiabinexanua pexaniacuene pacuenia Dioso itsi. Cuenecaējëpatsinua pecuaicuaijainēxa, pacuenia Dioso.

Orijibia Dioso nacuenējëpaeya jiwi xaina mapitsijamatabëcuenejawanē: pebarëyajamatabëcuene, pianaepanaejamatabëcuene, pejamatejemajamatabëcuene, penajamatabëxainaejamatabëcuene, piasiwajamatabëcuenenua xaniawaetsia piasiwänēxa Dioso, pewënajijiwi-ata.

Caejiwiyo canacujitsia xainanua pecana-ëjëbijamatabëcuene, xaniawaetsia peyapëtaenēxa Dioso. Nexata pacuenia Dioso

jamatabëcuenematatoxeneta daxita pecobecowë, bajarapacuenia piji-nia jiwi jamatabëcuenematatoxenetsijitsia daxita Dioso pecobecowë mapanacuataje. Bajarapapitsicuenia jiwi jamatabëcuenejëpa Dioso itsa nacuenecataeya exanatsi.

Nadab, Abiúbeje

Bajaraponëbeje Aarón pexënatobeje sacerdotenëbeje picani. Lev 10:1-jawata itsa yorobatsi pacuenia bajaraponëbeje piaithia-cuenia saya exanabeje, Dioso petonajumecopatsicuenewecua itsapacujinae incienso tajuítabeje Dioso pitabarata. Nexata Dioso tsitorobatsibeje isoto petajuénexatsibeje. Jiwi pecana-ëjëbiwi mapa-liwaisi apoxinae caejamatabëcuene xua yabara naneconitabeje Diosojawabelia. 1) Itsamonae canaëjëta pepitsijawa itsa-iso-ita-ire piniji-altar broncepíjjawawecua. 2) Itsamonae pijinia canaëjëta pepitsijawa itsawiria-incienso pëjëjawa Dioso petocaëjëtsijawawecua. 3) Itsamonae canaëjëta saicaya horata pexanaejawabeje. 4) Itsa-monae canaëjëta bajaraponëbeje aposacerdotenëbeje. Saicayacuenia mapamonae canaëjëtsi-ata bajaraponëbeje pexanaecueneyabara, itsiata daxita bajarapaliwaisianë nacayapëtaeya-exana bajara-ponëbeje apo peyayia-tajawa Dioso. Bajaraxuata naneconitabeje.

Nonotapuna paxa pitabarata

Bajayatami pexijiwi banonotapunabiaba paxa pitabarata, pecopiapitsinexa itsa junua pabo-ënëlia eca. Bajarapacuenia najamatabëcuene-itajëta peyayataecueneyaxawabelia. Itsiata Gén 31:35-jawata Raquel apononotapuna paxa pitabarata, tsipaji bajarapowa naboxonobaponapona pina. Itsamonae pecanaëjëbiwi bajayapijicuene jumaitsi Raquel yabara: «Apopexaniajajawa penaboxonobijawa yabara. Saya nayawajunuaxaina, bajarapadiosowi pejedorota pejumata pe-ecaexae», jai itsamonae.

- O -

Ónice-iboto

Pa-ibotoxi rubena majotaje pe-ojobi-jawanë. Bitso bajarapa-ibotonë pexaniawiria-ibotonë. Pe-ojobiwajënaeya bajarapa-ibotoxi jumaxuxuwabiaba. Jiwi canacuene-babiaba penaitabëtsinexa.

Oveja

Judíowi bajayatami ewetabiaba ovejaxi. Bajarapadajubi witsatabiaba pewinexa, pemilechenexa, pejumananotsinexa-ata, pepananë pejorocaenexa. Caewai canacujitsia pija-oveja jumanaxunabiaba.

Oveja monae itsajota apoxinae pewetsinëtsi, nexata caebitsaëtoyocuenia aponacopatsi. Saya nacayajatsia jinawanapabiaba, caenë canacujitsia pejitsipaejawabelia. Nexata imisia peponaponaexae, yapëxanepanaeya piayaiwi xaeyabiabatsi. Bajarapacuenia pijinia waxaitsi-ata. Itsapacujinae apoxinaetsi abaxë Dioso wajanacawetsinënexa, nexata caejiwitsi canacujitsia natojaitabiabatsi saicayacuenia wajanawetsinexa Diosonejewa. Bajarapacuenia exanae-atatsi, itsiata bitso nacatsi-ayai tsabiabi. Caenë ra jane Dioso xaniawaetsia wajanacawetsinë tsaponapona.

Oveja mata-eto–piobijawanë judíowi

Judíowi bajayatami xainabiaba piobijawanë apocaewiria-cuenejawa; apopenajëpaejawanë. Bajarapacuenia-ata caejawa canacujitsia xaina saicayacuenia pecanacuenebijawanënexa. Chofar-wënëjawa obabiaba pa-epatota dajubi tajuitabiabijitsia altar-jawata. Obabiabanua peyapëtae-ya-exanaenexa pejanajua-meto petaxuxuabijawanexa, pa-epatota pitsapaina merawipijijua-meto tsiquirimuxupayo. Obanua fiesta matacabi pecopiajopaejawa jiwi pemuxunapatsinexa.

Ovejamata-etoyo pijinia xaina saicayacuenia peyapëtaeya-exanaenexa piobijawata. Bajarapaovejamata-etota itsa oba, peju-meyapëtaewi wajabitsaëwi yapëtane pejunatsijawa penacaetuat-sinexa. Pamonaë pijinia apowajabitsaëwi penamatayabinxexa pijawajabitsaëwecua, bajarapacuenia-ata penacuenexaniawaet-sinexa. Wajabitsaëwi pebarënewajabitsaëtsijawata pijawajabitsaëwijawabelia, ponë oveja mata-eto piobinë yapëtaeya-exanabiaba pi-obijumeta itsa tsi-ayaijitsiatsi pijawajabitsaë, caewëarena penawia-binxexa. Itsa jume itsacuenia oba daxita caecuenia petsimaxëponaenexa pijawajabitsaë.

Itsajawata sacerdotenë itsa to-ajibitsi pepopiapiachofar nexata obabiaba pecunua oveja mata-etoyo chofarcuenia.

Itsajawa judíowi xainabiaba itsawiria piobijawanë broncenanitota, itsajume palatananitota pexanaejawanë. Bajaraxuanë wënë-rubabiaba trompeta. Bajarapatrompetajawanë obabiaba fiesta matacabianëjawa.

Piapiachofar-jawanë aponawitsi tsipaji canacuenebabiaba unupijinë pemata-eto, be-owebicuenenë. Mapitsi-unupijinë pemata-etota bacanacueneba chofar pexanaenexa.

Pacujinaë israelitawi jinawanapa Babilonia nacuata, bajarapanacuapijiwi obabiaba itsawiria-obijawanë, pewënë zampoño. Bajaraxuanexa canacuenebabiaba chivo-bocoto daxitanë. Peuxunijawata piababa-nexa naebo upixatatabiaba. Itsamaxë-upijawawelia upixatata pewojo pexainaëbo itsaxuayo jumalipitsapaejitsia penajumetsinexa.

Oveja pewetsiwi pijanaëbo

Daxita pamonaë oveja pewetsiwi xainabiaba pijanaëbo. Bajarapanabebota tsatabiaba pija-ovejabitsaëto. Yajiwiyorotababianua piayaiwiwecua pijadajubi petoxaeyaniwatsi.

Itsajawata bajarapanaëbo upicatoxorona, jamatejema pewësicawae-tabinexa pija-oveja itsawecuatoqueta. Itsamonae namuto pexanaewi nayajiwi caponabiaba pijanaëbo penacobetoxotsiwiwecua, jomowecua, itsamonae pijinia piayaiwiwecua.

Oso

Bajaraponë unupijinë pianaepanaenë. Pinijinë bemetsajawajëto, itsiata pecuaibo jëpa be-awiri; awonopia. Bajaraponë pewi pexaenë. Toxaeyabiaba judíowi pijadajubi, pacuenia newëthë nacatoxaeyabiaba wajadajubi itsajawata.

- P -

Padam-aram nacua

Bajarapanacuami eca Eufatés mene, Tigris menebeje tuatujê irajawata. Caewênê apoxinae bajarapanacua. Dioso Pejumeliwaisi Peru-juliwaisibaxutota itsajawata wênêruta Mesopotamia, itsajawata pijinia jumaitsi tsabiabi bajarapanacua yabara Padam-aram nacua; jai. Bajarapanacuamita jinawanapa Abraham-pijinë pijamonae, Abraham pepitsapaecujinae Canaán nacuyabelia.

Pandereta

Bajarapacuenia xua bajayatami wênêrubabiaba tambores, maparucaeje wênêrubabiaba pandereta. Bajarapapanderetajawaxi najumetsia-exana penacobeconitabijawata pecobejapatojawabelia.

Paxuyo tonacueneba pexênatoyo pepitsinexa

Bajayatami Padam-aran nacuapijiwi ponê pitsijitsia itsanê pexênatoyo bamatamonacueneba copiaya pitsinejewa abaxê pexênatoyo. Palata itsa pexainaenê matamotabiaba caecuenia pepitsinexa. Itsa palata apoxinae, nexata paxuyo tonacueneba petocaējētsicueniatsi. Jacob apopexainaexae palata, nexata tonacuenebaponapona paxuyo siete pawaiheje pematamotsinexa pexênatoyo pepitsinexa.

Bajarapanacuapijiwimi, piopaxajiwi itsa matamotapona paxuyo pexênatoyo pematamo, bajarapamatamoyajuwênêjawa benapita pexênatoyo penacojiobicujinae. Gén 31:14-16-jawata nacayapêtaeya-exana pacuenia Labán tsaena aporajutsibeje pexênatoyobejajawabelia Jacob petonacuenebimatamoyajuwênêjawa, saya naxainaeyaba êponênexa.

Pascua fiesta

Pamerawijawa Dioso jutsijitsia Israel-pijinë pemomoxi Egipto nacuawecua, bajarapamerawi Jehová pija-angelenê tocaējēta pebenajetaruaenexa copiaya penaexanaepibijiwi. Itsiata Israel pemomoxi tocaējētatsi itsacuenia pexanaenexa petotêpaeyaniwatsi pexi matapijiwi pebijiwi. Itsiata baitsi jane, pamona pejabaupa tsautaruba oveja pejanaxita, bajarapabopijiwi Jehová apobenajetaruae. Matatosatsiaya najetarua. Pa-ovejayo pejanapejamatatbécueneta wecuapanepaejitsia petêpaejawaminexawecua daxita pebijiwi pepopematapijiwi, bajarapa-ovejaneño Dioso wênêruba Pascuanê. Nexata caewai canacujitsia xua Israel-pijinë pemomoxi exanabiaba fiesta, penajamatatbênapitababinexa Jehová pitaxutotsoniatatejawatsi bajarapamerawi dajubiyo pejanapejamatatbécueneta pepanepaejawa. Bajarapanabanicuene wênêruta baja Pascuafiesta, oveja pejamatatbécujiru.

Jesucristo wajanacasiwatêpaexae Pascua-wênêfiestamatatabijawata wajanacapanepaenexa wajapascuanêcuenia, bajaraxuata wowai wênêrubabiaba Semana Santa Pascuawênêcuenia.

Pecaquiatsijawanê trigoxu

Itsa baja trigoxu bitso tsewa, nexata bajarapaxu caquiata molinota. Pamolino nacueneba ibotomi. Mapadibujojawata nacayapêtaeya-exana pacuenia canacueneba bajayatami judiowi.

Pijamolionexa nacueneba mapacueniaje: Copiaya buata irata penamatajêpae-iboto. Bajarapa-iboto jumawereca matatoyorotsia

nuba itsa ibotonë. Pared-cuenia catsananuba pecaquiatsijawata piot-hopaeyaniwa irabereca trigoxu.

Judíowi petiriawi xaina pijinia itsamolinoyo pecaquiatsinexa. Copiaya buata pefererecae-ibotoyo irata. Bajaraxuacujinae pexu eta pijumawereca. Bajarapaxujumawereca icatsia buata piarewe-iboto, pecaquiatsinexa. Pemuxubërëyota xaina pewojotoyo penutsinexareca naejawayo, petajiaratsinexa. Bajarapatajiaratsijawata nacaquiata trigoxu, pepobenno pepitsapaenexa.

Pecaxueyatsinë

Bajarapajume wowaijumeta hechicero. Itsiata hechicerojume caju-nua mapajamatabëcueneliwaisianëje: 1) Bajarapajiwi pijacujirucuenia jiwi awitania-exanabiaba pebeyaxuabinexa. 2) Yapëtaeya-exanabiaba xuanë jiwi tocopiapatsijitsiatsi. 3) Bajarapajiwi peyapëtaewi waji-cuene, naeconocuene, peyarajutsicuene, peyacuene xanepanexa tsiyapëtane, peyacuene-abejia-exanaenexanua pecueyawi.

Pecuamonatëpaewa pijacuene (pamona pewecuatëpaewatsi)

Bajayatami judíomonae xaina pacuenia ewetsijitsia pamona pewecuatëpaewatsi. Tsiyaji petiriawi caeto-ata aponapitsi paxa pija-irayajuwënëjawa, pamonami pija-irayajuwënëjawami-ata, bajaraxuata pecuamonatëpaewa bitso bepejiobiwa.

Itsajawata bajarapajudíowi pitabiaba pematapijinëmi pijawami. Itsa pematapijinëmi tēpa barëxainaenejewa pijawa pebinëyo, petiriwa nexata nacojiobiabiaba pamona pewënamuto petëpaenëmi pejuyapijinëjawabelia pebarëxainaenexatsi pebinëyo. Nexata itsa pexi barëxainaejitsipa bajaraponë bajarapowajawabelia, copiaya penaexanaenëyo bajarapapebinëyo pecanacopsatsinexa bepejënatocuenia petëpaenëmi pecobecowë. Bajarapacuenia petowerewerecaeyaniwatsi pijawiria-maëto petëpaenëmi. Bajaraponëyo itsa pecunuanë baja pita xua petëpaenëmi pecobecowëmi; baitsi pijadajubimi, pija-irami-ata. Itsa baja nacojioba bajaraponë, nexata paxapijinëmi pijawiriamaëtocuenia cat-sitecaponapona. Bajarapacuenia exanawanapa bajayatami judíowi.

Penacasabifiesta

Bajayatami pamatacabi anijajiwi beje napitsiajitsiabeje, pinijifiesta barë-exana peyapëtaewitsi, imoxoyo pe-enaewi yajawa. Bajarapafiesta exanabiaba bejamatabë siete pamatacabibeje, itsajume catorce pamatacabibejucuenia.

Penacojiobiwanexa pijacuene

Bajayatami petiriawi pamatacabita nacojiobijitsia banaitabara-acatabiaba penaitabaracaransipanayota. Nexata merawi matapania pitaquirijaijawata we-itabarapita. Bajaraxuata bajayacunua pepitsinë xaniawaetsia itabaratanë matapania powa pita.

Penacëbijawanë

Bajayatami penaewetsinexa Israel-pijinë pemomoxi apocanacuenebi picani pitsicuenejawanë wajamonaeyajuwënëwi canacuenebabiaba. Itsiata bajarapamonae xainabiaba xua nacëbijitsia pitsacueniabi-yaniwatsi, bajarapacuenia pijinia itsajawanë canacueneba sebocuenia, itsajawanë nua pecajinawanapaenexa

peyacueni axanepanaenexa, daxita bajaraxuanējawabelia pesiwa-najamatabēcopatsinexa Diosowecua, bajarapacuenia xaniawaetsia penaewetsinexa.

Penaliwaisicajonecuene bajayanacuapijiwimi

Bajayatami pacujinae anijajiwi beje naliwaisicajonejitsiabeje penasi-wajamatabēcuenēbarēyanexabeje exanabeje mapacuenia jepejumenamatsinexabeje: Dajubi capatabiaba. Nexata caenēyo canacujitsia pebeyaxuabicujinae, tupatitibabepona, pebuataponaenexa nacorobotsiaya. Bajaraxuacujinae nexata penaliwaisicajonenēnexabeje, bajarapatupatitibabejawa tuatuajēalia ponabiababeje. Bajarapacuenia exanabiaba penajamatabēcuenē-itajētsinexa pepacuene pexanaejawanexa xua namata-enetsia najumaitsibeje najumecapanepaeya pexanaenexabeje. Itsiata pacujinae Dioso itoroba Abram bajarapacuenia pexanaenexa Gén 15:8-21-jawata, Abram tuatuajēalia aponucapona. Caenē Dioso tuatuajēalia pona pitayotsicunucuenia, tsipaji Abram apotsicaruaetsi itsacuenējawa pexanaejawanexa. Dioso saya najumecapanepaeya jumaitsitsi pacuenia to-exanaejitsia pemomoxijawabelia.

Penaperabēcana jetabiabiwa

Bajayatami Canaan nacuata pejinawanapaewi itsajawata itsawaxi naperabēcana jetabiaba pibisiacuene pexanaenexa pewitota. Jama-tejema pebijiwi peyapētaenexa bajarapitsi wacuene, bajarapowaxi naitabara-acata pepanayota. Ecabiabanua namutomuxuneneta itsajota ajena jonejitsia tomarajawabelia.

Penawecuacapsapaejawa

Bibliabaxutota itsa Dioso itoroba israelitawijawabelia penawecuacapsapaejawayabara, xaina mapajamatabēcuenē: Itsa pacujinae jiwi apojumecowēnētsi pacuenia Dioso tonajumecopatatsi penajumeliwaisicajonejawatsi, pijajiwicuenia, nexata itsa apo-exanae, Dioso itoroba: 1. Penawecuacapsapaeya-exanaenexa pijamonaewecua, saicaya peponaponaenexa. 2. ApoDioso pijajiwitonēcuenia petaenexatsi. Nexata acuenebi pebarēcuai cuaijainexa pijamonae-ata, acuenebi pebarēnacuenēbinexa itsacuenējawayo-ata, penawijatsinexanua to-ayapēbejetsi; bepetēpaenēcuenia petaenexatsi. Orijiibia acuenebi pecapatsinexa dajubi petajuitsinexa altar-jumata, penawajēcaenexanua Diosojawabelia penacaetuatabiabiabota, penajuacaetuatsinexanua pijamonae Dioso pewēnēta. Bajarapacuenianua Dioso-ata bepetēpaenēcuenia taejitsiatsi peyawenonaeyaniwatsi 3. Bajara-pajume nacayapētaeya-exananua pebeyaxuabi-exanaejawanexatsi itsa aponajamatabēcuenēpēnēyorotsi pexanaejawawecua, penawecuacapsapaeya-exanaecujinaetsi.

Itsiata itsa bajarapajiwiyo najamatabēcuenēpēnēyorotsipa pexanaejawawecua, icatsia Dioso pejitsipaecuene pexanaenexa, nexata bajarapajiwiyo xaniawaetsia copiapitabiabatsi dajubi petajuitsicujinae pijaneconijamatabēcuenē.

Hebreojumeta panawecua capsapare itsa jai, yabara jumaitsi pawerebiabijawa, itsa jume piajibia-exanaejawa, pejaijawa. Bajaraxuata wowaipijibibliabaxutota canacuenēbabiaba, «eliminarlos» pejaijume.

Bajarapacueneyabara Pablo itoroba Corinto tomarapijiwi Dioso pejumecowēñtsiwi penawecuacapsapaenexa ponē pibisiacuene pexanaponaponaenē. Itorobanua petocopsinexa Satanájawabelia pebeyaxuabinexatsi, itsa aponajamatabēcuenepēñeyorotsi pexanae-cuenewecua. (Taema 1Co 5).

Penayacaranatenaewaja

Bajayatami itsatomaranē xainabiaba matatoyorotsia penayacaranatenaewaja. Daxitatomara matatoyorotsia exananuba-biaba peyacaranatsipanaxaneto pejoneyaniwa pijawajabitsaē. Bajarapanucae-panata exanabiaba baupa pejoneyabiabinexa pijatomarajawabelia. Bajarapatomara-yacaranatsipanapijibaupajawata, bajarapatomarapijiwi nacaetuatabiaba. Itsa pinijitomara tsipae bajarapayacaranatsipanaxaneto xainaewitsipa pijinia itsabaupanē.

Pepopenamatacaitorobisacerdotenē

Marapacuenia naxatata sacedotewi pepopenamatacaitorobinē.

Petiriwa Gén 2:23

Hebreojumeta petiriwa pejajume, «pebiwa», pejajume, itsa jume «petiriwa-pebi», pejajume. Nexata Adán, pijawabeje najamatabēcueneliwaisijēpabeje. «Pebiwa», itsa jai hebreojumeta maxua yabaraje: Xaina mapajamatabēcueneye: Xaina pebi pecanaējētsicuene. Xaina pebi pijumalicuene. Itsa bajaraxuanē najua xainabeje, nexata aponawecua-aitothiabeje. Pacuenia pebi cuenejēpa Dioso, bajarapacuenia-ata pijinia petiriwa nacuenējēpa Dioso.

Petēpaewimi pijamonaemi pecowēyapona

Bajarapaliwaisi nacato-itajēta petēpaenē piasiwajawa yayiataecuenia pejumaitsijawa petēpaenē yabara. Buata pijamonaemi-yajawa: Judíowi amuxujitsibi pemēthētsicuene petēpaenē. Nexata itsa mēthēta pijamonaenēmi, yayiataeya jumaitsi tsabiabi: «Pabuatajē pijamonaemita», jai tsabiabi. Bajarapacuenia bajumaitsi, tsipaji bajayatami mēthētabiaba nacaemonaewi caeibowajujawata.

Pexaetunaxujawanē

Bajaraxuanē pewēñē wowajumeta, nukes, itsajawanē pijinia almendra. Bajaraxuanē nacuenebabiaba pexaenexa. Itsajawanē ejeba-biaba icotiata. Itsajawanē pijinia sebabiaba. Itsajawanē pijinia asiaya xane pacuenia cumali-ēthēto, jipiribētunaxuto-ata. Bajarapitsijawanē Jacob to-itoroba amoneyacuenia perajutsinexa Joséjawabelia, Egipto nacua pewetsinē.

Peyanacua-ewetsibo

Bajarapitsibo wowai wēñeruba palacio. Palacio pejajume xaina anijamatabēcueneyebeje: 1) Bitso pexaniaboxaneto, 2) itsapabota ponaponabiaba pepopeyanacua-ewetsinē bitso palata pexainaenē.

Piniji-altar branceninitota pexanaewaja

Bajarapa-altar-jawa nucabiaba Dioso pijacarpabo panabota, itsa jume templo panabota. Bajarapa-altar-jumata tajuitabiaba dajubi jiwi pijaneconijamatabēcuenē.

Piobijawanē judíowi pijajawanē

Taema Ovejamata-eto.

- Q -

Quedorlaomer

14:1-2 Quedorlaomer-wënënë: Bajayatami Quedorlaomer peyanacua-ewetsinē tsaponaponae panacuanē ena Jordán mene-muxubērēalia, pecuene-amoneyabixae bajarapamonaemi. Nexata wajēcabiaba impuestomatamo bajarapamonaejawabelia. Itsiata bexējajawabelia bajarapamonaemi acuenejitsibi bajarapamatamo pematamotabiabi-jawa. Bajaraxuata Sodoma pewetsinē, itsamonae cuatro ponēbeje pewetsiwi, najamatabēxaina pebarēnawajabitsaētsinexa Quedorlaomer-jawabelia; penawecuapitsapaenexa peyanacua-ewetsijawatsiwecua. Quedorlaomer juya natsicueyajunata itsanacuanē pewetsiwi pebarēnawajabitsaētsinexa Mar Muerto pucaxanetoyenepanata pe-enaetomaranē pewetsiwi jawabelia, penaneconitsixae Quedorlaomer-jawabelia.

Quemos

Bajarapajumapecataeya pexanaenē moabitawi pijadioso. Bajaraponējawabelia siwanajamatabēcuenecopatabiaba itsapa-cujinae barēnawajabitsaētsijitsia pijawajabitsaējawabelia. Salomón pina tonacuenebanuta Quemos pijapenawajēcaetaxunaenexa Olivowënētsutojumata, Jerusalén-tomarata. 1Re 11:7.

Querubinewi

Bajarapamonaer querubinewi apowajataecapanepaewi picani. Dioso pija-ángelwiyajuwënēwi. Itsapacujinae naitajēta jiwi-jawabelia, naitajētabiaba jiwicuenia, pecorofejuwīwi. Itsamonae canaējēta pijinia itsacuenia penaitajētsijawanexa. Bajarapamonaer pewetsiwi Dioso pijataxunae, itsawerena yanacua-eweta pijajiwi, daxitacuenie-ata. 1Re 6:27; Eze 10:1-20; Sal 99:1; Isa 37:16.

Itsajawata bajarapaquerubinewi wënēruba serafinewi (Isa 6:2,6). Itsamonae canaējēta serafine-ángelwī pewetsijawa Dioso pe-ecaetrone (Apoc 4:8; 9:9; 12:14). Apopewënērubixae pijawiria-cuene Apocalipsis-baxutota, aponayapētae itsa peposerafinewi, itsa jume itsawiria ángelwiyajuwënēwi.

- R -

Reynē – pepopeyanacua-ewetsinē

Bajayanacuapijiwi xainawanapa pepopeyanacua-ewetsinēnexatsi. Bajarapamonaer wënēruba rey. Bajaraponē judiōwinexa pijawiriayajuwënënë tsabiabi. Caenē reynē yanacua-ewetabiaba daxita judiōwi. Bitso peliwaishi namatamotsinē daxita itsapewetsiwiwecua pacuenia ancianomonaer, príncipewi, juez-monaer-ata. Reynē jaitabiaba pacuenia pijajiwi xaniawaetsia jinawanapaejitsia. Itorobabiaba pejumecowënētsinexa, peyaiyataenexa-ata penaewetsiliwaisianē. Namatacaitorobabiabanua penawajabitsaētsinexa, nexata itorobabiaba pacuenia exanaejitsia pijawajabitsaējawabelia. Reynē itoroba-biaba jiwi pematamotsinexa impuestomatamo, jamatejema wajabitsaēwi pematamobinexa peya-ewetsiwitsi pijawajabitsaēwecua.

- S -

Sacerdotewi

Dioso pejumeliwaisibaxutota bajarapamonae Dioso pitapetsiwitsi pebijiji petonacuenebiwinxexa, jiwi caejamatabëcuene pexainanexa Diosojawabelia, pecujarubiwinexanua Dioso Peliwaisi. Bajayatami Dioso Pejumeliwaisibaxuto peyaquinaeweretsiwajënaeya, Jesucristo jiwi pesiwatëpaewajënaeyanua, itsamonae naexana petocuaicuaijiwi-nexa Diosojawabelia Dioso pitapetsixaetsi. Bajarapamonae wënëruba sacerdotewi. Nexata bajarapamonae pematatsënëa towajëtabiaba jiwi jiwi Dioso pewënëta, Dioso juya peyawenonaenexatsi bajarapamonae. Itsajawatanua yapëtaeya-exanabiaba jiwi Dioso Pejumeliwaisi. Itsa Moisés-pijinë wereta Dioso pijacarpabo pexanaejawa, bajaraxuacujinae Dioso tocaëjëta sacerdotewi petotajuitabiabinexa altar-jumata pecapatsiwi pijadajubi pijaneconijamatabëcuene. Bajarapacuenia yawenona jiwi caejamatabëcuene pexanaejawa Diosojawabelia. Dioso pijacarpabo pexanaeweretsicujinae, pacuenia Aarón pexi, pemomoxi-ata cuenecaëjëpatsi sacerdotewi panaexanaenexa.

- T -

Tabernáculobo – Dioso pijacarpabo

Tabernáculobo pejaijamatabëcuene: «Pecawarapabiabibo, caetaxunae apopexainaebo», pejaijamatabëcuene xaina. Dioso itoroba bajarapitsibo israelitawi-jawabelia peto-exanaenexatsi, pacujinae israelitawi jinawanapa petusatonacuata. Bajarapamonae-ata saicaya cajanawana-pa pijacarpaboxi, tsipaji warapabiabanajetarubena. Nexata pepo-naewajënaeya pijabonë jonabiaba pecaponaenexa. Itsapacujinae pata icatsia itsajota nacuenebijitsia pijataxunaebos, pejinawanapaenexa cae-epatoyo, nexata icatsia xatabiaya nubabiaba pijacarpaboxi. Bajarapitsibocuene Dioso itoroba israelitawi peto-exanaenexatsi saicaya pijacarpabonexa, itsajota Dioso petocaëjëtsicuenia exanaejitsia. Bajarapatabernáculobo wënërubabiaba Dioso Pijacarpabo.

Tajutaxanenë

Hebreowi itsa junata Dioso bajarapajumeta junatabiaba jumaitsi tsabiabi, «adonai», jai tsabiabi. Bajarapacuenia junatabiaba ayaijamatabëcuenewi, pewetsiwi, itsamonae peyaiyataewi-ata. Pacuenia wowai canacueneba «Señor», bajarapacuenia judíowi canacueneba «adonai» pejaiume. Bajarapajumecuenia-ata junatabiaba Dioso, pepo-petuxanenëxae daxitanexa. Bajarapacuenia itsa jumaitsi Diosojawabelia, najamatabëcuene-itajëta beweliamatabëcuene penataejawa pejunatsijawata: «Daxitacuenenexa Pijatuxanenëmë», pejaiwënëcuenia junatabiaba.

Terafim

Bajaraxuaxi jumapecataeya pefaratsinëxi pecobeta, jiwi pecajinawanapaenexa bediosowicuenia petaenexa. Bajayatami itsamonae wajëcabiaba bajaraxuanëjawabelia, pexaniacuene petaenexa. Itsajamatabëcuene pijinia peyapëtaeya-exanaenexatsi pexanaejawa paxa

pecobecowë pecanacopsijawanexa. Raquel tsaena tsitatsi pamona pecanacopsinexa paxa pecobecowëmi, bajaraxuata meta pita bajaraxuanë. Itsa jume, meta tsitatsi bajarapowa pexi pexainaenexa, apopenacoxitabiabixae. Baitsi pacuenia paxa pijadajubi pexi xainabiaba nawitsiacuenia, peyacaëjëpaenexa paxa pijadajubinexa, pamona Jacob pijadajubinexa-ata, bajarapacuenia bajarapowa-ata penacoxitaponanexa. Jamatabëcuenejumaitsi tsaena meta bajarapowa: «Itsa capitsianatsi, nexata caxainaenatsi taxi», jamatabëjai meta pepitsiwajënaeya.

Tofet

Tofet pejumaitsi jume, 'täëbaba,' pejai jume. Bajarapacuenia wënë-ruba tsaena tsipaji jiwi ayaijumeta tambor peconitsijawata täëpajunujunua pejumetaeyaniwa pejewaxi pe-aëaëjajawa petajuitsijawata Molec-wënë jumapetacaeya pexanaenë-jawabelia. Bajarapitsicuene Dioso bitso pecuene-itoyaxae, bajaraxuata Tofet-wënëfoto Dioso tane bepenaxuirabinacua.

Tofet-jawatanua Jerusalén tomarapijiwi bapenetabiaba petotëpae-dajubitsi, petuxutsaebijawanë-ata. Nexata bajarapamonae itajunawabiaba bajarajota peponaejawa. Bajarapataxunae pinijifotoxaneto anijatsutobeje tuatujëta pebocaejava. Nexata pitajanitojawareca xuababiabireca pepenetsijawanë. Najuacunebeje yabara petaenexa bepenaxuirabinacua. Najëpa saya «jiwi», pejaijawa jiwijumeta. Dioso pacujinae exana Adán, apo-exanaetsi caenë. Itsiata abaxë petiriwanexa peyenesito tsarucae. Nexata saya caecuenia najuaexanatsibeje nacenecataeya. Bajaraxuata jiwijumeta Adánwi apojaitsi jiwi yabara. Saya «jiwi», bajajitsi.

Tribu

Wowaijumeta, bajarapatribujume xaina anijajamatabëcuenebeje. Caejamatabëcuene yabaracuaicuaijai pamona nacaemonae caesalinainë jawawerena pepitsapaexae. Baitsi caenë pemomoxi natsanae-ata pepobitsaëtoxicuenia. Itsajamatabëcuene pijinia yabaracuaicuaijai pamona nacaewiriapijiwi pecuene, pijume-ata yabara, sicuanicuenia pejinawanapaewi. Baitsi itsa tribu jai, nayapëtane apocaenacuacueniapijiwi pacuenia wowai, chinomonae, japonemonae, rusomonae. Saya tsiquiribitsaëtoyo.

Dioso pejumeliwaisibaxutota tribu yabaracuaicuaijai caesalinainë jawawerena pepitsapaewi. Nexata Israel-pijinë pemomoxi canacopata bajarapawënë pijawiriayabara. Itsiata Israel-pijinë pemomoxi apocawënë pexainaewi pijawiriayabara: Itsawënë Israelpijinë pemomoxi. Itsawënë pijinia israelitawi. Itsawënë pijinia judíowi, tsipaji bajayata Jesús peponaponaematacabita bajarapa-monae jinawanapa Judea nacuata. Bajaraxuata bajarapawënë canacopata judíowënë. Nexata canacopata nacuwënë pijawiria-wënënexa. Maparucaeje Israel pemomoxi anijawënëbeje xaina: judíowi, israelí-ata.

Israel-pijinë xaina pexi doce ponëbeje. Nexata Israel-pijinë pemomoxi nacopata doce papemomoxibitsaëtobejecuenia natsanaeya. Bajarapapemomoxibitsaëto wënë-ruba tribu wowaijumeta. Caepe-momoxibitsaëto canacujitsia canacopata pijasalinaiwi Jacob pexi

pewënëcuenia pijatribunexa. Baitsi Rubén pemomoxi nacopata Rubén pewënëcuenia pijatribunexa, bajarapacuenia Judá pemomoxi Judá pewënëcuenia pijatribunexa, Leví pemomoxi nacopata Leví pewënëcuenia pijatribunexa, bajarapacuenia itsi tsaponae caenë canacujitsia pemomoxinexa. Daxita bajarapapemomoxibitsaëtonë tribucuenia caenë itsiata Israel-pijinë pemomoxi.

Trigo

Bajayatami judfomonae ubabiaba trigojawanë pexaejawanënexa. Maparucacataje itsanacuanëpijiwi-ata xaina bajaraxuanë. Pecaquiat-sijawata trigoxu capitsapabiaba pexaniabenonë. Bajarapabenonë bitso xanepana petotowipan pexanaenexa itsawirixu pebenojawanëwecua. Bajaraxuata judfomonae bitso asiwaya taeyabiaba cebadaxuwecua. Itsajawata trigoxu tajatabiaba pexaenexa namutua, itsapacujinae pona itsajawabelia tajë pijabowecua.

Tulupu pecanaëjëbicuene

Bajaya nacuapijiwi tsitatsi tulupu bejiwi. Nexata wënëruba-biaba bejiwiwënëcuenia. Nexata yaiyataeyabiaba, tsipaji tsitatsi be-ayaijamatabëcuenewi peyayataenexa. Nexata itsamonae canaëjëba pijacujiru-cuenia, peyapëtaenexa pacuenia bajarapa-rubenaejawanë yapëtaeya-exanaejitsiatsi merawipijicueneyabara. Bajaraxuacujinae jumecowënëtabiaba paliwaisi pe-ëjëbi-cuenia tocopiapatatsi. Pijamonaenua itorobabiaba pejumecowënëtsinexa bajarapaliwaisi. Bajarapitsiwi wënëjona «astrólogowi» wowaijumeta, «tulupu-ëjëbiwi», bajarapamonae peliwaisi pijinia «astrología», «tulupu-ëjëbiliwaisimi».

Baitsi nacuenëjëpa wajasalinai pejume-cowënëtsijawa Tsamaniwi peliwaisi. Pacuenia tulupu wënëruba jiwiwënëcuenia; pacuneta jiwi wënëruba tulupu Tsamaniwënë, Cajuyaliwënë, maxënejebarëpa-ata. Nexata Tsamaniwi peliwaisi jumecowënëta. Wajasalinai, itsamonae bajaya nacuapijiwi-ata, ayaicuenia yamaxë-itajorobatsi Sataná. Bajaraponë yamaxë-itojoroba pijamalicaí-wita (demonio), bajarapamonae athëbëta-tsia pejinawanapaexae.

Túnica

Itsajawanë saicaya penaxatabijawanënexa Aarón xaina, penajamatabëcuene-itajëtsinexa sacerdotewi pepopenamatacaitorobinëcuene yabara. Itsajawanë pijinia bewelia penaxatabijawanë Aarón pexi pebiijiwi penaxatabinexa penajamatabëcuene-itajëtsinexa sacerdotewicuenia israelitawi tuatujëta. Éxo 28:40 Patúnica-nawaxi naxatatabiaba sacerdotewi peniojai-nawa tsabiabi. Itsiata patúnicanawa itsamonae israelitawi naxatatabiaba aposacerdotewi pasäëjainawanë.

- U -

Ucucu pinijiwirianë

Mapitsi-ucucuto Israel pemomomoxi bepejiobiwi tajuitabiaba Diosojawabelia pijaneconijamatabëcuene. Baitsi pamonae apopexainaewi oveja, palata-ata apoxinae penatocomuatsinexa, nexata capatabiaba ucucuto pinijiwirianë. Bajaraxuata José Mariabeje capata ucucuto petajuitsinexa Diosojawabelia, bepejiobiwixabeje. Bajarapacuenia

Dioso to-exana Israelpijinē pemomoxi caejiwiyo-ata penacopatsiya-niwa pijaneconiyajawa natotajuitsinejewa, bepejiobijiwiyo-ata.

Ur tomara

Bajarapatomara eca bajayatami Éufrate menemuxuneneta. Bajara-jota jinawanapa itsamonae Sem-pijinēmi pemomoxiyajuwēnēwi. Bajarapamonae Diosowecua nawajēcabiaba merawipijijuametojawabelia. Bepijadiosocuenia tane bajarapamonae.

Urim

Urim, Tumim-wēnjəjawabeje apoyapētaetsi pepacuene pawiriacue-nejawabeje. Itsiata sacerdotewi penamatacaitorobinē canacuenebiaba peyapētaenexa xua exanaejitsia Dioso pejamatabēcueneta. Nexata bajaraponē canacuenebabiaba pijacujiru-cuenia Urim, Tumim-beje, peyapētaenexa xua Dioso tojitsipatsi pexanaenexa.

Pepacuene apoyapētae-atatsi pawiriacuenejawabeje, bajarapitsi-cuenejawanē tsaena canaējēta bajayapijicuene penacujarubiwi. Urim, Tumim-jawabeje naejawayobeje, bewajacobesitowajēto. Bajarapanaejawayobeje xaina cuatro payenepanabeje penamatajəpaejawanē. Nexata caenenia xainapona bendición pejai-itaneto, itsanenia xaina maldición pejai-itaneto, bajarapacuenia daxita bajarapacuatro payenepanabeje peyacaējəpaenexa bajarapa-itanetonē. Baitsi anijayenepanabeje xaina bendición pejai-itanetobeje, itsayenepanabeje pijinia xaina maldición pejai-itaneto. Daxita bajarapacuenia canacuenebabeje Urim naeboyoy, Tumim naebobeje. Nexata peyapētaenexa pacuenia exanaejitsia Dioso pejitsipacuenecowēya pinijicuenejawalia, Sacerdotenē pepopena-matacaitorobinē canacuenebabiaba bajaraxuanēta. Bajarapacuenia canacueneba Dioso peyanijobicuenia pe-ējəbijawata. Pethaətojumawereca pijanawa tsiwajənaeyereta sacerdotenē pebixabajarabinexa Urim, Tumim-jawabeje, peyapētaenexa xua topitsapaejitsiatsi. Itsa topitsapaejitsipatsi daxita naebobejəjawata «bendición», peneta Dioso pejejaicuene pexanaenexa. Yawenonaejitsia pexania-cuenia petopitsapaenexatsi. Itsa pijina topitsapaejitsipatsi «maldición» daxita naeboyobejəjawata, peneta Dioso pitoya-cuene pexanaeyaniwa. Cuenecaranatsijitsia pexaniacuenia petopitsapaeyaniwatsi. Itsa pijinia itsa Urim naeboyota topitsapatsi «bendición», itsa pijinia Tumim naeboyəjawata topitsapatsi «maldición», peneta Dioso, «abaxə raja», pejaijawa pexanae-yaniwa. Bajarapacuenia nexata bajarapamonae yapētaeyabiaba pexanaewajənaeya. Itsiata Espíritu Santo Dioso pejumecowē-nətsiwi petsijamatabē-ecaexaetsi, bajarapitsicuene apocanacuenebi baja. Baitsi Espíritu Santo yapētaeya-exanatsi pexaniajaicuene pexanaenexa. Éxo 28:30; Núm 27:21; Prov 16:23; Jn 14:16-17,26; 16:13; 8:30-36,40; Hch 15:1-2,4,23-29.

- V -


Vinora

Judíomonae bajayatami baxainabiaba uvabacabonē. Papabia-nēta ubabiaba ē-uvamacanaenē. Bajarapamacanaenē nacuaitebiaba caeto caewai canacujitsia. Nexata natoxainabiaba uvacuai bajayajebi, xaniawaetsia-ata xaniawaetabiaba peto-abeje yaniwatsi.


Uvacuai penotsicujinae daxita, itsajawa tsatabiaba pe-ejebinexa bepeyajawawajëto uvapasana. Pecunuajawa itsiata copata petaxubataxubinexa, pejutsinexa pepora. Bajarapora pewënë vinora. Uvacuai petaxubataxubinexa tsixainamëthë, pepora pejutsinexa petaxubataxubicuenia. Bajaraxua ibomëthë. Itsanë nexata taxubataxuba pejutsinexa vinora. Itsamëthë pijinia eca pemuxuneneta, ëpeporanexa. Petaxubataxubimëthë xaina pewojotoyo caenenia pepora pepitsapaenexa itsamëthëabereca, jamatejema penawotsinexa ë-uvabarëmenera. Bajarapora penawotsicujinae tsiquiri-mëthëyojawabereca, nexata bajarapora epaca waxianëjawabelia pexaniawaetsinexa. Itsajawata yajeba dajubibocodoruanëta. Itsajawata bajarapora yajeba piatatura penaexanaejawabelia. Bajarapora pewënë vinagre. Bajarapavinagrera bepejiobiwi matajërëtabiaba merata piapaenexa. Itsajawata pijinia bajarapora yajeba bajayajebi, piamenetanejawabelianexa.

Piamentanecujinae bajarapora xaniawaetsi-ata bajayajebi apo-abeje tsanucæ. Itsajawata bepjiayo apa, amenetanenejewa. Pacueneta tsixanepanatsi piapaenexa apaeyabiaba. Porayo apa amenetanenejewa wënëruba pejanavinora. Pora pijina piamentanerayo wënëruba vinora saya, tsipaji nayapëtane piataneracueni. Panacuata jinawapa judiowi penajatonë, pepamenianë-ata bewelia. Nexata pexaniawaetsimera piapaenexa atuxubeje tsabiabi. Bajaraxuata matajërëtabiaba piatanevinora, itsa jume vinagrera merata piapaenexa. Piatamera matajërëababiaba merata piatajibiyaniwanua. Bajarapacuenia pexanaexæ piapaejawata apo-aitajibi tsabiabi.

El Templo en el tiempo de Jesucristo



Plano del Interior del Templo



1. La Mesa y los Panes de la Proposición
2. El Candelabro
3. El Altar del Incienso
4. El Velo
5. El Arca del Pacto
6. Los Querubines



